


Gwo Ma Arumgimis



Uduk New Testament and OT Portions

Gwo Ma Arumgimis

Uduk New Testament and OT Portions

copyright © 2005 SIM International

Language: Uduk

Translation by: SIM International

Uduk New Testament and OT Portions

Published by Bible Alliance Mission, 1983.

. If you are interested in obtaining a printed copy, please contact the SIM at www.sim.org.

. This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-02

PDF generated using Haiola and XeLaTeX on 18 Apr 2025 from source files dated 29 Jan 2022
f734434c-b6bd-5d21-abc6-692c3842e034

Contents

TAKWIIN	1
MMO/II KA PIJE/ MO	92
GWAY GI IDAWUU'D	127
MATA	268
MARKUS	331
LUUKA	371
YOHAAN	437
MII GUN MIINU MO	485
RUUMIYA	547
KURINT̩HUUS 'DE/	573
KURINT̩HUUS SU/	599
GALATHIYYA	616
EPASUS	626
PILIBBI	635
KULUUSI	641
TASALUNIIKI 'DE	647
TASALUNIIKI SU/	653
TIMUTHAWUUS 'DE/	657
TIMUTHAWUUS SU/	665
TIITHUS	671
PILIMUUN	675
İbraniyyin	677
YAKUUB	698
BUTERUS 'DE/	705
BUTERUS SU/	712
YOHAAN 'DE/	717
YOHAAN SU/	724
YOHAAN KWARA	725
YAHUUSA	726
GWO JIN 'CEENU MO	728

Gwo ma Musa jin 'Kwara A'di jin Ta jin Twa/a/ mo jin Yuƙu Gway ka Takwiin

¹ Ka muƙ'kup mo tani Arungimis uƙki momis dhali mony'cesh mo.

² Dhali mony'cesh a'di 'cethki'da 'thintha/ mo dhali di bwa 'te/ mo, dhali mondhurumi'd a'di wupki'da apo/ mo jin 'kula'kul mo. Dhali Shi/in ma Arungimis a'di wukurki'd apowa ris kumma/ yi'de/ mo.

³ Dhali Arungimis ki o gwo mo ki: Dhalki monƙush piyi'd mo. Dhali monƙush diki'd mo.

⁴ Dhali Arungimis parki monƙush e ki a'di 'bora'bor mo. Dhali Arungimis ki kwa/ monƙush bwa 'peni mondhurumi'd mo.

⁵ Arungimis ki yuƙ monƙush ki Montee mo dhali mondhurumi'd yuƙa a'di ki Mon'thiny mo. Dhali mom'pimpili/ diki'd mo dhali mon'thamo/ diki'd mo, a'di jin ta'da cim 'de/ mo.

⁶ Dhali Arungimis ki o gwo mo ki: Dhalka balany di'd mo ibwaman kumma/ yi'de/ mo dhali dhalki a'di kwa/a'da ris kumma/ yi'de/ bwa mo 'pena ris kumma/ yi'de/ mo.

⁷ Dhali Arungimis ki uƙa balany mmokwa/a ris kumma/ yi'de/ bwa mo, uni kun 'kokin e bwan'kwariny ma balany 'pena ris kumma/ yi'de/ mo, uni kun 'kokina powa balany mo. Dhali uni 'kokin kan mo.

⁸ Dhali Arungimis ki yuƙa balany ki Momis mo. Dhali mom'pimpili/ diki'd mo dhali mon'thamo/ diki'd mo, a'di jin ta'da cim su/ mo.

⁹ Dhali Arungimis ki o gwo mo ki: Dhalka ris kumma/ yi'de/, uni kun 'kokin e bwan'kwariny momis mo minu tul isi montal 'de/ mo e mon 'de/ mo, dhali dhalki monƙuthu'd piyi'd mo. Dhali a'di waki'd kan mo.

¹⁰ Arungimis ki yuƙ mo jin kuthaku'th ki Mony'cesh mo, dhali aris yi'de/ gwansan kun tulu isi montal 'de/ mo tani yukkina a'di gway ki Kumma/ Yi'de/ mo be. Dhali Arungimis ki par a'di e ki a'di 'bora'bor mo.

¹¹ Dhali Arungimis ki o gwo mo ki: Dhalka 'cesh 'ka to ale/ ki ton dhii/in mo, to kun minu si kun mini dho'th maman ki emen buni mo, dhali cwa kun mini dho'th maman ki emen buni kun cinu uni mo, uni 'baar ka 'dete/ 'dete/ isi ki e jin 'ko uni ki she/ ki she/ kuku/ mo, apo/ mony'cesh mo. Dhali a'di waki'd kan mo.

¹² Mony'cesh a'di dho'thki ton dhii/in kun 'kana le/ mo, to kun sinu mo kun dhodhi maman mo isi ka ka'bany buni kun 'kona e uni ki she/ ki she/ mo, dhali cwa kun dho'thki maman ki emen buni ki she/ ki she/ kun cinu uni mo, uni 'baar ki isi e kuku/ mo. Dhali Arungimis ki par a'di e mo ki a'di 'bora'bor mo.

¹³ Dhali mom'pimpili/ diki'd mo dhali mon'thamo/ diki'd mo, a'di jin ta'da cimi kwara mo.

¹⁴ Dhali Arungimis ki o gwo mo ki: Dhalki monƙush uni i'kon eya balany gi momis mo mmokwa/ montee bwa 'peni mon'thiny mo. Dhali dhalki uni ta jamas mii mo dhali goma yir mo dhali goma tee mo dhali gom yil mo,

¹⁵ Dhali dhalki uni kushi mo mo 'pena balany gi momis mo mmoƙi monƙusha po/ mony'cesh mo. Dhali a'di waki'd kan mo.

¹⁶ Dhali Arungimis ki uƙ dhan monƙush kun caaca isu/ mo, a'di jin ta dhan monƙush jin caaca mmoji mo jin yuƙu ki montee mo, dhali a'di jin boƙa is ka kamu/ mmoji mo jin yuƙu ki mon'thiny mo. A'di uƙki'da risa cul si'da/ mo.

17 Dhali Arumgimis ki dhu uni eya balany gi momis mo mmoçi monkush buni apo/ mony'cesh mo,

18 mmoji mo jin yuku ki montee mo dhali apo/ mon'thiny mo, dhali mmokwa/ monkush bwa 'peni mondhurumi'd mo. Dhali Arumgimis ki par a'di e mo ki a'di 'bora'bor mo.

19 Dhali mom'pimpili/ diki'd mo dhali mon'thamo/ diki'd mo, a'di jin ta'da cimi donjon mo.

20 Dhali Arumgimis ki o gwo mo ki: Dhalka ris yi'de/ dhodhona risa waambuhany to/e kun uku mo, dhali dhalka ris 'dii pena apo/ mony'cesh mmo'ciñh ka 'ciñhan dhul apowa balany gi momis mo.

21 Wakan Arumgimis ki uk dhan to kun 'kon e kumma/ yi'de/ kun caaca mo dhala ris to kun 'kon ki e kun kalki ya ka bor mo, uni kun 'tu'dki yi'de/ isi ki em buni kun 'ko uni kuku/ mo, dhala ris 'dii kun 'kan ma bi mo isi ki em buni kun 'ko uni kuku/ mo. Dhali Arumgimis ki par a'di e mo ki a'di 'bora'bor mo.

22 Dhali Arumgimis ki 'bor uni mii mo, mmo/o gwo mo ki: Dhodhi maman mo, dhali mari is mo dhali 'tu'di aris yi'de/ ki piny piny mo e bwam uni kun ta kumma/ yi'de/ mo, dhali dhalka ris 'dii mar is apo/ mony'cesh mo.

23 Dhali mom'pimpili/ diki'd mo dhali mon'thamo/ diki'd mo, a'di jin ta'da cim ma mudhe'd mo.

24 Dhali Arumgimis ki o gwo mo ki: Dhalki mony'cesh dhodho'da ris to kun 'kon ki e kun uku mo isi ki em buni kun 'ko uni kuku/ mo: bip dhali to kun parana 'cesh mo dhali tombwaasho mo kun 'kon e mony'cesh mo isi ki em buni kun 'ko uni ki she/ ki she/ kuku/ mo. Dhali a'di waki'd kan mo.

25 Dhali Arumgimis ki uk tonyucuk kun 'kon e mony'cesh mo isi ki em buni kun 'ko uni ki she/ ki she/ kuku/ mo dhali bip isi ki em buni kun 'ko uni ki she/ ki she/ kuku/ mo, dhali aris to kun parana po/ mony'cesh isi ki em buni kun 'ko uni ki she/ ki she/ kuku/ mo. Dhali Arumgimis ki par a'di e ki a'di 'bora'bor mo.

26 Dhali yan'ko'd Arumgimis ki o gwo mo ki: Dhalki ana uka wathi/ en'thi/ mo ki jamas bana mo, mmowa e ki jamas bana mo, dhali dhalki uni ta gi mom'bi'th mo apo/ yi'de/ kun 'kon e bwan kumma/ yi'de/ mo, dhali apowa ris 'dii kun pen e mis mo, dhali apo/ bip mo, dhali apowa ris mony'ceshi 'baar mo, dhali apowa ris to/e kun parana 'cesh mo, uni kun parkin apo/ mony'cesh mo.

27 Wakan Arumgimis ukki wathi/ en'thi/ mo ki jamas pitin gana/ mo, ki jamas ma Arumgimis gana/ mo tani a'di i/ukkina a'di a'di mo. A'di jin ta wathin gwañh mo dhali a'di jin ta wathim 'bomi mo, uni i/ukkina a'di mo.

28 Dhali Arumgimis ki 'bor uni mii mo, dhali Arumgimis ki o uni gwo mo ki: Dhodhi maman mo, dhali mari is mo, dhali 'tu'di mony'cesh mo, dhali dili a'di abora 'cesh mo, dhali tayi gi mom'bi'th apo/ to yi'de/ gi kumma/ yi'de/ mo dhali apowa ris 'dii kun pen e mis mo, dhali apowa ris to kun 'kon ki e kun kalki ya apo/ mony'cesh mo.

29 Dhali Arumgimis ki o gwo mo ki: Hili mo mo ma, aha/ cikina um aris emen to kun minu si mo kun mini dho'th mo uni kun 'kokin apo/ bwam/e gi mony'cesh 'baar mo, dhali arisa ka'bany cwa ki maman buni ki she/ ki she/ mo. Um mini bu'th uni haali/ uni mini ta tonçe/ gom um mo.

30 Dhala ris tonyucuk gi mony'cesh mo dhali aris 'dii kun pen e momis mo dhala ris to kun parana po/ mony'cesh mo, dhali aris to kun shi/irin kun 'kon ki e mo tani aha/ cikina aris ton dhii/in kun minu si gom tonçe/ mo. Dhali a'di waki'd kan mo.

31 Dhali Arumgimis parki aris to/e kun ukkina a'di mo, dhali hili mo ma, a'di 'bora e ki 'bor mo. Dhali mom'pimpili/ diki'd mo, dhali mon'thamo/ diki'd mo, dhali a'di ta'da cim ma pe'de/ mo.

2

¹ Wakan momis dhali mony'cesh uni 'baarkunu mo dhali aris to kun 'koni bwaman uni mo.

² Dhali ka cim ma pesu/ mo tani Arumgimis 'baarki miim piti jin miikina a'di mo, dhali a'di ki si is ka cim ma pesu/ 'pena ris miin tom piti kun miikina a'di mo.

³ Wakan Arumgimis ki 'bora cim ma pesu/ mii mo dhali kar a'di ki she/ ki dhelel dhelel mo, haali/ eya cim ma pesu/ yan mo tani Arumgimis ki si is mo 'pena ris tom piti kun miikina a'di ki uk jin ukkina a'di to mo.

⁴ Uni gwansan itana nya_{kum} yil ki momis mo dhali mony'cesh mo me'd jin 'konu mmo/uk uni mo be.

Ka tee jin uka Tapa Arumgimis mony'cesh mo dhali momis mo tani

⁵ ki to jin sinu e mombunto piyi'd e mony'cesh naskina/ mo dhali to jin miinuwa 'tash 'koki 'ko e bunto mo mmo'ka/a le/ naskina/ mo - haali/ Tapa Arumgimis diki dhal uniya sho'k bway mo mmohetha po/ mony'cesh mo, dhali wathimpa en'thi/ piyi'd mmokora 'cesh mo.

⁶ Hili jasa shile/ a'di icuki mis 'peni mony'cesh mo dhali ya'th bwam/e gi mony'cesh ki japem piti mo -

⁷ dhali yan'ko'd Arumgimis ki 'diki wathimpa en'thi/ 'peni bu'da'cesh mo, dhali pi shi/in e shush piti, shi/in jin di ki e mo dhali wathimpa en'thi/ warki'd ki jin di ki e mo.

⁸ Dhali Tapa Arumgimis thosonki bwaagon e Idin, e mom'pesho'k mo dhali e mun mo a'di ki kar wathi/ jin ukkina a'di icine/ mo.

⁹ Dhali 'pena 'cesh mo tani Tapa Arumgimis ki kara 'cesh jin mina cwa 'ka a'diya po/ mo, aris cwa 'baar mo kun 'bora'bor kun minu hil mo dhali kun 'boron kun minu shwa maman 'peni nycine/ mo. Dhali cwa gi mondiki/e si'da/ di'd e bwaman ma gonj mo dhali cwa jin minu nyith to jin 'boro'd dhali jin shiyi'd diki'd si'da/ mo.

¹⁰ Yi'de/ guski'd 'peni bwaman ma gonj ma Idin mo, a'di jin wolki'd e bwaagon mo dhali a'di kwa/kunu bwa mo mmo'ko 'kusi dojon mo.

¹¹ Dhali gway gi yi'de/ jin twa/a/ yuku gway ka Pishun mo, a'di jin guski'd mmokulum bampa/ gi Pam Hawiila isi 'baar mo e mo jin 'kokina 'dolkon gana/ mo.

¹² Dhali 'dolkon gana/ gi mony'cesh yan mo tani uni 'bora'bor mo. Dhala 'bica wasin dhela/ dhala wasin dhela/ jin ta'da jama kush mo uni 'kokin mo.

¹³ Dhali gway kumma/ yi'de/ jin 'kon ma po/i su/ mo tani yuku gway ka Jihun mo, a'din tal 'de/ jin guski'd mo mmo'kama 'cesh gi Panj Kush is mo.

¹⁴ Dhali kumma/ yi'de/ jin 'kon ma po/i kwara mo tani a'di yuku gway ka Hidaagil mo, a'di jin guski'd 'kupki mom'pesho'k ki Pan Ashshuur mo. Dhali yi'de/ jin 'kon ma po/i dojon mo yuku gway ka Elpuraat mo.

¹⁵ Dhali Tapa Arumgimis ki bu'th wathimpa en'thi/ mo mmokar a'di e bwaagon ma Idin mmokorki a'di mo dhali mmokar a'di mo.

¹⁶ Dhali Tapa Arumgimis kanki wathimpa en'thi/ gwo mo mmo/o gwo mo ki: /E mini shwa aris cwa gi bwaman bwaagon 'bakany mo

¹⁷ hili cwa jin minu 'bi'th e ki miim 'boro'd mo dhali ki mii shiyi'd mo tani /e mini dhalki a'di ki shwa mo, haali/ ka tee jin dhali /e shwa a'di mo tani /e mini wu mo be.

¹⁸ Dhali yan'ko'd Tapa Arumgimis ki o gwo mo ki: A'di diki 'bor mmokar wathimpa en'thi/ a'di 'de/ kan mo. Aha/ mina mii uk ki a'di amanwoth, a'di jin midi gam ki a'di mo.

¹⁹ Wakan 'pena 'cesh mo tani Tapa Arumgimis ki uka ris tombwaasho mo dhali aris 'dii kun pen e momis mo, dhali a'di ki 'doyu uni wathimpa en'thi/

mmohil mo ki a'di midi yer uni gway mo, dhali ma gway gunn kun yerkina wathi/ to/e kun ukkunu mo kun 'ko ki e mo tani a'di ita gway kun yeru uni mo.

²⁰ Wathi/ en'thi/ ki ci aris to/e gway 'baar mo dhali aris 'dii kun pen e momis mo dhali aris tombwaasho mo. Hili gom wathi/ en'thi/ mo tani wathi/ piyi'd jin gamkunu jin midi woth a'di, a'di jin midi gam gom a'di mo.

²¹ Wakan Tapa Arungimis ki dhal mo jin 'ce'du e kagahara mmobita po/ wathimpa en'thi/ mo, dhali ki a'di di'di mmo/ish e mo tani a'di bu'thki'da simanj gwar tal 'de/ 'peni a'di mo dhali a'di ki 'dapki bungwar is ki shuman 'twa/ mo.

²² Dhali 'pena simanj gwar jin bu'thkina Tapa Arungimis 'peni wathinj gwath mo tani a'di ki uk a'di mmota a'bom mo dhali guya yim e wathinj gwath mo.

²³ Dhali yan'ko'd wathinj gwath ki o gwo mo ki:

Hayyiye ayaase ita'da simam pema
dhali bungwar is ki shuman is pema.

Ayim minu yuk gway ka A'bom mo,
haali/ ayim a'di bu'thkunu 'peni Wathinj Gwath mo.

²⁴ Dhali gom gwo gi wakan mo tani wathinj gwath midi dhal com 'pen mo dhali kum mo dhali 'dap is piti me'd ki ash mo dhali uni su/ warkina bungwar is ki isa 'de/ mo.

²⁵ Dhali wathinj gwath dhali ashim piti mo tani uni 'ko ki is 'te/ mo dhali uni 'kona is ki 'theya 'the mo.

3

¹ Dhali tasha/ a'di kora e ki kor mo mmobola ris tombwaasho kun uku mo, uni gun ukkina Tapa Arungimis mo. A'di ki owa 'bom gwo mo ki: A/ Arungimis o gwo mo ki: Um mini mii dhalku/ cwan tal 'de/ ki shwa 'peni bwaagonj 'te/o?

² Dhala 'bom ki thok tasha/ gwo mo ki: Aman dhalu bway mmoshwa aris maman cwa gi bwaagonj mo.

³ Hili Arungimis ki o gwo mo ki: Um mini mii dhalku/ ki shwa maman cwa jin di'd e bwaman gi bwaagonj mo, walla dhalku/ ki ta a'di is ki me'd mo gom isi ciki/ um mini wu mo.

⁴ Hili tasha/ ki owa 'bom gwo mo ki: Um mini wu mo yisa.

⁵ Haali/ Arungimis mishki'd ki um mini shwa a'di mo tani em bum minu ka'd mo dhali um mina e wa ka Arungimis mo mmonyith jin 'boro'd dhali jin ta thus ki thus mo.

⁶ Wakan ka 'bom ki par cwa e ki a'di 'bora'bor mmoshwa mo, dhali a'di 'kunya'kuny e jis/em piti mo, dhali cwa a'di iminu o bwa mmokar jan tal 'de/ mmoyuka yuk mo tani ayim ki bu'th maman cwa mo dhali shwa a'di, dhali ayim si'da/ ki ciki a'di ka kathim piti mo, dhali a'di shwaki'd mo.

⁷ Dhali yan'ko'd uni su/ ka'dkunu em buni mo, dhali uni su/ mishki mo mo ki uni 'ko ki is 'te/ mo, dhali uni ki sho 'cemena pu/ mmon'tal 'de/ mo dhali uni ki uka rompa/ 'peni 'cemena pu/ gom is buni mo.

⁸ Dhali uni cikki is gi Tapa Arungimis mmoyakina a'di e bwam ma gonj e mom'pimpili/ jin 'thup ma tee she/ mo, dhali wathinj gwath dhali ash uni bagki is buni 'peni bun' kus gi Tapa Arungimis mo e bwanycwa gi bwaman gi bwaagonj mo.

⁹ Hili Tapa Arungimis yukki wathi/ mo dhali o a'di gwo mo ki: /E dini mana?

¹⁰ Dhali a'di ki thok gwo mo ki: Aha/ cika is jin gwo /e e bwaman ma gonj mo, dhali aha/ ko/kina is mo, haali/ aha/ dina is 'te/ mo, dhali aha/ bagkina is pem mo.

11 A'di o gwo mo ki: Kaja itor /e gwo mo ki /e di is 'te/a? Ki /e ishwaki cwa jin kanka/ /e gwo mo ki: /E mini mii dhalku/ a'di ki shwa mo?

12 Dhali wathi/ ki o gwo mo ki: A'bom a'di jin cikina /e mmonyak ca'b ki aha/ mo tani ayim a'di iciki aha/ maman cwa mo dhali aha/ shwakina a'di mo.

13 Dhali yan'ko'd Tapa Arungimis ki owa 'bom gwo mo ki: Katinta sa/ jin miikina /e mo? Dhali a'bom ki thok gwo mo ki: Tasha/ a'di imu'thki aha/ e mo dhali aha/ shwakina a'di mo.

14 Dhali Tapa Arungimis ki o tasha/ gwo mo ki: Haali/ gom miim pini jin miikina /e kansan tan mo tani monyjeem pini boli'da ris to/e kun uku e ki shi/ mo dhali apowa ris to/e kun 'koni bwaasho 'baar mo. Dhali ka bor pini mo tani /e mini para bora 'cesh mo, dhali bu'da'cesh mina /e shwa mo ka risa tee gi mondiki/em pini 'baar mo.

15 Aha/ mina kar mo jin dupu i bwaman /e mo dhala 'bom mo, dhali e bwaman emen pini mo dhali emen ma yim mo.

A'di midi pwath /e 'kup pini mo dhali /e mini tikina tin kilam piti ka ulmany mo.

16 Eya 'bom mo tani a'di ki o gwo mo ki: Isa nyor dho'th pini gom uci mo tani miga/ mar is kagahara gom /e mo. /e mini dho'th uci ki isa nyor i e mo, hili bwam pini mini mii o ka kathim pini mo dhali a'di midi ta tapa apo/ /e mo.

17 Dhali a'di ki owa Aadam gwo mo ki: Gom miim pini jin cika /e 'twa/ gi ashim pini mo dhali shwa cwa yansan jin kanka/ /e gwo mo ki: /E mini mii dhalku/ ki shwa a'di mo tani mony'cesh jeenu mo gom /e mo be.

Aris to kun mina /e shwa mo tani uni mina /e gam 'peni mii jin mina /e 'kosha shir shir mo ka tee gi mondiki/em pini 'baar mo.

18 A'de/ dhala lit uni mini 'ka gom /e mo, dhali /e mini shwa to kun sinu 'peni bunto mo.

19 /E mini shwa tonte/ ki jiti/ bwam/em pini mo ntagi /e mini dok ki bu'da'cesh ka nyan'ko'd, haali/ 'peni bu'da'cesh mo tani /e bu'thkunu mo be. /E ta bu'd gana/ mo,

dhali e bu'da'cesh mo tani /e mini dok ki a'di ka nyan'ko'd mo.

20 Dhali wathi/ ki yuk ash gway ka Hawwa mo, a'di jin ta 'pemen gwo jin onu ki: To jin di'd ki e mo, haali/ ayim ta'da ata'da ma ris to 'baar kun 'kon ki e mo.

21 Dhali Tapa Arungimis ki uk ka Aadam dhali gom ashim piti burryne/ 'pena yi'c mo, dhali hi'thki uni i is mo.

22 Dhali yan'ko'd Tapa Arungimis ki o gwo mo ki: Hili mo mo ma, wathi/ a'di wakina e ki jan tal 'dem bana mo, mmomish jin 'boro'd dhali jin ta thus ki thus mo. Dhali shwane/ isi ciki/ ki a'di midi kar me'd piti dhali bu'th cwa gi mondiki/e si'da/ mo dhali shwa a'di mo dhali a'di midi ca'b ki e ki sule/ sule/ mo.

23 Dhali gom gwo gi wakan mo tani Tapa Arungimis ki kar a'di 'pen ka pije/ 'peni bwaagon ma Idin mo, mmoya kora 'cesh ki me'd piti mo 'peni mo jin bu'thkunu a'di 'peni cine/ mo.

24 A'di ki ur wathi/ ka pije/ mo dhali e mom'pesho'k gi bwaagon ma Idin mo tani a'di ki dhu karubiim kun ta iman'doyu gwo mo dhali gandal jin kaaka

jin shwa'd ki o'd ki bar bar mo a'di jin tu'kki'd ki washar washar 'ban kuku/ mo, mmoji bway gi maman cwa jin di ki e mo.

4

¹ Dhala Aadam mishki'da Hawwa jin ta ash mo, dhali ayim bwaaki'd mo dhali dhodha Kayiin mo mmo/o gwo mo ki: Aha/ gamkina a'cingwath ki mowoth gi Tapa mo.

² Dhali dok/e ayim dho'thki'da kam piti jin yuku gway ka Habiil mo. Dhala Habiil ta'da manhil ka'bal mo dhala Kayiin ta'da mankora 'cesh mo.

³ Dhali ki en kamu/ mo tani Kayiin a'di ki 'doyi maman to kun sinu eya 'cesh mo mmoçi ki Tapa mo,

⁴ dhala Habiil a'di ki 'doyi ushi ka'bal kun tana bwanyara/ mo 'pena ma'diny ka'bal piti mo dhali 'peni unim buni kun 'thika'thik ki tuntum tuntum mo. Dhali Tapa ki ciya hirdhe/ gom to ma Habiil jin cina a'di ki me'd mo,

⁵ hili goma Kayiin dhali tom piti kun cina a'di ki me'd mo tani a'di diki ciya hirdhe/ mo be. Wakan a'di shwakin ma Kayiina nyor kagahara mo dhali jis/ em piti bushura/ bushur mo.

⁶ Dhali Tapa ki owa Kayiin gwo mo ki: Atinta shwana /e anyor kan mo dhali atinta 'bushurkina jis/em pini ki 'bushur kan mo?

⁷ Wakki/ /e mini mii ki 'bore/ mo tani a/e minu diki mish bu'th mowa? Dhali wakki/ /e diki mii ki 'bore/ mo tani miinthus a'di wupki'd e 'twanjal gu'b mo. A'di ona bwa ki /e mo, hili /e mini mii ta tapa apo/ a'di mo.

⁸ Kayiin ki owa Habiil gwo jin ta'da kam piti mo ki: Dhalki ana iina ka pije/ e bwam bunto mo. Dhali ki uni 'kokin e bwam bunto mo tani aKayiin cuki mis apowa kam piti jin ta'da Habiil mo dhali 'kosh a'di jwa mo.

⁹ Dhali yan'ko'd Tapa ki owa Kayiin gwo mo ki: Mana Habiil jin ta'da kam pini mo? A'di ki o gwo mo ki: Mishгаа? Aha/ tana manhila kam pema?

¹⁰ Dhali Tapa ki o gwo mo ki: Atinta miikina /e? 'Twa/ ma bas ma kam pini a'di gwoki'd 'twa/ i aha/ 'pena 'cesh mo.

¹¹ Dhali shwane/ /e jeekunu 'pena 'cesh mo, a'di jin ka'dki 'twa/ mo mmolosa bas ma kam pini 'peni me'd pini mo.

¹² Ki /e mini kora 'cesh mo tani a'di midi dok/e dho'th to kagahara gom /e 'peni mom'bi'th is piti mo yisa. /E mini ta jwa ki jwa mo dhali ya yany ca/ e mony'ceshi 'baar mo.

¹³ Kayiin ki o Tapa gwo mo ki: Miim pem jin di aha/ 'ba/ a'di caaca gom aha/ mmokal mo.

¹⁴ Hili mo mo ma, /e urki aha/ ka pije/ ka cim yansan mo 'pena 'cesh mo. Dhali 'peni jis/em pini mo tani aha/ minu bag mo, dhali aha/ mina ta jwa ki jwa mo dhali ya yany ca/ e mony'cesh mo dhali ma a'diyin jin midi gam aha/ mo tani midi 'kosh aha/ jwa mo.

¹⁵ Dhali yan'ko'd Tapa ki o a'di gwo mo ki: Midi wakan yisa. Wakki/ jan tal 'den kamu/ midi 'kosha Kayiin jwa mo tani mori'c midi di apo/ a'di me'di pesu/ mo. Dhali Tapa ki ciya Kayiin jamas mo, isi ciki/ ki a'din 'de/ yin jin midi ya apo/ a'di midi diki 'kosh a'di jwa mo.

¹⁶ Dhali yan'ko'da Kayiin yaki'd ka pije/ 'peni bun'kus gi Tapa mo dhali ca'b e mony'cesh gi Pa Nud mo, e mom'pesho'k ma Idin mo.

¹⁷ Dhala Kayiin mishki'da 'bom piti mo dhali ayim bwaaki'd mo dhali dhodha Hanuuk mo. Dhali a'di nyar'ki dhan 'penkuman bampa/ mo dhali yuk 'penkuman bampa/ gway mmobaḥ gway gi ya/m piti ka Hanuuk i'ko'd mo.

18 Dhali Hanuuk dho'th ya/ jin yuku ka Irad mo. Dhala Irad ta'da baba ma Mahuya/iil mo dhala Mahuya/iil ta'da baba ma Matusha/iil mo dhala Matusha/iil ta'da baba ma Laamak mo.

19 Dhala Laamak ki mash upi su/ mmota i/ash mo. Dhali gway jan 'de/ mo tani yuku ka Aadah dhali gway ka kamu/ yuku ka Sillah mo.

20 Aadah a'di dho'thki'da Yabal mo. A'di ta'da baba gi uni gwansan kun 'kon e gu'b burrine/ dhali ta gi to/e mo.

21 Dhali gway ma kam piti yuku gway ka Yubal. A'di ta'da baba gi uni gwansan kun pikina dhen'dhenye/ kun 'kon ma shu/i pesu/ mo dhala baranku/ mo.

22 Dhala Sillah dho'thki'da Tubalkayiin mo. A'di ta'da mandor to kun kaaka mo dhali gurany mo dhali tonkuthu'd mo. Dhali 'bwaham ma Tubalkayiin yuku gway ka Naama mo.

23 Dhala Laamak ki o up gwo mo ki:

Aadah dhala Sillah, ciki gwo 'peni 'twam pem mo.

Um kun ta up ma Laamak mo tani ciki gwo jin miga/ o mo:

Aha/ 'koshkina wathi/ jin 'koshki aha/ mmotak jama/ mo,

wathi/ jin ta dhuru'c jin 'koshki aha/ mo.

24 Wakka Kayiin ri'ckunu me'di pesu/ mo tani

ka jin gana/ si'da/ Laamak minu ri'c me'di iss 'kwanimpa ikwara i'ce'dka 'kume'd i'ce'dka pesu/ mo.

25 Dhala Aadam mishki'da 'bom piti dok/e mo, dhali ayim dho'thki'da 'ci jin ta ya/ mo dhali yuk a'di gway ka Shiit mo, haala yim o gwo mo ki: Arungimis karki aha/ 'pen ka piye/ mmodhodha 'cin kamu/ mmodhalka Habiil e i is mo, haala Kayiin 'koshki a'di jwa mo.

26 Dhala Shiit si'da/ ta'dki ya/ jin dho'thkina a'di mo dhali a'di ki yuk a'di gway ka Anuush mo. Dhali ka tee caan mo tani 'kwani telki mii 'pen mo mmoko 'twa/ apo/ Tapa mo.

5

1 A'di ta'da warka/ ma nyakum yil gi uci ma Aadam mo. Ka Arungimis ki uk wathimpa en'thi/ mo tani a'di ki uk a'di mmowa e ka Arungimis mo.

2 Wathin gwath dhali wathim 'bomi a'di ki uk uni mo dhali a'di ki 'bor uni mii mo dhali a'di ki yuk uni gway ki 'kwani en'thi/ mo me'd jin ukkina a'di uni mo.

3 Ka Aadam ca'bki'd ki e ki yili iss 'kwanimpa ipe'de/ i'ce'dka 'kume'd mo tani a'di warki'd ka baba gom ya/ m piti jin wakina e ki a'di mo, mmobu'thkina a'di isi jamas piti mo, dhali yuk a'di gway ka Shiit mo.

4 Atee kun din ma Aadam 'ko'di a'di taki'da baba goma Shiit mo tani a'di 'kokina yili iss 'kwanimpa i/iss su/ mo, dhali a'di ta'dki iya/a tiya mo dhali i'bwaa tiya mo.

5 Dhali wakan arisa tee kun ca'bkin ma Aadam ki e mo tani a'di ta yil kun ta iss 'kwanimpa i/iss su/ i'ce'dki iss 'kwanimpa ipe'de/ i'ce'dka 'kume'd mo, dhali a'di wuki'd mo.

6 Dhala Shiit ca'bki'd ki e ki yili iss 'kwanimpa imudhe'd i'ce'dka mudhe'd mo tani a'di warki'd ka baba ma Anuush mo.

7 Dhala Shiit ca'bki'd ki e mo 'ko'di dho'th ma Anuush mo ka yili iss 'kwanimpa i/iss su/ i'ce'dka pesu/ mo, dhali a'di ta'dki iya/a tiya mo dhali i'bwaa tiya mo.

8 Dhali wakan arisa tee kun ca'bkin ma Shiit ki e mo tani 'kona yili iss 'kwanimpa i/iss su/ i'ce'dki iss 'kwanimpa imudhe'd i'ce'dka 'kume'd i'ce'dka su/ mo, dhali a'di wuki'd mo.

⁹ Ka Anuush ca' bki'd ki e ki yili iss 'kwanimpa idonjon i'ce'dka 'kume'd mo tani a'di warki'd ka baba ma Kinan mo.

¹⁰ Anuush ca' bki'd ki e mo 'ko'di dho'th ma Kinan mo ki yili iss 'kwanimpa i/iss su/ i'ce'dka karpa'c mo dhali a'di ta'dki iya/a tiya mo dhali i'bwa/a tiya mo.

¹¹ Dhali wakan arisa tee kun ca'bkin ma Anuush ki e mo tani 'kona yili iss 'kwanimpa i/iss su/ i'ce'dki iss 'kwanimpa imudhe'd i'ce'dka mudhe'd apo/ mo, dhali a'di wuki'd mo.

¹² Ka Kinan ca' bki'd ki e ki yili iss 'kwanimpa ikwara i'ce'dka 'kume'd mo tani a'di warki'd ka baba ma Mahlal/iil mo.

¹³ Dhala Kinan ca' bki'd ki e mo 'ko'di dho'th ma Mahlal/iil mo ki yili iss 'kwanimpa i/iss su/ i'ce'dki iss su/ mo, dhali a'di ta'dki iya/a tiya mo dhali i'bwa/a tiya mo.

¹⁴ Dhali wakan arisa tee kun ca'bkin ma Kinan ki e mo tani 'kona yili iss 'kwanimpa i/iss su/ i'ce'dki iss 'kwanimpa imudhe'd i'ce'dka 'kume'da apo/ mo, dhali a'di wuki'd mo.

¹⁵ Ka Mahlal/iil ca' bki'd ki e ki yili iss 'kwanimpa ikwara i'ce'dka mudhe'd mo tani a'di warki'd ka baba ma Yarid mo.

¹⁶ Dhala Mahlal/iil ca' bki'd ki e mo 'ko'di dho'th ma Yarid mo ki yili iss 'kwanimpa i/iss su/ i'ce'dka iss 'kwanimpa 'de/ i'ce'dka 'kume'da apo/ mo, dhali a'di ta'dki iya/a tiya mo dhali i'bwa/a tiya mo.

¹⁷ Dhali wakan arisa tee kun ca'bkin ma Mahlal/iil ki e mo tani 'kona yili iss 'kwanimpa i/iss su/ i'ce'dki iss 'kwanimpa idonjon i'ce'dka karpa'c apo/ mo, dhali a'di wuki'd mo.

¹⁸ Ka Yarid ca' bki'd ki e ki yili iss 'kwanimpa ipekwarra i'ce'dka su/ mo tani a'di warki'd ka baba ma Aknuuk mo.

¹⁹ Dhala Yarid ca' bki'd ki e mo 'ko'di dho'th ma Aknuuk mo ki yili iss 'kwanimpa i/iss su/ mo, dhali a'di ta'dki iya/a tiya mo dhali i'bwa/a tiya mo.

²⁰ Dhali wakan arisa tee kun ca'bkin ma Yarid ki e mo tani 'kona yili iss 'kwanimpa i/iss su/ i'ce'dki iss 'kwanimpa ipekwarra i'ce'dka su/ apo/ mo, dhali a'di wuki'd mo.

²¹ Ka Aknuuk ca' bki'd ki e ki yili iss 'kwanimpa ikwara i'ce'dka mudhe'd mo tani a'di warki'd ka baba ma Matushaalal mo.

²² Aknuuk nyak ya ka Arungimis mo 'ko'di dho'th ma Matushaalal mo ki yili iss 'kwanimpa karpa'c mo, dhali a'di ta'dki iya/a tiya mo dhali i'bwa/a tiya mo.

²³ Dhali wakan arisa tee kun ca'bkin ma Aknuuk ki e mo tani 'kona yili iss 'kwanimpa karpa'c i'ce'dki iss 'kwanimpa ikwara i'ce'dka mudhe'd apo/ mo.

²⁴ Aknuuk a'di nyakki ya ka Arungimis mo, dhali a'di dinuki gam mo haali/ Arungimis suski a'di mo be.

²⁵ Ka Matushaalal ca' bki'd ki e ki yili iss 'kwanimpa ipedonjon i'ce'dka pesu/ mo tani a'di warki'd ka baba ma Laamak mo.

²⁶ Dhala Matushaalal ca' bki'd ki e mo 'ko'di dho'th ma Laamak mo ka yili iss 'kwanimpa i/iss su/ ath 'de/ i'ce'dka su/ mo, dhali a'di ta'dki iya/a tiya mo dhali i'bwa/a tiya mo.

²⁷ Dhali wakan arisa tee kun ca'bkin ma Matushaalal ki e mo tani 'kona yili iss 'kwanimpa i/iss su/ i'ce'dki iss 'kwanimpa ipekwarra i'ce'dka pedonjon apo/ mo, dhali a'di wuki'd mo.

²⁸ Ka Laamak ca' bki'd ki e ki yili iss 'kwanimpa ipedonjon i'ce'dka su/ mo tani a'di warki'd ka baba gi ya/ mo

²⁹ dhali a'di ki yuk a'di gway ka Nuuh mo mmo/o gwo mo ki: 'Pena 'cesh jin jeekina Tapa mo tani jan 'de/ yansansan a'di midi kal ana mo jin minu rak ana is ka 'cesh mo 'peni miin tom bana mo dhali 'peni miin tom bana jin 'kosha ana ki me'd bana ki tu/ul tu/ul ki is jin wu ana e mo.

³⁰ Dhala Laamak ca'bki'd ki e mo 'ko'di dho'th ma Nuuh mo ka yili iss 'kwanimpa i/iss 'de/ i'ce'dki iss 'kwanimpa ipedoŋon i'ce'dka karpa'c apo/ mo, dhali a'di ta'dki iya/a tiya mo dhali i'bwa/a tiya mo.

³¹ Dhali wakan arisa tee kun ca'bkin ma Laamak ki e mo tani 'kona yili iss 'kwanimpa i/iss su/ aṭṭh iss su/ i'ce'dka 'kume'd i'ce'dka pesu/ apo/ mo, dhali a'di wuki'd mo.

³² Ka Nuuh taki'd ki yili iss 'kwanimpa i/iss 'de/ i'ce'dki iss 'kwanimpa imudhe'd mo tani a'di warki'd ka baba ma Saam dhala Haam dhala Yapaṭh mo.

6

¹ Ki 'kwani telki mii 'pen mmomar is mo apo/ bwam/e ga 'cesh mo dhali 'bwa/m buni dho'thkunu uni mo tani

² iya/ ma Arungimis mo uni parki i'bwa/ gi 'kwani e mo ki uni 'bora'bor mo dhali uni ki mash uni mo mmota i/ash mo me'd jin kwanykina uni uni wakan mo.

³ Dhali yan'ko'd Tapa ki o gwo mo ki: Shi/in pem mididi diki malas 'kwani ki sule/ sule/ mo haali/ a'di ta buŋgar is mo, hili ateem piti mididi ta yili iss 'kwanimpa ipe'de/ mo.

⁴ Dhan kampak 'kwani uni 'kokin e mony'cesh ka tee gwansan mo dhali uni 'koni 'ko'd si'da/ mo me'd jin pu'dkina iya/ ma Arungimis e i'bwa/ gi 'kwani mo dhali uni dho'thki uni uci mo. Uni gwansan ita 'kwani kun ca'bki dem dem 'peni kadhamo/ mo dhali kun tora gway karash mo.

⁵ Tapa parki tonthus e kun miikina 'kwani caaca kagahara e mony'cesh mo dhali misha ris gwalal buni kun kulumkina uni eya dum buni mo ta jasi tonthus ki sule/ sule/ mo.

⁶ Dhali Tapa kalki bwan diti'd mo ki a'di ukki 'kwani e mony'cesh mo dhali a'di jwakatki a'di adum piti mo.

⁷ Wakan Tapa a'di ki o gwo mo ki: Aha/ mina dhi'th 'kwani sho'k mo uni kun ukka/ 'peni bwam/e ga 'cesh mo, 'kwanimpa en'thi/ dhali tombwaasho dhali to kun parana 'cesh dhali 'dii kun pen e mis mo haali/ aha/ dita bwa mo ki aha/ i/ukkina uni mo.

⁸ Hili Nuuh gamki'da 'the e gi Tapa mo.

⁹ Uni gwansan itana nyakum yil ma Nuuh mo. Nuuh a'di ita wathin kar/ e mo, dar gi mii 'ba/ e nyakum yil gi 'kwanim piti mo. Nuuh nyak ya ka Arungimis mo.

¹⁰ Dhala Nuuh ta gi iya/ ikwara mo: Saam dhala Haam dhala Yapaṭh mo.

¹¹ Hili mony'cesh a'di pu/ki'd e bwam/e ma Arungimis mo dhali mony'cesh 'tu'dkunu ki piny piny ki mo jin bujurkunuwa bujur mo.

¹² Dhali Arungimis mishki mony'cesh mo dhali hili mo mo ma, a'di pu/ki'd mo haali/ aris buŋgar isi 'baar pu/ki uni isiny cine/ mo e bway buni jin iina uni apo/ mony'cesh mo.

¹³ Dhali Arungimis ki owa Nuuh gwo mo ki: Aha/ kara/ dina gwo ibwa mo ba/ mmodaka ris buŋgar is 'kup mo haali/ mony'cesh a'di 'tu'dkunu ki piny piny ki mo ma bujur gi uni mo. Hili mo mo ma, aha/ mina 'ce'd uni sho'k nyakki mony'ceshi lu/ mo.

¹⁴ Uki /e is pini adhana kur yi'de/ 'pena cwa jin wana e ki tu'b mo dhali /e mini thoson bwan gu'b e bwaman ma kur mo dhali /e mini gwa'c a'di bwaman dhali 'ko'd gwar ka 'cesh jin dekadek jin ta'da jillo mo.

¹⁵ Mii a'dihe/ be jin mina /e uk a'di mo. Aluc ma kur mididi ta gula iss 'kwanimpa karpa'c mo dhali beem piti mididi ta iss 'kwanimpa isu/ i'ce'dka 'kume'd mo ki gulam piti mo dhali tur piti mididi ta iss 'kwanimpa 'de/ i'ce'dka 'kume'd mo ki gulam piti mo.

¹⁶ Nyaṅa kur 'kupan mo dhali 'baari a'di mo ntagi gulam piti 'kup mo dhali /e mini kar 'twan'kal goma kur si'da/ e em bwaman piti mo dhali uki a'di di dhunya/ dhunya/ ka makampo/ mo ka po/i kwara mo.

¹⁷ Haali/ hili mo mo ma aha/ mina hasha gannu/ yi'de/ apo/ mony'ceshi 'baar mo mmo'ce'da ris bungwar is sho'k mo uni gun shi/irin mon'koki/e 'peni bwari'kwariny momis mo. Aris to 'baar mo kun 'kon e mony'cesh mo tani mini wu mo.

¹⁸ Hili aha/ mina tel gwom pem jin gamka/ me'd nyakki /e sho'k mo dhali / e mini ciḅ bwaa kur mo /e dhali iya/m pini dhali ashin dhali up gi iya/m pini nyakki /e mo.

¹⁹ Dhali 'peni aris to kun 'ko ki e kun ta shuman is mo tani /e mini 'doyi uni ka susu/ susu/ aris uni kun 'kona e ki she/ ki she/ mo e bwaa kur mo mmodhu uni ki e nyakki /e mo uni gun ta gwasan dhali kuman mo.

²⁰ Pena ris 'dii isi ki em buni kun 'ko uni ki she/ ki e kuku/ mo, dhali 'pena ris to/e mo isi ki em buni kun 'ko uni ki she/ ki e kuku/ mo, 'pena ris to kun parana 'cesh mo isi ki em buni kun 'ko uni ki she/ ki e kuku/ mo, ka susu/ susu/ uni mini nyak ii ki /e mo ki /e mini dhu uni ki e mo.

²¹ Wakan /e mini kala ris tonte/ 'baar kun 'kona e ki she/ ki she/ uni kun shwanu mo, dhali dhuyi uni themes mo, dhali a'di midi ta tonte/ jin minu mii ki /e mmoshwa mo dhali gom uni mo.

²² Nuuh miiki mii yansan mo. A'di miiki'da ris gwo kun kankin ma Arungimis a'di mo be.

7

¹ Dhali yan'ko'd Tapa ki owa Nuuh gwo mo ki: Yaku/ bwaa kur mo, /e dhala risa wak gi gu'b pini mo, haali/ aha/ misha ki /e ta wathin kar/ e ibwambori aha/ ki nyakum yil gi 'kwani gwasan mo.

² Susi nyakki /e to/e kun 'koni pesu/ ka pesu/ pesu/ mo kun mishu shum 'ka mo, kun ta gwasan dhali kuman buni mo, dhali to/en kamu/ si'da/ kun molu shum 'ka mo, arasan dhali kuman mo,

³ dhali 'dii kun 'koni pesu/ ka pesu/ pesu/ mo kun pen e mis si'da/ mo, rasan dhali kuman mo, mmodhu uni ki e ki jamas buni ki she/ ki she/ e bwam/e gi mony'ceshi 'baar mo.

⁴ Haali/ ka cim pesu/ mo tani aha/ mina hasha sho'k apo/ mony'cesh mo acim ma iss su/ montee mo dhali acim ma iss su/ mon'thiny mo. Dhali aris to/e 'baar mo kun 'kon ki e mo kun ukka/ mo tani aha/ mina kal uni sho'k ka piye/ 'peni bwam/e ga 'cesh mo.

⁵ Dhala Nuuh a'di mii'da ris to kun kana Tapa a'di mo.

⁶ Dhala Nuuh 'koni yil iss 'kwanimpa i/ iss 'de/ i'ce'dki iss 'kwanimpa i'kume'd mo me'd jin pu'dkin ma gannu/ yi'de/ apo/ mony'cesh mo.

⁷ Dhala Nuuh dhali iya/m piti dhali ash dhali i/ash gi iya/m piti nyakki a'di mo tani uni iikin e bwaa kur mo mmoye 'pena gannu/ yi'de/ mo.

⁸ To/e kun mishu shum 'ka mo dhali to/e kun molu shum 'ka mo, dhali 'dii mo dhala ris to kun parana 'cesh mo

⁹ ka susu/ susu/ mo, gwasan dhali kuman mo, iikin e bwam ma kur nyakka Nuuh mo me'd gwo jin kankin ma Arungimisa Nuuh mo.

¹⁰ Dhali 'ko'da cim pesu/ thimkin mo tani agannu/ yi'de/ pu'dki'da po/ mony'cesh mo.

¹¹ Ka yil iss 'kwanimpa i/iss 'de/ i'ce'dki iss 'kwanimpa i'kume'd jin ta yil mondiki/e ma Nuuh mo tani, ka ppe jin 'ko'd mo jin ta'da cim 'kume'd i'ce'dka pesu/ ma appe mo, dhali ka cim caan mo tani aris yi'de/ kun kasha e 'peni jisa 'kulga/ uni 'twakkin mo dhali campur gi momis a'di ka'dkunu 'twa/ mo.

¹² Dhala sho'k wolki 'twa/a po/ mony'cesh ka cim iss su/ montee mo dhali ka cim iss su/ mon'thiny mo.

¹³ Dhali ka tenter gana/ yan mo tani Nuuh dhali iya/m piti jin ta'da Saam dhala Haam dhala Yaph^h dhali asha Nuuh dhali up gi iya/m piti kun 'koni kwara nyakki ciç ki uni e bwam ma kur mo,

¹⁴ uni dhali aris tombwaasho 'baar mo isi ki jamas buni ki she/ ki she/ mo, dhali aris bip mo isi ki jamas buni ki she/ ki she/ mo, dhali aris to jin parkin mo kun parana 'cesh mo isi ki jamas buni ki she/ ki she/ mo, dhali aris 'dii 'baar mo isi ki jamas buni ki she/ ki she/ mo, aris 'dii ka warom buni ki she/ ki she/ mo.

¹⁵ Uni iikin nyakka Nuuh e bwam ma kur mo, ka susu/ susu/ mo, aris to kun ta ga shuman is mo e uni kun pinu shush buni mmo'ko ki e mo.

¹⁶ Dhali uni gwasan kun ta gwasan mo dhali kuman mo kun ta shuman isi 'baar mo, uni ciçkin mo me'd gwo jin kankin ma Arumgimis a'di mo. Dhali Arumgimis ki mu'thki a'diya campur mo.

¹⁷ Agannu/ yi'de/ a'di tikirki'd ka cim iss su/ apo/ mony'cesh mo dhali yi'de/ marki is mo dhali a'di ki 'deka kur mo dhali a'di ki cu mo mmobola 'cesh ka po/ mo.

¹⁸ Dhali yi'de/ a'di piki mii e mo dhali mar is kagahara apo/ mony'cesh mo dhali akur a'di hashki'd e 'kupan yi'de/ mo.

¹⁹ Dhali yi'de/ a'di piki mii e ki mo ma dem dem mo apo/ mony'cesh wakan mo, dhali aris wosha turga/ kun 'kokin e bwaj'kwariny momis mo tani uni hacina yi'de/ ki 'peny'ce i e mo.

²⁰ Dhali yi'de/ piki mii e mo apowa ris wosha turga/ mo mmolos uni mo ki engula kun 'koni karpa'c ki 'kul piti mo.

²¹ Dhali aris bungwar is wukin mo dhali to kun 'koni mmokal ya apo/ mony'cesh mo, 'dii dhali bip dhali tombwaasho, dhali aris to kun tana ris kun yan ka nul 'kup kun 'kona po/ mony'cesh mo dhali aris 'kwani 'baar mo,

²² aris to kun 'kon eya 'cesh jin kuthaku'th mo kun pinu shush buni mmo'ko ki e mo tani uni wukin mo be.

²³ A'di kalki'da ris to 'baar mo sho'k ka pije/ mo kun 'kon ki e 'peni bwam/ e ga 'cesh mo, 'kwani dhali to/e dhali to kun parana 'cesh mo dhali 'dii kun pen e momis mo tani uni ikalkina a'di sho'k ka pije/ 'peni mony'cesh mo. Jasa Nuuh a'di 'de/ idhalkunu mo dhali uni gwasan kun nyak'ko ki a'di eya kur mo.

²⁴ Dhali yi'de/ piki mii e apo/ mony'cesh mo ka tee iss 'kwanimpa ipesu/ i'ce'dka 'kume'd mo.

8

¹ Hili Arumgimis kaki'da Nuuh e mo dhala ris tombwaasho mo dhala ris to/e mo kun nyak'ko ki a'di e bwam ma kur mo. Dhali Arumgimis ki uk dhan 'tham mmoposha po/ mony'cesh mo dhali yi'de/ a'di guki'da wuuy mo.

² Yi'de/ kun kasha e 'peni mo kun 'kula'kul mo dhala campur gi momis mo tani uni mu'thkuu mo dhala sho'k 'peni momis a'di guki 'twa/ mo,

³ dhali yi'de/ cunycumki'd ka 'cesh mo 'pena 'cesh ki sule/ sule/ mo. Dhali ka cim iss 'kwanimpa ipesu/ i'ce'dka 'kume'd thimin mo tani yi'de/ a'di mara'd ma apo/ mo.

⁴ Dhali ka appe 'kupi pesu/ mo dhali ka cim 'kume'd i'ce'dka pesu/ jin ta jama/ appe mo tani akur a'di pu'dki'da po/ 'kuwosha turga/ kun yuku gway ka Ararath dhali rep mo.

⁵ Dhali yi'de/ di'di mmotikir mmomara'd is mo ntaga ppe 'koni 'kupi 'kume'd mo, dhali ka appe 'koni 'kupi 'kume'd mo tani a'di jin ta'da tee jin twa/a/ ka appe mo tani 'kupan dhan wosha turga/ uni parkunu e mo.

6 Dhali 'ko'da cim iss 'kwanimpa su/ 'baarki'd mo tani Nuuh 'ce'dki'da shubbaak ma kur mo a'di jin ukkina a'di mo.

7 Dhali a'di ki hasha waranḡwak mo, dhali a'di wukurki'd ntagi yi'de/ ku'thki'd 'peni mony'cesh mo.

8 Dhali yan'ko'd a'di ki hasha gurko/ 'peni a'di mo mmopar mo e mo wakki/ yi'de/ midi gu ka wuuy 'peni bwam/e ga 'cesh mo.

9 Hili gurko/ diki gam monḡkamu/ jin mina a'di kar sho'k piti icine/ mo, dhala yim dokki'd ka nyan'ko'd e a'di e bwam ma kur mo haali/ yi'de/ di'd naskina/ e bwam/e gi mony'ceshi 'baar mo. Wakan a'di ki kar me'd piti mo dhali budha yim mo dhali susa yim bway bwam ma kur nyakki a'di mo.

10 A'di cōrki'da cim pesun kamu/ dok/e mo dhali a'di ki hash gurko/ ka piye/ 'peni bwam ma kur dok/e mo.

11 Dhali gurko/ pu'dki'd ka nyan'ko'd i a'di mom'pimpili/ mo dhali hili mo mo ma, ayim kalki'd e 'twam piti 'cemen jipi/ cwa setuun jin ta'da go'd go'd mo jin daka 'cithkunu ki she/ mo. Wakana Nuuh a'di mishki mo mo ki yi'de/ a'di guki'da wuuy 'peni mony'cesh mo.

12 Dhali yan'ko'd a'di cōrki'da cim pesun kamu/ mo, dhali a'di hash gurko/ mo, dhala yim yaki'd mo dhali diki doḡu/ ka nyan'ko'd i a'di mo.

13 Ka yil iss 'kwanimpa i/iss 'de/ i'ce'dki iss 'kwanimpa i'kume'd i'ce'dka 'de/ mo, dhali ka appe jin twa/a/ dhali ka cim 'de/ ka appe mo, yi'de/ a'di ku'thki'd 'peni mony'cesh mo dhala Nuuh a'di 'ceeki'da kur 'kup mo dhali a'di ki par mo e mo dhali hili mo mo ma, bwam/e ga 'cesh a'di pupura/ pupur mo.

14 Dhali ka appe kun 'kon ma po/i su/ mo ka cim iss 'de/ i'ce'dka pesu/ ka appe mo tani mony'cesh a'di pupuri'di 'baar mo.

15 Dhali yan'ko'd Arungimis ki owa Nuuh gwo mo ki:

16 Yaku/ ka piye/ 'peni bwam ma kur mo, /e dhali ashin mo dhali iya/m pini mo dhali up gi iya/m pini nyakki /e mo.

17 'Doyi aris to kun 'kon ki e nyakki /e mo uni gun ta to ki shuman isi 'baar mo, aris 'dii dhali to/e dhali aris to kun paran mo kun paran e mony'cesh mo ki uni mini cis ka enthus apo/ mony'cesh mo ki uni mini dho'th maman dhali mar is apo/ mony'cesh mo.

18 Wakana Nuuh yaki'd ka piye/ mo dhali iya/m piti mo dhali ash mo dhali up gi iya/ nyakki a'di mo.

19 Dhali aris tombwaasho mo dhali aris to kun parana 'cesh mo dhali aris 'dii mo dhali aris to kun kalki ya apo/ mony'cesh mo, iikin ka piye/ ka wak buni ki she/ ki she/ 'peni bwam ma kur mo.

20 Dhali yan'ko'da Nuuh ki nyanḡ gwata/ mmomiiya bas gom Tapa mo dhali a'di ki bu'th to/e kun dheleladhelel mo 'pena ris tiya mo dhali 'dii kun dheleladhelel mo 'pena ris tiya mo dhali a'di ki ci to kun 'cithu/ 'kus mmomiiya bas eya gwata/ mo.

21 Dhali ki Tapa cikki'da shim jin ciyi mo ki cii jin 'bor a'di bwa mo tani Tapa o gwo eya dum piti mo ki: Aha/ mina diki dok/ e jee a'cesh mo gom 'kwani ki sule/ mo haali/ gwalal buni kun kulumkina uni gwo ibwa ta thus ki thus 'peni dhuru'c buni mo. Aha/ si'dayi mina diki 'ce'da ris to sho'k dok/ e ki sule/ mo kun 'kon ki e kun uḡu mo me'd jin miikika/ mo.

22 Ki mony'cesh diki'd mo tani mo jin sinu aka'bany to dhali mo jin 'cithu/ to uni 'kokin mo, dhali mon'thupu'd dhali mom'batha'd, dhali moyurantee dhali mondiḡ mo, dhali montee dhali mon'thiny uni mol daḡ ki sule/ sule/ mo.

9

1 Dhali Arungimis ki 'bora Nuuh mii mo dhali iya/m piti mo dhali o uni

gwo mo ki: Dhodhi maman mo dhali mari is mo dhali 'tu'di mony'cesh mo.

² Dhali um mina to/e ko/ mo dhali um mina to/e dee ki bir bir mmo'cuḱi 'kup mo, aris to/e kun 'kon e mony'cesh mo dhali aris 'dii kun pen e momis mo dhali aris to e kun parana 'cesh mo dhali aris to yi'de/ kun 'koni bwar kumma/ yi'de/ mo. E me'd bum mo tani uni ḱikunu um mo.

³ Aris to kun jockin kun 'kon ki e mo tani uni mini ta tonte/ gom um mo, dhali me'd jin ḱika/ um ton dhii/i'd mmosi mo tani aha/ mina ḱi um aris to 'baar mo.

⁴ Hili um mini mii dhalku/ ki 'ka to ka basi e mo, haala bas a'di ta mondiki/ em piti mo.

⁵ Goma bas bum jin 'kona um ki e mo tani aha/ ka jin gana/ aha/ mina 'theḱ gwo mo mmokara kar mo. 'Pena ris tombwaasho mo aha/ mina 'theḱ gwo mo dhali 'peni 'kwani mo. Dhali 'peni aris 'kwani kun ta ikam mo tani aha/ mina 'theḱ gwo gom mondiki/e gi wathi/ mo.

⁶ A'diyin jin midi 'kosh wathi/ jwa mo mmogaḱa bas piti a'cesh mo tani abas piti gara/ mina 'kwani gaḱa 'cesh mo, haali/ Arungimis ki uḱ wathi/ ki jamas pitiḱ gana/ mo.

⁷ Dhali um mini dho'th maman dhali mar is mo, ki um mini kala dho'th ka enthus mo dhali mara mar is kagahara i mony'cesh nycine/ mo.

⁸ Dhali yan'ko'd Arungimis ki owa Nuuh dhali iya/ kun nyak 'ko ki a'di gwo mo ki:

⁹ Hili mo mo ma, aha/ telkina gwom pem jin gamka/ me'd nyakki um mo dhali emen bum kun mini bath um 'ko'd mo

¹⁰ dhali aris to/e kun 'kon ki e kun uḱu mo kun nyak 'ko ki um mo, 'dii dhali tonkal, dhali tombwaasho kun nyak 'ko ki um e mony'cesh me'd jin tana uni aris ka ris mmo/iyu/ 'peni bwam ma kur mo.

¹¹ Aha/ telkina gwom pem jin gamka/ me'd nyakki um mo ki aris buḱwar is gi 'kwani minu 'ce'd sho'k ka gannu/ yi'de/ dok/e yisa ki sule/ dhali mony'cesh yisa minu 'ce'd sho'k ka gannu/ yi'de/ dok/e yisa ki sule/ mo.

¹² Dhali Arungimis ki o gwo mo ki: A'di ta jamas mii gi gwom pem jin gamka/ me'd a'dihe/ mo, a'di jin miga/ gam me'd nyakki um mo dhali aris to/e kun uḱu mo kun nyak 'ko ki um mo gom yilanḱamu/ ma nyakum yil buni 'baar mo.

¹³ Aha/ karkina bwaam pem e bwam ma rak mo, dhali a'di midi ta jamas mii gi gwo jin gamka/ me'd ibwaman aha/ dhali mony'cesh mo.

¹⁴ Ki aha/ mina dhala rak mmo'ka apo/ mony'cesh mo dhali 'kwani ki para bwaa e e bwam ma rak mo tani

¹⁵ aha/ mina ka gwom pem jin gamka/ me'd e mo jin karka/ ibwaman aha/ mo dhali um mo dhali aris to/e kun 'kon ki e mo kun ta shuman isi 'baar mo, dhali yi'de/ midi dok/e war ka gannu/ mmo'ce'da ris buḱwar is sho'k mo yisa ki sule/.

¹⁶ Ka bwaa midi di e bwaman ma rak mo tani aha/ mina hil apo/ a'di mo dhali ka gwo jin gamu me'd e jin di'd ki sule/ sule/ mo e bwaman ma Arungimis mo dhali aris to/e kun 'kon ki e mo dhali aris buḱwar is kun 'kon apo/ mony'cesh mo.

¹⁷ Arungimis ki owa Nuuh gwo mo ki: A'di ta jamas mii gi gwo jin gamka/ me'd mo, a'di jin miga/ tel sho'k ibwaman aha/ mo dhali aris buḱwar is kun 'kon e mony'cesh mo.

¹⁸ Iya/ ma Nuuh kun iikin ka pije/ 'peni bwaman ma kur mo tani jan 'de/ yuku gway ka Saam mo, dhali jan kamu/ yuku gway ka Haam mo dhali jan kamu/ yuku gway ka Yaphḱ mo. Haam a'di ta'da baba ma Kanaan mo.

¹⁹ Unin̄ kwaran̄ gwansan mo tani ita iya/ ma Nuuh mo, dhali 'peni uni gwansan mo tani mony'cesh taki'd gi 'kwani mo.

²⁰ Nuuh a'di ta wathin̄ tal̄ 'de/ jin̄ t̄wa/a/ jin̄ k̄orki'da 'cesh mo. A'di siki'da mura'th mo.

²¹ Dhali a'di ki pi yimana mura'th jin̄ ka/ u ki nah̄ nah̄ mo, dhali a'di 'koshkunu ki a'di me'da su mo, dhali a'di ishki e gu'b burrinyem piti ki dar gi ton̄ kamu/ mmokum is mo.

²² Dhala Haam jin̄ ta'da ababa ma Kanaan mishki com mmodi is 'te/ mo dhali a'di ki tor̄ ikam piti isu/ gwo mo uni kun 'kona pije/ mo.

²³ Dhali yan'ko'd Saam dhala Yapaṯh̄ uni ki bu'th burrinye/ mo, uni ki hi'th a'di 'kupa bim buni mmontaṯal̄ 'de/ mo dhali ii ka ciṅ'ko'd mo dhali kumki ababam buni is piti jin̄ dina a'di is 'te/ mo, dhali bwam/em buni tu'kkina uni mo dhali uni 'koki par com e mmodina a'di is 'te/ mo.

²⁴ Ka Nuuh merki e mo 'peni mom piti jin̄ 'kosha yimana mura'th a'di mo dhali mish to jin̄ miina a'di ya/ jin̄ gwa'da'd a'di wakan mo tani

²⁵ a'di o gwo mo ki:

Monyjee midi di goma Kanaan mo.

Ciṅkina/ jin̄ tanu mmota ciṅkina/ mo tani a'di imidi wakan gom ikam piti mo.

²⁶ A'di si'da/ o gwo mo ki:

Mom'bor mii gi Tapa Arungimis pem midi di goma Saam mo,

dhali dhalka Kanaan ta ciṅkinam piti mo.

²⁷ Arungimis dwaḳa Yapaṯh̄ mo ma

dhali dhalki a'di ca'ba'd e gu'b burrinye/ ma Saam mo,

dhali dhalka Kanaan ta ciṅkinam piti mo.

²⁸ Dhali 'ko'da gannu/ yi'de/ 'baarki'd mo tani Nuuh ca'bki'd ki e mo ki yili iss 'kwanimpa karpa'c i'ce'dki iss 'kwanimpa su/ i'ce'dka 'kume'd apo/ mo.

²⁹ Dhali arisa tee ma Nuuh kun ca'bkina a'di ki e mo tani uni 'koni iss 'kwanimpa i/iss su/ i'ce'dki iss 'kwanimpa ipesu/ i'ce'dka 'kume'd apo/ mo, dhali a'di wuki'd mo.

10

¹ Uni gwansan itana nyakum yil gi iya/ ma Nuuh mo uni gun ta Saam dhala Haam dhala Yapaṯh̄ mo. Iya/ dho'thkunu uni mo 'ko'da gannu/ yi'de/ mo be.

² Iya/ ma Yapaṯh̄: a'di jin̄ t̄wa/a/ yuku gway ka Jumar mo, dhala Majuuj mo dhala Maday mo dhala Yawan mo dhala Tubal mo dhala Maashik mo dhala Tiras mo.

³ Dhali iya/ ma Jumar: a'di jin̄ t̄wa/a/ yuku gway ka Ashkanaas mo, dhala Ripaṯh̄ mo dhala Tujarmah mo.

⁴ Dhali iya/ ma Yawan: a'di jin̄ t̄wa/a/ yuku gway ka Aliishah mo, dhala Tarshiish mo dhala Kittim mo dhala Dudaniim mo.

⁵ 'Peni uni 'kwani gwansan kun 'kokin e yana gap mo tani uni a'di ipeperkin mo be. Uni gwansan kun ta iya/ ma Yapaṯh̄ mo kun 'kon e mony'cesh buni mo, uni ka 'dete/ 'dete/ ki 'twam buni gun wala uni mo ka wak̄ buni i'pen mo dhali ki kal buni ilu/ mo.

⁶ Iya/ ma Haam: a'di jin̄ t̄wa/a/ yuku gway ka Kush mo, dhala Masir mo dhala Puth mo dhala Kanaan mo.

⁷ Dhali iya/ ma Kush: a'di jin̄ t̄wa/a/ yuku gway ka Saba mo, dhala Hawiila mo dhala Sabtah mo dhala Raamah mo dhala Sabtaka mo. Dhali iya/ ma Raamah: a'di jin̄ t̄wa/a/ yuku gway ka Shaba mo, dhala Dadaan mo.

⁸ Kush a'di warki'd ka baba ma Nimruud mo. A'di ta wathi/ en'thi/ jin̄ t̄wa/ a/ jin̄ ca'bki dem dem e mony'cesh mo.

⁹ A'di ta wathi/ jin ca'bki dem dem mmopar ka yempa/ ibwambori Tapa mo. Gom gwo gi wakan mo tani a'di onu gwo mo ki: Wathi/ jin waga Nimruud jin ca'bki dem dem ibwambori Tapa mo.

¹⁰ Dhali montel 'pen gi 'penkuman bampam piti mo ta Pam Baabil mo dhali Pan Arak mo dhali Pa Akkad mo, aris uni 'baar mo 'kon e mony'cesh gi Pan Shinaar mo.

¹¹ 'Peni mony'cesh caan mo tani a'di yaki'd mo e Pa Ashshuur mo dhali nyan Pa Ninawa mo dhali Pa Rahubuteer mo dhali Pan Kaalah mo

¹² Dhali Pa Rasan ibwaman gi Pa Ninawa mo dhali gi Pan Kaalah mo, a'di jin ta 'penkuman bampa/ jin caaca mo.

¹³ Masir warki'd ka baba ma Ludim mo dhala Anamiim mo dhala Lahabiim mo dhala Naptuhiim mo

¹⁴ dhala Patrusiim mo dhala Kasluhiim mo (uni i/iyyina 'Kwani gi Pa Pilistiin 'peni cine/ mo) dhali Pan Kapturiim mo.

¹⁵ Kanaan warki'd ka baba ma Sidun mo a'di jin ta ya/m piti jin twa/a/ mo, dhala Hith mo

¹⁶ dhali 'Kwani gi Pa Yabuus mo dhali 'Kwani gi Pa Amuur mo dhali 'Kwani gi Pa Jirjaash mo

¹⁷ dhali 'Kwani gi Pa Hiwwi mo dhali 'Kwani gi Pa Argi mo dhali 'Kwani gi Pan Siin mo

¹⁸ dhali 'Kwani gi Pa Arwaad mo dhali 'Kwani gi Pan Samaar mo dhali 'Kwani gi Pa Hamaat mo. Dhali yan'ko'd mo tani awak gi 'Kwani gi Pan Kanaan uni ihagaski mony'cesh ki lala'th mo.

¹⁹ Dhali mo gi 'Kwani gi Pan Kanaan par 'twa/ ki ribi/ ribi/ 'peni Pan Sidun e mo jin cutha a'di bway 'kup ki Pany Jaraar ki si'd piti jin si'da a'di ntagi Pan Ghassa mo dhali 'peni mo jin cutha a'di bway 'kup ki bway Pan Saduum mo dhali Pan Gamuura mo dhali Pa Admah mo dhali Pa Sabuyiim ki si'd piti jin si'da a'di ntagi Pan Laasha/ mo.

²⁰ Uni gwansan uni ta iya/ ma Haam mo ka wak buni i'pen mo dhali ki 'twam buni ilu/ mo dhali ki mony'cesh buni ilu/ mo dhali ki kal buni ilu/ mo be.

²¹ Dhali uci dho'thkunu eya Saam si'da/ a'di jin taki'da baba gom uci ma Aabir 'baar mo, a'di jin ta'da kam ma Yapat h jin ca'd mo.

²² Iya/ ma Saam: a'di jin twa/a/ yuku gway ka Ilaam mo, dhala Ashshuur mo dhala Arpakshaad mo dhala Lud mo dhala Araam mo.

²³ Dhali iya/ ma Araam: a'di jin twa/a/ yuku gway ka Uus mo, dhala Hul mo dhala Jaathar mo dhala Mash mo.

²⁴ Dhala Arpakshaad warki'd ka baba ma Shaalah mo dhala Shaalah warki'd ka baba ma Aabir mo.

²⁵ Eya Aabir mo tani iya/ su/ dho'thkunu mo. Dhali jan 'de/ yuku gway ka Paalaj mo haali/ ka teem piti mo tani mony'cesh kwa/kunu bwa mo, dhala kam jin ta 'ko'd piti mo tani yuku gway ka Yagthaan mo.

²⁶ Yagthaan warki'd ka baba ma Almudad mo dhala Shaalap mo dhala Hadharmoot mo dhala Yaarah mo

²⁷ dhala Haduraam mo dhala Usal mo dhala Diglah mo

²⁸ dhala Uubal mo dhala Abimaayil mo dhala Shaba mo

²⁹ dhala Upir mo dhala Hawiila mo dhala Yubab mo. Aris uni gwansani 'baar mo tani uni ta iya/ ma Yagthaan mo.

³⁰ Dhali mony'cesh jin 'kokina uni nycine/ mo tani a'di parki 'twa/ ki ribi/ ribi/ mo 'peni Pa Misha mo e mo jin ta bway jin cu'thki 'twa/ ki Pan Sapaar ibampa/ ki pan 'kuwosh gi mom'pesho'k mo.

³¹ Uni gwansan ita iya/ ma Saam mo ka wak buni i'pen mo dhali ki 'twam buni gun wala uni ilu/ mo dhali ki mony'cesh buni ilu/ mo dhali ki kal buni ilu/ mo be.

³² Uni gwansan itana wak gi iya/ ma Nuuh mo isi gi gwom buni jin bele'thkuunu mo dhali gom kal buni mo, dhali 'peni uni gwansan mo tani kal gi 'kwani uni ihagaski mony'cesh ki lala'th mo 'ko'da gannu/ yi'de/ mo be.

11

¹ Dhali aris 'kwani 'baar mo kun 'koni mony'cesh mo tani uni ta gi jasi 'twan 'de/ jin wala uni kadhamo/ mo dhali 'twa/ yisa misha uni ki thatha/ thatha/ yisa.

² Dhali me'd jin borkina 'kwani is mo e mom'pesho'k mo tani uni gamki mony'cesh jin ta'da thithin thith mo e Pan Shinaar mo dhali uni ki 'ko nycine/ mo.

³ Dhali uni ki o gwo ka rem 'kup mo ki: Iiyu/ bala dhalki ana uka je mo dhali 'thos uni mo ki til til mo. Dhali uni tan ga jer gu'b 'peni wosh mo dhala dena ma sipti mmorus to mo.

⁴ Dhali yan'ko'd uni ki o gwo mo ki: Iiyu/ mo dhalki ana nyaṅa dhan 'penkuman bampa/ gom is bana mo dhali gu'b jin turatur, a'di jin midi gu 'kup piti gamki mis mo dhali dhalki ana 'kwara gwo gom is bana mo isi ciki/ ki ana 'konuki ceke' bwa e bwam/e gi mony'ceshi 'baar mo.

⁵ Dhali Tapa a'di thulki'd ka 'cesh mo mmopar 'penkuman bampa/ e mo dhali gu'ba turga/ yan mo a'di jin nyaṅkina iya/ gi 'kwani mo.

⁶ Dhali Tapa ki o gwo mo ki: Hili mo mo ma, uni ta 'kwani jin tala en 'de/ mo dhali uni 'baar mo wal 'twan tal 'de/ mo, dhali a'di ta jasi montel 'pen jin twa/ a/ mo a'di jin mina uni mii mo, dhali ma to yin jin mina uni o bwa mmomii mo tani a'di midi diki ta to jin midi pi uni e mo.

⁷ Iiyu/ mo dhali dhalki ana iina ka 'cesh mo dhali tunkur uni 'twa/ is mo ki uni mini 'koki mish cik gwo ka gam 'kup mo jin wala uni mo.

⁸ Wakan Tapa ki ceke' uni bwa e mo 'baar mo 'peni mun ntagi bwam/e gi mony'ceshi 'baar mo, dhali uni dhalki 'penkuman bampa/ 'pen ki dar gi mo jin 'kona uni ki 'ka a'di 'kup mo.

⁹ Wakan gway piti yuku gway ka Baabil mo haali/ Tapa tunkurki 'twa/ gi mony'ceshi 'baar mo is mo, dhali 'peni mun mo tani Tapa ki ceke' uni bwa eya ris bwam/e gi mony'ceshi 'baar mo.

¹⁰ Uni gwansan uni ita emen ma Saam mo. Ka Saam 'kokina yil iss 'kwanimpa imudhe'd ka dhan piti mo tani a'di warki'd ka baba ma Arpakshaad mo 'ko'di yili su/ mo i'ko'di gannu/ yi'de/ mo.

¹¹ Dhala Saam ca'bki'd ki e mo 'ko'di dho'th ma Arpakshaad mo ki yili iss 'kwanimpa i'iss 'de/ i'ce'dki iss 'kwanimpa imudhe'd mo, dhali a'di ta'dki iya/ a tiya mo dhali i'bwa/a tiya mo.

¹² Ka Arpakshaad ca'bki'd ki e ki yili iss 'de/ i'ce'dka karpa'c mo tani a'di warki'd ka baba ma Shaalah mo.

¹³ Dhala Arpakshaad ca'bki'd ki e mo 'ko'di dho'th ma Shaalah mo ki yili iss 'kwanimpa i'iss 'de/ i'ce'dka kwara mo, dhali a'di ta'dki iya/a tiya mo dhali i'bwa/a tiya mo.

¹⁴ Ka Shaalah ca'bki'd ki e ki yili iss 'de/ i'ce'dka 'kume'd mo tani a'di warki'd ka baba ma Aabir mo.

¹⁵ Dhala Shaalah ca'bki'd ki e mo 'ko'di dho'th ma Aabir mo ki yili iss 'kwanimpa i'iss 'de/ i'ce'dka kwara mo, dhali a'di ta'dki iya/a tiya mo dhali i'bwa/a tiya mo.

¹⁶ Ka Aabir ca'bki'd ki e ki yili iss 'de/ i'ce'dka 'kume'd i'ce'dka donon apo/ mo tani a'di warki'd ka baba ma Paalaj mo.

17 Dhala Aabir ca'bki'd ki e mo 'ko'di dho'th ma Paalaj mo ki yili iss 'kwanimpa i/iss 'de/ i'ce'dki iss 'kwanimpa 'de/ i'ce'dka 'kume'd apo/ mo, dhali a'di ta'dki iya/a tiya mo dhali i'bwa/a tiya mo.

18 Ka Paalaj ca'bki'd ki e ki yili iss 'de/ i'ce'dka 'kume'd mo tani a'di warki'd ka baba ma Ra/u mo.

19 Dhala Paalaj ca'bki'd ki e mo 'ko'di dho'th ma Ra/u mo ki yili iss 'kwanimpa i'kume'd i'ce'dka pedonon mo, dhali a'di ta'dki iya/a tiya mo dhali i'bwa/a tiya mo.

20 Ka Ra/u ca'bki'd ki e ki yili iss 'de/ i'ce'dka 'kume'd i'ce'dka su/ apo/ mo tani a'di warki'd ka baba ma Saruuj mo.

21 Dhala Ra/ u ca'bki'd ki e mo 'ko'di dho'th ma Saruuj mo ki yili iss 'kwanimpa i'kume'd i'ce'dka pesu/ mo, dhali a'di ta'dki iya/a tiya mo dhali i'bwa/a tiya mo.

22 Ka Saruuj ca'bki'd ki e ki yili iss 'de/ i'ce'dka 'kume'd mo tani a'di warki'd ka baba ma Nahur mo.

23 Dhala Saruuj ca'bki'd ki e mo 'ko'di dho'th ma Nahur mo ki yili iss 'kwanimpa i'kume'd mo, dhali a'di ta'dki iya/a tiya mo dhali i'bwa/a tiya mo.

24 Ka Nahur ca'bki'd ki e ki yili iss 'de/ i'ce'dka pedonon mo tani a'di warki'd ka baba ma Taarah mo.

25 Dhala Nahur ca'bki'd ki e mo 'ko'di dho'th ma Taarah mo ki yili iss 'kwanimpa ipe'de/ i/atḥ 'de/ mo, dhali a'di ta'dki iya/a tiya mo dhali i'bwa/ a tiya mo.

26 Ka Taarah ca'bki'd ki e ki yili iss 'kwanimpa ikwara i'ce'dka 'kume'd mo tani a'di warki'd ka baba ma Abraam mo dhala Nahur mo dhala Haraan mo.

27 Dhali uni gwansan mo tani uni ita emen ma Taarah mo. Taarah a'di ta'da baba ma Abraam mo dhala Nahur mo dhala Haraan mo, dhala Haraan ta'da baba ma Luuth mo.

28 Haraan wuki'di twa/a/ mo ki com ga Taarah mo eya 'cesh jin dho'thkunu a'di mo e Pa Ur ma Kaldaan mo.

29 Dhala Abraam dhala Nahur mashkin mo. Dhali asha Abraam yuku gway ka Saray, dhali gway gi asha Nahur yuku ka Milkah mo a'di jin ta 'bwa/ ma Haraan mo a'di jin ta com ga Milkah dhala Yiskah mo.

30 Dhala Saray a'di ta'da burum mo. Ayim ta ga 'ciṅ kamuwa?

31 Taarah ki susa Abraam jin ta ya/m piti mo dhala Luuth jin ta'da 'ci ma Haraan mo, jin tana a'di adhancom mo, dhala Saray jin ta'da mar piti mo, a'di jin ta ash gi ya/m piti jin ta'da Abraam mo, dhali uni iikin mo mmontal 'de/ mo 'peni Pa Ur ma Kaldaan mmo/ii e bampa/ gi Panj Kanaan mo. Hili ki uni pu'dkin e Pan Haraan mo tani uni ki 'ko mo be.

32 Yil ma Taarah jin ca'bkina a'di ki e mo tani a'di ta yili iss 'kwanimpa i'kume'd i'ce'dka mudhe'd mo, dhala Taarah wuki'd mo e Pan Haraan mo be.

12

1 Dhali Tapa ki owa Abraam gwo mo ki: Yaku/ mo 'peni bampam pini mo dhali 'peni 'kwani ma bas pini mo dhali 'peni 'kwani gi gu'b gi cim mo e mony'cesh jin miga/ tor /e mo.

2 Dhali aha/ mina kar /e mmota dhan kal caaca mo, dhali aha/ mina 'bor /e mii mo dhali kar gway pini ki ca mo, wakan ki /e mini 'bora 'bor mii mo be.

3 Aha/ mina 'bor uni gwansan mii gun 'bor /e mii mo dhali a'di jin midi jee /e mo tani aha/ si'da/ mina jee a'di mo, dhali gom /e mo tani arisa wak gi 'kwaniny'cesh mo tani minu 'bor mii mo be.

⁴ Wakan Abraam yaki'd mo, me'd gwo jin torkina Tapa a'di mo dhala Luuth yaki'd nyakki a'di mo. Dhala Abraam 'kokini yili issi kwara i'ce'dka karpa'c mo me'd jin yakina a'di 'peni Pan Haraan mo.

⁵ Dhala Abraam ki susa Saray jin ta ashim piti ilu/ mo dhali a'di ki susa Luuth jin ta'da 'ci ma kam mo, dhali aris tom buni kun tana uni mo uni gun tulkina uni is mo, dhali 'kwani kun gamkina uni e Pan Haraan. Dhali uni 'kakin ka ji sho'k ki bway Pan Kanaan mo. Ki uni pu'dkin e bampa/ gi Pan Kanaan mo tani

⁶ Abraam yaki'd ki tur mo e mony'cesh gi bampa/ gi Pan Shakiim mo e dhan cwa jin wana e ka 'kwattan ma Murah mo. Ka cim caan mo tani 'Kwani Kanaan uni 'kokin e mony'cesh caan mo.

⁷ Dhali yan'ko'd Tapa ki piya Abraam i is mo mmo/o gwo mo ki: E emen pini mo tani aha/ mina ci uni mony'cesh yansan mo. Wakan a'di ki nyañ agwata/ jin miinuwa bas gom Tapa mo a'di jin piki a'di i is mo.

⁸ Yan'ko'd a'di ki thoth mo e 'kuwosha turga/ gi mom'pesho'k ki Pam Beet/ iil mo dhali a'di ki tel gu'b burrinyem piti mo. Pam Beet/ iil di'd ka bora lungu'b mo dhali Pa Aay di'd ki 'ban gi mom'pesho'k mo. Dhali e mun mo tani a'di ki nyaña gwata/ jin miinuwa bas gom Tapa mo dhali a'di ki yuk gway gi Tapa mo.

⁹ Dhala Abraam yaki'd mo mmoya naskina/ 'kup ki bway ma Januub mo.

¹⁰ Dhali te/ 'koshki'd kagahara mo e bampa/ mo. Wakan Abraam yaki'd ka lungu'b e Pam Masir mo ki ya yilkina/ mo e mun mo, haali/ te/ shina 'kosh ki shi/ e bampa/ mo.

¹¹ Ki a'di 'dishi 'twa/ mmociç Pam Masir mo tani a'di ki owa Saray gwo mo, a'di jin ta ash mo ki: Aha/ misha ki /e tana 'bom jin ta jaro/ ki jaro/ jin teru/ mo.

¹² Dhali ki 'Kwani gi Pam Masir mini par /e e mo tani uni mini o gwo mo ki: A'di yansan ta ashim piti mo. Dhali yan'ko'd uni mini 'kosh aha/ jwa mo, hili /e minu dhalku/ ki e mo.

¹³ /E mini o gwo mo ki /e ta 'bwah pem mo, ma a'di mina to ya ki 'bore/ gom aha/ gom /e mo, dhali mondiki/em pem minu 'tash 'twa/ 'peni jwa gom miim pini mo.

¹⁴ Ka Abraam ciçki'd e Pam Masir mo tani 'Kwani gi Pam Masir parki'da 'bom e jin shina jaro/ i me'd mo.

¹⁵ Dhali ki iya/ ma Pirawn parki'da yim e mo tani uni mankina yim eya Pirawn mo. Dhala 'bom suskunu mo e gu'b ma Pirawn mo.

¹⁶ Dhali gom gway ma yim mo tani a'di miid ki 'bore/ goma Abraam mo. Dhali a'di ta'dki ka'bal mo dhala morbip mo dhali gwasin thuluny mo dhali 'kwani kun miina tu'c mo dhali cinjina/ nyara/ mo dhali kuman thuluny mo dhali kalman mo.

¹⁷ Hili Tapa 'koshki'da Pirawn dhali kuñ gu'b piti ka dhan 'ba'th jin wo'cki is she/ mo goma Saray, a'di jin ta asha Abraam mo.

¹⁸ Wakana Pirawn yukki'da Abraam mo dhali o a'di gwo mo ki: Atinta tan jin miina /e aha/ kan mo? Atinta dina /e ki tor aha/ gwo ka yim ta ashin mo?

¹⁹ Dhali /e ki 'cur gwo o ka yim ta 'bwahan mo. Wakan aha/ de budha yim mo mmo'taki ta ashim pem mo. Shwane/, ashim pini a'dan mo. Susi a'di mo, dhali iiyi mo.

²⁰ Dhala Pirawn ki ci gwath gwonkan mo isi gom a'di mo. Dhali uni ki kar ki a'di 'pen mo nyakki ashim piti mo dhali aris to kun tana a'di mo be.

13

¹ Wakan Abraam yaki'd ka gagamis 'peni Pam Masir mo a'di uni ki ashim

piti nyakki a'di mo dhali aris to kun tana a'di mo dhala Luuth si'da/ nyakki uni mo eya Januub mo.

² Dhala Abraam ta pa ki pa mo e to/e mo dhali e 'dolkon kush mo dhali e 'dolkon gana/ mo.

³ Dhali a'di yaki'd 'pena Januub mo ntagi Pam Beet/iil mo e mo jin dikina gu'b burrinyem piti ki montel 'pen mo, mo jin diki'di bwaman gi Pam Beet/iil mo dhali gi Pa Ayy mo,

⁴ e mo jin nyan'kina a'diya gwata/ jin miinuwa bas mo itwa/a/ mo. Dhali e mun mo tani a/Abraam a'di yukki gway gi Tapa mo.

⁵ Dhala Luuth, a'di jin yaki'd nyakka Abraam mo tani a'di si'da/ ta'dki ma'diny ka'bal ka ris mo dhali ma'diny mi ka ris mo dhali to/e ka ris mo dhali gu'b burrinye/ ka ris mo.

⁶ Ki a'di wakan mo tani bampa/ mol uni thip mo uni su/ mmonyak uni 'ko mo mmontal 'de/ mo, haali/ tom buni kun takina uni mo tani uni tana ris ka ris kagahara mo. Wakan uni moli nyak 'ko mo mmontal 'de/ mo.

⁷ Dhali mo jin biruwa bir diki'di bwaman imanhil to/e ma Abraam mo dhali imanhil to/e ma Luuth mo. Dhali ka tee caan mo tani 'Kwani gi Pan Kanaan mo dhali 'Kwani gi Pam Paaris 'kokin mo e bampa/ mo.

⁸ Dhali yan'ko'd Abraam ki owa Luuth gwo mo ki: Dhalku/ ki dhal mo jin biruwa bir bway mo mmodi ibwaman ana mo, aha/ dhali /e mo, dhali ibwaman imanhil to/em pini mo dhali imanhil to/em pem mo haali/ ana tana ikam mo.

⁹ Dina bampa/ isi 'baar mo ki di ibwambori /e mo 'taa? Kwa/ki is pini bwa mo 'peni aha/ mo ma. Wakki/ /e mini bu'th 'ban ma biny cam mo tani wakan aha/ mina ya ki 'ban ma bim poros mo, walla wakki/ /e mini bu'th 'ban ma bim poros mo tani wakan aha/ mina ya ki 'ban ma biny cam moyi.

¹⁰ Dhala Luuth 'de'kki em piti ki mis mo dhali mishki mo mo ki embul ma Uurdun a'di ya'thkunu ki 'bore/ eya ris mo 'baar mo me'd bwaagon jin ta monsinu gi Tapa mo, me'd bampa/ gi Pam Masir si'da/ e mo jin cutha a'di bway 'kup ki Pan Suugar mo. Yansan diki'di twa/a/ mo ki Pan Saduum dhali Pan Gamuura 'konuki 'ce'd sho'k mo ki Tapa mo.

¹¹ Wakan mo Luuth kwanyki'd gom is piti aris mo 'baar mo jin ta embul ma Uurdun mo, dhala Luuth yaki'd mo 'kup ki mom'pesho'k mo. Wakan uni kwa/ki is buni bwa mo ka rem 'kup mo.

¹² Abraam ca'bki'd mo e bampa/ gi Pan Kanaan mo, ka Luuth ca'bki'd mo e bwan 'kwani eya ris 'penkuman bampa/ gi embul mo dhali a'di ijo'ki gu'b burrinyem piti ntagi Pan Saduum mo be.

¹³ Dhali 'Kwani gi Pan Saduum mo tani uni ta uni gun ta thus ki thus mo dhali gun ta imanmii miinthus kun shi/ashi/ apo/ Tapa mo.

¹⁴ Dhali Tapa ki owa Abraam gwo mo 'ko'da Luuth kwa/ki is piti bwa mo 'pena Abraam mo ki: 'Deki em pini imis mo ma, dhali hili mo mo ma, 'peni mo jin dina /e nycine/ mo 'kup ki mon'ko'd gwar ma bim poros mo dhali 'kup ki mon'ko'd gwar ma biny cam mo dhali 'kup ki mom'pesho'k mo dhali 'kup ki bora lungu'b mo,

¹⁵ haali/ aris mony'cesh 'baar mo jin misha /e mo tani a'di miga/ ci gom /e mo dhali gom emen pini kun mini pi 'peni /e mo ki sule/ sule/ mo be.

¹⁶ Aha/ mina dhu emen pini kun mini pi 'peni /e mo mmota aris me'd emen gi bu'da'cesh gi mony'cesh mo. Wakan mo tani wakki/ wathin kamu/ mishi emen gi bu'da'cesh gi mony'cesh denj e mo tani emen pini kun mini pi 'peni /e mo si'da/ minu mish denj e mo be.

¹⁷ Cuyi mis mo ma, dhali ya ki sho'k ki tur mo e mony'cesh yan mo ka luc piti mo dhali ki beem piti mo haali/ aha/ mina ci a'di ki /e mo be.

18 Wakan Abraam ijocki gu'b burrinyem piti mo dhali a'di pu'dki'd mo dhali ca'bki'd mo e 'ko'd gwar gi dhan cwa jin wana e ka 'kwattan ma Mamra kun 'kon e Pa Habruun mo. Dhali e mun mo tani a'di ki nyanja gwata/ jin miinuwa bas gom Tapa mo be.

14

1 Ka tee ma Amraapal jin ta'da malik gi Pan Shinaar mo dhala Aryuuk jin ta'da malik gi Pa Allasar mo dhala Kadarla/oomar jin ta'da malik gi Pa Ilaam mo dhala Tid/aal jin ta'da malik gi Pa Juyim mo tani

2 imalik gwansan miiki mo/as apowa Baara/ jin ta'da malik gi Pan Saduum mo dhala Birshaa/ jin ta'da malik gi Pan Gamuura mo dhala Shin/aab jin ta'da malik gi Pa Admah mo dhala Shim/iibar jin ta'da malik gi Pan Sabuyiim mo dhali a'di jin ta'da malik gi Pam Baala/ mo (yansan ita Pan Suugar mo).

3 Dhali aris 'kwani ma mee gwansan gamki 'twa/ 'kup mmontal 'de/ mo e Embul ma Siddiim mo (yansan ita a'di jin ta Al* 'Donkoro/ mo).

4 Dhali yil 'koni 'kume'd i'ce'dka su/ mo kun miikina uni to mo goma Kadarla/oomar mo, hili ki yil 'koni 'kupi 'kume'd i'ce'dka kwara mo tani uni pishki is ka le'd mo.

5 Dhali ki yil 'koni 'kupi karpa'c ath 'de/ mo tani Kadarla/oomar dhali imalik kun nyak 'ko ki a'di mo pu'dkin mo dhali 'dapki uni e bwan'kwariny buni mo uni gun ta 'Kwani Rapa e Pa Ashtaruthgarnaayim mo dhali 'Kwani Suus e Pa Haam mo dhali 'Kwani Iim e Pan Shawagiryataayim mo

6 dhali 'Kwani Hur e Wosh Si/iir buni mo ntagi Pam Paran mo e mo jin di'd e gwayu/ gi mombwaasho mo.

7 Dhali yan'ko'd mo tani uni dokkin ka nyan'ko'd mo e Pa Eenmishpaath (yansan ita Pan Kaadish mo), dhali uni 'dapki aris bampa/ gi 'Kwani gi Pa Amaliik e bwan'kwariny buni mo ki 'Kwani gi Pa Amuur ilu/ mo uni gun 'kokin mo e Pa Hassuun Tamar mo.

8 Dhali yan'ko'd mo tani malik gi Pan Saduum mo dhala malik gi Pan Gamuura mo dhala malik gi Pa Admah mo dhala malik gi Pan Sabuyiim mo dhala malik gi Pam Baala/ mo (yansan ita Pan Suugar mo), uni iikin ka pije/ mo dhali uni gamki 'twa/ 'kup mo e mo ma mee mo e Embul ma Siddiim mo

9 uni nyakka Kadarla/oomar jin ta'da malik gi Pa Ilaam mo dhala Tid/aal jin ta'da malik gi Pany Juyim mo dhala Amraapal jin ta'da malik gi Pan Shinaar mo, dhala Aryuuk jin ta'da malik gi Pa Allasar mo, uni gun ta imalik kun 'koni dojon mo apo/ imalik kun 'koni mudhe'd mo be.

10 Dhali Embul ma Siddiim mo tani a'di i'tu'dkunu ki jis ma dena ma sipti mo, dhali me'd jin soyina malik gi Pan Saduum mo dhala malik gi Pan Gamuura mo tani kun tiya ta'kkin e uni mo, dhali kun tiya sokin mo e 'kuwosh mo.

11 Wakan mo tani uni kun ta 'kup gi uni mo tani uni ki budha ris to kun tana 'Kwani gi Pan Saduum mo dhali 'Kwani gi Pan Gamuura mo dhali aris tontem buni gom bway mo, dhali uni iikini bway buni mo.

12 Dhala Luuth si'da/ ibu'thkina uni mo, a'di jin ta ya/ ma kam ma Abraam mo, a'di jin ca'bki'd mo e Pan Saduum mo dhali aris tom piti bu'thkina uni mo dhali uni iikin mo be.

13 Dhali yan'ko'd jan 'de/ jin yeki'd mo tani a'di pu'dki'd mo dhali a'di ki tora Abraam, a'di jin ta ji Ibraani† gwo mo, a'di jin diki'd mmoca'b mo e 'ko'd gwar gi dhan cwa jin wana e ka 'kwattan ma Mamra mo, a'di jin ta wathi/ gi

* 14:3 Al Wu † 14:13 Ibraani jin ta 'pemen gwo jin onu mo ki: Jan 'de/ jin pu'dki'd 'peni bwampo/ Yi'dej Kumma/ Elpuraat mo.

Pa Amuur mo, jin ta'da kam ma Ashkuul mo dhala Anir mo. Uni ta imangam gwo me'd mo nyaḱka Abraam mo.

14 Dhali ka Abraam cikki gwo mo ki a'di jin ta'da bas piti ibu'thkunu mo mmota habuus mo tani a'di ki shu 'kwanim piti kun ye'thkunu sho'k ka piye/ mo uni kun dho'thkunu mo e gu'b piti mo, uni kun 'kon ki iss 'kwanimpa karpa'c i'ce'dka 'kume'd i'ce'dka pekwaro apo/ mo dhali uni iikin mo mmo/ ur uni isho'k mo ntagi Pan Daan mo.

15 Dhali a'di ki kwa/ 'kwani ma meem piti gun gamki 'twa/ 'kup bwa mo apo/ uni ki mon'thiny mo, dhali a'di uni ki i'cinjinam piti ilu/ mo 'koshki uni mo dhali urki uni isho'k mo ntagi Pan Hubah mo jin di'd ki 'ban ma bim poros gi Pan Dimashk mo.

16 Dhali yan'ko'd a'di ki 'doyu aris to ka nyan'ko'd mo, dhali a'di si'da/ ki sus abas piti ka Luuth ka nyan'ko'd mo nyaḱki tom piti mo ki upi lu/ mo dhali 'kwani ma mee gara/ mo be.

17 Dhali 'ko'di modok piti ka nyan'ko'd mo 'peni mo jin pinuwa Kadarla/ oomar e mo dhali itapa kun nyaḱ 'ko ki a'di mo tani tapa gi Pan Saduum mo yaki'd ka piye/ mmogam a'di 'kup mo e Embul ma Shawa (a'di jin onu mo ki, Embul ma Malik mo).

18 Dhala Malkisaadag si'da/ jin ta'da malik gi Pan Saliim mo a'di ki 'doyu tonte/ ka piye/ mo dhali yimana mura'th jin ka/ u ki ṅah ṅah mo. A'di ta'da gasiis ma Arumgimis jin Cayaa/ e ki Ca mo.

19 Dhali a'di 'borki a'di mii mo dhali oki gwo mo ki: Mom'bor mii midi di goma Abraam mo ka Arumgimis jin Cayaa/ e ki Ca mo, a'di jin ukki momis dhali mony'cesh mo.

20 Dhali mom'bor mii midi di si'da/ goma Arumgimis jin Cayaa/ e ki Ca mo, a'di jin ciki uni kun ta 'kup ki /e mo e me'd pini mo. Dhala Abraam ki ci a'di to jin 'dapki'da 'dap 'twa/ ka 'kume'd mo 'peni aris to 'baar mo.

21 Dhala malik gi Pan Saduum oki'da Abraam gwo mo ki: Ciyi aha/ 'kwani mo ma, hili budha ris to gom is piniṅ gana/ ma.

22 Hili Abraam oki'da malik gi Pan Saduum gwo mo ki: Aha/ thulkina gwo me'da po/ gom Tapa Arumgimis jin Cayaa/ e ki Ca mo, a'di jin ukki momis dhali mony'cesh mo,

23 ki aha/ mina 'taki diki budha thus mo walla waḱkana appa/ mo walla ma toṅ kamu/ jin ta jim pini moyi, isi ciki/ ki /e mini o gwo mo ki: Aha/ de aha/ ikarkina Abraam mmota pa ki pa mo.

24 Toṅ kamu/ miga/ bu'th yisa, hili jasi a'di jin shwakina 'kwanin dhuru'c mo dhali to jin pwakḱunu bwa mo gom 'kwaninṅ gwas kun nyaḱ ii ki aha/ mo. Dhalka Aanir mo dhala Ashkuul mo dhala Mamra mo bu'th to kun pwakḱunu bwa mo gom uni mo ma.

15

1 'Ko'di to gwansan mo tani gwo gi Tapa pu'dki'd mo eya Abraam mo ki tonyjan mo mmo/o gwo mo ki: Dhalki is ki ko/ mo ma, Abraam. Aha/ tana goṅgorom pini mo. Adhan to jin ish kumma/ jin caaca kagahara mo tani a'di midi ta jim pini mo.

2 Hili Abraam oki gwo mo ki: Ayy Tapa Arumgimisa ki to jin ta'da ta imina /e ciyaa/ mo? haali/ aha/ tikirkina di mo ki dar gi uci mo dhali a'di jin midi kal mal gom gu'b pem mo tani a'di ita Eli/aasar gi Pan Dimashk mo.

3 Dhala Abraam oki gwo mo ki: Hili mo mo ma, emena kamu/ yisa cikina /e aha/ mo, dhali cinḱina/ jin dho'thkunu mo e gu'b pem mo tani a'di midi ta a'di jin midi kal mal pem mo.

⁴ Dhali hili mo mo ma, gwo gi Tapa pu'dki'd mo e a'di mo mmo/o gwo mo ki: Wathi/ yan midu ta amankal mal pini mo yisa. Ya/m piniŋ gana/ a'di imidi ta amankal mal pini mo be.

⁵ Dhali a'di suski a'di mo ka pije/ mo dhali oki gwo mo ki: Hilki/ e mo 'kupki momis mo, dhali denji arisa cul e mo wakki/ /e mini mish uni denj e mo. Dhali yan'ko'd a'di oki a'di gwo mo ki: Wakan be, emen pini kun mini pi 'peni/ e mo tani uni imini 'ko mo be.

⁶ Dhali a'di gamki Tapa gwo is mo dhali a'di karki a'di gom a'di mo ki mo ma kar/ e mo.

⁷ Dhali a'di oki a'di gwo mo ki: Aha/ tana Tapa mo, a'di jin suski/ e mo 'peni Pa Ur ma Kaldaan mo mmoçi/ e mony'cesh yan mmobu'th mo be.

⁸ Hili a'di oki a'di gwo mo ki: Ayy Tapa Arumgimisa, ki tonta imiga/ mish mo mo ki aha/ mina bu'th a'diya?

⁹ A'di oki a'di gwo mo ki: 'Doyu/ i aha/ anas bip jin ta'd gi yili kwara mo ma dhali kuman mi jin ta'd gi yili kwara si'da/ mo dhali arasiŋ ka'bal jin ta'd gi yili kwara gara/ dhali bimbir gurko/ mo dhali gurko/ jin bapki'd mo.

¹⁰ Dhali a'di 'doyi'da ris to gwansan e a'di mo dhali 'cihki uni bwa mo ka 'ban su/ mo dhali 'bwanu'ba kanu/ 'thikina a'di mo ka par 'bana kamu/ mo ka 'dete/ 'dete/ mo. Hili 'dii gwansan 'cihkina a'di bwa mo ki 'ban su/ mo yisa.

¹¹ Dhali me'd jin pu'dkina 'dii kun 'kwar to ka gwapi/ mo ka 'cesh mo apo/ buŋwar isa goŋgoro/ mo tani Abraam ki ur uni asho mo be.

¹² Me'd jin din ma tente/ mmoyul mo tani mo jin 'ce'du e kagahara bi'tki'da powa Abraam mo. Dhali hili mo mo ma, dhan mondhurumi'd jin deenu ki bir bir bi'tki'da apo/ a'di mo.

¹³ Dhali yan'ko'd Tapa oki'da Abraam gwo mo ki: Mishi gwo 'ban mo ma me'd to jin 'tashu 'twa/ mo ki emen pini kun mini pi 'peni/ e mo tani uni mini ta uni kun iiki iin 'kus e bampa/ jin diki ta jim buni mo, dhali uni mini ta ciŋkina/ e mun mo, dhali uni minu siri'c ki sho'k mo ki yili iss 'kwanimpa i/ iss 'de/ mo.

¹⁴ Hili aha/ mina dhu uni e mo jin dwallu gwo mo, kal gi 'kwani gwansan jin mina uni mi to mo, dhali ŋ'ko'd mo tani uni mini pu'du/ ka pije/ mo mmota gi to kun ish ka enthus mo.

¹⁵ Dhali hili gom is pini mo tani /e mini ya e icim mo e monku'th is mo. /E minu kan mo ki /e mini ta adhan mo ki 'bore/ mo, e mo jin canu ki yil mo.

¹⁶ Dhali uni mini doku/ mmahan ka nyan'ko'd mo e bwan 'kwani ma nyakum yil kun min ma apo/ i 'ko/i doŋon mo, haali/ miinthus gi 'Kwani Amuur mo a'di ithimkunu mo yisa naskina/ moyi.

¹⁷ Ka tente/ yulki'd mo dhali mo di'd ki mondhurum mo tani hili mo mo ma, 'ku'kus gwansan pekunu 'kup mbwaman mo ka nos jin 'thanu o'd nycine/ mo jin diki'd mo mmoya aku'd mo dhali ki dhantho/ o'd si'da/ jin diki'd mmoshwa ka le'dan mo.

¹⁸ Ka tee yin mo tani Tapa gamki gwo me'd mo nyakka Abraam mo mmo/o gwo mo ki: E emen kun mini pi mo 'peni/ e mo tani aha/ mina ci bampa/ yan mo 'peni yi'denj kumma/ ma Masir mo ntagi dhan yi'denj kumma/ ma Elpuraat mo

¹⁹ a'di jin ta bampa/ gi 'Kwani Giin mo, dhali 'Kwani Genissi mo, dhali 'Kwani Gadmuun mo,

²⁰ dhali 'Kwani Hitha mo, dhali 'Kwani Paariss mo, dhali 'Kwani Rapa mo,

²¹ dhali 'Kwani Amuur mo, dhali 'Kwani Kanaan mo, dhali 'Kwani Jirjaash mo, dhali 'Kwani Yabuus mo.

16

¹ Dhala Saray, a'di jin ta asha Abraam mo tani ayim dho'thki a'di a'ciñ kamu/ yisa. Dhala yim ta'dki nyarany ciñkina/ gi Pam Masir jin yuku gway ka Haagar mo.

² Dhala Saray oki'da Abraam gwo mo ki: Hili mo mo ma, Tapa a'di ki non aha/ mo mmodho'th uci mo. Mashi nyarany ciñkinam pem mo ma, ma a'di miga/ gam uci ki a'di moyi. Dhala Abraam cikki 'twa/ ma Saray mo be.

³ Wakan 'ko'di Abraam ca'bki'd mo e Pan Kanaan mo ki yili 'kume'd mo tani Saray jin ta asha Abraam mo tani bu'thki'da Haagar jin ta ji gi Pam Masir mo dhali jin ta nyarany ciñkina/ ma yim mo dhali ciki a'di ka Abraam jin ta'da kathim piti mo mmota ash mo.

⁴ Dhali a'di mashki'da Haagar mo dhala yim bwaaki'd mo. Dhali ka yim mishki'd mo ka yim bwaaki'd mo tani ayim hilki'da 'bom jin karu mmohil nyarany ciñkina/ yin ka wak mo.

⁵ Dhala Saray ki owa Abraam gwo mo ki: Dhalki to jin thuthu mii apo/ aha/ mo di/ e 'ba/ mo ma. Aha/ de cikina/ e nyarany ciñkinam pem mmokoth e me'd pini mo dhali ka yim mishki'd mo ka yim bwaaki'd mo tani ayim ki hil aha/ ka wak mo. Dhalki Tapa a'di idwall gwo ibwaman /e mo dhali aha/ mo ma.

⁶ Hili Abraam ki owa Saray gwo mo ki: Hili mo mo ma, nyarany ciñkinam pini di'd e mom'bi'th pini mo. Miiyi to ka yim me'd jin o /e bwa mo ma. Yan'ko'd Saray ki us mii is mo ki gwony 'cwar goma yim mo dhala ayim ki gus ya nwaça/ mo 'peni a'di mo be.

⁷ Dhala man'doyu gwo gi Tapa gamki'da yim e yi'de/ jin kasha e mo e mombwaasho mo. A'di ta yi'de/ jin kasha e jin di'd e bway gi Pan Shur mo.

⁸ Dhali a'di ki o gwo mo ki: Haagar nyarany ciñkina/ ma Saray, /e pu'dkin mo 'peni mana mo dhali /e yani ya mana mo? Ayim oki gwo mo ki: Aha/ guskina ka nwaça/ mo 'pena 'bom jin karu mmohil aha/ jin tana nyarany ciñkina/ mo, ayim jin yuku gway ka Saray mo.

⁹ Aman'doyu gwo gi Tapa ki owa yim gwo mo ki: Doğu/ mo eya 'bom pini jin karu mmohil nyarany ciñkina/ mo dhali 'dapi 'twa/a 'cesh eya yim mo.

¹⁰ Aman'doyu gwo gi Tapa ki owa yim gwo mo si'da/ ki: Aha/ mina mar emen pini kun mini pi 'peni /e mo is kagahara mo wakansan ki uni minu mol den e gom uni mini ta adhana buhany wathimpa caaca kan mo.

¹¹ Dhala man'doyu gwo gi Tapa ki owa yim gwo mo ki: Hili mo mo ma, /e bwaakin mo dhali /e mini dho'th ya/ mo. /E mini yer a'di gway ka Isma/iil mo haali/ Tapa ciki'da hirdhe/ gom monço'c bwam pini mo.

¹² A'di midi ta wathin gwath me'd thuluny bwaasho mo, dhali me'd piti midi di apo/ aris 'kwani 'baar mo dhali me'd ga ris 'kwani 'baar si'da/ mini 'ko apo/ a'di mo dhali a'di midi ca'b apo/ aris uni ma bas piti mo be.

¹³ Dhala yim yerki gway gi Tapa jin torki a'di gwo mo ki: /E tana Arumgimis jin mishi mo mo, haali/ ayim ki o gwo mo ki: A/aha/ ka jin gana/ mishkina Arumgimis mo dhali aha/ dina ki e mo naskina/ 'ko'di aha/ mishkina a'di mo 'taa?

¹⁴ Haali/ a'di wakan mo tani jis yi'de/ yan yukunu gway ka Birlahayru/i mo. A'di di'di bwaman ma Kaadish dhala Baara'd mo.

¹⁵ Dhala Haagar dho'thki ya/ gom Abraam mo dhala Abraam ki yer gway gi ya/m piti jin dho'thkin ma Haagar mo ka Isma/iil mo.

¹⁶ Dhala Abraam 'kokini yili iss 'kwanimpa idonon i'ce'dka pe'de/ mo me'dyin Haagar ki dho'th Isma/iil eya Abraam mo be.

17

¹ Dhali ka Abraam 'koni yili iss 'kwanimpa imudhe'd aḥka 'de/ mo tani

Tapa piki Abraam i is mo dhali oki a'di gwo mo ki: Aha/tana Tapa Arungimis jin Eka/ e ki Ek mo. Yayi ki sho'k ibwambori aha/ mo ma dhali tayi ki dar gi mii i'ba/ mo.

² Dhali gwom pem miga/ gam me'd nyakki/ e mo ibwaman aha/ mo dhali/ e mo dhali aha/ mina mar /e amar is kagahara mo be.

³ Yan'ko'd Abraam bitki bwam/em piti a'cesh mo dhali Arungimis oki a'di gwo mo ki:

⁴ Hili mo mo ma, gwom pem jin gamka/ me'd mo a'di di'd e /e mo dhali /e mini ta ababa goma waambuhany kal gi 'kwaniny'cesh mo.

⁵ Gway pini minu dok/ e yuk ka Abraam* mo yisa, hili gway pini minu yuk ka Ibrahiim† mo, haali/ aha/ karkina /e mo mmota ababa goma waambuhany kal gi 'kwaniny'cesh mo be.

⁶ Aha/ mina kar /e jin miga/ dhu ka dho'th maman mmokala dho'th ka enthus mo dhali 'peni/ e mo tani miga/ dhu kal gi 'kwaniny'cesh mo dhali imalik mini pu'du/ mo 'peni/ e mo be.

⁷ Dhali gwom pem jin gamka/ me'd mo a'di imiga/ tel sho'k mo ibwaman aha/ mo dhali /e mo dhali emen pini kun mini pi 'peni/ e mo 'ko'di/ e mo eya ris nyakum yil gi 'kwanim buni mo, mmota gwo jin gamu me'd mo jin di'd ki sule/ sule/ mo be, mmota Arungimis gom /e mo dhali gom emen pini kun mini pi 'peni/ e mo 'ko'di/ e mo be.

⁸ Dhali e /e mo dhali e emen pini kun mini pi 'peni/ e mo 'ko'di/ e mo tani aha/ mina ci um mony'cesh gi mo/ii ki iinj 'kus bum mo dhali aris mony'cesh gi Paŋ Kanaan mo mmota mom bum jin mina um ibu'th ki sule/ sule/ mo dhali aha/ mina ta Arungimis buni mo be.

⁹ Dhali Arungimis oki'da Ibrahiim gwo mo ki: Dhali gom /e mo tani /e mini mii dhu gwom pem jin gamu me'd mo, /e dhali emen pini kun mini pi 'peni/ e mo 'ko'di/ e mo eya ris nyakum yil gi 'kwanim buni mo be.

¹⁰ A'di ta gwom pem jin gamu me'd mo jin mina /e imii dhu mo ibwaman aha/ mo dhali /e mo dhali emen pini kun mini pi mo 'peni/ e mo 'ko'di/ e mo. Aris gwasan kun 'koni bwaman um mo tani uni minu mii i'citha/ munyjal yis buni mo.

¹¹ Um minu mii i'citha/ munyjal yis bum mo e shuman is ma yi'c ma munyjal yis jin 'kučkunu is mo, dhali a'di midi ta jama mii gi gwo jin gamka/ me'd mo ibwaman aha/ mo dhali /e mo.

¹² Dhali a'diyin jin di'di bwaman um mo jin ta'd ga cim pekwara mo tani a'di iminu mii i'citha/ munyjal yis piti mo, aris gwasani 'baar ka 'dete/ 'dete/ mo eya ris nyakum yil gi 'kwanim bum mo wakki/ a'di dho'thkunu mo e gu'b pini mo walla a'di yolunu mo ka guurush pini mo 'peni 'kwanin tiya kun 'koki ta ji gi emen pini mo.

¹³ A'di jin dho'thkunu mo e gu'b pini mo dhali a'di jin yolunu mo ka guurush pini mo tani a'di iminu mii i'citha/ munyjal yis mo be. Wakan gwom pem jin gamka/ me'd mo tani a'di midi di e shuman is pini mo gwo jin gamu me'd mo jin midi di ki sule/ sule/ mo be.

¹⁴ Jan tal 'dej kamu/ 'peni gwasan kun 'konuki i'citha/ munyjal yis mo jin diki i'citha/ munyjal yis piti mo e shuman is ma yi'c ma munyjal yis jin 'kučkunu is mo tani a'di iminu mii i'cith 'twa/ mo 'peni 'kwanim piti mo be. A'di 'ce'dki gwom pem jin gamka/ me'd mo.

¹⁵ Dhali Arungimis oki'da Ibrahiim gwo mo ki: Dhali goma Saray jin ta ashim pini mo tani /e mini yuk a'di ki gway ma yim ka Saray yisa. Hili gway ma yim minu mii iyuk ka Saarah mo be.

* 17:5 'pemen piti jin o'd ka ababa jin karu ki ca mo † 17:5 'pemen piti jin o'd ka baba goma waambuhany 'kwani mo

16 Aha/ mina 'bora yim mii mo dhali bahili aha/ mina ci /e ya/m ka yim mo. Aha/ mina 'bora yim mii mo dhala yim midi ta kum gi kal gi 'kwaniny' cesh mo, dhali imalik gi 'kwaniny' cesh mini pu'du/ mo 'pena yim mo be.

17 Yan'ko'd a/Ibrahiim bitki bwam/em piti a'cesh mo dhali a'di ki pe'th mo dhali o gwo ki is piti mo ki: A/dhali ya/ minu dho'th e wathin gwath jin 'koni yili iss 'kwanimpa imudhe'd mowa? A/dhali Saarah si da/ jin 'koni yil iss 'kwanimpa idonon i'ce'dka 'kume'd mo ayim midi dhodha 'ciya?

18 Dhala Ibrahiim oki'da Arungimis gwo mo ki: Ayy, dhalka Isma/iil ca'b ki e mo e jis/em pini mo.

19 Dhali Arungimis oki gwo mo ki: Yisa. Hili Saarah jin ta ashim pini mo midi dho'th /e ya/in mo dhali gway piti mina /e iyuk ka Is/hak mo. Gwom pem jin gamka/ me'd mo tani miga/ tel sho'k mo nyakki a'di mo mmota gwo jin gamu me'd mo jin di'd ki sule/ sule/ mo gom emen piti kun mini pi 'peni a'di mo 'ko'di a'di mo be.

20 Dhali goma Isma/iil mo tani /e cikga/ mo. Hili mo mo ma, aha/ mina 'bor a'di mii mo dhali kar a'di mmodho'th maman mo dhali mar a'di amar is mo kagahara mo. A'di midi ta ababa gom uni kun 'koni 'kume'd i'ce'dka su/ mo kun ta iya/ ma malik mo dhali aha/ mina kar a'di mmota kal jin caaca mo.

21 Hili gwom pem jin gamka/ me'd mo tani miga/ tel sho'k mo nyakka Is/hak mo jin min ma Saarah dho'th /e mo ka yir yan ka yil jin 'ko'd mo.

22 Ki a'di thimki'da tor jin torkina a'di nyakki a'di mo tani Arungimis yaki'd ki mis mo 'pena Ibrahiim mo.

23 Yan'ko'd a/Ibrahiim bu'thki'da Isma/iil jin ta ya/m piti mo dhali aris cinjina/ kun yolu mo, uni kun dho'thku mo e gu'b piti mo walla uni kun yolku mo ka guurush piti mo, aris gwasani 'baar ka 'dete/ 'dete/ mo kun 'koni bwaman 'kwanin gwas gi gu'b ma Ibrahiim mo, dhali a'di ki 'cith uni amunyal yis mo e shuman is ma yi'c ma munyal yis buni kun 'kuckunu is mo ka tee yin gana/ mo, me'd jin okin ma Arungimis a'di mo be.

24 Dhala Ibrahiim 'kona yili iss 'kwanimpa imudhe'd i/ath 'de/ mo me'dyin a'di 'cithkunuwa munyal yis mo e shuman is ma yi'c ma munyal yis piti jin 'kuckunu is mo.

25 Dhala Isma/iil jin ta ya/m piti mo tani a'di 'kona yili 'kume'd i'ce'dka kwara mo me'dyin a'di 'cithkunuwa munyal yis mo e shuman is ma yi'c ma munyal yis piti jin 'kuckunu is mo.

26 Ka tee yin gana/ mo tani Ibrahiim dhali ya/m piti ka Isma/iil mo uni i'cithkunuwa munyal yis mo.

27 Dhali aris 'kwanin gwas gi gu'b piti mo, uni kun dho'thku mo e gu'b mo dhali uni kun yolku mo ka guurush 'peni wathin kamu/ mo tani uni i'cithkunuwa munyal yis nyakki a'di mo be.

18

1 Dhali Tapa piki a'di i is mo e 'ko'd gwar gi dhan cwa kun wana e ka 'kwattan ma Mamra mo me'd jin ca'bkina a'di eya campur gi gu'b burrinyem piti mo e mo jin ta mom'batha'd jin 'koshki to montee mo.

2 Dhali a'di 'de'kki em piti ki mis mo dhali hilki mo mo, dhali hili mo mo ma, 'kwanin gwasi kwara doshkin mo ibwambori a'di mo. Dhali ki a'di parki uni e mo tani a'di guski'd 'pena campur gi gu'b burrinye/ mmoraq uni ibway mo dhali a'di kumki is piti 'twa/a 'cesh mo

3 dhali oki gwo mo ki: Tapam pema, wakki/ aha/ gamkina 'the e jis/em pini mo tani dhalku/ ki ya cinjinam pini pe mo.

4 Dhalki ari yi'de/ ha'bkunu mo mo ma dhali lami sho'k bum mo ma dhali siyi is bum mo eya lany cwa mo

5 ki aha/ ki ya guwa gabul maan^hkuthu'd mo ki um mini ye is bum 'ba/ mo dhali η'ko'd mo tani um mini mish iim pe mo - haali/ um pu'dkin mo e cin^hkinam bum mo. Wakan uni oki gwo mo ki: Miiyi me'd jin okina /e mo mo ma.

6 Dhala Ibrahiim miiki is ki 'kasa/ 'kasa/ mo mmopu'd e gu'b burrinye/ eya Saarah mo dhali oki gwo mo ki: Thosoni to ki jahanne/ mo ma, to jin ta'da dipany jin 'tiya'ti jin baru ka u^hca^hji kwara mo. Na'th a'di mo ma dhali miia guraasa mo ma.

7 Dhala Ibrahiim guski'd mo eya ma'diny bip mo dhali a'di ki bu'th ari bip jin 'ta'dama'ta'dam mo dhali jin 'bora'bor mo dhali ci a'di ki cin^hkina/ mo a'di jin miiki is ki 'kasa/ 'kasa/ mo mmothoson a'di mo.

8 Yan'ko'd a'di ki guwa kontan^hka/ mo dhala ko mo dhali ari bip jin thosonkina a'di mo dhali dhuki uni ibwambori uni mo. Dhali a'di doshki'd ki 'dishe/ i uni mo e bwan'kwariny gi cwa mo ki uni shwaki to mo.

9 Uni oki a'di gwo mo ki: Mane Saarah jin ta ashim pini mo mane? Dhali a'di oki gwo mo ki: A'di di'di gu'b burrinye/ mo be.

10 Dhali a'di oki gwo mo ki: Ka jin gana aha/ mina mii do^hku/ e /e mo ki yil midi ta jin this mo, dhala Saarah jin ta ashim pini midi dho'th ya/ mo be. Dhala Saarah di'd mmocik^h gwo mo eya campur gi gu'b burrinye/ jin di'di bwamp/ a'di mo.

11 Hili Ibrahiim dhala Saarah uni itakina dhan mo dhali cakin ki yil mo dhali goma Saarah mo tani mo jin bath^hu mii gi up da^hki'd mo.

12 Haali/ a'di wakan mo tani Saarah pe'thki'd ki is piti mo mmo/o gwo mo ki: 'Ko'di aha/ takina dhan mo dhala ka^hthim pem si'da/ ta'da dhan mo tani miga/ ta gi 'ce^hji kamu/ jin midi 'kol aha/ mowa?

13 Dhala Tapa oki'da Ibrahiim gwo mo ki: Ata pe'thkin ma Saarah kan mo dhali ata on ma yim gwo mo ki: Ka jin gana/ aha/ mina dhodha 'ciya ki aha/ shwane/ cakina yil mo?

14 Ton tal den^h kamu/ di'da jin mola Tapa mii mo 'taa? Ka tenten^h kar/e mo tani miga/ do^hku/ e /e mo e mo jin tana yil this mo dhala Saarah midi dho'th ya/ mo be.

15 Hili Saarah wat^hki gwo mo mmo/o gwo mo ki: Aha/ dinaki pe'th mo, haali/ ayim ko/ki is mo. Dhali a'di oki gwo mo ki: Yisa wakana, hili /e pe'thkin mo ka jin gana/ mo.

16 Yan'ko'd 'kwanin^h gwas gwansan 'kakin ka ji sho'k 'peni mattan mo, dhali uni hilkin mo 'kup ki Pan Saduum mo. Dhala Ibrahiim suski uni 'pen mbway buni mo.

17 Dhali Tapa oki gwo mo ki: A/dhali a'di jin murka/ mii mo tani miga/ bag 'pena Ibrahiim mo 'taa?

18 Haali/ Ibrahiim midi war mo ki kal gi 'kwaniny'cesh jin caaca mo dhali jin eka/ ek^h mo dhali e a'di mo tani aris kal gi 'kwaniny'ceshi 'baar mo minu 'bor mii mo be.

19 Yisa, haali/ a'di kwanykika/ mo ki a'di midi kan ucim piti gwo mo dhali uni gi gu'b piti kun mini 'ko mo η'ko'di a'di mo ki uni mini dhu bway gi Tapa mo mmo'ko mmomii mii ma kar/e mo dhali mii kun miinu ki dar gi mii ma gwar 'de/ mo. Ki a'di wakan mo tani a'di mina Tapa 'taki gu eya Ibrahiim mo a'di jin okina Tapa gwo is mo.

20 Yan'ko'd Tapa oki gwo mo ki: Haali/ cuuwa/ jin 'theru apo/ Pan Saduum mo dhali Pan Gamuura mo maru is mo dhali miinthus buni caaca kagahara mo tani

21 aha/ mina ya ka 'cesh mo mmopar e mo waḳki/ uni miiki mii mo isi gi cuuwa/ jin 'theru e aha/ ki 'bil kan mo, dhali waḳki/ a'di yisa wakan mo tani aha/ mina mish mo mo.

22 Wakan mo tani 'kwaninḡ gwas gwansan tu'kkin mo 'peni matṭaan mo dhali iikin mo 'kup ki Pan Saduum mo. Hili Ibrahiim doshki'd mo naskina/ ibwambori Tapa mo.

23 Yan'ko'd Ibrahiim 'dishki is mo dhali o gwo mo ki: Ka jinḡ gana/ /e mini 'ce'd uni sho'k mowa uni gun mii miinḡkar/e mo nyaḳki uni gun mii tonthus mowa?

24 Waḳki/ uni gun mii miinḡkar/e mo mini 'taki 'ko iss 'kwanimpa su/ i'ce'dka 'kume'd mo ibwaman 'peḡkuman bampa/ mo tani wakan mina /e 'taki 'ce'd mo sho'k mo dhali diki 'taki 'tash a'di 'twa/ mo gom uni gun mii miinḡkar/e mo kun 'koni iss 'kwanimpa su/ i'ce'dka 'kume'd mo ibwaman a'di mo 'taa?

25 Dhalka mii gi wakan midi mii diki thoṭh /e is mo ma mmo'kosh uni gun mii miinḡkar/e mo nyaḳki uni gun mii tonthus mo, wakan ki uni gun mii miinḡkar/e mina e wa gi uni gun mii tonthus mo. Dhalka mii yan midi mii diki thoṭh /e is mo ma. A/min ma Mandwall aris mony'cesh gwo mo diki mii miim 'boro'da?

26 Dhali Tapa oki gwo mo ki: Waḳki/ aha/ mina 'taki gam e Pan Saduum mo uni gun mii miinḡkar/e mo kun 'koni iss 'kwanimpa su/ i'ce'dka 'kume'd mo ibwaman 'peḡkuman bampa/ mo tani aha/ mina 'tash aris mo yani 'baar mo 'twa/ mo gom gway buni mo be.

27 Dhala Ibrahiim thoḳki 'twa/ mo ki: Hili mo ma, aha/ bu'thkina a'di apo/ is pem mo mmotor gwo e Tapa mo, aha/ be jin ta jasi bu'da'cesh mo dhali 'piny mo.

28 Waḳki/ uni imudhe'd 'peni uni kun 'koni iss 'kwanimpa isu/ i'ce'dka 'kume'd mo kun mii miinḡkar/e mo tani mini 'taki aṭh mo, a/mina /e 'ce'd 'peḡkuman bampa/ sho'k mo ka 'bimbil mo mmo/ aṭha 'kwani imudhe'd mowa? Dhali a'di oki gwo mo ki: Aha/ mina diki 'ce'd a'di sho'k mo waḳki/ aha/ mina 'taki gam uni kun 'koni iss 'kwanimpa su/ i'ce'dka mudhe'd mo mmun mo be.

29 Dhali dok/e a'di ki tor a'di gwo mo dhali o gwo mo ki: Waḳki/ uni 'koni iss 'kwanimpa isu/ kun minu 'taki gam mmun mowa? Dhali a'di thoḳki gwo mo ki: Gom gway gi uni kun 'koni iss 'kwanimpa isu/ mo tani aha/ mina diki mii a'di mo.

30 Yan'ko'd a'di oki gwo mo ki: Ayy Tapa dhalku/ anyor ki shwa mo ma, dhali aha/ mina tor gwo mo. Waḳki/ uni 'koni iss 'kwanimpa 'de/ i'ce'dka 'kume'd mo kun minu 'taki gam mmun mowa? Dhali a'di thoḳki gwo mo ki: Aha/ mina diki mii a'di mo tani waḳki/ aha/ mina 'taki gam uni kun 'koni iss 'kwanimpa 'de/ i'ce'dka 'kume'd mmun mo.

31 A'di oki gwo mo ki: Hili mo ma, aha/ bu'thkina a'di apo/ is pem mo mmotor gwo e Tapa mo. Waḳki/ uni 'koni iss 'kwanimpa 'de/ mo kun minu 'taki gam mmun mowa? Dhali a'di thoḳki gwo mo ki: Gom gway gi uni kun 'koni iss 'kwanimpa 'de/ mo tani aha/ mina diki 'ce'd a'di sho'k mo.

32 Yan'ko'd a'di oki gwo mo ki: Ayy Tapa dhalku/ anyor ki shwa mo ma, dhali aha/ mina gwo tor dok/e mo jasi me'd 'deḡ gana/ mo. Waḳki/ uni 'koni 'kume'd mo kun minu 'taki gam mmun mowa? Dhali a'di thoḳki gwo mo ki: Gom gway gi uni kun 'koni 'kume'd mo tani aha/ mina diki 'ce'd a'di sho'k mo.

33 Dhali Tapa yaki bway piti mo me'd jin thimkina a'di gwo tor ka Ibrahiim mo. Dhala Ibrahiim dokki'd ka nyaḡ'ko'd mo e mom piti mo be.

19

¹ Iman'doyu gwo su/ gwansan pu'dkin mo e Pan Saduum mo e mom'pimpili/ mo. Dhala Luuth diki'd mo mmoça'b 'pena 'cesh e 'twaŋkal gi Pan Saduum mo. Ki Luuth parki uni e mo tani a'di cuki mis mo mmogam uni 'kup mo dhali a'di kumki is piti mo ki bwam/em piti eya 'cesh mo.

² Dhali a'di oki gwo mo ki: Itapam pema, aha/ dotkina um mo. Tuki mo ma 'peni bway bum mo e gu'b gi cin'kinam bum mo dhali 'baari mon'thiny mo dhali lami sho'k bum mo. Yan'ko'd um mini mish cu mis mo ki jahanne/ mon'thamo/ mo dhali ii ki bway bum mo. Uni oki gwo mo ki: Yisa. Am mina i'baar mon'thiny mo e bway tur mo.

³ Hili a'di tirrishki uni ki gwom 'bi'thga/ mo. Wakan uni tu'kki mo 'peni bway buni e a'di mo dhali šiçki gu'b piti mo. Dhali a'di miiki uni dhan mo jin shwanu to mo dhali šiçki maan'kuthu'd jin miinu ki dar ka cumat mo dhali uni ishwakin mo be.

⁴ Hili ki uni 'koki ish 'ko'da 'cesh naskina/ mo tani 'kwaniŋ gwas gi 'penkuman bampa/ yan mo, 'kwaniŋ gwas gi Pan Saduum mo, uni kun ta dhuru'c mo dhali uni kun tana dhan lu/ mo, aris 'kwani 'baar mo ntagi wathin gwaŋ jin 'ko'd mo tani uni 'kamki gu'b mo.

⁵ Dhali uni yu'kki 'twa/ eya Luuth mo ki: Mane 'kwaniŋ gwas kun pu'dkin e /e mon'thiny yan mo mane? Susi uni ka pije/ e aman mo ma ki aman mina mish uni mo.

⁶ Dhala Luuth yaki'd ka pije/ ki campur mo e 'kwaniŋ gwas mo dhali mu'thki campur i'ko'di a'di mo,

⁷ dhali oki gwo mo ki: Aha/ dotkina um mo ikam pema, dhalku/ tonthus ki mii wakan mo ma.

⁸ Hili mo mo ma, aha/ takina gi i'bwa/i su/ mo kun 'koki mish wathin kamu/ mo. Dhalki aha/ bway mo mmosus uni ka pije/ e um mo dhali miyi um e uni mo me'd jin o um bwa mo. Hili dhalku/ ton kamu/ ki mii e 'kwaniŋ gwas gwansan mo ma haali/ uni pu'dkin mo ibwan'kwariny ma darha'da/ ma galgin gu'b pem mo.

⁹ Hili uni oki gwo mo ki: Doshi ka cin'ko'd mo ma. Dhali uni oki gwo mo ki: Cim yan pu'dki'd mo mmoça'b yilkina/ mo dhali a'di mididi 'taki lo'b mo jin tanuwa mandwall gwo moyi. Shwane/ aman mina tu/ ul /e mo ki mii kun warkin ki shi/ kagahara mo mmobol kun minu mii gom uni e mo. Yan'ko'd uni yapki apo/ wathin gwaŋ jin yuku ka Luuth ki is kagahara mo dhali 'dishki is mo mmo'ce'da campur mo.

¹⁰ Hili 'kwaniŋ gwas dhuki me'd buni mo dhali susa Luuth bway bwan gu'b e uni mo, dhali mu'thki'da campur mo.

¹¹ 'Kwaniŋ gwas kun 'kokin mo eya campur gu'b mo tani dha'bkina uni em buni ki ja'da/ mo, uni kun gwa'da is mo dhali kun caaca mo, wakan ki uni wukina is buni e mo mmotopuwa campur mo.

¹² Yan'ko'd 'kwaniŋ gwas okina Luuth gwo mo ki: Tal 'deŋ kamu/ takina / e imahana? Iya/ kun ta imar mo 'taa? Iya/ mo 'taa? I'bwa/ mo 'taa? Walla ma a'din kamu/ jin takina /e mo e 'penkuman bampa/ yan mo tani susi uni ka pije/ mo 'peni mo yan mo

¹³ haali/ am mura 'ce'd mo yan sho'k mo haali/ cuuwa/ jin 'theru apo/ 'kwaniŋ piti mo tani a'di warki'd mmomaru is mo ibwambori Tapa mo dhali aman hashkina Tapa mo mmo'ce'd a'di sho'k mo be.

¹⁴ Dhali wakan mo tani Luuth yaki'd ka pije/ mo dhali oki iya/ kun ta imar mo uni kun mini 'taki mash i'bwa/ piti gwo mo ki: Cuyi mis mo ma. Iiku/ ka pije/ mo 'peni mo yan mo, haali/ Tapa muru'di 'ce'd 'penkuman bampa/ yan sho'k mo. Hili a'di wakina e ga man/o gwo ki ma' mo e iya/ kun ta imar piti mo.

15 Ki e ma tente/ kasha'd mo tani aLuuth miikina iman'doyu gwo is ki 'kasa/ 'kasa/ mo mmo/o gwo mo ki: Cuyi mis mo mo ma mmosus ashim pini dhali i'bwa/m pini isu/ mo, uni kun 'koyin mmahan mo, isi ciki/ ki /e minu diki 'ce'd sho'k mo e mo jin doruwa dor mo gi 'penkuman bampa/ mo.

16 Dhali ki a'di di'd mmocora/ cor naskina/ mo tani 'kwanij gwas gwansan bu'thki a'di i is apo/ me'd piti mo dhali apo/ me'd gi ashim piti mo dhali apo/ me'd gi i'bwa/m piti isu/ ilu/ mo. Tapa si'da/ a'di di'd mmomiimii apo/ a'di mo. Dhali uni isuski a'di ka pije/ mo dhali karki a'di ka pije/ mo 'peni 'penkuman bampa/ mo be.

17 Dhali ki uni suskina uni ka pije/ mo tani uni ki o gwo mo ki: Yeyi /e mo ma gom mondiki/em pini mo. Dhalku/ /e ki hil ka cin'ko'd η'ko'di /e mo ma walla dhalku/ /e ki ca' b e mo isi 'baar mo jin ta'da mom'ba'da'd mo. Yeyi /e mo ma 'kup ki wosh mo isi ciki/ ki /e minu diki kup ki 'ci'd'da/ mo be.

18 Dhala Luuth oki uni gwo mo ki: Ayy tapam pema, dhalku/ a'di ki di wakan mo ma.

19 Hili mo mo ma, shwane/ cin'kinam pini gamki'da 'the e jis/em pini mo, dhali momiimiim pini ekkina /e mo, a'di jin torkina /e i aha/ mo e mo jin wothuwa woth gom mondiki/em pem mo. Dhali mmoye mo e 'kup ki wosh mo molga/ mii mo isi ciki/ ki tonthus yan midi 'taki kal aha/ ka 'cesh mo dhali aha/ mina 'taki wu mo be.

20 Hili mo mo ma, shwane/ 'penkuman bampa/ yaase a'di 'disha'dish mo mmoye nycine/ mo, dhali a'di si'da/ gwa'dagwa'd mo. Ayy, dhalki aha/ mmoye mo imun mo ma - a'di diki ta ari gwa'dga/ mo 'taa? - Dhali mondiki/ em pem minu woth mo be.

21 Dhali a'di oki a'di gwo mo ki: Hili mo mo ma aha/ mina mii mii ma 'the si'da/ mmomiga/ diki kum 'penkuman bampa/ yaase 'twa/a 'cesh mo, a'di jin dotkina /e mo.

22 Layu/ /e ki jahanne/ mo ma mmoye imun mo haali/ aha/ mola toj kamu/ mii mo ntagi /e mini pu'du/ mo e mun mo. Haali/ a'di gi wakan mo tani a'di iyukkunu 'penkuman bampa/ yan gway ka Suugar mo.

23 Ateute/ sulki'd mo hila/ apo/ mony'cesh mo me'd jin ciçkin ma Luuth e Pan Suugar mo.

24 Dhali yan'ko'd mo tani Tapa a'di he'thki'da po/ Pan Saduum mo dhali apo/ Pan Gamuura mo to jin si'du/ mo dhala kapany o'd 'peni Tapa mo 'peni bwaman momis mo.

25 Dhali a'di kumki 'penkuman bampa/ gwansan 'twa/a 'cesh mo dhala ris mom'ba'da'd si'da/ mo dhali aris uni gun 'kokin mo e 'penkuman bampa/ gwansan mo dhali to jin caki'd mo apo/ mony'cesh mo.

26 Hili ashim piti jin diki'di 'ko'd mo ibwampo/ a'di mo tani a'di hilki mo ka cin'ko'd mo dhali a'di warki'd mo ki wosh 'donkoro/ mo.

27 Dhala Ibrahiim la cuki mis mo mon'thamo/ mo e mo jin doshkina a'diya dosh mo ibwambori Tapa mo.

28 Dhali a'di hilki'da 'cesh mo 'kup ki Pan Saduum mo dhali Pan Gamuura mo dhali 'kup ki aris bampa/ jin ta mom'ba'da'd mo dhali a'di hilki mo mo. Dhali hili mo mo ma, aku'd 'peni bampa/ cuki mis mo me'da ku'd 'peni mo jin 'thanu o'd ki wur wur mo.

29 Dhali a'di warki'd mo ka Arungimis 'ce'dki 'penkuman bampa/ kun 'koni bwaman mom'ba'da'd sho'k mo tani Arungimis kaki'da Ibrahiim e mo dhali karki'da Luuth ki ya mo 'peni bwaman mo jin kumkunu 'twa/a 'cesh mo me'd jin kumkina a'di 'penkuman bampa/ gwansan 'twa/a 'cesh mo uni kun ca' bkin ma Luuth nycine/ mo be.

30 Dhala Luuth yaki'di ya ki mis ka pije/ mo 'peni Pan Suugar mo dhali ca'bki'd mo e 'kuwosha turga/ mo dhali i'bwa/m piti isu/ nyakki a'di mo.

Haali/ a'di ko/ki'da ko/ is mo mmo'ko e Pan Suugar mo. Dhali a'di ca'bki'd mo ibwamana jurum wosh mo dhali i'bwa/m piti isu/ nyakki a'di mo.

³¹ Dhali a'di jin ta bwanyara/ ki o a'di jin ta jin 'ko'd gwo mo ki: Ababam bana ta'da dhan mo dhali wathin gwathu kamu/ yisa di'da e mony'cesh mo mmoyayu/ bway bwaman ana mo me'd mii jin bathu imii mo isi mony'ceshi 'baar mo.

³² Yayu/ /e mo dhali dhalki ana tuca babam bana mo mmopiya yimana mura'th jin ka/u ki nah nah mo, dhali ana mina nyak ish ki a'di mo ki ana mina 'taki dhuwa dhu mo gom emen ma babam bana mo be.

³³ Dhali uni tu'ckina babam buni mo mmopi yimana mura'th jin ka/u ki nah nah mo ki mon'thiny yin gana/ mo. Dhali a'di jin ta bwanyara/ yaki'd mo dhali nyak ish ki com piti mo. Dhala Luuth a'di diki mish mo mo, atente/ jin ishkina a'diya yim 'ko'da 'cesh mo walla atente/ jin cukina a'di ki mis mo.

³⁴ Dhali a'di waki'd mo ka cim jin 'ko'd mo tani a'di jin ta bwanyara/ ki o a'di jin ta jin 'ko'd mo ki: Hili mo mo ma katili/ ki mon'thiny mo tani aha/ nyakkina ish ka babam pem mo. Dhalki ana ki tu'c a'di mo mmopi yimana mura'th jin ka/u ki nah nah ki mon'thiny shwane/ si'da/ mo. Dhali yayi /e mo dhali ish nyakki a'di mo ki ana mina 'taki dhuwa dhu mo gom emen ma babam bana mo.

³⁵ Dhali uni tu'ckina babam buni mo mmopi yimana mura'th jin ka/u ki nah nah mo ki mon'thiny dok/e mo. Dhali a'di jin ta jin 'ko'd cuki mis mo dhali ishki nyakki a'di mo. Dhali dok/e aLuuth diki mish mo mo, atente/ jin ishkin ma yim 'ko'da 'cesh mo walla atente/ jin cukin ma yim ki mis mo.

³⁶ Wakan be uni su/ kun ta i'bwa/ ma Luuth mo uni 'kokin mo ki uci ibwa mo ki com buni mo be.

³⁷ Dhali ayim jin ta bwanyara/ dho'thki ya/ mo dhali a'di yerkinu gway mo ka Muwab mo. A'di yaase ita com gom 'Kwani gi Pa Muwab mo ntagi shwanesan mo be.

³⁸ Dhali ayim jin ta jin 'ko'd mo a'di si'da/ idho'thki ya/ mo dhali gway piti yerkinu mo ka Ben/ammi mo. A'di yaase ita com gom uci ma Ammuun mo ntagi shwanesan mo be.

20

¹ Dhali 'peni mattaan mo tani Ibrahiim yaki'di yam pe mo 'kup ki bampa/ jin di'd e 'ko'd gwar ga biny jam mo dhali a'di ca'bki'd mo ibwaman gi Pan Kaadish mo dhali gi Pan Shur mo dhali a'di pu'dki'd ki yan'kus e Pan Jaraar mo.

² Dhala Ibrahiim oki gwo mo goma Saarah jin ta ashim piti mo ki: Ayim ita 'bwah pem mo. Dhala Abimaalik jin ta malik gi Pan Jaraar mo karki'da kar 'pen mo dhali bu'thki'da Saarah mo.

³ Hili Arumgimis pu'dki'd eya Abimaalik gi tony jan ki mon'thiny mo dhali oki a'di gwo mo ki: Hili mo mo ma, /e ta wathin gwath jin wana e gi wathi/ jin wu'd mo goma 'bom jin bu'thkina /e mo haali/ ayim ita ash gi wathin kamu/ mo.

⁴ Hili Abimaalik a'di i'dishkin ma yimi is yisa dhali a'di oki gwo mo ki: Tapa a/mina /e i'kosh kal gi 'kwaniny'cesh gun daran gi mii m'ba/ si'da/ moyi?

⁵ Dina a'di ki o gwo mo ki is pitin gana/ ki aha/ mo ki: Ayim ita 'bwah pem mowa? Dhala yim si'da/ ayim ki is pitin gana/ o gwo mo ki: A'di ita'da kam pem mo. E mo jin dika/ ki mii ki nadhum eya dum pem mo dhali e mo jin dika/ ka po/ gi me'd pem mo tani a'di imiikika/ mii yan mo be.

⁶ Dhali yan'ko'd Arumgimis oki a'di gwo mo ki tony jan mo ki: Nye, a'di imishka/ mo ki mii yan a'di imiikina /e mo ki mii jin miikunu mo ki dar gi nadhum eya dum pini mo. Dhali a'di ita aha/ si'da/ jin nonkina /e mo 'peni mo

jīn mīkunu mīnthus apo/ aha/ mo. Haali/ a'di gi wakan mo tani a'di dika/ ki dhal/ e bway mo mmota ayim is ki me'd moyi.

⁷ Hili shwane/ mo tani dokki/ /e e wathin gwath ashim piti ka nyan'ko'd mo ma, haali/ a'di ita aman/o gwo mo dhali a'di midī 'tho gom /e mo, dhali /e minī di ki e mo. Hili wakki/ /e minī diki doka ayim ka nyan'ko'd mo tani mishi /e mo mo ma ki /e minī mii wu mo ka jin gāna/ mo, /e dhala ris uni 'baar mo gun ta kum pini mo be.

⁸ Wakan be Abimaalik la cuki mis mo mon'thamo/ mo dhali a'di yukki imanmīya tu'c piti i'baar mo dhala ris to gwansani 'baar mo itorkina a'di mo e 'cem buni mo. Dhali 'kwani gwās gwansan uni ko/kina ko/ is kagahara mo.

⁹ Dhali yan'ko'd Abimaalik yukki'da Ibrahiim mo dhali oki a'di gwo mo ki: To gi wakatinta imiikina /e mo apo/ aman mo? Dhali ton shigga/ gi wakata si'da/ imiikika/ apo/ /e mo mmo'doyina /e dhan mīnthus caaca apo/ aha/ mo dhali apo/ bampam pem si'da/ mo. /E be imiiki to apo/ aha/ mo kun ka ba/ iminu 'koki mii mii mo be.

¹⁰ Dhala Abimaalik ki owa Ibrahiim gwo mo ki: Atinta caan jin kulumkina /e ibwa mo mmomiikina /e mii yan mo?

¹¹ Dhala Ibrahiim ki o gwo mo ki: A'di imiikika/ kan haali/ a'di itoshkika/ mo mmo/o gwo mo ki: Ka jin gāna/ monko/ isa kamu/ yisa di'da goma Arungimis e mo yansan mo dhali uni minī 'kosh aha/ jwa mo gom gway gi ashim pem mo.

¹² Dhali bahili ayim ka jin gāna/ ita 'bwah pem mo, a'di jin ta 'bwa/ ma babam pem mo, hili ayim diki ta 'bwa/ ma ta'dam pem mo. Dhali ayim warki'd ki ashim pem mo.

¹³ Dhali ki aha/ rakkin ma Arungimis mo mmo/li ki ii ma ca/ mo 'peni gu'b ma babam pem mo tani aha/ okina yim gwo mo ki: A'di yansan ta mīim pini jin mina /e ikar bwa jin kushakush gom aha/ mo. Eya ris mo i'baar mo jin mina ana ipu'du/ mo tani oyi gwo gom aha/ mo ki: A'di ita'da kam pem mo.

¹⁴ Dhali yan'ko'd Abimaalik bu'thki ka'bal mo dhala morbip mo dhali 'kwani kun mīina tu'c mo dhali up kun mīina tu'c mo dhali ciki uni ka Ibrahiim mo dhali warki a'di aSaarah i is mo, ayim jin ta ashim piti mo be.

¹⁵ Dhala Abimaalik ki o gwo mo ki: Hili mo mo ma, bampam pem di'di bwambori /e mo. Ca'bi /e mo mo ma e mo jin midī 'bor /e bwa mo.

¹⁶ Dhali eya Saarah a'di oki gwo mo ki: Hili mo mo ma, aha/ cikina akam pini gabul 'dolkun kushi alip mo. A'di ita mom pini jin yenuwa ye mo e jis/ e gi uni 'baar mo kun nyak' ko ki /e mo. Dhali ibwambori aris 'kwani 'baar mo tani /e minu kar ki mo ma kar/ e mo be.

¹⁷ Dhali yan'ko'd Ibrahiim 'thoki'd ka Arungimis mo. Dhali Arungimis ki waça Abimaalik mo dhali ashim piti si'da/ waçkunu mo dhali aris up kun mīina tu'c mo ki uni ki dho'thki uci mo be.

¹⁸ Haali/ aris bwa gi gu'b ma Abimaalik molona dho'th mo mmomu'thkina Tapa uni mo gom gway ma Saarah mo a'di jin ta ash ma Ibrahiim mo.

21

¹ Dhali Tapa a'di yayi'd mo mmobuta Saarah me'd jin okina a'di mo, dhali Tapa a'di mīiki eya Saarah mo me'd jin okina a'di gwo is mo be.

² Dhala Saarah bwaaki'd mo dhali ayim ki dhodha 'ci jin ta ya/ goma Ibrahiim mo ki yil jin cana a'di mmota dhan mo ka tee caan mo a'di jin okin ma Arungimis a'di mo be.

³ Dhala Ibrahiim yukki gway gi ya/m piti jin dho'thkunu gom a'di mo tani, a'di jin dho'thkin ma Saarah mo gom a'di mo tani ka Is/hak mo be.

⁴ Dhali me'd jin kankin ma Arumgimis a'di mo tani Ibrahiim 'cithki'da Is/ haka munyal yis mo ki ya/m piti ka Is/hak 'kon ma cimi pekwarra mo.

⁵ Dhala Ibrahiim 'kokina yil iss 'kwanimpa imudhe'd ka dhan piti mo tani me'd jin dho'thkunu ya/m piti ka Is/hak gom a'di mo.

⁶ Dhala Saarah oki gwo mo ki: Arumgimis a'di ciki mo gi mompe'th gom aha/ mo. Aris 'kwani 'baara mo ka 'dete/ 'dete/ kun mini cik gwo mo mini pe'th gom aha/ mo.

⁷ Dhali ayim ki o gwo mo ki: Kaja a'di jin mido 'taki o ka Ibrahiim gwo mo ka Saarah mido 'taki ci uci ako mmopi moyi? Hili aha/ be ki dho'th a'di ya/ mo ki yil jin cana a'di mmota dhan mo be.

⁸ Dhali a'di ca'd mo dhali a'di dhalkunuwa kon kum 'pen mo dhala Ibrahiim miiki'da dhan mo jin yukunuwa yuk mo ka cim jin dhalkunuwa kon kum 'pen mo goma Is/hak mo.

⁹ Hili Saarah parki ya/ ma Haagar jin ta ji gi Pam Masir e mo, a'di jin dho'thkin ma yim goma Ibrahiim mo, dhali a'di ki mii a'di ka mak mo.

¹⁰ Gom gwo gi wakan mo tani ayim ki owa Ibrahiim gwo mo ki: Uri a'bom cinkina/ yan ka pije/ mo nyakka 'cim piti mo haali/ ya/ ma 'bom cinkina/ yan mo tani mido diki pwaq mal bwa nyakki ya/m pem mo, isi a'di jin ta'da Is/hak mo.

¹¹ Dhali gwo yan jwaka'tki'da Ibrahiima du e jis/em piti mo gom gway gi ya/ mo be.

¹² Dhala Arumgimis ki owa Ibrahiim gwo mo ki: Dhalku/ gwo yan ki kar mmojwaga't/eya du e jis/em pini mo goma 'ci yan mo, dhali gom gwo gi ashin jin ta'da 'bom cinkina/ mo. Dhali eya ris gwo kun on ma Saarah/e mo tani ciki 'twa/ ma yim mo ma haala Is/hak a'di mido ta emen pini jin minu yuk gway i'ko'd mo be.

¹³ Dhali gom ya/ ma 'bom cinkina/ si'da/ mo tani aha/ mina kar a'di mmota kal mo haali/ a'di ta emen pini mo be.

¹⁴ Dhala Ibrahiim cu mis mo mon'thamo/ ka'tum mo dhali bu'th maan'kuthu'd mo dhali kucan yi'de/ mo dhali a'di ki ci ka Haagar mo mmokar ki a'di e 'kupa bi ma yim mo dhali a'di ki ci ka yima 'ci mo dhali karka ayim 'pen mo dhala ayim a'di yaki'd mo dhali yaki yany ca/ mo e mombwaasho e Pam Birsaba mo.

¹⁵ Dhali yi'de/ jin di'di bwa kucan mo tani a'di ku'thki'd mo dhala yim ki bita 'ci me'd e bwaman ma bwaabuuy mo.

¹⁶ Dhala yim yaki'd mo dhali a'di ki ca'ba 'cesh mo mmoci a'di 'ko'di is mo ari is 'ko'd mo kantaan me'd mo jin shiinu aththa mo kantaan, haala ayim oki gwo mo ki: Aha/ mina mii dhalku/ ki par jwa ma 'ci e mo. Dhala ayim ki ca'b mmoci a'di 'ko'di is mo dhali a'di ki 'de'k 'twam piti mo dhali ko mo.

¹⁷ Dhali Arumgimis cikki 'twa/ ma ara 'ci mo dhala man'doyu gwo ma Arumgimis yukki'da Haagar mo 'peni momis mo dhali owa yim gwo mo ki: Ata mii /e mo, Haagar? Dhalku/ is ki ko/ mo haali/ Arumgimis cikki 'twa/ ma ara 'ci e mo jin dina a'di mo.

¹⁸ Cuyi mis mo dhali 'deka 'ci mo dhali susi a'di ki me'd pini mo haali/ aha/ mina kar a'di ki dhan kala caaga/ mo.

¹⁹ Dhali yan'ko'd Arumgimis ki ka'd e ma ayim mo dhala yim ki par jis yi'de/ e mo. Dhala yim yaki'd mo dhali 'tu'd kucan ki yi'de/ mo dhali a'di ki ci ka 'ci mmopi mo be.

²⁰ Dhali Arumgimis nyak di ka 'ci mo dhali a'di caki'd mo dhali a'di ca'bki'd e mombwaasho mo dhali warki'd ki wathi/ jin yukayuk mo mmoshiina aththa mo.

²¹ Dhali a'di ɕa'bki'd e mombwaasho gi Pam Paaraan mo dhali kum ki ɲapki a'di a'bom mo 'peni Pa Masir mo.

²² Dhali a'di warki'd ki mo jin peki'd mo ka tee ɕaan mo ka Abimaalik dhala Pikul jin ta tapa gi 'kwani ma mee mo oki'da Ibrahiim gwo mo ki: Arungimis nyah di e /e eya ris to kun miikina /e mo be.

²³ Dhali gom gwo gi wakan mo tani thuli /e me'da po/ mmahan ki gway ma Arungimis mo gom aha/ mo ki /e mini diki mii to shiyi'da po/ aha/ mo walla apo/ ya/m pem mo walla apo/ iya/m pem kun mini dho'th iya/ i'ko'd mo, hili gom mii kun miiga/ ki bwanɕkush gom /e mo tani /e si'da/ mini mii a'di gom aha/ mo be, dhali e mony'cesh a'di jin mina /e ya ki yan'kus mo.

²⁴ Dhala Ibrahiim oki gwo mo ki: Aha/ mina thul gwo me'da po/ mo be.

²⁵ Dhala Ibrahiim nyo/ki'da Abimaalik ki gwo mo gom jis yi'de/ mo a'di jin bu'thkina ɕɪŋkina/ ma Abimaalik ki 'bi'th mo.

²⁶ Dhala Abimaalik ki o ki gwo mo ki: Aha/ yisa misha wathi/ jin thami to mii kansan mo yisa. /E si'da/ diki ɕor aha/ gwo mo. Dhali kan si'da/ aha/ si'da/ dinaki ɕiɕ gwoŋ kamu/, hili jasi ki 'dishe/ ishunsan mo.

²⁷ Dhala Ibrahiim bu'thki ɕa'bal mo dhala morbip mo dhali a'di ki ɕi ki uni ka Abimaalik mo dhali uni su/ miiki gwo jin gamu me'd mo be.

²⁸ Dhala Ibrahiim ki dhu ushi nas ɕa'bali pesu/ 'pen ka piye/ mo 'pena ma'diny piti mo uni 'cena mo.

²⁹ Dhala Abimaalik ki owa Ibrahiim gwo mo ki: 'Pemen gwo yan ta'da ta mo mmodhuna /e ushi nas ɕa'bali pesu/ 'pen ka piye/ mo mmo'ko uni 'cena mo?

³⁰ Dhali a'di ki o gwo mo ki: Ushi nas ɕa'bali pesu/ gwansan mina /e ibu'th ki me'd pini mo ki uni mini ta iman/o gwo gom aha/ mo ki aha/ ɕwanykina jis yi'de/ yansan mo be.

³¹ Gom gwo gi wakan mo a'di iyuk'kunu mo yansan gway ka Birsaba mo, haali/ uni su/ thulki gwo me'da po/ mo be.

³² Dhali gom gwo gi wakan mo tani uni gamki gwo me'd mo e Pam Birsaba mo. Dhala Abimaalik cuki mis mo dhala Pikul mo a'di jin ta wathi/ gom 'kwani ma meem piti mo dhali uni dokkin ka nyan'ko'd mo eya 'cesh gi Pam Pilisthiin mo.

³³ Dhala Ibrahiim siki cwa jin wana e ka 'kwattan e Pam Birsaba mo dhali a'di ki yuk' gway gi Tapa mo a'di jin ta'da Arungimis jin di'd ki e ki sule/ sule/ mo be.

³⁴ Dhala Ibrahiim yaki'd ki yan'kus e Bampa/ gi Pam Pilisthiin yil ka ris mo be.

22

¹ Dhali ki a'di warki'd ki mo jin pekin ma ris to gwansan mo tani Arungimis nyo/ki'da Ibrahiim mo dhali o a'di gwo mo ki: Ibrahiim. Dhali a'di ki thoɕ a'di 'twa/ mo ki: Aha/ dina mmahan mo be.

² Dhali a'di ki o gwo mo ki: Susi ya/m pini shwane/ a'di jin ta jim piniŋ gana/ mo, a'di jin ena /e, isi a'di jin ta'da Is/hak mo dhali iiyi mo eya 'cesh gi Pa Muriyya dhali /e mini 'ciɕh a'di 'kus mmomiiya roroɕo/ e 'kuwosh mo e mo jin miga/ ɕor /e mo be.

³ Dhala Ibrahiim cuki mis mo mon'thamo/ ka'tum mo dhali a'di ki shi'd thuluny piti akakasha apo/ mo dhali a'di ki sus dhuru'c washan piti isu/ dhala Is/hak jin ta ya/m piti mo. Dhali a'di ki 'ce'd ɕɪŋkira/ mo goma roroɕo/ mo dhali a'di ki cu mis mo dhali ya mo e mo jin ɕor ma Arungimis a'di mo.

⁴ Dhali ka cim 'koni kwara mo tani Ibrahiim 'de'kki em piti 'kupki mis mo dhali a'di ki par mo e isa dhana/ mo be.

⁵ Dhala Ibrahiim ki o dhuru'c 'kwanim piti gwo mo ki: 'Koyi mmahan mo nyakki thuluny mo. Dhali aha/ dhali a'ci mina ii i mattaan ari is 'ko'd mo dhali aman mina lunj mo dhali doku/ ka nyan'ko'di um mo be.

⁶ Dhala Ibrahiim ki bu'th cinjira/ jin minu miya roroço/ mo dhali 'thik a'di mo e 'kupa bi ma Is/hak jin ta ya/m piti mo dhali a'di ki kal o'di me'd piti mo dhali gandal mo. Dhali uni ki ii 'kupki misi montal 'de/ mo be.

⁷ Dhala Is/hak oki'da Ibrahiim jin ta com mo dhali o gwo mo ki: Ababam pema! Dhali a'di ki thok a'di gwo mo ki: Aha/ dina mmahan mo be. Hili mo mo ma. O'd jin shwa'd di'di mmahan dhali cinjira/ mo. Hili mane ka'bal jin mina ana i'cih 'kus mmomiya roroço/ mo?

⁸ Dhala Ibrahiim ki o gwo mo ki: Arungimis ki is piti midi thoson ana ka'bal jin mina ana 'cih mmomiya basa 'cesh mo, ya/m pem mo. Dhali uni su/ iikin ki misi montal 'de/ mo be.

⁹ Dhali uni pu'dkin e mo jin tor ma Arungimis a'di mo. Dhala Ibrahiim ki ka'ba gwaťa/ mo dhali su'k cinjira/ mo dhali deka Is/hak jin ta ya/m piti mo dhali 'thi a'di apo/ 'kupa gwaťa/ apo/ cinjira/ mo be.

¹⁰ Dhali yan'ko'd Ibrahiim he'thki me'd piti mo dhali bu'th gandal mo mmomuri 'taki 'kosh ya/m piti mo be.

¹¹ Hili aman'doyu gwo gi Tapa yukki a'di mo 'peni momis mo dhali oki a'di gwo mo ki: Ibrahiim. Ibrahiim. Dhali a'di oki gwo mo ki: Aha/ dina mmahan mo be.

¹² Dhali a'di ki o a'di gwo mo ki: Dhalku/ ki kar me'd pini apowa 'ci mo, walla dhalku/ ki mii tonj kamu/ gom a'di mo. Haali/ aha/ misha mo shwane/ ki /e ko/kina Arungimis mo mmomishka/ ki /e diki non ya/m pini mo a'di jin ta ya/in gana/ 'peni aha/ mo be.

¹³ Dhala Ibrahiim 'de'kki em piti 'kupki mis mo dhali a'di ki par mo e mo dhali hili mo mo ma e bwamp/ a'di mo tani arasinj ka'bal di'd jin bu'th ma 'de/ i'cem piti mo. Dhala Ibrahiim yaki'd mo dhali bu'th arasinj ka'bal mo dhali a'di ki ci a'di mo mmo'cih 'kus mo mmomiya basa 'cesh mo mmodhal ya/m piti e i is mo.

¹⁴ Dhala Ibrahiim ki yuk mo yan gway ka Yahwah Yir/ah mo, me'd jin okunu gwo ka tee yan mo ntagi shwane/ mo ki: E 'kuwosh gi Tapa mo tani a'di iminu thoson to mo be.

¹⁵ Dhala man'doyu gwo gi Tapa yukki Ibrahiim mo me'di su/ 'peni momis mo be.

¹⁶ Dhali a'di ki o gwo mo ki: Aha/ ki is pem mo tani thulkina gwo me'da po/ mo a'di ita gwo jin ona Tapa gom to yan jin miikina /e mo dhali mmodina /e ki non ya/m pini a'di jin ta ya/m piniñ gana/ mo.

¹⁷ Gom mom'bor mii tani aha/ mina mar 'bor /e mii mo dhali gom mo jin maruwa mar is mo tani aha/ mara emen pini is mo mmowa e ka cul gi momis mo dhali mmowa e ka si'b kun 'koni bwaman ma gap mo. Dhali emen pini mini dila ris to 'pena goñ gi 'kwani gun ta 'kup pini mo,

¹⁸ dhali e emen pini mo tani aris kal gi 'kwaniny'cesh minu 'bor mii mo haali/ /e haki gwo gi 'twam pem e mo.

¹⁹ Gom gwo gi wakan mo tani Ibrahiim dokki'd mo nyakki 'kwanin dhuru'c piti mo dhali uni ki cu mis mo dhali ii mo i montal 'de/ mo e Pam Birsaba mo. Dhala Ibrahiim ca'bki'd e Pam Birsaba mo be.

²⁰ Dhali a'di warki'd ki mo jin peki'd mo 'ko'da ris to gwansan gun torkunu Ibrahiim mo mmo/o ki: Hili mo mo ma, aMilkah a'di dho'thki uci mo ka kan ka Nahur mo,

²¹ Jin twa/a/ yuku gway ka Uus mo dhali jin 'ko'd yuku gway ka Buus dhali jin 'kon ma po/ ikwara yuku gway ka Gamu/iil mo a'di jin ta'da baba ma Araam mo

²² dhali Kaasad mo dhala Hasu mo dhala Pildaash mo dhala Yidlaap mo dhala Batu/iil mo be.

²³ Dhala Batu/iil dho'thki'da Ripka mo. Uci ipekwaru gwansan idho'thkin ma Milkah goma Nahur mo jin ta'da kam ma Ibrahiim mo be.

²⁴ Dhala 'boma 'bwaash piti jin yuku gway ka Ra/uumah mo ayim si'da/dho'thki'da Thaabah mo dhala Jaaham mo dhala Taahash mo dhala Maakah mo be.

23

¹ Dhala Saarah diki'd ki e ki yili iss 'kwanimpa ipe'de/ i'ce'dka pesu/ apo/ mo. Uni ta yil kun din ma Saarah ki e mo be.

² Dhala Saarah a'di wuki'd mo e Panj Giryat/arba (a'di jin ta Habruun) e bampa/ gi Panj Kanaan mo dhala Ibrahiim yaki'd mo mmoko goma Saarah dhali ko ki gwony jabu'th goma yim mo be.

³ Dhala Ibrahiim cuki mis mo ibwambor a'di jin wuki'd mo dhali o 'Kwani gi Pa Hiththa gwo mo ki:

⁴ Aha/ tana wathi/ yilkina/ dhali aha/ yana yany ca/ ibwaman um mo. Ciya/ mo mbwam um jin miga/ kana kan mo ki aha/ mina kan jwam pem 'peni jis/em pem mo.

⁵ 'Kwani gi Pa Hiththa thokkina Ibrahiim gwo mo ki:

⁶ Ciki aman gwo mo ma. Tapam pem /e ta wathi/ jin ca'bki dem dem ibwaman aman mo. Kani jwam pini e mo jin mina /e ikwany mo e mo gi jis jwam bam mo. Wathin kamu/ yisa midi non /e 'peni mo gi jis jwam piti yisa, walla midi non /e 'peni mmokan jwam pini yisa.

⁷ Dhala Ibrahiim cuki mis mo dhali luḡ is piti mbwambori 'Kwani gi Pa Hiththa uni kun ta 'kwani gi bampa/ caan mo.

⁸ Dhali a'di ki o uni gwo mo ki: Waḡki/ um ona bwa ki aha/ mina kan jwam pem 'peni jis/em pem mo tani ciki aha/ gwo mo dhali 'thoyi Ipruun jin ta ya/ ma Suuhar mo

⁹ ki a'di midi ci aha/ jurum wosh gi Pa Makpiillah mo a'di jin ta jim piti mo, a'di jin di'di shemen buntom piti mo. Ka thaman gana/ mo tani dhalki a'di ci a'di aha/ e bwambori um mo ki a'di midi ta mo jin miga/ bu'th mmokana/ kan mo be.

¹⁰ Dhala Ipruun a'di diki'di bwaman 'Kwani gi Pa Hiththa mo dhali a'di ki thokki Ibrahiim gwo mo ki gwo jin cikina 'Kwani gi Pa Hiththa mo 'pena ris 'kwani kun iyyin ka piḡe/ gi 'twanjala goḡ gi 'penkuman bampam piti mo.

¹¹ Yisa, tapam pem cik aha/ gwo mo. Aha/ cikina /e bwam bunto dhali aha/ cikina /e jurum wosh dhali to jin di'di bwaman a'di mo. E bwambori jis/e iya/ gi 'kwanim pem mo tani aha/ cikina /e a'di mmokan jwam pini mo be.

¹² Dhali yan'ko'd Ibrahiim a'di luḡki is piti ibwambori 'kwani gi bampa/ yan mo be.

¹³ Dhali a'di ki owa Ipruun e mo jin cika 'kwani gi bampa/ gwo mo ki: Hili waḡki/ /e mini cik aha/ gwo mo tani aha/ mina ci /e thaman gi bunto mo. Buthi a'di 'peni aha/ mo ki aha/ mina kan jwam pem imun mo.

¹⁴ Ipruun thokki'da Ibrahiim gwo mo mmo/o gwo mo ki:

¹⁵ Tapam pem, ciki gwo 'peni aha/ mo ma. Mony'cesh jin yolka/ tani a'di ta iss 'kwanimpa i/iss 'de/ jin ta'da guurush gi 'dolkon kush mo. To yan midi ta atinta ibwaman /e dhali aha/ mo? Kani jwam pini mo ma.

¹⁶ Ibrahiim gamki gwo me'd nyakka Ipruun mo dhala Ibrahiim ki bara guurush 'dolkon kush mo goma Ipruun mo a'di jin yerkina a'di gway e gwo jin cikina 'Kwani gi Pa Hiththa jin ta'da guurush iss 'kwanimpa i/iss 'de/ 'peni 'dolkon kush mo me'd isi mii jin barkunu a'di ibwaman 'kwani kun ta imanyol to mo.

¹⁷ Gom gwo gi wakan mo tani bunto ma Ipruun e Pa Makpiilah a'di jin di'd 'kup ka bor ki mis gi Pa Mamra mo, e bunto jin dina jurum wosh a'di jin di'di bwaman mo dhala ris cwa kun 'koni bunto mo ntagi shemen piti 'baar mo tani a'di i'kwarkunu mo

¹⁸ ga Ibrahiim mo a'di ta mom piti mo ibwambori 'Kwani gi Pa Hiththa mo dhali ibwambora ris uni kun iin bway bwamana gonj gi 'penjkuman bampam piti mo.

¹⁹ N'ko'd mii yan mo tani Ibrahiim kanki'da Saarah jin ta ash mo e jurum wosh gi mom bunto jin ta Makpiilah mo jin di'd 'kupki mis ki Pa Mamra mo (a'di jin ta Pa Habruun) jin ta bampa/ gi Panj Kanaan mo.

²⁰ Mombunto dhali jurum wosh jin di'di bwaman mo tani uni i'kwarkunu mo ga Ibrahiim mo mmota jim piti mo gom mo jin minu kana kan ki 'Kwani gi Pa Hiththa mo be.

24

¹ Dhala Ibrahiim ta'da dhan mo, a'di ta dhana dhan gana/ ki yil piti mo. Dhali Tapa a'di 'borki'da Ibrahiim mii ka ris to 'baar mo be.

² Dhala Ibrahiim oki cinjkinam piti gwo mo ki, a'di jin caki'd jin hilki gu'b piti mo, a'di jin ta tapa apowa ris tom piti kun tana a'di mo, ki: Kari me'd pini awum pem mo.

³ Dhali aha/ mina kar / e mmothul gwo me'da apo/ ki Tapa mo ka Arungimis jin di'di momis mo dhali a'di jin di'di mony'cesh mo ki /e mini diki gama 'bom gom ya/m pem 'peni i'bwa/ gi 'Kwani gi Panj Kanaan mo e bwaman uni kun ca'bka/ mo.

⁴ Hili /e mini ya mo e bampam pem mo dhali e 'kwani ma bas pem mo dhali gama 'bom gom ya/m pem ka Is/hak mo be.

⁵ Dhali cinjkina/ ki o a'di gwo mo ki: Wariba/ a'bom midi diki hayaa/ gwo e mmobathaa/ e bampa/ yan mo. Wakki/ wakan mo tani ya/m pini miga/ mii sus mo ka nyan'ko'd e bampam pini jin yayina /e 'peni nycine/ mo?

⁶ Ibrahiim ki thok a'di gwo mo ki: A/e mini mii dhalku/ ki sus ya/m pem ka nyan'ko'd e bampa/ caan mo.

⁷ Tapa jin ta'da Arungimis gi momis mo a'di jin suski aha/ mo 'peni gu'b ma babam pem mo dhali 'pena 'cesh jin dho'thkunu aha/ mo dhali a'di jin oki aha/ gwo mo dhali thulki aha/ gwo me'da apo/ mo gom emen pem mo mmo/ o ki: Aha/ mina ci emen pini a'cesh yan mo. Dhali a'di midi hasha man'doyu gwom piti ibwambori jis/em pini mo dhali /e mini gama 'bom gom ya/m pem 'peni mun mo be.

⁸ Hili wakka 'bom dina bwa ki oyu/ mmobath /e mo tani yan'ko'd /e din ki 'kus 'peni gwo yan jin gama ana me'd mo haali/ /e yisa mini sus ya/m pem imuna.

⁹ Dhali gom gwo gi wakan mo tani cinjkinam piti karki me'd piti eya wum ma Ibrahiim mo a'di jin ta tapam piti mo dhali thul gwo me'd apo/ gom a'di isi gom gwo gi to yan mo be.

¹⁰ Dhali yan'ko'd cinjkina/ a'di suski kalmani 'kume'd jin ta ji gi tapam piti mo dhali bu'th moyam piti mo. Dhali a'di ki kala ris to kun cinu ki me'd e kugu 'peni tapam piti mo. Dhali a'di cuki mis mo dhali ya mo e uka 'cesh jin tana dhan yi'deya kara'b e 'penjkuman bampa/ ma Nahur mo be.

¹¹ Dhali a'di ki kana ris kalman mo mmo'ko ki jin 'kupa'dupuna 'cesh ka pije/ 'peni 'penjkuman bampa/ mo e yany jis yi'de/ ka tee caan mom'pimpili/ mo ka tente/ jin 'cetha up ka pije/ mmo/li ha'bi yi'de/ mo be.

¹² Dhali a'di ki o gwo mo ki: Ayy Tapa Arungimis gi tapam pem ka Ibrahiim mo, nyan'aha/ ki 'bore/ mo jin miga/ gam mii adu is mo, aha/ 'thona /e mo. / E ki tor aha/ mmodhal mii e is ki mo/en gi tapam pem ka Ibrahiim mo.

¹³ Hili mo mo ma, aha/ doshkina e shemen jis yi'de/ jin kasha e mo dhali i'bwa/ gi 'kwani gi 'penkuman bampa/ uni iikin ka pije/ mmoha'b yi'de/ mo be.

¹⁴ Dhalki nyara/ jin miga/ o gwo ki: Aha/ 'thona /e ki /e mini dhal dhur yi'dem pini mo ki aha/ mina 'taki pi yi'de/ mo, dhali jin midu oyaa/ gwo mo ki: Piyi ma tani dhali aha/ mina ciki kalman pini mmopi mo, dhalka yim midu mii ta a'di jin mina /e mii kar 'pen ka pije/ gom cin'kinam pini ka Is/hak mo be. Dhali gom mii yan kan mo tani aha/ mina mish ki /e torki aha/ mo/en gi tapam pem mo be.

¹⁵ Ntwa/a/ ki a'di ki 'baarki gwom piti mmo/o mo tani hili mo mo ma, Ripka a'di jin dho'thkunu ka Batu/iil jin ta ya/ ma Milkah jin ta ash ma Nahur jin ta'da kam ma Ibrahim mo tani a'di yayi'd ka pije/ ka dhur yi'dem piti me'd e 'kupa bi ma yim mo be.

¹⁶ Ayim nyara/ ta jaro/ ki jaro/ mo, a'di jin di'd ki nyaran gana/ a'di jin dina wathiŋ kamu/ ki mash mo. Ayim yaki'd ka lungu'b e jis yi'de/ jin kasha e mo dhali 'tu'd dhur ma yim mo dhali a'di pu'dki'd mo be.

¹⁷ Yan'ko'd a'di jin ta cin'kina/ guski'd mo mmogama ayim 'kup mo dhali o gwo mo ki: Aha/ 'thona /e mmo'ciyaa/ ari yi'de/ 'peni dhur pini mo.

¹⁸ Dhala yim ki o gwo mo ki: Piyi ma, tapam pem mo, dhala yim ki jahanne/ ki dhal dhur piti me'd 'peni me'd ma yim mo dhali a'di ki ci a'di yi'de/ mmopi mo.

¹⁹ Dhali ka yim 'baarki yi'de/ mmo'ci a'di mmopi mo tani ayim ki o gwo mo ki: Aha/ si'da/ mina mush ki kalman pini yi'de/ mo ntagi uni mini pi ikap mo be.

²⁰ Dhali ki jahanne/ ayim ki gaç yi'dem piti eya kur mo dhali gus ka nyan'ko'd bway jis yi'de/ mo mmomush yi'de/ mo dhala yim mushki yi'de/ goma ris kalman piti mo be.

²¹ Wathi/ ki guwa yim ki e ki e ma 'thime/ ki shwamm mo mmoda/ar gwo wakki/ Tapa thoson moyam piti mo walla yisa.

²² Ki kalman kapki yi'de/ mmopi mo tani wathi/ ki bu'th 'dolkon jin hidhu i me'd jin baru ka nusa guurush mo dhali gurany 'peri su/ mo goma yim ki hidha bi mo jin baru ki 'dolkoni 'kume'd ka guurush mo.

²³ Dhali yan'ko'd a'di ki o gwo mo ki: Toraa/ gwo mo ma ki /e ta 'bwa/ maja mo? A/mo jin ishu di'di gu'b gi cima jin mina aman i/ishi cineya?

²⁴ Ayim ki o a'di gwo mo ki: Aha/ tana 'bwa/ ma Batu/iil jin ta ya/ ma Milkah mo a'di jin dho'thkin ma yim ka Nahur mo be.

²⁵ Dhala yim ki mar gwo is mo mmo/o gwo mo ki: Am tana ka wusha/ dhali tonte/ mmo'kosh jwa mo dhali gu'b mmo/ishi cine/ mo be.

²⁶ Wathi/ ki gonj 'kup piti ka lungu'b mo dhali lunj Tapa mo be.

²⁷ Dhali a'di ki o gwo mo ki: Mom'bor mii gom Tapa mo a'di jin ta'da Arungimis gi tapam pem ka Ibrahim mo, a'di jin diki dhal mo/en piti 'pen mo dhali mii ma isin' gana/ 'kup ki tapam pem mo. Dhali gom aha/ tani Tapa ki shu aha/ bway gu'b gi ibas gi itapam pem mo.

²⁸ Dhali yan'ko'd nyara/ a'di guski'd mo dhali tor 'kwani gi gu'b gi kum gwo mo goma ris to gwansan mo be.

²⁹ Dhala Ripka ta'd ka kam jin yuku gway ka Laabaan mo. Dhala Laabaan ki gus ka pije/ e wathi/ mo e jis yi'de/ jin kasha e mo be.

³⁰ Dhali a'di ki par tome'd e mo dhali gurany 'per eya bi gi 'bwaham mo dhali me'd jin cikina a'di gwo gi 'bwaham ga Ripka mo ki: Wathi/ torki'da tor ki aha/ mo tani a'di yaki'd mo e wathi/ mo. Dhali hili mo mo ma, a'di doshki'd nyakka kalman e jis yi'de/ jin kasha e mo be.

31 A'di ki o gwo mo ki: Yayi mo. Ayy mom'bor mii gi Tapa mo. Atinta dosha /eya pije/ kan mo? Haali/ aha/ thosonkina /e gu'b mo dhali mo gom kalman mo be.

32 Gom gwo gi wakan mo tani wathi/ pu'dki'd e gu'b mo. Dhala Laabaan 'cukki kalman ashi/ mo dhali a'di ki ci uni awusha/ mo dhali tonte/ gom kalman mmoshwa mo dhali yi'de/ mmolam sho'k piti mo dhali sho'k gi 'kwani kun nyak iiyu/ ki a'di mo be.

33 Dhali yan'ko'd mo tani tonte/ karu ibwambori a'di mmoshwa mo. Hili a'di ki o gwo mo ki: Aha/ mina diki shwa tonte/ naskina/ ntagi aha/ mina tor 'pemen 'kup yam pem yan. Dhali a'di ki o a'di gwo mo ki: Tori gwo mo ma.

34 Dhali gom gwo gi wakan mo tani a'di ki o gwo mo ki: Aha/ tana ciŋkina/ ma Ibrahim mo be.

35 Tapa a'di 'borki tapam pem mii kagahara mo dhali a'di caki'd mo. Dhali Arumgimis ciki a'di tonkal mo dhali bip mo dhali 'dolkon kush dhali 'dolkon gana/ dhala ris ciŋkina/ kun miina tu'c mo kun ta gwaḥ mo dhala ris ciŋkina/ kun miina tu'c kun ta nyara/ mo dhala ris kalman dhala ris thuluny mo be.

36 Dhala Saarah jin ta ash gi tapam pem mo tani a'di dho'thki ya/ mo gom tapam pem mo ka yim ta'da dhan mo dhali ki a'di mo tani a'di ciki'da ris to 'baar mo kun tana a'di ki a'di mo.

37 Tapam pem ki kar aha/ mmothul gwo me'da po/ mo mmo/o gwo mo ki: /E mini mii diki dhal ya/m pem bway mmogam nyara/ 'peni 'Kwani gi Pan Kanaan mo e mony'cesh jin dika/ mo.

38 Hili /e mini ya mo e gu'b ma babam pem mo e 'kwani ma bas pem mo dhali gama 'bom gom ya/m pem mo be.

39 Dhali aha/ ki o tapam pem gwo mo ki: Wariba/ a'bom midi ushu mmoyayu/ nyakki aha/ mo.

40 Hili a'di ki o aha/ gwo mo ki: Tapa a'di jin yaka/ ibwambor midi hasha man'doyu gwom piti nyakki /e mo mmoshu /e bway mo dhali /e mini gama 'bom gom ya/m pem 'peni 'kwani ma bas pem mo dhali 'peni 'kwani gi gu'b ma baba mo be.

41 Dhali yan'ko'd /e mini di ki 'kus mo 'peni gwo jin thulka/ me'da po/ mo, me'd jin mina /e ya mo e 'kwani ma bas pem mo. Dhali wakki/ uni mini 'koki ci ayim ki /e mo tani /e din ki 'kus mo 'peni gwo jin thulka/ me'da po/ mo be.

42 Aha/ pu'dkina mo shwane/ e jis yi'de/ jin kasha e mo dhali o gwo mo ki: Ayy Tapa /e jin tana Arumgimis gi tapam pem ka Ibrahim mo, wakki/ /e shwane/ mini shu/aa/ bway e bway jin miga/ ya mo tani

43 hili mo mo ma aha/ doshkina e jis yi'de/ jin kasha e mo dhali dhalki nyara/ jin pu'du'd mmoya mush yi'de/ mo a'di jin miga/ o gwo mo ki: Ciyyaa/ ari yi'de/ 'pena dhur mo ma tani

44 dhali a'di midi oyaa/ gwo mo ki: Piyi ma dhali aha/ mina mush gom kalman pini si'da/ mo. Dhalki a'di ta'da yim jin mina Tapa kar 'pen ka pije/ gom ya/ gi tapam pem mo be.

45 Ntwa/a/ ki aha/ daka gwom pem o mo eya du mo tani hili mo mo ma, aRipka a'di ayim pu'dki'd mo nyakki dhur yi'de/ e 'kupa bi ma yim mo dhala yim yaki'd ka lun'gu'b e jis yi'de/ jin kasha e mo dhali mush yi'de/ mo dhali aha/ ki owa yim gwo mo ki: Ciyyaa/ dhalki aha/ pina ma.

46 Dhali ki jahanne/ ayim ki dhal dhur yi'de/ me'd 'peni 'kupa bi ma yim mo dhali o aha/ gwo mo ki: Piyi ma dhali aha/ mina ci ki kalman pini si'da/ mmopi mo.

47 Gom gwo gi wakan mo tani aha/ pikina mo dhala yim ki ci ki kalman mmopi si'da/ mo be. Dhali yan'ko'd mo tani aha/ ki doṭa yim gwo mo mmo/ o ki: /E ta 'bwa/ maja si'da/? Ayim ki thoḳ aha/ gwo mo ki: Aha/ tana 'bwa/

ma Batu/iil jin ta ya/ ma Nahur mo, a'di jin dho'thkin ma Milkah a'di mo. Gom gwo gi wakan mo tani aha/ki kar dhirriny 'dolkon e shush ma yim dhali gurany 'per eya bi ma yim mo be.

48 Dhali yan'ko'd aha/ ki lunj 'kup pem mo dhali lunj Tapa mo, dhali 'bor Tapa mii mo a'di jin ta'da Arungimis gi tapam pem ka Ibrahiim mo, a'di jin shu aha/ bway, ki bwaya 'borganj gana/ mmosus 'bwa/ gi 'kwani ma bas gi tapam pem gom ya/m piti mo be.

49 Dhali shwane/ wakki/ /e mini tu/ul gi mii ma tete/ mo dhali gi miinj gana/ gi tapam pem mo tani tori /e aha/ gwo mo dhali wakki/ diki ta gwoj gana/ mo tani tori aha/ gwo mo ki aha/ mina tu'k mo ki me'da bim poros mo walla ki me'da biny cam mo.

50 Dhali yan'ko'd mo tani Laabaan dhala Batu/iil thokki gwo mo ki: To gwan pu'dkin 'peni Tapa mo dhali aman mola gwo shiyi'di o i/e walla jim 'boro'd mo.

51 Hili mo mo ma, aRipka a'di di'di bori /e mo. Susa yim mo dhali iiyi mo me'd gwo jin okina Tapa mo be.

52 Dhali ki cinjina/ ma Ibrahiim cikki gwo jin ona uni mo tani a'di gonjki is piti mo ka 'cesh ibwambori Tapa mo be.

53 Dhali cinjina/ a'di kalki'da ris tonyjaro/ kun ta 'dolkon kush mo dhali 'dolkon gana/ mo dhali burrinye/ dhali ciki uni ka Ripka mo dhali a'di ki ci ki uni ka kam nyara/ mo dhali ki kum nyara/ mo to gi 'bitha yol she/ ki 'bi'th mo.

54 Dhali a'di dhali 'kwani kun nyak ii ki a'di mo tani uni shwaki to mo dhali piki to mo dhali uni ki isha cim 'dej gana/ imun mo. Ki uni cuki mis mon'thamo/ mo tani a'di ki o gwo mo ki: Hashi aha/ ka nyan'ko'd e tapam pem mo.

55 Akam gi nyara/ dhali kum nyara/ ki o gwo mo ki: Ayim midi ca'b naskina/ ka cimi 'kume'd mo. 'Ko'da cim caan mo tani ayim midi ya beseene/.

56 Hili a'di ki o uni gwo mo ki: Dhalku/ ki mii aha/ mii ka diite/ mo. Me'd jin 'borkina Tapa aha/ mii e bway pem mo tani dhalki aha/ yana mo ki aha/ mina ya mo e tapam pem mo.

57 Uni ki o gwo mo ki: Am mina yuk nyara/ mo dhali dota yim mo be.

58 Dhali uni yukkina aRipka mo dhali owa ayim gwo mo ki: A/e mini ya nyakki wathi/ yan mo? Ayim ki o gwo mo ki: Aha/ mina ya mo be.

59 Gom gwo gi wakan mo tani uni hashkina Ripka jin ta 'bwaham mo dhala yim jin midi nyak di ki a'di mo dhali cinjina/ ma Ibrahiim mo dhali 'kwanim piti mo be.

60 Dhali uni 'borkina Ripka mii mo dhali owa yim gwo mo ki: 'Bwah bama, tayi ata'da gi 'kwani ma alaap ka ris kun maru is ka alaapi 'kume'd mo dhali dhalki emen pini dil to 'peni 'twaman ma gonj gi uni gwansan kun shi/ uni i e mo.

61 Dhali yan'ko'd aRipka dhali nyara/ kun nyak ii ki a'di cuki mis mo dhali mer kalmana po/ mo dhali bath wathi/ mo. Dhali kan cinjina/ suski'da Ripka dhali ya e bway piti mo be.

62 Dhala Is/hak a'di yayi'd 'peni Pam Birlahayru/i dhali a'di ca'bki'd mo eya Januub mo.

63 Dhala Is/hak yaki'd ka pije/ mmo'thowa pije/ mo e mom'pimpili/ mo. Dhali a'di 'de'kki em piti 'kupki mis mo dhali par mo e mo dhali hili mo mo ma, kalman uni pu'dkin mo be.

64 Dhala Ripka 'de'kki em piti 'kup ki mis mo dhali ka yim parki'da Is/hak e mo tani ayim ki thul ka 'cesh 'peni kalman mo

⁶⁵ dhali o cɪŋkina/ gwo mo ki: Wathi/ jana idi'di mat̪aan mo a'di jin yayi'd mmogam ana 'kup mo? Cɪŋkina/ ki thoḵ a'di gwo mo ki: A'di ta tapam pem mo. Wakan ayim ki bu'th burrinyen 'kup piti dhali kum is piti mo be.

⁶⁶ Dhali cɪŋkina/ ki tor Is/hak gwo goma ris to kunne miikina a'di mo be.

⁶⁷ Dhali yan'ko'd Is/hak ki susa yim e gu'b burriyne/ mo dhali a'di ki butha Ripka dhali ayim warki'd ki ash mo dhali a'di enki'da yim mo. Dhala Is/hak a'di malaskunuwa du mo 'ko'di jwa gi kum mo be.

25

¹ Ibrahiim a'di bu'thki'da 'boma kamu/ mo a'di jin yuku gway ka Gathuu-
ra mo be.

² Ayim dho'thki a'di aSimraan mo dhala Yagshaan mo dhala Madaan mo
dhala Midyaan mo dhala Yishbaag mo dhala Shuha mo be.

³ Yagshaan si'da/ a'di ita'da baba ma Shaba mo dhala Dadaan mo. Dhali
iya/ ma Dadaan uni si'da/ annihe/ mo: Ashshuriim dhala Lathushiim dhala
La/ummiim mo be.

⁴ Dhali iya/ ma Midyaan uni si'da/ annihe/ mo: Epah dhala Ipir mo dhala
Hanuuk mo dhala Abiidaa/ mo dhala Elda/ah mo be. Aris uci gwansan uni
ta kuma Gathuurah mo be.

⁵ Ibrahiim ciki'da ris tom piti kun tana a'di ka Is/hak i'baar mo be.

⁶ Hili e iya/ gi up lacam piti yan mo tani Ibrahiim ki ci uni to kun cinu ki
me'd mo, dhali ki a'di di'd ki e naskina/ mo tani a'di ki dhuki uni 'pen mo 'peni
ya/m pitiŋ gana/ ka Is/hak mo mmo/iiku/ mmo'koku/ 'kupki mom'pesho'k isa
dhana/ imun mo jin ta bampa/ gi mom'pesho'k mo be.

⁷ Hili atee yil jin din ma Ibrahiim ki e annihe/ mo, a'di 'kona yili iss
'kwanimpa ipekwara i'ce'dka karpa'c apo/ mo be.

⁸ Ibrahiim a'di ciki shi/in piti jin 'ko'd mo dhali a'di wuki'd mo ki dhana
dhan gana/ mo mmotana a'di dhan gumpun dhan ki yil piti mo dhali a'di
gamkunu me'd nyakki 'kwanim piti mo be.

⁹ Is/hak dhala Isma/iil uni kun ta iya/m piti mo tani uni kanki a'di e jurum
wash ma Makpiilah mo e bwam bunto ma Ipruun jin ta ya/ ma Suuhar jin ta
wathi/ Hiththa jin di'd 'kup ka bor ki mis ki Pa Mamra mo be.

¹⁰ Bwam bunto yan yolkin ma Ibrahiim 'peni 'Kwani Hiththa mo tani a'di
ikankunu a'di nycine/ uni ka ashim piti ka Saarah mo be.

¹¹ 'Ko'di jwa ma Ibrahiim mo tani Arumgimis 'borki'da Is/hak mii mo a'di
jin ta ya/m piti mo. Dhala Is/hak a'di ca'bki'd mo e pam Birlahayru/i mo be.

¹² Uni kun ta emen ma Isma/iil kun yerkinu gwayi 'ko'd mo a'di jin ta ya/
ma Ibrahiim mo ka Haagar jin ta ji Masir mo a'di jin ta cɪŋkina/ nyara/ ma
Saarah a'di jin dho'thkina a'di ka Ibrahiim mo be.

¹³ Gway gi iya/ ma Isma/iil mo tani uni annihe/ mo, a'di jin yerkinu ka
bath 'pen ka dho'th buni mo: Nabayuut a'di ita'da bwanyara/ ma Isma/iil
mo dhala Gidar mo dhala Adab/iil mo dhala Mibsaam mo,

¹⁴ dhala Mishmaa/ mo dhala Duumah mo dhala Massa mo

¹⁵ dhala Hadaar mo dhala Teema mo dhala Yathuur mo dhala Napish mo
dhala Gidmah mo be.

¹⁶ Uni gwansan uni ita iya/ ma Isma/iil mo dhali gway buni si'da/ uni anann
mo be. Dhali gway bampam buni dhali ata/ kun 'kona uni tani uni 'kume'd
i'ce'dka su/ mo ka wak buni kun tana uni iya/ ma malik mo.

¹⁷ Hili atee yil jin din ma Isma/iil annihe/ mo, a'di 'kona yili iss 'kwanimpa
ipesu/ ath ikwara mo dhali a'di ciki shi/in piti jin 'ko'd mo dhali a'di wuki'd
mo dhali a'di nyakkunu is gam me'd ki 'kwani ma bas piti mo be.

18 Uni 'peni Pa Hawiila ntagi Pan Shur mo a'di jin di'd ka par 'twa/ ki Pa Masir mo 'kupki bway jin cuthi 'twa/ 'kupki bway Pa Ashshuur mo be. A'di ca'bki'da po/ aris 'kwanim piti mo be.

19 Gway gi iya/ ma Is/hak uni kun ta emen piti mo a'di jin ta ya/ ma Ibrahiim mo: Ibrahiim jin ta'da baba ma Is/hak mo.

20 Is/hak a'di i'kokina yili issu/ mo ka dhan piti me'd jin bu'thkina a'di aRipka ki ash mo a'di yim jin ta 'bwa/ ma Batu/iil mo jin ta Wathi/ Araam gi Pam Paddaan/araam jin ta 'bwah ma Laabaan Wathi/ Araam mo be.

21 Dhala Is/hak 'thoki'da Arumgimis gom ash mo, dhala Ripka jin ta ash a'di yim bwaaki'd mo be.

22 Dhali uci su/ gwansan uni gurunyki is e bwa ma yim mo, dhali ayim ki o gwo mo ki: Wakki/ a'di wakan mo tani, ata si'da/ idika/ ki e mo? Gom gwo gi wakan mo tani ayim yaki'd mo dhali 'thek gwo yan e Tapa Arumgimis mo.

23 Dhali Tapa ki owa yim gwo mo ki:

Kal 'koni su/ e bwa ma dho'th pini mo,

dhali 'kwani su/ gwan kun mina /e dho'th mo tani uni mini kwa/ bwa mo

dhali jan tal 'de/ a'di imidi 'bitha'bi'th mo mmobola kamu/ e mo,

dhali a'di jin ca'd a'di imidi mii ara kam to mo be.

24 Ka tee ma yim jin mina a'di dho'th thimkunu mo tani, hili mo mo ma, ushi uci su/ 'kon e bwa ma yim mo be.

25 A'di jin pu'dki'di twa/a/ mo tani a'di tagi 'per mo, dhali aris burngwar is piti wana e ki burrinnye/ muri is mo. Gom gwo gi wakan mo tani a'di yukki a'di gway ka Iisu mo.

26 Dhali yan'ko'd mo tani akam pu'dki'd mo, dhali me'd piti bu'thki 'pena tinjila/ ma Iisu mo. Dhali gom gwo gi wakan mo tani a'di yukkunu gway ka Yakuub mo. Is/hak 'kona yil issi kwara mo me'd jin dho'thkin ma yim uni mo be.

27 Me'd jin cakina uci su/ mo tani Iisu ta wathi/ jin kora e ki kor e mompar mo, a'di ta wathi/ ma shonj gana/ mo ka Yakuub ta wathi/ jin bu'th is piti ka mathan'kur dhali ca'b e gu'b burrinnye/ mo be.

28 Is/hak enki'da Iisu mo haali/ a'di 'kaki shum piti kun parkina a'di mo. Hila Ripka enki'da Yakuub mo be.

29 Ka cima kamu/ me'd jin miikin ma Yakuub a'tash mo tani Iisu pu'dki'di pa mo 'peni bwaasho mo dhali a'di mutta/ te/ is kagahara mo.

30 Dhali Iisu ki owa Yakuub gwo mo ki: Dhalki aha/ nyoka 'tash pini yan jin cesa /e e ki 'per 'per mo haali/ aha/ mutta/ te/ is mo (gom gwo gi wakan mo tani a'di iyukkunu a'di gway ka Aduum mo).

31 Yakuub oki gwo mo ki: /E mini yolaa/ mo ma bwanyaran dho'th ganam pini yan mo.

32 Iisu thokki gwo mo ki: Aha/ mura wu 'te/ mo be. Mo ma bwanyara/ yan midii miya ta gom aha/ mo?

33 Yakuub ki o gwo mo ki: /E mini thul gwo me'da po/ ntwa/a/ gom aha/ mo, dhali wakan a'di thulki gwo me'da po/ gom a'di dhali yol mo ma bwanyaran dho'th pitinj gana/ ka Yakuub mo be.

34 Yan'ko'da Yakuub ki cika Iisu maanj guraasa dhala 'tasha pasuliya jin cesu/ mo dhali a'di shwaki a'di mo dhali a'di piki to mo dhali cu mis mo dhali ya e bway piti mo. Iisu a'di ishi/ki mo ma bwanyaram pitinj gana/ i e mo be.

26

1 Dhali shwane/ te/ pu'dki'd mo e bampa/ mo mmowaki ten dhamo/ mo me'd jin din ma Ibrahiim mo. Dhala Is/hak a'di yaki'd mo e Pany Jaraar mo eya Abimaalik jin ta'da malik gi 'Kwani Pilisthiin mo.

² Dhali Tapa piki a'di is mo, dhali o a'di gwo mo ki: Dhalku/ki ya ka lungu'b bway Pa Masir mo. Hili ca'bi /e eya 'cesh jin miga/ tor /e mo.

³ Tayi aca/eya 'cesh yan mo dhali aha/mina di nya'ki /e mo dhali 'bor /e mii mo, dhali gom /e mo dhali gom emen pini mo tani aha/ mina ci aris bampa/gwan ki /e mo dhali aha/ mina thim gwom pem jin oka/ is mo mmothul gwo me'da po/ goma Ibrahiim jin ta'da babam pini mo be ki:

⁴ Aha/ mina mar emen pini is mo me'da cul gi momis mo dhali aha/ mina ci emen pini aris bampa/ yani 'baar mo. Dhali gom gway gi emen pini mo tani aris kal gi mony'cesh mini 'bor is buni mii ki uni mo be.

⁵ Haala Ibrahiim haki gwo gi 'twam pem e mo dhali dhu gwo kun kanka/ a'di mo dhali gwoŋkan pem mo dhali gwoŋkan pem kun cinu ki 'twa/ mo dhali gwoŋkan pem jin cinu mo be.

⁶ Gom gwo gi wakan mo tani Is/hak a'di ca'bki'd mo e Pany Jaraar mo be.

⁷ Ki 'kwaniŋ gwaḥ gi mo yan dotki a'di gwo mo gom ash mo tani, a'di ki thok gwo mo ki: Ayim a'di ita 'bwah pem mo, haali/ a'di ko/ki is mo mmo/o ki a'di ta ashim piti mo isi ciki/ 'kwani gi mo yan imini 'taki 'kosh a'di jwa mo gom gway ma Ripka mo, haala yim dina jarom piti ki she/ mo mmohil mo be.

⁸ Ki a'di diki'd e mun ki rash rash mo tani Abimaalik jin ta'da malik gi 'Kwani Pilisthiin mo tani a'di hilki mo ki e shu'd gu'b mo dhali para Is/hak e mo mmolo'bkina a'di aRipka jin ta ash mo.

⁹ Gom gwo gi wakan mo tani Abimaalik yukki'da Is/hak mo dhali o a'di gwo mo ki: Hili mo mo ma, ayim ta ashin mo ba/, kata jan ona /e gwo oki ayim ta 'bwahan mo? Is/hak ki thok a'di gwo mo ki: Haali/aha/ kulumkina gwo ibwa mo oki aha/ mina wu mo gom gwo ma yim mo be.

¹⁰ Abimaalik ki o a'di gwo mo ki: Atinta a'dan jin miikina /e wakan apo/ aman mo, wathiŋ kamun 'de/ wariba/ midu 'taki/ ya mo isha 'bom pini mo dhali /e mini 'taki guyu/ mo jin thamu mii apo/ aman mo be.

¹¹ Gom gwo gi wakan mo tani Abimaalik ki ruma aris 'kwani 'baar ki gwo mo mmo/o ki: A'di yin jin midu ta wathi/ yan is ki cwa mo walla ashim piti mo tani a'di minu 'kosh jwa mo be.

¹² Dhala Is/hak siki to mo e bampa/ yan mo dhali a'di 'ciḥki to mo ki yila 'de/ yan mo ki iss 'kwaniŋpa imudhe'd mo. Haali/ Tapa a'di 'borki a'di mii mo be.

¹³ Dhali wathi/ warki'd ki wathiŋpa mo dhali gama ris to ki nyanye/ kun markunu is mo ntagi a'di ta wathi/ jin eka/ 'pen ki ek mo.

¹⁴ A'di taki'd ga ma'diny ka'bal kun jinu mo dhali bip mo dhali aris cin'kina/ tana ris mo kun 'kokin e gu'b piti mo, dhali gom gwo gi wakan mo tani 'Kwani Pilisthiin uni taki dhapan apo/ a'di mo be.

¹⁵ (Dhali shwane/ 'Kwani Pilisthiin uni 'dapkina aris jis yi'de/ 'twa/ ka dihar mo uni kun cwanykin ma ris cin'kina/ gi com ka tee ma babam piti ka Ibrahiim mo.)

¹⁶ Dhali Abimaalik ki owa Is/hak gwo mo ki: Yaku/ /e mo 'peni aman mo haali/ /e ta wathi/ jin ca'bki dem dem mmobol am e mo.

¹⁷ Gom gwo gi wakan mo tani Is/hak yaki'd mo 'peni mattaan mo dhali nyan gu'b burriŋyem piti e embul wosh ma Jaraar mo dhali ca'bi mun mo be.

¹⁸ Dhala Is/hak cwanyki jis yi'de/ dok/ e mo e mo jin 'thissa/ cwanykunu uni ka tee ma Ibrahiim jin ta com mo haali/ 'Kwani Pilisthiin 'thissa/ 'dapki uni 'twa/ ka dihar mo 'ko'di jwa ma Ibrahiim mo dhali a'di yerki uni gway mo me'd jin yerkina com uni gway mo be.

¹⁹ Hili ki cin'kina/ ma Is/hak cwanyki jis yi'de/ mo e embul wosh mo tani uni gamki jis yi'de/ kun kasha yi'de/ e ki kash mo.

²⁰ Dhali imanhil ka'bal gi Pany Jaraar uni walkin ki imanhil ka'bal ma Is/hak mo mmo/o gwo mo ki: Yi'de/ta jim bam mo be. Dhali gom gwo gi wakan mo tani a'di yukki jis yi'de/ yan ki gway mo ka Isig haali/ uni askin gom a'di mo be.

²¹ Dhali yan'ko'd uni cwanyki jis yi'de/ kam/ mo dhali uni si'da/ walkina po/ caan mo. Dhali gom gwo gi wakan mo tani a'di ki yuk jis yi'de/ yan ka Sithnah mo.

²² Dhali a'di so'kki'd mo 'peni mun mo dhali cwany jis yi'de/ kam/ mo dhali apo/ caan mo tani uni 'koki wal mo, dhali gom gwo gi wakan mo tani a'di ki yuk jis yi'de/ yan gway ka Rahubut mmo/o gwo mo ki: Tapa a'di ithosonki ana embul mo mo dhali ana shwane/ mina kal mamana dho'th mo e bampa/ yan mo be.

²³ 'Peni mattaan mo tani a'di yaki'd ka gagamis mo e Pan Birsaba mo be.

²⁴ Dhali Tapa piki a'di i is mon'thiny mo dhali o gwo mo ki: Aha/ tana Arungimis ma Ibrahiim jin ta'da babam pini mo, dhalku/ is ki ko/ mo haali/ aha/ mina nyak di ki /e mo dhali 'bor /e mii mo dhali mar emen pini is mo gom gway gi cinjinam pem ka Ibrahiim mo be.

²⁵ Gom gwo gi wakan mo tani a'di nyan'ki'da gwata/ jin miinuwa basa 'cesh mo e mun mo dhali yuk gway gi Tapa mo dhali thum gu'b burrinyem piti i mun mo. Dhali e mun mo tani cinjina/ ma Is/hak uni cwanyki jis yi'de/ ka ris mo.

²⁶ Dhali yan'ko'd Abimaalik yaki'di a'di 'peni Pany Jaraar mo nyakka Ahussaat jin ta'da amanlogom a'di ki gwo mo dhala Pikul jin ta'da 'kan'kup gom 'kwani ma meem piti mo.

²⁷ Is/hak ki o uni gwo mo ki: Atinta iiyina umi aha/ mo? 'Kona um ki misha ki um shi/i aha/ i e mo dhali ur aha/ mo 'peni um mowa?

²⁸ Uni ki thok a'di gwo mo ki: Aman misha eya tenten gana/ ki Tapa di'd nyakki /e mo, a'di i/ona aman gwo jin waki cise/ mo ki: Dhalki mo jin minu mii thul gwo me'da po/ midii mii di mo e bwaman am dhali /e mo, dhali dhalki ana gama gwo jin gamu me'd mo nyakki /e mo.

²⁹ Ki /e mini diki mii to shiyi'da kamu/ apo/ aman mo, me'd jin 'kona aman ki ta /e is ki cwa mo dhali aman si'da/ 'konaki mii toj kamu/ mo hili jasi tom 'boro'd mo dhali hashki /e mo ki mon'ku'th is mo. /E shwane/ 'borkina Tapa mii mo be.

³⁰ Gom gwo gi wakan mo tani a'di miiki uni tonte/ jin shwanu ka tul 'kup mo dhali uni shwaki to mo dhali uni piki to mo be.

³¹ Dhali mon'thamo/ mo tani uni cuki mis mo ki jahanne/ mo dhali thul gwo me'da po/ ka rem'kup mo, dhala Is/hak dhuki uni 'pen mo e bway buni mo dhali uni iikin mo 'peni a'di ki mon'ku'th is mo be.

³² Dhali 'pena cim 'de/ yan mo tani cinjina/ ma Is/hak pu'dkin mo dhali tor a'di gwo gom jis yi'de/ kun cwanykina uni mo dhali o gwo mo ki: Aman gamkina yi'de/ mo be.

³³ A'di yukki jis yi'de/ yan gway mo ka Shibah mo. Gom 'pemen gwo gi wakan mo tani a'di iyuk'kunu 'pen'kuman bampa/ yan gway ka Birsaba ntagi shwanesan mo be.

³⁴ Me'd jin 'kona yili Iisu i issu/ mo tani a'di bu'thki ash mo jin yuku gway ka Yahudiit jin ta 'bwa/ ma Biiri jin ta Wathi/ Hiththa mo dhala Basmah jin ta 'bwa/ ma Iiluun jin ta Wathi/ Hiththa mo.

³⁵ Dhali uni gwan mii mon'ko apowa Is/hak dhala Ripka mmoka/a ka/ mo.

27

¹ Ka Is/hak taki'da dhan mo dhali em piti si'da/ dhuruma/ dhurum wakan mo a'di imolkina a'di mo mmpar e ki 'bore/ mo, a'di iyuk'kina a'di a/Iisu mo

a'di jin ta ya/m piti jin ca'd mo dhali o a'di gwo mo ki: Ya/m pema, dhali a'di ki thoḵ a'di gwo mo ki: Aha/ dina imahan mo.

² A'di ki o gwo mo ki: Hili mo mo ma, aha/ tana adhan mo dhali aha/ dinaki misha cim jwam pem mo.

³ Hili shwane/ buthi to gi mo/as pini mo dhala kulpem pini dhala bwam pini mo dhali ya ka piḵe/ e mombwaasho mo dhali par tom bwaasho mo gom aha/ mo.

⁴ Dhali thosoni shum jin 'kunya'kuny gom aha/ mo, a'di jin enka/ mo dhali kali a'di ki aha/ ki aha/ mina shwa a'di mo dhali 'bor /e mii ntwa/a/ ki aha/ dinaki wu mo be.

⁵ Dhala Ripka cikki gwo yan me'd jin okin ma Is/hak gwo e ya/m piti ka Iisu mo. Gom gwo gi wakan mo tani Iisu a'di yaki'd ka piḵe/ mo dhali par tombwaasho mo dhali 'koshi a'di mo dhali kali a'di mo.

⁶ Ripka si'da/ oki ya/ m piti ka Yakuub gwo mo ki: Aha/ cikkina 'twa/ mmoḵora/ tor ka kan ka Iisu mo, ki:

⁷ Kalaa/ shum tombwaasho mo dhali thosoni shum jin 'kunya'kuny gom aha/ mo ki aha/ mina shwa a'di mo dhali 'bor /e mii mo mbwambor ki Tapa mo ntwa/a/ ki aha/ dinaki wu mo be.

⁸ Hili mo mo ma, ya/m pem, hayi gwom pem e mo me'd jin kankika/ /e mo.

⁹ Yaku/ e ma'diny ka'bal mo dhali kwanyi ushi gungulu mi isu/ mo ki aha/ mina thoson shum kun 'kunya'kuny 'peni uni mo gom cim mo a'di jin enkina a'di kagahara mo.

¹⁰ Dhali /e mini kalki a'di ki cim mo mmoshwa mo. Wakan ki a'di mididi 'bor /e mii mo ntwa/a/ ki a'di diki wu mo.

¹¹ Hila Yakuub oki'da Ripka jin ta kum gwo mo ki: Hili mo mo ma, akam pem ka Iisu a'di ta wathi/ jin 'kan ma muri is mo, dhali aha/ 'tikila/ bungwar ki 'tikil mo.

¹² Wariba/ ababa mididi tayaa/ is is ki me'd mo, dhali aha/ mina e waki aha/ miina a'di ka maḵ mo dhali aha/ mina kal monyjee apo/ is pem mo, yisa mom'bor mii mo.

¹³ Kum ki o a'di gwo mo ki: Monyjeem pini mididi apo/ aha/ mo ya/m pem mo, hili hayi gwom pem e mo dhali yayi mo dhali kwanyi uni gom aha/ mo.

¹⁴ Gom gwo gi wakan mo tani a'di yaki'd mo dhali buthi uni mo dhali 'doyu/ uni ki kum mo, dhali kum ki thoson shum kun 'kunya'kuny mo, me'd jin enkina com kagahara mo be.

¹⁵ Dhala Ripka ki bu'th burrayem 'borga/ ma Iisu jin ta ya/ ma yim jin ca'd mo uni kun 'koni gu'b nyakka yim mo a'di ki hi'thki a'di ka Yakuub mo a'di jin ta ya/m piti jin gwa'da'd mo.

¹⁶ Dhala yim ki hi'thki a'di ayi'c mi e 'bame'd piti mo dhali e 'bam piti jin 'tikila/ 'tikil mo.

¹⁷ Dhali ayim ki ci shum jin 'kunya'kuny mo dhali maanj'kuthu'd mo a'di jin thosonkin ma yim mo e me'd gi ya/m piti ka Yakuub mo.

¹⁸ Wakan a'di yaki'd bway gu'b gi com mo, dhali o a'di gwo mo ki: Ababam pema, dhali a'di ki thoḵ a'di gwo mo ki: Aha/ dina imahan mo. Ki/e aja a'dun mo? ya/m pem.

¹⁹ Yakuub oki com gwo mo ki: Aha/ tana Iisu jin ta'da bwanyaram pini mo. Aha/ miikina me'd jin kankina /e aha/ gwo mo dhali shwane/ ca'bi /e ki mis mo dhali 'kayi shum tombwaashom pem mo ki /e mini 'bor aha/ mii mo.

²⁰ Hila Is/hak oki ya/m piti gwo mo ki: Mii wakata ganne/ gamkina /e a'di ki jahanne/ kan mo? ya/m pem. A'di ki thoḵ gwo mo ki: Haali/ Tapa Arungimis pini a'di ciki aha/ a'di ki 'ta'b kan mo be.

21 Yan'ko'd Is/hak ki owa Yakuub gwo mo ki: Shoru/ is ki 'dishe/ mo ki aha/ mina ta /e is is ki me'd mo ya/m pem mo ki aha/ mina mish /e mo wakki/ /e tana Iisu ka jin gana/ jin ta ya/m pem mo, walla aja a'dan mo?

22 Wakan aYakuub a'di yaki'd mo mmo'disha Is/hak is mo a'di jin ta com mo, a'di taki a'di is is ki me'd mo dhali o gwo mo ki: 'Twa/ a'di ita jim ma Yakuub mo, hili me'd uni ita me'd ma Iisu mo be.

23 Dhali a'di diki nyith a'di mo haali/me'd piti 'kan ma mur nycine/ mo me'd ji ma kam piti ka Iisu mo, dhali gom gwo gi wakan mo tani a'di ki 'bor a'di mii mo be.

24 A'di ki o gwo mo ki: A/e ta ya/m pem ka jin gana/ mo jin ta'da Iisu mo? A'di ki thok gwo mo ki: Aha/ tana a'di mo be.

25 Dhali yan'ko'd a'di ki o gwo mo ki: Kali a'di ki aha/ mo ki aha/ mina 'ka shum tombwaasho gi ya/m pem mo dhali 'bor /e mii mo. Wakan a'di kalki a'di a'di mo dhali a'di 'kaki a'di mo dhali a'di kalki a'di yimana mura'th jin ka/u ki njahnah mo dhali a'di piki a'di mo be.

26 Dhali yan'ko'd com ka Is/hak ki o a'di gwo mo ki: Shoru/ is ki 'dishe/ mo dhali piyaa/ 'twa/ mo ya/m pem mo.

27 Wakan a'di pu'dki'd ki 'dishe/ mo dhali pi a'di 'twa/ mo dhali a'di jikki'da shim burrinyem piti mo dhali 'bor a'di mii mo dhali o gwo mo ki:

Hili yisawa/, ashim gi ya/m pem mo
ma isi me'da shim gi wathi/ jin yayi'd 'pena pije/ mo, a'di jin 'borkina Tapa mii be.

28 Dhala Arumgimis ci jape/ gi momis mo,
dhali aris tom 'boron gi mony'cesh mo,
dhali pos mo dhala mura'th ki nyanye/ mo.

29 Dhalka ris 'kwani 'baar mo mii /e to ime'd mo,
dhali aris kal gi mony'cesh mina 'ko ka bamambor mmolun /e mo.

Tayi tapa apo/ ikam pini mo
dhali dhalki iya/in gi kwan mini 'ko ka bamambor mmolun /e mo.

Monyjee midi di apo/ aris 'kwani 'baar ka 'dete/ 'dete/ kun jeeki /e mo,
dhali mom'bor mii midi di apo/ aris 'kwani 'baar mo kun 'borki /e mii mo.

30 Dhali ka Is/hak daka/ 'baarki mii i'dishesan mmo'bora Yakuub mii mo,
ka Yakuub 'tilki is mo mmoya ka pije/ mo 'peni bwambor ma Is/hak mo jin ta com mo tani Iisu jin ta'da kam mo tani a'di pu'dki'd mo 'peni mompar mo be.

31 A'di si'da/ thosonki shum jin 'kunya'kuny mo dhali kali a'di e com mo.
Dhali a'di ki o com gwo mo ki: Dhalka baba cu mis mo dhali 'ka shum tombwaasho gi ya/m piti mo ki /e mini 'bor aha/ mii mo.

32 Ababam piti ka Is/hak oki a'di gwo mo ki: Ki /e aja a'dun mo? A'di thokki gwo mo ki: Aha/ tana ya/m pini, jin ta'da bwanyara/ jin ta'da Iisu mo be.

33 Yan'ko'd a/Is/hak a'di dekina is ki bir bir ki 'bi'th mo, dhali o gwo mo ki: Kaja sa/ yaki'd mo mmopar mo dhali 'koshi tombwaasho mo dhali kali aha/ shum mo, dhali aha/ 'kakina a'di 'baar mo n'wa/a/ ki /e diki pu'du/ mo dhali aha/ 'borkina a'di mii mo? Nye a'di minu mii 'bor mii mo.

34 Ka Iisu cikki gwo 'peni com mo tani a'di 'therki dhan ko ki 'bi'th mo dhali ko ki jabu'th ki ku'bu/ ku'bu/ mo, dhali o com gwo mo ki: 'Bori aha/ mii mo ma, isi aha/ gara/ si'dayi, ayy ababam pem mo.

35 Hili a'di oki gwo mo ki: Akam pini a'di pu'dki'd ka mak mo, dhali a'di bu'thki mom'bor miim pini mo.

36 Iisu oki gwo mo ki: A'di 'konuki yuk gway ka Yakuub ka jin gana/ 'taa? Haali/ a'di thamki aha/ thum me'di su/ mo. A'di bu'thki mo ma bwanyaram pem jin taka/ mo, dhali hili mo mo ma, shwane/ a'di bu'thki mom'bor miim

pem 'peni aha/ mo. Yan'ko'd a'di ki o gwo mo ki: A/mom'bor miin kamu/ bunya/ dina /e ki 'tash' twa/ mo gom aha/ mowa?

³⁷ Is/hak ki thoKa Iisu gwo mo ki: Hili mo mo ma aha/ karkina a'di mmota tapam pini mo, dhali aris ikam piti aha/ cĭkina uni ki a'di mmota cĭnkina/ mo mmomii a'di i me'd mo dhali pōs dhala mura'th kun sinu mo aha/ cĭkina uni ki a'di mo mmocil mo. Kata beseene/ imiga/ mii gom /e ya/m pem mo?

³⁸ Iisu ki o com gwo mo ki: A/e taki jasi mom'bor mii 'denj gana/ kan niina? ababam pem mo. 'Bori aha/ mii mo ma, isi aha/ gara/ si'dayi, ayy ababam pem mo. Dhala Iisu ceki 'twam piti mo dhali ko mo be.

³⁹ Dhali yan'ko'd Is/hak jin ta'da babam piti thoKki a'di gwo mo ki: Hili mo mo ma, /e mini si'd mo 'peni mony'cesh jin minu si to mo haali/ a'di ita mom pini jin mina /e ca'bi cine/ mo,

dhali /e si'da/ mini si'd mo 'peni jape/ gi momis e mo jin ka'dama/ ka'dam mo.

⁴⁰ Shemen gandala turgam pini mo tani a'di imina /e ndi ki e mo be.

Dhali /e mini miiya kan to mo,

hili ki /e mini kwa/ is pini bwa mo tani

/e kwa/ki dhanKa'b tom'bam piti bwa mo 'peni 'bam pini mo be.

⁴¹ Shwane/ Iisu shi/ki'da Yakuubi e mo gom mom'bor mii jin 'borkina com a'di mii mo, dhala Iisu oki gwo e is piti mo ki: Atee jin minu kowa ko goma babam pem a'di 'dishkina' twa/ mo. Aha/ mina 'kosha kam pem ka Yakuub jwa mo ŋ'ko'd mo.

⁴² Hili gwo gi Iisu a'di torkunuwa Ripka mo a'di jin ta'da bwanyara/ ma yim mo. Gom gwo gi wakan mo tani ayim hashki gwo mo mmoyuka Yakuub jin ta ari ya/ ma yim jin gwa'da'd mo, dhali o a'di gwo mo ki: Hili mo mo ma, akam pini ka Iisu a'di malaski is piti mo dhali thoson is mo mmo'kosh /e jwa mo.

⁴³ Dhali 'peni shwanesan mo, ya/m pem hayi gwo gi 'twam pem e mo, dhali cuyi mis dhali gusi pa mo a Laabaan mo a'di jin ta'da kam pem mo e Pan Haraan mo.

⁴⁴ Dhali ca'bi /e e mun mo nyakki a'di ki ari mo mo ntaga nyor ma kan yan jin 'batha'ba'th mina she/ i'thup mo.

⁴⁵ Ntaga nyor ma kan yan mina she/ i'thup mo dhali a'di midi this to gwan e mo kun miikina /e mo. Yan'ko'd aha/ miina hash gwo mo dhali susi /e ka nyan'ko'd 'peni mun mo. Goma tinta imiga/ this um isu/ e mo mmon'tal 'de/ ka cim 'de/ kan mo.

⁴⁶ Yan'ko'd aRipka ki owa Is/hak gwo mo ki: Aha/ 'baka/ mondiki/em pem e mo haali/ aris up gi 'Kwani gi Pan Hiththa mo. Wacka Yakuub midi mash jan 'de/ 'peni up gi Pan Hiththa me'd uni up gwansan kun 'kon e bampa/ yansan mo, dhali shim miim 'boro'da ta midi di gom mondiki/em pem mo?

28

¹ Dhali yan'ko'd Is/hak yukki'da Yakuub mo dhali 'bor a'di mii mo dhali kan a'di gwo mo ki: /E mini dhalku/ ki mii masha 'boma kamu/ 'de/ 'peni 'Kwani gi Pan Kanaan mo.

² Cuyi mis mo dhali yayi mo e Pam Paddaan/araam e gu'b ma Batu/iil jin ta'da baba gi kwan mo dhali butha 'bom 'peni mun mo jan 'de/ 'peni i'bwa/ ma Laabaan jin ta'da kam gi kwan mo.

³ Arungimis jin Eka/ Ek mo 'borki /e mii mo dhali kar /e mmodho'th mo dhali mar /e amar is mo ki /e mini ta dhana buhany 'kwani mo be.

⁴ Dhalki a'di ci mom'bor mii ma Ibrahiim ki /e mo dhali emen pini si'da/ mo ki /e mini bu'th bampa/ gwan kun takina /e aca/ apo/ mo a'di jin cĭkin ma Arungimis a/Ibrahiim mo.

5 Wakan Is/hak hashki'da Yakuub 'peni a'di mo dhali a'di yaki'd mo e Pam Paddaan/araam mo eya Laabaan jin ta ya/ ma Baṭu/iil mo jin ta Wathi/Araam a'di jin ta'da kam ma Ripka mo a'di jin ta KoYakuub dhala Iisu mo.

6 Dhala Iisu me'd jin mishkina a'di ka Is/hak 'borki'da Yakuub mii mo dhali karki a'di 'pen mo e Pam Paddaan/araam mo mmobutha 'bom 'peni mun mo tani dhali ki a'di 'borki a'di mii mo dhali kan a'di gwo mo ki: /E mini dhalku/ ki mash jan 'de/ 'peni up 'Kwani Kanaan mo,

7 dhali ka Yakuub haki gwo gi com e mo dhali kum mo dhali ya mo e Pam Paddaan/araam mo.

8 Wakan Iisu parki mo e mo ki up gi 'Kwani gi Paṅ Kanaan 'koki 'bora Is/hak bwa mo a'di jin ta com mo.

9 Iisu a'di yaki'd mo eya Isma/iil mo dhali butha 'bom mo mmomar upa tiya kun takina a'di is mo a'di jin ta'da Mahlah jin ta 'bwa/ ma Isma/iil mo jin ta ya/ ma Ibrahim mo a'di jin ta 'bwaham ma Nabayuut mo be.

10 Yakuub dhalki Pam Birsaba 'pen mo dhali yaki'd mo 'kupki bway Pan Haraan mo.

11 Dhali a'di pu'dki'd mo e monkamu/ mo dhali a'di ca'bki'd e mun mon'thiny mo haala tente/ yulki'd mo. A'di ki bu'th wosha kamu/ mo e mo yan mo mmokar 'kup piti mo dhali a'di ki ishi mo yan mo be.

12 Dhali a'di shu'bki jan mo ki to di'd jin karkunu mo 'peni mony'cesh mo jin senu sho'k mo dhali 'kupan piti jithirki momis mo dhali hili mo mo ma, iman'doyu gwo ma Arungimis seki momisi a'di mo dhali thulkin ki a'di mo.

13 Dhali hili mo mo ma, Tapa doshki'di 'kupi a'di mo dhali o gwo mo ki: Aha/ tana Tapa Arungimis ma Ibrahim jin ta'da babam pini mo dhali Arungimis ma Is/hak mo. Mony'cesh yan jin isha /e apo/ mo tani aha/ mina ci a'di ki /e mo dhali emen pini mo be.

14 Dhali emen pini uni mina e waki bu'da 'cesh mo dhali /e mini hakas mo ka bor mo ntaga bora lungu'b mo dhali 'kupki mom'pesho'k mo dhali 'kupka 'bana bim poros mo dhali 'kupka 'bana biny cam mo, dhali ki /e mo dhali emen pini mo tani arisa wak gi 'kwaniny'cesh mini 'bor is buni mii mo be.

15 Hili mo mo ma, aha/ mina di nyakki /e mo dhali kar /e mo eya ris mo gunn kun mina /e iya mo dhali susi /e ka nyan'ko'd e bampa/ yansan mo. Haali/ aha/ yisa mina dhal /e 'pen yisa ntagi aha/ mina thim gwom pem jin okika/ /e mo be.

16 Yan'ko'd aYakuub merki e mo 'peni mo/ish em piti mo dhali o gwo mo ki: Ka jin gana/ Tapa a'di idiki'd e mo yan mo dhali aha/ molkina a'di mo be.

17 Dhali a'di ko/ki is mo dhali o gwo mo ki: Mo yan ta mo jin kogu mo. Mo yan a'di ita isi gu'b ma Arungimis gana/ mo 'tese/ be dhali yansan a'di ita twankala gon gi bway momis mo be.

18 Wakan aYakuub cuki mis mo mon'thamo/ ka 'tum mo dhali bu'th wosh jin isha a'di 'ba/ mo dhali thum a'di ki mis mo mmota tinjilij mo dhali wol a'di ayini 'kup mo.

19 A'di yukki mo caan gway mo ka Beet/ iil mo, hili gway gi 'penkuman bampa/ yan mo tani a'di yuku itwa/a/ ka Luus mo be.

20 Yan'ko'd aYakuub thulki gwo me'da apo/ mo mmo/ o ki: Wakki/ Arungimis midi di e aha/ mo dhali kar aha/ e bway pem yan jin yaka/ iya mo dhali ciyaa/ tonṭe/ mmoshwa mo dhali burrinye/ mmohithi is mo,

21 wakan ki aha/ mina doku/ bway pa e gu'b ma babam pem ki mon'ku'th is mo tani yan'ko'd Tapa a'di imidi ta Arungimis pem mo be.

22 Dhali wosh yan jin thumkika/ ki mis me'da tinjilij mo tani a'di imidi ta gu'b ma Arungimis mo dhali aris to 'baar mo kun mina /e ci aha/ mo tani aha/ mina bu'th jan 'de/ mo 'pena 'kume'd mo gom /e mo be.

29

¹ Dhala Yakuub yaki'd mo e bway piti mo ntagi a'di pu'dki'd mo e 'kwani gi bampa/ gi mom'pesho'k mo be.

² Ki a'di hilki mo mo tani a'di parki jis yi'de/ e mo e bwam bunto mo dhali hili mo mo ma, adhana ma'diny ka'bal ikwara kun ishkini shemen piti mo haali/ 'peni jis yi'de/ caan mo tani ama'diny ka'bal wolkunu yi'de/ mo. Dhali wosh gi 'twanjal jis yi'de/ yan mo tani a'di caaca mo be.

³ Dhali ka ma'diny ka'bal tulkunu isi montal 'de/ imattaan mo tani imanhil ka'bal ki 'danjal wosh 'peni 'twanjal jis yi'de/ mo dhali wolki ka'bal yi'de/ mo dhali karki wosh ka nyan'ko'd mo e mom piti mo e 'twanjal jis yi'de/ mo.

⁴ Yakuub ki o uni gwo mo ki: Ikam pema um iyyin 'peni mana mo? Uni ki thoƙ a'di gwo mo ki: 'Peni Pan Haraan mo be.

⁵ A'di ki o uni gwo mo ki: A/um mishina Laabaan jin ta ya/ ma Nahur mowa? Uni ki thoƙ a'di gwo mo ki: Aman mishkina a'di mo be.

⁶ A'di ki o uni gwo mo ki: A/dhali a'di 'bora is mo 'te/ tana? Uni thoƙki a'di gwo mo ki: A'di 'bora is mo, dhali hili mo mo ma, aRahiil jin ta 'bwa/ pu'dki'd mo nyakki ka'bal mo be.

⁷ A'di ki o gwo mo ki: Hili mo mo ma, atente/ caaca kagahara mo, a'di diki ta atente/ jin minu tul to/e isi montal 'de/ mo, woli ka'bal yi'de/ mo ma dhali iiku/ mo mmoƙi uni ashon dhii/i'd mo.

⁸ Hili uni thoƙki a'di gwo mo ki: Aman mola mii ntaga ma'diny ka'bal minu tul isi 'baar mo imontal 'de/ mo dhali wosh si'da/ minu 'danjalu/ mo 'peni 'twanjal jis yi'de/ mo dhali yan'ko'd aman ki wol ka'bal yi'de/ mo be.

⁹ Ki a'di mal ma ƙor mmoƙor ki uni mo tani Rahiil pu'dki'd mo nyakki ka'bal gi com haala yim a'di ita'da manhil uni mo be.

¹⁰ Dhali ka Yakuub parki'da Rahiil e mo a'di jin ta 'bwa/ ma Laabaan jin ta'da kam gi kum mo dhali ka'bal ma Laabaan jin ta'da kam gi kum mo tani Yakuub seki mis mo dhali 'danjal wosh mo 'peni 'twanjal jis yi'de/ mo dhali wolka ma'diny ka'bal ma Laabaan yi'de/ mo a'di jin ta'da kam gi kum mo be.

¹¹ Dhali yan'ko'd a'di piki'da Rahiil 'twa/ mo dhali 'ther dhan ko kagahara mo be.

¹² Dhala Yakuub ƙorki'da Rahiil gwo mo ki a'di ta'da bas gi com mo dhali a'di si'da/ ta ya/ ma Ripka mo, dhali ayim guski'd mo dhali ƙor com gwo mo be.

¹³ Ka Laabaan cikki gwom 'borga/ goma Yakuub jin ta ya/ gi 'bwaham mo tani a'di guski'd mo mmogam a'di 'kup mo dhali kar a'di mmota isa kony mo dhali pi a'di 'twa/ mo dhali susi a'di bway gu'b piti mo. AYakuub ƙorki'da Laabaan aris to gwansani 'baar mo be.

¹⁴ Dhali aLaabaan ki o a'di gwo mo ki: Ka jin gana/ /e tana simam pem mo dhali bunƙwar is pem mo. Dhali a'di ca'bki'd nyakki a'di ka appe i'de/ mo.

¹⁵ Dhali yan'ko'da Laabaan ki owa Yakuub gwo mo ki: Haali/ /e tana bas pem mo tani a'di 'boro'da jin mina /e imii aha/ aƙu'c ki me'd mowa? Ƙoraa/ gwo mo gom tom pini jin mina /e gam ki ji gi mina /e ta mo tani midi ta atinta mo?

¹⁶ Dhala Laabaan a'di ita gi i'bwa/i su/ mo: gway gi 'bwa/ jin ca'd mo tani a'di iyuku ka Le/ah mo dhali gway gi 'bwa/ jin gwa'da'd mo tani a'di iyuku ka Rahiil mo be.

¹⁷ E ma Le/ah mol mo hil ki 'bore/ mo haali/ em piti 'cwara'cwar mo, hila Rahiil a'di ta jaron gana/ mo dhali enu kagahara mo be.

¹⁸ Yakuub enki'da Rahiil mo dhali a'di ki o gwo mo ki: Aha/ mina mii /e aƙu'c ki yili pesu/ mo gom 'bwa/m pini jin ta'da Rahiil jin gwa'da'd mo be.

19 Laabaan ki o gwo mo ki: A'di 'boro'd ki 'bor gana/ mo gom aha/ mo mmociki /e a'di mo, ma mo diki ci a'di 'kwanin tiya mo, ca'bi /e nyakki aha/ mo.

20 Wakana Yakuub miiki'da tu'c ki yili pesu/ goma Rahiil mo dhali uni wana mo i e ka cim midi diki ta rash rash gom mo/en jin enkina a'di ayim mo be.

21 Yan'ko'da Yakuub oki'da Laabaan gwo mo ki: Ciyaa/ a'bom pem mo ki aha/ mina ya ayim mo haali/ mom pem 'baarki'd mo be.

22 Wakan aLaabaan tulki'da aris 'kwani gi mo caan isi montal 'de/ mo dhali shwa to jin yukuwa yuk ka tul 'kup mo.

23 Hili mom'pimpili/ mo tani a'di ki bu'th 'bwa/ ka Le/ah dhali suski a'di aYakuub mo dhali a'di yaki'da yim mo be.

24 (Laabaan ciki nyarany cinjinam piti jin ta'da Silpah e 'bwa/m piti ka Le/ ah mo mmota cinjina/ nyara/ ma yim mo.)

25 Dhali e mon'thamo/ mo tani hili mo mo ma, aLe/ah ayim ta a'di jin cikunu a'di mo dhala Yakuub ki owa Laabaan gwo mo ki: Dika/ ki miiki /e atu'c goma Rahiil mo 'taa? Atinta he'kkina /e aha/ e wakan mo.

26 Laabaan ki thok a'di gwo mo ki: A'di yisa miinu wakana e bampam bam mo mmoci jin gwa'da'd n'wa/a/ mmodhal a'di ma bwanyara/ i'ko'd mo.

27 Thimi adhas nyakki jan 'de/ yan mo dhali aman mina ci /e jan kamu/ si'da/ mo e mii jin mina /e dok/e dok sho'k mmomii aha/ to ki yili pesu/ kamu/ mo be.

28 Yakuub miiki'd kan mo dhali a'di 'baarki'da dhas 'de/ mo. Yan'ko'da Laabaan ciki a'di 'bwa/ ka Rahiil mo mmota ash mo be.

29 (Laabaan ciki cinjina/ nyaram piti ka Bilhah ki 'bwa/ ka Rahiil mo mmota cinjina/ nyara/ ma yim mo.)

30 Wakan aYakuub yaki'd mo eya Rahiil mo si'da/ dhali a'di enki'da Rahiil mmobola Le/ah e mo, dhali a'di miiki'da Laabaan atu'c mo gom yili pesu/ kamu/ mo be.

31 Ki Tapa parki mo e ka Le/ah shi/kunu i e mo tani a'di ka'dki'da yim bwama dho'th piti 'twa/ mo, hila Rahiil a'di ta'da burum mo be.

32 Dhali aLe/ah a'di bwaaki'd mo dhali dho'th ya/ mo dhala yim ki yuk a'di gway ka Ra/ubiin mo haala yim oki gwo mo ki: Haali/ Tapa hilki'd apo/ to kun wo'cki aha/ is she/ mo, shwane/ akathim pem midi en aha/ ka jin gana/ mo be.

33 Ayim a'di bwaaki'd dok/e mo dhali dho'th ya/ mo dhali o gwo mo ki: Haali/ Tapa a'di icikki gwo mo ki aha/ shi/kunu i e mo, a'di si'da/ icikina a'di aha/ ya/m pem yan mo dhala yim yukki a'di gway ka Shim/uun mo.

34 Dok/ e ayim bwaaki'd mo dhali dho'th ya/ mo dhali o gwo mo ki: Shwanesan mo akathim pem midi gam is piti me'd ki aha/ mo haali/ aha/ dho'thkina a'di ucingwathi kwara mo. Gom gwo gi wakan mo tani a'di iyukkunu a'di gway ka Lawi mo.

35 Dhali ayim bwaaki'd dok/e mo dhali dho'th ya/ mo dhali o gwo mo ki: Aha/ mina man Tapa mo ganne/ mo. Gom gwo gi wakan mo tani a'di iyukkunu a'di gway piti ka Yahuuda mo, dhali yan'ko'da yim dakki'da dho'th mo be.

30

1 Ka Rahiil parki e mo ka yim diki dho'thka Yakuub uci mo tani ayim taki dhapan apo/ 'bwaham mo dhali ayim owa Yakuub gwo mo ki: Ciyaa/ uci mo ma walla aha/ mina wu mo 'te/ ba/.

2 Anyor ma Yakuub a'di 'thakunu apowa Rahiil ki 'bi'th mo dhali a'di ki o gwo mo ki: Aha/ dina e embul ma Arungimis mo a'di jin 'tashki bwama dho'th pini 'twa/ mo mmokal mamana dho'th mowa?

³ Yan'ko'da yim ki o gwo mo ki: Bilhah jin ta nyarany cɪŋkinam pem di'd imahan mo. /E mini ya ayim mo ka yim midi ta gi uci e 'kupa'dupun pem mo dhali aha/ mina ta gi uci ka yim si'da/ moyi.

⁴ Wakan ayim ciki a'di aBilhah jin ta nyara/ cɪŋkinam piti mo mmota ash mo dhali aYakuub a'di yaki'da yim mo.

⁵ Dhala Bilhah a'di bwaaki'd mo dhali dho'thka Yakuub ya/ mo.

⁶ Dhali yan'ko'd Rahiil ki o gwo mo ki: Arumgimis dwallki aha/ gwo mo dhali a'di si'da/ cikki aha/ 'twa/ mo dhali ciki aha/ ya/m mo. Gom gwo gi wakan mo tani ayim ki yuk a'di gway mo ka Daan mo.

⁷ Nyara/ cɪŋkina/ ma Rahiil a'di bwaaki'd dok/e mo dhali dho'thka Yakuub ya/ jin 'kon ma po/ isu/ mo.

⁸ Dhali yan'ko'd Rahiil oki gwo mo ki: Ki mon'thir jin ca'bki dem dem mo tani a'di i'thirkika/ 'bwah pem mo dhali pi gwo jipi/ mo. Gom gwo gi wakan mo tani ayim ki yuk a'di gway mo ka Naptaali mo.

⁹ Ka Le/ah parki mo e mo ki a'di dakki'da dho'th mo tani ayim ki bu'th cɪŋkina/ nyaram piti jin ta'da Silpah mo mmociki a'di ka Yakuub mo mmota ash mo be.

¹⁰ Yan'ko'd cɪŋkina/ nyara/ ma Le/ah a'di dho'thki'da Yakuub ya/ mo be.

¹¹ Dhala Le/ah ki o gwo mo ki: Mo i e ki 'bor mo, wakan ayim ki yuk a'di gway mo ka Jaad mo.

¹² Cɪŋkina/ nyara/ ma Le/ah a'di jin ta'da Silpah mo dho'thki'da Yakuub ya/ jin 'kon ma po/i su/ mo.

¹³ Dhala Le/ah ki o gwo mo ki: Aha/ be i'bora bwa mo, haali/ aris upi 'baar mo mini yuk aha/ gway ki ji gi 'bora bwa mo, wakan ayim yukki a'di gway mo ka Ashiir mo.

¹⁴ Ka tee jin 'cithkunu pos bunyan mo tani aRa/ubiin a'di yaki'd mo dhali gam mamana kamu/ e bunto mo (a'di jin yuku ki 'twa/ ma Arab ka luppaa mo). Dhali a'di ki kalki uni kum ka Le/ah mo. Dhali yan'ko'da Rahiil o gwo mo ki: Ciyaa/ mo ma, aha/ 'thona /e maman cwa ma luppaa jin kalkina ya/m pini mo.

¹⁵ Hila yim ki thoka yim gwo mo ki: A/a'di ta ari mii jin gwa'dagwa'd mo mmobutha kathim pem mo 'peni aha/ mo 'taa? Dhali /e ki dok/e o gwo mo ki /e mini kal maman cwa ma luppaa jin kalkina ya/m pem 'te/ si'dawa? Rahiil ki thoka yim gwo mo ki: Ba a'di be midi ya ishi /e mon'thiny shwane/ mo gom maman cwa ma luppaa jin kalina ya/m pini mo 'te/ be.

¹⁶ Ka Yakuub pu'dki'd mo 'peni bunto mom'pimpili/ mo tani aLe/ah yaki'd ka pije/ mo mmogam a'di 'kup mo, dhali o a'di gwo mo ki: /E mini mii yayu/ aha/ shwane/ mo haali/ aha/ yolkina /e mo ki maman cwa ma luppaa jin ta jim ma ya/m pem mo. Wakan a'di ishki'd nyakka yim mon'thiny caan mo.

¹⁷ Dhali Arumgimis cikki gwo ma Le/ah mo dhala yim bwaaki'd mo dhali dho'thka Yakuub ya/ jin 'kon ma po/ imudhe'd mo be.

¹⁸ Le/ah ki o gwo mo ki: Arumgimis ciki aha/ tom pem jin karka/ ka bara tu'c mo haali/ aha/ cikina cɪŋkina/ nyaram pem ka kathim pem mo. Wakana yim ki yuk a'di gway ka Yassaakar mo.

¹⁹ Dhali aLe/ah a'di bwaaki'd mo dok/e dhala yim dho'thki'da Yakuub ya/ jin 'kon ma po/i pe'de/ mo be.

²⁰ Dhali yan'ko'da Le/ah ki o gwo mo ki: Arumgimis a'di tashaa/ ki tom 'boro'd jin kamu/ akam mo. Shwane/ akathim pem midi tak aha/ mo haali/ aha/ dho'thkina a'di iya/ kun 'kon ma po/ ipe'de/ mo. Wakan ayim ki yuk a'di gway mo ka Sabuluun mo be.

²¹ Yan'ko'da yim dho'thki 'bwa/ mo dhali yuka yim gway mo ka Diinah mo.

²² Dhali yan'ko'da Arumgimis si'da/ kaki'da Rahiil e mo dhali Arumgimis cikki'da yim gwo mo dhali ka'dka yim bwa ma dho'th piti 'twa/.

²³ Ayim bwaaki'd mo dhali dho'th ya/ mo dhali o gwo mo ki: Arumgimis kalki mowaḱ pem sho'k ka piḱe/ mo.

²⁴ Dhala yim ki yuk a'di gway ka Yuusup mo mmo/o gwo mo ki: Dhalka Arumgimis maraa/ ya/a kamu/ is mo.

²⁵ Ka Rahiil dho'thki'da Yuusup mo tani aYakuub oki'da Laabaan gwo mo ki: Karki aha/ 'pen mo ki aha/ mina ya mo e gu'b pem mo dhali e bampam pem mo.

²⁶ Ciyaa/ up pem mo dhali uḱim pem mo uni kun miikika/ /e aṱu'c mo dhali dhalkaa/ bway ayana mo haali/ /e mishkina ṱu'c kun miikika/ /e mo be.

²⁷ Hila Laabaan o a'di gwo mo ki: Waḱki/ /e mini dhala/ bway mmo/o gwo gi wakan mo si'da/ tani aha/ da/arkina gwo mo ki to jin mishu ki jamas mii mo tani Tapa a'di 'borki aha/ mii gom /e mo be.

²⁸ Yeri to gway mo, uni kun gamu ki ji gi miinu to mo dhali aha/ mina ciki /e uni mo be.

²⁹ AYakuub ki o a'di gwo mo ki: /E ki is pini mishi to kun miikika/ /e aṱu'c mo dhali aris to/em pini 'ko /e ki 'kom pa mo gom mo jin hilka/ uni ki 'bore/ mo be.

³⁰ Haali/ /e tan jasi ushi'ceenne/ kagush mo nṱwa/a/ ki aha/ dina ki pu'du/ mo dhali shwane/ uni markunu is ka enthus mo dhali Tapa 'borki /e mii eya ris mo gunn kun ṱu'kka/ mo. Hili dhali aha/ kakasja si'da/ miga/ mii thoson to gom ku gi gu'b pem mo?

³¹ A'di ki o gwo mo ki: Atinta a'di imiga/ ci /e mo? AYakuub o gwo mo ki: /E mini ci aha/ toṱ kamu/ yisa. Waḱki/ /e mini mii to yan gom aha/ mo aha/ mina doḱ/e ci ama'diny ka'bal pini ashon dhii/i'd mo dhali ta amandhu uni mo.

³² Dhalki aha/ yana e bwaman ma arisa ma'diny ka'bal pini ki tur mo shwane/ mmokwa/ 'peni arisa unycur dhali adhudhunyaṅ ka'bal dhali ka'bal 'thi/ ka ris mo dhali 'peni arisa dhudhunya/ min 'thi/ mo dhali arisa unycur mi mo, dhali uni gi wakan mo tani uni be ita tom pem jin gamka/ ki ji gi miinu to mo be.

³³ Dhali gom gwom pem ji wakan mo jin oka/ ki o ma tete/ mo tani /e mini thoḱ gwo gom aha/ yilaṅ kamu/ i'ko'd mo ki /e mini pu'du/ mo, dhali para ris tom pem jin miga/ gam ki ji gi miinu to inyakki /e mo. Aris uni kun tana unycur dhali gun tana dhudhunya/ mi dhali ka'bal 'thi/ waḱki/ gamu mo tani uni minu deṅ e oki kuki ḱwalu mo be.

³⁴ Laabaan ki o gwo mo ki: 'Boro'd be, dhalki a'di gi wakan mo me'd jin ona /e mo be.

³⁵ Hili 'peni acim ḱaan mo tani a'di ḱwa/ki'da aris gwaṱi mi bwa mo uni kun tana 'beres is mo dhala dhudhunya/ mo dhali aris kuman mi kun tana unycur mo dhali ḱan iya/ gwo mo mmoji uni mo be.

³⁶ Dhali a'di hashki uni mmo/ii mo si'dasi'd ka cim kwara mo 'peni bwaman a'di ki is piti mo dhala Yakuub mo. Dhala Yakuub dhuki kun tiya mo uni kun tana ma'diny ka'bal ma Laabaan mo be.

³⁷ Dhali yan'ko'da Yakuub ḱwa/ki'da biny cwan this jin 'ta'dama'ta'dam mo dhali 'ciṱ uni mo dhali thoson uni mo dhali 'ce cwa is mo mmoṱagi kush mo mmoṱor gulu'c cwaṅkush gwan eya tente/ mo.

³⁸ A'di dhuki cwaṅkush gwan jin 'cena a'di is mbwambor ma ma'diny ka'bal mo eya al yi'de/ mo jin wolkunu uni yi'de/ ka ḱur mo e mo jin pu'dkin ma ma'diny ka'bal mo mmopi yi'de/ mo. Dhali me'd jin merkina uni mo mmomash mo tani uni pu'dkin mmopi yi'de/ mo be.

³⁹ Dhali ama'diny ka'bal merkin mo dhali mash mo mbwambor cwa gwan jin 'cena a'di is mo dhali wakan ama'diny dho'thki ushan kun 'beresa is ki 'beres mo dhali tana unyur mo dhali kun tana dhudhunya/ mo.

⁴⁰ Dhala Yakuub kwa/ki ka'bal bwa mo dhali kar jis/em piti 'kupki ka'bal kun 'beresa is ki 'beres mo dhali dhalki ka'bal 'thi/ e bwamana ma'diny ka'bal ma Laabaan mo dhali a'di ki dhu kum piti kun ura a'di ki she/ mo dhali diki gam uni me'd ka ma'diny kuma Laabaan mo be.

⁴¹ E bwaman ka'bal kun 'bitha is ki 'bi'th mo mmodho'th mo tani aYakuub ki gu cwa mo dhali dhu uni eya al yi'de/ mo mbwambori jis/e ma ma'diny ka'bal mo ki uni mini mer mo dhali mash mo e bwaman cwa su/ gwan mo.

⁴² Hili e ka'bal kun 'ka'da is ki 'ka'd mo tani a'di diki dhu cwa gwan imun mo wakan uni gwan kun ta ka'bal kun 'ka'da is mo tani uni kuma Laabaan mo dhali kun 'bitha is ki 'bi'th gwan mo tani uni ta kuma Yakuub mo be.

⁴³ Ki mii wakan mo tani wathi/ ta pa mo ijasa/? dhali a'di taki'd ka ma'diny ka'bal jin caaca mo dhali up piti si'da/ takin gi up cin'kina/ ka ris mo kun mii uni to ime'd mo dhali 'kwaniḡ gwath tana ris kun ta cin'kinam piti mo kun mii a'di to ime'd mo dhali aris kalman mo dhali aris thuluny mo be.

31

¹ Dhala Yakuub cikki gwo jin 'kokina iya/ ma Laabaan mmo/o mo ki: AYakuub a'di bu'thki'da ris to 'baar mo kun ta kuma babam bana mo, dhali 'peni kuma babam bana mo tani a'di igamkina a'di mii adu is mmota pa ki pa kagahara mo be.

² Dhala Yakuub si'da/ mishki mo mo ka Laabaan diki hil a'di i e ki 'bore/ki hila 'the mo me'd jin twa/a/ mo.

³ Dhali yan'ko'd Tapa ki owa Yakuub gwo mo ki: Dok/ e eya 'cesh gi ibabam pini ka nyar'ko'd mo dhali e 'kwani ma bas pini mo dhali aha/ mina di e /e mo.

⁴ Gom gwo gi wakan mo tani aYakuub hashki gwo eya Rahiil dhala Le/ah e mombwaasho jin 'kona ma'diny ka'bal piti mo.

⁵ Dhali a'di ki o uni gwo mo ki: Aha/ mishka ka babam bum diki hil aha/ i e ki 'bore/ki hila 'the mo me'd jin twa/a/ mo. Hili Arungimis ma babam pem a'di nyakki di ki aha/ mo.

⁶ Um mishkin ki aha/ miikina ababam bum atu'c ki mom'bi'th pemi 'baar mo.

⁷ Dhali hili ababam bum a'di di'd mmohe'k aha/ e mo dhali ak tom pem e mo jin gamka/ ki ji gi miiga/ to mo me'di 'kume'd mo. Hili Arungimis diki dhal a'di bway mo mmo'kosh aha/ mo.

⁸ A'di oki gwo mo ki: Wakki/ min dhudhunya/ mini dho'th mo tani uni a'di imini ta kum pini mo kun mina /e igam ki ji gi miina /e to mo, dhali arisa ma'diny uni ka jin gana/ uni idho'thkina dhudhunya/ mi mo. Dhali yan'ko'd dok/e a'di ki o gwo mo ki: Wakki/ mi kun 'beresa is ki 'beres mini 'ko mo tani uni a'di imini ta kum pini kun mina /e igam mo ki ji gi miina /e to mo, dhali arisa ma'diny uni ka jin gana/ uni idho'thkina 'beres is mi mo.

⁹ Gom gwo gi wakan mo tani a'di ibu'thkin ma Arungimis to/e ma babam bum mo dhali ci uni ki aha/ mo.

¹⁰ Dhali yil kun bwana ma ma'diny ka'bal dhali mi mo tani aha/ 'de'kkina em pem 'kupki mo momis mo dhali mish to ki jan mo ka ris gwasi mi ji kun pekina jappa/ apo/ ma'diny ka'bal mo tani uni tana dhudhunya/ mo dhali uni 'beresa is ki 'beres mo dhali uni itana diḡdiḡ mo.

¹¹ Dhali yan'ko'd aman'doyu gwo gi Tapa o aha/ gwo ki jan mo ki: Yakuub, dhali aha/ki thoḡ a'di gwo mo ki: Aha/ dina imahan mo.

12 Dhali a'di ki o aha/ gwo mo ki: 'Deki em pini 'kupki mo momis mo dhali pari mo e mo, aris mi kun pena jappa/ apo/ ama'diny ka'bal mo tani uni 'beresa is ki 'beres mo dhali uni tana dhudhunya/ mo dhali uni tana dinjin mo haali/ aha/ mishkina ris to kun miikin ma Laabaan apo/ e mo.

13 Aha/ tana Arumgimis ma Beet/iil e mo jin wolkina /e ayini 'kuwosh jin karkina /e ka tinjiliŋ mo dhali /e ki thul gwo me'da po/ gom aha/ mo. Cuyi mis shwane/ mo 'peni bampa/ yan mo dhali doki /e ka nyan'ko'd e bampam pini jin dhothu /e mo.

14 Yan'ko'da Rahiil dhala Le/ah thokki a'di gwo mo ki: A/toŋ kamu/ di'd jin 'tuntulkunu bwa ime'd mo walla mala kamu/ dhalkunu aman e gu'b ma babam bam mowa?

15 Aman shwane/ dina a'di ki yuk ki bunycan paŋ 'kwanin tiya mowa? Haali/ a'di yolki aman mo dhali a'di 'baarki'da guurush jin cikunu a'di gom aman mo.

16 Aris mal kun bu'thkin ma Arumgimis mo 'pena babam bam mo tani uni ta kum bam mo dhali kuki ucim bam mo. Hili shwane/ aris gwo gunn kun min ma Arumgimis i o /e mo tani miyi uni mo ma.

17 Wakan aYakuub cuki mis mo dhali dhu iya/ dhali i/ash e kalman mo.

18 Dhali a'di dilki'da ris to/em piti sho'k mo, aris mal piti kun gamkina a'di adu is ki miŋ jin miikina a'di to mo, to/em piti kun tulkina a'di is mo e Pam Paddaan/araam mo mmo/ii mo e bampa/ gi Paŋ Kanaan eya babam piti ka Is/hak mo be.

19 Dhali ka cim caan mo tani aLaabaan a'di yaki'd mo mmo'ciŋh ka'bal piti amur mo dhala Rahiil a'di kwalki tompinycon gi gu'b gi com mo.

20 Dhala Yakuub shakalki'd mo ki e ka wu mo i'ko'da Laabaan jin ta wathi/ Araam mo mmodiki tor a'di gwo ki a'di murki'di gus mo be.

21 A'di guski'd mo nyaŋki aris to kun tana a'di mo dhali cu mis mo mmo'ciŋh Yi'deŋ Kumma/ Elpuraat mo dhali a'di cu'thki jis/em piti 'kupki bampa/ gi paŋ 'kuwosh e Pany Jil/aad mo.

22 Dhali yan'ko'd gwo torkunuwa Laabaan 'ko'da cim kwara mo ka Yakuub guski'd mo be.

23 A'di bu'thki 'kwani ma bas piti nyaŋki a'di mo dhali ur a'di isho'k ka cim pesu/ mo dhali baŋh a'di isho'k ki ya'th ya'th mo e bampa/ gi Pany Jil/aad mo be.

24 Hili Arumgimis pu'dki'da Laabaan mo a'di jin ta wathi/ Araam ki jan mo mon'thiny mo dhali o a'di gwo mo ki: 'Cunycuri is pini ki 'bore/ mo ki /e mini diki o gwon tal 'deŋ kamu/ ka Yakuub mo walla ki gwom 'boro'd mo walla ki gwo shiyi'd mo.

25 Dhali aLaabaan gamki'da Yakuub mo. Dhala Yakuub a'di thumki gu'b burriyem piti e bampa/ gi paŋ 'kuwosh mo dhali aLaabaan nyaŋki 'kwani ma bas piti mo tani uni ishkina yuuka/ mo e paŋ 'kuwosh gi Pany Jil/aad mo be.

26 Dhali aLaabaan ki owa Yakuub gwo mo ki: Atinta si'da/ imiikina /e mo mmokwal aha/ to mo kan mo dhali bor i'bwa/m pem mo me'd 'kwani kun bu'thkunu ki shemen gandala turga/ e mo wakan gomata mo?

27 Gomata iguskina /e ka kwal is mo dhali kwal aha/ to mo dhali ilu/ diki tor aha/ gwo mo, wakan ki aha/ mina 'taki karki /e 'pen ki bwaŋ 'kunyu'd mo dhali ki gway jin yuku mo ka danluuka kun doru ki me'd mo dhali ka dhenhene/ kun 'kon ma shu/i pesu/ mo?

28 Dhali atinta dina /e ki dhala/ bway mo mmopi iya/m pem dhali i'bwa/ m pem 'twa/ mo dhali o uni gwo mo ki: Iiku/ ki 'bore/ ibway mo. Shwane/ /e miŋ miimpus mo.

29 A'di ta mom'bi'th pem mo mmo'kosh / e jwa mo shwanetan, hili Arungimis ma babam pini a'di toriki aha/ gwo ki jan ka en'thiny mo mmo/ o gwo mo ki: 'Cunycuri is pini ki 'bore/ mo ki /e mini diki o gwon tal 'den kamu/ ka Yakuub mo walla ki gwom 'boro'd mo walla ki gwo shiyi'd mo.

30 Shwane/ /e yakin mo haali/ /e 'kosh a dhan tem pa kagahara gom gu'b gi cim mo, hili atinta si'da/ ikwalkina /e tompinycon pem mo?

31 AYakuub thokki'da Laabaan gwo mo ki: Haali/ aha/ ko/kina is mo haali/ aha/ kulumkina gwo ibwa mo oki /e mini bu'th i'bwa/ yin ki 'bi'th 'peni aha/ mo be.

32 E a'din 'de/ yin jin mina /e gam tompinycon pini nycine/ mo tani mididi ki e mo. E bun'kus 'kwani ma bas bana mo tani tori to e ki me'd mo uni kun ta kum pini kun bu'thka/ mo dhali kali uni mo. Dhala Yakuub yisa mishi gwo 'bana kamu/ mo ka Rahiil a'di ikwalki uni mo.

33 Wakan aLaabaan ciki gu'b burrinye/ ma Yakuub mo dhali gu'b burrinye/ ma Le/ah mo dhali gu'b burrinye/ gi up cin'kina/ su/ gi i'bwah mo, hili a'di diki gam uni mo. Dhali a'di yaki'd ka pi'e/ mo 'peni gu'b burrinye/ ma Le/ah mo dhali ci'e jima Rahiil mo be.

34 Dhali aRahiil a'di ka jin gana/ ikwalki tompinycon gi gu'b gi com mo dhali dhu uni apon kalman e bwam ma ras mo dhali ca'bi uni 'pena po/ mo. Laabaan a'di kulki'da ris gu'b burrinye/ 'baar mo dhali diki gam uni mo be.

35 Dhali ayim ki o com gwo mo ki: Tapam pem mididi mii dhalka nyor ki mii shwa mo haali/ aha/ mola cu ibwambori /e mo haali/ bway gi up mo tani a'di di'da po/ aha/ mo. Wakan a'di napki'da nap ki bur bur mo hili a'di diki gam tompinycon gi gu'b piti mo.

36 Dhali yan'ko'da Yakuub warki'd ki dhana nyor jin caaca mo dhali waka Laabaan mo. Yakuub oki'da Laabaan gwo mo ki: Tom pem jin thamka/ mane si'da/ ti dhali mane miinthus pem mo? jin urkina /e aha/ isho'k ki 'bar 'bar mo kan?

37 Ba /e napki bwam tom pem mo ki bur bur mo. Aris uni 'baar mo kun gamkina /e mo tani uni ta ku ki gu'b piniya? Dhu uni imahan mo ibwambori 'kwani ma bas pem mo dhali 'kwani ma bas pini mo ki uni mini 'cunycur to mo e bwaman ana su/ mo.

38 Yil 'koni iss 'de/ kun nyakka/ ca'b ki /e mo. Aris gwasin ka'bal pini dhali kuman ka'bal uni thamka/ hil yisa dhali aha/ si'da/ dinaki 'ka jan tal 'den kamu/ mo 'pena ma'diny ka'bal pini mo be.

39 Uni kun dhera tongwapi/ is ka gwapi/ mo tani uni 'koka/ kali /e mowa? Aha/ thiskina is 'ko'd e mo gom uni mo dhali e 'peni bwam me'd pem mo tani /e ki 'the'k gwo mo gom uni mo wakki/ uni kwalu montee mo walla mon'thiny mo.

40 Aha/ a'dan be montee jin 'ba'th ma tente/ mmoshilaa/ is mo dhali 'thama 'thupga/ mo mon'thiny mo dhali e ish em pem mo tani a'di guski'd mo 'peni em pem mo be.

41 Yil 'koni issu/ jin nyakka di ki e e gu'b pini mo, dhali aha/ miikina /eya tu'c ki yili 'kume'd i'ce'dka donon mo gom i'bwa/ m pini su/ gwan mo, dhali yili pe'de/ si'da/ goma ma'diny ka'bal pini mo dhali /e akki tom pem e me'di 'kume'd mo uni kun gamka/ ki ji gi miinu to mo.

42 Wakki/ a'di mididi 'taki diki ta Arungimis ma babam pem mo a'di jin ta'da Arungimis ma Ibrahiim mo dhali a'di jin ko/kin ma Is/hak mo wakki/ a'din gana/ yan mididi 'taki diki di ka 'ban pem mo tani /e ka jin gana/ mini 'taki hash aha/ mo me'd 'ten' gana/ mo. Arungimis mishki isa nyor pem jin wo'c aha/ she/ mo dhala tu'c gi me'd pem mo dhali kucur /e ka en'thiny mo.

43 Dhali yan'ko'da Laabaan thokki'da Yakuub gwo mo ki: I'bwa/ m gwan mo tani uni ita i'bwa/ m pem mo dhali uci gwan mo tani uni ita u'cim pem

mo dhali ama'diny ka'bal gwan mo tani uni itana ma'diny pem mo dhali aris to kun parkina /e e mo tani uni ta kum pem mo be. Hili ata a'di imiga/mii shwane/ mo gom i'bwam pem gwan mo walla gom uci gwansan kun dho'thkina uni mo?

⁴⁴ Yayo/shwane/ mo dhali dhalki ana gama gwo me'd mo /e dhali aha/ mo, dhali dhalki a'di ta gwo jin minu mish tor e bwaman /e dhali aha/ mo.

⁴⁵ Wakana Yakuub bu'thki wosh mo dhali thum a'di ka tin'kiliij mo be.

⁴⁶ Dhala Yakuub ki tor 'kwani ma bas piti gwo mo mmotuli wosh is mo. Dhali uni bu'thki wosh mo dhali su'k uni ka tul 'kup mo dhali uni shwaki to imattaan e mo ma tul 'kup wosh mo.

⁴⁷ Dhala Laabaan ki yuk mo caan gway ka YajarSahduutha mo, hila Yakuub yukki a'di gway ka Jal/iid mo.

⁴⁸ Dhala Laabaan ki o gwo mo ki: Wosh su'k yan mo tani a'di midi tor gwo e bwaman /e dhali aha/ mo 'pena tee yan shwane/ mo. Gom gwo gi wakan mo tani a'di yukki mo yan gway ka Jal/iid mo be.

⁴⁹ Dhala tin'kiliij yan yuk kunu gway ka Mispah mo haali/ a'di oki gwo mo ki: Tapa a'di ihilki'da hil e bwaman /e mo dhali aha/ mo ki ana mina mii pi mo ka rem'kup 'pena kamuŋ kamu/ mo.

⁵⁰ Wakki/ /e mini tham i'bwam pem to mii apo/ mo walla /e wari mini bu'th upa tya mmopana'd i'bwam pem isa po/ mo tani, ba wathij kamu/ piyi'd mmonyak di ki ana mo mmomii mo, hili, kayi gwo e mo, Arumgimis a'di ita'da amantor gwo e bwaman /e dhali aha/ mo be.

⁵¹ Dhali yan'ko'da Laabaan ki owa Yakuub gwo mo ki: Pari wosh su'k gwan e mo dhala tin'kiliij piti mo a'di jin thumkika/ mo e bwaman /e mo dhali aha/ mo.

⁵² Wosh su'k yan a'di ita'da man/o gwo mo dhali atin'kiliij a'di ita'da man/o gwo mo ki aha/ mina diki pe 'kuwosh su'k yan mo e /e mo, dhali /e si'da/ mini diki pe 'kuwosh su'k yan e aha/ mo gom mo jin 'koshuwa 'kosh mo be.

⁵³ Arumgimis ma Ibrahiim dhali Arumgimis ma Nahur a'di jin ta'da Arumgimis ga babam buni mo dhalki a'di dwall gwo i bwaman ana mo. Wakana Yakuub thulki gwo me'da po/ mo ki mon'ko/ is ma babam piti ka Is/hak mo.

⁵⁴ Dhala Yakuub a'di ciki to mo mmomiiya basa 'cesh mo e 'kuwosh jin turatur mo dhali yuk 'kwani ma bas piti mo dhali shwa maan'kuthu'd mo, dhali ki uni shwaki maan'kuthu'd mo tani uni 'kokin e mun mmo'baar mon'thiny yan mo e 'kuwosh jin turatur mo be.

⁵⁵ Mon'thamo/ ka 'tum mo aLaabaan a'di cuki mis mo dhali pi idhancom 'twa/ mo dhali i'bwam piti mo dhali 'bor uni mii mo dhali yan'ko'd a'di ki kwa/ is piti bwa 'peni uni mo dhali doŋ bway pa ka nyan'ko'd mo be.

32

¹ AYakuub a'di iyaki'd mo e bway piti mo dhali iman'doyu gwo gamki a'di 'kup mo.

² Dhali ka Yakuub mishi uni mo tani a'di oki gwo mo ki: Uni gwansan ita 'kwani ma mee ma Arumgimis mo. Wakan a'di yukki mo caan gway mo ka Mahanaayim mo.

³ Dhala Yakuub hashki'da ris 'kwani ma gum bway piti ntwa/a/ ki a'di mo eya Iisu jin ta'da kam piti mo e bampa/ ki Pa Si/iir mo jin ta bampa/ Aduum mo.

⁴ A'di ye'thki uni sho'k ki gwo mo mmo/o ki: Iiyi tor'ki tapam pem ka Iisu gwo mo ki: Cin'kinam pini ka Yakuub oki gwo gi wakan mo ki: Aha/ yakina yanyca/ mo e pa Laabaan mo dhali ca'b ntagi shwane/ mo.

⁵ Dhali aha/ tana ga risa morbip mo dhali aris thuluny mo dhali ama'diny ka'bal mo dhali aris c̣in̄kinaṅ 'kwanin̄ gwaṅh mo kun miina tu'c mo dhali aris c̣in̄kina/ nyara/ mo kun miina tu'c mo dhali aha/ hashkina gwo mo mmoṭor tapam pem gwo mo ki aha/ mina gam mii ma 'the 'peni jis/em pini mo.

⁶ Dhali aris 'kwani ma gum bway piti uni dokkin ka nyan'ko'da Yakuub mo mmo/o gwo mo ki: Aman pu'dkina eya kam pini ka Iisu mo dhali a'di di'd mmoyayu/ mo mmogam /e 'kup mo nyakki 'kwanin̄ gwaṅh kun 'koni iss 'kwanimpa i/iss 'de/ kun nyak iiyu/ ki a'di mo.

⁷ Dhali yan'ko'da Yakuub ko/ki is kagahara mo dhali a'di butha 'tham mo dhali a'di kwa/ki 'kwani bwa mo kun 'kokin nyakki a'di mo dhali ama'diny ka'bal mo dhala buhany bip mo dhali aris kalman mo mmo'ko ka ta/ isu/ mo.

⁸ A'di kulumki gwo ibwa mo wakki/ Iisu midu pu'du/ ka ta/ 'de/ mo dhali 'ce'da/ 'ce'd sho'k mo tani aṅaṅ kamu/ minu dhalku mo mmoye mo be.

⁹ Dhala Yakuub ki o gwo mo ki: Ayy Arumgimis ma babam pem ka Ibrahiim mo dhali Arumgimis ma babam pem ka Is/hak mo, ayy Tapa /e jin oki aha/ gwo mo ki: Doki ka nyan'ko'd e bampam pini mo dhali e 'kwani ma bas pini mo dhali aha/ mina mii /e ki 'bore/ mo.

¹⁰ Aha/ dina ki ha me'd mo goma ris mo/en jin telu sho'k mo dhali goma ris mii ma isin̄ ganam pini mo uni kun ṭorkina /e c̣in̄kinam pini mo haali/ ki cwa gi me'd pem 'te/ mo tani a'di i'ciṅka/ Yi'deṅ Kumma/ Uurdun mo dhali shwane/ aha/ warkina ki wathi/ jin 'kon ma ta/i su/ mo be.

¹¹ 'Cuṅi aha/ mo ma, aha/ 'thona /e mo 'peni me'd ma kam pem mo isi 'peni me'd ma Iisu mo haali/ aha/ ko/kina a'di mo isi ciki/ a'di midu pu'du/ mo dhali 'kosh am 'baar mo jwa mo nyakki ita'da ki uci ilu/ mo.

¹² Hili /e oki gwo mo ki: Aha/ mina mii /e ki 'bore/ mo dhali dhu emen pini mmowa e ka si'b gi bwam ma al yi'de/ mo a'di jin minu mol deṅ e mo goma buhany piti mo.

¹³ Wakan a'di ishki'd imattaan mon'thiny mo dhali a'di ki bu'th 'peni to kun tana a'di mo to jin cinu ki me'd mo goma kam ka Iisu mo.

¹⁴ A'di ciki a'di kuman ka'wali iss 'kwanimpa i'kume'd mo dhali gwasu mi i/iss 'de/ mo dhali kuman ka'wali iss 'kwanimpa i'kume'd mo dhali gwasin̄ ka'wali iss 'de/ mo.

¹⁵ Dhali kuman kalman kun umuwa ko i iss 'de/ i'ce'dka 'kume'd mo nyakki ushan buni mo dhali bipi issu/ mo dhali amorbipi 'kume'd mo dhali kuman thulunyi iss 'de/ mo dhali gwaṅhan thulunyi 'kume'd mo.

¹⁶ Aris to gwansan idhukina a'di e me'd ma ris c̣in̄kinam piti mo dhali aris uni urkunu ki she/ ki she/ mo dhali a'di oki'da ris c̣in̄kinam piti gwo mo ki: Iiku/ nṭwa/a/ ki aha/ mo dhali kari buli bwaman mo mmo/ur to mo dhali uri to mo.

¹⁷ A'di ye'thki uni kun iikin nṭwa/a/ sho'k ki gwo mo ki: Ka Iisu jin ta'da kam pem midu gam um 'kup mo dhali doṅ um gwo mo ki um ta gu maja mo tani, dhali um iini ii mana mo? tani, dhali aris to maja gwansan kun iini bwambori um mo isan? tani,

¹⁸ dhali yan'ko'd um mini o gwo mo ki: Uni ta ku gi c̣in̄kinam pini ka Yakuub mo, uni ta to kun cinu ki me'd kun hashu /e tapam pem ka Iisu mo dhali a'di ki is piti yayi'di 'ko'di aman mo be.

¹⁹ A'di mii miin 'de/ yan jin nyakka'd mmoye'th uni kun 'kon ma po/ isu/ sho'k gi gwo mo dhali nyakki uni kun 'kon ma po/ ikwara mo dhali aris uni kun uru mo ki: Um mini mii o jasi gwon 'de/ mo eya Iisu mo ki um mini gam a'di 'kup mo.

²⁰ Dhali um mini o a'di gwo mo ki c̣in̄kinam pini ka Yakuub a'di di'd mmoyayu/ ki is piti i'ko'di aman mo, haali/ a'di kulumki gwo ibwa mo ki aha/

mina 'taki wan a'di is ki to jin cinu ki me'd mo kun iini bwambori aha/ mo dhali yan'ko'd aha/ mina par jis/em piti e mo: wakki/ a'di wariba/ midu 'taki bu'th aha/ mo.

²¹ Wakan to kun cinu ki me'd iikin mo mmoshu a'di bway mbwambor mo dhali a'di ki is piti ishki'd mo mon'thiny yin e gu'b burinyem piti mo.

²² Dhali mon'thiny 'de/ yan mo tani a'di cuki mis mo dhali bu'th i/ashi su/ mo dhali up cinkina/ nyaram piti isu/ mo 'dhali ucin piti 'kume'd i'ce'dka 'de/ mo dhali a'di ki 'citha al yi'de/ ma Yabbug mo.

²³ A'di suski uni mo dhali hash uni mo mmo'cith yi'de/ jin guski'd mo dhali nyakka ris to 'baar mo kun tana a'di mo.

²⁴ Dhala Yakuub a'di dhalkunu a'di 'de/ mo dhali a'di 'tirki'd uni ki wathin kamu/ mo ntagi e kali kush mo.

²⁵ Ki wathi/ parki mo e mo ki a'di diki piya Yakuub e ki mii mo tani a'di ki ta a'di bwaman ma wum piti is ki me'd mo ntagi a'di burushki'd mo dhali awum gi Yakuub a'di irakki'd mo 'peni gocer piti mo me'd jin 'tirki'd a'di nyakki a'di mo.

²⁶ Dhali yan'ko'd a'di ki o gwo mo ki: Dhalki aha/ me'd, aha/ yana mo haali/ mo kalki kush mo. Hila Yakuub oki gwo mo ki: Aha/ mina dhal/ e me'd mo yisa isi ciki/ /e mini mii 'bor aha/ mii mo.

²⁷ Dhali a'di ki o a'di gwo mo ki: Gway pini yuku kaja mo? Dhali a'di ki thok a'di gwo mo ka: Yakuub mo.

²⁸ Dhali yan'ko'd a'di ki o gwo mo ki: Gway pini minu mii 'koki dok/ e yuk ka Yakuub yisa, hili ka Israyiil mo haali/ /e askina Arumgimis nycine/ mo dhali 'kwani mo dhali /e piki mii e mo be.

²⁹ Dhali yan'ko'd Yakuub ki dot a'di gwo mo ki: Tori aha/ gwo mo ma aha/ 'thona /e mo, gway pini yuku kaja mo? Hili a'di oki gwo mo ki: Gomatinta idotkina /e gway pem mo? Dhali a'di ki la dhiij mii is mo i'bor a'di mii mo be.

³⁰ Wakan aYakuub yukki mo caan gway mo ka Panu/iil mo mmo/o gwo mo ki: Haali/ Arumgimis mishkika/ jis/em piti ka karambor mo dhali hili mondiki/ em pem a'di 'tashkunu 'twa/ mo.

³¹ Atente/ sulki'da po/ a'di mo me'd jin pekina a'di Pa Panu/iil mo mmoto'b ki cwa mo haala wum piti ta njwol mo.

³² Gom gwo gi wakan mo 'pena cim caan mo tani 'Kwani ma Israyiili 'baar mo tani uni 'koki 'ka to kun miinycuru/ 'kus ki 'bi'th mo mmorak dugu'b buni 'peni awum mo haali/ a'di burushki'da Yakuub awum piti mo 'peni dugu'b mo be.

33

¹ Dhali aYakuub i'de'kki em piti ki mis mo dhali par mo e mo dhali hili mo mo ma, Iisu a'di pu'dki'd mo nyakki 'kwanim piti kun 'koni iss 'kwanimpa /i iss 'de/ mo. Wakan a'di kwa/ki uci bwa mo e bwaman ma Le/ah dhala Rahiil mo dhali upi su/ gwan kun ta cinjina/ nyara/ mo.

² Dhali dhuki upi su/ gwan kun ta cinjina/ nyara/ mbwambor mo nyakki ucin buni mo dhali yan'ko'da Le/ah nyakki uci ma yim mo dhala Rahiil mo dhala Yuusup nj'ko'd gana/ mo ki tiya 'baar mo.

³ A'di ki is piti yaki'd ntwa/a/ ki uni mo dhali lunji is piti a'cesh ki gonggo/ mo me'di pesu/ mo ntagi a'di 'dishki'da kam is mo be.

⁴ Hila Iisu a'di guski'd mo mmogam a'di 'kup mo dhali kar a'di mmota isa kony mo dhali biti 'bam piti mo dhali pi a'di 'twa/ mo dhali uni ki ko mo imontal 'de/ mo be.

⁵ Dhali ka Iisu 'de'kki em piti ki mis mo dhali par up e mo dhali aris uci mo tani a'di ki o gwo mo ki: 'Kwani kuna anansan kun nyakki iyu/ ki /e mo?

AYakuub ki thoḳ gwo mo ki: Uci kun cikin ma Arumgimis cingkinam pini ka 'the mo.

⁶ Dhali yan'ko'd up nyarany cingkina/ uni 'dishkin mo, uni dhali uci buni mo dhali goḳ is ka 'cesh mo.

⁷ Le/ah miiki'd wakan mo dhali uci ma yim mo uni 'dishkin mo dhali goḳ is ka 'cesh mo dhala Yuusup ḡ'ko'd mo dhala Rahiil i'dishki mo is mo dhali uni goḳki is ka 'cesh mo.

⁸ Iisu doḳki gwo mo ki: 'Pemen miim pini yan ta'da ta mo jin gamkika/ arisa taḡ 'kwaniḡ 'kup mo kan? AYakuub a'di thoḳki gwo mo ki: Mmogam mii ma 'the 'peni jis/e gi tapam pem mo be.

⁹ Hila Iisu thoḳki gwo mo ki: Aha/ tana gi to kun 'koshi jwa mo akam pem. Dhuyi uni kun tana /e mo gom is pini mo.

¹⁰ Yakuub thoḳki gwo mo ki: Yisa, aha/ 'thokina /e mo, wakki/ aha/ mina gam mii ma 'the 'peni jis/em pini mo tani /e mini mii bu'th tom pem gwan kun cinu ki me'd mo 'peni me'd pem mo haali/ ka jin gana/ mmopar jis/em pini e mo wakan mo tani a'di wana e ki mmopar jis/e ma Arumgimis e mo mmobu'thkina /e aha/ ki mii ma 'the gi wakan mo be.

¹¹ Buthi uni mo, aha/ 'thokina /e mo tom pem gwan kun cika/ ka 'ka'd me'di is mo kun kalkika/ gom /e mo haali/ Arumgimis tu/ulki aha/ ki mii ma 'the mo dhali haali/ aha/ takina gi to jin 'kosh jwa mo. A'di tirishki a'di mo dhali a'di bu'thki uni mo be.

¹² Dhali yan'ko'd Iisu ki o gwo mo ki: Dhalki ana iina mo e bway bana mo dhali aha/ mina shu /e bway mo.

¹³ Hila Yakuub thoḳ a'di gwo mo ki: Tapam pem /e mishi uci ki uni gwa'dagwa'd mo dhali ama'diny ka'bal dhali dhana ḡul'kup ka'bal ta gi ushan mo kun miga/ hili e ki 'bore/ mo. Dhali wakki/ uni uru ki ur ma hala/hala/ ka cim 'de/ mo tani arisa ma'diny ka'bal uni mini wu 'baar mo be.

¹⁴ Dhalki tapam pem shuki cingkinam piti bway ntwa/a/ mo dhali aha/ mina suska suska sereḳ sereḳ mo isi me'd ḡatgin to/e mo uni gun 'kon abori aha/ mo dhali isi me'd ḡatgin jin mina uci idhu mo, ntagi aha/ mina pu'dku/ i tapam pem e Pan Si/iir mo be.

¹⁵ Wakan Iisu oki gwo mo ki: Dhalki aha/ dhalkina /e 'kwaniḡ gwaḡh kun nyak 'ko ki aha/ mo. Hili a'di oki gwo mo ki: Atinta a'di imina uni mii cor imun mo? Dhalki aha/ gama mii ma 'the 'peni jis/em pini mo tapam pem mo.

¹⁶ Wakana Iisu doḳki'd mo ka tee caan mo e bway piti mo e Pan Si/iir mo be.

¹⁷ Hila Yakuub a'di yaki'd mo e Pan Sukkuut mo dhali nyanḡ gu'b gom is piti mo dhali nyanḡa ris cingḡa/ goma ris to/em piti mo. Gom gwo gi wakan mo tani a'di iyukunu mo caan gway mo ka Sukkuut mo be.

¹⁸ Dhala Yakuub a'di pu'dki'd ki 'dantar mo e 'penkuman bampa/ gi Pan Shakiim mo a'di jin di'di Pan Kanaan mo e bway piti jin yayina a'di mo 'peni Pam Paddaan/araam mo dhali a'di pe'dki gu'b burrinyem piti ibwambor 'penkuman bampa/ mo.

¹⁹ Dhali 'peni iya/ ma Hamuur mo a'di jin ta'da baba gi 'Kwani gi Pan Shakiim mo tani a'di yolki'da 'cesha kamu/ ka riyaal iss 'kwaniimpa imudhe'd mo a'di jin thumkina a'di gu'b burrinyem piti mo.

²⁰ E mo yan mo tani a'di ka'bki'da gwaḡa/ mo a'di jin miinuwa basa 'cesh mo dhali yuk mo yan gway mo ka El-Elohe Israyiil mo.

34

¹ Dhali aDiinah jin ta 'bwa/ ma Le/ah a'di jin dho'thkin ma yim ka Yakuub mo a'di yaki'd mo mmobuta ris up gi bampa/ yan mo be.

² Dhali ka Shakiim jin ta ya/ ma Hamuur jin ta Wathi/ gi Pan Hiwwi jin ta ya/ ma malik gi bampa/ yan parki'da yim e mo tani a'di bu'thki'da yim mo dhali ish nyakka yim mo dhali kara yim is ki gwa'd mo.

³ Dhali akashiram piti dirkunu mo 'kup ka Diinah mo a'di jin ta 'bwa/ ma Yakuub mo. A'di enki nyara/ yan mo dhali wal 'twa/ ka yim ki wala te'e/ mo.

⁴ Wakan Shakiim torki'da tor ki com jin ta'da Hamuur mo mmo/o gwo mo ki: Guyaa/ nyara/ yan mo ma mmota a'bom pem mo.

⁵ Dhali ka Yakuub cikki gwo mo ki a'di shi/ki 'bwa/m piti ka Diinah is mo tani, hili iya/ 'koyina mo mmohil to/em piti e bwaasho/ mo. Wakana Yakuub bu'thki monku'th is piti mo ntagi uni pu'dkin mo be.

⁶ Dhala Hamuur jin ta'da baba ma Shakiim mo tani a'di yaki'd ka pije/ mo mmotora tor ka Yakuub mo.

⁷ Dhali iya/ ma Yakuub pu'dkin mo 'peni bwaasho mo ki uni cikki gwo yan mo dhali 'kwani gwan shwan ma anyor eya du mo dhali miya anyor kagahara mo haali/ a'di wakaski tonthus yan jin ta pus e 'Kwani ma Israyiil mo mmo/ishi 'bwa/ ma Yakuub mo haali/ tonthus gi wakan ka ba/ iminu 'koki mii mii mo be.

⁸ Hila Hamuur torki'da tor ki uni mo dhali o gwo mo ki: Akashira/ gi ya/m pem ka Shakiim a'di 'thotha bwa gom 'bwa/m bum mo, aha/ 'thona um mo, mmociya yim ki a'di mo mmomash mo.

⁹ Thosoni gwo gi miimash nyakki aman mo, ciyu/ i'bwa/m bum ki aman mo dhali buthi i'bwa/m bam gom is bum si'da/ mo.

¹⁰ Um mini nyak 'ko ki aman mo dhali mony'cesh midi di ki kany gom um mo. 'Koyi mo dhali miya tu'c e a'di mo dhali gami mal e a'di mo.

¹¹ Shakiim si'da/ oki gwo eya baba ma yim mo dhali e ikam ma yim mo ki: Dhalki aha/ gama mii ma 'the e jis/em bum mo dhali aris to gunn kun mina um i o aha/ mo tani aha/ mina ci uni mo be.

¹² Doti aha/ mo ma, ma to gom miimash jin taka/ ki nyanye/ mo a'di jin ta tontak dhali to kun cinu ki me'd mo dhali aha/ mina ci uni isi me'd jin ona um aha/ mo, hili ciyaa/ nyara/ yan mmota a'bom pem mo.

¹³ Dhali iya/ ma Yakuub thokkina Shakiim gwo mo dhali com ka Hamuur gwo ka he'k e mo haali/ a'di shi/ki 'bwah buni ka Diinah is mo be.

¹⁴ Uni oki uni gwo mo ki: Aman mola to yan mii mo mmoci 'bwah bam ki wathi/ jin 'konuki 'citha/ munyjal yis mo haali/ mii yan a'di imidi ta mii jin midi 'the aman is mo be.

¹⁵ Hili e mii yan mo tani aman mina gam gwo me'd nyakki /e mo ki /e mini mii war mo mmowa ki aman mo dhali aris 'kwani gwa' pini minu mii 'citha/ munyjal yis mo be.

¹⁶ Dhali yan'ko'd aman mina ci i'bwa/m bam ki um mo dhali aman si'da/ mina bu'th i'bwa/m bum gom is bam mo dhali aman mina 'ko nyakki um mo dhali warki 'kwani en 'de/ mo.

¹⁷ Hili wakki/ /e diki cik gwom bam mo dhali 'citha/ munyjal yis mo tani aman mina bu'th 'bwa/m bam mo dhali aman mina ii mo be.

¹⁸ Gwom buni 'borki'da Hamuur bwa mo dhala Shakiim jin ta ya/ ma Hamuur mo be.

¹⁹ Dhali dhuru'c wathi/ diki ta diite/ mo mmomii to yan mo haali/ a'di 'kunya bwa ki 'kuny kagahara gom 'bwa/ ma Yakuub mo. Dhali a'di si'da/ ita wathi/ jin taku kagahara mmobol tiya 'baar mo e e bwaman ma wak piti ki montak mo.

²⁰ Wakana Hamuur dhali ya/m piti ka Shakiim uni iikin ka pije/ e 'twan'kala gon gi 'penkuman bampa/ mo dhali tora tor ki 'kwani ki 'penkuman bampa/ mo dhali o gwo mo ki:

21 'Kwani gwansan uni ita ikam bana mo. Dhalki uni 'kon mo e bampa/yan mo dhali miya tu'c apo/ a'di mo haali/hili mo mo ma, bampa/ beeyabee mo dhali midu 'kosh jwa mo gom uni mo. Dhalki ana butha i' bwa/m buni mo mmomash mo dhali dhalki ana si'da/ cina uni 'bwa/m bana mo.

22 Hili jasi e mii yan 'de/ mo tani a'di imina 'kwani igam gwo me'd mo dhali nyak 'ko ki ana mo dhali war ki 'kwani en 'de/ mo, ki aris 'kwanij gwaṭh 'peni bwaman ana mo tani minu 'ciṭha/ munyjal yis mo me'd jin 'ciṭh kunu uniya munyjal yis mo be.

23 Mina to/em buni dhali mal buni dhali aris tonkal buni 'koki ta kum bana mowa? Dhalki ana gama jasi gwo yan me'd ki uni mo dhali uni mini nyak 'ko ki ana mo be.

24 Aris 'kwani kun iikin ka pije/ 'peni 'twaṅkal ma goṅ 'penkuman bampam piti mo tani uni cikki gwo ma Hamuur mo dhali ya/m piti ka Shakiim mo dhali aris 'kwanij gwaṭh 'baar mo tani uni 'ciṭh kunu amunyjal yis mo, aris uni 'baar mo kun iikin ka pije/ 'peni 'twaṅkal ma goṅ gi 'penkuman bampam piti mo.

25 Dhali ka cim 'koni kwara mo ki uni 'kon ki jama/ i is mo tani iya/ ma Yakuub su/ mo a'di jin ta'da Shim/uun dhala Lawi uni kun ta ikam ma Diinah mo bu'thki gandala turgam buni mo dhali pu'dku/ e 'penkuman bampa/ ki e ka wu mo dhali 'kosha ris 'kwanij gwaṭh gwan jwa mo 'baar mo be.

26 Uni 'koshkina Hamuur dhali ya/m piti ka Shakiim jwa ki gandala turga/ mo dhali susa Diinah ka pije/ 'peni gu'b ma Shakiim mo dhali uni ki ii mo be.

27 Dhali iya/ ma Yakuub uni pu'dkin e moṅ'kosha 'kosh mo dhali kar 'penkuman bampa/ mmota abar ka bar mo haali/ 'bwah buni a'di ishi/kunu is mo be.

28 Uni bu'thkina ma'diny ka'bal buni mo dhala buhany bip buni mo dhali aris thulunyu buni mo dhali aris to gunn kun 'kon e 'penkuman bampa/ mo dhali kun 'kon e bwam bunto mo.

29 Aris tom buni kun tana uni pa ki pa mo dhali aris ushi uḅim buni mo dhali aris up buni mo dhali aris to gwan kun 'kon eya ris gu'b mo tani uni bu'thki uni mo dhali war ki tom buni jin dilina uni 'kwani mo.

30 Dhali yan'ko'da Yakuub ki owa Shim/uun dhala Lawi gwo mo ki: Um kalki mo jin raku arak isa po/ aha/ mo mmokar aha/ gway pem mmoshi/a shi/ e bwaman 'kwani gi bampa/ yan mo uni kun ta 'Kwani gi Panj Kanaan mo dhali 'Kwani gi Pam Pirissi mo. Aha/ tana a/ushala/ mo dhali wakki/ uni mini tul isi montal 'de/ apo/ aha/ mo dhali pu'daa/ i is mo tani aha/ minu 'ce'd sho'k mo aha/ dhali nyakki kun gu'b pem 'baar mo.

31 Hili uni oki gwo mo ki: A/miim piti 'boro'da? mmomii 'bwah bam me'da 'bom ḅal mowa?

35

1 Arungimis oki'da Yakuub gwo mo ki: Cuyi mis mo dhali yayi ka gagamis e Pam Beet/iil mo dhali ḅa'bi/e imun mo dhali ka'bi agwaṭa/ goma Arungimis imun mo a'di jin piki /e i is mo me'd jin guskina /e mo 'pena kam pini ka Iisu mo.

2 Wakan aYakuub oki gwo e kun gu'b piti mo dhali aris uni 'baar mo kun nyak 'ko ki a'di mo ki: Dhuya risa rum thus 'pen ka pije/ mo ma uni kun tana rum gi 'kwanim bunycani tiya mo 'peni bwam um mo dhali dhagami is bum mo dhali aki burrinyem bum e mo.

3 Dhali dhalki ana cuna mis mo dhali iina ka gagamis e Pam Beet/iil mo ki aha/ mina ka'b agwaṭa/ goma Arungimis imun mo a'di jin thoḅki aha/ 'twa/ mo ka teem pem jin taka cis ka cis mo dhali a'di jin nyakki di ki aha/ mo eya ris mo gunn kun yakika/ mo.

⁴Wakan uni cikina Yakuub arisa rum thus gi bunyancan 'kwanin tiya mo uni kun takina uni mo dhali aris malla/ 'cem buni mo dhali aYakuub ba'kki uni mo e 'peny cwa ma çaww jin 'dish Pan Shakiim is mo.

⁵Dhali ki uni iikin ibway mo tani dhan moŋko/ is 'peni Arumgimis yayi'da po/ 'penkuman bampa/ kun 'kamki uni is mo. Wakan uni 'koki ur iya/ ma Yakuub isho'k mo.

⁶Dhala Yakuub a'di ipu'dki'd mo e Pan Luus mo a'di jin ta'da Beet/iil mo a'di jin di'd e bampa/ Kanaan mo a'di dhali aris 'kwani kun nyakki 'ko ki a'di mo be.

⁷Dhali imun mo tani a'di ika'bkina a'di gwaṭa/ mo mmomiiya basa 'cesh mo dhali yuḱ mo yan gway mo ka Iil Beet/iil mo haali/ e mo yan mo tani Arumgimis ṭorki a'di is piti e eya tente/ mo me'd jin guskina a'di mo 'pena kam piti mo.

⁸Dhala Dabuurah jin ta'da manhila Ripka mo a'di iwuki'd mo dhala yim a'di kankunu mo e 'peny cwa ma çaww e mo jin di'd ka luŋgu'b ki Pam Beet/iil mo. Wakan a'di iyuḱkunu a'di gway mo ka Alluun Bakuut mo.

⁹Arumgimis piki'da Yakuubi is dok/e mo me'd jin pu'dkina a'di mo 'peni Pam Paddaan/araam mo dhali 'bor a'di mii mo be.

¹⁰Dhali Arumgimis ki o a'di gwo mo ki: Gway pini be yuḱu ka Yakuub mo be dhali /e yisa minu dok/e yuḱ gway pini ka Yakuuba mo yisa. Hili gway pini minu yuḱ ka Israyiil mo. Wakan a'di iyuḱkunu a'di gway ka Israyiil mo be.

¹¹Dhali Arumgimis ki o a'di gwo mo ki: Aha/ tana Arumgimis jin Eka/ Ek mo. Kali /e mamana dho'th mo dhali mari /e amar is mo. Kal 'kwaniny'cesh dhali arisa ṭa/ gi kal 'kwaniny'cesh mini piyu/ 'peni /e mo dhali imalik ka ris mini du'du/ 'peni /e mo.

¹²Mony'cesh jin cikika/ ka Ibrahiim dhala Is/hak mo tani aha/ mina çi a'di /e mo dhali aha/ mina çi a'di ki emen pini i'ko'd mo be.

¹³Dhali yan'ko'da Arumgimis borki is piti imis mo 'peni mo jin ṭorkina a'diya ṭor nyakki a'di mo be.

¹⁴Dhala Yakuub thumki'da ṭiŋkiliŋ mo e mo yan jin ṭorkina a'diya ṭor nyakki a'di mo, a'di jin ta'da ṭiŋkiliŋ woŋh mo dhali wolki'da ṭiŋkiliŋ tompi i'kupi a'di jin çinu ki bwa ma 'the mo dhali wola yini 'kupi a'di mo be.

¹⁵Wakana Yakuub yuḱki mo yan gway ka Beet/iil mo a'di jin ṭorkin ma Arumgimis aṭor ki a'di mo be.

¹⁶Dhali yan'ko'd uni iikin mo 'pena Pam Beet/iil mo dhali uni si'dasi'd naskina/ 'peni Pan Apraatah mo, aRahiil shwan ma 'ci mo dhali ayim di'd e mo jin shwana bwan dho'th mo.

¹⁷Dhali ka yim diki'd e mo jin shwana bwan dho'th mo tani a'bom jin karu mo mmowoṭha woṭh mo gom mondho'th up mo tani oki a'di gwo mo ki: Dhalku/ is ki ko/ mo ma haali/ /e shwane/ murkini ta ga 'cingwaṭha kamu/ mo be.

¹⁸Dhali me'da kashira/ ma yim di'di mmokwa/kina a'di is bwa 'pena yim mo (haali/ ayim wuki'd mo) tani a'di ayim ki yuḱ a'di gway ka Ben/uuni mo hili com a'di iyuḱki a'di gway mo ka Benyamiin mo.

¹⁹Wakana Rahiil a'di wuki'd mo dhala yim a'di kankunu mo e bway gi Pa Apraatah mo, a'di jin ta Pam Beet/laham mo be.

²⁰Dhala Yakuub thumki'da ṭiŋkiliŋ i'kup jis jwa ma yim mo a'di jin ta'da ṭiŋkiliŋ i'kup jis jwa ma Rahiil mo a'di jin diki'd imun ntagi shwanesan mo be.

²¹Israyiil a'di yaki'd mo dhali thum gu'b burrinyem piti e bwampo/ gu'ba turga/ gi Pan Idir mo.

²² Ka Israyiil ca' b'ki'd e bampa/ yan mo tani Ra/ ubiin a'di yaki'd mo dhali isha Bilhah mo a'di jin ta'da 'bom laça/ gi com mo dhala Israyiil cikki gwo yan mo.

Dhali iya/ ma Yakuub uni 'koni 'kume'd i'ce'dka su/ mo.

²³ Iya/ ma Le/ah mo tani jin twa/a/ a'di jin ta'da bwanbara/ ma Yakuub a'di ita'da Ra/ ubiin mo dhala Shim/uun mo dhala Lawi mo dhala Yahuuda mo dhala Yassaakar mo dhala Sabuluun mo.

²⁴ Iya/ ma Rahiil uni si'da/ annihe/ mo: Yuusup dhala Benyamiin mo be.

²⁵ Dhali iya/ ma Bilhah a'di jin ta nyarany cınkina/ ma Rahiil mo uni si'da/ annihe/ mo: Daan dhala Naptaali mo.

²⁶ Dhali iya/ ma Silpah uni si'da/ annihe/ mo: Jaad dhala Ashiir mo. Uni gwansan ita iya/ ma Yakuub mo kun dho'thkunu a'di me'd jin dikina a'di e Pam Paddaan/araam.

²⁷ Dhala Yakuub pu'dki'di com ka Is/hak mo e Pa Mamra mo walla e Pan Giryat/arba mo a'di jin ta Pa Habruun mo e mo jin yakin ma Ibrahiim dhala Is/hak iinyça/ mo be.

²⁸ Dhali atee yil ma Is/hak uni 'koni iss 'kwanimpa ipedonon mo be.

²⁹ Dhala Is/hak a'di ciki shi/in piti jin 'ko'd mo dhali a'di wuki'd mo dhali a'di gamkunu isi montal 'de/ nyakki 'kwanim piti mo mmotana a'di dhan guma dhan gana/ mo ka teem piti mo. Dhali iya/m piti jin ta'da Iisu dhala Yakuub uni kanki a'di mo be.

36

¹ Uni gwansan ita emen ma Iisu mo (a'di jin ta Aduum mo).

² Iisu bu'thki'da ris up 'peni 'Kwaniñ Kanaan mo: Ada jin ta 'bwa/ ma Iiluun jin ta Wathi/ Hiththa mo dhala Uhulibaamah jin ta 'bwa/ ma Ana jin ta ya/ ma Sib/uun mo jin ta Wathi/ Hiwwi mo.

³ Dhala Basmah jin ta 'bwa/ ma Isma/iil dhali 'bwaham ka Nabayuut mo.

⁴ Dhala Ada dho'thki'da Iisu a/Elipaas mo dhala Basmah dho'thki'da Ra/u/ iil mo.

⁵ Dhala Uhulibaamah dho'thki'da Ya/uush dhala Yalaam dhala Guurah mo. Uni gwansan ita iya/ ma Iisu mo kun dho'thkunu a'di mo me'd jin dikina a'di e Pan Kanaan mo be.

⁶ Dhali yan'ko'da Iisu bu'thki'da ris up piti mo dhali aris iya/m piti mo dhali aris i' bwa/m piti mo dhali arisa wak gi gu'b piti mo dhali to/em piti mo dhali aris tonkal piti 'baar mo dhali aris mal piti 'baar mo kun gamkina a'di adu is mo 'peni bampa/ gi Pan Kanaan mo dhali a'di yaki'd mo e bampañ kamu/ mo 'pena kam piti ka Yakuub mo be.

⁷ Haali/ tom buni kun gamkina uni mo tani uni caaca kagahara mo gom uni mmo'ko imontal 'de/ mo haali/ mony'cesh jin tana uni aça/ apo/ mo tani midi mol uni thip mo gom to/em buni mo.

⁸ Wakana Iisu a'di ca' b'ki'd mo e bampa/ gi pan 'kuwosh ma Si/iir mo. Iisu a'di ita wathi/ Aduum mo.

⁹ Uni gwansan ita emen ma Iisu mo jin ta'da baba gi 'Kwani gi Pan Aduum mo e bampa/ pan 'kuwosh ma Si/iir mo be.

¹⁰ Gway gi iya/ ma Iisu uni annihe/ mo: Elipaas jin ta ya/ ma Ada mo jin ta asha Iisu mo dhala Ra/u/iil jin ta ya/ ma Basmah jin ta asha Iisu mo.

¹¹ Dhali iya/ ma Elipaas uni annihe/ mo: Temaan dhala Awmaar dhala Sapwa dhala Ja/thaam dhala Ganaas mo be.

¹² (Timnaa/ a'di ita'da 'bom laça/ goma Elipaas mo a'di jin ta ya/ ma Iisu mo. Ayim a'di idho'thki'da Amaliik ka Elipaas mo.) Uni gwansan ita iya/ ma Ada jin ta asha Iisu mo be.

13 Uni gwansan ita iya/ ma Ra/u/iil mo: a'di jin yuku gway ka Nahath dhala Saarah dhala Shammah dhala Missa mo. Uni gwansan ita iya/ ma Basmah mo jin ta asha Iisu mo.

14 Uni gwansan ita iya/ ma Uhulibaamah mo a'di jin ta 'bwa/ ma Ana mo jin ta ya/ ma Sib/uun mo jin ta asha Iisu mo. Ayim dho'thki a'di aYa/uush mo dhala Yalaam dhala Guurah mo be.

15 Uni gwansan ita iya/ ma Iisu kun tana ris tapa mo. Iya/ ma Elipaas a'di jin ta'da bwanyara/ ma Iisu mo: Temaan dhala Awmaar dhala Sapwa dhala Ganaas uni ita tapa mo.

16 Guurah dhala Ja/thaam dhala Amaliik uni gwansan si'da/ ita tapa 'pena Elipaas e bampa/ gi Pan Aduum mo uni kun ta iya/ ma Ada mo.

17 Uni gwansan si'da/ ita iya/ ma Ra/u/iil jin ta ya/ ma Iisu mo: Nahath dhala Saarah dhala Shammah dhala Missa mo uni gwansan ita tapa 'pena Ra/u/iil mo e bampa/ gi Pan Aduum mo. Uni gwansan ita iya/ ma Basmah mo jin ta asha Iisu mo.

18 Uni gwansan ita iya/ ma Uhulibaamah jin ta asha Iisu mo uni kun ta itapa mo: Ya/uush dhala Yalaam dhala Guurah mo. Uni gwansan ita tapa 'pena Uhulibaamah jin ta 'bwa/ ma Ana a'di jin ta asha Iisu mo be.

19 Uni gwansan ita iya/ ma Iisu mo (jin ta Aduum mo) dhali itapam buni anann mo be.

20 Uni gwansan si'da/ ita iya/ ma Si/iir jin ta Wathi/ gi Pan Huri mo a'di jin cila bampa/ yan mo: Luthan dhala Shubal dhala Sib/uun dhala Ana mo.

21 Dishun dhala Iisar dhala Dishan mo uni gwansan ita itapanj 'Kwani gi Pan Huri mo kun ta iya/ ma Si/iir e bampa/ Pan Aduum mo.

22 Iya/ ma Luthan mo tani ita iHuri dhala Hemam mo, dhali 'bwah ma Luthan mo tani a'di ita'da Timnaa/ mo.

23 Uni gwansan ita iya/ ma Shubal mo: Alwaan dhala Manaahah dhala Ebaal dhala Shapwa dhala Unam mo.

24 Uni gwansan ita iya/ ma Sib/uun mo: Ayyah dhala Ana a'di jin ta'da Ana jin gamki yi'de/ jin kasha e ki kash jin 'batha'ba'th e mombwaasho mo me'd jin urkina a'di aris thuluny ma Sib/uun jin ta'da babam piti mmociya shon dhii/i'd mo.

25 Uni gwansan ita uci ma Ana mo: Dishun dhala Uhulibaamah a'di ta 'bwa/ ma Ana mo.

26 Uni gwansan ita iya/ ma Dishan mo: Hamdaan dhala Ashbaan dhala Yithraan mo dhala Karaan mo.

27 Uni gwansan ita iya/ ma Iisar mo: Bilhaan dhala Sawaan dhala Agaam mo.

28 Uni gwansan ita iya/ ma Dishun mo: Uus dhala Araan mo.

29 Uni gwansan ita itapanj 'kwani bampa/ Huri mo, uni kun ta itapa mo: aLuthan dhala Shubal dhala Sib/uun dhala Ana mo.

30 Dishun dhala Iisar dhala Dishan uni gwansan ita itapa gi 'Kwani Huri mo isi me'da bas buni kun tana uni mo e Pan Si/iir mo.

31 Uni gwansan ita imalik mmoji/a ji e bampa/ Pan Aduum mo ntwa/a/ ka malik'denj kamu/ diki ji/a ji apo/ 'Kwani ma Israyiil mo be.

32 Baala/ a'di jin ta ya/ ma Ba/uur mo a'di ijiki'da ji mo apo/ Pa Aduum mo dhali 'penj kuman bampam piti yuk kunu gway ka Dinhaabah mo.

33 Baala/ a'di iwuki'd mo dhala Yubab jin ta ya/ ma Saarah 'pena Busrah mo tani a'di ijiki'da ji i embul piti mo.

34 Yubab a'di iwuki'd mo dhala Husham 'peni bampa/ 'Kwani gi Pan Temaan a'di ijiki'da ji mo i embul piti mo.

35 Husham a'di wuki'd mo dhala Hadaad jin ta ya/ ma Badaad a'di jin piki 'Kwani Midyaan e mo e bampa/ 'Kwani Pam Muwab mo tani a'di ki ji/a ji i

embul piti mo dhali gway 'penkuman bampam piti mo tani a'di yuku gway ka Awiit mo.

³⁶ Hadaad a'di iwuki'd mo dhala Samlah 'pena Masriigah a'di ijiki'da ji i embul piti mo.

³⁷ Samlah a'di iwuki'd mo dhala Sha/uul 'pena Rahubut 'peni 'kwani Yi'den Kumma/ ma Elpuraat mo tani a'di ijiki'da ji i embul piti mo.

³⁸ Sha/uul a'di iwuki'd mo dhala Baalhanaan a'di jin ta ya/ ma Akbuur a'di ijiki'da ji i embul piti mo.

³⁹ Baalhanaan a'di jin ta ya/ ma Akbuur a'di iwuki'd mo dhala Hadaad a'di ijiki'da ji i embul piti mo dhali gway gi 'penkuman bampam piti mo tani a'di iyukkunu gway ka Pa/u mo. Ash yukkunu gway ka Mahithab/iil mo a'di jin ta 'bwa/ ma Mathrid mo a'di jin ta 'bwa/ ma Maadahab mo.

⁴⁰ Uni gwansan ita gway itapa uci ma Iisu mo isi me'd jin tana uni awak buni mo dhali mon'kom buni jin 'kona uni mmoyer mo gway ki she/ ki she/ mo. Itapa ita iTimnaa/ mo dhala Alwaah mo dhala Yatiit mo.

⁴¹ Uhulibaamah dhala Iilah dhala Pinun mo.

⁴² Ganaas dhala Temaam dhala Mibsar.

⁴³ Majdi/iil dhala Iraam uni gwansan ita itapa 'Kwani Aduum (a'di Iisu jin ta'da baba gi 'Kwani Aduum mo) mo isi me'd mon'kom buni mo e mony'cesh jin takina uni mo be.

37

¹ Yakuub ca'bki'd mo e mony'cesh jin takina coma ca/ apo/ mo e bampa/ gi Panj Kanaan mo.

² Yansan a'di ita gwo jin beledhu goma wak ma Yakuub mo.

Yuusup a'di 'kona yili 'kume'd i'ce'dka pesu/ apo/ mo me'd jin urkina a'di ama'diny ka'bal nyakki ikam mo. A'di ta'da 'ci nyakki iya/ ma Bilhah dhala Silpah mo uni kun ta up ki com mo, dhala Yuusup kalki'da ris gwon thus kun thama ikam a'di imii mmotor ababam buni mo.

³ Dhala Israyiil a'di enki'da Yuusup kagahara mmobol ucim pitin tiya e mo haali/ a'di ta ya/m piti jin tana a'di ka dhan piti mo. Dhali a'di shoki a'di burrynen turga/ jin tur ma bi ki tur mo.

⁴ Hili ki ikam parki mo e ka babam buni enki a'di kagahara mo mmobol ikam piti e mo tani uni shi/ki a'di i e mo dhali 'te bwa mmotora tor nyakki a'di ki mon'ku'th is mo be.

⁵ Dhala Yuusup shu'bki jan mo dhali ki a'di torki ikam gwo mo tani uni ki thisi 'cur 'pen ishi/ki a'di i e ki nyanye/ mo.

⁶ A'di oki uni gwo mo ki: Ciki gwony jan jin shu'bka/ mo ma.

⁷ Hili mo mo ma, ana 'kokina mmodek dekken pos e bwam bunto mo dhali hili mo mo ma, dekken pos pem a'di icuki mis mo dhali dosh ka ji sho'k mo dhali hili mo mo ma, dekken pos bum uni tulki isi montal 'de/ iijim pem mo dhali goj is ka 'cesh mmoluj dekken pos pem mo.

⁸ Ikam piti o a'di gwo mo ki: A/e ka jin gana/ mini ji/a ji apo/ aman mowa? Walla a/e mini ta tapa apo/ aman mowa? Wakan uni shi/ki, a'di i e ki nyanye/ mo gom gwony jan piti mo dhali gom gwom piti mo.

⁹ Dhali yan'ko'd a'di shu'bki jana kamu/ mo dhali torki a'di ikam mo dhali o gwo mo ki: Hili mo mo ma aha/ shu'bkina jana kamu/ mo dhali hili mo mo ma, atente/ dhali appe mo dhali acul kun 'koni 'kume'd i'ce'dka 'de/ apo/ mo tani uni 'kokin mo mmogoj is ka 'cesh mo mmoluj aha/ mo be.

¹⁰ Hili ki a'di torki 'pemen jan yan ki com mo dhali ikam piti mo tani ababam piti a'di ikucurki a'di mo dhali o a'di gwo mo ki: Jan yan ta'da ta mo

jin shu'bkina /e mo? A/aha/ dhali kwan dhali ikam pini ka jin gana/ mina iiku/ mo dhali 'ko is bam ki gonjo/ ibwambori /e mowa?

11 Dhali ikam piti uni taca bwa gom a'di mo hili ababam piti a'di idhuki gwo gwansan ibwa mo.

12 Dhali ikam iikin mo mmociya ma'diny ka'bal gi com ashon dhii/i'd mo mmo'dish Pan Shakiim is mo.

13 Dhala Israyiil oki'da Yuusup gwo mo ki: Ikam pini 'koki ura ma'diny ka'bal mo mmociya shon dhii/i'd mmo'dish Pan Shakiim is mo 'taa? Yayu/ mo, aha/ mina hash /e i uni mo. Dhali a'di tho'kki a'di gwo mo ki: Aha/ dina imahan mo be.

14 Wakan a'di oki a'di gwo mo ki: Yayi mo shwane/ dhali par mo e mo wakki/ ikan 'kon ki 'bore/ mo dhali nyakka ma'diny ka'bal mo dhali kalaa/ gwo ka nyan'ko'd mo. Wakan a'di hashki a'di mo 'peni embul wosh ma Habruun mo dhali a'di pu'dki'd mo e Pan Shakiim mo.

15 Dhali wathin kamu/ gamki a'di mo mmomanaskina a'di mo e mombwaasho mo dhali wathi/ dotki a'di gwo mo ki: /E napkina tinta mo?

16 Aha/ napkina ikam pem mo. A'di oki gwo kan mo mmo/o ki: Toraa/ mo ma, aha/ 'thona /e mo, mane mom buni jin cina uni ama'diny ka'bal ashon dhii/i'd mo?

17 Dhali wathi/ tho'kki a'di gwo mo ki: Uni iikin mo haali/ aha/ cika tor jin torkina uni mo mmo/o gwo mo ki: Dhalki ana iina mo e Pan Duthan mo. Wakana Yuusup bathki ikam isho'k mo dhali gam uni e Pan Duthan mo.

18 Uni mishki a'di 'pena dhana/ ki si'd si'd mo dhali ntwa/a/ ki a'di pu'dki'd mo mmo'dish uni is mo tani uni gamki 'twa/ 'kup mo mmo'kosh a'di jwa mo.

19 Uni oki gwo ka rem'kup mo ki: Amanshu'b jana acaan a'di ipu'dki'd mo.

20 Iiyu/ mo shwane/ dhalki ana 'kosha a'di jwa mo dhali bit a'di mo e jis 'denj kamu/ mo dhali yan'ko'd ana mina o gwo mo ki: A'di 'kosha tongwapi/ jin shwan ma nyor jwa mo dhali ana mina par mo e mo 'pemen jan piti yan midi wakata mo?

21 Hila Ra/ubiin cikki gwo yan mo tani a'di 'cukki a'di mo 'peni me'd buni mo dhali o gwo mo ki: Dhalkina ki 'kosh mondiki/em piti mo.

22 Dhali Ra/ubiin oki uni gwo mo ki: Dhalki a'diya bas ki po mo. Biti a'di e jis yi'de/ gwan kun 'kon e mombwaasho mo hili dhalki me'd bum ki dhu apo/ a'di mo, ki a'di midi 'taki ye a'di mo 'peni me'd buni mo mmowar a'di is mo goma babam piti mo be.

23 Wakana Yuusup me'd jin pu'dkina a'di e ikam piti mo tani uni 'cukki a'di burrinyen turga/ 'peni is mo a'di jin ta burrinyen turga/ jin tur ma bi ki tur jin hi'thkina a'di mo.

24 Dhali uni bu'thki a'di mo dhali bit a'di e jis yi'de/ mo. Jis yi'de/ yan a'di idi bwa 'te/ mo, yi'denj kamu/ yisa di'd nycineya.

25 Dhali uni 'kokina 'cesh mo mmoshwa to mo dhali uni 'de'kki em buni 'kup ki mis mo tani uni parkina dhana nul'kup 'Kwani ma Isma/iil e mo mmopu'du/ mo 'peni Pany Jil/aad mo nyakka ris kalman buni mo mmokala 'bi'c mo dhala 'bi'c 'peni cwa jin yuku ka balsam mo dhali cwa jin yuku ka murr mo mmo/iikina uni mo mmo/ii e bway buni bway Pa Masir mo mmokal uni ka lungu'b mo.

26 Dhala Yahuuda oki ikam gwo mo ki: Miim 'boro'd jana mina ana gam mo wakki/ ana mina 'kosh a'di jwa mo dhali di'ka bas piti e mo.

27 Iiyu/ mo dhalki ana yola a'di mo e 'Kwani ma Isma/iil mo dhali dhalku/ me'd bana ki dhu apo/ a'di mo haali/ a'di ita'da kam bana mo, a'di jin ta bungwar is bana mo. Dhali ikam piti cikina hirdhe/ ki gwom piti mo.

²⁸ Dhali 'Kwani Midyaan kun ta imanyol to mo si'da/iikin ki iimpe mo dhali dirkina Yuusup ka pije/ mo dhali 'de'k a'di ka pije/ 'peni jis yi'de/ mo dhali yolki a'di mo e 'Kwani Isma'iil mo ka guurush jin 'koni iss 'de/ mo a'di jin ta 'dolkon kush mo dhali uni suskina Yuusup bway Pa Masir mo be.

²⁹ Ka Ra/ubiin dokki'd ka nyan'ko'd e jis yi'de/ mo tani dhali para Yuusup e ki a'di diki di ijis yi'de/ mo tani a'di dherki burrinyem piti bwa mo be.

³⁰ Dhali a'di dokki'd ka nyan'ko'd e ikam piti mo dhali o gwo mo ki: Ari dhuru'c wathi/ a'di piki'd mo dhali aha/ mo mane mo jin miga/ ya mo?

³¹ Uni bu'thki burrinye/ ma Yuusup mo dhali 'kosh mi jwa mo dhali bi burrinyen turga/ yan eya bas mo.

³² Dhali uni ki hash burrinyen tura bi yan mo dhali kali a'di eya babam buni mo dhali o gwo mo ki: A'di yan gamkina aman mo. Pari a'di e mo shwane/ wakki/ a'di ta ji gi ya/m pini mo walla yisa.

³³ Dhali a'di nyithki a'di mo dhali o gwo mo ki: A'di ta burrinyen turga/ gi ya/m pem mo. A'di be 'koshkina tongwapi/ mo 'te/ be. Gwo jin minu dhan goma Yuusup piyi'd mo haali/ a'di idherkina to bwa ka gwapi/ mo.

³⁴ Dhali yan'ko'da Yakuub dherki burrinyem piti bwa mo dhali dek burrinyen shawaal e empa'd piti mo dhali ko gom ya/m piti acim ka ris ris mo.

³⁵ Aris iya/m piti dhali aris i'bwa/m piti cuki mis mo mmomalas a'di mo tani hili a'di ushki'd mo ki a'di minu malas mo dhali o gwo mo ki: Yisa. Aha/ mina ya ka lungu'b eya Haawiya mo gom ya/m pem mo. Kon gana/ jin gwona ki kony jwa mo a'di idosh 'peni o'd kan mo. Wakan com gwoki'd gom a'di mo be.

³⁶ Ki ari embul mo ari'ceenne/ mo tani 'Kwani Midyaan yolki a'di mo e Pa Masir mo eya Puthipar a'di jin ta wathi/ jin cil ma askar goma Pirawn mo a'di jin ca'd ki 'kwani ma mee kun jina ji mo be.

38

¹ A'di bu'thki embul ka cim caan mo ka Yahuuda a'di yaki'd ka lungu'b mo 'peni ikam piti mo dhali a'di tu'kki'd mo e monkamu/ mo dhali gam Wathi/ gi Pa Adullaam 'kup mo a'di jin yukkunu gway ka Hiirah mo.

² E mun mo tani aYahuuda mishki 'bwa/ gi 'Kwaniŋ Kanaan mo jin yukkunu gway ki Shuu/ mo. A'di mashki a'di mo dhali ya gu'b ma yim mo be.

³ Dhala yim bwaaki'd mo dhali dho'th ya/ mo dhali a'di ki yuk a'di gway ka Iir mo be.

⁴ Dok/e ayim bwaaki'd mo dhali dho'th ya/ mo dhali ayim ki yuk a'di gway ka Unan mo be.

⁵ Naskina/ dok/e ayim dho'thki ya/ mo dhali ayim ki yuk a'di gway ka Shiilah mo. Ayim diki'd e Parŋ Kasiib mo me'd jin dho'thkin ma yim a'di mo be.

⁶ Dhala Yahuuda si'da/ gamki'da 'bom goma Iir jin ta'da bwanyaram piti mo, dhala yim yuku ka Thamar.

⁷ Hili Iir jin ta'da bwanyara/ ma Yahuuda mo tani a'di ta thus ki thus e jis/e gi Tapa mo dhali Tapa 'koshki a'di jwa mo.

⁸ Dhali yan'ko'da Yahuuda oki'da Unan gwo mo ki: Mashi asha kam pini mo mo ma, dhali miiyi mii mo jin minu mii mii mo gom marem pini mo, dhali cis uci goma kam pini mo.

⁹ Hila Unan nyithki'd ka 'ci jin mina a'di icis mo tani midi diki ta jim piti mo. Wakan ki a'di yaki bway gu'b e asha kam mo tani a'di wolki'da 'co/ piti eya 'cesh mo isi ciki/ ki a'di midi diki cis uci goma kam mo.

¹⁰ Dhali mii jin miikina a'di wakan mo tani a'di diki 'bor e jis/e gi Tapa mo dhali a'di si'da/ 'koshki a'di jwa mo.

11 Dhala Yahuuda oki'da Thamar gwo mo a'di jin ta'da mar pitim 'bomi gwo mo ki: Diyi ka dhalla/ e gu'b ki cim mo ntaga Shiilah jin ta ya/m pem midi ca mo. Haali/ a'di ko/ki is mo oki a'di midi wu mo me'd ikam mo. Wakana Thamar a'di yaki'd mo dhali ca'b e gu'b gi com mo be.

12 N'ko'd mo tani mo pu'du'd mo ki 'bwa/ ma Shuu/ jin ta asha Yahuuda a'di iwuki'd mo dhali ka Yahuuda malaskunu mo tani a'di yaki'd mo e Pan Timnah mo eya manhil ka'bal piti mo a'di dhala mugum piti ka Hiirah mo jin ta Wathi/ gi Pa Adullaam mo.

13 Dhali ka Thamar torkunu gwo ka mar piti a'di yaki'd mo e Pan Timnah mo mmo'cith ka'bal piti amur mo tani,

14 ayim 'cukki burrinyem ma dhallam piti 'peni is mo dhali hi'th burrinye/ jin kumu 'kup mo dhali 'tam is ma yim ki burrinye/ mo dhali ca'b e shemen bway ma Eenaayim a'di jin diki'd 'kup ki bway gi Pan Timnah mo haala yim mishki mo mo ka Shiilah a'di caki'd mo dhali a'di ayim dinuki ci ki a'di mmomash mo.

15 Ka Yahuuda parki'da yim e mo tani a'di kulumki'da yimi bwa mo oki a'di ta'da 'bom cal mo haali/ ayim a'di kumki jis/em piti mo.

16 A'di yaki'da yim mo e shemen bway mo dhali o a'di gwo mo ki: Yayu/ mo dhalki aha/ yana /e gu'bi is mo, haali/ a'di diki misha yim mo ki a'di ta'da mar piti mo. Ayim ki o a'di gwo mo ki: Atinta a'di imina /e ici aha/ mo ki /e mini yayu/ i aha/ mo.

17 A'di ki tho'k a'di gwo mo ki: Aha/ mina ciki /e ari mi mo 'peni bwaman ma ma'diny ka'bal mo. Dhala yim ki o a'di gwo mo ki: Mina /e diki ciyaa/ jamas mii mo ntagi /e mini hashi a'di mowa?

18 A'di tho'kki gwo mo ki: Jamas mii gi wakata imiga/ ci /e mo? Ayim tho'kki gwo mo ki: To me'd pini dhali dhen'dhenye/ jin 'kon ma ashu ipesu/ mo dhali cwa jin di'di me'd pini mo. Wakan a'di ciki'da yim uni mo dhali ya ayim gu'bi is mo dhali ayim bwaaki'd ki a'di mo be.

19 Dhali yan'ko'da yim cuki mis mo dhali ya mo dhali ayim bu'thki burrinye' kup piti mo dhali hi'th burrinyem ma dhallam piti i is mo.

20 Ka Yahuuda hashki ari mi ka mugum piti jin ta Wathi/ gi Pa Adullaam mo jin mina a'di bu'th jamas to mii 'peni me'd ma 'bom mo tani a'di diki gama yim mo be.

21 Dhali a'di dotki 'kwani gi mo yan mo ki: Mane a'bom cal yan mo a'di jin ca'bki'd e shemen bway gi Pa Eenaayim mo? Dhali uni tho'kki a'di gwo mo ki: A'bom cala kamu/ yisa di'di mahana.

22 Wakan a'di dokki'da Yahuuda ka nyan'ko'd mo dhali o a'di gwo mo ki: Aha/ dinaki gama yim mo dhali 'kwani gi mo yan o gwo si'da/ ki a'bom cala kamu/ yisa di'di mahana.

23 Yahuuda tho'kki gwo mo ki: Dhalka yim dhu to gwan gom is pitin gana/ mo isi ciki/ ana mina 'kwani ipe'th mo. /E mishini ki aha/ hashkina ari mi yan mo dhali /e diki gama yim mo.

24 Ko'da ppe kwara n'ko'd mo Yahuuda torkunu gwo mo ka Thamar jin ta'da marem pini a'di lo'bki'di miinyal mo dhali shwane/ ayim a'di bwaaki'da 'ci ki miinyal mo. Dhala Yahuuda oki gwo mo ki: Guya ayim ka piye/ mo dhali dhalka ayim cidhu ki o'd mo.

25 Dhali me'd jin 'koyunu mmokala ayim ka piye/ mo tani ayim hashki gwo eya mar pitin gwach mo ki: Wathi/ yan jin cikina to gwansan mo tani a'di ta wathi/ jin bwaakika/ a'ci mo. Dhala yim oki gwo mo ki: Nyithi jamas to gwansan mo aha/ 'thona /e mo. To gwansan uni ta kuma ja mo tome'd dhala dhen'dhenye/ kun 'kon ma shu ipesu/ mo dhali cwa mo.

²⁶ Dhali yan'ko'da Yahuuda nyithki uni mo dhali o gwo mo ki: Ayim a'di iboli aha/ e ki mii ma kar/ e e mo haali/ aha/ dinaki ciya yim ki ya/m pem ka Shiilah mo. Dhali a'di diki ish nyakka yim dok/ e mo be.

²⁷ Dhali ki mo pu'dki'd mo jin min ma yimi dho'th mo tani ushi uci 'koni su/ e bwa ma yim mo be.

²⁸ Dhali ka yim shwan ma 'ci mo tani jan tal 'de/ karki me'd ka pije/ mo dhali a'bom jin karu mmowotha woth mo gom mondho'th up mo tani a'di dekki me'd piti ka thus 'per mo mmo/o gwo mo ki: Yansan a'di ipu'dki'di twa/ a/ mo be.

²⁹ Hili ki a'di dokki me'd piti bway bwa mo tani hili mo mo ma, akam piti pu'dki'd ka pije/ mo dhala yim ki o gwo mo ki: Awanyam pini jin pu'dkina/ e ka pije/ ki is pini mo tani isa wa'da. Wakan a'di iyukkunu a'di gway mo ka Paaris mo.

³⁰ Dhali yan'ko'd akam pu'dki'd mo ka thus 'peri me'd piti mo dhali gway piti yukkunu ka Saarah mo be.

39

¹ Dhali aYuusup a'di isuskunu ka lungu'b e Pa Masir mo dhala Puthipar jin cil ma askar goma Pirawn dhali wathi/ jin cil ma askar kun jina ji mo gom 'Kwani Masir mo a'di yolki a'di 'peni 'Kwani Isma/iil mo uni kun kalki a'di ka lungu'b 'peni mun mo.

² Dhali Tapa nyakki di ka Yuusup mo dhali a'di warki'd ki wathi/ jin hana mii me'd mo dhali a'di diki'd e gu'b gi tapam piti jin ta Wathi/ Masir mo.

³ Dhali tapam piti mishki mo mo ki Tapa nyakki di ki a'di mo dhali ki Tapa rakki'da ris mii jin mina a'di ha me'd mmorusa/ rus mo.

⁴ Wakana Yuusup gamki mii ma 'the e jis/em piti mo dhali buk a'di 'pen ka pije/ mo dhali a'di ki kar a'di mmota amanhil to gom gu'b mo dhali kar a'di ki tapa apowa ris tom piti jin tana a'di mo be.

⁵ Pena cim yan jin karkina a'di a'di mo mmota amanhil to gom gu'b piti mo dhali kar a'di ki tapa apowa ris tom piti jin tana a'di mo tani Tapa 'borki 'kwani gi gu'b gi Wathi/ Masir mii mo gom gway ma Yuusup mo. Dhali mom'bor mii gi Tapa diki'da po/ aris to 'baar mo kun tana a'di mo e bwan gu'b mo dhali e bwam bunto mo.

⁶ Wakan a'di dhalki'da ris to 'baar mo e me'd ma Yuusup mmohil mo dhali mmodhalkina a'di a'di e me'd piti mo tani a'di yisa shwana jwa mo gom tonj kamuwa, hili jasi gom tonte/ jin shwakina a'di mo.

Dhala Yuusup njala/ 'bora jaro/ ime'da/ a'di hili mo ki jis/e jin yesayes mo.

⁷ Dhali ki ara cima kamu/ mo tani a'bom gi tapam piti, ayim 'cemi'dki'da Yuusup ki e mo dhali o a'di gwo mo ki: Ishi nyakki aha/ mo ma.

⁸ Hili a'di ushki'd mo dhali owa 'bom gi tapam piti gwo mo ki: Hili mo aha/ dhalkina tapam pem to ime'd mo dhali a'di dina jwa ki shwa mo goma ris to mo e gu'b mo kun dhalkina a'di aha/ e me'd pem mo.

⁹ A'di diki caaca kagahara e gu'b yan mmobol aha/ e mowa. Tonj kamu/ yisa 'tasha a'di aha/ 'twa/ mo yisa hili isi ciki/ is piniñ gana/ mo haali/ /e ta ashim piti mo. Aha/ mina mish dhan miinthus yan mii mo wakan mana dhali mii miinthus apowa Arungimis mowa?

¹⁰ Ba dhala yim torki'da tor ka Yuusup isa yempa/ yempa/ mo dhali a'di 'tena bwa mmocik gwo ma yim mo mmo/isha ayim mo walla mmonyak ca'b ka yim mo.

¹¹ Hili ka cimi 'deñ kamu/ mo me'd jin yakina a'di gu'b mo mmomiiya tu'c piti mo dhali 'kwanin tiya yisa 'koni bwan gu'b yisa uni kun miina tu'c e gu'b mo tani,

¹² ayim bu'thki a'di e burrinyem piti mo mmo/o a'di gwo mo ki: Ishi nyakki aha/ mo. Hili a'di dhalki burrinyem piti e me'd ma yim mo dhali gus mo dhali pu'd ka pije/ 'peni gu'b mo.

¹³ Dhali ka yim parki mo e mo ki a'di dhalki burrinyem piti e me'd ma yim mo dhali pu'd ka pije/ 'peni gu'b mo tani

¹⁴ ayim yuk 'kwani gi kun gu'b ma yim mo dhali o uni gwo mo ki: Hili a'di guyi Wathi/ Ibraan yan e bwam ana mo mmosor ana mo. A'di seyi bwan gu'b mo dhali di ki gwo ibwa mo mmo/ish nyakki aha/ mo dhali aha/ cuukina ki dhan 'twa/ jin caaca mo.

¹⁵ Dhali ki a'di cikki gwo ki aha/ 'deka 'twam pem ki mis mo dhali cuu mo tani a'di dhalki burrinyem piti i aha/ mo dhali gus mo dhali pu'd ka pije/ 'peni gu'b mo.

¹⁶ Dhali yan 'ko'da yim karki burrinyem piti e me'd ma yim mo ntagi tapam piti pu'dki'di pa mo.

¹⁷ Dhali ayim tor ki a'di gwo jin nyakka'd mo mmo/o ki: Wathi/ Ibraan yan jin ta cinjina/ a'di jin suskina /e ibwaman ana mo pu'dki'di aha/ mo mmosor aha/ mo be.

¹⁸ Hili me'd jin 'de'kkika/ 'twam pem 'kupki mis mo dhali cuu mo tani a'di dhalki burrinyem piti e aha/ mo dhali pu'd ka pije/ 'peni gu'b mo.

¹⁹ Ki tapam piti cikki gwo 'peni 'twa/ gi ash mo ki: Mii a'dan jin miikina cinjinam pini jan aha/ mo tani anyor piti 'batha'ba'th mo.

²⁰ Dhali tapa ma Yuusup bu'thki a'di mo dhali kar a'diya sijin mo e mo jin ta'kkunu habuus ma malik nycine/ mo dhali a'di diki'da sijin imun mo.

²¹ Hili Tapa a'di nyakki di ka Yuusup mo dhali tor a'di mo/en piti jin telu sho'k mo dhali ci a'di mii ma 'the i jis/e ma manhila sijin mo.

²² Dhali amanhila sijin ciki'da Yuusup gwo ime'd mo mmota amanhil 'kwani ma sijin i'baar mo uni kun 'kokina sijin mo. Dhali aris mii gunn kun miinu mo tani a'di ki mii uni mo.

²³ Dhali amanhila sijin mo tani a'di cina hirdhe/ yisa ki mii gunn kun miin ma Yuusup mo mmohila hil mo haali/ Tapa nyakki di ki a'di mo dhali eya ris to gunn kun miina a'di mo tani Tapa dhuki uni mmorusa/ rus mo be.

40

¹ Ka cima kamu/ 'ko'di mii yan mo tani tapa jin karu mmohil 'kwani kun miina tu'c e gu'b ma malik gi 'Kwani Masir mo dhali aman'cok maam piti mo tani uni thamki to mii mo gom tapa malik Masir buni mo.

² Dhala Pirawn shwaki'da nyor gom 'kwani kun can ka askar piti su/ gwan mo, tapa jin karu mmohil 'kwani kun miina tu'c e gu'b ma malik mo dhali aman'cok maam piti mo.

³ A'di dhuki uni eya sijin mo e gu'b gi wathi/ jin ca'd gom 'kwani ma mee kun jina ji eya sijin mo jin di'di bwan'kwariny mo jin dikin ma Yuusup nycine/ mo.

⁴ Wathi/ jin ca'd gom 'kwani ma mee kun jina ji mo tani a'di kanki'da Yuusup gwo mo gom uni mo dhali a'di miiki uni to mo dhali uni 'kon ki mondek is mo ki sule/ sule/ ntaga cima kamu/ mo.

⁵ Dhali mon'thinya kamu/ mo tani uni su/ shu'bki jan mo a'di jin ta tapa gom 'kwani kun miina tu'c mo dhali a'di jin ta'da man'cok maa goma malik 'Kwani Masir mo uni kun 'kokin e bwan'kwariny ma sijin mo uni ita gi jan buni ki she/ ki she/ mo dhali 'pemen jan buni 'kon ki she/ ki she/ mo.

⁶ Ka Yuusup pu'dki'di uni mon'thamo/ mo tani dhali parki uni e ki uni tocu 'kus mo.

7 Wakan a'di dotki 'kwani ma mee ma Pirawn uni kun nyak 'ko ki a'di e mo jin dekuwa dek mo e gu'b gi tapam piti mo ki: Atinta itaka um jis/em bum ka lungu'b kan ganne/ mo?

8 Uni torki a'di gwo mo ki: Aman takina ki jan mo dhali wathi/ piyi'd jin midi tor 'pemen buni mo. Dhala Yuusup thokki uni gwo mo ki: Dina mo jin toru 'pemen jan ki ta kuma Arungimis mowa? Tori uni ki aha/ mo ma aha/ 'thona um mo.

9 Wakan tapa jin karu mmohil 'kwani ma tu'c torki jan piti ka Yuusup mo dhali a'di oki a'di gwo mo ki: E jan pem mo tani cwalmana mura'th uni 'kokini bwambori aha/ mo.

10 Dhali apo/ cwalmana mura'th mo tani abi karkini kwara e a'di mo dhali me'd jin lu/kina a'di mo tani jandim piti ca'bki'd ki tup tup mo dhali atora mura'th iski'd mo jin minu 'cith mo.

11 Akubbaaya ma Pirawn diki'd e me'd pem mo dhali aha/ bu'thkina amura'th mo dhali nyu/ uni e bwam ma kubbaaya ma Pirawn mo dhali karka/ akubbaaya e me'd ma Pirawn mo.

12 Dhala Yuusup thokki a'di gwo mo ki: 'Pemen jan a'dan be: cwalman ma mura'th kun 'koni kwara mo tani a'di ita'da cimi kwara mo.

13 E bwaman ma cimi kwara yan mo tani aPirawn midi 'de'k 'kup pini ki mis mo dhali wari /e is mo mmodoka tu'c pini ka nyan'ko'd mo dhali /e mini dhuwa Pirawn akubbaaya e me'd piti mo me'd jan dhamo/ mo me'd jin karkunu /e mmota tapa gom 'kwani kun miina tu'c mo.

14 Hili /e mini mii kayaa/ e mo ki mii midi mii ha me'd mo gom /e mo dhali miyi aha/ ki mii gi bwan'kush mo, aha/ 'thona /e mo jin mina /e mii pika Pirawn gwo yan i is gom aha/ mo dhali wakan /e mini 'cukaa/ ka pije/ 'peni gu'b yan mo.

15 Haali/ aha/ ka jin gana/ kwalkunu mo 'peni Pan 'Kwani Ibraan mo dhali e mahan si'da/ mo tani aha/ dinaki mii ton' kamu/ mo jin mina uni kar aha/ e jisa 'tum yan mo.

16 Ki tapa jin ta'da man'co'k maa mo parki 'pemen jan yan e ki uni ha me'd mo tani a'di oki'da Yuusup gwo mo ki: Aha/ si'da/ tana gi jan mo. Maan'kuthu'd kun kalka/ ka nura/ ikwara mo tani uni 'koni 'kupi aha/ mo.

17 Dhali e 'kupan ma nura/ mo tani aris maan'kuthu'd tana eya ris ka ris mo goma Pirawn mo hili aris 'dii 'kokin mo mmoshwa uni mo 'peni bwam ma nura/ e 'kupi aha/ mo be.

18 Dhala Yuusup thokki a'di gwo mo ki: 'Pemen jan a'dan be: anura/ kun 'koni kwara mo tani a'di ita'da cimi kwara mo.

19 E bwaman ma cimi kwara yan mo tani Pirawn midi 'de'k 'kup pini ki mis mo 'peni /e mo dhali /e minu shir ka 'cajala/ apo/ cwa mo dhali aris 'dii mini 'ka shum gi bungwar is 'peni /e mo.

20 Ka cimi kwara a'di jin ta'da cim jin dhodhuwa Pirawn mo tani a'di yu'ki'da yuk jin yuku 'kwani mmotul 'kup mo goma ris 'kwanim piti kun miina tu'c mo dhali a'di 'de'k'ki 'kup gi wathi/ jin ta tapa gom 'kwani ma tu'c gi gu'b ma malik mo dhali 'kup gi wathi/ jin ta'da man'co'k maa mo e bwaman 'kwanim piti kun miina tu'c mo.

21 A'di warki wathi/ jin ta tapa jin karu mmohil 'kwani ma tu'c gi gu'b ma malik is mo dhali a'di karki'da kubbaaya e me'd ma Pirawn mo.

22 Hili a'di shirki tapa jin ta'da man'co'k maa 'kus ka shi/ mo me'd 'pemen jan jin torkin ma Yuusup uni mo.

23 Dhali wathi/ jin karu mmohil 'kwani kun miina tu'c e gu'b ma malik maca/ ya'di ka aYuusup e mo yisa hili a'di thiski a'di e mo be.

41

1 'Ko'di yili su/ gwansani 'baar mo tani P̄irawn a'di shu'bki jan mo ki a'di doshki'd e shemen Yi'deñ Kumma/ Niil mo.

2 Dhali hili mo mo ma, bip 'koni pesu/ kun pikin ka pije/ 'peni kumma/ yi'de/ mo kun yesa bungwar is ki yes mo dhali kun 'thika'thik mo dhali uni shwakina lupe/ mo.

3 Dhali hili mo mo ma, bip 'koni pesu/ kun 'bwaṭala'bwaṭal mo dhali kun korakor mo pikin mo 'peni Yi'deñ Kumma/ Niil mo dhali doshkin mo nyakki bipa tiya mo e yana gap Yi'deñ Kumma/ Niil mo be.

4 Dhali uni gwansan kun 'bwaṭala is ki 'bwaṭal dhali kun korakor mo tani uni 'kaki uni gwansan kun yesa bungwar is ki yes mo dhali kun 'thika'thik mo. Dhala P̄irawn a'di merki e mo be.

5 Dhali a'di 'ce'dkina e mo dhali shu'bki jan jin 'kon ma po/i su/ mo dok/ e dhali hili mo mo ma, awusham pos 'koni pesu/ mo kun dwama e ki dwam mo dhali kun 'bora'bor mo uni cakin mo e cwalman 'de/ nyakki uni ma 'de/ 'dete/ gwan mo.

6 Dhali hili mo mo ma, η'ko'd unim pesu/ gwan waski 'kup mo, uniy korga/ dhali kun 'ce'dkina 'ce'd ki 'tham gi mom'pesho'k mo.

7 Dhali pos kun tawash ma wusha/ ki tawash mo tani uni a'di iloski pos kun 'koni pesu/ kun dwam ma wusha/ e ki dwam mo dhali kun bocora e ki bojor mo. Dhala P̄irawn merki e mo dhali hili mo mo ma a'di ita jan mo be.

8 Wakan mon'thamo/ mo tani shi/in piti to'ckunu 'kus mo dhali a'di hashki gwo mo dhali yuka/ yuk goma ris ṅaariny 'Kwani Masir mo kun ṭori gwo ki 'twañ gwocon mo dhali aris 'kwanin yukga/ mo, dhala P̄irawn ṭorki uni jan piti mo. Hili jan 'deñ kamu/ yisa di'da a'di jin mishi 'pemen jan ka P̄irawn ṭor mo.

9 Dhali yan'ko'd tapa jin karu mo mmohil 'kwani gi gu'b ma malik oki'da P̄irawn gwo mo ki: Aha/ kakina miim pem jin thamkika/ e shwane/ mo.

10 Ka P̄irawn shwaki'da nyor apo/ 'kwanim piti kun dhuna a'di atu'c mo dhali kar aha/ dhala man'coḳ maa e mo jin 'tashuwa 'tash 'twa/ mo e gu'b gi a'di jin ji'da ji mo tani,

11 aman su/ shu'bkina jan ka cim 'de/ mo mon'thiny yin mo a'di dhali aha/ aman ka 'dete/ 'dete/ takina ki jan mo kun 'kona 'pemen buni ki she/ ki she/ mo.

12 Dhuru'c wathi/ Ibraan yan diki'd nyakki aman imun mo a'di jin ta'da manmi wathi/ jin ca'da tu'c mo gom a'di jin ji'da ji mo. Dhali ki aman a'di ṭorkina a'di gwo mo tani a'di ṭorki 'pemen jan bam mo. A'di theke'thki 'pemen jan tor ki 'bore/ e 'kwani su/ gwan isi me'd jan buni mo be.

13 Dhali me'd jin ṭorkina a'di a'di ki aman mo tani wakan a'di pu'dki'd ki 'pemen gana/ mo dhali aha/ warkunu is mo mmodoka maktab pem mo dhali aman'coḳ maa a'di ishirkunu ka 'cajala/ mo.

14 Dhala P̄irawn a'di hashki gwo mo dhali yuka Yuusup mo dhali uni suski a'di ki 'ta'b mo 'peni jisa 'tum mo dhali ki a'di 'thiki'da mur 'kup mo dhali ak burriyem piti e mo tani a'di pu'dki'di bwambor ma P̄irawn mo be.

15 Dhala P̄irawn oki'da Yuusup gwo mo ki: Aha/ takina gi jan mo dhali wathiy kamu/ yisa di'da jin mishi 'pemen piti ṭor mo dhali aha/ cikina gwo mo gom /e mo ki me'd jin cikina /e gwo gom jan mo tani /e mishki 'pemen buni ṭor mo be.

16 Yuusup thokki'da P̄irawn gwo mo ki: A'di yisa ta aha/ mo. Arumgimis midī ciya P̄irawn gwon thok jin ha me'd ki han gana/ mo.

17 Dhala P̄irawn oki'da Yuusup gwo mo ki: Hili mo mo ma e jan pem jin shu'bka/ mo tani aha/ doshkina apowa gap Yi'deñ Kumma/ Niil mo.

18 Dhali bip 'koni pesu/ kun 'thika'thik mo dhali kun yesa bungwar is ki yes mo pikin ka pije/ 'peni kumma/ yi'de/ mo dhali uni shwakina lupe/ mo.

19 Dhali bip 'koni pesu/ kun bathi uni isho'k mo kun hatha'ko'd ki ha'th mo dhali kun 'bwatala is ki 'bwatal mo dhali uni korakor mo uni kun wakan yisa mishkika/ me'd 'denj kamu/ e bampa/ Masir mo.

20 Dhali uninj korga/ dhali uni bip kun 'bwatala is ki 'bwatal mo tani uni 'kaki bip pesu/ gwan kun 'thika'thik kun 'koni twa/a/ mo.

21 Dhali me'd jin 'kakina uni uni mo tani wathinj kamu/ yisa midu 'taki mish mo mowa mo jin 'kakina uni uni mo haali/ uni i'kokin ki 'bwatal kan naskina/ 'pena mun'kup mo dhali yan'ko'd aha/ merkina e mo.

22 Aha/ si'da/ mishkina e jan pem mo awusham pos kun 'koni pesu/ mo uni kun cakin mo eya cwalman 'de/ nyakki uni ma 'de/ 'dete/ gwan mo kun dwama e ki dwam mo dhali kun 'bora'bor mo.

23 Dhali awusham pos kun 'koni pesu/ uni ku'thkin mo mmokora kor mo dhali kun 'ce'dkina 'ce'd sho'k ki 'tham gi mom'pesho'k mo waski 'kupi 'ko'di uni mo.

24 Dhali uni wusham pos gwan kun korakor iloskina wusham posa dwamga/ gwan kun 'koni pesu/ mo. Dhali aha/ torkina aris njaari/ gwan gwo mo uni kun tori gwo ki 'twanj gwocon mo, hili wathinj kamu/ yisa di'da jin midu 'taki be'daa/ gwo 'pen ka pije/ ki 'bore/ mo.

25 Dhali yan'ko'da Yuusup thokki'da Pirawn gwo mo ki: Jan ma Pirawn mo tani a'di tal 'de/ mo be. Arungimis be'dki'da Pirawn gwo mo gom to jin murkina a'di i'dish 'twa/ mmomii mo be.

26 Bipa 'borga/ kun 'koni pesu/ mo tani uni a'di ita yil kun mini 'ko ipesu/ kun mini 'bora'bor mo dhali awushan dwamga/ kun 'bora'bor mo tani uni si'da/ ita yili pesu/ mo, jan a'di itala 'pen 'de/ mo be.

27 Dhali bip kun 'koni pesu/ kun 'bwatala'bwatal dhali kun korakor mo kun pu'dkini 'ko'di uni mo tani uni a'di ita yili pesu/ mo dhala wusha/ kun tawasha tawash mo tani uni kun ta 'tham gi mom'pesho'k kun 'ce'dkina 'ce'd sho'k mo tani a'di si'da/ ita yili pesu/ jin mina te/ i'kosha 'kosh mo be.

28 A'di a'dan be me'd jin torkika/ /e aPirawn ka Arungimis murki'da tora Pirawn to jin i'disha 'twa/ a'di mmomii mo.

29 Yil imidi 'ko ipesu/ jin mina tonte/ idho'th kagahara mo e bampa/ Masiri 'baar mo.

30 Hili 'ko'di uni mo tani adhan te/ si'da/ midu cu mis i'kosh 'kwani ki yili pesu/ mo dhali aris to kun ishkin kagahara mo tani mina 'kwani inja mo be e bampa/ Masir mo. Adhan te/ midu kup bampa/ 'baar mo.

31 Dhali aris to kun tana 'kwani kagahara minu mol 'ban mo e bampa/ mo gom 'pemen gwon te/ mo a'di jin midu batha/ bathi 'ko'd mo haali/ te/ a'di midu jwaka'adu ki 'bi'th mo.

32 Dhali jan ma Pirawn kun shu'bkina a'di ka 'bukum 'ban mo tani uni ta kun thosonkin ma Arungimis mo dhali Arungimis midu tor uni eya tente/ ki 'dishe/ san mo.

33 Dhali gom gwo gi wakan mo tani dhalka Pirawn a'di kwany wathi/ jin midu ku'th is ki 'cese/ 'cese/ dhali wathi/ jin yukayuk mo dhali kari a'di apo/ bampa/ Masiri 'baar mo.

34 Dhalka Pirawn di'b mii is mo mmodhu 'kwani 'pen ka pije/ mo mmota imanhil tonte/ apo/ bampa/ mo dhali bu'th 'bwanu'b tonte/ kun 'kon ma po/i mudhe'd kun gamkina 'Kwani Masir ka tee yan kun isha tonte/ ka enthus ki yili pesu/ mo.

³⁵ Dhali dhalki uni tula ris tonte/ is mo 'peni yila 'borga/ yan mo kun iyyin mo dhali dhuyi pos e me'd ma Pirawn a'di jin cili mom'bi'th mo gom tonte/ goma ris 'pernkuman bampa/ mo dhali dhalki uni dhu uni mo.

³⁶ Dhali tonte/ minu 'tash 'twa/ mo apo/ bampa/ gom yili pesu/ yan mo jin mina te/ ibita po/ bampa/ Masir mo wakan ki 'kwani kun 'koni bampa/ yan mina te/ diki 'ce'd sho'k mo.

³⁷ Gwo yan 'thinuwa 'cesh mo tani a'di wame'd 'boro'da Pirawn e ki 'bor mo dhali 'kwani si'da/ kun miina tu'c piti 'baar mo.

³⁸ Dhala Pirawn oki'da ris 'kwanim piti kun miina tu'c piti gwo mo ki: A/ ana mina gam wathi/ jin wakansan 'peni mana mo a'di jin taki'd gi Shi/in ma Arungimis mo?

³⁹ Wakana Pirawn oki'da Yuusup gwo mo ki: Me'd jin torkin ma Arungimis /e aris to gwansani 'baar mo tani, wathin kamu/ yisa di'da jin mididi ku'th is ki 'cese/ 'cese/ dhali jin yukayuk wakansan me'd /e mo.

⁴⁰ /E mini ta tapa apo/ gu'b pem mo, dhali aris 'kwanim pem uni mini nin is buni mo me'd jin mina /e ikan uni gwo mo. Hili jasi gwo goma kursi ma malik mo tani aha/ imina a'di icil dhali bol /e e ki ca kagahara mo.

⁴¹ Dhala Pirawn oki'da Yuusup gwo mo ki: Hili mo mo ma aha/ karkina /e mo apo/ bampa/ Masiri 'baar mo.

⁴² Dhali yan'ko'da Pirawn bu'thki tome'd piti 'peni me'd piti mo dhali hi'thka Yuusup e me'd piti mo dhali shum a'di ki burriyene/ ma malik jin na'bulana'bul mo dhali hi'thki a'di ajindhiir 'dolkon i'bam piti mo.

⁴³ Dhali a'di karki a'di mmomera arabiya jin dira shumarun piti mo a'di jin 'kon ma po/i su/ mo dhali uni kumki cuuwa/ ibwambori a'di mo ki: Luṅa luṅ ki jin 'kupa'dupun mo ma. Nyca/ a'di karki a'di apo/ bampa/ Masiri 'baar mo.

⁴⁴ Dok/e Pirawn oki'da Yuusup gwo mo ki: Aha/ tana Pirawn mo. Wathin kamu/ yisa mididi mii 'de'k me'd di mis walla sho'k piti e bampa/ Masiri 'baar mo ki dar gi gwoṅkan pini mo.

⁴⁵ Dhala Pirawn yukki'da Yuusup gway ka Sapnaat Paniih dhali ciki a'diya Asnaat mmomash mo a'di jin ta 'bwa/ ma Puthipaara/ mo a'di jin ta'da gasiis ma Uun mo. Wakana Yuusup raski'd ki mis e bampa/ Masiri 'baar mo.

⁴⁶ Yuusup a'di 'kona yili iss 'de/ i'ce'dka 'kume'd mo me'd jin cikina a'di e momii to ma Pirawn jin ta'da malik 'Kwani Masir mo be. Dhala Yuusup yaki'd ka pije/ 'peni bun'kus ma Pirawn mo dhali ya e bampa/ Pa Masiri 'baar mo.

⁴⁷ Ki embul yil pesu/ yan mo tani a'cesh dho'thki to ka enthus mo.

⁴⁸ Dhali a'di tulki'da aris tonte/ is mo 'peni yil pesu/ yan jin kapa 'pen 'kwani mo e bampa/ Masir mo dhali dhu uni e themes gi 'pernkuman bampa/ mo. A'di si'da/ dhu e themes gi 'pernkuman bampa/ 'peni bunto kun 'kam uni is mo.

⁴⁹ Dhali aYuusup dhuki posi themes ki nyanyen gana/ ka enthus mo mmowa e ka si'b gi bwam ma gap mo ntagi a'di dak uni bar mo haali/ a'di molu bar mo be.

⁵⁰ Ntwa/a/ ki yil te/ diki pu'd naskina/ mo tani aYuusup a'di ita gi iya/ isu/ mo, uni kun dho'thkin ma Asnaat a'di jin ta 'bwa/ ma Puthipaara/ jin ta'da gasiis ma Uun mo.

⁵¹ Yuusup yukki gway ma 'ci ma bwanyaram piti ka Manassa mo haali/ a'di oki gwo mo ka: Arungimis kar aha/ mmothisa ris mii kun di'adi e mo dhali aris to gi gu'b ma babam pem mo.

⁵² Dhali gway a'di jin 'kon ma po/i su/ mo tani a'di yukki a'di gway ka Eprayim mo: Haali/ Arungimis karki aha/ mmoḱal mamana dho'th mo e bampa/ jin wo'ckina is aha/ she/ mo.

⁵³ Yili pesu/ yansan jin kapa 'pen 'kwani a'di/ piki gwo jipi/ mo e bampa/ Masir mo tani a'di 'baarki'd mo.

⁵⁴ Dhali yili pesu/ jin mina te/ i'kosh a'di itelki 'pen mo me'd gwo jin okin ma Yuusup mo. Dhan te/ a'di caaca e bampany 'ceshi 'baar mo dhali hili e bampa/ Masiri 'baar mo tani tonte/ di'd mo.

⁵⁵ Ka ris 'kwanim bampa/ Masiri 'baar mo harki to mo tani 'kwani cuukin 'twa/a Pirawn mo gom tonte/ mo dhala Pirawn torki 'Kwani Masir gwo mo ki: Iiku/ mo aYuusup mo dhali cik gwo jin mina a'di ikan um mo mmomii mo.

⁵⁶ Wakan me'd jin peperkina te/ apo/ bampany 'ceshi 'baar mo tani aYuusup a'di ika'dki'da ris gu'b themes 'twa/ mo dhali yolki 'Kwani Masir tonte/ mo haali/ te/ shina 'kosh ki shi/ e bampa/ Masiri 'baar mo.

⁵⁷ Dok/e adhana 'cesh yini 'baar mo uni pu'dkin e Pa Masir mo eya Yuusup mo mmoyol pos mo haali/ te/ shilki 'kwani isi 'baar mo e mony'cesh mo be.

42

¹ Ka Yakuub da/arki gwo ki pos ishki'd mo e bampa/ Masir mo tani a'di oki iya/m piti gwo mo ki: Atinta i'kona um mmohili e ka rem'kup kan mo?

² Dhali a'di oki gwo mo ki: Hili mo mo ma, aha/ cikkina gwo mo ki pos ishki'd mo e bampa/ Masir mo. Iiku/ ka lungu'b mo dhali yoli pos 'peni mun gom ana mo ki ana mina 'ko ki e mo dhali 'koki wu mo be.

³ Wakan ikam ma Yuusup kun 'koni 'kume'd uni iikin ka lungu'b mo mmoyoli pos 'peni bampa/ Masir mo be.

⁴ Hila Yakuub diki hasha Benyamiin mo a'di jin ta'da kam ma Yuusup mo nyakki ikam mo haali/ a'di ko/ki is mo oki tonthusu kamu/ midi 'taki bit a'di apo/ mo be.

⁵ Wakan iya/ ma Israyiil pu'dkin mo mmoyol to mo nyakki 'kwani kun pu'dkin mo gom gwon te/ 'peni bampa/ Kanaan mo be.

⁶ Dhali aYuusup a'di itaki'da mudhiir mo apo/ pa 'baar mo. A'di iyolki to goma ris 'kwanim bampa/ 'baar mo. Dhali ikam ma Yuusup uni pu'dkin mo dhali gon is buni ka 'cesh mo ibwambori a'di mo ki jis/em buni kun 'dokina uni ka lungu'ba 'cesh mo.

⁷ AYuusup mishki ikam mo dhali nyith uni mo hili a'di miiki uni ka jin thus me'd 'kwanin tiya kun 'kona e ki she/ mo dhali a'di torki'da tor nyakki uni ki 'twany 'cwar mo mmo/o ki: Um iyyin 'peni mana mo? A'di oki'd kan mo. Uni thokki a'di gwo mo ki: 'Peni Panj Kanaan mo mmoyol tonte/ mo be.

⁸ Wakana Yuusup nyithki ikam mo ihili uni i'koki mish a'di mo be.

⁹ Dhala Yuusup kakina gwony jan piti e mo a'di jin shu'bkina a'di gom uni mo dhali a'di oki uni gwo mo ki: Um ta 'kwani kun parkina mee mo, um pu'dkin mo mmopar bampa/ e mo ki a'di 'ka'da is ki 'ka'd mo.

¹⁰ Uni thokki a'di gwo mo ki: Yisa tapam bam hili mmoyol tonte/ mo a'di ipu'dkina cinjinam pini mo.

¹¹ Aman 'baar mo tana iya/ gi wathin 'de/ mo. Aman tana 'kwanin kar/e mo, cinjinam pini gwansan 'koki ta 'kwani kun parkina mee mo.

¹² A'di oki uni gwo mo ki: Yisa mo ti mmo'ka'da bampa/ yan is ki 'ka'd mo ti. A'di ti ipu'dkina um mo mmopar mo e mo.

¹³ Dhali uni thokki gwo mo ki: Aman kun tana cinjinam pini mo aman kun tana ikam kun 'kon jasi i'kume'd i'ce'dka su/ mo kun ta iya/ gi wathin 'de/ mo e bampa/ Kanaan mo dhali hili mo mo ma, ara gwa'dgan gana/ ka tee yan mo tani a'di idiyi'di nyakka babam bam mo dhali jan kamu/ yisa di'd dok/eya.

¹⁴ Hila Yuusup thokki uni gwo mo ki: Me'd gwo jin okika/ um mo tani aha/ ona um ki um ta 'kwani kun parana mee ka jin gana/ mo.

15 Gom mii yansan mo tani um minu pal mo ki mondiki/e ma Pīrawn mo, um mini mish ii 'peni mo yan yisa ntagi um mini sus ara kam bum jin ta'da tu/um imahan mo.

16 Hashi jan 'de/ 'peni um mo dhali dhalki a'di susi'da kam bum mo ki um 'kon ka yiha/ eya sijin mo ki gwom bum minu nyo/ mo, mishki gwoŋ gana/ di'd e um mo walla isi'da/ ki mondiki/e ma Pīrawn mo, um ka jin gana/ ta 'kwani kun parkina mee mo.

17 Dhali a'di dhuki uni 'baar mo mmontal 'de/ eya sijin mo ka cimi kwara mo.

18 'Ko'da cimi kwara mo tani aYuusup oki uni gwo mo ki: Miiyi mii yan mo a'di i'kona um ki e mo haali/ aha/ ko/kina Arumgimis mo be.

19 Waŋki/ um ta 'kwaniŋ kar/e mo tani dhalka kam buma kamu/ diki'da sijin mondek is mo dhali dhalki kun tiya ki ii mo dhali kal pos gom te/ mo gom kuŋ gu'bi 'baar mo.

20 Dhali susi ara kam bum jin gwa'da'd i aha/ mo wakan ki gwom bum minu 'da'b 'pen mo dhali um mini 'koki wu mo be. Dhali uni miikin wakan mo be.

21 Dhali yan 'ko'd uni oki gwo ka rem 'kup mo ki: Ka jin gana/ ana 'kona mii i'ba/ isi gwo goma kam bana mo me'd jin mishkina ana mii ma kashiram piti jin diki'd e mo ma cis mo ki a'di suski ana gwo sho'k mo dhali ana 'konaki cik gwom piti mo. Gom gwo gi wakan mo tani a'di biŋa mii ma cis apo/ ana mo be.

22 Dhali aRa/ubiin thoŋki uni gwo mo ki: Dika/ ki o um gwo mo ki: Dhalku/ miinthus ki mii apo/ ari dhuru'c wathi/ mowa? Hili um 'koki cik gwo mo. Wakan shwane/ mo jin ri/u ari/ gom abas piti mo tani a'di ipu'dki'd mo be.

23 Uni yisa mishi gwo 'bana ka Yuusup cikki gwom buni mo haala manluk 'twa/ a'di idiki'd e bwaman uni mo be.

24 Dhali yan 'ko'd a'di tu'kki 'ban 'peni uni mo dhali ko mo be. Dhali a'di doŋki'di uni ka nyan 'ko'd mo dhali tor'ki'da tor ki uni mo. Dhali a'di bu'thki'da Shim/uun 'peni uni mo dhali deŋ a'di mo ibwambori jis/em buni mo be.

25 Dhala Yuusup kanki gwo mo mmo'tu'da wolgwapim buni ki pos mo dhali ro'dki uniya guurush buni e 'twamana wolgwapim buni ka 'dete/ 'dete/ mo dhali thosonki uni tonŋe/ kun mina uni mii ishwa e bway iim buni mo. Yan a'di imiikunu gom uni mo be.

26 Dhali yan 'ko'd uni su'kki thuluny buni to apo/ mo dhali shipiti ii mo be.

27 Dhali ki jan 'de/ 'peni uni ka'dki'da wolgwapi/ 'twa/ mo mmo'taki ci thuluny piti to mmoshwa e mo jin ishkina uni mo tani a'di mishki'da guurush e 'twaman ma wolgwapim piti mo be.

28 Dhali a'di oki ikam gwo mo ki: Aguurush pem doŋkunu aha/ i is ka nyan 'ko'd mo. A'di a'dihe/ e 'twaman ma wolgwapim pem mo. Gom mii yan mo tani adum buni ushki uni me'di e mo dhali uni tu'kkin ka rem 'kup mo mmode ki bir bir mo mmo/o gwo mo ki: Atinta a'dan mo? a'di jin miikin ma Arumgimis ana mo.

29 Ki uni pu'dkina Yakuub jin ta'da babam buni e bampa/ Kanaan mo tani uni tor'ki a'di aris to kun miikin ki uni mo mmo/o gwo mo ki:

30 Wathi/ jin ta tapa apo/ bampa/ yan mo tani a'di tor'ki'da tor ki aman ki 'twany 'cwar mo dhali bu'th aman mo, o ki aman tana 'kwani kun parkina mee mo apo/ bampa/ mo.

31 Hili aman thoŋkina a'di gwo mo ki: Aman tana 'kwaniŋ kar/e mo dhali aman yisa tana 'kwani kun parkina mee mo.

³² Aman tana ikam kun 'kon jasi 'kume'd i'ce'dka su/ mo, iya/ ma babam bam mo, jan 'dej kamu/ yisa diyi'da dhali ara tu/u shwane/ yan a'di idiyi'd nyakka babam bam e bampa/ Kanaan mo.

³³ Dhali yan'ko'd wathi/ jin ta tapa gom bampa/ yan mo oki aman gwo mo ki: Gom kan mo tani aha/ mina mish um ki um ta 'kwaniŋ kar/e mo. Dhalka kam buma kamun 'de/nyakki aha/ mo dhali kali pos mo gom te/ gom kuŋ gu'b bumi 'baar mo dhali iiku/ mo e bway bum mo.

³⁴ Susi ara kam bum jin gwa'da'd e aha/ mo dhali yan'ko'd aha/ mina mish um ki um 'koki ta 'kwani kun parkina mee mo hili um ta 'kwaniŋ kar/en gana/ mo dhali aha/ mina 'cuŋki uma kam bum mo dhali um mini yol to e bampa/ yan mo be.

³⁵ Me'd jin wolkina uni arisa wolgwapim buni to mo 'peni bwaman mo tani hili mo mo ma, arisa guurush buni kun dekkunu is mo tani gamkunu e bwaman ma wolgwapim buni ki she/ ki she/ mo dhali uni dhala babam buni uni parkina guurush buni e mo kun dekkina uni mo, uni merkina ijamasa/.

³⁶ Dhala Yakuub jin ta'da babam buni oki uni gwo mo ki: Um bu'thki uci 'peni aha/ mo dhala Yuusup yisa di'da dhali aShim/uun si'da/ a'di piki'd mo adhali um shwane/ mini susa Benyamiina? Aris mii gwansan uni pu'dkina po/ aha/ mo.

³⁷ Dhali yan'ko'da Ra/ubiin oki'da babam piti gwo mo ki: 'Koshi iya/m pem su/ gwan jwa mo wakki/ aha/ dinaki doŋi a'di pa i/ e ka nyan'ko'd mo. Kari a'di e me'd pem mo ma dhali aha/ mina doŋi a'di pa ka nyan'ko'd mo e /e mo be.

³⁸ Hili a'di thokki gwo mo ki: Ya/m pem midi mol ya ka lunŋu'b nyakki um mo haali/ akam a'di iwuki'd mo dhali a'di idiki'd jasi 'de/ mo. Wakki/ tonthusa kamu/ midi 'taki biŋ a'di apo/ e bway iim bum yan jin mura umi kar mo tani um mini raŋa wuum pem yan jin 'kayaa/ mmodiŋ bwa ntaga Haawiya mo be.

43

¹ Shwane/ te/ shilki 'kwani is ki she/ e bampa/ mo be.

² Dhali ki uni shwaki pos mo a'di jin kalkina uni 'peni Pa Masir mo tani ababam buni oki uni gwo mo ki: Iiku/ mo doŋe/ mmoyoli ari tonte/ gom ana mo.

³ Hila Yahuuda oki a'di gwo mo ki: Wathi/ rumki aman ki gwo ki 'bi'th mo mmo/o gwo mo ki: Um mini mol jis/em pem par e mo isi ciki/ akam bum midi nyak yayu/ ki um mo.

⁴ Wakki/ /e mini hasha kam bam nyakki aman mo tani aman mina ii ka lunŋu'b mo dhali yolu/ e tonte/ mo.

⁵ Hili wakki/ /e mini diki hash a'di mo tani aman yisa mina ii ka lunŋu'b mo haali/ wathi/ oki aman gwo mo ki: um mini mol jis/em pem par e mo isi ciki/ akam bum midi nyak yayu/ ki um mo.

⁶ Israyiil oki gwo mo ki: Katinta jan miina um aha/ ka jin thus kan mo mmotor wathi/ gwo mo o ki um tan ga kama kamu/ mo?

⁷ Uni thokki gwo mo ki: Wathi/ be idotki aman gwo ka kar/e mo gom is bam mo dhala bas bam mo mmo/o gwo mo ki: A/ababam bum di'd ki e naskina/ mowa? A/um tan ga kam buma kamu/ mowa? A'di jin torkina aman a'di mo tani uni a'di ita gwon doŋ kun thokkunu mo. A/ba aman misha to kun mina a'di i'taki mii owa? Mmo/o ki susa kam bum ka lunŋu'b mo.

⁸ Dhali aYahuuda oki'da Israyiil jin ta'da babam piti gwo mo ki: Hashi dhuru'c wathi/ nyakki aha/ mo dhali aman mina cu mis dhali ii mo ki aman

mina 'ko ki e mo dhali 'koki wu mo, aman imontal 'de/ inyakki /e mo dhali ushi ucin gwa'dgam bam si'da/ mo.

⁹ Aha/ mina ya ta a'di jin 'tashu 'twa/ mo gom a'di mo. 'Peni me'd pem mo tani /e mini 'theḡ gwo gom a'di. Wakki/ aha/ dinaki susu/ a'di pa ka nyan'ko'di /e mo dhali kar a'di ibwambori /e mo tani dhalki mo jin diluwa dil miga/ kal e 'ba/ pem ki sule/ sule/ mo.

¹⁰ Haali/ wakki/ aman mina 'taki 'koki ta adiite/ kan mo tani aman anann be mina 'taki pu'du/ ka nyan'ko'd me'di su/ mo be.

¹¹ Dhali yan'ko'd ababam buni ka Israyiil oki uni gwo mo ki: Wakki/ a'di midi mii wakan mo tani ba miyi a'di yan mo. Buti maman cwa kun mina umi kwany mo 'peni bampa/ mo dhali dhuyi uni e bwan kucarj mo dhali kalki uni ka lungu'b gom wathi/ mo mmota to jin mina um tak a'di mo ara 'bi'c cwa ma balsam dhali ara yina dham dhala 'bi'c en'thi/ dhala murr dhali emen cwa jin wana maman ki shu'be/ mo dhali emen cwarj kamu/ si'da/ mo.

¹² Kali aguurush ka 'bukum 'ban mo nyakki um mo. Kalka guurush gwan ka nyan'ko'd kun dokkunu umi is mo e aris 'twaman ma wolgwapim bum mo, wariba/ a'di ta mii jin thamunu miyi mo.

¹³ Susa kam bum si'da/ mo dhali cuyi mis mo dhali iiku/ i wathi/ dok/ e mo.

¹⁴ Ba dhalka Arungimis jin Eka/ Ek ci um mii jin miinu mo ibwambori wathi/ mo ki a'di midi hasha kam bum akamu/ ka nyan'ko'd nyakka Benyamiin mo. Wakki/ aha/ minu bu'th uci i'baar mo tani aha/ dara ki mowoth mo be.

¹⁵ Wakan 'kwani kalki tontak mo dhali uni kalkina aguurush ka 'bukum 'ban nyakki uni mo dhala Benyamiin mo dhali uni cuki mis mo dhali ii ka lungu'b bway bampa/ Masir mo dhali uni doshkini bwambor ma Yuusup mo be.

¹⁶ Ka Yuusup parki'da Benyamiin e mo tani a'di oki'da manhil to e gu'b piti gwo mo ki: Susi 'kwani gu'b mo dhali 'cithi/ to/e 'kus mo dhali thosoni to ki jhanne/ mo haali/ 'kwani mini nyak to shwa ki aha/ montee mo.

¹⁷ Wathi/ miiki'd me'd jin kankin ma Yuusup a'di gwo mo dhali suski 'kwani e gu'b ma Yuusup mo.

¹⁸ Dhali 'kwani uni ko/ki is mo haali/ uni suskunu bway gu'b ma Yuusup mo dhali uni oki gwo mo ki: A'di ta mii ma guurush wariba/ kun dhukunu e 'twamana wolgwapim bana mo ka cim gi twa/a/ yin mo a'di isuskunu ana gu'b mo 'tese/ wakan ki a'di midi njap embula 'borga/ apo/ ana mo dhali bita po/ ana dhali dhu ana ki cinjina/ kun yolu mo dhali bu'th thuluny bana mo be.

¹⁹ Wakan uni iiki gu'b gi wathi/ jin ta'da manhil to ma Yuusup mo dhali tora tor nyakki a'di e shan'tamo/ gi gu'b mo.

²⁰ Dhali oki gwo mo ki: Ayy tapam bam, aman pu'dkina ka lungu'b ka cim jin twa/a/ mo mmoyol tonte/ mo.

²¹ Dhali ki aman pu'dkina e mo jin ishu mo tani aman ka'dkina wolgwapim bam 'twa/ mo dhali imun mo tani aman 'kwani gamkina aguurush ka 'dete/ 'dete/ e 'twaman ma wolgwapim bam mo, aguurush bam uni iditadiḡ mo, wakan aman kalina uni dok/ e nyakki aman mo.

²² Dhali aman si'da/ kalina aguurusha kamu/ ka lungu'b e me'd bam mo mmoyol tonte/ mo. Aman yisa misha wathi/ jin dhuki aman aguurush e 'twamana wolgwapim bam mo.

²³ A'di thoḡki uni gwo mo ki: Shiyi is bum ki gwo jin rokomkunu mo ma. Dhalku/ is ki ko/ mo, Arungimis bum dhali Arungimis ma babam bum a'di be i'taki mii idhuki umi tom bum kun ish kumma/ e 'twamana wolgwapim

bum mo gom um mo. Aha/ bu'thkina aguurush bum mo. Dhali yan'ko'd a'di suski'da Shim/uun ka pije/ e uni mo.

²⁴ Dhali wathi/ suski 'kwani bway gu'b ma Yuusup mo dhali ci uni yi'de/ mo dhali ki uni lamki sho'k buni mo dhali ki a'di ciki thuluny buni to mmoshwa mo si'da/ tani

²⁵ uni thosonki tontak buni is mo goma Yuusup midi yayu/ pa mo montee mo haali/ uni cikki gwo ki uni mini 'taki shwa tonte/ imun mo.

²⁶ Ka Yuusup pu'dki pa mo tani uni kalki a'di to bway gu'b mo kun ta tontak kun takina uni mo dhali uni gonki is ka 'cesh mo e a'di mo ntaga 'cesh gana/ mo.

²⁷ Dhali a'di 'thekki gwondot mo gom mon'kom buni dhali o gwo mo ki: A/ ababam bum di'd ki 'bore/ mo 'te/ tana? wathin dhan jin torkina um aha/ gwo mowa? A/a'di di'd ki 'bore/ mowa?

²⁸ Uni thokki a'di gwo mo ki: Cin'kinam pini jin ta'da babam bam mo tani a'di idi'd ki 'bore/ mo, a'di di'd ki e naskina/ mo be.

²⁹ Dhali a'di i'de'kki em piti ki mis mo dhali misha kam piti ka Benyamiin mo jin ta ya/ gi kum mo dhali o gwo mo ki: A/ ara kam bum jin gwa'da'd a'dana a'di jin torkina um aha/ mowa? Arungimis midi mii mii ma 'the gom /e ya/m pem.

³⁰ Dhali yan'ko'da Yuusup di'bki mii is mo ki jahanne/ haali/ adum piti gworki'd mo goma kam piti mo dhali a'di napki mo mo mmoko nycine/ mo. Dhali a'di yaki gu'b ish piti mo dhali ko imun mo.

³¹ Dhali yan'ko'd a'di lamki jis/em piti mo dhali yayu/ ka pije/ mo dhali butha du mo dhali o gwo mo ki: Dhalki tonte/ a'di ipashu mo.

³² Uni ciki a'di tonte/ ki is piti a'di 'de/ mo dhali uni 'cena cem buni mo dhali 'Kwani Masir kun nyakki tonte/ shwa ki a'di uni 'cena cem buni mo haali/ 'Kwani Masir mini mol tonte/ shwa nyakki 'Kwani Ibraan mo haali/ a'di midi ta miin nyogga/ gom 'Kwani Masir mo.

³³ Dhali uni dhukunu 'pena 'cesh mo ibwambori a'di mo, a'di jin ta'da bwanyara/ me'di isi gwo ma bwanyara/ jin tana a'di ka kar/e mo dhali ara gwa'dga/ me'd isi dhuru'c piti jin tana a'di mo. Dhali 'kwani hilkin e ka rem kup mo dhali mer kagahara mo be.

³⁴ To kun 'tuntulu/ bwa ime'd 'pena tharabeesa ma Yuusup mo tani a'di kalkunu uni mo hili aBenyamiin a'di 'tuntulkunu to ime'd me'di mudhe'd mo mmobol kum buni e mo. Wakan uni piki to mo dhali 'kuny bwa nyakki a'di mo be.

44

¹ Dhali yan'ko'd a'di kanki wathi/ jin ta'da manhil tom piti gwo mo ki: 'Tu'dki 'kwani awolgwapim buni ki tonte/ ki nyanye/ mo me'd mii jin mina uni imish a'di kal mo dhali dhuka guurush buni e 'twamana wolgwapi/ gi 'kwani ka 'dete/ 'dete/ mo.

² Dhali kari akubbaayam pem a'di jin ta'da kubbaayan 'dolkon kush mo e 'twamana wolgwapi/ a'di jin gwa'dagwa'd mo nyakka guurush pos piti mo. Dhali a'di miiki a'di mo me'd gwo jin kankin ma Yuusup a'di mo be.

³ Me'd jin kalkina mo kush mon'thamo/ mo tani 'kwani uni idhukunu 'pen mo nyakki thuluny buni mo be.

⁴ Ki uni iikin mo ari is 'ko'd ari'ceenne/ mo 'peni 'penkuman bampa/ mo tani aYuusup oki'da manhil tom piti gwo mo ki: Cuyi mis mo dhali ur 'kwani gwan isho'k mo dhali ki /e mini siri'c uni apo/ ki sho'k mo tani oyi uni gwo mo ki: Atinta irakkina um tom 'boro'di bway mo mmowar ki to shigga/ mo? Atinta ikwalkina uma kubbaayan 'dolkon kush pem mo?

5 A'di diki ta ji gi pina tapam pem to mowa dhali gom mii yan mo tani a'di inyitha a'di to kun mini mii yilanƙamu/ moyi? Um thamki mii mo mmomii wakan mo be.

6 Ki a'di siri'cki uni apo/ ki sho'k mo tani a'di tor ki uni ki gwo gwansan mo be.

7 Uni thoƙki a'di gwo mo ki: Atinta i/okina tapam bam gwo gi wakan mo? Gwo midu mii si'dasi'd 'peni aman kun tana ƙinƙinam pini mo ki uni mini 'taki mii to gi wakan mo.

8 Hili mo mo ma, aguurush kun gamkina aman 'peni 'twamana wolgwapim bam uni ƙalkina aman /e ka nyan'ko'd mo 'peni bampa/ Kanaan mo, dhali mii jin midu 'taki ta ata 'te/ imina aman ƙwal 'dolƙon kush walla 'dolƙon gana/ 'peni gu'b gi tapam pini mo?

9 Dhali e bwaman ƙinƙinan 'de/ yin jin minu gam to nycine/ mo tani dhalki a'di iwu'd mo dhali aman si'da/ mina ta ƙinƙina/ jin yolu gom tapam bam mo.

10 A'di thoƙki uni gwo mo ki: Dhalki a'di miinu mo me'd gwo jin okina um mo ki: Ki a'di yin jin minu gam to nycine/ mo tani a'di imidi ta ƙinƙina/ jin yolu pem mo dhali um kun boƙin mo tani mini ta 'kwani kun mini dar gi mii i'ba/ mo be.

11 Dhali yan'ko'd aris 'kwani thulkina wolgwapim buni ka 'cesh ki jahanne/ mo dhali aris 'kwani uni ƙa'dkina wolgwapim buni 'twa/ mo be.

12 Dhali a'di nƙaƙi to mo mmotel 'pen 'peni a'di jin ca'd mo dhali dak 'kup ki a'di jin gwa'da'd mo dhali aƙubbaaya a'di gamkunu e 'twaman ma wolgwapi/ ma Benyamiin mo be.

13 Dhali yan'ko'd uni dherki burrynem buni bwa mo dhali aris 'kwani deƙki thulunyu buni to apo/ ka nyan'ko'd mo mmodok bway 'penƙuman bampa/ mo.

14 Ka Yahuuda dhali ikam pu'dkin e gu'b ma Yuusup mo a'di di'd naskina/ imun mo dhali uni ta'kkina ibwambori a'di a'cesh mo be.

15 Yuusup oki uni gwo mo ki: Mii gi wakatinta imiikina um mii gi wakan mo? 'Kona um ki misha wathi/ me'd aha/ mo mina nyith to kun mini mii yilanƙamu/ mowa?

16 Dhala Yahuuda thoƙki gwo mo ki: Atinta a'di i mina amani o e tapam bam mo? Dhali aman mina o katinta mo? Walla am mina dhu is bam athithin thith kata mo? Arungimis a'di gamki mii jin thamu apo/ ƙinƙinam pini mo. Hili mo mo ma, aman takina ƙinƙina/ tapa kun yolu mo amani 'baari montal 'de/ dhali a'di si'da/ jin gamkunuwa kubbaaya e me'd piti mo.

17 Hili a'di si'da/ oki gwo mo ki: Mii yan midu si'dasi'd 'peni aha/ mo ki aha/ mina diki 'taki mii wakan mo. Hili jasi e me'd jin minu gama kubbaaya mo tani a'di imidi ta ƙinƙinam pem jin yolka/ mo hili gom um mo tani iiku/ ki monƙu'th is eya babam bum mo.

18 Dhali yan'ko'da Yahuuda yaki'di a'di mo dhali o a'di gwo mo ki: Ayy tapam pem. Dhalki ƙinƙinam pini mo, aha/ 'thona /e mo, tora tor ki tapam pem e bwany'cem piti mo dhali dhalka nyor pini ki pur ki o'd apo/ aman kun tana ƙinƙinam pini mo haali/ /e wana e ka Pirawn ki is pini mo.

19 Tapam pem dotki ƙinƙinam piti gwo mo dhali oki: A/um tan ga babam bum mo dhali akam buma?

20 Dhali aman okina gwo e tapam bam mo ki: Aman tana ka baba wathin dhan mo dhali ara kam bam jin gwa'dagwa'd mo jin ta'da 'cim piti ka dhan piti mo dhali akam piti a'di iwuki'd mo dhali a'di idhalkunu a'di 'de/ 'pena 'cinƙum mo dhali ababam piti enki a'di kagahara mo.

21 Dhali yan'ko'd /e oki ƙinƙinam pini gwo ki susu/ a'di ka lunƙu'b i /e mo ki aha/ mina 'thos a'di em pema is mo.

²² Aman okina gwo yan e tapam bam mo ki: Ari dhuru'c wathi/ midi mol dhal com 'pen mo haali/ wakki/ a'di midi dhal com 'pen mo tani ababam piti a'di imidi wu mo.

²³ Dhali yan'ko'd /e ki o cinjinam pini gwo mo ki isi ciki/ wakka kam buma gwa dga/ diki yayu/ ka lungu'b nyaƙki um mo tani um mini 'koki mish jis/em pem par e dok/e mo.

²⁴ Ki aman dokkina e pa gi cinjinam pini jin ta'da babam pem mo dhali tor gwon tapam pem mo,

²⁵ dhali ka babam bam oki aman gwo mo ki: Iiku/ dok/e mo dhali yolu/ ari tonte/ mo tani,

²⁶ aman thokkina a'di gwo mo ki: Aman mola ii ka lungu'b mo. Wakki/ ara kam bam jin gwa'da'd midi nyaƙ ya ki aman mo tani aman mina ii ka lungu'b mo. Haali/ aman mola par wathi/ jis/em piti e mo isi ciki/ ara kam bam jin gwa'da'd midi mii nyaƙ di ki aman mo.

²⁷ Dhali yan'ko'd cinjinam pini jin ta'da babam pem ki o aman gwo mo ki: Um mishin ka 'bom pem dho'thki aha/ iya/i su/ mo.

²⁸ Jaƙ kamu/ thiska/ e mo dhali aha/ okina gwo ki: A'di ka jin gana/ dherkina tongwapi/ bwa ka gwapi/ ki ruƙ ruƙ mo dhali aha/ dinaki mish a'di 'pena cim yin ki sule/ sule/ mo.

²⁹ Wakki/ um mini sus jin tal 'de/ yan si'da/ 'peni aha/ mo tani dhali tonthus ki bita po/ a'di mo tani um mini raƙa awuunƙ kush pem yan isi bwan diti'd mo dhali ya mo eya Haawiya mo.

³⁰ Dhali gom gwo gi wakan mo tani ki aha/ yakina e cinjinam pini jin ta'da babam pem mo dhali ari dhuru'c wathi/ diki nyaƙ yayu/ ki aman mo haali/ mondiki/em piti a'di dekkunu mo nyaƙki ji gi ari dhuru'c wathi/ mo.

³¹ Ki a'di parki mo e ki ari dhuru'c wathi/ diki nyaƙ di ki aman mo tani a'di midi iwu mo be dhali cinjinam pini mini raƙa awuunƙ kush piti isi bwan diti'd mo dhali a'di midi ya ka lungu'b eya Haawiya ki bwan diti'd mo a'di jin ta cinjinam pini jin ta'da babam bam mo.

³² Haali/ cinjinam pini a'di warki'd ka manmish mo ki isi mish gana/ gom ari dhuru'c wathi/ goma babam pem mo mmo/o gwo mo ki: Wakki/ aha/ dinaki susi a'di pa i /e mo tani dhalki aha/ a'di ikala mo jin diluwa dil mo e jis/e ma babam pem ki mondiki/em pemi 'baar mo.

³³ Dhali gom gwo gi wakan mo tani dhalki cinjinam pini mo, aha/ 'thona / e mo, mmoƙa'bkul mo e embul ma ari dhuru'c wathi/ mo mmota cinjina/ gi tapam pem jin yolu mo. Dhali dhalki ari dhuru'c wathi/ dok bway pa nyaƙki ikam piti mo.

³⁴ Haali/ aha/ mola dok bway pa ababam pem mo wakki/ ari dhuru'c wathi/ diki nyaƙ ya ki aha/ mo haali/ aha/ ko/kina is mo mmopar tonthus gi wakan e mo mmopu'da po/ ababam pem mo be.

45

¹ Dhala Yuusup mol is piti non mo ibwambori aris 'kwani kun nyaƙ 'ko ki a'di mo, dhali a'di 'therki ko mo ki: Raƙa ris 'kwani 'baar mo mmo/ii ka piƙe/ 'peni aha/ mo. Gom gwo gi wakan mo tani wathin tal 'denƙ kamu/ yisa di'd nyaƙki a'di mo me'd jin torkin ma Yuusup is piti eya tente/ e ikam piti mo.

² Dhali a'di 'therki ko kagahara mo, wakan 'Kwani Masir cikki a'di mo dhali aris 'kwani gi gu'b ma Pirawni 'baar mo cikki a'di mo.

³ Dhali aYuusup oki ikam gwo mo ki: Aha/ tana Yuusup mo. A/ababam pem di'd ki e naskina/ mowa? Hili ikam piti mol a'di gwo thok mo haali/ uni ko/ki is kagahara ibunƙus piti mo be.

⁴Wakana Yuusup oki ikam piti gwo mo ki: Shori aha/ is ki 'dishe/ mo. Dhali uni shorki a'di is mo. Dhali a'di oki uni gwo mo ki: Aha/ tana akam bum jin ta'da Yuusup a'di jin yolkina um mo e Pa Masir mo.

⁵Dhali shwane/ dhalku/ is bum ki dhu ka madhan'kur mo walla ka nyor e bwaman is bum mo haali/ um yolki aha/ imahan mo, haali/ Arumgimis hashki aha/ ntwa/a/ ki um mo mmo'tash mondiki/e 'twa/ mo.

⁶Haali/ te/ diki'd e bampa/ yansan yili su/ mo dhali yil bockini mudhe'd mo jin minu 'koki gorra 'cesh mo walla 'cith to mo.

⁷Dhali Arumgimis hashki aha/ ntwa/a/ ki um mo mmo'tasha/ 'tash 'twa/ gom um mo haali/ um tana ushalla/ e mony'cesh mo dhali mmodhuya dhu ki e gom um mo uni ka ris kun minu 'ko ki e mo.

⁸Wakan um yisa a'di ihashki aha/ imahan mo, hili Arumgimis mo dhali a'di karki aha/ mmota ababa goma Pirawn mo dhali tapa gom kuñ gu'b piti 'baar mo dhali ta amanji/a ji apo/ bampa/ Masiri 'baar mo.

⁹Thosoni is ki jahanne/ mo dhali iiku/ ka gagamis mo eya babam pem mo dhali oyi a'di gwo mo ki: Gwo jin ona ya/m pini ka Yuusup a'dihe/ mo ki: Arumgimis karki aha/ ki tapa 'Kwani Masiri 'baar mo. Yayu/ ka lun'gu'bi aha/ mo. Dhalka diite/ ki miyu/ mo.

¹⁰/E mini ca'b e bampa/ Jaasaan mo dhali /e mini 'dishaa/ is mo /e dhali ucin pini mo dhali uci gi ucin pini mo dhali arisa ma'diny ka'bal pini mo dhali arisa nul'kup bip pini mo dhali aris to 'baar mo kun takina /e mo.

¹¹Dhali e mahan mo tani aha/ mina thip /e ki to mo haali/ yil bockini mudhe'd naskina/ jin mina te/ pu'du/ mmo'kosha/ 'kosh mo isi ciki/ /e dhali aris kuñ gu'b pini dhali aris to kun tana /e mo mini war ki moha'th'ko'd pini mo.

¹²Dhali shwane/ em pini midi mish mo mo dhali e ma kam pem ka Benyamiin mishki mo mo ki a'di ta 'twam pem jin torki'da tor nyakki /e mo.

¹³Um mini mii tora babam pem gwo mo goma ris to ma ra/ ra/ pem e Pa Masir mo dhali aris to 'baar mo kun parkina um e mo. Thosoni is ki jahanne/ mo dhali susa babam pem ka lun'gu'b imahan mo.

¹⁴Dhali yan'ko'd a'di bitki'd m'ba/ ma kam piti ka Benyamiin mo dhali ko mo dhala Benyamiin si'da/ goki'd e 'ba/ piti mo.

¹⁵Dhali a'di piki ikam piti 'twa/i 'baar mo dhali ko eya po/i uni mo dhali yan'ko'd mo tani ikam torkina tor nyakki a'di mo be.

¹⁶Ki gwo jin kalu cikkin ma Pirawn e gu'b piti mo ki ikam ma Yuusup pu'dkin mo tani a'di 'borki'da Pirawn bwa mo dhali aris cin'kinam piti gara/ mo be.

¹⁷Dhala Pirawn oki'da Yuusup gwo mo ki: Oyi ikam pini gwo mo ki: Miiyi mii yansan mo ma, suki to/e gwansan towa po/ mo dhali iiku/ ka nyan'ko'd e Pan Kanaan mo.

¹⁸Dhali susi ababam bum mo dhali aris kuñ gu'b bum mo dhali iiyu/ i aha/ mo dhali aha/ mina ci um mom'borga/ e bampa/ mo dhali um mini shwa to 'pena 'cesh yan jin tu'atu/ mo.

¹⁹Kani uni gwo si'da/ mo ki: Miiyi mii yansan mo ma. Kala arabiya kun dira shumaram 'peni Pa Masir mo mmokala ris ushi ucin bum mo dhali goma ris up bum mo dhali susa babam bum mo dhali iiyu/ mo.

²⁰Dhalki gwoñ kamu/ ki kulumi bwa gom tom bum mo haali/ mony'cesh jin mina um i'ko nycene/ mo tani a'di ta jim 'borgañ gana/ mo e bampa/ Masir mo a'di jin midi ta jim bum mo be.

²¹Iya/ ma Israyiil miikin kan mo dhala Yuusup ciki uni arisa arabiya kun dira shumaram mo isi me'd gwo jin kankin ma Pirawn mo dhali thosonki uni tonçe/ kun mina uni ishwa e bway iim buni mo.

²² Eya ris uni ka 'dete/ 'dete/ dhali eya ris uni 'baar mo tani a'di ciki uni burrinye/ ka kwa kwara mmo/ak e mo hili aBenyamiin mo tani a'di ki ciki a'di ariyaal iss 'kwanimpa karpa'c mo 'pena guurush jin ta 'dolkon kush mo dhali burrinye/ imudhe'd kun mina a'di mii ak e mo.

²³ Goma babam piti mo tani to kun hashkina a'di gom a'di mo tani uni ta thuluny i'kume'd mo kun su'kkunu tom 'boron gi Pa Masira po/ mo dhali kuman thuluny 'koni 'kume'd kun su'kkunu posa po/ mo dhali maanj'kuthu'd mo dhali tonte/ si'da/ thosonkunu is mo goma babam piti mo gom ya jin mina a'di iyayu/ i bway mo.

²⁴ Dhali yan'ko'd a'di dhuki ikam piti 'pen mo, dhali ki uni kwa/ is bwa mo tani a'di oki uni gwo mo ki: Dhalka wala ki wal i bway mo.

²⁵ Wakan uni cuki mis ka pije/ 'peni bampa/ Masir mo dhali pu'd e Pan Kanaan mo eya babam buni ka Yakuub mo be.

²⁶ Dhali uni tor'ki a'di gwo ka Yuusup di'd ki e naskina/ mo dhali a'di iji'da ji apo/ bampa/ Masiri 'baar mo, dhala dum piti a'di 'thikina buye/ mo haali/ a'di diki gam gwom buni is mo.

²⁷ Hili ki uni tor'ki a'di aris gwo ma Yuusup i'baar mo a'di jin okina a'di uni mo dhali a'di parki'da arisa arabiya kun dira shumarum e mo uni kun hashkin ma Yuusup mo mmokali a'di mo tani shi/in ma babam buni ka Yakuub a'di warkunu is mo be.

²⁸ Dhala Israyiil oki gwo mo ki: A'di 'koshki jwa mo. Yuusup jin ta ya/m pem a'di idiki'd ki e naskina/ mo. Aha/ mina ya mo dhali par a'di e mo ntwa/ a/ ki aha/ dinaki wu mo be.

46

¹ Wakana Israyiil bu'thki moyam piti mo nyakka ris tom piti kun tana a'di mo dhali a'di pu'dki'd mo e Pam Birsaba mo dhali a'di ki ci to jin 'cithu/ 'kus mmomiiya basa 'cesh goma Arungimis ma babam piti ka Is/hak mo.

² Dhali Arungimis tor'ki'da tor ka Israyiil mon'thiny ki jan mo dhali o a'di gwo mo ki: Yakuub, Yakuub. Dhali a'di oki gwo mo ki: Aha/ dina imahan mo.

³ Dhali yan'ko'd a'di oki gwo mo ki: Aha/ tana Arungimis mo a'di jin ta'da Arungimis ma babam pini mo. Dhalku/ is ki ko/ mo mmoya ka lungu'b bway Pa Masir mo haali/ aha/ mina di imun mo dhali kar /e mmota adhan kal caaca mo.

⁴ Aha/ mina ya ka lungu'b nyakki /e mo e Pa Masir mo dhali aha/ si'da/ mina doku/ /e pa ka nyan'ko'd dok/ e mo dhali me'd ma Yuusup a'di imidi mu'th em pini mo.

⁵ Dhala Yakuub cuki mis mo 'peni Pam Birsaba mo dhali aris iya/ ma Israyiil uni kalkina Yakuub jin ta'da babam buni mo nyakki ushi ucim buni mo dhali aris up buni mo eya risa arabiya kun dira shumarum mo uni kun hashkin ma Pirawn mo mmokalu/ uni mo be.

⁶ Uni si'da/ urki to/ em buni mo dhali tom 'borgam buni mo uni kun gamkina uniya du is mo e Pan Kanaan mo dhali uni pu'dkin mo e Pam Masir mo a Yakuub dhali aris kum piti kun cisa a'di nyakki a'di mo be.

⁷ Iya/ m piti dhali iya/ gi iya/ m piti nyakki a'di mo dhali i'bwa/ m piti mo dhali i'bwa/ gi iya/ m piti mo, aris kum piti 'baar mo kun cisa a'di mo tani uni 'doyina a'di bway Pa Masir mo be.

⁸ Dhali aris gway gi emen ma Israyiil uni annihe/ mo uni gun pu'dkin e Pa Masir mo a Yakuub dhali iya/ m piti mo. Ra/ ubiin jin ta'da bwanyara/ ma Yakuub mo.

⁹ Dhali gway gi iya/ ma Ra/ ubiin uni annihe/ mo: Hanuuk dhala Pallu dhala Hasruun dhala Karmi mo.

10 Dhali gway gi iya/ ma Shim/uun uni annihe/ mo: Yamu/iil dhala Yaamiin dhala Uuhad dhala Yaakiin dhala Suuhar dhala Sha/uul a'di jin ta ya/ ma 'bom 'Kwani Kanaan mo be.

11 Dhali gway gi iya/ ma Lawi uni annihe/ mo: Jirshuun dhala Gahaat dhala Maraari mo.

12 Dhali gway gi iya/ ma Yahuuda uni annihe/ mo: Iir dhala Unan dhala Shiilah dhala Paaris dhala Saarah mo (hila Iir dhala Unan uni a'di iwuyin mo e Pan Kanaan mo) dhali gway gi iya/ ma Paaris mo uni annihe/ mo: Hasruun dhala Hamul mo.

13 Dhali gway gi iya/ ma Yassaakar uni annihe/ mo: Tuulaa/ dhala Pawwah dhala Yuub dhala Shimruun mo.

14 Dhali gway gi iya/ ma Sabuluun uni annihe/ mo: Saarad dhala Iiluun dhala Yahal/iil mo.

15 (Uni gwansan ita iya/ ma Le/ah mo uni kun dho'thkina a'diya Yakuub mo e Pam Paddaan/araam imontal 'de/ nyakki ku gi 'bwa/ ka Diinah mo imontal 'de/ nyakki iya/m piti dhali i'bwa/m piti mo dhali monderj buni 'koni iss 'de/ i'ce'dka 'kume'd i'ce'dka kwara apo/ mo.)

16 Dhali gway gi iya/ ma Jaad uni annihe/ mo: Sipyuun dhala Hajji dhala Shuuni dhala Asbuun dhala liri dhala Aruudi dhala Ar/iili mo.

17 Dhali gway gi iya/ ma Ashiir uni annihe/ mo: Yimnah dhala Yishwah dhala Yishwi dhala Bari/ah nyakka Saarah jin ta 'bwah buni mo. Dhali gway gi iya/ ma Bari/ah uni annihe/ mo: Haabar dhala Malki/iil mo.

18 (Uni gwansan ita iya/ ma Silpah mo a'di jin cikin ma Laabaana Le/ah jin ta 'bwa/m piti mo dhali uni gwansan idho'thkin ma yima Yakuub mo, 'kwani kun 'koni 'kume'd i'ce'dka pe'de/ mo.)

19 Dhali gway gi iya/ ma Rahiil a'di jin ta asha Yakuub uni annihe/ mo: Yuusup dhala Benyamiin mo.

20 Dhali goma Yuusup e bampa/ Masir mo iya/ kun dho'thkunu a'di mo tani gway buni annihe/ mo: Manassa dhala Eprayim uni kun dho'thkin ma Asnaat a'di mo a'di ta 'bwa/ ma Puthipaara/ jin ta'da gasiis ma Uun mo be.

21 Dhali gway gi iya/ ma Benyamiin uni annihe/ mo: Baala/ dhala Baakar dhala Ashbiil dhala Jiira dhala Namaan dhala Iihi dhala Ruush dhala Muppiim dhala Huppiim dhala Ard mo.

22 (Uni gwansan ita iya/ ma Rahiil mo kun dho'thkina a'diya Yakuub mo kun ta 'kwani kun 'koni 'kume'd i'ce'dka donjon 'baar mo.)

23 Dhali gway gi iya/ ma Daan uni annihe/ mo: Hushim mo.

24 Dhali gway gi iya/ ma Naptaali uni annihe/ mo: Yahas/iil dhala Juuni dhala Yisr dhala Shilliim mo.

25 (Uni gwansan ita iya/ ma Bilhah a'di jin cikin ma Laabaana Rahiil jin ta 'bwa/ mo dhali uni gwansan kun dho'thkin ma yim ma Yakuub mo tani ta 'kwani kun 'kon jasi pesunj gana/ 'baar mo.)

26 Aris 'kwani kun ta kuma Yakuub kun pu'dkin mo e bampa/ Masir mo tani uni ta jasi ku ki cisa a'di mo, yisa nyce/e ki ku ki aris up gi iya/ ma Yakuub mo. Hili aris uni 'baar mo imontal 'de/ mo tani uni tana issi kwara i'ce'dka pe'de/ mo be.

27 Dhali iya/ ma Yuusup kun dho'thkunu a'di e bampa/ Masir mo tani uni 'koni jasi su/ mo dhali aris uni 'baar mo kun 'kon e gu'b ma Yakuub mo me'd jin pu'dkina uni e bampa/ Masir mo tani uni 'koni issi kwara i'ce'dka 'kume'd mo be.

28 A'di hashki'da Yahuuda ntwa/a/ ki a'di mo eya Yuusup mo mmopi a'di i isi bwambor e Pan Jaasaan mo dhali uni pu'dkin mo e mony' cesh ma Jaasaan mo.

²⁹ Dhali yan'ko'da Yuusup thosonki'da arabiyam piti jin dira shumaram is mo dhali cu mis mo dhali ya gama Israyiil 'kup mo a'di jin ta'da babam piti e Pan Jaasaan mo dhali a'di ciki is piti ki a'di mo dhali biti 'bam piti mo dhali ko e 'bam piti ki rash rash gana/ mo.

³⁰ Israyiil oki'da Yuusup gwo mo ki: Shwane/ dhalkaa/ wuna mo me'd jin mishkika/ jis/em pini mo dhali mish mo mo ki /e din ki e naskina/ mo.

³¹ Yuusup oki ikam piti gwo mo dhali aris 'kwani 'baar mo kun ta kunj gu'b gi com mo ki: Aha/ mina ya mo dhali tora Pirawn gwo mo dhali aha/ mina o a'di gwo mo ki: Ikam pem dhali aris 'kwani kun ta kunj gu'b ma babam pemi 'baar mo uni kun 'kokin e mony'cesh gi Pan Kanaan mo tani uni pu'dkini aha/ mo be.

³² Dhali 'kwani uni ita imanhil ka'bal mo haali/ uni ta imanhil to/e mo dhali uni kalkina ma'diny ka'bal buni ilu/ mo dhala dhana nul'kup bip buni mo dhali aris to 'baar mo kun tana uni mo be.

³³ Ka Pirawn midi yuk um mo dhali o gwo mo ki: Miin tom bum ta'da tinta mo? tani,

³⁴ um mini o gwo mo ki: Cinjinam pini uni ita imanhil to/e mo 'peni dhuru'c bam kun tana aman mo ntagi shwanesan mo, aman dhali ibabam bam mo, ki um mini mish 'ko mo e mony'cesh gi Pan Jaasaan mo haala ris 'kwani kun ta imanhil ka'bal mo tani uni ita thus ki thus e jis/e gi 'Kwani Masir mo be.

47

¹ Wakana Yuusup yaki bway gu'b mo dhali torka Pirawn gwo mo ki: Ababam pem dhali ikam pem nyakka ma'diny ka'bal buni dhala dhana nul'kup bip dhali aris to kun tagina uni mo tani uni ipu'dkin mo 'peni Pan Kanaan mo dhali uni shwane/ 'kokin e Pan Jaasaan mo.

² Dhali 'peni bwaman ikam piti mo tani a'di bu'thki 'kwani imudhe'd mo dhali torki uniya Pirawn i e mo.

³ Pirawn oki ikam piti gwo mo ki: Miin tom bum ta'da tinta mo? Dhali uni thokkina Pirawn gwo mo ki: Cinjinam pini uni ita imanhil ka'bal mo me'd ibabam bam mo.

⁴ Uni okina Pirawn gwo mo ki: Aman pu'dkina mo mmo'ko ki 'ko ma ca/ e mony'cesh yan mo haali/ ashon dhii/i'da kamu/ yisa di'd imun kun mina cinjinam pini iciya ma'diny ka'bal mo haali/ te/ si'da/ a'di ishilki 'kwani is mo e Pan Kanaan mo. Dhali shwane/, aman 'thona /e mo, ki/e mini dhal cinjinam pini bway mo mmo'ko e Pan Jaasaan mo.

⁵ Dhali yan'ko'da Pirawn ki owa Yuusup gwo mo ki: Ababam pini dhali ikam pini uni pu'dkini /e itan mo be.

⁶ Bampa/ Masir uni 'koni bwambori /e m'baar mo. Thumi ababam pini dhali ikan mon'ko mo e mony'cesha 'borga/ mo dhali dhalki uni 'kon mo e Pan Jaasaan mo. Dhali wakki/ /e mishi wathi/ jin 'bora she/ 'peni bwaman uni mo tani dhuyi uni mmota imanhil to/em pem mo.

⁷ Dhali yan'ko'da Yuusup ki susa Yakuub jin ta'da babam piti mo dhali kar a'di ibwambor ma Pirawn mo dhala Yakuub 'borki'da Pirawn mii mo be.

⁸ Dhala Pirawn oki'da Yakuub gwo mo ki: Atee gi yil gi mondiki/em pini uni 'kokin ekata mo?

⁹ Dhala Yakuub thokki'da Pirawn gwo mo ki: Atee gi yila ca/ pem mo tani uni 'koni iss 'kwanimpa ipe'de/ i'ce'dka 'kume'da po/ mo. Dhala tee gi yil gi mondiki/em pem mo tani uni tana honye/ mo dhali kun pu'da tonthus apo/ aha/ mo dhali uni yisa i'thona/ 'tho/ ki me'd goma tee gi yil gi mon'koki/e gi ibabam pem ka atee kun iikina uni iinyca/ mo.

¹⁰ Dhala Yakuub 'borki'da Pirawn mii mo dhali ya ka pije/ 'peni bun'kus ma Pirawn mo be.

11 Dhali yan'ko'da Yuusup thumki'da babam piti dhali ikam mon'ko mo dhali ciki uni mo mmota jim buni e bampa/ Masir mo e mony'cesh jin 'bora'bor mo e bampa/ Ra/amsiis mo me'd gwo jin kankin ma Pirawn mo be.

12 Dhala Yuusup thipki'da babam piti mo dhali ikam piti mo dhali aris 'kwani 'baar mo kun ta kunj gu'b gi com mo ki tonṭe/ mo isi ki mii jin mina uni mii ta gi a'di mo be.

13 Dhali tonṭe/ piyi'd eya ris bampa/ 'baar mo haali/ te/ a'di ishilki 'kwani is mo wakan bampa/ Masir dhali bampa/ Kanaan uni shi/ki is mo gom gwon te/ mo be.

14 Dhala Yuusup tulki'da risa guurush is mo uni kun gamkunu mo e bampa/ Masir dhali 'peni Pañ Kanaan gom pos jin yolkina 'kwani mo. Dhala Yuusup kalki'da guurush e gu'b ma Pirawn mo.

15 Dhali ka guurush 'baarki'd mo e bampa/ Masir mo dhali e bampa/ Kanaan mo tani aris 'Kwani Masir uni pu'dkina Yuusup mo dhali o a'di gwo mo ki: Ciyi aman tonṭe/ mo ma. To jin ta'da tinta imina amani wu mo ibwambori jis/em pini kan mo? Haali/ aguurush bam a'di 'baarki'd mo be.

16 Dhala Yuusup thoḱki uni gwo mo ki: Ciyaa/ to/em bum mo dhali aha/ mina ci um tonṭe/ mo mmowan a'di e ki to/em bum mo wakka guurush bum 'baarki'd mo.

17 Wakan uni kalki to/em buni aYuusup mo dhala Yuusup ciki uni tonṭe/ mo mmowan a'di e ki to/em buni kun tana ris, shumarum mo dhali ama'diny ka'bal mo dhala ṅul'kup bip dhali aris kuman thuluny mo dhali a'di thipki uni ki tonṭe/ mo mmowan a'di e ki to/em buni kun tana uni ki yil caan mo.

18 Dhali ki yil caan 'baarki'd mo tani uni pu'dkini a'di ki yil jin 'ko'd mo dhali o a'di gwo mo ki: Aman yisa mina ba'k gwo 'peni tapam bam ka guurush bam 'baarki'd mo dhali arisa ṅul'kup to/e uni ta to gi tapam bam mo, tonṭ kamu/ yisa boḱki'da e jis/e gi tapam bam mo hili jasi bungwar is bam dhali mony'cesh bam mo be.

19 To jin ta'da tinta i mina amani wu e bwambori jis/em pini mo, aman dhali mony'cesh bam mo? Yoli aman mo dhali mony'cesh bam ki tonṭe/ mo dhali aman nyakki mony'cesh bam imina ta ciṅkina/ ma Pirawn kun yolu mo, dhali ciyi aman emena ka'bany to mo ki aman mina 'ko ki e mo dhali 'koki wu mo dhali mony'cesh si'da/ mididi ki ta bwam ma'du/ mo.

20 Wakana Yuusup yolki bampa/ Masiri 'baar mo goma Pirawn mo haala ris 'Kwani Masir yolkina ris buntom buni mo haali/ te/ a'di ishilki'da shil ki she/apo/ uni ki 'bi'th mo. Dhali mony'ceshi 'baar mo tani uni ta kuma Pirawn gana/ mo be.

21 Dhali gom 'kwani mo tani a'di dhuki uni mmota ciṅkina/ kun yolu mo 'peni yokkam Pa Masir itor karash ntagi 'bana kamu/ mo.

22 Jasi mony'cesh 'kwani kun ta igasiis mo tani a'di dina a'di ki yol mo haali/ igasiis uni ita gi to kun kalkina uni ki me'd 'pena Pirawn mo dhali 'ko ki e mo 'peni to gwansan kun kalkina uni ki me'd mo kun cikin ma Pirawn uni mo. Gom gwo gi wakan mo tani uni 'koki yol mony'cesh buni mo be.

23 Dhali yan'ko'da Yuusup oki 'kwani gwo mo ki: Hili mo mo ma, aha/ 'pena tee yansan mo tani aha/ yolkina uni mo dhali mony'cesh bum goma Pirawn mo. Shwane/ emena ka'bany annihe/ gom um mo dhali um mini si uni e mony'cesh mo.

24 Dhali e bwam mondhe'd mo tani um mini ciṅka Pirawn 'ban 'de/ 'peni uni kun 'kon ma po/i mudhe'd mo dhali 'ban kun 'kon ma po/i doḱon mo 'peni apo/ ma kamu/ mudhe'd mo tani uni imini ta jim bum mo jin mididi ta emena ka'bany to gom bunto mo dhali me'd tonṭe/ gom is bum mo dhali goma ris kunj gu'b bum mo dhali gom tonṭe/ gom ushi uḱim bum mo.

25 Dhali uni oki a'di gwo mo ki: /E taki mondiki/em bam is is ki me'd mo. Dhalki gwo yan 'bor tapam bam bwa mo ki aman mina ta cɪŋkina/ ma Pɪrawn kun yolu mo.

26 Wakana Yuusup a'di karki a'di mmota gwoŋkan jin bahu mo isi gom gwo gi bampa/ Masir mo dhali a'di 'dishki'd 'pena cim caan ntagi shwanesan mo ka Pɪrawn midi bu'th 'ban 'de/ 'peni uni to kun 'kon ma po/i mudhe'd mo. Mony'cesh gi igasiis uni 'cena 'koki ta ku ma Pɪrawn mo be.

27 Wakana Israyiil a'di ɪɔa'bki'd mo e Pa Masir mo e mony'cesh gi Pan Jaasaan mo dhali uni gamki miya du is e a'di mo, dhali dho'thki maman mo dhali mara/ amar is ki nyanye/ mo.

28 Dhala Yakuub ɔa'bki'd e bampa/ Masir ki yili 'kume'd i'ce'dka pesu/ apo/ mo. A'di ita'da tee ma Yakuub gi wakan mo dhali yil gi mondiki/em piti 'koni iss 'kwanimpa ipesu/ i'ce'dka pesu/ apo/ mo.

29 Dhali ki mo 'dishkina 'twa/ mo ka Israyiil midi mii wu mo tani a'di yuŋki ya/m piti ka Yuusup mo dhali o a'di gwo mo ki: Wakki/ aha/ shwane/ mina gam mii ma 'the 'peni jis/em pini mo tani kari me'd pini awum pem mo dhali oyi gwo is mo mmota ga dum paŋ gana/ dhali tayi wathɪŋ gana/ gom aha/ mo. Dhalku/ /e ki kanaa/ e bampa/ Masir mo.

30 Dhalki aha/ yana ish nyakki ibabam pem mo. Kali aha/ ka piye/ 'peni bampa/ Masir mo dhali kani aha/ e mom buni jin kana uniya kan mo. A'di thoŋki gwo mo ki: Aha/ mina mii a'di me'd jin okina /e mo.

31 Dhali a'di oki gwo mo ki: Thuli /e gwo me'da po/ gom aha/ mo. Dhali a'di ithulki gwo me'da po/ gom a'di mo. Dhala Israyiil a'di ɔa'bki'd ki goŋgo/ ki is piti mo apo/ 'kupa cim piti mo be.

48

1 'Ko'di mii yan mo tani aYuusup a'di ɔorkunu gwo mo ki: Hili mo mo ma, ababam pini a'di 'ba'thki'd mo. Wakan a'di suski iya/m piti isu/ mo iManassa dhala Eprayim mo.

2 Dhali a'di ɔorkunuwa Yakuub mo ki: Ya/m pini ka Yuusup a'di pu'dki'di/ e mo, dhali yan'ko'da Yakuub iriny is piti mo mmogam mom'bi'th mo dhali ɔa'bki mis mo apowa ci mo.

3 Dhala Yakuub oki'da Yuusup gwo mo ki: Arungimis jin Eka/ Ek a'di piki aha/ i is mo e Pan Luus mo e bampa/ Kanaan mo dhali a'di 'borki aha/ mii mo be.

4 Dhali a'di o aha/ gwo mo ki: Hili mo mo ma, aha/ mina kar /e mo mmodho'th maman kagahara mo dhali aha/ mina mar /e amar is mo dhali aha/ mina kar /e mo mmota adhana ŋul'kup 'kwani mo dhali aha/ mina ɔi bampa/ yan ki emen pini mo i'ko'di /e mo mmota mom buni jin mina uni ibu'th ki sule/ sule/ mo.

5 Dhali shwane/ iya/ m pini isu/ gwansan uni kun dho'thkuunu /e mo e bampa/ Masir mo nɔwa/a/ ki aha/ dinaki pu'di /e e Pa Masir mo tani uni ta kum pem mo Eprayim dhala Manassa uni imini ta kum pem mo me'd jin tan ma Ra/ubiin dhala Shim/uun kum pem mo.

6 Dhali uni kun minu ɔis ki /e 'ko'di uni mo tani uni a'di imini ta kum pini mo. Uni minu yuk gway gi ikam buni mo e mal buni mo.

7 Haali/ me'd jin pu'dkika/ mo 'peni Pam Paddaan mo tani aRahiil ki bwan di'ti'd pem mo tani a'di wukaa/ mo e Paŋ Kanaan mo e bway jin iiyina ana mo ki ŋatgin si'dasi'd naskina/ mo mmo'taki ii bway Pan Apraatah mo dhali aha/ kankina ayim imun mo e bway tur gi Pan Apraatah mo (a'di jin ta Pam Beetlaham mo).

⁸ Ka Israyiil parki iya/ ma Yuusup e mo kun 'koni su/ mo tani a'di oki gwo mo ki: Ija anni'dan mo?

⁹ Yuusup oki com gwo mo ki: Uni ta iya/m pem mo uni kun çikin ma Arumgimis aha/ imahan mo. Dhali a'di oki gwo mo ki: Susi uni i aha/ mo ma, aha/ 'thona/e mo, ki aha/ mina 'bor uni mii mo.

¹⁰ Dhali e ma Israyiil a'di dhuruma/ dhurum mo goma dhan piti mo, wakan a'di imolkina a'di mmopar e ki 'bore/ mo. Wakana Yuusup suski uni mmo'dish a'di is mo dhali a'di ki pi uni 'twa/ mo dhali dhu uni mmota isa kony mo.

¹¹ Dhala Israyiil oki'da Yuusup gwo mo ki: Aha/ dara ki gwo ibwa mo me'dyin mo mmo'taki par jis/em pini e mo dhali hili mo mo ma, Arumgimis ki dhal aha/ bway mo mmopar uçim pini e mo si'da/ mo.

¹² Dhali yan'ko'da Yuusup shorki uni is mo 'peni 'kupa'dupun piti mo dhali a'di gonki is piti mo dhali kar jis/em piti ka 'cesh mo.

¹³ Dhali aYuusup bu'thki uni isu/ mo, Eprayim ki me'da bim poros piti mo 'kupki me'da biny cam ma Israyiil mo, dhala Manassa ki me'da biny cam piti mo 'kupki me'da bim poros ma Israyiil mo dhali suski uni mmo'dish a'di is mo.

¹⁴ Dhala Israyiil he'thki me'da bim poros piti mo dhali 'thi a'di i'kup ma Eprayim a'di jin gwa'da'd mo dhali me'da biny cam piti di'di 'kup ma Manassa mo mmo/aç abi e mo haala Manassa a'di ta'da bwanyara/ mo.

¹⁵ Dhali a'di 'borki'da Yuusup mii mo dhali o gwo mo ki: Arumgimis a'di jin iikina ibabam pem ka Ibrahiim dhala Is/hak mo dhali Arumgimis jin shuki aha/ bway eya ris mondiki/em pem mo ntagi shwanesan mo,

¹⁶ aman'doyu gwo a'di jin wanki aha/ 'ba/ mo 'pena ris tonthus mo, 'bori uç mii mo.

Dhali e uni mo tani dhalki gway pem lu/ki'd mo dhali gway gi ibabam pem ka Ibrahiim dhala Is/hak mo.

Dhali dhalki uni can mo mmota dhana buhany 'kwani mo e bwaman mony'cesh mo.

¹⁷ Ka Yuusup parki com e mmokar me'da bim poros piti i'kupa Eprayim mo tani a'di ishi/ki a'di bwa mo, dhali a'di ki bu'th com ime'd mo dhali shor a'di me'd piti mo 'peni 'kup ma Eprayim mo mmokar a'di i'kup ma Manassa mo be.

¹⁸ Dhala Yuusup ki o com gwo mo ki: Yisa ababam pem haali/ a'di yansan ita'da bwanyara/ mo. Kari me'da bim poros pini i'kup piti mo.

¹⁹ Hili ababam piti a'di i/ushki'd mo dhali o gwo mo ki: Aha/ misha mo ya/ m pem mo, aha/ misha mo. A'di si'da/ midi war ki 'kwani mo dhali a'di si'da/ midi caaca mo. Bahili ara kam jin gwa'dagwa'd a'di imidi caaca kagahara mo mmobol a'di e mo dhali emen piti midi ta abuhany kal 'kwaniny'cesh ka ris mo.

²⁰ Wakan a'di 'borki uni mii ka cim çaan mo dhali o gwo mo ki:

Ki um mo tani Israyiil a'di imini bah mom'bor mii mo mmo/o gwo mo ki:

Arumgimis midi kar /e me'da Eprayim mo dhali me'da Manassa mo.

Dhali wakan a'di karki'da Eprayim ntwa/a/ ka Manassa mo be.

²¹ Dhali yan'ko'da Israyiil oki'da Yuusup gwo mo ki: Hili mo mo ma, aha/ 'dishkina 'twa/ mmowu mo, hili Arumgimis midi nyak di ki /e mo dhali a'di midi susi /e bway pa ka nyan'ko'd e mony'cesh gi ibabam pini mo.

²² Ba aha/ çikina /e tony caaga/ mmobol ikan e mo a'di jin ta 'ban 'de/ ka wosha turga/ mo a'di jin bu'thka/ 'peni me'd gi 'Kwani Amuur ki gandala turgam pem mo dhali ki bwam pem mo be.

49

¹ Dhali yan'ko'da Yakuub yukki iya/m piti mo dhali o gwo mo ki: Tuli um is bumi mont'al 'de/ mo ki aha/ mina tor um to kun mini mii taka po/ um yilin tiya kun mini iiyu/ mo.

² Tuli is mo dhali cik gwo mo, ayy um iya/ ma Yakuub mo dhali cik gwo ma Israyiil jin ta'da babam bum mo.

³ Ra/ubiin /e tana bwanyaram pem mo,

'peni mo ma dem dem pem mo dhali 'peni maman pem kun t'wa/ a/ gi mom'bi'th is mo

dhala litgan pem mo e monyca mo dhala litgan e mom'bi'th mo.

⁴ /E jin gwakalki mii mo me'd yi'de/ mo tani /e mini gam mo jin mina /e idiya litgan yisa,

haali/ /e sekim ka ci gi cim mo

dhali shi/ a'di is mo dhali /e yakin ki mis mo eya ci ma nya'ba'b pem mo.

⁵ Shim/uun dhala Lawi uni kun ta ikam mo.

To gi mo/as gom mo ma bujur mo tani uni ita gandala turgam buni mo.

⁶ Ayy akashiram pem midi diki ya 'kup ki mo ma tul is buni mo.

Ayy shi/in pem midi diki gam dhana nul'kup 'kwanim buni is mo.

Goma nyor buni mo tani uni 'koshki 'kwani mo

dhali mmocana uni bwa en'dap buni mo tani uni ki 'citha morbip buni dugu'b gi 'kupa'dupun buni mo be.

⁷ Monyjee midi di goma nyor buni mo haali/ a'di cithira'cithir mo,

dhali anyor buni mo tani a'di si'da/ ita ji ma' mo.

Aha/ mina kwa/ uni bwa mo e bwaman ma Yakuub mo

dhali ce'ker uni bwa mo e bwaman ma Israyiil mo.

⁸ Yahuuda, ikam pini uni imini ma' /e mo

dhali me'd pini midi di eya aris 'ba/ gi 'kwani kun ta 'kup ki /e mo.

Iya/ gi cim uni imini go' is ka 'cesh ibwambori /e mo.

⁹ Yahuuda a'di ita adhop dhuru'c mo.

'Peni mo jin dheru to bwa ka gwapi/ mo, ayy ya/m pem, /e yaki bway mis mo.

A'di wupki'da 'cesh mo dhali a'di ishki'd ki bara'th me'da dhop mo

dhali me'd kumana dhop mo. Aja a'di iro'dki mii mo mmomer a'di e mo?

¹⁰ Cwa ma malik midi diki pi mo 'peni Yahuuda ki sule/ mo

walla cwa gi amanjinuwa ji 'peni bwaman sho'k piti mo

ntagi a'di midi pu'dku/ e a'dim piti jin cila a'di mo,

dhali e a'di mo mo jin hanu gwo e ki 'kwani midi mii di mo.

¹¹ A'di dekki ari thuluny dhuru'c piti ki cwalmana mura'th mo

dhali ari dhuru'c thuluny piti cwalmana mura'th jin kwanykunu mo gom 'boro'd piti mo tani,

a'di wuski burrinyem piti ki yimana mura'th jin ka/u ki nah nah mo

dhali burrinye/ ma pom piti eya basa mura'th mo.

¹² Em piti midi ca'bki dhir dhir gom yimana mura'th jin ka/u ki nah nah mo

dhali she/ piti midi tagi kush goma ko mo be.

¹³ Sabuluun a'di imidi ca'b e yana gap gi bwam ma al mo,

a'di imidi war ki mo kun min ma risa kur yi'de/ ikok 'kupi nycine/ mo,

dhali bwayam piti midi ya ntagi Pan Sidun mo.

¹⁴ Yassaakar a'di imidi 'bitha'bi'th me'd thuluny mo

mmothum 'kup ka lungu'b mo e bwaman ma ma'diny ka'bal mo.

¹⁵ A'di parki mo jin sinu is e mo, ki a'di 'bora'bor mo

dhali bampa/ ki a'di ta gi jin 'boru bwa mo.

Wakan a'di igonkina a'di 'kupa bim piti ka 'cesh mo dhali kala/ kal mo
dhali a'di warki'd ki cinkina/ jin yolu mo jin miinu ki 'bi'th goma tu'c mo.

¹⁶ Daan a'di imidi ta amandwall 'kwanim piti gwo mo,
me'd a'din 'de/ e bwaman ma wak gi 'Kwani ma Israyiil mo.

¹⁷ Daan a'di imina e i wa ki tasha/ jin ishki'd e shemen bway mo
a'di jin ta tashan 'thi/ jin ishki'd e bway tur jin iinu mo mmowo'c shumaram
'pena tinkilam piti mo

wakan ka manmer a'di apo/ mo tani a'di imidi bit ki tar mo be.

¹⁸ Aha/ corkina mowoth pini mo ayy Tapa.

¹⁹ Iman'ceya/ 'ce ki buw buw mini 'ceya Jaadi is mo,
hili a'di imidi 'ce uni ki is eya panyajapam buni mo.

²⁰ Tonte/ jin min ma Ashiir ishwa mo tani uni mini tawusa'awus mo
dhali a'di midi dho'th ton tawusga/ ma malik mo.

²¹ Naptaali a'di imina e wa ka yuul jin dhalkunu me'd ki 'kus mo
jin dho'thki ushana 'borga/ mo.

²² Yuusup a'di imidi ta abinycwa jin midi dho'th maman mo
abinycwa jin midi dho'th maman monyjo'co/ mo.

Abinycwam piti mini so wupuni 'kup agangara/ ma gon bampa/ mo.

²³ 'Kwani kun mishina bwa shin kun cithira'cithir mo tani iwupkina po/ a'di
mo

dhali shin a'di mo dhali 'cwar a'di ki nara'd nara'd mmobur a'di adu mo.

²⁴ Baththo/ abwam piti tikir di mo mmo'konu ki jo'c a'di mo,
dhali abim piti dhunu ki mo jin mishu mii mo

ki me'd gi a'din 'de/ jin Eka/ Ek mo a'di jin ta jima Yakuub mo
(ki gway ma Manhil Ka'bal mo jin ta Wosh ma Israyiil mo.)

²⁵ Ka Arungimis ma babam pini mo a'di jin midi woth /e mo,
a'di jin ta da Arungimis jin Eka/ Ek mo a'di jin midi 'bor /e mii mo
ka ris mom'bor mii gi momis kun 'koni bur'kup mo,

dhali aris mom'bor mii kun 'kon e mon'kulga/ mo kun parashaparash e
bwan'kwariny mony'cesh mo

dhali aris mom'bor mii 'pena risa bor kun cina ko mmopi mo

dhali aris bwama dho'th mo.

²⁶ Mom'bor mii ma babam pini mo

uni ita mo ma dem dem jin 'ce'dki gwayu/ ma ris mom'bor mii ma ris wosha
turga/ kun 'konu ki sule/ sule/ mo

dhali maman gi wosha turga/ kun 'konu ki sule/ sule/ mo.

Dhalki uni 'kon mo e 'kupa Yuusup mo

dhali eya mur 'ko'd em piti mo a'di jin karkunu ki she/ 'peni ikam piti mo.

²⁷ Benyamiin a'di ita awuu jin pitili to ki she/ mo,

e mon'thamo/ mo tani a'di midi la shwa 'kwani ki 'ci'd'da/ mo

dhali mom'pimpili/ mo a'di ki pwak to bwa mo uni kun dilina a'di 'kwani mo.

²⁸ Uni gwansani 'baar mo tani uni itana wak ma Israyiil kun 'koni 'kume'd
i'ce'dka su/ mo, dhali gwo jin tor'kin ma babam buni uni anann mo me'd jin
'borkina a'di uni mii mo mmo'bor uni mii ka 'dete/ 'dete/ mo, mom'bor mii
kun ha me'd mo gom a'di mo.

²⁹ Dhali yan'ko'd a'di kanki uni gwo mo dhali o uni gwo mo ki: Aha/ minu
mii 'tuma bi is imontal 'de/ nyakki 'kwanim pem mo. Kanaa/ nyakki ibabam
pem mo e jurum wosh gi mombunto Ipruun mo, jin ta Wathi/ Hiththa mo.

³⁰ E jurum wosh gi mombunto ma Makpiilah jin diki'd ki mom'pesho'k gi Pa Mamra mo e bampa/ gi Pan Kanaan mo a'di jin yolkin ma Ibrahiim 'peni bwam bunto ma Ipruun jin ta 'Kwani Hiththa mo e mo jin mina a'di imii ta mo gom mo jin kanuwa kan mo.

³¹ E mo yan mo tani a'di ikankina uniya Ibrahiim nycine/ mo dhala Saarah jin ta ash mo, dhali imun si'da/ mo tani a'di kankina uniya Is/hak dhala Ripka jin ta ash mo dhali imun si'da/ mo tani a'di ikankika/ aLe/ah mo.

³² Bwam bunto dhali jurum wosh gwansan mo tani a'di iyolkunu 'peni 'Kwani Hiththa mo.

³³ Ka Yakuub 'baarki gwo jin kankina a'di ya/m piti mo tani a'di dhuki sho'k piti eya ci mo dhali a'di ciki shi/in piti jin 'ko'd mo dhali a'di tulkunuwa abi is nyakki 'kwanim piti mo be.

50

¹ Dhali yan'ko'da Yuusup bitki'di 'ba/i com mo dhali ko eya po/i a'di mo dhali pi a'di 'twa/ mo be.

² Dhala Yuusup kanki'da ris cinjinam piti gwo mo ka ris uni kun tana hakiim mini lol com bwa mo a'di idina a'di ki bul mo. Wakana risa hakiim uni lulkina Israyiil bwa mo be.

³ Acimi iss 'kwanimpa su/ a'di i'thekunu gwo mo gom a'di mo, haali/ acim tana ris wakan kun 'thekunu gwo mo mmolol bwa mo. Dhali 'Kwani Masir uni gwokin gom a'di ka cim iss 'kwanimpa ikwara i'ce'dka 'kume'd mo.

⁴ Dhali ka tee jin gwokunu gom a'di 'baarki'd mo tani aYuusup tor'ki'da tor ki kun gu'b ma Pirawni 'baar mo mmo/o gwo mo ki: Wakki/ aha/ mina gam mii ma 'the e jis/em pini shwane/ mo tani, oyi gwo mo, aha/ 'thona /e mo, e bwany'ce ma Pirawn mo mmo/o ki:

⁵ Ababam pem kar aha/ mmothul gwo me'da po/ mo mmo/o ki: Ki aha/ mura 'twa/ i'dish i mmomuri wu mo tani e jis wosh jwam pem jin 'kulkika/ mo e Pan Kanaan mo tani a'di iminu kan aha/ imun mo. Dhali shwane/ gom gwo gi wakan mo tani dhalki aha/ yana ka gagamis mo, aha/ 'thona /e mo, dhali kana babam pem mo dhali yan'ko'd aha/ ki doku/ mo.

⁶ Dhala Pirawn thokki gwo mo ki: Yaku/ ka gagamis mo dhali kani cim mo me'd jin karkina a'di /e mmothul gwo me'da po/ mo.

⁷ Wakana Yuusup yaki'd ka gagamis mo mmokana babam piti mo dhali nyakki a'di mo tani cinjina/ tana ris kun bathki a'di mo 'peni ku ma Pirawn mo dhali aris 'kwani gwanyjaka/ 'peni ku ki gu'b piti mo dhali aris 'kwani gwanyjaka/ gi bampa/ Masiri 'baar mo.

⁸ Dhali isi kan aris kun gu'b ma Yuusupi 'baar mo ikam piti dhali aris kun gu'b gi com mo hili jasi ushi ucim buni a'di idhalkunu mo dhali ama'diny ka'bal buni mo dhali adhana nul'kup bip buni mo uni a'di idhalkunu mo e Pan Jaasaan mo.

⁹ Dhali aris 'kwani kun merkina arabiya kun dira shumarum mo tani uni inyakki ii ka gagamis nyakki a'di mo dhali aris 'kwani kun mer shumaruma po/ mo a'di ta dhana buhany wathimpa jin seki'd jin caaca kagahara mo be.

¹⁰ Ki uni pu'dkin mo e ja'dam pos gi Pan Athaad mo a'di jin diki'd e bwamp/ Yi'den Kumma/ Uurdun mo tani uni kumki ko mo imun mo gom dhan bwan diti'd kagahara mo e kony jwa jin gwokina uni mmo/up e ki jabu'th mo dhali a'di karki mo jin gwonu ki kony jwa gom com ka cima pesu/ mo.

¹¹ Ki 'kwani kun cila mony'cesh yan mo tani uni gun ta 'Kwani Kanaan mo parki kony jwa jin gwokunu mo e ja'dam pos gi Pan Athaad mo tani uni oki gwo mo ki: Kony jwa yansan jin gwokunu mo tani a'di ita a'di jin jwakatki'da

du mo gom 'Kwani Masir mo. Gom gwo gi wakan mo tani a'di iyukkunu mo yan gway ka Aabilmisrayim mo. A'di jin diki'd e bwampo/ Yi'den Kumma/ Uurdun mo be.

¹² To jin miina iya/m piti gom a'di a'dan mo me'd jin kankina a'di uni gwo mo.

¹³ Haali/ iya/m piti kalki a'di mo e mony'cesh gi Pañ Kanaan mo dhali kan a'di mo e bwam bunto ma Makpiilah mo a'di jin di'd 'kupki mom'pesho'k gi Pa Mamra mo a'di jin yolkin ma Ibrahiim 'pena Ipruun jin ta wathi/ Hiththa mo mmokar a'di ki mo jin minu kana kani cine/ mo.

¹⁴ 'Ko'di a'di kanki'da babam piti mo tani, aYuusup dokki bway Pa Masir mo nyakki ikam piti mo dhali aris 'kwani 'baar mo kun nyakki ii ki a'di ka gagamis mo mmokana babam piti mo be.

¹⁵ Ki ikam ma Yuusup parki mo e ma ka babam buni a'di iwuki'd mo tani uni oki gwo mo ki: Wariba/ aYuusup midi shi/ ana i e mo dhali ri/ ana mo goma ris tonthus kun miikina ana a'di apo/ me'd yin mo.

¹⁶ Gom gwo gi wakan mo tani uni hashki gwo aYuusup mo dhali o gwo mo ki: Ababam pini a'di ikanki gwo yansan ntwa/a/ ki a'di diki wu mo ki:

¹⁷ Oya Yuusup gwo mo ki: Gwami agwam mo ma, aha/ 'thona /e mo, gwondhan gi ikam pini mo dhali miinthus buni mo haali/ uni miiki /e tonthus a po/ mo. Dhali shwane/ am 'thona /e ki /e mini gwama/ gwam mo gom gwondhan gi cinkina/ ma Arungimis mo jin ta'da Arungimis ma babam pini mo. Yuusup a'di gwoki'd mo me'd jin tokina uni ator ki a'di mo.

¹⁸ Dhali ikam piti pu'dkin mo dhali taka 'cheshi bwambori a'di mo dhali o gwo mo ki: Hili mo mo ma, aman tana cinkinam pini mo.

¹⁹ Hila Yuusup oki uni gwo mo ki: Dhalku/ is ki ko/ mo ma haali/ a/aha/ be dina e embul ma Arungimis mowa?

²⁰ Haali/ me'd um mo, kagush tani um kar to apo/ aha/ ki 'pemen thus mo hili Arungimis a'di ikarki a'di ki 'pemen jim 'boro'd mo mmowaski mii yan mo ki 'kwani ka ris ris minu dhu ki e mo, me'd jin 'kokina uni ki e shwanesan mo.

²¹ Dhalku/ is ki ko/ wakan mo, aha/ mina thip um mo dhali ushi u_çim bum mo. Wakan a'di rokomki uni ki gwo mo dhali malas uni mo.

²² Wakan Yuusup a'di ca'bki'd mo e bampa/ Masir a'di nyakki 'kwani gi gu'b gi com mo. Dhala Yuusup a'di ca'bki'd ki e mo ki yil iss 'kwanimpa imudhe'd i'ce'dka 'kume'da po/ mo.

²³ Dhala Yuusup parki uci ma Eprayim e mo kun 'kon ma ata/i kwara mo dhali uci ma Maakir si'da/ mo a'di jin ta ya/ ma Manassa mo uni dho'thkunu mo e 'kupa'dupun ma Yuusup mo.

²⁴ Dhala Yuusup oki ikam piti gwo mo ki: Aha/ 'dishkina 'twa/ mmomuri wu mo hili Arungimis a'di midi yayu/ mmobuti um mo dhali a'di midi susi um bway pa ka nyan'ko'd mo 'peni bampa/ yansan e mony'cesh jin thulkina a'di a/Ibrahiim gwo me'da po/ mo goma Is/hak dhala Yakuub mo be.

²⁵ Dhali yan'ko'da Yuusup bu'thki mo jin thulu gwo me'da po/ mo e iya/ ma Israyiil mo mmo/o gwo mo ki: Arungimis midi yayu/ mmobuti um mo dhali um mini kal asimam pem mo 'peni mahan mo.

²⁶ Wakana Yuusup a'di iwuki'd mo mmo'kokina yil a'di i/iss 'kwanimpa imudhe'd i'ce'dka 'kume'da po/ mo, dhali uni lolki is piti mo dhali a'di karkunu mo e bwam ma kur jwa mo e bampa/ Masir mo be.

Gwo ma Musa jin 'Kon ma Po/ i Su/: Mmo/ii ka Pije/ mo

'Kwani ma Israyiil Sere'ckunu ki Sho'k mo

¹ Gwansan i ta gway gi iya/ ma Israyiil mo uni kun iikin bway Pam Masir mo nyakka Yakuub mo, aris uni ka 'dete/ 'dete/ mo 'peni kuj gu'b piti mo be.

² Ra/ubiin mo dhala Shim/uun dhala Lawi mo dhala Yahuuda/ mo be.

³ Yassaakar dhala Sabuluun dhala Benyamiin mo.

⁴ Daan dhala Naptaali dhala Jaad dhala Ashiir mo be.

⁵ Aris emen ma Yakuub i 'baar mo uni 'ko iss 'kwanimpa i kwara i'ce'dka 'kume'd mo. Dhala Yuusup diki'di t̄wa/a/ e Pam Masir mo be.

⁶ Dhali yan'ko'd aYuusup wuki'd mo dhala ris ikam piti mo dhala risa nyakum yil ki ucim buni mo be.

⁷ Hili emen ma Israyiil uni dho'thkin ka ris mo dhali markunu is kagahara mo. Dhali uni ekin mo ki nyanye/ dhali 'bi'thkina is ki 'bi'th mo. Gom kan mo tani Pam Masir 'tu'dkunu ki uni mo.

⁸ Dhali yan'ko'd amalik thisa kamu/ bu'thki embul ma kamu/ dhamo/ mo i Pam Masir mo a'di jin diki misha Yuusup mo be.

⁹ Dhali a'di ki o 'kwanim piti gwo mo ki: Ayy, 'kwani ma Israyiil uni tana ris ka ris mo dhali uni si'da/ 'bitha'bi'th mo mmobol ana e mo be.

¹⁰ Wakki/ mo/as midi bita po/i ana mo tani uni mini gam me'd ki 'kwani kun ta 'kup ki ana mo dhali as ana mo dhali ye mo 'peni bampam bana mo be. Dhalki ana tikira apo/ uni ki yuƴ yuƴ mo ki uni mini 'koki mar is mo.

¹¹ Gom 'kup gwo yan tani uni dhuki itapa apo/ uni mo mmoƿa/ uni is jwa ka tu'c kun ditadiƿ mo. Dhali uni nyanƿkina Pirawn 'penkuman bampa/ ki jasi mondu tom piti mo kun yuku gway ka Piƿuum dhala Ramasiis mo be.

¹² Hili ki 'kwani ma Israyiil 'kokunu mo mmosirica po/ ki sho'k mo ki nyanye/ mo tani uni si'da/ markunu is mo ki nyanye/ mo dhali mmohakara 'cesh ka bor mo. Wakan 'kwani Pam Masir uni ko/ ki is mo gom 'kwani ma Israyiil mo be.

¹³ Wakan uni dhuki 'kwani ma Israyiil mo mmomiiya tu'c ki cinƿkina/ ki mom'bi'th mo be.

¹⁴ Dhali uni si'da/ dhuki 'kwani ma Israyiil is mmo'ta'bula'ta'bul mo ka tu'c jin 'batha'ba'th mo mmo'thoƿa jeen gu'b mo dhali eya risa tu'c kun 'kona e ki she/ ki she/ mo e bwam buntom buni mo. Eya risa tu'c buni gwansani 'baar mo tani cinu uni ki dar gi mo si/is mo be.

¹⁵ Dhali yan'ko'da malik gi 'kwani Pam Masir ki o iShipira uni ka Puu/a kun ta up kun dho'th tiya Ibraniyiin gwo mo ki:

¹⁶ Wakki/ um dho'th up 'kwani Ibraniyiin mo dhali um ki par uni e eya powa birish jin dhodhuwa dho'th apo/ mo tani, 'koshi a'di jwa mo wakki/ ta'da 'cingwath mo. Hili wakki/ ta'da 'bomi mo tani dhalka yim di'd ki e mo.

¹⁷ Hili up gwansan kun dhodhi tiya mo tani uni ko/kina Arungimis mo. Dhali uni 'koki mii gwonƿkan ma malik gi Pam Masir jin kankina a'di uni mo. Hili uni dhal ucingwath mo mmo'ko ki e mo be.

¹⁸ Dhali amalik gi Pam Masir a'di yukki up gwansan mo dhali o uni gwo mo ki: Atinta miina um kan mo mmodhal ucingwath bway mo mmo'ko ki e kan mo?

¹⁹ Up kun dhodhi tiya thokkina Pirawn gwo mo ki: Haali/ up gi 'Kwani Ibraniyiin yisa wa ki up gi 'kwani Pam Masir yisa. Hili uni ca'b ki dem dem

mo dhali uni la dho'th uçim buni ntwa/a/ mo ki aman 'konaki pu'd naskina/ mo be.

²⁰ Wakan Arungimis miiki'd ki 'bore/ gom up gun dho'thki tiya mo. Dhali 'kwani markunu is ki nyanye/ mo dhali uni ça'b ki dem dem e mom'bi'th buni mo be.

²¹ Dhali gom moŋko/ jin ko/kina up Arungimis mo tani a'di ciki uni uçim buni si'da/ mo be.

²² Dhali yan'ko'd mo tani aPirawn kanki'da ris 'kwanim piti gwo 'baar mo ki: Aris iya/ kun dho'thkunu gom 'kwani Ibraniyiin mo tani minu ta'kku/ mo e kumma/ yi'de/ mo, hili um mini dhalku/ ushi i'bwa/ i 'kon ki e mo be.

2

Mondho'th ma Musa

¹ Dhali ki embul yan wathi/ 'peni 'Kwani Lawi masha'da 'bom 'pena wak piti mo.

² Dhali a'bom bwaki'd mo dhali dho'th ya/ mo. Dhali ka yim parki a'di e mo ka 'ci 'bora'bor mo tani ayim ki bag a'di mo ka ppee 'kupi kwara mo be.

³ Dhali ka yim mol a'di bag ki rash rash mo tani ayim 'kuçki'da guppa mo jin ukunu mo 'pena 'ci'd mo dhali rus a'di ka 'bi'c mo dhala sipti/ mo, mmonon yi'de/ ki bway mo mmose bwa guppa mo. Dhala yim ki kara 'ci nycine/ mo dhali karki a'di e bwam ma 'ci'd jin di'd i shemen ma gap gi kumma/ yi'de/ mo be.

⁴ Dhali 'bwah ma 'ci doshki'd ari kaŋan mo mmpar mo e mo ka ta a'di i midu pu'd e ara kam mo.

⁵ Dhali 'bwa/ ma Pirawn pu'dki'd ka lungu'b mo mmo/ up yi'de/ mo e kumma/ yi'de/ mo. Dhali aris nyara/ gun mii a'di atu'c iikin e yan wor mo tani ayim mishki'da guppa mo e bwam ma 'ci'd mo. Dhali ayim ki hash nyarany ciŋkinam piti mo mmo'cwam a'di mo be.

⁶ Dhali ka yim ka'dki a'di 'kup mo tani ayim parki ara 'ciŋwath e mo. Dhali ara 'ci di'd mmoko mo. Ayim hilki a'di ki e ma 'thime/ gi mo/en mo dhali o gwo mo ki: Yansan a'di i ta ara 'ci 'peni 'Kwani Ibraniyiin mo be.

⁷ Dhali yan'ko'd 'bwah ma 'ci yansan ki o 'bwa/ ma Pirawn gwo mo ki: Miga/ ya mo dhali yuçi/eya manthipa 'ci 'peni bwaman up 'Kwani Ibraniyiin mo mmothip ki/eya 'ci mo 'taa?

⁸ Dhali 'bwa/ ma Pirawn ki o ari nyara/ gwo mo ki: Nye, yaku/ mo ma. Gom gwo gi wakan mo tani ari nyara/ yaki'd mo dhali yuçi kum ma 'ci mo be.

⁹ Dhali 'bwa/ ma Pirawn o'da yim gwo mo ki: kalka 'ci yansan mo dhali thipi a'di mo gom aha/ mo dhali aha/ mina ciki/ e to jin miina/eya tu'c gom a'di mo. Gom gwo gi wakan mo tani a'bom bu'thki'da 'ci mo dhali thip a'di mo be.

¹⁰ Dhali a'ci caki'd mo dhala yim ki kalki a'di 'bwa/ ma Pirawn mo dhali a'di warki'd ki ya/ ma yim mo. Dhali ayim ki yer a'di gway ka Musa* mo goma yim oki gwo mo ki: Haali/ aha/ 'cwamkina a'di ka piye/ mo 'peni yi'de/ mo be.

AMusa Guski Pa Midyaan mo

¹¹ Ka Musa caki'd mo tani a'di yaki'd ka piye/ mo mmobuti 'kwanim pitiŋ gana/ mo dhali para tuca ditga/ gi kwanim piti e mo. Dhali a'di parki wathi/ Masir e mo mmo'koshkina a'di wathi/ Ibraniyiin mo a'di jin ta wathi/ 'peni 'kwanim piti mo be.

¹² AMusa ki 'kar mo ki e mo dhali jan tal 'den kamu/ yisa di'da. Dhali a'di ki 'kosh wathi/ Masir jwa mo dhali bag a'di mo e bwam ma si'b mo be.

* 2:10 Gway yan wana e ki gwo jin onu ki 'cwam ki 'twan 'kwani Ibraniyiin mo.

13 Ka cim jin 'ko'd, a'di yaki'd ka pije/ i 'kwanim piti dok e mo dhali a'di ki mish 'kwani Ibraniyiin i su/ kalkin ki as cem buni mo. Dhali a'di ki o wathi/ jin dina mii i 'ba/ gwo mo ki: Atinta i dorkina /eya waƙ pini mo kan?

14 A'di thokki a'di gwo mo ki: Aja i kar /e ki tapa mo dhali ka mandwall aman gwo mo? A /e kulumki gwo i bwa mo mmonƙapi 'kosh aha/ jwa mo me'd jin 'koshkina /e wathi/ Pam Masir mo 'taa? Dhali yan'ko'd aMusa ko/ki is mo dhali kulumki gwo 'kup mo ki to yansan ka jin gana/ mishu mo be.

15 Yan'ko'da malik cikki gwo yansan mo dhali napa Musa ki minu 'kosh jwa mo. Hila Musa guski'd mo 'pena Pirawn mo dhali a'di yaki'd mmoƙa'b e Pam Midyaan mo be. Dhali ka cima kamu/ a'di ƙa'bki'da 'cesh e shemen jis yi'de/ mo.

16 Dhala gasiis gi Pam Midyaan taki'd gi i 'bwa/ i pesu/ mo dhali uni pu'dkin mo mmomush yi'de/ e mo jin ƙa'b ma Musa i shemen mo. Dhali uni 'tu'dkina ƙur ki yi'de/ mo goma ma'diny ƙa'bal dhali miya ma babam buni mo be.

17 Imanhil ƙa'bala tiya uni pu'dkin mo dhali ur uni mo. Hila Musa cuki mis mo dhali woƙki nyara/ dhali dokki uni ka nyan'ko'd mmowol ki uni to em buni yi'de/ mo be.

18 Ki nyara/ dokkin eya babam buni ka Rau/iil mo tani a'di ki o uni gwo mo ki: 'Pemen ta'da ta layina um pu'du/ gane/ ki jahanne/ kan mo?

19 Uni ki thok gwo mo ki: Wathi/ Masir a'di i woƙki aman mo 'peni me'd gi imanhil ƙa'bal mo dhali a'di si'dayi ki mush ki aman yi'de/ mo dhali wolki to e mo be.

20 A'di oki i'bwa/ gwo mo ki: Mane a'di mane? Atinta i dhalina um wathi/ mo? Yuƙi a'di mo ma ki a'di midi shwa to nyaƙki ana mo.

21 Dhala Musa gamki gwo me'd mo mmoƙa'b mo nyaƙki wathi/ yan mo. Dhali a'di cikki'da Musa 'bwa/ jin yuku gway ka Sapuura mmota ash mo be.

22 Ayim dho'thki a'di ya/ mo dhala Musa ki yer a'di gway piti ka Jirshuum' mo haali/ a'di oki gwo mo ki: Aha/ dina ka cis e pampaƙ kamu/ mo.

23 I'ko'di yil ka ris pekin mo tani amalik gi 'kwani Pam Masir a'di wuki'd mo be. Dhali 'kwani ma Israyiil uni 'kon mmo/ohon mo e bwan'kwariny miiny ƙinƙinam buni mo dhali uni ƙumki cuuwa mo gom mowoth mo. Dhali kom buni e bwan'kwariny miiny ƙinƙina/ mo tani cikkin ma Arumgimis mo be.

24 Dhali Arumgimis cikki mo/ohon buni mo dhali a'di kakina gwo e mo jin gamkina a'di me'd ki mondek nyaƙka Ibrahiim mo dhali nyaƙka Is/hak mo dhali nyaƙka Yakuub mo be.

25 Dhali Arumgimis mishki 'kwani ma Israyiil mo dhali a'di ta gi bwan kulum apo/ uni mo gom mon'kom buni jin shi/ashi/ kan mo be.

3

Arumgimis Yuki'da Musa mo

1 Dhala Musa ta'da amanhila ma'diny ƙa'bal ma mar piti ka Rau/iil mo jin ta'da gasiis gi Pa Midyaan mo. Dhala Musa urki'da ma'diny ƙa'bal piti dhali 'cith' bway mombwaasho mo dhali pu'di Wosh Sinaa/ jin ta wosh jin ƙogu mo be.

2 Dhali aman'doyu/ gwo gi TAPA piki a'di i is ka le'dan o'd e ari bwaman cwa mo. Dhala Musa parki mo e dhali merki'd mo ki cwa shwakina o'd mo dhali a'di 'konu ki kup ki sule/ mo be.

3 Dhali aMusa ki kulum gwo i bwa mo ki: Atinta dina o'd ki kup ari bwaman cwa yan mo kan sa/? Aha/ mina shorki is mo dhali par dhan miimer yan e mo.

† 2:22 Gway yan wana e ki gwo jin onu ki: Wathi/ 'peni bampaƙ kamu/ mo ki 'twan' kwani Ibraniyiin mo.

4 Ki TAPA parki mo e ka Musa ya'd mmo'dish mo is mmopar mo e mo tani Arumgimis yukki a'di 'peni ari bwaman cwa mo ki: Musa, Musa. Dhali a'di thokki gwo mo ki: Aha/ dina i se mo be.

5 Dhali yan'ko'd Arumgimis ki o a'di gwo mo ki: Dhalku/ ki shor mmo'dish mo yan is mo. 'Cuka ppam pini 'peni sho'k mo ma haali/ mo yan jin dina /e i cine/ mo tani ta'da 'cesh jin kogu mo be.

6 Dhali a'di ki o a'di gwo mo ki: Aha/ tana Arumgimis gi ibabam pini jin ta'da Arumgimis ma Ibrahiim mo dhali Arumgimis ma Is/hak dhali Arumgimis ma Yakuub mo be. Dhali yan'ko'da Musa tikki jis em piti mo haali/ a'di ko/ki is mo mmohila Arumgimis mo be.

7 Dhali yan'ko'd TAPA ki o a'di gwo mo ki: Aha/ misha isa nyor jin wo'cki 'kwanim pem mo uni kun 'kokin mo e Pam Masir mo. Dhali aha/ cikkina kom buni mo gom mii gi imanjiya tu'c buni kun ta 'Kwani Masir mo. Dhali aha/ misha mon'kosh is ka nyor buni mo be.

8 Dhali aha/ thulkina ka 'cesh mo mmo'cuk uni 'peni me'd gi 'Kwani Masir mo. Dhali aha/ mina sus uni mo 'peni pa caan mo bway mo jin 'kosh jwa mo jin isha ris embul mo dhali jin 'bor ma 'cesh ki 'bor mo. A'di ta mo jin 'kona 'kwani Pan Kanaan mo dhali Pa Hiththa mo dhali Pa Amuur mo dhali Pam Paaris mo dhali Pa Haypa mo dhali Pa Yabuus mo be.

9 Dhali shwane/ aha/ cikkina ko gi 'kwani ma Israyiil mo dhali aha/ mishkina mo jin siriju asiri'c ki sho'k jin 'kokina 'Kwani Pam Masir mmosiri'c uni apo/ki sho'k mo be.

10 Dhali shwane/ yaku/ mo ma, aha/ mina hash /e aPirawn mo ki /e mini mish susu 'kwanim pem ka pije/ mo, uni kun ta 'kwani ma Israyiil mo 'peni Pam Masir mo be.

11 Hila Musa thokki'da Arumgimis gwo mo ki: Aha/ jana/ sa/ mina 'taki ya aPirawn dhali susi 'kwani ma Israyiil ka pije/ 'peni Pam Masir mo?

12 Arumgimis ki thok a'di gwo mo ki: Aha/ mina nyak di ki /e mo. Dhali ki /e mini dili 'kwani sho'k ka pije/ 'peni Pam Masir mo tani um mini mii mii mmotak aha/ e 'kuwosh yan mo. Dhali mii yansan midi ta jamas mii mo gom /e mo ki aha/ tana a'di jin hashkina /e mo be.

13 Dhali yan'ko'd aMusa ki owa Arumgimis gwo mo ki: Wakki/ aha/ mina pu'dku/ e 'kwani ma Israyiil mo dhali o uni gwo mo ki: Arumgimis gi ibabam bum a'di i hashki aha/ i um mo tani uni mini dot aha/ gwo mo ki: Gway piti yuku kaja mo? Atinta i migal/ thok uni mo?

14 Arumgimis ki thoka Musa gwo mo ki: Aha/ Be I Tana Aha/ be. Dhali a'di ki o gwo mo ki: Oyi gwo yansan e 'kwani ma Israyiil ki: Aha/ jin Tana Aha/ mo tani i hashki aha/ i um mo.

15 Arumgimis si'da/ ki owa Musa gwo mo ki: Oyi gwo yansan mo ma e 'kwani ma Israyiil mo ki: Aha/ jin tana TAPA jin ta'da Arumgimis gi ibabam bum mo a'di jin ta'da Arumgimis ma Ibrahiim mo dhali Arumgimis ma Is/hak mo dhali Arumgimis ma Yakuub mo aha/ i hashkina /e i uni mo. Gway pem a'dansan ki sule/ sule/ ya ye 'ba/ mo. Gway yan a'di ta 'pemen jin min ma risa nyakum yili heri 'baar mo ka londhoth mo be.

16 Yaku/ mo dhali tuli jwahan 'kwani ma Israyiil gun jina ji isi montal 'de/ mo dhali oyi uni gwo mo ki: TAPA jin ta'da Arumgimis gi ibabam bum mo a'di jin ta'da Arumgimis ma Ibrahiim mo dhali Arumgimis ma Is/hak mo dhali Arumgimis ma Yakuub mo a'di i piki aha/ i is mo mmo/o gwo mo ki: Aha/ nyithkina um mo gom to kun miikunu um mo e Pam Masir mo be.

17 Dhali aha/ ona gwo is mo ki aha/ mina susi um ka pije/ mo 'peni mii jin woci um is she/ 'peni miin 'kwani gi Pam Masir mo mmopu'd mo e Pan kanaan mo dhali Pa Hiththa mo dhali Pan Amuur mo dhali Pam Paaris mo dhali Pa Haypa mo dhali Pa Yabuus mo e mo jin 'bor ma 'cesh ki 'bor mo.

¹⁸ Dhali uni mini cik 'twam pini mo dhali /e dhali gwany jwahaŋ 'kwani ma Israyiil um mini ii eya malik gi 'kwani gi Pam Masir mo dhali o a'di gwo mo ki: TAPA jin ta'da Arungimis gi 'kwani ma Ibraniyiin mo tani a'di butki'di aman mo. Dhali shwane/ aman dota /e 'twa/ mo ki/e mini dhal aman bway ki aman mina ii mo jin kala'da cimi kwara e mombwaasho mo ki aman mina 'ciŋ to e 'kus mmomiya bas gom Tapa Arungimis bam mo be.

¹⁹ Aha/ misha ka malik gi Pam Masir mido diki dhal um bway mo hili isi ciki/ a'di minu gaç ki dhan me'd jin 'bitha'bi'th mo be.

²⁰ Wakan aha/ mina he'th me'd pem mo dhali dor 'Kwani Masir mo ka ris miimer mo uni kun miga/ mii mo. Yan'ko'd mo tani a'di mido dhal um bway mo be.

²¹ Dhali aha/ mina raç 'kwani gwansan mmoci um monyca mo. Dhali ki um mini ii mo tani um mini 'koki ii bwam me'd 'te/ mo be.

²² Up 'Kwani Israyiil ka 'dete/ 'dete/ mini ii gu'b gi 'Kwani Masir kun 'dish uni is mo dhali mini doç to 'peni uni mo dhali 'peni uni ilu/ gun 'koni gu'b buni mo. Dhali uni mini doç uni dhiriny 'dolkon kush mo dhali dhiriny 'dolkon gana/ mo dhali burriŋye/ mo. Dhali um mini hi'thki iya/m bum burriŋye/ i/is mo dhali i'bwam bum si'da/ mo. Dhali um beseene/ mini bu'th mal gi 'kwani Pam Masir ki mom'bi'th bum mo be.

4

Jamas Mii goma Musa mo

¹ AMusa thoçki gwo mo ki: Wakki/ uni 'koki gam gwom pem is mo walla cik 'twam pem mo dhali o aha/ gwo mo ki: TAPA yisa piki /e i is mo yisa tani, aha/ mina mii ata mo?

² Dhali yan'ko'd TAPA ki o a'di gwo mo ki: Atinta i di'di me'd pini mo sa/? A'di ki thoç a'di gwo mo ki: Alukaas mo be.

³ Dhali TAPA ki o gwo mo ki: Biçi a'di a'cesh mo ma. Wakan a'di biçi a'di a'cesh mo dhali a'di warki'd ki tasha/ mo dhala Musa guski'd 'peni a'di mo be.

⁴ Yan'ko'd TAPA oki'da Musa gwo mo ki: Lunji ma dhali buthi a'di i thin mo. Wakan a'di lunji'd mo dhali bu'th a'di mo dhali a'di warki'd ka lukaas doç e mo e me'd piti mo be.

⁵ Wakan ki uni mini gam gwo is ki TAPA a'di piki /e i is mo, a'di jin ta'da Arungimis jin ta ji gi ibabam buni mo, Arungimis ma Ibrahiim mo dhali Arungimis ma Is/haç mo dhali Arungimis ma Yakuub mo.

⁶ Doç e TAPA ki o a'di gwo mo ki: Dwari me'd abor pini mo ma, dhali a'di miiki'd kan mo. Dhali ki a'di buçki a'di ka piye/ mo tani me'd piti 'koshkina monthus mo mmokusha/ kush me'd 'thipiny gana/ mo be.

⁷ Dhali yan'ko'd Arungimis ki o a'di gwo mo ki: Dwari me'd pini ka nyan'ko'd abor pini mo. Wakan a'di dwarki me'd ka nyan'ko'd abor piti mo. Dhali ki a'di buçki a'di ka piye/ mo tani a'di dhelelkunu ka nyan'ko'd mo me'd isi is pitin gana/ mo be.

⁸ Dhali TAPA ki o gwo mo ki: Wakki/ uni mini 'koki gam /e gwo is mo tani, walla 'koki çiya hirdhe/ ki to gi miimer jin twa/a/ mo tani uni mini gam gwo is ki miimer yansan mo be.

⁹ Wakki/ uni 'koki gam gwo is, isi gom to gi miimera su/ gwansan mo walla 'koki çiya hirdhe/ ki 'twam pini mo tani /e mini pash yi'de/ 'peni kumma/ yi'de/ mo dhali gaç a'di apowa 'cesh jin kuthaku'th mo dhali yi'de/ mido war ka bas mo be.

¹⁰ Hila Musa thoçki TAPA gwo mo ki: Ayy Tapam pem, aha/ mola gwo o ka kar e ki 'bore/ ki sule/ mo, 'peni ntwaa/ nniin wala 'peni embul jin tela /e mii

'pen mmowal 'twa/ ki aha/ mo. Hili aha/ diṭa 'twa/ wal ki diṭ mo mmo/o gwo mo dhala le'd cumpula/ cumpul mo be.

¹¹ Dhali yan'ko'd TAPA ki o a'di gwo mo ki: Kaja a'di i ukki 'twa/ gi wathi/ mo? Dhali kaja a'di i karki a'di mo mmota amanmol 'twa/ wal mo walla mmota 'diye/ mo walla mmomish to par e mo walla mmota aja'da/ mo? A'di diki ta aha/ mo 'taa jin tana TAPA mo?

¹² Shwane/ yaku/ mo dhali aha/ mina di e 'twam pini mo dhali ṭor /e gwo jin mina /e i o mo be.

¹³ Hili aMusa thoḱki gwo mo ki: Ayy Tapa, hashki wathin kamu/ mo ma mmomii wakan mo.

¹⁴ Dhali yan'ko'd TAPA diṭkina bwa apo/a Musa ki 'bi'th mo dhali a'di ki o gwo mo ki: Din ma Haruun ki ta akam pini 'peni 'kwani Lawi mo 'taa? Aha/ misha ki a'di mish gwo o ki 'bore/ mo dhali a'di yayi'di bway mmogam /e 'kup mo. Dhali ki a'di mididi mish /e mo tani a'di mina bwa i 'bor kagahara mo be.

¹⁵ Dhali /e mini o a'di gwo mo dhali ṭor ki a'di gwo jin mina a'di o mo. Dhali aha/ mina di e 'twam pini mo dhali di e 'twam piti mo dhali ṭorki um gwo mo gom to kun mina umi mii mo be.

¹⁶ A'di mididi o gwo mo gom /e e 'kwani mo dhali mididi ta 'twa/ gom /e mo. Dhali /e a'di i mini wa a'di e ka Arungimis mo be.

¹⁷ Dhali /e mini kala lukaas yan i me'd mo mmoṭor miimer ka ris mo.

AMusa Doḱki'd Bway Pam Masir mo

¹⁸ Yan'ko'd aMusa doḱki'd ka nyan'ko'd eya Rau/iil mo a'di jin ta'da mar piti mo dhali o a'di gwo mo ki: /E dotga/ 'twa/ mo ki: Dhalki aha/ bway mmodobok ka nyan'ko'd i 'kwanim pem e Pa Masir mo dhali par uni e mo wakki/ 'kon ki e mo. Dhala Rau/iil ki owa Musa gwo mo ki: Yaku/ ki moṅku'th is mo.

¹⁹ Dhali ka Musa di'd e Pam Midyaan naskina/ mo tani TAPA ki o a'di gwo mo ki: Doki ka nyan'ko'd e Pam Masir mo, haali/ aris 'kwani kun ṅapki /e mmo'kosh jwa mo tani uni wukin mo be.

²⁰ Wakana Musa suski ash mo dhali iya/m piti isu/ mo dhali dhu uni i 'ku thuluni mo dhali tel 'pen mmodobok ka nyan'ko'd eya 'cesh gi Pam Masir mo. Dhali e me'd piti mo tani a'di ki kala lukaas ma Arungimis mo be.

²¹ Dhali TAPA ki owa Musa gwo mo ki: Ki /e mini doḱ ka nyan'ko'd e Pam Masir mo tani hili ki 'bore/ mmomiiya ris miimeri 'baar mo ibwambor ma Pirawn mo uni kun cikika/ /e mom'bi'th mmomii mo. Hili aha/ mina 'bi'thki a'di adum piti is me'd wosh mo, wakan ki a'di mididi diki dhal 'kwani bway mo mmo'ii mo be.

²² Dhali /e mini owa Pirawn gwo mo ki: Yase ta gwo jin ona TAPA ki is piti mo ki: Israyiil ta'da bwanyaraj gwaṭh pem mo be.

²³ Dhali aha/ ṭora /e gwo mo ki: Dhalki ya/m pem ya'd mo ki a'di mididi mii mii mmotaḱ aha/ mo. Dhali /e ushun mo mmodiki dhal a'di bway mmoya mo. Gom kan aha/ mina 'kosha bwanyaraj gwaṭh pini mo be.

²⁴ E mo jin ishkina uni mo e bway mo tani TAPA gamki a'di 'kup mo dhali ṅap a'di mmo'taki 'kosh jwa mo be.

²⁵ Dhali yan'ko'da Sapuura ki 'de'k wosh jin kaaka dhali 'ci'th ya/m piti amunjyal jin mo dhali ta aMusa sho'k piti ki a'di mo. Dhali a'di ki o gwo mo ki: /E ka yin gana/ tana kaṭhim pem ka bas e aha/ mo be.

²⁶ Gom gwo gi wakan mo tani TAPA dhalki a'di mo. Dhali yan'ko'd a'di waka'd mo kan me'd jin okin ma yim a'di mo ki: /E tana kaṭhim pem ka bas mo. A'di o gwo yan goma munyjyal yis jin 'ciṭhu mo be.

²⁷ Dhali TAPA oki'da Haruun gwo mo ki: Yaku/ e mombwaasho mo mmogama Musa 'kup mo. Gom kan mo tani a'di yaki'd mo dhali gam a'di 'kup mo e wosha turga/ ma Arungimis mo dhali pi aMusa 'twa/ mo be.

²⁸ Dhala Musa torki'da Haruun aris gwo gi TAPA mo jin hashkina TAPA a'di mo. Dhali a'di si'da/ torki'da Haruun aris jamas miimer mo jin kankina TAPA a'di mo mmomii mo be.

²⁹ Dhala Musa uni ka Haruun iikin mo dhali tula ris gwanyjwahan 'kwani ma Israyiil isi montal 'de/ mo.

³⁰ Dhala Haruun oki'da ris gwo 'baar mo uni kun torkina TAPA aMusa mo. Dhali a'di ki mii jamas miimer i bwambori 'kwani 'baar mo be.

³¹ Dhali 'kwani gamki gwo is mo. Dhali uni cikki gwo ki TAPA yaya'di 'kwani ma Israyiil mo dhali ki a'di si'da/ ta gi bwanj kulum ki nyanye/ gom isa nyor buni jin wo'cki uni is she/ mo. Dhali uni lunjina lurj mo be.

5

Ka Cim jin Twa/a/ i Bwambora Pirawn

¹ Yan'ko'da Musa dhala Haruun iikina Pirawn mo dhali o a'di gwo mo ki: Yase/ ta gwo jin ona TAPA mo a'di jin ta'da Arungimis gi 'kwani ma Israyiil mo ki: Dhalki 'kwanim pem iin mo mmota gi dhan moshwan to mmotak aha/ e mombwaasho mo.

² Hila Pirawn oki gwo mo ki: Kaja i taki TAPA mo ki aha/ mina ci a'di embul mo dhali dhala Israyiil bway mo mmo/ii mo? Aha/ yisa misha TAPA yisa. Dhali aha/ yisa mina dhala Israyiil bway mo mmo/ii mo yisa.

³ Dhali yan'ko'd uni ki o gwo mo ki: Arungimis gi 'kwani Ibraniyiin a'di nyakki is tul ki aman mo. Aman 'thona /e bway mo mmodhalki aman iina mo ari ii jin tura 'ba/ gom jasa cimi kwara mo e mombwaasho mo. Aman mina mii TAPA abasa 'cesh mo a'di jin ta'da Arungimis bam mo, isi ciki/ ki a'di midi diki bita po/ aman mo ki 'ba'th jin woci 'kwani is she/ mo walla ki mo ma mee mo be.

⁴ Hila malik gi 'kwani Pa Masir oki uni gwo mo ki: Musa um ka Haruun, ata njapa um mo mmosus 'kwani mo 'pena tu'c buni mo? Dokki ka nyanj'ko'da tu'c bum mo ma.

⁵ Dhala Pirawn ki o gwo mo ki: 'Kwani kun 'koni bampa/ yansan mo tani uni tana ris ka ris mo. Um ki dosh uni mo 'pena tu'c buni gomata?

⁶ Ka tenten 'de/ yan mo tani aPirawn kanki'da ris imanjiya tu'c kun ta 'Kwani Masir gwo mo dhali imahil tiya kun ta 'kwani ma Israyiil mo.

⁷ Um mini dok e ci 'kwani kun'tush i me'd mo mmo'thoka jeng'u'b yisa. Dhalki uni iini njapi kun'tush ki is buni mo.

⁸ Uni mini mii uka jeng'u'b me'd jin miina uni itwa/a/ mo. Ajenj gu'ba 'denj kamu/ yisa midi piya. Uni tana piny is ka piny is mo. Wakan a'di ona uni gwo ki: Dhalki aman iina i miya Arungimis bam abasa 'cesh 'te/ mo.

⁹ Dhalka tu'c kun ditadit i 'thikkunu 'kwani i 'ba/ mo ki uni mini miya tu'c mo dhali 'koki ci 'ce mo gom gwo ma mak ka ris mo.

¹⁰ Wakan imanjiya tu'c dhali imanhil tiya kun ta 'kwani ma Israyiil mo tani uni iikin ka piye/ mo dhali o 'kwani gwo mo ki: Yase ta gwo jin on ma Pirawn mo ki aha/ mina diki ci um kun'tush mo be.

¹¹ Iiyi ki is bum mo dhali kali kun'tush 'peni mo jin mina umi gami a'di mo. Hili atu'c bum mina shej kamu/ i po'd yisa ki sule/ mo.

¹² Wakan aris 'kwani ceckeri bwa mo mmopwak is e Pa Masiri 'baar mo mmotula wusha is mo me'd kun'tush mo be.

¹³ Dhali imanjiya tu'c buni naskina/ 'kon mmopucur uni ka tu'c mo mmo/ o gwo mo ki: Miiya atu'c bumi 'baar mo me'd jin miina um a'di ka cimi 'baar mo jin cinu um kun'tush inniin mo.

¹⁴ Dhali imanhil tiya 'peni 'kwani ma Israyiil uni kun dhuna imanmiya tu'c ma Pirawn ki imanhil tiya mo tani uni si'da/ dorkunu mo dhali dotkunu

gwo mo ki: Atinta 'kona um ki miiya risa tu'c bum mo mmo/uka jengu'b ka nimira shwane/ dhali katili mo me'd mii jin miikina um a'di itwa/a/ mo?

15 Yan'ko'd imanhil tiya 'peni 'kwani ma Israyiil pu'dkin mo dhali kum cuuwa eya Pirawn mo ki: Atinta tu/ula /e aman ki mii gi wakan mo?

16 kun'tusha kamu/ yisa di'da jin kalunu cinjinam pini mo. Hili uni 'kon mo mmo'a'bi o aman gwo mo ki: 'Thoka jengu'b mo. Pari cinjinam pini e 'koshu kata? Hili 'kwanim pini uni a'di thu'th mii mo.

17 Hila malik ki thok uni gwo mo ki: Um tana piny is ka piny is mo. A'di ona um gwo ki: Dhalki aman iina mo mmomii TAPA abasa 'cesh mo.

18 Dokki ka nyan'ko'd mo dhali miiya tu'c mo haali/ kun'tusha kamu/ minu ci ki um yisa. Hili um mini uka jengu'b ki nyanye/ mo mmonyakki jin twa/a/ mo.

19 Imanhil tiya 'peni 'kwani ma Israyiil uni mishki mo mo ki uni 'kokin mo e embul jin kanjama kanjam mo ka Pirawn oki gwo mo ki: Um mini dhalku/ miinj kamu/ ki guwa wuy mo 'pena tuca jengu'b mo a'di jin ta toma e me'd mo.

20 Uni gamki iMusa 'kup mo uni ka Haruun mo ki uni carki uni mo me'd jin iiyina uni ka pije/ mo 'pena Pirawn mo be.

21 Dhali uni ki thok uni gwo mo ki: Dhalki TAPA hilki'da po/ um mo dhali dwall um gwo mo haali/ um dhuki aman mo mmota imankola kol mo e jis e ma Pirawn mo dhali aris imanmii a'di to mo dhali um dhu gandala turga/ e me'd buni mo mmo'kosh aman jwa mo be.

Arungimis Oki Gwo Is gom To jin Minu Mii mo

22 Dhali yan'ko'da Musa dokko'd mo e TAPA mo dhali o gwo mo ki: Ayy Tapa, atinta miikina /e to jin shi/ashi/ wakan apo/ 'kwani gwansan mo? Dhali atinta sa/ i hashina /e aha/ wakan mo?

23 Haali/ me'd jin yakika/ aPirawn mo dhali o gwo ki gway pini mo tani a'di botki mii ton thus ki nyanye/ apo/ 'kwani gwansan mo. Dhali /e si'da/ yisa 'cukki 'kwanim pini gwansan yisa ki sule/ sule/ mo.

6

1 Yan'ko'd TAPA thokki'da Musa gwo mo ki: Shwane/ /e mini mish to jin miga/ miiya Pirawn mo haali/ ki me'd pem jin 'bitha'bi'th mo tani aPirawn midi hashki uni ka pije/ mo. Nye, ki me'd pem jin 'bitha'bi'th mo tani a'di midi ur uni ka pije/ 'peni bampam piti mo be.

Arungimis Yukki'da Musa mo

2 Dhali Arungimis ki owa Musa gwo mo ki: Aha/ tana TAPA mo.

3 Aha/ pikina Ibrahim i is dhala Is/hak dhala Yakuub mo me'da Arungimis jin ca'b ki dem dem mo. Hili gom gway pem jin taka/ TAPA mo tani aha/ dina ki dhal gway yan bway mo uni ki mish aha/ mo be.

4 Aha/ si'da/ tela gwom pem jin gamga/ me'd ki mondek nyakki uni mmociki uni Pan Kanaan mo e bampa/ jin 'kona uni 'pena gush ki hilkina/ mo be.

5 Dhali aha/ si'dayi cika ohon gi 'kwani ma Israyiil mo uni kun dhukina 'Kwani Masir mo mmota cinjinam buni mo. Dhali aha/ kakina gwom pem e jin gamga/ me'd mo.

6 Oyi gwo cikise/ mo e 'kwani ma Israyiil mo ki: Aha/ tana TAPA mo dhali aha/ mina sus um ka pije/ mo 'peni ton ditin gi 'kwani Pa Masir mo dhali aha/ mina 'cu'k um mo 'peni mii jin mina uni um ki cinjina/ mo. Dhali aha/ mina wan um 'ba/ mo ka bim pem jin miga/ ye'th ka pije/ mo dhali ki dhan mii jin caaca ki gwon dwall mo be.

7 Dhali aha/ mina bu'th um ki 'kwanim pem mo dhali aha/ mina ta Arungimis bum mo. Dhali um mini mish mo mo ki aha/ tana TAPA

Arumgimis bum mo a'di jin suski um ka pije/ mo 'peni aris ton di'in gi 'Kwani Masir mo be.

⁸ Dhali aha/ mina sus um ka pije/ mo e bampa/ jin oka/ gwo is ki gwon dek mo mmocika Ibrahiim mo dhala Is/haḡ mo dhala Yakuub mo be. Aha/ mina ci ki um a'di mo mmota mo jin mina umi bu'th is mo. Aha/ be i tana TAPA mo be.

⁹ Musa si'da/ oki yase e 'kwani ma Israyiil mo, hili uni 'koki cik gwo ma Musa haali/ shi/in buni i 'ce'dkunu bwa mo dhali gom miiny cinḡinam buni jin mathamath mo be.

¹⁰ Dhali TAPA ki owa Musa gwo mo ki:

¹¹ Yaku/ /e mo dhali tora Pirawn gwo mo a'di jin ta'da malik gi 'kwani Pam Masir mo mmodhalki 'kwani ma Israyiil bway mo mmo/ii ka pije/ mo 'peni bampam piti mo.

¹² Hila Musa thokki TAPA gwo mo ki: Hili wakki/ 'kwani ma Israyiil ush gwo cik 'peni aha/ mo tani bakata i min ma Pirawn i cik aha/ 'twany cumpulgam pem yan mo?

¹³ Hili TAPA oki iMusa uni ka Haruun gwo mo gom 'kwani ma Israyiil mo dhali goma Pirawn mo a'di jin ta'da malik gi 'kwani Pam Masir mo. Dhali a'di kanki iMusa mmosus 'kwani ma Israyiil ka pije/ mo 'peni Bampa/ Masir mo be.

Kuḡ Gu'b ma Musa dhala Haruun

¹⁴ Gwansan uni tana 'kanḡkup gom kuḡ gu'b gi ibabam buni mo, gway gi iya/ ma Ra/ubiin mo a'di jin ta'da bwanyara/ ma Israyiil mo: Hanuuk dhala Pallu dhala Hasruun dhala ḡarmi mo. Uni gwansan i tana wak ma Ra/ubiin mo be.

¹⁵ Gway gi iya/ ma Shim/uun si'da/ aniihe/ mo. Yamu/iil dhala Yamiin dhala Uhad dhala Yakiin dhala Suhar dhala Sha/uul jin ta ya/ 'pena 'bom gi Paḡ Kanaan mo. Uni i tana wak ma Shim/uun mo be.

¹⁶ Gwansan si'da/ i ta gway gi iya/ ma Lawi mo isi me'da nyakum yil buni kun tana uni mo: Jirshuun dhala Gahaat dhala Maraari mo. Dhali yil ma Lawi jin dikina a'di ki e mo tani 'koni 137 mo be.

¹⁷ Dhali gway gi iya/ ma Jirshuun aniihe/ mo: Libni dhala Shim/i nyakka wak buni mo be.

¹⁸ Dhali gway gi iya/ ma Kahaat aniihe/ mo: Amraam dhala Yishaar dhala Hibruun dhala Usi/iil mo. Dhali yil jin dikin ma Kahaat ki e mo 'koni 133 mo be.

¹⁹ Dhali gway gi iya/ ma Maraari aniihe/ mo: Mahli dhala Mushi mo: Gwansan uni tana wak gi 'kwani Lawi mo isi me'da nyakum yil buni mo be.

²⁰ Amraam bu'thki'da 'bom jin yuku ka Yukabed mo a'di jin ta 'bwah ma babam piti mo dhala yim dho'thki a'diya Haruun mo dhala Musa mo. Dhali yil piti jin dikina a'di ki e mo tani a'di 'koni 137 mo be.

²¹ Dhali gway gi iya/ ma Yashar aniihe/ mo: kuurah dhala Napu'c dhala Sikri mo be.

²² Dhali gway gi iya/ ma Usi/iil aniihe/ mo: Misha/iil dhala Elsaapaan dhala Sitr mo be.

²³ Haruun si'da/ bu'thki'da 'bom jin yuku gway ka Alishaba/ mo a'di jin ta 'bwa/ ma Aminadab mo dhali a'di jin ta 'bwah ma Nahshuun mo. Dhali ayim dho'thki a'di aNadaab dhala Abiihu dhala Eli/asar dhala Ithamaar mo be.

²⁴ Dhali gway gi iya/ ma kuurah aniihe/ mo: Assiir dhala Elkana dhala Abi/asaap mo. Gwansan uni i tana wak gi 'kwani kuurah mo.

²⁵ Ili/assar a'di jin ta ya/ ma Haruun mo a'di bu'thki'da 'bom 'de/ mo 'peni 'bwa/ ma Puti/iil mo. Dhala ayim dho'thki a'di a Pinihas mo. Gwansan uni i tana 'kanḡkup gu'b 'kwani ma Lawi mo 'pena wak buni mo be.

²⁶ AHaruun dhala Musa uni anansan kun ona TAPA gwo mo ki: Susu 'kwani ma Israyiil ka pije/ mo 'peni Bampa/ Masir mo ka waƙ buni mo.

²⁷ Uni i ta uni kun oki gwo eya P̄irawn jin ta 'da malik gi 'kwani Pa Masir mo mmomuri susu 'kwani ma Israyiil ka pije/ mo 'peni Pam Masir mo, aMusan 'de/ yan mo dhala Haruun mo be.

AHaruun Midi Ta Amanluk Goma Musa mo

²⁸ Ka tee yin jin okina TAPA gwo eya Musa e Bampa/ Masir mo tani

²⁹ TAPA oki'da Musa gwo mo mmo/o ki: Aha/ tana TAPA mo. Tori aP̄irawn jin ta 'da malik gi 'Kwani Masir aris gwo kun oka/ /e 'baar mo.

³⁰ Hila Musa thokki TAPA gwo mo ki: Aha/ wana 'twam pemi cumpula/ ki jin ta 'da tinta i min ma P̄irawn i cik 'peni aha/ mo?

7

¹ Dhali TAPA oki'da Musa gwo mo ki: Hili ma. Aha/ mina mii /e me'da Arungimis ibwambora malik mo. Akam pini ka Haruun midi o gwom pini goma malik me'd isa manci gwo ma Arungimis jin o gwo ma Arungimis gom 'kwani mo.

² Torka Haruun aris to 'baar mo kun kankika/ /e mo dhala Haruun midi luk ka P̄irawn gwo mo mmodhal 'kwani ma Israyiil bway mo mmo/ii ka pije/ mo 'peni bampam piti mo.

³ Hili aha/ mina 'bitha P̄irawn adum piti mo, dhali ba aha/ mina mara ris jamas miim pem is mo dhali momer mo e Bampa/ Masir mo be.

⁴ P̄irawn yisa midi cik gwo 'peni /e mo. Dhali yan'ko'd aha/ mina dor Pam Masir mo dhali susa waƙ pem ka 'dete/ 'dete/ ka pije/ mo uni kun ta 'kwanim pem mo 'peni Bampa/ Masir mo.

⁵ Dhali 'kwanim Pam Masir mini mish mo mo ki aha/ tana TAPA mo me'd jin miga/ dor Pam Masir mo dhali susu 'kwani ma Israyiil ka pije/ mo 'peni bwam uni mo be.

⁶ AMusa dhala Haruun uni miikin kan mo me'd isi ji gi kankina TAPA uni gwo mo be.

⁷ Ka tee jin okina uni a P̄irawn gwo mo tani aMusa i 'kona yili iss 'kwanim pa i donjon mo dhala Haruun i 'kona yili iss 'kwanimpa i donjon i 'ce'dka kwara apo/ mo be.

Alukaas ma Musa Warka'd ki Tasha/ mo be

⁸ Dhali TAPA oki'da Musa dhala Haruun gwo mo ki:

⁹ Waƙka P̄irawn midi kan um mmomii miimer mo tani /e mini owa Haruun gwo mo ki: Budhi cwam pini mo dhali bit̄i a'di a 'cesh i bwambor ma P̄irawn mo ki a'di midi war ki tasha/ mo.

¹⁰ Wakana Musa dhala Haruun uni iikina P̄irawn mo dhali miiki a'di me'd jin kankina TAPA uni gwo mo. Haruun bit̄ki'da lukaas piti a'cesh ibwambor ma P̄irawn mo dhali aris imanmiya tu'c piti mo dhali a'di warki'd ki tasha/ mo be.

¹¹ Dhali yan'ko'd si'da/ P̄irawn yuk̄ki 'kwanim piti kun yuk̄ayuk̄ mo dhali aris narim piti mo. Dhali uni si'da/ miiki to jin nyakan mo ki miilatt̄ buni mo.

¹² Haali/ aris uni ka 'dete/ 'dete/ bit̄kina lukaas buni mo dhali uni warkin ki tasha/ mo. Hila lukaas ma Haruun a'di i loski'da lukaas buni i 'baar mo be.

¹³ Naskina/ adu ma P̄irawn wa ki wosh jin 'bitha'bi'th mo dhali ushki gwom buni gam is mo me'd gwo jin tor̄kina TAPA uni mo be.

Mompal jin Wo'c 'kwani is she/ ka Bas mo

¹⁴ Dhali yan'ko'd TAPA ki owa Musa gwo mo ki: Adu ma P̄irawn a'di 'bitha'bi'th mo. A'di ushki'd mo mmodhal 'kwani bway mo mmo/ii mo be.

15 Yaku/ a Pirawn mon'thamo/ mo me'd isi mii jin miikina a'di mo mmoya ka pije/ e kumma/ Yi'de/ Niil mo. Cori a'di e yana gap mo dhali kala lukaas pini yan me'd mo a'di jin warki'd ki tasha/ mo.

16 Dhali /e mini o a'di gwo mo ki: TAPA jin ta'da Arungimis gi 'kwani ma Ibraniyiin a'di i hashki aha/ i /e mo mmo/o /e gwo mo ki: Dhalki 'kwanim pem iin mo ki uni mini lunj aha/ mo e mom bwaasho mo. Dhali /e ushki gwo ha e naskina/ mo be.

17 Yase i ta gwo jin ona TAPA mo. 'Peni mii yan mo tani /e mini mish gwo 'ban ki aha/ tana TAPA mo. Aha/ mina dor kumma/ yi'de/ mo ka lukaas pem mo a'di jin diki'd e me'd pem mo dhali a'di midi war ka bas mo be.

18 Dhali wa'c kun 'kokini kumma/ yi'de/ yan mo tani uni mini wu mo dhali kumma/ yi'de/ midi bulabul mo be. Dhali 'kwani Pam Masir mini mol yi'de/ pi 'peni kumma/ yi'de/ yansan mo.

19 Dhali TAPA ki owa Musa gwo mo ki: Owa Haruun gwo mo ki: Budha lukaas pini mo dhali yetha bim pini mo apo/ aris mon'kulu yi'de/ ka ris mo gi Pam Masir mo eya ris wor buni i 'baar mo dhali eya kanycal buni mo dhali eya ris ushi mo kun doshkina yi'dem buni dhali eya al buni 'baar mo, ki uni mini war ka bas mo. Dhali abas minu mish ki tur mo e Bampa/ Masiri 'baar mo eya ris bwaman ton'kul bwa mo kun ta cwa mo dhali e bwaman wosh kun ta ton tantar bwa mo be.

20 Musa dhala Haruun uni miikin me'd jin kankina TAPA gwo mo. E jis e ma Pirawn dhali aris imanmiiya tu'c piti mo tani Haruun 'de'kki'da lukaas mo dhali dora po/ kumma/ Yi'de/ Niil mo. Dhala ris yi'de/ kun 'kokin mo eya Niil mo tani uni warkunu ka bas mo be.

21 Dhali aris wa'c kun 'kokin eya Niil mo tani uni wukin mo dhala Niil ki bul mo mo. Wakan 'kwani Pam Masir uni molki yi'de/ pi 'pena Niil mo. Dhali abas si'da/ ishki'd ki tur e Bampa/ Masiri 'baar mo be.

22 Hili nari gi Pam Masir mo tani uni si'da/ mii to jin nyakan ki miilat buni mo. Wakan adu ma Pirawn wa ki wosh jin 'bitha'bi'th mo. Dhali a'di diki ha uni gwo e mo me'd gwo jin okina TAPA mo be.

23 APirawn tu'kki'd mo dhali ya gu'b piti mo dhali a'di si'dayi diki kar 'cem piti gom to yan mo.

24 Dhala ris 'kwani Pam Masir si'da/ uni cwanyki jis e yana Niil ka ris mo gom yi'de/ mmopi mo, haali/ uni molki yi'de/ pi 'pena Niil mo be.

Mompal jin Wo'c Kwani Is She/ ka 'Dwa/ mo

25 Acim 'koni pesu/ kun pekin 'ko'di TAPA warki yi'den Niil ka bas mo be.

8

1 Dhali yan'ko'd TAPA oki'da Musa gwo mo ki: Yaku/ mo eya Pirawn mo dhali tori a'di gwo mo ki: Yase ta gwo jin ona TAPA mo ki: Dhalki 'kwanim pem bway mo mmo/ii mo ki uni mini mii mii mmodak aha/ mo.

2 Hili wakki/ /e mini ush mo mmodiki dhal uni bway mo mmo/ii mo tani, aha/ mina 'kosh aris bampam pini ka ma'dinya 'dwa/ mo be.

3 Dhali kumma/ Yi'de/ Niil minu 'tu'd mo ka risa 'dwa/ mo. Uni mini seku bway gu'b pini mo dhali bway gu'b ish pini mo dhali apowa cim pini mo dhali eya ris gu'b gi imanmii tom pini mo dhali 'kwanim pini mo dhali eya ris mo ma purun pini mo dhali e bwaman ma sahan kun miikunu /eya gana'th mo.

4 Arisa 'dwa/ mini seku /e i is mo dhali apo/ 'kwanim pini mo dhali apo/ aris imanmiiya tu'c pini mo be.

5 Yan'ko'd TAPA oki'da Musa gwo mo ki: Tora Haruun gwo mo mmo'deka lukaas piti apo/ aris yi'de/ kun son mo dhali apowa risa kanycal dhali apowa risa al mo. Dhali raka risa 'dwa/ mmoseyu/ apo/ Bampa/ Masir mo.

6 Wakana Haruun 'de'kki'da lukaas piti mo apowa ris yi'de/ gi Pam Masir mo. Dhali arisa 'dwa/ pu'dkin ka pije/ mo dhali kum Bampa/ Masir mo be.

7 Hili nari si'da/ miiki miilat buni gun gama uni adu is mo kun nyakkan ki mii gi iMusa mo. Dhali uni si'da/ raka arisa 'dwa/ mmoseyu/ ka pije/ mo e Bampa/ Masir mo be.

8 Dhali yan'ko'da Pirawn yukki'da Musa dhala Haruun mo dhali o uni gwo mo ki: 'Thoyi TAPA mo ma ki a'di midi kaka risa 'dwa/ mo 'peni aha/ mo dhali 'peni 'kwanim pem mo, dhali aha/ mina dhal 'kwani bway mo mmo/ii mo mmomii TAPA a basa 'cesh mo be.

9 Musa oki'da Pirawn gwo mo ki: Aha/ mina bwa 'kuny mo mmo'tho gom/ e mo. Tori atente/ jin napa /e aha/ ki 'tho gom /e mo dhali goma ris imanmiya tu'c pini mo dhali gom 'kwanim pini mo ka risa 'dwa/ minu 'ce'd sho'k mo dhali minu dhalku/ mo mmo'ko jasi e kumma/ Yi'de/ Niil mo be.

10 Dhala Pirawn ki o gwo mo ki: Ka'thamo/ mo. AMusa thokki gwo mo kan ki: Dhalki mii yan miinu wakan mo me'd jin okina /e mo ki /e mini mish mo mo ki jan kamu/ yisa di'da jin wa ki TAPA Arungimis bam mo.

11 Ama'dinya 'dwa/ mini dhal um 'pen mo dhali aris gu'b pini mo dhali aris imanmii tom pini kun mii ki /eya tu'c mo dhali 'kwanim pini mo. Dhali momboç ma 'dwa/ mina uni 'ko jasi e kumma/ Yi'de/ Niil mo be.

12 Wakana Musa dhala Haruun uni iikin ka pije/ mo 'pena Pirawn mo. Dhala Musa 'thoki'd ki 'bi'th mo e TAPA mo isi gom gwo ma 'dwa/ mo jin hashkina a'di a Pirawn mo.

13 Dhali TAPA miiki a'di mo isi me'd gwo ma Musa mo. Dhali arisa 'dwa/ wukin mo eya ris gu'bi 'baar mo dhali eya ris bwaagoni 'baar mo dhali e mondhe'di 'baar mo.

14 Dhali uni tulki uni is i montal 'de/ ka nul'kup mo dhali bampa/ bulabul mo be.

15 Hili ka Pirawn parki mo e mo ka 'dwa/ wukin mo tani a'di 'bi'thki'da dum piti mo dhali diki'd ki gwo i bwa mo mmo/ush gwo ma Musa dhala Haruun mo me'd jin torkina TAPA uni gwo mo be.

Mompal jin Wo'c 'Kwani Is She/ ka Shokom mo

16 Dhali yan'ko'd TAPA ki owa Musa gwo mo ki: Tora Haruun gwo mo ki: 'Deki alukaas pini mo dhali dori bu'da 'cesh mo ki a'di midi war ka shokom ki tur mo e Bampa/ Masiri 'baar mo.

17 Wakan aHaruun dorki'da 'cesh ka lukaas piti mo dhali dhan bu'd 'ce'dki'd ki to'bo/ to'bo/ mmowar ka shokom mo dhali shwa 'kwanim Pam Masiri 'baar mo dhali to em buni si'da/ mo be.

18 Dhali nari si'da/ palki mii mo mmo'taki raka shokom mmoseyu/ ka pije/ ki miilat buni mo jin gama uni adu is tani, hili uni pikunu e mo. Ashokom ishki'd e 'kwani mo dhali to e mo be.

19 Dhali nari torkina Pirawn gwo mo ki: Yansan ta me'd ma Arungimis mo. Hila Pirawn i 'bi'thkin ma du mo dhali a'di si'da/ ush gwom buni cik mo me'd gwo jin okina TAPA mo be.

Mompal jin Wo'c 'Kwani Is She/ ka kanthi/ mo

20 Dhali yan'ko'd TAPA ki owa Musa gwo mo ki: Cuyi mis mo mon'thamo/ ka'tum mo dhali yayi dosha bora Pirawn mo me'd jin yakina a'di ka pije/ bwaya Niil mo, dhali tor a'di gwo mo ki: Yase ta gwo jin ona TAPA mo ki: Dhalki 'kwani bway mo mmo/ii mo ki uni mini mii mii mnotak aha/ ki moman mo.

21 Wakki/ /e mini diki dhal 'kwanim pem bway mo mmo/ii mo tani aha/ mina hash ka dhana buhanya kan'thi/ apo/ /e mo dhali apo/ imanmiya tu'c pini mo dhali apo/ 'kwanim pini mo dhali eya ris bwan'gu'b pini mo. Dhali

eya ris bwan̄gu'b gi 'kwani Pam Masir mo tani uni minu 'tu'd mo ka dhana buhanya kan'thi/ mo dhali i tagi mo jin karkina Bampa/ Masir 'kup mo be.

²² Hili ka tee caan mo tani aha/ mina kwa/ Bampa/ Jaasaan bwa mo a'di jin 'kokina 'kwanim pem i cine/ mo, wakan ka buhanya kan'thi/ 'den kamu/ midi diki di imun mo, ki /e mini mish gwo 'ban ki aha/ tana TAPA jin di'd e bwaman gi mony'cesh mo.

²³ Yaase/ i ta mii jin miga/ mii mo mmokwa/a kwa/ bwa mo e bwaman 'kwanim pem dhali 'kwanim pini mo. Ka'thamon̄ gana/ mo tani a'di i mina to mer yan i di mo be.

²⁴ Dhali TAPA miiki mii gi wakansan mo. E mun mo tani adhana buhanya kan'thi/ pu'dkin mo e gu'b ma Pirawn mo dhali gu'b ma ris imanmii tom piti mo. Dhali eya ris Bampa/ Masiri 'baar mo uni shi/kunu is mo ki 'kup gwo ma kan'thi/ mo be.

²⁵ Dhali yan'ko'd a Pirawn yukki'da Musa dhala Haruun mo dhali o uni gwo mo ki: liku/ mo dhali miya Arumgimis bum abasa 'cesh e bampa/ Masir mo.

²⁶ Hila Musa thokki gwo o ki: A'di yisa midi 'bora mmomii mii gi wakan mo haali/ aman mina mii TAPA Arumgimis bam abasa 'cesh mo. Mii yan midi bulabul mo gom 'kwani Pam Masir mo. Wakki/ aman miina abasa 'cesh jin bulabul mo e jis e gi 'kwani Pam Masir mo tani uni mini 'koki 'kosh aman jwa mo ki wosh mo 'te/ tana?

²⁷ Aman mina mii ii mo goma cimi kwara mo e mom bwaasho mo dhali mii TAPA Arumgimis bam abasa 'cesh mo me'd gwo jin karkina a'di aman mo be.

²⁸ Wakana Pirawn oki gwo mo ki: Aha/ mina dhal ki um bway mo mmo/ii mo dhali mii TAPA Arumgimis bum abasa 'cesh mo e mombwaasho mo hili um mini ii i si'dasi'd yisa. 'Thoyi gom aha/ si'da/ mo.

²⁹ Dhali yan'ko'da Musa oki gwo mo ki: Aha/ yana mo ka pije/ mo 'peni /e mo dhali aha/ mina 'tho TAPA ki a'di midi hashka buhanya kan'thi/ mo 'peni/e mo jin tana Pirawn mo dhali 'peni imanmiiya tu'c pini mo, dhali 'peni 'kwanim pini mo ka'thamon̄ gana/ mo. Pirawn, dhalku/ ki ca'bi heka he'k em pus mo dok e mo mmodiki dhal 'kwani bwayi ii mo mmomii TAPA abasa 'cesh mo.

³⁰ Yan'ko'd aMusa a'di yaki'd ka pije/ mo dhali 'thoki TAPA mo be.

³¹ Dhali TAPA miiki'd wakan mo me'd jin okin ma Musa a'di mo dhali kalki'da buhanya kan'thi/ mo 'pena Pirawn mo dhali 'peni imanmiiya tu'c piti mo dhali 'peni 'kwanim piti mo. Jan 'den kamu/ yisa bo'co'da.

³² Hila Pirawn 'bi'thki'da dum piti is mo dok e ka tente/ yansan gana/ si'da/ mo, dhali diki dhal 'kwani bway mo mmo/ii mo be.

9

Mompal jin Wo'c 'Kwani Is She/ gom To/e kun Thipu mo

¹ Dhali yan'ko'd TAPA oki'da Musa gwo mo ki: Yaku/ mo eya Pirawn mo dhali o a'di gwo mo ki: Yase/ ta gwo jin ona TAPA Arumgimis gi 'kwani Ibraniyiin mo ki: Dhalki 'kwanim pem bway mo mmo/ii mo ki uni mini mii mii mmotak aha/ mo.

² Wakki/ /e mini ush mo mmodhal uni bway mo mmo/ii mo dhali di mmonon uni 'kup mo tani

³ me'd gi TAPA midi bita po/ to em pini ki 'ba'th jin shi/ashi/ mo e uni 'baar kun 'kon eya pije/ mo, shumaruun dhali thulun̄y dhali kalman dhali bip dhala ma'diny ka'bal dhali miya si'da/ mo be.

⁴ Hili TAPA midi kwa'th to e gi 'kwani ma Israyiil mo 'peni bwaman ji gi 'Kwani Masir mo. Wakan ki jin tal 'de/ midi diki wu mo 'peni aris uni kun ta ku ma Israyiil mo be.

⁵ Dhali TAPA karki'da cim 'pen ka pije/ mo dhali o gwo mo ki: Ka'thamon gana/ aha/ TAPA mina mii to yansan mo be.

⁶ Dhali mon'thamon gana/ mo tani TAPA miiki to yansan mo. Aris to e gi 'kwanim Pam Masir wukin mo. Hili to e gi 'kwani ma Israyiil mo tani tal 'den kamu/ yisa wu'da.

⁷ Dhala Pirawn hashki'da hash mmo'kar to e gi 'Kwani ma Israyiil mo. Dhali jan 'den kamu/ yisa di'da 'peni ji gi 'kwani ma Israyiil jin wu'da. Hila Pirawn 'bi'thki'da dum piti mo dhali a'di diki dhal 'kwani bway mo mmo/ii mo be.

Mompal jin wo'c 'kwani is she/ ki 'Ba'th Jamany Jwa mo

⁸ Dhali TAPA oki'da Musa gwo mo dhala Haruun ki: Muthi 'pinyi 'tu'd me'd bum mo 'peni bwam ma gwaṭa/ mo dhali dhalka Musa yeḳ uni i mis mo e jis e ma Pirawn mo.

⁹ Dhali a'di mido war ki bu'da 'cesh gana/ mo apowa ris Pa Masiri 'baar mo. Dhali 'ba'th jamany jwa mido mu/ 'kwani is dhali ki to e ilu/ ki tur mo e Pa Masiri 'baar mo be.

¹⁰ Wakan uni mu'thki 'piny mo 'peni bwam ma gwaṭa/ mo dhali dosh mo ibwambor ma Pirawn mo. Dhala Musa yeḳki 'piny mo isi mis mo dhali a'di warki'd ki 'ba'th jamany jwa mo apo/ i'kwanim pa ki to e ilu/ mo be.

¹¹ Dhali 'kwani kun miiki to ki e ma rum thus molki dosh mo ibwambor ma Musa mo gom jamany jwa mo haali/ jamany jwa bitḳi'da po/ uni mo dhali apo/ 'kwani Pam Masir i 'baar mo be.

¹² Hili TAPA i 'bi'thki'da Pirawn adum piti is mo. Dhali a'di diki ciḳ gwom buni mo me'd isi gwo jin ṭorkina TAPA aMusa mo be.

Mompal jin Wo'c 'Kwani Is She/ ka Wassa/ mo

¹³ Dhali yan'ko'd TAPA oki'da Musa gwo mo ki: Cuyi mis mon'thamo/ ka 'tum mo dhali doshi ibwambor ma Pirawn mo dhali oyi a'di gwo mo ki: Yase/ ta gwo jin ona TAPA Arungimis gi 'kwani ma Ibraniyiin mo ki: Dhalki 'kwanim pem bway mo mmo/ii mo ki uni mini mii mii mmoṭaḳ aha/ ki momanḳ mo.

¹⁴ Ka tee yansan aha/ mina hash mom'bi'th gi mompal jin wo'c 'kwani is she/ pem apo/ /e mo dhali apowa ris imanmiiya tu'c pini mo dhali apo/ aris 'kwanim pini mo, wakan ki /e mini mish mo mo ki wathin kamu/ yisa wa ki aha/ eya ris mony'ceshi 'baar mowah.

¹⁵ Waḳki/ aha/ mina 'taki 'de'k me'd pem mmodor /e mo ki 'kwanim pini ilu/ mo tani um minu 'taki 'ce'd ki sho'k mo 'peni 'dishesan mo 'peni mony'cesh mo ki 'ba'th jin wo'cki 'kwani is she/ ki ra'b ra'b mo.

¹⁶ Hili gom 'kup mii yan mo tani aha/ dhalkina /e mo mmotor /e mom'bi'th pem mo, wakan ki gway pem minu bah ki tur mo eya ris mony'ceshi 'baar mo be.

¹⁷ /E din naskina/ mo mmokar is pini ki ca mo apo/ 'kwanim pem mo dhali diki dhal uni bway mo mmo/ii mo be.

¹⁸ Gom kan mo tani ka'thamon gana/ ka tente/ gi wakansan mo tani aha/ mina rasa dhana wassa/ kun diṭadiṭ mo, ji gi wakan yisa mishkunu e Pam Masir mo yisa, 'pena cim caan jin ḳa'bkunu Pa Masir mo ntagi shwanesan mo be.

¹⁹ Hashi gwo mo mmoṭulu to em pini isi 'baar mo uni kun takina /e mo eya pije/ mo ki /e mini dhu uni ki 'dant̄ar e bwar'kwarany ma darha/ da/ mo haala wassa/ mini wolu ka 'cesh mo apo/ 'kwani 'baar mo dhali apo/ to e mo kun 'kokin apije/ mo. Dhali waḳki/ uni 'konuki 'doyu/ pa mo tani uni mini wu mo be.

20 Dhali yan'ko'd uni kun ƙo/ki gwo gi TAPA mo e bwaman 'kwani kun miikina Pīrawn aƙu'c mo tani uni dhuki aris cīƙkina/ dhali to em buni mo mmosoyu/ bway bwar gu'b mo be.

21 Hili gwattan kun dina gwon TAPA ki thoƙ ki is mo tani uni dhalki cīƙkinam buni kun yola uni mo dhali to em buni eya pije/ mo be.

22 Dhali TAPA oki'da Musa gwo mo ki: Yethi me'd pini 'kup ki momis mo ka wassa/ midi rasu/ apo/ Pam Masiri 'baar mo apo/i 'kwani mo dhali apo/i to e mo dhali eya ris to kun sinu eya pije/ ki tur mo e Bampa/ Masir mo be.

23 Wakana Musa 'de'kki cwam piti mo 'kup ki mis mo dhali TAPA hashki mondor ma sho'k mo dhala wassa/ dhali o'd iikina war war ka 'cesh mo. Wakan TAPA a'di i he'thki'da wassa/ mo apo/ Bampa/ Masir mo be.

24 Awassa/ raski'd, dhali awara sho'k su'kki'd ki dwa/a'd dwa/a'd ki sule/ sule/ mo 'peni bwaman ma wassa/ mo. 'Tham si'da/ bucurki'd ki 'bi'th mo. Ji gi wakansan yisa mishkunu yisa e Bampa/ Masiri 'baar mo 'pena dhamo/ me'dyin dina a'di ki war ki kal mo.

25 Awassa/ raski'da po/a 'cesh eya ris to kun 'kona pije/ mo uni kun sikunu mo ki tur mo eya ris Bampa/ Masir mo ki 'kwani ilu/ mo dhali to e ilu/ si'da/ mo dhali dhera ris cwa bwa 'baar mo kun 'kokin e bwam bunto si'da/ mo be.

26 Dhali mon 'de/ jin dina a'di ki 'ce'd sho'k ka wassa/ mo tani ta'da 'cesh gi Pany Jaasaan jin 'kona uci ma Israyiil i cine/ mo be.

27 Dhali yan'ko'da Pīrawn hashki'da hash mo dhali yuƙa Musa dhala Haruun mo dhali o uni gwo mo ki: Aha/ miikina miinthus ka tee yan mo. TAPA a'di i mii'd ki 'bore/ mo dhali aha/ dhali 'kwanim pem mo tani aman a'di i thamkina mii mo be.

28 'Thoyi TAPA mo ma, haali/ a'di 'kosh jwa mo 'peni kon dor ma sho'k yan mo dhala wassa/ mo. Aha/ mina dhal um bway mo mmo/ii mo. Um mini mii dhalku/ ki mii 'ko ki rash rash kan mo.

29 Musa ki thoƙ a'di gwo mo ki: Ki aha/ mina ya mo 'peni 'penkuman bampa/ ki 'ta'b mo tani aha/ mina te'd me'd pem e TAPA mo dhali 'tho mo. Dhali mondor ma sho'k midi dosh mo dhala wassa/ si'da/ mini 'koki 'ko mo dok e ki /e mini mish gwo 'ban ki mony'cesh ta ji gi TAPA mo be.

30 Hili gom /e mo dhali aris 'kwanim pini kun miiki /eya tu'c mo tani, aha/ mish a ki um 'koki ƙo/ TAPA Arungimis naskina/ moyi.

31 Emen to ma yin dhali ƙala uni i'ce'dkunu sho'k mo haali/ ƙala isi'd mo dhali emen to ma yin di'd e pimpal mo be.

32 Hila gameh yisa i'ce'dkunu sho'k mo haali/ a'di iski'd i 'ko'd mo be.

33 Wakan aMusa a'di yaki'd ka pije/ mo 'peni 'penkuman bampa/ mo 'pena Pīrawn mo dhali te'd me'd piti e TAPA mo. Dhali mondor ma sho'k dhala wassa/ uni doshkin mo dhali ashok yisa dok e hethi yi'de/ apo/ mony'cesh mowa.

34 Hili ka Pīrawn mishki'd ka sho'k dhala wassa/ dhali mondor ma sho'k doshkin mo tani a'di miiki miinthus naskina/ dok e mo. Dhali a'di 'bi'thki'da dum piti ki 'bi'th mo, a'di i nyakki/ uni kun miiki a'di aƙu'c si'da/ mo be.

35 Wakan adu ma Pīrawn a'di 'bi'thki'd mo dhali a'di diki dhal 'kwani ma Israyiil bway mo mmo/ii mo me'd gwo jin torkina TAPA eya Musa mo be.

10

Mompal jin Wo'c Kwani Is She/ ka Kuyu/ mo

1 Dhali yan'ko'd TAPA oki'da Musa gwo mo ki: Yaku/ aPīrawn mo haali/ aha/ i'bi'thkina a'di adum piti is mo dhala du gi aris 'kwani kun miiki a'di aƙu'c mo ki aha/ mina mii aris miimer pem gwansan i bwamani uni mo.

² Dhali ki /e mini mii tor gwo mo ki uċim pini mo dhal ki uċi gi iya/in mo gom mon'the is jin 'thekika/'kwani Pam Masir mo ka tee jin miikika/ miimer e bwaman uni mo. Um 'baar mo mini mish mo mo ki aha/ tana TAPA mo.

³ Wakana Musa dhala Haruun uni iikina Pīrawn mo dhali o a'di gwo mo ki: Yase/ ta gwo jin ona TAPA mo a'di jin ta 'da Arungimis gi 'kwani Ibraniyiin mo. Me'di ekata i mina /e i ca'bi ush is pini kar ki gwa'd kan mo ibwambori aha/ mo? Dhalki 'kwanim pem bway mo mmo/i mo ki uni mini mii mii mmotak aha/ ki momanj mo be.

⁴ Haali/ wakki/ /e mini ush 'kwanim pem dhal bway mo mmo/ii mo tani, ka'thamonġ gana/ aha/ mina hasha waambuhanya kuyu/ e bampam pini mo.

⁵ Dhali uni mini tika 'cesh e mo, wakan ki wathin tal 'denġ kamu/ midi diki misha 'cesh mo. Dhali uni mini shwa to ki ca'ba ca'ba kun urki 'kup mo i'ko'da wassa/ mo. Dhali uni mini shwa aris cwam bumi 'baar mo kun cakin mo e mondhe'd mo be.

⁶ Dhali uni si'da/ mini 'tu'd aris gu'b pini mo dhali aris gu'b gi 'kwanim pini kun miiki /eya tu'c mo dhali aris gu'b gi 'kwani Pam Masiri 'baar mo. To gi wakansan yisa mishkina ibabam pini mo dhali idhan cim mo 'pena tee caan jin pu'dkina uni e mo yan mo ntagi shwane/ mo yisa. Dhali yan'ko'd aMusa tu'kki'da bor mo 'pena Pīrawn mo dhali ya ka pije/ mo be.

⁷ Dhali 'kwani kun miikina Pīrawna tu'c mo tani oki a'di gwo mo ki: Me'd ekata i mina wathi/ yan iċa'bi yap ana ka gumme/ wakan mo? Dhalki 'kwani iin mo ki uni mini mii mii mmotak TAPA Arungimis buni mo. /E mala tumu'c pini mmomol gwo 'ban naskinaġ gana/ mo? Dina /e ki mish gwo 'ban ki Pam Masir 'ce'dkunu shoka?

⁸ Yan'ko'd aMusa dhala Haruun uni susunu ka nyar'ko'd eya Pīrawn mo. Dhala Pīrawn ki o uni gwo mo ki: Iiku/ mo mmomii mii mmotak TAPA jin ta'da Arungimis bum mo. Hili ija uni i mini ii mo?

⁹ Dhala Musa ki thoġ a 'di gwo mo ki: Aman mina ii nyakki dhuru'c bam mo dhali nyakki 'kwani kun tana dhan mo. Dhali aman mina ii nyakki iya/m bam mo dhali i'bwa/m bam mo dhali ura ma'diny ka'bal bam mo dhali aris bip bam mo haali/ aman mina mii ta gi dhan moshwan to mmotak TAPA mo be.

¹⁰ Dhala Pīrawn ki o uni gwo mo ki: Dhalki TAPA di'd e um mo ma, wakki/ aha/ dhala um bway mo mmo/ii mo nyakki uċim bum mo. Um ta gi gwon thusa tiya eya dum bum mo ba/.

¹¹ Yisa wakan 'teya. Iiku/ mo um 'kwaningwath um 'cena mo dhali miyyi mii mmotak TAPA mo. Haali/ mii a'dan jin gwon ma dum bum mo. Dhala Musa uni ka Haruun urkunu ka pije/ 'peni bunġ kus ma Pīrawn mo be.

¹² Dhali TAPA oki'da Musa gwo mo ki: 'Deki me'd pini mo apo/ Bampa/ Masir mo goma kuyu/ mo ki uni mini thathu ki shenġ 'kup mo eya 'cesh gi Pam Masir mo dhali shwa aris to kun sinu mo e bwam bunto mo aris uni 'baar mo kun urkin ma wassa/ 'kup mo be.

¹³ Wakan aMusa a'di ihe'thki'da lukaas piti mo apo/ Bampa/ Masir mo. Dhali TAPA kalki 'tham gi mom'pesho'k mo mmoposh ka enthus mo ka cim caan ki mon'thiny ilu/ mo. Dhali ki mo ta mon'thamo/ mo tani 'tham gi mom'pesho'k a'di i kala'da risa kuyu/ mo be.

¹⁴ Dhala waambuhanya kuyu/ tha'thkin apowa 'cesh gi Pam Masir mo dhali thoson is buni mo mmo'ko mo e dhan Bampa/ Masiri 'baar mo. Adhana kuyu/ shwan ma risa nyor kagahara mo. Ji gi wakansan yisa mishkunuwa, dhali a'di midi doġ e di ki sule/ sule/ mo yisa.

¹⁵ Uni kumkina 'ceshi 'baar mo. Wakan a'cesh ki kar 'kup ki dhurun mo mo. Dhali uni shwaki to kun sikunu mo e mony'cesh mo dhali aris maman to 'peni uni kun urkin ma wassa/ 'kup mo. Ton dhi/i'da kamu/ yisa boċo'da

walla cwa si'da/ walla to kun sinu mo em bunto mo ki tur eya 'cesh gi Pam Masir mo.

¹⁶ Dhali yan'ko'da Pirawn yukki'da Musa dhala Haruun ki jahanne/ mo dhali o uni gwo mo ki: Aha/ miikina miinthus apo/ TAPA Arumgimis bum mo dhali apo/ um mo be.

¹⁷ Dhali shwanesan gwami aha/ miinthus pem jasi me'd 'deŋ gana/ mo. Dhali 'thoyi TAPA Arumgimis bum mo gom aha/ mo mmojoç ki mompal jin 'koshoda 'kosh jwa mo 'peni aha/ mo.

¹⁸ Wakan aMusa yaki'd ka pije/ 'pena Pirawn mo dhali 'thoki TAPA mo be.

¹⁹ Dhali TAPA akki 'tham gi mompesho'k a'ban e mo mmowar ka bora lunġu'b mo jin 'bitha'bi'th mo a'di jin yu'dki'da buhanya kuyu/ mo dhali kal uni sho'k mo e Yi'deŋ kummam 'Per mo. Ara kuyun kamu/ 'de/ yisa di'd jin dhalkunu mo e Bampa/ Masira.

²⁰ Hili TAPA 'bi'thki'da Pirawn adum piti is mo dhali a'di diki dhal 'kwani ma Israyiil bway mo mmo/ii mo be.

Mompal jin Wo'c 'Kwani Is She/ ki Mondhurumi'd mo

²¹ Dhali yan'ko'd TAPA oki'da Musa gwo mo ki: Te'dki me'd pini 'kup ki momis mo ki mondhurumi'd jin 'cethe'da 'tum midu wuma po/ Pam Masiri 'baar mo. Mondhurumi'd mina moŋkusha kamu/ i diki di ce e mo.

²² Wakan aMusa te'dki me'd piti 'kup ki momis mo dhali dhan mondhurumi'da 'tum diki'd mo e Bampa/ Masir goma cimi kwara mo be.

²³ Wathin kamu/ yisa di'da jin mishi tiyan tiya par e mo yisa. Walla jin tal 'deŋ kamu/ yisa cuki mis mo 'peni mom piti mo ka cimi kwara mo. Hili aris 'kwani ma Israyiil uni a'di i ta gi moŋkush mo e mo jin 'kokina uni mo be.

²⁴ Dhali yan'ko'd aPirawn yukki'da Musa mo dhali o gwo mo ki: Iiku/ mo mmomii mii mmotak TAPA mo ki up bumi lu/ mo. Dhali uçim bum si'da/ mini nyak ii ki um mo. Hili dhalka ma'diny ka'bal dhali aris bip bum i mini 'koku/ mataan mo.

²⁵ Hila Musa thoŋki gwo mo ki: /E mini mii dhal aman bway si'da/ mo mmota gi to jin mina aman i miya basa 'cesh mo dhali to kun minnu mo kun cinu ki me'd mo jin 'thanu o'd ka kuluny ki aman mina çiki a'di TAPA Arumgimis bam mo be.

²⁶ To em bam si'da/ mini mii ii nyakki aman mo, To e 'deŋ kamu/ yisa minu dhalku/ i'ko'd yisa, haali/ aman mina mii bu'th uni mo dhali mii mii mmotak TAPA Arumgimis bam mo. Dhali aman yisa misha to kun mina aman i mii i 'ci'th 'kus naskina/ gom TAPA yisa ntagi aman mina pu'dku/ i mun mo be.

²⁷ Hili TAPA a'di i 'bi'thki'da Pirawna du is mo dhali a'di diki dhal uni bway mo mmo/ii mo be.

²⁸ Dhala Pirawn ki owa Musa gwo mo ki: Guki jis em pini mo 'peni aha/ mo. Mishi gwo 'ban ki /e mini diki doŋu/ ka nyan'ko'd doŋ e mo. Dhali ka cim jin mina /e i par jis em pem e mo tani /e mini wu mo be.

²⁹ Musa thoŋki a'di gwo mo ki: Me'd jin ona /e mo tani aha/ si'da/ mina diki par jis em pini e ki sule/ doŋ e mo be.

11

Mompal jin Wo'c 'Kwani Is She/ Goma Bwanyara/ ma Dho'th mo

¹ Itwa/ a/ TAPA tori'da Musa gwo mo ki: Mompala kamu/ jin wo'c 'kwani is she/ diy'i'di 'de/ naskina/ mo a'di jin miga/ kala powa Pirawn mo dhali apo/ 'kwanim piti mo. Yan'ko'd mo tani a'di midu dhal um bway mo mmo/ii mo besene/ mo. Ki a'di midu dhal um bway mo mmo/ii mo tani, a'di midu ur um ka kuluny mo.

² Tori 'kwanin gwath gwo mo ki up ilu/ ki uni mini dot tiya kun 'dish uni gu'b is mo gom dhiriny 'dolkon kush dhali 'dolkon gana/ mo be.

³ Dhali TAPA ciki 'kwani mii ma 'the i jis e gi 'kwani Pam Masir mo. Dhali aMusa ki is piti mo tani a'di karu ki dhan gumpa/ mo e Pam Masir mo e jis e ma ris 'kwani kun miikina Pirawn atu'c mo dhali e jis e gi 'kwani mo be.

⁴ Wakan aMusa oki'da Pirawn gwo mo ki: Yase/ i ta gwo jin ona TAPA mo. Ki mo midi ta mombwam/e mo tani aha/ mina yaku/ e bwaman 'Kwani Masir mo.

⁵ Dhala bwanyara/ ucin gwathi 'baar mo gun 'kon e Pam Masir mo tani mini wu mo 'pena bwanyara/ ma Pirawn jin ca'bka'da kurse/ ma malik mo ntaga bwanyara/ gi cinjinam piti kun miina yo mo dhali i ta ga bwanyaram bip si'da/ mo be.

⁶ Dhali e mun mo tani adhan cuuwa minu 'ther ki tur mo e Bampa/ Masiri 'baar mo. Mii gi wakan yisa mishkunu me'd 'de/ yisa walla mii yan midi dok e di yisa ki sule/ mo.

⁷ Hili e bwaman 'kwani ma Israyiil mo tani a'karj kamu/ yisa midi buk wathin kamu/ wala to e ilu/ yisa. Yan'ko'd um mini mish ki TAPA kar ki mo jin kwa/uwa kwa/ bwa 'peni 'kwanim Pam Masir nyakki 'kwani ma Israyiil mo be.

⁸ Dhali aris 'kwanim pini kun miiki /e to mo tani uni mini dhorothu aha/ mo dhali lunja lunj gom aha/ mo dhali o gwo mo ki: Yaku/ /e ka pije/ mo dhali aris 'kwani kun bathki /e nsho'k 'baar mo. Dhali yan'ko'd mo tani aha/ mina ya ka pije/ mo. Dhali a'di yaki'd ka pije/ 'pena Pirawn ka nyor jin 'batha'ba'th mo.

⁹ Dhali itwa/a/ TAPA oki'da Musa gwo mo ki: APirawn midi cik gwo 'peni /e yisa mo. Wakan ki miimer pem miga/ mar is mo e Pam Masir mo be.

¹⁰ Musa dhala Haruun miikina ris to mer gwani 'baar mo i ibwambor ma Pirawn mo. Hili TAPA 'bi'thki'da Pirawn adum piti is mo dhali a'di diki dhal 'kwani ma Israyiil bway mo mmo/ii mo 'peni bampam piti mo be.

12

Mompe'kupanyolos mo

¹ Dhali TAPA oki iMusa uni ka Haruun gwo mo e Pam Masir mo ki:

² Appee yansan a'di ta'da ppee jin twa/a/ ki yil gom um jin mina umi tel 'pen goma risa ppee i 'baar mo. A'di midi ta appee jin twa/a/ ki yil gom um mo be.

³ Tora risa njul 'kup 'kwani ma Israyiil gwo yan mo ka cima 'kume'd ka ppee yansan mo tani uni mini bu'th ushi ka'bal gwathan mo, wathi/ ka 'dete/ 'dete/ 'peni gu'b gi ibabam buni mo isi me'd jin wana a'di kan mo, ka'bala 'de/ gom gu'b ka kuluny mo be.

⁴ Dhali wakki/ kunju'ba ka kuluny gwa'da she/ mo gom ka'bala 'de/ mo tani dhalki uni nyak ka'bal ki gu'ba kamu/ mo jin 'dish uni is mo. Uni mini de' 'kwani e me'd isa nimira jin midi par shum isi me'd mo be.

⁵ Ka'bal bum mini mii dar gi thalkin mo, 'pena rasan jin dina yili 'de/ gana/ mo. Um mini bu'th a'di 'peni bwanj ka'bal mo walla 'peni bwam mi mo.

⁶ Dhali um mini dhu uni ki 'bore/ mo ntaga cimi 'kume'd i'ce'd ka donon ka ppee yansan mo. 'Kwani ma Israyiil ka njul 'kupi 'baar mo mini 'kosh ka'bal buni jwa mom 'penkaskum mo be.

⁷ Dhali yan'ko'd mo tani uni mini 'thupa bas mo dhali 'kosh a'di e cwa gi 'twanjal gu'b ka 'ban su/ mo dhali i cwa gi bunj'kup ma campur gu'b mo kun 'kokina uni mmo'ka shum mo be.

⁸ Uni mini 'thos shum ki isi o'd dhali 'ka a'di ki mon'thinya 'de/ caan mo! Dhali uni mini 'ka a'di nyakki jasse/ jin ka/aka/ mo dhali nyakki maankuthu'd jin miinu ki dar ga cumat mo.

⁹ Dhalku/ shum ki 'ka ki 'de/ mo walla dhalku/ a'di ki shun ki yi'de/ mo. Hili 'thosi a'di ki o'd mo ki 'kup ilu/ mo dhali ki 'basha'k ilu/ mo dhali ka ris to 'baar kun 'koni bwaman bungwar is ilu/ mo be.

¹⁰ Dhali um mini dhalku/ shuma kamu/ ki boç ntagi mon'thamo/ mo. Wakki/ kun tiya boça umi ta gi mon'thamo/ tani 'thayyi um uni o'd mo ka jin gana/ mo.

¹¹ Bwaya 'dihe/ jin mina um i 'ka a'di mo: Deki waçkan e empa'd bum mo dhali hitha ppam bum mo dhali kala lukaas e me'd bum mo, dhali um mini 'ka shum ki yap yap ise/ ki jahanne/ mo. Haali/ a'di ta Mompe'kupanyolos gi TAPA mo be.

¹² Dhali aha/ mina pe ki tur e Bampa/ Masir ki mon'thiny caan mo. Dhali aha/ mina 'kosha bwanyara/ gi Pam Masir 'baar mo uni kun tana gwath mo dhali ki to e ilu/ mo. Dhali arum pinycon jin luña uni mo tani aha/ mina dor uni mo. Aha/ be i tana TAPA mo be.

¹³ Abas a'di i midu ta jamas mmomish gwo 'ban gom moñ'kom bum mo. Dhali ki aha/ mina para bas e mo tani aha/ mina pe um 'kupa nyolos mo. Dhali mii shi/gañ kamu/ yisa midu bita po/ um mo mmo'ce'd um sho'k mo me'd jin miga/ 'kosh Bampa/ Masir mo yisa.

¹⁴ Atee midu ta jim bum jin mina umi ka e mo. Um mini ta gi dhan moshwan to mmotak TAPA mo. Um mini nyoñ a'di me'd gwoñkan jin mina umi mii ki tur e emen bum ki sule/ sule/ mo be.

¹⁵ Um mini shwa maankuthu'd jin miinu ki dar ga cumat goma cimi pesu/ mo. Dhali ka cim jin twa/a/ mo tani um mini kala cumat bum sho'k ka pije/ mo 'peni aris gu'b bum mo. Jan tal 'deñ kamu/ midu diki shwa ji gi din ma cumat e mo'pena cim jin twa/a/ ntaga cimi pesu/ mo. Haali/ wakki/ wathñ kamu/ shwa to ka mak tani minu 'cith 'twa/ mo 'peni 'kwani ma Israyiil mo be.

¹⁶ Ka cim jin twa/a/ mo tani um mini ta gi mo ma tul 'kup jin kogu mo. Dhali ka cimi pesu/ mo dok e um mini ta gi mo ma tul 'kup jin kogu mo. Atuca kamu/ minu mii ka tee gwansan yisa, hili jasi to jin miin ma ris 'kwani 'baar ka 'dete/ 'dete/ i shwa mo a'di mina umi i mii thoson jasi is mo be.

¹⁷ Um mini kar Dhan Moshwan To gi Maankuthu'd jin miinu ki dar ga cumat mmotak TAPA ki sule/ mo be. Haali/ a'di ta'da tee yan gana/ jin kalkika/ wak bum ka pije/ 'peni Pam Masir mo. Ka cim yansan 'ko'di yili 'baar mo tani um mini shwa maankuthu'd jin miinu ki dar gi cumat mo ki dhan mombut yan mo be.

¹⁸ Dhali ka cim jin twa/a/ jin ta'da 'kume'd i'ce'd ka doñon ma ppe mo mom'pimpili/ mo tani um mini shwa maankuthu'd jin miinu ki dar ga cumat mo dhali wakan si'da/ ntaga cim iss 'de/ i'ce'd 'de/ ka ppe mo mom'pimpili/ mo be.

¹⁹ Haali/ goma cima pesu/ mo tani acumata kamu/ minu gam yisa eya ris gu'b mowa. Dhali wakki/ unin tiya shwaki maankuthu'd jin miikunu ka cumat mo tani 'kwani gwansan minu 'cith 'twa/ mo 'pena ñul'kup gi 'kwani ma Israyiil mo be. Nyakka'd kan wakki/ a'di ta wathi/ jin yayi yilkina/ mo walla wathi/ gi bampa/ mo be.

²⁰ Dhalku/ maa jin minu ka cumat ki shwa mo. E mo 'baar kun 'kona um mo tani, um mini mii shwa to kun minu ki dar ga cumat mo be.

21 Dhala Musa yukki'da ris 'kwani jwaha/ ma Israyiil mo dhali tor uni gwo mo ki: Lahi ushi ka'bal gom is bum mo me'd isa wak bum mo dhali 'koshi uni mo goma Cim gi Mompe'kupanyolos yan mo.

22 Budhi deken cwan 'tasha cal bip mo dhali 'thupi a'di ka bas jin diki'd mo e bwaman ma sahan mo. Dhali 'koshi a'di i buj'kup ma campur mo dhali ka 'ban su/ cwa ma campur mo ka bas jin diki'd e bwaman ma sahan mo. Dhali jan tal 'den kamu/ yisa midi ya ka pije/ ka campur gu'b piti mo ntagi mon'thamo/ mo be.

23 Haali/ TAPA a'di i midi ya pe ki tur mo mmo'kosh 'kwani Pam Masir mo. A'di midi para bas e mo e buj'kup ma campur dhali 'ko'd gwara su/ mo. Dhali a'di midi peya campur 'kup mo dhali midi diki dhala aman'ce'da 'ce'd sho'k bway mo mmoci'c aris gu'b bum mo mmo'kosh um mo be.

24 Um mini ha gwonkan e mo, um dhali iya/m bum ki sule/ sule/ mo.

25 Dhali ki um mini ci'c mo e bampa/ caan jin okina TAPA mo mmoci um mo me'd isi gwo jin okina a'di is mo tani um mini kar Mompe'kupanyolos yansan mo be.

26 Dhali ucim bum mini o um gwo mo ki: 'Pemen mii yan ta'da tinta jin ona um gom miin to yan mo? Ki uni mini o um gwo kan mo tani

27 um mini o gwo mo ki: A'di ta mii ma basa 'cesh gi TAPA mo gom mompe'kupanyolos mo haali/ a'di peki gu'b gi 'kwani ma Israyiil 'kup e Pam Masir mo. A'di 'koshki 'kwani Pam Masir mo hili a'di i 'tashki gu'b bana 'twa/ mo be. Dhali 'kwani taki 'kup buni ka lungu'b mo dhali luja luju mo be.

28 Dhali 'kwani ma Israyiil uni iikin mo dhali mii a'di wakansan mo me'd gwo jin kankina TAPA aMusa mo dhala Haruun mo.

29 Ki mombwam/ e mo tani TAPA 'koshki'da risa bwanyara/ gi Bampa/ Masir mo. A'di 'koshki'da bwanyara/ ma Pirawn mo a'di jin ca'bki'da kursem piti mo. Dhali a'di 'koshki'da ris uni 'baar mo si'da/ ntaga bwanyara/ gi a'di jin di'da sijina 'kulga/ mo dhali arisa bwanyara/ gi to e mo be.

30 Dhali aPirawn cuki mis mo mon'thiny mo, a'di dhali aris imanmii a'di to mo dhali aris 'kwani Pam Masiri 'baar mo. Dhali adhan mo jin kumu/ ko caaca kagahara mo e Bampa/ Masir mo haali/ gu'ba kamu/ yisa di'da jin dina jan tal 'den kamu/ ki wu i bwaman mowa.

Mmo/i ka Pije/ mo

31 Dhali a'di yukki'da Musa dhala Haruun ki mon'thinya 'de/ caan mo dhali o gwo mo ki: Cuyi um mis mo dhali iiku/ mo ka pije/ 'peni bwaj 'kwanim pem mo isi um gwan dhali 'kwani ma Israyiil mo. Dhali iiku/ um mo dhali mii ki montak gom TAPA mo me'd jin okina um mo be.

32 Budhi arisa ma'diny ka'bal bum dhali aris bip bum mo me'd gwo jin okina um mo. Dhali iiyi mo dhali 'borki aha/ mii si'da/ mo.

33 Dhali 'kwanim Pam Masir uni di'bki 'kwani is mo mmo/iiku/ mo ki yap yap ki jahanne/ 'peni bampam buni mo haali/ uni oki gwo mo ki: Amani 'baar mo mura wu mo be.

34 Gom kan mo tani 'kwani kalkina gana'th buni ki dar ga cumat i e mo. Akwalal buni jin 'thoka uni to nycine/ mo tani kothkina uni is mo ki burrinyem buni mo dhali shir uni mo e 'kupa bim buni mo be.

35 Dhali 'kwani ma Israyiil miikin mo me'd jin tor kin ma Musa uni gwo mo. Uni 'thoki 'kwani Pam Masir dhiriny 'dolkon kush mo dhali 'dolkon gana/ mo dhali burrinye/ mo be.

36 Dhali TAPA ciki 'kwani mii ma 'the e jis e gi 'kwani Pam Masir mo. Uni ciki uni to gun dofa uni mo be. Yase/ i ta mii jin kalkina uni 'kwani Pam Masir to mo be.

37 Dhali 'kwaniḡ gwath ma Israyiil thum ii ka ji sho'k mo 'peni Pa Ramisiis mo ntagi Pan Sukuuḡ mo. 'Kwani 'kona alipi suttu miyya mo kun iikin ki sho'k mo mmodiki deḡ uḡ e dhali uḡi mo be.

38 'Kwanin tiya ka ris iikin nyaḡki uni mo dhali to e kun tana ris ka ris mo nyaḡka ma'diny ka'bal mo dhali aris bip mo be.

39 Dhali uni 'thoḡki maanḡkuthu'd ki dar ga cumat i e mo 'pena gana'th jin kalina uni mo ka piye/ 'peni Pam Masir mo. Uni 'konuki miyya cumat i e mo haali/ uni dhi'thunu sho'k ka piye/ mo 'peni Pam Masir mo. Uni yisa tan ga tenten kamu/ mo mmothoson is bunin gana/ mo gom tonte/ gom bway mo yisa.

40 Yil gun 'kokina 'kwani ma Israyiil mo e Pam Masir mo tani ta'da urbu/ miyya wa talatiin mo be.

41 Dhali e she/ yil ma urbu miyya wa talatiin mo 'pena cim gana/ 'de/ yan mo tani ku gi TAPA 'baar mo iikin ka piye/ mo 'peni Pa Masir mo.

42 A'di ta mon'thiny jin jikina TAPA aji mo mmosusu uni ka piye/ mo 'peni Pam Masir mo. Wakan ki mon'thiny yansan jin nyaḡka'd mo tani 'kwani ma Israyiili 'baar mo mini jiya ji ka tee yan eya risa nyaḡkum yil buni mo be.

Gwoḡkan Gom Mompe'kupanyolos mo

43 Dhali TAPA oki'da Musa dhala Haruun gwo mo ki: Yansan a'di i ta gwoḡkan gom mompe'kupanyolos mo be. Wathi/ gi paḡ kamu/ midi 'ka a'di mo yisa.

44 Hili aris ciḡkina/ kun yolu ka guurush mo tani uni a'di i mini 'ka a'di mo ḡ'ko'di /e mini 'ciḡh uni amunyjal yis buni mo be.

45 Hili 'kwani gun iiyi yilkina/ mo walla 'kwani gun kwanyu ki imanmiyya tu'c mo tani uni mini 'ka yisa.

46 E gu'ba 'de/ mo tani a'di i minu 'ka a'di mo. Um mini dhalku/ shum ki kal ka piye/ mo 'peni gu'b mo dhali um si'da/ mini dhalka sima/ ki 'ce'd bwa mo 'peni uni mo be.

47 Adhana wak 'kwani ma Israyiil ka kuluny mii moshwan to yan mmotak TAPA mo be.

48 Dhali wakki/ wathi/ jin dina e ki she/ di'di nyaḡki um mo dhali ḡpa'd mmokar Mompe'kupanyolos gi TAPA mo tani dhalka ris unim piti ka kuluny kun tana gwath 'ciḡhuwa munyjal yis mo, dhali yan'ko'd a'di midi yayu/ mo mmo'dish mo is mo dhali kar a'di mo. A'di si'da/ midi wa e ki wathi/ gi bampa/ mo. Hili wathi/ jin di'd ka munyjal yisi e mo tani midi diki 'ka shum yan mo.

49 Gwoḡkan midi tal 'de/ gom wathi/ gi bampa/ mo dhali gom wathi/ jin dina e ki she/ jin nyaḡki di ki um mo be.

50 Yase/ i miikina 'kwani ma Israyiil i 'baar mo me'd jin kankina TAPA aMusa gwo dhala Haruun mo.

51 Dhali ka cima 'deḡ gana/ yan mo tani TAPA suski 'kwani ma Israyiil ka piye/ mo 'peni Bampa/ Masir mo ka wak buni 'peni e kun 'ko uni ki she/ ki she/ mo be.

13

Monyciya Bwanyara mo

1 Dhali TAPA oki'da Musa gwo mo ki:

2 Ciyi aha/ arisa bwanyara/ mo 'peni kuḡ gwath, uni kun ka'dki bwa ma dho'th gi 'kwani ma Israyiil mo 'peni wathin gwath mo dhali to e mo. Uni ta kum pem mo.

3 Dhali aMusa oki 'kwani gwo mo ki: Kayi atee yansan e mo a'di jin pikina um ka piye/ mo 'peni Bampa/ Masir mo, 'peni mo jin miinu um ki miiny

ciŋkina/ mo. Haali/ ki me'd gi TAPA jin 'bitha'bi'th mo tani i suskina a'di um ka pije/ mo 'peni mo yansan mo. Maanḵuthu'da kamu/ yisa mina umi shwa jin din ma cumatḵi e mo yisa.

⁴ Ka ppee jin tḵwa/a/ jin yuḵu ka Abiib* mo tani um mini ii ki sule/ sulerḵa/ mo.

⁵ TAPA oki gwo is gom ibabam bum mmoḵi ki um a'cesh gi Bampa/ Kanaan mo dhali Bampa/ Hathath mo dhali Bampa/ Amuur mo dhali Bampa/ Hawb mo dhali Bampa/ Yabuus mo. Ki a'di mididi 'doyu/ um eya 'cesh jin ta pa ki pa mo, um mini mii moshwan to yan ka ppee jin tḵwa/a/ 'ko'di yili 'baar mo be.

⁶ Goma cimi pesu/ um mini shwa maanḵuthu'd jin miinu ki dar ga cumatḵ mo. Dhali ka cim pesu/ mo tani dhan moshwan to mididi mmtakḵ TAPA mo be.

⁷ Maanḵuthu'd jin miinu ki dar ga cumatḵ mo tani a'di i minu i shwa ka cim pesu/ mo. Maanḵuthu'da kamu/ jin miinu ka cumatḵ yisa minu mii mishi um mo dhali acumatḵ yisa si'da/ minu mii i mishi um eya ris gwayu/ moḵ'kom bumi 'baar mo yisa.

⁸ Dhali /e mini tor iya/m pini gwo ka tee caan mo ki: Mii yan miikika/ gom to jin miina TAPA gom aha/ mo ki aha/ pikina ka pije/ 'peni Bampa/ Masir mo be.

⁹ Dhali a'di mididi ta jamas mii e me'd pini mo dhali me'd mo jin kanuwa ka e e buyem pini mo, ki gwoḵkan gi TAPA mididi e 'twam pini mo. Haali/ ki me'da 'bi'thga/ gi TAPA mo tani a'di i suski /e ka pije/ mo 'peni Pam Masir mo be.

¹⁰ Gom gwo gi wakansan mo tani /e mini kar gwoḵkan yansan ka ḵanne ka cim jin karu a'di gom ki sule/ 'ko'di yili 'baar mo be.

¹¹ Dhali TAPA mididi susi /e e Bampaḵ Kanaan mo isi me'd mii jin thulkina a'di gwo me'da po/ mo gom /e mo dhali ibabam pini mo. Dhali ki a'di mididi ciki /e a'di mo tani

¹² /e mini dhu to ki she/ gom TAPA mo, uni kun tḵwa/a/ mo kun ka'dki bwama dho'th mo. Arisa bwanyaran to em pini mo uni kun tana rasan mo uni ta kun TAPA mo be.

¹³ Eya risa bwanyara ma rasan thuluny mo tani /e mini wan uni 'ba/ ki ka'bal mo. Walla wakki/ /e diki wan uni 'ba/ mo tani 'ce'di a'di 'ba/ piti mo. Dhali arisa bwanyara/ uciḵgwaḵ kun dho'thḵunu mo e bwaman iya/m pini mo tani /e mini wan uni 'ba/ mo be.

¹⁴ Dhali ka tee mididi pu'du/ mo tani ya/m pini mididi dotḵ /e gwo mo ki: 'Pemen gwo yan ta'da tinta mo? /E mini thoḵ a'di gwo mo ki: Ki me'd gi TAPA jin 'bitha'bi'th mo tani a'di i suskina a'di aman ka pije/ mo 'peni Pam Masir mo 'pena 'cesh gi miiny ciŋkina/ mo be.

¹⁵ Haali/ ka Pirawn yan ushki'd ki 'tash mo mmodhal aman bway mo mmo/ ii mo tani TAPA ki 'kosh arisa bwanyara/ kun dhodhu e Bampa/ Masiri 'baar mo 'peni uciḵ gwaḵ kun tana bwanyara/ mo dhali 'pena risa bwanyaran to e mo. Gom gwo gi wakan mo tani aha/ miikina TAPA abasa 'cesh mo 'peni aris to e kun ta gwaḵan mo kun ka'dki bwama dho'th 'twa/ mo. Hila bwanyara/ gi iya/m pem 'baar mo tani aha/ wankina/ uni 'ba/ mo be.

¹⁶ A'di mididi ta jamas gom /e e me'd pini mo walla e buyem pini mo ki me'da 'bi'thga/ gi TAPA a'di i suski aman ka pije/ 'peni Pam Masir mo be.

Mony'ci'th ḵumma/ Yi'de/ mo

¹⁷ Ka Pirawn dhalki 'kwani bway mo mmo/ii mo tani Arumgimis diki shu uni bway mo ki bway Pam Piliḵiyiin mo, ba ki a'di 'disha'dish mo kan de.

* 13:4 Abiib ta'da ppee ki 'dish ma sho'k mmohe'th mo.

Haali/ Arungimimis oki gwo mo ki: Wakki/ uni mini par mo/as e mo tani uni wari mini rica du is mo dhali doḡ bway Pam Masir ka nyan'ko'd mo ba/.

¹⁸ Hili Arungimimis suski 'kwani ka kukul is mo ki bway gi mombwaasho mo 'kup ki kumma/ Yi'de/ jin ta gi 'Per mo. Dhali 'kwani ma Israyiil uni iikin ka piye/ mo 'peni Bampa/ Masir mo mmonyan' is gom mo ma mee mo be.

¹⁹ Dhali aMusa kalki'da sima/ ma Yuusup mo nyakki a'di mo haala Yuusup teki gwo gom 'kwani ma Israyiil mmo/o is mmomii kan mo be. A'di ki o gwo mo ki: Arungimimis midi yayu/i woth um mo. Dhali yan'ko'd mo tani um mini mii kala simam pem nyakki um mo 'peni mahan mo.

²⁰ Dhali uni jockin mo 'peni Pa Sukuth mo dhali bu'th mon'ko me'd e Pan Ithaam mo e shemen gi mombwaasho mo be.

²¹ Dhali TAPA a'di i yaki uni ibwambor montee ka rak jin wana e ka ka'dum ki jamas piti mo mmoshu uni bway ki sule/ sule/ mo. Dhali mon'thiny si'da/ o'd jin wana e ka ka'dum ki jamas piti ciki uni mon'kush mo ki uni mini mish ii montee dhali mon'thiny mo be.

²² Araḡa ka'dum montee dhali araḡa ka'dum o'd mon'thiny mo uni 'koki dhal 'kwani 'pen mo 'peni jis em buni mo be.

14

Mmo'ciḡh kumma/ Yi'dem 'Per mo

¹ Dhali yan'ko'd TAPA oki'da Musa gwo mo ki:

² Tori 'kwani ma Israyiil gwo mo mmoṡuka bor ka nyan'ko'd mo dhali thum gu'b burrinyem buni mo i bwambor ma Pihaahiruth mo. A'di di'da nuss bwaman gi i Majduul dhali kumma/ yi'de/ mo jin 'dish pa Baalsapun is mo.

³ Haala Pirawn midi tosh ki 'kwani ma Israyiil ii ki ii ma wukura/ e mombwaasho mo dhali mombwaasho si'da/ mu'thki uni ki jit mo e bwaman mo.

⁴ Dhali aha/ mina 'bitha Pirawn adum piti is me'd wosh mo dhali a'di midi ur um i sho'k mo dhali aha/ mina gam monyca 'pena Pirawn mo dhali 'pena jesh piti mo. Dhali 'kwani Pam Masir mini mish mo mo ki aha/ tana TAPA mo. Dhali 'kwani ma Israyiil miikin wakan si'da/ mo be.

⁵ Ka malik gi 'kwanim Pam Masir ṡorkunu gwo mo ki 'kwani sokin bway bwaasho mo tani bwa ma Pirawn aḡ e nyakki imanmii tom piti mo 'kup ki uni mo. Dhali uni oki gwo mo ki: Atinta a'dan jin miikina ana mo? Ana ki dhala Israyiil bway mo mmo/ii mo 'peni mo jin miikina uni ana to mo.

⁶ Wakan a'di thosonki'da arabiyam piti jin dira shumaram ki jahanne/ mo dhali sus 'kwani ma meem piti nyakki a'di mo be.

⁷ Dhali a'di dilki'da arabiya sho'k i'baar mo gun dira shumaram mo e bwaman uni kun tana suthumiyya i 'bora'bor mmobol tiya e mo. I bwaman uni ta gi 'kwaniny can ka 'dete/ 'dete/ mo.

⁸ Dhali TAPA 'bi'thki'da du ma Pirawn is mo a'di jin ta'da malik gi 'Kwani Masir mo dhali a'di urki 'kwani ma Israyiil i sho'k mo me'd jin iikina uni mo ki dar gi mon'ko/ is mo.

⁹ 'Kwani Pam Masir uni urki uni i sho'k mo, aris shumaram ma Pirawn mo dhali arisa arabiya kun dira shumaram mo dhali 'kwanim piti kun merki shumaram apo/ mo dhali 'kwanim piti mo dhali 'kwani ma meem piti mo. Dhali uni 'baar mo ur uni sho'k dhali dil uni is mo ki 'kwani ma Israyiil thumki gu'b burrinyem buni i shemen kumma/ yi'de/ mo ki bway gi Bampa/ Pan Pihaahiruth mo jin 'dish Bampa/ Baalsipun is mo be.

¹⁰ Ka Pirawn 'dishki mo is mo tani 'kwani ma Israyiil uni 'deki em buni 'kup ki mis mo dhali 'kwani Pam Masir uni yakina ye'c ye'c i'ko'di uni mo.

Dhali uni shwakin ma kape/ kagahara mo. Dhali 'kwani ma Israyiil uni gwo ki 'twa/ en TAPA mo.

11 Dhali uni okina Musa gwo mo ki: A a'di bese/ i ta mii mo haali/ jis jwa jin minu kan 'kwani e Pam Masir piyina? I suskina /e am mo mmowu mo mombwaasho kana? Atinta miikina /e aman kan mo mmosusu aman ka pije/ 'peni Pam Masir mo?

12 A'di diki ta gwo jin ona aman /e e Pam Masir ki: Dhalki aman mo. Dhalki aman miikina 'kwani Pam Masir to mo. Haali/ a'di mididi 'taki ha me'd ki isi han gana/ mo gom aman mo mmomii ki 'kwani Pam Masir to mo mmo'koki wu mo e mombwaasho mo be.

13 Dhala aMusa oki 'kwani gwo mo ki: Dhalku/ is ki ko/ mo. Doshi tel shoka 'cesh 'te/ mo dhali par mowoth gi TAPA e mo a'di jin mina a'di i miyya tuca po/ shwane/ gom um mo. 'Kwani Pam Masir kun parkina um e mo shwane/ tani mina umi 'koki par e dok e ki sule/ sule/ mo.

14 TAPA a'di i mididi as gom um mo dhali um a'di 'te/ i mini tel jasi shoka 'cesh mo.

15 TAPA oki'da Musa gwo mo ki: Atinta i gwokina /e 'twa/ i aha/ mo? Tori 'kwani ma Israyiil gwo mo mmo/ii mo ki seth.

16 'Deki cwam pini 'kup ki mis mo dhali yethi me'd pini apo/ kumma/ yi'de/ mo dhali kwa/i a'di bwa mo ki uni mini mish ii apo/a 'cesh jin kuthaku'th ki tur mo e kumma/ yi'de/ mo be.

17 Dhali aha/ mina 'bitha du gi 'kwani Pam Masir is mo wakan ki uni mini i bath uni i sho'k mo. Dhali aha/ mina gam monyca 'pena Pirawn mo dhala risa jesh piti mo dhali aris shumaram piti kun dirina arabiya mo dhali aris 'kwani ma meem piti kun mer shumarama po/ mo be.

18 Dhali 'kwani Pam Masir mini mish mo mo ki aha/ tana TAPA mo ki aha/ mina gam monyca mo apowa Pirawn mo dhali arisa arabiyam piti kun dira shumaram mo dhali aris 'kwani ma meem piti kun merki shumarama po/ mo be.

19 Dhali yan'ko'd aman'doyu/ gwo ma Arungimis jin yaki'da jesh gi 'kwani ma Israyiil ibwambor mo tani a'di jocki'd mo dhali ya i'ko'di uni mo. Dhali araka ka'dum si'da/ jocki'd mo 'peni bwambori uni bway 'ko'd mo be.

20 A'di dwarki'di embul bwaman ma jesh 'Kwani Masir mo dhala jesh 'kwani ma Israyiil mo be. Arak kali mondhurumi'd gom 'kwani pa Masir mo, hili a'di ki ciki monkush gom 'kwani ma Israyiil mo. Dhali mon'thiny yaki'di pe mo ki dar gi jin tal 'denj kamu/ mmoyaku/ mmo'disha kamu/ is ki mon'thiny cani 'baar mo be.

21 Dhali yan'ko'd aMusa ye'thki me'd piti mo apo/ kumma/ yi'de/ mo. Dhali TAPA halki kumma/ yi'de/ ka nyan'ko'd ki 'tham gi mom'pesho'k jin 'bitha'bith mo mon'thinyi 'baar mo dhali a'di ki kar kumma/ yi'de/ mo mmota a'cesh jin kuthaku'th mo dhali aris yi'de/ uni kwa/kunu bwa mo be.

22 Dhali 'kwani ma Israyiil uni iikin mo e bwaman kumma/ yi'de/ apowa 'cesh jin ku'th ma po/ ki ku'th mo. Aris yi'de/ karki 'kup ki ta gangara/ gom uni mo ki 'ban sum buni mo be.

23 'Kwani Pam Masir uni urkina uri sho'k mo dhali iikin mmobath uni gi sho'k mo e bwaman kumma/ yi'de/ mo, aris shumaram ma Pirawn mo dhali arisa arabiyam piti mo dhali aris 'kwani ma meem piti kun merki shumarama po/ mo be.

24 Dhali i 'twa/a/ gi mon 'twash e TAPA hilki mo ka lun'gu'b 'peni bwam ma ka'dum o'd dhali arak mo apo/ 'kwani ma mee Pam Masir mo dhali dun'gur uni 'kup is mo be.

²⁵ A'di rakki'da arabiyam buni kun dirkina shumarum mo. Wakan mombor buni uni ditkin ki dit mo. Dhali 'kwani Pam Masir uni oki gwo mo ki: Dhalki ana sona mo 'peni 'kwani ma Israyil mo haali/ TAPA a'di i aski'd gom uni mo apo/ ana mo be.

²⁶ Dhali yan'ko'd TAPA oki'da Musa gwo mo ki: Yethi /e me'd pini mo apo/ kumma/ yi'de/ mo ki yi'de/ midi doku/ ka nyan'ko'd apo/ 'kwani Pam Masir mo dhali apowa ris arabiyam buni mo dhali apo/ 'kwani ma meem buni kun merki shumaruma po/ mo.

²⁷ Wakan aMusa a'di i ye'thki me'd piti mo apo/ kumma/ yi'de/ mo. Dhali mon'twash e kumma/ yi'de/ a'di dokki'd ka nyan'ko'd bway mo jin gusina a'di mo be. Dhali 'kwani Pam Masir uni sokin 'peni yi'de/ mo hili TAPA a'di belki uni mo e bwaman kumma/ yi'de/ mo be.

²⁸ Yi'de/ dokki'd ka nyan'ko'd mo dhali kuma po/ a/arabiya kun dirkina shumarum mo dhali 'kwani ma mee kun merki shumaruma po/ mo dhala risa jesh ma Pirawn mo uni kun bathki 'kwani ma Israyiil i sho'k mo e kumma/ yi'de/ mo. Jan tal 'den kamu/ dhalu ki e yisa.

²⁹ Hili 'kwani ma Israyiil uni iin ki tur eya 'cesh jin kuthaku'th mo e kumma/ yi'de/ mo, yi'de/ i warki'd ka gangara/ gom uni ki 'bana bim poros buni mo dhali ki 'bana biny cam buni mo be.

³⁰ Yase/ i ta mii gi TAPA mo mmota Israyiil is ki me'd mo ka tee caan mo 'peni me'd gi 'kwani Pam Masir mo. Dhala Israyiil mishki 'kwani Pam Masir wukin mo e yana gap gi kumma/ yi'de/ mo be.

³¹ Dhala Israyiil mishki dhan mom'bi'th jin miikina TAPA apo/ 'kwani Pam Masir mo. Dhali 'kwani uni ko/ki TAPA mo. Dhali uni gamki gwo is e TAPA mo dhali e cinjinam piti ka Musa mo be.

15

Gway Yuk ma Musa mo

¹ Dhali yan'ko'da Musa dhali 'kwani ma Israyiil yuki gway yansan mo e TAPA mo mmo/o gwo mo ki:

Aha/ mina yuk gway e TAPA mo

haali/ a'di karu ki ji gi eka/ ek mo.

Shumarum dhali com piti mo tani

uni belkunu mo e kumma/ yi'de/ mo be.

² TAPA a'di i ta mom'bi'th pem mo dhali moroc pem mo

dhali a'di warki'd ki mowoth pem mo.

A'di i ta'da Arungimis pem mo dhali aha/ mina man a'di mo,

Arungimis jin ta ji gi ibabam pem mo dhali aha/ mina kar a'di ki ji gi eka/ ek mo.

³ TAPA a'di i ta a'di gi mo/as mo,

gway piti i ta TAPA mo.

⁴ Arabiya ma Pirawn kun dirkina shumarum ka ris mo dhali ajesh piti mo tani uni i ta'kkina a'di mo e kumma/ yi'de/ mo.

Dhali 'kwaniny can piti kun yukayuk gun bol tiya e ki yuk mo tani uni loskina kumma/ Yi'de/ jin Ta gi 'Per mo be.

⁵ Agannu/ yi'de/ i kumki uni mo,

uni iikin ka 'cesh mo ki si'd si'd me'd wosh gana/ mo be.

⁶ Me'da bim poros pini ayy TAPA, a'di eka/ek e mom'bi'th mo.

Me'da bim poros pini, ayy TAPA a'di i ceckerki 'kwanij 'kup bwa mo.

⁷ E monycam pini jin caaca kagahara mo e mo jin eka/ /e ki ek mo tani

/E yocorki 'kwani 'twa/a 'cesh kun ta 'kup ki /e mo.

/E hashkina nyor pini jin 'batha'ba'th mo
a'di shwa ki uni mo me'da wusha/ mo be.

⁸ Eya le'dan gi jisan shush pini mo tani aris yi'de/ palan ka pije/ mo.

Dhali agannu/ yi'de/ a'di doshki'd ka jisho'k me'da gangara/ mo
dhali moŋ'kulga/ gi kumma/ yi'de/ wara'd ki boro'th mo.

⁹ 'Kwani kun ta 'kup oki gwo mo ki: Aha/ mina ura uri sho'k mo, dhali aha/
mina bu'th uni mo.

Dhali aha/ mina kwa/ mal buni bwa mo, dhali dil ku gi o aha/ bwa mo.

Dhali aha/ mina buk gandala turgam me'd pem mo.

Dhali me'd pem a'di i mid i 'ce'd uni sho'k mo be.

¹⁰ /E 'the'ki 'tham pini mo dhali kumma/ yi'de/ i kumki uni 'twa/a 'cesh mo be.
Uni loskina yi'de/ mo ki 'kolo'c me'da hathith mo, e yi'de/ jin ca'b ki dem dem
mo.

¹¹ Kaja a'di wana e ki /e, ayy TAPA, i bwaman ma risa ruma 'cesh mo kun
yeru gway ka wuny is mo?

Kaja a'di wana e ki /e mo?

/e jin cayaa/ e ki ca mo e mo jin kogu mo.

/e dar ki lil e monycam pini jin miina /e to mo

/e miiki miimer ka ris mo.

¹² /E ye'thki me'd pini jin ta'da bim poros mo tani mony'cesh loski uni mo be.

¹³ 'Kwani kun wankina /e 'ba/ mo tani

/E shuki uni bway ki mo/en pini jin telkunu sho'k mo.

/E shuki uni bway ki mom'bi'th pini mo

e moŋkogum pini jin dina /e nycine/ mo.

¹⁴ Ka ŋul'kup 'kwani i cikkin mo tani uni dekin ki bir bir mo be,

dhali akape bu'thki 'kwani Piliistiyyin mo be.

¹⁵ Dhali aris tapa gi Pa Aduum uni si'da/ kalkina jwa mo

dhali aris tapa gi 'kwani Mu/ab mo tani mo jin denu ki bir bir mo tani a'di
bu'thki uni mo.

Dhali aris 'kwani kun 'kokin mo e Paŋ Kanaan mo tani uni thiski mo ma dum
'bi'thgam buni e mo be.

¹⁶ Akape/ dhali mo jin tagu is jwa mo a'di i bitki'da po/ uni mo.

Gom monyca ma bim pini mo tani

uni doshkin mo mmoku'th gunkuru/ me'd wosh mo, Ayy TAPA.

Ntagi 'kwanim pini pekin mo uni kun 'cu'kina /e mo be,

¹⁷ /E mini susi uni mo dhali i dhu uni e 'kuwosha turgam pini mo,

ayy TAPA, e mo jin karkina /e mmota mondin pini jin kogu/ mo

jin nyan'kina /e ki me'd pini mo.

¹⁸ TAPA /e i mini ta aMalik gom ki sule/ sule/ ya ye 'ba/ mo be.

Gway Yuk ma Miriyam

¹⁹ Ka arabiyay 'kwani Pa Masir dhali shumaru ki imanmer uni ilu/
'cethki bway kumma/ yi'de/ mo tani TAPA kalki yi'de/ ka nyan'ko'd 'peni
kumma/ yi'de/ apo/ uni mo be. Hili 'kwani ma Israyil uni iikin apo/a 'cesh
jin kuthaku'th e bwaman kumma/ yi'de/ mo be.

²⁰ Dhali yan'ko'd aMiriyaam jin ta'da amanci gwo jin ta'da yim mo a'di jin
ta 'bwah ma Haruun mo a'di 'bu'thki'da jallugga/ e me'd piti mo. Dhali aris
upi 'baar mo iikin mo ka pije/ mmobatha yimi sho'k ka jalluggam buni i me'd
mo dhali sa mo be.

²¹ Dhala Miriyam yukki uni gway mo mmo/o gwo mo ki:

Yuki gway e TAPA mo haali/ a'di piki mii e ki monycan gana/ mo.

Shumarum dhali imanmer uni apo/ mo tani uni belkunu mo e kumma/ yi'de/ mo be.

Yi'deŋ ka/ga/ mo

²² Dhali yan'ko'd aMusa suski'da Israyiil ki seth mo 'peni kumma/ Yi'dem 'Per mo. Dhali uni iikin mo e mombwaasho jin yuku gway ka Shur mo. Uni iikin ka cimi kwara/ e mombwaasho mo dhali 'koki gam yi'deŋ kamu/ mo be.

²³ Ki uni pu'dkin e mo jin yuku gway ka Murrah mo tani uni molki yi'de/ pi 'peni a'di mo haali/ a'di ka/aka/ kagahara mo. Gom gwo gi wakan mo tani a'di i yukunu a'di gway ka Murrah mo.

²⁴ Dhali 'kwani miikina gungum apowa Musa mo mmo/o gwo mo ki: Atinta a'di mina ana i pi mo?

²⁵ Dhala Musa gwo ki 'twa/ e TAPA mo dhali TAPA torki a'di cwa mo. Dhali a'di birki a'di mo e yi'de/ mo dhali yi'de/ ca'b ki dhel dhel mo. E mun mo tani TAPA ciki uni gwoŋkan ki 'twa/ mmomii mo. Dhali e mun mo tani a'di palki uni mo.

²⁶ A'di o gwo mo ki: Wakki/ um mini ha gwom pem e ki 'bor 'bor mo tani dhali mii jasi tom 'boron e jis em pem mo tani dhali ciya hirdhe/ ki gwoŋkan pem mo dhali dhuwa ris gwoŋkan gi 'twam pem mo tani, aha/ mina dhu 'batha tiya apo/ um yisa me'd kun dhukika/ apo/ 'Kwani Masir mo. Haali/ aha/ tana TAPA jin waç um mo.

²⁷ Dhali yan'ko'd uni pu'dkin mo e Pa Iliim mo e mo yin jin 'kokina yi'de/ gun du'dun i 'kume'd i'ce'dka su/ mo dhali cwan jetkum 'kokina iss 'kwanimpa ikwara i'ce'dka 'kume'd mo. Dhali uni thumki gu'b burrynem buni mo e yan yi'de/ mo be.

16

AManna/ dhali kuskun mo

¹ Arisa nul'kup 'kwani ma Israyiil uni iikin mo 'peni Pa Iliim dhali pu'dkin mo e mom bwaasho jin yuku gway ka Sinaa/ mo a'di jin diki'd mo em bwaman gi Pa Iliim dhali Pa Sinaa/ mo. A'di ta'da cim ma 'kume'd i'ce'dka mudhe'd ka ppee jin 'kon ma po/ i su/ mo i'ko'di monycum buni 'peni Bampa/ Masir mo.

² Dhali e mombwaasho tani uni miikina gungum apowa Musa dhala Haruun mo.

³ Dhali uni oki uni gwo mo ki: Midi 'taki 'bor ki aman mina wuyu/ mo e me'd gi TAPA e Bampa/ Masir mo. E mun tani aman misha 'ko a'cesh dhali 'ka shum mo dhali shwa aris to gun o am bwa i kap mo. Hili um bala suski aman ka pije/ mo e mom bwaasho mo i 'kosha tul 'kup kwani 'baar mo ki te/ mo ba/.

⁴ Dhali yan'ko'd TAPA oki'da Musa gwo mo ki: Aha/ mina rasku/ tonte/ 'peni momis me'da sho'k mo gom um mo. Dhali 'kwani mini ii ka pije/ isa yempa/ mo dhali tul tonte/ is mo gom jasa cima 'de/ caan mo ki aha/ mina nyo/ uni mo wakki/ uni mini ii e gwoŋkan pem walla yisa mo.

⁵ Ka cim pe'de/ mo tani uni mini kal tonte/ ka 'bukum 'ban mo dhali thoson a'di mo.

⁶ Wakan aMusa dhala Haruun torkina ris 'kwani ma Israyiil gwo mo ki: Ki mo midi ta mom'pimpili/ mo tani um mini mish gwo 'ban ki TAPA a'di suski um ka pije/ mo 'peni Pa Masir mo.

⁷ Dhali ki mon'thamo/ um mini par monyca gi TAPA e mo haali/ a'di cikki'da gungum bum apo/ a'di mo. Haali/ aman tana ija mo, jin miikina uma gungum apo/ aman kan mo?

8 Dhala Musa oki gwo mo ki: Um mini mish ki a'di ta TAPA jin ci ki um shum mmo'ka mom'pimpili/ mo dhali maan'kuthu'd mmoshwa mon'thamo/ mo haali/ TAPA cikki'da gungum bum mo apo/ a'di mo. Aman tana ija sa/? Mo ma gungum bum di'd apo/ aman yisa hili apo/ TAPA mo be.

9 Dhali a Musa oki'da Haruun gwo mo ki: Oyi arisa nul'kup 'kwani ma Israyiil gwo mo ki: Iiyu/ ibwambori TAPA mo haali/ a'di cikki'da gungum bum mo.

10 Dhali me'd jin tor'kin ma Haruun anul'kup 'kwani ma Israyiil gwo mo tani uni hilki mo mo 'kup ki mom bwaasho mo dhali monyca gi TAPA a'di piki'd mo eya rak mo be.

11 Dhali TAPA oki'da Musa gwo mo ki:

12 Aha/ cikkina gungum gi 'kwani ma Israyiil mo. Tori uni gwo mo ki: Mom'pen kaskum mo tani um mini 'ka shum mo, dhali mon'thamo/ mo tani um mini shwa aa i kap mo. Dhali yan'ko'd mo tani um mini mish mo mo ki aha/ tana TAPA Arumgimis bum mo be.

13 Ki mo ta mom'pimpili/ mo tani kus'kun tha'thkin ka ris mo dhali kuma 'cesh caan 'baar mo. Dhali mon'thamo/ jape/ 'kaka'd mo be.

14 Dhali ki jape/ birki is mo tani yan'ko'd bunya jin po'dapo'd diki'd mo eya po/a 'cesh gi mom bwaasho mo me'da kwarma'c to mo jin wana e ka komo/ mo be.

15 Ki 'kwani ma Israyiil parki a'di e mo tani uni oki gwo ka rem 'kup mo ki: Atinta a'di a'dan mo? Haali/ uni 'koki mish a'di gi wakan mo. Dhala Musa oki uni gwo mo ki: A'di ta ton'te/ jin cikina TAPA um mo mmoshwa mo be.

16 Yansan a'di ta gwo jin kankina TAPA mo ki: Tuli ton'te/ is mo um 'baar ka 'dete/ 'dete/ mo ki nyanye/ me'd jin mina umi napa a'di mo. Um mini bar a'di ka balapip isu/ mo isi me'da ris 'kwani gi gu'b pini mo.

17 Dhali 'kwani ma Israyiil miiki a'di wakan mo, uni tulki uni is mo. Kun tiya tulki is ki nyanye/ mo dhali kun tiya tulki is ki gwa'd gwa'd mo be.

18 Hili ki uni barki a'di bwa mo tani a'di jin tul kum piti is ki nyanye/ mo tani a'di be i 'kosh jwa 'peni ji gi napa mmodiki ur 'kup mo. Dhali a'di jin tulki is ki gwa'd gwa'd mo tani a'di yisa hara toj kamuwa. Aris uni tulki uni is mo isi me'd jin mina uni i shwa a'di mo be.

19 Dhali aMusa oki uni gwo mo ki: Wathinj kamu/ yisa di'da jin midi boc a'di itagi mon'thamo/ mo.

20 Hili unin tiya cik gwo 'pena Musa yisa. Kun tiya bocki 'bana tiya i tagi mon'thamo/ mo dhali a'di shwakin ma yish mo dhali ca'b ki bul bul mo, dhali aMusa shwa'da nyor apo/ uni mo be,

21 Mon'thamo/ isa yempa/ uni tulki uni is mo aris uni ka 'dete/ 'dete/ me'd isi ji gi mina uni shwa a'di mo. Hili ka tente/ caki'd ka nyor piti ki 'ba'th 'ba'th mo tani uni gun bockona 'cesh to'dkin mo be.

22 Ka cim pe'de/ mo tani uni tulki a'di is ki nyanye/ me'di su/ me'd ton'te/ mo ka balapipi i dojon gom uni ka 'dete/ 'dete/ mo. Dhali aris tapa ka nul 'kup pu'dkin mo dhali tor ka Musa gwo mo.

23 A'di oki uni gwo mo ki: Yansan a'di i ta gwo jin kankina TAPA wakan mo ki: Ka'thamo/ a'di ta'da tee jin minu dosh shoka 'cesh mo mmosi/is mo jin kogu gom TAPA mo. 'Thoki to jin napa umi 'thok mo dhali shuni to gun napa umi shun mo. Dhali aris uni gun urki 'kup mo tani thoson ki uni mo ki uni minu dhuku/ mo ntaga 'thamo/ mo be.

24 Wakan uni thosonki uni mo ntagi mon'thamo/ mo me'd gwo jin kankin ma Musa uni mo. Dhali uni 'koki bul mo mo dhali ayisha kamu/ yisa di'di e uni mowaa.

²⁵ Musa oki gwo mo ki: Shwayi a'di shwane/ mo ma, haali/ shwane/ a'di i ta'da cim ma pesu/ jin sinu is jin ta'da cim jin cinu ki TAPA mo. Shwane/ um yisa mini gam tonter kamu/ apije/ mo yisa.

²⁶ Goma cim pe'de/ mo tani um mini tul uni is mo hili ka cima pesu/ mo tani a'di jin ta'da cim mosi/is mo, um yisa mini gam tonter kamu/ yisa mowa.

²⁷ Ka cima pesu/ mo tani 'kwanin tiya uni iikin ka pije/ mo mmotul tonter/ is mo hili uni gam ton kamuwu?

²⁸ Yan'ko'd TAPA oki'da Musa gwo mo ki: Me'd e kata ushkina um gwonkan pem e mo 'peni gwo jin cika um ki 'ce'de/ 'ce'de/ mo?

²⁹ Kayi gwo e ki TAPA ciki uma cim gi mosi/is mo dhali gom kan mo tani ka cim pe'de/ mo aha/ cikina um tonter/ goma cimi su/ mo ba/. Dhalka ris 'kwani ka 'deter/ 'deter/ 'kon e mom buni mo. Dhalku/ ki dhal wathin 'de/ bway mo mmoya ka pije/ mo 'peni mom piti ka cima pesu/ mo.

³⁰ Wakan 'kwani si/ki is mo ka cima pesu/ mo be.

³¹ Wakan 'kwani ma Israyiil yukki a'di gway mo ka manna* mo. A'di wana e ki emen to jin miinu a'tash dhali ta gi kush mo. Dhali 'kuny piti waka biskwiita po'd 'ban jin miinu ka yina dham mo be.

³² Dhali aMusa oki gwo mo ki: TAPA kanki ana mmodhuwa mannan tiya gom emen bana jin mina uni mish tonter/ 'peni ji gi cikina a'di ana mmoshwa e mombwaasho mo me'd jin suskina a'di ana ka pije/ mo 'peni Pa Masir mo be.

³³ Dhali aMusa oki'da Haruun gwo mo ki: Buthi dhur mo dhali 'thutha manna jin baru ka balapip i bwaman mo. Dhali kar ki a'di ibwambor gi TAPA mo ki a'di minu kar ki tur mo gom emen bana mo.

³⁴ Me'd gwo jin kankina TAPA aMusa mo tani wakan aHaruun karki'da manna e mo jin mina a'di di ki sule/ mo ibwambora sanduuk jin dina gwonkan jin tenu mo be.

³⁵ Dhali 'kwani ma Israyiil uni shwakina manna ki yili issu/ mo ntagi uni pu'dkin mo e bampañ Kanaan mo dhali 'ko mo.

³⁶ Tom bar yan wana e ka balapip iss 'de/ mo be.

17

Yi'de/ 'Pena Kuluny Wosh mo

¹ Arisa nul'kup 'kwani ma Israyiil 'baar mo uni joçkin mo 'peni mombwaasho jin yuku gway ka Siin mo dhali joçkon e mon tiya ka ris mo isi me'd gwonkan gi TAPA mo. Dhali uni ki thum moñ'kom buni e Pan Repidiim mo hili yi'der kamu/ yisa di'da jin mina 'kwani i pi mo.

² Gom gwo gi wakan mo tani 'kwani miikina gungum apowa Musa o ki: Ci an yi'de/, aman ki pi mo ma. Dhala Musa thokki uni gwo mo ki: Atinta miikina uma gungum apo/ aha/ kan mo? Atinta si'da/ pala um TAPA kan?

³ Hili 'kwani ku'thkina 'kus gunjuru/ mo imun gom yi'de/ mo dhali 'kwani miikina gungum apo/ aMusa naskina/ mo dhali o gwo mo ki: Atinta i susina /e aman ka pije/ mo 'peni Pa Masir mo mmo'kosh aman dhali uçim bam dhali to em bam jwa mo ki yi'dem bu'th kan mo?

⁴ Wakana Musa 'thoki TAPA mo ki: Atinta i miga/ mii mo gom 'kwani gwansan mo? Uni 'dishkina 'twa/ mo mmo'kosh aha/ ki wosh mo be.

⁵ Dhali TAPA oki'da Musa gwo mo ki: Yayi ibwambori 'kwani mo. Susi 'kwanin gwanyjwaha/ ma Israyiila tiya nyakki /e mo dhali gwuyi cwam pini i me'd mo a'di jin dorkina /e yi'de/ ma Niil mo dhali yaku/ mo.

* 16:31 Manna: 'pemen piti ta atinta a'dan?

⁶ Aha/ mina dosh ibwambori /e apo/ wosh mo e Wosh Sinaa/ mo. Dhali /e mini dor wosh mo dhali yi'de/ midì gacu/ ka pije/ mo 'peni a'di mo jin mina 'kwani i pi a'di mo. Dhali aMusa miiki a'di wakan mo e jis e gi gwanyjwahan 'kwani ma Israyiil mo be.

⁷ Dhali a'di yukki yansan gway ka Massa* mo dhala Miiriba† mo haali/ 'kwani ma Israyiil miikina gumgum mo dhali uni palki TAPA mmo/o gwo mo ki: A TAPA di'di bwamani ana 'te/ tana walla piyi'd mo?

'Kwani ma Amaliik Pikunu E mo

⁸ Yan'ko'd 'kwani Amaliik pu'dkin mo dhali as 'kwani ma Israyiili cine/ mo e Pa Repidiim mo be.

⁹ Dhali aMusa oki'da Jeshuwa gwo mo ki: Kwanyi 'kwanim bana mo. Dhali iyyi um ka pije/ mo mmo/as 'kwani Amaliik nycine/ mo. Ka'thamo/ aha/ mina dosh i 'kupan wosh mo ki cwa ma Arungimis e me'd pem mo be.

¹⁰ Wakana Jeshuwa miiki'd mo me'd jin kankin ma Musa a'di gwo mo. Dhali uni as ki 'kwani Amaliik nycine/ mo. Dhala Musa dhala Haruun dhala Huur iikin ka gagamis i 'kupan wosh mo be.

¹¹ Me'd jin 'de'kkin ma Musa me'di mis mo tani Israyiil piki mii e mo. Dhali me'd jin thulkina a'di me'd piti ka 'cesh mo tani 'kwani Amaliik uni piki mii e mo be.

¹² Hili me'd ma Musa i wuki e mo. Wakan uni kalki wosh mo gom a'di mmoça'b apo/ a'di mo. Dhali aHaruun dhala Huur bu'thki me'd piti mo, jan tal 'deñ kamu/ ki 'bana 'deñ kamu/ mo dhali jan kamu/ ka 'bana kamu/ mo. Wakan me'd piti 'bi'thkina is mo ntagi mo jin yakin ma tente/ jis mo be.

¹³ Ki mii yan mo tani Jeshuwa dorki 'kwani Amaliik 'twa/a 'cesh mo ki gandala turga/ mo be.

¹⁴ Dhali TAPA oki'da Musa gwo mo ki: 'Kwari gwo yansan mo ki gwo jin minu ka e mo e bwaman ma warkan 'kuç mo. Dhali bahi gwo yansan e bwany 'ce ma Jeshuwa mo haali/ aha/ mina 'ce'd 'Kwani Amaliik sho'k ka kuluny mo be.

¹⁵ Dhali a Musa nyanki'da gwata/ mo dhali yuk a'di gway mo ki: TAPA a'di i ta'da berkam pem mo.

¹⁶ A'di o gwo mo ki: 'Deka berkam piti isi mis mo. TAPA midì as 'kwani Amaliik nycine/ mo ki sule/ mo be.

18

ARau/iil Ya ki Yilkina/ Bway Pa Musa mo

¹ Rau/iil jin ta'da mar ma Musa ta'da gasiis gi Pam Midyaan mo. A'di cikki gwo goma ris to 'baar mo jin miikin ma Arungimis goma Musa mo dhali 'kwanim piti ka Israyiil mo. Dhali a'di cikki gwo ki TAPA suski 'Kwani Israyiil ka pije/ 'peni Bampa/ Masir mo.

² Dhala Rau/iil jin ta'da mar ma Musa mo a'di suski'da Sippuura mo a'di jin ta asha Musa mo i'ko'da Musa hashki'da yim mo nyakki ucin gwath ma yim su/ mo 'peni a'di mo,

³ dhali ucin gwath ma yim su/ mo. Jan tal 'de/ yukkuu gway mo ka Jirshuum* mo, haali/ aMusa oki gwo mo ki: Aha/ yakina yany ca/ mo e bampa/ 'kwanim tiya mo.

* 17:7 Massa: 'pemen piti ta *mompal* † 17:7 Meriba: 'pemen piti ta *mo ma gumgum* * 18:3 Jirshuum: Gway yan wana e ki gwo jin onu ki: *Wathi/ 'peni bampañ kamu/ mo ki 'twañ 'kwani Ibraniyiin mo.*

4 Dhali gway gi jaŋ kamu/ mo tani a'di i ta'da Iliyaasir[†] haali/ a'di oki gwo mo ki: Arungimis ma babam pem mo tani a'di ta'da manwoth^h aha/ mo dhali wo^h aha/ mo 'peni gandal ma Pirawn mo be.

5 Dhala Rau/iil pu'dki'd mo nyakki asha Musa dhali iya/ i su/ mo e mo jin bu'thkin ma Musa mondi me'd e mombwaasho e wosha turga/ ma Arungimis mo be.

6 Dhali a'di hashki'da Musa gwo mo ki: Amar pini ka Rau/iil a'di yayi'd nyakki ashin mo dhali ucin gwa^h ma yimi su/ mo be.

7 Wakana Musa yaki'd mo dhali gama mar piti 'kup mo dhali 'tuk a'di i is mo dhali pi a'di 'twa/ mo. Dhali uni theki me'di mon^{tal} 'de/ mo dhali uni iiki bway gu'b burrine/ mo be.

8 Dhali yan'ko'da Musa torki'da mar piti aris to 'baar mo jin miikina TAPA a Pirawn mo dhali aris 'kwani Pam Masir i 'baar mo gom gway ma Israyiil mo. Dhali a'di torki'da ris ton ditga/ kun pu'dkina po/ uni i bway mo dhali mii jin wo^hkina TAPA uni mo be.

9 Dhala Rau/iil 'kunykina bwa mo gom tom 'borga/ jin miikina TAPA goma Israyiil mo e mii jin miikina a'di mmo'cu^k uni ka pije/ 'peni me'd gi 'kwani Pam Masir mo be.

10 Dhala Rau/iil oki gwo mo ki: Mom'bor mii gom TAPA mo a'di jin 'cu^kki um ka pije/ mo 'peni me'd gi 'kwani Pam Masir mo dhali 'peni me'd ma Pirawn mo. Dhali mom'bor mii gom TAPA jin 'cu^kki 'kwani 'peni mii cin^{kin}am buni mo be.

11 Shwane/ aha/ misha ki TAPA a'di i ekki'd mo mmobola risa ruma tiya e mo haali/ a'di 'cu^kki 'kwani mo 'peni bwan 'kwariny me'd gi 'kwani Pam Masir mo ki uni tu/ulki uni ki mii ma^h mo.

12 Dhala Rau/iil a'di jin ta'da mar ma Musa mo a'di ciki to jin cinu ki me'd jin 'thanu o'd dhali miya Arungimis abasa 'cesh mo. Dhala Haruun dhali aris 'kwanin gwanyjwaha/ ma Israyiil uni pu'dkin mo dhali shwa ton^{te}/ jin karu ki she/ goma Arungimis mo nyakka mar ma Musa mo be.

13 Dhali ka'thamo/ ki en kamu/ mo tani aMusa ca'bki'd mo dhali dwall 'kwani gwo mo. Dhali 'kwani doshkin mo mmo'kama Musa is ki dek mo 'peni mon'thamo/ ntagi mom'pimpili/ mo be.

14 Ka mar ma Musa parki'da ris to gwansan e mo kun miikina a'di mo gom 'kwani mo tani a'di oki gwo mo ki: Atinta a'dan jin miikina /e 'kwani mo? Atinta dina /e/e 'de/ kan dhali aris 'kwani doshkini 'kam /e is mo 'peni mon'thamo/ ntagi mom'pimpili/ mo?

15 Dhali a Musa tho^kki'da mar piti gwo mo ki: Haali/ 'kwani pu'dkini aha/ mo mmotheke'th gwo mo goma Arungimis mo be.

16 Ki uni su'kkin ki gwo mo tani yan'ko'd uni ki iiyu/ i aha/ mo dhali aha/ ki mish gwo pwa^k bwa bese/ i bwamani uni gun su'kkin ki gwo mo. Dhali aha/ ki dhu uni mo mmomish gwon^{kan} ma Arungimis kun 'kwarkunu mo dhali gwon^{kan} piti kun cinu mo be.

17 Mar ma Musa oki a'di gwo mo ki: To jin miikina /e yisa 'boro'da.

18 /E dhali aris 'kwani gun iiyini /e mo tani un mina isi wu e mo, haali/ to ditadi^t gom /e mo. /E yisa mini mish tel shoka 'cesh /e 'de/ mo yisa.

19 Ciki gwo gi 'twam pem mo. Aha/ mina logom /e ki gwo mo dhali Arungimis midi di nyakki /e mo. A'di 'boro'd gom /e ki dosh i bwaman 'kwani dhali Arungimis mo dhali kala ris tom buni kun toci uni 'kus eya Arungimis mo be.

† 18:4 Eliyaasir: Gway yan wana e ki gwo jin onu ki: *Arungimis wo^hi aha/ mo.*

²⁰ Dhali /e mini tor uni gwoŋkan mo dhali gwo gom moŋ'ko mo. Dhali dhuyi uni mo mmomish bway mo a'di jin mina uni mish ii nycine/ mo gom to jin mina uni i mii mii mo be.

²¹ Hili kwanyi 'kwani kun mishi mii mo si'da/ 'peni aris 'kwani mo, dhali dhu uni ki jwaha/ apo/ 'kwani alip mo dhali apo/ iss 'kwanimpa ka mudhe'd mo dhali apo/ iss 'kwanimpa isu/ i'ce'dka 'kume'd mo dhali apo/ 'kwani ka 'kume'd mo be. Uni mini mii ta 'kwani gun ko/ on Arumgimis mo, 'kwaniŋwath kun dhelel ma du mo dhali uni kun shi/ki mii kun wanu 'kwani is ki ton tiya i e mo.

²² Dhali dhalki uni a'di i dwall 'kwani gwo isa yempa/ mo. Eya ris dhan mii kun piki e mo tani uni mini mishi uni kalu i /e mo. Hili ushi mii kun po'da she/ mo tani uni a'di mini pwaŋ uni bwa mo uni ki is buni uni 'cena mo. Wakan a'di i mina to i 'dish mii ki 'dish gom /e mo dhali uni mini mish ton titin nyak kal ki /e mo be.

²³ Wakki/ /e mini mii mii yan mo tani dhali Arumgimis kanki /e wakan mo tani yan'ko'd /e mini mish 'dim 'kup mo. Dhali aris 'kwani gwansan si'da/ mini ii mom buni ki moŋku'th is mo be.

²⁴ Gom gwo gi wakan mo tani aMusa a'di ciki'da hirdhe/ ki gwo ma mar piti mo dhali miiya ris to gwansani 'baar mo jin okina a'di mo be.

²⁵ AMusa a'di kwanyki 'kwaniŋ wath kun mishki mii mo 'peni aris 'kwani ma Israyiil mo dhali dhuki uni mmota tapa apo/i 'kwani mo, i tapa kun ji 'kwani alip mo dhali 'kwani iss 'kwanimpa i mudhe'd mo dhali a/iss 'kwanimpa isu/ i 'ce'dka 'kume'd mo dhali imandwall gwo i 'kume'd mo be.

²⁶ Dhali uni dwalki 'kwani gwo isa yempa/ mo. Gwo kun 'bitha'bi'th mo tani uni kalki a'di ka Musa mo, hili ushi mii kun po'da she/ mo tani misha uni dwall ki is buni uni 'cena mo be.

²⁷ Dhali yan'ko'da Musa dhalki'da mar piti bway mo mmoya mo dhali a'di yaki'd mo ki bway bampam piti mo be.

19

E 'Kuwosh Sinaa/ mo

¹⁻² 'Kwani ma Israyiil iikin ka piye/ mo 'peni Pa Repidiim mo. Dhali ka cima 'de/ ka ppee 'kupi kwara 'ko'di uni iikin mo 'peni Pa Masir mo tani uni pu'dkin mo e mombwaasho ma Sinaa/ mo be. Dhali imun mo tani Israyiil bu'thki moŋ'ko me'd i bum'pen i wosha turga/ mo be.

³ Dhali aMusa seki mis wosh mmogam Arumgimis 'kup mo. Dhali TAPA yukki a'di mo 'peni wosha turga/ mo dhali o gwo mo ki: Yase/ i mina /e i tor 'kwani ma Israyiil gwo mo ki:

⁴ Um mishki to kun miikika/ 'kwani Pa Masir me'dyin mo dhali bahili aha/ borkina um ka bi ma wulu/ mo dhali susu um e aha/ mo be.

⁵ Dhali wakki/ um mini ha gwo gi 'twam pem e mo dhali tel gwom pem jin gamu/ me'd mo tani um mini fa 'kwani gun kwanyka/ ka me'd pem kun miga/ nyuny mo e bwaman ma aris 'kwani mo haali/ aris mony'ceshi 'baar mo tani uni ta kum pem mo be.

⁶ Dhali um mini ta kum pem gun cinu aha/ aha/ 'de/ mo. Dhali um mini dhu miim pem me'd igasiis mo. Gwo gwansan a'di i mina /e i tor 'kwani ma Israyiil mo be.

⁷ Wakan aMusa thulki'd mo dhali yukki gwanyjwahan 'kwani mo dhali tor uni aris gwo gwansani 'baar mo uni gun kankina TAPA a'di mo be.

⁸ Dhali aris 'kwani 'baar mo thokki gwo imonta' de/ mo dhali oki gwo mo ki: Aris gwo gwansan kun okina TAPA mo tani mina amani mii mo. Dhali aMusa dokki gwoŋ 'kwani ka nyan'ko'd bway TAPA mo be.

⁹ Dhali TAPA oki'da Musa gwo mo ki: Aha/ mina yaku/ i/ e ka rak jin dhinya/ e ki dhiny mo ki 'kwani mini mish ki aha/ tora tor nyakki/ e mo. Dhali uni si'da/ mini gam/ e gwo is ki sule/ sule/ mo. Dhali yan'ko'd aMusa torki gworj 'kwani e TAPA mo be.

¹⁰ Dhali TAPA oki'da Musa gwo mo ki: Yaku/ i 'kwani mo dhali dhu uni ki she/ shwane/ mo dhali ka'thamo/ mo. Dhali dhalki uni wusi burrinyem buni mo

¹¹ dhali thosoni is mo goma 'thamo/ can mo. Haali/ ka'thamo/ can mo tani TAPA a'di mididi i thulu ka 'cesh mo apo/ 'Kuwoh Sinaa/ mo e jis e gi 'kwani 'baar mo.

¹² Dhali /e mini kar gwayu/ ka kukul is mo ki 'ko'd gwar wosh jin mina 'kwani 'koki 'cith a'di mo. Dhali oyi gwo mo ki: Hili ki 'bore/ ki um 'koki se 'ku wosh mo walla 'dish a'di is mo. Ba a'di yin jin mididi ta Wosh Sinaa/ is ki me'd mo tani minu 'kosh jwa mo be.

¹³ Me'da kamu/ yisa mididi ta a'di is ki me'd yisa mo hili a'di minu 'kosh ki wosh mo walla minu shin ka thopa mo. Wakki/ ta to e walla wathimpa mo tani a'di mididi mish di ki e yisa. Ka poome/ mididi ko mo tani yan'ko'd uni mini iiku/ 'kup ki wosh mo.

¹⁴ Wakan aMusa yaki'd ka 'cesh mo 'peni 'kuwohsha turga/ mo e 'kwani mo dhali tor 'kwani gwo mmothoson is mmoluḡ mo. Dhali uni wuski burrinyem buni mo be.

¹⁵ Dhali a'di oki 'kwani gwo mo ki: Thosoni is mo goma 'thamo/ can mo. Dhalku/ up ki mii 'dish is mo.

¹⁶ Mon'thamo/ jin 'kon ma po/i kwara mo tani kon dor ma sho'k diki'd mo dhala wara sho'k mo dhali arak jin 'cethe'da 'tum apo/ 'kuwohsha turga/ mo. Dhali ko ma poome/ dhi'thki'd ki nyanye/ mo. Wakan aris 'kwani kun 'kokin e mo jin butha uni moḡ'ko me'd mo tani uni dekin ki bir bir mo.

¹⁷ Dhali yan'ko'da Musa suski 'kwani ka pije/ mo 'peni moḡ'kom buni mmogama Arungimis 'kup mo. Dhali uni doshkin mo e bum'pen woshha turga/ mo.

¹⁸ Dhali 'kuwoh Sinaa/ ka kuluny a'di kothkunu is ka ku'd mo haali/ TAPA i thulki'di a'di ki o'd mo. Dhali aku'd piti a'di yaki mis mo me'd ji ma purun mo. Dhali woshha turga/* kakulu mo tani a'di yikinki is kagahara ki nyanye/ mo.

¹⁹ Dhali ki ko ma poome/ gwoki'd ki nyanye/ dhali ki nyanye/ mo tani aMusa torki'da tor mo dhali Arungimis thoḡki a'di gwo ki 'twa/ jin wa ki kon dor ma sho'k mo be.

²⁰ Dhali TAPA thulki'd ka 'cesh eya liman wosh Sinaa/ mo dhali yuka Musa bwaya liman wosh mo. Dhala Musa a'di i seki 'kuwoh mo be.

²¹ Dhali TAPA oki'da Musa gwo mo ki: Thulku/ ka 'ceshi 'kwani dhali rumi 'kwani ki gwo mo isi ciki/ ki uni mini 'koki 'cethku/ ki tur mo mmohil aha/ mo ka 'thime/ mo. Haali/ wakki/ miinu kan tani uni ka ris ka ris mini wu mo be.

²² Dhali si'da/ dhalki igasiis uni kun iyyin ki 'dishe/ e TAPA dhagam is buni mo isi ciki/ ki TAPA mididi diki dor uni mo.

²³ Dhali aMusa oki TAPA gwo mo ki: 'Kwani mini molku/ seku/ bway 'kuwoh Sinaa/ mo haali/ /e ki is pini kanki aman gwo mo mmo/o ki: Kari gwayu/ mo mmo'kam 'kuwohsha turga/ is mo dhali dhagami a'di mo.

²⁴ Dhali TAPA oki a'di gwo mo ki: Yaku/ ka 'cesh mo dhali susa Haruun nyakki/ e bway aha/ mo. Hili dhalku/ ki dhal igasiis bway dhali aris 'kwani

* 19:18 Awarkan 'kuca tiya o gwo ki: 'Kwani dekin ki bir bir mo.

mo mmo'ciḥ gwayu mo mmo/ii i aha/ mo haali/ waḵki/ miina uni kan mo tani aha/ mina dor uni mo be.

²⁵ Wakan aMusa a'di i yaki'd ka 'cesh mo e 'kwani mo dhali ṭorki uni gwo jin okina TAPA mo be.

20

Gwoḵkan kun 'Koni 'Kume'd mo

¹ Arungimis oki'da ris gwo gwansani 'baar mo mmo/o ki:

² Aha/ tana TAPA Arungimis pini jin suski /e ka piye/ mo 'peni Pa Masir mo 'peni mo jin miikunu /e ki miiny ciḵkina/ mo.

³ /E mini mii dhalku/ ki mii luḵa ruma tiya mo. /E mini mii luḵ jasi aha/ 'de/ mo.

⁴ /E mini mii dhalku/ to ki mii uḵ mo jin mina /e i luḵ mo, a'di jin wana e ki toḵ kamu/ jin di'd e momis walla jin di'di mony'cesh walla jin di'd e yi'de/ e bwan'kwariny mony'cesh mo.

⁵ /E mini mii dhalku/ ki mii luḵ to/uka kamu/ mo walla mii uni to mo. Haali/ aha/ tana TAPA Arungimis pini mo. Aha/ yisa mina dhal /e bway mmoluḵa ruma kamu/ mo. Aha/ dora 'kwani gun shi/aa/ i e dhali gun ush gwom pem mo. Dhali aha/ dora emen buni ka lonthoḥ i taga po/ doḵon mo.

⁶ Hili aha/ tora mo/en jin ṭelu sho'k mo gom emena alip kun enki aha/ mo dhali dhu gwoḵkan pem mo.

⁷ /E mini mii dhalku/ ki yer gway gi TAPA Arungimis pini ka wuny is ka ṭor mo haali/ TAPA midi diki dhal a'di jin yeri gway piti ka ṭor mo be.

⁸ Kayi acima pesu/ e mo mmokar a'di ki she/ ki dhelel dhelel mo.

⁹ /E ta ga cimi pe'de/ mo mmomiya risa ṭu'c pini 'baar mo.

¹⁰ Hili acim ma pesu/ mo tani a'di ta'da cim gi mo si/is gom aha/ mo be. E a'di mo tani /e mini mii dhalka ṭu'c pini mo, /e dhali ya/m pini mo dhali 'bwa/ m pini mo walla ciḵkina/ wathiḵ gwaḥ jin mii'da ṭu'c pini mo dhali ciḵkina/ nyara/ jin mii'da ṭu'c pini mo dhali bip pini mo dhali wathi/ jin yayi yilkina/ e pum mo.

¹¹ Haali/ acim pe'de/ mo tani aha/ jin tana TAPA uḵkina momis mo dhali mony'cesh mo dhali kumma/ yi'de/ mo dhali aris to kun 'kokin e bwaman uni mo. Bahili ka cim ma pesu/ mo aha/ sikina is mo. Gom gwo gi wakan mo tani aha/ 'borkina cim ma pesu/ mii mo dhali kar a'di ki ji gi ḵogu mo be.

¹² Taḵi cim dhali kwan mo ma, ki yil pini jin dina /e ki e mo mini ta ris mo e mo jin min ma Arumimisi ciki /e mo be.

¹³ /E mini mii dhalka mee ki 'kosh mo.

¹⁴ /E mini mii dhalku/ miinyḵal ki mii mii mo.

¹⁵ /E mini mii dhalku/ to ki kwal mo.

¹⁶ /E mini mii dhalka ṭor ki kal apo/ wathiḵ kamu/ mo.

¹⁷ /E mini mii dhalku/ bwa ki mii 'thoḥ gom gu'b gi wathiḵ kamu/ mo. / E mini mii dhalku/ bwa ki 'thoḥ goma 'bom gi wathiḵ kamu/ mo walla gom wathi/ jin ta ciḵkinam piti mo walla nyarany ciḵkinam piti mo walla mor bip piti mo walla thuluny piti mo walla ton ṭal 'deḵ kamu/ jin di'd e gu'b gi wathiḵ kamu/ mo be.

'Kwani ko/ Is mo

¹⁸ Dhali ki 'kwani nyith mondor ma sho'k mo dhala wara sho'k mo dhali ko ma poome/ mo dhali wosha turga/ mmoyakina a'di aku'd mo tani 'kwani ko/ki is mo dhali den ki bir bir mo dhali uni doshkin isa dhana mo be.

¹⁹ Dhali uni ki owa Musa gwo mo ki: /E a'di i mini wal 'twa/ nyakki aman mo dhali aman mina cik gwo mo. Hili aman ko/a is gom wakka Arungimis a'di midi wal 'twa/ i nyakki aman mo tani aman mina wu mo be.

²⁰ Dhali aMusa oki 'kwani gwo mo ki: Dhalki is ki ko/ mo ma, haali/ Arungimis pu'dki'd mo mmopal um mo dhali woth um mmoha gwom piti e mo ki um mini 'koki mii miinthus mo be

²¹ Hili 'kwani doshkin isa dhanaj gana/ mo imun mo. Jasa Musa a'di 'de/ 'dishki'da raka dhiny e is mo e mo jin dikin ma Arungimis mo be.

To kun Uku dhala Gwata/

²² Dhali TAPA oki'da Musa gwo mo ki: Yase a'di i mina /e i o 'kwani ma Israyiil mo ki: Um mishkin ki is bum ki aha/ torkina ator nyakki um 'peni momis mo.

²³ Um mini mii dhalka ruma kamu/ ki mii uk 'peni 'dolkon kush walla 'dolkon gana/ mo mmokar ka par ki aha/ mo, jin mina umi luɔ mo.

²⁴ Agwata/ ma 'cesh a'di i mina umi uk mo mmomii aha/ abasi cine/ mo 'peni ka'bal pini dhali bip pini mo mmota to jin cinu ki me'd goma Arungimis mo. Kun tiya minu ci mmo'tha o'd ka kuluny dhali kun tiya minu ci gom monku'th is goma Arungimis mo. E mo guni 'baar mo jin rak gway pem kakunu e mo tani aha/ mina pu'dku/ i um mo dhali 'bor um mii mo be.

²⁵ Dhali ki um mini uka gwata/ 'peni wosh mo tani um mini mii dhalki a'di ki uk 'peni wosh jin pathu ki 'doro/ mo haali/ wakki/ um mini path a'di ki 'doro/ mo tani a'di yisa midi 'kosh jwa mo yisa gom to jin kogu mo.

²⁶ Dhali um mini 'koki seya bor ki mis gi ushi mon tan eya gwatam pem mo haali/ um mini tora yir bunɔwar is bum eya tente/ mo be.

Gway gi iDawuu'd AWARKA/ JIN TWA/A/ MO

1

1 Mom'bor mii gom wathi/ a'di jin diki ya e bway jin logoma 'kwanin thus gwo mo, walla dosh e bway gi imanmii miinthus mo, walla ca'b mo e moŋ'ko gi uni gun 'theḱ shushi mis mo,

2 hili mom'bor bwam piti mo tani di'd e gwoŋkan gi Tapa Arungimis jin cinu mo, dhali e gwoŋkan piti jin cinu mo tani a'di ki ci is ki a'di montee mo dhali mon'thiny mo be.

3 A'di wana e ki cwa jin cu'thkunu e shemen yi'de/ jin guski'd mo, a'di jin gwono'dki maman ki yil piti mo, dhali 'cemen piti diki ku'th mo. Eya ris to 'baar kun miina a'di mo tani a'di rusa/ rus mo.

4 Imanmii tonthus mo tani yisa wakana, hili uni wana e ka 'pi'b jin 'dashkina 'tham mo be.

5 Wakan imanmii tonthus mo tani mini 'koki dosh mo ka tee gi gwon dwall jin toru gwo 'twa/a 'cesh mo walla imanmii miinthus si'da/ e dhan mo ma tul 'kup gi 'kwani ma kar/e mo, 6 haali/ Tapa Arungimis mishki bway gi a'diŋ kar/e mo, hili bway gi uni gun mii tonthus mo tani ta mony'ce'd sho'k mo be.

2

1 Ata miina 'kwani gi kala tiya adulatt mo, dhali 'kwani gam 'twa/ 'kup ki pe'th kan mo?

2 Imalik gi 'kwaniny'cesh doshkin ki is buni ki 'dishe/ mo, dhali itapa tuli isi montal 'de/ mo apo/ Tapa dhali apo/ a'din 'de/ jin 'koshkunu ki monyca mo, mmo/o gwo mo ki:

3 Dhalki ana 'ce'da mondeḱ buni mo dhali taka nyok buni 'peni ana mo.

4 A'di jin ca'bki'd eya ris momis mo tani pe'thki'd mo, Tapa miiki uni ka mudhiny'cere/ mo.

5 Yan'ko'd a'di mido tor uni gwo eya nyor piti mo dhali dher uni is bwa ka nyor piti jin cithiraçithir mo mmo/o gwo mo ki:

6 Aha/ karkina malik pem mo apowa Sihyuun, a'di jin ta wosh pem jin kogu mo.

7 Aha/ mina tor gwoŋkan gi Tapa mo: A'di ta gwo jin ona a'di aha/ mo ki: /E ta Ya/m pem mo, shwane/ aha/ dho'thkina /e mo.

8 Doti aha/ ma, dhali aha/ mina ci /eya ris kal gi 'kwaniny'cesh mo mmota mal pini mo, dhali 'pemen gi mony'cesh mo tani uni mini ta kum pini mo.

9 /E mini 'ce'd uni bwa mo ki cwan kol 'kus jin ta toŋkuthu'd mo,

dhali mu/uni 'twa/a 'cesh mo ka 'ci'cimi'th mo me'd ton'kul bwa jin uku 'pena je mo.

¹⁰ Dhali wakan shwane/, ayy imalik, yuki is mo ma, muri is mo, ayy um itapa gi mony'cesh mo.

¹¹ Miiyi Tapa to ki monko/ is mo dhali ki mondee is mo,

¹² piyi sho'k piti 'twa/ mo,

isi ciki/ ki a'di midi diki shwaa nyor mo, dhali um minu 'ce'd sho'k ibway mo, haali/ anyor piti 'thakunu hila/ ki jahanne/ mo.

Mom'bor mii goma ris uni gun bu'thki mo jin huru jwa e a'di mo.

3

Gway jin yuku mo mmoka mo jin miinuwa mii e mo jin ta jim ma Dawuu'd mo me'd jin guskina a'di mo 'peni ya/m piti ka Abshaluum mo.

¹ Ayy Tapa, 'kwani kun ta 'kup gi aha/ wana risa!

Uni tana ris ka ris kun cuna po/ aha/ mo.

² Uni tana ris o gwo gom aha/ mo ki:

mowotha/ kamu/ midi di gom a'di eya Arungimis yisa.

Doshi ma dhali 'cunycuri yan mo.

³ Hili /e, ayy Tapa, itana gongoro/ gom aha/ mo,

dhali monycam pem mo dhali aman'de'k 'kup pem ki mis mo.

⁴ Aha/ 'thera cuuwa/ ki nyanye/ e Tapa mo,

dhali a'di tho'ki aha/ 'twa/ 'peni 'kuwosh piti jin kogu mo.

Doshi ma dhali 'cunycuri yan mo.

⁵ Aha/ isha 'ko'da 'cesh dhali ish e mo.

Aha/ mera e dok/e mo, haali/ Tapa a'di teki aha/ mo.

⁶ Aha/ dinaki ko/ is gom 'kwani kun 'koni alaapi 'kume'd mo

uni gun doshkin ki is buni apo/ mo mmo'kama 'kam mo.

⁷ Cuyi mis mo ma, ayy Tapa.

'Cuki aha/ mo ma, ayy Arungimis pem.

Haali/ e dorkina ris uni gun ta 'kup ki aha/ e peshe/ mo,

dhali /e ki 'ce'd she/ gi uni gun ta thus ki thus mo.

⁸ Mo jin 'cukuwa 'cuk mo tani a'di ta ji gi Tapa mo,

mom'bor miim pini a'di midi di apo/ 'kwanim pini mo.

Doshi ma dhali 'cunycuri yan mo.

4

Eya manyuk gway mo nyakka risa dhen'dhenye/. Gway jin yuku mo mmoka mo jin miinuwa mii e mo. Gway ma Dawuu'd.

¹ Tho'ki aha/ 'twa/ mo ma ki aha/ yuka yuk mo, ayy Arungimis pem jin ta'da kar/e mo.

/E ciki aha/ mo mo ki aha/ dina ka cis mo.

Miiyi mii ma 'the apo/ aha/ ma, dhali ciki mo ma 'thom pem mo.

² Ayy 'kwani kakasja imina montak pem jin 'koshu is is ka nyor idi ki mo ma 'the is kan mo?

Kakasja imina /e dhal mo/en gi gwo jin di'd bwa 'te/ 'pen mo dhali simm jasi gwo ma tor e kan mo?

Doshi ma dhali 'cunycuri yan mo.

³ Hili mishi gwo 'ban ki Tapa a'di dhuki unij gayiin ki she/ mo gom is piti mo. Tapa cikki aha/ gwo mo ki aha/ gwona 'twa/ e a'di mo.

⁴ Ka nyor di'd mo tani hili dhalku/ miinthus ki mii mo.

Wali 'twa/ ka dum bum mo apowa cim bum mo dhali 'koyi um ki shwamm mo.

Doshi ma dhali 'cunycuri yan mo.

⁵ Ciyi to kun 'ciṭhu/ 'kus kun tana kar/enj gana/ mo dhali dhuyi mongam gwo is bum e Tapa mo.

⁶ Kwani tana ris kun o gwo mo ki: Ayy, ki ana mina mish tom 'boro'da kamuyi.

'Deki monkush gi jis/em pini apo/ aman mo, ayy Tapa.

⁷ /E karki monkuny bwa ki nyanye/ eya dum pem mo

mmobol uni gwansan e mo kun takin gi pos buni dhali yimana mura'th jin ka/u ki nah nah kun ishkin mo.

⁸ E mo ma ku'th is mo tani aha/ mina ish 'ko'da 'cesh mo dhali ish e mo, haali/ /e 'de/ mo tani ayy Tapa, kar aha/ mmoça'b ki 'dantar mo.

5

Eya manyuk gway mo gom imanpiya thathar mo. Gway ma Dawuu'd.

¹ Ciyi 'cem pini ka ris gwom pem mo ma, ayy Tapa, yipi /e 'kup mo gom ohon pem jin ohonkika/ mo.

² Ciki kony cuuwam pem jin gwoka/ mo ma, aMalik pem dhali Arumgimis pem, gom e /e mo tani aha/ 'thona mo.

³ Ayy Tapa, e mon'thamo/ mo tani /e cikki 'twam pem mo, e mon'thamo/ mo tani aha/ 'ciṭha to 'kus gom /e mo dhali tima tim mo.

⁴ Haali/ /e diki ta Arumgimis jin 'kunya bwa mo e tonthus jin miikunu mo. tonthus midi diki nyak di ki /e mo.

⁵ Iman'thek 'ba/i mis mo mini 'koki doshi bwambori jis/em pini mo, /e shi/kina ris imanmii tonthusi e mo.

⁶ /E 'ce'dki uni gwansan sho'k mo kun oki gwo ma tor mo.

Tapa shi/i uni gwansani e kun budha te/ jasi goma bas mo dhali 'kwani kun tana he'k e ka he'k e mo.

⁷ Hili aha/ ki mo/en pini jin telu sho'k mo jin ishki'd ka enthus mo tani aha/ mina ciç gu'b pini mo,

dhali aha/ mina luja luja ka karambuye/ gi gu'b gi mondheleladhelel pini mo ki monko/ /e mo.

⁸ Shuyi aha/ bway mo ma, ayy Tapa, e mii ma kar/em pini mo haali/ gom 'kup pem tana ris mo, kari bway pini ka ji sho'k mo ibwambori aha/ mo.

⁹ Haali/ gwonj gana/ yisa di'da e 'twam buni mo,

adum buni 'ce'dkunu sho'k mo, 'kus buni wana e ki mon'kupaje jin ka'du 'twa/ mo, dhali uni ko 'kus ka le'd buni mo.

¹⁰ Dhuyi uni mmokal tom buni kun 'ko uni i'ba/ mo, ayy Arumgimis,

dhalki uni bitkin ki gwom bunin gana/ gun 'ko uni ibwa mo,
 haali/ goma dhin gwom buni ka ris mo tani taki uni ka pije/ mo,
 haali/ uni walkin ki tas tas apo/ /e mo.

- 11 Hili dhalka ris uni gwansan kun huri jwa mo e /e mo tani 'kunya bwa mo.
 Dhalki uni yuk gway ki sule/ gom mon'kuny bwa mo,
 dhali /e a'di imina uni jett me'di cine/ mo,
 ki uni gwansan kun en gway pini mo tani mina bwa /i/i imis gom /e mo.
 12 Haali/ /e 'borki unin kar/e mii mo, ayy Tapa,
 /e kumki uni ki mo ma 'them pini me'da gongoro/ mo.

6

Eya manyuk gway mo nyakki dhenhene/ isi ki kon ko jin 'kula 'kus ki 'kul mo. Gway ma Dawuu'd.

- 1 Ayy Tapa, dhalku/ ki kucur aha/ ka nyor pini mo,
 walla dor aha/ ka nyor pini jin 'batha'ba'th mo.
 2 Miiyi mii ma 'the gom aha/ mo, ayy Tapa, haali/ aha/ 'dushura ki 'dushur mo.
 Ayy Tapa, waci/ aha/ mo, haali/ arisa simam pem tocu bwa mo.
 3 Akashiram pem si'da/ a'di puru/ ki monto'c bwa mo.
 Hili /e, ayy Tapa - kakasja sa?
 4 Tuki mo, ayy Tapa, tayi mondiki/em pem is ki me'd mo,
 'cuki aha/ mo gom gway gi mo/en pini jin telki sho'k mo.
 5 Haali/ e mowu mo tani mon'kamu/ yisa di'da jin kanu /e e mo.
 E mo ma Haawiya mo tani aja si'da/ imidi ci /e moman mo?
 6 Aha/ 'thabula is mo gom is pem jin shunki aha/ mo,
 aris mon'thinyi 'baar mo aha/ upa cim pem ki jabu'th mo.
 Aha/ corosa/ ki coros apowa cim pem mo ki jabu'th pem jin gwoka/ mo.
 7 Em pem ca'bki ren ren mo gom monyiwakat pem mo,
 a'di warki'd ki mon'ka'd is mo haala ris 'kup pem tana ris ka ris mo.
 8 Iiku/ 'peni aha/ mo, aris um gun miiki tonthus mo,
 haali/ Tapa a'di cikki cuuwa/ gi kom pem mo.
 9 Tapa cikki aha/ ko gom mo ma di'b is mo.
 Tapa bu'thki mo ma 'thom pem mo be.
 10 Aris uni gun ta 'kup pem minu dhu ki mo ma 'the is mo dhali pura du ki
 monto'c bwa mo,
 uni mini dok ka nyan'ko'd mo dhali minu dhu ki mo ma 'the is ki e
 'kamu'thki'd hila/ mo.

7

Ko ma Dawuu'd mo a'di jin yukkina a'di gway e Tapa mo isi ki gwo goma Kuush mo jin ta'da wak ma Benyamiin mo.

- 1 Ayy Tapa Arungimis pem, e /e mo tani aha/ budha mo jin huru jwa mo,
 tayi aha/ is ki me'd 'pena ris unim pem kun uri aha/ isho'k mo, dhali 'cuki
 aha/ mo ma,
 2 isi ciki/ ki uni mini 'koki dher aha/ bwa me'da dhop mo,
 mmodir aha/ mo mmodar gi jan tal 'de/ mmowoth aha/ mo.
 3 Ayy Tapa Arungimis pem wakki/ aha/ miina yansankan mo,
 dhali wakki/ ton' kamu/ di'd jin miiga/ ki me'd pem jin shiyi'd mo tani

4 dhali wakki/ aha/ ri/a amugum pem ki tonthus mo tani
walla dil a'di jin ta 'kup pem to ka wuny is mo tani

5 dhalki a'di jin ta 'kup gi aha/ uri aha/ mo dhali bu'th mo,
dhali dhalki a'di pucur mondiki/em pem 'twa/a 'cesh mo,
dhali 'thi/a kashiram pem e bwam bu'd mo.

Doshi ma dhali 'cunycuri yan mo.

6 Cuyi mis mo ma, ayy Tapa, eya nyor pini mo,
'deki is pini ki mis apo/ uni gwansan kun ta 'kup pem kun puri mii ki o'd mo,
meri is mo, ayy Arungimis pem, /e torki gwon dwall jin toru gwo 'twa/a 'cesh
mo.

7 Dhalki montul is gom 'kwani uni itul is gom /e mo,
dhali apo/ a'di mo tani budhi monyca'b pini jin eka/ ek mo.

8 Tapa dwalli 'kwani gwo mo,
dwalli aha/ gwo mo ayy Tapa, isi ki mii ma kar/em pem mo
dhali isi ki gwo jin di'di aha/ jin dika/ ki mii ki nadhun mo.

9 Ayy dhalki tonthus gi imanmii miinthus daku ka bwa i'ba/ mo ma,
hili teli /e imanmii ka kar/e sho'k mo,
/e jin nyo/ki bwanj 'kwani mo dhali adunj 'kwani mo,
/e jin tana Arungimis jin ta'da kar/e mo.

10 Agongorom pem a'di di'd eya Arungimis mo,
a'di jin ta uni is ki me'd mo, uni kun dhelel ma du mo.

11 Arungimis ta'da kar/e jin dwalli gwo mo,
dhali Arungimis jin dek ma nyor mo isa yempa/ mo.

12 Wakki/ wathi/ diki rica du is mo tani
Arungimis midi cil gandal piti ki nar nar mo.
A'di ric'ki'da shum bwam piti mo.

13 A'di thosonki to gi mo/as piti gom mo gi 'koshuwa 'kosh mo,
mmodhala thopa/ o'd piti me'd mo jin ca'bki wur wur mo.

14 Hili mo mo ma, amanmii tonthus mo tani a'di bwaaki'da ris tonthus mo,
dhali di'd ka 'ci ibwa mo jin ta'da pibi ka pibi mo,
dhali a'di ki kala tor ka piye/ mo.

15 A'di ki cwany jis mo tani dhali tor a'di karash ka piye/ mo,
dhali bit'i jis piti jin cwanykina a'di mo be.

16 Mo ma pibim piti tu'kki'd e 'kup pitinj gana/ mo,
dhali mombujur piti thulu'd e bwanj 'kup pitinj gana/ mo.

17 Aha/ mina ci Tapa mo jin 'boruwa 'bor bwa i is mo jin ha me'd ki mo ma
kar/em pitinj gana/ mo
dhali aha/ mina yuk gway mmomanj gway gi Tapa mo, a'di jin Caa e ki Ca mo.

8

Eya manyuk gway, isi ki gway jin yuku ka jattiyya mo. Gway ma Dawuu'd.

1 Ayy Tapa, jin ta Tapam bam, gway pini wa'di eka/ e mony'ceshi 'baar mo!
/E jin ta gi monyca apo/ momisi 'baar mo jin nani'da nana/ mo.

2 Ki 'twa/ gi usha na/ mo dhali uni gun tana 'pereny mo tani
/e telkina cur sho'k mo haali/ gom uni gun ta 'kup gi /e mo,
mmodosh a'di jin ta 'kup gi /e mo dhali a'di jin ri'cki'da ri'c mo.

3 Ki aha/ parkina momis pini e mo, jin ta'da tu'c gi me'd pini mo tani

mmopara ppe e mo dhala risa cul kun telkina /e sho'k mo,

⁴ wathi/ gi wakata mo, jin mina /e i/o bwa ki a'di mo, walla ya/ gi wathi/ mo ki /e mini hil a'di i e mo?

⁵ Naskin /e ki kar a'di mmota ari jin gwa'da'd ka Arumgimis mo dhali shum a'di ki monyca mo dhali mii montak mo.

⁶ /E ciki a'di mo jin tanu tapa apowa risa tu'c gi me'd pini mo dhali /e dhukina ris to 'baar mo e bwan'kwariny sho'k piti mo

⁷ aris ka'bal dhala morbip mo, dhali si'da/ aris tombwaasho mo,

⁸ dhali aris 'dii kun peni mis mo, dhala ris wa'c e bwan kumma/ yi'de/ mo dhala ris to gunn kun dhu bway e bwan kumma/ yi'de/ mo.

⁹ Ayy Tapa, jin ta Tapam bam mo,

gway pini wa'di eka/ e mony'ceshi 'baar mo!

9

Eya manyuk gway mo isi ki gwo mowu gi ya/m piti mo. Gway ma Dawuu'd.

¹ Aha/ mina ci mo jin 'boruwa 'bor bwa i is e Tapa ka dum pemi 'baar mo. Dhali aha/ mina tora ris to kun miikina /e ki jaro/ jaro/ mo.

² Aha/ mina bwa 'kuny mo dhali ya i mis gom /e mo.

Dhali aha/ mina yuk gway mmoman gway pini mo, ayy /e jin Caa e ki Ca.

³ Ka ris uni kun ta 'kup gi aha/ dokkin ka nyan'ko'd mo dhali uni golinki is mo dhali 'ce'd sho'k ibwambori /e mo.

⁴ Haali/ /e halki mom pem jin raku jin ta jin kar/e mo.

/E ca'bkina po/ kursi ma malik mo mmoci mo ma kar/e mo dhali gwon dwall jin toru gwo 'twa/a 'cesh mo.

⁵ /E kucurkina ris kal gi 'kwaniny'cesh mo, /e 'ce'dki uni gun ta thus ki thus sho'k mo,

/e 'koshki gway buni ki sule/ dhali ki sule/ mo.

⁶ Uni gun ta 'kup mo tani uni torki sho'k ka pupush mo e mo jin mu/u 'twa/a 'ceshi 'baar mo,

aris 'penkuman bampam buni mo tani yu'dkina /e mo,

dhali mom buni jin kanu uni e mo tani a'di i'ce'dkunu sho'k mo be.

⁷ Hili Tapa a'di ica'bki'd i mo ma kursi ma malik ki sule/ mo.

A'di telki'da kursi ma malik piti mo gom gwon dwall jin toru gwo 'twa/a 'cesh mo,

⁸ dhali a'di dwallki 'kwaniny'cesh gwo ki mii ma kar/e mo.

A'di midi dwall 'kwani gwo ki dar gi mii ma gwar 'de/ mo.

⁹ Tapa a'di 'bitha'bi'th me'da cur gom uni gun yapkunu mo,

a'di ta'da cur jin 'bitha'bi'th ka tee jin tojuwa to'c bwa mo.

¹⁰ Dhali uni gwansan kun mishki gway piti mo tani dhuki mongam gwo is buni e /e mo,

haali/ gom /e mo tani ayy Tapa /e diki dhal uni gwansan 'pen mo gun simmki /e mo.

¹¹ Yuki gway ki manj Tapa mo a'di jin di'd eya Sihyuun mo.

Tori miin tom piti e bwaman ma ris 'kwani mo.

¹² Haali/ a'di jin ri'cki'da bas mo tani a'di diki this uni e mo

dhali a'di diki this ko e mo, ko gi a'di jin wo'ckunu is she/ mo.

13 Miiyi mii ma 'the gom aha/ mo ma, ayy Tapa.
 Hili mo mo ma to jin 'koshi aha/ is ka nyor mo tani a'di ta to 'peni uni gwansan
 kun shi/ki aha/ i e mo,
 Ayy /e jin 'de'kki aha/ mo 'peni 'twaŋkal gi mowu mo,
 14 ki aha/ mina rasha ris momaŋ pini e mo,
 ki eya ris 'twaŋkal ma goŋ gi 'bwa/ ma Sihyuun mo
 ki aha/ mina bwa 'kuny mo e mony'cuḱ pini mo.

15 Aris kal gi 'kwaniny'cesh ciḱin 'teki jorom mo e jis kun cwanykina uni mo,
 eya nyok kun bagkina uni mo tani a'di bu'thki uni isho'k buninḱ gana/ mo.

16 Tapa dhalki is piti ki a'di minu mish mo, a'di torki gwon dwall 'twa/a 'cesh
 mo,
 uni gun ta thus ki thus mo tani bu'thkin ma gumem buni kun uḱkina uni ki
 me'd buninḱ gana/ mo.

Higgaion. Doshi ma dhali 'cunycuri yan mo.

17 Uni gun ta thus ki thus mo tani uni mini ceḱer bwa mo eya Haawiya mo,
 aris kal gi 'kwaniny'ceshi 'baar mo kun thiskina Arungimis e mo.

18 Haali/ uni kun mini mii ta gi to mo tani uni minu mii 'koki this e isa yempa/
 mo,
 dhali mo ma 'teŋ kape/ gi uni gun hatha'ko'd mo tani uni minu 'koki 'ce'd
 sho'k ki sule/ mo be.

19 Cuyi mis mo, ayy Tapa. Dhalku/ ki dhal 'kwani mmopi gwo jipi/ mo.
 Dhalka ris kal gi 'kwaniny'ceshi 'baar mo dwallu gwo mo ibwambori jis/em
 pini mo.

20 Dhuyi uni ki mo ma ko/ is mo, ayy Tapa.
 Dhalka ris kal gi 'kwaniny'cesh ki mish uni mo ki uni tana ta, uni ta
 'kwaniny'cesh mo!

Doshi ma dhali 'cunycuri yan mo.

10

1 Katinta doshkina /e isa dhana/ kan mo, ayy Tapa?
 Katinta bagkina /e is pini 'pena tee jin tocu bwa mo?

2 E mo jin dhuna uni kun ta thus ki thus is ki ca mo tani uni ki ur uni kun
 hatha'ko'd isho'k mo.
 Dhalki uni budhu mo e mom buni kun piḱhinkina uni ki 'pen mo kun
 kulumkina uni gwo ibwa mo.

3 Haali/ uni kun ta thus ki thus mo tani dhuki 'ba/ ki ca mo gom to kun gop
 uni bwam buni mo,
 dhali wathi/ jin pura bwa ki pur gom nyunykina/ mo tani a'di midi jeeya je
 mo dhali ruḱ Tapa mo.

4 E bwam/em piti jin kara a'di 'ba/ ki ca mo tani a'di jin ta thus ki thus mo tani
 diki ŋaḱ a'di mo.
 Dhali aris gwom piti kun kuluma a'di ibwa mo tani ta ku kun wa cikise/ mo
 mmo/o ki: Arungimis piyi'd mo be.

5 Bway piti ruski'd ki rus isa yempa/ mo,
 gwon dwall pini a'di ca'bki'd e mo jin eḱa/ eḱ mo, jin di'di bwampo/ gi jis/em
 piti mo:
 dhali goma ris 'kup piti mo tani a'di ki 'taḱ uni manya/ i'kup mo.

6 A'di kulumki gwo eya dum piti mo ki: Aha/ mina mol joḱ mo,
 eya risa nyakum yil gi 'kwani mo tani aha/ mina diki gam a'di jin ta mo jin
 'konu ki 'twa/ jin 'bushura/ 'bushur 'kup mo.

- 7 Twam piti 'tu'dkunu mo ki mo ma jee mo dhali ki mo ma he'k e mo dhali mmoyapa yap mo,
dhali 'ko'da le'd piti mo tani a'di taki'da pibi mo dhali miinthus jin shi/ashi/
mo.
- 8 A'di ca'bki'd mo mmobag mo eya ris bampa/ mo,
e mom piti jin bagkina a'di is mo tani a'di jin ta'da man'kosha mee gom uni
gun 'kon ka po/ mo.
Em piti mii'd ki jir jir mmotim uni gun hatha'ko'd mo
- 9 a'di ki wupa 'cesh ka kwal is me'da dhop e bwanj gu'b piti mo,
a'di ki wupa 'cesh ki a'di midi bu'th uni gun hatha'ko'd mo,
a'di ki bu'th uni gun hatha'ko'd mo ki a'di di'd mmodir uni ka nyok bway
bwaman mo.
- 10 Uni gun hatha'ko'd mo tani uni nyu/kunu mo, mmocij ka 'cesh mo,
dhali ta'k mo e mom'bi'th piti mo.
- 11 A'di kulumki gwo eya dum piti mo ki: Arungimis dhalki'da dhal 'pen mo,
a'di bagki jis/em piti mo, a'di midi mol a'di par e mo.
- 12 Cuyi mis mo ma ayy Tapa, ayy Arungimis. 'Deki me'd pini mo,
dhalku/ ki dhal uni gun woca is is she/ 'pen mo.
- 13 Katinta irukkina wathi/ jin ta thus ki thus Arungimis mo,
dhali o gwo eya dum piti mo ki: /E mini diki yuk a'di mmoci mondenj piti e
mo?
- 14 / E mishkin mo, nye, / e nyithki mo jin tocu bwa mo dhali mo jin
jwakat'kunuwa jwakat mo
ki/e mini 'taki kal a'di e me'd pini mo,
a'di jin hatha'ko'd mo tani a'di ciki is piti ki /e mo,
haali/ /e jin tana manwoth gom a'di jin dar gi com mo.
- 15 'Ce'dki /e a'di abi mo a'di jin ta thus ki thus mo dhali a'di jin ta'da manmii
tonthus mo,
simmi miin tonthus piti e naskin mo ntagi /e mini diki gam torj kamu/ mo.
- 16 Tapa a'di ta'da malik gom ki sule/ mo dhali ki sule/ mo.
Kal gi 'kwaniny'ceshi 'baar mo mini 'ce'd sho'k 'peni mony'cesh mo.
- 17 Ayy Tapa /e mini cik to gi a'di jin 'ka'd ma du ki 'ka'd gom to jin o a'di bwa
mo,
/e mini 'bi'th uni adum buni is mo dhali /e mini ka'd 'cem pini mo,
- 18 mmodhuwa dhu ka po/ mo gom uni gun dar gi icom mo dhali uni gun
yapkunu mo be,
wakan ki wathi/ gi mony'cesh midi diki dhu uni ki monjko/ is dok/e mo be.

11

Eya manyuk gway mo. Gway ma Dawuu'd.

- 1 E Tapa mo tani aha/ bu'thkina mom pem jin hurkika/ jwa mo, dhali /e mini
oyaa/ gwo kata mo ki:
Peyi me'd 'dii mo e 'kuwosha turga/ mo,
- 2 haali/ hili mo mo ma, haali/ uni gun ta thus ki thus mo tani gwana'dkina
bwa mo,
uni ka'bkina thopam buni eya shu/ mo
mmoshin e mondhurumi'd mo apo/ uni kun dhelel ma du mo.
- 3 Dhali wakki/ mo kun ka'bkunu 'ce'dkunu sho'k mo tani
imanmii ka kar/e mini miya ta mo?
- 4 Tapa a'di di'd e gu'b gi mondheleladhelel piti jin kogu mo,

dhali akursi gi Tapa a'di di'd e momis mo,
dhali em piti hilki mo mo, dhali akwarma'c em piti a'di nyo/ ki uci gi
'kwaniny'cesh mo be.

⁵ Tapa a'di nyo/ki uni gun miin ka kar/e mo dhali uni gun ta thus ki thus mo,
dhali akashiram piti shi/ki a'di i e mo a'di jin enki mo jin bujuruwa bujur mo.

⁶ Apo/ a'di jin ta thus ki thus kan mo tani a'di mididi hetha po/ a'di akapany o'd
mo dhali to jin si'du/ mo,
dhali 'tham jin shi'bil to mo tani a'di mididi ta tom buni kun pwa'kkunu uni bwa
ka 'to'd 'to'd mo be.

⁷ Haali/ Tapa a'di ta'da kar/e mo dhali a'di eni mii gun miinu ka kar/e mo.
Uni gun dhelel ma du mo tani mini hil bwam/em piti mo be.

12

Eya manyuk gway mo: isi ki gwo ma sheminith mo. Gway ma Dawuu'd.

¹ Wothi/ awoth mo ma, Tapa. Haali/ jan kamu/ yisa di'da naskina/ jin ta'da
gayiin mo,

haali/ uni kun ta ku isin gana/ mo tani torki sho'k ka pupush mo 'peni
bwaman gi ya/ gi 'kwaniny'cesh mo be.

² Aris 'kwaniny'ceshi 'baar mo ka 'dete/ 'dete/ mo tani takina tor ka tor apo/
imannyak 'dish gu'b buni is mo,
ki gwo man buni 'pena le'd buni ka mak mo dhali ka du kun 'koni su/ mo tani
uni ki tor gwo mo.

³ Dhalki Tapa a'di 'cithki'da risa man kun manu ka mak 'peni 'twa/ mo,
dhala le'd kun dhu dhan 'ba/ ki ca mo,

⁴ uni gwansan kun o gwo mo ki: Ka le'd bana mo tani ana mina pi gwo jipi/
mo,
ale'd bana 'kon nyakki ana mo, kaja a'di ita tapam bana mo?

⁵ Haali/ uni gun hatha'ko'd mo tani uni yapkunu mo, haali/ uni gun mini mii
ta gi to mo tani uni ohonkin mo,
aha/ mina cu mis shwane/ mo, a'di ta gwo jin ona Tapa mo,
dhali aha/ mina kar a'di ki 'dantar e mo jin o a'di bwa mo.

⁶ Aris gwo kun ona Tapa is mo tani uni ta gwo kun onu is mo kun dhelelkin
mo,
'dolkon kush uni ito'dkunu ki o'd jin ca'b ki wur wur mo 'pena 'cesh mo,
uni dhukunu i o'd me'di pesu/ mmodhelel a'di mo.

⁷ Ayy Tapa, miiyi mii mmocesh am ka po/ mo ma,
jiyi aman 'pena nyakum yil gi 'kwani gwansan mo ma ki sule/ mo.

⁸ Eya ris 'twan'kal kuku/ mo uni kun ta thus ki thus mo tani 'kakarki mo mo,
me'd miim bulga/ a'di ikaru ki ca e bwaman iya/ gi 'kwaniny'cesh mo.

13

Eya manyuk gway mo. Gway ma Dawuu'd.

¹ Kakasja, ayy Tapa? A/e mini dhal aha/ 'pen ki sule/ sule/ kan mowa?
Dhali /e mini bag jis/em pini 'peni aha/ ki mo gi wakata mo?

² Dhali ki mo gi wakatinta imiga/ mii kal mom'pe'd shem pem eya kashiram
pem mo,
dhali ta gi mondit bwa eya dum pem iyula tente/ kan mo?
Ki mo gi wakatinta imina a'di jin ta 'kup gi aha/ ica apo/ aha/ mo?

³ Nyithi ma dhali thok aha/ gwo mo, ayy Tapa, Arungimis pem mo.

Kushi em pem mo isi ciki/ ki aha/ mina ish e mo e a'di jin ta mo/ish e gi mowu mo,

⁴ isi ciki/ ki a'di jin ta 'kup ki aha/ midi o gwo mo ki: Aha/ pina a'di e mo be, isi ciki/ ki uni kun ta 'kup ki aha/ mina bwa 'kuny mo haali/ aha/ yikinkunu is mo be.

⁵ Hili aha/ gamkina gwo is mo e mo/en pini jin telkunu sho'k mo, adum pem mina bwa 'kuny mo e bway mowoth pini mo.

⁶ Aha/ mina yuk gway e Tapa mo, haali/ a'di mii aha/ ki 'bore/ ki miin to kun ishkin ka enthus mo.

14

Eya manyuk gway mo. Gway ma Dawuu'd.

¹ A'di jin ta pus mo tani o gwo eya dum piti mo ki: Arungimis piyi'd mo. Uni pu/kin mo, dhali uni mii mii kun bulabul mo.

Jaj kamu/ jin mii'd ka kar/e yisa di'da.

² Tapa hilki mo ka lungu'b 'peni mis apo/ uci gi 'kwaniny'cesh mo mmopar mo e mo wakki/ jan tal 'deŋ kamu/ mii mii ki yuk yuk mo, mmosimm jasi Arungimis e mo.

³ Uni 'baar mo iikini dheres mo, uni 'baar mo wakina e ki to gun pu/kin mo, jan tal 'deŋ kamu/ yisa di'da jin mii mii jin 'boro'd mo, tal 'de/ piyi'd mo be.

⁴ 'Kona uni ki nyitha/, aris imanmii tonthus mowa, uni kun shwa 'kwanim pem me'd tonte/ kun shwana uni mo, dhali uni 'koki yuk Tapa mo.

⁵ Uni minu dhu ki dhan monko/ is mo, haali/ Arungimis nyak di ki 'kwani ma nyakum yil kun mii miin kar/e mo.

⁶ Um mini 'taki non mo jin thosona wathi/ jin hatha'ko'd 'twa/ mo tani, hili Tapa a'di ita jim piti jin hura a'di jwa nycine/ mo be.

⁷ Ayy mony'cuŋ midi 'taki pu'd gom 'Kwani ma Israyiil moyi 'peni Sihyuun mo!

Ki Tapa midi wara shamanettan ki 'kwanim piti is mo tani Yakuub mina bwa 'kuny mo dhali Israyiil mina bwa 'bor mo.

15

Gway ma Dawuu'd

¹ Ayy Tapa, aja a'di imidi ca'b ki ca'b yilkina/ e gu'b burrinyem pini mo? Dhali aja a'di imidi ca'b e 'kuwosh pini jin kogu mo?

² A'di jin ya'd ki dar gi mii 'ba/ mo, dhali mii miim 'boro'd mo, dhali tor gwon gana/ 'pena dum piti mo,

³ a'di jin diki thutha thu'th 'pen ka le'd piti mo, dhali diki mii tonthus ka kam piti mo, walla kal mo jin wakuwa wak apowa mannyak ca'b piti jin 'dish a'di is mo,

⁴ dhali e jis/em piti mo tani aman/ush gwo gam is mo tani wakina a'di mo, hili a'di tak uni gwansan kun ko/ki Tapa mo,

dhali a'di jin thulki gwom piti me'da po/ mo ki to jin shi/ki a'di mo tani dhali diki ak gwom piti e mo be,

⁵ a'di jin diki kara guurush piti e mo jin nyunyu/ to mo, dhali a'di diki bu'th mo jin wanu is apo/ a'di jin di'd ka po/ mo be.

A'di jin mii to gwansan mo tani minu mol joŋ ki sule/ mo be.

16

Ko ma Dawuu'da dhamo/jin kanu e mo.

- 1 Tashi aha/ 'twa/ mo ma, ayy Arungimis, haali/ e /e mo tani aha/ bu'thkina mo jin huru jwa mo.
- 2 Aha/ ki o Tapa gwo mo ki: /E ta Tapam pem mo.
Ki dar gi /e mo tani aha/ mina mol tom 'boro'd gam mo.
- 3 Me'd uni gun dhunu ki she/ ki dheel dheel e mony' cesh mo tani uni a'di ita kun bol tiya e ki 'bor mo,
dhali e uni mo tani a'di 'kunyka/ bwam pemi 'baar mo.
- 4 Uni gwansan kun kwanykina ruma tiya mo tani uni marki monditi bwam buni is mo,
mon tom buni gun cina uni mmo'ciha basa 'cesh mo tani aha/ mina diki ci mo
walla aha/ mina diki kal gway buni e 'twam pem mo.
- 5 Tapa a'di ta tom pem jin kwanyka/ mmobu'th mo dhala kubbaayam pem mo dhali /e ko'dki mal pem is mo.
- 6 Jil uni dirkini bwambori aha/ mo e mo jin 'kunyka/ bwa mo,
nye, aha/ tana gi mala 'borga/ mo.
- 7 Aha/ 'bora Tapa mii mo a'di jin ciki aha/ gwo logom mo,
e mon'thiny si'da/ mo tani adum pem ye'thki aha/ sho'k ki gwo mo.
- 8 Aha/ karkina Tapa isa yempa/ ibwambori jis/em pem mo,
haali/ a'di di'd ki me'da bim poros pem mo ki aha/ minu 'koki joç mo be.
- 9 Wakan adum pem a'di 'borkunu bwa mo dhala kashiram pem a'di 'kunykina bwa mo.
Bungwar is pem a'di ca'bki'd ki ca'b 'pempaŋ gana/ mo.
- 10 Haali/ /e diki ci aha/ eya Haawiya mo,
walla /e diki dhal a'din 'de/ jin ta'da gayiin pini bway mo mmpar jisa 'kulga/ e mo.
- 11 /E toriki aha/ bway tur gi mondiki/e mo,
e buŋ'kus pini mo tani a'di isha mo jin 'tu'du ki moŋ'kuny bwa mo,
eya bim poros pini mo tani a'di 'kona mo jin 'boru bwa ki sule/ sule/ ya ye 'ba/ mo.

17

Mon'tho ma Dawuu'd

- 1 Ciki gwoŋ kar/e mo ma, ayy Tapa. Kari 'ce gom kom pem mo.
Ciyi 'cem pini gom mon'thom pem 'pena le'd pem jin di'd ki 'kus 'pena he'k e mo.
- 2 'Peni /e mo tani dhalki mom pem jin yenu pu'du'd mo.
Dhalki em pini a'di hili jim 'boro'd mo.
- 3 Waŋki/ /e mini pala dum pem mo, dhali waŋki/ /e mini yayu/ mmobuti aha/ mon'thiny mo,
dhali waŋki/ /e mini nyo/ aha/ mo tani /e mini diki gam tonthusu kamu/ e aha/ mo.
- 'Twam pem diki dhaŋ gwo mo.
- 4 Me'd mii gun miina 'kwani mo tani ki gwo gi 'twam pini mo tani aha/ gaskina mo 'peni bway gi uni kun bujurkina bujur mo.
- 5 Naŋgin pem telki sho'k mo e bway tur pini mo,
sho'k pem diki yeres mo.

6 Aha/ yuƙkina /e mo haali/ /e mini thoƙ aha/ 'twa/ mo, ayy Arungimis.
Kari /e 'cem pini gom aha/ mo, ciƙi /e gwom pem mo ma.

7 Tori montel sho'k gi mo/en pini ki jaro/ jaro/ mo,
ayy amanwoth gi uni gwansan kun simmki mo jin huru jwa e mo
'peni uni kun ta 'kup gi uni ki me'da bim poros pini mo.

8 Kari aha/ me'da pinya/ e e mo.
Bagi aha/ eya la ma bim pini mo,

9 'peni uni kun ta thus kun dilki aha/ to mo,
kun ta 'kup pem kun shi/in ki shin gana/ mo kun 'kamki aha/ mo.

10 Uni mu'thkina dum buni 'peni bwa jin hilu ki e ma 'thime/ mo.
Dhali ki 'twam buni mo tani uni oki gwo ki 'ba/ kun dhuna uni ki ca mo.

11 Uni thuƙki aha/ ki 'the'b 'the'b mo, dhali shwane/ uni 'kamki aha/ mo.
Uni dhuki em buni mo mmo'tuƙ aha/ ka 'cesh mo.

12 Uni wana e ka dhop jin gananki 'ba/ mo mmodher to bwa ka gwapi/ mo,
me'd ari dhuru'c ma dhop jin wupki'da 'cesh mmobag mo.

13 Cuyi mis mo, ayy Tapa, jemi uni 'kup mo, dhali piyi uni e mo.
Dhali 'cuƙi mondiki/em pem 'peni uni kun ta thus ki thus ki gandal pini mo,

14 'peni 'kwani ki me'd pini mo, ayy Tapa,
'peni 'kwani gwansan kun bu'th to jin ta moŋ'ko gi mony'cesh mo.
Dhalki bwam buni 'tu'du/ mo ki to kun dhukina /e gom uni mo.
Dhalki uƙim buni uni tan gi to ki nyanye/ mo jin midi bol ji gi ca'd e mo.
Dhali dhalki uni ur ton tiya 'kup gom usha ŋam buni mo.

15 Dhali gom aha/ mo tani aha/ mina hil bwam/em pini mo e mo ma kar/e mo.
Ki aha/ mina mer e mo tani aha/ minu kap mo mmohila yir em pini mo be.

18

Eya manyuk gway mo. Gway ma Dawuu'd, a'di jin ta ciŋkina/ gi Tapa mo, a'di jin dhalki'da ris gwo me'd mo ki gway jin yuƙa a'di e Tapa mo ka tee jin 'cuƙkina Tapa a'di mo 'peni me'd ma ris unim piti kun ta 'kup ki a'di mo dhali me'd ma Shawuul mo tani a'di ki o gwo mo ki:

1 Aha/ ena /e mo, ayy Tapa, jin ta mom'bi'th pem mo.

2 Tapa a'di ta wosh pem mo, dhali acur pem mo, dhali aman'cuƙ aha/ mo,
dhali Arungimis pem mo, dhali wosh pem mo, e a'di jin bu'thkika/ mo jin hurga/ jwa mo,

a'di jin ta'da goŋgorom pem mo, dhali ce gi bway gi mowoth pem mo, dhali mo ma cur pem jin tenu gwo mo.

3 Aha/ yuƙkina Tapa mo, a'di jin haki me'd mo jin minu maŋ mo,
dhali aha/ takunu is ki me'd mo 'pena ris unim pem kun ta 'kup ki aha/ mo.

4 Atomm gi mowu a'di 'tamkunu aha/ is mo,
mii jin kar 'kus me'd yi'de/ 'peni mo jin daƙu/ gwo me'd mo a'di tiƙ aha/ e mo,

5 dhali atomm ma Haawiya a'di kothki aha/ is mo,
dhali agume/ gi mowu a'di jemki aha/ 'kup mo.

6 E mo ma cis pem mo tani aha/ yuƙkina Tapa mo,
eya Arungimis pem mo tani aha/ gwokina 'twa/i a'di gom mowoth mo.

'Peni gu'b gi mondheleladhelel piti mo tani a'di ciƙki 'twam pem mo,
dhali kom pem a'di jidhirki'd mo e bwany'cem piti mo.

7 Dhali mony'cesh a'di yaki'd ka kul is mo dhali tu'k 'ban ki washar washar mo,

dhali moŋka'b ma ris wosha turga/ si'da/ uni deekin ki bir bir mo,
dhali yiƙinki is mo haali/ a'di shwaki'da nyor mo.

8 Aku'd yaki'd ka pije/ 'peni shush piti mo

dhali o'd jin midi kupa kup 'peni 'twam piti mo,
akapany o'd jin kakaca kaka'c gacki'd ka pije/ 'peni a'di mo.

⁹ A'di gonki momis is mo dhali thulu/ ka 'cesh mo
dhala rak jin 'cethki'da 'tum a'di di'd e bwan' kwaryny sho'k piti mo.

¹⁰ A'di merki'da powa man'doyu gwo mo dhali pe mo,
a'di pu'dki'd ki 'ta'b apowa bi gi 'tham mo.

¹¹ A'di karki mondhurumi'd mmota tom piti jin 'kamki a'di is mo,
adarha'dam piti a'di ta'da rak jin 'cethki'da 'tum gom yi'de/ mo.

¹² 'Peni monkush jin kushi mo kagahara e bwambori a'di mo tani
to pu'dki'd 'pena rak piti mo jin ta'da wasa/ mo dhali akapany o'd mo.

¹³ Dhali Tapa si'da/ a'di gwoki'da gur gur e momis mo
dhali a'di jin Caa e ki Ca a'di bahki 'twam piti mo,
awasa/ mo dhali akapany o'd mo.

¹⁴ Dhali a'di shinki'da thopam piti mo dhali ce uni bwa mo
dhali a'di ki dhi'th mo ka war mo dhali ti'k uni 'pen mo.

¹⁵ Dhali bway tur e kumma/ yi'de/ mo tani uni 'kokunu mo mmomish mo,
dhali monka'b gi mony'cesh uni mishkunu mo be,
gom miin kucur pini mo jin kucurkina /eya kucur mo, ayy Tapa,
gom du'd gi shi/in 'peni shush pini mo.

¹⁶ A'di jidhirki'd 'peni mo jin eka/ ek mo, dhali a'di bu'thki aha/ mo,
a'di ki dir aha/ ka pije/ 'pena ris yi'de/ mo.

¹⁷ A'di ki 'cuq aha/ mo 'peni a'di jin ta 'kup ki aha/ jin 'bitha'bi'th mo,
dhali 'peni uni gwansan kun shi/ki aha/ i e mo,
haali/ uni 'kona isi 'bitha gom aha/ mo.

¹⁸ Uni pu'dkina po/ aha/ ka teem pem jin ta jok ki jok mo,
hili Tapa a'di ta mohal pem mo,

¹⁹ A'di ki buk aha/ ka pije/ e mo jin kwashara/ kwashar mo
dhali a'di 'cukki aha/ mo, haali/ a'di 'borkina bwa ki 'bor ki aha/ mo.

²⁰ Tapa a'di ciki aha/ adum pem jin ish kumma/ mo me'd isi mii ma kar/em
pem mo,
dhali me'd isi mii jin dhelelkika/ me'd pem mo tani a'di rakki aha/ to ibway
mo.

²¹ Haali/ aha/ dhukina bway gi Tapa mo
dhali aha/ dinaki mii tonthus mmoper mo 'peni bway ma Arungimis pem
mo.

²² Haali/ aris gwonkan piti kun onu mo tani uni 'koni bwambori aha/ mo,
dhali gwonkan piti kun bahu mo tani aha/ dinaki dhu uni 'pen ka pije/ 'peni
aha/ mo.

²³ Aha/ dara gi mii 'ba/ ibwambori a'di mo,
dhali aha/ karkina is pem 'peni mo jin 'konu ki mii 'ba/ mo.

²⁴ Gom gwo gi wakan mo tani Tapa a'di irakki aha/ to ibway mo isi ki mii ma
kar/em pem mo,
dhali isi ki me'd pem jin dhelelkika/ mo e jis/em piti mo be.

²⁵ Gom uni kun ta ku isin' gana/ mo tani /e ki tor is pini jin tana /e a/isin' gana/
e uni mo,
dhali ki wathi/ jin dar gi mii 'ba/ mo tani /e ki tor is pini jin dara /e ki mii 'ba/
e wathi/ mo.

²⁶ Dhali gom uni kun dhelelkin mo tani /e ki tor is pini jin dhelelkina /e e uni
mo,

dhali ki uni kun wanyarkina ii ki wanyar mo tani /e ki tor is pini e uni ki ca'ckon mo.

27 Haali/ /e 'cukki 'kwani kun dhu is ki gwa'd mo, hili uni kun dhu 'bam buni ki ca ki e ma waḵ mo tani /e mini thul uni ka 'cesh mo be.

28 Nye, /e kanyki moḵkush ma lambam pem mo.

Tapa Arungimis pem a'di 'twakki mondhurumi'd pem ki moḵkush mo.

29 Nye, ki /e mo tani aha/ misha sirica risa thuruḵ ma mee ki sho'k mo dhali ka Arungimis pem mo tani aha/ mina mish nyalla/ apo/ 'kupa gangara/ mo.

30 Arungimis yansan mo tani bway piti 'boro'd ki 'bor gana/ mo.

Dhali gwo jin ona Tapa is mo tani a'di nyo/ki gwoḵ gana/ mo.

A'di ta'da goḵgoro/ goma ris uni gwansan kun bu'thki mo jin huru jwa e a'di mo be.

31 Haali/ aja a'di ta'da Arungimis mo? hili a'di jin ta Tapa mo.

Dhali aja a'di ita wosh? isi ciki/ Arungimis bana mo.

32 Arungimis jin dekki aha/ ki mom'bi'th is mo, dhali kar bway pem ki 'dantar mo.

33 A'di ki kar sho'k pem mmowa e ki sho'k ma buyymo mo, dhali a'di ki kar aha/ ki kar 'pempaḵ gana/ mo e mo jin turatur mo.

34 A'di tor ki me'd pem gwo mo gom mo ma mee mo, wakan ka bim pem mini mish gwana'da bwa me'da korok mo.

35 /E ciki aha/ agoḵgoro/ gi bway mowoth pini mo, dhali ki me'da bim poros pini mo tani /e thiḵki aha/ mo, dhali ki mowoth pini mo tani a'di ki kar aha/ mmocaaca mo.

36 /E ki ci aha/ mo jin wangala/ wangal gom ḵatgin pem kun dhuka/ e bwan'kwariny pem mo, dhali sho'k pem diki yeres mo.

37 Aha/ urkina ris uni kun ta 'kup gi aha/ isho'k mo, dhali bu'th uni mo dhali aha/ dinaki dok ka nyan'ko'd mo ntagi uni kupkunu mo be.

38 Aha/ puḵkina uni i e mo, wakan ki uni molki cu mis mo. Uni ta'kkin e bwan'kwariny sho'k pem mo.

39 Haali/ /e dekki aha/ ki mom'bith mo gom mo ma mee mo.

/E ki dhu uni kun tikki aha/ e mo mmociḵ ki jorom mo ibwan'kwariny aha/ mo.

40 /E ki dhu aris unim pem kun ta 'kup ki aha/ mmoḵu'k aha/ 'ko'd buni i is mo dhali uni gwansan kun shi/ki aha/ i e mo tani aha/ 'ce'dkina uni sho'k mo be.

41 Uni cuukin gom mowoth mo hili jaḵ kamu/ piyi'd mmota uni is ki me'd mo. Uni cuukin 'twa/ e Tapa mo tani hili a'di diki thoḵ uni gwo mo be.

42 Aha/ dorkina uni mmota agarisa/ ibwambori 'tham mo. Aha/ ta'kkina uni ka piḵe/ me'da je e bway tur kun iinu mo.

43 /E 'cukki aha/ mo 'peni mo jin bira 'kwani abir mo, /E ki kar aha/ mmota a'kan'kup ki kal gi 'kwaniny'cesh mo.

Ki 'kwani kun dika/ ki mish mo tani uni miiki aha/ to mo.

44 Haali/ me'd jin cikina uni gwo gom aha/ mo tani uni haki aha/ gwo e mo. 'Kwani kun wal 'twan tiya mo tani uni pu'dkin mo mmopar ki jin 'kupa'dupun 'kup ki aha/ mo.

45 'Kwani kun wal 'twan tiya mo tani uni thiskin ma du e mo, dhali pu'du/ mo mmodee kagahara 'peni mo ma cur buni mo.

- 46 Tapa di ki e mo dhali mom'bor mii midi di gom wosh pem mo, dhali mo/ek midi di goma Arungimis pem jin ta bway mowoth pem mo.
- 47 Arungimis jin ciki aha/ mori'c mo dhali aris 'kwani mmo'dap 'twa/a 'cesh i bwan'kwariny sho'k pem mo.
- 48 A'di jin 'cukki aha/ mo 'pena ris 'kup pem mo, nye, /e karki aha/ ki ca mo mmoboloča ris uni kun ta 'kup ki aha/ e mo, dhali /e 'cukki aha/ mo 'peni 'kwani kun bujurkina bujur mo.
- 49 Haali/ gom mii yan kan mo tani aha/ mina ci /e montak gi gwo maŋ mo, ayy Tapa ibwaman kal gi 'kwany'cesh mo, dhali yuk gway mmomaŋ gway pini mo be.
- 50 Adhan mo jin pinu mii e mo tani a'di cikina a'di goma malik piti mo, dhali a'di ki tor mo jin telu mo/en piti sho'k mo ki a'dim piti jin 'koshkina a'di ki monyca mo, eya Dawuu'd mo dhali e emen piti ki sule/ sule/ mo.

19

Eya manyuk gway mo. Gway ma Dawuu'd.

- 1 Aris momis uni tor ki monyca ma Arungimis mo, dhala balany bahki miin tom piti ki me'd mo.
- 2 Ka yempa/ ka yempa/ mo a'di ki gač gwontor piti mo, dhali mon'thiny ka yempa/ mon'thiny mo tani a'di ki tor monyith piti mo,
- 3 Mowal 'twa/ piyi'd mo walla gwo piyin mo, dhali 'twam buni si'da/ 'konuki cik mo tani
- 4 hili 'twam buni a'di yaki'd ka piye/ e mony'ceshi 'baar mo, dhali gwom buni a'di yaki'd ki 'pemen gi mony'ceshi 'baar mo. E uni mo a'di ki kar gu'ba'ku/ goma tente/ mmodi mo,
- 5 a'di jin sulki'd ka piye/ me'd wathinyaŋa'b jin dhalki gu'b jin isha a'di 'pen mo dhali wa e ki wathi/ jin 'bitha'bi'th jin guski'd mmo'baar bway piti ki mon'kuny bwa mo.
- 6 Mosul piti a'di 'peni 'pemen ma ris momis mo, dhali mo ma kul is piti a'di taki'd gi 'pemen e uni mo, dhali toŋ kamu/ yisa di'da jin mishu bag mo 'peni mo ma wur wur piti mo.
- 7 Gwoŋkan jin cinu gi Tapa mo tani a'di 'boro'd ki isi 'bor gana/ mo, a'di jin warki'da kashira/ is mo, dhali gwonyci gi Tapa a'di doshki'd mo, mmodhu uni gun 'ka'da mii 'ba/ ki moyuk mo,
- 8 gwoŋkan gi 'twa/ gi Tapa mo tani uni yisa shiyina, hili uni 'kunykina du mo be. Dhali gwoŋkan gi Tapa jin 'kwarkunu mo tani a'di dheleladhelel mo, a'di jin kushki e gi 'kwani mo.
- 9 Moŋko/ jin kogu Tapa mo tani uni dheleladhelel mo, kun minu 'dim 'kup ki sule/ sule/ ya ye 'ba/ mo. Dhali gwoŋkan gi Tapa kun onu mo tani uni ta uninj gana/ mo dhali tana kar/e mmodtal 'de/ mo be.
- 10 Kun minu o bwa ki nyanye/ mmobol 'dolkon gana/ e mo isi kan si'dayi me'd 'dolkon gana/ jin tashkunu e ki o'd mo, dhali a'di jin ca'bki dhel dhel si'da/ mmobola dham e mo dhali jin yuki'd ki haw haw me'd mamana dham mo.

- 11 Bahili ki uni mo tani ciŋkinam pini a'di rumkunu mo

dhali mmodhu uni mo tani adhan to jin ish kumma/ jin caaca mo tani a'di cikunu mo.

¹² Hili aja a'di imidi theke'th tom piti kun thama a'di mii mo?

Dheleli /e aha/ 'peni mombag gi mii kun thamka/ mii mo.

¹³ Tashi cinjinam pini 'twa/ mo 'peni miinthus kun miina a'di ka daran du mo.

Dhali dhalku/ ki dhal uni bway mo mmota tapa apo/ aha/ mo.

Dhali yan'ko'd aha/ mina di ki dar gi mii 'ba/ mo

dhali di ka po/ 'pena dhan gwon dhanj mo.

¹⁴ Dhalki gwo gi 'twam pem dhali gwo kun kulum aha/ eya du mo

mishu bu'th mo e jis/em pini mo,

ayy Tapa jin ta wosh pem mo dhali amanwan aha/ 'ba/ mo.

20

Eya manyuk gway mo. Gway ma Dawuu'd.

¹ Tapa midi thok /e 'twa/ mo ka tee jin toju /e bwa mo.

Dhali gway ma Arungimis ma Yakuub mo tani a'di midi cesh /e ka po/ mo.

² Dhalki a'di hashki /e mowoth 'peni mo jin kogu mo

dhali ci /e mo ma thip 'pena Sihyuun mo.

³ Dhalki a'di ka'da ris tom pini kun cina /e ki me'd e mo mmo'cith 'kus mo,

dhali kar /e ki mo ma 'the mo gom to kun 'cithkina /e 'kus mo mmomiiya bas mo.

Doshi ma dhali 'cunycuri yan mo.

⁴ Dhalki a'di ci /e a'di jin gwon ma dum pini mo

dhali thima ris tom pini kun thosonkina /e is mo.

⁵ Dhalki aman wola cuuwa/ mo gom bwanj 'kunya/ apo/ mom pini jin pina /e mii e mo

dhali ki gway ma Arungimis bana mo tani dhalki ana thuma berek bana mo.

Dhalki Tapa a'di thimi'da ris mo ma 'thom pini mo.

⁶ Dhali aha/ misha ki Tapa a'di midi woth jim piti jin 'koshkunu ki monyca mo.

A'di midi thok a'di 'twa/ mo 'peni momis piti jin kogu mo

ki dhan mo ma dem dem jin pinu mii e mo ki me'da bim poros piti mo be.

⁷ Kun tiya dhu 'ba/ ki ca mo goma risa arabiiya kun dira shumarum mo, dhali goma ris shumarum mo.

Hili ana dhuna 'ba/ ki ca gom gway gi Tapa Arungimis bana mo.

⁸ Uni mini 'tuk mo dhali ta'k mo

hili ana mina cu mis mo dhali dosh ki bimbir mo.

⁹ Ciyi mo jin pinu mii e ka malik mo, ayy Tapa,

thoki aman 'twa/ mo ma ki aman yukkina yuk mo.

21

Eya manyuk gway mo. Gway ma Dawuu'd.

¹ E mom'bi'th is pini mo tani amalik a'di 'kunyina bwa mo, ayy Tapa, dhali e mowoth pini mo tani adhan momanj mmoyuk gway wa'd e a'diya!

² /E ciki a'di to jin gwon ma dum piti mo,

dhali /e diki non to jin 'theka a'di gwo ki 'twam piti mo.

Doshi ma dhali 'cunycuri yan mo.

³ Haali /e gamki a'di 'kup ki mom'bor miim 'barga/ mo,

dhali /e ki kar a'di ton'kup ki 'dolkon gana/ jin tashu e ki o'd i'kupi a'di mo.

⁴ A'di dotki mondiki/e 'peni /e mo tani dhali /e ciki a'di a'di mo, a'di jin ta'da luç ma tee gom ki sule/ dhali ki sule/ mo.

⁵ Monycam piti caaca gom mowoth pini mo, dhali mo ma ra/ ra/ mo dhali mo/ek mo tani karkina /e apo/ a'di mo be.

⁶ Nye, /e karki a'di mmota a'di jin midi 'bora 'bor mii ki sule/ mo dhali /e ki kar a'di mmota aman'bor bwa mo ki mon'kuny bwa gi buj'kus pini mo.

⁷ Haala malik gamki gwo is e Tapa mo dhali e montel sho'k gi mo/en gi a'di jin Caa e ki Ca mo tani a'di midi diki joc sho'k mo.

⁸ Me'd pini a'di midi gama ris unim pini 'baar kun ta 'kup ki /e mo. Me'da bim poros pini midi gam uni gwansan gun shi/ki /e i e mo.

⁹ /E mini dhu uni mmota 'cepesa 'cepes me'd to kun cesuwa gwata/ mo ki /e mini pi is ka pije/ mo.

Tapa a'di midi los uni ki 'kolo'c ka nyor piti mo, dhali o'd midi shwa uni ki 'ci'd'da/ mo.

¹⁰ /E mini 'ce'da 'pereny buni sho'k 'peni mony'cesh mo dhali ucim buni 'peni bwaman iya/ gi 'kwani mo.

¹¹ Wakki/ uni thoson tonthus apo/ /e mo, dhali wakki/ uni mini mum tonthus mmota pibi icine/ mo tani uni mini mol a'di pi 'ba/ ka pije/ mo.

¹² Haali/ /e mini dhu uni mmoso mo. Haali/ /e mini tur uni jis/em buni ka bwam pini mo.

¹³ Dhalki /e karu ki ca mo, ayy Tapa, e mom'bi'th is pini mo. Aman mina yuk gway mo dhali man' mom'bi'th pini mo be.

22

Eya manyuk gway mo, isi ki mii ma buyymo mo jin kala e kush mo. Gway ma Dawuu'd.

¹ Arumgimis pem, Arumgimis pem, atinta idhalkina /e aha/ 'pen kan mo? Dhali ki ton ta'da ta isi'da/ /e ki si'd 'peni mowoth aha/ kan mo? 'peni gwo gi kom pem jin ohonkika/ mo?

² Ayy Arumgimis pem aha/ gwokina montee ka yempa/ mo, dhali hili /e diki thok aha/ 'twa/ mo.

Dhali mon'thiny si'da/ aha/ gwokina mo, dhali hili mosi/isa kamu/ gamkaa/?

³ Naskin mo tani /e dheleladhelel mo, /e karuwa kursin tapa jin ta moman gi 'Kwani ma Israyiil mo.

⁴ E /e mo tani ibaba gamki gwo is mo. Uni gamki gwo is mo, dhali /e 'cukki uni mo.

⁵ E /e mo tani uni gwokin mo dhali 'kokunu mo mmota is ki me'd mo. E /e mo tani uni gamki gwo is mo, dhali uni 'konuki this dhu mo.

⁶ Hili aha/ tana yiish mo, dhali aha/ tana wathi/ yisa, haali/ aha/ cinu gurra/ ki 'kwani mo, dhali jin wakkuuni ki 'kwani mo.

⁷ Aris uni gwansan gun parki aha/ e mo tani uni miiki aha/ ka mak mo, uni thuny aha/ 'twa/ i is mo, dhali uni pirki 'kup buni mo be.

⁸ A'di ciki miim piti jin raka'd e Tapa mo. Dhalki a'di 'cuk a'di mo. Dhalki a'di 'cwam a'di mo, haali/ a'di 'kunya bwa e a'di mo.

⁹ Hili /e ta a'di jin bu'thki aha/ 'peni bwa ma dho'th ma ta'da mo.

Dhali /e karki aha/ ki 'dantar mo abora ko ma ta'dam pem mo.

10 Apo/ /e mo tani aha/ bitkunu 'peni mondho'th pem mo,
dhali me'd jin kal ma ta'dam pem aha/ e bwa mo tani /e tana Arumgimis pem
mo be.

11 Dhalku/ ki si'd 'peni aha/ kan mo ma,
haali/ mont'o'c bwa uni 'disha'dish mo
dhali wathin kamu/ piyi'd mmowotha woth mo be.

12 Aris gwachim bip uni 'kamki aha/ mo,
gwathim bip gun 'bitha'bi'th 'peni Pam Bashan mo tani uni 'kamki aha/ mo.

13 Uni ceeki aha/ 'twam buni i is mo
mmowa e ka dhop kun pithilki to ki she/ mo dhali ko mo.

14 Aha/ wana 'baar mo me'd yi'de/
dhala risa simam pemi 'baar rakkin mo 'peni gwocor mo.
Adum pem ta walmish ki walmish mo,
a'di to'do'd mo eya bor pem mo.

15 Mom'bi'th pem a'di ku'thki'd me'da 'pish mo,
dhala le'd pem a'di 'dapki'd e bwan ka'dkim pem mo.
/E 'thiki aha/ 'ko'd e bu'da 'cesh ki mowu mo.

16 Nye, arisa 'ka uni 'kamki aha/ mo.
Iman'jali 'pen kun mii tonthus mo tani uni hamki aha/ mo.
Uni su'kki me'd pem dhali sho'k pem mo.

17 Aha/ misha denja risa simam pem e mo -
Uni hilki aha/ ka 'thime/ mmoko'c e i is mo dhali pe'th ki kuss kuss apo/ aha/
mo.

18 Uni pwakki burrinyem pem bwa mo e bwaman is buni mo,
dhali gom burrinyem bwaman pem mo tani uni bitki to gom aha/ mo.

19 Hili /e, ayy Tapa, dhalku/ ki si'd mo ma.
Ayy /e jin ta mowoth pem mo, huru/ ki jahanne/ gom mowoth pem mo.

20 Cuka kashiram pem 'pena ris gandal gun kaaka mo ma,
dhali mondiki/em pem 'peni mom'bi'th ma 'ka mo.

21 Tayi aha/ is ki me'd 'peni 'twa/ ma dhop mo ma,
akashiram pem wa'thkunu i e ki ce ma morbip gun shwana nyor ka nyor mo.

22 Aha/ mina tor gway pini e iwak pem mo.
E bwaman ma dhana tul 'kup 'kwani mo tani aha/ mina man /e mo be.

23 Um gun ko/ki Tapa mo tani manja a'di mo ma,
aris um gun ta iya/ ma Yakuub mo tani kari a'di ki ca mo ma,
dhali doshi ki monko/ is gom a'di mo, aris um gun ta iya/ ma Israyiil mo.

24 Haali/ a'di diki waka wak mo dhali shi/a shi/ i e mo
gom mont'o'c bwa jin toci wathi/ bwa mo.
Dhali a'di diki bag jis/em piti 'peni wathi/ mo,
hili a'di cikki ko mo me'd jin gwokina wathi/ 'twa/ i a'di mo.

25 'Peni /e mo tani a'di pu'dkina mom pem jin manka/ /e eya dhana tul 'kup
ki 'kwani mo,
aris gwom pem kun oka/ is mo tani aha/ mina ci uni ibwambori uni gwansan
kun ko/ki a'di mo.

26 Wathi/ jin to'ckunu bwa mo tani a'di midi shwa tonte/ mo tani dhali minu
kap mo,

Dhali uni gwansan kun simmki a'di e mo tani uni mini man Tapa mo.
Dhalka dum bum 'kon ki sule/ sule/ ya ye 'ba/ mo.

27 Aris uni kun 'kokin isi 'pemen gi mony'ceshi 'baar mo tani uni a'di imini
ka a'di e mo

dhali tu'k e Tapa mo,

dhala risa waḵ gi kal gi 'kwaniny'cesh mini luḵ ibwambori a'di mo.

²⁸ Haali/ mo jin tanu tapa a'di cila Tapa mo,

dhali a'di ki jiya ris kal gi 'kwaniny'cesh mo.

²⁹ Nye, e a'di aris 'kwani kun dhu 'ba/ ki ca e mony'cesh mo tani mini dhu shush ka luḵgu'b mo.

Ibwambori a'di mo tani uni mini luḵ mo, uni gun mini ii ka 'cesh mmowa e ki bu'da 'cesh mo,

dhali a'di jin mol is piti kar ki e mo.

³⁰ Aris uni gun mini iyyu/ i'ko'd mo tani uni a'di imini mii a'di to mo.

Dhali 'kwani mini tor gwo gom Tapa goma nyaḵum yil gi uci gun mini pu'du/ i'ko'd mo.

³¹ dhali bah gwo gom mony'cuḵ piti mo gom uni gun 'konuki dho'th naskina/ mo,

ki a'di a'di iwagaski a'di mo.

23

Gway ma Dawuu'd.

¹ Tapa a'di ta'da Manhil aha/ mo.

Aha/ mina diki har to mo.

² A'di karki aha/ mmo/ish 'ko'da shon dhii/i'd mo.

A'di suski aha/ e shemen yi'de/ jin doshki'd mo.

³ A'di warki aha/ aḵashiram pem is mo.

A'di suski aha/ e bway mii ma ḵar/e mo

gom gway gi gway piti mo.

⁴ Ba isi waḵki/ aha/ mina ya e embul wosh ma la gi mowu mo tani

aha/ yisa mina ko/ tonthus yisa,

haali/ /e nyaḵki di ki aha/ mo.

Ajappam pini dhali cwam pini uni malaski aha/ mo be.

⁵ /E thosonki tonte/ ibwambori aha/ mo

e bur'kus ma ris uni gun ta 'kup ki aha/ mo.

/E 'koshki aha/ 'kup pem ka yin mo.

Aḵubbaayam pem a'di 'tu'dki'd iwol 'kupa sho mo.

⁶ Ka jin gana/ miim 'boron dhali momiimii mo tani uni mini baḥ aha/ nsho'k mo

ka teem pemi 'baar mo jin dika/ ki e mo,

dhali aha/ mina ca'b e gu'b gi Tapa ki sule/ ya ye 'ba/ mo.

24

Gway ma Dawuu'd.

¹ Mony'cesh a'di ta jin Tapa mo dhali mon'tu'd piti mo,

mony'cesh dhali uni gwansan gun 'koni bwaman a'di mo.

² Haali/ a'di nyanḵi a'diya powa ris kumma/ yi'de/ mo

dhali tel a'di sho'k mo apowa ris yi'de/ kun son mo.

³ Kaja a'di imidi shin 'kuwosh gi Tapa mo?

Dhali kaja a'di imidi doshi mom piti jin ḵogu mo?

⁴ A'di ta a'di jin mina me'di dheleladhelel mo dhali adu jin dheleladhelel mo,

a'di jin diki 'deka ḵashiram piti 'kup ki gwo jin 'ce'du/ 'te/ ka tor mo

dhali jin diki thul gwo me'da po/ ka he'k e mo.

⁵ A'di midu bu'th mom'bor mii 'peni Tapa mo,

dhali mo gi yeyunum piti 'peni Arumgimis gi bway gi mowoth piti mo.

⁶ Me'd uni ma nyakum yil gwansan kun simmki a'di e mo,
uni gun simmki jis/e ma Arumgimis ma Yakuub e mo.

Doshi ma dhali 'cunycuri yan mo.

⁷ 'Deki 'kup bum ki mis mo ma, ayy aris 'twaṅkala goṅ mo,
dhali um minu 'de'k mo, ayy arisa campur kun tana dhamo/ mo,
jin min ma Malik gi monyca yayu/ bway bwaman mo.

⁸ Kaja a'di ita'da Malik gi monyca mo?

Tapa a'di jin ta gi mom'bi'th mo dhali mo ma dem dem mo.

Tapa a'di jin ta gi mo ma dem dem e mo ma mee mo.

⁹ 'Deki 'kup bum ki mis mo ma, ayy aris 'twaṅkala goṅ mo
dhali um minu 'de'k mo, ayy arisa campur kun tana dhamo/ mo,
jin min ma Malik gi monyca yayu/ bway bwaman mo.

¹⁰ Kaja a'di yansan ita'da Malik gi monyca mo?

Tapa gi momis mo,

a'di ita'da Malik gi monyca mo be.

Doshi ma dhali 'cunycuri yan mo.

25

Gway ma Dawuu'd.

¹ E/e mo tani ayy Tapa, aha/'de'kkina kashiram pem mo.

² Ayy Arumgimis pem e/e mo tani aha/ gamkina gwo is mo.

Dhalku/ ki dhal aha/ ki aha/ minu kar ki mo ma 'the is mo.

Dhalku/ ki dhal ris uni kun ta 'kup ki aha/ mmoyuk gway ki mon'kuny bwa
apo/ aha/ mo.

³ Nye, dhalki jan tal 'de/ jin cor /e ki kar ki mo ma 'the is mo ma.

Dhalki uni dhunu ki mo ma 'the is mo, uni gwansan gun 'dapa e ki mii ma
'bar 'bar mo.

⁴ Kari aha/ mmomish bway pini mo ma, ayy Tapa.

Tori /e aha/ bway tur pini mo.

⁵ Shuyi aha/ bway e gwoṅ ganam pini mo, dhali tori aha/ gwo mo,

haali/ /e tana Arumgimis gi bway gi mowoth pem mo,

haali/ aha/ corkina /e ka tee 'baar mo isa yempa/ mo.

⁶ Kayi momiimiim pini e mo, ayy Tapa, dhali mo/en pini jin telu sho'k mo,

haali/ uni 'kokin 'peni kadhamo/ mo.

⁷ Dhalku/ ki ka miinthus pem e kun miiga/ ki aha/ tana dhuru'c mo, walla ris
gwon dhaṅ pem mo,

isi ki gwo ki mo/en pini jin telu sho'k mo tani kayi aha/ e mo,

gom gway gi miim 'borgam pini mo, ayy Tapa.

⁸ Tapa a'di 'boro'd dhali ta jan kar/e mo.

Dhali gom gwo gi wakan mo tani a'di ki ye'th imanmii miinthus sho'k e bway
'boro'd mo.

⁹ A'di ki shuwa shu/um bway gom uni gun dhu is ki gwa'd e a'di jin 'boro'd
mo,

dhali tor imandhu is ki gwa'd bway piti mo.

¹⁰ Aris bway tur gi Tapa mo tani uni telu sho'k e mo/en mo dhala ris mii ma
isin gana/ mo,

gom uni gwansan gun dhu gwom piti kun gamu me'd mo dhali gwonycim
piti gun cina a'di mo.

¹¹ Gom gway gi gway pini mo tani ayy Tapa,

dhalki miim pem jin dika/ i'ba/ 'pen mo ma, haali/ a'di caaca mo.

¹² Ki wathi/ ja iko/ki Tapa mo?

A'di imina a'di ye'th sho'k mo i bway jin mina a'di ikwany mo.

¹³ A'di ki is piti midi ca'b e mo jin isha to ka enthus mo, dhali ucim piti mini gam mal gi mony'cesh mo be.

¹⁴ Mo jin nyaḡu to mii ki Tapa mo tani a'di gom uni gwansan gun ko/ki a'di mo,

dhali a'di tor'ki'd eya tente/ e uni gwom piti jin gamu me'd mo.

¹⁵ Em pem isa yempa/ cu'thki 'kupki Tapa mo, haali/ a'di midi buk sho'k pem 'pena gume/ mo.

¹⁶ Tuki /e e aha/ mo dhali miiyi mii ma 'the e aha/ mo,

haali/ aha/ dina aha/ 'de/ dhali tocu bwa mo.

¹⁷ 'Cuki aha/ 'peni mo ma to'c bwa ma dum pem mo ma, dhali susi aha/ ka pije/ 'peni mo ma cis pem mo.

¹⁸ Hili isi gwo e gom monto'c bwam pem mo dhali gom mo ma du mur pem mo,

dhali gwami aha/ 'pena ris miinthus pemi 'baar mo.

¹⁹ Hili isi gwo e ma haali/ 'kup pem ḡala/ wana risa!

Dhali ki mombujur jin shinuwa shi/i e mo tani uni shi/ki aha/ i e mo be.

²⁰ Ayy jiyi mondiki/em pem mo dhali 'cuki aha/ mo.

Dhalku/ ki dhal aha/ bway ki aha/ minu kar ki mo ma 'the is mo, haali/ aha/ budha mo jin hurga/ jwa e /e mo.

²¹ Dhalki mii jin miinu ki dar gi ḡadhūm dhali miinḡar/ e uni 'tash aha/ 'twa/ mo,

haali/ aha/ cor'kina cor gom /e mo.

²² Wani 'Kwani ma Israyiil 'ba/ mo ma, ayy Arumgimis, 'pena ris monto'c bwam buni mo.

26

Gway ma Dawuu'd.

¹ Yeyi aha/ mo ma, ayy Tapa,

haali/ aha/ yana e yam pem ki ya jin dar gi ḡadhūm mo, dhali aha/ gamkina gwo is e Tapa ki dar gi bwa jin shinu 'kup mo.

² Nyo/i aha/ mo ma, ayy Tapa dhali pali aha/ mo.

'Cunycuri adum pem mo dhali bwam pem mo.

³ Haali/ mo/en pini iteli sho'k ibwambori em pem mo.

Dhali aha/ yana e ya ma isinḡ gana/ e/e mo.

⁴ Aha/ dinaki nyaḡ ca'b ki 'kwani kun ta iman'tor gwonthus mo, walla aha/ dinaki ce e ki 'kwani kun kal mii ka bor mo.

⁵ Aha/ shi/a mo jin cenu e ki iman'mii tonthusi e mo, dhali aha/ mina diki nyaḡ ca'b ki a'di jin ta thus ki thus mo.

⁶ Aha/ mina 'thur me'd pem mo gom aha/ dina ka po/ mo,

dhali ya mo e mo ma gwaṡam pini jin 'ciṡu/ to 'kus mo, ayy Tapa,

⁷ mmoyukḡ gway ki 'kall 'kall mo, gway jin 'boruwa 'bor bwa i is mo, dhali mmoṡora ris miiny jarom pini kun miina /e mo.

⁸ Ayy Tapa, aha/ ena mo kun 'konu e gu'b pini mo,

dhali e mo jin dina monycam pini mo.

⁹ Dhalku/ ki tor aha/ sho'k ka pupush nyaḡki iman'mii miinthus mo,

walla mondiki/ em pem nyaḡki 'kwani kun 'kosha te/ ma nyor mmowol 'kwani abasa 'cesh mo,

- 10 'kwani uni gun nyo/a me'd ki nyo/ gom tonthus kun pishinkina uni ki mii mo
 dhali me'da bim poros buni uni 'tu'dkunu ki mowan 'kwani is mo.
 11 Hili gom aha/ mo tani aha/ yana ki yam pem ki ya jin dar ki njadhum mo.
 Wani aha/ 'ba/ mo dhali miyi mii ma 'the e aha/ mo.
 12 Sho'k pem doshki'd e mo ma 'cesh jin ba'da/ ba'd mo.
 Eya dhana buhany 'kwani mo tani aha/ mina 'bor Tapa mii mo be.

27

Gway ma Dawuu'd.

- 1 Tapa a'di ta moṅkush pem mo dhali bway gi mowoth pem mo,
 kaja a'di imiga/ ko/ mo?
 Tapa a'di ta'da cur jin telu gwo sho'k mo gom mondiki/em pem mo,
 dhali kaja a'di imiga/ ko/ is mo?
 2 Ki imanmii tonthus tikki aha/ e mo tani
 uni thu'thkina thu'th 'pen kagahara apo/ aha/ mo,
 uni gun ta 'kup ki aha/ mo dhali kun 'kwarkina 'kwar ka gwapi/ mo tani
 uni mini kal 'bar mo dhali ta'k mo be.
 3 Ba aris uni kun 'kamkina 'kam apo/ aha/ mo tani
 adum pem yisa ko/ is yisa.
 Ba ki mo ma mee cuu'da po/ aha/ mo tani
 hili aha/ mina wu is ka 'cesh mo.
 4 Ton tal 'de/ dotkika/ 'peni Tapa mo,
 a'di jin miga/ simm e mo mmobathi 'ko'd mo,
 ki aha/ mina ca'b e gu'b gi Tapa mo
 ka risa cim pemi 'baar mo ki mondiki/em pem mo,
 mmohil monyjaru/ gi Tapa mo,
 dhali mmohil isi gwo i e mo gom gu'b gi mondheleladhelel piti mo be.
 5 Haali/ a'di midi bag aha/ eya darha'dam piti mo
 ka tee jin tocu aha/ bwa mo.
 A'di midi bag aha/ e bwan'kwariny gi gu'b burrinyem piti mo.
 Dhali a'di midi kar aha/ i'kuwosh jin turatur mo.
 6 Dhali shwane/ 'kup pem minu 'de'k ki mis mo apowa ris uni gun ta 'kup ki
 aha/ mo kun 'kamki aha/ is mo be.
 Dhali aha/ mina ci to jin 'cithu/ 'kus mmomiya bas e gu'b burrinyem piti mo
 ki cuuwa/ gi moṅ'kuny bwa mo.
 Dhali aha/ mina yuk gway mo dhali mii ko gom Tapa mo.
 7 Ciki ko mo ma, ayy Tapa, ki aha/ 'thera cuuwa/ kagahara mo.
 Miyyi mii ka 'the gom aha/ mo dhali thoki aha/ 'twa/ mo.
 8/E oki gwo mo ki: Simmi um bwam/em pem e mo.
 Adum pem o gwo gom /e mo ki:
 Bwam/em pini Tapa, a'di isimmkika/ e mo be.
 9 Dhalku/ ki bag bwam/em pini 'peni aha/ mo.
 Dhalku/ ki tu'k cin'kinam pini jin mii /e to ka nyor mo,
 /e jin tana manwoth pem 'thissa/ mo.
 Dhalku/ ki bit aha/ asho mo, dhali dhalku/ ki dhal aha/ 'pen mo,
 ayy Arungimis gi mowoth pem mo.
 10 Haala babam pem dhali ata'dam pem uni dhalki aha/ 'pen mo,
 hili Tapa a'di imidi hil aha/ i e mo.
 11 Tori aha/ bway pini mo ma, ayy Tapa,

dhali susi aha/ e bway tur jin ba'da/ ba'd mo
haali/ goma ris uni kun ta 'kup ki aha/ mo.

¹² Dhalku/ ki ci aha/ ki bwa gi uni kun ta 'kup ki aha/ mo,
goma ris iman/o gwonthus cukina po/ aha/ mo
dhali uni wukina shure/ gom mombujur mo.

¹³ Aha/ gama gwo is ki aha/ mina par miim 'boro'd gi Tapa e mo
e mo jin 'kona 'kwani ki e mo.

¹⁴ Cori Tapa mo ma,
dhali 'bithi is mo dhali dhalka dum pini bu'th mo jin rocu sho'k mo.
Nye, cori Tapa mo ma.

28

Gway ma Dawuu'd.

¹ E/e mo tani, ayy Tapa, aha/ yukkina /e mo.

/E jin ta wosh pem mo, dhalku/ ki ta a'diye/ gom aha/ mo,
isi ciki/ wakki/ /e mini 'taki ca'b ki shwamm gom aha/ mo tani
aha/ mina e waki uni gwanan gun iin ka lungu'b e jisa 'kulga/ mo.

² Ciki 'twam pem jin oka/ gwo gom mo ma di'b is pem jin di'bka/ mo ma,
me'd jin gwoka/ 'twa/ i/e gom mowoth mo,
me'd jin 'de'kkika/ me'd pem ki mis mo
'kup ki mom pini jin miinu to jin kogu mo jin bol tiya e mo.

³ Dhalku/ ki nu'th aha/ 'ban nyakki imanmii tonthus mo,
nyakki uni gwanan kun ta imanmii to kun ta thus ki thus mo,
uni gun torkina tor gom monku'th is nyakki imannyak 'kom buni mo,
ki mo ma pibi 'kokin eya dum buni mo.

⁴ Raki uni to ibway isi ki tom buni kun miina uni mo,
dhali isi ki tonthus buni kun miikina uni mo.
Raki uni to ibway isi ki miin to kun miina uni ki me'd buni mo.
Gar ki uni to 'kusi 'twa/ kun mina uni gam mo.

⁵ Haali/ uni 'koki dhu miin to gi Tapa mo,
walla miin to ki me'd piti mo.

A'di midu 'ce'd uni ka 'cesh mo dhali midu diki nyanj uni ki mis dok/e mo.

⁶ Mom'bor mii midu di gom Tapa mo!
Haali/ a'di cikki 'twam pem goma di'b is jin di'bkika/ is mo.

⁷ Tapa a'di ita mom'bi'th pem mo dhali agongorom pem mo.

E a'di mo tani adum pem gamki gwo is mo be.
Wakan aha/ wothkunu mo dhali adum pem midu ya i mis mo,
dhali ki gway pem jin miga/ yuk mo tani aha/ mina ci a'di mo jin 'boruwa 'bor
bwa i is mo.

⁸ Tapa a'di ita mom'bi'th gom 'kwanim piti mo.

A'di ta mo jin huru jwa jin tanu is ki me'd mo gom a'dim piti jin 'koshu ki
monyca mo.

⁹ Ayy tayi 'kwanim pini is ki me'd mo ma, dhali 'bori mal pini mii mo.
Tayi/e Amanhil uni mo dhali kali uni ki sule/ sule/ mo.

29

Gway ma Dawuu'd.

¹ Ciyi Tapa monyca mo, ayy um gun 'koni momis mo,
Ciyi Tapa monyca mo dhali mom'bi'th mo.

² Ciyi Tapa monyca ki gway piti mo
dhali luji Tapa e monyjarom piti jin kogu mo.

- 3 'Twa/ gi Tapa a'di diki'da powa ris yi'de/ mo.
 Dhali Arungimis ki monyca a'di ta 'twan tor ma sho'k mo,
 Tapa jin di'da powa ris yi'de/ 'baar mo.
- 4 'Twa/ gi Tapa a'di ta gi mom'bi'th caaca mo,
 dhali 'twa/ gi Tapa a'di 'tu'dkunu mo ki mo/ek mo.
- 5 'Twa/ gi Tapa a'di 'ce'dki cwa kun wana e ka bwanyayiis bwa mo,
 Tapa a'di 'ce'dki cwa kun wana e ka bwanyayiis bwa mo kun ta cwa gi Pan
 Lubnaan bwa mo.
- 6 A'di ki kar cwa yan e Pan Lubnaan mmopeya njalbothon mo me'd ari bip mo,
 dhali 'Kuwoosh Siryuun me'd dhuru'c ari morbip mo jin shwa'da nyor ka nyor
 mo.
- 7 'Twa/ gi Tapa a'di dhi'thki mo ka le'dan o'd ki 'bala'c 'bala'c mo.
- 8 'Twa/ gi Tapa a'di yikinki mombwaasho is mo,
 Tapa a'di yikinki mombwaasho is ki Pan Kaadish mo.
- 9 'Twa/ gi Tapa a'di ki dhu abuyymo mmodho'th ushan mo
 dhali mmo'cwar 'cemen gi bwanycwa mo.
 Dhali e gu'b gi mondheleladhelel piti mo tani aris 'kwani 'baar mo cuun ki:
 Monyca mo.
- 10 Tapa a'di ca'bki'da powa kursi apowa gannu/ yi'de/ mo,
 Tapa a'di ca'bki'da powa kursi ma malik ki sule/ sule/ mo.
- 11 Dhalki Tapa ci mom'bi'th piti ki 'kwanim piti mo.
 Dhalki Tapa 'bor 'kwanim piti mii ki mon'ku'th is mo.

30

Gway ma Dawuu'd. Gway jin yuku mmo'ci gu'b gi mondheleladhelel ka Arungimis mo.

- 1 Aha/ mina kar /e ki ca mo, ayy Tapa, haali/ /e 'de'kki aha/ ki mis mo,
 dhali /e diki dhal uni gwansan bway mo kun ta 'kup ki aha/ mo mmo'kuny
 bwa apo/ aha/ mo.
- 2 Ayy Tapa Arungimis pem, aha/ gwona 'twa/ e /e gom mowoth mo,
 dhali /e wa'cki aha/ mo be.
- 3 Ayy Tapa, /e 'cwamkina akashiram pem 'pena Haawiya mo,
 dhali war aha/ mondiki/em pem is mo 'peni bwaman uni gwansan kun iikin
 ka lun'gu'b e jisa 'kulga/ mo.
- 4 Yuki gway mmomar Tapa mo, ayy um piti kun dhunu ki she/ ki dhelel
 dhelel mo,
 dhali ciyi a'borim bwa i is gom gway piti jin kogu mo,
- 5 Haali/ anyor piti di'd mo hili jasi gom ari mo mo,
 dhali mii ma 'them piti a'di di'd ki sule/ sule/ mo.
 Ko jin gwonu a'di midi di gom mon'thiny mo tani
 hili mon'kuny bwa a'di pu'dki'd mon'thamo/ mo be.
- 6 Haali/ me'd aha/ mo tani aha/ ona gwo e mom pem jin isha to ka entus mo
 ki:
 Aha/ minu 'koki jo'c ki sule/ mo.
- 7 Ki mii ma 'them pini mo, ayy Tapa,
 /e telki aha/ sho'k mo me'd 'kuwosha turga/ jin 'bitha'bi'th mo.
 /E bagki jis/em pini mo tani dhali aha/ merkina mo.
- 8 E /e mo tani ayy Tapa, aha/ gwokina mo
 dhali e Tapa mo tani aha/ karkina mo jin di'buwa di'b is mo.
- 9 To wakata midi 'dap e mowum pem mo

wakki/ aha/ yana ka 'cesh e jisa 'kulga/ mo?
 A/dhali mina bu'da 'ceshi maɗ/eya?
 A/dhali mina a'di itor mom pini jin tana /e a/isir/ gana/ mowa?

¹⁰ Ciki gwo mo ma, ayy Tapa, dhali miiyi mii ma 'the gom aha/ mo.
 Ayy Tapa, wari /e ka manwoth aha/ mo ma.

¹¹ /E tu'kki monkom pem ki mo jin peka/ imis mo.
 Dhali /e 'cu'kki aha/ burrinyen shawaal mo
 dhali 'kam aha/ ki mon'kuny bwa mo,

¹² ka kashiram pem mido maɗ /e mo dhali diki di ki shwamm mo.
 Ayy Tapa Arumgimis pem mo, aha/ mina ci /e mo jin 'boruwa 'bor bwa i is ki
 sule/ sule/ mo.

31

Eya manyuk gway mo. Gway ma Dawuu'd.

¹ E /e mo tani ayy Tapa, aha/ simmkina mom pem jin huru jwa e mo.
 Dhalku/ ki dhal aha/ bway ki aha/ minu kar ki mo ma 'the is mo.
 E mo ma kar/em pini mo tani 'cu'ki aha/ mo.

² Kari 'cem pini gom aha/ mo ma.
 'Cwami aha/ ki 'ta'b mo.

Wari /e ki wosh jin miga/ hur jwa mo,
 dhali mmota acur jin 'bitha'bi'th jin mido ta aha/ is ki me'd mo.

³ Nye, /e ta wosh pem mo dhali acur pem mo,
 gom gway gi gway pini mo tani susi aha/ mo ma dhali shuyi aha/ bway mo.

⁴ Susi aha/ ka piye/ 'pena gume/ jin bagkunu gom aha/ mo,
 haali/ /e ta jim pem jin hurga/ jwa mo.

⁵ E me'd pini mo tani aha/ cikina shi/in pem mo.
 /E wanki aha/ 'ba/ mo, ayy Tapa, Arumgimis jin ta isin/ gana/ mo.

⁶ /E shi/ki uni gwansan i e mo uni gun cina hirdhe/ ki pe'th ki tompinycon
 kun lunu mo.

Bahili aha/ gamkina gwo is e Tapa mo.

⁷ Aha/ mina bwa 'kuny mo dhali 'bor mo gom mo/en pini jin telu sho'k mo,
 haali/ /e hilki mom pem jin tocu aha/ bwa mo,
 dhali /e yipki 'kup mo goma ris uni kun ta 'kup gi aha/ mo,

⁸ dhali /e diki ci aha/ e me'd gi uni kun ta 'kup gi aha/ mo.
 /E dhuki sho'k pem e mo ma 'cesh jin beeyabee mo.

⁹ Miiyi mii ma 'the gom aha/ mo, ayy Tapa, haali/ aha/ dina e mo ma cis mo.
 Em pem shi/ki is mo gom jwakat jin jwakatki'd mo,
 eya kashiram pem mo dhali bungwar is pem si'da/ mo.

¹⁰ Haali/ mondiki/em pem 'baaru mo jasi ki mondit bwa mo,
 dhali yil pem ki jasi mowuwa shure/ mo.

Mom'bi'th pem ushki me'd mo gom mondim pem jin 'bushura/ 'bushur mo,
 dhala simam bungwar is pem tana 'kala/ 'kala/ mo.

¹¹ Aha/ tana jin thunyu/ 'twa/ i is ka ris uni kun ta 'kup ki aha/ mo,
 dhali aha/ shi/u i e ki uni gun nyak 'ko ki aha/ mo,
 dhali aha/ tana to jin guna uni ki e mo ki monko/ is mo, unim pem kun mishi
 aha/ mo,

dhali uni gwansan kun parki aha/ e mo e bway tur mo tani uni 'cu'kki aha/ i
 'kup mo.

¹² Aha/ nakunu me'd jan 'de/ jin wuki'd mo.

Dhali aha/ wakina e ki toj'kul bwa jin waki'd mo.

¹³ Nye, aha/ cikkina ris 'kwani 'baar mo shilki gwalish mo mmo'dowa njur njur 'twaŋkal kuku/ mo, me'd jin 'tuntulkina uni isi montal 'de/ apo/ aha/ mo, me'd jin wu'thkina uni awu'th mmobu'th mondiki/em pem mo.

¹⁴ Hili aha/ gamkina gwo is e /e mo, ayy Tapa. Aha/ ona gwo mo ki: /E tana Arungimis pem mo.

¹⁵ Mom pem uni 'kon e me'd pini mo.

'Cuki aha/ mo 'peni me'd ma ris uni gun ta 'kup ki aha/ mo dhali uni kun to'cki aha/ bwa mo.

¹⁶ Dhalki bwam/em pini a'di kushu mo mo e cinjinam pini mo. Tayi aha/ is ki me'd mo e mo/en pini jin telu sho'k mo.

¹⁷ Dhalku/ ki dhal aha/ mo mmodi ki mo ma 'the is mo, ayy Tapa mo, haali/ aha/ yukkina /e mo.

Dhalki uni kun mii tonthus idhukunu 'te/ ki mo ma 'the is mo dhali dhalki uni ii 'ce us kan e mo ma Haawiya mo.

¹⁸ Dhalka le'd kun tana tor tana 'diye/ mo,

uni oki gwo sor apo/ unin kar/ e mo

e mo jin dhuna uni 'ba/ ki ca mo dhali mo ma bujur mo.

¹⁹ Ayy mom'boro'd pini wa'di ish ka enthusa!

A'di jin karkina /e gom uni gwansan kun ko/ki /e mo

dhali wagas mo gom uni gwansan kun bu'thki mo jin huru jwa e /e mo, e jis/e gi iya/ gi 'kwani mo.

²⁰ Dhali buj'kus pini mo tani a'di ibagki uni mo

'pena risa wu'th gi 'kwani mo.

/E dhuki uni ki 'dantar e bwan'kwariny ma darha'dam pini mo 'pena risa le'd jin biruwa bir mo.

²¹ Mom'bor mii midi di gom Tapa mo,

haali/ a'di wa'di 'bora mmo'or mo/en piti jin telu sho'k e aha/ mo ki aha/ karu mo mmohem me'd 'penkuman bampa/ mo.

²² Aha/ okina gwo e mo ma ayy/ayy/ayy pem mo ki:

Aha/ borkunu ki 'bal 'bal itaga dhana/ mo 'peni jis/em pini mo.

Hili /e cikki mom pem jin di'bkika/ di'b is mo

ki aha/ gwokina 'twa/i /e gom mowoth mo.

²³ Eni Tapa mo, aris umi 'baar mo kun ta kum piti kun dhunu ki she/ ki dhelel dhelel mo.

Arungimis dhuki uni kun ta ku isin gana/ mo,

hili tom piti kun mina a'di irak 'kwani to ibway ishki'd ka enthus mo gom uni kun kalki mii mo mmo'thek 'ba/ imis mo.

²⁴ 'Bithi is mo dhali dhalka dum pini bu'th mo jin rocu sho'k mo,

aris umi 'baar mo kun corki Tapa mo.

32

Gway ma Dawuu'd. Gway jin yuku mo mmoyetha ye'th sho'k ki gwo mo.

¹ Mom'bor mii gom a'di jin gwamkunu gwon dhanj piti mo, a'di jin ta miinthus piti jin kumkunu 'kup mo.

² Mom'bor mii gom wathi/ jin dina Tapa ki yer is ki gway gom miinthusa kamu/ mo,

dhali e shi/in piti mo tani mo ma he'k e piyi'd mo.

3 Ki aha/ dinaki tor gwo miinthus pem mo tani bunḡwar is pem a'di mutti'di 'baar mo
e mo/ohon pem ka tee 'baar mo.

4 Haali/ montee dhali mon'thiny mo tani me'd pini diṭadit apo/ aha/ mo.
Mom'bi'th pem a'di ku'thki'd mo me'd mom'batha'd jin 'koshki to moyuran-
tee mo.

Doshi ma dhali 'cunycuri yan mo.

5 Aha/ nyithkina miinthus pem e /e mo
dhali aha/ dinaki bag miinthus pem mo.
Aha/ ona gwo mo ki: Aha/ mina pi gwon dhan pem ki Tapa mo.
Dhali yan'ko'd /e gwamki aha/ gom miinthus jin di aha/ i'ba/ mo.
Doshi ma dhali 'cunycuri yan mo.

6 Wakan dhalka ris 'kwani 'baar mo kun tana gayiin 'thon e /e mo.
Ka tee ma cis mo, dhali ka tente/ kun sona dhan yi'de/ mo tani uni mol a'di
gam mo.

7/E ta mombag gom aha/ mo
dhali /e 'tashki aha/ 'twa/ mo 'peni montoc bwa mo.
Dhali /e 'kamki aha/ ki mony'cuḡ mo.
Doshi ma dhali 'cunycuri yan mo.

8 Aha/ mina ye'th /e sho'k mo dhali tor /e bway jin mina /e iya mo be.
Aha/ mina logom /e ki gwo mo ki em pem jin midi di apo/ /e mo.
9 Dhalku/ ki wa e ki shumarum walla bagal kun mol 'twa/ wal mo,
uni kun minu 'kali'th is mo dhali 'kamu'th 'twa/ ka lijaam mo
isi ciki/ ki uni mini 'koki so 'peni /e mo.

10 To kun diṭ bwa gom 'kwani kun ta thus ki thus mo tani uni tana ris mo,
hili mo/en jin teli sho'k mo a'di 'kam a'di is mo a'di jin gamki gwo is e Tapa
mo.

11 'Bori bwa e Tapa mo dhali 'kunyi bwa mo ayy um 'kwani kun tana kar/e
mo,
dhali kumi cuuwa/ gom monj'kuny bwa mo, aris um kun dhelel ma du mo.

33

1 'Kunyi bwa mo ma e Tapa, ayy um 'kwani kun tana kar/e mo.
Maṅa maṅ jin 'dapa'd gom uni kun dhelel ma du mo.
2 Maṅi Tapa ka dhenḡdhenye/ jin buḡu/ mo,
dhali yuḡi gway gom a'di ka dhenḡdhenye/ jin 'kon ma shu/i 'kume'd mo.
3 Yuḡi gway gom a'di, gway jin ta jin this mo,
buḡa shu/ ki me'd jin ta gwocon mo, ki 'kus jin caaca mo.
4 Haali/ gwo gi Tapa mo tani uni ha me'd mo.
Dhali aris miim piti uni miikunu ki mii ma isinj gana/ mo.
5 A'di enki momii ma kar/e mo dhali mo jin miinu ki dar gi mo ma gwar 'de/
mo.
Mony'cesh a'di 'tu'du/ mo ki mo/en gi Tapa jin teli sho'k mo.
6 Ki gwo gi Tapa mo tani momis ukkunu mo
dhali aris to kun 'koni bwaman uni ki shi/in jin shi/ini'd 'peni 'twam piti mo.
7 A'di ki tula ris yi'de/ is mo dhali kumma/ yi'de/ mo me'd jin 'thuthu/ uni
ibwaman ma gasaas mo.
A'di ki dhu yi'deṅ 'kulga/ e mo kun dhunu to mo.
8 Dhalki aris 'kwani 'baar kun 'kon e mony'cesh ko/ Tapa mo.

Dhalki aris 'kwani 'baar kun 'kon e mony'cesh doshon ki monko/ is gom a'di mo.

⁹ Haali/ a'di torki gwo mo tani dhali a'di pu'dki'd kan mo.

Dhali a'di kanki gwo mo tani dhali gwo doshki'd mo.

¹⁰ Tapa ki kal gwo kun logoma kal gi 'kwaniny'cesh mo mmota gwo jin di bwa 'te/ mo.

A'di ki non mo jin thosona 'kwani 'kup 'twa/ mo.

¹¹ Gwo logom gi Tapa mo tani a'di doshki'd ki sule/ mo.

Gwoj kulum eya dum piti mo tani a'di diki'd ki sule/ goma risa nyakum yil gi 'kwani mo.

¹² Mom'bor mii gom kal gi 'kwani jin tan ma Arumgimis Tapa mo, 'kwani kun kwanykina a'di mo mmota mal piti mo.

¹³ Tapa hilki mo ka lungu'b 'peni momis mmopara ris iya/ gi 'kwaniny'cesh e mo.

¹⁴ 'Peni mo jin ca'bkina a'di eya kursi ma malik mo tani a'di ki hil mo mo apowa ris 'kwani gi mony'cesh mo.

¹⁵ A'di ta a'di jin akki'da dum buni e 'baar mo, dhali a'di ki hila ris miim buni kun miina uni mo.

¹⁶ Amalik a'di 'konuki ta is ki me'd ki dhan 'kwani ma meem piti mo.

Wathi/ gom mo ma mee mo tani a'di 'konuki 'cuk ki dhan mom'bi'th piti mo.

¹⁷ Shumarum gi mo ma mee mo tani a'di ta tom pe'th gi mo ma 'tej kape/ gi mo jin pinu mii e mo.

Dhali ki dhan mo ma 'bi'th ma dem dem piti mo tani a'di molu ta is ki me'd mo.

¹⁸ Hili mo mo ma, e gi Tapa a'di di'd apo/ uni gwansan kun ko/ki a'di mo, apo/ uni gwansan kun takin gi mo ma 'tej kape/ gi mo/en piti jin telkunu sho'k mo,

¹⁹ ki a'di midi 'cuka kashiram buni 'peni mowu mo, dhali dhu uni ki e mo e yil jin 'kosha te/ mo.

²⁰ Akashiram bana a'di corki Tapa mo.

A'di ta'da Manwoth gom ana mo dhali agongorom bana mo.

²¹ Nye, adum bana 'kunykina bwa mo e a'di mo haali/ ana gamkina gwo is e gway piti jin kogu mo.

²² Dhalki mo/en pini jin telu sho'k, ayy Tapa, di'd eya po/ aman mo, isi kani, me'd jin tana aman ka 'tej kape/ e/ e mo.

34

Gway ma Dawuu'd, ki a'di ki mii me'd wathi/ jin gus ma du mo ibwambor ma Abimaalik mo. Wakan a'di urki a'di ka pije/ mo dhali a'di ki 'kosh ya mo.

¹ Aha/ 'bora Tapa mii isa yempa/ mo.

Momaṅ midi di isa yempa/ e 'twam pem mo.

² Akashiram pem kar is ki ca e Tapa mo.

Dhalki uni gwansan kun 'koshu ki isa nyor cik a'di mo dhali 'bor bwa mo.

³ Ayy kari Tapa ki ca nyakki aha/ mo, dhali dhalki ana kara gway piti ki ca imontal 'de/ mo.

⁴ Aha/ ṅapkina Tapa mo dhali a'di thoṅki aha/ 'twa/ mo,

dhali 'cuk aha/ mo 'pena ris monko/ is pem mo.

⁵ Hili 'kup ki a'di mo dhali kushi mo mo wakan ki bwam/em bum mini 'koki 'ko ki mo ma 'the is mo.

⁶ Wathi/ ha'th'ko'd yan gwoki'd mo dhali Tapa cikki a'di mo

dhali ta a'di is ki me'd mo 'pena ris monto'c bwam piti mo.

7 Aman'doyu gwo gi Tapa 'kamki'da 'kam ka kul is gom uni gwansan kun ko/
ki a'di mo,
dhali 'cuk uni mo.

8 Ayy nyoki ma dhali par e ki Tapa 'boro'd mo.

Mom'bor bwa gom wathi/ jin bu'thki mo jin huru jwa e a'di mo.

9 Ayy koki Tapa mo um piti kun dhunu ki she/ ki dheel dheel mo,
haali/ uni gwansan kun ko/ki a'di mo tani 'kona ton tiya ki har mo.

10 Ushi dhuruca dhop uni hari to mo haali/ uni 'kosha te/ mo
hili uni gwansan kun simmki Tapa e mo tani uni 'koki har tom 'boro'da
kamu/ mo.

11 Iiyu/ ma, ayy iya/ mo, ciki gwo 'peni aha/ mo.

Aha/ mina tor um gwo gom monko/ is gom Tapa mo.

12 Wathi/ jana i/ona bwa ki mondiki/e mo,
dhali 'thoth bwa ka yempa/ ki a'di mina bwa 'kuny ka yempa/ gom tom
'boro'd mo?

13 Nona le'd pini 'twa/ 'peni gwon thus mo
dhali 'twam pini mmo/o gwo ka he'k e mo.

14 Kwa/i bwa mo 'peni tonthus mo dhali miiyi ki 'bore/ mo.
Simmi monku'th is e mo dhali uri a'di isho'k mo.

15 E gi Tapa a'di di'da po/ uni kun miin ka kar/e mo
dhali 'cem piti 'kup ki kom buni mo.

16 Bwam/e gi Tapa di'da po/ imanmii tonthus mo,
ki uni minu 'cith 'twa/ mo ki uni minu 'koki dok/e ka e e mony'cesh mo.

17 Ki uni kun mii miinjkar/e gwokin gom mowoth mo tani Tapa cikki uni mo
dhali 'cuk uni mo 'peni aris monto'c bwam buni mo.

18 Tapa 'disha'dish ka yempa/ e uni kun 'ce'dkunuwa du mo
dhali ta uni is ki me'd mo uni kun siri'ckunu shi/in ki sho'k mo.

19 Monto'c bwa tana ris gom a'di jin mii miinjkar/e mo,
hili Tapa 'cukki a'di 'peni uni 'baar mo.

20 A'di ki dhuwa risa simam piti 'baar mo.
Simam pitij kamu/ yisa 'ce'dkunuwa.

21 Tonthus jin miinu midi 'kosha manmii tonthus mo,
dhali uni gwansan kun shi/ki 'kwani kun mii miinjkar/e i e mo tani minu wak
mo be.

22 Tapa a'di wanki mondiki/e gi cinjinam piti 'ba/ mo.

Jan tal 'dej kamu/ 'peni uni gwansan kun bu'thki mo jin huru jwa e a'di mo
tani minu 'koki wak mo be.

35

Gway ma Dawuu'd.

1 Jemi ajem 'kup mo ma, ayy Tapa, nya'kki uni gwansan kun jemki aha/ 'kup
mo.

Asi apo/ uni gwansan kun askin apo/ aha/ mo ma.

2 Bu'thka gongoro/ ki me'd mo dhali to mmocesh is mo
dhali cuyi mis gom mowoth pem mo.

3 Deka mee she mis mo dhali ameeny 'cith is mo
apo/ uni kun urki aha/ isho'k mo.

Oyi gwo goma kashiram pem mo ki:

Aha/ tana man'cuḵ pini mo.

⁴ Dhalki uni dhukunu 'te/ ki mo ma 'the is mo dhali ush taḵ mo uni gwansan kun simmki mondiki/em pem e mo.

Dhalki uni tu'kkunu ka nyan'ko'd mo dhali non 'twa/ mo uni kun pishinki mo gi 'pen mo mmomii tonthus apo/ aha/ mo.

⁵ Dhalki uni wana e ka 'pi'b ibwambori 'tham mo ka man'doyu gwo gi Tapa ki ur uni ki sule/ sule/ mo.

⁶ Dhalki bway buni ta'da 'tum mo dhali dheresa dheres mo, ka man'doyu gwo gi Tapa ki ur uni isho'k mo.

⁷ Ki dar gi 'kup mii mo tani uni bagkina gumem buni gom aha/ mo. Dhali ki dar gi 'kup mii mo tani uni cwanyki jis gom mondiki/em pem mo.

⁸ Dhalki mo kun toru sho'k ka pupush pu'du'd apo/ uni ki e ka wu mo. Dhalka gumem buni kun бага uni mo tani bu'th uni mo.

Dhalki uni ta'kkin ibwaman uni mmo'ce'd sho'k ka pupush mo.

⁹ Dhali yan'ko'd akashiram pem 'kunya bwa e Tapa mo mmoyuḵ gway mmomaṇa maṇ gom mony'cuḵ piti mo.

¹⁰ Arisa simam pem mini o gwo mo ki:

Ayy Tapa, kaja a'di jin waki/e mo,

/e jin 'cuḵ a'di jin 'ka'da is ki 'ka'd mo

'peni a'di jin 'bitha'bi'th gom a'di mo,

dhali a'di jin 'ka'da is dhali a'di jin midi mii ta gi to mo 'peni a'di jin shi/ki a'di is mo.

¹¹ Iman/o gwo kun dupuna dupi e mo tani uni cuki mis apo/ aha/ mo.

Uni dotki aha/ to kun 'koka/ ki mish 'ban mo.

¹² Uni ki ci aha/ tonthus ka nyan'ko'd gom tom 'borga/ kun miiga/ gom uni mo.

Akashiram pem a'di 'bushura/ 'bushur mo.

¹³ Hili aha/, ki uni 'ba'thkin mo tani -

aha/ hi'thkina burrinyen shawaal mo,

aha/ shi/kina is pem ki moṇga/ to mo.

Aha/ 'thokina ki 'kup pem jin karka/ ka luṅgu'b abor pem mo

¹⁴ me'd jin jwakaḵkunu aha/ adu goma mugum pem mo dhala kam pem mo.

Aha/ yakina ka kul is me'd jan tal 'de/ jin gwoki'd goma ta'dam piti mo,

mmobiḵ 'kup ka luṅgu'b dhali ko ki gwony jabu'th mo.

¹⁵ Hili e mombiḵ pem mo tani uni tulki is mo mmope'th ki kuss kuss mo,

uni tulki is mmontal 'de/ apo/ aha/ mo.

Uni kun ta ṅwol kun molka/ mo tani thu'thki aha/ 'pen ki dar gi mondaḵ mo.

¹⁶ Uni ci aha/ tinya/ ka maḵ mo ki nyanye/ dhali ki nyanye/ mo.

Uni 'pe'dki aha/ shem buni i is mo.

¹⁷ Kakasja, ayy Tapa, mina /e ca'bi gu is mo kan?

'Cwami aha/ mo 'peni mo ma bujur buni kun 'ce'du sho'k mo,

mondiki/em pem 'pena risa dhop mo.

¹⁸ Dhali yan'ko'd aha/ mina ci /e mom'bor bwa i is e bwaman ma waambuhany 'kwani mo.

Dhali e mom'bi'th ma waambuhany 'kwani mo tani aha/ mina maṇ /e mo.

¹⁹ Dhalku/ ki dhal uni gwansan bway mo mmo'kuny bwa apo/ aha/ mo

uni kun mii aha/ ki shi/ kun ta 'kup ki aha/ mo,

dhali dhalku/ ki dhal uni gwansan bway mo mmoshi'b e

kun shi/ aha/ i e ki dar gi miij kamu/ mo.

²⁰ Haali/ uni 'koki o gwo gom moṅku'th is mo,

hili apo/ uni gwansan kun 'kon ki biyuu e mony'cesh mo tani

uni bwaaki gwo kun hekuwa he'k e mo.

²¹ Uni ka'dki 'twam buni kun beeyabee apo/ aha/ mo.

Uni oki gwo mo ki: Soso soso.

Em bana parki a'di e mo.

²² /E mishkin mo, ayy Tapa. Dhalku/ ki ca'b ki shwamm mo ma, ayy Tapa, dhalku/ ki si'd 'peni aha/ mo.

²³ Muri is pini mo ma, dhali meri is gom tom pem jin rak aha/ mo, dhali tom pem jin pu'du'd mo. Arungimis pem mo dhali Tapam pem mo.

²⁴ Yeyaa/ mo, ayy Tapa, Arungimis pem, isi ki mii ma kar/em pini mo, dhali dhalku/ ki dhal uni bway mo mmo'kuny bwa apo/ aha/ mo.

²⁵ Dhalku/ uni ki dhal bway mo mmo/o gwo e is buni mo ki:

Soo, ana tana gi to kun on ma dum bana mo.

Dhalku/ uni ki dhal bway mo mmo/o gwo mo ki: Ana loskina a'di ki 'kolo'c mo.

²⁶ Dhalki uni dhunu ki mo ma 'the is mo dhali dunguru/ ka du isi montal 'de/ mo

uni kun 'kunykina bwa mo apowa cis pem mo.

Dhalki uni kumu is ki mo ma 'the is mo dhali ki mo jin ushuwa tak tak mo,

uni kun dhu is buni ki ca apo/ aha/ mo.

²⁷ Dhalki uni gwansan kun 'kona gwo i bwa gom moyem pem

kum cuuwa/ mo gom mon'kuny bwa mo dhali mom'bor bwa mo,

dhali o gwo ki sule/ sule/ mo ki:

Tapa a'di caaca mo,

a'di jin 'kunya bwa e miin to gi cin'kinam piti jin gama a'di adu is mo.

²⁸ Dhali yan'ko'd 'twa/ pem midi tor gwo gom mii ma kar/em pini mo

dhali moman' pini isa yempa/ isa yempa/ mo.

36

Eya manyuk gway mo. Gway ma Dawuu'd, a'di jin ta cin'kina/ gi Tapa mo.

¹ Gwon dhan oki a'di jin ta thus ki thus gwo mo ki 'kula'kul eya dum piti mo.

Monko/ isa kamu/ yisa di'da goma Arungimis e bwambor jis/em piti mo.

² Haali/ a'di o gwo man ka mak gom is piti mo e em pitinj gana/ mo

ki miinthus piti minu 'koki gam mo dhali shi/i e mo.

³ Gwo 'peni 'twam piti mo tani uni tana pibi mo dhali mo jin hekuwa he'k e mo.

A'di dakki'd mo 'peni mo jin miina a'di ki yuk yuk mo dhali mii ki 'bore/ mo.

⁴ A'di ci is piti ki gwo ma pibi ma wu'th mo ki a'di di'd mmo/isha ankar piti mo.

A'di ki kar is piti e bway jin diki 'bor mo.

A'di diki ush tonthus mo.

⁵ Mo/en pini jin teli sho'k mo tani, ayy Tapa, a'di jithirki'd e momis mo,

dhali mii gi isinj ganam pini eya rak mo.

⁶ Mii ma kar/em pini a'di wana e ki wosh kun turatur kun ta ku ma Arungimis mo,

gwon dwall pini kun toru gwo 'twa/a 'cesh mo uni wana e ki dhan 'kul yi'de/ mo.

'Kwani dhali tombwaasho takina /e is ki me'd mo, ayy Tapa.

⁷ Mo/en pini jin teli sho'k mo tani wa'di yinthowa, ayy Arungimis.

Uci gi 'kwaniny'cesh uni bu'thki mo jin huru jwa eya kashira/ ma bim pini mo.

⁸ Uni yukkina yuk e gu'b pini jin isha to ka enthus mo,

dhali /e çiki uni to mmopi mo 'peni yi'de/ jin 'kunykina /e bwa mo.

⁹ Haali/ e /e mo tani /e a'di ta mondiki/e jin kashki'd mo.
E moŋkush pini mo tani am parkina moŋkush e mo.

¹⁰ Ayy tikiri mo/en pini jin teli sho'k ki sule/ gom uni gwansan kun mishki /e mo,

dhali bway gi mowoth pini gom uni kun dhelel ma du ki dhelel mo.

¹¹ Dhalku/ ki dhal sho'k gi a'di jin kar 'ba/ ki ca mmopu'da po/ aha/ mo, walla me'd gi a'di jin ta thus ki thus mmobor aha/ mmosi'da/ si'd mo.

¹² Kwani kun ta imanmii tonthus ishkin ki rap rap mo, uni kun torkunu 'ko'da 'cesh mo, mmomol cu mo.

37

Gway ma Dawuu'd.

¹ Dhalku/ is pini ki anan mo goma manthu'th to mii mo, dhalku/ dhapan ki mii ta gom imanthu'th to mii mo.

² Haali/ uni mini la us ki jog me'da sho mo, dhali ku'th mo me'da sho mo.

³ Gami gwo is e Tapa mo, dhali miiyi ki 'bore/ mo.

Wakan ki /e mini ca'b eya 'cesh mo, dhali 'kuny bwa mo gom mo jin mina /e ca'b ki 'dantar mo.

⁴ Budhi mo jin 'kuny bwa e Tapa mo, dhali a'di midi ci /e to kun gwon ma dum pini mo.

⁵ Çuthi bway pini 'kup ki Tapa mo.

Dhali gami gwo is e a'di mo, dhali a'di midi kal mii mo be.

⁶ Dhali a'di midi kal mom pini jin minu ye /e mo e moŋkush mo dhali tom 'boro'd pini mina e waki montee mo.

⁷ Doshi naskina/ e bwambor gi Tapa mo dhali çoriya çor ki bwa jin 'kuçu/ ki 'kari'th gom a'di mo.

Dhalku/ is ki anan apo/ a'di jin gam mii adu is e bway piti mo, apo/ wathi/ jin kali tonthus ka piye/ ki mii jin pishina a'di ki 'pen mo.

⁸ Daki 'pena nyor mo dhali dhalka nyor jin shwanu 'pen mo.

Dhalku/ is pini ki anan mo, a'di jin kuthi is jasi gom tonthus mo.

⁹ Haali/ amanmii tonthus mo tani a'di minu la 'cith mo,

hili uni gwansan kun çorki Tapa mo tani uni a'di imini gam mony'cesh mo.

¹⁰ Çori naskina/ ari'ceenne/ mo dhali amanmii tonthus midi di dok/e yisa.

Ba me'd jin hila um a'di ki a'di di'd e mom piti ki 'bore/ mo tani a'di midi di yisa.

¹¹ Hili uni kun 'thup ma du mini gam mony'cesh mo

dhali 'kuny bwa e is buni mo e mo jin isha to ka enthus ki mii jin gama uni adu is mo.

¹² Amanmii tonthus a'di mii'da wu'th apo/ a'din kar/e mo dhali 'pe'd shem piti apo/ a'di mo,

¹³ hili Tapa pe'thki a'di jin mii tonthus mo haali/ a'di mishki'd ka teem piti pu'dki'd mo be.

¹⁴ Imanmii tonthus uni buki gandal buni mo dhali gwana'da bwam buni mo, mmokal ka 'cesh uni kun hatha 'ko'd mo dhali kun mini mii ta gi to mo.

dhali 'kosh uni gwansan kun iin ki iin dhelelga/ mo.

¹⁵ Gandal buni mini ciça dum buniŋ gana/ mo, dhali abwam buni minu 'ce'd bwa mo be.

- 16 To kun tana a'din̄ kar/e ush'ceenne/ mo tani a'di 'boro'd mo mmobol to jin ishi'd ka enthus ma ris uni kun mii tonthus e mo.
- 17 Haala bi gi imanmii tonthus mo tani uni minu 'ce'd mo, hili Tapa a'di dhuki imanmii miin̄kar/e mo.
- 18 Tapa a'di mishki'da tee gi uni kun 'kon ki dar gi mii 'ba/ mo, dhali mal buni ca'bki'd ki sule/ sule/ mo.
- 19 Uni minu 'koki dhu ki mo ma 'the is ka tee kun ta thus ki thus mo, dhali ka tee jin mina te/ 'kosh mo tani uni mini ta gi to jin ish ka enthus mo.
- 20 Hili imanmii tonthus mo tani uni 'ce'dki sho'k mo. Aris uni kun ta 'kup gi Tapa mo tani uni wana e ki monyca ma shon dhii/i'd mo, uni kun la puu mo - dhali uni kun wana e ka ku'd kun la puu mo.
- 21 Amanmii tonthus barki to ka' 'peni 'kwani mo tani, dhali mol ciya murem piti ka nyan'ko'd mo, hili a'din̄ kar/e ta'da 'the mo dhali ci'da ci mo.
- 22 Haali/ uni gwansan kun 'boru mii ki Tapa mo tani uni mini gam mony'cesh mo, hili uni gwansan kun jeenu ki a'di mo tani uni minu 'cith̄ 'twa/ mo be.
- 23 Natgin jin tana wathi/ mo tani a'di 'peni Tapa mo, dhali a'di telki a'di sho'k mo e bway jin mina bwa 'kuny a'di mo.
- 24 Ba ki a'di midi biṭ mo tani a'di minu 'koki biṭa sho 'kup ka luṅgu'b mo, haali/ Tapa a'di ta mondim gom me'd piti mo.
- 25 Aha/ tana dhuru'c 'thissa/ mo dhali shwane/ aha/ tana dhan mo. Hili naskina/ aha/ dinaki par a'din̄ kar/e e dhalkunu 'pen mo walla ucin̄ piti mmo'tho tonte/ mo.
- 26 A'di ciki to ka 'ka'd me'di is mo ka yempa/ mo dhali ci to mo, dhali ucin̄ piti warkin ki uni kun 'bor mii mo.
- 27 Kwa/i bwa mo 'peni tonthus mo dhali miyi ki 'bore/ mo, wakan ki /e mini di ki sule/ sule/ mo.
- 28 Haali/ Tapa a'di enki mo jin 'konuki miyi mii ka gwar 'de/ mo. A'di midi diki dhal unim piti kun dhunu ki she/ ki dhelel dhelel 'pen mo. Imanmii miin̄kar/e minu dhu ki sule/ sule/ mo. Hili uci gi imanmii tonthus mo tani uni minu 'cith̄ 'twa/ mo.
- 29 Imanmii miin̄kar/e mini gam mony'cesh mo dhali ca'ba po/ a'di ki sule/ sule/ mo.
- 30 'Twa/ ma manmii miin̄kar/e mo tani a'di bahki gwo gom moyuk mo dhali ale'd oki gwo ki dar gi mii ma gwar 'de/ mo.
- 31 Dhali gwonkan ma Arumgimis piti jin cinu mo tani a'di di'da dum piti mo. Dhali natgin piti 'koki yeresa/ yeres mo.
- 32 Amanmii tonthus a'di timki a'din̄ kar/e mo dhali simm a'di e mo mmo'kosh mo.
- 33 Tapa a'di midi diki dhal a'di 'pen e mom'bi'th piti mo, walla dhal a'di ki a'di minu wak mo me'd jin minu sus a'di e mondwall gwo mo.
- 34 Cori Tapa mo dhali kari bway piti mo dhali a'di midi kar /e ki ca mo mmogam mal gi mony'cesh mo. /E mini hil mony'ce'd sho'k ma manmii tonthus mo.
- 35 Aha/ hilkina manmii tonthus mo mmomii mii gi 'ba/ mo, dhali mmotura tur me'da bwanyayiis gi Pan Lubnaan mo.
- 36 Dok/e aha/ yakina ki yam pe mo dhali hili a'di diki di dok/e mo.

Ba aha/ njapkina a'di mo tani a'di 'konuki gam mo be.

³⁷ Cunycuri wathi/ jin dar gi mii 'ba/ mo dhali hili mo mo ma a'di jin dhelel ma du mo,

haali/ emen 'kon gom wathi/ gi monku'th is mo.

³⁸ Hili imandhan gwo mo tani uni minu 'ce'd sho'k imontal 'de/ mo.

Dhali emen gi imanmii tonthus mo tani uni minu 'cith mo be.

³⁹ Bway gi mowoth gom wathin kar/e mo tani a'di 'peni Tapa mo be.

A'di ita jim buni jin hura uni jwa ka tee gi monto'c bwa mo.

⁴⁰ Tapa wothki uni mo dhali 'cukki uni mo.

A'di 'cukki uni mo 'peni imanmii tonthus mo dhali ta uni is ki me'd mo

haali/ uni bu'thki mo jin huru jwa e a'di mo be.

38

Gway ma Dawuu'd mmoka to e jin cinuwa Arumgimis ki me'd mo.

¹ Ayy Tapa, dhalku/ ki kucur aha/ ka nyor pini mo walla dhalku/ ki dor aha/ ka nyor pini jin shwana /e mo!

² Haala thopam pini karana dum 'per pem 'kup mo, dhali me'd pini pu'dkina pom pem mo be.

³ Dhali monkamu/ mura shuman bungwar is pem is mowa?

haala nyor pini jin shwana /e caaca mo.

Dhali mowaca kamu/ di'd goma simam pema?

gom miinthus pem mo be.

⁴ Haali/ miinthus pem loski aha/ ki 'kupi lu/ mo,

dhali uni 'thiraa/ dit mmokal mo be.

⁵ Jamam pem 'kakin mo dhali bulabul mo dhali taga 'bi/ nycine/ mo gom miim pus pem mo.

⁶ Aha/ kumkunu 'twa/a 'cesh mo dhali 'daçal 'ko'da 'cesh mo.

Isa yempa/ yula tente/ mo tani aha/ yakina gwolu/ mo.

⁷ Haali/ empa'd pem a'di 'tu'dkunu ki mo jin 'batha'ba'th mo,

dhali monkamu/ mura shuman bungwar is pem is mowa?

⁸ Aha/ kumkunu 'twa/a 'ceshi 'baar mo dhali sirica po/ ki sho'k mo.

Aha/ ohonkina mo goma dulatt ma nyor ma dum pem mo.

⁹ Tapa, aris mom pem kun gwon ma du mo tani mishu ki /e mo.

Dhali ashurem pem jin wuka/ mo tani 'konuki bag 'peni /e mo be.

¹⁰ Adum pem shwa'd ki ju'k ju'k mo dhali mom'bi'th pem ushi me'd mo e aha/ mo

dhali apinya/ em pem jin shwa'd ki o'd mo tani, uni si'da/ uskin 'peni aha/ mo be.

¹¹ Imugum pem dhali uni gun nyak aha/ ii ka yempa/ mo tani uni doshkin ki monko/ is 'peni isa nyor pem kun wo'cki aha/ she/ mo,

dhala bas pem si'da/ uni doshkin isa dhana/ mo.

¹² Uni gwansan kun simmki mondiki/em pem e mo tani 'thikina gumem buni mo.

Uni gwansan kun simmki mo e jin mina uni shi/ aha/ is mo tani oki gwo kun minu kup mo

dhali kulum gwo ibwa mmo'ce'da 'ce'd me'di isi yula tente/ mo.

¹³ Hili aha/ wana e ki wathin 'diye/ mo, aha/ dinaki cik tonj kamu/ mo.

Aha/ wana e ki wathi/ jin mol 'twa/ wal mo jin mol 'twam piti ka'd mo.

¹⁴ Nye, aha/ wana e ki wathi/ jin mol gwo cik mo,

dhali e 'twa/ mo tani aha/ dara gi gwonj kucur mo.

- 15 Hili e/e mo tani ayy Tapa, /e be icorkaa/ mo be.
 A'di ta /e be, ayy Tapa Arungimis pem, /e jin mini tho_{ka} tho_k 'twa/ mo be.
- 16 Haali/ aha/ 'thona mo ki: Uni mini dhalki bwa ki 'kuny apo/ aha/ mo.
 uni gun dhu 'ba/ ki ca apo/ aha/ mo ki sho'k pem yereski'd mo.
- 17 Aha/ 'dishkina mmobi_t mo,
 dhali mo jin woca is aha/ she/ mo tani a'di di'da bori aha/ ki sule/ sule/ mo.
- 18 Aha/ pikina gwo gom tonthus pem jin miika/ mo,
 aha/ kala bwan di_ti'd gom miinthus pem mo.
- 19 Uni gwansan kun ta 'kup pem mo tani dar gi 'ko mo uni 'bitha'bi'th mo,
 dhali uni gwansan kun shi/i aha/ i e ki shi/ thus mo tani uni tana ris mo.
- 20 Dhali uni gwansan kun rakki aha/ tonthusi bway gom tom 'boro'd mo tani
 uni ita 'kup pem kun tana ris mo haali/ aha/ batha jasi tom 'boroni 'ko'd mo.
- 21 Dhalku/ ki dhal aha/ 'pen mo ma, ayy Tapa,
 ayy Arungimis pem, dhalku/ ki si'd 'peni aha/ mo!
- 22 Huru/ ki jahanne/ mmowoth aha/ mo,
 ayy Tapa, gi bway mowoth pem mo.

39

Eya manyuk gway mo: goma Yaduthuun. Gway ma Dawuu'd.

- 1 Aha/ ona gwo mo ki: Aha/ mina ji bway pem ki e mo,
 ki aha/ mina diki mii miinthus ka le'd pem mo.
 Aha/ mina 'kali'th 'twam pem mo,
 wakan me'd jin mina 'kwanin thusi 'kowa bori aha/ mo.
- 2 Aha/ usha 'twa/ wal mo dhali ca'bki shwamm mo,
 aha/ bu'thkina monku'th is pem mo tani ton kamu/ gamkaa/?
 mo ma cis pem thissi'di ca mo 'teki shi/ shi/ mo.
- 3 Adum pem ca'bki 'ba'th 'ba'th e aha/ mo.
 Me'd jin tashu aha/ ki gwo kun kulumkaa/ e bwa mo tani o'd jin 'batha'ba'th
 shwaki'd mo,
 dhali yan'ko'd aha/ ki o gwo ka le'd pem mo ki:
- 4 Tapa, dhalki aha/ misha 'pemen pem jin midi di 'kup mo
 dhali ateem bar pem wakata mo?
 Dhalki aha/ misha mo mo, ma mondiki/em pem midi gus kata mo?
- 5 Hili /e ki kara tem pem mmokuta/ kut me'd bwam me'd ki daka/ mo
 dhali mondiki/em pem jin dika/ ki e mo tani ta ton kamu/ ibwambori jis/em
 pini yisa.
 Ka jin gana/ aris 'kwani 'baar mo 'kokin 'twa/i 'kup 'te/ mo.
 Doshi ma dhali 'cunycuri yan mo.
- 6 Ka jin gana/ 'kwani iikin ki jasa kashira/ ma la 'te/ mo.
 Ka jin gana/ uni 'koshki jis mo ki dar gi mii kun kala uni mii 'kup pa ka pije/
 mo.
 'Kwani sugki to mo dhali mol mo mo a'di jin midi tul a'di is mo.
- 7 Dhali shwane/ Tapa, ki to jin ta'da ta icorkika/ mo?
 Mo ma 'tej kapem pem di'd e /e mo.
- 8 'Cuki aha/ mo 'pena ris gwom pem kun dhan_{ka}/ mo.
 Dhalku/ ki kar aha/ jin mina imanmii miim pus iwak aha/ mo.
- 9 Aha/ usha 'twa/ wal mo, aha/ dinaki ka'd 'twam pem mo,
 haali/ a'di ta /e jin miiki a'di mo.
- 10 Jo_{ck}i mondor pini 'peni aha/ mo.

Aha/ 'baarkina mo ki mondor ki me'd pini mo.

¹¹ Ki /e ki dor wathi/ dhali kucur a'di gom miinthus mo tani /e ki 'cum to jin ena a'di me'da dhurany jin shwa to jin 'ka'd a'di 'twa/ ki 'ka'da bor mo.

Ka jin gana/ aris 'kwani 'baar mo 'ko ki e 'twa/i 'kup 'te/ mo.
Doshi ma dhali 'cunycuri yan mo.

¹² Ciki mon'thom pem mo ma, ayy Tapa, dhali ka'di 'cem pini gom monkom pem mo. Dhalku/ ki bu'th monku'th is pini 'peni jabu'th em pem mo. Haali/ aha/ takina yilkinam pini jin yaki'd ki yam pe mo, a'di jin tani pa mo, mmowa e ki ibabam pemi 'baar kadhamo/ mo.

¹³ Hilki /e mo ka cin'ko'd mo 'peni aha/ mo, ki aha/ mina gam bwanj 'kunu'd mo ntwaa/ ki aha/ mina ya mo dhali diki di dok/e mo.

40

Eya manyuk gway mo. Gway ma Dawuu'd.

¹ Aha/ cora/ cor ki bwa jin 'kucu/ ki 'kari'th gom Tapa mo.

A'di ka'dki 'cem piti mo dhali cik aha/ kom pem mo.

² A'di dirki aha/ ka piye/ 'peni jis jin miga/ 'taki tor sho'k ka pupush mo, 'peni boro'th jin ca bki co'do/ co'do/ mo.

A'di ki dhu sho'k pem apo/ wosh mo dhali dhu natgin pem mmo'ko ki 'dantar mo.

³ A'di ki kar gway this e 'twam pem mo, gway jin manka/ Arungimis bana mo. 'Kwani ka ris mini par e mo tani dhali koka ko/ mo dhali dhu mongam gwo is buni e Tapa mo.

⁴ Mom'bor mii gom wathi/ jin kar Tapa ki jim piti jin gama a'di gwo is mo, a'di jin diki tu'k mo e mo jin karu is ki ca mo, ki uni gwansan kun iikini per mo mmobath gwo ma rum pinyconi sho'k mo.

⁵ /E marki momiin tom pini kun ta momer is mo dhali gwom pini kun kulumkina /e ibwa 'kupki am mo, ayy Tapa Arungimis pem mo.

Jamu/ piyi'd jin minu kar ka par nyakki /e mo.

Wakki/ aha/ mina 'taki bah gwo mo dhali tor uni mo tani uni mini 'taki bol uni kun minu 'taki deje e e ka ris mo.

⁶ To jin 'cithu/ 'kus mmomiiya bas mo dhali to jin cinu ki me'd mo tani bwam pini diki o mo.

Hili /e ki tup aha/ 'cem pem mmoshuwa shu mo.

To jin cithu/ ki o'd jin cinu ki me'd mo dhali jin cinu gom miinthus mo tani /e yisa 'thekki gwo gom uni yisa.

⁷ Yan'ko'd aha/ ki o gwo mo ki: Hili mo mo ma, aha/ pu'dkina mo.

Eya warka/ jin 'kucu/ is jin 'kwarkunu gwo apo/ gom aha/ mo.

⁸ Aha/ 'kunya bwa mo mmomii bwam pini mo, ayy Arungimis pem. Gwonkan pini jin cinu mo a'di di'd eya dum pem mo.

⁹ Aha/ torkina gwonj 'kunya/ jin cinu gom mo jin 'cukuwa 'cuk mo eya dhana tul 'kup mo.

Dhali hili mo mo ma, aha/ dinaki mu'th 'twam pem mo, me'd jin mishkina /e aha/ mo, ayy Tapa.

10 Aha/ dinaki bag mom pini jin tana /e aha/ is ki me'd mmowoth aha/ eya dum pem mo.

Aha/ torkina gwo mo goma isinj ganam pini jin tana /e mo dhali gom bway gi mowoth pini mo.

Aha/ dinaki us mo/en pini jin telu sho'k mo dhali mo ma isinj ganam pini jin tana /e mo.

'pena dhana tul 'kup 'kwani mo.

11 Dhalku/ ki bu'th momiimiim pini 'peni aha/ mo, ayy Tapa.

Dhalki mo/en pini jin telu sho'k mo dhali mo ma isinj ganam pini jin tana /e mo tani 'tash aha/ 'twa/ ki sule/ sule/ mo.

12 Haali/ tonthus uni 'kamki aha/ mo dhali uni molu den e mo.

Miinthus pem uni kalki aha/ ka 'cesh mo ntagi aha/ mola mo mo.

Uni tana ris ka ris kun bolina mur 'kup pem e mo.

Adum pem ush aha/ me'di e mo.

13 Ba miiyi ki 'bore/ bala, ayy Tapa, mmo'cuḱ aha/ mo.

Ayy Tapa, huru/ ki jahanne/ ma mmowoth aha/ mo.

14 Dhalki uni dhunu mo ma ki mo ma 'the is mo dhali dunḱuru/ 'kup isi montal 'de/ mo

uni gwansan kun simmki mii e mo tani mmo/uth mondiki/em pem mo.

Dhalki uni tu'kkunu ka nyar'ko'd mo dhali 'doyu/ e mo jin ushuwa tak tak mo

uni gun ona bwa ki shi/ aha/ is mo.

15 Dhalki uni meren kagahara gom mon'the is buni mo

uni gun o aha/ gwo mo ki: Soso, soso.

16 Hili dhalki uni gwansani 'baar mo kun simmki /e e mo tani

'kunya bwa mo dhali 'bor bwa mo e /e mo.

Dhalki uni gwansan kun eni bway gi mowoth pini mo tani

tikir gwo o mo ki: Tapa a'di i/eka/ ek mo.

17 Gom aha/ mo tani aha/ hatha'ko'd ki ha'th mo dhali mina mii ta gi to mo,

hili Tapa a'di kulumki gwo ibwa gom aha/ mo.

/E ta a'dim pem jin wothki aha/ mo dhali a'dim pem jin 'cuḱki aha/ mo.

Dhalku/ ki ta adiite/, ayy Arungimis pem!

41

Eya manyuḱ gway mo. Gway ma Dawuu'd.

1 Mom'bor mii gom a'di jin hili uni gun hatha'ko'di e mo.

Tapa 'cuḱki a'di ka tee jin toju a'di ato'c bwa mo.

2 Tapa wothki a'di mo dhali kar a'di ki e mo.

A'di yuku gway ka man'boru mii e mony'cesh mo.

/E diki ci a'di e bwa gi uni gun ta 'kup ki a'di mo.

3 Tapa a'di thip a'di 'ko'da cim piti jin isha a'di mmo'ba'th mo.

E mom'ba'th piti mo tani a'di ki waḱ a'di 'pena ris isa nyor kun 'koshki a'di mo.

4 Gom aha/ mo tani, aha/ ona gwo mo ki: Ayy Tapa, miiyi mii ma 'the gom aha/ mo ma.

Dhali waci aha/ mo, haali/ aha/ miikina miinthus po/ e mo be.

5 Uni gun ta 'kup ki aha/ mo o gwo e aha/ eya adun dup buni mo ki:

Kakasja imina a'di iwu mo? dhali gway piti ki 'ce'd sho'k mo?

6 Dhali ki jan tal 'den kamu/ pu'dki'd mmopar aha/ e mo tani a'di ki bah gwo kun 'kon isi bwa 'te/ mo,

ka yiha/ ka dum piti tulu'da ris mii ma pibi is mo.

Ki a'di ya'd ka pije/ mo tani a'di ki wagar gwo mo.

⁷ Aris uni gwansan kun shi/ki aha/ i e mo tani torkina tor ki k_{ako}/ mmontal 'de/ gom aha/ mo.

Uni ki gwalal buni mo tani uni kulumki gwo shi/in ibwa gom aha/ mo, kun bol tiya e mo.

⁸ Uni ki o gwo mo ki, To jin wunu kara bit_i'da po/ a'di ba/.

A'di midi cu mis dok/eya? ma 'peni mo jin isha a'di mo.

⁹ Isi kani amugum pem gana/ jin di'da bori aha/ jin gamka/ gwo is mo tani a'di jin shwaki tontem pem mo tani a'di 'de'k_{ki} 'penat_{in}kilam piti apo/ aha/ mo.

¹⁰ Hili /e ayy Tapa, miyyi mii ma 'the apo/ aha/ mo,

dhali 'deki aha/ ki mis mo ki aha/ mina 'taki mu'th uni 'twa/ mo.

¹¹ Gom mii yansan mo tani aha/ misha ki /e 'bora bwa ki aha/ mo,

ki a'di jin ta 'kup ki aha/ mo tani diki pi aha/ e mo be.

¹² Hili /e bu'th_{ki} aha/ mo gom miim pem jin dar gi n_{adh}um mo,

dhali /e ki kar aha/ e bun_j'kus pini ki sule/ sule/ mo.

¹³ Mom'bor mii midi di gom Tapa mo, a'di jin ta Arumgimis gi 'Kwani ma Israyiil mo,

'peni mo jin 'konuki/e ki sule/ sule/ ya ye 'ba/ mo ntagi mo jin 'konuki/e ki sule/ sule/ ya ye 'ba/ mo.

Amen dhali dok/e Amen mo.

AWARKA/ JIN 'KONA 'BANI SU/ MO.

42

Eya manyuk gway mo. Gway gom iya/ ma Guurah mo jin yethu sho'k mo.

¹ Me'da shet jin kara ce jin ta yoll mo a'di jin ona bwa ki yi'de/ jin kasha e ki kash mo tani

wakan si'da/ akashiram pem cor_{ki}'da cor gom /e mo, ayy Tapa Arumgimis.

² Akashiram pem budha te/ miin_{kar}/e goma Arumgimis mo,

goma Arumgimis jin di ki e mo.

Ki aha/ mina pu'd kakasja dhali hil bwam/e ma Arumgimis mo?

³ Jabu'th em pem a'di warki'd ki tontem pem gi montee mo

dhali mon'thiny mo,

ka yiha/ ki 'kwani 'kon mmorash aha/ gwo o mo ki:

Mane Arumgimis pini mane?

⁴ To gwansan mo tani uni kakika/ e mo,

me'd jin wolkika/ kashiram pem ka pije/ mo:

me'd jin yaka/ nyak_{ka} buhany 'kwani mo

dhali shu uni bway ka jintura/ e gu'b ma Arumgimis mo,

ki bwam 'boro'd kun kumu cuuwa/ mo dhali yuk gway kun 'boruwa 'bor bwa

i is mo,

me'd jin dhukin ma waambuhany 'kwani kun kogu acim mo.

⁵ Katinta ibitu/ /e eya 'cesh mo, ayy akashiram pem mo,

dhali atinta i/usha /e me'd kan e aha/ mo?

Tayi ka 'ter kape/ eya Arumgimis mo. Haali/ aha/ mina dok/e man a'di mo,

a'di jin ta'da manwoth pem dhali Arumgimis pem mo.

⁶ Akashiram pem a'di bitu/ 'ko'da 'cesh e aha/ mo.

Wakan aha/ kakina /e e mo

'pena 'cesh gi Pan Uurdun mo dhali gi Pan Harmuun mo

dhali 'peni 'Kuwosh ma Misar mo.

⁷ Mon'kulga/ jin yuku ki mon'kulgan kamu/ mo

me'd jin dora yi'den kuku/ kukum pini mo.

Aris yi'dem pini kun bir bakal mo dhali aris en kuthar yi'dem pini
uni kalki aha/ ka 'cesh mo.

⁸ Ki montee isa yempa/ mo tani Tapa a'di kanki mo/en piti jin telu sho'k mo
dhali mon'thiny mo tani gway piti di'd nyakki aha/ mo,
mmo'thowa Arungimis gi mondiki/em pem mo.

⁹ Aha/ ona gwo eya Arungimis jin ta wosh pem mo ki:

Atinta inana /e aha/ kan mo?

Katinta gara/ imiga/ ca'b jasi gwolu/ kan mo

gom mosiri'c gi uni kun ta 'kup ki aha/ kan mo.

¹⁰ Me'd wathi/ jin 'disha 'twa/ mmowu mo 'peni jama/ jin doruwa dor e
bungwar is pem mo tani

uni kun ta 'kup ki aha/ mo sorki aha/ mo,

dhali ka yiha/ mo tani uni 'kon mmorash aha/ gwo o mo ki:

Mane Arungimis pini mane?

¹¹ Katinta ibitu/ /e eya 'cesh mo, ayy akashiram pem mo,

dhali atinta i/usha /e me'd kan e aha/ mo?

Tayi ka 'tej kape/ eya Arungimis mo. Haali/ aha/ mina dok/e man a'di mo,
a'di jin ta'da manwoth pem dhali Arungimis pem mo.

43

¹ Yeyi aha/ mo, ayy Arungimis dhali 'ce'di gwo she/ gom to jin rakı aha/ mo
apo/ 'kwani kun 'koki mii miınkar/e mo,

dhali 'peni 'kwani kun ta imanhe'k e mo,

dhali 'peni 'kwani kun 'konuki dhu ki mo ma kar/e mo tani 'cuki aha/ mo.

² Haali/ /e tana Arungimis a'di jin bu'thka/ mom pem jin hurga/ jwa mo be.

Katinta bita /e aha/ asho kan mo?

Dhali tonta imiga/ ca'b jasi gwolu/ kan mo

gom uni kun siri'c aha/ ki sho'k mo kun ta 'kup pem mo?

³ Ayy, hashi monkush pini mo dhali gwon ganam pini mo.

Dhalki uni shu aha/ bway mo.

Dhalki uni sus aha/ mo e 'kuwosh pini jin kogu mo

dhali mom pini jin ca'ba /e mo.

⁴ Dhali yan'ko'd aha/ mina ya mo e mo ma gwaťa/ jin 'cihu/ to 'kus goma
Arungimis mo,

eya Arungimis jin 'kunya/ bwa ki 'kuny icine/ kagahara mo.

Dhali aha/ mina man /e ka dhenhene/ jin 'kon ma shu/i pesu/ mo,

ayy Arungimis jin ta Arungimis pem mo.

⁵ Katinta ibitu/ /e eya 'cesh mo, ayy akashiram pem mo,

dhali atinta i/usha /e me'd kan e aha/ mo?

Tayi ka 'tej kape/ eya Arungimis mo. Haali/ aha/ mina dok/e man a'di mo,
a'di jin ta'da manwoth pem dhali Arungimis pem mo.

44

Eya Manyuk gway mo. Gway gom iya/ ma Guurah jin yedhu sho'k mo.

¹ Aman cikina gwo ki 'cem bam mo, ayy Arungimis mo,

ibabam bam torıki aman gwo mo,

gom miim pini kun miikina /e mmothim ka teem buni mo,

ka tee 'peni kadhamo/ mo.

²/E ki me'd piniŋ gana/ mo tani /e ki ura ris kala tiya ka pije/ mo dhali hili uni mo tani /e ki cu'th uni mo.

/E ki dor 'kwani ka ris mo,

dhali hili uni mo tani /e ki dhu uni ki 'kus mo.

³Haali/ a'di ki gandal buni yisa igamkina uniya 'cesh yan adu is mo yisa, walla si'da/ abim buni diki ci uni mom'bi'th mo, hili me'da bim poros pini mo dhali abim pini mo, dhali moŋkush 'peni bwam/em pini jin kushki mo mo, haali/ /e 'kunykina bwa e uni mo be.

⁴/E tana Malik pem mo dhali Arungimis pem mo, a'di jin 'kawurki'da 'kawur mo gom mompinu mii e ma Yakuub mo.

⁵Ki /e mo tani am ki tan uni kun ta 'kup bam ka bor mo.

Dhali ki gway pini mo tani am ki yap uni gwahan ki sho'k mo kun gam am 'kup mmo/as mo.

⁶Haali/ bwam pem mo tani aha/ dinaki gam gwo is gom a'di mo, walla gandal pem si'da/ diki ta aha/ is ki me'd mo.

⁷Hili /e wothki aman mo 'peni uni kun ta 'kup ki am mo,

dhali kar to ibwaman uni kun shi/i aman i e mo jin midi duŋgur uni 'kup 'kup is mo.

⁸Eya Arungimis mo tani aman dhukina 'ba/ ki ca ki tikir tikir mo, dhali aman mina ci /e momaŋ gom gway pini ki sule/ sule/ mo.

Doshi ma dhali 'cunycuri yan mo.

⁹Hili /e ki ta'k am ka pije/ mo dhali dhu am ki mondhu is ki gwa'd mo, dhali /e diki ya ka pije/ nyaŋki 'kwani ma meem bam mo.

¹⁰/E ki dhu am mmodok ka nyaŋ'ko'd mo 'peni uni gun 'kwar am ka gwapi/ mo.

Dhali uni kun ta 'kup ki am mo tani dilki aman to mo.

¹¹/E ki dhu am me'd ka'bal kun minu 'cith' kus mo,

dhali /e ki cecker aman bwa mo e bwaman kal gi 'kwaniny'ceshi 'baar mo.

¹²/E ki yol 'kwanim pini ka maliim gana/ mo,

/e ki kan gwo ki uni minu 'koki yol ka thaman kun caaca mo.

¹³/E ki dhu am ki uni gun nyaŋ'ko ki am mmoŋi aman gura/ mo,

dhali aman dupu i e dhali thuny 'twa/ i is ki uni gwansan kun 'kamki am is mo.

¹⁴Dhali /e ki dhu am ki ku gun miinu mii ka maŋ mo e bwaman kal gi 'kwaniny'cesh mo.

dhali aman pe'thkunu mmopir 'kupi is e bwaman 'kwaniny'cesh mo.

¹⁵Ka cim 'baar mo mom pem jin darka/ ka 'the mo di'di bwambori aha/ mo, dhali mon'the is a'di kumki aha/ bwam/em pem mo,

¹⁶gom gwo gi uni kun ciki aman gura/ mo dhali imansor aman mo tani dhali e bwambor uni gun ta 'kup mo dhali a'di jin napa'd mmori/a ri'c mo.

¹⁷Aris to gwansan pu'dki'd apo/ aman mo,

ba aman 'konaki ŋa/e mo,

walla aman 'konaki ta thus gom gwom pini jin gamu me'd mo.

¹⁸Adum bam 'koki dok ka nyaŋ'ko'd mo,

walla natgin bam 'koki dheres 'peni bway pini mo

¹⁹ki /e mini 'taki 'ce'd am mo 'peni mo jin 'kon ma jala/ nycine/ mo,

dhali kum am 'kup ki mondhurumi'd jin 'kula'kul mo.

- 20 Wakki/ aman ṅakina gway ma Arumgimis bam mo tani, walla he'th me'd bam goma rum pinycon mo tani,
 21 min ma Arumgimis 'taki diki gam mii yansana? Haali/ a'di mishki to kun 'kona duṅ 'kwani ka kwal is mo.
 22 Yisa, gom gway pini mo tani aman 'koshkunu yula tente/ mo, dhali aman dhukunu mo me'd ka'bal kun dhunu mmo'ciṭh 'kus mo be.
 23 Muri is pini mo. Ata isha /e e kan mo, ayy Tapa? Meri /e e mo. Dhalku/ ki ta'k am asho ki sule/ sule/ mo.
 24 Katinta ibaga /e jis/em pini mo? Katinta iṅana /e mom bam jin woja is am she/ mo dhali mo jin siri'ckunu am ki sho'k mo?
 25 Haala kashiram bam a'di kumkunu 'twa/a 'cesh e bwam bu'd mo, dhali buṅgwar is bam ishkina 'cesh ki rap rap mo.
 26 Cuyi mis mo dhali yayu/ mmowoth aman mo. 'Cuki aman mo gom gway gi mo/en pini jin telu sho'k mo.

45

Eya manyuk gway mo, isi ki gwo gi jandin to mo. Gway jin yuku mmoye'th iya/ ma Guurah sho'k mo. Gway gi mo/en mo.

- 1 Adum pem a'di 'tu/du/ mo ki tom 'borga/ jin di'di bwaman mo mmo/o mo. Aha/ bahkina gwom pem eya malik mo. Ale'd pem a'di wana e ka galama riisha/ jin thoson ma man'kwar to is hila/ mo.
 2 /E ta a'di jin onu bwa ki nyanye/ ki iya/ gi 'kwani mo. A'the a'di wolkunuwa powa le'd pini mo. Wakan Arumgimis 'bor'ki /e mii ki sule/ sule/ mo.
 3 Deki gandal pini apowa wum pini mo, ayy /en 'de/ jin ca'bki dem dem mo e monycam pini mo dhali e mo/ek pini mo.
 4 E mo/ek pini mo tani meri mo e mo jin pinu mii e mo gom gway gi gwoṅ gana/ mo dhali gom mo jin minu cesh she/ mo gom mo jin minu dhu bwa ki gwa'd ki miinṅkar/e mo. Dhalki me'da bim poros pini ṭorki /e gwo gom dhan mii jin caaca mo.
 5 Athopam pini uni kaaka mo eya du uni kun ta 'kup ma malik mo. Dhali 'kwani ta'kkin e bwanṅkwariny pini mo.
 6 Kursim pini a'di ta ji ma Arumgimis jin di'd ki sule/ sule/ mo. Cwa ma malik pini a'di ta cwa jin 'konuki mii mii ka gwar 'de/ mo.
 7 /E eni mo jin miinu miinṅkar/e mo dhali shi/ mo jin miinu to gun 'coṅa'coṅ i e mo. Wakan Arumgimis jin ta'da Arumgimis pini mo tani a'di 'koshki /e ki monyca mo ka yin gi mom'bor bwa apo/ uni gun ta cim pini mo.
 8 Burrinye/ ma pom pini a'di ter mo kagahara mo gom yiman cwanṅ kuyu'd 'pena murr dhali yiman gi cwa jin wana e ka 'kwaṭan mo dhali yiman cwa jin yuku gway ka salika mo. 'Peni mo ma malik pini jin ta sheny je mo tani ashun dhenṅdhenye/ uni buṅkunu mo mmo'kunye /e bwa mo.
 9 I'bwa/ gi imalik mo uni 'koni bwaman up pini kun taṅu mo. E me'da bim poros pini mo tani ayim jin ta asha malik a'di doshki'd ki 'dolkon 'peni Pa Upir jin hidhu i/is ma yim mo.
 10 Ciki gwo mo ma, ayy 'bwa/um, dhali mishi isi gwo dhali ka'di 'cem pini mo. Dhalki 'kwanim pini 'pen mo dhali gu'b gi icim mo.

- 11 Dhala malik mina bwa o gom jarom pini mo.
Me'd jin tana a'di tapam pini mo tani luji a'di mo.
- 12 Kwani gi Pan Sur uni mini sus mo ma them pini ki to kun cinu ki me'd mo, uni peni kwani kun ta pa ki pa mo,
- 13 pena ris to gun kona e ki she/ ki she/ kun tanu mo.
Bwa/ ma Malik a'di shumkunu ki burrinye/ jin shonu ka ce e ki dolkoni e mo.
- 14 Ka ris jamas burrinye/ ki she/ ki she/ mo tani ayim suskunu amalik mo nyakki nyaranyanja'b ma yim jin suski a'di mo, uni gun iyyin nyakka yim mo.
- 15 Ki bwanj kunyud dhali ki bwanj kunyuka/ mo tani uni sus uni mmontal de/ mo
me'd jin cikina uni gu'b ma malik mo be.
- 16 Mmodhal mii yansan e i is gom ibabam bum mo tani a'di midi ta iya/m bum mo.
Dhali /e mini dhu uni mmota iya/ gi mony'ceshi baar mo be.
- 17 Aha/ mina kar gway pini ki a'di midi citha cim bwa mo jin minu tak a'di mo eya risa nyakum yil gi kwani mo.
Wakan kwani baar mo mini manj /e mo gom ki sule/ mo dhali ki sule/ mo.

46

Eya manyuk gway mo. Gway gom iya/ ma Guurah mo. Isi gi gwo gom a'di jin di'd ki nyaranj gana/ mo. Gway jin yuku mo.

- 1 Arumgimis ta a'dim bana jin hura ana jwa icine/ mo dhali mom'bi'th mo, a'di jin dishi'd ka yempa/ mmowotha woth peni monto'c bwa mo.
- 2 Wakan ana mina koki ko/ is mo, ma wakki/ mony'cesh midi ak jamas e mo, ma dhali wakka ris wosh kun turatur si'da/ mini taki yikin is mo e bwaman ma dun kumma/ yi'de/ mo,
- 3 ba yi'de/ a'di gwokina is mo dhali seya gabusha/ mo,
ba dhan wosha turga/ uni deekin mo ka dulatt piti mo.
Doshi ma dhali cunycuri yan mo.
- 4 Yi'de/ jin kasha e jin gusu'd a'di jin kar penjkuman Bampa/ ma Arumgimis ki bwanj kunyuka/ mo,
dhali mo jin kogu jin ta mo gi a'di jin Eka/ Ek mo.
- 5 Arumgimis a'di di'di bwaman ma yim mo. Ayim minu mol joç mo.
Arumgimis midi wotha yim ki dishe/ shunsan mo.
- 6 Kal gi kwanyin'cesh uni shwakina bumburush mo. Dhala risa hakuuma kun kona'cesh mo uni yaki yil mo mmokala mo uni mo.
A'di bahki gwo ki twam piti mo tani mony'cesh waki'd mo be.
- 7 Tapa gi momis mo tani a'di nyakki di ki ana mo.
Arumgimis ma Yakuub a'di ta jim bana jin hura ana jwa icine/ mo.
Doshi ma dhali cunycuri yan mo.

- 8 Iiyu/ ma, hili mo mo ma, mii kun miina Tapa mo,
a'di jin wagaski mo jin ce'du/ sho'k e mony'cesh mo.
- 9 A'di doshki mo ma mee kun asu mo e pemen gi mony'ceshi baar mo.
A'di ce'dki'da bwaa mo dhali tosha mee mo.
A'di ki citha arabiyya kun dira shummarum ki o'd mo.
- 10 Doshi ka ku'th is naskina/ mo dhali mishi gwo ban ki aha/ tana Arumgimis mo.
Aha/ karu ki ca e kal gi kwanyin'cesh mo.

Dhali aha/ karu ki ca e mony'cesh mo be.

¹¹ Tapa gi momis mo tani a'di nyakki di ki ana mo.

Arumgimis ma Yakuub a'di ta jin bana jin hura ana jwa icine/ mo.

Doshi ma dhali 'cunycuri yan mo.

47

Eya manyuk gway mo. Gway gom iya/ ma Guurah mo.

¹ Tori me'd bum mo, aris 'kwani 'baar mo.

Kumi cuuwa/ mo goma Arumgimis mo ki gway jin eku/ ki nyanye/ gom bwan 'kunya/ mo.

² Haali/ Tapa, a'di jin Caa e ki Ca mo tani a'di ka/ aka/ mo, a'di jin ta dhana Malik apo/ mony'ceshi 'baar mo.

³ A'di ki dhuwa ris 'kwani e bwan'kwariny ana mo dhali aris 'kwani e bwan'kwariny sho'k bana mo.

⁴ A'di ki kwany mal bana gom ana mo, 'ba/ jin kar ma Yakuub ki ca a'di jin ena a'di mo be.

Doshi ma dhali 'cunycuri yan mo.

⁵ Arumgimis shinki bway momis cuuwa/ ilu/ mo be, dhali Tapa ki ko ma poome/ mo.

⁶ Yuki gway mmomaŋ Arumgimis mo, yuki gway mmomaŋa maŋ mo.

Yuki gway mmomaŋa Malik bana mo, yuki gway mmomaŋa maŋ mo.

⁷ Haali/ Arumgimis a'di ta 'da Malik gom mony'ceshi 'baar mo.

Yuki gway mmomaŋa maŋ ki gway jin yedhuwa ye'th sho'k mo.

⁸ Arumgimis miiki miin tapa apowa ris kal gi 'kwaniny'cesh mo.

Arumgimis ca'bki'da powa kursim piti jin kogu mo.

⁹ Iya/ gi 'kwani mo tani uni tulki isi montal 'de/ mo

me'd 'kwani ma Arumgimis ma Ibrahiim mo.

Haala gongoro/ jin ta ji gi mony'cesh mo tani a'di cil ma Arumgimis mo be.

A'di karu ki ca jin eka/ ek mo.

48

Gway jin yuku gom iya/ ma Guurah mo.

¹ Tapa a'di ta a'di jin ca'd mo dhali ta a'di jin ca'd jin minu maŋ mo e 'peŋkuman bampa/ ma Arumgimis bana mo.

² Dhali e 'kuwosha turgam piti jin turatur jin kogu mo, dhali jarom piti ki tur mo,

a'di ta moŋ'kunya/ gom 'kwaniny'ceshi 'baar mo.

A'di jin ta Wosh ma Sihyuun mo jin di'd isa dhana/ ki 'ban ma bim poros mo,

a'di jin ta 'peŋkuman bampa/ ma dhana Malik mo.

³ E bwaman gi gu'b mo gom montur piti mo tani

Arumgimis ki tor is piti eya tente/ ki a'di ta a'di jin 'ce'de'da 'ce'd she/ mo.

⁴ Bahili, imalik uni tulki 'kup mo,

uni pu'dkini montal 'de/ mo be.

⁵ Isi me'd jin parkina uni a'di e mo tani uni merkin kagahara mo.

Uni 'kokunu mmodungur 'kup is mo dhali uni sokin mo be.

⁶ Mo jin deenu is ki bir bir mo tani a'di bu'thki uni mo,

dhali uni 'pe'dki she/ me'da 'bom jin shwan ma 'ci mmomuri dho'th mo.

⁷ Ki 'tham ki mom'pesho'k poshki'd mo tani /e ki por uni bwa mo

uni gun tana kur yi'de/ gi Pan Tarshiish mo.

⁸ Me'd jin cikina ana gwo mo tani wakan si'da/ parkina ana e mo,
e 'penkuman bampa/ gi Tapa gi momis mo,
dhali e 'penkuman bampa/ ma Arumgimis bana mo,
a'di jin tel ma Arumgimis sho'k ki sule/ sule/ mo.

Doshi ma dhali 'cunycuri yan mo.

⁹ Aman kulumkina gwo ibwa gom mo/ en pini jin telu sho'k mo, ayy
Arumgimis,

e bwaman gu'b gi mondheleladhelel pini mo.

¹⁰ Me'd gway pini mo tani, ayy Arumgimis mo,
wakan moman pini a'di jidhirki'd e 'pemen gi mony'cesh mo.
Me'da bim poros pini mo tani a'di 'tu'dkunu ki mampi mii e mo.

¹¹ Dhalki Wosh ma Sihyuun a'di 'kunya bwa mo.
Dhali dhalki i'bwa/ gi 'Kwani Yahuuda/ uni 'kunya bwa mo gom mondwall
gwom pini mo.

¹² Iyi mmo'kara Sihyuun mo, dhali iyyi ka kul is mmo'kama yim is mo,
denji aris gu'b ma yim kun turatur e mo,

¹³ hili isi gwo i e ki 'bore/ goma cur ma yim mo,
iyyi e bwaman mo ma, e mo ma yim kun turatur mo
ki um mini mii tora nyakum yil 'kwani gwo i'ko'd mo,

¹⁴ ki a'di yansan ta'da Arumgimis mo,
a'di jin ta'da Arumgimis bana mo gom ki sule/ dhali ki sule/ mo.
A'di midi ta jim bana jin midi shu ana bway ki sule/ sule/ mo.

49

Eya manyuk gway mo. Gway jin yuku gom iya/ ma Guurah mo.

¹ Ciki gwo yansan mo ma, aris 'kwani 'baar mo.

Dhali ciyi 'cem bum mo, aris um gun 'kokin e mony'cesh mo,

² um gun gwa'da is mo dhali um gun 'bapkin mo,
dhali kun ta pa ki pa mo dhali kun hatha'do'd si'da/ mmonṭal 'de/ mo.

³ 'Twa/ pem midi tor gwo gom moyuk mo.

Dhali gwom pem jin kulumka/ eya du mo tani minu mish 'ban mo be.

⁴ Aha/ mina ka'd 'cem pem ki gwom 'bi'th/e mo.

Aha/ mina gam gwom pem jin 'ce'dka/ agagala/ mo ki ko ma dhenḍhenye/ jin
'kon ma shu/i pesu/ mo.

⁵ Ki gomatinta imiga/ ko/ is goma risa tente/ kun toju aha/ bwa mo,

ki imanmii tonthun kun toci aha/ 'kus mo tani 'kamki aha/ mo?

⁶ Uni gun ta 'kwanin gwaṭh kun 'ko ki 'kus gom tom buni kun tana uni mo
dhali dhu 'ba/ ki ca gom tom buni kun tana uni kun ishkin ka entus ki pa jin
tana uni mo?

⁷ Ka jin gana/ wathin kamu/ piyi'd jin midi wan is piti 'ba/ mo,

walla ciya Arumgimis she/ yol gom mondiki/em piti mo,

⁸ haali/ mo jin wanu 'ba/ gom mondiki/em piti mo tani a'di 'bitha yol she/ ki
'bi'th mo,

dhali midi mol gam ki sule/ sule/ mo,

⁹ ki a'di midi 'taki tikir di ki e ki sule/ sule/ mo,

dhali mol jisa 'kulga/ par e mo.

¹⁰ Nye, a'di midi par e ka jin gana/ ki isi 'kwani kun yukayuk wukin mo,
uni gun ta pus dhali uni gun dar gi bwan'kup mo tani uni mini mii inyak 'ce'd
sho'k imonṭal 'de/ mo

dhali dhal tom buni kun tana uni pa ki pa ki unin tiya mo be.

¹¹ Jis jwam buni mo tani a'di ta pam buni jin mina uni 'ko ki sule/ sule/ mo, a'di jin ta mo jin mina uni i'ko nyakka ris 'kwani ma nyakum yil buni mo, ba uni toshki yuka 'cesh gway ki jim buni mo.

¹² Wathi/ mol ca'b ki e e 'penkapan piti jin tana a'di mo, a'di wana e ki tonyucuk kun 'ce'dki sho'k mo.

¹³ A'di yansan ta 'pemen gi uni gwansan kun ta pus mo kun wuna wuny jwa i is mo,

a'di ta 'pemen gi uni gwansan kun 'bora bwa gom tom buni gun pwaḱkunu uni mo.

Doshi ma dhali 'cunycuri yan mo.

¹⁴ Me'd ka'bal mo tani uni dhukunu 'pen ka piye/ goma Haawiya mo.

Wu a'di midi ta amanhil uni mo,

ka ji sho'k gana/ bway jis jwa mo tani uni thulkunu mo be,

dhala yi'c buni midi shi/ is mo.

AHaawiya a'di midi ta pam buni mo be.

¹⁵ Hili Arumgimis midi wana ḱashiram pem 'ba/ mo 'peni mom'bi'th ma Haawiya mo,

haali/ a'di midi bu'th aha/ mo be.

Doshi ma dhali 'cunycuri yan mo.

¹⁶ Dhalki is ki ko/ mo wakki/ jan tal 'denj kamu/ ta pa ki pa mo,

ki monyca gi gu'b piti maru is mo.

¹⁷ Haali/ ki a'di midi wu mo tani toḱ kamu/ mina a'di kal ime'da'

Monycam piti midi diki ya ka lunḱu'b bath a'di nsho'k mo.

¹⁸ Ba, me'dyin dina a'di ki e mo tani a'di ki par is piti e ki a'di 'bora bwa ki 'bor mo,

dhali ba wathi/ maru mo ki a'di ki mii to ki 'bore/ gom is piti mo tani

¹⁹ a'di midi ya nyakki 'kwani ma nyakum yil gi icom mo,

uni gun mini mol monḱush par e ki sule/ sule/ mo.

²⁰ Wathi/ mol ca'bki e e 'penkapan piti jin tana a'di mo,

a'di wana e ki tonyucuk kun 'ce'dki sho'k mo.

50

Gway ma Asap.

¹ A'din 'De/ jin ca'bki dem dem mo, Arumgimis jin ta Tapa mo,

ki a'di ki o gwo mo dhali mony'cesh yuḱkunu mo

'peni mo jin sul ma tente/ mo ntagi mo jin yul ma tente/ mo be.

² Pena Sihyuun mo tani 'bor piti shina jaro/ ime'd mo,

Arumgimis 'twakki mo mo.

³ Arumgimis bana pu'dki'd mo a'di diki ca'bki shwamm mo,

e bwambori a'di mo tani a'di ta o'd jin loski'da los mo,

dhali mo 'kam a'di is mo a'di jin ta'da dem dem mo tani a'di ta 'thama punthar mo.

⁴ A'di yuḱki'da yuḱ gom momis jin di'da po/ momis mo,

dhali mony'cesh mo, ki a'di midi dwall 'kwanim piti gwo mo be.

⁵ Tuli aha/ kum pem is mo kun ta ku isinḱ gana/ mo,

uni gun gamki gwo me'd nyakki aha/ ki to kun 'ciḱu/ 'kus mo.

⁶ Momis bahki gwo gom mo ma ḱar/em piti mo.

haali/ Arumgimis ki is piti mo tani a'di ta'da mandwall gwo mo.

Doshi ma dhali 'cunycuri yan mo.

- 7 Ciki gwo, ayy 'kwanim pem mo, dhali aha/ mina tor gwo mo, ayy Israyiila, aha/ mina te gwo apo/ um mo. Aha/ tana Arungimis jin ta'da Arungimis bum mo.
- 8 Dhali aha/ dinaki kucur um gom tom bum gun 'citha/ um 'kus mmomiiya bas mo, walla tom bum kun cina um ki me'd mo mmoçi'th ki o'd mo ki tikir tikir ibwambori aha/ mo.
- 9 Aha/ mina mola rasim bip bu'th 'peni gu'b bum mo, walla rasi mi 'peni kal bum mo.
- 10 Haala ris tonycuk kun 'kon e bwaasho mo tani uni ta kum pem mo, dhali bip kun 'koni 'kuwosha alip mo.
- 11 Aha/ misha ris 'dii kun pen e momisi 'baar mo, dhali aris to gwansan kun joçkin e bwam bunto mo tani uni ta kum pem mo.
- 12 Wakki/ aha/ mina te/ 'taki 'kosh mo tani aha/ mina 'taki diki tor um gwoyi, haali/ mony'cesh dhali aris to gwansan kun 'koni bwaman a'di mo tani uni ta kum pem mo be.
- 13 A/aha/ 'kana shum gi gwa'thim bip mo? walla a/aha/ pina bas mi mo?
- 14 Çiyi Arungimis to jin çinu ki me'd mmo'ci'th 'kus ki bwa jin 'boruwa 'bor i is mo, dhali çiyi gwom bum kun onu is ki a'di jin Eka/ Ek mo,
- 15 dhali yuki aha/ ka tee jin toju um bwa mo, dhali aha/ mina 'cuk um mo dhali um mini kar aha/ ki ca mo be.
- 16 Hili gom a'di jin ta thus mo tani Arungimis ki o gwo mo ki: Kaja ci/e shi/ mii mmorash gwonçkan pem kun bahu e mo, walla bu'th gwonçkan pem jin gamu me'd eya le'd pini mo?
- 17 Haali/ /e shi/i mo jin dilu 'kwani abora 'ceshi e mo dhali /e ki bi't gwom pem ki nyanyon mo.
- 18 Wakki/ /e ki par wathin 'di/ e mo tani /e tana mugum piti mo be dhali /e ki ta amançjali 'pen gom uni gun buthi miinyçal me'd mo.
- 19 /E ki ci 'twam pini bway ki kany mo gom tonthus mo, dhali ale'd pini ki uk mo jin hekuwa he'k e mo.
- 20 /E ki ca'b dhali tor gwo apowa kam pini mo. /E ki thutha 'ci ki kwan 'pen mo.
- 21 To gwansan miikina um mo dhali aha/ ca'ba ki shwamm mo. Dhali /e toshkin ki aha/ nyaka is ki /e mo. Dhali hili shwane/ aha/ kucurkina /e mo, dhali kar gwonçkan ibwambori /e mo.
- 22 Nyithi gwo yansan mo ma, um gun çakina Arungimis mo, isi ciki/ ki aha/ mina bwa pu'd ka pije/ mo dhali yan'ko'd jaç kamu/ midi diki di mmo'cuk um mo be.
- 23 A'di yansan jin 'doyu to ki bwa jin 'boruwa 'bor i is mo me'd to jin 'cithu/ 'kus jin ta jim piti mo tani a'di tak aha/ mo be. E a'di jin karki bway piti ki 'bore/ mo tani aha/ mina tor bway gi mowo'th ma Arungimis mo be.

51

Eya manyuk gway mo. Gway ma Dawuu'd, me'd jin pu'dkin ma Nathan jin ta'da mançi gwo i a'di mo i'ko'di yam piti jin yakina a'di a Ba'thshaba/.

1 Miiyi mii apo/ aha/ mo ma, ayy Arungimis, isi ki gwo gi mo/en pini jin telu sho'k mo, isi ki gwo gi mii ma 'them pini jin ishki'd ka enthus mo tani 'koshi aris gwon dhan pem mo ma.

² Lami aha/ 'pena tan̄kara/ 'peni miinthus pem mo,
dhali dheleli aha/ mo 'peni miinthus pem mo.

³ Haali/ aha/ misha gwon dhan̄ pem mo,
dhali miinthus pem di'd ka yempa/ e bwambori aha/ mo.

⁴ Apo/ /e, /e 'de/ mo tani a'di imiikika/ miinthus mo,
dhali mii a'din thus yin jin shi/a shi/ e bwambori jis/em pini mo,
wakan /e karu ki mo ma kar/e e gwom pini jin tora /e 'twa/a 'cesh mo,
dhali dar gi mii 'ba/ e gwon dwall pini mo.

⁵ Hili mo mo ma, aha/ kalunu ka pije/ e miinthus mo,
dhali e miinthus mo tani ata'dam pem bwaaki aha/ mo be.

⁶ Hili mo mo ma /e ona bwa ki gwon̄ gana/ e isi bwaman ma dum 'per mo.
Dhali gom gwo gi wakan mo tani tori aha/ gwo gom moyuk̄ mo eya dum pem
ki kup mo.

⁷ Dhagami aha/ mo ki cwa jin wana e ka 'tasha jalbip mo, dhali aha/ mina
dheleladhelel mo.

Lami aha/ mo dhali aha/ mina ca'bki bany bany mmobola wasa/ e mo.

⁸ Tu'di aha/ ki bwam 'borga/ mo dhali ki bwan̄ 'kunyga/ mo.
Dhalka sima/ jin 'ce'da /e mo 'kunya bwa mo si'da/.

⁹ Bagi jis/em pini 'peni miinthus pem mo
dhali 'koshi aris miinthus pemi 'baar mo.

¹⁰ Uki e aha/ adun dhelelga/ mo, ayy Arungimis,
dhali kar jin this dhali jin 'boro'd e bwaman shi/in pem mo.

¹¹ Dhalku/ ki bit̄ aha/ asho 'peni buŋ'kus pini mo,
dhali dhalku/ ki bu'th Shi/in dhelel dhelel pini 'peni aha/ mo.

¹² Wari bwan̄ 'kunyga/ is e aha/ mo e bway gi mowoth̄ pini mo,
dhali buthi aha/ me'd ki bwa gi shi/in mo.

¹³ Dhali yan'ko'd aha/ mina tor̄ imandhan̄ gwo bway pini mo,
dhali imanmii miinthus mo mini tu'k mo e /e mo be.

¹⁴ Cu'ki aha/ mo 'pena bas gi aha/ jin dina mii i'ba/ mo, ayy Arungimis,
/e jin tana Arungimis mo tani ita bway gi mowoth̄ pem mo be,
dhali ale'd pem midi yuk̄ gway ki 'kal 'kal gom mony'cu'k pini mo be.

¹⁵ Ayy Tapa, ka'di /e 'twa/ pem mo ma,
dhali 'twa/ pem midi tor̄ moman̄ pini mo.

¹⁶ Haali/ /e dina bwa ki 'kuny mo e mo jin 'ciŋhu/ to 'kus mmomiya bas mo.
Wak̄ki/ aha/ mina 'taki ci to ki me'd mmoci'th ki o'd mo tani /e mini 'taki diki
'bor bwa mo be.

¹⁷ To jin 'ciŋhu/ 'kus mmomiya bas jin mish ma Arungimis bu'th mo tani a'di
ta shi/in jin 'ce'dkunu mo.

Dhali mo ma du jin 'ce'du mo dhali adu jin waki'd mo tani, ayy Arungimis,
/e mini diki usha ush mo.

¹⁸ Miiyi ki 'bore/ gom Sihyuun mo e bwan̄ 'kunygam pini mo.
Nyan̄ji dok̄/e agon̄ gi Pa Urushaliim mo.

¹⁹ Dhali yan'ko'd /e mina bwa 'kuny mo e to jin cinu ki me'd mo mmo'ciŋ
'kus jin 'boro'd mo,
dhali e to jin cinu ki me'd mo mmoci'th ki o'd mo dhali kun ciŋhu/ ki o'd ka
'bimpil mo,
dhali yan'ko'd gwasimbip uni minu 'ciŋ'kus eya gwa'am pini mo.

52

Eya manyuk gway mo. Gway jin yuk ma Dawuu'd mmoyetha ye'th sho'k mo me'd jin pu'dkin ma Duwaag jin ta Wathi/ gi Pan Aduum, dhali tora Shawuul gwo mo ka: Dawuu'd pu'dki'd mo e gu'b ma Akimaalik mo.

¹ Atinta kara /e 'ba/ ki ca mo, ayy wathi/ jin ca'bki dem dem mo?

mmota pibi apo/ 'kwani kun tana gayiin mo.

Isa yempa/ /e kar gwo shiyi'd e ilu/ mo mmo'ce'da 'ce'd sho'k mo.

² Twam pini kaaka me'da nyer mo,

/e jin tana manmii mii jin hekuwa he'k e mo.

³ /E ki en tonthus mmobol jin 'boro'd e mo

dhali /e ki o gwo ka tor mmobol gwon gana/ e mo.

Doshi ma dhali 'cunycuri yan mo.

⁴ /E ki en aris gwo kun losina los mo,

ayy /e jin tan ma le'd pini ahe'k e ka he'k e mo.

⁵ Hili Arumgimis midi 'ce'd /e bwa ka 'cesh ki sule/ mo.

A'di midi bor /e mo dhali dher /e bwa mo 'peni gu'b burrinyem pini mo.

Dhali /e minu yu'd mo 'peni mo jin 'kona 'kwani mo.

Doshi ma dhali 'cunycuri yan mo.

⁶ Unij kar/e mini par e mo dhali ko/ is mo

dhali pe'th a'di mo mmo/o gwo mo ki:

⁷ Hili wathi/ yan jin 'tena bwa mmokara Arumgimis ki a'dim piti jin hura a'di jwa icine/ mo,

hili a'di ki gam gwo is e tom piti jin ishin ka enthus jin tana a'di pa ki pa mo,

dhali a'di ki naj mo jin huru jwa e 'penkapan piti jin tana a'di mo.

⁸ Hili aha/ wana e ki cwa setuun jin ca'bki go'd go'd

e gu'b ma Arumgimis mo.

Aha/ gamkina gwo is e mo/en ma Arumgimis jin telu sho'k

ki sule/ ki sule/ mo.

⁹ Aha/ mina ci /e bwam 'boro'di is ki sule/ ki sule/ mo,

haali/ /e miiki a'di mo.

Aha/ mina bah gway pini haali/ a'di 'boro'd mo be,

e bun'kus uni kun tana gayiin mo be.

53

Eya manyuk gway mo, isi ki koj gway jin gwonu gom bwan di'ti'd mo. Gway jin yuk ma Dawuu'd mmoyetha ye'th sho'k mo.

¹ A'di jin ta pus mo tani o gwo eya dum piti mo ki: Arumgimis piyi'd mo.

Uni pu'kin mo, dhali uni mii mii kun bulabul mo.

Jan kamu/ jin mii'd ka kar/e yisa di'da.

² Tapa hilki mo ka lungu'b 'peni mis

apo/ uci gi 'kwaniny'cesh mo

mmopar e mo wakki/ jan tal 'den kamu/ mii mii ki yuk yuk mo,

mmosimm jasi Arumgimis e mo.

³ Uni 'baar mo iikini dheres mo,

uni 'baar mo wakina e ki to kun pu'kin mo.

Jan tal 'den kamu/ yisa di'da jin mii mii jin 'boro'd mo,

tal 'de/ piyi'd mo be.

⁴ 'Kona uni ki nyitha, aris uni gwansan kun mii tonthus mo,

uni kun shwa 'kwanim pem me'd tonte/ mo

dhali uni 'koki yuka Arumgimis mo?

⁵ Uni nanni kun 'kon e dhan mo kun kogu is mo,
mo jin kogu is wakan diki di 'peni kadhamo/ mo.

Haali/ Arumgimis midu rasa sima/ gi 'kwani kun ushuna Arumgimis mo.
Uni minu dhu ki mo ma 'the is mo haali/ Arumgimis wakki uni mo be.

⁶ Ayy mo jin 'cukuwa 'cuḡ gom 'Kwani ma Israyiil mo tani a'di midu 'taki pu'du/
'pena Sihyuun moyi.

Ka Arumgimis midu wara shamanettan ki 'kwanim piti is mo tani
Yakuub mina bwa 'kuny mo dhali Israyiil mina bwa 'bor mo be.

54

Eya manyuk gway mo ka shu/ kun buku gway mo. Gway ma Dawuu'd jin yetha a'diya ye'th sho'k mo me'd jin pu'dkina 'Kwani gi Pan Siip mmotora Shawuul gwo mo ka Dawuu'd bagki'd e bwam am mo.

¹ Tayi aha/ is ki me'd mo ma, ayy Arumgimis mo, ki gway pini mo,
dhali yeyi aha/ mo ki mo ma dem dem pini mo.

² Ciki mon'thom pem mo ma, ayy Arumgimis.

Ciyi 'cem pini ki gwo gi 'twa/ pem mo.

³ Haali/ iman/ ush 'kwani ga/ mo tani uni cu mis apo/ aha/ mo,
dhali imangora bwa ki gor mo tani uni ḡapki mondiki/em pem mo.

Dhali uni 'koki kara Arumgimis ibwambori jis/em buni mo.

Doshi ma dhali 'cunycuri yan mo.

⁴ Hili mo mo ma, Arumgimis ta'da manwoth pem mo,
dhali Tapa a'di ta'da manṭel aha/ mondiki/em pem sho'k mo.

⁵ A'di midu ri'c 'kwani kun ta 'kup ki aha/ ki tonthus mo.

Dhali e mii ma isin ganam pini mo tani /e mini daḡ uni 'pemen buni 'kup mo
be.

⁶ Ki bwam pem jin di 'baḡany mo tani aha/ cina to jin 'ciṡhu/ 'kus mmomiiya
bas ki /e mo.

Dhali aha/ mina ci mo jin 'boruwa 'bor bwa i is ki gway pini mo, ayy Tapa,
haali/ mii yan a'di 'boro'd mo be.

⁷ Haali/ /e 'cukki aha/ mo 'pena ris mont'o'c bwam pem mo,

dhali em pem hilki mo jin pinu mii e apo/ 'kwani gun ta 'kup ki aha/ mo be.

55

Eya manyuk gway mo ka shu/ kun buku mo. Gway ma Dawuu'd jin yetha a'diya ye'th sho'k mo.

¹ Ciyi 'cem pini ki mon'thom pem, ayy Arumgimis.

Dhali dhalki is pini ki ba'k mo 'peni tom pem jin dotka/ ka di'b is mo.

² Kuthi is gom aha/ mo, dhali thoḡi aha/ gwo mo.

Aha/ kumu 'twa/a 'cesh ki mont'o'c bwam pem mo.

³ Dhali aha/ guskina du mo gom cuuwa/ gi 'kwani kun ta 'kup mo,
haali/ 'kwani kun ta thus ki thus mo tani uni siri'ckina siri'c ki sho'k mo.

Haali/ uni kali mo jin toju bwa apo/ aha/ mo

dhali ka nyor mo tani uni ki thiḡ mo ma dupe/ apo/ aha/ mo.

⁴ Dhali adum pem 'pe'di she/ e bwaman is pem mo,
dhala pure/ gom mowu biṡki'da po/ aha/ mo.

⁵ Monḡo/ is dhali mondee is pu'dkina po/ aha/ mo,

dhali to jin ko/ki aha/ is mo tani uni kumki aha/ 'twa/a 'cesh mo.

6 Dhali aha/ ona gwo mo ki: Ayy waḳki/ aha/ mina 'taki ta ga bi me'd gurko/ mo tani

aha/ mina 'taki pe mo dhali si/ is mo be.

7 Nye, aha/ mina ya si'dasi'd moyi

Aha/ mina ya ɕa'b e mombwaasho moyi.

Doshi ma dhali 'cunycuri yan mo.

8 Aha/ mina lala ki jahanneyi dhali gama darha'dam pem

'peni mo ma bumburush 'tham mo dhali 'thama punthar mo.

9 'Ce'di tom buni jin thosona uni sho'k sho'k mo ma, ayy Tapa. ɕumbulki uni ale'd buni mo,

haali/ aha/ hilkina mo jin bujura bujur mo dhali mo jin biruwa bir e 'penkuman bampa/ mo.

10 Montee dhali mon'thiny uni iikin ka kul is e yana gangaram piti mo,

dhali mo jin tanuwa pibi dhali mo jin toju bwa mo tani 'kon e uni mo.

11 Mo jin doru sho'k ka pupush mo tani a'di di'd e bwaman a'di mo,

dhali mo jin sirijuwa siri'c ki sho'k mo dhali mo jin hekuwa he'k e mo tani uni 'koki ii mo 'peni mo ma suug piti mo.

12 A'di diki ta a'di jin ta 'kup ki aha/ jin 'bakaa e mo -

ki aha/ mina 'taki mish a'di ɕal mo.

A'di diki ta a'di jin ta 'kup ki aha/ jin tu/ul mo jin gora bwa ki gor apo/ aha/ mo,

ki aha/ mina 'taki bag 'peni a'di mo.

13 Hili /e be, jin wa e ki aha/ ki is pem mo,

/e jin nyak ya ki aha/ mo, dhali /e jin tana waḳ pem mo.

14 Me'dyin mo ana nyaka tor tori montal 'de/ mo jin 'kunya'kuny mo.

E gu'b ma Arumgimis mo tani ana iina mmonyak to mii mo.

15 Dhalki mowu pu'du'd apo/ uni mo.

Dhali dhalki uni 'donu ki e eya Haawiya mo.

Dhali dhalki uni iin e bwaya pure/ gi mon'kupajem buni mo.

16 Hili aha/ yukkina Arumgimis mo.

Dhali Tapa midi ta aha/ is is ki me'd mo.

17 Mom'pimpili/ dhali mon'thamo/ dhali montee mo tani

aha/ bahkina gwo ma 'thupin 'twam pem mo dhali ko mo,

dhali a'di midi cik 'twam pem mo.

18 A'di midi 'cuḳa ɕashiram pem ki 'dantar mo

'peni mo ma mee jin miga/ 'taki as mo,

haali/ 'kwani tana ris miina bumburusha po/ aha/ mo.

19 Arumgimis midi ci 'cem piti mo dhali dhu uni ki gwa'd mo,

a'di jin diki'd eya kursi ma maliḳ kadhamo/ mo.

Haali/ uni 'koki dhu gwonḳan jin cinu mo

dhali uni 'koki ɕo/ Arumgimis mo.

Doshi ma dhali 'cunycuri yan mo.

20 Amannyak yam pem a'di he'thki'da bim piti mo apowa mugum piti mo,

a'di 'ce'dki gwom piti jin gama a'di me'd mo.

21 Gwom piti jin ona a'di mo tani a'di na'bulana'bul mmobola yina ko e mo,

hili anyor di'd eya dum piti mo.

Dhali gwom piti 'capuḳa/ 'capuḳ mmobola yin e mo,

hili uni wana e ki gandal kun 'de'kkunu she ki mis mo.

22 Taki to jin diti'd pini apo/ Tapa mo
dhali a'di mididi kal gom /e mo.
A'di mididi diki dhal jan kamu/ jin ta'da kar/e mmojoç mo.

23 Hili /e ayy Arungimis mini ta'k uni ka lungu'b mo
e jis jin 'kula'kul mo.
'Kwani kun wol tiya bas mo dhali kun wa'thkina wathi/ e mo tani
uni mini 'koki 'ko ki e mo ka teem bunin 'de/ i'tu'd mo.
Hili aha/ mina gam gwo is e /e mo be.

56

Eya manyuk gway mo, isi ki koŋ gurko/ kun 'kon e cwa kun si'dasi'd kun wana e ka ciŋŋ mo. Gway jin karu ki kup jin ta jima Dawuu'd mo me'd jin bu'thkina 'Kwani Piliŋthiin a'di mo e Pany Jatt mo.

1 Miiyi mii ka 'the gom aha/ mo ma, ayy Arungimis, haali/ 'kwani yapki aha/ ki sho'k mo.

Yula tente/ mo 'kwani kun ta 'kup ki aha/ uni siri'cki aha/ apo/ ki sho'k mo.

2 Uni gun ta 'kup ki aha/ mo tani uni yapki aha/ ki sho'k mo yula tente/ mo, haali/ 'kwani tana ris kun askina po/ aha/ ki 'ba/ gun dhuna uni ki ca mo.

3 Ki aha/ ko/kina is mo tani aha/ karkina moŋgam gwo is pem e /e mo be.

4 Eya Arungimis mo, a'di jin maŋka/ gwom piti mo, eya Arungimis mo tani aha/ gama gwo is ki dar gi moŋko/ is mo. Buŋgwar is mididi miiya tinta ki aha/ mo?

5 Yula tente/ mo tani uni simmki mii e mo mmoŋtaç aha/ jama/ gom tom pem jin rakki aha/ mo.

Aris gwom buni 'baar mo kun kulunkina uni ibwa apo/ aha/ mo tani uni ta thus ki thus mo.

6 Uni 'tuntulki is buni imonta' de/ mo, dhali uni wupkina 'cesh mo. Uni çorki ŋatgin pem mo.

Me'd jin çorkina uni mondiki/em pem mo,

7 wakan raçi uni to ibway mo gom tonthus buni mo kun miikina uni mo, ka nyor pini mo tani Arungimisa, taki 'kwani gwan ka 'cesh mo, ayy.

8 /E denki yam pem jin wuŋkulkika/ e mo.

Te'di jabu'th em pem eya gasaas pini mo.

'Kona uni ki 'ko eya warkam pini mowa?

9 Dhali yan'ko'd mo tani uni kun ta 'kup ki aha/ mo tani minu tu'k ka nyar'ko'd mo

ka tee jin miga/ yuka yuk mo.

Dhali aha/ misha ka jin gana/ ka Arungimis ta a'di gom aha/ mo be.

10 Eya Arungimis mo, a'di jin maŋka/ gwom piti mo,

e Tapa, a'di jin maŋka/ gwom piti mo,

11 Eya Arungimis mo tani aha/ gama gwo is ki dar gi moŋko/ is mo.

Ton tinta a'di imina 'kwani mii gom aha/ mo?

12 Gwom pem kun oka/ is e /e mo tani aha/ mina thim uni mo, ayy Arungimis. Aha/ mina çu mo jin 'boruwa 'bor bwa i is ki to jin çinu mmo'cih' kus gom /e mo.

13 Haali/ /e 'cukkina kashiram pem mo 'peni mowu mo, nye, sho'k pem 'tasha /e 'twa/ 'peni mombit mo, ki aha/ mina ya ibwambor ma Arungimis mo, e moŋkush gi mondiki/e mo.

57

Eya manyuk gway mo, isi ki gwo jin minu 'koki 'ce'd sho'k mo. Gway jin karu ki kup jin ta jima Dawuu'd mo me'd jin guskina a'di mo 'pena Shawuul mo e jurum wosh mo.

¹ Miiyi mii e aha/ mo, ayy Arumgimis, dhali miiyi mii e aha/ mo, haali/ e /e mo tani akashiram pem bu'thki mo jin huru jwa mo. Dhali eya la ma bim pini mo tani aha/ bu'thki mo jin hurga/ jwa mo, ntagi 'thama punthar jin 'ce'di'da 'ce'd sho'k peki'd mo be.

² Aha/ gwokina 'twa/ Arumgimis jin Caa e ki Ca mo, eya Arumgimis jin thimki 'kup miim 'boro'd piti gom aha/ mo.

³ A'di mididi hasha hash 'peni momis dhali ta aha/ is ki me'd mo, dhali a'di mididi dhu uni gwansan ki mon'the is mo, uni gun yapki aha/ ki sho'k mo.

Doshi ma dhali 'cunycuri yan mo.

Arumgimis mididi hashi mo/en piti jin telu sho'k mo dhali mii ma isinj ganam piti mo.

⁴ Aha/ isha e bwaman ma risa dhop mo uni gun pitilki iya/ gi 'kwani bwa ki she/ mo. Shem buni waka mee mo dhala thopa/ mo, dhali ale'd buni kaaka me'd gandal mo be.

⁵ Dhalki /e karu ki ca mo, ayy Arumgimis, apowa ris momisi 'baar mo. Dhalki monycam pini a'di di'da po/ mony'ceshi 'baar mo.

⁶ Uni karkina kume/ gom natgin sho'k pem kun dhuka/ mo, akashiram pem a'di di ki 'kup ka lungu'b mo.

Dhali uni cwanyki jis e bway pem jin yaka/ mo, hili uni ki is buni uni ita'kkin e jis buni jin cwanya uni mo.

Doshi ma dhali 'cunycuri yan mo.

⁷ Adum pem telkunu sho'k mo, ayy Arumgimis, adum pem ka jin gana/ a'di telkunu sho'k mo. Aha/ mina yuk gway mo dhali nann gway mo.

⁸ Meri e mo ma, akashiram pem.

Meri e mo ma, ayy adhen'dhenye/ dhali adhen'dhenye/ jin 'kon ma shu/i pesu/ mo.

Aha/ mina mer mo gi mon'thamo/ e mo.

⁹ Aha/ mina ci mo jin 'boruwa 'bor bwa i is ki /e mo, ayy Tapa, e bwaman ma ris 'kwani mo.

Aha/ mina yuk gway mo dhali mar / e mo e bwaman ma ris kal gi 'kwaniny'cesh mo.

¹⁰ Haali/ mo/en pini jin telu sho'k mo tani a'di caaca kagahara e momis mo, dhali mo ma isinj ganam pini jin tana /e mo e bwaman ma risa rak mo.

¹¹ Dhalki /e karu ki ca mo, ayy Arumgimis mo, apowa ris momisi 'baar mo. Dhalki monycam pini a'di di'da po/ mony'ceshi 'baar mo.

58

Eya manyuk gway mo, isi ki gwo jin minu 'koki 'ce'd sho'k mo. Gway jin karu ki kup jin ta jima Dawuu'd mo.

¹ A/um ka jin gana/ kani gwo ki isi kan gana/, um kun ta 'kwani ma tul 'kupa? A/um dwali iya/ gi 'kwani gwo ki dwall gana/ mowa?

- 2 Yisa, eya dum bum mo tani um usha 'ce 'kol mo eya dum bum gom tonthus mo.
Me'd bum tu/ul mo jin bujura bujur e mony'cesh mo.
- 3 Imanmii tonthus mo iikini dheres mo 'peni bwa gi ikum mo,
uni thamki mii 'pena cim gun dhodhu uni mo tani uni thamki gwo o ka tor mo.
- 4 Uni tan ga ti'd me'da ti'd tasha/ mo,
me'd tashan 'thi/ jin ta'da 'diye/ mo jin 'dapki bwany'cem piti 'twa/ mo,
5 wakan jin mina a'di diki cik gwalish gi wathi/ mo
walla lat jin latu/ a'di mo.
- 6 Ayy Arumgimis, 'ce'dki uni she/ e bwana 'twam buni mo.
Bukki uni sher gwolingwotha/ mo 'peni ushi dhuru'c ma dhop mo, ayy Tapa.
- 7 Dhalki uni pikin ki jahanne/ me'd yi'de/ jin gusu'di 'cith 'pen mo,
dhali wa e ka sho si'da/ jin tora monkuthu'd 'ko'da 'cesh mo dhali ku'th mo.
- 8 Dhalki uni wana e ka homo'th jin yu moros mo,
dhali me'da 'ci jin tagu ka dho'th piti jin moloda tente/ par e mo be.
- 9 Ki 'dishe/ tani anos bum mina 'ko'd gwari 'batha'ba'th me'da 'de/ jin shwana o'd mo,
wakki/ ta'da go'd go'd walla diki'd mo/o'd mo tani dhalki a'di dhi'th uni sho'k ki jahanne/ mo.
- 10 Amanmii miin'kar/e mo tani a'di mina bwa 'kuny mo haali/ a'di midi par mo jin ri/uwa ri'c e mo be.
Dhali a'di midi lam sho'k piti ka bas gi 'kwani kun ta thus ki thus mo.
- 11 'Kwani mini o gwo mo ki: Ka jin gana/ to jin ish kumma/ mo tani di'd gom 'kwani' kar/e mo.
Ka jin gana/ Arumgimis di'd mmodwall gwo apo/ mony'cesh mo be.

59

Eya manyuk gway mo, isi ki gwo jin minu 'koki 'ce'd sho'k mo. Gway jin karu ki kup jin tajima Dawuu'd mo me'd jin hashkin ma Shawuul 'kwani mo mmotim gu'b piti mmo'taki 'kosh a'di jwa mo be.

- 1 'Cuki aha/ mo ma 'peni 'kwani' kup pem mo, ayy Arumgimis pem,
ceshi aha/ 'peni uni gwansan kun cuuna po/ aha/ mo.
- 2 'Cuki aha/ mo 'peni uni gwansan kun mii tonthus mo,
dhali tayi aha/ is ki me'd mo 'peni 'kwani gwansan kun 'kosha te/ mmowol 'kwaniya bas mo.
- 3 Haali/ hili mo mo ma, uni ishkin mmo'cor mondiki/em pem mo,
'kwani kun 'cithira/ 'cithir mo tani uni 'tuntulki is buni imontal 'de/ apo/ aha/ mo.
- Gom gwon dhan pem walla miinthus pem yisa, ayy Tapa,
4 walla gom miim pem jin thamka/ yisa, uni urkina uri sho'k mo dhali thoson is mo.
- Muri is pini mo, dhali pu'du/ mo dhali woth aha/ mo, dhali pari mii yan e mo.
- 5 /E, jin ta Tapa Arumgimis gi momis mo tani, /e tana Arumgimis ma Israyiil mo be.
- Meri is mo dhali ciya ris kal gi 'kwaniny'cesh to kun wana e ki miim buni mo.
Dhalku/ ki dhal jan tal 'dej kamu/ bway mo 'peni uni gwansan kun 'dapa e ki mii ma wu'th gi tonthus mo.

Doshi ma dhali 'cuncuri yan mo.

- 6 Mom'pimpili/ isa yempa/ mo tani uni pu'dkin ka nyan'ko'd mo

mmobuk me'da 'ka ka ris mo dhali 'thil is buni e 'penkuman bampa/ mo.

⁷Uni anann be, gwona bombok ki 'twam buni mo,

dhali kaa 'twa/ i is ki 'twam buni mo -

haali/ kaja ikuluma uni gwo ibwa mo mmo/o gwo mo ki: Kaja imidi cik ana mo?

⁸Hili /e, ayy Tapa, /e pe'thki uni mo,

dhali /e dhukina ris kal gi 'kwaniny'cesh mmota uni gun waku mo.

⁹Ayy Mom'bi'th pem mo tani aha/ mina yuk gway mo mmoman/ e mo,

haali/ /e, ayy Arumgimis, tana cur pem jin tenu gwo mo.

¹⁰Arumgimis pem jin di'd e mo/en piti jin telu sho'k mo tani a'di mididi gam aha/ 'kup mo.

Dhali Arumgimis pem a'di mididi dhal aha/ bway mo mmopar mo jin pinu mii e mo apo/ uni gun ta 'kup ki aha/ mo.

¹¹Dhalku/ uni ki 'kosh jwa mo, isi ciki/ tagi 'kwanim pem mini this uni e mo.

Dhuyi uni mmomol dosh shoka 'cesh mo ki mom'bi'th pini mo, dhali 'doku/ uni ka lungu'b mo,

ayy Tapa, jin ta jim bam jin ta'da gongoro/ mo.

¹²Haali/ gom miinthus kun miikina uni ki 'twam buni mo, dhali ki gwo ma le'd buni mo,

dhalki uni bu'th ma kume/ gi 'bam buni kun dhuna uni ki ca mo.

Gom gwo ma jee dhali gwo ma tor kun baha uni mo tani

¹³shwayi uni ki 'ci'd'da/ ka nyor pini mo,

shwayi uni ki 'ci'd'da/ ntagi uni mini 'koki 'ko dok/ e mo, ki 'kwani mini mish ki /e tana Arumgimis jin ji 'kwani ma Yakuub mo

ntagi 'pemen gi mony'cesh mo be.

Doshi ma dhali 'cunycuri yan mo.

¹⁴Mom'pimpili/ isa yempa/ mo tani uni pu'dkin ka nyan'ko'd mo

mmobuk me'da 'ka ka ris mo

dhali 'thil is buni e 'penkuman bampa/ mo.

¹⁵Uni tani mo ki tantan gom tonte/ mo,

dhali cesh mo ki narash mo wakki/ uni 'koki kapa dum buni mo.

¹⁶Hili aha/ mina yuk gway gom mo ma dem dem pini mo.

Dhali aha/ mina yuk gway ki 'kal 'kal gom mo/en pini jin telu sho'k mo e mon'thamo/ mo.

Haali/ /e takina cur jin tenu gwo gom aha/ mo

dhali /e ta jim pem jin hurga/ jwa icine/ mo ka teem pem jin dika/ ka cis mo.

¹⁷Ayy Mom'bi'th pem mo tani aha/ mina yuk gway mo mmoman/ e mo,

haali/ /e, ayy Arumgimis, tana cur pem jin tenu gwo mo,

/e jin tana Arumgimis jin tor ki aha/ mo/en pini jin telu sho'k mo.

60

Eya manyuk gway mo, isi ki konj gway jin yuku gom jandin to mo. Gway ma Dawuu'd jin yedhu sho'k mo dhali gwo ma ye'th sho'k jin yedhu me'd jin kalkina a'diya shir shir uni ka Araam Nahreen mo dhala Araam Suba mo dhali me'd jin pu'd ma Yuwab e kul piti jin dokkina a'di me'd jin 'koshkina a'di 'Kwani gi Pa Aduum kun 'koni alaapi 'kume'd i'ce'dka su/ mo e embul Wosh ma 'Donkoro/ mo.

¹Ayy Arumgimis, /e wakki aman mo, dhali 'ce'd mom bam jin 'ce'du/ gwo she/ mo.

/E miikina nyor mo. Ayy, waru/ aman is mo ma.

²/E karki mony'cesh mmoyikin is mo. Dhali /e ki 'twak a'di bwa mmothek she/ mo.

Nyanj a'di ka nyanj'ko'd mo e mom piti jin shi/ki'd mo, haali/ a'di mol dosh shoka 'cesh mo.

³/E ki dhal 'kwanim pini mmo'kosh is ka nyor ki to kun 'batha'ba'th mo, /e ki dhu am me'd 'kwani kun sona du mo gom to kun di'adit kun 'kosh am mo.

⁴/E ki kar mom pini jin ta'da berag gom uni gwansan kun ko/ki /e mo, mmocuna uni ki bimbir 'peni a'di jin ta jin gana/ mo.
Doshi ma dhali 'cunycuri yan mo.

⁵Wakan ki unim pini gun ena /e mo minu 'cuk mo, ciyi mo jin pinu mii e ki me'da bim poros pini mo dhali tho' am gwo mo.

⁶Arungimis oki gwo e mom piti jin kogu mo.
Nyakki gway jin yuku ki mon'kuny bwa mo tani aha/ mina kwa/ Pan Shakiim bwa mo

dhali dhu uni ka bwanykin 'peni embul ma Sukkuut mo.

⁷Dhala Jil/aad, a'di ta jim pem mo. Dhala Manassa a'di ta jim pem mo.

Dhala Eprayim a'di ta toj'kup pem mo.

Dhala Yahuuda/ a'di ta cwa ma malik pem mo.

⁸Muwab a'di ta mom pem jin 'thurka/ me'd mo.

Dhali apo/ Pan Aduum mo tani aha/ yipa ppam pema po/ mo.

Dhali apo/ Pam Palasthiin mo aha/ mina 'ther cuuwa/ gom mo jin pinu mii e mo be.

⁹Kaja a'di imidi sus aha/ e 'penkuman bampa/ jin tenu gwo mo?

Dhali kaja a'di imidi shu aha/ bway mo e Pan Aduum mo?

¹⁰/E a'di idiki wak amana, ayy Arungimis?

/E diki kal ya ka bor mo, ayy Arungimis, nyakki 'kwani ma meem bam mo.

¹¹Ayy tuka bor ma, woth am mo 'pena po/ 'kwani kun ta 'kup ki am mo,

haali/ mowoth jin ta gi wathi/ mo tani a'di ta jim pe'th mo be.

¹²Nyakka Arungimis mo tani ana pina mii e mo

haali/ a'di ta a'di jin siri'cki uni gun ta 'kup bana ki sho'k mo.

61

Eya manyuk gway mo ka shu/ kun buku mo. A'di jin ta gway ma Dawuu'd.

¹Ciki gwom pem mo ma, ayy Arungimis, kari 'ce gom mon'thom pem mo,

²'peni 'pemen gi mony'cesh mo tani aha/ yukkina /e mo me'd jin 'thin ma dum pem buye/ mo be.

Susi /e aha/ mo e wosh caan jin turatur mmobol aha/ e mo,

³haali/ /e ta jim pem jin hurga/ jwa mo,

/e ta a'di jin waki gu'ba turga/ jin 'bitha'bi'th apo/ 'kwani kun ta 'kup ki aha/ mo.

⁴Dhalki aha/ ca'ba e gu'b burrinyem pini ki sule/ sule/ mo.

Ayy mmodi ki 'dantar e bwan'kwariny ma darha'dam pini jin ta'da bi mo.

Doshi ma dhali 'cunycuri yan mo.

⁵Haali/ /e, ayy Arungimis, cikki gwom pem jin oka/ is mo,

/e ciki aha/ mal gi uni gwansan kun ko/ki gway pini mo.

⁶Galali mondiki/e ma malik mo.

Dhali dhalki yil piti 'dim 'kup ntaga risa nyakum yil gi 'kwaniny'cesh mo.

⁷Dhalki a'di karuwa kursi ma malik ki sule/ sule/ ibwambor ma Arungimis mo.

Dhalku/ ki non mo/en jin telu sho'k mo dhali mii ma isinj gana/ mmotim a'di apo/ mo.

⁸ Dhali aha/ mina yuḵ gway mo mmomaṅ gway pini mo,
me'd jin ɕikika/ gwom pem jin oka/ is 'ko'da tee 'ko'da tee mo.

62

Eya manyuḵ gway mo, isi ki gwo ma Yaduthuun mo. Gway ma Dawuu'd.

¹ Goma Arungimis 'de/ mo tani a'di iḡor ma ƙashiram pem ki shwamm mo.
'Peni a'di mo tani mowoṯ pem pu'dki'd mo.

² A'din 'deṅ gana/ ita wosh pem mo dhali bway gi mowoṯ pem mo
dhali acur pem jin ɕenu gwo mo. Ki aha/ minu 'koki joḡ mo ki joḡ jin shiyi'd
mo.

³ Um mini daḵ mo kakasja mmo'ko apo/ 'kwani mo mmo'ce'd uni bwa mo,
aris umi 'baar mo,
kun wana e ka goṅ kun ishki gal mo, agoṅ jin dar gi mo jin kar shoka 'cesh
mo?

⁴ Uni i'kona gwo ibwa mo mmoyap a'di ki sho'k 'pena ris 'kup piti mo.

Uni 'kunykina bwa ki 'kuny gom gwon thus mo.

Uni 'borki 'twam buni mii mo,

dhali hili e bwaman ma dum buni mo tani uni jeekina jee mo.

Doshi ma dhali 'cunycuri yan mo.

⁵ Goma Arungimis a'di 'de/ mo tani a'di iḡor ma ƙashiram pem ki shwamm
mo.

Haali/ mo ma 'teṅ kapem pem mo tani a'di 'peni a'di mo be.

⁶ A'din 'deṅ gana/ ita wosh pem mo dhali bway gi mowoṯ pem mo
dhali acur pem jin ɕenu gwo mo. Aha/ minu mol yiḡin is mo be.

⁷ Eya Arungimis mo tani mom pem jin sika/ is gom mony'cuḵ mo dhali
montaḵ mo tani 'kon e a'dim pem

jin ta wosh jin eḵa/ eḵ mo, dhali a'dim pem jin hurga/ jwa mo tani a'di ita'da
Arungimis mo be.

⁸ Gami gwo is e a'di ka tee i'baar mo, ayy 'kwani.

Woli adum bum ibwambori a'di mo.

Haali/ Arungimis ta a'di jin mina ana hur jwa icine/ mo.

Doshi ma dhali 'cunycuri yan mo.

⁹ 'Kwani kun hatha moṅ'ko 'ko'd ki ha'th mo tani hili 'kon jasi ari'ceenne/ mo.
'Kwani kun 'kon e mo jin kapa 'penkapan mo tani suskunu this e mo eya dum
buni mo.

Dhali mombar buni 'deke'thki'd isi mis mo.

Uni tawasha tawash mo mmobola wulpe/ e mo.

¹⁰ Dhalku/ ki dhu mo jin wunu awuny jwa i is e mo jin dilu to mo.

Dhalku/ ki dhu mo ma 'te/ ma kapem bum ki pe'th e mo jin ƙwalu to mo.

Wakki/ mo jin tanu pa ki pa mar is mo tani dhalku/ ki dhu adum bum 'ko'di
uni mo.

¹¹ Me'd 'de/ Arungimis oki gwo mo.

Me'di su/ mo tani aha/ ɕiḵkina gwo yansan mo

ki mom'bi'th ta jima Arungimis mo

¹² dhali e /e mo tani ayy Tapa, mo/en jin ɕelu sho'k mo cila /e mo.

Haali/ /e ki raḵ wathi/ to ibway mo isi ki miin to jin miina a'di mo be.

63

Gway ma Dawuu'd me'd jin dikina a'di e bwaasho gi 'Kwani Yahuuda/ mo.

- ¹ Ayy Arumgimis, /e tana Arumgimis pem mo, dhali aha/ simmkina /e e mo.
 Akashiram pem 'kosha te/ /e mo.
 Bunḡwar is pem 'thina buye/ gom /e mo
 me'd mo jin kuthaku'th mo dhali mony'cesh jin ta tonkor jin dina yi'de/ ki di
 mo be.
- ² Wakan aha/ hilkina apo/ /e e mo jin kogu mo
 mmohil mom'bi'th pini mo dhali monyca mo.
- ³ Haali/ mo/en pini jin telu sho'k mo tani a'di 'borki'd mo mmobol mondiki/e
 e mo,
 'twa/ pem midi maḡ /e mo be.
- ⁴ Wakan aha/ mina 'bor /e mii mo isi me'd jin miga/ di ki e mo.
 Aha/ mina 'de'k me'd pem 'kup ki mis mo dhali yuka yuk apo/ gway pini mo.
- ⁵ Akashiram pem a'di 'kunykina bwa mo me'd ki monoro'd mo dhali ca'bki
 momoḡ momoḡ mo
 dhali 'twa/ pem a'di maḡki /e ki mon'kuny bwa jin ta 'twa/ mo.
- ⁶ Ki aha/ kulumkina gwo ibwa gom /e apowa cim pem jin ishka/ mo
 dhali kulum gwo ibwa gom /e mon'thiny kun timka/ tim mo.
- ⁷ Haali/ /e tana manwoth aha/ mo,
 dhali eya la ma bim pini mo tani aha/ yukkina gway gom mon'kuny bwa mo
 be.
- ⁸ Akashiram pem koḡki /e me'd mo.
 Dhali me'da bim poros pini bu'thki aha/ mo.
- ⁹ Hili uni gwansan kun simmkki mondiki/em pem e mo mmo'ce'd a'di sho'k
 mo tani
 uni mini ii ka luḡgu'b e mony'cesh jin 'kula'kul mo.
- ¹⁰ Uni mini ciku/ e mom'bi'th gi gandal jin kaaka mo.
 Uni min ma jala/ i'kwar ka gwapi/ mo.
- ¹¹ Hili amalik mina bwa 'kuny eya Arumgimis mo.
 Aris uni gun thulkunu me'da po/ ki a'di mo tani uni mini ca mo,
 haali/ 'twa/ gi uni kun tana tor ka tor mo tani minu 'dap 'twa/ mo be.

64

Eya manyuk gway mo. Gway ma Dawuu'd.

- ¹ Ciki 'twa/ pem ma, ayy Arumgimis, goma 'thupin 'twam pem mo.
 'Tashi mondiki/em pem 'twa/ mo 'peni mo jin kar aha/ ki mo ma ko/ is gom
 uni kun ta 'kup gi aha/ mo.
- ² Bagi aha/ mo 'peni 'kwanin thus kun miina wu'th ka kwal is mo,
 'peni mo jin 'konu gwo ibwa mo mmomii to jin ta thus ki thus mo.
- ³ Uni gun cilkina le'd buni me'd gandal kun kaaka mo,
 kun turki gwo kun kaaka me'da thopa/ kun turu/ to mo,
- ⁴ mmo'kosha 'kosh 'peni mo jin isha uni ki jim bag apo/ wathi/ jin dar gi mii
 'ba/ mo,
 mmo'kosh a'di ki jahanne/ mo dhali dar gi monko/ is mo.
- ⁵ Uni buthi tonthus buni me'd mo,
 dhali uni torkina tor goma gume/ kun 'thina uniya 'cesh ka kwal is mo
 mmokulum gwo ibwa mo mmo/o ki: Kaja mini par ana e mo?
- ⁶ Dhali kaja a'di imidi ḡap ana ki bur bur gom miim bana kun 'ko ana i'ba/
 mo?
 Ana kulumkina gwo ibwa ki e kun korakor mo mmobwaa wu'th mo.
 Haali/ isi bwaman bwa wathi/ mo dhali adu mo tani a'di 'kula'kul mo.

- 7 Hili Arumgimis a'di mididi shinka thopa/ ka lungu'b e uni imun mo, uni mini ta jama/ ki jahanne/ mo.
 8 Haali/ goma le'd buni mo tani a'di mididi 'doyi uni e mo jin kupu/ mo. Aris 'kwani kun mini par uni e mo tani mini bir 'kup buni mo be.
 9 Dhali yan'ko'd aris 'kwani 'baar mo mini ko/ is mo dhali uni mini tor to jin wagaskin ma Arumgimis mo, dhali kulum gwo ibwa mo gom to kun miikina a'di mo.
 10 Dhalki a'di jin mii miinjkar/e 'kunya bwa mo e Tapa mo dhali bu'th mo jin huru jwa e a'di mo.
 Dhalki uni gwansan kun dhelel ma du mo tani can mo.

65

Eya manyuk gway mo. Gway ma Dawuu'd. Gway jin yuku mo.

- 1 Momaj a'di 'dapa'd ki /e mo, ayy Arumgimis, eya Sihyuun mo, dhali e /e mo tani gwo jin onu is minu mii thim mo,
 2 ayy /e jin cikki mon'tho mo.
 Haali/ e i /e mo tani a'di ipiyina ris bungwar is mo
 3 haali/ gom gway gi miinthus mo.
 Ki gwondhanj bana piki ana e mo,
 /e gwamki uni mo.
 4 Mom'bor mii gom a'di jin kwanykina /e mo dhali guyu/ mmo'dish mo is mo, dhali mmoça'b e bwaagorj pini mo.
 Am minu kap mo ki miim 'borgam pini mo e gu'b pini mo
 jin ta gu'b pini gi mondheleladhelel mo be.
 5 Ki dhan miim pini kun miikina /e kun caaca mmothok am 'twa/ ki mony'cuk mo,
 ayy Arumgimis bam jin ta bway mowoth mo,
 /e jin ta mo ma 'tej kape/ goma ris 'kwani kun 'kokin e 'pemen gi mony'ceshi 'baar mo,
 dhali uni kun si'dkin mo e bwampowa ris kumma/ yi'de/ mo.
 6 /E ki mom'bi'th is pini mo tani /e telki dhan wosh kun turatur sho'k mo, mmoçu'th gi mo ma dem dem mo.
 7 /E jin doshki yi'de/ jin mii'da kuku/ kuku/ mo,
 dhala kuku/ kukum buni jin birkina uni bakal mo,
 dhala dulatt gi 'kwani mo,
 8 wakan uni gwansan gun 'kokin e mony'cesh jin si'dasi'd mo tani, uni ko/ki is gom jamas miim pini mo.
 /E ki dhal mo jin yana ya gi mon'thamo/ mo dhali mom'pimpili/ mo mmoikum cuuwa/
 gom bwanj 'kunya/ mo.
 9 /E butkin e mony'cesh mo dhali wol a'di yi'de/ mo,
 dhali /e 'kummki a'di ki 'kumm jin caaca kagahara mo.
 Yi'de/ ma Arumgimis kun son a'di 'tu'dki mo mo.
 /E ki 'twak emen buni mo,
 haali/ wakan /e thosonki a'di mo be.
 10 /E wolki a'di yi'de/ ka cenjal kun ishkin ka enthus mo,
 dhali thoson a'di jil piti mo,
 mmodhal a'di ki co'do/ mo 'pena piriny ma sho'k mo
 dhali /e ki 'bor a'di mii mo gom ca jin cana a'di mo.
 11 /E shumki yil gi mo jin isha to ka enthus kun ta kum pini mo.

Jil jin dir ma arabiyyam pini mo tani uni wolki 'twa/ mo ki momot jin momotkina uni mo.

¹² Mo ma shon dhii/i'd gi mombwaasho mo tani wolki 'twa/ mo, dhali aris woshi 'baar mo uni 'kamki is buni ki mon'kuny bwa mo.

¹³ Ashom bip uni hi'thki is buni ki mo ma ma'diny mo, dhali embul wosh uni hi'thki is buni ki pos mo, uni kumki cuuwa/ mo dhali yuk gway mmontal 'de/ ki mon'kuny bwa mo.

66

Eya manyuk gway mo. Gway jin yuku jin ta gway mo.

¹ Yuki gway ki mon'kuny bwa ki 'kal 'kal goma Arungimis aris um kun 'koni mony'cesh mo.

² Yuki gway ki monyca gom gway piti mo. Dhali ci a'di monyca ki moman mo.

³ Dhali oyi Arungimis gwo mo ki: Dhan miim pini 'ka'da mii ca kagahara. Wakan dhan monycam pini 'kucki uni gun ta 'kup ki /e ibwambori /e mo.

⁴ Aris 'kwani gi mony'ceshi 'baar mo lun'ki /e mo.

Uni yukki gway mmoman /e mo, uni yukki gway gom gway pini mo.

Doshi ma dhali 'cunycuri yan mo.

⁵ Iiyu/ mo dhali par to jin miikin ma Arungimis e mo.

A'di miiki'da dhan to kun caaca kagahara e bwan 'kwani gi mony'cesh mo.

⁶ A'di tu'kki kumma/ yi'de/ mo mmota a'cesh jin kuthaku'th mo.

Dhali 'kwani iikin ki sho'k e bwam yi'de/ jin ku'thki'd mo.

Dhali e mun mo tani aman 'kunykina bwa mo e a'di mo,

⁷ a'di jin jiki'da ji ki mo ma dem dem piti ki sule/ sule/ mo,

a'di jin timki kal gi mony'cesh gi 'kwani ki em piti mo,

dhalku/ ki dhal uni gwansan bway mo uni kun pishi is buni ka le'd mo mmodhu is buni ki ca mo.

Doshi ma dhali 'cunycuri yan mo.

⁸ Mom'bor mii goma Arungimis bana mo, ayy 'kwani,

dhalki cuuwa/ jin minu man a'di dhalki a'di ciku mo,

⁹ a'di jin dhuki ana e bwaman 'kwani kun 'kon ki e mo,

dhali diki dhal sho'k bana bway mmoyeres mo.

¹⁰ Haali/ /e, ayy Arungimis, /e nyo/ki aman mo.

Dhali /e palki aman me'd 'dolkon kush jin palu ki o'd mo.

¹¹ /E ki sus am eya gume/ mo.

/E ki 'thi monto'c bwa e empa'd bam mo.

¹² /E ki dhal 'kwani bway mo mmomeri 'kupi aman mo.

Aman iikina e mo/o'd mo dhali e yi'de/ kun shwana nyor mo,

hili /e din mmosus am e embul mo kun beeyabee mo.

¹³ Aha/ mina ya e gu'b pini mmoçi to jin 'cihu/ 'kus mmo'tha ki o'd mo.

Aha/ mina ci /e gwo jin oka/ is mo,

¹⁴ a'di jin bahkina 'twam pem mo

dhali 'twam pem oki gwo is mo me'd jin dika/ e monto'c bwa mo.

¹⁵ Aha/ mina ci /e to jin cinu mmo'cih 'kus jin ta gunkulus ka'bal mo,

nyakka ku'd ma rasiñ ka'bal mo kun 'cihu/ 'kus mmo'tha ki o'd mo.

Aha/ mina ci to jin 'cihu/ 'kus kun ta gwathim bip dhali mi mo.

Doshi ma dhali 'cunycuri yan mo.

- 16 Iiyu/ mo dhali cik gwo mo, aris umi 'baar mo kun ko/kina Arungimis mo, dhali aha/ mina tor a'di jin miikunu gom aha/ mo.
 17 Aha/ 'therkina cuuwa/ kagahara gom a'di mo, dhali a'di karkunu ki ca ki 'twa/ pem mo.
 18 Wakki/ aha/ mina 'taki thip tonthus eya dum pem mo tani Tapa a'di midi 'taki diki cik aha/ 'twa/ mo.
 19 Hili ka jin gana/ Arungimis a'di iciki'da cik mo. A'di ciki'da hirdhe/ ki 'twa/ pem jin 'thoka/ mo.
 20 Mom'bor mii goma Arungimis mo, haali/ a'di diki wak mon'thom pem mo, walla joç mo/en piti jin telu sho'k 'peni aha/ mo.

67

Eya manyuk gway mo ka shu/ kun buku mo. Gway jin yuku mo jin ta gway mo.

- 1 Dhalka Arungimis mii mii ma 'the gom am mo dhali 'bor am mii mo dhali kar bwam/em piti mmokush mo apo/ aman mo, Doshi ma dhali 'cunycuri yan mo.
 2 ki bway pini minu mish mo apo/ mony'cesh mo, dhali mom'bi'th pini jin tana / e ata is ki me'd mo e bwaman kal gi 'kwaniny'cesh mo.
 3 Dhalki 'kwani man /e mo, ayy Arungimis. Dhalka ris 'kwani 'baar mo man /e mo.
 4 Dhalki kal gi 'kwaniny'cesh yuk gway ki mom'bor bwa mo dhali ki mon'kuny bwa mo, haali/ /e dwallki 'kwani gwo ki dar gi mii ma gwar 'de/ mo, dhali shu kal gi 'kwaniny'cesh bway apo/ mony'cesh mo. Doshi ma dhali 'cunycuri yan mo.
 5 Dhalki 'kwani man /e mo, ayy Arungimis. Dhalka ris 'kwani 'baar mo man /e mo.
 6 Mony'cesh gwono'dki maman piti jin markina a'di is mo. Arungimis jin ta'da Arungimis bam mo, a'di 'borki am mii mo.
 7 Arungimis 'borki am mii mo. Dhalka ris 'kwani kun 'kon e 'pemen gi mony'cesh mo ko/ a'di mo.

68

Eya manyuk gway mo. Gway ma Dawuu'd. Gway jin yuku mo.

- 1 Dhalka Arungimis cu mis mo dhali dhalki uni kun ta 'kup ki a'di cekerunu bwa mo. Dhalki uni gwansan kun shi/ a'di i e mo tani son mo 'peni bwambori a'di mo.
 2 Dhalki uni wana e ka ku'd kun borkunu mo, wakan borki uni mo. Dhali me'd mamana dham jin to'dki'd ibwambori o'd mo tani dhalki a'di jin ta thus 'ce'du/ sho'k mo si'da/ e bwambor ma Arungimis mo.
 3 Hili dhalki a'di jin ta'da kar/e 'kunya bwa mo. Dhalki uni yuk gway ki mon'kuny bwa mo ibwambor ma Arungimis mo. Dhalki uni tashu ki mon'kuny bwa mo.
 4 Yuki gway eya Arungimis mo. Yuki gway jin manju gway piti mo.

'Deki gway isi mis apo/ a'di jin merki'da powa rak mo.
Gway piti ta Tapa mo. Yuki gway ki mon'kuny bwa mo ibwambori a'di mo.

5 Ababa gi uni kun daran ki icom mo, dhali amanhil up gun wuna ikath mo tani,

a'di ta'da Arumgimis jin di'd e mom piti jin kogu mo.

6 Arumgimis ki ci uni kun dar gi gu'b mo mo mmo'ko icine/ mo.

A'di ki sus 'kwani gun dhunu eya sijin e mo jin rusa/ rus mo,
hili uni gun pish is ka le'd mo tani uni 'kokin e mo jin ta'da burta/ o'd ka burta/ o'd mo.

7 Ayy Arumgimis, me'd jin yana /e ka pije/ nyakki 'kwanim pini mo tani
dhali me'd jin yana /eya ye'th ye'th nyakki 'kwanim pini mo e mombwaasho
mo tani,

Doshi ma dhali 'cunycuri yan mo.

8 mony'cesh yikinki is mo dhali momis wolki'da shoka 'cesh 'peni icine/ mo,
e bun'kus ma Arumgimis mo.

Wosh Sinaa/ caan mo tani a'di yikinki is mo e bun'kus ma Arumgimis mo,
a'di jin ta'da Arumgimis ma Israyiil mo.

9 Ayy Arumgimis, /e dhalkina sho'k mmohe'th kagahara mo,
/e jin wari mal pini is ka nyan'ko'd mo me'd jin wuyina is a'di e mo.

10 Ama'diny ka'bal pini uni gamki mo jin 'konu icine/ mo.

E mo mii miin ganam pini mo tani, ayy Arumgimis, /e ki thoson mii gom
'kwani kun dar gi to mo.

11 Tapa kanki gwo mo.

Uni gwansan tana ris kagahara kun kalki gwom 'borga/ yan mo.

12 Imalik' gi 'kwani ma mee mo tani uni son mo, hili uni sokin mo.

Up kun 'koni pa mo tani uni kwa/ki to jin dilu bwa mo,

13 ba uni nyak'ko ki ka'bal e bwam ma gonj mo,
dhala binj gurko/ uni 'koshkunu is ki 'dolkon kush mo
dhali jeshem piti ca'b ki go'd go'd me'd 'dolkona go'd go'd mo.

14 Ki a'di jin ta gi Mom'bi'th ma Dem Dem cekerki imalik' bwa mo tani
awasa/ pu'dki'd apo/ Wosha Salmuun mo.

15 Ayy, wosh jin turatur jin ca'bki dem dem mo, jin ta wosha turga/ gi Pam
Bashan mo.

Ayy wosha turga/ jin 'kana 'kup ki bidhi/ bidhi/ ka ris mo, jin ta wosha turga/
gi Pam Bashan mo.

16 Ata hila /e mo ki en dhapan kan mo, ayy, wosha turga/ jin 'kana 'kup ki
bidhi/ bidhi/ ka ris mo,

e 'kuwosh jin on ma Arumgimis bwa mo mmota mom piti mmo'ca'bi cine/
mo?

Nye, mo jin mina Tapa ca'b ki sule/ sule/ mo.

17 Ki mom'bi'th ma ris shumarum kun tana dem dem mo kun ta iss 'kwan-
impa ka iss 'de/ ka alip mo,

dhala alaapa powa alaap mo,
Tapa pu'dki'd 'peni 'kuwosha Sinaa/ e mo jin kogu mo.

18 /E ki pok wosh jin turatur mo,
dhali /e ki shu uni bway uni gun bu'thkunu mo e bway pini jin yana /e mo,
dhali bu'th to kun cinu ki me'd e bway 'kwani mo,

isi kan e bwanj 'kwani kun pishi is ka le'd mo, wakan ki Tapa Arungimis mididi e mo yan mo be.

19 Mom'bor mii mididi gom Tapa mo, a'di jin 'de'kki ana abor ki mis isa yempa/ mo. Arungimis a'di ta bway gi mowoth bana mo.

Doshi ma dhali 'cunycuri yan mo.

20 Arungimis bana a'di ta'da Arungimis gi bway gi mowoth mo. Dhali eya Arungimis mo tani, a'di ta Tapa jin cila mo jin yenu 'peni mowu mo.

21 Hili Arungimis mididi pworth 'kup gi uni kun ta 'kup ki a'di mo, dhali ayinyjwa gi 'kup gi a'di jin ya'd e bway piti jin dina mii a'di i'ba/ mo.

22 Tapa o gwo mo ki:

Aha/ mina dok uni ka nyan'ko'd 'peni Pam Bashan mo, dhali aha/ mina dok uni ka nyan'ko'd 'peni kumma/ yi'de/ jin 'kula'kul mo

23 ki um mini lam sho'k bum ka bas mo,

dhali ka le'd ma 'kam bum mo tani uni mini ta gi tonte/ 'peni 'kwani gi 'kup bum mo.

24 Yam pini kun kogu kun yana /e mo tani mishu mo, ayy Arungimis, a'di jin ta ya ma Arungimis pem mo, a'di jin ta'da Malik pem mo, e mo jin kogu mo,

25 imanyuk gway kun iina bori a'di mo, dhali uni kun bukina dhen'dhenye/ iini 'ko'd mo

dhali bwaman uni mo tani nyara/ pina dhen'dhenyem buni ki me'd mo.

26 'Bori Arungimis mii e dhana tul 'kup gi 'kwani mo, Tapa, ayy um 'kwani kun ta uci ma Israyil kun kasha e mo.

27 'Pena wak ma Benyamiin, a'di jin piski'd e bwaman uni, jin shu'da shu/um bway mo,

e bwaman gi iya/ gi 'Kwani Yahuuda/ eya waambuhany buni mo, dhali e iya/ gi 'Kwani gi Pan Sabulun mo, dhali e iya/ gi 'Kwani gi Pa Naptaali mo.

28 Tilu mom'bi'th ma dem dem pini is mo, ayy Arungimis. Tori mom'bi'th pini mo, ayy Arungimis, /e jin wagaski a'di gom am mo.

29 Gom gu'b gi mondheleladhelel pini jin di'd e Pa Urushaliim mo tani imalik kalki to kun cinu ki me'd mmoçi /e mo.

30 Kucuri to/e gwansan kun 'kon e bwaman ma pil mo, dhali e bwaman ma ma'diny gwithim bip nyakki ushi bip gi 'kwani mo.

Yap uni ki sho'k uni gwansan kun 'dapkina e goma thulpa/ mo, dhali ceckerki 'kwani bwa mo uni gun 'kunyi bwa e mo ma mee mo.

31 Dhalka korok kalu 'peni Pam Masir mo.

Dhalki 'Kwaninj Gale/ soyin ki jahanne/ mo dhali he'th me'd buni goma Arungimis mo.

32 Yuki gway eya Arungimis mo, ayy aris 'penkuman bampa/ gi mony'cesh mo.

Yuki gway mmomanj Tapa mo.

Doshi ma dhali 'cunycuri yan mo.

33 E a'di jin merki'd eya powa ris momis mo, a'di jin ta gi momisa dhamo/ mo. Hili mo mo ma, a'di hashki 'twam piti 'peni mun mo, 'twam piti jin ca'bki dem dem mo.

34 Cika Arungimis mom'bi'th mo, mom'bi'th piti jin miikina a'di miin tapa apo/ 'kwani ma Israyil mo,

dhali mom 'bi'th piti a'di diki'd e bwaman momis mo.

³⁵ Arumgimis a'di ka/aka/ e mom piti jin kogu mo,
a'di jin ta'da Arumgimis gi 'Kwani ma Israyiil mo,
a'di ki ci mom 'bi'th mo dhali 'bi'th 'kwanim piti is mo.
Mom'bor mii midi di goma Arumgimis mo.

69

Eya manyuk gway mo, isi ki gwo gom jandin to mo. Gway ma Dawuu'd.

¹ Tayi aha/ is is ki me'd mo ma, ayy Arumgimis.
Haali/ yi'de/ loski aha/ ki 'ba/ ilu/ mo.

² Aha/ ciçkina ka 'cesh e bwam boro'th jin 'kula'kul mo,
e mo jin dar gi mo jin miga/ jett shoki cine/ mo.
Aha/ pu'dkina e yi'de/ jin 'kula'kul mo,
dhali agannu/ yi'de/ a'di kac'ki'da po/ aha/ mo.

³ Aha/ wukina is e gom kom pem mo,
dhali 'kus pem dhère'di 'baar mo.
Dhali em pem 'ce'ñki'da 'tum kagahara mo
mmowu e 'kup mmocora Arumgimis mo.

⁴ Mmobola mur 'kup pem e mo tani
uni ta uni gwansan kun shi/ki aha/ e mo ki dar gi miinj kamu/ mo.
Uni gwansan ca'bki dem dem mo kun mini 'ce'd aha/ sho'k moyi,
uni gwansan kun mini bu'th aha/ ki gwo ma tor mo.
A'di jin dika/ ki kwal naskina/ mo tani
aha/ mina mii dok a'di ka nyan'ko'd mowa?

⁵ Ayy Arumgimis, /e mishki mii ma palim pem mo.
Mii gun thu'thka/ mii mo tani 'konuki bag 'peni /e mo be.

⁶ Dhalku/ ki dhal uni gwansan bway kun tan gi mo ma 'tej kape/ e /e mo
dhunu ki mo ma 'the is gom aha/ mo,
ayy Tapa Arumgimis gi momis mo.
Dhalku/ ki dhal uni gwansan bway kun simmki /e e mo jin minu 'doyu/ uni e
mo jin minu this uni tak gom aha/ mo,
ayy Arumgimis ma Israyiil mo.

⁷ Haali/ a'di gom gway pini mo tani aha/ kalkina mo jin wa'kuwa wa'k mo,
dhali mon'the is a'di kumki aha/ bwam/em pem mo.

⁸ Aha/ wara ki wathi/ gi bampañ kamu/ e bwaman 'kwani ma wa'k pem mo,
mmota a'di gi pañ kamu/ e bwaman iya/ ma ta'da mo.

⁹ Haala nyor gom gu'b pini a'di shwakaa/ mo,
dhali asor gi uni gwansan kun sorki /e mo tani ta'kkina po/ aha/ mo.

¹⁰ Ki aha/ karkina is pem ki gwa'd mo eya kashiram pem ki monga/ to mo tani
a'di warki'd ki mowak pem mo.

¹¹ Ki aha/ hi'thkina burrinye/ ma shawaal e is mmota burrinye/ gom is pem
mo tani,
aha/ warkina ki a'di jin miikina uni ka mak mo.

¹² Aha/ tana a'di jin tora uni gwansana tor kun 'kon e 'twan'kala goñ mo
dhali uni kun 'koshkin ma su mo tani yukki gway gom aha/ mo.

¹³ Hili gom aha/ mo a'thom pem jin 'thoka/ mo tani e /e mo be, ayy Tapa.
Eya tente/ jin mishuwa bu'th bu'th mo, ayy Arumgimis,
dhali e mo/ish jin isha mo/en pini jin telu sho'k mo tani /e 'thokki aha/ 'twa/
mo.

¹⁴ Ki mowoth pini jin ta isinj gana/ mo tani 'cwami aha/ mo
'peni boro'th jin loski aha/ mo.
Dhalki aha/ 'cuku mo 'peni 'kwani kun ta 'kup ki aha/ mo

dhali 'peni yi'de/ kun 'kula'kul kun shwana nyor mo.

15 Dhalku/ ki dhala gannu/ yi'de/ bway mo mmodhi'th aha/ sho'k mo, walla moŋ'kul piti mmolos aha/ mo, walla jisa 'kulga/ mmomu'th 'twa/ apo/ aha/ mo.

16 'Thoŋi aha/ 'twa/ mo ma ayy Tapa, haali/ mo/en pini jin t̄elu sho'k mo a'di 'bora'bor mo be.

Isi ki gwo gi momiimiim pini jin ishki'd ka enthus mo tani t̄u'kki/ aha/ is mo.

17 Dhalku/ ki bag jis/em pini 'peni c̄iŋkinam pini mo.

Haali/ aha/ dina e mo ma c̄is mo tani huru/ ki jahanne/ mo mmo'thoŋ aha/ 'twa/ mo.

18 'Dishi aha/ is mo dhali wani aha/ 'ba/ mo,

dhali kari aha/ ki 'kus 'peni 'kwani kun ta 'kup ki aha/ mo.

19 /E mishi mowak pem jin wak̄u aha/ mo,

dhali mo ma 'the is pem mo dhali mo jin 'konuki tak̄ aha/ mo.

Aris uni gun ta 'kup ki aha/ misha /e mo.

20 Asor 'ce'dkina dum pem bwa mo,

wakan a'di itaka/ buŋkan ki buŋkan mo.

Aha/ ŋapa mo jin minu 'taki h̄il aha/ ki mo ma 'thime/ ki mo/en mo tani hili aha/ gama wath̄iŋ kamu/ yisa.

Dhali aha/ ŋapa 'kwani mmo'taki malas aha/ mo tani, hili aha/ dinaki gam jan kamu/ mo.

21 Uni c̄iki aha/ aŋi'd tonthus e tonŋe/ mo,

dhali gom yi'de/ jin bu'thki aha/ mo tani uni c̄iki aha/ yiman tom'paŋa'd mmopi mo be.

22 Dhalki tonŋem buni jin shwana uni atharabeesa mo warki'd ka gume/ ibwambori uni mo.

Dhalki tom buni kun 'c̄iŋhu/ 'kus mmomiiya bas goma yuŋ jin yuŋu ka tul 'kup mo warki'd ka gume/ mo.

23 Dhalki em buni a'di dhurumkunu mo mo, wakan ki uni mini 'koki par mo e mo

dhali dhu ki uni empa'd buni mmodee ki sule/ sule/ mo.

24 Woli anyor pini jin deŋkina /e apo/ uni mo,

dhali dhalka nyor buni jin pura /e ki o'd kumki uni 'twa/a 'cesh mo.

25 Dhalki gu'ba'kum buni taki bwam ma'du/ mo.

Dhalku/ ki dhal jan tal 'deŋ kamu/ bway mo mmoŋa'b e gu'b burriŋyem buni mo.

26 Haali/ uni to'cki a'di bwa mo a'di jin dorkina /e mo,

dhali a'di jin tak̄kina /e jama/ mo tani uni 'kon naskina/ mmoŋo'c a'di bwa ki nyanye/ mo.

27 Dhuki uni ajisa i is mo.

Dhalku/ ki dhu uni mmodhu ka po/ 'peni /e mo.

28 Dhalki uni 'koshu gway buni 'pena warka/ gi mondiki/e mo,

dhali uni minu 'koki 'kwar gway buni e bwamana warka/ nyaŋki 'kwani kun tana kar/e mo.

29 Hili aha/ wo'ckunuwa du she/ mo dhali 'kaa du she/ mo,

Dhalki bwaya kar/em pini, ayy Tapa Arumgimis, kar aha/ e mo jin ka'dama/ ka'dam mo.

30 Aha/ mina maŋ gway ma Arumgimis ki gway jin yuŋu mo.

Aha/ mina eŋ a'di ki bwa jin 'boruwa 'bor i is mo.

31 Mii yansan a'di imidi 'bor Tapa bwa kagahara mmobola morbip e mo,

walla rasim bip jin 'kana je mo dhala cuk mo.

³² Dhalki uni gwansan kun siriju/ ki sho'k par mii e mo dhali 'kuny bwa mo. Dhali un gwansan gun simmkina Arungimis e mo tani dhalka dum bum tashu e mo dok/e.

³³ Haali/ Tapa a'di cikki gwo mo 'peni uni gun mini mii ta gi to mo, dhali a'di diki wak uni gun ta unim piti kun dekkunu mo.

³⁴ Dhalki momis dhali mony'cesh man a'di mo, dhali dhan kumma/ yi'de/ dhali aris to 'baar mo kun kalki ya e bwaman a'di mo.

³⁵ Haali/ Arungimis midi ta Sihyuun is is ki me'd mo dhali nyan ka Yahuuda/ 'penkuman bampam piti dok/e mo. Dhali uni gun ta cinjinam piti mo tani mini 'ko e mo yan mo dhali bu'th a'di mo

³⁶ dhali uci gi cinjinam piti mo tani midi ta mal piti mo, dhali uni gwansan gun eni gway piti mo tani mini 'ko e bwaman a'di mo.

70

Eya manyuk gway. Gway ma Dawuu'd, gom mo jin kanu to e jin cinu ki me'd mo.

¹ Tayi ki bwam 'boro'd ma, ayy Arungimis mmo'cuk aha/ mo. Ayy Tapa, huru/ ki jahanne/ mmowoth aha/ mo.

² Dhalki uni dhunu ki mon'the is mo dhali durkurki 'kup is mo uni gwansan kun nap mondiki/em pem mo. Dhalki uni dokkunu to ka nyan'ko'da bor mo dhali dhalki uni 'doyunu mo e mo jin ushu uni tak mo uni gwansan kun ona bwa ki aha/ minu shi/ mo.

³ Dhalki uni ko/ is ki ko/ jin shiyi'd mo gom mo ma 'the is buni mo uni gun o gwo mo ki: 'Thor ki 'thor.

⁴ Dhalki aris uni 'baar kun simmi /e e mo tani 'bora bwa mo dhali 'kuny bwa mo e /e mo. Dhalki uni gwansan kun en bway gi mowoth pini mo o gwo mo kagahara mo ki: Arungimis a'di caaca mo.

⁵ Hili aha/ hatha'ko'd mo dhali aha/ mina mii ta gi to mo. Huru/ ki jahanne/ gom aha/ mo, ayy Arungimis.

/E tana manwoth pem mo dhali aman'cuk pem mo. Ayy Tapa, dhalku/ ki taya diite/ mo.

71

¹ E /e mo tani, ayy Tapa, aha/ bu'thkina mom pem jin hurga/ jwa e /e mo. Dhalku/ ki dhal aha/ bway ki aha/ minu kar ki mo ma 'the is mo.

² E momii ma kar/em pini mo tani 'cuki aha/ mo dhali 'cwami aha/ mo. Ka'di 'cem pini gom aha/ mo dhali tayi aha/ is is ki me'd mo.

³ Wari /e ki wosh jin miga/ hur jwa icine/ mo, mmota acur jin tenu gwo mo mmota aha/ is is ki me'd mo, haali/ /e ta wosh pem mo dhali acur pem jin tenu gwo mo.

⁴ 'Cwami aha/ mo, ayy Arungimis pem, 'peni me'd gi a'di jin ta thus ki thus mo, dhali 'peni a'di jin bu'thki'da bu'th ki kwap mo, a'di jin diki ta kar/e mo dhali wathi/ jin ta matt ki matt mo.

⁵ Haali/ /e, ayy Tapa, /e tana 'ten kapem pem mo, dhali 'pena cim pem jin gamka/ /e gwo is mo, ayy Tapa, 'peni dhuru'c pem jin taka/ mo.

6 Apo/ /e mo tani aha/ dikina ka linthith 'peni mondho'th pem mo.
/E ta a'di be jin bu'thki aha/ 'peni bwa ma dho'th ma ta'dam pem mo.
Momaŋ pem tikirki di gom /e mo.

7 Aha/ mera 'kwani ka ris ka yempa/ mo.
Hili /e ta jim pem jin 'bitha'bi'th jin hurga/ jwa icine/ mo.

8 'Twa/ pem a'di 'tu'du/ mo ki piny piny ki momaŋ /e mo
dhali ki monycam pini i'baara tee mo.

9 Dhalku/ ki bi't aha/ asho ka tee jin miga/ ta adhan mo.

Dhalku/ ki dhal aha/ 'pen mo wakki/ aha/ mina mom'bi'th pemi 'baar mo.

10 Haali/ 'kwani tana ris kun ta 'kup ki aha/ mo kun oki isi gwo gom aha/ mo,
uni gwansan kun corki mondiki/ em pem mo tani uni logomki gwo mo
mmonta' de/ gom aha/ mo

11 dhali o gwo mo ki: Arumgimis, mola /e, dhalki a'di 'pen mowa?

Uri a'di isho'k mo dhali bu'th a'di mo
haali/ jaŋ kamu/ di'da jin midi 'cuŋ a'di mo?

12 Ayy Arumgimis, dhalku/ ki si'd 'peni aha/ kagahara mo.
Ayy Arumgimis pem, huru/ ki jahanne/ dhali wo'th aha/ mo.

13 Dhalki unim pem gwahan kun yeri aha/ is ki gway dhunu ki mo ma 'the is
mo dhali shwa ki o'd ki 'ci'd'da/ mo.

Dhalki uni tashu ki mo jin wakuwa wak mo dhali mo jin thisuwa tak tak mo,
uni gwansan kun simmki mo e jin midi shi/ aha/ is mo.

14 Hili aha/ mina ta gi mo ma 'teŋ kape/ ki sule/ sule/ mo,
dhali aha/ mina maŋ /e naskina/ ki sule/ dhali ki sule/ sule/ mo.

15 'Twam pem midi tor gwo gom mo ma kar/em pini jin kalkina /e mo
dhali miim pini jin miina /e gom bway gi mowoth goma tee 'baar mo,
haali/ mondeŋ buni a'di peki monyith pem jin nyithka/ uni mo.

16 Ki dhan mii ma dem dem gi Tapa Arumgimis mo tani aha/ mina pu'dku/
mo,

aha/ mina maŋ mii ma kar/em pini mo, a'di jin ta jim pini /e 'de/ mo.

17 Ayy Arumgimis, 'peni dhuru'c pem jin taka/ mo tani /e tor'ki aha/ gwo mo,
dhali aha/ mina bah dhan momer pini jin miina /e to mo.

18 Wakan, isi kani, e mo jin canu ki yil mo dhali mo jin 'kan ma wuu 'kwani
mo

ayy Arumgimis, dhalku/ ki dhal aha/ 'pen mo,
ntagi aha/ mina bah mo ma dem dem pini mo
eya risa nyakum yil gi 'kwani kun mini pu'du/ mo.

19 Mom'bi'th pini dhali mo ma kar/em pini mo tani, ayy Arumgimis,
uni jidhirkin e momis jin ka'dama/ ka'dam mo.

/E jin miikina dhan to kun caaca mo,
ayy Arumgimis, kaja a'di iwaki /e mo?

20 /E jin karki aha/ mo mmopara ris monto'c bwa e kun surkun mo tani
/e mini tash aha/ e mo dok/e.

'Peni moŋ'kul gi mony'cesh mo tani
/e mini 'de'k aha/ abor gi mis dok/e mo.

21 /E mini mar aha/ montak pem is is mo
dhali malas aha/ dok/e mo.

22 Dhali aha/ si'da/ mina maŋ /e ka dhen'dhenyem pem jin bukka/ mo
gom mo ma isin ganam pini jin tana /e mo tani, ayy Arumgimis pem,
aha/ mina yuk gway mmomaŋ /e ka dhen'dhenye/ jin 'kon ma shu/i pesu/ mo,

ayy /En 'De/ jin ta jima Israyiil jin Kogu mo.

²³ 'Twa/ pem midi 'ther cuuwa/ gom bwan 'kunya/ mo,
ma me'd jin miga/ yuk gway mmoman/ e mo,

nyakka kashiram pem si'da/ ilu/ mo a'di jin 'cwamkina /e mo.

²⁴ Dhali ale'd pem midi tor gwo gom mii ma kar/em pini jin wothkina /eya
woth

ka tee 'baar mo

haali/ uni dhukunu ki mo ma 'the is mo dhali mo jin thisuwa tak tak e mo,
uni gwansan kun n̄apki bway ki bur bur mo mmo'taki shi/ aha/ is mo.

72

Gway ma Sulemaan.

¹ Ciya malik mo ma kar/em pini mo, Ayy Arungimis,
dhali mo ma kar/em pini gom ya/ ma malik mo.

² Dhalki a'di dwall 'kwanim pini gwo ki mii ma kar/e mo
dhali unim pini kun hatha'ko'd ki mo ma kar/e mo.

³ Dhalki dhan wosha turga/ kali mo jin rusu ki rus gom 'kwani mo,
dhali aris wosh si'da/ kali mo ma kar/e mo.

⁴ Dhalki a'di 'ce'd gwo she/ gom to jin raki 'kwani kun hatha'ko'd mo.
Ciya mo jin 'cukuwa 'cuk gom 'kwani kun mini mii ta gi to mo,
dhali yapi uni gwansan kun siri'ckina siri'c ki sho'k mo.

⁵ Dhalki a'di di'd ki e mo ka tente/ di'di motim 'kup naskina/ mo,
dhali me'd jin din ma ppe naskina/ gara/ mo, eya risa nyakum yil gi 'kwani
mo.

⁶ Dhalki a'di wana e ka sho'k jin wolki yi'dem piti asho jin 'punyu/ mo,
me'da sho'k jin mii yi'de/ ki puya/ puya/ apowa 'cesh mo.

⁷ Eya teem piti jin dina a'di ki e mo tani dhalki mo ma kar/e 'twa'ka'd mo,
dhali mon'ku'th is mmo/ish mo ntaga ppe midi diki di dok/e mo.

⁸ Dhalki a'di ta gi mom'bi'th 'peni kumma/ yi'de/ mo ntagi kumma/ yi'den tiya
mo,
dhali 'peni yi'de/ kun sokin mo ita gi 'pemen gi mony'cesh mo.

⁹ Dhalki uni gun ta 'kup ki a'di lun'kini bwambori a'di mo,
dhali 'kwani kun ta 'kup ki a'di mini 'bitt bu'da'cesh mo.

¹⁰ Dhalki imalik gi Pan Tarshiish dhali kum pa uka 'cesh mo
ci a'diya thulpa/ mo,

dhali imalik gi Pan Shaba mo dhali Pan Saba mo
kal to kun cinu ki me'd gom a'di mo.

¹¹ Dhalki aris imaliki 'baar mo tagkina 'cesh ki jin 'kupa' dupuni bwambori a'di
mo,
dhali dhalka ris kal gi 'kwaniny'cesh si'da/ mii a'di to mo.

¹² Haali/ a'di 'cukki uni gun mini mii ta gi to mo, ki a'di yukki'da yuk mo,
a'di jin hatha'ko'd mo dhali a'di jin dar gi wathi/ mmowoth a'di mo.

¹³ A'di ki hila hil ki e ma 'thime/ ki mo/en apo/ uni gun 'ka'da is mo dhali apo/
uni gun mini mii ta gi to mo,
dhali ta mon'koki/em buni is ki me'd mo gom uni gun mini mii ta gi to mo.

¹⁴ 'Peni mo jin sirijuwa siri'c ki sho'k mo dhali abujur jin bujuru mo tani a'di
wanki mon'koki/em buni 'ba/ mo,
dhala bas buni ta yinthon gana/ e jis/em piti mo.

- 15 Dhalki a'di di'd ki e ki sule/ sule/ mo.
 Dhalki 'dolkon gana/ jin ta gi Pan Shaba cinu a'di mo.
 Dhalki mon'tho minu tikir 'tho gom a'di ki tikir tikir mo
 dhali mom'bor mii minu 'tho gom a'di ka tee 'baar mo.
- 16 Dhalki emen tente/ ishin ka enthus e bampa/ mo,
 apowa ris 'kuwosha turga/ mo me'd jin yikinkina 'tham uni is mo.
 Dhalki maman cwam piti wana e ki ji gi Pan Lubnaan mo
 dhali dhalki 'kwani 'tu'dina 'tu'd mo 'peni aris 'penkuman bampa/ mo
 me'da sho gi bwam bunto mo.
- 17 Dhalki gway piti 'dim 'kup ki sule/ sule/ mo.
 Dhalki yir piti di'd ki sule/ sule/ me'da tente/ mo.
 Dhalki 'kwani 'bori is buni mii ki a'di mo,
 dhali aris kal gi 'kwaniny'cesh yuki a'di mo ki a'di jin 'boru mii mo.
- 18 Mom'bor mii midi di gom Tapa mo a'di jin ta'da Arumgimis gom 'Kwani
 ma Israyiil mo,
 A'din 'deŋ gana/ imii'da dhan to gi momer mo.
- 19 Mom'bor mii midi di gom gway gi monycam piti ki sule/ sule/ mo.
 Dhalki monycam piti 'tu'd mony'ceshi 'baar mo. Amen dhali Amen.
- 20 Mon'tho ma Dawuu'd mo a'di jin ta ya/ ma Yassa mo a'di 'baarkunu mo.

AWARKA/ JIN 'KONA 'BANI KWARA MO

73

Gway ma Asap mo.

- 1 Ka jin gana/ Arumgimis ta a'di jin 'boro'd gom uni kun dhelel ma du mo,
 gom uni gwansan kun dhelelkin eya du mo.
- 2 Bahili gom aha/ mo tani sho'k pem 'dishi 'twa/ 'taki dheres mo,
 ŋaŋgin pem 'disha'dish 'taki yeres mo.
- 3 Haali/ aha/ tana dhapan gom uni kun dhu is ki ca mo,
 ki aha/ parkina mo jin rusa to ki rus gom uni kun ta thus ki thus e mo.
- 4 Haali/ uni dar gi mo jin su'k uniya du ka war mo.
 Buŋgwar is buni ɕa'b ki ɕur ɕur mo dhali ɕa'b ki 'thikil 'thikil mo.
- 5 Uni ɕocu 'kus me'd 'kwanin tiyaa?
 Dhali uni doru ki to jin woci is she/ me'd 'kwanin tiyaa?
- 6 Wakan uni dhu is ki ca gom neram buni kun hitha uni i'ba/ mo,
 dhali mo ma bujur jin bujurkina uni mo tani a'di 'kamki uni is mo me'd
 burriŋye/ mo.
- 7 Em buni dhethadhe'th gom momoŋ buni mo,
 adum buni a'di kumkunu 'twa/a 'cesh ki mii ma pali mo.
- 8 Uni 'theŋ shushi mis mo dhali o gwo ki mo jin dupuwa dup i e mo.
 Mmodhuna uni is buni eya tente/ ki thorony mo tani uni ki ruma rum gom
 mo jin miinu sirica siri'c ki sho'k mo.
- 9 Uni ki ɕa'd 'twam buni mmosor momis mo
 dhala le'd buni a'di ɕalki 'pen ɕany e mony'cesh mo.
- 10 Dhali gom gwo gi wakan mo tani 'kwani tu'kkin mo dhali maŋ uni mo
 dhali gam to shiyi'da kamu/ e uni yisa.
- 11 Dhali uni o gwo mo ki: Ki tonta si'da/ imish ma Arumgimis mo?
 A/a'di jin Caa e ki Ca nyithki toŋ kamuwa?
- 12 Hili mo mo ma, uni gwansan ita thus ki thus mo.
 Isa yempa/ uni 'koni mo jin 'ka'da mii 'ba/ ki 'ka'd mo

dhali uni mara to kun tana uni pa ki pa is mo.

¹³ Dhali aha/ ki pe'th mo tani aha/ karkina dum pem ki dhelel dhelel mo dhali lam me'd pem e mo jin 'konu ka po/ mo.

¹⁴ Haali/ ka tee 'baar mo tani aha/ dherkunu is bwa mo, dhali dorkunu isa yempa/ mon'thamo/ mo.

¹⁵ Wakki/ aha/ mina 'taki o gwo mo ki: Aha/ mina o gwo wakan mo tani aha/ mina 'taki diki ta a'dinj gana/ goma nyakum yil gi ucim pini mo.

¹⁶ Hili ki aha/ kulumkina gwo ibwa mmomish gwo yansan 'ban mo tani a'di midi 'taki wayaa/ e ki to jin midi wu is e mmomii mo,

¹⁷ ntagi aha/ yakina e mo ma Arumgimis jin kogu mo, dhali yan'ko'd aha/ ki nyith 'pemen gi 'ko'd 'buni mo.

¹⁸ Ka jin gana/ /e ki dhu uni e mo jin yeresa/ yeres mo. /E ki dhal uni bway mo mmota'k e mo jin kupu/ mo.

¹⁹ Uni 'ce'dki sho'k kadhamowa?

Uni dhidhu sho'k ka pupush ka dhan mii jin ta'da pure/ ka pure/ mo.

²⁰ Uni wana e ki jan jin shu'bu/ mo me'd jin merkina jan 'derj kamu/ e mo. 'Peni momer e mo tani um ki wak to munn buni mo.

²¹ Ka kashiram pem ka/ki'd ki ka/ mo tani dhali ki aha/ su'kkunu eya du mo,

²² aha/ takina dholgon mo dhali ta pus mo tani aha/ wana e ki tombwaasho 'kup ki /e mo.

²³ Bahili aha/ dina mmoṭikir ca'b nyakki /e mo. /E bu'thki me'da bim poros pem mo.

²⁴ /E ki shu aha/ bway ki gwom pini jin logomkina /e mo dhali yan'ko'd /e mini bu'th aha/ mmota'k mo.

²⁵ Kaja a'di itaka/ e momis mo? Hili diki ta jasi /eya?

Dhali to piyi'd e mony'cesh yan mo mmo/oka/ bwa mo mmodhal /e ka po/ mo.

²⁶ Bun'war is pem dhala dum pem mini 'taki ush me'd mo tani hili Arumgimis a'di ta'da Man'bitha dum pem is mo dhali Amanpwa'ki aha/ to jin miga/ ta ki sule/ sule/ mo.

²⁷ Haali/ hili mo mo ma, uni gwansan kun si'dkin 'peni /e mo tani minu 'ce'd sho'k mo be.

/E ki kar mo jin da'ku gwo 'kup mo gom uni gwansan kun tori gwon thus apo/ /e mo.

²⁸ Hili gom aha/ mo tani a'di 'boro'd jin miga/ 'disha Arumgimis is mo. Aha/ karkina Tapa Arumgimis mo mmota a'di jin hurga/ jwa icine/ mo, ki aha/ mina tora ris miim pini mo.

74

Gway jin yedhu sho'k goma Asap mo.

¹ Ayy Arumgimis, ki to jin ta'da ta ita'kkina /e amana sho ki sule/ sule/ kan mo?

Ki to jin ta'da ta idhala /eya nyor pini i ya ku'd apo/ ka'bal pini kun tana shon dhii/i'd mo?

² Kayi dhana tul 'kup 'kwanim pini e mo, uni gun takina /e 'peni kadhamo/ mo,

uni kun wankina /e 'ba/ mo mmota wak gom mal pini mo.

Kayi 'Kuwoh ma Sihyuun e mo e mo yan jin ca'bkina /e mo.

³ Cuthi /e natgin pini e mo jin 'tuk'kunu ki sule/ sule/ mo.

Uni gun ta 'kup ki 'kup mo tani 'ce'dkina ris to sho'k mo e mo jin kogu mo.

4 Uni gun ta 'kup ki /e mo tani an̄karkin e bwaman mom pini jin ƙogu mo.
Uni thumkina bereƙ bunin̄ gana/ mo mmota jamas mo.

5 Dhali e 'twan̄kal gu'b isi mis mo tani uni ki jep
cwandher bwa ka thurmany mo.

6 Dhali yan'ko'd aris cwa kun 'cimudhu bwa mo tani
uni 'ce'd uni ka 'cesh ka thurmanya ba'd'ban mo dhali ki 'dorro/ mo.

7 Uni ki ƙi'th ma mom pini jin ƙogu ki o'd mo.
Uni ki shi/a 'cesh pini jin ƙa'ba /e ki gway pini mo.

8 Uni ki o gwo e is buni mo ki: Ana mina uƙh̄ uni 'baar mo.
Uni ki ƙi'tha ris mo jin tulu is goma Arungimis e mo yan mo.

9 Ana 'konaki par jamas bana e mo.
Dhala man̄ci gwoƙ kamu/ di'da?

Dhali jaƙ kamu/ di'di bwam ana jin mishi gwo ki mii yan midu ta ata?

10 Ayy Arungimisa, /e mini dhal 'kwani kun ta 'kup bway mo mmo'thek̄
shushi mis ki rash rash kan ntagi mo gi wakata mo?

A/'kwani kun ta 'kup ki /e mini sor gway pini ki sule/ sule/ kan mo?

11 Ki to jin ta'da ta si'da/ igukina /e me'd pini ka nyan̄'ko'd mo?
Ki to jin ta'da ta ikarkina /e me'd pini e bwambor pini mo?

12 Hili Arungimis jin ta'da malik̄ pem mo a'di jin diki'd 'peni kadhamo/ mo,
jin miiki bway gi mowoth e bwaman gi mony'cesh mo.

13 /E ki ƙwa/ dhan yi'de/ bwa ki mii ma dem dem pini mo.

/E ki 'ce'd 'kup ma dhan tasha/ ki bwam yi'de/ mo.

14 /E ki pwath̄ 'kup gi dhan to yi'de/ mo,

dhali /e ki ƙi a'di mmota tonte/ gom uni kun uƙu kun 'kon e bwaasho mo.

15 /E ki tirki wosh mo dhali ƙa'd a'di 'twa/ mo dhali du'd yi'de/ mo dhali yi'de/
ki 'thonthor mo.

/E ki ƙu'thki yi'de/ jin sokin e bwam ma gap mo.

16 Atee ta jim pini mo. Mon'thiny si'da/ ta jim pini mo.

/E telki mon̄kush gi momis sho'k mo dhala tente/ mo.

17 /E thosonkina ris gwayu/ gi mony'cesh mo.

/E karki moyurantee mo dhali mondit̄ mo.

18 Kayi gwo yan e mo ma, ayy Tapa, 'kwani kun ta 'kup 'thek̄ki shushi mis kata
sa/ mo?

dhali 'kwani kun 'koki dhu mii gun ƙogu mo tani wak̄ki gway pini mo be.

19 Dhalku/ ki ƙiya ƙashira/ gi gurkom pini ki tom bwaasho mo.

Dhalku/ ki ƙa mondiki/e gi a'dim pini jin hatha'ko'd ki sule/ sule/ mo.

20 Kari gwom pini jin gamu me'd mo.

Haali/ mo gi mondhurumi'd gi mony'cesh mo tani a'di 'tu'dkunu mo ki
'kwani gwahan kun bujurkina bujur mo.

21 Dhalku/ ki dhal uni gwansan bway mo kun yapkunu ki sho'k mo mmodhu
ki mo ma 'the is mo.

Dhalki uni kun hatha'ko'd dhali kun mini mii ta gi to mo man̄ gway pini mo.

22 Cuyi mis mo, ayy Arungimis, dhali muri is mo gom mii jin midu rak̄/e mo.
Kayi gwo e ki uni gwahan kun ushi gwo kun ƙogu dhu 'thek̄i /e shushi is ka
tee 'baar mo.

23 Dhalku/ ki ƙa cuuwa/ jin cuuna 'kwani kun ta 'kup ki /e mo,
abombok̄ 'peni 'kwani kun ta 'kup ki /e ka ris mo, a'di jin yaki'd ka 'kulam
'pen mo.

75

Eya manyuk gway mo, isi ki gwo jin onu ki: Dhalki sho'k ki 'ce'd mo. Gway ma Asap. A'di jin ta gway mo.

¹ Am cina /e mo jin 'boru /e bwa i is mo, ayy Arungimis, bwa jin 'boruwa 'bor bwa i is cina aman /e mo.

Aman yukkina yuk apo/ gway pini mo dhali den dhan momer pini e mo kun miikina /e mo.

² Ka tee jin karka/ 'pen ka pije/ mo tani aha/ mina dwall gwo ki dar gi mii ma gwar 'de/ mo.

³ Ka 'cesh midi wunkul mo dhali aris 'kwani kun 'kon e a'di mo tani a'di ta aha/ be jin telki mom piti jin tana a'di akak mo.

Doshi ma dhali 'cunycuri yan mo.

⁴ Aha/ mina o uni gwansan kun dhu 'ba/ ki ca gwo mo ki: Dhalku/ 'ba/ ki dhu ki ca mo dhali aha/ mina o a'di jin ta thus ki thus gwo mo ki: Dhalku/ cem pini ki 'de'k ki mis mo.

⁵ Dhalku/ cem pini ki 'de'k 'kup ki mis jin ka'dama/ ka'dam mo walla o gwo mmo'thek 'ba/ imis mmo/ush 'kwani ga/ mo.

⁶ Haali/ yisa 'peni mom'pesho'k walla bora lungu'b mo dhali yisa 'peni mombwaasho mo ipu'dkina mo jin 'deku is ki mis mo.

⁷ Hili a'di ta'da Arungimis jin torki gwon dwall 'twa/a 'cesh mo mmo'thi jan 'de/ 'ko'da 'cesh mo dhali cuwa kamuŋ kamu/ mis mo.

⁸ Haali/ e me'd gi Tapa mo tani akubbaaya diki'd mo jin sekina yimana mura'th jin ka/u ki nah nah ki 'tha'da/ 'tha'da/ mo, jin 'koshu is ki 'bore/ mo.

Dhali a'di midi wol a'di 'peni jin pinu mo, dhali aris 'kwani kun ta thus ki thus e mony'cesh mo uni mini pi a'di ku'th mo ki ter ntaga 'cummam piti ilu/ mo.

⁹ Hili aha/ mina bwa 'kuny ki sule/ sule/ mo. Aha/ mina yuk gway mmoman Arungimis ma Yakuub mo.

¹⁰ Aris ce gi uni kun ta thus ki thus mo tani mina a'di wa'b bwa mo hili ce gi uni kun tana kar/e minu dhu ki ca mo.

76

Eya manyuk gway ka shu/ jin buku mo. Gway ma Asap. A'di jin ta gway mo.

¹ Eya Yahuuda/ mo tani a'di imish ma Arungimis mo, gway piti jin eka/ ek mo e bwaman ma Israyiil mo.

² Monyca'b piti a'di telkunu sho'k mo e Pan Saliim mo, mo jin ca'ba a'di mo tani a'di di'd eya Sihyuun mo.

³ E mun mo tani a'di ki 'ce'da thopa/ kun shinunu ki o'd ki yuwar yuwar bwa mo, dhali agongoro/ gi mo/as mo dhali gandal gi mo/as mo dhali aris tonkan gi mo/as mo.

Doshi ma dhali 'cunycuri yan mo.

⁴ Monyca ta jim pini mo, dhali mo jin eku mmobol dhan wosha turga/ e kun 'kon ki sule/ sule/ mo.

⁵ 'Kwani kun 'kon ma du ki dhethadhe'th mo tani uni dilkunu tom buni kun dilina uni mo.

Uni ciçkin e mo jin ishu e mo.

Aris 'kwani gi mo/as mo tani
uni mol me'd buni bu'th mmomii to mo.

⁶E mo ma kucur pini mo ayy Arungimis ma Yakuub mo tani
a'di jin mer shumaruma po/ mo dhali shumarum mo uni su/ miikina buye/
ka yinçira/ mo.

⁷Hili /e, /e tana pure/ mo.

Kaja a'di imidi mish doshi bwambori /e mo
me'd jin min ma nyor pini 'tulu/ ka pije/ mo?

⁸'Peni momis mo tani /e ki bah gwo gom gwon dwall jin toru 'twa/a 'cesh mo.
Mony'cesh ko/ki is mo dhali dosh shoka 'cesh mo

⁹ka Arungimis cuki mis mo dhali tel gwon dwall piti jin toru 'twa/a 'cesh mo
mmota ris 'kwani gwansan is ki me'd mo kun 'cwarkunu e mony'cesh mo.
Doshi ma dhali 'cunycuri yan mo.

¹⁰Ka jin gana/ anyor gi 'kwani midi man /e mo.

Dhali anyor jin boçki'd mina /e non 'twa/'pena po/ /e mo.

¹¹Oyi um gwo is e Tapa Arungimis bum mo dhali thimi uni mo.

Dhalki aris uni 'baar mo kun 'kam a'di is mo tani 'doyu to kun çinu ki me'd
mo

e a'di jin minu mii ko/ mo

¹²dhali a'di jin 'ciçki mondiki/e gi iya/ ma malik mo,
a'di jin taki'da pure/ ka pure/ apo/ imalik gi mony'cesh mo.

77

*Eya manyuk gway, isi ki gwo gi a'di jin 'cemki gway jin yuku ka Yadu u |un
mo. Gway ma Asap.*

¹Aha/ gwokina 'twa/ Arungimis ki nyanye/ mo,
mmoko 'twa/ Arungimis ki nyanye/ ki a'di midi ciç aha/ 'twa/ mo.

²Ka tee jin tocu aha/ bwa mo tani aha/ simmkina Tapa e mo,
e mon'thiny me'd pem a'di he'thki'd mo ki dar gi mo jin wuna is a'di e mo.
Akashiram pem a'di ushki'd mo ki a'di minu malas mo.

³Aha/ kulumkina gwo ibwa goma Arungimis mo, dhali aha/ gwokina mo
mmo/an an is mo.

Dhali aha/ kulumkina gwo ibwa mo dhali shi/in pem 'thikina buye/ mo.
Doshi ma dhali 'cunycuri yan mo.

⁴/E ki bu'th 'ko'd em pem me'd mo 'peni mo jin 'kamutha a'di e mo.
Aha/ tocu bwa kagahara mo dhali aha/ mola gwo o mo.

⁵Aha/ hila isi gwo i e goma teen dhamo/ gunn mo,
dhali aha/ kakina yil gunn e kadhamo/ mo.

⁶Aha/ torkina tor eya dum pem mon'thiny ka kar/e mo.
Dhali aha/ kulumkina gwo ibwa mo dhali aha/ napkina shi/in pem mo.

⁷Mina Tapa usha ush ki sule/ mo
dhali diki mii mii ma 'the dok/e 'taa?

⁸Mo/en piti jin telu sho'k dakki'd mo 'taa?

Dhali aris gwom piti kun onu is 'kokin ntagi 'pemen ma risa tee 'baar mo 'taa?

⁹Arungimis thiski mii ma 'them piti e mo 'taa?

Dhala nyor piti jin shwakina a'di mo tani a'di dakki'da hil hil ki e ma 'thime/
ki mo/en mo 'taa?

Doshi ma dhali 'cunycuri yan mo.

¹⁰ Dhali aha/ ona gwo mo ki: A'di ta aha/ jin jwakaṭkunuwa du mo
ki me'd gi a'di jin Caa e ki Ca aḱki mii e mo.

¹¹ Aha/ mina ka mii gi Tapa e mo.

Nye, aha/ mina ka momer piti e 'peni kun dhamo/ mo.

¹² Aha/ mina kulum gwo ibwa goma ris miin tom pini mo
dhali tikir gwo kulum ibwa gom mii ma dem dem pini mo.

¹³ Bway pini, ayy Arungimis, a'di kogu mo.

Ka rum jana caaca me'da Arungimis banan jana/ mo?

¹⁴ /E tana Arungimis jin miiki momer mo,

/e jin piki mo ma dem dem pini ibwaman 'kwani mo.

¹⁵ /E ki me'da bim pini mo tani /e ki wan 'kwanim pini 'ba/ mo,

uni gun ta iya/ ma Yakuub mo dhali ku ma Yuusup mo.

Doshi ma dhali 'cuncuri yan mo.

¹⁶ Ka ris yi'de/ parki /e e mo tani ayy Arungimis,

ka ris yi'de/ parki /e e mo tani uni ko/kina ko/ is mo,

nye, uni gun 'kula'kul mo tani deekina is ki bir bir gom moṅko/ is mo.

¹⁷ Dhali araḱ kun 'kani mis wolki yi'de/ mo,

dhali momis si'da/ dhalki mondor ma sho'k me'd mo.

Dhali athopam pini a'di dhwa/ a'dki'd ki dhwa/ a'd dhwa/ a'd mo eya ris
'twaṅkal kuku/ mo.

¹⁸ Dhali mom pini jin 'twaḱa mondor ma sho'k mo tani a'di diki'd e 'tham kun
'theḱkin mo.

Awara sho'k pini a'di kushki mony'cesh mo,

dhali mony'cesh deeki'd ki bir bir mo dhali yiḱin is mo.

¹⁹ Bway pini diki'd e bwam kumma/ yi'de/ mo

dhali bway tur pini diki'd eya dhan yi'de/ mo.

Dhala dum bwam sho'k pini jin yana /e mo tani mishuwa?

²⁰ /E ki sus 'kwanim pini me'da ma'diny ka'bal mo,

ki me'd ma Musa mo dhala Haruun mo.

78

Gway jin yedhu sho'k goma Asap mo.

¹ Dhuyi 'ce, ayy 'kwanim pem, ki gwo jin torka/ mo.

Ka'di bwany'cem bum mo ki gwo ki 'twam pem mo.

² Haali/ aha/ mina ka'd 'twam pem ki gwom 'bi'th e mo.

Aha/ mina bah gwo mmo/o gwo kun mini 'koki 'ko eya tente/ 'peni gwon
dhamo/ mo,

³ 'peni to gwansan kun cikina ana gwo mo dhali mish mo,

uni gun torkina ibabam bana ana mo.

⁴ Ki ana mina 'koki bag uni 'peni uḱim buni mo,

hili a'di minu tor ka nyakum yil jin mini yayu/ i'ko'd mo

mii gi monyca gi Tapa mo dhali mo ma dem dem piti mo

dhali momer jin wagaskina a'di mo.

⁵ A'di telki gwonyci sho'k eya Yakuub mo,

dhali kar gwoṅkan 'pen ka piye/ jin cinu eya Israyiil mo,

a'di jin kankina a'di ibabam bana mo

mmoṭor uḱim buni gwo mo

⁶ ki uḱi ma nyakum yil kun min ma po/i 'ko isu/ ki uni mini mish uni mo

dhali uḱi kun 'konuki dho'th naskina/ mo,

dhali cu mis mo dhali tor uci kun ta uci**m** buni mo

⁷ wakan ki uni mini dhu mo ma 'ten kapem buni eya Arungimis mo
dhali 'koki this mii ma Arungimis e mo,

hili mmodhu gwonkan piti kun 'kwarkunu mo

⁸ dhali ki uni mini 'taki 'koki waki ibabam buni mo,

mmota ga du jin tana wa'ba/ mo dhali ta anyakum yil kun mini pish is ka le'd
mo,

uni gun mini ta anyakum yil kun min ma du tel shoka 'cesh mo,

uni gun mini ta ga kashira/ kun mini 'koki ta ku isinj gana/ goma Arungimis
mo.

⁹ 'Kwani ma Eprayim uni takin ka bwaa gi mo/as mo,

dhali uni dokkin ka nyan'ko'd mo ka tee jin asuwa mee mo.

¹⁰ Uni 'koki dhu Gwo ma Arungimis jin gamu me'd mo,

hili uni ushkin ki 'tash mo mmo/ii isi ki gwonkan piti jin cinu mo.

¹¹ Uni naki mii kun miikina Tapa mo

dhali miimer jin torkina a'di uni mo.

¹² E jis/e gi ibabam buni mo tani a'di wagaski momer mo

dhali e Pam Masir mo dhali e bwam bunto ma Suu/an mo.

¹³ A'di ki kwa/ dhan kumma/ yi'de/ bwa mo dhali dhal uni bway mo mmo/ii
icine/ mo

dhali a'di ki kar yi'de/ mmodosh me'da gap mo.

¹⁴ Dhali montee mo tani a'di ki shu uni bway ka rak mo,

dhali mon'thiny isa yempa/ mo tani a'di ki shu uni bway ka dhan o'd jin kushi
mo mo.

¹⁵ A'di ki tawan wosh e ki cwa e mombwaasho mo

dhali a'di ki ci uni yi'de/ jin kasha e ki kash mmopi mo me'd mo jin 'kula'kul
mo.

¹⁶ A'di ki dhal yi'de/ bway mmo'thonthoru/ 'peni 'kuwosh mo,

dhali a'di ki rak yi'de/ mmogaçu/ ka 'cesh me'd a'di jin guski'd e bwaagap mo.

¹⁷ Naskina/ uni 'kon mmomii miinthus apo/ a'di mo,

mmopish is ka le'd apo/ a'di jin Caa e ki Ca mo e bwam ma si'b mo.

¹⁸ Uni ki pal Arungimis ka dum buni mo

ki gwom buni jin 'thekkina uni gom tonte/ mo ka dum buni kun purki uni mo.

¹⁹ Uni ki o gwo apowa Arungimis mo mmo/o gwo mo ki: A/Arungimis mishi
ci ana tonte/ mmoshwa e bwaashowa?

²⁰ A'di ki mush wosh ki cwa mo, wakan yi'de/ kolki 'kus mo,

dhali yi'de/ 'thonthorki'd kagahara mo.

Gara/ mina a'di diki ci tonte/

walla dina a'di gara/ ki ci shum ki 'kwanim piti mo?

²¹ Wakan ki Tapa cikki gwo mo tani, a'di 'tu'dkunu ka nyor mo.

O'd a'di 'thakunu apowa Yakuub mo,

anyor piti a'di caki'da powa Israyiil mo

²² haali/ uni dar gi mongam gwo is eya Arungimis mo

dhali 'koki gam gwo is gom mom'bi'th piti jin tana a'di ata is ki me'd mo.

²³ Naskina/ a'di ki kan momis jin di'di mis mo,

dhali a'di ki ka'c acampur gi momis mo

²⁴ dhali a'di ki hethu a'cesh apo/ uni amanna mmoshwa mo,

dhali a'di ki ci uni pos 'peni momis mo.

²⁵ 'Kwani shwaki tonte/ gi iman'doyu gwo mo.

A'di hashki uni tonte/ ka enthus mo.

²⁶ A'di ki rak 'tham gi mom'pesho'k mmoposhu e momis mo, dhali ki mom'bi'th piti mo tani a'di ki shu 'tham ma biny cam bway mo.

²⁷ A'di ki he'th shum apo/ uni me'd bu'da 'cesh mo, dhali 'dii kun 'kan ma bi me'd emena si'b kun 'kon e bwaman ma gap mo.

²⁸ A'di ki dhal uni bway mo mmota'k e bwaman gu'b ciηηam buni mo, mmo'kama ris mom buni kun 'kona uni is mo.

²⁹ Dhali uni 'kaki uni mo ntagi uni kapkin ki kap gana/ mo, haali/ a'di ciki uni to jin 'thona bwa uni ki gor gor mo.

³⁰ Hili ntwa/a/ ki uni dhu to kun gora bwa uni mo tani, ki tonte/ di'd e 'twam buni mo tani,

³¹ anyor ma Arungimis cuki mis apo/ uni mo dhali a'di ki 'kosh uni gun 'bitha'bi'th 'peni bwam uni mo dhali a'di ki 'thi uni gwahan a'cesh uni gun dhunu 'pen ka pije/ gom mom'bor buni 'peni 'Kwani ma Israyiil mo.

³² Bahili apowa ris to gwansan kun miinu mo tani uni 'kon naskina/ mmomii miinthus mo.

Dhali bahili ki a'di mii momer piti mo tani uni 'koki gam a'di gwo is mo.

³³ Wakan a'di dhalki'da teem buni mmopuu mo me'da wulpe/ mo dhali yil buni ta'da pure/ ka pure/ mo.

³⁴ Ki a'di 'koshki uni mo tani uni ηapki a'di mo.

Uni ri'ckina du is mo dhali ηapa Arungimis ka dun gana/ mo.

³⁵ Uni kaki gwo e ka Arungimis a'di ta wosh buni mo, a'di jin ta'da Arungimis buni jin Caa e ki Ca jin wanki'da wan 'ba/ mo.

³⁶ Hili uni torkina tor ki a'di ki 'twany jarom buni ka maḵ mo. Uni takina tor ka tor gom a'di ka le'd buni mo.

³⁷ Adum buni yisa telu shoka 'kup ki a'di mo.

Uni 'koki ha me'd gom gwon ganam piti jin gamu me'd mo.

³⁸ Hili a'di di'd naskina/ mmohila hil ki e ma 'thime/ ki mo/en mo, dhali gwam uni 'peni tonthus buni kun miikina uni mo, dhali diki 'ce'd uni sho'k mo.

A'di 'tumki'da nyor piti is ka nyan'ko'd me'd ka ris mo, dhali a'di diki mura nyor piti 'baar mo mmoshwa a'cesh ki sho'k mo.

³⁹ A'di kaki gwo e mo ki uni ta jasi shuman is gi buηḡwar is mo, me'd 'tham yin jin poshki'd mo dhali diki wuṭulu/ ka nyan'ko'd mo.

⁴⁰ Me'd wana risa kun pisha uni is ka le'da po/ a'di e mombwaasho mo dhali jwakat a'di adum piti e bwam ma si'b mo.

⁴¹ Uni palki a'di dok/e dhali dok/e mo dhali rukuny A'din 'De/ jin Kogu jin ta jima Israyiil mo.

⁴² Dhali uni yisa dhu mom'bi'th piti eya dum buni yisa, walla atee yin si'da/ me'd jin wankina a'di uni 'ba/ 'peni 'kup buni mo,

⁴³ me'd jin wagaskina a'di jamas miim piti e Pam Masir mo, dhali miimer piti e bunto ma Suu/an mo.

⁴⁴ A'di ki tu'k yi'dem buni mmota abas mo, wakan ki uni mini 'koki pi yi'dem buni kun sokin mo.

⁴⁵ A'di ki hash dhana buhanya kanthi/ e bwaman uni mo a'di jin loski uni mo, dhali adhana buhanya 'dwa/ jin 'ce'dki uni sho'k mo.

⁴⁶ A'di ki ci tontem buni kun sina uni ka jirsan mmoshwa mo, dhali maman buni jin miina uniya tu'c mo tani shwan ma kuyu/ mo.

⁴⁷ Dhali a'di ki 'ce'd cwalman tom buni sho'k ka wasa/ mo

dhali cwampu/ buni ki jape/ jin wuna uni me'd manyandhe/ mo.

48 Dhali a'di ki ci bip buni cwa ki me'd ka wasa/ mo,
dhali ma'diny ka'bal buni uni dorkunu ki dhan o'd jin dhwa/a'dki'd mo 'pena wara sho'k mo.

49 A'di ki 'cuka nyor piti jin ca'bki wur wur apo/ uni mo,
anyor jin ta'da nyor piti jin dek a'di mo dhali mo ma cis mo,
uni gun 'doyina iman'doyu gwo kun 'ce'dkina 'ce'd sho'k mo.

50 A'di ki kar bway tur goma nyor piti mo.

A'di 'tash uni 'twa/ 'peni mowuwa?

Hili a'di ki kar 'kupki ta'kki mon'koki/em buni ki mom'ba'th jin wo'cki uni is she/ mo.

51 A'di ki musha risa bwanara/ gi 'Kwani gi Pam Masir ki cwa mo,
mom'bi'th jin ta jim buni jin gacki'd e gu'ba'ku/ ma Haam mo.

52 Dhali yan'ko'd a'di ki shu 'kwanim piti bway ka pije/ me'd ka'bal mo,
dhali a'di ki shu uni bway e mombwaasho me'da ma'diny ka'bal mo.

53 A'di ki sus uni ki 'dantar mo, wakan uni 'koki ko/ is mo.

Hili dhan kumma/ yi'de/ a'di 'ce'dki 'kup buni sho'k mo.

54 Dhali a'di ki sus uni ka pije/ e mony'cesh piti jin kogu mo,
dhali e 'kuwosha turga/ jin ta'da bim poros piti mo jin gamkina a'di adu is mo.

55 A'di ki ura ris kal gi 'kwani ka pije/ ibwambori uni mo.

A'di ki dhu mo ki she/ gom uni jin mina uni mii bu'th mo,

dhali thoson mo kun minu 'ko goma wak ma Israyiil e gu'ba'kum buni mo.

56 Naskina/ uni 'kon mmopal a'di mo dhali pish is ka le'da po/ a'di jin Caa e ki Ca jin ta'da Arungimis mo,

dhali 'koki dhu gwonycim piti mo,

57 hili uni tu'kkin mo dhali 'dap e ki miiny daçara/ mo me'd ibabam buni mo.
Uni toshkin me'da bwaa jin he'kki'da he'k e mo.

58 Haali/ uni rukunyki a'di mo mmomii anyor mo ki mom buni kun eka/ ek mo.

Uni ki rak a'di joçu/ ki mo jin 'thothu/ bwa ki miin dhapan mo gom tampingcon buni kun uka uni mmoluḡ mo.

59 Ka Arungimis cikki gwo mo tani a'di 'tu'du ka nyor mo,
dhali a'di ki waka Israyiil ka bor 'den gana/ mo.

60 A'di ki dhal mom piti 'pen jin ca'bkina a'di jin ta Pan Shilu mo,

e gu'ba'ku/ jin ca'bkina a'di e bwan 'kwani mo,

61 dhali a'di ki cuk mom'bi'th piti apo/ uni gun bu'thkunu mo mmota cinkina/ mo,

dhali monyca gi me'd piti apo/ 'kwani kun ta 'kup mo.

62 A'di ki ci 'kwanim piti e me'd gi uni kun kal gandal mo,

dhali kuma nyor piti mo apo/ uni kun ta mal piti mo.

63 O'd shwaki 'kwani kun ta dhuru'c buni mo,

dhali nyaram buni uni dar gi gway gi momash mo.

64 Igasiis buni ta'kkina 'cesh gom shemen gandal mo,

dhali upa dhalla/ gi igasiis mo, monkamu/ gwona uniya?

65 Dhali yan'ko'd Tapa merki e mo 'peni mo jin wana e ki mo jin ishkina a'di e mo,

me'd wathi/ jin 'bitha'bi'th jin 'therki cuuwa/ gom yimana mura'th jin pina a'di jin ka/u ki nah nah mo.

66 Dhali a'di ki dhu 'kup piti mmokwa/ bwa mo.

A'di ki dhu uni e mo ma 'the is ki sule/ sule/ mo.

⁶⁷ A'di ki waḡ gu'ba'ku/ ma Yuusup mo,
dhali a'di diki kwanya waḡ ma Eprayim mo.

⁶⁸ Hili a'di ki kwanya awaḡ ma Yahuuda/ mo,
a'di jin ta 'Kuwoḡa Sihyuun, a'di jin ena a'di mo.

⁶⁹ A'di ki nyanḡ mom piti jin koḡu mo me'd mo jin eka/ eḡ e momis mo,
dhali me'd mony'ceḡ jin telkina a'di sho'k ki sule/ sule/ mo.

⁷⁰ Dhali a'di ki kwanya Dawuu'd jin ta ciḡkinam piti mo,
dhali sus a'di mo 'peni mo jin hila a'di ka'bal mo,

⁷¹ 'peni mo jin hila a'di ushi nas ka'bal kun bwan mo tani
a'di ki sus a'di mo mmota amanhil ka'bal gom 'Kwani ma Yakuub mo,
a'di jin ta'da Israyiil jin ta mal piti mo.

⁷² Ka du jin ta a'di pa ki pa mo tani a'di ki hil uni mo,
dhali a'di ki shu uni bway ki me'd piti jin ta gwocon mo.

79

Gway ma Asap.

¹ Ayy Arungimis, 'kwani kun 'kon ki 'kus 'peni ji gi lunḡu mo tani uni pu'dkun
e mo gi mal pini mo.

Uni ki shi/ gu'b gi mondheleladhelel pini mo.
Uni ki shi/ Pa Urushaliim mo mmokup a'di mo.

² Uni ki ci bungwar is gi ciḡkinam pini ki 'dii kun pen e momis mmota tonte/
gom uni ki 'ka mo,
bungwar is gi unim pini kun dhunu mo ki she/ki dhelel dhelel mo tani 'kakina
tonḡwapi/ gi mony'ceḡ mo.

³ Uni wolkina bas buni me'd yi'de/ mo
mmo'kam Pa Urushaliim is mo
dhali jan'kamu/ di'd jin kan uniya?

⁴ Ana warkina ki uni gun cinu gura/ ki imannyak 'kom bana mo,
dhali miikunu ka maḡ mo dhali pe'th ki petha sor ki uni gwansan kun 'kamki
ana is mo.

⁵ Ayy Tapa, kakasja imina /e di mo mmomiiya nyor mo?
Min ma nyor pini 'peni bwan ta'c pini diki pur me'd o'da?

⁶ Woli /e anyor pini apo/ kal gi 'kwaniny'ceḡ mo
uni kun 'koki mish /e mo,
dhali eya dhan bampa/ mo
uni kun 'koki yuk gway pini mo.

⁷ Haali/ uni loskina Yakuub mo,
dhali shi/ mom piti is mo.

⁸ Dhalku/ ki dok/ e ka gwo e apo/ am gom miinthus kun miikina ibabam bam
kadhamo/ mo.

Dhalki mo ma 'thimem pini jin hilu ki mo/en pu'du'd ki jahanne/ gam am
'kup mo,
haali/ aman dhukunu e mo jin 'the am is ki 'the ka lunḡu'b mo.

⁹ Woth/ aman mo, ayy Arungimis, jin ta bway mowoth bam mo,
ki gway gi monycam pini mo.

'Cuki aman mo dhali gwami aman 'peni miinthus bam mo,
gom gway gi gway pini mo.

¹⁰ Ki to jin ta'da ta imina kal gi 'kwaniny'ceḡ i/o gwo mo ki:
Mane Arungimis buni mane?

Dhalki mori'c pini goma bas gi c̣in̄kinam pini jin gaçkunuwa 'cesh mo, dhalki a'di mishu mo e bwaman kal gi 'kwaniny'cesh e bwambori jis/em bam mo.

11 Dhalki mo/ohon gi uni gun dhunuwa sijin pu'dkini bwambori /e mo, ki isi ki dhan mom'bi'th pini mo ki /e mini 'tash uni 'twa/ mo uni gwansan kun 'disha 'twa/ mmowu mo.

12 'Tu'dki uni to me'di pesu/ ibwambor mo uni gwahan kun ta imannyak 'kom bam mo,

gom gura/ jin c̣ikina uni /e mo, ayy Tapa.

13 Dhali yan'ko'd aman kun tana 'kwanim pini mo, uni gun tana ma'diny ka'bal pini goma shon dhii/i'd pini mo

aman mina c̣i /e mo jin 'boruwa 'bor bwa i is ki sule/ sule/ mo,

'pena nyakum yil jin tanu mo ntaga nyakum yil jin 'ko'd mo, aman mina pe'd moman pini mo be.

80

Eya manyuk gway, isi ki gwo gom jandin to mo. Gom gwo jin c̣inu goma Asaq mo. A'di jin ta gway mo.

1 Ciyi 'ce mo ma, ayy Amanhil Ka'bal ma Israyiil mo, /e jin shukina Yuusup bway ka pije/ me'da ma'diny ka'bal mo.

/E jin karkunu mo mmoça'ba po/ kursi ma malik mo apowa çarabiim kun 'thupa kursi is ka bim buni mo tani, kushi mo mo

2 ibwambor ma Eprayim mo dhali bwambor ma Benyamiin mo dhala Manassa mo.

Piri mo ma dem dem pini is mo

dhali yayu/ mo mmota am is ki me'd mo.

3 Waru/ am is mo, ayy Arungimis.

Dhalki bwam/em pini kushu mo mo, ki am minu ta is ki me'd mo.

4 Ayy Tapa Arungimis gi momis mo,

anyor pini midi di pu'd kakasja gom mon'tho gi 'kwanim pini mo?

5 /E ki c̣i uni tonte/ jin shwana uni jin ta jabu'th mo,

dhali /e ki c̣i uni jabu'th mmopi mo ki sher kwa jin 'tu'du'd mo.

6 /E ki dhu am ki imannyak 'kom bam mmoçi am gura/ mo,

dhali uni gun ta 'kup ki am mmope'th e bwaman is buni mo.

7 Waru/ am is mo, ayy Arungimis gi momis mo.

Dhalki bwam/em pini kushu mo mo, ki am minu ta is ki me'd mo.

8 /E ki kal cwalman ka pije/ 'peni Pam Masir mo,

dhali /e ki ura ris kal gi 'kwaniny'cesh ka pije/ mo dhali c̣u'th a'di mo.

9 /E ki kara 'cesh eya tente/ gom a'di mo.

A'di ki guwa birman piti ka lungu'b e mo jin 'kula'kul mo dhali a'di ki 'tu'd mony'cesh mo.

10 Dhali 'kuwosha turga/ uni 'tu'dkunu mo ka lam piti mo,

cwa kun wana e ka bwanyayiis kun ça'bki dem dem nyakka bim piti mo.

11 A'di ki hash ka bim piti ntagi kumma/ yi'de/ mo

dhala birman piti mmoya gam yi'de/ a'cesh mo.

12 Goma tinta sa/ i'ce'dkina /e agangaram piti ka 'cesh mo

wakan ka ris uni gun iikin ki iimpe e bway piti mo tani hoki maman piti mo?

13 Abogo'b gi bwaasho a'di ha'thki a'di ki 'twa/ mo,

dhali aris to gwansan kun 'kon mmokal ya e bwam bunto mo tani shwaki a'di mo.

- 14 Tuku mo dok/e, ayy Arumgimis gi momis mo.
 Hili mo ka lunḡu'b 'peni momis mo dhali par mo e mo.
 Hili cwalman ma mura'th yan mo ma,
 15 a'di jin koḡhki'd jin sikina /e ka bim poros pini mo.
 16 Uni ci'thki a'di ki o'd mo dhali uni ki jep uni ka 'cesh mo.
 Dhalki uni 'ce'd sho'k mo e mo jin kucura kucur mo jin ta jis/em pini mo.
 17 Hili dhalki me'd pini a'di di'da po/ wathi/ jin ta me'da bim poros pini mo,
 a'di jin ta ya/ gi wathi/ jin karkina /e mmo'bitha'bi'th gom is pini mo.
 18 Dhali yan'ko'd am mina mol dok ka nyan'ko'd 'peni /e ki sule/ mo.
 Ci am moḡ'koki/e mo dhali am mina yer gway pini mo.
 19 Waru/ am is mo, ayy Tapa Arumgimis gi momis mo.
 Dhalki bwam/em pini kushu mo mo, ki am minu ta is ki me'd mo.

81

*Eya manyuk gway mo, isi ki gwo ma dhenḡhene/ gi 'Kwani gi Pany Jatt mo.
 Gway ma Asap.*

- 1 Yuḡi um gway ki 'kal 'kal eya Arumgimis jin ta mom'bi'th bana mo.
 Kumi cuuwa/ mo gom bwan 'kunya/ eya Arumgimis ma Yakuub mo.
 2 'Deki gway abor ki mis mo ki ko ma dhenḡhene/ jin pinu ki me'd mo,
 adhenḡhene/ jin 'kon ma shu/ i pesu/ mo jin 'kunya'kuny mo dhali ad-
 henḡhene/ mo.
 3 Piyi apoome/ ka ppen this mo,
 dhali ka ppe jin ta'da kunn is mo, ka cim jin yuḡuwa yuḡ ka tul 'kup bana mo.
 4 Haali/ a'di ta gwoḡkan jin bahu gom 'Kwani ma Israyiil mo,
 dhali gwoḡkan ma Arumgimis jin onu ki 'twa/ goma Yakuub mo.
 5 A'di ki kar gwoḡkan goma Yuusup mo,
 me'd jin yakina a'di ka pije/ e Pam Masir mo.
 Aha/ cikina 'twa/ mo a'di jin molkika/ mo.
 6 Aha/ soroḡhki/ e 'kupa bim pini 'peni ton diti'd mo.
 Me'd pini karu ki 'kus 'pena nura/ mo.
 7 E mo ma cis pini mo tani /e yuḡkina yuḡ mo dhali aha/ 'cukina /e mo.
 Aha/ thoḡkina /e 'twa/ ka kwal is e mo jin dor ma shoka dor mo.
 Aha/ palkina /e mo e yi'de/ ma Mariiba mo.

Doshi ma dhali 'cuncuri yan mo.

- 8 Ciki gwo mo ma, ayy 'kwanim pem, dhali aha/ mina kucur um mo ki kucur
 pa mo.
 Ayy Israyiil, wakki/ /e mina bwa 'taki oyi, hili dhali cik aha/ gwo mo.
 9 Wakan ka rum pinycon kun luḡa 'kwanin tiya midi diki di e bwam um mo.
 Wakan ki um mini 'koki luḡ ka jin 'kupa'dupun gom tompinycon jin luḡa
 'kwanin tiya mo.
 10 Aha/ tana Tapa Arumgimis bum mo,
 a'di jin suski um ka pije/ 'peni Pam Masir mo.
 Ka'di 'twam bum ki wangal mo dhali aha/ mina 'tu'd a'di ki piny piny mo.
 11 Hili 'kwanim pem 'koki cik 'twam pem mo,
 Israyiil midi 'taki ta gi jim pema kamuwa?
 12 Wakan aha/ cikina uni bway mo eya dum buni kun miin ki wa'th wa'th mo,
 mmobaḡ gwom buni kun logoma bwam bunin gana/ uni mo.
 13 Ayy, ki 'kwanim pem mini 'taki 'koki cik aha/ gwo mo sa/?
 Ka Israyiil midi 'taki ya e bway pem moyi.
 14 Aha/ 'disha 'twa/ ba/ mmo'ce'd 'kup buni sho'k mo,

dhali tu'k me'd pem apo/ uni gun ta 'kup ki uni mo.

¹⁵ Uni gwansan kun shi/ki Tapa i e mo tani uni mini 'taki koçki til til 'kup ki a'di mo,

dhali tom buni jin 'baki uni e mo tani midi diyi bwambori uni ki sule/ sule/ mo.

¹⁶ Aha/ mina 'taki thip um ki pos bunyan gana/ mo dhali ka dham 'peni wosh jin midi 'taki kap um moyi.

82

Gway ma Asap.

¹ Arungimis bu'thki mom piti e mo ma tul 'kup jin ta jim piti mo, eya ris bwaman gi 'kwani ma hakuuumam piti a'di ki kar mo jin dwallu gwo jin toru gwo 'twa/a 'cesh mo.

² /E mini dağ gwo dwall ki shi/ shi/ kakasja mo dhali tor mo ma gwar 'de/ gom uni gun ta thus ki thus mo? Doshi ma dhali 'cunycuri yan mo.

³ Ciyi mii ma kar/e ki uni gun 'ka'da is mo dhali uni gun daran gi icom mo. Hali mo ma kar/e gom uni gun dorkunuwa du mo dhali gom uni kun mini mii ta gi to mo.

⁴ 'Cwamu/ uni gun 'ka'da is mo dhali uni kun mini mii ta gi to mo. 'Cuçi uni mo 'peni me'd gi uni gun ta thus ki thus mo.

⁵ Uni mish torj kamu/ nyith yisa walla gwoj kamu/ misha uni 'bana? Aris mo gun ka'bu mony'cesh mo tani uni yiçinki is mo.

⁶ Aha/ ona gwo mo ki: Um a'di itana hakuuma mo, dhali um ta iya/ gi a'di jin Caa e ki Ca mo, aris umi 'baar mo.

⁷ Bahili um 'baar mo mini wu mo me'd 'kwani mo dhali ta'k 'ko'da 'cesh me'd iya/ ma malik mo.

⁸ Cuyi mis mo, ayy Arungimis, dhali dwalli mony'cesh gwo mo haala ris kal gi 'kwaniny'ceshi 'baar mo tani ta kum pini mo be.

83

Gway jin yuçu mo. A'di jin ta gway ma Asap.

¹ Ayy Arungimis, dhalku/ ki ca'b ki shwamm mo. Dhalku/ ki ca'bi bu'th monçu'th is pini mo walla di ki shwamm mo, ayy Arungimis.

² Haali/ hili mo mo ma, 'kwaninj 'kup pini uni miikina dulatt mo. Uni gwansan kun shi/ki /e i e mo tani uni 'deki 'kup buni ki mis mo.

³ Uni 'thiki gwonthus 'cesh apo/ 'kwanim pini mmocesh uni mo. Uni torcina tor mmonçal 'de/ apo/ unim pini gun ceshkina /e ka po/ mo.

⁴ Uni o gwo mo ki: Iiyu/ mo, dhalki ana dhidha uni sho'k ka pupush 'peni kal jin tana uni mo.

Dhalku/ ki dhal gway ma Israyiil ki a'di minu ka e dok/e mo.

⁵ Nye, uni 'dapan ki me'd ki gwom buni ka rem 'kup mo. Apo/ /e mo tani uni ki gam gwo me'd mo.

⁶ Gu'ba'ku/ gi 'Kwani Pa Aduum dhali 'Kwani ma Isma/iil dhali 'Kwani gi Pa Muwab dhali 'Kwani gi Pa Haajar mo,

⁷ dhali 'Kwani gi Pany Jibaal dhali 'Kwani gi Pa Ammuun dhali 'Kwani gi Pa Amalik,

dhali 'Kwani gi Pam Palasthiin nyakka ris 'Kwani gi Pan Sur mo.

⁸ Dhali 'Kwani gi Pan Ashshuur si'da/ uni gamki gwo me'd ki uni mo.
Uni ta 'kwani kun 'bi'th ma bi ki 'bi'th kun ta uci ma Luuth mo.

Doshi ma dhali 'cunycuri yan mo.

⁹ Wakan /e mini mii miim pini apo/ uni me'd jin miikina /e apoj 'Kwani gi Pam Midyaan mo,

dhali me'da Sisara dhala Yabin mo e Yi'de/ ma Kishun mo,

¹⁰ uni gun 'ce'dkunu sho'k mo e Pan Endor mo,
uni gun warkin ki gure/ gom mony'cesh mo.

¹¹ Dhuyi mom buni kun tana uni 'penkapan mmowa e ka Guraab dhala Diib mo

dhali aris iya/ ma malik buni mo me'da Sabah dhala Salmunnaa/ mo.

¹² Uni gun o gwo mo ki: Dhalki ana budha to gom is bana mo
'pena shon dhii/i'd ma Arungimis mo.

¹³ Ayy Arungimis pem, dhuyi uni mmowa e ki 'tham jin 'theḱi bu'da'cesh ki ji wutul mo,

me'da 'pi'b jin 'dashedu ibwambori 'tham mo.

¹⁴ Me'd o'd jin shwaki bwanycwa mo,

dhali me'da le'dan o'd jin shwaki'd ka le'd eya ris 'kuwosha turga/ mo tani

¹⁵ wakan /e mini ḱal uni ka cunthar pini mo,

dhali por uni bwa ka punthar pini mo.

¹⁶ 'Tu'dki uni bwam/em buni ki mo ma 'the is mo,

ki uni mini 'taki ḱap gway pini mo, ayy Tapa.

¹⁷ Dhalki uni dhunu ki mo ma 'the is mo dhali 'koku ki 'ko ma cis ki sule/ sule/ mo.

Dhalki uni 'ce'dki sho'k mo ki mii jin thiskunu mii 'ko'd e ki dar ka 'the mo.

¹⁸ Dhalki uni mish gwo 'ban mo ki /e a'di ital 'de/ mo jin tana gway pini Tapa mo,

/e jin Caa e ki Ca apo/ mony'ceshi 'baar mo.

84

*Eya manyuk gway mo, isi ki gwo ma dhejdhene/ gi 'Kwani gi Pany Jatt mo.
Gway gom iya/ ma Guurah mo.*

¹ Mom pini jin ca'ba /e mo tani wanu ena,
ayy Tapa gi momis mo.

² Akashiram pem cor'ki'da cor mo, nye a'di 'thikina buye/ mo
gom mo ki monyca'b gi Tapa mo.

Adum pem dhali bunḱwar is pem yuḱi gway ki bwanj 'kunyga/
goma Arungimis jin di ki e mo.

³ Isi kan si'da/ ara ganya/ a'di gamki gu'b mo

dhala gwajayilil taki'd gi gu'b gom is piti mo,

e mo jin mina a'di dho'th ushan piti mo,

e mo ma gwaṭam pini jin miinu to mo, ayy Tapa gi momis mo,

/e jin tana Malik pem mo dhali Arungimis pem mo.

⁴ Mom'bor mii gom uni gwansan kun 'kokin e gu'b pini mo,

uni gun yuḱi gway mmomanj /e ki sule/ sule/ mo.

Doshi ma dhali 'cunycuri yan mo.

⁵ Mom'bor mii gom 'kwani gwahan kun 'kona mom'bi'th is e /e mo,
dhali uni gun kwasharr ma du ki kwasharr e bway ma Sihyuun mo.

⁶ Me'd jin iikina uni ka lunḱu'b e embul wosh ma Buka mo tani

uni ki war a'di mmota mo jin kasha yi'de/ e ki kash mo,
dhala shoka 'ce'dcipiny tashki a'di 'kup ki usha al piti mo.

⁷ Uni iikin ki mo jin 'bithu is mo itagi mo jin 'bithu is mo.
Arumgimis jin bol tiya e ki 'bor mo tani a'di iminu mish mo eya Sihyuun mo.

⁸ Ayy Tapa Arumgimis gi momis mo, ciki mon'thom pem mo ma.
Dhali ciyi /e 'ce mo, ayy Arumgimis ma Yakuub mo.

Doshi ma dhali 'cunycuri yan mo.

⁹ Hila goṅgoro/ me'd bam mo ma, ayy Arumgimis.

Hili 'kup ki jis/e gi a'dim pini jin 'koshu ki monyca mo.

¹⁰ Haali/ atee gi mo ki monyca'b pini mo tani a'di 'boro'd mo,
mmobola alip gi mo gunn e mo.

Aha/ mina 'taki dhal mii gunn e i is 'te/ sayi mmota manhil 'twanjal gu'b ma
Arumgimis pem mo

mmobol mo jin 'konu e gu'ba'ku/ gi 'kwani kun ta thus ki thus e mo.

¹¹ Haali/ Tapa Arumgimis a'di ta'da tente/ dhali agoṅgoro/ mo.

A'di ciki mo ma 'the dhali montak mo.

Tom 'boro'da kamu/ mina Tapa non yisa

'peni uni gwansan kun iikin ki iin gana/ mo.

¹² Ayy Tapa gi momis mo,

mom'bor mii gom wathi/ jin gamki gwo is e /e mo.

85

Eya manyuk gway mo. Gway gom iya/ ma Guurah mo.

¹ Tapa, /e miiki isi mii gi bwa goma 'cesh pini mo.

/E ki waru/ shamanettan ma Yakuub is mo.

² /E ki gwamki miinthus gi 'kwanim pini mo.

/E ki dhal ka ris miinthus buni 'pen mo.

Doshi ma dhali 'cunycuri yan mo.

³ /E dokkina nyor pini bway bwa 'baar mo.

/E tu'kkin mo 'pena nyor pini jin 'batha'ba'th mo.

⁴ Waru/ aman is ka nyan'ko'd mo dok/e ayy Arumgimis jin ta bway mowoth
bam mo

dhali dhu ka nyor pini gunn 'pen ka pije/ kun dekkina /e apo/ aman mo.

⁵ A/e mini miya nyor apo/ aman ki sule/ sule/ kan mo?

A/e mini dhala nyor pini mmoya ki tur apo/ ma risa nyaḱum yil gi 'kwani
kana?

⁶ Mina /e bunya/ diki tash am e mo dok/e?

ki 'kwanim pini mina bwa 'kuny mo e /e?

⁷ Tori aman mo/en pini jin telu sho'k mo ma, ayy Tapa,

dhali dhalki aman bway gi mowoth pini me'd mo.

⁸ Dhalki aha/ cika gwo mo ma, gwo jin min ma Arumgimis jin ta Tapa o mo,

haali/ a'di midi o gwo gom mon'ku'th is ki 'kwanim piti mo,

dhali unim piti gwansan kun dhuun mo ki she/ ki dhelel dhelel mo, dhali uni
gwansan kun tu'kkun e a'di mo eya dum buni mo.

⁹ Ka jin gana/ bway mowoth piti a'di diki'd e me'd mo gom uni gwansan kun
ko/ki a'di mo

ki monyca midi di e bampam bana mo.

¹⁰ Mo/en jin telu sho'k mo dhali mii jin ta ji ma isinj gana/ mo tani uni mini sho ki me'd mo.

Mii ma kar/e dhali monku'th is uni mini pi 'twa/ ka rem 'kup mo.

¹¹ Mo ma isinj gana/ midu kash e me'd yi'de/ 'peni mony'cesh mo, dhali mii ma kar/e midu hil ka lungu'b 'peni momis mo.

¹² Nye, Tapa a'di midu ci a'di jin 'boro'd mo, dhali bampam bana a'di midu gwono'd a'di jin midu mara mar is mo.

¹³ Mii ma kar/e midu ya ibwambori a'di mo dhali kar natgin piti mmota bway mo be.

86

Mon'tho ma Dawuu'd.

¹ Ka'di 'cem pini mo, ayy Tapa, dhali ci aha/ gwo mo, haali/ aha/ hatha'ko'd mo dhali mina mii ta gi to mo.

² Tashi mondiki/em pem 'twa/ mo, haali/ aha/ tana wathinj gayiin mo. Tayi cinkinam pini is ki me'd mo, a'di jin gami gwo is e /e mo.

³ /E tana Arumgimis pem mo.

Miiyi mii ka 'the gom aha/ mo, ayy Tapa, haali/ e /e mo tani aha/ gwokina 'twa/ i /e iyula tente/ mo.

⁴ 'Kunyi akashira/ gi cinkinam pini mo, haali/ e /e, ayy Tapa, akashiram pem 'de'kka/ 'kup 'kup ki mis mo.

⁵ Haali/ /e, ayy Tapa, ta a'di jin 'boro'd mo dhali jin gwamki'da gwam mo, ki mo/en pini jin telu sho'k mo jin ishki'd ka enthus mo gom uni 'baar mo kun mini yuk /e mo be.

⁶ Ciyi 'cem pini, ayy Tapa, ka 'thom pem mo.

Ciki gwo gom ko jin gwoka/ ka di'b me'di is mo.

⁷ Ka tee jin tocu aha/ bwa mo tani aha/ yukkina /e mo, haali/ /e thokki aha/ 'twa/ mo.

⁸ Jankamu/ yisa di'da e bwam ma rum thus gwahan jin waki /e, ayy Tapa, walla jan kamu/ yisa di'da jin mii to me'd /e mo.

⁹ Aris kal ma ris 'kwaniny'ceshi 'baar mo kun uka /e mo tani mini pu'du/ mo dhali lung ki jin 'kupa'dupuni bwambori /e mo, ayy Tapa, dhali kar gway pini ki ca mo.

¹⁰ Haali/ /e caaca mo dhali miina dhan to gi momer mo, dhali /e 'de/ itana Arumgimis mo.

¹¹ Tori aha/ gwo gom bway pini mo, ayy Tapa, ki aha/ mina ya e bway ganam pini mo.

Kara dum pem mmotal 'de/ mo ki aha/ mina ko/ gway pini mo.

¹² Aha/ cina mo jin 'boruwa 'bor bwa i is ki /e mo, ayy Tapa Arumgimis pem mo, ka dum pemi 'baar mo, dhali aha/ mina kar gway pini ki ca ki sule/ sule/ mo.

¹³ Haali/ mo/en jin telu sho'k mo tani a'di caaca 'kup ki aha/ mo. /E 'cukkina kashiram pem 'peni mon'kulga/ ma Haawiya mo.

¹⁴ Ayy Arumgimis, 'kwani kun ushi 'kwani ga/ uni cukin apo/ aha/ mo, dhana tul 'kup 'kwani kun mathamath mo tani simmki mondiki/em pem e mo, dhali uni 'koki kar /e ibwambori jis/em buni mo.

¹⁵ Hili /e, ayy Tapa, /e tana Arumgimis jin miimi mo dhali mii mii ka 'the mo, /e mangala she/ ki mangal goma nyor mo, dhali mo/en pini jin telu sho'k mo tani ishki'd mo dhali mii ma isinj gana/ si'da/ mo.

16 Tuku/ mo e aha/ mo dhali bu'th mo jin hiluwa hil ka 'thime/ ki mo/en apo/ aha/ mo.
 Ciyu/ mo jin 'bidhu/ e is pini ki cin'kinam pini mo,
 dhali tayi ya/ gi nyaranyacin'kinam pini is ki me'd mo.
 17 Tori aha/ jamas mii ma 'them pini mo,
 ki uni gwansan kun shi/ki aha/ i e mo mini par mii e mo tani dhali minu dhu
 ki mo ma 'the is mo
 haali/ /e, Tapa, wothki aha/ mo dhali malas aha/ mo be.

87

Gway gi iya/ ma Guurah. A'di ta gway jin yuku mo.

1 E 'kuwosha turga/ jin kogu mo jin doshki'd mo jin ta 'penkuman bampam piti
 jin ka'bki'd mo.
 2 Tapa a'di enki 'twaŋkala goŋ ma Sihyuun mo,
 mmobola ris mo jin 'konu e pa ma Yakuub e mo.
 3 To gi monyca a'di torkunuwa tor gom /e mo,
 ayy 'penkuman bampa/ ma Arumgimis mo.
 Doshi ma dhali 'cunycuri yan mo.
 4 E bwaman uni gwansan kun mishki aha/ mo tani aha/ torkina aRahab eya
 tente/ mo dhali Pam Baabil mo.
 Hili mo mo ma, 'Kwani gi Pam Palasthiin dhali 'Kwani gi Pan Sur nyaŋki
 'Kwani gi Paŋ Gale/ mo.
 Uni o gwo mo ki: Jan 'de/ yan dho'thkunu e mun mo.
 5 Dhali goma Sihyuun mo tani a'di minu o gwo ciki:
 Jan 'de/ yan dhali jan 'de/ caan dho'thkunu eya yim mo.
 Haali/ a'di jin Caa e ki Ca ki is piti midi tela yim sho'k mo.
 6 Tapa midi deŋa deŋ e mo me'd jin 'kwarkina a'di gway gi 'kwani mo ki:
 A'di 'de/ yan dho'thkunu imun mo.
 Doshi ma dhali 'cunycuri yan mo.
 7 Imanyuk gway dhali imansa gara/ o gwo mo ki:
 Aris mo jin kasha yi'dem pem e mo tani uni 'kon e /e mo.

88

Gway jin yuku mo. Gway gom iya/ ma Guurah mo. Eya manyuk gway mo, isi ki gway jin gwonu gom bwan diti'd mo. A'di ta gway mmoyetha Hemaan jin ta Wathi/ ma Asraah sho'k mo.

1 Ayy Tapa, Arumgimis pem, aha/ yukkina /e mmowoth aha/ montee mo.
 Aha/ gwokina mon'thiny ibwambori /e mo.
 2 Dhalki mon'thom pem pu'dki'd ibwambori /e mo,
 ka'di 'cem pini mmocik kom pem mo.
 3 Haali/ akashiram pem a'di 'tu'du/ mo ki monto'c bwa mo,
 dhali mondiki/em pem a'di kalkina mo mo mmo'disha Haawiya is mo.
 4 Aha/ deŋu e nyaŋki uni gwansan kun iikin ka lun'gu'b e jisa 'kulga/ mo.
 Aha/ tana wathi/ jin dar gi mom'bi'th mo,
 5 dhali mmowa e ki a'di jin dhalkunu 'pen e bwaman jwa mo,
 dhali wa e ki wathi/ jin 'koshkunu mmo/ish e jis jwa mo,
 dhali wa e ki uni gwansan kun dina /e ki ka e dok/e mo,
 haali/ uni 'cih'kunu 'twa/ mo 'peni me'd pini mo.
 6 /E karki aha/ e jisa 'kulga/ mo,
 dhali e pa gi mondhurumi'd dhali moŋ'kulga/ mo.
 7 Anyor pini ishki'da po/ aha/ ki diŋ diŋ mo,

- dhali /e kumki aha/ 'twa/a 'cesh ka ris mii gi lanthinem pini mo.
 Doshi ma dhali 'cunycuri yan mo.
- 8/E ki rak uni gun nyak ii ki aha/ mmogas aha/ mo.
 /E ki kar aha/ mmota to jin bulabul gom uni mo.
 Aha/ man'thkunu 'twanjal e bwaman mo wakan ki aha/ mina mol ye mo.
- 9 Em pem caki'd mo mmokala 'tum gom bwan diti'd mo.
 Isa yempa/ aha/ yukkina /e mo, ayy Tapa.
 Aha/ te'dkina me'd pem gom /e mo.
- 10 A/e mii miimer gom uni gun wukina?
 A/dhali kun iikin mo mini cu mis mo mmoman /eya?
 Doshi ma dhali 'cunycuri yan mo.
- 11 A/mo/en pini jin telu sho'k bahu e jis jwa mowa?
 Walla dhali mo ma isinj ganam pini e mo jin kupu mowa?
- 12 A/momer pini mishu e mondthurumi'd mowa?
 Walla a/mo jin tana /e is ki me'd mmowoth 'kwani e mony'cesh jin dhaluwa
 dhal 'pen mishu mowa?
- 13 Hili aha/, ayy Tapa, gwokina 'twa/ e /e mo.
 E mon'thamo/ a'thom pem yaki'di bwambori /e mo.
- 14 Ayy Tapa, atinta ibita /e aha/ asho kan mo?
 Atinta бага /e jis/em pini 'peni aha/ mo?
- 15 Mo jin jwatkunuwa du mo dhali mowu 'dishki aha/ is mo 'pena tee jin
 taka/ dhuru'c mo,
 aha/ 'koshu is ka nyor goma purem pini mo. Aha/ dara gi mowoth mo.
- 16 Anyor pini a'di dhi'thki aha/ sho'k mo.
 To jin ko/ka/ is 'peni /e uni bu'thkina bu'th mmo'ce'd aha/ sho'k mo.
- 17 Uni 'kamki aha/ is me'da gannu/ yi'de/ jin guski'd ka tee 'baar mo.
 Uni 'kamki aha/ 'kup ki deki montal 'de/ mo.
- 18 /E ki rak uni gun eni aha/ dhali imugum pem mmogas aha/ mo.
 Imannyak 'kom pem uni 'kon e mondthurumi'd mo.

89

Gway jin yedhu a/Ethaan sho'k jin ta Wathi/ ma Asraah mo.

- 1 Aha/ mina yuk gway gom mo/en pini jin telu sho'k mo, ayy Tapa, ki sule/
 sule/ mo.
 Ki 'twa/ pem mo tani aha/ mina bah gwo gom mo ma isinj ganam pini eya risa
 nyakum yil gi 'kwaniny'cesh mo.
- 2 Haali/ mo/en pini jin telu sho'k mo tani a'di telkunu ki sule/ sule/ mo.
 Mo ma isinj ganam pini a'di rwa'ckunu mo me'd momis mo.
- 3/E ki o gwo mo ki: Aha/ gamkina gwo me'd ki jin 'dem pem jin kwanyka/ mo.
 Aha/ thulkina gwo me'da po/ goma Dawuu'd jin ta cin'kinam pem mo.
- 4 Aha/ mina tel emen pini sho'k ki sule/ sule/ mo,
 dhali nyanja kursi ma malik pini goma risa nyakum yil gi 'kwani mo.
 Doshi ma dhali 'cunycuri yan mo.
- 5 Dhalki momis man momer pini mo, ayy Tapa,
 dhali mo ma isinj ganam pini e dhana tul 'kup gi 'kwani kun kogu mo.
- 6 Haali/ kaja a'di jin di'd e momis gunn kun uku jin minu kar ka par nyakki
 Tapa mo?
 Kaja ibwaman uni gi momis jin wakina e ki Tapa mo?
- 7 Arumgimis a'di jin ko/kunu eya dhana tul 'kup gi 'kwanim piti kun kogu mo,

a'di jin caaca mo dhali jin ta'da pure/ mo apowa ris uni 'baar mo kun 'kamki a'di is mo.

8 Ayy Tapa Arungimis gi momis mo, kaja a'di jin ta jima dem dem me'd /e mo? ayy Tapa, nyakki mo ma isinj ganam pini jin 'kamki /e is mo.

9 /E jikina ji apo/ yi'de/ jin birki bakal mo.

Ki lanthinem pini jin cukina a'di mis mo tani /e doshki uni mo.

10 /E siri'ckina Rahab apo/ ki sho'k mo me'd bungwar isa gongoro/ mo.

/E kwa/ki 'kwani kun ta 'kup ki /e 'twa/ mo ka bim pini jin ca'bki dem dem mo.

11 Momis ta kum pini mo dhali mony'cesh si'da/ ta jim pini mo.

Mony'cesh dhala ris to 'baar kun 'kon e a'di mo tani, /e ka'bki uni mo be.

12 Abora bim poros dhali abora biny cam /e ukki uni mo.

Wosh ma Tabur dhali Wosh ma Harmuun uni 'kunykina bwa gom gway pini mo.

13 /E takin ga bim pini jin ca'bki dem dem mo.

Me'd pini 'bitha'bi'th mo, me'da bim poros pini turatur mo.

14 Mo ma kar/e dhali mo jin dhunuwa dhu ka po/ uni ka'bkina kursi ma malik pini mo

dhali mo/en jin telu sho'k mo dhali mii ma isinj ganam pini mo uni iikini bwambori /e mo.

15 Mom'bor mii gom 'kwani kun mishi cuu mo e mo ma tul 'kup jin yukuwa yuk mo,

uni gun iikin mo, ayy Tapa, e monkush gi jis/em pini mo,

16 uni gun 'de'k gway isi mis gom gway pini ka tee 'baar mo,

dhali kar mo ma kar/em pini ki ca mo.

17 Haali/ /e ta monyca gom mom'bi'th is buni mo.

Ki mii ma 'them pini mo tani cem bam karkunu ki ca mo.

18 Haali/ agongoro/ gi me'd bana mo tani a'di ta ji gi Tapa mo,

amalik bana mo tani a'di ta ji gi A'din 'De/ jin Kogu jin ta jima Israyiil mo.

19 Haali/ 'pena dhamo/ mo tani /e torki gwo ki tonyjan mo

ki a'dim pinin 'de/ jin ta isinj gana/ mo dhali o a'di gwo mo ki:

Aha/ karkina tor'kup 'dolkon apo/ jan 'de/ a'di jin ca'bki dem dem mo,

dhali aha/ karkina a'di ki ca, a'din tal 'de/ yan jin kwanyu/ mo 'peni 'kwani mo.

20 Aha/ gamkina Dawuu'd mo a'di jin ta cinkinam pem mo.

Ka yin pem jin kogu mo tani aha/ ki 'koshki a'di mo.

21 Wakan me'd pem midi diya po/ a'di ki sule/ sule/ mo.

Abim pem si'da/ midi 'bi'th a'di is mo.

22 Uni gun ta 'kup ki a'di mo tani uni mini 'koki pi a'di e ki yuk mo.

Uni gun ta thus ki thus mini 'koki kar a'di mo mmokar is ki gwa'd mo.

23 Aha/ mina siri'c uni gun ta 'kup ki a'di ki sho'k ibwambori a'di mo.

dhali dher uni gwahan is bwa ka 'cesh mo uni gun shi/ki a'di i e mo.

24 Mii ma isinj ganam pem dhali mo/en pem jin telu sho'k mo tani uni mini nyak 'ko ki a'di mo be,

dhali ki gway pem mo tani cem piti minu kar ki ca mo.

25 Aha/ mina kar me'd piti apo/ kumma/ yi'de/ mo

dhali me'da bim poros piti apo/ yi'de/ kun son mo.

26 A'di midi 'ther ko e aha/ mo dhali o gwo mo ki: /E tana Ababam pem mo,

jin ta'da Arungimis pem mo, dhali Wosh jin ta bway mowoth pem mo.

27 Dhali aha/ mina kar a'di mmota abwanyara/ mo,

a'di jin eka/ ek mmobol imalik gi mony'cesh e mo.

28 Mo/en pem jin telu sho'k mo tani aha/ mina karki a'di gom a'di ki sule/ sule/ mo.

Dhali gwom pem jin gamka/ me'd mo midi dosh mmorwa'ckunu a'di gom a'di mo.

29 Aha/ mina tel jil piti sho'k ki sule/ sule/ mo
dhali akursi ma malik piti mina e wa ka tee gi momis mo.

30 Wakki/ ucim piti mini dhal gwonkan pem jin cinu 'pen mo
dhali 'koki ii isi me'd gwonkan kun onu mo tani,

31 dhali wakki/ uni ki puu gwonkan pem kun bahu mo
dhali 'koki dhu gwonkan pem kun 'kwarkunu mo tani

32 yan'ko'd aha/ mina ci uni ajisa gom gwondharj buni ki cwam pem mo
dhali miinthus buni ki gulu'c jin miga/ dor uni mo.

33 Hili aha/ mina joc mo/en pem jin telu sho'k 'peni a'di yisa,
walla aha/ mina ta thus gom mii ma isinj ganam pem yisa.

34 Aha/ mina diki puu gwo jin gamka/ me'd mo
walla ak gwo e mo jin piyi'd 'peni 'twam pem mo.

35 Me'd 'de/ ki sule/ aha/ okina gwo isi 'baar mo mmothul gwo me'da po/ gom
mondhelel pem mo.

Dhali aha/ mina diki ta ator goma Dawuu'd mo.

36 Jil piti midi 'dim 'kup ki sule/ sule/ mo,

dhali akursi ma malik piti midi di ki sule/ me'da tente/ ibwambori jis/em pem
mo.

37 Me'da ppe mo tani a'di midi tel sho'k ki sule/ sule/ mo.

A'di midi dosh ki morwa'c is mo ki momis 'kon mmo'dim 'kup mo.

Doshi ma dhali 'cunycuri yan mo.

38 Hili shwane/ /e bitkina bita sho mo dhali ruka/ ruk mo.

/E 'tu'dkunu mo ka nyor apo/ a'dim pini jin 'koshkunu ki monyca mo.

39 /E watki gwom pini jin gamu me'd mo gi cinjinam pini mo.

/E ki shi/ ton'kup piti is e bu'da'cesh mo.

40 /E ki yu'd agonj piti mo.

/E ki kar mom piti jin tenu gwo mmokup mo.

41 Aris uni gwansan kun pekin mo uni dilki a'di to mo.

A'di cikunu gura/ ki imannyak 'kom piti mo.

42 /E ki kar me'da bim poros gi a'di jin ta 'kup ki a'di ki ca mo.

/E ki dhuwa ris uni gun ta 'kup ki a'di mmo'kuny bwa mo.

43 Nye, /e ki dok shemen gandal piti jin kaaka ka nyan'ko'd mo.

Dhali /e diki kar a'di mmodosh mo e mo ma mee mo.

44 /E ki joc cwa ma malik 'peni me'd piti mo

dhali /e ki bita kursi ma malik piti a'cesh mo.

45 /E ki kara teem piti ki kut kut mo atem piti jin tana a'di dhuru'c mo.

/E ki tash a'di is ki mo ma 'the is mo.

Doshi ma dhali 'cunycuri yan mo.

46 Ki mo gi wakata, ayy Tapa, imina /e bag is pini ki sule/ sule/ kan mo?

Ki mo gi wakata, imin ma nyor pini pur me'd o'd kan mo?

47 Kayi gwo e mo ma, ayy Tapa, mondiki/e wana bar piti kata mo?

Dina /e ki par e mom pini jin uka /e to di bwa 'te/ goma ris iya/ gi 'kwani mo?

48 Wathi/ jana sa/ imidi di ki e mmodiki par wu e mo?

Dhali kaja si'da/ imidi misha kashiram piti woth 'peni mom'bi'th ma Haawiya
mo?

Doshi ma dhali 'cunycuri yan mo.

49 Tapa, mane mo/en pinin dhamo/ yin jin telu sho'k mo,

a'di jin tana /e isinj gana/ a'di jin thulkina /e aDawuu'd gwo me'da po/ mo?

50 Kayi gwo e mo ma, ayy Tapa, *cin*kinam pini *cinu* gura/ mo be.
 Kayi gwo e mo ma, ki aha/ *kalkina* asor gi 'kwani gwansan eya bor pem mo,
 51 a'di jin *thunykina* 'kwani kun ta 'kup ki /e 'twa/ is mo, ayy Tapa,
 a'di jin *miikina* uni ka mak mo, *natgin* gi a'di jin 'koshkina /e ki monyca mo.
 52 Mom'bor mii gom Tapa ki sule/ sule/ mo.

Amen dhali Amen.

AWARKA/ JIN 'KONA 'BANI DONON MO

90

Mon'tho ma Musa, a'di jin ta Wathi/ ma Arumgimis mo.

- 1 Tapa, /e taki jim bam jin 'kona am 'twa/i cine/ mo eya risa nyakum yil gi 'kwani mo.
- 2 Ntwa/a/ ka dhan wosha turga/ 'kokunu mmo'doyu/ ka pije/ mo, walla isi me'dyini jin uka /eya 'cesh dhali mony'cesh mo, 'peni mo jin 'konuki/e ki sule/ sule/ ya ye 'ba/ mo itan mo jin 'konuki/ e ki sule/ sule/ ya ye 'ba/ mo tani /e tana Arumgimis mo.
- 3 /E ki tu'k wathi/ mmowar ki bu'da'cesh ka nyan'ko'd dok/e mo dhali /e ki o gwo mo ki: Dokku/ ka nyan'ko'd mo, ayy uci gi 'kwaniny'cesh mo.
- 4 Haali/ yila alip e jis/em pini mo tani ta ton kamuwa? Hili a'di wana e katili/ jin peki'd mo, walla a'di wana e ki mon'thiny jin timkunu mo mo.
- 5 /E ki dhi'th 'kwani sho'k mo dhali uni wakina e ki jan jin shu'bu/ mo, dhali wa e ka sho jin lu/kin mon'thamo/ mo.
- 6 E mon'thamo/ me'd jin lu/a a'di ki tup tup mo dhali a'di lu/u mo dhali mom'pimpili/ mo tani a'di uski'd ki jog mo dhali ku'th mo.
- 7 Haali/ aman kupkunu ki 'ci'd'da/ ka nyor pini mo. Ka nyor pini mo tani aman kumkunu 'twa/a 'cesh ki kum jin 'boro'da?
- 8 /E ki kar tom bam jin 'coqa'coq ibwambori /e mo. Miinthus bam kun miikina am ka kwal is mo dhukina /e e monjkush gi bwam/ em pini mo.
- 9 Haala risa teem bami 'baar mo pekin mo e bwan'kwariny ma nyor pini mo. Yil bam pu'dkin itagi 'pemen mo me'da shure/ jin dak 'kup mo.
- 10 Yil gi mon'koki/em bam a'di ta iss 'kwanimpa kwara i'ce'dka 'kume'd apo/ mo, walla isi kani wakki/ 'kup gwo gom mom'bi'th is itagi iss 'kwanimpa donon mo tani hili naskina/ sur buni a'di di'di mmo'kosha 'kosh ki mii mo dhali monto'c bwa mo, dhali ki 'dishe/ mo tani uni pekin mo dhali aman pekina mo.
- 11 Kaja si'da/ imidi hil isi gwo i e goma nyor pini mo, dhali ka nyor pini isi ki gwo jin minu ko/ /e mo?
- 12 Wakan tori aman gwo mo mmoderja teem bam e mo ki aman mina gama dum bam gi moyuk mo.
- 13 Doku/ mo, ayy Tapa! Ki mo jin wakata imina /e idi mo? Hili ahil ki e ma 'thime/ gom cin'kinam pini mo.
- 14 Kapi amana dum bam ki mon'thamo/ ki mo/en pini jin telu sho'k mo ki aman mina bwa 'kuny mo dhali 'bor bwa mo ka teem bam 'baar mo.

- 15 Dhuyi aman mmo'kuny bwa mo me'da tee ka ris mo me'da cim gunn kun dorkina /e aman mo
dhali me'd yil ka ris me'd jin parkina aman tonthus e mo.
16 Dhalka tu'c pini a'di toru eya tente/ e cin'kinam pini mo,
dhali monyca gi mom'bi'th pini e u'cim buni mo.
17 Dhalki mii ma 'the gi Tapa Arumgimis bam di'da po/ aman mo,
dhali teli /e atu'c bam sho'k mo jin miina aman ki me'd bam mo,
nye, atu'c jin miina aman ki me'd bam mo tani teli /e a'di sho'k mo.

91

- 1 A'di jin ca'bki'd eya darha'da/ gi a'di jin Caa e ki Ca mo,
a'di jin ca'bki'd eya la gi a'di jin ca'bki dem dem mo,
2 mido o Tapa gwo mo ki: /E a'di ihurga/ jwa icine/ mo dhali /e tana cur pem
jin tenu gwo mo,
Arumgimis pem, e /e mo tani aha/ gamkina gwo is mo.
3 Haali/ a'di mido 'cuk /e mo 'pena gume/ jin cesh ma mancesh to to mo
dhali 'peni to jin wo'cki 'kwani is she/ mmowu mo.
4 A'di mido kum /e 'kup ki thulas piti mo,
dhali e bwar'kwariny ma bim piti mo tani /e mini gam mo jin huru jwa mo.
Mii ma isinj ganam piti a'di ta'da gongoro/ mo dhali pa'dal mo.
5 /E mini diki ko/ is gom mon'thiny jin mido miia pure/ mo,
walla athopa/ jin peki'd montee mo,
6 walla to jin wo'cki is she/ jin parki'd mon'thiny mo,
walla mo jin 'ce'du/ sho'k jin shi/ki'da shi/ is montee mo.
7 Alip 'kwani mini rasu/ e 'ko'd gwar pini mo,
dhali alaapi 'kume'd mini rasu/ ka bim poros pini mo,
hili a'di mido diki pu'du/ mmo'dish /e is mo.
8 /E mini hil ki jasi em pini mo
dhali hil mo jin minu ri'c a'di jin ta thus ki thus mo.
9 Haali/ /e ki kar Tapa mmota jim pini jin hura /e jwa mo,
a'di jin Caa e ki Ca mo jin ta mom pini jin ca'ba /e icine/ mo tani
10 tonthusa kamu/ mido diya mmopu'da po/ eya?
walla mo jin doruwa dor mido 'dish /e is e gu'b burrinyem pini jin ca'ba /eya?
11 Haali/ a'di mido hash iman'doyu gwom piti mo mmokan gwo gom /e mo
dhali mmoji /e mo eya ris bway pini 'baar mo.
12 E me'd buni mo tani uni mini 'de'k /e mo,
isi ciki/ ki /e mina sho'k pini diki torosh apo/ wosh mo be.
13 /E mini yapa dhopa po/ ki sho'k mo dhali tasha/ jin ta ga ti'di cine/ mo,
dhali adhop jin ta dhuru'c mo dhali tasha/ mo /e mini yap uni ki sho'k mo.
14 Haali/ a'di kothki aha/ me'd ki mo/en mo tani aha/ mina 'cuk a'di mo.
Dhali aha/ mina cesh a'di ka po/ mo haali/ a'di mishki gway pem mo be.
15 Ki a'di mido yuk aha/ mo tani aha/ mina yuk a'di 'twa/ mo,
aha/ mina nyak di ki a'di e mo jin toju a'di bwa mo.
Aha/ mina 'cwam a'di mo dhali tak a'di mo.
16 Ki mondiki/e jin tura 'ba/ ki tur mo tani aha/ mina kap a'diya du mo,
dhali tor a'di bway gi mowoth pem mo.

92

Gway. Gway jin yuku goma cim ma pesu/ mo.

- 1 A'di 'boro'd mmoçi mo jin 'boruwa 'bor bwa i is ki Tapa mo,

mmoyuk gway mmoman gway pini mo, ayy /e jin Caa e ki Ca mo,
 2 mmobah gwo gom mo/en pini jin telu sho'k mo mon'thamo/ mo,
 dhali mo ma isinj ganam pini mon'thiny mo,
 3 dhali ki konj gway ma dhenjhenye/ jin 'kon ma shu/i 'kume'd mo jin buku ki
 dar ga yi'c mo dhala dhenjhenye/ mo,
 dhali ko jin lukum ma dhenjhenye/ jin 'kon ma shu/i pesu/ mo be.
 4 Haali/ /e, ayy Tapa, /e karki aha/ mmo'kuny bwa ki 'kuny gom miim pini
 mo.
 Ki miin to ki me'd pini mo tani aha/ yukkina gway ki monj'kuny bwa mo.

5 Dhan miim pini 'ka'da miya, ayy Tapa.
 Gwom pini kun kuluma /e ibwa mo tani uni 'kula'kul mo.
 6 Wathi/ jin ta dholgon mo tani mol a'di mish 'ban mo,
 wathi/ jin 'kan ma 'kama janya/ mo tani a'di mol mish gwo yansan 'ban mo
 be.
 7 Ki ba a'di jin ta thus mo tani a'di 'ka'da le/ me'da sho mo
 dhali imanmii tonthusi 'baar mo lugkin ki tup tup mo tani
 uni 'birki 'kup ki mo jin 'ce'du/ sho'k ki sule/ sule/ mo,
 8 hili /e, ayy Tapa, /e a'di idikin e mo jin kapata/ kapat ki sule/ sule/ mo.
 9 Haali/, hili mo mo ma, 'kwani kun ta 'kup ki /e mo, ayy Tapa,
 haali/, hili mo mo ma, 'kwani kun ta 'kup ki /e mo tani uni minu 'ce'd sho'k
 mo.
 Aris imanmii tonthus mo tani minu cecker bwa mo be.

10 Hili /e ekki cem pem mo mmowa e ki ce ma almaña'th mo.
 /E ki wol aha/ ayin jin ta this ki this i is mo.
 11 Em pem parki uni kun ta 'kup ki aha/ e mo mmota'k ka lungu'b mo.
 'Cem pem cikki gwo gom mom'bir 'kup ki 'kwani kun ta thus ki thus kun
 tha'th aha/ ki is mo.

12 Uninj kar/e uni lugkin me'd cwanyjethkum mo
 dhali ca me'da bwanyayis e Pan Lubnaan mo.
 13 Uni cu'thkunu mo e gu'b gi Tapa mo.
 Uni lugkin ki tup tup e gu'b ma piye/ jin di 'kup kany ma Arumgimis bana mo.
 14 Uni 'kon naskina/ mmodho'th maman ka dhan buni kun tana uni mo.
 Uni 'tu'du/ mo ki sule/ ki yiman ki is buni mo dhali ishki dhii/ mo
 15 mmotor eya tente/ ki Tapa a'di ta a'di jin ta'da kar/e mo,
 a'di jin ta wosh pem mo, dhali miinj kamu/ di'd e a'di yisa jin ush me'd
 mmonon a'di mmota kar/e mo.

93

1 Tapa a'di jiki'da ji mo. A'di hi'thkunu ki burrinnye/ ma malik mo.
 Tapa a'di hi'thkunu is ki burrinnye/ mo. A'di 'kamkunu is ki mom'bi'th mo.
 Nye, mony'cesh a'di telkunu sho'k mo. A'di molu joç ki sule/ sule/ mo be.
 2 Kursi ma malik pini a'di telkunu sho'k mo 'peni kadhamo/ mo.
 /E idikin 'peni kadhamo/ ki sule/ sule/ mo.
 3 Agannu/ yi'de/ uni uluckin ki mis mo, ayy Tapa,
 agannu/ yi'de/ uni uluckin ki mis ki 'twam buni mo,
 agannu/ yi'de/ uni uluckin ki mis ki 'twam buni jin gwokina uni akuku/ kuku/
 mo.
 4 Mo ta gi mom'bi'th kagahara mmobol yi'de/ e jin alki is is ka ris mo,
 dhali mo ta gi mom'bi'th mmobol yi'de/ jin birki bakal e mo.

Tapa jin diki'd e mo jin ka'dama/ ka'dam mo tani a'di ca'bki dem dem mo.

⁵ Gwoŋkan pini kun 'kawurkunu mo tani uni 'kon eya tente/ ki 'koŋ gana/ mo. Moŋko/ piti a'di gama gam gom gu'b pini mo, ayy Tapa, gom ki sule/ sule/ mo.

94

¹ Ayy Tapa, /e tana Arumgimis jin ri'cki'da ri'c mo.

/E tana Arumgimis jin ri'cki'da ri'c mo tani dhalki /e kushki mo mo.

² Cuyi mis mo, ayy /e jin tana Amandwall mony'cesh gwo mo.

Ciki uni gwahan kun dhu is ki ca tom buni kun 'dapa uni ki 'dap mo.

³ Ayy Tapa, ki mo gi wakata imina uni kun ta thus ki thus i'ko mo?

Ki mo gi wakata imina uni kun ta thus ki thus 'ko mo mmope ki bwan 'kunyud mo?

⁴ Uni wolki gwom pus buni kun dhunu uni 'ba/ ki ca ka pije/ mo,

uni dhu 'ba/ ki ca mo, aris uni 'baar mo kun miiki tonthus mo.

⁵ Uni siri'cki 'kwanim pini apo/ ki sho'k mo, ayy Tapa,

dhali wa'th mal pini i e mo.

⁶ Uni ki 'kosh upa dhalla/ mo dhali uni kun ii ii yilkina/ mo,

dhali ta iman'kosha mee ki 'kwani kun dar gi icom mo.

⁷ Dhali uni ki o gwo mo ki: Tapa mishki toŋ kamu/ par eya?

Arumgimis ma Yakuub a'di mish toŋ kamu/ nyitha/?

⁸ Mishi gwo 'ban ma, ayy 'kwani kun ta dholgon ki dholgon mo.

Um kun tana rwa/e/, ki um mini yuk kakasja mo?

⁹ A'di jin ukki gu'ban'ce mo tani mina a'di diki cik gwo mowa?

A'di jin ukki e mo tani mina a'di diki par mo e mowa?

¹⁰ A'di jin dorki kal gi 'kwaniny'cesh mo tani mina a'di diki dora dor garaa?

A'di jin toŋki 'kwani gwo mmonyith to mo tani,

¹¹ Tapa a'di mishki to kun kuluma 'kwani ibwa mo,

ki uni ta toŋ kamuwa? ayy jasa wulpe/ 'te/ mo.

¹² Mom'bor mii gom wathi/ a'di jin dorkina /e mo, ayy Tapa,

dhali a'di jin toŋkina /e gwo 'peni gwoŋkan pini jin cinu mo,

¹³ mmoci a'di isa haju/ 'pena teem piti jin toju a'di bwa mo,

ntagi jisa 'kulga/ minu cwany mo gom a'di jin ta thus ki thus mo.

¹⁴ Haali/ Tapa mididi diki dhal 'kwanim piti 'pen mo.

A'di mididi diki dhal mal piti 'pen mo.

¹⁵ Mo jin dhunuwa dhu ka po/ mididi doku/ mo e mo jin ta'da kar/e mo,

dhali aris uni 'baar mo kun dhelel ma du mo tani uni mini bath a'di isho'k mo be.

¹⁶ Kaja a'di jin cu mis gom aha/ apo/ uni kun ta thus ki thus mo?

Kaja a'di jin doshki'd gom aha/ apo/ imanmii tonthus mo?

¹⁷ Waŋki/ Tapa mididi diki ta manwoth pem mo tani

akashiram pem ishunsan gana/ moyi mididi ca'b ki shwamm e mony'cesh jin 'konu ki shwamm mo.

¹⁸ Ki aha/ kulumkina gwo ibwa mo ki: Sho'k pem yereski'd mo tani

mo/en pini jin telu sho'k mo, ayy Tapa, a'di ibu'thki aha/ mmodosh mo be.

¹⁹ Ki mo ma tete/ ma dum pem tana ris mo tani

momalas pini uni 'kunykina kashiram pem bwa mo be.

²⁰ Mina itapa kun ta thus ki thus mish gwo gam me'd nyaŋki /e mo,

uni kun thosonki gwoŋkan kun bahu kun tanuwa pibi ka pibi mo?

²¹ Uni 'tuntulki isi montal 'de/ apo/ mondiki/e gi wathin kar/e mo,

dhali waŋ a'di jin di'd ka po/ mmokar a'di mmowu mo.

²² Hili Tapa a'di warki'd ka cur pem jin tenu gwo mo, dhali Arungimis pem ta wosh pem jin hurga/ jwa mo.

²³ A'di mididi dokki uni to i is mo gom miiny 'cokgam buni mo dhali dhi'th uni sho'k ka pupush 'peni miim buni kun tana uni thus ki thus mo.

Tapa Arungimis bana mididi dhi'th uni sho'k ka je'desh mo.

95

¹ Ayy iyyu/ mo, dhalki ana yuka gway gom Tapa mo.

Dhalki ana 'kunya bwa kagahara mmowol cuuwa/ gom wosh jin ta bway mowoth bana mo.

² Dhalki ana iyyina mo e bur'kus piti mo mmoçi mo jin 'boruwa 'bor bwa i is mo.

Dhalki ana 'kunya bwa kagahara mmowol cuuwa/ nyaçki gway jin manjua manj mo.

³ Haali/ Tapa a'di ta'da Arungimis jin caaca mo, dhali a'di ita'da Malik jin caaca apowa risa rum pinycon mo.

⁴ E me'd piti mo tani mon'kulga/ gi mony'cesh 'kokin mo, dhali mo jin ka'dama/ ka'dam kun ta wosha turga/ si'da/ uni ta kum piti mo.

⁵ Kumma/ yi'de/ uni ta kum piti mo, haali/ a'di i/ukki uni mo, haali/ me'd piti a'di ukki mony'cesh jin kuthaku'th mo.

⁶ Ayy iyyu/ mo, dhalki ana lunja lunj mo, dhali 'ko ki jin 'kupa'dupun mo, dhalki ana raka is ka 'cesh ibwambori Tapa jin ukki ana mo.

⁷ Haali/ a'di ta'da Arungimis bana mo, dhali ana tana 'kwani ma shon dhii/i'd piti mo, dhali ka'bal gi me'd piti mo.

Ayy ka tee yan shwane/ mo ki um mini 'taki cik 'twam piti moyi.

⁸ Dhalka dum bum ki 'bi'th mo me'd mo jin yuku gway ka Mariiba* mo me'da tee yan jin ta'da tee ma Massa e bwaasho mo,

⁹ ki ibabam bum palki aha/ mo dhali kar aha/ mmonyoy mo, ba uni mishki miim pem mo be.

¹⁰ Ki yila issu/ mo tani aha/ jwakatkunuwu du mo gom 'kwani ma nyakum yil gwan mo,

dhali o gwo mo ki: Uni 'kwani gwansan uni tan ma dum buni thuthu/ ki thuthu/ mo,

dhali uni 'koki dhu gwo ki bway pem mo.

¹¹ Wakan aha/ thulkina gwo me'da po/ ka nyor pem mo ki uni mini 'taki 'koki ciç mo e mo jin sinu is mo be.

96

¹ Ayy, yuki gway e Tapa gway jin ta jin this mo, yuki gway e Tapa mo aris 'kwaniny'ceshi 'baar mo.

² Yuki gway e Tapa mo, dhali 'bori gway piti mii mo, tori gwo gom bway mowoth piti 'pena tee itana tee mo.

³ Bahi monycam piti e bwaman kal gi 'kwaniny'cesh mo, dhali miim piti kun miina a'di ki momer e bwaman ma ris 'kwani mo.

⁴ Haali/ Tapa a'di caaca mo, dhali ki nyanye/ mo tani a'di iminu tak mo. A'di iminu ko/ mo apowa risa rum pinyconi 'baar mo.

* 95:8 Mo e mombwaasho jin doru wosh ki cwa gom yi'de/ mo.

- 5 Haali/ arisa rum pinycon gi 'kwani mo tani uni ta tompinycon kun luṅa 'kwani mo.
 Hili Tapa a'di ukki momis mo.
- 6 Montak dhali mo jin eka/ ek uni 'koni bwambori a'di mo,
 mom'bi'th dhali monyjarom piti uni 'kon e mom piti jin kogu mo.
- 7 Ciki Tapa monyca mo, ayy um uci gi 'kwani mo,
 ciki Tapa monyca mo dhali mom'bi'th is mo.
- 8 Ciki Tapa monyca mo, a'di jin 'dapa gway piti ki 'dap mo.
 Guyi to jin cinu mmo'cith 'kus mo dhali iyyi e mom piti jin di 'kup kany mo.
- 9 Luṅi Tapa ki burrinye/ ma du jin hidhu ki hitha dhelelga/ mo.
 Dhali deeyi ki bir bir ibwambori a'di mo, aris 'kwani 'baar gi mony'cesh mo.
- 10 Oyi gwo e bwaman kal gi 'kwaniny'cesh mo ki: Tapa a'di ijiki'da ji mo.
 Nye, mony'cesh a'di telkunu sho'k mo, dhali a'di molu joç ki sule/ sule/ mo be.
 A'di midi dwall 'kwani gwo ki dar gi mii ma gwar 'de/ mo.
- 11 Dhalki momis 'kunya bwa mo dhali dhalki mony'cesh si'da/ 'kunu bwa mo,
 dhali dhalki kumma/ yi'de/ si'da/ bir bakal mo dhali aris to gwansani 'baar mo kun 'tu'd a'di bwaman mo.
- 12 Dhalki bwam mondhe'd yuk gway ki moṅ'kuny bwa mo dhali aris to 'baar mo kun 'kon e bwaman a'di mo.
 Yan'ko'd aris cwa 'baar mo gi bwanycwa mini yuk gway ki moṅ'kuny bwa mo
- 13 ibwambor gi Tapa mo, haali/ a'di pu'dki'd mo,
 haali/ a'di pu'dki'd mo mmodwall mony'cesh gwo mo.
 A'di midi dwall mony'cesh gwo ki mii ma kar/e mo
 dhali 'kwaniny'cesh ki gwoṅ ganam piti mo.

97

- 1 Tapa a'di ijiki'da ji mo. Dhalki mony'cesh 'kunya bwa mo.
 Dhalka ris 'kwani kun 'kon e mony'cesh ki yanagap 'kunya bwa mo.
- 2 Araḱ dhali araḱ kun 'cethina ku'dum ki mondhurumi'd mo tani a'di 'kamki a'di is mo.
 Mo ma kar/e dhali mii ma kar/e uni ita moṅka'b ma kursi ma malik piti mo.
- 3 O'd yayi'di bwambori a'di mo,
 dhali shwa jin minu shwa 'kup piti ki o'd mo tani 'kamki a'di is mo.
- 4 Awara sho'k piti a'di kushki mony'cesh mo mo.
 Mony'cesh parki a'di e mo dhali dee ki bir bir mo.
- 5 Dhan wosha turga/ uni wakın me'd mandha/ dham mo ibwambori Tapa mo,
 ibwambori Tapa gi mony'ceshi 'baar mo.
- 6 Momis a'di bahki mo ma kar/em piti mo,
 dhali aris 'kwani 'baar mo parki monycam piti e mo be.
- 7 Aris uni 'baar mo kun luṅki tompinycon mo tani uni dhunu ki mo ma 'the is mo,
 uni kun dhu 'bam buni ki ca mo gom to jin mol ha me'd jin ta tompinycon mo.
- Arisa rum pinycon mini luṅ ki jin 'kupa'dupuni bwambori a'di mo.
- 8 Sihyuun cikki gwo mo tani dhali a'di 'kunya bwa mo,
 dhali i'bwa/ gi 'kwani Yahuuda/ uni 'kunya bwa mo,
 haali/ gom gwon dwall pini jin toru gwo 'twa/a 'cesh mo, ayy Arumgimis.

⁹ Haali/ /e, ayy Tapa, /e a'di icaaca apo/ mony'ceshi 'baar mo,
/e a'di ikarkunu ki ca apowa risa rum pinyconi 'baar mo.

¹⁰ Tapa a'di enki uni gwansan kun shi/ki tonthusi e mo.
A'di 'tashki mondiki/e gi unim piti kun dhunu ki she/ ki dhelel dhelel 'twa/
'peni tonthus mo.

A'di 'cukki uni 'peni me'd gi uni kun ta thus ki thus mo.

¹¹ Monkush kushki mo mo gom uni kun miin ka kar/e mo,
dhali mon'kuny bwa gom uni kun dhelel ma du mo.

¹² 'Kunyi bwa e Tapa mo, ayy uma kar/e mo,
dhali ci a'di mo jin 'boruwa 'bor bwa i is gom a'di jin kogu mo.

98

Gway

¹ Ayy, yuki gway e Tapa gway jin ta jin this mo, haali/ a'di miiki dhan to ki
momer mo.

Me'da bim poros piti dhala bim piti jin kogu mo tani
gamki a'di mo jin pinu mii e mo.

² Tapa a'di itorki mom piti jin pinu mii e eya tente/ mo,
a'di ki pi mom piti jin yenuwa ye mo e jis/e gi kal gi 'kwaniny'cesh mo.

³ A'di ki ka mo/en piti jin telu sho'k e mo dhali mii ma isinj ganam piti mo
e gu'b ma Israyiil mo.

Aris 'pemen gi mony'ceshi 'baar mo tani parki a'di e mo,
a'di jin ta mo jin pinu mii e ma Arungimis bana mo.

⁴ Kumi cuuwa/ gom bwan 'kunya/ e Tapa mo, aris 'kwaniny'ceshi 'baar mo.
Kwaku/ 'twanjal gom mon'kuny bwa ki gway mo dhali yuki gway jin manjwa
manj mo.

⁵ Yuki gway jin manjwa manj e Tapa ka dhenjhenye/ jin 'kon ma shu/i pesu/
mo,
dhali ka dhenjhenye/ jin 'kon ma shu/i pesu/ mo dhali ki konj gway jin lukumu
mo.

⁶ Ka risa poome/ jin pinu mo dhali ki kony ce jin pinu mo,
kumi cuuwa/ gom bwan 'kunya/ ibwambor ma Malik mo, a'di jin ta Tapa
mo.

⁷ Dhalki kumma/ yi'de/ bir bakal mo, dhali aris to gwansan kun 'tu'dki a'di
bwaman mo,
mony'cesh dhali uni gwansan kun 'kokin e a'di mo.

⁸ Dhalka gannu/ yi'de/ tor me'd buni mo.
Dhalka ris wosh yuk gway mon'kuny bwa imontal 'de/ mo

⁹ ibwambori Tapa mo, haali/ a'di midi pu'du/ mo
mmoji mony'cesh mo be.
A'di midi dwall 'kwaniny'cesh gwo ki mii ma kar/e mo
dhali 'kwani ki dar gi mii ma gwar 'de/ mo be.

99

¹ Tapa a'di ijiki'da ji mo. Dhalki 'kwani deen ki bir bir mo.
A'di ca'bki'd eya kursi ma Malik eya powa carabiim mo. Dhalki mony'cesh
thek she/ mo.

² Tapa a'di caaca eya Sihyuun mo.
A'di ikarkunu ki ca apowa ris 'kwani 'baar mo.

³ Dhalki 'kwani manj gway pini mo jin caaca mo dhala purem pini mo.

A'di ikogu mo.

⁴ Malik a'di ca'bki dem dem mo, a'di jin enki mo ma kar/e mo.

/E telki mo jin daru gi mii ma dehe/ sho'k mo.

/E ki tor gwowa bora 'cesh gom mii ma kar/e mo

dhali mo ma kar/e goma Yakuub mo.

⁵ Kari Tapa Arungimis bana ki ca mo.

Lunji a'di e cwam piti jin dhuna a'di sho'k mo.

A'di ikogu mo.

⁶ Musa dhala Haruun uni ita kum piti ibwaman ma gasiis mo.

Samu/il si'da/ a'di ita jim piti e bwaman uni gwansan kun yukka gway piti mo.

Uni ki ko 'twa/i Tapa mo tani dhali a'di ithokki uni gwo mo be.

⁷ A'di torki uni gwo ka rak jin wana e ka ka'dum ki jamas piti mo.

Uni dhuki gwonycim piti mo,

dhali gwonkan piti kun bahu mo kun cikina a'di uni mo.

⁸ Ayy Tapa Arungimis bam /e thokki uni 'twa/ mo.

/E tana Arungimis jin gwamki uni mo,

hili /e ki ri'c uni gom tonthus buni jin thama uni mii mo.

⁹ Kari Tapa Arungimis bana ki ca mo,

dhali lunji a'di e 'kuwosha turgam piti jin kogu mo,

haali/ Tapa Arungimis bana mo tani a'di kogu mo.

100

Gway jin yuku mo gom mo jin 'boruwa 'borim bwa i is gom to jin 'cithu/ 'kus mo.

¹ Kumi cuuwa/ ki mon'kuny bwa e Tapa mo, aris um 'kwaniny'cesh mo.

² Miiyi Tapa to ki bwanj 'kunyka/ mo.

Iiyu/ i bun'kusi a'di ki gway ilu/ mo.

³ Mishi mo mo ki a'di ta Tapa jin ta'da Arungimis mo.

A'di ta a'di jin ukki ana mo dhali ana tana kum piti mo be.

Ana tana 'kwanim piti mo dhali ana tana ka'bal ma shon dhii/i'd piti mo.

⁴ Cici e 'twanjal ma gonj piti ki mo jin 'boruwa 'bor bwa i is mo,

dhali e mom piti jin di 'kup kany nyakki mo jin manjwa manj mo.

Ciyi a'di mo jin 'boruwa 'bor bwa i is mo, dhali 'bori gway piti mii mo.

⁵ Haali/ Tapa a'di 'bora'bor mo.

Mo/en piti jin telu sho'k mo tani a'di 'dimki 'kup ki sule/ sule/ mo,

dhali mo ma isinj ganam piti eya risa nyakum yil ki 'kwani mo.

101

Gway ma Dawuu'd

¹ Aha/ mina yuk gway ki yuka gayiin mo dhali ki mo ma kar/e mo.

E /e mo tani ayy Tapa, aha/ mina yuk gway mo.

² Aha/ mina yip 'kup ki bway kun 'konu ki dar gi mii 'ba/ mo.

Ayy, kakasja imina /e pu'du/ i aha/ mo?

Aha/ mina ya ki dar gi njadhum eya dum pem

e gu'b pem mo.

³ Aha/ mina diki kar e bwambor jis/em pem mo,

ma tonj kamu/ jin 'coka'cok mo.

Aha/ shina mii gi uni gwansani e mo kun ta'kkin 'peni bway gana/ mo.

Uni mini 'koki thal aha/ mo.

4 Mo jin iinu ki ca'ckon eya du mo tani midi si'd 'peni aha/ mo.
Tonthus miga/ mol mo be.

5 A'di jin thuthi'da mannyak 'dish gu'b piti 'pen ka kwal is mo tani
aha/ mina 'ce'd a'di sho'k mo.

Wathi/ jin 'thek 'ba/ mmis dhali jin kar 'ba/ ki ca mo eya dum piti mo tani
aha/ mina mish a'di 'dim 'kup yisa.

6 Aha/ mina hila hil ki mo/en apo/ uni kun ta ku isinj gana/ e mony'cesh mo,
ki uni mini nyak 'ko ki aha/ mo be.

A'di jin yaki'd e bway jin 'konu ki dar gi mii 'ba/ mo tani
a'di imidi mii aha/ to mo be.

7 Wathi/ kamu/ jin boto'd ki mo ma he'k e isa yempa/ mo tani
a'di midi ca'bi gu'b pem yisa.

Wathi/ kamu/ jin baha'da tor ka yempa/ mo tani
a'di mol fikir ca'b e bun'kus pem mo be.

8 Mon'thamo/ itan mon'thamo/ mo tani aha/ mina 'ce'd uni sho'k mo,
aris uni kun ta thus ki thus kun 'kon e mony'cesh mo,

mmo'ci'ha ris tonthusi 'baar mo kun miina imanmii uni mo
'peni 'per'kuman bampa/ gi Tapa mo.

102

*A'tho 'peni jan 'de/ jin jwaka'kunuwa du mo, ki a'di 'thikina buye/ mo dhali
wola gungum piti ibwambori Tapa mo.*

1 Ciki mon'thom pem mo ma, ayy Tapa.
Dhalki kom pem pu'dki'di /e mo.

2 Dhalku/ ki bag jis/em pini 'peni aha/ mo
ka teem pem jin ta'da cis ki cis mo.

Ka'di 'cem pini ki aha/ mo.

Tho'ki aha/ 'twa/ ishunsan gana/ ka tee jin yukkika/ /e mo.

3 Haala teem pem a'di peki'd mo me'da ku'd jin 'ci'hi 'pen mo

dhala simam pem burkin mmowa e ki mo ma gwa'a/ jin 'thanu o'd jin
'batha'ba'th mo.

4 Adum pem dorkunu mmowa e ka sho mo dhali ku'thki'd mo.

Aha/ njakina ton'pem pem mmoshwa mo.

5 Haali/ gom dhan mo/ohon pem caaca mo tani
asimam pem thalkina bungwar is pem mo.

6 Aha/ wakina e ki koro/ gi mombwaasho mo,
aha/ wana e ka kunu/ jin diki'd e bwam ma'du/ mo.

7 Aha/ isha ki e i'kup ki walwal mo,

aha/ wana e ki 'dii jin di a'din 'den gana/ apo/ 'kungu'b mo.

8 Ka tee 'baar mo 'kwani kun ta 'kup ki aha/ thunyki aha/ 'twa/ i is

ki uni gwansan kun pe'th aha/ ki petha sor mmokar gway pem ki mo jin
jeenuwa jee mo.

9 Aha/ shwakina jasi 'piny me'd tonte/ mo,

dhali ce jabu'th pem e ki to jin pika/ mo

10 goma nyor jin dekkina /e mo dhala nyor pini mo.

Haali/ e kalki aha/ imis mo dhali bi't aha/ asho mo.

11 Ateem pem wana e ka kashira/ ma tente/ gi mom'pimpili/ mo.

Aha/ ku'thkina me'da sho mo.

12 Hili /e, ayy Tapa, dikin e kursi ma malik ki sule/ sule/ mo.

Gway pini a'di 'dim 'kup eya risa nyakum yil gi 'kwaniny'cesh mo.

13/E mini cu mis mo dhali tayi gi mo/en ma 'thime/ apowa Sihyuun mo.
A'di ta'da tente/ jin minu mii mii ka 'the goma yim mo.
Atente/ jin karu 'pen ka piye/ a'di pu'dki'd mo.

14 Haali/ cinjkinam pini uni bu'thki wosh ma yim ji gi ŋa/u mo,
dhali hila hil ki mo/en apo/ bu'da'cesh ma yim mo.

15 Kal gi 'kwaniny'cesh uni mini ko/ gway gi Tapa mo,
dhali aris imalik gi mony'cesh mo uni mini ko/ monycam pini mo.

16 Haali/ Tapa midi nyaŋa Sihyuun ki mis ka nyaŋ'ko'd mo,
a'di midi piyu/ ki monycam piti mo.

17 A'di midi ciya hirdhe/ ki mon'tho gi uni kun dhalkunu 'pen mo,
dhali a'di midi dike wak uni gom tom buni kun 'thona uni ka di'b is mo.

18 Dhalki gwo yansan a'di 'kwarkunu isa 'cesh goma nyaꝓum yil gi 'kwani kun
mini iyyu/ i'ko'd mo,
wakan ki 'kwani kun 'konuki dho'th naskina/ mo uni a'di imini maŋ Tapa
mo,

19 haali/ a'di hilki mo ka lungu'b 'peni mom piti jin kogu mo jin ka'dama/
ka'dam mo,

'peni momis mo tani Tapa hilki mo apowa 'cesh mo

20 mmocik ohon gi uni kun tana habuus mo,
mmo'cuꝓ uni gwansan kun 'birki 'kup ki jwa mo,

21 ki 'kwani mini bah gwo eya tente/ eya Sihyuun mo a'di jin ta gway gi Tapa
mo,

dhali e Pa Urushaliim mo tani uni mini bah gwo maŋ piti mo,

22 ki 'kwani mini tul isi montal 'de/ mo
dhali aris 'penkuman bampa/ mo mmoluŋ Tapa mo.

23 A'di 'ce'dki mom'bi'th pem bwa mo e bwaman yam pem mo.
A'di karki'da teem pem mmokuꝓa/ kuꝓ mo.

24 Ayy Arungimis pem, aha/ ona gwo mo ki: Dhalku/ ki bu'th aha/ 'peni
mahan mo

e bwaman ma teem pem mo,

/e jin 'dimkina yil 'kup mo

eya risa nyaꝓum yil gi 'kwaniny'ceshi 'baar mo.

25 'Peni kadhamo/ mo tani /e 'thiki monka'b gi mony'cesh mo,
dhali momis a'di ta mii ki me'd pini mo.

26 Uni mini 'ce'd sho'k mo tani hili /e a'di imini 'dim 'kup mo,
uni 'baar mo mini wuwa dhagale/ mo me'd burriŋye/ jin hidhu i is mo.

/E ak uni e me'd burriŋye/ jin hidhu i is mo dhali uni pekin mo,

27 hili /e ta a'di ma 'de/ mo, dhali yil pini mol di 'kup mo.

28 Uci gi cinjkinam pini uni mini 'ko ki 'dantar mo.

Nyemes gi uꝓim buni ki uni mini dho'th i'ko'd mo tani uni iminu tel shoki
bwambori /e mo be.

103

Gway ma Dawuu'd

1 'Bori Tapa mii mo, ayy kashiram pem,
dhali aris to gwan 'baar mo kun 'kon e aha/ mo, 'bori gway piti mii jin kogu
mo.

2 'Bori Tapa mii mo, ayy kashiram pem mo,
dhali dhalku/ ki ŋa a'dim piti jin 'dapa 'dap mo,

3 a'di jin gwamki /e 'pena ris miim pini kun 'coꝓa'coꝓ mo,

- a'di jin waçki /e 'pena ris 'ba'th pini mo,
⁴ a'di jin wanki /e 'ba/ 'peni jisa 'kulga/ mo,
 a'di jin shumki /e ki tonj'kup ki mo/en jin telu sho'k mo dhali ki momiimii mo,
⁵ a'di jin kapki /eya du mo ki tom 'boron me'd jin dikina /e ki e mo,
 wakan dhuru'c pini jin tana /e midi 'ka gura/ me'da biny jeshe/ ma wulu/ mo.
⁶ Tapa a'di miiki mii jin yenuwa ye mo
 dhali mo ma kar/e goma ris uni gwansan kun siri'ckunu apo/ ki sho'k mo.
⁷ Bway piti tora a'di eya tente/ ka Musa mo,
 dhali miim piti jin kala a'di e 'Kwani ma Israyiil mo.
⁸ Tapa a'di ta'da manmiimii mo dhali mii jin miinu ka 'the mo,
 anyor piti mangala she/ mo dhali mo/en jin telu sho'k ishki'd ka enthus mo.
⁹ A'di isa yempa/ diki kucura kucur mo,
 walla a'di diki kara nyor piti ki sule/ sule/ mo.
¹⁰ A'di diki tu/ul ana isi ki gwo gi miinthus bana mo,
 walla ri'c ana isi ki gwo gom tony 'cokgam bana kun miina ana mo.
¹¹ Haali/ me'd momis jin ka'dama/ ka'dam apo/ mony'cesh mo tani
 wakan dhan mo/en piti jin telu sho'k caaca mo 'kupki uni gwansan kun ko/ki
 a'di mo be.
¹² Me'd jin si'da mom'pesho'k ki si'd 'pena bora lungu'b mo tani
 isa dhana/ kan si'da/ a'di ki joç gwondhan bana 'peni ana mo.
¹³ Me'da baba jin hilki ya/ ki mo/en mo tani
 wakan si'da/ Tapa ki hil uni gwansan kun ko/ki a'di ki mo/en mo.
¹⁴ Haali/ a'di mishki'da yi'c bana mo,
 dhali a'di kaki gwo e ki ana tana bu'da'cesh mo.
¹⁵ Wathi/, ateem piti a'di wana e ka sho mo.
 A'di lugki'd ki tup tup mo me'd jandin to e bwam bunto mo,
¹⁶ haali/ 'tham poshki'd apo/ a'di mo dhali a'di ki 'cwar a'di mo,
 dhali mom piti mishi a'di dok/e yisa.
¹⁷ Hili mo/en gi Tapa a'di telkunu sho'k mo 'peni mo jin 'konuki/e ki sule/ ya
 ye 'ba/ mo itan mo jin 'konuki/e ki sule/ ya ye 'ba/ mo
 apo/ uni gwansan kun ko/ki a'di mo,
 dhali mo ma kar/em piti e uçi gi uçim buni mo,
¹⁸ e uni gwansan kun dhuki gwom piti jin gamu me'd mo,
 dhali ka uni e mo mmomii gwoŋkan piti kun 'kwarkunu mo.
¹⁹ Tapa a'di telki'da kursi ma malik piti sho'k e momis mo,
 dhali 'penkuman bampam piti jiki'da ji apowa ris to 'baar mo.
²⁰ 'Bori Tapa mii mo, ayy um iman'doyu gwom piti mo,
 um kun ca'bki dem dem mo kun mii gwom piti mo,
 mmocik 'twa/ gi gwom piti mo.
²¹ 'Bori Tapa mii mo, aris umi 'baar mo kun ta kum piti kun 'kon e momis mo,
 imanmii tom piti mo kun mii bwam piti mo.
²² 'Bori Tapa mii mo, aris to kun miina a'di mo,
 eya ris mo 'baar mo kun ta mom piti kun tana a'di tapa mo. 'Bori Tapa mii
 mo, ayy kashiram pem mo.

104

- ¹ 'Bori Tapa mii mo, ayy kashiram pem mo, ayy Tapa Arungimis pem, /e a'di
 icaaca kagahara mo.
 /E hi'thkunu ki montak mo dhali mo/ek mo,
² /e jin 'kamki is pini ki monjkush me'd burrineye/ jin 'kamu is mo,

/e jin bele'thki momis me'd gu'b burrinye/ mo,

³/e jin 'thikina ka'dum gi gu'b pini apowa ris yi'de/ 'baar mo,

/e jin dhukina rak me'd arabiyya jin dira shummarum pini mo,

/e jin merkina powa bi gi 'tham mo,

⁴/e jin dhuki 'tham ka ris mmota iman/ii gom /e mo,

o'd dhala le'dan o'd jin shwa'd ki bar bar mo tani uni mii /e to mo.

⁵/E ki kar mony'cesh e monka'b piti mo,

wakan ki a'di minu 'koki yikin is ki sule/ sule/ mo.

⁶/E ki kum a'di 'kup ki mon'kulga/ me'd burrinye/ jin kumu to 'kup mo.

Dhali yi'de/ doshki da powa ris wosha turga/ mo.

⁷Ki gwom pini jin kucurkina /e uni mo tani uni sokin mo.

Dhali ki kon dor ma sho'k pini mo tani uni yakina njwaga/ mo.

⁸Aris wosha turga/ cuki mis mo, dhali embul wosh mo tani uni ciçkin ka 'cesh mo

e mo jin karkina /e 'pen ka pije/ gom uni mo.

⁹/E ki kar gwayu/ mo ki uni mini 'koki pe mo,

wakan ki uni mini 'taki 'koki halas mony'cesh dok/e mo.

¹⁰/E ki dhu yi'de/ kun 'du'dun mmogaç ka pije/ e embul wosh mo.

Uni yakina njwaga/ e embul ma ris wosh mo.

¹¹Dhali uni 'baar mo pikina to/e 'baar mo kun 'kon e bwaasho mo.

Thuluny bwaasho si'da/ uni kapkin 'peni mo jin budha yi'de/ uni mo.

¹²Ki uni mo tani 'dii kun peni momis mo tani gamki mon'kom buni mo.

Uni wolki gway e bwaman ma risa biny cwa mo.

¹³'Peni monyça'b pini jin dina /eya 'ta'dama mo tani /e wolki yi'de/ apo/ wosha turga/ mo.

Mony'cesh a'di kapkunuwa du ki maman miin to ki me'd pini mo.

¹⁴/E rakkina sho ca'd gom to/e mo,

dhali dhu emen to jin mina 'kwani si mo,

ki a'di midi dho'th maman tonte/ 'peni mony'cesh mo,

¹⁵dhali yimana mura'th jin ka/u ki njah njah mmo'kunya duj 'kwani mo,

dhala yin mmokar bwam/em piti ki 'tikil 'tikil mo,

dhali tonte/ mmo'bi'th 'kwani adu mo.

¹⁶Aris cwa gi Tapa uni wolu yi'de/ ka enthus mo,

dhali arisa bwanyayis gi Pan Lubnaan jin sikina a'di mo.

¹⁷E uni mo tani 'dii nyan'ki gu'b buni mo,

dhala gwampi/ taki'd ki gu'b piti apo/ cwa jin wana e ka tup mo.

¹⁸Dhali aris wosha turga/ mo tani uni gom mi kun 'koni bwaasho mo,

dhali wosh uni ta mo jin hur ma warriny jwa icine/ mo.

¹⁹/E ki kara ppe mmoya yil mo,

dhali atente/ mishi mom piti jin mina a'di iyul mo.

²⁰/E ki kar mondhurumi'd mo dhali a'di ta ji mon'thiny mo,

ka ris to/e 'baar mo kun 'kon e mombwaasho mo tani parkina 'cesh mo.

²¹Ushi dhuruca dhop uni an'karki ko mo gom tom buni kun 'kwarkina uni ka gwapi/ mo,

mmosimm tontem buni e mo 'peni Arumgimis mo.

²²Ka tente/ sulki'd mo tani uni sokin 'pena tente/ mo

dhali bag is buni e jurum wosh mo.

²³Dhali wathi/ yaki'd mmomiya tu'c mo

dhali a'di ki miya tu'c piti ntagi mom'pimpili/ mo.

²⁴Ayy Tapa, mii gi me'd pini wan ma po/ e di'a/.

- E moyuk mo tani /e ukki uni 'baar mo.
 Aris mony'cesh 'tu'dkunu ki tom pini kun ukkina /e mo.
 25 Bwampo/ kumma/ yi'derj 'kulga/ mo kun caaca mo dhali kun beena bwa ki bee mo,
 a'di jin ishkina to/e ki mus mus ibwaman kun uku mo kun molu derj e mo,
 kun 'kon ki e mo nyakki kun gwa'da is mo dhali kun caaca mo.
 26 Dhali arisa kur yi'de/ si'da/ hashkina po/ a'di mo
 dhala dhan to yi'de/ a'di jin ukkina /e mmoguwa njalbothorj ibwaman a'di mo.
 27 Aris to gwansani 'baar mo hil 'kupki /e mo,
 dhali /e ciki uni totem buni mmoshwa ka tentem buni ki she/ ki she/ mo.
 28 Ki /e ki ciki uni to mo tani uni tulki a'di isi montal 'de/ mo.
 Ki /e ka'dki me'd pini mo tani uni 'tu'dkunu ki tom 'borga/ mo.
 29 Ki /e bagki jis/em pini mo tani uni bitkina bwa ka lungu'b mo.
 Ki /e ki bu'th shi/in buni mo tani uni wukin mo
 dhali dok ka nyan'ko'd e bu'da'cesh buni mo.
 30 Ki /e hashki Shi/in pini mo tani uni ukkunu mo be
 dhali /e ki ta bwam/e gi mony'cesh this mo dok/e mo.
 31 Dhalki monyca gi Tapa a'di i'dim 'kup ki sule/ sule/ mo.
 Dhalki Tapa 'kunya bwa e miim piti mo,
 32 a'di jin hilki mo apo/ mony'cesh mo dhali a'di deeki'd ki bir bir mo,
 a'di jin taki wosha turga/ is ki me'd mo dhali uni yakina ku'd mo.
 33 Aha/ mina yuk gway e Tapa mo me'd jin dika/ ki e mo.
 Aha/ mina yuk gway mmomanja Arungimis pem mo me'd jin kusha buye/
 aha/ mo.
 34 Dhalki gwom pem jin kulum aha/ ibwa mo tani 'bor a'di bwa mo,
 haali/ aha/ 'kunya bwa e Tapa mo.
 35 Dhalki imanmii miinthus tushunkunu ki o'd 'peni mony'cesh mo,
 dhali dhalki imanmii to kun 'coka'coq mini mii dhalku/ ki 'ko mo dok/e.
 'Bori Tapa mii mo ma, ayy kashiram pem.
 Manji Tapa mo.

105

- 1 Ayy ciyi mo jin 'boruwa 'bor bwa i is ki Tapa mo, dhali yuki gway piti mo.
 Kari eya tente/ mii gi tom piti e bwaman 'kwani mo.
 2 Yuki gway e a'di mo, yuki gway mmomanj a'di mo,
 tori aris to kun miina a'di ki momer mo.
 3 Cayi mo e gway piti jin kogu mo.
 Dhalka du gi uni gwansan kun simmki Tapa e mo tani 'kunya bwa mo.
 4 Simmi Tapa e mo dhali mom'bi'th piti mo,
 simmi bun'kus piti e ki tikir tikir mo.
 5 Kayi momer piti e jin miikina a'di mo,
 a'di jin ta miimer piti mo dhali gwon dwall kun toru 'twa/a 'cesh jin bahkina
 a'di mo,
 6 ayy emen ma Ibrahiim jin ta cinjinam piti mo,
 um kun ta iya/ ma Yakuub mo, kun ta kum piti kun kwanykina a'di mo.
 7 A'di ta Tapa ma Arungimis bana mo.
 Gwon dwall piti kun toru gwo 'twa/a 'cesh mo tani a'di idiki'da powa ris
 mony'ceshi 'baar mo.
 8 A'di tana bwam piti pa ki pa gom gwom piti jin gama a'di me'd ki sule/ sule/
 mo,

gom gwom piti jin kankina a'diya kan goma alip ma risa nyakum yil 'kwani mo,

⁹ gwo jin gamkina a'di me'd nyakka Ibrahiim mo, dhali gwom piti jin thulkina a'di me'da po/ mmo/o is goma Is/hak mo,

¹⁰ a'di jin rwa'ckina a'di eya Yakuub mo me'd gwoṅkan jin bahu mo, dhali eya Israyiil me'd gwoṅkan yan jin gamu me'd mo jin midi di ki sule/ sule/ mo,

¹¹ mmo/o gwo mo ki: E um mo tani aha/ mina ci um mony'cesh gi Paṅ Kanaan mo

mmota a'di jin mina umi 'tuntul bwa ime'd mo mmota mal bum mo.

¹² Ki uni 'kon ki daka/ ka ris buni mo, ki uni ta jasi ara ushalaṅ gana/ mo, ki iimpem buni e a'di mo,

¹³ mmo/iikina uni ki ii ma ca/ 'peni kal gi 'kwaniny'cesh mmotan kal gi 'kwaniny'cesh mo,

'peni bampa/ gi 'penkuman bampaṅ kamu/ itagi 'kwanin tiya mo,

¹⁴ a'di diki dhal jan 'den kamu/ bway mo mmosiri'c uni apo/ ki sho'k mo.

A'di kucurki imalik gom gway buni mo

¹⁵ mmo/o gwo mo ki: Dhalku/ ki ta unim pem kun kwanyka/ is ki me'd mo, dhalku/ ki mii to shi/ka/ apo/ imanci gwom pem mo.

¹⁶ Ki a'di yukki te/ apo/ mony'cesh mo,

dhali 'ce'da ris tonṅe/ 'baar mo kun miinu ime'd mo,

¹⁷ a'di ki hash wathi/ mmoya itwa/a/ ki uni mo,

a'di jin ta'da Yuusup mo, a'di jin yolkunu mmota ciṅkina/ mo.

¹⁸ 'Basho'k piti a'di shi/kunu ka makkiyya mo,

dhali 'ba/ piti a'di re'dkunu ka dhan neran tonṅuthu'd mo

¹⁹ ntagi gwo jin ona a'di mo pu'dki'd mo ki jim pe mo

dhali gwo gi Tapa nyo/ki a'di mo.

²⁰ Dhala malik hashki'da hash mo dhali 'cuk a'di mo be,

dhali tapa gi 'kwani mo tani karki a'di ki 'kus mo,

²¹ dhali a'di ki kar a'di ki ari tapa apo/ gu'b piti mo,

dhali kar a'di ki tapa apowa ris tom piti 'baar kun tana a'di mo,

²² mmoye'th uni kun ta iya/ ma malik piti sho'k ki bwam 'boro'd piti mo, dhali mmoṭor 'kwani gwanyjakam piti gwo ki moyuk mo.

²³ Dhali yan'ko'd Israyiil pu'dki'd e Pam Masir mo,

dhala Yakuub pu'dki'd ki yan'kus eya 'cesh ma Haam mo.

²⁴ Dhali Tapa ki dhu 'kwanim piti mmota uni kun dho'th maman gi dho'th gana/ mo,

dhali mmodhu uni mmota 'kwani kun 'bitha'bi'th mo mmobol 'kwanin 'kup buni e mo.

²⁵ A'di ki tuka dum buni mmoshi/ 'kwanim piti i e mo,

mmoṭu/ul nyakki uni mmoheka ris ciṅkinam piti e mo.

²⁶ A'di ki hasha Musa jin ta ciṅkinam piti mo,

dhala Haruun jin kwanykina a'di mo.

²⁷ Uni wagaskunu jamas miim piti e bwam uni mo,

dhali miimer kun miikunu e bampa/ ma Haam mo.

²⁸ A'di hashki mondhurumi'd mo, dhali 'ceth bampa/ 'tum mo.

Dhali uni pishki is ka le'da po/ gwom piti mo.

²⁹ A'di tu'kki kumma/ yi'dem buni mmota bas mo,

dhali rak wa'c buni isi jwa mo.

³⁰ Bampam buni tashkunu ka buhany ma 'dwa/ mo,

wakan si'da/ e gu'b gi imalik buni mo.

31 A'di oki gwo mo dhali abuhanya kanthi/ pu'dki'd mo, dhali arisa shokom tha'thkin e bampam buni 'baar mo.

32 A'di ci uni dhana wasa/ mmohe'th me'da sho'k mo, dhala wara/ sho'k yan jin dhwa/a'dki mo ki dhwa/a'd dhwa/a'd e bampam buni 'baar mo.

33 A'di 'koshki cwalman ma mura'th buni mo dhala ris cwam pu/ mo, dhali a'di kwa/ki cwa gi bampam buni 'baar mo.

34 A'di oki gwo mo dhala kuyu/ pu'dkin mo, dhali ushi emena kuyu/ kun molu den e mo,

35 uni kun loskina ris to kun sinu ki 'kolo'c e bampam buni mo, dhali uni ki shwa maman cwam buni 'pena 'cesh mo.

36 A'di ki 'kosha ris bwanyaram buni 'peni bampam buni mo, a'di jin gacki'di twa/a/ 'peni mom'bi'th buni mo.

37 Yan'ko'd a'di ki shuwa Israyiil bway ki 'dolkon kush mo dhali 'dolkon gana/ mo,

dhali jan tal 'den kamu/ piyi'd e bwaman ma wak piti mo jin kolkunu mo.

38 'Kwani gi Pam Masir 'bora bwa ki 'bor ki uni iikin mo,

haali/ dhan to jin ko/ uni is 'peni 'Kwani ma Israyiil mo tani pu'dki'da po/ uni mo.

39 A'di ki pa'da rak mmokuma kum 'kup mo, dhali o'd mmoçi monkush mon'thiny mo.

40 Uni dotki to mo dhali Arumgimis ki ci uni aris kusskun mo, dhali a'di ki ci uni tonte/ 'peni momis jin ishki'd ka enthus mo.

41 A'di ka'dki wosh 'twa/ mo dhali yi'de/ gacki'd ka piye/ mo.

A'di guski'd e bwam ma si'b me'd yi'de/ jin guski'd e bwam wor mo.

42 Haali/ a'di kaki gwom piti e jin ona a'di is jin kogu mo, dhala Ibrahiim jin ta cin'kinam piti mo.

43 Wakan a'di suski 'kwanim piti ka piye/ ki mon'kuny bwa mo, unim piti kun kwanykina a'di mmo/ii gwayi lu/ mo.

44 A'di ki ci uni kal gi bampa/ gi 'kwanin tiya mo, dhali uni bu'thki to gi 'kwanin tiya kun tana uni gi maman buni kun miikina uni to mo,

45 tagi 'kup gwo yan mo ki uni mini 'taki dhu gwonkan piti kun bahu mo, dhali mii gwonkan piti kun cikunu mo.

Manji Tapa mo.

106

1 Manji Tapa mo.

Ayy ciyi mo jin 'boruwa 'bor bwa i is gi Tapa mo, haali/ a'di 'bora'bor mo, haali/ mo/en piti jin telu sho'k mo tani a'di i'dimki 'kup ki sule/ sule/ mo.

2 Kaja a'di jin midi mish bah gwo gom miin to ma dem dem gi Tapa mo, walla tora ris moman piti mo?

3 Mom'bor mii gom uni gwansan kun miiki mii ma kar/e mo, uni kun mii miin'kar/e isa yempa/ mo.

4 Kayi aha/ e mo, ayy Tapa, ki/e din mmo'or mii ma 'them pini e 'kwanim pini mo.

Wothi/ aha/ mo me'd jin mina /e 'cuk uni mo,

5 ki aha/ mina par mo jin rusa/ rus gi unim pini kun kwanya /e e mo, ki aha/ mina bwa 'kuny mo e mo jin 'kunya bwan 'kwani gi kal pini mo,

ki aha/ mina ca mo e mal pini mo.

⁶ Am dhali ibabam bam mo, 'thissa/ niin mo tani miikina miinthus mo. Aman miikina mii kun 'coka'cok mo, am miikina to kun ta thus ki thus mo.

⁷ Ibabam bam, ki uni 'kokin e Pam Masir mo tani, uni 'koki hil gwo i e gom tom pini kun miina /e ki momer mo. Uni 'koki ka mo/en pini e jin telu sho'k jin ishki'd ka enthus mo, hili uni pishki is ka le'd apo/ a'di jin Caa e ki Ca e Kamma/ Yi'de/ jin ta gi 'Per mo.

⁸ Naskina/ a'di ki ta uni is ki me'd gom gway gi gway piti mo, ki a'di midi tor mom'bi'th ma dem dem piti mo.

⁹ A'di kucurki Kamma/ Yi'de/ jin ta gi 'Per mo dhali a'di warki'd ki mo jin kuthaku'th mo.

Dhali a'di suski uni e bwaman mon'kulga/ mo me'd jin miikina a'di e bwaman ma si'b mo.

¹⁰ Wakan a'di taki uni is ki me'd mo 'peni 'kwanij 'kup buni mo, dhali 'cuḡ uni mo 'peni mom'bi'th gi 'kwanij 'kup buni mo.

¹¹ Dhali yi'de/ kumki unij 'kup buni 'twa/a 'cesh mo.

Jan'kamu/ di'd jin boḡo'd 'peni uniya?

¹² Dhali yan'ko'd uni gamki gwom piti is mo.

Uni yukki gway gom moman piti mo.

¹³ Hili ki jahanne/ uni ḡaki miim piti mo.

Uni 'koki cor gwom piti jin logoma a'di mo.

¹⁴ Hili uni cana bwa en'dap mo mmogora bwa ki gor e mombwaasho mo, dhali kara Arungimis mo mmony'o/ a'di e bwam ma si'b mo.

¹⁵ A'di ci uni to jin dotkina uni mo,

hili a'di ki hash 'ba'th jin shi/ uni is e bwaman uni mo.

¹⁶ Ki 'kwanij gwas kun 'kon e mo ma yuukam buni mmoṭa'c bwa ki ta'c apowa Musa mo

dhala Haruun, a'di jin ta jan 'de/ gi Tapa jin kogu mo tani

¹⁷ mony'cesh ka'dki 'twa/ mo dhali losa wak ma Dathan mo dhali kum 'kwani kun nyak ii ka Abiram 'twa/a 'cesh mo.

¹⁸ O'd si'da/ du'dushki'da po/ imannyak iim buni mo dhala le'dan o'd shwaki 'kwani kun ta thus ki thus mo.

¹⁹ Uni ukki ari bip e 'kuwosh ma Hurib mo

dhali uni ki lunj tompinycon jin to'du/ mmo/uk a'di jin ta pinycon mo.

²⁰ Uni akki monyca ma Arungimis e mo

gom jamas to jin uku mo me'da morbip jin shwa'da sho mo.

²¹ Uni ḡakina Arungimis mo, a'di jin ta'da Manwoth uni mo a'di jin miiki dhan to jin caaca e Pam Masir mo,

²² ki mii gi momer mo e bampa/ ma Haam mo,

dhali dhana puren to e Kamma/ Yi'de/ jin ta gi 'Per mo.

²³ Wakan a'di oki gwo mo ki: A'di midi 'ce'd uni sho'k moyi, dhala Musan 'dem piti jin kwanya a'di mo tani

dina a'di ki doshi bwambori a'di mo

ntagi a'di dokki'da nyor piti jin midi 'taki 'ce'd uni sho'k mowa?

²⁴ Yan'ko'd uni ki wak mony'cesh jin 'bora'bor mo,

dhali dar gi mongam gwo is gom gwom piti jin ona a'di is mo.

²⁵ Uni miikina gungum e bwan gu'b burrynem buni mo, dhali ush gwo gi 'twa/ gi Tapa ha e mo.

²⁶ Wakan a'di 'de'kki me'd piti mo dhali thul gwo me'da po/ gom uni mo

mmo/o ki a'di mididi dhu uni mo mmoṭa'k mo e mombwaashoyi,
 27 dhali kwa/ emen gi uḅim buni bwa mo e bwaman kal gi 'kwaniny'cesh mo,
 mmoḅekerki uni bwa mo e bampany 'ceshi 'baar mo.

28 Wakan uni 'tampalki is buni ka rum ma Baal jin ta ji Pam P̄aguur mo,
 dhali 'ka to jin 'ciṭhu/ 'kus mmothe tompinycon gom jwa gi 'kwani kun wun
 mo.

29 Uni rukunyi Tapa mmomiya nyor mo gom miim buni mo,
 dhali 'ba'th jin wo'cki 'kwani is she/ du'dushki'd e bwaman uni mo.

30 Dhali yan'ko'd Pinahaas doshki'd ki mis mo dhali woṭh gwo is mo,
 dhali 'ba'th jin wo'cki 'kwani is she/ ca'bki'd mo.

31 Dhali a'di ikarkunu a'di ki mo ma kar/e mo
 'pena nyaḅum yil jin tanu mo mmotana nyaḅum yil ki sule/ sule/ mo.

32 Uni rak a'di isa nyor mo gom gwo yi'de/ e mo ma Mariiba mo,
 dhala Musa cinu isi jwa mo gom gway buni mo,

33 haali/ uni ki raḅa kaṣhiram piti ca'bki ṅah ṅah mo,
 dhali a'di ki o gwo ki mony'cwar mo.

34 Uni 'koki 'ce'd 'kwani sho'k mo
 me'd gwo jin kankina Tapa uni mo,

35 hili uni ceki e ki kal gi 'kwanin tiya mo
 dhali da/ar mii kun miina uni mo.

36 Uni ki mii to gom tompinycon buni mo,
 a'di jin warki'd ka gume/ gom uni mo.

37 Uni ki ci iya/m buni mmo'ciṭh 'kus mmomiya bas mo
 dhali i'bwā/ buni si'da/ ka rum thus kun nyo/anyo/ mo.

38 Uni ki wol tiya bas kun 'kon ma bas ka po/ mo,
 uni kun tana bas gi iya/m buni mo dhali i'bwā/ mo,
 uni kun cikina uni mmo'ciṭh 'kus gom tompinycon kun luṅu gi Panj Kanaan
 mo,

dhali bampa/ shi/kunu is ka bas 'kwanimpa mo.

39 Wakan uni taki 'kwani kun nyo/anyo/ ki miim buni mo,
 dhali lo'bi gwonyḅal ki miim buni mo.

40 Dhali yan'ko'd anyor gi Tapa a'di 'thakunu ki ligi/ ligi/ apo/ 'kwanim piti
 mo

dhali a'di ki shi/ mal piti i e mo.

41 A'di ki ciki uni mo e me'd gi kal gi 'kwanin tiya mo,
 wakan ki uni gwansan kun shi/ki uni i e mo tani mii miin tapa apo/ uni mo.

42 'Kwanin 'kup buni siri'cki uni apo/ ki sho'k mo,
 dhali uni 'doyunu mo mmodila bora 'cesh e bwan'kwariny mom'bi'th buni
 mo.

43 Me'd ka ris a'di ki 'cuk uni mo,
 hili uni pishki is ka le'd ki tas tas gom 'kup gwom buni mo
 dhali uni 'doyunu ka luṅu'b e miim buni kun 'coḅa'coḅ mo.

44 Bahili a'di ki ciya hirdhe/ ki mo ma cis buni mo,
 ki a'di cikki kom buni mo.

45 A'di ki ka gwo e gom gway buni gom gwom piti jin gama a'di me'd mo,
 dhali a'di ki biṭ bwam piti me'd mo isi ki gwo gi mo/en piti jin ṭelu sho'k mo
 jin ishki'd ka enthus mo.

46 A'di ki rak uni gwahan mmohila hil ki e ma 'thime/ ki mo/en mo
 ki uni gwansan kun bu'th uni mmota habuus mo.

⁴⁷ Tayi aman is ki me'd mo, ayy Tapa Arumgimis bam mo,
dhali tulu/ aman is mo 'pena ris bwaman gi kal gi 'kwaniny' cesh mo,
ki am mina ci mo jin 'boruwa 'bor bwa i is ki gway pini jin kogu mo,
dhali ca mo e momaŋ pini mo.

⁴⁸ Mom'bor mii gom Tapa mo, a'di jin ta'da Arumgimis ma Israyiil mo,
'peni mo jin 'konuki/e ki sule/ sule/ ya ye 'ba/ mo itan mo jin 'konuki/e ki sule/
sule/ ya ye 'ba/ mo.

Dhali dhalka ris 'kwani 'baar mo o gwo mo ki: Amen.

Maŋi Tapa mo.

AWARKA/ JIN 'KONA 'BANI MUDHE'D MO

107

¹ Ayy, ciyi mo jin 'boruwa 'bor bwa i is ki Tapa mo, haali/ a'di 'bora'bor mo,
haali/ mo/en piti jin telu sho'k mo a'di 'dimki 'kup ki sule/ sule/ mo.

² Dhalki 'kwani gwahan kun wanu 'ba/ mo i/o gwo wakan mo,
uni kun wankina a'di 'ba/ 'peni mo jin toju bwa mo,

³ dhali tul uni is 'peni mony' cesh mo

'peni mom'pesho'k mo dhali 'pena bora luŋgu'b mo,

dhali 'peni moŋ'ko'd gwar ma bim poros mo dhali 'peni moŋ'ko'd gwar ma
biny cam mo.

⁴ Unin tiya kun iikin ki iinyca/ e bwam ma si'b mo jin shinu is mo,
uni gam bwaya kamu/ e 'peŋkuman bampa/ mmo'ko icine/ mowa?

⁵ Uni 'kosha te/ mo dhali budha yi'de/ mo,

dhali akashiram buni 'thikina buye/ e bwaman uni mo.

⁶ Dhali yan'ko'd uni ki ko 'twa/i Tapa mo gom monto'c bwam buni mo,
dhali a'di 'cuŋki uni 'peni mo ma cis buni mo,

⁷ dhali a'di ki shu uni bway ki bwaya ji sho'k mo,

ntagi uni bumburkin mo e 'peŋkuman bampa/ mmo'ko icine/ mo.

⁸ Dhalki uni ci mo jin 'boruwa 'bor bwa i is gom Tapa mo gom mo/en piti jin
telu sho'k mo,

gom miin to gi momer piti e iya/ gi 'kwani mo.

⁹ Haali/ a'di ki kap a'diya du mo, a'di jin budha yi'de/ mo,

dhali a'di jin 'kosha te/ mo tani a'di ki 'tu'd a'diya du ki tom 'borga/ mo.

¹⁰ Kun tiya 'kokin e mondhurumi'da 'tum mo dhali e mo jin molu pi 'kup ka
pije/ mo

kun tana habuus mo gom uni doru ki isa nyor mo dhali remu 'basho'k ki
tonkuthu'd mo,

¹¹ haali/ uni pishki is ka le'da po/ gwo ma Arumgimis mo,

dhali bel gwo jin logoma a'di jin Caa e ki Ca mo.

¹² Adum buni a'di luŋku'd gom to jin diŋadiŋ kun miina uni mo,

dhali ki uni ta'kki 'ko'da 'cesh mo tani jan'kamu/ piyi'd mmowoŋh uni mo.

¹³ Yan'ko'd uni ki ko 'twa/i Tapa mo gom monto'c bwam buni mo

dhali a'di 'cuŋki uni 'peni mo ma cis buni mo.

¹⁴ Dhali a'di ki 'doyu/ uni ka pije/ 'peni mondhurumi'd mo dhali mo jin molu
pi 'kup ka pije/ mo

dhali a'di ki 'ce'd mondek buni mmoshat uni ka 'ceshi 'baar mo.

¹⁵ Dhalki uni ci mo jin 'boruwa 'bor bwa i is gom Tapa mo gom mo/en piti jin
telu sho'k mo,

gom miin to gi momer piti e iya/ gi 'kwani mo.

¹⁶ Haali/ a'di shaŋki'da risa campur ma korok ka 'cesh mo,

dhali a'di ki pwa_{th} dhana bem'ban ton_kuthu'd bwa mo.

17 Kun tiya 'ba'thkin mo e bway miinthus buni mo,
dhali gom miiny'cok_{am} buni mo tani uni 'koshkunu is ka nyor gom to jin
wo'cki is she/ mo.

18 Uni ushki ton_{ten} tiya kun 'kona e ki she/ mo,
uni 'dishki 'twa_nkal gi mowu is mo.

19 Dhali yan'ko'd uni ki ko 'twa/i Tapa mo gom mon_{to}'c bwam buni mo
dhali a'di 'cuk_{ki} uni 'peni mo ma cis buni mo.

20 A'di hashki gwom piti mo dhali wa_ç uni mo,
dhali a'di 'cuk_{ki} uni mo 'peni mo jin 'ce'du sho'k mo.

21 Dhalki uni ci mo jin 'boruwa 'bor bwa i is gom Tapa mo gom mo/en piti jin
telu sho'k mo,
gom miin to gi momer piti e iya/ gi 'kwani mo.

22 Dhali dhalki uni ci to jin cinu mmo'ci_{th}'kus ki bwa jin 'boruwa 'bor i is mo
dhali tor miim piti ki gway mo ki bwan'kunya/ mo.

23 Kun tiya iikin ka 'cesh e bwaman k_{umma}/ yi'de/ e bwaa k_{ur} mo,
mmomiya tu'c yol jin caaca e dhan yi'de/ mo.

24 Uni parki mii gi Tapa e mo,
momer piti kun miikina a'di e mon'kulga/ mo.

25 Haali/ a'di k_{anki} gwo mo dhali cu 'tham jin ta'da punthar mo,
a'di jin 'de'k_{ki} yi'de/ abor ki mis mmobir bakal apo/ k_{umma}/ yi'de/ mo.

26 Uni ulu_çki 'kup_{ki} mis mo tani dhali uni iikin ka 'cesh e mon'kulga/ mo.
Mo ma dum buni jin 'bitha uni is waki'd mo gom mo ma cin_{thar} buni kun ta
thus ki thus mo.

27 Uni iikin ki dho'do/ dho'do/ mo dhali wun_gul ii mo me'd 'kwani kun
'koshkin ma su mo,
dhali uni deekina miim buni ki tash tash mo.

28 Dhali yan'ko'd uni ki ko 'twa/i Tapa mo gom mon_{to}'c bwam buni mo
dhali a'di 'cuk_{ki} uni 'peni mo ma cis buni mo.

29 A'di karki'da punthar 'tham mmodi ka ku'th is mo,
dhali bakal k_{umma}/ yi'de/ a'di doshkunu ki biyuu mo.

30 Dhali yan'ko'd uni 'kunya bwa mo haali/ uni gam mo jin 'konu ki shwamm
mo,
dhali a'di ki sus uni e mom buni jin 'kana uni ki she/ jin ona bwa uni mo.

31 Dhalki uni ci mo jin 'boruwa 'bor bwa i is gom Tapa mo gom mo/en piti jin
telu sho'k mo,
gom miin to gi momer piti e iya/ gi 'kwani mo.

32 Dhalki uni kar a'di ki ca mo e bwaman ma tul 'kup 'kwani mo,
dhali man a'di e bwaman ma tul 'kup gi 'kwanin_g gwanyaka/ mo.

33 A'di ki tu'k yi'de/ e bwaman ma si'b mo,
yi'de/ jin kasha e e mony'cesh jin budha yi'de/ 'kwani mo.

34 Mony'cesh jin dhotha to a'di ki tu'k a'di mo mmota a'cesh jin
'balatha'bala'th jin shiyi'd mo,
gom miim buni kun ta thus ki thus kun 'kokin e a'di mo.

35 A'di ki tu'k bwaa si'b mmowar ka al yi'de/ mo,
dhali mony'cesh jin ta'da burta/ o'd mo tani a'di ki kar a'di mmokash yi'de/ e
mo.

36 Dhali imattaan a'di ki dhal uni kun 'kosha te/ mmo'ko mo,
dhali uni telki 'pen_kuman bampa/ sho'k mo mmo'ko icine/ mo.

37 Uni siki bunto mo dhali nyan_a gon mmosiya mura'th mo,

dhali gam maman cwa kun gwono'dkin mo.

38 Ki mom'bor miim piti mo tani uni markina mar is ki caaca mo, dhali a'di diki dhal bip buni bway mo mmo'koki 'ko mmodhodhi mar is mo.

39 Ki uni 'kon ki daka/ mo dhali warkunu ki 'kwani kun aṭha she/ ki aṭh mo e mo jin siri'ckunu uniya siri'c ki sho'k mo dhali monto'c bwa mo dhali bwani diti'd mo tani

40 a'di ki wol mowaka po/ iya/ gi imalik mo dhali a'di ki dhu uni mmo/ii ka ca/ e mo jin pina sho'k 'kwani mo dhali tonycuḵ mo.

41 Hili a'di ki cu uni mis uni kun mini mii ta gi to 'peni mo jin tojuwa to'c bwa mo,

dhali dhuwa waḵ buni mmowa e ka ma'diny ka'bal mo.

42 'Kwani kun dhelel ma du mo tani parki a'di e mo dhali 'kuny bwa mo dhali aris uni kun ta thus ki thus mo tani 'dapkunu 'twam buni mo.

43 A'diyin jin yuḵayuk mo tani dhalki a'di ciyi'da hirdhe/ ki to gwansan mo. Dhalki 'kwani hil isi gwo i e mo gom mo/en gi Tapa mo jin telu sho'k mo.

108

Gway. Gway jin ta gway ma Dawuu'd.

1 Adum pem thosonki is mo, ayy Arumgimis. Adum pem thosonki is mo.

Aha/ mina yuk gway mo, aha/ mina yuk gway mmomaṇa maṇ mo.

Meri e mo, akashiram pem.

2 Meri e mo, ayy adhenḍhenye/ dhala dhenḍhenye/ jin 'kon ma shu/i pesu/ mo.

Aha/ mina mer mon'twash/e mo.

3 Aha/ mina ci mo jin 'boruwa 'bor bwa i is ki /e mo, ayy Tapa, e bwaman ma ris 'kwani mo.

Aha/ mina yuk gway mmomaṇ /e e bwaman kal gi 'kwaniny'cesh mo.

4 Gom mo/en pini jin telu sho'k mo apowa dhan momis mo, mo ma isin ganam pini a'di jithirki'd e bwaman ma raḵ mo.

5 Kari is pini ki ca mo, ayy Arumgimis, apo/ momisi 'baar mo.

Dhalki monycam pini a'di di'da po/ mony'ceshi 'baar mo.

6 Ki a'dim pini jin enu minu 'cuḵ mo tani

/e ki ci mowoth ka bim poros pini mo, dhali thoḵ aha/ 'twa/ mo.

7 Arumgimis oki gwo is e mom piti jin kogu mo mmo/o gwo mo ki:

Aha/ mina ya i mis ki moṇ'kuny bwa mo dhali kwa/ Pan Shakiim bwa mo dhali 'to/ to bwa ime'd mo e embul Wosh ma Sukkuut mo.

8 Jil/aad a'di ta jim pem mo, dhala Manassa a'di ta jim pem mo,

dhala Eprayim a'di ta toṇ'kup pem mo.

Yahuuda/ a'di ta cwa ma malik pem mo.

9 Muwab a'di ta'da kwalal pem jin 'thurka/ me'd mo

dhali e Pan Aduum mo tani aha/ mina bita ppa/ pem mo,

dhali apo/ e Pam Palasthiin mo tani aha/ mina 'ther cuuwa/ ki mo jin pinu mii e mo.

10 Kaja a'di imidi shu aha/ bway e 'penkuman bampa/ jin tenu gwo mo?

Dhali kaja a'di jin midi shu aha/ bway e Pan Aduum mo?

11 Ki diki ta /e iwakki aman mo, ayy Arumgimis?

/E diki nyak ya ki aman mo, ayy Arumgimis, nyakki 'kwani ma meem bam mo.

12 Ayy ciyi aman mowoth 'peni 'kup bam mo ma,

haali/ mowoth h 'peni 'kwani mo tani ta jim pe'th mo.

13 Ka Arungimis mo tani ana mina mii mii kun ca'bki konj konj mo.
Haali/ a'di ta a'di jin midi tan bway gom 'kwani'j 'kup bana mo be.

109

Eya manyuk gway mo. Gway ma Dawuu'd.

1 Dhalku/ ki ca'b ki shwamm mo, ayy Arungimis gom momanj pem mo.

2 Haali/ 'twa/ gi 'kwani kun ta thus ki thus mo dhali kun he'kkina he'k e mo
ka'dkina uni apo/ aha/ mo,
mmo/o gwo apo/ aha/ ki 'twa/ ma tor mo.

3 Uni tu'bki aha/ ki gwo jin shinuwa shi/ i e mo
dhali bu'th aha/ ki dar gi mii mo.

4 To kun dokkina uni aha/ 'peni mo/en pem mo tani uni ki thisi yer aha/ is ki
gway mo,
isi kani me'd jin dika/ mmo'tho gom uni mo.

5 Wakan uni ki ci aha/ to jin ta thus gom tom 'boro'd mo
dhali mo jin shinuwa shi/ i e mo gom mo/en pem mo.

6 Kari wathi/ jin ta thus ki thus 'pen ka pije/ apo/ a'di mo
dhali dhalka manyer a'di is ki gway susi a'di e mo jin dwallu gwo mo.

7 Ki a'di dwallkunu gwo mo tani dhalki a'di dikina mii i'ba/ mo.
Dhalki mon'thom piti a'di derju e ki ta ji miinthus mo.

8 Dhalka teem piti karu ki kut kut mo.
Dhalki wathin kamu/ bu'th mal piti mo.

9 Dhalki ucim piti 'kon ki dar gi com mo,
dhali dhalki ashim piti ta'da dhalla/ mo.

10 Dhalki ucim piti ii iinyca/ dhali 'tho to mo.
Dhalki uni uru ka pije/ 'peni mo jin kupa uni kun 'kona uni mo.

11 Dhalki wathi/ jin dina a'di ka mure/ i'ba/ bu'th tom piti 'baar mo.
Dhalki 'kwani tiya si'da/ shi/ maman cwam piti is mo jin 'koshkina a'diya
tu'c ki mii mo.

12 Dhali dhalki wathi/ piyi'd jin mido mii kar bwa jin kushakush gom a'di mo,
walla hil ucim piti jin dar gi com ki mii ma 'thime/ gi mo/en mo.

13 Dhalki emen piti kun mini yayu/ i'ko'd 'cithkunu 'twa/ mo.
Dhalki gway piti si'da/ minu 'kosh 'peni 'kwani ma nya'kum yil kun min ma
po/i 'ko/i su/ mo.

14 Dhalki mii kun 'coka'cok gi icom kanu e ibwambori Tapa mo,
dhali dhalki miinthus gi kum minu 'koki 'kosh ka pije/ mo.

15 Dhalki uni 'koni bwambori Tapa ki tikir tikir mo
dhali dhalki a'di jin dhunu ibwa minu 'cith 'twa/ 'peni mony'cesh mo.

16 Haali/ a'di diki ka mii e mo mmo'or mii gi bwanj kush mo
hili a'di ki ur 'kwani kun hatha'ko'di sho'k mo
dhali uni gun mini mii ta gi to mo dhali uni gun 'ce'dkin ma dum buni gom
jwam buni mo.

17 A'di en mo jin jeenuwa jee kagahara mo, dhali dhalki mo ma jee pu'dki'da
po/ a'di mo.
A'di diki en mo jin 'boruwa 'bor mii mo, dhali dhalki a'di si'dasi'd 'peni a'di
mo.

18 A'di shumki is piti ki mo ma jee me'd burrinyem pom piti jin hitha a'di mo.
Dhalki a'di 'thok bungwar is piti me'd yi'de/ mo,
dhali me'da yin eya simam piti mo.

19 Dhalki a'di wana e ki burrinye/ jin 'tampalkina a'di i is mo,

dhali me'd waḡkan jin hi'thkina a'di e empa'd piti ka yempa/ mo.

²⁰ Dhalki a'di yansan ita to jin gam ma manyer aha/ is ki gway 'peni Tapa mo gom uni gwansan kun oki tonthusa po/ mondiki/em pem mo.

²¹ Hili, /e, ayy Arungimis jin ta Tapam pem mo,
tu/uli mii yan mo ma gom gway pem mo dhali gom gway gi gway pini mo haali/ mo/en pini jin ṭelu sho'k mo a'di 'boro'd mo mmo'cuḡ aha/ mo.

²² Haali/ aha/ hatha di 'ko'd ki ha'th mo dhali mina mii ta gi to mo, dhala dum pem a'di ta jama/ ki jama/ e isi aha/ mo.

²³ Aha/ 'baara mo, dhali aha/ wana e ka ḡashira/ ma la gi mom'pimpili/ mo. Aha/ yiḡinkunu is me'da kuyu/ mo.

²⁴ 'Kupa'dupun pem 'ka'da'ka'd mo gom ga/ jin ga/ka/ to mo. Bunḡwar is pem lulki'd mo.

²⁵ Aha/ tana kuṭ jin ṭhunya imanyer aha/ is ki gway 'twa/i is mo. Ki uni parki aha/ e mo tani uni birki 'kup buni mo be.

²⁶ Wothi/ aha/ mo ma, ayy Tapa Arungimis pem mo. Tayi aha/ is is ki me'd mo isi ki mo/en pini jin ṭelu sho'k mo.

²⁷ Dhalki uni mishi mo mo ki mii yansan a'di ita mii gi me'd pini mo, ki /e, ayy Tapa, imiiki a'di mo be.

²⁸ Dhalki uni jeena jee mo, hili /e mini mii mo jin 'boru mii mo. Dhalki uni gwansan kun ṭha'th aha/ ki is dhunu ki mo ma 'the is mo. Dhalki ciṅkinam pini 'kunya bwa mo.

²⁹ Dhalki imanyer aha/ is ki gway shumu ki mii jin thisuwa taḡ ush taḡ mo. Dhalki uni i'tampalkina mo ma 'the is buniṅ gana/ e is mo me'd burrinye/ mo.

³⁰ Ki 'twam pem mo tani aha/ mina ci mo jin 'boruwa 'bor bwa i is ki Tapa mo.

Aha/ mina maṅ a'di e bwaman ma waambuhany 'kwani mo.

³¹ Haali/ a'di doshki'd ki me'da bim poros mo gom a'di jin midi mii ta gi to mo, mmota a'di is ki me'd mo 'peni uni gwansan kun waḡki a'di mmowu mo be.

110

Gway ma Dawuu'd.

¹ Tapa ki o tapam pem gwo mo ki:

Ca'bi /e aha/ ki me'da bim poros pem mo ma ntagi aha/ mina dhu uni gun ta 'kup ki /e mmota cwa jin mina /e dhu sho'k mo.

² Tapa ki hash 'pena Sihyuun cwa ma malik pini jin ta gi mo ma dem dem mo. Jiyya ji e bwaman 'kwani kun ta 'kup pini mo.

³ 'Kwanim pini mini ci is buni 'baḡany mo ka tee jin mina /e susa waambuhany pini apo/ 'kuwosh kun turatur kun ḡogu mo.

'Peni bwa ma dho'th gi mon'thamo/ mo tani dhuru'c pini jin tana /e midi pu'du/ i /e me'd jape/ mo be.

⁴ Tapa thulki gwo me'da po/ mo dhali a'di midi diki ak bwam piti e mo: /E tana gasiis ki sule/ sule/ mo mmobaṭha cuḡ ma Malkisaadag isho'k mo be.

- 5 Tapa a'di diki'd ki me'da bim poros pini mo be.
 A'di midi shaṭ imalik ka 'cesh mo ka tee ma nyor piti mo.
- 6 A'di midi tor gwon dwall 'twa/a 'cesh e bwaman kal gi 'kwaniny'cesh mo,
 mmo'tu'd uni ki bungwar is jwa mo.
 A'di midi shaṭ itapa ka 'cesh mo
 apo/ mony'cesh jin beeyabee mo.
- 7 A'di midi pi 'peni jis yi'de/ jin kasha e jin di'di shemen bway mo.
 Wakan a'di midi 'de'k 'kup piti ki mis mo be.

111

- 1 Manj Tapa mo.
 Aha/ minā ci mo jin 'boruwa 'bor bwa i is ki Tapa mo ka dum pemi 'baar mo,
 ki dhan ya ma tul 'kup gi kwani kun dhelel ma du mo e bwaman ma tul 'kup
 yan mo.
- 2 Mii gi Tapa a'di caaca mo,
 dhali a'di thukkin ma ris 'kwani 'baar ka 'dete/ 'dete/ ki e mo, uni kun
 'borkina bwa e uni mo.
- 3 A'di 'tu'du/ ki montak mo dhali mo/ek mo e miin tom piti mo,
 dhali miinḡkar/em piti 'dimki 'kup ki sule/ sule/ mo.
- 4 A'di ki rak miin tom piti jin miina a'di ki momer kanu e mo.
 Tapa a'di ta'da 'the ka 'the mo dhali amanmiimii mo.
- 5 A'di ki thoson tonte/ gom uni gwansan kun ko/ki a'di mo.
 A'di dina bwam piti ki ush mmota pa gom gwo jin gama a'di me'd mo.
- 6 A'di ki tor 'kwanim piti mom'bi'th gi miin tom piti mo,
 dhali ci uni mal gi kal gi 'kwaniny'cesha tiya mo.
- 7 Miin to gi me'd piti mo tani uni ta ku isinj gana/ mo dhali kunḡkar/e mo.
 Aris gwonḡkan gi 'twam piti uni ta ku gun minu gam is mo.
- 8 Uni telkunu sho'k ki sule/ sule/ mo dhali ki sule/ sule/ mo,
 mmothim uni ki mii ma isinj gana/ mo dhali ki mii ma ḡkar/e mo.
- 9 A'di ki hash mo jin wanu 'ba/ ki 'kwanim piti mo.
 A'di ki kan gwonḡkan piti jin gamu me'd mmodi ki sule/ sule/ mo.
 Gway piti kogu mo dhali mii ma purem piti mo.
- 10 Monḡko/ gom Tapa mo tani a'di ta montel 'pen gi moyuk mo.
 Mo jin mishu gwo 'ban jin 'boro'd goma ris uni 'baar mo kun botkin ki a'di
 mo.
 Momanj piti a'di i'dimki 'kup ki sule/ sule/ mo.

112

- 1 Manj Tapa mo.
 Mom'bor mii gom wathi/ jin ko/ki Tapa mo,
 a'di jin 'kunykina bwa ki 'kuny kagahara e gwonḡkan piti kun 'kwarkunu mo.
- 2 Emen piti mini ca'bki dem dem e mony'cesh mo,
 dhala nyakum yil gi 'kwani kun dhelel ma du mo tani uni minu 'bor mii mo.
- 3 Pa jin tanu dhali pa jin tana a'di e gu'b piti mo
 dhali mo ma ḡkar/em piti 'dimki 'kup ki sule/ sule/ mo.
- 4 Monḡkush cuki mis e bwaman mondhurumi'd gom uni kun dhelel ma du mo.
 Tapa a'di ta'da 'the mo dhali ta'da manmiimii mo dhali ta'da ḡkar/e mo.
- 5 A'di 'boro'di gom wathi/ jin tu/ulki mii ki mii ma 'the mo dhali ci to ka 'ka'd
 me'di is mo,
 a'di jin mishi is piti ninn gom tom piti ki mii ma ḡkar/e mo.
- 6 Haali/ wathinḡ ḡkar/e a'di molu joḡ ki sule/ sule/ mo.
 A'di minu ka e ki sule/ sule/ ya ye 'ba/ mo.

7 Dhali a'di mididi diki ko/ is gom tonthus jin minu kal mo.
Adum piti rwa'ckunu mo, mmogamkina a'di gwo is e Tapa mo.

8 Adum piti shurki'd mo, a'di mididi diki ko/ is mo
ntagi a'di mididi par to jin ona bwa a'di e apo/ uni kun ta 'kup ki a'di mo.

9 A'di ki pwaḵ to bwa 'bakany mo, a'di ciki to gom 'kwani kun hatha'ko'd mo,
mii ma kar/em piti a'di 'dimki 'kup ki sule/ sule/ ya ye 'ba/ mo.
Cem piti a'di karkunu ki ca ki montak mo.

10 Wathi/ jin ta thus ki thus mo tani a'di parki a'di e mo dhali a'di shwa'da
nyor mo.

A'di ki 'pe'd shem piti mo dhali wa mo.

To jin ona bwa wathi/ jin ta thus ki thus mo tani warki'd ka munyal mo.

113

1 Maḅi Tapa mo.

Maḅi amaḅ mo, ayy um cḅinkina/ gi Tapa mo,
maḅi gway gi Tapa mo.

2 Mom'bor mii mididi mo gom gway gi Tapa mo
'pena tee yansan mo dhali ki sule/ sule/ mo dhali ki sule/ sule/ mo.

3 'Peni mo jin sul ma tente/ mo tani dhali mo jin yula a'di mo tani
gway gi Tapa a'di iminu maḅ mo.

4 Tapa a'di ika'damaka'dam apowa ris kal gi 'kwaniny'cesh mo,
dhali monycam piti a'di diki'da po/ momis mo.

5 Kaja a'di iwakina e ki Tapa Arumgimis bana mo,
a'di jin ca'bki'd e mo jin ka'dama/ ka'dam mo,

6 a'di jin hilki mo ka luḅgu'b
'pena po/ momis mo dhali mony'cesh mo?

7 A'di ki 'de'k 'kwani kun hatha'ko'd ki ha'th 'peni bu'da'cesh mo
dhali a'di ki 'de'k uni kun mini mii ta gi to mo 'pena duhal 'piny mo,

8 mmodhu uni mmonyak 'ko ki iya/ gi imalik mo,
dhali nyakki iya/ gi imalik gi 'kwanim piti mo.

9 A'di ki ciya 'boma burum pa mo mmoḅa'b mo,
mmokara yim mmo'kuny bwa ki 'kuny jin shiyi'd mo me'd kum gi uci mo.

Maḅi Tapa mo.

114

1 Me'd jin yakin ma Israyiil ka pije/ 'peni Pam Masir mo tani
gu'b ma Yakuub 'peni 'kwani kun wal 'twan tiya mo tani

2 Yahuuda/ warki'd ki mom piti jin kogu mo,
dhala Israyiil a'di ta mo jin tanu tapa ki sule/ sule/ mo.

3 Dhan kumma/ yi'de/ hilki mo mo dhali ya ḅwaḅa/ mo.
Dhali Kumma/ Yi'de/ Uurdun dokki'd ka nyan'ko'd mo.

4 'Kuwosha turga/ pekina ḅalbothoḅ ki 'thir 'thir mo me'd gwasin ka'bal mo,
dhali ushi wosha gwa'dga/ wana e ki ushi ka'bal mo.

5 Ata mii/eye, ayy kumma/ yi'de/, ki /e guskin kan mo?
Ayy Uurdun, katinta dokkina /e ka nyan'ko'd mo?

6 Ayy 'kuwosha turga/, ata pekina um ki 'thir 'thir me'd gwasin ka'bal kan
mo?

Dhali um ushi wosha gwa'dga/ kun wana e ki ushi ka'bal mo?

7 Deeyi ma ki bir bir mo, ayy mony'cesh, e buḅ'kus gi Tapa mo,
e buḅ'kus ma Arumgimis ma Yakuub mo,

8 a'di jin tu'kki wosh mo mmota a/al gom yi'de/ mo
dhali wosh jin bilitki o'd mo tani warki'd ki yi'de/ jin kasha e mo.

115

1 Yisa e am, ayy Tapa, yisa e am,
hili gom gway pini mo tani ciyi monyca mo,
gom gway gi mo/en pini jin telu sho'k mo dhali mii ma isin ganam pini mo.

2 Ki ton ta'da tinta imina kal gi 'kwaniny'cesh i/o gwo mo ki:
Mane Arumgimis buni mane?

3 Arumgimis bana a'di diki'd e momis mo.
A'di ki mii a'diyin jin 'bora bwa a'di mo.

4 Tompinycon buni kun luja uni mo tani ta 'dolkon kush mo dhali 'dolkon
gana/ mo
kun uku ki me'd gi 'kwani mo be.

5 Uni ta gi 'twa/ mo, hili uni o gwoŋ kamuwa?
Dhali uni ta gi e mo, hili uni parki toŋ kamu/ eya?

6 Uni ta gi 'ce mo, hili uni cik toŋ kamuwa?
dhali uni ta gi shush mo, hili uni cikina shim toŋ kamuwa?

7 Uni tan gi me'd mo, hili uni ta toŋ kamu/ is ki me'da?
Uni tan gi sho'k mo, hili uni mishi ii ki shoka?

Dhali uni misha isa kamu/ mur e 'kus buniya?

8 Uni gwansan kun uk uni mo tani uni wana e ki uni mo.
Wakan si'da/ aris uni gwahan kun gamki gwo is e tompinycon buni mo.

9 Ayy Israyiil, gami gwo is e Tapa mo.
Haali/ a'di ita mowoth buni mo dhali agongorom buni mo.

10 Ayy gu'b ma Haruun, kari mongam gwo is e Tapa mo.
Haali/ a'di ita mowoth buni mo dhali agongorom buni mo.

11 Um kun ko/ki Tapa mo tani gamki gwo is e Tapa mo.
Haali/ a'di ita mowoth buni mo dhali agongorom buni mo.

12 Tapa tana bwa pa ki pa gom ana mo. A'di midi 'bor ana mii mo.
A'di midi 'bor gu'b ma Israyiil mii mo.

Dhali a'di midi 'bor gu'b ma Haruun mii mo.

13 A'di midi 'bor uni gwansan mii kun ko/ki Tapa mo
'peni uni kun gwa'da is mo dhali uni kun cakin mo.

14 Dhalki Tapa ci um mo jin maruwa mar is mo,
um dhali ucim bum mo.

15 Dhalki um 'boru mii ki Tapa mo,
a'di jin ukki momis mo dhali mony'cesh mo.

16 Momis uni ta momis gi Tapa mo,
hili mony'cesh cikina a'di ki iya/ gi 'kwani mo.

17 Uni kun wukin mo tani mishi Tapa man yisa,
walla uni gwansan kun iikin ka lungu'b e mo ma shwamm mo.

18 Hili ana mina 'bor Tapa mii mo
'pena tee yansan shwane/ mo dhali ki sule/ sule/ ya ye 'ba/ mo.
Manji Tapa mo.

116

1 Aha/ mina en Tapa mo haali/ a'di cikki ko gi
'twam pem mo jin 'thoka/ ka di'b me'di is mo.

2 Haali/ a'di ka'dki bwany'cem piti ki aha/ mo
wakan aha/ mina yuk a'di isi ki me'd jin dika/ ki e mo.

- ³ Agume/ gi mowu uni 'kamki aha/ is mo, anyok ma Haawiya uni bu'thki aha/ mo. Aha/ 'kosha is ka nyor mo eya cis pem mo dhali 'pe'd she/ mo.
- ⁴ Yan'ko'd aha/ ki yuk gway gi Tapa mo mmo/o gwo mo ki: Ayy Tapa, aha/ yuka /e mo, tayi mondiki/em pem is ki me'd mo.
- ⁵ Tapa a'di ta'da 'the ka 'the mo dhali ta'da kar/e mo, Arumgimis bana jin miimii mo.
- ⁶ Tapa a'di 'tashki uni 'twa/ mo uni kun wana she/ is is kan mo, ki aha/ guyunu ka lun'gu'b e mon'gwa'dga/ mo tani a'di taki aha/ is ki me'd mo.
- ⁷ Do'ki ka nyan'ko'd, ayy kashiram pem, e mosi/is pini mo, haali/ Tapa a'di tu/ulki'd nyakki /e ki mii jin isha to ka entus gom /e mo.
- ⁸ Haali/ /e 'cukkina kashiram pem 'peni mowu mo, dhali em pem 'peni jabu'th jin wolki'd mo, dhali sho'k pem 'peni mo jin gwoluwa gol mo.
- ⁹ Aha/ yakina e bwambori Tapa mo e mony'cesh jin 'konuki/e mo.
- ¹⁰ Aha/ karkina mon'gam gwo is pem mo, isi kani me'd jin okika/ gwo mo ki: Aha/ tashu ka dhan mo jin jwaka'tkunuwa jwaka't jin shiyi'd mo.
- ¹¹ Aha/ ona gwo e mom pem jin dumbulkika/ bway mo ki: 'Kwani 'baar mo tan ga 'te'j kape/ jin ta jim ma pe'th mo.
- ¹² Ata a'di jin miga/ ci ki Tapa mo goma ris tom piti 'baar kun ishkin ka entus gom aha/ mo?
- ¹³ Aha/ mina 'deka kubbaaya gi mowoth ma Arumgimis ki mis mo dhali yuk gway gi Tapa mo.
- ¹⁴ Aha/ mina ci gwom pem jin oka/ is ki Tapa mo e bu'j'kus ma ris 'kwanim piti 'baar mo.
- ¹⁵ Yinthon' gana/ e jis/e gi Tapa mo, a'di ita wu ki unim piti kun dhunu ki she/ ki dhelel dhelel mo.
- ¹⁶ Ayy Tapa, aha/ tana cin'kinam pini mo. Aha/ tana cin'kinam pini mo, a'di jin ta ya/ gi nyaranycin'kinam pini mo be. /E ki 'cuk mondek pem mo.
- ¹⁷ Aha/ mina ci to jin 'cithu/ 'kus ki bwa jin 'boruwa 'bor i is mo dhali yuk gway gi Tapa mo.
- ¹⁸ Aha/ mina ci gwom pem jin oka/ is ki Tapa mo e bu'j'kus ma ris 'kwanim piti 'baar mo,
- ¹⁹ eya pi'je/ gi gu'b gi 'kup kany gi Tapa mo, e bwaman um mo tani, ayy Urushaliim. Manji Tapa mo.

117

- ¹ Manji Tapa mo, aris um kal gi 'kwaniny'cesh mo. Yuki gway ki mon'kuny bwa gom a'di mo, aris um 'kwani mo.
- ² Haali/ mo/en piti jin telu sho'k mo tani a'di caaca 'kupki ana mo dhali mo ma isin'j gana/ gi Tapa mo a'di 'dimki 'kup ki sule/ sule/ ya ye 'ba/ mo. Manji Tapa mo.

118

- ¹ Ayy ciyi mo jin 'boruwa 'bor bwa i is gom Tapa mo, haali/ a'di i'boro'd mo. Mo/en piti jin telu sho'k mo tani a'di 'dimki 'kup ki sule/ sule/ mo.
- ² Dhalka Israyiil o gwo mo ki: Mo/en piti jin telu sho'k mo tani a'di 'dimki 'kup ki sule/ sule/ mo be.

3 Dhalki gu'b ma Haruun o gwo mo ki:
Mo/en piti jin telu sho'k mo tani a'di 'dimki 'kup ki sule/ sule/ mo be.

4 Dhalki uni gwansan kun ko/ Tapa mo tani o gwo mo ki:
Mo/en piti jin telu sho'k mo tani a'di 'dimki 'kup ki sule/ sule/ mo be.

5 'Peni mo ma cis pem mo tani aha/ yukkina Tapa mo.

Dhali Tapa thokki aha/ 'twa/ mo dhali kar aha/ ki 'kus mo.

6 Ki Tapa nyak di ki aha/ mo tani aha/ mina ko/ tonj kamu/ yisa.

To gi wakatinta imina 'kwani imii aha/ mo?

7 Tapa a'di diki'd e 'ko'd gwar pem mo mmowoth aha/ mo.

Aha/ mina hil mo ki e jin pinu mii e mo apo/ uni gwansan kun shi/ki aha/ i e mo.

8 A'di 'boro'd mmobu'th mo jin huru jwa e Tapa mo
mmo'koki dhu mo jin wunuwa wuny jwa i is e 'kwani mo.

9 A'di 'boro'd mmobu'th mo jin huru jwa e Tapa mo
mmo'koki dhu mo jin wunuwa wuny jwa i is e iya/ ma malik mo.

10 Aris kal gi 'kwaniny'cesh uni 'kamki aha/ 'kup ki dek mo.

Ki gway gi Tapa mo tani aha/ 'cithkina uni 'twa/ mo.

11 Uni 'kamki aha/ 'kup ki dek mo, mmo'kam aha/ 'kup ka ris 'twanjal kuku/
mo.

Ki gway gi Tapa mo tani aha/ 'cithkina uni 'twa/ mo.

12 Uni 'kamki aha/ 'kup ki dek me'da dham mo.

Uni shwan ki bar bar me'd o'd cwan 'de/ mo.

Ki gway gi Tapa mo tani aha/ 'cithkina uni 'twa/ mo.

13 Aha/ gaçu/ ki gaç jin shi/ashi/ mo. Wakan aha/ 'barkina mo
hili Tapa wothki aha/ mo be.

14 Tapa a'di ta mom'bi'th pem dhali gway pem mo.

A'di warki'd ki bway gi mowoth pem mo.

15 Ciki gwo mo ma, gom gwaya 'kunya/ kun pinu mii e mo
e gu'b burrinye/ gi 'kwani gi miin_{kar}/e mo.

Me'da bim poros gi Tapa a'di miiki mii ki dar gi monyju/ mo.

16 Me'da bim poros gi Tapa a'di karkunu ki ca mo.

Me'da bim poros gi Tapa a'di miiki mii ki dar gi monyju/ mo.

17 Aha/ mina wu yisa, hili aha/ mina di ki e mo,
dhali tash miin to deñ e kun miina Tapa mo.

18 Tapa a'di dorki aha/ ntagi aha/ bura is ki wap wap mo,

hili a'di yisa ciki aha/ mmowu mo yisa.

19 Ka'di aha/ 'twanjal ma goñ ki mii ma _{kar}/e mo
ki aha/ mina _{cic} e uni mo

dhali ci mo jin 'boruwa 'bor bwa i is ki Tapa mo.

20 Yansan a'di ta 'twanjala goñ gi Tapa mo

jin mina 'kwanin _{kar}/e _{cici} cine/ mo.

21 Aha/ 'borkina /e bwa i is mo haali/ /e _{cikki} aha/ 'twa/ mo
dhali war ki bway gi mowoth pem mo.

22 Wosh gana/ yansan jin wak_{kina} imannyan gu'b mo tani
a'di warki'd ka dhana 'kan'kup wosh gi 'penabi mo.

23 Mii yansan a'di ita mii jin miikina Tapa mo,
dhali a'di ta mii jin meru em bana mo be.

24 Yansan a'di ita'da tee jin karkina Tapa mo.

Dhalki ana 'kunya bwa mo dhali 'bor bwa e a'di mo.

²⁵ Tayi am is ki me'd mo, am kun yukkina /e mo, ayy Tapa.

Ayy Tapa, am yukkina /e mo, ciyi aman mo jin diluwa bora 'cesh mo.

²⁶ Mom'bor mii gom a'di jin ciki'd mo e gway gi Tapa mo.

Am 'bora /e mii mo 'peni gu'b gi Tapa mo.

²⁷ Tapa a'di ita'da Arungimis mo,

dhali a'di ciki ana monkush mo.

Nyonji mo jin kalu ya goma yuk ma tul 'kup ka biny cwa mo

ntagi ce jin thumu e 'kupa gwata/ jin miinuwa bas mo.

²⁸ /E tana Arungimis pem mo dhali aha/ mina ci mo jin 'boruwa 'bor bwa i is ki /e mo.

/E tana Arungimis pem mo dhali aha/ mina kar /e ki ca mo.

²⁹ Ayy ciyi mo jin 'boruwa 'bor bwa i is gom Tapa mo, haali/ a'di i'boro'd mo, haali/ mo/en piti jin telu sho'k mo tani a'di i'dimki 'kup ki sule/ sule/ mo.

119

¹ Mom'bor mii gom uni gwansan kun 'kona bway buni ki dar gi mii i'ba/ mo uni kun iyyin e gwonkan jin cinu gi Tapa mo.

² Mom'bor mii gom uni gwansan kun dhuki gwonycim piti mo, uni kun simmki a'di e ka dum buni 'baar mo,

³ uni si'da/ kun 'koki thu'th to mii mo, hili mmo/ii e bway piti mo be.

⁴ /E kanki gwonkan gi 'twam pini mo ki uni minu dhu ka dun gana/ mo.

⁵ Ayy ki bway pem minu tel sho'k mo mmodhu gwonkan pini kun bahu mo.

⁶ Wakan ki aha/ minu 'koki kar ki mo ma 'the is mo, mmothoson em pem mmo'ko'c eya ris gwonkan pini 'baar mo kun 'kwarkunu mo.

⁷ Aha/ mina man /e ka du jin dheleladhelel mo, ki aha/ mina da/ar gwo gom mii ma kar/em pini 'peni gwonkan kun onu mo.

⁸ Aha/ mina mii gwonkan pini kun bahu mo.

Ayy dhalki aha/ ki dhal 'pen mo ka dun thorony mo.

⁹ A'di jin ta dhuru'c midi kar bway piti ki dhelel dhelel kata mo? mmoji a'di isi ki gwom pini mo.

¹⁰ Ka dum pemi 'baar mo tani aha/ simmkina /e e mo.

Dhalku/ ki dhal aha/ mmo'aca/ mo 'peni gwonkan pini kun 'kwarkunu mo.

¹¹ Aha/ dhukina gwom pini eya dum pem mo, ki aha/ mina diki mii miinthusu po/ /e mo.

¹² Mom'bor mii gom /e mo, ayy Tapa.

Tori aha/ gwonkan pini kun bahu mo.

¹³ Ki 'twam pem mo tani aha/ bahkina aris gwonkan pini kun onu ki 'twam pini mo.

¹⁴ E bway gi gwonycim pini mo tani aha/ 'kunya bwa mo me'd jin miga/ 'kuny bwa eya ris mo jin tanu pa ki pa mo.

¹⁵ Aha/ mina kulum gwo ibwa gom gwonkan gi 'twam pini mo dhali ko'c em pem e bway pini mo.

¹⁶ Aha/ mina bwa 'kuny mo e gwonkan pini kun bahu mo. Aha/ mina diki na gwom pini mo.

¹⁷ Tu/uli nyakki cinkinam pini ki mo jin isha to ka enthus mo, ki aha/ mina di ki e mo dhali mii gwom pini mo be.

- 18 Ka'di em pem mo ma ki aha/ mina par momer e
 kun 'kon e gwonkan pini jin cinu mo.
- 19 Aha/ tana yilkina/ ki yilkina/ e mony' cesh mo.
 Dhalku/ ki bag gwonkan pini kun 'kwarkunu 'peni aha/ mo.
- 20 Akashiram pem a'di 'cumkunu ki mo jin cora/ cor mo
 goma ris gwonkan pini 'baar kun onu ka yempa/ mo.
- 21 /E ki kucur uni gwansan kun ush 'kwani ga/ mo, dhali uni kun jeenu mo,
 uni kun ca'ckin mo 'peni bway gi gwonkan pini kun 'kwarkunu mo.
- 22 Kali 'peni aha/ mon'twam buni kun thunya uni aha/ i is mo dhali mo ma
 wak mo,
 haali/ aha/ dhukina gwonycim pini mo.
- 23 Isi kani ba iya/ ma malik uni 'kokin mo dhali miya wutha po/ aha/ mo tani
 cinkinam pini a'di midu kulum gwo ibwa gom gwonkan pini kun bahu mo.
- 24 Gwonycim pini uni a'di i'kunyika/ bwa mo
 haali/ uni itana manlogom aha/ ki gwo mo.
- 25 Akashiram pem thalkina bu'da' cesh mo.
 Tashi aha/ e mo isi ki gwom pini mo.
- 26 Ki aha/ torkina bway pem mo tani /e thokki aha/ 'twa/ mo.
 Tori aha/ gwonkan pini kun bahu mo.
- 27 Kari aha/ mmomish gwo 'ban gom bway gi gwonkan gi 'twam pini mo,
 dhali aha/ mina kulum gwo ibwa gom miim pini jin miina /e to ki momer mo.
- 28 Akashiram pem a'di waki'd gom bwan diti'd mo.
 'Bithi aha/ is mo isi ki gwom pini mo.
- 29 Kari bway jin ta thus ki thus mmosi'd 'peni aha/ mo.
 Dhali ka 'the mo tani tori /e aha/ gwonkan pini jin cinu mo.
- 30 Aha/ kwanykina bway gi mii ma isin ganam pini mo.
 Aha/ karkina gwonkan pini kun onu ibwambori jis/em pem mo.
- 31 Aha/ thalkina gwonycim pini mo, ayy Tapa.
 Dhalku/ ki dhal aha/ bway ki aha/ minu kar ki mo ma 'the is mo.
- 32 Aha/ mina gus e bway gi gwonkan pini kun 'kwarkunu mo
 ki /e mini lala'th mom pem jin mishka/ gwo 'ban is mo.
- 33 Tori aha/ gwo mo ma, ayy Tapa, gom bway gi gwonkan pini kun bahu mo
 dhali aha/ mina dhu uni ntagi 'pemen mo be.
- 34 Ciyi aha/ mo jin mishu gwo 'ban mo ki aha/ mina dhu gwonkan pini jin cinu
 mo
 dhali mii a'di ka dum pemi 'baar mo.
- 35 Susi aha/ e bway gi gwonkan pini kun 'kwarkunu mo
 haali/ aha/ 'kunya bwa e a'di mo.
- 36 Ka'da dum pem ki gwonycim pini mo
 yisa mmota miya du is ki me'd mo.
- 37 Tuki em pem 'peni mo jin hiluwa hil kun 'kon bwa 'te/ mo
 dhali ciyi aha/ mondiki/e e bway pini mo.
- 38 Rwaci gwom pini jin ona /e is e cinkinam pini mo,
 a'di jin ona /e gom uni gwansan kun ko/ki /e mo.
- 39 Kali 'peni aha/ mowak jin kalki aha/ 'ko'da 'cesh mo,
 haali/ gwonkan pini kun onu mo tani uni 'bora'bor mo.
- 40 Hili mo mo ma, aha/ corkina gwonkan gi 'twam pini mo
 e mii ma kar/em pini mo tani /e ciyi aha/ mondiki/e mo.
- 41 Dhalki mo/en pini jin telu sho'k pu'dki'd e aha/ mo, ayy Tapa,
 isi ki bway gi mowoth pini jin ona /e gwo is mo.

- 42 Dhali yan'ko'd aha/ mina ta gi gwonthok gom uni gwansan kun thunyki
aha/ 'twa/i is mo
haali/ aha/ gamkina gwo is e gwom pini mo.
- 43 Dhali dhalku/ ki bu'th gwoŋ gana/ 'peni 'twa/ pem ka dun thorony mo,
haali/ mo ma 'teŋ kapem pem a'di di'd e gwoŋkan pini kun onu mo.
- 44 Aha/ mina dhu gwoŋkan pini jin cinu ki tikir tikir mo
gom ki sule/ sule/ mo dhali ki sule/ sule/ mo.
- 45 Dhali aha/ mina ya 'bakany gana/ mo
haali/ aha/ ŋapkina gwoŋkan gi 'twam pini mo.
- 46 Aha/ si'da/ mina o gwo gom gwonycim pini ibwambori imalik mo
dhali aha/ minu 'koki kar ki mo ma 'the is mo
- 47 haali/ aha/ gamkina mom pem jin 'kunya/ bwa mo e gwoŋkan pini kun
'kwarkunu mo,
a'di jin enka/ mo.
- 48 Aha/ taka gwoŋkan pini kun 'kwarkunu mo, a'di jin enka/ mo,
dhali aha/ mina kulum gwoŋkan pini kun bahu mo eya du mo.
- 49 Kayi gwom pini e e cin kinam pini mo,
e a'di jin karkina /e aha/ mmota ga 'teŋ kape/ mo.
- 50 Yansan ta momalas pem mo e mont'o'c bwa mo
ki gwom pini jin ona /e is ci aha/ mondiki/e mo.
- 51 'Kwani kun dar gi mii ma gayiin mo tani uni pe'th aha/ ki petha sor mo,
hili aha/ dinaki tu'k mo 'peni gwoŋkan pini jin cinu mo.
- 52 Ki aha/ kulumkina gwoŋkan pini kun onu mo ibwa mo 'peni kadhamo/ mo
tani
aha/ bu'thkina momalas mo, ayy Tapa.
- 53 Anyor jin deku jin 'batha'ba'th mo tani bu'thki aha/ mo gom 'kwani kun ta
thus ki thus mo,
uni kun dhalki gwoŋkan pini jin cinu 'pen mo.
- 54 Gwoŋkan pini kun bahu mo tani uni warkin ki gway pem jin yukka/ mo
e gu'b pem gi moyam pem jin yaka/ luŋ mo be.
- 55 Aha/ kakina gway pini e mon'thiny mo, ayy Tapa,
dhali dhu gwoŋkan pini jin cinu mo.
- 56 Mom'bor mii yansan a'di bitki'da po/ aha/ mo
ki aha/ dhukina gwoŋkan gi 'twam pini mo.
- 57 Tapa a'di ita tom pem jin 'tuntulka/ bwa ime'd mo.
Aha/ ona gwo is mmodhu gwom pini mo.
- 58 Aha/ 'thona mii ma 'them pini ka dum pemi 'baar mo.
Miiyi mii ka 'the gom aha/ isi gi gwom pini jin ona /e is mo.
- 59 Ki aha/ kulumkina gwo ibwa gom bway pini mo tani
aha/ wothkina sho'k pem 'ba/ e gwonycim pini mo.
- 60 Aha/ hurkina ki 'ta'b mo dhali diki ta adiiŋe/ mo
mmodhu gwoŋkan pini kun 'kwarkunu mo.
- 61 Ba anyok gi 'kwani kun ta thus ki thus mo tani uni bu'thki aha/ ka gume/
mo
dhali aha/ dinaki this gwoŋkan pini jin cinu e mo.
- 62 E mombwam/e mo tani aha/ cukina mis mmodan /e mo,
haali/ gom mii ma kar/em pini gi gwoŋkan pini kun onu mo.
- 63 Aha/ nyaŋkina ya ka ris uni gwansan kun ko/ki /e mo,
uni gwansan kun dhuki gwoŋkan gi 'twam pini mo.

64 Mony' cesh, ayy Tapa, a'di 'tu'dkunu mo ki mo/en pini jin telu sho'k mo.
Tori aha/ gwonḵan pini kun bahu mo.

65 /E tu/ulkina tu/ul ki 'bore/ gom cḵḵinam pini mo,
ayy Tapa, isi ki gwom pini mo.

66 Tori aha/ gwo isi ki tor gana/ mo mmonyith to mo dhali moyuk mo,
haali/ aha/ gamkina gwo is e gwonḵan pini kun 'kwarkunu mo.

67 Ntwa/a/ ki aha/ wo'ckunu is she/ mo tani aha/ yakina yam per mo,
hili shwane/ aha/ dhukina gwom pini mo.

68 /E 'bora'bor mo dhali mii mii kun 'bora'bor mo.
Tori aha/ gwonḵan pini kun bahu mo.

69 'Kwani kun ushina ga/ ga/ mo tani uni 'thokki aha/ ka tor mo,
hili ka dum pemi 'baar mo aha/ dhukina gwonḵan gi 'twam pini mo.

70 Adum buni momaṭa/ momaṭ me'd kwalany mo,
hili aha/ 'kunykina bwa mo e gwonḵan pini jin cinu mo.

71 A'di 'boro'd gom aha/ ki aha/ jwakaṭkunuwa du mo
ki aha/ mina da/ar gwonḵan pini kun bahu mo.

72 Gwonḵan jin cinu ki 'twam pini mo tani a'di 'boro'd gom aha/ mo,
mmobol 'dolkon gana/ ma alip e mo dhali 'ku'kus 'dolkon kush mo.

73 Me'd pini a'di ukki'da uk mo dhali /e ciki aha/ jamas mo.
Ciyi aha/ mo jin mishu gwo 'ban mo ki aha/ mina da/ar gwonḵan pini kun
'kwarkunu mo.

74 Uni gwansan kun ko/ki /e mo tani mini par aha/ e mo dhali 'kuny bwa mo
haali/ aha/ tana gi mo ma 'terj kape/ e gwom pini mo.

75 Aha/ misha, ayy Tapa, ki gwon dwall pini kun toru gwon dwall 'twa/a 'cesh
mo tani uni tana kar/e mo
dhali /e dorki aha/ ki isa nyor ki mii ma isinj ganam pini mo.

76 Dhalki mo/en pini jin telu sho'k mo thoson is mo mmomas aha/ mo
isi ki gwom pini jin ona /e is gom cḵḵinam pini mo.

77 Dhalki momiimiim pini pu'du'd e aha/ mo ki aha/ mina di ki e mo,
haali/ gwonḵan pini jin cinu mo tani a'di ta jim pem jin 'kunya/ bwa mo.

78 Dhalki uni kun ushina ga/ ga/ mo tani idhunu ki mo ma 'the is mo
haali/ uni ceshki aha/ ki gwo ma maḵ mo.

Gom aha/ mo tani aha/ mina kulum gwo ibwa gom gwonḵan gi 'twam pini
mo.

79 Dhalki uni gwansan kun ko/ /e mo tani tu'kkina bor ki aha/ mo,
ki uni mini mish gwonycim pini mo.

80 Dhalka dum pem a'di dar gi mii 'ba/ e gwonḵan pini kun bahu mo
ki aha/ minu 'koki kar ki mo ma 'the is mo.

81 Akashiram pem a'di gananki 'ba/ mo gom bway gi mowoth pini mo.
Aha/ tana ga 'terj kape/ gom gwom pini mo.

82 Em pem ushi me'd mo mmoḵor /e gom gwom pini jin ona /e is mo.
Aha/ doṭa gwo mo ki: Kakasja sa/ imina /e imalas aha/ mo?

83 Haali/ aha/ warkina ki kucar gi yimana mura'th jin 'koshkin ma ku'd mo,
hili aha/ dinaki ṇa gwonḵan pini kun bahu mo.

84 Ki mo gi wakatinta imina cḵḵinam pini i'dim 'kup mo?
Kakasja imina /e idwall uni gwansan gwo mo uni kun to'c aha/ bwa mo?

85 'Kwani kun ushkina ga/ ga/ mo tani uni cwanyki jisa 'kulga/ gom aha/ mo
jin miga/ biti cine/ mo,

'kwani kun 'konuki dosh shoka 'cesh gom gwonḵan pini jin cinu mo.
86 Aris gwonḵan pini kun 'kwarkunu mo tani uni shurkin mo.

Uni to'cki aha/ bwa ki gwo ma tor mo. Wothi/ aha/ mo ma.

⁸⁷ Uni 'dishi 'twa/ mo mmo'baar aha/ 'peni mony'cesh yan mo hili aha/ dinaki na gwoṅkan gi 'twam pini mo.

⁸⁸ E mo/en pini jin telu sho'k mo tani 'tashi mondiki/em pem 'twa/ mo ki aha/ mina dhu gwonycim pini gi 'twam pini mo.

⁸⁹ Gom ki sule/ sule/ mo tani, ayy Tapa, gwom pini a'di irwa'ckunu mo mmothosonkunu uni mo e momis mo.

⁹⁰ Mii ma isinj ganam pini i'dimki 'kup ki sule/ sule/ eya risa nyaḱum yil gi 'kwani mo.

/E telki mony'cesh sho'k mo dhali a'di doshki'd ki sho'k piti mo.

⁹¹ Ki miim pini kun dhukina /e uni 'pen ka pije/ mo tani uni doshkin shwane/ mo.

Haali/ aris to 'baar mo tani uni ta cṅkinam pini mo.

⁹² Wakki/ gwoṅkan pini jin cinu midi 'taki diki ta jim pem jin 'kunya/ bwa mo tani,

aha/ minu 'taki 'ce'd sho'k e tom pem jin tocaa/ bwa mo.

⁹³ Aha/ mina mol na gwoṅkan gi 'twam pini ki sule/ sule/ mo, haali/ ki uni mo tani /e ciki aha/ mondiki/e mo.

⁹⁴ Aha/ tana jim pini mo. Tayi aha/ is ki me'd mo haali/ aha/ naḱkina gwoṅkan gi 'twam pini mo.

⁹⁵ Imanmii tonthus ishkin mo dhali cora/ cor mmo'ce'd aha/ sho'k mo, hili aha/ hila isi gwonycim pini i e mo.

⁹⁶ Aha/ hilkina gwayu/ gom a'di jin ha me'd ki isi han gana/ 'baar mo, hili gwoṅkan pini jin 'kwarkunu mo tani a'di ibeeyabee kagahara mo.

⁹⁷ Ayy, gwoṅkan pini jin cinu mo tani enka/ kata mo sa/.

A'di ta gwom pem jin kulumka/ ibwa isa yempa/ mo.

⁹⁸ Gwoṅkan pini jin 'kwarkunu mo ikar aha/ mmoyuḱayuk kagahara mmobol 'kwani kun ta 'kup ki aha/ e mo,

haali/ a'di di'd nyaḱki aha/ isa yempa/ mo be.

⁹⁹ Aha/ misha gwo 'ban kagahara mmobola ris uni kun torki aha/ gwo e mo, haali/ gwonycim pini a'di ta jim pem jin kulumka/ ibwa mo.

¹⁰⁰ Aha/ mishkina gwo 'ban mo mmobol 'kwani kun cakin e mo, haali/ aha/ dhukina gwoṅkan gi 'twam pini mo.

¹⁰¹ Aha/ wotha sho'k pem 'ba/ mo 'pena ris bway thus mo, gom mii gi wakan mo tani mmodhu gwom pini mo be.

¹⁰² Aha/ dinaki tu'k mo 'peni gwoṅkan pini kun onu mo, haali/ /e torki aha/ gwo mo be.

¹⁰³ Gwom pini wana 'kuny kata si'da/ mmonyokka/ a'di mo.

A'di ca'bki dhel dhel mmobola dham e e 'twam pem mo.

¹⁰⁴ E gwoṅkan gi 'twam pini mo tani a'di ibu'thkika/ mo jin mishu gwo 'ban mo.

A'di ishi/kika/ aris bway thusi e wakan mo.

¹⁰⁵ Gwom pini a'di ta'da lamba/ gom sho'k pem mo dhali moṅkush gom bway tur pem mo.

¹⁰⁶ Aha/ thulkina gwo me'da po/ mo dhali o gwo is mo dhali rwa'c a'di mo mmomii gwoṅkan pini kun onu mo kun tana kar/e mo be.

¹⁰⁷ Aha/ wo'ckunu is she/ mo mmobur is ki wap wap mo. Ciyi aha/ mondiki/e mo, ayy Tapa, isi ki gwom pini mo.

¹⁰⁸ Budhi tom pem jin cika/ ki me'd ki moman mo, ayy Tapa, dhali tori aha/ gwo gom gwoṅkan pini kun onu mo.

- 109 Aha/ butha mondiki/em pem e me'd pem ki sule/ sule/ mo, hili aha/ dinaki ŋa gwoŋkan pini jin cinu mo.
- 110 'Kwani kun ta thus ki thus mo tani uni 'thikina gume/ gom aha/ mo. hili aha/ dinaki per mo 'peni gwoŋkan gi 'twam pini mo.
- 111 Gwoŋcim pini uni ta mal pem ki sule/ sule/ mo. Nye, uni ita mom'bor bwa goma dum pem mo.
- 112 Aha/ ka'dkina dum pem mo mmothim gwoŋkan pini kun bahu ki sule/ sule/ mo ntagi 'pemen gi mony'cesh mo.
- 113 Aha/ shi/kina 'kwani kun 'kona bwa ka susu/ i e mo, hili aha/ enkina gwoŋkan pini jin cinu mo.
- 114 /E ta mo jin bagka/ mo dhali agongorom pem mo. Aha/ takina ga 'teŋ kape/ e gwom pini mo.
- 115 Iiku/ mo 'peni aha/ mo um kun mii to kun ta thus ki thus mo, ki aha/ mina 'taki dhu gwoŋkan ma Arumgimis pem kun 'kwarkunu mo.
- 116 Budhi aha/ mo isi ki gwom pini jin ona /e is mo ki aha/ mina di ki e mo, dhali dhalku/ ki dhal aha/ bway mo ki aha/ minu kar ki mo ma 'the is mo gom mom pem jin taka/ ga 'teŋ kape/ mo.
- 117 'Deki aha/ ki mis mo ki aha/ mina 'taki di ki 'dantar mo dhali mii gwoŋkan pini kun bahu ki sule/ sule/ mo.
- 118 /E wakina ris uni kun perkin mo 'peni gwoŋkan pini kun bahu mo, nye, mo jin laŋa/ uniya laŋ e mo tani a'di di bwa 'te/ mo.
- 119 Aris imanmii tonthus gi mony'cesh mo tani /e ki denj uni e me'd wushulan to mo. Wakan aha/ ena gwonycim pini mo.
- 120 Bungwar is dee'd ki bir bir gom moŋko/ is jin ko/ka/ /e mo, dhali aha/ ko/kina is kagahara gom gwon dwall pini kun toru gwon dwall 'twa/a 'cesh mo.
- 121 Aha/ miikina a'di jin ta'da kar/e mo dhali jin 'boro'd mo. Dhali dhalku/ ki dhal aha/ bway mo jin mina uni gwansan kun siri'c aha/ apo/ ki sho'k mo 'koki siri'c aha/ apo/ ki sho'k mo.
- 122 Tayi ki bwa ma 'dantar gom cinkinam pini mo, gom mom'bor piti mo. Dhalku/ ki dhal 'kwani kun molina gayiin ga/ bway mo mmosiri'c aha/ apo/ ki sho'k mo.
- 123 Em pem ushki me'd mo mmotim bway mowoth pini mo, dhali gom gwom pini jin minu thim jin ona /e is ki o ma kar/e mo.
- 124 Tu/uli nyakki cinkinam pini mo isi ki gwo gi mo/en pini jin telu sho'k mo, dhali tori aha/ gwo gom gwoŋkan pini kun bahu mo.
- 125 Aha/ tana cinkinam pini mo. Ciyi aha/ mo jin mishu gwo 'ban mo ki aha/ mina 'taki mish gwonycim pini mo.
- 126 A'di ta'da tee gi Tapa jin mina a'di kal mii mo, haali/ gwoŋkan pini jin cinu mo tani a'di 'ce'dkunu bwa mo.
- 127 Wakan aha/ enkina gwoŋkan pini kun 'kwarkunu mo mmobol 'dolkon e mo, dhali 'dolkon gana/ jin tashu e ki o'd ki tash gana/ mo.
- 128 Wakan aha/ cu'thkina bway pem 'twa/ 'kup ka ris gwoŋkan gi 'twam pini mo, dhali aha/ shi/kina ris bway thusi e mo.
- 129 Gwoŋcim pini uni ita jaro/ ki jaro/ mo. Wakan akashiram pem idhuki uni mo be.
- 130 Gwom pini kun 'ceenu mo tani uni ciki moŋkush mo. A'di ciki mo jin mishu gwo 'ban ki 'kwani kun tekela/ tekell mo.

- 131 Ki 'twa/ jin ka'du/ mo tani aha/ miikina shir shir mo,
 haali/ aha/ 'koshkina te/ gom gwoŋkan pini kun 'kwarkunu mo.
- 132 Tuki/ e 'kupki aha/ mo dhali miyi mii ka 'the gom aha/ mo,
 me'd jin bo'a/ e ki miim pini 'kup ki uni gwansan kun enki gway pini mo be.
- 133 Dhuyi sho'k pem dhali ŋatgin pem mmodosh ki seele/ mo isi ki gwom pini
 jin ona /e is mo,
 dhali dhalku/ ki dhal toŋ kamu/ jin 'coka'coḵ bway mo mmota tapa apo/ aha/
 mo.
- 134 Wani aha/ 'ba/ mo 'peni mo jin sirica 'kwani aha/ apo/ ki sho'k mo,
 ki aha/ mina 'taki dhu gwoŋkan gi 'twam pini mo.
- 135 Kari bwam/em pini mmokush mo mo apo/ ciŋkinam pini mo,
 dhali tori aha/ gwo gom gwoŋkan pini kun bahu mo.
- 136 Em pem yuki jabu'th ki haw haw mo
 haali/ 'kwani 'koki dhu gwoŋkan pini jin cinu mo be.
- 137 Akar/e itana /e mo, ayy Tapa,
 dhali /e tana kar/e ki gwon dwall pini jin toru gwon dwall 'twa/a 'cesh mo.
- 138 /E dhuki gwonycim pini 'pen ka piye/ mo e mii ma kar/e mo
 dhali eya ris mii ma isiŋ ganam pini mo.
- 139 Anyor pem shwaki aha/ mo
 haali/ uni kun ta 'kup ki aha/ mo tani uni ŋaki gwom pini mo.
- 140 Gwom pini jin ona /e is mo tani a'di nyo/u ki nyo/ gana/ mo,
 dhali ciŋkinam pini enki a'di mo be.
- 141 Aha/ gwa'da ki gwa'd mo dhali wakḵunu mo,
 hili aha/ dinaki ŋa gwoŋkan gi 'twam pini mo.
- 142 Mii ma kar/em pini uni itana kar/e ki sule/ sule/ mo,
 dhali gwoŋkan pini jin cinu mo tani a'di ita jin gana/ mo.
- 143 Monto'c bwa dhali mo jin 'pe'du/ she/ mo uni pu'dkina po/ aha/ mo,
 hili gwoŋkan pini kun 'kwarkunu mo tani uni ita kum pem kun 'kunya/ bwa
 mo.
- 144 Gwonycim pini uni tana kar/e ki sule/ sule/ mo.
 Ciyi aha/ mo jin mishu gwo 'ban mo ki aha/ mina di ki e mo.
- 145 Ka dum pemi 'baar mo tani aha/ gwokina mo. Thoḵi aha/ 'twa/ mo ma,
 ayy Tapa mo.
 Aha/ mina dhu gwoŋkan pini kun bahu mo.
- 146 Aha/ gwona 'twa/ i /e mo. Tayi aha/ is ki me'd mo
 ki aha/ mina 'taki mii gwonycim pini mo.
- 147 Aha/ cukina mis mmosul mon'twash/e bway mo dhali ko gom mowoth
 mo.
 Aha/ tana gi mo ma 'teŋ kape/ e gwom pini mo.
- 148 Em pem di'd ki e ki wal wal mo mmotim mo gi mon'thiny ki mombwam/
 e mo
 ki aha/ mina 'taki kulum gwo ibwa gom gwom pini jin ona /e is mo.
- 149 Ciki 'twa/ pem mo e mo/en pini jin telu sho'k mo,
 ayy Tapa, e mii ma kar/em pini mo tani 'tashi mondiki/em pem 'twa/ mo.
- 150 Uni pamki mo ki is ki 'dish 'dish mo uni gun to'cki aha/ bwa mo ki to kun
 ta thus ki thus 'te/ ka kar 'kup mo.
 Uni si'dasi'd 'peni gwoŋkan pini jin cinu mo.
- 151 Hili /e a'di i'disha'dish mo, ayy Tapa,
 dhali aris gwoŋkan pini 'baar kun 'kwarkunu mo tani uni ta kuŋ gana/ mo
 be.
- 152 'Peni kadhamoonii mo tani aha/ mishkina gwonycim pini mo

ki /e ka'bki uni ki sule/ sule/ mo.

153 Hili monto'c bwam pem mo dhali 'cuk aha/ mo haali/ aha/ dinaki na gwonkan pini jin cinu mo.

154 Wothi/ gwo is gom tom pem jin rakaa/ mo dhali wani aha/ 'ba/ mo. Ciyi aha/ mondiki/e isi ki gwom pini jin ona /e is mo.

155 Bway gi mowoth a'di si'dasi'd 'peni a'di jin ta thus ki thus mo be haali/ uni 'koki simm gwonkan pini kun bahu e mo.

156 Dhan momiimiim pini a'di caaca mo, ayy Tapa.

Ciyi aha/ mondiki/e isi ki gwo gi mii ma kar/em pini mo.

157 'Kwani tana ris ka ris kun ta imanto'c aha/ bwa mo dhali ta imanta 'kup ki aha/ mo,

hili aha/ dinaki gu is mo 'peni gwonycim pini mo.

158 Aha/ hila mo ki hil apo/ uni kun dar gi gwo jin gamu is mo dhali o gwo wak mo,

haali/ uni 'koki dhu gwonkan pini jin kana /eya kan mo.

159 Hili isi gwo i e mo ma. Gwonkan gi 'twam pini si'da/ enka/ kata mo.

'Tashi mondiki/em pem 'twa/ mo isi ki gwo gi mo/en pini jin telu sho'k mo.

160 Gumm gwom pini a'di ita gwon gana/ mo

dhali aris gwonkan pini kun onu 'baar ka 'dete/ 'dete/ mo tani uni ita kuj kar/ e mo dhali uni 'dimki 'kup ki sule/ sule/ mo.

161 Iya/ ma malik uni to'cki aha/ bwa ka wuny is kan mo,

hili adum pem doshki'd ki monko/ is gom gwom pini mo.

162 Aha/ 'kunykina bwa e gwom pini mo

mmowa e ki jan 'de/ jin gamki dhan to jin caaca jin dilu mo.

163 Aha/ shina shi/ i e mo dhali 'te bwa ki gwon thus mo,

hili aha/ ena gwonkan pini jin cinu mo.

164 Me'di pesu/ ka tee mo tani aha/ mankina /e mo

goma kar/em pini jin tana /e gom gwonkan pini kun onu mo.

165 Dhan monku'th is jin caaca tana uni gwansan kun enki gwonkan pini jin cinu mo.

To piyi'd jin midi kol uni mo.

166 Aha/ tana gi mo ma 'ten kape/ gom bway gi mowoth pini mo, ayy Tapa,

dhali aha/ miina gwonkan pini kun 'kwarkunu mo.

167 Akashiram pem dhu gwonycim pini mo.

Aha/ ena uni ki en jin shi/ashi/ mo.

168 Aha/ dhuna gwonkan gi 'twam pini mo dhali gwonycim pini mo,

haali/ aris bway pemi 'baar mo tani uni 'koni bwambori /e mo be.

169 Dhalki gwom pem pu'dki'di bwambori /e mo, ayy Tapa.

Ciyi aha/ mo jin mishu gwo 'ban isi ki gwom pini mo.

170 Dhalki tom pem jin 'thoka/ ka di'b is pu'dki'di bwambori /e mo.

'Cuki aha/ mo isi ki gwom pini mo.

171 'Twa/ pem midi wol mo jin manjwa man mo

ki /e torke aha/ gwonkan pini kun baha /e mo.

172 Ale'd pem midi yuk gway gom gwom pini mo

haali/ aris gwonkan pini 'baar kun 'kwarkunu mo tani uni ta kuj gana/ mo.

173 Dhalki me'd pini thoson is mo mmowoth aha/ mo

haali/ aha/ kwanykina gwonkan gi 'twam pini mo.

174 Aha/ 'koshkina te/ gom bway gi mowoth pini mo, ayy Tapa,

dhali gwonkan pini jin cinu mo tani a'di ta jim pem jin 'kunya/ bwa mo.

175 Dhalki aha/ dina ki e mo ki aha/ mina man /e mo

dhali dhalki gwoŋkan pini kun onu woth aha/ mo.

¹⁷⁶ Aha/ yakina per mo me'd ka'bal jin thiski e mo. Simmi cin'kinam pini e mo, haali/ aha/ dinaki ŋa gwoŋkan pini kun 'kwarkunu mo.

120

Gway jin yuku mmo/ii ka gagamis mo.

¹ E mo ma cis mo tani aha/ gwokina 'twa/i Tapa mo, ki a'di midi 'taki thok aha/ 'twa/ mo.

² 'Cuki aha/ mo, ayy Tapa, 'peni 'twa/ pem jin ta'da tor mo, dhali 'pena le'd pem jin he'kki'da he'k e mo.

³ Ata a'di iminu ci /e mo? Dhali tonta a'di iminu mii gom /e mo, /e jin tana le'd jin he'kki'da he'k e mo?

⁴ Athopa/ jin kaaka jin kala wathi/ ma mee nyakka 'cila'th o'd jin shwa'd ki bar bar mo 'peni cwa jin wana e ka shilgwal-ish mo.

⁵ Wayyi e aha/ ki aha/ yakina yanya/ e Pam Maashik mo, ki aha/ ca'bkina e bwaman gu'b burrinye/ ma Gidar mo.

⁶ Ki rash rash mo tani aha/ ca'bkina e bwaman uni gwansan kun shi/ki moŋku'th isi e mo.

⁷ Aha/ tana gom moŋku'th is mo, hili ki aha/ okina gwo mo tani uni ŋapkina nyor mo.

121

Gway jin yuku mmo/ii ka gagamis mo.

¹ Aha/ 'deka em pem 'kup ki wosh kun turatur mo. 'Peni mana imina woth pem ipu'du/ mo?

² Mowoth pem pu'dki'd 'peni Tapa mo, a'di jin ukki momis dhali mony'cesh mo.

³ A'di midi diki dhal sho'k pini bway ki a'di minu joç mo, a'di yan jin kar /e mo tani mina e diki 'ce'd mo.

⁴ Hili mo mo ma, a'di jin dhu 'Kwani ma Israyiil mo tani a'di mina e diki 'ce'd mo walla midi diki ish e mo.

⁵ Tapa a'di ita'da mankar /e mo. Tapa a'di ita'da la goma bim poros pini mo.

⁶ Atente/ midi diki 'kosh /e montee mo walla appe midi diki 'kosh /e mon'thiny mo.

⁷ Tapa midi kar /e 'pena ris tonthusi 'baar mo. A'di midi kar mondiki/em pini mo.

⁸ Tapa a'di imidi kara kar mo gom yam pini jin mina /e ya ka pije/ mo dhali kul pini jin mina /e kulu/ ka nyan'ko'd mo, 'pena tee yansan mo dhali ki sule/ sule/ ya ye 'ba/ mo.

122

Gway ma Dawuu'd jin ta gway jin yuku mmo/ii ka gagamis mo.

¹ Aha/ 'bora bwa ki 'bor mo mmo/ona uni aha/ gwo mo ki: Dhalki ana iina gu'b gi Tapa mo.

² Sho'k bam uni doshkin mo

e bwaman ma goṛ pini mo, ayy Urushaliim.

³Urushaliim, a'di nyanḵunu mo mmota 'penḵuman bampa/ mo a'di jin shokunu ki me'di montal 'de/ mo,

⁴e mo jin iikin ma waḵ gi 'kwani 'kup ki mis mo, uni kun tana waḵ gi 'kwani gi Tapa mo,

me'd gi gwoṛḵan jin 'kawurkunu mo goma Israyiil mo mmoçi mo jin 'boruwa 'bor bwa i is ki gway gi Tapa mo.

⁵Aḵursi ma malik gom gwon dwall jin toru gwo 'twa/a 'cesh mo tani uni dhukunu imun mo, aḵursi ma malik gom gu'b ma Dawuu'd mo.

⁶Thoyi gom moṛḵu'th is gi Pa Urushaliim mo.

Dhalki uni rusa/ rus mo, uni kun enki /e mo.

⁷Dhalki mo ma ku'th is di'd eya goṛ ma gangaram pini mo dhali mo ma 'dantar e bwaman mom pini kun tura e ki tur mo.

⁸Gom gway gi iwak pem mo dhali uni kun nyak ii ki aha/ mo tani aha/ mina o gwo mo ki: Moṛḵu'th is midi di e bwam um mo.

⁹Gom gway gi gu'b gi Tapa Arungimis bana mo, aha/ mina simm tom 'boro'd pini e mo.

123

Gway jin yuku mmo/ii ka gagamis mo.

¹E /e mo tani aha/ 'deka em pem 'kup ki mis mo, ayy /e jin dikin eya ḵursi ma malik e momis mo.

²Hili mo mo ma, me'd jin hila e gi ciṛkina/ me'd gi tapam buni mo, dhali me'd jin hila e gi nyara/ me'd ma yim jin karu mmohil ciṛkina/ nyara/ mo tani

wakan em bana si'da/ hil 'kup ki Tapa Arungimis bana mo, ntagi a'di midi miimii apo/ ana mo.

³Miiyi mii apo/ aman mo ma, ayy Tapa, miiyi mii apo/ aman mo haali/ aman tana ga dhana waḵ jin uri 'kup mo ba/.

⁴Ki rash rash mo tani aḵashiram bam 'tu'dkunu mo ki mo jin ṭhunyū aman 'twa/ i is mo ki uni gwansan kun 'ko ki 'ko 'penkapan mo,

ka waḵ buni uni gun dhu is buni ki ca mo.

124

Gway ma Dawuu'd jin ta gway jin yuku mmo/ii ka gagamis mo.

¹Waḵki/ a'di midi diki 'taki ta Tapa jin di'di 'ko'd gwar bana mo tani, dhalka Israyiil o gwo mo shwane/ -

²waḵki/ a'di midi diki 'taki ta Tapa jin di'di 'ko'd gwar bana mo shwane/ ki 'kwani 'kon mmocu mis apo/ ana mo,

³dhali yan'ko'd uni mini 'taki los ana ki 'kolo'c ki e mo, ka nyor buni jin 'thakina uni apo/ ana mo.

⁴Dhali yan'ko'd agannu/ yi'de/ midi 'taki dhi'th ana sho'k ka pupush mo, dhali yi'de/ jin mishi'da ṛwaça/ midi 'taki kum ana 'twa/a 'cesh mo,

⁵dhali yan'ko'da po/ ana mo tani yi'de/ jin wuluski eṛ ḵuthar mo.

⁶Mom'bor mii gom Tapa mo, a'di jin diki ci ana

ki shem buni mmo'kwar mo.

⁷ Ana yekina me'd 'dii

'pena gume/ ma mancesh to jin cesha a'di to mo,

dhala gume/ 'ce'dki bwa mo

dhali ana yekina mo.

⁸ Mowoth bana a'di diki'd e gway gi Tapa mo,

a'di jin ukki momis dhali mony'cesh mo.

125

Gway jin yuku mmo/ii ka gagamis mo.

¹ Uni gwansan kun gami gwo is e Tapa mo tani uni wana e ki 'Kuwosh ma
Sihyuun mo,

a'di jin molu joç mo, hili a'di ça'bki'd ki sule/ sule/ ya ye 'ba/ mo.

² Me'da ris wosha turga/ kun 'kamki Pa Urushaliim is mo,

wakan si'da/ Tapa midi 'kam 'kwanim piti is mo,

'pena tee yansan gana/ mo dhali ki sule/ sule/ mo.

³ Dhali cwa ma malik gom uni kun ta thus ki thus mo tani midi diki di mo

apo/ mony'cesh jin karu gom 'kwani kun tana kar/e mo,

isi ciki/ uni gun dhunu ka kar/e mini dhu me'd buni mmotham to mii mo.

⁴ Miiyi ki 'bore/ mo, ayy Tapa, gom uni gwansan kun 'bora'bor mo,

dhali gom uni gwansan kun dhelel ma dum buni ki dhelel mo.

⁵ Hili uni gwansan kun tu'kkin mo e bway buni kun wanycara/ wanycar mo
tani

Tapa midi shu uni bway nyakki uni gun mii to kun ta thus ki thus mo.

Monku'th is midi di goma Israyiil mo.

126

Gway jin yuku mmo/ii ka gagamis mo.

¹ Ki Tapa warki'da shamanettan ma Sihyuun is mo tani

ana wana e ki uni gwansan kun shu'bki jan mo.

² Yan'ko'd 'twam bana 'tu'dkunu ki piny piny ki mompe'th mo,

dhali ale'd bana a'di kumki cuuwa/ gom monj'kuny bwa mo.

Dhali yan'ko'd uni oki gwo e bwaman kal gi 'kwanin tiya mo ki:

Tapa miiki dhan to jin caaca gom uni mo be.

³ Tapa miiki dhan to jin caaca gom ana mo be.

Ana 'borkina bwa mo.

⁴ Wara shamanettan bam is mo ma, ayy Tapa,

mmowa e ki botan yi'de/ e mo ma Januub mo.

⁵ Dhalki uni gwansan kun si to ki kony jabu'th mo tani

dhalki uni 'cith to ki cuuwa/ jin kumu/ ki bwanj 'kunyka/ mo.

⁶ A'diyin jin yaki gwolu/

mmokal emen to mmosi mo tani

midi kulu/ bway pa ki cuuwa/ jin 'thera a'di ki bwanj 'kunyka/ mo,

mmokali cwalman maman to jin sina a'di mo.

127

Gway jin yuku mmo/ii ka gagamis mo. Gway ma Sulemaan.

¹ Isi ciki/ wakki/ Tapa midi nyan gu'b yan mo tani uni gwansan kun nyan a'di
mo tani uni miikina tu'c ki pe'th mo.

Isi ciki/ wakki/ Tapa ki tima po/ penkuman bampa/ mo tani

amantim mo mo tani diki'd ki e ki pe'th mo.

² A'di ta miim pe'th be ki /e mini cu mis ki jahanne/ mon'thamo/ mo, dhali ca'b mmota adiite/ mmosi/is mo, dhali mmoshwa tonte/ mo 'peni mii jin miinu a'di ki mo/anan is mo, haali/ a'di ciki unim piti kun ena a'di mo tani mo/ish e mo.

³ Hili mo mo ma, iya/ gi 'kwani uni ta mal 'peni Tapa mo, maman 'peni bwa ma dho'th mo tani a'di i/ishki kumma/ mo.

⁴ Me'da thopa/ e me'd ma man/as mo tani a'di wana e ki iya/ gi uni gun ta dhuru'c ki dhuru'c mo.

⁵ Mom'bor mii gom wathi/ jin 'tu'dki'da kulpem piti ki uni mo. A'di minu 'koki kar ki mo ma 'the is mo

ki a'di mididi tora tor ka ris 'kwaninj 'kup piti mo e 'twan'kala goŋ mo.

128

Gway jin yuku mmo/ii ka gagamis mo.

¹ Mom'bor mii goma ris uni 'baar ka 'dete/ 'dete/ kun ko/ki Tapa mo, a'di jin yaki'd e bway piti mo.

² /E mini shwa maman cwa ma tu'c ki me'd pini mo, dhali /e mina bwa 'bor mo, dhali a'di mididi ha me'd gom /e mo.

³ Ashim pini a'di mina e waki cwa jin dho'th maman mo e bwan' gu'b pini mo.

Ucim pini uni mina e waki cwa setuun kun 'kan ki bithi/ bithi/ mmo'kama tharabeesam pini is mo.

⁴ Hili mo mo ma, wakan wathi/ minu 'bor mii mo, a'di jin ko/ki Tapa mo.

⁵ Tapa 'borki /e mii mo 'pena Sihyuun mo.

Dhalki /e pari mo jin mididi rusa/ rus e gom Pa Urushaliim mo ka risa tee gi mondiki/em pini 'baar mo.

⁶ Dhalki /e hili uci gi ucim pini mo.

Mon'ku'th is mididi apowa Israyiil mo.

129

Gway jin yuku mmo/ii ka gagamis mo.

¹ Ka daran dun' gana/ mo tani uni wo'cki aha/ is she/ mo 'peni dhuru'c pem jin taka/ mo,

dhalka Israyiil o gwo wakan shwane/ mo -

² Ka daran dun' gana/ mo tani uni wo'cki aha/ is she/ mo 'peni dhuru'c pem jin taka/ mo,

hili uni 'koki pi gwo jipi/ apo/ aha/ mo.

³ Imangora 'cesh uni gorkina 'cesha powa pom pem mo.

Dhali uni dherki gwan'thim buni ki tur tur mo.

⁴ Tapa a'di ta'da kar/e mo.

A'di 'cithki'da shi/ gi 'kwani kun ta thus ki thus bwa mo.

⁵ Dhalki uni gwansan kun shi/kina Sihyuuni e mo tani dhunu ki mo ma 'the is mo dhali dhuwa bor ki tar mo.

⁶ Dhalki uni wana e ka shon' 'kungu'b mo

kun ku'thkin mo itwa/a/ ki uni 'koki ca mo,

⁷ a'di jin din ma man'cith to ki 'tu'd me'd piti mo,

walla aman'de'k cwalman maman to ki kala bor piti mo,

8 ki 'kwani gwansan kun iin mo mmope a'di mo tani 'koki o gwo mo ki:
 Mom'bor mii gi Tapa midi di apo/ /e mo.
 Aman 'bora /e mii ki gway gi Tapa mo.

130

Gway jin yuku mmo/ti ka gagamis mo.

1 'Peni mo jin 'kula'kul mo tani aha/ gwokina 'twa/ e /e mo, ayy Tapa.

2 Tapa, ciki 'twa/ pem mo ma.
 Dhalki 'cem pini ci'da hirdhe/ mo
 ki 'twa/ pem jin 'thoka/ to ka di'b me'di is mo.

3 Ayy Tapa, wakki/ /e mini 'taki nyitha ris mony'coḱka/ mo tani
 Tapa, kaja a'di imidi dosh mo?

4 Hili mo jin gwamkina /eya gwam mo tani di'd e /e mo,
 ki /e a'di minu 'taki ko/ moyi.

5 Aha/ cōrkina Tapa mo, aḱashiram pem cōrki'da cōr mo
 dhali e gwom pini mo tani aha/ tana ga 'teḱ kape/ mo.

6 Aḱashiram pem cōrki Tapa mo
 mmobola ris 'kwani kun thimki mon'thamo/ e mo,
 mmobola ris 'kwani kun thimki mon'thamo/ e mo.

7 Ayy Israyiil, tayi gi mo ma 'teḱ kape/ e Tapa mo.
 Haali/ gom Tapa mo tani mo/en jin telu sho'k diki'd mo
 dhali e a'di mo tani mo ma entus jin wanuwa wan 'ba/ ishki'd mo.

8 Dhali a'di midi wana Israyiil 'ba/ mo
 'pena ris miim piti kun 'coḱa'coḱ mo.

131

Gway jin yuku mmo/ti ka gagamis mo. Gway ma Dawuu'd.

1 Ayy Tapa, adum pem 'konuki 'de'k ki mis mo dhali em pem 'konuki 'de'k
 'kup ki mo jin ka'dama/ ka'dam gara/ be.

Buḱgwar is pem diki jar e ki dhan to kun caaca gara/ mo
 dhali ki to kun ta to mer gom aha/ gara/ mo.

2 Hili aha/ ca'bkina ki dwam mo dhali kara ḱashiram pem ki shwamm mo,
 me'da 'ci jin karkina kum ki shwamm mmoḱiya ko eya bor piti mo.

Me'da 'ci jin karkunu ki shwamm mo tani aha/ kara ḱashiram pem ki
 shwamm mo be.

3 Ayy Israyiil, tayi gi mo ma 'teḱ kape/ e Tapa mo
 'peni mo yansan shwane/ mo dhali ki sule/ sule/ mo.

132

Gway jin yuku mmo/ti ka gagamis mo.

1 Kayi gwo e mo ma, ayy Tapa, goma 'the goma Dawuu'd mo,
 aris to 'baar mo kun 'batha'ba'th kun 'dimkina a'di 'kup mo,

2 ba a'di thulki gwo me'da po/ e Tapa mo
 dhali o gwo is ki A'di ma Dem Dem ma Yakuub mo, mmo/o gwo mo ki:

3 Aha/ mina mol ciḱ gu'b pem mo,
 walla ish eya powa cim pem mo,

4 dhali aha/ mina diki ci is pem ki e mmo/ish mo,
 walla dhal mon'ko'd em pem bway mmo'ce'd e mo,

5 ntagi aha/ mina gam mo gom Tapa mo,
 mo jin mina A'di ma Dem Dem ma Yakuub iḱa'b mo.

- 6 Hili mo mo ma, aman cikkina gwo mo 'pena Apraatah, dhali aman gamkina a'di mo e bwam bunto ma Waar mo.
- 7 Dhalki ana iina mo e mom piti jin ca'ba a'di mo. Dhalki ana luja a'di e cwam piti jin dhuna a'di sho'k mo.
- 8 Cuyi mis mo ma, ayy Tapa, dhali yayi mo e mom pini jin mina /e ishi/ is mo, /e dhali Sanduuk gi mo ma dem dem pini mo.
- 9 Dhalki igasiis pini uni shumkunu ki mo ma kar/e mo, dhali dhalki unim pini kun dhunu ki she/ ki dhelel dhelel kum cuuwa/ gom bwanj 'kunya/ mo.
- 10 Gom gway ma Dawuu'd jin ta cinjinam pini mo tani dhalku/ ki tu'k bwam/em pini 'peni a'dim pini jin 'koshkina /e ki monyca mo.
- 11 Tapa a'di thulki'da Dawuu'd gwo me'da po/ ki isi onj gana/ mo, 'peni gwo jin mina a'di diki dok ka nyan'ko'd mo, mmo/o gwo mo ki: Jan tal 'de/ 'peni iya/m pini gi bungwar is pini mo tani a'di miga/ kara po/ kursi ma malik pini mo.
- 12 Wakki/ iya/m pini mini dhu gwom pem jin gamu me'd mo dhali gwonycim pem kun miga/ tor uni mo tani iya/m buni si'da/ ki sule/ sule/ mo mini 'kowa po/ kursi ma malik pini mo.
- 13 Haali/ Tapa a'di kwanyki'da Sihyuun mo. Dhali a'di ona bwa ki a'di ki o jin shiyi'd mo gom mom piti mo be.
- 14 Mo yansan a'di ta mom pem jin miga/ si/ is ki sule/ sule/ mo. Mmahan imiga/ ca'b mo haali/ aha/ ona bwa ki a'di mo be.
- 15 Dhali aha/ mina 'bor mo ma yim mii ka enthus gom to kun minu ci a'di mo. Aha/ mina kap 'kwani ma ha'th'ko'd ma yima du ki tonje/ mo.
- 16 Igasiis ma yim mo tani aha/ mina hi'th uni ki bway mowoth mo dhali uni ma yim kun dhunu ki she/ ki dhelel dhelel mo tani mini kum cuuwa/ ki moj'kuny bwa mo.
- 17 Imun mo tani aha/ mina dhal ce ma Dawuu'd mmo'ka ale/ gom a'di mo. Aha/ thosonkina lamba/ gom a'dim pem jin 'koshka/ ki monyca mo.
- 18 Kwanij 'kup piti mo tani aha/ mina shum uni ki mo ma 'the is mo hili apo/ is piti mo tani tonj'kup piti a'di mididhel mo ki ra/ ra/ mo.

133

Gway jin yuku mmo/ii ka gagamis mo.

- 1 Hili mo mo ma, wa'di 'bora dhali bwanj 'kunyud wakata sa/ ki 'kwani kun ta ikam mmonyak 'ko ki isa tal 'de/ mo.
- 2 A'di wana e ka yin jin ta yinthonj gana/ jin wolu i'kup mo, mmogus ka 'cesh mmothul ka halan'twa/ mo, apowa halan'twa/ ma Haruun mo, dhali mmogus ka 'cesh mmothul ka yupen 'twaman burrinyem pom piti mo.
- 3 Dhali a'di wana e ki jape/ gi Pan Harmuun mo, a'di jin ta'kki'da po/ 'Kuwocha turga/ ma Sihyuun mo. Haali/ Tapa kanki mo jin 'boru mii e mattaan mo, gom mondiki/e ki sule/ sule/ ya ye 'ba/ mo.

134

Gway jin yuku mmo/ii ka gagamis mo.

- 1 Iiyu/ mo, 'bori Tapa mii mo, aris um 'baar mo kun ta cinjina/ gi Tapa mo,

um kun doshkin mon'thiny e gu'b gi Tapa mo.
 2 'Deki me'd bum 'kup ki mis ki mo jin kogu mo,
 dhali 'bori Tapa mii mo.
 3 Dhalki Tapa 'bor um mii 'pena Sihyuun mo,
 a'di jin ukki momis dhali mony'cesh mo.

135

- 1 Manj Tapa mo.
 Manj gway gi Tapa mo,
 ciyi momanj mo, ayy um cinjina/ gi Tapa mo,
 2 um kun doshkin e gu'b gi Tapa mo,
 dhali e gu'b ma pije/ jin di 'kup kany ma Arumgimis bana mo.
 3 Manj Tapa mo, haali/ Tapa a'di i'bora'bor mo.
 Yuki gway gom gway piti mo, haali/ a'di ita'da manmii mii ga 'the mo.
 4 Haali/ Tapa kwanyki'da Yakuub gom is piti mo,
 Israyiil ita jim pitin gana/ jin cila a'di mo.
 5 Haali/ aha/ misha Tapa ki a'di caaca mo
 dhali Tapam bana a'di di'da powa risa rumi 'baar mo.
 6 Aris to gunn kun 'bori Tapa bwa mo tani uni miina a'di mo,
 e momis mo dhali e mony'cesh mo,
 dhali eya ris kumma/ yi'de/ mo dhali aris mon'kulga/ mo.
 7 A'di jin dhuki'da rak mmocu mo e mo jin dina mony'cesh 'kup mo,
 a'di jin ukki'da wara sho'k goma sho'k mo
 dhali a'di jin kalki 'tham 'peni mongu'b piti jin dhuna a'di uni mo.
 8 A'di ta a'di jin 'koshki'da bwanyara/ gi 'Kwani gi Pam Masir mo,
 kun tana bwanyara/ gi 'kwaniny'cesh dhali to/e mo,
 9 a'di jin diki'di bwaman /e mo, ayy Masir,
 jin hashki jamas mii mo dhali momer mo
 apowa Pirawn dhali aris cinjinam piti mo,
 10 a'di jin 'koshki'da ris kal gi 'kwaniny'cesh mo,
 dhali 'kosh imalik kun ca'bki dem dem mo,
 11 Siihuun jin ta'da malik gi 'Kwani Amuur
 dhala Uuj jin ta'da malik gi Pam Bashan mo,
 dhala ris 'perjkuman bampa/ gi Par Kanaan mo,
 12 dhali ci mony'cesh buni mmota mal,
 mmota mal gi 'kwanim piti kun ta ku ma Israyiil mo.
 13 Gway pini, ayy Tapa i'dimki 'kup ki sule/ sule/ mo,
 /e mishu manj mo, ayy Tapa, ka ris 'kwani ma nyaqum yil mo.
 14 Haali/ Tapa a'di midi ye 'kwanim piti mo
 dhali hila hil ki e ma 'thime/ ki mo/en apo/ cinjinam piti mo.
 15 Tompinycon kun luja kal gi 'kwanin tiya mo tani ta 'dolkon kush mo dhali
 'dolkon gana/ mo,
 uni kun ta mii ki me'd gi 'kwani mo.
 16 Uni ta gi 'twa/ mo tani hili uni mol gwo o mo,
 uni ta gi e mo tani hili uni mol to par e mo,
 17 uni ta gi 'ce mo tani hili uni mol to cik mo,
 walla shi/ina kamu/ di'd e 'twam buniya?
 18 Uni wana e ki uni gwansan kun ukki uni mo -
 nye, aris uni gwansan kun gamki gwo is e uni mo.
 19 Ayy gu'b ma Israyiil, 'bori Tapa mii mo ma.

Ayy gu'b ma Haruun, 'bori Tapa mii mo ma.

²⁰ Ayy, gu'b ma Lawi, 'bori Tapa mii mo ma.

Um kun ko/ki Tapa mo tani 'bori Tapa mii mo ma.

²¹ Mom'bor mii midi di gom Tapa 'pena Sihyuun mo, a'di jin ca'bki'd e Pa Urushaliim mo.

Manj Tapa mo.

136

¹ Ayy ciyi mo jin 'boruwa 'bor bwa i is ki Tapa mo, haali/ a'di 'bora'bor mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

² Ayy ciyi mo jin 'boruwa 'bor bwa i is ka Arumgimis jin bolki'da risa rum e mo,

haali/ mo/en piti jin telu sho'k mo tani a'di 'dimki 'kup ki sule/ sule/ mo.

³ Ayy ciyi mo jin 'boruwa 'bor bwa i is gom Tapa jin bolki'da ris tapa e mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

⁴ E a'di, a'din 'deñ gana/ mo jin miiki dhan momer kun caaca mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

⁵ E a'di jin ukki momis ki gwo jin mishu 'ban mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

⁶ E a'di jin peperki mony'cesh apo/ yi'de/ mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

⁷ E a'di jin ukki dhan monkush kun caaca mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

⁸ Atente/ mmoji apo/ montee mo, haali/ mo/en piti jin telu sho'k mo tani a'di 'dimki 'kup ki sule/ sule/ mo,

⁹ Appe dhala risa cul mmojiya po/ mon'thiny mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

¹⁰ E a'di jin 'koshki'da bwanyara/ gi 'Kwani Masir mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

¹¹ Dhali suski'da Israyiil ka piye/ 'peni bwaman uni mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

¹² Ki me'da bim 'bi'thgam piti mo dhali ki me'd piti jin he'thkina a'di mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

¹³ E a'di jin kwa/ki dhan Kumma/ Yi'de/ jin ta gi 'Per bwa ki buuw mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

¹⁴ Dhali a'di ki dhala Israyiil bway mo mmoya bwaman a'di mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

¹⁵ Hili a'di ki kuma Pirawn 'twa/a 'cesh e bwam Kumma/ Yi'de/ jin ta gi 'Per mo,

haali/ mo/en piti jin telu sho'k mo tani a'di 'dimki 'kup ki sule/ sule/ mo.

¹⁶ E a'di jin suski 'kwanim piti ka piye/ e mombwaasho mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

¹⁷ E a'di jin 'koshki dhan imalik mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

¹⁸ Dhali a'di jin 'koshki imalik kun gwonu 'kus mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

¹⁹ Siihuun jin ta'da malik gi 'Kwani Amuur mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

²⁰ Dhali Malik Uuj gi Pam Bashan mo, haali/ mo/en piti jin telu sho'k mo tani a'di 'dimki 'kup ki sule/ sule/ mo.

²¹ Dhali a'di ki ci mony'cesh buni mmota mal mo,

haali/ mo/en piti jin telu sho'k mo tani a'di 'dimki 'kup ki sule/ sule/ mo.

²² Mmota mal goma Israyiil jin ta c̣in̄kinam piti mo,

haali/ mo/en piti jin telu sho'k mo tani a'di 'dimki 'kup ki sule/ sule/ mo.

²³ A'diyi ita a'di jin kayi ana e mo e mom bana jin 'koyina ana e mo jin hatha
'ko 'ko'd ki ha'th mo,

haali/ mo/en piti jin telu sho'k mo tani a'di 'dimki 'kup ki sule/ sule/ mo.

²⁴ Dhali 'cwam ana mo 'peni 'kwaniñ 'kup bana mo,

haali/ mo/en piti jin telu sho'k mo tani a'di 'dimki 'kup ki sule/ sule/ mo.

²⁵ A'di jin c̣iki tonte/ goma ris bungwar isi 'baar mo,

haali/ mo/en piti jin telu sho'k mo tani a'di 'dimki 'kup ki sule/ sule/ mo.

²⁶ Ayy c̣iyi mo jin 'boruwa 'bor bwa i is ka Arungimis gi momis mo,

haali/ mo/en piti jin telu sho'k mo tani a'di 'dimki 'kup ki sule/ sule/ mo.

137

¹ E yana gap gi yi'den̄ kumma/ gi Pam Baabil mo tani ana 'kokina a'cesh mo
dhali ko mo

ki ana kakina Sihyuun e mo.

² E cwa jin wana e ka gwapindhop mo tani

ana shirkina adhen̄dhen̄yem bana kun 'kon ma shu/i pesu/ mo.

³ Haali/ uni kun bu'thki ana mo tani

'thēkki gwo mo ki ana mina yuk̄ gway bana mo,

dhali uni gun 'koshki ana is ka nyor kagahara mo, uni 'thēkki gwo mo ki ana
mina isi ca'b ki cur cur mo, mmo/o gwo mo ki:

Yuk̄i aman gwaya kamu/ 'de/ 'peni gway ma Sihyuun mo.

⁴ A/ana mina yuk̄ gway gi Tapa kata mo e bampa/
gi 'kwaniñ tiya mo?

⁵ Wak̄ki/ aha/ ṅana /e mo tani ayy Urushaliim,

dhalki me'da bim poros pem ku'thki'd mo.

⁶ Dhalka le'd pem 'dapa'di bwan̄ka'dki/ gi 'twam pem mo

wak̄ki/ aha/ dinaki ka /e e mo,

wak̄ki/ aha/ dinaki kar Pa Urushaliim

apo/ mom pem jin eka/ eḱ jin 'kunyka/ bwa mo.

⁷ Kayi gwo e mo, ayy Tapa, apo/ 'Kwani Aduum

goma tee gi Pa Urushaliim mo,

me'd jin ona uni gwo mo ki: Ka 'cesh gana/. Ka 'cesh gana/.

Ntagi mon̄ka'b piti mo.

⁸ Ayy 'bwa/ gi 'Kwani gi Pam Baabil, /e jin 'ce'd mo sho'k ki tash tash mo.

Mom'bor bwayi gom a'di jin midi rak /e to ibway mo

gom to jin miikina /e gom aman mo.

⁹ Mom'bor bwa gom a'di jin bu'thki ushi uḱim pini mo

dhali wa uni 'ko'di wosh mo.

138

Gway ma Dawuu'd.

¹ Aha/ c̣ina /e mo jin 'boruwa 'bor bwa i is mo, ayy Tapa, ka dum pemi 'baar
mo.

Ibwambora risa rum pinycon mo tani aha/ yuk̄kina gway mmoman̄ /e mo.

² Aha/ ca'b̄kina ka jin 'kupa'dupun mmolun̄ 'kupki gu'b gi mondheleladhelel
pini mo

dhali c̣i mo jin 'boruwa 'bor bwa i is ki gway pini mo

gom mo/en pini jin telu sho'k mo dhali mii ma isin ganam pini mo
 haali/ /e a'di i/ekkin ki ek apowa ris to 'baar mo
 ki gway pini mo dhali ki gwom pini mo.

³ Ka tee jin yukka/ /e mo tani /e thokki aha/ 'twa/ mo,
 dhali mom'bi'th is ma kashiram pem mo tani markina /e is mo.

⁴ Aris imalik gi mony'cesh mo tani uni mini man /e mo, ayy Tapa,
 haali/ uni cikki gwo gi 'twam pini mo.

⁵ Dhali uni mini yuk gway ki bway gi Tapa mo,
 haali/ monyca gi Tapa a'di icaaca mo.

⁶ Ba haali/ Tapa a'di i/eka/ ek mo tani a'di ki ciya hirdhe/ ki uni kun hatha 'ko
 'ko'd ki ha'th mo,

hili uni kun 'thek 'ba/ imis mo tani mishkina a'di 'pena dhana/ mo.

⁷ Ba aha/ yana e bwaman mo jin toju bwa mo tani

/e 'tashki aha/ mondiki/em pem 'twa/ mo.

/E ki he'th me'd pini apowa nyor gi 'kwani kun ta 'kup ki aha/ mo,
 dhali me'da bim poros pini mo tani /e 'cukki aha/ mo.

⁸ Tapa a'di midi thim bwam piti yin jin 'boro'd gom aha/ mo.

Mo/en pini jin telu sho'k mo tani, ayy Tapa, a'di 'dimki 'kup ki sule/ sule/ mo.
 Dhalku/ ki dhal miin to ki me'd pini 'pen mo.

139

Eya manyuk gway mo. Gway ma Dawuu'd.

¹ Ayy Tapa, /e napa/ aha/ ki bur bur mo dhali mish aha/ mo.

² /E mishkina mish mo ki aha/ ca'bkina 'cesh mo dhali ki aha/ cuna mis mo.
 /E nyithki gwom pem kun kulumka/ ibwa 'pena dhana/ mo.

³ /E napa/ bway pem ki bur bur mo jin yaka/ ka pije/ mo dhali mom pem jin
 ishka/ 'ko'da 'cesh mo,

dhali miim pem mishkina /e 'baar mo.

⁴ Isi kan si'dayi /e mishki gwo kun 'koni 'twam pemi twa/a/ mo,

hili mo mo ma, ayy Tapa, /e mishki uni 'baar mo imontal 'de/ mo.

⁵ /E tu'bki aha/ ibwampo/ mo dhali ibwambor mo,

dhali /e kari me'd pini apo/ aha/ mo.

⁶ Dhan mo jin mishu gwo 'ban a'di ita jaro/ gom aha/ mo.

A'di ka'dama/ ka'dam mo. Aha/ mola a'di gamm mo.

⁷ Ki mana imiga/ ya 'peni /e ki dar gi Shi/in pini mo?

Walla ki mana imiga/ gus 'peni /e ki dar gi bun'kus pini mo?

⁸ Wakki/ aha/ shinkunu bway momis mo tani /e dikin imun mo.

Wakki/ aha/ mina ta ga ci e mo jin 'kona 'kwani kun wun mo tani /e dikin
 imun mo.

⁹ Wakki/ aha/ mina bu'th ya ma bi ma tente/ mon'thamo/ mo

dhali e mo gi bwaagap gi kumma/ yi'de/ 'baar mo

¹⁰ isi kani me'd pini shuki aha/ bway mo

dhali me'da bim poros pini bu'thki aha/ mo.

¹¹ Wakki/ aha/ mina o gwo mo ki: Dhalki mondhurumi'd 'kam aha/ is mo

dhali dhalki monkush wara'd ki mon'thiny gom aha/ mo,

¹² isi kan mondhurumi'd diki ta mondhurumi'd gom /e mo.

Mon'thiny a'di ca'bki bany bany me'd montee mo

haali/ mondhurumi'd a'di wara'd ki monkush gom /e mo.

¹³ Haali/ /e ukkina aris to gi bwaman is pem mo,

/e shoki aha/ ki 'be'b 'be'b e bwama dho'th ma ta'dam pem mo.

¹⁴ Aha/ mankina /e mo haali/ /e a'di kogu mo dhali /e tana manmii to mer mo.
To mer uni ta miim pini mo.

/E mishki aha/ ki mish gana/ mo.

¹⁵ Ayica yir pem a'di molu bag 'peni /e mo,

ki aha/ 'konu mmo/uk ki kup mo,

ki kotj jin wagaskunu a'di e mony'cesha 'kulga/ mo.

¹⁶ Em pini mishki bul pem ntwaa/ gom uk pem ki aha/ tana ari 'dii mo.

Ka tee kun 'kawurkunu gom aha/ mo tani

a'di 'kwarkunu eya warkam pini mo, aris uni 'baar mo,

me'd jin 'kona uni ki 'ko mo naskina/ mo.

¹⁷ Gwom pini kun kuluma / e bwa gom aha/ mo wani yinthowa, ayy
Arungimis.

Kwashar buni 'ka'da miiya?

¹⁸ Wakki/ aha/ mina den uni e mo tani uni bolkina si'b gi bwaagap e ka ris
mo.

Ki aha/ merkina e mo tani aha/ dina nyakki /e mo naskina/.

¹⁹ Ayy /e jin mini 'taki 'kosh uni kun mii tonthus moyi, ayy Arungimis,

dhali ki 'kwani kun wol 'kwaniya bas mo mini 'taki kwa/ is buni bwa 'peni
aha/ mo,

²⁰ ki 'kwani kun dupi /e i e mmo/ush /e gwo ki 'tash mo,

uni kun cukin ki is buni imontal 'de/ apo/ /e gom tonthus mo.

²¹ Dika/ ki shi/ uni i e uni gun shi/ki /e i e mo, ayy Tapa?

Dhali dika/ ki 'te bwa ki uni gwansan kun cukina apo/ /e mo?

²² Aha/ shi/kina uni i e ki isi shi/ ma shij gana/ i e mo.

Aha/ denkina uni e moyi mmota 'kup ki aha/ mo.

²³ Napi aha/ ki bur bur mo, ayy Arungimis, dhali misha dum pem mo.

Nyo/i aha/ mo dhali mish gwom pem kun kulumka/ ibwa mo.

²⁴ Dhali pari mo e mo wakki/ tonthusa kamu/ di'd e aha/ mo,

dhali shuyi aha/ bway e bway jin 'konuki/e ki sule/ sule/ mo.

140

Eya manyuk gway mo. Gway ma Dawuu'd.

¹ Cuki aha/ mo, ayy Tapa, 'peni 'kwani kun ta thus ki thus mo.

'Tashi aha/ 'twa/ mo 'peni 'kwani kun bujurkina bujur mo,

² uni kun thosonki tonthus is eya dum buni mo,

dhali bir 'kwani mmo/asa mee ka yempa/ yempa/ mo.

³ Uni dhuna le'd buni mmokaaka me'd tasha/ mo,

dhali 'twa/ buni 'tu'dkin ka ti'd tashan 'thi/ mo.

Doshi ma dhali 'cunycuri yan mo.

⁴ Jiyi aha/ mo, ayy Tapa, 'peni me'd gi 'kwani kun ta thus ki thus mo.

'Tashi aha/ 'twa/ mo 'peni 'kwani kun bujurkina bujur mo,

uni kun thosonki is mo mmota'b aha/ ki sho'k mo.

⁵ 'Kwan kun dhu is ki ca mo mmo/ush gwonjkan gume/ gom aha/ mo,

nyakka nyoka gume/ jin bere'thkina uni mo,

e 'ko'd gwar bway mo tani uni ka'bkina gume/ gom aha/ mo.

Doshi ma dhali 'cunycuri yan mo.

⁶ Aha/ ona gwo e Tapa mo ki: /E tana Arungimis pem mo.

Ciyi 'ce ki 'twa/ ki tom pem jin 'thoka/ ka di'b me'di is mo, ayy Tapa.

- 7 Ayy Tapa, /e jin ta Tapam pem mo, dhali /e jin ta jim pem jin 'bitha'bi'th jin 'cukki aha/ mo, /e kumki aha/ 'kup pem mo ka tee gi mo ma mee mo.
- 8 Dhalku/ ki ci amanta thus ki thus to jin on ma dum piti a'di mo, ayy Tapa. Dhalku/ ki tho^h tonthus piti jin miina a'diya wu'th apo/ mo. Doshi ma dhali 'cunycuri yan mo.
- 9 Uni gwansan kun 'kamki aha/ ki de^k mo tani uni 'de'kki 'kup buni mo. Dhalki 'twa/ buni kun tana pibi kumki uni 'twa/a 'cesh mo.
- 10 Dhalki o'd jin 'thanu ka 'cila'th ta'kki'da po/ uni mo. Dhalki uni ta'kkunu e jis jin 'kula'kul mo jin mina uni mol cuyu/ mis dok/e mo.
- 11 Dhalku/ ki dhala manthutha thu'th 'pen bway mo mmo^{te}l mii sho'k e mony'cesh mo. Dhalki tonthus wa'di wathi/ jin bujurki'da bujur ki jahanne/ mo.
- 12 Aha/ misha Tapa halki mo jin wo'cki is she/ jin rakki'd mo, dhali tor gwon dwall 'twa/a 'cesh ki mii ma ka^r/e gom uni gun mini mii ta gi to mo.
- 13 Ka jin gana/ uni gun tana ka^r/e mini ci mo jin 'boruwa 'bor bwa i is ki gway pini mo. Dhali uni gun dhelel ma du mini 'ko e buj'kus pini mo be.

141

Gway ma Dawuu'd.

- 1 Aha/ yukkina /e mo, ayy Tapa. Layu/ ki jahanne/ e aha/ mo. Ciyi 'cem pini ki 'twam pem mo, ki aha/ yukkina /e mo.
- 2 Dhalki mon'thom pem a'di deⁿu e me'da ku'da 'bicajwahar ibwambori /e mo, dhali mo jin 'de'kka/ me'd pemi mis mo me'd to jin 'ci^hu/ 'kus mom'pimpili/ mmomiiya bas mo.
- 3 Kari mo jin jinuwa ji apo/ 'twam pem mo, ayy Tapa, doshi mmo^tima campur gi 'twam pem mo.
- 4 Dhalku/ ki ka'da dum pem ki ma tonthusa kamu/ mo, mmoshwa pibi/ anyor ki is pem gom tonthus mmomii mo mmonyak ya ki 'kwani kun mii to kun 'co^ka'co^k mo, dhali dhalku/ ki dhal aha/ bway mo mmoshwa ton^{te}m buni kun ta^wusa^tawus mo.
- 5 Dhalki wathi/ jin 'boro'd idor aha/ mo walla ku^cur aha/ ki bwan^kush mo, hili dhalku/ ki dhala yin gi 'kwanin thus ki a'di minu 'kosh 'kup pem ki sule/ sule/ mo. Haali/ mon'thom pem tikirkika/ apo/ tonthus buni kun miina uni mo.
- 6 Me'd jin cikunu uni e me'd gi uni gwansan kun mini wa^k uni mo tani dhali yan'ko'd uni mini da/ar gwo ki gwon Tapa a'di ita gwoⁿ gana/ mo.
- 7 Me'd wosh jin ko^hkina jan ta^l 'de/ me'd mo dhali sha^t uni apowa 'cesh mo tani wakan asimam buni minu 'kwa^kar bwa mo e 'twa/ ma Haawiya mo.
- 8 Hili em pem di'd 'kup ki /e mo, ayy Tapa Arungimis. E /e mo tani aha/ simmkina mo jin hurga/ jwa e mo. Dhalku/ ki dhal aha/ me'd wathi/ jin dar gi mo jin ceshuwa cesh ka po/ mo.
- 9 Noni aha/ 'twa/ mo 'pena gume/ jin 'thikina uniya 'cesh gom aha/ mo, dhali agume/ gi uni kun mii tonthus mo.
- 10 Dhalki imanmii tonthus ta'kkini mon^{ta}l 'de/ agumem buni mo

ki aha/ dina mmoye mo.

142

Gway jin yedhuwa Dawuu'd sho'k mo ki a'di diki'd e jurum wosh mo. Mon'tho mo.

¹ Aha/ gwokina ki 'twam pem e Tapa mo,

ki 'twam pem mo tani aha/ 'thokina to ka di'b me'di is e Tapa mo.

² Aha/ gaça mom pem jin walka/ a'thupuny 'twa/ e bwambori a'di mo.

Aha/ tora tom pem kun toci aha/ bwa ibwambori a'di mo.

³ Ki shi/in pem 'thikina buye/ mo tani

/e mishki bway pem mo.

E bway tur jin yaka/ mo tani

uni bagkina gume/ gom aha/ mo.

⁴ Aha/ hilkina mo ki 'bana bim poros mo dhali tim mo mo,

hili jan'kamu/ yisa di'da jin tor aha/ ki e mo.

Mo jin huru jwa yisa di'd gom aha/ mo.

Wathi/ piyi'd jin hilki'da hıl gom aha/ mo.

⁵ Aha/ gwona 'twa/ e /e mo, ayy Tapa.

Aha/ ona gwo mo ki: /E ta jim pem jin hurga/ jwa icine/ mo,

tom pem jin 'tuntulka/ bwa ime'd mo, a'di jin di'd nya'kki 'kwani kun 'kon ki e e mony'cesh mo.

⁶ Ciyi ahirdhe/ ki gwom pem mo,

haali/ aha/ gunu ka lun'gu'b gana/ mo.

'Cuki aha/ mo 'peni imanto'c aha/ bwa mo,

haali/ uni 'bitha'bi'th gom aha/ mo mmobol aha/ e mo.

⁷ Susi aha/ ka piye/ 'pena sijn mo,

ki aha/ mina 'taki ci mo jin 'boruwa 'bor bwa i is ki gway pini mo.

'Kwani kun tana 'kar/e mini 'kam aha/ mo

haali/ /e mini tu/ul dhan mo jin isha to ka entus gom aha/ mo.

143

Gway ma Dawuu'd.

¹ Ciki mon'thom pem mo, ayy Tapa.

Dhali ciyi 'cem pini ki tom pem kun 'thoka/ ka di'b me'di is mo.

E mi ma isin ganam pini mo tani thoki aha/ 'twa/ mo, e mo ma 'kar/em pini mo.

² Dhalku/ ki ciç mo e mo jin dwallu gwo nya'kki ciñkinam pini mo

haali/ wathiñ kamu/ yisa di'da jin di'd ki e jin ta'da 'kar/e ibwambori /e mo.

³ Haali/ wathi/ jin ta 'kup mo tani a'di urki aha/ isho'k mo.

A'di yapki mondiki/em pem ki sho'k itaga 'cesh mo.

A'di ki kar aha/ mmoça'b e mondhurumi'd mo me'd uni gwansan kun wukin ki wuñ gana/ mo.

⁴ Gom gwo gi wakan mo tani shi/in pem 'thikina buye/ e isi aha/ mo,

dhali adum pem e isi aha/ mo tani a'di tintira/ tintir mo.

⁵ Aha/ kakina teen dhamo/ gunn e mo.

Aha/ kulunkina gwo ibwa goma ris to kun miikina /e mo.

Dhali aha/ 'tikirk ina gwo kulumi bwa gom miin to ki me'd pini kun wagaskina /e mo.

⁶ Aha/ he'thkina me'd pem gom /e mo.

Akashiram pem ku'thkina 'kus gun'kuru/ mo me'd mo ma bur'ra/ o'd mo.

Doshi ma dhali 'cunycuri yan mo.

7 Huru/ki jahanne/ mo dhali thoḵ aha/ 'twa/ mo, ayy Tapa.

Shi/in pem ushi me'd mo.

Dhalku/ki bag jis/em pini 'peni aha/ mo,

isi ciki/ki aha/ mina e wa ki uni gwansan kun iikin ka lungu'b e jisa 'kulga/ mo.

8 Dhalki aha/ cika gwo mon'thamo/ gom mo/en pini jin telu sho'k mo, haali/ e /e mo tani aha/ kara mom pem jin gamka/ gwo is mo.

Tori aha/ bway jin miga/ 'taki ya mo,

haali/ e /e mo tani aha/ 'de'kkina aḵashiram pem 'kup ki mis mo.

9 'Cuki aha/ mo, ayy Tapa, 'peni aris 'kwani kun ta 'kup ki aha/ mo.

Aha/ guskina mmohur jwa e /e mo.

10 Tori aha/ gwo mmomii bwam pini mo,

haali/ e tana Arungimis pem mo.

Dhalki shi/in pini jin 'boro'd shu aha/ bway mo

e bway jin ba'daba'd mo.

11 Gom gway gi gway pini mo tani, ayy Tapa, 'tashi mondiki/em pem 'twa/ mo.

E mii ma ḵar/em pini mo tani susi aha/ ka piye/ 'peni monto'c bwa mo.

12 Dhali e mo/en pini jin telu sho'k mo tani 'cithi/ 'kwani kun ta 'kup ki aha/ 'twa/ mo

dhali 'ce'd uni kun ta 'kup ki aha/ shoki 'baar mo

haali/ aha/ tana cinḵinam pini mo.

144

Gway ma Dawuu'd.

1 Mom'bor mii midi di gom Tapa mo, a'di jin ta wosh pem mo,

a'di jin to'kki me'd pem gom mo ma mee mo,

dhali nḵwal me'd pem mmo/asa as mo,

2 a'di jin ta wosh pem dhali acur pem mo,

dhali acur pem jin tenu gwo mo dhali aman'cuḵ aha/ mo,

dhala goḵgorom pem mo dhali a'di jin bu'thka/ mo jin hurga/ jwa mo,

a'di jin 'dapki'da ris 'kwani e bwan'kwariny piti mo.

3 Ayy Tapa, ki wathiny'cesh jana sa/ imina bwa o /e ki a'di mo,

walla ya/ gi wathiny'cesh jana imina /e kulum gwo ibwa gom a'di mo?

4 Wathiny'cesh wana e ka wulpe/ mo,

ateem piti wana e ka ḵashira la jin peki'd mo.

5 Goḵi momis pini is ka 'cesh mo, ayy Tapa, dhali pu'du/ ka 'cesh mo.

Tayi wosha turga/ is ki me'd mo ki uni mini iiya ku'd mo.

6 Biliti/ uni mmoshwayi mo mmomiiya war mo dhali ceḵer uni bwa mo.

Dhali peper ka risa thopam pini bwa mo dhali miiya 'bala'c 'bala'c dhan mo yin mo.

7 Hethi me'd pini 'peni mo jin ḵa'dama/ ḵa'dam mo,

'cwami aha/ mo dhali 'cuḵi aha/ mo 'pena ris yi'de/ mo,

dhali 'peni me'd gi 'kwani gi bampan tiya mo,

8 uni kun tana 'twa/ buni aḵor ka ḵor mmo/o gwo mo,

dhali uni gun tana me'da bim poros buni abim poros jin ta thus ki thus mo.

9 Aha/ mina yuḵ gway jin ta gway this gom /e mo, ayy Arungimis,

apowa dhenjhenye/ jin 'kon ma shu/i 'kume'd mo aha/ mina pi a'di gom /e mo,

¹⁰ a'di jin ciki mo jin pinu mii e ki imalik mo, a'di jin 'cwamki cinjinam pini ka Dawuu'd mo.

¹¹ 'Cwami aha/ 'peni gandal gi 'kwani kun ta matt ki matt mo dhali 'cuki aha/ mo 'peni me'd gi 'kwani kun ta 'kwani gi bampan tiya mo, uni kun tana 'twa/ buni ator ka tor mmo/o gwo mo, dhali uni gun tana me'da bim poros buni abim poros jin ta thus ki thus mo.

¹² Dhalki iya/m bam e dhuru'c buni mo wana e ki cwalman kun dhethadhe'th mo, walla i'bwa/m bam mmowa e ka ka'dum gu'b mo kun jepkunu mo mmonyang gu'b ma malik mo.

¹³ Dhalki themes bam 'tu'du/ ki piny piny mo mmo'tu'da risa lakanj gu'b kun dhuna am to mo. Dhalki ka'bal bam dhodhon ka alip mo dhali ka alaapi 'kume'd mo e buntom bam mo.

¹⁴ Dhalki bip bam 'tu'd mo ki ushan mo, jin mina is 'koki 'kosh uni ka nyor gom 'ba'th mo walla ta a/ulul is mmodho'th ushan mo. Dhalku/ ki mii dhal ko jin gwonu ki ko ma cis bway mo mmodi e bway tur bam mo.

¹⁵ 'Kwani kun bita mo jin 'boru mii wakana po/ mo tani uni i'bora bwa mo. 'Kwani kun tan ga Arumgimis jin ta Tapa mo tani uni i'bora bwa mo.

145

Gway jin yuk ma Dawuu'd mmomaŋa maŋ mo.

¹ Aha/ mina kar /e ki ca mo, /e jin tana Arumgimis pem mo dhali aMalik pem mo,

dhali 'bori gway pini mii ki sule/ sule/ mo dhali ki sule/ sule/ mo.

² Isa yempa/ aha/ mina 'bor /e mii mo, dhali maŋ gway pini ki sule/ sule/ mo dhali ki sule/ sule/ mo.

³ Tapa a'di icaaca mo dhali a'di ica'd jin minu maŋ mo, dhali dhan cam piti minu 'koki gu'd 'kup mmodot mo.

⁴ Anyakum yil gi 'kwanin 'denj kamu/ mini maŋ miim pini ka nyakum 'kwani yilan tiya mo, dhali uni mini bah dhan mii ma dem dem pini jin kala /e ki mii mo.

⁵ Gom monyca ma ra/ ra/ pini mo dhali mo/ek pini mo dhali aris to kun miina /e ki momer mo tani aha/ mina kulum uni ibwa mo be.

⁶ 'Kwani mini bah dhan mo ma dem dem ma purem pini jin kala /e ki mii mo, dhali aha/ mina bah dhan monycam pini mo.

⁷ Uni mini gaç miin tom pini jin ishi'd ka enthus ki gway pini jin tor /e karash gom tom 'boron mo

dhali yuk gway ki 'kal 'kal gom mo ma kar/em pini mo.

⁸ Tapa a'di ta'da manmii mii ka 'the mo dhali amanmiimii mo, anyor piti maŋgala she/ mo dhali mo/en ishki'd jin telu sho'k mo.

⁹ Tapa a'di 'bora'bor gom 'kwani 'baar mo, dhali bwam ma 'thimem piti ki mo/en diki'da powa ris 'kwani 'baar mo kun ukkina a'di mo.

¹⁰ Aris miin tom pini mini ci /e bwa jin 'boruwa 'bori is mo, ayy Tapa,

dhali aris unim pini kun dhunu ki she/ ki dhelel dhelel mo tani uni mini 'bor /e mii mo.

11 Uni mini o gwo gom monyca gi bampam pini mo, dhali uni mini tor gwo gom mom'bi'th pini mo,

12 mmo'tor eya tente/ e iya/ gi 'kwani mo miin to ma dem dem pini mo, dhali monyca jin mii'd ki ra/ ra/ jin ta ji gi bampam pini mo.

13 Bampam pini a'di ta bampa/ jin midi di ki sule/ sule/ mo dhali mo jin tanu tapam pini 'dimki 'kup ki sule/ sule/ mo eya risa nya'kum yil gi 'kwaniny'cesh mo.

Tapa a'di ita a'di ma isin gana/ eya ris gwom piti mo, dhali ta 'the ka 'the eya ris miin tom piti mo.

14 Tapa a'di bu'thki uni gwansan kun ta'kkin mo, dhali 'deka ris uni imis mo uni gun 'kokin ki gon'go/ mo.

15 Aris e gi 'kwani 'baar mo hilki /e mo dhali /e ki ciki uni tontem buni ki yil ka kar/e mo.

16 /E ka'dki me'd pini mo dhali /e kapkina ris to kun 'ko ki e adu mo ka ris to gun o uni bwa mo.

17 Tapa a'di ita'da kar/e eya ris bway piti 'baar mo dhali kush bwa ki kush goma ris miim piti mo.

18 Tapa a'di 'disha'dish goma ris uni gwansan kun yukki a'di mo, eya ris uni gun yukki a'di gom miin gana/ mo,

19 A'di ki thim to jin ona a'di bwa mo a'di jin ko/ki a'di mo. A'di si'da/ cikki gwom buni mo dhali ta uni is ki me'd mo.

20 Tapa a'di ki 'tasha ris uni 'baar 'twa/ mo uni gun enki a'di mo, hili aris uni gun ta thus ki thus mo tani mina a'di i'ce'd sho'k mo.

21 'Twa/ pem midi o gwo mmoman' Tapa mo, dhali dhalka ris shuman isi 'baar mo 'bor gway piti jin kogu mii mo ki sule/ sule/ mo.

146

1 Manj Tapa mo.

Manj Tapa mo ma, ayy kashiram pem.

2 Aha/ mina manj Tapa ki aha/ dina mmodi ki e mo.

Aha/ mina yuk' gway mmoman'ja Arumgimis pem mo ka yiha/ ki aha/ dina ki e mo.

3 Dhalku/ ki dhu mom bum jin gamu gwo is e iya/ gi imalik mo, e ya/ gi 'kwani mo, e a'di jin dar gi mowoth mo.

4 Ki shi/in piti 'baarki'd mo tani a'di dokki'd ki bu'da'cesh ka nya'ko'd mo, Dhali ka tenter' gana/ yan mo tani to jin thosona a'di mo tani nya'k sho'k 'ce'd ki a'di mo.

5 Bwam 'boro'd gom a'di jin ta gi mowoth 'pena Arumgimis ma Yakuub mo, a'di jin ta'd ga 'ter' kape/ e Tapa Arumgimis piti mo,

6 a'di jin ukki momis dhali mony'cesh mo, dhali kumma/ yi'de/ mo dhali aris to kun 'kon e bwaman uni mo, a'di jin dhu'da dhu ka dhu ma isin gana/ ki sule/ sule/ mo,

7 a'di jin torki gwon dwall 'twa/ a 'cesh ki tora kar/ e mo, gom uni gun siri'ckunuwa po/ ki sho'k mo, a'di jin ciki tont'e/ ki 'kwani kun 'kosha te/ mo.

Tapa dhuki uni kun tana habuus ki 'kus mo.

- 8 Tapa ka'dki e gi 'kwani kun tana ja'da/ mo.
 Tapa 'de'kki uni gwansan kun 'kokin ki gonjo/ mo.
 Tapa enki 'kwani kun miin ka kar/e mo.
 9 Tapa timki'da powa ris 'kwani kun iiki iin 'kus mo.
 A'di ki ta up kun wuna ikath is ki me'd mo dhali uni gun dar gi icom mo,
 hili bway jin iina 'kwani kun ta thus ki thus mo tani mina a'di guyu/ e mo jin
 mina uni kup mo.
 10 Tapa a'di midi ta tapa ki sule/ sule/ mo,
 ayy Sihyuun, a'di jin ta'da Arumgimis pini mo, eya risa nyakum yil gi 'kwani
 mo.
 Manj Tapa mo.

147

- 1 Manj Tapa mo.
 Haali/ a'di 'boro'd mmoyuk gway mmomaŋa Arumgimis bana mo,
 haali/ a'di ta'da 'the mo dhali gway jin minu manj a'di mo a'di ha me'd mo.
 2 Tapa nyanj Pa Urushaliim mo.
 A'di ki tul uci ma Israyiil is kun ta'kkunuwa sho mo.
 3 A'di ki waç uni gun 'ce'dkunuwa du mo
 dhali is jamam buni kun 'koshkunu uni mo.
 4 A'di ki kar gwo mmota ulla/ mo gom gwo mmodenja cul e mo.
 A'di ki ciya cul gway buni ki she/ ki she/ mo.
 5 Tapam bana a'di icaaca mo dhali mom'bi'th piti ishi'd ka entus mo.
 Mo jin mishu gwo 'ban jin ta jim piti mo tani a'di idiki'd ibwampo/ mo jin
 molu bar a'di mo.
 6 Tapa a'di ki 'de'k uni gun yapkunu ki sho'k mo.
 A'di ki tor uni 'ko'da 'cesh uni gun ta thus ki thus mo.
 7 Yuçi gway e Tapa mo jin 'boruwa 'bor bwa i is mo.
 Lugumi gway eya Arumgimis bana ka dhen'dhenye/ jin 'kon ma shu/i pesu/
 mo.
 8 A'di ki kum momis ka rak mo,
 dhali a'di ki thosona sho'k mmohetha po/ mony'cesh mo,
 dhali a'di ki rak sho mmoca mo apowa ris wosh mo.
 9 A'di ki ci to/e tontem buni mmoshwa mo
 dhali ki usha waraŋgwaç kun gwokin mo.
 10 Bwanj 'kunyud piti yisa di'd e shumarum kun 'bitha'bi'th mo,
 walla bwanj 'kunyud piti yisa di'd e 'basho'k gi wathi/ mo.
 11 Hili Tapa a'di ki bu'th mo jin 'boru bwa mo e uni gwansan kun ko/ki a'di
 mo,
 dhali e uni gwansan kun tan ga 'teŋ kape/ e mo/en piti jin telu sho'k mo.
 12 Manj Tapa mo, ayy Urushaliim.
 Manj Arumgimis pini mo, ayy Sihyuun.
 13 Haali/ a'di 'bi'thki'da bem'ban gi tonkuthu'd jin miinu 'twaŋkala gonj pini
 mo.
 A'di 'borki iya/m bum mii e bwaman um mo.
 14 A'di karki monku'th is e bwaŋgwayum bum mo.
 A'di 'tu'dki um bwa ka dipany pos bunyan jin thebera/ e ki theber mo.
 15 A'di hashki gwo jin kana a'diya kan e mony'cesh mo.
 Gwom piti guski'd ki shaw shaw mo.
 16 A'di ki ciya wasa/ mmo/isha 'cesh me'da mur ka'bala bany bany mo.
 A'di ki kwa/a wasanyjape/ bwa me'd 'piny mo.
 17 A'di ki taka wasam piti ka 'cesh me'd ushi kuluny to mo.

Kaja a'di imidi doshi bwambor mon'thup piti jin 'thupa a'di mo?

¹⁸ A'di hashki gwom piti mo dhali wa uni mo.

A'di ki kar 'tham piti mo mmoposh mo dhali yi'de/ yakina ŋwaça/ mo.

¹⁹ A'di ki bah gwom piti eya Yakuub mo

a'di jin ta gwonkan piti kun bahu mo dhali gwonkan kun onu eya Israyiil mo.

²⁰ Kal gi 'kwanin tiya dina a'di ki tu/ul ki mii gi wakan mo.

Uni 'koki mish gwonkan piti kun onu mo.

Manj Tapa mo.

148

¹ Manj Tapa mo.

Manj Tapa mo 'peni momis mo.

Manj a'di e mo jin ka'dama/ ka'dam mo.

² Manj a'di mo, aris iman'doyu gwom piti mo.

Manj a'di mo, aris unim piti kun 'kon e momis mo.

³ Atente/ dhala ppe, manj a'di mo,

manj a'di mo, aris uma cul kun kushki mo mo.

⁴ Manj a'di mo, um momis kun ka'dama/ ka'dam mo,

dhali um yi'de/ kun 'kona po/ momis mo.

⁵ Dhalki uni bway mo mmomanj gway gi Tapa mo.

Haali/ a'di kanki'da kan mo dhali uni 'kokunu mo mmo/uk mo.

⁶ Dhali a'di telki uni sho'k ki sule/ sule/ mo dhali ki sule/ sule/ mo.

A'di ki thoson gwayum buni jin mina uni mol pe mo.

⁷ Manj Tapa 'peni mony'cesh mo,

um kun ta dhan to yi'de/ gi kumma/ yi'de/ mo dhali aris mon'kulga/ mo,

⁸ o'd dhala dhana wasa/ wosh dhala wasa/ kun telkin mo dhala wasanyjape/ mo,

dhali 'tham jin mii'da punthar uni thimki gwom piti jin kana a'diya kan mo.

⁹ Kuwosha turga/ mo dhala ris wosh mo,

cwa kun dho'th maman mo dhali arisa bwanyayis mo.

¹⁰ Aris tombwaasho dhali aris to/e mo,

dhali to kun parana 'cesh mo dhali 'dii kun peni mis mo.

¹¹ Imalik kun 'kon e mony'cesh mo dhali aris 'kwani mo,

dhali iya/ gi imalik mo dhali aris tapa gi mony'cesh mo.

¹² 'Kwani kun ta dhuru'c mo dhali aris nyara/ mmontal' de/ mo,

dhali 'kwani kun tana dhan mo dhali uci mo.

¹³ Dhalki uni manj gway gi Tapa mo,

haali/ gway piti a'di 'de/ ikaru ki ca mo.

Monycam piti a'di idiki'da po/ mony'cesh mo dhali momis mo.

¹⁴ A'di ki 'de'k ce gi mowoth gom 'kwanim piti mo,

manj manj goma ris unim piti kun dhunu ki she/ ki dhelel dhelel mo,

haali/ 'Kwani ma Israyiil mo tani uni i'dishki a'di is mo.

Manj Tapa mo.

149

¹ Manj Tapa mo.

Yuki gway gi Tapa mo gway jin ta gway this mo,

momanj piti eya dhana tul 'kup gom 'kwani kun ta ku isin gana/ mo.

² Dhalka Israyiil 'bora bwa mo eya Man/uk a'di mo,

dhalki iya/ ma Sihyuun 'kunya bwa eya Malik buni mo.

³ Dhalki uni manj gway piti ki pe jin pena uni imis mo,

mmolugum gway gom a'di ka dhenḍhenye/ jin pinu ki me'd mo dhala
dhenḍhenye/ jin 'kon ma shu/i pesu/ mo.

⁴ Haali/ Tapa bu'thki mo jin 'boru bwa e 'kwanim piti mo.

A'di nyonki a'di jin kar is ki gwa'd mo ki mo jin pinu mii e mo.

⁵ Dhalki uni gun ta ku isinj gana/ iini mis gom bwam 'boro'd e monyca mo.

Dhalki uni yuki gway gom bwanj 'kunyū'd eya cim buni mo.

⁶ Dhalki mo jin eka/ ek jin minu manj Tapa di'd e 'kus buni mo,
dhali dhan gandal kun kaaka ka 'ban su/ 'kon e me'd buni mo,

⁷ mmori/a ri'c jin ricu apo/ kal gi 'kwanin tiya mo

dhali mmodora dora pō/ 'kwani mo,

⁸ mmodek imalik buni ka jindhiir mo

dhali unim buni kun sena 'penkapan ka makkiyyan tonkuthu'd mo,

⁹ mmotor uni gwon dwall 'twa/a 'cesh, gwon dwall jin 'kwarkunu mo.

Yan ta monyca goma ris unim piti kun ta ku isinj gana/ mo.

Manj Tapa mo.

150

¹ Manj Tapa mo.

Manj Arumgimis e mom piti jin kogu mo.

Manj a'di e mo ma balany piti mo jin ca'bki dem dem mo.

² Manj a'di gom miin to ma dem dem piti mo.

Manj a'di isi ki dhan miiny cam piti jin cana a'di mo.

³ Manj a'di ki ko ma poome/ jin dhalu me'd mo.

Manj a'di ka dhenḍhenye/ jin 'kon ma shu/i 'kume'd mo jin buku ki dar ga yi'c
mo dhala dhenḍhenye/ mo.

⁴ Manj a'di ka dhenḍhenye/ jin pinu ki me'd mo dhali iiyi imis mo.

Manj a'di ka shun dhenḍhenye/ mo dhala bargum mo.

⁵ Manj a'di ki ko ma sahana shu e mo.

Manj a'di ki 'kal 'kal ki ko ma sahana shu e mo jin tirkunu mo.

⁶ Dhalka ris to 'baar mo kun shi/irkin mo manj Tapa mo.

Manj Tapa mo.

Gwom 'Borga/ Isi ki Gwo ma MATTA mo

Gwo jin Beledhu goma Yesus Kristhos mo

¹ Gwo jin 'kwaru mo mmobele'th gwo mo goma Yesus Kristhos mo jin ta ya/ ma Dawuu'd mo dhali ya/ ma Ibrahiim mo.

² Ibrahiim ta'da baba ma Is/hak mo dhala Is/hak ta'da baba ma Yakuub mo dhala Yakuub ta'da baba ma Yahuusa mo dhali ikam piti mo be.

³ Dhala Yahuusa ta'da baba ma Paaris mo dhala Saarah mo ka Thamar mo. Dhala Paaris ta'da baba ma Hasruun mo dhala Hasruun ta'da baba ma Araam mo.

⁴ Dhala Araam ta'da baba ma Aminadaab mo dhala Aminadaab ta'da baba ma Nahshuun mo dhala Nahshuun ta'da baba ma Salmuun mo be.

⁵ Dhala Salmuun ta'da baba ma Bu/as ka Rahab mo dhala Bu/as ta'da baba ma Ubiid ka Ra/uuth mo dhala Ubiid ta'da baba ma Yassa mo.

⁶ Dhala Yassa ta'da baba ma Dawuu'd jin ta'da malik mo be.

Dhala Dawuu'd ta'da baba ma Sulemaan ki ash ma Uriyya mo

⁷ dhala Sulemaan ta'da baba ma Rahabaam mo dhala Rahabaam ta'da baba ma Abiyya mo dhala Abiyya ta'da baba ma Aasa mo.

⁸ Dhala Aasa ta'da baba ma Yahushapaath mo dhala Yahushapaath ta'da baba ma Yuram mo dhala Yuram ta'da baba ma Ussiyya mo

⁹ dhala Ussiyya ta'da baba ma Yutham mo dhala Yutham ta'da baba ma Ahaas mo dhala Ahaas ta'da baba ma Hiskiyya mo.

¹⁰ Dhala Hiskiyya ta'da baba ma Manassa mo dhala Manassa ta'da baba ma Aamuun mo dhala Aamuun ta'da baba ma Yushiyya mo

¹¹ dhala Yushiyya ta'da baba ma Yakunya mo dhali ikam piti mo ka tee jin bu'thkunu uni mo e Pam Baabil mo be.

¹² Dhali 'ko'di mo jin bu'thkunu uni mo e Pam Baabil mo tani Yakunya ta'da baba ma Sha/alti/iil mo dhala Sha/alti/iil ta'da baba ma Sarubbaabil mo be.

¹³ Dhala Sarubbaabil ta'da baba ma Abihud mo dhala Abihud ta'da baba ma Aliyagiim mo dhala Aliyagiim ta'da baba ma Aasuur mo.

¹⁴ Dhala Aasuur ta'da baba ma Saaduug mo dhala Saaduug ta'da baba ma Akiim mo dhala Akiim ta'da baba ma Aliyuud mo

¹⁵ dhala Aliyuud ta'da baba ma Ali/aasar mo dhala Ali/aasar ta'da baba ma Mattaan mo dhala Mattaan ta'da baba ma Yakuub mo.

¹⁶ Dhala Yakuub ta'da baba ma Yuusup jin ta'da kath ma Mariyam mo, Mariyam jin dho'thki'da Yesus mo, a'di jin yukunu gway ka Kristhos mo be.

¹⁷ Wakan 'pena risa nyakum yil 'pena Ibrahiim mo ntaga Dawuu'd mo tani uni 'koni 'kume'd i'ce'dka dojon ka nyakum yil mo, dhali 'pena Dawuu'd mo tani ntagi mo jin bu'thkunu uni mo e Pam Baabil mo tani 'koni 'kume'd i'ce'dka dojon ka nyakum yil mo, dhali 'peni mo jin bu'thkunu uni mo e Pam Baabil mo tani ntaga Kristhos mo tani 'koni 'kume'd i'ce'dka dojon ka nyakum yil mo be.

Mondho'th ma Yesus mo be

¹⁸ Dhali dho'th ma Yesus Kristhos a'di bu'thki mo yan kansan mo be. Ka ta'dam piti jin ta'da Mariyam karkunu mo goma Yuusup mo tani ntwa/a/ ki uni 'konuki gam me'd mo tani ayim gamkunu mo ka 'ci mbwa ki Shi/in Dheleladhelel mo be.

¹⁹ Dhala kathim piti ka Yuusup mo mmotana a'di wathin kar/e mo dhali mmo'tena a'di bwa mo mmokara yim ki mon'the is mo tani a'di dina gwo mbwa mo mmothoson gwo jin 'kwaru mo mmodhala yim 'pen ki kup mo be.

²⁰ Hili ki a'di dina gwo yansan mbwa mo tani hili mo mo ma, aman'doyu gwo gi Tapa piki a'di i is ki jan mo mmo/o gwo mo ki: Yuusup ya/ ma Dawuu'd, dhalki is ki ko/ mo ma mmobudha Mariyam ki ashim pini mo haali/ a'di caan jin bwaakina a'di mo tani a'di 'peni Shi/in Dheleladhelel mo be.

²¹ Ayim midi dho'th ya/ mo dhali /e mini yer a'di gway ka Yesus mo haali/ a'di midi woth 'kwanim piti 'peni miinthus buni mo be.

²² Aris gwo gwansan bu'thki embul mo mo kun minu thim mo jin ona Tapa ka manci gwom piti kadhamo/ mo ki:

²³ Hili nyaran gana/ midi bwaa mo dhali dho'th ya/ mo, dhali gway piti minu yuk ka Imanu/iil mo ('pemen piti jin o'd ka Arumgimis di'd e ana mo).

²⁴ Ka Yuusup merki e mo 'peni mo/ish e mo tani a'di miiki'd me'd jin kankin ma man'doyu gwo gi Tapa a'di gwo mo. A'di bu'thki a'di mo mmota ashim piti mo be.

²⁵ Hili a'di diki misha yim mo naskina/ ntaga yim dho'thki ya/ mo. Dhali a'di ki yer a'di gway ka Yesus mo be.

2

Mombu jin Buṭa 'Kwani kun Yukayuk mo

¹ Dhali ka Yesus dho'thkunu mo e Pam Beetlaham gi Pa Yahuudiyya ka tee ma Hirodus jin ta'da malik mo tani hili 'kwani kun yukayuk 'peni mom'pesho'k pu'dkin mo e Pa Urushaliim mo mmo/o gwo mo ki:

² Mane a'di jin dho'thkunu mo mmota malik gi 'Kwani Yahuuda/ mo? Haali/ aman parkina acul piti e mo e mom'pesho'k mo dhali aman iikina mo mmoluḡ a'di mo be.

³ Ka Hirodus jin ta'da malik cikki gwo yansan mo tani a'di mur ma du mo dhali aris 'kwani gi Pa Urushaliimi baar mo nyakki a'di mo be.

⁴ Dhali a'di ki tul aris igasiis kun can is mo dhali iman'kwar to gi 'kwani mo. A'di ki dot uni gwo mo gom mo jin minu dhodha Kristhos nycine/ mo.

⁵ Dhali uni ki tor a'di gwo mo ki: E Pam Beetlaham e Pa Yahuudiyya mo, haali/ wakan a'di ta gwo jin 'kwarkin ma manci gwo ma Arumgimis kadhamo/ mo ki:

⁶ Dhali /e, ayy Beetlaham, e bampa/ Yahuudiyya mo tani /e yisa pisina e bwaman 'kwani gi itapa gi 'Kwani Yahuudiyya mo, haali/ 'peni /e mo tani amanjiya ji midi pu'du/ mo, a'di jin midi hil 'kwanim pem ma Israyiil mo be.

⁷ Yan'ko'd Hirodus ki yuk 'kwani kun yukayuk mo ka kwal is mo dhali dot gwo 'peni uni goma tee jin pikin ma cul mo.

⁸ Dhali a'di ki hash uni e Pam Beetlaham mo mmo/o gwo mo ki: Iiku/ mo ma dhali ṅap gwo ka kar/e goma 'ci mo, dhali ki um mini gam a'di mo tani guyaa/ gwo mo ki aha/ si'da/ mina yaku/ mo dhali luḡ a'di mo be.

⁹ Ki uni cikki gwo 'pena malik mo tani uni iikin e bway buni mo, dhali hili, acul jin parkina uni e mo e mom'pesho'k mo tani yaki'di uni ibwambor mo ntagi a'di pu'dki'd mo mmodosh apo/ mo jin din ma 'ci nycine/ mo be.

¹⁰ Ki uni parkina acul e mo tani uni 'kunykina bwa mo ka daran du ki dhan bwan 'kunyga/ mo.

¹¹ Dhali ki uni iiki bway bwan gu'b mo tani uni parkina 'ci e mo nyakka Mariyam jin ta kum mo dhali uni ta'kkina 'cesh mo dhali luḡ a'di mo. Dhali yan'ko'd uni ki ka'd tom buni gun ish kumma/ 'twa/ mo tani uni ki ci a'di to kun cinu ki me'd mo, 'dolkon gana/ mo dhala 'bicajwahar mo dhala 'bi'c cwa jin yuku ka murr mo be.

¹² Dhali uni rumkunu ki gwo ki jan mo mmo'koki doka Hirodus mo. Uni iikin ki bway bampam bunij gana/, mo ki bwaya kamu/ mo be.

Hirodus Palki Mii mo Mmo'kosha Yesus mo

¹³ Dhali ki uni iikin mo tani hili mo mo ma, aman'doyu gwo gi Tapa piki'da Yuusup i is mo ki jan mo dhali o a'di gwo mo ki: Cuyi mis mo ma, dhali susa 'ci dhali kum mo dhali soyi mo e Pam Masir mo dhali 'koyi mmun mo ntagi aha/ mina tor /e gwo mo, haala Hirodus muru'di njapa 'ci mmo'ce'd a'di sho'k mo be.

¹⁴ Dhali a'di cuki mis mo dhali susa 'ci mo dhali kum mon'thiny mo dhali ii Pam Masir mo.

¹⁵ Dhali uni 'kokin mo mmun ntagi jwa ma Hirodus mo. Yansan miikunu mo mmothim gwo jin ona Tapa ka manci gwom piti kadhamo/ mo ki: 'Peni Pam Masir mo tani aha/ yukkina ya/m pem mo be.

¹⁶ Yan'ko'd ka Hirodus ki a'di parki mo e ki a'di he'kkunu e ki 'kwani kun yukayuk mo tani a'di dak ma nyor bwa me'd mo dhali a'di ki hash gwo mo dhali 'kosh ucingwath jwa 'baar mo kun 'kon e Pam Beetlaham mo dhali e bampa/ kun 'kon ka kukul is mo kun 'kona yil susu/ mo dhali kun 'kona bor mo me'd gwo jin da/arkina a'di 'peni 'kwani kun yukayuk mo.

¹⁷ Wakan a'di thinkunu mo jin okin ma manci gwo ma Arungimis kadhamo/ mo jin ta'da Irmiya mo ki:

¹⁸ 'Twa/ cik'kunu mo e Pa Rama mo mmomiiya cinthar mo dhali kony jwa jin gwonu ki jabu'th mo, aRahiil gwoki'd mo gom uci ma yim mo. Ayim ushki'd mo ki a'di minu malas mo, haali/ uni mini 'koki 'ko dok/e mo be.

¹⁹ Hili ka Hirodus wuki'd mo tani hili mo mo ma, aman'doyu gwo gi Tapa piki'da Yuusupi is ki jan mo e Pam Masir mo mmo/o gwo mo ki:

²⁰ Cuyi mis mo ma dhali susa 'ci dhali kum mo, dhali iiyi e bampa/ gi 'kwani ma Israyiil mo haali/ uni gwansan kun njapkina 'ci mondiki/em piti mo mmo'kosh mo tani uni wukin mo be.

²¹ Dhali a'di cuki mis mo dhali susa 'ci dhali kum mo dhali ii mo e bampa/ gi 'kwani ma Israyiil mo be.

²² Hili ki a'di cikki gwo ka Arkilaawus ta tapa apo/ Pa Yahuudiyya mo e mo gi com ka Hirodus mo tani a'di ko/ki is mo mmoya mo dhali a'di rumkunu ki gwo ki jan mo tani a'di yaki'd mo e Pany Jaliil mo be.

²³ Dhali a'di yaki'd mo mmoça'b e 'penkuman bampa/ jin yuku ka Naasira mo. A'di jin ta gwo jin okin ma manci gwo ma Arungimis kadhamo/ mo ki a'di minu thim mo ki: A'di minu yuk ki wathi/ gi Pa Naasira mo be.

3

Gwo jin Cin ma Yohaana jin Ta'da Manmiiya Mii ki Yi'de/ mo

¹ Dhali ka tee gwansan Yohaana jin ta'da manmii ki yi'de/ pu'dki'd mo mmoçi gwo mo e bwaasho gi Pa Yahuudiyya mo mmo/o gwo mo ki:

² Rici adu is mo ma haali/ Bampa/ gi Momis midu pu'd ki 'dishe/ mo be.

³ Haali/ a'di yansan ta a'di jin okunu ka manci gwo ma Arungimis kadhamo/ mo jin ta'da Ishaya ki a'di o gwo mo ki:

'Twa/ gi jan 'de/ mmocuu gwo em bwaasho ki:

Thosoni bway gi Tapa mo ma.

Kari bway piti ka kar/e mo.

⁴ Dhala Yohaana a'di hi'thki'da mur kalman mo dhali waçkan mo e empa'd piti mo, dhali tontem piti jin shwana a'di mo tani ta'da kuuyu/ dhala dham eya kur mo be.

⁵ Yan'ko'd aris 'kwani 'baar mo iikin ka pije/ mo e a'di mo 'peni Pa Urushaliim mo dhali 'peni bampa/ Yahuudiyya 'baar mo dhali e bampa/ 'baar mo kun 'kon ka kukul is mo e Yi'derj Kumma/ Uurdun mo be.

⁶ Dhali uni 'kokunu mo mmomii ki yi'de/ ki a'di mo e Yi'derj Kumma/ Uurdun mo mmopikina uni gwo gom miinthu buni mo be.

⁷ Hili ki a'di parki 'Kwani Parisiyyin e mo dhali 'Kwani Sadukiyyin pu'dkin mo e mo gi miinuwa mii ki yi'de/ mo tani a'di ki o uni gwo mo ki: Um ucin tasha/. Aja rum um ki gwo mo mmoso mo 'pena nyor jin midi pu'du/ mo?

⁸ Kali maman gana/ adho'th mo ma jin midi ha me'd ki mo jin rijuwa du is mo

⁹ dhali dhalku/ ki tel gwo 'pen mo mmo/o gwo mo e is bum ki: Ana tana ga Ibrahiim jin ta'da ababam bana mo. Haali/ aha/ tora um gwo mo ka Arumgimis mishi war wosh gwansan mmo'de'k uni mmota uci ma Ibrahiim mo be.

¹⁰ Hili shwane/ athurmany a'di 'thikunu mo eya birman cwa mo. Wakan mo tani aris cwa 'baar mo ka 'dete/ 'dete/ kun 'koki dho'th maman mo tani uni jepkunu ka 'cesh mo dhali minu taki o'd mo be.

¹¹ Aha/ miikina um ki yi'de/ gom mo gi minu rica du is mo, hili a'di jin midi yayu/ i'ko'di aha/ mo tani a'di ca'd ki aha/ mo dhala ppam piti mo tani aha/ dinaki ha me'd mo mmokal uni mo. Hili a'di midi mii um ki Shi/in Dheleladhelel mo dhali ki o'd mo be.

¹² Dhali tonkar shem piti mmo'dash to mo tani di'di me'd piti mo dhali a'di midi dhelel ja'dam piti mo dhali a'di midi tul emen pos is mo e bwan themes mo, hila 'pi'b mina a'di ci'th ki o'd jin midi mol us mo be.

Mo jin Miinuwa Yesus ki Yi'de/ mo

¹³ Yan'ko'd Yesus pu'dki'd mo 'peni Pany Jaliil e Yi'derj Kumma/ Uurdun eya Yohaana mo ki a'di minu mii ki yi'de/ ki a'di mo be.

¹⁴ Yohaana a'di ur a'di gwo mo mmo/o gwo mo ki: Aha/ mina mii ta gi mo gi miinuwa mii ki yi'de/ ki /e mo dhali /e pu'dkini aha/ kan mo 'taa?

¹⁵ Hila Yesus tho'k a'di gwo mo ki: Dhalki a'di miinu mo wakan shwane/ haali/ a'di wakan jin midi ha me'd mo gom ana mmothima ris mo ma kar/e mo. Dhali yan'ko'd a'di gamki gwo me'd mo be.

¹⁶ Dhali ka Yesus miikunu ki yi'de/ mo tani a'di cuki mis ki jahanne/ 'peni yi'de/ mo dhali hili, momis ka'dkunu mo dhali a'di parki Shi/in ma Arumgimis e mo mmothulu/ me'd gurko/ mo mmo'ca'ba po/ a'di mo be.

¹⁷ Dhali hili, 'twa/ 'peni momis o gwo mo ki: Yansan ta Ya/m pem jin enka/ mo dhali e a'di mo tani aha/ 'bora bwa mo be.

4

Mo gi Paluwa Yesus mo

¹ Yan'ko'd aYesus a'di urkina Shi/in ka pije/ mo e mombwaasho mo dhali a'di palkina tapa ma ruma 'cesh mo be.

² Dhali a'di ga/ki to mo ka cim ma issu/ montee mo dhali ka cim ma issu/ mon'thiny mo dhali yan'ko'd mo tani a'di 'kosha te/ mo be.

³ Dhali amanpal a'di pu'dki'd mo dhali o a'di gwo mo ki: Wakki/ /e ta Ya/ ma Arumgimis mo tani kani wosh gwansan gwo mo ma mmowar ki ton'te/ mo.

⁴ Hili a'di tho'k a'di gwo mo ki: A'di 'kwarkunu mo ki:

Wathi/ midi diki di ki e jasi gom ton'te/ a'di 'de/ mo

hili ki gwo 'baar mo ka 'dete/ 'dete/ kun piyin mo 'peni 'twa/ ma Arumgimis mo be.

⁵ Yan'ko'd tapa ma rum a'cesh ki sus a'di mo e 'penkuman bampa/ jin kogu mo dhali a'di ki kar a'di eya liman gu'b gi mondheleladhelel mo

⁶ dhali a'di ki o a'di gwo mo ki: Waƙki/ /e ta Ya/ ma Arumgimis mo tani biƙi is pini ka 'cesh mo ma haali/ a'di 'kwarkunu mo ki:

A'di midi ci iman'doyu gwom piti mo mmoji /e mo, dhali,

E me'd buni mo tani uni mini 'de'k /e mo,

isi ciki/ ki /e mina sho'k pini diki torosha po/ wosh mo be.

⁷ Yesus o a'di gwo mo ki: Dok/e gwo 'kwarkunu mo ki: /E mini diki pal Tapa Arumgimis pini mo.

⁸ Dok/e tapa ma ruma 'cesh ki sus a'di mo e 'kuwosh jin turatur kagahara mo dhali mmoƙor a'di aris bampa/ gi mony'ceshi 'baar mo dhali monycam buni mo be.

⁹ Dhali a'di ki o a'di gwo mo ki: Aris uni gwansani 'baar mo tani miga/ ci /e mo be waƙki/ /e mini biƙa 'cesh mo dhali luƙ aha/ mo be.

¹⁰ Yan'ko'd Yesus ki o a'di gwo mo ki: Yaku/ mo ma, Seƙaan, haali/ a'di 'kwarkunu mo ki:

/E mini luƙ Tapa Arumgimis pini mo,

dhali a'di 'de/ mo tani mmina /e mii to mo be.

¹¹ Yan'ko'd tapa ma ruma 'cesh ki dhal a'di 'pen mo dhali hili, iman'doyu gwo pu'dkin mo dhali mii a'di to mo be.

Yesus Telki Mii ma Tu'c Piti 'Pen mo

¹² Dhali ki a'di cikki gwo ka Yoahaan karkunu eya sijin mo tani a'di pu'dki'd mo e Pany Jaliil mo be.

¹³ Dhali a'di dhalki Pa Naasira 'pen mo dhali ya mo dhali ca'b mo e Pan Kapranahuum mo e shemen yi'de/ gi bampa/ gi Pan Sabuluun mo dhali Pan Naptaali mo be.

¹⁴ A'di ta gwo jin okunu ka manci gwo ma Arumgimis kadhamo/ mo jin ta'da Ishaya, a'di jin minu thim mo ki:

¹⁵ E Pan Sabuluun mo dhali e Pan Naptaali mo tani

'kup ki shemena gap jin 'cithu/ Yi'denƙ Kumma/ Uurdun mo, e Pany Jaliil gi 'kwani kun 'koki ta 'Kwani Yahuuda/ mo tani

¹⁶ 'kwani kun 'kokin mo e bwaman mondhurumi'd mo tani

uni parki dhan monƙush e mo,

dhali e uni gwansan kun 'kokin mo e bampa/ mo dhali eya la wu mo tani

monƙush 'twakƙunu mo mo be.

¹⁷ 'Pena tee caan mo tani Yesus telki gwo 'pen mo mmoƙi gwo mo mmo/o gwo mo ki: Ricci adu is mo ma haali/ Bampa/ gi Momis a'di pu'dki'd mo be.

Yesus Yukki Imancik A'di Gwo Itwa/a/ mo

¹⁸ Me'd jin yakina a'di e shemena gap ma al ma Jaliil mo tani a'di parki 'kwanin tiya e isu/ mo kun tana kam mo, Simaan jin yuku gway ka Buterus mo dhala Andaraawus jin ta'da kam piti mo mmobitƙina uni a' thi/ a/al mo, haali/ uni ta imancesh to yi'de/ mo be.

¹⁹ Dhali a'di ki o uni gwo mo ki: Bathi aha/ nsho'k mo ma dhali aha/ mina dhu um ki imanbu'th 'kwani ki gwo mo be.

²⁰ Dhali ki jahanne/ uni dhalkina 'thim buni 'pen mo dhali bathi a'di isho'k mo be.

²¹ Dhali ki a'di yaki'd mo 'peni mun mo tani a'di parki 'kwani su/ e mo kun ta ikam mo si'da, Yakuub jin ta ya/ ma Sabadi dhala Yoahaan jin ta'da kam piti mo e bwam ma kur buni nyak ka Sabadi jin ta'da ababam buni mo mmoshowa 'thim buni mo, dhali a'di ki yuk uni mo.

²² Dhali ki jahanne/ uni dhalkina kur buni 'pen mo dhali ababam buni mo, dhali bath a'di nsho'k mo be.

Yesus Çiki Gwo mo dhali Waça/ Waç mo

²³ Dhali a'di yaki'd mo e Pany Jaliili 'baar mo tani a'di torki gwo mo e gu'b gi montul is buni mo dhali mmoçi gwom 'borga/ gom Bampa/ mo dhali mmowaça ris 'bathi 'baar mo dhali aris isa nyor kun 'koshi 'kwani mo be.

²⁴ Wakan gwo gom a'di yaki'd ki lala'th ki tur mo e Pan Suriyya mo dhali uni suskina ris 'kwani e a'di kun 'bathan mo, uni gwansan kun doru ki isa nyor mo dhali ki isa nyor kun woci is she/ mo dhali kun bu'th ma rum thus mo dhali aris uni kun wu gampanj mo dhali aris uni kun mutta/ is mo dhali a'di ki waç uni mo be.

²⁵ Dhali awaambuhany 'kwani caaca 'peni Pany Jaliil bathki a'di m'pen mo dhali 'peni Pan Dekapolis mo dhali 'peni Pa Urushaliim mo dhali 'peni Pa Yahuudiyya mo dhali 'peni bwampo/ Yi'den Kumma/ Uurdun mo be.

5

Gwo jin Toru e 'Kuwosh mo

¹ Mmohilkina a'di awaambuhany 'kwani mo tani a'di seki bway 'kuwosh jin turatur mo dhali ki a'di ca'bki'da 'cesh mo tani imanciç a'di gwo pu'dkini a'di mo be.

² Dhali a'di ki ka'd 'twam piti mo dhali tor uni gwo mo mmo/o gwo mo ki:

'Ban jin 'Boruwa 'Bor Mii mo

³ Mom'bor mii gom uni gun hatha'ko'd e shi/in mo, gom bampam buni ta ji gi momis mo be.

⁴ Mom'bor mii gom uni gwansan kun gwokin mo, ki uni minu malas mo be.

⁵ Mom'bor mii gom uni gun 'thup ma du mo ki uni mini gam mal ma 'cesh mo be.

⁶ Mom'bor mii gom uni gwansan kun 'kosha te/ mo dhali kun butha te/ miinjkar/e mo ki uni minu kap mo be.

⁷ Mom'bor mii gom uni gun miimii mo ki uni mini gam momiimii mo be.

⁸ Mom'bor mii gom uni gun dhelel ma du mo ki uni mini para Arumgimis e mo be.

⁹ Mom'bor mii gom uni gun dhuna dhu ka ku'th is mo ki uni minu yuk ki iya/ ma Arumgimis mo be.

¹⁰ Mom'bor mii gom uni gwansan kun toju bwa mo gom gway gi miinjkar/e mo, gom bampam buni jin tana uni mo tani ta ji gi momis mo be.

¹¹ Mom'bor mii gom um ki 'kwani mini sor um mo dhali to'c um bwa mo dhali wal gwo sora shigga/ apo/ um mo gom gway pem mo be.

¹² 'Kunyi bwa mo ma dhali 'bori bwa mo, haali/ tom bum gun tana um gun ish kumma/ mo e momis mo tani uni ekin mo, haali/ wakan 'kwani toci imanciç gwo ma Arumgimis bwa kadhamo/ mo uni gun 'koni twa/a/ ki um mo be.

'Donkoro/ dhali Monkush

¹³ Um tana 'donkoro/ gom mony'cesh mo. Hili wakka 'donkoro/ midi this montanjkar piti e mo tani a'di midi mish 'bala'th kata mo? A'di diki ha me'd mo dok/e gom toj kamu/ mo, hili isi ciki/ a'di minu bi'a sho mo dhali minu yap ki sho'k gi 'kwani mo be.

¹⁴ Um ta monkush gi 'kwaniny'cesh mo be. 'Penkuman bampa/ caan jin ka'bkunu mo e 'kuwosh mo tani a'di molu ba'k mo be.

15 Walla ki 'kwani ɕi'thkina lamba/ mo tani uni kum a'di 'kup ki toŋ'kul bwa mo 'taa? Hili uni ki kar a'di e ɕirkina/ mo dhali a'di ki ɕi monkush e gu'bi 'baar mo be.

16 Dhalki monkush bum kushi mo mo wakan mbwambori 'kwani mo, ki uni mini par miim 'boron bum e mo dhali ɕi monyca ka Babam bum jin di'd e momis mo be.

Yesus Torki Gwo gom Gwoŋkan jin Cinu mo

17 Dhalku/ ki tosh ki aha/ pu'dkina mo mmopuu gwoŋkan jin cinu mo dhali imanɕi gwo ma Arumgimis kadhomo/ mo. Aha/ pu'dkina mo mmopuu uni mo yisa, hili mmothim uni mo be.

18 Haali/ ka jinŋ gana/ aha/ ona um gwo mo ki: ntagi momis dhali mony'cesh uni mini pe mo tani walla ari businyanŋ gwo walla 'pisiranŋ gwo mo tani uni mini 'koki pe mo 'peni gwoŋkan jin cinu mo ntagi uni 'baar mo minu thim mo be.

19 A'diyin jin mididi 'ce'd gwoŋkana 'de/ 'peni uni gwansan kun 'kwarkunu mo kun pisin mo dhali tor 'kwani gwo wakan mo si'da/ tani a'di minu yuk ki a'di jin pisapis mo e Bampa/ gi Momis mo. Hili a'di jin mii uni mo dhali tor gwo ki uni mo tani a'di minu yuk gway ki a'di jin caaca mo e Bampa/ gi Momis mo be.

20 Haali/ aha/ tora um gwo mo ki isi ciki/ miinŋkar/em bum mo mini bol ku gi iman'kwar to e mo dhali 'Kwani Parisiyiin mo tani um mini mol ɕiɕ e Bampa/ gi Momis mo be.

Yesus Torki Gwo mo gom Gwo ma Nyor mo

21 Um ɕikki gwo jin onu 'peni 'kwanin dhamo/ ki: /E mini mii dhalku/ ki 'kosh'a 'kosh mo, dhali a'di jin 'koshki'da 'kosh mo tani a'di mididi 'dapi gwon dwall mo be.

22 Hili aha/ ona um gwo mo ki aris 'kwani 'baar mo ka 'dete/ 'dete/ ki ji gi mii'da nyor ka kam piti mo tani a'di mididi 'dapi gwon dwall mo be. A'diyin jin soro'da kam piti mo si'da/ mo tani mididi 'dapi gwon dwall e montul is gi 'Kwani Yahuuda/ mo, dhali a'diyin jin mididi o/e gwo mo ki: /E ta pus mo tani, a'di mididi 'dapi mo ma al o'd mo be.

23 Wakan wakki/ /e ki guyu/ tom pini jin cinu ki me'd mo apowa gwaɕa/ mo dhali /e ki ka gwo e ka kam pini dina toŋ kamu/ apo/ /e mo tani

24 dhalki tom pini jin ɕina /e ki me'd mo mbwambor ma gwaɕa/ mo dhali yaku/ mo, mmogwama gwam nɕwa/a/ mo nyakka kam pini mo dhali yan'ko'd yayu/ mo dhali ɕi tom pini jin cinu ki me'd mo.

25 Miiji amugu ki jahanne/ mo nyakki a'di jin yer /e is ki gway mo ki um 'kon mo mmo/ii ka yiha/ mo e bway mmodwall gwo mo nyakki a'di mo, isi ciki/ amanyer /e is ki gway mididi biŋki /e mo e me'd ma mandwall gwo mo dhali amandwall gwo mo a'di mididi ɕiki /e ka manji mo mo dhali /e minu kar eya sijin mo be.

26 Ka jinŋ gana/ aha/ ona /e gwo mo ki /e mini mol 'ba/ piyu/ ka piye/ ki sule/ mo ntagi /e mini ɕiya maliim jinŋ 'ko'd mo be.

Yesus Torki Gwo mo gom Mii jin Miinu Miinyal mo

27 Um ɕikki gwo jin onu ki: Dhalku/ ɕal ki mii mii mo ma.

28 Hili aha/ ona um gwo mo ki aris 'kwani 'baar mo ka 'dete/ 'dete/ uni gun hili 'kup ki up mo mmo'dap e mo tani ki jahanne/ uni miiki miinyal nyakki up mo eya dum buni mo be.

29 Wakki/ e ma bim poros pini tu'c/e mo mmomii miinthus mo tani buki a'di ka piye/ mo ma dhali biŋi a'di asho mo haali/ a'di 'boro'd gom /e mo mmothi

bungwar is gi 'ban is piniŋ kamu/ e mo jin mina bungwar is pini ka 'bimpil diki ya mo e mo ma al o'd mo be.

³⁰ Dhali wakki/ me'da bim poros pini midi tu'c/ e mo mmomii miinthus mo tani 'cithi/ a'di mo ma dhali yipi a'di asho mo haali/ a'di 'boro'd gom /e mo mmothis bungwar is gi 'ban is piniŋ kamu/ e mo jin mina bungwar is pini ka 'bimpil diki ya mo e mo ma al o'd mo be.

Yesus Turki Gwo mo gom Mii jin Dhaluwa Dhal 'Pen mo

³¹ A'di onu si'da/ ki: A'diyin jin midi dhal ashim piti 'pen mo tani dhalki a'di thosoni'da warka/ jin dhaluwa dhal 'pen mo.

³² Hili aha/ ona um gwo mo ki aris 'kwani 'baar mo ka 'dete/ 'dete/ gun dhalki up buni 'pen mo hili isi ciki/ jasi gom gwo gi miinyɔal mo tani uni dhu uni ki imanmii miinyɔal mo dhali a'diyin jin midi mash a'bom jin dhal ma kaḥim piti 'pen mo tani a'di si'da/ miiki miinyɔal mo be.

Yesus Turki Gwo mo gom Gwo jin Thulu Me'da Po/ mo

³³ Dok/ e um cikki gwo jin onu mo ki 'kwanin dhamo/ ki: /E mini dhalku/ ki mii thul me'da po/ gwo mo mmo/o is ka tor mo, hili thimi gwo e Tapa mo a'di jin thula /e gwo me'da po/ mo mmo/o mo.

³⁴ Hili aha/ ona um gwo mo ki: Dhalku/ gwo ki mii thul me'da po/ mo mmo/o mo ki sule/ mo ma, walla gom momis mo haali/ a'di ta'da kursi ma Arumgimis mo be,

³⁵ walla gom mony'cesh mo haali/ a'di ta mondhu sho'k piti mo, walla gom Pa Urushaliim mo haali/ a'di ta 'penkuman bampa/ ma Malik jin ca'd mo.

³⁶ Dhali dhalku/ ki mii thul gwo me'da po/ mo mmo/o mo gom 'kup pini mo haali/ /e molona mur'kup tal 'deŋ kamu/ war mo mmota gi kush mo walla mmota gi 'thi/ mo.

³⁷ Dhalki gwom pini jin ona /e mo midi ta jasi anynye mo walla yisa mo. Ma e torŋ kamu/ jin mar mii yan is mo tani uni pu'dkin 'peni tonthus mo be.

Mo/en gom Uni gun Ta 'Kup mo

³⁸ Um cikkin a'di jin onu ki: Ki e gom e mo dhali ki she/ gom she/ mo tani

³⁹ hili aha/ ona um gwo mo ki: Dhalku/ ki roɔ a'di jin ta thus mo. Hili wakki/ jan 'deŋ kamu/ midi dor /e e 'ban 'peshe/ ma bim poros mo tani tu'kki a'di 'bana kamu/ si'da/ mo ma.

⁴⁰ Dhali wakki/ wathin 'deŋ kamu/ midi sus /e mo dhali bu'th burrinyem bwaman pini mo tani dhalki a'di bu'th jam po/ si'da/ mo ma.

⁴¹ Dhali wakki/ wathin 'deŋ kamu/ kan /e gwo ki 'bi'th mo mmoya ki ŋatgin 'de/ mo tani yayi nyaŋki a'di mo ki ŋatgini su/ mo.

⁴² Ciki a'di jin doŋki to 'peni /e mo dhali dhalku/ ki ush a'di jin midi bar to kal 'peni /e mo.

⁴³ Um cikkin a'di jin onu ki: /E mini en amannyak ca'b pini mo dhali shi/ 'kup pini i e mo.

⁴⁴ Hili aha/ tora um gwo mo ki: Eni uni gun ta 'kup ki um mo ma dhali 'thoyi gom uni gwansan kun toci um bwa mo.

⁴⁵ Wakan ki um mini ta iya/ ma Ababam bum jin di'd e momis mo, haali/ a'di tu'cki'da tentem piti mmosul apo/ 'kwani kun to thus ki thus mo dhali apo/ uni kun ta 'kwanin gana/ mo, dhali a'di ki hasha sho'k apo/ 'kwani kun ta kuŋ kar/ e mo dhali apo/ uni gun 'koki ta kuŋ kar/ e mo be.

⁴⁶ Haali/ wakki/ um ki eni gwansan kun eni um mo tani tom bum kun mina um gam gom mii gi wakan mo tani mini wakata mo sa/? 'Kona imantera thulpa/ ki mii mii jin nyaŋka'd kan mo 'taa?

⁴⁷ Dhali wakki/ um ki the jasi iwak bum me'd mo tani mii jana imiina /e ki nyanye/ mmobol cin tiya e mo? 'Kona 'kwani kun 'koki ta 'Kwani Yahuuda/ ki mii mii jin nyaka'd kan mo 'taa?

⁴⁸ Wakan um mini mii ta unim 'borgarj gana/ mo me'da Ababam bum jin di'd e momis jin ta a'dim 'borgarj gana/ mo be.

6

Yesus Torki Gwo gom To jin Minu Ci 'Kwani kun Hatha'ko'd mo

¹ Jiyyi miiny jarom bum jin mina umi bot mo mbwambori 'kwani mo mmomina uni mish um mo haali/ n'ko'd mo tani um mini ta gi to jin ish kumma/ yisa 'pena Ababam bum jin di'd e momis mo.

² Wakan si'da/ ki /e mini ci to jin cinu gom 'kwani kun hatha'ko'd mo tani dhalku/ ki kowa poome/ mo mbwambori /e mo me'd 'kwani kun tana he'k e ka he'k e mo kun miiki to mo e gu'b gi montul is mo dhali e bway tur kun iinu mo ki uni mina 'kwani imarj mo. Ka jinj gana/ aha/ ona um gwo mo ki uni tan gi tom buni gun ish kumma/ mo be.

³ Hili ki /e mini ci to gom 'kwani kun hatha'ko'd mo tani dhalku/ ki dhal me'da cam pini mmomish me'da bim poros pini mmomiina a'di to mo

⁴ wakan ki tom pini kun cina /e gom 'kwani kun hatha'ko'd mo minu mii ki kup mo, dhala Ababam pini jin mishki'da ris to gun miinu ki kup mo tani midi ci /e to kun mini ish kumma/ mo be.

Yesus Torki Gwo mo gom Mon'tho mo

⁵ Dhali ki /e mini 'tho mo tani /e mini mii dhalku/ ki mii me'd 'kwani kun ta imanhe'k e mo haali/ uni eni mondosh mo dhali 'tho mo e gu'b gi montul is mo dhali e mo jin 'citha/ bway tur mo ki uni mina 'kwani mish mo. Ka jinj gana/ aha/ ona um gwo mo ki uni tan gi tom buni gun ish kumma/ mo be.

⁶ Hili ki /e mini 'tho mo tani yayi gu'b pini mo dhali muthi acampur mo dhali 'thoyi Ababam pini mo, a'di jin 'konuki tor eya tente/ mo, dhali Ababam pini, a'di jin mishki to gun 'kon ki kup mo tani midi ci /e to gun ish kumma/ mo be.

⁷ Dhali eya 'thom bum mo tani dhalku/ ki roth gwo apo/ mo gun 'ko bwa 'te/ mo me'd 'kwani kun 'koki ta 'Kwani Yahuuda/ mo haali/ uni kulumki gwo mbwa mo ki uni minu cik 'twam buni ki gwom buni kun ona uni ka ris mo be.

⁸ Dhalku/ ki wa e ki uni mo ma haali/ Ababam bum mishki a'di jin mina um mii ta mo ntwaa/ ki um dotki a'di mo be.

⁹ 'Thoyi wa cikise/ mo ma:
Ababam bam jin di'di momis,
dhalki gway pini a'di kogu mo ma.

¹⁰ Dhalki bampam pini a'di yayi'da 'cesh.
Dhali dhalki bwam pini a'di miinu a'cesh mo ma
me'd yan a'di miinu e momis.

¹¹ Ka tee yansan ciyi am tontem bam jin ta ji gi isa yempa/ mo ma.

¹² Dhal am amure/ miinthus bam 'pen mo ma
me'd yan si'da/ dhala aman 'kwani 'pen gun 'kon ka mure/ miinthus bam
m'ba/.

¹³ Dhalku/ ki sus am e mo jin palu mo e miinthus.
Hili wo'hi/ aman 'peni wathin thus mo ma.

¹⁴ Haali/ wakki/ um mini dhal 'kwani gwon dhanj buni 'pen mo tani Ababam bum si'da/ midi dhal um gwon dhanj bum 'pen mo be.

¹⁵ Hili wakki/ um 'koki dhal 'kwani gwon dhan bunu 'pen mo tani wakan si'da/ Ababam bum midu diki dhal um gwon dhan bum 'pen mo be.

Yesus Torke Gwo mo gom To jin Ga/ u mo

¹⁶ Dhali ki um mini ga/ to mo tani dhalku/ ki hil mo ki engwamash mo me'd 'kwani kun tana he'ke ka he'ke mo haali/ uni warki jis/em bunu mo ki monga/ tom bunu minu mish ki 'kwani mo. Ka jin gana/ aha/ ona um gwo mo ki uni tan gi tom bunu kun ish kumma/ mo be.

¹⁷ Hili ki /e mini ga/ to mo tani shupuri 'kup pini ka yin mo ma dhali lami bwam/em pini mo

¹⁸ ki monga/ tom pini minu 'koki mish ki 'kwani mo hili ka Ababam pini, a'di jin dinuki tor mo eya tente/ mo, dhali Ababam pini jin mishi to jin di'd ki jin kup mo tani a'di midu ci /e to jin ish kumma/ mo be.

Mmo/ish Kumma/ e Momis mo

¹⁹ Dhalku/ ki sug to gom is pini mo ma mmo/ish kumma/ mo e mony'cesh yan mo, e mo gun 'kon ma dhurany mo dhali mo gun wuna to gure/ mo mmoshwa mo dhali mo gun 'kona 'kwanin 'di/ mo mmo'ce'd mo mo dhali mmokwal to mo be.

²⁰ Hili suki is pini ki to kun ish kumma/ mo e momis mo e mo jin dar ga dhurany mo walla mo jin wuna to gure/ mo mmoshwa to mo dhali e mo jin daru gi 'kwanin 'di/ mo mmo'koki 'ce'd to mo dhali kwal to mo.

²¹ Haali/ mo jin isha tom pini kumma/ mo tani a'di ta mo jin min ma dum pini idi si'da/ mo be.

Alamba/ gi Bunjwar Is mo

²² E, a'di ta'da lamba/ gom bunjwar is mo. Wakan wakki/ em pini midu ca'bki kwany kwany mo tani bunjwar is pini 'baar mo ka 'bimpil mo tani minu 'tu'd mo ki monjkush mo be.

²³ Hili wakki/ em pini diki ca'bki kwany kwany mo tani bunjwar is pini 'baar mo ka 'bimpil mo tani minu 'tu'd mo ki mondhurumi'd mo be. Wakki/ monjkush jin di'd e /e dhurumi'd mo kan tani dhan mondhurumi'd 'ka'da miya!

Mmo/anan Is mo

²⁴ Wathin 'den kamu/ yisa di'da jin midu mish miya tu'c gom tapa isu/ mo: haali/ a'di midu mi shi/ jan tal 'den kamu/ i e mo dhali ena kamu/ mo walla ilu/ a'di midu bu'th jan 'den kamu/ ka bor mo dhali wak jan kamu/ mo be. Um moli mi Arungimis to mo dhali mi to gun tanu pa ki pa mo.

²⁵ Wakan aha/ tora um gwo mo ki dhalku/ is ki anan mo gom mon'koki/em bum mo ma walla gom tonte/ jin mina umi shwa mo walla gom to jin mina umi pi mo walla gom bunjwar is bum mo gom to jin mina umi hithi is mo. Dina mondiki/e ki bol tonte/ e mo 'taa? Dhali bunjwar is ki bol burriney/ e mo 'taa?

²⁶ Hili 'kup ki 'dii kun pen e mis mo ma. Uni 'koki si to mo walla 'koki 'cith to mo walla 'koki tul to is mo e bwan themes mo tani dhali hili Ababam bum jin di'di momis mo tani a'di thipki uni mo be. 'Kona um ki ta 'kwani kun 'bitha yol she/ ki 'bi'th mo mmobol uni e mo 'taa?

²⁷ Dhali wathi/ jana di'di bwam um mo jin midu anan is mo dhali jin midu mish ganan mondiki/em piti 'ba/ mo?

²⁸ Dhali atinta anana um is mo gom burriney/ mo? Kulumi gwo ibwa mo ma gom jandin to kun 'kona piye/ mo mmocakina uni mo. Uni 'koki miya tu'c mo walla sura thus mo be.

²⁹ Hili aha/ tora um gwo mo, goma Sulemaan e monycam piti 'baar mo tani a'di dinuki hi'th ki burrinye/ jin waki jandin 'de/ 'peni uni gwansan mo be.

³⁰ Hili wakki/ Arungimis ki hitha sho ki burrinye/ wakan mo e bwaasho mo tani uni gun 'kokin mo shwane/ dhali ka'thamo/ 'kwani ki ta'k uni e mo/ o'd mo tani bakata 'te/ mmina a'di diki hi'th um ki burrinye/ ki nyanye/ mo, ayy um 'kwani kun gwa'da mongam gwo is ki gwa'd mo kan?

³¹ Wakan dhalku/ is ki anan mo ma mmo/o gwo mo ki: Atinta mmina ana ishwa mo? walla, Atinta mmina ana ipi mo sa/? walla, Atinta mmina ana ihithi is mo sa/?

³² Haali/ 'kwani kun 'koki ta 'Kwani Yahuuda/ n̄apkina ris to gwansani 'baar mo, dhali Ababam bum jin di'di momis mo tani a'di mishki a'di jin mina umi mii ta gi uni 'baar mo be.

³³ Hili simmi bampam piti e n̄twa/a/ mo ma dhali mo ma kar/em piti mo, dhali aris to gwansani 'baar mo tani uni mini ta kum bum si'da/ mo be.

³⁴ Wakan dhalku/ is ki anan mo gom ka'thamo/ mo haala 'thamo/ midi anan is mo gom is piti mo. Dhalka tee ki is pitiñ gana/ t̄oci bwa mo mmoṭeya tee mo.

7

Mmodwall kun Tiya Gwo mo

¹ Dhalku/ ki çinjitha çinji'th mo ki um minu 'koki çinji'th mo.

² Haali/ ki gwo jin çinjitha um ki çinji'th mo mmopi mo tani um minu çinji'th mo dhali ki mii jin bara um mii mo tani um minu bar ka nyan 'ko'd mo be.

³ Atinta mishkina /e businyan to i e ma kam pini mo hili diki mish adhana ka'dum jin di'd /e e em piniñ gana/ mo?

⁴ Walla atinta mina /e i/owa kam pini gwo mo ki: Dhalki aha/ guna /e businyan to 'peni em pini mo ma dhali/e ki dhal adhana ka'dum /e i em piniñ gana/ mo.

⁵ /E jin tana he'k e ka he'k e kan mo, buki aka'dum jin di'di em pini n̄twa/a/ mo ma dhali yan'ko'd /e mini mish mohil ki 'bore/ mo mmobuk businyan to jin di'da kam pini i e mo be.

⁶ Dhalku/ ki çiya 'ka to jin k̄ogu mo dhali dhalku/ ki biṭ dhemam bum mbwambori k̄uthar mo, hili isi ciki/ ki uni mini sa uni ki sho'k mo dhali tu'k mo mmo'kosh um mo be.

Doṭi ma, dhali Simmi Mii E mo, dhali Nagkani mo

⁷ Doṭi to mo ma dhali a'di minu çiki um mo be. Simmi mii e mo ma dhali um mini gam a'di mo be. Nagkani anagkan ki me'd mo ma dhali a'di minu ka'd ki um mo be.

⁸ Haali/ aris uni 'baar mo ka 'dete/ 'dete/ kun doṭki to mo tani bu'thki uni mo dhali uni gun simmki mii e mo tani gamki to mo dhali a'di jin nagkanki a'di mo tani a'di ka'dkunu a'di mo be.

⁹ Walla wathi/ jana di'di bwam um mo wakki/ ya/m piti doṭ a'di gwo gom maan̄kuthu'd mo tani mina a'di ç̄i a'di wosh mo 'taa?

¹⁰ Walla wakki/ a'di ki doṭ a'di gwo gom wa'c mo tani mina a'di ç̄i a'di tasha/ mo 'taa?

¹¹ Wakki/ um si'da/ kun ta 'kwani kun ta thus ki thus kan mo mishi tom 'boron ç̄i ki uçim bum mo tani bakata bese/ mmin ma Babam bum jin di'di momis mo diki ç̄i aris to gwansan kun 'boron ki uni gwansan kun doṭki a'di mo si'da/?

¹² Wakan ma to yin jin ona um ki 'kwani mini mii mii gom um mo tani miiyi wakan si'da/ gom uni mo ma haali/ gwo yansan ta gwon̄kan jin ç̄inu mo dhali gwo gi imañci gwo ma Arungimis kadhamo/ mo be.

Campur jin Nyuthanyu'th mo

13 Ciçi um mo ma e bway jin nyutha 'twaman ki nyu'th mo haali/ acampur a'di wängala wängal mo dhali bway a'di 'disha mii mo e mo jin shunu mo e mo jin 'ce'du sho'k mo dhali uni gwansan kun ciçkin e a'di mo tani tana ris ka ris mo be.

14 Haali/ acampura nyu'thga/ mo tani dhali bway mo tani a'di diṭa mii mo jin shunu mo e mondiki/e mo dhali uni gwansan kun gamki a'di mo tani 'koni ḍaka/ mo be.

Aris Cwa Uni Mishu ki Maman Buni mo be

15 Jiŷi imançi gwonthus ki e ki 'bore/ mo ma uni gun pu'dkin mo e um mo mmohitha mur ka'bali is mo, hili e bwaman ma du mo tani uni tana wu gun pitili to ki she/ mo be.

16 Um mini mish uni ki maman buni mo. Amura'th minu ho mo 'pena 'de/ mo 'taa? walla pu/ 'pena liṭ mo 'taa?

17 Wakan aris cwa kun 'boron mo tani dho'th maman kun 'boron mo hili cwa kun shi/ashi/ mo tani dho'th maman kun ta thus ki thus si'da/ mo be.

18 Cwam 'borga/ mol dho'th maman kun shiyin mo walla cwa shigga/ si'da/ mol dho'th maman kun 'boron mo be.

19 Aris cwa 'baar mo ka 'dete/ 'dete/ kun 'koki dho'th maman kun 'boron mo tani uni jepu ka 'cesh mo dhali ṭaki o'd mo be.

20 Wakan si'da/ um mini mish uni ki maman buni mo be.

21 Aris 'kwani 'baar mo ka 'dete/ 'dete/ kun o aha/ gwo mo ki: Tapa, Tapa mo tani mini 'koki ciç mo e Bampa/ gi Momis mo hili jasi a'di jin mii bwa ma Ababam pem jin di'd e momis mo be.

22 Dhali ka cim çaan mo tani 'kwani mini ta aris ka ris mo kun mini o aha/ gwo mo ki: Tapa, Tapa, 'kona aman ki o gwo is ki gway pini mo 'taa? dhali ura rum thus ka piŷe/ ki gway pini mo? dhali miŷiya ris dhan mii kun 'bitha'bi'th ki gway pini mo 'taa?

23 Dhali yan'ko'd aha/ mina ṭor uni gwo eya tente/ mo ki: Aha/ dinaki mish um ki sule/ mo be. Iiku/ mo 'peni aha/ mo ma, um gun ta imanmii tonthus mo.

Moṅka'b jin Ka'bu Isu/ mo be

24 Aris 'kwani 'baar mo ka 'dete/ 'dete/ kun ciçki gwom pem gwansan mo dhali mii uni mo tani uni wana e ki wathi/ jin yuḱayuk mo mmonyarṅ gu'b piti eya po/ wosh mo be.

25 Dhali ka sho'k wolki yi'de/ mo dhali dhana gannu/ yi'de/ pu'dki'd mo dhali 'tham poshki'd mo dhali dor apo/ gu'b mo tani hili a'di diki 'tuk mo be haali/ a'di ṅka'bkunu apo/ wosh mo be.

26 Dhali aris 'kwani 'baar mo ka 'dete/ 'dete/ kun ciçki gwom pem mo dhali 'koki mii uni mo tani uni wana e ki wathim pus jin nyanṅi gu'b piti apowa si'b mo be.

27 Dhali ka sho'k wolki yi'de/ mo dhali agannu/ yi'de/ pu'dki'd mo dhali 'tham poshki'd mo dhali dor apo/ gu'b çaan mo tani dhali a'di kumki'da 'cesh mo be dhali adhana bar jin caaca shinu is e a'di mo be.

Moshirr ma Yesus mo

28 Dhali ka Yesus 'baarki gwo gwansan mmo/o mo tani awaambuhany 'kwani merkin mo gom gwontor piti mo be

29 haali/ a'di ṭorki uni gwo mo me'd wathi/ jin ta gi moshirr mo dhali yisa me'd iman'kwar tom buni mo be.

8

Yesus Dhelelki Wathi/jin 'Kosha Monthus Is mo

1 Ki a'di thulki'd ka 'cesh mo 'peni 'kuwosha turga/ mo tani adhana waambuhany 'kwani kun caaca bathki a'di m'pen mo be.

2 Dhali hili wathi/ jin 'kosha monthus pu'dki'di a'di mo dhali ca'bki jin 'kupa'dupuni bwambori a'di mo mmo/o gwo mo ki: Tapa, wakki/ /e ona bwa mo tani /e mishi aha/ mmodhelel mo be.

3 Dhali a'di ki he'th me'd piti mo dhali ta a'di is ki me'd mo mmo/o gwo mo ki: Aha/ ona bwa mo be. Dheleli mo ma. Dhali ki jahanne/ monthus piti dhelelkunu mo be.

4 Dhala Yesus ki o a'di gwo mo ki: Hili /e mini dhalku/ ki o wathin kamu/ gwo mo gom ton tal 'de/ yan mo. Hili yaku/ mo dhali tor is pini ka gasiis mo dhali ci a'di to jin kan ma Musa gwo mo e gwonkan mo haali/ a'di ta to jin nyo/ i gwo gom 'kwani mo be.

Cinjkina/ ma Mancil ma Askar Iss 'Kwanimpa Mmudhe'd jin Waçkunu mo

5 Me'd jin cinjkina a'di mo e Panj Kapranahuum mo tani amancil ma askar iss 'kwanimpa mmudhe'd mo tani pu'dki'd 'kup ki a'di mo mmonap a'di mo,

6 dhali o gwo mo ki: Tapa, cinjinam pem ishki 'ko'da 'cesh ki 'ba'th jin mutt a'di is mo e pa mo dhali a'di shwan ma çisa nyor mo be.

7 Dhali a'di ki o a'di gwo mo ki: Aha/ mina yaku/ mo dhali waç a'di mo be.

8 Hili amancil ma askar iss 'kwanimpa mmudhe'd thoç a'di gwo mo ki: Tapa, aha/ dinaki ha me'd mo jin mina /e yayu/ mo eya galgin gu'b pem mo. Hili oyi jasi gwo mo 'te/ dhali cinjinam pem minu waç mo be.

9 Haali/ aha/ tana wathi/ jin di 'ko'd e moshirr mo. A/askar 'koni bwam me'd pem mo, dhali ki aha/ ona gwo e jan tal 'de/ mo ki: Yaku/ mo tani dhali a'di yaki'd mo. Dhali aha/ ki o gwo e jan tal 'dej kamu/ mo ki: Yayu/ mo tani a'di yayi'd mo be, dhali e cinjinam pem ki: Miiyi yan mo ma tani dhali a'di miiki a'di mo be.

10 Ka Yesus cikki gwom piti mo tani a'di merki'd mo dhali o uni gwansan gwo kun bathi a'di nsho'k gwo mo ki: Ka jin gana/ aha/ ona um gwo mo ki: Jan 'dej kamu/ yisa di'da e 'kwani ma Israyiil jin gamkika/ jin ta'd gi mongam gwo is gi wakansan mo be.

11 Aha/ tora um gwo mo ki: Ama'diny 'kwani ka ris mini pu'du/ mo 'peni mom'pesho'k mo dhali 'pena bora lungu'b mo dhali 'ko atharabeesa nyakka Ibrahim mo dhala Is/hak mo dhala Yakuub mo e Bampa/ gi Momis mo be

12 ki iya/ gi Bampa/ gi Momis mo minu ta'k mo e mondhurumi'd jin ta'da 'tum ka 'tum mo tani e mun mo tani 'kwani mini ko mo dhali 'pe'd shem buni mo be.

13 Dhali eya mancil ma askar iss 'kwanimpa mmudhe'd mo tani Yesus ki o a'di gwo mo ki: Yaku/ mo ma. Dhalki a'di miinu mo gom /e mo me'd jin gamkina /e gwo is mo be. Dhali cinjkina/ a'di waçkunu mo eya tee çaan ki e 'kamu'thki'd mo be.

Yesus Waçki'da Mar ma Buterus jin Ta'da 'Bomi mo

14 Dhali ka Yesus cikki gu'b ma Buterus mo tani a'di parki'da mar ma Buterus e mo jin ta'da 'bomi mo mmo/isha a'di mmo'batha a'di is ki 'ba'th mo.

15 A'di ki ta ayim is ki me'd mo dhali 'ba'th dhalki'da yim 'pen mo dhali ayim cuki mis mo dhali mii a'di to mo be.

16 Ki mom'pimpili/ mo tani uni kalki 'kwani i a'di mo aris uni gun bu'th ma ruma 'cesh mo dhali a'di ki ura rum thus kun nyo/on ka piye/ mo ki gwo mo dhali a'di ki waç uni 'baar mo kun 'kokin mo mmo'ba'th mo be.

17 Dhali a'di yan ta gwo jin minu thim mo me'd gwo jin okin ma manci gwo ma Arungimis kadhama/ mo jin ta'da Ishaya mo ki: A'di kalki isa nyor bana mo dhali kalki aris 'ba'th jin 'koshki ana mo be.

Uni kun Mini 'Taki Batha aYesus Nsho'k mo

18 Dhali ka Yesus parki'da waambuhany 'kwani e kun 'kamki a'di mo tani a'di kalki gwo mo mmoja mo mmo'citha/ gap ki 'bana kamu/ mo be.

19 Dhala man'kwar to pu'dki'd mo dhali o a'di gwo mo ki: Amanfor Gwo, aha/ mina bath /e nsho'k mo e mo 'baar mo jin mina /e iya mo.

20 Dhala Yesus ki o a'di gwo mo ki: Amaḡ uni ta gi jis mo dhali 'dii kun pen e momis mo tani uni ta gi gu'b mo. Hili, Ya/ gi 'Kwani mo tani a'di dar gi mo mo mmokar 'kup piti nycine/ mo be.

21 Dhala manciḡ gwoḡ kamu/ o a'di gwo mo ki: Tapa, dhalki aha/ yana ntwa/a/ mo mmokana babam pem mo.

22 Hila Yesus ki o a'di gwo mo ki: Bathi aha/ m'pen mo ma dhali dhalki jwa kan ceny jwam buninj gana/ mo.

Yesus Doshki'da Dhana Punthar 'Tham mo

23 Dhali ki a'di ciḡki'd e bwaḡḡur mo tani imanciḡ a'di gwo bathki a'di isho'k mo be.

24 Dhali hili adhana punthar 'tham caaca cuki mis mo e bwam yi'de/ mo, wakan dhala kur a'di borkunu mo ki yi'de/ jin bir bakal mo. Dhali hili a'di ishki e mo be.

25 Dhali uni iikin mo mmomer a'di e mo mmo/o gwo mo ki: Woḡhi/ awoḡh mo ma, Tapa. Ana 'ce'da sho'k mo be.

26 Dhali a'di ki o uni gwo mo ki: Atinta ko/ka um is mo kan, ayy um 'kwani kun gwa'da monḡam gwo is ki gwa'd kan mo? Dhali yan'ko'd a'di ki cu mis mo dhali kuḡur 'tham ki gwo mo dhali yi'de/ mo dhali adhan mo dosh ki biyuu mo be.

27 Dhali 'kwani merkin mo mmo/o gwo mo ki: Ki wathi/ jana a'danne, ki 'tham dhali yi'de/ ha a'di gwo e mo kan?

'Kwani gi Paḡ Gadara kun Bu'th ma Ruma 'Cesh mo

28 Dhali ki a'di pu'dki'd ki 'bana gapa kamu/ jin ta bampa/ gi Paḡ Gadara mo tani 'kwani su/ 'kon kun takin ga rum thus kun nyo/on mo gamki a'di 'kup mo kun iiyin 'peni mon'kupaje mo. Uni shwana nyor kagahara ki jan tal 'deḡ kamu/ mididi diki ya ki bway caan mo be.

29 Dhali hili uni cuun kagahara mo ki: /E mini miiya tinta e am mo ayy Ya/ ma Arungimis? /E pu'dkin mo mmahan mmodhu am ki isa nyor ntwa/a/ ki mo diki pu'd mo naskina/ 'taa?

30 Dhali ama'diny kuḡhar 'kokin mo mmoshwa mo isa dhana/ mo 'peni uni mo.

31 Dhali arum thus kun nyo/on ki dot a'di gwo mo ki: Waḡki/ /e mini dhu am 'pen ka pije/ mo tani hashi aman mo e bwaḡ kuḡhar mo ma.

32 Dhali a'di ki o uni gwo mo ki: Iiku/ mo. Wakan uni iikin mo ka pije/ mo dhali se mo e bwaḡ kuḡhar mo. Dhali hili ama'diny kuḡhar uni yakina waḡa/ ka luḡgu'b mo e bwaman ma gapa al mo dhali uni 'ce'dkunu sho'k ki yi'de/ mo be.

33 Dhali imanhil kuḡhar uni sokin mo dhali uni iikin mo e 'penkuman bampa/ mo dhali uni ḡorkina ris to gwansan mo dhali gom to kun miikunu mo goma rum thus kun nyo/on mo.

34 Dhali hili aris 'kwani gi 'penkuman bampa/ uni pu'dkin mo mmogama Yesus 'kup mo. Dhali ki uni parki a'di e mo tani uni dotki a'di mo mmodhal mom buni gun 'kokina uni 'pen mo be.

9

Yesus Waçki Wathi/jin Mutta/ Is mo

¹ Dhali a'di ciçki bwam ma kur mo mmo'ciṭha/ gap mo dhali a'di pu'dki'd mo e 'peṅkuman bampam piti mo be.

² Dhali hili uni kalki a'di wathi/ jin mutta/ is mo mmo/isha a'di eya cim piti mo. Dhali ka Yesus parki moṅgam gwo is buni e mo tani a'di ki o a'di jin mutta/ is gwo mo ki: Buthi adu mo ma, ya/m pem. Miinthus pini dhalkunu /e 'pen mo be.

³ Dhali hili iman'kwar ton tiya o gwo mo e is buni ki: Wathi/ yansan walki gwo sor mo be.

⁴ Hila Yesus mishki gwom buni jin kulumkina uni ibwa mo be mmo/o gwo mo ki: Atinta kuluma um gwon thus eya dum bum kan mo?

⁵ Haali/ mii jana sa/? ṅ'ka'da'd mo? Mmo/o wathimpa gwo mo ki: Miinthus pini dhalkunu /e 'pen mo? walla mmo/o gwo mo ki: Cuyi mis mo dhali 'deki acim pini dhali ya mo?

⁶ Hili ki um mini mish ki Ya/ gi 'Kwani ta gi moshirr mo e mony'cesh yan mo mmodhal miinthus gi 'kwaniny'cesh 'pen mo - yan'ko'd a'di ki o wathi/ jin mutta/ is gwo mo ki: Cuyi mis mo, dhali 'deki acim pini mo dhali yayi bway pa mo ma.

⁷ Dhali yan'ko'd a'di cuki mis mo dhali ya bway pa mo be.

⁸ Ka waambuhany 'kwani parki a'di e mo tani uni 'kokin mo mmoḳo/ is mo dhali uni karkina Arumgimis ki ca mo gom a'di jin çiki moshirr e 'kwani kan mo be.

Ayuk jin Yuḳkunuwa Matta mo

⁹ Ka Yesus yaki'd ki yampe 'peni mattan mo tani a'di parki wathin kamu/ e mo jin yuku gway ka Matta mo mmoça'ba a'di mo e mo jin teruwa thulpa/ mo. Dhali a'di ki o a'di gwo mo ki: Baṭhi aha/ nsho'k mo ma. Dhali a'di cuki mis mo dhali baṭh a'di nsho'k mo be.

¹⁰ Dhali ki a'di ca'bki'd mo eya tharabeesa e gu'b mo tani hili imantera thulpa/ ka ris dhali imanmii miinthus mo pu'dkin mo dhali 'kowa 'cesh nyakka Yesus mo dhali imanciḳ a'di gwo mo be.

¹¹ Dhali ki 'Kwani Parisiyiin mishki mii yan mo tani uni ki o imanciḳ a'di gwo mo ki: Atinta shwan ma manṭor gwom bum to mo nyakki imantera thulpa/ mo dhali 'kwani kun mii miinthus kan mo?

¹² Hili ki a'di ciçki gwo yan mo tani a'di ki o gwo mo gom uni gwansan kun 'kon ki 'bore/ mo kun mini mii 'koki mii ta ga hakiim mo, hili jasi gom uni gwansan kun 'ba'thkin mo be.

¹³ Iiku/ mo ma dhali da/ari a'di yan jin ta 'pemen gwo mo ki: Aha/ ṅapa momiimii moyi dhali yisa gom to jin minu 'ciṭh 'kus mo. Haali/aha/ pu'dkina mo yisa mmoyuḳ uni gun mii miinḳar/e mo yisa hili gom uni gun ta imanmii miinthus mo be.

Gwondot jin Dotu gom To jin Ga/u mo

¹⁴ Dhali yan'ko'd imanciḳa Yohaana gwo uni pu'dkini a'di mo mmo/o gwo mo ki: Atinta ga/a aman to mo dhali 'Kwani Parisiyiin si'da/? hili imanciḳ /e gwo 'koki ga/ to mo?

¹⁵ Dhala Yesus ki o uni gwo mo ki: Mina 'kwani kun yuku mo e momiimash mo mmota yilkina/ mmoko mo e mo çaan jin dina wathinyaṅa'b nyakki uni mo 'taa? Atee mini pu'du/ mo ki wathinyaṅa'b minu gu mo 'peni uni mo tani dhali yan'ko'd uni ki ga/ to mo be.

16 Wathin 'deñ kamu/ yisa di'da jin kar sharkin burrinye/ jin diki shum is apo/ burrinyen dhamo/ mo haali/ mo jin 'dapu mo tani midi dher bwa mo 'peni burrinye/ mo, dhali mondher piti midi shi/ mo kagahara.

17 Wakan si'da/ wathin kamu/ diki kar yimana mura'th jin this e bwan kucan yimana muratha dhamo/ mo. Wakki/ a'di midi mii kan mo tani kucan midi 'twak mo dhali yimana mura'th midi gaça sho mo, dhali kucan minu 'ce'd sho'k mo. Hili yimana mura'th minu kar e kucan kun daça kucuru mo dhali wakan uni su/ mini 'ko ka 'dan'dap mo be.

'Bwa/ gi Wathi/ jin Ta Tapa mo dhala 'Bom jin Ta'da Yesu 'Twaman Burrinyem Piti Is ki Me'd mo

18 Ki a'di di'd mmo/o gwo mo wakan i uni mo tani hili tapan kamu/ pu'dki'd mo dhali ca'b ki jin 'kupa'dupuni bwambori a'di mo mmo/o gwo mo ki: 'Bwa/ um pem daça wu'd mo be. Hili yayu/ mo ma dhali kar me'd pini apowa yim mo ka yim midi di ki e mo.

19 Dhala Yesu cuki mis mo dhali bath a'di nsho'k mo nyakki imancik a'di gwo mo be.

20 Dhali hili a'boma kamu/ diki'di mun jin 'kosha is ka nyor mo 'pena bas jin gus a'di ki yili 'kume'd i'ce'dka su/ mo. Dhali a'di pu'dki'd mo n'ko'di a'di mo dhali ta 'twaman burrinyem piti is ki me'd mo,

21 haala yim o gwo mo ki is piti mo ki: Wakki/ aha/ mina ta a'di jasi 'twaman burrinyem piti is ki me'd mo tani aha/ mina isi 'bor mo be.

22 Yesu tu'kki'd mo dhali para yim e mo dhali o a'di gwo mo ki: Buthi adu mo ma, 'bwa/um, mongam gwo is pini wacki /e mo be. Dhali ki jahanne/ mo tani a'bom wacki'd mo be.

23 Dhali ka Yesu pu'dki'd mo e gu'b gi tapa mo tani a'di parki imanpiya thathar e mo dhala waambuhany 'kwani mo mmomiya dulatt mo

24 dhali a'di ki o gwo mo ki: Iiku/ mo ma haali/ ari nyara/ diki wu mo, hili a'di ishi e mo be. Dhali uni pe'th a'di mo be.

25 Hili ka waambuhany 'kwani urkunu ka pije/ 'baar mo tani a'di seki bway bwan gu'b mo dhali butha yim mme'd mo be dhali ari nyara/ cuki mis mo.

26 Dhali gwo gom mii yan mo tani a'di yaki'd ki lala'th mo e bampa/ 'baar mo be.

'Kwaniny Ja'da/ Isu/ kun Bu'thki Momish Mo mo

27 Dhali ka Yesu yaki'd ki yampe mo 'peni mun mo tani 'kwaniny ja'da/ isu/ bathki a'di nsho'k mo mmocu ki 'twa/ kun caaca mo ki: Miiyi mii apo/ aman mo ma, Ya/ ma Dawuu'd mo.

28 Ki a'di cikki gu'b mo tani 'kwani kun tana ja'da/ pu'dkini a'di mo. Dhala Yesu ki o uni gwo mo ki: Um gamki gwo is mo ki aha/ misha to yan mii mo 'taa? Uni tho'k a'di gwo mo ki: Nye, Tapa.

29 Dhali yan'ko'd a'di ki ta uni em buni is ki me'd mo dhali o gwo mo ki: Isi me'd mongam gwo is bum mo tani a'di miikunu gom um mo be.

30 Dhali em buni ka'dkunu mo dhala Yesu ki la kan uni gwo ki 'bi'th mo mmo/o gwo mo ki: Dhalku/ ki dhal wathin kamu/ mmomish a'di yan mo.

31 Hili uni iikini bway mo dhali peper gwom piti ki lala'th mo e pa gwansani 'baar mo.

Wathi/ jin Ta'da 'Diye/ Mishki 'Twa/ Wal mo

32 Me'd jin iikina uni mbway mo tani hili wathin 'diye/ jin bu'th ma rum thus mo suskunu i a'di mo be.

33 Dhali ka rum thus urkunu ka pije/ mo tani wathi/ jin ta'da 'diye/ oki gwo mo dhala waambuhany 'kwani merkin mo mmo/o gwo mo ki: Toñ kamu/

yisa di'da jin paru e mo wakansan 'thissa/ mo e 'Kwani ma Israyiil ki sule/ mo be.

³⁴ Hili 'Kwani Parisiyiin o gwo mo ki: A'di urki'da rum thus ka piye/ ki gway gi tapa ma ruma 'cesh mo be.

Yesus Hilki'da Hil ka 'Thime/ gom 'Kwani mo

³⁵ Dhala Yesus yaki'd e 'penkuman bampa/ 'baar mo dhali e bampa/ si'da/ mmotor gwo e gu'b gi montul is buni mo dhali mmoçi gwom 'borga/ gom Bampa/ ma Arumgimis mo dhali mmowaça ris 'ba'th kun 'koshi 'kwani mo dhali aris isa nyor mo be.

³⁶ Ki a'di parki'da waambuhany 'kwani e mo tani a'di hilki'da hil ka 'thime/ mo gom uni mo haali/ uni 'kokin mo ka ha'th 'ko'd mo dhali dar gi mom'bi'th mo mmowa e ki ka'bal kun dar ga manhil uni mo be.

³⁷ Dhali yan'ko'd a'di ki o imanciğ a'di gwo gwo mo ki: Bwaman mondhe'd iskina to mo tani hili imanmiiya tu'c uni 'koni dağa/ mo be.

³⁸ 'Thoyi wakansan mo ma, ki Tapa gi mondhe'd mididi hashki imanmiiya tu'c mo e bwam mondhe'd piti mo be.

10

Yesus Kwanyki Uni Ny'kume'd I'ce'dka Su/ mo

¹ Dhali a'di yukki uni e a'di mo gun ta kum piti kun 'koni 'kume'd i'ce'dka su/ mo kun ta imanciğ a'di gwo mo dhali çi uni moshirr mo apowa rum thus kun nyo/on mo mmo/ur uni ka piye/ 'peni uni mo dhali mmowaça ris 'ba'th dhali aris isa nyor kun 'koshi 'kwani mo be.

² Dhali gway gi uni kun 'koni 'kume'd i'ce'dka su/ mo kun dhunu ki she/ mo tani wa cikise/ mo be: jin twa/a/ ta'da Simaan, a'di jin yuku gway ka Buterus mo dhala Andaraawus jin ta'da kam piti mo, dhala Yakuub jin ta ya/ ma Sabadi mo dhala Yohaana jin ta'da kam piti mo be.

³ Dhala Pilibbus dhala Bartulamaawus, dhala Tuuma dhala Matta jin ta'da mantera thulpa/ mo, dhala Yakuub jin ta ya/ ma Halpa mo, dhala Taddaawus mo,

⁴ dhala Simaan gi Parj Kaana mo dhala Yahuusa Iskariyuuti, a'di jin 'cithi/ a'di is ki gwo mo be.

Uni kun Hashu ka 'Kume'd I'ce'dka Su/ mo

⁵ Unin 'kume'd i'ce'dka su/ gwansan hashkin ma Yesus ka piye/ mo mmoğan uni gwo mo ki: Dhalku/ ki ii mo e bwaman mo kun 'kona 'kwani kun 'koki ta 'Kwani Yahuuda/ mo ma dhali dhalku/ ki çiç mo e bampa/ gi Pa Saamira mo.

⁶ Hili iyyi mo ma mmodhal mii e i is mo mmoṇap ka'bal kun thisu e mo e gu'b ma Israyiil mo be.

⁷ Dhali çiyi gwo mo me'd jin mina umi ii mo mmo/o ki: Bampa/ gi Momis pu'dki'd mo hila/ e me'd mo be.

⁸ Waçi uni gun 'ba'thkin mo, 'deki uni gun wukin mo, dhali dheleli uni gun 'kosha monthus mo, dhali uri aruma 'cesh ka piye/ mo. Um bu'thki a'di ki dar gi to jin çinu mo, çiyi a'di jin çinu ki dar ga kar 'kus mo.

⁹ Dhalku/ 'dolkon gana/ ki bu'th mo walla 'dolkon kush mo walla gurany 'per eya jisalaan bum mo,

¹⁰ walla kucan mo gom iim bum mo, walla burrinyem bwaman isu/ mo, walla appa/ nsho'k mo, walla to mme'd mo, haali/ amanmiiya tu'c a'di ha me'd gom tonṭem piti mo.

¹¹ Dhali e mom bampa/ yin jin mina umi se mo walla pa mo tani gami a'di jin ha me'd mo e bwaman mo yan mo dhali 'koyi nyakki a'di mo ntagi um mini ii mo.

12 Me'd jin mina umi ciƙ gu'b mo tani theyi a'di me'd mo ma.

13 Dhali wakƙi/ gu'b ha me'd mo tani dhalki moƙku'th is bum pu'dki'da po/ a'di mo. Hili wakƙi/ a'di diki ha me'd mo tani dhalki moƙku'th is bum doƙki'di um ka nyan'ko'd mo.

14 Dhali wakƙi/ a'din 'de/ yin midi diki bu'th um mo walla diki ciƙ gwom bum mo tani biri abuhany 'peni sho'k bum mo ma me'd jin dhalkina um gu'b caan 'pen mo walla pa caan mo.

15 Ka jin gana/ aha/ ona um gwo mo ki a'di mina 'twa/ si'd mo yisa ka tee gi gwon dwall mo gom bampa/ gi Pan Saduum mo dhali Pan Gamuura mo mmobol pa caan e mo yisa.

Monto'c 'Kus Mini Pu'du/ mo

16 Hili mo mo ma, aha/ hashkina um mo ka pije/ mo me'd ka'bal mo e bwaman ma wu mo, wakan yuƙi ki yuƙ mo me'd tasha/ mo, dhali dari ga maƙ mo me'd gurko/ mo.

17 Jiƙi 'kwani ki e ki 'bore/ mo ma haali/ uni mini ci um mo e montul is jin dwallu gwo mo dhali dor um mo e gu'b gi montul is buni mo be.

18 Dhali um minu dir 'ko'da 'cesh mo mbwambori imudhiir mo dhali imalik mo gom gway pem mo mmoƙi gwo mbwambori uni mo dhali 'kwani kun 'koki ta 'Kwani Yahuuda/ mo be.

19 Ki uni mini ci um wakan mo tani dhalku/ is ki anan mo mmo/o gwo mo ki gwonta imina umi o mo walla um mini o ata mo. Haali/ a'di jin mina umi o mo tani minu ci um ki mo yansan mo be.

20 Haali/ a'di diki ta um kun mini o gwo mo, hili Shi/in 'pena Ababam bum oki gwo e um mo be.

21 Akama kamu/ midi ciya kam piti mmowu mo, dhali ababa gi wathin 'denƙ kamu/ midi ci ya/m piti mmowu mo dhali uƙi mini cu mis apo/ ikum mo dhali uni mini dhu uni mmowu mo be.

22 Dhali um minu ishi/ i e mo gom gway pem mo be. Hili a'diyin jin midi 'dim 'kup ntagi 'pemen mo tani a'di minu woƙ mo be.

23 Ki uni mini to'c um bwa mo e baman 'denƙ kamu/ mo tani soyi mo e bamanƙ kamu/ mo. Haali/ ka jin gana/ aha/ ona um gwo mo ki um mini 'koki ii e bampa/ gi 'Kwani ma Israyiili 'baar mo n'wa/a/ ki Ya/ gi 'Kwani midi pu'du/ mo be.

24 Amancik gwo yisa ica'd ka mantor a'di gwo mo yisa, walla cinƙina/ si'da/ yisa ica'd ki tapam piti mo yisa.

25 A'di 'koshi jwa mo goma mancik gwo mo mmowa e ka mantor gwom piti mo be, dhali cinƙina/ si'da/ a'di 'koshi jwa mo mmowa e ki tapam piti mo be. Wakƙi/ uni mini yuƙ tapa gi gu'b gway ka Baalsebuul mo tani bakata 'te/ beseene/ mina uni sor uni gwansan kun 'koni gu'b piti mo.

A'di jin Minu Ko/ mo

26 Wakan dhalki uni ki ko/ mo haali/ toƙ kamu/ yisa di'da jin kumu 'kup mo ki a'di minu 'koki toƙ eya tente/ mo. Walla toƙ kamu/ yisa di'da jin bagkunu mo ki a'di minu 'koki mish eya tente/ mo.

27 A'di jin toƙa/ um ka kwal is mo tani mina umi toƙ e moƙkush mo dhali a'di jin ciƙa um ki kako/ mo tani mina umi toƙ eya tente/ ej 'kuƙgu'b mo be.

28 Dhali dhalku/ ki ko/ uni gwansan kun 'koshi buƙgwar is mo hili uni 'koki misha ƙashira/ 'kosh mo. Hili dhali mii yan e i is mo mmoko/ a'di jin mishki'da ƙashira/ sho'k 'ce'd mo mmon'al 'de/ ki buƙgwar is ilu/ mo e mo ma al o'd mo be.

29 'Konuki yol ushi 'dii su/ ka maliimi su/ mo 'taa? Dhali jan kamu/ 'de/ 'peni uni gwansan midi diki bi'a 'cesh mo ki dar gi bwa ma Ababam bum mo be.

³⁰ Hili amur 'kup bum gana/ uni 'baar mo denj_kunu e mo be.

³¹ Gom a'di gi wakan mo tani dhalku/ is ki ko/ mo ma haali/ um a'di i'bitha yol she/ ki 'bi'th mo mmobol ushi 'dii e mo be.

³² Wakan aris 'kwani 'baar mo ka 'dete/ 'dete/ uni gun mini ci gwo mbwambori 'kwani mo gom aha/ mo tani aha/ si'da/ mina ci gwo gom uni mbwambor ma Ababam pem mo, a'di jin di'd e momis mo be.

³³ Hili a'diyin jin wat_ki aha/ gway mo mbwambori 'kwani mo tani aha/ si'da/ mina wat_a a'di gway mo mbwambor ma Ababam pem jin di'd e momis mo be.

Yisa Moṅku'th Isa, Hili Gandal jin Ka'd mo

³⁴ Dhalku/ ki tosh ki aha/ pu'dkina mo mmokar moṅku'th is e mony'cesh mo. Aha/ dinaki pu'du/ mo mmokaḷ moṅku'th is mo, hili gandala turga/ mo be.

³⁵ Haali/ aha/ pu'dkina mo mmothum wathi/ apo/ com mo dhali a'di jin ta uni a'bwa/um mo tani apo/ kum mo be dhali a'di jin ta uni a'bwa/um eya mar piti mo tani apowa mar pitim 'bomi mo be.

³⁶ Dhali 'kwani kun ta 'kup gom wathin kamu/ mo tani mini ta uni gwansan gi gu'b pitin gana/ mo be.

³⁷ A'di jin eni com kagahara mo walla kum mo mmobol aha/ e mo tani a'di diki ha me'd mo gom aha/ mo be. Dhali a'di jin eni ya/ mo walla 'bwa/ mo mmobol aha/ e mo tani a'di diki ha me'd mo gom aha/ mo be.

³⁸ Dhali a'di jin diki kaḷ cwany'ciṭhan dhul piti mo dhali diki bath aha/ nsho'k mo tani a'di diki ha me'd mo gom aha/ mo be.

³⁹ A'di jin midi gam mondiki/em piti mo tani a'di midi this a'di e mo be, dhali a'di jin midi this mondiki/em piti e mo gom gway pem mo tani a'di midi gam a'di mo be.

To gi Ish Kumma/ mo

⁴⁰ A'diyin jin bu'thki um mo tani a'di bu'thki aha/ mo dhali a'diyin jin bu'thki aha/ mo tani a'di bu'thki a'di jin hashki aha/ mo be.

⁴¹ A'diyin jin bu'thki'da manci gwo ma Arungimis kadhama/ mo haali/ a'di ta'da manci gwo mo tani midi bu'th to jin ish kumma/ ma manci gwo ma Arungimis mo, dhali a'diyin jin bu'thki wathin kar/e mo haali/ a'di ta wathin kar/e mo tani a'di midi bu'th to jin ish kumma/ gi wathin kar/e mo be.

⁴² Dhali a'diyin jin midi pash ari jan tal 'de/ jin gwa'da'd 'peni uni gwansan yi'den 'thupga/ ki 'kwa mo haali/ a'di ta'da manciḷ gwo mo tani ka jin gana/ aha/ ona um gwo mo ki a'di midi diki this tom piti e jin ish kumma/ mo be.

11

¹ Dhali ka Yesus 'baarki gwo yansan mmoye'thkina a'di kum piti kun 'koni 'kume'd i'ce'dka su/ sho'k ki gwo mo kun ta imanciḷ a'di gwo mo tani a'di yaki'd mo 'peni mun mo dhali tor gwo mo dhali ci gwo mo e 'penkuman bampam buni mo be.

Imanhashu mo 'Pena Yohaana jin Ta'da Manmiiya Mii ki Yi'de/ mo

² Dhali ka Yohaana cikki gwo mo ki a'di di'd eya sijin mo gom mii kun miikin ma Kristhos mo tani a'di hashki gwo mo ki imanciḷ a'di gwo mo

³ dhali o a'di gwo mo ki: A/e ta a'di jin midi pu'du/ mo 'taa? walla aman mina hil jan kamu/ mo?

⁴ Dhala Yesus ki thok uni gwo mo ki: Iiku/ mo ma dhali tora Yohaana gwo mo gom to jin cika um mo dhali jin parkina um e mo be

⁵ ki uni gun tana ja'da/ mo tani bu'thki momish mo mo dhali uni gun ta njwol mo tani iin ki sho'k mo, dhali uni gun 'kosha monthus mo tani dhelelkunu is mo dhali uni gun tana 'diye/ mo tani cikki gwo mo dhali uni gun wukin mo tani cukunu mis mo dhali uni gun hatha'ko'd mo tani uni cikunu gwom 'boro'd mo be.

⁶ Dhali mom'bor mii gom a'diyin, a'di jin midi diki bu'th monkol e aha/ mo be.

⁷ Me'd jin iikina uni e bway mo tani Yesu telki mii 'pen mo mmotora waambuhany 'kwani gwo mo isi gwo goma Yohaana mo ki: Atinta iikina um ka pije/ mo mmopar e mo e mombwaasho mo? Apil jin yi'inkina 'tham is mo 'taa?

⁸ Atinta iikina um ka pije/ mo mmopar e mo? Mmopar wathi/ jin hithi burriyeny na'bulka/ e mo 'taa? Hili uni gwansan kun hithi burriyeny na'bulka/ mo tani uni 'kon e gu'b gi imalik mo be.

⁹ Dhali atinta iikina um ka pije/ mo mmopar e mo? Aman'ci gwo ma Arungimis kadhamo/ mo 'taa? Nye. Aha/ tora um gwo mo dhali a'di jin bolo'da man'ci gwo e mo.

¹⁰ A'di yansan ita a'di jin 'kwarkunu gwo mo ki: Hili mo mo ma, aha/ mina hasha gum bway pem mbwambori jis /em pini mo,

a'di jin midi thoson /e bway pini nt'wa/a/ mo be.

¹¹ Ka jin gana/ aha/ ona um gwo mo e bwama uni gwansan kun dhodha up mo tani jan kamu/ yisa di'da jin ca'd ka Yohaana jin ta'da man'niya mii ki yi'de/ mo. Hili a'di jin pisapis mo e Bampa/ gi Momis mo tani a'di nyca'd ki a'di mo be.

¹² Pena tee ma Yohaana jin ta'da man'ni ki yi'de/ mo ntagi shwane/ mo tani Bampa/ gi Momis 'koshu ki mombujur mo dhali 'kwani kun bujurki a'di mo tani bu'thki a'di ki mom'bi'th mo be.

¹³ Haali/ aris iman'ci gwo ma Arungimis kadhamo/ mo dhali gwon'kan jin cinu mo tani di'd mo mmo/o gwo is mo ntaga Yohaana mo be.

¹⁴ Dhali wakki/ um ona bwa ki bu'th a'di mo tani a'di ta'da Iliya jin midi pu'du/ mo be.

¹⁵ Dhali a'diyin jin ta'd gi gu'ban'ce mo tani dhalki a'di cik gwo mo ma.

¹⁶ 'Kwani ma nyakum yil gwansan mo tani miga/ dhu uni ka par 'ban kata mo? Uni wana e ki u'ci kun 'kon mo e mo ma suug mo dhali mmoyuka yuk mo ki uni gun nyak uniya lo'b buni mo ki:

¹⁷ Aman pina athele/ mo gom um mo tani dhali um 'koki sa mo be. Aman gwona mo mmom'niya cinthar mo tani dhali um 'koki ko mo ki kony jwa mo be.

¹⁸ Haala Yohaana pu'dki'd mo dhali diki shwa to mo walla diki pi to mo dhali uni o gwo mo ki: A'di ta'd ga rum thus mo be.

¹⁹ Dhali Ya/ gi 'Kwani pu'dki'd mo dhali shwa to mo dhali pi to mo dhali uni o gwo mo ki: Hili mo mo ma. Amanshwana te/ anyor mo dhali aman'kosh ma su mo, a'di jin ta'da mugu gi imantera thulpa/ mo dhali 'kwani kun ta iman'ni miinthus mo. Hili moyuk a'di karu ka kar/e e mo ki mii ma yimi 'baar mo be.

Wayyi e 'Penkuman Bampa/ kun Ushkina Du Ri'c Is mo

²⁰ Dhali yan'ko'd a'di telki mii 'pen mo mmotor 'kwani gi 'penkuman bampa/ gwo mo ki 'bi'th mo e mo jin miikunu miiny caagam piti nycine/ mo haali/ uni 'koki rica du is mo be.

²¹ Wayyi e um, 'Kwani gi Pa Kurasiin mo. Dhali wayyi e um, 'Kwani gi Pam Beetsayda mo. Haali/ wakki/ adhan miiny caaga/ kun miikunu mo e um mo

tani minu 'taki mii mo e Pan Sur mo dhali e Pan Saydaa/ mo tani uni mini 'taki rica du is mo kadhama/ mo nnii mmohi'th burrinyen shawaal mo dhali 'kosh 'piny mo be.

²² Hili aha/ tora um gwo mo ki a'di mina 'twa/ si'd mo yisa ka tee gi gwon dwall mo gom Pan Sur mo dhali Pan Saydaa/ mo mmobol um e mo yisa.

²³ Dhali um 'Kwani gi Pan Kapranahuum mo a/um minu 'de'k me'd momis mo 'taa? Um minu 'doyu/ ka 'cesh eya Haawiya mo. Haali/ wakka dhana tuca 'bi'thga/ kun miikunu mo e um mo tani minu 'taki mii mo gom Pan Saduum mo tani a'di midu 'taki di ntaga tee yansan mo be.

²⁴ Hili aha/ tora um gwo mo ki a'di mina 'twa/ si'd mo yisa goma tee gi gwon dwall mo gom Pan Saduum mo mmobol um e mo yisa.

Iiyu/I Aha/ mo ma, dhali Siyi Is mo

²⁵ Dhali ki mo caan mo tani Yesus ki tor gwo mo eya tente/ mo ki: Aha/ 'bora /e bwa i is mo. Ababa jin ta Tapa gi momis mo dhali mony'cesh mo, ki /e bagki to gwansan 'peni 'kwani kun yukayuk mo dhali kun mishi gwo 'ban mo mmo'tor a'di eya tente/ ki uni gun tana 'pereny mo be.

²⁶ Nye, Ababa, gom ku gi wakan mo tani a'them pini ona bwa mo be.

²⁷ Aris to 'baar mo cikunu aha/ mo ka Ababam pem mo dhali jan 'den kamu/ yisa di'da jin mishki Ya/ mo hili isi ciki/ Ababa mo, dhali jan 'den kamu/ yisa di'da jin mishki'da Ababa mo hili isi ciki/ a'di jin ta Ya/ mo dhali ma a'din 'de/ yin jin mina Ya/ ikwany mo tani mina a'di itor eya tente/ mo be.

²⁸ Iiyu/ i aha/ mo ma, aris 'kwani 'baar mo kun miina tu'c mo dhali kun 'thira ton diti'd mo, dhali aha/ mina ci um mosi/is mo.

²⁹ Buthi dhan'ka'b tom 'bam pem apo/ um mo ma dhali da/ari 'peni aha/ mo haali/ aha/ tana man'thup e pem dhali amankar is ki gwa'd eya du mo dhali um mini gam mosi/is goma kashiram bum mo be.

³⁰ Haali/ dhan'ka'b tom 'bam pem mo tani a'di 'disha'dish mo dhali tom pem jin kalka/ mo tani a'di po'dapo'd mo be.

12

Imancik Gwo Uni 'Ce'dki Pos ka Cim ma Pesu/ mo be

¹ Dhali ka tee caan mo tani Yesus yaki'd mo e bwam bunto mo ka cim ma pesu/ mo dhali imancik a'di gwo uni 'koshkina te/ mo be dhali uni telki mii 'pen mo mmo'ce'd pos mo dhali mmo'ka a'di mo be.

² Hili ki 'Kwani Parisiyin parki a'di jin miikunu e mo tani uni oki a'di gwo mo ki: Hili imancik /e gwo uni miiki to jin dina gwonkan jin cinu ki dhal bway mo mmomii ka cim ma pesu/ mo be.

³ Dhali a'di ki o uni gwo mo ki: 'Kona um ki den Gwo ma Dawuu'd e mo 'taa? ki a'di 'kosha te/ mo tani dhali uni gwansan kun nyakki 'ko ki a'di mo tani

⁴ ba a'di cicki gu'b ma Arungimis mo dhali shwa maan'kuthu'd jin di'di bur'kus mo, a'di jin dina gwonkan jin cinu ki dhal a'di bway mo mmoshwa mo walla uni gwansan kun nyakki 'ko ki a'di mo, hili gom igasiis uni 'cena mo be.

⁵ Walla 'kona um ki den gwonkan jin cinu e mo goma cim ma pesu/ mo ki igasiis kun 'kon e gu'b gi mondheleladhelel mo tani uni 'koki kara cim ma pesu/ ki jin kogu mo dhali uni 'kon ka po/ mo?

⁶ Aha/ tora um gwo mo ki jan kamu/ jin ca'd jin bol gu'b gi mondheleladhelel e mo tani di'di mahan mo be.

⁷ Dhali wakki/ um mini mish 'pemen gwo yansan mo tani, aha/ ona bwa ki momiimii mo dhali yisa abas jin 'ciṭṭu/ mo, um mini 'taki 'koki wak uni gun 'kon ka po/ mo be.

⁸ Haali/ Ya/ gi 'Kwani a'di ta tapa ga cim ma pesu/ mo be.

Wathi/jin Kutha Me'd Gunḡkuru/ mo

⁹ Dhali a'di yaki'd mo 'peni mun mo dhali ciḡki'd mo e gu'b gi montul is buni mo be.

¹⁰ Dhali hili wathiṅ kamu/ diki'd mmun mo jin kutha me'd gunḡkuru/ mo dhali uni dotki a'di gwo mo ki: A'di ta gwo jin dhala gwoṅkan jin cinu bway mo mmowaḡa/ waḡ mo ka cim ma pesu/ mo 'taa? Wakan ki uni mini 'taki ta gi gwo mmoyer a'di is ki gway mo be.

¹¹ Dhali a'di ki o uni gwo mo ki: Wathi/ jana di'di bwam umme, a'di jin ta'd gi ka'bala 'de/ jin bitki'd e bwam jis mo ka cim ma pesu/ mo, mina a'di diki ya mo mmobu'th a'di mo dhali mmokal a'di ka piḡe/ mo 'taa?

¹² Bahili wathimpa a'di gama she/ yol ki gam mo mmobol ka'bal e mo. Wakan a'di ta gwo jin dhala gwoṅkan jin cinu bway mo mmomii miim 'boro'd ka cim ma pesu/ mo be.

¹³ Dhali yan'ko'd a'di ki o wathi/ gwo mo ki: Hethi me'd pini mo ma. Dhali wathi/ he'thki me'd piti mo dhali a'di waḡkunu mo dhali a'di 'borkina me'd mo me'd jaṅ kamu/ mo be.

¹⁴ Hili 'Kwani Parisiyiin iikin ka piḡe/ mo dhali bu'th gwo jin gamu me'd apo/ a'di mo gom mii jin mina uni 'ce'd a'di sho'k mo be.

Gwo ma Ishaya jin Onu Is Thimkunu mo be

¹⁵ Dhala Yesus a'di nyithki mii yansan mo dhali yaki'd mo 'peni mun mo. Dhali 'kwani ka ris baṭṭhi a'di nsho'k mo dhali a'di ki waḡ uni 'baar mo be.

¹⁶ Dhali a'di ki kan uni gwo mo mmodhalku/ ki dhal a'di ki a'di minu mish mo.

¹⁷ Dhali mii yansan a'di ta gwo jin thimkunu mo jin okin ma amanci gwo ma Arungimis kadhamo/ mo jin ta'da Ishaya mo ki:

¹⁸ Hili mo mo ma, ciṅkinam pem a'di jin kwanyka/ mo tani jin ta a'di jin enka/ mo dhali a'di jin 'bor ma kaṡhiram pem bwa i is mo tani

aha/ mina ci Shi/in pem apo/ a'di mo,

dhali a'di midi tor gwo gom miinḡkar/ e gom 'kwani kun 'koki ta 'Kwani Yahuuda/ mo be.

¹⁹ Dhali a'di midi diki wal mo walla midi diki ko kagahara mo walla mina jan 'deṅ kamu/ diki ciḡ 'twam piti mo e bway tur jin iinu mo be.

²⁰ Dhali a'di midi diki 'ce'd bwa mo me'd apil jin mu/u mo

walla midi diki usa thus jin mura she/ ikup mo

ntagi a'di midi kal mo ma kar/ e ki mo jin minu pi mii e mo be.

²¹ Dhali ki gway piti mo tani a'di mina 'kwani kun 'koki ta 'Kwani Yahuuda/ ita ga 'teṅ kape/ mo be.

Gwo Sor jin Walu apo/ Shi/in Dheleladhelel mo

²² Dhali yan'ko'd wathi/ jin ta'da ja'da/ mo dhali jin mol 'twa/ wal mo dhali jin bu'th ma rum thus mo tani kalkunu mo e a'di mo dhali a'di ki waḡ a'di mo. Wakan a'di jin mol 'twa/ wal mo tani a'di oki gwo mo dhali par to e mo be.

²³ Dhali aris 'kwani 'baar mo merkin mo dhali o gwo mo ki: Dina yan ki ta Ya/ ma Dawuu'd mo 'taa?

²⁴ Hili ki 'Kwani Parisiyiin ciḡki a'di mo tani uni o gwo mo ki: A'di ta jasi jim ma Baalsebuul mo jin ta tapa ma ruma 'cesh mo jin urkina wathi/ yansan arum thus ka piḡe/ mo.

25 Dhali a'di mishki gwom buni kun kuluma uni ibwa mo tani a'di ki o uni gwo mo ki: Aris 'penkuman bampa/ kun k_wa/u bwa mo e is buni mo tani uni shi/ki is mo dhali 'penkuman bampa_n kamu/ walla gu'b jin k_wa/u bwa mo e is piti mo tani mididi mol dosh mo be.

26 Dhali wakka Setaan uru'da Setaan ka pije/ mo tani a'di k_wa/u bwa mo apo/ is piti mo. Ba bampam piti mididi mish dosh kata mo?

27 Dhali wakki/ aha/ ura aruma 'cesh ka pije/ ki gway ma Baalsebuul mo tani a/dhali iya/m bum mini ur uni ka pije/ kaja mo? Wakan uni mini ta um imandwall gwo mo.

28 Hili wakki/ ki Shi/in ma Arumgimis jin urka/ aruma 'cesh ka pije/ mo tani dhali yan'ko'd Bampa/ ma Arumgimis mididi pu'du/ apo/ um mo be.

29 Walla ki wathi/ mididi ciç gu'b gi wathi/ jin 'bitha'bi'th kata mo dhali kal tom piti mo hili isi ciki/ a'di mididi mii de_k wathi/ jin 'bitha'bi'th ka shi/ nt_wa/ a/ mo. Dhali yan'ko'd mo tani ka jin gana/ a'di mididi k_wal gu'b piti to mo be.

30 A'di jin diki di nyakki aha/ mo tani a'di di'd apo/ aha/ mo dhali a'di jin diki nyak is tul ki aha/ mo tani a'di ta'da a_kw_a/um bwa ki aha/ mo be.

31 Wakan aha/ tora um gwo mo ki: Ka aris miinthus mo dhali gwo sor jin wala 'kwani mo tani uni dhalkunu 'kwani 'pen mo be. Hili a'di jin wal gwo sor apo/ Shi/in mo tani yisa minu dhal miinthus piti 'pen mo ki sule/ mo.

32 Dhali a'diyin jin mididi o gwo apo/ Ya/ gi 'Kwani mo tani a'di minu dhal miinthus piti 'pen mo, hili a'diyin jin o gwo sor apo/ Shi/in Dheleladhelel mo tani a'di minu 'koki dhal miinthus piti 'pen mo hili ki she/ yil yan mo walla ki yil jin mididi pu'du/ mo be.

33 Hili kari cwa jin 'boro'd mo dhali maman piti jin 'boro'd mo, walla kari cwa jin shiyi'd mo dhali maman piti jin shiyi'd mo, haali/ cwa mishu ki maman piti mo be.

34 Um uçi gi tasha/, um mishu gwo jin 'boro'd o kata mo? ki um ta kun ta thus ki thus kan mo? Haali/ 'peni mo jin isha to k_um_ma/ eya du mo tani 'twa/ a'di ciki gwo mo be.

35 Dhali wathim 'boro'd jin isha tom 'boro'd k_um_ma/ eya du mo tani a'di kalki miim 'boro'd mo dhali wathi/ jin ta thus jin isha tonthus k_um_ma/ eya dum piti mo tani a'di kalki tonthus mo be.

36 Aha/ tora um gwo mo eya tee yan gi gwon dwall mo tani 'kwani minu kam 'kup ki gwo mo goma ris gwo 'baar mo ki 'beles kun th_utha uni mii mo mmo/o mo be.

37 Haali/ ki gwom pini mo tani /e minu kar ka kar/e mo dhali ki gwom pini mo tani /e minu wak_u mo be.

'Kwani kun Tana Nyakum Yil kun Ta Thus ki Thus mo Nyakki Jamas Mii mo

38 Dhali yan'ko'd iman'kwar ton tiya dhali 'Kwani Parisiyiin mo tani uni oki a'di gwo mo ki: Aman_tor gwo, aman ona bwa ki par jamas mii e 'peni /e mo be.

39 Hili a'di thokki uni gwo mo ki: 'Kwani kun ta thus ki thus mo dhali kun ta imanmii miinyal ka nyakum yil buni mo tani simmki jamas mii e mo, hili jamas mii yisa minu çi gom uni mo hili isi ciki/ jamas mii jin ta'da amançi gwo ma Arumgimis kadhama/ mo jin ta'da Yuunaan mo be.

40 Haali/ me'd jin dikin ma Yuunaan ka cim kwara mo dhali ka cim kwara ki mon'thiny ilu/ mo e bwan to yi'de/ mo tani wakan si'da/ mina Ya/ gi 'Kwani di ka cim kwara mo dhali ka cim kwara ki mon'thiny ilu/ mo eya du gi mony'cesh yansan mo be.

41 'Kwani gi Pa Ninawa mini cu mis mo e gwon dwall mo nyakki 'kwani ma nyakum yil gwansan mo dhali uni mini wak_u uni mo, haali/ uni 'koki rica du

is mo gom gwo jin cikin ma Yuunaan mo, dhali hili jan kamu/ di'di mahan mo jin ekki'd ka Yuunaan mo be.

⁴² Dhala yim jin ta'da malik 'peni 'ko'd gwar ma biny cam mo tani midi cuyu/ mis mo e gwon dwall mo nyakki 'kwani ma nyakum yil gwansan mo dhali wak uni mo be haala yim pu'dki'd mo 'peni mo jin dina mony'cesh 'kup mo mmocik yuk ma Sulemaan mo dhali hili mo mo ma, jan kamu/ di'di mahan mo jin ekki'd ka Sulemaan mo be.

Mo jin Dokkin ma Rum Thus kun Nyo/on ka Nyan'ko'd mo

⁴³ Ka rum thus kun nyo/on iikin ka pije/ 'peni wathi/ mo tani a'di yaki'd ki tur mo e mo jin dar gi yi'de/ mo mmoṅap mo mo mmosi/is mo hili a'di diki gam mo mo be.

⁴⁴ Dhali yan'ko'd a'di ki o gwo mo ki: Aha/ mina dok ka nyan'ko'd mo e gu'b pem mo 'peni mo jin yayika/ mo 'peni cine/. Dhali ki a'di pu'dki'd mo tani a'di gamki a'di bwa 'te/ mo mmodhi'thkunu a'di mo dhali mmothosonkunu aris to 'baar mo ki 'bore/ mo be.

⁴⁵ Dhali yan'ko'd a'di ki ya mo dhali susa rum thus kun 'koni pesu/ nyakki a'di mo kun ta thus ki thus mo mmobol a'di e ki is piti mo dhali uni cikin mo dhali nyakki 'ko mo. Dhali monyca'b gi wathi/ jin ta jin 'ko'd mo tani a'di warki'd ki shi/ mo mmobol jin twa/a/ e mo be. Wakan si'da/ a'di mina e waki 'kwani ma nyakum yil gwansan kun ta thus ki thus mo be.

KoYesus dhali Ikam Piti mo

⁴⁶ Dhali ki a'di di'd mmo/o 'kwani gwo mo tani hili kum dhali ikam doshkina pije/ mo mmodot gwo mo mmoṭora ṭor ki a'di mo be.

⁴⁷ Wathin kamu/ ṭorki a'di gwo mo mmo/o gwo mo ki: Ata'dam pini dhali ikam pini uni 'kokin mo mmodosha pije/ mo mmodot /e mo mmoṭora ṭor ki / e mo be.

⁴⁸ Hili a'di thoḳ wathi/ gwo mo dhali o a'di gwo mo ki: Aja a'di ita'da ata'dam pem mo dhali aja a'di ita ikam pem mo?

⁴⁹ Dhali a'di ki he'th me'd piti mo 'kup ki imancik a'di gwo mo dhali a'di ki o gwo mo ki: Ita'dam pem anan mo dhali ikam pem anan mo be.

⁵⁰ Haali/ a'diyin jin mii bwa ma Ababam pem jin di'd e momis mo tani a'di ta'da akam pem mo dhali 'bwah pem mo dhali ata'dam pem mo be.

13

Gwom 'Bi'th/e goma Ka'bany To jin Yeku mo

¹ Dhali ka teen 'de/ caan mo tani Yesus yaki'd ka pije/ mo 'peni gu'b mo dhali ca'bki'di shemena al mo be.

² Dhali adhana waambuhany 'kwani tulki is mo e a'di mo. Wakan a'di sekina a'di mo e bwam ma kur mo dhali ca'b nycine/ mo dhali awaambuhany 'kwani uni doshkini shemen ma gap mo be.

³ Dhali a'di ki ṭor uni gwo ka ris ki gwom 'bi'th/e mo ki: Amanyeka ka'bany yaki'd mo mmoyeka ka'bany mo be.

⁴ Dhali ki a'di yekki'd mo tani aka'banya tiya bitkin mo e bway tur kun iinu mo dhali 'dii pu'dkin mo dhali los uni mo be.

⁵ Dhali aka'banya tiya bitkin mo eya 'cesh gi embul wosh mo, e mo jin dara uni ka 'cesh ki nyanye/ mo tani dhali ki jahanne/ uni 'kana le/ mo haali/ uni dar gi embul mo e mo ma 'cesh mo be.

⁶ Hili ka tente/ sulki'd mo tani uni shi'bilkunu mo dhali haali/ uni daran ga birman mo tani uni ku'thkin ka bush'ko'd mo be.

⁷ Aka'banya tiya uni bitkin mo e bwam ma 'de/ mo dhali ka 'de/ can mo tani uni cokatki uni mo be.

⁸ Aka'banya tiya uni bitkin mo eya 'cesh jin 'boro'd mo dhali uni dho'th maman mo, jan kamu/ dhotho'di iss 'kwanimpa ka mudhe'd mo dhali jan kamu/ dhotho'di iss 'kwanimpa ka 'de/i'ce'dka 'kume'd mo be.

⁹ A'diyin jin ta'd gi gu'ban'ce mo tani dhalki a'di cik gwo mo ma.

Kup Gwo gom Gwom 'Bi'th/e mo

¹⁰ Dhali yan'ko'd imancik a'di gwo pu'dkini a'di mo dhali o a'di gwo mo ki: Arinta tora/e uni gwo ki gwom 'bi'th/e mo sa/?

¹¹ Dhali a'di ki thok uni gwo mo ki: E um mo tani um cinu gwo mo mmomish gwo jin cinu ki jin bag mo gom Bampa/ gi Momis mo, hili e uni mo tani uni 'konuki ci a'di mo be.

¹² Haali/ e a'diyin jin ta'd gi nyanye/ mo tani minu ci a'di ki nyanye/ mo be dhali a'di midi ta gi a'di jin ishki'd ka enthus mo. Dhali hili 'peni a'diyin jin dara'd mo tani hili me'd jin tana a'di gi a'di mo tani minu bu'th 'peni a'di mo be.

¹³ A'di ta 'pemen gwo a'danni jin oka/ gwo e uni ki gwom 'bi'th/e mo haali/ uni hilki to gun 'kona uni ki mish mo dhali uni cikki gwo kun 'kona uni ki cik mo walla uni 'koki mish gwo 'ban mo be.

¹⁴ E uni ka jin gana/ mo tani gwo thimkunu mo jin onu is mo eya Ishaya jin o'd ki:

Um ka jin gana/ mini cik gwo mo tani hili um mini 'koki mish gwo 'ban ki sule/ mo,

dhali um ka jin gana/ mini par to e mo tani hili um mini 'koki nyith to ki sule/ mo be.

¹⁵ Haala dun 'kwani gwansan uni warkin ka du kun dhethadhe'th mo dhali 'cem buni mo tani usa/us mo mmocik gwo mo, dhali em buni mo tani uni 'dapkin mo be.

Hili isi ciki/ ki uni mini 'taki nyith to ki em buni mo

dhali cik gwo ki 'cem buni mo

dhali mish a'di 'ban ka dum buni mo

dhali tu'k mo e aha/ mo jin miga/ 'taki waç uni mo be.

¹⁶ Hili mom'bor mii gom em bum mo haali/ uni mishki to mo dhali 'cem bum mo haali/ uni cikki gwo mo be.

¹⁷ Ka jin gana/ aha/ ona um gwo mo ki imanci gwo ma Arumgimis ka ris mo dhali 'kwani kun tana kar/e mo tani uni 'koshkina te/ mo mmohil a'di jin misha um mo tani dhali uni 'koki par a'di e mo dhali mmocik a'di jin cikkina um mo dhali uni 'koki cik a'di mo be.

Yesus A'di Torki 'Pemen Gwo gom Gwom 'Bi'th/e gom To jin Yeku mo

¹⁸ Gom a'di gi wakan mo tani ciki gwo gom gwom 'bi'th/e goma manyeka ka'bany to mo ma.

¹⁹ Ki a'din 'de/ yin jin cikki gwo gom Bampa/ ma Arumgimis mo dhali diki mish a'di 'ban mo tani a'din thus 'de/ yin pu'dki'd mo dhali kwany gwo jin sinu eya dum piti mo be. A'di yansan ta a'di jin yeku e bway tur jin iinu mo be.

²⁰ Dhali me'd gom a'di jin yeku e embula 'cesh wosh mo tani a'di ta a'di jin cikki gwo mo dhali ki jahanne/ a'di ki la bu'th a'di ki bwarj 'kunya/ mo,

²¹ hili a'di dara'd ga birman e is piti mo hili a'di di'd ari'ceenne/ mo dhali ki mont'o'c bwa pu'dki'd mo walla ki mon'kosha 'kosh cuki'd mo gom gway gi gwo mo tani ki jahanne/ a'di bitki'd mo be.

²² Dhali wakan gom a'di jin yeku mo e bwam ma 'de/ mo tani a'di yansan ita a'di jin cik gwo mo, dhali hili a'di bala to ga 'cesh is mo dhali 'penkapan piti jin tana a'di pa ki pa mo tani cokat a'di mo dhali a'di mol dho'th maman mo be.

23 Dhali gom gwo gi a'di jin yeku mo eya 'cesh jin 'bora'bor mo tani a'di yansan nta a'di jin cik gwo mo dhali mish a'di 'ban mo dhali a'di ka jin gana/dhodhi maman mo be, dhali adho'th piti jin dhodha a'di eya tora 'de/ mo tani ta iss 'kwanimpa mmudhe'd mo dhali jan kamu/ ki iss 'kwanimpa ikwara mo, dhali jan kamu/ ki iss 'de/ i'ce'dka 'kume'd mo be.

Biriny e Bwam Pos jin Sinu mo

24 Dhali gwom 'bi'th/enj kamu/ kara a'di uni mbwambor mo mmo/o gwo mo ki: Bampa/ gi Momis mo tani mishu kar ka par 'ban mo me'd wathi/ jin yekki'da ka 'bany tom 'boro'd e bwaman buntom piti mo be.

25 Hili ki 'kwani ishki e mo tani a'di jin ta 'kup gi a'di pu'dki'd mo dhali yek biriny e bwaman pos piti mo dhali a'di ki ya mo be.

26 Wakan ki to jin sinu mo 'kaki'da le/ mo tani dhali dho'th emen mo tani dhali yan'ko'd biriny pikin si'da/ mo be.

27 Dhali ki imanmiiya tu'c gi com gu'b pu'dkin mo dhali o a'di gwo mo ki: Tapa, dina /e ki yeka ka'bany to jin 'boro'd e bwam buntom pini mo 'taa? Atinta winya biriny isi pi mo?

28 A'di ki o uni gwo mo ki: A'di jin ta 'kup, a'di mii mii yansan mo be. Dhali imanmiiya tu'c o a'di gwo mo ki: A/dhali /e n*api* aman mmo/ii mo mmotul uni is mo 'taa?

29 Hili a'di ki o gwo mo ki: Yisa. Hili isi ciki/ ki um mini tul biriny is mo tani um mini buk pos si'da/ mo mmo*ntal* 'de/ nyakki uni mo be.

30 Dhalki uni cani mo*ntal* 'de/ mo ntagi bwam mondhe'd mo dhali bwam mondhe'd min ma teem piti 'baar mo jin minu 'cith a'di to mo tani aha/ mina tor iman'cith to gwo mo ki: 'Cithi/ to mo ma mmotul biriny is n*tw*a/a/ mo dhali dek uni ki dekken mo mmo*ci*'th mo hili tuli pos is mo e bwam themes pem mo ma.

Emen To jin Miinuwa 'Tash mo

31 Dhali gwom 'bi'th/enj kamu/ kara a'di uni mbwambor mo mmo/o gwo mo ki: Bampa/ gi Momis a'di wana e ki emen to jin miinuwa 'tash mo, a'di jin kala wathi/ mo dhali yek mo e bwam buntom piti mo be.

32 Emen to a'di ta piri'th ki piri'th mo be hili ki a'di caki'd mo tani a'di wurupa wurup kagahara mo dhali warki'd ki cwa mo. Wakan 'dii kun pen e mis mo tani pu'dkin mo dhali nyan gu'b buni eya bim piti mo be.

Gwo goma Cumat mo

33 A'di ki tor uni gwom 'bi'th/enj kamu/ mo mmo/o gwo mo ki: Bampa/ gi Momis wana e ka cumat jin ka*l* ma 'bom mo dhali kum a'di 'kup mo eya dipany jin baru ka uca*n*ji kwara mo ntagi a'di sha'bki'di 'baar mo be.

Mo gi Bu'th ma Yesus Gwom 'Bi'th/e Mmotor mo

34 Aris gwo gwansani 'baar mo okin ma Yesusa waambuhany 'kwani ki gwom 'bi'th/e mo. Ka jin gana/ a'di diki o gwo*n* kamu/ ki dar gi gwom 'bi'th/e mo be.

35 A'di ta gwo jin minu thim mo jin okin ma amanci gwo ma Arungimis kadhamo/ ki:

Aha/ mina ka'd 'twam pem mo mmotor gwom 'bi'th/e mo be.

Aha/ mina tor eya tente/ to jin bagu mo ki mony'cesh ka'bkunu mo be.

Yesus A'di Torki 'Pemen Gwom 'Bi'th/e goma Biriny jin yeku e Bwam Pos mo

36 Dhali yan'ko'd a'di dhalki'da waambuhany 'kwani 'pen mo dhali a'di yaki bway gu'b mo. Dhali imancik a'di gwo pu'dkini a'di mo mmo/o a'di gwo mo ki: Tori aman 'pemen gwom 'bi'th/e mo ma gom biriny jin yeku e bwam bunto mo.

37 Dhali a'di thok gwo mo ki: A'di jin yekki emen to jin 'boro'd mo tani ta Ya/ gi 'Kwani mo be.

38 Dhali bwam mondhe'd mo tani a'di ta mony'cesh mo be. Dhali emen to tani a'di ta 'pemen gwo gom iya/ gi Bampa/ gi Momis mo. Dhali 'pemen gwo gom biriny mo tani a'di ta iya/ gi a'din thus 'de/ yin mo be.

39 Dhali a'di jin ta 'kup jin si'da ka 'bany to e uni mo tani ta tapa ma ruma 'cesh mo be. Dhali bwam mondhe'd mo tani a'di ta mo jin 'disha 'pemen mo mo mmodi 'kup mo be. Dhali iman'ciṯh to mo tani ta iman'doyu gwo mo be.

40 Jasi me'd biriny kun tulu is mo dhali ci'th ki o'd mo tani wakan a'di mina embul mo i'dish 'twa/ mo be.

41 Haali/ Ya/ gi 'Kwani midi hash iman'doyu gwom piti mo dhali uni mini tul uni gwansan is ka piye/ 'peni bampam piti mo aris uni gun rakki miinthus mo dhali aris uni gun miiki to kun ta thus ki thus mo.

42 Dhali uni mini ta'k uni e mo/o'd jin ca'bki wur wur mo. Dhali e mun mo tani 'kwani mini ko mo dhali 'pe'd shem buni mo be.

43 Dhali uni gun miin ka kar/e mo tani mini 'twak mo mo me'da tente/ 'peni Bampa/ ma Ababam buni mo be. A'di jin ta'd gi gu'ban'ce mo tani dhalki a'di cik gwo mo ma.

To jin Ish Kumma/ jin Bagu mo

44 Bampa/ gi Momis mo a'di wana e ki to jin ish kumma/ jin bagu mo e bwam bunto mo, jin gama wathi/ mo dhali kum 'kup mo. Yan'ko'd gom bwan 'kunygam piti mo tani a'di ki ya mo dhali yol a'di 'baar mo, a'di jin tana a'di mo jin mina a'di yol bunto caan mo be.

Dhema/ jin 'Bitha Yol She/ ki 'Bi'th mo

45 Dok/e Bampa/ gi Momis a'di wana e ki wathi/ jin mii'da dukkaan mo jin napi dhema/ jin gama gam mo be.

46 A'di, ki a'di gamki a'din 'de/ jin caaca mo jin 'bitha yol she/ ki 'bi'th mo tani a'di yaki'd mo dhali yol a'di 'baar mo, a'di jin tana a'di mo ki a'di midi yol a'di mo be.

Gwo goma 'Thi/ mo

47 Dok/e Bampa/ gi Momis a'di wana e ka 'thi/ mo, a'di jin yipu mo e bwam yi'de/ mo dhali mmomusha ris wa'c ka entus ki e ki she/ ki she/ mo be.

48 Dhali ki a'di 'tu'dki'd mo tani 'kwani ki dir a'di ka gap mo dhali 'ko 'pena 'cesh mo dhali lak uni gun 'boron mo e bwaman ton'kul bwa mo, hili kun shiyin mo tani taguwa sho mo be.

49 Wakan si'da/ a'di midi ta mo jin 'disha 'twa/ mo. Iman'doyu gwo mini pu'du/ mo dhali kwa/ 'kwanin thus bwa mo 'peni uni gun miin ka kar/e mo be.

50 Dhali ta'k uni e mo o'd jin ca'bki wur wur mo be. Dhali e mo yin mo tani 'kwani mini ko mo dhali 'pe'd shem buni mo be.

To kun Ish Kumma/ kun This dhali kun Dhamo/ mo

51 A/um mishi gwo gwansan 'bani 'baar mo 'te/ sana? Uni thok a'di gwo mo ki: Nye.

52 Dhali a'di oki uni gwo mo ki: Wakan si'da/ iman'kwar to 'baar mo uni gun ye'thkunu sho'k mo gom Bampa/ gi Momis mo tani uni wana e ki com gu'b jin kalki tom piti jin ish kumma/ mo ka piye/ mo a'di jin ta jin this mo dhali jin dhamo/ mo be.

Yesus A'di Wakunu mo e Pa Naasira mo

53 Dhali ka Yesus 'baarki gwom 'bi'th/e gwansan mo tani a'di yaki'd 'peni mun mo be.

⁵⁴ Dhali a'di pu'dki'd mo e bampam pitin gana/ mo dhali tor uni gwo mo e gu'b gi montul is buni mo. Wakan uni merkin mo dhali o gwo mo ki: 'Peni mana gama wathi/ yansan yuk kan mo sa/? Dhali mii mii gwansan kun eka/ ek mo?

⁵⁵ Dina a'di ki ta ya/ ma manpa/ cwa mo 'taa? Dhali din ma kam piti ki ta Yakuub mo dhala Yuusup mo dhala Simaan mo dhala Yahuusa mo 'taa?

⁵⁶ Dhali 'kona i'bwaham piti 'baar mo ki nyaƙ 'ko ki ana mo 'taa? Dhali 'peni mana gama wathi/ yansan aris to gwansani 'baar mo kan?

⁵⁷ Dhali uni kolu ki a'di mo be. Hila Yesus ki o uni gwo mo ki: Amanci gwo ma Arungimis yisa dar gi tak e mon tiya yisa, hili isi ciki/ e bampam piti mo dhali e gu'b pitin gana/ mo be.

⁵⁸ Dhali a'di mol mii mii gun 'bitha'bi'th mo e mun gom uni dar gi gwo jin gamu is mo be.

14

Mowu ma Yohaana jin Ta'da Manmiya Mii ki Yi'de/ mo

¹ Dhali ka tee caan mo tani Hirodus jin ta'da rub ra/iis cikki gwo goma Yesus mo be.

² Dhali a'di ki o cinƙinam piti gwo mo ki: A'di ta'da Yohaana jin ta'da manmiya mii ki yi'de/ mo be. A'di 'de'kkunu mo 'peni mowu mo. A'di miikina a'di aris to gwansan ki mom'bi'th mo.

³ Haala Hirodus bu'thki'da Yohaana mo dhali deƙ a'di mo dhali kar a'di eya sijin mo gom gway ma Hirodiyya mo ash ma kam piti ka Pilibbus mo be.

⁴ Haala Yohaana o a'di gwo mo ki: Haali/ a'di diki ta mii gi gwoƙan mmokar ayim mo be.

⁵ Dhali hili a'di naƙ a'di mmo'kosh jwa mo tani a'di ko/ki 'kwani mo haali/ uni karki a'di ka manci gwo ma Arungimis mo be.

⁶ Hili ka cim jin dhodhuwa Hirodus pu'dki'd mo tani 'bwa/ ma Hirodiyya saki'd mo mbwambori 'kwani mo dhali a'di 'boro'da Hirodus bwa mo be.

⁷ Wakan a'di ki o a'di gwo is mo ka ba/ gom to jin mina a'di ciya yim mo to yin jin mina a'di doƙ a'di mo be.

⁸ Dhali ayim logomkina kum ki gwo mo mmo/o gwo mo ki: Ciya/ 'kup ma Yohaana jin ta'da manmii ki yi'de/ shwanesan mo e bwam ma sahan mo.

⁹ Dhala malik a'di shina bwa mo, hili haali/ gom gwo jin ona a'di is mo dhali yilkinam piti mo tani a'di kanki gwo mo ki a'di minu guyu/ mo be.

¹⁰ A'di hashki gwo mo dhala Yohaana 'cithkunu 'kup mo eya sijin mo be.

¹¹ Dhali 'kup piti guyunu mo e bwam ma sahan mo dhali ciki nyara/ mo dhala yim ki kalki a'di ki kum mo be.

¹² Dhali imancik a'di gwo pu'dkin mo dhali kal bungwar is piti mo dhali kan a'di mo, dhali uni iikin mo dhali tora Yesus gwo mo be.

'Kwani Alaapi Mudhe'd kun Cikunu Tonte/ mo

¹³ Ka Yesus cikki gwo yansan mo tani a'di yaki'd mo 'peni mun eya kur yi'de/ mo e mo jin dar gi 'kwani mo is 'ko'd mo be. Hili ka waambuhany 'kwani cikki gwo mo tani uni iikin mo mmobath a'di nsho'k mo ki sho'k 'peni bampa/ mo.

¹⁴ Ki a'di yaki'd e shemena gap mo tani a'di parki'da dhana waambuhany 'kwani e mo, dhali a'di ki ko'c uni e i is mo dhali waƙ ba'th buni mo be.

¹⁵ Ki mo ta mom'pimpili/ mo tani imancik a'di gwo pu'dkini a'di mo dhali o a'di gwo mo ki: Mo yansan dar gi 'kwani mo be dhali shwane/ atente/ yulu'd mo. Hashka waambuhany 'kwani bway pa mo ma mmoyol tonte/ gom is buni mo.

16 Yesus ki o uni gwo mo ki: Uni mini mii ta gi bway mmo/ii bway pa mo yisa. Um mini ci uni tonte/ mmoshwa mo be.

17 Uni ki thoḱ a'di gwo mo ki: Am tana gi jasi maanḱuthu'di mudhe'd mmahan mo dhali to yi'de/ isu/ mo be.

18 Dhali a'di ki o uni gwo mo ki: 'Doyi uni mmahani aha/ mo ma.

19 Dhali yan'ko'd a'di ki kana waambuhany 'kwani gwo mo mmo'ko 'pena 'cesh apowa sho mo. Dhali a'di ki bu'th maanḱuthu'di mudhe'd mo dhali to yi'de/ nsu/ mo tani a'di ki hil 'kup ki 'ce'd a'di mo dhali a'di ki ci maanḱuthu'di ki imancik a'di gwo mo dhali imancik a'di gwo ki ciki uni ka waambuhany 'kwani mo be.

20 Dhali uni 'baar mo shwaki a'di mo dhali uni kapkunu mo. Dhali uni 'tu'dkina nura/ i'kume'd i'ce'dka su/ mo ki 'pisira/ maa kun 'ce'dkunu mo gun uri 'kup mo be.

21 Dhali uni gwansan kun shwakin mo tani ta 'kwaniḡ gwas alaapi mudhe'd mo mmodhal up ka po/ mo dhali uci mo be.

Yesus Ya ki Sho'k e 'Kupa Al Yi'de/ mo

22 Dhali yan'ko'd a'di ki tor imancik a'di gwo gwo mo mmose bwaa kur mo dhali iiyi twa/ a/ ki a'di mo mmo'ciḥa/ gap gi 'bana kamu/ mo ki a'di di'd mmodhala waambuhany 'kwani bway mo mmo/ii bway pa mo.

23 Dhali yan'ko'd ki a'di dhalki'da waambuhany 'kwani 'pen mo tani a'di yaki bway 'kuwosha turga/ mo a'di 'de/ mo mmo'tho mo be. Ki mom'pimpili/ pu'dki'd mo tani a'di diki'd a'di 'de/ mmun mo.

24 Hila kur ka tente/ yan mo tani a'di si'da ḡatgin ka ris 'pena gap mo. A'di dorkina 'tham mo haali/ 'tham poshki'da po/ uni mo be.

25 Dhali ki mo ta mon'twash/e mo tani a'di pu'dki'd e uni mo mmoya ki sho'k e 'kup yi'de/ mo be.

26 Hili ki imancik a'di gwo parki a'di e mo mmoya ki sho'k e 'kup yi'de/ mo tani uni deekina is mo kagahara mo mmo/o gwo mo ki: A'di ta'da arum mo be. Dhali uni cuukin mo kagahara haali/ uni ko/ki is mo be.

27 Hili ki jahanne/ a'di tor ki uni gwo mo mmo/o gwo mo ki: 'Bithi adu is mo ma. Aha/ tana a'di mo be. Dhalku/ is ki ko/ mo ma.

28 Dhala Buḡerus ki thoḱ a'di gwo mo ki: Tapa, wakki/ /e ta a'di mo tani yuki aha/ mmoyaku/ i/ e i'kuyi'de/ mo ma.

29 A'di ki o a'di gwo mo ki: Yayu/ mo ma. Wakan Buḡerus cuki mis 'pena kur mo dhali ya ki sho'k e 'kuyi'de/ mo dhali pu'da Yesus mo.

30 Hili ki a'di parki 'tham e mo tani a'di ko/ki is mo dhali telki mii 'pen mo mmociḡ yi'de/ mo. A'di gwoki'd mo ki: Tapa, woḥi/ aha/ mo ma.

31 Dhala Yesus ki jahanne/ a'di jidhirki me'd piti mo dhali bu'th a'di mo mmo/o a'di gwo mo ki: Ayy wathi/ jin gwa'da monḡam gwo is ki gwa'd mo. Atinta shina/ e bwa 'kup kan mo?

32 Dhali ki uni ciḡkin e bwam ma kur mo tani 'tham doshki'd mo be.

33 Dhali uni gwansan kun 'kon e bwam ma kur mo tani luḡki a'di mo mmo/ o gwo mo ki: Ka jinḡ gana/ /e ta Ya/ ma Arumḡimis mo be.

Yesus Waḡki 'Kwani kun 'Bathan e Pa Jannisaaraḡ mo

34 Dhali ki uni 'ciḥkina gap gi 'bana kamu/ mo tani uni pu'dkin mo e Bampa/ gi Pa Jannisaaraḡ mo be.

35 Dhali ki 'kwani gi mo caan nyithki a'di mo tani uni hashki gwo e bampa/ 'baar mo kun 'kon ka kukul is mo dhali kala ris 'kwani kun 'bathan e a'di mo be.

³⁶ Dhali uni ṅapki a'di mo mmo'taki ta a'di 'twaman burrinyem piti is ki me'd mo. Dhali aris uni gun taki a'di is ki me'd mo tani 'borkunu is mo be.

15

Gwon Dhamo/jin Luḱu 'Peni 'Kwani Gwanyjaka/ mo

¹ Dhali yan'ko'd 'Kwani Parisiyiin dhali iman'kwar to pu'dkina Yesus mo 'peni Pa Urushaliim mo dhali o a'di gwo mo ki:

² Atinta dhaṅa imanciḱ /e gwo gwon dhamo/ jin luḱu 'peni 'kwani gwanyjaka/ mo? Haali/ uni 'koki 'thur me'd buni ki yi'de/ nṅwa/a/ ki uni 'koki shwa to mo.

³ A'di ki thoḱ uni gwo mo ki: Dhali atinta si'da/ idhaṅa um gwonḱan ma Arungimis jin 'kwarkunu mo gom gway gi gwon dhamom bum jin luḱu mo?

⁴ Haali/ Arungimis kanki gwo mo ki: Taḱi cim dhali kwan mo, dhali, A'di jin midi o gwonthus apo/ com mo walla kum mo tani dhalki a'di ka jin gana/ iwu'd mo.

⁵ Hili um o gwo mo ki: Waḱki/ wathin 'de/ midi tor com gwo mo walla kum gwo mo ki: Ki a'di jin mina /e gam 'peni aha/ mo tani cikunu Arungimis mo tani a'di midi diki mii ta gi mo mmotaḱ com mo.

⁶ Wakan gom gway gi gwon dhamom bum jin luḱu mo tani um ki puu Gwo ma Arungimis mo be.

⁷ Um gun tana he'k e ka he'k e mo. Din ma Ishaya ki o um gwo is mowa ki a'di o gwo mo ki:

⁸ 'Kwani gwansan taḱ aha/ ki 'twam buni mo tani hili adum buni si'dasi'd 'peni aha/ mo be.

⁹ Uni luṅki aha/ ki pe'th mo be.

Gwonḱan gi 'twaṅ 'kwani tora uni me'd gwonḱ gana/ mo be.

To gi Shi/i Wathi/ Is mo

¹⁰ Dhali a'di ki yuk 'kwani e a'di mo dhali o uni gwo mo ki: Ciki gwo mo ma dhali mish a'di 'ban mo.

¹¹ A'di diki ta to jin yaki 'twa/ wathi/ jin midi shi/ a'di mo hili a'di jin piyi'd 'peni 'twa/ wathi/ mo tani to yansan a'di ishi/ki wathi/ is mo be.

¹² Yan'ko'd imanciḱ a'di gwo pu'dkini a'di mo dhali o a'di gwo mo ki: Dina /e ki mish 'Kwani Parisiyiin 'kokunu mo mmogol mo ki uni cikki gwo yansan mo 'taa?

¹³ Dhali a'di thoḱki uni gwo mo mmo/o gwo mo ki: Aris to gun sinu 'baar mo ka 'dete/ 'dete/ jin din ma Ababam pem e momis ki si mo tani uni minu w'o'd mo be.

¹⁴ Dhalki uni 'kon, uni 'cena mo ma. Uni ta uni gun tana ja'da/ ka ja'da/ mo kun toshki ta ashu/um bway mo be. Dhali waḱki/ wathiny ja'da/ sus ceny ja'da/ mo tani uni su/ mini taḱi jis mo be.

¹⁵ Hila Buterus ki thoḱ a'di gwo mo ki: Tori aman 'pemen gwom 'bi'th/e yansan mo ma.

¹⁶ Dhali a'di ki o uni gwo mo ki: A/um si'da/ 'kon naskina/ kan mo mmomol gwo 'ban mo 'taa?

¹⁷ Kona um ki misha, ki to yin jin ya 'twa/ wathi/ mo mmoya bwa mo tani dhali wakan a'di ki pe moyi?

¹⁸ Hili to jin piyi'd mo 'peni 'twa/ wathi/ mo tani a'di yayi'd 'pena du mo dhali to yansan a'di ishi/ki wathi/ is mo be.

¹⁹ Haali/ 'pena du mo tani gwonthus kun kulumu mbwa mo pu'dkin mo mmo'kosha mee mo dhali mmota ḱal mo dhali mmomii miinyḱal mo

dhali mmokwal to mo dhali mmo/o gwonthus apo/ wathinj kamu/ mo dhali mmothutha thu'th 'pen mo be.

²⁰ To gwansan uni ita to gun shi/i wathi/ is mo, hili mmoshwa to ki me'd kun 'konuki 'thur ki yi'de/ mo tani a'di diki shi/ wathi/ is mo be.

Mongam Gwo Is ma 'Bom gi Pan Kanaan mo

²¹ Dhali ka Yesus yaki'd mo 'peni mo yin mo tani a'di yaki'd mo e bampa/ gi Pan Sur mo dhali Pan Saydaa/ mo be.

²² Dhali hili a'bom gi Pan Kanaan 'peni bampa/ caan mo tani pu'dki'd mo dhali cuu gwo mo ki: Miyyi mii apo/ aha/ mo ma, ayy Tapa, Ya/ ma Dawuu'd mo. 'Bwa/m pem bu'th ma ruma 'cesh kagahara mo.

²³ Hili a'di diki tho'ka yim gwo mo. Dhali imancik a'di gwo pu'dkin mo dhali do' a'di gwo mo mmo/o gwo mo ki: Urka yim mo ma haali/ ayim cuu'di bath ana n'ko'd mo be.

²⁴ Dhali a'di ki thok gwo mo ki: Aha/ hashkunu mo jasi gom ka'bal gi gu'b ma Israyiil kun thiskunu e mo uni 'cena mo be.

²⁵ Hila yim pu'dki'd mo mmo'ca'b ki jin 'kupa'dupuni bwambori a'di mo mmo/o gwo mo ki: Tapa, wothi/ aha/ mo ma.

²⁶ Dhali a'di ki thok a'di gwo mo ki: A'di yisa ta mii jin ha me'd mo mmobu'th maanj'kuthu'd 'peni uci mo dhali ta'k a'di ka 'ka mo.

²⁷ Ayim thok a'di gwo mo ki: Nye, Tapa, hili, a'ka uni mini shwa kuluny maa kun ta'kkin mo 'pena tharabeesa gi tapam buni mo be.

²⁸ Yan'ko'd Yesus ki tho'ka yim gwo mo ki: Ayy, a'bom, dhan mongam gwo is pini caaca mo. Dhalki a'di miinu mo gom /e mo me'd jin dina a'di /e e bwa mo. Dhali 'bwa/m piti wa'ckunu hila/ mo be.

Yesus Wa'ki 'Kwani ka Ris mo be

²⁹ Dhala Yesus yaki'd 'peni mun mo dhali 'citha/ gap gi Al ma Jaliil mo be. Dhali a'di seki'd e mo n'kuwosh mo dhali a'di ca'bki'da 'cesh mmun mo be.

³⁰ Dhali awaambuhany 'kwani pu'dkini a'di mo mmosuski 'kwani e a'di mo, uni gun ta njwol mo dhali uni gun kutha is gun'kuru/ mo dhali uni gun tana ja'da/ mo dhali uni gun mol 'twa/ wal mo dhali kun tiya ka ris mo dhali uni ki 'thi uni mo e sho'k piti mo dhali a'di ki wa'c uni mo be.

³¹ Wakan awaambuhany 'kwani merkin mo be ki uni parki wathi/ e mo jin mol 'twa/ wal walki 'twa/ mo be, dhali uni gun kutha is gun'kuru/ mo 'borkunu is mo dhali uni gun ta njwol mo iikin ki sho'k mo dhali uni gun tana ja'da/ mo mishki mo mo dhali uni karkina Arumgimis gi 'kwani ma Israyiil ki ca mo be.

'Kwani Alaapi Do'jon kun Cikunu Tonte/ mo

³² Dhali yan'ko'd Yesus ki yuk imancik a'di gwo e a'di mo dhali o uni gwo mo ki: Aha/ koca e eya waambuhany 'kwani mo be. Haali/ uni 'kon nyakki aha/ ka cim kwara shwane/ mo dhali uni dar gi tonte/ mmoshwa mo. Dhali aha/ 'tena bwa mmohash uni bway pa mo ki te/ mo isi ciki/ haali/ uni mina buye/ i'thi mo mbway mo be.

³³ Dhali imancik a'di gwo ki do' a'di gwo mo mmo/o gwo mo ki: 'Peni mana mmina ana gam tonte/ jin midi 'kosh jwa mo e bwam ma si'b mmahan mo mmociya waambuhany 'kwani kun caaca wakan mo?

³⁴ Dhala Yesus ki o uni gwo mo ki: Um 'kona maanj'kuthu'd ekata mo? Uni ki thok a'di gwo mo ki: Mpesuyi, dhali ushi to yi'de/ idaka/ mo be.

³⁵ Dhali a'di ki kana waambuhany 'kwani gwo mo mmo'ko mo mmo'ko 'pena 'cesh mo be.

³⁶ Dhali a'di ki bu'th maanꝓkuthu'di pesu/ mo dhali to yi'de/ mo dhali a'di ki 'bora 'bor bwa i is mo dhali a'di ki 'ce'd uni mo dhali ɕi uni ki imanciꝓ a'di gwo mo mmoɕika waambuhany 'kwani mo be.

³⁷ Dhali ki uni 'baar mo shwakin mo dhali 'kokunu mo mmokap mo tani uni ki tul maanꝓkuthu'd is jin ta 'pisira/ jin 'ce'dkunu bwa mo mmo'tu'da nura/ pesu/ 'peni jin urkunu 'kup mo be.

³⁸ Uni gwansan kun shwaki to mo tani tana alaapi doꝓon mo mmodhal up ka po/ mo dhali uɕi mo be.

³⁹ Dhali a'di ki hasha waambuhany 'kwani mo dhali a'di ciꝓki'd mo e bwam ma ƙur mo mmoya bampa/ gi Pa Majdal mo be.

16

Mmo/o Bwa ki Paɾ Jamas Mii E mo

¹ Dhali 'Kwani Paɾisiyiin dhali 'Kwani Sadukiyiin pu'dkin mo dhali pal a'di ki gwo mo. Uni doꝓki a'di mo mmotor uni jamas mii 'peni momis mo be.

² A'di ki thoꝓ uni gwo mo ki: Ki mo ta mom'pimpili/ mo tani um ki o gwo mo ki: A'di midi ta a'di mompiriny mo shwane/ haali/ momis 'pera'per mo be.

³ Dhali ka'thamo/ tani a'di midi ta mon'thama punthar mo shwane/ mo haali/ momis 'pera'per mo dhali wuma wuma mo. Um mishina jo'da yir mii gi momis mo tani hili atinta 'kona um ki mishaj o'd jamas mii ma tee mo?

⁴ Um 'kwani gun tana nyakum yil kun ta thus ki thus kan mo dhali imanmii miinyal mo tani naꝓki jamas mii mo janta? bahili jamas mii minu ɕi um mo yisa hili isi ciki/ jamas mii ma Yuunaan mo. Wakan a'di ki dhal uni mo dhali ya mo be.

Acumaf gi 'Kwani Paɾisiyiin mo

⁵ Ki imanciꝓ a'di gwo merkin e 'bana gapa kamu/ mo tani uni naꝓki maanꝓkuthu'd mo mmo'koki guyi jaꝓ kamu/ mo be.

⁶ Yesu ki o uni gwo mo ki: Hili ki 'bore/ mo ma dhali jiyi acumaf gi 'Kwani Paɾisiyiin mo dhali 'Kwani Sadukiyiin mo ma.

⁷ Dhali uni su'kkin ki gwo mo, uni 'cena cem buni mo mmo/o gwo mo ki: Ana 'konaki guyu/ maa mo be.

⁸ Hila Yesu mishki gwo yansan mo dhali o uni gwo mo ki: Ayy um 'kwani kun gwa'da mongam gwo is ki gwa'd mo. Atinta suka um ki gwo cem bum kan mo? mmodara um ki tonɕe/ mo.

⁹ 'Kona um ki nyiɕ mo 'taa? 'Kona um ki ka gwo e gom maanꝓkuthu'd kun shwana 'kwani alaapi mudhe'd mo dhali anura/ ekata i'tu'dkina um mo mmotul is mo?

¹⁰ Walla maanꝓkuthu'di pesu/ kun shwana 'kwani alaapi doꝓon mo dhali anura/ ekatinta i'tu'dkina um mmotul is mo?

¹¹ Atinta 'kona um ki nyiɕ mii mo ki aha/ dinaki o gwo mo gom tonɕe/ mo? Jiyi acumaf gi 'Kwani Paɾisiyiin mo dhali 'Kwani Sadukiyiin mo ma.

¹² Dhali yan'ko'd uni mishki gwo 'ban mo ki a'di diki ɕor uni gwo mo mmojiya cumaf gi tonɕe/ mo, hili gom gwontor gi 'Kwani Paɾisiyiin mo dhali 'Kwani Sadukiyiin mo be.

Buɕerus A'di Torki Mii eya Tente/ goma Yesu mo

¹³ Dhali ka Yesu pu'dki'd e bampa/ gi Paꝓ Kaysariyya gi Pam Pilibbi mo tani a'di ki doꝓ imanciꝓ a'di gwo gwo mo ki: Ki 'kwani oki Ya/ gi 'Kwani jana a'dan mo?

¹⁴ Dhali uni ki thoꝓ a'di gwo mo ki: Kun tiya on ka Yoahan jin ta'da manmiiya mii ki yi'de/ mo. Dhali kun tiya on ki Iliyya mo. Dhali kun tiya

on ka Irmiya mo walla jan 'de/ 'peni imanci gwo ma Arungimis kadhamo/ mo be.

¹⁵ Dhali a'di ki o uni gwo mo ki: Hili ba um on ki aha/ tana aja mo?

¹⁶ Simaan Buterus thoƙ a'di gwo mo ki: /E tana Kristhos mo, Ya/ ma Arungimis jin di'd ki e mo be.

¹⁷ Dhala Yesus ki thoƙ a'di gwo mo ki: Mom'bor mii gom /e mo, Simaan jin ta ya/ ma Yuuna mo. Haali/ bungwar is mo dhala bas mo tani uni 'koki tor a'di yan eya tente/ e /e mo, hili, Ababam pem a'di jin di'd e momis mo be.

¹⁸ Dhali aha/ tora /e gwo mo, /e jin tana Buterus mo, dhali eya po/ wosh yan mo tani aha/ mina nyaƙa kaniisam pem mo, dhali mom'bi'th gi mowu mo tani mididi diki pi a'di jipi/ mo be.

¹⁹ Aha/ mina ci /e amuptha/ gi Bampa/ gi Momis mo, dhali ma to yin jin mina /e nnon mo e mony'cesh mo tani a'di minu non mo e momis mo dhali ma to yin jin mina /e ndhal me'd e mony'cesh mo tani a'di minu dhal me'd e momis mo be.

²⁰ Yan'ko'd a'di ki kan imancik a'di gwo gwo mo ki 'bi'th mo, mmodiki tor wathin tal 'deƙ kamu/ gwo mo ki a'di ta'da Kristhos mo be.

Yesus Torki Wum Piti Itwa/a/ mo

²¹ 'Peni mo caan mo tani Yesus telki mii 'pen mo mmoƙor imancik a'di gwo gwo mo ki a'di mididi mii ya mo e Pa Urushaliim mo dhali 'kosh is ka nyor ki to ka ris mo 'peni 'kwani gwanyjaka/ mo dhali 'peni igasiis mo dhali iman'kwar to mo, dhali a'di minu 'kosh jwa mo, dhali ka cim kwara mo tani a'di minu 'de'k mo be.

²² Dhala Buterus ki bu'th a'di mo dhali tel mii 'pen mo mmokucur a'di ki gwo mo mmo/o gwo mo ki: Arungimis diki tosh kan mo, Tapa. Mii yansan mididi diki pu'di /e ki sule/ sule/ mo be.

²³ Hili a'di ki tu'k mo dhali owa Buterus gwo mo ki: Seƙaan, yaku/ i'ko'di aha/ mo ma. /E noni aha/ 'kup mo. Haali/ /e diki di ki 'ban ma Arungimis mo, hili /e din ka 'ban gi 'kwani mo be.

²⁴ Yan'ko'd Yesus ki tor imancik a'di gwo gwo mo ki: Wakki/ wathin kamu/ mididi yayu/ ibath aha/ nsho'k mo tani dhalki a'di non is piti mo ma dhali 'de'k cwany'cithan dhul piti mo dhali bath aha/ nsho'k mo.

²⁵ Haali/ a'diyin jin mididi woth mondiki/em piti mo tani mididi this a'di e mo dhali a'diyin jin mididi this mondiki/em piti e mo gom gway pem mo tani mididi gam a'di mo be.

²⁶ Haali/ mii jin nyo/a wathi/ mo wakata si'da/ wakki/ a'di gama'da ris to 'baar mo e mony'cesh yan mo dhali this mondiki/em piti e mo? Walla wathi/ mididi wan mondiki/em piti 'ba/ ka tinta mo?

²⁷ Haali/ Ya/ gi 'Kwani mididi pu'du/ mo nyaƙki iman'doyu gwom piti ilu/ mo ki monyca gi com mo dhali yan'ko'd a'di mididi ci aris 'kwani 'baar mo ka 'dete/ 'dete/ to jin wana e ki mii kun miikina uni mo be.

²⁸ Ka jin gana/ aha/ ona um gwo mo ki 'kwanin tiya 'kon kun doshkini mahan mo shwane/ mo tani uni mini 'koki nyok wu ntwa/a/ mo ki uni 'koki par Ya/ gi 'Kwani e mo mmopu'du/ mo nyaƙki Bampam piti mo be.

17

Mmowarkin ma Yesus Jamas Piti mo

¹ Dhali 'ko'da cim pe'de/ mo tani Yesus ki susa Buterus nyaƙki a'di mo dhala Yakuub dhala Yohaƙan jin ta'da kam piti mo, dhali sus uni bway 'kuwosh jin turatur uni 'cena mo.

² Dhali a'di ki war is piti mbwambori uni mo, dhali bwam/em piti 'twakki mo mo me'da tente/ mo dhali burrinyem piti warki'd ki bany bany me'd moŋkush mo be.

³ Dhali hili aMusa dhali Iliyya piki uni i is mo mmoŋora/ tor nyakki a'di mo be.

⁴ Dhala Buterus ki owa Yesus gwo mo ki: Tapa a'di 'boro'd gom aman mmo'kona aman mmahan mo. Wakki/ /e ona bwa mo tani aha/ mina nyaŋ ciŋŋa/ ikwara mmahan mo, jan tal 'de/ gom /e mo dhali jan kamu/ goma Musa mo dhali jan kamu/ gom Iliyya mo be.

⁵ Ki a'di di'd mmo/o gwo mo tani hili arak jin kushu mo mo 'kamki uni is mo dhali 'twa/ 'pena rak yan mo tani o gwo mo ki: Yansan ta Ya/m pem jin enka/ mo, a'di jin 'borka/ bwa i is mo. Ciki a'di gwo mo ma.

⁶ Ki imanciŋ a'di gwo cikki gwo yan mo tani uni ta'kki bwam/em buni a'cesh mo dhali uni 'tu'dkunu mo ki moŋko/ is mo be.

⁷ Hila Yesus pu'dki'd mo dhali ta uni is ki me'd mo mmo/o gwo mo ki: Cuyi mis mo ma. Dhalku/ is ki ko/ mo ma.

⁸ Dhali ki uni 'de'kki em buni ki mis mo tani uni 'koki par wathiŋ kamu/ e mo, hili jasa Yesus a'di 'de/ mo be.

⁹ Dhali me'd jin pu'dkina uni ka 'cesh 'peni 'kuwosh tani Yesus kan uni gwo mo ki: Dhalku/ wathiŋ tal 'deŋ kamu/ ki tor tonyjan yan mo ntagi Ya/ gi 'Kwani minu 'de'k mo 'peni mowu mo be.

¹⁰ Dhali imanciŋ a'di gwo doŋ a'di gwo mo ki: Atinta i/ona iman'kwar to gwo mo ki Iliyya midii mii pu'du/ ntwa/a/ mo?

¹¹ A'di ki thoŋ uni gwo mo ki: Iliyya pu'dki'd mo dhali a'di midii thoŋon aris to 'baar mo be.

¹² Hili aha/ tora um gwo mo ki Iliyya a'di pu'dki'd hila/ mo dhali uni 'koki mish a'di mo, hili uni ki mii a'diyin jin 'bor uni bwa mo. Wakan si'da/ Ya/ gi 'Kwani mina isi 'kosh ka nyor mo e me'd buni mo be.

¹³ Dhali yan'ko'd imanciŋ a'di gwo mishki gwo 'ban mo ki a'di toriki uni gwo mo goma Yoŋaan jin ta'da manmiiya mii ki yi'de/ mo be.

Yesus Wacki'da 'Ci jin Bu'thkin ma Rum Thus jin Nyoo'd mo

¹⁴ Dhali ki uni pu'dkin eya waambuhany 'kwani mo tani wathiŋ kamu/ pu'dki'd e a'di mo dhali ca'bki jin 'kupa'dupuni bwambori a'di mo dhali o gwo mo ki:

¹⁵ Tapa, miiyi mii apo/ ya/m pem mo ma. Haali/ a'di wu gampan mo dhali a'di 'koha is ka nyor kagahara mo. Haali/ me'd ka ris a'di biŋki'd e bwam o'd mo dhali me'd ka ris a'di biŋki'd e bwam yi'de/ mo be.

¹⁶ Dhali aha/ suskina a'di e imanciŋ /e gwo mo tani dhali uni 'koki mish a'di waŋ mo be.

¹⁷ Dhala Yesus ki thoŋ uni gwo mo ki: Ayy, um 'kwani kun aŋa moŋgam gwo is ki ath kan mo dhali kun caca ii ki caca mo eya nyaŋum yil bum mo, aha/ mina di i um ki mo gi wakata mo? Dhali ki mo gi wakata imiga/ i'dim 'kup e um mo sa/? Susi a'di mmahan i aha/ mo ma.

¹⁸ Dhala Yesus ki kucur a'di ki gwo mo dhali aruma 'cesh pu'dki'd ka piŋe/ 'peni a'di mo dhali a'ci a'di waŋkunu ki jahanne/ mo be.

¹⁹ Dhali yan'ko'd imanciŋ a'di gwo pu'dkina Yesus mo uni 'cena mo dhali o a'di gwo mo ki: Atinta 'kona aman ki mish a'di ur ka piŋe/ mo sa/?

²⁰ A'di ki thoŋ uni gwo mo ki: Haali/ moŋgam gwo is bum gwa'dagwa'd mo. Haali/ ka jin gana/ aha/ ona um gwo mo ki, wakki/ um mini ta gi moŋgam gwo is me'd emen to jin miinuwa 'tash mo tani um mini o wosha turga/ yansan gwo mo ki: Dhalki a'di joŋu/ mo 'peni mo yansan is 'ko'di mun mo ma tani

dhali a'di minu joç mo dhali toŋ kamu/ yisa di'da jin minu mol mii gom um mo be.

²¹ Hili mii yansan midî diki piyu/ 'kup ka piye/ mo hili isi ciki/ ki mon'tho mo dhali ki moŋga/ to mo be.

Dok/e aYesus Torki Mowum Piti Itwa/a/ mo

²² Me'd jin tulkina uni is mo mmontał 'de/ mo e Pany Jaliil mo tani Yesus ki o uni gwo mo ki: Ya/ gi 'Kwani minu ci 'kwanin thusi me'd mo be.

²³ Dhali uni mini 'kosh a'di jwa mo dhali a'di minu 'de'k ka cim kwara mo. Dhali uni butha 'tham kagahara mo be.

Mmoçiya Guurush gom Gu'b gi Mondheleladhelel mo

²⁴ Dhali ki uni pu'dkin e Paŋ Kapranahuum mo tani imantera tulpa/ gom gu'b gi mondheleladhelel mo pu'dkina Buterus mo dhali o a'di gwo mo ki: Din ma mantor gwom bum ki çiya thulpa/ mo 'taa?

²⁵ A'di ki o a'di gwo mo ki: Nye. Dhali ki a'di pu'dki bway pa mo tani Yesus ki tora tor ki a'di ntwa/a/ mo mmo/o gwo mo ki: Atinta kuluma /e mbwa mo, Simaan? 'Peni mana ikał ma malik kun 'kon e mony'cesha thulpa/ mo dhali to gun wothu/ 'kup mo? 'Peni iya/m buni mo 'taa? Walla 'peni kun tiya mo?

²⁶ Dhali a'di o a'di gwo mo ki: 'Peni kun tiya mo tani Yesus ki o a'di gwo mo ki: Wakan iya/ 'kon ki 'kus mo.

²⁷ Bahili mmomina ana 'koki kol uni mo tani yaku/ mo e yi'de/ mo ma dhali bița bi'c mo dhali bu'th wa'c jin yayi'di twa/a/ ka piye/ mo dhali ki /e mini ka'd a'di 'twa/ mo tani /e mini gama guurush e 'twam piti mo. Buthi caan mo dhali ci a'di ki uni mo gom aha/ mo dhali gom is pini mo.

18

Kaja A'di Cade?

¹ Dhali ka tee caan mo tani imancik a'di gwo pu'dkina Yesus mo dhali o a'di gwo mo ki: Kaja a'di ica'd mo e Bampa/ gi Momis mo?

² Dhali a'di ki yuķa 'ci mo dhali kar a'di e bwaman uni mo

³ dhali o gwo mo ki: Ka jin gana/ aha/ ona um gwo mo ki isi ciki/ wakki/ um 'koki tu'k mo dhali war ki uçi mo tani um mini 'koki se Bampa/ gi Momis ki sule/ mo be.

⁴ A'diyin jin kar is piti ki gwa'd mo mmowa e ka 'ci yansan mo tani a'di icaaca mo e Bampa/ gi Momis mo be.

⁵ A'diyin jin midî budha 'ci gi wakansan ki gway pem mo tani a'di buthi aha/ mo be.

⁶ Hili a'diyin jin midî rak jan tal 'de/ 'peni uni gwansan kun gwa'dan kun gam gwo is e aha/ mo mmomii miinthus mo tani a'di midî 'taki 'bor mo gom a'di ka dhan wosha caaga/ minu 'taki deķ a'di e 'bam piti mo dhali biț a'di mo e kułkun yi'de/ mo be.

Mompal gom Miinthus mo

⁷ Wayyi e 'kwaniny'cesh mo gom mompal gi miinthus mo. Haali/ a'di ta mii jin midî ta mii mo ki mompal mini pu'du/ mo. Dhali hili, wayyi e wathi/, a'di jin pu'dkina mompal 'peni cine/ mo be.

⁸ Dhali wakki/ me'd pini walla sho'k pini rak /e mo mmomii miinthus mo tani 'cihi/ uni mo ma dhali taki uni asho 'peni /e mo haali/ a'di 'boro'd gom /e mo mmociç mondiki/e ki ŋul mo walla ki ŋwol mo jin minu 'koki biț /e ki me'd su/ mo walla ki sho'k su/ mo e mo ma al o'd ki sule/ mo be.

⁹ Dhali wakki/ em pini rak /e mo mmomii miinthus mo tani buķi a'di mo ma dhali biți a'di ka piye/ 'peni /e mo. A'di 'boro'd gom /e mo mmociç mondiki/e

ki en tal 'de/ mo jin minu 'koki bit/ e ki e su/ mo e mo ma al o'd jin kakacaka'c mo be.

Gwom 'Bi'th/e gom Ka'bal jin Thisi E mo

10 Hil ki 'bore/ ki um mini 'koki waḵ jan tal 'deḵ kamu/ 'peni uni gwansan kun gwa'dan mo haali/ aha/ tora /e gwo mo ki e momis mo tani iman'doyu gwom buni isa yempa/ uni hilki bwam/e ma Ababam pem jin di'd e momis mo be.

11 Haali/ Ya/ gi 'Kwani pu'dki'd mo mmowoth uni gun thiskunu e mo be.

12 Um kulumi gwo mbwa jin wakata mo? Waḵki/ wathi/ ta gi ka'bal iss 'kwanimpa mmudhe'd mo dhali jan tal 'deḵ kamu/ 'peni uni thiski e mo tani mina a'di diki dhal uni iss 'kwanimpa mmudhe'd athka 'de/ mo e moḵ'kuwosh mo dhali ya mo mmoḵap jin tal 'de/ jin thiski e mo 'taa?

13 Dhali waḵki/ a'di ki gam a'di mo tani ka jin gana/ aha/ tora /e gwo mo ki a'di 'kunya bwa ki 'kuny kagahara mo gom a'di jin 'dap uni 'twa/ ka iss 'kwanimpa mmudhe'd athka 'de/ mo kun 'koki this e mo ki sule/ mo.

14 Wakan a'di si'da/ diki ta bwa ma Ababam pem jin di'd e momis mo ki jan tal 'deḵ kamu/ 'peni uni gwansan kun gwa'dan mo tani minu 'taki 'koki 'ce'd sho'k mo be.

Akam gi Miiki Miinthus mo

15 Waḵka kam pini mii miinthus apo/ /e mo tani yaku/ mo dhali tor a'di miim piti mo ce um su/ mo, /e dhali a'di 'de/ mo. Waḵki/ a'di cik/ e gwo mo tani /e warana kan mo be.

16 Hili waḵki/ a'di diki cik gwo mo tani susi jan tal 'deḵ kamu/ mo walla su/ mo nyakki /e mo ki aris gwo 'baar mo ka 'dete/ 'dete/ kun onu mo minu 'da'b 'pen mo mmota du'd gwo gi 'twaḵ 'kwani su/ mo walla kwara mo be.

17 Waḵki/ a'di ki ush gwo cik 'peni uni mo tani tori a'di ki 'kwaninḵ kaniisa mo, dhali waḵki/ a'di si'da/ ki ush gwo gi 'kwaninḵ kaniisa cik mo tani dhalki a'di wara'd gom /e ki wathi/ jin diki ta Wathi/ Yahuuda/ mo dhali ka mantera thulpa/ mo be.

18 Ka jin gana/ aha/ tora um gwo mo ki ma to yin jin mina umi nnon mo e mony'cesh yansan mo tani a'di minu non mo e momis mo dhali ma to yin jin mina umi dhal me'd mo e mony'cesh mo tani a'di minu dhal me'd mo e momis mo be.

19 Dok/ e aha/ ona um gwo mo ki waḵki/ 'kwani 'koni su/ mbwam um kun gami gwo me'd mo e mony'cesh mo gom ma to yin jin mina uni dot mo tani a'di minu mii gom uni ki gway ma Ababam pem jin di'd e momis mo be.

20 Haali/ waḵki/ 'kwani 'koni su/ mo walla kwara mo kun tuli is mo e gway pem mo tani aha/ dina e bwam uni mo be.

Gwom 'Bi'th/e gom Ciḵkina/ jin Diki Dhala Kamu/ Amurem Piti 'Pen mo

21 Dhali yan'ko'd Buterus pu'dki'd mo dhali o a'di gwo mo ki: Tapa, me'd ekata min ma kam pem mmii miinthus apo/ aha/ mo dhali aha/ ki dhal a'di miinthus piti 'pen mo? a/me'd kun 'koni saba kana?

22 Yesus ki thok a'di gwo mo ki: Aha/ dinaki o /e gwo mo ki jasi me'di saba mo, hili me'd saba/iin pi saba mo.

23 Wakan Bampa/ gi Momis minu kar ka par 'ban ka malik jin thosoni gwo nyakki ciḵkinam piti mo gom to gun derju e mo.

24 Ki a'di telki mii 'pen mo mmoderḵ a'di e mo tani jaḵ kamu/ suskunu mo e a'di mo jin din ma murem piti m'ba/ mo ki dhan* kuluny 'dolkon alaapi 'kume'd mo.

* 18:24 Dhan kuluny 'dolkon 'de/ wana e ka jineeh iss 'kwanimpa ka iss 'de/ aḵa iss 'de/ apo/ mo.

²⁵ Dhali ki a'di diki mish mmoçi a'di to mo tani tapam piti kanki gwo mo ki a'di minu yol mo nyaḱki ashim piti mo dhali ki ucim piti ilu/ mo dhali ka ris to 'baar mo kun tana a'di mo tani, dhali mii jin din ma mure/ a'di m'ba/ mo tani minu çi mo be.

²⁶ Wakan çinḱina/ a'di biṱki'd ki jin 'kupa'dupuni sho'k piti mo mmowoth gwo is gom a'di mo mmo/o gwo mo ki: Tapa, 'kuçi bwa gom aha/ mo ma dhali aha/ mina çi /e aris to 'baar mo be.

²⁷ Dhali gom miiny çinḱina/ jin miikina a'di mo gom a'di mo tani tapa gi çinḱina/ ki 'cuk a'di 'ba/ mo dhali dhal a'di amurem piti 'pen mo be.

²⁸ Hili eny çinḱinan 'de/ yan mo tani me'd jin yakina a'di ka piḱe/ mo tani a'di gamki 'kup ki çinḱinam pitin kamu/ mo a'di jin din ma mure/ a'di m'ba/ mo ka riyaal iss 'kwanimpa ikwara mo. Dhali a'di ki jigiti a'di 'ba/ ki me'd mo dhali o gwo mo ki: Ciya/ to jin din ma mure/ /e m'ba/ mo ma.

²⁹ Wakan agarr piti jin nyaka a'di aṱuc mii mo tani biṱki'da 'cesh mo dhali woth a'di gwo is mo mmo/o gwo mo ki: 'Kuçi bwa gom aha/ mo ma dhali aha/ mina çi /e amurem pini mo be.

³⁰ A'di ushu'd mo dhali ya mo dhali kar a'di eya sijin mo ntagi a'di mididi 'taki ciya mure/ mo be.

³¹ Ki imannyaka ṱuc mii ki a'di, ki uni parki a'di jin bu'thki embul mo mo tani uni butha 'tham kagahara mo dhali uni ki ii mo dhali çi gwo e tapam buni mo goma ris to gwansan kun bu'thki embul mo mo be.

³² Dhali yan'ko'd tapam piti ki dot a'di gwo mo dhali o a'di gwo mo ki: /E ta çinḱina/ jin ta thus ki thus mo. Aha/ dhalkina /e arisa murem pini 'peni 'baar mo haali/ /e wuki aha/ jwa i is mo be.

³³ Dhali /e mini 'taki diki ta gi momiimii apo/ amannyaka ṱuc pini mii mo me'd jin miikika/ mii apo/ /e mo?

³⁴ Dhali ka nyor mo tani tapam piti a'di ki çi a'di ki imanjiya sijin mo ntagi a'di mididi 'taki çi amurem piti 'baar mo be.

³⁵ Wakan si'da/ Ababam pem jin di'd e momis mo mididi mii kan goma ris umi 'baar mo ka 'dete/ 'dete/ mo wakki/ um 'koki dhal ikam bum amure/ miinthus buni 'pen 'pena dum bum gana/ mo be.

19

Yesus Ṭorki Gwo gom Mo jin Dhaluwa Dhal 'Pen mo

¹ Dhali ka Yesus 'baarki'da ris gwo gwansan mo mmo/o mo tani a'di yaki'd mo 'peni Pany Jaliil mo dhali ciç mo e Bampa/ Yahuudiyya mo e bwampo/ Yi'deḱ Kamma/ Uurdun mo be.

² Dhali adhana waambuhany 'kwani caaca baṱhi a'di nsho'k mo dhali a'di ki waç uni mo be.

³ Dhali 'Kwani Parisiyyin pu'dkini a'di mo dhali pal a'di ki gwo mo mmo/o gwo mo ki: A'di ta mii jin dhala gwonḱan bway mo mmomina wathi/ thoson gwo mo mmodhal ashim piti 'pen mo goma ris miin tiya kun tocon mo 'taa?

⁴ A'di ki thoḱ gwo mo ki: 'Kona um ki deḱ gwo e mo ki a'di jin ukki uni 'peni ka mun'kup mo ukki uni mo mmota wathin gwaṱh mo dhali wathim 'bomi mo 'taa?

⁵ Dhali a'di ki o gwo mo ki: Haali/ gom 'kup mii gi wakan mo tani wathi/ mididi mii dhal com 'pen mo dhali kum 'pen mo dhali gam is me'd ki ashim piti mo dhali uni su/ tala bungwar isa ṱal 'de/ mo be.

⁶ Wakan uni dok/ e 'koni su/ dok/ e yisa. Hili uni ṱal 'de/ mo. Haali/ gwo gi wakan mo tani a'di jin gam ma Arungimis is mo mmota isa 'de/ mo tani dhalku/ ki dhal wathin kamu/ bway mo mmoḱwa/ uni bwa mo.

7 Dhali uni ki thoḵ a'di gwo mo ki: Ba katinta iḵan ma Musa gwo mo ki wathin taḷ 'de/ midī thosona warka/ jin dhaluwa dhal 'pen mo mmodhala yim 'pen mo?

8 Dhali a'di ki thoḵ uni gwo mo ki: Haali/ adum bum kun 'bitha'bi'th mo tani aMusa dhalki um bway mo ba/ mmodhal up bum 'pen mo, hili 'peni ka muḵ'kup mo tani a'di yisa wakana.

9 Dhali aha/ ona um gwo mo ki: A'diyin jin midī dhal ashim piti 'pen mo gom ma to gunn kun tocon mo dhali mash jaḵ kamu/ mo tani a'di miiki miinyal mo be. Mo ma dhal 'pen midī diki mii di mo gom ma to gunn kun tocon mo, hili isi ciki/ mo waḵka 'bom mii miinyal ki wathin kamu/ mo be. Dhali a'diyin jin midī masha 'bom jin dhal ma kaḥim piti 'pen mo tani a'di miiki miinyal mo.

10 Dhali imanciḵ a'di gwo o a'di gwo mo ki: Waḵki/ wakan gom wathin gwath 'mo gom gwo gi ash mo tani mane shi/ miim 'boro'd jin minu mash mo?

11 Hili a'di ki o uni gwo mo ki: Aris 'kwani 'baar mo yisa mini bu'th gwo yansan mo yisa, hili jasi uni gwansan kun cikunu a'di mo be.

12 Haali/ 'kwanin tiya 'kon ki mantil wakan mo 'peni mo jin dhodhu uni mo dhali 'kwanin tiya 'kon kun ta mantil 'peni mantil kun miina 'kwani uni mo dhali 'kwanin tiya 'kon kun mii is buni ki mantil mo uni 'cena mo gom gway gi Bampa/ gi Momis mo. A'di jin mishi gwo yansan bu'th mo tani dhalki a'di bu'th a'di mo ma.

Yesus 'Borki Ushi Uciḵ Gwa'dga/ Mii mo

13 Dhali yan'ko'd 'kwani 'kon mmoḵali uci i a'di mo ki a'di midī kar me'd piti apo/ uni mo dhali 'tho mo. Dhali imanciḵ a'di gwo uni ḵucurki 'kwani ki gwo mo be.

14 Hila Yesus ki o gwo mo ki: Dhalki uci iiyini aha/ mo ma. Dhalki uni ki non mo haali/ e Bampa/ gi Momis mo tani a'di ta'd gi uni gi wakan mo be.

15 Dhali a'di ki kar me'd piti apo/ uni mo dhali ya mo be.

Wathin Dhuru'c jin Ta Pa ki Pa mo

16 Dhali hili, jan 'de/ pu'dki'di a'di mo mmo/o gwo mo ki: Mantor gwo, tom 'boro'd jin miga/ mii mii mo ta'da ta mo? mmogam mondiki/e ki sule/ sule/ ya ye 'ba/ mo.

17 Dhali a'di ki thoḵ a'di gwo mo ki: Atinta doḷa /e aha/ gwo mo gom a'di jin 'boro'd mo? Jan taḷ 'deḵ kamu/ di'd jin 'boro'd mo. Waḵki/ /e mini 'taki ciḵ mondiki/e mo tani dhuyi gwoḵan kun 'kwarkunu mo ma.

18 Dhali a'di ki o a'di gwo mo ki: Jana? Dhala Yesus ki thoḵ a'di gwo mo ki: /E mini mii dhalka 'kosh ki mii 'kosh mo. /E mini mii dhalki ḵal ki mii mii mo. Dhali /e mini mii dhalku/ ki mii ḵwal to mo. Dhali /e mini mii dhalku/ ki aḵ wathin kamu/ gwo i is mo.

19 Taḵi cim dhali kwan mo dhali /e mini ena mannyak ḵa'b pini me'd is piniḵ gana/ mo be.

20 Dhali dhuru'c wathi/ ki thoḵ a'di gwo mo ki: Aris to gwansani 'baar mo tani miikika/ mo. Dhali to jin wakata i/athka/ mo?

21 Yesus ki thoḵ a'di gwo mo ki: Waḵki/ /e mini 'taki ta wathim 'borgan gana/ mo tani yaku/ mo dhali yola ris to kun tana /e mo, dhali ciki uni ki 'kwani kun hatha'ko'd mo, dhali /e mini gam to kun ish ḵumma/ mo e momis mo. Dhali yayu/ mo mmobath aha/ nsho'k mo.

22 Ki wathin dhuru'c cikki gwo yansan mo tani a'di yaki'd mo ki bwa jin diḵadiḵ mo, haali/ a'di ta wathi/ jin isha to ka entus mo be.

²³ Dhala Yesus ki o imancik a'di gwo gwo mo ki: Ka jin gana/ aha/ ona um gwo mo ki: A'di diṭa mii ki diṭ mo gom wathi/ jin ta pa ki pa mo mmociḡ Bampa/ gi Momis mo be.

²⁴ Dok/e aha/ tora um gwo mo ki: A'di 'disha mii ki 'dish mo gom kalman mo mmoya ki solol e jisa 'dipira/ mo mmodhal wathimpa e i is mo, a'di jin ta pa ki pa mo mmociḡ Bampa/ ma Arungimis mo be.

²⁵ Ki imancik a'di gwo cikki gwo yansan mo tani uni 'kokin mo mmomer kagahara mo mmo/o gwo mo ki: Wakki/ a'di wakan mo tani ba ija a'di mminu iwoth mo?

²⁶ Hila Yesus ki hil uni mo dhali o uni gwo mo ki: Ki miin 'kwani mo tani a'di molu mii mo, hili ka Arungimis mo tani aris to 'baar mo mishu mii mo be.

²⁷ Dhali yan'ko'd Buterus ki thok a'di gwo mo ki: Hili, aman dhalkina aris to 'peni 'baar mo dhali bath/e nsho'k mo dhali aman mina ta ga ta mo?

²⁸ Yesus ki thok uni gwo mo ki: Ka jin gana/ aha/ tora um gwo mo ki e momis jin this dhali e mony'cesh jin this mo tani ki Ya/ gi 'Kwani mididi ca'ba po/ kursi gi monycam piti mo tani um kun bathi aha/ nsho'k mo tani mini 'ko si'da/ apowa kursi ma malik kun 'koni 'kume'd i'ce'dka su/ mo mmodwall uci ma Israyiil gwo mo, uni kun 'kon ma waki 'kume'd i'ce'dka su/ mo be.

²⁹ Dhali aris 'kwani 'baar mo ka 'dete/ 'dete/ uni gun dhalki gu'b buni 'pen mo walla ikam buni mo walla i'bwah buni mo walla icom mo walla ikum mo walla ucin buni mo walla mo mo gom gway pem mo tani uni mini bu'th to ki me'd iss 'kwanimpa mmudhe'd mo dhali ta gi mal gi moṅ'koki/e ki sule/ sule/ ya ye 'ba/ mo.

³⁰ Hili 'kwani ka ris kun 'koni tṽwa/a/ mo tani uni minu dhu ṅ'ko'd mo be dhali uni gun 'koni 'ko'd mo tani minu dhu nṽwa/a/ mo be.

20

Imanmiya Tu'c e Bwam Monsinu mo

¹ Haali/ Bampa/ gi Momis a'di wana e ki wathi/ jin cila gu'b mo, a'di jin ya'd mo mon'thamo/ ka'tum mo mmonṅap imanmiya tu'c mo gom bwaman monsinum piti mo be.

² 'Ko'di gwo jin gama a'di me'd nyaḡki imanmiya tu'c piti mo gom nasa guurush ka tee mo tani a'di ki hash uni e bwaman monsinum piti mo be.

³ Dhali a'di yaki'd mo dok/e ka tente/ ta'da tente/ pedoṅon mo tani a'di parki 'kwanin tiya e mo mmodosh mo ka wuny is e mo ma suug mo be.

⁴ Dhali e uni mo tani a'di ki o uni gwo mo ki: Um mini ii e bwaman monsinum pem mo si'da/ dhali a'diyin jin 'boro'd mo tani aha/ mina ci um a'di mo. Wakan uni iikin mo be.

⁵ Gom ya jin yana a'di dok/e ka tente/ di'di bwanṅ 'kup mo dhali ka tente/ kwara mo tani a'di ki mii mii jin nyaḡka'd kan mo si'da/.

⁶ Dhali ka tente/ ta'da tente/ mudhe'd mo tani a'di yaki'd mo dhali gam kun tiya mmodosh mo dhali a'di ki o uni gwo ki: Atinta dosha um mmahan ka wuny is kan iyula tee mo?

⁷ Uni ki thok a'di gwo mo ki: Haali/ wathin tal 'de/ yisa di'da jin ṅapi aman mo. A'di ki o uni gwo mo ki: Um mini iiku/ mo e bwaman monsinum pem mo si'da/.

⁸ Dhali ki mom'pimpili/ pu'dki'd mo tani com gi monsinu o'da mandhu tom piti gwo mo ki: Yuki imanmiya tu'c mo dhali ci uni tom buni gun miina uniya tu'c mo mmoṭel 'pen nyaḡki uni gun 'ko'd mo ntagi uni kun 'koni tṽwa/a/ mo be.

⁹ Dhali ki uni gwansan kun yuk^kunu mo ka tente/ mudhe'd pu'dkin mo tani uni ka 'de^te/ 'de^te/ bu'thki nasa guurush mo.

¹⁰ Dhali ki uni kun 'koni t^wa/a/ pu'dkin mo tani uni kulumki gwo i bwa mo ki uni mini 'taki bu'th ki nyanye/ mo. Hili uni 'baar mo ka 'de^te/ 'de^te/ si'da/ bu'thki nasa guurush si'da/ mo be.

¹¹ Dhali ki uni bu'thki uni mo tani uni miikina gumgum apo/ com gu'b mo

¹² mmo/o gwo mo ki: Uni gwansan kun miikina tu'c n^k'o'd mo ka jasa tenten 'de/ mo tani dhali /e ki dhu uni mmonyakki aman mana, aman kun miikina tu'c kun di^tadi^t ka tente/ jin 'batha'ba'th kan mo.

¹³ Hili a'di tho^k jan ta^l 'deⁿ kamu/ gwo mo 'peni uni mo ki: Akam pema, aha/ dinaki mii /e ki shi/ mo. Dina /e ki gam gwo me'd ki aha/ mo gom nasa guurush mo 'taa?

¹⁴ Buthi a'di jin ta jim pini mo ma dhali yaku/ mo. Aha/ kwanykina a'di jin ci^ka/ uni gwansan mo kun i^yini 'ko'd mo me'd jin ci^kika/ /e mo be.

¹⁵ Aha/ dina bway ki k^any mo be mmomii to jin oyaa/ bwa mo gom a'di jin ta jim pem mo be. Walla mina /e ta ham 'kus mo gom aha/ mmomiga/ mii ka 'the mo ki 'bore/ mo 'taa?

¹⁶ Wakan uni gun 'koni 'ko'd mo tani minu dhu n^tw/a/a/ mo dhali uni gun 'koni t^wa/a/ mo tani minu dhu n^k'o'd mo be.

Yesus Torki Mowum Piti It^wa/a/ Me'di Kwara mo

¹⁷ Dhali ka Yesus yaki'd ka gagamis e Pa Urushaliim mo tani a'di suski imancik a'di gwo i kume'd i ce'dka su/ mo uni 'cena mo dhali e bway mo tani a'di ki o uni gwo mo ki:

¹⁸ Hili ana iina ii ka gagamis e Pa Urushaliim mo, dhali Ya/ gi 'Kwani minu ci 'kwaniⁿ gasiis kun cani me'd mo dhali iman'kwar to mo, dhali uni mini wa^k a'di mo mmo'kosh a'di jwa mo be.

¹⁹ Dhali uni mini ci a'di ki 'kwani kun 'koki ta 'Kwani Yahuuda/ mo mmomii a'di ka mak mo dhali mmodor a'di mo dhali 'kosh a'di mo ki cwany'ci^than dhul mo, dhali a'di midu cu mis mo ka cim kwara mo be.

Gwondot ma Yakuub dhala Yohaana mo

²⁰ Dhali yan 'ko'd ata'da gi iya/ ma Sebadi pu'dkini a'di mo nya^kki iya/m piti mo dhali 'ko ki jin 'kupa'dupuni bwambori a'di mo, dhala yim ki do^t a'di gwo mo gom to mo.

²¹ Dhali a'di ki owa yim gwo mo ki: Atinta n^apa /e mo? Ayim ki tho^k a'di gwo mo ki: Kani iya/m pem su/ gwansan gwo mo ma mmo'ko mo, jan 'de/ midu ca'b /e ki me'da bim poros pini mo dhali jan 'de/ midu ca'b /e ki me'da biny cam pini mo e bampam pini mo be.

²² Hila Yesus ki tho^k a'di gwo mo ki: Um 'koki mish to jin do^tkina um mo be. Um mini mish piya kubbaaya jin pikika/ mo 'taa? Uni ki tho^k a'di gwo mo ki: Aman mina mish mii mo be.

²³ A'di ki tho^k uni gwo mo ki: Um mini piya kubbaayam pem mo. Hili mmo'ko aha/ ki me'da bim poros pem mo dhali ki me'da cam pem mo tani a'di diki ta miim pem mmodhal um bway mo, haali/ a'di ta mo gom uni gwansan kun thosonkin ma Ababam pem mo gom uni mo be.

²⁴ Dhali ki uni gun 'koni 'kume'd ci^kki gwo yan mo tani uni 'kokin ka nyor mo apo/ uni su/ gwansan mo kun ta ikam mo be.

²⁵ Hila Yesus yuk^ki uni mo dhali o gwo mo ki: Um mishki mo mo ki tapa kun 'koki ta 'Kwani Yahuuda/ mo mii miin tapa apo/ uni mo dhali 'kwanim buni gun can mo miiki moshirr apo/ uni mo be.

²⁶ Mii yansan minu 'koki mii wakan e bwam um mo. Hili a'diyin jin midu 'taki ca mo mbwam um mo tani a'di midu mii ta amanmiiya tu'c bum mo.

²⁷ Dhali a'diyin jin midu 'taki di ntwa/a/ mbwam um mo tani a'di midu mii ta cinjinam bum mo be.

²⁸ Wakansan me'd Ya/ gi 'Kwani pu'dki'd mo ki a'di minu 'koki mii to mo tani hili ki a'di midu mii to gom 'kwani mo dhali mmoçi mondiki/em piti mo mmota amangwam gom 'kwani ka ris mo be.

'Kwani Su/ kun Bu'thki Momish Mo mo

²⁹ Dhali me'd jin iikina uni ka pije/ mo 'peni Pa Ariiha mo tani adhana waambuhany 'kwani bathki a'di nsho'k mo be.

³⁰ Dhali hili 'kwaniny ja'da/ isu/ 'kokin e shemen bway mo be. Ki uni cikki gwo ka Yesus yaki'd ki yampe mo tani uni cuu gwo kagahara ki: Miiyi mii apo/ aman mo ma, Ya/ ma Dawuu'd mo.

³¹ Dhali awaambuhany 'kwani kucurki uni ki gwo mo mmoçor uni gwo mo mmo'ko ki shwam mo. Hili uni cuukin kagahara ki nyanye/ mo ki: Tapa, miiyi mii apo/ aman mo ma, Ya/ ma Dawuu'd mo.

³² Dhala Yesus doshki'd mo dhali yuk uni mo dhali o gwo mo ki: Atinta o um bwa jin miga/ mii gom um mo?

³³ Uni thoç a'di gwo mo ki: Tapa, dhalki em bam ka'du mo ma.

³⁴ Dhala Yesus ki kwo'c uni e i is mo dhali ta uni em buni ki me'd mo, dhali ki jahanne/ uni bu'thki momish mom buni mo dhali uni bathki a'di nsho'k mo be.

21

Mo jin Pinu Mii E mo Mmoçi Pa Urushaliim mo

¹ Dhali ki uni 'dishkin e Pa Urushaliim mo dhali pu'd mo e Pam Beetpaji mo e 'Kuwosh Setuun mo tani yan'ko'd Yesus ki hash imancik a'di gwo isu/ mo

² mmo/o uni gwo mo ki: Iiku/ mo ma e bampa/ jin di'd ka par 'bani um mo dhali ki jahanne/ um mini gam thuluny jin shi'du/ mo dhali aran nyaç di ki a'di mo. 'Cuçi uni mo dhali doyu/ uni i aha/ mo ma.

³ Wakki/ wathin 'deç kamu/ midu 'taki o um gwo mo tani um mini o a'di gwo mo ki: Tapa a'di midu mii ta gi uni mo dhali a'di midu doçu/ uni ki jahanne/ mo be.

⁴ Mii yansan a'di bu'thki mo mo jin minu thim gwo mo, a'di jin okin ma mançi gwo ma Arungimis kadhamo/ mo mmo/o gwo mo ki:

⁵ Tori 'bwa/ ma Sihyuun gwo mo ma, hili amalik pini a'di pu'dki'd e /e mo mmokar is ki gwa'd mo, dhali a'di merki thuluny apo/ mo, dhali eya po/ ari thuluny mo, a'di jin ta arin thuluny mo.

⁶ Imancik a'di gwo uni iikin mo dhali mii a'di me'd gwo ma Yesus jin kankina a'di uni mo be.

⁷ Uni suski thuluny dhali aran mo dhali pa'd burrinyem buni apo/ uni mo, dhali a'di merki a'di apo/ mo be.

⁸ Dhala waambuhany 'kwani 'dishkina 'twa/ m'baar mo uni kun pa'dki burrinyem buni mbway mo dhali kun tiya uni kwa/kina biny cwa mo dhali pa'd uni e bway mo be.

⁹ Dhala waambuhany 'kwani iikini bwambori a'di mo dhali uni gun bathki a'di nsho'k mo tani kumki cuuwa/ mo ki: Hosanna e Ya/ ma Dawuu'd mo. Mom'bor mii gom a'di jin yayi'd ki gway gi Tapa mo. Hosanna a'di jin di'd e mo jin eka/ ek mo.

¹⁰ Dhali ki a'di cikki'd mo e Pa Urushaliim mo tani aris 'kwani gi 'penkuman bampa/ uni ci'thkunu is ki mii mo mmo/o gwo mo ki: Kaja a'danne?

¹¹ Dhala waambuhany 'kwani o gwo mo ki: Yansan ta'da Mançi Gwo jin ta'da Yesus 'peni Pa Naasira gi Pany Jaliil mo be.

Mmodhelel Gu'b gi Mondheleladhelel mo

¹² Dhala Yesus cicki'd e gu'b gi mondheleladhelel ma Arungimis mo dhali urki'da ris uni ka piye/ mo uni gun yolki to mo dhali kun yoli to mo e gu'b gi mondheleladhelel mo. Dhali a'di ki 'danƙala tharabeesa gi uni gun wani emena guurush mo dhali mon'ko gi uni gwansan kun yoli gurko/ mo be.

¹³ A'di ki o uni gwo mo ki: A'di 'kwarkunu mo ki: Gu'b pem minu yuk ki gu'b gi mon'tho mo. Hili um ki mii a'di me'd gu'b gi 'kwanin 'di/ mo be.

¹⁴ Dhali 'kwaniny ja'da/ dhali uni gun ta njwol pu'dkini a'di mo e gu'b gi mondheleladhelel mo dhali a'di waƙki uni mo be.

¹⁵ Dhali hili ki igasiis kun can mo dhali iman'kwar to mo parki miim 'borga/ kun miikina a'di e mo tani dhali uci mmogwona uni mo e gu'b gi mondheleladhelel mo ki: Hosanna e Ya/ ma Dawuu'd mo tani, uni 'kokin ka nyora du mo be.

¹⁶ Dhali uni ki o a'di gwo mo ki: A/e cikki gwo jin ona uni gwansan mo? Dhala Yesus ki thoƙ uni gwo mo ki: Nye. 'Kona um ki den gwo e ki suny suny mo 'taa? jin o gwo mo ki:

'Peni 'twa/ uci dhali uni gun pina ko mo tani /e ƙalki momaƙa 'borgaƙ gana/ mo be.

¹⁷ Dhali a'di ki dhal uni 'pen mo dhali ya mo e 'perƙuman bampa/ gi Pam Beetaniya mo dhali ca'b e mun mo be.

Cwampu/ jin Jeekunu mo

¹⁸ Dhali ki mo ta mon'thamo/ mo tani me'd jin doƙkina a'di e 'perƙuman bampa/ mo tani a'di 'koshkina te/ mo be.

¹⁹ Dhali a'di yaki'd mo mmonapa pu/ mo jin di'd e shemen bway mo dhali ki a'di yaki'd mo dhali diki gam maman tal 'de/ 'peni a'di mo tani hili jasi 'cemen uni 'cena mo be. Dhali a'di ki o a'di gwo mo ki: Maman 'peni/ e mo tani minu 'koki piyu/ shush ka piye/ ki sule/ sule/ mo doƙ/e. Dhali apu/ a'di ku'thki'd ki jahanne/ mo be.

²⁰ Dhali ki imanciƙ a'di gwo parki a'di e mo tani uni merkin mo mmo/o gwo mo ki: Hili atinta lan ma pu/ ku'th hila/ ki jahanne/ kan mo?

²¹ Dhala Yesus ki thoƙ uni gwo mo ki: Ka jin gana/ aha/ ona um gwo mo ki: Waƙki/ um mini ta gi monƙam gwo is mo dhali 'koki shi/ bwa 'kup mo tani um mini 'koki mii jasi a'di jin miikunu mo gom cwampu/ yan mo. Hili waƙki/ um mini owa dhan wosha turga/ yansan gwo mo ki: Dhalki a'di gunu mo dhali biƙ mo e bwam ƙumma/ yi'de/ mo tani, a'di minu mii mo be.

²² Dhali ma to yin jin mina umi doƙ ki mon'tho mo tani um mini bu'th a'di mo waƙki/ um ta gi monƙam gwo is mo be.

Moshirr ma Yesus Doƙkunu Gwondoƙ mo

²³ Dhali ki a'di pu'dki'd mo e gu'b gi mondheleladhelel mo tani igasiis kun can dhali 'kwani gwanyjaka/ gi 'kwani mo, uni pu'dkini a'di mo me'd jin torƙina a'di gwo mo dhali o gwo mo ki: Ki moshirr jana sa/ mmiikina /e aris to gwansani 'baar mo kan? Dhali aja a'di iƙiki /e moshirr yansan mo?

²⁴ Yesus ki thoƙ uni gwo mo ki: Aha/ si'da/ mina thoƙ um gwondoƙ mo dhali waƙki/ um mini tor aha/ gwon thoƙ mo tani yan'ko'd aha/ si'da/ mina tor um gwo mo gom gwo gi moshirr yan jin miikika/ to gwansan mo be.

²⁵ Ki mo jin miin ma Yohaana mii ki yi'de/ mo tani 'peni mana moye? 'Peni momis mo 'taa? Walla 'peni 'kwani mo? Dhali uni walkin ka rem 'kup mo

mmo/o gwo mo ki: Wakki/ ana mina 'taki o ki 'peni momis mo tani a'di mididi 'taki o ana gwo mo ki: Ba tinta 'kona um ki gam a'di gwo is mo?

²⁶ Hili wakki/ ana ona ki, 'peni 'kwani mo tani, ana ko/ kina waambuhany 'kwani mo. Haali/ uni 'baar mo karkina Yohaana ka manci gwo ma Arungimis mo be.

²⁷ Wakan uni thokkina Yesus gwo mo ki: Aman mola mo mo be. Dhali a'di ki o uni gwo mo ki: Wakan si'da/ aha/ mina diki tor um gwo mo gom moshirr yan kun miikika/ aris to gwansan mo be.

Gwom 'Bith/e gom Iya/ Isu/ mo

²⁸ Dhali um kulumki gwo mbwa wakata mo? Gom wathi/ jin 'kona iya/ isu/ mo. Dhali a'di yaki'd mo e a'di jin ta'da bwanyara/ mo dhali o a'di gwo mo ki: Ya/uma, yaku/ mo dhali miya tu'c e bwaman monsinu shwane/ mo.

²⁹ Dhali a'di ki thok a'di gwo mo ki: Aha/ mina ya yisa. Hili n'ko'd mo tani a'di rici'da du is mo dhali ya mo be.

³⁰ Dhali a'di yaki'd mo e a'di jin 'kon ma po/i su/ mo dhali o a'di gwon tal 'de/ mo. Dhali a'di ki thok a'di gwo mo ki: Aha/ mina ya mo gana. Hili a'di diki ya mo be.

³¹ Jana 'peni bwam uni su/ gwansan jin miiki bwa gi com mo? Uni ki thok a'di gwo mo ki: Jin t'wa/a/ mo be. Dhala Yesus ki o uni gwo mo ki: Ka jin gana/ aha/ ona um gwo mo ki, imantera thulpa/ dhali uni gun mii miinyal mo tani mini ii nt'wa/a/ ki um mo e Bampa/ ma Arungimis mo be.

³² Haala Yohaana pu'dki'd mo e um mo ki bway gi miinkar/e mo. Dhali um 'koki gam a'di gwo is mo. Hili imantera thulpa/ dhali uni gun mii miinyal mo tani uni gamki a'di gwo is mo be. Dhali hili me'd jin hilkina um a'di mo tani n'ko'd um 'koki rica du is mo dhali gam a'di gwo is mo be.

Gwom 'Bith/e gom Bwaman mo ma Mura'th jin Sinu mo dhali Imanhil Mo mo

³³ Ciki gwom 'bi'th/en kamu/ mo. Wathi/ jin cila gu'b mo di'd mo a'di jin thosoni mo mo e monsinu mo dhali a'di ki nyanja gon mmo'kam a'di is mo. Dhali a'di ki cwany mo mo mmonyu/a mura'th nycine/ mo dhali a'di ki nyan gu'ba turga/ mo dhali a'di ki dhal a'di e uni gun miina tu'c mo dhali a'di ki ya bampa/ jin si'dasi'd mo be.

³⁴ Dhali ki yil gi maman cwa 'dishi 'twa/ mo tani a'di hashki cinkinam piti e uni gun miina tu'c mo mmokali maman cwam piti mo be.

³⁵ Dhali imanmiya tu'c bu'thki cinkinam piti mo dhali dor jan 'de/ mo dhali jan kamu/ 'koshkina uni jwa mo dhali jan kamu/ 'koshkina uni ki wosh mo be.

³⁶ Dhali dok/e a'di ki hash cinkinam piti mo, a'di jin bol kun t'wa/a/ e ka ris mo, dhali uni mii uni ki miin tal 'de/ mo jin miina uni mo be.

³⁷ Yan'ko'd a'di ki hash ya/m pitin gana/ e uni mo mmo/o gwo mo ki: Uni mini tak ya/m pem mo be.

³⁸ Hilki imanmiya tu'c parki ya/ e mo tani uni o gwo mo cem buni mo ki: Yan ti nta a'di jin mididi kal mal mo. Iiyu/ mo ma, dhalki ana 'kosha a'di jwa mo dhali kal mal piti mo.

³⁹ Dhali uni bu'thki a'di mo dhali bi't a'di ka pije/ 'peni bwaman monsinu mo dhali 'kosh a'di jwa mo be.

⁴⁰ Dhali wakan ki com jin cila monsinu mo mididi pu'du/ mo tani a'di mididi mii atinta mo gom imanmiya tu'c gwansan mo?

⁴¹ Uni ki thok a'di gwo mo ki: A'di mididi dhu uni gwansan kun ta 'kwanin thus mo e mowu jin ka/aka/ mo, dhali dhal monsinum piti ki imanmiya tuca tiya mo, uni gun mini ci a'di maman cwa gi yil buni mo be.

⁴² Yesus ki thok uni gwo mo ki: 'Kona um ki den gwo e ki suny suny mo 'taa e Gwo ma Arungimis jin 'kwarkunu mo ki:

Ki wosh gana/ yansan jin nyan'kunu gu'b mo tani wak'kina imannyan' gu'b mo dhali a'di warki'd mo ki dhan 'kupan wosh gi 'pena bi mo.

Mii yansan a'di ita mii jin miikina Tapa mo, dhali a'di ta mii jin meru em bana mo be.

⁴³ Wakan aha/ mina tor um gwo mo ki: Bampa/ ma Arungimis mo minu bu'th 'peni um mo dhali ci a'di ki kala kamu/ mo jin midi dho'th maman e a'di mo be.

⁴⁴ Dhali a'di jin midi 'bar apo/ 'kuwosh yansan mo tani midi 'ce'd bwa ka 'ci'cimi'th mo, hili ki a'di midi bit apo/ jan 'den kamu/ mo tani midi yap a'di mo be.

⁴⁵ Dhali ki igasiis kun can dhali 'Kwani Parisiyiin cikki gwom 'bi'th/em piti mo tani uni nyithki gwo ki a'di oki gwo gom uni mo be.

⁴⁶ Hili ki uni palki mii mmobu'th a'di mo tani uni ko/ kina waambuhany 'kwani mo haali/ uni karki a'di ka manci gwo ma Arungimis mo be.

22

Gwom 'Bi'th/e gom Miimash jin Yukuwa Yuk mo

¹ Dhali dok/e Yesus oki gwom 'bi'th/e e uni mo mmo/o gwo mo ki:

² Bampa/ gi Momis miga/ kar ka par 'ban ka malik mo, a'di jin yukki'da yuk mo gom miimash gi ya/m piti mo be.

³ Dhali mmohasha a'di cin'kinam piti mo mmoyuk uni gwansan kun yuk'kunu mo e momiimash jin yukuwa yuk mo tani hili uni 'koki iiyu/ mo be.

⁴ Dhali a'di ki hash cin'kinan tiya mo mmo/o gwo mo ki: Yuki uni gwansan kun yuku mo ma. Hili aha/ thosonkina tontem pem mo, dhali amorbip pem mo dhali ushi bip pem mo uni 'koshkunu mo dhali aris to 'baar mo thosonkunu mo. Iiyu/ mo ma e mo ma yuk jin yuku mo e momiimash mo be.

⁵ Hili uni 'koki ciya hirdhe/ ki a'di mo dhali uni iikin mo dhali jan 'den kamu/ e buntom piti mo dhali jan kamu/ e mo ma tu'c piti mo be.

⁶ Ki 'kwanin tiya 'kon mo mmojigit cin'kinam piti 'ba/ ki me'd mo tani kun tiya miikina uni ki mon'the is mo dhali 'kosh uni jwa mo be.

⁷ Dhala malik shwa'da nyor ka nyor mo dhali a'di ki hash 'kwani ma meem piti mo dhali 'ce'd uni gwansan sho'k mo kun 'koshkina mee mo dhali ci'th bampam buni ki o'd mo be.

⁸ Dhali a'di ki o cin'kinam piti gwo mo ki: Ayuk jin yuku mo gom moshwa to mo e momiimash mo tani a'di thosonkunu mo, hili uni gwansan kun yuk'kunu mo tani uni ta 'kwani kun 'koki ha me'd mo.

⁹ Iiku/ mo wakan e bwaya beega/ mo dhali yuki 'kwani e momiimash ka ris mo me'd jin mina umi gam mo.

¹⁰ Dhali cin'kina/ gwansan uni iikin mo e bway tur mo dhali tula ris uni 'baar mo is kun gamkina uni mo nyakki uni kun shiyini lu/ mo dhali kun 'boron mo. Wakan momiimash jin yuka yuk mo tani a'di 'tu'dkunu mo ki yilkinan' 'kwani mo be.

¹¹ Hili ka malik pu'dki'd mo dhali hil 'kwani yilkina/ mo tani a'di parki wathin 'den kamu/ e mo mmodara a'di gi burriney/ gi momiimash mo be.

¹² Dhali a'di ki o a'di gwo mo ki: Akam pema, atinta iyayina /e mmahan ki dar gi burriney/ gi momiimash kan mo? Dhali a'di diki thok 'twan kamu/ mo be.

¹³ Dhali yan'ko'd amalik ki o gwo mo e uni gun miina tu'c mo ki: De'ki a'di ki me'di lu/ mo dhali ki shoki lu/ mo ma dhali bit a'di e jis jin ta'da 'tum ka

'tum mo, dhali e mun mo tani mo yan a'di ta mo jin mina 'kwani ko mo dhali 'pe'd shem buni mo be.

¹⁴ Haali/ 'kwani ka ris yuƙkunu mo tani hili uni 'kokini daƙa/ mo kun kwanykunu mo be.

Mo gi Cinu Athulpa/ ka Kaysar mo

¹⁵ Yan'ko'd 'Kwani Parisiyyiin iikin mo dhali gam 'twa/ 'kup mo mmocesh a'di ki gwo jin ona a'di mo be.

¹⁶ Dhali uni ki hash imanciƙ a'di gwo i a'di mo nyakki 'Kwani Hirodusiyyiin mo mmo/o gwo mo ki: Manƙor Gwo, am misha ki/ e ta a'din gana/ mo dhali /e ki tor gwo gi bway ma Arumgimis gana/ mo dhali /e diki ko/ 'kwani mo haali/ /e diki mii mii ka gwar 'de/ gom buye/ jin nyiƙha /eya nyiƙh mo walla gom 'kwani kun ta tapa mo.

¹⁷ Tori aman gwo mo ma, gwo kuluma /e mbwa katinta mo? A'di ta gwonƙan 'taa? jin minu ciya Kaysara thulpa/ mo walla minu dhalku/ mo?

¹⁸ Hila Yesus mmonyiƙha a'di tonthus buni mo tani a'di ki o gwo mo ki: Atinta pala um aha/ ki gwo kan mo, um 'kwani kun tana he'k e ka he'k e mo?

¹⁹ Tori aha/ nasa guurush jin cinuwa thulpa/ mo ma. Dhali uni ki guyu/ a'di nasa guurush mo be.

²⁰ Dhala Yesus ki o uni gwo mo ki: Jamas maja a'dan? dhali aja a'di i'kwara a'di san mo?

²¹ Uni ki thoƙ a'di gwo mo ka Kaysar mo be. Dhali yan'ko'd a'di ki thoƙ uni gwo mo ki: Wakan ciƙa Kaysar to jin ta jim ma Kaysar mo ma. Dhali ciƙa Arumgimis to jin ta ji ma Arumgimis mo ma.

²² Ki uni ciƙki gwo gwansan mo tani uni merkin mo, dhali uni dhal a'di 'pen mo dhali ii mo be.

Mo gi Dotu Gwondoƙ gom Mo gi Pinu mo

²³ Dhali ka tente/ caan mo tani 'Kwani Sadukiyyiin pu'dkini a'di mo mmo/o gwo mo ki: Mompinuƙ kamu/ yisa di'da. Dhali uni ki doƙ a'di gwondoƙ mo

²⁴ mmo/o gwo mo ki: Manƙor Gwo, aMusa a'di oki gwo mo ki: Wakki/ wathi/ midu wu mo ki dar gi uci mo tani akam piti midu masha 'bom jin dar ga kath mo dhali cis uci goma kam piti mo be.

²⁵ Dhali uni ikam 'kokini pesu/ mo gun 'koni bwam am mo. Jin twa/a/ mashki'd mo dhali a'di wuki'd mo ki dar gi uci mo, dhali a'di ki dhal ash ka kam piti mo be.

²⁶ Wakan si'da/ a'di jin 'ko'd mo dhali jin 'kon ma po/i kwara mo ntagi uni 'baar mo 'kokini pesu/ mo be.

²⁷ Dhali 'ko'di uni 'baar mo tani a'bom wuki'd si'da/ mo be.

²⁸ Dhali e mompinu mo tani wakan e uni gun 'koni pesu/ mo tani ayim midu ta asha ja mo? Haali/ uni 'baar mo mashkina yim mo be.

²⁹ Hila Yesus ki thoƙ uni gwo mo ki: Um thuthi mii mo haali/ um 'koki mish Gwo ma Arumgimis kun 'kwarkunu mo walla mom'bi'th ma Arumgimis mo be.

³⁰ Haali/ e mompinu mo tani uni mini mash mo yisa walla minu 'koki ci bway mo mmomash mo si'da/. Hili uni mina e waki iman'doyu gwo mo e momis mo be.

³¹ Dhali gom gwo jin pinu 'peni mowu mo tani 'kona um ki der gwo e mo, a'di jin okin ma Arumgimis um mo mmo/o gwo mo ki:

³² Aha/ tana Arumgimis ma Ibrahiim mo dhali Arumgimis ma Is/hak mo dhali Arumgimis ma Yakuub mo. A'di diki ta Arumgimis gom uni gun wukin mo, hili gom uni gun 'kokin ki e mo be.

³³ Dhali ka waambuhany 'kwani cikki gwo yan mo tani uni 'kokin mo mmomer mo gom gwom piti jin ṭora a'di mo be.

Aadhan Gwoṅkan jin Ca'd jin 'Kwarkunu mo

³⁴ Dhali ki 'Kwani Parisiyiin cikki gwo yan ki a'di 'teki 'Kwani Sadukiyyin 'twa/ mo tani uni tulki is mo mmontal 'de/ mo be.

³⁵ Dhali jan ṭal 'deṅ kamu/ 'peni uni mo tani jin ta'da manmisha jo'd gwoṅkan mo dotki a'di gwondot mo mmopal a'di mo be mmo/o gwo mo ki:

³⁶ Mantor gwo, gwoṅkan jana i/eka/ ek mo mbwan gwoṅkan jin 'kwarkunu mo?

³⁷ Dhali a'di ki thoḳ a'di gwo mo ki: /E mini mii en Tapa Arungimis pini ka dum pini 'baar mo dhali ka ḳashiram pini 'baar mo dhali ki bwam pini 'baar mo be.

³⁸ Gwo yansan a'di ita gwoṅkan jin ṭwa/a/ jin eka/ ek mo e gwoṅkan jin 'kwarkunu mo be.

³⁹ Dhali jin 'ko'd jin waki a'di mo tani a'dihe/ mo be. /E mini en amannyak ca'b pini me'd is piniṅ gana/ mo be.

⁴⁰ Eya po/ gwoṅkan su/ gwansan kun 'kwarkunu mo tani uni i'dapkan ki gwoṅkan jin cinu 'baar mo dhali gwo jin cina imanci gwo ma Arungimis kadhamo/ mo be.

Gwo gi Dotu gom Ya/ ma Dawuu'd mo

⁴¹ Dhali ki 'Kwani Parisiyiin 'kokin mo mmotul is mo mmontal 'de/ mo tani Yesus ki dot uni gwondot mo be

⁴² mmo/o gwo mo ki: Atinta kuluma um gwo mbwa mo goma Kristhos mo? A'di ta ya/ maja mo? Uni thoḳ a'di gwo mo ki: Ya/ ma Dawuu'd mo be.

⁴³ Dhali a'di ki thoḳ uni gwo mo ki: Dhali wakki/ a'di wakan mo tani atinta on ma Dawuu'd gwo ki Shi/in mo mmoyuk a'di ki Tapa mo mmo/o gwo mo ki:

⁴⁴ Tapa o'da Arungimis pem gwo mo ki:

Ca'bi /e aha/ ki me'da bim poros pem mo ma,

ntagi aha/ mina dhu uni gun ta 'kup ki /e mo e bwan'kwariny mom pini jin dhuna /e sho'k mo be.

⁴⁵ Dhali wakka Dawuu'd ki yuk a'di ki Tapa mo tani ba/ata mmuna a'di ita ya/ m piti moyi?

⁴⁶ Dhali jan ṭal 'deṅ kamu/ yisa di'da jin mishi a'di gwo yansan thoḳ mo, walla 'pena tee caan mo tani jan kamu/ dok/e di'd 'de/ yisa jin dotki a'di gwondota kamu/ mo be.

23

Yesus Be'dki Mii gi Iman'kwar To mo dhali 'Kwani Parisiyiin mo

¹ Dhali yan'ko'd Yesus ki owa waambuhany 'kwani gwo mo dhali imancik a'di gwo mo be mmo/o gwo mo ki:

² Iman'kwar to dhali 'Kwani Parisiyiin uni 'kokin mo e monyca'b ma Musa mo be.

³ Wakan boti ki mii gi ma to gunn iniin dhali ciya hirdhe/ ki gwo jin ṭora uni um mo hili dhalku/ ki mii to kun miina uni mo, haali/ uni ciki gwo mo tani hili uni 'koki botki a'di mo be.

⁴ Uni dekki to jin ditadiṅ mo kun shina kal ki shi/ mo dhali uni ki dhu uni e 'kupa binj 'kwani mo. Hili uni ki is buni mo tani uni 'koki joḳ uni ki me'd buni mo be.

⁵ Uni miina ris tom buni 'baar mo ki uni mina 'kwani mish mo. Pilak^{*}terim* buni miina uni ki bee bee mo dhali burrinyen turgam buni nye'ba/ uni she/ ka yupen turga/ mo.

⁶ Dhali uni eni montak e mo jin yuk^kunuwa yuk mo dhali mom 'boron e gu'b gi montul is mo be

⁷ dhali en monthe me'd kagahara e mo ma suug mo dhali uni eni mii jin yuka 'kwani uni ki gum pem jin caa e ki ca mo.

⁸ Hili um mini 'koki ñap 'kwani mmoyuk um ki gum bam kun caa e ki ca mo haali/ um tan ga man^{for} gwom bum jin tal 'de/ mo dhali um tana waka tal 'de/ mo be.

⁹ Dhali um mini 'koki yuk wathin kamu/ ka babam bum e mony'cesh yan mo haali/ um tan ga Babam bum jin tal 'de/ mo a'di jin di'd e momis mo be.

¹⁰ Walla um yisa minu yuk ki itapa mo haali/ um tan gi tapam bum tal 'de/ mo a'di jin ta'da Kristhus mo be.

¹¹ A'di jin caaca e bwam um mo tani a'di midi ta cin^{kinam} bum mo be.

¹² A'diyin jin kar is piti ki ca mo tani minu kar ki gwa'd mo dhali a'diyin jin kar is piti ki gwa'd mo tani minu kar ki ca mo be.

¹³ Wayyi e um, 'kwani kun ta iman'kwar to mo dhali 'Kwani Parisiyiin mo kun tana he'k e ka he'k e mo. Haali/ um 'dapki bway gi Bampa/ gi Momis 'twa/ mo apo/ 'kwani mo. Haali/ um ki is bum 'koki ciç mo walla 'koki dhal uni gwansan bway mo kun mini 'taki ciç i a'di mo be.

¹⁴ Wayyi e um, 'kwani kun ta iman'kwar to mo dhali 'Kwani Parisiyiin mo kun tana he'k e ka he'k e mo. Haali/ um loski gu'b gi up gun wuna ikath mo dhali eya por ma piye/ mo tani um ki mii mon'tho mo ki rash rash mo. Wakan um mini bu'th dhan miiwak^g gun caaca mo be.

¹⁵ Wayyi e um, 'kwani kun ta iman'kwar to mo dhali 'Kwani Parisiyiin mo kun tana he'k e ka he'k e mo. Haali/ um tani mo mo dhali dhan yi'de/ mo dhali a'cesh mo mmogam jan tal 'den kamu/ jin dina e ki she/ mo mmobu'th gwom bum mo, dhali ki a'di warki'd ka manbu'th gwom bum mo tani um ki mii a'di ka 'ci ma al o'd me'di su/ ki nyanye/ mo mmobol is bum gana/ e mo be.

¹⁶ Wayyi e um, 'kwani kun tana ja'da/ ka ja'da/ mo kun toshki ta ashu/um bway mo, kun o gwo mo ki: Wakki/ jan tal 'den kamu/ midi thul me'da po/ gu'b gi mondheleladhelel mo tani a'di mii mii ki pe'th mo be. Hili wakki/ wathin kamu/ midi thul me'da po/ 'dolkon gana/ gi gu'b gi mondheleladhelel mo tani a'di deku ki gwom piti jin ona a'di is mo be.

¹⁷ Um 'kwani kun tana ja'da/ kun ta pus mo. Haali/ to jin ca'd ita'da ta mo, ta 'dolkon 'taa? walla gu'b gi mondheleladhelel jin kar 'dolkon ki a'di jin kogu mo?

¹⁸ Dhali um kun o gwo mo ki: Wakki/ jan 'de/ midi thul me'da powa gwata/ jin miinuwa bas mo tani a'di mii'd ki pe'th mo be. Hili wakki/ wathin 'den kamu/ thul me'da po/ to jin cinu ki me'd mo apowa gwata/ jin miinuwa bas mo tani a'di deka gwom piti jin ona a'di is mo be.

¹⁹ Um 'kwani kun tana ja'da/ mo. Haali/ to jana ica'd mo, to jin cinu ki me'd mo 'taa? walla gwata/ jin miinuwa bas a'di kar to jin cinu ki me'd ki jin kogu mo?

²⁰ Wakan a'di jin thuli me'da apowa gwata/ jin miinuwa bas mo tani a'di thulki me'di a'di mo dhali aris to 'baar kun 'koni a'di mo be.

²¹ Dhali a'di jin thuli me'da po/ gu'b gi mondheleladhelel mo tani a'di thulki me'di a'di mo dhali ki a'di jin ca' bki'd e a'di mo be.

* **23:5** Pilak^{ter}i ta'da yi'c jin dhunu Gwo ma Arumgimisa tiya kun 'kwarkunu mo apo/ mo mmohithi buye/ mo dhala biny cam mo e mon'tho mo.

²² Dhali a'di jin thuli me'da po/ momis mo tani thulki me'da powa kursori ma Arumgimis mo dhali ki a'di jin ca'bki'da po/ a'di mo be.

²³ Wayyi e um, 'kwani kun ta iman'kwar to mo dhali 'Kwani Parisiyiin mo kun tana he'k e ka he'k e mo, haali/ um cina nana/ ki to jin cinu Arumgimis mo dhali anuŋkure/ mo dhali ton kuyga/ jin miinuwa 'tash jin ta'da akammun mo dhali um ki ta piny is e ton tiya kun 'bitha mii 'ba/ ki 'bi'th mo me'd gwonkan jin cinu mo dhali momii ma kar/e mo dhali momii mo dhali mongam gwo is mo. Aris to gwansan ka ba/ mmuna umi mii mii mo mmodar ga piny isi cine/ ki miin tiya mo.

²⁴ Um kun toshki ta ashu/um bway kun tana ja'da/ mo, um ki dhim e ka pije/ mo dhali um ki los kalman ki 'kolo'c mo be.

²⁵ Wayyi e um, 'kwani kun ta iman'kwar to mo dhali 'Kwani Parisiyiin mo kun tana he'k e ka he'k e mo, haali/ um lamki 'ko'd gwar ma kubbaaya mo dhali asahan mo, hili e bwaman mo tani uni 'tu'dkunu mo ki mondil to mo dhali ki mii kun 'coka'cok mo.

²⁶ /E Wathim Parisi jin ta'da ja'da/ mo. Lami bwamana kubbaayam pini ntwa/a/ mo ma dhali asahan mo, wakan ki 'ko'd gwar ma pije/ si'da/ mididi dheleladhelel mo be.

²⁷ Wayyi e um 'kwani kun ta iman'kwar to mo dhali 'Kwani Parisiyiin mo kun tana he'k e ka he'k e mo, haali/ um wana e ki mon'kupaje kun kushu mo ki bany bany mo e mis 'te/ mo. Dhali eya por ma pije/ mo tani uni ki piyu/ monyjar/ mo, hili e bwaman uni mo tani uni 'tu'dkunu mo ka simanj 'kwani kun wukin mo dhali aris to mo kun nyo/anyo/ mo.

²⁸ Wakan um si'da/ eya por ma pije/ mo tani um ki pi monkar/e gom 'kwani mo, hili e bwam um mo tani um 'tu'dkunu mo ka he'k e mo dhali ki mii kun 'coka'cok mo be.

²⁹ Wayyi e um, 'kwani kun ta iman'kwar to mo dhali 'Kwani Parisiyiin mo kun tana he'k e ka he'k e mo. Haali/ um nyanji mon'kupaje gi imanci gwo ma Arumgimis kadhamo/ mo dhali um ki nyon to mo apo/ mon'kupajen 'kwanin kar/e mo,

³⁰ mmo/o gwo mo ki: Wakki/ ana mina 'taki 'ko ka tee gi ibabam bana mo tani ana mina 'taki 'koki nyak to mii ki uni mo e mo jin woluwa bas gi imanci gwo ma Arumgimis kadhamo/ mo be.

³¹ Wakan um o gwo apo/ is bum mo ki um ta iya/ gi uni gwansan kun 'koshkina mee gi imanci gwo ma Arumgimis kadhamo/ mo be.

³² 'Tu'di 'te/ ma ki piny piny mo ki mombar gi ibabam bum mo.

³³ Um kun ta tasha/ mo, dhali um kun ta ushin tashan 'thi/ mo, um mini mish ye kata sa/, um kun 'dapa'dap ki bway gi mo ma al o'd kan mo.

³⁴ Wakan aha/ hashkina um imanci gwo ma Arumgimis kadhamo/ mo dhali 'kwani kun yu'kayuk mo dhali 'kwani kun ta iman'kwar to mo. Dhali kun tiya mina uni 'kosh mo dhali 'kosh ki cwany'cithan dhul mo dhali kun tiya mina umi dor mo e gu'b gi montul is bum mo dhali to'c 'kus e bampa/ ki she/ ki she/ mo.

³⁵ Wakan eya po/ um mo tani arisa bas gi 'kwanin kar/e wolcina po/ mony'cesh mo 'pena bas ma Habiil jin di'd ka po/ mo ntaga bas ma Sakariyya jin ta ya/ ma Barakiyya mo a'di jin 'koshkina um mo e bwaman ma gwata/ jin karu mo ki jin kogu mo e mo jin miinuwa bas mo be.

³⁶ Ka jin gana/ aha/ tora um gwo mo ki aris to gwansan mini pu'd apo/ 'kwani gwansan kun tana nyakum yil mo be.

Yesus Gwoki'd Apo/ Pa Urushaliim mo

³⁷ Ayy Urushaliim Urushaliim jin 'koshki imanci gwo ma Arumgimis kadhamo/ jwa mo dhali 'kosh uni gwansan ki wosh kun hashkunu e /e mo.

Me'd wana risa kun oka/ ki tul uçim pini isi montal 'de/ mo me'd kumana rjwa jin wupi ushan piti ka bi mo, dhali um ushkin mo be.

³⁸ Hili mo mo ma, gu'b pini dhalkunu 'pen mo dhali ta ma'du/ ki ma'du/ mo.

³⁹ Haali/ aha/ tora um gwo mo ki: Um mini 'koki par aha/ e dok/ e mo ntagi um mini o gwo mo ki: Mom'bor mii gom a'di jin pu'dki'd ki gway gi Tapa mo be.

24

Mo jin 'Ce'du Gu'b gi Mondheleladhelel Sho'k mo dhali Jamas Mii jin Toru I_twa/a/ gom 'Pemen jin 'Ko'd mo

¹ Dhala Yesus dhalki gu'b gi mondheleladhelel 'pen mo dhali di'd mmoya ka pije/ mo ki imanci' a'di gwo pu'dkin mo dhali tor a'di gu'b gi mondheleladhelel mo be.

² Hili a'di ki thoç uni gwo mo ki: Um mishina ris to gwansani 'baar mo 'taa? Ka jin gana/ aha/ ona um gwo mo ki wosha kamu/ yisa minu dhal ka makampo/ apowa kamu/ jin midi diki bita 'cesh mo.

³ Me'd jin dikina a'di e 'Kuwoş Setuun mo tani imanci' a'di gwo pu'dkini a'di mo mmo/o gwo mo ka kwal is ki: Tor am gwo mo ma, kakasja sa/ mmına to yansani di mo? dhali ki jamas mii gi wakata mmına /e mpu'du/ mo dhali ki mii jin mina yil gi mony'ceshi di 'kup mo?

⁴ Dhala Yesus ki thoç uni gwo mo ki: Hili ki 'bore/ mo ma, ki wathin 'den kamu/ midi diki sus umi dheres mo.

⁵ Haali/ 'kwani tana ris kun mini iiyu/ ki gway pem mo mmo/o gwo mo ki: Aha/ tana Kristhos mo dhali uni mini sus tiya ka ris mmodheres mo.

⁶ Dhali um mini cik' gwo gom mo/as mo dhali gwo gom mo/as jin 'ce'du 'te/ mo. Hili mo mo ma ki um mini dhalki is ki ko/ mo haali/ mii yansan a'di midi bu'th embul mo mo dhali hili 'pemen diki pu'd naskina/ mo be.

⁷ Haali/ kala kamu/ midi cu mis apo/ kala kamu/ mo dhali 'penkuman bampañ kamu/ midi cu mis apo/ 'penkuman bampañ kamu/ mo, dhali te/ midi di mo dhali mony'cesh midi yikin is ki mo ka ris mo be.

⁸ Aris to gwansan uni ta jasi montel 'pen gi isa nyor mo be.

⁹ Yan'ko'd uni mini ci um mo ki um minu to'c bwa mo dhali dhu um mmowu mo. Dhali um minu shi/i e mo ka ris kal gi 'kwaniny'cesh mo gom gway pem mo be.

¹⁰ Dhali yan'ko'd 'kwanin tiya ka ris mini ye gwo is mo dhali wat' tiya gway ka rem 'kup mo dhali shi/a ashim bwa i is ka rem 'kup mo be.

¹¹ Dhali imanci' gwonthus mini cu mis mo dhali sus 'kwani ka ris mmodheres mo be.

¹² Dhali mo/en gi 'kwani ka ris mo tani mina isi mii ki dhadharmu'th mo haali/ aris tonthus kun 'coka'coç mo tani markunu is kagahara mo be.

¹³ Hili a'di jin 'dimki 'kup mo ntagi 'pemen mo tani a'di iminu woth' mo be.

¹⁴ Dhali gwom 'borga/ gi Bampa/ gi Momis mo tani minu mii cika pije/ e mony'ceshi 'baar mo me'd gwo jin cinu gom kal gi 'kwaniny'ceshi 'baar mo, idhali yan'ko'd mo tani 'pemen midi pu'du/ mo be.

¹⁵ Wakan ki um mini par a'di e mo mmodosha a'di e mo jin kogu mo a'di jin ta mii jin bulabal mo jin mina 'kwani ta'k is jwa mo tani a'di jin okin ma manci' gwo ma Arumgimis kadhamo/ mo jin ta'da Dani/aal mo (Dhalca mander' gwo e mishi gwo 'ban mo).

¹⁶ Dhali yan'ko'd dhalki uni gwansan kun 'kon e Pa Yahuudiyya mini so 'kuwoş mo.

17 Dhalki a'di jin di'd e 'kunu'g'b mididi diki thul ka 'cesh mo mmogu ton kamu/ 'peni gu'b piti mo.

18 Dhali a'di jin di'd e bwam bunto mo mididi diki doku/ ka nyan'ko'd mmobu'th burrinyem pom piti mo be.

19 Dhali ayy/ayy/ayy gom uni gwansan kun bwaa uci mo dhali gom uni gwansan kun ci uci ako mmopi ka tee gwansan mo.

20 Thoyi mo ma ki mosom bum mini 'taki 'koki ta mondit mo walla ka cim ma pesu/ mo.

21 Haali/ yan'ko'd adhan monto'c bwa mididi mo, gi ji wakan yisa di'da 'peni ka mun'kup gi mony'cesh mo ntagi shwanesan mo, yisa, dhali mididi diki di ki sule/ sule/ mo be.

22 Dhali wakki/ ka cim gwansan 'konuki 'taki 'koki 'cith bwa mo tani wathimpan kamu/ si'da/ minu 'taki 'koki wo'th mo be. Hili haali/ gom gway gi uni gwansan kun kwanykunu mo ka tee gwansan mo tani a'di i'cith kunuwa cim bwa mo be.

23 Yan'ko'd wakki/ jan 'den kamu/ mididi o um gwo mo ki: Hili mo mo ma, aKris'thos a'dan mo be tani walla, a'di acitta'an mo tani dhalku/ gwom piti ki gam is mo ma.

24 Haali/ ikristhos kun 'koki ta kun gana/ walla imanci gwo kun 'koki ta kun gana/ mo tani mini cu mis mo dhali tora dhan jamas mii mo dhala dhan momer mo. Wakan uni mini susa susi dheres mo ntagi uni kun kwanyu ki she/ mo wakki/ a'di mishu mii mo be.

25 Hili mo mo ma, aha/ tora um gwo n'wa/a/ mo be.

26 Wakan wakki/ uni mini o um gwo mo ki: Hili mo mo ma, a'di di'd e mombwaasho mo tani dhalku/ ki ii ka piye/ mo. Wakki/ uni o um gwo mo ki: Hili mo mo ma, a'di di'd isi bwaman gu'b gana/ mo tani dhalku/ gwom piti ki gam is mo ma.

27 Haali/ me'da wara sho'k jin pu'dki'd 'peni mom'pesho'k mo dhali dhwa/ a'd mo mo ntaga bora lun'gu'b mo tani wakan a'di mididi ta mo jin mina Ya/ gi 'Kwani ipu'du/ mo be.

28 E mo yin jin mina bun'gwar isi di mo tani a'di mina korro/ itul 'kup mmontal 'de/ mo be.

Mo jin Mina Ya/ gi 'Kwani Doku/ mo

29 Dhali ki jahanne/ 'ko'di monto'c bwa ka tee gwansan mo tani atente/ mididi dhorum mo mo dhali appe mididi diki ci mon'kush piti mo dhali arisa cul mini ta'k 'peni momis mo dhali aris mom'bi'th kun 'kon e momis mo tani minu yikin is mo be.

30 Dhali yan'ko'd jamas mii gi Ya/ gi 'Kwani minu piyu/ mo 'peni momis mo, dhali yan'ko'd arisa wak gi 'kwaniny'cesh mini ko mo dhali uni mini par Ya/ gi 'Kwani e mo mmopu'du/ e bwaarak 'peni momis mo ki mom'bi'th mo dhali ki monyca ilu/ mo be.

31 Dhali a'di mididi hash iman'doyu gwom piti ka dhana yuk gi cuuwa/ ma poome/ mo dhali uni mini tul unim piti is kun kwanykunu mo 'peni momis kun 'kona shem 'penabi idonon mo 'peni montel 'pen gi momis mo ntagi 'bana kamu/ mo be.

32 Mishi gwo 'ban mo ma 'peni cwampu/ mo. Ki jahanne/ me'd jin lu/kina a'di abinycwalman piti jin 'ta'dama'ta'dam mo tani dhali lu/ jipim piti mo tani um ki mish gwo 'ban mo ki moyurantee 'dishi'd mo be.

33 Wakan si'dayi, ki um ki para ris to gwansan e mo tani um ki mish mo mo ki a'di 'disha'dish mo dhali a'di 'dishki'd hila/ mo e 'twan'al mo be.

34 Ka jin gana/ aha/ ona um gwo mo ki 'kwani ma nyakum yil gwansan mini 'koki pe mo ntagi aris to gwansan mini bu'th mo mo be.

35 Momis dhali mony'cesh mini pe mo tani hili gwom pem mini 'koki pe mo be.

Wathij Kamu/ Yisa Mishi'da Tee mo dhali Mo mo

36 Hili ka tee caan mo dhali mo mo tani dina wathin 'de/ ki mish mo dhali iman'doyu gwo si'da/ kun 'kon e momis mo 'koki mish mo mo walla Ya/ si'da/, hili Ababa a'di 'de/ mo be.

37 Me'da tee ma Nuuh mo tani wakan si'da/ mina Ya/ gi 'Kwani pu'du/ mo be.

38 Haali/ ka tee gwansan itwa/a/ ka gannu/ yi'de/ mo tani uni 'kokin mo mmoshwa to mo dhali mmopi to mo dhali mmomash mo dhali mmociya ci mmomash mo ntaga tee ma Nuuh jin jithirkin a'di mo e bwam ma kur mo be.

39 Dhali uni 'koki mish mo mo ntaga gannu/ yi'de/ pu'dki'd mo dhali dhi'th uni 'baar sho'k mo. Dhali wakan mina Ya/ gi 'Kwani pu'du/ mo be.

40 Dhali yan'ko'd 'kwani gwasu/ mini 'ko mo e bwam bunto mo. Dhali jan 'de/ minu bu'th mo be dhali jan kamu/ minu dhalku/ mo be.

41 Up mini 'ko isu/ mo si'da/ kun mini yor to ayo mo. Dhali jan 'de/ minu bu'th mo be dhali jan kamu/ minu dhalku/ mo be.

42 Timi mo mo ma wakan, haali/ um 'koki mish mo mo atee jin mina Tapam bumi yayu/ mo be.

43 Hili mishi yaase mo ma, wakki/ com gu'b midi 'taki misha cim jin mina wathin 'di/ 'taki yayu/ mon'thiny mo dhali kwal to mo tani a'di midi 'taki tim mo mo dhali midi 'taki diki dhal gu'b piti mo ki a'di minu 'taki 'koki 'ce'd mo be.

44 Wakan um si'da/ mini mii thoson is mo haali/ Ya/ gi 'Kwani midi pu'du/ ki mo jin mina umi 'taki 'koki tosh mo.

Cinjina/ jin Ta jin Gana/ mo dhali Cinjina/ jin Diki Ta jin Gana/ mo

45 Kaja a'di jin ta isinj gana/ mo dhali jin ta cinjina/ jin yukayuk moye? A'di, jin mina tapam piti kar a'di tapa apo/ gu'b piti mo mmoci unim piti tonte/ ka tenterj gana/ mo?

46 Mom'bor mii 'te/ ba/ gom cinjina/ caan, a'di jin mina tapam piti pu'du/ mo mmogam mo ki a'di di'd mmomii kan mo be.

47 Ka jin gana/ aha/ ona um gwo mo ki a'di midi kar a'di ari tapa apo/ aris tom piti jin tana a'di mo be.

48 Hili wakki/ cinjina/ caan jin ta thus ki thus mo o gwo mo e is piti mo ki: Tapam pem tayi'da diite/ mo be

49 dhali yan'ko'd a'di ki tel mii 'pen mo mmodor igarr piti kun nyakka a'di atu'c mii mo dhali shwa to mo dhali pi to mo nyakki uni gun 'kosh ma su mo tani

50 dhali tapa gi cinjina/ midi pu'du/ mo ka tee jin dina a'di ki tosh ki a'di midi 'taki pu'du/ mo dhali ki mo jin dina a'di ki mish mo mo be.

51 Dhali a'di midi ci a'diya jisa mo dhali a'di midi kar a'di nyakki uni gun tana he'k e ka he'k e mo. Dhali e mun mo tani a'di ta mo jin mina 'kwani 'pe'd shem buni mo be.

25

Gwom 'Bi'th/e gom Nyaranj 'Kume'd mo

1 Yan'ko'd Bampa/ gi Momis minu kar ka par 'ban ki nyara/ kun 'koni 'kume'd mo kun kalkina lambam buni mo dhali ii mo mmorak wathinyanja'b mbway mo be.

² Dhali unin tiya kun 'koni mudhe'd mo tani uni ta pus mo dhali kun 'koni mudhe'd mo tani uni yuƙayuk mo be.

³ Haali/ uni gun ta pus ki pus mo kalkina lambam buni mo tani uni 'koki kala yini nyaƙki uni mo.

⁴ Hili uni gun yuƙayuk mo kalki tura/ yin nyaƙka lambam buni mo be.

⁵ Me'd jin tayina wathinyaƙa'ba diite/ mo tani uni 'baar mo to'da e is mo dhali ish e mo be.

⁶ Hili ki mombwam/erj gana/ mo tani cuuwa/ cuuyunu mo ki: Hili mo ma. Wathinyaƙa'b a'dan be. Iiyu/ ka pije/ mo mmoraƙ a'di mbway mo.

⁷ Dhali yan'ko'd aris nyara/ gwansan uni cuki mis mo dhali dhitha lambam buni is mo be.

⁸ Dhali uni kun ta pus ki pus mo ki o uni gun yuƙayuk gwo mo ki: Ciyi aman ara yin bum mo ma haali/ alambam bam mur ma yini ku'th mo be.

⁹ Hili uni gun yuƙayuk thoƙ uni gwo mo ki: Wariba/ a'di si'da/ midi diki mii 'kosh jwa mo gom am mo dhali gom um mo. Ba dhali mii e i is mo dhali ii mo e imanyol to mo dhali yolu a'di gom is bum mo.

¹⁰ Dhali ki uni 'kokin mo mmo/ ii mo mmoyol mo tani wathinyaƙa'b pu'dki'd mo dhali uni gwansan kun 'kokin mo mmothoson is mo tani uni iiki bway bwanj gu'b mo nyaƙki a'di mo e mo ma yuƙ gi momiimash mo. Dhali acampur mu'thunu mo be.

¹¹ Dhali yan'ko'd nyaran tiya uni pu'dkin mo si'da/ mmo/o gwo mo ki: Tapa Tapa, ka'dki aman gu'b mo ma.

¹² Hili a'di thoƙ uni gwo mo ki: Ka jinj gana/ aha/ tora um gwo mo ki: Aha/ mola um mo be.

¹³ Wakan timi mo mo ma haali/ um moli mo mo walla cim mo walla mo mo be.

Gwom 'Bi'th/e gom Kuluny 'Dolkon mo

¹⁴ Haali/ a'di mina e waki wathi/ jin ya ya yilkina/ e bampaƙ kamu/ jin si'dasi'd mo dhali a'di ki yuƙ cinƙinam piti mo dhali a'di ki ci uni tom piti mo be.

¹⁵ Dhali e jan 'de/ mo tani a'di ki ci a'di adhan kuluny 'dolkoni mudhe'd mo dhali e jan kamu/ tani a'di ki ci a'di adhan kuluny 'dolkoni su/ mo dhali e jan kamu/ mo tani a'di ki ci a'di adhan kuluny 'dolkoni 'de/ mo, e uni ka 'dete/ 'dete/ mo me'd isi to kun misha uni mii mo be. Dhali yan'ko'd a'di ki ya mo be.

¹⁶ A'di jin bu'thki adhan kuluny 'dolkoni mudhe'd mo tani a'di yaki'd mo ki jahanne/ mo dhali yol to ki uni mo dhali a'di ki ta/ a'di mo mmota adhan kuluny 'dolkoni mudhe'd ki nyanye/ mo be.

¹⁷ Wakan si'da/ a'di jin ta'd gi dhan kuluny 'dolkoni su/ mo tani a'di ki ta/ a'di mo doƙ/e mmota adhan kuluny 'dolkoni su/ ki nyanye/ mo be.

¹⁸ Hili a'di jin bu'thki adhan kuluny 'dolkoni 'de/ mo tani a'di yaki'd mo dhali cwany jisa 'cesh mo dhali ba/a guurush gi tapam piti mo be.

¹⁹ Dhali yan'ko'd mmosi'dkina tapam buni ca'b'ko'd ki si'd mo tani tapa gi cinƙina/ gwansan a'di pu'dki'd mo dhali thoson gwo gom ton den nyaƙki uni mo be.

²⁰ Dhali a'di jin bu'thki adhan kuluny 'dolkoni mudhe'd mo tani pu'dki'd kadhoƙ mo mmokaƙ adhan kuluny 'dolkoni mudhe'd ki nyanye/ mo mmo/o gwo mo ki: Tapa, /e ciƙi aha/ adhan kuluny 'dolkoni mudhe'd mo tani aha/ miikina to mmota/ uni mmota adhan kuluny 'dolkoni mudhe'd ki nyanye/ mmahan mo be.

²¹ Dhali tapam piti ki o a'di gwo mo ki: Mba/ ca/. /E ta cinƙina/ jin 'boro'd mo dhali jin ta isinj gana/ mo be. /E ta a'di jin ta isinj gana/ apo/ ushi to kun

gwa'dan mo. Aha/ mina kar /e apowa ris to ki nyanye/ mo. Huri /e mo 'te/ ma e moŋ'kuny bwa gi tapam pini mo.

22 Dhali a'di si'da/ jin ta'd gi dhan kuluny 'dolkoni su/ mo pu'dki'd kadhonj mo mmo/o gwo mo ki: Tapa, /e ciki aha/ adhan kuluny 'dolkoni su/ mo. Aha/ miikina to ki uni mo dhali ta/ adhan kuluny 'dolkoni su/ ki nyanye/ mmahan mo be.

23 Dhali tapam piti ki o a'di gwo mo ki: Mba/ ca/. /E ta ciŋkina/ jin 'boro'd mo dhali jin ta isiŋ gana/ mo. /E ta a'di jin ta isiŋ gana/ apo/ ushi to kun gwa'dan mo. Aha/ mina kar /e apowa ris to ki nyanye/ mo. Huri /e mo 'te/ ma e moŋ'kuny bwa gi tapam pini mo.

24 A'di si'da/ jin bu'thki adhan kuluny 'dolkoni 'de/ mo pu'dki'd kadhonj mo mmo/o gwo mo ki: Tapa, aha/ misha ki /e ta wathi/ jin cinthira cinthir mo haali/ /e ciŋhi to jin dina /e ki si mo dhali tul to is jin dina /e ki 'dash mo.

25 Wakan aha/ ko/ka is mo dhali aha/ yakina mo dhali ba'k adhan kuluny 'dolkon pini eya 'cesh mo. Dhali a'di a'dan be. Guyi a'di jin ta jim pini mo ma.

26 Hili tapam piti ki thoŋ a'di gwo mo ki: /E ta thus ki thus mo dhali /e ta ciŋkina/ jin ta'da piny is ka piny is mo. /E mishkin ki aha/ tana man'ciŋh to jin dika/ ki si mo? dhali tul a'di jin dika/ ki 'dash is mowa?

27 Dhali yan'ko'd /e ka ba/ mini 'taki dhuka guurush pem mo e imandhuwa guurush mo dhali ki yampu'd pem jin miga/ 'taki bu'th a'di jin ta jim pem gana/ mo dhali nyunycinam piti mo be.

28 Wakan buthi adhan kuluny 'dolkon 'peni a'di mo ma dhali ciki a'di jin ta'd gi dhan kuluny 'dolkoni 'kume'd mo.

29 Haali/ aris uni ka 'dete/ 'dete/ kun ta gi to mo tani minu ci to ki nyanye/ mo dhali uni mini ta gi to kun mini ur 'kup mo. Hili 'peni a'di jin dara'd mo tani hili a'di jin tana a'di mo tani minu bu'th 'peni a'di mo be.

30 Dhali bu'th ciŋkina/ jin ush me'd ki 'tash mo dhali biŋ a'di mo e mo jin ta'da 'tum ka 'tum mo. Dhali e mo yin mo tani a'di ita mo jin mina 'kwani 'pe'd shem buni mo be.

Mom'bor Mii dhali 'Kwani kun Jeenu mo

31 Ki Ya/ gi 'Kwani midi pu'du/ mo e monycam piti mo tani dhali ka ris iman'doyu gwom piti ilu/ mo tani dhali yan'ko'd a'di midi ca'b apowa kursorim piti gi monyca mo be.

32 Aris kal gi 'kwaniny'ceshi 'baar mo minu tul isi bwambori a'di mo, dhali a'di midi kwa/ uni bwa mo 'peni tiyan tiya mo me'd jin kwa/ ma manhil ka'bal ka'bal bwa mo 'peni mi mo be.

33 Dhali a'di midi dhu ka'bal ki me'da bim poros piti mo, hili mi mina a'di dhu ki me'da cam piti mo be.

34 Dhali yan'ko'd aMalik midi o uni gwansan kun 'kon ki me'da bim poros piti gwo mo ki: liyu/ mo ma, ayy um kun 'bor ma Ababa mii mo mmogam mal gi Bampa/ gi Momis jin thosonkunu mo gom um mo 'peni mo jin ka'bkunuwa 'cesh sho'k mo be.

35 Haali/ bu'dh jin 'kosha te/ aha/ mo tani dhali um ki ci aha/ tonŋe/ mo. Dhali ki aha/ metha yi'de/ mo tani dhali um ki ci aha/ yi'de/ mmopi mo. Dhali ki aha/ yana ya yilkina/ mo tani dhali um hanki aha/ mo be.

36 Dhali ki aha/ dina is 'te/ mo tani dhali um hi'thki aha/ burriŋye/ i is mo. Dhali ki aha/ 'ba'thki mo tani dhali um iiyini buti aha/ mo. Dhali ki aha/ dina eya sijn mo tani dhali um pu'dkini aha/ mo be.

37 Dhali yan'ko'd uni kun ta kunj kar/ e mini thoŋ a'di gwo mo ki: Tapa, kakasjana mparkina aman /e e mo mmo'kosha te/ /e mo dhali mmoci /e tonŋe/ mo? walla butha yi'de/ /e mo dhali aman ki ci /e a'di mmopi mo?

³⁸ Dhali kakasja mparkina aman /e e mo mmoya ya yilkina/ mo dhali aman ki han /e mo? walla dina /e is 'te/ mo dhali aman ki hi'th /e burriyne/ i is mo?

³⁹ Dhali kakasja mparkina aman /e e mo mmo'ba'th mo walla dina /e eya sijn mo dhali aman ki buti /e mo?

⁴⁰ Dhali aMalik ki thok uni gwo mo ki: Ka jin gana/ aha/ tora um gwo mo ki: Me'd jin miina um a'di gom a'din 'deŋ kamu/ jin pisi'd mo 'peni ushi uni gwansan kun tana waƙ pem mo tani um miiki a'di gom aha/ mo be.

⁴¹ Dhali yan'ko'd a'di midi o uni gwansan gwo mo kun 'kon ki me'da cam piti ki: Iiku/ 'peni aha/ mo ma, um kun jeekunu mo e mo ma al o'd jin midi diki us ki sule/ sule/ mo, a'di jin thosonkunu mo gom tapa ma ruma 'cesh mo dhali iman'doyu gwon thus piti mo be.

⁴² Haali/ aha/ 'kosha te/ mo ka jin gana/ dhali um 'koki ci aha/ tonte/ mo, dhali aha/ butha yi'de/ ka jin gana/ mo dhali um 'koki ci aha/ yi'de/ mmopi mo be.

⁴³ Dhali aha/ ka jin gana/ yana ya yilkina/ mo tani dhali um 'koki han aha/ mo. Dhali aha/ dina is 'te/ mo tani um 'koki hi'th aha/ burriyne/ i is mo be. Dhali ki aha/ batha mo tani dhali di eya sijn mo tani um 'koki buti aha/ mo be.

⁴⁴ Dhali yan'ko'd si'da/ uni mini thok gwo mo ki: Tapa, kakasjana mparkina aman /e e mo mmo'kosha te/ /e mo walla butha yi'de/ /e mo walla ya ya yilkina/ mo walla di is 'te/ mo walla 'ba'th mo walla di eya sijn mo dhali 'kona aman ki mii to gom /e mo?

⁴⁵ Dhali yan'ko'd a'di midi thok uni gwo mo ki: Ka jin gana/ aha/ tora um gwo mo ki: Me'd jin 'kona um ki mii a'di gom jan tal 'deŋ kamu/ 'peni uni gwansan kun pisin mo tani um 'koki mii a'di gom aha/ mo be.

⁴⁶ Dhali uni mini ii mo e mo jin 'konu ki mii 'ba/ ki sule/ mo, hili uni kun miin ka kar/e mo tani mini ciƙ mo e moŋ'koki/e ki sule/ sule/ ya ye 'ba/ mo be.

26

Imanshu 'Kwani Bway Miikina Wu'th apowa Yesus mo

¹ Ka Yesus 'baarki'da ris gwo gwansan mmo/o mo tani a'di ki o imanciƙ a'di gwo gwo mo ki:

² Um mishi mo mo ki 'ko'da cim su/ mo tani a'di ta'da cim ki Mompe'kupanyolos midi pu'du/ mo dhali Ya/ gi 'Kwani minu ci mo mmo'kosh ki cwany'ciƙhan dhul mo be.

³ Dhali igasiis kun can dhali 'kwani gwanyjaka/ gi 'kwani mo uni mini tul is mo mmonta' de/ mo e bwaagon ma gasiis jin ca'd mo a'di jin yuƙkunu gway ka Kayaapa mo be.

⁴ Dhali uni gamki 'twa/ 'kup mo mmonta' de/ mo mmobutha Yesus ki kup mo dhali mmo'kosh a'di jwa mo be.

⁵ Hili uni o gwo mo ki: Yisa ka cim jin yuƙuwa yuƙ mo yisa, hili isi ciki/ haali/ adulaƙƙi midi di mo e bwan'kwani mo be.

Yesus A'di 'Koshkunu Is ka Yina Pi'dnaŋ Gana/ mo e Pam Beetaŋiya mo be

⁶ Dhali ka Yesus di'd e Pam Beetaŋiya e gu'b ma Simaan jin ta gi monthus mo tani

⁷ a'boma kamu/ pu'dki'di a'di mo, a'di jin ta'd gi turan gasaas jin ta gi kush mo, a'di jin din ma yina pi'dnaŋ gana/ nycine/ jin 'bitha yol she/ ki 'bi'th mo. Dhala yim ki wol a'di e 'kup piti mo me'd jin dikina a'di eya tharabeesa mo be.

⁸ Hili ki imanciƙ a'di gwo parki a'di e mo tani uni deƙ ma nyor mo mmo/o gwo mo ki: Atinta shinu yansan isa 'cesh kan mo?

⁹Haali/ayina pi'dna/yansan minu 'taki yol ka guurush ki nyanye/mo dhali ci 'kwani kun hatha'ko'd mo be.

¹⁰Hila Yesus ki tor mii yansan ki e mo dhali o uni gwo mo ki: Atinta toca uma 'bom 'kus kan mo? Haali/ayim mii tony jaro/ gom aha/ mo be.

¹¹Haali/ um isa yempa/ tan gi 'kwani kun hatha'ko'd kun 'kon e um mo. Hili um mini 'koki ta gi aha/ ki sule/ mo be.

¹²Mmowoluwa yina pi'dna/ yansan e bungwar is pem mo tani ayim ki mii a'di mmothoson a'di gom aha/ gam kan jin minu kan aha/ mo be.

¹³Ka jin gana/ aha/ tora um gwo mo ki: E mo yin jin minu ci gwom 'borga/ yan e mony'ceshi 'baar mo tani a'di jin miin ma yim mo tani minu tor mo mmonyonj mo mo mmoka ayim e mo be.

Yahuusa A'di Gamki Gwo Me'd mo Mmo'ciṭṭha/ Yesus Is ki Gwo mo

¹⁴Dhali yan'ko'd jan tal 'deŋ kamu/ 'peni uni jin 'dap uni 'twa/ ka 'kume'd i'ce'dka su/ mo jin yuku gway ka Yahuusa Iskariyuuti mo tani a'di yaki'd mo e igasiis kun can mo be

¹⁵Dhali o gwo mo ki: Atinta mmına umi ci aha/ mo wakki/ aha/ mina ci a'di ki um mo? Dhali uni ki ci a'di gabul 'dolkon kushi iss 'de/ i'ce'dka 'kume'd mo be.

¹⁶Dhali 'peni mo caan ki jahanne/ mo tani a'di cor'ki'da cor mo mmogam embul gana/ mo mmo'ciṭṭh a'di is ki gwo mo be.

Yesus Shwaki Tonte/ jin 'Ko'd Nyakki Imancik A'di Gwo mo

¹⁷Dhali ka cim jin twa/a/ gi Maan'kuthu'd jin miinu ki dar ga cumat mo tani imancik gwo pu'dkina Yesus mo mmo/o gwo mo ki: Mana o/e bwa jin mina amani thoson to mo gom/e mo mmoshwa ki Mompe'kupanyolos mo?

¹⁸A'di ki o uni gwo mo ki: Iiku/ mo e 'penkuman bampa/ mo dhali e jan 'deŋ kamu/ mo dhali o a'di gwo mo ki: Aman'or gwo o gwo mo ki: Mom pem 'dishi'd mo hila/. Aha/ mina mii rash di ki Mompe'kupanyolos yan e gu'b pini nyakki imancik aha/ gwo mo be.

¹⁹Dhali imancik a'di gwo miikin mo me'd jin kankin ma Yesus uni gwo mo, dhali uni ki thoson to mo gom Mompe'kupanyolos mo be.

²⁰Dhali ki mo ta mom'pimpili/ mo tani a'di ca'bki'da tharabeesa nyakki imancik a'di gwo mo kun 'kon' 'kume'd i'ce'dka su/ mo be.

²¹Dhali ki uni 'kokin mo mmoshwa to mo tani a'di ki o uni gwo mo ki: Ka jin gana/ aha/ tora um gwo mo ki jan 'de/ 'peni um mid'ciṭṭh aha/ is ki gwo mo be.

²²Dhali uni 'kokina bwa mmodit mo kagahara, dhali uni ki tel mii 'pen mo mmo/o a'di gwo mo ka rem 'kup ka bath 'pen mo ki: Aha/ 'taa? Tapa.

²³Dhali a'di ki thok gwo mo ki: A'di jin 'thupki me'd piti eya sahan nyakki aha/ mo tani a'di mid'ciṭṭh aha/ is ki gwo mo be.

²⁴Haali/Ya/ gi 'Kwani yaki'd mo me'd gwo jin 'kwarkunu mo gom a'di mo, hili wayyi e wathi/ yan a'di jin mid'ciṭṭh Ya/ gi 'Kwani is ki gwo mo. A'di mid' 'taki 'bor ki 'bor gana/ mo gom wathi/ yan wakki/ a'di minu 'taki 'koki dhodhu/ mo be.

²⁵Yahuusa be a'di jin 'ciṭṭhi a'di is ki gwo mo a'di ki o a'di gwo mo ki: A/ aha/ 'taa, Tapa? A'di ki thok a'di gwo mo ki: /E oki a'di wakan si'da/ mo be.

²⁶Dhali me'd jin 'kokina uni mmoshwa tonte/ mo tani Yesus bu'thki maan'kuthu'd mo dhali 'bora 'bor bwa i is mo, dhali a'di ki 'ce'd a'di mo dhali ci a'di ki imancik a'di gwo mo dhali o gwo mo ki: Buthi a'di mo ma, dhali 'kayi mo ma. A'di yansan ita bungwar is pem mo be.

²⁷ Dhali a'di bu'thki'da kúbaaya mo dhali ki a'di ciki mom'bor bwa i is mo tani a'di ki ci a'di ki uni mo mmo/o gwo mo ki: Piyi a'di mo ma, aris umi 'baar mo,

²⁸ haali/ a'di yansan ita'da bas pem ki gwo jin gamu me'd mo, a'di jin wolki'd ka piye/ mo gom 'kwani ka ris mo gom mogwama gwam gom miinthus mo be.

²⁹ Aha/ tora um gwo mo ki aha/ mina diki dok/e pi yiman maman cwa yansan ki sule/ ntaga tee jin miga/ pi a'di jin ta jin this nyakki um e Bampa/ ma Ababam pem jin di'd e momis mo be.

Mo jin Wat ma Buterusa Yesus Gway A'di Torkunu Itwa/a/ mo

³⁰ Dhali ki uni yukki gway mo tani uni iikin ka piye/ mo e 'Kuwosh Setuun mo be.

³¹ Yan'ko'd aYesus ki o uni gwo mo ki: Umi 'baar mo mini ta'k mo gom aha/ mon'thiny yan shwane/ mo tani haali/ a'di 'kwarkunu mo ki: Aha/ mina 'kosha manhil ka'bal mo dhali ka'bal 'pena ma'diny piti mo tani uni minu ceker bwa mo be.

³² Hili n'ko'd mo tani ki aha/ piyunu/ mo tani aha/ mina ya um itwa/a/ e Pany Jaliil mo be.

³³ Dhala Buterus ki tor a'di gwo mo eya tente/ ki: Ba uni gwansani 'baar mo mini ta'k mo gom /e mo tani aha/ mina diki bit ki sule/ mo be.

³⁴ Dhala Yesus ki o a'di gwo mo ki: Ka jin gana/ aha/ tora /e gwo mo ki mon'thiny yansan shwane/ mo ntwa/a/ ka dhon'gola nwa diki ko e naskina/ mo tani /e mini wataa/ gway me'di kwara mo be.

³⁵ Dhala Buterus thok a'di gwo mo ki: Hili wakki/ aha/ mina mii wu mo nyakki /e mo tani aha/ mina diki wat /e gway mo. Dhali imancik a'di gwo 'baar mo o gwo wakansan mo be.

Yesus 'Thoki'd e Monsinu jin Ta Bwaagon ma Jathsemaani mo

³⁶ Dhali yan'ko'd aYesus yaki'd nyakki uni mo e mo jin yuku ka Jathsemaani mo dhali a'di ki o imancik a'di gwo gwo mo ki: 'Koyi mmahan mo ma ki aha/ mina tho'th is mo mmattan dhali 'tho mo be.

³⁷ Dhali a'di ki susa Buterus nyakki a'di mo dhali iya/ ma Sabadi isu/ mo, dhali a'di telki mii 'pen mo mmo'kal bwan di'ti'd mo dhali bwa jin to'co'd mo be.

³⁸ Dhali yan'ko'd a'di ki o uni gwo mo ki: Akashiram pem a'di dita bwa ki dit kagahara mo gom mowu mo. 'Koyi mmahan mo ma, dhali timi nyakki aha/ mo ma.

³⁹ Dhali mmothothkina a'di 'peny'ce ari'ceenne/ mo tani a'di bitki bwam/ em piti a'cesh mo dhali 'tho mo ki: Ababam pem, wakki/ a'di yan mishu mii mo tani dhalka kubbaaya yan ya'di pe aha/ mo ma. Bahili a'di jin oyaa/ bwa mo yisa. Hili a'di jin ta bwam pini mo be.

⁴⁰ Dhali a'di pu'dki'd e imancik a'di gwo mo dhali gam uni ki uni ishki e mo. Dhali a'di ki owa Buterus gwo mo ki: A/um bunya/ mini 'koki tim nyakki aha/ ka tente/ 'de/ mo?

⁴¹ Timi mo mo ma, dhali 'thoyi mo ma, ki um mini 'taki 'koki ci'c mo e mo jin palu mo, haali/ shi/in ka jin gana/ mo tani a'di ona bwa mo, hili bun'gwar is a'di ihatha'ko'd ki ha'th mo be.

⁴² Dok/e gom me'd jin 'ko a'di isu/ mo tani a'di yaki'd mo dhali 'tho mo ki: Ababam pem, wakki/ a'di yan mol pe mo tani hili isi ciki/ aha/ mina pi a'di mo, dhalki a'di jin ta bwam pini mo tani dhalki a'di miinu mo ma.

⁴³ Dhali dok/e a'di pu'dki'd mo dhali gam uni ki uni ishki e mo haali/ em buni to'dki uni is mo be.

44 Wakan a'di dhalki uni mo dok/e dhali a'di ki ya mo dhali 'tho mo gom me'di kwara mo mmo/o jasi gwon tal 'de/ mo be.

45 Dhali yan'ko'd a'di pu'dki'd mo e imanciꝯ a'di gwo mo dhali o uni gwo mo ki: A/um 'kon mmo/ish e kan mo? dhali bu'th mosi/is bum mo? Hili mo mo ma, mo pu'dki'd mo hila/ mo dhali Ya/ gi 'Kwani 'ciṯhḱunu is ki gwo mo e me'd gi 'kwani kun ta imanmii miinthus mo be.

46 Cuyi mis mo ma. Dhalki ana iina mo. Hili, a'di jin 'ciṯhḱi aha/ is ki gwo mo tani a'di pu'dki'd mo be.

Mo jin 'Ciṯhuwa Yesus Is ki Gwo mo dhali Mo gi Budhu A'di mo

47 Ki a'di di'd mo mmo/o gwo naskina/ mo tani Yahuusa pu'dki'd mo, a'di jin 'dap tiya 'twa/ ka 'kume'd i'ce'dka su/ mo, dhali nyakki a'di mo tani dhana waambuhany 'kwani pu'dkin ki gandala turga/ mme'd mo dhali cwa mo, 'peni igasiis kun can mo dhali 'kwaniṯ gwanyjaka/ gi 'kwani mo be.

48 Dhali a'di jin 'ciṯhḱi a'di is ki gwo mo ciki uni jamas mii mo mmo/o gwo mo ki: A'din 'de/ jin miga/ pi 'twa/ mo tani ta wathi/ mo. Buti a'di mo ma.

49 Dhali a'di pu'dki'da Yesus ki jahanne/ mo dhali o gwo mo ki: Hayy, Tapa. Dhali a'di ki pi a'di 'twa/ mo be.

50 Yesus ki o a'di gwo mo ki: Akam pem, /e miina ta mmahan mo? Dhali yan'ko'd uni ki pu'du/ i a'di mo dhali dhu me'd buni apowa Yesus mo dhali bu'th a'di mo be.

51 Dhali hili jan 'de/ 'peni uni gwansan jin nyaḱ di ka Yesus mo tani a'di he'thki me'd piti mo dhali buḱ gandala turgam piti mo dhali ruṯhun ciṯhḱina/ ma gasiis jin ca'd mo dhali 'ciṯh 'cem piti mo be.

52 Dhali yan'ko'd Yesus ki o a'di gwo mo ki: Dwari gandala turgam pini ka nyan'ko'd e mom piti mo ma, haali/ aris uni gwansani 'baar mo kun kalki gandala turga/ mo tani minu 'ce'd sho'k ki gandala turga/ mo be.

53 A/tosha /e ki aha/ mina mol Ababam pem 'tho mo dhali a'di ki ci aha/ ki jahanne/ awaambuhany iman'doyu gwom piti ka ris mo mmo'koki 'ko jasi 'kume'd i'ce'dka su/ mo?

54 Hili bakataye ki Gwo ma Arungimis minu 'taki thim mo ki a'di minu mii mii wakan mo be.

55 Dhali ki mo yan mo tani aYesus ki owa waambuhany 'kwani gwo mo ki: Um iiyin ka piye/ ki gandala turga/ mme'd mo dhali ki cwa mo mmobu'th aha/ mmohabus mo me'd wathin 'di/ mo. Ka tee kun bathani 'ko'd mo tani aha/ dikina mo e gu'b gi mondheleladhelel mo mmoṯor gwo mo dhali um 'koki bu'th aha/ mo be.

56 Hili aris to gwansani 'baar mo tani uni bu'thki embul mo mo, ki Gwo ma Arungimis kun 'kwarkina imanci gwo ma Arungimis kadhamo/ mo minu mii thim mo be. Dhali yan'ko'd aris imanciḱ a'di gwo uni dhalki a'di 'pen mo dhali so mo be.

Yesus Doshki'd e Bwambor Montul Is gi 'Kwani Yahuuda/ mo

57 Dhali yan'ko'd uni gwansan kun bu'thki Yesus mo tani uni ki sus a'di eya Kayaapa jin ta'da gasiis jin ca'd mo e mo jin tulkina iman'kwar to is mo dhali 'kwani gwanyjaka/ si'da/ mo be.

58 Hila Buṯerus bathki a'di nsho'k isa dhana/ mo ntagi mo gi bwaagon ma gasiis jin ca'd mo. Dhali a'di ki seyu bwaman mo. Dhali a'di ki nyaḱ ca'b ki uni kun hili mo mo mmopar 'pemen gwo e mo be.

59 Dhali igasiis kun can dhali aris uni 'baar mo gi montul is yan mo tani uni ṅapki gwonthus mo mmo'ce'da Yesusa po/ mo, ki uni mini 'taki kar a'di mmowu mo be.

60 Hili uni 'koki gam tonthusa 'de/ mo, bahili aris iman/o gwonthus apo/ a'di mo tani uni pu'dkin kadhoṯ mo. N'ko'd uni su/ pu'dkin kadhoṯ mo

⁶¹ dhali o gwo mo ki: Agarr yansan o gwo mo ki: Aha/ misha mmo'ce'd gu'b gi mondheleladhelele ma Arungimis sho'k mo dhali nyan' a'di ka cim kwara mo be.

⁶² Dhala gasiis jin ca'd a'di doshki'd ki mis mo dhali o gwo mo ki: Ayy, /e moli 'twarj kamu/ 'de'k mo? Gwo wakata ona 'kwani gwansan apo/ /e mo?

⁶³ Hila Yesus ca'bki'd ki shwam mo. Dhala gasiis jin ca'd ki o a'di gwo mo ki: Aha/ kana /e gwo ka Arungimis jin di ki e mo. Ba tor am gwo mo ma, wakki/ /e tana Kristhos mo, a'di jin ta Ya/ ma Arungimis mo.

⁶⁴ AYesus ki o a'di gwo mo ki: A'di ta gwo jin ona /e si'da/ mo be. Hili aha/ mina tor /e a'di 'peni shwane/ mo, /e mini par Ya/ gi 'Kwani e mo mmoça'b ki me'da bim poros ki mom'bi'th mo dhali mmoyayu/ e bwaarak' 'peni momis mo be.

⁶⁵ Dhali yan'ko'd agasiis jin ca'd dherki burrinyem piti bwa mo dhali o gwo mo ki: A'di walki gwo sor jin shi/ashi/ mo. Atinta 'kokina ana mmoçap gwo mo mmo/o apo/ a'di mo? Um cikki gwo sor 'peni 'twam piti shwane/ mo be.

⁶⁶ Gwom bum jin tosha um wakata mo? Uni thoğ gwo mo ki: A'di ha me'd mo mmowu mo be.

⁶⁷ Dhali yan'ko'd uni ki tak' a'di manya/ e bwam/em piti mo dhali dor a'di mo dhali kun tiya ki dor a'di ki cwa mo

⁶⁸ mmo/o gwo mo ki: Oyi am gwo is mo ma, /e jin tana Kristhos mo. Kaja 'dunn idorki /e kan mo?

Buterus Watki'da Yesus Gway mo

⁶⁹ Dhala Buterus a'di ca'bki'da pije/ e bwaman ma goj mo. Dhali ari nyarany cinjina/ pu'dki'di a'di mo dhali o a'di gwo mo ki: /E si'da/, /e nyakki di ka Yesus gi Pany Jaliil mo be.

⁷⁰ Hili a'di watki gwo mo mbwambori uni 'baar mo mmo/o gwo mo ki: Aha/ dinaki mish 'pemen gwom pini yan jin ona /e mo be.

⁷¹ Dhali ki a'di yaki'd mo ka pije/ eya lambalany gu'b mo tani ari cinjina/ nyaran kamu/ parki a'di e mo dhala yim ki o uni gwansan gwo kun doshkina pije/ ki: Wathi/ yansan nyak di ka Yesus gi Pa Naasira mo be.

⁷² Dhali yan'ko'd dok/ e a'di watki gwo mo ki gwo mmoçe gwo mo ki: Aha/ dinaki mish wathi/ yan mo be.

⁷³ Yan'ko'd ari'ceenne/ uni kun doshkina pije/ mo tani pu'dkin mo dhali owa Buterus gwo mo ki: Ka jin gana/ /e ta jan tal 'de/ si'da/ 'peni uni mo haali/ 'twam pini tor /e eya tente/ mo be.

⁷⁴ Yan'ko'd a'di telki mii 'pen mo mmojee is piti jwa ki is piti mo dhali mmothul gwo me'da po/ mo mmo/o gwo mo ki: Aha/ dinaki mish wathi/ yan mo be. Dhali ki jahanne/ adhongola njwa gwoki'd mo.

⁷⁵ Dhala Buterus ka gwo ma Yesus e mo jin ona a'di a'di ntwaa/ a/: Ka dhongola njwa diki ko e mo naskina/ tani /e mini wat' aha/ gway me'di kwara mo. Dhali a'di yaki'd ka pije/ mo dhali ko ki jabu'th ki ku'bu/ ku'bu/ mo be.

27

Yesus Suskunu mo Mbwambor ma Bilaatus mo be

¹ Dhali ki mon'thamo/ pu'dki'd mo tani aris igasiis kun can dhali 'kwaninj gwanyjaka/ gi 'kwani mo uni gamki 'twa/ 'kup apowa Yesus mo mmokar a'di mmowu mo be.

² Dhali uni ki dek' a'di mo dhali sus a'di mo dhali mmoçi a'di ka Bilaatus jin ta'da mudhiir mo be.

Jwa ma Yahuusa mo

³ Ka Yahuusa jin ta'da man'cith a'di is ki gwo parki a'di e mo ki a'di wak kunu mo tani a'di rici'da du is mo dhali a'di ki 'doyu 'dolkon kush jin ta'da iss 'de/ i'ce'dka 'kume'd ka nyar'ko'd mo e igasiis kun can mo dhali 'kwanin gwanyjaka/ mo

⁴ mmo/o gwo mo ki: Aha/ miikina miinthus mo mmo'cith a'di is ki gwo mo, a'di jin din ma bas ka po/ mo. Dhali uni ki thok a'di gwo mo ki: A'di yan ta'da ta gom am mo? Hili is pini 'teyi e ma.

⁵ Dhali a'di ki ta'k 'dolkon kush e gu'b gi mondheleladhelel mo dhali a'di ki pi ka pije/ mo dhali ya mo dhali shir is piti ka nyok mo be.

⁶ Hili igasiis kun can uni bu'thki 'dolkon kush mo mmo/o gwo mo ki: A'di diki ta mii jin dhala gwonkan bway mo mmodhu uni mo e mo jin dhunuwa guurush mo haali/ uni tana guurush ma bas mo be.

⁷ Wakan uni gamki 'twa/ 'kup mo mmobu'th uni mo dhali yol mo gi iman/ uka nos mo mmokan 'kwani kun ta yilkina/ nycine/ mo be.

⁸ Wakan mombunto yan yuk kunu gway ki Mombunto ma Bas mo ntaga tee yansan mo be.

⁹ Wakan gwo thimkunu mo, a'di jin okin ma manci gwo ma Arungimis kadhamo/ mo jin ta'da Irmiya mo mmo/o gwo mo ki: Dhali uni bu'thki 'dolkon kush kun 'koni iss 'de/ i'ce'dka 'kume'd mo jin ta she/ yol piti mo, a'di jin ta she/ yol jin karkina unin tiya kun ta iya/ gi uci ma Israyiil mo be.

¹⁰ Dhali uni ki ci uni gom uni kun cila mombunto ma iman/ uka nos mo be me'd gwo jin shukina tapa aha/ bway mo be.

Bilaatus Dotki'da Yesus Gwo mo be

¹¹ Dhala Yesus doshki'd mbwambora mudhiir mo dhala mudhiir ki dot a'di gwo mo ki: Ki /e de /e tana Malik gi 'Kwani Yahuuda/ mo? Dhala Yesus ki thok a'di gwo mo ki: A'di ta gwo jin ona /e si'da/ mo be.

¹² Hili ki a'di yerkunu is ki gway mo ki igasiis kun can mo dhali 'kwanin gwanyjaka/ mo tani a'di diki thok 'twar kamu/ mo be.

¹³ Dhali yan'ko'da Bilaatus ki o a'di gwo mo ki: Dina /e ki cik gwo mo 'taa? ama'diny gwo kun ona uni apo/ /e mo?

¹⁴ Hili a'di diki ci a'di 'twan thoka 'de/ mo walla ari gwon kamu/ jin yerkunu a'di is ki gway mo. Wakan ntaga mudhiir a'di merki'd kagahara mo be.

Yesus Torkunu Gwo 'Twa/a 'Cesh mo Mmowu mo

¹⁵ Dhali ka yuk jin yuku mo tani mii ma mudhiir isa yempa/ mo mmo'cukka waambuhany jan tal 'de/ 'peni uni habuus mo a'di jin dotkina uni mo be.

¹⁶ Dhali uni tan gi wathi/ eya sijin jin mishu 'baar mo eya tente/, a'di jin yuk kunu gway ka Baraabas mo be.

¹⁷ Wakan uni tulki is mo mmontal 'de/ mo dhala Bilaatus ki o uni gwo mo ki: Kaja i/o um bwa jin miga/ 'cukki um mo, a/Baraabas 'taa? walla Yesus a'di jin yuku ka Kristhos mo?

¹⁸ Haali/ a'di mishki dhapan buni jin takina uni mo mmoçi a'di mo be.

¹⁹ Isa dhamo/ 'teya ki a'di diki'd mmoça'ba kursi jin dwallu gwo jin ta jim piti mo tani ashim piti hashki a'di gwo mo mmodhalku/ ton kamu/ ki mii apo/ wathin kar/ e yan mo haali/ aha/ to'ckunu bwa kagahara shwane/ gom a'di mo ki gwon jan mo be.

²⁰ Dhali igasiis kun can dhali 'kwanin gwanyjaka/ uni lalki 'kwani sho'k ki gwo mo mmodot gwo mo goma Baraabas mo dhali mmo'ce'da Yesus sho'k mo be.

²¹ Dhala mudhiir ki o uni gwo mo dok/ e ki: Jana 'peni bwam uni su/ jin o um bwa mo jin miga/ 'cukki um mo? Dhali uni ki thok gwo mo ki: aBaraabas be.

²² Dhala Bilaatus ki o uni gwo mo ki: Dhali aha/ mina miia tinta ka Yesus mo a'di jin yuku gway ka Kristhos mo? Uni 'baar mo thoꝝ gwo mo ki: Dhalki a'di 'koshu ki cwany'ciḥan dhul mo.

²³ Dhali a'di ki thoꝝ uni gwo mo ki: Gomata sa/? Tonthus gi wakatinta imiikina a'di mo? Hili uni cuukin kagahara mo mmontal 'de/ mo mmo/o gwo mo ki: Dhalki a'di 'koshu ki cwany'ciḥan dhul mo.

²⁴ Wakan ka Bilaatus parki a'di e mo ki a'di mol gwo pi jipi/ mo tani hili a'di ki dhal mii e i is mo goma dulatt jin telkunu 'pen mo tani a'di ki bu'th yi'de/ mo dhali 'thur me'd piti mo mbwambor ma waambuhany 'kwani mo mmo/ o gwo mo ki: Aha/ dina ka po/ 'pena bas gi wathi/ yan mo. Hili a'di 'te/ ki is bumi niin ma.

²⁵ Dhali aris 'kwani 'baar mo thoꝝ a'di gwo mo ki: Abas piti midi di apo/ aman mo dhali apo/ ucim bam mo be.

²⁶ Dhali yan'ko'd a'di ki 'cuꝝki uni a Baraabas mo dhali ki a'di dorki'da Yesus ki yis bip mo tani a'di ki ci a'di mmo'kosh ki cwany'ciḥan dhul mo be.

I/askar Miikina Yesus ka Mak mo

²⁷ Dhali yan'ko'd i/askar ma mudhiir uni ki susa Yesus mo e bwaagon gi gu'b ma mudhiir mo dhali uni ki tula askar isi 'baar mo mmontal 'de/ mo lbwambori a'di mo be.

²⁸ Dhali uni ki 'cuꝝ a'di burrinye/ mo dhali hi'th a'di is ki burrinye/ jin ta'da duk is mo be.

²⁹ Dhali uni ki thoson toꝝkup 'pena 'de/ mo dhali uni ki hi'th a'di i'kup piti mo dhali uni ki kar a'di guluca cwahan e me'da bim poros piti mo dhali luꝝ ki jin 'kupa'dupuni bwambori a'di ka mak mo mmo/o gwo mo ki: Hayy, Malik gi 'Kwani Yahuuda/ mo.

³⁰ Dhali uni ki 'tak a'di manya/ i is mo dhali uni ki bu'th gulu'c mo dhali dor a'di e 'kup piti mo be.

³¹ Dhali ki uni miiki a'di ka mak mo tani uni ki 'cuꝝ a'di burrinyen duk is mo dhali uni ki hi'th a'di burrinyem piti i is mo dhali uni ki sus a'di ka piꝝe/ mo mmo'kosh ki cwany'ciḥan dhul mo be.

Mo gi 'Koshuwa 'Kosh ki Cwany'ciḥan Dhul mo

³² Me'd jin 'kokina uni mmoya ka piꝝe/ mo tani uni pu'dkin mo e wathi/ gi Pan Kerawaan jin yuku gway ka Simaan mo. Wathi/ yansan a'di tu'ckina uni mo mmokal cwany'ciḥan dhul piti mo be.

³³ Dhali ki uni pu'dkin mo e mo jin yuku ka Gulgutha mo tani (a'di jin ta 'pemen gwo jin onu ki: Mo ma Siman 'Kup mo)

³⁴ uni ki ci a'di yimana mura'th jin 'koshu e ki toꝝ ka/ga/ mo. Hili ki a'di nyokki a'di mo tani a'di ushki a'di pi mo be.

³⁵ Dhali ki uni 'koshki a'di ki cwany'ciḥan dhul mo tani uni ki kwa/ burrinyem piti bwa mo e bwam uni 'cena mo mmo'ta'k to mo.

³⁶ Yan'ko'd uni ki 'ko a'cesh mo dhali rash 'ko mo mmotim a'di apo/ mo be.

³⁷ Dhali apo/ 'kup piti mo tani uni ki 'kwar gwo apo/ a'di mo jin denꝝu e mo ki: Yansan ta'da Yesus jin ta'da Malik gi 'Kwani Yahuuda/ mo be.

³⁸ Dhali 'kwani su/ kun tana 'di/ nyakkunu 'kosh ki a'di mo ki cwany'ciḥan dhul mo, jan 'de/ ki me'da bim poros piti mo, dhali jan kamu/ ki me'da biny cam piti mo be.

³⁹ Dhali uni gwansan kun iikin ki iimpe e bway mo tani uni sorki a'di mo mmpir 'kup buni mo be,

⁴⁰ dhali mmo/o gwo mo ki: /E jin mini 'taki 'kosh gu'b gi mondheleladhelel mo dhali nyan a'di ka cim kwara mo tani wothi is pini mo. Wakki/ /e ta Ya/ ma Arungimis mo, ba thulu ka 'cesh 'peni apo/ cwany'ciḥan dhul mo.

41 Wakan si'da/ igasiis kun can dhali iman'kwar to mo dhali 'kwanin gwanyajaka/ mo tani uni miiki a'di ka mak mo mmo/o gwo mo ki:

42 A'di wothki tiya mo tani is piti mola a'di woth moyi. Dhalki a'di thulu'd ka 'cesh shwane/ 'peni apo/ cwany'cithan dhul mo, dhali ana mina gam a'di gwo is mo be.

43 A'di gamki'da Arungimis gwo is mo. Dhalka Arungimis 'cuq a'di mo shwane/ wakki/ a'di ona bwa ki a'di mo, haali/ a'di o gwo mo ki a'di ta Ya/ ma Arungimis mo be.

44 Dhali unin 'di/ kun nyakkunu 'kosh ki cwany'cithan dhul nyakki a'di mo tani uni si'da/ wakki a'di ki gwon 'de/ yan mo be.

Mowu ma Yesus mo

45 Dhali shwane/ ka tente/ ta'da tente/ mbwanj 'kup mo tani adhan mond-hurumi'd pu'dki'da po/ mony'ceshi 'baar mo ntaga tente/ mbum 'ban mo be.

46 Dhali ka tente/ ta'da tente/ kwara mo tani Yesus gwoki'd ki 'twa/ jin caaca mo ki: Ili, Ili, lama sabaktani, a'di jin ta 'pemen gwo jin onu ki: Arungimis pem, Arungimis pem, atinta dhalkina /e aha/ 'pen kan mo?

47 Dhali unin tiya kun doshkin ki 'dishe/ cikki a'di mo dhali o gwo mo ki: Wathi/ yuqki'd Iliyya mo be.

48 Dhali jan tal 'de/ 'peni uni a'di guski'd ki jahanne/ mo dhali a'di ki kala lipa/ mo dhali 'tu'd a'di ki yiman tom 'paca'd mo dhali kar a'di eya cwahan mo dhali a'di ki ciki a'di mo mmopi mo be.

49 Hili kun tiya o gwo mo ki: Cori naskina/ bala/. Dhalki ana para mo e mo wakki/ Iliyya midu thulu/ mo mmowoth a'di mo.

50 Dhala Yesus cuu'd ki dhan 'twa/ jin caaca dok/e mo dhali a'di ki ci shi/in piti mo be.

51 Dhali hili mo ma, burrine/ gi gu'b gi mondheleladhelel mo a'di dherkunu bwa mo ka 'ban su/ mo 'peni bun'kup mo ntagi bum'pen mo, dhali mony'cesh yikinki is mo, dhali aris woshi 'baar mo pwahtkununa bwa mo be.

52 Dhali mon'kupaje si'da/ uni ka'dkunu 'twa/ mo, dhali aris bun'gwar is gi uni kun dhunu ki she/ ki dhelel dhelel mo uni gun ishki e mo e mowu mo tani uni cukunu mis mo be.

53 Dhali mmopikina uni ka pije/ 'peni jis jwa mo tani 'ko'di mompim piti mo tani uni iikin e 'perjkuman bampa/ jin kogou mo dhali piki 'kwani i is ka ris mo be.

54 Dhali ka mancil ma askar iss 'kwanim pa mmudhe'd dhali uni gwansan kun nyak 'ko ki a'di mo tani uni rashkina Yesus tim mo mmopar mony'cesh e mo mmoyikin is mo dhali to gwansan kun bu'thki embul mo mo tani uni 'tu'dkunu mo ki mon'ko/ is mo dhali o gwo mo ki: Ka jin gana/ yansan ta Ya/ ma Arungimis mo be.

55 Wakan si'da/ up 'kokin ka ris mo mmun mmohil mo 'pena dhana/ mo, uni gun bathkina Yesus nsho'k mo 'peni Pany Jaliil mo mmota imanmii a'di to mo be.

56 Dhali e bwaman uni mo tani aMariyam Magdaliyya diki'd mo dhala Mariyam jin to Ko Yakuub mo dhala Yuusup mo dhali ko iya/ ma Sabadi mo be.

Mo jin Kanuwa Yesus mo

57 Dhali ki mo ta mom'pimpili/ mo tani wathi/ jin ta pa ki pa pu'dki'd mo 'peni Pa Arraama jin yuqkunu gway ka Yuusup mo, a'di si'da/ jin ta'da mancika Yesus gwo mo be.

58 A'di yaki'd mo eya Bilaatus mo dhali dot a'di gwo mo gom bun'gwar is ma Yesus mo. Dhali yan'ko'd Bilaatus ki kan gwo mo ki a'di minu ci ki a'di mo be.

⁵⁹ Dhala Yuusup ki bu'th bungwar is mo dhali 'tam a'di is ki burriyenen dhelelga/ jin ta'da dhinye mo be.

⁶⁰ Dhali 'thi a'di e jis pitin gana/ jin ta jis jwan this mo, a'di jin 'kolkina a'di wosh mo. Dhali a'di ki 'danjal wosha caaga/ mo mmo'dap 'twanjal jis jwa 'twa/ mo, dhali a'di ki ya mo be.

⁶¹ Mariyam Magdaliyya dhali Mariyama kamu/ nyakki 'ko mmun mo mmo'ko ka par 'twa/ gi mon'kupaje mo be.

Imanji Mo mo e Mon'kupaje mo

⁶² Dhali ka cim jin 'ko'd mo, a'di jin ta'da cim jin 'ko'd jin Thosonkunu to mo tani igasiis kun can dhali 'Kwani Parisiyyin tulki isi bwambor ma Bilaatus mo be.

⁶³ dhali o gwo mo ki: Tapa, am kakina gwo e jin okin ma manhe'k 'kwani e mo ki a'di di'd ki e mo naskina/ mmo/o gwo mo ki: 'Ko'da cim kwara mo tani aha/ mina cuyu mis dok/e mo be.

⁶⁴ Wakan ki /e mini kan gwo mo ki mon'kupaje minu mii ji mo ki 'dantar mo ntaga cim kwara mo, isi ciki/ ki imancik a'di gwo mini 'koki ii mo dhali kwal is piti mo dhali tor 'kwani gwo mo ki: A'di piki'd 'peni mowu mo, dhali gwonthus jin ta jin 'ko'd jin minu o mo tani a'di midi war ki shi/ kagahara mo mmobol jin twa/a/ e mo be.

⁶⁵ Bilaatus ki o uni gwo mo ki: Um tan ga askar kun ji mo mo. Iiku/ mo ma, mmoji a'di ki 'dantar mo me'd jin misha um a'di mii mo be.

⁶⁶ Wakan uni iikin mo dhali ji mon'kupaje mo, dhali uni ki 'dap wosh 'twa/ ka 'dinjala/ mo dhali dhu imanji mo mo be.

28

Mompinu mo

¹ Dhali 'ko'da cim ma pesu/ mo tani ki mo kali kush mo ka cim jin twa/a/ ka dhas mo tani aMariyam Magdaliyya dhala Mariyama kamu/ uni iikin mo mmopar mon'kupaje e mo be.

² Dhali hili mo mo ma, adhan mony'cesh yikinki is mo kagahara haala man'doyu gwo gi tapa thulki'd mo 'peni momis mo dhali pu'du/ mo dhali ka'c wosh ka nyan'ko'd mo dhali a'di ki ca'ba po/ a'di mo be.

³ Jamas piti jin piyina a'di mo tani a'di wana e ka wara sho'k mo dhali burriyem piti ca'bki bany bany mo me'da wasan gana/ mo be.

⁴ Dhali gom is jin kogu a'di mo tani imanji mo mo uni deekina is mo dhali uni wakina e gi 'kwani kun wukin mo be.

⁵ Hila man'doyu gwo ki o up gwo mo ki: Dhalku/ is ki ko/ mo ma, haali/ aha/ misha ki um napkina Yesus jin 'koshkunu jwa mo ki cwany'cihan dhul mo be.

⁶ A'di yisa di'di mahana, haali/ a'di cuki mis mo me'd gwo jin ona a'di mo. Iiyu/ mo ma, mmopar mo e mo jin ishkina a'di nycine/ mo.

⁷ Dhali yan'ko'd iyyi ki jahanne/ mo dhali tor imancik a'di gwo gwo mo ki a'di cuki mis mo 'peni mowu mo. Dhali hili mo mo ma, a'di midi ya n'twa/a/ ki um mo e Pany Jaliil mo be. Dhali e mun mo tani um mini gam a'di mo. Hili aha/ torkina um gwo mo be.

⁸ Wakan uni iikin ki jahanne/ mo 'peni mony jis jwa mo ki mon'ko/ is mo dhali ka dhan bwan 'kunyga/ mo, dhali uni sokin mo mmo'tor imancik a'di gwo mo be.

⁹ Dhali hili mo mo ma, aYesus gamki uni 'kup mo dhali o gwo mo ki: Hayy. Dhali uni pu'dkin mo dhali bu'th a'di i sho'k piti mo dhali lunj a'di mo be.

¹⁰ Dhali yan'ko'd Yesus ki o uni gwo mo ki: Dhalku/ is ki ko/ mo ma. Iiku/ mo ma, dhali tor iwaḱ pem gwo mo mmo/ii mo e Pany Jaliil mo dhali uni mini par aha/ e i mun mo be.

Imanji Mo mo Wankunu Is mo be

¹¹ Ki uni 'kokin mo mmo/ii mo tani hili mo mo ma, kun tiya 'peni uni gun ta imanji mo mo tani uni iikin mo e 'penkuman bampa/ mo dhali tor igasiis kun can gwo mo goma ris to gwansan kun bu'thki embul mo mo be.

¹² Dhali ki uni tulki is mo mmonta' de/ mo nyakki 'kwanin gwanyjaka/ mo dhali gam 'twa/ 'kup mo tani uni ki ciya dhana guurush ki i/askar mo be

¹³ mmo/o gwo mo ki: Tori 'kwani gwo mo ki: Imancik a'di gwo pu'dkin mo mon'thiny mo dhali kwal a'di mo ki aman 'kokina mmo/ish e mo be.

¹⁴ Dhali wakki/ gwo yansan mido pu'du/ mo e bwany'ce ma mudhiir mo tani aman mina lal a'di sho'k ki gwo mo dhali buḱ um 'ba/ mo 'peni monto'c bwa mo be.

¹⁵ Wakan uni bu'thkina guurush mo dhali mii a'di me'd jin kankunu uni gwo mo. Dhali gwo lolop yansan a'di kalu ki lala'th mo e bwarj 'Kwani Yahuuda/ 'baar mo ntaga tee yansan mo be.

Yesus Hashki Uni kun 'Koni 'Kume'd I'ce'dka 'De/ mo

¹⁶ Dhali imancik a'di gwo kun 'koni 'kume'd i'ce'dka 'de/ mo tani uni iikin mo e Pany Jaliil mo e 'kuwosh jin kankin ma Yesus uni gwo mo.

¹⁷ Dhali ki uni parki a'di e mo tani uni lunḱi a'di mo. Hili kun tiya 'koni modhar gwo mo be.

¹⁸ Dhala Yesus pu'dki'd mo dhali o uni gwo mo ki: Aris moshirri 'baar mo e momis mo dhali apo/ mony'cesh mo tani uni cikunu aha/ mo be.

¹⁹ Wakan iiku/ mo ma, dhali waraa ris kal gi 'kwaniny'cesh ki imancik aha/ gwo mo. Miiki uni ki yi'de/ ki gway ma Ababa mo dhali ki gway gi Ya/ mo dhali ki gway gi Shi/in Dheleladhelel mo be.

²⁰ Tori uni gwo mo ma, mmodhu aris gwo gwansan uni gun kankika/ um mo, dhali hili mo mo ma, aha/ mina nyak di e um isa yempa/ mo ntagi yil gi mony'cesh yan mido di 'kup mo be.

Gwom 'Borga/ Isi ki Gwo ma MARKUS mo

Gwo jin Cın ma Yahaan jin Ta'da Manmiiya Mii ki Yi'de/ mo

¹ Montel 'pen gi gwom 'borga/ ma Yesus Kristhos jin ta Ya/ ma Arungimis mo be.

² Me'd gwo jin 'kwarkunu eya Ishaya jin ta'da manci gwo ma Arungimis kadhamo/ mo ki:

Hili mo mo ma. Aha/ hashkina agum bway pem ibwambori jis/em pini mo. a'di jin midi thoson /e bway mo.

³ 'Twa/ gi wathin 'de/ mmocuu gwo em bwaasho ki:

Thosoni bway gi Tapa mo ma, kari bway piti ka ji sho'k mo.

⁴ Yahaan jin ta'da manmii 'kwani ki yi'de/ a'di piki'd mo e mombwaasho mo mmoci gwo mo gom mo jin minu miya mii ki yi'de/ mo mmorica du is mo gom gwo gi miinthus kun minu gwam 'kwani mo.

⁵ Dhali aris 'kwani iikin ka pije/ e a'di mo 'peni aris bampa/ gi Pa Yahuudiyya mo dhali 'peni aris 'kwani gi Pa Urushaliim mo. Dhali uni 'kokunu mo mmomii ki yi'de/ ki a'di mo e Yi'derj Kumma/ Uurdun mo mmopikina uni gwo gom miinthus buni mo be.

⁶ Dhala Yahaan si'da/ hi'thki'da mur kalman e isi a'di mo dhali a'di ta'd gi waçkan jin hi'thkina a'di e empa'd piti mo dhali a'di 'ka'da kuuyu/ dhali shwa'da dham eya kur mo be.

⁷ Dhali a'di ciki gwo mo mmo/o gwo mo ki: N'ko'di aha/ mo tani jamu/ midi pu'du/ mo jin ca'd ki aha/ mo. Dhali waçkana ppm piti mo tani aha/ dinaki ha me'd mo mmolun ki ji lun mo dhali 'cuk uni mo be.

⁸ Aha/ miikina um ki yi'de/ tani hili a'di midi mii um ki Shi/in Dheleladhelel mo be.

Mo jin Miinuwa Yesus ki Yi'de/ mo

⁹ Dhali ka tee gwansan mo tani Yesus pu'dki'd mo 'peni Pa Naasira jin di'd e Pany Jaliil mo dhali a'di miikunu ki yi'de/ ka Yahaan mo e Yi'derj Kumma/ Uurdun mo be.

¹⁰ Dhali ki a'di piki'd ka pije/ 'peni yi'de/ mo tani ise/ ki jahanne/ a'di parki momis e mo mmodi ki kany dhali Shi/in di'd mmothulu/ i a'di mo me'd gurko/ mo be.

¹¹ Dhali 'twa/ cikunu 'peni momis mo ki: /E ta Ya/m pem jin enka/ mo, dhali aha/ 'bora bwa ki 'bor ki /e mo.

Mo gi Paluwa Yesus mo

¹² Dhali Shi/in Dheleladhelel a'di urki'da Yesus ka pije/ ise/ mo e mombwaasho mo.

¹³ Dhali a'di diki'd e mombwaasho mo ka cim ma issu/ mo, dhali a'di palkunu ka Setaan mo. Dhali a'di nyakki di ki tombwaasho mo. Dhali iman'doyu gwo pu'dkin mo dhali mii a'di to mo be.

Yesus Telki Mii ma Tu'd Piti 'Pen mo

¹⁴ Dhali ka Yahaan karkunu eya sijin mo tani Yesus pu'dki'd mo e Pany Jaliil mo mmoci gwom 'borga/ ma Arungimis mo

¹⁵ dhali mmo/o gwo mo ki: Mo thimkunu mo, dhali Bampa/ ma Arungimis pu'dki'd e me'd mo. Rici adu is mo ma dhali gam gwom 'borga/ is mo.

Yesus Yukki Imancesh To Yi'de/ Idojon mo

¹⁶ Dhali me'd jin yakina a'di ki yampe e shemen ma gap ma Al ma Jaliil mo tani a'di parki'da Simaan e mo dhala Andaraawus jin ta'da kam ma Simaan mo mmobitkina a'di a'thi/ eya al mo haali/ uni ta 'kwani kun ta imancesh to yi'de/ mo be.

¹⁷ Dhala Yesus ki o uni gwo mo ki: Bathi aha/ nsho'k mo ma, dhali aha/ mina dhu um mmowar ki imanbu'th 'kwani ki gwo mo be.

¹⁸ Dhali ki jahanne/ uni dhalkina 'thim buni 'pen mo dhali uni ki bath a'di nsho'k mo be.

¹⁹ Dhali mmootho'hkina a'di is ari'ceenne/ mo tani a'di parki'da Yakuub e mo jin ta ya/ ma Sabadi dhala Yohaana jin ta'da kam piti mo uni kun 'kokin eya kur buni mo mmshowa 'thi/ mo be.

²⁰ Dhali ki jahanne/ a'di ki yuk uni mo. Dhali uni dhalkina babam buni ka Sabadi eya kur mo nyakki cin'kina/ kun miina tu'c mo dhali bath a'di nsho'k mo be.

Wathi/jin Bu'th ma Arum Thus jin Nyo/o'd mo

²¹ Dhali ki uni pu'dkin mo e Pan Kapranahuum mo tani dhali ki jahanne/ a'di seki gu'b gi montul is buni ka cim ma pesu/ mo dhali a'di torki gwo mo be.

²² Dhali uni merkin mo gom gwom piti jin torkina a'di mo haali/ a'di torki uni gwo mo me'd wathi/ jin ta gi moshirr mo dhali yisa me'd iman'kwar to mo.

²³ Dhali ki jahanne/ wathin kamu/ diki'd e gu'b montul is buni mo a'di jin taki'd ga rum thus jin nyo/o'd mo be.

²⁴ Dhali a'di cuuki'd ki dhan 'twa/ caaca mo mmo/o gwo mo ki: Ki /e mini mii atinta ki aman mo, Yesus gi Pa Naasira mo? A/e pu'dkin mo mmo'ce'd aman sho'k mo? /E mishka/ ki /e ta a'din tal 'de/ ma Arungimis jin kogu mo.

²⁵ Hila Yesus kucurki a'di ki gwo mo mmo/o gwo mo ki: Ca'bi ki shwam. Piyu/ ka pije/ 'peni a'di mo.

²⁶ Dhala rum thus jin nyo/o'd ki tor a'di 'ko'da 'cesh mo dhali cuu gwo ki dhan 'twa/ jin caaca mo. Dhali a'di ki pi ka pije/ 'peni a'di mo.

²⁷ Dhali uni 'baar mo merkin mo. Dhali wakan, uni dotki gwondot e bwam uni mo mmo/o gwo mo ki: Mii yan ta'da taye? Gwon this jin toru de. Ki moshirr maja sa/ ikankina a'di arum thus kun nyo/on gwo mo dhali uni ha a'di gwo e mo?

²⁸ Dhali ki jahanne/ gwom piti yaki'd ki lala'th mo e mo 'baar mo ki tur mo eya ris bampa/ kun 'kon ki jin 'kam mo e bampa/ gi Pany Jaliil mo be.

Yesus Wa'ki'da Mar ma Simaan jin Ta'da 'Bomi mo

²⁹ Dhali ki jahanne/ a'di dhalki gu'b gi montul is buni 'pen mo dhali a'di ciki'd mo e gu'b ma Simaan mo dhala Andaraawus mo nyakka Yakuub mo dhala Yohaana mo be.

³⁰ Dhala mar ma Simaana 'bomi, a'di 'ba'thki'd mo mmo/ish 'ko'da 'cesh ki 'batha thunya/ mo dhali ki jahanne/ uni ki torki a'di ayim mo be.

³¹ Dhali a'di pu'dki'd mo mmobutha yim mme'd mo dhali 'deka yim ki mis mo dhala thunya/ dhalki'da yim 'pen mo, dhala yim miiki uni to mo be.

Yesus Wa'ki 'Kwani ka Ris Mom'pimpili/ mo

³² Dhali ki mo ta mom'pimpili/ mo jin yulkin ma tente/ mo tani uni kalki 'kwani e a'di mo, aris uni gun 'ba'thkin mo dhali uni kun bu'thkin ma ruma 'cesh mo be.

³³ Dhali aris 'kwani gi 'penkuman bampa/ 'baar mo tulki is mo mmontal 'de/ mo e shan'tamo/ mo be.

³⁴ Dhali a'di ki waç uni ka ris mo, uni gun 'ba'thkin mo ki 'ba'th ki she/ ki she/ mo, dhali a'di ki ura ruma 'cesh ka pije/ mo, dhali a'di diki dhala ruma 'cesh bway mo mmowal 'twa/ mo haali/ uni nyithki a'di mo be.

Yesus Yaki'd mo Mmoçi Gwom 'Borga/ mo

³⁵ Dhali ki mo ta mon'thamo/ ka 'tum gana/ mo ki monjkush ntwa/a/ mo tani a'di cuki mis mo dhali ya mo e mo jin pina 'kwani mo, dhali a'di ki 'tho mo be.

³⁶ Dhala Simaan dhali uni gwansan kun nyakki 'ko ki a'di mo tani bathki a'di nsho'k mo be.

³⁷ Dhali uni gamki a'di mo dhali o a'di gwo mo ki: Aris 'kwani 'baar mo ñapki /e mo be.

³⁸ Dhali a'di ki o uni gwo mo ki: Dhalki ana iina mo e bampa/ kun 'dish yan is mo, ki aha/ mina çi gwo mmun si'da/ mo. Haali/ gom mii gi wakan mo tani a'di ipu'dkika/ mo be.

³⁹ Dhali a'di yaki'd ki tur mo e bampa/ gi Pany Jaliili 'baar mo mmoci gwo mo e gu'b gi montul is buni mo dhali mmo/ura ruma 'cesh ka pije/ mo be.

Yesus Dheelki Wathi/jin 'Kosha Monthus Is mo

⁴⁰ Dhali wathi/jin 'kosha monthus pu'dki'di a'di mo mmoñap mowoth 'peni a'di mo, dhali ca'bki jin 'kupa'dupun mo dhali o a'di gwo mo ki: Wakki/ /e ona bwa mo tani /e mishi aha/ dheel mo.

⁴¹ Mmogukina a'di a'di ki e ma 'thime/ ki mo/en mo tani a'di ki he'th me'd piti mo dhali ta a'di is ki me'd mo dhali o a'di gwo mo ki: Aha/ ona bwa mo be. Dheeli mo ma.

⁴² Dhali ki jahanne/ monthus dhalki a'di 'pen mo dhali a'di dheelkina is mo be.

⁴³ Dhali a'di ki kan a'di gwo ki 'bi'th mo dhali hash a'di mo mmoyaku/ mo ki jahanne/ mo

⁴⁴ dhali tor a'di gwo mo ki: Hili miim pini i e ki 'bore/ mo ki /e mini diki tor jan tal 'denj kamu/ gwo mo. Hili yaku/ mo dhali tora gasiis is pini i e mo dhali ci a'di to gom is pini jin dheelkunu mo me'd gwoñkan jin kankin ma Musa mo haali/ a'di ta gwo jin nyo/a 'kwani mo.

⁴⁵ Hili a'di yaki'd ka pije/ mo dhali tel mii 'pen mo mmobah gwo gom a'di 'bakany mo dhali mmoçal gwo ki lala'th mo. Wakan a'di mol ma Yesus ciç bampa/ dok/e mo eya tente/, hili a'di di'd ka pije/ 'peni bampa/ mo, dhali 'kwani pu'dkini a'di mo 'peni aris shemen bampa/ mo be.

2

Yesus Waçi Wathi/jin Mutta/ Is Is mo

¹ Dhali ki a'di dokki'd ka nyan'ko'd mo 'peni Pan Kapranahuum 'ko'da cim ka hony/e mo tani gwo toru mo ki a'di di'di pa mo be.

² Dhali 'kwani ka ris tulki is mo mmoñtal 'de/ mo. Wakan, mo piyi'd gom uni mo. Monkamu/ yisa di'da shan'tamo/ si'da/ mo. Dhali a'di di'd mo mmoci uni gwo mo be.

³ Dhali uni pu'dkin mo dhali kali wathi/ jin mutta/ is mo e a'di mo, jin kalkina 'kwaniñ gwasi dojon mo be.

⁴ Dhali ki uni mol a'di 'dish is mo goma waambuhany 'kwani mo tani uni ka'cki 'kungu'b mo 'peni 'kupi a'di mo. Dhali ki uni tupki mo i e mo tani uni ki dhala ci me'd ki wathi/ i e jin mutta/ is mo be.

⁵ Dhali ka Yesus parki mongam gwo is buni e mo tani a'di ki o wathi/ jin mutta/ is gwo mo ki: Ya/m pem, miinthus pini gwamkunu /e mo be.

⁶ Dhali iman'kwar ton tiya, uni 'kokin mo mmodot̄ gwo mo eya dum buni mo ki:

⁷ Katinta sa/i/ona wathi/ yansan gwo gi wakan mo? A'di walki gwo sor mo. Kaja a'di mid̄i mish gwam 'kwani gom miinthus mo, hili jasa Arungimis a'di 'de/ mo be.

⁸ Dhali ki jahanne/ Yesuṣ nyithki'd e is piti ki uni tan gi gwondot̄ wakan e is buni mo dhali a'di ki o uni gwo mo ki: Atinta dot̄kina um gwondot̄ eya dum bum kan mo?

⁹ Ki ji gi 'ka'da mii mane ti, mmo/o wathi/ jin mut̄ta/ is gwo mo ki: Miinthus pini gwamkunu /e mowa? walla mmo/o gwo mo ki: Cuyi mis mo dhali 'deka cim pini mo dhali yayi mo?

¹⁰ Hili ki um mini mish ki Ya/ gi 'Kwani ta gi moshirr mo e mony'cesh yan mo mmogwam miinthus gi 'kwani mo, a'di ki o wathi/ jin mut̄ta/ is gwo mo ki:

¹¹ Aha/ ona /e gwo mo ki: Cuyi mis mo dhali kala cim pini mo dhali yayi bway pa mo.

¹² Dhali a'di cuki mis mo dhali ki jahanne/ a'di ki kala cim piti mo dhali ya ka piye/ mbwambori uni 'baar mo. Wakan aris uni 'baar mo merkin mo dhali karkina Arungimis ki ca mo mmo/o gwo mo ki: Ana 'konaki par ji gi wakan e me'd 'de/ ki sule/ mo be.

Mo jin Yuk̄kunuwa Lawi mo

¹³ A'di yayi'd ka piye/ mo dok/e e shemen ma gap ma al mo, dhala dhana buhany wathimpa tulki is i a'di mo, dhali a'di torki uni gwo mo be.

¹⁴ Dhali ki a'di yaki'd ki yampe mo mbway mo tani a'di parki'da Lawi e mo a'di jin ta ya/ ma Halpa mo mmodikina a'di mo e mo jin teruwa thulpa/ mo, dhali a'di ki o a'di gwo mo ki: Bathi aha/ nsho'k mo ma. Dhali a'di cuki mis mo dhali bath a'di nsho'k mo be.

¹⁵ Dhali ki a'di ca'bki'da tharabeesa e gu'b piti mo tani imantera thulpa/ ka ris dhali imanmii miinthus 'kokin nyak̄ka Yesuṣ mo dhali imancik̄ a'di gwo mo, haali/ 'kwani tana ris ka ris kun bathki a'di nsho'k mo be.

¹⁶ Dhali iman'kwar to dhali 'Kwani Parisiyiin ki uni parki'de e ki a'di shwaki to nyak̄ki uni gun ta imanmii miinthus mo dhali imantera thulpa/ mo tani uni ki dot̄ imancik̄ a'di gwo gwo mo ki: Atinta ishwana a'di to nyak̄ki imantera thulpa/ mo dhali nyak̄ki uni gun ta imanmii miinthus kanni?

¹⁷ Dhali ka Yesuṣ cik̄ki a'di yan mo tani a'di ki o uni gwo mo ki: 'Kwani gwansan kun 'kon ki 'bore/ mo tani uni mini 'koki mii ta ga hakiim mo, hili uni gwansan kun 'ba'thkin mo be. Aha/ pu'dkina mo yisa mmoyuk̄ 'kwani kun mii miin̄kar/e hili gom imanmii miinthus mo be.

Gwo jin Dot̄u mo gom To jin Ga/u mo

¹⁸ Dhali imancika Yohaana gwo dhali 'Kwani Parisiyiin uni ga/ki to mo dhali 'kwani pu'dkini a'di mo dhali o a'di gwo mo ki: Katinta si'da/ imiina imancika Yohaana gwo mii mo dhali 'Kwani Parisiyiin mmoga/ to mo, hili imancik̄ /e gwo uni 'koki ga/ to mo be.

¹⁹ Dhala Yesuṣ ki thok̄ uni gwo mo ki: Mina 'kwani yilkina/ gwansan, uni kun yuku mo e momiimash mo mish to ga/ mo ki wathinyaṅa'b diki'd nyak̄ki uni naskina/ mo 'taa? Me'd jin dikina wathinyaṅa'b e bwam uni mo tani uni moli to ga/ mo be.

²⁰ Atee mid̄i pu'du/ mo ki wathinyaṅa'b minu susu/ 'peni mo tani dhali yan'ko'd uni ki ga/ to ka tee caan mo be.

²¹ Wathin̄ kamu/ yisa di'da jin sho burrinyen this apo/ sharkin burrinyen dhamo/ mo. Wak̄ki/ a'di mid̄i mii kan mo tani mo jin 'dapu mid̄i dher bwa

'peni a'di jin ta jin this mo 'peni jin dhamo/ mo, dhali mondhere'd midi war ki shi/ mo.

²² Dhali wathin kamu/ yisa di'da jin midi kar yimana mura'th jin ta jin this mmowol a'di e kucan jin wolu yimana muratha dhamo/ mo. Wakki/ a'di midi mii kan mo tani yimana mura'th midi 'twak kucan mo dhali yimana mura'th midi gaça sho mo. Dhali wakan kucan minu dher bwa mo, hili yimana mura'th this minu mii wol mo e kucan this jin daça kucuru/ mo be.

Imancik Gwo Uni 'Ce'dki Pos ka Cim ma Pesu/ mo be

²³ Ka cim ma pesuñ kamu/ tani a'di yaki'd ki tur mo e bwam bunto mo. Dhali ki uni tanki bway buni mo tani imancik a'di gwo telki mii 'pen mo mmo'ce'd pos mo be.

²⁴ Dhali 'Kwani Parisiyyin o a'di gwo mo ki: Hili ma, atinta imiina uni to jin dina gwonkan ma cim ma pesu/ ki dhal bway mo?

²⁵ Dhali a'di ki thok uni gwo mo ki: 'Kona um ki den gwo e mo gom mii ma Dawuu'd mo 'taa? ki a'di midi mii ta gi to mo dhali ki a'di 'kosha te/ mo tani a'di dhali uni gwansan kun nyakki 'ko ki a'di mo.

²⁶ A'di cicki gu'b ma Arumgimis mo ka Abi/athaar di'd jin ta'da gasiis jin ca'd mo, dhali shwa tonte/ jin di'di bur'kus ma Arumgimis mo, a'di jin dina gwonkan ki dhal bway mo gom 'kwanin tiya mo, hili jasi gom igasiis uni 'cena mmoshwa mo be. Dhali a'di si'da/ ki ciki uni gwansan kun nyakki 'ko ki a'di mo be.

²⁷ Dhali a'di ki o uni gwo mo ki: Acim ma pesu/ karkunu mo gom wathi/ mo, yisa wathi/ goma cim ma pesu/ mo.

²⁸ Wakan Ya/ gi 'Kwani si'da/ a'di ta tapa goma cim ma pesu/ mo be.

3

Wathi/ jin Kutha Me'd Gunkuru/ mo

¹ Dok/e a'di cicki gu'b gi montul is mo dhali wathi/ diki'd jin ku'thkina me'd gunkuru/ mo be.

² Dhali uni timki a'di mo mmopar a'di e mo wakki/ a'di midi 'taki waç a'di ka cim ma pesu/ mo, wakan ki uni mini 'taki ta gi gwo mmoyer a'di is ki gway mo be.

³ Dhali a'di ki o wathi/ jin kutha me'd gunkuru/ gwo mo ki: Yayu/ ise mo ma.

⁴ Dhali a'di ki o uni gwo mo ki: A'di ta mii jin dhala gwonkan bway mo mmomii mii jin 'boro'd ka cim ma pesu/ mo 'taa? walla mii jin ta jin thus minu mii mo? mmowotha/ woth mo 'taa? walla mmo'kosha 'kosh mo? Hili uni 'kon ki shwam mo be.

⁵ Dhali a'di ki hil mo mo mmo'kar mo ki e mo ka nyor e uni mo mmokal bwa dit mo goma dum buni kun 'bitha'bi'th mo. Dhali a'di ki o wathi/ gwo mo ki: Hethi me'd pini mo ma. Dhali a'di he'thki a'di mo dhali me'd piti waçkunu mo be.

⁶ Dhali 'Kwani Parisiyyin iikin ka pije/ mo dhali ki jahanne/ uni ki gam 'twa/ 'kup nyakki 'Kwani Hirodusiyyin apo/ a'di mo mmo'ce'd a'di sho'k mo be.

Adhana Waambuhany 'Kwani 'Kokini Shemen ma Al mo

⁷ Yesus a'di yaki'd mo nyakki imancik a'di gwo mo e shemen ma al mo dhala dhana buhany wathimpa 'peni Pany Jaliil bathki a'di nsho'k mo. Dhali 'peni Pa Yahuudiyya si'da/ mo be

⁸ dhali 'peni Pa Urushaliim mo dhali 'peni Pa Adumiyya mo dhali 'peni bampa/ jin di'd e bwampo/ Yi'den Kumma/ Uurdun mo dhali 'peni Pan Sur mo dhali 'peni Pa Saydaa/ mo, dhana waambuhany 'kwani mmocika uni gwo mo goma ris mii kun miikina a'di mo tani, uni pu'dkini a'di mo be.

⁹ Dhali a'di torki imancik a'di gwo gwo mo mmothosona kur gom a'di mo goma waambuhany 'kwani mo, isi ciki/ ki uni mini 'koki 'taki yap a'di ki is mo.

¹⁰ Haali/ a'di waçki'da waç ka ris mo, wakan ki aris uni kun 'koshkina 'ba'th ka ris mo gaçkina gaç mo mmota a'di is ki me'd mo.

¹¹ Dhali ka rum thus kun nyo/on parki a'di e mo tani uni ta'kkina 'cesh mbwambori a'di mo dhali cuu gwo ki dhan 'twa/ kun caaca ki: /E ta Ya/ ma Arungimis mo be.

¹² Dhali a'di ki kan uni gwo ki 'bi'th mo mmodhalku/ ki dhal a'di ki a'di minu mish mo.

Yesus Kwanyki Uni kun 'Koni 'Kume'd I'ce'dka Su/ mo

¹³ Dhali a'di yaki'd ka gagamis e moŋ'kuwosh mo dhali a'di ki yuk uni gwansan nyakki a'di mo, uni kun ona bwa a'di ki sus mo. Dhali uni pu'dkini a'di mo be.

¹⁴ Dhali a'di ki dhu uni kun 'koni 'kume'd i'ce'dka su/ mo mmonyak 'ko ki a'di mo dhali mmohash uni mmoçi gwo mo

¹⁵ dhali mmota gi moshirr mo mmo/ura ruma 'cesh ka pije/ mo.

¹⁶ Simaan, a'di jin yukunu gway ka Buŋerus mo,

¹⁷ dhala Yakuub jin ta ya/ ma Sabadi mo dhala Yohaana jin ta'da kam ma Yakuub mo, uni kun yukkina a'di gway ka Buwanarjis mo jin ta 'pemen gwo jin onu ki iya/ ma wara sho'k mo.

¹⁸ Dhala Andaraawus mo dhala Pilibbus mo dhala Bartulamaawus mo dhala Matŋa mo dhala Tuuma mo dhala Yakuub jin ta ya/ ma Halpa mo dhala Taddaawus mo dhala Simaan gi Paŋ Kaana mo,

¹⁹ dhala Yahuusa Iskariyuuti jin 'ciŋhi/ a'di is ki gwo mo be.

Gwo Sor jin Walu apo/ Shi/in Dheleladhelel mo

Dhali yan'ko'd a'di yaki bway pa mo be.

²⁰ Dhala waambuhany 'kwani pu'dkin mo dhali tuli isi montal 'de/ dok/e mo. Wakan uni 'koki ta gi mo mo mmoshwa to mo.

²¹ Dhali ki imugum piti cikki gwo gom a'di mo tani uni pu'dkin mo dhali nap a'di mo mmobu'th mo haali/ uni o gwo mo ki: A'di guski'da du mo be.

²² Dhali iman'kwar to pu'dkin mo ka lunġu'b 'peni Pa Urushaliim mo mmo/ o gwo mo ki: A'di bu'thkin ma Baalsebuul mo dhali ki gway gi tapa ma ruma 'cesh mo tani a'di urkina a'di aruma 'cesh ka pije/ mo be.

²³ Dhali a'di ki yuk uni i a'di mo dhali tor uni gwo mo ki gwom 'bi'th/e mo ki: A/ka Seŋaan mishi is piti ur ka pije/ ce Seŋaan mo 'taa?

²⁴ Wakki/ 'penkuman bampa/ kwa/u bwa mo e is piti mo tani 'penkuman bampa/ caan midi mol dosh mo be.

²⁵ Dhali wakki/ gu'b kwa/u bwa mo apo/ is piti mo tani gu'b caan midi mol dosh mo be.

²⁶ Dhali wakka Seŋaan midi cu mis apo/ is pitiŋ gana/ mo wakan dhali kwa/ bwa mo tani a'di midi mol dosh mo, hili a'di midi daç ka bwa i'ba/ mo be.

²⁷ Hili wathin 'den kamu/ yisa di'da jin midi mish ciç gu'b gi wathi/ jin 'bitha'bi'th mo dhali shi/ tom piti is mo, hili isi ciki/ a'di midi mii deç wathi/ jin 'bitha'bi'th ka shi/ ntwa/a/ mo. Dhali yan'ko'd ka jin gana/ mo tani a'di midi shi/ gu'b piti is mo be.

²⁸ Ka jin gana/ aha/ ona um ki, aris miinthusi 'baar mo minu gwam ki iya/ gi 'kwani mo, dhala ris gwo sor gunn kun wala uni mo.

²⁹ Hili a'di jin wali gwo sor apo/ Shi/in Dheleladhelel mo tani minu 'koki gwam miinthus piti ki sule/ mo, hili a'di dina mii m'ba/ ki sule/ sule/ e miinthus mo be.

³⁰ Haali/ uni oki gwo mo ki: A'di ta'd ga rum thus jin nyo/o'd mo be.

KoYesus dhali Ikam Piti mo

³¹ Dhali kum dhali ikam piti pu'dkin mo dhali dosha pije/ mo. Uni ki hash a'di gwo mo dhali yuk a'di mo be.

³² Dhala dhana waambuhany 'kwani 'kokini 'kam a'di is mo dhali uni ki o a'di gwo mo ki: Kwan dhali ikam pini dhali i'bwahan uni 'kona pije/ mmahan mo mmodot /e mo be.

³³ Dhali a'di ki thoḡ gwo mo ki: Aja sa/ nta'da ta'dam pem dhali ikam pem mo?

³⁴ Dhali a'di ki hil mo mo mmo'kar mo ki e mo gom uni gwansan kun 'kon mmo'kam a'di is mo, dhali a'di ki o gwo mo ki: Ita'dam pem anan be dhali ikam pem anan mo be.

³⁵ A'diyin jin mii'd ki bwa ma Arumgimis mo tani a'di ita'da kam pem mo dhali 'bwah pem mo dhali ata'dam pem mo be.

4

Gwom 'Bi'th/e goma Ka'banya To jin Yeku mo

¹ Dok/e a'di telki mii 'pen mo mmoḡor uni gwo e shemen ma gap mo. Dhala dhana waambuhany 'kwani caaca kagahara tulki isi a'di mo. Wakan a'di seki bwaa kur mo dhali ca'bi cine/ mo e bwaman ma al mo. Dhala dhana waambuhany 'kwani uni 'koni shemen ma gap ma al mo eya 'cesh mo.

² Dhali a'di ṭorki uni gwo ka ris mo ki gwom 'bi'th/e mo, dhali e gwom piti jin tora a'di uni mo tani a'di ki o uni gwo mo ki:

³ Ba cikḡ gwo mo ma. Amanyeḡa ka'banya a'di ya'd ka pije/ mo mmoyeḡ to mo.

⁴ Dhali ki a'di yekki to mo tani aka'banya tiya ta'kkin mo e bway tur jin iinu mo. Dhali 'dii pu'dkin mo dhali los uni mo be.

⁵ Dhali aka'banya tiya uni ta'kkin mo e mo wosh mo dhali uni daran ga 'cesh e embul mo. Dhali ki jahanne/ ki uni 'kana le/ mo haali/ uni dar ga 'cesh mo tani,

⁶ dhali ka tente/ sulki'd ka nyor piti jin 'batha'ba'th mo dhali mmodara uni ka birman mo tani uni la shi'bil mo be.

⁷ Dhali aka'banya tiya uni ta'kkin mo e bwam ma 'de/ mo dhali ka 'de/ can mo tani a'di cokoṭki uni mo dhali a'di moli maman dho'th mo be.

⁸ Dhali aka'banya tiya uni ta'kkin mo eya 'cesh jin 'bora'bor mo dhali uni ki kala dho'th kagahara mo mmocakina uni mo dhali mmomarkina uniya mar is mo, mmogwono'dkina uniya dho'th ki iss 'de/ i'ce'dka 'kume'd eya tora 'de/ mo dhali ki iss 'kwanimpa ikwara mo dhali ki iss 'kwanimpa imudhe'd mo be.

⁹ Dhali a'di ki o uni gwo mo ki: A'di jin ta'd gi gu'ban'ce mo mmocikḡ gwo mo tani dhalki a'di cikḡ gwo mo ma.

¹⁰ Dhali ki a'di di'd a'di 'de/ mo tani dhali uni gwansan kun tulki isi a'di kun tana 'kume'd i'ce'dka su/ mo tani uni dotḡi a'di gwo mo isi gom gwom 'bi'th/e yan mo.

¹¹ Dhali a'di ki o uni gwo mo ki: Um cinu gwo jin cinu ki kup mo gom Bampa/ ma Arumgimis mo, hili gom uni gwansan kun 'kona pije/ mo tani uni a'di iminu ṭorki gwo ki gwom 'bi'th/e mo be.

¹² Wakan ki uni mini mii mish ka jin gana/ dhali 'koki nyith a'di mo, dhali uni ka jin gana/ mini cikḡ a'di mo tani dhali 'koki mish a'di 'ban mo be. Hili isi ciki/ ki uni mini 'taki tu'k mo dok/e dhali uni minu 'taki gwamki miinthus buni mo be.

13 Dhali a'di ki o uni gwo mo ki: A/um si'da/ 'koki mish gwom 'bi'th/e yan 'ban mo? Um mini mish a'di 'ban kata aris gwom 'bi'th/e gwansan mo?

14 Amanyeka ka'bany to mo tani a'di yekki gwo mo be.

15 Dhali uni gwansan uni ita uni kun ta'kkin mo e bway tur mo e mo jin yeku gwo nycine/ mo. Dhali ki uni cikki gwo mo tani aSetaan ki jahanne/ pu'dki'd mo dhali ka' gwo jin yeku e uni mo be.

16 Dhali uni gwansan si'da/ uni ita uni gun yekku mo e embula 'cesh wosh mo. Uni, ki uni cikki gwo mo tani uni la bu'th a'di ki jahanne/ ki bwan 'kunu'd mo be.

17 Dhali uni tan ga birman yisa e is buni mo, hili uni 'kon jasi ari'ceenne/ mo, dhali yan'ko'd ki monto'c bwa walla mo gi 'koshuwa 'kosh cuki mis mo gom gway yan mo tani ki jahanne/ uni ta'kkin mo be.

18 Dhali aka'banya tiya uni gun yekku mo e bwam ma 'de/ mo tani uni ita uni gwansan kun cikki gwo mo be.

19 Hili uni bala to ga 'cesh is mo dhali 'penkapan buni jin el uni e ki el mo dhali bwam buni gun ona uni gom ton tiya mo tani cikina uni nycine/ mo dhali cokat gwo mo dhali a'di inyo/i uni mo ki uni moli dho'th mo be.

20 Hili uni gwansan kun yeku mo eya 'cesha 'borga/ mo tani uni ita uni gun cikki gwo mo dhali bu'th a'di mo dhali dho'th maman mo, eya tora 'de/ mo tani a'di dhotho'd ki iss 'de/ i'ce'dka 'kume'd mo, dhali eya tora 'de/ mo tani a'di dhotho'd ki iss 'kwanimpa ikwara mo, dhali eya tora kamu/ mo tani a'di dhotho'd ki iss 'kwanimpa imudhe'd mo be.

Moḡkush jin Kumu 'Kup ki Toḡ'kul Bwa mo

21 Dhali a'di ki o uni gwo mo ki: Alamba/ ki a'di kalkunu bway gu'b mo tani a'di kumkunu 'kup ki toḡ'kul bwa mo 'taa? walla karkunu mo e bwan'kwariny ma angar mowa? dhali a'di dinuki kara po/ tirkina/ mo 'taa?

22 Haali/ toḡ kamu/ yisa di'da jin minu bag mo isi ciki/ a'di minu mish eya tente/ mo. Walla toḡ kamu/ yisa di'da jin minu mi ka 'di/ mo, hili isi ciki/ uni minu mish ki moḡkush mo be.

23 Waḡki/ wathin 'den kamu/ ta'd gi gu'ban'ce mo tani dhalki a'di cik gwo mo ma.

24 Dhali a'di ki o uni gwo mo ki: Hili ki 'bore/ a'di jin cika um mo. A'di jin barkina um mo tani a'di minu barki um mo dhali to ki nyanye/ mo tani a'di minu ci ki um mo be.

25 Haali/ a'di jin ta'd gi to mo tani minu ciku/ ki nyanye/ mo. Dhali 'peni a'di jin dara'd mo tani, me'd jin tana a'di gi a'di mo tani a'di minu bu'th 'peni a'di mo be.

Gwom 'Bi'th/e goma Ka'bany To jin Caki'd mo

26 Dhali a'di ki o gwo mo ki: Bampa/ ma Arungimis a'di wana e ki wathi/ jin midi 'taki pepera ka'bany bwa apo/ mony'cesh mo

27 dhali 'taki ish e mo dhali cu mis mon'thiny mo dhali montee mo, dhali aka'bany midi 'taki 'ka ale/ mo dhali ca mo ki a'di molo'd mo be.

28 A'cesh a'di dho'thki to ki is piti mo, ale/ a'di i'ka'di tḡwa/ a/ mo dhali yan'ko'd akulpe/ mo dhali yan'ko'd maman gana/ mo.

29 Hili ki maman iski'd mo tani a'di ki kar mo ma nyertha/ eya tente/ ki jahanne/ mo haali/ mo gi minu 'ciḡ to mo pu'dki'd mo be.

Gwom 'Bi'th/e gom Emen To jin Miinuwa 'Tash mo

30 Dhali a'di ki o gwo mo ki: Mina ana kar Bampa/ ma Arungimis ka par 'ban kata moye? walla gwom 'bi'th/e gi wakata imina ana i/o mo gom a'di mo?

³¹ A'di wana e ki emena ka'bany to jin miinuwa 'tash mo, a'di jin yeƙkunu apowa 'cesh mo. A'di ta ara ka'bany to jin ca'ba e ki piri'th piri'th apowa 'cesh mo.

³² Hili ki a'di yeƙkunu mo tani a'di caki'd mo dhali a'di warki'd ki dhan wurup mo dhali a'di ki pepera adhana bi mo. Wakan 'dii kun pen e mis mo tani uni nyanƙi gu'b buni eya lam piti mo be.

Mo gi Bu'th ma Yesus Gwom 'Bi'th/e Mmoƙor mo

³³ Ka ris gwom 'bi'th/e gi wakan mo tani a'di ki ƙor uni gwo mo me'd jin mina uni 'taki mish a'di mo be.

³⁴ A'di diki ƙor uni gwo ki dar gi gwom 'bi'th/e mo. Hili e imancik gwom pitiƙ gana/ mo uni 'cena mo tani a'di ki be'd uni gwo 'baar mo be.

Yesus Doshki'da Dhana Punthar 'Tham mo

³⁵ Ka tee caan ki mo ta mom'pimpili/ mo tani a'di ki o uni gwo mo ki: Dhalki ana iina mo mmo'citha/ gap gi 'bana kamu/ mo.

³⁶ Dhali mmodhalkina uni awaambuhany 'kwani 'pen mo tani uni suski a'di nyakki uni mo me'd jin ca'bkina a'di e bwam ma ƙur mo. Dhali aƙura tiya nyakki 'ko ki a'di mo be.

³⁷ Dhali adhana punthar 'tham poshki'd mo dhali yi'de/ birki bakal mo mmodora ƙur mo. Wakan aƙur a'di 'tu'dkina yi'de/ hila/ mo be.

³⁸ Hili a'di diki'd mo e bum 'pen ma ƙur mo mmo/ish e apo/ burrinye/ jin ishu 'ba/ mo. Dhali uni merki a'di e mo dhali o a'di gwo mo ki: Mantor gwo, ki /e bunya/ dina is ki mer mo ki ana mina 'ce'd sho'k mo?

³⁹ Dhali a'di ki mer e mo dhali ƙucur 'tham ki gwo mo dhali o yi'de/ gwo mo ki: Roci sho'k mo dhali doshi munƙun mo. Dhali 'tham doshki'd mo dhali adhan mo dosh ki biyuu mo be.

⁴⁰ Dhali a'di ki o uni gwo mo ki: Katinta ƙo/ka uma ƙo/ ise? Um dar gi monƙam gwo is mo 'taa?

⁴¹ Dhali uni 'kokunu mo mmo'tu'd ki mondee is mo dhali o gwo ka rem 'kup mo ki: Ki wathi/ jana a'dan sa/? ki 'tham dhali yi'de/ haki a'di gwo e mo?

5

Wathi/ gi Pan Gadara jin Bu'thkin ma Ruma 'Cesh jin Waƙunu mo

¹ Dhali uni pu'dkin ki 'ban ma gap ma ala kamu/ mo e bampa/ gi Pan Gadara mo be.

² Dhali ki a'di piki'd ka piƙe/ 'peni bwam ma ƙur mo tani a'di gamki 'kup ki wathi/ jin piki'd mo 'peni mon'kupaje jin taki'd ga rum thus jin nyo/o'd mo be.

³ A'di jin ca'bki'd e mon'kupaje mo dhali wathin 'deƙ kamu/ yisa di'da jin mishki a'di deƙ ki sule/ mo isi ka jindhiir ilu/ mo.

⁴ Haali/ a'di deƙkunu me'd ka ris ka makkiya mo dhala jindhiir mo, hila jindhiir bene'dkina a'di bwa mo dhali makkiya si'da/ 'ce'dkina a'di ka 'ci'cimi'th mo. Dhali wathin kamu/ yisa ta gi 'bitha mmo'te a'di mii 'twa/ mo.

⁵ Mon'thiny dhali montee a'di diki'd mo e mon'kupaje mo dhali e mon'kuwosh si'da/ mo a'di cuuki gwo ki 'twa/ jin caaca mo dhali tha'th is piti ki wosh mo be.

⁶ Dhali ki a'di parki'da Yesus e mo 'pena dhana/ mo tani a'di guski'd mo dhali luƙ a'di mo be

⁷ dhali a'di cuu gwo ki dhan 'twa/ jin caaca mo mmo/o gwo mo ki: Ki /e mini miyya tinta ki aha/, Yesus, /e jin ta Ya/ gi a'di jin Cayaa/ e ki Ca jin ta'da Arungimis mo? Aha/ kana /e gwo mo ka Arungimis mo ki: Dhalku/ ki 'kosh aha/ is ka nyor mo.

8 Haali/ a'di ki o a'di gwo mo ki: Piyi ka pije/ 'peni wathi/ mo, /e jin tana rum thus jin nyo/o'd kan mo.

9 Dhala Yesus ki dot a'di gway mo mmo/o gwo mo ki: /E yuku gway kaja mo? A'di ki thok gwo mo ki: Gway pem yuku Karis mo haali/ aman 'kona ka ris mo be.

10 Dhali a'di ki dot a'di gwo ka daran du mo mmohash uni ka pije/ 'peni bampa/ mo be.

11 Dhala dhana waambuhany kuthar uni shwakin mo e 'bambala wosh mo be.

12 Dhali uni dotki a'di bway mo mmo/o gwo mo ki: Hashki aman mo e bwan kuthar mo ma. Dhalki aman cika e uni mo.

13 Wakan a'di ki dhal uni bway mo mmo/ii mo be. Dhala rum thus kun nyo/ on pu'dkin ka pije/ mo dhali ciç mo e bwan kuthar mo. Dhala dhana buhany kuthar denkunu e ka alaapi su/ mo, mmosokina uni ka lungu'b eya gap yi'den 'kulga/ mo e bwam yi'de/ mo dhali uni loskina yi'de/ mo be.

14 Dhali imanhil kuthar uni sokin mo dhali tor gwo e 'penkuman bampa/ mo dhali e pa 'baar mo. Dhali 'kwani pu'dkin mo mmopar a'di e mo a'di jin miiki'd mo be.

15 Dhali uni pu'dkina Yesus mo dhali uni ki par wathi/ jin bu'thkin ma ruma 'cesh e mo mmoça'b mo ki burryne/ i is mo dhali ka dum piti jin 'boro'd mo be dhali wathi/ jin taki'd ga ruma 'cesh ka ris mo tani dhali uni ko/ki a'di mo be.

16 Dhali uni gwansan kun mishki a'di mo tani uni torki gwo mo gom a'di jin miikunu mo gom wathi/ jin bu'th ma ruma 'cesh mo dhali gwo gom kuthar mo.

17 Dhali uni telki mii 'pen mo mmoyuka Yesus mo mmoya mo 'peni mom buni mo be.

18 Dhali me'd jin jithirkina a'di mo e bwam ma kur mo tani wathi/ jin bu'thkin ma ruma 'cesh a'di dotki a'di 'twa/ mo ki a'di midi 'taki nyak di ki a'di mo be.

19 Hila Yesus ushki'd mo dhali o a'di gwo mo ki: Yaku/ bway pa mo e imugun pini mo ma dhali tor uni gwo gom to jin miikina Tapa gom /e mo dhali gom momiimii jin miikunu apo/ /e mo be.

20 Dhali a'di yaki'd ka pije/ mo dhali tel mii 'pen mo mmotor gwo eya tente/ e Bampa/ gi Pan Dekapolis mo gom dhan to jin miikin ma Yesus gom a'di mo, dhali aris 'kwani 'baar mo merkin mo be.

'Bwa/ ma Yaa/irus dhala 'Bom jin Taki'da Yesus 'Twaman Burrinyem Piti Is ki Me'd mo

21 Dhali ka Yesus 'cithki'da gap dok/ e eya kur ki 'bana kamu/ mo tani awaambuhany 'kwani caaca tulki isi a'di mo. Dhali a'di diki'd e shemen ma gap ma al mo.

22 Dhali yan'ko'd tapan kamu/ gi gu'b gi montul is pu'dki'd mo, a'di jin yukunu gway ka Yaa/irus mo. Dhali ki a'di parki a'di e mo tani a'di bitki'da 'ceshi sho'k piti mo be.

23 Dhali mmonap a'di mo mmo/o gwo mo ki: Ari 'bwa/m pem a'di 'ba'thki'd mo mmomuri wu mo. Yayu/ mo ma dhali kar me'd pini apowa yim mo. Wakan ka yim mina isi 'bor mo dhali di ki e mo be.

24 Dhali a'di yaki'd mo nyakki a'di mo.

Dhala dhana waambuhany 'kwani caaca bathki a'di mo dhali uni ki 'kam a'di ki dek mo.

25 Dhali a'boma kamu/ diki'd si'da/ mo, a'di jin guskin ma bas ki yil 'kume'd i'ce'dka su/ mo be.

26 Dhali a'di 'koshkina is ka nyor kagahara mo gom mii jin yakina a'di i ihakiim ka ris mo. Dhali a'di ki 'baara ris to 'baar mo kun takina a'di mo be dhali isa kamu/ yisa 'borki'da, hili isa nyor 'curki 'pen ki shi/ mo kagahara mo be.

27 Dhali ayim cikki gwo kun okunu goma Yesus mo dhali a'di pu'dki'di 'ko'di a'di mo e bwaman ma waambuhany 'kwani mo dhali ta a'di burrinyem piti is ki me'd mo.

28 Haali/ ayim ki o gwo mo ki: Wakki/ aha/ mina 'taki ta isi burrinyem piti is ki me'd mo tani aha/ mina isi 'bor mo be.

29 Dhali ki jahanne/ abas jin guski a'di dakki'd mo, dhali ayim mishki'd ki is piti mo ka yim waçkunu mo 'peni 'ba'th jin 'koshki a'di mo be.

30 Dhala Yesus nyi'ihki'd ki is piti ki mom'bi'th yaki'd 'peni a'di mo dhali ki jahanne/ a'di ki tuka bor mo e bwaman ma waambuhany 'kwani mo dhali o gwo mo ki: Kaja ta aha/ burrinye/ is ki me'd mo?

31 Dhali imancik a'di gwo ki o a'di gwo mo ki: /E parkina waambuhany 'kwani e yapkina yap ki is mo mmo'kam /e mo dhali ata ona /e ki: Kaja ta aha/ is ki me'd mo?

32 Dhali a'di ki hil mo ki e mo mmopar a'di jin miiki'd kan e mo be.

33 Hila 'bom a'di mishki a'di jin miikunu mo gom a'di mo. A'di pu'dki'd ki monko/ is mo dhali mondee is mo dhali a'di ki bita 'cesh ibwambori a'di mo dhali a'di ki tor a'di gwon gana/ 'baar mo.

34 Dhali a'di ki owa yim gwo mo ki: 'Bwa/m pem, mongam gwo is pini a'di waçi /e mo. Yaku/ mo ki monku'th is mo dhali waçi mo 'peni 'ba'th pini jin 'koshki /e mo.

35 Dhali ki a'di di'd mmo'or gwo mo tani 'kwanin tiya pu'dkin mo 'peni gu'b gi tapa mo, uni gun o gwo mo ki: 'Bwa/m pini wuki'd mo. Atinta tu/ulkina /e aman'or gwo ki gwo ki rash rash kan mo?

36 Hili a'di tonki'd mo gom gwo jin okina uni mo. Dhala Yesus ki o tapa gi gu'b gi montul is gwo mo ki: Dhalku/ is ki ko/ mo ma. Hili gami jasi gwo is mo.

37 Dhali a'di diki dhal jan tal 'dey kamu/ bway mo mmobath a'di mo, hili isi ciki/ jasa Buterus mo dhala Yakuub mo dhala Yohaana jin ta'da kam ma Yakuub mo be.

38 Ki uni pu'dkin mo e gu'b gi tapa gi gu'b gi montul is mo tani a'di parki'da dulatt e mo jin miikunu mo dhali 'kwani mmoko mo dhali mmomiiya cinthar kagahara mo.

39 Dhali ki a'di cikki gu'b mo tani a'di ki o uni gwo mo ki: Atinta miikina uma dulatt mo dhali ko mo kan? A'ci a'di yisa wu'd mowa, hili a'di ishki e mo be.

40 Dhali uni ki pe'th a'di mo. Hili a'di ki dhu uni 'peni 'baar ka piye/ mo dhali a'di ki sus jasi com ma 'ci mo dhali kum mo dhali uni gwansan kun nyakki 'ko ki a'di mo dhali ii bway bwan gu'b e mo jin din ma 'ci mo.

41 Dhali a'di ki butha yim ki me'd mo dhali a'di ki owa yim gwo mo ki: Talitha kumi, a'di jin ta 'pemen gwo jin onu ki: Ari nyara/, aha/ ona /e gwo mo ki: cuyi mis mo.

42 Dhali ki jahanne/ ari nyara/ cuki mis mo dhali ya ki sho'k mo. Haala yim 'kona yili 'kume'd i'ce'dka su/ mo. Dhali ki jahanne/ uni 'baar mo 'kokunu mo mmotash ki momer mo be.

43 Dhali a'di ki kan uni gwo ki 'bi'th mo ki wathij kamu/ midi 'taki diki mish mii yan mo. Dhali a'di ki tor uni gwo mo mmoçi ka yim tonte/ mmoshwa mo be.

6

Yesus A'di Wakḵunu mo e Pa Naasira mo

1 A'di yaki'd mo 'peni mun mo dhali pu'd mo e bampam piti mo dhali imancik a'di gwo bathki a'di nsho'k mo be.

2 Dhali ka cim ma pesu/ mo tani a'di ki tel mii 'pen mo mmoṭor uni gwo mo e gu'b gi montul is mo. Dhali 'kwani ka ris kun cikki gwom piti mo tani uni 'kokin mo mmomer mo mmo/o gwo mo ki: 'Peni mana sa/ igamkina wathi/ yansan aris mii gwansan mo? Ki moyuk jin ta'da ta sa/ icikunu a'di mo? Dhali adhan mom'bi'th maja sa/ imiikina a'di mii gwahan ki me'd piti mo?

3 Dina a'di ki ta amanpa/ cwa 'taa? Dhali dina a'di ki ta ya/ ma Mariyam 'taa? Dhali ikam piti 'koki ta iYakuub mo dhala Yusi mo dhali Yahuuda/ mo dhala Simaan 'taa? Dhali 'kona i'bwaham piti ki nyak 'ko ki ana imahana? Dhali uni kolkunu ki a'di mo be.

4 Dhala Yesus ki o uni gwo mo ki: Amanci gwo ma Arumgimis yisa dar gi tak e mon tiya hili isi ciki/ jasi e bampam pitin gana/ mo dhali e bwaman ma bas 'kwanim piti mo dhali e gu'b pitin gana/ mo be.

5 Dhali a'di mol dhan miny caaga/ mii mo isi ciki/ a'di kar me'd piti apo/ 'kwani kun 'bathan ki daka/ mo dhali a'di ki waç uni mo be.

6 Dhali a'di merki'd kagahara mo haali/ gom 'kom buni jin 'kona uni ki dar gi mongam gwo is mo be.

Dhali a'di yaki'd mo e bwaman 'kwani e bampa/ 'baar mo mmoṭor gwo mo be.

Mo'ii jin Iina Uni 'Kume'd I'ce'dka Su/ mo

7 Dhali a'di ki yuh 'kwani 'kume'd i'ce'dka su/ nyakki a'di mo, dhali a'di ki tel mii 'pen mo mmohash uni ka susu/ susu/ mo. Dhali ci uni moshirr apowa rum thus kun nyo/on mo be.

8 A'di ki kan uni gwo mo mmo'koki 'do ton tiya gom iim buni i bway mo hili isi ciki/ jasi cwa mo, walla maa yisa, walla kucan yisa, walla guurush yisa eya jisalaan buni mo.

9 Hili uni mini hi'th jasa ppa/ isho'k mo dhali mini 'koki hi'th burrinyem bwamani su/ mo.

10 Dhali a'di ki o uni gwo mo ki: E gu'b yin jin mina umi ciç mo tani 'koyi mo ntagi um mini dhal mo yan 'pen mo.

11 Dhali wakki/ 'kwani gi mo caan 'koki bu'th um mo, dhali ush gwo cik 'peni um mo tani dhali ki um mini dhal mo yin 'pen mo tani piri abuhany 'peni sho'k bum mo haali/ a'di midi ta gwo jin onu apo/ uni mo be.

12 Wakan uni iikin mo dhali ci gwo mo ki 'kwani mini 'taki rica du is mo be.

13 Dhali uni urkina ruma 'cesh ka pije/ ka ris mo dhali wol uni ayini 'kup ka ris mo, aris uni gun 'ba'thkin mo dhali waç uni mo be.

Mowu ma Yohaana jin Ta'da Manmiiya Mii ki Yi'de/ mo

14 Dhala Malik Hirodus cikki gwo mo gom a'di mo, gom gway ma Yesus mishkunu e mo 'baar mo. Gom kun tiya o gwo mo ki: A'di ta'da Yohaana jin ta'da manmiiya mii ki yi'de/ mo jin cukunu mis mo 'peni mowu mo. A'di 'bitha wathi/ mii ki 'bi'th e a'di mo be.

15 Hili kun tiya o gwo mo ki: A'di ta'da Iliya mo. Dhali kun tiya o gwo mo ki: A'di ta'da manci gwo ma Arumgimis mo jin wana e gi jin tal 'denj kamu/ 'peni imanci gwo ma Arumgimis kadhamo/ mo be.

16 Hili ka Hirodus cikki gwo mo gom a'di mo tani a'di ki o gwo mo ki: AYohaana jin 'cithka/ 'kup mo a'di cukunu mis mo 'te/ be.

17 Haala Hirodus a'di hashki gwo mo dhali butha Yohaana mo dhali deḡ a'di mo mmokara sijin mo gom gway ma Hirodiyya mo jin ta asha kam piti ka Pilibbus mo haali/ a'di mashki'da yim mo be.

18 Haala Yohaana ki owa Hirodus gwo mo ki: A'di diki ta mii jin dhala gwonkan /e bway mo mmomash asha kan mo be.

19 Dhala Hirodiyya a'di dikina gwo apo/ a'di mo mmoruk a'di mo dhali nḡap a'di mmo'taki 'kosh jwa mo tani hili ayim diki mish a'di mii mo.

20 Haala Hirodus a'di ko/ki'da Yohaana mo mmomishkina a'di a'di ki a'di ta wathin kar/e mo dhali wathi/ jin kogu mo dhali kar a'di ki 'dantar mo. Ki a'di cikki gwo 'peni a'di mo tani a'di dunḡurkina 'kup is kagahara mo dhali a'di di'd mmocik gwo 'peni a'di ki bwan 'kunyaga/ mo be.

21 Hili embula 'borga/ pu'dki'd mo ka Hirodus pu'dkin ma cim jin dhodhu a'di mo tani a'di miiki dhan maa gom 'kwani ma hakuuma gi gu'b piti mo dhali imancil ma askar alip mo dhali 'kwani gwanyjaka/ gi Pany Jaliil mo be.

22 Dhali ki 'bwa/ ma Hirodiyya pu'dki'd mo dhali sa mo tani ayim 'borki'da Hirodus bwa mo dhali yilkinam piti mo, dhali malik ki o nyara/ gwo mo ki: Doḡi aha/ mo ma gom ma to yin jin o /e bwa mo dhali aha/ mina ciki a'di /e mo be.

23 Dhali a'di ki owa yim gwo is mo mmo/o gwo mo ki: Ma to yin jin mina / e idot aha/ mo tani aha/ mina ciki a'di /e mo ntagi 'bwanu'b bampam pema kamu/ mo be.

24 Dhala yim yaki'd ka piḡe/ mo dhali doḡ kum gwo mo ki: Ata miga/ doḡ a'di mo? Dhali kum ki o a'di gwo mo ki: 'Kup ma Yohaana jin ta'da manmiiya mii ki yi'de/ mo be.

25 Dhala yim yaki gu'b ki jahanne/ mo mmobumburku/ mo eya malik mo dhali doḡ a'di gwo mo mmo/o gwo mo ki: Aha/ nḡapa /e mmoci aha/ 'kup ma Yohaana shwane'dan e bwam ma sahan mo, a'di jin ta'da manmiiya mii ki yi'de/ mo be.

26 Dhala malik a'di bitkina bwa ka lungu'b kagahara mo ki bwan diḡi'd mo. Hili haali/ gom gwo jin ona a'di is mo dhali yilkinam piti mo tani a'di 'tena bwa mmo'ce'd gwom piti goma yim mo be.

27 Dhali ki jahanne/ a'di hashki'da askar mo, a'di jin ta'da amanji mo mo, dhali kan gwo mo ki 'kup piti minu guyu/ mo. Dhali a'di yaki'd mo dhali 'citha/ Yohaana 'kup mo eya sijin mo

28 dhali guyu/ 'kup piti mo e bwam ma sahan mo dhali ciki a'di ki nyara/ mo, dhali nyara/ ki ciki a'di ki kum mo be.

29 Dhali ki imancik a'di gwo cikki gwo mo gom a'di mo tani uni pu'dkin mo dhali kal bunḡwar is piti mo dhali 'thi a'di e jis wosh mo be.

'Kwani Alaapi Mudhe'd kun Cikunu Tonte/ mo

30 Dhali imandhun ma Yesus ki she/ mo uni doḡkin mo ka nyan'ko'd eya Yesus mo dhali tor a'di aris gwo 'baar mo kun miikina uni mo dhali aris gwo kun torkina uni mo be.

31 Dhali a'di ki tor uni gwo mo ki: Iiyi mo um 'cena mo e mo jin pina 'kwani mo dhali siyi is mo ari'ceenne/. Haali/ 'kwani tana ris ka ris pu'dkin mo dhali iikin mo, dhali uni 'koki butha tente/ mo mmokar toḡ kamu/ n'twa/ mo mmoshwa mo be.

32 Dhali uni iikin mo e bwam ma kur mo e mo jin dar gi 'kwani uni 'cena ki is buni mo be.

33 Dhali 'kwani ka ris parki uni e mo mmo/ii mo dhali mish uni mo dhali uni sokin ki sho'k mo 'peni aris bampa/ 'baar mo dhali pu'di twa/a/ ki uni mo be.

34 Ki a'di thulki'd mo tani a'di parki'da dhana buhany wathimpa e mo dhali a'di ki ko'c uni e i is mo haali/ uni wakina e gi ka'bal kun dar ga manhil uni mo. Dhali a'di ki tel mii 'pen mo mmo'or uni gwo ki to ka ris mo be.

35 Dhali ki mo taki'da babalalu/ mo tani imancik a'di gwo pu'dkin mo dhali o a'di gwo mo ki: Mo yansan ta mo jin pina 'kwani mo, dhali mo ta'da 'thintha/ mo be.

36 Hashki uni mo ma ki uni mini ii bampa/ mo dhali pa kun 'kon gi jin 'kam mo dhali yol tonte/ gom is buni mo mmoshwa mo.

37 Hili a'di ki thok uni gwo mo ki: Um mini ci uni tonte/ mmoshwa mo. Dhali uni o a'di gwo mo ki: Mina aman ii mo 'te/be dhali yol maanjuthu'd ka riyaal* iss 'kwanimpa ipe'de/ mo dhali ci uni mmoshwa mo 'taa?

38 Dhali a'di ki o uni gwo mo ki: Um 'kon ma guraasa ekata mo? Iiku/ mo dhali par e mo ma. Dhali ki uni gamki a'di mo tani uni ki o a'di gwo mo ki: Imudhe'd mo dhali to yi'de/ 'koni su/ mo be.

39 Dhali yan'ko'd a'di ki kan uni gwo 'baar mo mmo'ko 'pena 'cesh ka pwa'k she/ mo apowa shon dhii/i'd mo.

40 Wakan uni 'kokina 'cesh ka nul 'kup mo ki iss 'kwanimpa ka mumudhe'd mo dhali ki iss su/ i'ce'dka 'kume'd mo be.

41 Dhali a'di ki bu'th maanjuthu'di mudhe'd mo dhali to yi'de/ isu/ mo tani dhali a'di ki hil 'kup ki momis mo dhali a'di ki 'bora 'bor bwa i is mo dhali 'ce'd maanjuthu'd bwa mo dhali a'di ki ci uni ki imancik a'di gwo mo mmodhu ibwambori 'kwani mo. Dhali a'di ki pwa'k to yi'de/ isu/ bwa mo mbwaman uni 'baar mo.

42 Dhali uni 'baar mo shwakin mo dhali kapkunu mo be.

43 Dhali uni 'tu'dkina nura/ ka 'kume'd i'ce'dka su/ mo ki 'pisira/ maa mo dhali to yi'de/ mo be.

44 Dhali uni gwansan kun shwaki maanjuthu'd mo tani ta 'kwanij gwasi alaapi mudhe'd mo be.

Yesus Ya ki Sho'k e 'Kupa Al Yi'de/ mo

45 Ki jahanne/ a'di ki tor imancik a'di gwo gwo mo mmose bwam ma kur mo mmo/ii itwa/a/ ki a'di mo e 'bana gapa kamu/ mo e Pam Beetsayda mo ki a'di midii 'cukka waambuhany 'kwani montul is mo be.

46 Dhali nj'ko'd ki a'di dhalki uni 'pen mo tani a'di seki mo'kuwosh mo dhali 'tho mo be.

47 Dhali ki mom'pimpili/ pu'dki'd mo tani akur a'di diki'd isi bwaman ma al mo dhali a'di di'd a'di 'de/eya 'cesh mo be.

48 Dhali a'di di'd mmopar uni e ki uni 'kokin ka cis mo e mo'kosh yi'de/ is ki cwa mo haala punthar 'tham poshki'da po/ uni mo be. Dhali ki mo ta mon'twash/e mo tani a'di pu'dki'di uni mo mmoya ki sho'k e 'kupa al yi'de/ mo. A'di ya'd 'taki ya pe uni mo be.

49 Hili ki uni parki a'di e mo mmoya ki sho'k apo/ 'kupa al yi'de/ mo tani uni toshkin ki a'di ta'da rum mo dhali uni kumki cuuwa/ mo be

50 haali/ uni 'baar mo parki a'di e mo dhali uni 'kokina isi modee mo. Hili ki jahanne/ a'di tor ki uni gwo mo dhali o gwo mo ki: Budhi adu mo ma. Aha/ a'dan be. Dhalku/ is ki ko/ mo ma.

51 Dhali a'di seki'd e bwam ma kur mo nyakki uni mo dhali 'tham doshki'd mo be. Dhali uni 'kokini momer kagahara mo be.

52 Haali/ uni 'koki mish gwo 'ban mo gom maanjuthu'd mo haali/ adum buni 'bitha'bi'th mo be.

Yesus Wa'ki 'Kwani kun 'Bathan e Pa Jannisaarat mo

* 6:37 miyya wa ishriin

⁵³ Dhali ki uni 'cithkina gap mo tani uni pu'dkin mo e bampa/ gi Pa Jannisaarat mo dhali uni shi'dkina kur iyana gap mo be.

⁵⁴ Dhali ki uni pikin ka pije/ mo 'peni bwam ma kur mo tani ki jahanne/ 'kwani nyithki a'di mo be

⁵⁵ dhali uni sokin mo 'peni aris bampa/ 'baar mo mmokukul mo caan is mo dhali tel mii 'pen mo mmokal 'kwani kun 'bathan mo eya cim buni mo e mo 'baar mo jin ciika uni gwo ki a'di di'di cine/ mo be.

⁵⁶ Dhali e mo yin jin pu'da a'di mo eya ris bampa/ mo dhali e 'penkuman bampa/ mo walla e bampa/ mo tani uni ki 'thi uni gun 'bathan e mo ma suug mo dhali o bwa ki a'di mo, ki uni mini 'taki ta a'di isi 'twaman burrinyem piti is ki me'd mo. Dhali ka ris uni ka ris kun taki a'di is ki me'd mo tani uni 'kokunu mo mmowaç mo be.

7

Mii gi 'Kwanin Gwanyjaka/

¹ Dhali ki 'Kwani Parisiyiin tulki is imontal 'de/ mo e a'di mo nyakki iman'kwar to mo uni gun pu'dkin mo 'peni Pa Urushaliim mo tani

² uni parki imancik a'di gwon tiya e mo mmoshwa to ki me'da nyo/ga/ mo mmo'koki 'thur uni ki yi'de/ mo be.

³ (Haali/ 'Kwani Parisiyiin dhali aris 'Kwani Yahuuda/ mo tani uni 'koki shwa to wakan mo, hili isi ciki/ uni mini 'thur me'd buni mo mmobotki mii gi 'kwani gwanyjaka^m buni kadhamo/ mo be.

⁴ Dhali ki uni pu'dkin 'peni mo ma suug mo tani uni si'da/ 'koki shwa to mo hili isi ciki/ uni mini mii nyon is buni mo dhali miin tiya ka ris si'da/ miikina uni mo gom miin dhamo/ kun torokunu uni mo mmomii mii mo mmolama kubbaaya mo dhala nos mo dhali ton'kul bwa kun ta gurany kush mo.)

⁵ Dhali 'Kwani Parisiyiin dhali iman'kwar to mo dotki a'di gwo mo ki: Katintaye i'kona imancik/e gwo ki bath mii gi gwon gwanyjakaⁿ dhamo/ mo, hili uni shwa to ki me'd kun nyo/anyo/ kan mo.

⁶ Dhali a'di ki o uni gwo mo ki: Nye, din ma Ishaya ki o um gwo is ki um tana he'k e ka he'k e mo me'd gwo jin 'kwarkunu mo ki:

'Kwani gwansan uni tak aha/ ki 'twam buni mo tani hili adum buni si'dasi'd 'peni aha/ mo be.

⁷ Uni ki lunj aha/ ki pe'th mo

gwonkan 'peni 'kwani mo tani tora uni me'd gwon gana/ mo be.

⁸ Um dhalki gwonkan ma Arumgimis mo dhali bu'th gwon 'kwanin dhamo/ ki nyen ka bor mo.

⁹ Dhali a'di ki o uni gwo mo ki: Um 'dapa'dap kagahara mmo/ush gwonkan ma Arumgimis mo jin mina um dhu gwon 'kwanin dhamom bum mo.

¹⁰ Haala Musa o gwo mo ki: Taki icim dhali ikwan mo, dhali, A'di jin midi o gwon thus apo/ com mo walla kum mo tani dhalki a'di ka jin gana/ iwu'd mo.

¹¹ Hili um o gwo mo ki: Wakki/ wathi/ midi tor com gwo mo walla kum ki a'di jin mina /e 'taki gam 'peni aha/ mo tani midi ta Kurbaan mo (a'di jin ta 'pemen jin onu ki: A'di jin cikunu Arumgimis mo be) -

¹² dhali yan'ko'd um 'koki dhal a'di bway mo mmomii ari ton kamu/ tal 'de/ gom com mo walla kum mo be.

¹³ Wakan um ki puu gwo ma Arumgimis mo gom gwo gi gwon 'kwanin dhamom bum mo a'di jin luka um mo. Dhali um ki miiya ris ton tiya gi wakan mo be.

To gi Shi/i Wathi/ Is mo

14 Dhali a'di ki yuk 'kwani i a'di mo dok/e dhali o uni gwo mo ki: Ciki gwo 'peni aha/ mo ma, aris umi 'baar mo dhali mishi gwo 'ban mo ma.

15 Toŋ kamu/ yisa di'da jin di'd 'pena pije/ jin midi ya bwa wathi/ mo dhali shi/ a'di is mo, hili a'di jin piyi'd ka pije/ 'peni bwa wathi/ mo tani a'di shi/ki a'di is mo be.

16 Waŋki/ wathin kamu/ ta gi gu'ban'ce mo mmocik gwo mo tani dhalki a'di cik gwo mo ma.

17 Dhali ki a'di ciki gu'b mo tani dhali dhal 'kwani mo tani imancik a'di gwo dotki a'di gwo mo gom gwom 'bi'th/e yan mo be.

18 Dhali a'di ki o uni gwo mo ki: A/ki um si'da/ 'kokin kan mo mmo'koki mish gwo 'ban mowa? 'Kona um ki mish 'taa ki ma to yin jin yaki'd e bwa wathi/ 'pena pije/ mo tani midi mol shi/ a'di is mo be

19 haali/ a'di diki seya dum piti mo hili e bwam piti mo dhali wakan a'di ki ya ka pije/ mo. (Wakan a'di torki gwo eya tente/ ka ris tonte/ 'baar mo ta kun dhelelkin mo be.)

20 Dhali a'di ki o gwo mo ki: To jin piyi'd ka pije/ 'peni 'twa/ wathi/ mo tani a'di ishi/ki a'di is mo be.

21 Haali/ 'peni bwaman mo, 'peni bwaman ma du wathi/ mo tani a'di pu'dkina gwon thus kun kulumu ibwa kun shi/ashi/ mo, kun ta mii gun miinu miinyal mo, dhali mmota 'di/ mo dhali mmo'kosha mee mo dhali mmota cal mo

22 dhali mmo'thoth bwa mo dhali mmomii mii kun 'coka'cok mo dhali mmota he'k e mo dhali mii kun 'kanuwa kanthi/ mo dhali miin dhapan mo dhali mmota imanthurta thu'th 'pen mo, mmodhu 'ba/ki ca mo dhali mii jin miinu miim pus mo.

23 Aris tonthus gwansani 'baar mo kun pikin ka pije/ 'peni bwa wathi/ mo tani uni a'di ishi/ki wathi/ is mo be.

Moŋgam Gwo Is ma 'Bom gi Pam Pinikiyya ma Suriyya mo

24 Dhali a'di cuki mis mo 'peni mun mo dhali ya mo e bampa/ gi Pan Sur mo dhali Pan Saydaa/ mo. Dhali a'di ciki gu'b mo dhali a'di diki dhal jan 'den kamu/ bway mo mmomish a'di mo. Hili a'di molu bag mo be.

25 Hili ki jahanne/ a'boma kamu/ a'di jin bu'thkin ma rum thus jin nyo/o'd 'bwa/ mo ciki gwo mo gom a'di mo, dhali a'di pu'dki'd mo dhali ca'bki jin 'kupa'dupuni shoki a'di mo be.

26 A'bom yansan ta'da 'bom gi Pan Griki mo be, a'di jin dho'thkunu mo e Pam Pinikiyya ma Suriyya mo. Dhala yim dotki a'di gwo mo mmo/ura ruma 'cesh ka pije/ 'peni 'bwa/ mo be.

27 Dhali a'di ki owa yim gwo mo ki: Dhalki uci cinu tonte/ mmoshwa ntwa/ a/ mo, haali/ a'di diki 'bor mo mmokal tonte/ 'peni uci mo dhali ta'k a'di ka 'ka mo.

28 Hila yim thoŋki a'di gwo mo ki: Nye, Tapa, hili a'ka si'da/ uni mini shwa kuluny maa uci kun raskin 'pena tharabeesa mo be.

29 Dhali a'di ki owa yim gwo mo ki: Gom gwo jin ona /e wakansan mo tani yaku/ /e mo. Aruma 'cesh dhalki 'bwa/um pini 'pen mo be.

30 Dhali ayim yaki pa mo dhali gama 'ci mmo/ish eya ci mo dhali aruma 'cesh dhalki a'di 'pen mo be.

Yesus Waŋki Wathi/ jin Ta'da 'Diye/ mo dhali jin Moli 'Twa/ Wal mo

31 Dhali yan'ko'd a'di dokki'd ka nyan'ko'd mo e Pan Sur mo dhali yaki tur mo e Pan Saydaa/ mo eya Al ma Jaliil mo dhali ki tur mo e bampa/ gi Pan Dekapolis mo be.

³² Dhali uni kalki a'di wathi/ jin ta'da 'diye/ mo dhali 'twam piti jin cumpulkina a'di wal mo. Dhali uni n̄apki a'di mo mmokar me'd piti apo/ a'di mo be.

³³ Dhali uni ki kal a'di 'pen ka pije/ mo 'pena waambuhany 'kwani mo, a'di 'de/ mo. A'di ki kar me'd piti e bwany' cem piti mo, dhala Yesus ki 'tak̄ manya/ mo dhali ta a'di ale'd piti is ki me'd mo be.

³⁴ Dhali a'di ki hil mo 'kup ki momis mo dhali wuwa shure/ mo dhali o a'di gwo mo ki: Ippatha, jin ta 'pemen jin onu gwo mo ki: Dhalki a'di ka'du mo ma.

³⁵ Dhali 'cem piti ka'dkunu mo dhala le'd piti 'cuk̄kunu mo dhali a'di ki o 'twa/ eya tente/ mo be.

³⁶ Dhali a'di ki kan uni gwo mo mmo'koki tor jan tal 'den̄ kamu/ gwo mo gom gwo yan mo. Dhali hili mmokankina a'di uni gwo ki 'bi'th ki nyanye/ mo tani wakan uni torki gwo ki bwa gom a'di ki nyanye/ eya tente/ mo be.

³⁷ Dhali uni 'kokin mo mmomer ki mer jin shiyi'd mo mmo/o gwo mo ki: A'di miiki'da ris to gwansan ki 'bore/ mo. A'di ka'dki wathi/ jin ta'da nape/ 'ce mo mmocik̄ gwo mo dhali uni gun mol 'twa/ wal mishki 'twa/ wal mo be.

8

'Kwani Alaapi Dojon kun Cikunu Tonte/ mo

¹ Dhali ka tee gwansan ka dhana waambuhany 'kwani tulki is dok/ e mo dhali uni dar gi tonte/ mo mmoshwa mo tani a'di ki yuk̄ imancik̄ a'di gwo mo e a'di mo dhali o uni gwo mo ki:

² Aha/ ko'ckina adhana waambuhany 'kwanimpa e i is mo haali/ uni 'koni aha/ shwane/ ka cimi kwara mo dhali dar gi tonte/ mmoshwa mo be.

³ Dhali wakki/ aha/ mina hash uni bway pa ki te/ mo e bampam buni mo tani uni mina buye/ i'thi mo i bway mo. Haali/ kun tiya iyin 'peni pa kun si'dasi'd mo be.

⁴ Dhali imancik̄ a'di gwo thok̄ki a'di gwo mo ki: Adhana waambuhany 'kwani minu ci tonte/ mmoshwa e bwam ma si'b imahan 'peni mana mo?

⁵ Dhali a'di ki dot uni gwo mo ki: Um 'kona maan̄kuthu'd ekata mo? Uni ki thok̄ a'di gwo mo ki: Ipesu/ mo be.

⁶ Dhali a'di ki kana dhana waambuhany 'kwani gwo mo mmo'ko 'pena 'cesh mo. Dhali a'di ki bu'th maan̄kuthu'd ipesu/ mo dhali ki a'di ciki mo jin 'boruwa 'bor bwa i is mo tani a'di ki 'ce'd uni mo dhali ci uni ki imancik̄ a'di gwo mo mmodhu abori 'kwani mo. Dhali uni dhuki uni ibwambor ma waambuhany 'kwani mo be.

⁷ Dhali uni tan gi ushi to yi'de/ idaka/ mo. Dhali ki a'di 'borki'da 'bor bwa i is mo tani a'di kanki uni gwo mo ki uni gwansan si'da/ minu 'taki dhu ibwambori uni mo be.

⁸ Dhali uni shwaki uni mo dhali uni 'kokunu mo mmokap mo. Dhali uni tulki kuluny maa is kun urki 'kup mo mmo'tu'da nura/ ipesu/ mo be.

⁹ Dhali uni gwansan kun 'kokin mo mmoshwa a'di mo tani wakina e gi 'kwani alaapi dojon mo be.

¹⁰ Dhali a'di ki hash uni mo dhali ki jahanne/ a'di seki bwam ma kur mo nyak̄ki imancik̄ a'di gwo mo dhali uni iikin mo e bampa/ gi Pan Dalmanutha mo be.

Mmo/o Bwa ki Par Jamas Mii E mo

¹¹ Dhali 'Kwani Parisiyin pu'dkini a'di mo dhali telki mii 'pen mo mmogar a'di gwo 'kusi 'twa/ mo mmo'n̄ap jamas mii 'peni a'di 'peni momis mo mmopal a'di mo be.

12 Dhali a'di wuki'da shure/ kagahara mo e shi/in piti mo dhali o gwo mo ki: Atinta n̄ap ma nyakum yil 'kwani gwansan jamas mii mo? Ka jin gana/ aha/ tora um gwo mo ki: Jamas miiŋ kamu/ yisa minu ci um 'kwani ma nyakum yil gwansan mo.

13 Dhali a'di ki dhal uni 'pen mo dhali se i bwam ma kur dok/e mo. A'di ki 'ciḥa gap gi 'bana kamu/ mo be.

Acumat gi 'Kwani Parisiyiin mo

14 Dhali uni n̄aki maan̄kuthu'd mo mmo'koki guyu/ mo. Dhali uni tan gi jasi jin tal 'deŋ gana/ jin takina uni mo e bwam ma kur mo.

15 Dhali a'di ki rum uni ki gwo mo mmo/o gwo mo ki: 'Cunycuri miim bum ki 'bore/ mo dhali jiŋi acumat gi 'Kwani Parisiyiin ki e ki 'bore/ mo dhali acumat gi 'Kwani Hirodusiŋi mo.

16 Dhali uni su'kkin ki gwo ka rem 'kup mo mmo/o gwo mo ki: Ana dara gi maan̄kuthu'd mo be.

17 Dhala Yesu nyithki gwom buni mo dhali o uni gwo mo ki: Atinta su'kkina um ki gwo mo gom maan̄kuthu'd jin piŋi'di um kan mo? 'Kona um ki nyith mo 'taa? Walla 'kona um ki mish gwo 'ban mo? Adum bum 'bitha'bi'th mo kana?

18 Um tan gi e mo dhali 'kona um ki mish mo mo? Dhali um tan gi 'ce mo dhali 'kona um ki ciḡ gwo mowa? Dhali 'kona um ki ka gwo e mowa?

19 Ki aha/ 'ce'dkina maan̄kuthu'di mudhe'd mo gom 'kwani alaapi mudhe'd mo dhala nura/ ekata i'tu'dkina um ki kuluny maa kun uri 'kup mo? Uni ki thoḡ a'di gwo mo ki: I'kume'd i'ce'dka su/ mo be.

20 Dhali maan̄kuthu'di pesu/ gom 'kwani alaapi doŋon mo tani anura/ 'tu'dkina um ekata ki kuluny maa kun tulkina um is mo? Dhali uni ki thoḡ a'di gwo mo ki: Ipesu/ mo be.

21 Dhali a'di ki o uni gwo mo ki: Dhali 'kona um ki mish gwo 'ban naskina/ mowa?

Wathiny Ja'da/ jin Waḡkunu mo e Pam Beetsayda mo

22 Dhali uni pu'dkini Pam Beetsayda mo. Dhali 'kwani tiya suski wathi/ i a'di mo, a'di jin ta'da ja'da/ mo dhali n̄ap a'di mo mmota a'di is ki me'd mo be.

23 Dhali a'di ki sus wathi/ jin ta'da ja'da/ ki me'd mo, dhali a'di ki sus a'di ka piŋe/ 'peni pa mo. Dhali ki a'di 'takki manya/ i em piti mo dhali sus a'di ki me'd piti mo tani a'di ki doḡ a'di gwo mo ki: /E mishi toŋ kamu/ par e mo 'taa?

24 Dhali a'di ki hil 'kup ki mis mo dhali o a'di gwo mo ki: Aha/ mishkina 'kwani mo. Hili uni wakina e gi cwa kun iikin mo 'te/.

25 Dhali yan'ko'd dok/e a'di ki sus a'di ki me'd piti mo dhali kar me'd piti apo/ em piti mo. Dhali a'di hilki'da hil ki dha'k mo dhali waḡ mo dhali a'di mishki'da ris to 'baar mo eya tente/ mo be.

26 Dhala Yesu ki hash a'di bway gu'b piti mo mmo/o gwo mo ki: Dhalku/ ki ciḡ bampa/ mo.

Buterus A'di Torki Mii eya Tente/ goma Yesu mo

27 Dhala Yesu nyak ya ki imanciḡ a'di gwo mo e bampa/ gi Paŋ Kaysariyya mo e Pam Pilibbi mo. Dhali e bway tur jin iina uni mo tani a'di ki doḡ imanciḡ a'di gwo mo ki: Ki 'kwani on ki aha/ tana aja mo sa/?

28 Dhali kun tiya ki tor a'di gwo mo ki: Ka Yohaŋ jin ta'da manmiiya mii ki yi'de/ mo ti. Dhali kun tiya o ki: Iliyya mo, dhali kun tiya o ki: Jan tal 'de/ 'peni imanciḡ gwo ma Arungimis kadhama/ mo be.

29 Dhali a'di ki thoḡ uni gwo mo ki: Hili idhali um onki aha/ tana aja mo sa/? Buterus ki thoḡ a'di gwo mo ki: /E tana Kristhos mo be.

³⁰ Dhali a'di ki kan uni gwo mo mmodiki tor jan tal 'denj kamu/ gwo gom a'di mo be.

Yesus Torke Wum Piti Itwa/a/ mo

³¹ Dhali a'di telki mii 'pen mo dhali tor uni gwo mo ki Ya/ gi 'Kwani mina isi 'kosh ka nyor mo gom to ka ris mo dhali mina 'kwaniḡ gwanyjaka/ iwaḡ mo dhali igasiis kun can mo dhali iman'kwar to mo, dhali a'di minu 'kosh jwa mo, dhali 'ko'da cim kwara mo tani a'di mididi cuyi mis dok/e mo be.

³² Dhali a'di o gwo yansan eya thithin thith gana/ mo. Dhala Buṭerus ki bu'th a'di mo dhali tel mii 'pen mo mmoḡkucur a'di ki gwo mo be.

³³ Hili a'di tu'kki'da bor mo dhali hil imanciḡ a'di gwo mo tani a'di ki ḡcucura Buṭerus ki gwo mo dhali o gwo mo ki: Seṭaan, yaku/ i'ko'di aha/ mmun mo ma. Haali/ /e diki di ki 'ban ma Arungimis mo hili /e din ka 'ban gi 'kwani mo be.

³⁴ Dhali a'di ki yuḡ uni i a'di mo awaambuhany 'kwani nyaḡki imanciḡ a'di gwo mo dhali o uni gwo mo ki: Waḡki/ wathin kamu/ mididi yayu/ ibath aha/ nsho'k mo tani dhalki a'di non is pitiḡ gana/ mo dhali 'de'k cwany'ciḡhan dhul piti mo dhali bath aha/ nsho'k mo.

³⁵ Haali/ gom a'diyin jin mididi 'taki woḡh mondiki/em piti mo tani mididi this a'di e mo. Dhali a'diyin jin mididi this mondiki/em piti e mo gom gway pem mo tani dhali gom gway gi gwom 'borga/ mo tani mididi woḡh a'di mo be.

³⁶ Haali/ gwo gi wakataye jin nyo/a wathi/ mo wakki/ a'di mididi gam to 'baar mo e mony'cesh mo dhali lo'b mondiki/em piti mii nycine/ mo?

³⁷ Haali/ wathi/ mididi mish wan mondiki/em piti 'ba/ kata mo?

³⁸ Haali/ a'diyin jin mina isi 'theya'the mo gom aha/ mo dhali gom gwom pem mo e bwaman uni gwansan kun tana nyaḡum yil kun ta imanmii miinycaḡ mo dhali imanmii miinthus mo tani Ya/ gi 'Kwani si'da/ a'di mina isi 'theya'the mo gom a'diyin mo ki a'di mididi pu'du/ mo e monyca gi com mo dhali nyaḡki iman'doyu gwom piti kun ḡogu ilu/ mo be.

9

¹ Dhali a'di ki o uni gwo mo ki: Ka jin gana/ aha/ tora um gwo mo ki: Kun tiya 'kokin mo mmodoshi mahan mo kun mini 'koki nyok wu mo ntwa/a/ ki uni 'koki par Bampa/ ma Arungimis e mo mmoḡpu'du/ ki mom'bi'th mo be.

Mmwarkin ma Yesus Jamas Piti mo

² Dhali 'ko'da cim pe'de/ mo tani Yesus ki susa Buṭerus nyaḡki a'di mo dhala Yakuub mo dhala Yohaana mo, dhali sus uni bway 'kuwosh jin turatur uni 'cena mo. Dhali a'di ki war is piti ibwambori uni mo be.

³ Dhali burryem piti ca'bki 'be'd 'be'd mo dhali ki bany bany kagahara mo. Toḡ kamu/ yisa di'da e mony'cesh yan jin mididi mish dhagam uni ki kush kush kan mo.

⁴ Dhali e mun mo tani Iliyya piki uni i is mo uni ka Musa mo, dhali uni torkina tor ka Yesus mo be.

⁵ Dhala Buṭerus ki owa Yesus gwo mo ki: Tapa, a'di 'boro'd gom am ki aman 'kona imahan mo. Dhalki aman nyaḡa ciḡḡa/ ikwara mo, jan tal 'de/ gom /e mo dhali jan tal 'de/ goma Musa mo dhali jan tal 'denj kamu/ gom Iliyya mo be.

⁶ Haali/ a'di diki mish gwo jin ona a'di mo haali/ uni ḡo/kina ḡo/ is kagahara mo be.

⁷ Dhali araḡ 'kamki uni is mo dhali 'twa/ pu'dki'd 'peni bwam ma rak yansan mo mmo/o gwo mo ki: Yansan ta Ya/m pem jin enka/ mo. Ciḡi a'di gwo mo ma.

⁸ Dhali ki jahanne/ ki uni hilki mo mo mmo'kar mo ki e mo tani uni yisa mishki wathin kamu/ mo jin nyaḡ di ki uni mo, hili jasa Yesus a'di 'de/ mo be.

⁹ Dhali ki uni 'kokin mo mmothul ka 'cesh mo 'peni 'kuwosh mo tani a'di ki kan uni gwo ki 'bi'th mo mmo'koki tor wathin kamu/ tal 'de/ gwo gom to jin parkina uni e mo ntagi Ya/ gi 'Kwani minu 'de'k mo 'peni mowu mo be.

¹⁰ Wakan uni dhuki gwo mo mmokulum gwo ibwa mo uni 'cena mo mmodot eya dum buni gom 'pemen gwo jin okina a'di ki a'di midi cuyu mis mo 'peni mowu mo.

¹¹ Dhali uni ki dot a'di gwo mo ki: Katinta sa/ i/ona iman'kwar to gwo mo ki Iliyya midi mii pu'du/ itwa/a/ mo?

¹² Dhali a'di ki thok uni gwo mo ki: Iliyya pu'dki'di twa/a/a mo dhali tela ris to 'baar mo sho'k ka nyan'ko'd mo. Dhali ba ki gwo 'kwaru kataye ki Ya/ gi 'Kwani mina isi 'taki 'kosh ka nyor ki nyanye/ mo gom miin tiya ka ris mo dhali minu mii ka jin thus mo dhali minu wak mo be.

¹³ Hili aha/ tora um gwo mo ki Iliyya pu'dki'd mo dhali uni miiki a'diyin jin 'bori uni bwa mo me'd gwo jin 'kwarkunu mo gom a'di mo be.

Yesus Waçki'da 'Ci jin Bu'thkin ma Rum Thus jin Nyo/o'd mo

¹⁴ Dhali ki uni pu'dkin mo e imancik a'di gwo mo tani uni parkina dhana buhany wathimpa e mo kun 'kamki a'di mo dhali iman'kwar to garki uni gwo 'kusi 'twa/ mo.

¹⁵ Dhali ki jahanne/ adhana buhany wathimpa ki uni parki a'di e mo tani uni 'kokini momer kagahara mo dhali uni sokin 'kup ki a'di mo dhali the a'di me'd mo be.

¹⁶ Dhali a'di ki dot uni gwo mo ki: Gwonta su'kkina um nyakki uni mo?

¹⁷ Dhali jan tal 'de/ 'pena buhany wathimpa thokki a'di gwo mo ki: Man'or Gwo, aha/ suskina ya/m pem i/ e mo haali/ a'di bu'thkin ma rum thus jin nyo/ o'd jin mol a'di 'twa/ wal mo.

¹⁸ Dhali ki a'di bu'thki a'di mo tani a'di torki a'di 'ko'da 'cesh mo, dhali a'di shwaki'da gabusha/ mo dhali rem shem piti 'kup mo dhali a'di peshki'd mo. Dhali aha/ dotkina imancik/ e gwo gwo mo mmo/ur a'di ka pije/ mo tani dhali uni molki a'di mii mo be.

¹⁹ Dhali a'di ki thok uni gwo mo ki: Ayy, um 'kwani kun tana nyakum yil kun a'ha mongam gwo is ki a'ah mo. Ki aha/ mina di i um ki mo gi wakata mo? Dhali ki mo gi wakata imiga/ i' dim 'kup e um mo sa/? Susi a'di i aha/ mo ma.

²⁰ Dhali uni ki susa 'ci i a'di mo. Dhali ka rum thus jin nyo/o'd parki a'di e mo tani dhali ki jahanne/ a'di ki tora 'ci 'ko'da 'cesh mo dhali a'di ki bita' cesh mo dhali 'dar'kal ka gabusha/ i'twa/ mo be.

²¹ Dhala Yesus ki dot com gwo mo ki: Kakasja sa/ imiikina a'di mii gi wakan mo? Dhali a'di ki thok a'di gwo mo ki: 'Pena cim jin tana a'di a'ci mo be.

²² Dhali me'd ka ris a'di ki bit a'di e bwam o'd mo dhali e bwam yi'de/ mo mmo'ce'd a'di sho'k mo tani hili wakki/ /e mini mish tor kamu/ mii mo mmomina /e hila ha'th'ko'd bam mo dhali woth am mo.

²³ Dhala Yesus ki o a'di gwo mo ki: Wakki/ /e ona bwa mo tani aris to mishu mii mo gom a'di jin gamki gwo is mo be.

²⁴ Dhali ki jahanne/ com ma 'ci gwoki'd ki jabu'th mo dhali o gwo mo ki: Aha/ gamkina gwo is mo. Woth/ i/ aha/ mo mmodika/ ki dar gi gwo jin gamu is mo.

²⁵ Dhali ka Yesus mishki'da dhana buhany wathimpa pu'dkin mo mmosoyu/ mo mmon'tal 'de/ mo tani a'di kucurki'da rum thus jin nyo/o'd ki gwo mo mmo/o a'di gwo mo ki: /E jin noni wathi/ 'twa/ wal mo dhali /e jin ta wathi/ 'ceya 'diye/ mo, dhali /e jin tana arum jin nyo/o'd mo tani aha/ kankina /e gwo mo ki: Piyi ka pije/ 'peni a'di mo dhali dhalku/ ki se i a'di ki sule/ sule/ mo dok/e.

²⁶ Dhali 'ko'di cuuwam piti jin cuukina a'di mo tani a'di ki tor a'di 'ko'da 'cesh ki tor jin shiyi'd mo dhali a'di ki pi ka piye/ mo. Dhala 'ci a'di wakina e gi wathi/ jin wuki'd mo. Wakan aris uni 'baar mo oki gwo mo ki: A'di wuki'd mo be.

²⁷ Hila Yesus bu'th a'di ki me'd mo dhali 'de'k a'di ki mis mo. Dhali a'di cuki mis mo be.

²⁸ Dhali ki a'di ciċki bwanj gu'b mo tani imancik a'di gwo dotki a'di gwo mo ka kwal is mo mmo/o gwo mo ki: Atinta gara/ i'kona aman ki mish a'di ur ka piye/ mo?

²⁹ Dhali a'di ki thok uni gwo mo ki: Ji gi wakansan minu 'koki mish ur ka piye/ ki miinj kamu/ mo ba/, hili ki mon'tho mo be.

Dok/e aYesus Torki Mowum Piti Itwa/a/ mo

³⁰ Dhali uni iikin 'peni mun mo dhali ii ki tur mo e Pany Jaliil mo. Dhali a'di diki dhal wathin tal 'dej kamu/ bway mo mmomish a'di mo be.

³¹ Haali/ a'di torki imancik a'di gwo gwo mo mmo/o uni gwo mo ki: Ya/ gi 'Kwani minu ci e me'd gi 'kwani thus mo, dhali uni mini 'kosh a'di jwa mo. Dhali ki a'di minu 'kosh jwa mo tani 'ko'da cim kwara mo tani a'di midi cuyi mis mo be.

³² Hili uni 'koki mish gwo 'ban jin ona a'di mo dhali uni ko/ki is mo mmodot a'di mo be.

Kaja A'di Icade?

³³ Dhali uni pu'dkin mo e Pañ Kapranahuu mo. Dhali ki a'di diki'd e bwanj gu'b mo tani a'di ki dot uni gwo mo ki: Gwonta sa/ isu'kkina um mmo/ iiyina um ibway mo?

³⁴ Hili uni 'kokin ki shwam mo haali/ e bway jin iiyina uni mo tani uni su'kkin ki gwo ka rem 'kup mo gom gwo gi a'di jin cak'i'd mo be.

³⁵ Dhali a'di ca'bki'da 'cesh mo dhali yuk uninj 'kume'd i'ce'dka su/ mo, dhali a'di ki o uni gwo mo ki: Wakki/ wathin tal 'de/ jin ona bwa ki ta jin twa/ a/ mo tani a'di midi mii ta jinj 'ko'd mo dhali ta amanmii to gom tiya 'baar mo be.

³⁶ Dhali a'di ki budha 'ci mo dhali kar a'di ibwaman uni mo. Dhali mmokara a'di a'di 'ko'da bim piti mo tani a'di ki o uni gwo mo ki:

³⁷ A'diyin jin midi budha 'ci gi wakansan ki gway pem mo tani a'di bu'thki aha/ mo, dhali a'diyin jin midi bu'th aha/ mo tani a'di diki bu'th aha/ jasi 'te/ mo, hili a'di bu'thki a'di jin tu'cki aha/ ki yayu/ mo be.

A'di Caan jin Diki Di apo/ Ana mo tani A'di Ta A'di gom Ana mo

³⁸ Yohaana ki o a'di gwo mo ki: Amantor Gwo, aman mishkina wathinj kamu/ jin urki'da rum thus ka piye/ ki gway pini mo dhali a'di diki bath ana nsho'k mo, dhali aman nonkina a'di mo haali/ a'di diki ta amanbath ana nsho'k mo be.

³⁹ Hila Yesus ki o gwo mo ki: Dhalki a'di ki non mo ma haali/ a'di jin midi miya tu'c jin eka/ ek ki gway pem mo tani a'di midi diki mish mmo/o gwon thus apo/ aha/ mo ki jahanne/ n'ko'd mo.

⁴⁰ Haali/ a'di jin diki se ana shoka po/ mo tani a'di ta a'di gom ana mo be.

⁴¹ Haali/ ka jin gana/ aha/ tora um gwo mo ki: A'diyin jin midi ci um yi'de/ ki 'kwa mmopi mo haali/ um yuku ki gway ma Kristhos mo tani a'di yisa midi this tom piti jin ish kumma/ e mo.

Mompal gom Miinthus mo

⁴² A'diyin jin midi rak jan tal 'de/ 'peni uni gwansan kun gwa'dan kun gam gwo is e aha/ mo mmomii miinthus mo tani a'di midi 'taki 'bor ki 'bor gana/

mo wakka dhana yo minu dek a'di i'bam piti mo dhali a'di minu bit mo e kumma/ yi'de/ mo.

⁴³ Dhali wakki/ me'd pini rak/e mo mmomii miinthus mo mmokol mo tani 'cithi/ a'di mo ma. A'di 'boro'd ki 'bor gana/ mo gom /e mo mmociɕ mondiki/ e ki ŋwol mo ki /e mini 'taki diki ya e mo ma al o'd ki me'd su/ mo be, e mo jin mola o'd us mo.

⁴⁴ E mun mo tani ayish buni 'koki wu mo dhali o'd si'da/ diki us mo be.

⁴⁵ Dhali wakki/ sho'k pini rak/e mo mmomii miinthus mo mmokol mo tani 'cithi/ a'di mo ma. A'di 'boro'd ki 'bor gana/ mo gom /e mo mmociɕ mondiki/ e ki ŋwol mo ki /e minu i'taki 'koki bit ki sho'k su/ e mo ma al o'd mo be.

⁴⁶ E mun mo tani ayish buni 'koki wu mo dhali o'd si'da/ diki us mo be.

⁴⁷ Dhali wakki/ em pini rak/e mo mmomii miinthus mo mmokol mo tani buki a'di ka pije/ mo. A'di 'boro'd ki 'bor gana/ mo gom /e mo mmociɕ Bampa/ ma Arungimis ki en tal 'de/ mo ki /e minu i'taki 'koki bit ki e su/ mo e mo ma al o'd mo.

⁴⁸ E mun mo tani ayish buni 'koki wu mo dhali o'd si'da/ diki us mo be.

⁴⁹ Haali/ aris 'kwani 'baar mo ka 'dete/ 'dete/ mo tani uni minu imii ka 'donkoro/ ki mo/o'd mo be.

⁵⁰ A'donkoro/ a'di 'bora'bor mo. Hili wakka 'donkoro/ a'di ki this mom'bala'th piti e mo tani um mini gam mon'dan'kari'th gom a'di mmana? Tayi ka 'donkoro/ e is bum mo ma dhali tayi ki mon'ku'th is ka rem 'kup mo ma.

10

Yesus Torki Gwo gom Mo jin Dhaluwa Dhal 'Pen mo

¹ Dhali a'di dhalki mo yan 'pen mo dhali yaki'd mo e Bampa/ gi Pa Yahuudiyya mo dhali e bwampo/ Yi'deɗ Kumba/ Uurdun mo, dhala dhana buhany wathimpa thulki is i a'di mo dok/e. Dhali dok/e me'd miim piti jin miina a'di isa yempa/ mo tani a'di ki tor uni gwo mo be.

² Dhali 'Kwani Parisiyiin pu'dkin mo mmonap bway mo mmopal a'di ki gwondot mo mmo/o gwo mo ki: A'di ta gwonkan jin dhala'da dhal bway mo 'taa? gom wathi/ mmothoson gwo jin dhaluwa dhal 'pen mo mmodhal ash 'pen mo?

³ A'di ki thok uni gwo mo ki: Gwo gi wakatinta ikankin ma Musa um mo?

⁴ Uni thokki a'di gwo mo ki: AMusa a'di dhalki wathi/ bway mo mmo'kwara warka/ jin dhaluwa dhal 'pen mo dhali kara yim 'pen ka pije/ mo be.

⁵ Hila Yesus ki o uni gwo mo ki: Haali/ goma dum bum kun 'bitha'bi'th kan mo tani a'di 'kwarki um gwonkan gi wakansan mo be.

⁶ Hili 'peni ka muɗ'kup jin uku to mo tani Arungimis ki uk wathin gwath mo dhali wathim 'bomi mo be.

⁷ Gom 'kup gwo gi wakan mo tani a'di imina wathi/ idhal com 'pen mo dhali kum mo dhali gam is ki ashim piti mo be.

⁸ Dhali uni su/ mina bungwar isi tal 'de/ mo be. Wakan uni dok/e yisa i'koni su/ dok/e yisa, hili uni tala bungwar isa 'de/ mo be.

⁹ Gom mii gi wakan mo tani uni gun gam ma Arungimis isi montal 'de/ mo tani dhalku/ ki dhal wathin kamu/ bway mo mmokwa/ uni bwa mo.

¹⁰ Dhali e bwan gu'b mo tani imanciɕ a'di gwo dotki a'di gwo mo gom gwo yansan dok/e mo.

¹¹ Dhali a'di ki o uni gwo mo ki: A'diyin jin midi dhal ashim piti 'pen mo dhali mash jan kamu/ mo tani a'di miiki miinyɕal apowa yim mo be.

12 Dhali waḵka yim si'da/ dhala'da kaḥim piti 'pen mo dhali mashi jan kamu/ mo tani ayim si'da/ miiki miinyal mo be.

Yesus 'Borki Ushi Uciḡ Gwa'dga/ Mii mo

13 Dhali uni 'kokin mo mmosusi uci i a'di mo ki a'di midi 'taki ta uni is ki me'd mo. Dhali imanciḡ a'di gwo kucurki uni ki gwo mo be.

14 Hili ka Yesus mishki mii yan mo tani a'di deḡkin ma nyor mo dhali o uni gwo mo ki: Dhalki uci iiyini aha/ mo ma. Dhalki uni ki non mo. Haali/ ku gi wakansan mo tani uni 'kokin mo e Bampa/ ma Arungimis mo be.

15 Ka jinḡ gana/ aha/ tora um gwo mo ki a'diyin jin midi diki bu'th Bampa/ ma Arungimis mo mmowa e ka 'ci yan mo tani a'di midi diki se a'di mo be.

16 Dhali a'di ki sus uni mo mmodhu 'ko'da bim piti mo dhali a'di ki 'bor uni mii mo mmokarkina a'di me'd piti apo/ uni mo be.

Wathin Dhuru'c jin Ta Pa ki Pa mo

17 Dhali mmomurkina a'di mmoya mo e bway piti mo tani wathin tal 'denḡ kamu/ guski'd mo dhali ca'bki jinḡ 'kupa'dupunḡ bwambori a'di mo dhali o a'di gwo mo ki: Amantor Gwo jin 'boro'd mo, ki aha/ mina mii miyya taye mmogam mal gi mondiki/e ki sule/ ya ye 'ba/ mo?

18 Dhala Yesus ki thoḡ a'di gwo mo ki: Atinta yuka /e aha/ ki jin 'boro'd mo? Jan tal 'denḡ kamu/ yisa di'da jin 'boro'd mo, hili jasa Arungimis a'di 'de/ mo be.

19 /E mishki gwonḡkan kun 'kwarkunu mo 'taa? kun o gwo mo ki: Dhalka 'kosh ki mii 'kosh mo, dhali, Dhalki cal ki mii mii mo, dhali, Dhalku/ to ki mii kwal mo. dhali, Dhalki gwon thus ki mii aḡ wathin kamu/ i is mo, dhali, Dhalki to ki mii dil mo, dhali, Taki cim dhali kwan mo?

20 A'di ki thoḡ a'di gwo mo ki: Amantor Gwowa, aris to gwansani 'baar mo miikika/ mo ki aha/ tana dhuru'c mo be.

21 Dhala Yesus ki hil a'di ki e mo dhali en a'di mo dhali o a'di gwo mo ki: Ton tal 'de/ aḥa /e mo be. Yaku/ mo dhali yol aris tom pini 'baar mo kun tana /e mo dhali ciki uni ki 'kwani kun hatha'ko'd mo, dhali /e mini ta gi to kun mini ish kumma/ mo e momis mo, dhali yayu/ mo ma, mmobathḡ aha/ nsho'k mo.

22 Gom gwo jin onu a'di kan mo tani a'di ki biḡ a'di bwa ka lunḡu'b mo dhali a'di ki ya bway pa mo ki bwa jin diḡadiḡ mo, haali/ a'di ta'd gi dhan to kun eḡa 'pen ki eḡ mo be.

23 Dhala Yesus ki hil mo mo dhali 'kar mo ki e mo dhali o imanciḡ a'di gwo gwo mo ki: Mii wa'di diḡa/ gom uni gwansan kun ta pa ki pa mo mmociḡ Bampa/ ma Arungimis mo be.

24 Dhali imanciḡ a'di gwo merkin gom gwom piti yansan mo be. Hila Yesus ki o uni gwo mo dok/e ki: Uciya, a'di wana mii diḡa/ gom uni gun gamki gwo is gom pam buni kun tana uni mo mmociḡ Bampa/ ma Arungimis mo.

25 A'di 'disha mii ki 'dish gom kalman mo mmoya ki solol e jis ma 'dipira/ mo mmodhal wathimpa e i is mo, a'di jin ta pa ki pa mo mmociḡ Bampa/ ma Arungimis mo be.

26 Dhali uni 'kokin mo mmomer mo ka daran duḡ gana/ mo dhali o gwo ka rem 'kup mo ki: Ba waḡki/ wakan mo tani ija a'di iminu iwothḡ moyi?

27 Yesus ki hil uni mo dhali o uni gwo mo ki: Ki 'kwani mo tani a'di molu mii mo, hili ka Arungimis mo tani aris to 'baar mo mishu mii ka Arungimis mo be.

28 Hila Buterus telki mii 'pen mo mmo/o a'di gwo mo ki: Hili, aman dhalkina aris to 'peni 'baar mo dhali bathḡ /e nsho'k mo be.

²⁹ Yesus ki o uni gwo mo ki: Ka jin gana/ aha/ ona um gwo mo ki: wathin kamu/ yisa di'da jin dhalki gu'b piti 'pen mo walla ikam piti mo walla i'bwah piti mo walla kum mo walla com mo walla uci mo walla mo mo gom gway pem mo dhali gom gway gi gwo 'borga/ mo tani

³⁰ a'di jin mididi diki bu'th to ki me'd iss 'kwanimpa ka mudhe'd mo shwane/ mo ki mo yansan mo, gu'b mina a'di gam mo dhali ikam piti mo dhali i'bwaham piti mo dhali ikum mo dhali uci mo dhali mo mo nyakki to kun mini to'c a'di 'kus mo, dhali ki she yil yan jin mididi pu'du/ mo tani a'di mididi gam mondiki/e ki sule/ sule/ ya ye 'ba/ mo be.

³¹ Hili aris uni gun 'koni t_{wa}/a/ mo tani uni minu dhu η'ko'd mo dhali uni gun 'koni 'ko'd mo tani uni minu dhu i_{wa}/a/ mo be.

AYesus Torki Wum Piti Me'di Kwara It_{wa}/a/ mo

³² Dhali uni 'kokin mo mmo/ii i bway mo mmo/ii ka gagamis mo e Pa Urushaliim mo dhala Yesus yaki'di shu uni bway mo. Dhali uni 'kokin mo mmomer mo dhali uni gwansan kun bath_{ki} a'di nsho'k mo tani ko/ki is mo. Dhali a'di ki sus uni gun 'koni 'kume'd i'ce'dka su/ mo dok_e dhali a'di ki tel mii 'pen mo dhali tor uni gwo mo gom to gun minu mii a'di mo be,

³³ mmo/o gwo mo ki: Hili mo mo ma, ana iina ka gagamis mo e Pa Urushaliim mo, dhali Ya/ gi 'Kwani minu ci mo e igasiis kun can mo dhali iman'kwar to mo, dhali uni mini wak a'di mo mmo'kosh a'di jwa mo, dhali a'di minu ciki 'kwani kun 'koki ta 'Kwani Yahuuda/ ime'd mo be.

³⁴ Dhali uni mini mii a'di ka mak mo dhali 'tak a'di manya/ i is mo dhali dor a'di mo dhali 'kosh a'di jwa mo. Dhali 'ko'da cim kwara mo tani a'di mididi piyu/ ka piye/ mo be.

Gwondoḡ ma Yakuub mo dhala Yohaana mo

³⁵ Dhala Yakuub dhala Yohaana uni gun ta iya/ ma Sabadi mo tani pu'dkin kadhonj 'kup ki a'di mo dhali o a'di gwo mo ki: Amantor Gwo, aman ona bwa ki /e mini dhal aman bway mo gom to jin mina amani dot 'peni /e mo be.

³⁶ Dhala Yesus ki o uni gwo mo ki: Atinta o um bwa mo jin miga/ mii gom um mo?

³⁷ Dhali uni ki thoḡ a'di gwo mo ki: Dhas am bway mo ma mmo'ko mo. Jan 'de/ mididi ca'b /e ki me'da bim poros pini mo dhali jan 'de/ mididi ca'b /e ki me'da biny cam pini mo e monycam pini mo be.

³⁸ Hila Yesus ki o uni gwo mo ki: Um 'koki mish to jin doḡa um mo. A/um mini piya kubbaaya jin pika/ mo walla a/um minu cuḡ mo ki mii jin miinuwa mii ki yi'de/ mo jin miikunu aha/ mo?

³⁹ Dhali uni ki thoḡ a'di gwo mo ki: Aman mina mish mii mo be. Dhala Yesus ki o uni gwo mo ki: Akubbaaya jin pika/ mo tani mina umi pi mo dhali mo jin miinu aha/ amii ki yi'de/ mo tani a'di imiinu mii um si'da/ mo be.

⁴⁰ Hili mmo'ko aha/ ki me'da bim poros pem mo walla ki me'da biny cam pem mo tani a'di diki ta miim pem mo mmodhas um bway mo, hili a'di gom uni gwansan kun thosonkunu uni mo be.

⁴¹ Dhali ki uni gun 'koni 'kume'd cik_{ki} gwo yansan mo tani uni telki mii 'pen mo mmodeka nyor mo goma Yakuub mo dhala Yohaana mo be.

⁴² Dhala Yesus ki yuk uni mo i a'di mo dhali o uni gwo mo ki: Um mishki gwo mo gom uni gwansan kun o ki ta tapa apo/ 'kwani kun 'koki ta 'Kwani Yahuuda/ mo tani uni mii miin tapa apo/ uni mo dhali 'kwanim buni gun eka/ ek_{ki} kun ta gi moshirr mo apo/ uni mo be.

⁴³ Hili mii yansan minu 'koki mii wakan apo/ um mo. Hili a'diyin jin mididi eka/ ek_{ki} mo e bwam um mo tani a'di mididi mii ta a'di jin mididi mii um to mo be.

⁴⁴ Haali/ a'diyin jin mididi mii ta jin t̄wa/a/ mbwaman um mo tani a'di mididi mii ta c̄in̄kina/ gom umi 'baar mo be.

⁴⁵ Haali/ Ya/ gi 'Kwani si'da/ pu'dki'd mo yisa ki a'di minu mii to mo, hili ki a'di mididi mii 'kwani to mo dhali c̄i mondiki/em piti mo mmota Amanwan 'Kwani 'Ba/ ka ris mo be.

Bartimawuus jin Ta Wathiny Ja'da/ Bu'thki Momish Mo mo

⁴⁶ Dhali uni pu'dkin mo e Pa Ariiha mo. Dhali ki a'di di'd mmodhal Pa Ariiha 'pen mo nyakki imancik a'di gwo mo tani adhana waambuhany wathimpa caaca kagahara mo. Dhali wathiny ja'da/ kamu/ diki'd jin yukunu gway ka Bartimawuus mo jin ta'da man'tho to mo, a'di jin ta ya/ ma Timawuus mo, a'di ca'bki'd mo e shemen bway isa yempa/ mo.

⁴⁷ Dhali ki a'di cikki gwo goma Yesus ki Pa Naasira mo tani a'di telki mii 'pen mo mmocuu gwo ki dhan t̄wa/ jin caaca mo dhali o gwo mo ki: Yesus, jin ta Ya/ ma Dawuu'd. Miiyi mii apo/ aha/ mo ma.

⁴⁸ Dhali 'kwani ka ris kucurki a'di ki gwo mo mmotor a'di gwo mo mmoca'b ki shwam mo. Hili a'di cuuki'd kagahara ki nyanye/ ki nyanye/ mo ki: Ya/ ma Dawuu'd. Miiyi mii apo/ aha/ mo ma.

⁴⁹ Dhala Yesus doshki'd mo dhali o gwo mo ki: Yuki a'di mo ma. Dhali uni ki yuki wathiny ja'da/ mo dhali o a'di gwo mo ki: Budhi adu mo ma. Cuyi mis mo. A'di yukki/ e mo be.

⁵⁰ Dhali a'di bitki burrinye/ ma pom piti a'cesh mo dhali a'di ki pe imis mo dhali ya aYesus mo.

⁵¹ Dhala Yesus ki o a'di gwo mo ki: Ata o /e bwa jin miga/ mii gom /e mo. Dhali wathiny ja'da/ ki o a'di gwo mo ki: Tapa, dhalki aha/ butha momish mom pem mo ma.

⁵² Dhala Yesus ki o a'di gwo mo ki: Yaku/ i bway pini mo. Mongam gwo is pini a'di wothki /e mo. Dhali ki jahanne/ a'di ki bu'th momish mo mo dhali bath a'di nsho'k ibway mo be.

11

Mo jin Pinu Mii E mo Mmocic Pa Urushaliim mo

¹ Dhali ki uni 'dishki Pa Urushaliim is mo e Pam Beetpaji mo dhali e Pam Beetaniya mo e 'Kuwosh Setuun mo tani a'di ki hash imancik a'di gwo isu/ mo be

² dhali o uni gwo mo ki: Iiku/ i bampa/ jin di'd ka par 'twa/ i um mo, dhali ki jahanne/ ki um mini c̄ic a'di mo tani um mini gam ari thuluny jin shi'du/ mo. A'di yisa merkina wathin kamu/ apowa. 'Cuuki a'di mo dhali guyu/ a'di mo.

³ Wakki/ wathin 'derj kamu/ mididi o um gwo mo ki: Atinta mina um kan mo tani tori a'di gwo mo ki: Tapa a'di mididi mii ta gi a'di mo dhali mididi hashu/ a'di ka nyan'ko'd ki jahanne/ mo imahan mo.

⁴ Dhali uni iikin mo dhali gam ari thuluny jin shi'dkunu mo e 'twanjal bway tura beega/ mo. Dhali uni 'cuuki a'di mo be.

⁵ Dhali uni gwansan kun doshkin mo tani o uni gwo mo ki: Atinta imina um kan mo sa/? Um 'cuuki ari thuluny gomata?

⁶ Dhali uni ki tor uni gwo mo gom gwo jin okin ma Yesus mo, dhali uni ki dhal uni bway mo mmo/ii mo be.

⁷ Dhali uni ki susi ari thulunya Yesus mo dhali uni ki pa'd burrinyem buni apo/ a'di mo dhali a'di ki mer a'di apo/ mo be.

⁸ Dhali 'kwani ka ris uni pa'dki burrinyem buni e bway tur mo be. Dhali kun tiya pa'dkina biny cwa kun kwa/kina uni 'peni bwam bunto mo be.

⁹ Dhali uni gwansan kun iikini t̄wa/a/ mo dhali uni gwansan kun bath̄ki uni nsho'k mo tani uni kumki cuuwa/ mo ki 'twa/ kun caaca mo ki: Hosanna. Mom'bor mii mididi di mo gom a'di jin pu'dki'd ki gway gi Tapa mo be.

¹⁰ Mom'bor mii mididi di mo gom Bampa/ ma ababam bana ka Dawuu'd a'di jin pu'dki'd mo. Hosanna jin di'di mis mo.

¹¹ Dhali a'di cički'd mo e Pa Urushaliim mo dhali a'di seki gu'b gi mondheleladhelel mo be. Dhali ki a'di hilki mo mo dhali 'kara ris to 'baar mo ki e mo tani dhali ḡ'ko'd a'di ki dok Pam Beetaniya nyak̄ki uni gun 'koni 'kume'd i'ce'dka su/ mo haala tente/ yulu'd mo be.

Cwampu/jin Jeekunu mo

¹² Dhali ka cim jin bath̄a'di 'ko'd mo tani ki uni pu'dkin mo e Pam Beetaniya mo tani a'di 'koshkina t̄e/ mo be.

¹³ Dhali a'di mishki'da pu/ 'pena dhana/ mo jin lu/u'd mo. A'di ki ya mo mmopar e mo wak̄ki/ a'di mididi 'taki gam maman 'peni a'di mo. Ki a'di pu'dki'di a'di mo tani a'di diki gam toḡ kamu/ mo hili jasi 'cemen gana/ mo haali/ a'di diki ta yil ma pu/ mmodho'th mo be.

¹⁴ Dhali a'di ki o a'di gwo mo ki: Wathin tal 'deḡ kamu/ mididi diki shwa maman 'peni /e dok/e mo ki sule/. Dhali imancik̄ a'di gwo cik̄ki gwo yansan mo be.

Mmodhelel Gu'b gi Mondheleladhelel mo

¹⁵ Dhali uni pu'dkin mo e Pa Urushaliim mo. Dhali ki a'di cički gu'b gi mondheleladhelel mo tani dhali a'di telki mii 'pen mo mmo/ur uni gwansan ka pije/ kun yoli to mo, dhali uni gwansan kun yolki to mo e gu'b gi mondheleladhelel mo. Dhali a'di ki kuma tharabeesa 'twa/ a'cesh mo gun ta ku gi uni gwansan kun wanki emena guurush mo dhali a'di ki kum to 'twa/ a'cesh mo kun 'kona imanyol gurko/ mo be.

¹⁶ Dhali a'di diki dhal uni bway mo mmo'do ton tiya mmo'ciḡh ki tur mo e gu'b gi mondheleladhelel mo be.

¹⁷ Dhali a'di ṡorki gwo mo dhali o uni gwo mo ki: A'di diki ta gwo jin 'kwarkunu mo 'taa? ki: Gu'b pem minu yuk̄ ki gu'b jin minu 'tho goma ris kal gi 'kwaniny'ceshi 'baar mo? Hili um ki mii a'di me'd gu'b gi 'kwani kun ta imandil to mo be.

¹⁸ Dhali igasiis kun can dhali iman'kwar to mo uni cik̄ki gwo yan mo dhali uni ḡapki bway mo mmo'ce'd a'di sho'k mo haali/ uni ko/ki a'di mo haali/ awaambuhany 'kwani caaca kagahara mo merkin mo gom gwom piti jin ṡorkina a'di mo be.

¹⁹ Dhali ki mom'pimpili/ pu'dki'd mo tani a'di dhali imancik̄ a'di gwo uni iikin ka pije/ mo 'peni 'penkuman bampa/ mo.

Gwo gom Cwampu/jin Ku'thki Gun̄kuru/ mo

²⁰ Me'd jin iikina uni ki iimpe mo mon'thomo/ mo tani uni parkina pu/ e mo mmoku'thkina a'di hila/ ka birman ilu/ mo be.

²¹ Dhala Buterus kakina gwo e mo dhali o a'di gwo mo ki: Tapa. Hila pu/ mo ma, a'di jin jeekina /e mo tani a'di ku'thki'd mo be.

²² Dhala Yesus ki thoḡ uni gwo mo ki: Tayi gi mongam gwo is mo eya Arungimis mo.

²³ Ka jin gana/ aha/ ona um gwo mo ki: A'diyin jin mididi o wosh yansan gwo mo ki: Dhalki a'di gunu mo dhali biṡ mo e bwan̄ kumma/ yi'de/ mo dhali diki ta ga du jin shi/i gwo 'kup mo tani, hili a'di gamki gwo is gom a'di jin okina a'di mo tani ki a'di mididi pu'd mo tani a'di minu mii gom a'di mo be.

²⁴ Wakan aha/ tora um gwo mo ki a'diyin jin mina umi dot ki mon'tho mo tani gami gwo is mo ma, ki a'di mina umi bu'th mo dhali um mini bu'th a'di mo be.

²⁵ Dhali ma mo yin jin mina umi dosh mo mmo'tho mo tani dhalki a'di 'pen mo wakki/ um ta gi gwo jin ona um is apo/ cin tiya mo tani wakan si'da/ Ababam bum jin di'd e momis mo midi dhal um gwon dharj bum 'pen mo be.

²⁶ Hili wakki/ um 'koki dhal 'kwani amure/ miinthus buni 'pen mo tani wakan si'da/ Ababam bum jin di'd e momis mo midi diki dhal um amure/ miinthus gi gwon dharj bum 'pen mo be.

Moshirr ma Yesus jin Dotkunu Gwondoṭ mo

²⁷ Dhali uni pu'dkin dok/e mo e Pa Urushaliim mo. Dhali ki a'di diki'd mmoya e gu'b gi mondheleladhelel mo tani igasiis kun can dhali iman'kwar to mo dhali 'kwaniṅ gwanyjaka/ mo uni pu'dkini a'di mo be.

²⁸ Dhali uni ki o a'di gwo mo ki: Ki moshirr jana sa/ imiikina /e aris to gwansani 'baar mo, walla kaja iciki /e moshirr yansan mo mmomii uni mo?

²⁹ Yesus ki thoḱ uni gwo mo ki: Aha/ si'da/ mina dot um gwondoṭ mo. Thoḱi aha/ gwo mo ma dhali aha/ mina tor um a'di jin ciki aha/ moshirr mmomii aris to gwansan mo be.

³⁰ Mo jin miin ma Yohaana mii ki yi'de/ mo tani, a'di 'peni momis mo 'taa? walla 'peni 'kwani mo? Thoḱ aha/ gwo mo ma.

³¹ Dhali uni garki gwo 'kusi 'twa/ ka rem 'kup mo mmo/o gwo mo ki: Wakki/ aman mina o gwo mo ki: 'Peni momis mo tani, a'di midi o am gwo mo ki: Batinta 'kona um ki gam a'di gwo is mo?

³² Hili wakki/ aman mina o ki: 'Peni 'kwani mo tani uni ko/ki 'kwani mo haali/ aris 'kwani 'baar mo karkina Yohaana ka manci gwo ma Arumgimis gana/ mo be.

³³ Wakan uni thoḱkina Yesus gwo mo ki: Aman 'konaki mish mo mo. Dhala Yesus ki o uni gwo mo ki: Wakan si'da/ aha/ mina diki tor um gwo mo gom a'di jin ciki aha/ moshirr mo mmomii to gwansan mo be.

12

Gwom 'Bi'th/e gom Bwam Monsinu ma Mura'th dhali Uni gun Hil Mo mo

¹ Dhali a'di telki mii 'pen mo mmoṭor uni gwo mo ki gwom 'bi'th/e mo mmo/ o gwo mo ki: Wathi/ diki'd mo jin siki'da mura'th mo dhali a'di ki nyanja gonj mo mmo'kam a'di is mo dhali a'di ki cwany jis gom yimana mura'th mo dhali a'di ki nyan 'kukuma/ isi mis mo, dhali a'di ki dhal a'di e imanmii to ka guurush mo dhali a'di ki ya bampaṅ kamu/ jin si'dasi'd mo be.

² Dhali ki mo pu'dki'd mo tani a'di ki hash ciṅkinaṅ kamu/ e imanmii to ka guurush mo mmo'taki kali maman cwan tiya 'peni monsinu mo be.

³ Dhali uni bu'thki a'di mo dhali dor a'di mo dhali uni ki hash a'di me'd 'te/ mo be.

⁴ Dok/e a'di ki hash ki uni ciṅkinaṅ kamu/ i uni mo dhali uni waki a'di 'kup ki jama/ mo dhali uni ki mii a'di ka jin thus ki mon'the is mo be.

⁵ Dhali a'di ki hashki uni jaṅ kamu/ mo dhali a'di si'da/ 'koshkina uni jwa mo. Dhali wakan si'da/ kun tiya ka ris 'koshkina uni mo dhali kun tiya dorkina uni mo dhali kun tiya 'koshkina uni jwa mo be.

⁶ A'di ta'd gi jasi jin tal 'deṅ gana/ mo jin di'di a'di mo, a'di jin ta ya/m piti jin ena a'di ki en gana/ mo. N'ko'd a'di ki uthki uni ya/m piti mo mmohashki a'di e uni mo mmo/o gwo mo ki: Uni mini tak ya/m pem mo be.

7 Hili uni gwansan kun miiki to ka guurush mo o gwo mo ka rem 'kup mo ki: Amanka! mala caan pu'dki'd mo. Dhalki ana 'kosha a'di jwa mo dhali mal midi ta jim bana mo be.

8 Dhali uni bu'thki a'di mo dhali 'kosh a'di mo dhali kar a'di 'pen ka pije/ mo 'peni bwam monsinu mo be.

9 Ata mina com gi mo ma mura'th i mii mo sa/? A'di midi pu'du/ mo dhali 'ce'd uni gwansan sho'k mo kun miiki to ka guurush mo dhali ci mo ma mura'th ki 'kwanin tiya mo be.

10 'Kona um ki deŋ Gwo e mo 'taa? Gwo jin 'kwarkunu mo. Ka dhan wosha caaga/ yansan jin waƙkina imannyan gu'b mo tani warki'd ki dhan wosh gi 'kupan ma rukun gu'b mo.

11 Yansan ta mii gi Tapa mo be.

Dhali a'di ta dhan mii jin meru em bana mo be.

12 Dhali uni palki mii mo mmo'taki cesh a'di mo tani hili uni ko/ kina waambuhany 'kwani mo haali/ uni nyithkin ki a'di torki gwom 'bi'th/e yansan apo/ uni mo. Wakan uni dhalki a'di mo dhali ii mo be.

Mmoçika Kaysara Thulpa/ mo

13 Dhali uni hashki a'di 'kwanin tiya 'peni 'Kwani Parisiyiin mo dhali 'kwanin tiya 'peni 'Kwani ma Hirodusiyyiin mo mmo'taki cesh a'di ki gwo jin ona a'di mo.

14 Dhali uni pu'dkin mo dhali o a'di gwo mo ki: Amanƙor Gwowa, aman misha ki /e ta a'din gana/ mo dhali /e diki mii mii ka gwar 'de/ mo gom wathin kamu/ mo, haali/ /e diki taƙ 'kwani gom monycam buni mo hili ka jin gana/ /e tori gwo gi bway ma Arumgimis mo be. A/a'di ta gwonƙan jin minu cika Kaysara thulpa/ mowa? walla minu dhalku/ mo?

15 Mina aman 'taki ciya thulpa/ mo 'taa? walla mina aman 'taki dhal 'pen mo? Hili mmonyitha a'di ahe'k em buni mo tani a'di ki o uni gwo mo ki: Atinta palkina um aha/ kan mo? Guyi aha/ nasa guurush mo ma dhali dhalki aha/ para a'di e mo.

16 Dhali uni ki guyi a'di jan 'de/ mo. Dhali a'di ki o uni gwo mo ki: Ki jamas maja a'dan sa/? Dhali a'di 'kwar maja imahan mo? Dhali uni ki thok a'di gwo mo ki: A'di ta jim ma Kaysar mo be.

17 Yesu ki o uni gwo mo ki: Cika Kaysar to jin ta jim ma Kaysar mo ma dhali cika Arumgimis to jin ta jim ma Arumgimis mo ma. Dhali uni merkin mo gom a'di mo be.

Gwondoŋ jin Doƙu mo gom Mo jin Pinu mo

18 Dhali 'Kwani Sadukiyyiin pu'dkini a'di mo, uni gun o gwo mo ki momp-inun kamu/ yisa di'da. Dhali uni ki doƙ a'di gwondoŋ mo mmo/o gwo mo ki:

19 Amanƙor Gwo, aMusa a'di 'kwarki aman gwo mo mmo/o gwo mo ki: Waƙka kam gi wathi/ midi wu mo dhali dhal ashim piti mo hili diki dhal a'di a'ci mme'd mo tani wathi/ midi mii mash asha kam piti mo dhali cis uci goma kam piti mo be.

20 Ikam uni 'kokini pesu/ mo be. Jin twa/a/ bu'thki'da 'bom mo dhali ki a'di wuki'd mo tani a'di diki dhal a'di a'ci mo be.

21 Dhali jin 'kon mo po/i su/ mo bu'thki'da yimi mo dhali wuki'd mo si'da/ mmodiki dhal a'di a'ci mo dhali jin 'kon ma po/i kwara mo nyaƙkina mii gi wakansan mo be.

22 Dhali unim pesu/ 'koki dhal a'di a'ci mo. Yan'ko'd mo tani a'bom si'da/ wuki'd mo.

23 E mompinu mo tani a'bom midi ta asha ja mo? Haali/ gwaƙh 'kokini pesu/ kun bu'thki a'di mo mmota a'bom buni mo be.

24 Yesus ki o uni gwo mo ki: A'di diki ta 'kup gwo jin thu'thkina um mii mo ki um 'koki mish Gwo ma Arungimis kun 'kwarkunu mo walla mom'bi'th ma Arungimis mo?

25 Haali/ ki uni mini piyu/ mo 'peni mowu mo tani uni mini mash dok/e yisa walla minu 'koki ci bway mo mmomash mo si'da/. Hili uni mina e waki iman'doyu gwo mo e momis mo be.

26 Dhali gom gwo gi uni gun minu cuyi mis mo 'peni mowu mo tani 'kona um ki den gwo e mo e gwo jin 'kwarkin ma Musa mo 'taa? e gwo gi ari cwa me'd jin on ma Arungimis a'di gwo mo ki: Aha/ tana Arungimis ma Ibrahiim mo dhali aha/ tana Arungimis ma Is/hak mo dhali aha/ tana Arungimis ma Yakuub mo?

27 A'di diki ta Arungimis gom uni gun wukin mo hili gom uni gun 'kon ki e mo. Um wani imanthu'th mii mana?

Adhan Gwoŋkan jin Ca'd jin 'Kwarkunu mo

28 Dhali jan tal 'den kamu/ 'peni iman'kwar to pu'dki'd mo dhali cik gwo jin su'kkina uni ka rem 'kup mo. Dhali mmonyitha a'di ki a'di tho^{kk}i uni gwo ki 'bore/ mo tani a'di ki dot a'di gwo mo ki: Gwoŋkan jana jin 'kwaru si'da/ jin ta jin twa/a/ ki tiya 'baar mo?

29 Yesus ki tho^k a'di gwo mo ki: Jin twa/a/ a'dihe/ be jin o gwo mo ki: Ciki um gwo mo ma. Ayy, um 'Kwani ma Israyiil mo. Tapa Arungimis bana a'di ta Tapa Arungimis jin tal 'de/ mo be.

30 Dhali /e mini en Tapa Arungimis pini ka dum pini 'baar mo dhali ka kashiram pini 'baar mo dhali ki bwam pini 'baar mo dhali ki 'bi'th pini 'baar mo.

31 Dhali jin 'ko'da 'dihe/ mo be: /E mini en amannyak ca'b pini me'd is piniŋ gana/ mo be. Gwoŋkana kamu/ jin 'kwarkunu mo yisa di'da jin ca'd mmobol yansan e mo.

32 Dhali aman'kwar to mo a'di ki o a'di gwo mo ki: /E o gwoŋ gana/ mo, Amantor Gwo. /E tori gwo ki tor gana/ ki a'di tal 'de/ mo, haali/ jan kamu/ yisa di'da, hili a'di 'de/ mo be.

33 Mmo/en a'di ka du 'baar mo dhali ka du jin mishi gwo 'bani 'baar mo dhali ki mom'bithi 'baar mo dhali mmo/en amannyak ca'b pini me'd is piniŋ gana/ mo tani a'di boli to 'baar mo e gun cinu mo mmoçi'th ki o'd mo dhali kun 'donu mo mmomiiya bas mo be.

34 Dhali ka Yesus mishki'd ki a'di tho^{kk}i a'di gwo ki 'bore/ mo tani a'di ki o a'di gwo mo ki: /E yisa si'dkina 'peni Bampa/ ma Arungimis mo. Dhali 'peni mo yan mo tani wathin 'den kamu/ yisa di'da jin ro'dki mii mo mmodot a'di gwondota kamu/ mo be.

Gwo gi Dotu gom Ya/ ma Dawuu'd mo

35 Dhali ka Yesus di'd mo mmo^{tor} uni gwo mo e gu'b gi mondheleladhelel mo tani a'di ki o uni gwo mo ki: Kata i/ona iman'kwar to mo ka Kristhos ta Ya/ ma Dawuu'd moye?

36 Haala Dawuu'd ki is piti mmoshi/irrkunu a'di ki Shi/in Dheleladhelel mo tani a'di o gwo eya tente/ mo ki: Tapa o Tapam pem gwo mo ki: 'Ca'bi /e aha/ ki me'da bim poros pem mo ntagi aha/ mina dhu 'kup pini mo e bwaj 'kwariny cwa jin dhuna /e sho'k mo.

37 Dawuu'd ki is piti ki yuk a'di ki Tapa mo. Wakan a'di mido ta ya/m piti kata mo dok/e? Dhali adhana waambuhany 'kwani cikki gwo 'peni a'di ki bwaj 'kunya/ mo be.

Yesus Be'dki Gwo gom Mii gi Iman'kwar To mo

³⁸ Dhali e gwom piti jin *torā* a'di uni mo tani a'di ki o uni gwo mo ki: Jiji iman'kwar to ki e ki 'bore/ mo uni gun eni momanjas ki burriyenyen turga/ i is mo dhali kun eni mo jin takuwa tak ka rem 'kup e mo ma suug mo

³⁹ dhali mmobu'th mo kun 'boron e gu'b gi montul is mo dhali mo kun takuwa tak mo e mo jin yukuwa yuk mo,

⁴⁰ uni gun loski gu'b gi up gun wuna ikath ki 'kolo'c mo dhali uni gun miiki mon'tho mo eya por ma pije/ mo ki rash rash mo. Uni mini bu'th dhan miiwak jin bol kun tiya e mo be.

A'bom jin Wun ma Kath jin Ci To mo

⁴¹ Dhali a'di ca'bki'da 'cesh ka par 'twa/ e mo jin dhunuwa guurush mo dhali a'di parki'da waambuhany 'kwani e mo mmodhuna uni aguurush e mo jin dhunuwa guurush mo. 'Kwani tana ris ka ris kun ta pa ki pa mo kun dhukina dhana guurush mo.

⁴² Dhala 'bom jin wukin ma katham piti mo pu'dki'd mo dhali a'di ki dhu ushi emena guurushi su/ mo kun ta gi 'per mo, uni gun wana e ka tariipan 'de/ mo be.

⁴³ Dhali a'di ki yuk imancik a'di gwo e a'di mo dhali o uni gwo mo ki: Ka jin gana/ aha/ ona um gwo mo ki, a'boma ha'th'ko'd yansan jin wun ma katham piti mo tani a'di dhuki'da ris tom piti 'baar mo mmobol uni gwansan e mo kun ta'kki to mo e mo jin dhunuwa guurush mo.

⁴⁴ Haali/ uni 'baar mo ta'kki to mo 'peni tom buni gun ishkin ka entus mo. Hili ayim 'pena ha'th'ko'd piti mo tani a'di dhuki'da ris to 'baar mo kun tana a'di mo gun mini 'taki kar a'di mo be.

13

Mo gi 'Ce'du Gu'b gi Mondheleladhelel Sho'k mo dhali Jamas Mii jin Toru Itwa/a/ mo gom 'Pemen jin 'Ko'd mo

¹ Dhali me'd jin yakina a'di ka pije/ mo 'peni gu'b gi mondheleladhelel mo tani jan 'deñ kamu/ 'peni imancik a'di gwo mo o a'di gwo mo ki: Hili mo mo ma, Aman'tor Gwo. Wosh gwahan wani jaro/ jarowa dhali monyangi gu'b gwahan wani jaro/ jaro/ mo!

² Dhala Yesus ki o a'di gwo mo ki: /E mishi dhan mii gi gu'ba caaga/ gwansan kun nyan'kunu mo? Hili wosha tal 'deñ kamu/ yisa mididi apowa kamu/ mo jin minu 'koki ta'k a'cesh mo be.

³ Dhali me'd jin ca'bkina a'di e 'kuwosh Setuun jin di'd ka par 'twa/ ki gu'b gi mondheleladhelel mo tani Buterus dhala Yakuub dhala Yohaana dhala Andaraawus dotki a'di gwo ka kwal is mo ki:

⁴ Tori aman gwo mo ma, ki mii gwansan mini pu'd kakasja mo? Dhali ki jamas mii kun wakatinta imina to gwansani 'baar mo mmothim mo mo?

⁵ Dhala Yesus ki tel mii 'pen mo dhali o uni gwo mo ki: 'Cunycuri mii ki is bum ki 'bore/ mo ma, ki jan tal 'deñ kamu/ mididi diki sus um mmodheres mo.

⁶ 'Kwani tana ris ka ris mini iyyu/ ki gway pem mo mmo/o gwo mo ki: Aha/ tana a'di mo. Dhali uni mini sus tiya ka ris mmodheres mo be.

⁷ Dhali ki um mini cik gwo gom mo/as mo dhali gom gwo jin 'ce'du 'te/ mo gom mo/as mo tani dhalku/ is ki anan mo. Gom to gwansan mini mii pu'du/ mo. Hili 'pemen yisa minu thim naskina/ mo.

⁸ Haali/ kala kamu/ mididi cu mis apo/ kala kamu/ mo dhali 'penkuman bampañ kamu/ mididi cu mis apo/ 'penkuman bampañ kamu/ mo. Dhali adhan mony'cesh mididi yikin is ki mo ka ris mo dhali te/ mididi di mo si'da/. Hili mii gwansan uni ita jasi montel 'pen ki isa nyor mo be.

⁹ Hili 'cunycuri mii ki is bum ki 'bore/ mo ma. Haali/ uni mini ci um mo e montul is mo dhali um minu dor mo e gu'b gi montul is mo dhali um mini doshi bwambor imudhiir mo dhali imalik mo gom gway pem mo mmoci gwo ibwambori uni mo be.

¹⁰ Dhali gwom 'borga/ minu mii ciki kal gi 'kwaniny'ceshi 'baar mo ntwa/a/ mo be.

¹¹ Dhali ki uni mini sus um mo e mo jin dwallu gwo mo dhali ci um wakan mo tani dhalku/ is ki anan mo ntwa/a/ mo gom gwo jin mina umi o mo. Hili oyi a'diyin jin minu ci um ki mo yansan mo haali/ a'di diki ta um kun mini o gwo mo, hili Shi/in Dheleladhelel mo be.

¹² Dhala kama kamu/ mididi ci akam piti mmo'kosh jwa mo dhali com mididi ci ya/ ki 'bwa/ ilu/ mo mmo'kosh mo dhali uci mini cu mis apo/ ikum mo dhali uni mini dhu uni mmowu mo be.

¹³ Dhali um minu shi/i e ki 'kwani ka ris mo gom gway pem mo. Hili a'di jin mididi 'dim 'kup mo ntagi 'pemen mo tani a'di iminu iwotth mo be.

¹⁴ Hili ki um mini par a'di jin ta mii jin bulabul e mo, a'di jin thumu mo e mo jin mina a'di ka 'taki diki di mo ba/ tani (dhalka mandeŋ gwo e mishi gwo 'ban mo) dhali yan'ko'd uni gwansan kun 'kon e Pa Yahuudiyya mo tani dhalki uni soni 'kuwosh mo ma.

¹⁵ Dhali dhalki a'di jin di'di 'kungu'b mididi diki thul ka 'cesh mo walla cig gu'b piti mo mmogu toŋ kamu/ mo.

¹⁶ Dhali dhalki a'di jin di'd e bwam bunto mididi diki doku/ ka nyan'ko'd mo mmogu burryem pom piti mo be.

¹⁷ Dhali ayy/ayy/ayy gom uni gwansan kun bwaa uci mo dhali gom uni gwansan kun ci uci ako mmopi ka tee gwansan mo.

¹⁸ Thoyi mo ma ki a'di mididi diki pu'du/ mondit mo.

¹⁹ Haali/ ka cim gwansan mo tani monto'c bwa mididi di jin diki di wakan mo 'peni ka mun'kup mo me'd jin uk ma Arumgimis to mo ntagi shwane/ mo ba/, dhali mididi diki di ki sule/ sule/ mo be.

²⁰ Dhali wakki/ Tapa mididi 'taki diki 'citha/ cim gwansan bwa mo tani buye/ wathimpan kamu/ minu 'taki 'koki wotth mo be. Hili gom gway gi uni gun kwanykunu mo, uni gun kwanykina a'di mo tani a'di i'cithuwa cim bwa mo be.

²¹ Dhali wakki/ wathin 'deŋ kamu/ mididi o um gwo mo ki: Hili mo mo ma, aKristhos a'dan mo, walla, Hili mo mo ma, a'di acittaan mo tani dhalki gwom piti ki gam is mo.

²² Haali/ ikristhos kun 'koki ta kun gana/ mo dhali imançi gwonthus mini cu mis mo dhali for dhan jamas mii mo dhali dhan momer mo mmosusa susi dheres mo, wakki/ a'di mishu mii si'da/ gom uni gun kwanykunu mo be.

²³ Hili 'cunycuri is bum ki 'bore/ mo. Aha/ torkina um aris to gwansani 'baar mo ntwa/a/ mo be.

Mo gi Mina Ya/ gi 'Kwani Pu'du/ mo

²⁴ Hili ka tee gwansan mo 'ko'di monto'c bwa mo tani atente/ mididi dhurum mo mo dhali appe mididi diki ci monkush piti mo be.

²⁵ Dhali arisa culi 'baar mo mini ta'k mo 'peni momis mo dhali mom'bi'th kun 'kon e momis mo tani minu pir is mo be.

²⁶ Dhali yan'ko'd uni mini par Ya/ gi 'Kwani e mo mmopu'du/ mo e bwaarak ka dhan mom'bi'th mo dhali ki monya mo be.

²⁷ Dhali yan'ko'd a'di mididi hash iman'doyu gwom piti mo dhali tul kum piti is kun kwanykunu mo 'peni mony'cesh kun 'kona shem 'pena bi idonon mo 'peni mo jin din ma 'cesh 'kup mo ntagi mo jin dina momis 'kup mo be.

²⁸ 'Peni gwo gi cwampu/ da/ari a'di mo dhali mishi miim piti mo. Me'd jin lu/kina a'di abim piti mo mmo'ta'dama'ta'dam mo dhali dhu jipin this mo tani um ki mish mo mo ki moyurantee 'dishi'd mo be.

²⁹ Wakan si'da/ wakki/ um ki par aris to gwansan e mo mmobu'th mo mo tani um ki mish mo mo ki a'di 'dishki'd mo, e 'twanjal hila/ mo be.

³⁰ Ka jin gana/ aha/ tora um gwo mo ki 'kwani ma nyakum yil gwansan mini 'koki pe mo ntwa/a/, ntwa/a/ ka ris to gwansan mini bu'th mo mo be.

³¹ Momis dhali mony'cesh mini pe mo tani hili gwom pem midi diki pe mo be.

³² Hili ka tente/ caan mo walla ki mo caan mo tani a'di dina wathin tal 'denj kamu/ki mish mo walla iman'doyu gwo kun 'kon e momis mo walla Ya/si'da/ mo, hili jasi Com a'di 'de/ mo be.

³³ 'Cunycuri is bum ki 'bore/ mo ma dhali timi mo mo ma dhali 'thoyi mo ma, haali/ um 'koki mish mo mo atente/ jin mina mo pu'du/ mo be.

³⁴ A'di mina e waki wathi/ jin ya yilkina/ mo. Me'd jin dhalkina a'di pam piti 'pen mo tani dhali a'di dhu cinjinam piti mo mmohil mo mo isi ka tu'c piti ka 'dete/ 'dete/ mo. Dhali a'di ki kan amantim 'twanjal gu'b gwo mo mmotim mo mo be.

³⁵ Timi mo mo ma wakan - haali/ um 'koki mish mo mo jin mina com gu'bi pu'du/ mo. A'di wari midi ta mom'pimpili/ mo walla mombwam/e mo walla mo kun gwon ma dhongola nwa mo walla mon'thamo/ mo.

³⁶ Hili isi ciki/ a'di midi pu'du/ ki jahanne/ mo dhali gam um ki um mala e mo be.

³⁷ Dhali a'di jin torka/ um mo tani miga/ tor ki 'kwani 'baar mo ki: Timi mo mo ma.

14

Imanshu 'Kwani Bway Miikina Wu'th apowa Yesus mo

¹ Dhali acim bockini su/ ntwa/ a/ ka cim gi Mompe'kupanyolos mo dhali ayuk jin tulu 'kup mo gi maanjuthu'd jin miinu ki dar ga cumat mo. Dhali igasiis kun can dhali iman'kwar to mo uni n'apki bway mo mmobu'th a'di ki kup mo dhali 'kosh a'di jwa mo

² haali/ uni o gwo mo ki: Yisa ka tul 'kup yan jin yukuwa yuk mo yisa hili isi ciki/ adulat minna 'kwani ishwa mo be.

Yesus A'di 'Koshkunu Is ka Yina Pi'dnanj Gana/ mo e Pam Beetaniya mo be

³ Dhali ki a'di diki'd e Pam Beetaniya e gu'b ma Simaan jin 'kosha monthus mo tani ki a'di ca'bki'da tharabeesa mo tani a'boma kamu/ pu'dki'd mo jin taki'd gi turanj gasaas jin ta gi kush mo jin din ma yina pi'dnanj gana/ nycine/ mo, jin 'bitha yol she/ ki 'bi'th mo. Dhala yim ki 'ce'd tura mo dhali wol a'di e 'kup ma Yesus mo be.

⁴ Hili 'kwanin tiya 'kokini mun mo kun dekin ma nyor mo e is buni mo mmo/o gwo mo ki: Atinta shinu ayina pi'dnanj gana/ yan isa 'cesh kan mo?

⁵ Haali/ ayina pi'dna/ yan minu 'taki yol ka riyaal iss 'kwanimpa ka 'kume'd mo dhali ciki 'kwani kun hatha'ko'd mo. Dhali uni ki ruka yim ki gwo mo be.

⁶ Hila Yesus o gwo mo ki: Dhalka yim mo ma. Atinta toca um ayim bwa mo? Ayim miiki tony jaro/ gom aha/ mo.

⁷ Haali/ um isa yempa/ um tan gi 'kwani kun hatha'ko'd kun nyak 'ko ki um mo, dhali ki yilan tiya jin ona bwa um mo tani um ki mish uni tom 'boron mii mo. Hili um mini 'koki ta gi aha/ isa yempa/ mo.

⁸ Ayim mii a'di jin misha a'di mii mo. Ayim 'koshki aha/ bun'gar is pem ntwa/a/ mo gom kan jin minu kan aha/ mo be.

⁹ Dhali ka jin gana/ aha/ tora um gwo mo ki: E mo yin jin minu ci gwom 'barga/ e mony'ceshi 'baar mo tani a'di jin miikin ma yim mo tani minu tor mo mmokaa yim e mo be.

Yahuusa A'di Gamki Gwo Me'd mo Mmo'citha/ Yesus Is ki Gwo mo

¹⁰ Dhali yan'ko'd Yahuusa Iskariyuuti a'di jin 'dap tiya 'twa/ ka 'kume'd i'ce'dka su/ mo tani a'di yaki'd mo e igasiis kun can mo mmothoson gwo mo mmo'cith a'di is ki gwo mo e uni mo be.

¹¹ Dhali ki uni cikki gwo mo tani uni 'kunya bwa ki 'kuny mo dhali o gwo is mo mmo'ciki a'di aguurush mo. Dhali a'di n'apki embula 'borganj gana/ mo mmo'cith a'di is ki gwo mo be.

Yesus Shwaki Tont'e/ jin 'Ko'd Nyakki Imancik A'di Gwo mo

¹² Dhali ka cim jin t'wa/a/ gi maanj'kuthu'd jin miinu ki dar ga cumat mo ki uni 'cithki ari ka'bal 'kus mo gom Mompe'kupanyolos mo tani imancik a'di gwo oki a'di gwo mo ki: Ki mana o /e bwa jin mina aman ii mo dhali thoson to mo gom /e mo mmoshwa ki Mompe'kupanyolos mo?

¹³ Dhali a'di hashki imancik a'di gwo isu/ mo dhali o uni gwo mo ki: Iiku/ i dhan 'penkuman bampa/ mo dhali wathi/ jin kali dhan dhur yi'de/ midi gam um 'kup mo. Bathi a'di nsho'k mo ma.

¹⁴ Dhali e mo yin jin mina a'di ci'e mo tani oyi com gu'b gwo mo ki: Amantor Gwo o ki: Mane gu'b jin midi ta gu'b yilkina/ gom aha/ mo jin miga/ shwa to ka cim gi Mompe'kupanyolos nyakki imancik gwom pem mo?

¹⁵ Dhali a'di midi tor um adhan gu'ba beega/ mo jin nyanu ka makampo/ apowa kamu/ mo, jin isha to ki korom korom mo dhali jin thosonkunu mo. E mun mo tani thosoni to mo ma gom ana mo.

¹⁶ Dhali imancik a'di gwo iikin mo dhali pu'd mo e 'penkuman bampa/ mo dhali gam a'di me'd jin torkina a'di uni gwo mo. Dhali uni thosonki to mo gom Mompe'kupanyolos mo be.

¹⁷ Dhali ki mo ta mom'pimpili/ mo tani a'di pu'dki'd nyakki kum piti kun 'koni 'kume'd i'ce'dka su/ mo.

¹⁸ Dhali ki uni 'kokina tharabeesa mo mmoshwa to mo tani Yesus ki o gwo mo ki: Ka jin gana/ aha/ tora um gwo mo ki: Jan tal 'de/ 'peni um midi 'cith aha/ is ki gwo mo, a'din 'de/ jin nyakki to shwa ki aha/ mo be.

¹⁹ Dhali uni telki mii 'pen mo mmo'kal bwan diti'd mo dhali o a'di gwo mo ka bath 'pen ka rem 'kup mo ki: A/aha/ 'taa?

²⁰ A'di ki o uni gwo mo ki: A'di ta jin tal 'de/ 'peni um kun 'koni 'kume'd i'ce'dka su/ mo, a'di jin 'thupki maanj'kuthu'd nyakki aha/ eya sahana 'de/ mo be.

²¹ Haali/ Ya/ gi 'Kwani yaki'd mo me'd gwo jin 'kwarkunu mo gom a'di mo, hili wayyi e wathi/ jin 'cithki Ya/ gi 'Kwani is ki gwo mo. A'di midi 'taki 'bor ki isi 'bor gana/ mo gom wathi/ yansan mo wakki/ a'di minu 'taki 'koki dho'th mo be.

²² Dhali ki uni 'kokin mo mmoshwa to mo tani a'di ki bu'th maanj'kuthu'd mo dhali 'bora 'bor bwa i is mo dhali 'ce'd a'di mo dhali ciki uni mo dhali o gwo mo ki: Budhi a'di yansan mo ma. A'di ta is pem mo be.

²³ Dhali a'di ki budha kubbaaya mo, dhali ki a'di ciki mom'bora 'bor bwa i is mo tani a'di ki ciki uni mo dhali uni 'baar mo piki a'di mo be.

²⁴ Dhali a'di ki o uni gwo mo ki: A'di yansan ta'da abas pem gi gwo jin gamu me'd jin ta jin this mo a'di jin wolki'd gom 'kwani ka ris mo be.

²⁵ Ka jin gana/ aha/ tora um gwo mo ki aha/ mina diki pi yiman maman cwa dok/e mo ntaga tee jin miga/ pi a'di jin ta jin this e Bampa/ ma Arungimis mo be.

Mo jin Waṭ ma Buṭerusa Yesus Gway A'di Torkunu Itwa/a/ mo

²⁶ Dhali ki uni yuḱki gway mo tani uni iikin ka pije/ mo e 'kuwosh Setuun mo.

²⁷ Dhala Yesus ki o uni gwo mo ki: Umi 'baar mo mini ta'k mo. Haali/ a'di 'kwarkunu mo ki: Aha/ mina 'kosha manhil ka'bal mo dhali ka'bal minu ceke bwa mo be.

²⁸ Hili ṅ'ko'd mo tani ki aha/ minu cuyu mis mo dok/ e tani aha/ mina ya itwa/a/ ki um e Pany Jaliil mo be.

²⁹ Buṭerus ki o a'di gwo mo ki: Bahili waḱki/ uni gwansani 'baar mo mini ta'k mo tani aha/ mina diki biṭ mo be.

³⁰ Dhala Yesus ki o a'di gwo mo ki: Ka jin gana/ aha/ tora / e gwo mo ki mon'thiny yansan shwane/ mo ntwa/a/ ka dhongola ṅwa diki ko e me'di su/ mo naskina/ tani / e mini wat aha/ gway me'di kwara mo be.

³¹ Hili a'di oki gwo ka du jin daradar mo ki: Waḱki/ aha/ mina mii wu mo nyakki/ e mo tani aha/ mina diki waṭ / e gway mo. Dhali uni 'baar mo nyakki o 'twan ṭal 'de/ mo be.

Yesus Thoki'd e Monsinu jin Ta Bwaagoy ma Jathsemaani mo

³² Dhali uni iikin mo e mo jin yuḱu gway ka Jathsemaani mo. Dhali a'di ki o imancik a'di gwo gwo mo ki: 'Koyi imahan mo ma. Aha/ ki ya mo dhali 'tho mo.

³³ Dhali a'di ki susa Buṭerus mo dhala Yakuub mo dhala Yohaana mo dhali mii ma cis telki a'di 'pen mo mmobu'th a'di kagahara mo dhali bwa jin tocu 'kus si'da/ mo be.

³⁴ Dhali a'di ki o uni gwo mo ki: Akashiram pem diṭa bwa ki diṭ kagahara mo, ma isi kan mmowu moyi. 'Koyi imahan mo ma dhali timi mo mo mmo'ko ki e i'kup mo.

³⁵ Dhali mmoyakina a'di mo mmothoth is ari'ceenne/ mo tani a'di biṭki'da 'cesh mo dhali 'tho mo waḱki/ a'di minu 'taki mish mii mo tani ki mo yan midi 'taki ya pe a'di mo.

³⁶ Dhali a'di o gwo mo ki: Abba Ababa. Aris to 'baar mo mishu mii ki / e mo. Kalka kubbaaya yan 'peni aha/ mo ma. Hili a'di yisa jin oyaa/ bwa, hili a'di jin ta bwam pini mo be.

³⁷ Dhali a'di pu'dki'd mo dhali gam uni ki uni ishki e mo dhali a'di ki owa Buṭerus gwo mo ki: Simaan, A/ e ishki e kan mo? Bunya/ mina / e diki tim mo mo ka tenten 'de/ mmodi ki e i'kup mo?

³⁸ Timi mo mo ma dhali 'koyi ki e i'kup mo dhali 'thoyi mo, ki um mini 'koki ciḱ mo e mo jin palu mo. Shi/in ka jin gana/ a'di ona bwa mo tani hili bungwar is a'di ihatha'ko'd ki ha'th mo be.

³⁹ Dhali dok/ e a'di yaki'd mo dhali 'tho mo mmorash jasi gwon ṭal 'de/ e mo.

⁴⁰ Dhali dok/ e a'di pu'dki'd mo dhali gam uni ki uni ishki e mo haali/ em buni ṭo'dki uni is mo dhali uni 'koki mish gwo jin mina uni thoḱ a'di mo be.

⁴¹ Dhali me'di kwara mo dok/ e tani a'di pu'dki'di uni mo dhali o uni gwo mo ki: A/ um 'kon mo mmo/ish e kan mo dhali bu'th mosi/ is bum mo? A'di 'koshi jwa mo ba/. Mo pu'du'd mo. Ya/ gi 'Kwani a'di 'cithkunu is ki gwo mo e me'de gi 'kwani kun ta imanmii miinthus mo be.

⁴² Cuyi mis mo. Dhalki ana iina mo. Hila uma? Aman'cithaa/ is ki gwo pu'dki'd hila/ mo be.

Mo jin 'Cithuwa Yesus Is ki Gwo mo dhali Mo gi Budhu A'di mo

⁴³ Dhali ki jahanne/ ki a'di di'di mmo/o gwo mo naskina/ mo tani Yahuusa pu'dki'd mo, a'di jin 'dap tiya 'twa/ ka 'kume'd i'ce'dka su/ mo dhali a'di suski'da waambuhany 'kwani nyakki a'di mo ki gandala turga/ ime'd mo

dhali cwa mo, 'peni igasiis kun can mo dhali iman'kwar to mo dhali 'kwaniḡ gwanyjaka/ mo be.

44 Dhali a'di jin 'ciḡḡki a'di is ki gwo mo ciki uni jamas mii mo mmo/o gwo mo ki: Jan ṭal 'de/ jin miga/ pi 'twa/ mo tani a'di ta wathi/ mo. Budhi a'di mo dhali susi a'di ki 'dantar mo.

45 Dhali ki a'di pu'dki'd mo tani a'di ki ya a'di ki jahanne/ mo dhali o a'di gwo mo ki: Tapa. Dhali a'di ki pi a'di 'twa/ mo be.

46 Dhali uni 'baar mo ki dhu me'd buni apo/ a'di mo dhali bu'th a'di mo.

47 Hili jan ṭal 'deḡ kamu/ 'peni uni gwansan kun doshkin ki 'dishe/ mo tani a'di ki buk gandala turgam piti mo dhali ruḡḡun ciḡḡkina/ ma gasiis jin ca'd mo dhali 'ciḡḡ a'di 'cem piti mo be.

48 Dhala Yesus ki o uni gwo mo ki: A/um iyyin ka piḡe/ mmobu'th aha/ ki gandala turga/ ime'd mo dhali ki cwa mo, me'd mii jin miinu apo/ wathin 'di/ mo?

49 Ka tee kun baḡḡani 'ko'd mo tani aha/ dikina mo e gu'b gi mondheleladhelel mo mmoṭor um gwo mo dhali um 'koki bu'th aha/ mo be. Hili dhalki Gwo jin 'kwarkunu mo thimu mo.

50 Dhali uni 'baar mo dhalki a'di me'd mo dhali so mo be.

Wathin Dhuru'c jin Guski'd mo

51 Dhali wathin dhuruca kamu/ baḡḡki a'di nsho'k mo ki dar gi toḡ kamu/ i is mo, jasi burrinyen dhinye jin 'kamkina a'di i is mo, dhali uni ki bu'th a'di mo.

52 Hili a'di dhalki burrinyen dhinye mo dhali gus is 'te/ mo ki jasi burrinye/ jin hitha a'di i empa'd mo be.

Yesus Doshki'd mo e Bwambor gi Montul Is gi 'Kwani Yahuuda/ mo

53 Dhali uni ki susa Yesus eya gasiis jin ca'd mo. Dhali igasiis kun cani 'baar mo dhali 'kwaniḡ gwanyjaka/ mo dhali iman'kwar to mo uni tulki is mo be.

54 Dhala Buṭerus baḡḡki a'di nsho'k 'pena dhana/ mo. A'di ki ya ki sule/ e bwaagoḡ ma gasiis jin ca'd mo. Dhali a'di ki nyak ca'b ki imanji mo mo dhali sam is piti i o'd mo be.

55 Dhali igasiis kun can dhali 'kwani gi montul is buni 'baar mo uni ḡapki gwo mo mmo/o apowa Yesus mo mmokar a'di mmowu mo tani hili uni 'koki gam ton ṭal 'deḡ kamu/ mo be.

56 Haali/ 'kwani tana ris ka ris kun 'ce'dki a'di gwo apo/ mo dhali gwom buni gun 'ce'dkina uni a'di i is mo tani uni 'konuki gam me'd mo be.

57 Dhali kun tiya doshkin ki mis mo dhali 'ce'd a'di gwo apo/ mo mmo/o gwo mo ki:

58 Aman ciḡḡkina gwo jin ona a'di mo ki: Aha/ mina 'kosh gu'b gi mondheleladhelel yansan mo, a'di jin nyanḡkunu ki me'd mo, dhali ka cim kwara mo tani aha/ mina nyanḡ jan kamu/ jin 'konuki nyanḡ ki me'd mo be.

59 Isi gwom buni jin 'ce'da uni kan mo tani yisa gamu me'd mowa.

60 Dhala gasiis jin ca'd doshki'd ki mis mo e bwaman uni mo dhali doṭa Yesus gwo mo ki: A/e bunya/ diki 'de'k 'twanḡ kamu/ mo mmothokḡ gwo kana? Gwo gi wakatinta i/ona 'kwani gwansan apo/ /e mo?

61 Hili a'di ca'bki'd ki shwam mo dhali yisa thokḡ 'twanḡ kamuwa. Dhala gasiis jin ca'd dok/e ki doṭ a'di gwo mo ki: A/e tana Kristḡḡos jin ta Ya/ gi A'di jin Maḡḡu mowa?

62 Dhala Yesus ki thokḡ a'di gwo mo ki: Aha/ tana a'di mo, dhali /e mini par Ya/ gi 'Kwani e mo mmoca'b ka bim poros gi mom'bi'th mo dhali mmodobu/ ka nyan'ko'd mo e bwaarak 'peni momis mo be.

⁶³ Dhala gasiis jin ca'd dherki burrinyem pom piti bwa mo dhali o gwo mo ki: Katinta icorkina ana gwo mo jin minu mii o mo?

⁶⁴ Um cikki a'di walki gwo sor mo. Gwo jin gama um me'd mo wakata mo? Dhali uni 'baar mo wakki a'di mo mmo/o ki a'di ha me'd mmowu mo be.

⁶⁵ Dhali kun tiya telki mii 'pen mo mmo'tak a'di manya/ i is mo dhali mmokum a'di bwam/em piti mo dhali dor a'di mo mmo/o gwo mo ki: Oyi gwo is mo ma. Dhali mmodora uniya dor ki me'd buni mo tani uni kun ta imanji mo mo bu'thki a'di mo be.

Buterus Watki'da Yesus Gway mo

⁶⁶ Dhala Buterus diki'd ka lunḡu'b mo e bwam ma goḡ mo, dhali nyarany ciḡkina 'deḡ kamu/ 'peni jim ma gasiis jin ca'd mo tani a'di pu'dki'd mo.

⁶⁷ Dhali mmonyithkina a'diya Buterus mo mmosam is piti i o'd mo tani ayim ku'thki a'di ki e mo dhali o gwo mo ki: /E si'da/ nyakki di ki wathi/ gi Pa Naasira yan jin ta'da Yesus mo.

⁶⁸ Hili a'di watki gwo mo mmo/o gwo mo ki: Aha/ mola a'di mo walla 'pemen gwom pini jin ona /e mo tani a'di molka/ 'ban mo. Dhali a'di ki ya ka piḡe/ ki 'twaḡkala lambalany mo. Dhala dhongola ḡwa gwoki'd mo be.

⁶⁹ Dhali nyarany ciḡkina/ parki a'di e mo dhali tel mii 'pen mo mmo/o a'di gwo mo dok/e e uni gwansan kun doshkin ki 'dishe/ mo ki: Wathi/ yansan ta jan tal 'de/ 'peni uni mo be.

⁷⁰ Dhali dok/e a'di watki gwo mo. Dhali yan'ko'd dok/e ari'ceenne/ mo tani uni gwansan kun doshkin ki 'dishe/ mo tani ona Buterus gwo mo ki: Ka jin gana/ /e ta jan tal 'de/ 'peni uni mo haali/ /e ta ji gi Pany Jalil mo be.

⁷¹ Hili a'di telki mii 'pen mo mmojee is piti jwa mo ki gwo jin thulkina a'di me'da po/ mo, mmo/o gwo mo ki: Aha/ dinaki mish wathi/ yan mo, a'di jin okina um mo.

⁷² Dhali ki jahanne/ adhoḡgola ḡwa gwoki e me'di su/ mo. Dhala Buterus kana gwo e mo, ma gwo yin jin on ma Yesus a'di mo ki: Nṡwa/a/ ka dhongola ḡwa diki ko e mo me'di su/ mo tani /e mini waḡaha/ gway me'di kwara mo. Dhali ki a'di di'd mmoka gwo e 'baar mo ka bath 'pen mo tani a'di 'tul ma du mo dhali a'di gwoki'd ki jabu'th mo be.

15

Yesus Doshki'd Ibwambor ma Bilaatus mo

¹ Dhali ki jahanne/ ki mo ta mon'thamo/ mo tani igasiis kun can mo dhali 'kwaniḡ gwanyjaka/ mo dhali iman'kwar to mo dhali aris 'kwani gi montul is buni mo tani uni tulki is mo mmoganan gwo 'kup mo. Dhali uni ki deḡa Yesus mo dhali sus a'di mo mmocika Bilaatus mo be.

² Dhala Bilaatus ki dot a'di gwo mo ki: Ki /e de itana malik gi 'Kwani Yahuuda/ mo de? Dhali a'di ki thoḡ a'di gwo mo ki: /E si'da/ on wakansan mo be.

³ Dhali igasiis kun can uni yerki a'di is ki gway ki to ka ris mo.

⁴ Dhala Bilaatus ki dot a'di mo dok/e ki: /E bunya/ mini diki thoḡ 'twaḡ kamu/ mo 'taa? Hili ma, ama'diny gwo wana risa kun okina uni apo/ /e mo.

⁵ Hila Yesus diki thoḡ a'di gwon tal 'deḡ kamu/ mo. Gom mii gi wakan mo tani aBilaatus merki'd mo be.

Yesus Torkunu Gwo 'Twa/a 'Cesh mo Mmowu mo

⁶ Dhali ki mii jin tuluwa tul 'kup mo tani miim piti isa yempa/ ta mii mmo'cuḡki uni jan 'de/ 'peni 'kwani habuus mo a'di jin dotkina uni mo be.

⁷ Dhali wathi/ di'd jin yukkunu gway ka Baraabas mo jin diki'di bwam uni eya sijin mo, a'di jin 'koshki'da mee mo e mii jin miinu gom gwo jin onuwa 'cesh gom bampa/ mo be.

⁸ Dhala waambuhany 'kwani pu'dkin mo dhali tel mii 'pen mo mmodota Bilaatus gwo mo mmomii to jin miina a'di isa yempa/ gom uni mo.

⁹ Dhali a'di ki thok uni gwo mo ki: Um napki aha/ mmo'cu'ki um aMalik gi 'Kwani Yahuuda/ mo 'taa?

¹⁰ Haali/ a'di nyithki dhapan jin takina igasiis kun can mo gom a'di mo mmoci a'di wakan mo.

¹¹ Hili igasiis kun can ci'thkina waambuhany 'kwani is ki mii mo ki a'di mido 'cu'ki uni aBaraabas mo 'te/.

¹² Dhala Bilaatus ki o uni gwo mo dok/e ki: Dhali aha/ mina miia ta ki wathi/ jin yuka um ka Malik gi 'Kwani Yahuuda/ mo?

¹³ Dhali uni cuukin kagahara mo dok/e ki: 'Koshi a'di ki cwany'cithan dhul mo.

¹⁴ Dhala Bilaatus ki thok uni gwo mo ki: Gomatinta sa/? Tonthus gi wakatinta imiikina a'di mo? Hili uni 'baar mo kumki cuuwa/ mo ki nyanye/ mo mmo/o gwo mo ki: 'Koshi a'di ki cwany'cithan dhul mo.

¹⁵ Wakan Bilaatus mmodikina a'di gwo ibwa mo mmo'teya waambuhany 'kwani ki gwo mo tani a'di ki 'cu'ki uni aBaraabas mo dhali ki a'di dorki'da Yesus ki yis bip mo tani a'di ki ciki a'di ki uni mo mmo'kosh ki cwany'cithan dhul mo be.

I/askar Miikina Yesus ka Mak mo

¹⁶ Dhali i/askar ki sus a'di mo e bwam mo ma mudhiir mo, a'di jin ta gu'b jin ca'ba a'di nycine/ mo. Dhali uni ki yuk i/askari 'baar mo ka tul 'kup mo.

¹⁷ Dhali uni ki hi'thki a'di burrinyen duk is mo jin ta jam po/ mo dhali uni ki to'd ton'kup 'pena 'de/ mo mmokar a'di i'kup mo be.

¹⁸ Dhali uni ki tel mii 'pen mo mmothe a'di me'd mo mmo/o gwo mo ki: Hay Malig gi 'Kwani Yahuuda/ mo.

¹⁹ Dhali uni ki dor a'di 'kup ki cwa mo dhali 'tak a'di manya/ i is mo dhali uni ki lunj ki jin 'kupa 'dupuni bwambori a'di mo mmowu is ka 'cesh mo.

²⁰ Dhali ki uni miiki a'di ka mak mo tani uni ki 'cu'k a'di burrinyen duk is jin ta jam po/ mo dhali uni ki hi'thki a'di burrinyem piti i is mo. Dhali uni ki sus a'di ka piye/ mo mmo'kosh ki cwany'cithan dhul mo be.

Mo gi 'Koshuwa 'Kosh ki Cwany'cithan Dhul mo

²¹ Dhali uni ki budha Simaan gi Pan Kerawaan ki 'bi'th mo a'di jin ta CoAlaksandar mo dhala Rupus mo, a'di jin yaki yampe mo, a'di jin yayi'd 'peni bampa/ mo, mmokal cwany'cithan dhul piti mo.

²² Dhali uni suski a'di mo e mo jin yuku gway ka Gulgutha mo (jin ta 'pemen gwo jin onu mo ki: mo ma simarj 'kup mo be.)

²³ Dhali uni ciki a'di yimana mura'th jin 'koshu e ki yiman cwa jin ta'da murr mo be. Hili a'di diki bu'th a'di mo be.

²⁴ Dhali uni 'koshki a'di ki cwany'cithan dhul mo dhali uni ki kwa/ burrinyem piti bwa mo e bwam uni mo mmota'k to mo gom uni mo mmopi gwo 'pen ka piye/ mo, gom to jin mina uni 'baar mo ka 'dete/ 'dete/ 'taki bu'th mo be.

²⁵ Dhali ki mo ta'da tente/ pedonon mo tani uni 'koshki a'di ki cwany'cithan dhul mo be.

²⁶ Dhali gwo jin onu apo/ a'di jin 'kwarkunu mo, a'di jin den'kunu e mo tani o'd ka: Malik gi 'Kwani Yahuuda/ mo be.

²⁷ Dhali nyakki a'di mo tani uni ki 'kosh 'kwanin 'di/ isu/ ki cwany'cithan dhul mo, jan tal 'de/ ki me'da bim poros piti mo dhali jan kamu/ ki me'da biny cam piti mo be.

²⁸ Dhali Gwo ma Arungimis jin 'kwarkunu mo thimkunu mo, a'di jin o gwo mo ki: A'di karkunu mo nyakki imandhan gwo mo.

²⁹ Dhali uni gwansan kun iikin ki iimpe mo tani uni ciki a'di gura/ mo dhali pir 'kup buni mo dhali o gwo mo ki: Ayy. /E jin mini 'taki 'kosh gu'b gi mondheleladhelel mo dhali nyan a'di ka cim kwara mo tani

³⁰ wothi/ is pini mo ma, dhali thulu/ ka 'cesh 'pena po/ cwany'cithan dhul mo.

³¹ Wakan si'da/ igasiis kun can miiki a'di ka mak mo ka rem 'kup nyakki iman'kwar to mo mmo/o gwo mo ki: A'di mishi tiya woth mo tani hili a'di molki is piti woth moyi.

³² Dhalka Kristhos jin ta'da Malik gi 'Kwani ma Israyiil thulu'd ka 'cesh shwane'dan 'pena po/ cwany'cithan dhul mo ki ana mina par e mo dhali gam gwo is mo. Dhali uni gwansan kun nyakkunu 'kosh ki a'di ki cwany'cithan dhul mo tani uni si'da/ sorki a'di mo be.

Mowu ma Yesus mo

³³ Dhali ka tente/ pu'dki'di bwan 'kup mo tani adhan mondhurumi'd pu'dki'd apo/ mony'ceshi 'baar mo ntaga tente/ ibum 'ban mo be.

³⁴ Dhali ka tente/ 'koni kwara mo tani Yesus cuuki'd ki dhan 'twa/ jin caaca mo ki: Iluwi, Iluwi, lama sabaktani, a'di jin ta 'pemen gwo jin onu ka: Arungimis pem, Arungimis pem, atinta dhalkina /e aha/ 'pen kan mo?

³⁵ Dhali unin tiya kun doshkin ki 'dishe/ cikki a'di mo dhali o gwo mo ki: Hili mo mo ma. A'di yukki'da Iliyya mo be.

³⁶ Dhali jan tal 'derj kamu/ guski'd mo dhali 'tu'da lipa/ ki yiman tom 'pa'a'd mo mmokar a'di e cwa mo dhali ciki a'di mmopi mo mmo/o gwo mo ki: Cora ma. Dhalki ana para e mo wakki/ Iliyya midi pu'du/ mo mmo'cu'k a'di ka 'cesh mo.

³⁷ Dhala Yesus cuuki'd kagahara mo dhali a'di ki ci shi/in piti jin 'ko'd mo be.

³⁸ Dhali burrinye/ jin di'd e gu'b gi mondheleladhelel mo tani a'di dherkunu bwa mo ka 'ban su/ mo 'peni bur'kup mo ntagi bum'pen mo be.

³⁹ Dhali ka mancil ma askar iss 'kwanimpa imudhe'd, a'di jin doshki'd ka karambuye/ i a'di mo tani parki a'di e mo mmoko wakan mo dhali mmo'ci shi/ in piti jin 'ko'd mo tani a'di ki o gwo mo ki: Ka jin gana/ wathi/ yansan ta Ya/ ma Arungimis mo be.

⁴⁰ Dhali up 'kokin mo mmun si'da/ mo kun hilki mo mo 'pena dhana/ mo. Uni gun 'koni bwaman uni mo tani ta iMariyam Magdaliyya mo dhala Mariyam jin ta KoYakuub mo jin ta a'di jin ta dhuru'c mo dhala Yusi mo dhala Saluuma mo be.

⁴¹ Uni gun bathki a'di nsho'k mo me'd jin dikina a'di e Pany Jaliil mo dhali mii a'di to mo. Dhali up tana ris ka ris si'da/ kun pu'dkin mo kun nyakki ii ki a'di mo e Pa Urushaliim mo be.

Mo jin Kanuwa Yesus mo

⁴² Dhali ki mom'pimpili/ pu'dki'd mo me'd jin tana a'di atee jin Thosonkunu to mo tani a'di jin ta'da tee jin twa/a/ ka cim ma pesu/ mo tani

⁴³ aYuusup gi Pa Arraama a'di jin taku mo jin ta jan tal 'de/ gi montul is buni mo, a'di ki is piti si'da/ jin corki Bampa/ ma Arungimis mo, a'di bu'thki'da du mo dhali yaa Bilaatus mo dhali dot a'di gwo mo gom bungwar is ma Yesus mo be.

⁴⁴ Dhala Bilaatus merki'd mo wakki/ a'di mididi 'taki wu ki jahanne/ kan mo. Dhali a'di ki yuka mancil ma askar iss 'kwanimpa imudhe'd mo mmodot a'di gwo mo wakki/ a'di wuki'd hila/ mo walla a'di kapki wu mo.

⁴⁵ Dhali ki a'di da/arki gwo 'pena mancil ma askar iss 'kwanimpa imudhe'd mo gom jwa jin wukina a'di mo tani a'di ki dhala Yuusup bway mo mmokal bunjwar is piti mo be.

⁴⁶ Dhali a'di yolki burrinyen dhiny e jin kanuwa kan mo dhali a'di ki thul a'di ka 'cesh mo dhali 'tham a'di is ki burrinyen dhiny e jin kanuwa kan mo dhali 'thi a'di mo e jis wosh jin 'kolkunu mo dhali 'danjal dhan wosha caaga/ mo mmomu'th 'twaman jis jwa 'twa/ mo be.

⁴⁷ Mariyam Magdaliyya dhala Mariyam jin ta KoYusi parki mo e mo, mo jin 'thikunu a'di nycine/ mo be.

16

Mompinu mo

¹ Dhali ka cima pesu/ peki'd mo tani aMariyam Magdaliyya dhala Mariyam jin ta KoYakuub mo dhala Saluuma mo uni yolki to kun kuyi mo ki kuy mo, wakan ki uni mini ii mo dhali 'koshki a'di i is mo be.

² Dhali ki mo ta mon'thamo/ ka tee jin twa/a/ ga dhas mo tani uni iikin mo e mon'kupaje mo ka tente/ sulki'd mo be.

³ Dhali uni 'kokin mo mmo/o gwo ka rem 'kup mo ki: Kaja sa/ imidi ka'cki ana wosh 'peni 'twaman jis jwa mo?

⁴ Dhali uni hilki mo 'kup ki mis mo dhali uni parki wosh e mo mmo'danjalkunu a'di ka nyan'ko'd mo haali/ a'di caaca mo be.

⁵ Dhali uni cikki bwaman jis jwa mo dhali uni parki wathin dhuruca kamu/ e mo mmoça'bki me'da bim poros mo mmohi'th burrinye/ jin ca'bki bany bany mo dhali uni merkin mo.

⁶ Dhali a'di ki o uni gwo mo ki: Dhalku/ ki mer mo. Um napkina Yesus gi Pa Naasira mo, a'di jin 'koshkunu jwa mo ki cwany'cihan dhul mo. A'di cuki mis mo be. A'di diki di imahan mo be. Hili mo mo ma, mo jin karkina uni a'di nycine/ mo.

⁷ Hili iiku/ mo dhali tor imancik a'di gwo gwo mo dhala Buterus si'da/ ki a'di mididi ya itwa/a/ ki um e Pany Jaliil mo. Dhali e mun mo tani um mini par a'di e mo me'd gwo jin torcina a'di um mo be.

⁸ Dhali uni iikin mo dhali so ka nwaça/ 'peni mon'kupaje mo haali/ mo jin deenu is mo dhali momer mo pu'dki'd apo/ uni mo be, dhali uni 'koki o gwon kamu/ tal 'de/ mo ki wathin kamu/ mo haali/ uni ko/ki is mo be.

Yesus Piki'da Mariyam Magdaliyya I/is mo

⁹ Dhali ki a'di cukunu mis mo ka'tum ka cim jin twa/a/ ka dhas yan mo tani a'di piki'da Mariyam Magdaliyya i is ntwa/a/ mo a'di jin urkina a'di aruma 'cesh thusi pesu/ ka piye/ mo be.

¹⁰ Ayim yaki'd mo dhali tor to gwansan ki uni gwansan kun nyakki 'ko ki a'di mo ki uni 'kokin mo mmo'ko ki bwan ditin mo dhali mmoko mo be.

¹¹ Hili ki uni cikki gwo ki a'di diki'd ki e mo dhali mish ma yim mo tani uni 'koki gam gwom piti is mo be.

Yesus Piki Imancik A'di Gwo Isu/ I/is mo

¹² Dhali yan'ko'd mo tani a'di piki unin sun tiya i is mo ki jamasa kamu/ mo me'd jin iikina uni ibway mo mmo/ii bampa/ mo.

¹³ Dhali uni iikin ka nyan'ko'd mo dhali tor aris to gwansan ki 'kwani 'baar mo. Hili uni 'koki gam gwom buni is mo be.

Yesus Hashki Uni kun 'Koni 'Kume'd I'ce'dka 'De/ mo

¹⁴Dhali yan'ko'd mo tani a'di ki pi uni 'kume'd i'ce'dka 'de/i is uni 'cena mo me'd jin 'kokina uni eya tharabeesa mo mmoshwa to mo. Dhali a'di ki kucur uni ki gwo mo gom gwom buni gun 'kona uni ki gam is mo dhali goma dum buni kun 'bitha'bi'th mo haali/ uni 'koki gam gwo gi uni gwansan is mo uni kun parki a'di e mo 'ko'di pim piti jin piyunu a'di mo be.

¹⁵Dhali a'di ki o uni gwo mo ki: liku/ mo e mony'ceshi 'baar mo dhali ci gwom 'borga/ eya ris 'kwani 'baar mo kun ukkunu mo.

¹⁶I/a'di jin midi gam gwo is mo dhali minu mii ki yi'de/ mo tani a'di iminu iwoth mo be. Hili a'di jin diki gam gwo is mo tani a'di minu wak mo be.

¹⁷Dhali jamas mii gwansan mini bath uni gwansan kun gam gwo is mo: Ki gway pem mo tani uni mini ura ruma 'cesh ka piye/ mo dhali uni mini wal 'twa/ ki 'twan thisa tiya mo be.

¹⁸Uni mini bu'th tasha/ mo. Dhali wakki/ uni mini pi ton tiya kun 'kon ma ti'di cine/ mo tani a'di midi diki shi/ uni is mo be. Uni mini dhu me'd buni apo/ uni gun 'ba'thkin mo, dhali uni minu waç mo be.

Yesus Shinkunu Bway Momis mo

¹⁹Dhali yan'ko'd wakan Tapa Yesus 'ko'di a'di torki gwo e uni mo tani a'di bu'thkinu mo bway momis mo dhali di'd mo mmoça'b ka bim poros ma Arungimis mo.

²⁰Dhali uni iikin mo mmoci gwo mo eya ris mo 'baar mo dhali Tapa diki'd mo mmonyakka tu'c mii ki uni mo dhali mmo'da/ki uni gwo kun cina uni sho'k mo ki jamas mii kun bathkinu mo be. Amen

Gwom 'Borga/ Isi ki Gwo ma LUUKA mo

Gwo jin Yedhuwa Thawupilus Sho'k mo

¹ Haali/ me'd 'kwani ka ris kun bu'thki gwo mo mmotul gwo 'kup mo ka bath 'pen mo, gwo jin thimkunu mo e bwam ana mo,

² jasi me'd uni kun cikunu ana mo ki uni gwansan 'peni ka muŋ'kup mo kun ta iman/o gwo ki e mo dhali imanmii gwo mo tani

³ a'di toshka/ ki a'di 'boro'd gom aha/ si'da/ mo mmobathā aris to gwansan ki 'dishe/ mo haali/ goma cim gunn isa gush mo mmo'kwar uni ka rotham po/ mo gom /e mo /e jin tana Thawupilus jin ta jim 'borga/ mo

⁴ ki /e mini mish gwoŋ gana/ mo gom gwo gi to gwansan kun torkunu /e mo be.

Mondho'th ma Yohaana jin Mii'da Mii ki Yi'de/ Torkunu Ntwa/a/ mo

⁵ Dhali ka tee ma Hirodus jin ta'da malik gi Pa Yahuudiyya mo tani agasiisa kamu/ diki'd mo jin yuku gway ka Sakariyya mo. A'di ta'da awak 'peni 'kwani ma Abiyya mo. Dhali a'di ta'd gi ashim piti 'peni i' bwa/ ma Haruun mo dhali gway ma yim yuku ka Ilisabaat mo be.

⁶ Dhali uni su/ mmontal 'de/ mo tani ta kun kar/ e mo ibwambor ma Arungimis mo mmomii gwoŋkan jin 'kwarkunu 'baar mo dhali a'di jin ona gwoŋkan gi Tapa mo ki dar gi miwak mo be.

⁷ Hili uni dar ga 'ci mo haali/ Ilisabaat a'di ta'da burum mo dhali uni su/ cakin ki yil mo be.

⁸ Dhali ki a'di di'd mo mmomiya tu'c ma gasiis ibwambor ma Arungimis mo ka wak piti 'kon atu'c mo tani

⁹ isi me'd mii ma gasiis mo tani to bitki'da po/ a'di mo, to jin bitu mo jin mina a'di ci'c e gu'b gi mondheleladhelel gi Tapa mo dhali duka 'bicajwahaar mo be.

¹⁰ Dhali awaambuhany 'kwani 'baar mo 'kokina pije/ mo mmo'tho mo ka tente/ jin dukuwa 'bicajwahaar mo be.

¹¹ Dhali aman'doyu gwo gi Tapa piki a'di i is mo mmodosh ki 'bana bim poros ma gwa'a/ jin dukuwa 'bicajwahaar mo.

¹² Dhala Sakariyya mur ma du mo mmoparkina a'di a'di e mo dhali moŋko/ is bitki'da po/ a'di mo be.

¹³ Hili aman'doyu gwo ki o a'di gwo mo ki: Dhalki is ki ko/ mo ma, Sakariyya, haala 'thom pini cikunu mo be dhali ashim pini ka Ilisabaat midi dho'th /e ya/in mo dhali gway piti mina /e iyuk ka Yohaana mo be.

¹⁴ Dhali /e mina bwa 'kuny mo dhali 'bor bwa mo be, dhali 'kwani ka ris mina bwa 'kuny mo gom mondho'th piti mo be.

¹⁵ Haali/ a'di midi eka/ ek mo mbwambori Tapa mo, dhali a'di midi diki pi yimana mura'th jin ka/u ki nah nah mo walla tompinum 'bi'thga/ mo,

dhali a'di minu 'tu'd mo ki Shi/in Dheleladhelel mo. me'd jin dikina a'di 'peni bwan kum mo be.

¹⁶ Dhali a'di midi tu'k iya/ ma Israyil ka ris mo e Tapa Arungimis buni mo be,

¹⁷ dhali a'di midi ya mbwambori a'di ki shi/in mo dhali gi mom'bi'th ma Iliyya mo,

mmotuka du gi icom ki uci mo,

dhali uni gun ushi gwo ha e mo e moyuk gi uni gun miin ka kar/e mo,

mmothoson 'kwani is mo gom Tapa mo, 'kwani kun thosonkunu mo be.

18 Dhala Sakariyya thokki'da man'doyu gwo gwo mo ki: Yan miga/ mish kata mo? Haali/ aha/ si'da/ tana wathin dhan mo dhali ashim pem si'da/ a'di ca'd ki yil mo be.

19 Dhali aman'doyu gwo ki o a'di gwo mo ki: Aha/ tana Jibra/iil, a'di jin doshki'd e bur'kus ma Arungimis mo, dhali aha/ hashkunu mo mmoci /e gwo mo dhali mmokal /e gwom 'boro'd yansan mo.

20 Dhali hili mo mo ma, /e mini ta a'diye/ mo dhali mol gwo o mo ntaga tee ki to gwansan minu pu'd mo haali/ /e diki gam gwom pem is mo, a'di jin minu thim ki mom buni mo be.

21 Dhali 'kwani 'kokin mo mmocora Sakariyya mo dhali uni merkin mo mmoṭayina a'di adiite/ mo e gu'b gi mondheleladhelel mo be.

22 Dhali ki a'di yayi'd ka pije/ mo tani a'di diki mish 'twa/ walki uni mo dhali uni nyithkin ki a'di parki tonyjan e mo e gu'b gi mondheleladhelel mo, dhali a'di ki mi jamas mi mmoṭor uni mo dhali a'di di'd ka 'diye/ mo naskina/.

23 Dhali ki mo ma cim piti jin miikina a'diya tu'c 'baarki'd mo tani a'di dokki bway pam piti mo be.

24 Dhali 'ko'da tee gwansan mo tani ashim piti ka Ilisabaat bwaaki'd mo dhali ka ppe 'kona 'kupi mudhe'd mo tani ayim bagki is piti mo mmo/o gwo mo ki:

25 Tapa a'di miid kan e aha/ mo ka tee jin hila a'di apo/ aha/ mo mmokal mowaḵ pem jin waḵu aha/ e bwaman 'kwani mo.

Mondho'th ma Yesus Tokunu Ntwa/a/ mo

26 Dhali ka ppe 'kona 'kupi pe'de/ mo tani aman'doyu gwo jin ta'da Jibra/iil mo a'di hashkunu mo 'peni Arungimis mo e 'penkuman bampa/ gi Pany Jaliil mo jin yuku gway ka Naasira mo be,

27 eny nyaran gana/ jin karkunu mo gom wathi/ jin yuku gway ka Yuusup mo 'peni gu'b ma Dawuu'd mo, dhali nyaran gana/ yan yuku gway ka Mariyam mo be.

28 Dhali a'di pu'dki'da yim mo dhali o gwo mo ki: Hayy, ayy, /en 'de/ jin gamkina 'the mo. Tapa a'di di'd e /e mo be.

29 Hili a'di yim mur ma du kagahara mo, gom gwo yan jin okunu mo, dhali kulum a'di e bwam piti mo gom monthe me'd yan midi ta atinta mo.

30 Dhali aman'doyu gwo ki o a'di yim gwo mo ki: Dhalku/ is ki ko/ mo ma, Mariyam, haali/ /e gamkina 'the 'peni Arungimis mo be.

31 Dhali hili mo mo ma. /e mini bwaa e bwam pini mo dhali dho'th ya/in mo dhali /e mini yer a'di gway ka Yesus mo be.

32 Dhali a'di midi ek mo dhali minu yuk ki Ya/ gi a'di jin Cayaa/ e ki Ca mo. Dhali Tapa Arungimis midi ci a'di akursi ma ababam piti ka Dawuu'd mo be.

33 Dhali a'di midi ta tapa apo/ gu'b ma Yakuub ki sule/ mo, dhali bampam piti midi di kan ki dar gi 'pemen mo be.

34 Dhali aMariyam thokki'da aman'doyu gwo gwo mo ki: Yan minu mish mii kata mo ki aha/ mola wathin gwaḥ kan mo?

35 Dhali aman'doyu gwo thokki'da yim gwo mo ki:

Shi/in Dheleladhelel midi yayu/ apo/ /e mo,

dhali mom'bi'th gi a'di jin Cayaa/ e ki Ca mo midi 'kam /e ka la mo be.

Wakan a'ci jin minu dho'th mo tani a'di minu yuk ki jin kogu mo,

a'di jin ta Ya/ ma Arungimis mo be.

36 Dhali hili mo mo ma, abas pini ka Ilisabaat si'da/ bwaaki'da 'ci ki yil jin can ma yim mo, dhali yansan ta'da ppe 'kupi pe'de/ mo ka yim jin yuku gway ka yima burum mo be.

³⁷ Haali/ ka Arungimis mo tani to piyi'd jin molu mii mo be.

³⁸ Dhala Mariyam o gwo mo ki: Hili mo mo ma. Aha/ tana cinjina/ nyara/ gi Tapa mo. Dhalki a'di miinu mo gom aha/ mo isi ki gwom pini mo. Dhali aman'doyu gwo yaki'd mo 'pena yim mo be.

Mariyam Butki'd, Uni ka Ilisabaat mo

³⁹ Dhali ka tee gwansan mo tani aMariyam cuki mis mo dhali ya mo ki jahanne/ mo e bampa/ gi pañ 'kuwosh mo e 'penkuman bampa/ gi Pa Yahuudiyya mo.

⁴⁰ Dhali ayim cikki gu'b ma Sakariyya mo dhali theka Ilisabaat me'd mo be.

⁴¹ Dhali ka Ilisabaat cikki monthe me'd ma Mariyam mo tani a'ci peki'd mo e bwa ma yim mo be. Dhali Ilisabaat 'tu'dkunu mo ki Shi/in Dheleladhelel mo be,

⁴² dhali ayim 'terki cuuwa/ mo ka dhan 'twa/ jin caaca mo ki: Mom'bor mii gom /e e bwaman up mo dhali mom'bor mii gom maman gi bwam pini mo!

⁴³ Dhali a'di yan cikunu aha/ mo gomata mo? ka ta'da gi Tapam pem midi 'taki yayu/ i aha/ mo?

⁴⁴ Haali/ hili mo mo ma. Ki 'twa/ jin thekina /e aha/ me'd mo pu'dki'd e bwany'cem pem mo tani a'ci peki'd mo e bwam pem mo gom monj'kuny bwa mo be.

⁴⁵ Dhali mom'bor mii goma yim, a'di jin gamki gwo is mo ki a'di minu thim mo, a'di jin okunuwa yim mo 'peni Tapa mo.

Gway ma Mariyam jin Manja A'diya Manj mo

⁴⁶ Dhala Mariyam o gwo mo ki:

Akashiram pem ekki Tapa mo,

⁴⁷ dhali shi/in pem 'kunykina bwa mo eya Arungimis jin ta'da Amanwoth pem mo,

⁴⁸ haali/ a'di ki hil monyca'b piti jin hatha nyarany cinjkinam piti 'ko'd mo.

Haali/ hili mo mo ma. 'Peni shwane/ mo tani aris 'kwani ma nyakum yil mo mini yuk aha/ gway ki a'di jin 'boru mii mo be.

⁴⁹ Haali/ a'di jin ta gi mom'bi'th mo tani miiki'da dhan to jin ekki'd e aha/ mo, dhali gway piti kogu mo be.

⁵⁰ Dhali momiimiim piti di'd apo/ uni gwansan kun ko/ a'di mo, 'peni uni gun tana nyakum yil ka nyakum yil mo be.

⁵¹ A'di tor 'bi'th piti ka bim piti mo be.

A'di kwa/ki uni gun dhu is ki ca mo e gwalal buni kun kuluma uni eya dum buni mo be.

⁵² A'di ki thul uni gun ta gi 'bi'th ka 'cesh mo 'pena kursin tapam buni mo.

Dhali a'di ki dhu uni gwansan ki ca mo kun hatha 'ko 'ko'd mo be.

⁵³ A'di ki 'tu'd uni gun 'kosha te/ mo ki tom 'boron mo,

dhali uni kun ta pa ki pa mo tani dhukina a'di 'pen bwa 'te/ mo be.

⁵⁴ A'di wo'hi cinjkinam piti ka Israyil mo,

mmoka momiimiim piti e mo be,

⁵⁵ me'd gwo jin okina a'di ibabam bana mo be,

eya Ibrahiim dhali iya/m piti ki sule/ mo.

⁵⁶ Dhala Mariyam ca'bki'd mo nyakki a'di me'da ppe 'kupi kwara mo dhali dok pam piti ka nyanj'ko'd mo be.

Mo jin Dhodhuwa Yohaani jin Mii'da Mii ki Yi'de/ mo

⁵⁷ Dhali mo pu'dki'd mo goma Ilisabaat mmodho'th mo be dhali a'di ki dhodha 'ci jin ta ya/ mo.

58 Dhali imannyak 'kom piti dhala bas piti cikki gwo ki Tapa torki dhan miim piti e a'di yim mo dhali uni 'kunykina bwa mo nyakka yim mo be.

59 Dhali ka cim 'koni pekwarra mo tani uni pu'dkin mo mmo'citha/ 'ciya munyal yis mo, dhali uni mini 'taki yer a'di gway ka Sakariyya 'ko'di gway gi com mo,

60 hili kum piti o gwo mo ki: Yisa wakana. A'di minu yuk gway ka Yohaana mo be.

61 Dhali uni o a'di yim gwo mo ki: Abas pininj kamu/ yisa yuku ki gway gi wakan mo be.

62 Dhali uni ci a'di jamas mii mo gom com mo mmo/o ki a'di minu yuk kata mo?

63 Dhali a'di dotki uni cwam ba'd is mo jin gwaju ka 'dinjilan dham mo mmo'kwar to mo dhali a'di 'kwarki'd ki: Gway piti ka Yohaana mo be. Dhali uni 'baar mo merkin mo be.

64 Dhali ki jahanne/ 'twam piti ka'dki'd mo dhala le'd piti 'cukki'd mo dhali a'di oki gwo mo mmo'bora Arungimis bwa i is mo be.

65 Dhali monko/ is pu'dki'd apowa ris imannyak 'kom buni mo. Dhali aris to gwansan 'kokunu mo mmo/o ki lala'th mo e bampa/ 'baar mo gi pan 'kuwosh gi Pa Yahuudiyya mo be.

66 Dhali aris uni kun cikki uni mo tani dhuki uni eya dum buni mo dhali o gwo mo ki: A'ci yan midi ta ata mo? Haali/ me'd gi Tapa di'd e a'di mo be.

Gwo ma Sakariyya jin Ona A'di Is mo

67 Dhali ababam piti ka Sakariyya 'tu'dkunu mo ki Shi/in Dheleladhelel mo dhali o gwo is mo mmo/o ki:

68 Mom'bor mii e Tapa Arungimis gi 'Kwani ma Israyiil mo, haali/ a'di yayi'd mo mmobut mo dhali mmowan 'kwanim piti 'ba/ mo be.

69 Dhali a'di ki 'de'k ce gi mowoth gom ana mo, e gu'b gi cinjinam piti ka Dawuu'd mo.

70 Me'd gwo jin okina a'di ki 'twa/ gi imanci gwo ma Arungimis kadhamo/ mo kun kogu mo 'peni kadhamo/ mo,

71 ki ana minu woth mo 'peni 'kup bana mo, dhali 'peni me'd ga ris uni gun shi/i ana i e mo,

72 mmo'baar momiimiim piti gun onu is mo gom ibabam bana mo, dhali mmoka gwom piti e jin gamu me'd jin kogu mo.

73 Gwo yan jin ona a'di is jin thula a'di ababam bana ka Ibrahiim me'da po/ mo,

74 mmoçi ana mony'cuk mo 'peni me'd gi uni gun ta 'kup ki ana mo, ki ana mina mii a'di to mo ki dar gi monko/ is mo be,

75 e mo gi ko/uwa ko/ mo dhali e mo ma kar/e mo ibwambori a'di mo ka cimi 'baar mo gi mon'koki/em bana mo.

76 Dhali /e jin tana 'ci mo, /e minu yuk ka manci gwo ma Arungimis jin Cayaa/ e ki Ca mo,

haali/ /e mini ya ibwambori Tapa mo dhali thoson a'di bway mo be,

77 mmoçi mo jin mishu mowoth bana mo e 'kwanim piti mo, dhali e modhal miinthus buni 'pen mo be.

78 Ka du gi momiimii ma Arungimis bana mo, ka tee mini kush mo mo apo/ ana 'peni momis mo,

79 mmoçi monkush e uni gwansan gun 'kokin mo e mondhurumi'd mo dhali eya la gi mowu mo,

mmoshu sho'k bana bway mo e bway gi monku'th is mo be.

⁸⁰ Dhali a'ci ca'd mo dhali a'di 'bitha is mo e shi/in mo dhali a'di diki'd e mombwaasho mo ntaga tee jin toru a'di eya tente/ e 'Kwani ma Israyiil mo be.

2

Mondho'th ma Yesus mo be

¹ Dhali ka cim gwansan tani gwonkan hashu mo 'pena Ughusthus Kaysar ki aris 'kwaniny'ceshi 'baar mo minu mii 'kwar gway buni mo.

² A'di ta mo gi 'kwaru gway jin twa/a/ jin miikunu ka Kiriniyuus ta'da mudhiir gi Pan Suriyya mo be.

³ Dhali uni 'baar mo iiki bway pu buninj gana/ mo ki she/ ki she/ mo mmo'kwar gway buni mo be.

⁴ Dhala Yuusup yaki'd mo si'da/ 'peni Pany Jaliil mo. A'di yaki'd mo 'peni Pa Naasira em Bampa/ Yahuudiyya mo em Pan Dawuu'd jin yuku ka Beetlaham si'da/ haali/ a'di ta 'kwani gi gu'b ma Dawuu'd mo dhali awak ma Dawuu'd mo be.

⁵ A'di yaki'd mo mmo'kwar gway ki is piti mo uni ka Mariyam jin ta a'di jin onu a'di ki bu'th mo, dhali a'di si'da/ cana bwa mo be.

⁶ Dhali ki uni 'kokin mo imun mo tani acim pu'dki'd mo jin mina a'di dho'th mo.

⁷ Dhali ayim dho'thki'da bwa nyaram piti jin ta ya/ mo. Dhali a'di ki 'tam a'di is ki burriinye/ dhali 'thi a'di eya kak bip mo haali/ mo piyi'd gom uni e gu'b yilkina/ mo be.

Imanhil Ka'bal dhali Iman'doyu Gwo mo

⁸ Dhali e bampa/ yansan ki mon'thiny mo tani imanhil ka'bal 'kona pije/ mmohil ka'bal buni mo be.

⁹ Dhala man'doyu gwo gi Tapa piki uni i is mo dhali monyca gi Tapa twaki mo mo e isi uni mo dhali uni ko/kina ko/ is kagahara mo be.

¹⁰ Dhala man'doyu gwo ki o uni gwo mo ki: Dhalku/ is ki ko/ mo ma, haali/ aha/ guyina um gwom 'boro'd dhali gwo mmo'bor um bwa kagahara mo jin midi di goma ris 'kwani 'baar mo.

¹¹ Haali/ ka tee yansan mo tani Amanwoth jin ta Tapa Kristhos a'di dho'thkunu mo gom um e Pan Dawuu'd mo be.

¹² Dhali ki jamas mii yan mo tani a'di mina umi nyith a'di mo be. Um mini gama na/ 'tamkunu is ki burriinye/ mo dhali mmo/isha kak bip mo be.

¹³ Dhali ise/ iman'doyu gwon tiya ka ris ris 'peni momis nyakki 'ko ka man'doyu gwo mo be. Uni manjana Arungimis mo dhali o gwo mo ki:

¹⁴ Monyca ma Arungimis isi momis mo, dhali monku'th is e mony'cesh e bwan 'kwani gun 'bora a'di bwa i is mo.

¹⁵ Dhali ki iman'doyu gwo dokkin mo 'peni uni imomis ka nyan'ko'd mo tani imanhil ka'bal o gwo ka rem 'kup ki: Dhalki ana iina mo shwane/ e Pam Beetlaham dhali par to yan e jin yayi'd jin tora Tapa ana mo.

¹⁶ Dhali uni iikin mo ise/ tani gamkina Mariyam dhala Yuusup dhali ara na/ mmo/isha kak bip mo be.

¹⁷ Dhali ki uni parki a'di e mo tani uni tori gwo jin cikina uni mo goma 'ci yan mo be.

¹⁸ Dhala ris 'kwani gun cikki a'di mo tani meren ki gwo gwansan gun ona imanhil ka'bal uni mo be.

¹⁹ Hila Mariyam a'di di'd mo mmodhu gwo gwansan mo mmokulum uni eya dum piti mo be.

²⁰ Dhali imanhil ka'bal dokkin ka nyan'ko'd mo mmokara Arumgimis ki ca mo, dhali manji a'di mo goma ris to gun cikina uni mo dhali kun mishkina uni mo me'd ji gi onu uni mo be.

Mo jin Cinuwa Yesus ka Arumgimis e Gu'b gi Mondheleladhelel mo

²¹ Dhali ki mo thimi'd mo ka cim pekwaro mo tani ki a'di 'cithkunuwa munyal yis piti mo tani a'di yerkuu gway ka Yesus mo, gway jin cikin ma man'doyu gwo mo ntwa/a/ ki a'di 'kokunu mo mmobwaa mo e bwa mo be.

²² Dhali ki mo pu'dki'd mo gom mondhelel is buni mo isi ki gwonkan ma Musa jin cinu mo tani uni suski a'di mo e Pa Urushaliim mo mmoci a'di ki Tapa mo

²³ (me'd gwo jin 'kwarkunu mo e gwonkan gi Tapa jin cinu mo ki: Aris unin gwath ka 'dete/ 'dete/ kun ka'dki bwan dho'th mo tani uni minu yuk gway ki uni kun dhelelin mo gom Tapa mo.)

²⁴ Dhali uni suski a'di mo si'da/ mmomii to mmo'citha/ basa 'cesh mo isi me'd gwo jin okina gwonkan gi Tapa jin cinu mo ki bimbir gurko/ su/ walla gurko/ kun bapani su/ mo be.

²⁵ Dhali wathi/ diki'd mo e Pa Urushaliim jin yuku gway ka Simaan dhali wathi/ yan ta a'din kar/e mo dhali ta a'din gayiin mo a'di jin corki momalas gi 'Kwani ma Israyiil mo dhali Shi/in Dheleladhelel diki'da po/ a'di mo be.

²⁶ Dhali a'di torkunu a'di eya tente/ mo ki Shi/in Dheleladhelel mo ki a'di midi 'taki diki wu mo ntwa/a/ ki a'di diki par Tapa jin ta'da Kristhos e mo be.

²⁷ Dhali a'di shi/inkunu mo ki Shi/in mo tani a'di pu'dki'd mo e gu'b gi mondheleladhelel mo. Dhali ki com dhali kum suskina 'ci jin ta'da Yesus mo tani mmomii a'di me'd isi mii gi gwonkan jin cinu mo tani

²⁸ a'di bu'th a'di mo 'ko'da bim piti mo dhali 'bora Arumgimis bwa i is mo dhali o gwo mo ki:

²⁹ Tapa, dhalki cinkinam pini ya'd mo ki monku'th is mo ma, isi ki gwom pini mo,

³⁰ haali/em pem parki bway gi mowoth pini e mo

³¹ a'di jin thosonkina /e mo e bun'kus gi 'kwani 'baar mo,

³² monkush yan mmo'cee eya tente/ gom 'kwani kun 'koki ta 'Kwani Yahuuda/ mo

dhali gom monyca gom 'Kwanim pini ma Israyiil mo.

³³ Dhali com dhali kum uni merkin mo gom gwo yan jin okina a'di gom a'di mo.

³⁴ Dhala Simaan 'bor uni mii mo dhali owa Mariyam jin ta kum gwo mo ki: Hili mo mo ma, a'ci yan karkunu mo gom ku gi ta'kkin mo dhali mmocu 'Kwani ma Israyiil ka ris mo,

dhali gom jamas mii caan jin okunu gwo mo apo/ a'di mo tani

³⁵ (dhali gandala turga/ midi suka kashiram pini mo si'da/)

ki gwo kun kulumu ka ris eya du mo minu tor eya tente/ mo.

³⁶ Dhali ayima 'bomin kamu/ diki'd mo jin ta'da Hanna mo. A'di ta 'bwa/ ma Panu/iil mo 'pena wak ma Ashiir mo. Ayim a'di caki'd ki yil kagahara mo dhali a'di ca'bki'd mo nyakka kathim piti mo ki yil pesu/ mo 'peni yil jin dina a'di ki nyaran gana/ mo

³⁷ dhala yim wun ma kathim piti mo dhali a'di di'd kan ntagi yil issi* donon i'ce'dka donon apo/ mo be. Dhala yim diki ya mo 'peni gu'b gi mondheleladhelel mo mmoluja luj mo ki monga/ to mo dhali mmo'tho mo ki mon'thiny mo dhali ki montee ilu/ mo be.

* 2:37 arba wa tamaniin

³⁸ Dhali ki mo warki'd mo ka tente/ yan mo tani ayim pu'dki'd mo dhali 'bora Arumgimis bwa i is mo dhali mmo/o gwo mo gom a'di gom uni 'baar mo kun 'kokin mo mmohil gom mowan 'ba/ gi Pa Urushaliim mo.

Mondok jin Doka Uni ka Nyar'ko'd e Pa Naasira mo

³⁹ Dhali ki uni 'baarkina ris to mii mo me'd isi ki gwonkan gi Tapa jin cinu mo tani uni dokkin ka nyar'ko'd mo e Pany Jaliil mo e 'penkuman bampam bunij gana/ mo e Pa Naasira mo.

⁴⁰ Dhali a'ci ca'd mo dhali 'bidhu is mo dhali 'tu'du mo ki moyuk mo. Dhala 'the ma Arumgimis ca'bki'da po/ a'di mo be.

Jesus jin Ta Ari Washan Diki'd e Gu'b gi Mondheleladhelel mo be.

⁴¹ Dhali com dhali kum uni iikin isa yempa/ e Pa Urushaliim mo ki yil mo gom Mompe'kupanyolos mo be.

⁴² Dhali ki a'di 'kona yili 'kume'd i'ce'dka su/ mo tani uni iikin mo me'd isi mii jin miinu mo be.

⁴³ Dhali ki Mompe'kupanyolos 'baarki'd mo tani me'd jin dokkina uni bway pa mo tani a'Yesus jin ta'da 'ci a'di ca'bki'd mo n'ko'di uni mo e Pa Urushaliim mo. Com dhali kum 'koki mish a'di mo,

⁴⁴ hili uni toshkin ki a'di midi di i bwanj 'kwani mo tani uni iikin ka tee iiyan mo dhali uni n'apki a'di mo e bwanj 'kwani ma bas buni mo dhali 'kwani kun misha uni mo.

⁴⁵ Dhali ki uni 'koki gam a'di mo tani uni dokkin ka nyar'ko'd mo e Pa Urushaliim mo dhali n'ap a'di mo.

⁴⁶ 'Ko'da cim kwara mo tani uni gamki a'di mo e gu'b gi mondheleladhelel mo mmo'ca'b mo e bwam imantor gwo mo mmocik gwo 'peni uni mo dhali mmodot uni gwondot mo.

⁴⁷ Dhali aris uni kun cik a'di mo tani uni merkin mo gom a'di mo mmomisha a'di gwo 'ban mo dhali gwonthok piti mo be.

⁴⁸ Dhali ki uni parki a'di e mo tani uni merkin mo dhali ata'dam piti ki o a'di gwo mo ki: Ya/um, atinta miina /e aman wakan mo? Hili mo mo ma. Babam pini dhali aha/, aman n'apkina /e ki mo/anan is mo be.

⁴⁹ Dhali a'di ki o uni gwo mo ki: Atinta n'apkina um aha/ mo? A/'kona um ki mish mo mowa ki aha/ mina mii di e gu'b ma Babam pem mo?

⁵⁰ Dhali uni mol gwom piti 'ban jin ona a'di uni mo be.

⁵¹ Dhali a'di ya'd ka lungu'b nyakki uni mo dhali pu'd mo e Pa Naasira mo dhali a'di haki gwom buni e mo, dhali ata'dam piti a'di kulumki'da ris to gwansan eya dum piti mo be.

⁵² Dhala Yesus maru moyuk is mo dhali a'di 'tuntilkina bunjwar is mo dhali ki yil mo, dhali ka 'the ma Arumgimis mo dhali ki jinj 'kwani mo be.

3

Gwo jin Cin ma Yohaana jin Ta'da Manmiiya Mii ki Yi'de/ mo

¹ Dhali ki yil ta'da karpa'c mo tani jin takin ma Thibariyuus Kaysar amalik mo tani Punthi Bilaatus ta'da mudhiir gi Pa Yahuudiyya mo dhala Hirodus ta'da ra/iis rub gi Pany Jaliil mo dhala akam piti ka Pilibbus jin ta'da ra/iis rub gi Pa Ithuriyya mo dhala aTarakuniitis mo dhali Lisaniyyus ta'da ra/iis rub gi Pa Abiliyya mo be.

² Dhali ki mo jin tan ma Hannaan dhala Kayaapa igasiis kun can mo tani Gwo ma Arumgimis pu'dki'd mo eya Yohaana mo a'di jin ta ya/ ma Sakariyya em bwaasho mo be.

³ Dhali a'di ya'd mo e mo 'baar mo ka kukul is mo e Pa Uurdun mo mmoçi gwo gom mo jin minu miiya mii ki yi'de/ mo dhali mmorica du is mo gom gwo gi miinthus jin minu gwam 'kwani mo.

⁴ Me'd gwo jin 'kwarkunu mo e bwanj gwo ma Ishaya jin ta'da mançi gwo ma Arungimis kadhamo/ mo ki:

'Twa/ gi jan tal 'de/ mmocuu gwo em bwaasho ki:

Thosoni bway gi Tapa mo ma,

kari bway piti ka kar/e mo.

⁵ Aris embul wosh mo ka 'dete/ 'dete/ mo tani minu 'tu'd mo

dhali aris wosha turga/ ka 'dete/ 'dete/ mo dhali aris wosh minu dhu ki gwa'di 'baar mo,

dhali bwaya kolga/ minu dhu ka kar/e mo,

dhali bway kun kōkorakōkor mo tani mini 'ticiila/ 'ticiil mo be,

⁶ dhali aris bunjwar isi 'baar mo mini par bway mowoth ma Arungimis e mo be.

⁷ Dhali a'di o gwo wakan si'da/ eya waambuhany 'kwani mo kun pu'dkin mo e mo jin minu miiya mii ki yi'de/ ki a'di mo ki: Um ucin tasha/ mo. Kaja rum um ki gwo mo mmoso mo 'pena nyor jin midi pu'du/ mo?

⁸ Dhodhi maman gana/ mo ma, kun mini ha me'd ki mo jin rijuwa du is mo dhali dhalku/ ki tel gwo 'pen mo mmo/o e is bum ki: Aman tana ga Ibrahiim jin ta'da babam bam mo, haali/ aha/ tora um gwo mo ka: Arungimis mishi wosh gwansan war mo ki uci goma Ibrahiim mo.

⁹ Me'd gi shwane/ athurumany a'di 'thikunu mo hila/ eya birman cwa mo, ka ris cwa 'baar mo ka 'dete/ 'dete/ wakan kun 'koki dho'th mamana 'borga/ mo tani minu jep ka 'cesh mo dhali minu ta'k mo e o'd mo be.

¹⁰ Dhala waambuhany 'kwani dotki a'di gwo mo ki: Haali/ a'di wakan mo tani aman mina miiya tinta mo?

¹¹ Dhali a'di thokki uni gwo mo ki: A'di jin ta gi burrinyen 'thami su/ mo tani dhalki a'di kwa/ a'di bwa mo ki a'di jin dara'd mo. Dhali a'di jin ta'd gi tonte/ mo tani dhalki a'di mii'd wakan si'da/ mo ma.

¹² Dhali imantera thulpa/ si'da/ pu'dkin mo e mo jin miinuwa mii ki yi'de/ mo ki uni minu mii mo be dhali uni o a'di gwo mo ki: Mantor gwo, aman mina miiya tinta mo?

¹³ Dhali a'di ki thok uni gwo mo ki: Dhalku/ to ki ter mmo'ce'da po/ mo dok/ e, jasi a'di jin torunu um mo.

¹⁴ Dhali i/askar si'da/ dotki a'di gwo mo si'da/ ki: Aman mina miiya tinta mo? Dhali a'di ki thok uni gwo mo ki: Dhalku/ to ki dil 'peni jan kamun 'de/ ki mombujur mo walla ki gwonthus jin 'ce'du 'te/ apo/ mo dhali kapi mo ma ki to kun gama um ki ji miina um to mo.

¹⁵ Me'd jin 'kokina 'kwani mo mmocora cor mo dhali aris 'kwani dotki gwo mo eya dum buni mo isi gwo goma Yohaana mo wakki/ a'di wari ita'da Kristhos mo.

¹⁶ Yohaana thokki uni 'baar mo gwo mo ki: Aha/ miikina um ki yi'de/ mo tani hili a'di jin ca'd ki aha/ ki canj gana/ mo midi yayu/ mo be. Dhali wakana ppam piti mo tani aha/ dinaki ha me'd mo mmo'cuç uni mo. A'di midi mii um ki Shi/in Dheleladhelel mo dhali ki o'd mo be.

¹⁷ Dhali ton 'dash toj kar shem piti di'd mme'd mo mmodhelel ja'dam piti mo dhali mmodul emen is mo e themes piti mo hila 'pi'b mina a'di ci'th ki o'd jin moli us mo be.

¹⁸ Wakan a'di malaski'da malas ka ris mo mmoçi gwom 'boro'd ki 'kwani mo be.

¹⁹ Hila Hirodus jin ta'da ra/iis rub mo tani a'di jin nyo/kina a'di ki gwo mo goma Hirodiyya, ash ma kam piti mo, dhali goma ris tonthus kun miikin ma Hirodus mo si'da,

²⁰ mmomarkina a'di uni isi 'baar mo tani a'di ki kara Yohaana sijin mo be.

Mo jin Miinuwa Yesus ki Yi'de/ mo

²¹ Dhali ka ris 'kwani 'baar mo 'kokin mo mmomii ki yi'de/ mo tani dhala Yesus si'da/ ki a'di miikunu ki yi'de/ mo tani dhali di'd mmo'tho mo tani momis ka'dki'd mo be

²² dhali Shi/in Dheleladhelel thulki'di a'di mo mmobu'th jama gi burjwar mo mmowa e ki gurko/ mo, dhali 'twa/ yayi'd 'peni momis mo mmo/o gwo mo ki: /e ta Ya/m pem jin enka/ mo. Ki /e mo tani aha/ 'bora bwa mo be.

Mo jin Beledhu Gwo mo goma Yesus mo be

²³ Dhala Yesus ki a'di telki mii ma tu'c piti 'pen mo tani a'di 'kona yili iss 'de/ i'ce'dka 'kume'd mo. Mmotana a'di ya/ ma Yuusup mo (me'd jin toshu kan mo) jin ta ya/ ma Hali mo

²⁴ dhali jin ta ya/ ma Matthaat mo dhali jin ta ya/ ma Lawi mo dhali jin ta ya/ ma Melki mo dhali jin ta ya/ ma Yanna mo dhali jin ta ya/ ma Yuusup mo,

²⁵ dhali jin ta ya/ ma Mattaathiya mo dhali jin ta ya/ ma Aamuus mo dhali jin ta ya/ ma Nahuum mo dhali jin ta ya/ ma Hasli mo dhali jin ta ya/ ma Najaay mo,

²⁶ dhali jin ta ya/ ma Ma/aath mo dhali jin ta ya/ ma Mattaathiya mo dhali jin ta ya/ ma Shim/i mo dhali jin ta ya/ ma Yuusup mo dhali jin ta ya/ ma Yahuusa mo,

²⁷ dhali jin ta ya/ ma Yuhanna mo dhali jin ta ya/ ma Risa mo, dhali jin ta ya/ ma Sarubbaabil mo dhali jin ta ya/ ma Sha/alti/iil mo dhali jin ta ya/ ma Niri mo,

²⁸ dhali jin ta ya/ ma Melki mo dhali jin ta ya/ ma Addi mo dhali jin ta ya/ ma Gusam mo dhali jin ta ya/ ma Elmudaam mo dhali jin ta ya/ ma Iir mo,

²⁹ dhali jin ta ya/ ma Yuusi mo dhali jin ta ya/ ma Eli/aasar mo dhali jin ta ya/ ma Yuriim mo dhali jin ta ya/ ma Matthaat mo dhali jin ta ya/ ma Lawi mo,

³⁰ dhali jin ta ya/ ma Shim/uun mo dhali jin ta ya/ ma Yahuusa mo dhali jin ta ya/ ma Yuusup mo dhali jin ta ya/ ma Yunaan mo dhali jin ta ya/ ma Eliyagiim mo,

³¹ dhali jin ta ya/ ma Malaya mo dhali jin ta ya/ ma Menaan mo dhali jin ta ya/ ma Mattatha mo dhali jin ta ya/ ma Nathaan mo dhali jin ta ya/ ma Dawuu'd mo,

³² dhali jin ta ya/ ma Yassa mo dhali jin ta ya/ ma Ubiid mo dhali jin ta ya/ ma Bu/as mo dhali jin ta ya/ ma Salmuun mo dhali jin ta ya/ ma Nahshuun mo,

³³ dhali jin ta ya/ ma Aminadaab mo dhali jin ta ya/ ma Araam mo dhali jin ta ya/ ma Hasruun mo dhali jin ta ya/ ma Paaris mo dhali jin ta ya/ ma Yahuusa mo,

³⁴ dhali jin ta ya/ ma Yakuub mo dhali jin ta ya/ ma Is/hak mo dhali jin ta ya/ ma Ibrahiim mo dhali jin ta ya/ ma Taarah mo dhali jin ta ya/ ma Nahur mo,

³⁵ dhali jin ta ya/ ma Saruuj mo dhali jin ta ya/ ma Ra/u mo dhali jin ta ya/ ma Paalaj mo dhali jin ta ya/ ma Aabir mo dhali jin ta ya/ ma Shaalah mo,

³⁶ dhali jin ta ya/ ma Giinaan mo dhali jin ta ya/ ma Arpakshaad mo dhali jin ta ya/ ma Saam mo dhali jin ta ya/ ma Nuuh mo dhali jin ta ya/ ma Laamak mo,

³⁷ dhali jin ta ya/ ma Maṭushaalaaḥ mo dhali jin ta ya/ ma Aknuuk mo dhali jin ta ya/ ma Yaarid mo dhali jin ta ya/ ma Mahlal/iil mo dhali jin ta ya/ ma Giinaan mo,

³⁸ dhali jin ta ya/ ma Anuush mo dhali jin ta ya/ ma Shiṭ mo dhali jin ta ya/ ma Aadam mo dhali jin ta ya/ ma Arumgimis mo be.

4

Mo gi Paluwa Yesus mo

¹ Dhala Yesus 'tu'dkunu mo ki Shi/in Dheleladhelel mo dhali dokki'd ka nyan'ko'd mo 'peni Yi'deṅ Kūmma/ Uurdun mo dhali a'di ura Shi/in mo ka piḗ/ mo.

² Dhali a'di diki'd em bwaasho ka cim ma issu/ mo dhali palkina tapa ma ruma 'cesh mo be. Dhali a'di diki shwa toṅ kamu/ mo eya cim gwansan mo. Dhali ka cim 'baarkin mo tani a'di 'koshkina te/ mo be.

³ Dhali tapa ma ruma 'cesh ki o a'di gwo mo ki: Waḱki/ /e ta Ya/ ma Arumgimis mo tani kani wosh yansan gwo mo ma, mmowar ki maa mo.

⁴ Dhala Yesus thoḱ a'di gwo mo ki: A'di 'kwarkunu mo ki: Wathi/ midi diki ca'b mo ki e mo gom jasi tonte/ 'te/ mo.

⁵ Dhali tapa ma ruma 'cesh ki sus a'di ki mis mo dhali toṅ a'di aris 'penkuman bampa/ gi mony'cesh mo, ki e 'kamu'thki'd mo hila/ mo tani

⁶ dhali a'di ki o a'di gwo mo ki: E /e mo tani aha/ mina ci /e aris moshirr gwansani 'baar mo dhali monycam buni mo. Haali/ uni cikunu aha/ mo dhali aha/ cikina uni gwansan kun oyaa/ bwa mo be.

⁷ Waḱki/ /e mini luṅ aha/ kan mo tani uni 'baar mo mini ta kum pini mo be.

⁸ Dhala Yesus thoḱ a'di gwo mo ki: A'di 'kwarkunu mo be ki:

/E mini luṅ Tapa Arumgimis pini mo,

dhali a'di a'di 'de/ mo tani a'di imina /e mmii to mo be.

⁹ Dhali a'di ki sus a'di mo e Pa Urushaliim mo dhali a'di ki kar a'di e 'kupan gu'b gi mondheleladhelel mo dhali o a'di gwo mo ki: Waḱki/ /e ta Ya/ ma Arumgimis mo tani biṭi is pini ka 'cesh mo ma 'peni mahan mo,

¹⁰ haali/ a'di 'kwarkunu mo ki:

A'di midi hash iman'doyu gwom piti mo mmokan gwo gom /e mo dhali mmoji /e mo,

¹¹ dhali,

E me'd buni mo tani uni mini 'de'k /e mo,

isi ciki/ ki /e mina sho'k pini diki toṅosh apo/ wosh mo be.

¹² Dhala Yesus thoḱki a'di gwo mo ki: A'di okunu mo ki: /e mini dhalku/ ki pal Tapa Arumgimis pini mo.

¹³ Dhali ki tapa ma ruma 'cesh 'baarki mompal piti mo tani a'di yaki'd mo 'peni a'di mo ntagi embula 'borga/ mo be.

Yesus Telki Mii ma Tu'c Piti 'Pen mo

¹⁴ Dhala Yesus dokki'd mo ka nyan'ko'd ki mom'bi'th gi Shi/in mo e Pany Jaliil mo dhali gwo gom a'di yaki'd ki lala'th mo eya ris bampa/ 'baar mo kun 'kon ki jin' kam mo be.

¹⁵ Dhali a'di toṅki gwo mo e gu'b gi montul is buni mo dhali a'di karkin ma ris 'kwani 'baar ki ca mo.

Yesus A'di Waḱkunu mo e Pa Naasira mo

¹⁶ Dhali a'di pu'dki'd mo e Pa Naasira mo e mo jin thipkunu a'di mo. Dhali a'di yaki'd mo e gu'b jin tulu is mo, me'd miim piti jin mukina a'di mo, ka cim ma pesu/ mo. Dhali a'di doshki'd ki mis mo dhali deṅ gwo e mo.

¹⁷ Dhali a'di cikunu awarka/ gi gwo ma manci gwo ma Arumgimis kadhamo/ jin ta'da Ishaya mo. A'di ka'dki'da warka/ mo dhali gam mo jin 'kwarkunu gwo nycine/ mo ki:

¹⁸ Shi/in gi Tapa a'di diki'da po/ aha/ mo,

haali/ a'di 'koshki aha/ is ki monyca mo mmoci gwom 'boro'd mo gom uni gun hatha'ko'd mo.

A'di hashki aha/ mo mmobah eya tente/ mo mo jin 'cuku uni gwansan kun tana habuus mo,

dhali mmoka'd uni e mo uni gun tana ja'da/ mo mmomish mo mo,

dhali mmodhu uni gwansan ki 'kus mo, uni gun 'cwarkunu mo be,

¹⁹ mmobah eya tente/ yil jin kwanyu mo gom Tapa mo.

²⁰ Dhali a'di mu'thki'da warka/ mo dhali ci a'di ka nyan'ko'd mo e a'di jin doshki'd mo mmomii to mo dhali a'di ca'bki'da 'cesh mo. Dhali aris e gi 'kwani kun 'kon e gu'b gi montul is mo tani dhorothkina po/ a'di mo be.

²¹ Dhali a'di telki gwo 'pen mo dhali mmo/o uni gwo mo ki: Shwane/ Gwo ma Arumgimis yan jin 'kwarkunu mo tani a'di thinkunu mo e bwany'cem bum mo mmocik mo be.

²² Dhali aris 'kwani 'baar mo o gwo ki 'bore/ gom a'di mo dhali mer mo gom gwo ma 'the kun pikin mo 'peni 'twam piti mo. Dhali uni o gwo mo ki: A'di diki ta Ya/ ma Yuusup mo 'taa?

²³ Dhali a'di ki thok uni gwo mo ki: Ka jin gana/ um mini thok aha/ gwo mo 'peni gwon gwar ka 'bi'th/e ki: /e jin tana hakiim mo tani waci is pini mo ma. Gwo jin cika aman mo gom miim pini jin miikina /e mo e Pan Kapranahuum mo tani miyyi a'di si'da/ mmahan mo e bampam piniy gana/ mo ma.

²⁴ Dhali a'di thok uni gwo mo ki: Ka jin gana/ aha/ ona um gwo mo ki: amanci gwo ma Arumgimis kadhamon kamu/ yisa mishu bu'th mo e bampam pitinj gana/ mo.

²⁵ Dhali hili e gwon gana/ mo tani aha/ tora um gwo mo ki up ka ris kun wuna ikath 'kokin mo ka ris e 'Kwani ma Israyiil mo ka tee ma Iliyya mo, ki momis dar ga sho'k mo ki yili kwara mo dhali ka ppe 'kupi pe'de/ mo dhali adhan te/ pu'dki'd mo apo/ mony'ceshi 'baar mo.

²⁶ Dhali Iliyya yisa hashkunu mo e jan tal 'den kamu/ 'peni uni mo yisa, hili jasi e a'di jin di'd e Pan Sarpa mo e Bampa/ gi Pan Saydaa/ mo eya 'bom jin wun ma kath mo be.

²⁷ Dhali e mun mo tani 'kwani 'kon ka ris kun 'kosha monthus mo e 'Kwani ma Israyiil mo ka tee jin tan ma Aliisha amanci gwo ma Arumgimis kadhamo/ mo dhali jan 'den kamu/ 'peni uni yisa dhelelki'd mo yisa, hili jasa Nimaan gi Pan Suriyya mo be.

²⁸ Dhali ki uni cikki gwo yansan mo tani aris 'kwani gi gu'b gi montul isi 'baar mo 'tu'dkunu mo ka nyor mo be.

²⁹ Dhali uni cuki mis mo dhali kar a'di 'pen ka pije/ mo 'peni 'penkuman bampa/ mo dhali sus a'di mo eya liman 'twa/ wosh e mo jin nyan'kunu 'penkuman pam buni mo, ki uni mini 'taki bel a'di ka 'cesh ka lungu'b mo be.

³⁰ Hili mmoyakina a'di ki yampe mo e bwam uni mo tani a'di yaki'd mo.

Wathi/ jin Bu'thkin ma Rum Thus jin Nyo'o'd mo

³¹ Dhali a'di pu'dki'd ka lungu'b mo e Pan Kapranahuum mo e 'penkuman pa gi Pany Jaliil mo. Dhali a'di ciki uni gwo mo ka cima pesu/ mo be.

³² Dhali uni merkin gom gwony cim piti jin cina a'di ki moshirr mo be.

³³ Dhali e gu'b montul isi mun mo tani wathi/ diki'd jin ta'd ga rum thus jin nyo'o'd mo. Dhali a'di cuu gwo ka dhan 'twa/ jin caaca ki:

³⁴ Ahh. /e mini mii aman kata, Yesus gi Pa Naasira? /e pu'dkin mo mmo'ce'd am sho'k mo 'taa? Aha/ misha ki /e tana aja. /e ta jin 'de/ ma Arungimis jin kogu mo.

³⁵ Hila Yesus kucurki a'di ki gwo mo mmo/o gwo mo ki: Ca'bi ki shwam mo, dhali piyi mo ma 'peni a'di mo. Dhali ka rum thus jin nyo/o'd bitki a'di a'cesh mo e bwam uni mo tani a'di piki'd ka pije/ mo 'peni bwam a'di mo. A'di diki mii to shiyi'da kamu/ gom a'di mo.

³⁶ Dhali aris uni 'baar mo merkin mo dhali dot gwo ka rem 'kup mo ki: Gwo yan ta'da atinta mo? Haali/ ki moshirr mo dhali ki mom'bi'th mo tani a'di kanki'da rum thus kun nyo/on gwo mo dhali uni iikin ka pije/ mo be.

³⁷ Dhali gwo gom a'di yaki'd ka pije/ eya ris mo 'baar mo e bampa/ kun 'kon ki jin 'kam mo be.

Mo jin Waç ma Yesus Amar ma Simaan jin Ta'da 'Bomi mo

³⁸ Dhali a'di cuki mis mo dhali dhal gu'b gi montul is 'pen mo dhali ciç mo e gu'b ma Simaan mo. Dhali amar ma Simaan a'di 'ba'thki'd ki is jin 'batha ba'th mo dhali uni ñapki a'di goma yim mo be.

³⁹ Dhali a'di doshki'd e 'kup ma yim mo dhali kucur 'ba'th ki gwo mo, dhali 'ba'th dhalki'da yim 'pen mo. Dhali ki jahanne/ ayim cuki mis mo dhali miiki uni to mo be.

Mo jin Waç ma Yesus 'Kwani ka Ris Mom'pimpili/ mo

⁴⁰ Dhali ka tente/ yaki jis mo tani aris uni gwansan kun tan gi tiya kun 'bathan ki 'ba'th ki she/ ki she/ mo tani uni kalki uni mo e a'di mo dhali a'di karki me'd piti apowa ris uni 'baar mo ka 'dete/ 'dete/ mo dhali waç uni mo be.

⁴¹ Wakan si'da/ arum thus pikin ka pije/ mo 'peni bwam uni ka ris mo mmocuu gwo mo ki: /e ta Ya/ ma Arungimis mo. Dhali hili a'di kucurki uni ki gwo mo dhali a'di diki dhal uni bway mo mmowal 'twa/ mo haali/ uni mishkin ki a'di ta'da Kristhos mo be.

Yesus A'di Yaki'd mo Mmotan Bampa/ mo Mmoçi Gwo mo

⁴² Dhali ki mo ta montee mo tani a'di yaki'd mo dhali ya mo e mo jin dar ki 'kwani mo. Dhali 'kwani ñap a'di mo dhali pu'd mo e a'di mo dhali uni ki non a'di mmoya mo 'peni uni mo be.

⁴³ Hili a'di o uni gwo mo ki: Aha/ mina mii çi gwom 'borod' gom Bampa/ ma Arungimis mo gom 'penkuman bampam tiya mo si'da/ haali/ aha/ hashkunu mo gom 'pemen yan mo be.

⁴⁴ Dhali a'di çiki gwo mo e gu'b gi montul is gi 'Kwani Yahuudiyya mo be.

5

Mo gi Budhu Dhan To Yi'de/ ka Ris mo

¹ Ki 'kwani yap a'di ki is mo mmocik gwo ma Arungimis mo tani a'di doshki'd ki mis mo eya al yi'de/ gi Pa Jannisaaraç mo.

² Dhali a'di parki'da kur yi'de/ e isu/ mo eya al mo. Hili imancesh to yi'de/ uni iikin ka pije/ mo 'peni uni mo dhali uni 'kokin mo mmolama 'thim buni mo be.

³ Dhali a'di seki'di bwam ma kur 'de/ mo a'di jin ta jim ma Simaan mo. A'di ki dot a'di mo mmokar a'di 'pen ka pije/ mo ari is 'pena gap mo. Dhali a'di ca'bki'da 'cesh mo dhali tor 'kwani gwo mo 'peni bwam ma kur mo be.

⁴ Dhali ki a'di dakki gwo tor mo tani a'di ki owa Simaan gwo mo ki: Shorka kur e moj'kulu'd mo ma dhali dhala 'thim pini me'd ka 'cesh mo mmobu'th to mo.

⁵ Dhala Simaan thok a'di gwo mo ki: Tapa, aman miikina tu'c ki mon'thiny ilu/ 'baar mo tani dhali am 'konaki bu'th ton' kamu/ mo be. Dhali hili ki gwom pini mo tani aha/ mina dhala 'thi/ me'd ka 'cesh mo be.

⁶ Dhali ki uni miiki a'di yansan mo tani uni mushki to yi'de/ kun tana ris ka ris kagahara mo, dhali a'thim buni 'kokin mo mmodher bwa mo,

⁷ dhali uni wukki uni e ki me'd mo uni gun miina tu'c eya kura kamu/ mo mmo/iyyu/ mo dhali mmowoth uni mo. Dhali uni pu'dkin mo dhali uni 'tu'dkina kuri su/ mo. Wakan akur murkina yi'de/ ilos mo be.

⁸ Hili ka Simaan Buterus parki a'di e mo tani a'di bitki'd e 'kupa'dupun ma Yesus mo mmo/o gwo mo ki: Yaku/ mo 'peni aha/ mo ma haali/ aha/ tana wathi/ gi miinthus mo, ayy Tapa.

⁹ Haali/ a'di merki'd mo dhali aris uni gwahan kun nyak 'ko ki a'di mo mmobu'th to yi'de/ kun kalkina uni mo.

¹⁰ Dhali wakan si'da/ aYakuub diki'd mo dhala Yohaana mo uni gun ta iya/ ma Sabadi uni gun nyak to mii ka Simaan mo. Dhala Yesus ki owa Simaan gwo mo ki: Dhalku/ is ki ko/ mo ma. 'Peni shwane/ /e mini ta amancesh 'kwani ki gwo mo be.

¹¹ Dhali ki uni kalkina kur buni ka pije/ mo eya 'cesh mo tani uni dhalkina ris tom buni 'peni 'baar mo dhali bath a'di nsho'k mo be.

Yesus A'di Dhelelki Wathi/ jin 'Kosha Monthus Is mo

¹² Ki a'di diki'd mo e 'pen'kuman bampa' kamu/ mo tani wathin kamu/ diki'di mun jin tashkina monthus mo. Dhali ki a'di parki'da Yesus e mo tani a'di bitki bwam/em piti a'cesh mo dhali nap a'di ki gwo mo ki: Tapa, wakki/ /e ona bwa mo tani /e mishi aha/ dhelel mo be.

¹³ Dhali a'di he'thki me'd piti mo dhali ta a'di is ki me'd mo mmo/o gwo mo ki: Aha/ ona bwa mo be. Dheleli mo ma. Dhali ki jahanne/ monthus dhalki a'di 'pen mo be.

¹⁴ Dhali a'di kanki a'di gwo mo ki dhalku/ ki tor wathin 'de'j kamu/ gwo mo. Hili yayi mo ma dhali tor is pini ka gasiis mo dhali ci to mo gom bungwar is pini jin dhelelki'd mo me'd gwonkan jin kankin ma Musa mo haali/ a'di ta gwo jin nyo/a 'kwani mo be.

¹⁵ Dhali hili gwo yaki'd mo kagahara ka pije/ ki lala'th isi gom a'di mo, dhali awaambuhany 'kwani ka ris tulki is mo mmocik gwo 'peni a'di mo dhali ki uni minu wag mo 'peni 'ba'th buni ki she/ ki she/ mo.

¹⁶ Hili a'di sere'thki'd bway bwaasho mo dhali 'tho mo be.

Yesus A'di Waçki Wathi/ jin Mutta/ Is Is mo

¹⁷ Dhali 'peni bwam ma cim 'de/ gwansan mo tani me'd jin cikina a'di gwo mo tani 'Kwani Parisiyyin 'kokin mo dhali imantor gwonkan jin cinu mo 'kokin ki 'dishe/ mo, uni gun pu'dkin mo 'peni aris bampa/ 'baar mo ka 'dete/ 'dete/ mo 'peni Pany Jalil mo dhali 'peni Pa Yahuudiyya mo dhali 'peni Pa Urushaliim mo dhali mom'bi'th gi Tapa diki'da po/ a'di mo mmowaça wag mo be.

¹⁸ Dhali hili mo mo ma, 'kwani 'kokin mo mmohan wathin kamu/ ka ci i e mo, a'di jin mutta/ is mo. Dhali uni napki bway mo mmoçal a'di bway bwan gu'b mo dhali mmo'thi a'di mbwambor ma Yesus mo tani

¹⁹ hili uni 'koki gam bway mo mmoçal a'di mo haali/ abuhany 'kwani caaca mo tani uni seki 'kungu'b mo dhali uni ki thul a'di ka 'cesh ka cim piti i e mo ki embul shu'd e 'kungu'b mo eya galany 'kwani mbwambor ma Yesus mo.

²⁰ Dhali ki a'di parki mongam gwo is buni e mo tani a'di o uni gwo mo ki: Wathi/, miinthus pini dhalkunu /e 'pen mo be.

21 Dhali iman'kwar to dhali 'Kwani Parisiyiin telki gwo 'pen mo mmodot gwo mo ki: Wathi/ yan ta'da ja sa/ jin walki gwo sor kan mo? Kaja a'di mishi dhal 'kwani miinthus buni 'pen mo? Hili jasi Arungimis a'di 'de/ mo be.

22 Ka Yesus nyithki'd e gwondot buni mo tani a'di thokki uni gwo mo ki: Atinta idotkina um gwo eya dum bum kan mo?

23 Mii jana i'ka'da mii mo, mmo/o gwo mo ki: Miinthus pini dhalkunu /e 'pen mo, walla mmo/o ki: Cuyi mis mo dhali ya ki sho'k mo?

24 Hili ki um mini mish mo mo ki Ya/ gi 'Kwani ta gi moshirr mo e mony'cesh mo mmogwam miinthus gi 'kwani mo be - a'di ki o wathi/ jin mutta/ is gwo mo ki: Aha/ ona /e ki: Cuyi mis mo ma dhali 'deka cim pini dhali yayi bway pa mo.

25 Dhali ki jahanne/ a'di cuki mis mo mbwambori uni mo dhali a'di ki bu'th a'di jin ishkina a'di 'ko'di cine/ mo dhali ya bway pa mo mmokara Arungimis ki ca mo be.

26 Dhali momer bu'th uni 'baar mo dhali uni karkina Arungimis ki ca mo dhali uni 'tu'dkunu mo ki monko/ is mo mmo/o gwo mo ki: Ana mishkina to gun daka uli is mo shwane/.

Yesus Yukka'da Lawi mo

27 'Ko'di mii yansan mo tani a'di yaki'd ka pije/ mo dhali para mantera thulpa/ e mo. Gway piti yuku ka Lawi mo. A'di ca' bki'd mo e mo jin tera a'diya thulpa/ mo. Dhali a'di ki o a'di gwo mo ki: Bathi aha/ m'pen mo ma.

28 Dhali a'di dhalki'da aris tom piti 'peni 'baar mo dhali cu mis mo dhali bath a'di isho'k mo be.

29 Dhali Lawi ki miya dhana yuk caaca gom a'di e gu'b piti mo be. Dhali a'di nyakki ca'b ki imantera thulpa/ ka ris mo dhali kun tiya si'da/ kun nyakki 'kowa tharabeesa nyakki uni mo be.

30 Dhali 'Kwani Parisiyiin dhali iman'kwar tom buni miikina gumgum apo/ imancik a'di gwo mo mmo/o gwo mo ki: Atinta shwana /e to nyakki 'kwani gun ta imantera thulpa/ mo dhali nyakki 'kwani gun ta imanmii miinthus kan mo?

31 Dhala Yesus thokki uni gwo mo ki: Uni gwansan kun 'bora is mo tani uni mini mii 'koki mii ta ga hakiim mo, hili uni gwansan kun 'ba'thkin mo be.

32 Aha/ dinaki yayu/ mo mmoyuk 'kwani gun mii miinkar/ e mo hili mmoyuk uni gun mii miinthus mo mmorica du is mo be.

Gwondot jin Dotu mo gom To jin Ga/u mo

33 Dhali uni thok a'di gwo mo ki: Imancika Yohaana gwo uni ga/i to mo me'd ka ris mo dhali uni 'thokin mo dhali wakan miina imancik 'Kwani Parisiyiin gwo mo si'da/. Hili kun pini uni shwaki to mo dhali pi to mo.

34 Dhala Yesus ki thok uni gwo mo ki: Mina umi dhu yilkina/ kun yuku mo e momiimash ga/ to mo ka yiha/ ki wathinya'ba' di'd e bwam uni mo 'taa?

35 Atee midi pu'du/ mo ki wathinya'ba' susu mo ka pije/ 'peni uni mo tani dhali yan'ko'd uni ki ga/ to mo ka tee yansan mo be.

36 A'di ki tor uni gwo mo ki gwom 'bi'th/e si'da/ ki: Wathin 'den kamu/ diki dher burrinyen this mo dhali 'dap a'di apo/ burrinyen dhamo/ mo. Wakki/ a'di mii'd kan mo tani a'di midi dher jin this bwa mo dhali sharkin burrinyen this midi diki gam me'd ki jin dhamo/ mo be.

37 Dhali wathin 'den kamu/ si'da/ diki kar yimana mura'th this apo/ yimana mura'th kucanja dhamo/ mo. Wakki/ a'di mii'd kan mo tani yimana mura'th this midi 'twak kucan/ i e mo dhali a'di midi gaca sho mo dhali kucan minu 'ce'd sho'k mo be.

38 Hili yimana mura'th this minu mii kar mo e kucan/ this mo be.

³⁹ Dhali wathin kamu/ yisa di'da jin ona bwa mmopi yimana mura'th this mo 'ko'di a'di ki pi jin dhamo/ mo, haali/ a'di o gwo mo ki: Jin dhamo/ a'di 'bora'bor mo be.

6

Imancik Gwo Uni 'Ce'dki Pos ka Cim ma Pesu/ mo be

¹ Ka cim ma pesu/ mo tani ki a'di yaki'd ki tur mo e bwam bunto mo tani imancik a'di gwo uni 'ce'dki to mo dhali uni ki 'ka emen pos bunyana tiya mo mmomu/ uni ki me'd buni mo.

² Hili 'Kwani Parisiyina tiya o gwo mo ki: Atinta imiina um a'di jin nona gwonkan ma cim ma pesu/ kan mo?

³ Dhala Yesus thok uni gwo mo ki: 'Kona um ki denj gwo ma Dawuu'd e mo 'taa? Ki a'di 'kosha te/ mo tani a'di dhali uni gwansan kun nyakki 'ko ki a'di mo tani

⁴ a'di cikki gu'b ma Arungimis mo dhali bu'th maa gi bun'kus ma Arungimis mo dhali shwa a'di mo, a'di jin diki ta gwonkan gom maa gom 'kwanin tiya mo hili jasi gom igasiis uni ishwa a'di uni 'cena mo be. Dhali a'di ki ci uni gwansan gun nyakki 'ko ki a'di mo be.

⁵ Dhali a'di ki o uni gwo mo ki: Ya/ gi 'Kwani a'di ta Tapa ka cim ma pesu/ mo be.

Wathi/jin Kutha Me'd Gun'kuru/ mo be

⁶ Dhali ka cim ma pesu kamu/ mo tani ki a'di cikki gu'b gi montul is buni mo tani dhali tor gwo mo tani wathin kamu/ diki'd mmun jin kutha me'da bim poros piti gun'kuru/ mo.

⁷ Dhali iman'kwar to dhali 'Kwani Parisiyin timki a'di mo mmopar e mo wakki/ a'di mido waça waç ka cim ma pesu/ mo. Wakan ki uni mini 'taki gam bway mo mmo'ce'd a'di gwo apo/ mo be.

⁸ Hili a'di mishki gwom buni kun kuluma uni ibwa mo dhali a'di ki o wathi/ jin kutha me'd gun'kuru/ gwo mo ki: Yayu/ mo ma, dhali doshi imahan mo. Dhali a'di cu mis mo dhali dosh mmattaan mo be.

⁹ Dhali Yesus ki o uni gwo mo ki: Aha/ do'a um gwo mo, a'di diki ta gwonkan ka cim ma pesu/ mmomii miim 'boro'd mo 'taa? walla mmomii tonthus mo? walla mmowotha/ wothi kar ki e mo? walla mmo'ce'da 'ce'd sho'k mo?

¹⁰ Dhali a'di 'karki uni 'baar mo ki e mo dhali o a'di gwo mo ki: Hethi me'd pini mo ma. Dhali a'di miiki a'di mo wakan dhali me'd piti 'borki'd mo be.

¹¹ Hili uni 'tu'dkunu mo ka cinthar mo dhali uni o gwo ka rem 'kup gom to jin mina uni 'taki miyya Yesus mo be.

Yesus Kwanyki Unin 'Kume'd I'ce'dka Su/ mo

¹² Dhali ka tee gwansan mo tani a'di yaki'd mo e mon'kuwosh mo dhali 'tho mo. Dhali ki mon'thinyi 'baar mo tani a'di rashki 'tho mo eya Arungimis mo be.

¹³ Dhali ki mo ta montee mo tani a'di yukki imancik a'di gwo mo dhali kwany uni 'peni bwam unin 'kume'd i'ce'dka su/ mo uni gun yukkina a'di gway ki uni gun dhunu ki she/ mo:

¹⁴ Simaan jin yuka a'di gway ka Buterus mo, dhala Andaraawus jin ta'da kam piti mo, dhala Yakuub mo dhala Yohaana mo dhala Pilibbus mo dhala Bartulamaawus mo

¹⁵ dhala Matta mo dhala Tuuma mo dhala Yakuub jin ta ya/ ma Halpa mo, dhala Simaan a'di jin yuku gway ka El Ghayuur mo,

¹⁶ dhala Yahuusa jin ta ya/ ma Yakuub mo dhala Yahuusa Iskariyuuti mo a'di jin warki'd ka man'cith a'di is ki gwo mo be.

Yesus Miiki Dhan To jin Caaca goma Waambuhany 'Kwani mo

17 Dhali a'di thulki'd ka lungu'b mo nyakki uni mo dhali dosh e momba'da'd mo nyakka waambuhany 'kwani kun cik a'di gwo mo dhali abuhany 'kwani ka ris caaca 'peni Pa Yahuudiyya mo dhali Pa Urushaliim mo dhali bampa/ kun 'kon e yana gap gi Pan Sur mo dhali e Pan Saydaa/ mo. Uni pu'dkin mo mmocik gwo 'peni a'di mo ki uni minu waç mo 'peni 'ba'th kun 'koshki uni mo be.

18 Dhali uni gwansan kun 'kokunu mo mmoto'c bwa ka rum thus kun nyo/ on mo tani uni waçunu mo be.

19 Dhali awaambuhany 'kwani ñapki a'di mo mmota a'di is ki me'd mo haali/ mom'bi'th yaki'd mo 'peni a'di mo dhali a'di waçki uni 'baar mo be.

Mom'bor Mii dhala Wayyi mo

20 Dhali a'di 'de'kki em piti ki mis mo apo/ imancik a'di gwo mo dhali o gwo mo ki:

Mom'bor mii gom um gun hatha'ko'd mo haali/ 'penkuman bampam bum jin tana um mo tani a'di ta ji ma Arungimis mo be.

21 Mom'bor mii gom um gun 'kosha te/ shwane/ mo haali/ um minu kap mo be.

Mom'bor mii gom um gun gwokin mo shwane/ haali/ um mini pe'th mo be.

22 Mom'bor mii gom um ki 'kwani shi/i um i e mo dhali ki uni mini kwa'th um mo dhali wak um mo dhali ta'k gway bum mo me'd tonthus gom gway gi Ya/ gi 'Kwani mo.

23 'Kunyi bwa mo ma ka tee caan mo dhali iyyi i mis mo gom bwam 'borga/ mo haali/ hili mo mo ma, adhan tom bum kun ish kumma/ mo tani uni 'kon mo e momis mo be, haali/ wakan miikina ibabam buni mo gom imanci gwo ma Arungimis kadhamo/ mo be.

24 Hili wayyi e um mo kun ta pa ki pa mo haali/ um bu'thki momalas bum mo.

25 Wayyi e um kun 'tu'du/ mo shwane/ haali/ um mina te/ i'kosh mo.

Wayyi e um mo kun pe'thkin mo shwane/ haali/ um mini ko mo ki kony jabu'th mo mmomiiya cinthar mo.

26 Wayyi e um mo, ka ris 'kwani 'baar mo mini o gwom 'boro'd gom um mo haali/ wakan miikina ibabam buni mo si'da/ gom imanci gwonthus mo be.

Mo/en gom Uni gun Ta 'Kup mo

27 Hili aha/ ona um gwo mo um gun cik gwo mo ki: Eni uni gwansan kun ta 'kup ki um mo ma. Miyyi ki 'bore/ gom uni gwansan kun shi/i um i e mo.

28 'Bori uni gwansan mii mo ma kun jee um mo. 'Thoyi gom uni gwansan kun sorki um mo ma.

29 E a'di jin dori /e mo e 'peshe/ mo tani tu'kki a'di 'pesheñ kamu/ si'da/ mo, dhali 'peni a'di jin gu /e burrinyem po/ mo tani dhalku/ ki non a'di ki burrinyem bwaman si'da/ mo.

30 Cika ris 'kwani 'baar mo ka 'dete/ 'dete/ to mo ma kun dotki to 'peni /e mo dhali 'peni a'di jin kalki tom pini mo tani dhalku/ ki dot uni ka nyan'ko'd mo dok/e.

31 Dhali me'd jin ona bwa um mo jin mina 'kwani mii to ki 'bore/ gom um mo tani, miyyi a'di wakan si'da/ mo ma gom uni mo.

32 Wakki/ um eni uni gwansan kun eni um mo tani um minu o gwo mañ kata mo 'te/? Haali/ me'd uni gwansan kun miiki miinthus mo tani uni enki uni gwansan kun enki uni mo be.

³³ Dhali wakki/ um miin ki 'bore/ gom uni gwansan kun mii ki 'bore/ gom um mo tani um minu o gwo maŋ kata mo 'te/? Haali/ me'd imanmii miinthus mo uni mii a'di jin nyakka'd kan mo be.

³⁴ Dhali wakki/ um wan to e ki 'kwani gwansan mo tani 'peni uni kun tana uma 'teŋ kape/ mo mmobu'th to mo tani um minu o gwo maŋ kata mo 'te/? Me'd imanmii miinthus mo uni wanki to e ki imanmii miinthus mo tani uni ki bu'th a'di jin nyaka she/ kan dok/e mo.

³⁵ Hili eni uni gwansan kun ta 'kup ki um mo ma dhali miiyi ki 'bore/ gom uni mo dhali wani to e mo mmo'koki cor toŋ kamu/ mmodoku/ um ka nyar'ko'd mo, dhali tom bum kun ish kumma/ mini eka/ ek mo dhali um mini ta iya/ gi a'di jin Cayaa/ e ki Ca mo, haali/ a'di mii'd ki mo/en gom uni gwansan kun dar ga nnyuca/ mo dhali kun tana ham 'kus ka ham 'kus mo.

³⁶ Wari ki imanmiimii mo ma, me'da Babam bum a'di ta'da manmiimii mo be.

Mmodwall kun Tiya Gwo mo

³⁷ Dhalku/ ki ciŋitha ciŋi'th mo ma dhali um minu 'koki ciŋi'th si'da/ mo. Dhalka waŋ ki waŋ mo ma dhali um minu 'koki waŋ mo be. Dhalki markin 'kwani 'pen mo ma dhali um minu dhal markin 'pen mo be.

³⁸ Ciyi to mo ma dhali a'di minu ci um mo be, tombar tom 'boro'd jin shomu is mo tani uni shekemkini montal 'de/ mo mmo'tu'd mo mmogača 'cesh mo dhali uni minu dhu 'ko'da 'dupun bum mo. Haali/ to jin bara um mmoči mo tani mini ta tom bum kun baru um ka nyar'ko'd mo be.

³⁹ A'di si'da/ ki tor uni gwo ki gwom 'bi'th/e mo mmo/o gwo mo ki: Mina wathiny ja'da/ mish sus wathiny ja'da/ mo 'taa? Mina uni su/ 'koki ta'k mo e bwany jis mo 'taa?

⁴⁰ Amancik gwo yisa ica'd ka mantor a'di gwo mo yisa hili aris 'kwani 'baar mo ka 'dete/ 'dete/ ki uni bu'thki gwontori 'baar mo tani uni mina e wa ka mantor uni gwo mo be.

⁴¹ Atinta ihilkina /e businyan to i e ma kam pini mo, ihili /e diki hil aka'dum jin di'd e em pininj gana/ mo?

⁴² Walla atinta imina /e i/owa kan gwo mo ki: Akam pema, dhalki aha/ guna /e businyan to caan jin di /e i e mo? ki /e ki is pini diki hila ka'dum caan jin di /e i em pininj gana/ mo. /e he'k e yan, /e mini mii buka ka'dum 'peni em pininj gana/ ntwa/a/ mo dhali yan'ko'd /e mini mish hil mo mo ki 'bore/, mmogu businyan to caan jin di'da kam pini i e mo be.

Aris Cwa Uni Mishu ki Maman Buni mo be

⁴³ Haali/ cwam 'boro'da kamu/ yisa di'da jin dhothi maman kun shi/ashi/ mo, walla wakan si'da/ cwa shigga/ mol maman dho'th kun 'kunya'kunya mo be.

⁴⁴ Haali/ aris cwa 'baar mo ka 'dete/ 'dete/ mo uni mishu ki maman buninj gana/ mo. Haali/ mamana pu/ 'konuki ho mo 'pena 'de/ mo walla amura'th si'da/ 'konuki ho mo 'pena buyy mo be.

⁴⁵ Wathim 'boro'd jin ish to kumma/ jin 'boro'd eya dum piti mo tani wagaski tom 'boro'd mo dhali wathin thus jin isha tonthus kumma/ mo eya du mo tani a'di wagaski tonthus mo, haali/ 'peni mo jin isha to ka enthus eya du mo tani 'twa/ a'di iciki gwo ka pije/ mo be.

Moŋka'b jin Ka'bu Isu/ mo be

⁴⁶ Atinta yuka um aha/ ki Tapa, Tapa mo? dhali 'koki mii to gun toraka/ um mo?

⁴⁷ Aris 'kwani 'baar mo ka 'dete/ 'dete/ kun iiyini aha/ mo dhali cik gwom pem mo dhali mii uni mo tani aha/ mina tor um gwo a'di jin wana e cikise/ mo be.

⁴⁸ A'di wana e ki wathi/ jin nyan̄ki gu'b mo, a'di ki cwany jis mo dhali a'di ki kar moŋka'b apo/ wosh mo dhali ka dhana gannu/ yi'de/ cuki mis mo tani dhali ki yi'de/ gački'da po/ gu'b mo tani dhali a'di mol a'di yiŋin is mo haali/ a'di nyan̄kunu ki nyan̄ gana/ mo be.

⁴⁹ Hili a'di jin cik gwom mo dhali diki mii uni mo tani a'di wana e ki wathi/ jin nyan̄ gu'ba 'cesh 'te/ ki dar gi moŋka'b mo dhali ki yi'de/ gački'd mo tani dhali ki jahanne/ a'di biŋki'd mo dhali dhana barr caan jin shinu is mo e gu'b caan mo tani caaca mo be.

7

Ciŋkina/ ma Mancil ma Askar Iss 'Kwanim Pa Imudhe'd jin Waçkunu mo

¹ Ko'di a'di 'baarki'da ris gwom piti jin okina a'di mo e bwany'ceŋ 'kwani kun cik gwom mo tani a'di cički'd mo e Paŋ Kapranahuum mo.

² Dhala mancil ma askar iss 'kwanimpa imudhe'd mo a'di ta'd gi ciŋkina/ jin kara a'di ki jin̄ ŋa/ mo tani a'di 'ba'thki'd mo dhali 'disha 'twa/ mmowu mo be.

³ Dhali ki a'di cički gwo goma Yesus mo tani a'di hashki a'di 'kwanin̄ gwanyjaka/ gi 'Kwani Yahuuda/ mo mmodot a'di mo mmoyayu/ mo dhali mmowaç ciŋkinam piti mo be.

⁴ Dhali ki uni pu'dkina Yesus mo tani uni ŋapki a'di mo mmodi'b a'di is ki gwo mo mmo/o gwo mo ki: A'di ha me'd ki/e mini mii to yansan gom a'di mo be

⁵ haali/ a'di enki kal bana mo dhali a'di nyan̄ki ana gu'b gi montul is bana mo be.

⁶ Dhala Yesus yaki'd mo nyakki uni mo. Ki a'di diki si'd pa is mo naskina/ tani amancil ma askar iss 'kwanimpa imudhe'd hashki imugum piti e a'di mo mmo/o a'di gwo mo ki: Tapa, dhalku/ ki mur is pini mo ma haali/ aha/ tana ji gi ha me'd mo yisa jin mina /e yayu/ eya galgin gu'b pem mo.

⁷ Wakan aha/ dinaki tosh ki aha/ tana ji gi ha me'd mo mmoyayu/ i /e mo. Hili oyi gwo mo ma dhali dhalki ciŋkinam pem minu waç mo.

⁸ Haali/ aha/ tana wathi/ jin karkunu 'ko'd e moshirr mo dhali i/askar 'koni me'd pem mo dhali aha/ okina jan 'den kamu/ gwo mo ki: Yaku/ mo ma tani, dhali a'di yaki'd mo be, dhali e jan kamu/ ki: Yayu/ mo ma tani, dhali a'di yaki'd mo be. Dhali e ciŋkinam pem mo tani ki: Miiyi to yansan mo ma tani, dhali a'di miiki a'di mo be.

⁹ Ka Yesus cikki gwo yansan mo tani a'di merki'd mo gom a'di mo dhali a'di ki tuka bor mo dhali owa waambuhany 'kwani gwo mo kun bathi a'di nsho'k mo ki: Aha/ tora um gwo mo ki aha/ dinaki gam jan 'den kamu/ e 'Kwani ma Israyiil jin ta'd gi moŋgam gwo is jin wakansan mo be.

¹⁰ Dhali uni gwansan kun hashkunu mo tani uni dokki bway pa mo ka nyan̄'ko'd mo tani uni gamki ciŋkina/ 'borkina is mo be.

Yesus 'De'kki Ya/ ma 'Bom jin Wun ma Kaŋhim Piti mo e Pa Nayiin mo

¹¹ Yan'ko'd ki 'dishe/ mo tani a'di yaki'd mo e 'peŋkuman bampa/ jin yuku ka Naayiin mo dhali nyakki imancik a'di gwo mo dhali awaambuhany 'kwani caaca kagahara mo nyakki ii ki a'di mo be.

¹² Ki a'di 'dishki 'twaŋkala goŋ 'peŋkuman bampa/ is mo tani hili mo mo ma, wathin kamu/ jin wuki'd mo a'di kalkunu ka pije/ mo a'di ta jasi ya/ tal 'den gana/ jin di'di kum mo dhala yim a'di wun ma kaŋh mo. Dhali adhana buhany 'kwani caaca mo 'peni 'peŋkuman bampa/ nyakki 'ko ka yim mo be.

13 Dhali ki Tapa parki'da yim e mo tani a'di hilki'da hil ka 'thime/ apowa yim mo dhali owa yim gwo mo ki: Dhalku/ ki ko mo ma.

14 Dhali a'di pu'dki'd mo dhali ta aciny jwa is ki me'd mo dhali uni gun hankina ci mo tani doshkin naskina/ mo. Dhali a'di ki o gwo mo ki: Wathin dhuru'c, aha/ ona /e gwo mo ki: Cuyi mis mo ma.

15 Dhali wathi/ jin wuki'd mo tani ca'bki'd ki mis mo be dhali a'di telki gwo 'pen mo mmowal 'twa/ mo. Dhali a'di ki ci a'di ki kum mo be.

16 Dhali monko/ is bu'th uni 'baar mo dhali uni karkina Arumgimis ki ca mo mmo/o gwo mo ki: Adhana manci gwo ma Arumgimis a'di cukunu mo e bwam ana mo! Dhali, Arumgimis a'di butki'd e 'kwanim piti mo be!

17 Dhali gwo yansan gom a'di mo tani a'di yaki'd ki lala'th mo e bampa/ gi 'Kwani Yahuudiyya 'baar mo dhali eya ris bampa/ kun 'kon ka kukul is mo be.

Imanhashu mo 'Pena Yohaana mo jin Ta'da Manmiiya Mii ki Yi'de/ mo

18 Dhali imancika Yohaana gwo uni tori a'di gwo mo goma ris to gwansan mo be.

19 Dhala Yohaana yukki imancik gwom piti isu/ mo mmohash uni mo e Tapa mo mmo/o gwo mo ki: A/e ta a'di jin midi yayu/ mo 'taa? Walla aman mina hil jan kamu/ mo?

20 Dhali ki 'kwani pu'dkin mo e a'di mo tani uni o a'di gwo mo ki: Yohaana jin ta'da manmiiya mii ki yi'de/ mo tani a'di hashki am i /e mo mmo/o gwo mo ki: A/e ta a'di jin midi pu'du/ mo 'taa? walla aman mina hil jan kamu/ mo?

21 Dhali e mo caan mo tani a'di wacki 'kwani ka ris mo kun 'kosha 'ba'th mo dhali kun doru ki isa nyor mo dhali ka rum thus kun nyo/on mo dhali 'kwaniny ja'da/ ka ris wothkina a'di mo mmomish mo be.

22 Dhali a'di ki thok uni gwo mo ki: Iiku/ mo ma dhali tora Yohaana gwo mo gom to kun parkina um e mo dhali cik mo be ki 'kwani kun tana ja'da/ mo bu'thki momish mom buni mo dhali 'kwani kun ta jwol mo tani iin ki sho'k mo dhali uni gun 'kosha monthus mo tani dhelelunu is mo be dhali uni kun tana 'diye/ mo tani cikki gwo mo dhali uni gun wukin mo tani cukunu mis mo dhali uni kun hatha'ko'd mo tani tanki gwom 'boro'd jin cikunu uni mo be.

23 Dhali mom'bor mii gom a'di jin diki gam to jin kol a'di mo e aha/ mo be.

24 Ki 'kwani kun hash ma Yohaana iikin mo tani a'di telki gwo 'pen mo mmo/ owa waambuhany 'kwani gwo mo isi gwo goma Yohaana mo ki: Atinta i/iikina um ka pije/ mo e mombwaasho mo mmohil mo? Apil jin yikinkina 'tham is mo 'taa?

25 Atinta i/iikina um ka pije/ mo mmopar e mo? Wathi/ jin hithi burrinye/ jin na'bula/ na'bul mo 'taa? Hili mo mo ma uni gwansan kun 'kokin mo mmohi'th burrinyeny jaro/ jaro/ mo dhali mmo'ko 'kom 'penkapan mo tani uni 'kon mo e gu'b ma malik mo be.

26 Atinta i/ iikina um ka pije/ mo mmopar e mo? Amanci gwo ma Arumgimis kadhama/ mo 'taa? Nye, aha/ tora um gwo mo dhali amanbola manci gwo ma Arumgimis kadhama/ e mo.

27 A'di yansan ta a'di jin 'kwarkunu gwo mo ki:

Hili mo mo ma. Aha/ hashkina agum bway pem ntwa/a/ e jis/em pini mo, a'di jin midi thoson bway pini ntwa/a/ gom /e mo be.

28 Aha/ tora um gwo mo ki: E bwaman uni gwansan kun dhodhu mo e bwam up mo tani jan tal 'denj kamu/ yisa di'da jin ca'd jin bolki'da Yohaana e mo hili isi ciki/ a'di jin pisi'd mo e Bampa/ ma Arumgimis mo tani a'di i/ekki'd ki a'di mo be.

29 (Ki uni ciġki gwo gwansan mo tani aris 'kwani 'baar mo dhali imantera thulpa/ karkina Arumgimis ki a'di jin ta jan ħar/e mo mmomiikunu uni ki yi'de/ mo ki mii yi'de/ jin miikin ma Yohaana mo be.

30 Hili 'Kwani Parisiyyin dhali imanmisha jo'd gwo mo tani uni ki puu gwo jin di'da Arumgimis mbwa mo gom is buni mo mmo'koki miia mii ki yi'de/ ki a'di mo be.)

31 'Kwani ma nyakum yil gwansan mo tani miga/ dhu uni ka par 'ban kata mo? Uni wana e kata mo?

32 Uni wana e ki uci gun 'kon mo e mo ma suug mo dhali yuka yuk ka rem 'kup mo ki:

Am pina athele/ gom um mo dhali um 'koki sa mo be.

Am gwona mo mmomiya cinthar mo tani dhali um 'koki ko ki kony jwa mo.

33 Haala Yohaana jin ta'da manmii ki yi'de/ a'di pu'dki'd mo mmodiki shwa tonte/ mo dhali mmodiki pi yimana mura'th jin ka/u ki nah nah mo dhali um o gwo mo ki: A'di ta'd ga ruma 'cesh mo be.

34 Ya/ gi 'Kwani a'di pu'dki'd mo dhali shwa to mo dhali pi to mo dhali um o gwo mo ki: Hili mo mo ma. Amanshwana te/ anyor mo dhali aman'kosh ma su mo. A'di jin ta'da mugu gi imantera thulpa/ mo dhali imanmii miinthus mo.

35 Hili moyuk a'di karu ka ħar/e mo ki uci ma yimi 'baar mo be.

Jesus A'di Di'd e Gu'b gi wathim Parisi jin Yuġu ka Simaan mo

36 Wathi/'deġ kamu/'peni 'Kwani Parisiyyin a'di dotki a'di mo mmonyak to shwa ki a'di mo dhali a'di ciġki gu'b gi Wathim Parisi mo dhali a'di ca'bki'da tharabeesa mo be.

37 Dhali hili mo mo ma, a'boma kamu/'peni 'penkuman bampa/ yan mo a'di ta'da manmii miinthus mo. Ka yim da/arki gwo ki a'di ca'bki'da tharabeesa gi gu'b gi Wathim Parisi mo tani a'di guyi'd turan gasaas jin ta gi kush jin din ma yina 'borga/ mo.

38 Dhali a'di ki doshi bwampo/ a'di isho'k piti mo. A'di ki ko mo. A'di ki tel mii 'pen mo mmoli/ a'di sho'k ki jaba'th em piti mo dhali a'di ki shumut uni ka mur 'kup ma yim mo dhali a'di ki pi sho'k piti 'twa/ mo dhali a'di ki 'kosh uni ka yina 'borga/ mo be.

39 Dhali ki Wathim Parisi jin yukki a'di mo parki a'di e mo tani a'di o gwo e is piti mo ki: Wakki/ wathi/ yan ta'da amanċi gwo ma Arumgimis kadhamo/ mo tani a'di midi 'taki nyith mo mo ka 'bom yansan si'da/ ta'da 'bom jana mo jin taki a'di is is ki me'd mo haala yim ta'da manmii miinthus mo be.

40 Dhala Yesus thoċki gwo mo dhali o a'di gwo mo ki: Simaan, aha/ tana gi gwoġ kamu/ mo mmo/o/e mo. Dhali a'di ki thoċ a'di gwo mo ki: Katinta mo Mantor Gwo mo?

41 Wathin 'deġ kamu/ ta'd gi 'kwani su/ mo kun 'kon ma mure/ m'ba/ mo. Jan 'de/ din ma mure/ ma riyaal* iss 'kwanimpa ka ħarpaci 'ba/ mo dhali jamu/ ka riyaal† iss wathimpa mmota iss 'de/ i'ce'dka 'kume'd mo.

42 Ki uni mol to ċi ka nyan'ko'd mo tani a'di ki dhal uni su/ 'pen mo ka mure/ i'ba/ mo. Shwane/ jana 'peni bwam uni midi en a'di ki nyanye/ mo?

43 Simaan thoċ a'di gwo mo ki: Jan 'de/ jin toshka/ mo ki a'di jin dhalkunu amure/ 'pen mo ki nyanye/ mo. Dhali a'di ki o a'di gwo mo ki: /e o gwo ki 'bore/ mo be.

44 Yan'ko'd a'di ki tu'k 'kup ka 'bom mo dhali owa Simaan gwo mo ki: /e mishkina 'bom yansan mo 'taa? Aha/ ciġkina gu'b pini mo tani dhali /e diki ċi aha/ yi'deġ kamu/ mo ki sule/ mo gom sho'k pem mo. Hila yim a'di ki li/

* 7:41 (b) tuġtumiyya † 7:41 (c) taġtaġin

aha/ sho'k pem ki jabu'th em piti mo dhali shumut uni ka mur 'kup piti mo be.

⁴⁵/e diki ci aha/ mompi 'twa/ ki sule/ mo. Hili 'pena tee ki aha/ pu'dkina mo tani ayim diki dağ mo mmopi sho'k pem ki 'twa/ mo be.

⁴⁶/e diki 'koshaa/ 'kup pem ka yin mo be. Hila yim a'di 'koshki aha/ sho'k pem ka yina 'borga/ mo be.

⁴⁷Wakan aha/ torkina/ e gwo mo ki miinthus ma yim kun takina ris mo tani uni dhalkunuwa yim 'pen mo haala yim enki'da en ki nyanye/ mo. Hili a'di jin dhalkunu miinthus 'pen ki gwa'de/ mo tani a'di enki'da en ki gwa'd gwa'd mo be.

⁴⁸Dhali a'di ki owa yim gwo mo ki: Miinthus pini dhalkunu /e 'pen mo be.

⁴⁹Dhali yan'ko'd uni gwansan kun nyakki 'kowa tharabeesa nyakki a'di mo tani uni telki gwo 'pen mo mmo/o e bwam uni 'cena mo ki: Kaja yanne jin mishi dhal 'kwani miinthus buni 'pen mo?

⁵⁰Dhali a'di ki owa 'bom gwo mo ki: Monğam gwo is pini a'di woḥki /e mo be. Yaku/ ki monğu'th is mo ma.

8

Upa Tiya Baḥkina Yesus Isho'k mo

¹Yan'ko'd ki 'dishe/ mo tani a'di yaki'd mo eya ris 'penkuman bampa/ 'baar mo dhali bampa/ si'da/ mmoçi gwo mo dhali mmokal gwom 'boro'd gom Bampa/ ma Arungimis mo. Dhali uni 'kume'd i'ce'dka su/ nyakki 'ko ki a'di mo.

²Dhali upa tiya si'da/ kun woḥu/ 'pena rum thus kun nyo/on mo dhali 'peni 'ba'th kun 'koshi uni mo: Mariyam jin yuku gway ka Magdaliyya 'peni a'di jin urkunuwa rum thus kun nyo/on pesu/ ka pije/ mo,

³dhala Yuwanna jin ta ash ma Kusi jin ta'da mandhu to goma Hirodus mo dhala Susanna mo dhali unin tiya ka ris mo kun ci to 'peni tom buni kun mina uni mii ta mo.

Gwom 'Bi'th/e jin Onu goma Ka'bany To jin Yeku mo

⁴Dhali ka waambuhany 'kwani pu'dkin mo mmonta' de/ mo dhali 'kwani 'peni bampa/ gi bampa/ mo pu'dkin mo e a'di mo tani a'di ki tor uni gwo ki gwom 'bi'th/e mo ki:

⁵Amanyeka ka'bany to a'di ya'd ka pije/ mo mmoyeka ka'bany tom piti mo. Dhali ki a'di yekki'd mo tani aka'banya tiya ta'kkini bway tur mo dhali uni yapkunu ki sho'k mo dhali 'dii kun pen e momis mo tani loski uni mo be.

⁶Dhali kun tiya bitkin mo e mowosh mo. Dhali ki uni can mo tani uni shi'bilin mo hila/ haali/ mo ta tonkor gom uni mo be.

⁷Dhali unin tiya bitkin mo e bwam ma 'de/ mo dhali a'de/ can mo nyakki uni mo tani dhali a'di ki koḥ uni 'kup mo be.

⁸Dhali kun tiya uni bitkina 'cesh kun 'bora'bor mo dhali uni can mo dhali dho'thkin ki iss 'kwanimpa imudhe'd mo e emen gi cwalmana 'de/ mo. Ki a'di o gwo yansan mo tani a'di yukki'da yuk mo ki: A'di jin ta'd gi bwany'ce mo mmociğ gwo mo tani dhalki a'di ciğ gwo mo ma.

⁹Dhali ki imanciğ a'di gwo dotki a'di gwo mo gom 'pemen gi gwom 'bi'th/e yan ta'da ta mo tani

¹⁰a'di ki o uni gwo mo ki: E um mo tani um cikunu gwo mo mmomish gwo jin cinu ki jim bag mo gom Bampa/ ma Arungimis mo, hili gom unin tiya mo tani uni toru ki jim 'bi'th/e mo, wakan ki uni gwansan kun mishi mo mo tani mini 'koki mish mo mo dhali uni kun ciğki gwo mo tani uni mini 'koki mish gwo 'ban mo be.

11 Gwom 'bi'th/e a'di a'dihe/ mo be: Aka'bany to a'di ta gwo ma Arumgimis mo be.

12 Dhali unin tiya kun bitkin mo e bway tur mo tani uni ita uni gwansan kun cikki gwo mo. Yan'ko'd tapa ma ruma 'cesh pu'dki'd mo dhali 'do gwo 'pena dum buni mo ki uni mini 'koki gam gwo is mo dhali ki uni minu 'koki woth mo be.

13 Dhali unin tiya kun bitkin mo e mowosh mo tani uni ita uni gwansan, ki uni cikki gwo mo tani bu'th a'di ki bwanj 'kunyud mo hila/. Hili uni gwansan idar ga birman mo. Uni gam gwo is mo ari'ceenne/ mo dhali ki mo pu'dki'd jin paluwa pal mo tani uni ta'kkin mo be.

14 Dhali gom uni gun bitkin mo e bwam ma 'de/ mo tani uni ita uni gwansan kun cikki gwo mo hili ki uni iikin mo e bway buni mo tani uni kotha to gun noni 'twa/ mo dhali mo jin tanu pa gi pa mo dhali to kun se 'kwani ki 'pen mo e moj'ko mo, dhali maman buni 'koki is mo be.

15 Dhali gwo gom uni gun ta'kkin mo eya 'cesh kun 'bora'bor mo tani uni ita uni gwansan kun cikki gwo mo mmodhu uni ki 'bore/ mo ka dun gana/ mo dhali ka dum 'borga/ mo dhali uni ki dho'th maman ki mo jin 'kuçu/ bwa mo ki 'kari'th mo be.

Moŋkush jin Kumu 'Kup ki Toŋ'kul Bwa mo

16 Wathin kamu/ diki ciŋha lamba/ mo mmokum a'di 'kup ki 'kwa mo walla mmokar a'di e bwanj 'kwariny ma ci mo, hili a'di ki kar a'di apo/ tirkina/ mo ki uni gwansan kun cikki gu'b mo tani mini par moŋkush e mo be.

17 Haali/ toŋ kamu/ yisa baguwa jin minu 'koki tor eya tente/ mo walla jin 'dapu 'kup mo jin minu 'koki mish mo dhali guyu/ ki moŋkush mo.

18 Hil ki 'bore/ mo ma, gwo jin ciŋa um mo. Haali/ a'di jin ta'd gi to mo tani a'di minu ci ki nyanye/ mo dhali 'peni a'di jin dara'd mo tani to jin tosha a'di jin tana a'di mo tani minu bu'th 'peni a'di mo be.

KoYesus dhali Ikam Piti mo

19 Dhali yan'ko'd kum dhali ikam piti uni pu'dkin 'kup ki a'di mo dhali hili uni 'koki 'dish a'di is mo goma waambuhany 'kwani mo be.

20 Dhali a'di torunu gwo mo ki: Kwan dhali ikam pini uni doshkina piŋe/ mo, ona bwa mo mmopar /e e mo be.

21 Hili a'di o uni gwo mo ki: Ata'dam pem dhali ikam pem ta uni gwansan kun cik gwo ma Arumgimis mo dhali mii uni mo be.

Yesus Doshki'da Dhana Punthar 'Tham mo

22 Ka cima kamu/ mo tani a'di seki'da kur mo nyakki imanciŋ a'di gwo mo dhali a'di ki o uni gwo mo ki: Dhalki ana 'ciŋha/ gap ki 'bana kamu/ ma al mo ma. Wakan uni karkina kur 'pen mo be.

23 Dhali me'd jin hashkina uni mo eya kur yi'de/ mo tani a'di ishki e mo. Dhala punthar 'tham pu'dki'd apo/ ma al yi'de/ mo dhali uni 'tu'dkina yi'de/ bwa kur mo dhali uni 'kokin mo e mo jin ŋagu wu mo be.

24 Dhali uni iikin mo mmomer a'di e mo mmo/o a'di gwo mo ki: Tapa, Tapa, ana 'ce'du/ sho'k mo. Dhali a'di merki e mo dhali kucur 'tham ki gwo mo dhali yi'de/ jin bir bakal mo. Dhali uni daŋkan mo dhali mo dosh ki biyuu mo be.

25 Dhali a'di ki o uni gwo mo ki: Mane moŋgam gwo is bum mane? Dhali uni ko/ki is mo be dhali uni merkin mo mmo/o gwo ka rem 'kup mo ki: Wathi/ yan ta'da ja sa/ haali/ a'di kaŋki 'tham gwo mo dhali yi'de/ mo, dhali uni ha gwom piti e mo be.

Wathi/ gi Paŋ Gadara jin Bu'thkin ma Ruma 'Cesh mo A'di Waçu/ mo

26 Dhali uni merkin mo e bampa/ gi Paŋ Gadara mo a'di jin di'd ka par 'twa/ ki Pany Jaliil mo be.

²⁷ Dhali ki a'di thulki'd ka 'cesh mo tani wathin kamu/ 'peni 'penkuman bampa/ jin ta'd ga ruma 'cesh mo gamki a'di 'kup mo. Haali/ isa gush mo tani a'di diki hi'th burrinyeŋ kamu/ i/is mo dhali a'di diki ca'b e gu'b mo, hili a'di ca'bki'd mo e bwaman moŋ'kupaje mo.

²⁸ Ki a'di parki'da Yesus e mo tani a'di cuu'd ki 'twa/ jin caaca mo dhali bita 'cesh mo mbwambori a'di mo dhali o gwo mo ki dhan 'twa/ jin caaca ki: /e mini mii aha/ katinta mo, Yesus jin ta Ya/ ma Arumgimis jin Cayaa/ e ki Ca mo? Aha/ 'thokina /e mo ki dhalku/ ki tocaa/ 'kus mo.

²⁹ Haali/ a'di kanki'da rum thus jin nyo/o'd gwo mo mmoya ka pije/ mo 'peni wathi/ mo. (Haali/ me'd ka ris a'di bu'thki a'di mo dhali a'di karkunu mo mmoji mo dhali a'di dekkunu ka jindhiir mo dhala makkiya mo, hili a'di 'ce'dki mondek mo dhali a'di urkin ma ruma 'cesh ka pije/ mo e bwam ma si'b mo.)

³⁰ Yan'ko'd Yesus ki dot a'di ki: Gway pini yuku kata mo? Dhali a'di ki thok a'di gwo mo ki: Karis mo. Haali/ ama'dinya ruma 'cesh uni sekini a'di mo be.

³¹ Dhali uni 'thoki a'di mo mmodiki kan uni gwo mo mmo/ii mo e bwany jisa 'kulga/ mo.

³² Dhali hili ama'diny kuthar caaca shwani 'bambala wosh mo dhali uni 'tho a'di mo mmodhal uni bway mo mmose i uni gwansan mo be. Wakan a'di dhalki uni bway mo be.

³³ Dhali yan'ko'd aruma 'cesh iikin ka pije/ 'peni wathi/ mo dhali ciç mo e bwam kuthar mo dhali ama'diny kuthar uni yakina nwaça/ mo ka lunḡu'b mo eya gapa al jin 'kula'kul mo mbwaman ma al mo dhali uni loskunu mo be.

³⁴ Ki imanhil kuthar parki a'di jin miikunu e mo tani uni son mo dhali tor a'di e 'penkuman bampa/ mo dhali e pa 'baar mo.

³⁵ Dhali yan'ko'd 'kwani iikin ka pije/ mo mmopar to jin miiki'd e mo dhali uni pu'dkina Yesus mo dhali uni ki gam wathi/ 'peni a'di jin pikin ma ruma 'cesh ka pije/ mo mmoça'b e sho'k ma Yesus mo mmodi ki burrinye/ i is mo dhali mmoça'b ka dum 'boro'd mo dhali uni 'kokin mo mmoço/ is mo be.

³⁶ Dhali uni gwansan kun parki a'di e mo tani tor'ki uni gwo mo gom a'di jin bu'thkin ma ruma 'cesh mo tani a'di waçkunu mo be.

³⁷ Dhali yan'ko'd aris 'kwani kun 'kona bampa/ ki jin 'kam mo e Paŋ Gadara mo tani uni dotki a'di mo mmoya mo 'peni uni mo haali/ uni butha moŋko/ is jin caaca kagahara mo. Wakan a'di seki'd mo e bwam ma kur mo dhali dok ka nyan'ko'd mo be.

³⁸ Wathi/ jin yakin ma aruma 'cesh ka pije/ mo 'peni cine/ mo tani dotki a'di mo mmo'taki nyaç ya ki a'di mo. Hili a'di hashki a'di mo mmo/o gwo mo ki:

³⁹ Dokku/ bway pam pini mo ma dhali tora ris to jin miikin ma Arumgimis i /e mo. Dhali a'di yaki'd mbway mo mmo'tora ris to gwansani 'baar mo eya ris 'penkuman bampa/ gom tony caaga/ jin miikin ma Yesus gom a'di mo be.

'Bwa/ ma Yaa/irus dhala 'Bom jin Ta'da Yesus 'Twaman Burrinyem Piti Is ki Me'd mo

⁴⁰ Dhali ka Yesus dokki'd ka nyan'ko'd mo tani awaambuhany 'kwani hanki a'di mo haali/ uni 'kokin mo mmoçor a'di mo be.

⁴¹ Dhali wathin kamu/ pu'dki'd mo jin yuku gway ka Yaa/irus mo. A'di ta tapa gi gu'b gi montul is mo, dhali a'di ki bita 'cesh e sho'k ma Yesus mo mmoŋap a'di mo mmoya bway gu'b piti mo be.

⁴² Haali/ a'di ta'd gi jasi 'bwa/ jin di'd 'deŋ gana/ mo. A'di 'kona yili 'kume'd i'ce'dka su/ mo ki cam piti mo dhali ayim muru'di wu mo be.

Ki a'di yaki'd mo tani 'kwani kalki a'di ka bor mo be.

⁴³ Dhala 'boma kamu/ jin gus ma bas ki yili 'kume'd i'ce'dka su/ mo dhali a'di molu waç mo ki miin kamu/ mo.

44 A'di pu'dki'di bwampo/ a'di mo dhali ta a'di 'twaman burrinyem piti is ki me'd mo, dhali ki jahanne/ abas ma yim jin guski'd mo tani dakki'd mo be.

45 Dhala Yesus ki o gwo mo ki: Kaja a'di jin tayaa/ is ki me'd mo? Ki uni 'baar mo urki gwo mo tani Buterus ki o a'di gwo mo ki: Tapa, awaambuhany 'kwani caaca kagahara kal /e ki is mo dhali yap /e mo.

46 Hila Yesus o gwo mo ki: Jin tal 'denj kamu/ taki aha/ is ki me'd mo, haali/ aha/ nyitha ki mom'bi'th yaki'd mo 'peni aha/ mo be.

47 Dhali ka 'bom mishki'd ki a'di 'kokunu ki mol mo tani ayim pu'dki'd mo dhali deena is kagahara mo dhali bita 'cesh mo ibwambori a'di mo dhali a'di ki tor gwo mo e bwambori 'kwani 'baar mo mmotana a'di a'di is ki me'd mo dhali mmowaçkunuwa yim ki jahanne/ mo be.

48 Dhali a'di ki owa yim gwo mo ki: 'Bwa/um, mongam gwo is pini waçki /e mo be. Yaku/ /e ki monku'th is mo ma.

49 Ki a'di di'd mmotor gwo mo tani wathi/ 'peni gu'b gi tapa pu'dki'd mo dhali o gwo mo ki: 'Bwa/um pini a'di wuki'd mo be. Dhalku/ ki mura amantor gwo adu is dok/e mo.

50 Hila Yesus, mmocikkina a'di gwo yansan mo tani thokki a'di gwo mo mmo/o ki: Dhalku/ is ki ko/ mo ma. Gami gwo is mo 'te/ dhala yim minu waç mo be.

51 Dhali ki a'di pu'dki'd mo e gu'b mo tani a'di diki dhal jan 'denj kamu/ bway mo mmociç nyakki a'di mo, hili jasa Buterus dhala Yohaana dhala Yakuub mo dhali com ma 'ci mo dhali kum ma 'ci mo be.

52 Dhali aris uni gun gwokin mo dhali kun miikina pure/ mo goma yim mo tani, hili a'di o gwo mo ki: Dhalku/ ki ko mo ma haala yim yisa wu'd mowa, hili a'di ishi e mo be.

53 Dhali uni ki pe'th a'di mo mmomisha uni ka yim a'di wuki'd mo be.

54 Hili a'di ki budha yim ki me'd mo. A'di ki yuça yuç mo mmo/o gwo mo ki: Ari nyara/, cuyi mis mo ma.

55 Dhali shi/in ma yim dokki'd mo dhali ayim cuki mis ki jahanne/ mo dhali a'di kanki gwo mo ki to minu mii mii mo mmoci ayim mmoshwa mo be.

56 Dhali icom ma yim uni 'kokin mo mmomer mo be. Hili a'di kanki uni gwo mo mmo'koki tor wathinj kamu/ a'di jin miikunu mo be.

9

Uni kun Hashu ka 'Kume'd i'ce'dka Su/ mo

1 Dhali a'di ki yuç uninj 'kume'd i'ce'dka su/ mmotal 'de/ mo dhali a'di ki ci uni mom'bi'th mo dhali moshirr mo apowa risa ruma 'cesh mo dhali mmowaça ris mom'ba'th mo.

2 Dhali a'di hashki uni mo ka pije/ mmoci gwo mo gom Bampa/ ma Arungimis mo dhali mmowaça waç mo be.

3 Dhali a'di ki o uni gwo mo ki: Dhalku/ ki kal to gom iim bum e bway mo ma, dhalku/ ki kal cwa mo walla kacañ mo walla maa mo mo walla guurush mo, dhali dhalku/ ki ta gi burrinyem bwamani su/ mo.

4 Dhali e gu'b yin jin mina umi ciç mo tani 'koyi mmattaan mo ma dhali 'peni mattaan mo tani iiku/ mo ma.

5 Dhali e mo yin jin mina 'kwani 'koki bu'th um mo tani ki um murini dhal pa caan 'pen mo tani piri abuhany 'peni sho'k bum mo ma. A'di ta gwo jin onu apo/ uni mo be.

6 Dhali uni iikin mo dhali ii mo e bampa/ 'baar mo mmoci gwom 'borga/ mo dhali mmowaça waç mo e mo 'baar mo.

Mowu ma Yohaana jin Ta'da Manmiiya Mii ki Yi'de/ mo

⁷ Dhali ka Hirodus jin ta'da ra/iis rub cikki'da ris to gwansan kun miikunu mo tani a'di dumbulki mo mo haali/ gwo ona 'kwanin tiya mo ka Yohaana a'di 'de'kkunu mo 'peni mowu mo.

⁸ Dhali kun tiya o gwo mo ki Iliyya a'di piki'd mo dhali 'kwanin tiya o gwo mo ki a'di ta jan 'de/ 'peni imanci gwo ma Arumgimis ka dhamo/ mo a'di cukunu mis mo.

⁹ Hirodus o gwo mo ki: AYohaana a'di i'cithka/ 'kup moyi. Hili wathi/ yansan ta'da ja mo jin cikika/ aris to kun wakan mo? Dhali a'di nɔpki'da nɔp mo mmopar a'di e mo be.

Mmoçi 'Kwani Alaapi Mudhe'd Tonte/ mo

¹⁰ Dhali e mondok jin dokkina imandhunu ki she/ mo tani uni ɔrki a'di to kun miikina uni mo be. Dhali a'di ki sus uni mo dhali uni ki ii mo uni 'cena mo e 'penkuman bampa/ jin yuku ka Beetsayda mo be.

¹¹ Dhali ka waambuhany 'kwani da/arki gwo mo tani uni bathki a'di isho'k mo dhali a'di hanki uni mo dhali ɔr uni gwo mo gom Bampa/ ma Arumgimis mo dhali waç uni gwansan kun mini mii ta gi mowaç mo be.

¹² Dhali ka tente/ di'd mo mmogala bi mo tani unin 'kume'd i'ce'dka su/ mo pu'dkin mo dhali o a'di gwo mo ki: Hashka waambuhany 'kwani bway pa mo ma mmo/ii bampa/ mo dhali pa kun 'kon ka kukul is mo mmo/ish mo dhali mmogam tonte/ gom bway mo haali/ ana 'kona mo mmahan mo e mo jin dar gi 'kwani mo be.

¹³ Hili a'di ki o uni gwo mo ki: Um mini ci uni tonte/ mmoshwa mo. Dhali uni thok a'di gwo mo ki: Ana dara gi to ki nyanye/ mo jasi maan'kuthu'di mudhe'd mo dhali to yi'de/ isu/ mo isi ciki/ ana mina mii ii mo dhali yol tonte/ goma ris 'kwani kun wakansan mo be.

¹⁴ Haali/ uni wana e ki iss 'kwanimpa gwas alaapi mudhe'd mo. Dhali a'di ki o imancik a'di gwo gwo mo ki: Tuci uni mmo'ko 'pena 'cesh mo ma, e mon'kom buni ki iss su/ i'ce'dka 'kume'd mo ki she/ ki she/ mo be.

¹⁵ Dhali uni miiki a'di wakan mo dhali dhu uni 'baar mo mmo'ko 'pena 'cesh mo be.

¹⁶ Dhali a'di bu'thki maan'kuthu'di mudhe'd mo dhali to yi'de/ isu/ mo dhali a'di ki 'de'k e ki mis mo dhali 'bora 'bor bwa i is mo dhali 'ce'd uni mo dhali a'di di'd mmoçiki uni mo ki imancik a'di gwo mo mmodhu ibwambor ma waambuhany 'kwani mo be.

¹⁷ Dhali aris uni 'baar mo shwakin mo dhali 'kokunu mo mmokap mo be. Dhali uni ki tul uni is mo kun urki 'kup mo dhali uni 'tu'dkina nura/ i'kume'd i'ce'dka su/ mo ki 'pisira/ maa mo be.

ABuɔerus A'di ɔrki Mii eya Tente/ goma Yesus mo

¹⁸ Dhali a'di warki'd mo ki a'di di'd mo mmo'tho mo a'di 'de/ mo tani imancik a'di gwo nyak 'ko ki a'di mo dhali a'di ki doɔ uni gwo mo ki: Ki 'kwani o ki aha/ tana aja mo?

¹⁹ Dhali uni thok a'di gwo mo ki: Ka Yohaana jin ta'da manmii ki yi'de/ mo ti. Kun tiya o gwo mo ki: Ki Iliyya mo, dhali kun tiya o gwo mo ki: Ki jan 'de/ 'peni imanci gwo ma Arumgimis kadhamo/ mo jin cukunu mo.

²⁰ Dhali a'di ki o uni gwo mo ki: Hili um o ki aha/ tana aja mo si'da/? Dhala Buɔerus thok a'di gwo mo ki: AKristhos ma Arumgimis mo be.

²¹ Hili a'di kanki uni gwo mo dhali kan uni gwo ki kan gana/ mo ki uni mini dhalku/ ki ɔr gwo yan ki wathin 'deɔ kamu/ mo

²² mmo/o gwo mo ki: Ya/ gi 'Kwani mina isi mii 'kosh ka nyor mo gom to ka ris mo dhali minu waç mo ki 'kwanin gwanyjaka/ mo dhali ki igasiis mo

dhali iman'kwar to mo dhali a'di minu 'kosh jwa mo dhali ka cim kwara mo tani a'di minu piyu/ mo be.

Yesus Torki Wum Piti Ntwa/a/ mo

²³ Dhali a'di ki owa ris 'kwani 'baar mo gwo mo ki: Wakki/ wathin kamu/ midu yayu/ mmobath aha/ isho'k mo tani dhalki a'di non is piti mo ma dhali 'de'k cwany'cithan dhul piti mo dhali bath aha/ m'pen mo be.

²⁴ Haali/ a'diyin jin midu woth mondiki/em piti mo tani midu this a'di e mo dhali a'diyin jin midu this mondiki/em piti e mo gom gway pem mo tani a'di midu woth a'di mo be.

²⁵ Haali/ to jin nyo/a wathi/ mo tani ta'da tinta mo wakki/ a'di midu jar e e to gi mony'ceshi 'baar mo dhali this e mo walla 'ce'd sho'k mo ki is piti mo.

²⁶ Haali/ a'diyin jin 'thema is ki aha/ mo dhali ki gwom pem mo tani e a'di si'da/ Ya/ gi 'Kwani mina isi 'the mo ki a'di midu pu'du/ mo e monycam piti mo dhali ki monyca ma Ababa mo dhali ki iman'doyu gwom piti kun kogu mo.

²⁷ Hili aha/ tora um gwo ka jin gana/ mo ki 'kwanin tiya doshkini mahan mo kun mini 'koki nyok mowu ntwa/ a/ mo ki uni mini par Bampa/ ma Arungimis e mo be.

Mmowarkin ma Yesus Jamas Piti mo

²⁸ Dhali ki mo wana e ka cim pekware n'ko'di gwo gwansan kun okina a'di mo tani a'di ki susa Buterus nyakki a'di mo dhala Yohaana dhala Yakuub mo, dhali sus uni bway 'kuwosh jin turatur mo mmo'tho mo.

²⁹ Dhali ki a'di diki'd mo mmo'tho mo tani jama gi jis/em piti jin pikina a'di mo tani ankala/ankal mo dhali burrinyem piti warki'd ki ra/ ra/ mo dhali ki bany bany mo be.

³⁰ Dhali hili ma, 'kwani su/ nyakina tor tor ki a'di mo be, a'di jin ta'da Musa dhali Iliyya mo be.

³¹ Uni gun pikin mo e monyca mo dhali uni ki tor gwo mo gom yam piti jin mina a'di ya mo, a'di jin mina a'di ithim mo e Pa Urushaliim mo.

³² Buterus dhali uni gwansan kun nyakki 'ko ki a'di mo tani uni 'ce'da e is mo hili uni 'kokin mo mmorash e mer mo dhali uni parki monycam piti e mo dhali 'kwani su/ gwansan kun doshkin mo nyakki a'di mo be.

³³ Dhali ki 'kwani su/ iikin mo 'peni a'di mo tani Buterus o'da Yesus gwo mo ki: Tapa, a'di 'boro'd gom aman mmo'kona aman mmahan mo be. Dhalki aman nyaṅa um cina/ ikwara mo ma, 'de/ gom /e mo dhali 'de/ goma Musa mo, dhali jan kamu/ 'de/ gom Iliyya mo, haali/ a'di mol gwo jin ona a'di mo.

³⁴ Dhali ki a'di o gwo yansan mo tani arak pu'dki'd mo dhali 'kam uni is ka la mo. Dhali uni 'kokin mo mmoko/ is mo me'd jin cikina uni e bwam ma rak mo.

³⁵ Dhali 'twa/ pu'dki'd mo ka pije/ 'peni bwam ma rak mo mmo/o gwo mo ki: Yan ta Ya/m pem mo, jim pem jin kwanyka/ mo. Ciki a'di gwo mo ma.

³⁶ Dhali ki 'twa/ okunu gwo mo tani Yesus gamkunu a'di 'de/ mo. Dhali uni 'kon ki shwam mo dhali tor wathin kamu/ 'de/ gwo mo ka cim gwansan yisa ma e to jin parkina uni e mo.

Yesus A'di Waḱi'da 'Ci jin Bu'thkin ma Rum Thus jin Nyo/o'd mo

³⁷ Dhali ka cim jin 'ko'd mo tani ki uni thulkin ka 'cesh 'peni wosha turga/ mo tani awaambuhany 'kwani caaca kagahara mo gamki a'di 'kup mo be.

³⁸ Dhali hili mo mo ma, wathin kamu/ 'peni bwam ma waambuhany 'kwani a'di cuuki'd mo ki: Mantor Gwo, aha/ yuka /e mo mmohila hil apo/ ya/m pem mo. Haali/ a'di ta ya/m pem jin di'd tal 'den gana/ mo.

³⁹ Dhali hili ma, arum thus bu'thki a'di mo dhali a'di ise/ ki cuu kagahara mo dhali a'di ki pesh mo ntagi a'di mii'da gabusha mo dhali a'di mompola is ki mombol mo dhali a'di diṭa mii mo mmodhal a'di 'pen mo.

⁴⁰ Dhali aha/ yukkina imancik /e gwo mo mmo/ur a'di ka pije/ mo tani hili uni mol a'di mii mo be.

⁴¹ Yesus thoḵ a'di gwo mo ki: Ayy um 'kwani kun aṭha mongam gwo is ki aṭh mo dhali kun caca/ ii ki caca/ mo eya nyaḵum yil bum mo tani aha/ mina di ka cim ekata mo e um mo dhali 'dim 'kup e um mo? Susi ya/m pini mmahan mo ma.

⁴² Ki a'di di'd mmoyayu/ mo tani aruma 'cesh ki mombol a'di is mo dhali pesh a'di mo. Hila Yesus ki kucura rum thus jin nyo/o'd ki gwo mo dhali a'di ki waḵa 'ci mo dhali a'di ki ḵi a'di ka nyar'ko'd e com mo.

⁴³ Dhali aris 'kwani 'baar mo 'kokin mo mmomer mo gom mo/ek ma Arumimis mo be.

Dok/e aYesus A'di Torki Mowum Piti Nṭwa/a/ mo be

Hili ki uni 'kokin mo mmomer mo goma ris to 'baar mo jin miikina a'di mo tani a'di ki o imancik a'di gwo gwo mo ki:

⁴⁴ Dhalki gwo gwansan hur bwany'cem bum mo ma, haali/ Ya/ gi 'Kwani minu ḵi mo e me'd gi 'kwaniny'cesh mo.

⁴⁵ Hili uni 'koki mish gwo yansan 'ban mo jin okina a'di mo dhali gwo yan a'di bagkunu mo 'peni uni mo ki uni mini 'koki nyiṭh a'di mo dhali uni ko/ a'di mo mmodot a'di gwo mo gom gwo yansan mo be.

Kaja A'di Icade?

⁴⁶ Dhali gwo jin wala uni cuki'd mo e bwam uni mo mmo/o gwo mo ki: Kaja a'di ica'd ki tiya i bwam uni mo?

⁴⁷ Hili ka Yesus nyiṭhki gwo kun kuluma uni eya dum buni mo tani a'di ki bu'th ara 'ci mo dhali kar a'di e 'ko'd gwar piti mo

⁴⁸ dhali o uni gwo mo ki: A'diyin jin midu bu'th ara 'ci yansan ki gway pem mo tani a'di bu'thki aha/ mo be dhali a'diyin jin midu bu'th aha/ mo tani bu'thki a'di a'di jin hashi aha/ mo haali/ a'di jin midu pis mo mbwam uni 'baar mo tani a'di ta jan tal 'de/ jin caaca mo be.

A'di jin Diki Di Apo/ Um mo tani A'di Ta A'di gom Um mo be

⁴⁹ Dhala Yohaana thoḵ a'di gwo mo ki: Tapa, am mishkina wathiṅ kamu/ urki'da ruma 'cesh ka pije/ ki gway pini mo dhali aman nonkina a'di mo haali/ a'di diki bath ana isho'k mo be.

⁵⁰ Hila Yesus thoḵ a'di gwo mo ki: Dhalku/ a'di ki non mo ma, haali/ a'di ḵaan jin diki di apo/ um mo tani a'di ita a'di gom um mo be.

Yesus Kucurki'da Yakuub dhala Yohaana mo be

⁵¹ Ki mom piti 'dishkina 'twa/ mo jin minu bu'th a'di mo tani a'di ki kar jis/ em piti mo mmoya bway Pa Urushaliim mo. Dhali a'di ki hash iman/ii nṭwa/ a/ ki a'di mo.

⁵² Dhali uni iikin mo dhali ciḵ mo e Bampa/ gi Pan Saamira mmothoson to gom a'di mo be.

⁵³ Hili 'kwani 'koki bu'th a'di mo haali/ jis/em piti karkina a'di mo 'kup ki Pa Urushaliim mo be.

⁵⁴ Dhali ki imancik a'di gwo jin ta'da Yakuub dhala Yohaana parki a'di e mo tani uni o a'di gwo mo ki: Tapa, /e napi aman mo mmokan o'd gwo mo mmothulu/ ka 'cesh 'peni momis mo dhali shwa uni mo 'taa?

⁵⁵ Hili a'di tu'kki'da bor mo dhali kucur uni ki gwo mo be.

⁵⁶ Dhali uni iikin mo e bampaṅ kamu/ mo.

Uni kun Mini 'Taki Batha aYesus Nsho'k mo

⁵⁷ Me'd jin iikina uni e bway tur ki sule/ mo tani wathin kamu/ ki o a'di gwo mo ki: Aha/ mina bath /e m'pen mo e mo 'baar mo jin mina /e iya mo be.

⁵⁸ Dhala Yesus ki thok a'di gwo mo ki: Amak uni ta gi jis mo dhali 'dii kun pen e momis mo tani ta gi gu'b mo. Hili Ya/ gi 'Kwani a'di dar gi mo mo mmokar 'kup piti nycine/ mo be.

⁵⁹ Dhali e wathin kamu/ a'di ki o a'di gwo mo ki: Bathi aha/ m'pen mo ma. Hili a'di ki o a'di gwo mo ki: Tapa, dhalki aha/ yana ntwa/a/ mo dhali kan ababam pem mo.

⁶⁰ Hili a'di ki o a'di gwo mo ki: Dhalki jwa uni kan ceny jwam bunin gana/ mo ma. Hili gom /e mo tani yayi mo dhali tor Bampa/ ma Arumgimis eya tente/ mo.

⁶¹ Dhali jan 'dej kamu/ o a'di gwo mo si'da/ ki: Aha/ mina bath /e nsho'k mo Tapa. Hili dhalki aha/ ona gwo ntwa/a/ mo mmotak uni gwansan kun 'koni gu'b pem mo.

⁶² Yesus ki o a'di gwo mo ki: Jan kamu/ yisa di'd 'deya jin karki me'd piti apo/ to jin goru a'cesh mo dhali mmohil ka isan'ko'd mo a'di jin midi ha me'd mmo'kosh jwa ki Bampa/ ma Arumgimis mo.

10

Uni kun Hashu ki Issi Kwara I'ce'dka 'Kume'd mo

¹ 'Ko'di to gwansan mo tani Tapa lakki 'kwanin tiya i/issi kwara i'ce'dka 'kume'd mo dhali a'di hashki uni mo ntwa/a/ ki a'di mo ka susu/ susu/ mo e bampa/ 'baar mo dhali e mo 'baar mo jin mura a'di ki is piti mmoyaku/ mo.

² Dhali a'di ki o uni gwo mo ki: Bwam mondhe'd ishki'd ka enthus mo, hili imanmiya tu'c mo tani uni 'koni daka/ mo. Haali/ a'di wakan mo tani 'thoyi mo ma, ki Tapa gi bwam mondhe'd midi hash imanmiya tu'c piti mo e bwam mondhe'd piti mo be.

³ Iiku/ i bway bum mo ma. Hili mo mo ma, aha/ mina hashki um mo me'd ushi ka'bal mo e bwam ma wu mo.

⁴ Dhalka jisilaan ki kal mme'd mo walla kucan mo, walla appa/ mo, dhali dhalki wathin 'dej kamu/ ki the me'd mbway mo ma.

⁵ E gu'b yin jin mina umi ciç mo tani oyi gwo ntwa/a/ mo cikise/ ki: Monku'th is midi di e gu'b yansan mo.

⁶ Dhali wakki/ ya/ gi monku'th is di'd e mun mo tani monku'th is bum mini si/is apo/ a'di mo, hili wakki/ a'di diki di mo tani a'di minu dokku/ um mo.

⁷ Dhali 'koyi e gu'ba tal 'de/ yan mo mmoshwa to mo dhali mmopi to mo a'di jin mina uni ici um mo, haali/ amanmiya tu'c minu mii ci to jin ha me'd ka tu'c piti mo. Dhalku/ ki tan gu'b mo ma.

⁸ E bampa/ yin jin mina umi ciç mo tani dhali 'kwani ki bu'th um mo tani shwayi tonte/ jin minu kara bori um mo.

⁹ Waci uni gun 'bathan e bampa/ yan mo dhali oyi uni gwo mo ki: Bampa/ ma Arumgimis a'di pu'dki'd ki 'dishe/ e um mo.

¹⁰ Dhali e bampa/ yin jin ciçkina um mo dhali uni 'koki bu'th um mo tani iiyi i bway tur piti mo dhali oyi gwo mo ki:

¹¹ Bu'da 'cesh gi bampam bum yansan mo tani jin mu'thkina aman ki sho'k bam mo tani aman dhi'thkina a'di apo/ um mo. Bahili mishi mo mo ma, ki Bampa/ ma Arumgimis midi pu'du/ ki 'dishe/ mo be.

¹² Aha/ tora um gwo mo ki a'di mina 'twa/ si'd mo yisa gom Pan Saduum mo ka tee caan mo me'd bampa/ caan mo be.

Wayyi e 'Penkuman Bampa/ kun Ushkina Du Ri'c Is mo

13 Wayyi e um gi Pan Kurasiin mo, wayyi e um gi Pam Beetsayda mo, haali/wakka dhan miim 'bi'thga/ kun miikunu mo e um mo tani minu 'taki mii mo e Pan Sur mo dhali Pan Saydaa/ mo tani uni mini 'taki rica du is kadhamo/ mo mmo'ko e burrinyen shawaal mo dhali bwam 'piny mo.

14 Hili a'di mina 'twa/ 'dish mo gom gwon dwall gi Pan Sur mo dhali Pan Saydaa/ mo mmobol um e mo be.

15 Dhali um 'kwani gi Pan Kapranahuum mo minu 'de'k um me'd momis mo 'taa? Um minu 'doyu/ ka lun'gu'b eya Haawiya mo be.

16 A'diyin jin cikki um gwo mo tani a'di cikki aha/ gwo mo be dhali a'di jin wakki um mo tani a'di wakki aha/ si'da/ mo be. Dhali a'di jin wakki aha/ mo tani a'di wakki a'di jin hashki aha/ mo be.

Mondok kun Dokkina Uni Issi Kwara I'ce'dka 'Kume'd mo

17 'Kwanimpa issi kwara i'ce'dka 'kume'd mo tani uni dokkini a'di mo ki bwaj 'kunya/ mo mmo/o gwo mo ki: Tapa, aruma 'cesh uni haki gwom bam e ki gway pini mo be.

18 Dhali a'di ki o uni gwo mo ki: Aha/ parkina Setaan e mo bi'tki'd mo me'da wara sho'k mo 'peni momis mo.

19 Hili mo mo ma, aha/ cikina um moshirr mo mmose tasha/ shoka po/ mo dhali a'dak mo dhali apowa ris mom'bi'th gi uni gun ta 'kup mo, dhali tor kamu/ yisa di'da jin midi shi/ um is mo be.

20 Hili mo mo ma, dhalku/ bwa ki 'kuny mo gom mii yan mo, ka ruma 'cesh haki gwom bum e mo, hili 'kunyi bwa mo ma, gom gway bum kun 'kwarkunu mo e momis mo.

Yesus 'Kunykina Bwa mo

21 Dhali e mo yansan mo tani a'di 'kunykina bwa mo e Shi/in Dheleladhelel mo dhali o gwo mo ki: Aha/ 'bora /e bwa i is mo, Ababa, Tapa gi momis mo dhali mony'cesh mo, ki/e bagkina aris to gwansan 'peni uni gun yukayuk mo dhali kun mishi gwo 'ban mo dhali /e ki tor uni eya tente/ mo ki uni gun ta uci mo be. Nye, Ababa, gom ku gi wakan mo tani bwam ma 'them pini a'di a'dan mo be.

22 Aris to 'baar mo cikunu aha/ mo ka Ababam pem mo, dhali wathin kamu/ yisa mishi mo mo ki Ya/ a'di ta'da aja mo, hili isi ciki/ Ababa mo be, walla Ababa a'di ta'da aja mo, hili isi ciki/ Ya/ mo dhali ma a'din 'de/ yin jin mina Ya/ ikwany mo tani mina a'di itor a'di i e mo be.

23 Yan'ko'd a'di ki tu'k 'ban mo dhali o imancik a'di gwo gwo mo uni 'cena ki: Mom'bor mii gom e mo uni gun mishi to gin misha um mo.

24 Haali/ aha/ tora um gwo mo ki imanci gwo ma Arumgimis kadhamo/ mo kun tana ris mo dhali imalik si'da/ mo, uni ona bwa mo mmopar to e mo kun para um e mo dhali uni 'koki mish a'di mo dhali mmocik a'di jin cika um mo tani dhali uni 'koki cik a'di mo be.

Wathi/ gi Pan Saamiram 'Borga/ mo

25 Dhali hili mo mo ma, amanmisha jo'd gwonkan doshki'd ki mis mo mmokar a'di mo mmopal ki gwo mo ki: Mantor Gwo, aha/ mina mii atinta mo mmota gi mal gi mondiki/e ki sule/ ya ye 'ba/ mo?

26 Dhali a'di ki thok a'di gwo mo ki: Gwo wakata 'kwarkunu mo e gwonkan jin cinu mo? Ji gi wakata idenkina /e e mo?

27 Dhali a'di ki thok a'di gwo mo ki: /e mini en Tapa Arumgimis pini mo ka dum pini 'baar mo dhali 'ka kashiram pini 'baar mo dhali ki 'bi'th pini 'baar mo dhali ki bwam pini 'baar mo, dhali amannyak ca'b pini mina /e i/en me'd is pini'j gana/ mo be.

²⁸ Dhali a'di ki thok a'di gwo mo ki: /e thokki gwo ki 'bore/ mo be. Rashi yansan mii mo ma, dhali /e mini di ki e mo be.

²⁹ Hili a'di dina gwo mbwa mo mmokar is piti me'd wathi/ jin ta jan kar/ e ki is piti mo. A'di ki owa Yesus gwo mo ki: Dhali aja a'di ita'da amannyak ca'b pem mo?

³⁰ Yesus thok gwo mo ki: Wathin kamu/ yaki'd ka lunju'b 'peni Pa Urushaliim mo e Pa Ariiha mo. Dhali a'di 'kamkina 'kwanin 'di/ 'kup mo. Uni ki bu'th tom piti 'baar mo dhali dor a'di mo, dhali uni ki ii mo dhali dhal a'di mo mmodikina a'di eny jwa mo.

³¹ Dhali e ya ma gasiis jin yana a'di iya ka lunju'b mo e bway tur mo tani dhali a'di ki par a'di e mo dhali a'di ki per bway tur ki 'bana kamu/ mo.

³² Wakan si'da/ Wathi/ Lawi ki a'di pu'dki'd mo e mo yan mo dhali par a'di e mo tani a'di ki per ki bway ki 'bana kamu/ mo.

³³ Hili Wathi/ gi Pan Saamira a'di yaki'd ki yampe mo tani a'di pu'dki'd mo e mo jin dina a'di mo, dhali ki a'di parki a'di e mo tani a'di ki hil a'di ka 'thime/ mo

³⁴ dhali ya i a'di mo dhali a'di ki ya i'tam jamam piti mo dhali wol a'di ayin nycine/ mo dhali yimana mura'th jin ka/u ki nah nah mo. Dhali yan'ko'd a'di ki kar a'di apo/ thuluny piti mo dhali a'di ki sus a'di e gu'b yilkina/ mo dhali a'di ki mii miim pa gom a'di mo be.

³⁵ Dhali ka cim jin 'ko'd mo tani a'di ki budha riyaal 'de/ mo dhali a'di ki ci a'di e com gu'b gi yilkina/ mo mmo/o gwo mo ki: Miiyi ki 'bore/ gom a'di mo ma, dhali a'diyin jin mina /e i'baar mo tani aha/ mina ci /e a'di mo ki aha/ mina dokku/ ka nyan'ko'd mo.

³⁶ Jana 'peni bwam unij kwara gwansan jin kuluma /e gwo mbwa mo jin nyonki mii mo me'da mannyak ca'b gi wathi/ yan jin bitki'd e bwam me'd gi 'kwanin 'di/ mo?

³⁷ A'di o a'di gwo mo ki: Jan 'de/ jin tor momiimii apo/ a'di mo be. Dhala Yesus ki o a'di gwo mo ki: Yaku/ mo ma, dhali miiyi wakansan mo.

Yesus A'di Ca'bki'd e Gu'b ma Marthā dhala Mariyam mo be.

³⁸ Dhali ki uni iikin e bway buni mo tani a'di cikki'd e pa mo. Dhala 'bom jin yuku gway ka Marthā bu'thki a'di e gu'b piti mo.

³⁹ Dhali ayim ta'd gi 'bwaham jin yuku gway ka Mariyam mo, a'di jin ca'bki'd e sho'k gi Tapa mo dhali cik gwontor piti mo.

⁴⁰ Hila Marthā a'di tashu ka tu'c kagahara mo mmomii to mo. Dhali ayim yaki'd e a'di mo dhali o gwo mo ki: Tapa, dina bwa ki ta /e wathimpa mo ki 'bwah pem a'di dhalki aha/ mo mmomii to aha/ 'de/ mo? Tora yim gwo mo ma, mmowoth aha/ mo.

⁴¹ Hili Tapa thok a'di gwo mo ki: Marthā, Marthā, /e tana man/anan is mo dhali din ma du ki 'kus goma ris to 'baar mo.

⁴² Ton tal 'de/ di'd jin minu mii ta mo. Mariyam a'di kwanyki 'ban jin 'boro'd mo a'di jin minu 'koki bu'th mo 'pena yim mo be.

11

Yesus Torki Gwo goma 'Tho jin Minu 'Tho mo

¹ Dhali a'di diki'd mo mmo'tho mo e monkamu/ mo dhali ki a'di dakki 'tho mo tani jan tal 'den kamu/ 'peni imancik a'di gwo o a'di gwo mo ki: Tapa, tori aman gwo mo ma, mmo'tho mo me'da Yohaana mmo'torkina a'di imancik a'di gwo mo.

² Dhali a'di ki o uni gwo mo ki: Ki um mini 'tho mo tani oyi gwo cikise/ mo ma:

Ababa, dhalki gway pini a'di kogu mo ma. Dhalki bampam pini a'di yayi'd mo.

³ Ci am tontem bam jin ta ji gi isa yempa/ mo ma.

⁴ Dhali dhal am amure/ miinthus bam 'pen mo ma, haali/ am ki is bam dhalkina 'kwani 'baar 'pen ka 'dete/ 'dete/ mo, uni gun 'kon ma mure/ miinthus bam m'ba/ mo. Dhali dhalku/ ki sus am mo e mo jin palu mo.

⁵ Dhali a'di ki o uni gwo mo ki: Jana 'peni um jin ta'd ka mugu mo jin midi ya i a'di mombwam/e mo dhali o a'di gwo mo ki: Amuguwa, ci aha/ maan kuthu'di kwara mo ma

⁶ haala mugum pem pu'dki'd mo 'peni bway jin yayina a'di mo dhali aha/ dara ki to mmokar a'di mbwambor mo.

⁷ Dhali a'di midi thok gwo mo 'peni gu'b ki: Dhalku/ ki tocaa/ 'kus mo. Acampur di'd ki mu'th mo shwane/ dhali ucim pem uni 'kona ci nyakki aha/ mo be. Aha/ mola cu mis mo dhali ci/ e toj kamu/ mo be.

⁸ Aha/ tora um gwo mo, ba a'di midi diki cu mis mo dhali ci a'di toj kamu/ mo haali/ a'di ta'da mugum piti mo, hili gom mmodina a'di ki 'the is mo tani a'di midi cu mis mo dhali ci a'di to yin jin mina a'di mii ta mo be.

⁹ Dhali aha/ tora um gwo mo ki: Doti to mo ma, dhali a'di minu ci um mo. Simmi mii e mo ma dhali um mini gam a'di mo. Nagkani acampur apo/ ki me'd mo ma, dhali a'di minu ka'dki um mo be.

¹⁰ Haala ris 'kwani 'baar mo ka 'dete/ 'dete/ gun dotki to mo tani bu'thki to mo dhali a'di jin simmki to e mo tani gamki a'di mo dhali a'di jin nagkanki'da campura po/ ki me'd mo tani a'di minu ka'dki a'di mo be.

¹¹ Ababa jana di'di bwam um mo, wakki/ ya/ ki dot a'di gwo gom wa'c mo, dhali a'di midi dhal wa'c e i is mo dhali ci a'di tasha/ mo 'taa?

¹² walla wakki/ a'di dotki a'di mo goma oma njwa mo tani mina a'di ci a'di a'dak mo 'taa?

¹³ Wakki/ um kun ta thus kan mo mish mmoçi tom 'boron ki me'd mo ki ucim bum mo tani bakata 'te/ imin ma Baba gi momis mo ci Shi/ in Dheleladhelel mo ki uni gwansan kun dotki a'di mo?

Bampa/ jin Kwa/kunu Bwa mo gun Shi/ki Is mo

¹⁴ Dhali a'di di'd mmo/ura ruma 'cesh ka pije/ mo 'peni wathi/ jin mol 'twa/ wal mo. Dhali ka ruma 'cesh yaki'd ka pije/ 'peni wathi/ jin mol 'twa/ wal mo tani a'di mishki gwo o mo dhali 'kwani merkin mo be.

¹⁵ Dhali 'kwanin tiya o gwo mo ki: A'di urki'da ruma 'cesh ka pije/ ki gway ma Baalsebuul jin ta tapa ma ruma 'cesh mo.

¹⁶ Ka yiha/ 'kwanin tiya si'da/ palki a'di mo mmodotkina uni jamas mii 'peni momis mo.

¹⁷ Hili a'di mishki gwo jin kulumkina uni eya dum buni mo dhali o uni gwo mo ki: Aris bampa/ kun kwa/kunu bwa e is buni mo tani uni shi/kin mo dhali gu'b a'di bitki'da po/ gu'ba kamu/ mo.

¹⁸ Dhali wakka Setaan si'da/ kwa/i bwa mo apo/ is piti mo tani ki bampam piti midi dosh kata mo? Haali/ um o gwo mo ki aha/ urkina ruma 'cesh ka pije/ ki gway ma Baalsebuul mo.

¹⁹ Dhali wakki/ aha/ ura ruma 'cesh ka pije/ ki gway ma Baalsebuul mo tani iya/m bum ur uni ka pije/ katinta mo? Wakan uni mini ta imandwall gwo gom um mo be.

²⁰ Hili wakki/ a'di ki me'd ma Arungimis mo jin urkika/ aruma 'cesh ka pije/ mo tani yan'ko'd Bampa/ ma Arungimis midi pu'du/ apo/ um mo be.

²¹ Ki wathi/ jin 'bitha'bi'th mo hi'thki'da gongoro/ e is piti 'baar mo mmodi mo mmoji gu'b pitiñ gana/ mo tani tom piti kun tana a'di mo tani dhunu ki mo ma ku'th is mo be.

²² Hili wakki/ jan 'deŋ kamu/ jin 'bitha'bi'th mo mmobol a'di e mo gam a'di 'kup mo dhali pi a'di e mo tani a'di ki budha goŋgorom piti jin gama a'di gwo is mo tani a'di midi kwa/ tom piti jin budhu bwa mo be.

²³ A'di jin diki ca'b nyaƙki aha/ mo tani a'di di'd apo/ aha/ mo dhali a'di jin diki nyaƙ is tul ki aha/ mo tani a'di ta a'di jin kwa/i bwa mo.

Mo jin Doƙkin ma Rum Thus kun Nyo/on ka Nyaŋ'ko'd mo

²⁴ Ka rum thus kun nyo/on iikin ka piƙe/ 'peni wathi/ mo tani a'di yaki'd ki tur mo e mo jin dar gi yi'de/ mo mmoŋap mo mo mmosi/is mo. Dhali a'di diki gam moŋkamu/ mo tani a'di o gwo mo ki: Aha/ mina doƙ e gu'b pem ka nyaŋ'ko'd mo 'peni mo jin yayika/ mo 'peni cine/ mo.

²⁵ Dhali ki a'di pu'dki'd mo tani a'di gamki a'di ki a'di dhi'thkunu mo dhali to thosonkunu ki 'bore/ mo be.

²⁶ Yan'ko'd a'di ki ya mo dhali susa rum pesun tiya mo kun shi/ashi/ mo kun bol a'di ki is pitinƙ gana/ e mo dhali uni ciƙkin mo dhali 'ko imun mo. Dhali mondirƙ 'ko'd gi wathi/ yan mo tani a'di warki'd ki shi/ mo mmobol jin twa/a/ e mo be.

Mom'bor Miin Gana/ mo

²⁷ Ki a'di oki gwo yansan mo tani a'boma kamu/ 'peni bwam ma waambuhany 'kwani mo tani a'di ekki cuuwa/ mo dhali o gwo mo ki: Mom'bor miin gom bwa gi a'di jin dhothi/ e mo dhali ako yan jin piƙina/ e mo be.

²⁸ Hili a'di ki o gwo mo ki: Mmodhal gwo yansan e i is mo mmo/o gwo mo ki: Mom'bor miin gom uni gwansan kun ciƙki Gwo ma Arungimis mo dhali mmodhu uni mo be.

'Kwani kun Tana Nyakum Yil kun Ta Thus ki Thus mo Nƙƙi Jamas Mii mo

²⁹ Ka waambuhany 'kwani marki is mo tani a'di telki gwo 'pen mo mmo/o gwo mo ki: 'Kwani ma nyaƙum yil gwansan mo tana nyaƙum yil kun ta thus ki thus mo. Uni nƙƙi jamas mii mo, hili jamas miin kamu/ yisa minu ci gom uni yisa hili isi ciki/ jamas mii ma Yuunaan mo be.

³⁰ Haali/ me'da Yuunaan warki'd ki jamas mii gom 'kwani gi Pa Ninawa mo tani wakan mina Ya/ gi 'Kwani ita goma nyaƙum yil gi 'kwani gwansan mo be.

³¹ A'bom jin ta'da malik 'peni 'ko'd gwar ma biny cam mo tani a'di midi cuyi mis mo dhali dwell gwo mo nyaƙki 'kwani ma nyaƙum yil gwansan mo, dhali waƙ uni mo, haala yim a'di pu'dki'd mo 'peni 'pemen gi mony'cesh mo mmocik yuƙ ma Sulemaan mo, dhali hili mo mo ma, jan tal 'deŋ kamu/ jin eƙa/ ek jin bolki'da Sulemaan e mo tani a'di di'd mmahan mo be.

³² 'Kwani gi Pa Ninawa mini cu mis mo e gwon dwell mo nyaƙki 'kwani ma nyaƙum yil gwansan mo dhali waƙ uni mo, haali/ uni ri'ckina du is mo 'peni gwo jin cin ma Yuunaan uni mo, dhali hili mo mo ma, jan 'deŋ kamu/ jin eƙa/ eƙ mo mmobola Yuunaan e mo tani a'di di'd mmahan mo be.

Alamba/ gi Buŋgwar Is mo

³³ Wathin kamu/ yisa di'da ki a'di ci'thki'da lamba/ mo dhali kar a'di e jis jin cwanyu mo e bwan gu'b mo walla mmokar a'di mo e bwan'kwariny ton'kul bwa mo hili a'di ki dhal a'di mo mmodi eya po/ tirkina/ mo ki uni gwansan kun ciƙki gu'b mo tani mini mish moŋkush mo be.

³⁴ Em bum a'di ta'da lamba/ gom buŋgwar is bum mo be. Wakki/ em bum tal 'de/ mo tani buŋgwar is bumi 'baar mo 'tu'du/ mo ki moŋkush mo be. Hili wakki/ a'di diki tal 'de/ mo tani buŋgwar is bum 'tu'dkunu mo ki mondhurumi'd mo be.

³⁵ Wakan miyi ki 'bore/ mo ma, gom moŋkush jin di'd e /e mo jin mina a'di diki dhurum mo mo.

³⁶ Yan'ko'd waŋki/ buŋwar is bum 'tu'du/ mo ki moŋkush mo tani mmodar gi mondhurumi'd e 'bana kamu/ mo tani a'di 'baar ka 'bimpil mo midi 'twak mo mo me'da bi ma lamba/ jin ci um moŋkush mo be.

Yesus A'di Be'dki Mii gi 'Kwani Parisiyiin mo dhali Imanmisha Jo'd Gwo mo

³⁷ Ki a'di di'd mmo/o gwo mo tani Wathim Parisi doŋki a'di mo mmoshwa to nyaŋki a'di mo. Wakan a'di yaki'd nyaŋki a'di mo dhali ca'bki'da tharabeesa mmoshwa to mo.

³⁸ Dhali Wathim Parisi merki'd kagahara mo mmopar a'di e mo mmodina a'di ki 'thur me'd ki yi'de/ ntwa/a/ ki tonte/ gi montee mo.

³⁹ Dhali Tapa o a'di gwo mo ki: Shwane/ um 'Kwani Parisiyiin, um lamki 'ko'd gwar ma kubbaaya mo dhala sahan mo tani dhali hili e bwaman mo tani um 'tu'dkunu mo ki mondil to mo dhali ki mii kun 'coŋa'coŋ mo.

⁴⁰ Um pus gwahan. Dina a'di jin uŋki 'ko'd gwar ki uŋ bwaman mo si'da/ 'taa?

⁴¹ Hili ciyi to jin minu ci ki me'd mo gom 'kwani kun hatha'ko'd mo, to gwansan kun 'koni cine/ mo dhali hili mo mo ma, aris to 'baar mo ta kun dhelelkin mo gom um mo be.

⁴² Hili wayyi e um 'Kwani Parisiyiin, haali/ um cina nana/ ki to jin cinu Arungimis mo dhali jipin to jin wana e ka guremu/ mo dhali aris jipi/ kun kuyi mo ki kuy mo dhali um ki ta piny is mo e momii miŋkar/e mo dhali mo/ en ma Arungimis mo. To gwansan ka ba/ mina umi mii thim mo ba/ dhali mmo'koki ta piny is gom miin tiyan tiya mo.

⁴³ Wayyi e um 'Kwani Parisiyiin haali/ um eni moŋ'kom 'borga/ mo e gu'b gi montul is mo dhali um eni monthe me'd e mo ma suug mo.

⁴⁴ Wayyi e um haali/ um wana e ki moŋ'kupaje kun 'konuki mish mo dhali 'kwani ki ii i'kupi uni mo mmo'kona uni ki mish uni mo be.

⁴⁵ Amanmisha jo'd gwoŋkana kamu/ 'de/ thoŋ a'di gwo mo ki: Amanŋor Gwo, e gwo yan jin ona /e mo tani /e ki wak am si'da/ mo be.

⁴⁶ Dhali a'di ki o gwo mo ki: Wayyi e um kun ta imanmisha jo'd gwoŋkan mo si'da/ haali/ um ki dhu 'kwani to kun diŋa mii ki diŋ mo mmoka/ mo tani dhali um ki is bum 'koki ta tondiŋ'd is ki me'd mo ki ari me'd buma tal 'denŋ kamu/ mo be.

⁴⁷ Wayyi e um mo haali/ um nyanŋi moŋ'kupaje gi imanŋi gwo ma Arungimis kadhama/ mo, uni gun 'koshkina ibabam bum mo be.

⁴⁸ Wakan um ta iman/o gwo apo/ mo dhali gam gwo me'd mo gom mii gi ibabam bum mo haali/ uni 'koshki uni jwa mo dhali um nyanŋi moŋ'kupajem buni mo be.

⁴⁹ Wakan si'da/ Moyuŋ ma Arungimis o gwo cikise/ mo ki: Aha/ mina hashki uni imanŋi gwo ma Arungimis kadhama/ mo dhali imandhunu ki she/ mo, dhali kun tiya i bwam uni mo mina uni i'kosh jwa mo dhali kun tiya mina uni iŋo'c bwa kagahara mo

⁵⁰ ka bas gi imanŋi gwo ma Arungimisi 'baar mo kadhama/ mo jin wolkunu mo 'peni mo gi ka'bu mony'cesh mo tani minu doŋ to mo 'pena nyaŋum yil gi 'kwani gwansan mo be,

⁵¹ 'pena bas ma Habiil mo ntaga bas ma Sakariyya mo tani a'di jin 'ce'dkunu sho'k mo e bwaman ma gwata/ jin karu mo mmomiya bas mo dhali e gu'b gi mondheleladhelel ma Arungimis mo. Nye, aha/ ŋorkina um gwo mo ki a'di minu doŋ to mo 'peni 'kwani ma nyaŋum yil gwansan mo be.

⁵² Wayyi e um mo kun ta imanmisha jo'd gwoṅkan mo. Haali/ um bu'thkina muptha/ gi moyuk mo. Dhali um ki is bum 'koki ciç mo dhali um ki non uni gwansan kun ciçkin mo be.

⁵³ Me'd jin yakina a'di mo 'peni mo çaan mo tani iman'kwar to dhali 'Kwani Parisiyyin telki mii 'pen mo mmodhu gwo mbwa mo gom a'di kagahara mo dhali uni ki 'cwar a'di ki gwo mo jin mina a'di oya ris ton tiya mo

⁵⁴ mmotimkina uni a'di mo mmoçor mo gom a'di mo mmocesh a'di ki gwo jin mina a'di 'taki o gom toṅ kamu/ mo be.

12

Gwo jin Rumu apo/ Imanheka He'k E mo

¹ Dhali e mo çaan ka waambuhany 'kwani tana ris ka ris mo tulki is mo mmonta' de/ mo dhali uni yapki unin tiya ki is mo tani dhali a'di telki gwo 'pen mo mmo/o imanciç a'di gwo gwo mo nṅwa/a/ ki: Jiyi acumat gi 'Kwani Parisiyyin ki e ki 'bore/ mo ma, uni kun tana he'k e ka he'k e mo.

² Toṅ kamu/ yisa di'da jin kumkunu 'kup mo jin minu 'koki toṅ eya tente/ mo walla toṅ kamu/ yisa di'da jin bagkunu mo jin minu 'koki mish mo yisa.

³ Waçki/ gwo jin ona um e mondhurumi'd mo tani a'di minu ciç mo e moṅkush mo dhali a'di jin ona um ki kako/ mo ka kwal is e gu'b mo tani a'di minu ci eya tente/ e 'kuṅgu'b mo be.

A'di jin Minu Ko/ mo

⁴ Aha/ tora um gwo mo ikam pem mo ki: dhalku/ ki ko/ uni gwansan kun 'koshki buṅgwar is mo ma, dhali ṅ'ko'd uni dar ki miin kamu/ mo jin misha uni mii mo.

⁵ Hili aha/ mina rum um ki gwo mo gom a'di jin mina umi ko/ mo: Koki a'di, a'di jin ta gi mom'bi'th mo mmotaka ta'k mo e mo ma al o'd mo 'ko'di a'di 'koshki'da 'kosh mo. Nye, aha/ tora um gwo mo ki: Koki a'di mo ma.

⁶ 'Konuki yol ushi 'dii imudhe'd ka tariipa mowa? Dhali jan tal 'denj kamu/ 'peni uni yisa thiskunu e mo ibwambor ma Arungimis yisa.

⁷ E/ um hili amur'kup bum gana/ si'da/ uni 'baar mo denjunu e mo be. Dhalku/ is ki ko/ mo ma. Haali/ um gama she/ yol ki gam mo mmobol ushi 'dii e mo be.

Mmopiya Kriṣṭhos Gwo Mbwambori 'Kwani mo

⁸ Dhali aha/ tora um gwo mo, aris uni 'baar mo ka 'dete/ 'dete/ kun mini pi gwo gom aha/ mbwambori 'kwani mo tani wakan si'da/ Ya/ gi 'Kwani mididi pi a'di gwo mo ibwambori iman'doyu gwo ma Arungimis mo be.

⁹ Hili a'di jin waṅki aha/ gway mo mbwambori 'kwani mo tani a'di minu waṅ gway mo ibwambori iman'doyu gwo ma Arungimis mo be.

¹⁰ Dhali aris 'kwani 'baar mo ka 'dete/ 'dete/ uni kun oki gwo apo/ Ya/ gi 'Kwani mo tani uni minu dhal 'pen mo. Hili a'di jin wal gwo sor apo/ Shi/in Dheleladhelel mo tani a'di minu dhal 'pen mo yisa.

¹¹ Dhali ki uni mini sus um mo e bwambor gu'b gi montul is mo dhali e itapa mo dhali e uni gun ta gi moshirr mo tani dhalku/ is ki anan mo gom gwo gi wakata imina umi thoç mo walla gwonta imina umi o mo,

¹² haali/ Shi/in Dheleladhelel a'di mididi toṅ um gwo ki mo yansan gana/ mo gwo jin mina um ka i/o mo ba/.

Gwom 'Bi'th'e gom Wathi/ jin Ta Pa ki Pa jin Ta Pus mo

¹³ Jan 'denj kamu/ 'peni bwarj 'kwani ma waambuhany oki a'di gwo mo ki: Mantor Gwo, kana kam pem gwo mo ma, mmopwaç mal bwa mo nyakki aha/ mo.

14 Hili a'di o a'di gwo mo ki: Wathi/kaja kar aha/ mo mmota mandwall gwo mo walla mmota manpwaḱki um to bwa mo?

15 Dhali a'di ki o uni gwo mo ki: Hili ki 'bore/ mo ma, dhali jiyi aris mo jin 'thothu/ bwa ki e ki 'bore/ mo, haali/ mondiki/e gi wathi/ a'di diki gamki mo jin isha tom piti jin gama a'di ka enthus mo.

16 Dhali a'di ki tor uni gwo mo ki gwom 'bi'th/e mo mmo/o gwo mo ki: A'cesh jin tana wathi/ jin ta pa ki pa mo tani a'di pirki to me'd mo ka enthus mo be.

17 Dhali a'di ki kulum gwo ibwa ki is piti mo ki: Aha/ mina miyya tinta mo haali/ aha/ dara ki mo mo mmodhu tom pem mo be.

18 Dhali a'di ki o gwo mo ki: To yansan a'di imiga/ imii mo be. Aha/ mina 'kosh themes pem ka 'cesh mo dhali nyanḱ kuny caaga/ mo be. Dhali aha/ mina dhu tom pemi 'baar mo kun ta pos pem mo dhali tom pem kun taka/ mo be.

19 Dhali aha/ mina owa ḱashiram pem gwo mo ki: ḱashiraa, /e ta gi to kun 'koshi jwa mo kun dhukunu mo gom yil ka ris mo be. Hili mo isunse/ mo ma, shwayi to mo, dhali piyi to mo dhali 'kunyi bwa mo ma.

20 Hili Arungimis o a'di gwo mo ki: /em pus yan mo. Mon'thiny yan shwane/ mo tani aḱashiram pini miga/ dot 'peni/e mo, dhali to kun thosonkina /e is mo tani uni mini ta kum maja mo?

21 Wakan a'di jin isha to kumma/ gom is piti mo dhali diki ta pa ki pa mo 'kup ka Arungimis mo.

Mmo/anan Is mo

22 Dhali a'di ki o imancik a'di gwo gwo mo ki: Wakan aha/ tora um gwo mo ki dhalku/ is ki anan mo gom mon'koki/em bum mo, gom to kun mina umi shwa mo walla to gom buḱḱwar is bum mo a'di jin mina umi hithi is mo.

23 Haali/ mondiki/e a'di ica'd ki tonte/ mo dhali buḱḱwar is a'di boli burrineye/ e mo be.

24 Kulumi gwo ibwa gom 'dii mo ma. Uni 'koki si to mo walla 'koki 'cith to mo tani uni si'da/ dar gi gu'b jin dhunu to mo walla themes mo dhali hili Arungimis thipki uni mo be. Bakata 'te/ um a'di i'bitha yol she/ ki 'bi'th mo mmobol 'dii e mo be.

25 Dhali jan 'deḱ kamu/ 'peni bwam um di'da jin midi anan is mo jin midi mish mar gulan tur piti is mo?

26 Wakki/ um si'da/ 'koki mish ushi toḱ gwa'dga/ mii mo kun wakan tan mo tani tinta anana um is mo gom miin tiya mo sa/?

27 Kulumi gwo ibwa mo ma, gom jandin to mo mmocakina uni mo. Uni 'koki miyya tu'c mo walla sura thus mo. Hili aha/ tora um gwo mo goma Suleaman eya aris monycam piti mo tani a'di dinuki hi'thki burrineye/ jin waki jandi/ 'peni uni gwansan 'de/ mo be.

28 Hili wakki/ Arungimis ki hi'th asho ki burrineye/ kun 'kon e bwaasho shwane/ mo dhali ka'thamo/ uni tagu i o'd mo tani bakata 'te/ imina a'di hi'th um ki burrineye/, um 'kwani kun aḱha monḱam gwo is ki aḱh kan mo?

29 Dhali dhalku/ ki simm to e jin mina umi shwa mo dhali gwo gom to jin mina umi pi mo walla dhalku/ ki ta iman/anan is e bwam bum mo.

30 Haali/ aris 'kwani gi kal gi mony'ceshi 'baar mo tani uni simmki to gwansan e mo dhali Ababam bum mishki a'di caan jin mina umi mii ta gi uni mo be.

31 Ma mo simm jasi bampam piti e mo dhali aris to gwansan mini ta kum bum si'da/ mo be.

Mmo/ish Kumma/ e Momis mo

32 Dhalku/ is ki ko/ mo ma, usha ma'diny mo, haali/ bwa ma Ababam bum midi 'bor mo mmoci um bampa/ mo be.

³³ Yoli tom bum kun tana um mo ma. Dhali ci to jin cinu ki me'd mo gom 'kwani kun hatha 'ko'd mo. Kucura jisilaan ki is bum mo ma, uni gun 'koki war ki kun dhamo/ mo, a'di jin ish to kumma/ mo e momis jin midi diki ush me'd ki sule/ mo, mo jin daru ka 'di/ mo mmo'dish mo is mo dhali adhurany midi diki 'ce'd uni sho'k mo be.

³⁴ Haali/ mo jin isha tom bum kumma/ mo tani a'di imin ma dum bumi 'ko si'da/ mo be.

Imanmiya Tu'c kun Timina Tim mo

³⁵ Dhalki empa'd bum minu 'kam ki to mo dhali citha lambam bum mo

³⁶ dhali wayi e ki 'kwani kun corki tapam buni mo mmopu'du/ bway pa mo 'peni momimash jin yukuwa yuk mo wakan ki uni mini mish ka'd ki a'di 'twarikal ise/ ki a'di midi pu'du/ mo dhali nagkana campur mo be.

³⁷ Mom'bor mii gom cinkina/ gwansan uni kun gama tapa ki e mo ki a'di pu'dki'd ka nyan'ko'd mo. Ka jin gana/ aha/ ona um gwo mo ki a'di midi 'kam empa'd piti ki to mo dhali yuk uni mo mmo'kowa tharabeesa mo dhali a'di midi yaku/ mo dhali mii uni to mo be.

³⁸ Wakki/ a'di pu'dki'd mo ntwa/a/ ki mombwam/e mo tani walla 'ko'di mombwam/e mo tani dhali a'di ki gam uni wakan mo tani mom'bor mii gom cinkina/ gwansan mo be.

³⁹ Hili mishi yan mo ma, wakka mancila gu'b midi 'taki misha tente/ jin mina wathin 'di/ iyayu/ mo tani a'di midi 'taki di ki e mo dhali midi diki dhal gu'b piti 'pen mo wathin 'di/ ki 'ce'd mo.

⁴⁰ Um si'da/ mini mii thoson is mo haali/ Ya/ gi 'Kwani midi pu'du/ mo ka tente/ jin mina um 'koki tosh ki a'di midi pu'du/ mo be.

Cinkina/ jin Diki Ta Isinj Gana/ mo

⁴¹ Buterus o a'di gwo mo ki: Tapa, a/e tori gwom 'bi'th/e yan jasi gom am mo 'teya, walla gom 'kwani 'baar mo?

⁴² Dhali Tapa ki o a'di gwo mo ki: Kaja a'di jin ta wathi/ isinj gana/ mo dhali yuka yuk mo mmota mandhu to mo? a'di jin mina tapam piti kar ari tapa apo/ gu'b piti mo mmoci uni tonte/ ki 'ban buni ka tente/ ka kar/e mo?

⁴³ Mom'bor mii gom cinkina/ caan mo a'di jin mina tapam piti gam mo wakki/ a'di midi pu'du/ mo mmogam a'di mmomii kan mo be.

⁴⁴ Ka jin gana/ aha/ tora um gwo mo a'di midi kar a'di eya powa ris tom piti 'baar mo kun tana a'di mo be.

⁴⁵ Hili wakki/ cinkina/ caan o gwo e is piti mo ki: Tapam pem tayi'da diite/ mo mmoyayu/ mo dhali a'di ki tel mii 'pen mo mmodor 'kwani gwath kun ta cinkina/ mo dhali kun ta cinkina/ nyara/ si'da/ mo dhali a'di ki shwa to mo dhali pi to mo dhali 'kosh ma su mo tani

⁴⁶ tapa gi cinkina/ yansan midi pu'du/ mo ka tee yan jin dina a'di ki tosh mo ki a'di midi yayu/ mo dhali ki mo jin dina a'di ki mish mo mo dhali a'di midi ci a'diya jisa mo dhali a'di midi kar a'di mo nyakki uni gun 'koki ta ku isinj gana/ mo be.

⁴⁷ Dhali cinkina/ caan jin mishi bwan tapam piti mo tani dhali diki thoson is mo walla diki mii me'd isi bwam piti mo tani a'di midi bu'th mondor me'd ka ris mo be.

⁴⁸ Hili a'di jin diki mish mo mo dhali mii to jin midi mii gam mondor mo tani a'di midi bu'th mondor jin gwa'dagwa'd mo. Aris 'kwani 'baar mo ka 'dete/ 'dete/ uni kun cikunu to ki nyanye/ mo tani 'peni uni mo to jin caaca mo tani minu dot mo. Dhali 'peni uni gun cina 'kwani to ki nyanye/ mo tani mina uni dot to ki nyanye/ si'da/ mo be.

Yesus ki Rak mo gi Kwa/u Bwa mo

⁴⁹ Aha/ pu'dkina mo mmokar o'd apo/ mony'cesh mo be. Dhali aha/ ona bwayi ki a'di minu 'tha mo hila/.

⁵⁰ Aha/ tana gi mo jin minu mii ki yi'de/ mo mmomii nycine/ mo dhali aha/ miina is ki 'kasa/ 'kasa/ mo ntagi a'di minu thim mo be.

⁵¹ Um toshkin ki aha/ pu'dkina mo mmoçi monjku'th is e mony'cesh mo 'taa? Yisa. Aha/ òra um gwo mo, hili, mmodhal mii e i is mo mmokwa/ bwa mo be.

⁵² Haali/ 'peni shwane/ mo gu'ba tal 'de/ jin mina 'kwani 'ko imudhe'd mo tani uni minu kwa/ bwa mo, kun 'koni kwara mo mini kwa/ bwa mo apo/ uni kun 'koni su/ mo dhali kun 'koni su/ mo tani mini kwa/ bwa mo apo/ unij kwara mo be.

⁵³ Uni mini kwa/ bwa mo, ababa apo/ ya/ mo dhali ya/ apo/ com mo, dhali kum apo/ 'bwa/ mo dhali 'bwa/ apo/ kum mo dhali kumpa jin ta'da mare/ apo/ mar pitim 'bomi mo dhali a'bom mash jin ta'da mare/ apo/ mar piti mo be.

Mo jin Nyithu Mo mo

⁵⁴ A'di si'da/ ki owa waambuhany 'kwani gwo mo ki: Ki um parkina rak e mo mmocu mo 'pena bor ma lungu'b mo tani um ki o gwo ki jahanne/ ki: Ari piriny pu'dki'd mo be dhali wakan a'di miiki'd mo be.

⁵⁵ Dhali ki um hilki 'tham 'peni 'ko'd gwar ma biny cam poshki'd mo tani um ki o gwo mo ki: Mo midi 'batha'ba'th mo. Dhali a'di miiki'd mo be.

⁵⁶ Um 'kwani kun tana he'k e ka he'k e kan mo. Um mishki to nyith e mony'cesh kun pikin mo dhali momis mo tani hili, atinta 'kona um ki mish nyith mo gi buj'kus shwanesan mo?

Mo jin Mina /e Thoson Gwo Nyakka Manyer /e Is ki Gway mo

⁵⁷ Dhali atinta 'kona um ki is bum ki theke'th gwo mo gom a'di jin 'boro'd mo?

⁵⁸ Me'd jin mina /e ya mo nyakka manyer /e is ki gway mo ibwambor ma mandwall gwo mo tani pali gwo mo mmothoson nyakki a'di mbway mo hili isi ciki/ ki a'di midi diki dir /e eya dwallin gwo jin ca'd mo dhali adwallin gwo jin ca'd mo midi ci /e eya mantor tonthus 'twa/a 'cesh mo dhali amantor tonthus 'twa/a 'cesh mo midi kar /e eya sijin mo be.

⁵⁹ Aha/ òra /e gwo mo ki /e mini diki pi ka pije/ ki sule/ ki mini ci ara maliim jin 'ko'd mo be.

13

Mo gi Rijuwa Du Is mo walla Mony'ce'd Sho'k mo

¹ 'Kwanin tiya 'kon ki mo caan mo uni kun òrki a'di gwo mo gom 'Kwani gi Pany Jaliil kun 'kosh ma Bilaatus abas buni e mo nyakki tom buni kun 'ciha/ uni 'kus mo mmomiya basa 'cesh mo.

² Dhali a'di ki thok uni gwo mo ki: A/um kulumki gwo ibwa ki 'Kwani gi Pany Jaliil gwansan ta imanmii miinthus kun shi/ashi/ mo mmobola ris 'Kwani gi Pany Jaliila tiya e mo 'taa? haali/ uni 'koshkunu ki isa nyor kan mo?

³ Aha/ òra um gwo mo ki: Yisa. Hili isi ciki/ um mini rica du is mo ki umi 'baar mo minu 'koki 'ce'd sho'k wakan mo be.

⁴ Walla uni gwansan kun 'koni 'kume'd i'ce'dka pekwarra mo uni gun bitkina gu'ba turga/ apo/ mo e Pan Siluwaam mo dhali 'kosh uni jwa mo tani a/ um kulumki gwo ibwa mo ki uni ta imandhin gwo kun shi/ashi/ mo mmobola ris unim tiya kun 'kon e Pa Urushaliim e mo 'taa?

⁵ Aha/ òra um gwo mo ki: Yisa, hili isi ciki/ um mini rica du is mo ki umi 'baar mo minu 'koki 'ce'd sho'k wakan mo be.

Gwom 'Bi'th/e gom Cwampu/ mo

⁶ Dhali a'di ki tor gwo gi gwom 'bi'th/e yan gom uni mo ki: Wathi/ jin ta'd gi cwampu/ jin sikina a'di e bwaagon piti mo dhali a'di pu'dki'd mo mmonap maman 'peni a'di mo tani dhali a'di diki gam jan 'dej kamu/ mo be.

⁷ Dhali a'di ki owa manhil cwalman gwo mo ki: Hili mo mo ma. Yil 'koni kwara shwane/ jin yayika/ mo mmonap maman 'pena pu/ yan mo tani dhali aha/ dinaki gam jan 'de/ mo. Jepi a'di ka 'cesh mo ma. Atinta mina a'di bu'th mony'cesh yan kan mo?

⁸ Dhali a'di ki thok a'di gwo mo ki: Dhalki a'di di'd mo ma, tapa, yil yansan si'da/ ntagi aha/ mina cwany a'di ka 'kawur is mo dhali wol guren to/eya po/ mo.

⁹ Dhali wakki/ a'di midi dho'th maman ki yil jin 'ko'd mo, 'boro'd be. Hili wakki/ a'di diki dho'th maman mo tani /e mini mish a'di jep ka 'cesh mo be.

A'bom jin Ta Nwol jin Waçkunu ka Cim ma Pesu/ mo

¹⁰ Dhali a'di diki'd mo mmo'or gwo mo e gu'b gi montul isa kamu/ ka cim ma pesu/ mo.

¹¹ Dhala 'boma kamu/ diki'd jin ta'd ga rum thus jin 'batha a'di mo mmo/ ath mom'bi'th mo ki yili 'kume'd i'ce'dka pekwaro mo. Ayim di'd ki gonjo/ mo dhali a'di mol is piti 'de'k ki 'bore/ mo.

¹² Dhali ka Yesus parki'da yim e mo tani a'di yukki'da yim mo dhali owa yim gwo mo ki: A'boma, /e din ki 'kus mo 'peni 'ba'th pini mo be.

¹³ Dhali a'di ki dhu me'd piti apowa yim mo dhali ki jahanne/ ayim 'ka'dkina is mo dhala yim 'borki'da Arungimis bwa i is mo be.

¹⁴ Hili tapa gi gu'b gi montul is mo a'di shwaki'da nyor ka nyor mo haala Yesus waçki'da waç ka cim ma pesu/ mo be. A'di ki o 'kwani gwo mo ki: Acim 'koni pe'de/ jin minu ka mii thima tu'c mo be. Iiyu/ ka cim gwansan mo ma ki um minu waç mo, yisa ka cim ma pesu/ mo.

¹⁵ Yan'ko'd Tapa ki thok a'di gwo mo ki: Um 'kwani kun tana he'k e ka he'k e mo. 'Kona um ka 'dete/ 'dete/ ka cim ma pesu/ ki 'cuç morbip bum mo walla thuluny bum 'peni gu'b buni mmosus uni mmopi yi'de/ mo 'taa?

¹⁶ Dhala 'bom yansan mo jin ta 'bwa/ ma Ibrahiim mo a'di jin deçkin ma Setaan ki yili 'kume'd i'ce'dka pekwaro mo tani a'di ka ba/ mminu mii diki 'cuç mo 'peni mondek yan ka cim ma pesu/ mo?

¹⁷ Me'd jin okina a'di gwo gwansan mo tani aris uni kun ta 'kup ki a'di mo tani dhukunu ki mon'the is mo dhala ris 'kwani 'baar mo 'kunykina bwa mo goma ris mii gi monyca kun miikina a'di mo be.

Gwom 'Bi'th/e gom Emen To jin Miinuwa 'Tash mo

¹⁸ Dhali wakan a'di ki o gwo mo ki: Bampa/ ma Arungimis wana e katinta mo sa/? Dhali aha/ mina kar a'di ka par 'ban katinta mo?

¹⁹ A'di wana e ki emen to jin miinuwa 'tash jin kala wathi/ mo dhali si e monsinum piti mo. Dhali a'di caki'd mo dhali a'di warki'd ki cwa mo dhali 'dii kun pen e mis mo tani nyançi gu'b buni eya bim piti mo be.

Gwom 'Bi'th/e goma Cumat mo

²⁰ Dhali dok/e a'di ki o gwo mo ki: Aha/ mina kar Bampa/ ma Arungimis ka par 'ban kata mo sa/?

²¹ A'di wana e ka cumat jin kal ma 'bom mo mmo'thok mo mmoce e ka dipany ka uçañ bwamani kwara mo ntagi a'di seki'd mo be.

Acampur jin Nyutha 'Twaman ki Nyu'th mo

²² A'di yaki'd mo e bway piti mo e bampa/ mo dhali e pa 'baar mo mmo'or gwo mo dhali a'di ki ya mo 'kup ki Pa Urushaliim mo.

²³ Dhali wathin 'deŋ kamu/ o a'di gwo mo ki: Tapa, mina uni gwansan kun wothkunu mo 'ko i daƙa/ kan mo 'taa? Dhali a'di ki o uni gwo mo ki:

²⁴ Uthi/ mo ma mmociƙ mo eya campur jin nyuthanyu'th mo haali/ 'kwani torkika/ um gwo mo ki: Uni tana ris mo kun mini simm mo e mmociƙ mo tani dhali uni mini mol se mo be.

²⁵ Ki eŋ kamu/ ka mancila gu'b, ki a'di midu cu mis mo dhali mutha campur mo tani um mini tel mii 'pen mo mmodosha pije/ mo dhali nagkana campura po/ ki me'd mo mmo/o gwo mo ki: Tapa, ka'dki am gu'b mo ma. A'di midu thok um gwo mo ki: Aha/ mola mo jin iyyina um 'peni cine/ mo be.

²⁶ Dhali yan'ko'd um mini tel mii 'pen mo mmo/o gwo mo ki: Aman shwana to mo dhali pi to mo e buŋ'kus pini mo dhali /e torki aman gwo mo e bway bam mo.

²⁷ Hili a'di midu o gwo mo ki: Aha/ tora um gwo mo ki: Aha/ dinaki mish mo mo jin iyyina um 'peni cine/ mo be. Iiku/ um mo 'peni aha/ mo aris umi 'baar mo kun miiki mii kun 'coka'cok mo.

²⁸ Dhali yan'ko'd um mini ko mo dhali 'pe'd shem bum mo ki um mini para Ibrahiim e mo dhala Is/hak mo dhala Yakuub mo dhali aris imanci gwo ma Arungimis kadhamo/ mo e Bampa/ ma Arungimis mo dhali um ki is bum minu ta'k ka pije/ mo be.

²⁹ Dhali 'kwani mini pu'du/ mo 'peni mom'pesho'k mo dhali 'pena bor ma luŋgu'b mo dhali 'peni moŋ'ko'd gwar ma bim poros mo dhali 'peni moŋ'ko'd gwar ma biny cam mo dhali uni mini 'ko mo atharabeesa gi Bampa/ ma Arungimis mo be.

³⁰ Dhali hili mo mo ma, unin tiya kun 'koni 'ko'd mo tani minu dhu itwa/a/ mo dhali unin tiya kun 'koni twa/a/ mo tani minu dhu i'ko'd mo be.

Yesus Gwoki'd Apo/ Pa Urushaliim mo

³¹ Dhali e mo caan gana/ mo tani 'Kwanim Parisiyyina tiya pu'dkin mo dhali o a'di gwo mo ki: Yayi mo 'peni mahan mo haala Hirodus ŋap /e mmo'kosh jwa mo be.

³² Dhali a'di ki o uni gwo mo ki: Iiku/ um mo ma dhali tora maƙ caan gwo mo ki: Hili mo mo ma. Aha/ urkina ruma 'cesh ka pije/ mo dhali mii mowaƙ shwane/ mo dhali ka'thamo/ si'da/ mo, dhali ka cim kwara mo tani aha/ mina 'baar bway pem mmothim a'di mo be.

³³ Bahili aha/ mina mii ya e bway pem shwane/ mo dhali ka'thamo/ dhali ka tee jin midu bathi 'ko'd mo haali/ a'di dinuki mish mii mo ka manci gwo ma Arungimis kadhamo/ mo minu 'koki 'taki 'ce'd sho'k ka pije/ mo 'peni Pa Urushaliim mo be.

³⁴ Ayy Urushaliim, Urushaliim, um kun 'koshki imanci gwo ma Arungimis kadhamo/ jwa mo dhali 'kosh uni gwansan ki wosh mo uni gun hashkunu mo e um mo. Me'd wana risa jin oka/ bwayi mmotul uƙim bum is mo mmontaƙ 'de/ mo me'd kumana ŋwa jin wupi ushan piti ka bi mo dhali um ushkin mo be.

³⁵ Hili mo mo ma. Gu'b bum dhalkunu um 'pen ki ma'du/ mo be. Dhali aha/ tora um gwo mo ki um mini 'koki par aha/ e mo ntagi um mini o gwo mo ki: Mom'bor mii ki a'di jin pu'dki'd ki gway gi Tapa mo be.

14

Yesus Waƙi Wathi/ jin 'Kosha 'Batha Wasa/ I/is mo

¹ Dhali ka cim ma pesun 'deŋ kamu/ mo tani ki a'di yaki'd mo mmosha to mo e gu'b gi tapaŋ kamu/ mo 'peni 'Kwani Parisiyyin mo tani uni timki a'di mo be.

² Dhali hili mo mo ma, wathin kamu/ doshki'da bor a'di mo a'di jin ta'd gi 'batha wasa/ e is piti mo.

³ Dhala Yesus ki o imanmisha jo'd gwonkan gwo mo dhali 'Kwani Parisiyin gwo mo ki: A'di ta mii gi gwonkan mo 'taa? mmowaça waç ka cim ma pesu/ mo? walla minu dhalku/ mo?

⁴ Hili uni 'kon ki shwam mo. Yan'ko'd a'di ki sus a'di mo dhali waç a'di mo dhali mmodhal a'di mmoya mo be.

⁵ Dhali a'di ki o uni gwo mo ki: Wathi/ jana 'peni bwam um ta'd gi thulunyo mo walla morbip kun ta'kkin mo e bwany jis mo, mina a'di diki ya ki jahanne/ mo mmodir uni ka pije/ mo ka cim ma pesu/ mo 'taa?

⁶ Dhali uni mol thok gwo yansan mo be.

Gwo gom Yilkina/ dhali Com Gu'b mo

⁷ Dhali a'di ki tor uni gwo mo ki gwom 'bi'th/e mo gom uni gwansan kun yukkunu mo ki a'di nyithki uni mo mmokwanykina uni mo'kom 'borga/ mo mmo/o gwo mo ki:

⁸ Ki /e yukkunu mo, ma e momiimash ka tul 'kup mo tani dhalku/ ki ca'ba 'cesh e mom'borga/ mo, hili isi ciki/ wathi/ jin ekki'd ki /e mo yukkina a'di mo be,

⁹ dhali a'di jin yukki /e mo gara/ midu pu'du/ mo dhali o /e gwo mo ki: Ciyi mo yansan ki wathi/ yansan mo ma dhali yan'ko'd /e mini tel mii 'pen mo mmo'the is mo mmobu'th mo jin gwa'dagwa'd mo be.

¹⁰ Hili ki /e yukkunu mo tani yaku/ mo dhali ca'b e mo jin gwa'dagwa'd wakan mo, ki a'dim bum jin ciki'da yuk mo midu pu'du/ mo tani dhali a'di midu o /e gwo mo ki: Amugum pema, shoru/ mo ma, mmoça'bi mompoko'd yaase mo. Yan'ko'd /e minu tak mo e bun'kus uni 'baar mo kun 'kona tharabeesa nyakki /e mo be.

¹¹ Haali/ aris 'kwani 'baar mo ka 'dete/ 'dete/ kun dhu is buni ki ca mo tani minu dhu ki gwa'd mo, dhali a'di jin kar is piti ki gwa'd mo tani a'di minu kar ki ca mo be.

¹² Dhali a'di si'da/ o gwo mo e wathi/ jin yukki a'di mo ki: Ki /e ki ciya yuk jin yuku mo gom tonte/ mo walla dhan tonte/ jin shwanu mo tani dhalku/ ki yuk imugum pini mo walla ikam pini mo walla ibas pini mo walla imannyak 'kom pini kun ta pa ki pa mo hili isi ciki/ uni si'da/ mini yuk /e mo mmodok mii mo dhali /e minu rak mii yani bway mo be.

¹³ Hili wakki/ /e mini ciya yuk jin yuku mo tani yuki 'kwani kun hatha'ko'd mo ma, dhali uni gun kutha is gunkuru/ mo dhali uni kun ta njwol mo dhali uni gun tana ja'da/ mo be

¹⁴ dhali /e minu 'bor mii mo haali/ uni mini mol /e to rakı bway mo be. Hili /e minu rak to ibway mo ki mompinu ki uni kun ta kuj kar/e mo be.

Gwom 'Bi'th/e gom Dhan Tonte/ jin Shwanu mo

¹⁵ Ki jan tal 'denj kamu/ 'peni uni gwansan kun 'kokina tharabeesa nyakki a'di mo ciki gwo yansan mo tani a'di o a'di gwo mo ki: Mom'bor mii gom a'di jin midu shwa tonte/ e Bampa/ ma Arungimis mo be.

¹⁶ Hili a'di ki o a'di gwo mo ki: Wathi/ ki enj kamu/ ciki'da yuk mo gom dhan tonte/ jin shwanu mo tani a'di yukki 'kwani ka ris mo be.

¹⁷ Dhali ka tee pu'dki'd mo gom tonte/ mo tani a'di hashki cin'kinam piti mo mmo/o uni gwansan gwo mo uni kun yukkunu mo ki: Iiyu/ mo ma, haali/ aris to 'baar mo thosonkunu mo be.

¹⁸ Hili uni 'baar mo telki mii 'pen mo mmoci gwo 'ko'd mo be. Wathi/ jin twa/a/ a'di oki a'di gwo mo ki: Aha/ daka yola bunto mo dhali aha/ mina mii ya mo mmpar a'di e mo. Aha/ dotkina /e mo ki aha/ minu dhalku/ mo be.

19 Dhali jaŋ kamu/ o gwo mo ki: Aha/ yolkina morbipi 'kume'd mo kun repu/ 'ba/ ki dhaŋka'b to ka susu/ susu/ mo dhali aha/ mina mii ya mo mmopal uni mo. Aha/ dotkina/ e mo ki aha/ minu dhalku/ mo be.

20 Dhali jaŋ kamu/ o a'di gwo mo ki: Aha/ daka maskina a'bom mo dhali gom gwo gi wakan mo tani aha/ mina molku/ yaku/ mo be.

21 Wakan ciŋkina/ a'di pu'dki'd mo dhali tor gwo yansan ki tapam piti mo dhali com gu'b a'di shwa'da nyor kagahara mo dhali o ciŋkinam piti gwo mo ki: Yaku/ ka pije/ ki jahanne/ mo ma, e bwaya beega/ mo dhali bway tura nyu'thga/ mo gi 'penkuman bampa/ mo dhali susi uni gun hatha'ko'd mo dhali uni gun kutha is gunkuru/ mo dhali uni gun tana ja'da/ mo dhali uni kun ta njwol mo.

22 Dhali yan'ko'd ciŋkina/ ki o gwo mo ki: Tapa, gwo gi kankina/ e akan mo tani miikunu mo be dhali embul di'd naskina/ mo.

23 Dhali tapa ki o ciŋkina/ gwo mo ki: Yayi e bway tur ka pije/ mo kun 'kon is'ko'd mo dhali e bwaagon mo dhali malasi 'kwani ki gwo mo mmo/iiyu/ mo, ki gu'b pem minu 'tu'd mo be.

24 Haali/ aha/ tora um gwo mo ki jan tal 'den kamu/ 'peni 'kwani gwansan kun yukunu mo tani uni mini 'koki nyok tontem pem mo be.

Mii jin Minu Mii Den E Mmota Amanciŋa Yesus Gwo mo

25 Dhali adhana waambuhany 'kwani nyaŋki ii ki a'di mo dhali a'di ki tuŋa bor mo dhali o uni gwo mo ki:

26 Waŋki/ wathiŋ kamu/ midi yayu/ i aha/ mo dhali diki shi/ ababam pitin gana/ i e mo dhali kum mo dhali ash mo dhali uci mo dhali ikam mo dhali i'bwaham mo, nye, dhali mondiki/em pitin gana/ si'da/ mo tani a'di mol ta amanciŋ gwom pem mo be.

27 A'diyin jin diki kal cwany'cithan dhul pitin gana/ mo dhali bath aha/ isho'k mo tani a'di mol ta amanciŋ gwom pem mo be.

28 Haali/ wathi/ jana 'peni bwam um jin ona bwa ki nyan gu'ba turga/ mo mina a'di diki di ntwa/a/ mo mmodeŋ to e jin midi mii 'baar a'di mo 'taa? waŋki/ a'di ta'd gi to jin 'kosh jwa mo mmothim a'di mo.

29 Hili isi ciki/ waŋki/ a'di midi kar mo jin ka'bu mo tani dhali a'di mol a'di thim mo tani aris uni 'baar mo kun mishi a'di mo tani mini tel mii 'pen mo mmomii a'di ka mak mo be.

30 mmo/o gwo mo ki: Wathi/ yan ti telki mii 'pen mo mmonyan gu'b mo tani dhali mol a'di 'ka 'kup mo be.

31 Walla malik si'da/ jin yaki'd mo mmogam 'kup ka malika kamu/ mo mmo/as mo tani mina a'di diki di itwa/a/ mo mmo'cunycur mii mo waŋki/ a'di mish ta ga askar ka alaapi 'kume'd mo mmogam a'di 'kup mo a'di jin yayi'd mo apo/ a'di nyaŋka askar alipi iss 'kwanimpa 'de/ mo 'taa?

32 Dhali waŋki/ a'di diki wakan mo tani ka malika kamu/ dina sho'k mmosi'du/ mbway mo tani a'di ki hash amanya mo dhali dot gwo mo gom moŋku'th is mo be.

33 Gom gwo gi wakan mo tani a'diyin 'peni um mo jin diki dhal tom piti 'peni 'baar mo jin tana a'di mo tani a'di mol ta amanciŋ gwom pem mo be.

A'donkoro/ jin Thapathap mo

34 A'donkoro/ a'di 'bora'bor mo hili waŋki/ a'di ki this mom'bala'th piti e mo tani a'di midi mish mom'bala'th piti ta kata ka nyan'ko'd mo?

35 A'di diki ha me'd mo goma 'cesh mo walla goma duhal guren to/e mo. 'Kwani mini biŋ a'di ka pije/ mo. A'di jin ta gi bwany'ce mo mmocik gwo mo tani dhalki a'di cik gwo mo ma.

15

Gwom 'Bi'th/e gom Ka'bal jin Thisi E mo

¹ Dhali imantera thulpa/ dhali imanmii miinthus mo uni 'kokin mo mmo'dish a'di is mo mmocik a'di gwo mo be.

² Dhali 'Kwani Parisiyin dhali iman'kwar to mo uni miina gungum mo mmo/o gwo mo ki: Wathi/yansan a'di buthi imanmii miinthus mo dhali nyak to shwa ki uni mo be.

³ Wakan a'di ki tor uni gwo gom gwom 'bi'th/e yansan mo be ki:

⁴ Ki wathi/ jana ibwam um ta'd gi ka'bal issi mudhe'd mo, wakki/ jan 'de/ this e mo 'peni uni mo tani a'di midi diki dhal uni ka iss 'kwanimpa imudhe'd mmo/ath 'de/ mo e bwaasho mo dhali ya mo mmonap a'di jin thiski e mo ntagi a'di ki gam a'di mo 'taa?

⁵ Dhali ki a'di gamki a'di mo tani a'di ki kar a'di mo e 'kupa bim piti mo dhali 'kuny bwa mo be.

⁶ Dhali ki a'di pu'dki bway pa mo tani a'di ki yuk imugum piti mo dhali imannyak 'kom piti mmontal 'de/ mo mmo/o uni gwo mo ki: 'Kunyi bwa mo ma, nyakki aha/ mo, haali/ aha/ gamkina ka'bal pem jin thiski e mo be.

⁷ Dhali wakan, aha/ tora um gwo mo ki mom'bor bwa midi caaca mo ki nyanye/ mo e momis mo apo/ jan 'de/ jin ta'da amanmii miinthus jin ri'cki'da du is mo mmobol uni gun ta iss 'kwanimpa imudhe'd athka 'de/ e mo kun tana kar/e mo uni gun mini mii 'koki ta gi mo gi rica du is mo be.

Gwom 'Bi'th/e gom Emena Guurush jin Thisi E mo

⁸ Walla a'bom jana ta gi emena guurush 'dolkon kushi kume'd mo,* wakka yim this jan 'deŋ kamu/ e mo tani mina a'di diki kanya lamba/ mo dhali dhi'th gu'b mo dhali nŋap a'di ki burbur mo ntaga yim ki gam a'di mo 'taa?

⁹ Dhali ka yim gamki a'di mo tani ayim ki yuk iyim piti mo dhali imannyak 'kom piti mo mmontal 'de/ mo mmo/o gwo mo ki: 'Kunyi bwa mo ma, nyakki aha/ mo, haali/ aha/ gamkina emena guurush pem jin thiskika/ e mo be.

¹⁰ Dhali wakan si'da/ aha/ tora um gwo mo ki mon'kuny bwa midi di mo ibwambori iman'doyu gwo ma Arumgimis mo apo/ amanmii miinthus 'de/ jin ri'cki'da du is mo be.

Gwom 'Bi'th/e gom Ya/ gi Wathi/ jin Thisi E mo

¹¹ Dhali a'di ki o gwo mo ki: Wathi/ di'd jin ta gi iya/i su/ mo be.

¹² Dhali a'di jin gwa'da'd ki uni mo, o com gwo mo ki: Ababa, ci aha/ to jin minu pwaŋ bwa mo gom aha/ mo. Dhali a'di ki pwaŋki uni to bwa mo be.

¹³ Dhali ka cim 'koki ta aris n'ko'd mo tani a'di ya/ jin gwa'da'd mo tulki'da ris to isi 'baar mo dhali a'di ki bu'th moyam piti mo e bampa/ jin si'dasi'd mo, dhali e mun mo tani a'di ki la mii tom piti ka burbur mo dhali a'di diki butha shure/ mo.

¹⁴ Dhali ki a'di 'baarki tom piti 'baar mo tani adhan te/ cuki mis mo e bampa/ caan mo dhali a'di telki mii 'pen mo mmohar to mo be.

¹⁵ Wakan a'di yaki'd mo mmogam is piti gi wathin 'de/ gi 'penkuman bampa/ caan mo. A'di ki hash a'di mo e bwam buntom piti mo mmoci kuthar to mmoshwa mo.

¹⁶ Dhali a'di imina bwa 'bor mmoshwa kwarma'c maman cwa mo kun cinu kuthar mo mmoshwa mo be. Dhali jan 'deŋ kamu/ yisa di'da jin ci a'di to mo.

¹⁷ Hili ki a'di kulumki gwo ibwa mo ki is piti mo tani a'di o gwo mo ki: Hili cinkina/ ma baba wana risa kun cikina a'di aguurush mo dhali kun ta

* 15:8 Emena guurush 'dolkon kush 'de/ jin wana e ki nasa guurush mo.

gi tonte/ kun 'koshi jwa mo dhali kun uri 'kup mo, hili aha/ 'ce'dkunu sho'k ki te/ mmahan mo be.

¹⁸ Aha/ mina cu mis mo dhali ya ababam pem mo dhali aha/ mina o a'di gwo mo ki: Ababa, aha/ miikina miinthus apo/ momis mo dhali ibwambori /e mo be.

¹⁹ Aha/ mina mish ta ji gi ha me'd mo dok/e yisa ki aha/ minu yuk ki ya/m pini mo. Kari aha/ ki cinjina/ jin midi mii to ka guurush mo ma.

²⁰ Dhali a'di cuki mis mo dhali pu'd mo eya ababam piti mo. Dhali hili ki a'di si'dasi'd mo mbway naskina/ mo tani ababam piti mishki a'di mo dhali a'di ki hil a'di ka 'thime/ mo dhali a'di ki gus mo dhali koth a'di me'd mo dhali pi a'di 'twa/ mo be.

²¹ Dhali ya/ ki o a'di gwo mo ki: Ababa, aha/ miikina miinthus apo/ momis mo dhali ibwambori /e mo. Aha/ dinaki ta ji gi ha me'd mo jin minu yuk ki ya/m pini mo be.

²² Hili com ki o cinjinam piti gwo mo ki: Guyu/ burryne/ jin 'boro'd ki jahanne/ mo ma dhali hi'th a'di mo, dhali hi'th a'di ki tome'd mo dhala ppa/ e sho'k piti mo.

²³ Dhali guyu/ ara morbip mo jin 'thika'thik mo dhali 'kosh a'di mo dhali dhalki ana 'kana a'di mo dhali 'bor bwa mo.

²⁴ Haali/ ya/m pem yansan a'di wuki'd mo dhali a'di piki'd mo shwane/ dok/e. A'di thiski e mo tani, dhali a'di gamkunu mo. Dhali uni telki mii 'pen mo mmo'bor bwa mo be.

²⁵ Dhali ya/ jin ta'da bwa nyara/ mo tani a'di di'd e bwam bunto mo. Dhali ki a'di pu'dki'd mo dhali 'dish gu'b is mo tani a'di cikki gway jin yuku mo dhali sa jin sana 'kwani mo be.

²⁶ Dhali a'di ki yuk cinjinaŋ kamu/ 'de/ mo dhali a'di ki dot a'di gwo gom 'pemen mii yansan mo.

²⁷ Dhali a'di ki o a'di gwo mo ki: Akam pini pu'dki'd mo dhali ababam pini a'di 'koshki a'di ara morbipa 'thikga/ mo haali/ a'di bu'thki a'di ka nyan'ko'd ki 'dantar mo dhali ki 'bore/ mo.

²⁸ Hili a'di shwaki'da nyor mo dhali ush bway bwan gu'b ya mo be. Ababam piti yaki'd/ ka pije/ mo dhali malas a'di mo.

²⁹ Hili a'di thokki com gwo mo ki: Hili mo mo ma, ka ris yili 'baar mo tani aha/ miikina /e to mo dhali aha/ dinaki ush gwonkan pini e mo. Hili /e diki ci aha/ ari mi mo ki aha/ mina 'taki 'bor bwa mo nyakki imugum pem mo.

³⁰ Hili ki ya/ m pini yansan pu'dki'd mo tani a'di jin loski tom pini ki miinthus jin ta miinyal mo dhali /e ki 'koshki a'di amor bipa 'thikga/ mo.

³¹ Dhali a'di ki o a'di gwo mo ki: Ya/uma, /e nyak di ki aha/ isa yempa/ mo dhali aris to gwansani 'baar mo kun ta kum pem mo tani uni ta kum pini mo be.

³² A'di ha me'd ki han gana/ mo mmo'bor bwa mo dhali mmo'kuny bwa mo goma kam pini yansan jin wuki'd mo dhali a'di di'd ki e mo, a'di jin thiskunu e mo dhali a'di gamkunu mo be.

16

Gwom 'Bi'th/e gi Wathi/jin Thisi To Dhu mo

¹ A'di si'da/ ki o imancik a'di gwo gwo mo ki: Wathiŋ kamu/ diki'd jin ta pa ki pa mo, a'di jin ta'd ka mandhu to mo dhali gwo gi yeru a'di is ki gway pu'dki'di a'di mo ki wathi/ yansan miiki tom piti jin tana a'di ka burbur mo be.

² Dhali a'di ki yuk a'di mo dhali o a'di gwo mo ki: Gwon tinta cik̄kika/ mo gom /e mo? Ciyaa/ montonden pini jin dhuna /e to e mo haali/ /e mini mish ta amandhu to mo dok/e yisa.

³ Dhali amandhu to a'di o gwo mo e is piti ki: Aha/mina mii katinta mo sa/? haali/ tapam pem a'di bu'thki mo jin dhuka/ to mo 'peni aha/ mo. Aha/ tana wathi/ jin 'bitha'bi'th jin 'kosh jwa mo mmoçwany jis yisa dhali aha/ 'thena is mo mmo'tho to mo.

⁴ Aha/ misha to jin miga/ mii mo ki 'kwani mini mish aha/ bu'th mo e gu'b buni mo ki aha/ minu kar 'pen ka pije/ mo 'peni mo jin dhunu to mo.

⁵ Wakan a'di ki yuk 'kwani kun 'kon ma mure/ gi tapam piti m'ba/ ka 'dete/ 'dete/ mo dhali a'di ki o jin t̄wa/a/ gwo mo ki: /e din ma mure/ gi tapam pem i'ba/ ekata mo?

⁶ A'di ki thok a'di gwo mo ki: Ayin jin baru ki iss* 'kwanimpa imudhe'd mo. Dhali a'di ki o a'di gwo mo ki: Budhi awarka/ jin 'kwara /e to mo dhali ca'bi a'cesh ki jahanne/ mo dhali 'kwari ki iss† 'kwanimpa su/ i'ce'dka 'kume'd mo.

⁷ Dhali yan'ko'd a'di ki o jan kamu/ gwo mo ki: Dhali ekata si'da/ ndin ma mure/ /e m'ba/ mo? Dhali a'di ki o a'di gwo mo ki: Pos bunyan jin baru ki iss 'kwanimpa mmudhe'd mo. Dhali a'di ki o a'di gwo mo ki: Budhi awarkam pini jin 'kwara /e to mo dhali 'kwari ki iss‡ 'kwanimpa idonj mo.

⁸ Dhali tapa ki manja mandhu to jin diki ta akar/e mo goma gany piti mo, haali/ iya/ gi 'kwaniny'cesh gwansan mo tani uni yukayuk mo eya nyakum yil buninj gana/ mo mmobol iya/ gi monkush e mo be.

⁹ Dhali aha/ tora um gwo mo ki, miya mugu gom is bum mo ki to jin ta pa ki pa mo kun 'koki ta kunj kar/e mo, wakan ki a'di midu ush me'd mo tani uni mini 'taki bu'th um mo e mo gi mon'koki/e ki sule/ ya ye 'ba/ mo.

¹⁰ A'di jin ta isinj gana/ mo gom ari tonj gwa'dga/ mo tani a'di ta isinj gana/ mo si'da/ gom to jin ca'd mo. Dhali a'di jin thisi to kun gwa'dan mii mo tani ta a'di jin thisi to kun can mii si'da/ mo be.

¹¹ Wakki/ um 'koki ta isinj gana/ mo gom to jin ta pa ki pa mo kun 'koki ta kunj kar/e mo tani aja a'di jin midu ci um to jin ta pa ki pa gana/ mo mmodhu mo?

¹² Dhali wakki/ um 'koki ta ku isinj gana/ mo gom to ma cinj kamu/ mo tani aja a'di jin midu ci um a'di jin midu ta jim bum gana/ mo?

¹³ Cinjkinaj kamu/ yisa di'da jin midu mish to mii gom tapa isu/ mo. Hili a'di midu mii shi/ jan tal 'deñ kamu/ i e mo dhali en jamu/ mo walla a'di midu bu'th jan 'de/ ka bor mo dhali wak jan kamu/ mo. Um moli mii Arumgimis to mo dhali mii to gi ta pa ki pa mo.

¹⁴ Dhali 'Kwani Parisiyyin uni gun ta iman/ena guurush mo ki uni cik̄kina ris to gwansani 'baar mo tani dhali uni 'thekki a'di shushi mis mo be.

¹⁵ Hili a'di o uni gwo mo ki: Um ta uni gun dhu is bum ka kar/e mo mbwambori 'kwani mo. Hili Arumgimis mishki'da dum bum mo. Haali/ a'di jin ek̄ki'd e bwaman 'kwani mo tani a'di ta tonthus ki thus mo e jis/e ma Arumgimis mo be.

Gwonkan jin Cinu mo dhali Bampa/ ma Arumgimis mo

¹⁶ Gwonkan jin cinu mo dhali imançi gwo ma Arumgimis kadhamo/ mo uni 'kokin mo ntaga Yoahaan mo. 'Peni mo yan mo tani gwom 'boro'd gi Bampa/ ma Arumgimis a'di cikunu mo dhali aris 'kwani 'baar mo ka 'dete/ 'dete/ cik̄kini a'di ki mombujur mo be.

¹⁷ A'di 'disha mii mo gom momis mo dhali mony'cesh mmopi mo mmobol ari businya/ gi gwonkan jin cinu mo ki a'di minu kar ki mompuu mo be.

* 16:6 miya † 16:6 kamsiin ‡ 16:7 tamaniin

Gwo jin Tor ma Yesus Apo/ Mo jin Dhaluwa Dhal 'Pen mo

18 Aris 'kwani 'baar mo ka 'dete/ 'dete/ kun dhal up buni 'pen mo dhali mash kun tiya mo tani uni miiki miinyal mo be, dhali a'di jin mashki'da 'bom jin dhalu 'pen mo 'pena kathim piti mo tani a'di miiki miinyal mo be.

Wathi/jin Ta Pa ki Pa dhala Li/aasar mo

19 Wathiŋ kamu/ diki'd jin ta pa ki pa mo, a'di jin hi'thki burrinye/ jin ta'da buhe/ ka buhe/ mo dhali burrinye/ jin na'bulana'bul mo dhali jin shwa to ki shwam paŋ gana/ isa yempa/ mo.

20 Dhali e 'twaŋkala goŋ piti mo tani wathi/ jin hatha'ko'd 'thikunu mo, a'di jin yuku gway ka Li/aasar mo a'di jin tasha jama/ isi 'baar mo.

21 Dhali a'di dina gwo mbwa mo ki a'di minu thip mo ki to kun bitkin 'pena tharabeesa gi wathi/ jin ta pa ki pa mo. Hila 'ka pu'dkin mo dhali 'te'd jamam piti mo be.

22 Wathi/ ha'th'ko'd yan a'di wuki'd mo dhali a'di kalkina iman'doyu gwo mo eya bor ma Ibrahiim mo. Dhali wathi/ jin ta pa ki pa si'da/ tani a'di wuki'd mo dhali kankunu mo be.

23 Dhali eya Haawiya mo tani a'di 'koshkunu is ka nyor mo dhali a'di 'de'kki em piti ki mis mo dhali a'di ki para Ibrahiim e mo 'pena dhana/ mo dhala Li/aasar eya bor piti mo be.

24 Dhali a'di ki yuka yuk mo ki: Ababa Ibrahiima, miyi mii apo/ aha/ mo ma dhali hasha Li/aasar mo mmothul aliman me'd piti e yi'de/ mo dhali mmo'thupa le'd pem mo haali/ aha/ 'pe'dkina she/ mo eya le'dan o'd yansan mo be.

25 Hila Ibrahiim thok a'di gwo mo ki: Ya/uma, kayi gwo e mo ma. Ki/e din ki e mo tani, /e buthi tom 'boron pini mo dhala Li/aasar a'di buthi to kun shiyin wakan mo. Dhali hili, shwane/ a'di malaskunu imahan mo dhali /e din e mo jin 'pe'du she/ mo be.

26 Dhali eya ris mii yan ka makampo/ mo tani dhan jisa caaga/ di'di bwaman am mo dhali um mo jin thosonkunu mo, ki uni gwansan kun mini 'taki 'cith 'peni mahan e /e mo mini mol mii mo, dhali jan 'denj kamu/ midi mol 'cith 'peni mun ntagi am mo be.

27 Dhali a'di ki o gwo mo ki: Wakki/ wakan mo tani aha/ dotkina /e mo ababa, mmohash a'di mo e gu'b ma babam pem mo be

28 haali/ aha/ tana gi ikam pemi mudhe'd mo, wakan ki a'di midi rum uni ki gwo mo, hili isi ciki/ ki uni si'da/ mini 'koki iyyu/ mo e mo/isa nyor yansan mo be.

29 Hili a/ibrahiim thok a'di gwo mo ki: Uni tan ga Musa mo dhali imanci gwo ma Arumgimis kadhamo/ mo. Dhalki uni cik uni gwo mo ma.

30 Dhali a'di ki thok gwo mo ki: Yisa, ababa Ibrahiim. Hili wakki/ jan 'denj kamu/ midi ya i uni 'peni mowu mo tani uni mini rica du is mo be.

31 A'di ki o a'di gwo mo ki: Wakki/ uni 'koki ha gwo ma Musa e mo dhali gwo gi imanci gwo ma Arumgimis kadhamo/ e mo tani wakan si'da/ uni mini 'koki ci bwam buni ka gam 'kup mo wakki/ jan 'denj kamu/ midi 'taki cu mis 'peni mowu mo be.

17

Mompal gi Miinthus mo

1 Dhali a'di ki o imancik a'di gwo gwo mo ki: Mompalu gom miinthus ka jinŋ gana/ mini pu'du/ mo. Hili wayyi e a'di jin mina uni ipu'du/ mo be.

² A'di midī 'bor ki 'bor gana/ mo wakka yo minu 'taki dek a'di m'bam piti mo dhali a'di minu bit mo e kumma/ yi'de/ mo jin mina a'di 'taki diki rak jan 'de/ 'peni uni gwansan is mo kun gwa'dan mo mmomii miinthus mo.

³ Yipi 'kup 'kup ki is bum ki 'bore/ mo ma. Wakka kam pini mii miinthus mo tani kucuri a'di ki gwo mo ma, dhali wakki/ a'di ri'cki'da du is mo tani dhalki a'di miinthus piti 'pen mo.

⁴ Dhali wakki/ a'di mii miinthus apo/ /e me'di pesu/ ka tee mo tani dhali a'di ki tu'k mo me'di pesu/ dhali o /e gwo mo ki: aha/ ri'ckina adu is mo tani /e mini mii dhal a'di miinthus piti 'pen mo be.

Mari Aman Mongam Gwom Bam Is mo ma

⁵ Dhali uni gun dhunu ki she/ mo ki o Tapa gwo mo ki: Mari aman mongam gwo is bam is mo ma.

⁶ Dhali Tapa ki o gwo mo ki: Wakki/ um ta gi mongam gwo is mo me'd emen to jin miinuwa 'tash mo tani um mini mish o cwa yansan jin wana e ka 'kum'dii gwo mo ki: Dhalki a'di yu'du/ mo dhali dhalki a'di cudhu/ mo e yi'den kumma/ mo dhali a'di midī ha um gwo e mo be.

Aṭu'c jin Miina Ciṅkina/ mo

⁷ Mina tal 'den kamu/ 'peni um, a'di jin ta gi ciṅkina/ jin goro'da 'cesh walla jin ur ka'bal mo mmo/o a'di gwo mo ki a'di pu'dki'd mo 'peni bwam bunto mo ki: Yau/ ki jahanne/ mo dhali ca'ba 'cesha tharabeesa mowa?

⁸ Walla mina a'di diki dhal gwo e i is mo mmo/o gwo mo ki: Thosonaa/ tonte/ mo ma dhali deki is pini ki burrinye/ mo dhali mii aha/ to mo ma, ntagi aha/ mina shwa to mo dhali pi to mo dhali yan'ko'd /e mini shwa to mo dhali pi to mo?

⁹ A'di 'bori ciṅkinam piti bwa i is mo 'taa? haali/ a'di miiki to jin kankina a'di a'di gwo mo mmomii mo 'taa?

¹⁰ Wakan um si'da/ ki um miiki to gwansani 'baar mo kun kankunu um mo tani oyi gwo mo ki: Am tana ciṅkina/ kun 'koki ha me'd mo. Aman miikina jasi a'din 'den gana/ mo jin ta'da tu'c bam mo be.

Yesus Dheelki 'Kwani kun 'Kosha Monthusi 'Kume'd Is mo

¹¹ E bway gi Pa Urushaliim mo tani a'di yaki'd e bway bampa/ gi bwaman gi Pan Saamira mo dhali Pany Jaliil mo be.

¹² Dhali ki a'di ciki bampa/ mo tani a'di gamkina 'kwani kun 'kosha monthus 'kup mo uni kun 'koni 'kume'd mo, uni kun doshkin isa dhana/ mo.

¹³ Dhali uni ki 'de'k 'twam buni ki mis mo dhali o gwo mo ki: Yesus jin ta Tapa, miyi mii apo/ aman mo ma.

¹⁴ Dhali ki a'di mishki uni mo tani a'di ki o uni gwo mo ki: Iiku/ mo ma, dhali tor is bum eya tente/ e igasiis mo. Dhali ki uni iikin mo tani uni dheelkina is mo be.

¹⁵ Dhali yan'ko'd jan tal 'den kamu/ 'peni uni mo tani ki a'di parki is piti e ki a'di waçu/ mo tani dokki'd ka nyan'ko'd mo mmomaṅa Arungimis mo ki dhan 'twa/ jin caaca mo be.

¹⁶ Dhali a'di ki bit bwam/em piti a'cesh mo e sho'k ma Yesus mo mmoçi a'di mom'bor bwa i is mo be. Hili a'di ta wathi/ gi Pan Saamira mo be.

¹⁷ Yan'ko'd Yesus ki o a'di gwo mo ki: 'Kona uni ki 'ko 'kume'd uni kun dheelkin mo 'taa? Mane uni gun 'koni pedoron mane?

¹⁸ Jin tal 'den kamu/ bunya/? diki gam mo mmодоку/ mo mmomaṅa Arungimis mo hili isi ciki/ a'di jin diki ta Wathi/ Yahuuda/ mo be.

¹⁹ Dhali a'di ki o a'di gwo mo ki: Cuyi mis mo ma dhali yayi e bway pini mo. Mongam gwo is pini a'di wothki /e mo be.

Mo gi Mina Bampa/ gi Momisi Pu'du/ mo

20 Dhali a'di dotkunu gwo mo ki 'Kwani Parisiyiin mo ki Bampa/ ma Arungimis midi pu'du/ kakasja mo sa/? Dhali a'di ki thok uni gwo mo ki: Bampa/ ma Arungimis midi diki yayu/ ki jamas mii jin minu tim ki ye'th mo.

21 Walla uni mini 'koki o gwo mo ki: Hili mo mo ma, A'di a'dan be, walla, Imattaan mo, haali/ hili mo mo ma, Bampa/ ma Arungimis a'di di'di bwam um mo be.

22 Dhali a'di ki o imancik a'di gwo gwo mo ki: Atee mini pu'du/ mo ki um mina bwa o mo mmopara tenter kamu/ e jin ta ji gi Ya/ gi 'Kwani mo dhali um mini 'koki par a'di e mo be.

23 Dhali uni mini o um gwo mo ki: Hili mo mo ma, mmattaan mo, walla, Hili mo mo ma, mmahan mo tani, dhalku/ ki ii mo ma. Dhalku/ ki bath uni isho'k mo.

24 Haali/ me'da wara sho'k jin dhithi mo ka war mo dhali mmokush mo 'peni momis mo 'peni 'ko'd gwar gi 'bana kamu/ mo tani wakan mina Ya/ gi 'Kwani di eya teem piti mo be.

25 Hili ntwa/a/ a'di mina isi 'kosh ka nyor mo gom to ka ris mo dhali a'di minu wak mo ki 'kwani ma nyakum yil gwansan mo be.

26 Me'da tee ma Nuuh mo tani wakan a'di midi ta atee gi Ya/ gi 'Kwani mo be.

27 Uni shwaki to mo dhali uni piki to mo dhali uni mashkin mo dhali uni 'kokin mo mmoçiya çì mmomash mo ntaga tee jin ciçkin ma Nuuh mo e bwaa kur mo dhali agannu/ yi'de/ pu'dki'd mo dhali 'ce'd uni 'baar mo sho'k mo be.

28 Wakan si'da/ a'di mina e waka tee ma Luuth mo - uni shwaki to mo dhali uni piki to mo dhali uni yolki to mo dhali uni yolkin mo dhali uni siki to mo dhali uni nyançi to mo

29 hili ka tee jin yakin ma Luuth ka pije/ mo 'peni Pan Saduum mo tani o'd dhali to jin si'du/ mo he'thki'd ka sho'k mo 'peni momis mo dhali 'ce'd uni 'baar mo sho'k mo be.

30 Wakan si'da/ a'di midi ta atee gi Ya/ gi 'Kwani ki a'di minu tor eya tente/ mo be.

31 Ka tee caan mo tani dhali a'di jin di'd e 'kuŋgu'b mo nyakki tom piti jin tana a'di e gu'b mo tani midi diki thulu/ ka 'cesh mo mmo'do uni mo dhali wakan si'da/ a'di jin di'd e bwam mombunto mo tani midi diki dokku/ ka nyan'ko'd mo.

32 Kayi gwo gi asha Luuth e mo ma.

33 A'diyin jin midi simm to e jin mina a'di ita e mondiki/em piti mo tani a'di midi this a'di e mo be. Hili a'diyin jin midi this mondiki/em piti e mo tani a'di midi kar a'di mo be.

34 Aha/ tora um gwo mo, e mon'thiny caan mo tani 'kwani su/ mini 'kowa cin tal 'de/ mo. Dhali jan tal 'de/ minu bu'th mo, dhali jan kamu/ minu dhalku/ mo be.

35 Up mini 'ko isu/ mo kun mini yor to mo mmonal 'de/ mo. Dhali jan tal 'de/ minu bu'th mo, dhali jan kamu/ minu dhalku/ mo be.

36 Dhali 'kwani su/ si'da/ mini 'ko e bwam bunto mo. Dhali jan 'de/ minu bu'th mo, dhali jan kamu/ minu dhalku/ mo be.

37 Dhali uni o a'di gwo mo ki: Mmana, Tapa? A'di ki thok uni gwo mo ki: I mo jin dina buŋwar is nycine/ mo tani e mo yan mo tani korro/ mini tul is mo mmonal 'de/ mo be.

18

Gwom 'Bi'th/e goma 'Bom jin Wun ma Kath mo dhala Mandwall Gwo mo

¹ Dhali a'di ki tor uni gwo ki gwom 'bi'th/e mo jin ta gi 'pemen jin mina uni ka mii 'tho mo isa yempa/ mo dhali mmo'koki dhotha du mo be.

² A'di ki o gwo mo ki: E 'penkuman bampaŋ kamu/ mo tani wathi/ diki'd mo jin ta'da mandwall gwo mo. A'di si'da/ jin diki ko/a Arumgimis mo walla diki tak 'kwani mo be.

³ Dhala 'boma kamu/ jin wun ma kath si'da/ mo tani diki'd e 'penkuman bampa/ caan mo, a'di jin rashki ya ka yempa/ e a'di mo dhali o gwo mo ki: Miiyi aha/ ka kar/e mo ma apo/ a'di jin yeri aha/ is ki gway mo.

⁴ Dhali hili ki a'di di'd mmo/ush mo tani hili yan'ko'd a'di ki o gwo ki is piti mo ki: Ba aha/ yisa ko/ka Arumgimis yisa walla taŋa 'kwani yisa

⁵ hili goma 'bom yansan jin wun ma kath mo mmoŋu/ulkina a'di aha/ ki mii mo tani aha/ mina mii ka kar/e goma yim mo, wakan ka yim mididi diki wuyaa/ is e mo ki yam piti jin rashina a'di mo be.

⁶ Dhali Tapa ki o gwo mo ki: Ciŋi gwo mo ma, jin on ma mandwall gwo jin diki ta amanmii ka kar/e mo.

⁷ Dhali min ma Arumgimis diki mii ka kar/e gom kum piti kun kwanykina a'di mo 'taa? uni gun gwoki 'twa/ i a'di ki montee ilu/ mo dhali ki mon'thiny mo 'taa? Mina a'di itaya adiite/ apo/ uni mo 'taa?

⁸ Aha/ tora um gwo ki a'di mididi mii ka kar/e gom uni ki jahanne/ mo. Bahili ki Ya/ gi 'Kwani mididi pu'du/ mo tani mina a'di gam moŋgam gwo is e mony'cesh mo 'taa?

Gwom 'Bi'th/e gom 'Kwani Parisiyin mo dhali Imantera Thulpa/ mo

⁹ A'di si'da/ ki tor gwom 'bi'th/e yansan ki uni gun gam 'twa/ 'kup ki is buni mo ki uni ta kuŋ kar/e mo dhali waŋ kun tiya mo.

¹⁰ 'Kwani su/ iikin mo e gu'b gi mondheleladhelel mo mmo'tho mo. Jan 'de/ ta Wathim Parisi mo. Dhali jamu/ ta'da mantera thulpa/ mo be.

¹¹ Wathim Parisi doshki'd mo dhali 'tho kan ki is piti mo ki: Arumgimis, aha/ 'bora/ e bwa i is mo ki aha/ dinaki waki 'kwanin tiya mo kun ta imankwal to mo dhali kun 'koki ta kuŋ kar/e mo dhali imanmii miinycaal mo walla mmodiki wa e ka mantera thulpa/ yansan mo be.

¹² Aha/ ga/a to mo me'di su/ ka dhas mo. Aha/ cina to mo jin taŋu Arumgimis 'peni to 'baar mo jin gamkika/ mo be.

¹³ Hila mantera thulpa/ a'di doshki'd isa dhana/ mo, a'di diki 'de'k em piti 'kup ki momis mo, hili a'di dorki'da bor piti ki me'd mo mmo/o gwo mo ki: Arumgimis, miiyi mii apo/ aha/ jin tana amanmii miinthus mo.

¹⁴ Aha/ tora um gwo mo ki: wathi/ yansan yaki'd ka lunŋu'b bway gu'b piti mo ki mo ma kar/e mo, ma mo dhalka kamu/ mo. Haali/ aris 'kwani 'baar mo ka 'dete/ 'dete/ mo kun dhu is buni ki ca mo tani uni minu dhu ki gwa'd mo, hili a'di jin karki is piti ki gwa'd mo tani minu kar ki ca mo be.

Yesus 'Borki Ushi Uci Mii mo

¹⁵ Dhali uni 'kokin mo si'da/ mmosusi usha 'perenyi a'di mo ki a'di mididi ta uni is ki me'd mo. Dhali ki imancik a'di gwo parki a'di e mo tani uni kucurki uni ki gwo mo be.

¹⁶ Hila Yesus yukki uni i a'di mo mmo/o gwo mo ki: Dhalki ushi uci iiyini aha/ mo ma, dhalki uni ki non mo. Haali/ ku gi wakan mo tani 'kon e Bampa/ ma Arumgimis mo be.

¹⁷ Ka jin gana/ aha/ ona um gwo mo ki: a'diyin jin mididi diki bu'th Bampa/ ma Arumgimis me'd ara 'ci mo tani mididi diki ciŋ a'di mo be.

Wathin Dhuru'c jin Ta Pa ki Pa mo jin Ta Tapa mo

18 Dhali tapan kamu/ dot a'di gwo mo ki: Mantor Gwo jin 'boro'd. Aha/mina mii kata mo mmogam mal gi mondiki/e ki sule/ ya ye 'ba/ mo sa/?

19 Dhala Yesus ki thoḱ a'di gwo mo ki: Atinta yuka/ e aha/ ki jin 'boro'd mo? Wathin tal 'denj kamu/ yisa di'da jin 'boro'd mo, hili Arungimis a'di 'de/ mo be.

20 /e mishi gwonḱan kun 'kwarkunu mo kun o gwo mo ki: Dhalku/ cal ki mii mii mo ma, dhali, Dhalka 'kosh ki mii 'kosh mo ma, dhali, Dhalku/ to ki mii kwal mo ma, dhali, Dhalki gwonthus ki mii aḱ mo ma, dhali, Takḱi cim dhali kwan mo ma.

21 Dhali a'di ki thoḱ a'di gwo mo ki: Aris to gwansan dhukika/ mo 'peni yil pem jin taka/ dhuru'c mo be.

22 Dhali ka Yesus cikḱi a'di mo tani a'di ki o a'di gwo mo ki: Ton tal 'denj kamu/ di'd jin aḥa /e mo be. Yoli aris to gwansan kun tana /e mo ma dhali ciki uni gwansan kun hatha'ko'd mo dhali /e mini gam mo jin isha to kumma/ e momis mo dhali yayu/ mo dhali baḥaa/ isho'k mo.

23 Hili ki a'di cikḱi gwo gwansan mo tani a'di warkina bwa ki diḱ mo haali/ a'di ta wathi/ jin ta pa ki pa mo be.

24 Yesus hilki a'di mo dhali o gwo mo ki: Mii wa'di diḱa/ gom uni gwansan kun ta pa ki pa mo mmociḱ Bampa/ ma Arungimis mo be.

25 Haali/ a'di 'ka'da mii gom kalman mo mmoya ki solol e jisa 'dipira/ mo mmodhal wathi/ jin ta pa ki pa e i is mo mmociḱ Bampa/ ma Arungimis mo be.

26 Uni gwansan kun cikḱi a'di mo tani o gwo mo ki: Waḱki/ wakan mo tani ija iminu iwoth mo sa/?

27 Hili a'di o gwo mo ki: To jin molu mii ki 'kwani mo tani a'di mishu mii ka Arungimis mo be.

28 Dhala Buterus ki o a'di gwo mo ki: Hili mo mo ma, am dhalkina gu'b bam 'pen mo dhali baḥ /e nsho'k mo be.

29 Dhali a'di ki o uni gwo mo ki: Ka jin gana/ aha/ ona um gwo mo ki: wathin kamu/ yisa di'da jin dhalki gu'b piti 'pen mo walla ashim piti mo walla ikam piti mo walla icom mo walla uḱim piti mo gom gway gi Bampa/ ma Arungimis mo

30 a'di jin midi diki gam to jin maru is ki nyanye/ ki mo yansan mo dhali ki she/ yil jin midi pu'du/ mo tani a'di midi gam mondiki/e ki sule/ ya ye 'ba/ mo be.

Yesus Torki Mowum Piti Nṱwa/a/ Me'di Kwara mo

31 Dhali a'di ki sus uninj 'kume'd i'ce'dka su/ mo dhali a'di ki o uni gwo mo ki: Hili mo mo ma, ana iina ka gagamis mo e Pa Urushaliim mo be dhali aris to kun 'kwarkunu mo gom Ya/ gi 'Kwani mo ki imancij gwo ma Arungimis kadhamo/ mo tani minu thim mo be.

32 Haali/ a'di minu ci 'kwani kun 'koki ta 'Kwani Yahuuda/ mo dhali uni mini mii a'di ka maḱ mo dhali kar a'di ki mon'the is jin shi/ashi/ mo dhali 'tak a'di manya/ i is mo.

33 Dhali uni mini dor a'di mo dhali 'kosh a'di mo, dhali ka cim kwara mo tani a'di midi cuyi mis mo be.

34 Hili uni 'koki mish gwo 'ban gom gwo gwansan mo. Haali/ gwo yansan bagkunu mo 'peni uni mo dhali uni 'koki nyith gwo jin okina a'di mo be.

Wathiny Ja'da/ jin Ta'da Man'tho To, A'di Waḱkunu mo e Shemen Bway gi Pa Ariiha mo

35 Dhali ki a'di 'dishki Pa Ariiha is mo tani wathiny ja'dan kamu/ ca'bki'd e shemen bway tur mo mmo'tho to mo be.

³⁶ Dhali a'di cikki'da waambuhany 'kwani mmo/iikina uni ki iim pe mo. A'di ki dot gwo mo ki: Li yan ta'da tinta mo?

³⁷ Dhali uni ki tor a'di gwo mo ka: Yesus gi Pa Naasira a'di yaki'd ki yampe mo be.

³⁸ Dhali a'di cuu'd ki: Yesus Ya/ ma Dawuu'd, miyi mii apo/ aha/ mo ma.

³⁹ Dhali uni gwahan kun 'koni bur'kup mo tani kucurki a'di ki gwo mo mmotor a'di gwo mo mmoça'b ki shwam mo. Dhali hili a'di cuu'd kagahara dok/e ki nyanye/ ki: Ya/ ma Dawuu'd, miyi mii apo/ aha/ mo ma.

⁴⁰ Dhala Yesus doshki'd mo dhali kan a'di gwo mo ki a'di minu susu mo e a'di mo. Dhali ki a'di 'dishki a'di is mo tani a'di ki dot a'di gwo mo ki:

⁴¹ Atinta o /e bwa ki aha/ mina mii gom /e mo? A'di thoḵ a'di gwo mo ki: Tapa, dhalki aha/ budha momish mo mo.

⁴² Dhala Yesus ki o a'di gwo mo ki: Budhi momish mom pini mo ma. Monḡam gwo is pini a'di woṭhi/e mo be.

⁴³ Dhali ki jahanne/ a'di buṭhki momish mo mo dhali a'di ki bath a'di nsho'k mo mmokara Arungimis ki ca mo dhali aris 'kwani, ki uni parki a'di e mo tani uni çina Arungimis moman mo be.

19

Yesus dhala Sakka

¹ A'di cikki'd mo e Pa Ariiha mo dhali a'di yaki'd ki tur mo be.

² Dhali e mun mo tani wathiḡ kamu/ diki'd jin yuku gway ka Sakka mo. A'di ta'da 'kan'kup gi imantera thulpa/ mo dhali a'di ta pa ki pa mo be.

³ Dhali a'di ṅapki mo mo mmopara Yesus e mo ki a'di ta'da ata mo dhali hili a'di diki par a'di e mo goma risa waambuhany 'kwani shwa'da nyor mo haali/ a'di kuṭakuṭ ki kuṭ piti mo be.

⁴ Wakan a'di guski'd itwa/a/ mo dhali se mis cwampu/ mo mmopar a'di e mo haali/ a'di yaki'd e bway çaan mo be.

⁵ Dhali ka Yesus pu'dki'd mo e mo yan mo tani a'di ki hil 'kup ki mis mo dhali o gwo mo ki: Sakka, thulu/ ka 'cesh ki 'ta'b mo haali/ aha/ mina mii di e gu'b pini shwane/ mo be.

⁶ Wakan a'di thulki'd mo ise/ dhali yayu/ ka 'cesh mo dhali buṭh a'di ki bwan' kunyga/ mo be.

⁷ Dhali ki uni parki a'di e mo tani uni 'baar mo miina gungum mo mmo/o gwo mo ki: A'di yaki'd mo mmota yilkina/ e gu'b gi wathi/ jin ta'da manmii miinthus mo be.

⁸ Dhala Sakka doshki'd mo ki mis mo dhali o Tapa gwo mo ki: Hili mo mo ma, Tapa, 'ban gi tom pem jin taka/ ka dehe/ mo tani miga/ ci 'kwani kun hatha'ko'd mo be. Dhali wakki/ aha/ shwana to ki kup 'peni jan tal 'denj kamu/ mo tani aha/ mina ci a'di ka nyan'ko'd me'di donjon apo/ mo.

⁹ Dhala Yesus ki o a'di gwo mo ki: Shwane/ mowoth a'di pu'dki'd mo e gu'b yansan mo me'd jin tana a'di ya/ ma Ibrahiim si'da/ mo be.

¹⁰ Haali/ Ya/ gi 'Kwani pu'dki'd mo mmonapa ṅap mo dhali mmowotha woṭh mo gom uni gun thiskunu e mo be.

Gwom 'Bi'th/e gom Kuluny 'Dolkoni 'Kume'd mo

¹¹ Me'd jin cikina uni gwo gwansan mo tani a'di marki uni gwoṅ kamu/ is mo mmotor ki gwom 'bi'th/e mo haali/ a'di 'dishki Pa Urushaliim is mo dhali haali/ uni toshkin ki Bampa/ ma Arungimis minu piyu/ ki jahanne/ mo be.

¹² Gom gwo gi wakan mo tani a'di ki o gwo mo ki: Wathi/ jin mii'da tu'c e bampa/ ma malik tani a'di yaki'd mo e baman kamu/ jin si'dasi'd mo mmobuṭh mom'bi'th ma malik mo dhali doḵu/ ka nyan'ko'd mo.

13 A'di ki yuk c̄in̄kinam piti kun 'koni 'kume'd mo. A'di ki c̄i uni kuluny 'dolkoni 'kume'd* mo. Dhali a'di ki o uni gwo mo ki: Miiyi aṭu'c ki uni gwansan mo ma ntagi aha/ mina pu'du/ mo.

14 Hili 'kwani gi bampam piti shi/i a'di i e mo dhali hashki a'di 'kwani kun hashu mo mmobath a'di isho'k mo mmo/o gwo mo ki: Am'tena bwa jin mina wathi/ yansan ta tapa apo/ am mo be.

15 Ki a'di dokki'd ka nyan'ko'd mo mmobu'thkina a'di mom'bi'th ma malik mo tani a'di kanki c̄in̄kina/ gwansan gwo mo e uni kun cikina a'diya guurush mo ki uni minu yuku/ i a'di mo ki a'di mididi mish to mo gom nyunycina/ to kun miikunu mo.

16 Jin twa/a/ pu'dki'd ibwambori a'di mo mmo/o gwo mo ki: Tapa, kuluny 'dolkon pini warki'd ki kuluny 'dolkoni 'kume'd mo be.

17 Dhali a'di ki o a'di gwo mo ki: Mba/ /e ta c̄in̄kina/ jin 'boro'd mo. Haali/ /e ta a'di jin ta isin̄ gana/ mo eya po/ ushi to kun gwa'dan mo tani /e mini ta gi moshirr apo/ 'penkuman bampa/ kun 'koni 'kume'd mo be.

18 Dhali jin 'kon ma po/i su/ pu'dki'd mo si'da/ mmo/o gwo mo ki: Tapa, kuluny 'dolkon pini warki'd ki kuluny 'dolkoni mudhe'd mo be.

19 Dhali a'di ki o a'di gwo mo ki: /e mini ta tapa apo/ 'penkuman bampa/ kun 'koni mudhe'd mo.

20 Dhali yan'ko'd jan kamu/ pu'dki'd mo mmo/o gwo mo ki: Tapa, kuluny 'dolkon pini a'dan be, a'di jin karkika/ mo eya mantiil mo.

21 Haali/ aha/ ko/ka /e mo haali/ /e ta wathi/ jin ceshi mo mo ki thith mo. /e 'de'kki a'di jin dina /e ki kara 'cesh mo dhali /e 'cithki a'di jin dina /e ki si mo be.

22 A'di ki o a'di gwo mo ki: Aha/ mina wak /e mo 'peni gwo gi 'twam pinin̄ gana/ mo. /e ta c̄in̄kina/ jin ta thus mo. /e mishin ki aha/ tana wathi/ jin ceshi mo mo ki thith, mmo'de'k a'di jin dika/ ki kara 'cesh mo dhali mmo'cith a'di jin dika/ ki si mo tani

23 atinta dina /e ki dhuka guurush pem mo e mo jin dhunuwa guurush mo dhali ki yam pem jin miga/ pu'du/ mo tani aha/ mina 'taki tul uni is mo nyakki nyunycinam piti mo?

24 Dhali a'di ki o uni gwansan gwo mo uni kun doshkin mo ki: Budhi kuluny 'dolkon 'peni a'di mo ma, dhali c̄i a'di jin ta'd gi kuluny 'dolkoni 'kume'd mo.

25 (Dhali uni ki o a'di gwo mo ki: Tapa, a'di ta'd gi kuluny 'dolkoni 'kume'd mo be Ayy!)

26 Aha/ tora um gwo mo ki, eya ris uni 'baar mo ka 'deṭe/ 'deṭe/ uni kun tan gi to mo tani minu c̄i ki nyanye/ mo be, hili 'peni a'di jin dara'd mo tani a'di si'da/ jin tana a'di mo tani a'di minu war a'di mo be.

27 Hili gom uni gwansan kun ta 'kup ki aha/ mo tani uni kun 'koki ṅap aha/ mo mmota tapa apo/ uni mo tani susi uni mmahan mo ma dhali 'kosh uni jwa mo mbwambori aha/ mo.

Mo jin Pinu Mii E Mmoc̄ Pa Urushaliim mo

28 Dhali ki a'di oki gwo gwansan mo tani a'di yaki'd nṭwa/a/ mo mmoya ka gagamis mo e Pa Urushaliim mo be.

29 Ki a'di 'dishki Pam Beṭpaji is mo dhali Pam Beṭaniya mo tani e 'kuwosh caan jin yuku ka Setuun mo tani a'di ki hash uni su/ 'peni imancik̄ a'di gwo mo

30 mmo/o uni gwo mo ki: Iiku/ bampa/ mo ma jin di'd ka par 'twa/ mo. E mo jin cik̄kina umi cine/ mo tani um mini gam ari thuluny jin shi'dkunu mo,

* 19:13 Kuluny 'dolkon 'de/ wana e ka riyaal iss 'kwanimpa ikwara mo.

a'di jin dina wathin 'denj kamu/ ki mera po/ mo ki sule/ mo. 'Cuka a'di mo ma dhali susi a'di mmahan mo.

³¹ Wakki/ jan 'denj kamu/ doti um gwo mo ki: Atinta 'cuka um a'di mo tani um mini o gwo mo cikise/ ki: Tapa mididi mii ta gi a'di mo be.

³² Wakan uni gwansan kun hashkunu mo tani iikin mo dhali gam a'di me'd jin torkina a'di uni gwo mo be.

³³ Dhali me'd jin 'cukina uni ari thuluny mo tani icom gi ari thuluny o uni gwo mo ki: Atinta 'cuka um ari thuluny mo?

³⁴ Dhali uni thok uni gwo mo ki: Tapa mididi mii ta gi a'di mo be.

³⁵ Dhali ki uni suski a'di aYesus mo tani uni ta'kki burrinyem buni apo/ ari thuluny mo dhali uni ki kara Yesus apo/ a'di mo be.

³⁶ Dhali ki a'di merki'd ki tur mo tani uni pa'dki burrinyem buni e bway tur mo be.

³⁷ Dhali me'd jin 'dishkina a'di mo is mo tani e mo jin thulkina Wosh ma Setuun 'twa/ ka lungu'b mo tani awaambuhany 'kwani kun ta imancik a'di gwo mo tani uni telki mii 'pen mo mmo'kuny bwa mo dhali mmomaña Arungimis mo ki 'twa/ jin caaca mo gom miim 'bi'thga/ kun parkina uni e mo

³⁸ mmo/o gwo mo ki: Mom'bor mii goma malik mo, a'di jin pu'dki'd mo ki gway gi Tapa mo. Monku'th is e momis mo, dhali monyca e mo jin ca e ki ca mo be.

³⁹ Dhali 'Kwani Parisiyiina tiya uni 'kokin mo e bwaman ma waambuhany 'kwani mo mmo/o a'di gwo mo ki: Mantor Gwo, kucuri imancik /e gwo gwo mo ma.

⁴⁰ A'di thok uni gwo mo ki: Aha/ tora um gwo mo wakki/ uni mini 'ko ki shwam mo tani wosh gwahan uni mini 'taki 'ther cuuwa/ mo be.

⁴¹ Dhali ki a'di 'dishki mo is mo dhali par 'penjuman bampa/ e mo tani a'di gwoki'd apo/ a'di mo be

⁴² mmo/o gwo mo ki: Wakki/ /e mini 'taki mish shwane/ to gi ta jim monku'th is mo tani hili shwane/ uni bagkunu mo 'peni em pini mo be.

⁴³ Haali/ atee mini pu'du/ apo/ /e mo ki uni kun ta 'kup gi /e mini nyanja gor mo mmo'kam /e is mo dhali uni mini 'kam /e 'kup mo dhali /e minu hem mo ki 'twarikal kuku/ mo be

⁴⁴ dhali /e minu mu/i 'baar mo eya 'cesh mo, /e dhali ucim pini kun 'koni bwam/e mo dhali uni mini 'koki dhal wosha kamu/ ka makampo/ e /e mo haali/ /e diki nyith mo mo gom mowoth pini mo be.

Mmodhelel Gu'b gi Mondheleladhelel mo

⁴⁵ Dhali a'di ciki gu'b gi mondheleladhelel mo dhali telki mii 'pen mo mmo/ ur 'kwani gwansan ka pije/ kun yoli to mo

⁴⁶ mmo/o uni gwo mo ki: A'di 'kwarkunu mo ki: Gu'b pem mididi ta gu'b jin miinu 'tho mo. Hili um mii a'di me'd gu'b gi 'kwanin 'di/ mo be.

⁴⁷ Dhali a'di rashki uni gwo tor ka yempa/ mo e gu'b gi mondheleladhelel mo. Igasiis kun can dhali iman'kwar to mo dhali 'kwanij gwanyajaka/ uni napki bway mo mmo'ce'd a'di sho'k mo be.

⁴⁸ Hili uni 'koki gam tor kamu/ jin mina uni mii mo be haali/ aris 'kwani 'baar mo uni laki gwom piti me'd ki kwap kwap mo be.

1 Ka cima kamu/ mo tani me'd jin torkina a'di 'kwani gwo mo e gu'b gi mondheleladhelel mo dhali ci gwom 'borga/ mo tani igasiis kun can mo dhali iman'kwar to mo nyakki 'kwaniŋ gwanyjaka/ ilu/ mo tani uni pu'dkin mo

2 dhali uni ki o'a'di gwo mo ki: Tori aman gwo mo ma, ki moshirr ja imiikina /e to gwansan mo? walla aja içi /e moshirr yansan mo?

3 A'di ki thoƙ uni gwo mo ki: Aha/ si'da/ mina doƙ um gwondot mo. Dhali um mini toraa/ gwo mo.

4 Mo jin miin ma Yohaana mii ki yi'de/ 'peni momis mo 'taa? walla 'peni 'kwani mo?

5 Dhali uni cuki gwo ka rem 'kup mo mmo/o gwo mo ki: Wakki/ ana mina o gwo mo ki: 'Peni momis mo tani a'di mido o ana gwo mo ki: Atinta 'kona um ki gam a'di gwo is mo?

6 Hili wakki/ ana mina o gwo mo ki: 'Peni 'kwani mo tani aris 'kwani 'baar mo mini tuƙun ana ki wosh mo, haali/ uni gamki gwo me'd mo ka Yohaana ta'da mançi gwo ma Arungimis mo be.

7 Wakan uni thoƙki a'di gwo mo ki uni 'koki mish mo mo jin yayina a'di 'peni nycine/ mo be.

8 Dhala Yesus ki thoƙ uni gwo mo ki: Walla aha/ si'da/ yisa mina tor um gwo mo gom moshirr kun miikika/ to gwansan mo yisa.

Gwom 'Bi'th/e gom Bwaman mo ma Mura'th jin Sinu mo dhali Imanhil Mo mo

9 Dhali a'di telki mii 'pen mo mmoƙor 'kwani gwo ki gwom 'bi'th/e mo ki: Wathi/ di'd jin siki'da mura'th mo dhali a'di ki dhal a'di mo e uni gun miina tu'c mo dhali a'di ki ya mo e bampa/ jin si'dasi'd mo ka cim ka ris mo.

10 Dhali ki mo pu'dki'd mo tani a'di hashki ciŋkinanƙ kamu/ e imanhil mo mo ki uni mini 'taki ci a'di maman to 'peni bwam ma goƙ piti mo. Hili uni gun hili mo mo tani dorki a'di mo dhali uni ki hash a'di ka nyan'ko'd me'd te/ mo be.

11 Dhali a'di ki hash ciŋkinanƙ kamu/ mo. A'di si'da/ dorkina uni mo dhali uni ki kar a'di ki mon'the is ki shi/ shi/ mo dhali uni ki hash a'di ka nyan'ko'd me'd te/ mo be.

12 Dhali a'di hashki jin 'kon ma po/i kwara dok/e mo. Jan 'de/ yansan uni ki kar a'di jama/ i is mo dhali biƙ a'di ka piƙe/ mo be.

13 Dhali yan'ko'd com gi monsinu o gwo mo ki: Aha/ mina miya tinta mo? Aha/ mina hashki uni ya/m pem jin enka/ mo. A'di wari mmuna uni itak mo.

14 Hili ki uni gun hilki mo mo parki a'di e mo tani uni o gwo e is buni mo ki: A'di jin mido kal mal a'dan ti. Dhalki ana 'kosha a'di jwa mo ki mal piti mido ta jim bana mo be.

15 Dhali uni ki bit a'di ka piƙe/ 'peni bwam monsinu mo dhali 'kosh a'di jwa mo. Dhali com monsinu mido miya tinta n'ko'd mo gom uni mo?

16 A'di mido pu'du/ mo dhali 'ce'd uni gwansan sho'k mo kun hili mo mo dhali bwam monsinu minu ciki kun tiya mo. Ki uni cikki gwo gwansan mo tani uni oki gwo mo ki: Dhalku/ ki dhal a'di mmomii kan mo.

17 Hili a'di ki hil uni mo dhali o uni gwo mo ki: Gwo yansan wakatinta jin 'kwarkunu mo ki:

Wosh yan gana/ jin wakƙina imannyan gu'b mo tani a'di warki'd ki 'kupan jin karu eya rukun mo.

18 Aris 'kwani 'baar mo ka 'dete/ 'dete/ kun ta'kkin e 'kuwosh yansan mo tani minu 'ce'd bwa ka 'ci'cimi'th mo, hili wakki/ a'di biƙi'd apo/ jan kamu/ mo tani a'di mido tuƙun a'di mo be.

Mo gi Cinu Athulpa/ ka Kaysar mo

19 Dhali iman'kwar to dhali igasiis kun can uni palki mii mo mmodhu me'd buni apo/ a'di ki mo yan gana/ mo tani hili uni ko/ki 'kwani mo, haali/ uni nyithkin ki a'di torki gwom 'bi'th/e yan apo/ uni mo be.

20 Wakan uni timki a'di mo dhali hash iman'kar mo mo kun dhu is buni me'd 'kwanim paŋ gana/ mo ki uni mini 'taki bu'th gwo 'peni a'di jin okina a'di mo. Wakan ki uni mini ci a'di mo e mo gi shirru mo dhali e mom'bi'th ma mudhiir mo be.

21 Uni dotki a'di mo ki: Mantor Gwo, am mishkina ki /e oki gwo mo dhali tor gwo ki 'bore/ mo dhali /e diki tor mii jin miinu ka gwar 'de/ mo hili ka jin gana/ /e torki gwo gi bway ma Arumgimis mo be.

22 A'di ta gwonkan mo 'taa ki am mina cika Kaysara thulpa/ mo? walla minu dhalku/ mo?

23 Hili a'di nyithki jim buni jin isha uni a'cesh mo dhali o uni gwo mo ki:

24 Tori aha/ emena guurush mo ma. Jamas maja a'dan mo dhali a'di 'kwar maja mmahan mo? Uni ki thok a'di gwo mo ki: A'di ta ji ma Kaysar mo be.

25 A'di ki o uni gwo mo ki: Gom a'di gi wakan mo tani cika Kaysar to jin ta ji ma Kaysar mo ma, dhali cika Arumgimis to jin ta ji ma Arumgimis mo ma.

26 Dhali uni mol a'di bu'th mo e bwambori 'kwani mo gom gwo jin okina a'di mo. Hili uni merkin mo gom gwom piti jin thokkina a'di uni mo tani uni 'kokin ki shwam mo be.

Mo gi Dotu Gwondot gom Mo gi Pinu mo

27 Dhali 'Kwani Sadukiyiina tiya pu'dkini a'di mo, uni kun o gwo mo ki mompinuŋ kamu/ yisa di'da.

28 Dhali uni ki dot a'di gwondot mo mmo/o gwo mo ki: Amantor Gwo, aMusa a'di ki 'kwarki aman gwo mo ki wakka kam gi wathi/ wuki'd mo ki a'di ta'd ga 'bom mo hili a'ci piyi'd mo tani wathi/ midi mii budha 'bom mo dhali cis uci mo goma kam mo.

29 Dhali ikam 'kokini pesu/ mo. Jin twa/a/ mashki'da 'bom mo dhali a'di wuki'd mo ki dar gi uci mo be.

30 Dhali jin 'ko'd si'da/ mo be.

31 Dhali jin 'kon ma po/i kwara mashki'da yim mo, dhali wakan aris uni pesu/ 'baar mo uni 'koki dhal a'ciŋ kamu/ mo dhali uni wukin mo.

32 Yan'ko'd a'bom si'da/ wuki'd mo be.

33 E mompinu wakan mo tani a'bom midi ta jim maja mo? Haali/ unim pesu/ mashki a'di ka 'bom buni mo be.

34 Dhala Yesu ki o uni gwo mo ki: Iya/ gi embul yil gwansan mo tani uni mashkin mo dhali uni cikunu bway mo mmomash mo be.

35 Hili uni gwansan kun dhunu ki ku gi ha me'd mo mmobumbur mo e she/ caan mo dhali e mompinu 'peni mowu mo walla mmomash di'd yisa walla mo jin cinuwa ci mmomash mo.

36 Haali/ uni moli wu mo dok/e haali/ uni nyakkina nyak ki iman'doyu gwo mo dhali uni ta iya/ ma Arumgimis mo mmotakina uni iya/ gi mompinu mo be.

37 Hili ki uni kun wukin mo minu cu mo tani a'di tor ma Musa gwo mo e gwo jin 'kwarkunu mo gom ari cwa mo, me'd jin yukkina a'di Tapa mo a'di jin ta'da Arumgimis ma Ibrahim mo dhali Arumgimis ma Is/hak mo dhali Arumgimis ma Yakuub mo be.

38 Dhali hili a'di diki ta Arumgimis gom uni gun wukin mo hili gom uni kun 'kokin mo, haali/ aris uni 'baar mo 'kokin e a'di mo be.

39 Dhali iman'kwar ton tiya thok a'di gwo mo ki: Mantor Gwo, /e oki gwo ki 'bore/ mo be.

40 Haali/ uni ko/ki a'di mo mmodot a'di gwon kamu/ mo be.

Mo gi Dotu Gwondot gom Ya/ma Dawuu'd mo

41 Hili a'di o uni gwo mo ki: A/ki uni o gwo ka Křisthos ta ya/ ma Dawuu'da?

42 Haala Dawuu'd ki is piti oki gwo eya warka/ ma Masamiir mo ki:
Tapa ki o Tapam pem gwo mo ki:

Ca'bi aha/ ki me'da bim poros pem mo ma,

43 ntagi aha/ mina dhu 'kup pini mmota cwa jin dhuna /e sho'k pini mo.

44 Dawuu'd wakan ki yuk a'di ki Tapa mo. Wakan kata yuka a'di a'di ki ya/m piti mo?

Yesus Be'dki Gwo gom Iman'kwar To mo

45 Dhali e bwany'ce jin cikkin ma ris 'kwani gwo gwansani 'baar mo tani a'di ki o imancik a'di gwo gwo mo ki:

46 Jiyi iman'kwar to ki e ki 'bore/ mo ma, uni gun eni monyanjal ki burriyen turga/ i is mo dhali en monthe me'd kagahara mo e mo ma suug mo dhali kun eni mon'kom 'borga/ e gu'b gi montul is mo dhali mo gun takuwa tak mo e mo jin yukuwa yuk mo

47 uni gun loski gu'b gi up kun wuna ikath mo dhali uni gun mii mii eya por ma piye/ mo e en 'kwani mo mmomii mon'tho ki rash rash mo. Uni mini bu'th momiiwak kun eka/ ek mo be.

21

A'bom jin Wun ma Kath jin Ci To mo

1 A'di 'de'kki em piti ki mis mo dhali par uni gun ta pa ki pa e mo mmodhu tom buni kun cina uni ki me'd mo e mo jin dhunuwa guurush mo.

2 Dhali a'di ki para 'boma ha'th'ko'd e mo jin wun ma kath mo mmodhu ushi emena guurush isu/ mo kun ta gi 'per mo.*

3 Dhali a'di ki o gwo mo ki: Ka jin gana/ aha/ tora um gwo mo ka 'boma ha'th'ko'd yan jin wun ma kathim piti mo tani a'di dhuki to jin boli'da ris uni gun tan e mo be.

4 Haali/ uni 'baar mo pashki to 'pen mo 'peni tom buni gun ishkin ka enthus mo, hili ayim 'pena ha'th'ko'd piti mo tani dhuki'da ris to 'baar mo kun mini kar a'di mo be.

Mo jin 'Ce'du Gu'b gi Mondheleladhelel Sho'k mo dhali Jamas Mii jin Toru Ntwa/a/ gom 'Pemen jin 'Ko'd mo

5 Dhali me'd jin ona 'kwanin tiya gwo mo gom gu'b gi mondheleladhelel mo mmonyaju a'di ki wosha 'borga/ mo dhali to kun cinu mo dhali a'di ki o gwo mo ki:

6 Me'da ris to gwansan kun parkina um e mo tani atee mini pu'du/ mo ki wosha kamu/ yisa minu dhal ka makampo/ apowa kamu/ imahan yisa kun mini 'koki taka 'cesh mo.

7 Dhali uni ki dot a'di gwo mo ki: Mantor Gwo, ki mii yan midi mii kakasja mo? Dhali jamas mii gi wakata minu mii mo? ki mii yansan jin mura 'twa/ mmobu'th mo mo.

8 Dhali a'di ki o gwo mo ki: 'Cunycuri mii ki is bum ki 'bore/ mo ma ki um minu 'koki susi dheres mo. Haali/ 'kwani tana ris mini iyu/ ki gway pem mo mmo/o gwo mo ki: Aha/ tana a'di be, dhali, Mo a'di pu'dki'd hila/ mo tani, dhalku/ ki ii mmobath uni isho'k mo.

9 Dhali ki um mini cik gwo gom mo/as mo dhali adulatt jin miina 'kwani mo tani dhalka shi/iny jwa ki shwa mo ma haali/ mii yansan a'di midi mii bu'th mo mo ntwa/a/ mo, hili 'pemen midi diki pu'd naskina/ ki jahanne/ mo.

* 21:2 Kun wana e ka girish 'de/ mo be.

10 Yan'ko'd a'di ki o uni gwo mo ki: Kal gi kala kamu/ midi cu mis apo/ kala kamu/ mo dhali 'penkuman bampaŋ kamu/ midi cu mis apo/ 'penkuman bampaŋ kamu/ mo be.

11 Dhan mony'cesh midi yikin is ki mo ka ris mo dhali e mon tiya ka ris mo tani te/ midi 'kosha 'kosh mo dhali mo/isa nyor 'peni to kun woci 'kwani is mo, dhali to kun mini dher 'kwani is bwa mo dhali dhan momer 'peni momis mo be.

12 Hili ntwa/a/ ka ris to gwansan mo tani uni mini dhu me'd buni apo/ um mo dhali to'c um bwa mo mmoci um e gu'b gi montul is mo dhali eya sijin mo dhali um minu susu mo mbwambori imalik mo dhali e imudhiir mo gom gway pem mo be.

13 Yansan midi ta atente/ gom um mmota iman/o gwo mo be.

14 Thosoni adum bum ntwa/a/ mo ma dhali dhalku/ ki dhuwa du ki mur mo gom gwo jin mina umi thok mo,

15 haali/ aha/ mina ci um 'twa/ mo dhali moyuk mo a'di jin mina jan 'den kamu/ 'peni uni kun ta 'kup ki um mol roç mo walla 'ce'd uma po/ mo be.

16 Um minu ci mo ki ikwan mo si'da/ dhali ikam bum mo dhali ibas bum mo dhali imugum bum mo, dhali kun tiya 'peni bwam um mo tani mina uni i'kosh jwa mo be.

17 Um mina 'kwani 'baar mo ishi/i e mo gom gway pem mo be.

18 Hili amur 'kup 'den kamum bum mo tani minu diki 'ce'd sho'k mo be.

19 Ki miim bum jin 'dima um 'kup mo tani um mini gam mon'kom bum mo be.

20 Hili ki um mini par Pa Urushaliim e mo mmo'kamkunu a'di 'kup ki dek mo ki 'kwani ma mee mo tani yan'ko'd um ki mish mo mo ki a'di ta mony'ce'd sho'k jin pu'dki'd ki 'dishe/ mo be.

21 Yan'ko'd dhali uni gwansan kun 'kon e Pa Yahuudiyya mo mini so 'ku-wosha turga/ mo, dhali dhalki uni gwansan kun 'kon e bwaman 'penkuman bampa/ mo tani mini ii mo, dhali mmo'koki dhal uni gwansan kun 'kon ka pije/ e bampa/ mmociç e a'di mo.

22 Haali/ atee gwansan a'di ta mo gi toru gwo 'twa/a 'cesh ka kar/ e mo mmothima ris to kun 'kwarikunu mo be.

23 Ayy/ayy/ayy gom uni gwansan kun bwaa uci mo dhali gom uni gwansan kun ci uci ako mmopi mo ka tee gwansan mo. Haali/ adhana wukura/ midi caaca mo jin midi pu'du/ apo/ mony'cesh mo dhali anyor midi di apo/ 'kwani gwansan mo.

24 Dhali uni minu tor 'ko'da 'cesh ki sheŋ gandala turga/ mo, dhali uni minu sus mo mmota habuus mo e bwaman kal gi 'kwaniny'ceshi 'baar mo. Dhali Pa Urushaliim minu shubur ki sho'k gi 'kwani kun 'koki ta 'Kwani Yahuuda/ mo ntaga tee gi 'kwani kun 'koki ta 'Kwani Yahuuda/ minu thim mo be.

Mo jin Mina Ya/ gi 'Kwani Doku/ mo

25 Dhali jamas mii midi di eya tente/ mo dhala ppe mo dhali acul mo. Dhali eya po/ mony'cesh mo tani awukura/ e kal gi 'kwaniny'cesh mo midi di mo eya dumbul bway mo goma kuku/ kuku/ kumma/ yi'de/ mo dhali mombir bakal mo.

26 'Kwani mina shi/ini wu 'kup mo gom mon'ko/ is mo gom to jin çorkina uni mo, a'di jin midi pu'du/ apo/ mony'cesh mo. Haali/ mom'bi'th gi momis mo tani minu yikin is mo be.

27 Dhali yan'ko'd uni mini par Ya/ gi 'Kwani e mo mmoyayu/ e bwaarak mo ki mom'bi'th mo dhali ka dhan monyca jin ca'd ilu/ mo be.

²⁸ Dhali ka ris to gwansan mini tel mii 'pen mo mmobu'th mo mo tani hili 'kup ki mis mo ma dhali 'deki 'kup bum mo haali/ mowan 'bam bum mo tani a'di 'disha'dish mo be.

²⁹ Dhali a'di ki tor uni gwo mo ki gwom 'bi'th/e mo ki: Hili cwampu/ mo ma dhali aris cwa 'baar mo.

³⁰ Me'd jin daka lu/a uni jipiny this mo tani um ki par mo e gom is bum mo dhali um ki mish mo mo ki moyurantee a'di 'disha'dish hila/ mo be.

³¹ Wakan si'da/ ki um mini par aris to gwansan e mo mmobu'th mo mo tani um ki mish mo mo ki Bampa/ ma Arungimis 'disha'dish mo be.

³² Ka jin gana/ aha/ ona um gwo mo ki, 'kwani ma nyakum yil gwansan mo tani mini 'koki pe mo ntagi to 'baar mo minu thim mo be.

³³ Momis dhali mony'cesh mini pe mo tani hili gwom pem mini 'koki pe mo be.

³⁴ Hili 'cunycuri is bum ki 'bore/ mo ma hili isi ciki/ adum bum mina umi bit is jwa mo 'peni mo jin tanu adhora su mo dhali 'peni mo gi 'kosh ma su 'kwani mo dhali mii kun noni 'twa/ e mondiki/e yan mo, dhali atee yan midi pu'du/ apo/ um ise/ mo me'da gume/ mo be.

³⁵ Haali/ a'di midi pu'du/ apo/ 'kwani 'baar mo uni gun 'kokin e jis/ e gi mony'cesh yansan mo be.

³⁶ Hili timi mo mo ma ka tee 'baar mo, mmo'tho mo ki um mini ta gi mom'bi'th mo mmoye aris to gwansan mo kun mini bu'th mo mo, dhali mmodoshi bwambori Ya/ gi 'Kwani mo be.

³⁷ Dhali ka yempa/ mo tani a'di diki'd mo mmo'tor gwo e gu'b gi mondhele-ladhelel mo hili ki mon'thiny mo tani a'di yaki'd ka piye/ mo dhali ca'b mo e 'kuwosh jin yuku ka Setuun mo be.

³⁸ Dhali ki mon'thamo/ ka'tum mo tani aris 'kwani 'baar mo pu'dkini a'di mo e gu'b gi mondheleladhelel mo mmocik gwo 'peni a'di mo be.

22

Awu'th jin Wudhuwa powa Yesus mo

¹ Dhali ka cim gi maan'kuthu'd jin miinu ki dar ka cumat 'dishki'd mo tani a'di jin yuku ki Mompe'kupanyolos mo.

² Dhali igasiis kun can mo dhali iman'kwar to mo uni 'kokin mo mmo'ap bway mo mmokar a'di mmowu mo haali/ uni ko/ki 'kwani mo be.

³ Yan'ko'd Setaan cicki'd mo eya Yahuusa mo a'di jin yuku ka Iskariyuuti a'di jin 'dap tiya 'twa/ ka 'kume'd i'ce'dka su/ mo be.

⁴ A'di yaki'd mo mmo'tora tor ki igasiis kun can mo dhali tapa kun can ki imanhil gu'b gi mondheleladhelel gom bway jin mina a'di 'taki 'cith a'di is ki gwo mo e uni mo be.

⁵ Dhali uni 'kunya bwa mo dhali gam gwo me'd mo mmo'ci a'di aguurush mo be.

⁶ Wakan a'di gamki gwo me'd mo dhali mmo'apkina a'di embula 'borga/ mo mmo'cith a'di is ki gwo mo e uni mo ki kup ki dar ga waambuhany 'kwani mo be.

Yesus A'di Shwa To gi Mompe'kupanyolos Nyakki Imancik A'di Gwo mo be

⁷ Yan'ko'd atee pu'dki'd mo ki maan'kuthu'd jin miinu ki dar ka cumat mo, ka tee gi ari ka'bal gi Mompe'kupanyolos minu mii 'citha/ bas mo.

⁸ Wakan Yesus ki hasha Buterus dhala Yohaana mo mmo/o gwo mo ki: Iiku/ mo ma dhali thosoni to mo gom Mompe'kupanyolos gom ana mo, ki ana mina shwa a'di mo be.

⁹ Dhali uni ki thoḵ a'di gwo mo ki: Mana i/o /e bwa jin mina aman thoson a'di mo?

¹⁰ A'di ki o uni gwo mo ki: Hili mo mo ma, ki um mini ciç 'penkuman bampa/ mo tani wathi/ jin ḵali dhur yi'de/ midi gam um 'kup mo. Bathi a'di isho'k mo e gu'b jin ciça a'di mo.

¹¹ Dhali tor com gu'b gwo mo ki: Aman_{tor} Gwo o /e gwo mo ki: Mane gu'b yilkina/ mane mo, a'di jin miga/ shwa to gi Mompe'kupyolos nyakki imancik gwom pem mo?

¹² Dhali a'di midi tor um dhan bwaman gu'ba beega/ mo jin di'di mis apowa kamu/ mo jin isha to ki kokorom mo. E mun mo tani thosoni to mo ma.

¹³ Dhali uni iikin mo dhali gam a'di me'd jin tor_{kina} a'di uni gwo mo, dhali uni thosonki to mo gom Mompe'kupyolos mo be.

¹⁴ Dhali ki mo pu'dki'd mo tani a'di ca'bki'da tharabeesa mo dhali uni gun dhunu ki she/ mo nyakki a'di mo be.

¹⁵ Dhali a'di ki o uni gwo mo ki: Aha/ dina gwo i bwayi ki nyanye/ mo mmonyak to shwa ki Mompe'kupyolos yan nyakki um mo ki aha/ dina is ki 'kosh ka nyor ntwa/a/ mo be.

¹⁶ Haali/ aha/ tora um gwo mo ki: Aha/ mina diki shwa a'di mo dok/e ntagi a'di minu thim mo e Bampa/ ma Arungimis mo be.

¹⁷ Dhali a'di bu'thki'da ḵubbaaya mo dhali ki a'di ciki mom'bor bwa i is mo tani a'di o gwo mo ki: Budhi yansan mo ma dhali ḵwaki a'di bwa e bwam um ki is bum mo ma.

¹⁸ Haali/ aha/ tora um gwo mo ki 'peni shwane/ mo tani aha/ mina diki pi yiman maman cwa mo ntagi Bampa/ ma Arungimis midi pu'du/ mo be.

¹⁹ Dhali a'di bu'thki maan_{kuthu}'d mo si'da/ dhali ki a'di ciki mom'bor bwa i is mo tani a'di ki 'ce'd a'di mo dhali ci uni mo mmo/o gwo mo ki: Yansan ta is pem mo be, a'di jin cikunu mo gom um mo. Miiyi yansan mmoka aha/ e mo.

²⁰ Dhali wakan si'da/ 'ko'di ton_{te}/ mo tani a'di bu'thki'da ḵubbaaya mo mmo/ o gwo mo ki: Ḵubbaaya yan ta ji gi wolo'd ka pi_{je}/ gom um mo a'di jin ta gwon this jin gamu me'd ka bas pem mo be.

²¹ Hili, hili mo mo ma, me'd gi a'di jin 'cithi/ aha/ is ki gwo mo a'di nyakki di ki aha/ eya tharabeesa mo be.

²² Haali/ Ya/ gi 'Kwani a'di yaki'd mo me'd jin karkunu gom a'di mo. Hili wayyi e wathi/ caan mo ki a'di jin 'cithki a'di is ki gwo mo be.

²³ Dhali uni telki mii 'pen mo mmodot gwondot ka rem 'kup mo ki jana 'peni bwam uni ta a'di jin midi 'taki mii to yansan mo.

Gwo gi Sugu/ mo gom A'di jin Midi Ca mo

²⁴ Dhali gwo gi sugu/ si'da/ cu_{ki}'d mo e bwam uni mo gom a'dija iminu kar ki ca mo e bwam uni mo?

²⁵ Dhali a'di ki o uni gwo mo ki: Imalik gi 'kwani kun 'koki ta 'Kwani Yahuuda/ mo tani mii mo gi tanu tapa apo/ uni mo, dhali uni gwansan kun ta gi moshirr mo apo/ uni mo tani yuk_{kunu} gway ki imanmii ki 'bore/ gom uni mo.

²⁶ Hili yansan midi diki di wakan gom um mo. Hili dhalki a'di jin ca'd e bwam um mo dhal mii e i is mo mmowar ki gwa'd mo dhali a'di jin di'di t_{wa}/ a/ mo ta a'di jin midi ta amanmii to mo be.

²⁷ Haali/ a'di jin ca'd mo tani ta a'din 'de/ jin di'da tharabeesa mo 'taa? walla a'di jin ta'da manmii to mo? A'di diki ta a'di jin di'da tharabeesa mo 'taa? Hili aha/ dina mbwam um mo mmota wathin 'de/ jin mii to mo be.

²⁸ Um ta uni gwansan kun rashi 'ko nyakki aha/ mo e mompal pem mo.

²⁹ Me'da Ababa mmoṭorkina a'di aha/ bampa/ i e mo tani wakan si'da/ aha/ torkina um a'di i e mo,

³⁰ ki um mini nyak to shwa mo dhali nyak to pi eya tharabeesam pem e bampam pem mo dhali mmo'ko 'pena kursin tapa mo mmodwall 'Kwani ma Israyiil gwo mo uni kun 'kon ma waki 'kume'd i'ce'dka su/ mo be.

Mo jin Min ma Buṭerus Waṭ Gwo mo A'di Torkunu Nṭwa/a/ mo

³¹ Simaan, Simaan, hili mo mo ma, Seṭaan dina gwo mbwa mo mmobu'th um mo ki a'di mididi 'dash um me'd emen pos mo.

³² Hili aha/ 'thokina mo gom /e mo ki monḡam gwo is pini mididi diki ush me'd mo. Dhali ki /e mini tu'k mo dok/e tani 'bithi awak pini is mo ma.

³³ Dhali a'di ki o a'di gwo mo ki: Tapa, aha/ thosonkina is mo mmonyak ya ki /e mo eya sijin mo dhali mmowu mo be.

³⁴ Dhali a'di ki o a'di gwo mo ki: Aha/ tora /e gwo mo, Buṭerus, ka dhongola ṅwa mididi diki ko e ka tee yan mo tani ntagi /e mini waṭ aha/ gway me'di kwara ki /e mishi aha/ kan mo be.

Jisilaan, dhali Kucaṅ, dhali Gandal

³⁵ Dhali a'di ki o uni gwo mo ki: Me'd jin hashkika/ um ka pije/ mo ki dar ga jisilaan mo walla kucan mo walla ka ppa/ isho'k mo tani um harki toṅ kamu/ mo 'taa? Uni thoḡ a'di gwo mo ki: To piyi'd mo be.

³⁶ Dhali a'di ki o uni gwo mo ki: Hili shwane/ mo ma. Dhalki a'di jin ta'd ga jisilaan bu'th a'di mo dhali wakan si'da/ a'di jin ta gi kucan mo. Dhali dhalki a'di jin dara'd gi gandala turga/ mo tani yol burrinym pom piti mo dhali yol gandala kamu/ mo.

³⁷ Haali/ aha/ tora um gwo mo ki Gwo ma Arumgimis yansan jin 'kwarkunu mo ki: Dhali a'di karkunu nyakki imandhan gwo mo tani a'di naskina/ minu mii thim ki aha/ mo be. Haali/ a'di jin 'kwarkunu gom aha/ mo tani a'di ta mo gi thimkunu a'di mo be.

³⁸ Dhali uni ki o gwo mo ki: Hili mo mo ma, Tapa, gandala turga/ 'koni su/ imahan mo. Dhali a'di ki o uni gwo mo ki: A'di 'kosh jwa mo.

Yesus 'Thoki'd mo e Bwam Monsinu mo

³⁹ Dhali a'di pu'dki'd ka pije/ mo dhali ya mo me'd mii jin miina a'di mo mmoya e 'Kuwosh ma Seṭuun mo. Dhali imanciḡ a'di gwo bathki a'di isho'k mo be.

⁴⁰ Dhali ki a'di pu'dki'd mo e mo caan mo tani a'di ki o uni gwo mo ki: 'Thoyi mo ma, ki um mini 'koki ciḡ mo e mo jin palu mo.

⁴¹ Dhali ki a'di thoṭhi is mo 'peni uni mo me'd ari wosh jin yipu kantaan mo tani dhali a'di ki ca'b ki jin 'kupa'dupun mo dhali 'tho mo be ki:

⁴² Ababa wakki/ /e ona bwa mo tani thoṭhka kubbaaya yan 'peni aha/ mo ma, hili a'di jin oyaa/ bwa mo yisa hili a'di jin o /e bwa mo, ki a'di minu mii mo be.

⁴³ Dhali a'di pikin ma man'doyu gwo i is mo 'peni momis mo mmo'bi'th a'di is mo be.

⁴⁴ Dhali mmowoja is a'di she/ mo tani a'di 'thoki'd ka daran du mo. Dhali jiṭim piti warki'd ki dhan ḡuḡkulisa bas kun ta'kkina 'cesh apowa 'cesh mo be.

⁴⁵ Dhali ki a'di cuki mis mo 'peni mon'tho mo tani a'di pu'dki'd mo e imanciḡ a'di gwo mo dhali gam uni mo mmomalkina uni e mo ki bwani diṭi'd mo be.

⁴⁶ Dhali a'di ki o uni gwo mo ki: Atinta isha um e mo kan? Cuyi mis mo ma dhali 'thoyi mo, ki um mini 'koki 'taki ciḡ mo e mo jin palu mo be.

Mo jin 'Cithuwa Yesus Is ki Gwo mo dhali Mo gi Budhu A'di mo

⁴⁷ Ki a'di di'd mmo/o gwo mo tani awaambuhany 'kwani pu'dkin mo dhali wathi/ jin yuku gway ka Yahuusa a'din 'de/ jin ta tiya a'kume'd i'ce'dka su/ mo tani a'di shuyi uni bway mo. A'di ki 'disha Yesus is mo dhali pi a'di 'twa/ mo be.

⁴⁸ Hila Yesus ki o a'di gwo mo ki: Yahuusa, mina /eyi 'cith Ya/ gi 'Kwani is ki gwo ki 'twam pi kan mo 'taa?

⁴⁹ Dhali ki uni gwansan kun 'kamki a'di mo tani parki mii e mo jin midu 'taki mii i'ko'd mo tani uni o gwo mo ki: Tapa, mina aman dora/ dor ki gandal mo 'taa?

⁵⁰ Dhali jan 'denj kamu/ 'peni uni mo tani a'di dorki cinjina/ ma gasiis jin ca'd mo dhali 'cith a'di 'ce ma bim poros piti mo be.

⁵¹ Hila Yesus o gwo mo ki: Dhalku/ yan ki mii dok/ e mo. Dhali a'di ki ta 'cem piti is ki me'd mo dhali waç a'di mo be.

⁵² Yan'ko'd Yesus ki o igasiis kun can gwo mo dhali tapa kun can ki imanhil gu'b gi mondheleladhelel mo dhali 'kwani gwanyjaka/ mo, uni gun iyyin ka pije/ apo/ a'di mo ki: Um iyyina po/ wathi/ me'd wathin 'di/ ki gandala turga/ dhali ki cwa kan mo 'taa?

⁵³ Ki aha/ dikina ka tee jin batha'di 'ko'd isa yempa/ e gu'b gi mondheleladhelel mo tani um 'koki dhu me'd bum apo/ aha/ mo. Hili yaase ta mom bum mo be dhali mom'bi'th gi mondhurumi'd mo.

Buterus Watki'da Yesus Gway mo

⁵⁴ Dhali yan'ko'd uni ki bu'th a'di mo dhali uni ki shu a'di bway mo mmosusi a'di mo e gu'b ma gasiis jin ca'd mo. AButerus di'd mmobath a'di isho'k isa dhana/ mo.

⁵⁵ Dhali ki uni 'thaki o'da 'cila'th mo e bwaman mo gi dwallu gwo mo dhali 'kowa 'cesh mmontal 'de/ mo tani Buterus ca'bki'di bwam uni mo be.

⁵⁶ Yan'ko'd ari nyara/ hilki a'di mo mmodina a'di mo mmoça'b ka le'dan o'd mo dhali tor a'di ki e mo mmo/o gwo mo ki: Wathi/ yansan si'da/ nyaç di ki a'di mo be.

⁵⁷ Hili a'di waç a'di gwo mo mmo/o ki: A'boma, aha/ dinaki mish a'di mo be.

⁵⁸ Dhali yan'ko'd ari'ceenne/ mo tani jan 'denj kamu/ si'da/ parki a'di e mo dhali o a'di gwo mo ki: /e si'da/ ta jan tal 'de/ 'peni uni mo be. Hila Buterus o gwo mo ki: Wathi/ aha/ tana a'di yisa.

⁵⁹ Dhali yan'ko'd ki ari mo ta mo mo tani jan tal 'denj kamu/ di'd si'da/ mo mmo'cece'b gwo mo mmo/o ki: Ka jin gana/ wathi/ yansan si'da/ nyaç di ki a'di mo, haali/ a'di ta wathi/ gi Pany Jalil mo.

⁶⁰ Hila Buterus ki o a'di gwo mo ki: Wathi/ aha/ mola gwo 'ban jin ona /e mo. Dhali ki jahanne/ ki a'di di'd mmo/o gwo mo tani adhongola nwa gwo e mo be.

⁶¹ Dhali Tapa tu'kki'd mo dhali hila Buterus mo dhala Buterus kakina gwon Tapa e mo, gwo jin okina a'di a'di mo ki: Ntwa/a/ ka dhongola nwa diki ko e shwane/ mo tani /e mini waç aha/ gway me'di kwara mo be.

⁶² Dhali a'di yaki'd ka pije/ mo dhali ko ki jabu'th ki ku'bu/ ku'bu/ mo be.

Yesus Miikunu ka Maç mo dhali Doru mo

⁶³ Dhali 'kwani kun 'kokin mo mmobudha Yesus mo tani uni mii a'di ka maç mo dhali dor a'di mo be.

⁶⁴ Uni si'da/ kum a'di e mo mmota ja'da/ mo dhali dot a'di gwo mo ki: Ciyi gwo mo ma. Kaja 'dunn idorki /e mo?

⁶⁵ Dhali uni oki gwon tiya ka ris apo/ a'di mo mmosor a'di mo be.

Yesus Diki'd Mbwambor Montul Is gi 'Kwani Yahuuda/ mo

⁶⁶ Dhali ka tee pu'dki'd mo tani 'kwaniḡ gwanyjaka/ tulki is mo mmontal 'de/ mo nyakki igasiis kun can mo dhali iman'kwar to mo. Dhali uni ki shu a'di bway ka pije/ e montul is buni mo, dhali uni ki o gwo mo ki:

⁶⁷ Wakki/ /e tana Kristhos mo tani tori aman gwo mo ma. Hili a'di ki o uni gwo mo ki: Wakki/ aha/ mina tor um gwo mo tani um mini 'koki gam gwo is mo be.

⁶⁸ Dhali wakki/ aha/ mina doḡ um gwo mo tani um mini 'koki thoḡ aha/ gwo mo be.

⁶⁹ Hili 'peni mo yansan shwane/ mo tani Ya/ gi 'Kwani minu kar mo mmoḡa'b ka bim poros gi mom'bi'th ma Arumgimis mo be.

⁷⁰ Dhali uni 'baar mo o gwo mo ki: /e ta Ya/ ma Arumgimis de? Dhali a'di ki thoḡ uni gwo mo ki: Um oki aha/ tana a'di mo be.

⁷¹ Dhali uni ki o a'di gwo mo ki: Gwonta mina ana imii ita ki nyanye/ mmo/ o mo? Haali/ ana ciḡa gwo ki is bana 'peni 'twam pitin gana/ mo be.

23

Yesus Diki'd Ibwambor ma Bilaatus mo

¹ Yan'ko'd aris uni 'baar mo kun tulki is mo uni cuki mis mo dhali susi a'di mo mbwambor ma Bilaatus mo.

² Dhali uni telki mii 'pen mo mmoyer a'di is ki gway mo mmo/o gwo mo ki: Aman gamkina wathi/ yansan mmo/o gwo apo/ bampam bana mo dhali non am 'kup mo si'da/ mmociya Kaysara thulpa/ mo dhali o gwo ki a'di ki is piti ta'da Kristhos jin ta'da Malik mo.

³ Dhala Bilaatus ki doḡ a'di gwo mo ki: Ki /e de ntana Malik gi 'Kwani Yahuuda/ mo de? Dhali a'di ki thoḡ a'di gwo mo ki: Ona /e wakan si'da/ mo be.

⁴ Dhala Bilaatus ki o igasiis kun can gwo mo dhala waambuhany 'kwani mo ki: Aha/ dinaki gam miinḡ kamu/ e wathi/ yansan jin thutha a'di mii mo be.

⁵ Hili uni 'cece'bki gwo mo mmo/o ki: A'di cuki 'kwani is mo mmoḡor gwo ki tur mo e Bampa/ Yahuudiyya 'baar mo 'peni Pany Jaliil itagi mahansan mo be.

Yesus Diki'd Ibwambor ma Hirodus mo

⁶ Ka Bilaatus cikki gwo yan mo tani a'di doḡki gwo mo wakki/ a'di ta wathi/ gi Pany Jaliil mo.

⁷ Dhali ki a'di da/arki gwo mo ki a'di cila mo ma Hirodus gi moshirr mo tani a'di hashki a'di ka Hirodus mo, a'di jin di'd ki is piti e Pa Urushaliim ki mo caan mo be.

⁸ Ka Hirodus parki'da Yesus e mo tani a'di 'kunya bwa kagahara mo haali/ a'di dina gwo ibwa mo isa gush mo mmopar a'di e mo, haali/ a'di cikki gwo mo gom a'di mo dhali a'di toshki par miimera kamu/ e mo jin miikina a'di mo.

⁹ Wakan a'di doḡki a'di gwon tiya ka ris mo, hili a'di diki 'de'k 'twanḡ kamu/ mo be.

¹⁰ Dhali igasiis kun can mo dhali iman'kwar to mo doshkin ki 'dishe/ mo mmo'cwar a'cwar mo mmoyer a'di is ki gway mo be.

¹¹ Dhala Hirodus nyakka askar piti mo tani uni kar a'di ki mon'the is mo dhali mmomii a'di ka maḡ mo. Yan'ko'd uni ki hi'th a'di burrinye/ jin ca'bki 'be'd' be'di is mo dhali a'di ki hash a'di ka nyan'ko'd eya Bilaatus mo be.

¹² Dhala Hirodus dhala Bilaatus uni warkin ka mugu ka rem 'kup mo ka teenḡ gana/ caan mo haali/ ki mii yansan ntwa/a/ mo tani uni ta 'kup ka rem 'kup mo be.

Yesus Torkunu Gwo 'Twa/a 'Cesh mo Mmowu mo

¹³ Yan'ko'd Bilaatus ki tul igasiis kun can is mo dhali 'kwani kun tana 'kan'kup pa mo dhali 'kwani mmonṭal 'de/ mo be.

¹⁴ Dhali a'di ki o uni gwo mo ki: Um suski wathi/ yansan i aha/ mo me'd wathin 'de/ jin o gwo apo/ 'kwani mo. Dhali ṅ'ko'd aha/ palkina a'di mo mbwambori um mo. Dhali hili mo mo ma aha/ dinaki gam wathi/ yansan 'peni ton tal 'deṅ kamu/ jin ṭhutha a'di mii mo jin ona um a'di gwo apo/ mo.

¹⁵ Walla Hirodus si'da/ haali/ a'di hashki a'di ka nyan'ko'd e ana mo. Dhali hili mo mo ma. Tonj kamu/ yisa di'da jin ha me'd ki mowu mo jin miikina a'di mo be.

¹⁶ Dhali gom mii gi wakan mo tani aha/ mina ci a'di monṭo'k mo dhali 'cuḱ a'di mo be.

¹⁷ Dhali a'di mididi mii ta mii mo jin mina a'di mii 'cuḱ wathin 'de/ gom uni ka cim gun 'boron mo be.

¹⁸ Hili uni 'baar mo cuukin ki nyanye/ mo mmonṭal 'de/ mo ki: Ka bor 'deṅ gana/ e wathi/ yansan mo, dhali 'cuḱi amana Baraabas mo -

¹⁹ wathi/ jin bitkunu mo eya sijin mo gom gwo gi onuwa 'cesh e 'penkuman bampa/ mo dhali haali/ a'di ta'da man'kosha mee mo.

²⁰ Dhala Bilaatus ṭorki uni gwo mo dok/ e mmodina gwo a'di i bwa mo mmo'cuḱa Yesu mo be.

²¹ Hili uni cuukin ki dhan 'twa/ kun caaca mo ki: 'Koshi a'di ki cwany'ciṭhan dhul mo ma. 'Koshi a'di ki cwany'ciṭhan dhul mo ma.

²² Me'di kwara a'di ki o uni gwo mo ki: Goma tinta? tonthus wakata imiikina a'di mo? Aha/ dinaki gam miinj kamu/ jin ṭhutha a'di mii mo jin mididi ha me'd ki mowu mo. Gom mii gi wakan mo tani aha/ mina ci a'di monṭo'k mo dhali 'cuḱ a'di mo be.

²³ Hili uni 'kokin mo mmo'cece'b gwo mo mmodot gwo ki cuuwa/ kun caaca mo ki a'di minu 'taki 'kosh ki cwany'ciṭhan dhul mo. Dhali 'twam buni piki gwo jipi/ mo be.

²⁴ Wakan Bilaatus a'di dhalki gwon dwall me'd mo ki gwom buni kun doṭa uni minu mii mo be.

²⁵ A'di 'cuḱki uni wathi/ jin bitu eya sijin mo gom gwo gi onuwa 'cesh mo dhali goma mee jin 'kosha a'di mo, a'di jin dotkina uni mo, hila Yesu a'di cikunu uni mo gom gwo gi bwam buni mo be.

Mo gi 'Koshuwa 'Kosh ki Cwany'ciṭhan Dhul mo

²⁶ Dhali me'd jin suskina uni a'di i bway mo tani uni bu'thki wathin 'de/ jin ta'da Simaan gi Paṅ Kerawaan mo, a'di jin yayi'd 'peni pa mo dhali uni ki 'thiḱ a'di cwany'ciṭhan dhul piti m'ba/ mo mmokal a'di ṅ'ko'da Yesu mo be.

²⁷ Dhali adhana waambuhany 'kwani baṭhki a'di isho'k mo dhali ki up ilu/ mo uni gun miikina cinthar mo dhali ko kagahara gom a'di mo be.

²⁸ Hila Yesu tu'kki 'ban mo dhali o uni gwo mo ki: I'bwa/ gi 'Kwani gi Pa Urushaliim, dhalku/ ki ko gom aha/ mo ma, hili koyi gom is bum mo dhali gom uḱim bum mo.

²⁹ Haali/ hili mo mo ma, atee mini pu'du/ mo jin mina uni o gwo mo ki: Mom'bor mii gom uni gun tana burum mo dhali bwa kun molona dho'th ki sule/ mo dhala bor kun 'koki ciya ko mmopi ki sule/ mo.

³⁰ Dhali yan'ko'd uni mini tel mii 'pen mo mmo/o wosha turga/ gwo mo ki: Biṭi apo/ am mo ma, dhali e wosh kun boḱa/ she/ ki: Kumi aman is mo ma.

³¹ Haali/ wakki/ uni mii to yansan mo ki cwa yathaya'th mo tani atinta mididi mo ṅ'ko'd ki a'di mididi ku'th mo?

³² 'Kwanin tiya 'koni su/ si'da/ uni kun ṭhu'thki mii mo, uni suskunu ka piije/ mo mmo'kosh jwa mo nyakki a'di mo be.

³³ Dhali ki uni pu'dkin mo e mo jin yuku ka Siman 'Kup mo tani uni ki 'kosh a'di ki cwany'cithan dhul mmun mo. Dhali uni gun thuthi mii mo, jan tal 'de/ ki 'bana bim poros piti mo dhali jan tal 'de/ ki 'bana biny cam piti mo be.

³⁴ Dhala Yesus ki o gwo mo ki: Ababa, dhalki uni miinthus buni 'pen mo ma, haali/ uni 'koki mish to jin miina uni mo be. Dhali uni ta'kki to mo mmokwa/ burrinyem piti bwa mo.

³⁵ Dhali 'kwani doshkin ki 'dishe/ mo mmohil mo mo, hili 'kwani kun tana 'kan'kup pa mo wakki a'di mo mmo/o gwo mo ki: A'di wothki kun tiya mo tani dhalki a'di woth is pitin gana/ mo ma, wakki/ a'di ta'da Kristhos 'peni Arungimis mo, a'di jin ta jim pitin 'de/ jin kwanykunu mo.

³⁶ Dhali i/ askar si'da/ mii a'di ka mak mo. Uni iikin mo dhali ci a'di tom'paca'd mo,

³⁷ dhali mmo/o gwo mo ki: Wakki/ /e tana Malik gi 'Kwani Yahuuda/ mo tani wothi/ is pini mo ma.

³⁸ Dhali gwo si'da/ 'kwarkunu mo n'kupi a'di mo ki: Yansan ta'da Malik gi 'Kwani Yahuuda/ mo be.

³⁹ Dhali jan 'de/ jin thuthi mii mo jin shirkunu apo/ cwany'cithan dhul mo tani o a'di gwo mo mmo/o ki: Dina /e ki ta Kristhos 'taa? Wothi is pini mo ma dhali aman mo.

⁴⁰ Hili jan kamu/ kucurki a'di ki gwo mo mmo/o gwo mo ki: Dina /e ki ko/ka Arungimis mo 'taa? Haali/ /e dikin 'ko'di me'd gi gwon dwall gi miuwak jin nyaka'd mo.

⁴¹ Dhali ana ka jin gana/ miinu ka kar/e kan mo. Haali/ ana bu'thkina a'di jin minu mii ci ana mo gom mii gun miikina ana mo, hili wathi/ yansan diki thu'th toj kamu/ mii mo be.

⁴² Dhali a'di ki o gwo mo ki: Yesus, kayi aha/ e mo ma, ki /e mini pu'dku/ mo e mom'bi'th gi bampam pini mo.

⁴³ Dhali a'di ki o a'di gwo mo ki: Ka jin gana/ aha/ ona /e gwo mo ki: Shwane/ /e mini nyak di ki aha/ mo e monyjar/ e momis mo.

Mowu ma Yesus mo

⁴⁴ Dhali mo wana e ka tente/ bwan 'kup mo tani dhali mondhurumi'd pu'dki'd mo apo/ mony'ceshi 'baar mo ntaga tente/ mbum 'ban mo be.

⁴⁵ Ka tente/ uski monjkush piti mo tani dhali burrinye/ jin di'd e gu'b gi mondheleladhelel mo tani a'di dherkunu bwa mo ka 'ban su/ mo be.

⁴⁶ Dhali yan'ko'd Yesus ki cuu ki dhan 'twa/ jin caaca mo mmo/o gwo mo ki: Ababa, e me'd pini mo tani aha/ cikina /e shi/in pem mo be. Dhali ki a'di oki gwo yansan mo tani a'di ki ci shi'ir piti jin 'ko'd mo.

⁴⁷ Dhali ka mancil ma askar iss 'kwanimpa imudhe'd parki a'di jin bu'thki mo e mo tani a'di manki'da Arungimis mo dhali o gwo mo ki: Ka jin gana/ wathi/ yansan a'di di'd ka po/ mo be.

⁴⁸ Dhali awaambuhany 'kwani 'baar mo kun tulki is mo mmopar mo e mo tani ki uni parki a'di jin bu'thki mo e mo tani uni dokki bway pa mo mmodora bor buni ki me'd mo be.

⁴⁹ Dhali aris 'kwani kun mishki a'di mo dhali up mo, uni gun bathki a'di nsho'k mo 'peni Pany Jaliil mo tani doshkin isa dhana/ mo dhali par to gwanan e mo be.

Mo gi Kanuwa Yesus mo

⁵⁰ Dhali wathin kamu/ di'd jin yuku gway ka Yuusup mo, a'di 'peni pa gi 'Kwani Yahuuda/ mo jin yuku ka Arraama mo. A'di ta jan 'de/ 'peni montul is gi 'kwanin gwanyjaka/ gi 'Kwani Yahuuda/ mo jin ta wathim 'boro'd mo dhali wathin kar/e mo be.

⁵¹ A'di diki gam gwo me'd ki gwom buni gun 'ko uni mbwa mo dhali mii mo hili a'di cōrki'da cōr mo gom Bampa/ ma Arumgimis mo.

⁵² Wathi/ yansan yaki'd eya Bilaatus mo dhali doṭ a'di gwo mo gom is ma Yesus mo be.

⁵³ Dhali yan'ko'd a'di ki bu'th a'di ka 'cesh mo dhali a'di ki 'tam a'di is ki burrinyen dhiny e mo dhali kar a'di e jis wosh jin cwanyu gom jis jwa mo jin dinuki kar jan tal 'deṭ kamu/ nycine/ naskina/ mo.

⁵⁴ A'di ta'da tee jin Thosonkunu to mo dhali acim ma pesu/ telkunu 'pen mo be.

⁵⁵ Dhali up kun nyakki ii ki a'di 'peni Pany Jaliil mo tani bathkina bathi sho'k mo dhali uni parki moṅ'kupaje e mo dhali mo jin karkunu is piti nycine/ mo.

⁵⁶ Dhali yan'ko'd uni ki doḷ bway pa mo dhali uni ki thoson to kun kuyi mo mo dhala yina pi'dna mo.

Dhali ka cim ma pesu/ mo tani uni siki is mo isi ki gwoṅkan jin 'kwarkunu mo be.

24

Mompinu mo

¹ Hili ka tee jin twa/a/ ka dhas mon'thamo/ ka'tum mo tani uni iikin mo e moṅ'kupaje mo mmokal to kun kuyi/ mo mo kun thosonkina uni mo be.

² Dhali uni gamki wosh ka'ckunu mo 'peni 'twaman jis jwa mo.

³ Hili ki uni iiki bwaman mo tani uni 'koki gam bungwar is gi Tapa Yesus mo be.

⁴ Ki uni 'kokin mo mmodumbul gom mii yansan mo tani hili mo mo ma, 'kwani su/ doshkini uni mo kun shwakina burrinye/ ka wara sho'k mo.

⁵ Dhali me'd jin ko/kina uni is mo tani uni lunḷki bwam/em buni a'cesh mo dhali 'kwani ki o uni gwo mo ki: Atinta ṅapkina um a'di jin di'd ki e 'peni bwam mowu kan mo? A'di diki di mmahan mo. Hili a'di piki'd mo be.

⁶ Kayi gwo e mo ma, a'di jin ṭorkina a'di um mo ki a'di di'd naskina/ e Pany Jaliil mo

⁷ ki Ya/ gi 'Kwani minu mii ci 'kwanin thusi me'd mo dhali minu mii 'kosh jwa mo ki cwany'ciṭhan dhul mo dhali ka cim kwara mo tani a'di midi cu mis mo be.

⁸ Dhali uni kaki gwom piti e mo be

⁹ dhali dok ka nyan'ko'd 'peni moṅ'kupaje mo mmoṭor uni aris to gwansan ki uni gun 'koni 'kume'd i'ce'dka 'de/ mo dhali aris 'kwanin tiya si'da/ mo be.

¹⁰ Dhala Mariyam Magdaliyya dhala Yuwanna dhala Mariyam jin ta KoYakuub dhali upa tiya mo nyakki 'ko ki uni mo uni gun ṭori to gwansan e uni gun dhunu ki she/ mo.

¹¹ Hili gwo gwansan kun onu mo tani wa uni e ki gwo gi 'kwani kun sona du mo dhali uni 'koki gam uni gwo is mo be.

¹² Hila Buterus cuḷi mis mo dhali gus mo e moṅ'kupaje mo dhali tu mo mo dhali par bwaman e mo. Dhali a'di ki par burrinyen dhiny e e mo mmo'ko e mom buni mo dhali a'di doḷ bway pa mo dhali a'di merki'd mo gom to gun miikin mo be.

Mo gi Iinu e Pa Imwaas mo

¹³ Dhali ka tee yansan gana/ mo tani 'kwani su/ 'peni bwam uni 'kokin mo mmo/ii bway Pa jin yuku gway ka Imwaas mo, a'di jin wana e ki ṅatgini pesu/ 'peni Pa Urushaliim mo be.

¹⁴ Dhali uni 'kokin mo mmoṭora ṭor ka rem 'kup mo goma ris to gwansan kun miikin mo be.

15 Ki uni 'kokin mo mmotora tor mo dhali mmodhan gwo n'twa/ mmontal 'de/ mo tani Yesus ki is piti 'dishki uni is mo dhali nyaḱ ya ki uni mo be.

16 Hili em buni 'kokunu mo mmodik mo 'peni monyith a'di mo be.

17 Dhali a'di ki o uni gwo mo ki: Gwon tinta 'kona um mo mmoburushi 'twa/ mo ka rem 'kup mo mmo/iina um kan mo? Dhali uni doshkin mo naskina/ mmohil mo ki bwan diti'd mo.

18 Dhali jan 'de/ 'peni uni mo tani yukunu gway ka Kilyubaas mo, thokki a'di gwo mo ki: /e ta jasi wathi/ yilkinan 'de/ e Pa Urushaliim mo jin diki mish to gwansan kun miikin ka tee gwansan mo 'taa?

19 Dhali a'di ki o uni gwo mo ki: Ton tinta mo? Dhali uni ki thok a'di gwo mo ki: Isi gwo goma Yesus gi Pa Naasira mo, a'di jin ta'da mançi gwo mo, a'di jin ta gi mi gun 'bitha'bi'th mo dhali gwo ibwambor ma Arungimis mo dhali eya ris 'kwani 'baar mo.

20 Dhali hili igasiis kun can bana mo dhali 'kwaniḱ 'kaḱ'kup pa mo tani uni ciki a'di mo ki a'di minu waḱ mo mmowu mo dhali mmo'kosh a'di jwa mo ki cwany'ciḱhan dhul mo.

21 Hili aman takina ga 'teḱ kape/ ki a'di ta jan 'de/ mmowan 'Kwani ma Israyil 'ba/ mo be. Nye, dhali ka ris to gwahan ka roḱham po/ mo tani a'di ta'da tee kun 'koni kwara mo shwane/ ki to gwansan miikin mo be.

22 Dhali upa tiya 'peni bampam bam mo tani merki aman e mo. Uni 'kokin e moḱ'kupaje mo e mon'thamo/ ka'tum mo

23 dhali uni 'koki gam is piti mo. Dhali uni dokkin ka nyan'ko'd mo mmo/o gwo mo ki uni hilki jasi tonyjan jin wana e ki iman'doyu gwo mo, a'di jin o gwo mo ki a'di di'd ki e mo be.

24 'Kwanin tiya 'peni 'kwani gwansan, uni gun nyaḱki 'ko ki am mo tani uni iikin mo e moḱ'kupaje mo dhali gam a'di mo me'd jasi gwo jin ona up mo, hili a'di mo tani 'kona uni ki par e mo be.

25 Dhali a'di ki o uni gwo mo ki: Ayy um 'kwani kun ta pus mo dhali kun gwa'd ma du ki gwa'd mo mmo'koki gam aris gwo 'baar is mo kun okina imançi gwo ma Arungimis kadhamo/ mo.

26 A'di diki ta mii jin minu mii mii mo ka Kristhos mina is 'taki diki mii 'kosh ka nyor gom to gwansan mo dhali ciḱ mo e monycam piti mo 'taa?

27 Dhali mmote! 'pen 'pena Musa mo dhali imançi gwo ma Arungimis kadhamo/ mo tani a'di ki tor uni aris 'pemen gwo kun 'kwarkunu mo e Gwo ma Arungimis mo goma ris to gi isi gom is piti mo be.

28 Wakan uni 'dishki pa is mo e mo jin iikina uni mo. A'di wana e ki a'di ya'di ya gi yam piti mo.

29 Hili uni wothki a'di 'kup mo mmo/o gwo mo ki: Ca'bi nyaḱki am mo ma haali/ mo ta mom'penkaskum mo be haala tee 'baara 'pen mo be. Wakan a'di seki bwaman mo mmonyak ca'bki uni mo be.

30 Dhali ki a'di diki'da tharabeesa nyaḱki uni mo tani a'di bu'thki maanḱuthu'd mo dhali 'bora 'bor bwa i is mo dhali 'ce'd a'di mo dhali ci a'di ki uni mo be.

31 Dhali em buni ka'dkunu mo dhali uni nyithki a'di mo dhali a'di piki'd mo 'peni bwam/em buni mo be.

32 Dhali uni o gwo ka rem 'kup mo ki: 'Kon ma dum bana ki su'kka war mo mmo'kona ana mmotora/ tor e bway tur mo? mmoḱa'dkina a'di ana Gwo ma Arungimis kun 'kwarkunu mowa?

33 Dhali uni cuki mis mo ka tenten gana/ yansan mo dhali dok ka nyan'ko'd mo e Pa Urushaliim mo. Dhali uni ki gam uninḱ 'kume'd i'ce'dka 'de/ mo tulki is mo mmontal 'de/ mo dhali uni gwansan kun nyaḱki 'ko ki uni mo

34 dhali uni kun o gwo mo ki: Tapa, ka jin gana/ a'di cuki mis mo dhali a'di piki'da Simaani is mo.

35 Dhali yan'ko'd uni ki tor uni to kun miikin e bway tur mo dhali mmony-ithkina uni a'di mo mmo'ce'd maanjuthu'd mo be.

AYesus Piki Imanci A'di Gwo I/is mo

36 Dhali ki uni 'kon mo mmo/o gwo yansan mo tani Yesus ki is piti doshki'd mo mbwam uni mo dhali o uni gwo mo ki: Monjku'th is e um mo.

37 Hili uni dherkina is bwa mo mmo/ko/ is mo dhali toshki uni parkina arum e mo be.

38 Dhali a'di ki o uni gwo mo ki: Atinta murkina uma du kan mo? Dhali gwondota tinta cuki'd mo eya dum bum kan?

39 Hili me'd pem dhali sho'k pem mo ma. Aha/ ki is pem tana a'di mo be. Budhi aha/ is ki me'd mo ma dhali par e mo, haala rum diki ta gi bungwar is mo dhala sima/ mo me'd jin parkina um e mo kun taka/ mo be.

40 Dhali ki a'di oki gwo yansan mo tani a'di ki tor uni me'd piti i e mo dhali sho'k piti mo be.

41 Dhali ki uni 'kokin mo mmothis gwo 'koki gam is naskina/ mo gom monj'kuny bwa mo dhali momer mo tani a'di ki o uni gwo mo ki: Um tan gi torj kamu/ mmoshwa mmahan mo 'taa?

42 Dhali uni ki ci a'di ushi kuluny shum wa'c mo jin 'thosu mo

43 dhali a'di ki bu'th a'di mo dhali 'ka ibwambori uni mo be.

44 Dhali yan'ko'd a'di ki o uni gwo mo ki: Gwo gwansan ta gwom pem kun oka/ um mo ki aha/ dina um naskina/ mo, ka ris to gwansan kun 'kwarkunu mo gom aha/ mo e gwonkan ma Musa jin cinu mo dhali e gwo gi imanci gwo ma Arumgimis kadhamo/ mo dhali eya Masamiir mo tani minu mii thim mo be.

45 Yan'ko'd a'di ki ka'd uni adum buni e mo mmomish gwo 'ban mo gom Gwo kun 'kwarkunu mo be.

46 Dhali a'di ki o uni gwo mo ki: Wakan a'di 'kwarkunu mo ka Kristhos minu mii 'kosh is ka nyor mo dhali ka cim kwara mo tani a'di midi cu mis mo 'peni mowu mo.

47 Dhali ki gwo gom mo gi rijuwa du is mo dhali gom gwo gi minu dhal miinthus gi 'kwaniny'cesh 'pen mo tani minu mii ci ki gway piti mo e kal gi 'kwaniny'ceshi 'baar mo mmo'el 'pen 'peni Pa Urushaliim mo be.

48 Um ta iman/o gwo gom to gwansan mo be.

49 Dhali hili mo mo ma aha/ mina hash gwo jin on ma Babam pem is mo apo/ um mo be. Hili 'koyi e 'penjkuman bampa/ mo ntagi um minu shum mo ki mom'bi'th mo 'peni momis jin eka/ ek mo be.

Mmoshinkunu A'di Bway Momis mo

50 Dhali yan'ko'd a'di ki shu uni bway ka pije/ mo ntagi Pam Beetaniya mo. Dhali a'di ki 'de'k me'd piti ki mis mo dhali 'bor uni mii mo be.

51 Ki a'di di'd mmo'bor uni mii mo tani a'di ki kwa/ is piti 'peni uni mo dhali a'di bu'thkunu bway momis mo be.

52 Dhali uni lunji a'di mo mmodok ka nyan'ko'd mo e Pa Urushaliim mo ka dhan bwan 'kunya/ mo be

53 dhali uni 'kokin mo mmorash 'ko mo e gu'b gi mondheleladhelel mo mmo'bora Arumgimis bwa i is mo be.

Gwom 'Borga/ Isi ki Gwo ma YOHAAN mo

Gwo Wara'd ki Bungwar mo

¹ Ka mun'kup tani Gwo diki'd dhali Gwo di'd eya Arungimis mo dhali Gwo ta'da Arungimis mo be.

² A'di diki'd 'peni ka mun'kup nyakka Arungimis mo be.

³ Aris to 'baar mo 'kokunu mo mmo/uk ki a'di mo dhali ton tal 'den kamu/ yisa di'da jin uku ki dar gi a'di mo.

⁴ E a'di mo tani mondiki/e diki'd mo dhali mondiki/e a'di ta monkush gi 'kwani mo be.

⁵ Dhali monkush a'di 'twakki mondhurumi'd bwa mo dhali mondhurumi'd diki pi a'di e mo be.

⁶ Wathi/ diki'd jin tu'ckin ma Arungimis ki yaku/ mo, a'di jin yuku gway ka Yohaana mo be.

⁷ A'di pu'dki'd mo gom gwo mmo'or mo, mmo'or gwo mo gom monkush mo, ka ris 'kwani 'baar mo mini gam gwo is e a'di mo be.

⁸ A'di diki ta monkush ki is piti mo. Hili a'di pu'dki'd mo mmo'or gwo gom monkush mo be.

⁹ Dhali monkush gana/ a'di diki'd mmoyayu/ i 'kwaniny'cesh mo be, a'di jin ta monkush gana/ mmokusha ris 'kwaniny'ceshi 'baar mo ka 'dete/ 'dete/ mo be.

¹⁰ A'di diki'd e mony'cesh mo dhali 'kwaniny'cesh ukkunu ki a'di mo tani hili a'di 'kona 'kwaniny'cesh ki nyith mo be.

¹¹ A'di pu'dki'd e kum piti tani dhali 'kwanim piti 'koki bu'th a'di mo be.

¹² Hili aris uni 'baar mo kun bu'thki a'di kun gam gway piti is mo tani a'di ciki uni mom'bi'th mo mmowar ki uci ma Arungimis mo be.

¹³ Uni gun dhodhu 'pena bas yisa, walla 'peni bwa gi bungwar is yisa, walla 'peni bwa wathi/ yisa, hili 'peni Arungimis mo be.

¹⁴ Dhali Gwo warki'd ki bungwar mo dhali shurki ca'b mo e bwam ana mo, 'tu'du/ ka 'the dhali ki gwon gana/ mo. Ana mishkina cam piti mo, monyca gi Ya/ jin di'd tal 'de/ 'peni Com mo be.

¹⁵ (Yohaana a'di tor'ki gwo gom a'di mo dhali cuu gwo mo ki: Wathi/ yansan a'di ta jin tor'ka/ um gwo mo ki: A'di jin midu pu'du/ i'ko'di aha/ mo tani a'di icaki'd ki aha/ mo haali/ a'di diki'di t'wa/a/ ki aha/ mo be.)

¹⁶ Dhali 'pena 'tu'd piti mo tani ana 'baar bu'thki 'the mo mmomara 'the is mo be.

¹⁷ Haali/ gwonkan jin cinu mo tani a'di cikunu ka Musa mo. Hili a'the dhali gwon gana/ pu'dkin 'pena Yesus Kristhos mo be.

¹⁸ Wathin tal 'den kamu/ yisa di'da jin parki'da Arungimis e ki sule/ sule/ mo be, hili jasi Ya/m pitin tal 'de/ a'di jin diki'da bor gi com mo, a'di jin tor'ki a'di eya tente/ mo be.

Gwo jin Tor ma Yohaana jin Mii'da Mii ki Yi'de/ mo

¹⁹ Dhali yansan ta gwo jin tor ma Yohaana mo ki 'Kwani Yahuuda/ hashki igasiis mo dhali 'Kwani Lawi 'peni Pa Urushalim mo mmodot a'di gwo mo ki: Ki/e tana ajaye?

²⁰ A'di ki pi gwo mo. A'di diki ur gwo mo. Hili a'di piki gwo mo mmo/o gwo mo ki: Aha/ dinaki ta Kristhos mo be.

21 Dhali uni ki dot a'di gwo mo ki: Ba /e tana ja sa/? /E tana Iliyya 'taa? A'di ki o gwo mo ki: Aha/ tana a'di yisa. Dhali uni ki o a'di gwo mo ki: I/e tana manci gwo de? Dhali a'di ki thok uni gwo mo ki: Yisa.

22 Dhali yan'ko'd uni ki o a'di gwo mo ki: Ba ki /e tana jaye? Dhalki aman mina mii tagi gwon thok gom uni gun hashki aman mo. Ata ona /e gwo gom is pini kan mo sa/?

23 A'di ki o gwo mo ki: Aha/ tana 'twa/ wathin tal 'de/ mo mmocuu gwo mo e mombwaasho ki: Kari bway Tapa ka ji sho'k mo ma, me'd gwo jin okin ma manci gwo ma Arungimis kadhama/ mo jin yuku gway ka Ishaya mo.

24 Dhali uni hashkunu mo 'peni 'Kwani Parisiyiin mo be.

25 Dhali uni dotki a'di gwo mo ki: Katinta imiikina /e 'kwani ki yi'de/ mo wakki/ /e diki ta aKristhos mo walla Iliyya mo walla amanci gwo mo?

26 Dhala Yohaana ki thok uni gwo mo ki: Aha/ miikina mii jin miikunu ki yi'de/ mo tani hili wathi/ doshki'di bwam um mo jin molkina um mo be.

27 Isi a'diyini jin midi yayu/ i'ko'di aha/ mo, dhali wackana ppam piti mo tani aha/ dinaki ha me'd mo mmo'cu'k uni mo be.

28 Mii yansan a'di bu'thki mo mo e Pam Beetaniya mo e bwampo/ Yi'den Kumma/ Uurdun mo e mo jin miikin ma Yohaana mii ki yi'de/ mo be.

Hili ma, Ari Ka'bal ma Arungimis mo

29 Dhali ka cim jin 'ko'd mo tani a'di parki'da Yesu e mo mmoyayu/ 'kup kadhoj mo i a'di mo dhali o gwo mo ki: Hili mo mo ma, Ari Ka'bal ma Arungimis a'di jin midi kal miinthus gi 'kwaniny'cesh mo be.

30 Wathi/ yansan a'di ta a'di jin torka/ um gwo mo ki: 'Ko'di aha/ tani wathi/ midi pu'du/ mo a'di jin caki'd ki aha/ ntwa/a/ mo haali/ a'di diki'di twa/a/ ki aha/ mo be.

31 Aha/ ki is pem dinaki mish a'di mo. Hili gom mii yan mo tani aha/ pu'dkina mo mmomiiya mii jin miinu ki yi'de/ mo ki a'di minu tor eya tente/ e 'Kwani ma Israyiil mo be.

32 Dhala Yohaana torki gwo mo mmo/o gwo mo ki: Aha/ parkina Shi/in Dheleladhelel e mo mmothulu/ me'd gurko/ 'peni momis mo mmo'ca'ba po/ a'di mo be.

33 Aha/ ki is pem dinaki mish a'di mo. Hili a'di jin hashki aha/ mo mmomiiya mii jin miinu ki yi'de/ mo tani a'di o aha/ gwo mo ki: A'di jin mina /e par Shi/in e mmothulu/ mo dhali ca'ba po/ a'di mo tani a'di ta a'di yansan jin mii'da mii jin miinu ki Shi/in Dheleladhelel mo be.

34 Dhali aha/ mishkina mo mo dhali ta aman/o gwo ki a'di yansan ita Ya/ ma Arungimis mo be.

Imancik Gwo kun Twa/a/

35 Dhali ka cim jin 'ko'd mo tani aYohaana a'di doshki'd mo nyakki imancik a'di gwo isu/ mo be.

36 Dhali a'di ki para Yesu e mo me'd jin yayina a'di mo dhali o gwo mo ki: Hili mo mo ma. A'di ta Ari Ka'bal ma Arungimis mo be.

37 Dhali imancik a'di gwo su/ cikki gwo mo mmo/ona a'di gwo yansan mo dhali uni bathkina Yesu nsho'k mo be.

38 Yesu ki tuka bor mo dhali par uni e mo mmobathkina uni a'di nsho'k mo dhali o uni gwo mo ki: Atinta napa um mo? Dhali uni ki thok a'di gwo mo ki: Rabbi, (a'di jin ta 'pemen gwo jin onu ka Mantor Gwo mo) ki /e dini mana mo?

39 A'di ki thok uni gwo mo ki: Iiyu/ mo ma dhali par mo e mo. Uni pu'dkin mo dhali par mo e mo jin ca'bkina a'di mo dhali uni nyakki 'ko ki a'di ka tee caan mo haali/ atente/ ta'da tente/ idonjon mo be.

⁴⁰ Jan tal 'de/ 'peni uni su/ jin cik gwo ma Yohaán jin tora a'di mo dhali jin bath a'di nsho'k mo tani a'di ta'da Andaraawus mo, jin ta'da kam ma Simaan Buterus mo be.

⁴¹ A'di gamki'da kam piti ntwa/a/ mo jin ta'da Simaan mo dhali o a'di gwo mo ki: Aman gamkina aMasiyya (jin ta 'pemen gwo jin onu ka Kristhos mo be).

⁴² A'di suski'da kam piti eya Yesus mo dhala Yesus parki a'di e mo dhali o a'di gwo mo ki: Hayyiye /e tana Simaan jin ta ya/ ma Yohaán mo. /E minu yuk gway ka Sapa mo (a'di jin ta 'pemen gwo ka Buterus mo).

Yesus Yukki'da Pilibbus dhala Nathana/iil mo

⁴³ Dhali ka cim jin 'ko'd mo tani Yesus pu'da/ bwa ka pije/ mo mmoya Pany Jaliil mo. Dhali a'di gamki'da Pilibbus mo dhali o a'di gwo mo ki: Bathi aha/ nsho'k mo ma.

⁴⁴ Dhala Pilibbus a'di ta wathi/ gi Pam Beetsayda mo jin ta 'penkuman bampa/ ma Andaraawus dhala Buterus mo be.

⁴⁵ Dhala Pilibbus a'di gamki'da Nathana/iil mo dhali o a'di gwo mo ki: Aman gamkina wathi/ yin jin okin ma Musa mo e gwonkan jin cinu mo dhali imançi gwo ma Arungimis kadhamo/ mo, uni si'da/ 'kwarki gwo mo goma Yesus gi Pa Naasira mo, a'di jin ta Ya/ ma Yuusup mo.

⁴⁶ Dhala Nathana/iil ki thoḵ a'di gwo mo ki: A/mina tom 'boro'da kamu/ piyu/ mo 'peni Pa Naasira mowa? Pilibbus ki thoḵ a'di gwo mo ki: Yayu/ mo ma dhali par e mo.

⁴⁷ Dhala Yesus mishki'da Nathana/iil mo mmopu'du/ e a'di mo dhali o a'di gwo mo ki: Hili mo mo ma. Wathi/ 'peni 'Kwani ma Israyiil ka jin gana/ jin dar ga maḵ mo.

⁴⁸ Dhala Nathana/iil ki thoḵ a'di gwo mo ki: /E mishi aha/ kata moye? Yesus ki thoḵ a'di gwo mo ki: Ntwa/a/ ka Pilibbus diki yuk /e mo ki /e dina lampu/ mo tani aha/ parkina /e e mo be.

⁴⁹ Dhala Nathana/iil ki thoḵ a'di gwo mo ki: Rabbi, /e ta Ya/ ma Arungimis mo. /E tana Malik gi 'Kwani ma Israyiil mo be.

⁵⁰ Dhala Yesus ki thoḵ a'di gwo mo ki: Haali/ gom gwo jin oka/ /e ki aha/ parkina /e e eya lampu/ mo tani a'di igama /e gwo is mowa? /E mini par dhan to kun caaca e mo mmobol gwansan e mo.

⁵¹ Dhali a'di ki o a'di gwo mo ki: Ka jin gana/ ka jin gana/ aha/ tora /e gwo mo ki um mini par momis e mo mmodi ki kany mo, dhali iman'doyu gwo ma Arungimis mo mmoseku/ mo dhali mmothulu/ mo apo/ Ya/ gi 'Kwani mo be.

2

Momiimash e Pañ Kaana mo

¹ Dhali ka cim kwara mo tani momiimash diki'd e Pañ Kaana gi Pany Jaliil mo. Dhali KoYesus diki'd imun mo be.

² Dhala Yesus si'da/ yukkunu mo e momiimash yan mo nyaḵki imanciḵ a'di gwo mo be.

³ Ki yimana mura'th bolu ki is mo tani KoYesus pu'dki'd mo dhali o a'di gwo mo ki: Uni dar gi yimana mura'th mo be.

⁴ Dhala Yesus ki owa yim gwo mo ki: Ayy a'boma. A'di midi mii /e katinta dhali aha/ mo? Haali/ mom pem diki pu'd naskina/ mo be.

⁵ Dhali kum ki o imanmiya tu'c gwo mo ki: Miyyi a'diyin jin mina a'di itor um mo.

⁶ Dhali dhur wosh 'kokini pe'de/ mo kun caaca mo kun dhukunu mo gom 'Kwani Yahuuda/ mo mmolam to mo me'd mii gi gwonkan jin cinu mo be.

Jin tal 'de/ kalki'da jaluun bwamani iss 'de/ mo walla jaluun bwamani iss 'de/ i'ce'dka 'kume'd mo be.

⁷ Yesus ki o uni gwo mo ki: 'Tu'di dhur gwansan ki yi'de/ mo ma. Dhali uni ki 'tu'd uni ki shengolu/ ilu/ mo be.

⁸ Dhali a'di ki o uni gwo mo ki: Pashi mo ma dhali ha'bki a'di eya mancila to gi mo jin yukuwa yuk mo. Wakan uni ha'bki a'di mo be.

⁹ Dhali ka mancila to gi mo jin yukuwa yuk mo nyokki yi'de/ jin warki'd ki yimana mura'th mo tani dhali a'di diki mish mo jin ha'bkunu a'di 'peni nycine/ mo (bahili jasi imanmiiya tu'c uni mishki mo jin ha'bkunu yi'de/ 'peni cine/ mo) dhala mancila to gi mo jin yukuwa yuk gom montul 'kup mo tani a'di ki yuk wathinya'ba' mo be.

¹⁰ Dhali a'di ki o a'di gwo mo ki: Aris 'kwani 'baar mo ka 'dete/ 'dete/ ciki 'kwani yimana mura'th jin 'boro'di t'wa/a/ mo, dhali ki 'kwani pikini kap mo tani yimana mura'th jin thapathap mo ciyunu 'kwani mo be. Hili /e karki yimana mura'th gana/ mo ntagi shwanesan mo be.

¹¹ Mii yansan a'di ta miimer jin t'wa/a/ jin miikin ma Yesus e Panj Kaana gi Pany Jalil mo dhali a'di ki tor monycam piti eya tente/ mo, dhali imancik a'di gwo gamki gwo is e a'di mo be.

¹² Dhali 'ko'di mii yan mo tani a'di yaki'd ka lungu'b e Panj Kapranahuum nyakki kum mo dhali ikam piti mo dhali imancik a'di gwo mo dhali uni ki 'ko imun ka cim ka honye/ mo be.

Mmodhelel Gu'b gi Mondheleladhelel mo

¹³ Dhali Mompe'kupanyolos gi 'Kwani Yahuuda/ dishki'd mo dhala Yesus yaki'd ka gagamis e Pa Urushaliim mo be.

¹⁴ Dhali e gu'b gi mondheleladhelel mo tani a'di gamki uni gwansan kun 'kokin mo mmoyola morbip mo dhali ka'bal mo dhali gurko/ mo, dhali uni kun ta imanwan emena guurush mo eya tu'c buni mo be.

¹⁵ Dhali a'di ki to'd guluca 'ci'd mo dhali a'di ki ur uni 'baar ka pije/ mo ki ka'bal ilu/ mo dhali ka morbipi lu/ mo 'peni gu'b gi mondheleladhelel mo, dhali a'di ki wol emena guurush 'pera 'cesh mo dhali a'di ki kuma tharabeesam buni 'twa/a 'cesh mo.

¹⁶ Dhali a'di ki tor uni gwansan gwo mo, uni gun yolki gurko/ mo ki: 'Doyi to gwansan mo. Um mini 'koki mii gu'b ma Babam pem me'd gu'b gi moyol mo.

¹⁷ Imancik a'di gwo kakina gwo e mo jin 'kwarkunu mo jin o gwo mo ki: Anyor gom gu'b pini mo tani a'di miga/ shwa mo be.

¹⁸ Dhali yan'ko'd 'Kwani Yahuuda/ ki o a'di gwo mo ki: Jamas mii gi wakatinta imina /e imii mo mmotor am mmomiina /e to gwansan mo.

¹⁹ Yesus ki thok uni gwo mo ki: 'Koshi gu'b gi mondheleladhelel yansan mo dhali ka cim kwara mo tani aha/ mina 'de'k a'di imis mo be.

²⁰ Dhali 'Kwani Yahuuda/ ki o a'di gwo mo ki: Gu'b gi mondheleladhelel yansan a'di bu'thki yil issu/ i'ce'dka pe'de/ apo/ mmonyaj a'di mo dhali /e mini 'de'k a'di imis ka cim kwara mmanakan?

²¹ Hili a'di oki gwo mo gom gu'b gi mondheleladhelel jin ta bunjwar is piti mo be.

²² Dhali wakan ki a'di cuyunu mis mo 'peni mowu mo tani imancik a'di gwo kana gwo e mo jin okina a'di wakansan mo dhali uni gamki Gwo jin 'kwarkunu is mo dhali gwo jin okin ma Yesus mo be.

Yesus Mishki 'Kwani 'Baar mo

²³ Dhali ki a'di diki'd e Pa Urushaliim ka cim gi Mompe'kupanyolos jin yukuwa yuk mo tani 'kwani ka ris gamki gwo is e gway piti mo mmomishkina uni jamas miim piti kun miikina a'di mo.

²⁴ Hila Yesus ki is piti diki'd naskina/ mmowo'd uni mo

²⁵ haali/ a'di mishki'da ris 'kwani 'baar mo dhali mididi mii diki ta gi jan tal 'deŋ kamu/ mmotor a'di gwo apo/ 'kwani mo haali/ a'di ki is piti mishki to kun 'kon e bwanj 'kwani mo be.

3

Yesus dhala Nikudimus

¹ Dhali wathinj kamu/ diki'd 'peni 'Kwani Parisiyiin jin yuƙkunu gway ka Nikudimus mo a'di jin ta tapa gi 'Kwani Yahuuda/ mo be.

² Wathi/ yansan pu'dki'da Yesus mon'thiny mo dhali o a'di gwo mo ki: Rabbi, aman misha ki /e tana Manƙor Gwo jin pu'dki'd 'peni Arungimis mo. Haali/ jan tal 'deŋ kamu/ yisa di'da jin mididi mish jamas mii gwansan mii mo kun miina /e mo, hili isi ciki/ Arungimis mididi nyak di i a'di mo be.

³ Yesus ki thoƙ a'di gwo mo ki: Ka jin gana/, ka jin gana/, aha/ tora /e gwo mo ki: Isi ciki/ wakki/ jan tal 'deŋ kamu/ dinuki dho'th ki dho'th this 'peni momis mo tani a'di mididi mol se Bampa/ ma Arungimis mo be.

⁴ Nikudimus ki thoƙ a'di gwo mo ki: Ki wathi/ jin ca'd minu mish dho'th kata mo? Mina a'di mish se bwanj kum doƙ/e ki a'di minu dho'th mowa?

⁵ Yesus ki thoƙ a'di gwo mo ki: Ka jin gana/, ka jin gana/, aha/ tora /e gwo mo ki: Isi ciki/ wakki/ jan tal 'deŋ kamu/ dinuki dho'th 'peni yi'de/ dhali 'peni Shi/in mo tani a'di mididi mol ciƙ Bampa/ ma Arungimis mo be.

⁶ Caan jin dhodhu 'peni buŋgwar is mo tani ta buŋgwar is mo dhali caan jin dhodhu 'peni Shi/in mo tani a'di ta shi/in mo be.

⁷ Dhalku/ ki mer mo gom gwo jin oka/ /e mo ki: Um minu mii dho'th ki dho'th this 'peni momis mo.

⁸ 'Tham poshki'd ki bwam piti mo dhali /e ciƙki is jin gwona a'di mo, hili /e diki mish mo jin yayina a'di mo walla mo jin yakina a'di mo. A'di ta mondho'th gi wakan be jin dhodhuwa ris 'kwani 'baar mo ka 'dete/ 'dete/ kun dhodhu ki Shi/in mo be.

⁹ Dhala Nikudimus ki thoƙ a'di gwo mo ki: Yan minu mish mii kataye?

¹⁰ Dhala Yesus ki thoƙ a'di gwo mo ki: /E tana manƙor 'Kwani ma Israyiil gwo mo dhali /e din naskina/ mmodiki mish gwo yansan 'ban mowa?

¹¹ Ka jin gana/, ka jin gana/, aha/ tora /e gwo mo ki: Haali/ aman tora gwo gi to jin misha aman mo dhali tor gwo gi to jin para aman e mo. Hili um 'koki bu'th gwo jin tora aman mo be.

¹² Wakki/ aha/ tora um gwo gom to ga 'cesh mo dhali um 'koki gam gwo is mo tani ba um mini mish gwo gam is kata mo wakki/ aha/ tora um gwo gom to gi momis mo?

¹³ Wathin tal 'deŋ kamu/ yisa di'da jin seki momis mo, hili a'di jin thulki'd 'peni momis mo, a'di jin ta Ya/ gi 'Kwani mo, a'di jin diki'd e momis mo be.

¹⁴ Dhali me'd jin 'de'k ma Musa tasha/ e mombwaasho mo tani wakan si'da/ Ya/ gi 'Kwani minu mii 'de'k mo be,

¹⁵ ki a'diyin jin mididi gam a'di gwo is mo tani mididi ta gi mondiki/e ki sule/ sule/ ya ye 'ba/ mo be.

¹⁶ Haali/ Arungimis enki 'kwaniny'cesh kagahara tani a'di cikina a'di Ya/ m piti jin di'd tal 'de/ mo, ki a'diyin jin mididi gam a'di gwo is mo tani mididi 'taki diki this e mo hili mididi ta gi mondiki/e ki sule/ sule/ ya ye 'ba/ mo.

¹⁷ Haali/ Arungimis hashki Ya/m piti i mony'cesh yansan yisa mmowak 'kwaniny'cesh mo, hili ki 'kwaniny'cesh minu woƙ ki a'di mo be.

18 A'diyin jin gam a'di gwo is mo tani yisa wakuwa, hili a'diyin jin diki gam gwo is mo tani a'di wakunnu hila/ mo be haali/ a'di diki gam gway gi Ya/ ma Arungimis jin di'd tal 'de/ is mo.

19 Dhali miiwak a'dan be ki monkush pu'dki'd e 'kwaniny'cesh mo tani dhali 'kwaniny'cesh enki mondhurumi'd mo, mmodhal monkush e i is mo haali/ miim buni kun miikina uni mo tani ta thus ki thus mo be.

20 Haali/ aris uni 'baar mo kun miiki to kun ta thus ki thus mo tani shi/ki monkushi e mo dhali 'koki iiyu/ imonkush mo isi ciki/ ki miim buni minu 'taki be'd mo be.

21 Hili a'di jin botki'd mmomii gwonj gana/ mo tani a'di pu'dki'd mo e monkush mo, ki a'di minu tor eya tente/ mo ki miim piti kun miikina a'di mo tani uni wagaskin ma Arungimis mo be.

A'di Midi Mü Eka/ Ek mo, Hili Aha/ Mina Mii Wa She/ Is Kan mo be.

22 Dhali yan'ko'd ki mii yansan mo tani Yesus dhali imancik a'di gwo uni iikin e Bampa/ Yahuudiyya mo, dhali nyački ca'b ki uni imun mo dhali mmomiya mii ki yi'de/ mo be.

23 Dhala Yohaana si'da/ a'di miiki'da mii ki yi'de/ e Pa Enuun jin 'dish Pa Saliim is mo haali/ yi'de/ caaca imun mo. Dhali 'kwani pu'dkin mo dhali 'kokunu mo mmomiya mii ki yi'de/ mo be.

24 Haala Yohaana dinuki kara sijn naskina/ mo be.

25 Dhali gwo jin sugu mo cuki'd mo ibwaman imancika Yohaana gwo mo dhali Wathi/ Yahuudaŋ kamu/ mo gom mii jin miinu mmolam to mo me'd mii gi gwonkan jin cinu mo be.

26 Dhali uni pu'dkina Yohaana mo dhali o a'di gwo mo ki: Rabbi, a'di jin nyački di ki /e e bwampo/ Yi'den Kuma/ Uurdun mo tani a'di jin torkina /e gwo mo tani a'di a'dani, miiki'da mii jin miinu ki yi'de/ mo, dhali aris 'kwani 'baar mo iikini a'di mo be.

27 Yohaana ki thoŋ uni gwo mo ki: Wathin tal 'denj kamu/ yisa di'da jin midi bu'th torj kamu/ mo hili isi ciki/ a'di cikunu a'di 'peni momis mo be.

28 Um ki is bum ta iman/o gwo gom aha/ mo, gwo jin oka/ um ki aha/ dinaki ta Kristhos mo, hili aha/ hashkunu ntwa/a/ mo gom a'di mo be.

29 A'diyin jin ta gi nyaranya'a'b mo tani a'di ta wathinya'a'b mo, dhali amugu gi wathinya'a'b jin doshki'd mo dhali cik a'di 'twa/ mo tani a'di 'kunya bwa ki 'kuny kagahara mo mmocik 'twa/ gi wathinya'a'b mo. Dhali wakan si'dayi a'di 'kunya/ bwa ki 'kuny mo shwane/ jin ta bwanj 'kunyud pem mo.

30 A'di midi mii eka/ ek mo, hili aha/ mina mii wa she/ is kan mo be.

A'di jin Pu'dki'd 'Peni Momis mo

31 A'di jin pu'dki'd 'peni momis kan mo tani a'di ta ji gi di'd apo/ 'kwani 'baar mo. A'di jin yayi'd 'peni mony'cesh mo tani ta ji jin cil ma 'cesh mo dhali ki 'twany'cesh mo tani a'di ki o gwo mo. A'di jin pu'dki'd 'peni Momis mo tani a'di ta ji gi di'd apo/ 'kwani 'baar mo be.

32 A'di torji gwo gom a'di jin parkina a'di e mo dhali gwo jin cikina a'di mo, dhali wathin kamu/ yisa di'da naskina/ jin bu'thki gwo jin tora a'di mo be.

33 A'diyin jin bu'thki gwo jin tora a'di mo tani 'dapka'd ki a'di yansan mo ka Arungimis ta jin gana/ mo be.

34 Haali/ a'di jin hashkin ma Arungimis mo tani a'di torji gwo ma Arungimis mo haali/ a'di diki ci a'di Shi/in me'd jin baru to mo.

35 Haali/ a'di jin ta Com enki Ya/m piti mo dhali ciya ris to 'baar mo e me'd piti mo be.

³⁶ A'diyin jin gamki gwo is e Ya/m piti mo tani a'di ta'd gi mondiki/e ki sule/ sule/ ya ye 'ba/ mo be. A'diyin jin diki ha gwo gi Ya/ e mo tani a'di midi diki par mondiki/e e mo, hili anyor ma Arumgimis ca'bki'd apo/ a'di mo be.

4

Yesus dhala 'Bom gi Pan Saamira mo

¹ Dhali ki Tapa nyithki'd ki 'Kwani Parisiyiin cikki gwo ka Yesus diki'd mmomar imancik a'di gwo is mo dhali mmomiya mii jin miinu uni ki yi'de/ si'da/ mmobol kum ma Yohaana e mo

² (ba Yesus yisa imii uni ki yi'de/ ki is piti mo hili jasi imancik a'di gwo mo be).

³ Dhali a'di dhalki Pa Yahuudiyya 'pen mo dhali dokki'd ka nyan'ko'd e Pany Jaliil mo be.

⁴ A'di midi mii ya ki tur mo e Pan Saamira mo be.

⁵ Wakan a'di pu'dki'd e 'penkuman Bampa/ gi Pan Saamira, a'di jin yukunu gway ka Sukar mo, a'di jin 'dishki mo ma 'cesh ma Yakuub is jin cikina a'di ya/m piti ka Yuusup mo be.

⁶ Dhali jis yi'de/ ma Yakuub si'da/ diki'di mun mo be. Dhali wakan aYesus si'da/ a'di wukina is e mo gom ya jin yayina a'di nyakki imancik a'di gwo mo. Dhali a'di ca'bki'da 'cesh nshemen jis yi'de/ mo. Haali/ mo ta'da tente/ mbwan 'kup mo be.

⁷ Dhala 'bom gi Pan Saamira pu'dki'd mo mmomush yi'de/ mo. Yesus ki owa yim gwo mo ki: Ciyi aha/ mmopi mo ma.

⁸ Haali/ imancik a'di gwo mo uni iikin e 'penkuman bampa/ mo mmoyolu/ tonte/ mo be.

⁹ Dhala 'bom gi Pan Saamira ki thok a'di gwo mo ki: Ki /e jin ta Wathi/ Yahuuda/ 'tho aha/ yi'de/ ipi manakan? aha/ jin tana 'bom gi Pan Saamira mo? Haali/ 'Kwani Yahuuda/ usha gwo me'd nyakki 'Kwani Samiriyiin mo be.

¹⁰ Dhala Yesus ki thoka yim gwo mo ki: Wakki/ /e mini nyith to jin cin ma Arumgimis ki me'd mo dhali gom gwo gi a'di yansan jin o /e gwo mo ki: Ciyi aha/ yi'de/ aha/ pina mo tani /e mini 'taki dot a'di mo dhali a'di midi 'taki ci /e yi'de/ jin di ki e mo be.

¹¹ Dhala 'bom ki thok a'di gwo mo ki: Tapa, /e dar gi to mmomush yi'de/ mo dhali jis yi'de/ 'kula'kul mo ba/. Yi'de/ jin di ki e mina /e igam 'peni mana mo?

¹² A/ki /e can ka babam bam ka Yakuub 'taa? a'di jin ciki aman jis yi'de/ yansan mo? Dhali a'di ki is piti piki'd si'da/ mo 'peni jis yi'de/ yansan mo dhali iya/m piti mo dhali to/em piti mo be.

¹³ Yesus ki thoka yim gwo mo ki: Aris uni 'baar mo ka 'dete/ 'dete/ kun pi yi'de/ yansan mo tani mina yi'de/ dok/e bu'th mo be.

¹⁴ Hili a'diyin jin midi pi yi'de/ jin miga/ ci a'di mo tani mina yi'de/ diki dok/ e bu'th ki sule/ sule/ mo. Yi'de/ jin miga/ ci a'di mo tani midi war mo e a'di mmokash mo dhali mmodu'd mo ntagi mondiki/e ki sule/ sule/ ya ye 'ba/ mo be.

¹⁵ Dhala 'bom ki thok a'di gwo mo ki: Tapa, ciyi aha/ yi'de/ yansan mo ma, ki aha/ mina yi'de/ diki dok/e bu'th mo walla mmodiki yayu/ imahan mmoha'b yi'de/ mo be.

¹⁶ Yesus ki owa yim gwo mo ki: Yaku/ mo ma. Yu'ka kathim pini mo dhali yayu/ imahan mo.

17 Dhala 'bom ki thoƙ a'di gwo mo ki: Aha/ dara ga kaƙhim pem mo. Yesus ki thoƙa yim gwo mo ki: Gwom pini 'boro'd mo jin ona /e gwo mo ki: Aha/ dara ga kaƙhim pem mo be.

18 Haali/ /e 'dapkina gwath 'twa/ ka mudhe'd mo dhali a'di jin di'di /e shwane/ mo tani yisa ta'da kaƙhim piniya. Gwo yan ona /e ki oƙ gana/ mo be.

19 Dhala 'bom ki o a'di gwo mo ki: Tapa, aha/ nyiƙhina ki /e tana manci gwo ma Arungimis mo be.

20 Haali/ ibabam bam uni ilunƙin e 'kuwosh yansan mo be dhali um o gwo ki mo gi Pa Urushaliim a'di ta mo jin mina 'kwani ƙa mii ilunƙ mo ba/.

21 Yesus ki thoƙa yim gwo mo ki: A'boma, gami aha/ gwo is mo ma. Mo midi pu'du/ mo ki um mini 'koki luƙa Baba e 'kuwosh yan mo walla e Pa Urushaliim mo be.

22 Um lunƙi to jin 'kona um ki mish mo. Aman lunƙina a'di jin misha aman mo haali/ mowoth piyi'd mo 'peni 'Kwani Yahuuda/ mo be.

23 Hili, mo midi pu'du/ mo dhali a'di a'dan shwane/ mo ki uni gun lunƙina lunƙi bwanƙ gana/ mo tani mini luƙa Baba ki shi/in mo dhali ki gwonƙ gana/ mo haala Baba nƙaƙi ku gi wakansan mmolunƙ a'di mo be.

24 Arungimis ta shi/in be dhali uni gwansan kun lunƙi a'di mo tani mini mii lunƙ a'di ki shi/in dhali ki gwonƙ gana/ mo be.

25 Dhala 'bom ki thoƙ a'di gwo mo ki: Aha/ misha ka Masiyya midi pu'du/ mo (a'di jin yuku gway ka Kristhos mo tani), dhali ki a'di midi pu'du/ mo tani a'di midi tor aman aris to 'baar mo be.

26 Yesus ki thoƙa yim gwo mo ki: Aha/ jin tora /e gwo mo tani aha/ a'dan be jin tana a'di mo be.

27 Dhali yan'ko'd ki 'ta'b mo tani imanciƙ a'di gwo pu'dkin mo. Dhali uni merkin mo mmoƙorkina a'di aƙor ka 'bom mo. Hili jan tal 'deƙ kamu/ yisa ƙa'd 'twa/ mo mmo/o gwo mo ki: Atinta nƙaƙa /e mo, walla, Atinta ƙorkina /e aƙor nyakƙa yim mo?

28 Wakan a'bom dhalki dhur yi'dem piti 'pen mo dhali ya 'penƙuman bampa/ mo dhali tor 'kwani gwo mo ki:

29 Iiyu/ mo ma dhali par wathin kamu/ e mo jin ƙorki aha/ aris tom pemi 'baar mo kun miikika/ mo. Yansan diki ta Kristhos 'teya?

30 Dhali uni iikin ka piƙe/ mo 'peni bampa/ mo dhali pu'dku/ i a'di mo be.

31 Ki embul mo yan mo tani imanciƙ a'di gwo nƙaƙi a'di mo mmo/o a'di gwo mo ki: Rabbi, shwayi to mo ma.

32 Hili a'di ki thoƙ uni gwo mo ki: Aha/ takina gi tonte/ mmoshwa mo a'di jin molkina um mo be.

33 Wakan imanciƙ a'di gwo o gwo ka rem 'kup mo ki: Ki wathin kamu/ ƙalki a'di tonte/ mmoshwa mo 'taa?

34 Yesus ki thoƙ uni gwo mo ki: Tontem pem jin shwaka/ mo tani ta bwa gi a'di jin hashki aha/ mo dhali mmothima tu'c piti mo be.

35 'Kona um ki o gwo mo ki: Appe boƙa 'kupi doƙon mo naskina/ dhali yan'ko'd mo gi 'ciƙhu/ to midi pu'du/ mo. Dhali aha/ tora um gwo mo ki: 'Deƙ em bumi mis mo dhali hili mombunto mo, a'di kusha to mo mo hila/ mmo/is mo gom mo jin minu 'ciƙh a'di to mo be.

36 A'di jin 'ciƙhi to mo tani midi bu'th jin mina a'di gam mo dhali tul maman is gom mondiki/e ki sule/ mo. Wakan amanyeƙa ƙa'bany to mo dhali aman'ciƙh to mo uni 'kunykina bwa mo mmontal' de/ mo be.

37 E mii yan mo tani gwo jin onu mo gama gam ki gwonƙ gana/ mo jin o gwo mo ki: Wathin tal 'de/ ki si to mo dhali jan kamu/ ki 'ciƙh to mo be.

³⁸ Aha/ hashkina um mo mmo' cith a'di, a'di jin 'kokina um ki miia tu'c mo. Kun tiya uni miikina tu'c mo dhali um ciçkin e mo ma tu'c buni mo be.

³⁹ Kwani Samiriyiin 'peni 'perjuman bampa/ caan mo tani gamki a'di gwo is mo haali/ gom gwo jin tor ma 'bom mo mmo/o gwo mo ki: A'di torki aha/ gwo mo goma ris to 'baar mo kun miikka/ mo be.

⁴⁰ Wakan ki 'Kwani Samiriyiin pu'dkin e a'di mo tani uni dotki a'di mo mmonyak ca'b e uni mo, dhali a'di ca'bki'di mun ka cim su/ mo be.

⁴¹ Dhali uni ka ris ris gamki gwo is mo gom gwom piti mo be.

⁴² Dhali uni ki owa 'bom gwo mo ki: A'di yisa di'd mmota gwom pini jin gama aman gwo is mo yisa haali/ aman cikina gwo ki is bam mo, dhali aman misha a'di yansan ka jin gana/ a'di ita'da Manwoth gi 'kwaniny'cesh mo be.

Yesus Waçi Ya/ gi Wathi/ ma Hakuuma jin Ca'd mo

⁴³ Dhali 'ko'da cim su/ mo tani a'di yaki'd e Pany Jaliil mo be.

⁴⁴ Haala Yesus ki is piti torki gwo ka mançi gwoŋ kamu/ yisa taçu e bampam pitiŋ ganaa.

⁴⁵ Wakan ki a'di pu'dki'd e Pany Jaliil mo tani 'Kwani gi Pany Jaliil hanki a'di mo mmomishkina uniya ris to gun miikina a'di mo e Pa Urushaliim e mo ma yuk jin yuku mo haali/ uni si'da/ iikin e mo jin yukuwa yuk mo be.

⁴⁶ Wakan a'di pu'dki'd ka nyan'ko'd e Pan Kaana gi Pany Jaliil e mo jin warkina a'di yi'de/ ki yimana mura'th mo. Dhali e Pan Kapranahuum mo tani wathi/ ma malika kamu/ diki'd jin 'ba'thkina ya/m piti mo be.

⁴⁷ Ki a'di cikki gwo ka Yesus pu'dki'd 'peni Pa Yahuudiyya e Pany Jaliil mo tani a'di yaki'd mo dhali yuk a'di mo mmoyayu/ ka lunğu'b mo dhali waç ya/ m piti mo haali/ a'di 'disha 'twa/ mmowu mo be.

⁴⁸ Dhali wakan aYesus ki o a'di gwo mo ki: Isi ciki/ ki um 'koki par jama mii e mo dhali momer mo tani um mini 'koki gam gwo is mo be.

⁴⁹ Dhali wathi/ ma malik ki o a'di gwo mo ki: Tapa, yayu/ ka lunğu'b mo ma ntwa/a/ ka 'cim pem diki wu mo.

⁵⁰ Yesus ki o a'di gwo mo ki: Yaku/ mo ma. Ya/m pini midi di ki e mo. Dhali wathi/ gamki gwo is jin torkin ma Yesus a'di mo dhali a'di yaki bway pa mo be.

⁵¹ Dhali ki a'di diki'd mmoyaku/ ka lunğu'b mo tani imanmiia tu'c piti gamki a'di 'kup mo dhali tor a'di gwo mo ki: Ya/m pini a'di di'd ki e mo be.

⁵² Wakan a'di ki dot uni atente/ mo jin telkina a'di mii 'pen mo mmowaç mo. Dhali uni ki thoç a'di gwo mo ki: Katili/ ka tente/ joç is 'peni bwan 'kup mo mmota atenten 'de/ mo tani athunya/ ki dhal a'di 'pen mo be.

⁵³ Dhali com ki misha tente/ jin okin ma Yesus a'di gwo mo ki: Ya/m pini midi di ki e mo. Dhali a'di ki is piti gamki gwo is mo dhali 'kwani gi gu'b piti 'baar mo be.

⁵⁴ Dhali mii yansan a'di ta miimer kun 'kon ma po/i su/ mo jin miikin ma Yesus mo me'd jin pu'dkina a'di 'peni Pa Yahuudiyya e Pany Jaliil mo be.

5

Mowaç jin Waçu eya Al Yi'de/ mo

¹ Dhali 'ko'di mii yan mo tani ayuk jin yuku mmotul 'kup gi 'Kwani Yahuuda/ 'dishki'd mo dhala Yesus ya'd ka gagamis e Pa Urushaliim mo be.

² Dhali ara al yi'de/ diki'd e Pa Urushaliim e 'twankala goŋ ka'bal mo jin yukunu ki 'twan 'Kwani Ibraniyiin ka Beet/ hisda mo, a'di jin 'kokin ma lambalanyi mudhe'd mo be.

³ Dhali mo yansan a'di ta mo jin ishkin ma waambuhany 'kwani kun aḥa mom'bi'th mo dhali kun takina ja'da/ mo dhali kun ta ṅwol mo dhali kun kṛ'thkina is guṅkuru/ mo, mmoḡor yi'de/ mmobangal is mo,

⁴ haala man'doyu gwo gi Tapa thulki'd ki me'da tiya eya al mo dhali mmobangal yi'de/ is mo. Dhali a'diyin jin thulki yi'de/ ntwa/a/ 'ko'di yi'de/ bangalkunu is mo tani a'di waḡki'd 'peni 'ba'th yin jin 'koshki a'di mo be.

⁵ Wathin ṭal 'de/ diki'd, a'di jin 'ba'thki'd ki yil iss 'de/ i'ce'dka 'kume'd mo dhali pekwara mo.

⁶ Dhali ka Yesus parki a'di e mo mmo/isha a'di 'ko'da 'cesh ki rash rash mo tani a'di ki o a'di gwo mo ki: /E ṅapan ki /e minu waḡ mowa?

⁷ Dhali wathi/ jin 'batha'd a'di ki thoḡ a'di gwo mo ki: Tapa, aha/ dara gi wathi/ mmokar aha/ eya al mo ki yi'de/ bangalki is mo, dhali ki aha/ dina mmoya mo tani jaṅ kamu/ thulki'di ṭwa/a/ ki aha/ mo be.

⁸ Dhala Yesus ki o a'di gwo mo ki: Cuyi mis mo dhali 'deka cim pini dhali yayi mo.

⁹ Dhali ki jahanne/ wathi/ waḡkunu mo dhali a'di 'de'kki'da cim piti mo dhali ya bway pa mo be.

Dhali acim yansan a'di ta'da cim ma pesu/ mo be.

¹⁰ Dhali wakan 'Kwani Yahuuda/ ki o wathi/ jin waḡkunu gwo mo ki: A'di ta'da cim ma pesu/ mo. A'di diki ta mii jin dhala gwoṅkan /e bway mo mmokala cim pini mo be.

¹¹ Hili a'di ki thoḡ uni gwo mo ki: Wathi/ jin waḡki aha/ mo tani a'di ki o aha/ gwo mo ki: 'Deki acim pini mo ma dhali yayi mo.

¹² Dhali uni ki thoḡ a'di gwo mo ki: Ki wathi/ jana i/o/e gwo kan mo? mmo/ o gwo mo ki: 'Deki acim pini dhali yayi mo?

¹³ Dhali wathi/ jin waḡkunu mo tani a'di diki mish wathi/ mo haala Yesus borki is piti mo haala dhana waambuhany 'kwani caaca mo e mo ḡaan mo be.

¹⁴ Dhali yan'ko'd Yesus ki gam a'di e gu'b gi mondheleladhelel mo dhali o a'di gwo mo ki: Hili mo mo ma. /E 'borkina is mo. Dhalku/ miinthusu kamu/ ki mii mii doḡ/e mo jin mina jin kamu/ jin shi/ashi/ mmobol yansan e mo diki 'kosh /e mo.

¹⁵ Dhali wathi/ yaki'd mo dhali ṭor 'Kwani Yahuuda/ gwo mo ka Yesus a'di iwaḡki a'di mo be.

¹⁶ Dhali gom mii yan kan mo tani a'di ṭoca 'Kwani Yahuuda/ aYesus 'kus mo haali/ a'di miiki mii yansan ka cim ma pesu/ mo be.

¹⁷ Hila Yesus thoḡ uni gwo mo ki: Ababam pem di'd naskina/ mmomiya ṭu'c mo. Dhali aha/ si'da/ dina mmomiya ṭu'c mo.

¹⁸ Dhali gom gwo yan kan mo tani 'Kwani Yahuuda/ 'baar mo ṅapkina ṅap mo ka dun dara'd mo mmo'kosh a'di mo haali/ a'di ilu/ yisa 'ce'dki jasa cim ma pesu/ yisa, hili si'da/ a'di yukki'da Arungimis ki Com mo mmokar is piti mmonyaka nyak ka Arungimis mo be.

Moshirr gom Ya/ mo

¹⁹ Dhali Yesus ki thoḡ uni gwo mo ki: Ka jin gana/ ka jin gana/ aha/ ṭora um gwo mo ki: Ya/ moli ṭor kamu/ mii ki bwam piti mo hili jasi a'di jin parkina a'di Com e mo mmomi mo. Haali/ to yin jin miikina a'di mo tani wakan si'da/ Ya/ a'di miiki uni mo be.

²⁰ Haali/ Ababa a'di enki Ya/m piti mo dhali ṭor a'di aris to 'baar mo a'di jin miikina a'di ki is piti mo. Dhali adhan mii kun can kun boli gwansan e mo tani mina a'di iṭor a'di i e mo ki um mini mer mo be.

21 Haali/ me'd jin 'de'kkin ma Baba uni kun wukin mo dhali ci uni moŋ'koki/e mo tani wakan si'da/ Ya/ ciki uni moŋ'koki/e mo uni gun ona bwa a'di mo be.

22 Dhala Baba diki dwall jan tal 'denj kamu/ gwo mo, hili aris gwon dwalli 'baar mo tani cikina a'di Ya/ mo be ka ris 'kwani 'baar mo mini tak Ya/ mo,

23 ma me'dyin si'da/ takkina uniya Baba mo. A'di jin diki tak Ya/ mo tani diki taka Baba mo a'di jin hashki a'di mo be.

24 Ka jin gana/, ka jin gana/ aha/ ona um gwo mo ki: A'diyin jin cikki gwom pem mo dhali gam a'di is mo a'di jin hashki aha/ mo tani a'di ita'd gi mondiki/ e ki sule/ sule/ ya ye 'ba/ mo be. A'di midi diki yayu/ e miiwak gi gwon dwall mo hili a'di 'cihki'd mo 'peni mowu mo ntagi moŋ'koki/e ki sule/ sule/ ya ye 'ba/ mo be.

25 Ka jin gana/, ka jin gana/ aha/ tora um gwo mo ki: Mo midi pu'du/ mo dhali a'di diki'd shwane/ mo, ki uni kun wukin mo mini cik 'twa/ gi Ya/ ma Arumgimis mo, dhali uni gwansan kun cikkin mo tani mini 'ko ki e mo be.

26 Haali/ me'd jin tan ma Baba gi mondiki/e e is piti mo tani wakan si'da/ a'di ciki a'di Ya/m piti mo mmota gi mondiki/e e is piti mo be.

27 Dhali a'di ciki a'di moshirri 'baar mo mmotor mii 'twa/a 'cesh gi gwon dwall mo haali/ a'di ta Ya/ gi 'Kwani mo be.

28 Dhalku/ ki mer gom gwo yansan mo haali/ mo midi pu'du/ mo ka ris 'kwani 'baar mo kun 'kokin mo e jis jwa mo tani mini cik 'twam piti mo be

29 dhali uni mini piyu/ ka pije/ mo uni gwansan kun miiki miim 'boron mo e mo jin pinu e moŋ'koki/e mo dhali uni gwansan kun miiki tonthus mo tani uni mini piyu/ e momiiwak mo be.

Iman/o Gwo goma Yesus mo

30 Aha/ mola toŋ kamu/ mii ki moshirr pem mo. Me'd gwo jin cikika/ mo tani aha/ ki dwall gwo mo. Dhali gwon dwall pem kun dwallka/ mo tani ta kuj kar/e mo haali/ aha/ dinaki nɔpi mmomii ki bwam pem mo, hili jasi ki bwa gi a'di jin hashki aha/ mo be.

31 Wakki/ aha/ ona gwo gom is pem mo tani gwo jin tora/ gom is pem mo tani diki ta jin gana/ mo be.

32 Jamu/ diki'd jin ta'da man/o gwo gom aha/ mo dhali aha/ misha ki gwo jin tora a'di mo gom aha/ mo tani ta gwoŋ gana/ mo be.

33 Um hashki 'kwani eya Yohaana mo dhali a'di ta'da man/o gwo mo gom gwoŋ gana/ mo be.

34 Hili aha/ dinaki bu'th gwo jin toru 'peni 'kwani mo, hili aha/ ona gwo yansan ki um minu woŋ mo be.

35 A'di ta o'd jin shwaki'd mo dhala lamba/ jin 'twakki mo mo, dhali um okina bwa mo mmo'kuny bwa mo mmo'ko ari'ceenne/ mo e moŋkush piti mo be.

36 Hili gwo jin okunu mo gom aha/ mo a'di ica'd mo mmobol gwo ma Yohaana e mo. Haali/ atu'c jin cikin ma Baba aha/ mo mmothim a'di mo, atu'c gwansan gana/ kun dika/ mmomii mo tani uni ta iman/o gwo gom aha/ mo ka Baba a'di hashki aha/ mo be.

37 Dhali Ababa a'di jin hashki aha/ mo tani a'di ki is piti ta'da man/o gwo gom aha/ mo. 'Twam piti 'kona um ki cik ki sule/ sule/ mo dhali ayir/em piti 'kona um ki par e ki sule/ sule/ mo be.

38 Dhali um 'kon kan ki dar gi gwom piti mmodi e um mo haali/ um 'koki gam a'di gwo is mo a'di jin hashkina a'di mo be.

39 Um nɔpkin ki burbur e bwan Gwo ma Arumgimis kun 'kwarkunu mo haali/ um toshkin ki um ta gi moŋ'koki/e ki sule/ sule/ ya ye 'ba/ mo e uni mo. Dhali uni itana man/o gwo gom aha/ mo be.

⁴⁰ Dhali um 'kokin mo mmo/ush ki 'tash mo mmo/iiyu/ i aha/ mo ki um mini ta gi mon'koki/e mo.

⁴¹ Aha/ dinaki bu'th monyca 'peni 'kwani mo.

⁴² Hili aha/ misha ki mo/en jin mina umi 'taki ena Arungimis mo tani piyi'd e um mo be.

⁴³ Aha/ pu'dkina ki gway ma Babam pem mo dhali um 'koki bu'th aha/ mo. Waḳki/ jan tal 'deḳ kamu/ midī 'taki pu'du/ ki gway piti mo tani a'di imina umi se 'twa/ apo/ mo mmobu'th mo be.

⁴⁴ Ba gwo mina umi mish gam is kata mo? um kun buthi monyca ka rem 'kup mo dhali 'koki ḡap monyca jin pu'dki'd 'peni Arungimis jin di'd tal 'de/ mo?

⁴⁵ Dhalku/ ki tosh ki aha/ mina yer um is ki gway eya Ababa mo. A'di ta'da Musa jin midī yer um is ki gway mo a'di jin karkina um ka 'teḡ kapem bum mo be.

⁴⁶ Waḳki/ um mini 'taki gama Musa gwo is mo tani um si'da/ mini 'taki gam aha/ gwo is mo haali/ a'di 'kwarki gwo gom aha/ mo be.

⁴⁷ Hili waḳki/ um 'koki gam gwo jin 'kwarkina a'di is mo tani ba um mini mish gwom pem gam is kata moye?

6

'Kwani kun Ćinu Tonte/ kun Tana Alaapi Mudhe'd mo

¹ Dhali 'ko'di miḡ yansan mo tani Yesuḡ yaki'd mo mmo'ciḡha/ gap ma Al ma Jaliil mo a'di jin ta'da Al ma Thabariyya mo be.

² Dhala waambuhany 'kwani baḡki a'di nsho'k mo haali/ uni mishki miimer kun miikina a'di gom uni gwansan kun 'koshkina 'ba'th mo be.

³ Dhala Yesuḡ a'di yaki'd e 'kuwosh mo dhali a'di ki ḡa'ba 'cesh nyakki imancik a'di gwo mo be.

⁴ Dhali Mompe'kupanyolos jin yuḡuwa yuḡ gi 'Kwani Yahuuda/ 'dishki'd mo be.

⁵ Dhali yan'ko'd mmo'deka a'di em piti ki mis mo dhali mmomisha a'diya waambuhany 'kwani mmopu'du/ i a'di mo tani Yesuḡ ki owa Pilibbus gwo mo ki: 'Peni mana imina ana iyol maa mo jin mina 'kwani gwansan wakan i'taki shwa mo?

⁶ Gwo yansan okina a'di mo mmopal a'di mo haali/ a'di mishki'd ki is piti gom to jin mina a'di 'taki miḡ mo be.

⁷ Pilibbus ki thoḡ a'di gwo mo ki: Ariyaal iss* 'kwanimpa ipe'de/ midī 'taki diki yol maanḡkuthu'd mmo'kosh jwa mo gom uni 'baar mo ka 'dete/ 'dete/ mmo'ceth bwa ime'd ki gwa'd gwa'd mo.

⁸ Jan tal 'deḡ kamu/ 'peni imancik a'di gwo jin yukunu gway ka Andaraawus mo jin ta'da kam ma Simaan Buterus mo o a'di gwo mo ki:

⁹ A'ciḡ kamu/ di'di mahan jin ta'd gi maanḡkuthu'di mudhe'd 'peni emen posa kamu/ mo dhali to yi'de/ isu/ mo. Hili uni gwansan minu miḡya tinta libwaman 'kwani ka ris kun wakan mo?

¹⁰ Yesuḡ ki o gwo mo ki: Tuci 'kwani mmo'ko 'pena 'cesh mo. Dhali asho 'bina e ki 'bi mo. Wakan 'kwaniḡ gwas uni 'kokina 'cesh mo dhali mondeḡ jin denḡunu uni e mo tani wana e ka alaapi mudhe'd mo be.

¹¹ Yan'ko'd Yesuḡ ki bu'th maanḡkuthu'd mo dhali ki a'di 'bor'ki'da 'bor bwa i is mo tani a'di ki ḡiki uni gwansan kun 'kokina 'cesh mo. Dhali to yi'de/ si'da/ miḡkunu wakansan mo me'd jin ḡapkina uni a'di mo be.

* 6:7 miyya wa ishriin

12 Dhali ki shwam buni jin shwakina uni a'di ikap mo tani a'di ki tor imancik a'di gwo gwo mo ki: Tuli kuluny maa kun uru 'kup is mo ki jan tal 'derj kamu/ minu 'taki diki this e mo be.

13 Wakan uni tulki uni is mo dhali 'tu'dkina nura/ ka 'kume'd i'ce'dka su/ ki kuluny maa 'peni maanj_kuthu'di mudhe'd 'peni emen posa kamu/ mo, kun dhalkina uni gwansan kun shwakin mo be.

14 Dhali ki 'kwani parki miimer e mo jin miikina a'di mo tani uni o gwo mo ki: Wathi/ yansan ka jin gana/ ta'da manci gwo mo a'di jin midi yayu/ i mony'cesh mo be.

15 Dhali yan'ko'd mmonyith_kina a'di uni mo ki uni muruni iiyu/ mo dhali bu'th a'di ki 'bi'th mo mmokar a'di ka malik mo tani Yesus yaki'd mo dok/e e 'kuwosh mo a'di 'de/ mo be.

Yesus Yaki'd ki Sho'k e 'Kupa Al mo

16 Ki mom'pimpili/ pu'dki'd mo tani imancik a'di gwo uni iikin ka lungu'b eya al mo,

17 mmosekina uni e bwam ma kur mo dhali mmotel ii 'pen mo mmo'citha/ gap ma al e Pan Kapranahuum mo. Dhali mo dhuruma/ dhurum mo be dhala Yesus diki yayu/ i uni naskina/ mo be.

18 Dhali yi'de/ birki bakal mo haali/ 'tham poshki'd kagahara mo be.

19 Dhali ki uni 'koshki cwa is me'd natgini kwara mo walla idonon mo tani uni parkina Yesus e mo mmoya ki sho'k e 'kupa al mo dhali a'di 'dishki'da kur is mo be. Dhali uni ko/kina ko/ is kagahara mo.

20 Hili a'di ki o uni gwo mo ki: Aha/ a'dan be. Dhalku/ is ki ko/ mo ma.

21 Dhali yan'ko'd uni 'kunykina bwa mo dhali bu'th a'di e bwam ma kur mo, dhali ki jahanne/ akur a'di pu'dki'd e mo jin 'kokina uni mmo/ii mo be.

'Kwani Napkina Yesus mo

22 Dhali ka cim jin 'ko'd mo tani 'kwani kun 'kokina 'bana gapa kamu/ mo tani mishki mo mo ka kur diki'd jasi tal 'de/ imun mo, dhala Yesus diki se akur mo nyakki imancik a'di gwo mo, hili imancik a'di gwo uni iikin uni 'cena mo be.

23 Bahili jasa kur 'peni Pan Thabariyya mo tani pu'dkin mo mmo'dish mo is mo e mo jin shwakina uni maanj_kuthu'd mo 'ko'di Tapa 'borki'da Arumgimis bwa i is mo be.

24 Wakan ki 'kwani mishkin ka Yesus diki di imun mo tani walla imancik a'di gwo mo tani uni ki is buni seki bwam ma kur mo dhali ii e Pan Kapranahuum mo mmonjapa Yesus mo be.

Yesus Ta Maa gi Mondiki/e ki Sule/ mo

25 Dhali ki uni gamki a'di e 'bana gapa ala kamu/ mo tani uni ki o a'di gwo mo ki: Rabbi, /e yayini mahan kakasja mo?

26 Dhala Yesus ki thok uni gwo mo ki: Ka jin gana/, ka jin gana/ aha/ tora um gwo mo ki: Um napi aha/, yisa mmoparkina um miimer e mo yisa, hili mmoshwakina um maanj_kuthu'd ikap mo be.

27 Dhalku/ ki miya tu'c gom tonte/ mo jin midi 'ce'd sho'k mo hili gom tonte/ jin midi 'dim 'kup ntagi mon'koki/e ki sule/ sule/ ya ye 'ba/ mo, a'di jin mina Ya/ gi 'Kwani ici um mo. Haali/ e a'di mo tani Arumgimis jin ta Com mo a'di 'dapki gwom piti 'twa/ ki a'di mo be.

28 Dhali yan'ko'd uni ki o a'di gwo mo ki: Aman mina mii miya ta mo mmomii mii ma tu'c ma Arumgimis mo?

29 Yesus ki thok uni gwo mo ki: Mii yaase a'di ta mii jin minu mii goma Arungimis mo ba/ ki um mini gam a'di gwo is mo, a'di jin hashkina a'di ki yayu/ mo be.

30 Wakan uni ki o a'di gwo mo ki: Ki miimer wakata imina /e imii mo jin mina aman i'taki par e mo dhali gam /e gwo is mo? Mii gi wakata imiikina /e mo?

31 Ibabam bam shwakina manna mo e mombwaasho mo me'd Gwo ma Arungimis jin 'kwarkunu mo jin o ki: A'di ciki uni maan gana/ 'peni momis mmoshwa mo be.

32 Dhali yan'ko'd Yesus ki o uni gwo mo ki: Ka jin gana/, ka jin gana/ aha/ tora um gwo mo ki: AMusa, yisa a'di iciki um maa yan 'peni momis yisa. Ababam pem a'di ciki um maan gana/ yan 'peni momis mo be.

33 Haali/ maa ma Arungimis a'di ta a'di jin pu'dki'da 'cesh 'peni momis mo dhali ci mondiki/e e 'kwaniny'cesh mo.

34 Uni ki o a'di gwo mo ki: Tapa, ci am maa yansan isa yempa/ mo ma.

35 Yesus ki o uni gwo mo ki: Aha/ tana maa gi mondiki/e mo be. A'diyin jin yayi'di aha/ mo tani mina te/ diki bu'th mo, dhali a'di jin gam aha/ gwo is mo tani mina yi'de/ diki bu'th ki sule/ mo be.

36 Hili aha/ tora um gwo mo ki: Um parki aha/ e mo tani dhali um 'koki gam aha/ gwo is naskina/ mo be.

37 Aris uni 'baar mo kun cikin ma Baba aha/ mo tani uni mini iiyu/ i aha/ mo, dhali a'di jin midi yayu/ i aha/ mo tani aha/ mina diki ur a'di ka piye/ mo be.

38 Haali/ aha/ pu'dkina i mony'cesh yansan 'peni momis mo, yisa mmomii ki bwam pem yisa, hili ki bwa gi a'di jin hashki aha/ mo be.

39 Dhali a'di yansan ita bwam piti jin hashki aha/ mo, ki aha/ mina diki this jan tal 'denj kamu/ e mo 'pena ris uni gwansan kun cikina a'di aha/ mo, hili aha/ mina 'de'k uni ka cim jin 'ko'd mo be.

40 Haali/ a'di yansan ita bwa ma Babam pem mo, ki aris 'kwani 'baar mo ka 'dete/ 'dete/ kun parki Ya/ e mo dhali gam gwo is e a'di mo tani mini 'taki ta gi monj'koki/e ki sule/ sule/ ya ye 'ba/ mo. Dhali aha/ mina 'de'k uni ka cim jin 'ko'd mo be.

41 Dhali yan'ko'd 'Kwani Yahuuda/ uni miikina gungum apo/ a'di mo haali/ a'di oki gwo mo ki: Aha/ tana maa jin thulki'd 'peni momis mo be.

42 Uni o gwo mo ki: Wathi/ yan diki ta aYesus mo? a'di jin ta Ya/ ma Yuusup mo. 'Kona ana ki mish com dhali kum mowa? Ba ata ona a'di gwo mo shwane/ ki: Aha/ thulkina 'peni momis mo?

43 Yesus ki thok uni gwo mo ki: Dhalka gungum ki mii e bwam um um 'cena kan mo.

44 Wathin tal 'denj kamu/ yisa di'da jin midi yayu/ i aha/ isi ciki/ Ababa jin hashki aha/, a'di dirki a'di mo. Dhali aha/ mina 'de'k a'di ka cim jin 'ko'd mo be.

45 A'di ta gwo jin 'kwarkina imançi gwo ma Arungimis kadhamo/ mo ki: Dhali uni 'baar mo min ma Arungimisi tor mo. Ki aris uni 'baar mo ka 'dete/ 'dete/ kun mini cik gwo mo dhali da/ar 'pena Baba mo tani uni mini i/iyyu/ i aha/ mo be.

46 Wathin tal 'denj kamu/ yisa di'da jin parki'da Baba e mo, hili isi ciki/ jasi a'di jin ta ji 'peni Arungimis mo, a'di mishki'da Baba mo be.

47 Ka jin gana/, ka jin gana/ aha/ tora um gwo mo ki: A'diyin jin gamki gwo is mo tani ta'd gi mondiki/e ki sule/ sule/ ya ye 'ba mo be.

48 Aha/ tana maa gi mondiki/e mo be.

49 Ibabam bum shwakina manna e mombwaasho mo dhali uni wukin mo be.

50 A'di yansan ta maa jin thulki'd 'peni momis mo jin mina wathi/ 'taki shwa mo tani dhali a'di midi diki wu mo be.

51 Aha/ tana maa jin di'd ki e jin thulki'da 'cesh 'peni momis mo. Wakki/ wathin tal 'deŋ kamu/ jin midi shwa maa yansan mo tani a'di midi di ki e ki sule/ sule/ mo. Dhali maa jin miga/ ci gom moŋ'koki/e gi 'kwaniny'cesh mo tani a'di ta buŋwar is pem mo be.

52 Dhali yan 'ko'd 'Kwani Yahuuda/ uni su'kkin ki gwo e bwaman cem buni mo mmo/o gwo mo ki: Ki wathi/ yansan midi ci ana buŋwar is piti mmo'ka manakan?

53 Dhali wakan aYesus ki o uni gwo mo ki: Ka jin gana/ ka jin gana/ aha/ tora um gwo mo ki: Isi ciki/ wakki/ um 'koki 'ka shuman is gi Ya/ gi 'Kwani mo dhali pi abas piti mo tani um mini 'koki ta gi moŋ'koki/e e is bum mo be.

54 A'diyin jin 'ka buŋwar is pem mo dhali piya bas pem mo tani a'di ta'd gi mondiki/e ki sule/ sule/ ya ye 'ba/ mo dhali aha/ mina 'de'k a'di ka cim jin 'ko'd mo be.

55 Haali/ buŋwar is pem a'di ta tonŋeŋ gana/ mo be dhali abas pem a'di ta to jin minu pi jin ta jin gana/ mo be.

56 A'diyin jin 'ka buŋwar is pem mo dhali piya bas pem mo tani a'di nyakki ca'b e aha/ mo dhali aha/ e a'di mo be.

57 Dhali me'da Babam pem jin di'd ki e mo dhali hash aha/ mo tani dhali aha/ dina ki e mo goma Baba mo, wakan a'diyin jin midi 'ka aha/ mo tani midi di ki e mo gom aha/ mo be.

58 Yansan ta maa jin thulki'da 'cesh 'peni momis mo, yisa waki jin shwakina icim dhali wu mowa. A'di jin midi shwa maa yansan mo tani midi di ki e ki sule/ sule/ ya ye 'ba/ mo be.

59 Gwo yansan okina a'di e gu'b gi montul is buni mo me'd jin torkina a'di uni gwo mo e Paŋ Kapranahuum mo be.

Gwo gi Mondiki/e ki Sule/ Ya Ye 'Ba/ mo

60 Imancik a'di gwo ka ris ki uni cikki gwo yansan mo tani uni o gwo mo ki: Gwo yansan 'bitha'bi'th mo be. Aja a'di imidi mish a'di cik mo?

61 Hila Yesus a'di nyithki'd ki is piti mo ki imancik a'di gwo miiki'da gungum mo isi gom gwo yan mo tani dhali o uni gwo mo ki: Um si'da/ kolkunu mo gom gwo yansan mo de?

62 Wakki/ wakan mo tani gwo midi wakataye wakki/ um ki par Ya/ gi 'Kwani e mmoseku/ e mo jin dina a'di 'thissa/ mo?

63 A'di ta shi/in jin ci moŋ'koki/e mo. Buŋwar is a'di aŋha/aŋ mo. Gwo jin torka/ um mo tani uni ta shi/in dhali moŋ'koki/e mo be.

64 Hili unin tiya 'kokini bwam um mo kun 'koki gam gwo is mo. Haala Yesus mishki'd 'peni ka mun'kup ntwa/a/ mo uni gwansan kun mini 'koki gam gwo is mo dhali a'diyin jin midi 'taki 'cith a'di is ki gwo mo be.

65 Dhali a'di ki o gwo mo ki: Gom gwo gi wakan mo tani a'di itorka/ um gwo mo ki jan tal 'deŋ kamu/ midi moli yayu/ i aha/ mo, hili isi ciki/ a'di imin ma Babam pemi ci a'di mo be.

66 'Ko'di mii yansan mo tani imancik a'di gwo ka ris yeki gwo is mo dhali 'koki nyak ii ki a'di mo be.

67 Yesus ki o uni gun 'koni 'kume'd i'ce'dka su/ gwo mo ki: I/um si'da/ mini ii mo 'taa?

68 Simaan Buterus ki thok a'di gwo mo ki: Tapa, ki am mina ii aja mo? Ki /e a'di ita gi gwo gi mondiki/e ki sule/ sule/ ya ye 'ba/ mo.

⁶⁹ Dhali aman gamkina gwo is mo dhali shorkina is mo dhali mish mo mo ki /e ta jan tal 'de/ jin kogu mo 'peni Arumgimis mo be.

⁷⁰ Dhala Yesus ki thoꝝ uni gwo mo ki: Dika/ ki kwany umi 'kume'd i'ce'dka su/ mo dhali jan tal 'denj kamu/ 'peni bwam um mo tani ta tapa ma ruma 'cesh mowa?

⁷¹ A'di oki gwo kan goma Yahuusa jin ta ya/ ma Simaan Iskariyuuti, haali/ a'di ta jan tal 'de/ 'peni uninj 'kume'd i'ce'dka su/ mo jin midu 'ciḥ a'di is ki gwo mo.

7

Ikam ma Yesus Daran gi Gwoḅ Gam Is mo

¹ 'Ko'di mii yan mo tani Yesus yaki'd e Pany Jaliil mo. A'di ushki ya Pa Yahuudiyya mo haali/ 'Kwani Yahuuda/ uni ḅapki a'di mmo'kosh jwa mo be.

² Dhali ayuk gi 'Kwani Yahuuda/ jin yukuwa yuk mo gom Gu'b Cija/ mo tani 'dishki'd mo be.

³ Wakan ikam piti o a'di gwo mo ki: Dhali mo yan mo dhali yayi e Pa Yahuudiyya mo ki imancik /e gwo mini 'taki par miim pini e jin miikina /e mo.

⁴ Haali/ wathin kamu/ yisa di'da jin miiki'da tu'c ka 'di/ mo wakki/ a'di ona bwa ki miim piti minu mish eya tente/ mo. Wakki/ /e mii to gwansan mo tani tori is pini eya tente/ e 'kwaniny'cesh mo.

⁵ Haali/ ikam piti si'dayi 'koki gam a'di gwo is mo be.

⁶ Dhala Yesus ki o uni gwo mo ki: Mom pem diki pu'd naskina/ mo be, hili mom bum uni 'kokin isa yempa/ mo.

⁷ 'Kwaniny'cesh 'koki shi/ umi e mo, hili uni shi/ki aha/ i e mo haali/ aha/ torina uni gwo ki miim buni kun miikina uni mo tani ta thus ki thus mo be.

⁸ Iiku/ um mo ma eya yuk jin yuku ka tul 'kup ki is bum mo. Aha/ mina diki ya eya yuk jin yuku mo haali/ mom pem diki pu'd mo mmothim mo naskina/ mo.

⁹ Gom gwo jin ona a'di kan mo tani a'di ca'bki'd e Pany Jaliil mo be.

Yesus Diki'd e Mo ma Yuk gi Gu'b Cija/ gi 'Kwani Yahuuda/ mo

¹⁰ Hili ḅ'ko'd ki ikam piti iikin ka gagamis e mo ma yuk jin yuku mo tani yan'ko'd a'di si'da/ yaki'd ka gagamis mo, yisa ya'd eya tente/ yisa, hili ka kwal is mo be.

¹¹ Dhali 'Kwani Yahuuda/ 'kokin mo mmonap a'di ka cim jin yukuwa yuk mo dhali o gwo mo ki: Mane a'di sa/?

¹² Dhala dhana gumgum miikin ma waambuhany 'kwani mo gom a'di mo. Kun tiya o gwo mo ki: A'di ta wathi/ jin 'boro'd mo be. Dhali kun tiya o gwo mo ki: Yisa. A'di suski 'kwani mmodheres mo be.

¹³ Bahili gom 'Kwani Yahuuda/ mo tani wathin tal 'denj kamu/ yisa di'da jin oki gwo eya tente/ gom a'di mo be.

¹⁴ Dhali ibwaman ma yuk jin yuku mo tani Yesus yaki'd ka gagamis mo e gu'b gi mondheleladhelel mo dhali tor gwo mo be.

¹⁵ Dhali 'Kwani Yahuuda/ merkin mo gom gwom piti mo dhali o gwo mo ki: Ki wathi/ yansan mishki gwo 'peni mana kan mo ki a'di diki di mo naskina/ mmomish gwo denj e mo?

¹⁶ Wakan aYesus ki thoꝝ uni gwo mo ki: Gwom pem jin torika/ mo tani diki ta jim pem mo, hili ta ji gi a'di jin hashki aha/ mo be.

¹⁷ Wakki/ wathin kamu/ ona bwa ki mii bwam piti mo tani a'di midu mish mo mo wakki/ gwo jin toru ta jim ma Arumgimis mo walla wakki/ aha/ tora gwo ki moshirr pem gana/ mo be.

18 A'diyin jin oki gwo ki moshirr pitin̄ gana/ mo tani a'di n̄apki monyca ki is piti mo. Hili a'diyin jin n̄apki monyca gi a'di jin hashki a'di mo tani ta jin gana/ mo dhali mii kun 'koki ta kun̄ kar/e yisa 'kona e a'di mo be.

19 Din ma Musa ki ci um gwon̄kan jin cinu mowa? Dhali jan tal 'den̄ kamu/ 'peni um yisa di'da jin dhuki gwon̄kan jin cinu mo. Ata in̄apkina um aha/ mmo'kosh mo?

20 Dhali 'kwani ki thok̄ a'di gwo mo ki: /E tan ga ruma 'cesh mo. Aja in̄apki /e mmo'kosh jwa mo?

21 Yesus ki thok̄ uni gwo mo ki: Aha/ miikina jasi ton tal 'de/ mo dhali umi 'baar mo merkin mo gom a'di mo be.

22 AMusayi iciki um gwo mo gom mo jin minu 'citha/ munyjal yis mo (dhali a'di yisa jasi 'pena Musa, hili 'peni ibabam bum mo) dhali um ki 'cith̄ wathin̄ gwath̄a munyjal yis piti ka cim ma pesu/ mo be.

23 Wak̄ki/ ka cim ma pesu/ wathin̄ gwath̄ ki bu'th mo jin 'cith̄uwa munyjal yis mo tani wakan gwon̄kan jin cin ma Musa mo tani minu 'koki 'taki 'ce'd mo. A/um mii aha/ ka nyor mmowaçka/ bun̄gwar is gi wathi/ ka 'bimpil mmo'bor mo ka cim ma pesu/ mowa?

24 Dhalku/ gwo ki dwall eya por ma pije/ kan mo, hili dwalli gwo ki dwall gana/ ka kar/e mo.

Yansan Ta'da Kristhos mowa?

25 'Kwanin tiya 'peni Pa Urushaliim oki gwo wakan mo ki: Ki a'di diki ta wathi/ a'dana jin n̄apkina umi mmo'kosh mowa?

26 Dhali a'di di'di mahan shwane/ mmotor gwo eya tente/ mo dhali uni 'koki o gwon̄ kamu/ e a'di mo. A/mina uni gwansan kun ta gi moshirr imish ki a'di yansan ta'da Kristhos 'te/sana?

27 Bahili aman mishkina mo jin yayina wathi/ yansan 'peni cine/ mo dhali ka Kristhos minu piyu/ 'kwani i is mo tani wathin tal 'den̄ kamu/ yisa di'da jin mid̄i mish mo jin yayina a'di 'peni cine/ mo be.

28 Wakan Yesus ki tor uni gwo mo eya tente/ mo me'd jin tor̄kina a'di gwo e gu'b gi mondheleladhelel mo mmo/o gwo mo ki: Um mish̄i aha/ mo dhali mo jin yayika/ 'peni cineyi? Hili aha/ dinaki yayu/ ki bwam pem mo. A'di jin hashki aha/ mo tani ta a'din̄ gana mo, dhali a'di tani 'kona um ki mish mo be.

29 Aha/ misha a'di mo haali/ aha/ yayina 'peni a'di mo dhali a'diyi ihashki aha/ mo be.

30 Wakan umi n̄apki bway mo mmobu'th a'di mo, hili wathin tal 'den̄ kamu/ diki kar me'd piti apo/ a'di mo haali/ mom piti diki pu'd naskina/ mo be.

31 Dhali hili 'kwani ka ris gamki a'di gwo is mo dhali uni o gwo mo ki: A/ ki me'd jin minu piya Kristhos 'kwani i is mo tani a/mina a'di mii miimer ki nyanye/ mmobol ku gi miina wathi/ yansan e mowa?

Iboliish Hashkunu mo Mmobudha Yesus mo

32 Dhali 'Kwani Parisiyiin cik̄kina waambuhany 'kwani mmomiikina uni agum̄um kan mo gom a'di mo, dhali igasis kun can mo dhali 'Kwani Parisiyiin hashka iboliish mo mmobu'th a'di mo be.

33 Dhali yan'ko'd Yesus ki o uni gwo mo ki: Aha/ mina di e um ari'ceenne/ mo dhali yan'ko'd aha/ mina ya e a'di jin hashki aha/ mo be.

34 Um mini n̄ap aha/ mo dhali um mini 'koki gam aha/ mo haali/ mo jin miga/ ya mo tani mina um moli iyu/ mo be.

35 Dhali 'Kwani Yahuuda/ oki gwo ka rem 'kup mo ki: Ki mana dina wathi/ yansan gwo ibwa mo mmoya mo jin mina ana 'koki gam a'di mo? A'di dina gwo ibwa mo mmoya mo e bwaman 'Kwani Yahuuda/ kun ceker̄kunu bwa mo e bwan̄ 'Kwanin̄ Griki mo dhali tor 'Kwanin̄ Griki gwo mo 'taa?

36 Ki 'pemen gwo yan jin ona a'di ta'da taye? jin ona a'di ki: Um mini n̄ap aha/ mo tani dhali um mini 'koki gam aha/ mo, dhali, Mo jin dika/ nycine/ mo tani mina um mol iiyu/ icine/ mo be.

Kumma/ Yi'de/ jin Di ki E mo

37 Dhali ka cim jin 'ko'd ki mo ma yuk jin yuku ka tul 'kup mo tani a'di jin ta'da cim jin caaca mo tani Yesus doshki'd ki mis mo dhali tor gwo eya tente/ mo mmo/o gwo mo ki: Wakki/ wathin tal 'den kamu/ budha yi'de/ mo tani dhalki a'di yayi'di aha/ mo dhali pi mo.

38 A'diyin jin gamki aha/ gwo is mo tani dhalki a'di yayi'di aha/ mo, dhali dhalki a'diyin jin gamki aha/ gwo is mo tani pi a'di mo, me'd Gwo ma Arungimis jin 'kwarkunu mo jin o gwo mo ki: 'Peni bwam ma dum piti mo tani a'di mina yi'den kumma/ jin di ki e igusu/ mo be.

39 Dhali gwo yansan jin okina a'di mo tani okina a'di gom Shi/in mo, jin mina a'di ci gom uni gwansan kun gamki a'di gwo is mo kun muruni bu'th a'di mo be. Haali/ Shi/in a'di dinuki ciyu/ naskina/ mo haala Yesus naskina/ dinuki kar cam piti eya tente/ mo be.

Monkwa/ Bwa e Bwan Kwani mo

40 Ki uni cikki gwo gwansan mo tani 'kwanin tiya o gwo mo ki: Wathi/ yansan ta'da manci gwo ma Arungimis ka jin gana/ mo be.

41 Dhali kun tiya ki o gwo mo ki: Wathi/ yansan a'di ta'da Kristhos mo. Hili kun tiya o gwo mo ki: A/Kristhos mididi piyu/ mo 'peni Pany Jaliila?

42 Dina Gwo ma Arungimis jin 'kwarkunu mo ki o gwo mo ka Kristhos mididi pi 'peni emen ma Dawuu'd mo? dhali minu piyu/ 'peni Pam Beetlaham, a'di jin ta pa jin din ma Dawuu'd nycine/ mo?

43 Wakan mondher bwa di'di bwaman 'kwani gom a'di mo be.

44 Unin tiya ona bwa ki bu'th a'di mo, hili wathin tal 'den kamu/ yisa di'da jin karki me'd apo/ a'di mo be.

Uni Gwansan kun Ta gi Moshirr kun Daran ki Mongam Gwo Is mo

45 Dhali iboliish uni dokkin ka nyan'ko'd mo e igasiis kun can mo dhali 'Kwani Parisiyiin mo, uni gun oki uni gwo mo ki: Atinta 'kona um ki guyu/ a'di mo?

46 Dhali iboliish ki thok uni gwo mo ki: Wathin kamu/ yisa di'da jin tor ki gwo me'd wathi/ yansan mo be.

47 Dhali 'Kwani Parisiyiin ki thok uni gwo mo ki: A/ki um si'da/ suskunu idheres mo de?

48 A/kun tiya 'peni 'kwani kun ta gi moshirr walla 'Kwani Parisiyiin gamki a'di gwo is mowa?

49 Hili awaambuhany 'kwani gwahan uni molki gwonkan jin cinu mo dhali um jeekunu jwa mo be.

50 Dhala Nikudimus a'di jin yaki'di a'di mon'thiny n̄twa/a/ mo tani dhali a'di jin ta jan tal 'de/ 'peni uni mo jin oki uni gwo mo ki:

51 A/gwonkan bana jin cinu mo mididi dwall wathi/ gwo ka wuny isa, n̄twa/ a/ mo ki uni 'koki dhu 'ce mo mmocik a'di mo dhali da/ar a'di jin miikina a'di mowa?

52 Dhali uni ki thok a'di gwo mo ki: /E si'da/ ta wathi/ 'peni Pany Jaliil 'taa? Aggi. Napi mo ma dhali /e mini par e mo haala manci gwo ma Arungimisa kamu/ yisa di'da jin mididi piyu/ mo 'peni Pany Jaliil mo.

A'bom jin Bu'thkunu mo e Mo jin Miina A'di Miinyal mo

53 Uni iikin e gu'b buni ki she/ ki she/ mo be.

8

1 Hila Yesus yaki'd mo e 'Kuwosh Setuun mo be.

2 Dhali mon'thamo/ ka 'tum mo tani a'di pu'dki'd e gu'b gi mondhelelad-helel dok/e mo. Aris 'kwani 'baar mo pu'dkini a'di mo. Dhali a'di ca'bki'da 'cesh mo dhali tor uni gwo mo be.

3 Dhali iman'kwar to mo dhali 'Kwani Parisiyiin uni suskina 'bomi a'di mo jin bu'thkunu mo e momii miinyal mo, dhali uni ki kara yimi bwaman mo be.

4 Dhali uni ki o a'di gwo mo ki: Mantor Gwowa, a'bom yansan a'di bu'thkunu mo e mo jin miina a'di miinyal mo be.

5 Dhali gwonkan jin cin ma Musa mo kanki aman gwo mo mmo'kosh wathi/ gi wakansan ki wosh mo be. Gwom pini wakatintaye jin mina /e i/o mo goma yim mo?

6 Mii yansan miikina uni mmopal a'di mo ki uni mini 'taki ta gi gwo mmo/ o apo/ a'di mo. Dhala Yesus ca'bki'd ki ji luŋ mo dhali 'kwara 'cesh ki me'd piti mo be.

7 Dhali ki uni 'kon mo mmotirrish a'di ki gwondot mo tani a'di doshki'd ki mis mo dhali o uni gwo mo ki: Dhalki a'di jin dara'd gi miinthus e bwam um mo tani iyipi woshi twa/a/ mo mmo'kosha yim mo.

8 Dhali ki jahanne/ a'di ca'bki'd ki ji luŋ mo dhali 'kwara 'cesh ki me'd piti mo be.

9 Hili ki uni cikki a'di mo tani uni iikin ka pije/ ka 'dete/ 'dete/ mo mmotel 'pen 'peni a'di jin ca'd mo, dhala Yesus dhalkunu a'di 'de/ mo nyakka 'bom jin doshki'di bwambori a'di mo be.

10 Dhala Yesus ki hil mo mo dhali owa yim gwo mo ki: A'boma, mane uni mane? Dina wathin tal 'den kamu/ ki wak/eya?

11 Ayim ki thok gwo mo ki: Wathi/ yisa di'da Tapa. Dhala Yesus ki o a'di gwo mo ki: Wakan si'da/ aha/ dinaki wak /e mo be. Yaku/ mo ma dhali dhalku/ miinthus ki mii dok/e mo.

Yesus Ta Monkush gi 'Kwaniny'cesh mo

12 Dok/ e Yesus ki tor uni gwo mo mmo/ o ki: Aha/ tana monkush gi 'kwaniny'cesh mo be. A'di jin midi bath aha/ nsho'k mo tani midi diki ya e mondhurumi'd mo. Hili a'di midi ta gi monkush gi mondiki/e mo be.

13 Dhali yan'ko'd 'Kwani Parisiyiin ki o a'di gwo mo ki: /E tori gwo ki is pini ba/. Gwom pini jin tora /e mo tani diki ta gwon gana/ mo be.

14 Yesus ki thok uni gwo mo ki: Ba isi wakki/ gwo jin torka/ gom is pem mo tani gwom pem jin torka/ mo tani ta gwon gana/ mo haali/ aha/ misha mo jin yayika/ 'peni cine/ mo dhali mo jin yaka/ iya mo si'da/ hili um 'koki mish mo jin yayika/ 'peni cine/ mo walla mo jin yaka/ iya mo be.

15 Um dwalli gwo isi gom bungwar is mo. Aha/ dinaki dwall jan tal 'den kamu/ gwo mo be.

16 Ba isi wakki/ gwo jin dwalka/ mo tani gwon dwall pem ta gwon gana/ mo haali/ aha/ yisa dina aha/ 'de/ mo jin dwalli gwo mo, hili aha/ dhali Ababam pem jin hashki aha/ mo be.

17 E gwonkan bum jin cinu mo, a'di jin 'kwarkunu mo mmo/o gwo mo ki: Gwo jin cina 'kwani su/ mo tani ta gwon gana/ mo be.

18 Aha/ tora gwo gom is pem mo dhali Ababam pem a'di jin hashki aha/ mo tani a'di torki gwo gom aha/ mo be.

19 Wakan uni ki thok a'di gwo mo ki: Mane Cim mane? Yesus ki thok uni gwo mo ki: Um 'koki mish aha/ mo walla Ababam pem mo. Wakki/ um mishi aha/ mo tani um mini 'taki misha Babam pem si'da/ mo be.

20 Gwo gwansan okin ma Yesus e mo jin dhunuwa guurush mo me'd jin torkina a'di 'kwani gwo e gu'b gi mondheleladhelel mo. Hili wathin tal 'deŋ kamu/ yisa di'da jin bu'thki a'di mo haali/ mom piti diki pu'd naskina/ mo be.

Mo jin Yaka/ Ya Nycine/ tani Mina Um Mol Iiyu/ mo

21 Dok/e a'di ki o uni gwo mo ki: Aha/ yana ya mo dhali um mini ŋaḡ aha/ mo dhali um mini wu mo e miinthus bum mo. Dhali mo jin yaka/ iya icine/ mo tani um mini mol iiyu/ mo be.

22 Dhali yan'ko'd 'Kwani Yahuuda/ ki o gwo mo ki: Mina a'di 'kosh is piti jwa mo 'taa? me'd jin ona a'di gwo mo ki: Mo jin yaka/ iya mo tani mina um moli iiyu/ mo be.

23 Dhali a'di ki thoḡ uni gwo mo ki: Um 'pena 'cesh yan mo. Aha/ 'peni momis mo. Um ita ku gi mony'cesh yan mo. Aha/ dinaki ta ji gi mony'cesh yan mo be.

24 Aha/ tora um gwo mo ki um mini wu mo e miinthus bum mo, haali/ um mini wu mo e miinthus bum mo isi ciki/ um mini 'taki gam aha/ gwo is mo ki aha/ tana a'di mo be.

25 Dhali uni ki o a'di gwo mo ki: /E sa/ tana ja mo? Yesus ki thoḡ uni gwo mo ki: Ma isi gwo yin jin torka/ um mo 'peni ka muŋ'kup mo tani a'di itorkika/ umi 'baar mo be.

26 Aha/ tana gi gwon tiya ka ris mmo'taki o gom um mo dhali mmo'taki dwall si'da/ mo tani hili a'di jin hashki aha/ mo tani ta a'diŋ gana/ mo, dhali aha/ torkina a'di i'kwaniny'cesh mo gwo jin ciḡka/ 'peni a'di mo be.

27 Dhali uni 'koki mish gwom piti 'ban mo jin okina a'di uni mo gom gwony Com mo be.

28 Dhali wakan aYesus ki o uni gwo mo ki: Ki um mini 'de'k Ya/ gi 'Kwani mo tani yan'ko'd um mini mish mo mo ki aha/ tana a'di be dhali ki aha/ dinaki mii ton tal 'deŋ kamu/ ki moshirr pem ki is pem mo, hili jasi uni kun okika/ kun torkin ma Baba aha/ mo be.

29 Dhali a'di jin hashki aha/ mo tani a'di di'd e aha/ mo. A'di diki dhal aha/ 'pen mo haali/ aha/ miina to isa yempa/ kun 'borki a'di bwa mo be.

30 Me'd jin torkina a'di gwo wakan mo tani 'kwani ka ris gamki a'di gwo is mo be.

Gwoŋ Gana/ Midi Dhu Um ki 'Kus mo be

31 Dhali yan'ko'd Yesus ki o 'Kwani Yahuuda/ gwo mo, uni kun gamki a'di gwo is mo ki: Waḡki/ um mini tikir 'ko mo e gwom pem mo tani um ka jin gana/ mini ta imancik aha/ gwo mo be.

32 Dhali um mini mish gwom gana/ mo. Dhali gwom gana/ midi dhu um ki 'kus mo be.

33 Uni thoḡki a'di gwo mo ki: Aman tana emen ma Ibrahiim mo dhali aman 'konaki ta ciŋkina/ gi 'kwanin tiya mo. Ba ata i/ona /e gwo mo ki: Um minu dhu ki 'kus mo?

34 Yesus ki thoḡ uni gwo mo ki: Ka jin gana/, ka jin gana/ aha/ ona um gwo mo ki: Aris 'kwani 'baar mo ka 'deṭe/ 'deṭe/ kun miiki miinthus mo tani uni ta ciŋkina/ gi miinthus mo be.

35 Dhali ciŋkina/ yisa mishi tikir ca'b e gu'b ki sule/ ki sule/ mo, hili ya/ a'di tikirki ca'b ki sule/ sule/ mo be.

36 Wakan waḡki/ Ya/ dhu um ki 'kus mo tani um ka jin gana/ mini 'ko ki 'kus mo be.

37 Aha/ misha ki um ta emen ma Ibrahiim mo. Bahili um ŋaḡki aha/ mmo'kosh mo haali/ gwom pem diki gam monyca'b e um mo be.

38 Aha/ torkina gwo ki to jin mishkika/ 'pena Babam pem mo dhali um miiki to jin ciḡka um 'pena babam bum mo be.

Ababam Bum Ta'da Iblis mo

³⁹ Uni ki thoḵ a'di gwo mo ki: Ibrahiim ta'da babam bam mo. Dhala Yesus ki thoḵ uni gwo mo ki: Waḵki/ um mini 'taki ta uci ma Ibrahiim mo tani um mini 'taki mii mii kun miin ma Ibrahiim mo be.

⁴⁰ Hili shwane/ um ṅapki aha/ mmo'kosh mo, wathi/ jin ṭorki um gwoṅ gana/ jin cikkina a'di 'peni Arungimis mo. Mii ma Ibrahiim yisa wakana.

⁴¹ Um mii to kun ciḵa um 'pena babam bum mo. Uni ki thoḵ a'di gwo mo ki: Aman 'konuki dho'th ki dho'th ḵal mo be. Aman tana ga Baba jin di'd ṭal 'de/ mo a'di jin ta'da Arungimisi.

⁴² Yesus ki thoḵ uni gwo mo ki: Waḵki/ Arungimis mido 'taki ta Ababam bum mo tani um mini 'taki en aha/ mo haali/ aha/ pikina 'peni Arungimis mo dhali aha/ yayina 'peni a'di mo. Aha/ dinaki yayu/ ki bwam pem mo, hili ki bwa gi a'di jin hashki aha/ mo be.

⁴³ Atinta 'kona um ki mish gwo jin oka/ 'ban mo? Haali/ a'di wakan mmomola um gwom pem cik mo be.

⁴⁴ Um 'pena babam bum jin ta tapa ma ruma 'cesh mo dhali bwam bum o'd ki mii me'd bwa ma babam bum mo. A'di ta'da man'kosha mee mo 'peni ka muṅ'kup mo dhali a'di dar gi toṅ kamu/ mmomii gom gwoṅ gana/ mo haali/ gwoṅ ganaṅ kamu/ yisa di'da e a'di mo. Ki a'di ki ṭor gwo ka ṭor mo tani a'di ki o gwo mo me'd isi jin di'di a'diyi haali/ a'di ta'da ṭor mo dhali com jin cil ma ṭor mo.

⁴⁵ Hili haali/ gom gwoṅ gana/ jin ṭorka/ um mo tani um 'koki gam aha/ gwo is mo be.

⁴⁶ Wathi/ jana 'peni bwam um gamki aha/ ki aha/ dina mii m'ba/ gom miinthus mo? Waḵki/ aha/ ṭora gwoṅ gana/ mo tani ata 'kona um ki gam aha/ gwo is mo si'da/?

⁴⁷ A'diyin jin ta jim ma Arungimis mo tani cikki'da Arungimis gwo mo. Dhali gom gwo jin 'kona um ki cik a'di mo tani um 'koki ta ku ma Arungimis mo be.

Nṭwa/a/ ka Ibrahiim mo tani Aha/ Dikina mo be

⁴⁸ Dhali 'Kwani Yahuuda/ ki thoḵ a'di gwo mo ki: Aman ona gwo ki oṅ gana/ ba/ ki /e ta Wathi/ gi Pan Saamira jin taki'd ga ruma 'cesh moyi?

⁴⁹ Yesus ki thoḵ uni gwo mo ki: Aha/ dinaki ta aruma 'cesh mo, hili aha/ taḵa Ababam pem mo dhali um 'koki taḵ aha/ mo be.

⁵⁰ Hili wakan si'da/ aha/ dinaki ṅap monyca ki is pem mo. Jan ṭal 'den kamu/ diki'd jin ṅapki a'di mo dhali a'di mido ta mandwall gwo mo be.

⁵¹ Ka jinṅ gana/, ka jinṅ gana/ aha/ ṭora um gwo mo ki: Waḵki/ wathin ṭal 'den kamu/ mido dhu gwom pem mo tani a'di mido diki par wu e ki sule/ mo be.

⁵² Dhali 'Kwani Yahuuda/ ki o a'di gwo mo ki: Shwane/ aman misha ki /e tana ga ruma 'cesh mo. Ibrahiim wuki'd mo ba/, me'd jin wukina imançi gwo ma Arungimis kadhamo/ mo dhali i/e a'di i/on ki: Waḵki/ wathi/ mido dhu gwom pem mo tani a'di mido diki nyoḵ wu ki sule/ mo be.

⁵³ /E can mo mmobola babam bam ka Ibrahiim e jin wuki'd mo 'taa? Aggi. Dhali imançi gwo ma Arungimis kadhamo/ mo kun wukin mo. Ki /e si'da/ toshki /e tana ja mo?

⁵⁴ Yesus ki thoḵ uni gwo mo ki: Waḵki/ aha/ kara monyca pem mo tani monyca pem di'd ki buthur mo. A'di ta'da Babam pem jin karki aha/ ca eya tente/ mo, a'di jin okina um ki a'di ta'da Arungimis bum mo be.

⁵⁵ Hili um 'koki mish a'di mo. Aha/ misha a'di mo be. Waḵki/ aha/ ona gwo ki aha/ mola a'di mo tani aha/ mina 'taki ta aṭor me'd um mo, hili aha/ misha a'di mo dhali aha/ dhuna gwom piti mo be.

⁵⁶ Ababam bum ka Ibrahiim a'di 'kunykina bwa mo mmopina a'di acim pem e mo. A'di mishki a'di mo dhali 'borkina bwa mo be.

⁵⁷ Dhali yan'ko'd 'Kwani Yahuuda/ ki o a'di gwo mo ki: /E dina yil ki 'ko/ issu* i'ce'dka 'kume'd naskina/ mo dhali /e parkina Ibrahiim eya?

⁵⁸ Yesus ki thok uni gwo mo ki: Ka jin gana/, ka jin gana/ aha/ tora um gwo mo ki: Ntwa/a/ ka Ibrahiim diki di mo tani aha/ dikina mo be.

⁵⁹ Dhali wakan uni 'de'kki wosh mo dhali 'taki 'kosh a'di mo. Hila Yesus bagki is piti mo dhali ya ka pije/ mo 'peni gu'b gi mondheleladhelel mo be.

9

Yesus Waçi Wathi/jin Dhodhu ka Ja'da/ mo

¹ Me'd jin yakina a'di ki yampe mo tani a'di mishki wathin kamu/ jin taki'da ja'da/ pena dho'th piti jin dho'thkunu a'di kan mo be.

² Dhali imancik a'di gwo dotki a'di gwo mo ki: Rabbi, kaja miiki miinthus mo, wathi/ yansan 'taa? walla icom mo, ki a'di dho'thkunu ka ja'da/ kan mo?

³ Yesus ki thok gwo mo ki: A'di yisa ita miinthus gi wathi/ yan mo walla icom mo, hili ki mii ma Arungimis minu tor eya tente/ e a'di mo be.

⁴ Ana tucu ki mii mii gi a'di jin hashki aha/ mo, ki mo di'd ki mantee naskina/ mo. Ki mo midi ta mon'thiny mo tani wathin tal 'derj kamu/ midi mola tu'c mii mo be.

⁵ Me'd jin dika/ e mony'cesh yan mo tani aha/ tana monkush gi 'kwaniny'cesh mo be.

⁶ Me'd jin okina a'di gwo wakansan mo tani a'di ki 'tak manya/ a'cesh mo dhali 'thoka je ki manya/ mo dhali gwa'c wathi/ e ka je mo be,

⁷ mmo/o a'di gwo mo ki: Yaku/ mo ma mmolam eya Al Yi'de/ Siluwaam mo (a'di jin ta 'pemen gwo jin onu mo ki: a'di hashkunu mo). Wakan a'di yaki'd mo dhali lamki'd mo dhali dokki'd ka nyan'ko'd mo mmomish mo mo be.

⁸ Dhali imanmiiya tu'c dhali uni gwansan kun mishki a'di ntwa/a/ mo mnotana a'di aman'tho to mo tani uni o gwo mo ki: Dina a'di ki ta wathi/ yansan a'di jin ca'bki'd dhali 'tho to mo?

⁹ Kun tiya o gwo mo ki: A'di ta a'di be. Kun tiya o gwo mo ki: Yisa, hili a'di wana e ki a'di mo. A'di ki o uni gwo mo ki: Aha/ tana wathi/ mo be.

¹⁰ Uni ki o a'di gwo mo ki: Dhali em pini mishu ka'd kataye?

¹¹ A'di ki thok gwo mo ki: Wathi/ jin yuku ka Yesus a'di 'thokki'da je mo dhali gwa'c aha/ em pem mo dhali o aha/ gwo mo ki: Yaku/ mo eya Siluwaam mo dhali lam mo. Wakan aha/ yakina mo dhali lam mo dhali aha/ bu'thkina momish mom pem mo be.

¹² Uni ki o a'di gwo mo ki: Mane a'di mane? A'di ki thok gwo mo ki: Aha/ mola a'di mo be.

'Kwani Parisiyiin Uni Theke'thki Gwo mo Gom Mo jin Waçuwa Waç ki E mo

¹³ Dhali uni ki susi wathi/ e 'Kwani Parisiyiin mo, a'di jin taki'da ja'da/ 'thissa/ mo be.

¹⁴ Dhali a'di ta'da cim ma pesu/ jin miikin ma Yesusa je mo dhali ka'd a'di em piti mo be.

¹⁵ Dhali 'Kwani Parisiyiin dok/ e ki dot a'di gwo mo ki a'di mishi bu'th momish mom piti kata mo. Dhali a'di ki o uni gwo mo ki: A'di karki'da je e em pem mo dhali aha/ lamkina mo tani aha/ mishkina mo mo be.

¹⁶ Dhali 'Kwani Parisiyiina tiya ki o gwo mo ki: Wathi/ yansan diki di 'peni Arungimis mo ba/ haali/ a'di diki kara cim ma pesu/ ki jin kogu mo. Hili kun

* 8:57 kamsiin

tiya o gwo mo ki: A/ki wathi/ jin ta'da manmii miinthus mido mish miimer gi wakansan mii mowa? Mondher bwa di'di bwaman uni mo be.

¹⁷ Wakan uni dok/e ki o wathiny ja'da/ gwo mo ki: Gwo gi wakata i/ona /e gom a'di mo me'd jin ka'dkina a'di /e e mo? A'di thoḵ gwo mo ki: A'di ta'da manci gwo ma Arungimis mo be.

¹⁸ Dhali 'Kwani Yahuuda/ 'koki gam gwo is ki a'di taki'da ja'da/ mo dhali ki a'di bu'thki momish mo mo ntagi uni ki yuk icom gi wathi/ jin bu'thki momish mom piti mo be.

¹⁹ Dhali uni ki doṭi uni gwo mo ki: A/yan ta ya/m buma, a'di jin ona um ki a'di dho'thkunu ka ja'da/ mo? Ba a'di mishi mo mo kata shwane/?

²⁰ Icom thoḵki gwo mo ki: Aman misha ki a'di yansan ta ya/m bam mo dhali a'di dho'thkunu ka ja'da/ mo be.

²¹ Bahili a'di mishi mo kata shwane/ sa/? Aman mola mo walla aman 'konaki mish a'di jin ka'dki em piti mo. Doṭi a'di mo ma. A'di cana yil mo. A'di mido o gwo gom is piti mo be.

²² Icom oki gwo wakansan mo haali/ uni ko/ki 'Kwani Yahuuda/ mo haali/ 'Kwani Yahuuda/ thosonki gwo mo jin gamu me'd mo wakki/ wathin tal 'deḡ kamu/ mido 'taki pi gwo gom a'di mo mmo/o ki a'di ta'da Kristhos mo tani a'di minu ur ka pije/ 'peni gu'b gi montul is buni mo be.

²³ A'di ta gwo jin ona icom gwo mo wakan mo ki: A'di cana yil mo be. Doṭi a'di mo ma.

²⁴ Wakan dok/e me'di su/ mo tani uni ki yuk wathi/ jin taki'da ja'da/ mo dhali o a'di gwo mo ki: Ciya Arungimis mom'bor bwa i is mo ma. Aman misha ki wathi/ yansan ta'da manmii miinthus mo be.

²⁵ A'di ki thoḵ uni gwo mo ki: Wakki/ a'di ta'da manmii miinthus mo tani aha/ mola mo be. Jasi ton tal 'de/ a'di imishka/ mo ba/ me'd jin taka/ ja'da/ mo tani aha/ misha mo shwane/ mo be.

²⁶ Uni ki thoḵ a'di gwo mo ki: Ki a'di mii'da ta i/e mo? Ki e ka'da a'di /e kata mo?

²⁷ A'di ki thoḵ uni gwo mo ki: Aha/ torkina um gwo mo hila/ dhali um ushki gwo cik moyi. Ba tinta inapa um a'di mmocik dok/e sa/? Um si'da/ napan mmowar ki imancik a'di gwo mo 'taa?

²⁸ Dhali uni sorki a'di mo mmo/o gwo mo ki: /E a'di itana mancik a'di gwo mo. Hili aman tana imancika Musa gwo mo be.

²⁹ Aman misha ka Arungimis torki'da Musa gwo mo. Hili gom gwo gi wathi/ yan mo tani aman mola mo mo jin yayina a'di 'peni cine/ mo be.

³⁰ Dhali wathi/ ki thoḵ uni gwo mo ki: Ba mii yansan ta miimer mo be. Ki um 'koki mish mo jin yayina a'di 'peni cine/ mo dhali hili a'di ka'dki aha/ em pem mo be.

³¹ Ana misha mo mo ka Arungimis diki cik 'twa/ gi imanmii miinthus mo hili wakki/ jan 'de/ yin jin ta'da manluna Arungimis mo dhali mii bwam piti mo tani Arungimis cikki a'di 'twa/ mo be.

³² Hili 'pena dhamo/ ki suny suny mo me'd jin telkina mony'cesh 'pen mo tani gwo yisa cikunuwa ki jan tal 'deḡ kamu/ ka'dki'da kamu/ e mo a'di jin dhodhu ka ja'da/ mo.

³³ Wakki/ wathi/ yansan mido 'taki diki di 'peni Arungimis mo tani a'di mido 'taki mol toḡ kamu/ mii mo be.

³⁴ Dhali uni ki thoḵ gwo mo ki: /E jin dho'thkunu e miinthus kan mo tani dhali mina /e imish am gwo tora? Dhali uni ki ur a'di ka pije/ mo be.

³⁵ Dhala Yesus cikki gwo ki uni urki a'di ka pije/ mo dhali a'di ki gam a'di 'kup mo, dhali a'di ki o a'di gwo mo ki: /E gamki Ya/ ma Arumgimis gwo is mo 'taa?

³⁶ A'di ki thoƙ a'di gwo mo dhali o gwo mo ki: Ki a'di jaye, Tapa, ki aha/ mina gam a'di gwo is mo?

³⁷ Yesus ki thoƙ a'di gwo mo ki: /E mishki a'di mo dhali a'di a'dan be jin torki /e gwo mo be.

³⁸ A'di ki thoƙ a'di gwo mo ki: Tapa, aha/ gamkina gwo is mo. Dhali a'di ki lun a'di mo be.

³⁹ Dhala Yesus ki o gwo mo ki: Gom gwon dwall mo tani aha/ pu'dkina i mony'cesh yansan mo, ki uni gwansan kun 'koki mish mo mo tani mini 'taki mish mo mo, dhali uni gwansan kun mishi mo mo tani mini war ka ja'da/ mo be.

⁴⁰ 'Kwani Parisiyiina tiya 'dishkin mo mmocik gwo jin ona a'di mo dhali uni ki o a'di gwo mo ki: A/am si'da/ de itana ja'da/ de?

⁴¹ Yesus ki thoƙ uni gwo mo ki: Wakki/ um mini 'taki ta ja'da/ mo tani um mini 'taki dar gi mii 'ba/ mo, hili shwane/ um o gwo mo ki: Aman misha mo mo. Dhali mo kun 'konu ki mii 'ba/ mo tani ishkin e um mo be.

10

Gwom 'Bi'th/e goma Goƙ Ka'bal mo

¹ Ka jin gana/, ka jin gana/ aha/ ona um ki a'diyin jin diki se ki 'twaƙala goƙ ka'bal mo, hili ise ki bwaya kamu/ mo tani a'di ta wathin 'di/ mo dhali jin ta'da mandil to mo be.

² Hili a'diyin jin cikki'd ki 'twaƙal mo tani a'di ta'da manhil ka'bal jin hili ka'bal mo be.

³ Dhali amanƙor 'twaƙal mo tani ka'dki a'di 'twaƙal mo, dhali ka'bal cikki 'twam piti mo, dhali a'di ki yuk ka'bal pitiƙ gana/ ki gway buni mo dhali shu uni bway ka pije/ mo be.

⁴ Ki a'di suski kum pitiƙ gana/ 'baar mo ka pije/ mo tani a'di ki ya ntwa/a/ ki uni mo dhali ka'bal bathi a'di nsho'k mo haali/ uni mishki 'twam piti mo be.

⁵ Jan kamu/ jin di ki she/ mo tani mina uni 'koki bathi sho'k mo be, hili uni mini so mo 'peni a'di mo haali/ uni 'koki mish 'twa/ gi 'kwanin tiya mo be.

⁶ Gwom poƙ yansan tor ma Yesus uni mo, hili uni 'koki mish gwo 'ban mo, gwo jin okina a'di uni mo be.

Yesus Ta'da Manhil Ka'bal jin 'Boro'd mo

⁷ Wakan Yesus ki o uni gwo dok/e mo ki: Aha/ tora um gwo mo ki: Aha/ tana 'twaƙal gom ka'bal mo be.

⁸ Aris uni 'baar mo kun iiyini twa/a/ ki aha/ mo tani uni ta 'kwanin 'di/ mo dhali kun ta imandil to mo. Hili ka'bal 'koki ci bwa 'kup ki uni mo be.

⁹ Aha/ tana 'twaƙal mo. Wakki/ jan tal 'deƙ kamu/ midu seyu/ i aha/ mo tani a'di minu woth mo dhali midu seyu/ bwaman mo dhali ya ka pije/ mo dhali gama shon dhii/i'd mo be.

¹⁰ 'Kwanin 'di/ uni pu'dkin mo mmokwal to jasi 'te/ mo dhali mmo'kosha 'kosh mo dhali mmo'ce'da 'ce'd sho'k mo. Aha/ pu'dkina mo ki uni mini ta gi mon'koki/e mo dhali mmota gi a'di ki nyanye/ mo be.

¹¹ Aha/ tana manhil ka'bal jin 'boro'd mo. Amanhil ka'bal jin 'boro'd ki kar mondiki/em piti a'cesh gom ka'bal mo be.

¹² Hili a'di jin mii to ka guurush mo dhali diki ta manhil ka'bal mo tani dhali ka'bal 'koki ta kum piti mo tani ki a'di parki'da wu e mo mmoyayu/ mo tani

a'di ki dhal ka'bal 'pen mo dhali gus mo be dhala wu ki bu'th uni mo dhali ceke uni bwa mo be.

¹³ A'di guski'd mo haali/ a'di ta'da manmii to ka guurush mo be dhali bwan kamu/ yisa ta a'di pa gom ka'bala.

¹⁴ Aha/ tana manhil ka'bal jin 'boro'd mo. Aha/ misha kum pem mo dhali kum pem mishi aha/ mo be.

¹⁵ Me'd jin mishkin ma Baba aha/ mo tani dhali aha/ misha Ababa mo. Dhali aha/ karkina mondiki/em pema 'cesh gom ka'bal mo be.

¹⁶ Dhali aha/ tana gi ka'bala tiya kun 'koki 'ko eya goŋ yansan mo. Aha/ mina mii susi uni si'da/ mo, dhali uni mini ci bwa gom 'twam pem mo be. Wakan uni mini ta ama'dinya tal 'de/ mo be dhali amanhil ka'bal midi di 'de/ mo be.

¹⁷ Gom 'kup gwo gi wakan mo tani Ababa enki aha/ mo haali/ aha/ karkina mondiki/em pema 'cesh mo ki aha/ mina 'taki bu'th a'di ka nyan'ko'd mo be.

¹⁸ Wathin tal deŋ kamu/ yisa di'da jin midi bu'th a'di 'peni aha/ mo, hili aha/ karkina a'diya 'cesh ki bwam pem gana/ mo. Aha/ tana gi mom'bi'th mo mmokar a'diya 'cesh mo dhali aha/ tana gi mom'bi'th mo mmobu'th a'di dok/e mo be. Gwoŋkan yan bu'thkika/ 'pena Babam pem mo be.

¹⁹ Dhali gwo jin dheru 'kwani bwa mo dok/ e diki'd mo e bwan 'Kwani Yahuuda/ mo haali/ gom gwo gwansan mo be.

²⁰ 'Kwanin tiya ka ris o gwo mo ki: A'di ta'd ga ruma 'cesh mo dhali a'di guski'da du mo. Atinta ciŋa um gwom piti mo?

²¹ Kun tiya o gwo mo ki: Gwo gwansan 'koki ta gwo gi wathi/ jin taki'd ga ruma 'cesh mo. A/min ma ruma 'cesh mish ka'd wathiny ja'da/ e mowa?

Yesus Wakina 'Kwani Yahuuda/ mo

²² A'di ta'da ayuk jin yuku ka tul 'kup mo mmokar gu'b gi mondheleladhele ki she/ mo (mmokar a'di ki she/ 'ko'di a'di nyonkunu dok/ e mo be) e Pa Urushaliim mo be.

²³ A'di ta mondii mo dhala Yesus yaki'd ki sho'k e gu'b gi mondheleladhelel eya lambalany ma Sulemaan mo be.

²⁴ Wakan 'Kwani Yahuuda/ tulki is i a'di mo dhali o a'di gwo mo ki: /E mini dhu am ki mo gi wakata mmoshi bwa 'kup mo kan? Wakki/ /e tana Kristhos mo tani tori aman gwo shoka 'cesh ka ji sho'k mo ma.

²⁵ Yesus ki thok uni gwo mo ki: Aha/ torkina um gwo mo tani dhali um 'koki gam gwo is mo. Gom mii kun miikika/ ki gway ma Babam pem mo tani uni torki gwo gom aha/ mo be.

²⁶ Hili um 'koki gam gwo is mo haali/ um 'koki ta uni kun cilka/ ki ka'bal pem mo.

²⁷ Ka'bal pem cikki 'twam pem mo dhali aha/ misha uni mo dhali uni bathki aha/ nsho'k mo be.

²⁸ Dhali aha/ cina uni mon'koki/e ki sule/ ya ye 'ba/ mo be. Dhali uni mini 'koki 'ce'd sho'k ki sule/ mo. Dhali wathin tal 'deŋ kamu/ midi diki sul uni mo 'peni me'd pem mo be.

²⁹ Ababam pem a'di jin ciki uni aha/ mo tani a'di ica'd ki uni 'baar mo dhali wathin kamu/ yisa di'da jin midi mish sul uni mo 'peni me'd ma Babam pem mo be.

³⁰ Aha/ dhala Baba, aman tala 'de/ mo be.

³¹ Dhali 'Kwani Yahuuda/ uni 'de'kki wosh mo dok/ e mmo'taki 'kosh a'di mo.

³² Yesus thok uni gwo mo ki: Aha/ torkina um miim 'borga/ i e ka ris 'pena Babam pem mo. Dhali gom mii kuna imina umi 'kosh aha/ ki wosh mo?

33 'Kwani Yahuuda/ thokki a'di gwo mo ki: Aman mina 'kosh /e ki wosh gom miim 'boro'd yisa hili gom gwo sor jin walkina /e mo, haali/ /e jin ta wathiny'cesh kan mo kar is pini ka Arumgimis mo.

34 Yesu ki thok uni gwo mo ki: A'di dinuki 'kwar mo e gwoŋkan bum jin cinu mo mmo/o gwo mo ki: Aha/ ona gwo mo ki: Um a'di itana rumi?

35 Wakki/ a'di ki yuk uni ka rum, uni kun pu'dkina Gwo ma Arumgimis mo (Dhali Gwo ma Arumgimis jin 'kwarkunu mo tani minu mol 'ce'd mo be) tani

36 a/um ki o gwo mo ki a'di jin karkina Com ki she/ ki jin kogu mo dhali hashu e mony'cesh mo ki: /E walki gwo sor mo, haali/ aha/ ona gwo mo ki: Aha/ tana Ya/ ma Arumgimis mo.

37 Wakki/ aha/ dinaki mii mii ma Babam pem mo tani dhalki gwom pem ki gam is mo ma.

38 Hili wakki/ aha/ ki mii uni mo tani ba wakki/ isi um 'koki gam aha/ gwo is mo tani gami aha/ gwo is gom mii mo ma, ki um mini mish mo mo dhali mish gwo 'ban mo ka Baba a'di diki'd e aha/ mo dhali aha/ eya Baba mo be.

39 Dok/e uni palki mii mo mmobu'th a'di mo, hili a'di yeki'd mo 'peni bwam me'd buni mo be.

40 A'di yaki'd dok/e mo mmo'citha/ Al Kumma/ Yi'de/ Uurdun mo e mo yin jin miikin ma Yohaana mii ki yi'de/ ntwa/a/ mo dhali a'di ki ca'bi mun mo be.

41 Dhali 'kwani ka ris pu'dkini a'di mo dhali uni ki o a'di gwo mo ki: Yohaani diki mii miimer mo tani, hili aris gwo kun okin ma Yohaani gom wathi/ yansan mo tani ta gwoŋ gana/ mo be.

42 Dhali 'kwani ka ris gamki a'di gwo is imun mo be.

11

Mowu ma Li/aasar mo

1 Dhali wathin kamu/ diki'd jin 'ba'thki'd jin yuku gway ka Li/aasar gi Pam Beetaniya mo, a'di jin ta pa ma Mariyam dhali 'bwaham piti ka Marthā mo be.

2 A'di ta'da Mariyam jin 'koshki Tapa is ka yina pi'dnan gana/ mo dhali shumut a'di sho'k ka mur'kup ma yim mo, a'di jin 'ba'thkin ma kam piti ka Li/aasar mo.

3 Wakan i'bwaham hashki a'di gwo mo mmo/o gwo mo ki: Tapa, a'di jin ena /e mo tani 'ba'thki'd mo be.

4 Hili ka Yesu cikki gwo yansan mo tani a'di ki o gwo mo ki: 'Pemen 'ba'th yansan yisa ta mowuwa. A'di ta mii gom monya ma Arumgimis mo, wakan ki Ya/ ma Arumgimis minu kar ki ca gom a'di mo be.

5 Dhala Yesu enki'da Marthā dhali 'bwaham mo be dhala Li/aasar mo.

6 Wakan ki a'di cikki gwo gom a'di mmo'ba'thkina a'di mo tani a'di ca'bki'd ka cim su/ naskina/ e mo yin jin dikina a'di nycine/ mo be.

7 Dhali yan'ko'd a'di ki o gwo yansan e imancik a'di gwo mo mmo/o gwo mo ki: Dhalki ana iina Pa Yahuudiyya mo dok/e.

8 Dhali imancik a'di gwo ki thok a'di gwo mo ki: Rabbi, 'Kwani Yahuuda/ hila/ uni shwaneyin n̄apki /e mmo'kosh ki wosh mo dhali /e mini ya imun dok/e mana sa/?

9 Yesu ki thok uni gwo mo ki: 'Kon ma tee ki 'ko 'kume'd i'ce'dka su/ ka tente/ mowa? Wakki/ wathin kamu/ ki ya ki sho'k montee mo tani a'di diki kol mo haali/ a'di parki monkush gi mony'cesh yan e mo be.

10 Hili wakki/ wathin 'de/ ki ya ki sho'k mon'thiny mo tani a'di kolki'd mo haali/ monkush diki di e a'di mo be.

11 Wakansan a'di oki gwo mo dhali yan'ko'd tor uni gwo mo ki: Akam bana ka Li/aasar a'di ishki e mo, hili aha/ mina ya mo mmomer a'di e mo 'peni mo/ ish e mo be.

12 Dhali imancik a'di gwo ki o a'di gwo mo ki: Tapa, wakki/ a'di ishki e mo tani a'di mina isi 'bor mo be.

13 Dhala Yesus a'di oki gwo gom jwam piti mo, hili uni kulumki gwo ibwa mo ki a'di midi si a'di is 'peni mo/ish e mo be.

14 Dhali yan'ko'd Yesus ki tor uni gwo ka ji sho'k mo mmo/o gwo mo ki: ALi/aasar, a'di wuki'd mo be.

15 Dhali gom gway bum mo tani aha/ 'kunykina bwa mo ki aha/ dinaki di imun mo, wakan ki um mini gam gwo is mo. Hili dhalki ana iina i/i i a'di mo.

16 Tuuma, a'di jin yuku gway ka 'ci jin dhodhu isu/ mo, a'di o gwo e igarr piti jin nyaka a'di gwo cik mo ki: Dhalki ana iina si'da/ ki ana mina nyak wu ki a'di mo be.

Yesus Ta Mompì dhali Mondiki/e mo

17 Dhali ka Yesus pu'dki'd mo tani a'di gamki'da Li/aasar, a'di jin diki'di jis wa ka cim donon hila/ mo be.

18 Pam Beetaniya a'di 'dishki Pa Urushaliim is mo, dhali si'd piti wana e ki ntagini su/ mo be.

19 Dhali 'Kwani Yahuuda/ tana ris ka ris uni iikina Marthā mo dhala Mariyam mo mmomas uni mo isi goma kam buni mo be.

20 Ka Marthā cikki gwo ka Yesus pu'dki'd mo tani ayim yaki'd mo dhali rak a'di ibway mo, ka Mariyam diki'd e bwanj gu'b mo be.

21 Marthā ki owa Yesus gwo mo ki: Tapa, wakki/ /e mini 'taki di imahan mo tani akam pem midi 'taki diki wu mo be.

22 Dhali shwane/ isi me'd jin mishka/ ki to yin jin mina / e idot 'peni Arungimis mo tani Arungimis midi ci /e a'di mo be.

23 Yesus ki thoka yim gwo mo ki: Akam pini midi cu mis dok/e mo be.

24 Marthā ki thok a'di gwo mo ki: Aha/ mishayi ki a'di midi cu mis dok/eyi e mompinu ka cim jin 'ko'd mo be.

25 Yesus ki thoka yim gwo mo ki: Aha/ tana mompinu dhali mon'koki/e mo be. A'diyin jin gamki aha/ gwo is mo tani ba a'di jin wuki'd mo tani hili a'di midi di ki e mo be.

26 Dhali a'diyin jin di'd ki e dhali gam aha/ gwo is mo tani a'di midi diki wu ki sule/ mo. A/gwo yansan gama /e is mo 'te/sana?

27 Ayim ki thok a'di gwo mo ki: Nye, Tapa. Aha/ gama gwo is ki /e tana Kristhos mo jin ta Ya/ ma Arungimis mo, a'di jin midi yayu/ e mony'cesh yansan mo be.

Yesus Gwoki'd mo

28 Ka yim oki gwo yansan mo tani ayim yaki'd mo dhali yuk 'bwaham piti ka Mariyam mo mmo/o a'di gwo ka kwal is mo ki: Amantor Gwo di'di mahan mo dhali a'di yukki /e mo be.

29 Dhali ka yim cikki gwo mo tani ayim cuki mis ki jahanne/ mo dhali ya i a'di mo be.

30 Dhala Yesus diki pu'du/ ipa naskina/ mo, hili a'di diki'd naskina/ e mo yin jin gamkin ma Marthā a'di 'kup mo be.

31 Ki 'Kwani Yahuuda/ kun 'kokin mo naskina/ e gu'b nyakka yim mo mmomas yim mo tani uni parkina Mariyam e mo mmocukina a'di mis ki jahanne/ mo dhali ya ka pije/ mo tani, uni bathkina yimi sho'k mo mmo'tosh ka yim yaki'd ka pije/ mo mmoko mo e mon'kupaje mo be.

32 Dhali yan'ko'd, aMariyam, ka yim pu'dki'd e mo jin din ma Yesus mo dhali par a'di e mo tani a'di bitki'di sho'k piti mo dhali o gwo mo ki: Tapa, wakki/ /e mini 'taki di imahan mo tani akam pem midi 'taki diki wu mo be.

33 Ka Yesus parki'da yim e mo mmogwokina a'di mo tani dhali 'Kwani Yahuuda/ kun nyakki pu'd ka yim mo mmoko mo si'da/ tani a'di den ma du mo e shi/in piti mo dhali mur mo.

34 Dhali a'di ki o gwo mo ki: Mane mo jin karkina um a'di mo? Uni ki thok a'di gwo mo ki: Tapa, yayu/ mo ma dhali par e mo.

35 Yesus gwoki'd mo be.

36 Wakan 'Kwani Yahuuda/ oki gwo mo ki: Hili mo mo ma. A'di enki a'di ijasa/!

37 Hili kun tiya 'peni uni oki gwo mo ki: A/bunya/ mina a'di jin mishi wathiny ja'da/ ka'd e mo tani mina a'di 'taki diki mish wathi/ yansan non 'peni mowu mo?

Li/aasar A'di Warkunu Is mo Mmodi ki E mo

38 Dhali yan'ko'd Yesus den ma du mo e shi/in piti dok/ e mo dhali a'di pu'dki'd e moŋ'kupaje mo. A'di ta jis wosh jin 'kolkunu mo dhali wosh karkunu mo mmo'dap a'di 'twa/ mo be.

39 Yesus ki o gwo mo ki: Kaci wosh mo ma. Dhala Martha jin ta 'bwaham gi wathi/ jin wu'd mo tani o a'di gwo mo ki: Tapa, ki mo yan shwanetan mo tani a'di min ma shimi bulabul mo haali/ a'di 'kokin ma cimi doŋon mo mmowu mo be.

40 Yesus ki owa yim gwo mo ki: Dika/ ki tor /e gwo mo wakki/ /e mini 'taki gam gwo is mo tani /e mini 'taki par monyca ma Arungimis e mowa?

41 Wakan uni ka'cki wosh mo dhala Yesus 'deki em piti ki mis mo dhali o gwo mo ki: Ababa, aha/ 'borkina /e bwa i is mo ki /e cikki aha/ 'twa/ mo.

42 Aha/ mishkina ki /e cikki aha/ 'twa/ isa yempa/ mo, hili aha/ okina gwo yansan gom gway gi 'kwani kun doshkin ki 'dishe/ mo ki uni mini 'taki gam gwo is ki /e a'di ihashki aha/ mo be.

43 Ki a'di oki gwo wakansan mo tani a'di cuuki'd ki dhan 'twa/ jin caaca mo ki: Li/aasar, piyu/ ka pije/ mo.

44 Wathi/ jin wuki'd mo piki'd ka pije/ mo, me'd piti dhali sho'k piti 'tamkunu is ki burrinyen dhiny e jin kanuwa kan mo dhali bwam/em piti a'di 'tamkunu mo ki burrinye/ si'da/ mo. Yesus ki o uni gwo mo ki: 'Cu'ki a'di mo ma dhali dhalki a'di ya'd mo.

Awu'th jin Wudhu Apowa Yesus mo

45 Wakan 'Kwani Yahuuda/ ka ris ris uni kun iyyin nyakka Mariyam mo dhali kun parki to kun miikina a'di e mo tani uni gamki gwo is e a'di mo be.

46 Hili kun tiya 'peni uni, uni iikin mo e 'Kwani Parisiyiin mo dhali torki uni gwo mo gom to jin miikin ma Yesus mo be.

47 Wakan igasiis kun can mo dhali 'Kwani Parisiyiin uni tulki 'kwani gi montul is buni is mo dhali o gwo mo ki: Atinta i/a'di imina ana imii mo? Haali/ wathi/ yansan miiki'da ris miimer ka ris mo.

48 Wakki/ ana mina dhal a'di mmomii kansan san mo tani aris 'kwani 'baar ka 'dete/ 'dete/ mo mini gam a'di gwo is mo dhali 'Kwani Ruumaniiyin mini iyyu/ mo dhali 'ce'd mom bana jin kogu sho'k mo dhali kal bana mo be.

49 Hili jan tal 'deŋ kamu/ 'peni uni mo tani a'di ta'da Kayaapa, a'di jin ta'da gasiis jin ca'd gi yil caan mo, jin oki uni gwo mo ki: Um molu to 'baar mo.

50 Um 'koki mish gwo 'ban mo ki a'di ta shi/ miim 'boro'd gom um mo ki wathin tal 'de/ midi 'taki wu mo gom 'kwani mo, dhali ki kal yan ka 'bimpil minu 'taki 'koki 'ce'd sho'k mo be.

⁵¹ A'di diki o gwo yansan 'peni bwam piti 'te/ mo, hili mmotakina a'diya gasiis jin ca'd gi yil caan mo tani a'di oki gwo is mo ka Yesus mididi 'taki wu mo gom kal yan mo be.

⁵² Dhali yisa jasi gom kal yan a'di 'cena hili mmotul uci ma Arumgimis isi montal 'de/ mo uni gun ceckerkunu bwa mo is'ko'd mo be.

⁵³ Wakan 'pena tee caan mo tani uni gamki 'twa/ 'kup mo gom bway jin mina uni 'taki kar a'di mmowu mo be.

⁵⁴ Wakan aYesus yisa di'd mmoya eya tente/ mo e bwaman 'Kwani Yahuuda/ mo hili a'di yaki'd 'peni mun mo e bampa/ jin 'dish mombwaasho is mo e bampa/ jin yukkunu gway ka Eprayim mo. Dhali a'di ca'bki'di mun nyakki imancik a'di gwo mo be.

⁵⁵ Dhali Mompe'kupanyolos gi 'Kwani Yahuuda/ 'dishki'd mo dhali 'kwani ka ris iikin 'peni bampa/ e Pa Urushaliim ntwa/a/ ki Mompe'kupanyolos mo mmonyon is buni mo be.

⁵⁶ Uni 'kokin mo mmotima tim mo goma Yesus mo dhali mmo/o gwo ka rem 'kup mo me'd jin doshkina uni e gu'b gi mondheleladhelel mo ki: Ki gwo gi wakatinta ikulumkina /e ibwa mo? Ki a'di mididi diki yayu/ e montul is yan jin yukuwa yuk mo 'taa?

⁵⁷ Dhali igasiis kun can mo dhali 'Kwani Parisiyiin uni kanki gwo mo mmo/ o ki wakki/ wathin tal 'den kamu/ mididi mish mom piti mo tani a'di mididi 'taki tor uni gwo mo jin mina uni 'taki bu'th a'di mo be.

12

Yesus 'Koshkunu Is ka Yina Pi'dnanj Gana/ mo e Pam Beetaniya mo

¹ Acim 'koni pe'de/ ntwa/a/ ki Mompe'kupanyolos mo dhala Yesus pu'dki'd e Pam Beetaniya mo e mo jin pikin ma Li/aasar mo a'di jin 'de'kkin ma Yesus 'peni mowu mo be.

² Dhali uni miiki a'di tonte/ mo. Martha a'di miiki'da tu'c mo, hila Li/aasar a'di ta jan tal 'de/ e bwam uni gwansan kun 'kokina tharabeesa nyakki a'di mo be.

³ Mariyam bu'thki'da yina pi'dnanj gana/ jin 'bitha yol she/ ki 'bi'th mo jin din ma ratul 'de/ mo be. Dhali a'di ki 'kosh sho'k ma Yesus mo dhali shumut a'di sho'k ka mur'kup piti mo, dhali gu'b a'di 'tu'dkunu mo ka shim ma pi'dna/ mo be.

⁴ Hila Yahuusa Iskariyuuti a'din tal 'de/ 'peni imancik a'di gwo mo (a'di jin mididi 'ciht a'di is ki gwo mo) o gwo mo ki:

⁵ Atinta 'konuki yola pi'dna/ yansan ka riyaal iss* 'kwanimpa i'kume'd mo dhali ciki 'kwani kun hatha'ko'd mo?

⁶ Gwo yansan ona a'di, yisa mmotan ma du a'di pa yisa gom 'kwani kun hatha'ko'd mo, hili haali/ a'di ta'da 'di/ mo, dhali mmotana a'di ka jisilaan ma guurush mo tani a'di ki pil mo ki 'pen mo mmo'do uni mo.

⁷ Yesus ki o gwo mo ki: Dhalka yim mo ma. Dhalka yim kar a'di igama tee jin minu kan aha/ mo.

⁸ 'Kwani kun hatha'ko'd 'koni um isa yempa/ mo, hili um mini 'koki ta gi aha/ isa yempa/ mo.

Awu'th jin Wudhu Apowa Li/aasar mo

⁹ Dhana waambuhany 'Kwani Yahuuda/ ka ris da/arki gwo mo ki a'di di'di mun mo tani dhali uni pu'dkin mo, yisa jasi 'te/ gom gway ma Yesusa, hili si'da/ mmpara Li/aasar e mo a'di jin 'de'kkina a'di 'peni mowu mo be.

* 12:5 miyyateen

¹⁰ Wakan igasiis kun can mo thosonki gwo mo mmokara Li/aasar mmowu si'da/ mo be,

¹¹ haali/ gom gway gi a'di mo tani 'Kwani Yahuuda/ ka ris 'kokini mo/ii mo dhali gama Yesus gwo is mo be.

Mo jin Pinu Mii E mo Mmocic Pa Urushaliim mo

¹² Dhali ka tee jin 'ko'd mo tani awaambuhany 'kwani uni pu'dkin e mo ma yuk jin yuku ka tul 'kup mo mmocikkina uni gwo ka Yesus midi pu'dku/ e Pa Urushaliim mo be.

¹³ Wakan uni kwa/kina biny jethkum mo dhali ii mo mmorak a'di ibway mo mmocuu gwo mo ka: Hosanna. Mom'bor mii gom a'di jin pu'dki'd ki gway gi Tapa mo, isa Malik gi 'Kwani ma Israyiili.

¹⁴ Dhala Yesus a'di gamki ari thuluny mo dhali mer a'di apo/ mo me'd gwo jin 'kwarkunu mo ki:

¹⁵ Dhalku/ is ki ko/ mo, 'bwa/ ma Sihyuun.

Hili mo mo ma. Amalik pini a'di pu'dki'd mo mmomer ari thulunya po/ mo be.

¹⁶ Imancik gwo 'koki mish gwo yansan 'bani twa/a/ mo be. Hili ka Yesus karkunu cam piti eya tente/ mo tani dhali yan'ko'd uni kakina gwo yansan e mo jin 'kwarkunu mo gom a'di mo dhali jin miikunu mo gom a'di mo be.

¹⁷ Dhala waambuhany 'kwani 'kokin nyakki a'di mo me'd jin yukkina a'di aLi/ aasar 'peni jis jwa mo dhali 'de'k a'di 'peni mowu mo tani uni o gwo mo gom a'di mo be.

¹⁸ Dhali 'kup gwo a'dani, a'di iikin ma waambuhany 'kwani mo mmorak a'di ibway mo mmocikkina uni gwo mo gom miimer yansan jin miikina a'di mo be.

¹⁹ Dhali yan'ko'd 'Kwani Parisiyiin oki gwo ka rem 'kup mo ki: Misha uma, um moli tonj kamu/ mii mo, hili aris 'kwaniny'ceshi 'baar mo iikin mo mmobath a'di nsho'k mo be.

Ya/ gi 'Kwani Minu Mii 'De'k mo

²⁰ Dhali e bwaman uni gwansan kun iikin ka gagamis mo mmolun ka cim jin yukuwa yuk mo tani unin tiya gwahan ita 'Kwaninj Griki mo be.

²¹ Wakan uni gwansan pu'dkina Pilibbus mo, a'di jin ta wathi/ 'peni Pam Beetsayda e Pany Jaliil mo, dhali uni o a'di gwo mo ki: Tapa, aman ona bwayi mmopara Yesus e mo be.

²² Dhala Pilibbus yaki'd mo dhali torca Andaraawus gwo mo. Dhala Andaraawus yaki'd mo nyakka Pilibbus mo dhali uni torkina Yesus gwo mo be.

²³ Dhala Yesus ki thok uni gwo mo ki: Mo pu'dki'd mo gom Ya/ gi 'Kwani ki a'di minu kar ca eya tente/ mo be.

²⁴ Ka jin gana/, ka jin gana/ aha/ ona um gwo mo ki: Isi ciki/ wakki/ emen pos diki bita 'cesh dhali wu mo tani a'di midi di a'di 'de/ mo. Hili wakki/ a'di ki wu mo tani a'di midi dho'th maman kagahara mo be.

²⁵ A'diyin jin enki mondiki/em piti mo tani midi this a'di e mo, dhali a'diyin jin shi/ki mondiki/em piti i e mo e mony'cesh yansan mo tani a'di midi kar a'di ntagi mondiki/e ki sule/ ya ye 'ba/ mo.

²⁶ Wakki/ wathin tal 'dej kamu/ midi mii aha/ to mo tani a'di midi mii bath aha/ nsho'k mo be. Dhali mo yin jin miga/ di mo tani a'di imina cinjinam pemi di si'da/ mo be. Wakki/ wathin tal 'dej kamu/ midi mii aha/ to mo tani Ababa midi tak a'di mo be.

²⁷ Dhali shwane/ akashiram pem toc bwa mo, dhali aha/ mina i/o kata mo? Ababa. /E ki wothi aha/ 'peni mo yansan mowa? Yisa. Haali/ gom 'kup mii yan mo tani aha/ pu'dkina mo e mo yansan mo be.

²⁸ Ababa, kari /e gway pini ki ca mo. Dhali yan'ko'd 'twa/ pu'dki'd 'peni momis mo mmo/o gwo mo ki: Aha/ karkina a'di ki ca mo dhali aha/ mina kar a'di ki ca dok/e mo be.

²⁹ Dhala waambuhany 'kwani kun doshkin ki 'dishe/ cikki a'di mo dhali okin ki a'di ta'da sho'k jin dorki'd mo. Kun tiya o gwo mo ki: Aman'doyu gwo a'di torki gwo e a'di mo be.

³⁰ Dhala Yesus ki thoḡ gwo mo ki: 'Twa/ yansan pu'dki'd gom gway bum mo, yisa gom gway pema.

³¹ Dhali mo jin minu tor gwo 'twa/a 'cesh gi gwon dwall e mony'cesh yansan mo tani a'di pu'dki'd mo. Dhali tapa ma ruma 'cesh yansan minu biṡ ka pije/ mo be.

³² Dhali aha/, ki aha/ minu 'de'k mo 'peni mony'cesh yan mo tani aha/ mina dira ris 'kwani 'baar mo e is pem mo be.

³³ A'di oki gwo yansan mo mmotor 'pemen jwa jin mina a'di wu mo be.

³⁴ Dhala waambuhany 'kwani thokki a'di gwo mo ki: Aman cikkina gwo mo 'peni gwonḡan jin cikunu mo ka Kriṡthos mididi ca'b ki sule/ sule/ mo. Ba/ e o gwo kan mana ki Ya/ gi 'Kwani minu mii 'de'k mo? Ki Ya/ gi 'Kwani jana a'dan?

³⁵ Yesus ki thoḡ uni gwo mo ki: Monḡkush mididi nyak di e um ari'ceenne/ mo. Iiyi/ um mo ki monḡkush di'd naskina/ mo, isi ciki/ ki mondhurumi'd mididi diki kum um mo. A'diyin jin yaki'd e bwam mondhurumi'd mo tani diki mish mo jin yakina a'di mo be.

³⁶ Ki um ta gi monḡkush mo tani gami gwo is e monḡkush mo ki um mini 'taki war ki iya/ gi monḡkush mo be.

'Kwani Yahuuda/ kun Dar gi Gwoḡ Gam Is mo

Ka Yesus oki gwo yansan mo tani a'di yaki'd mo dhali bag is piti 'peni uni mo be.

³⁷ Ba a'di miiki miimer ka ris ibwambori uni mo tani hili uni 'koki gam a'di gwo is mo be.

³⁸ A'di ta gwo jin okin ma maṅci gwo ma Arumgimis kadhamo/ mo jin ta'da Ishaya mo jin minu thim moyi jin o gwo mo ki:

Tapa, kaja gamki gwom bana jin cinu is mo dhali eya ja torkunu abi gi Tapa i e mo?

³⁹ Wakan uni mol a'di gwo gam is mo be. Haala Ishaya dok/e o gwo mo ki:

⁴⁰ A'di 'dapki uni em buni mo mmota ja'da/ mo dhali 'bi'thki uniya dum buni mo,

isi ciki/ ki uni mini 'taki par e ki em buni mo dhali nyith ka dum buni mo, dhali tu'k mo gom aha/ mmowaḡ uni mo be.

⁴¹ Ishaya oki gwo yansan haali/ a'di mishki monyacam piti mo dhali o gwo gom a'di mo be.

⁴² Bahili 'kwani ka ris isi uni gun ta gi moshirr mo tani gamki a'di gwo is mo, hili gom monḡko/ is gom 'Kwani Parisiyiin mo tani uni 'koki pi gwo mo be, isi ciki/ uni minu 'taki ur ka pije/ 'peni gu'b gi montul is buni mo be.

⁴³ Haali/ uni enki montak 'peni 'kwani mo mmodhal montak 'peni Arumgimis e i is mo.

Gwo ma Yesus jin Midi Ta Gwo gi Dwalli 'Kwani mo

⁴⁴ Dhala Yesus cuuki'd kagahara dhali o gwo mo ki: A'diyin jin gamki aha/ gwo is mo tani diki gam aha/ gwo is jasi 'te/ mo, hili a'di gamki a'di jin hashki aha/ gwo is mo be.

⁴⁵ Dhali a'di jin parki aha/ e mo tani parki a'di jin hashki aha/ e mo.

⁴⁶ Aha/ pu'dkina mo mmota monkush ma 'cesh yan mo ki a'diyin jin midigam gwo is e aha/ mo tani mididi diki tikir di mo e mondhurumi'd mo be.

⁴⁷ Wakki/ wathin tal 'deŋ kamu/ cik gwo jin oka/ mo dhali diki dhu uni mo tani aha/ dinaki dwall a'di gwo mo, haali/ aha/ dinaki pu'du/ mo mmodwall 'kwaniny'cesh gwo mo, hili mmowoth 'kwaniny'cesh mo be.

⁴⁸ A'diyin jin ushki aha/ mo dhali diki bu'th gwom pem jin oka/ mo tani a'di ta gi jan tal 'deŋ kamu/ jin mididi dwall a'di gwo mo. Gwo jin oka/ mo tani a'di mididi ta gwon dwall piti ka cim jin 'ko'd mo.

⁴⁹ Haali/ aha/ dinaki o gwo 'peni moshirr pem gana/ mo. Ababa jin hashki aha/ mo tani a'di ki is piti ciki aha/ gwonkan jin 'kwarkunu mo gom gwo jin miga/ i/o mo dhali gwo jin miga/ itor mo.

⁵⁰ Dhali aha/ misha gwonkan piti jin 'kwarkunu mo ki a'di ta gwo gi mondiki/e ki sule/ sule/ ya ye 'ba/ mo. A'di jin oka/ mo tani okika/ me'd jin kankin ma Baba aha/ gwo mo be.

13

Yesus Lamki Imancik A'di Gwo Sho'k mo

¹ Dhali n'wa/a/ ki mo jin yukuwa yuk ka tul 'kup ki Mompe'kupanyolos mo tani a'Yesus mishki'd ki mom piti pu'dki'd mo jin mina a'di ya mo 'peni mony'cesh yansan e com mo tani, a'di enki kum piti kun 'kokin e mony'cesh yansan mo, a'di enki uni ntagi 'pemen mo be.

² Dhali ki tonte/ muru shwa mo tani ki tapa ma ruma 'cesh 'baarki gwo kar mo eya du ma Yahuusa Iskariyuuti mo, a'di jin ta ya/ ma Simaan mo mmo'cith a'di is ki gwo mo tani,

³ Yesus mmomishkina a'di ki Com ciki'da ris to 'baar mo e me'd piti mo dhali mmopu'dkina a'di 'peni Arungimis mo dhali mmomina a'di doka Arungimis ka nyan'ko'd mo tani

⁴ a'di cuki mis mo 'peni tonte/ mo, dhali a'di 'cukki burrinyem pom piti mo mmokara 'cesh mo dhali a'di ki dek burrinye/ gi imanmiya tu'c e empa'd piti mo.

⁵ Dhali yan'ko'd a'di ki wol yi'de/ e bwam ma sahan mo dhali tel mii 'pen mo mmolam imancik a'di gwo sho'k mo dhali shumut uni sho'k ki burrinye/ gi imanmiya tu'c jin hitha a'di e empa'd mo be.

⁶ A'di pu'dki'da Simaan Buterus mo dhala Simaan Buterus ki o a'di gwo mo ki: Tapa, /e mini lam aha/ sho'k pem 'taa?

⁷ Yesus ki thok a'di gwo mo ki: To jin miiga/ shwane/ tani dina /e ki mish mo, hili n'ko'd mo tani /e mini mish gwo yan 'ban mo be.

⁸ Buterus ki thok a'di gwo mo ki: /E mini diki lam aha/ sho'k pem ki sule/ sule/ mo ba/. Yesus ki thok a'di gwo mo ki: Wakki/ aha/ dinaki lam /e mo tani /e diki ta gi monkamu/ e aha/ mo be.

⁹ Simaan Buterus ki thok a'di gwo mo ki: Tapa, jasi sho'k pem 'te/ yisa, hili me'd pem si'da/ mo dhali 'kup mo be.

¹⁰ Yesus ki thok a'di gwo mo ki: Adiyin jin upkunu mo tani mididi mii diki mii ta gi mo jin minu lam a'di mo isi ciki/ jasi sho'k piti mo, hili a'di dheelki'd ka 'kup kulu/ mo be. Dhali um dheelkin mo tani, hili yisa uni 'baar mowa.

¹¹ Haali/ a'di mishki a'di jin mididi 'cith a'di is ki gwo mo. A'di i/ona a'di gwo gi wakan mo ki: Umi 'baar mo yisa idheleladhelel mo.

¹² Ki a'di lamki uni sho'k buni mo tani dhali a'di bu'thki burrinyem piti ka nyan'ko'd mo dhali ca'b e mom piti mo, dhali a'di ki o uni gwo mo ki: Um mishi 'pemen miin gwo yansan jin miiga/ gom un mowa?

¹³ Um yukki aha/ ka Mantor Gwo dhali ki Tapa mo. Dhali miim bum 'boro'd be haali/ aha/ wana kan mo be.

14 Wakki/ aha/ wana kan mmota Tapa mo dhali Amantor Gwom bum mo lamki um sho'k mo tani um si'da/ ka ba/ imini lam sho'k ka gam 'kup mo be.

15 Haali/ aha/ cikina um she/um mii mo ki um si'da/ mini 'taki mii mii me'd aha/ mo me'd jin miika/ gom um mo be.

16 Ka jin gana/, ka jin gana/ aha/ tora um gwo mo ki cinjina/ yisa ica'd ki tapam piti mo yisa, walla a'di jin hashu mo tani yisa ica'd ki a'di jin hashki a'di mowa.

17 Wakki/ um mini mish gwo gwansan mo tani mom'bor mii 'te/ ba/ gom um mo wakki/ um mini mii uni mo be.

18 Aha/ dinaki tor gwo gom umi 'baar mo. Aha/ misha uni gun kwanyka/ mo, a'di jin mina Gwo ma Arumgimis jin 'kwarkunu mo ki a'di minu thim moyi ki: A'di jin shwaki maam pem a'di 'de'kki 'penatinjilan sho'k piti apo/ aha/ mo.

19 Aha/ tora um gwo shwane/ ntwa/a/ mo ki mo diki bu'th mo mo, wakki/ a'di ki bu'th mo mo tani um ki gam gwo is ki aha/ tana a'di mo be.

20 Ka jin gana/, ka jin gana/ aha/ ona um gwo mo ki: A'diyin jin midi bu'th jan tal 'denj kamu/ 'peni bwam uni kun hashka/ mo tani a'di bu'thki aha/ mo, dhali a'di jin bu'thki aha/ mo tani a'di bu'thki a'di jin hashki aha/ mo be.

Mo jin Minu 'Citha/ Yesus Is ki Gwo mo Torkina A'di Itwa/a/ mo

21 AYesus oki gwo wakansan mo tani a'di murkin ma du mo e shi/in mo dhali te gwo shoka 'cesh mo ki: Ka jin gana/, ka jin gana/ aha/ ona um gwo mo ki: Jan tal 'denj kamu/ 'peni um midi 'cith aha/ is ki gwo mo be.

22 Dhali imancik gwo uni sugkin ki e ka rem 'kup mo mmomolkina uni wathi/ jin okina a'di mo be.

23 Jan tal 'de/ 'peni imancik a'di gwo mo a'di jin enkin ma Yesus mo mmo/ ishkina a'di ki 'dishe/ eya bor ma Yesus mo be.

24 Wakan Simaan Buterus wukki a'di ki 'kup aman mo dhali o gwo mo ki: Tori aman wathi/ jin okina /e mo ma.

25 Wakan mmo/ishkina a'di abor ma Yesus ki 'dishe/ mo tani a'di ki o a'di gwo mo ki: Tapa kaja sa/?

26 Yesus ki thok gwo mo ki: A'di ta a'di jin miga/ cika gabul maanj'kuthu'd yan mo ki aha/ mina 'thupki a'di mo be. Wakan ki a'di 'thupki a'di agabul maanj'kuthu'd mo tani a'di ki ciki a'di ka Yahuusa jin ta ya/ ma Simaan Iskariyuuti mo be.

27 Dhali yan 'ko'd ka gabul maanj'kuthu'd mo tani Setaan seki'da dum piti mo. Yesus ki o a'di gwo mo ki: A'di jin mura /e imii mo tani miyi a'di ki jahanne/ mo ma.

28 Dhali jan tal 'denj kamu/ jin di'da tharabeesa yisa mishki 'pemen gwowa, kata okina a'di a'di kan mo.

29 Kun tiya toshkin haali/ Yahuusa ta'd ga jisilaan ma guurush mo tani on ka Yesus torki a'di gwo mo ki: Yoli tonte/ kun mina ana mii ta goma yuk jin yuku ka tul 'kup mo, walla ki a'di midi 'taki ci to gom 'kwani kun hatha'ko'd mo be.

30 Wakan 'ko'da gabul maanj'kuthu'd jin bu'thkina a'di mo tani a'di ki jahanne/ yaki'd ka pije/ mo, dhali mo ta mondhurumi'd mo be.

Gwojkan Ta jin This jin 'Kwarkunu mo

31 Ki a'di yaki'd ka pije/ mo tani Yesus ki o gwo mo ki: Shwane/ Ya/ gi 'Kwani karkunu ca eya tente/ mo, dhali e a'di mo tani Arumgimis karkunu ki ca mo be.

32 Wakki/ Arumgimis karkunu ki ca mo e a'di mo tani Arumgimis si'da/ minu kar ki ca mo e is piti mo dhali midi kar a'di ki ca hila/ mo be.

³³ Ushi uciya, aha/ dina um jasi ari'ceenne/ mo. Um mini n̄ap aha/ mo dhali me'd jin okika/ 'Kwani Yahuuda/ gwo mo, wakan si'da/ tani shwane/ aha/ ona um gwo mo ki: Mo yin jin miga/ ya icine/ mo tani mina um mol iiyu/ icine/ mo be.

³⁴ Gwoŋkan jin ta jin this jin 'kwarkunu mo tani a'di cikika/ um mo ki um mini en ka rem 'kup mo, isi me'd jin enka/ um moyi, ki um si'da/ mini en ka rem 'kup mo be.

³⁵ Gom 'kup mii yansan kan mo tani aris 'kwani ka ris mini mish ki um ta imancik gwom pem mo wakki/ um enen ka rem 'kup mo be.

Mo jin Wat ma Buterus Gwo mo Torkunu Itwa/a/ mo

³⁶ Simaan Buterus ki o a'di gwo mo ki: Tapa, ki mana imina /e iya mo? Yesus ki thoŋ a'di gwo mo ki: Mo yin jin miga/ ya mo tani /e mini mol aha/ bathi sho'k shwane/ mo. Hili /e mini bath aha/ nsho'k n'ko'd mo be.

³⁷ Buterus ki o a'di gwo mo ki: Tapa, jan ta imiga/ mol /e bathi sho'k shwanetan mo? Aha/ mina kar mondiki/em pema 'cesh gom /e mo be.

³⁸ Yesus ki thoŋ a'di gwo mo ki: A/e mini kar mondiki/em pini a'cesh gom aha/? Ka jin gana/, ka jin gana/ aha/ tora /e gwo mo ki: Ka dhongola n̄wa diki ko e mo tani ntagi /e mini wat aha/ gway me'di kwara mo be.

14

Yesus Ta Bway Tagi Com mo

¹ Dhalku/ki dhu adum bum ki mur mo ma. Gami um gwo is eya Arumgimis mo dhali gami aha/ gwo is si'da/ mo.

² E gu'b ma Babam pem mo tani mo jin minu 'ko tana ris mo. Wakki/ a'di midi 'taki diki wakan mo tani a/miga/ 'taki tor um gwo ki aha/ yana ya mo mmothoson mo gom uma?

³ Dhali ki aha/ mina ya mo dhali thoson um mo tani aha/ mina doku/ dok/e dhali 'do um nyakki aha/ mo ki mo yin jin miga/ di nycine/ mo tani a'di imina umi 'ko si'da/ mo be.

⁴ Dhali mo yin jin yakika/ iya mo tani misha um mo dhali bway misha um si'da/ mo be.

⁵ Tuuma ki o a'di gwo mo ki: Tapa, aman 'konaki mish mo jin yana /e iya mo. I/aman misha bway imana?

⁶ Yesus ki thoŋ a'di gwo mo ki: Aha/ tana bway dhali gwon gana/ dhali mondiki/e mo. Wathin tal 'denj kamu/ midi diki yayu/ eya Baba, hili jasi e aha/ mo be.

⁷ Wakki/ um mini 'taki mish aha/ mo tani um mini 'taki misha Babam pem si'da/ mo be. 'Peni shwane/ um mishki a'di mo dhali um parki a'di e mo be.

⁸ Pilibbus ki o a'di gwo mo ki: Tapa, tor am Ababa i e mo ma, dhali aman minu te mo be.

⁹ Yesus ki o a'di gwo mo ki: Aha/ dina i /e ki rash rash kan mo dhali dina /e ki mish aha/ naskina/ Pilibbus? A'di jin parki aha/ e mo tani parki'da Baba e mo. Ba kata ona /e ki: Tor am Ababa i e mo?

¹⁰ Dina /e ki gam gwo is ki aha/ dina eya Baba dhali Ababa di'd e aha/ 'taa? Gwo kun oka/ um mo tani aha/ dinaki o a'di ki moshirr pem gana/ mo. Hili Ababa jin ca'bki'd e aha/ mo tani a'di miiki miim piti mo be.

¹¹ Gami aha/ gwo is mo ki aha/ dina eya Baba mo dhala Ababa di'd e aha/ mo, walla gami aha/ gwo is gom gway gi mii mo 'te/.

¹² Ka jin gana/, ka jin gana/ aha/ ona um gwo mo ki a'di jin gamki aha/ gwo is mo tani midi mii mii si'da/ kun miika/ mo, dhali mii kun can ki gwansan mo tani mina a'di imii mo haali/ aha/ yana ya Ababa mo be.

13 Ma to yin jin mina umi doṭ ki gway pem mo tani aha/ mina mii a'di mo, ka Baba minu kar ca eya tente/ e Ya/ mo be.

14 Waḱki/ um mini doṭ aha/ ton tiya ki gway pem mo tani aha/ mina mii uni mo be.

Gwo jin Onu Is gom Shi/in Dheleladhelel mo

15 Waḱki/ um eni aha/ mo tani um mini dhu gwoṅkan pem kun 'kwarkunu mo be.

16 Dhali aha/ mina doṭa Baba mo dhali a'di mididi ɔi uma Manmalasa kamu/ mmodi e um ki sule/ sule/ mo be,

17 isi a'diyi jin ta Shi/in gi gwoṅ gana/ mo, a'di jin molkina 'kwaniny'cesh bu'th mo haali/ uni 'koki mish a'di mo walla 'koki nyiṭh a'di mo. Um mishki a'di mo haali/ a'di ɔa'bki'd nyaḱki um mo dhali mididi di e um mo be.

18 Aha/ mina diki dhal um ka dhipa mo. Aha/ mina yayu/ i um mo be.

19 Shini naskina/ dhali 'kwaniny'cesh mini 'koki par aha/ e dok/ e mo. Hili um mishki aha/ mo. Haali/ aha/ dina ki e mo tani um si'da/ mini 'ko ki e mo be.

20 Ka cim ɔaan tani um mini mish ki aha/ dina eya Babam pem mo dhali um e aha/ mo dhali aha/ e um mo be.

21 A'di jin ta gi gwoṅkan pem kun 'kwarkunu mo dhali jin dhu uni mo tani a'di be ita ji gi eni aha/ mo be. Dhali a'di jin eni aha/ mo tani a'di min ma Babam pemi en mo dhali aha/ mina en a'di mo dhali ɔor a'di is pem i e eya tente/ mo be.

22 Yahuusa a'di jin ta'da Iskariyuuti yisa, a'di ki thok a'di gwo mo ki: Tapa, kata a'di imina /e itor is pini eya tente/ e am mo dhali diki ɔor 'kwaniny'cesh mo?

23 Yesus ki thok a'di gwo mo ki: Waḱki/ wathi/ mididi en aha/ mo tani a'di mididi dhu gwom pem mo, dhali Ababam pem mididi en a'di mo, dhali aman mina iiyu/ mo i a'di mo dhali mii moṅ'kom bam nyaḱki a'di mo be.

24 A'diyin jin diki en aha/ mo tani diki dhu gwom pem mo. Dhali gwo yin jin ɔika um mo tani diki ta jim pem mo, hili ta jim ma Baba jin hashki aha/ mo be.

25 Gwo gwansan ɔorkika/ um mo ki aha/ dina e um naskina/ mo be.

26 Hili ka Manmalas jin ta Shi/in Dheleladhelel mo, a'di jin min ma Babam pem hashu/ ki gway pem mo tani a'di mididi ɔor um gwo 'baar mo dhali mididi ka um gwo e 'baar mo kun ɔorkika/ um mo be.

27 Moṅku'th is dhalkika/ um mo. Moṅku'th is pem ɔikika/ um mo. Yisa me'd jin ɔinu 'kwaniny'cesha, aha/ ɔikina um a'di mo. Dhalka dum bum ki dhu ki mur mo walla dhalku/ ki dhu uni ka ko/ is mo.

28 Um ɔikki gwo mo jin oka/ ki: Aha/ yana ya mo dhali aha/ mina idoku/ i um mo. Waḱki/ um eni aha/ mo tani um mina bwa 'taki 'kuny mo haali/ aha/ yana Ababa mo, haala Baba a'di ekki'd mmobol aha/ e mo be.

29 Dhali shwane/ aha/ ɔorkina um gwo nṭwa/a/ mo ki mo diki bu'th mo mo naskina/. Wakan ki a'di mididi bu'th mo mo tani um mini gam gwo is mo be.

30 Aha/ mina diki ɔa'b mmotor um gwo ki rash rash mo haali/ tapa gi mony'cesh yan pu'dki'd mo. A'di dar gi mom'bi'th apo/ aha/ mo be.

31 Hili aha/ miikina to me'd jin kankin ma Baba aha/ gwo mo, wakan ki 'kwaniny'cesh mini 'taki nyiṭh ki aha/ ena Ababam pem mo. Cuyi mis mo. Dhalki ana iina imun mo.

¹ Aha/ tana cwalman gana/ mo dhali Ababam pem a'di ta'da mankor mo be.

² Arisa bim pem kun dak dho'th mo tani uni 'citha/ a'di mo mmo'do ka pije/ mo, dhali arisa bi kun dho'th maman mo tani a'di ki thoson mo dhali 'cith mo ki uni mini dho'th maman ki nyanye/ mo be.

³ Um dhelelkin mo hila/ ki gwo jin torkika/ um mo be.

⁴ Koyi e aha/ mo ma dhali aha/ e um mo. Me'da biny cwa jin moli maman dho'th ki is piti mo isi ciki/ a'di midi mii di e cwalman mo, wakan um si'da/ isi ciki/ um mini 'ko e aha/ mo be.

⁵ Aha/ tana cwalman gana/ mo, dhali um a'di itana bi mo. A'diyin jin ca'bki'd e aha/ mo dhali aha/ e a'di mo tani a'di be jin dhothi maman kagahara mo, haali/ ki dar gi aha/ mo tani um moli tonj kamu/ mii mo be.

⁶ Wakki/ wathi/ diki ca'b e aha/ mo tani a'di bitu ka pije/ me'da biny cwa mo dhali a'di ki ku'th mo dhala binycwa tulkunu is mo mmota'k i o'd mo, dhali o'd ki shwa mo be.

⁷ Wakki/ um 'kon e aha/ mo dhali gwom pem 'kon e um mo tani doti ma to yin jin ona bwa um mo dhali a'di minu mii gom um mo be.

⁸ Ki 'kup mii yan kan mo tani Ababam pem karkunu ki ca mo mmodho'thkina um maman kagahara mo, dhali wakan um ki nyo/ mii mo mmota imancik aha/ gwo mo be.

⁹ Me'd jin enkin ma Baba aha/ mo tani wakan si'da/ aha/ enkina um mo. Koyi e mo/en pem mo ma.

¹⁰ Wakki/ um dhu gwonkan pem kun 'kwarkunu mo tani um mini 'ko e mo/ en pem mo, me'd jin dhukika/ gwonkan ma Babam pem mo kun 'kwarkunu mo dhali ca'b e mo/en piti mo be.

¹¹ To gwansan torkika/ um mo ki mon'kuny bwam pem midi di e um mo dhali ki bwarj 'kunygam bum minu 'tu'd mo be.

¹² Gwo yansan a'di ta gwonkan pem jin 'kwarkunu mo ki um mini en ka rem 'kup mo me'd jin enkika/ um mo be.

¹³ Mo/en jin ca'da kamu/ yisa di'da e wathiny'cesha kamu/ jin wakansan mo jin mina wathi/ kar mondiki/em pitiya 'cesh gom ikam piti mo be.

¹⁴ Um ta ikam pem mo wakki/ um ki mii gwo kun kankika/ um mo be.

¹⁵ Aha/ yisa dikina mmoyuk um ki cinjina/ haali/ cinjina/ diki mish to jin miina tapam piti mo be. Hili aha/ yukkina um ki ikam pem mo haali/ aris to kun cikika/ 'pena Babam pem mo tani aha/ torkina um uni eya tente/ mo be.

¹⁶ Um 'koki kwany aha/ mo tani hili aha/ ikwanykina um mo dhali dhu um mo ki um mini 'taki 'ko mo dhali dho'th maman mo dhali ki maman bum mini 'taki 'ko mo. Wakan ki ma to yin jin mina um dota Baba ki gway pem mo tani a'di midi ciki um uni mo be.

¹⁷ Gwo yansan kankika/ um mo ki um mini en ka rem 'kup mo be.

'Kwaniny'cesh Shi/kina Shi/i E mo

¹⁸ Wakki/ 'kwaniny'cesh shi/i um i e mo tani um ki mish mo ki uni shi/ki aha/ i e ntwa/a/ mo dhali uni mini shi/ um i e mo be.

¹⁹ Wakki/ um mini 'taki ta ku gi 'kwaniny'cesh mo tani 'kwaniny'cesh mini 'taki ena en gom kum buni mo, hili haali/ um 'koki ta ku gi 'kwaniny'cesh mo haali/ aha/ kwanykina um mo 'peni 'kwaniny'cesh mo tani a'di ishi/kina 'kwaniny'cesh umi e kan mo be.

²⁰ Kayi gwo e jin torka/ um mo ma ki cinjina/ yisa ica'd ki tapam pitiya. Wakki/ uni to'cki aha/ 'kus mo tani uni si'da/ mini to'c um 'kus mo. Wakki/ uni mini dhu gwom pem mo tani uni si'da/ mini dhu gwom bum mo be.

²¹ Hili aris to gwansan mina uni mii mo gom gway pem mo haali/ uni 'koki mish a'di mo, a'di jin hashki aha/ mo be.

²² Wakki/ aha/ mina 'taki diki pu'du/ mo dhali o uni gwo kan mo tani uni mini 'taki dar gi miinthus mo ba/. Hili shwane/ uni dar gi gwo mmoçi miinthus buni 'ko'd mo be.

²³ A'diyin jin shi/ki aha/ i e mo tani shi/ki'da Babam pemi e si'da/ mo be.

²⁴ Wakki/ aha/ mina 'taki diki mii to ibwam uni, mii jin dina jan tal 'deñ kamu/ ki mii mo tani uni mini 'taki dar gi miinthus mo. Hili shwane/ uni parki mo e mo dhali shi/ aha/ i e mmontal 'de/ nyakka Ababam pem mo be.

²⁵ A'di ta gwo jin minu thim moyi jin 'kwarkunu mo e gwonkan buni jin cikunu mo ki: Uni shi/ki aha/ i e ka kar 'kup mo be.

²⁶ Hili ka Manmalas midi pu'du/ mo a'di jin miga/ hashu/ i um 'pena Baba mo tani isi a'diyi jin ta Shi/in gi gwon gana/ mo a'di jin piyi'd 'pena Baba mo, a'di midi ta Man/o gwo gom aha/ mo be.

²⁷ Dhali um si'da/ mini ta iman/o gwo mo haali/ um nyakki 'ko ki aha/ 'peni ka mun'kup mo be.

16

¹ Aha/ okina ris to 'baar mo e um mo mmonon um 'peni mo jin minu kol um mo be.

² Uni mini ur um ka pije/ 'peni gu'b gi montul is mo. Ka jin gana/, mo midi pu'du/ mo ki a'diyin jin midi 'kosh um mo tani midi tosh ki a'di mii to mmoluña a'diya luñ goma Arungimis mo.

³ Dhali uni mini mii mii yansan haali/ uni 'koki misha Baba mo walla aha/ mo be.

⁴ Hili aha/ okina to gwansan e um mo, ki mom buni mini pu'du/ mo tani um ki ka gwo e ki aha/ torkina um uni mo be.

Mii gi Shi/in Dheleladhelel mo

Aha/ dinaki o gwo gwansan 'peni ka mun'kup mo haali/ aha/ dikina nyakki um mo be.

⁵ Hili shwane/ aha/ yana ya e a'di jin hashki aha/ mo. Hili jan tal 'deñ kamu/ 'peni um diki doñ aha/ gwo mo ki: /É yani ya mana mo?

⁶ Hili haali/ aha/ torkina um gwo gwansan mo tani bwan diti'd 'tu'dki uma dum bum mo be.

⁷ Bahili aha/ torkina um gwon gana/ mo. A'di ta shi/ miim 'boro'd bum mo jin miga/ ya mo haali/ wakki/ aha/ dinaki ya mo tani Amanmalas midi diki yayu/ i um mo. Hili wakki/ aha/ yana mo tani aha/ mina hashki a'di i um mo be.

⁸ Dhali ki a'di midi pu'du/ mo tani a'di midi pucur 'kwaniny' cesh ki gwo mo gom miinthus mo dhali gom mo ma kar/e mo dhali gom gwo jin minu dwall mo be.

⁹ Gom gwo gi miinthus mo haali/ uni 'koki gam gwo is e aha/ mo be.

¹⁰ Gom mii ma kar/e mo haali/ aha/ yana ya Ababa mo, dhali um mini 'koki par jis/em pem e mo be.

¹¹ Gom gwon dwall mo haali/ tapa gi mony' cesh yansan a'di torkunu gwon dwall 'twa/a 'cesh mo be.

¹² Hili aha/ tana gi gwon tiya ka ris mmo/o um mo tani hili um mol uni bu'th shwane/ mo be.

¹³ Ki Shi/in gi gwon gana/ midi pu'du/ mo tani a'di midi shu um bway eya ris gwon gana/ 'baar mo. Haali/ a'di midi diki tor gwo gi moshirr ki is piti mo. Hili ma to yin jin mina a'di cik mo tani a'di mina a'di itor mo dhali a'di midi tor um eya tente/ to kun mini pu'du/ mo be.

¹⁴ A'di midi kar aha/ ki ca mo haali/ a'di midi bu'th jim pem mo dhali tor um a'di eya tente/ mo be.

¹⁵ Aris to 'baar mo kun ta ku ma Baba mo tani uni ta kum pem mo. A'di oka/ gwo mo wakan ki: A'di midi bu'th jim pem mo dhali tor um uni eya tente/ mo be.

Mondit Bwa Midi War ki Mon'kuny Bwa mo

¹⁶ Shini naskina/ dhali um mini 'koki par aha/ e dok/e mo. Dok/e shini naskina/ dhali um mini par aha/ e mo be.

¹⁷ Kun tiya 'peni imancik a'di gwo oki gwo ka rem 'kup mo ki: Gwonta okina a'di ana kan mo ki: Shini naskina/ dhali um mini 'koki par aha/ e mo dhali dok/e, shini naskina/ dhali um mini par aha/ e mo, dhali, haali/ aha/ yana iya Ababa mo?

¹⁸ Uni oki gwo mo ki: 'Pemen gwo yansan wakata jin ona a'di ki: Shini naskina/. Aman 'konaki mish 'pemen gwo jin ona a'di mo.

¹⁹ Yesus nyithki'd ki uni ona bwa ki dot a'di mo tani a'di ona a'di uni gwo mo ki: A/gom gwo yan a'di idotkina um gwo ki is bum mo jin oka/ 'pemen piti ki: Shini naskina/ mo dhali um mini 'koki par aha/ e mo, dhali dok/e, shini naskina/ mo dhali um mini par aha/ e mowa?

²⁰ Ka jin gana/, ka jin gana/ aha/ ona um gwo mo ki: Um mini ko mo dhali ko ki kony jabu'th mo, hili 'kwaniny'cesh uni imina bwa i'kuny mo. Um a'di imina bwa iditadit mo, hili bwani ditid bum midi war ki mon'kuny bwa mo be.

²¹ Ka 'bom shwan ma 'ci mo tani ayim dita bwa mo haali/ ayim pu'dki'di mom piti mo. Hili ka yim ki dhotha 'ci mo tani ayim yisa di'di moka gwo e mo goma nyor pitiya, gom bwani 'kunyud mo ka 'ci dho'thkunu mo e mony'cesh mo be.

²² Wakan um ditkina bwa shwane/ mo, hili aha/ mina par um e dok/e mo dhali adum bum minu 'tu'd ki mon'kuny bwa mo dhali wathin tal 'denj kamu/ yisa di'da jin midi bu'th mon'kuny bwa yan 'peni um mo be.

²³ Dhali ka tee caan mo tani um mini 'koki dot aha/ gwondota kamu/ mo. Ka jin gana/, ka jin gana/ aha/ ona um gwo mo ki: Wakki/ um mini dot tonj kamu/ 'pena Baba mo tani a'di midi ciki um uni ki gway pem mo be.

²⁴ Ntagi shwanesan mo tani um 'koki dot tonj kamu/ ki gway pem mo. Doti mo ma dhali um mini bu'th to mo ki mon'kuny bwam bum minu 'tu'd mo be.

Aha/ Pikina Mony'cesh E ki Mii mo

²⁵ Aha/ okina gwo yansan e um ki jim pok mo. Mo midi pu'du/ mo ki aha/ mina diki dok/e tor um gwo ki jim pok mo, hili aha/ mina tor um gwo ka ji sho'k goma Baba mo be.

²⁶ Dhali ka tee caan mo tani um mini dot ki gway pem mo. Dhali aha/ dinaki o um gwo mo ki aha/ mina dot Ababa gom um mo.

²⁷ Haali/ Ababa ki is piti enki um mo haali/ um enki aha/ mo dhali gamki gwo is ki aha/ pu'dkina 'pena Baba mo be.

²⁸ Aha/ pikina 'pena Baba mo dhali aha/ pu'dkina i 'kwaniny'cesh mo be. Dok/e aha/ mura idhal 'kwaniny'cesh 'pen mo dhali ya Ababa mo be.

²⁹ Imancik a'di gwo o gwo mo ki: Ayy, shwane/ /e torki gwo shoka 'cesh mo, yisa ki ari gwonj kamu/ jin poka /eya.

³⁰ Shwane/ aman misha ki /e mishkina ris to 'baar mo dhali /e mini mii diki ta gi jan tal 'denj kamu/ mmodot /e gwo mo. Gom 'kup mii yan mo tani aman gamkina gwo is ki /e pu'dkin 'peni Arumgimis mo be.

³¹ Yesus ki thok uni gwo mo ki: A/gwo gama um is shwane/ mowa?

³² Mo midi pu'du/ mo. Ka jin gana/ a'di pu'dki'd mo ki um minu ceker bwa mo, aris umi 'baar mo e gu'b bum ka 'dete/ 'dete/ mo dhali um mini dhal aha/

aha/ 'de/ mo. Hili aha/ dina aha/ 'de/ yisa, haali/ Ababa a'di nya^{kk}i di ki aha/ mo be.

³³ Aha/ okina gwo yansan e um mo ki e aha/ mo tani um mini ta gi mon^{ku}'th is mo. E mony' cesh yan mo tani um mini gam mon^{to}'c bwa mo, hili ro^{ci} shoka 'cesh 'te/ ma, haali/ aha/ pikina mony' cesh yansan e ki mii mo be.

17

Yesus 'Thoki'd mo gom Imancik A'di Gwo mo

¹ Ka Yesus 'baarki gwo gwansan mmo/o mo tani a'di 'de'k^{ki} em piti 'kup ki momis mo dhali o gwo mo ki: Ababa, mo pu'd^{ki}'d mo. Kari /e Ya/m pini ki ca mo ki Ya/m pini si'da/ midⁱ kar /e ki ca mo be.

² Me'dyin jin cikina /e a'di mom'bi'th apo/ bungwar is mo mmo^{ci} mon'koki/ e ki sule/ ya ye 'ba/ mo e uni gun cikina /e a'di mo be.

³ Dhali mon'koki/e ki sule/ sule/ ya ye 'ba/ mo a'dan be, ki uni mini mish / e mo, ki /e tana Arumgimis gana/ /e 'de/ ki lish mo, dhala Yesus K^{rist}hos, a'di jin hashkina /e mo be.

⁴ Aha/ karkina /e ki ca mo e mony' cesh yansan mmothimkika/ atu'c jin cikina /e aha/ mmomii mo be.

⁵ Dhali shwane/ Ababa, kari /e aha/ ki ca e buⁿ'kus pini mo ma, a'di jin ta monyca jin nya^{kk}a/ ki /e ntwa/a/ ki mony' cesh yansan dinuki u^k mo be.

⁶ Aha/ torkina gway pini eya tente/ e 'kwaniny' cesh mo, uni gun cikina /e aha/ 'peni 'kwaniny' cesh mo. Uni ta kum pini mo dhali /e cikⁱ uni aha/ mo dhali uni dhuki gwom pini mo be.

⁷ Shwane/ uni mishkin ka ris to 'baar mo kun cikina /e aha/ mo tani uni 'peni /e mo be.

⁸ Haali/ aha/ cikina uni gwo kun cikina /e aha/ mo dhali uni bu'thki uni mo dhali mish ka jin gana/ ki aha/ pikina 'peni /e mo, dhali uni gamki gwo is ki /e a'di ihashki aha/ mo be.

⁹ Aha/ dikina mmo'tho mo gom uni mo. Aha/ yisa dina mmo'tho gom 'kwaniny' cesh gwansan mo, hili gom uni gwansan kun cikina /e aha/ mo haali/ uni ta kum pini mo be.

¹⁰ Aris kum pemi 'baar mo tani uni ta kum pini mo be. Dhali kum pini ta kum pem mo dhali aha/ karkunu ki ca e uni mo be.

¹¹ Dhali shwane/ aha/ mina diki di i mony' cesh yan mo, hili uni a'di i'koni mony' cesh yan mo, dhali aha/ yakina iya i /e mo. Ababa, /e jin k^ogu mo, dhuyi uni ma e gway pini mo uni kun cikina /e aha/ mo, ki uni mini tal 'de/ mo isi me'd jin tal ana 'de/ mo be.

¹² Ki aha/ dikina uni naskina/ mo tani aha/ dhukina uni ki gway pini mo, uni kun cikina /e aha/ mo. Aha/ jikina uni mo dhali jan tal 'denj kamu/ 'peni uni yisa thisu e mowa, hili jasi ya/ gi a'di jin da^{ku} gwo me'd mo, ki Gwo ma Arumgimis jin 'kwarkunu minu thim moyi.

¹³ Hili shwane/ aha/ yakina iya i /e mo, dhali gwo gwansan torkika/ 'kwaniny' cesh mo ki uni mina bwa 'kuny mo mmo'tu'd uni ki is buni mo.

¹⁴ Aha/ cikina uni gwom pini mo dhali 'kwaniny' cesh shi/ki uni i e mo haali/ uni 'koki ta ku gi mony' cesh mo, isi me'dyin dika/ ki ta ji gi mony' cesh mo be.

¹⁵ Aha/ dinaki 'tho ki /e mini 'taki bu'th uni 'peni mony' cesh mo, hili ki /e mini 'taki dhu uni 'peni a'din thus 'deyin mo.

¹⁶ Uni 'koki ta ku gi mony' cesh mo, isi me'dyin dika/ ki ta ji gi mony' cesh mo be.

¹⁷ Dhagami uni ki gwoⁿ gana/ mo. Gwom pini ita gwoⁿ gana/ mo be.

¹⁸ Me'd jin hashkina /e aha/ i mony' cesh mo tani wakan si'da/ aha/ hashkina uni mo e mony' cesh mo be.

¹⁹ Dhali gom gway buni mo tani aha/ dhagamkina is pem mo, ki uni si'da/ minu dhagam e gwoj gana/ mo be.

²⁰ Aha/ dinaki 'tho gom uni gwansan uni 'cena mo, hili si'da/ gom uni gwansan kun mini gam aha/ gwo is i'ko'd mo e gwom buni mo be,

²¹ Ki uni 'baar mo mini tal 'de/ mo, isi me'dyin /e jin tana Baba dikin e aha/ mo, dhali aha/ e/e mo, ki uni si'da/ mini 'ko e ana mo, wakan ki 'kwaniny' cesh mini gam gwo is ki /e hashki aha/ mo be.

²² Dhali monyca yin jin cikina /e aha/ mo tani aha/ cikina uni a'di mo ki uni mini tal 'de/ mo isi me'd ana mmoṭala ana 'de/ mo be.

²³ Aha/ e uni mo dhali/e e aha/ mo ki uni minu gam is ki gam gana/ mmoṭal 'de/ mo, wakan ki 'kwaniny' cesh mini mish ki /e a'di ihashki aha/ mo dhali/e enki uni mo isi me'dyin jin enkina /e aha/ mo be.

²⁴ Ababa, aha/ ona bwa si'dayi ki uni gwansan kun cikina /e aha/ mo mini nyak 'ko ki aha/ mo e mo yin jin miga/ di mo, mmpar monycam pem e mo, a'di jin cikina /e aha/ mo ki mo/en pini gom aha/ mo ntwa/a/ ki mony'cesh yan dinuki ka'b mo be.

²⁵ Ayy Ababa jin ta'da kar/e mo, 'kwaniny' cesh 'koki mish /e mo, hili aha/ mishkina /e mo, dhali uni gwansan imishkin ki /e a'di ihashki aha/ mo be.

²⁶ Aha/ ṭorkina uni gway pini i e mo dhali aha/ mina kar a'di eya tente/ mo, ki mo/en caan jin enkina /e aha/ mo tani mididi e uni mo dhali aha/ e uni mo be.

18

Mo jin 'Cithuwa 'Cith Is ki Gwo mo dhali Mo jin Budhuwa Yesus mo

¹ Ka Yesus daki gwo gwansan o mo tani a'di yaki'd ka piye/ mo nyakki imancik a'di gwo mo mmo'cith embul wosh ma Gidruun mo e mo yin jin dikina monsinu mo, a'di jin cikina a'di nyakki imancik a'di gwo mo be.

² Dhala Yahuusa a'di jin 'cithki a'di is ki gwo mo si'da/ mishki mo mo haala Yesus yaki'di mun me'd ka ris mo nyakki imancik a'di gwo mo be.

³ Wakan Yahuusa a'di cikunu i/askar kun tulu 'kup mo, uni gun dhuun mo mmoji mo mo, dhali kun tiya kun tana imanji mo mo si'da/ 'peni igasiis kun can mo dhali 'Kwani Parisiyin mo, dhali uni iikin mo ka lamba/ ime'd mo dhali dhantho/ mo dhali to kun asu mo.

⁴ Dhali yan'ko'd Yesus mishki'da ris to gwansan kun mini pu'du/ i a'di mo tani dhali a'di yaki'd ka karambuye/ mo dhali o uni gwo mo ki: Kaja ṇapa um mo?

⁵ Dhali uni ki thoḡ a'di gwo mo ki: Yesus gi Pa Naasira mo. Yesus ki thoḡ uni gwo mo ki: Aha/ a'dan jin tana a'di mo. Dhala Yahuusa jin 'cithki a'di is ki gwo mo tani doshki'd nyakki uni mo be.

⁶ Ki a'di oki uni gwo mo ki: Aha/ tana a'di mo tani, uni iikin ka cinj'ko'd mo dhali tagkina 'cesh mo be.

⁷ Dok/e a'di ki doṡ uni gwo mo ki: Kaja a'di inapa um mo? Dhali uni ki thoḡ a'di gwo mo ki: Yesus gi Pa Naasira mo.

⁸ Yesus ki thoḡ gwo mo ki: Aha/ ṭorkina um gwo mo ki: Aha/ a'dan jin tana a'di mo. Waḡki/ um ṇapi aha/ kan mo tani dhalki 'kwani gwansan iin mo ma.

⁹ A'di ta gwo jin thimkunu moyi jin okina a'di mo ki: 'Peni uni gwansan kun cikina /e aha/ mo tani aha/ dinaki this jan tal 'dej kamu/ e mo be.

¹⁰ Dhali yan'ko'd Buṭerus ta'd gi dhan gandala turga/ mo dhali a'di ki buḡ a'di mo dhali ruṡhun cinjina/ ma gasiis jin ca'd mo dhali 'cith a'di 'ce ma bim poros piti mo. Dhali cinjina/ yan yuku gway ka Malkus mo be.

¹¹ Yesus ki owa Buṭerus gwo mo ki: Dwari gandala turgam pini e 'kumpum piti mo. Miga/ diki piya kubbaaya jin cikin ma Baba aha/ mo 'taa?

Yesus Suskunu mo Ibwambor ma Gasiis jin Ca'd mo

¹² Wakan i/askar dhala mancil ma askar alip buni mo dhali imanji mo mo 'peni 'Kwani Yahuuda/ mo uni bu'thkina Yesus mo dhali deƙ a'di mo be.

¹³ Ntwa/a/ uni ki sus a'di eya Hannaan mo haali/ a'di ta'da mar ma Kayaapa mo, a'di jin ta'da gasiis jin ca'd gi yil caan mo be.

¹⁴ A'di ta'da Kayaapa jin logomki 'Kwani Yahuuda/ ki gwo mo ki a'di ta shi/ miim 'boro'd jin mina wathin tal 'deƙ kamu/ 'taki wu mo gom 'kwani mo be.

Buterus Waƙi'da Yesus Gway mo be

¹⁵ Simaan Buterus bathki'da Yesus nsho'k mo dhali amancik a'di gwon kamu/ si'da/ mo. Dhali amancik gwo yan a'di mishkin ma gasiis jin ca'd mo dhali gom mii gi wakan mo tani a'di ciƙi bwaagon ma gasiis jin ca'd mo nyaka Yesus mo be,

¹⁶ ka Buterus di'di modosh naskina/ e 'twaƙala gon mo be. Wakan amancik gwo yan jin mishkin ma gasiis jin ca'd mo yaki'd ka piƙe/ mo dhali ƙora ƙora ki nyarany cinƙina/ jin hili 'twaƙala gon mo dhali susa Buterus bwaman mo mo.

¹⁷ Dhali nyarany cinƙina/ jin hili 'twaƙala gon mo tani o'da Buterus gwo mo ki: /E si'da/ diki ta amancik wathi/ yansan gwo mo 'taa? A'di ki o gwo mo ki: Aha/ yisa tana a'diya.

¹⁸ Dhali uni kun ta cinƙina/ dhali imanji mo mo tani uni 'thaki o'da 'cila'th mo haali/ mo 'thupa'thup mo, dhali uni 'kokin mo mmosam is buni i o'd mo. Dhala Buterus si'da/ nyakki di ki uni mo mmodoshkina a'di mo dhali mmosam is piti i o'd mo be.

Gasiis jin Ca'd Dotki'da Yesus Gwo mo

¹⁹ Dhali yan'ko'd agasiis jin ca'd dotki'da Yesus gwo mo gom imancik a'di gwo mo dhali gom gwo jin ƙora a'di mo be.

²⁰ Yesus ki thoƙ a'di gwo mo ki: Aha/ ƙorkina 'kwaniny'cesh gwo eya tente/ isa yempa/ mo dhali aha/ ƙorkina gwo isa yempa/ e gu'b gi montul is mo dhali e gu'b gi mondheleladhelel mo, e mo yin jin tulkina 'Kwani Yahuuda/ isi 'baar mo mmotal 'de/ mo. Aha/ dinaki ƙora gwon kamu/ ka kwal is mo.

²¹ /E doti aha/ gwo janta mo? Doti uni gwansan kun cik aha/ gwo mo ma, gwo jin okika/ uni mo. Uni mishi gwo kun oka/ mo be.

²² Ki a'di oki gwo gwansan mo tani jan tal 'de/ 'peni imanji mo mo jin doshki'd ki 'dishe/ mo tani dorki'da Yesus ki me'd piti mo dhali o gwo mo ki: Eeh. A/e thoƙkina gasiis jin ca'd gwo mo kana?

²³ Yesus ki thoƙ a'di gwo mo ki: Waƙki/ aha/ ƙutha gwo o mo tani ƙori gwo jin ƙu'thka/ mii mo. Hili waƙki/ aha/ ona gwo ka ƙar/e mo tani atinta dorkina /e aha/ mo?

²⁴ Dhali yan'ko'd Hannaan ki hash a'di eya gasiis jin ca'd ki mondeƙ is mo be.

Buterus Waƙi'da Yesus Gway mo Dok/e

²⁵ Dhala Simaan Buterus a'di diki'di modosh ki mis mo dhali mmosam is piti i o'd mo. Dhali uni ki o a'di gwo mo ki: /E si'da/ diki ta amancik a'di gwo mo 'taa? A'di waƙi gwo mo dhali o gwo mo ki: Aha/ yisa tana a'diya.

²⁶ Dhali cinƙinan tal 'deƙ kamu/ 'peni uni ma gasiis jin ca'd jin ta'da abas gi wathi/ jin 'ciƙh ma Buterus 'cem piti mo tani dotki a'di gwo mo ki: Dika/ ki par /e e mo nyakki a'di e bwam monsinu mowa?

²⁷ Dok/e Buterus waƙi gwo mo, dhali ki jahanne/ adhonƙola nƙa gwoki e mo be.

Yesus Diki'd Ibwambor ma Bilaatus mo

²⁸ Yan'ko'd uni ki susa Yesus mo 'peni gu'b ma Kayaapa mo e mo jin ca'b ma mudhiir nycine/ mo. A'di ta mon'thamo/ ka 'tum mo. Uni ki is buni 'koki ciç mo jin din ma mudhiir nycine/ mo, wakan ki uni minu 'taki 'koki nyo/ is mo, hili jin mina uni 'taki shwa to gi Mompe'kupanyolos mo be.

²⁹ Wakan aBilaatus yaki'd ka pije/ e uni mo dhali o gwo mo ki: Gom 'kup gwo gi wakatinta iyerkina um wathi/ yan is ki gway mo?

³⁰ Uni ki thoç a'di gwo mo ki: Wakki/ wathi/ yansan midi 'taki diki ta jin thus ki thus mo tani aman mina 'taki 'koki ci a'di wakan mo be.

³¹ Bilaatus ki thoç uni gwo mo dhali o gwo mo ki: Susi um a'di ki is bum mo dhali dwalli a'di gwo mo ki gwo jin ta jin kan bum mo. Dhali 'Kwani Yahuuda/ thoçki a'di gwo mo ki: A'di diki ta mii jin dhala gwoñkan am bway mo mmokar jan tal 'deñ kamu/ 'kupa 'cesh mo mmowu mo ba/.

³² A'di yansan miikunu mo mmothim gwo moyi jin okin ma Yesus mmoçor gwo mo gom wu jin mina a'di wu mo be.

³³ Bilaatus ciçki'd e mo ma mudhiir ka nyan'ko'd mo dhali yuka Yesus mo dhali o a'di gwo mo ki: Ki /e de itana Malik gi 'Kwani Yahuuda/ mo de?

³⁴ Dhala Yesus ki thoç gwo mo ki: /E si'da/ on kan e bwam pini mo 'taa? walla 'kwanin tiya a'di itorki /e gwo gom aha/ mo?

³⁵ Bilaatus ki thoç a'di gwo mo ki: Aha/ tana Wathi/ Yahuudaa? 'Kwani gi kal pini dhali igasiis kun can mo uni ciçi /e ki aha/ mo. Ki tonta imiikina /e mo sa/?

³⁶ Yesus ki thoç a'di gwo mo ki: Bampam pem jin taka/ tapa mo tani diki ta ji gi mony'cesh yansan mo. Wakki/ mom pem jin taka/ tapa mo midi 'taki di e mony'cesh yansan mo tani ciñkinam pem mini 'taki as mo, ki aha/ minu 'taki 'koki ci 'Kwani Yahuuda/ mo. Hili mom pem jin taka/ tapa mo tani yisa 'peni mony'cesh yana.

³⁷ Bilaatus ki thoç a'di gwo mo ki: Ba /e be itana malik mo 'te/ ise be. Yesus ki thoç gwo mo ki: /E be i/on ki aha/ tana amalik mo be. Haali/ gom 'kup mii yan mo tani aha/ dho'thkunu mo dhali gom 'kup mii yan mo tani aha/ pu'dkina e 'kwaniny'cesh mo mmoçor gwo ki gwoñ gana/ mo. Aris 'kwani 'baar mo ka 'dete/ 'dete/ uni gun ta 'kwani gi gwoñ gana/ mo tani uni ciçki 'twam pem mo be.

³⁸ Bilaatus ki o a'di gwo mo ki: Ki gwoñ gana/ atinta jan?

Yesus Torkunu Gwo 'Twa/a 'Cesh mo Mmowu mo

'Ko'd a'di oki gwo gwansan mo tani a'di yaki'd ka pije/ e 'Kwani Yahuuda/ dok/e mo dhali ÷or uni gwo mo ki: Toñ kamu/ yisa gamkika/ e a'di jin miga/ yer a'di is ki gway mo.

³⁹ Hili um tan gi mii mo ki aha/ mina 'taki 'cuç ki um wathin tal 'de/ gom um ka cim gi Mompe'kupanyolos mo. Um ona bwa ki aha/ mina 'cuçki uma Malik gi 'Kwani Yahuuda/ mo 'taa?

⁴⁰ Uni cuun kagahara dok/e mo mmo/o gwo mo ki: Wathi/ yansan yisa, hila Baraabas mo. Dhala Baraabas a'di ta wathi/ jin ta'da mandil to mo be.

19

¹ Dhali yan'ko'd Bilaatus ki budha Yesus mo dhali dor a'di ki yisbip mo be.

² Dhali i/askar uni to'di toñ'kup 'pena 'de/ mo dhali kar a'di i 'kup piti mo dhali uni ki hi'th a'di burrinyen duç is mo.

³ Uni pu'dkini a'di mo mmo/o gwo mo ki: Hayy, Malik gi 'Kwani Yahuuda/! Dhali uni ki dor a'di ki me'd buni mo be.

⁴ Bilaatus a'di yaki'd ka pije/ dok/e mo dhali o uni gwo mo ki: Hili mo mo ma. Aha/ suskina um a'di ka pije/ mo ki um mini mish ki aha/ dinaki gam toñ kamu/ e a'di jin miga/ yer a'di is ki gway mo be.

⁵ Wakan aYesus a'di yaki'd ka pije/ mo mmohi'th ton'kup ma 'de/ mo dhali burrinyen duk is mo, dhala Bilaatus ki o uni gwo mo ki: Wathi/ a'dahan mo be.

⁶ Ki igasiis kun can mo dhali imanji mo mo parki a'di e mo tani uni kumki cuuwa/ kagahara mo mmo/o gwo mo ki: 'Koshi a'di ki cwany'cithan dhul mo. 'Koshi a'di ki cwany'cithan dhul mo. Dhala Bilaatus ki o uni gwo mo ki: Guyi um a'di ki is bum mo dhali 'koshi a'di ki cwany'cithan dhul mo haali/ aha/ dinaki gam ton kamu/ e a'di jin miga/ yer a'di is ki gway mo be.

⁷ 'Kwani Yahuuda/ ki thok a'di gwo mo ki: Aman tana gi gwonkan jin cikunu mo dhali ki gwonkan jin cikunu mo tani a'di ka ba/ imidi wu moyi, haali/ a'di kar is piti mmota Ya/ ma Arungimis mo be.

⁸ Ka Bilaatus cikki gwo gwansan mo tani a'di ko/ki is kagahara mo be.

⁹ A'di cikki mo ma mudhiir dok/e mo dhali owa Yesus gwo mo ki: Ki/e 'peni mana sa/? Hila Yesus ci a'di gwon thoka kamuwa?

¹⁰ Wakan Bilaatus ki o a'di gwo mo ki: /E mini diki thok aha/ 'twaa? Dina /e ki mish ki aha/ tana gi mom'bi'th mo mmo'cuik /e mo dhali tana gi mom'bi'th mo mmo'kosh /e ki cwany'cithan dhul mo?

¹¹ Yesus thok a'di gwo mo ki: /E mini 'taki dar gi mom'bi'th apo/ aha/ mo, hili isi ciki/ a'di jin ciyunu /e 'peni momis mo. Wakan si'da/ a'di jin ciki /e aha/ mo tani a'di cana miinthus mo be.

¹² 'Peni mo yan mo tani Bilaatus napki bway mo mmo'cuik a'di mo, hili 'Kwani Yahuuda/ kumki cuuwa/ mo mmo/o gwo mo ki: Wakki/ /e mini dhal wathi/ yan me'd mo tani /e yisa tana mugu ma Kaysara. Haali/ aris 'kwani 'baar mo ka 'dete/ 'dete/ kun dhu is buni ka malik mo tani uni dhu is buni apowa Kaysar mo be.

¹³ Ka Bilaatus cikki gwo yansan mo tani a'di suski'da Yesus ka pije/ mo dhali a'di ki ca'ba 'cesh apowa kursi jin dwallu gwo mo e mo ma 'cesh jin yukkunu gway ka A'cesh jin Rusu Mmoçi Jamas mo dhali jin ta 'twan 'Kwani Ibraniyiin ka Jabbaatha mo be.

¹⁴ Dhali a'di ta'da tee jin Thosonkunu to mo gom Mompe'kupanyolos mo, dhali a'di ta'da tente/ ibwan'kup mo be. A'di ki o 'Kwani Yahuuda/ gwo mo ki: Amalik bum a'dan mo be.

¹⁵ Dhali uni kumki cuuwa/ mo mmo/o gwo mo ki: A'di ka bor 'de/ mo. A'di ka bor 'de/ mo. 'Koshi a'di ki cwany'cithan dhul mo. Bilaatus ki o uni gwo mo ki: Miga/ 'kosha Malik bum ki cwany'cithan dhula? Dhali igasiis kun can mo thok a'di gwo mo ki: Aman 'konaki ta ga malika kamu/ mo ba/, hila Kaysar a'di 'de/ mo be.

¹⁶ Dhali yan'ko'd a'di ki ciki a'di ki uni mo mmo'kosh ki cwany'cithan dhul mo be.

Mo gi 'Koshuwa 'Kosh ki Cwany'cithan Dhul mo

¹⁷ Wakan uni bu'thkina Yesus mo dhali a'di yaki'd ka pije/ mo mmo'kal cwany'cithan dhul pitin gana/ mo e mo jin yukkunu gway ki mo ma siman'kup mo, a'di jin yukkunu gway ki 'twan 'Kwani Ibraniyiin mo ka: Gulgutha mo be.

¹⁸ Uni ki 'kosh a'di ki cwany'cithan dhul imun mo dhali 'kwanin sun tiya si'da/ nyakkunu 'kosh ki a'di mo, jan tal 'denj kamu/ ki 'bana kamu/ mo, dhali jamu/ ki 'bana kamu/ mo dhala Yesus ibwamani uni mo be.

¹⁹ Bilaatus si'da/ a'di 'kwarki gwo mo dhali kari 'kup cwany'cithan dhul mo, a'di jin denjunu e mo ka: Yesus gi Pa Naasira, jin ta'da Malik gi 'Kwani Yahuuda/ mo.

²⁰ 'Kwani Yahuuda/ ka ris denjki gwo yansan e mo jin 'kwarkunu mo haali/ mo jin 'koshkunuwa Yesus ki cwany'cithan dhul mo tani a'di 'dishki

'penkuman bampa/ is mo dhali a'di 'kwarkunu ki 'twan 'Kwani Ibraniyiin mo dhali ki 'twan 'Kwani Ithaliyaan mo dhali ki 'twan 'Kwani Griki mo be.

²¹ Dhali yan'ko'd igasiis kun can gi 'Kwani Yahuuda/ mo okina Bilaatus gwo mo ki: Dhalku/ gwo ki 'kwar mo mmo/o ka: Malik gi 'Kwani Yahuuda/ mo, hili, 'kwari gwo mo mmo/o ki: Wathi/ yansan o'd ki: Aha/ tana aMalik gi 'Kwani Yahuuda/ mo be.

²² Bilaatus tho'kki gwo mo ki: A'di jin 'kwarka/ mo tani 'kwarkika/ mo be.

²³ Dhali ki i/askar mmo'koshkina uniya Yesus ki cwany'cithan dhul mo tani uni ki bu'th burrinyem piti mo dhali pwa'k a'di bwa mo she donon mo, jan tal 'de/ goma askar ki she/ she/ mo. Hili burrinyem bwaman piti jin uku ki dar gi mosh mo, miikunu mo 'peni 'ba/ tagi bum'pen mo be.

²⁴ Wakan uni oki gwo ka rem 'kup mo ki: Dhalkina ki dher a'di bwa mo, hili ana ki bit to mo gom a'di mo ki ana mina par e mo ki a'di midi ta jim maja mo. A'di ta gwo jin thimkunu moyi me'd gwo jin 'kwarkunu mo e Gwo ma Arungimis mo ki:

Uni kwa/ki burrinyem pem bwa mo e bwam uni mo,
dhali gom burrinyem pem mo tani to tagkina uni mo be.

²⁵ Wakan i/askar uni miiki to yansan mo. Hili uni kun doshkin ki 'dishe/ e cwany'cithan dhul ma Yesus mo tani ta a'di jin ta kum mo dhali 'bwaham gi kum mo be, dhala Mariyam jin ta ash ma Kiluuba mo dhala Mariyam Magdaliyya mo.

²⁶ Ka Yesus parki kum e mo dhali amancik a'di gwo jin ena a'di kagahara jin doshki'd ki 'dishe/ mo tani a'di ki o kum gwo mo ki: A'boma, hili ya/m pini mo ma.

²⁷ Dhali yan'ko'd a'di ki owa mancik a'di gwo gwo mo ki: Hili kwan mo ma. Dhali 'peni mo caan mo tani amancik a'di gwo suski'da yim bway gu'b pitin gana/ mo be.

Jwa ma Yesus mo

²⁸ 'Ko'di mo yansan mo tani Yesus mmomishkina a'di ka ris to 'baar mo ki uni 'baarkunu mo tani oki gwo mo (mmothim Gwo moyi jin 'kwarkunu mo) ki: Aha/ butha yi'de/ mo be.

²⁹ Dhali toj'kul bwan kamu/ diki'd mo jin 'tu'dkunu mo ki yiman tom'paca'd mo. Wakan uni ki paca lipa/ mo mmo'tu'd a'di ki yiman tom'paca'd mo dhali kar a'di e cwa jin wana e ki cwa ma 'tasha jal bip mo dhali kar a'di e 'twam piti mo be.

³⁰ Ka Yesus bu'thki yiman tom'paca'd mo tani a'di ki o gwo mo ki: A'di 'baarki'd mo, dhali a'di ki lu'j 'kup piti mo dhali ci shi/in piti mo be.

Gwar ma Yesus Su'kkunu mo

³¹ Me'd jin tana a'di atee jin Thosonkunu to mo, ki bu'ngwar is mini 'taki 'koki 'ko apo/ cwany'cithan dhul ka cim ma pesu/ mo (haali/ acim ma pesu/ caan ta'da cim jin eka/ ek mo) tani 'Kwani Yahuuda/ dotkina Bilaatus 'twa/ mo ka yorom buni minu 'taki 'ce'd mo dhali ki uni minu 'taki kal mo be.

³² Wakan i/askar uni pu'dkin mo dhali 'ce'da yoro gi a'di jin twa/a/ mo dhali ji gi a'din kamu/ jin nyakkunu 'kosh ki cwany'cithan dhul ki a'di mo.

³³ Hili ki uni pu'dkina Yesus mo dhali par a'di e mo ki a'di wuki'd hila/ mo tani uni 'koki 'ce'da yorom piti mo be.

³⁴ Hila askara 'den kamu/ su'kki a'di gwar ka mee mo dhali ki jahanne/ abas guski'd mo dhali yi'de/ mo be.

³⁵ A'di parki a'di e mo tani a'di oki gwo mo be - gwom piti jin torkina a'di mo tani ta gwo'j gana/ mo dhali a'di mishki'd ki a'di torki gwo'j gana/ - ki um si'da/ mini gam gwo is mo be.

³⁶ Haali/ to gwansan uni bu'thki mo mo mmothim Gwo ma Arungimis jin 'kwarkunu moyi ki: Asiman tal 'deŋ kamum piti minu 'koki 'ce'd mo be.

³⁷ Dhali dok/e Gwo ma Arungimisa kamu/ jin 'kwarkunu mo o gwo mo ki: Uni mini hil a'di mo a'di jin su'kkina uni mo be.

Mo jin Kanuwa Yesus mo

³⁸ 'Ko'di mii yansan mo tani Yuusup gi Pa Arraama, a'di jin ta'da mancika Yesus gwo mo, hili ki kup mo, haali/ a'di ko/ki 'Kwani Yahuuda/ mo, dhali a'di dotki'da Bilaatus 'twa/ mo ki a'di midi 'taki kal bungwar is ma Yesus mo dhala Bilaatus dhalki a'di bway mo be. Wakan a'di pu'dki'd mo dhali kal bungwar is piti mo be.

³⁹ Nikudimus si'da/ a'di jin yayi'di a'di ntwa/a/ mon'thiny mo, a'di pu'dki'd mo mmokal yiman cwa jin yuku ka murr jin 'koshi e ki yiman cwaŋ kamu/ jin wana e ka 'kwaŋan mo, a'di jin kuyi mo ki kuy mo, dhali jin baru ka raŋul iss 'kwanimpa imudhe'd mo be.

⁴⁰ Uni ki kal bungwar is ma Yesus mo dhali 'tam a'di is ki burrinyen dhiny e mo dhali to kun kuyi mo ki kuy mo me'd mii jin miina 'Kwani Yahuuda/ mo mmokana kan mo be.

⁴¹ Dhali e mo jin 'koshkunu a'di ki cwany'cithan dhul nycine/ mo tani bwam monsinu di'd mo dhali e monsinu mo tani jis jwa jin ta jin this diki'd mo jin dinuki kar wathin kamu/ nycine/ naskina/ mo be.

⁴² Wakan haali/ a'di ta'da tee gi 'Kwani Yahuuda/ jin Thosonkunu to mo dhali gom jis jwa 'disha'dish mo tani uni ki kara Yesus imun mo be.

20

Mompi jin Piyunu mo

¹ Dhali ka cim jin twa/a/ ka dhas mo tani Mariyam Magdaliyya pu'dki'd mo e moŋ'kupaje ka 'tum mo ki mo di'd ki mondhurum naskina/ mo dhali a'di parki wosh e ki a'di ka'ckunu hila/ 'peni jis jwa mo be.

² Wakan ayim guski'd mo dhali ya mo eya Simaan Buterus mo dhali amancik a'di gwoŋ kamu/ mo, a'din 'de/ yin jin en ma Yesus mo, dhali o uni gwo mo ki: Uni kalki Tapa 'peni jis jwa mo dhali aman 'konaki mish mo jin karkina uni a'di nycine/ mo.

³ Dhali yan'ko'd Buterus pu'dki'd ka pije/ mo nyakka mancik a'di gwoŋ kamu/ mo dhali uni sokin ka karambuye/ 'kup ki jis jwa mo be.

⁴ Dhali uni sokin mo, hila mancik gwoŋ kamu/ a'di bolki'da Buterus sho'k mo dhali jidhir e jis jwa ntwa/a/ mo be.

⁵ Dhali a'di tuki mo mo mmohil bwaman mo dhali a'di parki jasi burrinyen dhiny e e mo mmo/ishi mom buni mo, hili a'di diki ya bwaman mo be.

⁶ Dhali yan'ko'd Simaan Buterus pu'dki'd mo mmobath a'di nsho'k mo dhali a'di yaki bwany jis jwa mo dhali a'di ki par burrinyen dhiny e e mo mmo/ish mo be,

⁷ dhali burrinye/ jin dekkunu a'di i'kup piti mo tani yisa nyakki ish ki burrinyen dhiny e mo, hili a'di 'kucki is mo e mom piti mo be.

⁸ Dhali yan'ko'd amancik gwoŋ kamu/ a'di jin jidhirki'di jis jwa ntwa/a/ mo tani a'di si'da/ seki bwaman mo dhali a'di mishki mo mo dhali gam gwo is mo be.

⁹ Haali/ uni 'koki mish Gwo ma Arungimis jin 'kwarkunu mo naskina/ ki a'di midi mii pi 'peni mowu mo be.

¹⁰ Dhali yan'ko'd imancik a'di gwo uni dokki bway pam buni mo be.

Yesus Piki'da Mariyam Magdaliyya I/Is mo

11 Hila Mariyam doshki'd mo mmoko mo apije/ 'peni jis jwa mo dhali me'd jin gwokin ma yim mo tani ayim ki tu mo mo dhali par jis jwa e mo be.

12 Dhali ayim parki iman'doyu gwo su/ e ki bany bany mo mmo'ko e mo yin jin 'thikunu bunjwar is ma Yesus mo, jan 'de/ diki'di bunj'kup piti mo dhali jan kamu/ e busho'k piti mo be.

13 Uni ki owa yim gwo mo ki: A'boma, atinta gwokina /e kan mo? Ayim ki thok'uni gwo mo ki: Haali/ uni kalki Tapam pem mo dhali aha/ mola mo jin karkina uni a'di nycine/ mo be.

14 Mmo/ona a'di gwo kan mo tani ayim ki tuga bor mo dhali para Yesus e mo mmodosh mo, hili ayim diki mish a'di ki a'di ta'da Yesus mo be.

15 Yesus ki owa yim gwo mo ki: A'boma, atinta gwokina /e kan mo? Dhali aja inapkina /e mo? Dhali a'di toshki'd ki a'di ta'da manhil bwaman monsinu mo. Ayim ki o a'di gwo mo ki: Tapa, wakki/ /e kalki a'di mo tani tori aha/ mo jin 'thikina /e a'di nycine/ mo dhali aha/ mina kal a'di mo be.

16 Yesus ki owa yim gwo mo ki: Mariyam. Ayim ki tu'k 'ban mo dhali o a'di gwo ki 'twarj 'Kwani Ibraniyiin ki: Rabbooni (a'di jin ta 'pemen gwo jin onu mo ka: Mantor Gwo mo be).

17 Yesus ki owa yim gwo mo ki: Dhalku/ ki peyaa/ i is mo haali/ aha/ dinaki seya Baba naskina/ mo. Hili yaku/ e iwak pem mo dhali o uni gwo mo ki: Aha/ sena se Ababam pem mo dhali Ababam bum mo, dhali eya Arumgimis pem mo dhali eya Arumgimis bum mo be.

18 Mariyam Magdaliyya yaki'd mo dhali o imancik a'di gwo gwo mo ki: Aha/ parkina Tapa e ka pinya/ em pem mo be. Dhali ayim tor'ki uni gwo mo ki a'di tor'ki'da ris to gwansan eya yim mo be.

Yesus Piki Imancik A'di Gwo I/Is mo

19 Dhali ki mo ta mom'pimpili/ mo ka tee caan mo jin ta'da cim jin twa/a/ ka dhas mo tani acampur gu'bi 'baar mo 'kokin ki mu'th mo e mo jin 'kokina imancik a'di gwo nycine/ mo haali/ uni ko/ki 'Kwani Yahuuda/ mo. Dhala Yesus pu'dki'd mo dhali doshi bwam uni mo dhali o uni gwo mo ki: Mon'ku'th is midi di e um mo.

20 Ki a'di oki gwo yansan mo tani a'di ki tor uni me'd piti i e mo dhali gwar piti mo be. Dhali yan'ko'd imancik a'di gwo 'kunykina bwa mo mmoparkina uni Tapa e mo be.

21 Yesus ki o uni gwo dok/e mo ki: Mon'ku'th is midi di e um mo. Me'd jin hashkin ma Baba aha/ mo tani isi kan si'da/ aha/ hashkina um mo be.

22 Dhali ki a'di oki gwo yansan mo tani a'di shi'inki'da po/ uni mo dhali o uni gwo mo ki: Budhi Shi'in Dheleladhelel mo ma.

23 Wakki/ um gwamki miinthus gi cin tiya mo tani uni gwamkunu mo, dhali wakki/ um 'koki gwam miinthus gi cin tiya mo tani uni 'konuki gwam mo be.

A Tuuma jin Dar gi Monjam Gwo Is mo

24 Dhala Tuuma a'di jin ta jan tal 'de/ 'peni uninj 'kume'd i'ce'dka su/ mo, a'di jin yuk'kunu gway ka 'ci jin dhodhu isu/ mo tani a'di diki di i uni me'd jin pu'dkin ma Yesus mo be.

25 Wakan imancik a'di gwon tiya tor'ki a'di gwo mo ki: Aman parkina Tapa e mo. Hili a'di ki o uni gwo mo ki: Isi ciki/ aha/ mina 'taki para du'd ma musmaar e mo e me'd piti mo dhali dwar me'd pem e jisan ma musmaar mo dhali dwar me'd pem e gwar piti mo tani aha/ mina diki gam gwo is mo be.

26 Acim pekwara n'ko'd mo tani imancik a'di gwo 'kokini bwanj gu'b dok/ e mo, dhala Tuuma nyak'ki di ki uni mo. Dhali acampur gu'bi 'baar mo 'ko ki

mu'th mo. Hila Yesus pu'dki'd mo dhali doshi bwam uni mo dhali o gwo mo ki: Mon'ku'th is midi di e um mo be.

²⁷ Dhali yan'ko'd a'di ki owa Tuuma gwo mo ki: Kari me'd pini imahan mo dhali pari me'd pem e mo, dhali hethi me'd pini mo dhali dwari a'di e gwar pem mo. Dhalku/ ki di ki dar gi gwo jin gamu is kan mo, hili gami gwo is mo ma.

²⁸ Tuuma thok a'di gwo mo ki: Tapam pem dhali Arungimis pem.

²⁹ Yesus ki o a'di gwo mo ki: A/gwo gama /e is mo haali/ /e parki aha/ e mo? Mom'bor mii 'te/ be gom uni gwansan kun mini gam aha/ gwo is mo ki uni 'koki par aha/ e naskina/ mo be.

Gwo jin 'Dapa'd ki 'Dap Gana/ mo

³⁰ Dhala Yesus mii'da ris miimera tiya ka ris mo ibun'kusi imanci' a'di gwo mo, uni kun 'konuki 'kwar eya warika/ yansan mo be.

³¹ Hili mii gwansan uni 'kwarkunu mo ki um mini gam gwo is ka Yesus ta'da Kristhos mo, a'di jin ta Ya/ ma Arungimis mo, dhali ki um mini tikir gwo gam is mo dhali tikir mon'koki/e gam mo e gway piti mo be.

21

Yesus Piki Imanci' A'di Gwo Pesu/ I/is mo

¹ 'Ko'di mii yansan mo tani aYesus a'di torki is piti eya tente/ dok/ e e imanci' a'di gwo e shemen ma Al ma Thabariyya mo, dhali a'di torki is piti wakansan mo be.

² Simaan Buterus dhala Tuuma a'di jin yuk'kunu ka A'ci jin dhodhu isu/ mo dhala Nathana/iil gi Pan Kaana e Pany Jaliil mo, dhali iya/ ma Sabadi isu/ mo dhali imanci' a'di gwon tiya isu/ mo, uni 'kon mmon'tal' de/ mo be.

³ Simaan Buterus ki o uni gwo mo ki: Aha/ yana ya mo mmocesh to yi'de/ mo. Dhali uni ki o a'di gwo mo ki: Aman mina ii nyak'ki /e mo. Uni iikin mo dhali se bwa'kur mo. Hili ki mon'thiny caan mo tani uni 'koki bu'th ton' kamu/ mo be.

⁴ Me'd jin kala mo kush mo tani Yesus doshki'd e shemen ma gap mo. Hili imanci' a'di gwo 'koki mish ki a'di ta'da Yesus mo.

⁵ Yesus ki o uni gwo mo ki: Uciya, a/um ta gi to yi'den tiya 'te/ tana? Uni thok a'di gwo mo ki: Yisa.

⁶ A'di ki o uni gwo mo ki: Bi'ta 'thi/ ki 'bana bim poros ma kur mo dhali um mini gam kun tiya mo be. Wakan uni bit'ki a'di mo dhali shwane/ uni molona 'thi/ dir bway bwa'kur mo haali/ to yi'de/ 'ka'da 'kupa!

⁷ Dhali amanci' a'di gwo jin en ma Yesus mo o'da Buterus gwo mo ki: A'di ta Tapa be. Ka Simaan Buterus cikki gwo ki a'di ta Tapa mo tani a'di hi'thki burrinyem bwaman piti i is mo haali/ a'di di'd ki burrinye/ i empa'd 'te/ goma tu'c mo dhali a'di poshki'da al mo be.

⁸ Hili imanci' a'di gwon tiya uni pu'dkin mo e bwa'kur mo mmodira 'thi/ jin 'tu'da to yi'de/ mo haali/ uni yisa si'dkin 'pena gapa, hili uni ath'kina* nat'gini' de/ mo be.

⁹ Ki uni pikin ka pije/ eya 'cesh mo tani uni parki o'd e jin 'thanu ka 'cila'th imun mo dhali to yi'de/ mmo'ko i o'd mo dhali maan'kuthu'd mo be.

¹⁰ Yesus ki o uni gwo mo ki: Kali to yi'den tiya mo ma kun da'ka bu'thkina um mo.

¹¹ Wakan Simaan Buterus a'di yaki'da kur mo dhali dira 'thiya gap mo a'di jin 'tu'dkina to yi'deny caaga/ mo kun 'koni iss'† 'kwanimpa ipesu/ i'ce'dka

* 21:8 miyyateen duraa/ † 21:11 miyya talaata wa kamsiin

'kume'd i'ce'dka kwara apo/ mo be. Dhali baga ris jin takina uni wakan mo tani a'thi/ yisa 'cithki bwa mowa.

¹² Yesus ki o uni gwo mo ki: Iiyu/ mo ma dhali shwa tonte/ gi mon'thamo/ mo. Hila mancik a'di gwon kamu/ yisa di'd 'de/ jin ro'dki mi mo mmodot a'di gwo mo ki: Ki /e tana ja sa/? Uni nyithkin ki a'di ta Tapa mo be.

¹³ Yesus pu'dki'd mo dhali bu'th maan'kuthu'd mo dhali ciki uni mo dhali to yi'de/ miikina a'di kan si'da/ mo be.

¹⁴ Mii yansan a'di ta mii jin 'kon ma po/i kwara mo jin torkin ma Yesus imancik a'di gwo is piti e eya tente/ mo 'ko'di a'di cukunu mis mo 'peni mowu mo be.

Ciyi Ka'bal Pem Tonte/ mo ma

¹⁵ Ki uni 'baarki tonte/ gi mon'thamo/ mmoshwa mo tani Yesus ki owa Simaan Buterus gwo mo ki: Simaan, ya/ ma Yohaana, a/e eni aha/ mmobol gwansan e mo 'taa? A'di ki thok a'di gwo mo ki: Nye, Tapa. /E mishkin ki aha/ enkina /e mo.

¹⁶ A'di ki o a'di gwo mo ki: Ciyi ushi ka'bal pem to mmoshwa mo. Dok/e me'd jin 'kon ma apo/i su/ mo tani a'di ki o a'di gwo mo ki: Simaan, ya/ ma Yohaana, a/e eni aha/ mo 'taa? A'di ki o a'di gwo mo ki: Nye, Tapa. /E mishkin ki aha/ enkina /e mo. A'di ki o a'di gwo mo ki: Hili ka'bal pem mo ma.

¹⁷ A'di ki o a'di gwo mo me'di kwara ki: Simaan, ya/ ma Yohaana, a/e eni aha/ mo? AButerus suguwa du tash mo haali/ a'di ki o a'di gwo me'di kwara mo ki: A/e eni aha/ mowa? Dhali a'di ki o a'di gwo mo ki: Tapa, /e mishkina ris to 'baar mo dhali /e mishkin ki aha/ enkina /e mo. Dhala Yesus ki o a'di gwo mo ki: Ciyi ka'bal pem to mmoshwa mo.

¹⁸ Ka jin gana/, ka jin gana/ aha/ ona /e gwo mo, me'dyin jin dina /e ki gwa'd mo tani /e ki dek to i empa'd ki me'd pini mo dhali ya me'd jin ona bwa /e mo. Hili ki /e mini ta adhan mo tani /e mini he'th me'd pini mo dhali wathin kamu/ midi dek ki /e to mo dhali ka /e i mo jin mina bwa 'te /e ki ya mo be.

¹⁹ (Gwo yansan ona a'di mmo'or a'di wu jin mina a'di wu mo mmokar monyca ma Arungimis mo.) Dhali 'ko'di gwo yansan mo tani a'di ki o a'di gwo mo ki: Bathi aha/ nsho'k mo ma.

Amancik Gwo jin Enu mo

²⁰ Simaan Buterus tu'kki'd mo dhali par a'di jin bathki uni e mo a'di jin ta'da mancik gwo jin en ma Yesus mo, a'di jin ishki'd eya bor piti mo e tonte/ jin shwakina uni mom'pimpili/ yin mo dhali o a'di gwo mo ki: Tapa, kaja a'di jin midi 'cith /e is ki gwo mo?

²¹ Ka Buterus parki a'di e mo tani a'di ki owa Yesus gwo mo ki: Tapa, gwo gom wathi/ yan wakata mo?

²² Yesus ki o a'di gwo mo ki: Wakki/ a'di ta bwam pem gom a'di jin mina a'di ca'b kan ntagi aha/ mina pu'du/ mo tani yan midi ta ata gom /e mo? Bathi /e aha/ nsho'k mo ma.

²³ Gwo yansan a'di yaki'd ki lala'th mo e bwam uni kun tana a'di awak mo, ka mancik a'di gwo yansan midi diki wu mo. Hila Yesus diki o gwo e a'di ki a'di midi diki wu mo, hili a'di o gwo mo ki: Wakki/ a'di ta bwam pem jin mina a'di ca'b kan ntagi aha/ mina pu'du/ mo tani yan midi ta ata gom /e mo?

²⁴ A'di yansan ta'da mancik gwo jin ta'da man/o gwo gom to gwansan mo dhali a'di i'kwarki gwo gwansan mo. Dhali a'di mishki'd ki gwontor piti jin tora a'di mo tani ta gwon gana/ mo be.

²⁵ Hili ton tiya 'kokin ka ris si'da/ jin miikina ma Yesus mo. Wakki/ aris uni 'baar mo ka 'dete/ 'dete/ minu 'taki 'kwar mo tani aha/ tosha ki isi mony'cesh ki is piti mo midi dar gi mo mo mmodhuwa warka/ kun 'kwarkunu gwo mo kun minu 'taki 'kwar mo be.

Mii gi Imandhunu ki She/ mo

Gwo jin Onu Is gom Shi/in Dheleladhelel mo

¹ Gwo jin 'kwarka/ 'thissa/ Thawupiilus goma ris mii kun tel ma Yesu 'pen mo dhala ris gwo kun tela a'di 'pen mo mmoṭor si'da/

² gama cim jin gunu a'di momis mo 'ko'di gwonkan jin cina a'di ki Shi/in Dheleladhelel ki imandhuna a'di ki she/ mo kun kwanykina a'di mo.

³ 'Ko'di isa nyor piti mo tani Yesu ki tor uni is piti jin di'd ki e eya tente/ ka du'd miinj gana/ ka ris mo. A'di yayi'di pi uni i is ka cim ma issu/ mo be. A'di di'd mmoṭor gwo gom Bampa/ ma Arumgimis mo.

⁴ A'di di'd mmonyak is tul ki uni mmoṭal 'de/ mo dhali a'di ki kan uni gwo mo ki uni mini 'koki ii mo 'peni Pa Urushaliim mo haali/ uni mini cor gwo jin ona Com is jin ona a'di jin cika um 'peni aha/ mo.

⁵ Haala Yohaana ka jin gana/ mii'da mii ki yi'de/ mo tani um mina Shi/in Dheleladhelel mii si'da/ ki 'dishe/ mo be.

Mmoshinkunuwa Yesu Bway Momis mo

⁶ Uni si'da/, ki uni nyakki is tuli moṭal 'de/ mo tani uni doṭki a'di gwo mo mmo/o gwo mo ki: Tapa, /e mini ci bampa/ gi 'Kwani ma Israyiil ka nyan 'ko'd ki mo yansan mo 'taa?

⁷ Dhali a'di ki o uni gwo mo ki: A'di diki ta mom bum mmomish mo mo dhali yil mo uni kun dhun ma Baba a'di 'de/ mo mmoçi gwo ki moshirr pitinj gana/ mo be.

⁸ Hili um mini bu'th mom'bi'th gi Shi/in Dheleladhelel jin midi yayu/ apo/ um mo dhali um mini ta iman/o gwom pem e Pa Urushaliim mo dhali e Bampa/ gi Pa Yahuudiyya 'baar mo dhali e Pan Saamira mo dhali ntagi mo e mony'cesh jin di'd isa dhana/ nnii mo be.

⁹ Dhali ki a'di oki gwo gwansan ki uni 'kon mmohil a'di mo tani a'di 'de'kkunu bway momis mo dhala rak ki bu'th a'di mo, mmoṭik uni e mo be.

¹⁰ Ki uni 'kon mmohil momis ka 'thime/ mo tani hili ma, 'kwaniṅ gwasi su/ kun hi'thki burriyey kush mo doshkin i'ko'd gwari uni mo be.

¹¹ Uni si'da/ o gwo mo ki: Um 'Kwani gi Pany Jalil. Ata hila um momis ka 'thime/ kan mo? Yesu yan jin budhu mo 'peni um mo e bwam momis mo tani a'di midi dok/e yayu/ wakan me'dyan para um a'di e mo mmoya momis mo be.

Amangarr Embul ma Yahuusa jin Kwanykunu mo

¹² Yan 'ko'd uni dokkin e Pa Urushaliim ka nyan 'ko'd mo 'peni Wosh jin yuku ka Setuun jin 'dishi Pa Urushaliim is mo jin wana e ki mo jin mishu ii ka cim ma pesu/ mo be.

¹³ Ki uni sekin mo tani uni iikin 'kup ki mis e gu'b jin nyanu ka makampo/ apowa kamu/ mo, jin 'kona uni nycine/ mo, Buterus dhala Yohaana dhala Yakuub dhala Andaraawus dhala Pilibbus dhala Tuuma dhala Bartulamaawus dhala Matta dhala Yakuub ya/ ma Halpa dhala Simaan El Ghayuur dhala Yahuusa ya/ ma Yakuub mo.

¹⁴ Uni gwansani 'baar mo i'kon mo e gwon tal 'de/ mo mmoroç sho'k ki sule/ e mon'tho mo, uni ki up si'da/ mo dhala Mariyam jin ta KoYesu, uni ki ikam piti ilu/ mo be.

¹⁵ Dhali ka cim gwansan mo tani Buterus doshki'd ki mis mo ibwaman ma wak buni mo dhali o gwo mo ki: (dhala waambuhany 'kwani tul isi montal 'de/ mo uni wana e ki issi* pe'de/ mo be).

¹⁶ Awaƙ pema, a'di minu mii mii mo ki Gwo ma Arumgimis midu pu'du/ mo jin okina Shi/in Dheleladhelel ntwa/a/ ki 'twa/ ma Dawuu'd goma Yahuusa jin ta'da manshu uni bway kun bu'thkina Yesus mo.

¹⁷ Haali/ a'di mishu ki a'din tal 'den kamu/ 'peni bwam ana mo dhali 'ban piti butha a'di si'da/ e mii yan mo.

¹⁸ (Dhali wathi/ yan gam mombunto ki to jin cinu a'di mo gom miinthus piti mo be. Dhali mmobita a'di bwam/em pitiya 'cesh kan mo tani bwam piti 'twakka'd mo dhala 'colem piti 'baar mo tha'thka'd ka pije/ mo be.

¹⁹ Dhali a'di warki'd ki mo jin mishkunu mo e bwan 'kwani gi Pa Urushaliim kagahara mo ki mombunto yan yuku ki 'twam buni ka Akeldama jin o ki: mombunto ma bas mo).

²⁰ Haali/ a'di 'kwarkunu mo eya warka/ ma Masamiir mo ki: Dhalki monyca'b piti warki'd ki mombwamma'du/ mo dhali dhalki wathin kamu/ ki mii dhal bway mo mmoƙa'bi mo yan mo. dhali

Dhalki mom piti butha wathin kamu/ mo.

²¹ A'di mina tal 'den kamu/ mii war ka man/ o gwo nyakki ana mo gom mompinum piti mo tani tal 'de/ 'peni bwan 'kwani kun nyak 'ko ki ana ka cimi 'baar mo ki Tapa Yesus yuthurki'd e bwam ana mo

²² mmoƙel 'pen ka cim jin miin ma Yohaana a'di ki yi'de/ mo ntaga cim jin budhu a'di mo 'peni bwam ana mo.

²³ Dhali uni ki kwany 'kwani isu/ mmoƙor uni eya tente/ mo, Yuusup jin yuku ka Barsaaba jin yuku ki gwaya kamu/ ka Yustus si'da/ uni ka Mattiyaas mo.

²⁴ Dhali uni 'thon mo dhali o gwo mo ki: /En Tapa jin mishki'da dun 'kwani 'baar mo tani tori 'peni bwam uni su/ mo a'din tal 'de/ jin kwanykina /e mo

²⁵ mmobu'th mo mii yan mo dhali mo ma mankar ma Yesus ki she/ yan jin this ma Yahuusa e mo gom a'din gwom piti ki a'di midu ya mo e mom piti mo be.

²⁶ Dhali uni ki bit to gom uni mo tani to bitki'da powa Mattiyaas mo dhali a'di nyaku gway den e ki imandhun ma Yesus gwansan ki she/ kun 'koni 'kume'd i'ce'dka 'de/ mo be.

2

Mmopu'dkina Shi/in Dheleladhelel mo

¹ Dhali ka cim Kamsiin pu'dki'd mo tani aris uni 'baar mo tulki is mo mmontal 'de/ mo.

² Dhali ki jahanne/ ise/ to goyina is mo 'peni momis mo jin wana e ki 'tham jin guski'd mo dhali jin poshki'd kagahara mo. A'di 'tu'd gu'bi 'baar mo jin 'kona uni nycine/ mo.

³ Dhala le'd yayi'd pi uni i is mo mmowa e ki ji o'd mo mmokwa/ bwa mo dhali mmo'ko uni i'kup ka 'dete/ 'dete/ mo be.

⁴ Dhali uni 'baar mo 'tu'dkunu mo ki Shi/in Dheleladhelel mo dhali tel gwo 'pen mo mmowal 'twan tiya mo mmo'bitha Shi/in uni is mo mmowal 'twa/ ki she/ ki she/ mo be.

⁵ Dhali 'Kwani Yahuuda/ kun 'kon e Pa Urushaliim kun iyyin 'peni bampan tiya 'baar mo ki 'beles kun 'kon 'baame'da 'ceshi momis mo. Uni ta 'Kwani Yahuuda/ kun ko/kina Arumgimis mo.

* 1:15 miya wa ishriin

⁶ Ki to yan cik̄kunu mo tani awaambuhany 'kwani tulki isi montal 'de/ mo dhali dumbulkin kagahara mo haali/ aris 'kwani 'baar mo cik̄ki uni 'twa/ mo mmowala uni 'twam buni ki she/ ki she/ ka 'dete/ 'dete/ mo.

⁷ Dhali uni 'baar merkin kagahara mo dhali kulum gwo ibwa mo dhali o gwo mo ki: Hili ma. 'Kona uni ki ta 'Kwani gi Pany Jaliil 'taa aris uni 'baar kun o gwo kana?

⁸ Dhali ana cika gwo, aris ana 'baar ka 'dete/ 'dete/ ki 'twam bana ki she/ ki she/ uni kun dhotha ana manakan?

⁹ 'Kwani gi Pam Partiya mo dhali 'peni Pa Maadi mo dhali Pa Ilaam mo dhali 'kwani kun 'kon e pa ma uka 'cesh jin tana dhan yi' deya kara'b mo dhali Pa Yahuudiyya mo dhali Pan Kappadukiyya mo dhali Pam Puntus mo dhali Pan Asiyya mo.

¹⁰ dhali Pam Parijiyya mo dhali Pam Pampiliyya mo dhali Pam Masir mo dhali ushi bampa/ gi Pa Libiyya mo kun 'kon is 'ko'd 'peni Pan Kerawaan mo dhali yilkina/ 'peni Pa Ruumiya mo kun ta 'Kwani Yahuuda/ mo dhali kun 'koki ta 'Kwani Yahuuda/ mo tani hili gwo ma Arumgimis butha uni mo.

¹¹ 'Kwani gi Pan Kariit mo dhali 'Kwani gi Pa Arab mo. Ana cika gwo mmotora uni gwo ki 'twam bana ki dhan mii ma Arumgimis kun caaca mo.

¹² Dhali uni 'baar mo merkin dhali mol tonj kamu/ mii mo dhali mmo/o gwo mo ka rem 'kup ki: Ata yan wakan mo?

¹³ Hili kun tiya miikin ka mak mo mmo/o gwo mo ki: Uni 'tu'du/ mo ki yimana mura'th jin ta jin this jin ka/u ki nah nah mo be.

Gwo ma Buterus jin Torkina A'di ka Cim Kamsiin mo

¹⁴ Hila Buterus doshki'd ki mis nyak̄ki unin 'kume'd i'ce'dka 'de/ mo dhali a'di 'de'k 'twa/ mo dhali tor uni gwo mo mmo/o gwo mo ki: Um 'Kwani gi Pa Yahuudiyya mo dhali um 'baar mo kun 'kon e Pa Urushaliim mo. Dhalki a'di yan mishu mo e bwam um mo dhali dhuyi 'cem bum mmocik̄ gwom pem mo ma.

¹⁵ Haali/ gwahan 'kon ma su ki 'kosh mo me'd jin tosha um mo haali/ mo ta'da tente/ jin atha'd naskina/ mo.

¹⁶ Hili yan ta a'di jin okin ma manci gwo ma Arumgimis kadhama/ jin yuku ka Yu/iil mo ki:

¹⁷ Dhali ka cim jin 'ko'd jin okin ma Arumgimis mo tani aha/ mina gaç Shi/in pem apowa ris 'kwaniny'ceshi 'baar mo.

Dhali iya/m bum dhali i'bwa/m bum uni mini o gwo is mo,

dhali washan bum mini par tonyjan e mo,

dhali dhan 'kwanim bum mini shu'b jan mo,

¹⁸ nye dhali apo/ cinjkinan 'kwani kun yolu/ mo dhali cinjkinan nyara/ ka cim gwansan mo tani

miga/ gaç Shi/in pem mo dhali uni mini o gwo is mo.

¹⁹ Dhali aha/ mina tora dhan mii kun caaca e momis 'peni bwam momis mo

dhali momer e mony'cesh 'pena 'cesh mo

dhala bas dhali o'd dhala wulpe/ ma ku'd mo.

²⁰ Atente/ minu war mo ki mondhurumi'd mo

dhala ppe ka bas mo

ntwa/a/ ka cim gi Tapa midi pu'du/ mo

dhana cim yan jin mishu kagahara mo

²¹ dhali a'di midi war ki a'di yin jin midi yuk̄ gway Tapa mo tani a'di iminu woth mo be.

²² Um 'Kwani ma Israyiil, ciki gwo gwansan mo ma. Yesus gi Pa Naasira jin man ma Arumgimis ibwam um ki mii kun 'bitha'bi'th dhali ka dhan mii gun

caaca mo dhali momer kun miikin ma Arungimis e a'di e bwam um me'd jin mishkina um mo.

²³ Yesus yan mmocinu a'di ki bwa ma Arungimis ka kar/enj gana/ mo dhali mmomishkin ma Arungimis ntwa/a/ mo tani um 'koshki a'di jwa mo ki cwany'cithan dhul mo dhali a'di 'koshkina um jwa mo ka dun torony ki jwam 'batha'd me'd 'kwani gun ush gwonkan jin cinu mii mo.

²⁴ Hili Arungimis ki 'de'k a'di imis mo mmo'cu'ka a'di a'di 'pena nyor wu mo haali/ a'di molkun bu'th mo e mowu kan mo. Haala Dawuu'd o gwo gom a'di ki:

²⁵ Aha/ hilkina Tapa isa yempa/ ibwambori jis/em pem mo haali/ a'di di'd e me'da bim poros pem ki aha/ yisa minu joç mo yisa.

²⁶ A'di 'borkika/ bwa mo dhali 'twam pem 'kunyki'd mo. Bwam pem si'da/ midi ca'b ka 'tenj kape/ mo,

²⁷ haali/ /e mini diki dhala kashiram pem 'pen eya Haawiya mo dhali /e si'da/ mini diki dhal Amankogum pini mmopar mompu/ e mo.

²⁸ Bway mondiki/e tora /e aha/ eya tente/ mo. /E mini 'tu'd mom'bor bwam pem si'da/ ki bwam/em pini mo.

²⁹ Awak pema, aha/ mina 'taki o um gwo ki nyanye/ goma Dawuu'd jin ta'da dhana baban dhamo/ mo, a'di jin wuki'd mo dhali kankunu si'da/ mo dhali mon'kupajem piti di'di ana ntaga cim yan mo be.

³⁰ Mmotana a'di amançi gwo ma Arungimis kadhamo/ mo tani dhali mmomisha a'di gwo jin on ma Arungimis mmothul a'di me'da po/ ki a'di midi kar emen piti kam/ e kursin tapam piti mo tani

³¹ a'di mishki'd itwa/a/ mo dhali oki gwo si'da/ gom mompinu ma Kristhos ki a'di yisa dhalkunu 'pen mo eya Haawiya yisa dhali shuman is piti yisa parki mompu/ e yisa.

³² Yesus yan 'de'kkin ma Arungimis imis mo tani ana 'baar tana iman/o gwo gom a'di mo be.

³³ A'di mmokaru a'di ki ca e me'da bim poros ma Arungimis mo tani dhali mmobutha a'di gwo 'peni Com jin onu is gom Shi/in Dheleladhelel mo tani a'di gacki'da piye/ mo a'di yan jin misha um mo dhali jin cika um si'da/ mo.

³⁴ Haala Dawuu'd yisa seki momisa. Hili a'di o gwo mo ki is piti mo ki: Tapa ki o gwo e Tapam pem mo ki: Ca'bi /e aha/ ki me'da bim poros pem mo ³⁵ ntagi aha/ mina dhu 'kup pini e cwa gi mondhu sho'k pini mo be.

³⁶ Dhalka wak 'Kwani ma Israyiil 'baar mo mish mo mo ka jinj gana/ ka Arungimis kar a'di ki Tapa mo dhali ka Kristhos si'da/ mo, a'di jin ta'da Yesus yan jin 'koshkina um ki cwany'cithan dhul mo.

³⁷ Dhali ki uni cikki gwo yan mo tani uni suka gwo adum buni mo dhali owa Buterus mo dhali imandhun ma Yesus ki shen tiya gwo mo ki: Ikam bamma, am mina miya ta mo?

³⁸ Dhala Buterus ki o uni gwo mo ki: Rici adu is mo ma dhali miyi ki yi'de/ ki gway ma Yesus Kristhos mo, aris umi 'baar mo ki 'beles gom miinthus bum minu gwam um mo. Dhali um mini buth Shi/in Dheleladhelel jin ta a'di jin cinu ki me'd mo.

³⁹ Haali/ gwo jin onu is mo tani, a'di onu gom um mo dhali uçim bum mo dhali goma ris uni 'baar mo kun si'dkin mo be, aris uni 'baar mo kun mina Tapa Arungimis bana iyuk i a'di mo be.

⁴⁰ Dhali gwon tiya ka ris tora a'di uni mo dhali mmomalas uni mo mmo/o gwo mo ki: Wothi/ is bum 'peni 'kwani kun tana nyakum yil bum kun ta thus ki thus mo.

⁴¹ Yan'ko'd uni si'da/ kun bu'th gwom piti mo, uni miikunu ki yi'de/ mo dhali uni maru is ka cim yin mo 'kwani ka ris wari wana e ka alaapi kwara mo.

⁴² Dhali uni 'kon mmoroꝝ sho'k ki sule/ e gwo kun tora imandhun ma Yesus ki she/ mo dhali e mombuꝝ si'da/ mo, mmo'ce'd maanꝝkuthu'd mo be dhali e mon'tho si'da/ mo be.

Mo gi 'Konu e Mo gi Gama Imangam Gwo Is mo

⁴³ Dhali monꝝkogu di'da po/ aris uni 'baar ki 'beles mo. Dhali miimer dhali mii kun caaca kun tana ris mo tani miikina imandhun ma Yesus ki she/ mo be.

⁴⁴ Dhali uni 'baar mo kun gam gwo is mo nyakꝝ ki 'ko mo dhali nyak to dhu 'baar mo.

⁴⁵ Mom buni yola uni mo dhali tom buni yola uni si'da/ mo dhali kwa/ uni bwa mo ki uni 'baar mo me'd jin mina uni mii ta gi to ka 'dete/ 'dete/ mo be.

⁴⁶ Dhali ka yempa/ yempa/ mo tani uni rocki sho'k ki sule/ mo e gwon tal 'de/ mo e gu'b gi mondheleladhelel mo dhali mmo'ce'd maanꝝkuthu'd e gu'b buni si'da/ mo. Uni ki bu'th tonꝝe/ ki bwam 'boron mo dhali ki bwan tal 'de/ mo

⁴⁷ mmomaꝝa Arungimis mo dhali 'kwanin tiya 'baar maꝝ uni si'da/ mo. Dhali ka yempa/ yempa/ mo tani Tapa mar uni is ki uni kun woꝝkunu mo be.

3

Wathi/jin Ta Nwɔl Waꝝkunu mo e Twaꝝkal Gu'b gi Mondheleladhelel mo

¹ Dhala Buꝝerus dhala Yoahaan 'kon mmo/ii ka gagamis e gu'b gi mondheleladhelel mo, ki mo jin 'thonu jin ta'da tente/ kwara mo.

² Dhali wathiꝝ kamu/ ta nwɔl 'peni bwaꝝ kum mo jin kalu mo dhali 'thinu mo e twaꝝkal gu'b gi mondheleladhelel jin yuku ki jiny Jaro/ mo mmo'tho to 'peni uni kun seki gu'b gi mondheleladhelel mo be.

³ Ki a'di parki'da Buꝝerus e mo dhala Yoahaan mmomura uni ise gu'b gi mondheleladhelel mo tani a'di ki doꝝ to mmobu'th mo.

⁴ Dhala Buꝝerus mmohila a'di a'di ka 'thime/ nyak ka Yoahaan si'da/ mo tani a'di o a'di gwo mo ki: Hili am mo ma.

⁵ Dhali a'di ki ha gwom buni e mo mmotoꝝh ki a'di mido 'taki bu'th ton kamu/ 'peni uni mo.

⁶ Hila Buꝝerus o a'di gwo mo ki: 'Dolkon kush dhali 'dolkon gana/ piyini aha/ mo tani hili a'di jin taka/ mo tani a'di imiga/ iꝝi/ e mo. Ki gway ma Yesus Kristhos gi Pa Naasira mo tani yayi ki sho'k mo ma.

⁷ Dhali a'di ki bu'th a'di ime'da bim poros mo dhali 'de'k a'di ki mis mo dhali ise/ sho'k piti dhala simam bam sho'k piti bu'th 'bi'th mo.

⁸ Dhali mmopena a'di imis mo tani a'di doshki'd mo dhali tel moya 'pen mo dhali a'di seki'd nyakꝝ uni e gu'b gi mondheleladhelel mo mmoya ki sho'k mo dhali mmope mo dhali mmomaꝝa Arungimis mo be.

⁹ Dhala ris 'kwani 'baar mo mishki a'di mo mmoyana a'di ki sho'k mo dhali mmomaꝝa a'di Arungimis mo

¹⁰ dhali uni nyithkin ki a'di ta a'di jin ca'bki'd mmo'tho to i'Twaꝝkal Jaro/ gi gu'b gi mondheleladhelel mo be. Dhali uni meren ki mer jin shiyi'd mo dhali mmoda/ar a'di kagahara gom a'di yin jin pu'dki'd e a'di mo be.

Gwo ma Buꝝerus jin Torkina A'di eya Lambalany ma Sulemaan mo

¹¹ Hili ka Buꝝerus uni ka Yoahaan mmobutha a'di a'di ki me'd mo tani aris 'kwani 'baar mo nyakꝝ so ki uni kun 'kona lambalany jin yuku ki ji ma Sulemaan mo mmomer kagahara mo.

12 Dhali ka Buterus ki par a'di e mo tani a'di ki thok 'kwani gwo mo ki: 'Kwani ma Israyiil, ata mera um gom wathi/ yan kan mo? walla ata hila um am ka 'thime/ kan mo me'd mom'bi'th jin ta jim bam ki is bam mo dhali mmodhuna aman is bam ki she/ ki dhelel dhelel mo tani am waça a'di mmomish ya ki shoka?

13 Arungimis ma Ibrahiim dhala Is/ hak dhala Yakuub, Arungimis gi ibabam bana, karki ca gi ciŋkinam piti ka Yesus eya tente/ jin cikina um mmowu mo dhali jin watkina um gway mo ibwambor ma Bilaatus mo ki a'di dina gwo ibwa mo mmo'cuŋ a'di mo be.

14 Hili um watki gway ma Amankogu yan dhali Amanmii ka kar/enj gana/ yan mo dhali um dotkina man'kosha mee mo jin minu ciki um mo be.

15 Dhali Amanŋel mondiki/e 'pen 'koshkina um jwa mo jin 'de'kkin ma Arungimis 'peni mowu mo tani ana 'baar mo tana iman/o gwo gom a'di mo.

16 Dhali ki mongam gway piti is mo tani gway piti ki 'bi'th wathi/ yan is mo jin hila um mo dhali jin mishkina um mo. Nye, mongam gwo is jin di'd e a'di mo mo tani a'di ki ci a'di isa 'borgarj gana/ yansan ibwambori umi 'baar mo.

17 Dhali shwane/, ikam pem, aha/ misha ki a'di miikina um mo mmomolkina um to mo, me'd jin miikina um tapam bum si'da/ mo.

18 Hili to gwansan kun tor ma Arungimis ntwa/a/ ki 'twa/ gi imanci gwo ma Arungimis kadhamo/ 'baar mo tani ka Kriŋthos piti mina isi mii 'kosh ka nyor mo tani a'di miikunu a'di wakan mo.

19 Rici uma du is mo ma dhali tuka bor dok/e mo ki miinthus bum minu 'kosh mo, ki mii gi wakan mo ki mowaç midu pu'd mo 'peni bwambori Tapa mo be,

20 dhali ki a'di midu hashu Kriŋthos jin karkunu mo gom um mo, a'di jin ta'da Yesus mo,

21 a'di jin mina momisi mii bu'th mo ntagi mo jin minu tela ris to 'baar mo shoka 'cesh dok/e mo, uni gun on ma Arungimis ki 'twa/ gi imanci gwo ma Arungimis kadhamo/ mo kun dhunu ki she/ ki dhelel dhelel mo kun 'kokin 'peni isa dhamo/ innii mo.

22 Ka jin gana/ aMusa oki gwo mo ki: Amanci gwo ma Arungimis mina Tapa Arungimis piyu/ mo gom um 'peni bwam ikam bum mo jin midu wa e ki aha/ mo. A'di mina umi cik to 'baar mo ki 'beles kun mina a'di o um mo.

23 Dhali a'di midu war ka ris 'kwani 'baar ki 'beles kun mini 'koki cik gwo ma mançi gwo ma Arungimis yan mo tani uni minu 'ce'd shoki 'baar mo ki 'bil 'bil 'peni bwarj 'kwani mo.

24 Nye dhali aris imanci gwo ma Arungimis kadhamo/ mo 'pena Samu/iil mo dhali uni kun bathani 'ko'd tani aris uni 'baar mo kun oki gwo mo tani uni si'da/ torki gwo mo goma cim gwansan mo be.

25 Um ta iya/ gi imanci gwo ma Arungimis kadhamo/ mo dhali gwo jin gamu me'd jin on ma Arungimis is ki ibabam bum mo mmo/owa Ibrahiim gwo 'bil 'penimo ki: Dhali e emen pini mo tani arisa waçi 'baar mo kun 'kon e mony'cesh yansan mo tani uni minu 'bor mii mo be.

26 Mmo'de'kkin ma Arungimis ciŋkinam piti imis mo tani a'di cina a'di um itwa/a/ mo mmo'bor um mii mo mmotuka ris umi 'baar ka 'dete/ 'dete/ ki 'beles 'pena bor miiny 'coŋgam bum mo be.

4

1 Dhali ki uni 'kokin mo mmo/o gwo i 'kwani mo tani igasiis dhali tapa jin ca'd gi imanhil gu'b gi mondheleladhelel mo dhali 'Kwani Sadukiyyin iyyini uni mo

2 mmo'kon ma du uni ki mur mo haali/ uni tor 'kwani gwo mo dhali uni o gwo eya tente/ si'da/ ki mompinu 'peni mowu di'd eya Yesus mo.

3 Dhali uni bu'thki uni dhali dhu uni mo mmoji uni ntaga cim jin 'ko'd mo haali/ mo ta mom'pen'kaskum mo.

4 Hili uni 'kon ka ris 'peni bwam uni kun cik gwo mo uni kun gam gwo is mo dhali monden gi gwas warki'd ki monden jin wana e ka alaapi mudhe'd mo be.

5 Dhali a'di warki'd ka cim jin 'ko'd mo, ki tapam buni dhali 'kwani gwanyjakam buni dhali iman'kwar tom buni nyak is tuli montal 'de/ mo e Pa Urushaliim mo.

6 Dhali Hanaan jin ta'da gasiis jin ca'd diki'd imun mo dhala Kayaapa mo dhala Yohaana mo dhala Iskandar mo dhali uni 'baar mo kun tana bas ma gasiis jin ca'd mo.

7 Dhali ki uni dhu uni ibwan 'kwani mo tani uni ki dot gwo mo ki: Yan miikina um ki mom'bi'th jana mo walla ki gway maja mo?

8 Dhala Buterus mmo'tu'dkina Shi/in Dheleladhelel a'di mo tani a'di ki o uni gwo mo ki: Um tapaj 'kwani mo dhali 'kwani gwanyjaka/ mo,

9 wakki/ am ka cim yaase tirrishu ki gwo mo gom miim 'boro'd jin miikunu mo gom wathi/ jin dumpulki ya mo tani dhali ki mii ja njala/ wacu/ wathi/ yan mo tani

10 dhalki a'di mishu mo ibwam uni 'baar mo dhala ris 'Kwani ma Israyiili 'baar si'da/ mo ki gway ma Yesus Kristhos gi Pa Naasira mo tani jin 'kosha um ki cwany'cithan dhul mo dhali jin 'de'kkin ma Arungimis mo 'peni mowu mo tani e a'di yan tani wathi/ yan doshki'di mahan ibwambori um ki mowa'is mo be.

11 A'di ta wosh jin karkunu ki dhan wosh gi 'pena bi mo wosh yan jin ushkina um ki 'tash mo, um kun ta imannyaj gu'b mo.

12 Dhali mowoth yisa di'da e wathin kamu/ yisa haali/ gwaya kamu/ yisa di'da i'bame'd momis jin cinu ibwan 'kwani'y'cesh ki ana minu mii woth mo e a'di mo be.

13 Hili ki uni parkina Buterus dhala Yohaana e mo ki uni 'koki ju/ 'kwani mo tani dhali gam gwo ki uni 'koki ta 'kwani kun 'kon mmohila warka/ mo dhali ki uni si'da/ ta 'kwani gun moli to tani uni merkin kagahara mo. Dhali uni nyithkin ki uni nyakki 'ko ka Yesus mo.

14 Dhali mmomisha uni wathi/ jin wacu/ mo mmodosh nyakki uni mo tani uni moli gwon kamu/ o apo/ a'di mo.

15 Hili ki uni kanki uni gwo mo mmo/ii ka pije/ 'peni montul is buni yan mo tani uni ki tora tor ka rem 'kup mo

16 mmo/o gwo mo ki: Ana mina miiya ta ki 'kwani gwansan sa/? Haali/ ka jin gana/ a'di toru eya tente/ ibwam uni 'baar kun 'kon e Pa Urushaliim mo ki mimer jin misha 'kwani 'baar mo miikunu mo e uni mo dhali ana mola a'di wat mo be.

17 Hili jin mina a'di diki pala ibwan 'kwani naskina/ mo tani dhalki ana kana uni gwo ki 'bi'th mo ma, gom to kun mina ana 'taki mii apo/ uni mo jin mina uni 'koki tor wathin kamu/ tal 'de/ gwo mo e gway yan 'peni mo yan ki sule/ mo be.

18 Dhali uni yukki uni mo dhali kan uni gwo ki uni mini tuk gway ma Yesus yan ki sule/ ki sule/ mo mmo'koki tor gwo mo walla ci gwo ki gway ma Yesus mo.

¹⁹ Buterus dhala Yohaana thokki gwo mo dhali o uni gwo mo ki: Wakki/ a'di 'boro'd ibwambor ma Arungimis mo mmoha gwom bum e mo dhali ush ji ma Arungimis ha e mo tani 'cunycuri um mo ma,

²⁰ haali/ am mina mol gwo ush mmoṭor gom to kun mishkina aman mo dhali kun ciḳa aman mo.

²¹ Dhali uni, ki uni o uni ki 'bi'th doḳ/e gom to gun mina uni 'taki mii mo tani uni dhalki uni mo mmo/ii mo mmomola uni bway mmogam mo mmoḱi uni ajisa gom 'kwani mo haala ris 'kwani 'baar mo karkina Arungimis ki ca mo gom a'di jin miikunu mo be.

²² Haali/ wathi/ yan taki'd gi yili issu/ i/ur 'kup mo jin miikunu miimer i a'di mo be.

Imangam Gwo Is Uni 'Thokin mo ki Dar gi Monyju/ mo

²³ Dhali mmodhalu uni bway mo mmo/ii mo tani uni iikin cem buni mo dhali lolopki gwo 'baar mo kun okina igasiis kun can dhali 'kwaniḡ gwanyjaka/ uni mo be.

²⁴ Dhali uni, ki uni cikki a'di mo tani uni 'de'kki 'twam buniya Arungimis ki bwan tal 'de/ mo dhali o gwo mo ki: Ayy Tapa, /e jin ukki momis mo dhali mony'cesh mo dhali dhan kumma/ yi'de/ mo dhala ris to 'baar kun 'kon ibwaman uni mo,

²⁵ /e jin o gwo ki Shi/in Dheleladhelel ki 'twa/ ma babam bam ka Dawuu'd jin ta ciḡkinam pini ki:

Ata miina 'kwani kun 'koki ta 'Kwani Yahuuda/ apure/ mo, dhala ris 'kwani kulum to ka wuny is ibwa kan mowa?

²⁶ Tapany can gi 'kwaniḡ'cesh doshkin ki is buni ki 'dishe/ mo dhali itapa tuli isi montal 'de/ apo/ Tapa mo dhali apo/ a'dim piti jin ta'da Kristhos si'da/ mo.

²⁷ Haali/ ki gwon gana/ e pa yan apo/ ciḡkinam pini jin ta'da Yesu a'di jin karu ki she/ gi dhelel dhelel jin kara /e Tapa tani Hirodu uni ka Punthi Bilaatus nyakki 'kwani kun 'koki ta 'Kwani Yahuuda/ mo dhali 'Kwani ma Israyiil si'da/ mo tani uni 'baar mo nyak is tuli montal 'de/ mo

²⁸ mmomii a'di yin ki me'd pini mo dhali ki bwam pini jin onu isi twa/a/ twa/ a/ innii mo midi war kansan mo be.

²⁹ Dhali shwane/ Tapa, hiliya po/ gwo gun ona uni ki 'bi'th gom to kun mina uni 'taki mii apo/ aman mo dhali ciḳi ciḡkinam pini 'bi'th mo ma mmo/o gwom pini ki dar gi monyju/ 'kwani mo

³⁰ me'dyin hedha /e abim pini mmomii miiwaḱ mo dhali ki momer mo dhali dhan mii kun caaca kun minu mii ki gway gi Ciḡkinam pini jin ta'da Yesu jin karu ki she/ gi dhelel dhelel mo.

³¹ Dhali ki uni 'thon mo tani mo yikinki is mo e mo jin tula uni is nycine/ mo dhali uni 'baar mo 'tu'dkunu mo ki Shi/in Dheleladhelel mo dhali uni oki gwo ma Arungimis ki dar gi monyju/ 'kwani mo be.

Aris To 'Baar mo Gamu Me'd mo

³² Dhala waambuhany 'kwani 'peni bwam uni kun gam gwo is mo 'kon ka dun tal 'de/ mo dhali ki bwan tal 'de/ si'da/ mo. Dhali jamu/ yisa di'da i bwam uni jin o ki toḡ kamu/ tal 'de/ jin tana a'di mo tani ta jim piti ki is piti a'di 'de/ mo. Hili uni dhuna ris to 'baar mo imontal 'de/ mo.

³³ Dhali gwo gi mom'bi'th caaca mo tani imandhun ma Yesu ki she/ ci gwontor buni gom mompina Tapa Yesu 'peni mowu mo dhala 'the caaca ca'bk'i'da po/ uni 'baar mo be.

³⁴ Haali/ wathiḡ kamu/ yisa di'da ibwam uni jin hara toḡ kamu/ yisa haali/ uni kun ta imanta gi mo mo walla gu'b mo tani uni ki yol uni mo dhala guurush 'doyina uni ki she yol mo be

³⁵ dhali dhu uni isho'k gi imandhunu ki she/ mo dhali to k_wa/u bwa mo ka 'dete/ 'dete/ me'd jin mina wathin kamu/ mii ta gi to mo be.

³⁶ Dhala Yuusup jin yuka imandhun ma Yesus ki she/ ki gwaya kamu/ ka Barnaaba (ki 'twam buni jin onu ki: ya/ gi momalas mo) jin ta Wathi/ Lawi jin ta wathi/ gi Pañ Kuprus mo tani

³⁷ mmodana a'di gi mombunto mo tani a'di yolkina a'di mo dhala guurush 'doyina a'di mmodhu isho'k gi imandhunu ki she/ mo be.

5

Hananiyya dhala Sappiira mo

¹ Hili wathin kamu/ jin yuku gway ka Hananiyya uni ki ash jin yuku ka Sappiira mo tani uni yoli mo jin tana uni mo

² dhali bockina guurush 'pen 'pena guurush gi she yol piti mo, ashim piti si'da/ nyak mishki a'di mo. Dhali a'di 'doyi'da guurush gi 'bana kamu/ mo dhali dhu a'di isho'k gi imandhun ma Yesus ki she/ mo.

³ Hila Buterus ki o a'di gwo mo ki: Hananiyya, ata 'tu'd ma Setaan eya dum pini mmotham gwo o ki Shi/in Dheleladhelel mo dhali boç 'bana kamu/ 'pen 'pena guurush jin yolu/ mo mo sa/?

⁴ Ki a'di dinuki yol naskina/ mo tani dina a'di ki ta jim pini /e 'deya? dhali 'ko'di a'di yolunu mo tani dina /e ki ta gi 'bi'th apo/ a'diya? Mii yan di /e ibwam pini mana kan? Gwon thus thamkina /e ki 'kwaniny'cesh yisa, hili thama /e ka Arungimis mo be.

⁵ Dhali mmocik ma Hananiyya gwo gwansan mo tani a'di bitki'da 'cesh mo dhali ci shi/in piti mo be. Dhali monkogu caaca yayi'da po/ uni 'baar kun cik a'di mo be.

⁶ Dhali 'kwanin dhuru'c cuki mis mo dhali 'tam a'di is mo dhali kal a'di ka pije/ mo dhali kan a'di mo be.

⁷ Dhali mo ta'da tente/ jin wana e ka tente/ kwara mo mmoshor ma tente/ isi'ko'd me'dyan yayina ashim piti si'da/ ka enthus mo mmomola a'di a'di jin miikunu mo be.

⁸ Dhala Buterus oki'da yim gwo mo ki: Tor aha/ gwo mo ma, mo yola um ka guurush wa cikise/ mo 'taa? Dhala yim ki thok a'di gwo mo ki: Nye, ka guurush wakan mo be.

⁹ Hila Buterus oki'da yim gwo mo ki: Ata gama um gwo me'd mmonta 'de/ mmopal Shi/in gi Tapa kan mo? Hili ma, sho'k gi uni gun kankina kathin mo tani uni 'koni shan'tamo/ mo dhali uni mini kal /e ka pije/ gara/ mo be.

¹⁰ Dhali ise/ a'di bitki'da 'ceshi sho'k piti mo dhali ci shi/in piti mo dhali 'kwanin dhuru'c seyin mo dhali gama yim wuki'd mo be dhali uni kalki a'di ka pije/ mo dhali kan a'di ka remambor ka kathin piti mo be.

¹¹ Dhali monkogu caaca yayi'da po/ kaniisa 'baar mo dhali apo/ uni 'baar mo kun cik to gwansan mo be.

Aris Jamas Mii dhali Momer Uni Thimkunu mo

¹² Dhali ki me'd gi imandhunu ki she/ mo tani momer ka ris dhali dhan mii caaca si'da/ miikunu mo ibwan 'kwani mo be, dhali uni 'baar mo 'kon ki bwan tal 'de/ eya lambalany ma Sulemaan mo.

¹³ Hili 'peni uni gun 'ko ki she/ mo tani wathin kamu/ yisa di'da jin eni uni mmo'dish mo is mo. Hili 'kwani marj uni kagahara mo be.

¹⁴ Dhali imangam gwo is mo maru is ki nyanye/ e Tapa mo, awaambuhany 'kwani kun ta 'kwanin gwas uni ki upi lu/ mo.

15 To miikunu ki nyanye/ mo tani uni si'da/ ki kal kum 'bathan e bway mo dhali 'thi uni eya ci mo dhala birish si'da/ mo ka Buterus mmopena a'di uni mo tani akashiram piti mido 'taki wupa po/ unin tiya 'peni bwam uni mo be.

16 Dhala waambuhany 'kwani si'da/ iyyin mmontal 'de/ mo 'peni pa kun 'kon is 'ko'd 'peni Pa Urushaliim mo mmo'doyu/ 'kwani kun 'bathan mo dhali uni gun toju bwa ka rum thus kun nyo/on mo dhali uni 'baar waçkunu ki 'beles mo be.

Imandhunu ki She/ Uni To'ckunu Bwa mo

17 Dhala gasiis jin ca'd doshki'd ki mis mo dhali uni 'baar mo kun nyak 'ko ki a'di mo (uni kun ta ceŋ 'Kwani Sadukiyyin) dhali uni 'tu'du/ mo ki mondeeya du mo

18 dhali uni ki bu'th imandhun ma Yesu ki she/ mo dhali dhu uni mo e mo jin jinu 'kwani mo.

19 Hila man'doyu gwo gi Tapa mon'thiny mo tani a'di ka'dki'da sijin 'twaŋkal mo dhali sus uni ka piye/ mo dhali o gwo mo ki:

20 Iiyi um mo dhali doshi mo dhali tor 'kwani aris gwo 'baar mo gom mondiki/e yan e gu'b gi mondheleladhelel mo.

21 Dhali ki uni cik yan mo tani uni sekin e gu'b gi mondheleladhelel ki mo kali kush mo dhali uni ki tor gwo mo.

Hili agasiis jin ca'd yayi'd mo dhali uni kun nyak 'ko ki a'di mo dhali yuk uni mo imontul is buni yan imontal 'de/ mo dhali montul isa kamu/ ki 'kwani gwanyaka/ gi 'Kwani ma Israyiil mo dhali uni ki hash gwo i gu'ba sijin ki uni minu susu mo be.

22 Hili iboliish kun iikin mo tani uni 'koki gam uni eya sijin mo dhali uni dokkin mo dhali tor gwo mo

23 mmo/o gwo mo ki: Gu'ba sijin gamkina am ki mu'th ki 'dantar mo dhali imanhil mo mo mmodosh ishan'tamo/ mo. Hili ki am ka'dkina a'di mo tani am 'konaki gam wathiŋ kamu/ nycine/ mo.

24 Dhali ki tapa jin ca'd ki imanhil gu'b gi mondheleladhelel mo dhali igasiis kun can mo cik gwo gwansan mo tani uni dunjurkin ma du is mo gom uni mo mmomina to yan ita ata mo.

25 Dhali jin tal 'de/ yayi'd mo dhali tor uni gwo ki: Hili mo mo ma, 'kwanin gwaskun dhukina um eya sijin mo tani uni 'kon e gu'b gi mondheleladhelel mo mmodosh mo dhali mmo'tor 'kwani gwo mo.

26 N'ko'd Tapa jin ca'd gi imanhil gu'b gi mondheleladhelel mo uni ki iboliish mo tani uni iikin mo dhali sus uni ki dar gi mondor mo haali/ uni ki ko/ 'kwani mo gom uni minu 'taki 'kosh ki wosh mo.

27 Dhali ki uni suski uni mo tani uni ki dhu uni ibwambor montul is buni yan mo. Dhala gasiis jin ca'd dotki uni gwo mo

28 mmo/o gwo mo ki: Am kankina um gwo ki 'bi'th mo mmo'koki tor gwo ki gway yansan mo, dhali hili ma, um 'tu'di Pa Urushaliim ki gwontor bum mo dhali um o ki guya bas wathi/ yan mmokara po/ am mo.

29 Hila Buterus dhali imandhun ma Yesu ki she/ mo uni thoŋ gwo mo dhali o gwo mo ki: Am mina mii mii gwo ma Arumgimis mo, yisa jin 'kwaniny' cesh yisa.

30 Arumgimis gi ibabam bana 'de'kki'da Yesu jin 'kosha um jwa mo mmohankina um a'di imis cwa mo.

31 A'di karkin ma Arumgimis ki ca ki me'da bim poros piti mo mmota Amantel Mondiki/e 'Pen mo dhali ka Manwoth mmoci mo jin rijuwa du is ki 'Kwani ma Israyiil mo dhali mongwam gom miinthus mo.

32 Dhali am tana iman/o gwo gom to gwansan am ki Shi/in Dheleladhelel si'da/ jin cin ma Arumgimis gom uni kun ha gwom piti e mo mmomii mo be.

³³ Hili ki uni cik gwo yansan mo tani uni cithirkin ma dum buni ka nyor mo dhali 'kona gwo bwa mo mmo'kosh uni jwa mo.

³⁴ Hili jan tal 'de/ doshki'di bwam uni imontul is buni yan jin ta Wathim Parisi jin yuku ka Ghamala/iil jin ta'da mant'or gwo gom gwonkan jin cinu mo dhali a'di jin taku ki moman caaca ibwam ma ris 'kwani 'baar mo. Dhali a'di kanki gwo ki uni mini thothki imandhun ma Yesus ki she/ is 'ko'd naskina/ mo.

³⁵ Dhali a'di ki o uni gwo mo ki: Um 'Kwani ma Israyiil, 'cunycuri is bum mo ma gom 'Kwani gwansan mo gom to kun mura umi mii mo.

³⁶ Haali/ ka cim jin t'wa/a/ gwansan mo tani Thudaas doshki'd mo mmo'or is piti ki a'di ita jan kamu/ jin ca'd mo. 'Kwanin gwasa tiya wana e ki iss* 'kwanimpa i/iss 'de/ mo gam is buni me'd ki a'di jin 'koshu jwa mo, dhali uni 'baar mo uni kun mii gwom piti mo tani uni ceker kunu bwa mo dhali ton kamu/ yisa gamu 'peni a'diya.

³⁷ 'Ko'di wathi/ yan mo tani Yahuusa gi Pany Jaliil ka cim gi mon'kwaru 'kwani gway mo a'di doshki'd si'da/ mo dhali a'di ki sus 'kwanin tiya per mo mmobath a'di mo. A'di si'da/ this e mo dhali uni 'baar mo, uni kun mii gwom piti mo tani uni si'da/ ceker kunu bwa mo.

³⁸ Dhali shwane/ aha/ ona um gwo mo ki: Kwa/i is bum bwa mo 'peni 'kwani gwansan mo dhali dhalki uni 'kon uni 'cena mo. Haali/ wakki/ gwo jin onu yan walla mii yan ta jin 'kwani mo tani a'di minu 'taki pi e mo be.

³⁹ Hili wakki/ a'di ta ji ma Arungimis mo tani um mini mol pi uni e mo be wakki/ um minu 'taki gam mo mmo'ko mmo/asa po/ Arungimis kan mo.

⁴⁰ Dhali gwom piti gama uni me'd mo. Dhali ki uni yukki imandhun ma Yesus ki she/ i uni mo tani uni ki dor uni mo dhali kan uni gwo mo ki uni mini 'koki o gwo ki gway ma Yesus mo dhali uni ki dhal uni mo mmo/ii mo be.

⁴¹ A'di iina uni mo 'peni bwambori montul is yan mo mmo'bora uni bwa mo ki uni dhunu ki montak wakan mmo'kosha uni is ka nyor kan ki mon'the is mo gom gway yan mo be.

⁴² Dhali isa yempa/ e gu'b gi mondheleladhelel mo dhali e pa mo tani uni 'koki dak gwo mo mmo'or mo dhali mmo'ci si'da/ mo ka Yesus yan ita'da Kristhos mo be.

6

'Kwanin Gwas Pesu/ kun Lakkunu mo

¹ Dhali ka cim gwansan ki mondenji gi imancik gwo 'kokunu mo mmomar is mo tani 'Kwani Yahuuda/ 'peni Pan Griki miikina gumgum apo/ 'Kwani Ibraniyin mo haali/ up buni kun wuna ikathim buni mo tani miikunu ka piny is mo e mo jin miinu to ka yempa/ mo.

² Dhali uninj 'kume'd i'ce'dka su/ yukkina waambuhany imancik gwo i uni mo dhali o gwo mo ki: A'di diki 'bor jin mina aman dhal gwo ma Arungimis 'pen mo dhali miia tu'c ma tharabeesa mo.

³ A'di mina um, iwa'k pem, ilak 'peni bwam um 'kwanin gwas pesu/ kun manju mo dhali kun 'tu'du/ mo ki Shi/in mo dhali ki yuk si'da/ mo uni kun mina ana mish dhu uni apowa tu'c yan mo.

⁴ Hili am mina roc sho'k mo mmo'tho ki sule/ mo dhali mmomii gwo mo.

⁵ Dhali gwo yan jin onu mo tani a'di 'borki'da waambuhany 'kwani 'baar mo bwa mo dhali uni kwanykina Istipanus mo, a'di jin ta wathi/ jin 'tu'du/ ki mongam gwo is mo dhali ki Shi/in mo, dhala Pilibbus mo dhala Puru'kurus mo dhala Nikanu'ur mo dhala Timuun mo dhala Parminaas mo dhala Nikala/ uus jin ta Wathi/ gi Pan Anthaakiya jin bu'th gwon 'Kwani Yahuuda/ mo.

* 5:36 urbumiyya

⁶ Uni gwahan idhuna uni ibwambori imandhunu ki she/ dhali ki uni 'thokin mo tani uni dhuki me'd buni apo/ uni mo be.

⁷ Dhali gwo ma Arungimis caki'd mo dhali monderj gi imancik gwo markunu is mo e Pa Urushaliim kagahara mo dhala waambuhany igasiis caaca haki gwo yansan e jin gamu is mo.

Mo gi Bu'thkunuwa Istipanus mo

⁸ Dhala Istipanus 'tu'du/ ka 'the mo dhali ki mom'bi'th mo tani a'di miiki dhan mii kun caaca mo dhali momer si'da/ ibwanj 'kwani mo.

⁹ Hili 'kwanin tiya doshkin 'peni uni kun ta uni gi gu'b gi montul is jin yuku ki gu'b gi montul is gi 'Kwani Libartiin mo, dhali 'Kwani gi Panj Kerawaan mo dhali 'Kwani gi Pa Iskandariyya mo dhali 'peni uni gi Panj Kilikiyya mo dhali Pa Asiyya mo uni sugkin ki gwo mo uni ka Istipanus mo.

¹⁰ Dhali uni moli roc yuk yan mo dhali Shi/in jin ona a'di gwo mo be.

¹¹ Dhali uni wanki 'kwani is ka 'di/ mo dhali uni gun wanu is mo tani o gwo mo ki: Am cikkina a'di mmowal gwo sor apowa Musa dhali apowa Arungimis si'da/ mo.

¹² Dhali uni ka/ 'kwani is mo dhali 'kwanin gwanyjaka/ si'da/ mo dhali iman'kwar to si'da/ mo dhali uni iyyina po/ a'di mo dhali bu'th a'di mo dhali sus a'di e montul is yan mo.

¹³ Dhali uni dhuki iman/ak a'di gwo i is mo uni kun o gwo mo ki: Wathi/ yan diki dak gwo mo mmo/o apo/ mo yan jin kogu mo dhali gwonjan jin cinu si'da/ mo.

¹⁴ Haali/ am cikkina a'di mo mmo/o gwo ka Yesu yan gi Pa Naasira mididi 'ce'd mo yan sho'k mo dhali ak mii ma Musa e mo kun tora a'di ana mo.

¹⁵ Dhali uni 'baar mo kun 'kon e montul is yan mmohila uni a'di ka 'thime/ mo tani mishki bwam/em piti mo mmowakina e a'di ki bwam/e ma man'doyu gwo mo be.

7

Mo gi 'Ce'd ma Istipanus Gwo She/ mo

¹ Dhala gasiis jin ca'd o gwo mo ki: To gwansan wakana?

² Dhali a'di o gwo mo ki:

Imudhum pem dhali ibaba kana! Arungimis jin ta gi monyca mo tani a'di pi'da babam bana ka Ibrahiim i is ki a'di diki'd e uka 'cesh jin tana dhan yi'deya kara'b ntwa/a/ me'd jin ca'ba a'di e Pan Haraan mo tani

³ dhali a'di ki o a'di gwo mo ki: Yaku/ ka pije/ mo 'peni bampam pini mo dhali 'pena bas pini mo dhali yayi i mo jin miga/ tor /e mo.

⁴ N'ko'd a'di yaki'd ka pije/ 'peni Bampa/ gi 'Kwani Kaldaan mo dhali ca'b e Pan Haraan mo. Dhali 'peni mun mo tani ki com wuki'd mo tani Arungimis ki so'k a'di mo e bampa/ yan jin 'kokina um nycine/ shwane/ mo.

⁵ Dhali a'di diki ci a'di mala kamu/ nycine/ mo, wakan si'da/ ari 'bana kamu/ mmokar sho'k piti apo/ yisa. Dhali a'di ki o gwo is ki a'di mididi ci a'di a'di mo mmota jin piti mo be dhali ki emen piti n'ko'di a'di mo, ki a'di dar ga 'ci naskina/ mo.

⁶ Dhali Arungimis o gwo cikise/ mo be ki emen piti mini 'taki 'ko ki 'kus e bampanj kamu/ mo dhali ki uni mini 'taki sus uni mmota cinjkina/ mo dhali mii uni ka ha'th'ko'd ki yil iss 'kwanimpa i/iss 'de/ mo.

⁷ Dhali 'kwani gwansan jin mina uni ta cinjinam buni mo tani uni miga/ mii miiwak mo. A'di ta gwo jin on ma Arungimis kan mo. Dhali n'ko'd mo tani uni mini pi ka pije/ mo dhali mii gwom pem e mo yan mo be.

⁸ Dhali a'di ki ci a'di gwo jin gamu me'd mo gom gwo ma munyjal yis mo dhali wakan Ibrahiim ki dhodha Is/hak mo dhali ka cim pekwarra mo tani a'di ki 'cith a'diya munyjal yis mo dhala Is/hak ki dhodha Yakuub mo dhala Yakuub ki dhodha waƙ gi idhan com kun 'koni 'kume'd i'ce'dka su/ mo.

⁹ Dhali idhan com gwansan uni tan ma du dhapana powa Yuusup mo uni ki yol a'di iPam Masir mo dhala Arungimis di'd e a'di mo

¹⁰ Dhali woth a'di 'peni mo jin toju a'di bwa mo dhali ci a'di manj mo dhali moyuk mo ibwambor ma Pirawn jin ta'da malik gi Pam Masir mo dhali a'di ki kar a'di ka mudhiir gom Bampa/ Masir mo dhali gu'b piti 'baar mo.

¹¹ Te/ pu'dki'da po/ Bampa/ Masiri 'baar mo dhali Pan Kanaan si'da/ mo dhali dhan montocu bwa di'd mo dhali ibabam bana gamki tonte/ yisa.

¹² Hili ka Yakuub cikki gwo ki tonte/ di'd e Pam Masir mo tani a'di tu'cki ibabam bana ki ii me'd jin twa/a/ mo.

¹³ Dhali ki me'd jin 'kon ma po/i su/ mo tani a Yuusup torki is piti eya tente/ e ikam mo dhali 'kwani ma Yuusup toru eya tente/ aPirawn mo.

¹⁴ Dhala Yuusup ki hash gwo mo dhali yuƙa Yakuub jin ta com e a'di mo dhala risa bas piti kun ta 'kwani iss* 'kwanimpa 'kwara i'ce'dka karpa'c mo.

¹⁵ Dhala Yakuub yaki'd ka lunƙu'b mo e Pam Masir mo dhali a'di wuki'd ki is piti mo dhali ibabam bana si'da/ mo be.

¹⁶ Dhali uni kalu mo mmo'cih Bampa/ gi Pan Shakiim mo dhali uni 'thinu mo e moƙ'kupaje jin yolkin ma Ibrahiim ki she yol gi 'dolkon kush 'peni iya/ ma Hamuur gi Pan Shakiim mo.

¹⁷ Hili ki moƙ gwo jin onu is mo tani 'dishki'd mo jin gam ma Arungimis me'd ka Ibrahiim mo dhali 'kwani can mo dhali mari is mo e Pam Masir mo,

¹⁸ gama malika kamu/ jin piki'd apo/ Bampa/ Masir mo jin diki misha Yuusup mo.

¹⁹ A'di yan miiki 'kwanim bana ka maƙ mo dhali mii ibabam bana ka ha'th'ko'd mmo'ta'k ushi ucim buni ka piƙe/ jin mina uni 'taki 'koki 'ko ki e mo be.

²⁰ Ki yil yan mo tani aMusa dhodhu mo dhali a'di ta yinthoƙ gana/ mo dhali a'di thipu ka ppe 'kupi kwara e gu'b gi com mo.

²¹ Dhali ki a'di kalu ka piƙe/ mo tani 'bwa/ ma Pīrawn taƙ a'di mo dhali thip a'di ki ya/m pitin gana/ mo.

²² Dhali yuƙ gi 'Kwani Masiri 'baar mo tani a'di ye'th'kunuwa Musa sho'k mo dhali a'di 'bitha'bi'th e gwom piti mo dhali miim piti si'da/ mo be.

²³ Hili ki a'di mura yila issu/ 'baar mo tani gwo pu'dki'da dum piti mo mmodoka waƙ 'kwanim piti kun ta iya/ ma Israyil mo be.

²⁴ Dhali mmopara a'di jan tal 'deƙ kamu/ e 'peni uni kun 'koshu ka wuny is mo tani a'di ki woth a'di mo dhali cesh a'di jin miinu ka ha'th'ko'd kan mo mmo'kosh Wathim Pam Masir jwa mo dhali rica ri'c gom a'di mo.

²⁵ Dhali a'di toshki'd ka waƙ piti mish gwo 'ban ka Arungimis ki ci uni mo jin 'cuku ki me'd piti mo. Hili uni 'koki mish gwo 'ban mo be.

²⁶ Dhali ka cim jin 'ko'd mo tani a'di pi uni i is mo uni kun 'koni mo/as mo dhali a'di midi 'taki dhu uni mmogwam mo dok/e mmo/o gwo mo ki: Kana, um ta ikan mo be. Ata miina um ki shi/ ka rem 'kup kan mo?

²⁷ Hili a'di jin miiki'da mannyak ca'b piti ki shi/ mo tani a'di belki a'di mo mmoya mo mmo/o gwo mo ki: Kaja kar /e ki tapa mmodwall gwo apo/ aman mo?

²⁸ /E mini 'taki 'kosh aha/ jwa mo me'd jin 'koshkina /e Wathim Pam Masir katiliya?

* 7:14 kamsa wa saba/iin

29 Dhala Musa guski'd mo gom gwo yan jin onu mo dhali a'di warki'd ka mandi gi 'kus e Pam Madyaan mo e jin dhotha a'di iya/ isu/ mo.

30 Dhali ki yila issu/ thimki'd mo tani aman'doyu gwo piki a'di i is em bwaasho e 'Kuwosh Sinaa/ eya le'dan o'd e ari cwa mo.

31 Dhali ka Musa parki a'di e mo tani a'di merki'd gom to jin mishkina a'di mo dhali ki a'di shor a'di is mo mmo'dish a'di is mo mmohil mo mo tani 'twa/ yayi'd 'peni Tapa ki:

32 Aha/ tana Arungimis gi ibabam pini mo dhala Arungimis ma Ibrahiim mo dhala Is/hak mo dhala Yakuub mo. Dhala Musa deena is kagahara mo dhali ko/ki'da ko/ is mo mmohil a'di mo be.

33 Dhali Tapa ki o a'di gwo mo ki: 'Cuka ppa/ 'peni sho'k pini mo ma haali/ mo yan jin dosha /e apo/ mo tani a'di ta'da 'cesh jin kogu mo be.

34 Mishga/ ka jin gana/ monto'c bwa di'd e 'kwanim pem kun 'kon e Pam Masir mo dhali aha/ cikkina uni okonkin mo dhali aha/ dina mmoyaku/ ka 'cesh mo mmo'cuḵ uni mo. Dhali yayu/ shwane/ mo ma. Aha/ mina hash / e Pam Masir mo.

35 Musa yan jin ushkina uni mo mmo/o gwo mo ki: Kaja kar /e ki tapa mmodwall gwo mo tani a'di ihashkin ma Arungimis mo mmota tapa mo dhali mmota man'cuḵ uni ki me'd ma man'doyu gwo jin pi a'di i is e ari cwa mo.

36 Wathi/ yan ishu uni bway ka pije/ mo mmomiikina a'diya dhan mii kun caaca mo dhali momer si'da/ e Pam Masir mo dhali e bwaman dhan Yi'den Kummam 'Per e mombwaasho ki yil issu/ mo.

37 Yan ta'da Musa caan jin o ki uci ma Israyiil gwo mo ki: Amanci gwo min ma Arungimis ipiyu mo gom um 'peni bwaman ma waḵ bum mo mmowa e ki aha/ mo.

38 Yan ta a'di jin di'd e montul is e mombwaasho nyaḵka man'doyu gwo jin o a'di gwo e 'Kuwosh Sinaa/ mo dhali nyaḵ ki ibabam bana kun bu'th gwo gi mondiki/e mmoçi ana mo.

39 Ibabam bana ush a'di gwo ha e mmomii mo. Hili uni ki bel a'di mo mmoya mo 'peni uni mo dhali uni dok ma dum buni ka nyan'ko'd iPam Masir mo mmo/owa Haruun gwo mo ki:

40 Uḵ am to kun luḷu mo ma kun mini ii amani bwambor mo. Haala Musa yan jin susi ana ka pije/ 'peni Bampa/ Masir mo tani ana mola to jin yayi'di a'di mo be.

41 Dhali uni uḵ ari bip ka cim gwansan mo dhali 'do to jin 'ciṯhu/ 'kus mo e tompinyon mo dhali 'bor bwa mo gom mii jin ta ji gi me'd buni mo.

42 Hili Arungimis tu'kki'd mo dhali ci uni bway mo mmoluḷ to kun 'kon e momis mo me'd jin 'kwarkunu e bwaman ma warka/ gi imanci gwo ma Arungimis kadhamo/ mo ki:

Um ciyaa/ to/e jin 'ciṯha um 'kus mo dhali to jin 'ciṯhu si'da/ mmomii abas ki yil issu/ e mombwaasho mo, ayy 'kwani ma waḵ ma Israyiila?

43 Dhali um buthi gu'b burrinye/ ma Muuluuk mo dhali acul kun ta tompinyon jin yuku ka Rampaan mo to gun uḵu kun uḵa um mmoluḷ uni mo.

Dhali aha/ mina so'k um mo ibwampo/ Pam Baabil mo.

44 Ibabam bana takan gi gu'b burrinye/ gom gwontor e mombwaasho me'd jin kara a'di a'di jin o gwowa Musa ki a'di midi uḵ me'd she/mm jin mishkina a'di mo

45 jin kala ibabam bana si'da/ ki mongarr buni ki she/ ki she/ mo nyaḵka Yashuu/ ki uni sekin mo e mo gi 'kwanin tiya kun bel ma Arungimis ka pije/ ibwambori bwam/e gi ibabam bana mo ntaga cim ma Dawuu'd mo be.

46 A'di gam moman ibwambor ma Arungimis mo dhali 'tho monyca'b goma Arungimis ma Yakuub mo.

47 Hila Sulemaan nyan a'di gu'b mo.

48 Bahili A'di jin Cayaa/ e ki Ca mo diki ca'b e gu'b kun nyanu ki me'd mo me'd jin on ma manci gwo ma Arungimis kadhamo/ mo ki:

49 Momis ta'da kursin tapam pem mo dhali mony'cesh ta cwa jin dhuka/ sho'k pem.

Gu'b gi wakata imina umi nyanaa/ mo? Tapa i/o'd kan mo. walla ma mom pem jin miga/ isi/ is mo?

50 Dina me'd pem ki uk to gwansani 'baar mo 'taa?

51 Um 'thek 'bam bum imis mo dhali um 'konuki 'citha/ munyjal ma du mo dhali 'ce si'da/ mo. Shi/in Dheleladhelel ura um isa yempa/ mo. Me'd jin miikina ibabam bum mo tani wakan miikina um si'da/ mo.

52 Jana 'peni imançi gwo ma Arungimis kadhamo/ mo kun 'kona ibabam bum ki to'c 'kus mo? dhali uni 'kosh uni jwa mo uni kun tor gwo ntwa/a/ mo gom mmomina jan tal 'de/ jin mii'd ka kar/e iyayu/ mo. Um warkin ki iman'cith a'di is ki gwo mo dhali iman'kosh a'di jwa mo,

53 um kun bu'th gwonkan jin cinu mo me'd jin kara iman'doyu gwo a'di mo dhali a'di karkina um yisa.

Mo gi 'Koshkunuwa Istipanuus ki Wosh mo

54 Ki uni cikki gwo gwansan mo tani uni cithirkin ma du mo dhali uni 'pe'dki she/ i a'di mo.

55 Hili a'di mmo'tu'du/ a'di mo ki Shi/in Dheleladhelel mo tani a'di hilki momis ka 'thime/ mo dhali par monyca ma Arungimis e mo dhala Yesus si'da/ mmodoshkina a'di ka bim poros ma Arungimis mo

56 dhali o gwo mo ki: Hili mo mo ma. Aha/ parkina momis ka'du/ mo dhali Ya/ gi 'Kwani mmodosh ka bim poros ma Arungimis mo.

57 Hili uni cuun ki dhan 'twa/ kun caaca mo dhali 'dap 'cem buni ki me'd mo dhali tha'th a'di ki is mo mmontal 'de/ mo

58 dhali uni ki bit a'di ka pije/ 'peni bampa/ mo dhali 'kosh a'di ki wosh mo be. Dhali iman/o gwo dhu burrinyem buni a'cesh isho'k gi dhuru'c washana kamu/ mo jin yuku ka Shawuul mo

59 dhali uni ki 'kosha Istipanuus ki wosh mo mmoyuka a'di Tapa mmo/o gwo mo ki: Tapa Yesus, budhi shi/in pem mo.

60 Dhali a'di ca'bki'd ki jin 'kupa'dupun mo dhali cuu gwo ki dhan 'twa/ mo ki: Tapa, dhalku/ ki kar miinthus yan i'bam buni mo. Dhali ki a'di o gwo kan mo tani a'di ki ish e mo be.

8

1 Dhala Shawuul di'd mmogam bwa me'd mo gom wum piti mo be.

Shawuul To'cki'da Kaniisa Bwa mo be

Dhali ka cim yin tani monto'c 'kus caaca yayi'da po/ kaniisa jin di'di Pa Urushaliim mo dhali uni 'baar mo cekerki bwa mo i bampa/ 'baar mo e Pa Yahuudiyya mo dhali Pan Saamira mo, jasi imandhunu ki she/ uni i'kokin mo.

2 Dhali 'kwani gun tana gayiin mo tani uni ikankina Istipanuus mo dhali gwon mo dhali ananki is kagahara gom a'di mo be.

3 Hila Shawuul mii'da nyor ka daran du kagahara mo mmoshi/a kaniisa is mo dhali mmocica a'di gu'bi 'baar ki 'beles mo tani a'di ki dir 'kwani gwas mo dhali 'kwani up si'da/ 'ko'da 'cesh mo mmodhu uniya sijn mo.

Gwom 'Borga/ Cikunu mo e Pan Saamira mo

⁴ Uni si'da/ kun cekerki bwa mo tani uni iikin mo mmo_{tor} gwo ki lala'th mo be.

⁵ Dhala Pilibbus ya'd ka lungu'b mo e Pan Saamira mo be dhali ci uni gwo mo goma Kristhos yan mo.

⁶ Dhala waambuhany 'kwani cina dum buni ki bwan tal 'de/ ki gwo kun tor_{kin} ma Pilibbus mo me'd jin ci_{ka} uni gwo mo dhali momer misha uni kun miikina a'di mo be.

⁷ 'Peni uni ka ris kun bu'th ma rum thus kun nyo/on mo tani arum thus pikin mo mmocuuna uni ki dhan 'twa/ kun caaca mo dhali uni tana ris kun mut_{ta}/ is mo dhali kun ta njwol mo tani uni wackunu mo be.

⁸ Dhali mom'bor bwa caaca di'di pa caan mo be.

⁹ Wathij kamu/ di'd jin yuku gway ka Simaan mo. Ntwa/a/ mo tani a'di miid' rumatiya e pa caan mo dhali 'Kwani gi Pan Saamira meren gom gwo jin ona a'di uni ki a'di ki is piti ta a'di jin ca'd ki tiya mo.

¹⁰ Dhali uni 'baar ci is buni ki gwom piti 'peni a'di jin gwa'da'd ntagi a'di jin ca'd mo mmo/o gwo mo ki: Wathi/ yan ta ji gi mom'bi'th ma Arungimis jin yuku ki A'di jin Ca'd mo be.

¹¹ Dhali uni ci is buni ki gwom piti mo gom a'di mer uni is ki mii ma rum piti isa gush mo.

¹² Hili ki uni gam gwo ma Pilibbus is jin tor_{kina} a'di gom gwom 'borga/ gom Bampa/ ma Arungimis mo dhali gway ma Yesus Kristhos mo tani uni miikunu ki yi'de/ mo ki gwasu lu/ mo dhali ki upi lu/ si'da/ mo be.

¹³ Dhala Simaan ki is piti si'da/ a'di gam gwo is mo dhali miikunu ki yi'de/ mo. A'di nyak ca'b ka Pilibbus mo mmohil momer mo dhali dhan miimer kun caaca kun miikunu mo tani a'di merki'd mo be.

¹⁴ Hili ki imandhunu ki she/ mo kun 'koni Pa Urushaliim, ki uni ci_{ki} ki 'Kwani gi Pan Saamira bu'thki gwo ma Arungimis mo tani uni ki tuca Buterus uni ka Yoahan ki iiku/ i uni mo.

¹⁵ Ki uni thulkin ka lungu'b mo tani uni 'thon gom uni ki uni mini 'taki bu'th Shi/in Dheleladhelel mo

¹⁶ haali/ a'di diki ya apo/ jamu/ i bwam uni naskina/ mo. Uni miikunu ki yi'de/ jasi ki gway gi Tapa Yesus 'te/ mo.

¹⁷ N'ko'd mo tani uni dhu uni me'di 'kup mo dhali uni bu'thki Shi/in Dheleladhelel mo be.

¹⁸ Dhali ka Simaan parki uni e mo mmोधuna imandhunu ki she/ uni me'di 'kup mo tani Shi/in Dheleladhelel cikunu mo a'di ki tor uni aguurush i e mo,

¹⁹ mmo/o gwo mo ki: Ci_{yaa}/ mom'bi'th yan si'da/ mo ma, ki wathij kamu/ jin miga/ 'taki kar me'd pemi 'kup mo tani ki a'di si'da/ mididi 'taki bu'th Shi/in Dheleladhelel mo.

²⁰ Hila Buterus ki thok a'di gwo mo ki: Aguurush pini dhalki a'di nyak sho'k 'ce'd ki /e mo haali/ /e toshki gam to jin cin ma Arungimis ki me'd ka guurush 'te/ mo.

²¹ /E dar gi to walla mii e gwo yan mo haali/ adum pini diki 'bor ibwambor ma Arungimis mo be.

²² Rici adu is mo gom miinthus pini yan mo dhali 'thoyi Tapa mo ma, ki gwo jin kuluma /e ibwa wakan mo minu 'taki gwam /e mo.

²³ Haali/ mishga/ ki /e din e mo ma ci/ jin ka/ aka/ mo dhali mondeku gi miinthus mo.

²⁴ Dhala Simaan thok a'di gwo mo dhali o gwo mo ki: 'Thoyi Tapa gom aha/ mo ma ki to gwansan kun ona um mini 'koki 'taki pu'du/ apo/ aha/ mo.

25 Dhali ki uni ci gwontor buni mo dhali tor gwon Tapa mo tani uni dokkin ka nyan'ko'd mo mPa Urushaliim mo dhali tor gwom 'borga/ eya ris pa gi 'Kwani gi Pan Saamira mo be.

Pilibbus dhali Wathi/ gi Paṅ Gale/ jin Ta Mantil mo

26 Hila man'doyu gwo gi Tapa ki owa Pilibbus gwo mo ki: Cuyi mis mo ma dhali yayi 'kup ki 'ko'd gwar ka biny cam ki bway jin ya'd ka lunḡu'b 'peni Pa Urushaliim mo ntagi Paṅ Ghassa jin ta mombwaasho mo.

27 Dhali a'di ki cu mis mo dhali ya mo. Dhali hili Wathi/ gi Paṅ Gale/ di'd jin ta mantil mo dhali jin ta tapa jin ca'd 'pena Kandaaka, a'bom jin ta'da malik gi 'Kwani Gale/ mo. A'di ta'da mandhuwa guurush piti 'baar mo. A'di si'da/ yayi'di Pa Urushaliim mmolunḡ mo be.

28 Dhali a'di di'd mmodoḡ ka nyan'ko'd mo dhali a'di ca'bki'd i bwaman ma arabiya jin dira shumaru mo dhali di'd mmoderḡ gwo jin 'kwarkin ma manci gwo ma Arungimis kadhamo/ e mo jin yuku ka Ishaya mo be.

29 Dhali Shi/in Dheleladhelel ki owa Pilibbus gwo mo ki: Shori is pini mo ma dhali 'dishi a/arabiya yan is mo.

30 Dhala Pilibbus guski'di a'di mo dhali cik gwo jin deṅa a'di gwo e mo jin 'kwarkin ma manci gwo ma Arungimis kadhamo/ mo jin yuku ka Ishaya mo tani dhali o a'di gwo mo ki: Gwo jin deṅa /e e mo tani misha /e 'ban mo 'taa?

31 Dhali a'di ki o gwo mo ki: Miga/ mish 'peni mana ki dar gi wathi/ mmothuk aha/ gwo isi ciki/ mo. Dhali a'di yuḡki'da Pilibbus mo mmoseyu/ a/arabiya mo dhali nyaḡ ca'b ki a'di mo.

32 Dhali gwo 'peni Gwo ma Arungimis jin 'kwaru jin deṅa a'di e mo tani wa cikise/ mo be, jin o'd ki:

A'di susu me'd ka'bal mmo'ciḡh 'kus mo

dhali me'd ari ka'bal jin mol 'twa/ wal ibwambor ma man'ciḡh a'di amur piti mo tani

wakan si'da/ a'di diki cee 'twam piti mo.

33 Dhali mmokara a'di is piti ki gwa'd mo tani mondwall gwom piti kwa/u mo 'peni a'di mo.

'Kwani kun tana anyakum yil ki a'di mo tani kaja a'di jin midi ci gwo ki lala'th mo?

Haali/ mondiki/em piti gunu 'peni mony'cesh yansan mo.

34 Dhali a'di jin ta mantil oki'da Pilibbus gwo mo ki: Tor aha/ gwo mo ma, amanḡi gwo ma Arungimis kadhamo/ yin mo tani a'di tori gwo goma ja sa/? A'di tori gwo gom is piti mo 'taa? walla gom wathinḡ kamu/ mo.

35 Dhala Pilibbus ka'd 'twam piti mo dhali tel a'di Gwo ma Arungimis yin 'pen jin 'kwarkunu mo tani a'di ki ci a'di gwo goma Yesu mo be.

36 Dhali mmo/iina uni ibway mo tani uni pu'dkin mo e yi'derḡ kamu/ mo dhali a'di jin ta mantil ki o gwo mo ki: Hili yi'de/ a'dan mo. Ata a'di jin midi non aha/ mmomii ki yi'de/ mo?

37 Dhala Pilibbus ki o a'di gwo mo ki: Wakki/ /e gam gwo is ka dum pini 'baar mo tani /e minu mish mii mo be. Dhali a'di ki thoḡ gwo mo dhali o gwo mo ki: Aha/ gama gwo is ka Yesu Kristhos ta Ya/ ma Arungimis mo be.

38 Dhali a'di ki kan gwo mo ka arabiya jin dira shumaru minu dosh mo dhali uni su/ thulkin ka lunḡu'b i bwaman yi'de/ mo uni su/ ka Pilibbus uni ki a'di jin ta mantil mo, dhali a'di ki mii a'di ki yi'de/ mo be.

39 Dhali ki uni sen ka pije/ 'peni yi'de/ mo tani Shi/in gi Tapa a'di borki'da Pilibbus mo be dhali a'di jin ta mantil par a'di e dok/e yisa haali/ a'di ya'd mo i bway piti mmo'bora bwa a'di mo.

40 Hila Pilibbus gamkunu mo e Pa Ashduu'd mo dhali mmo'citha/ a'di pa yin mo tani a'di ki tor gwom 'borga/ e pa 'baar mo ntagi a'di pu'dki'd e Pan Kaysariyya mo be.

9

Mo jin Tu'k ma Shawuula Du Is mo

1 Hila Shawuul dek ma nyor kagahara naskina/ mo tani a'di shwa'da 'cesh ki sho'k mo dhali 'kosha 'kosh apo/ imancik Tapa gwo mo dhali a'di yaki'da gasiis jin ca'd mo

2 dhali dot a'di awarka/ gi Pan Dimashk ki gu'b gi montul isi 'baar mo, wakki/ a'di mididi 'taki gam kun tiya kun ta 'kwani gi Bway yan mo tani wakki/ uni mini 'taki ta gwas mo walla up mo tani a'di mididi 'taki bu'th uni mmodek mo dhali susu mo e Pa Urushaliim mo be.

3 Dhali ki a'di di'd mmoya mo tani a'di 'dishki Pan Dimashk is mo dhali ki jahanne/ ise/ monkush 'peni momis 'twakki mo mo mmo'kam a'di is mo.

4 Dhali a'di bitki'da powa 'cesh mo dhali a'di cikki 'twa/ mmo/o a'di gwo mo ki: Shawuul, Shawuul. Ata toca/e aha/ 'kus kan mo.

5 Dhali a'di o gwo mo ki: /E tana ja Tapa mo? Dhali a'di o gwo mo ki: Aha/ tana Yesus jin toca/e 'kus mo.

6 Hili cuyi/e mis mo ma dhali yayi ciç bampa/ mo ma, dhali a'di minu tor /e mo a'di jin mina /e imii mo be.

7 Dhali 'kwanin gwas kun nyakki ii ibway ki a'di mo tani doshkin mmomol gwo o mo mmocika uni gwo mo dhali mmo'kona uni ki par wathin kamu/ e mo.

8 Dhala Shawuul cu mis 'pena powa 'cesh mo dhali ki a'di ka'dki e mo tani a'di mol to par e mo dhali uni ki sus a'di ki me'd mo dhali sus a'di e Pan Dimashk mo be.

9 Dhali ka cim kwara mo tani a'di dar gi e mo dhali a'di shwa to yisa dhali a'di diki pi to si'da/ mo be.

10 Dhali amancik gwon kamu/ jin di'd e Pan Dimashk jin yuku ka Hananiyya mo dhali Tapa o a'di gwo ki tonyjan mo ki: Hananiyya. Dhali a'di ki o gwo mo ki: Hili ma. Aha/ dina imahan mo be Tapa mo.

11 Dhali Tapa ki o a'di gwo mo ki: Cuyi mis mo ma dhali yayi 'kup ki bway jin yuku ka Doshki Dhi'c mo dhali yayi igu'b ma Yahuusa mo dhali nap wathi/ 'peni Pan Tharsuus jin yuku ka Shawuul mo haali/ a'di 'thoki'd mo.

12 Dhali wathi/ mishkina a'di jin yuku ka Hananiyya mo mmoseyu/ bwan man mo mmodhu me'da po/ a'di mo ki a'di mididi 'taki mish mo mo.

13 Hila Hananiyya thok gwo mo ki: Tapa, aha/ cika gwo 'peni 'kwani ka ris gom wathi/ yan gom miim piti wa'di shi/ kagahara yisa kun miikina a'di ki 'kwanim pini kun dhuna /e ki she/ gi dhelel dhelel mo e Pa Urushaliim mo.

14 Dhali i mahan si'da/ a'di ta gi gwo 'peni igasiis kun can mo mmodek uni 'baar mo kun yer gway pini mo.

15 Hili Tapa o a'di gwo mo ki: Yayi i bway pini mo ma haali/ a'di ta ton'kul bwa jin kwanyka/ gom aha/ mo mmokal gway pem ibwambori 'kwanin tiya kun 'koki ta 'Kwani Yahuuda/ mo dhali imalik si'da/ mo dhali uci ma Israyiil mo be.

16 Haali/ aha/ mina tor a'di to kun wana risa kun mina isi mii 'kosh a'di ka nyor gom gway pem mo.

17 Dhala Hananiyya yaki'd mo dhali seki gu'b mo dhali mmodhu a'di me'di is mo tani a'di ki o a'di gwo mo ki: Akam pem ka Shawuula. Tapa jin ta'da Yesus jin piki /e isi bway jin yayina /e mo tani a'di tuci aha/ ki yayu/ mo, ki /e mini mish mo mo dhali ki /e minu 'tu'd mo ki Shi/in Dheleladhelel mo.

18 Dhali ise/ to jin wana e ka pampara/ biṭkin 'peni em piti mo dhali a'di mishki mo mo be. Dhali a'di ki cu mis mo dhali a'di miikunu mo ki yi'de/ mo

19 dhali a'di bu'th tonṭe/ mo dhali 'bidhu is mo be.

Shawuul A'di Ciki Gwo e Pan Dimashk mo be

Dhali a'di di'd ka cim ka hony/ e nyakki imancik gwo kun 'kon e Pan Dimashk mo.

20 Dhali ise/ a'di ki ci gwo e gu'b gi montul is buni mo goma Yesus ki a'di ta Ya/ ma Arungimis mo be.

21 Dhali uni 'baar mo kun cik a'di gwo mo tani merkin kagahara mo dhali o gwo mo ki: A'di diki ta a'di jin di'd e Pa Urushaliim jin 'ce'd 'kwani kun yer gway yan sho'k mo 'taa? Dhali a'di yayi'di mahan si'da/ mmomii kan ki a'di midi 'taki sus uni mmodek mo ibwambor gi igasiis kun can mo.

22 Hila Shawuul 'bitha is ki nyanye/ mo dhali a'di dumpulki 'Kwani Yahuuda/ kun 'kon e Pan Dimashk mo mmonyol/ gwo ka kar/ e ka Yesus yan ta'da Kristhos mo be.

Shawuul A'di Yeki'd mo 'Peni 'Kwani Yahuuda/ mo

23 Dhali ka cim tana ris thimkin mo tani 'Kwani Yahuuda/ gam gwo me'd ka rem 'kup mo mmo'kosh a'di jwa mo.

24 Hila wu'th buni pu'dki'da Shawuul mo. Dhali uni timki 'twaṅkal pa si'da/ montee mo dhali mon'thiny ilu/ mo jin mina uni 'taki 'kosh a'di jwa mo be.

25 Hili imancik a'di gwo bu'th a'di mon'thiny mo dhali thul a'di ka 'cesh ka shi/ ki en 'kupa gangaran goj ka nura/ i e mo be.

Shawuul A'di Diki'd mo e Pa Urushaliim mo

26 Dhali ki a'di pu'dki'd mo e Pa Urushaliim mo tani a'di palki is piti gam me'd nyakki imancika Yesus gwo mo be. Dhali uni 'baar mo ko/ a'di mo, mmo'koki gam gwo is ki a'di ta'da mancik gwo mo be.

27 Hila Barnaaba bu'th a'di mo dhali sus a'di e imandhunu ki she/ mo dhali ci uni gwo mo mmomisha a'di Tapa ibway mo dhali a'di tor a'di gwo si'da/ mo, dhali a'di si'da/ ki a'di di'di Pan Dimashk mo tani a'di tor gwo e gway ma Yesus mo mmodiki ju/ mo be.

28 Dhali a'di diki'd nyakki uni mmokul gu'b e Pa Urushaliim mo

29 mmotor gwo e gway gi Tapa mo mmodiki ju/ mo. Dhali a'di o gwo mo dhali su'k ki gwo apo/ 'Kwani Yahuuda/ kun ta 'Kwani Griki mo. Hili uni ṅap a'di mmo'kosh jwa mo.

30 Dhali ka wak piti mishkin mo tani uni sus a'di ka lungu'b mo e Pan Kaysariyya mo dhali tu'c a'di mmoya Pan Tharsuus mo be.

31 A'di tan ma kaniisa gi monku'th is e Pa Yahuudiyya 'baar mo dhali Pany Jaliil mo dhali Pan Saamira si'da/ mo mmonyaju uni is mo dhali mmo/ii ki monko/ gi Tapa dhali e momalas gi Shi/in Dheleladhelel mmomar is mo be.

Iniyaas A'di Waṅkunu mo be

32 Dhali a'di warki'd ki ya ma Buṭerus e moyam piti 'baar mo ki 'beles mo tani a'di yaki'd ka lungu'b si'da/ e uni kun dhunu ki she/ gi dhelel dhelel kun 'kon e Pan Ludda mo.

33 Dhali e mun mo tani a'di gamki wathin kamu/ jin yuku gway ka Iniyaas mo jin ish 'ko'da cim piti ki yil pekwara mo haali/ a'di mutta/ is mo be.

34 Dhala Buṭerus ki o a'di gwo mo ki: Iniyaasa, Yesus Kristhos waṅki /e mo. Cuyi mis mo dhali thosona cim pini mo ma. Dhali ise/ a'di cuki'd mo.

35 Dhali aris uni kun 'kon e Pan Ludda mo dhali Pan Saruun mo mishki a'di mo dhali uni tu'kkin ki Tapa mo be.

Thabiitha A'di Tu'kkunu Is mo Mmodi ki E mo

³⁶ Dhala mancik gwon kamu/ diki'd e Pan Yaapa jin yuku ka Thabiitha jin ta gi 'pemen ki 'twam buni jin yuku ka Ghasaala mo. A'bom yan 'tu'du/ ka tuca barga/ mo dhali mii mii gom 'kwani gun hatha'ko'd mo kun miikina a'di to mo.

³⁷ Dhali a'di warki'd ka cim gwansan ki a'di soka is mo dhala yim wuki'd mo. Dhali ki uni upki a'di is mo tani uni ki 'thi a'di e gu'b jin nyanu ka makampo/ mo.

³⁸ Dhali gom Pan Ludda 'dish Pan Yaapa is mo tani imancik gwo mmocika uni gwo ka Buterus di'di mun mo tani uni ki hash 'kwanin su/ mmo/ii a'di mo mmodi'b a'di is ki gwo mo ki: Dhalku/ ki miiya diite/ mo mmonyak ya ki am mo.

³⁹ Dhala Buterus cu'ki'd mo dhali yayi'd nyak ki uni mo. Dhali ki a'di pu'dki'd mo tani uni suski a'di e gu'b jin nyanu ka makampo/ mo dhala ris up kun wuna ikathim buni doshkini 'ko'd gwar piti mo mmoko mo dhali mmo'tor burrinyen tura bi mo dhali burrinye/ kun hidhuwa po/ tiya mo kun thosonkin ma Ghasaala ki a'di nyak di ki uni mo.

⁴⁰ Hila Buterus tho'hi uni 'baar mo tani dhali a'di ca'bki'd ki jin 'kupa'dupun mo dhali 'tho mo dhali mmo'tu'k 'kup ki is piti mo tani a'di ki o gwo mo ki: Thabiitha, cuyi mis mo ma. Dhali a'di ka'dki em piti mo dhali ki a'di parki'da Buterus e mo tani a'di cu mis mo.

⁴¹ Dhali a'di ci a'di me'd piti mo dhali 'de'k a'di ki mis mo dhali mmoyuka a'di imandhunu ki she/ gi dhelel dhelel mo dhali up kun wuna ikathim buni mo tani a'di ki tor uni ayim mo ki a'di di'd ki e mo be.

⁴² Dhali a'di warki'd ki mo jin mishu ki lala'th e Pan Yaapa 'baar mo dhali 'kwani ka ris gamki Tapa gwo is mo.

⁴³ Dhali a'di warki'd ki mo jin ca'bkina a'di mo ka cim ka ris e Pan Yaapa mo nyakka Simaana kamu/ jin ta'da man'kucur yi't mo be.

10

Buterus dhala Karniliyuus mo

¹ Dhali wathin kamu/ diki'di Pan Kaysariyya jin yuku gway ka Karniliyuus mo jin ta'da mancil ma askar iss 'kwanim pa mudhe'd mo ki mo jin yuku ki mo jin jin ma askar aji eya Ithaliyaan mo be.

² A'di ta wathin gayiin dhali a'di ta a'di jin ko/ki'da Arungimis mo uni ki kun gu'b piti ilu/ i'baar mo dhali jin ci tom piti kagahara gom 'kwani kun hatha'ko'd mo dhali 'tho'da Arungimis isa yempa/ mo.

³ Ki mo wana e ka tente/ ikwara mmodina a'di ibum 'ban mo tani ki tonyjan parkina a'di e eya tente/ mo tani aman'doyu gwo ma Arungimis pu'dki'di a'di mo dhali o a'di gwo mo ki: Karniliyuus.

⁴ Dhali a'di mmohila a'di a'di ka 'thime/ mo tani dhali mmo'ko/ is mo tani a'di ki o gwo mo ki: Ata Tapa? Dhali a'di ki o a'di gwo mo ki: Mon'thom pini dhali to kun cina /e cu'ki'd mis mo gom mo jin minu ka /e e mo ibwambor ma Arungimis mo.

⁵ Dhali shwane/ dhuyi 'kwanin gwas 'pen mo mmo/ii Pan Yaapa mo dhali susa Simaan jin yuku ki gwaya kamu/ ka Buterus mo.

⁶ A'di ca'bki'd nyakka Simaan jin ta'da man'kucur yi't mo. Gu'b piti di'di yana gap mo.

⁷ Dhali ka man'doyu gwo jin tor a'di gwo yaki'd 'peni a'di mo tani a'di yukki imanmiiya tu'c gi gu'b piti isu/ mo dhala askara kamu/ 'peni uni jin ta'da gayiin mo jin cor a'di ki sule/ mo tani

⁸ dhali mmorasha a'di gwo e 'baar mo gom uni mo tani a'di ki dhu uni 'pen mo mmo/ii Pan Yaapa mo be.

⁹ Dhali ka cim jin 'ko'd mo tani ki uni 'kon e mo/iim buni mo dhali ki uni 'dish pa is mo tani Buterus seki 'kunj'u' mo mmo'tho ki mo jin wana e ka tente/ ibwan'kup mo.

¹⁰ Dhali a'di 'kosh'a te/ mo dhali ṅap to mo mmoshwa mo. Hili ki uni 'kon mmothoson to mo tani a'di biṭa is jwa mo.

¹¹ Dhali a'di hilki momis ka'du mo dhali toṅ'kul bwan kamu/ thulki mo jin wana e ka dhan burrinye/ jin dhaluwa 'cesh ki shem 'pena bi doṅon apowa 'cesh mo

¹² kun 'kona ris to 'baar mo kun 'kona jamas ki she/ ki she/ nycine/ mo to/ e kun 'kona sho'k do doṅon mo dhali tony'cesh kun paaran mo dhali 'dii kun peni mis mo.

¹³ Dhali 'twa/ pu'dki'di a'di ki: Cuyi mis mo ma, Buterus. 'Koshi ma dhali 'kayi mo.

¹⁴ Hila Buterus ki o gwo mo ki: Yisa wakana, Tapa, haali/ aha/ dinaki 'ka toṅ kamu/ tal 'de/ ki sule/ jin ga/u mo walla jin 'konuki thoson me'd jin onu mmomii mo.

¹⁵ Dhali 'twa/ pu'dki'di a'di dok/ e me'di su/ ki: A'di jin thosonkin ma Arungimis ki dhelel dhelel mo tani dhalku/ ki kar a'di ki to jin ga/u mo ma.

¹⁶ Dhali yan miikunu me'di kwara mo. Dhali ise/ toṅ'kul bwa bu'thkunu e momis mo.

¹⁷ Dhali ka Buterus dumpulki'd kagahara ki is piti mo gom tonyjan yan jin para a'di e mo tani dhali gom 'pemen piti midi 'taki ta ji gi wakata mo tani hili 'kwanin' gwas kun tu'c ma Karniliyuus ki iiku/ mo tani mmodotkina uni gu'b ma Simaan mo tani uni doshkin ibwambor 'twan'kal gu'b mo,

¹⁸ dhali yukkina yuk mo mmodot gwo mo wakka Simaan jin yuku ki gwaya kamu/ ka Buterus mo tani midi 'taki ca'bi mahan mo.

¹⁹ Dhali ka Buterus di'd mmokulum gwon tonyjani bwa mo tani Shi/in o a'di gwo mo ki: Hili mo mo ma, 'kwanin' gwasi kwara ṅapi /e mo.

²⁰ Hili cuyi mis mo dhali thuli /e mo ma dhali yayi nyakki uni mmodiki dhan gwo i she/ mo, gom aha/ tuca uni mo be.

²¹ Dhala Buterus thulki'd ka 'ceshi 'kwani mo dhali o gwo mo ki: Hili mo mo ma. Aha/ tana a'di jin ṅapa um ti. Um iyyin kata?

²² Dhali uni o gwo mo ki: Karniliyuus jin ta'da mancil ma askar iss 'kwanimpa mudhe'd jin ta wathi/ jin mii'd ka kar/ e mo dhali ta a'di jin ko/ki'da Arungimis si'da/ mo dhali jin manja 'kwani gi Bampa/ Yahuuda/ 'baar mo tani a'di cin ma Arungimis gwo n'twa/ a/ ka man'doyu gwo jin dheleladhelel mo mmohashi /e e gu'b piti mo dhali mmocik gwo 'peni /e mo.

²³ A'di yukkina a'di uni bway bwan gu'b mo dhali dhu uni mmota yilkina/ mo be.

Dhali ka cim jin 'ko'd mo tani a'di cu mis mo dhali ya nyakki uni mo dhali kun tiya 'pena wak buni 'peni Pan Yaapa nyak ii ki uni si'da/ mo.

²⁴ Dhali ka cim jin 'ko'd mo tani uni seki Pan Kaysariyya mo. Dhala Karniliyuus di'd mmocor uni mo mmoyukkina a'di abas piti imontal 'de/ mo dhali imugun ganam piti kun ena a'di ki en gana/ mo.

²⁵ Dhali a'di warki'd ki mo jin sen ma Buterus mo tani aKarniliyuus gam a'di 'kup mo dhali bitki'da 'ceshi sho'k piti mo dhali lun' a'di mo.

²⁶ Hila Buterus 'de'kki a'di ki mis mo mmo/o gwo mo ki: Cuyi mis mo ma. Aha/ ki is pem si'da/ tana wathi/ mo.

²⁷ Dhali ki a'di tor'ki'da tor ki a'di mo tani a'di seki bway bwan gu'b mo dhali gamki 'kwani ka ris tulki isi montal 'de/ mo.

²⁸ Dhali a'di ki o uni gwo mo ki: Um ki is bum mishkin ki a'di nonu mo ki gwonkan jin cinu ki wathi/ jin ta Wathi/ Yahuuda/ midi mol is piti gam me'd mo walla midi diki ya e jarj kamu/ 'de/ e bampañ kamu/ mo. Dhali hili Arumgimis tori aha/ ki aha/ mina diki 'taki yuk wathin kamu/ tal 'de/ ki jin ga/ u mo walla jin dinuki thoson me'd jin onu mmomii mo.

²⁹ Haali/ a'di wakan mo tani aha/ si'da/ yayina um ki dar gi gwon dharj mo haali/ aha/ hashkunu mo. A'di dotka/ um ki gwonta ihashkina um aha/ mo.

³⁰ Dhala Karniliyuus o gwo mo ki: Acim doñon jin di'di twa/ a/ ntagi mo yan shwane/ mo tani aha/ dina mmobu'th mon'tho ka tente/ kwara e gu'b pem mo. Dhali hili mo mo ma. Wathi/ doshki'd ibwambori aha/ ki burrine/ i is ki ra/ ra/ mo

³¹ dhali o gwo mo ki: Karniliyuus, mon'thom pini ciku mo dhali to kun cina /e mo tani kakunu e mo eya Arumgimis mo.

³² Haali/ a'di wakan mo tani hashki gwo mo e Pan Yaapa mo dhali yuka Simaan jin yuku ki gwaya kamu/ ka Buterus mo. A'di ta yilkina/ e gu'b ma Simaan jin ta'da mankucur yit iyana gap mo.

³³ A'di hashka/ /e gwo mo ise/ dhali /e miin ki 'bore/ mmoyayina /e kan mo. Shwane/ haali/ a'di wakan mo tani aman 'baar mo imahan 'kona e bun'kus ma Arumgimis mo mmocika ris to 'baar mo kun kankina Tapa /e gwo mo.

Buterus A'di Tori Gwo e Gu'b ma Karniliyuus mo

³⁴ Dhala Buterus ka'd 'twam piti mo dhali o gwo mo ki: Ka jin gana/ aha/ nyithkina ka Arumgimis diki mii mii ka gwar 'de/ gom 'kwani mo.

³⁵ Hili em bampañ 'ceshi 'baar mo ki 'beles mo tani a'di jin ko/ a'di mo dhali mii miinjar/ e mo tani a'di misha a'di bu'th mo.

³⁶ Gwo jin hashkina a'di uci ma Israyiil mo mmoci gwom 'boro'd ki monku'th is ma Yesus Kristhos mo (a'di jin ta Tapa gom 'kwani 'baar mo) -

³⁷ Gwo caan jin onu misha um ki is bum mo a'di jin cinu ki lala'th e Bampa/ Yahuudiyya 'baar mo mmotelu a'di 'pen mo 'peni Pany Jaliil mo 'ko'di gwo jin miin ma Yohaana mii ki yi'de/ jin cinu mo be.

³⁸ Yesus gi Pa Naasira mmo'kosh ma Arumgimis a'di ki Shi/in Dheleladhelel mo dhali mom'bi'th si'da/ i'kupi a'di mo, tani, a'di jin manaski'd ki mis mo mmomii mii kun 'boron mo dhali mmowotha ris 'kwani kun 'kosh ma ruma 'cesh mo be, haali/ Arumgimis di'd e a'di mo.

³⁹ Dhali am tana iman/o gwo goma ris to gwansan kun miina a'di e bampañ 'Kwani Yahuuda/ mo dhali e Pa Urushaliim si'da/ mo. A'di si'da/ jin 'koshkina uni jwa mo mmohankina uni a'di apo/ cwa mo.

⁴⁰ A'di 'de'k ma Arumgimis mmis ka cim kwara mo dhali tor a'di eya tente/ mo

⁴¹ yisa ka ris 'kwani 'baar yisa, hili ki iman/o gwo kun lak ma Arumgimis 'thissa/ kun ta aman kun nyak to shwa ki a'di mo dhali mmonyak to pi ki a'di mo 'ko'di a'di piki'd 'peni mowu mo be.

⁴² Dhali a'di kan am gwo mmoci 'kwani mo dhali te gwo mo ki a'di ita a'di jin kar ma Arumgimis mmota adwallin gwo gom uni gun 'kon ki e mo dhali uni gun wukin mo.

⁴³ Gom a'di mo tani aris imanci gwo ma Arumgimis kadhamo/ mo uni te gwo mo ki ki gway piti mo tani aris 'kwani 'baar ki 'beles kun gam a'di gwo is mo tani mini bu'th monjwam gom miinthus mo be.

'Kwani gun 'Koki Ta 'Kwani Yahuuda/ Bu'thki Shi/in Dheleladhelel mo

⁴⁴ Hili ka Buterus di'd mmo/o gwo gwansan mo tani Shi/in Dheleladhelel yaki'da po/ aris uni 'baar mo kun cik gwo mo.

⁴⁵ Dhali uni kun 'ciṭhu/ amunyjal yis kun gam gwo is mo tani merkin kagahara mo, uni 'baar mo kun iina Buṭerus haali/ to jin cinu ki me'd jin ta Shi/in Dheleladhelel mo gaḅki'da po/ 'kwani kun 'koki ta 'Kwani Yahuuda/ si'da/ mo.

⁴⁶ Haali/ uni cik uni mmo/o gwo ki 'twan tiya dhali maṅa Arumgimis mo. N'ko'd mo tani aBuṭerus thoḅ gwo mo ki:

⁴⁷ Mina wathiṅ kamu/ mish non yi'de/ ki uni minu 'taki 'koki mii ki yi'deya, uni kun bu'th Shi/in Dheleladhelel me'd ana mo 'taa?

⁴⁸ Dhali a'di kan uni gwo mo ki uni minu mii ki yi'de/ ki gway ma Yesus Kriṣṭhos mo. Dhali uni doṭki a'di mo mmoḅa'bi uni ka cim ush'ceenne/ mo be.

11

Buṭerus A'di Lolopki'da Kaniisa Gwo e Pa Urushaliim mo

¹ Dhali imandhunu ki she/ mo dhali kun tiya 'pena waḅ kun 'kon e Bampa/ Yahuudiyya mo cikki gwo ki 'kwani kun 'koki ta 'Kwani Yahuuda/ si'da/ buthi gwo ma Arumgimis mo.

² Dhali ka Buṭerus yayi'd 'kup ki misi Pa Urushaliim mo tani uni kun 'ciṭhuwa munyjal yis mo su'k a'di ki gwo mo

³ mmo/o gwo mo ki: Katinta sa/? iyana /e i 'kwani gun 'konuki 'ciṭha/ munyjal yis mo dhali nyak to shwa ki uni mo?

⁴ Hila Buṭerus tel gwo 'pen mo mmoṭor gwo i uni ka roṭham po/ mo mmo/o gwo mo ki:

⁵ Ki aha/ dina e Bampa/ Yaapa mo mmo'tho mo dhali aha/ biṭa is jwa mo mmopar tonyjan e mo. Toṅ'kul bwan kamu/ thulki'd mo jin waṅa e ki dhan burriṅye/ jin dhaluwa 'cesh 'peni momis ki shem 'pena bi idonon mo. Dhali a'di yayi'di aha/ ciki/ mo be.

⁶ Dhali ki aha/ dina mmohil a'di ka 'thime/ mo tani dhali mmokulum gwo ibwa mo tani aha/ mishkina apo/ a'di mo to/e kun 'kona sho'k do donon kun ta kuny 'cesh mo dhali tombwaasho mo dhali to kun paarana 'cesh mo dhali 'dii kun peni momis mo be.

⁷ Dhali aha/ cika 'twa/ si'da/ jin o gwo i aha/ mo ki: Cuyi mis mo ma, Buṭerus, dhali 'koshi ma dhali 'kayi mo.

⁸ Hili aha/ ona gwo mo ki: Yisa wakana Tapa haali/ toṅ kamu/ jin ga/u walla toṅ kamu/ jin dinuki thoson me'd jin onu mmomii mo tani a'di yisa ya'di 'twam pem me'd 'deya.

⁹ Hili 'twa/ thoḅu mo me'di su/ 'peni momis mo ki: A'di jin thoson ma Arumgimis ki dhelel dhelel mo tani dhalku/ ki kar a'di ki to jin ga/u mo ma.

¹⁰ Dhali a'di miinu me'di kwara mo. Dhala ris to budhu e momis doḅ/e mo.

¹¹ Dhali hili mo mo ma, 'kwaniṅ gwasi kwara doshkin ibwambor gu'b jin 'kona aman nycine/ mo tani mmohashkunu uni 'peni Paṅ Kaysariyya i aha/ mo.

¹² Dhali Shi/in tu'c aha/ mmonyak ya ki uni mo ki dar gi gwon dhan mo. Dhali unim pe'de/ gwansan si'da/ 'pena waḅ mo tani nyak ii ki aha/ mo. Dhali am sekina gu'b wathi/ mo be.

¹³ Dhali a'di ṭorki aman gwo mo mmopara a'diya man'doyu gwo e mo mmodosh igu'b piti mo dhali o gwo mo ki: Hashi gwo e Paṅ Yaapa mo ma mmoyuḅa Simaan jin yuku ki gwaya kamu/ ka Buṭerus mo

¹⁴ jin mido /e gwo mo, gwo kun minu woṭh /e mo ki kun gu'b pini ilu/ mo.

¹⁵ Dhali me'd jin telka/ gwo 'pen mo mmo/o mo tani Shi/in Dheleladhelel yayi'da po/ uni mo me'd jin yakina a'di apo/ ana ka mun'kup mo be.

¹⁶ Dhali aha/ kana gwon Tapa e mo mmo/ona a'di gwo mo ka: aYohaana ka jin gana/ mii'da mii ki yi'de/ mo tani hili um minu mii ki Shi/in Dheleladhelel mo be.

¹⁷ Wakki/ Arumgimis ki ci uni to jin cinu ki me'd kansan mo tani me'd jin miina a'di si'da/ gom ana ki ana gamkina Tapa Yesus jin ta'da Kristhos gwo is mo tani aha/ tana aja sa/ jin miga/ mish roca Arumgimis mo?

¹⁸ Dhali ki uni cik to gwansani 'baar mo tani uni bu'th mon'ku'th is mo dhali kara Arumgimis ki ca mo mmo/o gwo mo ki: Hili 'kwani kun 'koki ta 'Kwani Yahuuda/ si'da/ cin ma Arumgimisa du mo mmori'c is mo ntagi mon'koki/e mo be.

Akaniisa e Pa Anthaakiya mo

¹⁹ Uni si'da/ kun ceckeri bwa mo gom monto'c bwa jin piki'd mo goma Istipanus mo tani iikin mo ntagi Pam Piniikiya mo dhali Pan Kuprus mo dhali Pa Anthaakiya mo mmo/o gwo ki kun tiya yisa, hili ki jasi 'kwani kun ta 'Kwani Yahuuda/ mo.

²⁰ Hili kun tiya 'koni bwam uni kun ta 'Kwani gi Pan Kuprus mo dhali Pan Kerawaan kun o ki 'Kwanin Griki si'da/ mmo'or gwon Tapa Yesus me'dyin iiyina uni e Pa Anthaakiya mo be.

²¹ Dhali me'd gi Tapa di'd e uni mo dhala waambuhany 'kwani caaca mo kun gam gwo is mo kun tu'kkin e Tapa mo.

²² Dhali gwontor yan yayi'di 'ceñ 'kwanin kaniisa jin di'd e Pa Urushaliim mo, dhali uni hashkina Barnaaba ntagi Pa Anthaakiya mo

²³ jin 'bora bwa mo me'dyin pu'da/ a'di mo, dhali a'the ma Arumgimis mishkina a'di mo be. Dhali a'di malaski uni 'baar mo ki gwo mo, ki gwo kun dhuna uni adu mo mina uni 'dim 'kup gom Tapa mo.

²⁴ Haali/ a'di ta wathi/ jin 'boro'd mo dhali jin 'tu'du/ mo ki Shi/in Dheleladhelel mo dhali ki mon'gam gwo is mo dhali 'kwani ka ris maru is e Tapa mo.

²⁵ Dhali a'di yaki'd mo e Pan Tharsuus mo mmon'apa Shawuul mo

²⁶ dhali ki a'di gamki a'di mo tani a'di ki sus a'di e Pa Anthaakiya mo. Dhali a'di warki'd ki mo jin 'baarkina uni yil 'de/ mo mmotul isi montal 'de/ nyakka kaniisa mo dhali tor gwo ki 'kwani ka ris ris mo, dhali imangam gwo is yuku gway ka Kristhiyan e Pa Anthaakiya mo be.

²⁷ Dhali ka cim gwansan tani imanci gwo iiyin ka lun'gu'b mo 'peni Pa Urushaliim e Pa Anthaakiya mo.

²⁸ Dhali jamu/ tal 'de/ 'peni uni doshki'd ki mis mo jin yuku ka Aghabuus mo dhali tor gwo mo gom momer jin misha a'di ki Shi/in ki dhan te/ caaca mididi apo/ mony'ceshi 'baar mo jin bu'th mo mo ka tee ma Kuludiyuus mo.

²⁹ Dhali imancik gwo uni 'baar mo ki 'beles me'd jin mishu a'di mii mo tani uni dhu bwa mo mmohash mowoth goma wak buni kun 'kon e Pa Yahuudiyya mo,

³⁰ me'd jin miina uni si'da/ mmohash a'di e 'kwanin gwanyjaka/ ki me'd ma Barnaaba dhala Shawuul mo be.

12

Yakuub A'di 'Koshkunu Jwa mo dhala Buterus Karkunu eya Sijin mo

¹ Dhali mo 'dishki'd mo ka cim gwansan mo tani Hiroodus jin ta'da malik karki me'd piti mmobu'th 'kwanin tiya 'pena kaniisa mo mmo'oc uni bwa mo.

² Dhali a'di 'koshki'da Yakuub jwa mo jin ta'da kam ma Yohaana ki gandala turga/ mo.

³ Dhali ki a'di parki'd ki 'Kwani Yahuuda/ 'boru bwa mo gom a'di mo tani a'di diki dak mii mo hili bu'thki'da Buṭerus si'da/ mo. Dhala cim gwahan ta'da Cim gi Maanjuthu'd kun miinu ki dar ga cumat mo.

⁴ Dhali ki a'di bu'thki a'di mo tani a'di kar a'di eya sijn mo dhali ci a'di ka askar kun dhunu mo ka nyir me'di do donjon mo mmoji a'di mo mmo/o gwo e bwa mmosus a'di mo ibwambori 'kwani 'ko'da cim gi Mompe'kupanyolos mo.

⁵ A'di karkunuwa Buṭerus eya sijn mo. Hili mon'tho miin ma kaniisa ki dar gi mondak mo eya Arumgimis gom a'di mo.

Buṭerus A'di 'Cukunu 'Pena Sijn mo

⁶ Dhali ka Hirodus murki'di sus a'di ka pije/ mo tani mon'thiny yansan mo tani Buṭerus di'd mmo/ish e ibwaman ma askar su/ mo dhali deku ka jindhiiri su/ mo dhali imanji mo mo 'koni bwambor ma campur mo mmohila sijn mo.

⁷ Dhali hili mo mo ma, aman'doyu gwo gi Tapa doshki'd mo mmo'dish a'di is mo dhali monkush 'twaḱki mo mo e ari gu'ba sijn mo. Dhali a'di dorki'da Buṭerus 'ko'd gwar ki me'd mo dhali mer a'di e mo mmo/o gwo mo ki: Cuyi mis ise/ ki jahanne/ mo. Dhala jindhiir piti 'cukkin mo 'peni me'd piti mo.

⁸ Dhali aman'doyu gwo o a'di gwo mo ki: Deḱi waḱkan e empa'd pini mo ma dhali deka ppam pini mo. Dhali a'di mii a'di mo. Dhali a'di ki o a'di gwo mo ki: Kumi burrinyem pini i is pini mo dhali bathi aha/ m'pen mo.

⁹ Dhali a'di ya'd ka pije/ mo dhali batha'da bath mo dhali a'di molo'd ki a'di ta jin gana/ jin miikin ma man'doyu gwo mo tani hili a'di tosh ki a'di par tonyjan e mo.

¹⁰ Dhali ki uni pe uni mo kun ta imanji mo mo kun 'koni twa/a/ dhali imanji mo mo kun ta kun 'ko'd mo tani uni iiyini 'twaḱkal tonḱuthu'd jin ka'du bway mo e 'penkuman bampa/ jin ka'da'd gom uni ki is piti mo. Dhali uni iin ka pije/ mo dhali iin mo naskina/ mmo'baar bwaya 'de/ mo dhali ise/ aman'doyu gwo yaki'd 'peni a'di mo.

¹¹ Dhali ka Buṭerus yaki'd ki is piti mo tani a'di o gwo mo ki: Shwane/ aha/ misha ka jin gana/ ki Tapa hashki'da man'doyu gwom piti mo dhali 'cuk aha/ ka pije/ mo 'peni me'd ma Hirodus mo dhali 'pena ris to kun čora 'Kwani Yahuuda/ mo.

¹² Dhali ki a'di mishki to eya tente/ kan mo tani a'di yaki'd e gu'b ma Mariyam jin ta KoYohaana jin yuku ki gwaya kamu/ ka Markus mo i mo jin tula 'kwani is ka ris mmonal 'de/ mo dhali uni 'kon mmo'tho mo be.

¹³ Dhali ki a'di dorki'da campur 'twaḱkal ki me'd mo tani ari nyara/ jin mii'da tu'c jin yuku gway ka Ruda mo tani a'di yayi'd mmociḱ 'twa/ naskina/ 'te/ mo.

¹⁴ Dhali ki a'di nyithki'd ki a'di ta 'twa/ ma Buṭerus mo tani a'di diki ka'd 'twaḱkal mo hili gom mom'bor bwam piti mo tani a'di guski'd mo mmoṭor gwo ka Buṭerus doshki'd ibwambor 'twaḱkal mo.

¹⁵ Dhali uni o a'di gwo mo ki: /E guskina du mo ba/. Hili a'di tor uni gwo dok/e ki 'bi'th ki a'di wakan mo be. Dhali uni o ki a'di ta'da man'doyu gwom piti 'te/ mo.

¹⁶ Hila Buṭerus di'di modor 'twaḱkal naskina/ mo dhali ki uni ka'dkin mo tani uni par a'di e mo dhali merkin mo be.

¹⁷ Hili a'di mmowukkina a'di uni e ki me'd mo mmo'ko ki shwam mo tani a'di ci uni gwo 'baar mo mmosusa Tapa a'di ka pije/ mo 'pena sijn mo. Dhali a'di o gwo mo ki: Tora ris to gwansan ka Yakuub mo dhala waḱ bana mo. Dhali a'di ya'd mo 'peni uni mo dhali ya'd mo e monkamu/ mo.

¹⁸ Dhali mmosul ma tente/ mo tani mii ibwaman ma askar yisa miinu ka sereḱ yisa, aBuṭerus warki'd kata mo?

¹⁹ Dhali ka Hirodus ṅapki'da ṅap kagahara mo tani dhali diki gam a'di mo tani a'di ṅapki gwo mo gom imanji mo mo dhali a'di kaṅki gwo mo ki uni minu 'kosh mo. Dhali a'di yaki'd ka lungu'b mo 'peni Bampa/ Yahuudiyya mo ntagi Paṅ Kaysariyya mo dhali ɕa'bi mun mo be.

Jwa ma Hirodus mo

²⁰ Dhali shwane/ Hirodus miiki'da nyor ki 'Kwani gi Pan Sur mo dhali Pan Saydaa/ mo dhali uni iyyin ki bwan tal 'de/ i a'di mo dhali mmomiina uni amugu aBalastus jin ta'da manmiiya tu'c gu'ba ci goma malik tani uni ki dot mongwam mo haali/ bampam buni thipu 'peni bampa/ ma malik mo be.

²¹ Dhali apowa cim jin karu mo tani Hirodus mmohidha a'di burrinye/ ma malik mo tani dhali mmoɕa'ba a'di eya kursi ma malik mo tani dhali a'di ki ɕi uni gwo mo be.

²² Dhali 'kwani cuun kagahara mo mmo/o gwo mo ki: 'Twa/ ma rum 'te/ be yisa 'twa/ gi wathimpa mo.

²³ Dhali ise/ aman'doyu gwo gi Tapa 'kosh a'di mo haali/ a'di diki kara Arungimis ki ca mo dhali a'di shwan ma yish mo dhali ɕi shi/in piti mo be.

Barnaaba dhala Shawuul mo

²⁴ Hili gwo ma Arungimis cakid mo dhali markunu is mo be.

²⁵ Dhala Barnaaba dhala Shawuul doḱkin 'peni Pa Urushaliim mo ki uni 'baarki mii jin iina uni mo mmomii mo tani uni suskina Yohaana nyakki uni mo, a'di jin yuḱkunu ki gwaya kamu/ ka Markus mo.

13

¹ Dhali kun tiya 'kon e Pa Anthaakiya eya kaniisa jin di'd imun kun ta imanci gwo mo dhali imantor gwo mo: iBarnaaba dhala Simaan jin yuku ka Nijar mo dhala Luḱiyus gi Paṅ Kerawaan mo dhala Manaayin jin ta'da amannyak ɕa'b ka Hirodus jin ta'da mudhiir dhala Shawuul mo.

² Dhali ki uni tul is mmolun Tapa mo dhali ga/ to mo tani Shi/in Dheleladhelel oki gwo mo ki: Dhuyi iBarnaaba dhala Shawuul ki she/ gom aha/ mo goma tu'c jin yuḱga/ uni mmomii mo.

³ Dhali ki uni ga/ to mo dhali 'tho mo dhali dhu me'd buni apo/ uni mo tani uni ki hash uni mo mmo/ii mo be.

Imandhunu ki She/ ɕiki Gwo e Paṅ Kuprus mo

⁴ Wakan be uni mmohasha Shi/in Dheleladhelel uni mo tani uni iikin ka lungu'b mo ntagi Pa Saluukiya mo dhali 'peni mun mo tani uni ki ii mo ka kur yi'de/ jin bela 'tham mo ntagi Paṅ Kuprus mo.

⁵ Dhali ki uni 'kon e Pan Salamiis mo tani uni ɕi gwo ma Arungimis e gu'b montul is gi 'Kwani Yahuuda/ mo. Dhali uni tan ga Yohaana si'da/ jin woṅhi uni mo.

⁶ Dhali ki uni 'cithkin isi bwaman ma 'cesha kunn is ki tur mo ntagi Pam Papuus mo tani uni gam wathin kamu/ jin ta gi e ma rum jin shi/ashi/ mo dhali jin ta'da manci gwonthus mo dhali jin ta Wathi/ Yahuuda/ si'da/ jin yuku gway ka Baryashuu mo

⁷ jin nyak ɕa'b ka wakiila Sarjiyuus Buulus jin ta'da mishin gwo wathi/ mo. A'di yan yuḱki'd iBarnaaba dhala Shawuul i a'di mo dhali ṅap gwo ma Arungimis mmocik mo.

⁸ Hila Aliim (haali/ gway piti yuku kan ki 'twan kamu/ mo) jin ta gi e ma rum jin shi/ashi/ mo tani a'di roḱki uni mo mmonapa wakiil yan mmoṭu'k mo 'peni mongam gwo is yan mo be.

⁹ Hila Shawuul jin yuku ka Buulus si'da/ mmo'tu'du/ a'di mo ki Shi/in Dheleladhelel mo tani a'di ki hil a'di ka 'thime/ mo

¹⁰ dhali o gwo mo ki: Ayy /e jin 'tu'du/ mo ka maḱi 'baar mo dhali /e jin ta thuthu/ ki thuthu/ mo dhali /e jin ta ya/ ma Iblis mo dhali /e jin ta 'kup ki a'di jin ta mo ma kar/e 'baar mo tani mina /e diki daḱ mo mmosusa sus jin ta jim per mo 'taa 'peni miinj gana/ gi Tapa mowa?

¹¹ Dhali shwane/ hili mo mo ma, me'd gi Tapa mididi apo/ /e mo dhali /e mini ta ja'da/ mo mmomola tente/ par e ki ari mo mo mmodiki ca'b ca'b 'pempa naskina/ mo. Dhali ise/ mōnduku'd bitki'da po/ a'di mo dhali mondhurumi'd si'da/ mo dhali a'di yuthurki'd mo mmoṅap 'kwani mo mmosus a'di me'da bi mo be.

¹² Dhali ḡ'ko'd mo tani awaḱiil ki a'di parki to e jin miikunu mo tani a'di gamki gwo is mo mmomera a'di mo gom gwon Tapa jin ṭoru mo be.

ABuulus dhala Barnaaba 'Kokin mo e Pa Anthaakiya mo gi Pam Pisidiyya mo

¹³ Dhala Buulus uni ki imannyak iim piti mo tani uni 'cukkina kur yi'de/ jin bela 'tham mo mmo/ii 'peni Pam Papuus mo dhali uni pu'dkin mo e Pam Parja gi Bampa/ gi Pam Pampiliyya mo dhala Yohaana ya'd mo 'peni uni mo mmodok ka nyan'ko'd e Pa Urushaliim mo.

¹⁴ Hili uni mmo'ciḱkina uni 'peni Pam Parja mo tani uni pu'dkin mo e Pa Anthaakiya gi Bampa/ gi Pam Pisidiyya mo dhali uni iikini gu'b gi montul is ka cim ma pesu/ mmo'kowa 'cesh mo.

¹⁵ Dhali 'ko'di gwoṅkan jin cinu deṅu e mo dhali gwo gi imanci gwo ma Arungimis kadhamo/ si'da/ tani Tapa gi gu'b montul is hashki uni gwo mo mmo/o gwo mo ki: Ikam bamaa, wakki/ um tan gi gwon tiya mo mmomalas 'kwani mo tani oyi mo ma.

¹⁶ Dhala Buulus doshki'd ki mis mo dhali mmowukkina a'di uni ki me'd mo tani a'di o gwo mo ki:

Um 'Kwani ma Israyiil mo dhali um kun ko/kina Arungimis mo tani kana:

¹⁷ Arungimis gi 'Kwani ma Israyiil gwan kwanyki ibabam bana mo dhali dhu 'kwani ki ca ki uni 'kon ki 'kus e Bampa/ Masir mo tani dhali ka bin tur mo tani a'di ki sus uni ka piḱe/ 'peni a'di mo be.

¹⁸ Dhali ki mo embul jin wana e ki yil issu/ mo tani a'di thipki'da thip gom uni mo e mombwaasho mo.

¹⁹ Dhali ki a'di 'ce'dki kal gi 'kwani kun 'kon ma po/i pesu/ sho'k kun 'kon e Paṅ Kanaan mo tani a'di ki ci uni bampam buni ki mal ki mo embul yan jin wana e ki yil iss* 'kwanimpa i/iss 'de/ i'ce'dki iss 'kwanimpa su/ i'ce'dka 'kume'd apo/ mo.

²⁰ Dhali ḡ'ko'di to gwansan mo tani a'di ki ci uni imandwall gwo gwo ntaga Samu/iil jin ta'da manci gwo mo.

²¹ Dhali ka nyan'ko'd dok/e mo tani uni dotkina malik mo dhala Arungimis ki ci uni aShawuul jin ta ya/ ma Kish jin ta wathi/ gi 'kwani ma wak ma Benyamiin ki mo embul ki yil issu/ mo.

²² Dhali ki a'di kwa/ki a'di mo tani a'di piki'da Dawuu'd mmota amalik buni mo. Gom a'di si'da/ a'di ki te gwo mo dhali o gwo mo ki: Aha/ gamkina Dawuu'd jin ta ya/ ma Yassa jin ta wathi/ jin gam ma du ki aha/ jin mididi mii bwam pemi 'baar mo.

²³ 'Peni emen gi wathi/ yan mo tani Arungimis me'd jin onu gwo is mo tani guyi'da Manwoḱ gom 'Kwani ma Israyiil mo jin ta'da Yesus mo

²⁴ me'dyin ṭor ma Yohaana gwo ṅtwa/a/ mo mmodina a'di ki yayu/ naskina/ mo tani gwo mmomiya mii ki yi'de/ gom mo jin minu rica du is goma ris 'Kwani ma Israyiili 'baar mo.

* 13:19 urbumiyya wa kamsiin

²⁵ Dhali ka Yohaana di'd mmo'baar bway piti mo tani a'di o gwo mo ki: Um tosh ki aha/ tana aja mo? Aha/ dina ki ta a'di mo. Hili mo mo ma, jamu/ midu yayu/ i'ko'di aha/ mo, appa/ sho'k piti mo tani aha/ dinaki 'bor jin miga/ 'cu'k a'di mo.

²⁶ Ikam pema um kun ta uci ma Ibrahiim kun iyyin 'pena tora 'de/ mo dhali um gwan ibwaman um kun ko/kina Arumgimis mo tani gwo gom mowoth yan hashkunu mo gom ana mo be.

²⁷ Haali/ uni kun 'koni Pa Urushaliim mo dhali tapam buni si'da/, haali/ uni 'koki mish a'di mo dhali 'koki mish gwo gi 'twa/ gi imançi gwo kun denju e mo ka cim ma pesu/ isa yempa/ mo tani uni miikina uni 'baar mo mmowakina uni a'di mo be.

²⁸ Dhali uni bala gamana ta i a'di mo mmoçi a'di mmowu mo hili uni dotkina Bilaatus gwo mo ki a'di minu mii 'kosh mo be.

²⁹ Dhali ki uni 'baarkina ris to 'baar mo mmomii kun 'kwarkunu mo gom a'di mo tani uni bu'thki a'di ka 'cesh 'peni cwa mo dhali 'thi a'di e mo'kupaje mo be.

³⁰ Hili Arumgimis 'de'k a'di 'peni mowu mo.

³¹ Dhali a'di mishu ka cim ka ris mo 'peni uni kun nyak ii ki a'di 'peni Pany Jaliil 'kup ki Pa Urushaliim mo tani uni shwane/ ita iman/o gwo gom a'di ibwarj 'kwani mo be.

³² Dhali am guyina um gwom 'borga/ 'peni jin onu is me'd jin toru ibaba mo

³³ ka Arumgimis 'baarki mii yansan e ana gom uci'cim bana mmo'de'kkina a'di aYesus mo be. Me'd jin 'kwarkunu mo si'da/ ka Masmuuri su/ mo ki:

/E ta Ya/m pem mo.

Ka cim yansan jin karka/ /e mmodi e aha/ mmotaya/ Ya/um mo.

³⁴ Dhali mmotana a'di gi wakan mo tani a'di 'de'kkina a'di a'di 'peni mowu shwane/ mo ki a'di midu diki tu'k ki sule/ mo e mompu/ mo, dhali a'di oki gwo cikise/ mo be ki:

Aha/ mina çi um mom'bor mii ma Dawuu'd kun ta kuj kogu mo dhali kun ta ku isinj gana/ si'da/ mo.

³⁵ Haali/ a'di si'da/ o'd kan eya masmuura kamu/ ki:

/E mini diki çi amankogum pini mmomish mompu/ mo.

³⁶ Haala Dawuu'd, 'ko'di a'di mii to gom 'kwani kun tana anyakum yil ki a'di ki bwa ma Arumgimis mo tani a'di ish e mo dhali 'thinu mo e mo gi icom mo dhali mishki mompu/ mo be.

³⁷ Hili a'di jin 'de'kkin ma Arumgimis mo tani a'di mol mompu/ mo.

³⁸ Haali/ a'di wakan mo tani dhalki a'di mishu mo ibwam um mo, ikam pem, ki wathi/ yan mo tani gwo gom miinthus mmogwam mo tani a'di cinu um mo be.

³⁹ Dhali 'pena ris to 'baar mo 'peni kun mola gwonkan ma Musa jin cinu mo um dhu ki mo ma kar/e mo tani e a'di mo tani aris uni 'baar mo ki 'beles kun gam gwo is mo tani uni dhunu ki mo ma kar/e mo be.

⁴⁰ Haali/ a'di gi wakan mo tani hili mo mo ma gom a'di midu 'taki pu'du/ apo/ um jin ona imançi gwo ma Arumgimis kadhamo/ mo ki:

⁴¹ Hili mo mo ma, um kun ta imanthyun 'twa/ mo tani meri mo ma dhali thisi e mo.

Haali/ aha/ miina mii ka cim bum mo,

mii jin mina umi ush ki 'tash mo mmogam is mo wakki/ jan tal 'de/ midu 'taki tor a'di um mo be.

⁴² Dhali ki uni iikin ka pije/ mo tani uni dotki gwo mo ki gwo gwansan minu 'taki o gom uni ka cim ma pesu' kamu/ jin 'ko'd mo.

⁴³ Dhali ki montul is 'koshu jwa mo tani uni ka ris 'peni 'Kwani Yahuuda/ dhali 'peni uni kun tana gayiin kun ta 'kwani kun 'koki ta 'Kwani Yahuuda/ kun bu'th gwo ma Arumgimis mo tani uni bathkina Buulus mo dhala Barnaaba mo kun o uni gwo mo mmomas uni mo mmo'ko ki sule/ eya 'the ma Arumgimis mo.

⁴⁴ Dhali ka cim ma pesun kamu/ jin 'ko'd mo tani 'kwani murkini 'taki ta 'kwani gi bampa/ 'baar mo kun iyyin mmutol is imontal 'de/ mo mmocik gwo ma Arumgimis mo.

⁴⁵ Hili ki 'Kwani Yahuuda/ mishkina waambuhany 'kwani mo tani uni 'tu'du/ ki mondeeya du mo dhali uni dhanjki to kun on ma Buulus mo dhali wal gwo sor si'da/ mo be.

⁴⁶ Dhala Buulus dhala Barnaaba o gwo eya tente/ mmo'koki ju/ mo dhali o gwo mo ki: A'di minu mii mii mo ki gwo ma Arumgimis minu mii o i/um ntwaa/ mo be. Haali/ um bel a'di 'peni um mo dhali um 'cunycurki is bum mmo/o ki um 'koki 'bor mmota gi mon'koki/e ki sule/ ya ye 'ba/ mo tani hili ma, aman tuka mo ki 'kwani kun 'koki ta 'Kwani Yahuuda/ mo.

⁴⁷ Haali/ wakan si'da/ Tapa kanki am gwo mo mmo/o gwo mo ki: Aha/ karkina /e mo mmota monkush gi 'kwani kun 'koki ta 'Kwani Yahuuda/ mo, ki /e mini 'taki di gom mowoth mo ntagi mo e mony'cesh jin di'd isa dhana/ nnii mo.

⁴⁸ Dhali me'dyin cika 'kwani kun 'koki ta 'Kwani Yahuuda/ gwo yan mo tani uni 'borkina bwa mo dhali kar gwo ma Arumgimis ki ca eya tente/ mo. Dhala ris uni gun dhunu mo mmota gi mon'koki/e ki sule/ ya ye 'ba/ mo tani uni gamki gwo is mo be.

⁴⁹ Dhali gwo gi Tapa kalu ki lala'th isi bampa/ yani 'baar mo ki 'beles mo.

⁵⁰ Hili 'Kwani Yahuuda/ lali upa gayiin kun manju sho'k mo dhali 'kwani kun tana 'kan'kup pa sho'k mo dhali uni cuuna po/ uni mmotoca Buulus dhala Barnaaba bwa mo dhali ta'k uni ka pije/ 'peni bwaman mompam buni mo be.

⁵¹ Hili uni pirkina buhany 'peni sho'k buni apo/ uni mo dhali pu'dkin mo e Pa Ikuuniya mo.

⁵² Dhali imancik gwo 'tu'dkin mo ki mom'bor bwa mo dhali ki Shi/in Dheleladhelel mo be.

14

ABuulus dhala Barnaaba 'Kokin e Pa Ikuuniya mo

¹ Dhali a'di warki'd ki mo jin 'kona uni e Pa Ikuuniya mo tani uni sekini montal 'de/ mo e gu'b gi montul is gi 'Kwani Yahuuda/ mo dhali mmo/ona uni gwo mo tani adhana waambuhany 'kwani caaca gi 'Kwani Yahuuda/ dhali 'Kwani Griki ilu/ mo tani gamki gwo is mo be.

² Hili 'Kwani Yahuuda/ kun ush gwo gam is mo tani uni cuuna po/ 'kwani kun 'koki ta 'Kwani Yahuuda/ mo dhali uni dhu uni gwo ibwa mo mmomii mii ha'th'ko'd apo/ awak yan mo.

³ A'di 'kona uni mmun ki rash rash mo mmo/o gwo ki dar gi monyju/ e Tapa mo jin ci gwo jin tenu mo gom gwo goma 'them piti mo mmoci momer mo dhala dhan mii caaca kun miinu mo ki me'd buni mo.

⁴ Hila waambuhany 'kwanimpa kwa/kunu bwa mo dhali kun tiya gamu me'd ki 'Kwani Yahuuda/ mo dhali kun tiya gam me'd ki imandhun ma Yesus ki she/ mo.

⁵ Dhali ki montha'th jin tha'thkina uni 'peni 'kwani kun 'koki ta 'Kwani Yahuuda/ mo tani dhali 'peni 'Kwani Yahuuda/ ilu/ nyakki tapam buni mo mmosor uni ki shi/ kagahara mo dhali mmo'kosh uni ki wosh mo tani

6 uni mishki gwo 'ban mo dhali son mo tagi Pa Lika/uniyya mo dhali Pan Listra mo dhali Pan Darba mo dhali kukul mo is mo.

7 Dhali e mun mo tani uni ɬorki gwom 'borga/ mo be.

ABuulus 'Koshkunu ki Wosh e Pan Listra mo

8 Dhali e Pan Listra mo tani wathin kamu/ ca 'bki'd jin dumpulki ya ki sho'k piti ki njwol 'peni bwan kum jin diki ya ki sho'k me'd 'de/ ki sule/ mo.

9 A'di yan cikki'da Buulus mmo/o gwo mo tani mmohila a'di a'di ka 'thime/ mo dhali mmomisha a'di ki a'di ta gi mongam gwo is mo mmowaçu a'di mo tani

10 a'di o gwo ki dhan 'twa/ ki: Doshi ki mis ki sho'k pini mo ma. Dhali a'di pe'di mis mo dhali yaki'd mo be.

11 Dhali ka waambuhany 'kwani parki mii yan e mo jin miikin ma Buulus mo tani uni 'de'kki 'twam buni mo mmo/o gwo ki 'twanj 'Kwani gi Pa Lika/ uniyya ki: Arum iyyini bwam ana ki jamas gi 'kwaniny'cesh mo.

12 Dhali uni yukkina Barnaaba gway ka Saps* mo dhala Buulus yuka uni ka Hermas† mo haali/ a'di ta tapa jin tori gwo mo.

13 Dhala gasiis ma Saps jin ta gi gu'b jin lunu to jin di'di 'twaman bampa/ mo tani a'di 'doyi'da morbip mo dhali jisarro/ mo e 'twanj kala gonj mo dhali a'di midi 'taki miya basa 'cesh nyakka waambuhany 'kwani mo.

14 Hili ki imandhunu ki she/ mo kun ta iBarnaaba dhala Buulus mo, cikki gwo gom a'di mo tani uni dherki burrinny buni bwa mo dhali peni bwaman ma waambuhany 'kwani mo dhali cuu ki dhan 'twa/ kun caaca mo

15 dhali o gwo mo ki: Kana 'kwani, ata miina um to gwahan kan mo. Am si'da/ tana 'kwanim 'ba'ban du me'd um dhali am guyina um gwom 'borga/ ki um mini 'taki tu'k mo 'peni tompinycon gwahan kun luja um mo eya Arungimis jin di ki e mo, jin ukki momis mo dhali mony'cesh mo dhali yi'de/ mo dhala ris to 'baar mo kun 'koni bwaman uni mo be,

16 a'di jin dhalki'da ris 'kwanim bampany 'cesh bwayi 'baar mo mmo/ii ki bwam buni mo e mo ma nyakum yil kun pekin mo be.

17 Dhali hili a'di diki dhal is piti ki dar gi gwontor mo haali/ a'di miiki miim 'boron mo dhali ci uma sho'k 'peni momis mo dhali yil mo kun dhotha tonɬe/ mo mmo'tu'da uma du ki tonɬe/ mo dhali monj'kuny bwa mo.

18 Dhali ki gwo gwansan kun enu mo tani uni miiki mii kun diɬadit mmonona waambuhany 'kwani 'peni mo ma basa 'cesh gom uni mo be.

19 Dhali 'Kwani Yahuudan tiya iyyini uni i mo yan mo 'peni Pa Anthaakiya mo dhali Pa Ikuuniya mo dhali mmolala uni awaambuhany 'kwani sho'k ki gwo mo tani uni 'koshkina Buulus ki wosh mo dhali dirki a'di ka pije/ 'peni bampa/ mo mmoɬoshkina uni ki a'di wuki'd mo be.

20 Hili ki imancik gwo doshkin ki jin 'kam a'di mo tani a'di cu mis mo dhali cikki'd e bampa/ mo dhali ka cim jin 'ko'd mo tani a'di yaki'd mo nyakka Barnaaba mo e Pan Darba mo be.

21 Dhali ki uni ɬorki gwom 'borga/ e bampa/ caan mo dhali imancik gwo ka ris 'kokin mo tani uni dokkin ka nyan'ko'd mo e Pan Listra mo dhali e Pa Ikuuniya mo dhali e Pa Anthaakiya mo

22 mmoɬel bwa gi imancik gwo sho'k mo mmomas uni ki gwo mo ki uni mini 'ko ki sule/ e mongam gwo is mo dhali ki monɬo'c bwa kun mini mii ta aris mo tani ana mina se Bampa/ ma Arungimis mo be.

* 14:12 Saps ta com to jin luja 'Kwaninj Griki mo. † 14:12 Hermas ta'da manya gom to kun luja 'Kwaninj Griki mo.

²³ Dhali ki uni dhuki uni ki 'kwaninḡ gwanyjaka/ eya risa kaniisa 'baar ki 'beles mo dhali 'tho ki monḡa/ to mo tani uni dhuki uni e me'd gi Tapa jin gamkina uni gwo is mo be.

Mondok jin Dokkina Uni ka Nyar'ko'd e Pa Anthaakiya gi Pan Suriyya mo

²⁴ Dhali uni 'cithkin ki tur mo e Pam Pisidiyya mo dhali pu'dkin mo e Pam Pampiliyya mo be.

²⁵ Dhali ki uni oki gwo e Pam Parja mo tani uni iikin ka lunḡu'b e Pa Attaaliya mo be.

²⁶ Dhali 'peni mo caan mo tani uni ki ii mo ka kur yi'de/ jin bela 'tham mo ntagi Pa Anthaakiya mo 'peni mo jin dhukunu uni eya 'the ma Arumgimis mo goma tu'c jin 'baarkina uni mo mmomii mo be.

²⁷ Dhali mmopu'dkina uni mo tani uni tulkina kaniisa is mo imontal 'de/ mo dhali uni lolopki uni gwo mo gom to 'baar mo kun miikin ma Arumgimis i uni mo dhali mmoka'dkina a'di acampur gi monḡam gwo is gom 'kwani kun 'koki ta 'Kwani Yahuuda/ mo.

²⁸ Dhali uni 'kokin ka cim ush'ceenne/ yisa nyakki imancikḡ gwo mo.

15

Montul Is gi 'Kwaninḡ Gwanyjaka/ ma Kaniisa e Pa Urushaliim mo

¹ Dhali 'kwaninḡ gwasia tiya iyyin ka lunḡu'b 'peni Pa Yahuudiyya mo dhali torkina waḡ buni gwo mo mmo/o gwo mo ki: Isi ciki/ ki um 'konuki 'citha/ munyjal yis mo me'd mii jin miikin ma Musa mo tani um molu woḡh mo be.

² Dhali ki iBuulus dhala Barnaaba uni walkina wal jin gwa'da'd yisa tani uni tiriishki uni ki gwo kagahara mo dhali awak buni ki dhu iBuulus mo dhala Barnaaba mo dhali kun tiya si'da/ 'peni bwam uni ki uni mini 'taki ii ka gagamis e Pa Urushaliim mo e imandhunu ki she/ mo dhali 'kwaninḡ gwanyjaka/ si'da/ mo gom gwo yansan jin doḡu/ mo.

³ Wakan mmosuskina 'kwaninḡ kaniisa uni ibway mo tani uni 'cithkin ki tur mo e Pam Piniikiya mo dhali e Pan Saamira mo mmoḡor gwo eya tente/ gom mo gi tuka 'kwani kun 'koki ta 'Kwani Yahuuda/ adu is mo dhali a'di pina dhan bwam 'boro'd eya waḡ buni 'baar mo.

⁴ Dhali ki uni pu'dkin e Pa Urushaliim mo tani uni butha 'kwaninḡ kaniisa mo dhali imandhunu ki she/ mo ki 'kwaninḡ gwanyjaka/ ilu/ mo dhali gwo lolopkina uni uni mo goma ris to 'baar mo kun miikin ma Arumgimis e uni mo.

⁵ Hili 'kwaninḡ tiya 'pena waḡa kamu/ 'peni bwanḡ 'Kwanim Parisiyyin kun gam gwo is mo tani doshkin 'peni bwam uni mo mmo/o gwo mo ki: A'di minu mii mii mo mmo'cith uni amunyjal yis buni mo dhali mmokan uni gwo mo ki uni mini ha gwonḡan ma Musa jin cinu e mo.

⁶ Dhali imandhunu ki she/ mo dhali 'kwaninḡ gwanyjaka/ nyakki is tul mo imontal 'de/ mo mmoḡora tor gom gwo yan mo be.

⁷ 'Ko'di gwo kun sugu ki rash rash mo tani aButerus cuki mis mo dhali o uni gwo mo ki:

Iwaḡ pema, um mishkin ka Arumgimis kwanyki'd 'peni um kagush ki 'twam pem mo tani 'kwani kun 'koki ta 'Kwani Yahuuda/ mini cikḡ gwom 'borga/ yan mo dhali gam gwo is mo.

⁸ Dhala Arumgimis jin mishki'da du mo tani a'di torki gwontor gom uni mmoci uni Shi/in Dheleladhelel mo me'd jin cikina a'di ana mo.

⁹ Dhali a'di diki mii mii ka gwar 'de/ gom ana mo dhali gom uni si'da/ kun 'koki ta 'Kwani Yahuuda/ mo haali/ a'di ki lam uni adum buni ki dhelel dhelel ki monḡam gwo is mo be.

¹⁰ Haali/ a'di wakan mo tani ata pala uma Arumgimis kan mo ki um mini 'taki dhu dhanḵa' b tom'ba/, i'ba/i imanciḵ gwo kun molkina ibabam bana ḵal mo dhali ana si'da/ mo.

¹¹ Hili ana gama gwo is ki ana minu woth mo ka 'the gi Tapa Yesus mo me'd mii jin mina uni mii kan si'da/ mo be.

¹² Dhali arisa waambuhany 'kwani 'baar mo 'kon ki shwam mo, dhali uni cikki gwo ma Barnaaba mo dhala Buulus mo mmololopa uni gwo mo gom momer mo dhala dhan mii kun caaca kun miikin ma Arumgimis i bwanḵ 'kwani kun 'koki ta 'Kwani Yahuuda/ e uni mo be.

¹³ Dhali 'ko'di uni 'kokin ki shwam mo tani aYakuub thok uni gwo mo mmo/ o gwo mo ki:

Iwak pema kana, ciki gwom pem mo ma.

¹⁴ Simaan lolopki gwo gom monthip jin thipkin ma Arumgimis 'kwani kun 'koki ta 'Kwani Yahuuda/ mo mmobuk 'kwani ka pije/ 'peni bwam uni gom gway piti mo.

¹⁵ Dhali gwo yan gama imanci gwo ma Arumgimis is kadhamo/ mo me'd jin 'kwarkunu mo ki:

¹⁶ 'Ko'di to gwansan mo tani aha/ mina dok/ mo

dhali aha/ mina dok/ e nyanḵ gu'ba burrine/ ma Dawuu'd jin 'tuḵu/ mo.

Dhali aha/ mina dok/ e nyanḵ gu'b jin shi/ u mo mo,

dhali aha/ mina thum a'di ki mis mo,

¹⁷ ki 'kwani kun ta nyenthe/ mo tani mini mish ḵap Tapa Arumgimis mo dhali aris 'kwani kun 'koki ta 'Kwani Yahuuda/ kun 'tho gway ma Arumgimis mo.

¹⁸ A'di ona Tapa jin ḵorki to gwansan eya tente/ 'peni kadhamo/ mo.

¹⁹ Haali/ a'di wakan mo tani gwo e bwam pem wa cikise/ mo be ki ana mina 'koki to'c uni gwansan bwa mo, uni kun 'koki ta 'Kwani Yahuuda/ kun tu'ḵkin mo ka Arumgimis mo.

²⁰ Hili ana mina 'kwar uni gwo mo ki uni mini dhal mii 'pen mo kun miina uni mo mmolunḵ tompinycon mo dhali 'peni mo kun miinu miinycaḵ si'da/ mo dhali 'peni to gun minyiciru 'kus dhali 'peni miin to ma bas si'da/ mo.

²¹ Haali/ 'peni yil kadhamo/ mo tani aMusa ta gi uni eya ris bampa/ 'baar mo kun ci gwom piti mmodenḵ a'di e e gu'b gi montul is ka risa cim ma pesu/ i 'baar mo ki 'beles mo.

Gwo gi Thoku mo e Montul Is gi 'Kwani Gwanyjaka/ ma Ḵaniisa Yan mo

²² N'ko'd mo tani uni toshkin ki a'di 'boro'd mo gom imandhunu ki she/ mo dhali 'kwaniḵ gwanyjaka/ gi 'kwaniḵ ḵaniisa 'baar ilu/ mo mmokwany 'kwani 'peni bwaman uni mo dhali mmoḵu'c uni mmo/ ii Pa Anthaakiya nyakki iBuulus mo dhala Barnaaba mo. Gway yerḵunu mo ka Yahuusa mo jin yuku ki gwaya kamu/ ka Barsaaba mo dhala Sila kun ta tapa ibwaman ma wak buni mo.

²³ Dhali uni 'kwarki gwo cikise/ e uni mo ki: Imandhunu ki she/ mo dhali 'kwaniḵ gwanyjaka/ ma wak buni eya wak kun 'koni bwaman 'kwani kun 'koki ta 'Kwani Yahuuda/ mo e Pa Anthaakiya mo dhali Pan Suriyya mo dhali Panḵ Kilikiyya mo tani theki uni me'd mo ma.

²⁴ Haali/ ka jinḵ gana/ aman cikkina gwo ki unin tiya kun iikin ka pije/ 'peni bwam am mo tani uni to'c um 'kus ki gwo mo mmo'kosh uma dum bum is mo uni kun 'kona aman ki ye'th sho'k ki gwo mo be.

²⁵ A'di toshkina aman ki a'di 'boro'd mo mmogama aman bwa me'd ki bwan tal 'de/ tani mmokwany 'kwani mo dhali mmoḵu'c uni ki ii i um mo nyakki iBarnaabam bam mo dhala Buulus kun ena aman kagahara mo be.

²⁶ Uni ta 'kwani kun ciki is buni ki 'kwanin tiya ki moŋ'koki/e gom gway gi Tapa Yesus Kristhos mo be.

²⁷ A'di hashkina amana Yahuusa mo dhala Sila mo. Uni ki is buni mini tor um gwo nyakki gwo kun toru ki 'twa/ mo.

²⁸ A'di toshkina Shi/ in Dheleladhelel ki a'di 'boro'd mo dhali am si'da/ mmo'koki dhu um towa po/ kun diḏaḏiḏ mo kun mini bol to gwansan gun minu mii mii mo e ki diḏ mo:

²⁹ ki um mini dhal mii 'peni mo 'peni to kun 'cithu/ mo mmomiiya basa 'cesh mo mmoluj tompinyon dhali 'peni miin to ma bas mo dhali 'peni to kun minyiruru 'kus mo dhali 'peni mo jin miinu miinyal si'da/ mo be. Waḳki/ um mini non is bum 'peni to gwansan mo tani a'di midi bor mo gom um mo. 'Koyi ki mom'bi'th is mo ma.

³⁰ Wakan ki uni 'cuḳkunu mo tani uni pu'dkin ka lunḡu'b mo e Pa Anthaakiya mo dhali mmotula uni awaambuhany 'kwani is mo mmoṅal 'de/ mo tani uni ki ci uni gwo kun 'kwarkunu mo be.

³¹ Dhali ki uni denḳi a'di e mo tani uni 'kunykina bwa mo gom gwo malas yan mo be.

³² Dhala Yahuusa dhala Sila mmoṅana uni imanci gwo si'da/ mo tani uni malaskina waḳ yan ki gwo ka ris mo dhali tel uni sho'k mo be.

³³ Dhali 'ko'di uni 'kokin ki rash rash ari'ceenne/ mo tani uni 'cuḳkunu mo ki moŋku'th is 'pena waḳ yan e uni gun tu'cki uni ki ii mo be.

³⁴ Hili a'di toshkin ma Sila ki a'di 'boro'd mo jin mina a'di ca'b imun mo.

³⁵ Hila Buulus dhala Barnaaba 'kokin mo e Pa Anthaakiya mo mmoṅor gwo mo dhali mmoḳi gwon Tapa nyakki aris kun tiya si'da/ mo be.

ABUUSA A'di Kwa/ki Bwa mo 'Pena Barnaaba mo

³⁶ Dhali 'ko'da cim ka honye/ mo tani aBuulus oki'da Barnaaba gwo mo ki: Dhalki ana doka shwane/ mo dhali ii yilkina/ awaḳ bana eya ris bampa/ 'baar ki 'beles mo kun cikina ana gwon Tapa mo mmopar uni e mo ki uni wakata mo?

³⁷ Dhala Barnaaba e bwam piti mo tani a'di o'd ki susa Yohaana si'da/ jin yuku ki gwaya kamu/ ka Markus mo.

³⁸ Hila Buulus a'di ikulumki gwo ibwa mo ki a'di diki 'bor mo mmosus a'di jin ya'd mo 'peni uni 'peni Pam Pampiliyya mo mmonyak ya ki uni mo a'di jin diki nyak ya ki uni eya tu'c mo.

³⁹ Dhali gwo jin kaaka jin wala uni piki'd mo tani a'di kwa/ uni bwa cem buni mo dhala Barnaaba suski'da Markus nyakki a'di mo dhali uni iikin mo eya kur yi'de/ jin bela 'tham mo ki bway gi Paṅ Kuprus mo be.

⁴⁰ Hila Buulus kwanyki'da Sila mo dhali uni iikin mo mmodhun ma waḳ yan uni eya 'the gi Tapa mo be.

⁴¹ Dhali a'di yaki'd ki tur mo e Pan Suriyya mo dhali Paṅ Kilikiyya mo mmoṅel 'kwanin ḳaniisa sho'k mo be.

16

Timuthawuus Bathki'da Buulus mo dhala Sila mo be.

¹ Dhali a'di pu'dki'd si'da/ mo e Pan Darba mo dhali e Pan Liṣtra mo dhali hili ma, amancik gwoṅ kamu/ diki'di mun jin yukḳunu ka Timuthawuus mo jin ta ya/ ma 'bom gi 'Kwani Yahuuda/ mo jin gamki gwo is mo hili com ta Wathin Griki mo be.

² A'di yansan maṅkunu mo e bwam ma waḳ jin di'd e Pan Liṣtra mo dhali e Pa Ikuuniya mo be.

³ A'di min ma Buulus i'taki ṅap mo mmosus nyakki a'di mo dhali a'di bu'thki a'di mo dhali 'cithki a'di amunyjal yis piti mo gom 'Kwani Yahuuda/

kun 'kon e pa gwattaan mo haali/ uni 'baar mo mishkin ki com ta Wathinj Griki mo be.

⁴ Dhali mmo/iina uni mo ki bway buni ki tur mo mmo'cith bampa/ mo tani uni ciki uni gwonkan yan mo mmodhu kun gama imandhunu ki she/ me'd mo dhali 'kwaniņ gwanyjaka/ si'da/ kun 'kon e Pa Urushaliim mo be.

⁵ Wakan si'da/ 'kwaniņ kaniisa 'bi'thkunu is mo e mongam gwo is mo dhali markunu is ka yempa/ mo be.

Dhan Tonyjan gi Wathi/ gi Pa Makiduniyya jin Parkin ma Buulus e mo

⁶ Dhali uni iikin ki tur mo e mo ka kukul is mo e Pam Parijiyya mo dhali Panj Ghalathiyya mo mmononkina Shi/in Dheleladhelel uni 'kup mo mmo/o gwo yan e Pa Asiyya mo be.

⁷ Dhali ki uni iin ka karambuye/ i Pam Misiyya mo tani uni palki mii mo mmo/ii ntagi Pam Biḥiniyya mo dhali Shi/in ma Yesus diki dhal uni bway mo be.

⁸ Dhali mmokalkina uni Pam Misiyya mo tani uni iikin ka lunḡu'b mo e Pan Taruwaas mo be.

⁹ Dhali tonyjan piki'da Buulusi is mon'thiny mo a'di jin ta wathi/ gi Pam Makiduniyya mo jin diki'd mmodosh mo mmoyuḡ a'di mo dhali o gwo mo ki: Yayu/ ma mmo'citha/ gapa e Pam Makiduniyya dhali woḥ aman mo ma.

¹⁰ Dhali ki a'di parki tonyjan e mo tani ise/ am palkina mii mo mmo/ii e Pam Makiduniyya mo mmopu'da aman e gwontal 'de/ mo ka Arungimis yuḡki aman mo mmoḡi gwom 'borga/ e uni mo be.

Mii jin Tu'kkin ma Lidiyya Is mo

¹¹ Kan mo tani a'di i'cukkina amana kur yi'de/ jin bela 'tham mo 'peni Pan Taruwaas mo be. Am iikina ka ji sho'k ki bway 'tham ntagi Pan Samuḥraaki mo dhali ka cim jin 'ko'd mo tani ntagi Pa Niyapullis mo.

¹² Dhali 'peni mo caan mo tani ntagi Pam Pilibbi jin ta bampa/ gi 'Kwani gi Pam Makiduniyya jin ta'da 'kaḡ'kup pa e mo yan jin ta 'penkuman bampa/ gi 'Kwani gi Pa Ruumiya mo dhali aman 'kokina naskina/ ka cim ka hony/e mo.

¹³ Dhali ka cim ma pesu/ mo tani aman iikina ka pije/ ki 'twanḡala goḡ bampa/ mo e yana gap mo e mo jin toshkina aman ki mo jin 'thonu di'd mo. Dhali am 'kokina 'cesh mo dhali okina up gun iiyini montal 'de/ mo.

¹⁴ Dhala 'boma kamu/ jin yuku gway ka Lidiyya jin ta'da manyol burrinye/ jin gwaju mo ki tom buhe/ gi Pa Thiyatira jin lunḡi'da Arungimis mo tani a'di ciki am gwo mo haala adum piti ka'dkina a'di ki Tapa mo mmoḡi is piti ki to kun okin ma Buulus mo be.

¹⁵ Dhali a'di miikunu ki yi'de/ mo dhali ki kuḡ gu'b piti ilu/ mo tani a'di yuḡki am mo mmo/o gwo mo ki: Wakki/ um nyithkin ki aha/ tana a'di jin ta isinḡ gana/ gom Tapa mo tani iiyu/ i gu'b pem mo ma dhali 'ko ise/ mo. Dhali a'di tu'cki am mo be.

Mo jin Dhukunu Uni eya Sijin e Pam Pilibbi mo

¹⁶ Dhali a'di warki'd ki mo jin 'kokina aman mmo/ii mo e mo jin 'thonu tani nyaraḡ kamu/ jin ta ga rum mmomish to tor gom mo jin midi yayu/ mo tani a'di gam aman 'kup mo jin kalki'da tu'c kagahara gom itapam piti mmoḡora a'di gwo wakan mo.

¹⁷ A'di yan mmobathkina a'diya Buulus mo dhali aman si'da/ mo tani a'di cuuki gwo kagahara mo mmo/o gwo mo ki: 'Kwani gwansan ta cinḡina/ ma Arungimis jin Cayaa/ e ki Ca mo kun ci un gwo gom bway ki mowoth mo.

¹⁸ Dhali yan miikina a'di ka cim ka ris mo. Hila Buulus mmodita bwa a'di mo tani tu'kki'd mo dhali owa rum gwo mo ki: Aha/ kana /e gwo ki gway ma

Yesus Kristhos mo mmoyayu/ ka pije/ 'peni a'di mo. Dhali a'di piki'd ka pije/ mo ki mo yansan mo.

19 Hili ki tapam piti mishkin ki to kun mina uni 'taki gam 'peni a'di pikin mo tani uni bu'thkina Buulus mo dhala Sila mo dhali dir uni ki 'bi'th mo e mo ma suug mo iwambori tapa mo.

20 Dhali ki uni suski uni e imandwall gwo mo tani uni o gwo mo ki: 'Kwani gwansan mmotana uni 'Kwani Yahuuda/ tani uni miiki mii kagahara mo mmoto'c 'kwani gi bampam bana bwa mo,

21 dhali tor mii kun nona gwonkan bam am bway mo mmobu'th mo walla mmobotki mii mo mmotana aman 'Kwani gi Pa Ruumiya mo.

22 Dhala waambuhany 'kwani gam gwo me'da po/ uni imontal 'de/ mo dhali imandwall gwo dher burrinyem buni bwa mo 'peni is buni mo dhali kan gwo mmodor uni ki cwa mo.

23 Dhali ki uni dhuki mondoruni ka risa po/ uni mo tani uni ta'kki uni eya sijn mo mmokana mançora sijn gwo mo ki: Dhuyi uni ki 'dantar mo.

24 Dhali mmobutha a'di gwonkan gi wakan mo tani a'di ta'kki uni e bwaman ma sijn gana/ mo dhali repki uni sho'k ki cwa mo.

25 Hili ki mo wana e ki mombwam/e mon'thiny mo tani aBuulus dhala Sila uni 'kon mo mmo'tho mo dhali mmoyuk gway goma Arumgimis mo dhali 'kwani kun tana habuus 'kon si'da/ mmoci'k uni mo be.

26 Dhali ise/ adhan mony'cesh yikinki is kagahara mo tani a'di yikinkina mo jin ka'bu gu'ba sijn is mo. Dhali ise/ arisa campuri 'baar mo tani ka'dkunu mo dhala ris mondek gi uni 'baar mo ka 'dete/ 'dete/ mo tani sulkunu mo be.

27 Dhala mançora sijn mmomeru a'di e mo 'peni mo/ish e mo tani dhali mmoparkina a'di is mo gom monko/ is mo tani a'di bitki'da 'cesh iwambor ma Buulus mo dhala Sila mo

28 Hila Buulus cuuki'd ki dhan 'twa/ mmo/o gwo mo ki: Dhalku/ to shiyi'da kamu/ ki mii gom is pini mo ma. Haali/ aman 'baar mo 'kona imahan mo.

29 Dhali a'di yukki'da yuk gom o'd mo dhali pe'di bwaman mo dhali mmodeena a'di is mo gom monko/ is mo tani a'di bitki'da 'cesh iwambor ma Buulus mo dhala Sila mo

30 dhali a'di suski uni ka pije/ mo dhali o gwo mo ki: Kana, aha/ mina miya ta mmowoth is pem mo?

31 Dhali uni oki a'di gwo mo ki: Gami Tapa Yesus is mo ma dhali /e minu woth mo dhali ki kuj gu'b pini ilu/ mo.

32 Dhali uni oki gwon Tapa e a'di ki uni 'baar mo kun 'kon e gu'b piti ilu/ mo.

33 Dhali a'di bu'thki uni ki mo yansan jin ta mon'thiny mo dhali upki uni mondoruni buni mo dhali ise/ a'di miikunu ki yi'de/ mo, a'di dhala ris unim piti 'baar mo be.

34 Dhali a'di suski uni ki mis e gu'b piti mo dhali dhuki tonte/ iwambori uni mo dhali uni 'borkina bwa kagahara mo inyakki kuj gu'b piti mo mmogamkina uniya Arumgimis gwo is mo be.

35 Hili ki mo kali kush mo tani imandwall gwo hashki iman'doyi to kun doruwa dor mo mmo/o gwo mo ki: Dhalki 'kwani gwansan iin mo ma.

36 Dhala mançora sijn guki'da Buulus gwo mo mmo/o gwo mo ki: Imandwall gwo hashki um gwo mo mmodhal um bway mo mmo/ii mo ti. Haali/ a'di wakan mo tani a'di mina uni iiyu/ mo shwanetan mo dhali iiyi ki monku'th is mo.

37 Hila Buulus oki uni gwo mo ki: Uni dorki am iwambori 'kwani ki dar gi miiwa'k mo, 'kwani kun ta ku gi Pa Ruumiya mo dhali ta'kki aman eya sijn

mo dhali shwane/ uni mini ta'k am ka pije/ ka 'diya? Yisa ka jin gana/. Hili dhalki uni iyyin ki is buni mo dhali sus am ka pije/ mo.

³⁸ Dhali iman'doyi to kun doruwa dor mo guki gwo yansan e imandwall gwo mo dhali uni ko/ki is mo haali/ uni cikkin ki uni ta 'Kwani gi Pa Ruumiya mo be.

³⁹ Dhali uni pu'dkin mo dhali yuk uni mo, dhali ki uni suski uni ka pije/ mo tani uni dotki uni mmo/ii 'peni bampa/ mo be.

⁴⁰ Dhali uni iikin ka pije/ mo 'pena sijn mo dhali cikkin mo e gu'b ma Lidiyya, dhali ki uni mishkina wak buni mo tani uni malaski uni ki gwo mo dhali ii mo be.

17

Mo gi Ekkuu Mii e Pan Tasaluniiki mo

¹ Dhali ki uni pekin ki tur mo e Pa Ampuliis mo dhali Pa Apuluniyya mo tani uni pu'dkin e Pan Tasaluniiki mo jin dina gu'b montul is gi 'Kwani Yahuuda/ mo.

² Dhala Buulus me'd miim piti jin miina a'di mo tani a'di yaki'd e bwam uni mo dhali ka cim ma pesu/ikwara mo tani a'di torki'da tor ki uni ka karambuye/ 'peni Gwo ma Arungimis kun 'kwarkunu mo

³ mmo'ka'd gwo mo dhali mmodhu eya tente/ ka Kristhos mina isi mii 'kosh ka nyor mo dhali midi mii piyu/ mo dok/e 'peni mowu mo, dhali ka Yesus yan jin cika/ um gwo mo tani a'di ta'da Kristhos mo be.

⁴ Dhali kun tiya e uni lalkunu gwo sho'k mo tani dhali uni wanki 'kwani is ki gwo mo nyakka Buulus dhala Sila mo. Dhali 'peni 'kwani' gayiin kun ta 'Kwani' Griki mo adhana waambuhany 'kwani si'da/ mo dhali 'peni up kun tana 'kan'kup pa yisa pelena.

⁵ Hili 'Kwani Yahuuda/ mmo'kon ma du uni ki jocon mo mmodee mo tani uni bu'thki uni ki me'd 'kup ki uni kun ta cin tiya kun ta gi mii kun bulabul 'peni uni gun 'kon ka piny is e mo ma suug mo, dhali mmodula uni awaambuhany 'kwani is mo tani uni tu'cki 'kwanim bampa/ mmo/ek mii kagahara mo dhali mmotha'th 'kup ki gu'b ma Yasuun mo tani uni palki mii mo mmonap uni mmobor uni ka pije/ i 'kwani mo.

⁶ Dhali ki uni 'koki gam uni mo tani uni dirkina Yasuun dhala waka tiya e bwambori tapam bampa/ mo mmocuu gwo mo ki: Gwahan kun wuluski mony'cesh mo tani uni iyyini mahan si'da/ mo,

⁷ kun bu'thkin ma Yasuun mo dhali uni 'baar mo mii to ki ca'ckon apo/ gwonkan ma Kaysar mo mmo/o gwo mo ki: aMali'ka kamu/ di'd jin ta'da Yesus mo be.

⁸ Dhali uni cina waambuhany 'kwani bwa shi/ ki me'd mo dhali tapam bampa/ ilu/ mo ki uni cikki to gwansan mo be.

⁹ Dhali ki uni dilki to 'pena Yasuun mo dhali kun tiya mo tani uni ki dhal uni bway mo mmo/ii mo be.

Imandhunu ki She/ 'Kokin mo e Pam Biriyya mo

¹⁰ Dhala wak buni ise/ uni ki tuca Buulus dhala Sila ki ii mo mon'thiny mo ntagi Pam Biriyya mo dhali uni iikin e gu'b gi montul is gi 'Kwani Yahuuda/ me'd jin pu'dkina uni imun mo.

¹¹ Hili uni gwansan bol uni gi Pan Tasaluniiki e ki yuk mo mmobu'thkina uni gwo mo ki mo/o bwa kagahara mmo'cunycur Gwo ma Arungimis kun 'kwarkunu mo ka yempa/ mo wakki/ to gwansan mini wakansan mo.

¹² A'di gamkina uni gwo is ka ris 'peni uni mo dhali 'peni up Griki si'da/ kun manju mo dhali kun ta 'kwani' gwas yisa pelena.

13 Hili ki 'Kwani Yahuuda/ kun 'kon e Pan Tasaluniiki mishkin ki gwo ma Arungimis cin ma Buulus e Pam Biriyya si'da/ mo tani uni pu'dkin imun si'da/ mo mmociya waambuhany 'kwani bwa shi/ ki me'd mo dhali mmoṭu'c uni adu mmomur mo.

14 Dhali ise/ ki jahanne/ mo tani awak buni tu'ckina Buulus mmo/ii ka pije/ ntaga dhan yi'de/ mo dhala Sila dhala Timuthawuus 'kokin naskina/ imun mo.

15 Hili uni kun suskina Buulus mo tani uni gu a'di ntagi Pa Athiina mo dhali mmobutha uni gwoṅkan goma Sila mo dhali Timuthawuus jin mina uni 'taki ii i a'di ki jahanne/ e me'd mo tani uni iikin mo be.

ABuulus Diki'd e Pa Athiina mo

16 Dhali ka Buulus cor̄ki uni e Pa Athiina mo tani shi/in piti de'da dum piti ki birbir mo mmohila a'di bampa/ jin 'tu'du/ ki tompinycon mo.

17 A'di tor̄kina a'diya tor̄ ka karambuye/ e gu'b gi montul is gi 'Kwani Yahuuda/ mo dhali nyakka gayiin 'kwani mo dhali e mo ma suug si'da/ isa yempa/ mo nyakki uni kun gam a'di 'kup mo.

18 Dhali 'kwaniṅ gangashan tiya si'da/ 'peni 'Kwani ma Apikuur mo dhali 'Kwani Ruwaak gam 'kup ki a'di mo. Dhali kun tiya o gwo mo ki: Aman'ta'b mo ki 'twa/ yan mo midī 'taki o katinta sa/ ise/? Kun tiya o gwo mo ki: A'di wana e ka manṭor gwo goma rum kun molu mo haali/ a'di ciki gwo ma Yesus mo dhali gwo gom moppinu mo be.

19 Dhali uni bu'thki a'di mo dhali sus a'di mo e mo jin yuku ka Ariyuus Baghuus mo mmo/o gwo mo ki: Mina amani mish gwo yan ki gwo ta'da tinta jin toru ki a'di jin ta jin this jin okina /e mo?

20 Haali/ /e 'doyi ton tiya eyi 'cem bam kun meru mo. A'di mina amani 'taki mish ki 'pemen to gwansan mo tani itana tinta mo?

21 Hila ris 'Kwani gi Pa Athiina dhali 'kwani gi kala tiya kun 'kon ki 'kus e mun mo tani uni 'baarana tentem buni mo mmomii tor̄ kamu/ yisa hili jasi mmoṭora tor̄ mo dhali mmocik̄ gwo gom jasi ton thisa tiya mo.

22 Dhala Buulus doshki'd mo ibwaman ma Ariyuus Baghuus mo dhali o gwo mo ki:

Um 'Kwani gi Pa Athiina mo. Eya ris to 'baar mo tani aha/ nyitha ki um tana shi/injwa kagahara mo.

23 Haali/ ki aha/ yakina ki yam pe mo tani dhali hila to gun luṅa um mo tani aha/ gamkina si'da/ to jin thenuwa rum apo/ jin ta gi gwo kun 'kwarkunu mo cikise/ ki: Gom tor̄ kamu/ jin luṅa mo ki ji mol mo. A'di si'da/ jin luṅa um ki ji mol mo tani a'di tor̄ka/ eya tente/ gom um mo.

24 Arungimis yan jin ukki mony'cesh mo dhala ris to kun 'koni bwaman a'di mo tani a'di mnotana a'di Tapa gi momis mo dhali ji gi mony'cesh mo tani a'di diki ca'b e moṅ'ko kun kogu mo kun uku ki me'd mo be.

25 A'di si'da/ idinuki mii to ki me'd gi 'kwani en'thi/ mo, ma me'd jin mina a'di mii diki ta gi tor̄ kamu/ haali/ a'di ki is piti ci'da ris moṅ'koki/e dhali shi/ in dhala ris to 'baar mo be.

26 Dhali 'peni jan tal' de/ mo tani a'di ukki'da ris kal gi 'kwaniny'ceshi 'baar ki 'beles mo mmo'ko eya ris bwam/e gi mony'cesh mo mmo'kawurkina a'di yil mom buni kun dhunu mo dhali ki mom bwangwayu/ gi moṅ'kom buni si'da/ mo,

27 ki uni mini 'taki napa Arungimis mo wakki/ uni si'da/ mini 'taki topu i a'di mo dhali gam a'di mo. Dhali a'di bala yisa isi'dki'd 'pena ris ana 'baar ka 'dete/ 'dete/ yisa.

28 Haali/

E a'di mo tani ana 'kona ki e mo dhali mmothoṭh mo dhali mmota gi moṅ'kom bana si'da/

me'd jin okina kun tiya ibwam iman'cem gway bum si'da/ mo ki:

Haali/ ana si'da/ tana bwambirman piti mo be.

²⁹ Mmotana ana bwambirman ma Arungimis kantan mo tani ana mina mii 'koki tosh ki a'di jin ta ji ma Arungimis jin piyi'd 'peni a'di wana e ki 'dolkon gana/ mo walla 'dolkon kush mo walla wosh gun cinuwa waro/ ki gwocon mo dhali ki gwalal gi wathi/ mo.

³⁰ A'di hilkin ma Arungimis ki jim pe yil mo ki ji mol mo mo. Hili shwane/ a'di kanki 'kwaniny'cesh gwo mo ki uni 'baar mo e mo 'baar mo tani mini 'taki rica du is mo

³¹ haali/ a'di karki'da cim jin mina a'di mii miiwak gom 'kwaniny'cesh mo e mo ma kar/e gi wathi/ jin 'kawurkina a'di ntwa/a/ mo. Gom a'di mo tani a'di ciki'da ris 'kwani 'baar mo mmomish mo ki isa dun gana/ mo mmo'de'kkina a'di a'di 'peni mowu mo be.

³² Dhali ki uni cikki gwo gom moppinu 'peni mowum piti mo tani kun tiya mii a'di ka mak mo. Hili kun tiya oki gwo mo ki: Am mina cik 'peni /e gom gwo yan dok/e naskina/ mo.

³³ A'di gi wakan be tani a'di yakin ma Buulus ka pije/ mo 'peni bwam uni mo be.

³⁴ Hili 'kwanin tiya 'dim 'kup e a'di mo dhali gamki gwo is mo. Ibwam uni mo tani Diyunisuyuus diki'd si'da/ mo jin ta wathi/ gi mo ma Ariyuuus Baghuus mo dhala 'boma kamu/ jin yuku ka Damaris mo dhali kun tiya si'da/ nyakki 'ko ki uni mo be.

18

ABuulus Diki'd e Paṅ Kurinṯhuus mo

¹ N'ko'di to gwansan mo tani a'di yaki'd 'peni Pa Athiina mo dhali a'di pu'dki'd e Paṅ Kurinṯhuus mo.

² Dhali a'di gamki Wathi/ Yahuudaṅ kamu/ jin yuku gway ka Akiila jin ta wathi/ gi Pam Puntus jin dhodhu mo jin daka pu'dki'd mo 'peni Pa Ithaaliya ki 'dishe/ nyakki ashim piti jin ta'da Piriskilla mo, haala Kuludiyuuus kanki'da ris 'Kwani Yahuuda/ gwo mo mmo/ii 'peni Pa Ruumiya mo dhali a'di pu'dki'd e uni mo.

³ Dhali haali/ a'di ta'da mannyak to mii ki uni mo tani a'di nyak ca'b ki uni mo dhali uni miiki to mo haala tu'c buni ta'da tu'c mmota imansho gu'b burrine/ mo be.

⁴ Dhali a'di tor'ki'da tor ka karambuye/ e gu'b gi montul is gi 'Kwani Yahuuda/ ka risa cim ma pesu/ mo dhali a'di mala 'Kwani Yahuuda/ ki gwo mo dhali 'Kwanij Griki mo be.

⁵ Hili ki iSila dhala Timuṯhauuus pu'dkin ka lungu'b mo 'peni Pam Makiduniyya mo tani aBuulus doshki'da po/ gwo mo mmotor gwo eya tente/ gom 'Kwani Yahuuda/ mo ka Yesus yan ta'da Kristhos mo be.

⁶ Dhali ki uni rocki gwo ki is buni mo dhali walki gwo sor mo tani a'di pirki burrine/ mo piti mo dhali o uni gwo mo ki: Dhalka bas bum di'di 'bam bum mo ma, um 'cena ki is bum mo. Haali/ aha/ tana jin dheleli'd mo. 'Pena cim yansan ki sule/ mo tani aha/ mina ya mo e 'kwani kun 'koki ta 'Kwani Yahuuda/ mo be.

⁷ Dhali a'di yaki'd 'peni mo yan mo mmoyaku/ e gu'b gi wathij kamu/ jin yuku gway ka Tithiyus Yustus mo. A'din 'de/ yan lunji'da Arungimis mo jin ta gi gu'b jin 'dishi gu'b gi montulu is is mo be.

⁸ Dhala Kirispus jin ta tapa gom gu'b gi montul is mo tani a'di gamki gwo is e Tapa nyakka ris kunj gu'b piti mo dhali 'Kwani gi Paṅ Kurinṯhuus ka ris

mo mmocika uni gwo mo tani uni gamki gwo is mo be dhali uni miikunu ki yi'de/ mo.

⁹ Dhali Tapa oki'da Buulus gwo mo mon'thiny ki tonyjan ki: Dhalku/ is ki ko/ mo ma. Hili oyi gwo mo, dhali dhalku/ ki ca'b ki shwam mo ma,

¹⁰ haali/ aha/ dina e /e mo dhali wathiŋ kamu/ mididi mol /e seya po/ mo mmomii /e ki shi/ mo, haali/ aha/ tana gi 'kwani ka ris e bampa/ yansan mo be.

¹¹ Dhali a'di ca'bki'd imun ki yil mo dhali ka ppe 'kupi pe'de/ mo mmoŋor gwo ma Arungimis e bwam uni mo be.

¹² Hili ka Ghaliyuun ta'da mudhiir gi Pa Akaa/iya mo tani 'Kwani Yahuuda/ ki bwan ɬal 'de/ mo tani uni tha'thkin mowa po/ Buulus mo dhali sus a'di ibwambor ma kursi jin dwallu gwo mo

¹³ mmo/o gwo mo ki: Wathi/ yansan lalki 'kwani sho'k ki gwo mmoluŋa Arungimis ki mii kun ta kuny ca'ckon apo/ gwoŋkan jin cinu mo.

¹⁴ Hili ka Buulus murki'di cee 'twam piti mo tani aGhaliyuun ki o 'Kwani Yahuuda/ gwo mo ki: Wakki/ ka jin gana/ a'di mididi 'taki ta mii shi/i'd mo walla mii jin ta jin thus mo dhali jin ta ji ma maka/ gany mo tani ayy um 'Kwani Yahuuda/ mo, adu mididi 'taki tucaa/ mmo'taki gu is 'peni um mo.

¹⁵ Hili wakki/ um ta gi gwondot gom gwon tiya mo dhali gwaya tiya mo dhali gom gwonkan bum jin cinu mo tani hili gwo gom a'di um ki is bum mo ma. Aha/ dinaki ta gi bwa mmota amandwall gwo gom gwo gwansan mo be.

¹⁶ Dhali a'di urki uni 'pena kursi jin dwallu gwo mo.

¹⁷ Dhali uni 'baar mo 'ce'dkina Sustaniis me'di is mo a'di jin ta tapa gom gu'b gi montul is mo dhali uni ki dor a'di mo dhali sus a'di e bwambor ma kursi jin dwallu gwo mo. Dhala Ghaliyuun dina gwo ki di ibwa gom ton ɬal 'deŋ kamu/ gwansan mo be.

ABuulus Dokki'd ka Nyan'ko'd e Pa Anthaakiya mo

¹⁸ Dhala Buulus mmoça'bkina a'di ka cim ka ris naskina/ mo tani a'di bu'thki moyam piti 'pena wak yan mo dhali yaki'd eya kur yi'de/ jin bela 'tham mo ki bway gi Pan Suriyya mo dhala Piriskilla dhala Akiila nyak ii ki a'di mo mmo'ciha/ a'di amur'kup piti e Pan Kançariya mo haali/ a'di ta gi gwo jin okina a'di is mo be.

¹⁹ Dhali ki uni pu'dkin e Pan Epasus mo tani a'di ki dhal uni imun mo. Hili a'di a'di ki is piti seki'd e gu'b gi montul is mo dhali ɬorki'da ɬor ka karambuye/ ki 'Kwani Yahuuda/ mo be.

²⁰ Dhali ki uni dotki a'di mo mmoça'bi uni naskina/ mo tani a'di ha gwo e yisa.

²¹ Hili mmobu'thkina a'di moyam piti 'peni uni mo dhali mmo/o uni gwo mo ki: Aha/ mina doku/ mo i um dok/e mo wakki/ Arungimis mididi 'taki o bwa mo. Dhali a'di 'cukki'da kur yi'de/ jin bela 'tham 'peni Pan Epasus mo be.

²² Dhali ki a'di thulki'da 'cesh e Pan Kaysariyya mo tani a'di merki'da gap mo dhali theki 'kwanj kaniiisa me'd mo dhali yaki'd ka lungu'b mo e Pa Anthaakiya mo be.

²³ Dhali mmoça'bkina a'di imun ki rash rash mo tani a'di yaki'd mo dhali yaki'd ki tur mo e bampa/ kukul is mo ntagi Pan Galathiyya mo dhali Pam Parijiyya ka tonɬon mo mmoŋela ris imanciŋ gwo sho'k mo be.

Abulluus Çiki Gwo e Pan Epasus mo

²⁴ Dhali Wathi/ Yahuudaŋ kamu/ diki'd jin yuku gway ka Abulluus jin ta Wathi/ gi Pa Iskandariyya ka dho'th piti mo jin yukayuk mmota gi 'twan

gwocon mo jin pu'dki'd e Pan Epasus mo dhali a'di ta gi mom'bi'th e Gwo ma Arungimis kun 'kwarkunu mo be.

²⁵ Wathi/ yan tor'kunu gwo mo e bway gi Tapa mo dhali mmo'ka/a a'di ki ka/ e shi/in mo tani a'di o gwo mo dhali tor'ki gwon to ka kar/e goma Yesus mo mmomisha a'di jasi mo jin miin ma Yohaana mii ki yi'de/ mo

²⁶ dhali a'di telki gwo 'pen mo mmo'ci gwo ki dar gi monyju/ mo e gu'b gi montul is mo be. Hili ka Piriskilla dhala Akiila cikki a'di mo tani uni bu'thki a'di 'kup ki is buni mo dhali tor'ki a'di gwo eya tente/ gom bway ma Arungimis ka kar/e ki nyanye/ mo.

²⁷ Dhali ki a'di dina gwo ibwa mmo'citha/ gap mmopu'd mo e Pa Akaa/iya mo tani awa' yan malaski a'di mo mmoya mo dhali uni 'kwarki imancik gwo gwo mo mmobu'th a'di mo be. Dhali ki a'di pu'dki'd mo tani a'di wothki uni ki nyanye/ mo uni kun gamki gwo is eya 'the mo,

²⁸ haali/ki mom'bi'th mo tani a'di pucurki 'Kwani Yahuuda/ ki gwo ibwam-bori 'kwani mo mmo'tor eya tente/ 'peni Gwo ma Arungimis kun 'kwarkunu mo ka Yesus yan ta'da Kristhos mo be.

19

ABuulus Diki'd e Pan Epasus mo

¹ Dhali a'di warki'd mo ki mo jin dikin ma Abulluus mo e Pan Kurinthus naskina/ mo aBuulus mmopena a'di ki tur mo e bampa/ jin di'd 'kup ki mis mo tani a'di pu'dki'd e Pan Epasus mo dhali gamki imancik gwon tiya mo.

² Dhali a'di oki uni gwo mo ki: Shi/in Dheleladhelel bu'thkina um mo me'dyin jin gamkina um gwo is mo 'taa? Dhali uni oki a'di gwo mo ki: Yisa. Am 'konaki cik gwo ki sule/ wakki/ Shi/in Dheleladhelel cikunu mo be.

³ Dhali a'di o gwo mo ki: Um miikunu ki mo jin miinuwa mii ki yi'de/ katinta kan si'da/ mo? Dhali uni ki o gwo mo ki: Ki mo jin miin ma Yohaana mii ki yi'de/ mo be.

⁴ Dhala Buulus ki o gwo mo ki: aYohaana miiki'da mii jin miinuwa mii ki yi'de/ ki mo jin minu rica du is mo mmo/o 'kwani gwo jin mina uni 'taki gam a'di gwo is jin midu 'taki yayu i'ko'di a'di mo a'di yan jin ta'da Yesus mo.

⁵ Dhali ki uni cikki gwo yan mo tani uni miikunu ki yi'de/ e gway gi Tapa Yesus mo.

⁶ Dhali ka Buulus dhuki me'd piti apo/ uni mo tani Shi/in Dheleladhelel yayi'di uni mo dhali uni wal 'twan tiya mo dhali ci gwo is mo be.

⁷ Dhali uni 'baar kun 'kon mo tani uni wana e ki 'kwani kun tana 'kume'd i'ce'dka su/ mo be.

⁸ Dhali a'di seki'd e gu'b gi montul is mo dhali ci gwo ki dar gi monyju/ mo ka ppe 'kupi kwara mo mmo'tora tor ka karambuye/ mo dhali mmomalasa malas ki gwo mo gom to gi Bampa/ ma Arungimis mo.

⁹ Hili ki kun tiya 'bi'thkunuwa du is mo dhali ushki gwo gam is mo dhali mmo/okina uni gwon thus gom gwo gi Bway yan ibwam-bor ma waambuhany 'kwani mo tani a'dim Buulus yaki'd 'peni uni mo dhali a'di kwa/ki imancik gwo mo mmodhu uni ki she/ mo mmo'tora tor ka karambuye/ ka yempa/ e mombut e Pan Tiraannus mo be.

¹⁰ Dhali mii yan miikunu ki sule/ ki sule/ mo jin ta yil su/ mo be. Gom a'di ki mii yan kan mo tani a'di cikkin ma ris uni kun 'koni Pa Asiyya gwon Tapa mo dhali kun ta 'Kwani Yahuuda/ mo dhali 'Kwani' Griki si'da/ mo be.

Iya/ ma Sakaawa mo

¹¹ Dhali Arungimis miiki miimer jin ta ji mum ki me'd ma Buulus mo.

¹² Gom a'di ki mii yan kan mo tani a'di 'dona uni burrinyeny jiti/ mo walla burrinyen tu'c 'peni is piti e uni kun 'bathan mo dhali mom'ba'th iikin mo 'peni mo mo dhala rum thus kun nyo/on iikin ka piye/ mo be.

¹³ Hili si'da/ kun tiya 'peni 'Kwani Yahuuda/ kun tani pa mo kun ta imandwaka rum thus mo tani uni palki mii mo mmoyer gway gi Tapa Yesus apo/ uni gun takin ga rum thus mo mmo/o gwo mo ki: Aha/ kana um gwo mo ki gway ma Yesus yan jin cin ma Buulus gwo mo.

¹⁴ Dhali a'din 'denj kamu/ jin 'kona iya/i pesu/ jin yuku gway ka Sakaawa jin ta Wathi/ Yahuuda/ mo dhali jin ta'da gasiis jin ca'd si'da/ kun miiki mii yan mo.

¹⁵ Dhala rum thus thokki 'twa/ mo dhali o uni gwo mo ki: Yesus yan nyithka/ mo dhala Buulus yan mishga/ mo. Hili um ta ija sa/?

¹⁶ Dhali wathi/ yan jin din ma rum thus icine/ mo tani a'di pe'da po/ uni mo dhali pi uni 'baar mo e ki mii mo dhali bol uni 'kup ki mom'bi'th apo/ uni mo. Gom a'di ki mii yan kan mo tani uni son ka piye/ mmoye mo 'peni gu'b caan ki ushi burrinye/ kun 'koni bwamani is 'te/ mo dhali ki jama/ i is si'da/ mo.

¹⁷ Dhali yan warki'd mo jin mishu mo e uni 'baar mo kun ta 'Kwani Yahuuda/ mo dhali kun ta 'Kwaninj Griki si'da/ kun 'kokin e Pan Epasus mo, dhali monko/ bitki'da po/ uni 'baar mo dhali gway gi Tapa Yesus ekki'd mo be.

¹⁸ Uni tana ris si'da/ 'peni uni kun gamki gwo is mo tani uni iikin mo mmo/or gwo gom miinthus mo dhali mmoçi gwo gom miim buni kun 'kokina uni mmomii mo.

¹⁹ Dhali uni yisa pelena 'peni uni kun mala mii ka daran du mo uni 'doyina risa warkam buni mo imonta' de/ mo dhali ci'th uni mo ibwambori uni 'baar mo. Dhali mo gi she yol buni denjina uni e mo dhali uni ki gam a'di mo ka 'ci'cimi'th kun ta 'dolkon kush kun 'koni alaapi iss* 'kwanimpa i/iss su/ i'ce'dka 'kume'd mo.

²⁰ Dhali gwo gi Tapa caki'd mo dhali pi'da ris mom'bi'th e 'baar mo be.

Amamanthar jin Diki'd e Pan Epasus mo

²¹ Dhali 'ko'da ris to gwansan 'baarunu mii mo tani aBuulus dina gwo ibwa ki shi/in piti jin minu diki dhal 'pen mo me'd jin pekina a'di ki tur mo e Pam Makiduniyya mo dhali Pa Akaa/iya mo mmoya mo ntagi Pa Urushaliim mo mmo/o gwo mo ki: 'Ko'di mo jin miga/ ca'bi mun mo tani aha/ mina mii par bway Pa Ruumiya e si'da/ mo.

²² Dhali mmohashkina a'di uni su/ ibway gi Pam Makiduniyya uni kun mii a'di to mo kun ta iTimuthawuus mo dhala Arasthuus tani a'di ki is piti ca'bki'd mo e Pa Asiyya naskina/ mo be.

²³ Dhali ka cim caan mo tani mii piki'd mo, mii jin miinu ka sereç yisa gom gwo gi Bway yan mo.

²⁴ Haali/ wathinj kamu/ jin yuku gway ka Dimitriyuus jin ta'da mantor 'dolkon kush mo dhali jin ta'da man/uk ushi to 'peni 'dolkon kush kun wana e ki dhan gu'b jin ca'd jin lunjuwa Arthamiis nycine/ mo dhali a'di kalki'da tu'c jin 'ka'da mii yisa gom itapa kun ta gi 'kwanij gwocon mo.

²⁵ Uni tulkina uni is mo imonta' de/ mo nyakki uni kun miina tu'c ka kwam bwa ki ji nyak mo dhali o gwo mo ki: Kana ba/. Um mishkin ki tom bana kun tana ana mo tani 'pena tu'c yan mo.

²⁶ Dhali um mishkin mo dhali um cikki gwo ka Buulus yan malaski 'kwani ki gwo mo dhali tu'k uni ka ris mo, yisa jasi e Pan Epasus a'di 'de/ yisa hili si'da/ mo muru/ 'baar mo be isi bwaman gi Pa Asiyya 'baar mo mmo/o gwo mo ki: To gun uku ki me'd mo mo tani yisa ta to kun lunju mo yisa

* 19:19 A'di jin wana e ka alpeen jineeh ma Injiliis mo.

27 dhali yisa jasi mo di'd e mo jin tagu wu mo jin min ma tu'c bana yan ta thuthu/ ki thuthu/ mo a'di 'de/ yisa, hili si'da/ gu'b gi lujuwa dhan tony caaga/ yan jin yuku gway ka Arthamiis si'da/ minu 'taki war ka ha'th'ko'd mo dhali ki a'di si'da/ minu 'taki gac 'peni mo/ek piti mo jin luja 'Kwani gi Pa Asiyya 'baar mo dhali ku ji mony' ceshi 'baar mo si'da/.

28 Dhali ki uni cikki gwo yan mo tani uni 'tu'du/ ka nyor mo dhali cuukin kagahara mmo/o gwo mo ki: A'di jin ta jin eka/ ek tani a'di ita'da Arthamiis gi Pan Epasus mo.

29 Dhali kum bampa/ yansan 'tu'du/ ki mo ma culma'th mo dhali uni tha'thkin ki bwan tal 'de/ e dhan mo jin ta montul is jin biruwa bir mo mmobu'thkina uniya Ghayuus mo dhala Aristarkus kun ta 'Kwani gi Pam Makiduniyya kun ta imannyak ii ka Buulus mo.

30 Dhali ka Buulus dina gwo ibwa mmose i bwan 'kwani mo tani imancik gwo nonki a'di 'kup mo be.

31 Dhali kun tiya si'da/ 'peni 'kwani kun tana 'kan'kup ki mo gi Pa Asiyya mo† tani mmotana uni imugum piti tani uni hashki a'di gwo mo dhali malas a'di mo jin mina a'di diki ci is piti ki ya mo e mo jin ta montul is yan jin biruwa bir mo.

32 Dhali kun tiya si'da/ cuuni ton 'de/ mo dhali kun tiya si'da/ i tiyan tiya mo. Haali/ montul is yan ta'da culma'th mo be dhali uni 'kon ka ris kun molki to jin tulkina uni is kan mo be.

33 Dhali uni suskina Iskandar ka pije/ 'pena waambuhany 'kwani mo mmokarkina 'Kwani Yahuuda/ a'di eya tente/ ki thorony mo. Dhala Iskandar wukki uni ki me'd mo dhali midu 'taki woth gwo is gom 'kwani mo.

34 Hili ki uni nyi'thkin ki a'di ta Wathi/ Yahuuda/ mo tani uni 'baar cuukin ki 'twan tal 'de/ mo mo ki mo jin wana e ka tente/ su/ mo ki: A'di jin ta jin eka/ ek mo tani a'di ita'da Arthamiis gi Pan Epasus mo.

35 Dhali ka hilingwonkan gom pa mu'thki'da waambuhany 'kwani 'twa/ mo tani a'di ki o uni gwo mo ki: Um 'Kwani gi Pan Epasus. Ki wathi/ jana si'da/ idi'd jin diki mish ki 'Kwani gi Pan Epasus ta imanhil gu'b jin lujuwa dhan tony caaga/ yan jin yuku gway ka Arthamiis mo dhali jamaas gi to yan jin bitki'd 'pena Saps mo?

36 Haali/ a'di gi wakan tani ki to gwansan minu mol wat mo dhali um mini mii ta gi mo mo mmo'ko ki shwam mo dhali 'koki mii tonj kamu/ ki ji ram mo.

37 Haali/ um suski 'kwani gwansan imahan mo kun 'koki ta 'kwani kun kwali to 'peni gu'b kun luju to mo dhali uni si'da/ 'koki ta 'kwani gun wali gwo sor apowa dhan tony caagam bana yan jin luju mo be.

38 Wakka Dimitriyuus si'da/ dhali tapan 'kwani kun ta gi gwocon kun nyak 'ko ki a'di mo ta gi gwo apo/ wathin kamu/ mo tani acim dhanu mo gom gwon dwall mo dhali iwakii/ 'kon si'da/ mo. Dhalki uni yer is buni gway ka rem 'kup mo ma.

39 Hili wakki/ um naji tonj kamu/ gom gwon tiya kun dotu/ mo tani a'di minu thoson mo e montul is yan jin yukuwa yuk mo.

40 Haali/ ka jin gana/ ana 'kona e mo jin tagu wu mo e mo jin yeru is ki gway mo gom mo jin doshu ka nyora tal 'de/ ki bimbir ka cim yansan mo dhali mmomiinu a'di mo ka wuny is 'te/ mo. Dhali gom a'di yan mo tani ana mina mol gwo thok goma nyor yan jin deku/ mo.

41 Dhali ki a'di dakki gwo o kan tan mo tani a'di si'da/ 'cukki montul is mo be.

† 19:31 Uni kun ta 'kwani kun kwanykunu mo gom montul is yan mo mmota uni kun mina montul is yani cil mo gom tak jin minu taka malik mo.

20

Ya ma Buulus e Pam Makiduniyya dhali Paṅ Griki mo be

¹ Dhali 'ko'di mo jin doshu ka nyora tal 'de/ki bimbir daḳu/ mo tani aBuulus mmohashkina a'di imancik gwo mo dhali mmomalaskina a'di uni ki gwo mo tani a'di ki bu'th moyam piti 'peni uni mo dhali a'di yaki'd mo e Pam Makiduniyya mo be.

² Dhali ka a'di yaki'd ki tur mo mmo'cith 'ban gwansan mo tani a'di ciki uni gwo gom momalas ki nyanye/ mo dhali a'di pu'dki'd mo e Paṅ Griki mo be.

³ Dhali ki a'di ca'bki'd ka ppe 'kupi kwara imun mo tani awu'th karkina 'Kwani Yahuuda/ mo apo/ a'di mo. Ki a'di murki'di ya eya kur yi'de/ jin bela 'tham mo ki bway gi Pan Suriyya mo tani a'di dina gwo mbwa mmodok ki tur ka nyan'ko'd mo e Pam Makiduniyya mo be.

⁴ Dhali a'di suskunu m'pen mo itagi Pa Asiyya mo be. Uni gun sus a'di mo tani ta iSupaatarus gi Pam Biriyya jin ta ya/ ma Purrus mo dhali 'peni 'Kwani gi Pan Tasaluniiki mo tani ta i/ Aristarkus mo dhala Sakuntus mo dhala Ghayuus gi Pan Darba mo dhala Timuthawuus mo dhali 'peni 'Kwani gi Pa Asiyya mo tani ta iTikiikus mo dhala Turupiimus mo.

⁵ Hili uni gwansan iikin ntwa/a/ dhali uni 'kokin mmoḳor aman mo e Pan Taruwaas mo be.

⁶ Dhali aman iikina eya kur yi'de/ jin bela 'tham mo 'peni Pam Pilibbi 'ko'da cim gi Maan'kuthu'd kun miinu ki dar ga cumat mo dhali aman pu'dkina e uni e Pan Taruwaas ka cimi mudhe'd mo be. E mo yan mo tani aman 'kokina ka cim pesu/ mo be.

ABuulus A'di Takunu e Pan Taruwaas mo

⁷ Dhali apowa cim yan jin twa/a/ ka dhas mo tani aman 'kokina mmutul is mo imontal 'de/ mo mmo'ce'd maan'kuthu'd mo tani aBuulus ṭorki'da ṭor ki uni ka karambuye/ mo mmoṭor mo gom ya jin mina a'di mii ya mo ka cim jin 'ko'd mo dhali gwom piti bulkina a'di uni mo ntagi mombwam/e mo be.

⁸ Dhala lamba/ 'kokin ka ris e gu'b jin nyanu ka maḳamp/ mo e mo jin 'kokina aman mo mmutul is imontal 'de/ mo.

⁹ Dhali wathin dhuruca kamu/ jin yuku gway ka Apitkuus ca'bki'd e ari embul gu'b jin tupu i e mo dhali a'di to'da e is mo mmo/ish e kagahara mo. Dhali ka Buulus ṭorki'da ṭor ka karambuye/ ki uni ki rash rash naskina/ mo tani mmoṭo'da e a'di is mo ki mo/ish/em piti mo tani a'di bitki'd ka luṅgu'b 'peni gu'b jin 'kon ma po/i kwara mo dhali a'di 'de'kkunu mony'jwa i is mo.

¹⁰ Dhala Buulus thulki'd ka luṅgu'b mo dhali a'di bitki'da po/ a'di mo dhali mmokothkina a'di a'di me'd mo tani a'di o gwo mo ki: Dhalka du ki mii mo ma haali/ a'di shi/irki'd mo be.

¹¹ Dhali ki a'di seki mo mis mo dhali mmo'ce'dkina a'di maan'kuthu'd yan mo dhali mmoshwa mo tani a'di si'da/ butki'd nyakki uni ki rash rash mo ntagi mo jin sul ma tente/ mo be. Wakan a'di yaki'd mo be.

¹² Dhali uni suskina 'cingwath jin di ki e mo dhali uni malaskunu ki jasa/?

Mo gi 'Cukkina Uni Akur Yi'de/ 'Peni Pan Taruwaas e Pa Miliitūs mo

¹³ Hili mmo/iikina aman ntwa/a/ mo eya kur yi'de/ jin bela 'tham mo tani aman 'cukkina kur yi'de/ jin bela 'tham ki bway gi Pa Assuus mo mmoṭoṣh ka Buulus mina amani bu'th imun mo haali/ gwo kankina a'di wakan mo mmoṭor ki is piti mmoya ki sho'k mo.

¹⁴ Dhali ki a'di gamki am 'kup e Pa Assuus mo tani aman bu'thkina a'di bway bwaman mo dhali mmopu'd mo e Pam Miṭiliini mo be.

¹⁵ Dhali mmo/iikina aman eya kur yi'de/ jin bela 'tham mo 'peni mo yan mo tani aman pu'dkina ka cim jin batha'd ka karambuye/ gi pa gi Paṅ Kiyuus mo.

Dhali ka cim jin 'ko'd mo tani aman takina Pa Samuus ki me'd mo dhali ka cim ki jim bath mo tani aman pu'dkina e Pam Miliitūs mo be.

16 Haala Buulus dina gwo ibwa mo mmoya eya kur yi'de/ jin bela 'tham mo mmope Pan Epasus mo jin mina a'di 'taki diki mii ca'b ka ara cim e Pa Asiyya mo haali/ a'di miikina is ki 'kasa/ 'kasa/ mo jin mina a'di mii di e Pa Urushaliim goma Cim Kamsiin yan mo wakki/ a'di mido 'taki ta isi mii gom a'di mo be.

ABuulus A'di Torki Gwo e 'Kwanij Gwanyjaka/ e Pan Epasus mo

17 Dhali 'peni Pam Miliitūs mo tani a'di hashki gwo mo e Pan Epasus mo dhali yuk 'kwanij gwanyjaka/ 'pena kaniisa mo e a'di mo.

18 Dhali ki uni pu'dkin e a'di mo tani a'di ki o uni gwo mo ki:

Um ki is bum mishki mo mo 'pena cim jin twa/a/ jin karkika/ sho'k pem e Pa Asiyya mo mmoyakika/ mo kan e um mo mmoça'b e um ki sule/ mo

19 mmomiya tu'c gi Tapa ki bwa jin karu ki jin gwa'd mo dhali ki jabuthi e mo dhali ki mompal kun tha'thkina po/ aha/ mo 'pena wu'th gi 'Kwani Yahuuda/ mo.

20 Dhali mmodika/ ki gu is pem 'peni gwon kamu/ tal 'de/ jin ta jim 'borga/ mo mmoçi um mo dhali mmoçor um gwo mo ibwaman 'kwani mo dhali mmoya gu'b ki jin kul mo

21 mmoçor gwo e uni kun ta 'Kwani Yahuuda/ mo dhali uni kun ta 'Kwanij Griki si'da/ mo ki mo jin rijuwa du is 'kup ka Arungimis mo dhali mongam gwo is e Tapa Yesus Kristhos bana mo be.

22 Dhali shwane/ hili mo mo ma aha/ yana ya ki mondek is ki Shi/in e Pa Urushaliim mo dhali aha/ mola to gun mini thathi aha/ imun mo

23 jasi ki Shi/in Dheleladhelel tani a'di tori aha/ gwo e bampa/ 'baar mo mmo/o gwo mo ki mondek dhali monto'c bwa çorki aha/ imun mo.

24 Hili aha/ mina diki bu'th mondiki/em pem mmokar a'di ki is pem ki jin ña/ mo mmomiga/ mish 'baar bway tur gi mondiki/em pem mo dhala tu'c jin bu'thkika/ 'peni Tapa Yesus mmoçi gwom 'borga/ mo goma 'the ma Arungimis mo.

25 Dhali shwane/ mishi mo mo ma. Aha/ misha ki um 'baar mo um kun yaka/ ibwaman mo mmoçi gwo gom Bampa/ ma Arungimis mo tani um mini 'koki par bwam/em pem e dok/e ki sule/ mo.

26 Haali/ a'di gi wakan mo tani aha/ çina um gwo ka cim yansan ki aha/ tana jin dhelelki'd 'pena bas bumi 'baar mo.

27 Haali/ aha/ dikina ki bu'th is pem mo 'peni moçi um gwo mo jin ta isi bwa ma Arungimisi 'baar mo.

28 'Cunycuri miim bum ki is bum mo ma dhala risa ma'diny gwan kun dhuna Shi/in Dheleladhelel um mo mmota icom kun mini hil mo mo dhali mmomiya tu'c mo mmohila kaniisa gi Tapa jin yolkina a'di ka bas jin ta jim pitij gana/ mo.

29 Aha/ misha ki 'ko'di mo jin miga/ ya mo tani awu kun cithiraçithir mo tani mini seyu/ i bwam um mo mmomii mii kun miinu ka sereç yisa goma ma'diny yan mo.

30 Dhali 'peni bwam um ki is bum um 'cena mo tani 'kwani mini piyu/ mo gun mini o gwon tiya kun mini ta kun ther mo mmoçwa/ imanciç gwo bwa mo mmobath uni mo be.

31 Haali/ a'di gi wakan mo tani 'dimi um 'kup mo ma, mmoka mii e mo me'd jin 'kona yili kwara mo tani aha/ dinaki daç gwo mo mmomalas umi 'baar ki 'beles mo ki jabu'th mon'thiny mo dhali montee mo be.

³² Dhali shwane/ aha/ dhuna um eya Arumgimis mo dhali ki gwo ma 'them piti jin mishi um nyanj mo dhali ci um mal mo e bwam uni 'baar mo kun dhunu ki she/ mo ki dhelel dhelel mo.

³³ Aha/ dina bwa ki 'tho^ho/ gom 'dolkon kush gi wathinj kamu/ mo walla 'dolkon ganam piti mo walla burrinyem piti si'da/ mo.

³⁴ Um ki is bum mishi mo ki me'd gwansan miiki to mo kun miga/ mii ta mo dhali gom uni gun nya^k 'ko ki aha/ si'da/ mo.

³⁵ Eya ris to 'baar mo tani aha/ cikina um isi she/mm mo ki um mmomiina uma tu'c wakan mo tani um si'da/ mini mii woth uni kun 'ka'da is mo dhali mmoka gwon Tapa Yesus e mo kun okina a'di ki is piti mo ki: Mmo^{ci} to a'di ta mo gi 'boru mii jin boli mombu'th to e ki 'bor mo be.

³⁶ Dhali ki a'di oki gwo kan tan mo tani a'di ca' bki'd ki jinj 'kupa'dupun mo dhali a'di 'thoki'd nya^kki uni 'baar mo.

³⁷ Dhali uni 'baar mo kumki ko mo dhali tagkini 'ba/ ma Buulus mo dhali pi a'di 'twa/ mo be.

³⁸ Bwan di'ti'd buni di'd ki nyanye/ gom gwo yan jin okina a'di uni ki uni mini 'koki par a'di bwam/em piti e dok/ e ki sule/ sule/ mo be. Dhali uni suski a'di m'pen ibway piti mo ntaga kur yi'de/ jin bela 'tham mo be.

21

Ya ma Buulus jin Yakina A'di e Pa Urushaliim mo

¹ Dhali ki aman 'kokina mmo/ii mo 'peni uni mo dhali 'cu^ka kur yi'de/ jin bela 'tham mo tani aman iikina ka ji sho'k ki bway gi 'tham mo ntagi Pan Kus mo dhali ka cim jinj 'ko'd ntagi Pa Rudus mo dhali 'peni mo yansan mo tani ntagi Pam Patara mo be.

² Dhali mmogamkina amana kur jin bela 'tham mo mmo'citha/ gap ntagi Pam Piniikiya mo tani aman iikina aponj kur yi'de/ mo dhali 'cu^k jin bela 'tham mo.

³ Dhali ki aman pu'dkina eya tente/ e Pan Kuprus mo tani mmodhalkina aman a'di ka biny cam mo tani aman iikina eya kur yi'de/ jin bela 'tham mo ntagi Pan Suriyya mo dhali aman thulkina 'cesh mo e Pan Sur mo be, haali/ e mun mo tani akur yi'de/ minu kal ton di'tin piti mo be.

⁴ Dhali mmogamkina am imancik gwo mo tani am 'kokina ka cim pesu/ imun mo dhali uni gwansan okina Buulus ki Shi/in ki a'di midi 'taki diki kar sho'k piti e Pa Urushaliim mo.

⁵ Dhali ki a'di warki'd ka cim jin 'baarkina aman mo tani aman iikina mo dhali ii mo ki mo/iim bam mo. Dhali uni 'baar ki upi lu/ mo dhali uci si'da/ mo tani uni suski am e bway bam mo gam am 'kokina mo mmo/ii ka piije/ mo 'peni 'penkuman bampa/ mo dhali mmo'kokina aman ki jinj 'kupa'dupun e mo ma dihal yi'de/ mo tani aman 'thokina mo be dhali aman cikina uni gwo mo mmothe me'd ka rem 'kup mmo/ii mo.

⁶ Dhali aman iikina aponj kur yi'de/ jin bela 'tham mo hili uni dokki bway pa ka nyanj'ko'd mo be.

⁷ Dhali ki aman 'baarkina mo/iim bam mo e yi'de/ 'peni Pan Sur mo tani aman merkina e Pam Pu^tulimaayis mo dhali am thekina wa^k me'd mo dhali 'ko nya^kki uni ka cim 'de/ mo.

⁸ Dhali ka cim jinj 'ko'd mo tani am iikina mo dhali pu'd mo e Pan Kaysariyya mo dhali mmocika aman gu'b ma Pilibus jin ta'da manci gwom 'borga/ jin ta jan 'de/ 'peni unim pesu/ mo tani am 'kona nya^kki a'di mo.

⁹ Dhali wathi/ yan ta'd gi i'bwa/i donjon kun ta nyaranj gana/ naskina/ kun ciki gwo is mo.

10 Dhali mmo'kokina aman imun ka cim ka hony/e mo tani amañci gwoŋ kamu/jin yuƙu gway ka Aghabuus yayi'd ka luŋgu'b 'peni Pa Yahuudiyya mo.

11 Dhali mmoyakina a'di i am mo dhali mmobu'thkina a'di waƙan ma Buulus mo tani a'di deƙki sho'k pitin gana/ mo dhali me'd piti si'da/ mo dhali oki gwo mo ki: Wakansan okina Shi/in Dheleladhelel mo ki: Wakan si'da/ mina 'Kwani Yahuuda/ gi Pa Urushaliim deƙ wathi/ yan jin ta com waƙan yan mo dhali ci a'di e me'd gi 'kwani kun 'koki ta 'Kwani Yahuuda/ mo be.

12 Dhali ki aman cikƙina to gwansan mo tani am inyakki uni gi pa yan mo tani aman malaskina a'di mo mmodiki ya ka gagamis e Pa Urushaliim mo.

13 Dhali n'ko'd mo tani aBuulus thoƙki gwo mo ki: Ata gwokina um mo mmo'koshaa/ du mo? Haali/ aha/ thosonkina is mo jasi ki mondeƙ 'te/ yisa hili si'da/ mmowu mo e Pa Urushaliim gom gway gi Tapa Yesus mo be.

14 Dhali ki a'di ushki gwo gi lalu a'di sho'k mo tani am daƙƙina gwo o mo mmo/o gwo mo ki: Dhalki bwana Tapa a'di miinu mo ma.

15 Dhali 'ko'da cim gwansan mo tani am deƙa tom bam is mo dhali ii ka gagamis e Pa Urushaliim mo.

16 Dhali imancik gwon tiya si'da/ nyakki ii ki am 'peni Paŋ Kaysariyya mo. Uni suski jan tal 'de/ nyakki uni jin yuƙu gway ka Manasuun gi Paŋ Kuprus jin ta'da mancik gwo jin twa/a/ jin mina am 'taki nyak ish ki a'di mo.

ABuulus Buƙi'd, Uni ka Yakuub mo

17 Dhali ki am merkina e Pa Urushaliim mo tani awaƙ bu'thki am mo ki bwan 'kunya/ mo.

18 Dhali ka cim ki jim baƙ mo tani aBuulus ya'di bwam am eya Yakuub mo dhala ris 'kwaniŋ gwanyjaka/ 'kon mo.

19 Dhali ki a'di theki uni me'd mo tani a'di toƙki uni gwo mo ka 'dete/ 'dete/ gom to kun miikin ma Arungimis ibwan 'kwani kun 'koki ta 'Kwani Yahuuda/ eya tu'c piti mo be.

20 Dhali ki uni cikki a'di mo tani uni karkina Arungimis ki ca mo dhali uni oki a'di gwo mo ki: Misha /eya mudhu, 'kwani wakina risa e bwan 'Kwani Yahuuda/ 'peni uni gun gamki gwo is mo dhali uni 'baar mo shwana nyor mo gom gwoŋkan jin cinu mo.

21 Dhali uni toƙkunu gwo mo gom /e ki /e din mo mmoƙora ris 'Kwani Yahuuda/ gwo kun 'kon ibwan 'kwani kun 'koki ta 'Kwani Yahuuda/ mo mmodhal gwo ma Musa 'pen mo mmo/o uni ki uni mini dhalku/ uƙim buni ki 'ciƙa/ munyal yis buni mo dhali mmodhalku/ ki ciya hirdhe/ si'da/ ki mii kun onu mmomii mo.

22 Ata mina ana mii mo sa/ gom a'di mo? Uni mini cik gwo ka jin gana/ ki /e pu'dkin mo.

23 Haali/ a'di gi wakan mo tani miyyi a'di jin mina amani 'taki o/e mo. Aman tana gi 'kwaniŋ gwasi doŋon kun 'kona to i'bam buni mo be.

24 Budhi gwan mo ma dhali thosoni is pini ki dhelel dhelel nyakki uni mo dhali ca'bi /e mo ma gom to gun minu doƙ mo gom uni ki uni mini mish 'kup buni 'thi mo be. Dhala ris 'kwani 'baar mo mini mish ki a'di diki ta gwoŋ gana/ gom to kun toƙkunu uni gom /e mo hili /e ki is pini si'da/ iyan mo mmodiki tor ci 'twa/ mo mmodhu gwoŋkan jin cinu mo.

25 Hili gom 'kwani kun 'koki ta 'Kwani Yahuuda/ kun gamki gwo is mo tani am 'kwarkina gwo mo mmoƙi gwo jin gamkunu me'd mo ki uni mini non is buni mo 'peni to gun 'ciƙu/ mo mmomiiya basa 'cesh mmoluŋ tompinyon mo dhali 'peni miin to ma bas mo dhali 'peni to gun minyciru 'kus mo dhali 'peni mo jin miinu miinyal si'da/ mo.

²⁶ Dhali ṛ'ko'd mo tani aBuulus ki bu'th 'kwani mo dhali ka cim jin 'ko'd mo tani mmothosonkina a'di is piti ki dhelel dhelel nyakki uni mo tani a'di yaki'd e gu'b gi mondheleladhelel mo mmoci gwo mmo'baara cim gi mo jin thosonkunu is ki dhelel dhelel mo ntagi to minu ci mo a'di jin cikunu eya tente/ mo gom uni gwansani 'baar ka 'dete/ 'dete/ mo.

ABuulus A'di Bu'thkunu e Gu'b gi Mondheleladhelel mo

²⁷ Dhali ka cim ma pesu/ 'dishki'di 'baar mo tani 'Kwani Yahuuda/ 'peni Pa Asiyya ki uni parki a'di e e gu'b gi mondheleladhelel mo tani uni ci'thkina waambuhany 'kwani is ki mii mo dhali uni tha'thki a'di me'di is mo be

²⁸ mmocuu gwo mo ki: 'Kwani ma Israyiil, wo'thi/ aman mo ma. Wathi/ yansan ta a'di jin ṭorki'da ris 'kwani 'baar mo gwo mo e mo 'baar mo apo/ 'kwani dhali apo/ gwonkan jin cinu mo dhali apo/ mo yansan mo. Dhali a'di si'da/ suski 'Kwanin Griki si'da/ e gu'b gi mondheleladhelel mo dhali mo yan jin kogu mo karkina a'di mo me'd mo jin dinuki ko/ mo be.

²⁹ Haali/ uni ntwa/a/ mishki a'di e bampa/ nyakka Turupimus jin ta Wathi/ gi Pan Epasus jin toshkina uni ka Buulus nsuski a'di e gu'b gi mondheleladhelel mo.

³⁰ Dhala ris 'kwanim bampa/ cuki mis mo dhali 'kwani sokin mo imonta/ 'de/ mo dhali uni ki budha Buulus mo dhali dir a'di ka pije/ 'peni gu'b gi mondheleladhelel mo dhali ki jahanne/ acampur mu'thkunu mo be.

³¹ Dhali ki uni 'kon mmoṇap a'di mo mmo'kosh mo tani gwo pu'dki'd e mis eya mancil ma askar alip ki mo jin jin ma askara ji ka ris mo e Pa Urushaliimi 'baar mo 'kokin mo ka culma'th mo be.

³² Dhali ki jahanne/ a'di bu'thki i/ askar mo dhali imancil ma askar iss 'kwanim pa imudhe'd mo dhali thulkin mo ka ṛwaca/ a'cesha po/ uni mo dhali uni, ki uni mishki imancil ma askar alip mo dhali mishki i/askar mo tani uni dakana Buulus 'kosh mo.

³³ Dhali yan 'ko'd mo amancil ma askar alip pu'dki'd mo ki 'dishe/ mo dhali bu'th a'di mo dhali kan gwo mo ki a'di minu deḡ mo ka jindhiiri su/ mo. Dhali a'di doṭki gwo mo ki a'di ta'da ja sa/ mo dhala ta miikina a'di mo.

³⁴ Dhali kun tiya cuun mo nton 'de/ mo dhali kun tiyan tiya ibwaman ma waambuhany 'kwani mo dhali ki a'di moli gwon ka'b yan jin ka'bu mo ka culma'th mo tani a'di kanki gwo mo ki a'di minu sus mo e gu'b gi i/askar mo.

³⁵ Dhali ki a'di pu'dki'd apo/ mo jin senu mis mo tani a'di warki'd ki mo jin kalkan ma askar a'di ime'd mo gom mii yan jin kal ma waambuhany 'kwani mo be.

³⁶ Haala waambuhany 'kwani bathani bathi 'ko'd mmocuu gwo mo ki: Guyi a'di mo ma.

ABuulus 'Ce'dki Gwo She/ gom Is Piti mo

³⁷ Dhali ka Buulus muru susu gu'b gi i/askar mo tani a'di oki'da mancil ma askar alip gwo mo ki: Miga/ o gwon kamu/ e/e mo 'taa? Dhali a'di o gwo mo ki: 'Twan Griki wala /e 'taa?

³⁸ /E diki ta Wathi/ gi Pam Masir yan si'da/ jin dhuki 'kwani alaapi donon kun ta iman 'kosh tiya jwa mo mmo/ek mii kagahara mo dhali jin suski uni ka pije/ mombwaasho ka cim kagush yin mo 'taa?

³⁹ Hila Buulus a'di oki gwo mo ki: Aha/ tana ji Yahuuda/ mo 'peni Pan Tharsuus gi Pan Kilikiyya jany 'cesh gi bampa/ jin molu mo yisa. Dhali aha/ 'thona /e mo mmodhalaa/ bway mo mmotor 'kwani gwo mo be.

⁴⁰ Dhali ki a'di ciki a'di bway mo tani aBuulus mmodoshkina a'di mo eya po/ mo jin senu mis mo tani a'di ki wuḡ 'kwani e ki me'd mo dhali ki mo doshki'd ki biyuu mo tani a'di ṭorki uni gwo ki 'twan 'Kwani Yahuuda/ mo mmo/o gwo mo ki:

22

¹ Imudhum pem dhali ibaba, kana, ciki um gwo jin miga/ 'ce'd um she/ shwane/ mo.

² Dhali ki uni cikki gwo ki a'di oki uni gwo ki 'twanj 'Kwani Yahuuda/ mo tani uni 'kokin ki shwam ki mutt mo dhali a'di ki o uni gwo mo ki:

³ Aha/ tana ji Yahuuda/ jin dhodhu mo e Pan Tharsuus gi Pan Kilikiyya mo dhali hili aha/ thipkunu e bampa/ yan em bwam sho'k ma Ghamala/jil mo be. Dhali aha/ ye' thkunu sho'k ki gwo mo gom mii gi gwonkan jin cinu mo kun ta kuny ji sho'k mo 'peni ibabam bana mo be dhali aha/ shwanaa nyor mo goma Arumginis si'da/ me'd umi 'baar mo kun 'kokin shwanetan mo.

⁴ Dhali aha/ to'ckina uni kun ta kum Bway yan 'kus mo igam uni wun mo mmodek uni mo dhali mmoçi uni eya sijn mo uni kun ta kunj gwas mo dhali upi lu/ mo.

⁵ Wakan si'da/ agasiis jin ca'd dak gwo me'd ki aha/ mo dhala ris 'kwanj gwanyjaka/ 'baar mo ka njul 'kup mo. 'Peni uni si'da/ kun bu' thkika/ warka/ eya wak yan mo dhali mmoya mo e Pan Dimashk mo mmosus uni si'da/ kun 'kon mo mmun mmosus ki mondek is mmori'c mo e Pa Urushaliim mo be.

ABuulus Torki Mii jin Tu'k A'di Is mo

⁶ Dhali a'di wara'd mo me'd jin dika/ mo e moyam pem mo dhali 'dish Pan Dimashk is mo ka tente/ muru'di di ibwanj 'kup mo tani ki jahanne/ adhan monkush caaca 'twa'ki mo mo 'peni momis mo mmo'kam aha/ is mo be.

⁷ Dhali aha/ bitkina powa 'cesh mo dhali cik 'twa/ jin o aha/ gwo mo ki: Shawuul Shawuul. Ata toca /e aha/ 'kus kan mo?

⁸ Dhali aha/ thokkina gwo mo ki: /E tana ja Tapa? Dhali a'di oki aha/ gwo mo ki: Aha/ tana Yesus gi Pa Naasira jin toca /e 'kus mo be.

⁹ Dhali uni gun 'kokin nyakki aha/ mo tani uni mishki monkush ka jin gana/ mo tani hili uni 'koki cik 'twa/ gi a'di jin oki aha/ gwo mo be.

¹⁰ Dhali aha/ ona gwo mo ki: Ata miga/ mii mo Tapa? Dhali Tapa oki aha/ gwo mo ki: Cuyi /e mis mo dhali yayi e Pan Dimashk mo dhali e mun mo tani a'di minu tor /e mo goma ris to 'baar mo kun thosonkunu gom /e mo mmomii mo be.

¹¹ Dhali ki aha/ mola mo hil gom mondhel gi monkush caan mo tani aha/ merkina mo e Pan Dimashk mo mmosuskina uni kun nyakki 'ko ki aha/ me'da bi mo.

¹² Dhali jan tal 'de/ jin ta'da Hananiyya jin ta wathinj gayiin gom gwonkan jin cinu mo dhali jin man ma ris 'Kwani Yahuuda/ 'baar mo kun 'koni mun mo tani

¹³ pu'dki'di aha/ mo dhali mmodosha a'di mmo'dish aha/ is mo tani a'di oki aha/ gwo mo ki: Akam pem ka Shawuula, budhi momish mo mo ma. Dhali ki mo yansan mo tani aha/ bu' thkina momish mom pem mo dhali aha/ misha a'di mo be.

¹⁴ Dhali a'di o'd ka Arumginis gi ibabam bana iski /e mo mmomish bwam piti mo dhali mmopar mo ma kar/e gi jan 'de/ e mo dhali mmocik cuuwa/ 'peni twam piti mo be.

¹⁵ Haali/ /e mini ta aman/o gwo gom a'di eya ris 'kwani gom a'di jin misha /e mo dhali jin cika /e mo si'da/.

¹⁶ Dhali shwane/ ata ca'ba /e mmomii mo? Cuyi /e mis mo ma dhali miiyi is pini ki yi'de/ mo mmolam miinthus pini mo mmoyer gway piti mo.

ABuulus A'di Yukkunu mo gom 'Kwani kun 'Koki Ta 'Kwani Yahuuda/ mo

¹⁷ Dhali me'd jin dokkika/ ka nyan'ko'd mo e Pa Urushaliim mo dhali ki aha/ dikina mmo'tho mo e gu'b gi mondheleladhelel mo tani aha/ bitkina is jwa mo be.

18 Dhali aha/ parkina a'di e mo mmo/o gwo i aha/ ki: Meri is mo dhali yayi mo ise/ ki jahanne/ 'peni Pa Urushaliim mo haali/ uni mini 'koki bu'th gwontor 'peni /e gom aha/ mo be.

19 Dhali aha/ okina gwo mo ki: Tapa, uni ki is buni mishkin ki aha/ dhukina uni gun gamki /e gwo is eya sijn mo dhali aha/ dorkina uni eya ris gu'b gi montul isi 'baar mo ki 'beles mo.

20 Dhali ka bas ma Istipanuus jin ta'da man/o gwom pini diki'd mmowol mo tani aha/ si'da/ doshkina ki 'dishe/ mo dhali gam bwa me'd mo dhali mmodhu burrinye/ gi uni gun 'koshki a'di mo.

21 Dhali a'di oki aha/ gwo mo ki: Yaku/ mo ma haali/ aha/ mina hash /e mo e mo jin si'dasi'd isa dhana/ mo e 'kwani kun 'koki ta 'Kwani Yahuuda/ mo be.

ABuulus A'di Jikunu mo

22 Dhali uni ci a'di 'cem buni ki gwo yan mo. Dhali uni 'de'kki 'twam buni mo dhali o gwo mo ki: Guyi ji wakan mo 'peni mony'cesh mo haali/ a'di diki ha me'd jin mina a'di 'taki di ki e mo be.

23 Dhali ki uni cuukin mo dhali ta'kki burrinyem buni mo dhali yekki bu'da 'ceshi momis mo tani

24 amancil ma askar alip kanki gwo ki a'di minu sus mo e gu'b gi i/askar mo mmokan gwo ki a'di minu mii turrish ki mondor ki yis bip mo jin mina a'di 'taki mish ki kata yan a'di jin cuuna uni apo/ a'di kan mo.

25 Dhali ki uni dekki a'di mo ki waçkan mo tani aBuulus oki gwo eya mancil ma askar iss 'kwanim pa imudhe'd jin doshki'd ki 'dishe/ mo ki: A'di ta gwonkan 'taa jin mina umi dor wathi/ jin ta ji Pa Ruumiya ki yis bip ki dar gi miwax kan mo 'taa?

26 Dhali ka mancil ma askar iss 'kwanim pa imudhe'd cikki a'di mo tani a'di yaki'd eya mancil ma askar alip mo dhali torki a'di gwo mo mmo/o gwo mo ki: Ata mura /e imii mo? Haali/ wathi/ yan ta ji gi Pa Ruumiya mo be.

27 Dhala mancil ma askar alip pu'dki'd mo dhali o a'di gwo mo ki: Toraa/ gwo mo ma, /e ta jim Pa Ruumiya 'taa? Dhali a'di ki o a'di gwo mo ki: Nye.

28 Dhala mancil ma askar alip thokki gwo mo ki: Ki dhan to gun tulu 'kup mo tani bu'thkika/ mo mmota jany 'cesh gi bampa/ yan mo. Dhala Buulus o gwo mo ki: Hili aha/ tana jim Pa Ruumiya jin dhodhu mo be.

29 Dhali uni gun 'kokin mmomuri turrish a'di mo tani ise/ uni iikin 'peni a'di mo. Dhala mancil ma askar alip si'da/ ko/ki is mo haali/ a'di mishki'd ki a'di ta ji Pa Ruumiya mo haali/ a'di dekki a'di mo be.

ABuulus Doshki'di Bwambor Montul Is gi 'Kwani Yahuuda/ mo

30 Hili ka cim jin 'ko'd mo tani mmorjapa a'di gwo mmomish gwon ka'b yan jin ka'bu mo mmoyera 'Kwani Yahuuda/ a'di is ki gway mo tani a'di 'cukki a'di mo dhali kanki'da gasiis kun can gwo mo dhali 'kwani gi montul is buni yani 'baar mo mmotul isi montal 'de/ mo dhali a'di suski'da Buulus ka 'cesh mo dhali kar a'di ibwambori uni mo be.

23

1 Dhala Buulus mmohilkina a'di apo/ montul is yan ka 'thime/ mo tani a'di o gwo mo ki: Iwax pema aha/ tana jany 'cesh gi bampa/ ibwambor ma Arumgimis mo e mii 'baar mo kun ta isi bwan gana/ ntaga tee yan mo be.

2 Dhala gasiis jin ca'd jin ta'da Hananiyya kanki uni kun doshkin ki 'dishe/ i a'di gwo mo mmodor a'di 'twa/ ki me'd mo.

3 N'ko'd aBuulus oki a'di gwo mo ki: Arumgimis midi dor /e mo, /e jin tana gangara/, jin kushu mo e mis 'te/ kan mo dhali /e ki ca'b mmodwall aha/ gwo mowa gom gwonkan jin cinu mo dhali /e ki kan gwo ki aha/ minu dor mo ki gwonkan jin cinu mo jin 'ce'du 'pen 'te/ mo?

⁴ Dhali uni gun doshkin ki 'dishe/ mo tani oki a'di gwo mo ki: /E sorkina gasiis jin ca'd ma Arumgimis mo kana?

⁵ Dhala Buulus ki o gwo mo ki: Aha/ dinaki mish, iwaḡ pem mo, ki a'di ta'da gasiis jin ca'd mo be, haali/ a'di 'kwarkunu mo ki: /E mini dhalku/ ki o gwon thuḡ gom tapar 'kwanim pini mo.

⁶ Hili ka Buulus nyithki'd ki 'bana 'de/ ta ji gi 'Kwani Sadukiyyiin mo dhali 'bana kamu/ ta ji gi 'Kwani Parisiyyiin mo tani a'di cuuki'd mo e montul is yan mo ki: Iwaḡ pema aha/ tana Wathim Parisi mo jin ta ya/ gi 'Kwani Parisiyyiin mo be dhali gom mo jin tanu ga 'teḡ kape/ mo dhali gom mompinu 'peni mowu mo tani aha/ yukunu mo gom gwondot yan mo.

⁷ Dhali ki a'di oki gwo kan mo tani mo jin walkunuwa wal piki'd e bwanḡ 'Kwani Parisiyyiin mo dhali 'Kwani Sadukiyyiin mo dhali montul is yan kwa/ kunu bwa mo be.

⁸ Haali/ 'Kwani Sadukiyyiin oki gwo mo ki mo jin pinu yisa di'da walla man'doyu gwo mo walla shi/in mo, hili 'Kwani Parisiyyiin si'da/ tor gwo gom mompinu mo dhala man'doyu gwo mo dhali shi/in mo.

⁹ Dhala dhan cuuwa/ piki'd mo dhali iman'kwar ton tiya kun ta kum 'ban gi 'Kwani Parisiyyiin doshkin ki mis mo dhali di'bki gwo is mo mmo/o gwo mo ki: Am yisa gama tonthusa kamu/ e wathi/ yansan yisa. Atinta wakki/ shi/in oki gwo e a'di mo walla man'doyu gwo mo?

¹⁰ Dhali ki mo jin walkunuwa wal jin caaca piki'd mo tani amancil ma askar alip mmoḡo/kina a'di is goma Buulus jin mina uni 'taki kwa/ a'di is bwa ka 'ci'cimi'th mo tani a'di kanki'da askar gwo mo mmo/ii ka 'cesh mo dhali bu'th a'di 'peni bwam uni ki kwap mo dhali mmosus a'di e gu'b gi i/askar mo be.

¹¹ Dhali ki mon'thiny jin bathki'd mo tani Tapa doshki'd ki 'dishe/ i a'di mo dhali oki gwo mo ki: Budhi adunḡ gana/ mo ma haali/ me'd jin torkina /e gwontor gom aha/ e Pa Urushaliim mo tani wakan si'da/ /e mini mii ci gwontor gom aha/ si'da/ e Pa Ruumiya mo.

Awu'th jin Wu'thkunu Apo/ Mondiki/e ma Buulus mo

¹² Dhali ki mo ta montee mo tani 'Kwani Yahuuda/ gamki bwa me'd mo imontal 'de/ mo dhali dekki is buni ki gwo jin gama uni me'd mo mmo/o gwo mo ki uni mini 'koki shwa to mo walla 'koki pi to mo ntagi uni mini 'taki 'kosha Buulus jwa mo be.

¹³ Dhali uni 'kokin ki nyanye/ ki issu/ mo kun miikina wu'th yan mo.

¹⁴ Dhali uni pu'dkin e igasiis kun can mo dhali 'kwaninḡ gwanyjaka/ mo dhali o gwo mo ki: Aman dekkina is bam ki gwo jin gamu me'd mo jin onu is mo mmo'koki nyok toḡ kamu/ mo ntagi aman mina 'kosha Buulus jwa mo.

¹⁵ Dhali shwane/ miyi um gwo eya tente/ ka mancil ma askar alip ki a'di mididi susi a'di ka 'ceshi um mo me'd jin mina umi dwall gwo gom a'di ka ji sho'k ki nyanye/ mo. Dhali aman ntwa/a/ ki a'di mididi 'dishu mo tani aman mina thoson is mo mmo'kosh a'di mo.

¹⁶ Hili ya/ gi 'bwah ma Buulus cikki gwo ki uni ishkin ki jim bag mo mmoḡor a'di mo tani a'di guski ce mo dhali ciḡ mo e gu'b gi i/askar mo dhali torka Buulus gwo mo be.

¹⁷ Dhala Buulus yukki jan tal 'de/ e a'di mo 'peni imancil ma askar iss 'kwanim pa imudhe'd mo dhali oki gwo mo ki: Susi washan dhuru'c yan eya mancil ma askar alip mo ma haali/ a'di ta gi toḡ kamu/ mmoḡor a'di mo.

¹⁸ Wakan a'di bu'th a'di mo dhali sus a'di eya mancil ma askar alip mo dhali o gwo mo ki: ABuulus jin ta'da habuus yukki aha/ i a'di mo dhali dotki aha/ gwo mo mmosus wathin dhuru'c yan i/e mo jin ta gi toḡ kamu/ mmo/o/e mo.

19 Dhala mancil ma askar alip bu'th a'di ki me'd mo dhali thoth mo mmodot a'di gwo mo ka 'di/ mo ki: Atinta a'di jin mina /e i'tor aha/ gwo mo?

20 Dhali a'di o gwo mo ki: 'Kwani Yahuuda/ gamki gwo me'd mo mmodot/ e mmosusa Buulus ka 'cesh ka 'thamo/ e montul is yan me'd jin mina /e 'taki tirrish gwo ka ji sho'k ni nyanye/ ari'ceenne/ gom a'di mo.

21 A'di mina /e dhalku/ ki ha gwom buni e mo. Haali/ 'kwanin gwaw 'kon ki nyanye/ ki issu/ mo kun ishkin ki jim bag mo mmo'gor a'di 'peni uni gun dekki is buni mo ki gwo jin gamu me'd mo jin onu is mo mmo'koki shwa to mo walla mmo'koki pi to si'da/ mo ntagi uni mini 'kosh a'di jwa mo dhali shwane/ uni 'kon mmothoson is mo mmohil 'kup ki gwo jin mina /e o is gom a'di mo.

22 Wakan amancil ma askar alip dhal dhuru'c wathi/ bway mo mmoya mo mmo'kan a'di gwo mo ki: Dhalki wathin kamu/ gwo ki 'tor ki /e mii to gwansan eya tente/ gom aha/ mo.

ABuulus A'di Hashkunu mo eya Piliks jin Ta'da Mudhiir mo

23 Dhali a'di yukki uni su/ i a'di kun tana imancil ma askar iss 'kwanim pa imudhe'd mo dhali o uni gwo mo ki: Thosoni i/askar iss* 'kwanimpa i'kume'd is mo ma mmo'ii ntagi Panj Kaysariyya mo dhali 'kwani gun ta ku gi shumarum issi† kwara i'ce'dka 'kume'd mo dhali 'kwani kun ta ku ma mee iss 'kwanimpa i'kume'd mo ka tente/ pedon jin ta mon'thiny mo

24 dhali a'di kanki uni gwo mo mmothoson to/e kun meruwa po/ mo jin mina uni 'taki kara Buulus po/ a'di mo dhali mmosus a'di ki 'dantar eya Piliks jin ta'da mudhiir mo.

25 Dhali a'di 'kwarki gwowa warka/ jin wana she/mm cikise/ mo ki:

26 Kuludiyuus Lisiyaas eya mudhiir jin ta jim 'borga/ jin ta'da Piliks ki gwon the me'd mo.

27 Wathi/ yan bu'thkina 'Kwani Yahuuda/ mo dhali murkina uni 'taki 'kosh jwa mo me'd jin pu'dkika/ apo/ uni mo dhali aha/ wothkina a'di mo nyakki i/ askar mo mmoda/arka/ gwo mo ki a'di ta jim Pa Ruumiya mo.

28 Dhali mmon'appa/ gwo mmomish 'ban mo gom mo jin yera uni a'di is ki gway mo tani aha/ suskina a'di ka 'ceshi montul is buni yan mo.

29 Dhali aha/ gamkina gwo mo mmoyeru a'di is ki gway mo gom gwondot gom gwon'kan buni jin cinu mo hili mmodara a'di ki ton kamu/ jin yeru a'di is ki gway jin mina a'di gam 'pemen jin ta ji gi wu mo walla jin ta ji gi mondek si'da/ mo.

30 Dhali ki a'di 'orkunu aha/ mo ka wu'th di'da po/ wathi/ yan mo tani aha/ hashkina a'di i /e ise/ mo mmo'kanki uni gwo mo uni kun yer a'di is ki gway si'da/ mo mmo'o gwowa po/ a'di ibwambori /e mo.

31 Wakan si'da/ i/askar me'd jin kankunu uni gwo mo tani uni bu'thkina Buulus mo dhali sus a'di ki mo ta mon'thiny mo e Pa Antibatris mo.

32 Hili ka cim jin 'ko'd mo tani uni dhalki 'kwani gun ta ku shumarum bway mo mmo'ii mo nyakki a'di mo dhali mmodok ka nyan'ko'd e gu'b gi i/askar mo.

33 Dhali uni, ki uni pu'dkin mo e Panj Kaysariyya mo dhali cika warka/ eya mudhiir mo tani uni 'orkina Buulus si'da/ e bwambori a'di mo be.

34 Dhali ki a'di denki gwo e mo tani a'di dotki a'di gwo mo ki /e ta jany cur jana mo, dhali ki a'di mishki gwo 'ban ki a'di ta ji Panj Kilikiyya mo tani

35 a'di o gwo mo ki: Aha/ mina cik gwo 'peni /e ki dhegem mo ki uni gwansan gun yer /e is ki gway si'da/ mini pu'du/ mo. Dhali a'di kanki gwo ki a'di minu kar e gu'b ma mudhiir jin ta ji ma Hirodus mo.

* 23:23 miyateen † 23:23 saba/iin

24

Gwon Dwall jin Dwallkunu Apowa Buulus mo

¹ Dhali 'ko'da cim mudhe'd mo tani agasiis jin ca'd jin ta'da Hananiyya pu'dki'd ka 'cesh mo nyakki 'kwanij gwanyjakan tiya mo dhali nyakka wa/ in gwon kamu/ mo jan tal 'de/ jin ta'da Tartullus mo dhali uni torkina mudhiir gwo eya tente/ apowa Buulus mo be.

² Dhali ki a'di yukkunu mo tani aTartullus telki gwo 'pen mo mmoyer a'di is ki gway mo mmo/o gwo mo ki:

Haali/ gom /e mo tani aman 'kunykina bwa mo ki monku'th is ki nyanye/ mo dhali gom monthoson pini mo tani tonthus thumu ki 'bore/ gom kal yan mo

³ aman butha a'di em bwayi 'baar mo dhali e mo 'baar mo /e jin ta jim 'borga/ jin tana Piliks ki bwa 'baar ki 'bore/ mo.

⁴ Hili ki aha/ mina diki bul /e ki gwo naskina/ mo tani aha/ 'thona /e ki jin nan pini gom bwa jin tana /e pa mo mmocik am gwo ki e 'pe'pere/ mo.

⁵ Haali/ aman gamkina wathi/ yan jin shwan ma pibi anyor mo dhali aman kala wal jin walkunu mo ibwan 'Kwani Yahuuda/ 'baar mo isi mony'ceshi 'baar mo dhala manshu tiya bway gom cej 'kwani kun lun ji gi Pa Naasira mo.

⁶ Dhali a'di si'da/ pali mii mo mmodiki kar gu'b gi mondheleladhelel ki jin kogu mo dhali a'di si'da/ bu'thkina aman mo dhali aman mina 'taki dwall a'di gwo ki gwonkan bam jin cinu mo.

⁷ Hili amancil ma askar alip jin ta'da Lisiyaas pu'dki'd mo dhali ki dhan miim 'bi'th kun caaca mo tani a'di bu'thki a'di mo 'peni bwam me'd bam mo

⁸ mmokan imanyer a'di is ki gway gwo mo mmo/ii ibwambori /e mo, dhali 'peni a'di si'da/ mo tani /e mini mish a'di mo mmoTirrish a'di ki gwo ki is pini mo mmonyith goma ris to gwansani 'baar mo kun yera aman a'di is ki gway mo.

⁹ Dhali 'Kwani Yahuuda/ si'da/ 'dapkin ki gwo ki mo jin yeru a'di is ki gway mo mmogam gwo me'd ki to gwansan ta kunj gana/ mo be.

ABuulus 'Ce'dki Gwo She/ Ibwambor ma Piliks mo

¹⁰ Dhali ka mudhiir wukki a'di ki 'kup mo mmo/o gwo mo tani aBuulus thokki gwo mo ki:

Haali/ aha/ misha ki /e din ki yil ka ris mmota mandwall gwo gom kal yan mo tani aha/ ki bwam 'boro'd mo tani aha/ mina 'ce'd /e she/ ki gwo mo,

¹¹ haali/ /e mini mish nyith ki a'di diki ta acim 'kume'd i'ce'dka su/ ki nyanye/ me'd jin yakika/ ka gagamis mmolun e Pa Urushaliim mo.

¹² Dhali uni si'da/ 'koki gam aha/ e gu'b gi mondheleladhelel mmosu'k ki gwo ki wathin tal 'den kamu/ walla mmocitha waambuhany 'kwani is ki mii mo si'da/ e gu'b gi montul is buni mo gi mo walla e bampa/ si'da/ mo.

¹³ Dhali uni si'da/ moli gwo kar ki ji ma du'd e /e gom to gun yera uni aha/ is ki gway mo.

¹⁴ Hili yan miga/ tor /e mo ki 'ko'di Bway jin yukkina uni ki jiny cem buni mo tani wakan aha/ miina to goma Arungimis gi ibabam bam mmogama ris gwo 'baar mo is kun waki gwonkan jin cinu mo dhali kun 'kwarkunu e imanci gwo ma Arungimis kadhama/ mo

¹⁵ mmota ga 'tej kape/ eya Arungimis mo dhali gwohe si'da/ ki is buni hili 'kup ki yan mo, ki mompinu jin midi di mo gom uni kun mii jasi miinjkar/e mo dhali uni si'da/ kun 'koki mii miinjkar/e mo be.

¹⁶ E mii yansan si'da/ mo tani aha/ pira is pem mo mmota gi isi bwan gana/ mmodiki kol ibwambor ma Arungimis mo dhali ibwambor gi 'kwani isa yempa/ mo.

¹⁷ Dhali 'ko'di yil ka ris mo tani aha/ pu'dkina mo mmo'do to kun cinu gom 'kwani kun hatha'ko'd e kal pem mo dhali to kun cinu ki me'd si'da/ mo.

¹⁸ E mii gwansan mo tani uni gamki aha/ mo mmothoson is ki dhelel dhelel e gu'b gi mondheleladhelel mo ki dar ga waambuhany 'kwani mo dhali ki dar gi mo ma dulatt naskina/ mo. Hili 'kwani Yahuudan tiya kun 'kon 'peni Pa Asiiya mo

¹⁹ kun mini 'taki mii 'ko imahan ibwambori /e mo dhali mmomii mo yan jin yeru is ki gway mo wakki/ uni ta gi toŋ kamu/ apo/ aha/ mo.

²⁰ Walla si'da/ dhalki 'kwani gwansan ki is buni o gwo gom miinthus jana jin gamkina uni mo me'd jin doshka/ ibwambor montul is yan mo,

²¹ walla isi kan mo gom 'twan tal 'de/ yan jin cuuka/ mo mmodoshi bwaman uni mo ki: Gwo gom mompinu 'peni mowu mo tani aha/ yuŋkunu mo gom gwondot ibwambori /e ka tee yan mo.

ABuulus A'di Bu'thkunu e Mo jin Jinuwa Ji mo

²² Hila Piliiks ki dhal mii e i is mo mmonyitha a'di ka ji sho'k ki nyanye/ gom Bway yan mo tani a'di si'd uni gwo 'ko'd mo mmo/o gwo mo ki: Ka Lisiyaas jin ta'da mancil ma askar alip midi yayu/ ka 'cesh mo tani aha/ mina mish gwo ki dhegem gom /e mo.

²³ Dhali a'di ki ci gwonkan eya mancil ma askar iss 'kwanimpa imudhe'd ki a'di minu mii kari mohil mo dhali a'di midi ta gi mo mmoya gi 'kus si'da/ mo dhali minu 'koki non si'da/ 'peni kum pitin tiya mo kun mini iyu/ i a'di mo.

²⁴ Hili 'ko'da tee gwansan tani Piliiks pu'dki'd nyakka Durusilla jin ta ashim piti jin ta'da 'Bom Yahuuda/ mo, dhali hashki'da Buulus mo dhali cik gwo 'peni a'di mo gom gwo jin gamu is eya Yesus Kristhos mo.

²⁵ Dhali me'dyin torcina a'diya tor ka rem 'kup gom mo ma kar/e mo dhali mo jin 'timuwa du mo dhali gom gwo miiwak jin midi yayu/ yilan kamu/ mo tani Piliiks ko/ki is mo dhali thokki gwo mo ki: Yayi ibway pini shwanetan mo ma dhali ki aha/ mina ta gi embul jin 'boro'd mo tani aha/ mina yuk /e i aha/ mo.

²⁶ A'di toshki'd si'da/ ka guurush min ma Buulusi 'taki ci a'di mo. Gom a'di gi wakan si'da/ mo tani a'di hashki a'di gwo ki ye'th ye'th mo dhali mmobuti nyakki a'di mo.

²⁷ Hili ki yila su/ kun thimkin mo tani Piliiks garr ma Purkiyuus Pastuus i embul piti mo dhali mmo/o bwa mmogam moman 'peni 'kwani Yahuuda/ mo tani Piliiks dhalki'da Buulus ki mondeŋ is mo be.

25

ABuulus Yipki 'Kup 'Kup ka Kaysar mo

¹ Mmopu'dkin ma Pastuus eya cur yan mo tani a'di yakina a'di 'ko'da cim kwara ka gagamis e Pa Urushaliim 'peni Pan Kaysariyya mo be.

² Dhali igasiis kun can dhali 'kwani gun tana 'kan'kup 'peni 'kwani Yahuuda/ ciki a'di gwo mo apowa Buulus mo. Dhali uni dotki a'di mo

³ mmodota 'them piti apo/ a'di mo ki a'di midi hash a'di e Pa Urushaliim mo mmomiiya wu'th mmo'kosh a'di jwa mo eyan bway mo.

⁴ Bahili aPastuus thokki gwo ka Buulus karkunu mo mmohil mo e Pan Kaysariyya mo dhali a'di ki is piti murki'di ya imun ki 'dishe/ mo.

⁵ Dhali a'di oki gwo mo ki: A'di mina um dhalki uni kun ta gi mom'bi'th ibwam um mmo/ii ka 'ceshi nyakki aha/ mo dhali wakki/ tonthusa kamu/ di'd e wathi/ yan mo tani dhalki uni yer a'di is ki gway mo.

⁶ Dhali ki a'di 'baarki'da cim naskina/ ibwam uni ka cim diki ta pekware mo walla 'kume'd ki nyanye/ mo tani a'di yaki'd ka lungu'b e Pan Kaysariyya

mo be. Dhali ka cim jin 'ko'd mo tani a'di ɕa'bki'd mo eya ƙursi jin dwallu gwo mo dhali ƙanki gwo mo ka Buulus minu susu mo be.

⁷ Dhali mmopu'dkina a'di mo tani 'Kwani Yahuuda/ kun pu'dkin ka lunƙu'b 'peni Pa Urushaliim mo tani doshkin ka kul isi a'di mo mmo'doyu gwowa po/ a'di kun tana ris mo dhali kun ta gi dhan gwony caaga/ kun mola uni dhu ki ji ma du'd mo.

⁸ N'ko'd mo tani aBuulus oki gwo ki jiny 'ce'd shem piti ki: Aha/ dinaki mii miinthusa kamu/ tal 'de/ ki lish apo/ gwonƙan gi 'Kwani Yahuuda/ mo walla apo/ gu'b gi mondheleladhelel mo walla apowa Kaysar mo.

⁹ Hila Paɕtuus mmo/ona, a'di bwa ki mii to mmo'bor 'Kwani Yahuuda/ bwa mo tani a'di thokki'da Buulus gwo mo dhali o gwo mo ki: /E ona bwa ki ya ka gagamis e Pa Urushaliim mo dhali /e minu dwall gwo gom to gwansan ibwambori aha/ imun mo 'taa?

¹⁰ Hila Buulus o gwo mo ki: Aha/ doshkina ibwambor ma ƙursi ma Kaysar jin dwallu gwo mo jin ta mo jin minu mii dwall gwo gom aha/ mo be. Aha/ miikina toƙ kamu/ jin shi/ashi/ apo/ 'Kwani Yahuuda/ yisa me'd jin misha /e si'da/ ki 'bore/ be.

¹¹ Waƙki/ aha/ si'da/ tana amandiki mii miinƙar/ e mo dhali waƙki/ aha/ miikina toƙ kamu/ jin midi gam 'pemen jin ta ji gi wu mo tani aha/ dinaki ush mmowu mo. Hili waƙki/ toƙ kamu/ tal 'de/ 'peni to gwahan kun yera gwahan aha/ is ki gway mo diki ta gwon ƙana/ tani wathin kamu/ yisa di'da jin midi mish ɕi aha/ e uni mo be. Aha/ mina yip 'kup pem 'kup ka Kaysar mo be.

¹² N'ko'd mo tani Paɕtuus ki a'di nyakki'da tor tor ki 'kwani gi montul is buni mo tani a'di thokki a'di gwo mo ki: /E o ki yip 'kup gi Kaysaro. /E mini ya eya Kaysar beseene/ mo.

ABuulus A'di Suskunu mo Ibwambor ma Aghripaas dhala Barniiki mo

¹³ Dhali ka cim ka hony/e pekin mo tani amalik jin ta'da Aghripaas dhala Barniiki merkin mo e Paƙ Kaysariyya mo dhali uni thekina Paɕtuus me'd mo be.

¹⁴ Dhali ki uni 'baarkina cim ka ris mo e mun mo tani aPaɕtuus ɕiki gwo goma Buulus eya tente/ ibwambor ma malik mo mmo/o gwo mo ki: Wathin kamu/ di'di mahan jin dhalkin ma Piliks ki mondeƙ is mo.

¹⁵ Dhali ki aha/ dikina e Pa Urushaliim mo tani igasiis kun can mo dhali 'kwaniƙ gwanyjaka/ gi 'Kwani Yahuuda/ ɕiki aha/ gwo mo gom a'di mmodot aha/ gwo gom miiwaka po/ a'di mo.

¹⁶ Uni thokkika/ gwo mo ki a'di diki ta mii gi 'Kwani gi Pa Ruumiya mo mmocɕi wathin kamu/ tal 'de/ ntwa/a/ ki a'di jin yeru is ki gway diki dosh ka ƙarambor i uni gun yer a'di is ki gway mo dhali mmota gi mo mmo/o gwo jin ta jiny 'ce'd shem piti gom gwo jin karu apo/ a'di mo.

¹⁷ Dhali ki uni 'kokin si'da/ i montul is buni imontal 'de/ imahan mo tani aha/ dinaki miyya diite/ mo. Hili ka cim jin 'ko'd mo tani aha/ ɕa'bkina eya ƙursi jin dwallu gwo mo dhali aha/ ƙankina gwo mo ki wathi/ minu mii susu mo be.

¹⁸ Dhali ki uni gun yer a'di is ki gway doshkin ki mis mo tani uni 'koki ɕi gwo gom to gun ta thus ki thus me'd jin toshkika/ mo be.

¹⁹ Hili uni ta gi gwondota tiya apo/ a'di gom gwo gi lunum buni uni 'cena mo dhali gom jan tal 'de/ yan jin ta'da Yesus jin wuki'd mo jin on ma Buulus ki a'di di'd ki e mo be.

²⁰ Dhali aha/ mmodumpulkika/ gwondot gom to gwansan mo tani aha/ dotƙina a'di mo waƙki/ a'di midi 'taki ya e Pa Urushaliim mo dhali a'di minu dwall gwo i mun gom gwo gwansan mo.

²¹ Hili ka Buulus yipki 'kup mo jin minu kar a'di mmohil mo mmotagi gwon dwall 'pena Ughusthus yan mo tani aha/ kankina gwo mo ki a'di minu kar mmohil mo ntagi aha/ mina 'taki hash a'di eya Kaysar mo be.

²² Dhala Aghripaas oki'da Pastuus gwo mo ki: Aha/ si'da/ mura bwa o mo mmocik gwo 'peni wathi/ ki is pem mo. A'di o gwo mo ki: Ka'thamo/ /e mini cik gwo mo 'peni a'di mo.

²³ Wakan ka cim jin 'ko'd mo tani Aghripaas pu'dki'd mo dhala Barniiki ka dhan mii jin nyoju mo dhali uni 'kokin mo mmocik mo e mo jin ciku gwo nyakki imancil ma askar alip mo dhali 'kwani gun tana 'kan'kup pa mo tani ki gwo jin kankin ma Pastuus mo tani aBuulus suskunu ibwaman 'kwani mo.

²⁴ Dhala Pastuus o gwo mo ki: AMalik Aghripaas dhala ris 'kwani 'baar mo kun nyak 'ko imahan ibu'kus bana mo. Um 'kon mmohil wathi/ yan jin torkin ma risa waambuhany 'Kwani Yahuuda/ aha/ gwo apo/ e Pa Urushaliim mo dhali imahan si'da/ uni cuun mo ki a'di mididi mii diki di ki enj kamu/ ki sule/ mo be.

²⁵ Hili aha/ gamkina a'di mo ki a'di yisa mii tonj kamu/ jin mididi gam mo jin ta ji gi mowu yisa. Dhali mmoyipkina a'di 'kup ki is piti ka Ughusthus mo tani aha/ dina gwo ibwa mo mmohash a'di i a'di mo.

²⁶ Gom a'di mo tani aha/ dara ki gwo' kamu/ jin ka'bu mo jin miga/ 'kwar ki tapam pem gwo mo. Haali/ a'di gi wakan mo tani aha/ suskina a'di ibwambori um mo dhali ki ji mumi bwambori /e jin tana malik Aghripaas ki aha/ mina 'taki ta gi gwo mmo'kwari 'ko'di mo jin theke'thkunu gwo mo ki theke'th theke'th mo.

²⁷ Haali/ aha/ tosha ki a'di diki ta 'kup gwo mmohash wathi/ habuus mo dhali mmodikiki ci gwo eya tente/ imonfal 'de/ mo, gwo jin onu apo/ a'di mo be.

26

ABuulus A'di 'Ce'dki Gwo She/ Ibwambor ma Aghripaas mo

¹ Dhala Aghripaas oki'da Buulus gwo mo ki: /E dhalkunu bway mo mmo/ o gwo gom is pini mo. Dhala Buulus he'thki me'd piti mo dhali o gwo jin ta jiny 'ce'd shem piti mo ki:

² Aha/ 'bora bwa ki is pem mo aMalik Aghripaas ki aha/ mina o gwo jin ta jiny 'ce'd shem pem ibwambori /e ka tee yan mo goma ris to gun yera 'Kwani Yahuuda/ aha/ is ki gway mo be.

³ Haali/ /e tana amanmish mii 'baar mo dhali gwo kun dotu/ mo si'da/ kagahara kun 'koni bwanj 'Kwani Yahuuda/ mo be. Haali/ a'di gi wakan mo tani aha/ yuka /e mmocik aha/ gwo mo ki bwa jin 'kuçu mo ki 'kari'th mo be.

⁴ Aris 'Kwani Yahuuda/ 'baar mo mishi miim pem ki yil gi mondiki/em pem 'peni yil pem kun twa/a/ kun 'kon ka mun'kup e bwam unim pem kun ta kal pem mo dhali e Pa Urushaliim si'da/ mo.

⁵ Uni mishki aha/ 'peni twa/a/ mo, wakki/ uni ta gi bwa mmo'gor gwo mo, ki aha/ dina ki ji Wathim Parisi mmota jim buni kun miin ka ji sho'k ki nyanye/ mii gun onu gom ji gi lunum bam mo.

⁶ Dhali shwane/ aha/ dosha mahan mmominu dwall gwo goma 'tenj kape/ gom gwo jin onu is 'peni Arungimis gi ibabam bam mo be.

⁷ Iwak bam kun 'koni 'kume'd i'ce'dka su/ mo koci e mo mmomii to goma Arungimis ki mon'thiny ilu/ mo dhali montee mmohil 'kup ki gwo jin onu is mo mmopu'du/ mo. Dhali goma 'tenj kape/ yan mo tani aha/ yer ma ris 'Kwani Yahuuda/ 'baar mo is ki gway mo, ayy malik.

⁸ Ata tosha /e ki a'di ta gwo jin molu gam is mo wakka Arungimis mididi 'taki 'de'k jin wu'd mo?

⁹ Aha/ ka jin gana/ kulumkina gwo ibwa ki is pem mo ki aha/ mina mii mii to ka ris kun ta kuny ca'ckona po/ gway ma Yesus gi Pa Naasira mo.

¹⁰ Dhali yan si'da/ miikika/ e Pa Urushaliim mo dhali uni ka ris mu'thkika/ eya sijn mo 'peni imandhunu ki she/ ki dhelel dhelel mo mmobu'thkika/ gwo ki mom'bi'th 'peni igasiis kun can mo dhali ki uni 'kokunu mo mmo'kosh jwa mo tani aha/ si'da/ cikina 'twam pem apo/ uni mo be.

¹¹ Dhali mmori'cka/ uni me'd ka ris eya ris gu'b gi montul isi 'baar mo tani aha/ tu'ckina uni mo mmowal gwo sor mo, dhali mmoshwakika/ anyor mo isi, ki bar bar apo/ uni mo tani aha/ pu'dkina ka pije/ mmoTAGI isi pan tiya si'da/ mo mmoTO'c uni bwa mo be.

ABuulus Torki Mii jin Tu'k A'di Is mo

¹² E moyam pem yan mo tani ki aha/ dikina mmoya e Pan Dimashk mo mmokaru aha/ 'pen mo ki mom'bi'th 'peni igasiis kun can mo tani

¹³ ka tente/ di'di bwan 'kup mo tani, ayy malik, aha/ mishkina e bway monkush jin boli'da tente/ e ki mon'twak mo mo mmo'twak mo mmo'kamaa/ is mo dhali uni gun nyakki ii ki aha/ mo be.

¹⁴ Dhali ki aman 'baar mo 'kokina mo mmobita powa 'cesh mo tani aha/ cikina 'twa/ jin o gwo i aha/ ki 'twan 'Kwani Yahuuda/ mo ki: Shawuul Shawuul, ata toca /e aha/ 'kus kan mo? A'di di'ta mii gom /e mmoru'ka /eya ruk ki si mo mmoT'k a'di 'pen mo.

¹⁵ Dhali aha/ thoka gwo mo ki: /E tana ja Tapa? Dhali Tapa ki o gwo mo ki: Aha/ tana aYesus jin toca /e 'kus mo be.

¹⁶ Hili cuyi /e mis mo dhali doshi ki sho'k pini mo haali/ gom 'pemen yan kan tan mo tani aha/ pina /e i is mo mmothoson /e mo mmota amanmii to mo dhali mmota aman/o gwo gom to gun mishkina /e aha/ mo dhali gom to gun miga/ pi /e i is mo

¹⁷ mmo'cuk /e 'peni 'kwani mo dhali 'peni 'kwani kun 'koki ta 'Kwani Yahuuda/ e uni gun miga/ tu'c /e mmoya mo be.

¹⁸ Mmoka'd uni em buni mo ki uni mini tu'k mo 'peni mondthurumi'd 'kup ki monkush mo dhali 'peni mom'bi'th ma Setaan eya Arungimis mo, ki uni mini bu'th mon'gam gom miinthus mo dhali mal ibwaman uni gun dhunu ki she/ ki dhelel dhelel ki mon'gam gwo is e aha/ mo be.

Gwo ma Buulus jin Cikina A'di gom 'Kwani Yahuuda/ mo dhali 'Kwani kun 'Koki Ta 'Kwani Yahuuda/ mo

¹⁹ Wakan si'da/, ayy Malik Aghripaas, aha/ dinaki usha ush e tony jan jin piyaa/ i is 'peni momis mo.

²⁰ Hili aha/ cikina uni gwo eya tente/ mo n'twa/a/ uni gun 'koni Pan Dimashk mo dhali e Pa Urushaliim si'da/ mo dhali isi bwamana ris bampa/ gi Pa Yahuudiyya mo dhali e 'kwani kun 'koki ta 'Kwani Yahuuda/ si'da/ ki uni mini 'taki rica du is mo dhali mmoT'k 'kup ka Arungimis mo mmomii mii gun minu gam mo jin rijuwa du is mo.

²¹ Gom gwo yan mo tani 'Kwani Yahuuda/ tulki aha/ me'di is mo mmobu'th mo e gu'b gi mondheleladhelel mo dhali uni murkini 'kosh aha/ jwa mo be.

²² Mmobu'thka/ mowoth jin di'd 'peni Arungimis mo tani a'di doshka/ gama tee yan mmoCI gwo gom uni gun gwa'dkin mo dhali uni kun cakin mo mmo/o gwon kamu/ tal /de/ yisa, jasi a'di jin ona imanci gwo ma Arungimis kadhamo/ mo dhala Musa jin mido 'taki pu'du/ mo,

²³ ka Kristhos yan mina isi mii 'kosh ka nyor mo dhali a'di jin mido ta amanpiya pi n'twa/a/ jin wuki'd mo mido 'taki ci mon'kush ki 'kwani mo dhali ki 'kwani kun 'koki ta 'Kwani Yahuuda/ si'da/ mo.

ABuulus A'di Yipki 'Kup 'Kup ka Aghripaas mo Mmo'taki Gam Gwo Is mo

²⁴ Dhali ki a'di ciki gwo jin ta jiny 'ce'd shem piti kan mo tani Pastuus oki gwo ki dhan 'twa/ mo ki: Buulus /e guskina du mo ba/. Mmomisha /e to den e kagahara mo a'di tu'k /eya du mo mmogus mo.

²⁵ Hila Buulus oki gwo mo ki: Aha/ dinaki gusa du mo ba/ Pastuus /e jin ta jim 'borga/ mo hili aha/ ona gwoŋ gana/ mo dhali ka du jin kuthi/ is ki 'cese/ 'cese/ mo be.

²⁶ Haala malik mishki to gwansan mo. E a'di si'da/ aha/ ona gwo ki dar gi monyju/ mo gom aha/ laluwa du sho'k gom toŋ kamu/ tal 'de/ 'peni 'kwani gwansan yisa di'da jin bagu mo 'peni a'di mo haali/ mii yansan yisa miikunu ki tar mo.

²⁷ Malik Aghripaas, gwo 'peni imanci gwo ma Arumgimis kadhamo/ gamkina /e is mowa? A'di mishga/ ki /e gami gwo is mo.

²⁸ Dhala Aghripaas oki'da Buulus gwo mo ki: A/e palaa/ ki ari mompal mmolal aha/ sho'k ki gwo mo jin miga/ war ka Kristhiyan mo?

²⁹ Dhala Buulus oki gwo mo ki: Aha/ mishayi ka Arumgimis ki ari pal walla ki dhan mompala caaga/ mo, yisa /e 'deya, hili si'da/ uni 'baar mo gun cikki aha/ ka tee yan mini 'taki war mo mmowa e ki aha/ isi ciki/ ki dar gi mondek gwansan mo be.

³⁰ Dhala malik cu mis mo dhala mudhiir dhala Barniiki mo dhali uni gun nyakki 'ko ki uni mo.

³¹ Dhali ki uni thothkin ka pije/ mo tani uni ciki gwo ka rem 'kup mo mmo/ o gwo mo ki: Wathi/ yan diki mii toŋ kamu/ jin mididi gam 'pemen jin ta ji gi wu mo walla jin mididi ta jin minu deka deka mo be.

³² Dhala Aghripaas oki'da Pastuus gwo mo ki: Wathi/ yan minu 'taki kar ki 'kus mo wakki/ a'di mididi 'taki diki yip 'kup 'kup ka Kaysar mo be.

27

ABuulus 'Cukki'da Kur Yi'de/ jin Bela 'Tham e Pa Ruumiya mo

¹ Dhali ki gwo gamu me'd mo jin mina amani 'taki ii eya kur yi'de/ jin bela 'tham ki bway gi Pa Ithaaliya mo tani uni cikina Buulus mo dhali uni ahabuusa tiya e me'd ma mancil ma askar iss 'kwanim pa imudhe'd mo jin yukkunu gway ka Yuliyuus mo 'peni mo jin jin ma askara ji eya Ughusthus mo.

² Dhali mmomerkina aman apon kur gi Pa Adramitiiniya jin bela 'tham mo jin muru 'cuk mo mmo/ii iyi'de/ e mon tiya eya gap gi Pa Asiyya mo tani aman 'cukkina akur yi'de/ e yi'de/ mo dhali jan tal 'de/ jin ta'da Aristarkus gi Pa Makiduniyya mo 'peni Pan Tasaluniiki mo tani a'di nyak di ki aman mo.

³ Dhali ka cim jin 'ko'd mo tani am takina Pan Saydaa/ ki me'd mo. Dhala Yuliyuus mii'da Buulus me'd wathimpa mo dhali mmodhal a'di bway mo mmoya mo e ikam piti mo dhali a'di ta wathimpa ki is piti mo be.

⁴ Dhali mmo'cukkina amana kur yi'de/ jin bela 'tham 'peni mun mo tani aman iikina eya kur jin bela 'tham mo mmosheshela gap gi Pan Kuprus mo gom 'tham 'kon ki ca'ckon mo.

⁵ Dhali ki aman iikina eya kur yi'de/ jin bela 'tham mo mmo'cih dhan yi'de/ jin di'd 'twa/ ki mis gi Pan Kilikiyya mo dhali Pam Pampiliyya mo tani aman pu'dkina e Pam Mira gi Bampa/ gi Pa Likiiya mo.

⁶ Dhali imun mo tani amancil ma askar iss 'kwanim pa imudhe'd mo gamki'da kur yi'de/ jin bela 'tham mo ki bway gi Pa Iskandariyya mo mmoya iyi'de/ ki bway gi Pa Ithaaliya mo dhali a'di tu'cki am mmomer a'di apo/ mo.

⁷ Dhali aman iikina i yi'de/ ka serec, ka serec mo ka cim ka ris mo dhali ki aman pu'dkina mo ki mii kun di'adit mo apo/ Pan Kiniidus mo mmonona

'tham am ki bway naskina/ mo tani aman iikina eya kur jin bela 'tham mo mmosheshela gap gi Panj Kariit apo/ Pan Salmuuni mo be.

8 Dhali ki mii kun ditadiit mmota agap ki me'd mo ki sule/ tani aman pu'dkina mo e monkamu/ jin yukunu ki Mo jin Dhunuwa Kur Yi'de/ ki Jaro/ mmo'dish Pa Lasaya/ isa mo be.

9 Dhali ka cim 'baarkuna ki nyanye/ mo dhali ki mo/ii jin ta jin tagu wu hila/ mo tani haali/ monnga/ to pekunu hila/ mo tani aBuulus kucurki uni ki gwom 'borga/

10 dhali oki uni gwo mo ki: Kana, aha/ nyitha ki mo/ii mido washi/a dhali mo jin minu this to e mido caaca mo, yisa jasi to kun kalu yisa dhala kur jin bela 'tham mo yisa hili si'da/ mon'koki/em bana mo.

11 Hila mancil ma askar iss 'kwanim pa imudhe'd mo ciki'da dum piti ki nyanye/ki gwo gi tapa ma kur yi'de/ jin bela 'tham mo dhali com ma kur yi'de/ si'da/ mo, yisa ki gwon to gwansan kun okin ma Buulus mo.

12 Dhali haali/ mo yan jin dhunuwa kur yi'de/ mo diki ta a'di jin karu ki 'bore/ mo mmo'baara ppe gi mondit mo tani a'bana tiya o gwo mo mmo'cuca kur yi'de/ jin bela 'tham mo mmo/ii mo 'peni mun, wakki/ a'di mido 'taki ta isi mii gom uni mmomish pu'd e Pam Piniks mo dhali 'baara ppe gi mondit mo imun mo jin ta mo jin dhunuwa kur yi'de/ gi Panj Kariit jin hili 'kup ki mom'pesho'k gi 'ko'd gwar ma bim poros mo dhali ki mom'pesho'k gi 'ko'd gwar ma biny cam mo.

Adhan 'Thama Punthar Poshki'd e Kumma/ Yi'de/ mo

13 Dhali ki 'tham gi 'ban ma biny cam poshki'd ki puyii puyii mo tani uni toshkin ki uni gamki to jin di uni ibwa mo tani uni bukkina kar 'kup tonkuthu'd jin telki'da kur yi'de/ mo dhali uni iikin mo eya kur yi'de/ jin bela 'tham mo mmota ga gap gi Panj Kariit ki me'd mo ki sule/ sule/ ki 'dish' dish mo.

14 Hili n'ko'di mo jin 'konu ki rash rash mo tani 'tham bit'kunu 'peni a'di jin mii'd ki ji wutul mo jin yuku ka Urukliiduun mo.

15 Dhali ka kur bu'thkunu mo tani a'di moli ya ibwambor 'tham mo tani am cikina a'di bway mo dhali am borkunu mo be.

16 Dhali mmosona aman mo mmosheshela gap ma ara uk ma 'cesh jin yukunu gway ka Kalawdi mo tani aman misha kur bu'th ki mom'bi'th ki mii jin ditadiit mo.

17 Dhali ki uni yu'dki a'di ki mis mo tani uni miiki to woth mo mmohakam is ma kur mo ki ton dek mo dhali mmo'ko/ ka uni is mo ki uni minu 'taki bit apo/ mo ma Sirtis* mo tani uni 'cukki burrinye/ ma kur jin bela 'tham mo dhali wakan uni 'kokunu mo mmobor mo be.

18 Dhali ki aman 'kokina mo mmo'kosha tu'c ki mii ki nyanye/ gom dhan 'thama punthar mo tani ka cim jin 'ko'd uni telki mii 'pen mo mmokal to kun kalu mmo'ta'k ka pije/ 'pena kur yi'de/ mo.

19 Dhali ka cim kwara mo tani uni ki me'd buni uni 'cena ita'kki cwam burrinyen 'tham ma kur yi'de/ ka pije/ mo.

20 Dhali ki dar ga tente/ mo walla acul mo mmokusha po/ aman ka cim ka ris mo dhali ki dhan 'thama punthar jin wa'da iyayi'da po/ aman mo dhali arisa 'tej kapem bam jin minu 'taki woth am mo tani thisu e 'baar ki 'bil 'bil mo.

21 Dhali ki uni 'kokin ki rash rash ki dar gi tonte/ mo tani aBuulus doshki'd ki mis mo 'peni bwam uni mo dhali o gwo mo ki: Kana, um mini 'taki ha isi gwom pem e mo mmo'taki 'koki 'cuca kur yi'de/ jin bela 'tham 'peni Panj Kariit

* 27:17 Sirtis a'di ta mo jin hapuc ma si'b ki hapuc mo.

mo dhali um mini 'taki ye mon tonthus yan mo dhali to gwansan kun thisu e si'da/ mo.

²² Dhali shwane/ aha/ malasa um ki gwo mo. Tayi gi bwam 'boro'd mo ma haali/ jamu/ tal 'de/ midi diki this mondiki/em piti e 'peni bwam um mo hili jasa kur yi'de/ 'te/ mo.

²³ Haala man'doyu gwoŋ kamu/ 'peni Arungimis doshki'd e aha/ mon'thiny yan mo aha/ jin tana jim piti mo, a'di jin miiga/ to si'da/ mo

²⁴ mmo/o gwo mo ki: Dhalku/ is ki ko/ mo ma, Buulus. /E mini mii doshi bwambor ma Kaysar mo dhali hili, Arungimis midi ci ki /eya ris uni gun nyak ii ki /e eya kur yi'de/ jin bela 'tham mo.

²⁵ Haali/ a'di gi wakan mo tani kana, tayi gi bwam 'boro'd mo ma haali/ aha/ gama Arungimis gwo is ki a'di midi mii mii wakan me'd jin okunu aha/ gwo mo be.

²⁶ Hili ana minu mii taka po/ moŋ kamu/ jin ta ara uka 'cesh mo be.

²⁷ Hili ki mon'thiny jin ta'da 'kume'd i'ce'dka doŋon pu'dki'd mo tani aman 'kokunu mmobor ki yi'dem babaŋgal eya dhan yi'de/ ma Adriya ki mo murki'di ta mombwam/e mo tani imanmiiya kur yi'de/ toshkin ki uni 'kokin mo mmo'dish bampaŋ kamu/ is mo be.

²⁸ Dhali uni bitki to mo mmopal 'kul gi dhan yi'de/ mo dhali uni gamki a'di mo mmota engula/ iss 'kwanimpa ipe'de/ mo dhali 'ko'di ari mo jin thoŋha uni is mo tani uni bitki to dok/e mo mmopal 'kul piti mo dhali uni gamki a'di mo mmota engula/ iss 'kwanimpa idonŋon i'ce'dka 'kume'd mo be.

²⁹ Dhali mmoko/kina aman is mo wakki/ aman minu 'taki ta'k mo a'cesh apo/ 'kuwosh 'kwaŋala/ mo tani uni ta'kkina kar 'kup toŋkuthu'd jin telki'da kur yi'de/ mo idonŋon 'peni bum 'pen jin 'ko'd mo dhali 'tho moŋkush ki a'di bala midi di kakasjaji.

³⁰ Dhali ki imanmiiya kur 'kokin mo mmoŋapki mo mo mmoso ka pije/ 'peni bwam ma kur yi'de/ mo dhali thulka kur yi'de/ eya dhan yi'de/ e mii jin diki ta jamas mii me'd jin mina uni 'taki beredha kar 'kup toŋkuthu'd jin telki'da kur yi'de/ mo 'peni bum 'pen ma kamu/ jin twa/a/ mo tani

³¹ aBuulus oki gwo eya mancil ma askar iss 'kwanimpa imudhe'd mo dhali i/askar si'da/ mo ki: Isi ciki/ mmo'kokina gwansan ki 'koki 'ko eya kur yi'de/ mo tani um minu mol woŋh mo be.

³² N'ko'd i/askar 'cithkina shi/ ma kur yi'de/ 'pen mo dhali mmodhal a'di mmobitku mo be.

³³ Dhali ki moŋkush ma tente/ di'd mmoyayu/ mo tani aBuulus ŋapki uni 'baar mo mmoshwa tonten tiya mo mmo/o gwo mo ki: Atee yan ta'da cim ma 'kume'd i'ce'dka doŋon mo jin cora um mo dhali 'kona um mmoga/ to mo dhali um 'koki bu'th toŋ kamu/ mo be.

³⁴ Haali/ a'di gi wakan mo tani aha/ yukkina um mo mmobu'th tonten tiya mo haali/ a'di ta mo jin ta mom bum ki 'dantar mo. Haali/ ara mur'kup tal 'deŋ kamu/ midi diki 'ce'd sho'k 'peni 'kup bum ki jin 'deŋ kamu/.

³⁵ Dhali ki a'di oki gwo yan kan tan mo tani dhali a'di bu'thki maan'kuthu'd mo dhali a'di 'borki'da Arungimis bwa i is e buŋ'kusi uni 'baar mo. Dhali a'di 'ce'dki a'di mo dhali tel a'di 'pen mo mmoshwa mo be.

³⁶ Dhali mmo'borkina uni bwa mo tani uni ki is buni si'da/ bu'thki tontē/ mo be.

³⁷ Dhali aman 'baar mo kun 'kona eya kur yi'de/ mo tani aman 'kwanimpa tana iss† 'kwanimpa i'kume'd i'ce'dka kwara apo/ i'ce'dka karpa'c i'ce'di 'de/ mo be.

† 27:37 miyateen siŋta wa saba/iin

38 Dhali ki uni shwakini kap mo tani uni pashkina *kur* yi'de/ to is mo mmoṭagku ka pije/ mo pos bunyan eya dhan yi'de/ mo.

Akur Pwathki Bwa mo

39 Dhali ki mo ta montee mo tani uni 'koki nyith mony'cesh mo hili uni thiskina bem bwan gapa 'kulgan kamu/ i is mo jin ta'da gap mo dhali uni torkina tor wakki/ uni mini 'taki misha *kur* yi'de/ bor apowa gap mo.

40 Dhali mmobitkina uniya *kar* 'kup tonkuthu'd jin telki'da *kur* yi'de/ mo tani uni dhalki uni mo eya dhan yi'de/ mo mmo'cuk to kun dekki cwa jin shu'da *kur* yi'de/ bway ka yiha/ mo. Dhali mmoyu'dkina uni burrinyen 'tham ma *kur* jin twa/a/ mo 'kup ki 'tham tani uni bu'thkina *kur* yi'de/ mo mmoya 'kup ka gap mo.

41 Hili mmobitkina uni apo/ mo jin gama dhan yi'de/ sun 'kup mo tani uni tu'ckina *kur* yi'de/ mo mmopeya 'cesh mo. Dhali bum 'pen ma *kur* yi'de/ jin twa/a/ jimki'da 'cesh mo dhali molu joç mo dhali di'd kan mo. Hili bum 'pen ma *kur* yi'de/ jin ta jin 'ko'd mo tel 'pen mo mmo'cuç is piti mo gom mom'bi'th gi yi'de/ mmobir bakal mo be.

42 Dhali gwo jin 'koni bwa gi i/askar mo tani ta gwo mmo'kosh 'kwani habuus mo jin mina unin tiya 'peni uni 'taki 'koki kan ka pije/ mo dhali ye mo be.

43 Hila mencil ma askar iss 'kwanimpa imudhe'd mo tani a'di dina gwo ibwa mmokara Buulus ki 'dantar mo tani a'di nonki uni mo 'peni gwo kun 'ko uni ibwa mo dhali kanki gwo mo ki uni gun mishi yi'de/ kan mo mini posh is buni eya dhan yi'de/ mo dhali pu'di mony'ceshi twa/a/ mo.

44 Dhali 'peni kun tiya mo tani uni 'kokin eya *kur* yi'de/ jin pwathki bwa mo dhali kun tiya e ton tiya 'pena *kur* yi'de/ mo. Dhali wakan a'di warki'd ki mo jin yekina uni 'baar mo mmopu'da po/ mony'cesh ki 'dantar mo be.

28

ABuulus Diki'd eya Uka 'Cesh gi Pam Maliitha mo

1 Dhali ki aman yekina mo tani n'ko'd aman nyithkina a/uka 'cesh yin jin ta a'di jin yuku ka Maliitha mo.

2 Dhali 'kwani gun 'koki wal 'twan Griki mo torki aman mii kun muma uni mo haali/ uni 'thaki o'd mo dhali bu'thki amani 'baar mo 'kup ki is buni mo haala sho'k di'd mmowol yi'de/ mo dhali haali/ mo 'thupa'thup mo be.

3 Hili ka Buulus tulki cinkira/ is imontal 'de/ mo dhali dhu uni e o'd jin shwa'd mo tani tashan 'thi pu'dki'd ka pije/ gom mom 'batha'd mo dhali 'tampal a'di i'bame'd piti mo.

4 Dhali ki 'kwani gun 'koki wal 'twan Griki parki ari to/e jin ta ga aci/i cine/ mmoshir ka 'cajala/ 'peni me'd piti mo tani uni oki gwo ka rem 'kup mo ki: Wathi/ yan de ita'da man'kosha mee mo be. A'di bala yeki'd mana 'pena dhan yi'de/ mo tani mo jin miinu ka *kar*/e non a'di mmodi ki e mo be.

5 Bahili a'di bitki to/e isi o'd jin shwa'd mo dhali a'di diki bu'th mo/isa nyor mo.

6 Hili uni corki a'di ki a'di mina isi 'taki dhe'th mo walla mmomina jwa 'taki kal a'di mmobit e me'd mo. Dhali ki uni 'kokin ki rash rash mo mmoçor a'di mo dhali mmohila uni ki tonthusu kamu/ diki pu'du/ i a'di mo tani uni woṭha bwam buni 'kup mo dhali o gwo mo ki a'di ta'da rum mo be.

7 Dhali e moṅ gu'b kun tulu 'kup e mo yan mo tani mo 'kon gun ta ji gi wathi/ ma 'kan 'kup ma uka 'cesh yan jin yukunu gway ka Publiyuus mo. A'di bu'thki aman mo dhali dhu am mmo/ish mo ka cimi kwara mmota yilkina/ mo.

⁸ Dhali 'a'di wakan si'da/ ki CoPubliyuus ishki 'ko'da 'cesh mmo'batha a'di is ki 'ba'th dhali mmo'thi mo. A'di jin yan ma Buulus nycine/ mo dhali mmo'tho mo dhali mmodhu me'd piti apo/ a'di mo mmowaç a'di mo.

⁹ Dhali ki mii yan miikunu mo tani kun tiya si'da/ kun 'kosha 'batha tiya eya uka 'cesh yan mo tani pu'dkin mo dhali uni 'kokunu mo mmowaç si'da/ mo be.

¹⁰ Uni si'da/ takki aman gi montak ka ris mo dhali ki aman 'cukkina kur yi'de/ jin bela 'tham mo tani uni dhu to gun mina am mii 'taki mii ta eya kur yi'de/ jin bela 'tham mo.

Buulus Merki'd e Pa Ruumiya mo

¹¹ Dhali 'ko'da ppe 'kupi kwara mo tani am 'cukkina kur yi'de/ jin bela 'tham mo jin ta ji gi Pa Iskandariyya mo jin 'baarki'da ppe gi mondit eya uka 'cesh yan jin ta gi jamasa 'de/ jin ta isa kam su/ mo. (Ikam gi uni su/ gwansan ta iya/ ma Saps jin ta com to gun luña 'Kwanin Griki mo dhali iya/ gwansan iyuku gway ka Kastuur mo dhala Polok mo dhali imanmiyya kur yi'de/ ki luñ uni me'd imanshu uni bway e bway yi'de/ mo.)

¹² Dhali mmotakina aman Pan Sirakuusa gi me'd mo tani aman 'kokina mo imun ka cimi kwara mo.

¹³ Dhali 'peni mo yan mo tani aman kukulkina bway mo dhali aman merkina e Pa Righiyuun mo dhali 'ko'da cim 'de/ mo tani 'tham gi 'bana biny cam poshki'd mo, dhali 'ko'da cim jin 'ko'd mo tani aman pu'dkina e Pam Puthiyuuli mo

¹⁴ e mo jin gamkina amana waç bam mo dhali aman tu'ckunu mo mmo'ko nyakki uni ka cim pesu/ mo. Dhali wakan mo tani am pu'dkina e Pa Ruumiya mo be.

¹⁵ Dhali 'peni mo yan tani awaç bam, ki uni cikki gwo gom aman mo tani, uni iyin mo mmoraç am ibway mo ntagi Mo ma Suug gi Pa Appiyuus mo dhali Mo gi Gu'b Yilkina/ Ikwara mo be. Dhali ka Buulus mishki uni mo tani a'di manki'da Arungimis mo dhali bwa ta a'di wathimpa mo be.

¹⁶ Dhali ki aman cikina e Pa Ruumiya mo tani Buulus dhalkunu bway mo mmoça'b a'di 'de/ nyakka askar jin ji a'di mo be.

ABuulus A'di Ciki Gwo e Pa Ruumiya mo

¹⁷ Dhali 'ko'da cim kwara mo tani a'di yukki uni mo mmotul is imontal 'de/ mo uni gun tana 'kan'kup gi 'Kwani Yahuuda/ mo dhali ki uni 'kokin mmotul isi montal 'de/ mo tani a'di oki gwo i uni mo ki: Aha/ ma waç bum, aha/ bala miikina ton kamu/ apor 'kwani yisa walla apo/ mii gi ibabam bana bala aha/ cikunu 'peni Pa Urushaliim mo mmota habuus e me'd gi 'Kwani gi Pa Ruumiya mo.

¹⁸ Dhali ki uni tirrishi aha/ ki gwo mo tani uni ona bwa ki kar aha/ ki 'kus mo haali/ mo jin yeru aha/ is ki gway mo diki ta 'pemen jin midi ta ji gi mowu mo.

¹⁹ Hili ki 'Kwani Yahuuda/ oki gwo apo/ a'di mo tani aha/ tu'ckunu mo mmoyip 'kup 'kup ka Kaysar mo, yisa mmotaka/ gi ton kamu/ jin miga/ yer 'kwani gi kal pem is ki gway mo yisa.

²⁰ Haali/ gom moyer is ki gway yan tan a'di iyukkika/ um mmoparaa/ e mo dhali mmotora tor nyakki aha/ mo haali/ goma 'ten kape/ gi 'Kwani ma Israyiil mo tani aha/ dekkunu ka jindhiir yan mo.

²¹ Dhali uni oki gwo i a'di mo ki: Aman 'kokina ki bu'th gwo jin 'kwarkunu 'peni Pa Yahuudiyya gom/ e walla tal 'den kamu/ 'pena waç pini yisa di'da jin pu'dki'd imahan mo dhali mmoçi gwo walla mmo/o gwon tonthusa kamu/ 'de/ gom/ e mo.

²² Hili aman ona ki a'di 'boro'd mmocik gwo 'peni /e a'di jin di /e i bwa wakan mo. Haali/ gom gwo gi ce yan mo tani a'di mishu mo ibwam aman ki gwo jin onu apo/ a'di e mo 'baar mo.

²³ Dhali ki uni karkina cim gom a'di mo tani uni tha'thkin i a'di mo e mo jin ca'bkina a'di mo. Dhali a'di torki uni gwo eya tente/ mo mmoçi gwo gom Bampa/ ma Arungimis mo dhali mmolal uni sho'k ki gwo mo goma Yesus mo 'peni gwoŋkan ma Musa jin cinu mo dhali gwo gi imanci gwo ma Arungimis kadhamo/ mo si'da/ 'peni mon'thamo/ ntagi mom'pen'kaskum mo be.

²⁴ Dhali kun tiya gamki to gwan is mo kun 'kokunu mo mmo/oku mo dhali gun tiya 'koki gam gwo is mo be.

²⁵ Dhali ki uni 'koki gam bwa me'd mo e bwam uni 'cena mo tani uni iikin mo, 'ko'da Buulus oki jasi gwoŋ kamu/ tal 'de/ mo ki: Gwo ona Shi/ in Dheleladhelel ki 'bore/ eya Ishaya ka ji sho'k jin ta'da mançi gwo ma Arungimis kadhamo/ mo ibabam bum mo

²⁶ mmo/o gwo mo ki:

Yayi /e mo ma e 'kwani gwansan mo dhali oyi gwo mo ki:
Mmocika um a'di ki cik gana/ mo tani um mini mol a'di 'ban ki tash tash mo dhali um mini par a'di e ka jin gana/ mo tani um mini mol a'di nyith ki 'bil 'bil mo.

²⁷ Haala duŋ 'kwani gwansan dhethadhe'th mo dhali 'cem buni usa us ki pintir mo mmocik gwo mo dhali em buni mu'thkina uni mo isi ciki/ ki uni mini 'taki nyith ki em buni mo dhali cik ki 'cem buni mo dhali mish gwo 'ban eya dum buni mo dhali 'taki tu'k 'kup ki aha/ mo jin miga/ 'taki waç uni mo be.

²⁸ Dhalki a'di mishu si'da/ mo e um ki mowoth yan 'peni Arungimis hashkunu mo e 'kwani kun 'koki ta 'Kwani Yahuuda/ mo. Ki uni mini cik si'da/.

²⁹ Dhali ki a'di oki gwo gwansan mo tani 'Kwani Yahuuda/ iikin mo mmosu'kkina uni ki gwo ki nyanye/ e bwam uni 'cena mo be.

³⁰ Dhali a'di ca'bki'd mmo'baar yil su/ mo e gu'b pitin gana/ jin cikina a'di aguurush mo mmoça'bi cine/ mo dhali a'di bu'thki uni 'baar kun iiyini a'di mo be,

³¹ mmoçi gwo gom Bampa/ ma Arungimis mo dhali mmoŋor to gom Tapa Yesus Kristhos ki dar gi monyju/i 'baar mo dhali wathi/ piyi'd jin 'tashki a'di 'twa/ mo be.

Gwo jin 'Kwar ma Buulus gom 'Kwani gi Pa RUUMIYA mo

Mo jin Thenu Me'd mo

¹ ABuulus jin ta cin̄kina/ ma Yesus Kristhos jin yukkunu mo mmota amankaru ki she/ mo, dhali a'di ki is piti ta jin karu ki she/ 'peni bwan tiya mo gom gwom 'borga/ ma Arungimis mo,

² 'peni gwo jin okina a'di is ki iman̄ci gwom piti kadhamo/ mo jin ta gwo jin 'kwarkunu jin kogu mo be.

³ Isi/ ki gwo gom Ya/m piti mo jin ta'da Yesus Kristhos Tapam bana mo, a'di jin dho'thkunu mo 'peni emen ma Dawuu'd mo isi/ ka yi'c buɲɲwar is mo.

⁴ Dhali a'di toru eya tente/ ki a'di ta Ya/ ma Arungimis mo ki mom'bi'th mo ki gwo gi Shi/in jin kogu mo mmopinu a'di mo 'peni mowu mo be.

⁵ Dhali ki a'di mo tani am bu'thkina 'the mo dhali am takina imandhunu ki she/ mo imonta' de/ mo e mmoha gwom piti e mo ki mon̄gam gwo is mo em bwaman kal gi 'kwani e mony'ceshi 'baar mo gom gway piti mo be.

⁶ Dhali nyak̄ki uni mo tani um si'da/ um ta uni gun yukkunu ki kum ma Yesus Kristhos mo be.

⁷ E uni 'baar mo kun 'kokin mo e Pa Ruumiya mo, uni gun en ma Arungimis mo dhali kun yukkunu mo mmodhu ki she/ ki dhelel dhelel mo.

A'the e um mo dhali mon̄ku'th is 'peni Arungimis jin ta'da Babam bana mo dhali Tapa Yesus Kristhos mo be.

ABuulus Dina Gwo Ibwa mo Mmobuɲi Pa Ruumiya mo

⁸ Ntwa/a/ aha/ 'bora Arungimis pem bwa i is mo eya Yesus Kristhos gom uni 'baar mo haali/ mon̄gam gwo is bum torkunu ki tur ka piɲe/ e mony'ceshi 'baar mo.

⁹ Haali/ Arungimis ta'da aman/o gwom pem mo a'di jin miiga/ to ki shi/in pem mo e gwom 'borga/ gi Ya/m piti mo, haali/ aha/ yera um gway ka yempa/ mo e mon'thom pem ki dar gi mon̄daɲ mo be.

¹⁰ Dhali aha/ doɲa Arungimis mo wakki/ a'di midi 'taki ta isi mii mo ki bwam piti mo tani ki aha/ mina gam a'di jin tupaa/ bwa mo isi/ isa gush mo mmoyaku/ i um mo be.

¹¹ Haali/ aha/ 'kosha te/ um kagahara mo ki aha/ mina 'taki ci um to gi shi/in mo, mmominu 'taki 'bi'th um is mo.

¹² Dhali a'di be nta gwo be ki ana minu nyak̄ka du roɲ mo ki mon̄gam gwo is bana ka rem 'kup mo, a'di jin di'd e um mo dhali e aha/ mo be.

¹³ Dhali shwane/ aha/ yisa mina dhal um mmota pus mo yisa, iwak̄ pem, haali/ aha/ dina gwo mbwa me'd ka ris mo mmoyaku/ i um mo (dhali hili aha/ nonkunu 'kup mo be) ki aha/ mina nyak̄ maman gana/ dho'th e um mo si'da/ me'd e unin tiya kun 'kokin mo e bwan̄ 'kwani kun 'koki ta 'Kwani Yahuuda/ mo be.

¹⁴ Aha/ din ma mure/ m'ba/ gom 'Kwaniɲ Griki mo dhali gom 'kwani kun 'koki wal 'twan̄ Griki mo dhali gom uni gun ta gi yuk̄ mo dhali gom uni gun ta pus mo.

¹⁵ Dhali wakan me'd jin mishga/ mii mo e is pem mo tani aha/ thosonkina is pem mo mmoɲi gwom 'borga/ e um mo si'da/ gun 'kon e Pa Ruumiya mo be.

Mom'bi'th gi Gwom 'Borga/ mo

16 Haali/ aha/ dina is ki 'the mo gom gwom 'borga/ mo haali/ a'di ta mom'bi'th ma Arungimis mo e bway mowoth mo, e uni 'baar mo ki 'beles kun gam a'di gwo is mo. Ntwa/a/ e 'Kwani Yahuuda/ mo dhali e 'Kwanin Griki si'da/ mo be.

17 Haali/ e a'di mo tani mo ma kar/e ma Arungimis torkunu eya tente/ ki mongam gwo is mo. Me'd jin 'kwarkunu mo ki: A'di jin ta jin kar/e ki mongam gwo is mo tani a'di midi di ki e mo be.

Mii jin 'Kona 'Kwani ki Mii 'Ba/ mo

18 Haala nyor ma Arungimis torkunu eya tente/ 'peni momis apowa ris mii gun ta ku gi ushu Arungimis mo dhali mii gun 'koki ta kar/ e kun miina 'kwani mo mmoyap gwon gana/ ki miim buni kun 'koki ta kar/e mo.

19 Haali/ mo jin mishuwa mish 'ban goma Arungimis mo tani a'di toru eya tente/ gom uni mo be. Haali/ a'di torkin ma Arungimis uni mo be.

20 Gom to gun molu par e 'peni a'di me'd jin ukkunu mony'cesh mo tani uni mishu eya tente/ mo be haali/ uni mishu e to gun uku mo be, uni gun mishu kun ta mom'bi'th piti jin di'd 'peni ka mun 'kup ki sule/ sule/ ya ye 'ba/ mo ntagi yilan kamu/ ki sule/ sule/ ya ye 'ba/ si'da/ mo dhali mnotana a'di Arungimis kan si'da/ mo tani, wakan mo tani uni dar ki gwo mo mmoçi 'ko'd mo be.

21 Haali/ ba ki uni mishkina Arungimis mo tani uni kar a'di ki ca me'da Arungimis gana/ yisa, dhali uni si'da/ 'koki man a'di mo. Hili uni warkin ki iman'kosh mo ki mii mo e gwom buni kun kulumkina uni ibwa mo dhali adum buni jin ta pus mo tani uni dhuruma/ dhurum mo be.

22 Dhali ki uni toshkin ki is buni ki uni yukayuk mo tani hili uni warkin ki pus mo be.

23 Dhali uni akki monyca ma Arungimis e mo jin moli wu mo me'd jamas to kun uku mo kun wana e ki wathiny'cesh jin mishi wu mo walla 'dii mo walla to/e mo walla to kun parana 'cesh mo be.

24 Dhali ki mii gi wakan mo tani Arungimis ciki uni bway mo ki mon'thoth bwa mo eya dum buni mo e to gun nyo/anyo/ mo, ki bunjgar is buni mini 'theya'the mo e bwam uni ki is buni mo be.

25 Haali/ uni akki gwon gana/ goma Arungimis e mo ki gwo ma tor mo dhali lunj to mo dhali mii to gom to jin uku mo, yisa goma Man/uk to mo jin ta jin 'boru mii ki sule/ sule/ mo be. Amen.

26 Haali/ gom 'kup mii yan kantan mo tani Arungimis ciki uni bway ki mon'dap e kun ta kun shigga/ mo. Up buni akki jamas buyem pam buni e mo mmobu'th jamas kun 'koki ta jamas buyem pa mo.

27 Dhali wakan si'da/ tani 'kwanin gwith uni dhalki jamas buyem pam buni ki up 'pen mo dhali uni bur ma dum buni mo mmo'dap e apon tiyan tiya gwith mo. 'Kwanin gwith ha'k 'pen ceñ 'kwanin gwith mo, dhali bu'th tonthus ki is buni uni 'cena mo, wakan ki miim buni kun thamkina uni mii mo be.

28 Dhali haali/ Arungimis usha uni mmonyith mo tani Arungimis si'da/ ciki uni bway mo mmota gi bwa kun mini ta aye/inj gwo mo dhali ki mii kun shi/ashi/ mo be.

29 Uni 'tu'dkunu mo ki piny piny ka ris mii gun ta mii gun 'koki ta miin kar/e mo dhali mii kun ta tonthus mo dhali mii mmota a'thothum bwa mo dhali mii kun ta kun dupa dupi e mo be. Dhali uni 'tu'du/ mo ki miin dhapan mo dhali mmo'kosha mee mo dhali mmota ibirinj gwo mo dhali mmota imanheka he'k e mo dhali mmota iman'do tiya ki e mo. Uni si'da/ tana le'd ka le'd apo/ 'kwanin tiya mo

³⁰ dhali ta iman u |tha thu'th 'pen mo dhali ta imanshi/a Arumgimis i e mo dhali ta iman/ush 'kwani ga/ kun can mo dhali ta iman'thek 'ba/ mmis mo dhali ta imandhu is ki ca mo dhali mmota imanmum miin tonthusu tiya kun ta kun this mo dhali mmota iman/ush gwo gi icom dhali ikum mo be,

³¹ dhali ta pus mo dhali ta uni gun tana akum bwa ka akum bwa mo dhali ta imandar ga dum pa mo dhali ta imangora bwa ki gor mo.

³² Bala ki uni mishki gwonkan ma Arumgimis mo ki uni gun miiki to gwansan mini gam 'pemen jin ta ku gi mowu mo tani uni yisa mii uni jasi uni 'cena ki is buni yisa, hili uni teski mii mo ki unin tiya kun botkin ki mii si'da/ mo be.

2

Mo jin Dwall ma Arumgimis Gwo ka Kar/e mo

¹ Haali/ a'di gi wakan mo tani /e dar gi gwo mmoçi 'ko'd mo, ayy ki /e wathi/ ki /e jana dwalli ci gwo mo. Haali/ ki /e dwalli gwo apo/ a'di mo tani /e wakki is pini mo haali/ /e jin tana mandwall gwo mo tani /e miiki isi to kun nyakkin mo be.

² Ana misha ki gwon dwall ma Arumgimis pu'dki'd ki shem'bor mo apo/ uni gun miiki to gwansan mo be.

³ Aki tosha /e, /e wathi/ ki gwo jin dwalla /e apo/ uni gun miiki to gwansan mo dhali /e bala mii uni ki is pini mo tani a/e mini ye mo 'peni mondwall gwo ma Arumgimis 'taa?

⁴ A/e bolockina ris mii kun ta kum pa ma Arumgimis gi mo/en gun ishin ka enthus ki bwa mo 'taa? Dhali mmoguna a'di bwa a'kany'cesh mo dhali mmo'kuca a'di bwa ki 'kari'th mowa? 'Kona um ki misha ki momiin ma Arumgimis ki mo/en mo tani ta 'pemen mmosus um mmoreca du is mowa?

⁵ Hili adum bum kun 'bi'thkin mo dhali kun tana ushin gwo mo tani um tulkina nyor is is mo gom is bum mo ka cim ma nyor mo ki gwon dwall ma Arumgimis jin ta jin kar/e minu tor eya tente/ mo be.

⁶ Haali/ a'di midi ciya ris 'kwani to ka 'dete/ 'dete/ isi ki mii gun miikina uni mo be.

⁷ A'di midi ci mon'koki/e ki sule/ ya ye 'ba/ mo ki uni gwansan kun miiki mii gun 'boron ki bwa gun 'kuçu mo ki 'kari'th mmosimm monyca e mo dhali montak mo dhali mo gi molu wu mo be.

⁸ Hili anyor midi di mo dhali mo jin ka/aka/ si'da/ mo gom uni gwansan kun ta ibirin gwo mo dhali kun ush gwon gana/ ha e mo mmomii mo hili uni ha gwon ton thus e mo mmomii mo be.

⁹ Monto'c bwa midi di mo dhali wukura/ si'da/ goma ris 'kwaniny'cesh 'baar mo ki 'beles kun miiki miinthus mo. 'Kwani Yahuuda/ ntwa/a/ mo dhali 'Kwanij Griki si'da/ mo be.

¹⁰ Hili monyca dhali montak dhali monku'th is goma ris uni gun mii miin gana/ mo, 'Kwani Yahuuda/ ntwa/a/ mo dhali 'Kwanij Griki si'da/ mo be.

¹¹ Haali/ Arumgimis diki mii mii ka gwar 'de/ mo be.

¹² Aris uni gun miiki miinthus ki dar gi gwonkan jin cinu mo tani minu 'ce'd sho'k si'da/ ki dar gi gwonkan jin cinu mo be. Dhali aris uni gun miiki miinthus 'ko'di gwonkan jin cinu mo tani uni minu dwall gwo ki gwonkan jin cinu mo be.

¹³ Haali/ uni gwansan gun shirki gwonkan jin cinu ki 'ce mo tani uni yisa nta unin kar/e ibwambor ma Arumgimis yisa. Hili uni gwansan gun miiki a'di mo tani uni idhunu ki mo ma kar/e mo be.

14 Dhali ki 'kwani kun 'koki ta 'Kwani Yahuuda/ kun dar gi gwoŋkan jin cinu mo mii ki buyem pa ki is buni a'di jin kana gwoŋkan jin cinu mo tani uni ta gwoŋkan ki is buni mo be. Hili ba uni idaran gi gwoŋkan jin cinu mo.

15 I/uni itori a'di mo ki a'di jin kana gwoŋkan jin cinu mo tani a'di 'kwarkunu eya dum buni mo. Dhali kan si'da/ 'twa/ ma dum buni ta'da man/o gwo mo dhali gwo kun kuluma uni i bwa ki ji wushur mo tani yer uni is ki gway mo walla tor gwo 'twa/ mo sayii

16 ka tee gwansan ka Arumgimis midi dwall 'kwani gwo kun kuma uni e bwa mo isi ki gwom 'borgam pem ka Kristhos jin ta'da Yesus mo be.

'Kwani Yahuuda/ dhali Gwoŋkan jin Cinu mo

17 Hili wakki/ /e yukki is pini ki Wathi/ Yahuuda/ mo dhali ca'b 'ko'd e gwoŋkan jin cinu mo tani dhali kar 'bam pini ki ca mo ki /e ta jim pa goma Arumgimis mo tani

18 dhali mish bwam piti mo dhali tes a'di jin ta isa 'borgaŋ gana/ mo haali/ /e ye'thkunu sho'k mo e gwoŋkan jin cinu mo be tani

19 dhali wakki/ /e mishkin ka jin gana/ ki /e tana manshu 'kwani kun tana ja'da/ bway mo tani dhali ki /e ta moŋkush gom uni gun 'kon mo e mondhurumi'd mo tani

20 dhali /e tana man'to'k gom 'kwani kun ta pus mo dhali amantor 'kwanim 'pereny gwo mo tani mmotana /e gi gwoŋkan jin cinu mo tani arisa yuk gun pe'dkunu mo mmomish to mo,

21 dhali /e si'da/ jin wakan si'da/ mo tani /e jin tori ci gwo mo tani mina /e diki tor is pini gwo mo 'taa? Dhali ki /e din mo mmo'tor gwo apo/ mo gi kwalu to mo tani /e si'da/ kwalki to mo 'taa?

22 /E jin o gwo ki jaŋ kamu/ midi mii dhalku/ cal ki mii mii mo tani /e si'da/ din mo 'taa? mmomii miinyal mo. /E jin shi/i tompinyconi e mo tani /e si'da/ kwalki to mo 'peni gu'b jin luju to mo 'taa?

23 /E jin kar 'bam pini ki ca mo gom gwoŋkan jin cinu mo tani /e ushkina Arumgimis tak mo 'taa? mmo'ce'd gwoŋkan jin cinu mo.

24 Haali/ me'd gwo jin 'kwarkunu mo ki: Gway ma Arumgimis walu gwo sora po/ mo e bwaŋ 'kwani kun 'koki ta 'Kwani Yahuuda/ mo gom /e mo be.

25 Haali/ ka jin gana/ mo tani mo jin 'cithuwa munyjal yis ta jim 'borga/ mo wakki/ /e ha gwoŋkan e mo mmomii mo, hili wakki/ /e 'ce'dki gwoŋkan mo tani mo ma munyjal yis pini jin 'cithu/ mo tani a'di warki'd ka munyjal yis jin dinuki 'cith mo be.

26 Dhali wakan si'da/ wakki/ wathi/ jin di'd ka munyjal yis i e mo dhuki gwoŋkan jin cinu mo ka kar/e mo tani mina mo ma munyjal yis piti jin dina a'di ki 'cith mo tani kar a'di ka munyjal yis jin 'cithu/ mo 'taa?

27 Dhali wakan si'da/ 'kwani kun 'kon ka munyjal yis i e kankan mo tani hili i/uni idhuki gwoŋkan jin cinu mo tani uni ka jin gana/ mini wak /e jin ta gi gwoŋkan jin 'kwarkunu mo dhali mo ma munyjal yis jin 'cithu/ kan mo tani hili /e i'ce'd gwoŋkan jin cinu mo be.

28 Haali/ a'di diki ta Wathi/ Yahuudaŋ gana/ jin ta'da por ma pije/ mo be. Dhali mo ma munyjal yis jin 'cithuŋ gana/ mo diki ta jim por ma pije/ mo dhali jim buŋwar is mo be.

29 A'di ta Wathi/ Yahuuda/ jin ta jim bwam mo dhali mo ma munyjal yis jin 'cithuŋ gana/ mo tani a'di ta jim ma du mo be, jin ta to gi shi/in mo, yisa jin 'kwarkunu 'te/ mo. Montak piti diki di 'peni 'kwani mo tani hili a'di 'peni Arumgimis mo be.

3

¹ Haali/ a'di gi wakan mo tani shi/ miim 'boro'da ta itana 'Kwani Yahuuda/ mo sa/? Walla tonta igama she/ mo mmo'cithuwa munyjal yis mo sa/?

² Shi/ miim 'boro'd 'teki nyanye/ mo be. To jin telkika/ 'pen a'dan be ki 'Kwani Yahuuda/ cinu gwo ma Arungimis kun 'kwarkunu mo.

³ Dhali gwo wakata wakki/ kun tiya dar gi gwo jin gamu is mo? Mmo'kona uni ki dar gi gwo jin gamu is mo tani a/a'di imina gwo jin gamu is ma Arungimis i/ush me'd mowa?

⁴ Dhalku/ ki tosh kan. Wakka ris 'kwani 'baar ki 'beles ta kun 'koki ta kun gana/ mo tani dhalka Arungimis ta a'din gana/ mo. Me'd gwo jin 'kwarkunu mo ki:

Ki /e mini 'taki ta jim ma kar/e ki gwom pini mo

dhali 'taki pi gwo kun dwallu /e e mo.

⁵ Hili wakki/ mii kun 'koki ta kun kar/em bana miina ana mo mmo'or mo ma kar/e ma Arungimis mo tani i/ana mina o katinta mo? Ka Arungimis diki ta a'din kar/e mo 'taa mmogaça a'di anyora po/ ana. (Aha/ ona gwo me'd wathim pa ba/.)

⁶ Dhalku/ ki tosh kan. Wakki/ gwo midu 'taki diki wakan mo tani Arungimis midu 'taki mish 'kwaniny'cesh gwo dwall 'taa?

⁷ Hili wakki/ gwon gana/ ma Arungimis ishkina monycam piti mo goma tor pem mo tani atinta iwakkunu aha/ mo me'd wathi/ jin miiki miinthus mo si'da/?

⁸ Dhali tonthus 'konuki 'taki mii mo gomata mmomina tom 'boro'di 'taki pu'du/ mo sa/? - me'd 'kwanin tiya kun rukunyi ana ki gwo mo mmo/o ki ana i/ona gwo kan mo. Ki mo gi miiwak buni tana kar/e mo be.

Janj Kamu/jin Mii'd ka Kar/e Yisa Di'da

⁹ Dhali katinta si'da/? A/ki ana gun tana 'Kwani Yahuuda/ mo bola bol e ki 'bor mo 'taa? Yisa ki sule/ mo be. Haali/ aha/ hila yer ma ris 'kwani 'baar mo is ki gway mo imontal 'de/ mo, 'Kwani Yahuuda/ mo dhali 'Kwanin Griki mo, ka ris 'kwani 'baar mo 'kokin mo 'ko'd e mom'bi'th gi miinthus mo be.

¹⁰ Me'd gwo kun 'kwarkunu mo cikise/ mo ki:

Janj kamu/ jin mii'd ka kar/e yisa di'da. Tal 'de/ piyi'd mo be.

¹¹ Janj kamu/ yisa di'da jin mishi gwo 'ban mo.

Dhali janj kamu/ yisa di'da jin n'apki'da Arungimis mo.

¹² Aris uni 'baar mo dhereskin ki 'beles mo, aris 'kwani 'baar mo iiki iin thus mo.

Janj kamu/ yisa di'da jin mii miim 'boro'da, tal 'de/ piyi'd mo be.

¹³ Kus buni wana e ki mon'kupaje jin ka'du 'twa/ mo.

Uni tan ka le'd buni kun he'kkina he'k e mo.

Acin tasha/ ca'bki'd 'ko'da le'd buni mo be.

¹⁴ Dhali 'twam buni 'tu'dkunu mo ki monyeyeya je mo dhali ka/ ma du ki ka/ mo be.

¹⁵ Sho'k buni dherkin mo mmowola bas mo be.

¹⁶ E bway buni jin iikina uni mo tani rakka'di 'baar mo dhali mii jin miinu miiny cin'kina/ mo be.

¹⁷ Dhali bway gi mo ma ku'th is mo tani molkina uni mo be.

¹⁸ Monko/ isa kamu/ yisa di'da goma Arungimis e bwambor jis/em buni yisa.

¹⁹ Dhali ana misha shwane/ ki a'di yin jin ona gwonkan jin cinu mo tani a'di onu gom uni gwansan kun 'ko 'ko'd e gwonkan jin cinu mo. Wakan mo tani ka ris 'twa/ 'baar mo minu 'dap 'twa/ mo gom gwo mo dhala ris 'kwani gi mony'ceshi 'baar mo mini dosh shoka 'cesh goma Arungimis mo be.

²⁰ Haali/ wathim paŋ kamu/ yisa di'da jin minu kar ki mo ma *kar/e* mo e jis/em piti mo goma tu'c gi gwoŋkan jin cinu mo yisa haali/ gom gwoŋkan jin cinu mo tani a'di nyithu/ miinthus mo be.

Mo ma Kar/e ki Moŋgam Gwo Is mo

²¹ Hili shwane/ tani mo ma *kar/e* ma Arungimis a'di torkunu eya tente/ ki dar gi gwoŋkan mo be. Ba gwoŋkan jin cinu mo dhali gwo gi imançi gwo ma Arungimis kadhamo/ mo jin 'kwarkunu si'da/ mo uni ta iman/o gwo gom a'di mo be.

²² A'di ta mo ma *kar/e* ma Arungimis ki moŋgam gwo is eya Yesus *Kristhos* gom uni 'baar kun gam gwo is mo be. Haali/ toŋ kamu/ di'd ka *kwa/um* bwa yisa.

²³ Haala ris 'kwani 'baar mo miiki miinthus mo dhali aŋki monyca ma Arungimis mo be.

²⁴ Uni dhukunu ki mo ma *kar/e* ka 'them piti me'd to jin cinu ki me'd mo ki mowan 'ba/ jin di'd eya *Kristhos* jin ta'da Yesus mo be.

²⁵ A'di jin karkin ma Arungimis ka the/m me'd ka bas piti mo mmobudha bu'th ki moŋgam gwo is mo be. Yan miikunu mo mmoŋor mo ma *kar/e* ma Arungimis mo haali/ gom bwa ma 'kany'cesh piti mo mmotana a'di Arungimis mo tani a'di peki miinthus dhamo/ 'kup mo be.

²⁶ A'di miikunu mo mmoŋor e buŋ'kus shwane/ ki a'di ki is piti ta jaŋ *kar/e* mo dhali ki a'di karki a'di ki mo ma *kar/e* mo a'di jin gami gwo is eya Yesus mo be.

²⁷ Dhali yan'ko'd mom bana jin dhukina ana 'ba/ ki ca mo tani a'di warki'd kata mo? A'di dhalkunu mo. Gom gwoŋkan jana? Gom gwoŋkan jin miinu mo 'taa? Yisa. Hili gom gwoŋkan gi moŋgam gwo is mo be.

²⁸ Haali/ ana *koca* e mo mmo/o ki wathi/ karu ki mo ma *kar/e* ki moŋgam gwo is ki dar gi mii gi gwoŋkan jin cinu mo.

²⁹ Walla Arungimis ta'da Arungimis gi 'Kwani Yahuuda/ uni 'cena? A'di si'da/ diki ta Arungimis gom 'kwani kun 'koki ta 'Kwani Yahuuda/ mo 'taa? Nye, a'di ta ji gi 'kwani kun 'koki ta 'Kwani Yahuuda/ si'da/ mo be

³⁰ haali/ Arungimis a'di tal 'de/ mo dhali a'di midi kar ki mo ma *kar/e* uni gun 'cithuwa munyjal yis mo gom moŋgam gwo is buni mo dhali uni gun 'konuki 'citha/ munyjal yis mo gom moŋgam gwo is buni si'da/ mo.

³¹ A/ki ana mina puu gwoŋkan jin cinu mo jin gamu is yansan mowa? Dhalku/ ki tosh kan. Nye, gwo jin bath' a'di is mo tani ana tela gwoŋkan jin cinu sho'k mo be.

4

A/Ibrahiim Ta She/mm mo

¹ Dhali ki gwonta imina ana i/o mo goma Ibrahiim mo, jin ta'da babam bana jin di'di twa/a/ mo isi ka yi'c ki bungwar is mo?

² Haali/ wakka Ibrahiim karu ki mo ma *kar/e* gom 'kup gwo jin miinu to mo tani a'di ta toŋ kamu/ jin kara a'di is ki ca mo gom a'di mo, dhali hili yisa ibwambor ma Arungimis mo.

³ Haali/ gwo wakata jin 'kwarkunu mo e Gwo ma Arungimis mo mmo/o ka: Ibrahiim gamki'da Arungimis gwo is mo, dhali a'di kar a'di ki mo ma *kar/e* mo be.

⁴ Hili a'din 'de/ jin miiki mii mo tani tom piti jin gama a'di mo gom mii mo yisa karu ki to jin cinu ki me'd mo yisa. Hili a'di karu ki to jin mina a'di mii gam mo gom miim piti jin miikina a'di mo be.

⁵ Hili a'din 'de/ jin diki mii mii mo tani hili a'di gamki a'di gwo is mo jin karki a'di ki mo ma *kar/e* mo, a'di jin ta'da Arumgimis a/ushin gwo mo tani, mongam gwo is piti karu ki mo ma *kar/e* mo be.

⁶ Wakan si'da/ aDawuu'd ciki 'twa/ man/ ki mom'bor mii apo/ wathi/ jin kar ma Arumgimis ki mo ma *kar/e* mo ki dar gi mii mo be

⁷ mmo/o gwo mo ki:

Mom'bor mii gom uni gwansan uni gun dhalkunu adhin gwom buni 'pen mo, dhali miinthus buni si'da/ kumkunu 'kup mo be.

⁸ Mom'bor mii apo/ wathi/ jin mina Tapa Arumgimis diki kar miinthus piti mo be.

⁹ Mom'bor mii yan a'di cinu 'twa/ man/ apo/ uni 'cena gun 'cithuwa munyjal yis mowa? walla apo/ uni si'da/ kun 'konuki 'citha/ munyjal yis mo. Haali/ ana ona gwo ki mongam gwo is karki'da Ibrahiim ki mo ma *kar/e* mo be.

¹⁰ Dhali a'di kar a'di kata mo? A'di karkunu ntwa/a/ mowa? walla n'ko'd ki a'di 'cithuwa munyjal yis mo. A'di yisa n'ko'da, hili ntwa/a/ ki a'di 'cithuwa munyjal yis mo be.

¹¹ Dhali a'di bu'thki mo jin 'cithuwa munyjal yis mo me'd jamas mii mo walla to jin 'dapa'd ki mo ma *kar/e* gi mongam gwo is jin takina a'di ki a'di di'd ka munyjal yis i e naskina/ mo be. Ki a'di mididi 'taki ta adhana baba ka ris 'kwani 'baar mo kun gamki gwo is mo be, uni gwansan kun darkin ki mo ma munyjal yis jin 'cithu naskina/ mo, ki mo ma *kar/e* minu 'taki kar gom uni mo be.

¹² Dhali ki a'di mididi 'taki ta adhana baba gom 'kwani kun 'cithuwa munyjal yis mo jasi 'te/ yisa, hili gom uni gun ta ku gi 'cithuwa munyjal yis mo si'da/ dhali kun bathi she/mm mii gi mongam gwo is jin ta jim ma babam bana ka Ibrahiim jin takina a'di ntwa/a/ ki a'di 'cithuwa munyjal yis mo be.

Gwo jin Onu Is Yayi'd ki Mongam Gwo Is mo

¹³ Dhali gwo jin onu is goma Ibrahiim mo dhali emen piti jin mina uni 'taki ta gi mal mo e mony'cesh mo tani, diki yayu/ gom gwonkan jin cinu mo, hili gom mo ma *kar/e* gi mongam gwo is mo be.

¹⁴ Haali/ wakki/ uni gun ta gi gwonkan jin cinu mo mini ta gi mal mo tani mongam gwo jin gamu gwo is mo tani minu war ki jin onu ka wuny is mo dhali gwo jin onu is mo si'da/ minu war mo ki gwo jin minu puu mo be.

¹⁵ Haali/ gwonkan jin cinu mo a'di kalki'da nyor mo be. Hili ki gwonkan piyi'd mo tani gwo molu dhin si'da/ mo.

¹⁶ Haali/ gom gwo gi wakan mo tani a'di ta ji gi gamu gwo is mo, ki gwo jin onu is min ma 'the cil mo dhali ki a'di minu tel sho'k mo gom emen piti 'baar mo, yisa gom jasi uni gun ha gwonkan jin cinu e mo, uni 'cena yisa, hili gom uni si'da/ kun nyak gwo gam is ka Ibrahiim mo be. Haali/ a'di ta'da adhana baba gom ana 'baar mo be.

¹⁷ Me'd Gwo jin 'kwarkunu mo mmo/o gwo mo ki: /E karkika/ mo mmota adhana baba gi kal gi 'kwaniny'cesh ka ris mo - e bur'kus ma Arumgimis mo, a'di jin gama a'di gwo is mo jin ciki mon'koki/e mo gom uni gun wukin mo dhali yuka yuk ki to gun 'koki 'ko mo me'd to gun 'kokin mo be.

¹⁸ Dhali ki mo ma 'tenj kape/ jin peki'd mo tani a'di gamki gwo is naskina/ mo ka 'tenj kape/ mo ki a'di mididi 'taki ta adhana baba gom kal gi 'kwaniny'cesh ka ris mo me'd gwo jin torkunu a'di mo ki: Wakan be emen pini mini 'ko mo be.

¹⁹ A'di diki 'ka'd mo e mongam gwo is mo ki a'di kulumki gwo ibwa mo gom bungwar is piti jin gana/ jin wana e ki jin wu'd mo haali/ a'di ta'd gi yil jin wana e

ki issi mudhe'd mo ka dhan piti mo walla ki a'di kulumki gwo ibwa mo si'da/ goma Saarah jin dina bwana dho'th piti jin taki'da burum naskina/ mo be.

²⁰ A'di diki a'ath mo jin gamu gwo is ki sule/ mo be. A'di dina a'di ki dumbul mo gom gwo jin okin ma Arungimis is mo. Hili a'di 'bi'thkunu is mo e mongam gwo is mo me'd jin karkina a'di Arungimis ki ca mo be.

²¹ Dhali a'di telu sho'k mo ki gwo eya du mo ka Arungimis mishi mii a'di jin okina a'di is mo be.

²² Dhali wakan mo tani mongam gwo is piti karki a'di ki mo ma kar/e mo be.

²³ Dhali hili, gwo jin okunu mo ki: a'di karki a'di mo tani, gwo gwansan uni 'kwarkunu mo gom jasi a'di a'di 'de/ yisa,

²⁴ hili gom ana si'da/ mo. A'di minu kar ka kar/e gom ana kun gama gwo is e a'di mo jin piki a'di 'peni mowu mo jin ta'da Yesus Tapam bana mo be.

²⁵ A'di jin karkunu mo mmowu mo goma adhi' gwom bana 'baar mo dhali jin pikunu mo ki ana minu dhu ki mo ma kar/e mo be.

5

Kup Gwo jin Dhunuwa Dhu ka Kar/e mo

¹ Dhali gom mii gi wakan mo tani ana dhunu mo ki mo ma kar/e ki mongam gwo is mo. Haali/ a'di gi wakan mo tani ana tana gi mon'ku'th is eya Arungimis mo eya Yesus Kristhos Tapam bana mo be.

² Dhali e a'di si'da/ ana takina ki bway mo eya 'the yansan mo jin doshkina ana nycine/ mo be. Dhali ana 'kunya bwa mo e mo ma 'tej kapem bana gi monyca ma Arungimis jin pwakkunu ana bwa mo be.

³ Dhali ki nyanye/ kan tan mo tani ana 'kunya bwa mo e mon'kosh is ka nyor bana mo dhali mmomisha ana ki mo/isa nyor pucurki'd mo mmogam 'pemen ki mo jin minu 'dim 'kup mo be.

⁴ Dhali mo jin minu 'dim 'kup mo pucurki'd mo mmogam 'pemen ki mo jin wanu gwo kan ibwa mo be dhali mo jin wanu gwo kan ibwa mo tani pucurki'd mo mmogam 'pemen ki mo ma 'tej kape/ mo be.

⁵ Dhali mo ma 'tej kape/ midi diki bit ana bwa ka lungu'b mo haali/ mo/en ma Arungimis gackunu eya dum bana ki Shi/in Dheleladhelel mo, a'di jin cikunu ana mo be.

⁶ Dhali ki ana 'kokina ki dar gi 'bi'th mo tani ki embula 'borga/ yansan mo tani aKristhos wuki'd mo gom ku gi ushuna ush goma Arungimis mo be.

⁷ Hili a'di dita mii gom jan tal 'de/ mo mmo'taki wu mo gom a'di jin ta wathin kar/e mo - bahili gom wathim 'boro'd mo tani jan tal 'de/ midi 'taki budha du mo mmowu mo be.

⁸ Hili Arungimis tor'ki mo/en piti gom ana mo haali/ ki ana 'kokina mo mmota imanmii minthus naskina/ mo tani aKristhos wuki'd gom ana mo be.

⁹ Dhali haali/ a'di wakan mo tani mmodhukunu ana ki mo ma kar/e shwane/ ka bas piti mo tani bakata 'te/ beseene/ ana minu ta is ki me'd mo ki a'di 'pena nyor ma Arungimis mo be.

¹⁰ Haali/ wakki/ ana gwamkunu ka Arungimis mo mmota isa 'de/ mo ki mowu gi Ya/m piti mo tani ki ana 'kokina mo mmota 'kup gom a'di mo tani bakata 'te/ beseene/ ana gwamkunu mo mmota isa 'de/ mo shwane/ tani ana minu ta is ki me'd ki mondiki/em piti mo be.

¹¹ Dhali a'di diki wakan jasi 'te/ mo hili ana si'da/ mina bwa 'kuny mo eya Arungimis mo ka Kristhos jin ta Tapa Yesus bana mo. E a'di mo tani ana bu'thkina mongwam bana mo mmota isa 'de/ mo be.

¹² Dhali me'd jin pu'dkina miinthus eya 'cesh ki wathim pan 'de/ mo tani dhali wu mo gom miinthus mo tani dhali wakan mo tani miinthus peperki'd eya ris 'kwani 'baar mo haala ris 'kwani 'baar mo miiki miinthus mo be.

¹³ Dhali ka jin gana/ miinthus ishki'd e mony'cesh yansan ntwa/ a/ ki gwonkan jin cinu mo 'konuki ci mo be. Dhali hili miinthusa kamu/ yisa karuwa wakki/ gwonkan piyi'd mo be.

¹⁴ Dhali hili wu seki'da Aadama po/ ntaga Musa mo, apo/ uni gwansan si'da/ kun takin gi miinthus kun waki gwon dhan ma Adam yisa. Adam ta'da shimpira/ mii gom a'di jin midi yayu/ mo be.

¹⁵ Dhali hili, to jin cinu ki me'd mo tani diki waki gwon dhiŋ mo. Haali/ wakki/ 'kwani ka ris wukin mo goma dhiŋ gwo gi wathin 'de/ mo tani bakata beseene/ a'the ma Arumgimis dhali to jin cinu ki me'd eya 'the gi wathin 'de/ caan jin ta'da Yesus Kristhos mo tani ishki'd mo gom 'kwani ka ris mo be.

¹⁶ Dhali to jin cinu ki me'd mo tani diki waka du'd mii 'peni miinthus wathin 'de/ caan si'da/ mo. Haali/ mii jin cinu isa nyok jin bathki gwon dhiŋ 'de/ mo tani a'di ikalki miiwak mo. Hili, to jin cinu ki me'd mo jin bathki gwon dhiŋ ka ris mo tani kalki mo jin dhunuwa dhu ka kar/e mo be.

¹⁷ Wakki/ gwon dhiŋ gi wathin 'de/ kalki wu mo jin seki'd apo/ mo gom wathin 'de/ yan tani bakata beseene/ mmina uni se apo/ mo e mon'koki/e mo ki wathin 'de/ yan jin ta'da Yesus Kristhos mo, uni gon bu'thkina 'the jin ishki'd ka enthus mo dhali to jin cinu ki me'd ki mo ma kar/e mo.

¹⁸ Dhali wakan si'da/ gom gwon dhan gi wathin 'de/ mo tani gwon dwall pu'dki'd apo/ aris 'kwani 'baar mo e miuwak mo be. Dhali wakan si'da/ gom jan tal 'de/ jin miid ki mii ma kar/e mo tani mo jin dhunuwa dhu ka po/ ki mon'koki/e mo pu'dki'd mo eya ris 'kwani 'baar mo be.

¹⁹ Haali/ gom jan 'de/ jin ta'da a/ushingwo mii mo tani 'kwani ka ris warkin ki imanmii miinthus mo be. Dhali wakan si'da/ gom jan tal 'de/ jin ta'da manha gwo e mo mmomii mo tani 'kwani ka ris si'da/ minu warku/ ki imanmii miin'kar/e mo be.

²⁰ Dhali yan'ko'd gwonkan jin cinu mo a'di pu'dki'd mo jin mina gwon dhan imar is mo. Dhali hili me'd jin markina miinthus is mo tani a'the ishki'd ki nyanye/ mo be.

²¹ Dhali wakan si'da/ me'd jin sekina miinthus apo/ mo gi wunu mo tani a'the si'da/ midi se apo/ mo ma kar/e ki mondiki/e ki sule/ ya ye 'ba/ mo eya Yesus Kristhos Tapam bana mo be.

6

Mo jin Wunu e Miinthus, Hili Mmo'ko ki E eya Kristhos mo

¹ Dhali gwo gi wakata imina ana i/o mo sa/? Mina ana rash 'ko e miinthus ki sule/ mo 'taa? jin min ma 'the i/ish mowa?

² Dhalku/ ki tosh kan. Ana gun wukina mo e miinthus mo tani ana mina 'ko ki e e a'di mmana?

³ Ki 'kona um ki misha ki ana 'baar gun cukunu eya Kristhos jin ta'da Yesus mo 'kokunu mo mmocuc mo nyakki jwam piti mo 'taa?

⁴ Ana 'kokunu mo mmokan mo kan nyakki a'di mo e jwam piti mo. Dhali wakan si'da/ me'da Kristhos mmocukunu a'di mis mo 'peni mowu ki monyca ma Baba mo tani ana si'da/ mina nyak mondiki/en this yan mo be.

⁵ Haali/ wakki/ ana tana imanwar ki isa 'de/ nyakki a'di e jwa jin waki jim piti mo tani ana minu warku/ ki isa 'de/ nyakki a'di e mompinum piti jin waki jim piti mo be.

⁶ Haali/ ana misha ki bwana dhamom bana 'koshkunu jwa mo nyakki a'di mo, ki bungwar is gi miinthus yan minu 'ce'd sho'k mo ki ana mina 'taki 'koki 'ko mo mmota cɪŋkina/ gi miinthus mo be.

⁷ Haali/ a'di jin wuki'd mo tani a'di di'd ka po/ 'peni miinthus mo be.

⁸ Dhali hili wakki/ ana wuna mo nyakka Kristhos mo tani ana gama gwo is ki ana mina 'ko nyakki a'di mo be.

⁹ Haali/ ana misha ka Kristhos a'di jin 'de'kkunu 'peni mowu mididi diki wu dok/e ki sule/ mo. Mowu ta gi mom'bi'th apo/ a'di dok/e yisa.

¹⁰ Jwa jin wukina a'di mo tani a'di wuki'd gom miinthus mo be me'd 'de/ ki sule/ mo. Hili mondiki/e jin dina a'di ki e mo tani a'di diki'd ki e eya Arungimis mo be.

¹¹ Dhali wakan si'da/ um mini mii dhu is bum ki ku gun wukin mo gom miinthus mo dhali 'ko ki e eya Arungimis mo eya Kristhos jin ta'da Yesus mo be.

¹² Dhalku/ ki dhal miinthus wakan mmose apo/ bungwar is ga 'cesh bum mo ma mmotu'c um mmocik gwo 'peni bwam bum mo.

¹³ Walla dhalku/ ki ci tom bungwar is bum ki miinthus mmota to mmomii mii kun 'coka'co'k mo ma. Hili ciyi is bum ka Arungimis mo ma, me'd 'kwani kun cuyunu mo 'peni mowu e mondiki/e mo dhali tom bungwar is bum si'da/ mmota ton kar/e goma Arungimis mo.

¹⁴ Haali/ miinthus mididi diki ta gi 'bi'th apo/ um mo, haali/ um ta 'kwani kun wana e ki cɪŋkina/ gi gwonkan jin cinu yisa. Hili um wana e ki cɪŋkina/ ma 'the ma Arungimis mo be.

Mmota Cɪŋkina/ gi Miin'kar/e mo

¹⁵ Haali/ a'di gi wakan mo tani ana mina imii miinthus mo 'taa? Gom ana 'konaki ta cɪŋkina/ gi gwonkan jin cinu mo 'taa? Mmotana ana cɪŋkina/ ma 'the ma Arungimis mo 'taa? Dhalku/ ki tosh kan.

¹⁶ Ki 'kona um ki misha wakki/ um ci is bum ki wathin kamu/ mmota cɪŋkina/ mmocik gwom piti mo tani um ta cɪŋkina/ gi wathi/ jin ci'ka um gwo mo ba/. Wakki/ a'di mididi 'taki ta miinthus mmogam mowu mo, walla wakki/ a'di mididi 'taki ta mmocik gwo mo tani a'di nta mii ma kar/e mo be.

¹⁷ Hili 'bora'bor ka Arungimis mo haali/ um gun 'thissa/ ta cɪŋkina/ gi miinthus mo tani shwane/ um warkin ki imanha gwo e 'pena dun gana/ gom gwon kar/e yan jin cinu um mmomii mo.

¹⁸ Dhali mmo'cu'kkunu um 'peni miinthus mo tani um warkin ki cɪŋkina/ ki mii ma kar/e mo be.

¹⁹ Aha/ ona gwo ki 'twa/ ga 'cesh mo, gom bungwar is ga 'cesh bum athan mo. Haali/ 'thissa/ um ci tom bungwar is bum ki jiny cɪŋkina/ 'peni miin 'dap e mo dhali ki miinthus kun eka/ ek mo tani wakan shwane/ ciyi tom bungwar is bum ki jiny cɪŋkina/ ki mii ma kar/e mo ma mmodhu gi she/ ki dhelel dhelel mo.

²⁰ Ki um ta cɪŋkina/ gi miinthus mo tani um 'kon ki 'kus mo 'peni miin'kar/e mo.

²¹ Hili maman kuna gamkina um 'thissa/ me'dyin 'kona um e mii gun 'the um is shwane/ mo? Haali/ 'pemen gi to gwansan mo tani uni ta mowu mo be.

²² Hili shwane/ mmo'cu'kkunu um mo 'peni miinthus mo dhali mmowara um ki cɪŋkina/ ma Arungimis mo tani um ta gi maman bum mmodhu gi she/ ki dhelel dhelel mo dhali 'pemen piti ta ji gi mon'koki/e ki sule/ ya ye 'ba/ mo.

²³ Haali/ to jin gamu ki mii jin miinu miinthus mo tani ta mowu mo. Hili a'di jin cin ma Arumgimis ki me'd mo tani a'di ta mondiki/e ki sule/ ya ye 'ba/ eya Yesus Kristhos Tapam bana mo be.

7

Suura 'Peni Gwo Miimash mo

¹ Dhali 'kona um ki misha, iwaka? (haali/ aha/ ona gwo e 'kwani kun mishi gwonkan jin cinu mo) ki gwonkan a'di dekki wathi/ ki yil gi mondiki/em piti 'te/ mo be.

² Me'da 'bom jin mashkin ma kath mo tani a'di dekkina gwonkan ma kath ki a'di di'd ki e mo. Hili wakka akathim piti wuki'd mo tani ayim karu ki 'kus 'peni isi gwonkan ma kath mo be.

³ Wakan mo tani wakki/ a'di mididi gam is piti ki wathin gwaṭha kamu/ mo ka kathim piti di'd ki e mo tani a'di minu yuk ka manmii miinyal mo. Dhali hili wakki/ a'di yim min ma kathim piti wu mo tani ayim di'd ki 'kus 'peni gwonkan yan mo dhali wakki/ a'di masha'di wathin gwaṭha kamu/ mo tani a'di ta'da manmii miinyal yisa.

⁴ Dhali ki mii gi wakan si'da/ mo tani iwak pem, um wukin mo gom gwonkan jin cinu ki bunḡwar is ma Kristhos mo be. Haali/ a'di wakan mo tani shwane/ um ta uni goma cin kamu/ mo a'di jin 'de'kkunu 'peni mowu ki ana mina dho'th maman goma Arumgimis mo be.

⁵ Ki ana 'kona ki e mo e bunḡwar is mo tani mon'dap e gi miinthus bana gun 'mera gwonkan jin cinu e mo tani 'kon mmowagas e tom bunḡwar is bana mo mmodho'th maman gom mowu mo.

⁶ Hili shwane/ ana 'cukkunu mo 'peni gwonkan jin cinu mo. Ana wukina mo gom a'di caan jin bu'thki ana ki cinkina/ mo, ki ana mina 'koki mii to ki gwonkana dhamo/ jin 'kwarkunu mo, hili ki ana mina mii to ki mondiki/en this gi Shi/in mo be.

Gwo gi Toju Bwa jin Dina Miinthus e Bwaman mo

⁷ Ata mina ana i/o mo sa/? A/ana mina o ki gwonkan jin cinu mo tani ta miinthus mo 'taa? Dhalku/ ki tosh kan. Hili wakki/ gwonkan jin cinu mo mididi 'taki pi mo tani aha/ mina 'taki mol miinthus nyith mo be. Aha/ mina 'taki mol 'ban a'di jin ta mon'thoth bwa wakki/ gwonkan jin cinu diki o gwo mo ki: Dhalki/e bwa ki mii i'thoth mo ma.

⁸ Hili miinthus mo tani mmogama a'di bway e gwonkan jin 'kwarkunu mo tani a'di wagaski'da ris to gun 'thothu bwa e aha/ mo. Ki dar gi gwonkan jin cinu mo tani miinthus wuki'd ka mak mo.

⁹ Ntwa/a/ mo tani aha/ ca'bkina ki e mo ki dar gi gwonkan jin cinu mo. Hili ki gwonkan jin 'kwarkunu pu'dki'd mo tani miinthus waḡa'd mo dhali aha/ wukina mo be.

¹⁰ Gwonkan a'di yin jin oki gwo is gom mondiki/e mo tani a'di gamkika/ wu nycine/ mo.

¹¹ Haali/ miinthus mmogamkina a'di gway e gwonkan jin 'kwarkunu mo tani a'di he'kki aha/ e mo dhali ki a'di mo tani a'di 'koshki aha/ jwa mo be.

¹² Wakan be gwonkan jin cinu mo a'di kogu mo. Dhali gwonkan jin 'kwarkunu mo a'di kogu mo dhali ta jin kar/e mo dhali ta jin 'boro'd mo be.

¹³ Mina a'di jin ta jin 'boro'd kal mowu gom aha/ mo 'taa? Dhalku/ ki tosh kan. Miinthus a'di be a'di miiki mo jin wunu e aha/ mo e a'di jin 'boro'd ki miinthus minu 'taki tor ki a'di nta miinthus mo be dhali ki gwonkan jin 'kwarkunu mo a'di mididi 'taki war ki miinthus jin shi/ashi/ mo be.

¹⁴ Ana misha gwo ki gwoŋkan jin cinu mo a'di ta to gi shi/in mo. Hili aha/ tana to gi shuman is mo jin yolkuu mo e bwamme'd gi miinthus mo.

¹⁵ Aha/ dinaki mish gwo 'ban gom miim pem gana/ mo. Haali/ aha/ dinaki mii a'di jin oyaa/ bwa mo. Hili aha/ miikina a'di yin jin shi/kika/ i e mo.

¹⁶ Hili wakki/ aha/ miina to jin dika/ ki o bwa mo tani aha/ gamkina gwo me'd mo ki gwoŋkan jin cinu ta jim 'borga/ mo be.

¹⁷ Haali/ kan mo tani a'di diki ta aha/ jin miiki a'di mo, hili miinthus jin ca'bki'd e aha/ mo be.

¹⁸ Haali/ aha/ misha ki tom 'borgan kamu/ yisa ca'bki'd e aha/ mo, a'di jin ta buŋwar is gi shuman is pem mo. Aha/ misha bwa o gom a'di jin 'boro'd mo, hili aha/ mola a'di mii mo be.

¹⁹ Haali/ aha/ dinaki mii tom 'boro'd jin oyaa/ bwa mo, hili tonthus jin 'teka/ bwa mo tani a'di imiikika/ mo be.

²⁰ Hili wakki/ aha/ miina to jin diki oyaa/ bwa mo tani a'di diki ta aha/ jin miikina a'di mo, hili miinthus jin ca'bki'd e aha/ mo be.

²¹ Wakan mo tani aha/ gamkina gwoŋkan bwa kan me'd jin oka/ bwa mmomii ki 'bore/ mo tani hili tonthus a'di ishki'd ki 'dish 'dish hila/ mo.

²² Haali/ aha/ 'bora bwa ki 'bor mo e gwoŋkan ma Arungimis jin cinu mo e isi bwaman is pem mo be.

²³ Hili aha/ mishkina e tom buŋwar is pem mo gwoŋkan gi bwan kamu/ aski'd mo ki gwoŋkan ma dum pem mmokar aha/ mmota cinkina/ gi gwoŋkan gi miinthus jin ca'bki'd e tom buŋwar is pem mo be.

²⁴ Ayy aha/ jin dinaki ta buye/ wathim pa mo. Kaja midu 'cuŋ aha/ mo 'peni buŋwar is gi mowu yan mo?

²⁵ 'Bora'bor ka Arungimis eya Yesu Kristhos Tapam bana mo. Dhali wakan mo tani aha/ ki is pem miikina gwoŋkan ma Arungimis jin cinu ka dum pem mo dhali hili ki shuman is pem mo tani aha/ miikina gwoŋkan gi miinthus mo be.

8

Mondiki/e e Shi/in mo

¹ Gom a'di gi wakan mo tani miuwak diki di mo shwane/ gom uni gwansan kun 'kokin eya Kristhos jin ta'da Yesu mo be.

² Haali/ gwoŋkan gi Shi/in gi mondiki/e eya Kristhos jin ta'da Yesu mo tani a'di karki aha/ ki 'kus 'peni gwoŋkan gi miinthus mo dhali mowu mo be.

³ Haali/ Arungimis 'baarki a'di jin mola gwoŋkan jin cinu mii mo haali/ a'di 'ka'da'd mo e buŋwar is mo mmohashkina a'di Ya/m pitin gana/ mo e jamaŋ gi buŋwar is gi miinthus jin shi/ashi/ mo dhali gom miinthus si'da/ tani a'di wakki miinthus e buŋwar is mo be.

⁴ A'di mii'd kan ki mo ma kar/e gi to jin doŋa gwoŋkan jin cinu mo minu thim e ana mo kun 'koki bath buŋwar is mo hili mmobath Shi/in mo be.

⁵ Haali/ uni gwansan kun 'ko 'ko'd e buŋwar is mo tani dhuna dum buni ki to gi buŋwar is mo. Hili uni gwansan kun 'ko 'ko'd e Shi/in mo tani dhuna dum buni ki to gi Shi/in mo be.

⁶ Mmodhuwa du 'ko'di buŋwar is mo tani ta mowu mo be. Hili mmodhuwa du 'ko'di Shi/in mo tani a'di ita mondiki/e mo dhali monku'th is mo be.

⁷ Haala du caan jin karu 'ko'd e buŋwar is mo tani a'di ta 'kup ka Arungimis mo. A'di diki gam me'd ki gwoŋkan ma Arungimis jin cinu mo. Ka jin gana/ a'di moli mii mo be.

⁸ Dhali uni gwansan kun 'kon e buŋwar is mo tani uni molona Arungimis 'bor bwa i is mo be.

⁹ Hili um 'koki 'ko e shuman gi bungwar is mo. Um 'kon e Shi/in mo be wakki/ Shi/in ma Arungimis ka jin gana/ di'd e um mo. Wathi/ jin dara'd gi Shi/in ma Kristhos mo tani a'di diki ta jim piti mo be.

¹⁰ Hili wakka Kristhos di'd e um mo tani ba bungwar is bum wukin mo gom miinthus mo tani shi/in bum 'kon ki e gom mo ma kar/e mo be.

¹¹ Wakki/ Shi/in gi a'di jin 'de'kki'da Yesus 'peni mowu di'd e um mo tani a'di jin 'de'kki'da Kristhos jin ta'da Yesus 'peni mowu mo tani mido ci mondiki/ e mo ki bungwar is bum kun mishi wu si'da/ mo ki Shi/in piti jin di'd e um mo be.

¹² Dhali wakan mo, iwa'ka, ana 'kon ma mure/m'ba/ mo, yisa gom bungwar is yisa mmobatha ana bungwar is yan mo be.

¹³ Haali/ wakki/ um 'ko 'ko'd e bungwar is mo tani um mini wu mo be. Dhali hili wakki/ ki Shi/in mo tani um ki 'kosh mii gi bungwar is jwa mo a'di imina umi 'ko e mo.

¹⁴ Haala ris uni gun shuna Shi/in ma Arungimis bway mo tani uni ita iya/ ma Arungimis mo be.

¹⁵ Haali/ um 'koki bu'th shi/in mmota cin'kina/ dok/e mmobit mo e mo ma ko/ is mo. Hili um bu'thki shi/in mmota iya/ mo. Me'd jin gwokina ana mo ki: Abba Ababa.

¹⁶ A'di ta Shi/in ki is piti jin oki gwo nya'kki shi/in bana ki ana tana uci ma Arungimis mo be.

¹⁷ Dhali wakki/ ana tana uci kan mo tani ana tana imankal mal mo, imankal mal ma Arungimis mo dhali imannyak mal kal ka Kristhos wakki/ ana mina isi 'kosh ka nyor nya'kki a'di mo ki ana minu nyak dhu ki ca ki a'di mo.

¹⁸ Aha/ tosha ki mo gi isa nyor jin di'd shwane/ diki ha me'd mmodhu ka par 'ban ki monyca jin minu tor ana eya tente/ yilar kamu/ mo.

¹⁹ Haali/ to kun uku mo tani uni corkina cor ki mo/o bwa ki 'bi'th gom mo jin minu tor uci ma Arungimis eya tente/ mo be.

²⁰ Haala ris to kun uku 'kon mmogam me'd mo mmowar mmopu/ mo be. Uni yisa ki bwam buni'j gana/ yisa, hili ki bwa gi a'di jin dhu uni ki mo ma 'tej kape/ mo.

²¹ Haali/ to gun uku uni, ki is buni minu 'cuk mo 'peni mondek buni gi mompu/ mo dhali bu'th mo jin dhunuwa dhu ki 'kus mo gi monyca gi uci ma Arungimis mo be.

²² Ana misha ki aris to gun uku okonkin mo ki isa nyor ma dho'th imontal 'de/ mo ntagi shwane/ mo be.

²³ Dhali yisa jasi to gun uku uni 'cena, hili ana ki is bana mo, ana gun takina maman gi Shi/in nt'waa/a/ mo okonkina isi bwaman mo me'd jin corkina ana a'gor gom mo jin budhuwa bu'th ka bas gi iya/ mo jin ta mo gi wanu bungwar is bana 'ba/ mo be.

²⁴ Haali/ e mo ma 'tej kape/ yan mo tani ana takunu is ki me'd mo be. Hili mo ma 'tej kape/ jin mishu mo tani a'di diki ta a'tej kape/ 'te/ mo. Haali/ a'dija jin ta'd ga 'tej kape/ gom to jin misha a'di mo?

²⁵ Hili wakki/ ana tana ga 'tej kape/ ki to gun 'kona ana ki mish mo tani ana corkina a'gor gom a'di ki bwa jin 'kuju mo ki 'kari'th mo be.

²⁶ Wakan si'da/ Shi/in wothki ana e mon'ka'd is bana mo be. Haali/ ana 'konaki mish to 'tho mo me'd jin mina ana mii 'tho mo ka ba/. Hili Shi/in ki is piti a'di woth gwo is gom ana mmowuwa shure/ ki nyanye/ ki gwo mo.

²⁷ Dhali a'di jin napki'da du'j 'kwani mo tani a'di mishki a'di jin ta'da adu gi Shi/in mo haali/ Shi/in a'di wothki gwo is gom uni kun dhunu ki she/ ki dhelel dhelel isi ki bwa ma Arungimis mo be.

Mmopi Mii E ki Nyanye/ mo

²⁸ Haali/ ana misha mo ka ris to nyaku/ mii ki 'bore/ gom uni gun enena Arungimis mo, gom uni gun yukkunu mo mmomii waki bwam piti mo be.

²⁹ Haali/ uni gun mishkina a'di ntwa/a/ mo tani uni i'kawurkina a'di mo mmonyak jamas ki Ya/m piti jin mina a'di ta abwa nyara/ ibwam ikam ka ris mo.

³⁰ Dhali uni gun 'kawurkina a'di mo tani uni iyukkina a'di si'da/ mo dhali uni gun yukkina a'di mo tani uni idhukina a'di ki mo ma kar/e mo dhali uni gun dhukina a'di ki mo ma kar/e mo tani uni idhukina a'di ki monyca si'da/ mo be.

³¹ Haali/ a'di gi wakan mo tani ana mina i/o kata gom gwo gwansan mo? Wakki/ Arungimis ta a'di gom ana mo tani aja a'di jin midi ta 'kup ki ana mo sa/?

³² A'di jin diki non Ya/m pitiŋ gana/ mo hili a'di ciki a'di mmowu mo goma ris ana 'baar mo tani mina a'di diki ci ana aris to ki nyanye/ ka 'the si'da/ nyakki a'di mo 'taa?

³³ Kaja a'di jin midi kar toŋ kamu/ tal 'de/ m'ba/ uni gun kwanykin ma Arungimis mo? A'di ta'da Arungimis jin kar wathi/ ki mo ma kar/e mo be.

³⁴ Kaja a'di jin midi waka wak mo? A'di ta'da Yesus Kristhos 'taa? jin wuki'd mo. Nye, a'di 'teyi jin 'de'kkunu 'peni mowu mo, a'di jin di'd ka bim poros ma Arungimis mo, a'di ka jin gana/ jin woŋ gwo is gom ana mo.

³⁵ Kaja a'di jin midi kwa/ ana bwa 'peni mo/en ma Kristhos mo? Mmamina to to'c 'kus 'taa? Mmo'ko ka cis 'taa? Mmo'kosha 'kwaniya 'kosh 'taa? Mmamina te/ 'kosh 'taa? Mmo'ko ki dar gi burrinye/ 'taa? Walla mmo'ko e mo jin tagu wu mo 'taa? Walla gandala turga/ 'taa?

³⁶ Wakan be a'di 'kwarkunu mo ki:

Aman 'koshkunu jwa iyula tente/ gom gway pini.

Aman 'kokunu mmodhu mo me'd ka'bal gun susu mmo'cith 'kus mo be.

³⁷ Yisa. Ka ris to gwansani 'baar mo tani ana tana imanpi mii e ki nyanye/ e a'di jin enki ana mo be.

³⁸ Haali/ aha/ misha mo ki isa duŋ gana/ ki mowu walla mondiki/e walla iman'doyu gwo walla mom'bi'th kun molu gadhir walla to gun 'kon shwane/ walla to gun mini 'ko yilaŋ kamu/ walla mom'bi'th

³⁹ walla montur walla moŋ'kul walla toŋ kamu/ tal 'de/ jin uku mo tani midi mol ana bwa kwa/ 'peni mo/en ma Arungimis jin di'd eya Kristhos jin ta'da Yesus Tapam bana mo be.

9

Mmokwanykin ma Arungimis 'Kwani ma Israyiil mo

¹ Aha/ ona gwoŋ gana/ eya Kristhos mo. Aha/ dinaki ta tor mo. 'Twa/ ma dum pem kalki aha/ gwo o e Shi/in Dheleladhelel mo

² ki aha/ takina gi bwam di'ti'd jin caaca mo dhali aha/ dinaki dak she/ 'pe'd eya dum pem mo.

³ Haali/ aha/ mina 'taki toshi ki aha/ ki is pem minu jee is jwa mo dhali 'cith 'twa/ 'pena Kristhos gom gway gi ikam pem gun tana bas pem ka yi'c mo.

⁴ Uni gun ta 'Kwani ma Israyiil mo dhali uni gun ta iya/ kun cila to mii mo dhali uni gun cila monyca mo dhali gwo jin gamu me'd mo dhali gwoŋkan jin ciku mo dhali gwo gi luŋu mo dhali gwo jin onu is mo be.

⁵ E uni a'di icil ma idhana baba mo dhali 'pena yi'c buni isi ki bungwar is mo tani a'di nta'da Kristhos jin diki'da po/ aris to 'baar mo, a'di jin ta'da Arungimis jin 'boru mii ki sule/ sule/ ya ye 'ba/ nnii mo. Amen.

6 Hili a'di yisa ta gwo ma Arungimis jin ushki me'd mo yisa. Haali/ uni 'baar gun piyin 'peni uci ma Israyiil mo tani ta unin gana/ ma Israyiil yisa.

7 Dhali uni 'baar mo 'koki ta ucin gana/ ma Ibrahiim mo haali/ uni ita kun piyin mo 'peni a'di. Dhali hili uni gun pikin 'pena Is/hak mo tani uni ita emen kun yer kunu gway n'ko'd mo be.

8 'Pemen gwo yan diki ta jasi gwo gi tana uni uci gi bun'gwar is mo 'te/ uni kun ta uci ma Arungimis mo. Hili uni ta uci gi gwo jin onu is mo kun ta emen kun yer kunu gway n'ko'd mo be.

9 Haali/ gwo jin onu is yansan mo o gwo mo ki: Ki mo caan mo tani aha/ mina dok ka nyan'ko'd mo dhala Saarah mididi ta gi ya/ mo be.

10 Dhali a'di ta jasi kan yisa. Hili si'da/ me'd jin bwaakin ma Ripka uci ki wathin gwa'ha 'de/ mo tani ababam bana jin ta'da Is/hak mo tani

11 bala ki uni 'konuki dho'th naskina/ mo tani dhali 'koki mii ton kamu/ jin 'boro'd mo walla jin shiyi'd mo tani ki bwa ma Arungimis jin 'kawurkina a'di ntwa/a/ ki mo jin kwanya a'diya kwany mididi ki sule/ mo tani yisa jasi gom mii yisa, hili goma yuk piti mo tani

12 a'diyim tor kunu gwo ki a'din gwanyjaka/ imidi mii to gom a'di jin ta dhuru'c mo be.

13 Me'd gwo jin 'kwarkunu mo ka: Yakuub a'di enka/ mo be. Hili Iisu a'di i'teka/ bwa mo be.

14 Ana mina i/o kata si'da/? Arungimis thu'thki mii mo 'taa? Dhalku/ ki tosh kan mo ma.

15 Haali/ a'di oki'da Musa gwo mo ki: Aha/ mina miimiiya po/ uni gun miga/ miimii mo dhali aha/ mina ko'c eya po/ uni gun miga/ ko'c e nycine/ mo.

16 Haali/ a'di diki ta to jin 'dapa'd e bwa wathi/ mo walla to jin palkunu mii mo hili a'di 'dapa'd ki momiimii ma Arungimis mo.

17 Haali/ Gwo ma Arungimis kun 'kwarkunu mo oki'da Pirawn gwo mo ki: Aha/ cukina/ e mis mo gom 'kup mii yaasen gana/ mo mmotor mom'bi'th pem e/ e mo. Wakan ki gway pem minu ci ki lala'th e mony'cheshi 'baar mo.

18 Dhali kan mo tani a'di miiki mii apo/ unin tiyan tiya mo kun ona bwa a'di mo dhali a'di 'bi'thki'da du unin tiyan tiya kun ona bwa a'di mo be.

19 A'di mina umi oyaa/ gwo cikise/ mo ki: Atinta karkina a'di gwo apo/ naskina/ mo? Haali/ kaja mididi mish bwam piti roc mo?

20 Hili ki/ e wathi/ ja mididi thoka Arungimis gwo ka nyan'ko'd mo? Mina to jin uku o a'di jin uk a'diya ki: Atinta uka/ e aha/ kan mo?

21 Aman/uka je dina a'di ki ta gi 'bi'th apowa je mmo/uk 'pena jen gabula 'de/ yan ton'kul bwan kamu/ ki jaro/ mo dhali jan kamu/ jin dinu ki ga/ to mmomiiya?

22 Atinta wakki/ Arungimis dina gwo ibwa mmotor anyor piti mo dhali mmotor mom'bi'th piti mo tani a'di kalki bwan diti'd ki bwa jin 'ku'cu/ ki 'kari'th mo dhali ton'kul bwa ma nyor gun uk kunu mo tani a'di ita gom mo gi 'ce'duwa 'ce'd sho'k mo be

23 mmothosonkina a'di momish mo jin tanu pa gi monycam piti gom ton'kul bwa gi momii miim piti mo be. A'di jin thosonkina a'di ntwa/a/ gom monyca mo

24 me'd isi anayi kun yukkina a'di mo, yisa jasi 'peni 'Kwani Yahuuda/ uni 'cena yisa si'da/, hili 'peni 'kwani kun 'koki ta 'Kwani Yahuuda/ mo be.

25 Me'd ka jin gana/ jin okina a'di gwo eya Huusha mo ki:

Uni gwansan kun 'koki ta 'kwanim pem mo tani

miga/ yuk ki 'kwanim pem mo.

Dhala yim jin dinuki en mo tani

aha/ mina yuk a'di ki jim pem jin enka/ mo be.

²⁶ Dhali e mo yan gana/ mo, e mo jin onu gom uni mo ki: Um 'koki ta 'kwanim pem mo tani

uni minu yuk ki iya/ ma Arungimis mo, jin di'd ki e mo be.

²⁷ Dhali Ishaya a'di cuuki'd mo gom 'Kwani ma Israyiil mo ki: Bala wakki/ aris iya/ ma Israyiil mina e 'taki wa ki emena si'b gi bwam ma gap mo tani hili jasi unin tiya ki daka/ iminu woṭṭ mo be.

²⁸ Haali/ Tapa midi daḡ bwam dwall gwom piti 'kup mo e mony'cesh ki 'bi'th dhali ki 'ta'b mo.

²⁹ Dhali me'd jin ṭorkin ma Ishaya gwo nṭwa/a/ mo tani ki:

Wakki/ Tapa Arungimis gi momis midi diki dhal ana uci mo tani

ana mina e 'taki wa ki 'Kwani gi Pan Saduum mo dhali mmowar mo me'd 'Kwani gi Paṅ Gamuura mo be.

'Kwani ma Israyiil dhali Gwom 'Borga/ mo

³⁰ Dhali ana mina i/o kata? Ki 'kwani kun 'koki ta 'Kwani Yahuuda/ kun 'koki ur mo ma kar/e isho'k mo dhali bu'th a'di mo, a'di a'di jin ta mo ma kar/ e yan gi monḡam gwo is mo,

³¹ hili ki 'Kwani ma Israyiil kun urki mo ma kar/e isho'k jin 'dapa'd ki gwoṅkan jin cinu mo tani uni 'koki ha me'd mo mmothim gwoṅkan caan jin cinu mo be.

³² Gomata? Haali/ uni 'koki ur a'di isho'k ki monḡam gwo is mo hili me'd jin 'dapa a'di ki mii mo be. Uni golkina wosh jin golki'da gol mo be.

³³ Me'd gwo jin 'kwarkunu mo ki:

Hili aha/ 'thikina Sihyuun wosh caan mo jin midi gol 'kwani mo, wosh caan jin mina uni ita'k mo.

Dhali a'di jin midi gam a'di gwo is mo tani minu 'koki kar ki mo ma 'the is mo be.

10

¹ Iwaka, adum pem oyaa/ dhali a'thom pem eya Arungimis mo gom 'Kwani ma Israyiil ki uni minu 'taki ta is ki me'd mo be.

² Aha/ kalkina gwo o gom uni mo, ki uni shwakina nyor goma Arungimis mo, hili a'di mishkina uni 'ban mo yisa.

³ Haali/ mmo'kona uni ki ji mol mo gom mo ma kar/e yan jin pu'dki'd mo 'peni Arungimis mo dhali mmosimma uni mii e mo mmoṭel mo ma kar/ em buni sho'k mo tani uni 'koki dhu is buni 'ko'di me'd mo ma kar/e ma Arungimis mo be.

⁴ Haala Kristhos a'di ta jin 'ko'd gi gwoṅkan jin cinu mo, ka ris 'kwani ka 'dete/ 'dete/ kun tan gi monḡam gwo is mo minu dhu ki mo ma kar/e mo be.

⁵ AMusa 'kwarki gwo mo ki, wathi/ jin boto'd ki mo ma kar/e jin 'dapa'd ki gwoṅkan jin cinu mo tani midi ca'b e a'di mo be.

⁶ Dhali hili, mo ma kar/e jin 'dapa'd ki gwo jin gamu is mo tani a'di o gwo mo ki: Dhalku/ ki o gwo eya dum pini mo ki: Kaja a'di jin midi se momis mo? (ki a'di midi thula Kristhos ka 'cesh mo)

⁷ walla, Kaja a'di jin midi thul jis jwa mo? (ki a'di midi guya Kristhos ka piye/ 'peni mowu mo.)

⁸ Hili gwo wakata okunu mo? Gwo 'dishki /e is mo, eya le'd pini mo dhali eya dum pini mo (a'di jin ta gwo gi monḡam is jin cikina aman mo be).

⁹ Haali/ wakki/ /e mini pi gwo ki 'twam pini ka Yesu ta Tapa mo dhali gam gwo is ka dum pini ka Arungimis 'de'kki a'di 'peni mowu mo tani /e minu woṭṭ mo be.

10 Haali/ wathi/ jin gam gwo is ka dum piti mo tani wakan a'di karu ki mo ma kar/e mo be. Dhali a'di jin piki gwo ki 'twam piti mo tani dhali kan, a'di wothkunu mo be.

11 Gwo ma Arumgimis jin 'kwarkunu o gwo mo ki: Wathin kamu/ 'de/ jin gamki a'di gwo is mo tani yisa minu kar ki mo ma 'the is yisa.

12 Haali/ mo ma gwar 'de/ diki di e bwaman Wathi/ Yahuuda/ mo dhali Wathin Griki mo. Tapa a'di ta Tapan 'de/ goma ris 'kwani 'baar mo dhali ta a'di jin ci mom piti jin tanu pa mo apowa aris uni kun yuk a'di mo be.

13 Haali/ aris 'kwani ka 'dete/ 'dete/ kun mini yer gway gi Tapa mo tani uni iminu ta is ki me'd mo be.

14 Hili 'kwani mini yuk a'di kata mo, uni kun 'koki gam a'di gwo is mo? Dhali uni mini gam a'di gwo is kata mo, uni gun 'koki cik gwo ki sule/ sule/ mo? Dhali uni mini cik gwo kata ki dar ga manci gwo mo?

15 Dhali 'kwani mini mish gwo ci kata mo? hili isi ciki/ uni minu 'taki mii hash mo ba/. Me'd gwo kun 'kwarkunu mo ki: Sho'k gi uni gwansan kun ciki gwom 'borga/ mo tani wani jarowa?

16 Hili uni 'baar 'koki ci is ki gwom 'borga/ yan mo. Haali/ a/Ishaya o gwo mo ki: Tapa gamkin maja gwo is jin cika a'di 'peni aman mo?

17 Wakan mongam gwo is pu'dki'd 'peni a'di jin cikunu mo dhali a'di jin cikunu mo tani pu'dki'd 'peni gwo jin cikunu mo goma Kristhos mo be.

18 Dhali hili aha/ dotkina gwo mo ki: A/ki 'kona uni ki cika? Ka jin gana/ uni cikkin mo be. Haali/

'Twam buni yaki'd ki lala'th isi mony'ceshi 'baar mo.

Dhali gwom buni taki'd ki 'pemen gi mony'cesh mo be.

19 Dok/e aha/ dota gwo mo ki: A/ki 'Kwani ma Israyiil 'koki mish gwo 'bana? Ntwa/a/ Musa o gwo mo ki:

Aha/ mina kar /e mmo'a'c bwa gom uni gun 'koki ta kal mo.

E kal jin ta pus mo tani aha/ mina kar /e mmoshwaa nyor mo.

20 Dhala Ishaya o gwo wakan ka daran du mo ki:

Aha/ gankunu ki uni gwansan kun 'koki n'ap aha/ mo.

Aha/ 'orkina is pem eya tente/ gom uni gwansan gun 'koki dot aha/ mo be.

21 Hili gom 'Kwani ma Israyiil mo tani a'di ki o gwo mo ki: Ka tee 'peni mon'thamo/ aha/ he'thkina me'd pem e 'kwani kun tana iman/ush gwo ha e mo dhali kun ta 'kwani kun ta ca'ckon ki ca'ckon mo be.

11

'Kwani ma Israyiil kun 'Kokini Daka/ mo

1 A'di dotka/ gwo dok/e mo ki: Arumgimis wakki 'kwanim piti mo 'taa? Dhalku/ ki tosh kan. Aha/ ki is pem tana Wathi/ ma Israyiil mo, emen ma Ibrahim mo, dhali aha/ tana jim ma wak ma Benyamiin mo be.

2 Arumgimis diki wak 'kwanim piti mo, uni gun 'kawurkina a'di mo. Dhali 'kona um ki misha, Gwo ma Arumgimis jin 'kwarkunu mo o gwo ki Iliyya a'di jin wothki'da Arumgimis gwo is apo/ 'Kwani ma Israyiil mo 'taa? Mmo/o gwo mo ki:

3 Tapa uni 'koshki /e imanci gwom pini mo. Uni 'ce'dki mo jin karu mmomiiya basa 'cesh gom /e sho'k mo dhali aha/ dhalkunu, aha/ 'de/ mo. Dhali uni n'apki mondiki/em pem mo.

4 Hili Arumgimis thok a'di gwo kata mo sa/? A'di thok a'di gwo mo ki: Aha/ dhukina 'kwani ki is pem kun tana alaapi pesu/ mo kun 'koki lunj ki jin 'kupa'dupun goma Baal mo.

5 Dhali wakan si'da/ ki mo yan mo tani 'kwani 'kokini daka/ kun kwanykunu ka 'the mo be.

⁶ Hili wakki/ a'di ka 'the mo tani a'di diki ta to mmo'dap ki mii mo. Wakki/ a'di diki wakan mo tani a'the midi diki ta a'the mo be.

⁷ Dhali ki gwonta si'da/? 'Kona 'Kwani ma Israyiil ki bu'th mo a'di jin napkina uni mo. Uni gun kwanykunu mo tani uni bu'thki a'di mo. Hili unin tiya 'bi'thkunuwa du mo be.

⁸ Me'd gwo jin 'kwarkunu mo ki:

Arungimis ki ci bwa eny'ce'd mo,

ki em buni mini 'taki 'koki mish mo mo dhali 'ce si'da/ mini 'taki 'koki cik' gwo mo,

ntaga teej gana/ yansan mo.

⁹ Dhala Dawuu'd o gwo mo ki:

Dhalka ayuk jin yuka uniya yuk mmutul 'kup mo tani warki'd ki mo jin ceshuwa cesh mo dhali ka gume/ si'da/ mo

dhali woshu jin gol uni mo dhali jin garr uni 'kus mo.

¹⁰ Dhalki em buni warkin ki mondhurumi'd mo ki uni mini 'koki mish mo mo,

dhali dhalka apom buni mmogomki'd ki sule/ sule/ mo.

Bway Mowoth gom 'Kwani kun 'Koki Ta 'Kwani Yahuuda/ mo

¹¹ Wakan aha/ dota gwo mo ki: A/ki uni golkunu jin mina uni 'taki bit' mo 'taa? Dhalku/ ki tosh kan. Hili gom gwon dhan buni mo tani a'di ipu'dkina mowoth e 'kwani kun 'koki ta 'Kwani Yahuuda/ mo be. A'di gi wakan mo tani a'di idhu 'Kwani ma Israyiil mmota atacam bwa mo.

¹² Dhali wakki/ gwon dhan buni ta 'pemen pa mo gom 'kwaniny'cesh mo tani dhali wakki/ miim buni kun ush me'd mo ta tom pa mo gom 'kwani kun 'koki ta 'Kwani Yahuuda/ mo tani bakata 'te/ 'peni 'tu'd buni mo?

¹³ Hili aha/ torkina um gwo mo um kun 'koki ta 'Kwani Yahuuda/ mo. Ma isi me'd jin taka/ amankaru ki she/ gom 'kwani kun 'koki ta 'Kwani Yahuuda/ mo tani miim pem mmomii to mo tani ek'kika/ mo be

¹⁴ jin minu dhu gwasu 'Kwani Yahuuda/ mmo'ta'c bwa mo dhali ki mii gi wakan mo tani unin tiya takunu is ki me'd mo be.

¹⁵ Dhali wakki/ gwo wak' buni ta 'pemen jin wanuwa wan 'ba/ mo mmo'tal isa 'de/ mo gom 'kwaniny'cesh mo tani mombu'th buni midi ta 'pemen wakata mo? Hili mondiki/e 'peni mowu 'te/ mo.

¹⁶ Dhali wakki/ ara gana'th 'peni maman to jin ta jin t'wa/a/ jin cinu mo ta jin kogu mo tani wakan si'da/ min ma gabul piti ka 'duntula/ ta jin 'kogu mo. Dhali wakka birman ta jin kogu mo tani wakan si'da/ abim piti mo be.

¹⁷ Dhali hili wakka bin tiya kwa/kunu mo tani dhali/ e jin tana ale/ 'te/ 'pena setuun jin 'kaki is piti 'te/ kamkunu mo e embul buni mo tani mmonyak' pa ta ki cwa setuun 'te/ mo tani

¹⁸ dhalku/ ki kar 'ba/ ki ca eya bi 'te/ mo. Dhali wakki/ /e kar 'ba/ ki ca mo 'te/ tani kayi gwo e ki/ e a'di idiki tela birman sho'k mo, hili abirman caan jin telki/ e sho'k mo be.

¹⁹ /E mini o gwo mo ki, abi 'ce'dkunu wakan jin miga/ 'taki ta kamkin ki a'di mo.

²⁰ A'di ta gwon ganayi. Uni 'ce'dkunu mo haali/ uni dar gi mongam gwo is mo. Hili /e ntelki mo gi gamu gwo is sho'k mo 'te/. Wakan dhalku/ 'ba/ ki kar ki ca mo hili doshi ki jin ko/ mo ma.

²¹ Haali/ wakki/ Arungimis diki tor momiimiim piti apo/ abiny cwa ka 'kup 'de/ mo tani wakan si'da/ a'di midi diki tor a'di ki /e mo be.

²² Hili a'di mo ma, mo jin miin ma Arungimis ki bwan'kush mo dhali mo jin miinuwa jisa ki 'bi'th ka kar/ e 'peni Arungimis mo. Jisan kar/ e yan 'kup ki uni gwansan kun bit'kin mo, hili Arungimis midi mii ki bwan'kush gom /e mo

wakki/ /e mini ca' b ki sule/ e mo gi bwanj kush piti mo. Waḳki/ a'di diki wakan mo tani /e si'da/ minu 'ciṭh mo be.

²³ Dhali kan si'da/ gom kun tiya mo tani wakki/ uni mini 'taki buḳ 'twa/ 'peni mo jin ushu gwo gam is mo tani uni minu ḳam mo be. Haali/ Arumgimis ta gi mom'bi'th mmokam uni dok/e mo be.

²⁴ Haali/ wakki/ /e 'ciṭh kunu 'peni cwa setuun jin 'kaki 'pen piti ka 'kup 'de/ mo dhali /e ḳam kunu ki ca'ckon mo /e jin diki di ka 'kup 'de/ e cwa setuun jin cu'th kunu mo tani bakata imin ma biny cwa ka 'kup 'de/ ḳam ka nyan'ko'd dok/e e cwa setuun bunin gana/ mo.

Mo gi Tuku 'Kwani ma Israyiil Is mo

²⁵ Ki um mini 'koki 'ko ki ji mol mo mo e mohe'k em bum mo tani aha/ ṅapa um mmomish gwo 'ban mo, a'di jin ta gwo jin bagu mo, iwaḳa. A/usiny'ce pu'dki'd e 'ban gi 'Kwani ma Israyiila tiya mo ntaga waambuhany 'kwani kun 'koki ta 'Kwani Yahuuda/ 'tu'dkunu mo mmopu'd mo be.

²⁶ Dhali wakan si'da/ aris 'Kwani ma Israyiil iminu ta is ki me'd mo be. Me'd gwo jin 'kwarkunu mo ki:

Ka man'cuka 'cuk 'ba/ mo midi pu'du/ 'pena Sihyuun mo tani a'di midi dhi'th mo gi ushuwa ush gom Arumgimis sho'k mo 'pena Yakuub mo be.

²⁷ Dhali a'di yansan midi ta gwom pem jin gamu me'd nyakki uni mo, ki aha/ mina ḳal miinthus buni mo be.

²⁸ Isi gom gwom 'borga/ mo tani uni ta 'kup ka Arumgimis mo gom gway bum mo. Hili isi gom unim piti kun kwanykina a'di mo tani uni a'di ita ku gi ena a'di gom gway gi ibabam buni kun 'kokin mo ṅtwa/a/ mo be.

²⁹ Haali/ to kun cinu ki me'd mo dhali ayuk ma Arumgimis uni 'kon ka ḳanne/ mo.

³⁰ Jasi me'd jin 'kokina um mo mmo/usha Arumgimis gwo ha e mo tani hili shwane/ um bu'thki momiimii piti mo gom mo jin usha uni gwo mmoha e mo be.

³¹ Wakan uni ushki gwo ha e mo jin mina uni 'taki gam momiimii si'da/ gom momiimii jin ṭorkunu um mo be.

³² Haali/ Arumgimis tulki'da aris 'kwani 'baar 'twa/ mo mmo/ush gwo ha e jin mina a'di miimii apo/ uni 'baar mo be.

³³ Ayy mmo'kula mo jin tan ma Arumgimis pa ki 'kul mo dhali ayuk piti mo dhali momish gwo 'ban ma Arumgimis mo. Mmotheke'th gwon dwall piti wanu imola dhali mmothuk bway piti ki e mo tani wanu imola.

³⁴ Haali/ kaja mishki'da adun Tapa Arumgimis mo walla aja ita'da manlogom a'di gwo mo?

³⁵ Walla aja a'di jin ciki a'di to jin cinu ki me'd mo ki a'di midi 'taki ci to ka garr 'kus mo?

³⁶ Haali/ 'peni a'di mo dhali ki a'di mo dhali e a'di mo tani aris to 'baar 'kokin mo. Dhali e a'di mo tani dhalki monyca di'd ki sule/ sule/ ya ye 'ba/ mo. Amen.

12

Mmota To jin 'Ciṭhu/ 'Kus jin Di ki E mo

¹ Haali/ a'di gi wakan mo tani aha/ yipa 'kup 'kup ki um mo, iwaḳ, gom momiimii ma Arumgimis jin mina umi ci is bum ka Arumgimis mo mmota to jin 'ciṭhu/ 'kus jin di ki e mo, jin ḳogu mo, jin mish ma Arumgimis bu'th mo, jin ta to gi shi/in bum jin lunja uma lunj mo be.

² Dhalku/ mii ki tash me'd 'kwani kun 'koni mony'cesh yan mo ma. Hili aḳi a/aḳ mo mmota ga dun this mo ki um mini pal a'di jin ta bwa ma Arumgimis

mo jin ta a'dim 'boro'd mo dhali jin mishu bu'th mo dhali jim 'borgaŋ gana/ mo be.

³ Haali/ ka 'the jin cikunu aha/ mo tani aha/ ona um gwo ka 'dete/ 'dete/ ibwam um ki a'din 'de/ mididi diki kar is piti mmoboloça boloç ki bwa mo jin mina a'di mii diki ka kar is kan mo ba/. Hili mmokulum bwa gi talu 'de/ mo aris 'kwani 'baar ka 'dete/ 'dete/ isi ki sheŋ gwo ma Arumgimis jin gamu is mo jin cinu a'di mo be.

⁴ Haali/ me'd jin ƚala buŋgwar isa 'de/ mo tani ana tana gi tom buŋgwar is ka ris mo. Dhala ris tom buŋgwar is uni 'koki ta jasi en 'de/ mo.

⁵ Wakan ana bala wana risa e buŋgwar is ma Kristhos mo dhali ka 'dete/ 'dete/ mo tani tom buŋgwar is ta anan tiya mo.

⁶ Ana cinu to jin cinu ki me'd mo ki she/ ki she/ mo isi ka 'the jin cikunu ana mo. Dhalki ana miina to ki uni mo ma. Waƚki/ gwo jin cinu ki 'twa/, ka para po/ gom moŋgam gwo is bana mo tani

⁷ waƚki/ ta momii to, e momii tom bana mo dhali a'di jin ƚori gwo mo e gwontor piti mo

⁸ dhali a'di jin malaski'da malas, e malas piti mo dhali a'di jin ci to, ka 'ka'd me'di is mo dhali a'di jin woƚki'da woƚh, ka nyor gana/ mo dhali a'di jin miimii jin miinuwa mii mo ki bwaŋ 'kunyud mo be.

Mo gi 'Dapu 'Twa/ mo e Miŋ 'Kwani ma Yesus mo Mmo'ko mo

⁹ Dhalki mo/en wara'd ki jin gana/ mo. Shi/i a'di i e mo tani jin ta jin thus mo. 'Dapi 'twa/ mo e a'di jin 'boro'd mo.

¹⁰ Eni ka rem 'kup mo mmota ikam gana/ mo dhali tayi ashu/um bway mo mmotaƚa ƚaƚ ka rem 'kup mo mmotor montak mo.

¹¹ Dhalku/ ki ta ƚumu'c eya nyor ki sule/ mo ma. Tayi awa 'bpa/ e Shi/in mo mmomii to gom Tapa mo.

¹² 'Kunyi bwa mo ma e mo ma 'teŋ kapem bum mo. 'Kuçi bwa mo ma ki 'kari'th e monto'c bwa mo. 'Dimi 'kup ki sule/ e mon'tho mo ma.

¹³ Nyaki to kun minu ta mo gom imandhunu ki she/ mo. Boti ki mii jin mina ci ta gu'b bum nƚal mo ma.

¹⁴ 'Bori uni gwansan mii mo ma kun ƚo'c um bwa mo. 'Bori a'bor bwa i is mo ma. Dhali dhalki uni ki jee mo.

¹⁵ 'Kunyi bwa mo ma nyakki uni gwansan kun 'kunya bwa mo. Koyi mo ma nyakki uni gwansan kun gwokin mo.

¹⁶ 'Ka'di bwa ki 'ka'd mo ka rem 'kup mo ma. Dhalku/ is ki kar ki ca mo, hili wuyi is ka 'cesh nyakki 'kwani en'thi/ mo ma. Dhalka boloç ki boloç ki sule/ mo.

¹⁷ Dhalki tonthus ki raki bway mo a'di jin ta jin thus mo mmokulum gwo ibwa ntwa/a/ mo a'di jin 'boro'd e bwambor jis/eŋ 'kwani 'baar mo.

¹⁸ Waƚki/ mishu mii isi mmomisha /e a'di mii mo tani ƚa'bi mo ki mo ma ku'th is nyakka ris 'kwani 'baar mo.

¹⁹ Um gun enka/ dhalka ri'c ki ri'c ki is bum mo ki sule/. Hili dhalki a'di ka nyor ma Arumgimis mo. Haali/ a'di 'kwarkunu mo ki: Mo ma ri'c mo tani ta jim pem mo be. Aha/ mina rak to ibway mo. A'di ta gwon Tapa mo be.

²⁰ Hili waƚki/ a'di jin ta 'kup pini 'kosha te/ mo tani ƚiyi a'di tonte/ mo ma. Dhali waƚki/ a'di budha yi'de/ mo tani ƚiki a'di mmopi mo ma. Haali/ gom mii gi wakan mo tani /e ki wola kapany o'di 'kup piti mo be.

²¹ Dhalku/ ki war ki uni gun pinu e ki tonthus mo ma. Hili piya ris tonthus e mo ki miim 'borga/ mo.

13

¹ Dhalka ris 'kwani 'baar ka 'dete/ 'dete/ dhu is 'ko'di me'd ma hakuuma jin ta gi 'bi'th mo. Haali/ mom'bi'tha kamu/ yisa di'da. Hili isi ciki/ 'peni Arumgimis mo be. Dhali uni gwansan kun 'kokin mo tani uni dhukin ma Arumgimis mo be.

² Dhali wakan mo tani uni gun roçkin ki mom'bi'th mo tani roçkin ki a'di jin torkin ma Arumgimis uni mo. Dhali uni gwansan kun roçkin mo tani uni mini 'dap uni ka nyok gi gwon dwall ki is buni mo.

³ Haali/ imanjiya ji 'koki ta ku gi minu ko/ mo gom miim 'borga/ mo, hili gom mii shigga/ 'te/ mo. /E mini 'taki diki ko/ a'di jin ta gi mom'bi'th 'taa? Dhali wakki/ wakan mo tani miyi a'di jin 'boro'd mo ma dhali /e mini bu'th momaṅ piti mo be.

⁴ Haali/ a'di ta ciṅkina/ ma Arumgimis gom mom'boro'd pini mo be. Hili wakki/ /e tham to mii mo tani ko/ki is mo ma. Haali/ a'di diki kaḷ gandala turgam piti ka kar 'kup 'te/ mo. A'di ta ciṅkina/ ma Arumgimis mo haali/ a'di ta'da mandakḷ bwana dwall gwom piti 'kup ka nyor piti mo goma mantham mii mo be.

⁵ Haali/ a'di wakan mo tani dhalki a'din 'de/ midii mii kar is piti 'ko'di me'd mo, yisa jasi gom mmothera nyor ma Arumgimis 'te/ yisa, hili si'da/ gom 'twa/ ma du mo be.

⁶ Haali/ gom 'kup gwo jin nyaḳki'd kan mo tani um mini ciya thulpa/ mo haali/ uni gun ta gi mom'bi'th mo uni ta imanmii to goma Arumgimis mo, kuthi is mo ki sule/ e to yan ka jin gana/ mo.

⁷ Cika ris uni to kun ta kun cila uni mo. Cika thulpa/ e uni gun cil ma thulpa/ mo, dhali ciki uni to gun woṅhi/ to 'kup mo dhali koki uni gun minu ko/ mo dhali taki uni gun minu tak mo.

⁸ Dhalku/ ki di ka mure/ i'ba/ gom to gi wathiṅ kamu/ mo, hili isi ciki/ mmo/ ena en ka rem 'kup mo. Haali/ a'di jin ene'da manyaḳ ḳa'b piti mo tani thimki gwoṅkan jin cinu mo be.

⁹ Gwoṅkan kun 'kwarkunu mo kun o gwo mo: /E mini dhalku/ ḳal ki mii mii mo. /E mini dhalku/ ki mii 'kosha 'kosh mo. /E mini dhalku/ ki mii kwal to mo. /E mini dhalki bwa ki mii 'thoṅ mo. Dhali gwoṅkana kamu/ ma jin 'dapa'd ki gwon tul 'kup yan mo tani o gwo mo ki: /E mini mii ena manyaḳ ḳa'b pini me'd is piniṅ gana/ mo be.

¹⁰ Mo/en diki ta to jin ṅudhu mii mo goma manyaḳ ḳa'b mo. Dhali wakan mo tani mo/en ki thim gwoṅkan jin cinu mo be.

¹¹ Goma 'ban yansan mo tani /e ki mish mo mo. Ka tente/ pu'dki'd mo hila/ jin mina /e mer e mo 'peni mo/ish e mo. Haali/ woṅḅ 'disha'dish mo e ana shwane/ ki ana gamkina gwo is nṅwa/a/ mo be.

¹² Mon'thiny a'di 'baarki'd mo dhali montee a'di pu'dki'd hila/ mo. Wakan dhalki ana ṅaga mii gi mondhurumi'd ka piye/ mo dhali hitha goṅgoro/ gi moṅkush mo.

¹³ Dhalki ana miina ki is bana ki dher mo ma, me'd jin miinu e montee mo. Yisa mmomii ki ra'b e moṅkupa su mo dhali e mo jin 'kosh ma suwa 'kosh mo. Yisa e mo jin tanu dhora su dhali e mo jin kanuwa kanthi/ mo. Yisa e mo jin waluwa wal mo dhali e mo jin tanuwa ṅacum bwa mo.

¹⁴ Hili hithi Tapa Yesuḳ Kristḱos i is mo ma dhali dhalki gwo ki mii kulum ibwa nṅwa/a/ gom bungwar is mmoṅe a'di e mon'dap e mo.

14

¹ Hili gom wathi/ jin 'ka'da is mo e mongam gwo is mo tani hani a'di mo ma. Hili yisa mmosu'k ki gwo kun 'kon ka kwa/m bwa mo.

² Wathin 'de/ gam gwo is ki a'di mishi shwa aris to mo. Dhali wathi/ jin 'ka'da is a'di shwa jasi ton dhii/i'd mo.

³ Dhalku/ ki dhal a'di jin shwa to ki wak a'di jin ga/i to mo. Dhali dhalku/ ki dhal a'di jin ga/i to ki ta ash/ m bwa gom a'di jin shwaki to mo haali/ Arungimis han a'di mo be.

⁴ /E ja jin midi wak cin/ki/ gi wathin kamu/ mo? A'di ta mii ibwambor tapam piti jin doshkina a'di mo dhali bit mo. Dhali a'di minu kar mmodosh mo haali/ Tapa mish a'di kar mmodosh kan mo be.

⁵ Wathin 'de/ karki'da cim 'de/ mmobola kamu/ e ki 'bor mo, ka kamu/ si'da/ kara'da tee 'baar mo ki jiny nyak mo. Dhalka ris 'kwani 'baar ka 'dete/ 'dete/ mishin ka daran du eya dum bunin/ gana/ mo.

⁶ A'di jin karki'da cim mo tani kar a'di mmotak Tapa mo be. A'di si'da/ jin shwaki to mo tani shwa a'di mo mmotak Tapa mo be, haali/ a'di 'borki'da Arungimis bwa i is mo, me'd a'di jin ga/ki to mo tani ga/ki a'di mo mmotak Tapa mo dhali mmo'bora Arungimis bwa i is mo be.

⁷ Wathin 'de/ 'peni bwam ana yisa di'da jin ca'bki'd gom is piti mo. Dhali jan kamu/ 'peni bwam ana yisa wuki'd gom is piti mo yisa.

⁸ Wakki/ ana 'kona ki e mo tani ana 'kokina ki e gom Tapa mo. Dhali wakki/ ana wuna mo tani ana wukina e Tapa mo. Dhali wakan mo, wakki/ ana 'kona ki e mo walla wakki/ ana wukina mo tani ana tana ku gi Tapa mo be.

⁹ Haali/ gom 'pemen yan kan mo tani aKristhos wuki'd mo dhali diki'd ki e mo dok/e ki a'di midi ta Tapa gi uni kun wukin mo dhali gi uni kun 'kon ki e mo be.

¹⁰ Atinta iwakkina /e akam pini kan mo? Walla /e si'da/ atinta shi/kina /e akam pini mo kan? Haali/ ana 'baar mo mina doshi bwambor ma Kursi ma Arungimis jin dwallu gwo mo be.

¹¹ Haali/ a'di 'kwarkunu mo ki:
Me'd jin dika/ ki e mo tani a'di ta gwo jin ona Tapa mo, aris 'kupa'dupuni 'baar mo mini lunj aha/ mo
dhali arisa le'di 'baar mo mini ci 'twa/ man/ goma Arungimis mo be.

¹² Wakan ana ka 'dete/ 'dete/ mina mii ci is banan/ gana/ mo ka 'dete/ 'dete/ ka Arungimis mo.

Dhalku/ ki Dhala Kam Bum Golu mo

¹³ Dhali wakan dhalkina dok/e ki waka wak ka rem 'kup mo. Hili yisa si'da/ mmogam gwo me'd ki sule/ sule/ mo mmokar to jin golo'da gol mo walla mmonona kan ki bway mo.

¹⁴ Aha/ misha dhali lala sho'k ki gwo e Tapa Yesus Kristhos ki ton kamu/ jin ga/u ki is piti yisa di'da. Hili a'di ta to jin ga/u gom macin tiya, uni kun kulum a'di ibwa ki a'di ta to jin ga/u mo be.

¹⁵ Wakka kam pini raku mo goma shwantom pini mo tani /e dok/e bathi mo/en yisa. Dhalku/ ki dhal ton/te/ jin shwana /e ki ci a'din tal 'der/ kamu/ jin wun ma Kristhos sho'k mmo'ce'd mo.

¹⁶ Wakan dhalku/ ki dhal to jin 'boro'd gom /e mo tani soru ki a'di ta tonthus mo.

¹⁷ Haali/ Bampa/ ma Arungimis diki ta 'pemen gwo gom ton/te/ mo dhali tom/ pi mo 'te/. Hili gom mo ma kar/ e mo dhali mo ma ku'th is mo dhali mon' kuny bwa e Shi/in Dheleladhele mo be.

¹⁸ A'di jin miiki to wakan goma Kristhos mo tani mish ma Arungimis bu'th mo dhali ta a'din/ gana/ jin man/ a 'kwani mo be.

¹⁹ Haali/ a'di gi wakan mo tani dhalki ana ura to jin midi dhuwa dhu ki mo ma ku'th is mo dhali mmotel sho'k ka gam 'kup mo.

²⁰ Dhalku/ ki dhal gwon tonte/ ki 'ce'da tu'c ma Arungimis sho'k mo. Aris to 'baar mo ka jin gana/ dhelelkin mo. Hili a'di ta to jin thamu mii mo gom macin tiya kun dhu tiya mmo'ta'k mo gom to jin shwakina uni mo be.

²¹ A'di ta miim 'borga/ mmo'koki 'ka shum walla mmopi yimana mura'th jin ka/u ki nah nah mo walla mmo'koki mii ton tiya ki suny suny kun mini dhala kan mmokol mo.

²² Mongam gwo is jin takina /e mo tani kari a'di ki is pini um ka Arungimis mo ma. Bwam 'boro'd gom wathi/ jin diki cu gwon dwall ki is piti mo gom to jin gwona a'di 'kus mo.

²³ Dhali hili a'di jin shi/i bwa 'kup mo tani waku mo be, wakki/ a'di shwaki to mo haali/ a'di yisa mii'd me'd mii 'peni mo gi gamu gwo is yisa. Haali/ aris to gun miinu ki dar gi mongam gwo is ki suny suny mo tani ta miinthus mo be.

15

Manj Amannyak Ca'b Pini mo, Yisa Is Piniy Ganaa

¹ Ana uni gun 'bitha is mo tani mina mii kal to gi uni gun 'ka'da is kun a'ha/ a'ah mo dhali mmo'koki manj is bana mo be.

² Dhalki ana ka 'dete/ 'dete/ manja amannyak ca'b bana mo gom tom 'borgam piti mmotel a'di sho'k mo.

³ Haala Kristhos diki manj is pitinj gana/ mo, hili me'd gwo jin 'kwarkunu mo ki: Awak jin wakina uni gwansan /e mo tani uni bitkina po/ aha/ mo be.

⁴ Haali/ me'd gwo yin jin 'kwarkunu kadhamo/ mo ka tee yin mo tani 'kwarkunu mo mmoye'th ana gwo sho'k mo mmotela tel sho'k mo dhali mmoroça roç mo gom Gwo ma Arungimis kun 'kwarkunu mo tani ana mina ta gi mo ma 'tej kape/ mo be.

⁵ Dhalka Arungimis jin ta jin tele'da tel sho'k mo dhali mmoroça roç mo tani ci um bwa mo mmo'ko ki bwana tal 'de/ ka rem 'kup isi ki bwa ma Kristhos jin ta'da Yesu mo be.

⁶ Ki umi montal 'de/ mo dhali ki 'twan tal 'de/ mmokar a'di jin ta'da Arungimis mo dhali jin ta'da Baba gi Tapa Yesu Kristhos bana ki ca mo.

Gwom 'Borga/ e 'Kwani kun 'Koki Ta 'Kwani Yahuuda/ mo

⁷ Hayi ci ka rem 'kup mo ma. Wakan me'da Kristhos a'di hay ki um mo gom monyca ma Arungimis mo be.

⁸ Haali/ aha/ tora um gwo ka Kristhos warki'd ki cinjina/ e mo jin 'cithuwa munyal yis mo mmotora Arungimis gwoj gana/ mo mmothim gwo jin onu is yan jin cikunu idhan ibaba mo be.

⁹ Dhali ki mii yan ki 'kwani kun 'koki ta 'Kwani Yahuuda/ mini kar Arungimis ki ca mo gom momiimiim piti mo be. Me'd gwo jin 'kwarkunu mo ki:

Wakan aha/ mina manj /e mo e bwaman 'kwani kun 'koki ta 'Kwani Yahuuda/ mo,

dhali yuk gway gom gway pini mo be.

¹⁰ Dhali dok/e a'di onu mo ki:

'Kunyi bwa mo ma, ayy 'kwani kun 'koki ta 'Kwani Yahuuda/ nya'ki 'kwanim piti mo.

¹¹ Dhali dok/e:

Manj um Tapa mo, um 'kwani 'baar mo kun 'koki ta 'Kwani Yahuuda/ mo, dhali dhalka ris 'kwani 'baar ki 'beles manj a'di mo.

12 Dhali dok/e Ishaya o gwo mo ki:

Abirman ma Yassa midu pu'du/ mo,

a'di jin midu cu mo mmota tapa apo/ 'kwani kun 'koki ta 'Kwani Yahuuda/ mo,

dhali e a'di mo tani mmina 'kwani kun 'koki ta 'Kwani Yahuuda/ nta ga 'teŋ kape/ mo be.

13 Dhalka Arungimis jin ta ji gi mo ma 'teŋ kape/ 'tu'd um ka ris bwan 'kunya/ dhali moŋku'th is e moŋgam gwo is mo, wakan ki mom'bi'th gi Shi/ in Dheleladhelel ki um mini ish ka enthus e mo ma 'teŋ kape/ mo be.

14 Aha/ ki is pem kapu/ gom um iwak pem mo, ki um ki is bum 'tu'dkunu ki piny piny ki miim 'borgaŋ gana/ mo dhali mmo'tu'd ka risa yuk mo dhali mmomish cin tiya sho'k ye'th ka rem 'kup mo.

15 Hili ka 'ban kuku/ mo tani aha/ 'kwarkina um gwo ki dar gi monyju/ gana/ mo mmorogom um gwo mo haali/ goma 'the jin cikin ma Arungimis aha/ mo be.

16 Mmota amanmii to goma Kristhos jin ta'da Yesu mo gom 'kwani kun 'koki ta 'Kwani Yahuuda/ mo mmota gasiis ma atu'c gi gwom 'borga/ ma Arungimis mo. Wakan ki to jin isi'd gi 'kwani kun 'koki ta 'Kwani Yahuuda/ minu mish bu'th mo a'di jin dhagamkunu ki Shi/in Dheleladhelel mo be.

17 Wakan eya Kristhos jin ta'da Yesu mo tani aha/ tana gi 'kup gwo mo mmokar is ki ca mo goma tu'c pem goma Arungimis mo be.

18 Haali/ aha/ dinaki mii ka gugundhi/ mo mmoci gwo gom toŋ kamu/ 'de/ hili isi ciki/ a'di jin wagaskin ma Kristhos ki aha/ mo mmodhu 'kwani 'peni 'kwani kun 'koki ta 'Kwani Yahuuda/ mmoha gwo e mo ki gwo mo dhali ki mii mo be.

19 Ki mom'bi'th gi jamas mii mo dhali momer dhali ki mom'bi'th gi Shi/ in Dheleladhelel mo. Gom mii gi wakan 'peni Pa Urushaliim mo dhali ntagi mo is 'ko'd e Pa Illirikuun mo tani aha/ thinkina gwom 'borga/ ma Kristhos mmoci mo be.

20 Wakan mmokar a'di ki tom pem jin guka/ ki e mo mmoci gwom 'borga/ mo e mo jin dinuki mish gway ma Kristhos naskina/ mo ki aha/ mina diki nyaŋ to e mo jin ka'ba wathin kamu/ mo be.

21 Hili me'd a'di jin 'kwarkunu mo ki:

Uni mini hil a'di mo, uni kun 'konuki tor a'di ki sule/ mo,

dhali uni mini mish gwo 'ban mo, uni kun 'koki cik gwo gom a'di ki sule/ mo be.

ABuulus Dina Gwo Mbwa mo Mmobuŋ e 'Kwani gi Pa Ruumiya mo

22 Yan a'di ta 'kup gwo mmononkunu aha/ bway mo me'd ka hony/e mo mmoyaku/ i um mo be.

23 Dhali hili shwane/ haali/ aha/ dara ki mo mo goma tu'c e bampa/ gwansan ka kukul is mo dhali haali/ aha/ dina gwo ibwa kagahara yil ka ris mmoyaku/ i um mo be.

24 Aha/ tora ki ya par um e mo mmomiga/ pe ki tur mo me'd jin miga/ ya Pa Ispaaniya mo dhali mmomina umi sus aha/ m'pen mo e moyam pem imun mo wakki/ ntwa/a/ mo tani aha/ mina 'taki kap buti um ari'ceenne/ mo.

25 Hili shwane/ aha/ yakina ya Pa Urushaliim ki to ime'd mo mmowoth uni gun dhunu ki she/ ki dhelel dhelel mo be.

26 Haali/ 'peni Pam Makiduniyya mo dhali Pa Akaa/iya mo tani uni 'borkina bwa mo mmoci ton tiya gom unin tiya kun aha to mo e bwam uni gun dhunu ki she/ ki dhelel dhelel e Pa Urushaliim mo be.

27 Uni 'kokina bwa mmo'bor mo mmomii a'di mo dhali ka jin gana/ uni 'kon ma mure/ m'ba/ mo gom uni mo, haali/ wakki/ 'kwani kun 'koki ta 'Kwani

Yahuuda/ daka pu'dkin mmopwak to gi shi/in buni bwa mo e mom'bor mii mo tani uni ka si'da/ ba/ mini ta imanmii uni to ki mom'bor mii ki to gun isha e uni mo be.

²⁸ Gom a'di gi wakan mo tani me'd jin miga/ 'baar mii yan mo tani dhali ciki uni to ki 'dantar mo gun tulu is mo tani aha/ mina yaki bway bum e Pa Ispaaniya mo be.

²⁹ Dhali a'di mishga/ ki aha/ mina yaku/ i um mo tani aha/ mina yaku/ ki mon'tu'd gi mom'bor mii ma *Kristhos* mo be.

³⁰ Aha/ yipa 'kup 'kup ki um mo, iwak, gom Tapa Yesus *Kristhos* bana mo dhali gom mo/en gi Shi/in, ki um mini uth mo mmontal 'de/ nyakki aha/ mo e mon'thom bum eya Arumgimis mo gom aha/ mo be.

³¹ Ki aha/ minu 'cuk mo 'peni uni gun 'koki gam gwo is e Pa Yahuudiyya mo dhali ka tu'c pem jin miiga/ gom Pa Urushaliim mo tani minu mish bu'th mo e uni gun dhunu ki she/ ki dhelel dhelel mo.

³² Wakan ki bwa ma Arumgimis mo tani aha/ mina yaku/ i um ki bwan 'kunyga/ mo dhali aha/ minu waç mo e bampam bum mo be.

³³ Arumgimis gi monku'th is midi di e umi 'baar mo. Amen.

16

Monthe Me'd jin Thenu ka Karembuye/ mo

¹ Aha/ kana um gwo mo gom 'bawah bana ka Pibi jin ta'da mancila to hil goma kaniisa gi Pan Kankariya mo be.

² Ki um mini bu'th a'diyim mo e Tapa me'd mii jin ha a'di me'd me'd kun dhunu ki she/ ki dhelel dhelel mo dhali wo'hi a'diyim mo ma e ton tiya jin min ma yimi mii ta 'peni um mo haala yim a'di wo'hi'ki'da wo'hi ka ris mo dhali bun'gwar is pem gana/ si'da/ mo be.

³ Theka Piriskilla me'd mo ma dhali Akiila, unim pem kun nyakkaa/ atu'c mii eya *Kristhos* jin ta'da Yesus mo be.

⁴ Uni gun ci 'bam buni ki to gom mondiki/em pem mo. E uni mo tani jasi aha/ 'de/ yisa, hili si'da/ eya risa kaniisa 'baar mo kun 'koki ta 'Kwani Yahuuda/ mo ci mom'bor bwa i is mo be.

⁵ Theka kaniisa me'd mo si'da/ kun 'kon e gu'b buni mo. Theka Abaynitus me'd mo a'di jin enka/ mo ma. A'di ta jan 'de/ jin t'wa/a/ jin tu'kki'da bor mo e Pa Akaa/iya goma *Kristhos* mo be.

⁶ Theka Mariyam me'd mo ma a'di jin miiki'da tu'c jin 'batha'ba'th e bwam um mo.

⁷ Theka Andaruunikus me'd mo ma dhali Yuniyas jin ta'da bas pem dhali agarr pem jin nyakkaa/ ca'ba sijin mo. Uni ita uni ibwan 'kwani kun dhunu ki she/ mo dhali uni 'kokin mo eya *Kristhos* nt'wa/a/ ki aha/ mo be.

⁸ Theka Ambiliyas me'd mo ma a'di jin enka/ e Tapa mo be.

⁹ Theka Urbanus me'd mo ma a'di jin ta'da mannyak to mii jin ta jim bana eya *Kristhos* mo. Dhali a'dim pem jin enka/ jin ta'da Istakis mo.

¹⁰ Theka Aballis me'd mo ma a'di jin manu eya *Kristhos* mo. Theki uni gwansan me'd mo ma uni gun tana wak ma Aristubulus mo.

¹¹ Theka bas pem me'd mo ma jin ta'da Hirudiyuun mo. Theki uni gwansan me'd mo uni kun 'kon e Tapa mo, uni gun tana wak ma Narkissus mo.

¹² Theki uni gwansan me'd mo kun miikina tu'c e Tapa mo uni kun ta iTaripeena dhala Taripuusa mo. Theka Barsiis me'd mo ma jin enu mo, a'diyim jin miiki'da tu'c jin 'batha'ba'th e Tapa mo.

¹³ Theka Rupus me'd mo ma, a'di jin leke'thkunu e Tapa mo dhali kum si'da/ jin ta'da ata'dam pem mo.

14 Theka Asinkiriitūs me'd mo dhala Piliguun mo dhala Harmaas mo dhala Baŕerubaas mo dhala Harmiis mo dhali awak kun nyak 'ko ki uni mo be.

15 Theka Piluluugus me'd mo ma dhala Juliya mo dhala Niriyuus mo dhali 'bwham piti mo dhala Ulumbaas mo dhali aris uni gun dhunu ki she/ ki dhelel dhelel mo kun nyak 'ko ki uni mo be.

16 Theka the me'd ka rem 'kup mo ma ki mo gi gamu 'twa/ 'kup ki 'bore/ mo. Arisa kaniisa ma Kristhos theki um me'd mo be.

17 Aha/ yipa 'kup 'kup ki um mo iwak ki um mini hil uni gwansan kun dhu bwa ka cem bwa mo dhali kun ta imanraŕa rak kun kolu kun se gwo i is mo, a'di jin ŕorkunu um mo. 'Cuki uni i 'kup mo ma.

18 Haali/ 'kwani kun ta thus kan mo tani 'koki mii to gom Tapam bana ka Kristhos mo hili uni mii to gom bwam buninŕ gana/ mo. Dhali ki gwom 'borga/ mo dhali ki gwo manŕ mo tani uni he'kki tiya adu e kun aŕha/aŕh mo.

19 Haali/ ki um 'kon mmoha gwo e mo tani a'di mishkunu e mo 'baar mo dhali gom a'di gi wakan mo tani aha/ 'kunykina bwa gom um mo. Hili aha/ ona ki um mini yukayuk mo mmomish a'di jin 'boro'd mo dhali ki um mini dar ga maŕi cine/ gom a'di jin ta thus mo.

20 Dhali yan'ko'd Arungimis jin ta gi monku'th is midi pucura Seŕaan eya 'cesh 'peni bwam sho'k bum ki 'dishe/ mo. A'the gi Tapa Yesuŕ Kristhos bana dhalki a'di di'd e um mo ma.

21 Timuŕhawuus a'di jin nyakki'da tu'c mii ki aha/ mo tani theki um me'd mo, wakan si'da/ miikin ma Luŕiyus mo dhala Yasuun mo dhali Susibaŕrus kun tana bas pem mo be.

22 Aha/ jin tana Tartiyuus jin 'kwarki gwo yansan mo tani aha/ thekina um me'd e Tapa mo be.

23 Gayus a'di jin ta'da 'borim bwa gom aha/ mo dhali goma kaniisa 'baar mo tani theki um me'd mo. Arastus jin cila 'pem pan ton dhu mo dhali akam bana ka Kawartus theki um me'd mo be.

24 A'the gi Tapa Yesuŕ Kristhos bana dhalki a'di di'd e umi 'baar mo. Amen.

Mmote Gwo mo ki Montak mo

25 Dhali shwane/ e a'di jin mish um 'bi'th is mo isi ki gwom 'borgam pem mo dhali ki gwo jin cinu goma Yesuŕ Kristhos mo isi ki gwo jin 'ceenu 'peni gwom bag yan mo tani a'di jin karu ki 'twan 'dap ki yil ka ris 'peni kadhamo/ innii mo.

26 Hili shwane/ a'di ŕoru eya tente/ mo dhali ki gwo gi imanŕi gwo ma Arungimis kadhamo/ kun 'kwarkunu a'di mishu eya tente/ eya ris kal gi 'kwaniny'ceŕhi 'baar mo isi ki gwoŕkan ma Arungimis jin di ki e ki sule/ ya ye 'ba/ mo mmokal mo gi hanu gwo e ki monŕam gwo is mo be.

27 Dhalki monyca di'd eya Arungimis mo, a'di jin yuki'd a'din 'denŕ gana/ ki sule/ ki sule/ ya ye 'ba/ eya Yesuŕ Kristhos mo. Amen.

Gwo jin T̩wa/a/ jin 'Kwar ma Buulus gom 'Kwani gi Paᅇ KURINT̩HUUS mo

Monthe Me'd mo

¹ ABuulus, a'di jin yukkunu ki bwa ma Arumgimis mo mmota a'di jin karu ki she/ goma Kristhos jin ta'da Yesus mo dhala kam bana ka Sustanis mo be.

² A'di 'kwarkunu goma kaniisa ma Arumgimis jin di'd e Paᅇ Kurint̩huus mo, e uni gwansan kun dhukunu ki she/ mo eya Kristhos jin ta'da Yesus mo, uni gun yukkunu mo mmodhu ki she/ ki dhelel dhelel mo imontal 'de/ nyakka ris uni gwansan kun 'kokin mo e mo 'baar mo kun yukki gway gi Tapam bana jin ta'da Yesus Kristhos mo, a'di jin ta Tapam buni mo dhali Tapam bana mo be.

³ A'the e um mo dhali monku'th is 'peni Arumgimis jin ta'da Babam bana mo dhali Tapa Yesus Kristhos mo be.

Mo jin 'Boruwa 'Bor Bwa i Is mo gom To gi Shi/in jin Cinu ki Me'd mo

⁴ Aha/ 'bora Arumgimis bwa i is isa yempa/ mo gom um mo haali/ goma 'the ma Arumgimis jin cikunu um eya Kristhos jin ta'da Yesus mo be,

⁵ haali/ eya ris to 'baar mo tani um saka'thkunu e a'di mo ka ris gwo kun toru mo dhali ka risa nyith jin nyithu to mo.

⁶ Isi kani gwo jin toru goma Kristhos mo tani telkunu sho'k e bwam um mo be.

⁷ Wakan um yisa hari ton kamu/ e to gi shi/in jin cinu ki me'd mo yisa, me'd jin corkina um gom mo jin minu piyu/ Tapa Yesus Kristhos bana mo be.

⁸ A'di jin midit tel um sho'k mo ntagi 'pemen mo mmomina umi dar gi mii 'ba/ mo ka tee gi Tapa Yesus Kristhos bana mo be.

⁹ Arumgimis ta a'di jin ta isin gana/ mo. Ki a'di mo tani um yukkunu mmonyak to mii ki Ya/m piti mo, a'di jin ta'da Yesus Kristhos Tapam bana mo be.

Akwa/um Bwa jin Kwa/u mo eya Kaniisa mo

¹⁰ Aha/ yipa 'kup 'kup ki um mo, iwak mo, ki gway gi Tapam bana jin ta'da Yesus Kristhos mo tani ki umi 'baar mo mini gam gwo me'd ki mo jin mina um i'taki 'ko ka kwam bwa mo tani midit 'taki diki di e bwaman um mo. Hili um mini gam 'twa/ 'kup mo e bwant al 'de/ mo dhali eya yisanya 'de/ mo be.

¹¹ Haali/ gwo torkunu aha/ mo ki 'kwani ma Kuluwi ki mowal di'd e bwam um mo, um kun tana wak pem mo.

¹² 'Pemen gwom pem jin oka/ mo a'dihe/ be, ki um ka 'dete/ 'dete/ o gwo mo ki: Aha/ tana ji ma Buulus mo, dhali, Aha/ tana ji ma Abulluus mo, dhali, Aha/ tana ji ma Sapa mo, dhali, Aha/ tana ji ma Kristhos mo.

¹³ Kristhos kwa/ u bwa mowa? ABuulus, a'di 'koshkunu ki cwany'cithan dhul mo gom um mowa? Walla um 'kokunu mmomii ki yi'de/ ki gway ma Buulus mo 'taa?

¹⁴ Aha/ 'borkina Arumgimis pem bwa i is mo ki aha/ dinaki mii jin tal 'denj kamu/ 'peni um ki yi'de/ mo, hili isi ciki/ jasa Kirispus dhala Gayus mo be,

¹⁵ isi kan ki jan tal 'denj kamu/ midit 'taki diki o ki um miinu ki yi'de/ ki gway pem mo be.

¹⁶ (Aha/ miikina amii ki yi'de/ si'da/ mo gom 'kwani ma Istipanus mo be. Sa kan mo tani aha/ dinaki mish ki aha/ miikina jin tal 'denj kamu/ ki yi'de/ mo si'da/.)

¹⁷ Haala *Kristhos* diki hash aha/ mo mmomiiya mii jin miinu ki yi'de/ mo, hili mmoçi gwom 'borga/ mo, yisa ki yuk jin midi ter 'kwani e mo isi ciki/ ki cwany'cithan dhul ma *Kristhos* minu kar ki jim puu mo ki dar gi mom'bi'th mo.

Kristhos jin Taki Mom'bi'th mo dhali Moyuk ma Arumgimis mo

¹⁸ Haali/ gwo gi cwany'cithan dhul mo tani a'di ta gwom pus gom uni gwansan kun 'kon ki jiny 'ce'd sho'k mo, hili gom ana kun 'kokunu mo mmota is ki me'd mo tani a'di ta mom'bi'th ma Arumgimis mo be.

¹⁹ Haali/ a'di 'kwarkunu mo ki:

Aha/ mina 'ce'd yuk gi 'kwani kun yukayuk sho'k mo, dhali mo jin korkunu e gi 'kwani gwansan kun kora e ki kor mo tani aha/ mina tor uni sho'k ka pupush mo be.

²⁰ Mane wathi/ jin yukayuk mo? Mane wathi/ jin ta'da man'kwar to mo? Mane amandot gwo gom yil gwansan mo? Din ma Arumgimis ki kar yuk gi mony'cesh yansan ki pus mowa?

²¹ Haali/ me'd jin tana yuk ji ma Arumgimis mo tani 'kwaniny'cesh 'koki nyitha Arumgimis ki yuk yan 'te/ mo tani a'di 'borki'da Arumgimis bwa mo mmota uni gwansan is ki me'd mo kun gamki gwo is mo eya pali/ gi gwo jin cikina ana uni mo be.

²² Haali/ 'Kwani Yahuuda/ dotki gwo ki jin 'theķ gom jamas mii mo dhali 'Kwaninj Griķi simmki moyuk e mo.

²³ Hili ana cikina gwo goma *Kristhos* jin 'koshkunu jwa mo ki cwany'cithan dhul mo, a'di jin golki 'Kwani Yahuuda/ mo dhali warki'd ki gwo ma pali/ gom 'kwani kun 'koki ta 'Kwani Yahuuda/ mo be.

²⁴ Hili gom uni gwansan kun yukkunu uni gun ta 'Kwani Yahuuda/ mo dhali 'Kwaninj Griķi si'da/ mo tani a*Kristhos* ta mom'bi'th ma Arumgimis mo dhali moyuk ma Arumgimis mo be.

²⁵ Haali/ gwom pus ma Arumgimis mo tani a'di yukki'd 'teki yuk mo mmobol 'kwani e mo dhali mon'ka'd is ma Arumgimis mo tani a'di 'bi'thki'd 'teki 'bi'th mo mmobol 'kwani e mo be.

²⁶ Hili isi jin tana mo yuk bum mo, iwak mo. Aris um ka ris mo yisa yukayuk mo me'd jin tana mo ma yuk gi mony'cesh yan mo. Dhali um tana ris mo yisa kun ta gi moshirr mo. Dhali um tana ris mo yisa kun dhodhu e mo jin tanu 'penkapan mo.

²⁷ Hili Arumgimis ki kwany to yan jin ta pus mo e mony'cesh mo mmo'the 'kwani kun yukayuk is mo. Dhali Arumgimis ki kwany to yansan jin 'ka'da is e mony'cesh yan mo mmo'the uni kun 'bitha is is mo be.

²⁸ Dhali Arumgimis ki kwany to yansan jin hatha ca'b 'ko'd mo dhali to yansan jin waku e mony'cesh mo, isi kan mo to kun 'koki 'ko mo si'da/ mo tani jin mina a'di dhu to kun 'kokin si'da/ mo me'd to kun puukin mo be.

²⁹ Wakan wathim pa en'thiņ kamu/ midi kar 'ba/ ki ca mo e bun'kus ma Arumgimis yisa.

³⁰ A'di ta 'kus gi mondiki/em pini eya *Kristhos* jin ta'da Yesus mo, a'di jin kar ma Arumgimis mmota yuk bana mo dhali mmota mo ma kar/em bana mo dhali mmota mo jin dhuuwa dhu ki she/ ki dhelel dhelel gom ana mo dhali mmota mo jin wanu ana 'ba/ mo.

³¹ Wakan me'd gwo jin 'kwarkunu mo ki: Dhalki a'di jin kar 'ba/ ki ca mo tani kar 'ba/ ki ca e Tapa mo.

2

Mmobah Gwo goma Kristhos jin 'Koshu/ ki Cwany'cithan Dhul mo

¹ Ki aha/ pu'dkina e um iwak mo tani aha/ dinaki pu'dku/ mmobah um gwo jin toru goma Arungimis mo ki gwo jin molu piyu/ 'kup ka piye/ mo walla ki yuk mo.

² Haali/ aha/ tana ki 'kup gwo mmomish ton kamu/ yisa e bwam um mo hili isi ciki/ jasa Yesus Krist̥hos mo dhali a'di jin 'koshkunu ki cwany'ciṡan dhul mo be.

³ Dhali aha/ dikina e um mo e mo jin 'ka'du is mo dhali e mo jin ko/kunu is kagahara mo dhali e mo jin deenuwa de e mo be.

⁴ Dhali gwom pem jin tor̥ka/ mo dhali gwom pem jin cika/ mo tani 'koki ta gwo kun mini el 'kwani e mo gom moyuk mo hili mmonyoy/ Shi/in mo dhali mom'bi'th mo be.

⁵ Wakan ki mongam gwo is bum minu 'koki thuma po/ moyuk gi 'kwani mo, hili e mom'bi'th ma Arungimis mo be.

Gwo jin 'Ceenu/ki Shi/in ma Arungimis mo

⁶ Bahili e bwaman uni gun iskin mo tani ana tora gwo yuk mo. Ba a'di yisa ta moyuk gi mony'cesh yan mo walla yisa ta moyuk gi tapa gi mony'cesh gwan mo, kun mini puu mo.

⁷ Hili ana tor̥kina gwo gom yuk jin cinu ki jin kup mo dhali yuk jin ta jim ma Arungimis jin bagu mo, a'di jin 'kawurkin ma Arungimis ntwa/a/ mo ki yil gi mony'cesh yan mo gom mo jin dhunu ana ki ca mo.

⁸ Itapa kun 'koni mony'cesh yan mo tani mishi gwo 'ban gom a'di yan yisa. Wakki/ uni mini 'taki mish mo tani uni mini 'taki 'koki 'kosh Tapa gi monyca ki cwany'ciṡan dhul mo be.

⁹ Hili me'd gwo jin 'kwarkunu mo ki:

A'di jin dina e ki mish mo walla jin dina 'ce ki cik mo walla jin diki dwar e gwalal gi wathi/ mo tani

a'di jin thosonkin ma Arungimis mo gom uni gwansan kun enki a'di mo tani,

¹⁰ Arungimis tor̥ki a'di eya tente/ e ana ki Shi/in mo. Haali/ Shi/in a'di theke'thki'da ris to 'baar mo, isi kani mon'kul ma Arungimis mo.

¹¹ Haali/ wathi/ jana mishki to jin kulum ma kamu/ ibwa mo? isi ciki/ shi/in gi wathi/ jin diki'd e a'di mo. Wakan si'da/ wathin tal 'dej kamu/ yisa mishki gwo jin kulum ma Arungimis ibwa yisa hili isi ciki/ Shi/in ma Arungimis mo be.

¹² Dhali ana 'kokina ki bu'th moyuk gi mony'cesh mo, hili ana bu'thkina Shi/in jin piki'd 'peni Arungimis mo ki ana mina mish gwo 'ban gom to kun cinu ki me'd mo kun cin ma Arungimis ana 'bakany mo.

¹³ Dhali ana tora gwo yansan yisa ki gwo gi yuk jin kuluma 'kwani en'thi/ ibwa mo yisa hili gwo jin tor̥kina Shi/in ana mo, mmopok gwo gom to gi shi/in mo gom uni gwansan kun bu'thki Shi/in mo be.

¹⁴ Wathi/ jin dar gi to gi shi/in mo tani diki bu'th to jin cinu ki me'd 'peni Shi/in ma Arungimis mo. Haali/ uni tana pali/ e a'di mo dhali a'di mol uni gwo mish 'ban mo haali/ uni nyithu/ ki to gi shi/in mo be.

¹⁵ Wathi/ jin ta gi to gi shi/in mo tani nyithki'da ris to 'baar mo dhali hili a'di ki is piti mo tani a'di minu 'koki nyith ki jan tal 'dej kamu/ mo be.

¹⁶ Haali/ aja a'di imishki bwa gi Tapa mo, wakan mmoye'th a'di sho'k ki gwo mo? Hili ana takina gi bwa ma Krist̥hos mo be.

3

¹ Hili iwak mo, aha/ mola gwo o e um mo me'd 'kwani kun ta gi to gi shi/in mo, hili me'd 'kwani kun ta ku gi bungwar is mo, me'd usha ŋa/ eya Kristhos mo be.

² Aha/ cina uma ko mo mmopi mo, yisa tonte/ jin ta jin ka'c mo. Haali/ um 'koki thoson is gom a'di mo. Dhali isi kani um naskina/ 'koki thoson is gom a'di mo be.

³ Haali/ um 'kon mmo'ko mo naskina/ gom bungwar is mo. Haali/ kan mo, mo jin tanu dhapan di'd naskina/ e um mo dhali mo jin biruwa bir e bwaman um mo tani 'kona um ki ta ku gi bungwar is mo 'taa? dhali mmomii to me'd 'kwani kun 'konuki ak mii e mowa?

⁴ Haali/ wathin kamu/ ki o gwo mo ki: Aha/ tana ji ma Buulus mo, dhali jan kamu/ ki o gwo mo ki: Aha/ tana ji ma Abulluus mo be, 'kona um ki ta 'kwani gi mony'cesh mo 'teya?

⁵ Ka Abulluus ta'da ta mo? Dhali aBuulus ta'da ta mo? Uni ta cinkina/ kun gamkina um gwo is nycine/ mo me'd mii gi Tapa mo mmोधukina a'di uni ka 'dete/ 'dete/ mo.

⁶ Aha/ sikina to mo tani, Abulluus a'di wolki to yi'de/ mo, hili Arungimis a'di ciki mo jin 'twaka to mo be.

⁷ Wakan si'da/ a'di jin siki to mo walla a'di jin wolki to yi'de/ mo tani uni ta toŋ kamuwa? hili Arungimis a'di 'de/ mo a'di ciki mo jin 'twaka to mo be.

⁸ A'di jin siki to mo dhali a'di jin wolki to yi'de/ mo tani uni nyakkin mo be, dhali uni ka 'dete/ 'dete/ mini bu'th to jin miikina uni to mo isi me'd shemen miim buni mo be.

⁹ Haali/ ana tana ci kun nyak to mii goma Arungimis mo be. Um ta mondhe'd ma Arungimis mo, mo jin nyan ma Arungimis mo be.

¹⁰ Isi ki gwo ma 'the ma Arungimis jin cikunu aha/ mo tani me'da man'kawur gu'b mo jin tana me'd piti gwocon mo tani aha/ 'thikina mo jin ka'bu/ mo dhali wathin kamu/ nyan'ki to apo/ a'di mo. Dhalki 'kwani ka 'dete/ 'dete/ hilin ki 'bore/ mo, a'di jin minu nyan apo/ a'di mo be.

¹¹ Haali/ monka'buŋ kamu/ yisa di'da jin mina wathin 'den kamu/ i'thi to kan apo/ mo jin 'thikunu mo, a'di jin ta'da Yesus Kristhos mo be.

¹² Dhali wakki/ wathin kamu/ midi nyan to apo/ monka'b ki 'dolkon gana/ mo dhali 'dolkon kush mo dhali wosh kun ta kun dhel mo dhali cwa mo dhali kun'tush mo dhala wusha mo tani

¹³ arisa tu'c gi 'kwani ka 'dete/ 'dete/ mo tani uni minu tor eya tente/ mo. Haala tee midi this a'di tor mo haali/ a'di minu tor eya tente/ ki o'd mo, dhali o'd a'di midi pala ris e ma tu'c kun miina 'kwani ka 'dete/ 'dete/ mo be.

¹⁴ Wakki/ atu'c jin miina wathi/ mmonyan to apo/ mo jin ka'bu/ mo midi tel mo tani a'di midi bu'th to jin ishki kumma/ mo be.

¹⁵ Wakka tu'c gi wathin kamu/ cithu/ ki o'd mo tani a'di midi this tom piti e mo. Bahili a'di ki is piti mo tani a'di iminu ta is ki me'd mo, hili a'di mina e wa gi mo jin boruwa bor mo 'peni 'twa/ o'd gana/ mo be.

¹⁶ 'Kona um ki misha ki um ta monya'b ma Arungimis mowa? dhali Shi/ in Dheleladhelel ma Arungimis di'd e umi.

¹⁷ Wakki/ wathin 'den kamu/ midi shi/ monya'b ma Arungimis mo tani Arungimis midi 'ce'd a'di sho'k mo be. Haali/ monya'b ma Arungimis mo tani a'di kogu mo dhali monya'b caan jin ca'ba a'di mo tani a'di ita um mo be.

¹⁸ Wathin 'den kamu/ midi mii dhalku/ ki he'k is piti e mo. Wakki/ wathin 'den kamu/ e bwaman um toshki'd ki a'di yukayuk mo e embul yil yansan mo tani dhalki a'di wara'd ki pus mo ki a'di midi 'taki war ki wathi/ jin yukayuk mo be.

¹⁹ Haali/ moyuk gi mony'cesh yansan mo tani uni ta e ma pali/ mo goma Arumgimis mo be. Haali/ a'di 'kwarkunu mo ki: A'di bu'thki uni gwansan kun yukayuk mo eya mak buni jin ishkina uni agany mo be.

²⁰ Dhali dok/e a'di 'kwarkunu mo ki: Tapa a'di mishki gwo kun kuluma 'kwani kun yukayuk ibwa mo kun ta gwo kun ta pe'th mo.

²¹ Wakan wathin tal 'derj kamu/ midi mii dhalku/ 'ba/ ki kar ki ca mo gom 'kwani mo be. Haali/ aris to 'baar mo ta kum bum mo be

²² wakki/ ta ji ma Buulus mo walla ji ma Abulluus mo walla Sapa mo walla mony'cesh mo walla mondiki/e mo walla mowu mo walla mo kun 'kon shwane/ mo walla mo kun mini 'ko yilan kamu/ mo tani aris to gwansani 'baar mo tani uni ta kum bum mo be.

²³ Dhali um ta ku ma Krist̪hos mo dhali Krist̪hos ta ji ma Arumgimis mo be.

4

Mii jin Miina Imandhunu ki She/ mo

¹ Dhalka aris 'kwani 'baar ka 'dete/ 'dete/ mo ibuk ana ka pije/ mo ki ana itana cinkina/ ma Krist̪hos mo dhali imandhu to mo gom gwo ma Arumgimis jin cinu mo ki jim bag mo.

² Bakata 'te/ a'di itheke'thkunu gwo mo gom imandhu to mo ki uni minu gam mo ki uni mini ta uni kun ta isinj gana/ mo.

³ Hili, ki aha/ mo tani a'di ta ari to jin gwa'da'd mo ki aha/ minu 'taki 'koki pal mo ki um mo walla ki gwon dwall gi wathi/ en'thin kamu/ mo. Aha/ dinaki dwall isi is pem gwo mo si'dayi.

⁴ Haali/ aha/ mola toj kamu/ nyith apo/ is pem mo. Hili ki a'di wakan mo tani aha/ dinaki di ki dar gi mii 'ba/ mo. A'di ta Tapa jin nyithki aha/ mo be.

⁵ Wakan dhalku/ ki ci 'twa/ gwon dwall ntwa/a/ ka tee mo, ntwa/a/ ki Tapa diki pu'd mo, a'di jin midi dhu aris to 'baar mo e monkush mo, aris to kun diku 'kup shwane/ mo e mondhurumi'd mo. Dhali a'di midi thisa dum pa tor mo. Dhali yan'ko'd aris 'kwani 'baar ka 'dete/ 'dete/ mo mini bu'th 'twa/ man 'peni Arumgimis mo be.

⁶ Aha/ dhukina ris gwo gwansan gom is pem si'da/ mo dhala Abulluus si'da/ gom gway bum mo kun tana wak mo ki um si'da/ mini da/ar 'peni aman mo mmo'ko mo me'd isi gwo ma Arumgimis kun 'kwarkunu mo, ki jan tal 'derj kamu/ 'peni um mo midi diki pe mii i is mo apowa kamu/ kamu/ mo.

⁷ Haali/ aja a'di jin hilki to gunn kun 'ko ki she/ e um mo? Ata tana um mo wakki/ um 'konuki ci to mo? Dhali yan'ko'd wakki/ a'di bu'thkina um mo tani atinta dhuna um 'ba/ ki ca mo me'd wakki/ a'di diki ta to jin cinu ki me'd mo?

⁸ Um 'tu'dkunu mo hila/ mo be. Um ta 'kwani kun ta pa ki pa mo hila/ mo be. Ki dar gi aman mo tani um waran ki imalik mo. Dhali aha/ onayi ki um mini jiya ji moyi. Wakan ki aman mina 'taki nyak tapa ta ki um mo.

⁹ Haali/ aha/ tosha ka Arumgimis a'di dhuki aman mo ki uni kun dhunu ki she/ mo mmota kuj 'ko'd mo me'd 'kwani kun toru gwo 'twa/a 'cesh mo mmowu mo. Haali/ aman takina businye/ gom 'kwaniny'cesh mo dhali gom iman'doyu gwo mo dhali gom 'kwani mo be.

¹⁰ Aman takina pus mo gom gway ma Krist̪hos mo be, hili um a'di iyukayuk eya Krist̪hos mo. Aman 'ka'dkina is mo. Hili um a'di i'bi'thkina is mo. Um a'di ishunkunu mo ki montak mo. Hili aman iwakkunu mo be.

¹¹ E mo yansan shwane/ mo tani aman 'koshkina te/ mo dhali bu'thkina yi'de/ mo. Aman hatha to hi'th 'ko'd mo dhali kanjamkina is ki kanjam mo gom mondor mo dhali aman dara gi gu'b mo be.

¹² Dhali aman miikina aṭu'c mo mmomiya tu'c ki me'd bam gana/ mo. Ki aman sorkunu mo tani aman 'bora 'bor mii mo. Ki aman to'ckunu bwa mo tani aman 'dimkina 'kup mo be.

¹³ Ki aman yerkunu is ki gway ki gwonthus mo tani aman malaskina gwo mo. Aman warkina mo dhali shwane/ wa e ka duhal gi 'kwaniny'cesh mo dhali aman wana e ki to jin dhi'thkunu aris to nyo/o'di 'baar mo be.

¹⁴ Aha/ dinaki 'kwar gwo yansan mmodhu um ki mon'the is mo, hili mmorum um ki gwo mo me'd u'cim pem kun enka/ ki mo/en gana/ mo be.

¹⁵ Haali/ um bala tanki imanshu um bway ki gwo mo kun wana risa eya Krīsthos mo. Dhali um yisa tanki ibabam bum ka ris yisa. Haali/ aha/ wara ka babam bum eya Krīsthos jin ta'da Yesus mo ki gwom 'borga/ mo be.

¹⁶ Aha/ yipa 'kup 'kup ki um mo wakan ki um mini ta imanthok aha/ mii mo be.

¹⁷ Wakan a'di ihashkika/ uma Timuṭhawuus mo, ya/m pem jin enka/ ki en gana/ mo dhali a'di jin ta'da a'cim pem jin ta isin gana/ e Tapa mo, a'di jin mido rogom um ki gwo mo gom miim pem eya Krīsthos mo me'd jin torka/ uni gwo mo eya ris mo 'baar mo eya kaniisa ki she/ ki she/ mo be.

¹⁸ Kun tiya dhu 'ba/ ki ca mo me'd jin oka/ ki aha/ mina diki yaku/ i um mo.

¹⁹ Hili aha/ mina yaku/ i um ki 'dishe/ mo wakki/ a'di ta bwa gi Tapa mo dhali aha/ mina nyiṭh mom'bi'th gi 'kwani gwansan kun dhu 'ba/ ki ca mo, yisa gom gwom buni 'te/.

²⁰ Haali/ Bampa/ ma Arungimis mo tani diki ta gom gwo mo hili gom mom'bi'th mo be.

²¹ Um 'kona gwonta ibwaye? Miga/ yaku/ i um ki cwa jin doruwa dor mowa? Walla ki mo/en e shi/in gi monkar bwa ki gwa'd mo?

5

Gwon Dwall Apo/ Mii jin Miinu Cal mo

¹ Gwo be'dkunu ki mo jin miinu miinyal mo ishki'd mo e bwaman um mo dhali ji gi wakansan gamkunu mo yisa isi bwaman 'kwani kun 'kon ka po/ ki dar gi ji gi luju mo. Haali/ wathin kamu/ ishki'd e ash gi com mo.

² Dhali um dhu 'ba/ ki ca mo. Um ka ba/ imini 'taki dhal mii yan e i is mo mmoko mo. Dhalki a'di jin miiki mii yansan kan san mo tani uru ka piye/ 'peni bwaman um mo.

³ Bahili ki aha/ pina e buṅwar is tani aha/ nyakkina di ki um mo e shi/in mo. Dhali me'd jin dika/ e buṅ'kus bum mo tani aha/ cikina 'twanṅ gwon dwall mo hila/

⁴ e gway gi Tapa Yesus apo/ wathi/, a'di jin miiki ji gi ta thus kansan mo be. Ki um tul is mo tani dhali shi/in pem nyak di ki um mo tani nyakkim mom'bi'th gi Tapa Yesus bana mo be tani

⁵ um mini mii ciki wathi/ yansan mo ka Setaan mo gom mo jin minu 'ce'd a'di sho'k mo e buṅwar is mo, ki shi/in piti minu woth mo ka tee gi Tapa Yesus mo be.

⁶ Bam bum kun dhuna um ki ca mo tani yisa 'borona. 'Kona um ki misha ki ara cumata gwa'dga/ seki'da ga'bula gana'th ki 'twan'dap mowa?

⁷ Dhagami acumata dhamo/ mo ki um mini ta agana'th kun ta kun this mo me'd jin 'kona um ka jin gana/ ki dar ga cumat mo. Haali/ aKrīsthos jin ta ari ka'bal bana gi mompe'kupanyolos mo tani a'di miikunuwa bas mo be.

⁸ Gom a'di gi wakan mo tani dhalki ana nyonṅa montul is jin yukuwa yuk mo, yisa ka cumata dhamo/ mo, a'di jin ta'da cumat gi mii kun dupa dupi e mo dhali mii kun 'koki ta miinṅkar/e mo yisa, hili ki maanṅkuthu'd jin dar ga cumat e mo, a'di jin dar ki washila/ mo dhali jin ta gwonṅ gana/ mo be.

⁹ Aha/ 'kwarkina um gwo e gwom pem mo ki um mini 'koki ce e ki imanmii miinyɔal mo.

¹⁰ A'di yisa ta 'pemen gwo mo gom imanmii miinyɔal gi mony'cesh yan mo walla imanta a'thothum bwa mo walla imandil to mo walla imanluɔ tompinyon mo, haali/ wakki/ a'di wakan mo tani ki ton ta'da ta imina /e diki ya ka pije/ 'peni mony'cesh mo, eee.

¹¹ Hili aha/ dhala mii yan e i is mo mmo'kwar gwo mo e um mo ki um mini dhalku/ ki ce e nyakki a'din 'de/ yin jin ta'd gi gway ma kam piti mo wakki/ a'di dina mii m'ba/ mo gom miinyɔal mo walla mmota a'thothum bwa mo walla mmota amanluɔ tompinyon mo walla mmota amansora sor mo walla mmota aman'kosh ma su mo walla mmota amandil to mo hili isi kan mo um mini dhalki to ki nyak shwa ki a'dinthus 'de/ yan mo be.

¹² Haali/ a'di diki ta miim pem mmodwall gwo gom uni kun 'kona pije/ mo. A'di diki ta uni gwansan kun 'kon eya kaniisa kun mina um idwall gwo mowa?

¹³ Arumgimis a'di dwalli uni gwansan gwo mo kun 'kona pije/ mo be. Uri a'di jin ta thus ki thus kan 'peni bwam um ka pije/ mo ma.

6

Mmo'koki So Ce Ibwambori 'Kwani kun Dar gi Gwo jin Gamu Is mo

¹ Wakki/ jan tal 'deɲ kamu/ 'peni um taki'd gi gwo jin 'konuki bath mo apowa kam piti mo tani a/mina a'di iya mo e bwambor ma hakuuma mo, uni gun 'konuki dhu ki she/ mo goma Arumgimis mo mmodhal uni kun dhunu ki she/ e i is mowa?

² 'Kona um ki misha, ki uni kun dhunu ki she/ ki dhelel dhelel mo tani mini dwall 'kwaniny'cesh gwo mowa? Dhali wakki/ 'kwaniny'cesh minu dwall gwo ki um mo tani a/um bunya/ 'koki ha me'd mo mmodwall ushi gwon gwa'dgaa?

³ 'Kona um ki misha ki ana mina dwall iman'doyu gwo gwo mowa? Bakatayee bathu mii gi mondiki/e yan mo?

⁴ Wakki/ um ta gi gwon dwall mo tani atinta dhuna um uni mo ibwambori uni gun piskin mo eya kaniisa mo?

⁵ Aha/ ona gwo yansan mo mmo'the um is mo. A/wathinɔ kamu/ bunya/ diki yukayuk mo ibwam um mo jin midi 'kosh jwa mo mmonyith gwo mbwaman ma wak piti gom ikam mowa?

⁶ Haali/ akama kamu/ yaki'di bwambor ma hakuuma mo mmo/o gwo apowa kam mo dhali a'di ibwambori uni gun dar gi gwo jin gamu is mo.

⁷ Mmota gi shi/ ushi gwon dwall mo ka rem 'kup mo tani a'di ta mii jin pinu um e mo. Ata 'kona um ki dhal mii e i is mo mmo'kosh is ka nyor mo gom tonthusa tiya mo? Ata 'kona um ki dhal mii e i is mo ki um minu dil mo?

⁸ Hili um ki is bum mii tonthus mo dhali dila dil mo dhali isi kan iwak bum gana/ dilkina um mo be.

⁹ 'Kona um ki misha ki uni gun 'koki mii mii kun ta kuɲ kar/e mo tani mini 'koki ta gi mal gi Bampa/ ma Arumgimis mo? Dhalku/ ki ta ku gi hegu e mo. Walla uni gun ta imanmii miinyɔal mo walla uni gun ta imanluɔ tompinyon mo walla uni gun ta ɔal ki ɔal mo walla uni gun cek ma du mo walla uni gun ha'k 'pen ɕerɕ gwas mo

¹⁰ walla 'kwanin 'di/ mo walla iman'thoth bwa mo walla iman'kosh ma su mo walla imansora sor mo walla imandil to mo tani uni mini 'koki ta gi mal gi Bampa/ ma Arumgimis mo be.

¹¹ Dhali kun tiya ta ku gi wakan e um mo. Hili um lamkunu mo, um dhukunu ki she/ ki dhelel dhelel mo, dhali um dhukunu mo ki mo ma kar/

e mo ki gway gi Tapa Yesus Krist̩hos mo dhali ki gway gi Shi/in Dheleladhelel ma Arumgimis bana mo be.

Kari Arumgimis ki Ca mo e Bungwar Is Bum mo

¹² Aris to 'baar mo tani dhala gwoṅkan aha/ bway mo, hili aris to 'baar mo yisa ta gi shi/ miim 'boro'd gom aha/ mo be. Aris to 'baar mo dhala gwoṅkan aha/ bway mo, hili aha/ mina diki dhal is pem bway mo mmota çin̩kina/ gom to gunni 'baar mo.

¹³ Tonteyi gom bwa mo dhali bwayi gom tonte/ mo. Dhali Arumgimis midi 'ce'd jin tal 'deṅ kamu/ sho'k mo dhali jan kamu/ mo. Bungwar is yisa uku gom mii jin miinu miinyçal mo. hili gom Tapa mo dhali Tapa gom bungwar is mo be.

¹⁴ Dhali Arumgimis 'de'kki Tapa mo dhali a'di si'da/ midi 'de'k ana mo e mom'bi'th piti mo be.

¹⁵ 'Kona um ki misha ki bungwar is bum ta to is goma Krist̩hos mowa? Gom a'di gi wakan mo tani a/aha/ mina gu tom bungwar is ma Krist̩hos mo dhali mii uni ki to is jin miinu miinyçal mowa? Aggi.

¹⁶ 'Kona um ki misha ki a'di jin gamki is piti is mo ki a'di jin miiki miinyçal mo tani talki isa 'de/ mo uni ka yima? Haali/ me'd gwo jin 'kwarkunu mo ki: Uni su/ mini tal bungwar isa 'de/ mo be.

¹⁷ Hili a'di jin gamki is piti me'd ki Tapa mo tani wara'd gi shi/ina 'de/ e a'di mo be.

¹⁸ Shipiti/a ṅwaca/ mo 'peni mo jin miinu miinyçal mo. Aris miinthusu tiya 'baar mo gun miina wathin kamu/ mo tani a'di ta jim por ma pije/ gi bungwar is mo, hili miinyçal jin miina wathi/ miinthus mo tani a'di miiki miinthus apo/ bungwar is pitin̩ gana/ mo be.

¹⁹ 'Kona um ki misha ki bungwar is bum ta monyça'b gi Shi/in Dheleladhelel jin di e uma? a'di jin takina um 'peni Arumgimisa? Um yisa ta uni gun ta ku gi is bum yisa.

²⁰ Um yokunu ki she/ yol jin 'bitha'bi'th mo. Wakan kari Arumgimis ki ca mo e bungwar is bum mo.

7

Gwo jin Toco'd Isi gom Gwo gi Miimash mo

¹ Dhali isi gom gwo gun baṅhu mo gom gwo kun 'kwarkina um mo tani a'di ta shi/ miim 'boro'd mo jin mina wathi/ diki 'disha 'bom is mo ba/.

² Hili gom mompal gi mo jin miinu miinyçal mo tani 'kwaniṅ gwath̩ ka 'deṅe/ 'deṅe/ mini mii ta gi up bunin̩ gana/ mo dhali up ka 'deṅe/ 'deṅe/ mo tani mini mii ta gi ikath̩im bunin̩ gana/ mo.

³ Wathin̩ gwath̩ midi mii kar ashim piti ki kar 'pempaṅ gana/ mo dhali wakan si'da/ ashim piti midi kara kath̩im piti ki kar 'pempaṅ gana/ mo be.

⁴ Haala 'bom midi mol ta tapa gom bungwar is pitin̩ gana/ mo, hili wathin̩ gwath̩ a'di ita'd mo. Wakan si'da/ wathin̩ gwath̩ midi mol ta tapa gom is pitin̩ gana/ mo, hili a'bom a'di ita'd mo be.

⁵ Dhalku/ ki ush ka rem 'kup mo, isi ciki/ wari ki gwo jin gamu me'd mo gom ari mo mo, ki um mini mii ga/ is bum mo mmo'tho mo. Dhali hili gam is mmontal 'de/ ṅ'ko'd mo isi ciki/ ka Set̩aan midi diki pal um mo mmo/ath̩a um mo jin 'timuwa du mo.

⁶ Aha/ ona gwo yansan ki sheshkon mo, yisa mmokan gwowa.

⁷ Aha/ onayi ka ris 'kwani 'baar mo mini 'taki wa e ki aha/ ki is pem mo. Hili aris 'kwani 'baar ka 'deṅe/ 'deṅe/ mo uni takin gi to gun çikunu ki me'd

mo ki ji mum mo ki is buni mo 'peni Arungimis mo, jan tal 'denj kamu/ ki ji en 'denj kamu/ mo dhali jan kamu/ ki ji en 'denj kamu/ mo.

8 E 'kwani kun 'koki mash mo dhali up kun wuna ikathim buni mo tani aha/ ona ki a'di ta shi/ miim 'boro'd gom uni mmo'ko kan ki laça/ mo me'd aha/ mo be.

9 Hili wakki/ uni molona du bu'th mo mmo'tim mo tani uni mini mii mash mo. Haali/ a'di 'boro'd mmomash mo mmodhal mii e i is mo mmodhu e ki 'thir 'thir gom mon'dap e mo be.

10 Gom uni gun mashkin mo tani aha/ kana gwo mo, dhali hili aha/ yisa, Tapa mo, ka 'bom midi diki mii kwa/ bwa 'pena katham piti mo

11 (hili wakka yim midi mii kan mo tani dhalka yim di'd ki laça/ mo mmodiki mash mo walla si'da/ dhalka yim o gwon gwam mo uni ka katham piti mo) – dhali ka kath si'da/ midi diki mii thoson gwo mo mmodhal ashim piti 'pen mo.

12 Gom um gun boçkin mo si'da/ tani aha/ ona gwo mo, Tapa yisa, ki wakki/ akam ta gi ash mo jin diki gam gwo is mo dhala yim gam gwo me'd mo mmonyak ça'b ki a'di mo tani a'di midi mii diki thoson gwo mo mmodhala yim 'pen mo.

13 Wakka 'boma kamu/ si'da/ ta ga katham piti jin dar gi gwo jin gamu is mo tani dhali a'di ki gam gwo me'd mo mmonyak ça'b ka yim mo tani ayim midi mii diki mii thoson gwo mo mmodhal a'di 'pen mo.

14 Haali/ wathij gwath jin dar gi gwo jin gamu is mo tani a'di karu ki she/ gi jin kogu mo gom gwo gi ash mo be. Dhali a'bom jin dar gi gwo jin gamu is mo tani a'di karu ki she/ gi jin kogu mo gom gwo ma kath mo. Wakki/ a'di diki wakan mo tani uçim bum si'da/ minu dhu gi ku gun 'koki dhelel mo. Hili me'd jin oka/ mo tani uni dhunu me'd ku gun dhelelin moyi.

15 Hili wakki/ amannyak ça'b jin dar gi gwo jin gamu is mo ona bwa mmokwa/ bwa mo tani dhalki a'di miinu wakan mo ma. Ki mo gi wakan mo tani akama kamu/ walla 'bwahama kamu/ minu 'koki deç mo ki gwo yansan mo. Haali/ Arungimis yuk ana mo gom moçku'th is mo be.

16 A'boma, /e mini diki mish bunya/ wakki/ /e mini woḥa katham pini mowa? Wathij gwath, mina /e diki mish bunya/ wakki/ /e mini woḥ ashin mowa?

Mii gi Mondiki/e jin Karkina Tapa mo

17 Hili dhalki 'kwani 'baar ka 'dete/ 'dete/ mo shuna shu/um bway mo e mii gun tora Tapa uni mo mmomii mo dhali e a'di jin yukkin ma Arungimis uni mo mmomii mo. A'di ta gwonjan pem goma kaniisa 'baar mo be.

18 Wathij kamu/ di'da ki a'di 'cithkunuwa munyjal yis mo hila/ me'd jin yukunu a'di mowa? Dhalku/ ki mii dhal a'di bway mo mmoçap mo mo mmowar mo gi a'di jin dinuki 'citha/ munyjal yis mo. Wathij kamu/ di'da jin yukunu mo ki a'di dinuki 'citha/ munyjal yis mowa? Dhalku/ ki mii dhal a'di bway mo mmoçap mo mo jin minu 'citha/ munyjal yis mo.

19 Haali/ mo ma munyjal yis jin 'cithu/ mo tani walla mo ma munyjal yis jin dinuki 'cith mo tani mii toj kamu/ yisa, hili mmodhu gwonjan ma Arungimis kun 'kwarkunu mo be.

20 Aris 'kwani 'baar ka 'dete/ 'dete/ mo mini mii 'ko kan mo e mom buni ki she/ ki she/ mo e mo kun yukunu uni mo be.

21 /E ta çinkina/ jin yolu mo ki /e yukunu mo 'taa? Dhalku/ di'd kan mo. Hili wakki/ /e mini 'taki mish gam mom pini jin dina /e ki 'kus mo tani miyi /e /te/ ki is pini 'bakany mo ma.

²² Haali/ a'di jin yukkunu mo e Tapa mo tani me'd jin tana a'di cɪŋkɪna/ jin yolu mo tani a'di ta wathi/ jin di'd ki 'kus mo e Tapa mo. Wakan si'da/ a'di jin di'd ki 'kus mo me'd jin yukkunu a'di mo tani a'di ta cɪŋkɪna/ jin yolu mo jin ta ji ma Kristhos mo be.

²³ Um yolkunu mo ki she/ yol jin 'bitha'bi'th mo. Dhalku/ ki mii dok/e ta cɪŋkɪna/ gi 'kwani kun mini yol um mo.

²⁴ Wakan iwaka, aris mo gunn kun yukkunuwa yuk ka 'dete/ 'dete/ mo tani dhalki a'di ca'ba'd mo nycine/ mo nyakka Arumgimis mo.

Ku gi 'Koki Mash mo dhali ku gi Wuna Ikath mo

²⁵ Dhali isi gwo gom uni kun 'koki mash mo tani aha/ dara ki gwonkan 'peni Tapa mo. Hili aha/ cikina um ayisany pem mo me'd wathin 'de/ jin ta a'di jin taki'd gi momiimii gi Tapa jin minu gam is ki isinj gana/ mo.

²⁶ Aha/ tosha gom mo jin 'konu ka cis e bun 'kus bana shwane/ mo tani a'di ta shi/ miim 'borod' gom wathi/ mmoqa'b mo kan me'd jin ca'ba a'di mo be.

²⁷ A/e dekkunu ki ashin mowa? Dhalku/ ki napa bway mo mmodi ki 'kus mo. A/e din ki 'kus mo 'pena 'boma? Dhalku/ mii ki tash mo mmonap momash mo.

²⁸ Hili wakki/ /e ki mash mo tani /e mii miinthus yisa. Dhali wakki/ nyara/ masha'd mo tani ayim mii miinthus yisa. Hili uni gwansan kun mashkin mo tani uni mina gwo gi mony'cesh ibal is mo mmofo'c bwa mo be dhali aha/ ona bwayi mmo'tash a'di 'twa/ 'peni um mo.

²⁹ Hili 'pemen gwo yan jin oka/ mo tani iwaka, atee jin karu mo tani a'di kutaku't mo be. 'Peni shwane/ mo tani dhalki uni gwansan kun ta gi up mo tani 'kon mo kan mo me'd uni gun daran mo,

³⁰ dhali uni gwansan kun gwokin mo tani me'd jin 'kona uni ki ko mo, dhali uni gwansan kun 'kunykina bwa mo tani me'd jin 'kona bwa uni ki 'kuny mo, dhali uni gwansan kun yolki to mo tani me'd jin 'kona uni ki dar gi to mo,

³¹ dhali uni gwansan kun usi mony'cesh is mo tani me'd jin 'kona uni ki us mony'cesh is ki sule/ mo. Haali/ yir gi mony'cesh yansan di'd mo mmope mo be.

³² Aha/ napa um mmo'ko ki 'kus 'peni mo jin ananu is mo. Dhali wathi/ jin diki mash mo tani a'di ananki is piti mo gom to gi Tapa mo, ki a'di midii mii mii gun 'bor Tapa bwa mo be.

³³ Hili wathi/ jin mashki'd mo tani a'di ananki is mo gom to gi mony'cesh mo jin mina a'di mii to mo jin midii 'bor ash bwa mo.

³⁴ Dhali wakan mo tani to gun koca a'di e nycine/ mo tani uni kwa/u bwa mo. Dhali a'bom jin diki mash mo walla nyara/ si'da/ mo tani uni ananki is mo gom to gi Tapa mo jin mina uni dhu bungwar is buni ki she/ mo ki jin kogu/ mo dhali shi/in buni si'da/ mo. Hili a'bom jin mashki'd mo tani a'di ananki is mo gom to gi mony'cesh mo jin mina a'di mii to mo jin midii 'bora katham piti bwa mo.

³⁵ Aha/ ona gwo yansan gom shi/ miim 'borod' gom mowoth bum mo, yisa mmodhu uma nyoki 'ba/ mo, hili mmoshush uma du mo ki shush gana/ mo jin mina umi ku'th is mo gom Tapa mo ki dar gi miinj kamu/ mo be.

³⁶ Wakki/ wathin tal 'derj kamu/ midii kulum gwo ibwa mo ki a'di diki mii mii kun mini ha me'd mo gom mondosh piti mo tani wakki/ bwa en'dap piti 'bitha'bi'th mo tani dhali wakki/ a'di minu mii mii mo tani dhalki a'di mii a'diyi jin o a'di bwa mo. Dhalki uni mashan mo. A'di ta miinthus yisa.

³⁷ Hili ma, a'diyin jin telu sho'k mo mmodosh mo eya dum piti mo tani dhali dar gi mo jin 'deke'thki a'di mo tani, hili si'da/ a'di ta gi bwa mo mmo'tima du mo dhali ta gi gwo ibwa eya dum piti mo gom mii yansan mo tani mmokara yim mo me'd jin piti jin dosha a'di mo tani a'di mii miim 'borod' mo be.

³⁸ Wakan be, a'di jin mashki'da yim jin dosha a'di mo tani mii'd ki 'bore/ mo ba/. Dhali a'di jin tukki mii mash is mo tani a'di mididi bol mii e mo.

³⁹ A'bom a'di deka gwonkan ma kath mo me'd jin din ma kath ki e mo. Ayim di'd ki 'kus mo mmomash mo 'ko'di jwa ma kath mo e a'di jin o'da yim bwa moyi, hili e Tapa mo be.

⁴⁰ Hili eya yisany pem mo tani ayim a'di mina bwa 'bor ki nyanye/ mo wakka yim mididi ca'b kan me'd jin ca'b ma yim mo. Dhali aha/ tosha si'da/ ki aha/ tana gi Shi/in Dheleladhelele ma Arumgimis mo be.

8

Tonte/ jin Thenu Tompinycon mo

¹ Dhali isi gwo gom tonte/ jin thenu tompinycon mo tani ana misha ki ana 'baar mo tana gi monyith yani 'baar mo. Monyith jin pe'di mis mo hili mo/en a'di nyan'ki'da nyan mo be.

² Wakki/ jan tal 'deŋ kamu/ ta'd gi gwalal mo mmo/o ki a'di mishi toŋ kamu/ mo tani a'di yisa mishki'd naskina/ to jin mina a'di 'taki mish mo ka ba/.

³ Hili wakki/ jan tal 'deŋ kamu/ enki'da Arumgimis mo tani a'di ta jan tal 'de/ jin mishu ki a'di mo be.

⁴ Isi gwo gom tonte/ jin shwanu jin thenu tompinycon mo tani ana misha ki aris tompinyconi 'baar mo 'koki ta to gun 'ko ki 'ko 'koŋ gana/ mo, dhali kan mo tani Arumgimisa kamu/ yisa di'da jasi a'di 'deŋ gana/ mo be.

⁵ Haali/ bala arisa rum kun yuku gway kan ka wuny is mo tani uni nala/ pelena kun 'kon e momis mo dhali e mony'cesh mo. Isi kan ka jin ganayi arisa rum nala/ pelena dhali amariny tapa mo tani

⁶ hili gom ana mo tani Arumgimis tal 'de/ mo a'di jin ta'da Baba mo dhali 'peni a'di mo tani aris to 'baar mo 'kokin mo dhali gom a'di mo tani ana 'kokina mo, dhali Tapan 'de/ mo jin ta'da Yesus Kristhos mo dhali e a'di mo tani aris to 'baar mo 'kokin mo dhali e a'di mo tani ana 'kokina mo be.

⁷ Bahili, aris 'kwani 'baar mo yisa tan gi monyith yan mowa. Hili kun tiya mmo'kokina uni isa dhamo/ mo ntagi shwanesan mo mmobotki mii mo mmoluŋ tompinycon mo tani uni shwaki tonte/ mo me'd a'diŋ gana/ jin thenu tompinycon mo, dhali 'twa/ ma dum buni mmo'ka'dkunu uni is mo tani shi/kunu mo be.

⁸ Tonte/ mididi diki mish ana sus eya Arumgimis mo. Ana minu mii ki shi/ yisa wakki/ ana 'konaki shwa a'di mo dhali ana minu 'bor mo yisa wakki/ ana ki shwa a'di mo.

⁹ Hili miim pini i e ki 'bore/ 'te/ mo isi ciki/ mom pini jin dina /e ki 'kus kan mo mididi 'taki war ki mo jin gola /e agol mo gom a'diŋ kamu/ jin 'ka'da is mo.

¹⁰ Haali/ wakki/ wathiŋ kamu/ ki par /e e mo, /e jin ta wathi/ jin nyithki to mo, mmoça'ba /e eya tharabeesa e gu'b gi luŋu tompinycon mo tani mina a'di mii diki rak is piti mo wakki/ bwana 'twam piti 'ka'da is mo mmoshwa tonte/ jin thenu tompinycon mowa?

¹¹ Dhali wakan gom monyith pini mo tani wathi/ yansan jin 'ka'da is mo tani a'di 'ce'dkunu sho'k mo be, a'di jin ta'da akan jin wun ma Kristhos mo be.

¹² Wakan miinthus jin miikina /e apo/ iwaŋ pini mo dhali mmodhuna /e jama/ e 'twa/ ma dum buni mo ki uni 'ka'da is mo tani /e miiki miinthus apowa Kristhos mo be.

¹³ Wakan wakki/ tonte/ rakki'da kam pem mmobit mo tani aha/ mina diki shwa a'di mo isi ciki/ ki aha/ mina diki raka kam pem mmobit mo be.

9

Mii gun Dhalu Imandhunu ki She/ Bway mo Mmomii mo

1 Dika/ ki di ki 'kus mowa? Dika/ ki ta a'di jin karu ki she/ mowa? Dika/ ki par Tapa Yesus bana e mowa? 'Kona um ki ta uni gun ta kuma tu'c pem e Tapa mowa?

2 Wa'kki/ gom kun tiya mo tani aha/ dinaki ta a'di jin karu ki she/ mo, hili isi kan um ta kum pem kun cilka/ mo haali/ um ta to jin 'dapuwa 'dap goma tu'c pem mo mmotaka/ a'di jin karu ki she/ mo gom Tapa mo be.

3 Gwo yansan ta gwom pem jin 'ce'dka/ she/ mo gom uni gwansan kun mini dot aha/ mo be.

4 'Konuki dhal am bway mo mmoshwa tonte/ mo dhali mmopi to mowa?

5 'Konuki dhal am bway mo mmota gi up mo me'd jin tana unin tiya gun dhunu ki she/ mo dhali ikam gi Tapa mo dhala Sapa mowa?

6 Walla aBarnaaba a'di 'deya dhali aha/ am 'cena inonu mo mmomisha tu'c mii gom mo jin 'konu mowa?

7 Kaja a'di jin mididi miya tuca askar ka guurush pitin' gana/ mo? Kaja a'di jin mididi si amura'th mo mmodiki shwa maman 'peni a'di mo? Kaja a'di jin ta'd gi tonkal mo jin mididi diki uma ko 'peni unin tiya mo?

8 Gwo yansan oka/ ki moshirr gi wathi/ mowa? Dina gwonkan jin cinu ki o gwo mo jin nyakka'd kan mowa?

9 Haali/ a'di 'kwarkunu mo e gwonkan ma Musa jin cinu mo ki: /E mini dhalka morbip ki 'kamu'th 'twa/ mo ki a'di di'd mmotor pos ki sho'k mo. Arungimis kulumki gwo ibwa mo goma morbip mowa?

10 Dina a'di ki o gwo gom gway bana 'baar mo ki 'bil 'bila? A'di 'kwarkunu mo gom gway bana mo haali/ amangora 'cesh mo tani mididi 'taki gora 'cesh ki mo ma 'tey kape/ mo dhali amantor to mo tani mididi tor to ki mo ma 'tey kape/ mo mmogamkina a'di emen to en tiya mo.

11 Wa'kki/ aman sina to gi shi/in gun 'boron mo e bwaman um mo tani a'di cana mii kagahara gara/ wa'kki/ aman mina gam to 'peni um gom bu'ngwar is mowa?

12 Wa'kki/ kun tiya uni tan gi to gwansan 'peni um mo tani mina am 'koki ta ki nyanye/ si'da/ 'peni uma?

Hili aman 'konaki bu'th bway jin dhalu aman mo mmomii kan mo. Hili aman 'dimkina 'kup mo e to gunn mo mmodhal mii e i is mo mmokar to jin gol 'kwani mo e bway gi gwom 'borga/ ma Kristhos mo be.

13 'Kona um ki misha ki uni gwansan kun miiki to mo e gu'b gi mondheleladhelel mo tani gamki tontem buni mo 'peni gu'b gi mondheleladhelel mo dhali uni gwansan kun miiki to mo eya gwata/ jin miinuwa bas mo tani gamki to 'peni to jin 'ci'hu/ 'kus mo mmomiiya bas mowa?

14 E bway jin nyakka'd kan mo tani Tapa a'di kanki gwo mo ki uni gwansan kun ciki gwom 'borga/ mo mini 'taki gam mon'kom buni jin mina uni 'ko ki 'kom pa mo ki gwom 'borga/ mo.

15 Hili aha/ dinaki bu'th bway tal 'den kamu/ mo jin dhalu aha/ mo mmomii wakan mo walla aha/ dinaki 'kwar gwo yansan mo mmogam ari ton kamu/ gi wakan mo. Haali/ aha/ wari mina dhal mii e i is mo mmowu moyi mmodiki dhal aha/ bway mo mmoci aha/ a'di jin mididi dhal aha/ mmokar 'ba/ ki ca mo be.

16 Haali/ wa'kki/ aha/ cina gwom 'borga/ mo tani a'di mididi diki dhal aha/ bway mo mmokar 'ba/ ki ca mo. Haala tu'c jin tucu mo tani a'di 'thinu apo/ aha/ mo. Wayyi e aha/ mo wa'kki/ aha/ dinaki ci gwom 'borga/ mo.

17 Haali/ wakki/ aha/ mina mii yansan ki bwam pem gana/ mo tani aha/ tana gi to jin ish kumma/ mo. Hili wakki/ aha/ dinaki mii mii yansan mo ki bwam pem gana/ mo tani aha/ 'dapkina ki a'di jin ta'da mandhu to mo.

18 Wakki/ a'di wakan mo tani tom pem kun taka/ mo mmo/ish kumma/ mo tani ta'da ta mo? Jasi a'di 'de/ jin wa cikise/ mo be: Ki gwom pem jin cika/ mo tani aha/ mina ci gwom 'borga/ ki me'd mo ki dar gi ton dot mo, mmodiki bu'th bway mo jin dhalu aha/ mo mmomii mo e gwom 'borga/ mo be.

19 Haali/ aha/ ka ba/ dina ki 'kus 'pena ris 'kwani 'baar mo. Aha/ kara is pem mmota cinjina/ goma ris 'kwani 'baar mo ki aha/ mina 'taki gam 'kwani ki nyanye/ adu is mo.

20 Gom 'Kwani Yahuuda/ mo tani aha/ warkina ki Wathi/ Yahuuda/ mo mmomiga/ mish gam 'Kwani Yahuuda/ adu is mo. Gom uni gwansan kun 'ko 'ko'd e gwonkan jin cinu mo tani aha/ warkina ki a'di jin di'd e bwan 'kwariny gwonkan jin cinu mo - aha/ bala dinaki di e bwan 'kwariny gwonkan jin cinu mo - ki aha/ mina 'taki gam uni gwansan kun 'koni bwan 'kwariny gwonkan jin cinu adu is mo be.

21 Gom uni gwansan kun 'kon ka pije/ 'peni gwonkan jin cinu mo tani aha/ warkina mo ki a'di jin di'd ka pije/ 'peni gwonkan jin cinu mo - yisa mmodarka/ gi gwonkan jin cinu ka karambuye/ 'kup ka Arumgimis mo yisa hili ibwan 'kwariny gwonkan ma Kristhos mo be - ki aha/ mina 'taki gam uni gwansan adu is mo kun 'kon ka pije/ 'peni gwonkan jin cinu mo be.

22 Gom uni gwansan kun 'ka'da is mo tani aha/ warkina mo ki a'di jin 'ka'da is mo ki aha/ mina gam uni gwansan adu is mo kun 'ka'da is mo. Aha/ warkina ka mandhas is pem bway mo gom 'kwani 'baar mo tani ki aha/ mina 'taki ta kun tiya is ki me'd mo, ma ki 'pemen yan kan mo be.

23 Aha/ miikina a'di 'baar mo gom gway gi gwom 'borga/ mo ki aha/ minu 'taki pwak mom'bor miim piti mo be.

24 Kona un ki misha ki e mo jin paru sho'k mo tani aris uni gun dhunu mo mmopar sho'k mo tani uni parki sho'k mowa? Hili jasi a'din 'de/ a'di ibu'thki tontaki. Wakan soyi mo ki um mini bu'th a'di mo.

25 Aris 'kwani ka 'dete/ 'dete/ mo kun ta imanlo'ba lo'b mo kun birina bir mo tani uni 'timkina adum buni mo goma ris en ton tiya mo be. Uni miiki a'di mo mmobu'th ton 'kup jin midu pu/ mo. Hili ana miikina a'di mo mmobu'th ton 'kup jin midu mol pu/ mo be.

26 Nye, aha/ dinaki gus ka kar 'kup mo. Aha/ dinaki hi'th ton 'kulush ime'd mo mmomiiya bumbum 'te/ mo.

27 Hili aha/ tukkinkina is pem ki me'd mo dhali aha/ dilkina is pem ki me'd si'da/ mo tani isi ciki/ 'ko'di gwom pem jin cika/ kun tiya mo tani aha/ ki is pem mo mina 'taki ta a'di jin minu this wak mo be.

10

Gwo jin Rumu Apo/ Mii jin Luju Tompinycon mo

1 Aha/ npapa um mo mmomish mo mo iwak mo, ki ibabam bana 'baar mo 'kokin mo e bwan 'kwariny ma rak mo dhali uni 'baar mo pekin isi bwaman yi'derj kumma/ mo.

2 Dhali uni 'baar mo 'kokunu mo mmocuç mo ki mii ma Musa mo eya rak mo dhali ki kumma/ yi'de/ mo be.

3 Dhali uni 'baar mo shwaki tonten tal 'de/ mo jin ta to gi shi/in mo

4 dhali uni 'baar mo piki tompin tal 'de/ mo jin ta ki ji gi shi/in mo. Haali/ uni pikin 'peni to gi shi/in yan jin ta wosh mo jin bathki uni nsho'k mo dhali Wosh yan mo tani a'di ta'da Kristhos mo be.

5 Bahili unin tiya ka woho/ mo tani Arumgimis dina bwa ki 'bor mo gom uni mo haali/ uni ta'kkunu mo e bwam ma sho mo be.

6 Dhali to gwansan uni ta gwo kun rumu gom ana mo ki ana mina bwa 'koki o mo mmomii tonthus mo me'd uni mo be.

7 Dhalku/ ki luŋ tompinycon mo me'd unin tiya mo me'd gwo jin 'kwarkunu mo ki: 'Kwani gwansan uni 'koki 'pena 'cesh mo mmoshwa to mo dhali mmopi to mo dhali mmocu mis mo mmosa mo be.

8 Ana mina mii 'koki dhal is bana bway mo e mo jin miinu miinyɔal mo me'd kun tiya mo kun miikin kan mo dhali 'kwani kun tana alaapi iss* 'kwanimpa 'de/ i'ce'dka kwara mo kun ta'kki jwa mo me'd kurkun ka tente/ mo.

9 Ana mina mii dhalku/ Tapa ki mii pal mo me'd jin miikina kun tiya mo dhali uni 'ce'dkunu sho'k mo ki tasha/ kun shi/ ma ti'd ki shi/ mo.

10 Walla ana mina mii dhalku/ ki miya gumgum mo me'd kun tiya kun miikin mo dhali uni 'ce'dkunu sho'k ka Man'ce'd uni Sho'k mo be.

11 Dhali mii gwansan miiki uni mo mmota to kun rumu uni mo. Hili uni 'kwarkunu mo gom mo jin minu ye'th sho'k bana mo, apo/ ana kun 'kona ki she/ yil yan jin midi di 'kup jin midi pu'du/ mo be.

12 Wakan ba/ dhalki a'din 'de/ yin jin kulum gwo ibwa mo ki a'di mishi dosh mo tani dhalki a'di hil miim piti i e ki 'bore/ mo isi ciki/ a'di midi la kum 'twa/ a'cesh mo.

13 Mompaluŋ kamu/ yisa di'da jin midi bu'th /e mo jin diki pal wathi/ en'thin kamu/ mo. Hili Arumgimis a'di ta ji gi isin gana/ mo dhali a'di midi diki dhal /e ki /e minu pal mo mmo'ce'd mom'bi'th pini apo/ mo. Hili ki mompal mo tani a'di si'da/ midi kwa/ /e bway mo mmoye mo jin mina /e mish a'di 'dim 'kup ki sule/ mo be.

14 Wakan mo um pem gun enka/ mo shipiti/a ŋwaca/ mo 'peni mo jin luŋu tompinycon mo.

15 Aha/ ona gwo e um mo me'd 'kwani kun ta gi yuk mo. Nyithi a'di ki is bum mo ma, a'di jin oka/ mo.

16 Akubbaaya gi mom'boru mii mo a'di jin 'bora ana a'bor mii mo tani a/ a'di diki ta mii jin nyaŋu to bu'th mo goma bas ma Kristhos mo 'taa? Dhali maan'kuthu'd jin 'ce'dkina ana mo tani a/a'di diki ta mii jin nyaŋu buŋwar is ma Kristhos bu'th mo 'taa?

17 Haala guraasa maan'kuthu'd tal 'de/ mo, ba ana kun tana ris mo tani ana tala 'de/ e buŋwar isa 'de/ mo be. Haali/ ana 'baar mo nyaŋkina guraasa maan'kuthu'd yan mo be.

18 Hili mii jin boŋa 'Kwani ma Israyiil mo. 'Kona uni gwansan kun 'ka to jin 'cithu/ 'kus mo mmomiiya bas mo e shemena gwaŋa/ jin miinuwa bas mowa?

19 Ki gwo jin oka/ ta'da ta saye? Ki tonte/ gun thenu tompinycon mo tani ta toŋ kamuwa? Walla ki ji gi ta pinycon mo tani ta toŋ kamuwa?

20 Yisa. Gwo jin oka/ mo tani oka/ gom uni gun dar ki ji gi luŋuŋ gana/ mo tani uni 'cithki to/e 'kus mo mmotheya ruma 'cesh mo, yisa Arumgimis gana/ mo. Aha/ dinaki ŋap um mo mmonyak to mii ka ruma 'cesh mo.

21 Um mini mola kubbaaya gi Tapa pi mo dhali piya kubbaaya ma ruma 'cesh ka yiha/ mo. Um moli 'kowa tharabeesa gi Tapa mo dhali 'kowa tharabeesa ma ruma 'cesh ka yiha/ mo.

22 A/ mina ana rukuny Tapa mmota'c bwa mowa? A/ ana tana gi 'bi'th mmobol a'di e mowa?

Miyyi Aris To 'Baar mo gom Monyca ma Arumgimis mo

* 10:8 talaŋa wa ishriin alip

²³ Aris to 'baar mo dhala gwoŋkan aha/ bway mo. Hili, aris to 'baar mo 'koki ta to gun woṭhina woṭh mo. Aris to 'baar mo dhala gwoŋkan aha/ bway mo. Hili aris to 'baar mo yisa nyanji is mo yisa.

²⁴ Wathin 'denj kamu/ mididi mii dhalku/ ki ŋap tom 'boron gom is piti mo. Hili a'di mididi ŋap tom 'boron goma man'dish gu'b is ki a'di mo.

²⁵ Shwayi ma to gunn gun yolu mo e mo ma suug mo ki dar gi 'twaŋ kamu/ jin minu 'de'k mo mmodot gwo mo gom gway gi 'twa/ ma du mo.

²⁶ Haali/ mony'cesh yansan mo tani ta ji gi Tapa mo dhala ris to 'baar mo gun 'kon e a'di mo be.

²⁷ Wakki/ jan tal 'denj kamu/ 'peni uni gun daran gi gwo jin gamu is mo tani ci uma yuk mo mmoshwa tonte/ mo dhali um 'kona bwa mo mmo/ii mo tani shwayi ma, ma a'diyin jin minu kara bori um mo ki dar gi 'twaŋ kamu/ jin minu 'de'k mo mmodot gwo mo gom gway gi 'twa/ ma du mo be.

²⁸ Hili wakki/ jan tal 'denj kamu/ o um gwo mo ki: To yansan mo tani a'di thekunuwa rum mo tani dhalki a'di ki shwa mo. A'di oka/ mo gom gway piti jin ŋorki um a'di mo dhali gom gway gi 'twa/ ma du mo tani

²⁹ 'pemen gwom pem jin oka/ mo gom 'twa/ ma dum piti mo tani diki ta jim bum mo be. Haali/ ata mina mom pem jin dika/ ki 'kus mo ta a'di jin minu wak mo ki 'twa/ ma du gi wathin kamu/ mo?

³⁰ Wakki/ aha/ nyaka to bu'th ki mo jin 'boruwa 'bor bwa i is mo tani kataye cinu 'twa/ wak apo/ aha/ mo gom to caan jin cika/ mo ki mo jin 'boruwa 'bor bwa i is mo?

³¹ Wakan wakki/ um ki shwa to mo walla pi to mo walla a'diyin jin miina um mo tani miyi a'di 'baar mo gom monyca ma Arungimis mo.

³² Dhalku/ 'Kwani Yahuuda/ ki ci e mo mmokol mo walla 'Kwanij Griki mo walla 'kwanij kaniisa ma Arungimis mo be.

³³ Jasi gom miim pem jin palka/ mo mmo'bora ris 'kwani bwa 'baar mo tani e to 'baar mo kun miika/ mo, yisa mmosimmka/ shi/ miim 'boron pem gana/ e mo hili gom 'kwani ka ris mo ki uni minu ta is ki me'd mo be.

11

¹ Tayi imanthok aha/ mii mo ma, me'd jin taka/ amanthoka Kristhos mii mo be.

Mii jin Mina Upi Kum 'Kup ki Burrinye/ mo

² Aha/ maŋa um mo haali/ um kayaa/ e mo eya ris to 'baar mo dhali mmodhu gwo jin luƙu um mo isi me'd jin cikika/ uni um mo be.

³ Hili aha/ ŋapa um mo mmomish gwo 'ban mo ki a'di jin ta'da 'kan'kup gom 'kwani 'baar mo tani ta'da Kristhos mo be. Dhali a'di jin ta'da 'kan'kup goma 'bom mo tani ta wathin gwath ma yim mo dhali a'di jin ta'da 'kan'kup goma Kristhos mo tani ta'da Arungimis mo be.

⁴ Ma 'kwani gunn kun 'thon mo walla o gwo jin onu is mo ki 'kup buni kumu ki to mo tani uni mii miin 'thalkina/ gom 'kup buni mo be.

⁵ Hili ma up gunn kun 'thon mo walla o gwo is mo ki 'kup buni 'konuki kum ki to mo tani uni mii miin 'thalkina/ mo - a'di ta mii jin nyaka'd si'da/ gi mii jin 'thin ma yima mur mo.

⁶ Haali/ wakka 'bom mididi diki hi'th to i'kup gom is piti mo tani ayim mididi 'taki 'ciṭha/ mur'kup piti mo be. Hili wakki/ a'di ta miin 'thalkina/ mo goma 'bom mo mmo'ciṭha/ mur'kup mo walla mmo'thiya mur'kup mo tani dhalka yim hithi burrinyen'kup mo ma.

⁷ Haali/ wathin gwath ka ba/ mididi diki kum 'kup piti ki to mo haali/ a'di ta jama ma Arungimis mo dhali monycam piti mo be. Hili ayima 'bomi a'di ta monyca gom wathin gwath mo be.

8 (Haali/ wathin_g gwath_h yisa uku 'pena 'bom mowa, hili a 'bom 'peni wathin_g gwath_h mo be.

9 Wakan si'da/ wathin_g gwath_h dinuki uk goma 'bom mo, ayima 'bomi gom wathin_g gwath_h mo be.)

10 Ki a'di gi wakan mo tani a'bom ka ba/ midii mii ta gi burrinyen 'kup mo gom gway gi iman'doyu gwo mo.

11 Bahili e Tapa mo tani a'bom mol is piti yip mo ki dar gi wathin_g gwath_h mo dhali wathin_g gwath_h mol is piti yip mo ki dar ga yima 'bomi mo be.

12 Haali/ me'd jin ukuwa yima 'bomi mo 'peni wathin_g gwath_h mo tani wakan si'da/ wathin_g gwath_h shwane/ dhodhu mo 'pena yima 'bomi mo be. Dhali aris to 'baar mo 'kon mo 'peni Arungimis mo be.

13 Nyithi mii ki is bum mo ma. A'di ha me'd mo goma 'bom mo mmo'tho Arungimis mo ki dar gi 'kup ma yim jin kumu mo ki burrinye/ mo 'taa?

14 Dina to gi mony'cesh ki is piti ki tor um gwo mo jin mina wathin_g gwath_h kala mura 'calalga/ e 'kup piti mo tani a'di ta mii jin 'the a'di is mowa?

15 Hili wakka 'bom ta'd ga mura 'calalga/ mo tani a'di ta to jin min ma yimi kar is ki ca moyi. Haala mur'kup ma yim cikunu a'di mo mmodik 'kup e mo be.

16 Wakki/ wathin_g tal 'den kamu/ dina gwo mbwa mo mmorukuny mii mo tani ana mina ush ki 'tash mo haali/ miin_g kamu/ yisa di'da jin botkunu mo, walla mii jin miina 'kwani_g kaniisa ma Arungimis mo.

Mii jin Miinuwa Tharabeesa gi Tapa ki Shi/ mo

17 Hili e gwom pem jin bath a'di i'ko'd jin miga/ ye'th um sho'k mo tani aha/ dinaki man um mo haali/ ki um tuli is mo mmontal 'de/ mo tani a'di yisa gom shi/ miim 'boro'da, hili gom mii jin shi/a um 'teki shi/ mo be.

18 Haali/ gwom pem jin ta jin twa/a/ mo a'dihe/ ba/. Ki um tulki is mo mmontal 'de/ mo eya kaniisa mo tani aha/ cika gwo ki mo ma kwam bwa di'd e bwam um mo be. Dhali aha/ meta/ mo me'd mo mmogam a'di is mo be.

19 Haali/ mo ma kwam bwa midii mii di mo e bwam um mo, kan ki unin tiya kun ta 'kwani_g gana/ mo e bwam um mo tani uni minu nyith_h mo be.

20 Ki um tulki is mo mmontal 'de/ mo tani a'di yisa ta tonte/ gi Tapa jin shwakina um mowa.

21 Haali/ e mo jin shwanu to mo tani kun tiya ka 'dete/ 'dete/ mo tani shwaki tiya to i e mo jin ta tontem buni mo dhali jan 'den kamu/ mo tani 'koshkina te/ mo dhali jan kamu/ mo tani 'koshkin ma su mo be.

22 Aggi. Ki um 'koki ta gi gu'b mo mmoshwayi to nycine/ mo dhali piyi to mowa? Walla kaniisa ma Arungimis thu'thkina um mii mbwaman kan mo dhali 'the uni gwansan is kun dar gi to mo kana? Ki gwo gi wakatinta mmiga/ i/o gom umi? A/miga/ man um gom gwo gi wakansana? Cawwo/. Aha/ mina ush ki 'tash mo be.

Mo jin Karu Mii mo goma Tharabeesa gi Tapa mo

23 Haali/ aha/ bu'thkina gwo 'peni Tapa mo, a'di si'da/ jin cikika/ um mo, ki Tapa Yesus ki mon'thiny yan ki a'di 'cithkunu is ki gwo mo tani a'di bu'thki maan'kuthu'd mo

24 dhali ki a'di 'borki'da 'bor bwa i is mo tani a'di ki 'ce'd a'di mo dhali o gwo mo ki: Yansan ta is pem jin 'ce'dki'd gom um mo. Miiyi mii yansan mo ma mmoka aha/ e mo.

25 E mii yan jin nyakki'd si'da/ mo tani a'di bu'thki'da kubbaaya mo i'ko'di tonte/ mo mmo/o gwo mo ki: Akubbaaya yan a'di ta gwon this jin gamu me'd goma bas pem mo. Miiyi mii yansan mo ma me'd gunn kun pina um a'di mo tani e mii jin mina umi kayaa/ e mo be.

²⁶ Haala risa cim gunni 'baar mo kun 'kana um maan̪kuthu'd yan mo dhali kun pina uma kubbaaya yan mo tani um ki ci mii eya tente/ wu gi Tapam bum mo ntaga tee jin mina a'di pu'du/ mo be.

Mii jin Budhu To Atharabeesa gi Tapa ki Mii kun 'Koki Ha Me'd mo

²⁷ Wakan a'diyin jin midu 'ka maan̪kuthu'd yan mo walla piya kubbaaya gi Tapa mo ki mii jin ush me'd mo tani a'di mina mii di m'ba/ mo mmomii bungwar is gi Tapa ki shi/ kan mo dhala bas piti mo be.

²⁸ Dhalki 'kwani ka 'dete/ 'dete/ mo nyith is buni mo dhali ki mii gi wakan mo dhalki uni 'ka maan̪kuthu'd mo dhali piya kubbaaya mo.

²⁹ Haali/ wathin 'de/ yin jin midu shwa to mo dhali pi to mo jin dar gi mo jin nyitha a'di bungwar yan mo tani a'di ki shwa mii mo dhali piya nyor ma Arumgimis jin toru gwon dwall 'twa/ a'cesh apo/ is pitin gana/ mo be.

³⁰ Ba gi mii yansan kan mo tani a'di i'ka'da uma tiya is ka ris mo dhali 'ba'th mo dhali kun tiya wukin mo be.

³¹ Hili wakki/ ana nyitha is banan̪ gana/ mo ka jin gana/ mo tani ana yisa minu 'taki dwall gwo mo yisa.

³² Hili ki ana dwallkina Tapa gwo mo tani ana dorkunu mo, wakan ki ana minu 'taki 'koki mii miiwak apo/ mo nya'kki 'kwaniny'cesh mo be.

³³ Wakan iwak pem mo ki um mini tul is mo mmontal 'de/ mo mmoshwa to mo tani cori a'cor ka rem 'kup mo ma.

³⁴ Wakki/ wathin tal 'den kamu/ 'kosha te/ mo tani ba dhalki a'di ishwayi'd 'peni gu'b piti mo, isi ciki/ ki um mini 'koki pu'du/ mo dhali tul is mo mmontal 'de/ mo gom mo jin minu waka wak mo. Gwo gom ton tiya mo tani aha/ mina yip um 'ban mo ki gwo mo me'd jin miga/ pu'dku/ mo be.

12

To gi Shi/in jin Cinu ki Me'd mo

¹ Shwane/ isi gwo gom to gi shi/in kun cinu ki me'd mo iwak mo, aha/ dinaki njap um mmota pus mo.

² Um mishin me'd jin 'kona um ki dar ki ji gi lunun̪ gana/ mo tani um suskunu this e mo mmolun̪ tompinycon mo kun 'kon ki mutt mo, ma e bway gunn kun jo'ckunu um mo.

³ Wakan aha/ njapa um mo mmomish gwo 'ban mo ki wathin tal 'den kamu/ yisa di'da jin oki gwo ki Shi/in Dheleladhelel ma Arumgimis mo ki sule/ mo mmo/o gwo mo ki: Dhalka Kr̪st̪hos a'di jeenu mo. Dhali jan tal 'den kamu/ yisa midu mish gwo o mo mmo/o ka: Yesu ta Tapa mo isi ciki/ ki Shi/in Dheleladhelel mo be.

⁴ Hili to gun cinu ki me'd mo tani tana e kuku/ mo, hili 'peni Shi/ina 'de/ mo be.

⁵ Dhali hili mii ma tu'c tana e kuku/ mo, hili Tapa tal 'de/ mo be.

⁶ Dhali hili mo jin miinuwa tu'c tana e kuku/ mo, hili a'di ta'da Arumgimisa 'de/ mo jin umki uni eya ris uni 'baar ka 'dete/ 'dete/ mo be.

⁷ E uni 'baar ka 'dete/ 'dete/ mo tani mo jin toru ki Shi/in mo tani a'di cinu mo gom mo jin wothuwa woth mo gom 'kwani 'baar mo.

⁸ E wathin kamu/ 'de/ mo tani a'di cinu Shi/in mo jin ta moyuk gi gwo mo dhali e jan kamu/ mo tani mo jin ta monyith gi gwo mo isi me'd gwo gi tala Shi/ina 'de/ mo be.

⁹ E jan kamu/ mo tani mo jin gamu gwo is mo tani ki jasi Shi/ina 'de/ mo. E jan kamu/ mo tani to gun cinu ki me'd mo mmowa'ca wa'c mo tani ta ji gi Shi/ina 'de/ mo be.

10 E jaŋ kamu/ mo tani mo jin miinu miimer mo dhali e jaŋ kamu/ mo tani mmo/o gwo jin onu is mo dhali e jaŋ kamu/ mo tani mo jin mishu shi/in mo mmodhu ka kwa/um bwa mo dhali e jaŋ kamu/ mo tani mo jin mishu 'twan tiya wal mo e kuku/ mo dhali e jaŋ kamu/ mo tani mo jin mishu 'twa/ luḵ ki 'twan tiya mo be.

11 Aris uni gwansani 'baar mo umu mo 'peni a'din 'de/ mo dhali Shi/in tal 'de/ mo mmpowaḵ bwa mo e uni ka 'dete/ 'dete/ mo me'd jin ona a'di bwa mo be.

Aris Tom Buŋgwar Isi 'Baar mo Tala Isa 'De/ mo

12 Haali/ me'd jin tala buŋgwar isa 'de/ mo tani dhali tom buŋgwar is ḡala/ wana risa dhali to gi buŋgwar is mo tani bala 'ka'da miia ma e buŋgwar 'de/ mo tani wakani a'di ta'da Kristhos mo be.

13 Haali/ ki Shi/ina 'de/ mo tani ana 'baar mo 'kokunu mo mmocuḵ mo ki yi'de/ mo e buŋgwar isa 'de/ mo - ku Yahuuda/ dhali kuŋ Griki mo, walla uni gun ta ḵiŋkina/ kun yolu mo walla kun 'kon ki 'kus mo - aris uni 'baar mo 'kokunu mo mmodhu mo mmonyak pi 'peni Shi/ina 'de/ mo be.

14 Haali/ buŋgwar is mo tani a'di diki ta jasi gom en toŋ kamu/ mo hili gom mmota aris mo be.

15 Wakki/ sho'k mido 'tako gwo mo ki: Haali/ aha/ ḡala/ tana me'd mo tani aha/ yisa icila buŋgwar is mowa, itani a/a'di mido 'tako cwap a'di ari'ceenne/ 'peni buŋgwar is mowa?

16 Dhali wakki/ 'ce mido 'tako gwo mo ki: Haali/ aha/ ḡala/ tana e mo tani aha/ yisa icila buŋgwar is mowa, itani a/a'di mido 'tako cwap a'di ari'ceenne/ 'peni buŋgwar is mowa?

17 Wakki/ buŋgwar is ka 'bimpil mo mido 'tako ta e mo tani mane mo jin minu 'tako cik gwo mo? Wakki/ buŋgwar is ka 'bimpil mo mido 'tako ta 'ce mo tani mane mo jin minu 'tako jika shim to mo?

18 Hili me'd jin wana a'di kan mo tani Arungimis a'di thumki hilsaŋ e buŋgwar is mo uni 'baar ka 'dete/ 'dete/ mo me'd jin kwanykina a'di uni mo be.

19 Wakki/ hilsaŋi 'baar mo mini 'koko laḵa/ mo tani mane mo jin mina buŋgwar isi 'tako di mo?

20 Me'd jin wana a'di kan mo tani mo ma 'ci'cimi'th ḡala/ wana risa, ba buŋgwar is tal 'de/ naskina/ mo be.

21 E mido mol gwo o gom me'd mo ki: Aha/ mina mii ta gi/eya? walla dok/e 'kup mido sho'k kan mo ki: Aha/ mina mii diki ta gi/e mo.

22 E gwo jin ta ḵa'ckon mo tani 'ban gi buŋgwar is mo kun simmi mii e mo mmo'ka'd is mo tani uni ta uni gom a'di mo be.

23 Dhali 'ban gi buŋgwar is gwansan gun tosha ana gun aḥi montak mo tani ana tashu ki montak jin caaca mo, dhali 'ban gi buŋgwar is bana gun aḥa she/ ki aḥ mo tani dhuna ana ki yos mo,

24 a'di jin minu mii 'koko mii ta mo gom 'ban gi buŋgwar is gun 'koko aḥ she/ kan mo. Hili Arungimis a'di su'kki buŋgwar is kan mo mmmoḵikina a'di montak jin caaca e 'ban gi buŋgwar is jin aḥki'd mo be

25 ki monkamu/ mido 'tako diki di ki shu mo e buŋgwar is mo, hili ki to gi buŋgwar is mo mini nyaḵ hili e ka rem 'kup mo be.

26 Wakki/ tom buŋgwar isa 'deŋ kamu/ 'koshu ki isa nyor mo tani aris uni 'baar mo 'koshu ki isa nyori montal 'de/ mo. Wakki/ tom buŋgwar isa 'deŋ kamu/ taku mo tani aris uni 'baar mo 'kunya bwa mo imontal 'de/ mo be.

²⁷ Shwane/ um ta bungwar is ma Kristhos mo dhali umi 'baar mo ta tom bungwar is piti ki she/ ki she/ mo be.

²⁸ Dhali Arumgimis a'di ki lege'th kun tiya eya kaniisa mo: Uni gunn kun ta kun twa/a/ mo ta uni gun dhunu ki she/ mo, dhali kun 'ko'd mmota imanci gwo kun onu is mo dhali kun 'kon ma po/i kwara mmota imantor gwo mo, dhali kun ta imanmii miimer mo dhali kun ta imanwaca wac mo dhali kun ta imanwotha/ woth mo dhali kun ta imanjiya ji mo dhali kun ta imanwal 'twan tiya ki she/ ki she/ mo be.

²⁹ A/aris uni 'baar mo ta uni gun dhunu ki sheya? A/aris uni 'baar mo ta uni gun ta iman'o gwo isa? A/aris uni 'baar mo ta imantor gwowa? A/aris uni 'baar mo mii miimera?

³⁰ A/aris uni 'baar mo bu'th to gun cinu ki me'd mo mmowaca wac mowa? A/aris uni 'baar mo mishki 'twan tiya wal mowa? A/aris uni 'baar mo ta imanluk 'twaa?

³¹ Hili tayi ki bwa jin onu ka daran du mo gom to gun cinu ki me'd mo kun yipu mii is mo.

Mo/en

Dhali aha/ mina tor a'di um jin 'ce'de'da po/ mo a'di jin 'boro'd ki isi 'bor gana/ mo be.

13

¹ Wakki/ aha/ mina o gwo ki 'twa/ gi 'kwani mo dhali ki 'twa/ gi iman'doyu gwo mo tani ihili aha/ dara gi mo/en mo tani aha/ gwona is 'te/ me'da sahan gurany 'per mo walla me'da sahana shu e mo jin tiri'd ki nyanye/ mo.

² Wakki/ aha/ tana gi mom'bi'th mo mmo/o gwo is mo dhali mmomisha ris gwo 'baar mo kun ta gwo kun baku 'ban mo dhali aris yuk mo si'da/, dhali wakki/ aha/ tana gi mongam gwo isi 'baar mo, wakan mmomish joç wosh kun turatur mo tani ihili aha/ dara gi mo/en mo tani aha/ tana ton kamuwa?

³ Wakki/ aha/ cina tom pemi 'baar mo kun taka/ mo dhali wakki/ aha/ pisha is pem ki o'd mo mmopur mo tani ihili aha/ dara gi mo/en mo tani aha/ kala ton kamu/ 'kup paa?

⁴ Mo/en a'di ta mon'kuç bwa mo dhali momii ki bwan'kush mo. Mo/en ta mii mmo'ta'c bwa mo yisa walla mmokar 'ba/ ki ca mo yisa.

⁵ A'di yisa kar is ki ji gi mish to mo yisa walla mii mii jin mantharamandhar yisa. Mo/en diki ses mo mmomii a'di jin o a'di bwa mo. A'di diki shwa mii ki o'd mo walla push gwo shi/i'd eya du mo.

⁶ A'di yisa 'kunya bwa mo gom tonthus gun thamu mii mo yisa, hili a'di 'kunya bwa mo gom mii kun miinu ki miinj gana/ mo be.

⁷ Mo/en a'di dininki'da ris to 'baar mo she/ mo, a'di gama'da ris gwo 'baar mo is mo, a'di ta'd ga 'tenj kape/ gom to 'baar mo, a'di 'dim 'kup gom to 'baar mo.

⁸ Mo/en midi diki wu 'kup mo. Me'd gwo jin onu is mo tani a'di midi pe mo. Me'd gwo jin onu ki 'twarj 'kwani mo tani uni mini dak mo. Me'd gwo gi yuk mo tani a'di midi pe mo.

⁹ Haali/ monyith bana mo tani a'di a'ha 'ban mo dhali gwom bana jin ona ana is mo tani a'di a'ha 'ban mo be.

¹⁰ Hili ki a'dim 'borganj gana/ midi pu'du/ mo tani a'di jin a'ha 'ban mo tani midi pe mo be.

¹¹ Ki aha/ tana a'ci mo tani aha/ ona gwo mo me'da 'ci mo, aha/ kulumkina gwo ibwa mo me'da 'ci mo, aha/ miina mii me'da 'ci mo. Ki aha/ wara ki wathi/ mo tani aha/ dhalkina mii ma 'ci 'pen mo.

¹² Haali/ shwane/ to parkina ana e eya hiljaro/ jin dukaduk mo tani, hili yilaŋ kamu/ ka karambor mo. Shwane/ 'bana kamu/ mishka/ mo. Hili yilaŋ kamu/ mo tani aha/ mina mish 'bani 'baar mo, isi kani me'd jin mishkunu aha/ 'bani 'baar mo be.

¹³ Wakan mongam gwo is mo dhali mo ma 'teŋ kape/ 'dapan ki me'd mo ki mo/en mo, uni kwara gwansan mo. Hili a'di jin ca'd ki caŋ gana/ mo mmobol gwoho e mo tani a'di ita mo/en mo be.

14

'Twan Tiya dhali Mo jin Onu Gwo Is mo

¹ Kari mo/en mmota tom bum jin mina umi gu ki e mo dhali oyi bwa ka daran du mo gom to gi shi/in gun cinu ki me'd mo isi ki ji mum mo ki um mini o gwo kun onu is mo.

² Haali/ wathin 'de/ jin midi o gwo ki 'twaŋ kamu/ mo tani diki o gwo gom 'kwani 'te/ mo, hili goma Arungimis mo. Haali/ jan tal 'deŋ kamu/ diki mish a'di gwo 'ban mo, hili a'di oki gwo jin baku ki Shi/in mo be.

³ Hili 'bwanu'b gwoŋ kamu/ a'dihe/ be, gom a'di jin oki gwo is mo tani a'di tor ki 'kwani gwo mo gom monyaŋ is buni mo dhali mmo'bi'th uni adu is mo dhali mmomalasa dum buni mo be.

⁴ A'di jin oki gwo mo ki 'twaŋ kamu/ mo tani a'di nyaŋki is pitinŋ gana mo, hili a'di jin oki gwo is mo tani a'di nyaŋki'da kaniisa is mo be.

⁵ Hili aha/ ŋapa umi 'baar mo mmo/o gwo ki 'twan tiya mo, hili isi kani aha/ ona bwa ki um mini o gwo is mo. A'di jin o gwo is mo tani a'di ekki'd ki a'di jin o gwo ki 'twaŋ kamu/ mo isi ciki/ jan tal 'deŋ kamu/ midi luk 'twa/ mo, wakan ka kaniisa minu 'taki nyaŋ is mo be.

⁶ Shwane/ iwaŋ mo, wakki/ aha/ mina pu'dku/ i um mo mmo/o gwo ki 'twan tiya mo tani aha/ mina 'taki mii shi/ miim 'boro'd wakata mo gom um mo? hili isi ciki/ mo aha/ mina be'd ki um gwoŋ kamu/ jin ta ji gi miinu 'cee mo walla moyuk mo walla gwo jin onu is mo walla gwo jin toru mo.

⁷ Hili isi kan wakki/ to gun miinu to mme'd mo kun dar ki mondiki/e mo me'da thathar mo walla adhen'dhenye/ mo tani 'koki lugum ko mo ka 'dete/ 'dete/ tani ki 'kwani mini mish ki ja pinu mo?

⁸ Dhali wakka puluŋ diki ko mo mmo/ak 'kus e mo tani aja a'di midi thoson is mo gom mmo/as mo?

⁹ Wakan wakki/ um ki is bum mo o gwo ki 'twaŋ kamu/ mo jin molu cik mo tani 'kwani mini mish gwo 'ban kata a'di jin onu mo? Haali/ um tor ki gwo ki buthur gana/ mo be.

¹⁰ Gwoŋ kamu/ maça/ minu dhaŋa? Aris 'twa/ tana ris ka ris kun 'kokin ki she/ ki she/ mo e mony'cesh mo dhali jaŋ kamu/ yisa dar gi 'pemena.

¹¹ Hili wakki/ aha/ dinaki mish 'pemen gwo ki 'twa/ yan mo tani aha/ mina ta amanmol 'twa/ yan cik mo goma manŋor gwo mo dhali amanŋor gwo yan mo midi ta amanmol 'twa/ yan tor gom aha/ mo be.

¹² Wakan, um ki is bum mo tani me'd jin ganankina um 'ba/ mo gom mo jin minu tor mii gi Shi/in eya tente/ mo tani shwayi ki o'd mo mmobol mii e mo mmonyaŋa kaniisa is mo.

¹³ Wakan a'di jin o gwo ki 'twaŋ kamu/ mo midi mii 'tho mo gom mom'bi'th mo gom 'twa/ jin minu luk mo be.

¹⁴ Haali/ wakki/ aha/ 'thona ki 'twaŋ kamu/ mo tani shi/in pem 'tho'd mo, hili adum pem mol maman dho'th mo be.

¹⁵ Dhali aha/ mina miya ta mo? Aha/ mina 'tho mo ki shi/in mo dhali aha/ mina 'tho mo ka du si'da/ mo. Dhali aha/ mina yuk gway ki shi/in mo dhali aha/ mina yuk gway ka du si'da/ mo be.

16 Wanya/ 'te/ ba/, wakki/ /e 'bori mii ki shi/in mo tani ka ciŋ kamu/ jin mol 'twa/ yan wal mo tani midī mish gwo o mo ki: Amen, kata mo gom mo ma 'bor bwam pini jin 'bora /e a'bor bwa i is mo ki a'di diki mish gwo jin ona /e moyi?

17 Haali/ /e mini ɕi mom'bor bwa i is jin ha me'd mo, hili wathiŋ kamu/ yisa minu nyaŋ is mowa.

18 Aha/ 'borkina Arungimis bwa i is mo ki aha/ okina gwo ki 'twan tiya mo mmobol um 'baar mo e mo.

19 Bahili eya kaniisa mo tani aha/ mina dhal mii e i is mo mmotor um gwo mo jasi mudhe'd ka dum pem mo, ma kan mo mmoye'th kun tiya sho'k mo, ki gwo gun 'koni alaapi 'kume'd mo jin miga/ tor ki 'twaŋ kamu/ mo be.

20 Iwaka, dhalku/ ki 'ko mo mmota uci mo e gwom bum kun kuluma umi bwa mo. Gom gwon thus mo tani wari ki usha ŋa/ mo hili e gwo gun kuluma umi bwa mo tani tayi ku gun isin mo.

21 E gwonkan jin cikunu mo tani a'di 'kwarkunu mo ki: Ki 'twa/ gi 'kwanin tiya mo dhali ka le'd gi 'kwani ki she/ mo tani miga/ tor gwo ki 'kwani gwansan mo, dhali isi kani uni si'da/ mini 'koki dhu 'ce gom aha/ mo. A'di ta gwo jin ona Tapa mo.

22 Wakan 'twan tiya uni ta jamas mii mo, yisa gom uni gun gam gwo is mo hili gom uni gun dar gi gwo jin gamu is mo. Nye, gwo jin onu is mo tani a'di yisa gom uni gun 'kon ki dar gi gwo jin gamu is mo, hili gom uni gun gami gwo is mo be.

23 Wakki/ wakan mo tani akaniisa 'baar mo ka tul 'kup mo dhali uni 'baar mo o gwo ki 'twan tiya mo tani dhali 'kwani gun 'kon ka piye/ walla gun daran ki gwo jin gamu is mo tani wakki/ uni ciɕin mo tani mina uni 'koki o gwo ki um sona du mowa?

24 Hili wakki/ uni 'baar mo o gwo is mo dhali a'di jin dara'd gi gwo jin gamu is mo walla akamu/ jin di'd ka piye/ cicki'd mo tani a'di sugu adu mo ki uni 'baar mo dhali a'di doŋu gwo gom miim piti mo ki uni 'baar mo si'da/.

25 Adum piti jin di'd ki kup mo tani thisu tor mo be. Dhali wakan mmobitkina a'di bwam/em piti a'esh mo tani a'di midī luŋa Arungimis mo dhali tor eya tente/ ka Arungimis ka jin gana/ a'di di'd e bwam um mo be.

Aris To 'Baar mo Minu Mii ka Para Po/ mo

26 Kataye si'da/, iwaŋ mo? Ki um tulki is mo mmontal 'de/ mo um ka 'dete/ 'dete/ yukki gway mo dhali ta gi gwo jin toru mo dhali gwo jin 'ceenu mo dhali 'twaŋ kamu/ jin toru mo walla gwo jin luŋuwa luŋ mo. Dhalka ris to 'baar mo miinu mo mmonyaŋa nyaŋ mo.

27 Wakki/ wathiŋ kamu/ wal 'twaŋ kamu/ mo tani dhalki uni mini mii 'ko jasi su/ mo walla midī mii ta jasi kwara mo dhali uni gwan ka 'dete/ 'dete/ ki jin gar mo dhali dhalki jaŋ kamu/ iluki 'twa/ mo.

28 Hili wakki/ jaŋ kamu/ midī diki di mo mmoluŋ 'twa/ mo tani dhalki uni ka 'dete/ 'dete/ 'peni uni mo 'kon ki shwam mo eya kaniisa mo dhali o gwo ki is buni mo dhali eya Arungimis mo be.

29 Dhalki uni su/ walla kwara gun ta iman/o gwo jin onu is mo mmotor gwo mo tani dhali dhalki kun tiya uni nyith a'di jin onu mo.

30 Wakki/ gwo jin 'ceenu onu gom a'diŋ kamu/ jin di'd ki she/ mo tani dhalki a'di jin twa/a/ ɕa'ba'd ki shwam mo.

31 Haali/ umi 'baar mo mini mish gwo o jin onu is mo ka 'dete/ 'dete/ mo. Wakan ki umi 'baar mo mini mish gwo 'ban mo dhali umi 'baar mo minu 'bitha du is mo be.

32 Dhali shi/in gi iman/o gwo jin onu is mo tani uni 'dapan ki gwo jin onu is mo be.

³³ Haali/ Arumgimis yisa ta'da Arumgimis jin dunḵurki mii mo, hili a'di ta ji gi mo ma ku'th is mo be.

Me'da risa kaniisa 'baar mo gi imandhunu ki she/ ki dhelel dhelel mo tani

³⁴ up mini mii 'ko ki shwam mo eya kaniisa mo. Haali/ uni 'konuki dhal bway mo mmo/o gwo mo, hili uni mini mii 'ko ki 'ko'd me'd mo me'd isi gwoḵkan jin cikunu mo jin o gwo kan si'da/ mo.

³⁵ Wakki/ toḵ kamu/ di'd jin ona bwa uni mmomish mo tani dhalki uni idot ikathim buni e gu'b buni mo. Haali/ a'di ta mii jin 'the is ki 'the mo goma 'bom mmoḵor gwo eya kaniisa mo be.

³⁶ Katintaye? Ki gwo ma Arumgimis piyi'd 'peni uma? Walla a/um a'di um 'cena ijidhirkina a'di mowa?

³⁷ Wakki/ wathin tal 'denḵ kamu/ mididi kulum gwo ibwa mo ki a'di ta a'di jin mididi o gwo is mo walla gom to gi shi/in mo tani a'di mididi 'taki nyith gwo gom gwom pem jin 'kwarka/ mo gom um mo ta gwoḵkan gi Tapa mo be.

³⁸ Wakki/ wathin tal 'denḵ kamu/ diki mish a'di yan mo tani a'di minu mish 'ban mo yisa.

³⁹ Wakan iwak pem mo, oyi bwa ka daran du mo mmo/o gwo jin onu is mo dhali dhalku/ ki nona non ki bway mo mmoḵor gwo ki 'twan tiya mo.

⁴⁰ Hili aris to 'baar mo minu 'taki mii mo ki mii jin thuḵu mo dhali ka para po/ mo be.

15

Mompi jin Piyin ma Kristhos mo

¹ Dhali shwane/ aha/ mina ka um gwo e mo, iwak mo, e gwom 'borga/ jin cikika/ um mo, a'di jin bu'thkina um mo dhali a'di jin doshkina um apo/ mo be.

² Gwo jin wothkununu um mo wakki/ um mini bu'th a'di mmoḵel shoki cine/ mo, - isi ciki/ um gamki a'di is ki pe'th mo.

³ Haali/ aha/ cikina a'di um a'di jin mididi mii ta to jin mididi mii ta jin twa/a/ mo a'di jin bu'thkika/ mo si'da/ ka Kristhos wuki'd mo gom miinthus bana mo isi me'd gwo ma Arumgimis kun 'kwarkunu mo be.

⁴ Dhali a'di kankunu mo dhali a'di cuki mis mo ka cim kwara isi me'd Gwo ma Arumgimis jin 'kwarkunu mo be.

⁵ Dhali a'di piki'da Sapa i is mo dhali yan'ko'd e uni gun tana 'kume'd i'ce'dka su/ mo be.

⁶ Dhali yan'ko'd a'di piki 'kwani gun bol 'kwani e mo kun 'koni iss* 'kwanimpa i/iss 'de/ i'ce'dki iss 'kwanimpa imudhe'd apo/ mo ki me'd 'denḵ gana/ mo. Kun tiya ka woho/ mo tani uni 'kon ki e mo naskina/, ba kun tiya uni i/ishki e mo be.

⁷ Yan'ko'd a'di piki'da Yakuubi is mo, dhali yan'ko'd a'di piki uni 'baar mo i is mo kun dhunu ki she/ mo.

⁸ Dhali 'ko'di uni 'baar mo tani a'di piki aha/ i is si'da/ mo me'd ara ḵan 'de/ jin daka sulu adho'th mo be.

⁹ Haali/ aha/ tana a'di jin pisi'd ki uni gun dhunu ki she/ mo, mmodika/ ki ha me'd mo jin minu yuk aha/ ki a'di jin karu ki she/ mo haali/ aha/ to'ckina akaniisa ma Arumgimis bwa mo be.

¹⁰ Hili ka 'the ma Arumgimis mo tani aha/ be itana aha/ mo, dhali ka 'them piti 'kup ki aha/ mo tani a'di yisa ki petha. E gwo gi ca'ckon mo tani aha/ miikina tu'c jin 'batha'ba'th mmobol unin tiya e mo gun miikin mo. Ba a'di yisa ta aha/ mo, hili a'the ma Arumgimis mo, a'di jin diki'd e aha/ mo be.

* 15:6 kumsumiyya

11 Wakki/ a'di ta aha/ walla uni mo tani wakan aman cikina um gwo mo dhali wakan um gamki gwo is mo be.

Mompi jin Pikina ku gun Wukin mo

12 Dhali wakka Kristhos cinu gwo mo me'd jin pikina a'di mo 'peni mowu mo tani kata ona uma tiya gwo mo ki mo jin piyunu/ mo 'peni mowu mo piyi'd mo?

13 Hili wakki/ mo jin piyunu/ mo 'peni mowu mo piyi'd mo tani aKristhos si'da/ yisa 'de'kkunuwa.

14 Wakka Kristhos minu 'taki 'koki 'de'k mo tani gwo jin cina aman mo tani midu ta jim pe'th mo dhali mongam gwo is bum mo si'da/ midu ta jim pe'th mo be.

15 Isi kan aman mina ta ku gi minu gam mo gun thisu hash mo goma Arungimis mo haali/ aman tena gwo mo goma Arungimis mo ki a'di 'de'kki'da Kristhos mo 'peni mowu mo a'di jin dina a'di ki 'de'k mo wakki/ a'di ta gwon gana/ mo wakki/ uni gun wukin mo 'konuki 'de'k mo be.

16 Haali/ wakki/ uni gun wukin mo 'konuki 'de'k mo tani wakan si'da/ Kristhos dinuki 'deku/ mo be.

17 Wakka Kristhos 'konuki 'deku/ mo tani mongam gwo is bum di'd ki pe'th mo dhali um 'kon mo naskina/ e miinthus mo be.

18 Dhali uni gwansan si'da/ gun ishki e mo eya Kristhos mo tani minu 'ce'd sho'k mo be.

19 Wakki/ e mon'koki/e yan jasi kan mo tani ana gun 'kona eya Kristhos mo tana gi mo ma 'tej kape/ mo tani ana 'baar mo tana 'kwani gun bofa ki shi/ gana/ mo mmobol 'kwanin tiya 'baar mo e mo be.

20 Hili shoka 'cesh gana/ mo tani aKristhos 'de'kkunu mo 'peni mowu mo, a'di yansan jin ta maman jin twa/a/ ki uni gwansan kun ishki e mo be.

21 Haali/ ki wathimpa mo tani a'di pu'dkina wu mo dhali ki wathimpa mo tani a'di pu'dkina mo jin piyunu/ mo si'da/ 'peni mowu mo be.

22 Haali/ me'd jin wukina 'kwani 'baar mo eya Aadam mo tani wakan si'da/ eya Kristhos mo tani aris uni 'baar mo minu dhu ki e mo be.

23 Hili aris 'kwani 'baar ka 'dete/ 'dete/ mo e mo ma para pom buni mo tani aKristhos ta maman ma 'kan 'kup jin twa/a/ mo dhali yan'ko'd e yam piti jin mina a'di pu'du/ mo tani uni gwansan kun ta ku ma Kristhos mo be.

24 Yan'ko'd 'pemen midu pu'du/ mo ki a'di midu ci bampa/ ka Arungimis mo a'di jin ta Com mo i'ko'd a'di midu 'ce'da ris mo gun tanu tapa sho'k mo dhali aris mo gun tanu ki moshirr mo dhali aris mom'bi'th mo be.

25 Haali/ a'di midu mii ta Tapa mo ntagi a'di midu dhu aris uni 'baar mo kun ta 'kup gi a'di mo e bwan'kwariny sho'k piti mo be.

26 Dhali 'kup jin ta jin 'ko'd jin minu 'ce'd sho'k mo tani ta wu mo be.

27 Haali/ Arungimis dhuki'da ris to 'baar mo 'ko'di me'd piti mo e bwan'kwariny sho'k piti mo be. Hili ki a'di o gwo mo ki: Aris to 'baar mo dhukunu mo 'ko'di me'd piti mo e bwan'kwariny a'di mo tani a'di di'da tente/ ba/ ki a'di jin dhuki'da ris to 'baar mo e bwan'kwariny me'd piti kan mo tani a'di di'd ka po/ mo be.

28 Ki aris to 'baar dhukunu mo 'ko'di me'd piti mo tani Ya/ si'da/ ki is piti mo minu kar 'ko'di me'di a'di mo a'di jin dhuki'da ris to 'baar mo e bwan'kwariny me'd piti mo, ka Arungimis midu ta aris to 'baar mo goma ris 'kwani 'baar ka 'dete/ 'dete/ mo be.

29 Maça/ 'te/ ba/. Ki gwonta ona 'kwani gwo mo gom gwo jin miinuwa mii ki yi'de/ mo gom gway gi uni kun wukin mo? Wakki/ uni kun wukin mo 'konuki 'deku/ 'baar mo tani atinta miinu 'kwani ki yi'de/ gom gway buni mo?

30 Kata si'da/ dikika/ e mo jin 'dishi 'twa/ aha/ wu mo?

31 Aha/ usha mo, iwak mo, gom miim pem jin karka/ is ki ca mo e um mo a'di jin taka/ eya Kristhos jin ta'da Yesu Tapam bana mo tani aha/ wukina isa yempa/ mo be.

32 Dhali to jin ta shi/ miim 'boro'd gom aha/ mo tani ta'da ta mo wakki/ aha/ ona gwo me'd wathi/ en'thi/ mo, wakki/ aha/ askina ki to/e gi Pan Epasu mo? Wakki/ uni gun wukin mo 'konuki 'deku/ mo tani: Dhalki ana shwana to mo dhali pi to mo haali/ ka'thamo/ mo tani ana ki wu mo be.

33 Dhalku/ ki ta ku gun minu he'k e mo. Mii jin cenu e ki tonthus mo tani uni shi/i miim 'boron kun botu mo be.

34 Kulumi gwo ibwa mo ki kulum gana/ mo ma. Dhali dhalku/ miinthus ki mii mo dok/e haali/ kun tiya 'koki misha Arungimis mo. Aha/ ona gwo yansan mmo'the um is mo be.

Mompi jin Piyunu ki Bunḡwar Is mo

35 Hili 'kwanin tiya ka 'dete/ 'dete/ mini doḡ gwo mo ki: Ki ku gun wukin minu 'deku kataye? Dhali ki bunḡwar is jin wakata imina uni pu'du/ mo?

36 /E wathim pus yan mo! To jin sina /e mo tani a/a'di midi di ki e itwa/a/ mowa hili isi ciki/ a'di midi wu mo be.

37 Dhali a'di jin sina /e mo tani diki ta bunḡwar is mo jin mina a'di di mo tani, hili jasi emena 'de/ mo, wariba/ midi ta pos bunyan mo walla emen posa kamu/ mo.

38 Hili Arungimis ki ci a'di bunḡwar is me'd jin kwanykina a'di a'di mo. Dhali arisa ka'bany to ki she/ ki she/ mo tani cina a'di bunḡwar is bunin gana/ mo be.

39 Haali/ aris shuman is yisa nyakkana, hili bunḡwar is tal 'de/ gom 'kwani en'thi/ mo, dhali bunḡwara kamu/ goma ris tonycuḡ mo, dhali bunḡwara kamu/ goma ris tonyjeshe/ mo dhali bunḡwara kamu/ goma ris to yi'de/ mo.

40 Wakan si'da/ aris bunḡwar isa tiya ta ku gi momis mo dhali wakan si'da/ aris bunḡwar isa tiya ta ku ga 'cesh mo. Hili monyca gi bunḡwar is gi momis mo tani a'di tal 'de/ mo dhali monyca gi bunḡwar is ga 'cesh mo tani a'di ta jan kamu/ mo be.

41 Dhali monycaḡ kamu/ 'de/ goma tente/ mo dhali monycaḡ kamu/ goma ppe mo dhali monycaḡ kamu/ goma risa cul mo. Haala cula kamu/ dina ca ki she/ 'pena cula kamu/ mo be.

42 Wakan si'da/ a'di nyakka'd ki mo jin pinu 'peni mowu mo be. A'di jin sikunu mo tani a'di mishi pu/ mo, dhali a'di jin 'de'kkunu mo tani a'di moli pu/ mo be.

43 A'di sikunu mo ki dar gi montak mo, dhali a'di 'de'kkunu mo e monyca mo. Dhali a'di sikunu mo ki is jin 'ka'da'd mo, dhali a'di 'de'kkunu mo ki mom'bi'th mo be.

44 A'di sikunu mo ki is bunḡwar jin ta shuman is mo dhali a'di 'de'kkunu mo ki bunḡwar is jin ta ji gi to gi shi/in mo. Wakki/ bunḡwar is jin ta ji gi shuman is di'd mo tani wakan si'da/ bunḡwar is gi to gi shi/in di'd mo be.

45 A'di i'kwarkunu gwo gi wakan mo be ki: Dhala Adam yan jin ta jin twa/ a/ mo tani warki'd ki to jin di ki e mo, dhala Adam jin ta jin 'ko'd mo tani warki'd ki shi/in jin ci mondiki/e mo be.

46 Hili a'di yisa ta to gi shi/in jin ta jin twa/a/ mo, hili a'di jin ta ji gi shuman is mo dhali yan'ko'd ji gi to gi shi/in mo be.

47 Wathi/ jin ta jin twa/a/ mo tani a'di ta jany 'cesh mo, wathi/ jin cila bu'd mo. Dhali wathi/ jin ta jin 'ko'd mo tani a'di 'peni momis mo be.

48 Me'd jin tana wathi/ jim bu'da 'cesh mo tani wakan si'da/ aris uni gwansan ta ku gi bu'da 'cesh mo. Dhali me'd jin tana wathi/ ji gi momis mo tani wakan si'da/ uni gwansan kun 'kon e momis mo.

49 Me'd jin kalkina ana jamas gi wathi/ gi bu'da 'cesh mo tani ana si'da/ mina kal jamas gi wathi/ jin ta ji gi momis mo be.

50 Aha/ tora um gwo yansan mo, iwaḵ mo, shuman is dhala bas mo tani uni mol mal gi Bampa/ ma Arungimis gam mo walla si'da/ to jin mishi pu/ mo tani mol gam mal gi a'di jin moli pu/ mo be.

51 Hili, aha/ tora um gwo jin ta jim bag mo. Ki ana 'baar mo mina 'koki ish e mo be, hili aris ana 'baar mo minu aḵ e mo be,

52 e mo jin ta ari mo mo, dhali e mo jin 'kamu'thkunu e mo tani ka poome/ jin ta jin 'ko'd dhalkunu me'd mo be. Haala poome/ midi koyu/ mo dhali uni gun wun mo tani minu 'deku/ mo e buṅwar kun moli pu/ mo dhali ana minu aḵ mo be.

53 Haali/ buṅwar is yan jin mishi pu/ mo tani midi mii war gi buṅwar is jin moli pu/ mo dhali buṅwar shuman is yan jin mishi wu mo tani midi mii shum mo ki mo jin moli wu mo be.

54 Ki a'di jin mishi pu/ mo midi shum mo ki a'di jin moli pu/ mo tani dhali a'di jin mishi wu mo tani midi shum mo ki a'di jin moli wu mo tani yan'ko'd a'di mina gwo pu'du/ mo jin onu jin 'kwarkunu mo cikise/ mo be ki: Mowu a'di loskunu mo e mo jin pinu mii e mo be.

55 Ayy wuwa, mane miim pini jin pina /e mii eye?

Ayy wuwa, mane mom pini jin woja /eya wojje?

56 Mowoj jin woja wu mo tani a'di ta miinthus mo dhali mom'bi'th gi miinthus mo tani a'di ta gwoṅkan jin cinu mo be.

57 Hili mo jin 'boruwa 'bor bwa i is mo midi di mo goma Arungimis mo a'di jin ciki ana mompi mii e e Tapam bana jin ta'da Yesus Kristhos mo be.

58 Wakan um pem gun enka/ mo, kun tana waḵ mo tani teli mo dhali tayi ku gi minu mol joḵ mo dhali 'dapi 'twa/ mo isa yempa/ eya tu'c gi Tapa mo mmomisha um ki um 'koki miya tu'c gi Tapa ki pe'th mo be.

16

Mo jin Cinu To gom Uni kun Dhunu mo ki She/ ki Dhelel Dhelel mo

1 Dhali isi gwo gom to jin cinu mo gom uni kun dhunu mo ki she/ ki dhelel dhelel mo. Me'd jin kankika/ 'kwaniṅ kaniisa gi Pan Galathiyya gwo mo tani wakan si'da/ miyi um a'di mo ma.

2 Ka cim jin twa/a/ ka dhas mo isa yempa/ mo tani aris um ka 'dete/ 'dete/ mo mini dhu to 'pen ka piye/ mo dhali dhu a'di e mo jin dhunu to mo, ma to yin jin gamkina um mo, wakan ki to gun cinu mo tani minu 'koki mii tul is mo me'd jin miga/ pu'dku/ mo be.

3 Dhali ki aha/ mina bumburku/ mo tani aha/ mina hashki uni gwansan gun mina umi mish 'ban ki gwo jin 'kwara um mo mmokal tom bum jin cina um ki me'd mo e Pa Urushaliim mo be.

4 Waḵki/ a'di midi 'taki ta shi/ miim 'boro'd gom aha/ mmoyaku/ mo si'da/ tani uni mini ta kum pem kun mini sus aha/ mo be.

Mo jin Kawurkunu mo gom Ii jin Inu mo

5 Aha/ mina buti um mo 'ko'di mom pem jin miga/ pe Pam Makiduniyya mo haali/ aha/ dina gwo ibwa mo mmoya pe Pam Makiduniyya mo be.

6 Dhali wari aha/ mina ca'b nyakki um mo walla isi kan aha/ mina 'baar mondit mo nyakki um mo, wakan ki um mini sus aha/ e yam pem jin yaka/ mo e mo gunn kun miga/ ya mo be.

⁷ Haali/ aha/ ona bwa mmopar um e shwane/ mo, yisa jasi e yampe yisa. Aha/ tana gi mo ma 'terj kape/ mo mmo'baar yila tiya mo nyakki um mo wakki/ Tapa midi dhal aha/ bway mo be.

⁸ Hili aha/ mina ca'b mo e Pan Epasus mo ntaga Acim Kamsiin mo be.

⁹ Haala campur wangala wangal mo dhali mo jin midi uma tu'c mo tani a'di ka'dkunu aha/ mo dhali 'kwani kun ta 'kup mo tani tana ris ka ris mo be.

¹⁰ Ka Timuthawuus midi pu'dku/ mo tani hili a'di e ki 'bore/ mo ma mmokar a'di ki kar 'pempa mo e bwam um mo haali/ a'di miiki'da tu'c gi Tapa mo me'd aha/ mo be.

¹¹ Wakan dhalku/ ki dhal wathin 'denj kamu/ bway mo mmowak a'di mo. Susu/ a'di e bway piti ki monku'th is mo ki a'di midi 'taki doku/ i aha/ mo, haali/ aha/ timkina a'di mo nyakka wak mo be.

Kwalany 'Te/ be. Gwondot kun Dotu mo dhali Monthe Me'd mo be

¹² Haali/ goma kam bana ka Abulluus mo tani aha/ okina bwa ka daran du mo gom a'di mmobuti um mo nyakka waka tiya mo, hili a'di yisa ta bwa ma Arungimis mo gom a'di mmoyaku/ shwane/ mo. A'di midi yaku/ mo wakki/ a'di ta'd gi embula 'borga/ mo be.

¹³ 'Koyi ki montim mo mo ma. Doshi mmotel shoka 'cesh e mongam gwo is bum mo. 'Bithi adu is mo dhali 'bithi ki 'bi'th mo.

¹⁴ Dhalka ris to gwansan gun miina um mo tani miinu ki mo/en mo.

¹⁵ Shwane/ iwaq mo, um mishin ki kunj gu'b ma Istipanus uni ta ku gi twa/ a/ kun gamki gwo is mo e Pa Akaa/iya mo dhali uni dhuki is buninj gana/ ki 'kwanij gayiin mo goma tu'c gi uni kun dhunu ki she/ ki dhelel dhelel mo be.

¹⁶ Aha/ yuka um mo ki bwa jin o'd ka daran du mo jin mina umi ha gwo gi 'kwani kun wakan e mo dhali ka ris uni 'baar ka 'dete/ 'dete/ mo, kun ta kun nyakkana tu'c mii mo dhali kun mii to mo.

¹⁷ Aha/ 'kunya bwa mo gom pu'd jin pu'dkin ma Istipanus mo dhala Purtunatus mo dhala Akaa/ikus mo haali/ uni 'tu'dki embul bum gun pina um mo ba/.

¹⁸ Haali/ uni yeeyaa/ shi/in pem mo ki jim bum gana/ ilu/ mo. Hayyi 'kwani gi wakansan mo ma.

¹⁹ Arisa kaniisa gun 'kon e Pa Asiyya mo tani hashki um monthe me'd mo. Akiila dhala Piriskilla mo nyakki 'kwanij kaniisa gi gu'b buni mo tani hashki uma du gi monthe me'd e Tapa mo be.

²⁰ Arisa waki 'baar mo hashki um monthe me'd mo be. Theka the me'd ka rem 'kup ki 'twanj gana/ jin pinu mo ma.

²¹ Aha/ jin tana Buulus 'kwarkina monthe me'd yansan ki me'd pem gana/ mo be.

²² Wakka cin 'denj kamu/ dara'd gi mo/en gi Tapa mo tani dhalki a'di jeenu mo. Tapam bam, pu'du/ ma.

²³ A'the gi Tapa Yesus midi di e um mo.

²⁴ Mo/en pem midi di gom umi 'baar mo eya Kristhos jin ta'da Yesus mo be. Amen.

Gwo jin 'Ko'd jin 'Kwar ma Buulus gom 'Kwani gi Pañ KURINT̩H̩UUS mo

Monthe Me'd mo

¹ ABuulus a'di jin karu ki she/ mo goma Kristhos jin ta'da Yesu mo ki bwa ma Arumgimis mo, dhala Timuthawuus jin ta'da kam bana mo.

Eya kaniisa ma Arumgimis mo jin di'd e Pañ Kurint̩h̩uus mo nyakkaa ris uni kun dhunu ki she/ ki dhelel dhelel mo, uni 'baar mo kun 'kokin mo e Pa Akaa/ iya mo.

² A 'the e um mo dhali mon'ku'th is 'peni Arumgimis jin ta'da Babam bana mo dhali Tapa Yesu Kristhos mo be.

Mii jin 'Bor ma Buulusa 'Bor Bwa I Is mo 'Ko'di Monto'c Bwa mo

³ Mom'bor mii mididi di mo goma Arumgimis mo dhali Ababa gi Tapam bana ka Yesu Kristhos mo, a'di jin ta'da Baba jin cila momiimii mo dhali Arumgimis jin ta'ji gi momalasi 'baar mo tani

⁴ a'di jin malaski ana mo eya ris monto'c bwam bana mo, wakan ki ana mina mish malas uni gwansan kun 'kon si'da/ e monto'c bwa mo ki malas jin malaskunu ana ki is bana mo 'peni Arumgimis mo be.

⁵ Haali/ me'd jin pwakkunu ana isa nyor ma Kristhos ki nyanye/ mo jin 'koshki a'di mo tani wakan si'da/ eya Kristhos mo tani ana minu pwak momalasi si'da/ ki nyanye/ mo be.

⁶ Wakki/ aman toju bwa mo tani a'di ta mii gom momalasi bum mo dhali bway mowoth mo. Dhali wakki/ aman malaskunu mo tani a'di si'da/ ta mii gom momalasi bum mo jin wana gwo um kani bwa mo ki um 'kucki bwa mo ki 'kari'th mmo'dim 'kup mo e mo gi isa nyor yan jin nyakka'd ki kun 'koshki am mo be.

⁷ Mo ma 'teñ kapem bam mo gom um mo tani a'di molu yikin is mo haali/ aman misha ki um pwakki mo gi isa nyor baman bwa mo tani um si'da/ minu nyak momalasi baman pwak mo be.

⁸ Haali/ aman 'tena bwa jin mina umi ta pus mo, iwak mo, gom monto'c bwa jin wa aman kan e bwa mo e Pa Asiyya mo haali/ aman 'kokina mo wakan ki ji uñ mo mmomol to kal kun 'thir aman mo haali/ mon'koki/em bam muru'di us kan mo be.

⁹ Hili aman toshkina ki aman bu'thkina gwon dwell jin toru 'twa/a 'cesh mmowu mo. Hili a'di yansan mmodhu aman mo mmo'koki cesh mo ki is bam mo, hili eya Arumgimis mo a'di jin 'de'kki ku gi wukin mo be.

¹⁰ Hili a'di 'cukki aman mo 'peni mowu yan jin caaca kagahara mo dhali a'di mididi 'cuk am aman mo. Eya po/ a'di mo tani aman dhukina mo ma 'teñ kapem bam mo ki a'di mididi 'cuk am dok/e mo be.

¹¹ Um si'da/ mini mii woth am ki mon'tho mo, wakan ki 'kwani ka ris mini mii ci mom'bor bwa i is mo apo/ gway bam mo gom mom'bor mii mo jin cikunu aman mo gom gwo ka ris jin thoku mo goma 'tho ka ris kun 'thonu mo.

Mombut ma Buulus jin Dhalkunu 'Pen mo

¹² Haali/ 'bam bam kun dhunu aman ki ca mo tani ta cikise/ mo be jin ta gwo jin cinu mo gom 'twa/ ma dum bam mo ki aman botkina ki mii e mony'cesh mo dhali ki nyanye/ mo tani aman miikina a'di 'kup ki um mo ki mii jin kogu mo dhali ki mii ma gayiin mo dhali ki mii jin daru gi washila/ mo, yisa ki moyuk gi mony'cesh yan mo, hili ka 'the ma Arumgimis mo be.

¹³ Haali/ am 'kwara um gwoŋ kamu/ ka wuny is yisa, hili ki gwo jin mina um mish deŋ e mo dhali mish 'ban mo. Aha/ tosha ki um mini mish a'di 'bani 'baar mo ki dhegem mo.

¹⁴ Me'd jin mishkina um a'di 'ban ki 'bana kamu/ mo tani ki um mini mish dhu 'ba/ ki ca mo gom aman mo me'd jin misha aman 'ba/ dhu gom um mo ka tee gi Tapa Yesus mo be.

¹⁵ Haali/ aha/ misha ki isi mish gana/ mo gom a'di yan mo, ki aha/ okina bwa mo mmoyaku/ i um itwa/a/ mo, wakan ki um mini ta gi bwam 'boro'd ka 'bukum 'ban mo be.

¹⁶ Aha/ okina bwa mo mmobuti um mo e bway pem jin yaka/ mo e Pam Makiduniyya mo dhali kulu/ i um ka nyan'ko'd mo 'peni Pam Makiduniyya mo dhali jin mina umi sus aha/ mo e bway pem mo e Pa Yahuudiyya mo be.

¹⁷ A/aha/ tana aman/aḱ bwa e mo mmo/o gwo mo ki mii to yansana? Dhali aha/ thosonkina miim pem mo me'd wathi/ gi mony'cesha jin nyoŋ is mo mmo/o gwo mo ki: Nye dhali Yisa, ki kupa?

¹⁸ Haali/ ka jin gana/ me'd jin tan ma Arungimis a'di isin gana/ mo tani gwom bam e um mo diki ta gwo ma Nye mo dhala Yisa mo be.

¹⁹ Haali/ Ya/ ma Arungimis mo jin ta'da Yesus Krist̥hos mo tani a'di jin cikina aman gwo e bwam um mo tani dhali iSilwaanus dhala Timuth̥awuus mo dhali aha/ mo tani yisa ta gwo ma Nye mo dhala Yisa mo, hili eya Yesus mo tani isa yempa/ mo tani a'di ta gwo ma Nye mo be.

²⁰ Haali/ aris gwo kun on ma Arungimis is mo tani gamki gwom buni jin onu ki Nye e a'di mo be. A'di be ta 'pemen gwo jin ona ana gwo ki Amen e a'di mo gom monyca ma Arungimis mo be.

²¹ Hili a'di ta'da Arungimis be jin telki aman sho'k mo nyakki um eya Krist̥hos mo dhali gwom piti jin kankina a'di am mo be.

²² A'di karki mon'dap piti apo/ am mo dhali ciki aman Shi/in piti eya dum bam mo me'd to jin wothu/ 'twa/ mo be.

²³ Hili aha/ yukkina Arungimis mo mmota aman/o gwo apo/ aha/ mo. A'di ta gwo mmo'tash um 'twa/ mo ki aha/ tukkina is pem mo 'peni mo jin miga/ 'taki yaku/ e Paŋ Kurint̥huus mo be.

²⁴ Yisa mmomiina aman miin tapa apo/ moŋgam gwo is bum mo yisa. Aman miikina atu'c nyakki um mo gom bwan 'kunygam bum mo haali/ um doshkin mo mmo'tel sho'k mo e moŋgam gwo is bum mo be.

2

¹ Haali/ aha/ dina gwo ibwa mo yisa mmoyaku/ ibuti um mo ki gwo jin mididi ci'th uma du mo.

² Haali/ wakki/ aha/ raka um cidhuwa du mo tani aja a'di mididi mii aha/ ki bwam 'boro'd mo, hili a'din 'de/ jin ci'thka/ adu mowa?

³ Dhali aha/ 'kwarkina a'di me'd jin miikika/ mo, wakan ki me'd jin pu'dkika/ mo tani aha/ minu 'koki ci'tha du ki uni gwansan kun mini 'taki 'koki mii aha/ ki bwan 'kunyga/ mo. Haali/ aha/ misha ki isa duŋ gana/ gom umi 'baar mo ki moŋ'kuny bwam pem mo tani mididi 'taki ta moŋ'kuny bwa gom umi 'baar mo be.

⁴ Haali/ aha/ 'kwarkina a'di i um mo 'peni bwa jin toco'd mo dhali ka du jin 'pe'd she/ mo dhali ki jabu'th jin upka/ mo e em pem mo, yisa mmorak um cidhuwa dum bum mo yisa, hili mmodhal um bway mo mmomish mo/en jin ishki'd ka enthus mo, a'di jin takika/ mo gom um mo be.

Mo ma Mure/ Miinthus jin Dhalkunu 'Pen mo gom A'di jin Dhan̄ki Gwo mo

⁵ Hili wakki/ jan tal 'deŋ kamu/ rakki mo jin cidhuwa du mo tani a'di rakki a'di mo yisa gom aha/ mo, hili ki shem boç mo, - a'di yisa ta gwo jin onu ki 'bitha - gom umi 'baar mo.

⁶ Haali/ gom wathin 'de/ wakan mo tani ajisa yansan jin dhukina 'kwani ka woho/ mo tani a'di 'kosh jwa mo be.

⁷ Wakan um mini 'taki mii dhal mii e i is mo mmoŋu'k mo mmodhal a'di amure/ miinthus piti 'pen mo dhali malas a'di mo, walla a'di minu kumki 'twa/a 'cesh mo ki bwa jin diŋadiŋ ki nyanye/ mo.

⁸ Wakan aha/ yuŋa um mo mmo'deki a'di mo ki mo/en bum mo gom a'di mo be.

⁹ Haali/ gom mii gi wakan mo tani a'di 'kwarkika/ gwo yan mo ki aha/ mina nyo/ um mo dhali mish gwo 'ban mo wakki/ um ta imanha gwo e mo gom to 'baar mo be.

¹⁰ A'din 'de/ yin jin mina umi dhal miinthus piti 'pen mo tani aha/ si'da/ mina dhal a'di miinthus piti 'pen mo be. A'di jin dhalkika/ miinthus piti 'pen mo tani wakki/ aha/ dhalkina miinthus ma ciŋ kamu/ 'pen mo tani a'di dhalkika/ mo gom gway bum mo e buŋ'kus ma Kristhos mo be,

¹¹ mmonona Seŋaan 'twa/ mo 'peni mmogam uma du is ki me'd mo gom shi/ miim 'boro'd apo/ ana mo. Haali/ ana yisa tana pus mo goma maŋ piti yisa.

Mo/is jin Anankin ma Buulus mo Me'd jin Dina A'di e Pan Taruwaas mo

¹² Ki aha/ tu'dkina mo e Pan Taruwaas mo mmoci gwom 'borga/ ma Kristhos mo tani acampur a'di ka'dkunu aha/ mo e Tapa mo be.

¹³ Dhali hili adum pem yisa mish ta gi mosi/is yisa haali/ aha/ dinaki gam akam pem ka Tiithus imun mo. Wakan aha/ bu'thkina moyam pem mo mmoya mo 'peni uni mo mmoya ki sule/ e Pam Makiduniyya mo be.

Mo jin Pinu Mii E eya Kristhos mo

¹⁴ Hili mom'bor bwa i is mo midi di mo goma Arungimis mo a'di jin di'd eya Kristhos mo jin di'd mo mmoshu ana bway mo isa yempa/ mo e momp'i mii e mo dhali e ana mo tani mo jin teru/ mo eya ris mo 'baar mo goma shima kuyga/ gi moyuk piti mo be.

¹⁵ Haali/ ana tana ashima kuyga/ jin cii mo eya Kristhos mo goma Arungimis mo e bwaman uni gwansan kun takunu is ki me'd mo dhali e bwaman uni gwansan kun 'ce'dki sho'k mo be.

¹⁶ E jan 'deŋ kamu/ mo tani ashima kuyga/ jin kuyi mo 'peni wu, itan wu mo dhali e jan kamu/ mo ashima kuyga/ 'peni mondiki/e, itan mondiki/e mo. Kaja a'di i'koshki jwa mo gom to gwansan mo?

¹⁷ Haali/ aman yisa wana e ki 'kwani ka risa, uni gun lat 'kwani e gi gwo ma Arungimis mo. Hili mmota 'kwani kun daran ki washila/ mo ki gwoŋkan ma Arungimis mo dhali e jis/e ma Arungimis mo tani aman ŋorkina gwo mo goma Kristhos mo be.

3

Imanmii Mii gom Gwon This jin Gamu Me'd mo

¹ A/aman ŋelkina mii 'pen mo mmoha me'd dok/e ibwambori uma? Walla aman mina mii ta gi gwo jin 'kwarkunu mo gom miim 'boron bam mo me'd unin tiya gun miin kan mowa? Walla gwo wakan 'peni uma?

² Um ki is bum ta gwo jin 'kwarkunu mo mmoŋor miim 'boron bam mo kun 'kwarkunu mo eya dum bum mo kun minu mish mo dhali kun minu deŋ e mo ki 'kwani 'baar mo be.

³ Dhali um toru mo ki um ta gwoŋ 'kwar 'pena Kristhos mo a'di jin cikina aman um mo. A'di yisa jin 'kwarkunu mo ka galama risha, hili ki Shi/in

Dheleladhelel ma Arungimis jin di ki e mo, yisa apo/ wosha pa'dga/ mo hili adum pa'dga/ gi wathimpa en'thi/ mo be.

⁴Jwa jin wuna amana wu i is mo tani eya Kristhos mo 'kup ka Arungimis mo be.

⁵Yisa mnotana aman uni kun mini 'kosh jwa mo ki is bama mmose gwon kamu/ i is yisa me'd jin yayi'd 'peni aman mowa. Mom bam jin 'kosha aman jwa mo tani 'peni Arungimis mo be,

⁶a'di jin thumki aman mo mnota ku gi mini mii to mo gom gwon this jin gamu me'd mo, yisa e gwonkan jin 'kwarkunu mo, hili e Shi/in mo be. Haali/ gwonkan jin 'kwarkunu mo tani a'di 'koshki'da 'kosh mo, hili Shi/in a'di ciki mondiki/e mo be.

⁷Dhali wakki/ mo jin 'dapu/ isi jwa mo, a'di jin cikunu jamas mo apo/ wosha pa'dga/ mo pu'dki'd mo ki mo jin mii ki ra/ra/ mo, ki 'Kwani ma Israyiil mol bwam/e ma Musa par e mo kan gom mondhel piti mo, mmothiskina a'di e ki liw liw kansan mo tani

⁸ata gara/ imina mo jin 'dapu/ isi jwa mo jin ta gi Shi/in mo 'taki ku'th is mo ki mii jin miinu ki ra/ra/ kagahara ki nyanye/ mo?

⁹Haali/ wakki/ mo jin miinu ki ra/ra/ di'd mo gom mo jin 'dapu/ isi jwa mo gom miiwak mo tani mo jin 'dapu/ isi jwa mo gi mii ma kar/e mo midi mii se ka pije/ ki ra/ra/ mo mmobol jin t'wa/a/ e kagahara mo be.

¹⁰Dhali ka jin gana/ e shushan mii yansan mo tani mo jin mii ki ra/ra/ mo tani wara'd ki mo ma ra/ra/ jin diki pi ari shusha kamu/ mo haali/ mo ma ra/ra/ jin ta jin 'ko'd jin bol a'di e mo be.

¹¹Haali/ wakki/ a'di jin 'baarkunu mo pu'dki'd mo ki mo ma ra/ra/ mo tani a'di jin midi di kan ka go/ mo midi mii ta gi mo ma ra/ra/ kagahara ki nyanye/ mo be.

¹²Me'd jin tana aman gi mo ma 'tej kape/ gi wakan mo tani aman tana ku gi 'koki ju/ kagahara mo be.

¹³Yisa me'da Musa a'di jin kumki bwam/em piti ki burrinye/ mo, wakan jin mina 'Kwani ma Israyiil 'koki hil mo ma ra/ra/ jin midi 'baar mo me'd jin sula a'di mo.

¹⁴Hili adum buni 'bi'thkin ki 'bi'th mo. Haali/ ntaga tee yansan mo tani ki uni denki gwon dhamo/ jin gamu me'd e mo tani burrinyem bwam/em buni yansan di'd naskina/ kan ki dar gi mompe'd mo haali/ jasi eya Kristhos mo tani a'di kalki a'di mo be.

¹⁵Nye, ntaga tee yansan mo me'dyin denkina uni Gwo ma Musa e mo tani burrinye/ ki kum uni adum buni 'kup mo be.

¹⁶Hili wakki/ wathi/ ki tu'k mo e Tapa mo tani burrinye/ a'di pe'dkunu mo be.

¹⁷Dhali shwane/ Tapa a'di ta Shi/in mo dhali mo jin dina Shi/in gi Tapa mo tani a'di idina mo kun 'konu ki 'kus mo be.

¹⁸Dhali ana 'baar mo dara gi bwam/e kun kumu mo mmohilkina ana monyca gi Tapa mo dhali mondhel jin dhelu/ mo mo tani ana 'kokunu mo mmo/ ak e mo e jamas piti mo 'peni monyca 'dej kamu/ itan monyca kamu/ mo. Haali/ monyca yansan pu'dki'd 'peni Tapa mo, a'di jin ta Shi/in mo be.

4

Kumman To e Toj'kul Bwa mo jin Ta'da Je mo

¹Wakan, mnotana aman gi mii yansan mmomii mo ki momiimii ma Arungimis mo tani aman yisa min ma dum bami ta'k ka lungu'b mo yisa.

²Aman dhan'kina to shigga/ mo dhali mii gun ishuwa 'cesh mo. Dhali aman ushkina mo mmobotki mii ma mak mo walla mmo'at gwo ma Arungimis e

mo, hili mmoṭor gwo eya tente/ gom gwoṅ gana/ mo tani aman mina dhu is bam ki ku gi ha me'd mo gom 'twa/ ma du ma ris 'kwani 'baar ka 'deṭe/ 'deṭe/ e jis/e ma Arumgimis mo be.

³ Dhali isi kan wakki/ gwom 'borgam bam kumu 'kup mo tani a'di kumu 'kup jasi gom uni gwansan kun 'koni mothis e mo be.

⁴ E 'kup miim buni yan mo tani arum gi mony'cesh yan jin luṅa uni mo tani dha'bki uni adum buni e mo uni gun daran gi gwo jin gamu is mo, mmonon uni 'peni mmopar moṅkush gi gwom 'borga/ e mo jin ta monyca ma Krist̥hos mo, a'di jin nyakki'da nyaḱ ka Arumgimis mo be.

⁵ Haali/ gwo yan jin cina aman mo tani ta gwom bam ki is bam mo yisa, hili aYesus Krist̥hos jin ta Tapa mo, dhali gom miiny ciṅkina/ jin tana aman ki is bam mo gom um mo tani a'di gom gway ma Yesus mo be.

⁶ Haali/ a'di ta'da Arumgimis jin o gwo mo ki: Dhalki moṅkush a'di 'twakki mondhurumi'd bwa mo, a'di jin kushki mo mo eya dum bana mo mmoḱi moṅkush gi moyuk gi monyca ma Arumgimis e jis/e ma Krist̥hos mo be.

⁷ Hili aman tana gi kumman to yan e toṅ'kul bwa mo jin ta'da je mo mmoṭor gwo ki mom'bi'th yan ta gummpa/ gi monyca ma Arumgimis mo dhali a'di ta jin bam yisa.

⁸ Aman to'ckunu bwa mo ka ris 'twaṅkal kuku/ mo tani hili mmoṭha'th 'pena'cesh yisa, am duṅkurkunu adu is mo tani hili mmodirkunu aman e mo ma cis yisa,

⁹ aman 'koshkunu mo tani hili aman 'konuki dhal 'pen mo, aman dorkunu kal 'ko'da 'cesh mo tani hili aman yisa 'ce'dkunu sho'k mowa.

¹⁰ Isa yempa/ aman kalkina e buṅwar is bam mowu ma Yesus mo, wakan ki mondiki/e ma Yesus si'da/ minu tor eya tente/ e buṅwar is bam mo be.

¹¹ Haali/ ki aman 'kona ki e mo isa yempa/ mo tani aman cikunu mo mmowu mo gom gway ma Yesus mo, wakan ki mondiki/e ma Yesus mo minu tor mo eya tente/ mo e buṅwar gi shuman is bam mo jin mishi wu mo be.

¹² Wakan ba/ mowu miiki'da tu'c e am mo, hili mondiki/e e um mo be.

¹³ Me'd jin tana aman gi Shi/ina 'de/ gi moṅgam gwo is mo me'd a'di jin di'd e a'di jin 'kwarki gwo ki: Aha/ gamkina gwo is mo dhali wakan aha/ toṅkina gwo mo tani, aman gara/ gama gwo is mo dhali wakan aman toṅkina gwo mo,

¹⁴ mmomish ki a'di jin 'de'kki Tapa Yesus 'peni mowu mo midi 'de'k aman si'da/ mo nyaḱka Yesus mo dhali sus an nyaḱki um mo e buṅ'kus piti mo be.

¹⁵ Haali/ a'di 'baar mo gom gway bum mo, wakan me'da 'the mmopeperkina a'di e 'kwani ki nyanye/ ki nyanye/ mo tani mo jin 'boruwa 'bor bwa i is mo minu mar is ki nyanye/ gom monyca ma Arumgimis mo be.

Moṅ'ko ki Moṅgam Gwo Is mo

¹⁶ Wakan aman mina 'koki biṭ bwa ka luṅgu'b mo. Ba buṅwar isa dhamom bam a'di shigkunu is mo, hili isi bwamana dum bam mo tani a'di jin yosu ki yos yos isa yempa/ mo be.

¹⁷ Haali/ mo jin toju bwa yansan mo jin tawasha tawash jin di'd jasi ki ari mo mo tani a'di thosonki'd mo gom aman mo mondiṭ ki monyca jin midi di ki sule/ sule/ ya ye 'ba/ mo jin molu kar ka par mo.

¹⁸ Haali/ aman 'konaki hil 'kup ki to kun mishu mo, hili 'kup ki to kun 'konuki mish mo. Haali/ to gun mishu mo tani 'kon eya tente/ ki laṅ laṅ mo, hili to gun 'konuki mish mo tani uni ta to gun mini 'ko ki sule/ sule/ ya ye 'ba/ mo be.

5

1 Haali/ aman misha ki wakki/ gu'ba'ku/ gi mony'cesh yan mo jin 'kona aman nycine/ 'ce'dkunu sho'k mo tani aman tana gi monyan 'peni Arungimis mo, gu'b jin nyanu ki me'd yisa, a'di jin midi di ki sule/ sule/ e momis mo be.

2 E mahan ka jin gana/ mo aman ohonkina mo dhali 'kosh kwa/ a/ mo mmoshum mo ki moŋ'kom bam e momis mo.

3 Wakan ki mo jin mina amani shum ki a'di mo tani aman minu 'koki gam is 'te/ mo be.

4 Haali/ me'd jin 'kona aman mo naskina/ e gu'ba'ku/ yan mo tani aman wukina shure/ ki mo/an an is mo, yisa ki aman minu 'koki hi'th is ki to mo, hili ki aman minu hi'th is ki to ki nyanye/ mo, wakan ki bungwar is yan jin mish wu mo tani minu los mo ki mondiki/e yan mo be.

5 A'di jin thosonki aman is mo gom to yan gana/ mo tani a'di ta'da Arungimis mo, a'di jin ciki aman Shi/in mo me'd to jin wothu/ 'twa/ mo be.

6 Wakan aman isa yempa/ mo tani tana gi mo ma duŋ gana/ jin 'bidhu is mo. Dhali aman misha ki me'd jin 'kona aman e moŋ'kom bam e bungwar is mo tani aman si'da ki si'd 'peni Tapa mo be.

7 Haali/ aman iina ki moŋgam gwo is mo, yisa ka shureya.

8 Aman tana ga duŋ gana/ jin 'bidhu is mo, dhali amani imina dhal mii e i is mo mmosi'd mo 'peni bungwar is mo dhali nyak 'ko ki Tapa mo be.

9 Wakan wakki/ aman nyaka 'ko mo walla si'd mo tani aman karkina a'di ki tom bam jin guna aman ki e mo mmo'bor a'di bwa mo be.

10 Haali/ ana 'baar mo mina mii pi mo e bwambor ma kursi ma Kristhos gi gwon dwall mo, wakan ki 'kwani ka 'dete/ 'dete/ mo mini 'taki bu'th to kun 'boron mo walla kun shiyin mo be isi me'd mii kun miikina uni ki bungwar is mo be.

Mii jin Miinu To mo goma Gwam jin Gwamkunu mo

11 Gom mii gi wakan mo tani mmomisha aman mii jin minu ko/ Tapa mo tani aman lalkina 'kwani sho'k ki gwo mo. Hili a'di jin tana aman mo tani a'di mish ma Arungimis mo dhali aha/ tana ga 'teŋ kape/ mo ki a'di si'da/ mishu ki 'twa/ ma dum bum mo be.

12 Aman yisa dhuna is bam ki ku gi ha me'd mo e um mo dok/e, hili mmoçi um mo jin raķu mo mmodhu is ki ca mo gom am mo be. Wakan ki um mini mish thok uni gwansan gwo mo kun dhu 'bam buni ki ca mo gom is buni mo gom monyca jin dina wathi/ nycine/ mo dhali yisa goma dum piti mo.

13 Haali/ wakki/ aman sona du ki is bam mo tani a'di goma Arungimis mo be. Wakki/ aman kutha is mo ki 'cese/ 'cese/ eya dum bam mo tani a'di gom um mo be.

14 Haali/ mo/en ma Kristhos mo tani a'di 'timkina amana du mo haali/ aman su'kkunuwa du mo ki tal 'deŋ kamu/ wu'd mo gom 'kwani 'baar mo. Wakan aris 'kwani 'baar mo wukin mo be.

15 Dhali a'di wuki'd mo gom 'kwani 'baar mo ki uni gwansan kun 'kon mo mini dok/e 'koki 'ko mo gom bungwar is buni mo hili gom a'di mo jin wuki'd mo gom gway buni mo dhali jin 'de'kkunu mo be.

16 'Peni mo yan shwane/ mo, ki mii gi wakan mo tani aman 'konaki nyith wathin 'deŋ kamu/ 'peni ji en'thi/ mo. Isi kani ba am isa gush nyitha Kristhos mo 'peni ji wathimpa en'thi/ mo tani aman nyitha a'di wakan dok/e yisa.

17 Wakan be wakki/ wathin 'deŋ kamu/ di'd mo eya Kristhos mo tani a'di ta jin this jin uķu mo. Miin dhamo/ pekin mo tani dhali hili miin this uni pu'dkin mo be.

¹⁸ Aris uni gwansani 'baar mo 'peni Arungimis mo be, a'di jin gwamki ana mo eya Kristhos mo ki is piti mo dhali ci ana mii ki mo gi gwo jin gwamkunuwa gwam mo be.

¹⁹ Gwo a'dan be. Arungimis diki'd eya Kristhos mo mmogwamkina a'di 'kwaniny'cesh mo ki is piti mo, yisa mmodhu gwon dhar buni apo/ uni mo, dhali dhu gwo e me'd bana mmotor mo, gwo gi mo jin gwamkunuwa gwam mo be.

²⁰ Wakan ana tana iman/ii goma Kristhos mo, haali/ mo ma Arungimis jin yipkina a'di 'kup mo tani e ana mo be. Dhali aman yukkina um mo gom gway ma Kristhos mo be: Wari um ki ku gun gwamkin ma Arungimis mo ma.

²¹ Gom gway bana mo tani a'di ki kar a'di mo mmota ji gi miinthus mo, a'di jin molki miinthus mo. Wakan e a'di mo tani ana minu dhuku/ mo ki ku ma kar/e mo goma Arungimis mo be.

6

¹ Mmonyaka um to mii ki a'di mo tani aman malaskina um mo mmo'koki budha 'the ma Arungimis ki pe'th mo.

² Haali/ a'di oki gwo mo ki:

Ka tee jin budhuwa bu'th mo tani aha/ cikkina /e gwo mo dhali woth /e mo ka tee gi mowoth mo be.

Dhali hili mo mo ma. Shwane/ a'di ta'da tee jin budhuwa bu'th shwane/ mo. Hili mo mo ma. Shwane/ a'di ta'da tee gi mowoth mo be.

³ Aman 'konaki kar ton kola kamu/ e bway gi jan tal 'deŋ kamu/ mo, wakan ki gwon thutha kamu/ minu 'koki gam mo apo/ miim bam jin miina am to mo be.

⁴ Hili me'd cinkina/ ma Arungimis mo tani am dhuna is bam mo ki ku gun ha me'd mo eya ris 'twanjal kuku/ mo. E dhan mon'dim 'kup mo, e montoc' bwa mo, e miinj kaka/ mo, e mii gun shi/ashi/ mo,

⁵ e mondor mo, eya sijn mo, e mo ma dulatt mo, e mo ma tu'c jin caaca mo, e montima tim mo, en te/ mo,

⁶ ki mii gun dheleladhelel mo, ki moyuk mo, ki mo jin 'kuçu bwa ki 'kari'th mo e mo gi isa nyor mo, ki mii jin miinu ki bwanjush mo, dhali ki Shi/in Dheleladhelel mo, ki mo/en gana/ mo,

⁷ ki gwon gana/ jin onu mo, dhali ki mom'bi'th ma Arungimis mo, ki to/as gi mii ma kar/e mo gom me'da bim poros mo dhali me'da cam mo be,

⁸ e montak mo dhali mo jin ushuwa tak tak mo, e gwonthus jin toruwa po/ mo dhali e gwom 'boro'd jin toruwa po/ mo. Aman miinu me'd 'kwani gun he'kkina he'k e mo tani hili aman tana kuj gana/ mo,

⁹ me'd uni gun 'konuki mish mo tani hili aman mishu mo ki 'bore/, dhali me'd kun 'kon mo e mowu mo tani dhali hili mo mo ma, aman 'kona ki e mo, me'd uni gun cikunuwa jisa mo tani hili aman 'konuki 'kosh jwa mo be,

¹⁰ me'd kun 'kon ki bwan diḏadiḏ mo tani hili isa yempa/ mmo'kuny bwa mo, me'd uni kun hatha'ko'd ki ha'th mo tani hili aman miikina mii ka ris kun ta pa ki pa mo, me'd uni gun dar gi to mo tani hili aman tana ga ris to 'baar mo be.

¹¹ Twam bam ka'dkunu mo gom um gi Panj Kurint̩huus mo. Adum bam wangala wangal mo be.

¹² Um yisa 'tashu 'twa/ ki aman mo yisa hili um i'tashu 'twa/ ka dum bum kun sicasi'c mo be.

¹³ E miim pem jin miga/ kul 'kup ki um mo tani - aha/ mina o um gwo mo me'd um ta uci mo - Wangali adum bum si'da/ mo ma.

Um Ta Monyca'b ma Arungimis jin Di ki E mo

14 Dhalku/ ki mash ki uni kun daran gi gwo jin gamu is mo ma. Haali/ mii ma kar/e midi nyak to mii ki to shigga/ kata mo? Walla mon̩kush midi nyak to mii ki mondhurumi'd kata mo?

15 Bwa ma K̩risthos midi gam me'd ki bwa ma Bali/aal mmana mo? Walla wathi/ jin gam gwo is taki'd gi to jin nyak̩ka'd mo ki a'di jin dara'd gi gwo jin gamu is mowa?

16 Gwo gi wakata mina gu'b gi mondheleladhelel ma Arungimis gam me'd mo ki ji gi lun̩u tompinycon mo? Haali/ ana tana gu'b gi mondheleladhelel ma Arungimis jin di ki e mo me'd gwo jin on ma Arungimis mo ki:

Aha/ mina di e uni mo dhali nyak̩ shekem ibwaman uni mo,
dhali aha/ mina ta uni Arungimis buni mo,
dhali uni mini ta 'kwanim pem mo be.

17 Gom gwo gi wakan mo tani piyi um ka pije/ mo 'peni uni mo dhali dhuyi is bum ki she/ 'peni uni mo. A'di ta gwo jin ona Tapa mo. Dhali dhalki to nyoggaŋ kamu/ ki ta is ki me'd mo.

Yan'ko'd aha/ mina hayy um mo be,

18 dhali aha/ mina ta um Ababa mo,
dhali um mini ta iya/m pem mo dhali i'bwa/m pem mo.

A'di ta gwo jin ona Tapa mo, a'di jin ta a'di jin Eka/ Ek mo be.

7

1 Me'd jin takina ana gi gwo gwansan gun onu is mo tani um gun enu mo tani dhalki ana dhelela is bana mo 'pena ris mii gun nyo/i buŋgwar isi 'baar mo dhali shi/in mo mmosus mo jin k̩ogu ki jaro/ jaro/ mo e mon̩ko/ goma Arungimis mo.

ABUULUS 'KUNYKINA BWA MO GOM 'KWANIŋ KANIISA KUN RI'CKINA DU IS MO

2 Ka'di adum bum gom aman mo. Aman 'konaki thu'th to mii e jan tal 'deŋ kamu/ mo. Aman 'konaki pu/ jan tal 'deŋ kamu/ mo. Aman 'konaki bu'th shi/ miim 'boro'da kamu/ gom jan tal 'deŋ kamu/ mo.

3 Aha/ dinaki o gwo yansan mo mmowaŋ um mo haali/ aha/ ona gwo yansan ntwa/ a/ mo ki um dhuna aman mo eya dum bam mo, mmowu mmontal 'de/ mo dhali mmo'ko ki e e montal 'de/ mo be.

4 Aha/ tana gi dhan mo jin wuka/ um jwa i is mo. Aha/ tana gi dhan mo jin karka/ is ki ca mo gom um mo. Aha/ 'tu'dkunu mo ki momalas mo. Ki mom bami 'baar mo jin toju aman bwa mo tani mon̩kuny bwam pem guski'd ki sho'k piti mo be.

5 Haali/ isi kani ki aman pu'dkina mo e Pam Makiduniyya mo tani buŋgwar is bam yisa gamki mo ma si/isa kamuwa, hili aman to'ckunu bwa mo ka ris mo jin tuku mo, mo/as ki us mo dhali ki mon̩ko/ is e bwaman mo.

6 Hili Arungimis a'di jin malaski a'di jin bit̩kunu bwa ka lun̩gu'b mo tani malaski aman mo gom pu'd jin pu'dkin ma Tiithus mo be.

7 Dhali yisa jasi gom pu'd jin pu'dkina a'di 'te/ mo, hili si'da/ ki momalas jin malaskina a'di um mo ki gwo jin to̩kina a'di aman mo gom kwa/am bum jin 'koshki um mo, dhali gom kom bum jin gwokina um mo, dhali gom mii jin shwa uma nyor ka nyor mo gom aha/ mo, wakan ki aha/ mina bwa 'kuny kagahara mo be.

8 Haali/ isi kani wak̩ki/ aha/ raka um mmokal bwan dit̩'d mo gom gwom pem jin 'kwarkika/ um mo tani aha/ yisa guna is mo gom a'di mo (ba aha/ gukina isi t̩wa/a/ mo be) haali/ aha/ nyith̩kina ki gwo yansan jin 'kwarkika/ um mo tani jwakat̩ki um mo be, bahili jasi gom ari mo mo.

⁹ Ki a'di gi wakan mo tani aha/ 'kunykina bwa mo, yisa haali/ um jwakaṭkunu mowa, hili haali/ um jwakaṭkunu mo e mo jin susu mmorica du is mo. Haali/ um suruna ki mony'wakaṭ mo jin ta a'di 'peni Arumgimis mo, wakan ki um mina isi 'koki 'kosh ka nyor gom toj kamu/ jin thisu e mo gom aman mo be.

¹⁰ Haali/ mony'wakaṭ 'peni Arumgimis mo a'di ki wagas mo jin rijuwa du is mo jin shu'di tagi bway mo jin tanuwa ta is ki me'd jin diki sus e mo jin 'donu is mo, hili mony'wakaṭ jin ta ji gi 'kwaniny'cesh mo tani a'di wagaski mowu mo be.

¹¹ Haali/ hili ma, mo jin gwona bwa ka daran du mo mony'wakaṭ yan jin ta ji 'peni Arumgimis mo tani a'di wagaskunu mo e um mo, mom'ba/ jin ganankina um mo mmoṭor markin bum mo ki is bum mo, mo ma nyor jin dekki um mo, dhali mo ma ayy/ayy/ am bum mo, dhali mony'kwa/ am bum jin 'koshki um mo, dhali mii jin shwa uma nyor ki thith dhali ajisa jin gamkunu mo be. Eya ris mii jin su'kkina um mo tani um ki is bum nyo/kunu mo ki ku gun 'kona mii ki 'ko 'ba/ mo goma ris mii kun 'konu ki bath mo be.

¹² Wakan, aha/ bala 'kwarkina gwo e um mo tani hili yisa gom a'din 'de/ yin jin thuthki to mii mo walla gom a'din 'de/ yin jin 'koshkina is ka nyor mo gom mii jin thutha a'di mii mo yisa, hili ki mo jin shwa uma nyor ki thith mo gom aman mo jin minu 'taki tor mo eya tente/ gom um e jis/e ma Arumgimis mo be.

¹³ Wakan aman malaskunu mo be.

Dhali ki momalas ganam bam jin 'ce'du 'ba/ mo tani aman 'kunykina bwa kagahara mo e mony'kuny bwa ma Tiithus mo haali/ adum piti a'di sikunu is mo gom umi 'baar mo be.

¹⁴ Haali/ wakki/ aha/ torkina a'di gwoj kamu/ mo gom mmokarka/ is ki ca mo gom um mo tani aha/ yisa karu ki mon'the is yisa. Hili jasi me'da ris gwo 'baar mo kun okina aman e um mo tani ta gwoj gana/ mo tani wakan 'bam bam jin dhuna am ki ca mo e bwambor ma Tiithus mo tani a'di nyo/kunu ki nyor/ gana/ mo be.

¹⁵ Dhala dum piti pu'dki'd ka pije/ 'baar mo kagahara gom um mo me'd jin kakina a'di gwom bum e jin hakina um e 'baar mo dhali mony'ko/ jin koka/ um mo dhali adee jin deekina um mo a'di jin bu'thkina um a'di mo be.

¹⁶ Aha/ 'kunykina bwa mo haali/ aha/ takina gi mo jin wuka/ um jwa i is mo jin 'boro'd ki 'bor gana/ mo be.

8

Mii jin C̩inu To ka 'Ka'd Me'di Is mo

¹ Aman ṅapa um mmomish mo mo iwak mo gom gwo ma 'the ma Arumgimis mo jin ṭorkunu mo eya kaniisa 'baar mo e Pam Makiduniyya mo be.

² Haali/ e mompal gi mo jin tocu bwa mo jin eka/ ek mo tani mony'kuny bwam buni jin ekki'd ki ek mo dhali moha'th'ko'd buni jin shwa'da nyor mo tani a'di guski'd ki sho'k piti mo ki pa jin tana uni ki to jin 'ka'da uni me'di is mo ki mii buni mo be.

³ Haali/ uni ciki to mo isi ki jim buni jin tana uni mo, me'd gwo jin mishka/ tor mo dhali ki tom buni jin 'ce'de'da po/ jin cina uni mo tani a'di 'peni bwam bunij gana/ mo be.

⁴ Uni 'thoki am mo ka dun dara'd mo gom mii ma 'the yan mmonyak to mii mo mmowoth uni kun dhunu ki she/ ki dhelel dhelel mo.

⁵ Dhali yansan miikina uni mo, yisa me'd jin toshkina aman mo, hili ntwa/a/ mo tani uni ciki is buni ki Tapa mo dhali ki aman mo ki bwa ma Arumgimis mo be.

⁶ Isi ki gwo gi wakan mo tani aman t̩irrishkina aTiithus ki gwo mo haali/ a'di telki mii 'pen mo hila/ mo tani a'di midi 'taki mii thim mii ma 'the yan e bwam um mo be.

⁷ Dhali me'd jin 'kokina um imis eya ris to 'baar mo e mongam gwo is mo, e mo jin onu gwo mo, e moyuk mo, eya risa du gun darkin gi dar mo, dhali e mo/en bum gom am mo tani hili si'da/ ki um mini 'ko imis gom mii ma 'the yansan si'da/ mo be.

⁸ Gwo yansan oka/ yisa mmokana kan mo, hili mmony/ mii mo ki mii gi cin tiya kun miina uni ka daran du mo ki mo/en bum si'da/ mini ta kuj gana/ kun dar ki washila/ mo be.

⁹ Haali/ um mishkina 'the gi Tapa Yesus Kr̩st̩hos bana mo, ba ki a'di ta pa ki pa mo tani a'di warki'd ka ha'th'ko'd gom gway bum mo. Wakan ki mo ma ha'th'ko'd piti mo tani um mini war ki uni gun ta pa ki pa mo be.

¹⁰ Dhali e mii yansan mo jin 'konu ki bath mo tani aha/ cikina uma yuk mo. A'di jin 'boro'd gom um mo mmothim a'di shwane/ mo tani a'di jin telkina um 'pen ki yil 'de/ yin kagush mo, yisa jasi mmomii to 'te/ mo, hili mmo/o bwa mo be.

¹¹ Wakan ki mo/is bum e bwa jin ona um ki mii a'di mo tani mini 'taki ta par mo ki miim bum jin thimkina um a'di mo 'peni to gun takina um mo be.

¹² Haali/ wakki/ mo jin isu di'd mo tani a'di mishkunu bu'th mo me'd isi to gun takina wathi/ mo, yisa me'd isi to jin darkina a'di yisaa.

¹³ Aha/ dinaki o gwo yansan ki kun tiya mini 'taki ta gi mii gun 'disha'dish abor mo dhali uma tiya mmokal to kun ditadi mo.

¹⁴ Hili mmonyaka nyak to mo, gom tom bum gun ishkin ka enthus mo shwane/ e mo yan mo tani mini 'taki thipa thip mo gom tom buni gun hara uni mo, wakan ki tom buni gun ishkin ka enthus mo tani mina uni 'taki thip um ki to gun hara um mo, wakan ki mo jin nyaku to midi di mo be.

¹⁵ Me'd gwo jin 'kwarkunu mo ki: A'di jin kwanyki to ki nyanye/ mo tani dara'd ki ji gi uri 'kup mo dhali a'di jin kwanyki'd ari'ceenne/ mo tani yisa hara tonj kamuwa.

Tiithus dhali Kum Piti kun Nyak A'di Ii mo

¹⁶ Hili ciyi mo jin 'boruwa 'bor bwa i is mo eya Arumgimis mo a'di jin karki bwa jin onu ka daran du mo mmohila hil mo gom um eya du ma Tiithus mo be.

¹⁷ Haali/ a'di yisa ibu'thki miinj 'kup bam jin yipa amana, hili a'di ki is piti ka daran du mo tani a'di midi yaku/ i um mo ki bwam pitiŋ gana/ mo be.

¹⁸ Ki a'di mo tani aman hashkina akam bana a'di jin torkina gway piti karash eya risa kaniisa 'baar mo gom gwony cim piti jin cina a'di mo gom gwom 'borga/ mo be.

¹⁹ Dhali hili jasi gom a'di jan yisa, hili a'di karkunu 'pen ka pije/ mo ka risa kaniisa 'baar mo mmonyak ya ki am mo gom mii ma 'the yan mo jin 'kokina aman mmokal ki mii mo gom monyca gi Tapa mo dhali mmoŋor bwam bam jin o'd ka daran du mo mmo/is mo be.

²⁰ Am 'kona e ki mii ki 'kahar mo ki wathin tal 'denj kamu/ midi diki 'taki 'tak manya/ apo/ am mo gom to jin ciyunu ki me'd jin 'ka'du i is mo a'di jin miikina aman to mo be.

²¹ Haali/ aman gukina a'di ki e mo a'di jin ta montak mo, yisa jasi e jis/e gi Tapa mo yisa, hili si'da/ e jis/e gi 'kwani mo be.

²² Dhali ki uni mo tani aman hashkina akam bam a'di jin nyo/kina aman mo me'd ka ris mo dhali gamkina aman mo ki a'di i/ona bwa ki onj gana/ goma ris to 'baar mo. Dhali hili a'di shwane/ a'di ona bwa ki dhan o jin shi/ashi/ mo gom dhan miim piti jin wukina a'di um jwa i is mo be.

²³ Haali/ me'da Tiithus mo tani a'di ita'da manpwak to bwa nyakki aha/ mo dhali agarr pem jin miiki to nyakki aha/ gom um mo. Dhali gom iwak bana mo tani uni ita imandhunu ki she/ mo eya risa kaniisa mo gom monyca ma Kristhos mo be.

²⁴ Wakan nyo/i mii mo ibwambora risa kaniisa mo gom mo/en bum mo dhali gom 'bam bam kun dhunu aman ki ca mo gom um mo ibwambori 'kwani gwansan mo be.

9

To jin Cinu mo gom Imandhunu ki She/ ki Dhelel Dhelel mo

¹ A'di yisa ta gwo jin miga/ mii i'kwar mo gom um mo gom to jin cinu ki me'd mo gom uni kun dhunu ki she/ ki dhelel dhelel mo.

² Haali/ aha/ mishkina miim bum jin iskina um mo, a'di jin karkika/ 'ba/ ki ca mo gom um mo ibwambori 'Kwani gi Pam Makiduniyya mo mmo/o gwo mo ki 'Kwani gi Pa Akaa/ iya uni 'kokin mo mmothoson is buni mo 'peni yil kagush mo. Dhali miim bum jin shwa uma nyor ki thiḥ tani a'di merki unin tiya is ka woho/ mo be.

³ Hili aha/ hashkina iwak mo, wakan ki 'bam bam gun dhuna aman ki ca mo gom um mo tani minu 'koki nyo/ ki pe'th eya yir yansan mo be, wakan ki um mini thoson is mo me'd gwo jin okika/ gom um mo jin mido 'taki di moyi.

⁴ Isi ciki/ wakki/ 'kwanin tiya 'peni Pam Makiduniyya mini pu'dku/ mo nyakki/ aha/ mo dhali gam um ki um 'koki thoson is mo tani aman minu dhu ki mon'the is mo, mmomol 'twan kamu/ o mo gom um mo, gom mo jin wuna aman um jwa i is kan mo be.

⁵ Wakan aha/ toshkina ki a'di ta mii jin minu mii mii mo mmodhuki iwak 'pen mo mmo/ii mo e um mo ntwa/a/ ki aha/ mo dhali thoson ntwa/a/ mo gom to jin cinu ki me'd mo jin ona um gwo is mo, wakan ki a'di minu thoson is mo, yisa mmokana kan ki 'bi'th mo gom a'di mo hili ki bwa jin ciki to ki me'd mo be.

⁶ Kup gwo a'dihe/ be. A'di jin siki to ki gwa'd gwa'd mo tani a'di si'da/ mido 'cith to jin gwa'dagwa'd mo dhali a'di jin siki to ka enthus mo tani a'di si'da/ mido 'cith to ka enthus mo be.

⁷ Aris 'kwani 'baar ka 'dete/ 'dete/ mo mini mii to gun dhukina uni eya dum buni mo, yisa ki is jin irinkunu mo walla ki mo jin rukunykuuwa rukuny mo haali/ Arumgimis enki uni gun ci to ka 'ka'd me'di is mo be.

⁸ Dhali Arumgimis mishi um te mo ka ris mom'bor mii e mo jin isha to ka enthus mo be. Wakan ki um isa yempa/ takin gi to jin 'koshi jwa mo 'pena ris to 'baar mo dhali wakan si'da/ um mini te aris mii gun ishin ka enthus goma ris miim 'borga/ mo be.

⁹ Me'd gwo jin 'kwarkunu mo ki: A'di yeḥki to mo isa dhana/ mo, a'di ciki to mo gom uni gun hatha'ko'd mo. Momii ma kar/em piti a'di 'dimki 'kup mo gom mii jin 'konu ki sule/ mo be.

¹⁰ A'di jin ciki'da ka'bany to ka mansi to mo dhali tonte/ goma manshwa to mo tani a'di mido thipa thip mo dhali mara ka'bany bum is mo dhali ganan mondhe'd bum jin ta mii ma kar/e mo be.

¹¹ Dhali um minu saka'th mo eya ris bwayi 'baar mo ki 'twan'kal kuku/ mo gom dhan tony caaga/ kun cina um ki me'd mo, a'di jin minu wagas ki am mo gom mo jin cinu a'bor bwa i is mo goma Arumgimis mo be.

¹² Haali/ gom mii yansan jin miikunu mo tani yisa jasi goma thip kun thipu ki to gom uni gun dhunu ki she/ gom to gun hara uni mo yisa hili si'da/ gom mo ka ris kun cinu a'bor bwa i is mo goma Arumgimis mo kun sokin ki sho'k buni mo be.

¹³ E bwan'kwariny mo yansan jin nyo/u mo gom mo jin miinu to mo tani um mini kara Arungimis ki ca mo gom gwo jin hana um e mo mmomii mo gom monyith jin nyithkina um gwom 'borga/ ma Kristhos mo dhali gom to jin cina um ka 'ka'd me'di is mo gom uni mo dhali gom cin tiya 'baar mo si'da/.

¹⁴ Dhali me'd jin 'kosha kwa/a/ uni gom um mo dhali 'tho gom um mo haali/goma 'the ma Arungimis jin bononi mii mo jin di e um mo.

¹⁵ Mom'bora 'bor bwa i is mo eya Arungimis mo gom to jin ciyunu ki me'd mo jin cina a'di mo a'di jin molu kolol mo be.

10

Mii ma Buulus jin 'Ce'dkina A'di Gwo She/ mo gom Mii jin Miina A'di To mo

¹ Aha/ Buulus ki is pem lalkina um sho'k ki gwo mo ki mii ma 'thup e mo dhali mii ma du jin 'thupki'd eya Kristhos mo - Aha/ jin kara is ki gwa'd mo ki ana 'kona ka karambor mo, hili aha/ dara gi monyju/ mo ki aha/ pikina 'peni um mo -

² Aha/'thokina um ki aha/ dikina e buŋ'kus bum mo ki aha/ mina 'taki diki tor mom pem jin dika/ ki ju/ mo gom miiny jwa jin wunu i is mo me'd jin miga/ tora po/ kun tiya mo kun 'bapaski aman is ki mii mo kun 'dapi e ki buŋwar is ga 'cesh mo.

³ Haali/ ba aman 'kona e mony'cesh mo tani aman yisa kalkina mo/as gi mony'cesh mo.

⁴ Haali/ to gi mo/as bana 'koki ta mo ma mee gi mony'cesh jin asa ana mo, hili uni ta ku gi mom'bi'th jin piyi'd 'peni Arungimis mo mmo'ce'da cur gi mo jin tenu mom'bi'th sho'k mo be.

⁵ Ana 'ce'dkina gwo jin garu 'kusi 'twa/ sho'k mo dhala ris mo jin dhunu is ki ca mo mmo'tasha 'tash 'twa/ mo gom mo jin minu nyitha Arungimis mo dhali budha ris gwo kun kulumkina ana i bwa mo mmodhu mo mmoha gwo ma Kristhos e mo be.

⁶ Mmonyon is mo mmorica ris gwo gun ushu ha e mo ki gwom bum gun hakina um e kun thimkunu mo be.

⁷ Hili a'di jin di'd e bwambori jis/em bum mo. Wakki/ jan tal 'den kamu/ wu'da wuny jwa i is mo ki a'di ta jim ma Kristhos mo tani dhalki a'di ka is piti e mo ki a'di ta ji ma Kristhos mo be. Wakani am si'da/ mo be.

⁸ Haali/ isi kan wakki/ aha/ kara 'ba/ ki ca mo 'teki shi/ ari nyanye/ mo gom moshirr bam mo jin cikina Tapa am mo gom mo jin nyanju um is mo dhali yisa gom mmo'ce'd um sho'k mo tani aha/ yisa minu kar ki mo ma 'the is mo.

⁹ Aha/ mina 'taki diki su'k uma du ka war moyi ki gwom pem jin 'kwarkika/ um mo be.

¹⁰ Haali/ uni o gwo mo ki: Gwom piti kun 'kwarkina a'di mo tani ditadit mo dhali 'bitha'bi'th mo, hili mo jin dina a'di e buŋ'kus is mo tani 'ka'da'ka'd mo dhali gwom piti jin ona a'di mo tani waku mo be.

¹¹ Dhalki 'kwani gi wakan mish gwo 'ban mo ki gwo gun ona aman e gwo kun 'kwaru mo me'd jin pina aman mo tani aman miikina a'di me'd jin 'kokina aman mo be.

¹² Yisa mmomiina aman ka gugundhi/ mmodhu is bam ka par nyakki unin tiya gwansan kun dhuki is buni ki ku gun ha me'd mo. Hili ki uni barki is buninj gana/ ki tiyan tiya mo tani dhali dhu is buni ka par mo ka rem 'kup mo tani uni dar gi gwo jin mishu 'ban mo be.

¹³ Hili aman mina 'koki dhu is ki ca mo mmo'ce'd gwayu/ mii apo/ mo, hili aman mina dhu gwayu/ ma Arungimis mo a'di jin dherkina a'di aman mo mmojidhir mo isi kan e umi.

14 Haali/ aman ki is bam yisa 'ce'dkina agagala/ mo, ma me'd jin dina aman ki jithirku/ i um mo. Aman takina uni kun t̪wa/a/ mo kun pu'dkin 'peni bway jin si'dasi'd e um mo gom gwom 'borga/ ma K̪rist̪hos mo be.

15 Aman 'konaki dhu 'bam bam ki ca mo mmo'ce'd gwayu/ mii apo/ mo e mii jin miina 'kwanin tiya to mo. Hili mo ma 'teŋ kapem bam a'dan be. Ki moŋgam gwo is bum minu ek mo tani bwam mondhe'd bam e bwam um mo minu galal ki galal jin caaca mo be.

16 Wakan ki am mina 'taki ci gwom 'borga/ eya ris bampa/ 'baar mo mmo'ce'd uma po/ mo ki dar gi mii jin dhunu 'ba/ ki ca mo gom mii jin iskin hila/ mo e bwam mondhe'd gi cin tiya mo be.

17 Dhalki a'di jin kar 'ba/ ki ca mo tani kar 'ba/ ki ca mo e Tapa mo be.

18 Haali/ a'di yisa ta wathi/ jin midi kar is piti ki ji gi ha me'd mo jin minu bu'th mo, hili wathi/ a'di imina Tapa kar ki ji gi ha me'd mo be.

11

ABuulus dhali ku gi Ta Thus ki Thus mo kun Dhunu ki She/ mo

1 Aha/ onayi ki um mini dhal aha/ ari bway mo mmo/o ari gwom pus mo. 'Kuci bwa mo ma ki 'kari'th gom aha/ mo.

2 Aha/ sura i mon'thoth bwa gom um mo jin piyi'd 'peni Arumgimis mo haali/ aha/ doshkina um eya K̪rist̪hos mo mmoçi um me'd nyaranyana'b this jin dheleladhelel mo goma ka'th ma yim mo be.

3 Hili aha/ ko/kina is mo, me'd mii jin miina tasha/ mo mmoheka Hawwa e mo ka mak piti mo tani ki gwom bum kun kulumkina umi bwa mo tani mini sus um mmoper mo 'peni mii gun daru gi washila/ mo dhali miin dhelelga/ kun ta mii ma gayiin eya K̪rist̪hos mo be.

4 Haali/ wakki/ jan tal 'deŋ kamu/ midi pu'dku/ mo dhali ci gwo goma Yesusa kamu/ mo jin diki ta a'din 'de/ jin cina aman um gwo mo tani walla wakki/ um bu'th shi/in kun 'ko ki she/ mo 'peni a'din 'de/ jin butha um mo walla wakki/ um bu'th gwom 'borga/ jin di ki she/ mo 'peni a'di jin bu'thkina um mo tani um komki 'peni a'di ki jahanne/ mo be.

5 Aha/ tosha ki aha/ dinaki kar ari sheŋ kamu/ mo goma uni gwansan kun dhunu ki she/ mo kun bolona bol e mo be.

6 Isi kani wakki/ aha/ dina 'twam pem ki ta gwocon mmotor gwo mo tani aha/ dara gi mo jin nyithuwa nyith mo yisa. Hili eya ris bwayi 'baar mo ki 'twanjal kuku/ mo tani aman torkina um a'di yansan eya tente/ eya ris to 'baar mo be.

7 A/ki aha/ miikina miinthus mo mmokarka/ is pem ki gwa'd wakana ki um minu 'taki dhu ki ca mo haali/ aha/ cikina um gwo ma Arumgimis jin ta gwom 'borga/ mo ki dar gi mii jin 'thonu to 'peni um mo be.

8 Aha/ 'tulkina to 'pena kaniisan tiya mo mmobu'thkika/ to gun cinu 'peni uni mo goma thip jin miinuwa thip mo, ki mii gi wakan mo mmomii um to mo be.

9 Dhali ki aha/ nyaka di ki um mo dhali aha/ hara to mo tani aha/ dinaki kar jan tal 'deŋ kamu/ ton diti'd ibwa mo haali/ tom pem jin taka/ mo tani 'kokunu mo mmothip aha/ 'pena wak mo uni gun pu'dkin mo 'peni Pam Makiduniyya mo be. Wakan aha/ tukkina is mo dhali aha/ mina isi tuk mo 'peni mo si'da/ jin 'konu ki ton diti'in ibwa e um mo eya ris 'twanjal kuku/ mo.

10 Me'd gwon gana/ ma K̪rist̪hos jin diki'd e aha/ mo tani 'bam pem jin karka/ ki ca mo tani aha/ mina 'twa/ diki 'dap mo e bampa/ gi Pa Akaa/iya mo be.

11 Dhali kataye? Haali/ aha/ dinaki en uma? Arumgimis mishki'd ki aha/ ena um mo be.

12 Dhali a'di jin miikika/ mo tani aha/ mina fikir a'di mii mo jin miga/ non uni gwansan kun se gwo i is mo, uni gun dhuki 'bam buni ki ca mo gom gwo jin hashu uni mo ki uni gun mini 'taki se gwo i is mo mmo/o ki uni i miiki mii mo ki mii ma garrne/ mo me'd aman mo be.

13 Haali/'kwani gi wakan ta uni gun dhunu ki she/ mo gun ta thus mo dhali imanmiya tu'c gun he'kkina he'k e mo, kun warki is bunin' gana/ ki uni ma Kristhos kun dhunu ki she/ mo.

14 Dhali mo jin meru di'da? Haali/ isi kani aSetaan warki is pitin' gana/ ka man'doyu gwo gi monkush mo be.

15 Wakan a'di yisa ta to jin meru wakki/ cin'kinam piti si'da/ warki is buni me'd is gi cin'kina/ gi mo ma kar/e mo be. Hili 'pemen buni mini 'ko isi ki miim buni gun miikina uni mo be.

Mo jin 'Kosh ma Buulus Is ka Nyor mo Me'd jin Tana A'di Amankaru ki She/ mo

16 Aha/ rasha gwo e mo ba/. Dhalki wathin tal 'denj kamu/ midi mii diki tosh ki aha/ tana pus mo. Hili isi kani wakki/ um toshkin kan mo tani budhi aha/ mo ma me'd wathim pus mo, wakan ki aha/ gara/ mina 'taki kar ari 'ba/ ki ca mo.

17 (A'di jin oka/ mo tani a'di oka/ mo yisa ki moshirr gi Tapa mo, hili me'd wathim pus mo mmokarkika/ 'ba/ ki ca mo mmowuwa wuny jwa i is mo be.

18 Me'd jin tana 'kwani aris ka ris kun dhu 'ba/ ki ca mo gom to ga 'cesh mo tani aha/ gara/ mina kar 'ba/ ki ca mo be.)

19 Haali/ um 'kunykina bwa mo mmo'kuç bwa mo gom uni gun ta pus mo me'd jin yuka um ki yuk ki is bum mo.

20 Haali/ um 'kuçi bwa mo wakki/ wathi/ dhu um ki cin'kinam piti mo, walla 'kwar um ka gwapi/ mo, walla bu'th shi/ miim 'boron bum mo, walla 'theç thini mis mo, walla dor um e jis/em bum mo.

21 E mon'the is pem mo tani aha/ mina mii o gwo mo ki am 'kokina mo ki is jin 'ka'da'ka'd kagahara mo gom mii jan mo be.

Hili ma a'diyin jin mina jan tal 'de/ ibu'th ki monkar 'ba/ nycine/ mo tani - aha/ okina gwo me'd wathim pus mo - aha/ si'da/ bu'thkina mo mmokar 'ba/ ki ca mo ki a'di jan mo be.

22 A/uni ta 'Kwani Ibraniyiina? Wakan aha/ garayi. A/uni ta 'Kwani ma Israyiila? Wakan aha/ garayi. A/uni ta emen ma Ibrahiima? Wakan aha/ garayi.

23 A/uni ta cin'kina/ ma Kristhosa? Aha/ tana jan 'de/ jin 'boro'di. - Aha/ ona gwo mo me'd wathi/ jin gusi'da du mo. Aha/ tana a'di jin 'boro'd ki 'bor gana/ kagahara goma tu'c jin caaca kagahara mo dhali gom mmodi eya sijin kagahara mo dhali gom mondor jin molu denj e mo dhali gom mmo'dish 'twa/ isa yempa/ mmowu mo.

24 Me'di mudhe'd mo aha/ bu'thkina mondor 'peni me'd gi 'Kwani Yahuuda/ mo ki mondor jin 'kona issu/ i/ath 'de/ mo.

25 Me'di kwara mo aha/ dorkunu mo ki cwa mo. Ki enj kamu/ mo tani aha/ 'koshkunu ki wosh mo. Me'di kwara mo tani aha/ dikina e bwam ma kur yi'de/ jin pwa'thki bwa mo. Ki mon'thiny ilu/ mo dhali ki montee ilu/ mo tani aha/ hashkina e 'kuçumma/ yi'de/ mo be.

26 E ya jin yaka/ me'd ka ris mo, aha/ 'dapa 'kup e mo jin tagu wu mo 'peni yi'de/ kun son mo, e mo jin tagu wu mo 'peni imandil to mo, e mo jin tagu wu mo 'peni 'kwanin pem mo, e mo jin tagu wu mo 'peni 'kwani gun 'koki ta 'Kwani Yahuuda/ mo, e mo jin tagu wu mo e 'per'kuman bampa/ mo, e mo jin tagu wu mo e nombwaasho mo, e mo jin tagu wu mo e kumma/ yi'de/ mo, e mo jin tagu wu mo 'peni iwak pem gun ta thus ki thus mo,

²⁷ e mii ma tu'c jin 'batha'ba'th mo, e miiny ciŋkina/ jin shwa'da nyor ki thiŋ mo, e mon'thiny ka ris ki dar gi e ki ish mo, e te/ jin 'kosho'da 'kosh mo dhali e yi'de/ jin bu'thki'da bu'th mo, me'd ka ris ki dar gi tontē/ mo, dhali e mon'thupga/ mo dhali ki is gana/ 'te/ mo.

²⁸ Dhali ki dar gi mii gwansani 'baar mo ka po/ mo tani to di'd jin yap aha/ mo isa yempa/ mo, a'di jin ta mo/an an is pem goma risa kaniisa 'baar mo be.

²⁹ Kaja a'di 'ka'da ise idhali aha/ idina is ki 'ka'd mo? Kaja a'di jin karu mmobiŋ moye idhali aha/ idin ma nyor ki deŋ mo?

³⁰ Wakki/ aha/ mina mii kar 'ba/ ki ca mo tani aha/ mina kar 'ba/ ki ca mo gom to gun toru aha/ e mon'ka'd is pem mo be.

³¹ Arungimis dhali Ababa gi Tapa Yesus mo tani a'di jin 'boru mii mo gom mii ma sule/ mo tani a'di mishki'd ki aha/ dinaki ta tor mo be.

³² E Pan Dimashk mo tani amudhiir jin diki'd e bwari'kwariny ma Malik jin ta'da Areta mo, jin jiki 'penkuman Bampa/ gi Pan Dimashk mo jin mina a'di bu'th aha/ mo be.

³³ Hili aha/ thulkunu ka 'cesh mo e bwam ma nura/ mo gi enj 'kup gi embul shu'd ma gonj mo dhali ye 'peni me'd piti mo be.

12

Tonyjan ma Buulus mo dhali Gwo jin 'Ceenu mo

¹ Aha/ mina mii kar 'ba/ ki ca mo. Tonj kamu/ yisa di'd jin mido ta shi/ miim 'boro'd gom a'di mo tani hili aha/ mina yip 'kup e tonyjan mo dhali gwo jin 'ceenu jin ta ji gi Tapa mo be.

² Aha/ misha wathi/ jin diki'd eya Kristhos mo, a'di jin diki'd ki yil karpa'c ath 'de/ mo 'thissa/, a'di jin bu'thkunu mo e bwam momis jin 'kon ma po/i kwara mo - wakki/ ki buŋwar is mo walla ki dar gi buŋwar is mo tani aha/ dinaki mish mo mo. Arungimis a'di mishki mo mo be.

³ Dhali aha/ misha ki wathi/ yansan a'di bu'thkunu mo e bwam monyaro/ ma Arungimis mo - wakki/ a'di e buŋwar is mo walla ki dar gi buŋwar is mo tani aha/ dinaki mish mo mo. Arungimis a'di mishki mo mo be.

⁴ Dhali a'di cikki gwo ki to gun minu mol tor mo, jin mina wathi/ mol bah mo be.

⁵ Gom gway gi wathi/ yansan mo tani aha/ mina kar 'ba/ ki ca mo, hili eya po/ gway gi is pem gana/ mo tani aha/ mina diki kar 'ba/ ki ca mo isi ciki/ jasi mon'ka'd is pem mo be.

⁶ Ba wakki/ aha/ onayi ki kar 'ba/ ki ca mo tani aha/ mina diki ta pus mo haali/ gwo jin miga/ tor mo tani mido ta gwonj gana/ mo be. Hili aha/ tu'kkina is mo 'peni a'di mo, wakan ki jan tal 'denj kamu/ mido 'taki diki kulum gwo apo/ aha/ ki nyanye/ 'peni a'di jin parkina a'di e e aha/ mo walla cik 'peni aha/ mo be.

⁷ Dhali mmonon aha/ 'peni mo jin miga/ kar 'ba/ ki ca mo goma ris gwony 'cee gwansan kun ishkin ka enthus mo tani a'de/ a'di cikunu aha/ mo e buŋwar is pem mo a'di jin ta'da gumbway ma Setaan mo mmotukun aha/ mo, mmonon aha/ mo 'peni mo jin miga/ 'taki kar 'ba/ ki ca ki nyanye/ mo.

⁸ Me'di kwara mo tani aha/ yuŋkina Tapa mo mmo'tho mo gom a'di yan mo ki a'di mido 'taki dhal aha/ mo.

⁹ Hili a'di ki o aha/ gwo mo ki: A'them pem a'di 'koshi jwa mo gom /e mo haali/ mom'bi'th pem a'di nyo/u mo ki nyo/ gana/ e mo is jin 'ka'da'ka'd mo. Aha/ mina bwa 'kuny ki nyanye/ kagahara 'baar mo mmokar 'ba/ ki ca mo e mom pem kun 'ka'dka/ is mo ki mom'bi'th ma Kristhos mido ca'ba po/ aha/ mo be.

10 Gom gway ma *Kristhos* kan mo tani aha/ *ca'bkina* ka this mo i e mo e is jin 'ka'da'ka'd mo, eya wak jin waku mo, e miiny *cin'kina*/ jin shwa'da nyor ki *thith* mo, e mo gun *tojuwa to'c bwa* mo, dhali e mii ma *cis* mo. Haali/ ki aha/ 'ka'da is kan mo tani aha/ 'bi'thkina is ki 'bi'th mo be.

Mo jin Anankin ma Buulus Is mo goma Kaniisa gi Pan Kurinthuus mo

11 Aha/ takina pus mo. Um *kankaa*/ ki 'bi'th mo gom a'di mo haali/ aha/ ka ba/ imina 'taki ha me'd ki han gana/ ki um mo. Haali/ aha/ dinaki kar ari shej kamu/ mo gom uni gwansan kun dhunu ki she/ mo kun bolona bol e mo, isi kani ba aha/ tana torj kamuwa.

12 Jamas mii goma mankaru ki she/ jin ta jin gana/ mo tani uni thimkunu mo e bwam um mo eya ris bwa 'baar mo kun 'kuçkunu mo ki 'kari'th mo dhali ki jamas mii mo dhali ki momer mo dhali ki miiny caaga/ mo.

13 Haali/ 'peni shi/ miim 'boro'd jana nonu um mo jin tan ma kaniisan tiya mo, isi ciki/ aha/ ki is pem dinaki kar *tonditi'da po*/ um mo. Dhalki aha/ 'peni mii yan jin *thu'thka*/ mo ma.

14 Mmahan gom me'd kun 'koni kwara mo tani aha/ thosonkina is pem mo mmoyaku/ i um mo. Dhali aha/ mina *dit* um mii ki *dit yisa*, haali/ aha/ dinaki simm to gun tana um e mo, hili aha/ *simma jasi* um e mo. Haali/ ushi uci ka ba/ imini 'koki mii dhu to mo gom icom buni mo, hili icom gom uci mii buni mo be.

15 Aha/ mina bwa 'kuny mo ki 'kuny gana/ mo mmo'baar tom pem mo dhali mmo'baaru is pem mo gom gway ma *kashiram* bum mo. Wakki/ aha/ ena um kagahara mo tani a/ dhali aha/ minu en ki gwa'd gwa'd mowa?

16 Hili 'boro'd be ki aha/ ki is pem dinaki *dit* um mii ki *dit* mo. Dhali um o gwo mo ki aha/ miikina ka *mak* mo dhali aha/ he'kkina um e mo ka gany pem mo.

17 A/ aha/ bu'thkina shi/ miim 'boro'd 'peni um ki unin tiya gwan gun hashkika/ e um mowa?

18 Aha/ *kankina Tiithus* gwo mo mmoyaku/ mo dhali mmohasha kam mmonyak ya ki a'di mo. A/ dhala *Tiithus bu'thki shi/ miim 'boro'd 'peni* um mowa? A/ kona am ki mii mii jin *nyaka'd* e shi/ ina 'de/ mowa? A/ kona aman ki *nyak njatgin* gun *nyakkan* mowa?

19 A/ um 'kon mmotosh isa yempa/ ki aman 'ce'dkina gwo she/ mo gom bungwar is bam mo *ibwambori* um mowa? A'di *ibwambori jis/ e* ma *Arungimis* mo ba/ ki aman *tor'kina* gwo goma *Kristhos* mo dhali a'di 'baar mo gom mmonyarj bum kun minu nyarj um is mo, um gun enu mo be.

20 Haali/ aha/ *ko/kina* is mo ki aha/ wari mina 'taki pu'dku/ mo dhali gam um me'd jin dika/ ki o bwayi, dhali ki um mini 'taki gam aha/ me'd jin mina um i'koki o bwa moyi. Wakan wari ki mo jin waluwa wal midi di mo walla bwan dhapan mo walla mo ma nyor mo walla mii jin miinu ka ham 'kus mo walla mo jin thudhuwa *thu'th 'pen* mo walla mo le'd jin tanu mo walla mo jin 'the'ku 'ba/ mmis mo walla mo ma *dulatt* jin miinu mo.

21 Aha/ *ko/kina* is mo ki me'd jin miga/ pu'dku/ mo dok/ e mo tani *Arungimis* pem a'di midi 'taki kar aha/ ki is jin gwa'da'd mo *ibwambori* um mo dhali aha/ mina 'taki mii ko mo goma ris uni gwansan kun miiki miinthus *itwa/ a/ mo* dhali 'koki rica du is mo 'peni mon'dap em buni mo dhali mii gun miinu miinyal mo dhali mii kun 'kanuwa *kanthi/ mo*, a'di jin *bot'kina* uni mo mmomii mo be.

13

Kwalany Te/ be. Gwo jin Rumkunuwa Rum mo dhali Monthe Me'd mo

¹ Yansan ta me'di kwara mo jin murka/ pu'dku/ i um mo. E mii gunn kun yera yer is ki gway mo tani minu mii te mo ki te'b ki 'twanj 'kwani su/ mo walla ki 'twanj 'kwani ikwara mo kun mini mii ta iman/o gwo mo.

² Aha/ rumkina uni gwansan kun mii miinthus ntwa/a/ ki gwo mo dhali aris unin tiya si'da/ mo, dhali aha/ rumkina uni ki gwo mo shwane/ me'd jin pikika/ mo me'd jin miikika/ mo ki aha/ dikina i bunj'kus mo eya pom but pem jin 'kon ma po/i su/ mo ki aha/ mina diki 'tash uni 'twa/ mo wakki/ aha/ mina pu'dku/ dok/e mo

³ haali/ um 'kokina gwo ibwa mo mmony/ mii mo ka Kristhos a'di torki gwo e aha/ mo. A'di yisa 'ka'da is ki 'ka'da e mo jin tu'ba a'di um mo, hili a'di ta gi mom'bi'th e um mo be.

⁴ Haali/ a'di 'koshkunu jwa mo ki cwany'ciṭhan dhul mo e mo jin 'ka'da a'di is ki 'ka'd mo, hili a'di di'd ki e mo dok/e ki mom'bi'th ma Arungimis mo. Haali/ aman 'ka'da is e a'di mo, hili mo jin tu'bu/ um mo tani aman mina nyak 'ko ki a'di mo ki mom'bi'th ma Arungimis mo be.

⁵ Nyithi/ is bum mo ma, mmopar e wakki/ um shurkin mo e mongam gwo is bum mo. Pali is bum mo ma. 'Kona um ki nyitha ka Yesus Kristhos a'di diki'd e um mo - isi ciki/ ka jin gana/ um ushki me'd mo mmogam mompal 'kup mo be.

⁶ Aha/ ona bwayi ki um mini gam gwo ki aman 'konaki ta ku gun ush me'd mo be.

⁷ Hili aman 'thokina Arungimis mo ki um mini 'koki mii a'di jin ta thus ki thus mo - yisa ki aman wana e gi uni gun gam mompal 'kup mo 'te/, hili ki um mini mii a'di jin ta jin kar/e mo, ba am a'di iwana e ki uni gun ushi me'd mo be.

⁸ Haali/ aman mina mol tonj kamu/ mii apo/ gwonj gana/ mo, hili jasi gom gwonj gana/ mo be.

⁹ Haali/ aman 'kunykina bwa mo ki aman 'ka'dkina is mo dhali um a'di i'bi'thkin ki 'bi'th mo. A'di jin 'thokina am mo tani ta gom miim bum jin minu nyo/ shoka 'cesh mo be.

¹⁰ Aha/ 'kwarkina gwo yansan ki aha/ si'da 'peni um mo, ki mii gi wakan ki aha/ mina pu'dku/ mo tani aha/ mina diki mii o gwo jin 'bitha'bi'th mo mmobu'thka/ moshirr mo a'di jin cikina Tapa aha/ mo gom mo jin nyanjuwa nyanj is mo dhali yisa mmopor to bwa mo.

¹¹ Kwality 'te/ ba/, iwaḡ mo. 'Koku/ ma. Toki miim bum ma. Ciya hirdhe/ ki gwom pem mo ma. Gami gwo me'd ka rem 'kup mo ma. 'Koyi e monku'th is mo ma. Dhali Arungimis gi mo/en dhali ji gi monku'th is mo a'di midi di e um mo be.

¹² Theka the me'd ka rem 'kup mo ma ki 'twa/ jin kogu jin pinu mo.

¹³ Aris uni 'baar mo kun dhunu ki she/ ki dhelel dhelel mo tani theki um me'd mo be.

¹⁴ A'the gi Tapa Yesus Kristhos mo dhali mo/en ma Arungimis mo dhali anyak jin nyakku to mii gi Shi/in Dheleladhelel mo tani mini 'ko e umi 'baar mo be.

Gwo jin 'Kwar ma Buulus gom 'Kwani gi Paṅ GALATHIYYA mo

Monthe Me'd mo

¹ ABuulus jin ta a'di jin karu ki she/ mo - yisa 'peni 'kwani mo walla ki wathiṅ kamu/ mo, hili ka Yesuṣ Kristḥos mo dhali Arungimis jin ta'da Baba mo, a'di jin 'de'kki a'di mo 'peni mowu mo be -

² dhali arisa waḳ peni 'baar mo, uni kun nyaḳki 'ko ki aha/ mo.

Eya risa kaniisa gi Paṅ Galathiyya mo be.

³ A'the e um mo dhali moṅku'th is 'peni Arungimis jin ta'da Baba mo dhali Tapa Yesuṣ Kristḥos bana mo be,

⁴ a'di jin ciki is piti mo gom miinthus bana mo mmo'cuḳ ana mo 'peni she/ yil jin ta jin thus yan mo isi ki bwa ma Arungimis bana mo dhali a'di jin ta Com mo.

⁵ E a'di mo tani imina monyca icil mo gom mo jin minu 'ko ki sule/ mo dhali ki sule/ ya ye 'ba/ mo be. Amen.

Gwom 'Borgaṅ Kamu/ Yisa Di'da

⁶ Aha/ merkina mo ki um ki jahanne/ kan aḳki a'di e mo a'di jin yuḳki um mo eya 'the ma Kristḥos mo dhali tu'k mo e gwom 'borgaṅ kamu/ mo -

⁷ yisa e gwom 'borga/ jin ta jin kamuwa, hili haali/ kun tiya 'kokin mo kun to'cki um bwa mo dhali kun ona bwa ki aḳ gwom 'borga/ ma Kristḥos e mo be.

⁸ Hili isi kani waḳki/ aman walla aman'doyu gwo 'peni momis mo mini 'taki ci um gwom 'borgaṅ kamu/ ki ca'ckon mo ki a'di jin cikina aman e um mo tani dhalki a'di jeenu mo.

⁹ Me'd gwo jin okina aman itwa/a/ mo wakan shwane/ mo tani aha/ ona gwo dok/e mo ki: Waḳki/ a'din 'deṅ kamu/ ci um gwom 'borga/ ki ca'ckon mo ki a'di jin bu'thkina um mo tani dhalki a'di jeenu mo ma.

¹⁰ A/aha/ shwane/ simmkina 'the gi 'kwani eya, walla 'the ma Arungimis mo? Walla aha/ palkina mii mo mmo'bor 'kwani bwa mowa? Waḳki/ aha/ dina mo naskina/ mo mmo'bor 'kwani bwa mo tani aha/ mina 'taki diki ta cinḳina/ ma Kristḥos mo be.

Mo jin Warkin ma Buulus ki A'di jin Karu ki She/ mo

¹¹ Haali/ aha/ mina 'taki dhal um imish mo moyi, iwaḳ mo, ki gwom 'borga/ a'di jin cinu ki aha/ mo tani diki ta gwo 'peni isi gwo gi wathi/ en'thi/ mo.

¹² Haali/ aha/ dinaki bu'th a'di 'peni wathi/ en'thiṅ kamu/ mo, walla si'da/ aha/ dinuki tor a'di mo, hili a'di pu'dki'd mo ki gwo jin 'ceen ma Yesuṣ Kristḥos mo be.

¹³ Haali/ um cikki gwo mo gom mondiki/em pem jin ta jin dhamo/ jin ta ji gi mii gi 'Kwani Yahuuda/ mo, a'di ito'ckika/ kaniisa ma Arungimis bwa mo ki mombujur mo dhali pal mii mo mmo'ce'd a'di sho'k mo be.

¹⁴ Dhali aha/ bolḳina uni e mo ki miin 'Kwani Yahuuda/ mo, mmo'ce'd uni ka ris apo/ mo uni gun ta ku gi yil pem gana/ mo e bwaman 'kwanim pem mo haali/ aha/ shwakina nyor ki thiṅ mo gom gwon dhamo/ gun luḳu 'peni 'kwani gwanyajakam pem mo be.

¹⁵ Hili ki a'di jin karki aha/ ki she/ mo ntwa/a/ ki aha/ dinuki dho'th mo dhali yuḳ aha/ mo goma 'them piti mo tani,

¹⁶ a'di 'borkina bwa mo mmo'tor Ya/m piti eya tente/ e aha/ mo. Ki mii gi wakan mo tani ki aha/ mina ci gom a'di e bwaman 'kwani kun 'koki

ta 'Kwani Yahuuda/ mo. Ki a'di wakan mo tani aha/ dinaki ƙora ƙor ki a'din kamu/ jin ta bungwar is mo walla abas mo,

¹⁷ walla aha/ si'da/ dinaki ya ka gagamis e Pa Urushaliim mo e uni gwansan kun 'kokunu mo mmodhu ki she/ mo nƙwa/a/ ki aha/ mo, hili aha/ yakina mo e Bampa/ gi Pa Arabiyya mo be dhali dok/e aha/ dokkina ka nyan'ko'd mo e Pan Dimashk mo be.

¹⁸ Dhali yan'ko'd 'ko'di yili kwara mo tani aha/ yakina ka gagamis e Pa Urushaliim mo mmobuƙa Sapa mo dhali nyaƙ ƙa'b ki a'di ka cim ma ƙarpa'c mo be.

¹⁹ Hili aha/ dinaki par unin tiya e kun dhunu ki she/ mo isi ciki/ jasa Yakuub jin ta'da kam gi Tapa mo be.

²⁰ (Dhali gwo jin 'kwarkika/ e um mo tani ibwambor ma Arungimis mo aha/ dinaki ta aƙor mo be.)

²¹ Dhali yan'ko'd aha/ yakina e Bampa/ gi Pan Suriyya mo dhali Pan Kilikiyya mo be.

²² Dhali aha/ 'konu mo mmomol mo naskeyi ki jis/e ma risa ƙaniisa ma Kristhos e Bampa/ Yahuudiyya mo be.

²³ Uni cikki jasi gwo jin onu mo ki: A'di jin to'cki ana bwa mo 'thissa/ a'di di'd shwane/ mmoƙi gwo gi monƙam gwo is mo, a'di jin palkina a'di mmo'ce'd sho'k mo be.

²⁴ Dhali uni karkina Arungimis ki ca mo gom aha/ mo be.

2

ABuulus A'di Bu'thkunu mo ki Unin Tiya kun Dhunu ki She/ mo

¹ Dhali yan'ko'd 'ko'di yili 'kume'd i'ce'dka donjon mo tani aha/ yakina ka gagamis mo dok/e e Pa Urushaliim mo nyaƙka Barnaaba mo mmosusa Tiithus nyaƙki aha/ mo be.

² Aha/ yakina mo ki gwo jin 'ceenu mo, dhali aha/ karkina a'di ibwambori uni mo (hili ki kup mo e bwambori uni gwansan kun dhunu ki uni gun tana shu/um bway mo) gom gwom 'borga/ mo a'di jin cika/ mo e bwaman 'kwani kun 'koki ta 'Kwani Yahuuda/ mo, isi ciki/ ki aha/ mina 'taki gus mo walla ki aha/ guskina 'te/ ki pe'th mo.

³ Hili isi kani aTiithus a'di jin nyaƙki ya ki aha/ mo, a'di yisa ƙucu mo mmo'ciha/ munyal yis piti mo, ba a'di ta Wathin Griki mo be.

⁴ Hili haali/ gom iwaƙ kun ta thus mo kun susu mo ibwaman mo ki kup mo tani uni kun hurki bwaman mo mmo'kar mom bam jin 'kona am ki 'kus e mo, a'di jin takina aman eya Kristhos jin ta'da Yesus mo, ki uni mini 'taki sus am e mo jin deƙuwa deƙ mo be.

⁵ E uni mo tani aman 'konaki dhas is bam bway mo isi kan gom ari mo mo, ki gwon gana/ gi gwom 'borga/ minu dhu mo gom um mo be.

⁶ Dhali 'peni uni gwansan si'da/ kun onu ki uni tana shu/um bway mo gom ton kamu/ mo (A'di jin tana uni mo tani midi diki mii ton kamu/ gom aha/ mo. Arungimis diki ƙor mii ma gwar 'de/ mo). Uni gwansan, aha/ ona gwo mo, e uni kun onu ki uni tana shu/um bway mo tani mini 'koki mar ton kamu/ is gom aha/ mo be.

⁷ Hili ki gwony ƙa'ckon mo, ki uni parki mii e mo ki aha/ karkunu mo mmoƙi gwom 'borga/ ki 'kwani kun 'kon ka munyal yisi e mo me'd jin karkunu aButerus mo mmota amanƙi gwom 'borga/ gom uni gun 'cihuwa munyal yis mo be.

⁸ (Haali/ a'di jin miiki'da tu'c mo ka Buterus mo gom gwo gi hashu mo e uni gun 'cihuwa munyal yis mo tani miiki'da tu'c mo e aha/ si'da/ mo gom 'kwani kun 'koki ta 'Kwani Yahuuda/ mo.)

⁹ Dhali ki uni nyithkina 'the jin cikunu aha/ mo tani aYakuub dhala Sapa dhala Yohaana uni gun onu ki uni tana atinkilij mo tani ciki aha/ bway mo dhala Barnaaba mo abim poros gi mmonyak to mii mo, ki aman mina 'taki ii mo e 'kwani kun 'koki ta 'Kwani Yahuuda/ mo, dhali uni e 'kwani kun 'cithuwa munyjal yis mo be.

¹⁰ Jasi uni ona bwayi ki aman mina ka uni gun hatha'ko'd e mo, a'di jin ta to yan gana/ jin gananka/ 'ba/ mo ka daran du mo mmomii mo be.

ABuulus Kucurki'da Buterus mo e Pa Anthaakiya mo

¹¹ Hili ka Sapa pu'dki'd mo e Pa Anthaakiya mo tani aha/ ceshkina a'di mo ka karambuye/ mo ki jis/em piti mo haali/ a'di doshki'd mo mmowaqkunu a'di mo be.

¹² Haali/ ntwa/a/ mo, ki 'kwanin tiya pu'dkin mo 'pena Yakuub mo tani a'di nyakki to shwa ki 'kwani kun 'koki ta 'Kwani Yahuuda/ mo. Hili ki uni pu'dkin mo tani a'di guki is piti ka nyan'ko'd mo dhali kwa/ is piti bwa mo mmoqo/ kina a'di 'kwani kun 'cithuwa munyjal yis mo be.

¹³ Dhali nyakki a'di mo tani 'Kwani Yahuudan tiya kun bockin mo tani nyakki mii yan mii mo ki mii washila/ mo. Wakan ka Barnaaba si'da/ a'di kalkunu shoki mis ki miim buni jin miikina uni ki washila/ mo be.

¹⁴ Hili ki aha/ mishkina ki uni 'konuki dosh ka ji sho'k mo gom gwoŋ gana/ gi gwom 'borga/ yan mo tani aha/ okina Sapa ibwambori uni 'baar mo ki: Wakki/ / e ba ta ji Yahuuda/ mo tani dhali diki mii me'd wathi/ jin diki ta Wathi/ Yahuuda/ mo tani dhali diki mii me'd Wathi/ Yahuuda/ mo tani/ e mini mish 'kwani kun 'koki ta 'Kwani Yahuuda/ dhu me'd 'Kwani Yahuuda/ kata mo?

'Kwani Yahuuda/ Nyakan ki 'Kwani kun 'Koki Ta 'Kwani Yahuuda/ mo kun Woŋhu/ ki Mongam Gwo Is mo

¹⁵ Ana ki is bana ana kun tana 'Kwani Yahuuda/ ka dho'th mo dhali yisa 'kwani kun 'koki ta 'Kwani Yahuuda/ kun ta imanmii miinthus mo,

¹⁶ dhali ana gun misha mo mo ki wathi/ dinuki kar ki mo ma kar/e ki mii gi gwoŋkan jin cinu mo, hili ki mongam gwo is eya Yesu Kristhos mo, isi kani ana gamkina gwo is eya Kristhos jin ta'da Yesu mo. Ki mii gi wakan mo mmodhuwa dhu ki mo ma kar/e mo ki mongam gwo is eya Kristhos mo dhali yisa ki mii gi gwoŋkan jin cinu mo haali/ ki mii gi gwoŋkan jin cinu mo tani jan tal 'deŋ kamu/ yisa di'da jin minu kar ki mo ma kar/e mo be.

¹⁷ Hili wakki/ miim bana jin pala ana ki ana minu dhu ki mo ma kar/e eya Kristhos mo tani ana ki is bana minu gam mo ki ana tana imanmii miinthus mo a/aKristhos a'di karu mo mmomii miinthus? Dhalku/ ki tosh kan mo.

¹⁸ Hili wakki/ aha/ ki nyan to gwansan is dok/e mo, uni gun 'tukka/ mo tani yan'ko'd aha/ nyo/a is pem mo ka mandhan gwo mo be.

¹⁹ Haali/ ki gwoŋkan jin cinu mo tani aha/ wuna mo e gwoŋkan jin cinu mo ki aha/ mina di mo goma Arungimis mo be.

²⁰ Aha/ nyakkunu 'kosh ki cwany'cithan dhul nyakka Kristhos mo. Dhali a'di yisa ta aha/ jin dina ki eya, hili aKristhos a'di jin diki'd ki e e aha/ mo. Dhali mondiki/e jin dika/ ki e e bungwar is mo shwane/ tani aha/ dina ki e ki mongam gwo is mo e Ya/ ma Arungimis mo, a'di jin enki aha/ mo dhali ci is piti mo gom aha/ mo be.

²¹ Aha/ dinaki puuwa 'the ma Arungimis mo. Haali/ wakki/ mo jin dhunuwa dhu ka kar/e diki'd mo e gwoŋkan jin cinu mo tani, kan, Kristhos wuki'd mo ki dar gi 'kup miinj gana/ mo be.

3

Gwoŋkan jin Ćinu mo walla Gwo jin Gamu Is mo

1 Ayy um 'Kwani gi Paŋ Galathiiyya kun ta pus mo. Um gun torkunuwa Yesu^s Kri^sthos eya tente/ mo ibwambori jis/em bum mo a'di jin 'koshkunu ki cwany' ci^hhan dhul mo tani aja iceshki um ki en dhathu/ mo?

2 Dhalki aha/ do^ta um jasi gwo gom gway yansan mo. A/ki um bu^thki Shi/ in ki mii gi gwoŋkan jin Ćinu mowa? Walla ki gwo jin ci^kkina um ki moŋgam gwo is mo?

3 Ayy, um 'kona isi pusi mana? Mmo^telkina um mii 'pen mo ki Shi/in mo, a/ dhali um shwane/ da^kki 'kup mo ki bu^gwar is mowa?

4 A/ki gwo gi wana um kani bwa imiikina um aris to ki pe^th mo kana? - ba a'di 'te/ wari ka jin gana/ ita jim pe^th mo.

5 Dhali a'di si^da/ jin thipki^da thip ki Shi/in e um mo dhali mii miimer e bwam um mo tani a/a'di ki mii a'di ki gwoŋkan jin Ćinu mo walla ki gwo jin ci^ku ki moŋgam gwo is mo?

6 Wakan a/Ibrahiim gamki^da Arumgimis gwo is mo, dhali a'di karkunu mo gom a'di ki mo ma ka^r/e mo.

7 Wakan um mini hil mii i e ki a'di ta mii gi 'kwani gi moŋgam gwo is mo kun ta iya/ ma Ibrahiim mo be.

8 Dhali Gwo ma Arumgimis kun 'kwarkunu mo, mmonyith^kina a'di ntwa/ a/ mo ka Arumgimis midi dhu 'kwani kun 'koki ta 'Kwani Yahuuda/ ki mo ma ka^r/e ki moŋgam gwo is mo tani a'di ci^ki gwo ki gwom 'borga/ ntwa/a/ ka Ibrahiim mo mmo/o gwo mo ki: E/e mo tani aris kal gi 'kwaniny'ceshi 'baar mo tani minu 'bor mii mo be.

9 Wakan mo, 'kwani gwansan kun ta ku gi gami gwo is mo tani uni 'boru mii mo nyakka Ibrahiim mo a'di jin ta^d gi moŋgam gwo is mo be.

10 Haali/ aris uni 'baar mo kun 'ko 'ko^d e mii gi gwoŋkan jin Ćinu mo tani uni 'kon e bwan'kwariny monyjee mo. Haali/ a'di 'kwarkunu mo ki: Monyjee midi di mo goma ris 'kwani 'baar ka 'de^te/ 'de^te/ mo, uni gun 'koki 'ko 'ko^d eya ris to 'baar mo kun 'kwarkunu mo e gwoŋkan jin Ćinu mo dhali mii uni mo be.

11 Dhali a'di di^d eya tente/ be ki wathi/ en^thiⁿ kamu/ yisa di^da jin minu kar ki mo ma ka^r/e mo ibwambor ma Arumgimis ki gwoŋkan jin Ćinu mo. Haali/ a'di 'kwarkunu mo ki: A'di jin karu ki mo ma ka^r/e ki moŋgam gwo is mo tani a'di midi di ki e mo be.

12 Hili gwoŋkan jin Ćinu mo tani diki di apo/ mo jin gamu gwo is mo, haali/ gwo 'kwarkunu mo ki: A'di jin mii uni mo tani a'di midi di 'ko^di uni mo be.

13 AKri^sthos a'di wanki ana 'ba/ mo 'peni monyjee gi gwoŋkan jin Ćinu mo mmowarkina a'di ki monyjee gom ana mo - haali/ a'di 'kwarkunu mo ki: Monyjee midi di goma ris 'kwani 'baar ka 'de^te/ 'de^te/ mo, uni kun shirki is buni apo/ cwa mo -

14 Ki eya Kri^sthos jin ta^da Yesu mo tani mo jin 'boruwa Ibrahiim mii mo midi 'taki pu^du/ apo/ 'kwani kun 'koki ta 'Kwani Yahuuda/ mo ki ana mina 'taki bu^th gwo jin onu is mo gom Shi/in e moŋgam gwo is mo be.

Gwoŋkan jin Ćinu mo dhali Gwo jin Onu Is mo

15 Aha/ mina ci um mii gi wathi/ en^thi/ gom she/mm mii mo, iwa^k mo. Wathin kamu/ yisa di^da jin midi puu gwo gom mal gi wathi/ mo walla mar gom piti is mo 'ko^di a'di tekunu shoka 'cesh mo.

16 Dhali gwo kun okunu is mo dhukunu mo goma Ibrahiim mo dhali gom emen piti mo. A'di diki o gwo mo ki: Dhali e emen piti mo, mmo/o gwo goma

ris mo. Hili mmo/o gwo mo gom a'din 'de/ mo ki: Dhali gom emen pini mo, a'di jin ta'da Kristhos mo be.

¹⁷ A'di ta 'pemen gwo jin oka/ mo. Ki gwoŋkan jin cinu mo jin pu'dki'd ki yil kun 'koni iss* 'kwanimpa i/iss 'de/i'ce'dki iss 'de/i'ce'dka 'kume'da po/ mo ŋ'ko'd mo tani a'di diki kar gwo mmopuu mo, gwo jin gamu me'd mo 'thissa/, a'di jin ten ma Arumgimis shoka 'cesh mo. Wakan ki gwo jin onu is mo minu kar ki jim puu mo be.

¹⁸ Haali/ wakki/ mal ta ji gi gwoŋkan jin cinu mo tani a'di yisa di mo 'ko'di gwo jin onu is mo, hili Arumgimis ki ci a'di ka Ibrahiim ki gwo jin onu is mo be.

¹⁹ Kata cinu gwoŋkan jin cinuye? A'di karkunuwa po/ mo gom gwoŋkan dhan mo ntagi emen midi 'taki pu'du/ mo e a'di jin okunu gwo is mo. Dhali a'di karkunu 'pen ka pije/ mo ki iman'doyu gwo mo ki a'di jin doshki'di bwaman mo mmowotha/ woth mo.

²⁰ Dhali a'di jin doshki'd e bwaman mo mmowotha/ woth mo tani a'di diki ta 'pemen mmodi jasi 'de/ mo. Hili Arumgimis a'di tal 'de/ mo be.

'Kup Gwoŋ Gana/ gom Gwoŋkan jin Cinu mo

²¹ A/dhali gwoŋkan jin cinu mo a'di di'da po/ gwo jin on ma Arumgimis is mowa? Dhalku/ ki toshkan mo. Haali/ wakki/ gwoŋkan jin cinu mo minu 'taki ci mo mmokar mo jin 'konu ki e mo tani yan'ko'd mo ma kar/e midi 'taki di mo ka jin ganayi ki gwoŋkan jin cinu mo be.

²² Hili Gwo jin 'kwarkunu mo tani tulki'da ris to 'baar mo 'twa/ mo e miinthus mo, ki gwo jin onu is mo e moŋgam gwo is eya Yesu Kristhos mo tani minu 'taki ciki uni gwansan kun gami gwo is mo be.

²³ Dhali n'twa/ a/ ki moŋgam gwo is diki pu'd mo tani ana 'kokunu mo mmohem mo e bwan'kwariny gwoŋkan jin cinu mo, mmodhukunu ana e bwan'kwariny mo jin 'tashuwa 'tash 'twa/ mo ntagi moŋgam gwo is minu tor eya tente/ mo be.

²⁴ Wakan gwoŋkan jin cinu mo tani a'di ta'da mansus bana mo ntaga Kristhos pu'dki'd mo, ki ana minu dhu ki mo ma kar/e ki moŋgam gwo is mo be.

²⁵ Hili shwane/ moŋgam gwo is a'di pu'dki'd mo, i/ana dok/ e yisa i'kona mmo'ko mo e bwan'kwariny a'di jin suski'da sus mo

²⁶ haali/ eya Kristhos jin ta'da Yesu mo tani umi 'baar mo ta iya/ ma Arumgimis mo ki moŋgam gwo is mo be.

²⁷ Haali/ aris umi 'baar mo kun miikunu ki yi'de/ mo eya Kristhos mo tani hi'thina Kristhos i'ba/ mo be.

²⁸ Wakan walla Wathi/ Yahuuda/ yisa di'da walla Wathiŋ Griki mo, walla wathi/ jin ta cin'kina/ jin yolu mo yisa di'da walla moŋ'ko ki 'kus mo, walla kun tana g'wath yisa di'da walla iyima 'bomi mo. Haali/ umi 'baar mo tal 'de/ mo eya Kristhos jin ta'da Yesu mo be.

²⁹ Dhali wakki/ um ta ku ma Kristhos mo tani um ta emen ma Ibrahiim mo, mmota gi mal isi ki gwo jin onu is mo be.

4

¹ Gwo jin oka/ mo gom mal mo a'dihe/ be. Me'd jin tana a'di a'ci mo tani a'di jin midi kal mal mo diki bol mii jin tanu cin'kina/ e ki 'bor mo, ba a'di ita a'di jin cila mali 'baar mo.

² Hili a'di diki'd mo e bwan'kwariny imanhil a'di jin a'ha she/ mo dhali imandhu tom piti mo ntaga tee jin karkina com a'di mo be.

* 3:17 urbumiyya wa tala'tiin

³Wakan gom ana mo. Ki ana takina uci mo tani ana takina cinjina/ gi gwo ma bwa nyara/ gom gwonkan gi mony' cesh yan mo.

⁴Hili ka tee pu'dki'd mo mmothimkunu a'di mo tani Arumgimis hashki Ya/m piti mo, a'di jin dhodhu 'pena 'bom mo dhali a'di jin dho'thkunu mo e bwan'kwariny gwonkan jin cinu mo be, mmowan uni gwansan 'ba/ mo, uni kun 'kokin mo e bwan'kwariny gwonkan jin cinu mo,

⁵wakan ki ana mina bu'th mo jin thipuwa thip me'd iya/ mo be.

⁶Dhali haali/ um ta iya/ mo tani Arumgimis hashki Shi/in gi Ya/m piti eya dum bana mo mmocuu gwo mo ki: Abba. Ababa.

⁷Wakan eya Arumgimis mo tani um yisa 'koni mmo'ko mo mmota cinjina/ mo, hili um ta iya/ mo, dhali wakki/ um ta iya/ mo tani um ta gi mal mo be.

ABuulus Dina Isi Gwo Ibwa mo gom Uni kun Gami Gwo Is mo

⁸Kadhamo/ ki um 'koki mish Arumgimis mo tani um 'kokin mo ki mondek is mo e mon'ko gi uni gun 'koki ta gi buyempa ma rum kun lunu mo.

⁹Hili shwane/ mmopu'dkina um mo mmomisha Arumgimis mo tani, walla ki mii jin dhalu e i is mo ki um mishu ka Arumgimis mo tani um mini mish dok ka nyan'ko'd kata mo e gwo ma bwa nyara/ gom gwonkan gi mony' cesh gwansan kun 'ka'da is ki 'ka'd mo dhali kun hatha'ko'd ki ha'th kan mo? Um ona bwa mmota cinjinam buni mo dok/eya?

¹⁰Um 'kon mmodhuwa tee mo dhala ppe mo dhali yir jin akka'da ak mo dhali yil mo be.

¹¹Aha/ ko/ka is mo ki aha/ miikina tu'c apo/ um ki pe'th mo.

¹²Iwaka, aha/ yuka um mo, wayi e ki aha/ mo ma haali/ aha/ si'da/ wana e ki um mo. Um 'koki thuthaa/ mii mo be.

¹³Haali/ um mishkin mo ki mo jin 'ba'thka/ mo e bunjwar is pem mo tani a'di cikika/ um gwo gom gwom 'borga/ yani twa/a/ mo be.

¹⁴Dhali ba mondin pem yin a'di ta mompal gom um mo tani um yisa ushi aha/ mo walla wak aha/ mo, hili um bu'thki aha/ mo me'da man'doyu gwo ma Arumgimis mo dhali me'da Kristhos jin ta'da Yesu mo be.

¹⁵Mane montem bum jin surki'd ki um mo be 'te/? Haali/ aha/ tana man/ o gwo gom um mo ki um mini 'taki buk aha/ em bum ka pije/ mo dhali ciyu/ uni ki aha/ mo wakki/ a'di mishu mii mo be.

¹⁶A/ki aha/ wara ka manta 'kup gi um mmo'torka/ um gwon gana/ mo?

¹⁷Uni ta malgin ki malgin gom um mo, dhali hili yisa gom 'kup miinj gana/ mo. Uni ona bwa mmomu'th um 'twa/ mo 'peni aha/ mo ki um mini 'taki ta malgin gom uni mo be.

¹⁸Haali/ gom 'kup miim 'borga/ mo tani a'di 'boro'd mmoçi gwo man' ki shem 'boro'd mo isa yempa/ mo dhali yisa ki aha/ dikina nyakki um mo 'te/.

¹⁹Ushi ucim pema, aha/ shwana bwan dho'th mo dok/ e ntaga Kristhos minu uk mo e um mo be.

²⁰Aha/ ona bwayi mmo'taki di nyakki um mo ishunsan dhali ak 'twam pem e jin torka/ gwo mo haali/ aha/ dunjurkunuwa du is mo gom um mo be.

Gwo jin Be'dkunu ka Par mo goma Haagar mo dhala Saarah mo be

²¹Tori aha/ gwo mo ma, um gun ona bwa mmo'ko mo e bwan'kwariny gwonkan jin cinu mo. A/'kona um ki cik gwonkan jin cinu mowa?

²²Haali/ me'd gwo jin 'kwarkunu mo ka: Ibrahim ta gi iya/i su/ mo, jan 'de/ ta ji gi cinjina/ mo dhali jan 'de/ ta ji ma 'bom jin di'd ki 'kus mo be.

²³Hili ya/ ma 'bom jin ta cinjina/ mo tani a'di dho'thkunu mo me'd isi gwo gom bunjwar is mo dhali ya/ 'pena 'bom jin di ki 'kus mo tani a'di e gwo jin onu is mo be.

²⁴ Dhali a'di yansan ibe'dki gwo gi 'pemena kamu/ mo. Ki up su/ gwansan ita gwo gun gamu me'd mo. Jan 'de/ 'peni Wosh Sinaa/ mo mmodho'th uci gom miiny cɨŋkina/ mo. Ayim jin ta'da Haagar mo be.

²⁵ Dhala Haagar a'di ta Wosh Sinaa/ e Pa Arabiyya mo. Ayim a'di nyaḱka'd ki Pa Urushaliim jin di'd shwane/ mo, haali/ a'di ta cɨŋkina/ jin yolu nyaḱki uci ma yim mo be.

²⁶ Dhali hili Urushaliim jin di'di momis mo tani a'di di ki 'kus mo dhala yim a'di ta'da ata'dam bana mo be.

²⁷ Haali/ me'd gwo jin 'kwarkunu mo ki:

'Kunyi bwa mo ma, ayy/ en 'de/ yin jin tana burum mo jin diki dho'th mo.

Çeyi 'twa/ mo ma dhali cuuyi mo, /e jin dina bwa ma dho'th ki shwa mo.

Haali/ ayim ma'du/ a'di ta'd gi uci ki nyanye/ mo

mmobola yim e, a'di jin ta'd ga kath mo be.

²⁸ Dhali ana iwak mo, wana e ga Is/hak mo mmota uci gi gwo jin onu is mo be.

²⁹ Hili ki me'd caan a'di jin dho'thkunu isi ki gwo gi buŋgwar is mo tani to'cki a'di bwa mo a'di jin dho'thkunu mo isi ki gwo gi Shi/in mo. Dhali a'di wakan shwane/ mo be.

³⁰ Hili Gwo ma Arumgimis kun 'kwarkunu mo o gwo kataye? O ki ura yim cɨŋkina/ ka piye/ mo dhali ya/ ma yim mo haali/ ya/ 'pena yim jin ta cɨŋkina/ jin yolu mo tani a'di midi diki gam mal mo nyaḱki ya/ ma 'bom jin di ki 'kus mo be.

³¹ Wakan iwaka, ana 'konaki ta uci gi cɨŋkina/ jin yolu mo, hili ana tana uci ma 'bom jin di ki 'kus mo be.

5

Doshi ma ki Mo jin Telu Sho'k mo e Mo jin 'Konu ki 'Kus mo

¹ Haali/ gom mo jin 'konu ki 'kus mo tani aKristhos a'di dhu ana ki 'kus mo. Gom gwo gi wakan mo tani doshi ma dhali teli sho'k mo. Dhali dhalku/ 'ba/ ki mii 'ce'd mo dok/ e mmonyak dhanḱa'b 'ba/ bu'th ki mii jin tanu cɨŋkina/ mo.

² Aha/ jin tana Buulus ona gwo yan e um mo. Wakki/ um bu'thki mo ma munyjal yis jin 'ciṯhu/ mo tani aKristhos midi mii diki mii ta gi shi/ miim 'boro'd gom um mo.

³ Aha/ baha gwo mo dok/ e eya ris 'kwani 'baar ka 'dete/ 'dete/ mo uni gun bu'thki mo ma munyjal yis jin 'ciṯhu/ mo ki a'di minu dek mo mmodhu gwoŋkan jin cinu mo ka 'bimpil mo be.

⁴ Um kun minu dhu ki mo ma kar/ e gi gwoŋkan jin cinu mo tani um minu 'ciṯ 'twa/ 'pena Kristhos mo be. Um ta'kkin mo 'peni bway ma 'the mo be.

⁵ Haali/ ki Shi/in mo tani dhali ki mongam gwo is mo tani ana çorkina çor mo gom mo ma 'teŋ kape/ gi mo ma kar/ e mo be.

⁶ Haali/ eya Kristhos jin ta'da Yesus mo walla e mo ma munyjal yis jin 'ciṯhu/ mo walla e mo ma munyjal yis jin 'konuki 'ciṯ mo tani a'di midi mii toŋ kamuwa? Hili mongam gwo is mmomiina a'di to mo ki mii gi mo/en mo be.

⁷ Um 'kokin mo mmoso ki 'bore/ mo. Kaja nonki um 'kup mo 'peni moha gwoŋ gana/ e mo?

⁸ Mii yansan jin laluwa lal sho'k mo tani a'di diki di 'peni a'di jin yuḱki um mo.

⁹ Ara cumaṯa gwa'dga/ tani a'di seki'da gana'th jin ta'da gabul ka 'bimpil mo.

¹⁰ Aha/ wukina Tapa jwa i is mo ki um mini 'koki budha yisaŋa kamu/ mmodhal jim pem mo. Dhali a'di jin to'c um bwa mo tani a'di midi mii bu'th

gwon dwall jin minu mii tor 'twa/a 'cesh gom a'di mo, ma a'di yin jin tana a'di mo.

11 Hili wakki/ aha/ iwak mo, dina mmoci gwo mo gom mo jin 'cithuwa munyjal yis mo tani atinta ito'ckunu aha/ bwa mo naskina/? E mii yan mo tani mo jin голуwa gol mo jin ta cwany'cithan dhul mo tani a'di jockunu mo be.

12 Aha/ onayi ki uni gun 'kon mmodun'kur um mii is mo mini uḥ is bunin gana/ ki tollo'k mo.

13 Haali/ um yuk'kunu mo mmo'ko ki 'kus mo iwak mo. Dhali dhalku/ ki bu'th mom bum jin 'kona um ki 'kus mo mmota shi/ embula 'borga/ mo gom bun'gwar is mo. Hili e mo/en mo tani tayi imanmii to ka rem 'kup mo ma.

14 Haali/ gwon'kan jin cinu ka 'dan'dap mo tani a'di thimkunu mo e gwon 'de/ mo, jin o gwo mo ki: /E mini en amannyak 'ca'b pini jin 'dish/e is mo me'd is pinin' gana/ mo be.

15 Wakki/ um ki shila shil ki she/ mo dhali losa los ka rem 'kup mo tani hil ki 'bore/ki um minu 'koki 'ce'd sho'k ka rem 'kup mo be.

Maman gi Shi/in mo dhali Mii jin Miinu ki Shuman Is mo

16 Hili aha/ ona gwo mo ki: Iiyi mo e Shi/in mo dhali dhalku/ ki te bwa en'dap kun o um ki bun'gwar is mo.

17 Haali/ bwa en'dap kun onki bun'gwar is mo tani a'di miinu apo/ Shi/in mo, dhali bwa jin o'dki Shi/in mo tani apo/ bun'gwar is mo, haali/ uni gwansan ita gwo kun thanyi 'twa/ ka rem 'kup mo mmonon um 'peni mii gun o um bwa moyi.

18 Hili wakki/ um shuna Shi/in bway mo tani um yisa i'kokin mo e bwan'kwariny gwon'kan jin cinu mo.

19 Dhali hili mii gi bun'gwar is mo tani uni 'kon eya tente/ ki thorony mo: mo jin miinu miinyal mo, dhali mo jin 'dapuwa 'dap e mo, dhali mii kun 'kanuwa kanthi/ mo,

20 dhali mo jin lunu tompinycon mo, dhali mii kun miinu mii ḡaari/ mo, dhali mii kun tanu 'kup ki 'kup mo, dhali mii kun biruwa bir mo, dhali mii kun tanuwa tacum bwa mo, dhali mii kun miinuwa nyor mo, dhali mii kun tanuwa ham 'kus ka ham 'kus mo, dhali mii kun ushu gwo gam me'd mo, dhali mii kun 'konu ka non she/ mo

21 dhali mii kun tanu dhapan mo dhali mii kun 'kosh ma suwa 'kosh mo, dhali mii kun waluwa wal e moḡ'kupa su mo, dhali mii gi wakansan mo. Aha/ ruma um ki gwo mo, me'd jin rumkika/ um itwa/a/ mo, ki uni gwansan kun miiki to gi wakansan mo tani mini 'koki gam mal gi Bampa/ ma Arungimis mo.

22 Hili maman gi Shi/in a'di ta mo/en mo dhali moḡ'kuny bwa mo dhali mo ma ku'th is mo dhali mombwa jin 'ku'cu ki 'kari'th mo dhali mii jin tanu ki bwan'kush mo, dhali mombwam 'borga/ mo dhali mombwa kun tanu ku isin' gana/ mo,

23 dhali mombwa kun 'thupu e ki 'thup mo dhali mombwa ma du jin 'timu/ mo. Apo/ mii gi wakan mo tani gwon'kana kamu/ jin cinu mo yisa di'da.

24 Dhali uni gwansan kun ta ku ma Kri'sthos jin ta'da Yesus mo tani uni 'koshki bun'gwar is buni mo nyakki e kun dhuna uni ki 'thir 'thir mo dhali bwa en'dap buni mo be.

25 Wakki/ ana 'kona e Shi/in mo tani dhalki ana si'da/ iina e Shi/in mo.

26 Dhalki ana nona is bana mo ki cot cot mo walla rukunya rukuny 'kup ka rem 'kup mo walla ta dhapan ka rem 'kup mo.

6

Kali To kun Diɗadiɗ I'ba/ka Rem 'Kup mo

¹ Iwaka, wakki/ wathin kamu/ bulu 'twa/a 'cesh e gwon dhaɗa kamu/ mo tani um gun ta gi to gi shi/in mo mini mii wari a'di is ka nyan'ko'd mo e shi/in jin 'thupu e ki 'thup mo. Hili 'kup, 'kupki is pini mo isi ciki/ ki /e minu pal mo gara/.

² Kali ton diɗin ka rem 'kup mo, dhali ki mii gi wakan mo tani um mini thim gwonkan ma Kristhos mo be.

³ Haali/ wakki/ jan tal 'deɗ kamu/ midu kulum gwo ibwa mo ki a'di ta a'di mo tani ki a'di diki ta toɗ kamu/ mo tani a'di he'kki isi is pitin gana/ e mo be.

⁴ Hili dhalki 'kwani 'baar ka 'dete/ 'dete/ pali miim bunin gana/ mo, dhali gwo jin di a'di a'din kamu/ ibwa mo mmokar 'ba/ ki ca mo tani midu di gom is piti a'di 'de/ mo dhali yisa eya mannyak ca' b jin 'dish a'di is mo be.

⁵ Haali/ 'kwani 'baar ka 'dete/ 'dete/ mini kal is kom mo gom tom bunin gana/ jin kala uni mo be.

⁶ Dhalki a'di jin toru gwo mo nyakka'da ris tom 'boron pwaɗ bwa mo ki a'di jin toru gwo mo.

⁷ Dhalku/ ki ta ku gi hegu e mo. Arungimis yisa ta ji gi minu mii ka maka. Haali/ ma to yin jin mina wathi/ si mo tani a'di si'da/ imina a'di i'ciɗ mo be.

⁸ Haali/ a'di jin siki to gom bunɗwar is piti mo tani a'di midu 'ciɗ to 'peni bunɗwar is jin midu pu/ mo. Dhali hili a'di jin midu si to gom Shi/in mo tani a'di midu 'ciɗ mondiki/e ki sule/ ya ye 'ba/ mo 'peni Shi/in mo be.

⁹ Dhali dhalki ana daka mii is jin wu e mo mmomii miim 'borga/ mo, haali/ ki she/ yil mo mo tani ana mina 'ciɗ to mo wakki/ ana 'kona bwa ki bit ka lungu' b mo be.

¹⁰ Dhali wakan mo tani me'd jin takina ana ki embula 'borga/ mo tani dhalki ana miina miim 'boron e 'kwani 'baar mo dhali isi kan ki jim mum mo gom uni gwansan kun 'kokin eya ta/ gi monɗam gwo is mo be.

Mo jin Daka Gwo Me'd mo jin Rumuwa Rum mo dhali Monthe Me'd mo

¹¹ Misha uma adhan toɗ gwo gun 'kwarkika/ um ki me'd pem gana/ mowa?

¹² A'di ta uni gwansan kun ona bwa ki tor eya tente/ eya por ma piɗe/ 'te/ gom bunɗwar is mo kun mini tu'c um ki um minu 'ciɗa/ munyjal yis mo, dhali ki jasi mii gi wakan mo tani uni ti, iminu 'koki to'c bwa mo gom cwany'ciɗhan dhul ma Kristhos mo be.

¹³ Haali/ isi kani uni gwansan kun bu'ɗhki mo ma munyjal yis jin 'ciɗu/ mo tani uni yisa ki is buni idhuki gwonkan jin cinuwa. Hili uni ona bwa mo ki ta gi mo ma munyjal yis jin 'ciɗu/ mo ki uni mini 'tash miinyca mo 'te/ e bunɗwar is bum mo.

¹⁴ Hili mii gi wakan midu diki thoɗhaa/ is mo mmokar 'ba/ ki ca mo isi ciki/ e cwany'ciɗhan dhul gi Tapa Yesu Kristhos bana mo. Ki a'di mo tani mony'cesh 'koshkunu jwa mo gom aha/ mo dhali aha/ gom mony'cesh mo be.

¹⁵ Haali/ walla mo ma munyjal yis jin 'ciɗu/ mo tani yisa 'dapa'dap ki toɗ kamuwa walla mo ma munyjal yis kun 'konu i e mo si'da/, hili a'di jin minu uk jin midu ta jin this mo be.

¹⁶ Monku'th is dhali momiiiii mini 'ko apo/ umi 'baar mo, um gun iikin mo e gwonkan yansan mo, apo/ um gun ta 'Kwani ma Israyiil kun ta ku ma Arungimis mo be.

¹⁷ 'Peni shwane/ mo tani dhalku/ ki dhal wathin tal 'deɗ kamu/ bway mo mmoto'c aha/ bwa mo, haali/ aha/ kalkina adu'd gi doru aha/ goma Yesu e bunɗwar is pem mo be.

¹⁸ A'the gi Tapa Yesus Kristhos bana mo midi di e shi/in bum mo, iwaḵ pem mo. Amen.

Gwo jin 'Kwar ma Buulus gom 'Kwani gi Pan EPASUS mo

Monthe Me'd mo

¹ ABuulus jin ta a'di jin karu ki she/ mo goma Kristhos jin ta'da Yesus ki bwa ma Arungimis mo be.

E uni gwansan gun dhunu ki she/ ki dhelel dhelel mo, uni si'da/ kun ta ku isin gana/ eya Kristhos jin ta'da Yesus mo be.

² A'the e um mo dhali monku'th is 'peni Arungimis jin ta'da Babam bana mo dhali Tapa Yesus Kristhos mo be.

Mom'bor Mii gi Shi/in eya Kristhos mo

³ Mom'bor mii midi di mo goma Arungimis mo dhali Ababa gi Tapa Yesus Kristhos bana mo, a'di jin 'borki ana mii mo eya Kristhos ka ris mii kun 'boruwa 'bor mii mo e to gi shi/in mo e mo kun 'kon e momis mo be.

⁴ Isi kani me'd jin kwanykina a'di ana mo e a'di mo ntwa/a/ ki mony'cesh yan 'konuki ka'b mo, ki ana mina ta ku gun kogu mo dhali ta ku gun mini ta kun dar gi thalkin ibwambori a'di mo be.

⁵ A'di 'kawurki ana mo e mo/en mo mmota iya/m piti mo eya Yesus Kristhos mo isi ki gwon 'kup bwam 'borgam piti mo

⁶ Gom moman ma 'the gi monycam piti mo a'di jin cikina a'di ana ki me'd mo e A'di jin Enu mo be.

⁷ E a'di mo tani ana tana gi mo jin wanuwa wan 'ba/ ka bas piti mo dhali amure/ gi gwon dhin bana kun dhalkunu ana 'pen mo, isi ka 'them piti jin tana a'di pa ki pa mo

⁸ a'di jin karkina a'di mmogus apo/ ana mo be.

⁹ Haali/ a'di torki ana a'di i e eya tente/ mo eya ris moyuk mo dhali monyith gwo jin cinu mo ki jim bag mo jin ta bwam piti mo, isi ki gwon 'kup bwam 'borgam piti mo, a'di jin karkina a'di eya Kristhos mo be

¹⁰ me'd gwo jin 'kawurkina a'di mo gom mo jin minu thim mo, mmogama ris to 'baar mo me'd e a'di mo, to gun 'kon e momis mo dhali to gun 'kon e mony'cesh mo be.

¹¹ E a'di mo isi ki gwon 'kup bwam 'borgam piti mo a'di jin thimki'da ris to 'baar mo isi ki bwan gwom piti jin 'kawurkina a'di mo be.

¹² Ana kun takina gi mo ma 'ten kape/ eya Kristhos ntwa/a/ mo tani ana 'kawurkunu mo dhali dhu 'pen ka piye/ mo mmo'ko mo gom montak mo gom monycam piti mo be.

¹³ E a'di mo um si'da/ kun cikki gwon gana/ mo dhali gwom 'borga/ mo gom bway gi mowoth bum mo dhali gam gwo is mo e a'di mo tani um 'kokunu mo mmo'dap 'twa/ ki a'di jin okunu is mo a'di jin ta Shi/in Dheleladhelel mo be.

¹⁴ A'di jin ta to jin wothu/ 'twa/ mo gom mal bana mo ntagi ana mina bu'th a'di mo e montak gi monycam piti mo be.

Mo jin 'Thonuwa 'Tho mo gom Moyuk mo dhali Monyith To mo

¹⁵ Gom 'kup gwo yan mo tani haali/ aha/ cikina gwo mo gom mongam gwo is bum mo e Tapa Yesus mo dhali mo/en bum 'kup ki uni kun dhunu ki she/ ki dhelel dhelel mo tani

¹⁶ aha/ yisa daka mo mmoçi mo jin 'boruwa 'bor bwa i is mo gom um mo mmoka um e mo e mon'thom pem mo

17 ka Arungimis jin ta a'di gom Tapa Yesus Kristhos bana mo dhali Ababa gi Monyca mo midi ci um shi/in gi moyuk mo dhali gwo jin 'ceenu e monyith jin nyitha um a'di mo,

18 mmotana um gi e ma du kun 'twakki mo ki 'twak jin shi/i'd mo, ki um mini mish mo ma 'teŋ kape/ yan mo jin yukkina a'di um icine/ mo dhali mom piti jin tana a'di pa ki pa mo gi mal gi monycam piti e uni kun dhunu ki she/ ki dhelel dhelel mo,

19 dhali mom'bi'th piti yan jin ekki'd ki ek jin shi/i'd jin molu bar mo e ana kun gama gwo is mo isi me'd miim piti jin miina a'di ka dhan 'bi'th jin ta'da dem dem mo,

20 a'di jin thimkina a'di eya Kristhos mo me'd jin 'de'kkina a'di a'di mo 'peni mowu mo dhali kar a'di mmoça'b ki me'da bim poros piti mo e mo kun 'kon e momis mo be,

21 isi mis gana/ mo apowa ris gwonkan kun cinu ki 'bi'th mo dhali moshirr mo dhali mom'bi'th mo dhali mo jin tanu tapa mo, dhali apowa ris gwayi 'baar mo kun yerkuu mo, yisa jasi e she/ yil yana, hili si'da/ e yil jin midi pu'du/ mo be.

22 Dhali a'di dhuki'da ris to 'baar mo e bwan'kwariny sho'k piti mo dhali a'di karki a'di ki a'di jin ta'da 'kan'kup apowa ris to 'baar mo goma kaniisa mo,

23 a'di jin ta bungwar is piti mo, gom mon'tu'd piti jin 'tu'dkina a'di a'tu'di 'baar mo be.

2

'Peni Mowu Ntaji Mondiki/e mo

1 Dhali a'di dhuki um ki e mo, ki um kun 'kokin mo mmowu mo gom gwon dhan mo dhali miinthus mo,

2 e uni kun iikina um 'thissa/ mo mmobathkina um ya gi mony'cesh yan mo dhali mmobathkina um miin tapa gi mom'bi'th kun pwanu/ e mis mo, jin ta shi/in caan jin di'd mmo/um mo e iya/ gi iman/ush gwo ha e mo be.

3 Ibwaman uni gwansan mo tani ana 'baar mo 'kokina mo ntwa/a/ mo e em bana mo kun dhuna ana ki 'thir 'thir mo gom bungwar is bana mo, mmobath bwa en'dap mo gom bungwar is mo dhali bwa mo, dhali wakan ana 'kokina mo ki buyem pa mmota uci ma nyor mo me'd 'kwanin tiya kun ta 'kwani en'thi/ mo be.

4 Hili Arungimis a'di jin ta pa ki pa e momiimii mo, 'peni dhan mo/en jin enkina a'di ana mo tani

5 isi kani ki ana 'kokina mo mmowu mo e gwon dhan bana mo tani a'di ki dhu ana mo mmo'ko ki e mo mmontal 'de/ mo nyakka Kristhos mo (Ka 'the mo tani um wothkunu mo be),

6 dhali a'di ki cu ana mis mo nyakki a'di mo dhali a'di ki dhu ana mmonyak 'ko ki a'di mo e mo kun 'kon e momis mo eya Kristhos jin ta'da Yesus mo be

7 ki she/ yil gunn kun mini pu'du/ mo tani a'di midi tor dhan pam piti jin tana a'di ka 'them piti jin molu bar mo e bwan'kush piti mo 'kup ki ana mo eya Kristhos jin ta'da Yesus mo be.

8 Haali/ ka 'the mo tani um wothkunu mo ki mongam gwo is mo be. Dhali yansan ta mii jin miina um ki is bum mo yisa. A'di ta to jin cin ma Arungimis ki me'd mo be.

9 Yisa, haali/ gom to jin miinu mowa, isi ciki/ jin mina wathin 'derj kamu/ diki kar 'ba/ ki ca mo.

10 Haali/ ana tana kuma tu'c piti mo kun ukkunu mo eya Kristhos jin ta'da Yesus mo gom mii ma tuca 'borga/ mo, uni gun thosonkin ma Arungimis ntwa/a/ mo ki ana mina 'taki ii e uni mo be.

Mo jin Talu Isa 'De/ mo eya Kristhos mo

¹¹ Wakan kayi gwo e mo ki um 'thissa/ ta 'kwani kun 'koki ta 'Kwani Yahuuda/ e bungwar is mo kun yukunu gway ki ku gi 'kon ka munyal yis i e mo ki uni gun yukunu ki uni gun 'cithuwa munyal yis mo, a'di jin miikunu e bungwar is ki me'd gi 'kwani mo be.

¹² Kayi gwo e mo ki um 'thissa/ me'dyin um kwa/kunu bwa mo 'pena Kristhos mo, dhali um ta ku gi 'kon ka pije/ 'peni 'penkuman bampa/ ma Israyiil mo dhali um ta 'kwani kun moli gwo jin gamu me'd mo jin onu is mo. Um daran gi mo ma 'tej kape/ mo dhali um daran ga Arungimis gana/ mo e mony' cesh mo be.

¹³ Hili shwane/ eya Kristhos jin ta'da Yesus mo tani um kun 'thissa/ si'dkin mo kagahara mo tani um suskunu mo mmo'dish mii is mo ka bas ma Kristhos mo be.

¹⁴ Haali/ a'di ta monku'th is bana mo, a'di jin dhuki ana mmonta' de/ mo dhali jin 'tukki mo ma gon jin kwa/u bwa mo 'peni mo jin tanu 'kup mo

¹⁵ mmopuukina a'di e bungwar is piti mo gwonkan jin cinu mo dhali jin 'kwarkunu mo, dhali jin onu mo ki a'di midi 'taki uka uk e is pitiŋ gana/ mo wathin tal 'de/ jin ta jin this mo e mo gi unin su/ mo, wakan a'di karki mo ma ku'th is mo.

¹⁶ Dhali wakan si'da/ a'di midi 'taki mii mii jin gwamkunuwa gwam mo gom am mo dhali um mo eya Arungimis mo e bungwar isa 'de/ mo ki cwany'cithan dhul mo. Wakan a'di ki dil mo jin tanu 'kup sho'k mo ntagi 'pemen mo be.

¹⁷ Dhali a'di pu'dki'd mo dhali ci gwo gom monku'th is e um mo, um gun 'thissa/ si'dkin mo ki si'd thus mo dhali monku'th is e uni gwansan kun 'dishkina 'dish is mo be.

¹⁸ Haali/ e a'di mo tani aman dhali um takina gi bway mo e Shi/ina 'de/ mo eya Baba mo be.

¹⁹ Wakan um dok/ e yisa 'kokin mo mmota 'kwani kun 'kon ka pije/ mo walla 'kwani kun 'kon ki 'kus mo 'peni bampa/ mo, hili um ta ku gi 'penkuman bampa/ mo nyaŋki uni kun dhunu ki she/ ki dhelel dhelel mo dhali um tal ma waka 'de/ mo eya ta/ ma Arungimis mo

²⁰ jin nyan'kunu mo apo/ mo jin ka'bkunu mo jin ta uni kun dhunu ki she/ mo dhali iman'ci gwo ma Arungimis kadhamo/ mo. AKristhos jin ta'da Yesus mo, a'di ki is pitiŋ gana/ a'di ta'da 'kan'kup gi dhan wosh gi 'penabi mo be.

²¹ E a'di mo tani aris mo 'baar mo kun re'du mo tani gam me'd imonta' de/ mo dhali cu mo mmota gu'b gi mondheleladhelel e Tapa mo be.

²² E a'di mo tani um si'da/ inyan'kunu mo e a'di jin ta monyca'b ma Arungimis e Shi/in mo be.

3

Mii jin Miina 'Kwani To mo gom ku gi 'Koki Ta 'Kwani Yahuuda/ mo

¹ Gom 'kup mii yansan mo aha/ jin tana aBuulus mo, aha/ jin tana habuus goma Kristhos jin ta'da Yesus mo gom gway bum mo um kun 'koki ta 'Kwani Yahuuda/ mo.

² Toshka/ ki um cik gwo mo gom mo jin dhunuwa 'the ma Arungimis mo a'di jin cikunu aha/ mo gom um mo,

³ mmo'orkunu aha/ gwo mo jin cinu ki jim bag mo mmomish mo ki gwo jin 'ceenu mo, me'd gwo jin 'kwarkika/ ki e 'pe'pere/ mo.

⁴ Ki um mini den yansan e mo tani um mini nyith a'di jin nyithka/ mo e gwo ma Kristhos jin cinu ki jim bag mo,

⁵ a'di jin dinuki tor iya/ gi 'kwanin tiya ka nyakum yil buni mo me'd jin torkunu a'di mo shwane/ e unim piti kun dhunu ki she/ ki jin kogu mo dhali imançi gwo ma Arungimis kadhamo/ mo ki Shi/in mo.

⁶ Ba kani a'di ita gwo gom 'kwani kun 'koki ta 'Kwani Yahuuda/ mo mmonyak mal mo, mmota waka 'de/ mo e bungwar is mo dhali mmonyak gwo pwaç bwa jin onu is eya Kristhos jin ta'da Yesus ki gwom 'borga/ mo be.

⁷ Gom gwom 'borga/ yan mo tani aha/ karu ka manmii to mo isi ki to jin cin ma Arungimis ki me'd ka 'the mo, a'di jin cikunu aha/ mo ki mo/um ki mom'bi'th piti mo be.

⁸ E aha/ mo tani ba aha/ itana a'di jin pisapis mo eya ris uni kun dhunu ki she/ mo tani a'the yansan cikunu aha/ mo mmoci gwo e 'kwani kun 'koki ta 'Kwani Yahuuda/ mo, mo jin tan ma Kristhos pa ki pa mo jin molu den e mo

⁹ dhali mmodhala ris 'kwani 'baar mo mmopar e mo a'di yan jin ti'thkunu mo ki jim bag mo mmoba'kkunu a'di ki yil ka ris mo eya Arungimis jin ukki'da ris to 'baar mo be.

¹⁰ Dhali wakan mo ka kaniisa mo tani 'ban ka ris gi moyuk ma Arungimis mo minu 'taki tor mo e mom'bi'th kun molu gadhir mo dhali mom'bi'th mo kun 'kon e mo kun 'kon e momis mo be.

¹¹ A'di yansan ta isi 'kup gwo ibwanj gwom piti ki mo jin ta ji ma sule/ mo a'di jin torkina a'di 'twa/a 'cesh mo eya Kristhos jin ta'da Yesus Tapam bana mo be.

¹² E a'di mo tani ana dara gi monyju/ mo dhali wu a'di jwa i is mo gom bway yan e mongam gwo is bana e a'di mo be.

¹³ Wakan aha/ yukkina um mo mmodhalka du ki biç ka lungu'b mo apo/ is pem jin 'koshki aha/ ka nyor mo gom um mo, a'di jin ta montak bum mo be.

Momish Mo/en ma Kristhos mo

¹⁴ Gom 'kup mii yansan mo tani aha/ bitkina ki jin 'kupa'dupuni bwambor ma Baba mo.

¹⁵ 'Peni a'di mo tani arisa wak kun 'kon e momis mo dhali kun 'kon e mony'cesh mo tani yer kunu gway mo,

¹⁶ ki isi pam piti jin tana a'di mo gom monycam piti mo tani a'di midi 'taki ci um mom'bi'th is ki dem dem ki Shi/in piti jin di isi bwaman wathi/ mo.

¹⁷ Dhali ka Kristhos midi 'taki di eya dum bum mo ki mongam gwo is mo dhali ki um mmotakina um ka birman mo dhali mo jin ka'bu/ mo e mo/en mo

¹⁸ mini 'taki ta gi mom'bi'th mo mmobu'th nyakka ris uni 'baar mo kun dhunu ki she/ ki dhelel dhelel mo a'di jin ta mombeega/ mo dhali mo kun tana luç mo dhali monturga/ mo dhali mon'kulga/ mo

¹⁹ dhali mmomish mo/en ma Kristhos mo, a'di jin bolki mo jin nyithuwa nyith e mo ki um minu 'taki 'tu'd mo ka ris mo ma Arungimis jin 'tu'da a'di a'tu'd mo be.

²⁰ Dhali e a'di mo, a'di jin ta gi mom'bi'th mo mmo/um mo e bwam ana mo, a'di jin mishki to mii mo ki nyanye/ mmobola ris to 'baar mo e kun dotkina ana mo walla kun toshkina ana mo,

²¹ e a'di mo tani monyca midi di mo eya kaniisa mo dhali eya Kristhos jin ta'da Yesus mo ntaga risa nyakum yil gi 'kwani mo gom mii ki sule/ mo dhali ki sule/ mo. Amen.

4

Mo jin Gamu Gwo Me'd ki Shi/in mo

¹ Wakan aha/ jin tana habuus gom Tapa mo yukkina um mo mmoshuwa shum bway ki mii kun ha me'd mo ka yuk jin yukunu um mo be

² ka ris mii kun dhunu is ki gwa'd mo dhali ki mii ma 'thup e mo, ki bwa jin 'kuçu ki 'kari'th mo, mmothonkina uma thon me'di 'ko'd ka rem 'kup mo e mo/en mo

³ mmoganankina um 'ba/ mo mmohal mo jin gamu gwo me'd e Shi/in mo eya deķ jin deķu/ gi mo ma ku'th is mo.

⁴ Buņgwar isi ƚal 'de/ mo dhali Shi/ini ƚal 'de/ mo jasi me'd jin 'kokunu mo mmoyuķ um mo e mo ma 'tej kapen 'de/ mo, a'di jin ta'da yuķ bum jin yuķkunu mo,

⁵ ki Tapan ƚal 'de/ mo dhali moņgam gwo isa 'de/ mo dhali moņtal 'de/ jin cuçuwa cuç mo,

⁶ ka Arumgimis 'de/ mo dhali Ababa gi ana 'baar mo, a'di jin diki'da powa ris mo 'baar mo dhali eya ris to 'baar mo dhali e bwaman ana 'baar mo.

⁷ Hili a'the çikunu ana ka 'dețe/ 'dețe/ mo isi ki mombar to jin çin ma Kristhos ki me'd mo.

⁸ Wakan a'di okunu gwo mo ki:
Ki a'di shinki bway momis mo tani a'di suski'da risa buhany uni gun bu'thkunu mo

dhali a'di çiki to kun cinu ki me'd mo e 'kwani mo.

⁹ (E gwo jin onu mo ki: A'di shinki bway momis mo, a'di ta 'pemen gwo gi wakata moye? Jasi ki a'di si'da/ thulki'd mo ka luņgu'b isi moņ'kulga/ gi mony'cesh mo.

¹⁰ A'di jin thulki'd mo tani ta a'di si'da/ jin shinki bway momis mo apowa ris mo gun si'dasi'd mo ki a'di mididi 'taki 'tu'da ris to 'baar mo.)

¹¹ Dhali tom piti kun çina a'di ki me'd mo annihe/ be. Ki kun tiya mini 'taki ta uni kun dhunu ki she/ mo dhali kun tiya mmota imançi gwo ma Arumgimis jin onu is mo dhali kun tiya mmota imançi gwom 'borga/ mo dhali kun tiya mmota imančila hil eya kaniisa mo dhali kun tiya mmota imançor gwo mo

¹² gom to gun 'tumu 'pen mo gom 'kwani kun dhunu ki she/ ki dhelel dhelel mo goma tu'c jin minu mii mo, dhali goma nyar jin minu nyar buņgwar is ma Kristhos mo,

¹³ ntagi ana 'baar mo mina ku'th is mo e mo jin gamu is me'd mo gi moņgam gwo is mo dhali monyith Ya/ ma Arumgimis mo eya 'bap jin 'bapu/ mo ntagi mom bar gi tur piti jin 'tu'dkunuwa Kristhos mo.

¹⁴ Wakan ki ana mina 'taki 'koki 'ko mo mmota uçi naskina/ mo ki ana minu 'koki 'dash mo dhali wuƚul mo dhali kał mo ka ris 'tham gi gwon thus ki eņ 'kwani kun korakor mo ka maķ buni kun takina uni mo eya he'k e jin he'kkina uni ka gany mo.

¹⁵ Dhali mii gwan e i is mo mmotor gwon gana/ e mo/en mo ki ana mina mii ca mo eya ris 'twançal kuku/ mo e a'di mo, a'di jin ta'da 'kan'kup mo, a'di jin ta'da Kristhos mo be.

¹⁶ 'Peni a'di mo tani buņgwar ka 'bimpil gamki is mo dhali cu'th 'kupi moņtal 'de/ mo ka ris gwocor mo, uni kun thičkina thiç gom a'di mo, ka ris yilsaņ gi buņgwar is ka 'dețe/ 'dețe/ mo 'kon mo mmomiya tu'c ki 'dantar mo mmoca buņgwar is mo dhali mmonyana nyar ki is piti e mo/en mo be.

Mondiki/en This eya Kristhos mo

¹⁷ Shwane/ aha/ karkina gwom pem mo dhali bah gwom pem mo e Tapa mo ki um mini mii 'koki 'ko mo me'd jin 'kona 'kwani kun 'koki ta 'Kwani Yahuuda/ mo e mii ma dum buni gun 'kona uni ki pe'th mo.

¹⁸ Uni tan ma dum buni a'tum ka 'tum mo mmo'ko ki dar gi momish gwo 'ban mo, mmo'ko ka pije/ 'peni mondiki/e ma Arumgimis mo haali/ gom miim pus buni kun 'kokin e uni mo goma dum buni gun 'bi'thkin ki 'bi'th mo.

19 Uni warkin ki enthus mo dhali uni çiki is buninɔ gana/ mo e mii kun 'kanuwa kanthi/ mo, mmopur bwa mo mmobotka ris mii gun 'dapu/ e ki she/ ki she/ mo be.

20 Wakan um 'koki da/ara Kristhos mo be.

21 Toshka/ ki um cik gwo gom a'di mo dhali ki um torkunu gwo mo gom a'di mo me'd gwonɔ gana/ jin di'd eya Yesus mo.

22 Dhuyi aris miin dhamom bum 'pen ka pije/ mo, uni gun cila miim bum kun miina um kadhamo/ mo dhali kun pu/kin mo e mo ma he'k e ki e kun 'dapu/ mo

23 dhali tayi this mo e shi/in gi bwam bum mo

24 dhali hithi miin this mo, a'di jin ukkunu mo mmowa e ka Arumgimis e mo ma kar/enɔ gana/ mo dhali monkogu mo be.

25 Wakan dhalki ana dhuna ris gwon thus 'pen ka pije/ mo, dhali dhalka ris 'kwani 'baar mo ka 'dete/ 'dete/ o gwonɔ gana/ e uni gun nyaka uni 'ko mo haali/ ana tana to isa 'de/ ka rem 'kup mo be.

26 Ka nyor di'd mo tani hili dhalku/ miinthus ki mii mo. Dhalku/ ki dhala tente/ iya jis mo ka nyor buma du mo.

27 Dhali dhalku/ embula 'borga/ ki ci mo gom tapa ma ruma 'cesh mo.

28 Dhalku/ ki dhal a'din 'di/ bway mo mmodi mo mmokwal to mo, hili dhalki a'di dhal mii e i is mo mmomiya tu'c mo, mmomiya tu'c ki isi miim pa ki me'd piti mo, wakan ki a'di mididi 'taki mish to ci mo gom uni gwansan kun mini mii ta gi to mo.

29 Dhalku/ ki dhal gwon thus bway mo mmopu'du/ 'peni 'twam bum mo, hili jasi a'di jin 'boro'd gom gwo jin yedhuwa ye'th sho'k mo, a'di jin mididi ha me'd ki embul yan mo ki a'di mididi 'taki ciya 'the ki uni gwansan kun cikki gwo mo be.

30 Dhali dhalku/ ki jwakaɔ Shi/in Dheleladhelel ma Arumgimis mo e a'di jin 'dapkunu um 'twa/ mo goma tee gi wanuwa wan 'ba/ mo be.

31 Dhalka ris mii kun ka/aka/ 'pen mo dhala nyor jin dekki'da deɔ mo dhala nyor jin miinu mo dhali cuuwa/ jin 'theru/ mo dhali mo ma thu'th 'pen jin thudhu mo mmodhu 'pen ka pije/ mo 'peni um mo nyaɔka ris mii kun dupa dupi e mo,

32 dhali tayi gi bwanɔkush ka rem 'kup mo ka du kun 'ka'da'ka'd mo mmodhala mure/ gi miinthus 'pen ka rem 'kup mo me'd mii jin dhalkin ma Arumgimis uma mure/ miinthus bum 'pen mo eya Kristhos mo be.

5

Iyi Me'd Uci gi Monkush mo

1 Wakan tayi imanthoka Arumgimis mii mo me'd uci gun enu mo be.

2 Dhali iyyi e mo/en mo me'da Kristhos enki ana mo dhali ci is pitiɔ gana/ mo gom ana mo mmota to jin kuyakuy mo jin cinu mo dhali jin 'cithu/ 'kus mo goma Arumgimis mo.

3 Hili mo jin miinu miinyɔal mo dhala ris mii kun ta en'dap mo walla mo jin tanuwa 'thothum bwa mo minu 'koki mii yer gway mo isi bwaman um kani me'd jin hana mii me'd mo e bwaman uni kun dhunu ki she/ ki dhelel dhelel mo.

4 Dhalku/ ki dhal miin kamu/ jin nyo/anyo/ bway mo mmodi mo, walla gwom pus jin onu mo walla miin salkin mo, uni gun 'koki ha me'd mo. Hili mmodhal mii gwansan e i is mo mmoçi mo jin 'boruwa 'bor bwa i is mo.

5 Mishi ki 'bore/ gom gwo yan mo ma. Wathin 'deɔ kamu/ jin mii miinyɔal jin haku 'pen ceɔ gwas mo walla jin 'dapa'da 'dap e mo walla jan 'deɔ kamu/

jin ta'da 'thothum bwa mo (a'di jin ta mii jin lunu to mo) midi diki gam ari mal e Bampa/ ma Kristhos mo dhali Arungimis mo be.

⁶ Dhalku/ ki dhal wathin 'dej kamu/ bway mo mmohe'k um e mo ki gwo kun 'ko bwa 'te/ mo haali/ gom to gi wakansan mo tani a'di ipu'dkin ma nyor ma Arungimis apo/ iya/ gi uni gun ush gwo ha e mo.

⁷ Wakan dhalku/ ki ce e ki uni mo

⁸ haali/ 'thissa/ um 'kokin mo e mondhurumi'd mo, hili shwane/ um ta ku gi monkush e Tapa mo. Iiyi um mo me'd uci gi monkush mo

⁹ (haali/ maman 'peni monkush mo a'di gamkunu mo eya ris miim 'borga/ mo dhali mii kun tana kar/e mo dhali mii gi gwoj gana/ mo).

¹⁰ Dhali pali mii mo mmoda/ar a'di jin midi 'bor Tapa bwa mo.

¹¹ Dhalku/ mii ki nyak mii ki mondhurumi'd mo jin moli maman dho'th mo, hili dhali mii e i is mo mmodhu uni eya tente/ mo.

¹² Haali/ a'di ta mii jin 'thenu is mo isi kani mmo/o gwo gom to gwansan kun miina uni ka kwal is mo.

¹³ Hili wakki/ ton kamu/ tal 'de/ toru eya tente/ ki monkush mo tani a'di wara'd ki to jin mishu mo haali/ ton 'dej kamu/ jin wara'd ki to jin mishu mo tani a'di ta monkush mo be.

¹⁴ Wakan a'di okunu gwo mo ki:

Meri is mo, ayy /e jin ishki e mo, dhali cuyi mis mo 'peni mowu mo dhala Kristhos midi ci /e monkush mo be.

¹⁵ Hili ki thoson mo gom ii jin mina umi ii mo, yisa me'd 'kwani kun dar gi moyuk mo, hili me'd 'kwani kun ta gi moyuk mo,

¹⁶ mmowar mo is mo haala tee ta thus ki thus mo be.

¹⁷ Wakan dhalku/ ki ta pus mo, hili mishi gwo 'ban mo gom bwa gi Tapa jin wa cikise/ mo be.

¹⁸ Dhali dhalku/ ki ta uni kun 'kosh ma su mo, gom mii ma dhor piti mo. Hili 'tu'di mo ki Shi/in mo

¹⁹ mmotora tor ka rem 'kup mo e gway kun yuku mo mmoka mo jin miinuwa mii e mo dhali e gway jin manuwa manj mo dhali e gway jin yuku mo gom to gi shi/in mo mmoyuk gway mo dhali mmomii ko 'pena dum bumi 'baar mo gom Tapa mo,

²⁰ isa yempa/ mo dhali goma ris to 'baar mo mmoçi mo jin 'boruwa 'bor bwa i is mo ki gway gi Tapam bana ka Yesus Kristhos mo eya Arungimis jin ta'da Baba mo be.

Ikath dhali I/ash mo

²¹ 'Dapi ki me'd ka rem 'kup mo ki monko/ ma Kristhos mo.

²² Up, 'dapi ki me'd ki gwo gi ikathim bum mo me'd mii jin miina um e Tapa mo be.

²³ Haali/ wathin gwath a'di ta'da 'kan'kup gom ash mo me'da Kristhos mnotana a'di a'kan'kup goma kaniisa mo, a'di jin ta bungwar is piti mo dhali mnotana a'di a'di ki is piti Amanwoth a'di mo be.

²⁴ Me'd jin 'dap ma kaniisa ki me'd ka Kristhos mo tani wakan dhalka ris up si'da/ 'dapan ki me'd ka ris to gi ikathim buni mo.

²⁵ Kwanij gwatha, eni up bum mo ma me'da Kristhos mmo/enkina a'diya kaniisa mo dhali ci is pitin gana/ mo goma yim mo

²⁶ ki a'di midi dhagama yim mo ki mo jin dhelelkina a'di ayim mo ki gwo mo me'd mo jin lamu ki yi'de/ mo

²⁷ ka kaniisa minu kari bwambori a'di mo ki ra/ ra/ mo ki dar gi monyo/o'd mo walla mo jin dudupa dudup mo walla ma to gi wakan mo, ka yim midi dheleladhelel mo dhali dar gi monthalkin mo.

²⁸ Isi kani gwaṭh si'da/ mini mii en up buni mo me'd is buninɔ gana/ mo. A'di jin eni ashim piti mo tani eni is pitiɔ gana/ mo be.

²⁹ Haali/ wathiɔ kamu/ yisa di'da jin shi/i buɔɔgwar is piti i e mo, hili a'di ki thip a'di mo dhali ɲa/ a'di mo me'd mii jin miikin ma Kristhos goma kaniisa mo.

³⁰ haali/ ana tana tom buɔɔgwar is piti mo be.

³¹ Haali/ gom 'kup gwo gi wakan mo tani wathi/ mididi mii kwa/ bwa mo 'peni com mo dhali kum mo dhali gam is ki ashim piti mo dhali uni su/ mo tani mini tal 'de/ mo be.

³² Gwo yansan ta dhan gwo jin bagu mo dhali aha/ butha 'pemen yan kan mo mmotana a'diya Kristhos mo dhala kaniisa mo be.

³³ Bahili dhalka ris umi 'baar ka 'dete/ 'dete/ mo eni up bum mo me'd is bum gana/ mo, dhali dhalki up si'da/ hilin ki 'bore/ mo ki uni mini tak ikathim buni mo be.

6

Gwo jin Hanu E mo dhali Mo/en mo

¹ Uciya, hayi gwo gi ibabam bum e mo dhali ikwan mo e Tapa mo, haali/ a'di yansan ta miim 'boro'd mo be.

² Taɔi ibabam bum mo dhali ikwan mo (Gwo yansan ta gwoɔkan jin 'kwarkunu mo jin ta jin tɔwa/a/ mo jin ta gi gwo jin onu is mo.),

³ ki a'di mididi 'taki 'bor mo gom um mo dhali ki um mini 'taki 'ko ki 'kom 'pempaɔ gana/ e mony'cesh mo.

⁴ Ibaba, dhalku/ ki rukuny uci ka nyor mo, hili thipi uni mo e mo jin 'dapuwa bora 'cesh mo dhali e mo jin yedhuwa ye'th sho'k ki gwon Tapa mo.

⁵ Um ciɔkina/ gun yolu mo, hayi gwo gi uni gwansan e mo kun ta tapam bum e mony'cesh mo ki monko/ is mo dhali ki mondee mo ka dun tal 'de/ mo me'd mii jin miina um goma Kristhos mo,

⁶ yisa e bway gi jis/e jin miina 'kwani to mo, mmo'bor 'kwani bwa mo 'te/ yisa, hili me'd uni kun ta ciɔkina/ kun mii to goma Kristhos mo mmomii bwa ma Arumgimis 'pena du mo,

⁷ mmomii to ki bwaɔ gana/ mo me'd mii jin miina um gom Tapa mo, dhali yisa gom 'kwaniya,

⁸ mmomisha um ki ma to gunn kun miina kun tiya ki 'bore/ mo tani a'di mididi bu'th to jin nyaka'd kan dok/e mo 'peni Tapa mo wakki/ a'di ta ciɔkina/ jin yolu mo walla ta a'di jin di ki 'kus mo be.

⁹ Itapa, miyi to kun nyakan gom uni mo ma, dhali 'doyi bwa ka 'kany'cesh mo 'peni mo jin shwanuwa 'cesh ki sho'k mo, mmomisha um ki a'di jin ta Tapam buni dhali Tapam bum mo tani a'di di'd e momis mo, dhali mo jin miinuwa mii ka gwar 'de/ yisa di'da e a'di mo be.

Agongoro/ ma Arumgimis ka 'Bimpil mo

¹⁰ Kwality 'te/ be. 'Bithi um is mo e Tapa mo dhali e mom'bi'th ma dem dem piti mo.

¹¹ Hithi agongoro/ ma Arumgimis ka 'bimpil mo ki um mini mish dosh mo apowa 'kanyco/ gi tapa ma ruma 'cesh mo.

¹² Haali/ ana 'konaki 'thir mo apo/ buɔɔgwar is mo dhala bas mo, hili apo/ mom'bi'th kun molu gadhir mo dhali apo/ mom'bi'th mo, dhali apo/ itapa kun ji mony'cesh yan mo jin ta mondhurumi'd mo shwane, dhali apowa risa buhany shi/in thus kun 'koki ta gi buɔɔgwar is ga 'cesh mo e mo kun 'kon e momis mo.

¹³ Wakan budhi agongoro/ ma Arumgimis ka 'bimpil mo ki um mini mish dosh mo mmoroç mo ka tee jin ta thus mo dhali mmothimkina um a'di mo tani mmodosh mo be.

¹⁴ Doshi um wakan mo mmodek waçkan gi gwoj gana/ mo e empa'd bum mo dhali hithi araçpa/ gi mii ma kar/e mo

¹⁵ dhali mmo'kamu'thkina um sho'k bum ki mo jin thosonkunu mo ki gwom 'borga/ mo gi mo ma ku'th is mo be.

¹⁶ Apowa ris mii gwansani 'baar mo tani budhi agongoro/ me'd bum mo, a'di jin ta mongam gwo is mo, haali/ e a'di mo tani um mini mish usa ris shemen toj kan kun 'bathan kun shina a'dinthus 'de/ yin mo.

¹⁷ Dhali budhi toj'kup ki bway mowoth mo dhali gandala turga/ gi Shi/in mo, a'di jin ta gwo ma Arumgimis mo be.

¹⁸ Thoyi isa yempa/ e Shi/in ka risa 'tho mo dhali ka di'b is jin di'bu/ mo, ki um mini 'dim 'kup mo ki montim mo mo mmodi'ba di'b is goma ris uni 'baar mo kun dhunu ki she/ ki dhelel dhelel mo be.

¹⁹ Dhali gom aha/ si'da/ ki mo jin bahkunu gwo mo minu 'taki ci aha/ mo e 'twam pem jin miga/ cee mo ki dar gi monyju/ mo mmobah gwo jin cinu ki jim bag mo, a'di jin ta gwom 'borga/ mo.

²⁰ Haali/ aha/ tana amanya eya jindhiir mo gom a'di mo jin miga/ 'taki bah a'di eya tente/ ki dar gi monyju/ mo me'd jin miga/ ka 'taki tor gwo mo ba/.

Kwalany Te/ Ba. Monthe Me'd mo

²¹ Dhali ki um si'da/ mini 'taki mish mo mo gom mondim pem mo dhali mii jin miga/ mo tani Tikikus, a'di jin ta'da kam bana jin enu mo dhali a'di jin ta isin gana/ mo e miin to gi Tapa mo tani midi tor um gwo mo goma ris to 'baar mo be.

²² Aha/ hashkina a'di i um mo gom 'kup gwom bwam 'boro'd yan mo, ki um mini 'taki mish mo mo ki aman anann be, dhali ki a'di midi 'taki 'bitha dum bum is mo be.

²³ Monku'th is midi di mo gom iwak mo dhali mo/en nyakki mongam gwo is mo 'peni Arumgimis jin ta'da Baba mo dhali Tapa Yesus Kristhos mo be.

²⁴ A'the midi di mo gom umi 'baar mo, um gun enki Tapa Yesus Kristhos bana mo ki mo/en jin midi diki wuwa mashira/ mo be.

Gwo jin 'Kwar ma Buulus gom 'Kwani gi Pam PILIBBI mo

Monthe Me'd

¹ Aбуulus dhala Timuthawuus kun ta cinjina/ goma Kristhos jin ta'da Yesus mo.

E uni 'baar mo kun dhunu mo ki she/ ki dhelel dhelel eya Kristhos jin ta'da Yesus mo, e uni gun 'kon mo e Pam Pilibbi nyakki 'kwaniḡ gwanyaka/ ma kaniisa dhali uni gun cila to hil mo.

² A'the e um mo dhali monku'th is 'peni Arumgimis jin ta'da Babam bana dhali Tapa Yesus Kristhos mo.

Mon'tho ma Buulus gom 'Kwani gi Pam Pilibbi kun Ta Imangam Gwo Is mo

³ Aha/ bora Arumgimis pem bwa i is mo apowa ris mom pem jin kaka/ um e mo be.

⁴ Isa yampa/ eya 'thom pem mo gom umi 'baar mo mmomii mon'thom pem ki bwanj 'kunyga/ mo.

⁵ Mmo'bora 'bor bwa i is mo gom gwom 'borga/ jin nyaku um pwaḡ ki aha/ 'pena tee jin twa/a/ ntagi shwane/ mo be.

⁶ Dhali aha/ misha ka jin gana/ ki a'di jin telki'da tu'c jin 'boro'd 'pen e um mo tani midi 'baar a'di mo ka tee ma Yesus Kristhos mo be.

⁷ A'di 'boro'd ki 'bor gana/ mo gom aha/ mmokulum gwo i bwa mo gom umi 'baar mo kansan mo haali/ aha/ dhuna um eya dum pem mo haali/ aris umi 'baar mo nyaku/ a'the pwaḡ ki aha/ mo me'd jin dika/ eya sijin mo dhali mmo'ce'd gwo she/ mo dhali mmotel gwom 'borga/ sho'k mo.

⁸ Haali/ Arumgimis ta'da man/o gwo gom aha/ mo mmo'kosha te/ aha/ mo gom umi 'baar mo ka du ma Kristhos jin gama gam mo jin ta'da Yesus mo.

⁹ Dhali a'di ita mon'thom pem ki mo/en bum mini ish ki nyanye/ ki nyanye/ mo nyakki yuk ilu/ mo dhali mmonyitha ris to 'baar mo.

¹⁰ Wakan ki um mini tes to kun 'boron ki 'bor gana/ mo dhali mmota kun dhelelin mo dhali kun dar gi mii m'ba/ mo goma tee ma Kristhos mo be.

¹¹ Mmo'tu'd mo ki maman gi mo ma kar/e jin pu'du'd 'pena Yesus Kristhos mo mmota monyca mo dhali momanj ma Arumgimis mo be.

Gom Aha/ Mmodi mo tani A'di Ta'da Kristhos mo

¹² Aha/ napa um mmomish mo mo, iwak, gom to gun mii aha/ mo ka jin gana/ tani a'di ta 'pemen mmopal gwom 'borga/ mo be.

¹³ Dhali wakan mondeḡ pem goma Kristhos a'di wara'd ki mo jin mishu mo isi ki tur mo e uni gun dhunu mo mmohil gu'b ma mudhiir e mo jin jin ma askar ma Ithaaliya aji mo dhala ris unin tiya si'da/ mo.

¹⁴ Dhali awaka tiya ka ris bu'thkina du mo e Tapa gom mondin pem eya sijin mo dhali uni dar ma du mo ki nyanye/ mmoḡor gwo ma Arumgimis ki dar gi monko/ is mo be.

¹⁵ Kun tiya ka jin gana/ ci gwo goma Kristhos 'peni bwa shigga/ mo dhali mmobira bir si'da/ mo hili kun tiya si'da/ ki bwanj gana mo be.

¹⁶ Ku gi 'ban yansan mii a'di ki mo/en mmomisha uni ki aha/ karkunu mo gom gwo mmo'ce'd she/ mo gom gwom 'borga/ mo.

¹⁷ Ku gi twa/ a/ ci gwo goma Kristhos 'peni bwa jin kwa/ u mo tani yisa ki bwanj gana/ mo hili uni kulumki gwo lbwa mo mmoḡo'c aha/ 'kus mo e mondin pem eya sijin mo be.

18 Gomata 'te/. Jasi eya ris mii 'baar mo wakki/ mii jin pwanu/ 'te/ mo walla e gwoŋ gana/ mo tani aKristhos cikunu 'twa/ maŋ mo dhali e a'di yan kantan mo tani aha/ 'kunykina bwa mo be.

19 Nye, dhali aha/ mina bwa 'kuny mo. Haali/ aha/ misha ka 'thom bum jin 'thokina um mo dhali mowoth gi Shi/in ma Yesus Kristhos kan mo tani a'di tu'kki mii is mo mmo'cuḱ aha/ mo be.

20 Me'd jin tana a'di moŋganan 'bam pem mo dhali mo ma 'teŋ kape/ mo ki aha/ mina isi diki 'theya 'the ki sule/ mo tani hili ka du jin rocu sho'k isi bwaman mo shwane/ me'd isa yempa/ mo tani aKristhos minu eh mo e buŋwar is pem mo wakki/ a'di ta mondiki/e walla mowu mo.

21 Haali/ gom aha/ mmodi mo tani a'di ta'da Kristhos mo dhali mmowu mo tani a'di ta nyunycina/ mo be.

22 Wakki/ a'di ta mo gi 'konu ki e e buŋwar is mo tani a'di ta 'pemen mmokal maman goma tu'c pem mo. Hili aha/ mola tor naskina/ a'di jin miga/ kwany mo.

23 Aha/ budha bwa ka yissa/ mo. Bwa oyaa/ ki kwa/ is mo dhali mmonyak di eya Kristhos mo haali/ a'di 'boro'd ki 'bor gana/ mo be.

24 Hili mmodi mo ki buŋwar is mo tani a'di minu mii mii mo gom gway bum mo be.

25 Dhali mmomishga/ yan ki isa duŋ gana/ mo tani aha/ misha ki aha/ mina di mo dhali rash ca'b mo e umi 'baar mo gom moŋkal iim bum mo dhali bwan'kunygam bum mo e moŋgam gwo is mo.

26 Wakan e aha/ mo tani ki um mini ta gi 'kup mii mo kun mini ish ka enthus mo mmodhu 'ba/ eya Kristhos jin ta'da Yesus mo gom mmomiga/ pu'dku/ dok/ e um mo be.

27 Jasi a'di imina umi mii mo: Dhali dhalki um ta kum paŋ gana/ mo kun mini ha me'd mo gom gwom 'borga/ ma Kristhos mo. Wakan wakki/ aha/ mina yaku/ mo dhali par um e mo walla aha/ mina pi mo tani aha/ mina 'taki cik gwo gom um mo ki um telki sho'k mo e shi/ina 'de/ mo ka dun tal 'de/ mo mmobira bir ki 'ban kuku/ mo gom moŋgam gwo is gi gwom 'borga/ mo be.

28 Dhali mmo'koki ko/ is gom toŋ kamu/ tal 'de/ mo 'peni uni gun asa uma po/ mo. A'di ta to jin toru eya tente/ mo gom uni mo mmo'kol e ki me'd mo gom mony'ce'd sho'k buni mo hili gom bway mowoth bum mo tani dhali a'di yan 'peni Arungimis mo be.

29 Haali/ a'di cikunu um mo gom gway ma Kristhos mo tani ki um mini 'taki 'koki gam a'di gwo is jasi 'te/ mo hili um si'da/ mina isi 'kosh ka nyor gom gway piti mo be.

30 Mmomal e e moŋ'kosh mii yan a'di jin parkina um e mo dhali jin cikkina um jin di'd e aha/ shwane/ mo be.

2

Kristhos Mmokarkina A'di Is ki Gwa'd mo tani A'di Karkunu ki Ca mo

1 Wakan wakki/ mo jin rocuwa du sho'k mo eya Kristhos di'd mo dhali mo gi lalu sho'k mo ki gwo gi mo/en mo dhali mo gi nyaku to mii ka dun 'de/ gi Shi/in mo dhali wakki/ adu jin gama gam mo dhali mii jin miinu ki mo/en mo tani

2 'tu'daa/ mo ki mom'bor bwa mo mmota ga du jin nyakka'd mo mmo'tu'd ki mo/en 'de/ mo dhali mmo'tu'd ki bwan 'de/ mo dhali ka dun 'de/ mo be.

3 Dhalka ankirre/ ki mii mo mmota ham 'kus mo walla mmodhu is ki 'kwanim pa mo. Hili mmodhu is ki gwa'd mo mmohil ci i e ki 'bore/ mmobol is bumi e mo.

⁴ Dhalka ris um ka 'dete/ 'dete/ hil to gi cin tiya i e mo mmo'koki hil jasi tom bum gana/ i e mo.

⁵ Tayi gi bwa yan e bwaman is bum um 'cena mo ma, a'di jin takina um eya *Kristhos* jin ta'da Yesu mo,

⁶ a'di ba/ a'di jin ta jama ma Arumgimis mo tani a'di diki o ki mo gi nyaka nyak ka Arumgimis midi ta to jin minu bu'th ki wup mo.

⁷ Hili a'di karki is piti bwa 'te/ mo mmobu'th jama gi cin kina/ mo mmodhodhu a'di ki dho'th jin dho'thkunu 'kwani kansan mo be.

⁸ Dhali mmogamu a'di kan ki is gi wathiny'cesh mo tani a'di karki isi is piti ki gwa'd mo dhali mmowar ka manha gwo e mo mmowu mo isi wu gi cwany'cihan dhul mo be.

⁹ Wakan Arumgimis karki a'di ki can gana/ mo dhali ci a'di gway jin di'd eya powa ris gwayi 'baar mo.

¹⁰ Dhali ki gway ma Yesu mo tani aris 'kupa'dupuni 'baar mo mini mii luj mo ki 'beles e momis mo dhali e mony'cesh mo dhali e bwan'kwariny mony'cesh mo

¹¹ dhala risa le'di 'baar mo mini pi gwo mo ka Yesu *Kristhos* ta Tapa mo gom monyca ma Arumgimis jin ta Com mo be.

Kushi Um Mo mo Me'd Monjkush e Mony'cesh mo

¹² Dhali wakan, um pem gun enka/ mo, me'd jin hana um gwo e isa yempa/ mo tani wakan shwane/, yisa jasi mmodika/ um e bur'kus mo hili ki nyanye/ mmopika/ mo, miiyi mowoth bum gana/ mo ki monko/ is mo dhali ki mondee mo.

¹³ Haali/ Arumgimis umki mii mo e um mo dhali ki bwa jin ta bwa mo dhali ki bwa ma tu'c jin ta bwam pitij gana/ mo be.

¹⁴ Miiyi aris to 'baar mo ki dar ga gumgum mo ma walla ki gwo jin dotuwa dot mo.

¹⁵ Ki um mini dar gi mii 'ba/ mo dhali dar ga mak mo mmota uci ma Arumgimis mo mmodar gi thalkin mo e bwaman 'kwani ma nyakum yil mo kun burusha ii ki burush mo dhali kun caca ii ki caca mo e bwam uni mo, uni kun kusha um mo me'd monjkush eya 'cesh mo.

¹⁶ Mmolana um gwo gi mondiki/e bu'th mo wakan ka tee ma *Kristhos* mo tani aha/ mina kar is ki ca mo ki aha/ dinaki gus mo ka wuny is walla miiya tu'c ka wuny is mo be.

¹⁷ Me'd wakki/ aha/ 'thinu mo e mo jin miinuwa basa 'cesh mo gom mongam gwo is bum mo tani aha/ 'bora bwa mo dhali 'kunya bwa mo nyakki umi 'baar mo be.

¹⁸ Wakan si'da/ um mina bwa 'bor mo dhali 'kuny bwa mo nyakki aha/ mo be.

Timuthawuus dhala Abapruditus mo

¹⁹ Aha/ tosha e Tapa Yesu mo mmohashka/ Timuthawuus e um mo ki 'dishe/ mo. Wakan ki aha/ minu malas mo ki gwo 'peni um mo.

²⁰ Aha/ dara gi jan 'de/ jin waki a'di mo jin midi ta gi bwan gana/ mo mmo/ anan is gom mmo'kona um ki 'kom pa mo.

²¹ Uni 'baar mo hili jasi 'kupki tom buni mo, yisa gom to ma Yesu *Kristhos* mo.

²² Hili Timuthawuus ta a'dim pa jin misha um mo mmomii to me'd ya/ jin mii to gom com mo tani a'di miiki to nyakki aha/ mo gom gwom 'borga/ mo be.

²³ Aha/ tosha wakan mmohashki a'di i um mo ki 'dishe/ me'd jin miga/ mish ki a'di midi ya kata gom aha/ mo.

²⁴ Dhali aha/ gama gwo is e Tapa mo ki aha/ ki 'dishe/ ki is pem mina yaku/ si'da/ mo be.

²⁵ Aha/ kuluma gwo ibwa ki kulum gana/ mo ki a'di minu mii mii mmohash ki uma Abapruditus a'di jin ta'da kam pem mo dhali agarr jin nyaka'da tu'c mii mo dhali agarr jin ta'da askar mo dhali amanyam bum mo dhali amanmii to jin miga/ mii ta mo.

²⁶ Haali/ a'di 'kosha te/ umi 'baar kagahara mo dhali a'di butha 'tham mo haali/ um cik gwo mo gom a'di ki a'di 'ba'thki'd mo be.

²⁷ Ka jin gana/ a'di 'ba'thki'd mo mmo'dish 'twa/ mmowu mo be. Hili Arungimis miimii apo/ a'di mo dhali yisa jasi e a'di, hili apo/ aha/ si'da/ isi ciki/ aha/ mina 'taki ta gi bwan diti'd jin ta jin diti'd mo.

²⁸ Aha/ tupa bwa kagahara mo mmohash ki um a'di wakan mo ki um mina bwa 'kuny mo mmopar a'di e mo dok/ e dhali kan mo ki aha/ mina mo/anan is pem idinin is mo be.

²⁹ Wakan buthi a'di e Tapa ki bwan 'kunyga/ 'baar mo ma dhali taki 'kwani kun wakan mo.

³⁰ Haali/ a'di muru'di wu mo goma tu'c ma Kristhos mo, a'di ci mondiki/em piti mmothima tu'c bum gom aha/ mo be.

3

Gwoŋ Gana/ gi Mii ma Kar/e mo

¹ Gom gwo jin boço'd mo gom um, iwaḵ pem mo. 'Bori bwa mo ma, e Tapa mo. Mmo'kwar um gwo kun nyakkan mo tani a'di diki tocaa/ bwa mo haali/ a'di ta'da tete/ gom um mo be.

² Jiyyi a'ka ki e ki 'bore/ mo ma. Dhali jiyyi uni gun mii tonthus ki e ki 'bore/ mo ma. Jiyyi uni gwansan ki e ki 'bore/ mo ma kun 'ciḥi/ buḅgwar is is mo.

³ Haali/ ana tana uni gun 'ciḥuwa munyjal yis gana/ mo ana gun luḅa Arungimis ki shi/in mo dhali monyca eya Kristhos jin ta'da Yesus mo dhali mmo'koki dhu buḅgwar is e buḅgwar is mo.

⁴ Ba aha/ ki is pem tana gi 'kup gwo mo gom buḅgwar is jin ta buḅgwar is mo si'da/. Waḵki/ wathiḅ kamu/ midi kulum gwo ibwa ki a'di ta gi 'kup gwo e buḅgwar is mo tani aha/ tana ki nyanye/ ki nyanye/ mo be.

⁵ Aha/ 'ciḥkunuwa munyjal yis mo ka cim pekware mo dhali aha/ tana wathi/ 'peni 'Kwani ma Israyiil mo dhali aha/ tana ja waḵ ma Benyamiin mo, dhali aha/ tana ji Ibraniyiin mo jin dhodhu e 'Kwani ma Ibraniyiin mo be. Me'd gwo gi gwoḅkan jin cinu ki 'Kwani Parisiyiin mo tani

⁶ aha/ shwakina anyor mo mmoḷoca kaniisa bwa mo, me'd gwo gi mo ma kar/e jin baḥ gwoḅkan jin cinu i'ko'd mo tani aha/ dina ka po/ mo be.

⁷ Hili waḵki/ nyunycinan kamu/ di'd jin taka/ mo tani a'di karka/ me'd to jin thisu e mo gom gway ma Kristhos mo be.

⁸ Ka jin gana/ aha/ dhuna ris to me'd to kun thisu e mo gom to jin bolo'da ris to 'baar mo e ki 'bor mo jin ta mmomisha Kristhos jin ta'da Yesus Tapam pem mo be. Dhali gom gway piti mo tani aha/ wana gwo kan e bwa mo mmodhala ris to 'peni 'baar mo dhali aha/ dhuna uni me'd to gun pishu mo ki mii gi wakan ki aha/ mina gama Kristhosa du is mo be.

⁹ Dhali ki aha/ minu this mo i is e a'di mo, yisa mmota gi mo ma kar/e ki is pem mo yisa, mmo'dap 'ko'di gwoḅkan jin cinu mo. Hili a'di jin ta mo gi gamu gwo is eya Kristhos mo. Mo ma kar/e yan 'peni Arungimis mo a'di jin di 'ko'd e mo jin gamu gwo is mo be.

¹⁰ Ki aha/ mina mish a'di mo dhali mom'bi'th gi mompim piti mo dhali aha/ mina pash mo gi isa nyor piti mo mmowar waki a'di e jwam piti mo be.

11 Wakan wakki/ a'di mishu mii mo gom aha/ ki aha/ mina bumbur mo e mo jin pinu mo 'peni mowu mo be.

Yana 'Kup ki 'Kupa Nwa mo

12 Yisa mmobu'thkika/ to yansan mo hila/ walla mmowarki jim 'borgaŋ gana/ mo hila/, hili aha/ dina mmo/ur a'di mo mmomiga/ bu'th a'di jin bu'thkin ma Kristhos jin ta'da Yesus aha/ mo, mmokar aha/ mo mmota jim piti mo be.

13 Iwaka, aha/ dinaki kar is pem ki jim bu'th to mo hila/. Hili ton tal 'de/ miiga/ mo mmodhalka ris to gunn ŋ'ko'd mo dhali mmogon is ka karambuye/ ki to gun 'koni buŋkup mo tani

14 aha/ gusa ur to i'ko'd mo e mo jin tanu gi 'kup to mo mmogam 'kupa nwa 'pena yuŋ ma Arungimis 'peni momis mo eya Kristhos jin ta'da Yesus mo be.

15 Dhalki ana gwansan gun isa mo tani tana gi bwa ki wakan mo ma. Dhali wakki/ um 'kona bwa ka bwanycin mo, ma e ton tiya mo tani Arungimis midi tor a'di yan eya tente/ e um si'da/ mo be.

16 Isi kan dhalki ana iina iinŋ gana/ mo e mo jin bumburkina ana mo.

17 Iwaka, 'thokaa/ mii mo ma dhali kuthi uni gwansan ki e mo ma uni gun 'kokin mo mmomii kan me'd jin para um she/mm e e aman mo.

18 Haali/ uni ka ris torrika/ um mo me'd ka ris mo dhali shwane/ aha/ tora um gwo ki jabu'th mo uni gun 'kokin mo mmomii waki uni gun ta 'kup gi cwany'cithan dhul ma Kristhos mo be.

19 'Pemen buni ta mony'ce'd sho'k mo dhali arum buni jin luŋa uni mo tani ta bwa mo dhali uni caki can thus e mon'the is buni mo ki bwa jin dhuna uni ki to ga 'cesh mo be.

20 Hili 'penkuman pam bana a'di ta momis mo be dhali 'peni a'di mo tani ana corkina Amanwoth mo jin ta Tapa Yesus Kristhos mo be,

21 a'di jin midi ak buŋgwar ha'th'ko'd bana yan e mo mmowa e ki buŋgwar is piti mo e monyca mo ki mom'bi'th jin 'bitha a'di e mo mmomisha ris to dhu 'baar mo mmobath a'di i'ko'd me'd is pitinŋ gana/ mo be.

4

'Kunyi Bwa mo ma e Tapa mo

1 Wakan iwak pem, um gun enka/ mo dhali kun 'kosha te/ aha/ mo dhali kun ta bwan 'kunygam pem mo dhali kun ta ton'kup pem mo tani teli sho'k wakan e Tapa mo ma um gun enka/ ki mo/en gana/ mo.

2 Aha/ malaskina Apuudiya mo dhali aha/ malaskina Sintiiŋki mo mmogam gwo me'd mo e Tapa.

3 Dhali aha/ dotkina /e si'da/ amannyak dhanŋka'b ganam pem bu'th mo ki wothi/ up gwansan mo ma, haali/ uni nyakkina tu'c mii ki 'ban kuku/ nyakki aha/ mo e gwom 'borga/ nyakka Aklimandus mo dhali kun tiya kun nyakkana tu'c mii ki aha/ mo uni gun 'kona gway eya warka/ gi mondiki/e mo be.

4 'Kunyi bwa mo ma, e Tapa, isa yempa/ mo. Dok/e aha/ mina o um gwo mo ki: 'Kunyi bwa mo ma.

5 Dhalka ris 'kwani 'baar mo mishi mo mo ma, mo ma dum bum jin 'tima um mo. Haali/ Tapa a'di 'disha 'twa/ mo hila/.

6 Dhalka anan ki anan mo gom ton 'den kamu/ mo ma hili eya ris to 'baar ki mon'tho mo dhali ka thip jin thipu mo ki mom'bor bwa i is mo tani dhalki ton dot bum minu mish mo eya Arungimis mo.

7 Dhali monku'th is ma Arungimis a'di jin peki'd eya ris mo jin mishu gwo 'ban mo tani a'di midi jiya dum bum mo dhali bwam bum eya Kristhos jin ta'da Yesus mo be.

Kulumi Gwo gi To Gwansani Bwa mo

⁸ Gom gwo jin boço'd mo gom um, iwak mo tani aris to gun ta kun gana/ mo, aris to gun ta kun taku mo, aris to gun ta kun kar/e mo, aris to gun ta kun dhelelin mo, aris to gun ta kun ŋa/u mo, aris to gun ta kuny jaro/ mo, wakki/ akamu/ midi 'taki di jin bol tiya e ki 'bor gana/ mo tani wakki/ tal 'deŋ kamu/ midi 'taki di jin ta jin ha me'd mo ki momaŋ mo tani kulumi gwo gwansani bwa mo ma.

⁹ To gun da/ara um mo dhali kun budha um mo dhali kun ciŋa um mo dhali kun parkina um e mo e aha/ mo tani to gwansan miyi uni mo ma dhali Arungimis gi moŋku'th is midi di e um mo be.

Gwo Toru gom To jin Cina 'Kwani gi Pam Pilibbi ki Me'd mo

¹⁰ Hili aha/ 'bora bwa mo e Tapa ki canye haali/ me'd dok/e hila/ um tuju bwam bum ki cu mo mmokayaa/ e mo. Ka jin gana/ um kaka/ e mo hili um dar gi bway 'boro'd mo mmomii to mo.

¹¹ Yisa mmo/oka/ gwo gom mo gi hara to mo haali/ aha/ mishkina mo ki is pem mo ki mo yin jin dika/ nycine/ mo tani aha/ ca'bkina mo ka this mo i e mo be.

¹² Aha/ misha mmokar is ki jin gwa'd mo dhali aha/ misha si'da/ mmo/ isha to ka entus mo. Eya ris to 'baar mo dhali gom to 'baar mo tani aha/ mishkina ka malimbu'da/ mmokap mo dhali mmo'kosha te/ mo, mmo/isha to ka entus mo dhali mmohara to mo.

¹³ Aha/ misha aris to 'baar mo mii mo e a'di jin 'bi'thki aha/ is mo be.

¹⁴ Bahili um miikin ki 'bore/ mo mmočina um to gom aha/ gom monto'c is pem mo be.

¹⁵ Dhali um ki is bum si'da/ mishin um gi Pam Pilibbi ki me'd ka muŋ'kup 'peni gwom 'boga/ki aha/ dhalkina Pam Makiduniyya 'pen mo tani akaniisan kamu/ yisa nyak to mii ki aha/ yisa e momii jin cinu to ki me'd mo dhali e mo jin budhu to mo hili isi ciki/ um 'cena mo be.

¹⁶ Gom me'dyin e Pan Tasaluniiki tani um hashki jan 'de/ mo dhali dok/e gom to jin miga/ mii ta mo.

¹⁷ Yisa mmosimka/ to jin cinu ki me'd e mo yisa, hili aha/ simma maman e mo ki a'di midi mar is mo mmokam gom um mo be.

¹⁸ Hili aha/ bu'thkina to 'baar mo ki nyanye/ mo. Aha/ 'tu'dkunu mo mmobu'thkika/ to mo 'pena Abaprudiŋus mo, to gun pu'dkin mo 'peni um jin ta'da shim jin cinu jin kuyi mo ki kuy jin ta mo jin miikunuwa bas mo jin mishu bu'th mo mmo'bora Arungimis bwa i is mo be.

¹⁹ Dhali Arungimis pem midi thiŋ um ka ris to gun mina umi mii ta mo isi to gun waki kun tana a'di pam piti mo e monyca eya Kriŋthos jin ta'da Yesus mo be.

²⁰ Shwane/ dhalki monyca a'di di'd eya Arungimis bana jin ta'da Babam bana ki sule/ sule/ ya ye 'ba/ moonni. Amen.

Kwalany Monthe Me'd jin 'Ko'd mo

²¹ Theka ris uni 'baar mo me'd kun dhunu ki she/ ki dhelel dhelel eya Kriŋthos jin ta'da Yesus mo ma. Dhala wak kun 'kon nyakki aha/ mo tani theki um me'd mo si'da/.

²² Aris uni kun dhunu ki she/ ki dhelel dhelel mo tani theki um me'd mo uni gun mumki 'ko mo e gu'b ma Kaysar mo be.

²³ A'the 'peni Tapa Yesus Kriŋthos midi di e shi/in bum mo be.

Gwo jin 'Kwar ma Buulus gom 'Kwani gi Paṅ KULUUSI mo

Monthe Me'd mo

¹ ABuulus, a'di jin karu ki she/ mo goma Kristhos jin ta'da Yesu mo ki bwa ma Arungimis mo dhala Timuthawuus jin ta'da kam bana mo.

² E uni kun dhunu ki she/ki dhelel dhelel mo dhali iwak kun ta ku isinj gana/ mo eya Kristhos mo, uni kun 'kokin mo e Paṅ Kuluusi mo.

A'the e um mo dhali monjku'th is 'peni Arungimis jin ta'da Babam bana mo be.

Mon'tho ma Buulus mo gom 'Kwani kun Gami Gwo Is mo e Paṅ Kuluusi mo

³ Aman isa yempa/ 'bora Arungimis bwa i is mo, a'di jin ta'da Baba gi Tapa Yesu Kristhos bana mo, me'd jin 'thokina aman mo gom um mo,

⁴ haali/ aman cikina gwo gom mongam gwo is bum eya Kristhos jin ta'da Yesu mo dhali mo/en jin takina um mo goma ris uni 'baar mo kun dhunu ki she/ki dhelel dhelel mo,

⁵ haali/ mo ma 'tenj kape/ a'di karkunu mo gom um e momis mo. Gom a'di yansan mo tani um cikki gwo nṅwa/a/ mo e gwo jin ta gwoṅ gana/ mo, a'di jin ta gwom 'borga/ mo,

⁶ a'di jin pu'dki'd e um mo, me'd a'di ka jinj gana/ diki'd e mony'ceshi 'baar mo mmodho'thkina a'di maman mo dhali mmo'twakkina a'diya 'twak mo - wakan e bwam um ki is bum mo 'pena tee jin cikina um a'di mo dhali mish a'di 'ban mo, a'di jin ta'da 'the ma Arungimis mo e gwonj gana/ mo,

⁷ me'd jin da/arkina um a'di mo 'pena Abapraas mo, a'di jin ta'da garr bam jin enu jin mii to mo. A'di ta a'di isinj gana/ mo jin mii to goma Kristhos mo gom gway bam mo

⁸ dhali a'di 'torki a'di aman mo gom mo/en bum e Shi/in mo be.

⁹ Dhali wakan 'pena tee jin cikina aman a'di mo tani aman yisa dakkina 'tho mo mmo'tho mo gom um mo, mmodota/ dot mo ki um minu 'taki 'tu'd mo ki monyith bwam piti mo eya ris miin to gi shi/in gi moyuk mo dhali momish gwo 'ban mo,

¹⁰ mmosusa sus e bway mii kun mini ha me'd gom Tapa mo, mmo'tu'd mo ki mii kun mini 'bor a'di bwa i is mo mmokal mamana dho'th mo goma ris miim 'borga/ mo dhali mmomara mar is mo ki monyitha/ Arungimis mo be.

¹¹ Dhalki um 'bitha is mo eya ris mom'bithi 'baar mo isi ki monycam piti jin ca'bki dem dem mo goma ris mo jin 'dimuwa 'dim 'kup mo dhali bwa jin 'kuču ki 'kari'th mo ki monj'kuny bwa mo,

¹² mmočiya Baba bwam 'boro'di is mo, a'di jin thumki ana mo mmonyak mal pwak ki uni kun dhunu ki she/ki dhelel dhelel mo e monjkush mo be.

¹³ A'di 'cukki ana mo 'peni mom'bi'th gi mondhurumi'd mo, mmo'ciṅ ana agap mo e bampa/ gi Ya/m piti jin ena a'di mo,

¹⁴ e a'di jin takina ana mo jin wanuwa wan 'ba/ mo dhali amure/ gi miinthus jin dhalkunu ana 'pen mo be.

Mon'tu'd ma Arungimis jin 'Tu'dki'd mo

¹⁵ A'di jin bu'thki jama ma Arungimis mo, a'di jin molu mish ki e ga 'cesh mo, a'di jin ta'da bwa nyara/ jin ṅwa/a/ ka ris to 'baar mo kun uku mo be.

¹⁶ Haali/ e a'di mo tani aris to 'baar mo 'kokunu mo mmo/uk mo e momis mo dhali e mony'cesh mo, uni gun mishu ki e ga 'cesh mo, dhali uni kun molu

par e ki e ga 'cesh mo, wakki/ adhana kursi ma malik mo walla mo jin tanu tapa mo, walla mom'bi'th kun molu gadhir mo walla moshirr mo tani - aris to 'baar mo 'kokunu mo mmo/uk mo e a'di mo dhali gom a'di mo be.

17 A'di diki'di t_{wa}/a/ ka ris to 'baar mo, dhali e a'di mo tani aris to 'baar mo tulkunu 'twa/ 'kup mo e a'di mo mmontal 'de/ mo be.

18 A'di ta'da 'kan'kup gom bungwar is mo a'di jin ta'da kaniisa mo. A'di ta montel 'pen mo, a'di ta'da bwa nyara/ 'peni mowu mo, ki a'di eya ris to 'baar mo tani midu 'taki ta isa 'cilman gana/ mo be.

19 Haali/ e a'di mo tani arisa 'tu'd kun ta ku ma Arumgimis mo tani 'borkina bwa mo mmota gi mon'ko mo be.

20 Dhali e a'di mo tani a'di gwamki'da gwam ki is piti_n gana/ mo eya ris to 'baar mo, wakki/ to gun 'kon e mony'cesh mo walla e momis mo tani a'di karki mo ma ku'th is ka bas piti ki cwany'cithan dhul mo be.

21 Dhali um kun 'thissa/ 'kokin ka pije/ 'peni a'di mo dhali kun ta 'kup ki 'kup eya dum bum mo mmomii to kun ta thus ki thus mo tani

22 a'di shwane/ gwamki'da gwam mo ki is piti mo jin ta shuman is ki jwam piti mo, ki mii gi wakan mo tani a'di midu tor um eya tente/ mo me'd ku gun dheelkin mo dhali kun dar gi thalkin mo dhali ku gun mini dar gi mo ma wak ibwambori a'di mo,

23 ba shi/ mii a'dan 'te/ba/, wakki/ um mini tikir 'ko mo e mongam gwo is mo, ki monka'b mo dhali tel sho'k mo, yisa mmoti'k mo 'peni mo ma 'tej kape/ gi gwom 'borga/ jin cikina um mo, a'di jin cikunu aris 'kwani 'baar mo kun ukunu mo e bwan'kwariny momis mo, dhali gom a'di mo tani aha/ jin tana Buulus warkina ka manmii a'di mo be.

ABuulus Miiki To mo goma Kaniisa mo

24 Dhali shwane/ aha/ 'kunykina bwa mo e is pem mo jin 'koshki aha/ ka nyor mo gom gway bum mo, dhali e shuman is pem mo tani aha/ thimkina a'di jin harkunu mo e mo jin tocuwa Kristhos bwa mo gom gway gi bungwar is piti mo, a'di jin ta'da kaniisa mo.

25 A'di jin warkika/ ka manmii to mo isi ki gwo jin piyi'd 'peni Arumgimis mo gom mo jin taka/ amandhu gwo mo, a'di jin cikunu aha/ mo gom um mo mmokar gwo ma Arumgimis ki a'di minu mish eya tente/ mo,

26 a'di jin ta gwo ma Arumgimis jin bagu mo, a'di jin ba'kkunu ki she/ yil ka ris mo dhali mo ma nyakum yil gun tanu mo, dhali hili shwane/ a'di torkunu eya tente/ ki kum piti kun dhunu ki she/ ki dheel dheel mo.

27 E uni mo tani Arumgimis ki kar bwa mo mmotor eya tente/ mo ka dhan mii kun wani caa e 'kwani kun 'koki ta 'Kwani Yahuuda/ mo ki monyca jin ta pa ki pa mo e gwo yansan jin cinu ki jim bag mo, a'di jin ta'da Kristhos jin di'd e um mo, jin ta mo ma 'tej kape/ gi monyca mo be.

28 A'di jin bahkina aman gwo mo mmoruma ris 'kwani 'baar ka 'dete/ 'dete/ ki gwo mo dhali tora ris 'kwani 'baar ka 'dete/ 'dete/ gwo mo eya ris moyuk mo ki aman mina 'taki dhuwa ris 'kwani 'baar ka 'dete/ 'dete/ mo ki ku gun isin mo eya Kristhos mo be.

29 Haali/ gom mii yan mo tani aha/ miikina mii jin 'batha'ba'th mo, mmo/ u_{th} mo ki is jin umu'di 'baar mo, a'di jin thi'thki'da thi'th mo e aha/ mo.

2

1 Haali/ aha/ ona bwa ki um mini mish mo mo ka dhan mii jin picirkika/ mo gom um mo dhali uni gwansan kun 'kon mo e Pa Lawudikiyya mo dhali goma ris uni 'baar mo kun 'koki par jis/em pem e mo

2 ka dum buni minu 'taki 'bi'th is mo me'd jin re'dkunu uni mo mmontal 'de/ mo e mo/en mo, mmota ga ris mo kun tanu pa ki pa mo gi momish mo

mo 'pena dun gana/ mo dhali monyitha/ Arungimis gwom bag yan mo a'di jin ta'da Kristhos mo.

³ E a'di mo tani aris moyuk kun ishki kumma/ mo dhali mo jin nyithuwa nyith mo be.

⁴ Aha/ ona gwo yansan mo wakan ki wathin tal 'dej kamu/ midi 'taki diki he'k um e mo ki gwo ma mak jin onu mo.

⁵ Ba aha/ pina e bungwar is mo tani hili aha/ dina e um ki shi/in mo, mmo'kuny bwa mo mmopar miim 'boron bum kun miina um ka para po/ e mo dhali mom bum jin tela um sho'k mo ki mongam gwo is bum eya Kristhos mo be.

⁶ Wakan, me'd jin bu'thkina uma Kristhos jin ta'da Yesus jin ta Tapa mo tani wakan 'koyi e a'di mo,

⁷ mmotana um ka birman mo e a'di mo dhali mmonyana um is mo e a'di mo dhali mmotela um sho'k mo e mongam gwo is mo, jasi me'd gwo jin torkunu um mo, mmoso ki sho'k bum e mo jin 'boruwa 'bor bwa i is mo be.

Mon'tu'd jin Tu'dki'd jin Ta Mondiki/e eya Kristhos mo

⁸ Jiyi mo ki e ki 'bore/ mo ki wathin tal 'dej kamu/ midi diki 'kwar um ka gwapi/ mo ki gwon 'kwaniŋ ganŋasha/ mo dhali ki gwo kun hekuwa he'k e kun 'ko bwa 'te/ mo, isi ki gwon 'kwani en'thin dhamo/ mo kun luku mo, isi ki gwo ma bwa nyara/ gom gwonkan gi mony'cesh yan mo, dhali yisa isi ki gwo ma Kristhos mo.

⁹ Haali/ e a'di mo tani mon'tu'd ka 'bimpil mo jin ta ji ma Arungimis mo mmotana a'di Arungimis mo tani ca'bki'd e bungwar is piti mo.

¹⁰ Dhali um pu'dkin mo mmo'tu'da/ 'tu'd mo e mondiki/em piti mo, a'di jin ta'da 'kan'kup goma ris montapa kun tanu mo dhala ris moshirr mo be.

¹¹ Dhali e a'di mo si'da/ um 'kokunu mo mmo'ciŋha/ munyjal yis mo ka munyjal yis jin 'ciŋhu/ ki dar gi me'd mo, ki mii jin dhalu bungwar is gi shuman is 'pen mo e mo ma munyjal yis jin 'ciŋhu/ jin ta ji ma Kristhos mo.

¹² Dhali um 'kokunu mo mmokan mo nyakki a'di mo e mo jin cu'cuwa cu' mo dhali e mii jin 'kokunu mmocu um mis mo si'da/ nyakki a'di e mongam gwo is mo e mo/um ma Arungimis mo, a'di jin 'de'kki a'di mo 'peni mowu mo be.

¹³ Dhali um, um kun 'kokin mo mmowu mo e gwon dhan mo dhali e mo ma munyjal yis bum jin 'konuki 'ciŋh um mo e shuman is bum mo tani Arungimis a'di ki dhu ki e mmotal 'de/ nyakki a'di mo, mmodhalkina a'di ana aris gwon dhan bana 'pen mo,

¹⁴ mmo'koshkina a'di gwo jin 'kwarkunu mo jin diki'da po/ ana mo, a'di jin theke'thki'da theke'th mo gom gwonkan mo be. A'di yansan idhalkina a'di ka po/ mo, mmotelkina a'di a'di ka musmaar mo apo/ cwany'ciŋhan dhul mo.

¹⁵ A'di dininki mom'bi'th kun molu gadhir she/ mo dhali mom'bi'th mo, dhali a'di ki tor uni eya tente/ mo jin mina uni ta she/mm mo mmopikina a'di uni e ki mii mo be.

Simmi To E mo kun Ta ku gi Momis mo

¹⁶ Wakan dhalki wathin tal 'dej kamu/ ki dhal bway mo mmokar gwo wak apo/ um mo e gwo jin dotuwa dot mo gom tonte/ mo dhali tompi mo walla gom mo ma yuk jin yuku ka tul 'kup mo walla goma appen this mo walla goma cim ma pesu/ mo.

¹⁷ Uni gwansan ta jasa kashira/ gom to kun mini pu'du/ mo, hili bungwar is gi mii mo tani uni ta ku ma Kristhos mo be.

18 Dhalku/ ki dhal wathin 'den kamu/ bway mo mmothu'th um thum mo, mmodi'b um is mo mmowu is ka 'cesh mo dhali lun iman'doyu gwo mo, mmodoshkina a'di apo/ tonyjan piti mo, mmose mo ki 'pura/ 'pura/ ki dar gi 'kup mii mo ki bwa gi bungwar is 'te/ mo.

19 Dhali yisa mmoṭela a'di e a'di jin ta'da 'Kaṅ'kup mo. 'Peni a'di mo tani bungwar is ka 'bimpil thipki'da thip mo dhali re'di montal 'de/ ki mom piti gun gamu is mo dhala billa/ mo mmo'twaḡ mo ki mon'twaḡ jin di'd 'peni Arungimis mo be.

20 Wakki/ um wukin mo nyakka Kristhos mo gom gwo ma bwa nyara/ gom gwonḡan gi mony'cesh yan mo tani gomatinta 'kokina um ki mon'ko mo jin cila 'kwaniny'cesh mo? Atinta 'dapkina um 'twa/ mo ki gwonḡan jin 'tashuwa 'tash bway mo?

21 Uni gun o gwo mo ki: Dhalku/ to ki bu'th is ki me'd mo. Dhali, Dhalku/ to ki nyok mo. Dhali, Dhalku/ to ki ta is ki me'd mo.

22 (Uni ta to gwansani 'baar mo kun minu 'ce'd sho'k mo mmomii uni mo), isi ki gwonḡan gi 'kwani en'thi/ mo dhali gwo kun toru mo?

23 Uni gwansan ka jin gana/ miikunu 'pena por ma pije/ mo mmoshusha du mo gom mii ma gayiin jin ta'da teteḡ gana/ mo dhali mo jin wunu is ka 'cesh mo dhali diki 'tash bungwar is 'twa/ mo, hili uni 'koki ta to gun 'bitha she/ ki 'bi'th mo mmonona non mo 'peni mii gi bungwar is jin din ma du ki 'thup mo.

3

1 Wakki/ um 'deku mo nyakka Kristhos mo tani simmi mii e mo gom to gun ta ku gi momis mo, e mo jin din ma Kristhos mo, e mo jin ca'bkina a'di ka bim poros ma Arungimis mo be.

2 Dhuyi adum bum gom to gun 'kon e momis mo, yisa gom to gun 'kon e mony'cesh mo.

3 Haali/ um wukin mo dhali mon'y'koki/em bum a'di bagkunu mo nyakka Kristhos eya Arungimis mo be.

4 Ka Kristhos, a'di jin ta mon'y'koki/em bana minu piyu/ mo tani um si'da/ minu piyu/ mo nyakki a'di mo e monyca mo be.

Miin Dhamo/ mo dhali Miin This mo

5 Wakan, 'koshi mii ga 'cesh jwa mo kun 'kon e um mo, kun ta mo gun miinu miinyal mo dhali mo gun 'dapu e mo dhali e kun dhunu ki 'thir 'thir mo dhali bwan thus kun pishu is mo dhali mo jin 'thothu/ bwa mo, a'di jin ta mii jin lunu tumpinyon mo be.

6 Gom mii gwansan mo tani a'di ipu'dkin ma nyor ma Arungimis apo/ iya/ gi 'kwani kun ushi gwo ha e mo.

7 E mii gwansan 'thissa/ mo tani um iikin e uni mo me'd jin 'kokina um mo e bwam uni mo be.

8 Hili shwane/ dhuyi uni 'baar mo 'pen ka pije/ mo, mii ma nyor mo, dhali anyor jin dekki'da dek mo, dhali mii gun dupa dupi e mo dhali mo ma thu'th 'pen jin thudhu ka sor gun walu mo dhali gwo nyogga/ 'peni 'twam bum mo.

9 Dhalku/ ki ta ator ka rem 'kup mo, mmomisha um ki um dhalki mii gi buyempan dhamo/ 'pen mo ki miim piti kun botkina um mo.

10 Dhali um ki hi'th miim buyempan this mo, a'di jin ukkunu mo dok/ e e monyitha/ nyith mo 'ko'di jamaḡ gi a'di jin ukki'da uk mo.

11 Mmahan mo tani Wathin Griki dhali Wathi/ Yahuuda/ mini mol 'ko ki she/ mo, dhali mo ma munyjal yis jin 'cithu/ mo dhali mo ma munyjal yis jin 'konuki 'cith mo, dhali wathi/ jin diki wal 'twan Griki mo dhali jin mii mii kun

kan̄kama kan̄kam mo, dhali cin̄kina/ jin yolu mo dhali wathi/ jin di ki 'kus mo, hili aKristhos a'di ta to 'baar mo dhali e ana 'baar mo be.

¹² Wakan, hithi ma mii gwansan mo, me'd unin̄ gana/ kun kwanykin ma Arumgimis mo, um kun dheelkin mo dhali kun enu mo, mii gi wakansa mo kun ta mii kun kwojuwa kwo'c e i is mo dhali mii kun miinu ki bwan̄kush mo dhali mii gun dhunu is ki gwa'd mo dhali mii kun miinu ka 'thup e mo dhali mii kun 'kucu bwa ki 'kari'th mo,

¹³ mmothona thon me'di 'ko'd ka rem 'kup mo dhali, wak̄ki/ wathin 'der̄ kamu/ ta gi gwo walla/ apowa kamū kamu/ mo tani dhali adhal gi miinthus 'pen ka rem 'kup mo ma. Me'd mii jin dhalkina Tapa uma mure/ miinthus bum 'pen mo tani um si'da/ mini mii dhalka mure/ miinthus 'pen mo.

¹⁴ Dhali apowa ris mii gwansani 'baar mo tani hithi mo/en mo, a'di jin dek̄ki'da ris to 'baar mo mmon̄tal 'de/ mo ki 'bor gana/ mo ki dar gi mo ma dhadharmu'th mo.

¹⁵ Dhali dhalki mon̄ku'th is ma Kristhos bway mo mmojiya dum bum mo e a'di ka jin̄ gana/ jin yuk̄kunu um mo e bungwar isa 'de/ mo, dhali mmoci mo jin 'boruwa 'bor bwa i is mo.

¹⁶ Dhalki gwo ma Kristhos ca'ba'd e um ki ca'b 'pempān̄ gana/ mo me'd mii jin torkina um gwo mo dhali mmorogom gwo ka rem 'kup mo ka ris moyuk mo, dhali me'd jin yuk̄kina um gway mo mmoka mo jin miinuwa mii e mo dhali gway jin man̄uwa man̄ mo dhali gway jin yuku gom to gi shi/in mo ki mii jin 'boruwa 'bor bwa i is eya dum bum goma Arumgimis mo be.

¹⁷ Dhali ma eya ris to gunn kun mina um imii mo tani e gwo gun ona um mo walla mii gun miina um mo tani miyi aris to 'baar mo ki gway gi Tapa Yesu mo mmoci mo jin 'boruwa 'bor bwa i is ka Arumgimis mo, a'di jin ta'da Baba e a'di mo be.

Mo jin Nyaku To Mii mo e Mon̄'ko 'Kwani gi Mon̄'koki/en This mo

¹⁸ Up 'dapi ki me'd ki gwo gi ikathim bum mo me'd gwo jin ha me'd e Tapa mo.

¹⁹ 'Kwanin̄ gwas, eni up bum mo ma, dhali dhalki uni ki 'cwar mo.

²⁰ Uciya, hayi gwo gi icim e mo dhali gwo gi ikwan e mo goma ris to 'baar mo, haali/mii yansan mo tani a'di ki 'bor Tapa bwa mo.

²¹ Ibaba, dhalku/ ki rukuny ucim bum ka nyor mo, isi ciki/ uni mini 'koki 'bitha du is mo.

²² Cin̄kina/ kun yoluwa, hayi gwo e eya ris to 'baar mo gi uni gwansan kun ta tapam bum mo e mony'cesh mo, yisa ki mii kun miinu e jis/en̄ 'kwani mo mmo'bor 'kwani bwa mo 'te/ yisa, hili ka dun̄ tal 'de/ mo mmōko/ Tapa mo be.

²³ Ma eya risa tu'c bum gunn kun miina um mo tani miyi a'di ki bwan̄ gana/ mo me'd jin miina um Tapa to mo, dhali yisa gom 'kwaniya,

²⁴ mmomishkina um 'peni Tapa mo ki um mini bu'th mal mo me'd tom bum jin ish kumma/ mo. Um miiki Tapa Kristhos to mo be.

²⁵ Haali/ amanthu'th to mii mo tani a'di minu doku/ tonthus apo/ a'di jin miikina a'di mo dhali mii jin miinu ka gwar 'de/ yisa di'da.

4

¹ Itapa, miyi cin̄kinam bum kun yola um ki mii ma kar/e mo dhali ki dar gi mii ma gwar 'de/ mo, mmomisha um si'da/ ki um ta gi Tapam bum e momis mo.

² Tikiri moshok̄ tel mo e mon'tho mo mmotimkina uma tim mo gom a'di ki mo jin 'boruwa 'bor bwa i is mo

³ dhali 'thoyi mo gom am si'da/ ka Arungimis midu 'taki ka'd amana campur gom gwo mo, mmobah gwo ma Kristhos jin cinu ki jim bag mo gom gway gi a'di jin dikika/ eya sijin mo

⁴ ki aha/ mina 'taki tor a'di eya tente/ me'd jin miga/ 'taki tor a'di ka ba/.

⁵ Boti ki mii ki is bum gana/ ki yuk yuk mo 'kupki uni gwansan kun 'kona pije/ mo mmowara tee is mo.

⁶ Dhalki gwom bum kun ona um isa yempa/ mo ta gwo ma 'the mo dhali kun cemesa cemes ka 'donkoro/ mo, wakan ki um mini mish mo mo gwo kun mina um ka ba/ ithok 'kwani 'baar ka 'dete/ 'dete/ mo.

Kwalany 'Te/ Ba/. Monthe Me'd mo

⁷ Tikikus a'di midu tor uma ris to 'baar mo kun miika/ mo. A'di ta'da kam bana jin enu mo dhali ta a'di isin gana/ mmomii to mo dhali agarr jin ta'da manmii to e Tapa mo be.

⁸ Aha/ hashkina a'di i um mo gom isi gwonj 'kup gwo yan gana/ mo ki um mini mish mo mo gom 'kom bam jin 'kona am mo dhali ki a'di midu 'taki 'bi'th uma dum bum is mo,

⁹ dhali nyakki a'di mo si'da/ a'di jin ta'da Unisiimus mo, a'di jin ta isin gana/ mo, dhali jin ta'da kam bana jin enu mo, a'di jin ta jan 'de/ gi is bum gana/ mo. Uni mini tor uma ris to 'baar mo kun buthi mo mo e mo yan mo.

¹⁰ Aristarkus jin ta'da agarr pem jin nyakkaa/ ca'b eya sijin mo tani theki um me'd mo dhala Markus jin ta nam ma Barnaaba mo (isi gwo gom a'di jin bu'thkina um mmoye'thkunu um sho'k ki gwo mo - wakki/ a'di midu pu'dku/ i um mo tani buthi a'di mo ma),

¹¹ dhala Yesuu/ a'di jin yukunu gway ka Yustus mo. 'Kwani gwansan uni ta jasi uni kun 'cithkunuwa munyal yis mo e bwaman uni kun nyakkaa/ tu'c mii mo gom Bampa/ ma Arungimis mo, dhali uni ita momalas pem mo be.

¹² Abapraas, a'di jin ta jan tal 'de/ ki is bum mo, jin ta'da manmii to goma Kristhos jin ta'da Yesus mo tani theki um me'd mo, isa yempa/ mmoka um e mo ka dun dara'd mo e mon'thom piti mo, ki um mini 'taki dosh mo me'd ku gi isin mo dhali mmomish mo ki isi mish gana/ 'baar mo a'di jin ta bwa ma Arungimis mo be.

¹³ Haali/ aha/ tana aman/ o gwo gom a'di mo haali/ a'di miiki'da tu'c jin 'batha'ba'th mo gom um mo dhali gom uni gwansan kun 'kon e Pa Lawudikiyya mo dhali e Pa Hiyarabulis mo be.

¹⁴ ALuuka, a'di jin ta'da hakiim jin enu mo dhala Dimas mo theki um me'd mo.

¹⁵ Ciki monthe me'd pem eya wak kun 'kon e Pa Lawudikiyya mo dhali eya Nimpaas mo dhala kaniisa jin di'd e gu'b ma yim mo.

¹⁶ Dhali ki gwo yansan denkunu e mo e bwam um mo tani dhalki a'di si'da/ denu e mo eya kaniisa gi Pa Lawudikiyya mo be dhali hili ki 'bore/ ki um ki denj gwo yan e si'da/ gwo 'peni Pa Lawudikiyya mo.

¹⁷ Dhali oya Arkibbus gwo mo ki: Hili ki 'bore/ ki/ e mini thim to mii mo a'di jin bu'thkina/ e 'peni Tapa mo.

¹⁸ Aha/ Buulus i'kwarkina gwo monthe me'd yan ki me'd pem gana/ mo. Kayi amakkiyam pem e jin dekkunu aha/ mo. A'the midu di gom um mo.

Gwo jin Twa/a/ jin 'Kwar ma Buulus gom 'Kwani gi Pan TASALUNIHIKI mo

Monthe Me'd mo

¹ ABuulus dhala Silwaanus dhala Timuthawuus.

Eya kaniisa gi Pan Tasaluniiki mo eya Arungimis jin ta'da Baba mo dhali Tapa Yesus Kristhos mo.

A'the e um mo dhali mon'ku'th is mo be.

Mon'gam Gwo Is gi 'Kwani gi Pan Tasaluniiki mo dhali She/mm kun Tana Uni mo

² Aman cikina mo jin 'boruwa 'bor bwa i is mo eya Arungimis isa yempa/ mo gom uni 'baar mo mmo'tikir gway bum mmoka e eya 'thom bam mo,

³ mmoka e ibwambor ma Arungimis bana mo dhali Ababa mo gom miim bum gi mon'gam gwo is mo dhali miin to kun miina um ki mo/en mo dhali mmo'tel sho'k mo e mo ma 'ten' kape/ e Tapa Yesus Kristhos bana mo be.

⁴ Haali/ aman misha mo iwa' mo, um kun enu ka Arungimis mo, me'd jin kwanykina a'di um mo

⁵ haali/ gwom 'borgam bam pu'dki'd e um mo jasi ki gwo yisa, hili si'da/ ki mom'bi'th mo dhali ki Shi/in Dheleladhelel mo dhali ki gwo jin 'tu'du'd mo ki mo jin suguwa du mo. Um mishkin ki aman tana 'kwani kun wakata kun nyo/kunu mo e bwam um mo gom gway bum mo.

⁶ Dhali um warkin ki iman'ho'k aman mii mo dhali gom Tapa mo haali/ um bu'thki gwo mo ki mo gi isa nyor jin 'kosho'd kagahara mo ki mon'kun'nyo bwa mo jin ta moshi/irr ki Shi/in Dheleladhelel mo.

⁷ Wakan ki um warkin ki uni gun ta she/mm goma ris uni kun gamki gwo is mo e Pam Makiduniyya mo dhali e Pa A'kaa/iya mo be.

⁸ Haali/ gwo gi Tapa yisa igwoki'd mo jasi 'peni um e Pam Makiduniyya mo dhali Pa A'kaa/iya mo hili si'da/ mon'gam gwo is bum si'da/ eya Arungimis mo a'di yaki'd ka piye/ eya ris mo 'baar mo. Wakan ki aman yisa mina ta gi to' kam/ mmo/o mo.

⁹ Haali/ uni ki is buni be'dki isi gwo mo gom aman mo gom han jin hankunu aman mo e bwam um mo dhali gom mom bum jin 'tu'kkina um mo eya Arungimis mo 'peni aris tompinycon mo mmomii to gom a'di jin di ki e mo, a'di jin ta'da Arungimis gana/ mo be,

¹⁰ dhali mmo'cor Ya/m piti 'peni momis mo, a'di jin cukina a'di mis mo 'peni mowu mo, a'di jin ta'da Yesus jin midi 'cuk ana mo 'pena nyor jin midi pu'du/ mo be.

2

Miin To ma Buulus jin Miina A'di e Pan Tasaluniiki mo

¹ Haali/ um ki is bum mishki mo mo iwa' mo, ki but jin bu'ta aman e um mo tani diki ta jim pe'th mo.

² Hili ba aman hila/ i'koshkina is ka nyor mo dhali miinu ki mon'the is kun shi/ashi/ mo e Pam Pilibbi mo me'd jin mishkina um mo dhali aman takina gi mo ma dum bam jin 'bi'thkina aman is mo eya Arungimis mo mmobah um gwom 'borga/ ma Arungimis mo e jis/e ka dhan mo jin tanu 'kup ki 'kup mo be.

³ Haali/ momalas bam mo diki pi 'peni mo ma he'k e mo walla mii kun nyo/ anyo/ mo walla a'di jin miinu ka ma' mo.

⁴ Hili jasi me'd jin teskunu aman ka Arumgimis mo mmota imandhu to mo gom gwom 'borga/ mo tani wakan aman torkina gwo mo, yisa mmomii mii mmo'bor 'kwani bwa mo yisa, hili mmo'bora Arumgimis bwa i is mo, a'di jin nyo/ki'da dum bam mo be.

⁵ Haali/ aman 'konaki bu'th gwo kun onu kun ta ku ma rakakokosh mo, me'd jin misha um mo, walla mii jin dik' mii e mo gom bwa jin puru'd mo me'd jin tan ma Arumgimis aman/o gwo mo.

⁶ Wakan si'da/ aman 'konaki simm monyca e mo 'peni 'kwani mo walla 'peni um mo walla 'peni 'kwanin tiya mo, ba aman mina 'taki ta ku gun 'thekki gwo mo gom to mo me'd uni kun dhunu ki she/ mo goma Kristhos mo.

⁷ Hili aman takina 'kwani kun 'thup ma du mo e bwaman um mo me'da yim jin hilki'da hil mo gom u'cim piti mo be.

⁸ Wakan aman usha e jo'co/ mo gom bwa jin o am ki um mo. Aman thosonkina is mo mmonyaka nyak' ki um mo, yisa jasi gwo gom gwom 'borga/ ma Arumgimis mo, hili si'da/ is bam gana/ mo haali/ um warkin ki uni kun ena am ki en gana/ mo be.

⁹ Haali/ um kaki miim bam jin miina aman to e mo dhali mii gun 'batha'ba'th mo, iwak' mo. Aman miikina mii mon'thiny mo dhali ki montee ilu/ mo ki aman mina 'taki diki dhu ton di'tin e 'ba/ apo/ jar' kamu/ mo me'd jin 'kokina am mmo'ci gwom 'borga/ ma Arumgimis e um mo be.

¹⁰ Um ta iman/o gwo mo dhali Arumgimis si'da/ mo gom mii ma gayiin bam mo dhali mii kun ta ku ma kar/e mo dhali mii kun daru/ ki thalkin mo ibwambori um kun ta imangam gwo is mo be.

¹¹ Haali/ um mishki um mo me'd mii kun miina com mo gom u'cim piti mo tani aman malaskina um ka 'dete/ 'dete/ mo dhali 'bi'th uma du is mo dhali kan um gwo mo

¹² mmo'ko 'ko jin ha me'd mo goma Arumgimis mo, a'di jin yukki um mo e bampam pitin' gana/ mo dhali monyca mo be.

¹³ Dhali aman si'da/ 'bora Arumgimis bwa i is mo ki tikir' tikir mo gom mii yan mo haali/ ki um bu'thki gwo ma Arumgimis mo jin cik'kina um 'peni aman mo tani um bu'thki a'di mo me'd gwo'j 'kwani yisa, hili me'd a'di jin ta a'di mo, a'di jin ta gwo ma Arumgimis mo, a'di jin diki'd mo mmo/um mo e um kun gamki gwo is mo be.

¹⁴ Haali/ um, iwak' mo, um warkin ki imanthok mii mo ka kaniisa ka ris mo kun ta ku ma Arumgimis mo eya Kristhos jin ta'da Yesus mo, uni kun 'kokin mo e Pa Yahuudiyya mo. Haali/ um 'koshkina is ka nyor mo ki ton tal' de/ mo 'peni 'kwani gi bampam bum mo me'd mii kun miikunu uni mo 'peni 'Kwani Yahuuda/ mo,

¹⁵ uni kun 'koshki Tapa Yesus jwa mo nyakki imanci gwo ma Arumgimis kadhamo/ mo dhali ur am ka pije/ gara/ mo dhali mii gi wakan diki 'bora Arumgimis bwa mo dhali uni ta 'kup ki 'kup mo gom 'kwani 'baar mo

¹⁶ mmononkina uni aman bway mo 'peni mo'or gwo e 'kwani kun 'koki ta 'Kwani Yahuuda/ mo ki uni minu 'taki woth mo. - Wakan me'd isa yempa/ mo uni 'tu'dki miinthus buni ki piny piny mo. Hili anyor ma Arumgimis pu'dki'd apo/ uni ki 'ta'b mo.

ABuulus Dina Gwo Ibwa mo Mmibu'ti 'Kwanij' Kaniisa Dok/e mo

¹⁷ Hili me'd jin 'thissa/ kwa/kunu aman bwa mo 'peni um iwak' mo, ki ari mo mo e bu'ngwar is mo tani, yisa eya du mo tani aman palkina mii mo ka daran du kagahara mo dhali o bwa ki o shiyi'd mo mmo'tora tor ki um ka karambuye/ mo.

¹⁸ Haali/ aman napa mmopu'dku/ i um mo - aha/ Buulus dok/e dhali dok/e mo - hila Setaan nonki aman 'kup mo.

¹⁹ Haali/ mo ma 'terj kapem bam walla moj'kuny bwam bam walla toj'kup jin dhuna aman 'ba/ ki ca mo ibwambori Tapa Yesus bana mo gom pu'd piti jin mina a'di pu'du/ mo tani a'di ta'da ta mo? A'di diki ta uma?

²⁰ Haali/ um ta tontak bam mo dhali moj'kuny bwam bam mo be.

3

¹ Wakan ki aman mola 'dim 'kup naskina/ mo tani aman okina bwa mo ki aman minu dhalku/ mo nj'ko'd mo e Pa Athina mo aman 'cena mo

² dhali aman hashkina aTimuthawuus mo, a'di jin ta'da kam bana mo dhali a'di jin ta'da manmii to mo goma Arungimis mo gom gwom 'borga/ ma Kristhos mo, mmotel um sho'k mo e mojgam gwo is bum mo dhali mmomas um mo,

³ ki wathin tal 'derj kamu/ minu 'koki joç mo ki monto'c bwa gwansan mo. Um ki is bum mishki mo mo ki a'di yansan ta tom bana jin midi 'bag ana e mo be.

⁴ Haali/ me'd jin 'kona aman nyakki um mo tani aman torkina um gwo gwansani twa/a/ mo ki ana mina isi 'kosh ka nyor mo e monto'c bwa mo, me'd jin pu'dkina a'di kan mo me'd jin mishkina um mo be.

⁵ Gom 'kup mii yansan mo ki aha/ mola a'di 'dim 'kup mo naskina/ mo tani aha/ hashkina gwo mo ki aha/ mina 'taki mish mojgam gwo is bum mo, gom mojko/ is mo ka manpal 'kwani mo gamki bwaya kamu/ mmopal um mo, ki miin tom bam midi 'taki ta jim pe'th mo be.

⁶ Hili shwane/ me'd jin pu'dkin ma Timuthawuus mo e am mo 'peni um mo tani dhali kalki aman gwom 'boron mo gom mojgam gwo is bum mo dhali mo/ en bum mo dhali be'd gwo mo ki um isa yempa/ kaki aman e mo ki bwan'kush mo dhali kwa/a/ ki 'kosh um mo mmopar am e mo, me'd jin 'koshkina kwa/ a/ aman si'da/ mo mmopar um e mo -

⁷ haali/ gom 'kup mii yan mo tani iwak mo eya ris mo ma cis bam mo dhali monto'c bwa mo tani aman 'kokunu mo mmomas mo ki um mo e mojgam gwo is bum mo be.

⁸ Haali/ shwane/ aman 'kokina mo wakki/ um mini tel sho'k e Tapa mo be.

⁹ Haali/ mo jin 'boruwa 'bor bwa i is mo ki mii gi wakata imina aman ici eya Arungimis mo gom um mo goma ris bwan 'kunyga/ suru'dki amana a'di jin takina aman gom gway bum ibwambor ma Arungimis mo

¹⁰ mmo'tho mo ka daran du mo ki mon'thiny ilu/ mo dhali montee mo ki aman mina tora tor ki um ka karambuye/ mo dhali thipa thip mo a'di jin hara um mo e mojgam gwo is bum mo be.

¹¹ Dhali shwane/ dhalki Arungimis bana dhali Ababa ki is piti dhali Tapa Yesus Kristhos cu'thki aman bway bam e um mo

¹² dhali dhalki Tapa a'di dhu um mmomar mo/en is mo ka rem 'kup mo dhali ci um mo/en jin ishki'd ka enthus ka rem 'kup mo, dhali goma ris 'kwani 'baar mo, me'd mii jin miikina aman mo gom um mo.

¹³ Wakan ki a'di midi tela dum bum sho'k mo ki dar gi mii kun 'koni 'ba/ mo e mii gun kogu mo ibwambor ma Arungimis bana mo dhali Ababa mo ki pu'd jin mina Tapa Yesus bana pu'du/ mo nyakka ris unim piti kun dhelelkin mo be.

4

Mii kun Miina Wathi/ Mii Mii mo Mmo'bora Arungimis Bwa mo

¹ Kwality 'te/ ba/ iwaka, aman yukkina um mo dhali malas um mo e Tapa Yesus mo ki um me'd jin da/arkina um gwo mo 'peni aman mo gom gwo

jin mina um ka 'ko mo ba/ dhali 'bora Arungimis bwa mo jasi me'd mii jin miikina um mo tani miiyi wakan ki nyanye/ mo dhali ki nyanye/ mo.

² Haali/ um mishki gwo jin ye'thkina aman um sho'k mo e Tapa Yesus mo be.

³ Haali/ a'di yansan ta bwa ma Arungimis mo, ki um minu dhagam mo, ki um mini 'do is mo 'peni mo jin miinu miinyal mo,

⁴ ki um ka 'dete/ 'dete/ mo mini mish mo mo mmobu'th up gom is bum gana/ mo e mii jin kogu mo dhali montak mo,

⁵ yisa e mii jin dhunu e ki 'thir 'thir mo mmo'dap e mo me'd mii kun miina 'kwani kun daran ki ji gi luju mo, uni kun 'koki misha Arungimis mo,

⁶ dhali ki wathin 'denj kamu/ midi diki dhanj gwo mo dhali mii akam piti ki shi/ e mii yan mo, haali/ Tapa a'di ta'da manrica ris to gwansani 'baar mo me'd gwo jin rumkina aman um itwa/a/ ki 'bi'th 'bi'th mo.

⁷ Haali/ Arungimis diki yuk ana mo gom mii en'dap mo, hili e miin dhelelga/ mo.

⁸ Hili a'diyin jin midi ush gwo yansan mo tani a'di ushki gwo gi wathi/ yisa, hili Arungimis mo, a'di jin ciki Shi/in piti jin Dheleladhelele e um mo be.

⁹ Hili isi gwo gom mo/ eni e mo iwak mo um yisa mini mii ta gi jan 'denj kamu/ jin midi 'kwar um to mo, haali/ um ki is bum torkunu gwo ka Arungimis mo ki um mini ena en ka rem 'kup mo

¹⁰ dhali ka jin gana/ umi 'baar mo enki iwak mo kun 'kokin mo e Pam Makiduniyya mo. Hili aman malaskina um mo iwak mo mmomii uni ki nyanye/ mo dhali ki nyanye/ mo,

¹¹ mmogu a'di ki e mo mmo'ko ki 'dantar mo, mmohil isi miim bumi e mo, dhali mmomiiya tu'c ki me'd bum mo me'd gwo jin kankina aman um mo.

¹² Wakan ki miim bum mini yuk montak 'peni 'kwani kun 'kon ka piye/ mo dhali mmo'koki 'tho to 'peni cin tiya mo.

Ku gun Wukin mo dhali kun 'Ko ki E mo ka Tee jin Mina Tapa Pu'du/ mo

¹³ Hili aman mina 'koki dhal um bway mo mmota pus moyi, iwak mo, isi gwo gom uni gwansan kun ishki e mo ki um minu 'koki jwaka/ mo me'd mii kun miina kun tiya kun daran gi mo ma 'tenj kape/ mo.

¹⁴ Haali/ me'd jin gamkina ana gwo is ka Yesus wuki'd mo dhali cu mo dok/ e, isi kan si'da/ wakan eya Yesus mo tani Arungimis midi 'doyu/ nyakki a'di si'da/ uni gwansan kun ishki e mo be.

¹⁵ Haali/ a'di yansan ibahkina aman e um mo ki gwon Tapa mo ki ana kun 'kona ki e mo dhali kun bockin mo ntagi pu'd jin mina Tapa pu'du/ mo tani ana mina 'koki sul uni gwansan bway mo kun ishki e mo be.

¹⁶ Haali/ Tapa ki is piti a'di midi thulu/ 'peni momis ki cuuwa/ jin kanu mo, nyakka yuk ma man'doyu gwo jin ca'd mo, dhali nyakki ko ma poome/ ma Arungimis mo. Dhali uni gun wukin eya Kristhos mo tani mini cu misi twa/ a/ mo be.

¹⁷ Dhali yan'ko'd ana kun 'kona ki e mo dhali kun bockin mo minu nyak bu'th mo nyakki uni mo mmonta/ 'de/ mo mmogam Tapa 'kup mo e bwaa rak mo e momis mo. Dhali wakan ana mina nyak 'ko ki Tapa ki sule/ mo.

¹⁸ Dhali ki mii gi wakan mo tani malasiya malas ka rem 'kup e gwo gwansan mo ma.

5

Thosoni Is mo gom Pu'd jin Mina Tapa Pu'du/ mo

¹ Hili isi me'd gwo goma tee mo dhali yir mo mo iwak mo, um mini mii 'koki ta gi gwon 'denj kamu/ jin minu 'kwarku/ e um mo.

² Haali/ um ki is bum mishki mo ki 'bore/ mo ka tee jin mina Tapa pu'du/ mo tani a'di wana e ki wathin 'di/ jin midi yayu/ mon'thiny mo.

³ Ki 'kwani mini o gwo mo ki: Mon'ku'th is a'diheye dhali mo jin 'konu 'kom 'pempa mo tani yan 'ko'd ki jahanne/ mony'ce'd sho'k midi pu'd apo/ uni mo me'da nyor ma 'ci jin shwa'da 'bom mo. Dhali mon'kamu/ minu yeya?

⁴ Hili um yisa 'kon e mondhurumi'd mo iwaḡ mo, haala tee yansan midi diki wuny um is mo me'd mii jin miina wathin 'diyi.

⁵ Haali/ umi 'baar mo ta iya/ gi mon'kush mo dhali iya/ ma tee mo. Ana 'konaki ta uni gi mon'thiny mo walla gom mondhurumi'd mo.

⁶ Wakan dhalki ana ki ish e mo me'd mii kun miina 'kwanin tiya mo, hili dhalki ana 'kona ki e i'kup mo dhali tim mo mo ki 'cese/ 'cese/ mo.

⁷ Haali/ uni gwansan kun ishki e mo tani ishki e mo e mon'thiny mo dhali uni gwansan kun 'koshkin ma su mo tani 'koshkin ma su mo mon'thiny mo be.

⁸ Hili me'd jin takina ana uni ma tee mo tani dhalki ana tima mo mo dhali hitha rapa/ gi mon'gam gwo is mo dhali mo/en mo dhali gom ton'kup mo tani a'di ta mo ma 'teḡ kapem bana gi bway mowoth mo be.

⁹ Haali/ Arungimis diki 'kawur ana mo goma nyor mo hili ki ana mina bu'th bway mowoth mo e Tapa Yesus Kristhos bana mo,

¹⁰ a'di jin wuki'd mo gom ana mo, wakan wakki/ ana 'kona ki e mo walla isha e mo tani ana mina 'taki 'ko nyakki a'di mo be.

¹¹ Wakan 'bithi ci adu is ka rem 'kup mo dhali nyanji anyan ka rem 'kup mo jasi me'd mii jin miikina um mo be.

Kwalany 'Te/ Ba. Momalas mo dhali Monthe Me'd mo

¹² Hili aman yukkina um mo iwaḡ mo, mmotak uni gwansan kun miiki mii e bwam um mo dhali uni gun can ki um e Tapa mo dhali uni gun logomki um ki gwo mo,

¹³ dhali takī uni mo ki tak jin caaca mo e mo/en mo goma tu'c buni mo be. Hili tayi gi mo ma ku'th is e bwaman is bum gana/ mo.

¹⁴ Dhali aman malaskina um mo, iwaḡ mo, ki um mini to'k uni gwahan kun tana piny is mo, dhali 'bithi uni gwansan adu is mo kun 'thina buye/ ki miin to mo, dhali wothī/ uni kun 'ka'da is mo, 'kuḡi bwa ki 'kari'th mo gom uni 'baar mo.

¹⁵ Hili ki 'bore/ ki jan tal 'den kamu/ 'peni bwam um midi diki rak tonthusi bway mo gom tonthus jin miinu mo, hili isa yempa/ simmi mii e mo mmomii miim 'boro'd ka rem 'kup mo dhali gom 'kwani 'baar mo.

¹⁶ 'Kunyi bwa mo isa yempa/ mo.

¹⁷ 'Thoyi ki tikir tikir mo.

¹⁸ Ciyi mo jin 'boruwa 'bor bwa i is mo goma ris mii 'baar mo kun tu'k 'ban mo. Haali/ a'di yansan ta bwa ma Arungimis eya Kristhos jin ta'da Yesus mo gom um mo be.

¹⁹ Dhalku/ Shi/in ki us mo.

²⁰ Dhalku/ gwo jin onu is ki wak mo.

²¹ Hili nyo/i aris to 'baar mo. Teli mo e a'di jin 'boro'd mo.

²² 'Doyi is mo 'peni aris e 'baar mo kun ta tonthus mo.

²³ Dhalka Arungimis jin ta mon'ku'th is ki is piti mo dhagam um ka 'bimpil mo, dhali dhalki shi/in bum dhala kashiram bum dhali bungwar is bum minu dhu ki 'dantar mo dhali dar gi monthalkin mo gom pu'd jin mina Tapa Yesus Kristhos bana pu'du/ mo be.

²⁴ A'di jin yukki um mo tani ta a'di jin ta isin gana/ mo dhali a'di midi mii a'di mo.

²⁵ Iwaka, 'thoyi gom aman mo ma.

²⁶ Theyi arisa waƙ me'd mo ki 'twa/ jin pinu ki jin ƙo/ mo.

²⁷ Aha/ ƙankina um gwo mo ki gwon Tapa mo ki gwo yansan minu deŋ e mo goma risa waƙi 'baar mo be.

²⁸ A'the gi Tapa Yesu Kristhos bana mo midi di e um mo be.

Gwo jin 'Ko'd jin 'Kwar ma Buulus gom 'Kwani gi Pan TASALUNIIKI mo

Monthe Me'd mo

¹ ABuulus dhala Silwaanus dhala Timuthawuus mo.

Eya kaniisa gi Pan Tasaluniiki mo eya Arungimis jin ta'da Babam bana mo dhali Tapa Yesus Kristhos mo be.

² A'the e um mo dhali monku'th is eya Arungimis a'di jin ta'da Baba mo dhali Tapa Yesus Kristhos mo be.

Gwon Dwall ka Tee jin Min ma Kristhosi Pu'du/ mo

³ Am kara ba/ mina ci mo jin 'boruwa Arungimis bwa i is mo isa yempa/ mo gom um mo iwak mo, me'd jin gama a'di ki gam mo, haali/ mongam gwo is bum 'twakki'd ka enthus mo dhali mo/en bum ka 'dete/ 'dete/ mo gom mo/en jin ena um ka rem 'kup mo a'di markunu is mo be.

⁴ Wakan aman ki is bam dhuna 'ba/ ki ca mo gom um mo eya risa kaniisa ma Arungimis mo gom sho'k bum jin telkina um mo dhali mongam gwo is bum eya ris mom bum jin 'koshu um mo dhali e monto'c bwa jin 'kokina umi mo'dim 'kup mo be.

⁵ Mii yansan a'di mishu mo eya tente/ mo ki gwon dwall ma Arungimis jin ta'da kar/e mo ki um minu 'taki dhu ki uni gun ha me'd mo gom Bampa/ ma Arungimis mo gom a'di jin 'koshkina um is ka nyor mo be.

⁶ Haali/ Arungimis ka jin gana/ karki a'di ki miinkar/e mo mmorak monto'c bwa ibway mo ki uni gwansan kun to'cki um bwa mo be

⁷ Dhali mmoci um mo ma si/is mo, um kun tashkunu ki bwana ditin mo nyakki am mo me'd jin mina Tapa Yesus 'ceeyu mo 'peni momis mo nyakki iman'doyu gwom piti kun 'bitha'bi'th mo e o'd jin shwa'd ka le'dan mo,

⁸ mmorica ri'c apo/ uni gwansan kun 'koki misha Arungimis mo dhali apo/ uni gwansan kun 'koki ha gwom 'borga/ gi Tapa Yesus bana e mo mmomii mo.

⁹ Uni mina isi 'kosh ka nyor mo gom gwon dwall jin toru gwo 'twa/a 'cesh mo gom mii ma kar/e mo, a'di jin ta mo jin minu 'ce'd sho'k ki sule/ ya ye 'ba/ mo dhali mo jin dheru bwa ki sule/ mo 'peni bun'kus gi Tapa mo dhali 'peni monycam piti gi mom'bi'th mo

¹⁰ me'd jin mina a'di pu'du/ ka tee caan mo ki a'di minu kar ki ca mo e kum piti kun dheleladhelel mo dhali a'di min ma ris 'kwani 'baar mo mer mo, uni kun gamki a'di gwo is mo, haali/ gwo jin toru e um mo tani gamkunu is mo be.

¹¹ Itagi 'pemen yan mo isa yempa/ mo tani aman 'thokina mo gom um mo ka Arungimis bana midi dhu um ki uni kun ha me'd mo ka yuk piti mo dhali thima ris 'kup mii 'baar mo kun 'boron mo dhali mii kun piyin mo 'peni mo jin gamu gwo is mo ki mom'bi'th piti mo.

¹² Wakan ki gway gi Tapa Yesus bana mo minu kar ki ca mo e um mo dhali um e a'di mo isi me'd gwo ma 'the ma Arungimis bana mo dhali Tapa Yesus Kristhos mo be.

¹ Dhali shwane/ isi gom gwo jin mina Tapa Yesus *Kristhos* bana pu'du/ mo dhali goma dhana tul'kup bana jin mina ana gam a'di'kup mo tani aman yukkina um mo iwak mo.

² Dhalku/ ki ta uni gun mina isi la yikin ki jahanne/ mo eya du mo walla la dhal cuuwa/ me'd mo walla ki shi/in mo walla ki gwo mo, walla ki gwo jin 'kwarkunu mo mmo/o ki a'di ta jim bam mo mmo'tes gwo mo ka tee gi Tapa pu'dki'd mo.

³ Dhalku/ ki dhal wathin 'denj kamu/ bway mo mmomu'th um e ki bwaya kamu/ mo. Haala tee caantan midi diki pu'du/ ciki/ mo isi ciki/ mo, mo jin dhalu gwo 'pen mo midi pu'du/ ntwa/a/ mo dhali wathin 'de/ yin jin ush gwonkan mo minu tor eya tente/ mo, a'di jin ta ya/ gi mo jin daku gwo me'd mo

⁴ a'di jin ceshki mo ki njarr mo dhali kar is piti ki ca mo apowa risa rum kun yuku gway kan ka wuny is mo walla to jin lunu mo, wakan a'di ki bu'th monyca'b piti e gu'b gi mondheleladhelel ma Arungimis mo mmobah gwo mo ki a'di ki is piti ta'da Arungimis mo be.

⁵ Kona um ki ka gwo eya, ki me'd jin dikika/ e um naskina/ mo tani aha/ torkina um gwo yansan mowa?

⁶ Dhali um mishki mo mo ki a'di jin 'tashki a'di 'twa/ mo shwane/ wakan mo ki a'di minu tor eya tente/ ka teem piti mo.

⁷ Haali/ mom'bi'th jin ta jin kup 'peni mo jin ushu gwonkan mo di'd mo hila/ mmo/um mui mo. Hili jasi a'di jin 'tashi a'di 'twa/ mo shwane/ midi mui wakan ntaga tee jin minu bu'th a'di 'peni bway piti mo be.

⁸ Dhali yan'ko'd a'din 'de/ yin jin ush gwonkan mo tani minu tor eya tente/ mo, dhali Tapa Yesus midi 'kosh a'di jwa mo ki shi/irr ki 'twam piti mo dhali 'ce'd a'di sho'k mo ki is piti mo jin mina a'di piyu/ mo dhali ki pu'd piti jin mina a'di pu'du/ mo be.

⁹ Mompu'd jin mina a'din 'de/ yin jin ushi gwonkan ipu'du/ mo ki mo jin um ma Setaan mui mo tani midi di ka ris mom'bithi 'baar mo dhali ki jamas mui ma mak mo dhali momer kun ta ku ma mak mo,

¹⁰ dhali nyakka ris mo jin hekuwa he'k e mo kun ta kun thus mo gom uni gwansan kun 'kokini mo'ce'd sho'k mo haali/ uni ushki gwon gana/ en mo dhali wakan ki uni minu 'taki woth mo.

¹¹ Wakan Arungimis a'di hashki'da po/ uni adhan mo jin susuwa sus mmoper mo 'peni gwon gana/ mo mmodhu uni mmogam a'di jin ta thus ki thus is mo.

¹² Wakan ki uni 'baar mo minu wak mo, uni kun 'koki gam gwon gana/ is mo, hili uni 'kola 'ce mo e momii mui kun 'koki ta kun kar/e mo.

Mo jin Kwanykunuwa Kwany mo gom Bway Mowoth mo

¹³ Hili am kara ba/ imina ci mo jin 'boruwa Arungimis bwa i is mo isa yempa/ mo gom um mo iwak mo, um gun enu ki Tapa mo, haali/ Arungimis kwanyki um 'peni ka mun'kup mo mmota ku gi minu woth mo e mui kun dhagamkunuwa dhagam ki Shi/in mo dhali mo jin gamkunu gwo is e gwon gana/ mo.

¹⁴ E mui yan mo a'di yukkina a'di um mo e gwom 'borgam bam mo, wakan ki um mini bu'th monyca gi Tapa Yesus *Kristhos* bana mo be.

¹⁵ Wakan mo tani iwak mo, doshi mo dhali teli sho'k mo dhali budhi gwo kun lu'u um mo, a'di jin torunu um ki aman mo, wakan, ki gwo jin onu ki 'twa/ mo walla ki gwo jin 'kwaru mo be.

¹⁶ Dhali shwane/ dhalki Tapa Yesus *Kristhos* bana ki is piti mo dhali Arungimis jin ta'da Babam bana mo, a'di jin enki ana mo dhali ci ana

momalas jin midi di ki sule/ sule/ ya ye 'ba/ mo dhali mo ma 'terj kapej gana/ ka 'the mo.

¹⁷ Dhalki a'di malaski'da dum bum mo dhali tel uni sho'k mo eya risa tuca 'borga/ mo dhali gwo mo be.

3

Thoyi gom Aman mo

¹ Kwality 'te/ be, iwak mo, 'thoyi gom am mo, ki gwo gi Tapa midi pala/ ki lala'th mo dhali pi mii e mo me'd mii jin miikina a'di e bwam um mo

² dhali ki aman minu 'cu'k mo 'peni 'kwani kun daran gi 'ce mo dhali kun ta thus ki thus mo. Haali/ 'kwani 'baar mo yisa ta gi gwo jin gamu is mo yisa.

³ Hili Tapa a'di ta a'di isinj gana/ mo. A'di midi 'bi'th um is mo dhali ji um 'peni a'dinthus 'de/ yin mo.

⁴ Dhali aman takina gi mo jin wukina aman Tapa jwa i is mo gom um mo ki um 'kon mmomii to shwanetan mo dhali ki um mini mii to kun kankina aman um gwo mo be.

⁵ Dhalki Tapa a'di cu'thki'da dum bum mo e mo/en mo goma Arumgimis mo dhali e sho'k jin telu mo eya Kristhos mo be.

Mii ma Mure/jin 'Ko 'Kwani 'Iba/ mo gom Mii jin Minu Imiyya Tu'c mo

⁶ Dhali shwane/ aman kankina um gwo mo iwak mo, e gway gi Tapa Yesus Kristhos bana mo ki um mini non is bum mo 'peni ikana tiya mo, uni kun 'kokin mo e mo ma piny is mo dhali yisa isi e gwo jin luku mo jin bu'thkina um 'peni aman mo.

⁷ Haali/ um ki is bum mishki mo mo gom um ka ba/ imini ta imanthok aman mii mo. Aman 'konaki ta apiny is mo me'd jin 'kokina aman e um mo.

⁸ Aman 'konaki shwa tonte/ gi wathin tal 'derj kamu/ mo ki dar gi to jin ro'du mo. Hili ka tu'c bam jin 'batha'ba'th mo dhali ki miin to jin miikina aman ki mon'thiny ilu/ mo dhali ki montee mo tani ki aman mina 'taki 'koki dhu ton ditini 'ba/ acinj kamu/ 'peni um mo.

⁹ A'di yisa wakana haali/ aman 'konuki dhal bway mo mmomii kan mo, hili mmo'ci um e miim bam kun bo'ta am mo mmota she/mm mo ki um mini ta imanthok aman mii mo be.

¹⁰ Haali/ isi kani me'd jin 'kokina aman e um mo tani aman cikina um gwonkan yansan mo ki: Wakki/ wathin tal 'derj kamu/ midi diki miyya tu'c mo tani dhalku/ ki dhal a'di bway mo mmoshwa tonte/ mo.

¹¹ Haali/ aman cikina gwo mo ki uma tiya 'kokin mo e mo ma piny is mo, dhali ta imankul gu'b 'te/ mo, mmo'koki miyya tuca tiya mo 'te/.

¹² Dhali 'kwani gi wakansan mo tani kankina aman um gwo mo dhali malas mo e Tapa Yesus Kristhos mo mmomii to ki me'd buni ki shwam mo dhali mmogam to ka tu'c buni jin mina uni mii ta mo.

¹³ Iwaka, dhalku/ is ki wu e mo mmomii miim 'borga/ mo.

¹⁴ Wakki/ wathin tal 'derj kamu/ midi ush gwo ha e mo jin ona aman mo eya warka/ yansan mo tani bu'ki wathi/ yan ka piye/ mo dhali dhalku/ a'di ki 'dish is mo mmonyak to mii ki a'di mo ki a'di mina isi 'theya 'the mo.

¹⁵ Dhali dhalku/ ki hil a'di me'd a'di jin ta 'kup ki um mo, hili rumi a'di ki gwo mo me'da kam bum mo.

Mom'bor Mii jin Dhalu Me'da Po/ 'Kwani mo

¹⁶ Dhali shwane/ dhalki Tapa gi mon'ku'th is ki is piti mo ci um mon'ku'th is mo eya ris mo 'baar mo dhali ka ris 'twan'kal kuku/ mo. Tapa midi di nyakki umi 'baar mo.

¹⁷ Aha/ Buulus 'kwarkina monthe me'd yansan ki me'd pem gana/ mo. A'di ta'da du'd mii kun 'kwarkika/ eya ris gwom pem mo. A'di ta miim pem jin 'kwarkika/ gwo mo.

¹⁸ Dhali a'the gi Tapa Yesus Kristhos bana midi di e umi 'baar mo be.

Gwo jin Twa/a/ jin 'Kwar ma Buulus goma TIMUTHAWUUS mo

Monthe Me'd mo

¹ ABuulus a'di jin karu ki she/ mo goma Kristhos jin ta'da Yesu mo ki gwoŋkan ma Arungimis mo jin ta'da Manwoth bana mo dhala Kristhos jin ta'da Yesu jin ta mo ma 'teŋ kapem bana mo be.

² Eya Timuthawuus mo, a'di jin ta'da 'cim pem gana/ e moŋgam gwo is mo.

A'the dhali momii dhali moŋku'th is 'peni Arungimis jin ta'da Baba mo dhala Kristhos jin ta'da Yesu Tapam bana mo be.

Arum jin Rumuwa Po/ Gwon Thus jin Toru mo

³ Me'd jin tirrihkika/ / e ki gwo mo me'd jin yakika/ ya mo e Pam Makiduniyya mo mmoča'b mo e Pan Epasus mo ki /e mini 'taki kan 'kwanin tiya gwo mo mmo'koki ŋor gwontora kamu/ jin diki she/ mo

⁴ walla si'da/ mmo'koki ciya hirdhe/ ki is buni mo gom gwo lolop jin ta ja mak buni mo dhali mo jin beledhu gwo mo jin dar ki 'pemen mo, a'di jin shushki'da du mo mmodot gwo mo 'te/ mmodhal mii e i is mo gom gwo jin yedhu sho'k jin piyi'd 'peni Arungimis mo, a'di jin ta gwo e moŋgam gwo is mo.

⁵ Hili tom bam jin 'dona am ki e mo mmokankina aman gwo mo tani ta mo/ en be, a'di jin piyi'd 'pena du jin dheleli'd mo dhali 'peni 'twa/ ma dum 'borga/ mo dhali 'peni moŋgam gwo is jin dar ki washila/ mo.

⁶ 'Kwanin tiya mmogaskina uni mo 'peni to gwansan mo tani uni wanykin ki wanya/ wanya/ mo e gwo kun 'ko bwa 'te/ mo kun 'kokina uni mmotora ŋor mo,

⁷ mmo'kona uni gwo ibwa mo mmota uni kun ta imantor gwo mo gom gwoŋkan jin cinu mo. Uni dar ki mo jin mishu gwo 'ban mo gom gwo kun ona uni mo walla gom to kun ona uni gwo mo ki gwo jin gwona uni 'kus mo be.

⁸ Dhali ana misha mo mo ki gwoŋkan jin cinu mo, a'di 'boro'd mo, wakki/ wathin 'deŋ kamu/ midi mii a'di mo me'd jin dhala gwoŋkan a'di bway mo mmomii mo.

⁹ A'di midi mii mish gwo yansan 'ban mo, ki gwoŋkan jin cinu mo yisa 'thikunuwa 'cesh mo gom uni kun ta kuŋ kar/ e mo, hili gom iman/ ush gwoŋkan mii mo dhali iman/ ush gwo ha e mo, dhali gom ku gi ushuna ush goma Arungimis mo dhali imanmii miinthus mo, dhali gom ku gi 'koki dhelel mo dhali gom ku gi 'koki dhu mii kun kogu mo dhali gom iman'kosha mee mo ki icom mo dhali iman'kosha mee mo ki ikum mo dhali iman'kosha mee mo ki 'kwani mo,

¹⁰ dhali 'kwani kun mii miinyal mo dhali imanha'k 'pen ceŋ gwas mo dhali imankwal 'kwani mo dhali imanta ŋor mo dhali imanthul me'da po/ gwo ka mak mo dhali ma to gunn kun miinu ki ca'ckon mo e gwoŋ gana/ jin toru mo,

¹¹ isi ki gwo gi monyca gi gwom 'borga/ mo jin ta ji ma Arungimis jin 'boru mii mo, a'di jin cikunu aha/ mo mmodhu mo be.

Mii ma Buulus jin 'Bora A'di A'bor Bwa i Is mo gom Mo jin Miinuwa Mii mo

¹² Aha/ 'borkina a'di bwa i is mo a'di jin ciki aha/ mom'bi'th mo gom a'di yan mo, a'di jin ta'da Kristhos jin ta'da Yesu mo jin ta Tapam bana mo, haali/

a'di mishki aha/ mo ki aha/ tana ji isin' gana/ mo mmokarkina a'di aha/ 'pen ka pije/ mo mmomii to mo gom a'di mo,

¹³ba aha/ 'thissa/ walkina gwo sor mo dhali aha/'koshkina 'kwani mo dhali aha/ sorkina a'di mo. Hili aha/ bu'thkina momiimii mo haali/ aha/ miikina miiim pus mo mmodika/ e mo jin daru ki gwo jin gamu is mo.

¹⁴Dhali a'the gi Tapam bana guski'd ki sho'k piti gom aha/ mo nyakki mongam gwo is mo dhali mo/en mo kun 'kon eya Kristhos jin ta'da Yesus mo be.

¹⁵Gwo yan jin onu mo ta gwoŋ gana/ mo dhali a'di ha me'd ki han' gana/ mo mmobu'th a'di 'baar mo ka Kristhos jin ta'da Yesus pu'dki'd mo e mony'cesh yan mo mmowoth uni kun miiki miinthus mo. Dhali aha/ tana 'kan'kup jin ta'da manmii miinthus mo.

¹⁶Hili aha/ bu'thkina momiimii mo gom 'kup mii yan mo, ki, e aha/ mo tani me'd jin taka/ 'kan'kup mo tani Yesus Kristhos mido 'taki tor eya tente/ bwa ma dum pitiŋ gana/ mo jin 'kuca a'di ki 'kari'th mo mmota she/mm mo gom uni gwansan kun mini 'ko mo mmogam gwo is mo e a'di mo gom moŋ'koki/e ki sule/ sule/ ya ye 'ba/ mo.

¹⁷Eya Malik jin di'd ki she/ yil mo, jin mido mol wu mo, dhali jin molu mish ki e ga'cesh mo, a'di jin ta'da Arungimis mo jin di'd 'den' gana/ mo, a'di minu tak mo dhali kar ki ca mo goma sule/ mo dhali ki sule/ ya ye 'ba/ mo. Amen.

¹⁸Gwoŋkan yansan kankika/ /e mo, Timuthawuus, /e jin ta ya/m pem mo, isi ki gwo kun onu is mo kun bagu mo, uni kun torokunu mo gom /e mo, ki /e mmoshi/irrkunu ki uni mo tani mini 'taki asa asa 'borga/ mo

¹⁹mmotel mongam gwo is sho'k mo dhali 'twa/ ma dur' gana/ mo. Mmo/ush gwo 'peni 'twa/ ma du mo tani 'kwanin tiya pwa'thki mongam gwo is buni mo.

²⁰E bwaman uni gwan mo tani ta iHiminayus mo dhala Iskandar mo, uni 'kon mo, uni kun cikika/ ka Setaan mo ki uni mini da/ar mii mo mmo'koki wal gwo sor mo be.

2

Gwo jin Yedhuwa Ye'th Sho'k mo gom Isi Gwo Goma 'Tho mo jin Minu 'Tho mo

¹Gwo jin ta jin t'wa/a/ ki gwo 'baar mo tani a'dihe/ be. Aha/ tirrishkina atirrish ki gwo mo ki mo jin di'buwa di'b is mo dhali mo ma 'tho mo jin 'thonu mo dhali gwo jin wothu/ is mo dhali mo jin cinuwa 'borim bwa i is mo minu mii mo gom 'kwani 'baar mo,

²gom imalik mo dhali gom 'kwani 'baar mo kun 'ko 'kom 'penkapan mo, ki ana mina 'kowa lam bana ki shwam mo dhali ki mon'ku'th is mo dhali ki mii ma gayiin mo dhali ki ana minu tul 'twa/ 'kup mo ki momar mo ka ris 'twaŋkal kuku/ mo be.

³Mii yansan a'di 'boro'd mo dhali a'di mishkunu bu'th mo e jis/ e ma Arungimis jin ta'da Manwoth bana mo,

⁴a'di jin dina gwo ibwa mo goma ris 'kwani 'baar mo ki uni minu woth mo dhali mmopu'du/ mo mmonyith' gwoŋ gana/ mo be.

⁵Haali/ Arungimis tal 'de/ mo be dhali jan 'de/ di'd si'da/ jin doshki'd e bwaman ma Arungimis mo dhali 'kwani mo, a'di jin ta wathi/ jin ta'da Kristhos jin ta'da Yesus mo,

⁶a'di jin ciki is piti mo mmota to jin wani 'kwani 'baar mo 'ba/ mo. Gwontor gom a'di mo tani a'di torokunu mo ki embul ma teem piti mo.

⁷Gom a'di yan mo tani aha/ karkunu 'pen ka pije/ mo mmota amanci gwo mo dhali mmota a'di jin karu ki she/ mo (Aha/ tora gwo ki tor gana/ mo. Aha/

dinaki ta aṭor mo). Aha/ tana amantor 'kwani kun 'koki ta 'Kwani Yahuuda/ gwo mo e moṅgam gwo is mo dhali e gwoṅ gana/ mo be.

⁸ Aha/ dina gwo ibwa mo si'da/ eya ris mo 'baar mo ki 'kwani mini mii 'tho mo, mmo'de'k me'd kun dhelelini mis mo ki dar ka nyor mo walla dar gi wala jin walu mo ki ṭas ṭas mo.

⁹ Wakan si'da/ up mini nyor is bunin gana/ mo ki dar gi mo jin minu ṭera ter mo dhali mmohi'th burrine/ i is mo kun gamana gam mo kun diṭ ma po/ e mo, yisa mmoṭo'da mur kagahara mo walla mmohi'th 'dolkon gana/ i is mo walla mmohi'th dhema/ i is mo walla mmohi'th burrine/ kun 'bitha yol she/ ki 'bi'th mo.

¹⁰ hili uni mini nyor is ki miim 'borga/ mo me'd jin mina a'di ha me'd mo gom up kun o gwo ki 'twa/ mo ki uni tana gayiin mo gom ji gi luṅu mo.

¹¹ Dhalka 'bom da/ar mii mo mmoṭa'b ki shwam mo dhali ṭa'b ki ṭa'b 'ko'd me'di 'baar mo.

¹² Aha/ dinaki dhala 'boma kamu/ bway mo mmota amantor gwo mo walla mmota gi moshir apo/ 'kwaniṅ gwas mo. Ayim mididi mii ṭa'b ki shwam mo.

¹³ Haala Aadam a'di ta a'di jin uku ntwa/a/ mo dhala Hawwa ṅ'ko'd mo.

¹⁴ Dhala Aadam yisa ihe'kkunu eya, hila 'bom a'di ihe'kkunu e mo dhala jin warki'd ka mandhan gwo mo be.

¹⁵ Hila 'bom minu woṭṭ mo ki mo jin dhodhu uci mo wakki/ ayim mididi rash di mo e moṅgam gwo is mo dhali e mo/ena en mo dhali mii kun dheleladhelel mo dhali mii kun miinu ki dar gi mii ma ṭer mo.

3

Monthum jin Thumkunu mo gom Jwahan 'Kwaniṅ Kaniisa mo

¹ A'di ta gwo jin ta isin gana/ be jin onu ki: Wakki/ wathin 'den kamu/ dina gwo ibwa mo mmomiya ṭu'c jin miina jwahan 'kwani mo tani a'di ona bwa ka ṭuca 'borga/ mo be.

² Wathi/ gwanyjaka/ mididi mii diki mii ta gi mii 'ba/ mo, dhali a'di mididi mii ta ga 'bom jasi 'de/ mo, dhali a'di mididi mii ta wathi/ jin min ma du 'tim mo, dhali a'di mididi mii ku'th is ki 'cese/ 'cese/ mo dhali a'di mididi mii diki lo'b is piti nycine/ mo, dhali a'di minu mii ta gu'b piti ṅal mo, dhali a'di mididi mii ta gwocon ki gwocon mo mmoṭor gwo mo,

³ dhali a'di mididi mii diki 'dish mo ma su is mo, dhali a'di mididi mii diki mii ki ra'b mo hili a'di mina e mii 'thupa'thup mo, dhali a'di mididi mii diki wala le'd ki ṭas ṭas mo, dhali a'di mididi mii diki ta aman/ena guurush mo si'da/.

⁴ A'di mididi mii mish kuṅ gu'b piti dhu ki 'bore/ mo, mmodhu uciṃ piti mmo'dapa bora 'cesh mo mmocik gwo mo dhali mmoṭaka ṭak mo ka ris 'twanjal kuku/ mo.

⁵ Haali/ wakki/ wathi/ diki mish kuṅ gu'b piti dhu ki 'bore/ mo tani ba ki jin ta'da ta mmina a'di mish 'kwaniṅ kaniisa ma Arungimis dhu mo?

⁶ A'di mididi mii diki ta wathi/ jin ta jin this mo jin daka bu'th gwo jin gamu is mo haali/ a'di mididi 'taki se ki 'pura/ 'pura/ mo ki 'ba/ jin kara a'di ki ca mo, dhali biṭ mo e mo jin waku tapa ma ruma 'cesh mo.

⁷ Bahili a'di minu mii maṅ mo ki 'kwani kun 'kon ka piye/ mo haali/ a'di mididi 'taki biṭ mo e mo jin wakuwa wak mo dhali eya gume/ gi tapa ma ruma 'cesh mo.

Monthum jin Thumkunu mo gom Imanhila Hil mo goma Kaniisa mo

⁸ Wakan si'da/ 'kwani kun dhunu mo mmohil to ma kaniisa i e mo tani uni mini mii ka/ aka/ mo, mmo'koki ta gi 'twa/ jin onu gwo isu/ mo, dhali mmo'koki jima su i 'twa/ mo, dhali mmo'koki pur bwa mo goma guurush mo.

⁹ Uni mini mii bu'th gwo jin ċinu ki jim bag mo jin gamu is mo ki 'twa/ ma dun dhelegam buni mo.

¹⁰ Dhali uni si'da/ minu mii nyo/i twa/a/ mo. Dhali yan'ko'd wakki/ uni nyo/ u ki is buni mo ki uni ta uni kun dar gi mii 'ba/ mo tani dhalki uni mii to mo me'd uni kun cila to hil mo goma kaniisa mo.

¹¹ Wakan si'da/ up mini mii ka/aka/ mo, mmo'koki thutha thu'th 'pen mo, hili uni mini ta uni kun mini 'tima du mo, mmota uni isiṅ gana/ mo eya ris to 'baar mo be.

¹² Dhalki uni kun cila to hil goma kaniisa mo ta gi up jasi 'dete/ 'dete/ mo dhali dhalki uni mish uċim buni dhu mo dhali kuṅ gu'b buni ki 'bore/ mo.

¹³ Haali/ uni gwansan kun miiki to ki 'bore/ mo me'd uni gun cila to hil mo goma kaniisa mo tani uni gam 'twa/ maṅ mo gom miinṅ gana/ jin gama uniya du is mo gom is buni mo dhali si'da/ adhan mo jin wunu jwa i is mo e moṅgam gwo is mo, a'di jin diki'd eya Kristhos jin ta'da Yesus mo be.

Gwo jin Ćinu ki jim Bag mo gom ji Luṅ Bana mo

¹⁴ Aha/ tosha mmopu'dku/ i um ki 'dishe/ mo, hili aha/ 'kwarkina um gwo gwansan mo mmoye'th um sho'k mo.

¹⁵ Wakan, wakki/ aha/ takina diite/ mo tani um mini 'taki mish mo mo ki um ka ba/ mini 'taki mii mii ki is bum mo me'd uni kun ta kuṅ gu'b ma Arungimis mo, a'di jin ta'da kaniisa jin ta ji ma Arungimis jin di ki e mo, a'di jin ta'da atinṅ kilinṅ mo dhala cur gi gwoṅ gana/ mo be.

¹⁶ Ka jin gana/ ana pikina gwo mo gom a'di yansan jin ta dhan gwo jin ċinu ki jim bag mo jin ta jim bana jin luṅṅ ana aluṅ mo:

A'di jin torkunu eya tente/ mo e shuman is mo,

dhali a'di jin karkunu ki mo ma kar/e e Shi/in mo

dhali a'di jin parkina iman'doyu gwo e mo

dhali a'di jin cikunu gwo mo e bwaman kal gi 'kwaniny'cesh mo

dhali a'di jin gamkina 'kwani gwo is mo e mony'cesh mo

dhali a'di jin bu'thkunu bway momis mo e monyca mo.

4

Gwo jin Toru Itwa/a/ mo gom Mo jin Minu Dhal Gwo jin Gamu Is 'Pen mo

¹ Dhali Shi/in a'di torki gwo ki ji lugum mo mmo/o gwo mo ki, ka cim kuṅ 'ko'd mo tani kun tiya mini per mo 'peni moṅgam gwo is mo mmociya hirdhe/ ki gwo gi shi/in kun he'kkunuwa he'k e mo dhali ki gwo kun toru goma ruma 'cesh mo

² e gwo ma por ma pije/ mo kun tanuwa tor ka tor mo ki 'kwani gwansan mo kun sula 'twa/ ma dum buni mo,

³ uni gun nonki mash jin mashu mo dhali uni kun shush mii mo mmoga/ tonten tiya mo, uni kun uk ma Arungimis mo mmota to gun minu bu'th ki mo jin 'boruwa 'bor bwa i is mo ki uni gwansan kun gamki gwo is mo dhali mish gwoṅ gana/ mo be.

⁴ Haali/ aris to 'baar mo kun uk ma Arungimis mo tani uni ta tom 'boron mo, dhali toṅ kamu/ minu wak mo gomata? wakki/ a'di budhu ki mo jin 'boruwa 'bor bwa i is mo,

⁵ haali/ a'di karu ki she/ mo wakan ki gwo ma Arungimis mo dhali ka 'tho jin 'thonu mo be.

Amanmii To jin Ha Me'd mo goma Yesus Kristhos mo be.

⁶ Wakki/ /e mini dhu gwo gwansan kun yedhuwa ye'th sho'k mo ibwambora wak mo tani /e mini ta a'dim 'borga/ mo mmomii to mo goma Kristhos jin

ta'da Yesus mo, gom gura/ jin 'kana /e mo e gwo jin gamu is mo dhali gom gwom 'boro'd jin toru /e mo a'di jin bathkina /e mo be.

⁷ Dhalka hirdhe/ ki ci mo gom gwo lolop jin ta ji ma mak mo jin diki ta ji ma gayiin mo dhali jin ta ji ma pali/ mo. Nyonji is piniṅ gana/ mo e mii ma gayiin mo.

⁸ haali/ me'd jin hana a'di ari me'd mo mmonyonṅ bungwar is mo 'te/ mo tani mii ma gayiin a'di ha me'd mo eya ris 'twanḱal kuku/ mo haali/ a'di gam mii adu is mo gom mondiki/e jin di'd shwane/ mo dhali si'da/ gom mondiki/e jin midi pu'du/ yilaṅ kamu/ mo be.

⁹ Gwo jin onu mo ta a'diṅ gana/ mo dhali ta a'di jin ha me'd mo mmobu'th ka 'bimpil mo.

¹⁰ Haali/ gom 'pemen yansan mo tani ana 'kona mo mmomiya tu'c kun 'batha'ba'th mo dhali mmopicira picir mo haali/ ana takina ga 'teṅ kapem bana mo jin karkunuwa po/ ma Arumgimis jin di ki e mo, a'di jin ta'da Amanwoth gom 'kwani 'baar mo, dhali ki ji mum mo gom uni gwansan kun gamki gwo is mo be.

¹¹ Kani gwo gwansan mo ma dhali tori uni mo.

¹² Dhalku/ ki dhal jan 'deṅ kamu/ bway mo mmowak /e mo gom dhuru'c pini jin tana /e mo. Hili tayi she/mm mo gom uni mo uni kun gamki gwo is mo e gwom pini jin tora /e mo dhali e is pini jin thosona /e mo dhali e mo/en mo dhali e monḱam gwo is mo, dhali e miin dhelelga/ mo.

¹³ Ntagi aha/ mina pu'dku/ mo tani kuthi is mo mmodeṅ Gwo ma Arumgimis jin 'kwarkunu e mo e bwanṅ 'kwani mo, dhali ciyi gwo mo dhali tori gwo mo.

¹⁴ Dhalku/ ki ta piny is mo gom to jin cinu ki me'd mo jin tana /e mo, a'di jin cikunu /e mo ki gwo jin onu is mo jin bahu mo me'd jin dhukina jwahanṅ 'kwani me'd buni apo/ /e mo be.

¹⁵ Boti ki mii gwansan kun minu mii mii mo. /E ki is pini imini ta agayiin gom uni mo. Wakan uni 'baar mo mini par yam pini jin yana /e e mo.

¹⁶ Hili is piniṅ gana/ i e ki 'bore/ mo dhali gwom pini jin tora /e mo. Noni is pini ki 'koho/ 'koho/ mo. Ki miim pini jin mina /e mii kan mo tani /e mini woṅ is pini mo dhali uni kun mini cik gwom pini mo be.

5

Mii kun Minu Mii Mii mo ka Karambuye/ mo gom cin Tiya mo

¹ Dhalku/ wathiny ca'd ki kucur mo, hili malasi a'di mo me'd mii jin mina /e mii cim mo. Usi 'kwanin dhuru'c is mo me'd ikam pini mo.

² Wakan si'da/ up kun tana ti/ mo me'd ita'dam pini mo, dhali up kun ta dhuru'c mo me'd i'bwahan mo, eya ris mii 'baar mo kun dheleladhelel mo.

³ Taki up kun wuna ikath ki wuṅ gana/ mo.

⁴ Wakka 'boma kamu/ jin wun ma kath mo ta'd gi uci mo walla uci gi ucim piti mo tani dhalki uni nṅwa/a/ da/ar gwo mo gom ji gi luṅum buni mo gom mii jin minu mii mii mo goma wak buninṅ gana/ mo mmoci ton tiya ka nyan 'ko'd mo gom ita'dam buni mo dhali icom mo. Haali/ mii yansan a'di mishu bu'th mo e jis/e ma Arumgimis mo.

⁵ Ayim jin wun ma kath ki wuṅ gana/ mo dhali jin dhalu a'di 'de/ mo tani ayim karki mo ma 'teṅ kapem piti apowa Arumgimis mo dhali tikirki mii mo mmodi'ba di'b is mo dhali 'tho mo ki mon'thiny ilu/ mo dhali montee mo.

⁶ Ayim jin momotki'da dum piti mo tani a'di di'di mowu mo isi kani me'd jin din ma yim ki e mo.

⁷ Kani gwo yansan mo wakan ki uni mini 'ko ki dar gi mii jin wakuwa wak mo.

8 Wakki/ jan tal 'den kamu/ diki thipa wak pitin gana/ mo tani a'di warki gwo jin gamu is mo, dhali a'di boli wathi/ jin diki gam gwo is e ki shi/ mo.

9 Dhalku/ ki dhal jan 'den kamu/ bway mo mmonyak gway 'kwar ki uni kun wuna ikath mo kun atha yili issi* kwara mo walla kun mashkunu mo 'thissa/ kagusha niin mo.

10 Dhala yim minu mii o gwo man mo gom miim 'borga/ ma yim mo me'd jan 'de/ jin thipki uci mo mmotor mii jin minu ta gu'b piti nal mo, mmolam uni kun dhunu ki she/ ki dhelel dhelel sho'k mo, mmowotha/ woth mo gom uni kun toju 'kus mo, dhali is ma yim jin kara a'di ka gayiin mo mmomii mii kun 'boron eya ris 'twanjal kuku/ mo.

11 Hili ushi uni gwansan gway 'kwar mo, uni kun ta dhuru'c kun wuna ikath mo. Haali/ ki uni cana bwa en'dap buni mo apowa Kristhos mo tani uni ona bwa ki mash mo

12 dhali wakan uni tulki miwax is mo mmo'ce'dkina uni gwom buni kun twa/a/ kun ona uni is mo.

13 Ki mii yan jin 'ce'de'da po/ mo tani uni da/arki mii mo mmota piny is mo dhali ta imanthap gu'b ki sho'k mo dhali yisa mmotana uni jasa piny is 'te/ yisa hili si'da/ uni tana le'd ka le'd mo dhali ta imankul gu'b ki kul kul mo mmoham gwo mo, mmo/o gwo mo kun mina uni 'taki 'koki o mo.

14 Wakan ba/ aha/ ona ki uni gun ta dhuru'c kun wuna ikathim buni mo tani dhalki uni mashan mo mmodho'th uci mo, mmoji gu'b buni mo, dhali mmo'koki ci a'di jin ta 'kup embula kamu/ mo mmosor ana mo.

15 Haali/ kun tiya uni hila/ perkin mo mmobatha Setaani sho'k mo be.

16 Wakka 'boma kamu/ jin gami gwo is mo ta'd ga wak piti kun wuna ikathim buni mo tani dhalka yim woth uni mo jin mina 'kwaniñ kaniisa 'koki kal mii kun didadit mo, wakan ki uni mini woth uni gwansan kun wuna ikath ki wuj gana/ mo.

17 Dhalki jwahan 'kwaniñ kaniisa uni kun ji mo ki 'bore/ mo, dhunu ki uni gun ha me'd mo ki montak ka 'bukum 'ban mo, ki nyanye/ gom uni gwansan kun mii to mo mmoçi gwo mo dhali mmotor gwo mo.

18 Haali/ Gwo ma Arungimis jin kwarkunu mo o gwo mo ki: /E mini dhalka morbip ki 'kamu'th 'twa/ mo ki a'di di'd mmotor pos ki sho'k mo, dhali, Amanmiiya tu'c minu mii ci to jin ha me'd ka tu'c piti mo.

19 Dhalku/ ki gam gwo me'd apo/ wathiny jwahan 'den kamu/ ki sule/ sule/ mo isi ciki/ mo gwo jin mishu eya tente/ mo ki 'twan 'kwani su/ mo walla ki 'twan 'kwaniñ kwara mo be.

20 Gom uni gwansan kun ush miinthus dak mii mo tani kucuri uni mo ibwambora ris 'kwani 'baar mo, wakan ki unin tiya si'da/ mini ko/ is mo mmodosh mo.

21 E bun'kus ma Arungimis mo dhali eya Kristhos jin ta'da Yesus mo dhali e iman'doyu gwom piti mo kun kwanykunu mo tani aha/ kana /e gwo mo mmodhuwa ris gwonkan gwansan mo ki dar gi mii jin miinu 'peni gwo jin di'di bwa n'wa/a/ la mo walla 'peni mii jin miinu ka gwar 'de/ mo.

22 Dhalku/ ki la mo e mo jin dhuna 'kwani me'da po/ 'kup wathi/ mo, walla mmonyak miinthus mii jin miina wathin kamu/ mo. Kari is pini ki dhelel dhelel mo.

23 Dhalku/ ki pi jasi yi'de/ mo naskina/, hili piyi ari yiman amura'th mo gom gway gi bwam pini mo dhali gom 'ba'th pini jin 'kosh /e ki jahanne/ jahanne/ gwo.

* 5:9 sittiin

²⁴ Miinthus gi 'kwanin tiya mo tani uni mishu eya tente/ mo, dhali uni dhunu eya tente/ mo gom gwon dwall mo, hili miinthus gi 'kwanin tiya mo tani uni minu piyu/ i'ko'd mo be.

²⁵ Wakan si'da/ miim 'borga/ uni toru eya tente/ mo, dhali isi kani me'd jin 'kona uni ki 'ko eya tente/ mo tani uni molu dhu ki ku gun bagu mo be.

6

¹ Dhalka ris uni 'baar mo kun 'kon mo e bwanj 'kwariny dhanjka'b 'bam buni kun tana uni cinjina/ kun yolu mo mmodhu uni kun ta tapam buni ki uni gun ha me'd mo eya ris montak mo, wakan ki gway ma Arungimis mo dhali gwo jin toru mo minu 'koki wal gwo sora po/ mo be.

² Uni gwansan kun takin gi itapa kun gamki gwo is mo tani uni mini mii 'koki dhu uni ki mon'the is mo mmo/o gwo mo ki uni ta ikam mo 'te/. Hili uni mini mii dhal mii yan e i is mo mmomii aris to 'baar mo ki 'bore/ ki nyanye/ mo haali/ uni gwansan kun miina cinjinam buni to mo tani ta uni kun gamki gwo is mo dhali uni gun enu mo be.

Mo jin Miinu Mii ma Gayiin mo Nyakki Mo jin 'Konu ka This Mo i E mo

Tori gwo mo dhali tirrishi gwo mo goma ris to gwansan kun minu mii mii mo.

³ Wakki/ wathin tal 'denj kamu/ midi tor gwoj kamu/ jin di ki she/ mo dhali diki gam gwo me'd mo ki gwom 'borga/ gi Tapa Yesus Kristhos bana mo tani dhali gwo jin toru jin gamu me'd mo ki mii ma gayiin mo tani

⁴ a'di yin seki'd ki 'pura/ 'pura/ mo, ki 'ba/ jin karu ki ca mo. A'di diki mish toj kamu/ mo. A'di ta'd gi 'ba'th jin 'kosh a'di mo mmo'kosh 'dañ gwo mo mmodota/ dot mo dhali gom gwo jin sugu ki gwo mo, a'di jin wagaski miin dhapan mo, dhali mii kun biruwa bir mo, dhali mii kun thudhuwa thu'th 'pen mo dhali mmo'tosh gwon thus eya du apo/ 'kwanin tiya mo

⁵ dhali mii gi gwo kun sugu e bwaman 'kwani mo 'peni bwam buni kun bulabul mo dhali kun dheru bwa mo 'peni gwoj gana/ mo, mmo'toshkina uni ki mii ma gayiin jin lujuwa luñ mo ta 'pemen mmogam mii adu is mo.

⁶ Dhan mii 'kon kun gamuwa du is ki mii ma gayiin jin lujuwa luñ mo wakki/ mo jin this is e di'd si'da/ mo,

⁷ haali/ ana 'konaki 'do miin tiya 'kup pa mo e mony'cesh yan mo dhali a'di mishu ka jinj gana/ mo ki ana mola toj kamu/ bu'th mmo'kal 'peni mony'cesh mo.

⁸ Hili wakki/ ana tana gi tonje/ mo dhali burrinye/ mo mmohi'th mo tani ana mina 'ko ka this mo i e mo gom uni gwansan mo.

⁹ Hili uni gwansan kun 'kona gwo ibwa mo mmota pa ki pa mo tani uni ta'kkin mo e mo jin paluwa pal mo dhali e mo ma gume/ jin bu'thki'da bu'th mo dhali eya ris miim pus mo dhali bwa jin onu gwo jin ta jama/ ki jama/ mo mmobul 'kwani 'kup e mo jin daku gwo me'd mo dhali mo jin 'ce'duwa 'ce'd sho'k mo.

¹⁰ Haali/ mo jin enuwa guurush mo tani a'di ta'da birman goma ris tonthusi 'baar mo. Gom 'dañ gwo yan jin 'kosho'd mo tani kun tiya perkin mo 'peni bway gi monjam gwo is mo dhali uni su'kkin ma dum buni ki la/a'd la/a'd ka ris mo.

Mo/as Gana/ jin Asu ki Monjam Gwo Is mo

¹¹ Hili gom/ e jin ta wathi/ ma Arungimis mo tani shipiti/a njwaca/ mo 'pena ris to gwansan mo. Guyi a'di ki e mo a'di jin ta mo ma kar/e mo dhali mii ma gayiin mo dhali monjam gwo is mo dhali mo/en mo dhali sho'k mmo'tel mo dhali mon'thup e mo.

¹² Asi ki as gana/ mo gom monḡam gwo is mo. Budhi a'di ki nyen mo, a'di jin ta mondiki/e ki sule/ ya ye 'ba/ mo, a'di jin yukḡunu /e nycine/ mo me'd jin pikina /e gwom 'boro'd mo gom a'di mo e buḡ'kusi iman/o gwo ka ris mo.

¹³ Dhali e buḡ'kus ma Arungimis mo, a'di jin ciki monḡ'koki/e mo goma ris to 'baar mo dhala Kristhos jin ta'da Yesus mo, a'di jin ciki gwom piti ibwambor ma Punthi Bilaatus mo, gwo jin pikina a'di ki piḡ gana/ mo tani

¹⁴ aha/ kana /e gwo mo mmodhu gwonḡan jin 'kwarkunu mo ki dar gi monyo/o'd mo dhali ki dar gi mo jin wakḡwa wakḡ mo ntaga tee jin mina Tapa Yesus Kristhos bana piyu/ mo be.

¹⁵ Dhali a'di yansan minu tor eya tente/ mo, ka tente/ jin ta'da kar/e mo jin ta Litgany gana/ 'de/ ki lish mo, jin 'boru mii mo, dhali a'di jin ta'da Malik jin doshki'da po/ imaliki 'baar mo dhali a'di jin ta Tapa jin doshki'da po/ itapa 'baar mo,

¹⁶ a'di jin ta a'di ki is piti a'di 'de/ mo jin dar gi mo jin wunu mo dhali jin ca'bki'd mo e monḡkush jin molu ii 'kupki cine/ mo, jin dina wathin kamu/ tal 'de/ ki par e mo ki sule/ sule/ mo walla jin mola wathin kamu/ par e ki sule/ mo be. E a'di mo tani montak midi di mo dhali mo jin tanu tapa midi di ki sule/ sule/ ya ye 'ba/ moonni. Amen.

¹⁷ Dhali gom uni kun ta pa ki pa mo e mony'cesh yan mo tani kani uni gwo mo mmo'koki 'do bwam buni isi mis mo walla mmodhu mo ma 'teḡ kapem buni apo/ pa jin tana uni jin mii uni e ki 'kala/ 'kala/ mo, hili apowa Arungimis mo jin ciki ana aris to 'baar mo ki monḡ'ka'd me'di is mo mmo'kuny bwa mo.

¹⁸ Uni mini mii to ki 'bore/ mo mmota pa ki pa mo ki miim 'borga/ mo dhali mmoçi to ki nyanye/ ka 'ka'd me'di is mo.

¹⁹ Wakan mmodhuna uni to mmo/ish kumma/ mo gom is buni mo mmota monḡa'b jin 'bora'bor mo gom yilan kamu/ mo tani wakan ki uni mini bu'th mondiki/e ki nyen mo, a'di jin ta mondiki/en gana/ mo be.

²⁰ Ayy Timuthawuus, kari a'di jin kankunu /e mo mmodhu mo. Thethi/ mo 'peni gwo jin waluwa tor ka wuny is mo ki dar gi mii ma gayiin mo dhali ayisenḡ gwo kun 'kon ki ca'ckon mo gom gwom pus jin yuku ki gwo gi moyuk mo.

²¹ Haali/ ki mo jin bathu/ a'di i'ko'd mo tani kun tiya ḡana/ du'd mii mo isi gwo jin gamu is mo be.

A'the midi di e/ e mo.

Gwo jin 'Ko'd jin 'Kwar ma Buulus goma TIMUTHAWUUS mo

Monthe Me'd mo

¹ ABuulus, a'di jin karu ki she/ mo goma Kristhos jin ta'da Yesu mo ki bwa ma Arumgimis mo isi ki gwo jin onu is mo gom mondiki/e jin di'd eya Kristhos jin ta'da Yesu mo be.

² Eya Timuthawuus jin ta ya/m pem jin enka/ mo.

A'the dhali momiimii dhali mon'ku'th is 'peni Arumgimis jin ta'da Baba mo dhala Kristhos jin ta'da Yesu mo jin ta Tapam bana mo.

Dhalku/ Is ki 'The mo

³ Aha/ 'bora Arumgimis bwa i is mo, a'di jin miiga/ to mo ki 'twa/ ma dum pem jin dheleladhelel mo, me'd mii jin miikina ibabam pem mo, ki aha/ kakina /e e ki fikir fikir mo e mon'thom pem mo.

⁴ Me'd jin kakika/ jabu'th pini e mo tani aha/ 'koshkina te/ /e ki mon'thiny ilu/ mo dhali montee ilu/ mo mmopar /e e mo, ki aha/ minu 'taki 'tu'd mo ki mon'kunyu bwa mo be.

⁵ Aha/ rogomkunu ki gwo mo gom mon'gam gwo is pini mo jin dar ki washila/ mo, mon'gam gwo is yan jin ca'bki'di twa/a/ mo eya tin'kwan pini jin ta'da Lo/iis mo dhali ata'dam pini jin ta'da Apniiki mo, dhali shwane/ aha/ misha ki isa dun'gana/ mo ki a'di ca'bki'd e /e mo.

⁶ Me'd jin rogomkika/ /e ki gwo mo mmo'ti'k to jin cin ma Arumgimis ki me'd mo, a'di jin di'd e /e mo ki mo jin thulka/ /e me'd pema po/ mo.

⁷ Haali/ Arumgimis diki ci ana shi/in ma shi/in ywa mo, hili a'di ki ci ana shi/in gi mom'bi'th mo dhali mo/en mo dhali mmomisha du 'tim mo.

⁸ Dhalku/ ki mii 'the is mo mmoci gwo mo gom Tapam bana mo, walla gom aha/ mmotaka/ habuus mo, hili budhi isa nyor pini jin pwa'ku /e mo gom gwom 'borga/ mo e mom'bi'th ma Arumgimis mo,

⁹ a'di jin woth'ki ana mo dhali yuk' ana mo ka yuk' jin kogu mo, yisa gom miim bana jin ha me'd mo, hili ki miim piti kun ha me'd mo e 'kup miim piti'gana/ yan mo dhali a'the jin cikina a'di ana mo tani eya Kristhos jin ta'da Yesu mo ki yil ka risi twa/a/ mo,

¹⁰ dhali shwane/ a'di toru eya tente/ mo gom is jin piyin ma Manwoth bana ka pije/ mo a'di jin ta'da Kristhos jin ta'da Yesu mo, a'di jin puuki wu mo dhali kalu mondiki/e mo dhali mo jin molu wu mo e mon'kush mo ki gwom 'borga/ mo be.

¹¹ Haali/ gom gwom 'borga/ yansan mo tani aha/ karkunu 'pen ka pije/ mo mmota amanci gwo mo dhali ta a'di jin karu ki she/ mo dhali ta a'di jin ta'da man'or gwo mo.

¹² Dhali wakan aha/ 'koshkina is ka nyor mo me'd jin 'kosha is aha/ ka nyor mo. Hili aha/ dina is ki 'the mo haali/ aha/ misha a'di jin gamka/ gwo is mo dhali aha/ misha ki isa dun'gana/ ki a'di mishi ji ki 'bore/ ntaga Tee caan mo a'di jin cikika/ a'di mmodhu mo be.

¹³ Bathi bway pem mo gom gwo' ganam pem kun tor'ka/ mo, uni kun cikina /e 'peni aha/ mo e mon'gam gwo is mo dhali e mo/en mo, uni gun 'kon eya Kristhos jin ta'da Yesu mo.

¹⁴ Jiyi gwo'gana/ mo a'di jin cikunu /e mo mmodhu mo ki Shi/in Dheleladhelel mo a'di jin ca'bki'd e bwaman ana mo.

¹⁵/E mishki gwo hila/ mo ka ris uni gwansan kun 'kokin mo e Pa Asiyya mo tani tu'kkin mo 'peni aha/ mo dhali e bwam uni gwansan mo tani ta iPiJallus mo dhala Harmujanis mo, uni 'kokin mo.

¹⁶Dhalki Tapa a'di ci momiimii gom kun gu'b ma Unisipurus mo haali/ a'di me'd ka ris yeki aha/ 'ba/ mo. A'di yisa 'thena is mo gom mondek pem jin deku aha/ ka jindhiir mo,

¹⁷hili ki a'di merki'd mo e Pa Ruumiya mo tani a'di napki'da nap mo gom aha/ ki bur bur ka daran du mo dhali a'di gamki aha/ mo be. -

¹⁸Dhalki Tapa ci a'di mo jin mina a'di gam momiimii mo 'peni Tapa mo 'pena Tee caan mo - dhali /e mishkin ki 'bore/ mo aris to kun kalkina a'di ki mii mo e Pan Epasus mo be.

2

Athuruḡ Gana/ ma Yesus Kriḡthos mo

¹/E si'da/ jin ta ya/m pem mo, 'bithi /e is mo eya 'the jin di'd eya Kriḡthos jin ta'da Yesus mo,

²dhali a'di jin cikina /e 'peni aha/ ntwa/a/ mo ka ma'diny iman/o gwo mo tani ciki uni 'kwani kun ta ku isinj gana/ mo mmodhu mo, uni kun mini mish tiyan tiya gwo tor si'da/ mo be.

³Budhi isa nyor pini jin pwaku /e mo me'da thuruḡ gana/ ma Kriḡthos jin ta'da Yesus mo be.

⁴Athuruḡa kamu/ yisa di'da jin mididi re'd is piti ki to gi monyca'b piti mo me'd jin dina a'di mmomii to ma thuruḡ mo, haali/ tom piti jin guna a'di ki e mo tani ta mii jin mina a'di mii mo mmokap a'di adu mo, a'di jin kar a'di atu'c ma thuruḡ mo be.

⁵Wathij kamu/ jin ishki'da bor ka 'cesh mo e mo ma lo'b mo tani minu 'koki shum ki toj'kup mo isi ciki/ a'di mididi mii thim isi gwo jin kanuwa kan mo gom mo ma lo'b yansan mo be.

⁶A'di ta'da mansi to jin mii'da tu'c jin 'batha'ba'th mo, a'di ka ba/ iminu pwakki 'kup to jin 'cithu/ ntwa/a/ mo.

⁷Kulumi gwo ibwa mo gom gwo kun oka/ mo haali/ Tapa a'di mididi ci /e mo jin mishu gwo 'ban mo goma ris to 'baar mo be.

⁸Kayi aYesus Kriḡthos e mo a'di jin pikunu mo 'peni mowu mo, a'di jin ta emen 'pena Dawuu'd mo, me'd gwom pem jin cikika/ e gwom 'borga/ mo,

⁹a'di jin ta gwom 'borga/ a'di jin 'koshka/ is ka nyor mo dhali rash mo ka makkiya m'bame'd mo me'da manthu'th to mii mo. Hili Gwo ma Arungimis mo tani a'di yisa ta gwo jin deku mowa.

¹⁰Wakan aha/ 'dimkina 'kup mo eya ris to 'baar mo gom gway gi uni kun kwanykunu mo, ki uni si'da/ mini 'taki bu'th bway mowoth yan jin diki'd eya Kriḡthos jin ta'da Yesus mo jin mididi nyak ya ki monyca ki sule/ sule/ ya ye 'ba/ mo.

¹¹Gwo yan jin onu mo tani ta gwo jin ta isinj gana/ mo be ki:

Wakki/ ana wuna mo nyakki a'di mo tani ana si'da/ mina 'ko ki e nyakki a'di mo be.

¹²Wakki/ ana 'dima 'kup mo tani ana si'da/ mina nyak tapa ta ki a'di mo be.

Wakki/ ana mina wat a'di gway mo tani a'di si'da/ mididi wat ana gway mo be.

¹³Wakki/ ana dara gi mongam gwo is mo tani a'di di'd kan mmota ji gi isinj gana/ mo be -

haali/ a'di mididi mol is piti wat mo be.

Wathi/ jin Mii To jin Nyo/u ki Nyo/ Gana/ mo

¹⁴ Rogomi uni ki gwo yan mo dhali *kan* uni gwo mo ibwambori Tapa mo mmotheth gwo jin sugu mo gom gwo mo, a'di jin diki *kal* miinj kamu/ 'kup pa mo, hili a'di jasi 'ce'd uni sho'k mo, uni kun cik a'di mo.

¹⁵ Miiyi miim pini ki dher mo mmoci bungwar is pini ka Arumgimis mo me'd a'din 'de/ jin tesu mo, mmota wathi/ ma tu'c mo, a'di jin mina isi mii diki 'the mo, a'di jin mididi dher bway ka *kar/e* mo e gwoj gana/ mo, mmotor a'di ki 'twanj gwocon mo.

¹⁶ Thethi/ mo 'peni gwo kun 'kon ki pe'th mo haali/ a'di mididi sus 'kwani ka ris mo e mo jin ushuwa Arumgimis ki nyanye/ mo dhali ki nyanye/ mo

¹⁷ Dhali gwom buni mini shwa bway mo me'd jama/ mo. E bwam uni gwansan mo tani ta iHiminayus mo dhala Pilitus mo,

¹⁸ uni kun wanykin mo 'peni gwoj gana/ mo mmobu'th gwo ki wup mo mmo/o ki mompinu a'di peki'd mo hila/. Uni ki kum monjgam gwo is gi 'kwanin tiya 'twa/a 'cesh mo.

¹⁹ Hili monka'b ma Arumgimis telkunu sho'k mo mmodosh mo, mmokal mo jin dina gwo yan ka 'dan'dap mo ki: Tapa mishi uni gwansan kun ta kum piti mo, dhali, Dhalka ris 'kwani 'baar ka 'dete/ 'dete/ mo uni kun yeri gway gi Tapa mo, kwa/ is buni bwa mo 'peni miinthus kun shi/ashi/ mo.

²⁰ Dhali eya dhan gu'ba caaga/ mo tani ton'kul bwa 'kon si'da/ mo, kun 'koki ta jasi 'dolkon gana/ mo dhali 'dolkon kush mo, hili si'da/ ton'kul bwany cwa si'da/ mo dhali ton'kul bwa ma je kun 'thosu mo si'da/ dhali kun tiya kun tana ajji kun dhunu ki she/ ki dhunj gana/ mo dhali kun tiya si'da/ kun dhunu mmota abar mo.

²¹ Wakki/ wathin tal 'dej kamu/ mididi dhelel is piti mo 'peni mii kun waku mo tani a'di mididi ta ton'kul bwa mo jin karu ki she/ ki kar gana/ mo goma tu'c gi montak mo, mmota ji gi karu ki she/ mo dhali mishi to mii mo gom tapa gi gu'b mo, mmonyonkina a'di is mo goma risa tuca 'borga/ gunn mo.

²² Wakan shipiti/a njwaca/ mo 'peni miin dhuru'c pini jin karkina /e e ki 'thir 'thir mo dhali guyi mo ma kar/e ki e mo, dhali monjgam gwo is mo, dhali mo/en mo dhali monku'th is mo nyakki uni gwansan kun yukki gway gi Tapa 'pena dum buni kun dheleladhelel mo.

²³ Dhalka hirdhe/ ki ci mo gom mo jin dotu/ gwowa dot mo kun ta gwom pus mo dhali gwo kun 'konuki ye'th sho'k mo. /E mishin ki uni cisina le'd jin walu ki tas tas mo.

²⁴ Dhali amanmii to gom Tapa mo tani a'di mididi mii diki mii ta amanwala le'd ki tas tas mo, hili a'di mina bwa mii ta gi kush gom 'kwani 'baar ka 'dete/ 'dete/ mo, dhali jin mididi mish ta amantor gwo ki 'twanj gwocon mo, mmoothona thon me'di 'ko'd mo,

²⁵ mmokucur unim piti gwahan ki gwo mo kun cesh a'di mo ki thith mo, ki mii jin 'thupu e ki 'thup mo. Arumgimis wari mididi 'taki ci uni mo jin rijuwa du is mo dhali pu'du/ mo mmomish gwoj gana/ mo,

²⁶ dhali uni mini 'taki ye mo 'pena gume/ gi tapa ma ruma 'cesh mo 'ko'di mom piti jin bu'thkina a'di uni mo mmomii bwam piti mo be.

3

Buye/ Mii jin Mina 'Kwani Ta mo ka Tee jin 'Ko'd mo

¹ Hili mishi gwo yansan 'ban mo, ki, ka tee kunj 'ko'd mo tani mo mididi pu'du/ mo jin min ma wukura/ di mo.

² Haali/ 'kwani mini en is buni mo dhali ena guurush mo dhali dhu 'ba/ ki ca mo dhali 'the'k 'bam buni imis mo, dhali wal gwo sor mo, dhali ush gwo gi icom buni ha e mo dhali ikum mo, dhali uni mini ta iman/usha 'borim bwa ci mo, dhali uni mini ta uni gun 'koki dhelel mo,

³ dhali uni mini dar gi mo/en jin di'd eya du wathi/ en'thi/ mo, dhali uni mini ta iman/ush gwo gwam mo, dhali uni mini ta imanthutha thu'th 'pen mo, dhali uni mini ta imandar ga du kun 'timu mo gom e kun dhuna uni ki 'thir 'thir mo, dhali uni mini ta imanmii mii kun kaŋkama kaŋkam mo, dhali uni mini ta imanshi/ miim 'boro'di e mo,

⁴ dhali uni mini ta iman'ciḥ is ki gwo mo, dhali uni mini ta imanbujura bujur mo, dhali uni mini se ki 'pura/ 'pura/ mo mmodhu 'ba/ oki uni imishi mo mo, dhali uni mini ta iman/en 'kom 'penkapan buni mo mmodhal mo/en ma Arumgimis e i is mo,

⁵ mmodhu jasa warma'c mii gom ji gi luŋu mo, hili uni ki waṭ gway gi mom'bi'th piti mo. Thethi/ mo 'peni 'kwani kun wakan mo.

⁶ Haali/ ibwaman uni gwansan mo tani uni ta uni kun kuli bway buni mo e gu'b gi 'kwanin tiya mo mmobu'th up kun ta 'thalkina/ ki 'thalkina/ mo kun bur ma du mo ki wap wap ki miinthus mo dhali thap miinthus kun 'kona e ki she/ ki she/ mo,

⁷ uni kun ta imanha 'kwani gunn gwo e mo, dhali yisa bumburkin ki sule/ e mo jin nyithu/ gwoŋ gana/ mo.

⁸ Me'da Yanniis dhala Yambiriis, uni ceshkina Musa mo mo, wakan si'da/ 'kwani gwansan uni ceshki mo mo gom gwoŋ gana/ mo, uni kun ta 'kwani kun pu/kin mo e bwam buni mo dhali kun ta gi moŋgam gwo is kun waku mo.

⁹ Hili uni mini thoḥ isa dhanaa? Haali/ mii ma palim buni midi di eya tente/ mo gom 'kwani 'baar mo, me'd mii gi 'kwani su/ gwansan mo be.

Gwo ma Buulus jin Ta jin 'Ko'd mo jin Kankina A'diya Timuthawuus mo

¹⁰ Shwane/ /e mishki gwom pem kun ṭorka/ mo dhali miim pem kun miika/ mo dhali tom pem jin guka/ ki e mo e mondiki/e mo dhali moŋgam gwo is pem mo, dhali bwam pem jin 'kučka/ ki 'kari'th mo, dhali mo/en pem mo, dhali sho'k pem jin telka/ mo,

¹¹ dhali monto'c bwam pem mo, dhali isa nyor pem jin 'koshki aha/ mo, dhali a'di jin pu'dki'di aha/ e Pa Anthaakiya mo, dhali e Pa Ikuniyya mo, dhali e Pa Listra mo, dhali monto'c bwa wana, kun 'dimka/ 'kup mo. Hili 'peni uni gwansan 'baar mo tani Tapa a'di yeki aha/ 'ba/ mo be.

¹² Ka jin gana/ aris uni gwansan kun 'kona gwo ibwa mo mmo'ko isi 'ko ma gayiin mo e moŋ'koki/e mo eya Kriṣṭhos jin ta'da Yesus mo tani uni minu to'c bwa mo be,

¹³ ki 'kwani gun mii tonthus mo dhali imanheka he'k e mo mini thi'th mii gun shiyin mo ntagi mii shigga/ kagahara mo, uni kun ta imanheka he'k e mo dhali uni kun he'kkunu e mo be.

¹⁴ Hili gom /e mo tani tikiri /e di mo e gwo jin da/arkina /e mo dhali e gwo jin gamkina /e is ki gam gana/ eya du mo, mmomishkina /e 'peni a'di jin da/arkina /e a'di mo

¹⁵ dhali mish 'ban 'peni mo jin tana /eya 'ci mo tani /e mishki gwo gwansan kun 'kwarkunu mo dhali kun kogu mo, uni gun mini mish /e sho'k ye'th mo gom bway gi mowoth ki moŋgam gwo is eya Kriṣṭhos jin ta'da Yesus mo.

¹⁶ Aris Gwo ma Arumgimisi 'baar ka 'dete/ 'dete/ mo kun 'kwarkunu mo tani uni shi/irkin ma Arumgimis mo dhali ha me'd mo gom gwo mmotor mo dhali gom kucur jin minu kucura kucur mo dhali gom to'k jin minu toka to'k mo dhali goma nyon is jin minu nyon mo gom mii ma kar/e mo

¹⁷ ki wathi/ ma Arumgimis minu 'taki thim mo, mmota ka ris to 'baar mo kun minu mii ta mo goma risa tuca 'borga/ 'baar ka 'dete/ 'dete/ mo be.

4

1 Aha/ kana/ e gwo mo ibun'kus ma Arumgimis mo dhala Krīsthos jin ta'da Yesus mo, a'di jin midi dwall gwo mo gom uni kun 'kon ki e mo dhali kun wukin mo, dhali ki pim piti jin mina a'di piyu/ is ka piye/ mo dhali bampam piti mo be.

2 Ciyi gwo mo, hayi me'd ki embul mo mo, dhali hayi me'd ki embul mo jin diki 'bor mo, dhali tokiya to'k mo dhali kucuriya kucur mo, dhali malasiya malas mo, dhali dhalku/ buye/ ki 'thi mo e bwa jin 'kuçu ki 'kari'th mo dhali e gwo jin toru mo.

3 Haali/ mo midi pu'du/ mo ki 'kwani mini 'koki 'dim 'kup mo e gwom 'borga/ jin toru mo, hili mmotana uni gi bwany'ce kun kasakas mo tani uni mini tul imantor gwo 'kup mo gom is buni mo mmogam bwam buni kun ona uni 'kup mo,

4 dhali uni mini tu'k mo 'peni gway gi gwoṅ gana/ jin ciḱu mo dhali ta ça/ ka ça/ e gwo lolop jin ta ja mak mo.

5 Dhali gom/ e mo tani isa yempa/ teli/ e sho'k mo, dhali 'dimi 'kup mo e mo jin 'koshu is ka nyor mo, dhali miya tu'c gi imantor gwom 'borga/ mo, dhali thimi miin tom pini mo.

6 Haali/ aha/ hila/ dikina e shushan mo jin minu mii aha/ abas mo. Dhali mom pem jin miga/ kwa/ is pem bwa mo tani a'di pu'dki'd mo be.

7 Aha/ askina ki as gana/ mo. Aha/ 'baarkina bway tur gi miin gana/ mo. Aha/ karkina moṅgam gwo is mo.

8 'Peni shwane/ mo to karkunu mo gom aha/ mo, a'di jin ta ton'kup gi mo ma kar/ e mo, a'di jin mina Tapa, jin ta'da amandwall gwo mo jin ta'da kar/ e mo ci aha/ mo ka Tee caan mo. Dhali yisa jasi e aha/ 'de/ mowa, hili si'da/ gom uni 'baar mo kun enki miim piti jin minu piyu/ a'di is ka piye/ mo be.

Gwo jin Yedhuwa Ye'th Sho'k gom 'Kwani ka 'Dete/ 'Dete/ mo

9 Miiyi ki is pini ki dher mo mmoyayu/ i aha/ ki jahanne/ mo.

10 Haala Dimas, a'di jin enki mony'cesh yan jin di'd shwane/ mo tani, a'di dhalki aha/ 'pen mo dhali yaki'd mo e Pan Tasaluniiki mo, dhala Kiriskis a'di yaki'd mo e Pan Galathiyya mo dhala Tiithus e Pan Dalmathiyya mo.

11 Luuka a'di di'd a'di 'de/ nyakki aha/ mo. Gama Markus mo dhali susi a'di mo nyakki/ e mo, haali/ a'di ta a'dim pan gana/ jin mii to gom aha/ mo.

12 Tikikus, aha/ hashkina a'di e Pan Epasus mo be.

13 Ki / e mini pu'du/ mo tani guyu/ burriyem pom pem mo, a'di jin dhalkika/ nyakka Karbus mo e Pan Taruwaas mo, dhala warka/ si'da/ mo, dhali isi ki ji mun mo ayi'c kun 'kwaru gwo apo/ mo.

14 Iskandar jin ta'da mantor to mo tani a'di miiki aha/ dhan to jin shi/ashi/ mo, dhali Tapa midi rak a'di to ibway mo gom miim piti jin miina a'di mo.

15 Jiyyi a'di ki e mo, /e ki is pini mo, haali/ a'di 'bitha'bi'th mo mmocesh mo mo gom gwom bam jin tora aman mo be.

16 E gwom pem jin ta jin twa/ a/ jin 'ce'dka/ she/ mo tani wathin tal 'denḱ kamu/ yisa di'da jin bu'thki 'ban gwom pem mo. Uni 'baar mo dhalki aha/ 'pen mo. Hili mii yan a'di minu mi dhalku/ ki dhu apo/ uni mo.

17 Hili Tapa a'di doshki'd nyakki aha/ mo dhali ci aha/ mom'bi'th is mo mmobah gwo ki bah gana/ 'baar mo, ki aris 'kwani kun 'koki ta 'Kwani Yahuuda/ mo mini 'taki ciḱ a'di mo be. Wakan aha/ yekunu mo 'peni 'twa/ ma dhop mo be.

18 Tapa a'di midi ye aha/ 'ba/ mo 'pena ris tonthus mo dhali ta aha/ is ki me'd mo gom bampa/ jin ta ji momis piti mo be. E a'di mo tani monyca midi di mo gom ki sule/ mo dhali ki sule/ ya ye 'ba/ mo be. Amen.

Kwalany 'Te/ Ba/. Monthe Me'd mo

¹⁹ Theka P̄iriska me'd mo dhala Akiila mo, dhali kuṅ gu'b ma Unisipurus mo be.

²⁰ Araastus diki'd mo e Paṅ Kurinṭhuus mo. Dhala Turupiimus a'di dhalkika/ mo e Pam Miliit̄us mo haali/ a'di 'ba'thki'd mo be.

²¹ Miiyi is pini ki dher mo mmoyayu/ nt̄wa/a/ ki mo diki ta mondiṭ mo. Abuulus hashki monthe me'd gom /e mo. Kan si'da/ miikin ma Budis mo dhala Linus mo dhala Kalapidiyya mo dhala risa waki 'baar mo be.

²² Tapa midi di e shi/in pini mo. A'the midi di gom /e mo.

Gwo jin 'Kwar ma Buulus goma TIITHUS mo

Monthe Me'd mo

¹ ABuulus jin ta ciŋkina/ ma Arungimis mo dhali a'di jin karu ki she/ mo goma Yesus Kriŋthos mo mmopal monŋgam gwo is ma Arungimis mo gom uni kun kwanykunu mo dhali gom monyith buni jin nyiŋhkina uni gwoŋ gana/ mo, a'di jin tekunu mo ki mii ma gayiin mo,

² e mo ma 'teŋ kape/ mo gom mo gi 'konu ki e ya ye 'ba/ mo, a'di jin okin ma Arungimis gwo is 'peni kadhamo/ dhamo/ nnii mo, a'di jin diki ta ator ki sule/ mo be.

³ Dhali ki mo ma teen gana/ mo tani a'di ki tor a'di eya tente/ ki gwom piti mo ki gwo jin cikunu mo, a'di jin cikunu aha/ mo mmodhu mo ki gwo jin kan ma Arungimis mo jin ta'da Manwoth bana mo be.

⁴ Eya Tiithus jin ta'da 'cim pem gana/ mo e monŋgam gwo is jin nyakka'd mo. A'the dhali monku'th is 'peni Arungimis jin ta'da Baba mo dhala Kriŋthos jin ta'da Yesus Amanwoth bana mo be.

Mii ma Tiithus e Paŋ Kariit mo

⁵ Gwo a'dihe/ be jin dhalkika/ /e mo e Paŋ Kariit mo, ki /e mini 'taki thoson ki 'bore/ mo to kun aŋhkin mo dhali dhu jwahaŋ 'kwani 'pen ka piŋe/ mo eya ris 'penkuman bampa/ ka 'dete/ 'dete/ mo, me'd gwo jin cikika/ /e ka karambuye/ mo,

⁶ 'kwani uni kun daran ki mii 'ba/ mo, uni kun mashi jasi me'd 'de/ ki lish mo, uni kun tana uŋim buni imangam gwo is mo dhali yisa uni kun mishu yer is ki gway mo gom mo jin dara uni ka du kun 'timu mo gom e gun dhuna uni ki 'thir 'thir mo walla gom mo jin usha uni gwo ha e mo.

⁷ Haali/ jwaha/ wathi/, me'd wathi/ jin ta'da mandhu to goma Arungimis mo ba/, a'di midi mii dar gi mii 'ba/ mo, dhali a'di midi mii diki 'theŋ 'ba/ imis mo, walla ta amanwar ki jahanne/ mo, walla ta a'di jin min ma su 'kosh mo, walla ta amanbujura bujur mo, walla ta amanpur bwa ki pur mo gom nyunyucina/ mo.

⁸ Hili a'di minu mii ta gu'b piti ŋal mo, dhali a'di midi mii ta aman/en miim 'borga/ mo, dhali ta amanji is piti mo, dhali ta a'di jin kusha buye/ mo, dhali ta a'di jin dheleladhelel mo, dhali ta a'di jin mishi'da du 'tim ki is piti mo.

⁹ A'di midi mii bu'th gwoŋ gana/ ki nyen mo mmoŋel shoki cine/ mo me'd jin torunu a'di a'di mo, wakan ki a'di midi 'taki mish ci gwo jin yedhuwa ye'th sho'k mo e gwoŋ gana/ jin toru mo dhali si'da/ mmoŋkucur uni gwansan ki gwo mo, uni kun dhaŋki a'di gwo i'twa/ mo.

¹⁰ Haali/ 'kwani tana ris kagahara mo ushki gwo ha e mo, uni kun ta iman/ o gwo kun 'ko bwa 'te/ mo dhali kun ta imanheka he'k e mo, isi ki ji mum mo gom uni gwansan kun 'ciŋhkuuwa munyjal yis mo.

¹¹ Uni minu mii dhu ki shwam mo, haali/ uni kumkina waŋa tiya 'twa/ a 'cesh mo ka 'bimpil mo mmoŋor gwo mo gom to jin mina uni gam ki nyunyucinan thus mo, a'di jin dara uni ki bway ka ba/ mmoŋor mo.

¹² Jan tal 'deŋ kamu/ di'd 'peni bwam uni mo jin kar is piti ka manci gwo mo jin ta jim buniŋ gana/ mo mmo/o gwo mo ki: 'Kwani gi Paŋ Kariit isa yempa/ tana tor mo dhali uni ta tombwaasho kun shi/ashi/ mo dhali kun shwan ma piny isa nyor mo dhali kun shwana te/a nyor mo be.

¹³ Gwoŋtor yansan ta gwoŋ gana/ mo. Wakan kucuri uni ki gwo jin kaaka ki uni mini 'taki ta kuŋ gana/ mo e monŋgam gwo is mo,

¹⁴ mmodhal mii e i is mo mmo'koki ciya hirdhe/ gom gwo lolop jin ta ja mak gi 'Kwani Yahuuda/ mo walla gwonkan gi 'kwani kun wakki gwonj gana/ mo.

¹⁵ E uni kun dhelelkin mo tani aris to ta kun dhelelkin mo, hili e uni gun pu/kin mo tani dhali kun dar gi gwo jin gamu is mo tani torj kamu/ piyi'd jin dhelelki'd mo. Bwam buninj gana/ mo dhali 'twa/ ma dum buni mo tani, uni pu/kin mo be.

¹⁶ Uni torji gwo ki 'twa/ ki uni mishkina Arungimis mo tani uni watki a'di gway ki miim buni mo be. Uni wakkunu ki wak jin shi/ashi/ mo gom bul buni mo dhali uni ta iman/ush gwo ha e mo dhali uni ha me'd gom ari tom 'boro'da kamuwa?

2

Gwo jin Toru jin Ta jin Gana/ mo

¹ Hili gom /e mo tani tori gwo mo a'di jin midi ha me'd mo gom gwontor gana/ mo.

² Kani 'kwani kun can gwo mo mmo'tima du mo, dhali mmoka/ aka/ mo dhali ku'th is ki 'cese/ 'cese/ mo, mmota kunj gana/ mo e monjam gwo is mo dhali e mo/en mo dhali mmoitel sho'k ki tel gana/ mo.

³ Kani up gun tana ti/ gwo mo wakan ki uni mini ka/ aka/ mo gom gway miim buni mo, mmo'koki ta imanthutha thu'th 'pen mo walla mmota cinjina/ ma su mo mmopi mo. Uni ka ba/ imini mii tor gwo mo gom a'di jin 'boro'd mo ba/.

⁴ Dhali wakan yethi up kun ta dhuru'c sho'k mo mmo/en ikathim buni mo dhali ucim buni mo,

⁵ dhali mmota uni kun mini ku'th is ki 'cese/ 'cese/ mo, dhali mmota uni gun mini ga/ gwaswa tiya mo, dhali ta imandhu gu'b buni ki 'bore/ mo, dhali ta imanta gi bwanjush mo, dhali ta uni kun mini 'dap 'twa/ mo e mo gi ikathim buni mo, ki gwo ma Arungimis minu 'taki 'koki wak mo be.

⁶ Wakan kani 'kwani kun ta dhuru'c gwo mo ka daran du mo mmo'tima du ki is buni mo.

⁷ Tori is pini eya ris 'twanjal kuku/ mo mmota she/mm ki miim 'borga/ mo, dhali e gwom pini jin tora /e mo tani tori a'di jin dara'd ki jin thusi cine/ mo, dhali a'di jin ka/ aka/ mo,

⁸ dhali gwom 'borga/ jin tora /e jin minu mol wak mo, wakan ki wathi/ jin ceshki mo mo tani minu kar ki mo ma 'the is mo mmodar gi tonthusa 'denj kamu/ mo mmo/o gom ana mo be.

⁹ Kani uniny cinjina/ gun yolu gwo mo mmo'dap 'twa/ mo e itapam buni mo dhali ci uni monjam po eya ris 'twanjal kuku/ mo. Uni mini mii 'koki burush uni gwo i'twa/ mo,

¹⁰ walla mmokal to ki bwam buni mo, hili mmo/or a'di jin di'd isi bwaman mo ki a'di jin ta jin gana/ mo, wakan ki eya ris to 'baar mo tani uni mini mii 'taki nyonj gwontor ma Arungimis is mo, a'di jin ta'da Manwoth bana mo be.

¹¹ Haali/ a'the ma Arungimis mo, a'di piki'd mo gom bway mowoth mo goma ris 'kwani 'baar mo be,

¹² mmoye'th ana sho'k mo mmowak gwo mo jin ushuwa Arungimis lunj mo dhali mii gun dhunu e ki 'thir 'thir mo e mony'cesh yan mo dhali mmo'ko mmoku'th is ki 'cese/ 'cese/ mo dhali mmota gi buyenj kush gana/ mo dhali mmomii mii ma gayiin mo e mony'cesh mo be,

¹³ mmocora cor mo gom mo ma 'tenj kapem bana jin 'boru mii mo, a'di jin ta mompi gi monya ma Arungimis bana mo jin caaca mo dhali Amanwoth bana jin ta'da Yesus Kristhos mo be.

14 A'di jin ciki is piti mo gom ana mo mmowan ana 'ba/ mo 'peni aris miinthus mo dhali mmodhelel 'kwanim pitiŋ gana/ mo gom is piti mo, uni kun shwana mii anyor ki thith mo gom miim 'boron mo be.

15 Bahi aris to gwansan mo dhali malasiya malas mo dhali kucuriya kucur ki moshirri 'baar mo. Dhalku/ ki dhal wathin 'denj kamu/ bway mo mmowak /e mo.

3

Tikiri Miim 'Borga/ mo kun Miinu mo

1 Rogomi uni ki gwo mo mmo'dap 'twa/ mo e uni kun ta itapa mo dhali uni kun ta gi moshirr mo, mmota imanha gwo e mo, dhali mmota uni kun mini thoson is mo gom ma gom miinj gana/ mo,

2 mmo'koki o gwon thusa po/ wathin 'denj kamu/ mo, mmotheth mo 'peni 'kwani kun walana le'd ki tas tas mo, mmota uni gun min ma du 'thup mo dhali mmo'tora dum paŋ gana/ mo e miin taŋ goma ris 'kwani 'baar mo.

3 Haali/ ana ki is bana 'thissa/ ntwa/a/ mooniin tani takina pus mo mmo/ush gwo ha e mo dhali ana suskunu per mo dhali ana takina ciŋkina/ ka ris mii kun dhukunu e ki 'thir 'thir mo, haali/ ana 'kona 'ce ki 'kol mo, mmo'baara teem bana mo jin dupuwa dup i e mo dhali ki miin dhapan mo, dhali ana shinu i e ki 'kwani mo dhali ana shina shi/ i e ka rem 'kup mo.

4 Hili ki miim 'borga/ mo dhali mii kun miinu ki mo/en ki bwan'kush mo jin ta ji ma Arungimis mo, a'di jin ta'da Amanwoth bana mo, piyin mo tani

5 a'di taki ana is ki me'd mo, yisa gom miim 'boro'da kamu/ jin miikina ana ki mii ma kar/e mowa, hili ki momiimiim pitiŋ gana/ jin ha me'd mo, ki mii jin lamkunu mo ka dho'th jin dhodhu dok/e mo dhali ki mii jin tanu this e Shi/in Dheleladhelel mo tani

6 a'di jin wolkina a'di apo/ ana mo ki ehe/ ka Yesus Kristhos jin ta'da Amanwoth bana mo be.

7 Wakan ki ana minu 'taki dhu ki mo ma kar/e mo ka 'them piti mo dhali ta imanbu'th mal e mo ma 'tej kape/ gi moŋ'koki/e ki sule/ sule/ ya ye 'ba/ mo be.

8 Gwo jin onu mo be ta isi gwon gana/ be.

Aha/ ona bwa ki /e mini tiriish gwo mo gom to gwansan mo ba/. Wakan ki uni gwansan kun gamki gwo is eya Arungimis mo tani mini mii mii ka sereç mo mmoçi is buni mo ki miinj gana/ mo. Mii gwansan uni kun ta kum 'borgaŋ gana/ mo dhali ta ku kun mini ha me'd mo gom 'kwani mo be.

9 Hili thethi/ mo 'peni mo jin dotu/ gwowa dot mo kun ta gwom pus mo, dhali mo jin beledhu gwo mo, dhali mo jin biruwa bir mo dhali mo jin tanuwa le'd ki tas tas mo apo/ gwonkan jin cinu mo, haali/ uni dar gi shi/ miim 'boro'd mo dhali kun ta kum pe'th mo.

10 Haali/ gom wathi/ jin kali gwon thus jin ta'da he'k e mo tani 'ko'di a'di rumkunu ki gwo mo me'd 'de/ mo walla me'di su/ mo tani dhalku/ miinj kamu/ ki 'dish is mo nyakki a'di mo

11 mmomisha /e ki wathi/ gi wakan a'di wu'tulkunu mo dhali ta'da manmii miinthus mo. A'di wak'kunu ki is piti mo be.

Gwo jin Yedhuwa Ye'th Sho'k mo gom 'Kwani ka 'Deçe/ 'Deçe/ mo

12 Me'd jin miga/ hashka Artimas mo walla Tikikus mo e /e mo tani miyi ki is pini ki dher mo mmoyayu/ i aha/ mo e Pa Nikubulis mo, haali/ aha/ dikina gwo ibwa mo mmo'baar mondiŋ imun mo be.

13 Miyi ki miim pini ki dher mo mmo'tora Sinas gwo mo, a'di jin ta'da manmisha jo'd gwonkan mo, dhala Abulluus mo mmo/iuyu/ e bway buni ki jahanne/ mo. Hili uni i e ki 'bore/ mo ki uni mina toŋ kamu/ diki har mo.

¹⁴ Dhali dhalki 'kwanim bana da/ar mii mo si'da/ mmoçi is buni ki miim 'boro'd mo, wakan ki uni mini wo^h miin tiya 'twa/ mo kun mini mii ta gi to mo dhali yisa mmomol maman gana/ dho'th mo.

Mom'bor Mii jin Dhalu Me'da Po/ Kwani mo

¹⁵ Aris uni 'baar mo kun nyakki 'ko ki aha/ mo tani hashki /e monthe me'd mo. Theki uni gwansan me'd mo kun enki aman mo e mongam gwo is mo be. A'the midi di e umi 'baar mo.

Gwo jin 'Kwar ma Buulus goma PILIMUUN mo

Monthe Me'd mo

¹ ABuulus jin ta'da habuus goma Kristhos jin ta'da Yesus mo dhala Timuthawuus jin ta'da kam bana mo,

Eya Pilimuun jin enu mo, a'di jin ta'da mannyaka tu'c bana mii mo.

² Dhala Abpiyya mo jin ta 'bwah bana mo dhala Arkibbus mo jin ta'da garr bana jin ta'da thuruk mo, dhala kaniisa e kun gu'b pini mo.

³ A'the e/e mo dhali monku'th is 'peni Arumgimis jin ta'da Babam bana mo dhali Tapa Yesus Kristhos mo be.

Mo/en ma Pilimuun dhali Mongam Gwo Is Piti mo

⁴ Aha/ 'bora Arumgimis pem bwa i is isa yempa/ mo ki aha/ kakina /e e mo eya 'thom pem mo be,

⁵ haali/ aha/ cikina gwo mo gom mo/en pini mo dhali gom mongam gwo is pini jin karkina /e ka karambuye/ ki Tapa Yesus mo dhali goma ris uni 'baar mo kun dhunu ki she/ ki dheel dheel mo,

⁶ dhali aha/ 'thokina ki mongam gwo is pini jin pwakkunu/e mo midi um mo mmonyitha ris to kun 'boron mo kun ta kum bana mo eya Kristhos mo be.

⁷ Haali/ aha/ tana gi mon'kuny bwa kagahara mo dhali momalas 'peni mo/en pini mo, /e jin tana kam pem mo, haali/ adu gi 'kwani kun dhunu ki she/ ki dheel dheel mo tani uni yenu 'ba/ mo e /e mo be.

ABuulus Wothki Gwo Is goma Unisiimus mo

⁸ Isi kan mo tani ba aha/ dara gi monyju/ mo ki nyanye/ eya Kristhos mo mmokan/e gwo mo mmomii to kun 'thekkunu gwo mo tani

⁹ hili gom gway gi mo/en mo tani aha/ ona bwa mo mmoyip 'kup 'kupki /e mo - aha/ jin tana Buulus mo, aha/ jin tana amanya goma Kristhos mo dhali shwane/ aha/ tana habuus mo si'da/ goma Kristhos jin ta'da Yesus mo be -

¹⁰ Aha/ yipa 'kup 'kupki /e mo, goma 'cim pem jin ta'da Unisiimus mo, aha/ jin warkina a'di ki com mo me'd jin dikika/ mo eya sijn mo.

¹¹ (Kadhamo/ niin mo 'thissa/ tani a'di diki ha me'd gom /e mo, hili shwane/ mo tani a'di ta a'din gana/ jin ha me'd mo gom /e mo dhali gom aha/ mo be.)

¹² Aha/ hashkina a'di ka nyan'ko'di /e mo, isa dum pem gana/ a'di ihashkika/ mo niin.

¹³ Aha/ onayi ki aha/ mina bwa 'taki 'kuny mo mmokar a'di nyakki aha/ mo, ki mii gi wakan mo tani ki a'di midi 'taki mii aha/ to mo gom gway pini mo me'd jin tikirkika/ di mo eya sijn mo gom gwom 'borga/ mo.

¹⁴ Hili aha/ 'tena bwa ki mii toj kamu/ ki dar gi gwom pini jin gama /e me'd mo, ki mii gi wakan mo tani ki tom pini kun 'boron minu 'taki 'koki mii ki mii kun tu'cu /e mo, hili ki bwam pini'j gana/ jin di ki kany mo be.

¹⁵ Wariba/ a'di ta mii yansan jin kwa/kunu a'di is mo 'peni /e mo gom ari mo mo ki /e mini 'taki ta gi a'di ka nyan'ko'd mo ki sule/ sule/ mo,

¹⁶ mmodok/e kar a'di me'd cin'kina/ jin yolu yisa, hili mmothis a'di mii 'ko'd e mo me'd cin'kina/ jin 'konuki yol mo, mmokar a'di ka kam pini jin enu mo, dhali isi ki ji mum si'da/ mo gom aha/ mo, hili a'di 'teki nyanye/ gom /e ba/ gom mii kun 'konu ki shuman is mo dhali e Tapa mo be.

¹⁷ Wakan wakki/ /e mini o bwa ki aha/ mo mmota agarr pini mo tani budhi a'di mo ma me'd mii jin mina /e 'taki bu'th aha/yi.

¹⁸ Wakki/ a'di thu'thki /e toŋ kamu/ mii mo tani walla di ka murem pini 'ba/ mo gom toŋ kamu/ mo tani 'kwari a'di gom gway pem mo ma.

¹⁹ Aha/, jin tana Buulus mo, i'kwarkina gwo yansan ki me'd pem gana/ mo. Aha/ mina ci /e to mo gom a'di mo - ki aha/ mina diki o gwoŋ kamu/ mo goma murem pini jin dina /e aha/ i'ba/ mo, isi kani jin ta buŋgwar is piniŋ gana/ mo.

²⁰ Nye, akam pem, aha/ ŋapa shi/ miim 'boro'd 'peni /e mo e Tapa mo. Yeyi aha/ adum pem eya Kristhos mo ma.

²¹ Gom jwam pem jin wuka/ /e i is mo gom gwom pini jin hana /e e mo tani aha/ 'kwarkina /e gwo yan mo, mmomishkika/ ki /e mini mii uni kan ki nyanye/ mo mmobol gwom pem jin oka/ /e e mo.

²² Ki mii yan jin miina /e e me'd mo tani thosoni gu'b yilkina/ si'da/ mo gom aha/ mo haali/ aha/ tosha e mon'thom pini mo ki aha/ minu ci ki /e mo be.

Kwalany 'Te/ Ba. Monthe Me'd mo

²³ Abapraas, a'di jin ta'da garr pem jin nyak aha/ ca'b eya sijin mo gom gway ma Kristhos jin ta'da Yesus mo tani hashki /e monthe me'd mo,

²⁴ dhala Markus si'da/ mii'd wakan mo dhala Aristarkus mo dhala Dimas mo dhala Luuka mo, uni kun tana garr pem kun nyak aha/ aŋu'c mii mo.

²⁵ A'the gi Tapa Yesus Kristhos midi nyak di ki /e e shi/in pini mo be.

Gwo jin 'Kwaru gom 'Kwani IBRANIYIIN mo

Arumgimis Torki Gwo ki Ya/m Piti mo

¹ Eya ris bway kun 'ko ki she/ ki she/ mo tani Arumgimis torki gwo e ibabam bana kadhamo/ mo ki imançi gwom piti kadhamo/ mo.

² Hili ka tee kun 'ko'd gwansan mo tani a'di torki gwo e ana ki a'di jin ta Ya/ mo be, a'di jin karkina a'di 'pen ka pije/ mo mmota amanbu'th mal gom to 'baar mo. Dhali e a'di mo tani mony'cesh si'da/ ukkina a'di mo be.

³ A'di dhelki monyca ma Arumgimis mo mo dhali ka/ isi jamas jin takina a'di buyempam pitin gana/ mo, mmojetkina a'di aris to kun uku mo ki gwo gi mom'bi'th piti mo be. Ki a'di diki'd mmodhelela dhelel mo gom miinthus mo tani a'di ca'bki'd ki me'da bim poros gi a'di jin Eka/ Ek e momis mo,

⁴ mmowarkina a'di ki a'di jin telki gantha/ mo mmope iman'doyu gwo 'kup mo, ma gom gway piti jin bu'thkina a'di mo jin 'boro'd ki isi 'bor gana/ mo mmobol kum buni e mo be.

Ya/ A'di Itelki Gantha/ ki Iman'doyu Gwo mo

⁵ Haali/ eya man'doyu gwo jana sa/ i/on ma Arumgimis gwo mo me'd 'de/ mo ki:

/E ta Ya/m pem mo,
shwane/ aha/ dho'thkina /e mo?

walla dok/e,
Aha/ mina ta a'di com mo,
dhali a'di midi ta aha/ ya/um mo?

⁶ Dhali dok/e, ki a'di kalki mo ma dho'th jin ta ji ma bwanyara/ e mony'cesh mo tani a'di oki gwo mo ki:

Dhalki aris iman'doyu gwo ma Arumgimis lunji a'di mo.

⁷ Gom iman'doyu gwo mo tani a'di ki o gwo mo ki:

A'di jin dhuki iman'doyu gwom piti mmota 'tham mo,
dhali cinkinam piti mmota akapany o'd ma le'dan mo.

⁸ Hili gom Ya/ mo tani a'di ki o gwo mo ki:

Akursin tapam pini, ayy Arumgimis, ta a'di jin midi di goma sule/ mo dhali ki sule/ mo.

Cwa ma kar/e mo ta cwa gi bampam pini mo.

⁹ /E enki mii ma kar/e mo dhali shi/ mo i e mo, mo jin ushu gwonkan mii mo.

Wakan Arumgimis, jin ta'da Arumgimis pini mo, a'di 'koshki /e is mo ka yin gi bwanj 'kunyga/ mo mmo'ce'd cin tiyam pini apo/ mo.

¹⁰ Dhali,

/E jin ta Tapa mo, /e ka'bki mony'cesh sho'k mo 'peni ka mun'kup mo,
dhali aris momis uni ta mii kun miina /e ki me'd pini mo be.

¹¹ Uni minu 'ce'd sho'k mo tani, hili /e mini di mo be.

Uni mini wuwa dhan mo me'd burrinye/ jin shi/i isi 'baar mo.

¹² Me'd burrinye/ jin kumu bwam/e mo tani /e mini 'kuç uni is mo

dhali uni minu aq e mo me'd burrinye/ mo be.

Hili /e din naskina/ ki jamas jin tana /e /e mo,

dhali yil pini mini 'koki ush me'd mo be.

¹³ Hili eya man'doyu gwo jana sa/ i/ona a'di gwo mo me'd 'de/ mo ki:

Ca'bi /e aha/ ki me'da bim poros pem mo

ntagi aha/ mina dhu 'kup pini

mmota cwam pini jin mina /e idhu sho'k mo?

14 'Kona ris uni ki ta shi/in kun mii to mo, kun hashkunu mo mmomii to mo, gom gway gi uni gwansan kun mini bu'th bway gi mowoth mowa?

2

Gum Dhan Mowoth mo

1 Wakan ana mina mii ciya hirdhe/ ki 'dish 'dish mo ki gwo jin cikina ana mo, isi ciki/ ki ana minu 'koki bor 'peni a'di mo.

2 Haali/ wakki/ gwo jin bahu ki iman'doyu gwo mo tani doshki'd ki sho'k mo dhali aris mo jin dhanu gwo mo walla mo jin ushu gwo ha e mo bu'thki mo jin rakwa raki bway jin ta jin kar/e mo tani

3 i/ana mina ye kata mo, wakki/ ana pinykina is mo gom dhan gumbway mowoth yan mo? A'di bakunu itwa/a/ mo ki Tapa mo, dhali a'di telkunu sho'k mo e ana mo ki uni gwansan kun cikki a'di mo be,

4 ka Arungimis di'd si'da/ mmokal gwo o ki jamas mii mo kun miikina a'di mo dhali aris momer mo dhali aris miimer kun 'kona e ki she/ ki she/ mo dhali ki to kun cinu ki me'd ki Shi/in Dheleladhelel mo, kun pwakkunu bwa mo isi ki bwam pitij gana/ mo be.

A'kar'kup gi Mowoth mo

5 Haali/ Arungimis diki kar gwo gi moshirr mo apo/ iman'doyu gwo mo gom to gun ta kun this kun minu mii e mony'cesh yan mo, a'di jin 'kokina ana mo mmo/o mo.

6 A'di pikunu mo e monkamu/ e gwo ma Arungimis mo ki:

Wathi/ gi wakata mo, jin mina /e i/o bwa ki a'di mo,
walla ya/ gi wathi/ mo ki /e mini hil a'di i e mo?

7 /E karki a'di gom ari mo mo mmota jin gwa'da'd ki iman'doyu gwo mo.

Dhali /e shumki a'di ki monyca mo dhali ki montak mo,

8 mmodhukina /e aris to 'baar mo e moshirr piti e bwan'kwariny sho'k piti mo be.

Dhali goma ris to gun dhukunu mo e moshirr gi 'kwaniny'cesh mo tani a'di diki dhal toj kamu/ ka piye/ mo 'peni moshirr piti mo. Me'd jin dina a'di kan mo tani, ana 'konaki para ris to e naskina/ mo e moshirr piti mo.

9 Hili ana parkina Yesus e mo, a'di jin diki'd ki ari mo mo mmokarkunu a'di ki gwa'd mo ki iman'doyu gwo mo tani a'di shumkunu mo ki monyca mo dhali montak mo gom isa nyor jin wukina a'di mo. Wakan ka 'the ma Arungimis mo tani a'di midu 'taki nyok wu mo goma ris 'kwani 'baar mo be.

10 Haali/ a'di gama'd ki isi gam gana/ mo ki a'di, a'di jin uku to 'baar mo gom gway piti mo dhali a'di jin 'kon ma ris to 'baar mo mmo/uka uk ki a'di mo, mmosuskina a'di iya/ gi 'kwani ka ris mo e monyca mo, a'di jin ta'da shu/um bway gom gway gi mowoth buni mo tani ki a'di minu 'taki kar ji gi isi 'borganj gana/ mo ki mo jin 'koshu is ka nyor mo be.

11 Haali/ a'di jin dhagamki'da dhagam mo dhali uni gwansan kun dhagamkunu mo tani uni takin gi mo ma tel 'pen jin ta'da 'kar'kup mo. A'di ka ba/ idina is ki 'the a'di mo mmoyuk uni ki iwak piti mo,

12 mmo/o gwo mo ki:

Aha/ mina bah /e gway pini e iwak pem mo

dhali e bwaman ma waambuhany 'kwani kun tuli is mo tani aha/ mina man /e mo be.

13 Dhali dok/e,

Aha/ mina kar mongam gwo is pem e a'di mo,

Dhali dok/e,

Aha/ a'dihe/ mo, dhali uci kun cin ma Arungimis aha/ mo be.

14 Me'd jin wakina a'di kan mo mmobu'thkina uci buɲɲgwar is mo dhala bas mo tani a'di ki is piti si'da/ bu'thki buyempa jin nyakka'd kan mo, ki, ki e mowu mo tani a'di mididi 'taki 'ce'd a'di sho'k mo, a'di jin ta gi mom'bi'th gi mowu mo, a'di jin ta tapa ma ruma 'cesh mo

15 Dhali 'cuɲ uni gwansani 'baar mo, uni kun 'kokin e mo jin ko/kina uni wu mo e moshirr gi mondek mo mmo'baar moɲ'koki/em buni mo.

16 Haali/ ka jinɲ gana/ a'di diki ta gwo gom iman'doyu gwo mo a'di jin shwakina a'di jwa mo, hili gom emen ma Ibrahiim mo be.

17 Wakan a'di ka ba/ ituju mmowa e ki iwak piti mo eya ris 'twanɲal kuku/ mo, wakan ki a'di mididi 'taki war ka gasiis jin ca'd mo jin ta'da manmiimii mo dhali jin ta isiɲ gana/ mo, e mo jin miinu to goma Arungimis mo, mmmomii mii jin ta ji ma the/m me'd gom miinthus gi 'kwani mo be.

18 Haali/ gom a'di ki is piti mo tani, a'di 'koshkina is ka nyor mo dhali a'di palkunu mo, a'di misha a'di uni gwansan woth mo kun palkunu mo be.

3

Yesus A'di Itelki Gantha/ka Musa mo

1 Wakan iwak kun kogu mo, um gun pwakkunu to gi momis mo ka yuɲ jin yuku mo, mmokwo'c jasi eya Yesus mo, a'di jin karkunu ki she/ mo dhali ta'da gasiis jin ca'd mo gom gwom bana jin pikina ana mo.

2 A'di ta a'di jin ta a'di isiɲ gana/ mo gom a'di jin karki a'di 'pen ka piɲe/ mo, me'da Musa mo mmotakina a'di isiɲ gana/ mo si'da/ e gu'b ma Arungimis mo.

3 Hila Yesus a'di karkunu ki a'di jin haki me'd ki haɲ gana/ mo e monyca mo mmobola Musa e mo, me'da mannyanɲ gu'b jin takkunu kagahara mo mmobol gu'b e mo be.

4 (Haali/ aris gu'b ki she/ ki she/ nyanɲkunu ki 'kwani mo, hili amannyanɲa ris to 'baar mo tani a'di ta'da Arungimis mo be.)

5 Dhala Musa a'di ta a'di jin ta isiɲ gana/ mo mmomiiya ris to 'baar mo e gu'b ma Arungimis mo me'da manmii to mo, mmotesa ris gwo gom to 'baar mo kun minu mii tori 'ko'd mo be.

6 Hila Kristhos a'di ta a'di jin ta isiɲ gana/ mo apo/ gu'b ma Arungimis mo me'd ya/ mo. Dhali ana tana kuɲ gu'b piti mo wakki/ ana mina bu'th gwo ki nyen mo, gwo gom mom bana jin wukina ana a'di jwa i is mo dhali dhu 'ba/ ki ca mo e mo ma 'tenɲ kapem bana mo be.

Asi/is gom 'Kwani ma Arungimis mo

7 Wakan, me'd gwo jin okina Shi/in Dheleladhelel mo ki: Shwane/, ki um mini cik 'twam piti mo tani

8 dhalka dum bum ki 'bi'th mo me'd mii jin ushkunuwa ush mo eya tee jin palkunu um mo e nombwaasho mo

9 e mo yin jin palkina ibabam bum aha/ mo dhali mish miim pem ki yila issu/ mo.

10 Wakan aha/ ci'thkunuwa du mo ki 'kwani ma nyakum yil gwansan mo, dhali o gwo mo ki: Uni isa yempa/ iikini dheres mo eya dum buni mo dhali uni 'koki mish bway pem mo.

11 Me'd jin thulka/ me'da po/ gwo mo goma nyor pem jin dekga/ mo tani uni mini 'koki ciɲ mo e mo ma si/is pem ki sule/ sule/ mo be.

12 Hili ki 'bore/ iwak mo isi ciki/ ki jin tal 'den kamu/ 'peni bwam um mo mididi diki 'taki ta ga du jin ta thus ki thus mo mmo/ush gwo gam is mo, mmosus um mmoɲa'k mo 'peni bway ma Arungimis jin di ki e mo be.

¹³ Malasiya malas ka rem 'kup isa yempa/ mo isi me'd jin tana a'di atee jin yuku ka Tee Yan mo, jin mina miinthus diki he'k jan tal 'deŋ kamu/ e mo ki mo ma he'k em piti mo mmo'bi'th uma du mo.

¹⁴ Haali/ ana pwakkunu to eya Kristhos mo wakki/ ana jasi 'te/ mo mina bu'th monyjam bana jin wuna ana a'di i isi twa/a/ mo mmo'tel sho'k mo ntagi 'pemen mo,

¹⁵ ki a'di 'konu mo mmo/o si'da/ mo ki:
Shwane/, ki um cikki 'twam piti mo tani
dhalka dum bum ki 'bi'th mo
me'd mii jin ushkunuwa ush mo.

¹⁶ Ki ija si'da/ uni i'kokin mo mmocik a'di mo dhali 'ko mo mmo/usha ush mo naskina/? 'Kona uni ki ta uni gwansani 'baar mo kun dhalki Pam Masir 'pen mo e bwar'kwariny mii jin shun ma Musa ashu/um bway mowa?

¹⁷ Dhali ki ija a'di ici'thki a'di adu ki yila issu/ mo? A'di diki ta uni gwansan kun miiki miinthus mowa, kun ishkina buŋgar is buni e bwam ma sho mowa?

¹⁸ Dhali ki ija si'da/ ithulkina a'di me'da po/ gwo mo mmo/o ki uni mini 'koki 'taki ciç mo e mo ma si/is piti ki sule/ sule/ mo, hili a'di diki ta uni gwansan kun ushki gwo ha e mo mmomii mowa?

¹⁹ Wakan ana parkina uni e mo ki uni molki ciç mo haali/ uni ushki gwo gam is mo be.

4

¹ Wakan, ki gwom piti jin okunu is mo gom ciç jin minu ciç mo e mo ma si/ is piti diki'd mo tani dhalki ana ko/ka is mo isi ciki/ mo ki jan tal 'deŋ kamu/ 'peni um midi 'taki aŋa/aŋh mo mmojidhir a'di mo be.

² Haali/ gwom 'boro'd pu'dki'di ana mo jasi me'd jin pu'dki'd e uni mo. Hili gwo jin cikkina uni mo tani diki war ki ji gi ha me'd gom uni mo, haali/ a'di diki 'dap ki me'd mo ki monjam gwo is mo e uni gun cikki a'di mo be.

³ Haali/ ana kun gamkina gwo is mo tani cikkina mo e mo ma si/is yan mo, me'd gwo jin okina a'di mo ki:

Me'd jin thulka/ me'da po/ gwo mo goma nyor pem jin dekga/ mo tani

Uni mini 'koki ciç mo e mo ma si/is pem ki sule/ sule/ mo be,
ba miim piti 'baarkunu mo 'peni monka'b jin ka'bkina a'di mony'cesh mo be.

⁴ Haali/ a'di torke gwo mo e monjamu/ mo goma cim ma pesu/ mo e bway ki wa cikise/ ki: Dhali Arumgimis siki is mo ka cim ma pesu/ mo 'pena ris to kun ukkina a'di mo be.

⁵ Dhali dok/e e mo yansan mo tani a'di o gwo mo ki:

Uni mini 'koki ciç mo e mo ma si/is pem ki sule/ sule/ mo be.

⁶ Me'dyin ki mii gi wakan mo tani kun tiya 'kon mmociç mo e a'di ki a'di diki'd naskina/ mo. Dhali uni gwansan kadhamo/ kun bu'thki gwom 'boro'd mo dhali ush me'd mo mmo'koki ciç a'di mo tani haali/ uni warkin ki iman/ush gwo ha e mo be.

⁷ Dok/e a'di karki'da teen kamu/ mo mmo/o gwo mo ki: Shwane/, mmo/o gwo mo eya Dawuu'd mo, ma isi 'ko'di nnii mo, e gwo kun 'tulkunu mo hila/ ki:

Shwane/ ki um cikki 'twam piti mo tani
dhalka dum bum ki 'bi'th mo.

⁸ Haali/ wakka Yashuu/ midi 'taki ci ki uni mo ma si/is mo tani Arumgimis midi diki 'taki o gwo goma teen kamu/ jin midi di i'ko'd mo be.

⁹ Wakan a'di iça'bkina ma cim ma pesu/ mo jin mina 'kwani ma Arumgimisi si/is mo be.

¹⁰ Haali/ a'diyin jin midi ciç mo eya tee jin min ma Arungimisi si/is mo tani a'di si'da/ midi daç miim piti mo me'd jin daç ma Arungimis miim piti mo be.

¹¹ Wakan dhalki ana bira bir mo mmociç mo e mo ma si/is yan mo, wakan ki jan tal 'deñ kamu/ midi diki biṭ mo e 'kusan gwon 'de/ yan jin ushu gwo ha e mo.

¹² Haali/ gwo ma Arungimis ta gwo jin di ki e mo dhali umi is mo dhali kaaka ki ṅarṅar mo mmobol gandala turga/ jin ka'd ka 'ban su/ e ki ka mo mmosuka su'k mo mmokwa/a kashira/ bwa mo dhali shi/in mo, dhali gwocor mo dhali noro'd mo, dhali mmonyith gwo kun kulumu ibwa mo dhali ayisen gwo gi 'twa/ ma du mo.

¹³ Dhali ibwambori a'di mo tani to jin ukur kamu/ yisa di'da jin bagkunu 'peni a'di mo, hili aris uni 'baar mo dhunu eya tente/ mo dhali 'kon ki lañ lañ mo e bwambori em piti mo, a'di jin mina ana mii us is mo mmomii to mo.

Yesus Ta Dhana Gasiis jin Caaca mo

¹⁴ Me'd jin takina ana ka dhana gasiis jin caaca mo, a'di jin peki'd ki tur mo eya ris momis mo, a'di jin ta'da Yesus mo, jin ta Ya/ ma Arungimis mo tani, dhalki ana budha a'di ki ri'd mo mmoṭel sho'k mo e gwom bana jin pina ana mo be.

¹⁵ Haali/ ana tana ka gasiis jin ca'd mo, a'di jin misha isa nyor 'ciñ mo nyakki mon'ka'd is bana mo, a'di jin ta jan tal 'de/ jin palkunu mo ki 'twanjal kuku/ mo me'd ana mo tani hili a'di diki mii miinthus mo be.

¹⁶ Wakan dhalki mom bana jin wuna ana a'di jwa i is mo 'dish ana abor mo ki 'dish 'dish mo eya kursi ma malik jin ta ji ma 'the mo, ki ana mina 'taki bu'th momimii mo dhali gama 'the mo mmowotha/ woth mo ka tee jin minu mii ta gi a'di mo be.

5

¹ Haali/ iris igasiis kun can ka 'dete/ 'dete/ mo kun kwanykunu mo 'peni bwan 'kwani mo tani uni dhukunu 'pen ka piye/ mo gom mii mo gom gway gi 'kwani mo mmo'disha uni Arungimis is ki mii mo, mmoçi to gun cinu ki me'd mo dhali to kun 'cithuwa basa 'cesh mo gom miinthus gi 'kwani mo.

² A'di mishi mii us is ka daran du mo gom 'kwani kun ta pus mo dhali kun thami mii mo, haali/ a'di ki is piti 'kamu ki mo jin 'ka'du is mo.

³ Haali/ gom mii yansan mo tani a'di ka ba/ imidi mii ci to jin cinu mmo'citha/ basa 'cesh mo gom miinthus pitin gana/ mo me'd mii jin nyakka'd ki isi nyak gana/ mo me'd jin miina 'kwani gwansan mo gom miinthus buni mo be.

⁴ Dhali wathin tal 'deñ kamu/ yisa di'da jin midi kar is piti ki montak yan apo/ is piti mo, hili a'di yukkunu ka Arungimis mo, jasi me'da yuk jin yukunuwa Haruun wakan mo be.

⁵ Wakan si'da/ aKristhos diki kar is pitin gana/ ki ca mo mmominu kar a'di ka gasiis jin ca'd mo, hili a'di karkunu 'pen ka piye/ mo ki a'di jin oki gwo e a'di mo ki:

/E ta Ya/m pem mo.

Shwane/ aha/ dhotha /e mo.

⁶ Me'd gwo jin ona a'di si'da/ e mon'kamu/ mo ki:

/E tana gasiis jin midi di ki sule/ sule/ mo

mmoothuk mii ma Malkisaadag i'ko'd mo.

⁷ Dhali ka tee jin bu'thkina a'di bungwar is gi 'kwani ki is piti mo tani, aYesus ciki mo ma 'tho jin 'thonu mo dhali di'ba di'b is mo ki 'twa/ jin caaca ki monko mo dhali ki jabu'th mo, e a'di jin mishi a'di is ta ki me'd mo 'peni mowu mo, dhali a'di cikunu ko mo gom mii ma gayiin piti jin kogu mo.

⁸ Ba a'di ita Ya/ mo tani a'di da/ arki gwo jin hanu gwo e mo gom to jin 'koshki a'di is ka nyor mo.

⁹ Dhali mmo'borkunu a'di ki 'bor gana/ mo tani a'di warki'd ki 'kusan gi bway gi mowoth ki sule/ mo e uni 'baar mo kun haki a'di gwo e mo be,

¹⁰ mmo'cemkin ma Arumgimis a'di gway mo mmota agasiis jin ca'd mo mmothuk mii ma Malkisaadag i'ko'd mo be.

Arum jin Rumu Apo/ Mo jin Dhalu Gwoŋ Gana/ 'Pen mo

¹¹ Gom gwo yansan mo tani ana takina gi gwo kagahara mo mmo/o mo, a'di jin 'bitha'bi'th mo mmobe'd 'pen ka piye/ mo, haali/ um ushkina 'ce ki us mo mmocik a'di mo be.

¹² Haali/ ba um ka tee yansan mo tani um ka ba/ imini 'taki ta imantor gwo mo, hili um mini mii ta gi jan 'deŋ kamu/ mmotor um gwo mo dok/e isi ki gwo ma bwa nyara/ jin twa/a/ gi gwo ma Arumgimis mo. Um mini mii ta ga ko mo mmopi mo, yisa mmoshwa maa ki ka'c yisa.

¹³ Haali/ aris 'kwani 'baar ka 'dete/ 'dete/ mo kun 'ko 'ko'd eya ko mo tani uni daran gi 'twarj gwocon mo e gwo jin ta'da kar/e mo, haali/ uni ta uci mo be.

¹⁴ Haali/ maa jin shwanu ki ka'c mo tani a'di gom 'kwani kun iskin mo be, a'di gom uni gwansan kun ye'thkunu sho'k mo ki gwoŋ gwocon gi bwam buni mo mmobotkina uni ki miim 'boro'd mmokwa'th mo 'peni a'di jin ta thus ki thus mo.

6

¹ Wakan, dhalki ana dhala gwo ma bwa nyara/ kun toru 'pen mo goma Kristhos mo dhali yip 'kupki isi yip gana/ mo e mo jin isuwa is mo, yisa mmomina ana n'thi torj kamu/ dok/e apo/ mo jin ka'bu/ e mo jin rijuwa du is mo 'peni mii kun wukin mo, dhali mongam gwo is 'kup ka Arumgimis mo yisa,

² ki gwo jin yedhu sho'k mo gom gwo gi mo jin lamuwa lam is mo ki miin dhamo/ mo, dhali mo jin 'thikunu mii 'ko'di me'd mo, dhali mompi 'peni mowu mo, dhali mo jin toru gwon dwall 'twa/a 'cesh ki sule/ mo.

³ Dhali mii yansan a'di imina ana imii mo wakki/ Arumgimis midi dhal ana bway mo be.

⁴ Haali/ a'di molu mii mo mmotash mii e mo dok/e gom mo jin rijuwa du is mo gom uni gwansan kun takin gi e ma du kun 'twakki mo ki 'twak jin shi/i'd 'thissa/ mo, uni gun nyokki to gi momis jin cinu ki me'd mo dhali war ki uni gun pwakkunu Shi/in Dheleladhelel mo be,

⁵ dhali uni kun nyokki mo jin 'kunya gwo ma Arumgimis mo dhali aris mom'bi'th kun mini pu'du/ ki she/ yil mo,

⁶ wakki/ uni mini ci mii jin dhalu gwo 'pen mo, me'd jin 'koshkina uni Ya/ ma Arumgimis jwa mo ki cwany'cithan dhul mo gom gwo ki bwam buni mo dhali 'de'k a'di imis mo ki a'di midi bu'th mo jin waquwa wak mo be.

⁷ Haali/ mony'cesh jin piki yi'den sho'k mo jin ta'kki 'twa/ me'd ka ris apo/ a'di mo dhali a'di ki dho'th 'cemen to kun ha me'd mo gom gway gi uni gwansan kun korki a'di mo tani mony'cesh bu'thki mom'bor mii 'peni Arumgimis mo be.

⁸ Hili wakki/ a'di dho'thki'da risa 'de/ mo dhali arisa lit mo tani a'di ushki me'd mo dhali 'dishkina 'twa/ mo ki a'di minu jee mo. Dhali 'pemen piti mo tani a'di minu pur ki o'd mo be.

Momish ki Isa Duŋ Gana/ mo. Mo ma 'Teŋ Kape/ mo

⁹ Hili um gun enu mo, aman lalkunu sho'k ki gwo mo eya dum bam mo gom um mo, mmomisha aman tom 'borga/ 'peni um mo kun ta kum bway gi mowoth mo, ba gwo gi wakan mo tani a'di i/okina aman gwo mo be.

¹⁰ Haali/ Arungimis diki mola kar/e ta mo wakan mmoshampar miin tom bum ki e mo dhali mo/en jin torkina um gom gway piti mo e miin to gun miikina um mo gom uni kun dhunu ki she/ ki dhelel dhelel mo, me'd mii gun 'kokina um mmomii a'di shwanesan mo.

¹¹ Dhali aman ona bwa ki isi on gana/ ki um ka 'dete/ 'dete/ mo mini tor mii yan ka daran du mo mmonyitha/ nyith ki mii jin shi/i'd mo mmomish ki isa duj gana/ gom mo ma 'teŋ kape/ jin midi di ntagi 'pemen mo be,

¹² wakan, ki um minu 'taki 'koki soroth mo, hili thoŋi uni gwansan mii mo uni gun takin gi mal mo e gwo kun onu is mo ki monŋam gwo is mo dhali ki bwa jin 'kuçu ki 'kari'th mo be.

¹³ Haali/ ka Arungimis oki gwo is goma Ibrahiim mo me'd jin dara a'di gi jin tal 'deŋ kamu/ jin eka/ eŋ ki a'di jin thulkina a'di gwo me'da po/ mo tani a'di ki is piti a'di ki thul a'di gwo me'da po/ ki is pitin gana/ mo

¹⁴ mmo/o gwo mo ki: Ka jin gana/ aha/ mina 'bor /e mii mo dhali mar /e is mo be.

¹⁵ Dhali wakan a/Ibrahiim taki'd gi bwa jin 'kučkina a'di ki 'kari'th mo mmobu'th gwo jin onu is mo.

¹⁶ 'Kwani ka jin gana/ thulki gwo me'da po/ ki a'di jin caaca mmobol uni e ki is bunin gana/ mo, dhali eya ris gwom buni kun suka uni mo tani gwo jin thulu me'da po/ mo a'di ta gwo jin 'ko'd jin toruwa bora 'cesh mo.

¹⁷ Wakan ka Arungimis dina gwo ibwa mo mmotor mo jin pina a'di gwo jipi e ki nyanye/ mo gom uni gun mini kal mal gi gwo jin onu is mo tani a'di diki ak buyempam pitin gana/ e mo gom 'kup bwan ganam piti mo tani a'di hurki 'pen bway bwaman mo ki gwo jin thulkina a'di me'da po/ mo be.

¹⁸ Wakan ki gwo kun 'koni su/ kun 'konuki ak e mo tani e mo jin moluwa Arungimis nyo/ mo ki a'di ta thus mo tani ana kun takina gi mo jin sokina ana mo gom jwam bana jin sokina ana mo mmohur mo e a'di mo tani minu 'taki 'bitha du is mo mmobu'th mo ma 'teŋ kape/ jin karkunuwa bori ana mo be.

¹⁹ Ana takina gi a'di yansan mo mmomish mo ki isa duj gana/ mo dhali telu sho'k mo ka kar 'kup tonkuthu'd goma kashira/ mo dhali mo ma 'teŋ kape/ caan jin jidhirki'd mo dhali ciç mo e mo yan jin kogu mo ibwampo/ burriye/ jin karu ka yolol mo mmodik mo e mo,

²⁰ mo caan jin yakin ma Yesus ntwa/a/ mo gom gway bana mo mmotakina a'di agasiis jin ca'd mo ki sule/ sule/ mo mmothuk mii ma Malkisaadag mo be.

7

Igasiis Thuŋki Mii ma Malkisaadag mo

¹ Haala Malkisaadag yan jin ta'da malik gi Pan Saliim mo dhali a'di si'da/ ta'da gasiis gi a'di jin Cayaa/ e ki Ca mo jin ta'da Arungimis mo tani a'di gamki'da Ibrahiim 'kup mo mmodokkina a'di ka nyan'ko'd mo 'peni mo jin 'koshkina a'di imalik mo dhali 'bor a'di mii mo be.

² Dhali e a'di mo tani a/Ibrahiim ki kwa/ a'di to bwa mo jin 'dapki'da 'dap 'twa/ ka 'kume'd mo 'peni aris to 'baar mo. A'di ta a'di jin twa/a/ mo ki mo jin luku gway piti mo jin ta'da malik jin ta'da kar/e mo dhali a'di si'da/ ta'da malik gi Pan Saliim mo, a'di jin onu ki, amalik gi mo ma ku'th is mo be.

³ A'di di'd ki dar gi com mo, walla kum si'da/ mo, walla dar gi gwo jin beledhu gom emen piti mo, dhali a'di si'da/ dara'd gi mo 'pena tee ga

mun'kup mo walla 'pemen gi mondiki/em piti mo, hili a'di wana e ki Ya/ ma Arungimis mo mmotikirkina a'di di mo mmota agasiis ki sule/ sule/ mo be.

⁴ Bahili ma. Cam piti wa'da/. A/Ibrahiim jin ta'da dhana baba gi 'Kwani ma Israyiil mo ciki a'di to jin 'dapki'da 'dap 'twa/ ka 'kume'd mo 'peni to kun dilunu mo.

⁵ Dhali uni gwansan kun ta emen gi 'Kwani Lawi mo kun bu'thki mo jin tanuwa gasiis mo tani uni ta gi gwoŋkan jin 'kwarkunu mo e gwoŋkan jin cinu mo mmobu'th to kun 'dap 'twa/ ka 'kume'd 'peni 'kwani mo, uni gun ta ikam buni mo, ba uni gwansan si'da/ ita emen 'pena Ibrahiim mo be.

⁶ Hili wathi/ yansan jin dara'd gi gwo jin beledhu 'peni emen buni mo tani bu'thki to jin 'dap 'twa/ ka 'kume'd 'pena Ibrahiim mo dhali 'bor a'di mii mo, a'di jin ta gi gwo jin onu is mo be.

⁷ A'di ta gwo jin 'ce'dki'da gagala/ isi nnii mo ki gwo jin sugu ki a'di jin gwa'da'd mo tani 'borkunu mii ki a'di jin telki gantha/ mo be.

⁸ Mmahan mo tani to kun 'dap 'twa/ ka 'kume'd mo bu'thkunu mo ki 'kwani kun mishi wu mo. Mmun mo tani ki jan tal 'de/ mo jin teskunu gwo mo ki a'di di'd ki e mo be.

⁹ Jan tal 'deŋ kamu/ midi 'taki o isi gwo ka Lawi ki is piti jin bu'thki to jin 'dap 'twa/ ka 'kume'd mo tani ciki to kun 'dap 'twa/ ka 'kume'd ka Ibrahiim mo,

¹⁰ haali/ a'di diki'd naskina/ e 'penthi'th gi com mo ka Malkisaadag gamki a'di 'kup mo be.

¹¹ Wakki/ mo jin tanu gu ki 'boron ki isi 'bor gana/ mo mishu jidhir mo ki mii gi 'Kwani Lawi ki mo jin tanuwa gasiis mo tani (Haali/ e bwaŋ'kwariny a'di mo tani 'kwani bu'thki gwoŋkan jin cinu mo) gwo ki wakata iminu dok/ e mii ta mo mmokok sho'k mo goma gasiisa kamu/ mo mmocu mis mo mmothuk mii ma Malkisaadag i'ko'd mo, mmोधal jan 'deŋ kamu/ gway piti e i is mo, mmothuk mii ma Haruun i'ko'd mo?

¹² Haali/ wakki/ mo di'd mo mmo/ak mo jin tanuwa gasiis e mo tani a'di midi mii ta mii jin ŋapuwa ŋap mo jin minu mii aka/ ak e mo e gwoŋkan jin cinu mo si'da/.

¹³ Haali/ a'din 'de/ yin jin okunu gwo gwansan mo tani a'di cila mo jin tana a'di ja waŋa kamu/ mo, 'peni a'di jin dina a'din 'deŋ kamu/ ki mii to mo eya gwaŋa/ jin miinu to goma basa 'cesh ki sule/ sule/ mo.

¹⁴ Haali/ a'di mishu eya tente/ ki Tapam bana a'di ta emen 'pena Yahuuda/ mo dhala Musa si'da/ diki o gwoŋ kamkina kamu/ goma waŋ yansan gom mo jin tanu igasiis mo.

¹⁵ Gwo yansan a'di warki'd ki isi gwo jin mishu eya tente/ ki mish gana/ mo ka gasiisa kamu/ midi cuyi mis jin mina e waka Malkisaadag mo be,

¹⁶ a'di jin warki'd ka gasiis mo, yisa ki isi gwo jin 'thekkina gwoŋkana 'thek mo isi gwo gom bungwar is mo 'peni emen kun tanu mo, hili ki mom'bi'th gi mondiki/e jin molu dhi'th sho'k mo.

¹⁷ Haali/ gwo onu mo gom a'di mo ki:

/E tana gasiis ki sule/ sule/ mo,
mmothuk mii ma Malkisaadag i'ko'd mo be.

¹⁸ Dhali ki me'da kamu/ mo tani gwoŋkana dhano/ jin 'kwarkunu mo a'di puunu/ mo haali/ a'di 'ka'dkina is ki 'ka'd mo dhali a'di ta dholgwon mo be.

¹⁹ (Haali/ gwoŋkan jin cinu mo tani yisa piyi miin kamu/ jin 'boro'd ki 'bor gana/ 'kup ka piŋe/ yisa.) Dhali ki me'da kamu/ dok/e mo tani mo ma 'teŋ kapem 'borga/ mo tani a'di waru/ is mo, a'di jin 'dishkina ana Arungimis is ki a'di mo be.

²⁰ Dhali a'di si'da/ diki di mo ki dar gi gwo jin thulu me'da po/ mo.

²¹ Haali/ unin dhamo/ gwansan kun warkin ki igasiis mo tani uni bu'thki mom buni kun tana uni igasiis mo ki dar gi gwo kun thula uni me'da po/ mo. Dhali hili jan tal 'de/ yansan mo tani a'di bahu gwo mo ki gwo jin thulu me'da po/ mo ki:

Tapa a'di thulki gwo me'da po/ mo
dhali a'di midi diki ak bwam piti e ki sule/ mo.
/E tana gasiis ki sule/ sule/ mo be.

²² Mii yansan a'di ki ciya Yesus mo mmota to jin 'tashu 'twa/ mo gom gwom 'borga/ jin gamu me'd mo jin bolo'da kamu/ e mo.

²³ Haali/ igasiisa dhamo/ tana ris ka ris ki em buni kun denju uni mo, haali/ uni dilu isa bora 'cesh ki wu mo 'peni miim buni jin tikirkina uni mii ma gasiis mo.

²⁴ Hili a'di bu'thki mii, mii jin tana a'di agasiis mo mmote/ ki sule/ mo, haali/ a'di tikirki di mo ki sule/ sule/ ya ye 'ba/ mo be.

²⁵ Gom 'kup gwo yan mo tani a'di mishki mii mo isa yempa/ mo mmota uni gwansan is ki me'd mo, uni kun 'dishkina Arumgimis is mo ki a'di mo, haali/ a'di isa yempa/ diki'd mo mmota amanwoth gwo is gom uni mo be.

²⁶ Haali/ a'di ha me'd ki han gana/ mo ki ana mina 'taki ta ga gasiis jin ca'd gi wakan mo, a'di jin kogu mo dhali a'di jin dar gi mii 'ba/ mo dhali a'di jin dar gi mo jin nyo/o'd mo, dhali a'di jin kwa/i is mo 'peni imanmii miinthus mo, dhali a'di jin karu ki ca mo apo/ momisi 'baar mo.

²⁷ A'di midi mii diki ta gi jamu/ mo me'd igasiis gwahan kun cakin mo mmo'cith to/e 'kus mo goma bas jin miinuwa 'cesh isa yempa/ mo, mmo'cithi twa/ a/ mo gom miinthus piti/ gana/ mo dhali yan'ko'd gom miinthus gi 'kwani gwansan mo. A'di miiki mii yansan me'd 'de/ ki sule/ mo ki a'di ciki is piti/ gana/ mo.

²⁸ Ka jin gana/ gwonkan jin cinu mo dhuki 'kwani 'pen ka pije/ mo e mon'ka'd is buni mo mmota igasiis kun can mo, hili gwo jin thulu me'da po/ mo jin pu'dki'di 'ko'd mo 'ko'di gwonkan jin cinu mo tani, a'di karki Ya/ ka pije/ mo, a'di jin karu mmota a'di jin 'boro'd ki 'bor gana/ ki sule/ sule/ ya ye 'ba/ mo.

8

Adhana Gasiis jin Ca'd ki Gwon This jin Gamu Me'd mo

¹ Dhali shushan gwo yan jin 'kona ana mmo/o mo tani ta gwo jin wa cikise/ mo be. Ana tana ka gasiis jin ca'd gi wakan mo, a'di jin ta jan tal 'de/ jin ca'bki'd ki me'da bim poros ma kursi ma malik mo jin ta ji gi a'di jin Eka/ Ek e momis mo,

² amanmii to mo e mo jin kogu mo dhali e gu'b cinjan gana/ mo, a'di jin telu ki me'd gi wathi/ yisa, hili ki Tapa mo be.

³ Haali/ iris igasiis kun can uni dhukunu 'pen ka pije/ mo mmoçi to gun cinu ki me'd mo dhali mmo'cith to/e 'kus mo mmomiya basa 'cesh mo. A'di gara/ iminu mii napa nap goma gasiis yansan mmomi ta gi ton kamu/ si'da/ jin mina a'di mii ci mo mmomiya bas mo be.

⁴ Dhali wakki/ a'di midi 'taki di e mony'cesh yan mo tani a'di midi 'taki diki ta agasiis moyi, haali/ igasiis uni 'kokin mo mmoçi to gun cinu ki me'd mo isi ki gwonkan jin cinu mo.

⁵ Uni bu'thki mii me'd mo mmota ayinyjwa mo dhali a'thintha/ mii mo gom to jin kogu mo jin di'di momis mo. Haali/ ka Musa murki'di nyan gu'b burrine/ mo tani a'di ye'thunu sho'k ka Arumgimis mo mmo/o gwo mo ki: Hili ki 'bore/ mo ki /e mini nyanja ris to 'baar mo isi ki she/mm jin torkunu /e mo 'peni 'kuwosha turga/ mo be.

⁶ Hili me'd jin wana a'di kan mo tani aK^risthos a'di bu'thki mo jin miinu to mo, a'di jin 'boro'd ki isi 'bor jin shi/i'd mo mmobol jin dhamo/ e mo, me'd gwo jin gamu me'd mo jin doshkina a'di agalany mo mmomii mo jin bolki'da kamu/ e mo, haali/ a'di ruu'kkunu mo ki gwo kun onu is mo kun bolki tiyan dhamo/ e mo be.

⁷ Haali/ wakki/ gwo jin gamu me'd mo jin ta jin t^wa/a/ mo midi 'taki ta a'di jin dar gi mii 'ba/ mo tani moŋkamu/ midi 'taki di yisa goma kamu/ jin 'ko'd mo.

⁸ Haali/ a'di gamki mii jin 'ko uni 'ba/ mo ki a'di oki gwo mo ki: Atee mini pu'du/ mo. A'di ta gwo jin ona Tapa mo.

Ki aha/ mina tel gwo jin gamu me'd jin ta jin this mo nyakki kun Gu'b ma Israyiil mo

dhali nyakki kun Gu'b ma Yahuuda/ mo tani

⁹ yisa mmowa e ki gwo jin gamka/ me'd nyakki ibabam buni mo

ka tee jin suska/ uni ka piye/ ki me'd pem mo

mmoshuyu/ uni bway ka piye/ 'peni Pam Masir mo,

haali/ uni 'koki tikir 'ko mo e gwom pem jin gamu me'd mo,

dhali wakan aha/ dinaki ciya hirdheŋ kamu/ e uni mo. A'di ta gwo jin ona Tapa mo be.

¹⁰ Gwo yansan a'di imiga/ gam me'd ki kun Gu'b ma Israyiil mo

'ko'da tee gwansan mo. A'di ta gwo jin ona Tapa mo.

Dhali aha/ mina kar gwoŋkan pem jin cinu mo eya dum buni mo

dhali 'kwar uni eya dum ba'dgam buni mo

dhali aha/ mina ta Arungimis buni mo,

dhali uni mini ta 'kwanim pem mo be.

¹¹ Dhali uni yisa mini mii tor 'kwani gwo ka 'dete/ 'dete/ mo, uni kun ta cim buni mo,

walla ris 'kwani 'baar ka 'dete/ 'dete/ mo e ikam buni mo, mmo/o gwo mo ki: Mishi Tapa mo ma,

haali/ uni 'baar mo mini mish aha/ mo be,

'peni uni kun pisapis mo ntagi uni gun 'bapa'bab mo be.

¹² Haali/ aha/ mina miimii 'kup ki miinthus buni kun miikina uni mo be,

dhali aha/ mina ka miinthus buni e doŋ/e yisa.

¹³ Mmo/ona a'di gwo mo gom gwo jin gamu me'd mo jin ta jin this mo tani

m motu/ulkina a'di mo a'di jin ta jin t^wa/a/ mo me'd jin dhamo/ jin puu'd mo

be. Dhali a'di jin ta jin dhamo/ jin warki'd ki jin puuki'd mo dhali wuwa mashira/ mo tani a'di hila/ midi us ki jog mo be.

9

Mo jin Kogu jin Ta ji gi Mony'cesh mo dhali ji gi Momis mo

¹ Dhali isi gwo jin gamu me'd mo jin ta jin t^wa/a/ mo taki'd gi gwoŋkan gom mo jin lujuwa luŋ mo dhali mo jin kogu mo jin ta ji gi mony'cesh mo.

² Haali/ gu'b burrinye/, a'di thosonkunu mo, a'di jin ta jan 'de/ jin di'd ka piye/ mo. E a'di mo tani a'di ita mo jin karkunu tirkina/ ma lamba/ mo, dhala tharabeesa mo, dhali maanŋkuthu'd jin karu i Buŋ'kus mo, a'di jin yuŋkunu ki Mo jin Kogu mo be.

³ Dhali ibwampo/ mo jin dhunu burrinye/ mmoshir ka maŋampo/ mo tani gu'b burrinyeŋ kamu/ doshki'd mo jin yuŋkunu ki Mo jin Koguwa Kogi 'baar mo,

⁴ mmotana a'di ka gwaŋa/ gi 'dolkon gana/ mo gom mo jin dukuwa 'bicajwar-har mo dhala Sanduuk jin 'koshu is ki 'dolkon gana/ mo i'ko'd gwar piti 'baar mo, a'di jin dhunu gwo jin gamu me'd mo, a'di jin taki'da jji mo jin ta 'dolkon

gana/ mo jin dhunuwa manna ibwaman mo, dhali cwa ma Haruun mo jin lu'kki'd mo dhali wosha ba'dga/ ki gwonkan jin gamu me'd mo.

⁵ Dhali apo/ a'di mo tani carabiim* 'kon mmohetha bi apo/ mo jin miinu mii ka the/m me'd mo. Gom to gwansan mo tani ana mola gwo o shwane/ e busho'k mo.

⁶ Mmomiikunuwa ris to gwansan kun nyonkunu mo wakansan mo tani igasiis 'kon mmo'tikir ii mo e gu'b burrinye/ jin di'd ka pije/ mo, mmothim miim buni kun bo'ta uni mii mo kun thidhu mo.

⁷ Hili ki mo jin 'kon ma po/i su/ mo tani a'di ta jasi mo jin min ma gasiis jin ca'di ya mo, dhali hili a'di midi yaki jasi me'd 'de/ ki yil mo, dhali a'di midi ya ki dar ga bas yisa, jin mina a'di 'cith 'kus gom is piti mo dhali gom mii kun thama 'kwani mii mo be.

⁸ Dhali ki mii gi wakan mo si'da/ tani Shi/in Dheleladhelel a'di torki bway e mo jin koguwa ko/ mo, ki a'di dinuki 'ka'd 'twa/ naskina/ mo me'd mii gi gu'b burrinye/ ma pije/ jin doshki'd naskina/ mo

⁹ (a'di jin ta'da shimpira/ mii gom she/ yil yan mo). Isi ki gwo yansan jin miinu ki jin garr mo tani to gun cinu ki me'd mo dhali to gun cinu mo mmo'cith 'kus mo mmomiya basa 'cesh mo, a'di jin mol 'bor 'twa/ ma du 'bor ki 'bor gana/ mo goma luñ jin luñ mo,

¹⁰ hili uni ki us mii is mo jasi gom tonte/ mo dhali gom tompi mo dhali aris miin tiya kun lamu is ki she/ ki she/ mo gom gwon dhamo/ mo, uni kun ta mii gun kankunu mo gom bungwar is mo, mmo'dap uni 'twa/a 'cesh mo ntagi mo jin min ma tee irica ri'c is mo.

¹¹ Hili ka Kristhos piki'd mo mmota gasiis jin ca'd mo gom tom 'boron mo kun pu'dkin mo tani yan'ko'd e a'di jin ta gu'b burrinye/ jin bol a'di e ki ca mo dhali jin bol a'di e ki 'bor mo (a'di jin 'konuki uk ki me'd gi 'kwani mo, a'di jin diki ta mo jin ukuwa uk mo e mony'cesh yansan mo)

¹² a'di cikki'd me'd 'deñ gana/ mo gom mmoteya te/ mo e Mo jin Kogu mo, dhali a'di diki budha bas mi mo dhala bas gi ushi bip mo, hili abas pitin gana/ mo, wakan a'di ki bu'th mo jin wanuwa wan 'ba/ ki sule/ sule/ mo.

¹³ Haali/ wakki/ bungwar is gi 'kwani kun bulabul mo kukuskunu ka bas mi mo dhala bas ma morbip mo dhali ki 'piny gi nas bip mo dhagamki'da dhagam mo gom mo jin minu dhelel bungwar is mo tani

¹⁴ bakata 'te/ imin ma bas ma Kristhos, a'di jin ci is piti ka Arungimis mo ki Shi/in gi mo ma sule/ ya ye 'ba/ mo, a'di jin dara'd gi thalkin mo mmodiki dhelel um 'twa/ ma dum bum 'peni mii kun wukin mo mmomii to goma Arungimis jin di ki e mo.

¹⁵ Wakan a'di ta a'di jin doshki'da galany mo mmota gwon this jin gamu me'd mo. Wakan, ki uni gwansan kun yukunu mo mini 'taki bu'th mal gi mo ma sule/ sule/ ya ye 'ba/ mo jin onu gwo is mo, haali/ mowun kamu/ bu'thki mo mo, a'di jin wanki uni 'ba/ mo 'peni gwon dhan mo e bwan'kwariny gwo jin twa/a/ jin gamu me'd mo.

¹⁶ Haali/ wakki/ gwo gi mal jin gamu me'd mo di'd mo tani jwa gi a'din 'de/ yan jin kar a'di mo tani a'di minu mii nyo/ mo be.

¹⁷ Haali/ gwo gi mal jin gamu me'd mo tani a'di bu'thki mo jasi 'ko'di mowu mo, haali/ a'di yisa minu bu'th ki 'bidha, ki com pitin 'de/ yan jin kar a'di mo tani di'd ki e mo naskina/.

¹⁸ Me'd isi kani gwo jin gamu me'd jin ta jin twa/a/ 'konuki te shoka 'cesh ki dar ga bas mo be.

* ^{9:5} Carabiim, a'di jin ta to/e jin uku mo jin 'thupki'da kursa ma Arungimis is ka bim piti mo, mmolun a'di mo gom monycam piti mo.

¹⁹ Haali/ ka ris gwonkan kun 'kwarkunu mo gi gwonkan jin cinu ka 'dete/ 'dete/ mo bakkin ma Musa gwo e 'kwani 'baar mo tani a'di ki budha bas gi ushi bip mo dhali mi mo, nyakki yi'de/ mo dhala mur ka'bal jin ta'da duk is mo dhali cwa ma 'tasha jal bip mo dhali a'di ki kukusa bas apowa warka/ ki is piti mo dhali aris 'kwani 'baar mo,

²⁰ mmo/o gwo mo ki: Abas yansan a'di ta gwo jin gamu me'd mo jin kan ma Arungimis um gwo mo be.

²¹ Dhali a'di si'da/ ki bway jin nyakka'd kan mo tani a'di kukuski'da bas apo/ gu'b burrine/ mo dhali eya aris ton'kul bwa mo kun mishu to mii nycine/ mo goma lunj jin lunj mo be.

²² Ka jin gana/ e bwan'kwariny gwonkan jin cinu mo tani aris to 'baar ka woho/ mo tani uni dhelelkunu ka bas mo, dhali ki dar gi mo jin woluwa basa 'cesh mo tani mo jin minu 'taki dhala mure/ gi miinthus gi 'kwani 'pen mo tani mini 'taki di yisa.

Miinthus Karkunu 'Pen ka Pije/ ka Krsthos mo Mmomiikunu A'diya Bas mo

²³ Wakan a'di ta mii jin minu mii napa nap mo goma yinyjwa gi to gi momis mo mmodhelel mo ki mii gwansan kun botu mmothi'th mo, hili to gi momis ki is buni mo tani mmodhelel mo ki mii kun 'cithuwa basa 'cesh kun bol gwansan e mo be.

²⁴ Haala Krsthos a'di cikki'd mo, yisa e mo jin kogu mo jin uku ki me'd gi 'kwani mo, a'di jin ta'da yinyjwa gi a'din 'denj gana/ mo, hili e momis ki is pitinj gana/ mo tani, hili a'di piki'd mo ibun'kus ma Arungimis mo gom gway bana mo be.

²⁵ Walla yisa mmoçi is piti mo mmorash me'd ka ris mo me'd mii jin miin ma gasiis jin ca'd mo mmociç mo e Mo jin Kogu mo me'd 'de/ ki yil mo ka basi me'd mo jin diki ta jim piti mo.

²⁶ Haali/ wakan mo tani a'di mina isi 'taki 'kosh ka nyor mo mmorash me'd ka ris mo 'peni mo jin ka'bkunu mony'cesh sho'k mo. Hili ki mii gi wakan mo tani, a'di piki'd jasi me'd 'denj gana/ mo e 'pemen jin 'ko'd mo gi she/ yil mo mmokal miinthus sho'k ka pije/ mo mmocikina a'di is piti mo mmota to jin 'cithu/ 'kus mo be.

²⁷ Dhali jasi me'd jin karkunu wu gom 'kwani mo mmowu mo me'd 'de/ mo tani dhali yan'ko'd mo jin toru gwon dwall 'twa/a 'cesh pu'dki'd mo tani

²⁸ wakan aKrsthos, a'di jin cikunu mo mmokal miinthus gi 'kwani ka ris me'd 'de/ mo tani a'di midi piyu/ dok/ e me'di su/ mo tani yisa mmo/us mii is mo gom miinthus mo, hili mmota uni gwansan is ki me'd mo, uni gun gananki 'ba/ ki ganan jin shi/i'd mo mmocor a'di mo be.

10

¹ Haali/ me'd jin dina gwonkan jin cinu mo mmota a'thintha/ gom tom 'boron kun mini pu'du/ mo, mmodhal mii yansan e i is mo gom jamas gana/ gi to gwansan kun piyi mo ki mii mo tani a'di midi mol mii ki sule/ sule/ mo nyakki mii jin 'cithu/ to/e 'kus mo mmomiya basa 'cesh mo jin tikirkunu mii mo mmoci mo ki yil 'ko'di yil mo mmodhu uni gwansan ki kum 'boron mo mmo'dish mo is mo be.

² Gwo jin ta jiny ca'ckon mo, a/mina uni dak mo mmoçi to jin 'cithu/ 'kus mowa? Wakki/ imanluna lunj uni dhelelkunu mo hila/ tani uni yisa mini dok/ e 'ko mo mmota gi 'twa/ ma du gom miinthusa kamu/ mo.

³ Hili e to gwansan kun 'cithu/ 'kus mo mmomiya bas mo tani gwo diki'd jin kakunuwa ka e mo gom miinthus mo 'ko'di yil 'ko'di yil mo be.

⁴ Haali/ a'di molu mii mo ka bas ma morbip mo dhali mi mo mini 'taki kal miinthus gi 'kwani mo be.

⁵ Haali/a'di gi wakan mo tani, ka Kristhos pu'dki'd e mony' cesh yan mo tani a'di ki o gwo mo ki:

To kun 'cithu/ 'kus mo mmomiiya bas mo dhali to gun cinu mo tani /e dina bwa ki o ki a'di mo, hili bunḡwar is mo tani /e thosonki a'di gom aha/ mo be.

⁶ E mo jin purkunu to jin cinu mo dhali to kun cinu gom miinthus mo tani /e diki bu'th mo jin dina 'ce ki 'kol /e mo be.

⁷ Dhali yan'ko'd aha/ ona gwo mo ki: Hili mo mo ma, aha/ pu'dkina mo mmomii bwam pini mo, ayy Arungimis mo, me'd gwo jin 'kwarkunu gom aha/ mo e ari gwo ma warka/ mo.

⁸ Ki a'di o gwo e ibun'kup imattaan mo ki: /E walla dina bwa ki o mo, walla /e yisa ta gi 'ceñ kamu/ jin 'kol /e mo gom to gun 'cithu/ 'kus mo dhali to gun cinu mo dhali to kun cinu mmopur ki o'd mo dhali to gun cinu gom miinthus mo tani (Uni gwansan, uni cinu mo me'd isi gwo gi gwoḡkan jin cinu mo be),

⁹ yan'ko'd dok/e a'di ki mar a'di is mo mmo/o gwo mo ki: Hili mo mo ma, aha/ pu'dkina mo mmomii bwam pini mo. A'di puuki mii jin twa/a/ yan mo tani ki mii gi wakan ki a'di mididi tel jin 'ko'd sho'k mo be.

¹⁰ Dhali ki bwa ma Arungimis yan mo tani ana dhagamkunu mo ki to jin cinu jin ta bunḡwar is ma Yesu Kristhos mo me'd /de/ ki sule/ mo.

¹¹ Dhali igasiis kun cani 'baar ka 'dete/ 'dete/ mo doshkin isa yempa/ apo/ momiin to mo, mmoci to kun rashu mii ki rash rash mo mmo'citha/ basa 'cesh mo kun nyakkin kan mo, uni kun moli miinthus gi 'kwaniny' cesh kal ki sule/ sule/ mo.

¹² Hili ka Kristhos a'di jin ciki is piti mo mmota to jin 'cithu/ 'kus mo tani me'd /deñ gana/ gom ki sule/ mo gom miinthus gi 'kwani mo tani a'di ca'bki'd ki me'da bim poros ma Arungimis mo be.

¹³ Dhali yan'ko'd a'di coriki mo mo ntagi 'kup piti minu 'taki dhu mo mmota cwa gom sho'k piti jin mina a'di idhu mo be.

¹⁴ Haali/ gom me'd /deñ gana/ mo tani a'di ciki is piti mo mmodu aris uni gwansani 'baar mo kun dhagamkunu mo ki kum 'borgañ gana/ mo gom ki sule/ mo.

¹⁵ Dhali Shi/in Dheleladhelele si'da/ a'di ki o gwo mo gom ana mo. Haali/ 'ko'di gwo jin onu is mo ki:

¹⁶ Yansan ta gwo jin miga/ gam me'd nyakki uni mo 'ko'da tee gwansan mo. A'di ta gwo jin ona Tapa mo ki: Aha/ mina dhu gwoḡkan pem jin cinu eya dum buni mo, dhali 'kwar uni e bwam buni mo be.

¹⁷ Dhali yan'ko'd a'di ki mar a'di is mo mmo/o gwo mo ki: Aha/ mina diki ka miinthus buni e mo dhali miim buni kun shina uni mii ki sule/ sule/ mo.

¹⁸ E mo jin dhaluwa mure/ gi miinthus gwansan 'pen mo tani moḡkamu/ yisa di'da dok/e jin minu mii ci to gom miinthus mo be.

Dhalki Ana 'Disha Mo Is mo dhali Tel Sho'k mo

¹⁹ Wakan iwak mo, me'd jin takina ana ki mo jin wuna ana a'di jwa i is mo mmoci mo e mo jin kogu mo ka bas ma Yesu mo

²⁰ ki miin this mo dhali ki bway gi mii kun 'konu ki e mo jin ka'dkina a'di ki burriñye/ yan jin shiru ka yolol mo, a'di jin ta bunḡwar is piti mo be,

²¹ dhali me'd jin takina ana ka dhana gasiis jin caaca mo e gu'b ma Arungimis mo tani

²² dhalki ana 'disha mii is mo ka duñ gana/ mo mmo'tu'd mo mmomish mo ki isa duñ gana/ ki moḡgam gwo is mo, ka dum bana kun kukuskunu ana

ki dhelel dhelel mo 'peni tonthus gi 'twa/ ma dum bana mo dhali bunḡwar is bana kun lamkunu ki yi'de/ jin ɕa'bki yidhiḥ yidhiḥ mo be.

²³ Dhalki ana budha ki ri'd mo ma 'teḡ kapem bana jin mina ana pi ki dar gi monḡsh mo, haali/ a'di jin oki gwo is mo tani a'di ta a'diḡ gana/ mo be.

²⁴ Dhali dhalki ana si'da/ 'kona isi gwo i bwa mo, ma mo ci'th ci is ki mii ka rem 'kup mo mmo/ena en mo dhali mmomii miim 'boron mo,

²⁵ yisa mmopinykin is gom mo jin tulu is mmontaḡ 'de/ mo, me'd jin boḡa kun tiya ki mii mo, hili mmo'bi'th ci adu is ka rem 'kup mo, dhali isa yempa/ mo ki nyanye/ mo me'd jin parkina uma Tee e mo mmo'dishkina a'di ki 'dish 'dish mo be.

²⁶ Haali/ waḡki/ ana miina miinthus mo mmoḡal mii ki is mo 'ko'di ana bu'thkina mii jin nyiḡhkina ana gwoḡ gana/ mo tani monḡkamu/ yisa di'da dok/ e jin minu mii 'ciḡh to/e 'kus mo gom miinthus mo be.

²⁷ Hili mii jin ḡogu is mo tani a'di 'thoyi mo gi gwon dwall mo dhali o'd jin ɕa'b ki wur wur mo, a'di jin mididi shwa uni kun ta 'kupi 'baar mo be.

²⁸ Wathi/ a'di jin 'ce'dki gwoḡkan jin ɕinu ka Musa mo tani a'di wuki'd mo ki dar gi momiiimii mo ki 'twa/ gi iman/o gwo kun 'koni su/ mo walla ikwara mo be.

²⁹ Ba shi/ ma jisa bala wakata mo a/um kulum gwo ibwa mo ki a'di mididi cil she/ mo gom wathi/ jin saki Ya/ ma Arumgimis ki sho'k mo, dhali jin sorki'da bas gi gwo jin gamu me'd mo, a'di jin dhagamkunu a'di mo dhali waḡ Shi/in ma 'the mo?

³⁰ Haali/ ana misha a'di mo, a'di jin oki gwo mo ki: Mo jin minu tor gwon dwall 'twa/a 'cesh mo tani a'di ta jim pem mo. Aha/ mina gar to 'kusi bway mo. Dhali dok/e, Tapa a'di mididi dwall 'kwanim piti gwo mo.

³¹ A'di ta to jin ḡogu is mo mmomina 'kwani ta'k mo e me'd ma Arumgimis jin di ki e mo be.

³² Hili yuḡa teen dhama/ gwansan mo ki 'ko'di um 'kokina e ma du kun 'twaḡki mo mo tani um 'dim 'kup mo e mii jin 'batha'ba'th jin jwakaḡki'd ki mo/isa nyor mo

³³ dhali ka cima tiya mo mmoḡor ibwambori 'kwani mo mmota businye/ goma sor mo dhali monḡo'c bwa mo dhali ka cima kamu/ mmogam mii me'd ki uni gwansan kun miinu mii ki shi/ mo wakan.

³⁴ Haali/ um ḡo'cki e gom 'kwani habuus mo dhali um bu'thki mo jin dilkunu um to mo kun tana um mo ki bwarḡ 'kunyga/ mo me'd jin misha um ki um ki is bum tan gi tom bum kun 'boron ki 'bor gana/ mo dhali kun mini 'ko ki sule/ mo.

³⁵ Wakan dhalku/ ki buḡ is bum mo 'peni mom bum jin wuna uma wuny jwa i is mo, a'di jin ta gi dhan mo jin isha to kumma/ mo.

³⁶ Haali/ um mini mii ta gi mo jin 'dimuwa 'dim 'kup mo wakan ki um mini 'taki mii bwa ma Arumgimis mo dhali bu'th a'di jin okunu is mo.

³⁷ Haali/ um ɕorkina ɕor mo ari'ceenne/ naskina/ mo dhali a'din 'deḡ kamu/ jin mididi pu'du/ mo dhali mididi diki ta adiḡte/ mo.

³⁸ Hili a'dim pem jin ta'da ḡar/e mo tani mididi di ki e e monḡgam gwo is mo,

dhali waḡki/ a'di mididi guwa 'kany'cesh ka nyan'ko'd mo tani aḡashiram pem mididi dar gi mo jin mididi 'kol 'ce mo e a'di mo be.

³⁹ Hili ana 'konaki ta uni gwansan kun mini 'dowa 'kany'cesh ka nyan'ko'd mo dhali kun 'ce'du sho'k mo, hili ana tana uni gwansan kun ta gi monḡgam gwo is mo dhali mmodhuwa ḡashiram bana mo be.

11

Monḡam Gwo Is mo

¹ Monḡam gwo is a'di imishu ki isa duḡ gana/ ki a'di ta to gom mo ma 'ten kape/ mo, mmosuka du mo gom to kun 'konuki par e mo.

² Haali/ ki a'di mo tani jwahaḡ 'kwanin dhamo/ uni bu'thki mo jin nyo/uwa nyo/ mo be.

³ Ki monḡam gwo is mo tani ana mishkina gwo 'ban mo ki mony'cesh ukkunu ki gwo ma Arumgimis mo, wakan ki a'di jin parkunu e mo tani ukkunu ki to kun 'koki piyu/ is ka pije/ mo be.

⁴ Ki monḡam gwo is mo tani aHabiil a'di miiki'da Arumgimisa bas mo jin mishu bu'th mo mmobol ji ma Kayiin e mo ki mii jin bu'thkina a'di mo jin nyo/uwa nyo/ mo me'd wathin kar/e mo. Haali/ Arumgimis kalki gwo o mo gom tom piti jin čina a'di ki me'd mo jin bu'thkunu mo. A'di wuki'd mo, hili ki monḡam gwo is piti mo tani a'di di'd ki e mo naskina/ mmo/o gwo mo be.

⁵ Ki monḡam gwo is mo tani a/Aknuuk a'di bu'thkunu bway momis mo, wakan ki a'di mididi 'taki diki par wu e mo. Dhali a'di yisa gamkunuwa, haali/ Arumgimis bu'thki a'di bway momis mo. Dhali ntwa/a/ ki a'di dinuki bu'th bway momis mo tani a'di kalkunu gwo o mo ki a'di miiki to jin 'borki'da Arumgimis bwa mo be.

⁶ Ki dar gi monḡam gwo is mo tani a'di molu mii mo mmo'bora Arumgimis bwa i is mo be. Haali/ a'diyin jin mididi 'taki 'disha Arumgimis is mo tani mididi mii gam gwo is ki a'di diki'd mo, dhali ki a'di mididi či uni gwansan to kun ish kumma/ mo kun ḡapi a'di mo be.

⁷ Ki monḡam gwo is mo tani aNuu, a'di rumkunu ka Arumgimis mo isi goma yirto jin dina a'di ki mish naskina/ mo tani a'di yipi unu 'kup mo ki monko/ is jin ta'da gayiin mo, a'di ki dhera kur mo gom kun gu'b piti jin minu ta is ki me'd mo be. Ki mii yan mo tani a'di ki mii miwaḡ gom gwon dwall jin toru gwo 'twa/a 'cesh mo gom 'kwaniny'cesh mo dhali a'di warki'd ka mankal mal gom mo ma kar/e mo jin pu'dki'd ki monḡam gwo is mo be.

⁸ Ki monḡam gwo is mo tani a/Ibrahiim haki gwo e mo ki a'di yukkunu mo mmoya ka pije/ mo e mo jin mina a'di bu'th mal mo. Dhali ki a'di yaki'd ka pije/ mo tani, mo misha a'diya jin yana a'di ya mo?

⁹ Ki monḡam gwo is mo tani a'di warki'd ki yilkina/ e mony'cesh jin onu gwo is mo, e mony'cesh jin diki ta jim pitin gana/ mo, mmoča'b e gu'b burriinye/ jin nyanu mo nyakka Is/hak mo dhala Yakuub mo, uni gun ta imankal mal mo nyakki a'di mo ki gwon 'de/ jin onu is mo be.

¹⁰ Haali/ a'di hilki'd gom 'penkuman bampa/ jin mididi pu'du/ yilan kamu/ mo, a'di jin ka'bu/ mo, a'di jin nyankin ma Arumgimis mo dhali a'di jin ukkina a'di mo be.

¹¹ Ki monḡam gwo is mo tani aSaarah, ayim ki is piti bu'thki mom'bi'th mo mmobwaa mo, isi kani ka yim 'baarkina yila dho'th piti mo, haala yim nyithki a'di ki a'di jin ta isin gana/ mo, a'di jin oki gwo is mo be.

¹² Wakan, 'peni wathin 'de/ mo tani, dhali a'di wana e ki wathiny jwa mo tani, emen tana ris ka ris dho'thkunu mo me'da cul gi momis mo dhali wa e ki emen ma si'b kun ishkin e bwaman ma gap mo kun molu deḡ e mo be.

¹³ Aris uni gwansani 'baar mo wukin mo e monḡam gwo is mo dhali yisa bu'th to jin onu gwo isa. Hili uni parki a'di e mo dhali the a'di me'd 'pena dhana/ mo, dhali uni 'kokin mo me'd 'kwani kun 'kon ka pije/ mo 'peni bampaḡ kamu/ mo dhali me'd uni gun 'kon e bwaman 'kwanin tiya mo e mony'cesh mo be.

14 Haali/ 'kwani kun o gwo kan mo tani kar a'di eya tente/ mo ki uni n̄apki mo mo jin minu n̄yan gu'b buni n̄ycine/ mo be.

15 Wakki/ uni mini kulum gwo ibwa mo gom mony'cesh caan jin iikina uni ka pije/ 'peni cine/ mo tani uni mini 'taki ta gi embula 'borga/yi mmodok ka n̄yan'ko'd i a'di mo be.

16 Hili, gom a'di gi wakan mo tani uni 'kokina gwo ibwa mo gom bampa/ jin dina jaro/ ki she/ mo, a'di yansan jin ta bamp̄an tal 'de/ jin ta ji gi momis mo be. Ki mii gi wakan mo tani Arungimis dina is ki 'the mo ki a'di minu yuk ka Arungimis buni mo haali/ a'di thosonki uni 'pen̄kuman bampa/ mo be.

17 Ki moŋgam gwo is mo tani a/Ibrahiim ki a'di palkunu mo tani ciki'da Is/ hak mo, dhali a'di jin bu'thki gwo jin onu is mo tani thosonki is mo mmoçi ya/m pitin tal 'deŋ gana/ mo be,

18 ma e a'di jin onu gwo is mo ki: Eya Is/hak mo tani emen pini minu 'cem gway mo be.

19 A'di nyithki'd ka Arungimis mishki 'kwani 'de'k mo isi kani 'peni mowu mo. Wakan, ki gwo jin wayina e kan jin okunu mo ki a'di bu'thki a'di ka n̄yan'ko'd mo be.

20 Ki moŋgam gwo is mo tani a/Is/hak 'thoki'd gom mom'bor mii yilaŋ kamu/ apowa Yakuub mo dhala lisu mo be.

21 Ki moŋgam gwo is mo tani aYakuub ki a'di murki'di wu mo tani a'di 'borki iya/ ma Yuusup mii ka 'dete/ 'dete/ mo, mmoŋaŋkina a'di is ka 'cesh mo mmoluŋa luŋ mo apo/ 'kucwa jin guna a'di ime'd mo.

22 Ki moŋgam gwo is mo tani aYuusup ki a'di dina mondiki/em piti 'kup mo tani a'di torki gwo eya tente/ mo gom ya ma pije/ gi Uci ma Israyiil mo dhali a'di ki kan gwo mo gom isi kan piti jin minu kan a'di mo be.

23 Ki moŋgam gwo is mo tani aMusa ki a'di dho'thkunu mo tani a'di bagkunu ka ppe 'kupi kwara mo ki icom mo haali/ uni mishkin ka 'ci shina jaro/ ime'd mo. Dhali uni 'koki ko/ is mo gom gwoŋkan ma malik mo.

24 Ki moŋgam gwo is mo tani aMusa ki a'di caki'd mo tani ushki'd mo mmoyukunu a'di ki ya/ gi 'bwa/ ma Pirawn mo.

25 A'di ki dhal mii e i is mo mmokwany mo gi mii ma ha'th'ko'd mo nyakki 'kwani ma Arungimis mo, ma mmodiki 'kuny bwa mo nyakki uni gwansan e mo jin 'konu ki 'kol 'ce e miinthus mo ki mo jin minu tor sho'k ka pupush mo be.

26 A'di nyithki'd mo ma sor jin 'koshu is ka nyor goma Kristhos mo mmota pa ki pa mo mmobol dhan to gi Pam Masir kun ish kumma/ e mo, haali/ a'di hiki'd gom to jin ish kumma/ jin minu ci mo be.

27 Ki moŋgam gwo is mo tani a'di dhalki Pam Masir 'pen mo, yisa mmoko/ kina a'di anyor ma malika, haali/ a'di 'dimki 'kup mo mmohilkina a'di a'di jin molu mish mo be.

28 Ki moŋgam gwo is mo tani a'di karki mo jin penuwa Pe'kupanyolos mo dhali kukusa bas mo, wakan ka Man'ce'da bwanyara/ sho'k mo midi 'taki diki ta uni is ki me'd mo be.

29 Ki moŋgam gwo is mo tani 'kwani 'cithki Kumma/ Yi'de/ jin ta gi 'Per mo me'd mony'cesh jin kuthaku'th mo. Hili 'Kwani gi Pam Masir, ki uni palki mii mo mmomii mii jin nyakki'd kan mo tani uni loskina yi'de/ mo be.

30 Ki moŋgam gwo is mo tani adhana gaŋgara/ gi Pa Ariiha bitki'da 'cesh mo 'ko'di uni kukulki a'di is mo ka cim pesu/ mo.

31 Ki moŋgam gwo is mo tani aRahab, a'di jin ta'da yim çal mo, diki 'ce'd sho'k mo nyakki uni gwansan mo, uni gun ush gwo ha e mo, haala yim a'di miiki mii mo mmohan 'kwani kun dhuyunu 'pen mo mmo'kar mo mo be.

³² Dhali ki gwo gi wakatinta imiga/ o moye? Haali/ mo midi har moyi gom aha/ mo mmotor gwo mo goma Gidyuum mo dhala Barag mo dhala Shamshuun mo dhala Yaptaah mo dhala Dawuud mo dhala Samu/iil mo dhali imançi Gwo ma Arungimis kadhamo/ mo -

³³ uni ki mongam gwo is mo tani piki bampantiya e mo mmobu'th mo, dhali mmotor gwowa 'bora 'cesh mo gom mo jin dhunuwa dhu ka kar/e mo, dhali bu'th gwo kun onu is mo, dhali mu'th aris 'twa/ ma dhop mo,

³⁴ dhali mmo/us o'd jin bilitki'd ka le'd mo, dhali ye shemen gandala turga/ mo, dhali mmogam mii adu is ki mom'bi'th mo 'peni mon'ka'd is mo dhali war ki a'di jin 'bitha'bi'th mo e mo ma mee mo, dhali dhu 'kwanin tiya kun tana thuruk ma mee mo mmoso mo.

³⁵ Up bu'thki kum buni kun wukin mo ki mampi jin piyunu/ mo. Kun tiya 'koshkunu is ka nyor ka 'cem 'cem mo, mmo/ush mo bu'th mo, mo jin 'cu'kuwa 'cu'ku mo, ki uni mini 'taki piyu mo dok/e e mondiki/e jin dina jaro/ ki she/ mo.

³⁶ Kun tiya 'kosha is ka nyor ki mii jin miinu uni ka mak mo dhali kun tiya dorkunu ki yis bip mo dhali isi kani kun tiya dekkunu mo ka makkiya mo dhali kun tiya takina habuus mo.

³⁷ Uni 'koshkunu ki wosh mo. Dhali kun tiya 'cithu/ is bwa ka 'co'colo'c mo. Dhali uni palkunu mo. Dhali uni 'koshkunu jwa mo ki gandala turga/ mo. Uni iikin ki iiny ca/ mo mmo'tamkina uni ayi'c ka'bal i is mo dhali ayi'c mi mo, mmo/ii is 'tej gana/ mo, dhali mmo'ockunu uni bwa ki mii ma ha'th'ko'd mo -

³⁸ Gom uni mo tani mony'cesh diki ha me'd mo. Uni takina ca/ mo e bwam ma si'b mo dhali e mon'kuwosha turga/ mo dhali eya risa jurum wosh mo dhali e jis ga/ gi mony'cesh mo be.

³⁹ Dhali aris uni gwansan mo, ba uni nyo/u ki nyo/ jin 'boro'd gom mongam gwo is buni mo tani uni 'koki bu'th to kun onu gwo is mo be.

⁴⁰ Haali/ Arungimis parki to e ntwa/a/ mo jin 'boro'd ki 'bor gana/ mo gom ana mo ki uni minu 'taki 'koki dhu ki uni kun isin mo ki dar gi ana mo be.

12

Ajisa gi Tapa jin Yedha A'di 'Kwani Sho'k mo

¹ Wakan, me'd jin 'kamkunu ana ki dek ka dhana rak gi iman/o gwo mo tani dhalki ana si'da/ thadha aris tom bana 'baar mo kun ditadit ka 'dete/ 'dete/ mo dhali miinthus kun tana junyu/ ki ana ki 'dish 'dish mo dhali dhalki ana sona ki bwa jin 'ku'cu ki 'kari'th mo mmopar sho'k mo gom to jin di'da bori ana mo be,

² mmohil 'kup ka Yesus mo a'di jin ta'da 'kan'kup mo dhali a'di jin midi thim mongam gwo is bana mo, ma a'di gom mon'kuny bwa jin diki'da bori a'di mo tani a'di 'dimki 'kup mo gom cwany'cithan dhul mo mmorukkina a'di mo jin 'thenu is mo dhali a'di ca'bki'd ki me'da bim poros ma kursi ma Arungimis mo be.

³ Nyithi/ a'di mo, a'di jin 'dimki 'kup mo 'peni imanmii miinthus mo kun ta 'kup ki 'kup ki a'di kan apo/ a'di mo, wakan ki um mini 'koki ca mo e mo jin wunu is e mo walla eya dum bum jin mina buye/ i'thi mo.

⁴ E mom bum jin askina uma shir shir apo/ miinthus mo tani um 'koki ro'c a'di naskina/ mo mmopu'd mo e shushan mii jin mina umi wola bas buma 'cesh mo be.

⁵ A/dhali um naki mo jin malasum mo jin yukunu um ki iya/ mowa? mmo/o gwo mo ki:

Ya/m pem dhalku/ ki halipa jisa jin yedha Tapa /e sho'k mo

walla dhalku/ ki sul mo jin 'bidhu /e adu is mo ki /e cinuwa jisa ki a'di mo.

6 Haali/ Tapa a'di ki ciya jisa jin yedhu wathi/ sho'k mo a'di jin ena a'di mo be.

dhali dor aris iya/ ka 'dete/ 'dete/ mo, uni gun bu'thkina a'di mo be.

7 A'di ta'da jisa jin yedhu wathi/ sho'k mo jin mina umi mii 'dim 'kupi cine/ mo be. Arumgimis miiki um mo me'd iya/ mo. Haali/ ya/ jana njala/ di'd jin dina com ki ciya jisa mo?

8 Wakki/ um dhalu ki dar ga jisa jin cinu mmoye'th um sho'k mo tani, a'di jin pwakkunu mo gom 'kwani 'baar mo tani, wakan um ta uci kun 'kon ki laça/ mo dhali um 'koki ta iya/ mo be.

9 Ki gwo yansan jin 'ce'de'd apo/ mo tani ana takina gi ibabam bana mo e mony'cesh mo mmoci ana ajisa mmoye'th ana sho'k mo dhali ana takkina uni mo be. Dhali bunya/ mina ana 'koki 'dap 'twa/ mo eya Babam bana gi ku gi shi/in mo dhali 'ko mowa?

10 Haali/ uni ciki ana ajisa jin yedhu ana sho'k mo ki ari mo mo me'd jin ona bwa uni mo. Hili Arumgimis ciki ana ajisa jin yedhu ana sho'k mo gom mom'boro'd bana mo, ki ana mina wapak mondhelel piti mo be.

11 Gom ari mo mo tani arisa jisa kun cinu mmoye'th ye'th sho'k mo tani wana e ki jin 'koshu ka nyor mo, ma mmodhal bwan 'kunyga/ e i is mo. Yan'ko'd mo tani a'di ki gwono'd maman gi mo ma kar/e mo jin ta mo ma ku'th is mo e uni gwansan kun ye'thkina a'di sho'k mo be.

Arum jin Rumu Apo/ 'Kwani kun Wakkina 'The ma Arumgimis mo

12 Wakan 'deki me'd bum kun 'kon ki polkon mo dhali 'bithi 'kupa'dupun bum kun miin ki 'ka'da/ 'ka'da/ mo

13 dhali dhuyi bway tur ka ji sho'k gom sho'k bum mo, wakan ki a'di jin ta njwol mo tani minu 'taki 'koki kar ka piye/ 'peni gwocor mo, hili mmodhal mii e i is mo mmowaça/ waç mo be.

14 Biriya bir mo gom monku'th is mo nyakka ris 'kwani 'baar mo dhali gom mo ma dhelel mo, a'di jin mola wathin kamu/ par Tapa e ki sule/ mo ki dar gi a'di mo be.

15 Mishi gwo 'ban mo ki wathin tal 'deñ kamu/ midi diki ush me'd mo mmobudha 'the ma Arumgimis mo, dhali dar gi mo ma birman jin ka/aka/ mo mmo'ka ale/ mo dhali rak mont'o'c bwa mo dhali ki a'di mo tani aris 'kwani ka ris warkin ki uni kun shi/u is mo be,

16 dhali ki wathin tal 'deñ kamu/ midi diki mii mii jin miinu miinyal mo walla diki dhu mii kun kogu mo, me'da Iisu mo, a'di jin yolki mo ma bwanyaram piti ki tonte/ jin shwanu 'te/ mo be.

17 Haali/ um mishkin nj'ko'd ki a'di ona bwa ki mal gi mom'bor mii mo tani a'di wakunu mo haali/ a'di diki gam bula kamu/ mmorica du is mo, ba a'di njpki a'di ki bur bur ki jabu'th mo be.

18 Haali/ um 'koki pu'd mo e wosh jin minu ta is ki me'd mo, a'di jin ta o'd jin shwa'd ka le'd mo, dhali mondhurumi'd mo dhali mondhurumi'd jin 'cethki'da 'tum mo dhali apunthar jin 'the'ki'd mo

19 dhali ko ma poome/ mo dhali 'twa/ jin ta gi gwo kun tu'c imancik uni mo mmodot gwo mo ki gwo gwansan minu 'koki oku/ ki thatha/ thatha/ mo gom uni mo be.

20 Haali/ uni moli 'dim 'kup moyi gom gwonkan yan jin cikunu mo jin o gwo mo ki: Wakki/ isi kani tombwaasho midi mumbur wosh yan ki is mo tani a'di minu 'kosh ki wosh mo be.

21 Ka jin gana/ nyca/, wakan mo, mo jin koguwa ko/ is diki'd mo e bwambori jis/em piti mo ka Musa o gwo mo ki: Aha/ deekina is mo ki monko/ is kagahara mo be.

²² Hili um pu'dkin mo e 'Kuwosh ma Sihyuun mo dhali e 'penkuman Bampa/ ma Arungimis jin di ki e mo, a'di jin ta bampa/ gi momis jin ta Pa Urushalim mo, dhali eya ris iman'doyu gwom piti kun molu derj e mo eya dhana tul 'kup kun tula uni is mo be,

²³ dhali eya dhana tul isa kamu/ gom uni kun tana bwanyara/ mo, uni gun 'kwarkunu gway mo eya warka/ gi momis mo, dhali eya Mandwall gwo mo a'di jin ta'da Arungimis gom 'kwani 'baar mo, dhali eya ris shi/in gi 'kwani kun tana kar/e mo kun dhunu ki ku gun iskin mo,

²⁴ dhali eya Yesus mo, a'di jin doshki'da galany mo gom gwo jin ta jin this jin gamu me'd mo, dhali e mo jin kukuskunuwa bas mo jin onu gwo ki o ma aane/ mo ka bas yan bol ji ma Habiil e mo be.

²⁵ Hili um ki 'bore/ mo. Dhalki a'di ki ush mo, a'di jin torqi um gwo mo. Haali/ wakki/ uni 'koki ye mo ki uni ushki a'di gwo mo, a'di jin rumki uni ki gwo mo e mony'cesh yan mo tani ba ana bala mina ye kata mo wakki/ ana mina wak a'di mo, a'di jin rumki ana ki gwo mo 'peni momis mo?

²⁶ Twam piti a'di yikinki mony'cesh is mo me'dyin mo. Dhali hili shwane/ a'di oki gwo is mo mmo/o gwo mo ki: Aha/ dok/e mina yikin jasi mony'cesh is mo yisa, hili si'da/ momis mo be.

²⁷ Gwo gwansan kun on ki: Aha/ dok/e mina, ba/ tani uni 'kayi gwo 'kus mo goma joç jin joçu/ mo gom is jin yikinkunu mo, me'd gwo jin onu gom to kun ukunu mo, ki mii gi wakan mo tani ki to kun molu yikin is mo tani mini 'taki 'ko mo be.

²⁸ Wakan mo, dhalki ana tana gi mo jin 'boruwa 'bor bwa i is mo gom mmobu'th 'penkuman bampa/ jin molu yikin is mo dhali wakan dhalki ana cina Arungimis mo jin lujuwa luw mo jin mishu bu'th mo ki mo jin tukuwa tuk mo dhali ki moŋko/ is mo.

²⁹ Haali/ Arungimis bana a'di shwa'd ki o'd ki bar bar mo be.

13

Miin To kun Miinu ki 'Bore/ mo 'Borki'da Arungimis Bwa mo

¹ Dhalki mo/en jin en ma wak ka rem 'kup mo tikir di mo.

² Dhalku/ ki mii mii ma pinykin is mo mmoŋor mii jin minu ta gu'b bum ŋal mo goma ris yilkina/ mo, haali/ gom mii gi wakan mo tani kun tiya suski iman'doyu gwo gu'b buni mo ki mii jin molkina uni uni mo be.

³ Kayi uni gwansan e mo kun 'kokin eya sijin mo, ma me'd jin nyakkina um 'ko eya sijin nyakki uni mo. Dhali nyakki uni gwansan kun miinu ka jin thus e mo, haali/ um si'da/ nyakki 'ko e bungwar is mo be.

⁴ Dhalki mash jin mashu ki mash gana/ mo karu ki montaki bwaman umi 'baar mo dhali dhalki mo gi miinu miimash karu ki jin kogu mo haali/ Arungimis midi dwall gwo mo gom uni gun ha'k 'pen 'cej gwath mo dhali up kun ta kumana 'ka mo dhali uni gun mii miinyçal mo.

⁵ Dhuyi moŋ'koki/em bum ki 'kus mo 'peni mo jin enuwa guurush mo dhali kapi um mo ki to jin tana um mo, haali/ a'di oki gwo mo ki: Aha/ mina diki ush me'd ki sule/ sule/ mo gom um mo walla aha/ mina diki dhal um 'pen mo be.

⁶ Wakan, ana mina kar dhan mo jin wuna ana a'di jwa i is mo mmo/o gwo mo ki:

Tapa a'di ta'da Manwoth pem mo be.

Dhali aha/ mina diki ta ko/is mo.

Ki to gi wakata imina 'kwani mii aha/ mo?

⁷ Kayi imanshu/ um bway e mo, uni gwansan kun oki um gwo ma Arungimis mo dhali nyithi/ adu'd mii mo gom mon'koki/em buni mo dhali thokiya thok mo gom mongam gwo is buni mo.

⁸ Yesus Kristhos ta a'di ma tili/ mo dhali ji gi shwane/ mo dhali gom ki sule/ sule/ mo, a'di jin diki war mo.

⁹ Dhalku/ ki ta uni kun minu susi per mo ki gwo kun toru kun 'kona e ki she/ ki she/ mo dhali kun molu mo naskina/. Haali/ a'di 'boro'd mo ka du minu 'bi'th is ka 'the mo, yisa ki tonte/ mo, a'di jin midi diki ha me'd mo gom uni gun shwaki uni mo.

¹⁰ Ana tana ga gwaṭa/ jin miinuwa basa 'cesh mo, dhali 'peni a'di mo tani uni gun miiki to mo gom gu'b burrinye/ mo tani 'konuki dhal bway mo mmoshwa to mo be.

¹¹ Haali/ buṅgwar is gi to/e gwansan kun wolkunuwa bas buni kun kalkunu mo e mo jin kogu mo ka gasiis jin ca'd mo gom mii kun 'ciṭhu/ a'di a'cesh mo gom miinthus mo tani uni ci'thkunu ki o'd mo ka pije/ 'peni gu'ba'ku/ mo be.

¹² Wakan Yesus si'da/ 'koshkina is ka nyor mo ka pije/ mo 'peni 'twaṅkala goṅ mo, ki mii gi wakan mo tani ki a'di midi dhagam 'kwani ka bas pitiṅ gana/ mo be.

¹³ Wakan, dhalki ana kala ya ka bor mo e a'di ka pije/ mo 'peni gu'ba'ku/ mo, mmokala sor jin minu sor ana gom a'di mo be.

¹⁴ Haali/ mmahan mo tani ana dara gi 'penkuman bampa/ jin ta a'di jin midi di ki sule/ sule/ mo, hili ana simma 'penkuman bampa/ e mo jin midi pu'du/ mo be.

¹⁵ E a'di mo tani dhalki ana si'da/ tikira 'ko mo mmoci mo jin miinuwa basa 'cesh mo mmomaṅa Arungimis mo, a'di jin ta gwo mo kun mini pi 'peni 'twam bana kun ta maman mo 'peni mo jin nyithu/ gway piti mo be.

¹⁶ Dhalku/ ki mii mii ma pinykin is mo mmomii mii kun 'boron mo dhali mmopwak to bwa mo a'di jin tana um mo, haali/ ki to gi wakan kun 'ciṭhuwa basa 'cesh mo tani a'di 'borki'da Arungimis bwa mo be.

¹⁷ Hai uni gwo e mo uni kun tana shu/um bway gom um mo dhali 'dapi 'twa/a 'cesh e uni mo. Haali/ uni 'kon mo mmotima kashiram bum mo me'd 'kwani kun 'kokin mo kun mini mii ci gwo mo. Dhalki uni mii a'di yansan ki bwan 'kunya/ mo, dhali yisa ki bwa kun biṭu ka lungu'b yisa, haali/ a'di midi 'taki diki ta shi/ miim 'boro'd gom umi.

¹⁸ 'Thoyi gom aman mo, haali/ aman misha ki isa duṅ gana/ mo ki aman dhelelkina 'twa/ ma dum bam ki dhelel mo mmo/o bwa mo mmomii mii kun minu taṅa taṅ mo eya ris to 'baar mo be.

¹⁹ Aha/ tirrishkina gwo ka daran du kagahara mo ki um mini mii to gwansan mo, ki mii gi wakan mo tani ki aha/ minu 'taki waru/ mii is ka nyaṅ 'ko'd mo e um mo ki 'dishe/ mo be.

Mom'bor Mii jin Dhalu Me'da Po/ 'Kwani mo dhali Monthe Me'd ki Kwalany mo

²⁰ Shwane/ dhalka Arungimis gi mon'ku'th is, a'di jin guyi Tapa Yesus bana 'peni mowu mo dok/e, a'di jin ta'da Amanhil ka'bal, ka bas gi gwo jin gamu me'd jin midi di ki sule/ sule/ ya ye 'ba/ mo

²¹ mmote um ka ris to kun 'boroni 'baar mo ki um mini mii bwam piti mo, mmo/umkina a'di e um mo a'di jin 'bor a'di bwa mo e bwambori jis/em piti mo, eya Yesus Kristhos mo, e a'di jin mina monyca icil ki sule/ sule/ mo dhali ki sule/ sule/ mo. Amen.

²² Aha/ yipa 'kup 'kupki um iwak mo. Thonaa/ me'di 'ko'd mo ki gwom pem jin malaskika/ um mo haali/ aha/ 'kwarkina um gwo ki e 'pe'pere/ mo.

²³ Um mini 'taki mish gwo 'ban mo goma kam bana ka Timuthawuus mo gom 'cuk jin 'cukkunu a'di mo. Ki a'di mo tani aha/ mina par um e mo wakki/ a'di midi pu'du/ ki 'dishe/ mo be.

²⁴ Theki aris imanshu/um bway me'd mo dhali aris uni gun dhunu ki she/ki dhelel dhelel mo. Uni gwansan kun pu'dkin mo 'peni Pa Ithaaliya mo hashki um monthe me'd mo be.

²⁵ A'the midi di gom umi 'baar mo. Amen.

Gwo jin 'Kwar ma YAKUUB mo

Monthe Me'd mo

¹AYakuub jin ta cɪŋkina/ ma Arungimis mo dhali Tapa Yesus Kriŋthos mo be.

E uni kun 'kon ma waƙi 'kume'd i'ce'dka su/ mo uni kun ɕekerƙunu bwa mo.

Monthe me'd mo.

Moŋgam Gwo Is dhali Mo jin Dhunu Is ki Gwa'd mo

²Kari bwan 'kunya/ mo ma, iwaƙ pem, ki um jemki 'kup ki mompal ki she/ ki she/ mo.

³Haali/ um mishkin ki mompal gi moŋgam gwo is bum pucurki'd mo mmotel sho'k mo be.

⁴Dhali dhalki mo jin telu sho'k mo 'tu'da/ mo jin pucuru mo ki um mini ta kum 'borgan gana/ mo dhali ta kun thimin mo mmo'koki har toŋ kamu/ mo.

⁵Waƙki/ jan tal 'deŋ kamu/ 'peni bwam um hara moyuƙ mo tani dhalki a'di doƙo'da Arungimis mo a'di jin ɕiki'da ris 'kwani ka duŋ gana/ mo ki dar gi ɲadhum mo dhali a'di minu ɕi a'di mo be.

⁶Hili dhalki a'di doƙ a'di ki moŋgam gwo is mo ki dar gi bwa jin shinu 'kup mo haali/ a'di jin shina bwa 'kup mo tani wana e ki yi'deŋ ƙumma/ jin bir bakal mo jin boru mo dhali jin 'dasha 'tham mo be.

⁷Haali/ wathi/ ɕaan midi mii diki mii tosh ki a'di midi bu'th toŋ kamu/ 'peni Tapa mo.

⁸A'di jin 'kona bwa isu/ mo dhali a'di jin gwakalki ya mo e bway piti 'baar mo.

⁹Hili dhalka kana ha'th'ko'd ki kar mo mmokar 'bam piti ki ca mo e mo jin karu a'di ki ca mo

¹⁰dhali a'di jin ta pa ki pa mo e mo jin karu a'di ki gwa'd mo haali/ me'd jandi/ ma sho mo tani a'di midi la pe mo be.

¹¹Haala tente/ sulu'd mo ki mom'ba'th piti jin shi'bili to mo dhali a'di ki ƙutha sho mo dhali jandim piti raskin mo dhali jarom piti 'ce'dƙunu sho'k mo. Wakan si'da/ wathi/ jin ta pa ki pa mo midi us mo ki jog e bway piti jin ura a'di to isho'k mo be.

Mo jin Paluwa Pal mo

¹²Mom'bor mii gom wathi/ jin 'dimki 'kup mo e mompal mo haali/ ki a'di mishki mompal mo tani a'di midi bu'th toŋ'kup gi mondiki/e mo a'di jin on ma Arungimis gwo is gom uni gwansan kun eni a'di mo be.

¹³Dhalku/ wathiŋ kamu/ ki dhal bway mo ki a'di palu mo mmo/o gwo mo ki: Aha/ pal ma Arungimis mo. Haali/ Arungimis molu pal ki tonthus mo dhali a'di ki is piti si'da/ diki pal jan tal 'de/ mo be.

¹⁴Hila ris 'kwani ka 'dete/ 'dete/ palkunu mo ki a'di jin diri'da dir mo dhali cesa bwa en'dap buni mo be.

¹⁵Dhali yan'ko'd mon'dap e ki a'di bwaakunu mo tani a'di dho'thki miinthus mo dhali miinthus ki a'di caki'd mo tani ƙalki mowu mo be.

¹⁶Dhalku/ ki ta uni gun hegu e mo ma, iwaƙ pem kun enka/ mo.

¹⁷Aris tom 'boron gun ɕinu ki me'd mo kun ta kum 'borgan gana/ mo tani uni 'peni momis mo mmothulu/ mo 'pena Baba gi moŋƙush mo. E a'di mo tani mo jin aƙuwa aƙ yisa di'da walla ala piyi'd si'da/ 'peni mo jin ƙukuwa ƙu'k mo.

18 'Peni bwam pitin gana/ mo tani a'di ki dho'th ana mo ki gwon gana/ mo ki ana mina ta maman kun t̄wa/a/ 'peni mo/uk̄ piti mo be.

Gwo jin Ciku dhali Mii Gwo mo

19 Mishi gwo yan mo ma, um iwak pem kun enka/ mo. Dhalka ris 'kwani 'baar ka 'dete/ 'dete/ mer is mo ki jahanne/ mmocik gwo mo dhali çori naskina/ mo dhali o gwo mo dhali çori naskina/ mo dhali miya nyor mo.

20 Haala nyor jin miina wathi/ mo tani a'di diki ta to jin mii mo ma kar/e goma Arungimis mo.

21 Dhali ki mii gi wakan mo tani dhuyi aris tony nyogga/ 'pen ka pije/ mo dhali mii kun 'coka'cok kun ishin ka enthus mo dhali bu'thki mo jin dhunu is ki gwa'd mo gwo jin sinu mo a'di jin mishki'da kashiram bum wo'th mo.

22 Hili tayi imanmii gwo mo ma dhali dhalku/ ki cik̄ gwo jasi 'te/ mo mmohe'k is bum e mo.

23 Haali/ wakki/ wathin 'de/ jin cik̄ jasi gwo 'te/ mo dhali diki mii a'di mo tani a'di wana e ki wathi/ jin hili jis/em piti jin dhodhu a'di mo eya hiljaro/ mo.

24 Haali/ ki a'di hilki is piti mo dhali ya mo tani dhali ki jahanne/ a'di ki this mohil jin wana a'di kan e mo be.

25 Hili a'di jin tu gwonkan jin cinum 'borgaŋ gana/ mo tani a'di jin ta ji gi kara'da kar ki 'kus mo dhali a'di jin 'dim 'kup mo mmodiki cik̄ jasi gwo 'te/ mo mmothis a'di e mo tani hili mii a'di yan jin miinu mo tani a'di iminu 'bor mii mo e a'di jin miikina a'di mo be.

26 Wakki/ wathin kamu/ kulum gwo ibwa ki a'di ta'da manluŋ to mo dhali diki 'kalitha le'd piti mo tani hili a'di he'kki'da dum piti e mo, mo jin luŋa wathi/ yan mo tani a'di ta mii jin miinu ki pe'th mo be.

27 Mo jin luŋa aluŋ jin dheleli'd mo dhali jin dinuki shi/ ki mii gi wakan mo ibwambor ma Arungimis mo dhali Ababa a'di wa cikise/ mo be: mmohil gom uni gun tana thipa/ i e mo dhali uni gun wuna ikath mo e monto'c bwam buni mo dhali mmokar is pitin gana/ mo ki dar gi monyogga/ mo 'peni mony'cesh mo be.

2

Gwo jin Rumu Apo/ Mii gi Miinuwa Mii ka Gwar 'De/ mo

1 Iwak pem, dhalku/ mii ki mii ka gwar 'de/ mo me'd jin bu'thkina um mongam gwo is mo e Tapa Yesus Kriŋthos bana mo, a'di jin ta Tapa gi monyca mo.

2 Haali/ wakki/ wathin kamu/ ta gi 'dolkon to me'd mo dhali hi'th burrinye/ jin bol tiya e ki 'bor i is mo mmoyayu/ e gu'b gi montul is bum mo tani dhali wathin kamu/ jin hatha'ko'd hi'th burrinym porkin pu'dki'd mo si'da/ tani

3 dhali um ci a'di jin hithi burrinye/ jin bol tiya e ki 'bor ahirdhe/ mo dhali o gwo mo ki: Ca'bi imahan mo ma gana, dhali um ka yiha/ ki o wathi/ jin hatha'ko'd gwo mo ki: Doshi mmattaan, walla, Ca'bi e sho'k pem mmahan mo ma tani

4 'kona um ki mii to ka kwam bwa wakan e bwam is bum mo dhali ta imandwall gwo gom gwonthus kun kulumkina um ibwa mo 'taa?

5 Dhuyi 'ce mo ma, uma wak pem gun enka/ mo. Din ma Arungimis ki kwany uni gwansan kun hatha'ko'd e mony'cesh mo mmota pa ki pa mo e mongam gwo is mo dhali mmota imankal mal gi bampa/ gi momis jin okina a'di gwo is gom uni gwansan kun eni a'di mo 'taa?

6 Hili um this wathi/ jin hatha'ko'd mii mo. A'di diki ta unim pa kun 'cwar umma? A'di diki ta uni gun dir um e mo jin dwallu gwo mo 'taa?

⁷ A'di diki ta uni gun wal gwo sora po/ gway yan ki a'di jin taku mo jin yuku um mo 'taa?

⁸ Wakki/ um ka jin gana/ thimki gwonkan ma malik mo isi me'd Gwo ma Arungimis kun 'kwarkunu mo ki: /E mini en amannyak ca'b pini me'd is piniñ gana/ mo tani um miin ki 'bore/ mo be.

⁹ Hili wakki/ um mii mii ka gwar 'de/ mo tani um miiki miinthus mo dhali um waka gwonkan jin cinu mo me'd 'kwani gun dhanji gwo mo be.

¹⁰ Haali/ a'di yin jin dhuki gwonkan jin cinu mo ka 'dan'dap mo hili i/ush me'd mo gom jan tal 'de/ mo tani a'di wara'd ki wathi/ jin dina mii i'ba/ mo gom uni 'baar mo be.

¹¹ Haali/ a'di jin o gwo mo ki: Dhalku/ cal ki mii mii mo ma, a'di si'da/ o gwo dok/e mo ki: Dhalka 'kosh ki mii 'kosh mo ma. Wakki/ /e diki mii miinyal mo hili i'kosha 'kosh mo tani /e waran ka mandhar gwonkan jin cinu mo be.

¹² Wakan oyi um gwo mo dhali miyi to mo wakan me'd uni gwansan gun minu dwall gwo mo 'ko'di gwonkan jin dhu'da dhu ki 'kus mo.

¹³ Haali/ gwon dwall a'di dar gi mo jin minu miimii mo e a'di jin diki tor momiimii mo. Hili momiimii ta mo jin pinu mii e apo/ gwon dwall mo be.

Mongam Gwo Is ki Dar gi Mii mo tani A'di Wu'd mo be

¹⁴ Dhali gwo bala nyo/u kata mo, iwak pem mo, wakki/ wathi/ o gwo ki a'di ta'd gi mongam gwo is mo hili idiki mii to mo tani a/mina mongam gwo is piti ita a'di is ki me'd mo 'taa?

¹⁵ Wakka kan walla 'bwahan hatha to hi'th 'ko'd mo dhali dar gi tonte/ mmoshwa mo tani

¹⁶ dhali jan 'de/ 'peni um o uni gwo mo ki: Iiku/ ki monku'th is mo ma, dhali, 'Bathi is ki 'ba'th mo, dhali, 'Tu'di/ mo, ki dar gi to jin cina um uni mo mmota mo gom bungwar is buni mo tani a/dhali mii yan a'di nyo/u ki 'bore/ 'taa?

¹⁷ Wakan si'da/ mongam gwo is ki is piti mo wakki/ a'di dinuki mii to mo tani a'di wu'd mo be.

¹⁸ Hili wathin 'deñ kamu/ midi o gwo mo ki: /E tan gi mongam gwo is mo dhali aha/ tana gi mii mo. Tor aha/ mongam gwo is pini ki dar gi miim pini mo ma dhali aha/ ki miim pem mo tani mina tor /e mongam gwo is pem mo be.

¹⁹ /E gami gwo is ka Arungimis tal 'de/ mo. /E miin ki 'bore/ mo be. Me'da rum thus kun nyo/on si'da/ gam gwo is mo dhali cuna is ki thunthur mo.

²⁰ /E ona bwa ki to minu tora, /e cim pus yan, ki mongam gwo is ki dar gi mii mo tani a'di ta'da bush 'ko'd mo be.

²¹ Ibrahiim jin ta'da babam bana dinuki kar ki mo ma kar/e ki mii mo ki a'di ci ya/m piti ka Is/hak apowa gwata/ jin miinuwa basa 'cesh mo?

²² /E mishin ki mongam gwo is nyak ya ki miim piti mo dhali mongam gwo is a'di thimkuno ki mii mo be.

²³ Dhali Gwo ma Arungimis jin 'kwarkunu mo thimki gwo jin onu mo ka: Ibrahiim gamki'da Arungimis gwo is mo dhali a'di karu a'di ki mo ma kar/e mo, dhali a'di yuku ka mugu ma Arungimis mo be.

²⁴ /E mishin ki wathi/ a'di karu ka kar/e ki mii mo dhali yisa ki mongam gwo is a'di 'de/ yisa.

²⁵ Dhali ki mii jin nyaka'd kan mo tani dinuki kara Rahab si'da/ jin mii miinyal mo, ki mo ma kar/e ki mii mo me'd jin bu'thkina a'di igumbway mo dhali tu'c uni ki ii ka piije/ ki bwaya kamu/ mowa?

²⁶ Haali/ me'd bungwar jin dar gi shi/in mo tani a'di wuki'd mo, wakan si'da/ mongam gwo is jin dar gi mii mo tani a'di wuki'd mo be.

3

Ale'd

¹ Um mini mii dhalku/ ki ta aris ka aris mo mmota iman^{tor} gwo mo, iwak pem, haali/ um mishin ki ana gun ^{tor} gwo mo tani minu dwall gwo ki miiwak jin 'bitha'bi'th ki nyanye/ mo be.

² Haali/ ana 'baar mo tana iman'cith mii ka ris e i'pen mo dhali wakka cin 'dej kamu/ jin diki 'cith mii e i'pen e gwo jin ona a'di mo tani a'di ta wathim 'borgan gana/ mo jin mish 'kali'th bungwar isi 'baar mo si'da/.

³ Wakki/ ana dhuna toj 'kali'th e 'twa/ shumarum mo jin mina uni ha ana gwo e mo tani ana susa bungwar is buni 'baar mo be.

⁴ Hili gwo goma kur yi'de/ mo ma si'da/, ba uni gun caaca kagahara mo tani dhali borkina 'tham kun 'bitha'bi'th mo tani uni shunu bway ki ushi cwam bum 'pen mo e mo yin jin ta bwa ma manbora kur mo be.

⁵ Wakan ale'd a'di ta ari tom bungwar is mo dhali kar 'ba/ ki ca mo gom to gun caaca mo. Bwany cwa wa'di caa jin karkunu mmoshwa ka le'd ga ara kapany o'd mo.

⁶ Dhali ale'd a'di ta o'd mo be. Ale'd a'di ta to gi 'kwaniny'cesh jin diki ta kar/ e ibwaman tom bungwar is bana mo mmonyo/ bungwar isi 'baar mo mmoci'th ki o'd 'peni buyem pa jin dhodhuwa dho'th jin dosh 'peni o'd mo dhali jin cidhu ki o'd ki mo/o'd mo.

⁷ Haali/ aris to gun 'kona sho'k do donon e ki she/ ki she/ mo tani dhali 'dii dhali to gun paarana 'cesh mo dhali to yi'de/ mo tani uni mishu non 'kup mo mmo'te 'twa/ mo dhali uni nonu 'kup mo mmo'te 'twa/ mo ki wathimpa en'thi/ mo be.

⁸ Hili wathimpa en'thin kamu/ yisa mishuwa le'd non 'kup mo mmo'te 'twa/ mo ki sule/ sule/ jin bir bakal ka yempa/ gom tonthus jin 'tu'du/ mo ka ati'd gi mowu mo be.

⁹ Ki a'di mo tani ana 'bora Tapa mii mo dhali Ababa mo dhali ki a'di mo tani ana jeekina 'kwani mo ana gun ukkunu mo mmowa e ka Arungimis mo.

¹⁰ 'Peni 'twa/ yan mo tani mom'bor mii pu'dki'd mo dhali monyjee mo. Iwak pem, gwo yansan ka ba/ imidi 'taki diki di wakan mo.

¹¹ A/yi'de/ yidhithga/ dhali jin ka/aka/ du'dun mo 'peni 'twan 'deya?

¹² Cwampu/ midi mish dho'th mamana setuuna, iwak pem, walla cwalmana mura'th midi dhodha pu/ 'taa? Wakan si'da/ yi'dem 'bala'thga/ mol war ki yi'de/ jin yidhithi'd mo be.

Moyuk Peni Momis mo

¹³ Kaja a'di iyukayuk mo dhali mish gwo 'ban mo ibwam um mo? Ki miim 'borgam piti mo tani dhalki a'di ^{tor} a'di ki miim piti jin kara a'di is ki gwa'd mo ki moyuk mo.

¹⁴ Hili wakki/ um ka/ ma du ki ka/ mo mmoshi/ bwa mo dhali ta ham 'kus mo mmo'tula dum bum nycine/ mo tani dhalku/ ki dhu 'ba/ ki ca mo dhali mmota ator mo gom gwon gana/ mo.

¹⁵ Moyuk yansan diki waki jin yayi'd ka 'cesh 'peni momis mo hili a'di ta jany 'cesh mo, dar gi to gi shi/in mo, ta ji ma rum thus kun nyo/on mo be.

¹⁶ Haali/ ki mo gi shinu bwa mo dhali mmota ham 'kus mo mmo'tula du mo 'kon mo tani a'di mina mo jin dun^{kuru} mii mo dhali mo jin botu ki miim bulga/ 'baar mo 'ko mo be.

¹⁷ Hili moyuk 'peni momis mo tani ta jin t^{wa}/a/ jin dheleli'd mo, yan'ko'd mmota gi monku'th is mo dhali mmo'thup e mo dhali mmo'ka'd bwa mo dhali mmo'tu'd ki momiimii mo dhali ki maman gana/ mo dhali mmodar gi mii ma gwar 'de/ mo walla mmodar ki washila/ mo be.

18 Dhali maman gi mo ma kar/e mo tani a'di sinu ki monku'th is mo ki uni gwansan kun dhukina dhu ki monku'th is mo be.

4

Mmo'koki Ta Mugu gi 'Kwaniny'cesh mo

1 'Peni mana yayin ma nyor mo dhali 'peni mana askina um ibwam um mo? A'di diki ta en'dap bum 'taa? kun askin e tom bungwar is bum mo?

2 Um 'kona gwo ibwa mo tani dhali um 'koki gam a'di mo. Wakan um ki 'kosha 'kosh mo. Dhali um 'tho'ha bwa mo tani dhali um mol a'di bu'th mo. Wakan um askin mo dhali gama nyor mo. Um 'koki gam to mo haali/ um 'koki dot to mo be.

3 Um dotki to mo tani dhali um 'koki bu'th a'di mo haali/ um dotki to ki dot thus mo mmo'baar a'di jin 'dapa um e mo be.

4 Um 'kwaniny cal, 'kona um ki mish mo mo ki mmonyak to mii ki 'kwaniny'cesh mo tani a'di ta 'kup ka Arumgimis mo? Haali/ a'di wakan mo tani a'di yin jin ona bwa ki ta mugu gi 'kwaniny'cesh mo tani kar is piti mo mmota 'kup ka Arumgimis mo be.

5 Walla a/tosha um ki Gwo ma Arumgimis jin 'kwarkunu mo o gwo ka wuny is mo mmo/o gwo mo ki: A'di jin shwana dhapana nyor apo/ shi/in jin kara a'di mo mmo'ca'b e ana mo?

6 Hili a'di ciki'da 'the ki nyanye/ mo be. Dhali wakan a'di o gwo mo ki: Arumgimis ceshki mo mo gom uni gun dhu 'ba/ ki ca mo hili a'di ki ciya 'the gom uni gun dhu is buni ki gwa'd mo be.

7 Ci is bum wakan ka Arumgimis mo ma. Roçi tapa ma ruma 'cesh mo ma dhali a'di midi gus mo 'peni um mo be.

8 'Dishi Arumgimis is mo ma dhali a'di midi 'dish um is mo be. Lami me'd bum mo ma, um 'kwani kun ta imanmii mianthus mo dhali dheleli adum bum mo ma, um 'kwani kun 'kona bwa ka susu/ mo.

9 Tayi buyem pa mo ma dhali koyi mo dhali ki kony jabu'th mo. Dhalki mompe'th bum wara'd ki monko mo dhali dhalki bwar 'kunyud bum wara'd ki mondit bwa mo.

10 Dhuyi is bum ki gwa'd mo ibwambori Tapa Arumgimis mo ma dhali a'di midi dhu um ki ca mo be.

Mmodwalla Kan Gwo mo

11 Dhalku/ gwonthus ki o ka rem 'kup mo ma, iwak pem. Haali/ a'di jin oki gwonthus apowa kam piti mo walla dwalla kam piti gwo mo tani a'di oki gwo apo/ gwonkan jin cinu mo dhali dwall gwonkan jin cinu gwo mo. Hili wakki/ / e ki dwall gwonkan jin cinu gwo mo tani /e tana manmii gwonkan jin cinu mo yisa hili /e tana mandwall gwo mo be.

12 Amançi gwonkan jin cinu mo tani di'd 'de/ mo dhali amandwall gwo di'd 'de/ si'da/ mo, a'di jin mishi'da mish woth mo dhali mmo'ce'da/ 'ce'd sho'k mo. Hili ki /e ja dwallkina mannyak ca'b pini gwo mo?

Dhalku/ 'Baki 'Theki Mis goma 'Thamo/ mo

13 Iiyu/ shwane/ mo ma, um uni gun o gwo mo ki: Shwane/ walla ka'thamo/ ana mina ii mo e mo ciki/ dhali ciki/ e bampa/ mo dhali 'baar yil mo imun mo dhali yol to mo dhali gam nyunycina/ mo.

14 Hili um 'koki mish to gun mini mii ka'thamo/ mo. Mon'koki/em bum wakata mo? Haali/ um tana wulpe/ kun piyin ki ari mo mo dhali la pi mo be.

15 Gom kan ka ba/ gun o gwo mo ki: Wakki/ Tapa ona bwa mo tani ana mina 'ko ki e mo dhali ana ki mii to yansan mo walla to çaan mo.

16 A'di ta a'di, um dhuki 'bam bum ki gwo jin baha um mo. Aris mo jin dhunu is ki ca mo tani uni ta tonthus mo.

17 A'di yin jin mish jim 'boro'd mo mmomii mo dhali diki mii a'di mo tani gom a'di mo a'di ita miinthus mo be.

5

Gwo jin Rumu gom Uni gun Ta Pa ki Pa mo

1 Iiyu/ shwane/ um gun ta pa ki pa mo mmoko mo dhali mmowol cuuwa/ mo gom monto'c bwa gun pu'dkina po/ um mo.

2 Tom bum kun tana um pa ki pa mo tani pu/kin mo dhali burrinyem bum shwan ma dhurany mo.

3 'Dolkon ganam bum dhali 'dolkon kush bum wu gure/ mo dhali gurem buni kun wuna uni mo tani mini ta gwontor apo/ um mo dhali a'di midi shwa bungwar is bum mo me'd o'd mo be. Um tul to gun ish kumma/ is mo goma cim kun 'koni 'ko'd mo be.

4 Hili to gi gama uni gun miina tu'c mo, uni gun 'cithi/ to mo e bwam buntom bum mo kun бага um ka wun mo tani gwokin kagahara mo. Dhali ko jin gwona iman'cith to mo tani a'di jidhirki'd mo e bwany'ce gi Tapa Arumgimis gi momis mo be.

5 Um 'koni mony'cesh ki 'kom bum mo dhali ki bwam bum mo. Um momotkina dum bum mo eya tee jin 'cithu/ to 'kus mo.

6 Um ta imanwaka wak mo. Um 'koshki wathin kar/e jwa mo. A'di diki roc um mo be.

'Kuçi Bwa mo dhali Mo jin Paluwa Pal mo

7 'Kuçi bwa mo ma ki 'kari'th wakan, iwak pem, ntaga cim jin mina Tapa pu'du/ mo. Hili mo mo ma, amankor to corki maman to jin tana aane/ e mony'cesh mo mmo'kuca a'di bwa mo ki 'kari'th apo/ a'di ntagi a'di bu'thki'da sho'k jin twa/a/ dhala sho'k jin 'ko'd mo be.

8 Um si'da/ 'kuçi bwa mo ma ki 'kari'th mo dhali tela dum bum sho'k mo gom ya gi mina Tapa pu'du/ e me'd hila/ mo.

9 Dhalku/ ki miiya gungum mo, iwak pem, apo/ ka rem 'kup mo ma, ki um minu 'koki dwell gwo mo. Hili mo mo ma, amandwall gwo a'di doshki'da po/ campur mo be.

10 Me'd gi she/mm gi isa nyor mo dhali bwa jin 'kuçu mo ki 'kari'th mo tani iwak pem, budhi imançi gwo ma Arumgimis mo, uni gun ciki gwo gom gway gi Tapa Arumgimis mo.

11 Hili mo mo ma, ana yuka uni gwansan ki ku gi 'bora bwa mo, uni gun 'kokunu mo mmotel sho'k mo. Um cikki gwo mo goma Ayuub telki sho'k mo dhali um parki 'pemen jin di'di bwan Tapa e mo, bahili Tapa Arumgimis a'di jin hilki'da hil mo dhali mmomiimii mo be.

12 Hili apowa ris to 'baar mo tani iwak pem, dhalku/ ki o gwo is mmothul me'd mo walla gom momis mo walla gom mony'cesh mo walla ma e gwo jin onu isa tiya mo, hili dhalka nyem bum ta'da nye mo dhali hili dhalka yisam bum ta'da yisa mo, ki um mini 'koki ta'k mo e miiwak mo be.

13 A/wathin kamu/ ibwam um 'kosha is ka nyor mo 'taa? Dhalki a'di 'tho'd mo. Dhali a/wathin kamu/ di'd jin 'bora bwa mo 'taa? Dhalki a'di yuk gway gi momarj mo.

14 A/wathin kamu/ ibwam um 'ba'thki'd mo 'taa? Dhalki a'di yuk 'kwani gwanyjaka/ ma kaniisa mo dhali dhalki uni 'thon mo gom a'di mo dhali wol a'di ayini 'kup ki gway gi Tapa mo

¹⁵ dhali ki mon'tho gi mongam gwo is mo tani a'di midu woth wathi/ jin 'batha'd mo dhali Tapa a'di midu cu a'di mis mo dhali wakki/ a'di miiki miinthus mo tani a'di minu gwam mo be.

¹⁶ Dhali ki mii gi wakan mo tani piyi gwo miinthus bum ka rem 'kup mo ma dhali 'thoyi ka rem 'kup mo ma, ki um minu waç mo be. Haali/ mon'tho gi wathiŋ kar/e mo tani ta gi mom'bi'th e a'di mmowagas mo be.

¹⁷ Iliyya a'di ta wathi/ jin nyaka e 'dap ki ana mo dhali a'di 'thoki'd ka daran du mo jin min ma shoki diki he'th mo, dhali ki yili kwara mo tani dhali ka appe 'kona 'kupi pe'de/ mo tani asho'k diki he'th apo/ mony'cesh mo be.

¹⁸ Dhali yan'ko'd a'di 'thoki'd mo dok/e dhali momis çiki'da sho'k mo dhali mony'cesh dho'thki maman tom piti mo be.

¹⁹ Iwak pem, wakki/ jan tal 'den kamu/ 'peni bwam um dhereski'd mo 'peni gwoŋ gana/ mo tani dhali jamu/ ki sus a'di ka nyan'ko'd mo tani

²⁰ dhalki a'di mishi'd ki a'di yin jin susu'da manmii miinthus ka nyan'ko'd 'peni bway dheres piti mo tani midu woth a'di akashiram piti 'peni mowu mo dhali midu kuma ma'diny miinthus 'kup mo be.

Gwo jin Twa/a/ jin 'Kwar ma BUTERUS mo

Monthe Me'd mo

¹ AButerus, a'di jin karu ki she/ mo goma Yesus Kristhos mo.

E uni gun 'kokin mo e bwaman 'kwanin tiya mo kun cekerkuu bwa mo e Pam Buntus mo dhali e Pan Galathiyya mo dhali e Pan Kabbadukiyya mo dhali e Pa Asiyya mo dhali e Pam Bithiniyya mo

² uni kun kwanykunu mo dhali kun 'kawurkin ma Arungimis jin ta'da Baba mo dhali kun dhagamkunu mo ki Shi/in mo gom gwo jin hana uni e mo eya Yesus Kristhos mo dhali goma bas piti jin kukuski'd mo.

Dhalka 'the dhali monku'th is minu mar is gom um mo.

Mo ma 'Tej Kape/ jin Di ki E mo

³ Mom'bor mii mididi mo goma Arungimis mo dhali Ababa gi Tapa Yesus Kristhos bana mo. Ka dhan momiimiim piti mo tani ana 'kokunu mo mmodho'th mo dok/e e mo ma 'tej kape/ jin di ki e mo ki mompma Yesus Kristhos 'peni mowu mo,

⁴ dhali e mo mal jin budhu mo a'di jin moli pu/ mo, dhali jin dinuki shi/ ki mii mo, dhali jin mididi diki us mo ki jog mo, dhali jin karkunu mo gom um mo e momis mo.

⁵ Um gun jinu ki mom'bi'th ma Arungimis mo ki mo ki mongam gwo is ki bway mowoth mo, a'di jin thosonkunu mo mmo'or eya tente/ ka tee jin 'ko'd mo.

⁶ E mii yansan mo tani 'kunyi um bwa mo ma, ba shwane/ ki ari mo yansan mo tani um mina isi 'kosh ka nyor mo ki mompal ki she/ ki she/ mo.

⁷ Wakan ki mongam gwo is bum gana/ mo, jin ta yintho/ ki yintho/ mo mmobol 'dolkon gana/ e mo, a'di, ba a'di jin mishi pu/ mo tani a'di nyo/u ki mo/o'd mo tani minu 'taki gam mo mmo'ci moman' mo dhali monyca mo dhali montak mo e mony'cee jin minu 'ceeya Yesus Kristhos mo be.

⁸ Ki dar gi mmopar a'di e mo tani um enki a'di mo. Ba um bala kun 'koki par a'di e mo shwane/ mo tani um gamki gwo is e a'di mo dhali 'kunykina bwa mo ki gwo jin molu bah mo dhali jin eka/ ek mo.

⁹ Me'd gwo jin thimkunu mo gom mongam gwo is bum mo tani um bu'thki bway mowoth bum goma kashiram bum mo be.

¹⁰ Imanci gwo ma Arungimis kadhamo/ kun oki gwo kun onu is mo goma 'the yan mo jin mididi ta jim bum mo tani uni simmki mii e mo dhali dota/ dot mo gom bway mowoth yansan mo be.

¹¹ Uni dotkina dot mo goma ci en'thin kamu/ mo walla mo mo jin torkina Shi/ in ma Kristhos jin di'd e uni mo me'd jin torkunu gwo n'twa/a/ mo gom isa nyor ma Kristhos mo dhali monyca jin mididi n'ko'd mo be.

¹² A'di torkunu uni eya tente/ mo ki uni 'koki mii to mo gom is buni mo, hili gom um mo, eya ris to gun bakkunu um shwane/ mo ki uni gwansan kun ta iman'ci gwom 'boro'd e um mo ki Shi/in Dheleladhelel mo, a'di jin hashkunu 'peni momis mo, uni kun ta to jin 'koshkina iman'doyu gwo te/ mo mmopar e mo be.

Ayuk jin Yuku mo Mmo'ko 'Ko jin Kogu mo

¹³ Wakan deki adum bum mo dhali kuthi is ki 'cese/ 'cese/ mo, dhali dhuyi a'tej kapem bum ki mon'tu'd mo apowa 'the mo, a'di jin pu'dki'di um mo 'peni mony'cee jin 'ceekunuwa Yesus Kristhos mo be.

¹⁴ Me'd uci gun ha gwo e mo tani dhalku/ mii ki tash mo mmodhu e ki 'thir 'thir mo me'd jin miikina um 'thissa/ e miin dhamom pus bum mo.

¹⁵ Hili me'd jin tana a'di jin yuki um, a'di jin kogu mo tani tayi um uni gun kogu mo ki is bum mo eya ris miim bum kun nyoŋa um is mo.

¹⁶ Haali/ me'd gwo jin 'kwarkunu mo ki: Um mini mii ta kun kogu mo haali/ aha/ tana a'di jin kogu mo be.

¹⁷ Wakki/ um mini yuka yuk apowa Baba mo, a'di jin dwallki 'kwani gwo ka 'dete/ 'dete/ ki dar gi mii ma gwar 'de/ mo isi ki miim buni kun miina uni mo tani nyoŋi is bum ki moŋko/ is mo ka teem bumi 'baar mo jin 'kona um mo e bwan 'kwanin tiya mo.

¹⁸ Um mishki mo ki um wankunu 'ba/ mo 'peni miim pe'th kun luku 'peni ibabam bum mo tani yisa ki to kun mini pu/ mo me'd 'dolkon kush mo walla 'dolkon gana/ mo,

¹⁹ hili um wankunu 'ba/ mo ka bas ma Kristhos jin ta yintho/ mo me'd ji gi ari ka'bal jin dar gi thalkin mo dhali jin ta jim 'borgaŋ gana/ mo.

²⁰ A'di 'kawurkunu ntwa/a/ mo ki mony'cesh yan 'konuki ka'b mo, hili a'di toŋkunu eya tente/ e 'ko'd mo gom mo gi gway bum mo be.

²¹ E a'di mo tani um takin gi mo jin wunuwa Arumgimis jwa i is mo, a'di jin cuki a'di mis 'peni mowu mo, dhali ci a'di monyca mo, wakan ki moŋgam gwo is bum mo dhali mo ma 'teŋ kapem bum mo mini 'ko eya Arumgimis mo be.

²² Mmodhelelkina um akashiram bum mo ki gwom bum jin hana um e mo e gwoŋ gana/ mo gom washila/ jin piyi'd e um mo e mo/en mo gom iwaŋ mo, mmo/enkina uma en mo ki bwan dara'd mo 'pena duŋ gana/ mo.

²³ Um dho'thkunu mo dok/ e ki dho'th this mo, yisa 'peni emen to jin midi pu/ mowa, hili 'peni emen to jin midi mol pu/ mo, e a'di jin ta gwo ma Arumgimis jin di'd ki e mo dhali jin midi di ki sule/ mo.

²⁴ Haali/

Aris shuman isi 'baar mo uni wana e ka sho mo.

Dhala ris jarom buni mo tani uni wana e ki jandi/ ma sho mo.

Asho ku'thkin mo dhali jandim buni raskin mo

²⁵ hili gwo gi Tapa mo tani a'di ca'bki'd ki sule/ sule/ ya ye 'ba/ mo be.

Gwo yansan a'di ta gwom 'boro'd mo, a'di jin cikunu um mo be.

2

Wosh jin Di ki E mo jin Ta'da 'Duntula/ mo dhali Kal jin Kogu mo

¹ Wakan dhuyi aris mii kun dupuwa dupi e 'pen ka pije/ mo dhali arisa mak mo dhali mii kun ta washila/ mo dhali miin dhapan mo dhali arisa thu'th 'pen kun thudhu mo.

² Me'd usha ŋam 'pereny kun daka dhodhu mo tani oyi bwa mo goma ko mo jin ta to gi shi/in jin dheleli'd mo. Ki a'di mo tani um mini ca mo e bway gi mowoth mo.

³ Haali/ um nyokki bwan'kush gi Tapa mo be.

⁴ Iiyu/ i a'di mo, a'di jin ta wosh yin jin di ki e mo, a'di jin wakina 'kwani mo, hili e jis/ e ma Arumgimis mo tani a'di kwanykunu mo dhali a'di ta yintho/ ki yintho/ mo.

⁵ Dhali me'd wosh kun 'ko ki e mo tani tayi um ki is bum kun minu nyan mo mmota gu'b gi to gi shi/in mo, mmota uni gun mii mii ma gasiis kun kogu mo, mmoci to kun 'cithu/ 'kus mo kun ta gi shi/in mo kun mishu bu'th ka Arumgimis eya Yesus Kristhos mo be.

⁶ Haali/ a'di telki'd mo e Gwo ma Arumgimis jin 'kwarkunu mo ki:

Hili mo mo ma, aha/ 'thikina aSihyuun wosh mo, a'di jin ta wosh 'penabi jin kwanyu mo dhali jin ta yintho/ mo.

Dhali a'di jin gam gwo is e a'di mo tani minu 'koki kar ki mo ma 'the is mo be.
 7 Wakan e um mo um gun gamki gwo is mo tani a'di ta yintho/ mo, dhali hili gom uni gwansan kun 'koki gam gwo is mo tani:

Wosh gana/ yansan jin wak̄kina imannyar̄ gu'b mo tani a'di warki'd ka dhana 'kan'kup wosh gi 'penabi mo,

8 dhali

Wosh jin midi dhu 'kwani mmokol mo, dhali wosh jin midi dhu uni mmota'k mo, haali/ uni golkunu mo haali/ uni 'koki ha gwo e mo me'd jin 'kawurkunu uni mo mmomii mo.

9 Hili um ta emen kun kwanykunu mo dhali imanmii mii ma gasiis jin waki ji ma malik mo, dhali um ta kal gi 'kwani kun kogu mo, dhali um ta 'kwani ma Arungimis ki is pitiᅇ gana/ mo, ki um mini bah eya tente/ mo miim 'borgam piti mo, a'di jin yuk̄ki um mo 'peni bwam mondthurumi'd mo e mon̄kush piti jin ta momer mo.

10 Ntwa/a/ mo tani um 'koki ta 'kwani mo, hili shwane/ um ta 'kwani ma Arungimis mo. Ntwa/a/ mo tani um 'koki bu'th mo jin miinu mii mo, hili shwane/ um bu'thki momiimii mo be.

Koyi Me'd Imanmii To goma Arungimis mo

11 Um gun enu mo, aha/ yuka um mo me'd 'kwani kun 'kon ka pije/ mo 'peni bampaᅇ kamu/ mo dhali me'd uni kun 'kon e bwaman 'kwanin tiya mo, mmoga/ mii kun dhunu e ki 'thir 'thir mo gi shuman is mo jin ta to jin aski'da asa powa kashiram bum mo.

12 Hali miim 'borga/ mo mmonyᅇ is mo e bwaman 'kwani kun 'koki ta 'Kwani Yahuuda/ mo, wakan wak̄ki/ uni mini 'taki o gwo apo/ um mo me'd iman̄thu'th to mii mo tani uni mini 'taki par miim 'borgam bum e mo dhali kara Arungimis ki ca mo eya tee gi mowoth̄ mo be.

13 'Dapi 'twa/ mo gom gway gi Tapa mo eya ris mii kun telkina 'kwani en'thi/ 'pen mo gom 'kom buni mo, wak̄ki/ a'di midi ta malik mo jin ta tapa apo/ tiyan tiya mo

14 walla imudhiir mo kun hashu ki a'di mo mmoci uni gwansana jisa mo kun thu'th to mii mo dhali maᅇ uni gwansan kun miin ki 'bore/ mo.

15 Haali/ a'di ta bwa ma Arungimis mo ki um ki miim 'borgam bum mo kun miina um mo tani mini mu'th 'twa/ gi 'kwanim pali/ mo dhali miim pus buni mo.

16 Tayi 'kwani kun 'kon ki 'kus mo, hili ki dar gi mii jin mina umi bu'th mom bum jin 'kona um ki 'kus mo mmota mii jin dik̄ mii gun miina um kun ta thus mo. Hili 'koyi me'd uni kun ta imanmii to goma Arungimis mo.

17 Tak̄i aris 'kwani 'baar mo. Eni iwak̄ bumi 'baar mo. Koki Arungimis mo. Tak̄i imalik mo.

She/mm Mii ma Krist̄hos jin 'Kosha Is A'di ka Nyor mo

18 Imanmii towa, 'dapi 'twa/ mo e tapam bum mo ka ris montak mo, hili yisa jasi e uni gun mii mii ki bwan̄kush mo dhali mii ma 'thup e mo, hili si'da/ e uni gun 'cwar̄kina 'cwar mo be.

19 Haali/ wathi/ a'di tesu mo wak̄ki/ a'di ta'd gi 'twa/ ma du 'kup ka Arungimis mo mmo'dim 'kup mo e isa nyor mo me'd jin tana a'di isa nyor jin diki ta kar/e mo.

20 Haali/ to jin gama um a'di ta'da taye, wak̄ki/ um ki thu'th to mii mo dhali gam mondor mo gom a'di mo tani dhali um mini bu'th a'di ki bwa jin 'kuᅇu ki

'kari'th mowa? Hili wakki/ um ki mii miim 'boron mo dhali 'kosh is ka nyor mo gom a'di mo tani um bu'thki a'di ki bwa jin 'kuçu ki 'kari'th mo dhali um tan gi mo jin tes ma Arumgimis um mo be.

²¹ Haali/ gom a'di yan mo tani um yukkunu mo, haala Kristhos si'da/ 'koshu is ka nyor mo gom um mo, mmodhalkina a'di um she/mm piti mo ki um mini 'taki batha çuk piti mo be.

²² A'di diki mii miinthus a'den kamu/ mo. Dhali gwo maça 'den kamu/ si'da/ dinuki gam 'pena le'd piti mo be.

²³ Ki a'di sorkunu mo tani a'di diki raça sori bway mo. Ki a'di 'koshkina is ka nyor mo tani a'di diki shwaa 'cesh ki sho'k mo. Hili a'di gamki a'di gwo is mo, a'di jin ta'da mandwall gwo mo jin ta'da kar/e mo.

²⁴ A'di a'di ki is piti kalki miinthus bana e is piti mo apo/ cwa mo, ki ana mina 'taki wu miinthus mo dhali 'ko ki e mo e mo ma kar/e mo. Ki jamam piti jin dorkunu a'di mo tani um waçkunu mo be.

²⁵ Haali/ um iikini per mo me'd ka'bal mo, hili shwane/ um dokkin ka nyan'ko'd mo eya Manhil Ka'bal mo dhali Amanjiya kashiram bum mo be.

3

Shush Mii jin Miina Up kun Mashu mo dhali Ikath mo

¹ Wakan si'da/ um upa, 'dapi 'twa/ mo e ikathim bum mo, wakan ki kun tiya mo, ba kun tiya yisa ha gwo eya, uni minu 'taki gama du is ki dar gi gwo mo goma nyoñ is gi i/ashim buni mo

² ki uni mini par miim bum jin tuka uma tu'k is e mo dhali miin dhelelga/ mo gom mii kun nyoñuwa nyoñ mo.

³ Hili dhalku/ki dhal miim bum mmota ji ma por ma pije/ mo gom tom bum kun hidha um i is mo ka mur jin to'du mo, dhali mmonyoy 'dolkon gana/ mo dhali hi'th burriyem po/ mo,

⁴ Dhali hili dhalki a'di ta'da cin kamu/ jin bagu mo jin ta'da du mo ki wosh dhel jin moli pu/ mo jin ta shi/in jin 'thupa e mo dhali jin di'd ki shwam mo, a'di jin ta yintho/ ki yintho/ mo e bwambori jis/e ma Arumgimis mo.

⁵ Wakan 'thissa/ up kun dhelelin mo, uni kun tan ga 'tej kape/ eya Arumgimis mo tani nyoñki is buni mo dhali 'dap 'twa/ mo e gwo gi ikathim buni mo,

⁶ me'da Saarah mmohakina a'di gwo ma Ibrahiim e mo dhali yuk a'di ki tapa mo. Dhali um shwane/ mo ta uçi ma yim mo wakki/ um mini mii mii ki 'bore/ mo dhali mmodiki dhal toñ kamu/ bway mo mmodee um is mo be.

⁷ Wakan si'da/ um gwaṭha, 'koyi ki isi 'kom pa mo nyakki up bum mo, mmoci montak goma 'bom mo me'd jin 'ka'da isa yim mo ki buñgwar ma yim mo, haali/ um nyakki mal buthi mon'de/ mo ka 'the ki mondiki/e mo, ki mii gi wakan mo tani ka 'thom bum kun 'thona um mo tani minu 'koki 'taki non kup mo be.

'Koshi Is ka Nyor ma gom Gway Mii ma Kar/e mo

⁸ Kwalany 'te/ be. Aris umi 'baar mo, tayi gi mo jin gamu gwo me'd e shi/in mo, dhali koci e mo, dhali eni iwak bum mo, dhali tayi ka duñ 'ka'dga/ mo dhali bwa kun dhunu ki gwa'd mo.

⁹ Dhalku/ki rak tonthusi bway mo gom tonthus mo walla dhalka sor ki raki bway mo goma sor jin soru mo. Hili apo/ mii yan ki ca'ckon mo tani 'boriya 'bor mii mo haali/ gom mii yan mo tani um yukkunu mo ki um mini 'taki bu'th mo jin 'boruwa 'bor mii mo be.

¹⁰ Haali/ me'd gwo jin 'kwarkunu mo ki:
A'di jin mido 'taki en mondiki/e mo

dhali par ateem 'borga/ e mo tani
 dhalki a'di noni'da le'd piti 'peni tonthus mo
 dhali 'twam piti 'peni mo jin onu gwo ma maḵ mo.

¹¹ Dhalki a'di tu'kki'd mo 'peni tonthus mo dhali mii miim 'boro'd mo
 dhali dhalki a'di simm monḵu'th is e mo dhali ur a'di isho'k mo.

¹² Haali/ e gi Tapa a'di di'd apo/ uni gun mii miinḵar/e mo
 dhali 'cem piti ka'dkina a'di mo gom mon'thom buni mo be.
 Hili bwam/e gi Tapa diki'da po/ uni gun miiki tonthus mo.

¹³ Dhali kaja di'di mmoshi/ um mo waḵki/ um shwana miinḵ gana/ anyor ki
 thith mo?

¹⁴ Hili isi kani waḵki/ um 'kosha is ka nyor mo gom gway gi mii ma ḵar/e
 mo tani um minu 'bor mii mo be. Dhalku/ uni ki ḵo/ mo walla dhalka du ki
 mur mo,

¹⁵ hili eya dum bum mo tani tuḵi aḶriḶḶhos me'd Tapa mo. Isa yempa/
 mo tani um mini thoson is mo mmota iman'ce'd gwo she/ mo gom ma gom
 'kwani gunn kun yukki um mo mmoḵi gwo goma 'teḵ kape/ jin di'd e um mo,
 hili miyi a'di ka du jin 'thupu e mo dhali ka tuk jin tuḵu/ mo.

¹⁶ Dhali dhuyi 'twa/ ma dum bum ki dhelel dhelel mo, wakan waḵki/ um
 minu 'taki sor mo tani uni gwansan kun sorki um mo goma nyonḵ bum jin
 nyonḵa um is ki 'bore/ mo eya ḶriḶḶhos mo tani uni minu dhu ki mo ma 'the is
 mo be.

¹⁷ Haali/ a'di 'boro'd ki 'bor gana/ mo mmo'kosh is ka nyor mo gom miinḵ
 gana/ mo waḵki/ a'di mididi 'taki ta bwa ma Arumgimis mo mmobol mii jin
 thudhu mii e mo.

¹⁸ Haala ḶriḶḶhos a'di wuki'd mo si'da/ gom miinthus mo me'd 'de/ mo gom
 'kwani 'baar mo, a'di jin ta'da ḵar/e mo wuki'd mo gom uni kun 'koki ta ḵar/e
 mo, ki a'di mididi 'taki sus ana eya Arumgimis mo. A'di karkunu mo mmowu
 mo ki buḵḵwar is gi shuman is mo, hili a'di karkunu ki e mo e shi/in mo.

¹⁹ E a'di jin yakina a'di mo dhali ḵi gwo e shi/in kun 'kon eya sijin mo,

²⁰ uni gun 'koki ha gwo e 'thissa/ mo, me'd jin 'kuḵkin ma Arumgimis bwa ki
 'kari'th mo mmoḵora cor ka tee ma Nuuh mo, me'd jin dikina a'di mmonyana
 dhana ḵur mo, a'di jin 'kokina 'kwani ki daḵa/ icine/ mo, uni gun 'koni jasi
 pekwaro mo, uni a'di itakunu is ki me'd 'peni yi'de/ mo be.

²¹ Mo ma cuḵ jin cuḵu/ jin 'dapa'd ki gwo yan mo tani a'di woḶḶki um
 shwane/ mo, yisa me'd mii jin ḵalkunuwa dihar ka piḵe/ 'peni buḵḵwar is mo,
 hili me'd isi 'kup jin yipkunu eya Arumgimis mo gom 'twa/ ma dun dhelelga/
 mo ki mompi ma Yesus ḶriḶḶhos mo,

²² a'di jin ciḵki bway momis mo dhali a'di jin diki'd ka bim poros ma
 Arumgimis mo nyakki aris iman'doyu gwo mo dhali ki moshirr mo dhali
 mom'bi'th kun 'dapki 'twa/ ki a'di mo be.

4

Imandhuwa 'The ma Arumgimis Gana/ mo

¹ Haali/ me'd mii gi wakan mo tani aḶriḶḶhos 'koshkina is ka nyor e shuman
 is mo tani thosoni is bum mo ki gwon 'de/ mo mmokulumu bwa mo, haali/
 a'diyin jin 'kosha is ka nyor mo e shuman is mo tani a'di daḵki miinthus mii
 mo,

² wakan mmo'ko mo gom mo jin boḵo'd mo naskina/ e shuman is mo
 yisa mmodok/e dhu e ki 'thir 'thir ki e gi 'kwani en'thi/ mo, hili ki bwa ma
 Arumgimis mo be.

³ Hili dhalka tee yin jin yaki'd ki jim pe mo 'kosh jwa mo mmomii me'd mii
 kun miikina 'kwani kun 'koki ta 'Kwani Yahuuda/ mo mmo'kokina uni e mii

kun 'kanuwa kanthi/ mo dhali e mii gun dhunu e ki 'thir 'thir mo dhali e mo jin 'kosh ma suwa 'kosh mo dhali e mii kun waluwa wal e mon'kupa su mo, dhali mmomii ki ra'b mo e mo ma su mo dhali e mii kun lunu tompinycon mo kun 'kona gwonḡan ki dhal bway mo.

⁴Uni wunyū/ is shwane/ mo ki um 'koki gam mii me'd ki uni mo e miin 'de/ jin 'baara uni mo ki 'twa/ mo e mii gun miina uni ki ra'b mo, dhali uni sorki um mo.

⁵Hili uni mini ci gwo e a'di mo, a'di jin thosonki is mo mmodwall gwo mo gom uni kun 'kon ki e mo dhali kun wukin mo be.

⁶Haali/ gom gwo gi wakan mo tani a'di cinu gwom 'borga/ yan mo isi kani gom uni gun wukin mo, ba ki uni dwallkunu gwo mo e shuman is mo me'd kwani mo tani uni mini 'taki 'ko ki e mo e shi/in mo me'da Arumgimis mo be.

⁷'Pemen ma ris to gwansani 'baar mo tani pu'dkin hila/ mo be. Wakan dhuyi adum bum ki 'bore/ mo dhali kuthi is ki 'cese/ 'cese/ mo goma 'thom bum jin mina umi 'tho mo.

⁸Apowa ris mii gwansani 'baar mo tani buthi/ mii ki ri'd mo mmo/ena en ka rem 'kup mo jin diki ush me'd mo, haali/ mo/en a'di kumki'da ris miinthus kun dhukunu ka maḡampo/ 'twa/a 'cesh mo.

⁹Boṭi ki mii jin minu ta gu'b bum ḡal mo ki dar ga gungum ka rem 'kup mo.

¹⁰Me'd 'kwani 'baar ka 'dete/ 'dete/ mo kun bu'thki to kun cinu ki me'd mo tani bu'thki a'di mo mmomii to mo gom tiya ka rem 'kup mo me'd imandhuwa 'the ma Arumgimis ki she/ ki she/ mo kun ta kum 'boron mo.

¹¹A'diyin jin oki gwo mo tani me'd a'din 'de/ yin jin bakki gwonḡan ma Arumgimis mo. Dhali a'diyin jin mii to e mo jin miinu to mo tani me'd a'din 'de/ yin jin mii to mo ki mom'bi'th jin thip ma Arumgimisa thip mo. Ki mii gi wakan mo tani eya ris to 'baar mo Arumgimis minu kar ki ca mo eya Yesuṣ Kriṣthos mo be. E a'di mo tani monyca cila a'di mo dhali mo jin tanu tapa mo gom 'pemen ki sule/ dhali ki sule/ ya ye 'ba/ mo. Amen.

Mo jin 'Koshu Is ka Nyor mo Me'd Uni kun Ta Uni ma Kriṣthos Gana/ mo

¹²Um gun enu mo, dhalku/ ki ta ku gun minu wuny is mo e mii kun 'batha'ba'th mo me'd o'd mo jin pu'dki'da po/ um mo mmony/ um mo, me'd toḡ kamu/ jin molu mo jin mii um mo be.

¹³'Kunyi bwa mo isi me'd jin pwakkina um isa nyor ma Kriṣthos mo tani ki um si'da/ mina bwa 'taki 'kuny mo dhali 'bor mo, ki monyca piti minu toḡ eya tente/ mo be.

¹⁴Wakki/ um waku mo gom gway ma Kriṣthos mo tani um 'borkunu mii mo, haali/ Shi/in gi monyca mo dhali ji ma Arumgimis ca'bki'da po/ um mo be.

¹⁵Hili dhalku/ ki dhal jan tal 'deḡ kamu/ 'peni bwam um mo mmo'kosh is ka nyor mo me'd a'di jin 'koshki'da mee mo, walla me'd a'di jin kwalki'da 'di/ mo walla me'd a'di jin thu'th to mii mo walla me'd a'di jin shwan ma pipi anyor mo.

¹⁶Hili wakki/ jan tal 'deḡ kamu/ 'kosha is ka nyor mo me'd a'di jin ta'da Kriṣthiyan mo tani a'di mina is diki mii 'theya 'the mo, hili e bwan'kwariḡ gway yan mo tani dhalki a'di kara'da Arumgimis ki ca mo.

¹⁷Haali/ mo pu'dki'd mo gom gwon dwall mo mmoṭel 'pen 'peni uni gun tana ta/ ma Arumgimis mo. Dhali wakki/ a'di telu 'pen ki ana mo tani 'pemen midi ta ata mo gom uni gwansan kun 'koki ha gwom 'borga/ ma Arumgimis e mo?

¹⁸Dhali me'd gwo jin 'kwarkunu mo ki:

Wakki/ a'di ta to jin diṭa mii mo gom wathin kar/e mo mmowoth mo tani mane mo jin mina uni gun ushuna ush mo dhali imanmii miinthusi piyu 'ba/ ka piije/ mo?

¹⁹ Wakan dhalki uni gwansan kun 'kosha is ka nyor mo isi ki bwa ma Arungimis mo mmomii miim 'boron mo tani dhalki uni miin mo dhali ciya kashiram buni eya Man/uk to jin ta isin gana/ mo.

5

Hili Ama'diny ma Arungimis mo ma

¹ Wakan aha/ malaskina jwahaṅ 'kwaniṅ kaniisa mo e bwam um mo, me'd jin taka/ garr jin ta jwaha/ si'da/ mo dhali ta aman/o gwo mo gom isa nyor ma Kristhos mo dhali me'd jin bu'thkika/ monycam piti si'da/ jin minu tor eya tente/ mo be.

² Ciya ama'diny ma Arungimis tonte/ mo, a'di jin kanu um gwo mo mmomii mo, yisa ki mii jin minu tu'c uma, hili ki bwa jin onu mo, yisa gom mii jin minu gama du is ki mon'the is mo, hili ki 'ba/ jin ganankunu mo,

³ yisa ki mii jin mina umi 'cwara 'cwar apo/ uni gwansan kun kanu um gwo mo mmomii to mo, hili tayi she/mm goma ma'diny ma Arungimis mo.

⁴ Dhali ki a'di jin ta'da Manhil Ka'bal jin ta'da 'kan'kup minu tor eya tente/ mo tani um mini bu'th tor'kup jin moli us ki jog mo jin ta monyca mo be.

⁵ Wakan si'da/ um gun ta dhuru'c mo 'dapi um 'twa/ mo e 'kwani kun ta gwanyjaka/ mo. Shumi is bum mo, aris umi 'baar mo, ki mo jin dhunu is ki gwa'd ka karambuye/ ka rem 'kup mo, haali/ Arungimis ceshki mo mo gom uni gun dhu 'ba/ ki ca mo, hili a'di ki ciya 'the gom uni gun dhu is buni ki gwa'd mo be.

⁶ Wakan dhuyi is bum ki gwa'd mo e bwan'kwariny me'd ma Arungimis jin ta gi mom'bi'th mo, ki ka teen gana/ yan mo tani a'di midi dhu um ki ca mo be.

⁷ Ta'kka ris mo/anan is bumi 'baar mo apo/ a'di mo haali/ a'di mishi'da hil hil mo gom um mo be.

⁸ Kuthi is ki 'cese/ 'cese/ mo dhali timi mo mo. Haali/ a'di jin ta 'kupki um jin ta tapa ma ruma 'cesh mo tani a'di an'kaski'd ki mis me'da dhop jin an'karki ko mo, mmosimm jan tal 'den kamu/ e mo mmolos ki 'kolo'c ka kuluny mo.

⁹ Roçi a'di mo, dhali teli sho'k mo e mongam gwo is bum mo, mmomisha um ki gwo jin wanu kani bwa gom isa nyor jin 'kosho'd mo tani a'di 'the'kkunu mo 'peni iwak bum mo kun 'kon e mony'ceshi 'baar mo.

¹⁰ Dhali 'ko'di mo jin 'koshkina um is ka nyor ki ari mo mo tani Arungimis jin ta'd ga 'the 'baar mo dhali a'di jin yukki um mo e monycam piti jin di'd ki sule/ sule/ mo eya Kristhos mo tani a'di ki is piti midi thoson um ki 'dantar mo, dhali tel um sho'k mo dhali 'bi'th um is mo be.

¹¹ E a'di mo tani mo jin tanu tapa mo midi di goma sule/ mo dhali ki sule/ sule/ ya ye 'ba/ mo. Amen.

Kwalany 'Te/ Ba/. Monthe Me'd mo

¹² Ka Silwaanus, a'di jin ta'da kam bana jin ta isin gana/ mo me'd jin oka/ gwo mo gom a'di mo tani aha/ 'kwarkina gwo ki e 'pe'pere/ mo gom um mo, mmomalasa malas mo dhali mmobah gwo mo ki a'di yansan ta'da 'the ma Arungimis gana/ mo. Doshi ki sho'k jin telu mo e a'di mo.

¹³ Ayim jin diki'd e Pam Baabil mo, a'di jin kwanykunu wakan mo tani hashki um monthe me'd mo. Dhali ya/m pem ka Markus miiki'd kan si'da/ mo.

¹⁴ Theka the me'd ka rem 'kup mo ki 'twa/ jin pinu ki mo/en mo.

Mon'ku'th is midi di gom umi 'baar mo, um kun 'kokin eya Kristhos mo be.

Gwo jin 'Ko'd jin 'Kwar ma BUṬERUS mo

Monthe Me'd mo

¹ ASimaan jin ta'da Buṭerus mo, a'di jin ta ciṅkina/ mo dhali a'di jin karu ki she/ mo goma Yesus Kristhos mo.

E uni gwansan kun bu'thki moṅgam gwo is jin nyakka'd ki ji yinthom bana mo e mo ma kar/e ma Arumgimis bana mo dhali Amanwoth bana jin ta'da Yesus Kristhos mo be.

² Dhalka 'the dhali moṅku'th is minu mar is mo gom um mo e monyith jin nyithkina uma Arumgimis mo dhali Tapa Yesus bana mo.

Ayuk Bum jin Yuḳu Um mo dhali Kwany jin Kwanykunu Um mo

³ Mom'bi'th piti jin piyi'd 'peni Arumgimis mo tani a'di ciki'da ris to 'baar mo e ana mo kun minu mii ta mo gom mondiki/e mo dhali mii ma gayiin mo e mo ma nyith piti jin nyithkina ana a'di mo jin yukkina a'di ana mo e monyca jin ta jim pitin gana/ mo dhali e miim 'borgam pitin gana/ mo be.

⁴ E uni mo tani a'di ciki ana gwom piti kun onu is mo kun ta yintho/ ki yintho/ mo dhali kun eka/ ek kagahara mo, dhali ki uni gwansan mo tani ki um mini 'taki ye mo 'peni mo jin pu/uwa pu/ mo, a'di jin di'd e mony'cesh yan mo gom mo jin dhunu e ki 'thir 'thir mo, dhali ki um mini war ki imanpwak buyempa jin piyi'd 'peni Arumgimis mo.

⁵ Haali/ gom 'kup mii yan gana/ mo tani pali aris mii ki 'twanjal kuku/ mo mmogalal moṅgam gwo is bum is mo ki miim 'borga/ mo, dhali miim 'borga/ ki mii jin nyithuwa nyith mo,

⁶ dhali mii jin nyithuwa nyith mo ki mii ma du jin 'timu mo, dhali ki mii ma du jin 'timu mo ki mii sho'k jin telu mo, dhali mii sho'k jin telu mo ki mii ma gayiin mo,

⁷ dhali mii ma gayiin mo ki momish jin mishu ikam ka rem 'kup mo, dhali mii jin mishu ikam ka rem 'kup mo ki mo/en mo.

⁸ Haali/ wakki/ to gwansan ta kum bum mo dhali ish ka enthus mo tani uni mini non um 'peni mii kun ushi me'd mo walla 'peni mo jin molu maman dho'th mo e monyith jin mina umi nyith Tapa Yesus Kristhos bana mo be.

⁹ Haali/ a'diyin jin midi har to gwansan mo tani a'di ta'da ja'da/ mo dhali hili'd isi shunse/ mo dhali a'di naki mo mo ki a'di lamkunu mo 'peni miinthusa dhamom piti mo be.

¹⁰ Wakan iwaka, shwayi uma nyor ki thith mo mmoṭe mo ma yuk jin yuku um mo dhala kwany jin kwanykunu um shoka 'cesh mo. Wakki/ um mini mii to yan mo tani um mini 'koki ta'k ki sule/ sule/ mo.

¹¹ Wakan, mo jin tanu pa ki pa mo minu ci um mo, a'di jin ta mo jin ciḳu mo e bampa/ gi Tapam bana mo dhali Amanwoth bana mo jin ta'da Yesus Kristhos mo, jin midi di ki sule/ sule/ ya ye 'ba/ mo be.

¹² Wakan aha/ dina gwo ibwa isa yempa/ mo mmoka um gwo e mo gom to gwansan mo, ba um mishki uni mo dhali um telkunu sho'k mo e gwoṅ gana/ mo jin takina um mo be.

¹³ Aha/ tosha ki a'di 'boro'd mo me'd jin ca'bka/ ki ca'b buṅwar is yan mo mmopir um is mo ki bway jin kaka/ um gwo e mo,

¹⁴ me'd jin mishka/ ki mo jin miga/ kar buṅwar is pem 'pen ka pije/ mo ki 'dishe/ mo me'd gwo jin tora Tapa Yesus Kristhos bana aha/ mo be.

¹⁵ Dhali aha/ mina hil a'di i e mo, ki 'ko'di yam pem jin miga/ kwa/ is bwa mo tani um mini 'taki mish to gwansan ka e mo, ma ka tee caan mo be.

Uni gun Ta Iman/o Gwo ki E mo gom Monyca ma Kristhos mo

¹⁶ Haali/ aman 'konaki batha gany gi gwo lolop kun ta ku ma maki sho'k mo kun lolopu ki lolop gwocon mo, me'd jin tora aman un eya tente/ mo mom'bi'th mo dhali mompu'd jin mina Tapa Yesus Kristhos bana pu'du/ mo, hili aman 'kokina mmota iman/o gwo ki e mo gom mo/ek' piti mo.

¹⁷ Haali/ ki a'di bu'thki montak mo dhali monyca 'peni Arumgimis jin ta'da Baba mo dhali 'twa/ gwoyi'd gom a'di mo ki Monyca jin Eka/ Ek mo ki: Yansan ta Ya/m pem jin enu mo. Ki a'di mo tani aha/ 'bora bwa mo.

¹⁸ Aman cikkina 'twa/ yansan jin gwoyi'd 'peni momis mo haali/ aman nyakkina 'ko ki a'di mo e wosh jin kogu mo.

¹⁹ Dhali ana takina gi gwo jin onu is mo jin tenu ki nyanye/ mo be. A'di mididi 'bor gom um mo wakki/ um mini ciya hirdhe/ mo gom a'di yan mo me'da lamba/ mo mmo'twakkina a'di mo mo e bwam mondhurumi'd mo ntaga tee mididi 'twak' mo mo dhala cul e gi mon'thamo/ ki cu mo eya dum bum mo.

²⁰ Um mini mii mish to yan 'ban mo ntwa/ a/ mo, ki gwoj kamu/ jin onu isa kamu/ yisa di'da e bwanj Gwo ma Arumgimis jin 'kwarkunu mo jin mina wathin tal 'denj kamu/ mish 'pemen piti tor ki is piti a'di 'de/ mo.

²¹ Haali/ gwoj kamu/ jin onu isa kamu/ yisa di'da jin pu'dki'd ki bwa gi wathi/ mo, hili 'kwani mmojockina Shi/in Dheleladhelel uni mo tani uni oki gwo 'peni Arumgimis mo be.

2

Imanci Gwo kun Ta Thus ki Thus mo dhali Imantor Gwonthus mo

¹ Hili imanci gwonthus si'da/ cuki mis mo e bwanj 'kwani mo jasi me'd jin mina imantor gwonthus 'ko i bwam un mo, uni gun mini kal gwonthusa tiya kun 'ce'du/ sho'k ka kwal is mo, isi kani mmowat Tapa gwo mo, a'di jin yolki uni mo, mmokal mo jin mina uni tor sho'k ka pupush ki is buni e mony'ce'd sho'k mo.

² Dhali 'kwani ka ris mini bath miim buni kun 'kanuwa kanthi/ isho'k mo, dhali gom miim buni mo tani bway gi gwoj gana/ minu sor mo be.

³ Dhali e bwam buni kun purapur mo tani uni mini nyuny um mo mmota nyuncina/ ki gwonthus buni mo. 'Peni kadhamo/ miwak buni jin toru gwo 'twa/a 'cesh mo tani diki ta nyon'kor mo dhali mony'ce'd sho'k buni si'da/ mo tani diki ish e mo be.

⁴ Haali/ wakki/ Arumgimis diki 'tash iman'doyu gwo 'twa/ mo me'd jin miina uni miinthus mo tani, hili a'di ki ta'k uni e mo/o'd mo dhali a'di ki dhu uni e jisa 'kulga/ mo kun ta mondhurumi'd jin 'ce'f'ki'da 'tum mo mmodhu uni ntagi gwo jin minu dwall mo be.

⁵ Wakki/ a'di diki 'tash mony'cesha dhama/ 'twa/ mo tani, hili a'di ki kara Nuuh ki 'dantar mo, a'di jin ta'da amanci gwo mo gom mo ma kar/e mo nyakki 'kwani pesun tiya mo me'd jin kalkina a'di agannu/ yi'de/ apo/ mony'cesh mo jin 'kona iman/usha ush mo.

⁶ Wakki/ mii jin tugu 'penkuman bampa/ gi Pan Saduum mo dhali Pan Gamuura mo ki burta/ o'd mo tani a'di ki wak uni mo ki mo jin toru gwo 'twa/ a 'cesh ki mony'ce'd sho'k mo dhali dhu uni mo mmota she/mm mo gom uni kun mini ta uni gun ushuna ush mo.

⁷ Dhali wakki/ a'di ye'da Luuth jin ta'da kar/e 'ba/ mo, a'di jin di'd ki dhan mo ma cis ki mii kun 'kanuwa kanthi/ mo gi 'kwanin thus gwansan mo

⁸ (Haali/ a'di jin misha wathin kar/e yan mo dhali cik' mo me'd jin ca'ba a'di e bwam uni mo tani a'di tu/ulkunu mo ki isa nyor eya kashiram piti jin ta'da kar/e ka yempa/ mo ka tee kun bathani 'ko'd mo ki miim buni kun ushkina uni gwojkan mii mo).

9 Wakan Tapa mishki ye uni 'ba/ mo, uni kun tana gayiin 'peni mompal mo, dhali dhu uni gwansan kun 'koki ta kunj kar/e mo e bwan'kwariny mo jin 'konu ka jisa apo/ mo ntaga tee gi gwon dwall jin minu tor gwo 'twa/a 'cesh mo,

10 dhali isi ki ji mum mo gom uni gwansan kun ci is buni ki bwa en'dap mo mmoshi/ is buni ki e gun dhuna uni ki 'thir 'thir mo dhali wak mo jin tanu ki moshirr mo.

Dhali dar gi monyju/ mo dhali ki bwam buni mo tani uni 'koki ko/a ko/ is mo mmosor uni kun ta gi monyca mo.

11 Bahili iman'doyu gwo mo, ba uni bol tiya e mo ki mo/ek jin caaca kagahara mo dhali mom'bi'th mo mo tani uni 'koki bah gwo sor jin ta gwon dwall apo/ uni mo mmosul Tapa bway mo.

12 Hili uni gwansan wana e ki to/e gun 'kon ka miiny mo, kun ta to gun uku mo ki buyem buni mo, uni gun dho'thkunu mo mmobu'th mo dhali mmo'kosh mo tani sorkina sor mo e mii kun 'kokina uni mmota pus mo tani uni minu 'ce'd sho'k mo nyakki uni ki mony'ce'd sho'k jin tal 'de/ mo,

13 mmo'kosh is ka nyor e miin thu'th buni jin thu'thkina uni to mii mo. Uni tulki a'di 'kup mo gom 'cem buni kun 'ko ki 'kol uni mo mmomiina uni ki ra'b mo e montee mo. Uni ta monyo/on mo dhali monthalkin mo mmomii ki ra'b mo e miim buni kun 'curkina uni e mo e mii 'baar mo dhali mmoko cuuwa/ ki kawwu mo e mo kun yukuwa yuk ka tul 'kup mo mmonyakki un mo.

14 Uni takin gi em buni kun 'tu'dkunu ki piny piny ki miinyal mo, a'di jin moli dak mo gom miinthus mo. Uni ellkina ell e mo gom 'kwanin tiya kun 'konuki tela kashiram buni sho'k mo. Uni takin ga dum buni kun yedhu sho'k mo e bwa jin purapur mo. Uni ta uci kun jeekunu mo.

15 Mmodhalkina uni bwaya kar/e 'pen mo tani uni iiki iim per mo. Uni bathki bway ma Balaam mo, a'di jin ta ya/ ma Basuur mo, a'di jin enki mo jin gamu nyunycina/ 'peni mii kun thudhu mo

16 hili a'di kucurkunu mo gom gwondhanj pitij gana/ mo. Ntagi thuluny jin mol 'twa/ wal mo, ki wal a'di ki 'twa/ gi wathimpa en'thi/ mo dhali nona manci gwo 'kup 'pena du ma nyonkom piti jin gusa a'di mo be.

17 Uni gwansan ta jis yi'de/ kun du'dun kun kutha e ki ku'th mo dhali kun tana shile/ kun borkin ma punthar mo. Gom uni mo tani mondhurumi'da 'tum a'di karkunu mo be.

18 Haali/ 'twam buni kun baha uni mmodhu 'ba/ ki ca mo eya palim buni mo tani uni ellkina ell e ki mii kun 'kanuwa kanthi/ mo ki e kun dhunu ki 'thir 'thir ki bujgwar is mo, mmo/ell 'kwani e mo, uni gun yekin mo 'peni yokkam gi uni kun 'kon e mii gun thudhu mo be.

19 Uni oki uni gwo is mo gom mo jin mina uni 'ko ki 'kus mo, hili uni ki is buni mo tani ta cinjina/ kun yolu mo e mo jin pu/u mo. Haali/ ma a'diyin jin midi pi wathi/ e mo tani a'di ta cinjina piti mo be.

20 Haali/ wakki/ 'ko'di uni yekin mo 'peni mo jin shi/u bujgwar is mo 'peni mony'cesh mo ki monyith Tapam bana mo dhali Amanwoth jin ta'da Yesu Kristhos mo tani uni dok/e kothkunu mo e uni mo dhali pinu e mo tani mon'kom buni jin ta jin 'ko'd mo tani warki'd ki shi/ kagahara mo gom uni mo mmobol jin twa/a/ e mo be.

21 Haali/ a'di midi 'taki 'bor ki isi 'bor gana/ mo gom uni mo ki uni mini 'taki 'koki mish bwaya kar/e yansan ki sule/ sule/ mo dhali 'ko'di uni mmomishkina uni a'di mo tani uni ki tu'k ka nyanj 'ko'd 'peni gwonkan jin kogu mo jin cikunu uni mo.

²² A'di pu'dki'di uni mo isi ki gwoŋ gana/ mo jin onu 'pena dhamo/ mo ki: A'ka lakki ya/ piti ka nyan'ko'd jin ya/kina a'di mo, dhali kuman kuthar upkunu yi'de/ mo jasi mmo'danjali bwam boro'th jin 'dorotha'doro'th mo be.

3

Gwo jin Onu Is mo gom Pu'd jin Mina Tapa Pu'du/ mo

¹ Gwo yansan shwane/ a'di ta gwo jin 'kon ma po/i su/ mo jin 'kwarkika/ um mo, um gun enu mo, dhali e uni su/ kan mo tani aha/ yikinkina uma du is mo e bwam bum kun dar ki washila/ mo e bway yan mo mmoka um gwo e mo.

² ki um mini 'taki ka gwo e mo ki gwo kun onu itwa/a/ mo ki 'twa/ gi imanci gwo ma Arumgimis kadhamo/ mo kun kogu mo dhali ki gwoŋkan gi Tapa mo dhali Amanwoth mo e unim bum kun dhunu ki she/ mo.

³ Ntwa/a/ ka ris to 'baar mo tani um mini mii mish gwo yansan 'ban mo ki uni kun tana mak ka mak mo mini pu'du/ ka tee kun 'ko'd mo ka mak buni mo mmobath en'dap gana/ kun dhuna uni e ki 'thir 'thir mo

⁴ dhali o gwo mo ki: Mane gwom piti jin onu is ki a'di midi pu'du/ mo? Haali/ 'peni me'd jin wukina ibabam bana mo tani aris to 'baar mo 'kon mmo'tikir 'ko mo me'd mii kun 'kokina uni mo 'peni ka mun'kup ki mo jin ukkunu to mo.

⁵ Uni ci mii 'ko'd mo ki bwam buni mo, ki, ki gwo ma Arumgimis mo tani aris momis 'kokin kadhamo/ innii mo ba/, dhali mony'cesh ukkunu 'peni yi'de/ mo dhali ki yi'de/ jin ta yi'de/yi

⁶ dhali ki a'di mo tani mony'cesh jin diki'd mo me'dyin, a'di halaskunu a'di ki yi'de/ mo dhali 'ce'd sho'k mo.

⁷ Hili ki gwon 'de/ mo tani aris momis dhali mony'cesh kun 'kokin mo shwane/ mo tani uni dhunu mo mmo/ ish kumma/ mo gom mo/ o'd mo, mmo'kokunu mmodhu uni mo ntaga tee jin minu tor gwon dwall 'twa/a 'cesh mo dhali 'ce'd 'kwani sho'k mo uni gun ushuna ush mo be.

⁸ Hili dhalku/ ki ci miin 'de/ yan 'ko'd mo, um gun enu mo, ki, ki Tapa mo tani ateen 'de/ yan wana e ki yil alip mo dhali yil alip mo tani a'di wana e ka teen 'de/ mo be.

⁹ Tapa a'di midi diki miiya diite/ mo gom gwom piti jin ona a'di is mo me'd jin ona kun tiya ki a'di midi taya diite/ mo, hili a'di thonki'da thon me'di 'ko'd mo 'kupki um mo. A'di yisa ona bwa ki tal 'dej kamu/ midi 'taki this e mo, hili ka ris 'kwani 'baar mo mini 'taki jidhir mo e mo jin rijuwa du is mo be.

¹⁰ Hila tee gi Tapa mo tani a'di midi pu'du/ mo me'd wathin 'di/ mo dhali yan'ko'd aris momis mini pe mo ki dhan cuuwa/ jin minu rayu/ mo, dhali to kun 'kon e mo ma tor piti mo tani mini wa ki o'd jin ca'b ki wur wur mo, dhali mony'cesh yan mo dhali miim piti mo kun 'kona po/ a'di mo tani minu puri 'baar mo be.

¹¹ Haali/ me'd jin mina ris to gwansani 'baar mo wa mo wakan mo tani um mini ta 'kwani kun mini wakata ka ba/ mo mmomii mii kun kogu mo dhali mii mii ma gayiin mo

¹² mmoçora çor mo dhali gom bwa jin onu ka daran du mo goma tee ma Arumgimis mmopu'du/ mo, haali/ gom a'di mo tani momis minu tushun ki o'd mo dhali minu wa mo dhali to kun 'kon e mo ma tor piti mo tani uni minu to'd ki o'd mo be.

¹³ Hili ki isi gwom piti jin onu is mo tani ana çora momis kun ta kun this mo dhali mony'cesh jin ta jin this mo, a'di jin mina mo ma kar/e nyça'bi cine/ mo be.

¹⁴ Wakan, um gun enu mo, me'd jin cōrkina um gom to gwansan mo tani shwayi anyor ki thith mo ki um minu gam e a'di mo ki dar gi monyo/o'd mo walla thalkin mo dhali um minu gam mo ki mo ma ku'th is mo.

¹⁵ Dhali kar mo ma thon jin thonkina Tapam bana ana me'di 'ko'd mo gom bway mowoth mo. Wakan si'da/ akam bana jin enu jin ta'da Buulus mo 'kwarki um gwo mo isi ki gwo ki moyuk jin cikunu a'di mo

¹⁶ mmotor a'di yansan mo me'd miim piti jin miikina a'di eya ris gwom piti jin 'kwarkina a'di mo. Dhali gwon tiya kun 'kokin e uni mo tani 'bitha bi'th mo mmomish 'ban mo, ki uni kun ta pus mo dhali uni kun 'konuki tel sho'k mo tani uni wutulki uni mii mo ntagi mo jin minu 'ce'd sho'k bunij gana/ mo be me'd jin miikina uni gom gwo ma Arungimisa tiya kun 'kwarkunu mo.

¹⁷ Wakan um gun enu mo mmomisha um a'di ntwa/a/ mo tani jiyi mo ki e mo isi ciki/ mo ki um minu 'koki 'de'k shoki mis mo ki gwo jin thamu mo 'peni 'kwani kun ush gworjan mii mo dhali this mom bum gana/ jin tela um sho'k e mo.

¹⁸ Hili 'bapi um mo eya 'the mo dhali e monyith Tapam bana mo dhali Amanwoth jin ta'da Yesus Krithos mo. E a'di mo tani monyca midi di mo 'peni shwane/ mo dhali ntaga tee jin midi di ki sule/ sule/ ya ye 'ba/ mo. Amen.

Gwo jin Twa/a/ jin 'Kwar ma YOHAAN mo

Gwo gi Mondiki/e mo

¹ A'di caan jin diki'd 'peni ka muŋ'kup mo dhali a'di caan jin cika aman mo dhali a'di caan jin misha aman mo ki em bam mo dhali a'di caan jin hila aman mo dhali jin tana aman is ki me'd bam mo isi gwo gi mondiki/e mo be,

² dhali mondiki/e yan toru eya tente/ mo dhali a'di hilkina aman mo dhali aman itana iman/o gwo gom a'di mo dhali mondiki/e yan tora aman um eya tente/ mo, mondiki/e yan jin di'd ki sule/ sule/ ya ye 'ba/ mo, jin di'd eya Baba mo tani dhali a'di torokunu aman eya tente/ mo be,

³ a'di caan jin misha aman mo dhali cik mo tani tora aman um eya tente/ si'da/ mo ki um si'da/ mini nyak to mii ki aman mo dhali tom bana jin nyaka ana mii mo tani nyakka Baba mo dhali nyakki Ya/m piti jin ta'da Yesus Kristhos mo be.

⁴ Dhali to gwansan 'kwarkina aman mo, ki moŋ'kuny bwam bana minu thim mo be.

Arumgimis Ta Moŋkush mo be

⁵ Yan ta gwo be jin cika aman 'peni a'di mo dhali jin cina aman e um mo, ka Arumgimis ta moŋkush mo dhali e a'di mo tani mondhurumi'd piyi'di 'baar mo be.

⁶ Wakki/ ana ona gwo ki ana nyaka to mii ki a'di mo dhali ii ka yiha/ mo e mondhurumi'd mo tani ana tana tor mo dhali gwoŋ gana/ 'kona ana ki mii mo be.

⁷ Hili wakki/ ana iina mo e moŋkush mo tani me'd a'di jin di'd e moŋkush mo tani ana nyaka to mii ka rem 'kup mo dhali abas ma Yesus jin ta Ya/m piti mo tani a'di pucumki ana aris miinthusi 'baar mo be.

⁸ Wakki/ ana ona gwo ki ana dara gi miinthus mo tani ana heka is banan gana/ e mo dhali gwoŋ gana/ yisa di'd e ana mo.

⁹ Wakki/ ana pina gwo miinthus bana mo tani a'di ta a'diŋ gana/ mo jin mii'd ka kar/e mo jin midi dhal ana miinthus bana 'pen mo dhali pucum ana 'pena ris mii kun 'koki ta kuŋ kar/e mo be.

¹⁰ Wakki/ ana ona gwo ki ana dara gi miinthus mo tani ana kara a'di mo mmota ator mo dhali gwom piti diki di e ana mo be.

2

AKristhos Ta'da Manmalas Bana mo

¹ Ushi ucin pema, aha/ 'kwarkina um gwo yansan mo ki um mini 'koki mii miinthus mo be. Hili wakki/ wathin kamu/ mii miinthus mo tani ana tana ka Manmalas mo nyakka Baba mo, aYesus Kristhos jin ta'da kar/e mo,

² dhali a'di ita mongwam gom miinthus bana mo, dhali yisa jasi gom kum bana yisa, hili si'da/ gom miinthus gi 'kwaniny'chesi 'baar mo be.

³ Dhali gom a'di yan kan mo tani ana mina mish mo ki ana misha a'di mo wakki/ ana dhuna gwonkan piti kun 'kwarkunu mo be.

⁴ A'di caan jin o gwo mo ki: Aha/ misha a'di mo, ihili ush gwonkan piti kun 'kwarkunu ha e mo tani a'di ta'da tor mo be dhali gwoŋ gana/ yisa di'da e a'di mo.

⁵ Hili a'diyin jin dhu gwom piti mo tani e a'di mo ka jin gana/ mo/en goma Arumgimis thimu ki 'bore/ mo be. Ki a'di gi wakan mo tani ana mina mish mo mo ki ana 'kona e a'di mo be.

6 A'di jin o gwo mo ki a'di ɔa'bki'd e a'di mo tani ɔa ya'd e bwaya 'de/ jin yana a'di mo ba/.

Gwoŋkan jin 'Kwaru jin Ta jin This mo

7 Um gun enu mo, aha/ dinaki 'kwar um gwoŋkan jin 'kwarkunu mo jin ta jin this mo hili gwoŋkana dhamo/ jin 'kwarkunu mo a'di jin takina um 'peni ka muŋ'kup mo, gwoŋkana dhamo/ jin 'kwarkunu mo jin ta gwo jin cikina um mo be.

8 Dok/e aha/ 'kwarkina um gwoŋkan jin ta jin this jin 'kwarkunu mo, a'di jin ta jin gana/ e a'di mo dhali e um mo, haali/ mondhurumi'd peki'd mo dhali moŋkush gana/ a'di 'twakki mo mo hila/ mo be.

9 A'di jin o gwo ki a'di di'd e moŋkush mo dhali shi/a kam piti i e mo tani a'di di'd e mondhurumi'd naskina/ mo be.

10 A'di jin ene'da kam piti mo tani ɔa'bki'd e moŋkush mo be dhali e a'di mo tani mo jin gwoluwa goŋ piyi'd mo be.

11 Hili a'di jin shi/ki'da kam piti i e mo tani a'di di'd e mondhurumi'd mo dhali ya e mondhurumi'd mo be dhali diki mish mo mo, mo jin yakina a'di iya mo haali/ mondhurumi'd dha'bki a'di em piti mo be.

12 Aha/ 'kwarkina um gwo yan mo, ushi uci, haali/ miinthus bum dhalkunu um 'pen mo gom gway piti mo be.

13 Aha/ 'kwarkina um gwo yan mo, ibaba, haali/ um mishi a'di mo, a'di jin di'd 'peni ka muŋ'kup mo. Dhali aha/ 'kwarkina um gwo yan mo, um kun ta 'kwanin dhuru'c mo, haali/ um piki a'dinthus 'de/ yin e mo. Aha/ 'kwarkina um gwo yan mo, um kun ta uci mo, haali/ um mishkina Baba mo be.

14 Aha/ 'kwarkina um gwo yan mo, ibaba, haali/ um mishi a'di jin diki'd 'peni ka muŋ'kup mo. Dhali aha/ 'kwarkina um gwo yan mo, um kun ta 'kwanin dhuru'c mo, haali/ um 'bitha'bi'th mo dhali gwo ma Arumgimis ɔa'bki'd e um mo dhali um piki a'dinthus 'de/ yin e mo be.

15 Dhalku/ ki en mony'cesh mo ma walla to kun 'kon e mony'cesh mo. Wakki/ wathin kamu/ eni mony'cesh mo tani mo/en goma Baba diki di e a'di mo be.

16 Haali/ aris to 'baar mo kun 'kon e mony'cesh mo kun ta mon'dap e gi buŋgwar is mo dhali mon'dap e gi e mo dhali mii mmodhu is ki ca mo tani a'di diki di 'pena Baba mo hili a'di ta jany 'cesh mo be.

17 Dhali mony'cesh peki'd mo dhali mon'dap em piti mo, hili a'di jin mii'd ki bwa ma Arumgimis mo tani a'di ɔa'bki'd ki sule/ sule/ ya ye 'ba/ mo be.

AKristhos jin Diki Ta jin Gana/

18 Uciya, a'di ta mo jin 'ko'd mo dhali me'd jin cika um gwo ka kristhosthus pu'dki'd mo tani wakan shwane/ arisa kristhos kun 'koki ta kun gana/ pu'dkin mo. Dhali gom gwo gi wakan mo tani ana ki mish mo mo ki a'di ta'da cim jin 'ko'd mo be.

19 Uni iikin ka pije/ 'peni ana mo hili uni 'koki 'ko 'peni ana mo haali/ wakki/ uni mini 'taki ta kum bana mo tani uni mini 'taki rash 'ko e ana mo. Hili uni iikin ka pije/ mo ki a'di minu tor eya tente/ mo ki uni 'baar mo 'koki 'ko 'peni ana mo be.

20 Hili um 'koshu ki a'din 'de/ jin kogu mo dhali umi 'baar mo mishi a'di mo be.

21 Aha/ 'kwarkina um gwo yan mo, yisa haali/ um 'koki mish gwoŋ gana/ mo yisa, hili haali/ um mishi a'di mo dhali mish yan mo ka tora kamu/ yisa di'd e gwoŋ gana/ yan mo be.

22 Kaja a'di jin ta'da tor mo hili a'di jin waŋki gwo mo ka Yesus ta'da Kristhos mo. Yan ta'da kristhos jin diki ta jin gana/ mo a'di jin waŋki'da Baba gwo mo dhali Ya/ mo.

²³ A'din 'deŋ kamu/ jin waŋki Ya/ mo tani a'di diki ta ga Ababa mo. A'di jin piki gwo gom Ya/ mo tani a'di ta'd ga Ababa mo si'da/.

²⁴ Dhalki a'di jin cika um 'peni ka muŋ'kup mo ca'ba'd e um mo. Waŋki/ a'di jin cika um 'peni ka muŋ'kup mo ca'ba'd e um mo tani yan'ko'd um mini 'ko e Ya/ mo dhali eya Baba mo be.

²⁵ Dhali a'di ta gwo yansan jin okina a'di ana is mo jin ta mondiki/e ki sule/ sule/ ya ye 'ba/ mo.

²⁶ Aha/'kwarkina um gwo yansan mo gom uni gwansan kun mini 'taki he'k um e mo be.

²⁷ Hili moŋ'kosh jin bu'thkina um mo 'peni a'di mo tani ca'bki'd e um mo dhali um mini mii 'koki mii ta gi jan 'deŋ kamu/ jin mididi 'taki ŋor um gwo mo, haali/ me'd moŋ'kosh piti ŋorki um gwo mo goma ris to 'baar mo dhali a'di ta gwoŋ gana/ mo dhali ator piyi'd e a'di mo be. Me'd jin ŋora a'di um gwo mo tani wakan 'koyi e a'di mo ma.

²⁸ Dhali shwane/ ushi uciya, 'koyi e a'di mo ma, wakan ki a'di mididi piyu/ mo tani ana mina 'taki 'koki ju/ mo dhali 'koki ko/ is ki mon'the is mo ibwambori a'di mo ki mom piti jin mina a'di pu'du/ mo be.

²⁹ Waŋki/ um mishi mo mo ki a'di ta'da kaŋ/e mo tani um mini mish mo mo ka ris uni 'baar ka 'deŋe/ 'deŋe/ kun miin ki 'bore/ mo tani dho'thkunu 'peni a'di mo be.

3

Uci ma Arungimis mo

¹ Hili mo/ en ma Baba jin cikunu ana mo ki ana minu yuk ki uci ma Arungimis mo. Dhali wakan ana tana uni mo be. A'di ta 'kup gwo jin 'kona 'kwaniny' cesh ki mish ana mo haali/ uni 'koki mish a'di mo be.

² Um gun enu mo, ana tana uci ma Arungimis shwane/ mo, a'di dinuki ŋor eya tente/ naskina/ mo a'di jin mina ana wa e mo, hili ana misha a'di ki a'di mididi piyu mo tani ana mina e waki a'di mo haali/ ana mina paŋ a'di e ki a'di wakan mo be.

³ Dhali aris 'kwani 'baar ka 'deŋe/ 'deŋe/ kun 'kon ka 'teŋ kape/ e a'di mo tani dhelelki is buni mo me'd a'di mmodhelelki a'di mo be.

⁴ Aris 'kwani 'baar ka 'deŋe/ 'deŋe/ kun miiki miinthus mo tani uni 'kona mii i'ba/ mo mmo'ce'd gwoŋkan jin cinu mo. Miinthus a'di ita to jin 'ce'd gwoŋkan jin cinu mo be.

⁵ Um mishin ki a'di ŋoru eya tente/ mo mmoŋal miinthus mo be dhali e a'di mo tani miinthus piyi'd mo be.

⁶ Wathin 'de/ jin ca'bki'd e a'di mo tani a'di diki di mo mmomii miinthus mo. Dhali wathin 'de/ jin di'd mo mmomii miinthus mo tani a'di diki paŋ a'di e mo walla diki mish a'di mo be.

⁷ Ushi uciya, dhalku/ ki dhal wathin 'de/ bway mo mmohe'k um e mo. A'di jin mii'd ki 'bore/ mo tani ta'da kaŋ/e mo me'd a'di mmotana a'diya kaŋ/e mo be.

⁸ A'di jin di'd mo mmomii miinthus mo tani a'di ta ji gi tapa ma ruma 'cesh mo, haali/ tapa ma ruma 'cesh a'di miiki miinthus 'peni ka muŋ'kup mo. A'di ta 'kup gwo jin ŋoru Ya/ ma Arungimis eya tente/ mo mmo'ce'd mii gi tapa ma ruma 'cesh sho'k mo be.

⁹ Wathin 'de/ jin dhodhu 'peni Arungimis mo tani a'di diki di mo mmomii miinthus mo, haali/ buyempa ma Arungimis ca'bki'd e a'di mo, dhali a'di mol di mo mmomii miinthus mo haali/ a'di dho'thkunu 'peni Arungimis mo be.

¹⁰ Gom mii yan kan mo tani a'di iminu mish mo mo eya tente/ mo gom uni gun ta uci ma Arungimis mo be dhali gom uni gun ta uci gi Tapa ma

ruma 'cesh mo: A'diyin jin diki di mo mmomii miim 'boro'd mo tani a'di 'peni Arumgimis yisa walla a'di jin diki ena kam piti mo.

Eni ka Rem 'Kup mo

¹¹ Haali/ a'di yansan ita gwo jin cikina um 'peni ka mun'kup mo ki ana mina en ka rem 'kup mo be

¹² dhali yisa mmowa e ka Kayiin mo a'di jin ta a'di 'peni a'dinthus 'de/ yin mo dhali 'kosha kam piti jwa mo. Dhali kata 'koshkina a'di a'di mo? Haali/ miim pitin gana/ mo tani ta jin thus mo dhali mii ma kam piti ta jan kar/e mo be.

¹³ Dhalku/ ki mer mo ma, iwaḱ pem, ki um shina 'kwaniny'ceshi e mo.

¹⁴ Ana misha ki ana pekina mo 'peni mowu mo e mon'koki/e mo haali/ ana ena awaḱ mo. A'di jin diki ena en mo tani a'di ca'bki'd e mowu mo be.

¹⁵ Macin 'de/ yin jin shi/ki'da kam piti i e mo tani ta'da man'kosha mee mo be dhali um mishin ki wathi/ jin 'koshki'da mee mo tani diki ta gi mondiki/e ki sule/ ya ye 'ba/ mo jin ca'bki'd e a'di mo.

¹⁶ Gom a'di yan kan mo tani ana misha mo/en mo ki a'di karki mondiki/ em piti a'cesh mo gom ana mo dhali ana ka ba/ imina mii dhu mon'koki/em bana mo gom iwaḱ mo ba/.

¹⁷ Hili waḱki/ macin 'de/ yin jin ta gi to ga 'cesh mo dhali hila kam piti ki e mo e to jin mina a'di mii ta mo tani hili a'di ki mutha dum piti apo/ a'di mo tani mo/en ma Arumgimis midi ca'bi a'di kata mo?

¹⁸ Ushi uciya, dhalkina ki en ki gwo mo walla le'd mo hili ki mii mo dhali ki gwoj gana/ mo be.

Ana Dara ki Monyju/ Ibwambor ma Arumgimis mo

¹⁹ Gom gwo gi wakan mo tani ana mina mish mo mo ki ana tana 'kwani 'peni gwoj gana/ mo dhali mmomisha dum bana ibwambori a'di mo be

²⁰ waḱka dum bana waḱ ana mo. Haali/ Arumgimis a'di ca'd ka dum bana mo dhali a'di mishki'da ris to 'baar mo be.

²¹ Um gun enu mo, waḱka dum bana diki waḱ ana mo tani ana dara gi monyju/ mo ibwambor ma Arumgimis mo be.

²² Dhali ana bu'thkina 'peni a'di mo, ma to yin jin dotkina ana a'di mo, haali/ ana 'kokina mo mmodhu gwojkan piti kun 'kwarkunu mo dhali mmomii to jin 'bor a'di bwa mo be.

²³ Dhali yan ta gwojkan piti jin 'kwarkunu mo ki ana mina gam gway gi Ya/ is mo jin ta'da Yesus Kristhos mo dhali mmo/en ka rem 'kup mo me'd jin kankina a'di ana gwo mo be.

²⁴ Dhali aris uni gun dhu gwojkan piti kun 'kwarkunu mo tani 'ko e a'di mo dhali a'di e uni mo. Dhali gom gwo gi wakan mo tani ana misha mo mo ki a'di ca'bki'd e ana mo ki Shi/in piti jin cikina a'di ana mo be.

4

Shi/in ma Arumgimis dhali Shi/in ma Kristhos jin Diki Ta jin Gana/ mo

¹ Um gun enu mo tani dhalku/ ki gam gwo is eya ris shi/in mo hili nyo/i aris shi/in mo mmopar e waḱki/ uni ta ku ma Arumgimis mo, haali/ imançi gwonthus uni iikin ka pije/ e mony'cesh mo.

² Gom gwo gi wakan mo tani um mini mish mo mo ki Shi/in ma Arumgimis mo: Aris shi/in 'baar mo ka 'dete/ 'dete/ kun pi gwo ka Yesus Kristhos pu'dki'd mo ki bungwar is mo tani uni 'peni Arumgimis mo be,

³ dhali aris shi/in 'baar ka 'dete/ 'dete/ kun 'koki pi gwo ka Yesus mo tani uni 'peni Arumgimis yisa. A'di yan ta shi/in ma kristhos jin diki ta jin gana/ mo,

a'di jin cikina um gwo mo ki a'di midu pu'du/ mo dhali shwane/ a'di diki'd e mony'cesh hila/ mo be.

⁴ Ushi uciya, um 'peni Arungimis mo dhali um piki uni e ki mii mo. Haali/ a'di jin di'd e um mo tani a'di ekki'd mo mmobol a'di jin di'd e mony'cesh yan e mo be.

⁵ Uni ta ku ga 'cesh mo, dhali kan mo tani gwo jin ona uni mo tani ta ku ga 'cesh mo dhali 'kwaniny'cesh cikki uni gwo mo be.

⁶ Ana tana ku ma Arungimis mo. A'diyin jin mishki'da Arungimis mo tani cikki ana gwo mo dhali a'di jin diki di 'peni Arungimis mo tani diki cik ana gwo mo be. Gom gwo gi wakan mo tani ana misha mo mo gom shi/in gana/ mo dhali gom shi/in jin thamu o mo be.

Arungimis Ta Mo/en be

⁷ Um gun enu mo, dhalki ana ena ka rem 'kup mo ma, haali/ mo/en ta ji ma Arungimis mo dhali a'di jin ene'da en mo tani dho'thkunu 'peni Arungimis mo dhali a'di mishki'da Arungimis mo be.

⁸ Dhali a'di jin diki di mo mmo/ena en mo tani a'di molki'da Arungimis mo haali/ Arungimis ta mo/en mo be.

⁹ Dhali e mii yan kan mo tani mo/en ma Arungimis a'di torokunu eya tente/ e bwam ana mo, ka Arungimis hashki Ya/m pitin 'de/ mo e mony'cesh mo, wakan ki ana mina 'ko e a'di mo be.

¹⁰ Dhali mo/en a'dan be, yisa mmo/enkina ana Arungimis mo hili mmo/ enkina a'di ana mo dhali mmohashkina a'di Ya/m piti mo mmota mo jin gwamuwa gwam mo gom miinthus bana mo be.

¹¹ Um gun enu mo tani wakki/ Arungimis ki en ana wakan mo tani ana ka ba/ imina mii en ka rem 'kup si'da/ mo.

¹² Wathimpan 'denj kamu/ yisa parki'da Arungimis e mo yisa. Wakki/ ana ena ka rem 'kup mo tani Arungimis ca'bki'd e ana mo dhali mo/en piti thimkunu e ana mo be.

¹³ Gom gwo gi wakan mo tani ana misha mo mo ki ana 'kona e a'di mo dhali a'di e ana mo haali/ a'di ciki ana Shi/in pitin gana/ mo be.

¹⁴ Dhali ana mishkina mo mo dhali ta iman/o gwo mo goma Baba mo mmohashkina a'di Ya/m piti mo mmota Amanwoth gom 'kwaniny'cesh mo be.

¹⁵ A'diyin jin pi gwo ka Yesus ta Ya/ ma Arungimis mo tani Arungimis ca'bki'd e a'di mo dhali a'di eya Arungimis mo be.

¹⁶ Wakan ana misha mo mo dhali gam gwo is mo gom mo/en jin takin ma Arungimis gom ana mo. Arungimis ta ji gi mo/en mo dhali a'di jin ca'bki'd e mo/en mo tani ca'bki'd eya Arungimis mo dhali Arungimis ca'bki'd e a'di mo be.

¹⁷ Dhali mo/en a'dan be jin thimkunu e ana mo ki ana mina 'koki ta gi monyju/ mo goma cim jin dwallu gwo mo haali/ me'd jin wana a'di kan mo tani ana 'kokina mo e mony'cesh yansan mo be.

¹⁸ Monko/ isa kamu/ yisa di'da e mo/en mo hili mo/ena 'borgañ gana/ mo a'di ta'kki monko/ is ka piye/ mo. Haali/ monko/ is a'di gamkunuwa jisa mo dhali a'di jin ko/ki'da ko/ is mo tani diki thim mo/en mo be.

¹⁹ Ana ena en mo haali/ a'di ntwa/a/ enki ana mo be.

²⁰ Wakka cin kamu/ jin midu o gwo mo ki: Aha/ ena Arungimis mo, dhali shi/a kam piti i e mo tani a'di ta'da tor mo, haali/ a'di jin diki ena kam piti mo tani a'di jin parkina a'di e mo tani a'di mol ena Arungimis mo ki a'di jin dina a'di ki par e mo be.

²¹ Dhali gwonkan jin 'kwaru a'dan be jin takina ana 'peni a'di mo, ki a'di jin enki'da Arungimis mo tani midu mii ena kam piti si'da/ mo be.

5

Monɔam Gwo Is A'di Ipiki Mii E mo e Mony'cesh mo

¹ Aris 'kwani 'baar ka 'dete/ 'dete/ kun gamki gwo is mo ka Yesu ta'da *Kristhos* mo tani uni ita uci ma Arungimis mo dhali aris 'kwani 'baar ka 'dete/ 'dete/ kun enki a'di jin dho'thki'd mo tani enki a'di jin dho'thkunu si'da/ mo be.

² Gom gwo gi wakan mo tani ana misha mo mo ki ana ena uci ma Arungimis mo, ki ana ena Arungimis mo dhali mmoha gwoŋkan piti e kun 'kwarkunu mo be.

³ Haali/ mo/en ma Arungimis a'dan be ki ana mina dhu gwoŋkan piti kun 'kwarkunu mo. Gwoŋkan piti kun 'kwarkunu mo diki ta ton di'ti'd mo.

⁴ Haali/ a'diyin jin dho'thkunu 'peni Arungimis mo tani piki mony'cesh e ki mii mo. Dhali mompi mii e a'dan be jin pi mony'cesh e ki mii mo jin ta monɔam gwo is bana mo be.

⁵ Kaja a'di ipiki mony'cesh e ki mii mo hili a'di jin gamki gwo is ka Yesu ta Ya/ ma Arungimis mo be.

Gwo jin Onu Isi gom Ya/ mo

⁶ Dhali yan ta a'di jin pu'dki'd ki yi'de/ mo dhali ka bas mo jin ta'da Yesu *Kristhos* mo, yisa jasi ki yi'de/ 'teya, hili ki yi'de/ mo dhali ka bas mo be.

⁷ Dhali Shi/in a'di ta'da aman/o gwo mo haali/ Shi/in a'di ta gwoŋ gana/ mo be.

⁸ Gwo kun onu mo tani uni 'koni kwara mo, Shi/in, dhali yi'de/, dhala bas. Uni kwara gwansan igami me'd mo be.

⁹ Wakki/ ana budha gwo kun ona 'kwani mo tani gwo jin on ma Arungimis mo tani a'di ekki'd mo be. Haali/ gwo jin on ma Arungimis a'dan be, ki a'di ta'da aman/o gwo gom Ya/m piti mo be.

¹⁰ A'di jin gamki gwo is e Ya/ ma Arungimis mo tani a'di ta'da aman/o gwo e is piti mo. A'di jin diki gam Arungimis gwo is mo tani kar a'di mo mmota ator mo haali/ a'di diki gam gwo jin on ma Arungimis is mo gom gwo gi Ya/ m piti mo be.

¹¹ Dhali gwo jin onu a'dan be, ka Arungimis ciki ana moŋ'koki/e ki sule/ ya ye 'ba/ mo dhali moŋ'koki/e yan e Ya/m piti mo be.

¹² A'di jin ta gi Ya/ mo tani a'di ta gi mondiki/e mo be, dhali a'di jin diki ta gi Ya/ mo tani a'di dar gi mondiki/e mo be.

Mishi Gwo ki Um Ta gi Mon'koki/e ki Sule/ Ya Ye 'Ba/ mo

¹³ Aha/ 'kwarkina um gwo yansan e um kun gam gwo is e gway gi Ya/ ma Arungimis mo, ki um mini mish mo mo ki um ta gi moŋ'koki/e ki sule/ sule/ ya ye 'ba/ mo be.

¹⁴ Dhali yan ta mo jin 'kona ana ki ju/ mo jin takina ana e a'di mo, wakki/ ana mina doŋ toŋ kamu/ isi ki bwam piti mo tani a'di cikki ana gwo mo be.

¹⁵ Dhali wakki/ ana misha mo mo ki a'di cikki ana gwo mo e to yin jin doŋkina ana a'di mo tani ana misha mo mo ki ana mina bu'th a'di yin jin doŋkina ana a'di mo be.

¹⁶ Wakki/ wathin 'deŋ kamu/ parki'da kam piti e mo mmomii miinthus jin diki ta ji gi wunu mo tani a'di midi doŋa/ doŋ mo dhali Arungimis midi ci a'di mondiki/e mo gom uni gwansan kun ta gi miinthus kun 'koki ta ku gi wunu mo. Miinthus 'kon kun gamu mo kun wunu mo. Aha/ dinaki o ki jaŋ kamu/ midi 'tho mo gom gwo yansan mo.

¹⁷ Aris mii kun thamu mii mo tani ta miinthus mo hili miinthus di'd jin diki ta ji gi wunu mo be.

¹⁸ Ana misha mo mo ki a'din 'de/ jin dhodhu 'peni Arungimis mo tani diki di mo mmomii miinthus mo, hili a'di jin dho'thkuunu 'peni Arungimis mo tani karki a'di mo, dhali a'dinthus 'de/ yin diki ta a'di is ki me'd mo be.

¹⁹ Ana misha mo mo ki ana tana ku ma Arungimis mo, dhali aris 'kwani gi mony'chesi 'baar mo uni 'kon e mom'bi'th gi a'dinthus 'de/ yin mo be.

²⁰ Dhali ana misha mo mo ki Ya/ ma Arungimis pu'dki'd mo dhali ciki ana gwo mo mmomish 'ban mo, mmomish a'di jin ta jin gana/ mo. Dhali ana e a'di mo a'di jin ta jin gana/ mo, e Ya/m piti jin ta'da Yesus Kristhos mo. Yan a'di ita'da Arungimis gana/ mo dhali mon'koki/e ki sule/ ya ye 'ba/ mo.

²¹ Ushi uciya, dhuyi is bum 'peni tompinycon mo ma.

Gwo jin 'Kon ma Po/i Su/ jin Kwar ma YOHAAN mo

Monthe Me'd mo

¹ Wathin gwanyjaka/ eya yim jin kwanyu mo dhali ucin piti mo, uni gun enka/ e gwonj gana/ mo, dhali yisa jasi aha/ 'de/ mo hili aris uni 'baar mo kun mishi gwonj gana/ si'da/ mo

² haali/ gom gwonj gana/ jin ca'bki'd e ana mo dhali jin midi di e ana ki sule/ sule/ mo.

³ A'the dhali momiimii mo dhali monku'th is mini 'ko e ana mo 'peni Arungimis jin ta'da Baba mo dhali 'pena Yesus Kristhos jin ta Ya/ gi Com mo, e gwonj gana/ mo dhali e mo/en mo be.

'Koyi e Gwo ma Kristhos mo ma

⁴ Aha/ 'kunya bwa kagahara mo mmogam ucin pinin tiya mmobath gwonj gana/ mo, me'd jin kankin ma Baba ana gwo mo.

⁵ Dhali shwane/ aha/ yuka / e jin tana yim mo, yisa me'd jin miga/ 'taki 'kwarki / e gwonkan jin 'kwarkunu jin ta jin this mo, hili a'din 'de/ jin takina ana 'peni ka mun'kup mo, ki ana mina en ka rem 'kup mo be.

⁶ Dhali mo/en a'dan be ki ana mina bath gwonkan piti kun 'kwarkunu mo. Gwonkan jin 'kwarkunu mo a'dan be, me'd jin cikina um 'peni ka mun'kup mo ki um mini bath mo/en mo be.

⁷ Haali/ 'kwani ka ris kun he'kkina he'k e mo tani iikin ka pije/ mo e mony'cesh mo, 'kwani kun 'koki pi gwo mo gom mo jin yayin ma Yesus Kristhos ki bungwar is mo. A'din 'de/ gi wakan mo tani ita'da he'k e mo dhala Kristhos jin diki ta jin gana/ mo.

⁸ Hili is bum ki 'bore/ mo ma ki um mini 'koki this a'di e mo a'di jin miikina um mii mo gom a'di mo hili ki um mini gam to jin cinu jin waki mii jin miinu mo mmo'koki ta bade/ mo.

⁹ Macin 'de/ jin ya'di twa/a/ mo dhali diki ca'b e gwo ma Kristhos mo tani a'di diki ta ga Arungimis mo. A'di jin ca'bki'd e gwo ma Kristhos mo tani a'di ta'd ga Baba mo dhali Ya/ mo be.

¹⁰ Wakka cin 'den kamu/ pu'dki'd e um mo dhali diki guyu/ gwo yan mo tani dhalku/ ki bu'th a'di bway gu'b mo walla dhalku/ ki ci a'di monthe me'd mo,

¹¹ haali/ a'di jin theki a'di me'd mo tani nyakki miin tonthus piti bu'th mo be.

Kwalany Monthe Me'd jin 'Ko'd mo

¹² Ba aha/ tana gi gwo ka ris mmo'kwarki um mo tani aha/ ona bwa yisa mmo'kwarki um to ka galama risha mo, hili aha/ tosha mmopar um e ki 'dishe/ mo dhali mmo'tora tor ki um ka karambuye/ mo, wakan ki mom'bor bwam bana minu thim mo be.

¹³ Uci gi 'bwah pini jin kwanyu mo tani uni theki / e me'd mo be.

Gwo jin 'Kon ma Po/i Kwara jin 'Kwar ma YOHAAN mo

Monthe Me'd mo

¹ Wathin gwanyjaka/ eya Gayus jin enu mo, a'di jin enka/ e gwoŋ gana/ mo.
² /E jin enu mo, aha/ 'thona ka ris to 'baar mo mini ii ki 'bore/ gom /e mo dhali ki /e mina isi 'bor mo. Aha/ misha mo mo ki a'di 'boro'd goma kashiram pini mo be.

³ Haali/ aha/ 'bora bwa kagahara mo ki 'kwani ma waka tiya bumburkin mo dhali ci gwo gom miin ganam pini mo ka jin gana/ me'd jin bathkina /e gwoŋ gana/ mo.

⁴ Mon'kuny bwan kamu/ yisa di'da jin ca'd ki a'di yan jin miga/ mish ta mo, mmocik gwo ki ucim pem bathi gwoŋ gana/ mo.

Mii ma Gayus jin Tanu Gu'b Piti Nal mo A'di Manu mo

⁵ /E jin enu mo, a'di ta'da tu'c isin gana/ mo jin miikina /e ki /e mii to mo ma wak mo isi ki ji mum mo eya ris yilkina/ mo

⁶ uni gun ciki gwo gom mo/en pini ibwambor ma kaniisa mo. /E mini mii ki 'bore/ mmohashki uni e bway buni gun iina uni mo me'd jin hana to me'd mo goma tu'c ma Arumgimis mo be.

⁷ Haali/ uni cuki mis mo gom gway piti mo dhali uni 'koki bu'th toŋ kamu/ 'peni 'kwani kun 'koki ta 'Kwani Yahuuda/ mo.

⁸ Wakan ana ka ba/ imina han 'wani kun wakan mo ki ana mina ta imannyak to mii e gwoŋ gana/ mo be.

Mii ma Diyutriipis jin Miina A'di ki Ca'ckon mo

⁹ Aha/ 'kwarkina gwoŋ kamu/ goma kaniisa mo. Hili Diyutriipis a'di jin ona bwa ki kar is piti n'wa/a/ mo tani diki pi gwo gom moshirr pem mo.

¹⁰ Wakan wakki/ aha/ mina pu'dku/ mo tani aha/ mina kal gwo ka pije/ mo gom to jin miina a'di mo mmoyer aha/ is ki gway ka wuny is ki gwonthus mo. Dhali a'di diki 'kosh jwa kan tan mo tani a'di ushki'd ki is piti mo mmohana wak mo, dhali a'di si'da/ ki non uni gwansan 'kup mo kun ona bwa ki han uni mo dhali a'di ki ur uni ka pije/ 'pena kaniisa mo.

Gwom 'Borga/ jin Cinu Isi goma Dimitriyus mo be

¹¹ /E jin enu mo, dhalku/ ki bath tonthus mmomii mo ma, hili bathi a'di jin 'boro'd mmomii mo. A'di jin mii tom 'boro'd mo tani a'di 'peni Arumgimis mo. A'di jin mii tonthus mo tani diki par Arumgimis e mo be.

¹² Dimitriyus a'di ta gi gwo jin cina 'kwani 'baar ka 'dete/ 'dete/ mo dhali 'peni gwoŋ gana/ ki is piti mo. Aha/ cina gwo gom a'di si'da/ mo dhali um mishi mo mo ki gwony cim pem ta kun gana/ mo be.

Kwalany Monthe Me'd jin 'Ko'd mo

¹³ Aha/ tana gi gwo kagahara mo mmo'kwarki/ e mo tani hili aha/ dina bwa ki o mmo'kwarki/ e a'di ka galama risha mo.

¹⁴ Aha/ tosha mmopar /e e ki 'dishe/ mo dhali ana mina tora tor mmontal 'de/ ka karambuye/ mo.

¹⁵ Mon'ku'th is midi di e /e mo. Ikam theki /e me'd mo. Theki ikam me'd mo ma, aris uni 'baar ka 'dete/ 'dete/ mo.

Gwo jin 'Kwar ma YAHUUSA mo

Monthe Me'd mo

¹ Yahuusa jin ta ciŋkina/ ma Yesu Kriŋthos mo dhali jin ta'da kam ma Yakuub mo.

E uni gwansan kun yukunu mo ki ku gi en ma Arungimis jin ta'da Baba mo dhali kun dhunu goma Yesu Kriŋthos mo be.

² Dhalki momiimii mo dhali moŋku'th is mo dhali mo/en minu mar is gom um mo.

Gwon Dwall gom Imantor Gwonthus mo

³ Um gun enka/ mo tani dhali mmo/oka/ bwa kagahara mo mmo'kwarki um gwo mo gom mowoth bana jin nyakki'd mo tani aha/ gamkina a'di jin ta jin minu mii mii ta mo mmo'kwar mo mmoyip 'kup 'kupki um mo mmosu'k ki gwo mo gom moŋgam gwo is mo, a'di jin cinu mo me'd 'de/ ki sule/ mo gom uni kun dhunu ki she/ ki dhelel dhelel mo.

⁴ Haali/ 'kwanin tiya 'kokin ka kwal is mo kun gam bway mo mmose mo, uni gun 'kokin kadhamo/ mo kun 'kawurkunu mo gom miuwaŋ yansan mo be, uni gun ta 'kwani gun ushkina Arungimis mo, uni gun tu'kkina 'the ma Arungimis bana mo mmota mii gun 'kanuwa kanthi/ mo dhali mmowat gway gi Tapa jin di'd 'de/ mo, a'di jin ta Tapa Yesu bana mo be.

⁵ Dhali aha/ dina gwo ibwa mo mmorogom um ki gwo mo, ba um me'd 'de/ ki sule/ to'rkunu to 'baar mo ki a'di jin wothki 'kwani 'peni Bampa/ Masir mo tani yan'ko'd a'di ki 'ce'd uni gwansan sho'k mo kun 'koki gam a'di gwo is mo be.

⁶ Dhali iman'doyu gwo, uni gun 'koki dhu mom bunin gana/ mo kun 'kona uni mo tani hili uni dhalki moŋ'kom pam buni 'pen mo tani uni bu'thkina a'di ka jindhiir ki sule/ sule/ ya ye 'ba/ mo e mondhurumi'da 'tum mo ntaga tee gi gwon dwall jin eka/ ek mo be.

⁷ Jasi me'd gi Bampa/ gi Pan Saduum mo dhali Pan Gamuura mo dhali bampa/ kun 'kon ki jin 'kam mo tani dhali ki mii jin nyaka'd mo tani uni ci is buni ki miinyal mo dhali mii mon'dap e kun 'koki ta buyempa mo tani uni dhunu mo mmota she/mm mmothima jisa gi mo/o'd ki sule/ sule/ ya ye 'ba/ mo be.

⁸ Dhali e bway jin nyakki'd kan mo tani 'kwani gwansan e jan buni kun shu'bkina uni mo tani uni nyo/ki bunŋwar is mo mmowak moshirr mo dhali mmowal gwo sor apo/ uni kun caaca mo be.

⁹ Hili ka man'doyu gwo jin ca'd jin ta'da Mika/iil su'kkin ki gwo mo uni ki tapa ma ruma 'cesh mo tani uni walkin mo gom bunŋwar is ma Musa mo a'di bu'thki'da du mo mmodiki yer a'di is ki gway ki gwo sor mo, hili a'di oki gwo mo ki: Tapa Arungimis kucurki /e mo be.

¹⁰ Hili 'kwani gwansan walkina sor apo/ to kun 'kona uni ki mish 'ban mo dhali ki to gwansan kun misha uni en tom bwa mo me'd to/e gun dar gi bwan 'twa/ wal mo tani uni 'ce'dkunu sho'k mo be.

¹¹ Wayyi e uni mo. Haali/ uni iikin e bway ma Kayiin mo dhali uni pura bwa mo mmobath mii jin tham ma Balaam mii mo dhali uni 'ce'du/ sho'k mo e gwon dhan ma Kuurah mo be.

¹² Uni gwansan ta thalkin apo/ moyuk bum gun ena um mo me'd jin 'kona uni ki ju/ mo mmo'kona uni i'kupa su mo mmowal mo mmontal 'de/ mo tani uni hilki is buni mo. Uni tana rak kun kutha e ki ku'th mo, kun kalkina 'tham

ki sule/ mo, dhali uni ta cwa gi moyurun kun ku'th gunkuru/ mo kun dar gi mamanan mo, me'di su/ mo tani uni wukin mo mmoyu'dkunu uni mo be.

13 Anyor yi'deny caaga/ jin bir bakal mo tani uni sekina gabusha/ mo gi mon'the is bunin gana/ mo, acul kun tana ca/ mo tani mondhurumi'da 'tum karkunu mo gom uni ki sule/ sule/ mo be.

14 Gom uni gwansan si'da/ mo tani Aknuuk a'di jin ta'da Aadama nyakum yili pesu/ mo tani ciki gwo is mo mmo/o gwo mo ki: Hili mo mo ma, Tapa a'di pu'dki'd mo nyakki kun dhelelin piti ka ris ris mo

15 mmotor gwon dwall 'twa/a po/ 'kwani 'baar mo dhali mmodhu uni ki ku gi 'kona mii i'ba/ mo aris uni gun ushuna ush mo ka ris miim buni kun miikina uni mo, mmota a/ushin gwo mo kun miikina uni ciki/ mo tani e gwo gi uni gun ushi gwo mo dhali ka ris gwo kun 'bitha'bi'th mo kun okina imanmii münthus mo kun ushuna ush apo/ a'di mo.

16 Uni gwansan ita imanmiiya gumgum mo, dhali waķa waķ mo mmobath mon'dap em bunin gana/ mo, dhali mmoċe 'twa/ mo mmodhu 'ba/ ki ca mo mmoman 'kwani ka mak mo mmogam nyunycina/ gi shi/ miim 'boro'd mo.

Gwo jin Rumuwa Rum mo dhali Mo jin Malasuwa Malas mo

17 Hili um mini mii ka gwo e mo, um gun enu mo, gwo jin ona uni gun dhuna Tapa Yesus Kristhos bana is mo.

18 Uni o um gwo mo ki: Ki mo jin 'ko'd mo tani uni gun miin ka mak mo tani mini bath mon'dap em bunin gana/ mo kun usha uni a/ush mo be.

19 Uni ta uni gwansan gun dhu gwo kun kwa/u bwa mo, kun ta 'kwani tony 'cesh mo, uni dar gi Shi/in mo be.

20 Hili um gun enu mo tani nyanji is bum apo/ mongam gwo is jin koguwa ko/ mo dhali 'thoyi e Shi/in Dheleladhelel mo ma.

21 Dhuyi is bum e mo/en ma Arungimis mo. Cori momiimii gi Tapa Yesus Kristhos bana mo ntagi mon'koki/e ki sule/ sule/ ya ye 'ba/ mo.

22 Dhali miyi mii apo/ unin tiya mo ma kun shina bwa 'kup mo.

23 Wothi/ kun tiya mo ma, mmobor uni ka pije/ mo 'peni mo/o'd mo. Miiyi mii ki jin ko/ mo ma, apo/ kun tiya me'd jin shi/a um burrinnye/ i e jin nyo/ki'd e buņwar is mo.

Mmo'borā 'Bor Mii mo

24 Dhali e a'di jin mish um dhu mo 'peni montag mo tani dhali mmoċi um ki dar gi mii kun nyo/on mo ibwambori buņ'kus monycam piti ki mon'kuny bwa mo tani

25 e a'di jin ta'da Arungimis 'de/ mo tani Amanwoth bana e a'di jin ta'da Yesus Kristhos Tapam bana mo tani dhalki a'di a'di idi'd ki monyca mo dhali mmo/eka/ ek mo dhali mom'bi'th mo dhali moshirr jin di'di twa/a/ 'baar mo dhali jin di'd shwane/ mo dhali jin midi di ki sule/ sule/ ya ye 'ba/ moonnii. Amen.

Gwo jin 'Ceenu eya Yoahaan mo

Gwo jin 'Ceenu goma Yesus Kristhos mo

¹ Gwo jin 'ceenu goma Yesus Kristhos mo, a'di jin cikin ma Arungimis a'di mo mmotor unim piti kun ta imanmii to mo gom to kun mini mii la bu'th embul mo mo. Dhali a'di karki a'di eya tente/ mo mmohashkina a'di aman'doyu gwom piti mo eya manmii tom piti jin ta'da Yoahaan mo,

² a'di jin ta'da mankal gwo o mo gom gwo ma Arungimis mo dhali gwontor jin tora a'di goma Yesus Kristhos mo, isi kani ma eya ris to 'baar mo kun parkina a'di e mo be.

³ Mom'bor mii gom a'di jin denki gwo yansan e mo jin onu is ki 'twa/ jin caaca mo dhali mom'bor mii gom uni gwansan kun cikki a'di mo dhali uni gun dhuki a'di jin 'kwarkunu nycine/ mo haali/ mo 'disha'dish mo be.

Monthe Me'd goma Kaniisa kun 'Koni Pesu/ mo

⁴ Yoahaan eya kaniisa kun 'koni pesu/ mo e Pa Asiyya mo:

A'the e um mo dhali monku'th is 'peni a'di jin di'd mo dhali a'di jin diki'd mo dhali a'di jin midu pu'du/ mo dhali 'peni shi/in kun 'koni pesu/ mo, uni gun doshkini bwambor ma kursi ma malik piti mo be.

⁵ Dhali 'pena Yesus Kristhos, a'di jin ta isinj gana/ gi gwo jin onu mo, a'di jin ta'da bwanyara/ gi mowu mo dhali ta tapa apo/ imalik kun 'koni mony'cesh mo.

E a'di, a'di jin enki ana mo dhali dhu ana ki 'kus mo 'peni miinthus bana mo ka bas piti mo,

⁶ dhali a'di ki nyon ana ki 'penkuman pa mo, mmota igasiis goma Arungimis piti mo dhali Ababa mo. Dhali e a'di mo tani monyca midu di mo dhali mo jin tanu tapa mo gom ki sule/ mo dhali ki sule/ ya ye 'ba/ mo. Amen.

⁷ Hili mo mo ma. A'di midu pu'du/ mo e bwaarak mo dhali aris enj 'kwani 'baar ka 'dete/ 'dete/ mini par a'di e mo, dhali aris 'kwani 'baar ka 'dete/ 'dete/ kun su'k a'di mo tani, dhali arisa wak gi 'kwaniny'cesh mini wol ko mo gom gway piti mo. Isi kan si'dayi. Amen.

⁸ Aha/ tana ja Mun'kup mo dhali jin 'Ko'd mo. A'di ta gwo jin ona Tapa Arungimis mo, a'di jin di'd mo dhali a'di jin diki'd mo dhali a'di jin midu pu'du/ mo, a'di jin ta a'di jin Eka/ Ek mo be.

Tonyjan gi Ya/ gi 'Kwani mo

⁹ Aha/ jin tana Yoahaan jin tana kam bum mo, aha/ jin pwakkina isa nyor nyakki um eya Yesus ki monto'c bwa mo dhali gom 'penkuman bampa/ mo dhali ki mo jin 'kuçu bwa ki 'kari'th mo mmo'dim 'kup mo tani aha/ dikina eya uka'cesh jin yuku gway ka Bathmus mo gom gway gi gwo ma Arungimis mo dhali gom gwontor jin torkika/ mo goma Yesus mo be.

¹⁰ Aha/ dikina e Shi/in mo ka tee gi Tapa mo dhali aha/ cikkina dhan 'twa/ apo/ aha/ mmun me'd ko ma poome/ mo

¹¹ mmo/o gwo mo ki: 'Kwari ma a'di jin parkina /e e mo eya warka/ mo dhali hashki a'di ka kaniisa gun 'koni pesu/ mo e Pan Epasus mo dhali e Pan Simirna mo dhali e Pam Bargaamus mo dhali e Pan Thiyatira mo dhali e Pan Sardis mo dhali e Pam Piladalpiya mo dhali e Pa Lawudikiyya mo.

¹² Dhali yan'ko'd aha/ tu'kkina 'ban mo mmopar 'twa/ yan jin oki aha/ gwo e mo, dhali ki aha/ tu'kkina mo tani aha/ parkina tirkina/ ma lamba/ e mo kun ta 'dolkon gana/ mo kun 'koni pesu/ mo.

¹³ Dhali e bwaman gi tirkina/ ma lamba/ mo tani jan tal 'den kamu/wakina e ki Ya/ gi 'Kwani mo jin hi'thki burriyne/ jin ta gi tur mo dhali waçkan 'dolkon gana/ mo eya bor a'di mo.

¹⁴ Kup piti dhala mur'kup piti ca'b ki bany bany me'da mur ka'bal mo jin ta gi kush mo dhali ta gi kush me'da wasa/ mo. Dhali em piti wana e ka le'dan o'd mo.

¹⁵ Dhali sho'k piti wana e ka korok jin kushi mo mo dhali dhel mo mo me'd mii jin to'du a'di mo e shemen o'd jin toru a'di mo, dhali 'twam piti wana e ka dhan yi'de/ kun gwona is ka ris mo.

¹⁶ Dhali e me'da bim poros piti mo tani a'di bu'thki'da cul kun 'koni pesu/ mo. Dhali 'peni 'twam piti mo tani a'di gacki gandala turga/ jin ka'd ka 'ban su/ mo dhali bwam/em piti 'twakki mo mo me'da tente/ mo mmo'tu'd mo ki mom'bi'th is mo be.

¹⁷ Ki aha/ parkina a'di e mo tani aha/ bitkina mo e sho'k piti mo, ma mmowa e ki wathi/ jin wuki'd mo. Hili a'di karki me'da bim poros piti apo/ aha/ mo mmo/o gwo mo ki: Dhalku/ is ki ko/ mo. Aha/ tana ja mun'kup mo dhali jin 'ko'd mo be,

¹⁸ dhali aha/ tana jan tal 'de/ jin di'd ki e mo. Aha/ wukina mo dhali hili mo mo ma, aha/ dikina ki e mo gom ki sule/ sule/ ya ye 'ba/ mo dhali aha/ takina ga muptha/ gi Mowu mo dhali Mo ma Haawiya mo be.

¹⁹ Shwane/ 'kwari a'di jin parkina /e e mo, a'di jin di'd shwane/ mo dhali a'di jin midi bu'th mo mo i'ko'd mo be.

²⁰ Gom gwo yansan jin cinu ki jim bag mo goma cul kun 'koni pesu/ mo jin parkina /e e mo e me'da bim poros pem mo dhali tirkina/ ma lamba/ kun 'koni pesu/ mo kun ta 'dolkon gana/ mo dhali acul kun 'koni pesu/ mo tani uni ta iman'doyu gwo mo kun 'kona kaniisa kun 'koni pesu/ mo dhali gom tirkina/ ma lamba/ kun 'koni pesu/ mo goma kaniisa kun 'koni pesu/ mo be.

2

Gwo jin Hashu goma Kaniisa gi Pan Epasus mo

¹ Eya man'doyu gwo ma kaniisa jin di'd e Pan Epasus mo tani 'kwari gwo mo ki: Gwo 'peni a'di, a'di jin bu'thki'da cul kun 'koni pesu/ mo e me'da bim poros piti mo, a'di jin yaki'd e bwaman tirkina/ ma lamba/ kun ta 'dolkon gana/ mo kun 'koni pesu/ mo, mmo/o gwo mo ki:

² Aha/ misha miim pini mo, dhali atu'c pini jin miina /e ki mii jin 'batha'ba'th mo dhali mo jin 'kuca /e bwa ki 'kari'th mo mmo'dim 'kup mo dhali mo jin mola /e bu'th 'kwani kun mii ton thus mo hili /e nyo/ki uni gwansan kun yukki is buni ki uni kun dhunu ki she/ mo tani hili uni yisa ta uniya, dhali gam uni ki uni ta thus ki thus mo.

³ Aha/ misha ki /e 'dimki 'kup mo ki bwa jin 'kuca /e ki 'kari'th mo dhali kal mo jin 'koshu is ka nyor mo gom gway pem mo dhali /e yisa cakin mo e mowu is eya.

⁴ Hili aha/ tana gi gwo yaase apo/ /e mo haali/ /e dhalki mo/en jin ta jin t'wa/ a/ jin di'di /e 'pen mo.

⁵ Kayi gwo e mo 'peni a'diyin jin bitkina /e mo dhali rici /e adu is mo dhali miyi to jin miina /e nt'wa/a/ mo. Wakki/ /e diki mii mo tani heey, aha/ mina pu'dku/ i /e mo dhali joç tirkina/ ma lambam pini mo 'peni mom piti mo, isi ciki/ wakki/ /e diki rica du is mo be.

⁶ Naskina/ ton kamu/ jin tana /e a'dihe/. /E shi/ki mii jin miina 'Kwani Nugulawiyiin i e mo, mii jin shi/kika/ i e si'da/ mo.

⁷ A'diyin jin ta'd gi gu'ban'ce mo tani dhalki a'di cik gwo jin ona Shi/in eya kaniisa gwansan mo. E a'di jin piki mii e mo tani aha/ mina ci a'di tonte/

mmoshwa mo 'peni cwa gi mondiki/e mo, a'di jin diki'd e monyjaro/ ma Arungimis mo be.

Gwo jin Hashu goma Kaniisa gi Pan Simirna mo

⁸ Dhali eya man'doyu gwo ma kaniisa gi Pan Simirna mo tani 'kwari gwo mo ki: Gwo gwansan ta ku gi a'di jin t̄wa/a/ mo dhali jin̄ 'ko'd mo gom a'di jin wuki'd mo dhali a'di jin pu'dki'd mo mmodi ki e mo, mmo/o gwo mo ki:

⁹ Aha/ misha monto'c bwam pini mo dhali aha'th'ko'd pini mo tani (hili / e ta pa ki pa mo) dhali uni gwansan kun thu'thkina thu'th 'pen mo kun oki uni ta 'Kwani Yahuuda/ mo tani dhali uni yisa ta uniya, hili uni tan gi gu'b gi montul is ma Setaan mo be.

¹⁰ Dhalku/ is ki ko/ mo gom to kun mura /e i'kosh is ka nyor nycine/ mo. Hili mo mo ma, tapa ma ruma 'cesh ona bwa ki ta'k uma tiya eya sijn mo ki um minu 'taki nyo/ mo dhali ka tee kun 'koni 'kume'o mo tani um mini gam monto'c bwa mo. Tayi /e a'di jin ta/a isinj gana/ mo mmowu mo dhali aha/ mina ci /e ton'kup gi mondiki/e mo be.

¹¹ A'diyin jin ta'd gi gu'ban'ce mo tani dhalki a'di cik gwo jin ona Shi/in eya kaniisa gwansan mo. A'di jin piki mii e mo tani a'di iminu 'koki shi/ ki wu jin 'kon ma po/i su/ mo be.

Gwo jin Hashu goma Kaniisa gi Pam Bargaamus mo

¹² Dhali eya man'doyu gwo ma kaniisa gi Pam Bargaamus mo tani 'kwari gwo mo ki: Gwo gi a'di jin ta'd gi gandala turga/ jin ka'd ka 'ban su/ mo, mmo/ o gwo mo ki:

¹³ Aha/ misha mom pini jin ca'ba /e mo, e mo jin ca'b ma kursi ma Setaan mo. /E telki sho'k mo e gway pem mo dhali /e diki wa' gwom pem jin gamu is mo isi kani ka tee ma Antibas mo, a'di jin ta'da man'o gwom pem mo, a'dim pem jin di'd 'de/ mo jin ta isinj gana/ mo, a'di jin 'koshkunu mo mbwam um mo, e mo jin ca'bkin ma Setaan mo be.

¹⁴ Hili aha/ tana gi ushi gwon tiya idaka/ mmo/o apo/ /e mo. /E tan gi 'kwanin tiya imun, uni kun bu'th gwo jin tor ma Balaam mo jin tor'ki'da Baalaag gwo mo mmokar mo jin koluwa kol mo mbwambori iya/ gi 'Kwani ma Israyil mo, ki uni mini 'taki shwa to jin 'cihu/ 'kus mo gom tompinycon mo dhali mmobotki mii jin miinu miinycal mo.

¹⁵ Wakan si'da/ /e tan gi 'kwanin tiya kun bu'thki gwo jin tora 'Kwani Nugulawiyiin mo.

¹⁶ Kan mo tani rici /e adu is mo. Wakki/ /e diki rica du is mo tani heey, aha/ mina yaku/ i /e ki jahanne/ mo dhali mii mo/as apo/ uni ki gandala turga/ jin ta 'twam pem mo.

¹⁷ A'di yin jin ta'd gi gu'ban'ce mo tani dhalki a'di cik gwo jin ona Shi/in eya kaniisa gwansan mo. E a'di jin piki mii e mo tani aha/ mina ci a'di amanna jin bagu mo, dhali aha/ mina ci a'di wosh dhel jin ta jin̄ kush mo ki gway this nycine/ mo jin 'kwaru apo/ wosh mo, a'di jin mola jan tal 'den kamu/ mo, isi ciki/ jasi a'di jin bu'thki a'di mo.

Gwo jin Hashu goma Kaniisa gi Pan Thiyatira mo

¹⁸ Dhali eya man'doyu gwo ma kaniisa gi Pan Thiyatira mo tani 'kwari gwo mo ki: Gwo jin ta ji gi Ya/ ma Arungimis mo, a'di jin ta gi e jin shwa'd ka le'dan o'd ki bar bar mo dhali a'di jin wana 'basho'k ka korok mo.

¹⁹ Aha/ misha miim pini mo dhali mo/en pini mo dhali mongam gwo is pini mo dhali miin tom pini kun miina /e mo dhali bwam pini jin 'kuca /e ki 'kari'th mo mmo'dim 'kup mo dhali miin tom pini kun ta kuj 'ko'd mo mmobol kun t̄wa/a/ e mo.

²⁰ Hili aha/ tana gi to yaase apo/ /e mo ki /e dhalkina 'bom jin ta'da Isabal mmodi e/e mo, ayim jin yukki is piti ka manci gwo mo dhali a'di torki gwo mo dhali mmosus cinjkinam pem mmoper mo mmobotki mii jin miinu miinyal mo dhali mmoshwa to jin 'ciṭhu/ 'kus mo mmothe tompinycon mo.

²¹ Aha/ cikina yima tee mo mmorica du is mo tani hili ayim ushki'd mo mmorica du is 'peni miinyal ma yim mo.

²² Hili mo mo ma, aha/ mina 'danjala yim 'ko'da ci mo, aci jin isha a'di ki 'ba'th mo dhali uni gwansan kun mii miinyal nyakka yim mo tani aha/ mina bit uni e monto'c bwa jin caaca mo, isi ciki/ wakki/ uni 'koki rica du is 'peni mii ma yim mo.

²³ Dhali aha/ mina 'kosh uci ma yim jwa mo. Dhali arisa kaniisa gwansan mini mish mo mo ki aha/ tana a'di jin ṅapki bwanj 'kwani ki bur bur mo dhali adun 'kwani mo, dhali aha/ mina ci aris umi 'baar mo to ka 'dete/ 'dete/ mo, to kun wana e ki miin to kun miina um mo.

²⁴ Hili gom uma tiya kun 'kon e Pan Thiyatira mo kun 'koki bu'th gwo yansan jin toru mo, um kun 'koki da/ar gwo mo kun yuka 'kwanin tiya ki toṅ'kulga/ ma Setaan mo, e um mo tani aha/ mina o um gwo mo ki aha/ dinaki 'thi toṅ kamu/ jin diṭadiṭ apo/ um mo a'di jin dina e ki she/ jin mina umi kal mo.

²⁵ Hili teli sho'k mo e a'di jin tana um mo ntagi aha/ mina pu'dku/ mo.

²⁶ A'di jin piki mii e mo tani dhali dhu miin tom pem mo ntagi 'pemen mo tani aha/ mina ci a'di mom'bi'th mo apowa ris kal gi 'kwaniny'cesh mo

²⁷ dhali a'di midi ji uni ki cwanj kol 'kus jin ta toṅkuthu'd mo, me'd jin 'kon ma anos kun uku 'pena je mo tani uni 'ce'dki bwa mo ki 'ci'cimi'th mo, wakan isi kani aha/ ki is pem si'da/ bu'thkina mom'bi'th mo 'peni Ababam pem mo

²⁸ dhali aha/ mina ci a'di acul gi mon'thamo/ mo.

²⁹ A'di yin jin ta'd gi gu'ban'ce mo tani dhalki a'di cik gwo jin ona Shi/in eya kaniisa gwansan mo.

3

Gwo jin Hashu goma Kaniisa gi Pan Sardis mo

¹ Dhali eya man'doyu gwo ma kaniisa gi Pan Sardis mo tani 'kwari gwo mo ki: Gwo gi a'di jin ta'd gi shi/in ma Arumgimis kun 'koni pesu/ mo dhali acul kun 'koni pesu/ mo be, mmo/o gwo mo ki:

Aha/ misha miin tom pini mo. /E takin gi gway gi a'di jin di ki e mo dhali /e ki is pini a'di iwuni.

² Meri e mo, dhali 'bithi is mo, a'di jin bocki'd e/e mo dhali a'di jin 'dishkina 'twa/ mmowu mo, haali/ aha/ dinaki gam miinj kamu/ jin 'boro'd e miim pini jin 'boro'd jin ha me'd mo ibwambori jis/e ma Arumgimis pem mo.

³ Kayi gwo e mo ma, a'di jin bu'thkina /e mo dhali a'di jin cikina /e mo. Kari a'di jan ma dhali rici /e adu is mo ma. Wakki/ /e mini diki mer e mo tani aha/ mina yaku/ me'd wathin 'di/ mo dhali /e mini mol mo mo, mo jin miga/ pu'dku/ apo/ /e mo be.

⁴ /E takin ush'ceenne/ naskina/ mo kun ta 'kwani gi Pan Sardis mo, uni kun 'koki nyo/ burrinyem buni mo. Dhali uni mini nyak ii ki aha/ e burrinyen kush mo haali/ uni ha me'd mo be.

⁵ A'di jin piki mii e mo tani a'di minu shum isi kan ki burrinyen kush mo, dhali aha/ mina diki 'kosh gway piti mo 'pena warka/ gi mondiki/e mo. Aha/ mina pi gway piti ibwambor ma Babam pem mo dhali ibwambori iman'doyu gwom piti mo.

⁶ A'diyin jin ta'd gi gu'ban'ce mo tani dhalki a'di cik gwo jin ona Shi/in goma kaniisa gwansan mo.

Gwo jin Hashu goma Kaniisa gi Pam Piladalpiya mo

⁷ Dhali eya man'doyu gwo ma kaniisa gi Pam Piladalpiya mo tani 'kwari gwo mo ki: Gwo gi a'din 'de/ jin kogu mo, a'din 'de/ jin ta jin gana/ mo, dhali a'di jin ta'd ga muptha/ ma Dawuu'd mo, a'di jin midi ka'd 'twaŋkal mo dhali jan tal 'denj kamu/ piyi'd jin midi mu'th a'di mo, a'di jin mu'thki a'di mo tani dhali jan tal 'denj kamu/ mol a'di ka'd mo be, mmo/o gwo mo ki:

⁸ Aha/ misha miin tom pini mo. Hili mo mo ma, aha/ karkina acampur ki kany ibwambori /e mo, a'di jin mola jan tal 'denj kamu/ mu'th mo. Aha/ misha ki/e tan gi jasi ari mom'bi'th jin gwa'dagwa'd mo dhali/e dini mmodhu gwom pem naskina/ mo dhali/e diki wat gway pem mo be.

⁹ Hili mo mo ma, aha/ mina dhu uni gwansan kun ta ku gi montul is ma Setaan mo, uni gwon oki uni ta ku gi 'Kwani Yahuuda/ mo dhali uni ta uni yisa, hili uni tana tor mo - hili mo mo ma, aha/ mina dhu uni mmopu'dku/ mo dhali lunj ki jin 'kupa'dupuni bwambori sho'k pini mo, dhali da/ar gwo mo ki aha/ enkina /e mo be.

¹⁰ Haali/ /e dhuki gwom pem mo ki bwa jin 'kuca /e ki 'kari'th mo ki mon'dim 'kup mo tani aha/ mina non/e 'peni mompal mo, a'di jin midi pu'du/ apo/ mony'ceshi 'baar mo, mmopal uni gwansan kun 'kokin mo e mony'cesh mo be.

¹¹ Aha/ mina pu'dku/ki 'dishe/ mo. Teli sho'k mo e a'di jin tana /e mo, wakan ki jan tal 'denj kamu/ midi 'taki diki bu'th tonj 'kup pini mo be.

¹² A'di jin piki mii e mo tani aha/ mina kar a'di mmota akaḡ gi gu'b gi mondheleladhelel ma Arungimis pem mo. A'di midi mol ya ka pije/ ki sule/ sule/ 'peni a'di mo, dhali aha/ mina 'kwar gwo apo/ a'di jin ta gway ma Arungimis pem mo, dhali gway gi 'penkuman Bampa/ ma Arungimis pem mo, a'di jin ta Pa Urushaliim jin ta jin this mo jin midi pu'dku/ ka 'cesh mo 'peni Arungimis pem mo 'peni momis mo, dhali gway this pem gana/ mo be.

¹³ A'diyin jin ta'd gi gu'ban'ce mo tani dhalki a'di cik gwo jin ona Shi/in mo goma kaniisa gwansan mo.

Gwo jin Hashu goma Kaniisa gi Pa Lawudikiyya mo

¹⁴ Dhali eya man'doyu gwo ma kaniisa gi Pa Lawudikiyya mo tani 'kwari gwo mo ki: Gwo gi a'di ma Amen mo, a'di jin ta isinj gana/ mo dhali jin ta'da man/o gwo jin ta jin gana/ mo, jin ta mo ma mun'kup me'd jin ukkin ma Arungimis aris to mo be, mmo/o gwo mo ki:

¹⁵ Aha/ misha miin tom pini mo. /E njala/ wani 'thupa walla monj kamu/ njala/ 'batha /eya. Ki /e kara ba/ imini 'taki 'thupa'thup mo walla 'batha'ba'th moyi.

¹⁶ Wakan, haali/ /e mangalamangal mo dhali /e njala/ wani 'thupa walla monj kamu/ 'batha /eya, aha/ mina ya/ /e ka pije/ 'peni 'twam pem mo be.

¹⁷ Haali/ /e o gwo ki, aha/ tana pa ki pa mo dhali aha/ wara ki pa mo dhali aha/ mina mii ta gi tonj kamu/ yisa, mmomola /e mo mo ki /e tocu 'kus mo dhali koku e i is mo dhali hatha'ko'd ki ha'th mo dhali ta ja'da/ mo dhali di is 'te/ mo.

¹⁸ Wakan aha/ malaskina /e mo mmoyol 'dolkon gana/ 'peni aha/ mo, a'di jin minu tash e ki o'd mo, ki /e mini 'taki ta pa ki pa mo dhali ta gi burriinyen kush mo mmohi'th /e i is mo dhali 'taki kar /e 'peni mo ma 'the is pini jin yana /e is 'te/ mo, 'peni mo jin mishu /e mo dhali /e mini 'taki ta gi kwalany mmogwa'c em pini mo, ki /e mini 'taki mish mo mo.

¹⁹ Uni gwansan kun enka/ mo tani aha/ to'kkina uni mo dhali aha/ dorkina uni mo. Wakan shwayi miia nyor mo ki thith mo dhali rici /e adu is mo.

²⁰ Hili mo mo ma, aha/ doshkina ishan'tamo/ mo dhali nagkana campura po/ki me'd mo. Wakki/ jan tal 'denj kamu/ midi cik 'twam pem mo dhali ka'dki

aha/ acampur mo tani aha/ mina seku/ ibwamani a'di mo dhali nyak to shwa ki a'di mo dhali a'di nyakki aha/ mo be.

²¹ A'di jin midi pi mii e mo tani aha/ mina ci a'di 'ban mo jin mina a'di ca'b nyakki aha/ ka kursi ma malik pem mo, me'd aha/ ki is pem mo mmopikika/ mii e mo dhali aha/ ca'bkina nyakka Babam pem eya kursim piti mo be.

²² A'diyin jin ta'd gi gu'ban'ce mo tani dhalki a'di cik gwo jin ona Shi/in goma kaniisa gwansan mo.

4

Mo ma Luḡ jin Ta ji gi Momis mo

¹ 'Ko'di mii gwansan mo tani aha/ hilkina mo mo dhali hili mo mo ma, e momis mo tani acampur ka'dkunu mo. Dhali 'twa/ jin twa/ a/ gwoyi'd mo. A'di jin cikka/ jin oki gwo mo e aha/ mo jin wana e ka poome/ jin o gwo mo ki: Yayu/ 'kup ki moho/ mo dhali aha/ mina tor/ e to mo, a'di jin midi bu'th mo mo i'ko'di mii yaase mo be.

² Dhali ki jahanne/ aha/ dikina e Shi/in mo dhali hili mo mo ma, akursi ma malik doshki'd mo e momis mo nyakki a'din 'de/ jin ca'bki'da po/ kursi ma malik mo.

³ Dhali a'di jin ca'bki'di mattaan mo tani jamas piti jin piyina a'di mo tani wana e ki wosha wasin dhela/ ki e ka ris mo dhali wosha wasin dhela/ jin ta jim 'per mo dhali ape'do/ mo a'di 'kamki'da kursi ma malik is mo jin wana e ki wosha wasin dhela/ jin ta jin dhii/ mo.

⁴ Dhali akursi ma malik 'kokini iss* 'kwanimpa 'de/ i'ce'dka doḡon kun 'kamkina kursi ma malik is mo dhali uni gun 'kokina powa kursi ma malik gwansan mo tani ta 'kwanin gwanyjaka/ kun 'kon ka iss 'kwanimpa 'de/ i'ce'dka doḡon mo kun shumkin ki burrinyeḡ kush mo nyakki toḡ'kup 'dolkon gana/ e 'kupi uni mo be.

⁵ 'Pena kursi ma malik mo tani moḡkush 'pena wara sho'k a'di dhwa/a'dki mo mo dhali 'twa/ mo dhali mondor ma sho'k gwoki'da gur gur mo, dhali e buḡ'kus ma kursi ma malik mo tani dhantho/ 'koni pesu/ kun kanykunu o'd mo, uni kun 'koni pesu/ mo tani uni kun ta shi/in ma Arumgimis mo.

⁶ Dhali mbwambor ma kursi ma malik mo tani kumma/ yi'de/ diki'd jin wana e ka gasaas jin miiki'd ki 'bera/ 'bera/ mo.

Dhali to/e kun 'kon ki e kun 'koni doḡon mo, uni 'kamkina kursi ma malik is mo mmo'kama kursi ma malik 'kup ki enḡwari lu/ mo, dhali mmosulkina e uni ka piḡe/ e ki bwambor mo dhali e kun 'ka uni ka bisan'ko'd mo.

⁷ To/e jin twa/a/ jin di'd ki e mo tani wana e ka dhop mo dhali to/e jin ta jin 'ko'd mo jin di'd ki e mo tani wana e ka morbip mo dhali to/e jin 'kon ma po/ i kwara mo jin di'd ki e mo tani wana jis/em piti ki wathi/ mo dhali to/e jin 'kon ma po/i doḡon mo jin di'd ki e mo tani a'di wana e ka wulu/ jin pe'di mis mo.

⁸ Dhali to/e kun 'kon ma po/i doḡon mo kun 'kon ki e mo, uni 'baar ka 'dete/ 'dete/ mo tani 'kan ma biny jeshem buni ipe'de/ mo dhali uni gun sula e ka piḡe/ ki thorony thorony mo, aris uni 'baar mo kun 'kon ki jin 'kam mo dhali e bwaman mo dhali montee dhali mon'thiny mo tani uni 'koki dak mo mmoyuk gway mo mmo/o gwo mo ki:

A'di jin kogu mo, a'di jin kogu mo, a'di jin kogu mo, a'di jin ta Tapa Arumgimis jin ta a'di jin Eka/ Ek mo, a'di jin diki'd mo dhali a'di jin di'd mo dhali a'di jin midi yayu/ mo be.

* 4:4 arba wa ishriin

⁹ Dhali ma me'd jin 'kona to/e gwahan kun 'kon ki e mo mmoçi monyca ka Arungimis mo dhali montak mo dhali mo jin 'boruwa 'bor bwa i is mo e a'di jin ca' bki'da powa kursi ma malik mo, a'di jin ca' bki'd ki sule/ki sule/ mo dhali ki sule/ mo tani

¹⁰ jwahan 'kwani kun 'kon iss 'kwanimpa 'de/ i'ce'dka doṅon mo tani ta'kkina 'ceshi bwambori a'di mo, e a'di jin ca' bki'da powa kursi ma malik mo dhali lunj a'di jin ca' bki'd ki e ki sule/ mo dhali ki sule/ mo tani uni ta'kki tor'kup buni me'd mo mbwambor ma kursi ma malik mo mmoyuk gway mo ki:

¹¹ /E a'di ha me'd mo, Tapam bam mo dhali Arungimis bam mo mmobu'th monyca mo dhali montak mo dhali mom'bi'th mo haali/ /e ukkina ris to 'baar mo dhali ki bwam pini mo tani uni 'kokin mo dhali uni 'konu mmo/uk mo be.

5

Yit jin 'Kuçu Is mo dhali Ari Ka'bal mo

¹ Dhali aha/ mishkina ki me'da bim poros gi a'di jin ca' bki'da powa kursi ma malik mo tani a'di ta'd gi yit jin 'kuçkunu is mo jin 'kwarkunu gwo nycine/ mo dhali apom piti mo si'da/, a'di jin 'dapkunu 'twa/ka 'din'kila/ kun 'dap a'di 'twa/ kun 'koni pesu/ mo.

² Dhali aha/ parkina man'doyu gwo e mo jin 'bitha'bi'th mo jin bahki gwo mo ki 'twa/ jin caaca mo jin o gwo mo ki: Aja a'di jin ha me'd ki han gana/ mo mmobene'd gwo jin 'kwaru apo/ yit yansan mo dhali kaca 'din'kilam piti mo?

³ Dhali jan tal 'dej kamu/ yisa di'di momis mo walla apo/ mony'cesh mo walla e wan'kwariny mony'cesh mo jin midi mish a'di ka'd mo, yit yansan jin 'kuçu is mo walla mmohil gwo jin 'kwaru e bwaman a'di mo be.

⁴ Dhali aha/ gwokina kagahara mo haali/ tal 'dej kamu/ yisa gamkunu mo jin ha me'd mo mmoka'd gwo yansan jin 'kuçkunu is mo walla mmohil gwo kun 'kwarkunu ibwaman a'di mo be.

⁵ Dhali yan'ko'd wathin tal 'de/ 'peni 'kwaniṅ gwanyjaka/ oki aha/ gwo mo ki: Dhalku/ ki ko mo ma. Hili mo mo ma, Adhop ma wak ma Yahuuda/ dhali Abirman ma Dawuu'd, a'di piki mi e mo be. Wakan a'di, a'di imidi mish yit yansan jin 'kuçu is ka'd 'twa/ mo dhala 'din'kila/ kun 'koni pesu/ kun 'dapkunu a'di 'twa/ mo.

⁶ Dhali mbwaman ma kursi ma malik mo dhali to/e kun 'koni doṅon kun 'kon ki e mo dhali ibwaman 'kwaniṅ gwanyjaka/ mo tani aha/ parkina Ari Ka'bal e mo mmodosh mo. A'di wana e ki a'di jin 'koshkunu mo, ki ce kun 'koni pesu/ ime'd mo dhali ka pinya/ e kun 'koni pesu/ mo, uni gun ta shi/in ma Arungimis kun 'koni pesu/ mo, uni gun hashkunu mo eya ris mony'ceshi 'baar mo.

⁷ Dhali a'di yaki'd mo dhali bu'thki yit yansan jin 'kuçkunu is mo 'peni me'da bim poros gi a'di jin ca' bki'd eya kursi ma malik mo.

⁸ Dhali ki a'di bu'thki yit yansan jin 'kuçu is mo tani to/e kun 'kon ma po/i doṅon kun 'kon ki e mo dhali 'kwaniṅ gwanyjaka/ kun 'koni iss 'kwanimpa 'de/ i'ce'dka doṅon mo tani ta'kkina 'ceshi bwambori Ari Ka'bal mo. Uni 'baar ka 'dete/ 'dete/ bu'thkina dheṅdhenye/ mo dhali tor'kul bwa kun tana sahan 'dolkon gana/ mo kun 'tu'dkunu mo ka 'bicajwahan mo jin ta mon'tho gi uni kun dhunu ki she/ ki dhelel dhelel mo.

⁹ Dhali uni yukki gway this mo mmo/o gwo mo ki: /E a'di ta a'di jin ha me'd mo mmobu'th yit yansan jin 'kuçu is mo dhali mmoka'da 'din'kilam piti jin 'dapu a'di 'twa/ mo, haali/ /e 'koshkunu jwa mo, dhali ka bas pini mo tani /e wanki 'kwani 'ba/ mo goma Arungimis mo 'peni arisa wak kun 'ko 'kwani e ki she/ ki

she/ mo dhali 'peni aris 'twa/ kun wala 'kwani ki she/ ki she/ mo dhali 'peni 'kwani kun 'kona e ki she/ 'peni tiya mo dhali 'peni kal gi 'kwaniny'cesh/ mo

¹⁰ dhali /e ki nyon uni ki 'perjkuman bampa/ mo dhali /e ki dhu uni ki igasiis goma Arumgimis bana mo

dhali uni mini ta tapa mo e mony'cesh yansan mo.

¹¹ Yan'ko'd aha/ ki hil mo mo dhali aha/ cikkina rakin jin rayunu/ mo ka kul is 'pena kursi ma malik mo dhali to/e kun 'kon ki e mo dhali gwanyjaka/ 'kwani mo tani 'twa/ gi iman'doyu gwo ka ris dhali ka ris uni ka ris kun molu de/ e mo dhali 'twan' kwani alip alip mo,

¹² mmo/o gwo ka dhan 'twa/ kun caaca mo ki: A'di ta a'di jin ha me'd mo. A'di jin ta Ari Ka'bal jin 'koshkunu mo mmobu'th mom'bi'th mo dhali pa mo dhali moyuk mo dhali mo jin eka/ ek mo dhali montak mo dhali monyca mo dhali mom'bor mii mo.

¹³ Dhali aha/ cikkina ris to 'baar mo ka 'dete/ 'dete/ kun ukkunu mo kun 'kon e momis mo dhali kun 'kon e mony'cesh mo dhali kun 'kon e bwan'kwariny mony'cesh mo dhali e bwan kumma/ yi'de/ mo dhali aris uni 'baar mo kun 'koni bwaman mo tani o gwo mo ki: E a'di jin ca'bki'da powa kursi ma malik mo dhali e Ari Ka'bal mo ki mom'bor mii midi di mo dhali montak mo dhali monyca mo dhali mo/ek mo gom ki sule/ mo dhali ki sule/ mo.

¹⁴ Dhali to/e kun 'kon ma po/i dojon mo kun 'kon ki e mo tani o gwo mo ki: Amen, dhali 'kwanij gwanyjaka/ ta'kkin mo dhali lunj a'di mo be.

6

Arisa 'Dinjila/ mo

¹ Dhali aha/ mishkina mo ki Ari Ka'bal 'ceeki yit yansan jin 'kuçu is 'twa/ mo a'di jin ta jin 'de/ 'peni tiyan pesu/ mo kun 'dapkunu 'twa/ mo ka 'dinjila/ mo, dhali aha/ cikkina 'twan 'de/ 'peni to/e kun 'kon ma po/i dojon kun 'kon ki e mo, mmo/o gwo mo me'd 'twa/ ma sho'k jin dorki'd mo ki: Yayu/ mo.

² Dhali aha/ parkina mo e mo dhali hili mo mo ma, shumarum kush mo dhali a'di jin merki a'di apo/ mo tani ta'd ga abwa mme'd mo. Dhali tonj'kup cikunu a'di mo, dhali a'di yaki'd ka pije/ mo mmopi mii e mo dhali di gwo ibwa mo mmopi mii e mo be.

³ Dhali ki a'di 'ceeki'da 'dinjila/ 'twa/ mo jin 'kon ma po/i su/ mo tani aha/ cikkina 'twa/ 'peni to/e kun 'kon ki e mo kun 'kon ma po/i su/ mo jin o gwo mo ki: Yayu/ mo.

⁴ Dhali shumaruma kamu/ pu'dki'd ka pije/ mo jin ca'bki'tikil 'tikil mo dhali dhir dhir mo. Dhali a'di jin merki a'di apo/ mo tani a'di dhalkunu bway mo mmobu'th monju'th is 'peni 'kwaniny'cesh mo, wakan ki 'kwani mini 'kosh jwa ka rem 'kup mo, dhali a'di cikunu dhan gandala turga/ jin caaca mo.

⁵ Ki a'di 'ceeki'da 'dinjila/ 'twa/ mo jin 'kon ma po/i kwara mo tani aha/ cikkina to/en kamu/ jin 'kon ma po/i kwara jin di ki e mo jin o gwo mo ki: Yayu/ mo. Dhali aha/ parkina mo e mo dhali hili mo mo ma, shumaruma kamu/ pu'dki'd mo jin ta'da dhisal mo, dhali a'di jin merki a'di apo/ mo tani ta'd gi to jin baru to mo mme'd piti mo be.

⁶ Dhali aha/ cikkina 'twa/ jin wana e ki a'di jin doshki'di bwaman to/e kun 'koni dojon kun 'kon ki e mo mmo/o gwo mo ki: Pos bunyan jin baru ka gada mo ki nasa guurush mo dhali pos bunyana kamu/ jin baru ka gada karka ba'de/ apo/ mo ki nasa guurush mo. Hili dhalku/ ki shi/a yin is mo dhali yimana mura'th jin ka/u ki nah nah mo.

⁷ Ki a'di 'ceeki'da 'dinjila/ jin 'kon ma po/i doŋon 'twa/ mo tani aha/ cikkina 'twa/ 'peni to/e kun 'kon ki e mo kun 'kon ma po/i doŋon mo kun o gwo mo ki: Yayu/ mo.

⁸ Dhali aha/ parkina mo e mo dhali hili mo mo ma, shumaruma kamu/ jin ta'da mandupany pu'dki'd mo, dhali a'di jin merki a'di apo/ mo tani gway piti yuku ki Mowu mo, dhali Mo ma Haawiya mo, a'di bathki a'di isho'k mo. Dhali uni cikunu mom'bi'th mo apo/ mony'cesh mo ntagi bwanu'ba kamu/ gi mony'cesh mo mmo'kosh uni ki gandala turga/ mo dhali ki te/ mo dhali ki mo/isa nyor 'peni to kun shi/kin mo dhali ki tombwaasho kun 'kokin e mony'cesh mo.

⁹ Dhali ki a'di 'ceeki'da 'dinjila/ 'twa/ mo jin 'kon ma po/i mudhe'd mo tani aha/ parkina mo e mo e bwan'kwariny mo ma gwaŋa/ jin miikunuwa basa'cesh mo akashira/ gi uni gwansan kun 'koshkunu jwa mo gom gwo ma Arungimis mo dhali gom gwo jin kala uni mmoŋor mo.

¹⁰ Uni cuukin ki dhan 'twa/ kun caaca mo mmo/o gwo mo ki: Ayy, Tapa jin di'da Litgany mo, /e kogu mo dhali /e ta a'din gana/ mo. Kakasja sa/? imina / e dwall gwo mo dhali ri/a ri'c mo goma bas bam mo apo/ uni gwansan kun 'kokin apo/ mony'cesh mo?

¹¹ Yan'ko'd uni 'baar ka 'dete/ 'dete/ cikunu burrinyeŋ kush mo dhali ŋorkunu gwo mo mmosi/is ari'ceenne/ mo ntagi mondeŋ gi igarr buni kun nyakkina tu'c mii mo dhali iwak buni mo minu'taki thim mo, uni gun minu'taki 'kosh jwa mo me'd uni, uni ki is buni mmomiikunu uni kan mo.

¹² Dhali ki a'di 'ceeki'da 'dinjila/ 'twa/ mo jin 'kon ma po/i pe'de/ mo tani aha/ hilkina mo mo dhali hili mo mo ma, adhan mony'cesh yikinki is mo dhali atente/ warki'd ki 'thi/ mo me'da shawaal 'thi/ mo dhali appe jin ta'da kunn is mo tani warki'd ka bas mo.

¹³ dhala risa cul 'peni momis uni ta'kkina 'cesh mo me'd cwampu/ mo me'd jin raskina a'di maman kun 'koki is mo e mondit mo ki a'di yikinkin ma punthar 'tham is mo.

¹⁴ Momis a'di puuki'd mo mmowa e ki yit jin 'kuçkunu is mo, dhala ris wosha turga/ mo dhali a/uŋa 'cesh mo uni joçkunu mo 'peni mom buni mo be.

¹⁵ Dhali yan'ko'd imalik kun 'kon e mony'cesh mo dhali 'kwani kun caaca mo dhali uni gun ta gummpa/ gom 'kwani ma mee mo dhali uni gun ta pa ki pa mo dhali uni kun 'bitha'bi'th mo dhali 'kwani 'baar ka 'dete/ 'dete/ mo dhali uni gun ta cinjina/ kun yolu mo dhali uni kun 'kon ki 'kus mo tani uni bagkin e jurum wosh mo dhali e bwamana ris wosh mo e 'kuwosha turga/ mo tani

¹⁶ uni yukki wosha turga/ mo dhali aris wosh mo mmo/o gwo mo ki: Taki apo/ aman mo dhali bagi aman mo 'peni jis/e gi a'di jin ca'bki'd eya kursi ma malik mo dhali 'pena nyor gi Ari Ka'bal mo

¹⁷ haali/ adhana tee ma nyor buni jin caaca a'di pu'dki'd mo dhali kaja a'di imidi mish doshi bwambori a'di mo?

7

Uci ma Israyiil kun 'Koni Alaapi Iss 'Kwanimpa Ipesu/ mo I'ce'dka Doŋon Apo/ mo kun 'Dapu ka 'Dinjila/ mo

¹ 'Ko'di mii yansan mo tani aha/ parkina iman'doyu gwo e mo kun 'koni doŋon mo mmodosh eya rukun gi mony'cesh kun 'koni doŋon mo mmobu'th 'tham kun poshkin me'd mo 'peni mony'cesh kun 'kona shem 'pena bi idoŋon mo, ki 'thama kamu/ midi 'taki diki poshu apo/ mony'cesh mo, walla e kumma/ yi'de/ mo walla apo/ cwan kamu/ mo.

² Yan'ko'd aha/ parkina man'doyu gwoŋ kamu/ e mo jin shinkunu mo 'peni mo jin sul ma tente/ mo ka 'diŋkila/ ma Arumgimis jin di ki e mme'd mo, dhali a'di yukki'da yuk ki dhan 'twa/ jin caaca kagahara mo e iman'doyu gwo kun 'koni doŋon mo, uni kun cikunu mom'bi'th mo mmoshi/ mony'cesh mo dhali kumma/ yi'de/ mo

³ mmo/o gwo mo ki: Dhalku/ mony'cesh ki shi/ is mo walla kumma/ yi'de/ mo walla aris cwa mo, ntagi ana mina 'dapa 'diŋkila/ apo/ imanmii to ma Arumgimis bana mo e buyem buni mo.

⁴ Dhali aha/ cikkina dhan mondeŋ gi uni gun 'dapkunuwa 'diŋkila/ mo mmota alaapi* iss 'kwanimpa ipesu/ mo i'ce'dka doŋon apo/ mo, uni gun 'dapkunuwa 'diŋkila/ mo 'peni arisa waŋ kun 'kona e ki she/ ki she/ mo 'peni iya/ ma Israyiil mo,

⁵ alaapi 'kume'd i'ce'dka su/ apo/ mo, uni gun 'dapkunuwa 'diŋkila/ 'pena waŋ ma Yahuuda/ mo, dhali alaapi 'kume'd i'ce'dka su/ apo/ mo, 'pena waŋ ma Ra/ubiin mo, dhali alaapi 'kume'd i'ce'dka su/ apo/ mo, 'pena waŋ ma Jaad mo,

⁶ dhali alaapi 'kume'd i'ce'dka su/ apo/ mo, 'pena waŋ ma Ashiir mo, dhali alaapi 'kume'd i'ce'dka su/ apo/ mo, 'pena waŋ ma Naptaali mo, dhali alaapi 'kume'd i'ce'dka su/ apo/ mo, 'pena waŋ ma Manassa mo,

⁷ dhali alaapi 'kume'd i'ce'dka su/ apo/ mo, 'pena waŋ ma Shamuun mo, dhali alaapi 'kume'd i'ce'dka su/ apo/ mo, 'pena waŋ ma Lawi mo, dhali alaapi 'kume'd i'ce'dka su/ apo/ mo, 'pena waŋ ma Yassaakar mo,

⁸ dhali alaapi 'kume'd i'ce'dka su/ apo/ mo, 'pena waŋ ma Sabuluun mo, dhali alaapi 'kume'd i'ce'dka su/ apo/ mo, 'pena waŋ ma Yuusup mo, dhali alaapi 'kume'd i'ce'dka su/ apo/ mo, gun 'dapkunu 'twa/ ka 'diŋkila/ 'pena waŋ ma Benyamiin mo.

Abuhany 'Kwani 'Pena Ris Kal gi 'Kwaniny'cesh mo

⁹ 'Ko'di mii yansan mo tani aha/ hilkina mo mo dhali hili mo mo ma, adhana buhany wathimpa caaca mo jin mina wathin tal 'deŋ kamu/ mol deŋ e mo, 'peni aris kal gi 'kwaniny'ceshi 'baar mo, dhali 'peni arisa waŋ gi 'kwani ki she/ ki she/ mo, dhali 'peni 'kwani kun 'kona e ki she/ ki she/ mo, dhali 'peni 'kwanin tiya kun wal 'twa/ ki she/ mo, mmodoshkina uni mbwambor ma kursi ma malik mo dhali mbwambori Ari Ka'bal mo, mmohi'th burrinyen turga/ kun ta kuj kush mo, dhali abiny jethkum e me'd buni mo be.

¹⁰ Dhali uni cuun ki dhan 'twa/ kun caaca mo mmo/o gwo mo ki: Mowoth ta ji ma Arumgimis bana mo, a'di jin ca'bkid'eya po/ kursi ma malik mo dhali e Ari Ka'bal mo.

¹¹ Dhali aris iman'doyu gwo 'baar mo doshkin ki mis mo mmo'kam a'di is mo, kursi ma malik mo, dhali mmo'kam 'kwanij gwanyjaka/ is mo dhali to/e kun 'koni doŋon kun 'kon ki e mo, dhali uni ta'kki bwam/em buni ibwambor ma kursi ma malik mo dhali luŋa Arumgimis mo

¹² mmo/o gwo mo ki: Amen. Mom'bor mii mo dhali monyca mo dhali moyuk mo dhali mo jin 'boruwa 'bor bwa i is mo dhali montak mo dhali mom'bi'th mo dhali mo/ek mo eya Arumgimis bana mo gom ki sule/ mo dhali ki sule/ mo. Amen.

¹³ Dhali yan'ko'd jan tal 'deŋ kamu/ 'peni 'kwanij gwanyjaka/ 'ka'daa/ gwo me'di is mo, mmo/o gwo mo ki: Ki ija anahannee kun shumkunu ki burrinyen turga/ kun ta kuj kush mo dhali 'peni mana ipu'dkina uni mo?

¹⁴ Aha/ ki o a'di gwo mo ki: Gana, /e a'di imishki uni mo be. Dhali a'di ki oyaa/ gwo mo ki: Uni gwansani, ita uni gun piyin mo 'pena dhan monto'c

* 7:4 miyya wa arba wa arba/iin alip

bwa mo. Uni lamki burrinyen tur buni mo dhali mii uni ki bany bany ka bas gi Ari Ka'bal mo.

¹⁵ Wakan uni 'kokini bwambor ma k_ursi ma malik ma Arungimis mo dhali mii a'di to ki montee ilu/ mo dhali ki mon'thiny ilu/ mo e gu'b gi mondheleladhelel piti mo be,

dhali a'di jin ca'bki'da po/ k_ursi ma malik mo tani a'di midi pa'd ki uni adarha'da/ jin ta bun'kus piti mo be.

¹⁶ Uni mina te/ mol 'kosh ki sule/ mo, walla mina yi'de/ 'koki bu'th ki sule/ mo. Atente/ si'da/ midi diki 'kosh uni mo, walla midi diki ci'th uni is ki mom'batha'd piti mo.

¹⁷ Haali/ Ari Ka'bal, a'di doshki'di bwaman ma k_ursi ma malik mo, a'di jin ta'da Amanhil uni mo,

dhali a'di midi shu uni bway mo e mo jin kasha yi'de/ jin di ki e e mo dhali Arungimis midi shumuta ris jabudhi 'baar mo 'peni em buni mo be.

8

A'din'kila/ jin 'Kon ma Po/i Pesu/ mo dhali Ton'kul Bwa jin Ta 'Dolkon Gana/ mo jin Duk'kunuwa 'Bicajwahar mo

¹ Ki Ari Ka'bal 'ceeki'da 'din'kila/ 'twa/ mo jin 'kon ma po/i pesu/ mo tani mo doshki'd ki biyuu e momis mo ki ari mo mo jin wana e ka nusa saa mo.

² Dhali yan'ko'd aha/ parkina iman'doyu gwo kun 'koni pesu/ e mo, uni gun doshkini bwambor ma Arungimis mo, dhali apoome/ 'koni pesu/ cikunu uni mo.

³ Dhala man'doyu gwo_o kamu/ pu'dki'd mo dhali doshki'd mo e mo ma gwata/ jin duk'kunuwa 'bicajwahar mo ki ton'kul bwa jin ta 'dolkon gana/ mo jin duk'kunuwa 'bicajwahar ime'd mo. Dhali a'di cikunuwa 'bicajwahar kagahara mo mmoce e ki mon'tho ma ris uni gun dhunu ki she/ ki dhelel dhelel mo apo/ mo ma gwatan to jin ta ton'kul bwa mo jin ta 'dolkon gana/ mo mbwambor ma k_ursi ma malik mo,

⁴ dhali aku'd ma 'bicajwahar a'di cuki mis mo nyakki mon'tho gi uni gun dhunu ki she/ ki dhelel dhelel mo 'peni me'd ma man'doyu gwo jin doshki'di bwambor ma Arungimis mo be.

⁵ Dhali yan'ko'd aman'doyu gwo bu'thki ton'kul bwa jin duk'kunuwa 'bicajwahar mo dhali a'di ki 'tu'd a'di ka kapany o'd mo 'peni mo ma gwata/ mo dhali a'di ki yek a'di apo/ mony'cesh mo, dhali kontor ma sho'k gwoki'd ki gur gur mo dhali dhan rakin caaca mo dhali awar dhwa/a'dki'd ki dhwa/a'd dhwa/a'd mo dhali adhan mony'cesh yikinki is mo be.

Arisa Poome/ mo

⁶ Dhali iman'doyu gwo kun 'koni pesu/ kun tan ga poome/ kun 'koni pesu/ mo tani uni thosonki is mo mmodhal uni me'd mo be.

⁷ Dhala man'doyu gwo jin t_wa/a/ a'di dhalki'da poomem piti me'd mo dhala wasa/ dhali o'd bathki a'di isho'k mo mmo'cur e ka bas mo, uni kun ta'kkina po/ mony'cesh mo be. Dhali 'ban gi mony'cesh jin 'kon ma po/i kwara mo tani a'di kopkunu ki o'd mo be dhali 'ban gi bwany'cwan kamu/ jin 'kon ma po/i kwara mo tani a'di kopkunu ki o'd mo be dhali arisa shon dhii/ini 'baar mo tani uni celkunu ki o'd mo.

⁸ Dhala man'doyu gwo jin 'kon ma po/i su/ mo tani dhalki'da poomem piti me'd mo be dhali dhan ton kamu/ caaca kagahara mo, wana e ka dhan wosha turga/ mo jin ci'thkunu ki o'd mo, dhali a'di bitkunu e bwan'kumma/ yi'de/ mo

⁹ dhali 'ban gi kumma/ yi'de/ jin 'kon ma po/i kwara mo tani warki'd ka bas mo dhali 'ban gi to/e kun 'kon ma po/i kwara kun 'kon ki e mo tani uni wukin

mo e yi'de/ mo dhali 'ban ma kur kun 'kona 'bani kwara mo tani uni 'ce'dkunu sho'k mo be.

¹⁰ Dhala man'doyu gwo jin 'kon ma po/i kwara mo tani dhalki'da poomem piti me'd mo dhali adhana cul bitki'd 'peni momis mo mmodhel mo mo me'd dhantho/ mo be dhali a'di bitki'd eya 'ban yi'de/ kun 'kon ma po/i kwara mo dhali apo/ yi'de/ jin kasha e ki kash mo be.

¹¹ Dhali gway ma cul yansan mo tani a'di yukunu gway ka tap mo. Dhali 'ban gi yi'de/ jin 'kon ma po/i kwara mo tani warki'd ka tap mo dhali 'kwani ka ris wukin mo 'peni yi'de/ yan mo be haali/ yi'de/ ca'bki ka/ ka/ mo.

¹² Dhala man'doyu gwo jin 'kon ma po/i donon mo tani dhalki'da poomem piti me'd mo, dhali 'ban ma tente/ jin 'koni kwara mo tani a'di pwaṭhkunu 'ban mo dhali 'ban ma ppe jin 'kon ma po/i kwara mo dhali 'ban ma cul jin 'kon ma po/i kwara mo, wakan ki 'ban gi monkush buni jin 'kon ma po/i kwara mo tani warki'd ki mondhurumi'd mo. Dhali 'ban gi montee jin 'kon ma po/i kwara mo tani a'di nonu mo 'peni mo jin 'twakki mo mo dhali wakan si'da/ 'ban gi mon'thiny jin 'kon ma po/i kwara mo be.

¹³ Dhali yan'ko'd aha/ hilkina mo mo dhali aha/ cikkina wulu/ jin 'therki ko mo ka dhan 'twa/ jin caaca kagahara mo me'd jin pekina a'di isi bwaman momis mo ki: Wayyi, wayyi, wayyi e uni gwansan kun 'koni mony'cesh mo ka poomen tiya 'konu mo mmodhal me'd mo, a'di jin mura iman'doyu gwo kun 'koni kwara mmopi mo be.

9

¹ Dhala man'doyu gwo jin 'kon ma po/i mudhe'd mo tani dhalki'da poomem piti me'd mo, dhali aha/ parkina cul e mo mmobitu/ 'peni momis a'cesh mo, dhali a'di cikunuwa muptha/ ki jis jin shu'd jin dar gi 'pemen mo.

² Dhali a'di ki ka'd moshu'd gi jis jin dar gi 'pemen mo, dhali 'peni moshu'd gi jis yan mo tani aku'd cuki mis mo me'd dhana ku'd jin caaca 'peni mo jin 'thanu o'd ki wur wur mo, dhali atente/ dhali bul mis 'kokin mo mmodhuruma dhurum mo ka ku'd 'peni jis shu'd yan mo be.

³ Dhali 'pena ku'd yan mo tani ameenkuuyu/ pu'dkin apo/ mony'cesh mo dhali uni cikunu mom'bi'th mo mmowa e ki mom'bi'th ma 'dak mo e mony'cesh mo.

⁴ Uni ṭorkunu gwo mo mmo'koki shi/ asho e mony'cesh mo, walla aris mo gunn kun dhii/in mo, walla cwa gunn mo, hili jasi 'kwani gwansan kun 'koki ta ga 'diṅkila/ ma Arumgimis e buyem buni mo tani

⁵ uni idhalkunu uni bway mo mmoçi isa nyor ki me'd mo ka ppe 'kupi mudhe'd mo, hili yisa mmo'kosh uni jwa mo, dhali thulany buni wana e ki thulany ma 'dak mo ki a'di wo'cki 'kwani mo be.

⁶ Dhali ka cim gwansan mo tani 'kwani mini ṅap wu mo tani dhali uni yisa mini gam a'diya. Uni mina bwa o kagahara mmowu mo dhali wu midi gus 'peni uni mo be.

⁷ Dhali jamas ma kuuyu/ gwansan mo tani uni wana e ki shumarum kun thosonkunu is mo gom mo ma mee mo. E 'kup buni mo tani uni takin gi ton'kup kun wana e ki ton'kup 'dolkon gana/ mo. Jis/em buni wana e ki jis/ en 'kwanim pa mo,

⁸ amur is buni wana e ka amur'kup gi up mo dhali shem buni wana e ki she/ ma dhop mo.

⁹ Uni takin gi nyahara/ kun wana e ka raṅpa/ kun ta ton'kuthu'd mo, dhali is ma bim buni alki is mo me'da risa arabiya kun dirkina shumarum mo mmoya ṅwaṅa/ e mo ma mee mo be.

¹⁰ Uni takin gi thin kun wana e ka 'dak mo dhali wo'c buni mo, dhali mom'bi'th buni mmoshi/ 'kwani mo ka ppe 'kupi mudhe'd mo ishki'd e thin buni mo be.

¹¹ Uni takin ga malik apo/ uni mo a'di jin ta'da man'doyu gwo gi jis jin dar gi 'pemen mo. Gway piti yuku ki 'twarj 'Kwani Ibraniyiin ka Abadduun mo, dhali ki 'twarj 'Kwaniḡ Griki a'di yuku ka Abulliyuun mo.

¹² Dhali awayyi jin ta jin twa/a/ peki'd mo. Hili mo mo ma, awayyi jin 'kon ma po/i su/ mo a'di diyi'd mmomii pu'du/ mo.

¹³ Dhali yan'ko'd aman'doyu gwo jin 'kon ma po/i pe'de/ mo dhalki'da poomem piti me'd mo, dhali aha/ cikkina 'twa/ 'peni ce kun 'koni doḡon 'pena gwata/ jin ta 'dolkon gana/ jin di'di bwambor ma Arumgimis mo

¹⁴ mmo/o gwo mo eya man'doyu gwo jin 'kon ma po/i pe'de/ mo, a'di jin ta'd ga poome/ mo ki: 'Cuki iman'doyu gwo kun 'koni doḡon mo, uni gun dekkunu mo eya dhan kumma/ yi'de/ jin yuku gway ka Elpuraat mo.

¹⁵ Wakan iman'doyu gwo kun 'koni doḡon mo tani uni 'cukkunu mo, uni gun bu'thkunu me'd mo mmothoson is mo goma saa mo dhali goma tee mo dhali goma ppe mo, dhali gom yil mo, mmo'kosh 'ban gi 'kwani kun 'kon ma po/i kwara a'cesh mo.

¹⁶ Dhan mondeḡ ma thuruk ma mee kun mer shumaru apo/ mo tani 'koni alaapi 'kume'd mar is dok/e ka alaapi 'kume'd mo dhali dok/e mar is ka alaapi 'kume'd mo. Dhali aha/ cikkina dhan mondeḡ buni e mo.

¹⁷ Dhali tonyjan pem jin parkika/ e mo tani shumaru wana e ciki/ mo. Dhali uni gun mer shumaru apo/ mo tani uni hi'thkina rapca/ mo ki jamas gi mo/o'd mo dhali jamas gi wosh jin ta 'pinyamath mo dhali jamas gi wosh jin si'da 'kwani mo jin ca'bki go'd go'd mo, dhali 'kup shumaru wana e gi 'kup ma dhop mo, dhali o'd dhali aku'd dhali wosh jin si'da 'kwani mo gački'd 'peni 'twam buni mo be.

¹⁸ Ki to gwasani kwara kun 'koshi 'kwani is ka nyor mo tani 'ban gi 'kwani kun 'kon ma po/i kwara kun 'kon e mony'cesh mo tani uni 'koshkunu ki o'd mo dhali ka ku'd mo dhali ki wosh jin si'da 'kwani mo jin gački'd 'peni 'twam buni mo be.

¹⁹ Haali/ mom'bi'th gi shumaru mo a'di diki'd e 'twam buni mo dhali e thin buni mo. Thin buni waki tasha/ mo kun takin gi 'kup mo, dhali ki uni mo tani uni ki dhu 'kwani jama/ i is mo.

²⁰ Dhali 'ban gi 'kwaniḡ kamu/ mo, uni gun 'konuki 'kosh mo naskina/ ki isa nyor yan jin woci 'kwani is she/ mo tani uni 'koki rica du is mo 'peni mii gi me'd buni mo walla dhala ruma 'cesh luḡ 'peni mo dhali tompinycon kun uku 'peni 'dolkon gana/ mo dhali 'dolkon kush mo dhali akoroḡ mo dhali wosh dhel mo dhali cwa mo, uni kun mol mo par e mo walla cik gwo mo walla ii ki sho'k mo.

²¹ Walla uni si'da/ 'koki rica du is mo 'peni mo ma meem buni kun 'kosha uni mo walla mii ma rum buni kun miina uni mo walla miinycaḡ buni kun miina uni mo walla mii ma 'dim buni kun miina uni mo.

10

Aman'doyu Gwo dhali Ari Yiḡ jin 'Kuḡ Is mo

¹ Yan'ko'd aha/ parkina man'doyu gwoḡ kamu/ e mo a'di jin ta gi mom'bi'th mo mmothulu/ ka 'cesh 'peni momis mo, koḡhu is ka rak mo dhali ka pe'do/ i'kupi a'di mo, dhali bwam/em piti wana e ka tente/ mo dhali 'basho'k piti wana e ka kaḡ o'd mo.

² A'di ta'd gi ari yit jin 'kuḡ is mo mmodi 'twa/ kany mo e me'd piti mo. Dhali a'di ki kar shoka bim poros piti apo/ kumma/ yi'de/ mo dhali shoka biny cam piti apo/ mony'cesh mo,

³ dhali a'di ki yuka yuk ki dhan 'twa/ jin caaca mo, mmowa e ka dhop jin an'karki ko mo. Ki a'di yukki'da yuk mo tani mondor ma sho'k kun 'koni pesu/ mo tani alki is mo.

⁴ Dhali ki mondor ma sho'k kun 'koni pesu/ mo alki is mo tani aha/ 'disha 'twa/ mo mmo'kwar a'di mo, hili aha/ cik'kina 'twa/ 'peni momis mo mmo/o gwo mo ki: 'Dapi a'di ka 'din'kila/ mo, a'di jin ona montor ma sho'k kun 'koni pesu/ mo, dhali dhalku/ a'di ki 'kwar mo ka jes is mo.

⁵ Dhali aman'doyu gwo, a'di jin parkika/ e mo tani doshki'da po/ kumma/ yi'de/ mo dhali mony'cesh mo mmo'de'k me'da bim poros piti 'kup ki momis mo

⁶ mmothul gwo me'da po/ mo ki a'di jin diki'd goma sule/ mo dhali ki sule/ mo, a'di jin ukki momis mo dhali to kun 'koni bwaman a'di mo dhali mony'cesh mo dhali to kun 'koni bwaman a'di mo dhali kumma/ yi'de/ mo dhali to kun 'koni bwaman a'di mo ki miin kamu/ minu 'taki 'koki mii miiyu/ ka diite/ mo,

⁷ hili ka tee gi ko ma poome/ jin yukuwa yuk mo jin minu kum cuuwa/ ka man'doyu gwo jin 'kon ma po/i pesu/ mo gom gwo ma Arum'gimis jin cinu ki jim bag mo me'd jin mina a'di bak a'di e cin'kinam piti mo, uni gun ta iman'ci gwom piti mo, ki a'di minu 'taki thim mo be.

⁸ Dhali yan'ko'd 'twa/ jin cik'ka/ 'peni momis o aha/ gwo mo dok/ e ki: Yaku/ mo, dhali budhi yit jin 'kuçu is mo, a'di jin di 'twa/ kany mo e me'd ma man'doyu gwo mo, a'di jin doshki'da po/ kumma/ yi'de/ mo dhali apo/ mony'cesh mo be.

⁹ Wakan aha/ yakina mo eya man'doyu gwo mo dhali tor a'di gwo mo mmoci aha/ ari yit jin 'kuçu is mo. Dhali a'di ki o aha/ gwo mo ki: Budhi a'di ma dhali 'kayi a'di ma. A'di midi ka/aka/ gom bwam pini mo, hili a'di midi ca'bki dhel dhel me'da dham mo e 'twam pini mo be.

¹⁰ Dhali aha/ bu'thkina ari yit jin 'kuçu is mo 'peni me'd ma man'doyu gwo mo dhali 'ka a'di mo. A'di ca'bki'd ki dhel dhel me'da dham mo e 'twam pem mo. Hili ki aha/ 'kakina a'di mo tani bwam pem ca'bki'd ki nah nah mo.

¹¹ Dhali aha/ torkunu gwo mo ki: /E mini mii ci gwo is mo gom 'kwani ka ris mo dhali gom kal gi 'kwaniny'cesh mo dhali gom 'kwani kun 'kona 'twa/ ki she/ ki she/ mo dhali gom imalik mo be.

11

'Kwani Su/ kun Ta Iman/o Gwo mo

¹ Dhali yan'ko'd aha/ cikunuwa cwahan mo jin wana e ki cwan kol 'kus mo mmobar to mo, dhali aha/ torkunu gwo mo ki: Cuyi mis mo dhali bari gu'b gi mondheleladhelel ma Arum'gimis mo dhali mo ma gwa'a/ jin miinuwa basa 'cesh mo dhali uni gwansan kun lun'kini cine/ mo.

² Hili dhalku/ ki bar mo ma gon jin di'd ka pije/ mo 'peni gu'b gi mondheleladhelel mo. Dhalki a'di 'pen mo, haali/ a'di cikunu 'kwani' kal gi mony'cesh mo, dhali uni mini yap mom'pen'kuman bampa/ yan jin kogu mo ki sho'k mo ka ppe iss* 'kwanimpa su/ i'ce'dka su/ mo.

³ Dhali aha/ mina ci uni kun 'koni su/, uni gun ta iman/o gwom pem, mom'bi'th mo mmoci gwo is mo goma tee kun 'kon ma alipi† 'de/ mo jin 'ce'dki'd ka iss 'kwanimpa ka 'kume'd 'dap 'twa/ ka kwara mo, mmohi'th burri'nye/ ma shawaal kun ta kun 'thi/ mo.

⁴ Uni gwansan ta cwa setuun isu/ mo dhali alamba/ kun ta tir'kina/ isu/ mo, uni gun doshkini bwambori Tapa gi mony'cesh mo.

* 11:2 itneen wa arba/iin † 11:3 alip wa miyyateen wa sittin

⁵ Dhali wakki/ jan tal 'deŋ kamu/ midi 'taki shi/ uni mo tani o'd minu wolu/ 'peni 'twam buni mo dhali shwa uni gun ta 'kup buni ki 'ci'd'da/ mo. Wakki/ jan tal 'deŋ kamu/ midi shi/ uni is mo tani a'di 'dapa'dap kan ki a'di minu 'kosh mo.

⁶ Uni ta gi mom 'bi'th mmomu'th momis 'twa/ mo ka shoka kamu/ midi diki pir ari yi'de/ a'cesh ki me'da tee gwansan jin 'kona uni mmoçi gwom buni is mo, dhali uni ta gi mom 'bi'th apo/ yi'de/ mo mmowar uni mmota abas mo dhali mmodor mony'cesh mo ka ris isa nyor kun woci 'kwani is she/ mo me'da ka ris me'd jin mina bwa o uni mo mmomii kan mo.

⁷ Dhali ki uni mini 'baar gwom buni jin ona uni is mo tani adhan to/e yan jin midi shinu 'peni jis jin dar gi 'pemen mo tani midi mii mo/as apo/ uni mo dhali pi uni e mo dhali 'kosh uni mo be.

⁸ Dhali bungwar is buni kun wukin mo tani mini ishi bway tur kun iinu mo e dhan 'penkuman bampa/ mo a'di jin yuku gway ki, a'di jin 'be'dki gwo ki 'pemen kamu/ mo, ki a'di jin ta Pan Saduum mo dhali Pam Masir mo e mo jin 'koshkunu Tapam buni ki cwany'ciḥan dhul mo.

⁹ Haali/ ka cim kwara dhali ka nusa po/ mo tani 'kwaniŋ gwas 'peni 'kwanin tiya mo dhali 'peni awaka tiya mo dhali 'peni 'kwani kun 'kona 'twa/ ki she/ ki she/ mo dhali 'peni kala tiya mo uni hilkina hil ka 'thime/ mo gom bungwar is buni kun wukin mo dhali ush ki 'tash mo mmodhal uni bway mo ki uni minu kan ijis jwa mo.

¹⁰ Dhali uni gwansan kun 'kon e mony'cesh mo tani uni mina bwa i'kunya'kuny apo/ uni mo dhali mii miim 'penkapan mo dhali ci to ki me'da ka rem 'kup mo haali/ imançi gwo su/ gwansan, uni 'koshki 'kwani is ka nyor ki to jin wo'cki 'kwani is she/ mo, uni kun 'kon e mony'cesh mo.

¹¹ Hili 'ko'da cim kwara dhali ka nus mo tani shi/ ir jin di ki e 'peni Arumgimis cicki'd e uni mo dhali uni doshkin ki sho'k buni mo, dhali adhan monko/ is bitkin apo/ uni gwansan kun parki uni e mo be.

¹² Dhali yan'ko'd uni cikki dhan 'twa/ jin caaca 'peni momis mo mmo/o uni gwo mo ki: Iiyu/ ise mo. Dhali e jis/e gi unim buni kun ta 'kup gi uni mo tani uni iiki bway momis mo e bwaarak mo.

¹³ Dhali ka tente/ caan mo tani adhan mony'cesh yikinki is mo dhali 'ban gi 'penkuman bampa/ jin 'kon ma po/i 'kume'd mo tani ta'kkin mo be. Dhali 'kwani alaapi pesu/ mo uni 'koshkunu ki mony'cesh jin yikinki is mo, dhali kun tiya uni deekin ki dee jin shiyi'd mo dhali ci monyca ka Arumgimis jin ta ji gi momis mo be.

¹⁴ Dhali awayyi jin 'kon ma po/i su/ mo tani peki'd mo be. Dhali hili mo mo ma, awayyi jin 'kon ma po/i kwara mo tani 'dishkina 'twa/ mmo'pu/du/ mo be.

Apoome/ jin 'Kon ma Po/i Pesu/ mo

¹⁵ Dhali yan'ko'd aman'doyu gwo jin 'kon ma po/i pesu/ mo tani dhalki'da poomem piti me'd mo be, dhala dhan 'twa/ kun caaca gwoyunu/ mo 'peni momis mo mmo/oyu/ gwo mo ki: 'Penkuman bampa/ gi mony'cesh mo tani a'di warki'd ki 'penkuman bampa/ gi Tapam bana mo dhala Kristhos jin ta jim piti mo, dhali a'di midi ta Tapa gom ki sule/ mo dhali ki sule/ mo be.

¹⁶ Dhali 'kwaniŋ gwanyjaka/ kun 'koni iss 'de/ mo mmo'ce'dka doŋon mo uni kun 'koki 'pena kursim buni ibwambor ma Arumgimis mo tani ta'kki jis/ em buni a'cesh mo dhali luŋa Arumgimis mo

¹⁷ mmo/o gwo mo ki:

Aman cikina /e mom'bor bwa i is mo, Tapa Arumgimis jin Eka/ Ek mo, /e jin din mo dhali /e jin dikin mo

haali/ /e bu'thki dhan mom'bi'th pini mo dhali tel mii 'pen mo mmota tapa mo.

18 Dhan kal gi 'kwaniny'cesh burushkina mo isho'k mo, hili anyor pini jin toru gwon dwall 'twa/a 'cesh mo tani a'di pu'dki'd mo dhali mo gom uni kun wukin mo ki uni minu dwall gwo mo dhali mo jin mina /e ci cinjinam pini to mo kun ish kumma/ mo, uni gun ta imanci gwo mo dhali uni kun dhunu ki she/ ki dhelel dhelel mo, dhali uni gwansan kun ko/ki gway pini mo, nyakki uni kun gwa'dan mo dhali uni kun cakin mo, dhali mo jin 'ce'duwa 'ce'd sho'k gom uni kun ta iman'ce'd mony'cesh sho'k mo be.

19 Dhali yan'ko'd gu'b gi mondheleladhelel ma Arungimis e momis mo tani a'di ka'dkunu 'twa/ mo dhala Sanduuk jin karu gwom piti jin gamu me'd mo tani a'di parkunu e mo e gu'b gi mondheleladhelel piti mo. Dhali awara sho'k su'kki'd ki dhwa/a'd dhwa/a'd mo dhali mo alki is mo dhali agur gur ma sho'k mo dhali mony'cesh yikinki is mo dhali adhan kuluny ma wasa/ ta'kkin mo.

12

A'bom dhali Tasha/ mo

1 Dhali adhan tonj kamu/ jin ta to mer piki'd mo e momis mo jin ta jamas ma 'bom jin hi'thki'da tente/ mo dhali appe e 'basha'k ma yim mo dhali e 'kup ma yim mo tani tonj'kup hi'thkin ma yim jin 'kon ma culi 'kume'd i'ce'dka su/ mo.

2 Dhali ayim bwaaki'da 'ci mo dhali ayim ki 'ther cuuwa/ mo gom isa nyora dho'th ma yim mo mmo'pe'dkina a'di she/ mo goma dho'th jin mina a'di idho'th mo.

3 Dhali adhan to mera kamu/ dok/e piki'd mo e momis mo. Hili mo mo ma, adhan tasham 'per taki'd gi 'kupi pesu/ mo dhali jin kalki ce 'kupi 'kume'd mo dhali tonj'kup ma malik kun 'koni pesu/ kun 'tamkunu mo e 'kup piti mo.

4 Dhali thin piti 'cwariki 'ban ma cul jin 'kon ma po/i kwara mo 'peni momis mo dhali ras uni ka 'cesh mo. Dhali tasha/ doshki'di bwambor ma 'bom mo a'di jin 'disha 'twa/ mo mmodhodha 'ci mo ki a'di mididi 'taki losa 'ci ma yim mo ka yim mididi 'taki dho'th a'di mo.

5 Dhali ayim dho'thki'da 'ci jin ta'da gwas mo, a'din 'de/ yan jin mididi ta tapa apo/ aris kal gi 'kwaniny'cesh mo ki cwan kol 'kus jin ta tonjkuthu'd mo, hili a'ci ma yim a'di bu'thkunu mo eya Arungimis mo dhali eya kursim piti mo.

6 Dhali a'bom yaki'da njwaca/ mo e mombwaasho mo, e mo jin thosonkin ma Arungimis goma yim mo, e mo jin minu thip a'di goma tee ma alipi 'de/ mo jin 'ce'dki'd ka iss 'kwanimpa ka 'kume'd mo ny'ce'dka kwara mo.

7 Dhali mo/as cuki mis mo e momis mo. Mika/iil dhali iman'doyu gwom piti askin apo/ tasha/ mo dhali tasha/ si'da/ nyakki/ iman'doyu gwonthus piti mo askina as mo.

8 Hili uni pikunu e mo dhali monjakamu/ di'd gom uni e momisa?

9 Dhali adhan tasha/ a'di bitkunu ka 'cesh mo, dhan tashan dhamo/ yin mo, a'di jin yukkunu gway ki Tapa ma Ruma 'Cesh mo dhali ka Setaan mo, a'di jin ta'da manhe'k 'kwaniny'cesh e 'baar mo - a'di bitkunu mo ka 'cesh mo dhali iman'doyu gwonthus piti si'da/ mo, uni ta'kkunu ka 'cesh nyakki a'di mo.

10 Dhali aha/ cikina dhan 'twa/ 'peni momis mo mmo/ o gwo mo ki: Shwane/ mowoth dhali mom'bi'th dhali 'penjuman bampa/ ma Arungimis bana mo dhali moshirr jin ta ji ma Krighthos piti mo tani pu'dkin mo, haali/ amanyera wak bana is ki gway mo, a'di bitkunu ka 'cesh mo, a'di jin yerki

uni is ki gway mo isa yempa/ ki montee ilu/ mo dhali ki mon'thiny ilu/ mo ibwambor ma Arumgimis bana mo.

¹¹ Dhali uni piki a'di e mo ka bas gi Ari Ka'bal mo dhali ki gwontor buni kun tora uni mo, haali/ uni yisa enki mon'koki/em buniya. Isi kani uni ci uni mmowu mo.

¹² Kunyi bwa mo ma, ayy um 'kwani kun 'koni momis mo dhali um gwattan kun 'kokin e a'di mo. Hili wayyi e um mo, ayy mony'cesh dhali kumma/ yi'de/ mo haali/ tapa ma ruma 'cesh pu'dki'd e um mo ka dhana nyor jin shi/ashi/ mo haali/ a'di mishki'da tentem piti 'disha'dish mo.

¹³ Dhali ki tasha/ parki mii yan e mo ki a'di bitkunu ka 'cesh mo tani a'di nalki'da 'bom mo, a'di jin dho'thki'da 'cingwath mo be.

¹⁴ Hili a'bom cikunuwa biny jeshe/ isu/ mo, uni kun ta ku ma dhana wulu/ mo ka yim midi 'taki pe mo 'peni tasha/ mo e mombwaasho mo e mo jin minu thipa yim mo ki mo mo dhali ki mo me'd ka ris mo dhali ki mo ka nus mo.

¹⁵ Dhali tasha/ gacki yi'de/ 'peni 'twam piti me'd kumma/ yi'de/ mo 'ko'da 'bom mo mmodhidha yim sho'k ka dhana gannu/ yi'de/ mo.

¹⁶ Hili mony'cesh pu'dki'd mo dhali wo'ha yim mo dhali mony'cesh ka'dki 'twam piti mo dhali los yi'de/ jin gackina tasha/ 'peni 'twam piti mo be.

¹⁷ Yan'ko'd dok/e tasha/ shin ma nyori me'd mo goma 'bom mo dhali yaki'd mo mmomii mo/as apo/ ushi uci ma yim mo kun 'kokin mo, uni gwansan kun dhuki gwonkan ma Arumgimis kun 'kwarkunu mo dhali kun ta iman/o gwo goma Yesus mo. Dhali a'di doshki'd apowa si'b gi kumma/ yi'de/ mo be.

13

To/e kun 'Koni Su/ mo

¹ Dhali aha/ parkina to/e e mo jin cuki'd 'peni kumma/ yi'de/ mo jin 'kana ce 'kupi 'kume'd mo dhali ta gi 'kupi pesu/ mo dhali hi'th ton'kup ma malik kun 'koni 'kume'd kun 'tamkunuwa po/ cem piti mo dhali gway jin ta gi 'pemen jin walu gwo sor mo karkunu mo apo/ 'kup piti mo.

² Dhali to/e caan jin parkika/ e mo tani a'di wana e ka kwa mo, dhali sho'k piti wana e ki jin tombwaasho mo jin waka mann mo, dhali 'twam piti waki 'twa/ ma dhop mo. Dhali e a'di mo tani tasha/ ciki mom'bi'th ki a'di mo dhali akursim piti mo dhali adhan moshirr mo be.

³ Kup pitin kamu/ 'de/ wana e ki 'kup jin ta'da wambor mo jin ta jama/ mo, hili 'kup piti jin ta'da wambor jin ta jama/ mo tani waçkunu mo dhali aris 'kwani gi mony'ceshi 'baar mo bathki dhan to/e yan isho'k mo mmomer mo.

⁴ 'Kwaniny'cesh lunji tasha/ mo haali/ a'di ciki moshirr piti e to/e mo dhali uni lunji to/e mo mmo/o gwo mo ki: Kaja a'di iwaki/ Eeeyee, /e jin ta to/e mo, dhali aja a'di imidi mish asa po/ a'di mo?

⁵ Dhali to/e a'di cikunu 'twa/ mo mmobah dhan gwo jin eka/ ek mo dhali gwo jin waluwa sor mo, dhali a'di dhalkunu bway mo mmopi moshirr piti ka ppe 'kupi issu/ i'ce'dka su/ mo.

⁶ A'di ka'dki 'twam piti mo mmobah gwo sora powa Arumgimis mo dhali mmowal gwo sor mo gom gway piti mo dhali gom monyca'b piti mo, a'di jin ta uni gwansan kun 'kokin e momis mo.

⁷ A'di si'da/ dhalkunu bway mo mmomii mo/as apo/ uni kun dhunu ki she/ ki dhelel dhelel mo dhali pi uni e mo. Dhali moshirr cikunu a'di apo/ 'kwani kun 'kon ma wak e ki she/ ki she/ mo dhali apo/ 'kwani mo dhali 'kwani kun wal 'twa/ ki she/ ki she/ mo dhali kal gi 'kwaniny'cesh mo,

⁸ dhali aris uni gun 'koni mony'cesh yan mo tani uni mini lunj a'di mo, aris uni ka 'dete/ 'dete/ mo kun 'konuki 'kwar gway buni ntwa/a/ ki mony'cesh

yansan 'konuki ka'b mo eya warka/ gi mondiki/e gi Ari Ka'bal jin 'koshkunu mo.

⁹ Waḱki/ a'diyin jin ta'd gi gu'ban'ce mo mmociḱ gwo mo tani dhalki a'di ciḱ gwo mo:

¹⁰ Waḱki/ jan tal 'deḱ kamu/ minu bu'th mmota ciḱkina/ mo tani e mo jin budhu a'di mo mmota ciḱkina/ mo tani a'di iyakina a'di nycine/ mo be.

Waḱki/ jan tal 'deḱ kamu/ 'koshki'da 'kosh ki gandala turga/ mo tani ki gandala turga/ mo tani a'di iminu mii 'kosh ki a'di mo be.

Hili ayuk jin yuku mmo'dim 'kup a'dihe/ mo dhali monḱam gwo is mo jin ta ji gi uni gun dhunu ki she/ ki dhelel dhelel mo.

¹¹ Dhali yan'ko'd aha/ parkina to/eḱ kamu/ e mo, a'di jin cuki mis mo 'peni mony'cesh mo. A'di ta'd gi ce isu/ mo jin wana e ki ji ari ka'bal mo dhali a'di oki gwo me'd tasha/ mo.

¹² A'di piki mii gi moshirri 'baar mo jin ta jin to/en t'wa/a/ mo e buḱ'kus piti mo, dhali a'di ki tu'c mony'cesh mo dhali 'kwani kun 'koni a'di mo mmoluḱ to/e jin t'wa/a/ mo, a'di jin takina 'kupa wambor gom jama/ jin waḱkunu a'di mo.

¹³ A'di miiki dhan jamas mii mo, isi kani a'di uḱki o'd mo mmothulu/ ka 'cesh 'peni momis mo apo/ mony'cesh mo e bwambori jis/eḱ 'kwani mo be.

¹⁴ Dhali ki dhan jamas mii jin dhalkunu a'di bway mo mmomii mo e buḱ'kus to/e yansan mo tani a'di he'kki 'kwani gwansan e mo, uni kun 'kokin apo/ mony'cesh mo. A'di ki us uni is ki mii mo mmo/uk jamas gi to/e mo, a'di jin takina 'kupa wambor ki gandala turga/ mo jin 'koshki a'di mo dhali a'di di'd ki e mo naskina/.

¹⁵ Dhali a'di dhalkunu bway mo mmoci shi/ir ki jamas gi to/e jin uḱu mo, wakan ki jamas to/e jin uḱu mo midi 'taki mish isi 'twa/ wali, dhali mmorak uni gwansan kun 'koki luḱ jamas to/e jin uḱu mo ki uni minu 'kosh mo be.

¹⁶ A'di si'da/ rakki'da ris 'kwani 'baar mo 'peni uni gun gwa'dan mo dhali uni kun cakin mo, 'peni uni gun ta pa ki pa mo dhali uni kun hatha'ko'd ki ha'th mo, 'peni uni kun 'kon ki 'kus mo dhali uni gun yolu mo ki yol ciḱkina/ mo, mmo'kwar jamas buni e me'da bim poros mo walla e buyem buni mo,

¹⁷ wakan ki wathin tal 'deḱ kamu/ midi mol yol mo walla yol to mo isi ciki/ a'di midi mii ta gi jamas mo, a'di jin ta gway gi to/e mo walla mondeḱ gi gway piti e mo be.

¹⁸ Mii yansan a'di 'theḱu gwo mo gom moyuk mo. Dhali dhalki a'di jin mishi gwo 'ban mo tani nyith mondeḱ gi gway gi to/e yan mo haali/ a'di ta mondeḱ gi gway gi wathi/ en'thi/ mo. Mondeḱ piti ta'da iss* 'kwanimpa i/ iss 'de/ i' ce'dki iss 'kwanimpa i'kume'd i' ce'dki issi kwara i' ce'dka pe'de/ apo/ mo.

14

Gway jin Yuḱa 'Kwani kun 'Koni Alaapi Iss 'Kwanimpa Ipesu/ mo I'ce'dka Doḱon Apo/ mo

¹ Yan'ko'd aha/ parkina mo e mo dhali hili mo mo ma, e 'Kuwosh ma Sihyuun mo tani Ari Ka'bal doshki'd mo dhali nyakki a'di mo ka alaapi iss 'kwanimpa ipesu/ mo i' ce'dka doḱon mo, uni gun tan gi gway piti mo dhali gway ma Babam piti jin 'kwarkunu e buyem buni mo be.

² Dhali aha/ ciḱkina 'twa/ 'peni momis mo mmowa e ka dhan yi'de/ jin gwokina is ka ris mo dhali mmowa e ki montor ma sho'k jin alki is mo. Dhali

* 13:18 sutḱumiya wa siḱta wa siḱtiin

'twa/ jin ciḱka/ mo tani wana e ki ko ma dhenḱdhenye/ mo kun pikina imanpi uni mo.

³ Dhali uni yukki gway jin ta gway this mo ibwambor ma ḱursi ma Arungimis mo dhali ibwambori to/e kun 'koni doḱon kun 'kon ki e mo dhali ibwambori 'kwanin gwanyjaka/ mo. Wathin ṭal 'deḱ kamu/ yisa mido mish gway yansan da/ar yisa, hili isi ciki/ uni gun tana alaapi iss 'kwanimpa ipesu/ mo i'ce'dka doḱon mo, uni gun wankunu 'ba/ mo 'peni mony'cesh yansan mo be.

⁴ A'di ta mii a'dihe/ mo uni gun 'koki nyo/ buḱwar is buni ki up mo, haali/ uni 'kokin kan 'pena bwanyara/ ma dho'th jin dhodhu uni mo. A'di ta mii a'dihe/ mo uni gun baḱki Ari Ka'bal mo e mo yin jin yakina a'di mo. Uni gwansan iwankunu 'ba/ mo 'peni aris mii kun miina 'kwaniny'cesh mo mmota maman kun t'wa/a/ goma Arungimis mo dhali gom Ari Ka'bal mo.

⁵ Dhali e 'twam buni mo tani gwo ma ṭora kamu/ 'konuki gam mo haali/ uni dar gi monyo/o'd mo be.

Gwo jin Hashina Iman'doyu Gwo kun 'Koni Kwara mo

⁶ Yan'ko'd aha/ parkina man'doyu gwoḱ kamu/ e mo, a'di jin peki'd isi bwaman momis mo, a'di jin ta gi gwom 'borga/ jin di'd ki e ki sule/ mo mmobah a'di mo e uni gwansan kun 'kon e mony'cesh mo, eya ris kal gi 'kwaniny'ceshi 'baar mo dhali e 'kwani kun 'kon ma waḱ e ki she/ mo dhali e 'kwani kun wal 'twan tiya mo dhali e 'kwani kun ta 'kwanin tiya mo.

⁷ Dhali a'di ki o gwo ka dhan 'twa/ jin caaca mo ki: Koki Arungimis mo dhali ci a'di monyca mo haali/ mo pu'dki'd mo gom gwon dwall piti jin toru gwo 'twa/a 'cesh mo, dhali luḱi a'di mo, a'di jin uḱki momis mo dhali mony'cesh mo dhali ḱumma/ yi'de/ mo dhali yi'de/ kun kasha e ki kash mo.

⁸ Dhali aman'doyu gwoḱ kamu/ mo, a'di jin 'kon ma po/i su/ mo, baḱki a'di isho'k mo mmo/o gwo mo ki: Pam Baabil biṭi'doo. Pam Baabil biṭi'doo. A'di jin caaca mo. Ayim a'di jin rakki aris kal gi 'kwaniny'cesh mmopi yimana mura'th jin ḱa/u ki ḱah ḱah mo jin ta e ma yim jin karkina a'di ki 'thir 'thir mo goma ḱanṭhi/ jin 'kakin ma yim mo.

⁹ Dhali aman'doyu gwoḱ kamu/ mo, a'di jin 'kon ma po/i kwara mo, baḱki a'di isho'k mo mmo/o gwo ka dhan 'twa/ jin caaca mo ki: Wakki/ wathin ṭal 'deḱ kamu/ mido luḱ to/e yan mo dhali jamas piti jin uḱu mo, dhali bu'th moḱ'kwar jin cinu jamas e buyem piti mo walla e me'd piti mo tani

¹⁰ a'di si'da/ mido pi yimana mura'th jin ḱa/u ki ḱah ḱah jin ta'da nyor ma Arungimis mo jin minu wolu/ jin 'konuki ce e ka ḱubbaaya ma nyor piti mo, dhali a'di minu ci isa nyor ki me'd mo jin mido wo'c a'di is she/ mo ki o'd mo dhali to jin si'du mo si'da/, a'di jin di'di buḱ'kus gi iman'doyu gwom piti kun ḱogu mo dhali e buḱ'kus gi Ari Ka'bal mo.

¹¹ Dhali aku'd gi moḱ'kosh is buni ka nyor jin mido wo'c is she/ mo tani uluḱi'd ki uluḱ uluḱ mo ki sule/ sule/ mo dhali ki sule/ mo, dhali kun mini dar gi mosi/is mo ki montee ilu/ mo dhali ki mon'thiny ilu/ mo, uni gwansan uni ta uni gun luḱi to/e yan mo dhali jamas piti jin uḱu mo dhali a'diyin jin mido bu'th moḱ'kwar gi gway piti mo.

¹² Hili ayuḱ jin yuḱu mmo'dim 'kup a'dihe/ mo gom uni kun dhunu ki she/ ki dhelel dhelel mo, uni gwansan kun dhuki gwoḱkan ma Arungimis jin 'kwarkunu mo dhali moḱgam gwo is ma Yesu mo be.

¹³ Dhali aha/ ciḱkina 'twa/ 'peni momis mo mmo/o gwo mo ki: 'Kwari gwo yansan mo ma. Mom'bor mii gom uni kun wukin mo, uni gun wun e Tapa mo 'peni shwane/ ki sule/ mo. Mom'bor mii ka jin gana/ mo, me'd gwo jin ona Shi/in mo, ki uni mini 'taki si/is mo 'peni mii ma ṭu'c buni mo haali/ miin tom buni baḱki uni isho'k mo be.

Bwam Mondhe'd gi Mony'cesh mo

¹⁴ Dhali yan'ko'd aha/ parkina mo e mo, dhali hili mo mo ma, arak jin ta gi kush ki bany bany mo dhali a'di jin ca'bki'da powa rak mo tani wana e ki ya/ gi 'kwani mo, mmota gi ton'kup 'dolkon gana/ mo e 'kup piti mo dhali anyertha/ jin ca'bki nar nar e me'd piti mo.

¹⁵ Dhali aman'doyu gwoŋ kamu/ pu'dki'd ka pije/ dok/ e mo 'peni gu'b gi mondheleladhelel mo mmoyuka yuk ki dhan 'twa/ jin caaca e a'di jin ca'bki'da powa rak mo mmo/o gwo mo ki: Kari anyertham pini mme'd mo dhali 'cithi/ to mo haali/ mo pu'dki'd jin minu 'cith to mo, haali/ bwam mondhe'd gi 'kwaniny'cesh yansan mo tani a'di iski'd mo ki is gana/ mo.

¹⁶ Wakan a'di jin ca'bki'd eya powa rak mo tani a'di ishki'da bor ga 'cesh ka nyertham piti apo/ mony'cesh mo dhali mony'cesh a'di 'cithkunu to mo be.

¹⁷ Dhali aman'doyu gwoŋ kamu/ pu'dki'd ka pije/ mo 'peni gu'b gi mondheleladhelel e momis mo, dhali a'di si'da/ ta'd ga nyertha/ jin ca'bki nar nar mo.

¹⁸ Dhali yan'ko'd aman'doyu gwoŋ kamu/ pu'dki'd ka pije/ mo 'peni mo ma gwata/ jin miinuwa bas mo, a'di jin ta'da man'doyu gwo jin ta gi mom'bi'th apo/ o'd mo, dhali a'di yukki'da yuk ki dhan 'twa/ jin caaca mo e a'di jin ta'd ga nyertha/ jin ca'bki nar nar mo mmo/o gwo mo ki: Kari anyertham pini mo dhali gori maman 'peni cwalman gi mony'cesh mo haali/ amura'th piti iskin ki is gana/ mo.

¹⁹ Wakan aman'doyu gwo a'di ishki'da bor ga 'cesh ka nyertham piti mo apo/ mony'cesh mo dhali gor maman to ma 'cesh mo dhali ta'k a'di eya dhan to jin nyu/u yimana mura'th mo, a'di jin ta'da nyor ma Arumgimis jin 'batha'ba'th mo.

²⁰ Dhali mo jin nyu/u amurathi cine/ mo tani yapkunu ki sho'k mo ka pije/ 'peni 'perkuman bampa/ mo dhali abas guski'd 'peni mo jin nyu/u yimana mura'th mo dhali 'kul ma bas caki'd mo mmogama lijaam gi 'twa/ gi shumarum mo, gom 'kus piti jin karkina a'di mo mmogus mo ta'da amyaal iss 'kwanimpa i'kume'd mo be.

15*Iman'doyu Gwo kun Ta gi Mo gi Isa Nyor kun Wo'cki 'Kwani Is She/ mo kun Ta kun 'Ko'd mo*

¹ Dhali yan'ko'd aha/ parkina to mera kamu/ e mo e momis mo, dhan to mer jin caaca mo, iman'doyu gwo kun 'koni pesu/ mo nyakki isa nyor jin woci 'kwani is she/ mo kun 'koni pesu/ mo, uni kun ta kun 'ko'd mo, haali/ ki uni mo tani anyor ma Arumgimis jin 'batha'ba'th mo tani a'di dak'kunu 'kup mo be.

² Dhali aha/ parkina ton kamu/ e mo jin piki'd e kumma/ yi'de/ mo jin mii'd ki 'bera/ 'bera/ mo me'da gasaas mo jin cenu e ki o'd mo, dhali uni gwansan kun piki to/e e mo jin uku mo dhali jamas piti mo dhali mondenj gi gway piti mo tani doshkin i'ko'd gwar gi kumma/ yi'de/ jin mii'd ki 'bera/ 'bera/ mo me'da gasaas mo ka dhen'dhenye/ ma Arumgimis ime'd buni mo be.

³ Dhali uni yukki gway ma Musa mo, a'di jin ta cinj'kina/ ma Arumgimis mo, dhali gway gi Ari Ka'bal mo mmo/o gwo mo ki:

Miin tom pini uni caaca mo dhali to mer mo,

ayy, Tapa Arumgimis jin Eka/ Ek mo.

Miin pini ta kun kar/e mo dhali kun gana/ mo,

ayy, Malik jin ta ji gi she/ yil mo.

⁴ Kaja a'di imidi diki ko/ /e mo dhali kar gway pini ki ca mo, ayy Tapa? Haali/ /e 'denj gana/ mo tani ita a'di jin kogu mo.

Aris kal gi 'kwaniny'ceshi 'baar mo mini iiyu/ mo dhali luŋ /e mo haali/ gwon dwall pini jin toru gwo 'twa/a 'cesh mo tani a'di torkunu eya tente/ mo.

⁵ 'Ko'di mii yansan mo tani aha/ hilkina mo mo dhali gu'b gi mondheleladhelel jin ta gu'b burrinye/ jin onu gwo mo e momis mo tani a'di ka'dkunu 'twa/ mo,

⁶ dhali 'peni gu'b gi mondheleladhelel mo tani iman'doyu gwo 'koni pesu/ mo, uni pu'dkin mo ki 'ba'th kun 'koni pesu/ ime'd mo kun wo'cki 'kwani is she/ mo mmoshumki burrinyen tur kun dheleladhelel mo, kun kushakush kun dhinya/ e ki dhiny mo dhali uni ki hi'th waçkan 'dolkon gana/ mo e empa'd buni mo.

⁷ Dhali to/e kun 'ko ki e mo, jan 'de/ 'peni tiyan doŋon gwansan mo tani ciki iman'doyu gwo kun 'koni pesu/ toŋ'kul bwan 'dolkon gana/ mo kun 'tu'dkunu mo ki piny piny ka nyor ma Arumgimis jin 'batha'ba'th mo, a'di jin di'd ki e ki sule/ mo dhali ki sule/ mo

⁸ dhali gu'b gi mondheleladhelel mo a'di 'tu'dkunu mo ki piny piny ka ku'd gi monyca 'peni Arumgimis mo dhali 'peni mom'bi'th piti mo, dhali jan tal deŋ kamu/ yisa mishi ciç gu'b gi mondheleladhelel mo ntagi 'ba'th kun 'kon ma po/i pesu/ kun woci 'kwani is she/ mo mina iman'doyu gwo gwansan kun 'koni pesu/ idak' kup mo be.

16

Aris Toŋ'kul Bwa ma Nyor mo kun 'Batha'ba'th mo

¹ Dhali yan'ko'd aha/ ciçkina dhan 'twa/ jin caaca mo 'peni gu'b gi mondheleladhelel mo mmotor iman'doyu gwo kun 'koni pesu/ gwo mo ki: iiku/ mo dhali gaça nyor ma Arumgimis jin 'batha'ba'th ki shen 'kup mo e mony'cesh mo 'peni toŋ'kul bwa kun 'koni pesu/ mo.

² Wakan aman'doyu gwo jin di'di twa/a/ mo tani a'di yaki'd mo dhali gaça nyor piti 'peni toŋ'kul bwa mo apo/ mony'cesh mo, dhali jama/ kun 'then mo ki 'then mo dhali kun bulabul mo pu'dkina po/ 'kwani mo uni gun kalki gway gi to/e yan mo dhali kun luŋki jamas piti jin uku mo be.

³ Dhali aman'doyu gwo jin 'kon ma po/i su/ mo gaçki'da nyor piti 'peni toŋ'kul bwa mo apo/ kumma/ yi'de/ mo dhali mo wakina e ka bas gi wathi/ jin wuki'd mo, dhali aris to 'baar mo kun 'kon ki e mo tani wukin mo, uni gun 'kokin e kumma/ yi'de/ mo be.

⁴ Dhali aman'doyu gwo jin 'kon ma po/i kwara mo tani gaçki'da nyor piti 'peni toŋ'kul bwa mo apo/ yi'de/ kun sokin mo dhali apo/ yi'de/ kun kasha e ki kash mo, dhali uni warkin ka bas mo be.

⁵ Dhali aha/ ciçkina man'doyu gwo gi yi'de/ mmo/o gwo mo ki: Gwon dwall pini gwansan kun torkina /e gwo 'twa/a 'cesh mo tani uni ta kuŋ kar/e mo, /e jin ta a'di jin din mo dhali jin diki'd mo, ayy /En 'De/ jin Kogu mo.

⁶ Haali/ 'kwani gaçkina bas gi unim pini kun dhunu ki she/ ki dhelel dhelel mo dhali imançi gwo mo, dhali /e ciki uni abas mmopi mo. A'di ta tom buni jin 'dapa 'dap mo be.

⁷ Dhali aha/ ciçkina gwata/ gi mo ma bas 'therki ko mo mmo/o gwo mo ki: Nye, Tapa Arumgimis jin Eka/ Ek mo, gwon dwall pini kun torkina /e gwo 'twa/a 'cesh mo tani uni ta uniy gana/ mo dhali kuŋ kar/e mo.

8 Dhali aman'doyu gwo jin 'kon ma po/i doṅon mo tani gački'da nyor piti 'peni toŋ'kul bwa mo apowa tente/ mo dhali a'di dhalkunu bway mo mmoshil 'kwani is ki o'd jin 'batha'ba'th mo.

9 'Kwani uni shilkunu is ki mom'batha'd jin ca'bki wur wur mo dhali uni jeeki gway ma Arumgimis mo, a'di jin ta gi mom'bi'th mo apo/ mom'ba'th gwansan kun wo'cki 'kwani is she/ mo, dhali uni 'koki rica du is mo dhali ci a'di monyca mo.

10 Dhali aman'doyu gwo jin 'kon ma po/i mudhe'd mo tani gački'da nyor piti 'peni toŋ'kul bwa mo apowa kursi gi to/e mo dhali 'penkuman bampam piti taki mondhurumi'd mo. Dhali 'kwani 'kali'thkina le'd buni ki she/ mo e isa nyor buni jin 'pe'dkina uni she/ mo,

11 dhali jee Arumgimis jin ta ji gi momis mo gom isa nyor buni mo dhali jamam buni mo dhali uni 'koki rica du is 'peni miim buni mo be.

12 Dhali aman'doyu gwo jin 'kon ma po/i pe'de/ mo tani gački'da nyor piti 'peni toŋ'kul bwa mo apo/ dhan kumma/ yi'de/ jin yuku gway ka Elpuraat mo, dhali yi'dem piti ku'thkunu mo mmothoson bway mo goma ris imalik kun 'koni mom'pesho'k mo.

13 Dhali aha/ parkina to jin gački'd 'peni 'twan tasha/ e mo dhali 'peni 'twa/ gi to/e mo dhali 'peni 'twa/ ma manci gwonthus mo, to kun 'kona e ikwara mo kun 'thena'then mo dhali kun bulabul mo 'peni shi/in piti jin wana e ki ji ma 'dwa/ mo

14 haali/ uni tan ga ruma 'cesh mo, mmo'kup momer mo, uni gun hakaski mo ka bor mo e imalik mo kun 'koni mony'ceshi 'baar mo, mmotul uni 'kup mo goma dhana mee ka tee jin caaca ma Arumgimis jin Eka/ Ek mo.

15 (Hili mo mo ma. Aha/ mina pu'dku/ mo mmowa e ki wathin 'di/ mo. Mom'bor mii gom a'di jin di'd ki e i'kup mo mmokar burrinyem piti mo ki a'di midi 'taki diki ya is 'te/ mo dhali ki a'di minu 'koki hil ki laŋ laŋ mo.)

16 Dhali uni tulki uni is mo mmonta' de/ mo e mo jin yuku gway ki 'twaŋ 'Kwani Ibraniyiin ka Harmajadduun mo.

17 Dhali aman'doyu gwo jin 'kon ma po/i pesu/ mo tani gački'da nyor piti mo 'peni toŋ'kul bwa mo e embul gi momis mo, dhali adhan 'twa/ pu'dki'd ka piŋe/ mo 'peni gu'b gi mondheleladhelel mo dhali 'pena kursi ma malik mo mmo'o gwo mo ki: A'di miikunu mo be.

18 Dhali awara sho'k su'kki'd ki dhwa/a'd dhwa/a'd mo dhali dhan mo alki is mo dhali kontor ma sho'k miiki'da gur gur mo dhali adhan mony'cesh yikinki is mo, ji gi wakansan yisa mishkunu yisa 'thissa/ me'd jin 'kokina 'kwani e mony'cesh mo. Dhan mony'cesh caan jin yikinki is mo tani wa'di caa.

19 Adhan 'penkuman bampa/ a'di dherki bwa mo ki she/ i kwara mo dhali aris 'penkuman bampa/ gi kal gi 'kwaniny'ceshi 'baar mo tani ta'kkin mo, dhali Arumgimis kaki dhan Pam Baabil e mo mmotuca yim mmopiya kubbaaya iku'th mo, a'di jin ta ji ma nyor piti jin 'batha'ba'th ki wap wap mo.

20 Dhali arisa uka 'ceshi 'baar mo sokin mo dhali dhan wosha turga/ yisa gamkunuwa.

21 Dhali adhan kuluny ma wasa/ ta'kkin mo. Diŋ buni ka 'dete/ 'dete/ kalki'da ratul iss 'kwanimpa ka mudhe'd mo kun ta'kkina po/ 'kwani 'peni momis mo ntagi 'kwani jeekina Arumgimis mo gom isa nyor kun wo'cki uni is she/ mo goma wasa/ mo, haali/ gom isa nyor jin wo'c uni is she/ kagahara kan mo.

1 Dhali yan'ko'd jan tal 'deŋ kamu/ 'peni iman'doyu gwo jin 'kon ma po/ i pesu/ mo, a'di jin taki'd gi toŋ'kul bwa kun 'kon ma po/i pesu/ mo tani pu'dki'di aha/ mo dhali o aha/ gwo mo ki: Yayu/ mo. Aha/ mina toŋ /e adhan gwon dwall jin toru gwo 'twa/a 'ceŋ jin caaca mo goma dhana 'bom jin mii miinyɔal mo, a'di jin ɔa'bk'i'da po/ yi'de/ ka ris mo.

2 A'di jin miikina imalik kun 'kon e mony'ceŋ gwansan miinyɔala po/ mo dhali uni ki pi yimana mura'th jin ka/u ki nah nah mo ki uni gwansan kun miiki miinyɔal kun 'kokina po/ mony'ceŋ mo, dhali uni warkin ki uni gun 'koshkin ma su mo.

3 Dhali a'di ki sus aha/ ki Shi/in mo e mombwaasho mo dhali aha/ parkina 'bom e mo mmoɔa'b apo/ to/eŋ kamu/ jin ta'da duk is mo, a'di jin 'tu'du/ is ki gway jin walu gwo sor mo, dhali a'di ta gi 'kupi pesu/ mo dhali ce i'kume'd mo be.

4 Dhali a'bom a'di hi'thkunu is ki burrinyem buhe/ mo dhali jin ta'da duk is mo dhali ayim nyon'kunu is ki 'dolkon gana/ mo dhali wosh kun ta kun dhel mo dhali dhema/ mo, dhali ayim bu'thki'da kubbaaya jin ta 'dolkon gana/ mo e me'd piti mo jin 'tu'dkunu ki mii kun bulabul mo dhali mii kun 'kan ma yima kanthi/ mo gom mo jin miin ma yim miinyɔal mo.

5 Dhali e buye/ ma yim mo tani a'di 'kwarkunu gway ki gwo jin bagu mo ki: Pam Baabil jin caaca mo, a'di jin ta'da ata'da gi uni kun cila ɔal mo dhali uni kun cila mii kun bulabul mo e mony'ceŋ mo.

6 Dhali aha/ parkina 'bom e mo mmo'koshkin ma bas gi uni kun dhunu ki she/ ki dhelel dhelel mo dhali abas gi uni kun 'ci'thu/ 'kup mo goma Yesus mo be.

Ki aha/ hilkina yim mo tani aha/ merkina ki dhan mer jin shiyi'd mo.

7 Hili aman'doyu gwo ki o aha/ gwo mo ki: Katinta mera eye? Aha/ mina toŋ /e gwo jin cinu ki jim bag mo goma 'bom yan mo dhali gom to/e jin 'kona 'kupi pesu/ mo dhali jin 'kona ce i'kume'd mo jin kalki'da yim ka piye/ mo.

8 Dhali to/e caan jin parkina /e e jin piki'd mo tani a'di diki di mo dhali a'di minu shinu/'peni jis jin dar gi 'pemen mo dhali ya mo e mo jin minu dak gwo me'd mo. Dhali uni gwansan kun 'kon e mony'ceŋ mo uni kun 'konuki 'kwar gway buni eya warka/ gi mondiki/e mo 'peni mo ma mun'kup ki mony'ceŋ yansan 'konuki ka'b mo tani uni mini mer ki mer jin shiyi'd mo mmohil to/e mo haali/ a'di diki'd mo dhali midi diki di mo dhali a'di midi pu'du/ mo.

9 Mii yaase a'di minu mii kor e ki kor nycine/ mo ki moyuk mo. 'Kup kun 'koni pesu/ mo tani a'di ta dhan 'kuwosh kun turatur mo kun 'koni pesu/ mo, e mo jin ɔa'b ma 'bom mo.

10 Dhali uni si'da/ita imalik kun 'koni pesu/ mo dhali kun 'koni mudhe'd mo tani ta'kkin mo, jan tal 'de/ a'di doshki'd mo, dhali jan kamu/ yisa pu'dki'da naskina/ mo, dhali ki a'di midi pu'du/ mo tani a'di midi mii ɔa'b mo ki jasi ari mo mo.

11 Dhali gom to/e yansan jin diki'd mo dhali diki di mo tani a'di i'kon ma po/i pekwaro mo, hili a'di icila uni gun 'koni pesu/ mo dhali a'di yaki'd mo e mo jin daku gwo me'd mo be.

12 Dhali ce gwansan kun 'koni 'kume'd kun parkina /e e mo tani uni ita imalik kun 'koni 'kume'd mo, uni gun 'koki bu'th mom'bi'th gi miin tapa naskina/ mo, hili uni mini bu'th moshirr mo me'd imalik ka tenten 'de/ mo, mmonyakki to/e mo.

13 Uni gwansan mina bwa tal 'de/ mo dhali ci mom'bi'th buni mo dhali moshirr buni ki to/e mo.

14 Uni mini mii mo/as apo/ Ari Ka'bal mo, dhali Ari Ka'bal midi pi uni e mo haali/ a'di ta Tapa jin di'da powa ris itapa mo dhali a'di ta'da Malik jin

di'da powa ris imalik mo dhali uni gwansan kun nyak 'ko ki a'di mo tani uni yukkunu mo dhali kwanykunu mo dhali ta uni kun ta isinj gana/ mo.

¹⁵ Dhali a'di ki o aha/ gwo mo ki: Yi'de/ kun parkina /e e mo e mo jin ca'b ma 'bom cal mo tani uni tana ris 'kwani mo dhali adhana buhany wathimpa mo dhali aris kal gi 'kwaniny'cesh mo dhali 'kwani kun wal 'twa/ ki she/ ki she/ mo.

¹⁶ Dhali ce gwansan kun 'koni 'kume'd kun parkina /e e mo tani uni dhali to/e mo tani uni mini shi/a 'bom cali e mo. Uni mini ciya 'bom tinya/ mo dhali mii a'di mmodi is 'te/ mo dhali los bungwar is ma yim ki 'kolo'c mo dhali citha yim ki o'd mo,

¹⁷ haali/ Arumgimis ki kar a'di eya dum buni mo mmomii bwam piti jin dina a'di gwo ibwa mo gom bwan tal 'de/ jin tana uni mo dhali ci mom'bi'th buni jin miina uni miin tapa ki to/e mo ntagi gwo ma Arumgimis minu thim mo be.

¹⁸ Dhali a'bom caan jin parkina /e e mo tani a'di ta'da dhan 'penkuman bampa/ jin caaca mo, a'di ita gi mo yan jin miinu tapa mo apo/ imalik kun 'koni mony'cesh mo be.

18

Pam Baabil jin Bitki'doo

¹ Dhali yan'ko'd aha/ parkina man'doyu gwoj kamu/ e mo mmothulu/ ka 'cesh 'peni momis mo. A'di ta gi dhan moshirr mo dhali mony'cesh 'twa'ki mo mo ki mo ma ra/ ra/ piti mo be.

² Dhali a'di yukki'da yuk ki 'twa/ jin eka/ ek mo mmo/o gwo mo ki: Pam Baabil biti'doo. Pam Baabil biti'doo. A'di jin caaca mo. A'di jin warki'd ki mo jin 'kon ma ruma 'cesh nycine/ mo, mo ma alanyjoro'c gom shi/ini 'baar ka 'dete/ 'dete/ mo kun 'thena'then mo, mo ma alanyjoro'c gom 'dii 'baar ka 'dete/ 'dete/ mo, kun 'thena'then mo dhali kun bulabul mo.

³ Haali/ aris kal gi 'kwaniny'ceshi 'baar mo piki yimana mura'th jin ka/u mo ki nah nah mo 'peni e ma yim jin karkina a'di ki 'thir 'thir mo goma kanthi/ jin 'kan ma yim mo.

Dhali aris imalik kun 'koni mony'cesh mo tani uni miiki miinca/ apowa yim mo
dhali aris uni gun yoli to e mony'cesh mo tani uni sekina 'pen ka pije/ mo gom pam buni jin tana uni mo 'peni mii ma yim kun cana bwa en'dap a'di mo.

⁴ Yan'ko'd aha/ cikina 'twan kamu/ 'peni momis mo mmo/o gwo mo ki: Iiyu/ ka pije/ 'pena yim mo, um gun fa 'kwanim pem mo, isi ciki/ ki um mini 'koki bu'th miinthus ma yim mo, isi ciki/ ki um mini 'koki pwa' isa nyor ma yim kun mini wo'c 'kwani is she/ mo.

⁵ Haali/ miinthus ma yim uni su'kkin ka makampo/ ntagi momis mo, dhali Arumgimis kaki mii ma yim kun 'koki ta kun kar/e e mo.

⁶ Ra'ka yim to ibway mo me'da yim ki is piti rakki to ibway mo dhali ra'ka yim to ibway mo ka 'bukum 'ban mo gom miin to ma yim mo. Poka yim to jin cena a'di e ka 'bukum 'ban n'twa/a/ mo ka kubbaaya jin cen ma yim to e mo.

⁷ Me'da yim mmokarkina a'di 'baki ca ki is piti mo dhali lo'b e mii gi bwa en'dap mo tani
wakan cika yim isa nyor jin midi wo'c a'di is she/ mo dhali koki kony jabu'th mo ki mii jin nya'ka e ki ji gi bar ma yim mii mo.

Haali/ eya du ma yim mo tani ayim o gwo ki is piti mo ki: Ahayi itana malik
 jin ta'da yim mo,
 aha/ yisa tana adhalla, dhali ko jin gwonu ki jabu'th mo tani miga/ par eya?
 8 Wakan to ma yim jin midi wo'c a'di is she/ mo tani midi pu'du/ ka tenten
 gana/ mo,
 mo/isa nyor 'peni to kun shi/kin mo, dhali ko jin gwonu ki kony jabu'th mo
 dhali te/ jin midi 'kosha 'kosh mo,
 dhali ayim minu ci'th ki o'd mo
 haali/ Tapa Arungimis jin dorki'da yim gwon dwall 'twa/a 'cesh mo tani a'di
 eka/ ek mo be.

9 Dhali aris imalik kun 'koni mony'cesh mo, uni gun miiki miinyal apo/
 a'di mo dhali uni gun mii mii kun ta bwa en'dap nyakka yim mo tani uni
 mini ko mo dhali wol kony jwa mo goma yim mo ki uni mini para ku'd e mo
 mmo'ku'a powa yim mo be.

10 Uni mini dosh isa dhana/ nnii mo mmo'ko/ isa nyor ma yim jin midi wo'c
 a'di is she/ mo dhali o gwo mo ki:
 Ayy/ayy/ayy, ayy/ayy/ayy. /E jin ta dhan 'penkuman bampa/ mo,
 /e jin ta dhan 'penkuman bampa/ gi Pam Baabil jin eka/ ek mo.
 Ka tenten 'de/ mo tani gwon dwall jin toru gwo 'twa/a 'cesh apo/ /e pu'dki'd
 mo.

11 Dhali uni kun yoli to e mony'cesh mo gwokin mo dhali koki kony jabu'th
 goma yim mo, haali/ wathin tal 'den kamu/ yisa di'da jin midi yol tom buni
 kun suka uni ki sule/ sule/ mo.

12 To kun suka uni mo kun ta 'dolkon gana/ mo dhali 'dolkon kush mo,
 dhali wosh dhel mo dhali dhema/ mo, dhali burrinyen dhiny e mo dhali
 burrinyen buhe/ mo dhali burrinye/ jin na'bulana'bul mo dhali burrinyen
 duk is mo dhali aris cwa kun 'kona e ki she/ ki she/ mo kun 'kon ma kulus
 nycine/ mo dhali aris to kun uku 'peni sheny je kun 'kona e ki she/ ki she/ mo,
 dhali aris to kun pa/u 'peni cwa kun 'bitha yol she/ ki 'bi'th mo, dhala korok
 mo dhali ton'kuthu'da 'bi'thga/ mo dhali dhan wosh jaro/ jin miina e ki wa'c
 wa'c mo.

13 dhali akur cwa jin wana e ka kwattan jin kuyi mo mo, dhali cwa jin ukuwa
 pi'dna/ 'peni cine/ mo dhali a'bicajwahar mo dhali cwa jin yuku gway ka
 murr mo dhali a'bicajwahar jin cenu e ki to jin kuyi mo mo, dhali yimana
 mura'th jin ka/u ki nah nah mo dhali ayin mo dhali adipanya 'tiga/ mo dhali
 pos bunyan mo dhali bip mo dhali ka'bal mo, dhali aris shumarum mo dhali
 arisa arabiya kun dira shumarum mo dhali 'kwani kun ta cin'kina/ kun yolu
 mo, uni gwansan kun tana kashira/ gi 'kwanimpa en'thi/ mo.

14 Dhali maman to jin 'kosh ma kashiram pini te/ mo tani a'di yaki'd 'peni /e
 mo,
 dhali aris tom pini kun tawusa'tawus mo dhali mo ma wa'c wa'c pini mo, uni
 thiski /e e mo, dhali minu gam dok/eya?

15 Dhali uni gun yolki to gwansan kun sugu mo, uni gun gamki mii adu is ki
 pa jin tana uni 'pena yim mo tani, uni mini dosh isa dhana/ mo e mon'ko/ is
 mo gom isa nyor ma yim mo jin midi wo'c a'di is she/ mo, dhali wol ko mo
 dhali koki kony jabu'th kagahara mo, mmo/o gwo mo ki:

16 Ayy/ayy/ayy, ayy/ayy/ayy, gom dhan 'penkuman bampa/ mo
 a'di caan jin hi'thkunu is ki burrinyen dhiny e mo dhali burrinyem buhe/ mo
 dhali burrinyen duk is mo,
 dhali nyon'kunu is ki 'dolkon gana/ mo dhali ki wosh dhel mo dhali ki dhema/
 mo.

17 Ka tenten 'den gana/ mo tani aris to gwansan kun ta pa ki pa mo tani shi/
 kunu is mo be.

Dhali aris uni gwahan kun ta tapa ma kur yi'de/ mo dhali aris 'kwani kun 'cethkina kur yi'de/ mo dhali uni kun ta imanbora kur mo dhali aris uni gwansan kun yolki to mo apo/ kumma/ yi'de/ mo tani, uni doshkin isa dhana/ mo

¹⁸ dhali kum cuuwa/ mo me'd jin parkina uni aku'd e mo mmo'ku_{ta} powa yim mo, mmo/o gwo mo ki:

Ki 'penjkuman bampa/ jana sa/ wana e gi dhan 'penjkuman bampa/ yan mo?

¹⁹ Dhali uni ye_{kk}i bu'da 'ceshi 'kup buni mo me'd jin gwokina uni mo, dhali koki kony jabu'th mo, mmo_{kum} cuuwa/ mo ki:

Ayy/ayy/ayy, ayy/ayy/ayy, gom dhan 'penjkuman bampa/ mo,

e mo jin 'kona uni 'baar kun tan ga kur mo kun ishkin ki kana'd kana'd mo gom pa jin tan ma yim mo.

Ka tenten 'denj gana/ mo tani ayim shi/kunu is mo be.

²⁰ 'Kunyi bwa mo ma, apowa yim mo, ayy um 'kwani kun 'koni momis mo, ayy um kun dhunu ki she/ ki dhelel dhelel mo dhali um kun dhunu ki she/ mo dhali imanci gwo mo,

haali/ Arumgimis ciki um gwon dwall jin minu tor gwo 'twa/a 'cesha powa yim mo.

²¹ Dhali yan 'ko'd aman'doyu gwo jin eka/ e_k mo bu'thki wosh jin wana e ki dhan wosh jin yoru to mo dhali bi_t a'di e kumma/ yi'de/ mo mmo/o gwo mo ki:

Wakan Pam Baabil jin ta dhan 'penjkuman bampa/ mo tani minu bi_t ka 'cesh ki mombujur mo,

dhali a'di minu gam dok/e yisa.

²² Dhali ko ma dhen_{dh}enyey/ jin bu_{ka} imanbu_k uni mo dhali uni kun tana 'twa/ gwocon ki gwocon gom gway jin yu_{ku} mo dhali uni kun mishkina thathar pi mo dhali uni kun mishkina apoome/ pi mo tani uni minu cik dok/e yisa e /e ki sule/ sule/ mo.

Dhali 'kwani kun ta iman/uk to 'peni ton tiya gunn kun u_{ku} mo tani

uni minu gam dok/e yisa e /e ki sule/ sule/ mo.

Dhali ko ma yo jin yoru to mo tani minu cik dok/e yisa e /e ki sule/ sule/ mo.

²³ Dhali mon_{kush} ma lamba/ mo tani

midi diki dok/e kush mo mo e /e ki sule/ sule/ mo.

Dhali 'twa/ gi wathinya_{na}'b dhali nyaranya_{na}'b mo tani minu cik dok/e yisa e /e ki sule/ sule/ mo.

Haali/ 'kwani kun yoli to e /e mo tani uni ta 'kwani kun caaca e mony'cesh mo

dhali aris kal gi 'kwani gi mony'ceshi 'baar mo tani uni he'kkunu e mo ki mii ma rum pini kun miina /e mo.

²⁴ Dhali eya yim mo tani abas gamkunu mo, a'di jin ta'da bas gi imanci gwo mo dhali imandhunu ki she/ ki dhelel dhelel mo dhali aris uni gwansan gun 'koshkunu apo/ mony'cesh mo be.

19

¹ Yan'ko'd aha/ cikkina 'twa/ jin waki dhan 'twa/ ma waambuhany 'kwani kun eka/ e_k e momis mo mmo_{kum} cuuwa/ mo ki:

Halleluya. Mowoth_h dhali monyca dhali mom'bi'th cil ma Arumgimis bana mo be,

² haali/ gwom piti jin toru gwon dwall 'twa/a 'cesh mo tani uni ta ku_n gana/ mo dhali ku_n kar/e mo.

Haali/ a'di dwallki'da dhana yim jin ta cal gwo mo, a'di jin pu/ ki 'kwaniny'cesh ki miiny_{cal} ma yim mo.

Dhali a'di ri'cki'da yim mo goma bas gi unim piti kun ta c̄in̄kinam piti mo.

³ Dhali dok/e uni k̄umki cuuwa/ mo ki:

Halleluya. Dhala ku'd'pena yim yaki mis mo ki sule/ dhali ki sule/ mo.

⁴ Dhali 'kwaniṅ gwanyjaka/ kun 'koni iss 'de/i'ce'dka doṅon mo dhali to/e kun 'koni doṅon kun 'kon ki e mo tani uni ta'kkina 'cesh mo dhali luṅa Arungimis mo, a'di jin ca'bki'da powa k̄ursi ma malik̄ piti mo mmo/o gwo mo ki: Amen, dhali Halleluya.

⁵ Dhali 'pena k̄ursi ma malik̄ mo tani 'twa/ pu'dki'd jin gwoyi'd mo ki:

Man̄ji Arungimis bana mo, aris umi 'baar mo kun ta c̄in̄kinam piti mo,

um kun k̄o/ki a'di mo, 'peni uni gun gwa'dan mo dhali uni kun cakin mo.

Tonte/ ma Yuḡ gi Momiimash gi Ari Ka'bal mo

⁶ Dhali yan'ko'd aha/ cik̄kina 'twa/ jin waki dhan 'twa/ ma waambuhany 'kwani mo, dhali jin wana e ki dhan yi'de/ jin gwona is ka ris mo dhali jin wana e ka dhan montor ma sho'k jin eka/ ek̄ mo jin mii'da gur gur mo, mmokum cuuwa/ mo ki:

Halleluya. Haali/ Tapa Arungimis gana mo, a'di jin ta a'di jin Eka/ Ek̄ mo tani a'di ta Tapa mo.

⁷ Dhalki ana 'kunya bwa mo dhali kar a'di ki ca mo dhali c̄i a'di monyca mo, haali/ momiimash gi Ari Ka'bal a'di pu'dki'd mo, dhali Nyaranyaṅa'b piti mo, ayim ki is piti a'di thosonki is mo.

⁸ Ayim tak̄kunu ki burriṅye/ jin dhinya/ e ki dhiny mo dhali jin ca'bki caw caw mo dhali jin dheleladhelel mo -

haali/ burriṅyen dhiny e yansan mo tani a'di ta mii ma kar/ e gi uni kun dhunu ki she/ ki dhelel dhelel mo be.

⁹ Dhala man'doyu gwo ki o aha/ gwo mo ki: 'Kwari gwo yansan mo ma: Mom'bor mii gom uni gwansan kun cinu ayuḡ mo mmo/iyu/ mo mmoshwa tonte/ gi momiimash gi Ari Ka'bal mo. Dhali a'di ki o aha/ gwo mo ki: Gwo gwansan uni ta gwoṅ gana/ ma Arungimis mo.

¹⁰ Dhali yan'ko'd aha/ bitkina 'cesh e sho'k piti mo dhali luṅ a'di mo, hili a'di ki o aha/ gwo mo ki: /E yisa mini mii mii kana. Aha/ tana garr jin nyaḡki'da tu'c mii ki /e mo dhali awak̄ pini mo, uni gun telki gwontor goma Yesu mo. Luṅi /e Arungimis mo. Haali/ gwontor ma Yesu mo tani a'di ta shi/in gi gwo jin cinu is mo be.

Amanmer Shumarum jin Ta jin̄ Kusha Po/ mo

¹¹ Dhali yan'ko'd aha/ parkina momis e mo mmoka'dkunu a'di 'twa/ mo, dhali hili mo mo ma, aha/ mishkina shumaram kush mo. Dhali a'di yansan jin ca'bki'da po/ a'di mo tani gway piti yuku ki: A'di jin ta Isin̄ Gana/ mo dhali a'diṅ Gana/ mo, dhali e momii mii ma kar/ e mo tani a'di dwalki gwo mo dhali kar mo/as mo be.

¹² Em piti wana e ka le'dan o'd mo dhali e 'kup piti mo tani aris ton̄'kup ma malik̄ tamkunu e 'kup piti mo. Dhali a'di yuḡkunu gway ka nyi'da/ nyi'da/ mo, a'di jin mola wathin̄ tal'den̄ kamu/ mo, hili a'di ki is piti imishki'd mo be.

¹³ A'di hi'thkunu is ki burriṅyen turga/ mo jin 'thupkunu is ka bas mo dhali gway gi a'di jin yuḡkunu a'di mo tani a'di ita Gwo ma Arungimis mo be.

¹⁴ Dhali aris 'kwani ma mee gi momis mo tani uni thosonkunu is ki burriṅyen dhiny e mo dhali kun ta kuṅ kush mo dhali kun dheleladhelel mo, mmobath̄ a'di isho'k mo ki shumaram buni kun ta gi kush mo.

¹⁵ Dhali 'peni 'twam piti mo tani a'di gacki gandala turga/ jin kaaka mo, a'di jin mina a'di 'kosh aris kal gi 'kwaniny'cesh mo dhali a'di midi ta tapa apo/ uni ki cwa jin ta ton̄kuthu'd mo. Dhali a'di midi yap mo jin nyu/u yimana

mura'th ki sho'k mo, a'di jin ta'da nyor ma Arumgimis jin Eka/ Ek mo, anyor jin 'batha'ba'th mo.

¹⁶ E burriyenyen turgam piti mo dhali e wum piti mo tani a'di cinu gway ka nyi'da/ nyi'da/ mo jin o ki: Amalik jin ta tapa apo/ imalik mo dhali Tapa jin ta tapa apo/ itapa mo.

¹⁷ Dhali yan'ko'd aha/ parkina man'doyu gwoŋ kamu/ e mo mmodosh atente/ jin shwa'd mo dhali ki dhan 'twa/ jin caaca mo tani a'di yukki'da yuk mo goma ris 'dii'baar mo kun pen isi bwaman momis mo ki: Peyu/ mo, dhali tulu/ is mo goma dhan tonŋe/ ma Arumgimis mo,

¹⁸ mmo'ka bungwar is gi imalik mo, dhali bungwar is gi uni gun ta gummpa/ ki gummpa/ mo gom 'kwani ma mee mo, dhali bungwar is gi 'kwani kun eka/ ek mo, dhali bungwar is ma ris shumarum mo dhali imanmer uni apo/ mo, dhali bungwar is ma ris 'kwani'baar mo, uni gun 'kon ki 'kus mo dhali uni gun yolu ki yol cinkina/ mo, 'peni uni gun gwa'da is mo dhali uni kun cakin mo.

¹⁹ Dhali aha/ parkina to/e e mo dhali imalik gi mony'cesh mo nyakki 'kwani ma meem buni mo mmotul is mmontal 'de/ mo mmomii mo/as apo/ a'di jin ca'bki'da po/ shumarum mo dhali apo/ 'kwani ma meem piti mo.

²⁰ Dhali to/e a'di bu'thkunu mo dhali nyakka manci gwonthus piti mo, a'di jin diki'd e bu'kus a'di mo dhali mmomii dhan jamas mii mo ki mii jin he'kkina a'di uni gwansan e mo, uni gun bu'thki jamas gi to/e mo dhali uni gwansan kun lun'ki jamas piti jin uku mo. Dhali uni su/ gwansan mo tani uni ita'kkunu eya al o'd ki e mo, e mo jin mina isi pur uni ki to jin si'du ilu/ mo.

²¹ Dhali kun tiya 'kokunu mo mmo'kosh ki gandala turga/ mo ki a'di jin ca'bki'da po/ shumarum mo, gandala turga/ jin ga'cki'd 'peni 'twam piti mo, dhali aris 'dii'baar mo komki 'pen mo gom bungwar is buni mo be.

20

Yil jin 'Koni Alipi 'De/ mo

¹ Dhali yan'ko'd aha/ parkina man'doyu gwo e mo mmothulu/ ka 'cesh 'peni momis mo, mmota ga muptha/ e me'da bim poros piti mo gom dhan jis jin dar gi 'pemen mo dhala jindhiir mo.

² Dhali a'di ki 'dap dhan tasha/ yan ka nyok mo, dhan tashan dhamo/ yin, jin yuk'kunu gway ki Tapa ma Ruma 'Cesh mo dhali ka Setaan mo dhali a'di ki dek a'di mo gom yil alip mo.

³ Dhali a'di ki bi't a'di mo e mo jin 'kula'kul mo, dhali a'di ki mu'th a'di 'twa/ mo dhali a'di ki 'dap a'di ka 'din'kila/ apo/ mo ki a'di midi 'taki diki heka ris kal gi 'kwaniny'cesh e dok/e mo ntagi yil alip midi di 'kup mo. Dhali 'ko'di mii caan mo tani a'di minu mii dhalu me'd mo gom ari mo mo.

⁴ Dhali yan'ko'd aha/ parkina risa kursi ma malik e mo, dhali uni gun 'kokina po/ uni mo tani uni ta uni gun cikunu gwon dwall jin toru gwo 'twa/ a 'cesh mo. Dhali aha/ si'da/ parkina kashira/ gi uni gwansan kun 'cith'kunu 'kup mo gom gwom buni kun tora uni goma Yesus mo dhali gom gwo ma Arumgimis mo, dhali uni gun 'koki lun' to/e yan mo walla jamas piti jin uku mo, dhali uni gun 'koki bu'th jamas piti e buyem buni mo walla e me'd buni mo. Uni pu'dkin ki e mo dok/e dhali nyak tapa ta ka Kristhos ki yil alip mo be.

⁵ Dhali unin tiya kun wukin mo tani 'koki pu'du/ mmo'ko ki e mo naskina/ mo tani ntagi yil alip midi di 'kup mo. A'di yansan ita mo jin pinu jin ta jin t'wa/a/ mo be.

⁶ Mom'bor mii mo dhali a'di jin kogu mo tani ta a'di mo a'di jin pwakki mompinu jin ta jin t'wa/a/ mo. Apo/ uni kun wakan mo tani mowu jin 'kon

ma po/i su/ mo tani a'di dar gi mom'bi'th apo/ uni mo, hili uni mini ta igasiis ma Arumgimis mo dhali goma Kristhos mo, dhali uni mini nyaḱ tapa ta ki a'di ki yil alip mo be.

⁷ Dhali ki yil alip midi di 'kup mo tani aSetaan a'di minu dhalu me'd mo 'pena sijin piti mo

⁸ dhali a'di midi pu'du/ ka piye/ mo mmoheka ris kal gi 'kwaniny'cesh e mo, uni gun 'kon ki 'ban gi mony'cesh kun 'kona shem 'penabi idonon mo, a'di jin ta Pany Juuj mo dhali Pam Majuuj mo, mmotul uni is mo gom mo ma mee mo. Monden buni uni wana e ka si'b gi bwam ma gap gi kumma/ yi'de/ mo.

⁹ Dhali uni yakina ye'th ye'th mo mmohakar mony'cesh ka bor mo dhali mmo'kama ris gu'ba'ku/ gi uni kun dhunu ki she/ ki dhelel dhelel mo dhali 'penkuman bampam buni jin enu mo. Hili o'd pu'dki'd ka 'cesh 'peni momis mo dhali shwa uni ki 'ci'd'da/ mo.

¹⁰ dhali tapa ma ruma 'cesh jin he'k uni e mo tani a'di bitkunu mo eya al o'd mo dhali e bwam to jin si'du mo, e mo jin dina to/e mo dhali amançi gwonthus mo, dhali uni minu 'kosh ki isa nyor jin midi wo'c is she/ mo montee dhali ki mon'thiny ilu/ mo ki sule/ dhali ki sule/ mo.

Gwo jin Toru Gwo 'Twa/a 'Cesh 'Pena Dhana K_ursi ma Malik jin Ta jin Kush mo

¹¹ Dhali yan'ko'd aha/ parkina dhana k_ursi ma malik jin ta gi kush e mo dhali a'di jin ca'bki'da po/a'di mo. 'Peni bun'kus piti mo tani mony'cesh dhali momis uni yakina nwaḱa/ mo, dhali mo yisa gamu gom uniya.

¹² Dhali aha/ parkina uni gun wukin e mo, uni kun cakin mo dhali kun gwa'dkin mo, mmodosh mo mbwambor ma k_ursi ma malik mo, dhali arisa warka/ ka'dkunu mo be. Dhali awarkan_u kamu/ si'da/ ka'dkunu mo, a'di jin ta'da warka/ gi mondiki/e mo. Dhali uni gun wukin mo tani uni dwallkunu gwo mo me'd gwo jin 'kwarkunu mo e bwam ma risa warka/ mo ki mii kun miikina uni mo be.

¹³ Dhali kumma/ yi'de/ ciyi 'kwani ka nyan'ko'd kun wukin e a'di mo. Mowu dhali Mo ma Haawiya ciyi 'kwani kun wukin e uni mo, dhali aris uni 'baar mo dwallkunu gwo mo ki mii kun miikina uni mo be.

¹⁴ Dhali yan'ko'd Mowu dhali Mo ma Haawiya uni ta'kkunu mo eya al o'd mo. A'di yansan ita wu jin 'kon ma po/i su/ mo, a'di jin ta'da al o'd mo.

¹⁵ Dhali waḱki/ jan tal'den kamu/ 'konuki gam gway piti jin 'kwarkunu mo eya warka/ gi mondiki/e yan mo tani a'di si'da/ minu bi't mo eya al o'd mo be.

21

Momis jin Ta jin This mo dhali Mony'cesh jin Ta jin This mo

¹ Dhali yan'ko'd aha/ parkina momis jin ta jin this e mo dhali mony'cesh jin ta jin this mo. Haali/ momis jin ta jin twa/a/ mo dhali mony'cesh jin ta jin twa/a/ mo tani uni pekin mo be, dhali kumma/ yi'de/ yisa di'd dok/e.

² Dhali aha/ parkina 'penkuman bampa/ jin kogu e mo, a'di jin ta Pa Urushaliim jin ta jin this mo, mmothulu/ ka 'cesh 'peni momis 'peni Arumgimis mo, mmothosonkunu a'di is mo me'd nyaranyanja'b jin nyonkunu is ki to mo goma kaḱim piti mo be.

³ Dhali aha/ cikina dhan 'twa/ 'pena k_ursi ma malik mo mmo/o gwo mo ki: Hili mo mo ma, monyca'b ma Arumgimis diki'd nyaḱki 'kwani mo. A'di midi nyaḱ ca'b ki uni mo dhali uni mini ta 'kwanim piti mo, dhali Arumgimis ki is piti, a'di midi nyaḱ di e uni mo dhali a'di midi ta uni Arumgimis buni mo.

⁴ Dhali a'di midi shumut jabu'th 'pena ris em buni ka 'dete/ 'dete/ mo, dhali wuj kamu/ midi dok/e diya, walla kony jabudha kamu/ minu kowa, walla

cuuwanj kamu/ minu cuuwa, walla isa nyora kamu/ mididiya? haali/ aris ton dhamo/ gwansan mo tani uni pekin mo be.

⁵ Dhali a'di jin ca'bki'da powa kursi mo tani oki gwo mo ki: Hili mo mo ma, aha/ miikina ris to mmota kun this mo. A'di si'da/ ki o gwo mo ki: 'Kwari a'di yansan mo ma, haali/ gwo gwansan mo tani uni ta ku isinj gana/ mo dhali kunj gana/ mo.

⁶ Dhali a'di ki o aha/ gwo mo ki: A'di miikunu mo. Aha/ tana ji ma Mun'kup mo dhali jin 'Ko'd mo, aha/ tana ji gi mo jin telkunu 'pen mo dhali mo jin mididi 'kup mo be. E uni kun butha yi'de/ gom miinjkar/e mo tani aha/ mina ci uni yi'de/ ki dar gi yol mo 'peni yi'de/ jin kashkina e ki kash mo jin ta mondiki/e mo be.

⁷ A'di jin piki mii e mo tani a'di mididi ta gi mal yansan mo, dhali aha/ mina ta Arungimis piti mo dhali a'di mididi ta aha/ ya/um mo.

⁸ Hili gom uni gun tana shi/inj jwa mo dhali uni gun dar gi monjam gwo is mo, dhali uni gun wali gwo sor mo, dhali uni gun ta iman'kosha mee mo, dhali uni gun ta imanha'k 'pen cej gwas mo, dhali uni gun ta imanmii mii ma rum mo, dhali imanluj tompinycon mo, dhali aris uni gun tana tor mo tani tom buni di'd jin mididi 'bag uni e mo eya al o'd mo jin purki'd ki o'd mo dhali to jin si'du mo si'da/, a'di jin ta wu jin 'kon ma po/i su/ mo be.

Pa Urushaliim jin Ta jin This mo

⁹ Dhali yan'ko'd aman'doyu gwoj kamu/ 'de/ 'peni bwam uni gun 'koni pesu/ mo, a'di jin ta'd gi ton'kul bwa mo jin 'tu'dkunu ki mom'ba'th kun 'koni pesu/ kun woci 'kwani is she/ mo kun ta kunj 'ko'd mo tani pu'dki'd mo dhali o aha/ gwo mo ki: Yayu/ mo. Aha/ mina tor /e Nyaranyanja'b mo, a'di jin ta'da 'bom gi Ari Ka'bal mo.

¹⁰ Dhali e Shi/in mo tani a'di kalki aha/ mo eya dhan wosh jin turatur mo, dhali tor aha/ 'penkuman bampa/ jin kogu mo jin ta Pa Urushaliim mo, mmothulu/ ka 'cesh mo 'peni momis mo 'peni Arungimis mo,

¹¹ mmotakina a'di gi monyca ma Arungimis mo, dhali dhel piti bolki wosh dhel jin ta'da aane/ e mo, mmowa e ki wosh dhel jin ta'da wasin dhela/ mo jin di'd eya tente/ jin mii'd ki wa'c wa'c mo.

¹² A'di ta'd ga dhana goj jin turatur mo jin 'kona 'twanjali 'kume'd i'ce'dka su/ mo dhali iman'doyu gwo 'koni 'kume'd i'ce'dka su/ mo e 'twanjal piti mo, dhali e 'twanjal piti mo tani gway 'koni 'kume'd i'ce'dka su/ mo kun tana wak gi iya/ ma Israyil mo kun cikunuwa nyi'da/ nyi'da/ mo.

¹³ E mom'pesho'k mo tani 'twanjal 'koni kwara mo dhali e mon'ko'd gwar ma bim poros mo tani 'twanjal 'koni kwara mo, dhali e mon'ko'd gwar ma biny cam mo tani 'twanjal 'koni kwara mo, dhali eya bora lunju'b mo tani 'twanjal 'koni kwara mo.

¹⁴ Dhali agoj gi 'penkuman bampa/ mo tani ta'd gi monka'b kun 'koni 'kume'd i'ce'dka su/ mo, dhali apo/ uni mo tani gway 'koni 'kume'd i'ce'dka su/ mo uni gun ta gway gi imandhunu ki she/ gi Ari Ka'bal mo kun 'koni 'kume'd i'ce'dka su/ mo be.

¹⁵ Dhali a'di jin torki'da tor ki aha/ mo tani ta'd gi cwan 'dolkon gana/ mo jin baru to mo mmobar 'penkuman bampa/ mo dhali 'twanjal piti mo dhali agangaram piti mo.

¹⁶ Dhali 'penkuman bampa/ mo nyakkina isi bwa mo dhali aluc piti nyakki'd ki bem piti mo. Dhali a'di barki 'penkuman bampa/ ki cwam piti mo, ka amyaal alipi* 'de/ mo jin 'ce'dki'd ka iss 'kwanimpa i/ iss 'de/ i'ce'dki iss 'kwanimpa imudhe'd mo. Aluc piti dhali bem piti dhali tur piti, uni nyakkan ki 'doko/ 'doko/ mo.

* 21:16 alip wa kumsumiyya

17 Dhali a'di si'da/ barki'da agangaram piti mo, ki gula/ iss[†] 'kwanimpa ipesu/ mo i'ce'dka donjon mo. A'di ta mombar jin baru 'kwani mo, a'di jin ta ji gi iman'doyu gwo mo.

18 Agon a'di inyan'kunu ki wosh dhel jin ta'da wasin dhela/ mo, dhali 'penkuman bampa/ miiki'd ki 'be'd 'be'd mo gom 'dolkon gana/ mo dhali di eya tente/ me'da gasaas mo.

19 Dhali mon'ka'b ma ganggara/ gi 'penkuman bampa/ mo tani a'di nyon'kunu ka ris wosh dheli 'baar mo ki she/ ki she/ mo. A'di jin ta jin twa/a/ mo ta wosh dhel jin ta'da wasin dhela/ mo ki e ka ris mo, dhali jin 'ko'd mo a'di ta wosh dhel jin ta 'pinyamath mo, dhali a'di jin 'kon ma po/i kwaro mo a'di jin ta wosh dhel jin ta jin dhii/ mo, dhali jin 'kon ma po/i donjon mo a'di jin ta wosha wasin dhela/ jin ta jin dhii/ mo,

20 dhali jin 'kon ma po/i mudhe'd mo a'di jin ta wosh dhel jin ta gi kush mo, dhali jin 'kon ma po/i pe'de/ mo a'di jin ta wosh dhel jin ta jim 'per mo, dhali jin 'kon ma po/i pesu/ mo a'di jin ta wosh dhel jin ta'da go'd go'd mo, dhali jin 'kon ma po/i pekwaro mo a'di jin ta wosh dhel jin miina is ki go'de/ go'de/ mo, dhali jin 'kon ma po/i pedonjon mo a'di jin ta wosh dhel jin miina is ki dhii/ e dhii/ e mo dhali jin 'kon ma po/i 'kume'd mo a'di jin ta wosh dhel jin tana jamasa tortukul mo, dhali jin 'kon ma po/i 'kume'd i'ce'dka 'de/ mo a'di jin ta wosh dhel jin tana isa mandupany mo, dhali jin 'kon ma po/i 'kume'd i'ce'dka su/ mo a'di jin ta wosh dhel jin ta'da duk is mo.

21 Dhali 'twan'kal kun 'koni 'kume'd i'ce'dka su/ mo tani uni ta dhema/ kun 'koni 'kume'd i'ce'dka su/ mo, dhali 'twan'kala gon ka 'dete/ 'dete/ mo uni uk'kunu ki dhema/ en 'de/ mo, dhali bway tur jin iinu ii 'penkuman bampa/ mo tani ta jasi 'dolkon gana/ 'baar mo, jin minu hil 'pena pije/ itor karash me'da gasaas mo.

22 Dhali aha/ parkina gu'b gi mondheleladhelela kamu/ e yisa e 'penkuman bampa/ mo, haali/ gu'b gi mondheleladhelele piti mo tani a'di ta Tapa Arungimis mo, a'di jin Eka/ Ek mo dhali Ari Ka'bal mo be.

23 Dhali 'penkuman bampa/ yansan yisa midi mii ta ga tente/ mo walla appe mo mmo'twak mo apo/ a'di mo, haali/ monyca ma Arungimis mo tani a'di ta mon'kush piti mo dhali alambam piti mo tani a'di ta Ari Ka'bal mo.

24 Ki mon'kush piti mo tani a'di min ma ris kal gi 'kwaniny'ceshi ii mo dhali aris imalik kun 'koni mony'cesh mo tani mini ci mony'cam buni mo gom a'di mo be,

25 dhali 'twan'kal piti mo tani mini 'ko kan ki kany ki sule/ montee mo - dhali mon'thinya kamu/ midi diya e mun mowa?

26 Uni mini ciki a'di monyca mo dhali montak mo goma ris kal gi 'kwaniny'ceshi 'baar mo.

27 Hili to nyo/o'da kamu/ yisa midi diya jin midi ci'e e a'di mo, walla jan tal 'de/ jin midi botki miinthus jin shi/ashi/ mo walla ta manci gwonthus mo, hili jasi uni gwansan kun 'kwarkunu gway eya warka/ gi Ari Ka'bal gi mondiki/ e mo tani, uni a'di imini 'ko mo be.

22

1 Dhali yan'ko'd a'di torki aha/ yi'de/ jin guski'd mo jin ta yi'de/ jin di ki e mo, jin kushakush jin mii'd ki wa'c mo, mmoyayaa njwaca/ mo 'pena kursi ma Arungimis mo dhali Ari Ka'bal mo,

2 ki tur mo isi bwaman bway tur gi 'penkuman bampa/ mo. Dhali si'da/ e 'ban kuku/ mo gi yi'de/ jin guski'd mo tani cwa gi mondiki/ e mo nyakki maman pitin gana/ kun 'kona e i'kume'd i'ce'dka su/ mo gwono'dki maman

† 21:17 miyya wa arba wa arba/jin

piti mo ka ppe ki she/ ki she/ mo. Dhali 'cemen gi cwa a'di karkunu mo mmowaça ris kal gi 'kwaniny'cesh mo.

³ Moŋkamu/ mididi yisa jin min ma manjeeya jee idi mo, hili jasa kursi ma malik ma Arumgimis mo dhali ji gi Ari Ka'bal mo a'di mididi nycine/ mo, dhali ciŋkinam piti mo uni imini luŋ a'di mo.

⁴ Dhali uni mini par jis/em piti e mo dhali gway piti mididi ça'ba po/ buyem buni mo.

⁵ Dhali mon'thiny mididi yisa. Uni mini mii ta gi moŋkush ma lamba/ mo yisa walla atente/ mo yisa haali/ Tapa Arumgimis a'di mididi ta moŋkush buni mo, dhali uni mini nyak tapa ta ki a'di ki sule/ mo dhali ki sule/ mo be.

Yesus Midi Pu'du/ki 'Dishe/ mo

⁶ Dhali a'di ki o aha/ gwo mo ki: Gwo gwansan uni ta ku isin gana/ mo dhali kuŋ gana/ mo. Dhali Tapa, jin ta'da Arumgimis mo gom shi/in gi imançi gwo mo tani a'di hashki'da man'doyu gwom piti mo mmotor ciŋkinam piti to mo kun mini bu'th mo ki 'dishe/ mo.

⁷ Dhali hili mo mo ma, aha/ mina pu'dku/ ki 'dishe/ mo.

Mom'bor mii gom a'di jin dhuki gwo kun onu is eya warka/ yansan mo.

⁸ Aha/ jin tana Yohaana mo tani aha/ tana a'di jin cikki to gwansan mo dhali par to gwansan e mo be. Dhali ki aha/ cikkina uni mo dhali par uni e mo tani aha/ biŋkina 'cesh mo mmoluŋ e sho'k ma man'doyu gwo mo, a'di jin torki aha/ to gwansan mo.

⁹ Hili a'di ki o aha/ gwo mo ki: /E mini diki mii mii kan mo. Aha/ tana garr jin nyakki'da tu'c mii nyakki/ e mo dhali awak pini mo uni kun ta imançi gwo mo, dhali nyakki uni gwansan kun dhuki gwo kun 'kwarkunu mo eya warka/ yansan mo. Luŋi /e Arumgimis mo.

¹⁰ Dhali a'di ki o aha/ gwo mo ki: Dhalku/ gwo ki 'dap 'twa/ ka 'diŋkila/ mo, gwo yansan jin onu is eya warka/ yansan mo, haali/ mo 'disha'dish mo be.

¹¹ Dhalki a'dinthus yin di'd naskina/ mo mmomii tonthus mo dhali dhalki a'di jin mii mii kun nyo/ anyo/ mo di'd naskina/ mo mmomii mii kun nyo/ anyo/ mo, dhali uni kun mii miinŋkar/ e mo tani dhalki uni 'kon naskina/ mo mmomii miinŋkar/ e mo dhali uni kun tana gayiin mo tani dhalki uni 'kon naskina/ mo mmomii mii ma gayiin mo.

¹² Hili mo mo ma, aha/ mina pu'dku/ ki 'dishe/ mo, mmokalku/ tom pem mme'd mo, mmoraka ris 'kwani 'baar mo to mbway mo ka 'deŋe/ 'deŋe/ mo me'd mii jin miikina uni mo.

¹³ Aha/ tana ja Muŋ'kup mo dhali jin 'Ko'd mo, aha/ cila mo jin twa/a/ mo dhali mo jin 'ko'd mo, dhali aha/ cilkina mo jin telkunu 'pen mo dhali mo jin di 'kup mo.

¹⁴ Mom'bor mii gom uni gwansan kun wuski burrinyen tur buni mo dhali kun mii gwoŋkan piti mo, ki uni mini ta gi moshirr mo gom cwa gi mondiki/ e mo, dhali ki uni mini 'taki ciç 'penkuman bampa/ ki 'twanŋal ma goŋ mo be.

¹⁵ Apije/ mo tani arisa 'ka 'kokin mo dhali uni kun mii mii ma rum mo dhali uni gun ha'k 'pen ceŋ gwas mo dhali iman'kosha mee mo dhali imanluŋ tompinycon mo dhali aris 'kwani 'baar ka 'deŋe/ 'deŋe/ mo, uni kun enina en thus mo dhali boŋki mii gi imançi gwonthus mo.

¹⁶ Aha/ jin tana Yesus hashkina man'doyu gwom pem e / e mo ki gwo yansan jin onu mo goma risa kaniisa mo. Aha/ tana birman mo dhali emen ma Dawuu'd mo, jin ta'da cul gi mon'thamo/ mo jin 'twakki mo mo.

¹⁷ Shi/in dhali Nyaranyaŋa' b o gwo mo ki: Iiyu/ mo. Dhali dhalki a'di jin cik a'di mo o gwo mo ki: Iiyu/ mo. Dhali dhalki a'di jin budha yi'de/ gom miinŋkar/ e mo yayi'd mo. Dhali dhalki a'di jin ona bwa ki bu'th yi'de/ gi mondiki/ e ki dar gi moyol mo tani iyayi'd si'da/ mo.

¹⁸ Aha/ rumkina aris 'kwani 'baar ka 'dete/ 'dete/ ki gwo mo uni kun cikki gwo gwansan jin onu is eya warka/ yansan mo. Dhali wakki/ jan tal 'deŋ kamu/ midi mar uni is mo tani Arungimis si'da/ midi mar a'di mo/ isa nyor is mo jin midi wo'c a'di is she/ mo, uni kun ɬorkunu mo eya warka/ yansan mo.

¹⁹ Dhali wakki/ jan tal 'deŋ kamu/ midi bu'th gwo 'pena warka/ yansan jin onu gwo is mo tani Arungimis si'da/ midi bu'th miim piti jin pwaƙkina a'di cwa gi mondiki/e mo dhali e 'penƙuman bampa/ jin ƙogu mo, uni kun ɬorkunu eya warka/ yansan mo.

²⁰ A'di jin teki gwo gwansan mo mmo/o mo tani o gwo mo ki: Ka jin gana/ aha/ mina pu'dku/ ki 'dishe/ mo be. Amen. Yayu/ ma, Tapa Yesus mo.

²¹ A'the gi Tapa Yesus midi di e uni kun dhunu ki she/ ki dhelel dheleli 'baar mo. Amen.